


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

Contents

Matêwre	1
Makre	83
Rukre	130
Juãw	216
Atre	277
Rõmãn	349
Wam Korît	391
Sikũn Korît	429
Karatas	453
Epes	468
Piripos	482
Korosẽ	491
Wam Tesarõn	500
Sikũn Tesarõn	507
Wam Ximotre	511
Sikũn Ximotre	522
Xitre	529
Piremõ	534
Eprêw	536
Xiakre	565
Wam Pêtre	575
Sikũn Pêtre	586
Wam Juãw	592
Sikũn Juãw	601
Hapuhã Juãw	603
Jutre	605
Apokarip	609

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwýnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwýr wrýk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahшти mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htãmnhwýjê nhĩxi

Rukre 3.23-38

¹ Amnepêm Jejus Kris kormã pika hwýr wrýk kêt ri hkukamã higêtjê nhĩxi na jajaja. Wýj ri higêtjê hõ nhĩxi na pre kêp Tawi. Nê Tawi xwýj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htõjaja.

³ Nê Juta hkra na pre wa kêp Pere nê Jera.

Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Nê Poas kra na pre kêp Opex.

Nê Opex katorxà na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxàja Uristi hprõ na pre.

Tã nhũm pre Uristi ty nhũm Tawija

hãmri mýrpê Uristi hprõ ho hprõ nê

kamã hkra. Nhũm wa hkraja kêp

Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonĩs mẽ htõjaja.

Kormã mẽ htír ri na pre Papirõn nhõ xwýnhjaja kot mẽ hkurê kaxàr kaxyw mẽ hwýr hprõt nê mẽ unê. Ijaew piitã unênh pa nê ma akupým mẽ õ pyka hwýr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonĩs mẽ htõjaja mẽ hipêêxà pyrã nê Papirõn kamã pa ho pa.

Nê Jekonĩs kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mẽ kot kãm: “Tirtũm kot mẽ pakaxyw ãm xwýnh” anhýr xwýnhhta na pre.

¹⁷ Nhũm Apraãw kanrêhã axte axpên kanrêhã mẽ àptàr nywjaja Tawija wýr kêp 14. Nê Tawi nhĩrõ pê Papirõn hwýr mẽ hapêx kêt ri axpên kanrêhã mẽ àptàr nywjaja mããnên kêp 14. Nê ra Papirõn kamã mẽ pa nhĩrõ pê axpên kanrêhã Jejus pê Tirtũm kot mẽ pakaxyw ãm xwýnhhta wýr mããnên kêp 14. ã na pre Jejus Kris xwýj ri higêtjê nhĩxi anê.

Jejus Kris kator

Rukre 1.26-38, 2.1-7

¹⁸ Tã ã mẽ hixi jarênh kot anhýr kanrêhã na pre ã Jejus Kris kator anê. Nhũm pre

kormã Jujeja Marir o hprõ kaxyw. Nom kormã ho hprõ hkêt ri nhũm htujarô. Kormã hkukrit tâ nhũm Tirtũm Karõ tanhmã ho nhũm htujarô. ¹⁹Hãmri nhũm Jujeja harênh ma nê tee ri hamaxpêr nê htỳx nhãm mêhõ kot kêp htu hã hkamnhĩx. Juje kot tãm amnhĩ nhĩpêx nê tãm hamaxpêr jakamã tee ri kot ho hprõ hkukamã hamaxpêr. Nê hamaxpêr o:

—Nà pa mãn ixte hturê hã. Nhãm mêhõ ra kot ã hipêx anhỹr kênã. Nà kot paj ho ixprõ hkêt nê. Nom kot paj ixkwỳjê mã ã kot amnhĩ nhĩpêx anhỹr o amnhĩrit kêt nê. Kot paj anê nhũm mê kuma nê ho kapêr punuj nhũm amnhĩ kamã hpijaam tỳx nê. Ja pymaj kot paj ixkatat kôt hkaga kurê kumrêx. Nom ixkwỳjê hkàx ã hkaga. Anê.

²⁰Nê ã hamaxpêr anhỹrja o ra gõr nê nõ. Nhũm Tirtũm kapêr o mê wrỳk xwỳnhjê hõ hwỳr wrỳ nê hwỳr axàn kuri xa. Hãmri nê kãm:

—Pa Juje? E ot pa awỳr tẽ. Kwa tee ri Marir o aprõ hkukamã ajamaxpêr punuj kêt nê. Mãmri ho aprõ. Mêhõ kot apê tanhmã ho hkêt. Tirtũm Karõ na pre ã hipêx anê. Jakamã kwa tee ri ajamaxpêr kêt nê mãmri ho aprõ nê war apa. ²¹Koja hkrare kato nê myre nê hprêk. Hãmri nê mê kot hkôt amnhĩ xunhwỳr xwỳnhjaja mê kot amnhĩ tomnuj piitã pê mê utar pa. Jakamã koja kato ka wa hã hixi mê nhũm kêp Jejus. Anê.

Nhũm pre ã Tirtũm kapêr o mê wrỳk xwỳnhja kãm kapêr anê. Ijaew kapêr kãm Jejus jarênhja te kêp “Tirtũm kêp mê papytar xwỳnh” anhỹr pyrãk. Jakamã nhũm Tirtũm kapêr o mê wrỳk xwỳnhja Juje ot kãm ã kãm Marir jarênh anê. ²²⁻²³Nom kormã ã kãm kapêr anhỹr xwỳj ri na pre ra Tirtũm nhỹ hã kapêr xwỳnhjê hõja kukamã tanhmã harênh to nê hã kagà. Nê hã kagà ho:

E mê inhma nê inhmar tỳx nê ho apa. Koja nhỹrmã pyka já kamã mêhõ kormã hkukrit tâ htujarô. Nê hkra kato nê myre. Nhũm mê omu nê hã hixi mê nhũm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtũm mê pahkôt pa ho pa” anhỹr jarênhja pyrãk. Jakamã nhũm pre Tirtũm nhỹ hã kapêr xwỳnhja Jejus kukamã ã harênh anê nê hã kagà.

²⁴Jakamã nhũm Tirtũm kapêr o mê wrỳk xwỳnhja Juje mã kapêr par mê nhũm hkrãkato. Hãmri nê kot kãm ujarênh xá hkôt Marir o hprõ. ²⁵Nom kormã tanhmã ho hkêt nê ri o pa rãhã nhũm hkrareja kato. Hãmri nhũm wa hã hixi mê nhũm kêp Jejus nê mãânênh kêp Emanuew.

2

Kanhêti ho studa xwỳnhjê jarênh

¹Nhũm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhõ xwỳnhjê ho amnhĩptar o pa ri nhũm õ pika kamã kato. Hãmri nhũm Tirtũmja kaxkwa kamã Kra kator jarênh xá hã kanhêti raxta õ nhõ nhũm pika hõ kamã kanhêti ho studa xwỳnhjaja omu. Kanhêti pumu nê hkĩnh nê axpên mã:

—Kwa ga mê kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhĩrit xá hã ajê. Kwa pu mê ma hapêr o mō nê nhỹri tokyx omu nã.

Anê hãmri nê amnhĩ to pikuprõnh pa nê ma hapêr o pa. Ma myt gjêx xá hwỳr hapêr o pa hã apkati xohtõ nê. Hãmri nê ra Ijaew nhõ pika hwỳr pøj nê krĩ pê Jerujarê hwỳr hapêr o mō. Pahi Eroxo nhõ krĩja wỳr nhũm mê hapêr o mō hãmri nê kamã pøj nê mê hkrare nywta ã krĩ nhõ xwỳnhjê kukjêr o mō ²nê mê kãm:

—Pa? Ot pa mê apê Ijaew nhõ pahi nywreta pumunh kaxyw mō. Ham kator xwỳnhja. Mê inhõ pika kamã na pa prem kaxkwa hkrax rũm kot ho amnhĩrit xá hã kanhêti raxta pumu. Hãmri nê nhỹri pahi nywre pumunh nê kutã mê ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mê inhõ krĩ rũm hapêr o mō. Kwa mê inhmã harê. Nhỹri na? Na pa mê inhmã omunh prãm tỳx kumrêx.

Anhỹr o hã mê hkukjêr o mōr jakamã nhũm mê piitã pahi nywja jarênh ma nê axpên mã harênh o hprõt. ³Nhũm pahi Eroxo jarênh ma nê tee ri amnhĩ kukamã hamaxpêr. Pahi nyw kot mê ho amnhĩptar ã hkamnhĩx nhũm já kêp omnuj tỳx nê. Nhũm krĩ nhõ xwỳnhjaja ã hamaxpêr anhỹr ã omu nê tee ri amnhĩ kukamã hamaxpêr o ra kãm ma nê. ⁴Hãmri nhũm pahi Eroxoja

amnhĩ wÿr hkwyjê hã karõ. Mẽ õ pa-tre krãhtũmjaja nẽ Tĩrtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ nẽ Tĩrtũm kot nhÿrmã mẽ hwÿr mẽn̄h mã xwÿnh̄ta ã mẽ hkukjêr kaxyw. Nẽ mẽ kãm:

—E Tĩrtũm kot nhÿrmã mẽ pahwÿr mẽn̄h mã xwÿnh̄ta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhÿrmã kator kaxyw nẽ nhÿri koja we kato? Xà jar mẽ panhõ krĩ kamã nà? Xà nhÿri krĩ hõ kamã? Anẽ.

⁵ Hãmri nhũm mẽ kuma nẽ kãm:

—Nà mẽ panhõ pika pê Jutej kamã koja xep kato. Krĩ pê Perêj kamãã. Na pre Tĩrtũm nhÿ hã kapêr o mẽ pa xwÿnh̄ja ra hkukamã mẽ panhĩgêjtê mã tanhmã harênh to nẽ hã kagã. Nẽ hã kagã ho:

⁶ Pa Perêj nhõ xwÿnh̄jaja? E mẽ anhõ krĩ grire htã kamã koja nhÿrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.

Ã na pre Tĩrtũm kot mẽ pahwÿr mẽn̄h mã xwÿnh̄ta kukamã mẽ kãm harê nẽ hã kagã anẽ. Anẽ.

⁷ Hãmri nhũm pahi Erox tee ri ã harênh anhÿrja ma hãmri nẽ amnhĩ wÿr mẽ kot hã àhkukjêr o mõi xwÿnh̄jê hã karõ. Nom nhÿri Ijaew kàx ã. Hãmri nhũm mẽ ma hwÿr mra nẽ agjê nhũm mẽ omu nẽ pahi nywta ã mẽ hkukja nẽ mẽ kãm:

—E mẽ aprĩ hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrÿ kute? Xà ham na ka prem omu nà amnepê mã? E mẽ aprĩ hã tanhmã inhmã harênh to. Anẽ.

Hãmri nhũm mẽ ihõja kãm:

—Nà na ra hã amgrã axkrut kaxyw. Na pa prem omu hãmri nẽ inhnojarêr nẽ man ixpa ho ixpa ry rax nẽ mẽ awÿr pøj. Anẽ.

⁸ Nhũm mẽ kuma nẽ mẽ kãm:

—Tÿ. Nom jar amrakati. Perêj kamã na xep kato. E mẽ mãmrĩ ma hwÿr mõi nẽ kamã hapêr. Hãmri nẽ nhÿri omu nẽ akupÿn ixwÿr mõi nẽ inhmã harê. Pa ijaxwÿja ma hwÿr mõi nẽ omu nẽ mẽ apyrã nẽ kãm mex o mex ã harê. Ijaxwÿja inhmã omunh prãm tÿx kumrêx. Anẽ.

Nom hêx rom ã ri mẽ kãm kapêr anê. Kot nhÿri harênh mar nẽ hã àmnênh nhũm mẽ kot hpĩr kaxyw nhũm hêx rom ã kãm omunh prãm tÿx ã amnhĩ jarênh anê. ⁹⁻¹⁰ Jakamã nhũm mẽ kuma hãmri nẽ kato nẽ ma Perêj wÿr mõi kurê kumrêx. Hãmri nẽ kormã mẽ õ pika kamã mẽ pa ri kanhêti ho studa xwÿnh̄ta nhũm mẽ axte amnhĩ kukamã omu nẽ hkĩnh nẽ. Nhũm ma Perêj wÿr mẽ hkukamã mõi nhũm mẽ omunh pê ma hkõt pa rãhã hwÿr pøj. Nhũm kanhêtiya pahi nywre nhõrkwy mÿri ajêt. ¹¹ Jakamã nhũm mẽ ma hkõt mra nẽ ixkreja wÿr pøj nẽ kapem xa. Hãmri nẽ mẽ kãm kapêr nẽ mẽ hwÿr agjê nẽ Jejus mẽ katorxãja wa omu. Hãmri nẽ Jejus kutã hkõn krã ho hkrĩ hpa nẽ kãm kapêr nẽ kãm:

—Pa Xugitre. Hêxta waa nẽ. Nà amex o amex. Kot kaj nhÿrmã axaptàr hãmri nẽ apê mẽ inhõ Pahi Maati. Nà ãm hãmri na pa mẽ apumu nẽ ixkĩnh nẽ. Anẽ.

Hãmri nẽ ahpÿnhã kãm hkĩnh xà gõ. Kãm ôr kwÿ gõ nẽ kãm mēhkuxwa xà hkwy gõ nẽ kãm te kot rãmre kuxware pyrãk pê mĩraja nhũm mẽ kãm hkwy gõ. Mẽ hkĩnh xà hã kàxpore xohtõ nhũm prem kãm õr pa. ¹² Hãmri nẽ ra akupÿm Jerujarê kamã pahi Erox wÿr nojarêr. Nhũm kamãt nhũm mẽ gõr nẽ hikwy hãmri nẽ ra amyti. Nhũm Tĩrtũm mẽ hpimtir kãm mẽ kãm kapêr nẽ mẽ kãm:

—Pa? E mẽ inhma. Kêr ka mẽ akupÿm pahi Erox wÿr amrar nẽ kãm mẽ hkrata jarênh kêt nẽ. ãm kwarĩ ho kwarĩ. Nẽ kêr ka mẽ pry hõ hã mãn ma mẽ anhõ pika hwÿr akupÿm apa ho apa.

Anhÿr o mẽ kãm kapêr jakamã nhũm ap-kati nhũm mẽ kãnhmã hkrĩ hãmri nẽ Tĩrtũm kot mẽ kãm hã karõ xà hkõt ma akupÿm mẽ õ pika hwÿr pa kurê kumrêx nẽ akupÿm pahi Erox wÿr mrar kêt nẽ.

Juje mẽ hprõ wa kot Erox pymaj ma Jejus o mõi

Apokarip 12.1-6, 12.13-18

¹³ Tã nhũm kanhêti ho studa xwÿnh̄jaja ma akupÿm hapêx hãmri nhũm Tĩrtũm axte Marir mjên Juje hwÿr kapêr o mẽ wrÿk xwÿnh̄jê hõ mẽ. Nhũm kê axte hpimtir kãm hwÿr wrÿ nẽ kãm kapêr nẽ kãm:

—Pa Juje. E kwa kànhmã nhỹ. Na ra pahi Eroxa aprõ pê hkrata ã amÿnê. Koja tokyx pôristi hkwyjaja mẽ anhõ krĩ hwÿr pøj nê war apê hpĩr kaxyw ri hapêr. Jakamã kwa wa tokyx akato nê ma pika pê Ejit wÿr amõr kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kànhmã nhỹ nê Marir mra nê war amnhĩ to akuprõ nê ra nojarêt. Hãmri nê krĩja pê Jesus o kato nê ma o mõr kurê kumrêx. Wa mõr ryy nê hãmri nê Ejit wÿr pøj nê kamã pa ho pa.

¹⁵⁻²⁰ Rôm nhũm pahi Erox tee ri amnhĩ wÿr kanhêti ho studa xwÿnhjê kamã hamak o pa nom nhũm mẽ akupÿm hwÿr mrrar kêt nê. Jakamã nhũm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupÿn ixwÿr mrrar nê nhÿri inhmã pahi nywta jarênh kêt nê. Nà kwãr mẽ mãmri ã inhĩpêx anê. Mẽ kot ixpê ho hpimxuure kaxyw ã. Nà kot paj mẽ kêp kupĩ nhũm mẽ rĩ amnhĩ pumu. Na xep prem kanhêti kot harênh xàja pumunh ã ra hã amgrà pyxi nê hkôt mytwrÿ kêp 6. Jakamã mãn mẽ hkrata ra hã amgrà axkrut kaxyw. Nà na pa ra ijamaxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptàr kêt nê.

Anhÿr o hamaxpêr hãmri nê amnhĩ wÿr õ pôristi hkwyjê hã karõ nê mẽ kãm mẽ hkrajê hã amÿnê nê mẽ kãm:

—E kêt ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhĩmex pa. Nê kormã mẽ hã amgrà axkrut kêt xwÿnhjaja mãânê nê mẽ himex par kumrêx. Nê Perêj pu hã ri krĩ hkryre hkôt mãânê ri ajapøj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrrar kurê kumrêx. Hãmri nê Perêj wÿr pøj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêêxàjaja tee ri mẽ hkra htyk xwÿnhjê pumu nê hkaprĩ htÿx nê mÿr rũnh nê. Nom na pre Tĩrtũm nhỹ hã kapêr jarênh o mẽ

pa xwÿnh finat Jeremĩstija ra amnepê m ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhĩ nhĩpêx to pyrãk nhũm Jeremĩstija tanhmã Ijaewjê jarênh to nê hã kagà. Nê hã kagà ho:

Amnepê m Perêj kamã na pre mẽ panã Rrakewja hpijagri ho nõrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhũm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mẽ hkrare ho hamak xàj mÿr o pa. Mẽ kot mẽ kêp utàr nê mẽ himex par jakamã nhũm mẽ tee ri mẽ ho hamak xàj mÿr o pa. Anê.

Nhũm pre finat Jeremĩsja mẽ hkukamã ã mẽ harê nê mẽ hã kagà anê. Tã ra jarãhã mēni piitã Rrakew pyrã nê hkrajê o hamak xàj mÿr o pa.

Wa kot akupÿm wa õ pika hwÿr Jesus o mõr
Juãw 7.41-42

Tã nhũm mytwrÿ grêre nê hapêx nhũm pahi Erox ty. Jakamã nhũm kamàt nhũm Jujeja gõr nê nõ. Nê kêt õt kãm axte amÿti. Nhũm Tĩrtũm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pĩr mã xwÿnhhta ty. Jakamã kwa wa mãmrĩ ma akupÿm mõ. Ma akupÿm mẽ apê Ijaewjê nhõ pika hwÿr axãmnhĩx aprõ mẽ hkrata wa o mõ.

Anhÿr o kãm kapêr. Na pre ra amnepê m Tĩrtũm nhỹ hã kapêr o mẽ pa xwÿnhjê hõja ja kukamã mẽ panhĩgêjtê mã ja jarê nê hã kagà. Nê hã kagà kot: “Ixpê Tĩrtũm kot paj nhÿrmã Ejit rũm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

²¹ Jakamã nhũm Tĩrtũm kapêr o mẽ wrÿk xwÿnhja ã Juje mã karõ anê hãmri nhũm kuma nê ma akupÿm wa o mõ. Ma akupÿm mẽ õ pika hwÿr wa o mõ.

²² Tã ra akupÿm hpôx kaxyw htêp o mō. Hãmri nê pahi Erox kra Akêrawja ra hipêêxà mÿr pê kot Jutej kamã mẽ ho amnhĩptàr hã harênh ma. Hãmri nê tee ri mẽ amnhĩ kukamã hamaxpêr nê kãm mẽ hwÿr wa o mōr pyma nê.

Tã nhũm kamàt nhũm Juje ra gōr nê nō nê kê axte amÿti. Nhũm kê axte Tĩrtũm kapêr o mẽ wrÿk xwÿnhja hwÿr wrÿ nê akupÿm ò pika hkwȳ pê Jutej wÿr mōr nê wa mẽ hkurê nê kãm:

—Pa Juje? E kêr ka Jutej wÿr wa mẽ amōr kêt nê. Pãnhã nhãm mẽ anhō pika hō hwÿr mãn mō nê kamã ri apa.

Anê nhũm kuma nê hpãnhã wa mẽ ma mẽ ò pika hkwȳ pê Garirej wÿr wa mẽ juk nê ma mō. ²³ Nê kamã pōj nê krĩ pê Najare hwÿr mō nê kamã amnhĩm òrkwÿ nhĩpêx nê kamã wa mẽ pa ho pa. Nhũm pre ra amnepêp Tĩrtũm nhÿ hã kapêr o mẽ pa xwÿnhjê hōja ra ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Nê hã kagà kot:

Tĩrtũm kot mẽ pahwÿr mēnh mã xwÿnhhta koja kêp Najare nhō xwÿnh. Anê.

3

Juãw Paxis kot Tĩrtũm kapêr jarênh o pa Makre 1.1-6; Rukre 3.1-14; Juãw 1.19-23

¹ Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amÿm ri kapôt ã ri mẽ kãm Tĩrtũm kapêr jarênh o pa. ²⁻³ Tĩrtũm nhÿ hã kapêr o pa xwÿnh finat Ijais ra kot Juãw kukamã mẽ panhĩgêjtê mã tanhmã harênh to nê hã kagà xá hkôt. Na pre hkukamã hã kagà ho:

Koja nhÿrmã mēhō mōn pōj. Kapôt ã mōn pōj nê mẽ kãm tanhmã mẽmoj tã karō hto ho ri pa. Nê mẽ kãm: “Koja Tĩrtũm tokyx mẽ pahwÿr mẽ panhō Pahihtija mẽ nhũm wrÿ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mēhō kutêp pry ho mexta pyrà nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihtiti kutêp ã

amnhĩ nhĩpêx anhÿr o ri apa.” Anhÿr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja mōn pōj. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwÿnhjaja ma hwÿr mra. Nhũm mẽ kãm kapêr nê mẽ kãm:

—E koja Tĩrtũm tokyx kot mẽ pakaxyw ãm xwÿnhja o amnhĩrit. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhÿr o Jejus kutêp mẽ kãm kapêr o pa.

⁴ Juãw Paxisja hikãxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê ãm krit ku nê menh ôr o ri pa.

⁵ Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwÿr mra. Pika pê Jutej kamã ri mẽ pa xwÿnhjaja. Nê Jutej kamã krĩ pê Jerujarê nhō xwÿnhjaja. Nê pyhti pê Jotãw mÿri mẽ pa xwÿnhjaja. Nhũm prem piitã harênh ma nê kot mar kaxyw ma hwÿr mra. ⁶ Hãmri nê kapêr ma nê Tĩrtũm noo mã mẽ kot amnhĩ tomnuj xwÿnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rēnh pa nê axte kãm hamaxpêr kêt nê. Jakamã nhũm pre Juãw Paxisja Tĩrtũm mã gōx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷ Tã nhũm Parijew mẽ Satusew nhō xwÿnhjaja mããnēn mẽ hkôt ma Juãw Paxis wÿr mra. Mẽ urak nê mẽ kêp Ijaew jakamã haxwÿja Juãw Paxis kot mẽ hkrã kumrãr kaxyw ma hwÿr mra. No ãm hkwȳjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkôt hkwȳjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhÿrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kēnã. Xà kot paj mẽ ate

amnhî tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nẽ? Nà koja já kãm mex kêt nẽ. Koja ja mýrapê nhýrmã tanhmã mẽ atomnuj tỳx to ka mẽ tee ri umaj apimxur prãm kaprý. ⁸ Na htem amnhî tomnuj kaga nẽ tãm amnhî nhĩpêx nẽ tam axpẽn nhĩpêx. Jakamã e kwa mẽ ã amnhî nhĩpêx o apa anê pa rĩ kormã mẽ akrã kumrã. ⁹ Na ka htem atỳx ri ajamaxpêr o: “Mẽ ixpê finat Apraãw kanrêhã htãmnhwỳ hkwỳ na pa mẽ. Jakamã koja Tĩrtũm ja hã mẽ ixpumũ hãmri nẽ mẽ ixte amnhî tomnuj o ixpa tã nhũm ja hã tanhmã mẽ ixto hkêt nẽ. Koja mẽ ixto mex nẽ.” Anhỹr o atỳx ri amnhî kukamã ajamaxpêr. Nom ja kot anhỹr kêt. Mẽ apê Apraãw kanrêhã htãmnhwỳ htã mẽ ate urak nẽ tãm amnhî nhĩpêxre hã. Kot kaj mẽ apê htãmnhwỳ htã amnhî tomnuj o ri apa hãmri nẽ Tĩrtũm noo mã te mẽ apê pikap kênre nhĩkwỳ pix pyrãk. ¹⁰ Na ra Tĩrtũm mẽ ate amnhî tomnuj mýrapê tanhmã mẽ ato kaxyw. Te ho mẽhõ nhõ mẽmo hpàr ô hkêt nhũm kot tee ri omunh nẽ krãhyr nẽ kuwy kamã mẽnh nẽ ho kaxàr par pyrãk o koja mẽ anhĩpêx. Jao amnhî nẽ kuwy hwỳr mẽ arê ka mẽ kamã amnhî xà htỳx kamã ajamak rãhã ho ri apa. Anẽ.

Nhũm pre ã Juãw Paxisja Parijew mẽ Satusew nhõ xwỳnhjê mã kapêr anê. ¹¹ Hãmri nẽ hpãnhã axte mẽ kot mar kaxyw hwỳr mẽ mrrar xwỳnhjê mã kapêr nẽ mẽ kãm:

—E ra mẽ ate amnhî tomnuj kaga xwỳnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwỳnhhta tãm mẽ pahwỳr pôj. àhpumunh tỳx o kot ijakrenh par jakamã na pa hte ãm kukwak ri ixpa nẽ amnhî tã hã ixpijaam o ri ixpa. Koja mẽ awỳr Tĩrtũm Karõ rẽ nhũm mẽ akarõ mã agjê. Ka mẽ ý hã tam amnhî nhĩpêx o ri apa. Nom kormã mẽ kot tãm amnhî nhĩpêx kêt xwỳnhjaja koja Tĩrtũm kot mẽ pahwỳr mẽnh xwỳnhja ja hã mẽ omu nẽ mẽ hipêx o te kuwy kot mẽmoj to kaxàr par pyrãk o mẽ hipêx.

¹² —Na htem pur kãm harôj nhĩkê nẽ ho grã nẽ hpãnhã kahtwỳ. Nẽ kahuk pa hãmri nẽ hkapĩ nhũm kôk apê nẽ prýhkà ho htor

pa. Nhũm mẽ hpãnhã hy ho pa nẽ ixkre kamã gôj kãm unhwỳ. Ja pyrã nẽ koja tokyx Tĩrtũmja mẽ piitã mẽ kot tanhmã amnhî nhĩpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhî nhĩpêx o mẽ pa xwỳnhjaja koja ma amnhî wỳr mẽ ho api nhũm mẽ kuri mex rãhã nẽ pa ho pa. No mẽ kot amnhî tomnuj rãhã ho mẽ pa xwỳnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wỳr pa nẽ kamã amnhî xà htỳx kamã hamak rãhã nẽ pa ho pa.

Anhỹr o mẽ kãm kapêr.

*Juãw Paxis kot Jejus krã kumrãr
Makre 1.9-11; Rukre 3.21-22; Juãw 1.32-34*

¹³ Tã nhũm Jejus pika pê Garirej rũm kato nẽ ma Juãw Paxis wỳr mỗ. Juãw kot pyhti pê Jotãw kamã hkrã kumrãr kaxyw ma hwỳr mỗ. Hãmri nẽ omu nẽ kãm:

—Pa. E ot pa awỳr amnhî to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:

—Kwa nà. Aa ate amnhî tomnure hã kot pa kêt ri akrã kumrã. Nà ka kot kaj ixkrã kumrã. Anẽ.

¹⁵ Hãmri nhũm kãm:

—Kwa nà. Mãmri ixkrã kumrã Juãw Paxis. Tĩrtũm kãm ja prãm kênã kot ka kêt ri axtem nẽ ixkaga. Kot puj mẽ Tĩrtũm kãm hprãm xà hkôt tanhmã amnhî nhĩpêx to ho ri papa. Anẽ.

Hãmri nhũm kuma nẽ kãm:

—Tôe. Nà kot paj akrã kumrã. Anẽ.

¹⁶ Hãmri nẽ pyhti hwỳr o wrỳ nẽ kamã hkrã kumrã. Hãmri nẽ wa akupỳm api nẽ gô mỳ ri ãm rãhã nhũm kaxkwa axkjê. Hãmri nhũm kurũm Tĩrtũm Karõja Jejus wỳr te tuuti pyrã nẽ ahpar mã hwỳr wrỳk o tẽ nẽ ikre hã xa. Nhũm Jejus arĩ amnhî wỳr wrỳk o htêm kãm omunh o xa. ¹⁷ Hãmri nhũm Tĩrtũm kaxkwa rũm kãm kapêr nẽ kãm:

Pa? E apê ixkra mex na ka. ãm hãmri na ka hte ixkanrêhã ã amnhî nhĩpêx mex anê. Inhmã ajapê kamã na ka ri apa ho apa. Anẽ.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mããnẽn Eprêw 2.18, 4.15

¹ Tã nhũm Jejus Tĩrtũm Karõ nhỹ hã ma kapõt ã ri pa. Satanasti kot amnhĩ tã kamã hamak kaxyw nhũm ma kapõt ã ri pa. ² Ri pa hã apkati xohtõ nẽ. Ra hã arĩgro pẽ 40. Nẽ kormã apkur kêt jakamã ra kãm prãm tỳx kumrẽx nẽ ri pa. ³ Hãmri nhũm Satanastija nhỹhỹnh hwỳr tẽ nẽ hẽx rom kãm kapẽr nẽ kãm:

—Pa. E kwa mãn ka ra amã prãm tỳx nẽ nã? Nom xep apê Tĩrtũm Kra jakamã apê mẽmoj hihtỳx kêt. Tĩrtũm pyrã nẽ axàhpumunh o axàhpumunh kẽnã. Jakamã kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm akapẽr. Anẽ.

⁴ Hãmri nhũm kuma nẽ kãm:

—Tk. Nà kot paj amar xà hkõt ã ri amnhĩ nhĩpêx anhỹr kêt nẽ. Kojã Tĩrtũm kãm inhmã mẽmoj nhõr prãm nẽ inhmã mẽmoj gõ pa rĩ kormã kukrẽ. Kapẽr ã kagã htũm kot ja jarẽnh kot:

Na htem mẽ apkur xà pix kukwak ri htĩr nẽ pa hkõt nẽ. Na htem mããnẽn Tĩrtũm kapẽr ma nẽ hkõt amnhĩ nhĩpêx nẽ htĩr nẽ pa. Anẽ.

—Ã kapẽr ã kagã kamã kot harẽnh kot anhỹr jakamã kot paj akapẽr kõt ri ã amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Hãmri nhũm Satanastija tee ri kuma hãmri nẽ hpãnhã ma Jerujarẽ hwỳr o mõ. Nẽ Tĩrtũm mã amnhĩ jarẽnh xà hã ixkre hprẽk nhĩmõk wỳr ho api nẽ kỳxpê hatur xà hã ãm nhũm xa. Hãmri nẽ amnhĩ parpê kẽn rũnh nhĩkwỹ xwỳnhja pumunh o xa nhũm Satanasti kãm:

⁶ —E apê Tĩrtũm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Kojã Anhĩpêxàja apumunh mex nẽ ka tanhmã amnhĩ to hkõt nẽ. Kapẽr ã kagã htũm kot harẽnh kot:

Tĩrtũm kojã kapẽr o wrỳk xwỳnh kwỳjẽ mã ajarẽ ka ajarĩ nẽ ahpar mã tẽ nhũm mẽ kỳx pẽ amỳ nhũm mẽmoj akà hyr kêt nẽ. Anẽ.

—Ã kapẽr ã kagã htũm kot ajarẽnh anhỹr jakamã e tokyx ajarĩ. Anẽ.

⁷ Hãmri nhũm Jejus kuma nẽ kãm:

—Tk kot paj ri ate inhmã karõ xàja kõt ã amnhĩ nhĩpêx anhỹr kêt nẽ. Kojã Tĩrtũm tãm inhmã ijarĩ hã karõ pa rĩ mar xà hkõt ijarĩ. No kot pa ri amar xà hkõt ijarĩ hkõt nẽ. Tĩrtũm kapẽr ã kagã htũm kot ja jarẽnh kot:

Kêr ka mẽ amnhĩ krã hkõt amnhĩ tã ixkamã ajamak kaxyw inhĩxi jarẽnh kõt tanhmã amnhĩ nhĩpêx to hkõt nẽ. Anẽ.

—Ã kot ja nẽ kapẽr kot anhỹr jakamã kwarĩ ho kwarĩ. Kot paj ri amar xà hkõt ijarĩ hkõt kumrẽx. Tĩrtũm tãm kot inhmã ã ixte amnhĩ nhĩpêx anhỹr ã karõre hã. Anẽ.

⁸ Hãmri nhũm Satanasti tee ri kuma nẽ hpãnhã ma nhỹri kẽn prêeti hwỳr o tẽ nẽ himõk ã axte o xa. Hãmri nẽ kãm pika piitã ahkre hpa. Nẽ mẽ hikukrẽx piitã nhũm kãm ahkre ho xa. Kàxpore nẽ mẽmoj mex piitã nhũm kãm ahkre nhũm Jejus piitã omunh o xa. ⁹ Hãmri nhũm kê Satanasti axte kãm:

—E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nẽ inhmã inhmex o inhmex ã ijarẽ pa ama nẽ amã piitã õr pa. Ka kam mẽmoj piitã ho anhõ nẽ ho amnhĩptar o apa. Jakamã e kwa tokyx. Anẽ.

¹⁰ Hãmri nhũm kuma nẽ axte kãm kapẽr nẽ kãm:

—Tk kwa ma nhỹhỹm tẽ Satanasti. Kot paj ri amã amex o amex ã ajarẽnh kêt kumrẽx. Tĩrtũm kapẽr ã kagã htũm kot ja nẽ kapẽr kãm hihtỳx kẽnã. Kapẽr kot:

Kêr ka mẽ ixkapẽr pix ma nẽ ixkutã pix mã akõnkrã ho akrĩ nẽ inhmã inhmex o inhmex ã ijarẽ. Kêr ka mẽ ã amnhĩ nhĩpêx anhỹr o ri apa.

—Anhỹr o kot hã karõ jakamã kot paj amã amex o amex ã ajarẽnh kêt kumrẽx. Anẽ.

¹¹ Hãmri nhũm tee ri amnhĩ tã kuma hãmri nẽ ma tẽ. Tee ri kãm kapẽr kaprỳja ã amnhĩ pumu hãmri nẽ hkaga nẽ ma tẽ. Hãmri nhũm Tĩrtũm kapẽr o mẽ wrỳk xwỳnhjaja Jejus wỳr wrỳ nẽ tanhmã ho mex to nẽ kãm õ nhũm kukrẽ nẽ akupỹm hihtỳx.

*Jejus kot Garirej kamã kapẽr o pa
Makre 1.14-15; Rukre 4.14-15*

¹² Tã nhũm Juãw Paxisja mẽmoj tã pahi Eroxo mã akir nhũm amnhĩ tã kuma nẽ gryk xàj haxà nhũm hkrĩ ho hkrĩ. Hãmri nhũm Jejusja harẽnh ma nẽ ma akupỹm Garirej kamã krĩ pẽ Najare hwỳr ma akupỹm tẽ. ¹³ Hãmri nẽ ra pøj nom kamã ri pa hkêt nẽ. Nẽ hpãnhã kurũm kato nẽ ma krĩ pẽ Kapanaũ hwỳr tẽ. Gõ rax pẽ Garirej mýri na pre. Pika hkwỳ pẽ Jepurõ mẽ Natari wa mẽ kamã na pre nhũm Jejus ma hwỳr tẽ. Hãmri nẽ kamã pa. ¹⁴ Nhũm ra amnepẽm Tĩrtũm nhỹ hã kapẽr jarẽnh o mẽ pa xwỳnh finat Ijaisja Jejus kukamã ra mẽ panhĩgêjtẽ mã ã kot amnhĩ nhĩpêx anhỹr ã harẽ nẽ hã kagà. Jejus kot ã mẽ hwỳr mõi anhỹrja kukamã nhũm pre harẽ nẽ hã kagà. ¹⁵ Pika hkwỳ kamã mẽ pa xwỳnhjaja nhũm pre mẽ hkukamã mẽ harẽnh mex nẽ. Nẽ pika pẽ Garirej kamã mẽ pa xwỳnhjaja nhũm pre mããnẽn mẽ hkukamã mẽ harẽ. Nẽ pyhti pẽ Jotãw mẽ gõ xujanãr wa hkaêx kãm pika piitã kamã mẽ pa xwỳnhjaja. Nẽ krĩ pẽ Garirej kamã mẽ kęp Ijaew kêt xwỳnhjaja nhũm pre mããnẽn mẽ harẽ. ã na pre finat Ijaisja mẽ hkukamã Tĩrtũm nhỹ hã mẽ piitã mẽ harẽ nẽ hã kagà anẽ. Jejus kot ma mẽ hwỳr mõi rja kukamã nhũm ra hprĩ hã harẽ nẽ hã kagà. Nẽ hã kagàja o:

¹⁶ E. Kot paj mẽ amã mẽmoj mex jarẽ ka mẽ inhma. Mẽ ate Tĩrtũm pumunh kêt jakamã te mẽ ate kamãt kô kamã ri apa pyrãk. Tã koja Tĩrtũm mẽ amã amnhĩ to amnhĩrit ka mẽ hpãnhã te mẽ ate hirã kamã ri apa pyrãk o amnhĩ nhĩpêx nẽ ra hkôt amnhĩ xunhwỳ.

Anhỹr o mẽ hkukamã mẽ harẽ nẽ hã kagà. ¹⁷ Tã nhũm ra kot hkukamã mẽ kãm ujarẽnh xà hkôt nhũm Jejusja mẽ hwỳr mõi nẽ mẽ kãm Tĩrtũm kapẽr jarẽnh o ri mẽ hkôt pa. Nẽ mẽ kãm tanhmã amnhĩ jarẽnh to ho pa. Nom kormã hprĩ hã mẽ kãm amnhĩ jarẽnh kêt nẽ. Te ho nhãm mẽhõ jarẽnh pyrãk o mẽ kãm amnhĩ jarẽ nẽ mẽ kãm:

—E na ra Tĩrtũmja kot mẽ akaxyw ãm xwỳnhhta mẽ nhũm mẽ awỳr wrỳ. Jakamã kwa mẽ tokyx tee ri ate amnhĩ tomnuj ã amnhĩ pumu nẽ ã ate amnhĩ nhĩpêx anhỹr kaga nẽ hpãnhã Tĩrtũm kôt mãn amnhĩ nhĩpêx o ri apa.

Anhỹr o mẽ kãm kapẽr o pa pẽ mẽ ahkre ho ri mẽ hkôt pa.

Jejus kot amnhĩ wỳr tep pynênh xwỳnhjê hwỳr

Makre 1.16-20; Rukre 5.1-11

¹⁸ Tã nhũm Jejus ma gõ rax pẽ Garirej mýri ri pa nẽ gõx kãm ja wa omu. Simãw Pêtre mẽ htõ Andreja nhũm wa gõx kãm kryhti rẽnh o wa xa. Hãmri nhũm Jejus wa hwỳr tẽ nẽ wa omu nẽ amnhĩ kôt wa kuwỳ nẽ wa kãm:

¹⁹—Pa. Ekwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarẽnh o ri apa. Mẽ kot war amar nẽ ra ixkôt amnhĩ xunhwỳr kaxyw. Anẽ.

²⁰ Hãmri nhũm wa kuma nẽ kryhti re nẽ wa ma hkôt htẽm kurê kumrêx. ²¹ Hãmri nhũm mẽ ma nhãm axte mõi nẽ ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ õ pãr kãm kryhti ho mex o wa mẽ nhỹ. Hãmri nhũm mẽ hwỳr mra nhũm Jejus amnhĩ kôt ja wa kuwỳ nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

²² Hãmri nhũm wa kuma nẽ hipêêxà mã amnhĩ jarẽ nẽ ma hkôt pa ho pa kurê kumrêx.

Jejus kot tanhmã amnhĩ nhĩpêx to Rukre 6.17-19

²³ Tã nhũm Jejus Garirej kamã Ijaew mã Tĩrtũm kapẽr jarẽnh o pa. Na pre hte Tĩrtũm kapẽr o mẽ ahkre xà hã ixkre hwỳr agjê nẽ kamã mẽ kãm Tĩrtũm kapẽr jarẽnh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm ja hã mẽ apumu nẽ mẽ ato hkra kurê kumrêx. Anẽ.

Hãmri nẽ akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa.

²⁴ Jakamã nhũm mẽ piitã pikaja kamã ri axpẽn mã harẽnh o hprõt. Nẽ pika pẽ Sir kôt mããnẽn ma ri axpẽn mã harẽnh o hprõt. Nhũm mẽ piitã harẽnh ma nẽ ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nẽ mẽ ã kamã mẽ htyk xwỳnhjaja. Nẽ mẽ hkrã

pipãnh xwýnhjaja. Nê mêkarõmnuti kot Satanasti nhỹ hã tanhmã ri mê ho xwýnhjaja. Nhũm prem mê hamý nê ma Jejus wýr mê o mra nhũm mê omu nê akupým mê ho mex pa. ²⁵ Jakamã nhũm mê ohtô nê ma hkôt pa. Krĩ pê Garirej rùm nê Tekap rùm nê Jerujarê rùm nê pika pê Jutej rùm. Nê pyhti pê Jotãw nhĩkjê rùm mê pa xwýnhjaja. Nhũm mê ã ohtô nê ma Jejus kôt omunh o pa anê.

5

Jejus kot tanhmã mê ahkre hto

Rukre 6.20-23

¹ Nhũm Jejus amnhĩ kôt ri mê kot omunh o mê pa xwýnhjê pumu hãmri nê mê ahkre kaxyw ma tẽ nê hixêt ã api nê himõk ã nhỹ. Hãmri nhũm mê ma hkôt mra nê pu hã hkrĩ pa. ² Hãmri nhũm mê ahkre nê mê kãm:

³ E mê inhma. Kot kaj mê atõ amnhĩ kaxyw tanhmã Tirtũm mê wa inhmã ajamaxpêr to nê ajamaxpêr o: “Koja Tirtũm inhĩkhô hã pa hkêt pa ixtýx ri tanhmã amnhĩ tomnuj to ho ri ixpa rãhã ho ri ixpa.” Anhýr o ajamaxpêr. Hãmri nhũm Tirtũm ã ajamaxpêr anhýr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

⁴ Nê kot ka mê atõ tanhmã amnhĩ tomnuj to. Hãmri nê tee ri ja hã amnhĩ pumu nê apijaàm nê akaprĩ nê. Nê akaprĩ xàj amýr o nhỹ. Amýr rax nê. Hãmri nhũm Tirtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê ka ajamakêtkati nê axãmnhĩx akĩnh nê ri apa.

⁵ Nê kot ka mê atõ agryk tokyx anhýr kêt nê. Nê kritpêm amnhĩ tã amã mê hkaprĩ ho ri apa. Hãmri nhũm Tirtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axãmnhĩx akĩnh nê ri apa.

⁶ Nê kot ka mê atõ amã Tirtũm kãm hprãm xà hkôt amnhĩ nhĩpêx o ri apa hprãm nê. Nhũm amnhĩ tã apumu nhũm ja kãm mex nê. Hãmri nhũm ato mex nê tanhmã akrã hto ka hkôt

pix mã amnhĩ nhĩpêx o ri apa. Jao ajamakêtkati nê axãmnhĩx akĩnh nê ri apa.

⁷ Nê mê kamã mê axukaprĩ ho ri apa xwýnhjaja na hte Tirtũm ja hã mê apumu nhũm ja kãm mex nê. Jakamã na hte mê hã mê apyrà nê mê akamã ukaprĩ ho pa. Jao mê ato mex nê ka mê ajamakêtkati nê axãmnhĩx akĩnh nê ri apa.

⁸ Nê kot ka mê atõ ã ajamaxpêr anê nê ajamaxpêr o: “Nà kot paj ãm Tirtũm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhýr o ajamaxpêr. Hãmri nhũm Tirtũm amnhĩ tã mê apumu nê mê ato mex nê. Ka mê ajamakêtkati nê axãmnhĩx akĩnh nê ri apa. Nê nhýrmã Tirtũm wýr api nê kuri amex rãhã apa ho apa.

⁹ Nê kot ka mê atõ mēhõ wa kot axpên kutã amnhĩ xãm xwýnhta axpên tã wa omu nê wa kot tanhmã axpên nhĩpêx tota nê tanhmã wa kãm akapêr to nê akupým tãm wa ãm. Hãmri nhũm Tirtũm ja hã apumu nhũm ja kãm mex nê. Nê apê hkra hã ajarê ka ajamakêtkati nê axãmnhĩx akĩnh nê ri apa.

¹⁰ Nê koja mēhõ mê ate Tirtũm kapêr mar xà hkôt amnhĩ nhĩpêx o apa hã mê apumu nê hã tanhmã mê anhĩpêx kati hto. Tã nom koja Tirtũm arĩ mê ato mex nê. Mê apê hkra jakamã mê kot tanhmã mê anhĩpêx hto htã ka mê ajamakêtkati nê axãmnhĩx akĩnh nê ri apa.

¹¹⁻¹² —Kwãr mê mãmri ixtã mê ato kapêr rý mê ato hêx rý tanhmã ri mê atomnuj to. Kwãr mê mãmri ã mê anhĩpêx anê. Nom kêr ka mê arĩ amnhĩ kaxyw inhmã ajamaxpêr týx rãhã pê ajamakêtkati nê axãmnhĩx akĩnh nê ri apa. Kwãr mê mãmri ixtã ã mê anhĩpêx anê nê mê amex kêt ã mê ajarê. Amnepêm na prem ã Tirtũm nhỹ hã kapêr jarênh xwýnhjê nhĩpêx anê. Jakamã koja mê uràk nê ã mê anhĩpêx anê. Hãmri nhũm Tirtũm ja hã mê apumu nê amnhĩm mê amex ã mê ajarê. Hãmri nê nhýrmã kaxkwa kamã wa inhõ krĩ kamã

mê ato mex nê. Jakamã kêr ka mê ã amnhî kukamã ajamaxpêr anhÿr pê mãmri akînh nê ajamakêtkati nê axàmnhîx ri apa. Kwâr mê mãmri ã wa ixtã mê anhîpêx anê. Anê.

Jejus krajaja te kot kaxwa mê kanê hpôk wa uràk

Makre 9.49-50; Rukre 13.34-35

¹³ Nhùm Jejus arî mê kãm kapêr nê mê kãm:

—Nê mê ate ixkôt amnhî xunhwÿr xwÿnhjaja te mê ate kaxwa pyrâk. Kaxwaja mê apkur xà ho ành mã mex. No koja mēhō tēn kamã pika hkwÿ mê nê ho ahkã. Hãmri tanhmã kot wem ho nê akupÿm ho mex? Nà koja akupÿm mex kêt nê. ãm mê kot hkapîr pix kaxyw koja mex. Ja pyrã nê kot ka mê atō ate inhmã tanhmã amnhî nhîpêx to ho apa hã amnhî jarēnh tã gaa nê rî amã ixkôt amnhî nhîpêx prãm kêt nê. Hãmri nê ra te apê kaxwa mê pika pihkarta pyrâk. Kwa mê ixujarēnh ma nê kãm ajamaxpêr tÿx rãhã ho ri apa.

¹⁴⁻¹⁶ —Nê te mê ate kanê hpôk pyrâk. Nê te mê ate hixêt prêk nhîmök ã krî xãm pyrâk. Koja krîja hixêt prêeti nhîmök ã xa nhùm mê piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kÿx pê mēmoj nhîmök ã unhwÿ nhùm mê piitã mê kãm hirã nhùm mê hirã kamã mēmoj pumunh mex nê. Ja pyrã nê kot kaj mê tãm amnhî nhîpêx o ri apa nhùm mê piitã ja hã mê apumunh kôt ra kaxkwa kamã Tirtüm mex ã harēnh o pa. Anê.

Jejus kot tanhmã Mojes kapêr jarēnh to Rukre 16.16-17

¹⁷ Nhùm Jejus arî mê kãm kapêr nê mê kãm:

—Nê amnepê m na prem mê panhîgêjtê mã Tirtüm kapêr kwÿ jarēnh o pa nê mê kãm: Kêr ka mê axpên par kêt nê. Kot kaj mê mēhōx pî nhùm mê ja mÿrapê atom-nuj nê. Nê ma mê anhō pahîhti hwÿr ato tē nhùm mÿrapê tanhmã ato rÿ hkôt apî. Anê.

¹⁸ —Tirtüm kapêr ã kagã htüm kot mēmoj jarēnhja. Koja ujarēnh xà hkôt mēmoj tanhmã amnhî to hpar mê nhùm rî kormã

kaxkwa mê pika wa hapêx pa nhùm kapêr ã kagãja mãânēn hapêx. Nom nhùm Tirtüm kapêr koja mēmojja pyrã nê aa hapêx kêt nê. Koja rãhã ho rãhã nê aa ihkjê ho tanhmã mēnh to hkêt nê. ãm hãmri na pa ã mê amã harēnh anê.

¹⁹ —Nê kot ka mê atō Tirtüm kapêr o pixire nê hirôp xa. Hãmri nê ra amnhî pyrã nê anhîo mã ja hã amÿnê. Apyrã nê kot hirôp ãm kaxyw ka kãm hã amÿnê. Kot kaj ã amnhî nhîpêx anê hãmri nê apê Tirtüm kra hkêt ã amnhî to amnhîrît. Nom kot ka kêt mê tãm amnhî nhîpêx o ri apa. Nê amnhî pyrã nê tãm mê kot amnhî nhîpêx kaxyw mê kãm akapêr o ri apa hãmri nhùm Tirtüm ja hã apumu nê ato hkra nê ato mex nê.

²⁰ —No Parijew nhō xwÿnhjaja nê Tirtüm kapêr tùm o mê ahkre ho mê pa xwÿnhjaja. Mê kot Tirtüm kapêr kôt amnhî nhîpêx mex ã amnhî jarēnh tã no ãm hkôt ã amnhî nhîpêx anhÿr kêt nê. Jakamã kot kaj mê hkôt amnhî nhîpêx o ri apa hãmri nê mê uràk nê nhÿrmã Tirtüm mê wa inhō krî kamã apa hkêt nê. Anê.

Mê gryk o mê pa xwÿnhjê jarēnh

Rukre 12.58-59; mãânēn Rômãn 12.19; Epes 4.26; Wam Ximotre 2.8; Xiakre 1.19-20

²¹ Nhùm Jejus arî mê kãm kapêr nê mê kãm:

—Nê amnepê m na prem mê panhîgêjtê mã Tirtüm kapêr kwÿ jarēnh o pa nê mê kãm:

Kêr ka mê axpên par kêt nê. Kot kaj mê mēhōx pî nhùm mê ja mÿrapê atom-nuj nê. Nê ma mê anhō pahîhti hwÿr ato tē nhùm mÿrapê tanhmã ato rÿ hkôt apî. Anê.

ãm hãmri na prem mê kãm ja jarê. ²² Tã kot paj ixprî hã mê amã tanhmã harēnh to ka mê inhma. Kot kaj mê mēmoj tã anhîo kamã agryk. Hãmri nhùm Tirtüm tee ri ja hã apumu nhùm ja kãm mex kêt nê. Jakamã koja mê anhō pahîhti tanhmã ja hã mê ato japêr hã koja ja mex nê. Rÿ kot kaj mê tanhmã mēhō japyrÿ hto. Ho hagrô rÿ ho rop. Mÿrapê kop apu akwÿ kot apynēnh nê anhō pahîhti hwÿr ato htēm nê îhkram ajaxar ronhÿx ja inhmã mex nê. Rÿ kot kaj mê tanhmã anhîo mã akapêr punuj to nê kãm: “Tk. Ate ho warêhti hã. Te apê hagrô

pyràk kênã.” Anhÿr o kãm akapêr. Tã kop apu Tirtũm ra ã akapêr anhÿrja mÿrapê mẽ kot amnhĩ xà htÿx kamã hamak tũm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

²³ —Nê kêr ka mẽ tanhmã ate anhÿo nhĩpêx hto kamã Tirtũm mã mex o mex ã harênh kêt nê. Kêr ka mẽ kãm amnhĩ jarênh o akrĩ hãmri nê ra mêhõ kot mẽmoj tã akamã gryk xwÿnh mã ajamaxpêr japêr. ²⁴ Hãmri nê akato nê ma hwÿr atêm kurê kumrêx nê wa tãm axpên mã akapêr nê tãm akupÿm axpên xãm. Hãmri nê rĩ kormã ma akupÿm tẽ nê Tirtũm mã amnhĩ jarênh jatur xàm amê nê kãm mex o mex ã harê. Kêr ka mẽ ã amnhĩ nhĩpêx anhÿr o ri apa.

²⁵⁻²⁶ —Na htem tanhmã axpên nhĩpêx to hãmri nê kot tanhmã war axpên to xwÿnhjê hõja ma õ pahi hwÿr tẽ nê kãm tanhmã kot ho xwÿnhhta jarênh kaxyw nojarê. Hãmri nhũm ra kamã gryk xwÿnhhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwÿr tẽ nê wa akupÿm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupÿm axpên xunhwÿ. No koja mẽ anhÿr kêt nhũm pahija wa harênh ma nê wa kot tanhmã axpên to xwÿnhhta õ jaxà nhũm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhÿrer pa nhũm pahihtija rĩ kormã pôristi mã anê nhũm kãm ure nhũm kato. Ja pyrà nê kêr ka mẽ Tirtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nê hkôt amnhĩ nhĩpêx rãhã ho ri apa. Anê.

Tanhmã mẽ pahte mẽ pahprõjê nhĩpêx to Matêwre 19.3-9; Makre 9.43-47, 10.2-9; mããnê Rukre 16.18

²⁷ Nhũm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêjtê mã Tirtũm kapêr tũm kwÿ jarê nê mẽ kãm: “Kêr ka mẽ amnhĩ prõ pix tânopxar o ri apa. No mẽ kuhpa hã nhãm mêhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã karõ. ²⁸ Tã kot paj ixprĩ hã mẽ amã tanhmã harênh to ka mẽ inhma.

Kot kaj mẽ nhãm mêhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyràk o amnhĩ nhĩpêx. Kormã ate ho amnhĩkati hkêt tã ra hkukamã ajamaxpêr jakamã te ra ate ho amnhĩkati pyràk o amnhĩ nhĩpêx. ²⁹ ã mẽ hamaxpêr punuj anhÿr xwÿnhjaja koja mẽ nhÿrmã ma mẽ kot amnhĩ xà htÿx kamã hamak tũm xàta wÿr ma mra nê kamã pa rãhã ho pa. Jakamã kêr ka mẽ nhãm mêhõ pumu nê amã hkĩnh japêr hãmri nê te ate ano kaxàr nê mênh nê axte ate omunh kêt pyràk o amnhĩ nhĩpêx. Jao hkàx ã rĩt nê ma nhÿhÿm atêm kurê kumrêx.

³⁰ —Nê kot kaj mẽ anhĩhkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ nhĩhkra krãhyr nê mênh pyràk o amnhĩ nhĩpêx nê tanhmã amnhĩ tomnuj to hkêt nê. Mẽ ìhkra ho mẽ kot tanhmã amnhĩ tomnuj to ho mẽ pa xwÿnhjaja koja mẽ nhÿrmã ma mẽ kot amnhĩ xà htÿx kamã hamak tũm xàta wÿr ma mra nê kamã pa rãhã ho pa. Anê.

Mẽ pahte axpên kaga hkêt

³¹ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêjtê mã Tirtũm kapêr tũm kwÿ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhĩ jarênh ã kagà nhĩpêx nê kãm agõ nê rĩ kormã hkaga.” Anê. ãm hãmri na pre ã mẽ kãm Tirtũm kapêr tũm jarênh anê. ³² Tã kot paj ixprĩ hã mẽ amã tanhmã harênh to ka mẽ inhma. Kêr ka mẽ atÿx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mêhõ ho amnhĩkati ka harênh ma hãmri nê amã ja hã hkaga hprãm nê mãmri kam nê hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkôt hkaga. Hãmri nhũm mêhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyràk o hipêx. Nê nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyràk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ Xiakre 5.12

³³ Nhũm Jêjus arĩ mẽ kãm kapêr nê mẽ kãm:

—Nê na pre finat Mojes mẽ panhîgêt nê pahpãmjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhÿr ã amnhĩ jarê hãmri nê amnhĩ jarênh xà hkôt kãm tanhmã amnhĩ nhĩpêx to. Nom kêr ka mẽ atÿx ri kãm tanhmã amnhĩ jarênh to ho amnhĩ to axêx kêt nê. ãm akatàt kôt mẽ ate amnhĩ jarênh to xà hkôt kãm tanhmã mẽmoj to.” Anê. ãm hãmri na pre mẽ kãm ja jarê. ³⁴ Tã kot paj ixprĩ hã mẽ amã tanhmã harênh to ka mẽ inhma. Kêr ka mẽhõ mã tanhmã amnhĩ jarênh to. Tĩrtũm mã pix mã amnhĩ jarênh kêt nhãm mẽhõ mã mãânên tanhmã amnhĩ jarênh to. Nê akatàt kôt kãm amnhĩ jarê. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarênh kôt amnhĩ jarê. Nom kêr ka mẽ axte ã mẽmo nhĩxi hã amnhĩ jarênh anhÿr kêt nê. Mẽmoj tã amnhĩ jarê nê akatàt kôt amnhĩ jarênh kurê kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarênh kêt nê. Tanhmãn kaxkwa nhĩxi jarênh kôt mẽmoj tã amnhĩ jarênh kêt nê. Kaxkwa kêp Tĩrtũm krĩ xà maati kênã kot ka kêt mẽ axtem nê atÿx ri amnhĩ kaxyw hixi jarê. ³⁵ Rÿ mẽ kot axêx kêt kôt apumunh kaxyw pika nhĩxi jarênh kêt nê. Pika kêp Tĩrtũm par xãm xà kênã kot ka kêt mẽ atÿx ri amnhĩ kaxyw tanhmã hixi jarênh to. Nê krĩ pê Jerujarêja mãânên kêr ka mẽ ri amnhĩ kaxyw tanhmã hixi jarênh to hkêt nê. Koja nhÿrmã Tĩrtũm mẽ awÿr Jerujarê hwÿr ixpê pah maati hã inhmẽ pa kamã mẽ ato amnhĩptâr o ixkrĩ. Jakamã kêr ka mẽ ri atÿx amnhĩ kaxyw tanhmã hixi jarênh to ho ri apa hkêt nê.

³⁶ —Nê kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprÿ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhÿr kêt nê. Jakamã mẽ ri atÿx tanhmã harênh to hkêt nê.

Nê mẽ atÿx ri mẽmo nhĩxi jarênh kôt mẽmoj tã amnhĩ jarênh o apa hkêt nê. ³⁷ ãm akatàt kôt tãm amnhĩ jarênh kurê kumrêx. Jao mẽ kãm: “Tÿ. Nà kot paj ho anê.” Anhÿr o mẽmoj tanhmã ho. Rÿ mẽ kãm: “Nà kot paj ho anhÿr kêt nê.” Anhÿr o mẽmoj

tanhmã ho hkêt nê. ãm akatàt kôt tanhmã mẽmoj tã amnhĩ jarênh to xà hkôt ho anhÿr kurê kumrêx. Mẽ kot Satanasti hkôt amnhĩ nhĩpêx o mẽ pa xwÿnh pixjaja na htem hêx rom mẽmoj nhĩxi jarênh kôt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jêjus kot mẽ pamã karõ

Rukre 6.27-30, 23.34; mãânên Atre 7.60; Rõmãn 12.14

³⁸ Nhũm Jêjusja arĩ mẽ kãm kapêr nê mẽ kãm:

—Na prem amnepêm mẽ panhîgêtjê mã Tĩrtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rÿ koja mẽhõ apê axwa hõ hkwÿr hã koja atã mã ho anê nê atã kêp wa hõ hkwÿr.” Anhÿr o mẽ kãm hã karõ. ãm hãmri na prem ã ja jarênh anê. ³⁹ Tã kot paj ixprĩ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyrãk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

⁴⁰ —Nê koja mẽhõ anhĩnõhkã hã awÿr nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkôt kry pê kãm anhĩnõhkã hpakã ry jagjênh xwÿnhhta nhõr pyrãk o amnhĩ nhĩpêx. Nom kêr ka mẽ kamã agryk kamã kãm õr kêt nê.

⁴¹ —Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrĩ kãm ho anê. Nê kot amã nhÿri hã karõ xaja wÿr o põj nom kamã kãm õr kêt nê. Kãm ho hakrenh ryy nê rĩ kormã akupÿm kãm agõ.

⁴² —Nê koja mẽhõ õ mẽmoj kêt nê awÿr tẽ nê mẽmoj tã awÿr ka mãmrĩ kãm agõ. Rÿ nhũm awÿr tẽ nê apê mẽmoj to ìpresta kaxyw ka mãmrĩ kãm ho ìpresta. Kêr ka mẽ ã axpên nhĩpêx anhÿr o ri apa. Anê.

Mẽ pamã axpên kĩnh ã Jêjus kot mẽ pamã karõ

Rukre 6.32-36; mãânên Rõmãn 12.14

⁴³ Nhũm Jêjus arĩ mẽ kãm kapêr nê mẽ kãm:

—Ně na prem amnhĩ krã hkôt axtem ně tanhmã mẽ panhĩgêtjê mã mẽmoj jarěnh to ně mẽ kãm: “Kêr ka mẽ amã mẽ akràmnhwỳjê pix kĩnh ně tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmri mẽ kamã axàhkurê ho ri apa.” Anhỹr o mẽ kãm karõ. ⁴⁴ Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt ně. ãm tanhmã mẽ ho mex to pix hkukamã mãn ajamaxpêr. Ně mẽ ho Tĩrtũm wỳr pix kukamã mãn ajamaxpêr. ⁴⁵ Na hte ã kaxkwa kamã Mẽpahpãm Tĩrtũmja amnhĩ nhĩpêx anhỹr o pa. Mẽ kot amnhĩ tomnuj xwỳnhjaja ně mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpẽn pyrãk. Jao hamê wa hwỳr na rê ně hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urãk ně mẽ piitã tãm mẽ hipêx o axpẽn pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpẽn pyrãk.

⁴⁶ —Ně xat kaj mẽ amã mẽ piitã mẽ ho mex prãm kêt ně ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex ně nà? Nà koja kãm mex kêt ně. Koja mẽhõ ato mex kêt tã kêr ka ãm amnhĩ rom ho mex ně. Nhũm Tĩrtũm ja hã apumu ně amnhĩm amex ã ajarê. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpẽn pyrãk. Mẽ kot tãm amnhĩ nhĩpêx xwỳnhjaja ně mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpẽn pyrãk.

⁴⁷ —Ně na hte mẽ hkwỳjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt ně. Nom kêr ka mẽ ã amnhĩ nhĩpêx anhỹr kêt ně. Kêr ka mẽ kurom mẽ piitã tãm mẽ hipêx o axpẽn pyrãk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpẽn pyrãk. Ně tãm mẽ kãm akapêr o axpẽn pyrãk. ⁴⁸ Kaxkwa kamã Mẽpahpãm Tĩrtũm pyrà ně mẽ kot amnhĩ tomnuj xwỳnhjê mẽ mẽ kot

amnhĩ to mex xwỳnhjaja mẽ ho apimràatã mẽ ho mex o axpẽn pyrãk. Na hte ã Tĩrtũmja mẽ panhĩpêx anê. Anê.

6

Mẽ pahte mẽ kêp amrakati xwỳnhjê ho mex rãhã hã mẽ pamã karõ

¹⁻² Nhũm Jejus arĩ mẽ kãm kapêr ně mẽ kãm:

—Ně na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt ně. ãm hkwỳjaja kot ja hã mẽ omunh ně mẽ mex ã mẽ harěnh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Ně mẽ pikuprõnh xà hã ixkre kamã kuhê ně tanhmã mẽ ho mex to. Mẽ hkwỳjaja kot ja hã mẽ omunh ně amnhĩm mẽ mex ã mẽ ho jarkrar kaxyw. Jakamã koja nhỹrmã Tĩrtũmja axte ja hã mẽ kãm mẽmoj mex nhõr kêt ně. Ra jar mẽ hkwỳjaja kot ja hã mẽ omunh ně amnhĩm mẽ mex ã mẽ harěnh kênã. Jakamã kwa kêr ka mẽ ho mẽ urãk kêt ně. Ně tanhmã mẽhõ ho mex to kaxyw ně akwỳjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh ně ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu ně mẽ hã tanhmã ato mex to hkêt ně. Koja ãm hã apumu.

³ —Ja pymaj kêr ka mẽ mẽ kêp amrakati xwỳnhjê mã mẽmoj nhõr kaxyw hãmri ně mẽ piitã mẽ no hkàx ã tanhmã mẽ ho mex to. Hãmri ně nhãm ri ja hã mẽ kãm amnhĩ to jarkrar kêt ně. Aprõ mã rỳ akrajê mã rỳ akràmnhwỳ mã hã amnhĩ jarěnh kêt ně. ⁴ Kot kaj mẽ no hkàx ã tanhmã ho mex to no nhũm Tĩrtũm tapxipix apumunh o nhỹ. Hãmri ně ja hã ato mex rax ně ka amex ně apa. Anê.

Tanhmã mẽ pahte Tĩrtũm mã amnhĩ jarěnh to hã mẽ pamã karõ

Rukre 11.1-13, 18.9-14

⁵ Nhũm Jejus arĩ mẽ kãm kapêr ně mẽ kãm:

—Ně mãănên ja. Na htem hakwa pix o amnhĩ mex ã amnhĩ jarěnh xwỳnhjaja Tĩrtũm mã amnhĩ jarěnh kaxyw ně mẽ kot

Tirtûm kapêr o mē ahkre xà hã ixkreja wÿr agjê. Nē mē piitã mē noo mã kãm tanhmã amnhĩ jarēnh to. Rÿ gáp kuhê nē mē piitã mē noo mã kãm amnhĩ jarē. Tã mēmo kaxyw na htem mē noo mã Tirtûm mã amnhĩ jarē? Nà ãm mē kot ja hã mē omunh nē mē mex ã mē ho jarkrar pix kaxyw. Nē mē harēnh o: “E mÿjti pumu. Na hte apkati mē ã Tirtûm mã amnhĩ jarēnh anē. Kot amnhĩ to mex xwÿnh mãn.” Anhÿr ã harēnh kaxyw. Tã ra mē piitã mē kot ja hã omunh nē amnhĩm mex ã ho jarkrar jakamã koja Tirtûm axte ja hã tanhmã ho mex to hkêt nē. Ra pika ja kamã mē kot mē omunh nē mē mex ã mē harēnh kênã. ⁶No mē kajaja. Kêr ka mē uràk nē ã amnhĩ nhĩpêx anhÿr kêt nē. ãm Tirtûm mã amnhĩ jarēnh kaxyw nē akwÿjê no hkàx ã hitom wÿr agjê nē hitom kãm ahte kãm amnhĩ jarē. Hãmri nhÿm Tirtûm tapxipix ja hã mē apumu. Mē amã amnhĩ to amnhĩrît kêt tã mē apumu. Hãmri nē mē ato mex nē.

⁷—Nē mē kêp Tirtûm kra hkêt xwÿnhjaja na htem sãnti mã amnhĩ jarēnh kaxyw nē xatã kãm amnhĩ jarē. Nē xatã kàx péê kãm amnhĩ jarē. Nē hamaxpêr o: “Kot paj xatã sãnti mã amnhĩ jarē nhÿm inhmar japêr.” Anhÿr o hamaxpêr jakamã xatã kãm amnhĩ jarē. No ãm htÿx ã hamaxpêr anhÿr kaprÿ. ⁸Jakamã kwa kêr ka mē ho mē uràk kêt nē. Tirtûm ra kot mē ate mēmoj tã hwÿr xàta ra ja kukamã kot omunh mex kênã kot ka kêt mē xatã hã hwÿr o akuhê.

⁹—Nē kêr ka mē kãm amnhĩ jarēnh kaxyw nē amnhĩ krã hkôt tanhmã kãm amnhĩ jarēnh to rÿ kãm amnhĩ jarēnh o: Pa Mēinhĩpêêxà maati pé kaxkwa kamã ri apa xwÿnh? Amex o amex Tirtûm.

¹⁰Apê mē ijamâr mex xwÿnh maati na ka. Na hte kaxkwa kamã mē kot ri amã tanhmã amnhĩ nhĩpêx to ho mē pa xwÿnhjaja akôt pix mã amnhĩ nhĩpêx o ri pa. Tã ijaxwÿja inhmã mē uràk nē akôt pix mã amnhĩ nhĩpêx o ri ixa hprãm.

¹¹Nē kwa jarãhã mē inhmã mēmoj gô pa mē akukwak ri ho apku.

¹²Na pa hte tãhã amnhĩ tomnuj nē Tirtûm. Nom mē kot tanhmã ixtomnuj to xwÿnhjaja na pa hte ãm mē omu nē

amnhĩ tã tanhmã mē ho hkêt nē. Nē ja ho ijamakêtkati nē axte kãm ijamaxpêr kêt nē. ã ixte amnhĩ nhĩpêx anhÿr jakamã kwa ja hã ixpumu nē ixpyrà nē ixte tanhmã amnhĩ tomnuj to hã ixpumu nē hã tanhmã ixto hkêt nē. ãm ho ajamakêtkati kurê kumrêx nē axte kãm ajamaxpêr kêt nē.

¹³Nē kot paj nhÿrmã tanhmã amnhĩ tomnuj to kaxyw ka ja hã ixpumu nē ixte ã amnhĩ nhĩpêx anhÿrja nē ixto htÿx nē pa tanhmã amnhĩ tomnuj to hkêt nē. ãm mēmoj punuj pé ixpytâr rãhã ho apa Tirtûm. Tã ãm ja pix na hapêx. Anē.

—E kêr ka mē ã Tirtûm mã amnhĩ jarēnh anē. Anē.

¹⁴—Nē koja mēhõ tanhmã anhĩpêx to htã ka ho ajamakêtkati nē axte kãm ajamaxpêr pix o ri apa hkêt nē. Hã koja kaxkwa kamã Mēpahpãm maati ja hã apumu nē apyrã nē tanhmã ate amnhĩ tomnuj to ho hamakêtkati nē axte kãm hamaxpêr kêt nē. ¹⁵Nom kot kaj mē ã amnhĩ nhĩpêx anhÿr kêt nē. Nē tanhmã mē kot mē atota ã anohtÿx rãhã ho apa hãmri nhÿm Mēpahpãm maati mē apyrã nē mē ate tanhmã amnhĩ tomnuj to ho hamakêtkati hkêt nē. ãm hã nohtÿx rãhã ho pa ho pa. Anē.

Tanhmã mē pahte Tirtûm mã mex o mex ã harēnh to

Rukre 18.11-12

¹⁶Nhÿm Jejus arĩ mē kãm kapêr nē mē kãm:

—Nē mē kot amnhĩ to jarkrar xwÿnhjaja na htem Tirtûm mã amnhĩ jarēnh kaxyw hãmri nē tãhã ho apkur kêt rãhã kãm amnhĩ jarēnh jakamã hkuk kaprĩ nē hkwÿjê hkôt pa. Tã mo kaxyw na htem ã mē noo mã amnhĩ nhĩpêx anē? ãm mē apkur kêt rãhã Tirtûm mã amnhĩ jarēnh ã mē omunh pix kaxyw. Tã ra jar pika ja kamã mē kot ja hã mē omunh jakamã koja Tirtûm nhÿrmã ja hã tanhmã mē ho mex to hkêt nē. Jakamã kwa kêr ka mē ho mē uràk kêt nē. ¹⁷Kêr ka mē tãhã Tirtûm mã amnhĩ jarēnh rÿy kaxyw axàpkur kaga hãmri nē amnhĩ krã kahõ nē amnhĩ jaxwÿr mux nē akuk kĩnh nē ri akwÿjê hkôt apa. ¹⁸Hãmri nē nhÿri mē

hkàx ã ahte kãm amnhĩ jarẽ nẽ kãm mex o mex ã harẽ. Kot kaj mẽ ã mẽ hkàx ã amnhĩ nhĩpêx anẽ nhũm mẽ akwỳjaja mẽ axàpkur kaga hã mẽ apumunh kêt nẽ. Nhũm Tĩrtũm pix ja hã mẽ apumu. Hãmri nẽ nhỹrmã ja hã mẽ ato mex nẽ. Anẽ.

Kaxkwa kamã mẽmoj mex

Rukre 12.33-34; mãânẽn Sikũn Ximotre 4.8; Wam Pêtre 1.4; Eprêw 10.34

¹⁹ Nhũm Jejus arĩ mẽ kãm kapêr nẽ mẽ kãm:

—Nẽ mãânẽn ja. Kêr ka mẽ jar pika ja kamã akukrêx rũnh o apa hkêt nẽ. Kêt jar mẽ hikukrêx koja kritpêm mex kêt nẽ. Kot kaj mẽ ho akuprõ nhũm amnhõre apê homnu rỳ paratre apê homnu. Nẽ kàx o mẽ akukrêx nhũm haxwỳja apê omnu rỳ nhũm mẽhõ apê hkwỳ ho ahkĩ. ²⁰ Jakamã kêr ka mẽ akukrêx rũnh o apa hkêt nẽ. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhỹrmã kaxkwa kamã akukrêx mex prãm xàj tãm mẽ piitã tãm mẽ hipêx nẽ mẽ ho mex o ri apa. Nẽ mẽ kamã axukaprĩ nẽ. Nẽ Tĩrtũm kôt ri amnhĩ nhĩpêx mex nẽ. Hãmri nhũm ã mẽ ate amnhĩ nhĩpêx anhỹr ã mẽ apumu nẽ mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhõre nẽ mo paratre? Nẽ kamã mo mẽ ahkĩnh xwỳnh? ãm kamã amrakati kumrêx. ²¹ Kot kaj mẽ jar akukrêx rũnh hãmri nẽ ãm tanhmã apê homnu hto pix kukamã ajamaxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamaxpêr rãhã ho ra akĩnh nẽ ri apa.

²² —Nẽ kot kaj mẽ ixkapêr ma nẽ ixkôt amnhĩ nhĩpêx hãmri nẽ tãm amnhĩ nhĩpêx. Nẽ tãm axpên hipêx. Jao te hirã kamã arĩt mex pyrãk o amnhĩ nhĩpêx. ²³ No koja mẽhõ ixkapêr ma nẽ ãm kuma nẽ ixkwỳm ri amnhĩ nhĩpêx o pa. Hãmri nẽ te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nẽ kãm ajamaxpêr tỳx rãhã ho ri apa.

²⁴ —Nẽ kot kaj apyxi nẽ anhõ patrãw hamêxkrut hãmri nẽ arĩgro pyxi hã hamê wa kãm axapênh o amỹkry hkêt nẽ. Kot kaj anẽ nẽ hõ gryk ã ihõ kaga. Ja pyrã nẽ

kot kaj mẽ jar akàxpore nẽ akukrêx pix mã ajamaxpêr nẽ amã hapê ho akwỳjê pê ho anhõxỳ ho ri apa. Nẽ gryk ã Tĩrtũm kãm hprãm xà hkôt tanhmã ho mẽ ho mex to hkêt nẽ. Jakamã kwa kêr ka mẽ Tĩrtũm pix mã mãn ajamaxpêr rãhã nẽ. Jao akàxpore nẽ akukrêx pix kukamã ajamaxpêr o ri apa hkêt nẽ. Anẽ.

Mẽ pahte tee ri amnhĩ kukamã pajamaxpêr kêt ã mẽ pamã karõ

Rukre 12.22-31; mãânẽn Piripos 4.6; Wam Pêtre 5.7

²⁵ Nhũm Jejus arĩ mẽ kãm kapêr nẽ mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamaxpêr kêt nẽ. Tanhmãnh axàpkur xà rỳ axê ka mẽ tee ri hkukamã ajamaxpêr kêt nẽ. Mẽmoj piitã hkukamã tee ri ajamaxpêr o ri apa hkêt nẽ. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mẽ anhĩpêx ka mẽ kukwak ri atĩr nẽ apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhĩpêx xwỳnh jakamã mãânẽn kêp mẽ amã mẽ anhõ xwỳnh. Nẽ kêp mẽ amã mẽ axê nhõr xwỳnh.

²⁶ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nẽ ri pa hkêt nẽ. Mẽ anhĩpêxà maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja urãk nẽ mẽ amã mẽ anhõ rãhã ho pa.

²⁷ —Nẽ xà kot kaj mẽ kritpêm atĩr prãm xàj ja pix kukamã ajamaxpêr rãhã nẽ ra ajamaxpêr kôt kritpêm atĩr nẽ apa? Nà kot kaj mẽ anhỹr kêt nẽ.

²⁸ —Mãn ka htem akunĩ kamã pixôrã pumu. Na hte tee ri tanhmã kute hkukamã hamaxpêr o ra hkaprĩ nẽ harir kêt nẽ. ²⁹ Tã nom muxre nẽ harir ka mẽ omu. Te ho amnepêm pahшти Sarumãw xê mex pyrãk nom mex o hakre. ³⁰ Pixôrãreja koja mẽmo arĩgro hã htĩr nẽ mux nẽ harir tã mẽmo arĩgro hã ra grã pa nẽ hapêx. Kêp pixôrã pix nẽ hapêx tokyx anhỹr tã nhũm Tĩrtũm ho mex nẽ nhũm mux nẽ harir. No mẽ kajaja na hte mẽ ato mex o pixôrã ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o

ri akaprî nê apa? Kot kaj mê ã ajamaxpêr anhÿr jao kormã amnhî kaxyw Tîrtûm mã ajamaxpêr tÿx kêt nê.

³¹—Kwa mê tee ri axàpkur xà hkukamã ajamaxpêr o ri akaprî hkêt nê. Nê tee ri amnhî kukamã tanhmã ajamaxpêr to ho ri akaprî hkêt nê. ³² Mê kot Tîrtûm kôt amnhî xunhwÿr kêt xwÿnhjaja na htem ã ri hamaxpêr anhÿr o pa. Tã nom kêr ka mê ho mê urák kêt nê. Tîrtûm ra kot mê panhõ mêmoy kêt kôt mê pahpumunh mex kênã.

³³ Jakamã kêr ka mê hkôt ri tanhmã amnhî nhîpêx to rãhã ho ri apa. Nê amã ja pix tânopxar prãm. Hãmri nhùm Tîrtûm amnhî tã mê apumu nê apkati mê mê amã mêmoy nhõr o pa.

³⁴—Jakamã kwa kêr ka mê tee ri amnhî kukamã ajamaxpêr o akaprî nê apa hkêt nê. Tîrtûm kot apkati mê mê pajamãr mex jakamã kêr ka mê jarãhã amnhî kukamã apkati mê ajamaxpêr kêt nê. Kê apkati mãn. ãm jarãhã pix mã mãn mê ate tanhmã amnhî nhîpêx tota kukamã ajamaxpêr. Tîrtûm kot mê pahpumunh mex o pa rãhã kênã. Anê.

7

Mê pahte axpên to pakapêr punuj kêt ã kot mê pamã karõ

Rukre 6.37-38, 6.41-42; mãänên Rômãn 2.1-3; Wam Korît 4.5; Xiakre 4.11-12

¹ Nhùm Jejus arî mê kãm kapêr nê mê kãm:

—Nê kêr ka mê atÿx ri amnhî krã hkôt tanhmã akwÿjê hõ kot amnhî tomnuj to hã harênh kêt nê. Kot kaj mê ã harênh anê nhùm Tîrtûm ja hã mê apumu nê mê kajaja ã mê ajarênh anê. ² Na hte tanhmã mê pahte axpên nhîpêx to hã mê pahpumunh kôt tanhmã mê panhîpêx to. ³⁻⁵ Jakamã kwa kêr ka mê mêmõ kot tanhmã amnhî tomnuj to hã omu hãmri nê hã kãm kapêr tokyx anhÿr kêt nê. Akumrêx ate tanhmã amnhî tomnuj to hã amnhî pumu nê hkaga hãmri nê rî kormã ate mêmoy tã omunh xwÿnhhta wÿr tẽ nê hã tanhmã kãm akapêr to. Kêr ka mê ã amnhî nhîpêx anhÿr o ri apa.

—Nê xà koja mê akwÿjê hõ tanhmã amnhî tomnuj to grire. Ka ate amnhî tomnuj tÿx o hakrenh tã ã kot amnhî nhîpêx

anhÿr ã omu nê hã kãm akir nhùm amã ja mex nê nà? Nà koja amã ja mex kêt nê. Kot ka akumrêx ate tanhmã amnhî tomnuj tota kaga hãmri nê rî kormã anhîõ tanhmã kot amnhî tomnuj to grireta nê kãm akapêr nhùm ja amã mex nê.

⁶—Nê xà na htem mê apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mê kot Tîrtûm kaga xwÿnhjê mã kapêr jarênh o ri apa hkêt nê. Anê.

Mê pahte mêmoy to presija hã amnhî to Tîrtûm wÿr

Makre 11.24; Rukre 11.5-13; Juãw 14.13-14; mãänên Wam Tesarõn 5.17; Xiakre 1.5-8, 4.1-3

⁷⁻¹¹ Nhùm Jejus arî mê kãm kapêr nê mê kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhùm krãhyre gre hã awÿ ka axtem nê makre hõ py nê kãm agõ? Nà na ka htem ã mê hipêx anhÿr kêt. Na ka htem kot mêmoy tã mê awÿr xà hkôt kãm mêmoy gõ. Mê ate amnhî tomnuj tã na ka htem akrajê ho mex o ri apa. Tã kaxkwa kamã Tîrtûmja na hte mê ato mex o mê ate mê akrajê ho mex jakrenh. Kãm mê ajapê htÿx kôt na hte mê amã mêmoy mex nhõr o pa. Jakamã kot ka mê mêmoy tã awÿ nhùm mê ama nê mê ate mêmoy tã hwÿr xàta kôt amã kugõ. ãm xatã mê ate hã axàhwÿr o ri apaja nhùm mê amã hprãm xwÿnhhta gõ. ãm mêmoy tã hwÿr rãhã ho ri apa nhùm mê ama nê mê amã mêmoy tanhmã hipêx to. Te ho mêmõ kãm tep xành nê teprênhxã hpyr nê xatã gôx kãm rênh o ãm pyrã nê xatã mêmoy tã awÿ. Hãmri nhùm mê ama nê mê amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mê amã mêmoy prãm xwÿnhhta gõ.

¹²—Nê mê piitã mê kot tãm mê anhîpêxja na mê amã hprãm. Tã kêr ka mê amnhî pyrã nê tãm mê piitã mê hipêx o ri apa. Mê kot tãm mê anhîpêx kêt tã kêr ka mê axãmnhîx mê kêp anhõxÿ hkêt nê tãm mê hipêx. Kot kaj mê ã axpên nhîpêx anê nê finat Mojes mê Tîrtûm nhÿ hã mê kapêr o mê pa xwÿnhjê xujarênh xà hkôt axpên nhîpêx mex o ri apa. Anê.

Pry pijakrut jarênh

Rukre 13.24; mãânên Piripos 3.19-21

¹³⁻¹⁴ Nhũm Jejus arĩ mẽ kãm kapêr nê mẽ kãm:

—Tĩrtũm kapêrja mẽ kêp hihtỳx jakamã na htem ohtô nê hkôt amnhĩ xunhwỳr kêt nê. Na htem ãm hpỳnhre nê hkôt amnhĩ xunhwỳ nê hkôt amnhĩ nhĩpêx. Jakamã te Tĩrtũm nhõ krĩ hwỳr pry grireta ã hpỳnhre nê pa pyræk. No nhũm Satanasti hkôt mẽ kot amnhĩ xunhwỳr xwỳnhjaja na htem Satanasti kôt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpên kôt mẽ ohtô nê pa pyræk o amnhĩ nhĩpêx. Axtem kuwy hwỳr pry krepakja nõi tã nhũm mẽ htỳx kuwyja wỳr amnhĩ to pa. Jakamã Tĩrtũm kapêrja mẽ apê hihtỳx tã kêt ka mẽ mãmri hkôt amnhĩ xunhwỳ. Jao Tĩrtũm nhõ krĩ hwỳr pry grireta ã mãn apa. Anê.

Mẽ kot amnhĩ to hêx xwỳnhjê jarênh

Rukre 6.43-44; mãânên Xiakre 3.9-12; Wam Juãw 3.10, 4.4-6

¹⁵ Nhũm Jejus arĩ mẽ kãm kapêr nê mẽ kãm:

—E kwa mẽ o kora. Mẽ akwỳjaja kot kêt Tĩrtũm nhỹ hã kapêr jarênh xwỳnh ã amnhĩ jarênh tã na htem ja hã amnhĩ to hêx. Nhũm htem kãm mẽ kapêr mar prãm nê. Te mẽ kapêr mex pyræk tã no nhũm htem ãm mẽ kãm amnhĩ to hêx pix o ri mẽ hkôt pa. Mẽ kot mar nê axtem nê Tĩrtũm kapêr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nê amnhĩ nê mẽ omunh mex nê. ¹⁶ Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nê rĩ kormã tanhmã mẽ harênh to. Mẽ hamaxpêr punuj xwỳnhjaja kêt Tĩrtũm nhỹ hã kapêr jarênh xwỳnh kêt. No koja mẽ tãm hamaxpêr nê tãm amnhĩ nhĩpêx ka ja hã mẽ omu nê mẽ kêt Tĩrtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nê rĩ kormã tanhmã mẽ harênh to. ¹⁷ Na htem hamaxpêr punuj hãmri nê hkôt tanhmã amnhĩ tomnuj to. Nom koja mẽhõ hamaxpêr mex nê hãmri nê hkôt tãm amnhĩ nhĩpêx mex o pa. ¹⁸ Na

htem tanhmã hamaxpêr to xà hkôt tanhmã amnhĩ nhĩpêx to ho pa.

¹⁹ —Nê koja mẽhõ õ pĩ hpàr ô hkêt japêr nhũm tee ri omu hãmri nê krãhta nê kuwym kumê. Ja pyrã nê koja mẽhõ tanhmã amnhĩ tomnuj to ho pa nhũm Tĩrtũm tee ri ja hã omu hãmri nê ã kot amnhĩ nhĩpêx anhỹr o paja mỳrapê kuwy hwỳr kumê. ²⁰ Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nê ra aprĩ hã tanhmã mẽ kute hã mẽ omunh kurê kumrêx. Mẽ kêt Tĩrtũm nhỹ hã kapêr xwỳnh ã mẽ omu rỳ mẽ kêt hkwỳm ri kapêr xwỳnh ã mẽ omu. Anê.

Mẽ kot Tĩrtũm nhõ krĩ hwỳr gjêx mã xwỳnhjê jarênh

Rukre 13.25-27; mãânên Sikũn Korĩt 13.5; Wam Juãw 2.3-6

²¹⁻²³ Nhũm Jejus arĩ mẽ kãm kapêr nê mẽ kãm:

—Nê Inhipeêxà Tĩrtũm mẽ wa inhõ krĩja wỳr koja mẽ piitã gjêx kêt nê. ãm mẽ kot kapêr kôt amnhĩ nhĩpêx o mẽ pa xwỳnh pixjaja koja mẽ nhỹrmã ma hwỳr agjê. Na hte mẽ hkwỳjaja ixto “Pahihti” anhỹr ã ijarênh tã no ãm ixkôt ri amnhĩ nhĩpêx kêt nê. Jakamã koja mẽ nhỹrmã wa inhõ krĩ hwỳr àpir kêt nê. Kot paj nhỹrmã mẽ piitã mẽ htĩr ri tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwỳjê jarê nê mẽ kot amnhĩ tomnuj ã mẽ hkwỳjê jarê. Hãmri nhũm mẽ hkwỳ kot ixkôt amnhĩ nhĩpêx o pa hkêt xwỳnhjaja kuwyta wỳr ma pa pymaj tee ri amnhĩ kukamã hamaxpêr hãmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mẽ kot mẽmoj pumunh kêt kwỳ ho anhỹr rax nê. Nê ixkwỳjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhỹr o inhmã amnhĩ jarê.

—Nom mẽ htĩr ri ã mẽ kot amnhĩ nhĩpêx anhỹr o pa htã ixkapêr kôt amnhĩ nhĩpêx kêt jakamã kot paj mẽ kuma nê ãm mẽ kuma nê amnhĩ nê mẽ hano nê mẽ kãm: “Tk kwa mẽ ma mra. Mẽ apê ixkwỳ hkêt. Mẽ ate ixkôt amnhĩ nhĩpêx o apare hã. ãm mẽ ate amnhĩ tomnuj xwỳnh na ka mẽ. E

mê ma kuwy hwÿr amrar kurê kumrêx.” Anhÿr o kot paj amnhî nê mê hano. Hâmri nhÿm mê kot ixkôt amnhî nhîpêx o mê pa xwÿnh pixjaja ma Tirtûm mê wa inhô krî hwÿr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juâw 2.3-6

²⁴ Nhÿm Jejus arî mê kâm kapêr nê mê kâm:

—E kot paj mê amã awjarê ka mê ixu-jarênh ma. Nà mê kot ixkapêr mar nê hkôt amnhî nhîpêx o mê pa xwÿnhjaja te mê kot ixujarênh ja pyrâk. Mê kot amnhî nhîpêx o te mêhõ kot amnhî kukamã hamaxpêr mex nê aptÿx kâm amnhîm ôrkwÿ nhîpêxja pyrâk. ²⁵ Kojã mêhõ aptÿx kâm amnhîm hipêx nhÿm mêmo arîgro hã na wrÿk rax nê gô htàm rax nê hanhi no nhÿm arî am tÿx nê xa. Tã kot kaj mê ixkôt amnhî nhîpêx o ri apa hã kot kaj mê te ixkre ja pyrâk. Jao amex nê ajamakêtkati nê ri apa. Te ho gô htàm kot ixkre janhir nhÿm arî am tÿxta pyrâk.

²⁶⁻²⁷ —No mê kot ixkapêr mar nê am mar xwÿnhjaja. Te mê kot mêhõ kot amnhî kukamã hamaxpêr mex kêt nê htÿx mör nê gô mÿri gyw rerek kâm amnhîm ôrkwÿ nhîpêx pyrâk. Kojã mêmo arîgro hã ôrkwÿ hã kôk xapêr tÿx nê na wrÿk rax nê. Nê gô htàm nê hanhi nê kêp gràn pa. Jakamã kojã mêhõ ixkôt amnhî nhîpêx kêt nê te kot ã kot amnhî nhîpêx anhÿr xwÿnhhta pyrâk. Jakamã kwa mê ixkapêr mar tÿx nê hkôt amnhî nhîpêx rãhã ho ri apa. Te mêhõ aptÿx kâm ôrkwÿ xãm xwÿnhhta pyrâk. Anê.

²⁸ Nhÿm pre Jejusja ã mê kâm ujarênh ry anê nhÿm mê amnhî jaêr pê kot tanhmã mê ahkre htoja mar o hkrî. ²⁹ Hâmri nê axpên mã harênh o:

—Hêxta waa nê. Am hãmri na ã mê pamã kapêr anê. àhpumunh tÿx kôt na hte am hãmri tanhmã mê pamã ujarênh to. Pêr am Tirtûm kapêr tûm o mê ahkre xwÿnhjê kurom àhpumunh tÿx kumrêx. Anê.

8

*Kà nhy hkro xapêr o pa xwÿnh jarênh
Makre 1.40-45; Rukre 5.12-16*

¹ Tã nhÿm Jejus mê kâm kapêr pa hãmri nê hixêt prêeta rûm akupÿn wrÿ nê ma tẽ nhÿm mê ohtô nê ma hkôt mra. ² Hãmri nhÿm mêhõ my hkà nhy hkro xapêr o pa xwÿnhja omu nê hwÿr tẽ. Hãmri nê kutã hkônkrã ho tẽm nê hipô nê nhÿ nê amnhî to kuwy nê kâm:

—Pa Pahihti. E ot pa awÿr amnhî to tẽ. Akupÿm ate mê ixto mex kaxyw axàhpumunh tÿx jakamã kot ka amã akupÿm ixto mex prãm nê mãmrî ixto mex. Anê.

³ Hãmri nhÿm Jejus kuma nê hkà punuti hã ìhkra xi. Amnhî kamã kahak kêt nê hã ìhkra xi nê kâm:

—Nà kot paj ato mex. E akupÿm akà mex. Anê.

Hãmri nhÿm hkà akupÿm mex kurê kumrêx. ⁴ Hãmri nhÿm Jejus kâm:

—E kêt ka amnhî tã mê kâm tanhmã ijarênh to hkêt rãhã ma patre hwÿr tẽ kê akupÿm akà mex ã apumu. Hãmri ka hpãnhã amnepêm finat Mojes kot mê ate akupÿm amex ã Tirtûm mã tanhmã amnhî nhîpêx to hã karõta ka kâm ho anê. Kê mê piitã akupÿm akà mex ã apumu. Anê.

Pôristi krãhtûm mã àpênh xwÿnh jarênh

Rukre 7.1-10

⁵ Tã nhÿm Jejus ma krî pê Kapanaü hwÿr mō. Hãmri nê hwÿr pøj nhÿm Rôm nhô xwÿnh pê pôristi krãhtûmja omu nê hwÿr tẽ. Kêp Ijaew kêt tã hwÿr tẽ. Na pre kâm àpênh xwÿnh kêt à htÿx nê nõ nhÿm omu nê tee ri hkukamã hamaxpêr. Hãmri nê Jejus ra ô krî hwÿr hpôx ã omu nê hwÿr tẽ nê kâm harê nê kâm:

⁶ —Pa Jejus? E ot pa awÿr tẽ. Inhmã àpênh xwÿnhja na ixpê à htÿx nê. Ra ì kamã htyk pa nê nõ. O mÿj inhörkwÿ kamã nõ. Anê.

⁷ Nhÿm Jejus kuma nê kâm:

—Tÿ? Tôe. Nà pa ma akôt tẽ nê akupÿm amã ho mex. Anê.

⁸⁻⁹ Hãmri nhÿm tee ri kuma nê kâm:

—Kwa akînhã ixpê Ijaew kêt jakamã ixte amnhî kuk ã ixpijaàm. Am ja rûm mãn akapêr pix o akupÿm inhmã ho mex nã? Ixpê mê hkrãhtûm na pa hte inhô pôristi mã mêmoj tã karô nhÿm mê inhmar xà hkôt inhmã mêmoj tanhmã ho. Na pa hte mê kâm: “E mê ma mra nê ã amnhî nhîpêx anê.” Anê nhÿm htem inhma nê ma mrar

kurê kumrêx. Rỳ pa mẽ kãm: “E mẽ amnê ixwỳr mra nê ã amnhĩ nhĩpêx anê.” Anê nhũm mẽ inhma nê ixwỳr mra. No kêt ixrom axàhpumunh tỳx kôt na ka hte mẽ àja mã akapêr nhũm ama nê mẽ kêp hapôx nê ma mrar kurê kumrêx. Jakamã kwa ãm ja rũm akapêr pix o akupỳm inhmã ho mex nà? Anê.

¹⁰ Hãmri nhũm Jejus amnhĩ jaêr pê kot kãm ã kapêr anhỳrta ma nê hkĩnh nê. Hãmri nê hã hkôt ri mẽ môr xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã hamaxpêr tỳx nê. Aa mẽ atõ urak nê ã amnhĩ kaxyw inhmã ajamaxpêr tỳx anhỳr kêt tã nhũm mẽ arom kãm àpênh xwỳnh kaxyw ã inhmã hamaxpêr tỳx anê.

¹¹ Nà koja nhỹrmã mẽ hkwỳjaja kêp Ijaew kêt tã ohtô nê pika piitã kurũm ma Tirtũm mẽ wa inhõ krĩ hwỳr api nê hwỳr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tã mẽ ìhkô hã apkur mex o hkrĩ nhũm Tirtũm mẽ ho mex rax o pa. ¹² No pêr mẽ apê Ijaew kwỳjaja kot kaj mẽ hkôt hwỳr agjêx kêt nê. Tirtũm kãm hwỳr mẽ agjêx prãm tã ka mẽ axtem nê hkaga. Jakamã kot kaj mẽ ma kamat kô xihtỳx rax wỳr ajapêx nê mẽ kêp awry rax nê mẽ kot amnhĩ xà htỳx kamã hamak tũm xàta kamã apa ho apa. Hãmri nê tee ri mẽ ixwỳr agjêx prãm kaprỳ nê akaprĩ xàj mur nê amnhĩ kamã agryk tỳx nê. No ãm tee ri amnhĩ kamã agryk kaprỳ. Mẽ ate Tirtũm kapêr kaga nê hkôt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anê. Anê.

¹³ Nhũm pre ã Jejusja mẽ kãm kapêr anê. Hãmri nê pòristi krãhtũmta mã kãm:

—E mãmrĩ ma akupỳm tẽ nê amã àpênh xwỳnhhta pumu. Ra ate kaxyw inhmã ajamaxpêr tỳx jakamã na pa ra akupỳm amã ho mex. E akupỳm tẽ nê omu.

Anhỳr o kãm kapêr rôm nhũm ra akupỳm kãm mex kurê kumrêx.

*Jejus kot ahpỳnhã mẽ à xwỳnhjê ho mex
Makre 1.29-31; Rukre 4.38-41*

¹⁴ Tã nhũm Jejus ma Simãw Pêtre nhõrkwỳ hwỳr tẽ nê hwỳr axà. Nhũm Simãw Pêtre xupãnhgêx ra à nê hkà kagro

htỳx nê nõ. ¹⁵ Hãmri nhũm Jejus hwỳr axà nê omu nê ìhkra hã kupy nhũm hkà hakry nê akupỳm hihtỳx kurê kumrêx. Jakamã kãnhmã nhỹ nê mẽ kãm mẽõ hã àpênh o ri mra.

¹⁶ Tã nhũm ra awjakry. Ra kamãtre ho mō nhũm mẽ piitã Jejus wỳr mẽ à xwỳnhjê ho mra. Nê mẽkarõmnuti kot mẽ hwỳr gjêx xwỳnhjaja nhũm mẽ hwỳr mẽ o mra. Hãmri nhũm mẽ omu nê akupỳm mẽ piitã mẽ ho mex. Mẽ à xwỳnhjê ho mex nê mẽ hkwỳjê nê mẽkarõmnuti jano. ãm kapêr pix o mẽ nê mẽ hano nhũm mẽ kêp hapôj nê ma hapêx. ¹⁷ Na pre ra Tirtũm nhỹ hã kapêr xwỳnh finat Ijaisja ã amnhĩ nhĩpêx anhỳrja kukamã amnepêm mẽ kãm harênh o:

Tirtũm kot mẽ pahwỳr mênh mã xwỳnhja koja nhỹrmã wrỳ nê mẽ panê mẽ paxà piitã rênh pa nê akupỳm mẽ pahto mex pa. Anê.

Na pre ã finat Ijaisja Jejus kukamã harênh anê. Tã nhũm wrỳ nê kot harênh xà hkôt ã amnhĩ nhĩpêx anhỳr o pa.

*Wa kãm Jejus kôt amnhĩ xãm prãm xwỳnh
wa harênh*

Rukre 9.57-62

¹⁸ Tã nhũm Jejus amnhĩ pu hã rīt nê tee ri hwỳr mẽ mrar xwỳnhjê pumu hãmri nê hkôt mẽ pa ho mẽ pa xwỳnhjê mã kãm:

—E ma pu mẽ pàr mã agjê nê ma xarmã mō. Anê.

¹⁹ Hãmri nhũm mẽ nojarêt rôm nhũm Tirtũm kapêr tũm o mẽ ahkre xwỳnhjê hõ Jejus wỳr tẽ nê kãm:

—Pa mẽ ijahkre xwỳnh? E pa ma akôt ri ixpa ho ixpa nà. Anê.

²⁰ Hãmri nhũm kuma nê kãm:

—Ko ka mã. Kam nê rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwỳ. Nê kuwênhre pĩ nhĩmõk ã hikwỳ. No pa ixpê Tirtũm kot mẽ awỳr inhmênh xwỳnh tã mry hkĩnhã inhõrkwỳ hkêt. Na pa hte amarĩ nhãm krĩ hwỳr ixpa nê nhãm hõ hwỳr ixpa. Tã xà kot ka ixpyrà nê ã amnhĩ nhĩpêx anhỳr o ri apa nà? Anê.

²¹ Hãmri nhũm pãnhã hõja hwỳr tẽ. Ra mẽ kot hkôt amnhĩ xunhwỳr xwỳnhjê hõja hwỳr tẽ nê kãm:

—Pa Pahiiti. E pa amã amnhĩ jarê ka inhma. Kot paj ma akôt ixpa ho ixpa no

ãm kormã. Koja nhÿrmã inhÿpêêxà tanhmã amnhÿ to nê ty mãn. Pa haxà hãmri nê rÿ kormã ma akôt ixpa ho ixpa. Anê.

²² Hãmri nhÿm kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mêmôj inhnê ano kupyr rÿ apê àmnàr kêt nê. Kwâr mē htÿr tÿm nê mē pa hkêt mã xwÿnhjaja mãn axwakre kamã amã anhÿpêêxà jamãr o pa nê haxà. Anê.

*Jejus kot kôk o pinhkrênh jarênh
Makre 4.35-41; Rukre 8.22-25*

²³ Tã nhÿm mē ra xarmã nojarêr nhÿm Jejus mē hkôt mē pa ho mē pa xwÿnhjaja pàr wÿr agjê hãmri nê himô raxja ã ma xarmã mō. ²⁴ Hãmri nhÿm Jejus ra ôtxwa nê ra gôr nê nō. Puh nhÿm naja hkokò ho mō nê kôk xàpêr tÿx kumrêx. Nhÿm gô kànhmã harÿ nê axpên tak tÿx nê. Xatã axpên tak nê pàr kre kamã axkapÿ nhÿm ra àr o mō. Hãmri nhÿm mē tee ri omu nê kãm ma htÿx kumrêx. Nê tee ri amnhÿ nhÿpêx. No nhÿm Jejusja htÿx gôr nê nō. ²⁵ Hãmri nhÿm mē hwÿr hprôt nê kumra nê kãm:

—Kwa Pahihti. Kot puj mē jarãhã pahtyk pa. Kwa tokyx kànhmã nhÿ nê ri tanhmã amnhÿ nhÿpêx to wehe. Anê.

²⁶ Hãmri nhÿm hkrãkato nê kànhmã nhÿ nê kôk mã kapêr nê kãm:

—E kwa hãmri anhÿkrê. Anê.

Puh nhÿm hpinhkrênh pa nhÿm gôja tãm nôr kurê kumrêx. Hãmri nhÿm Jejusja hkôt mē pa ho mē pa xwÿnhjê hwÿr apkjê nê mē kãm:

—Hêxta waa nê. Kwa pêr ãm kormã te mē ate amnhÿ kaxyw Tÿrtÿm mē wa inhmã ajamaxpêr tÿx kêt pyrãk. Hã na ka mē amã ma xàj tee ri amnhÿ kukamã ajamaxpêr. Anê.

²⁷ Hãmri nhÿm mē amnhÿ jaêr pê ã kot amnhÿ nhÿpêx anhÿrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokÿÿ. Pêr Jejus kêp mē panhÿo hkêt. Mē pahtô kot pu we te kot amnhÿ nhÿpêx pyrã nê kôk mã pakapêr nhÿm hpinhkrênh kurê kumrêx? Nà Jejusja mē pakurom àhpumunh tÿx o àhpumunh tÿx. Anê.

*Jejus kot wa nê mēkarômnuti janor
Makre 5.1-20; Rukre 8.26-39*

²⁸ Tã nhÿm mē ra himô rax pê Garirejja ã rê nê pika pê Geras wÿr pôj nê kamã mō. Hãmri nhÿm ra mēhō myja wa hamêxkrut nê mē kutã tē. Ra mēkarômnuti kot hamē wa hwÿr gjêx xwÿnhja wa. Mēkarômnuti xohtô kot tanhmã wa ho jakamã nhÿm wa oprê htÿx nê hihtÿx rax nê wa pa. Jakamã nhÿm mē piitã kãm wa uma nê amnhÿ nê mē htykjê jagjênh xà hã kên kre kaêx kãm wa kumê nhÿm wa kamã pa ho pa. Jakamã nhÿm wa Jejus kutã tē nê amnhÿ wÿr omu hãmri nê amnhÿ nê tanhmã kãm kapêr to. Nom mēkarômnuti nhÿ hã àmra kamã kãm kapêr nê kãm:

²⁹ —Pa Tÿrtÿm Kra Jejus? Mo kaxyw na ka mē ixwÿr tē? Kwa tanhmã mē ixtô hkêt nê. Ate tanhmã mē ixtomnu hto hã arÿgrota kormã katoore hã. Anê.

³⁰ Nhÿm ra krÿ nhō xwÿnhjê hkrit hagrô ohtô nê ri mē hpum pa. ³¹ Nhÿm mēkarômnuti mē omu hãmri nê amnhÿ to Jejus wÿ nê kãm:

—Kwa kot ka jahti wa nê mē ijapôx japêr nê mē kot amnhÿ xà htÿx kamã hamak tÿm xàta wÿr mē ixrênh kêt nê. Hagrô hkwÿ mÿj wÿr mãn mē ixrê pa mē hpãnhã hwÿr mãn hagjê nà? Anê.

³² Hãmri nhÿm mē kuma nê mē kãm:

—Tôe mē tãm mē hwÿr mãn mra. Anê.

Hãmri nhÿm mē kuma nê myta wa kêp hapôj nê hagrô hwÿr mrrar kurê kumrêx nê hpãnhã kãm gjêx pa. Hãmri nhÿm hagrôta mēkarômnuti pymaj amÿra nê ma hprôt nê himô hã hixêt prêk ã axpum rôrôk nê gôx kãm mrô nê pikaprãr pa. ³³ Hãmri nhÿm hagrô jamãr o ri mē pa xwÿnhjaja tee ri omu hãmri nê ma akupÿm krÿm hprôt nê mē kãm awjarê. Nê myta wa akupÿm tãm hkrã hã harênh o hprôt. ³⁴ Hãmri nhÿm krÿ nhō xwÿnhjaja tee ri mē hkrit jarênh ma nê ma piitã Jejus wÿr mra nê hkaxpa. Hãmri nê amnhÿ nê kãm:

—E kwa mē ma amrar kurê kumrêx. Anê.

Hãmri nhÿm mē kuma nê awjanã nê ma akupÿm pan rê.

9

ÿ kamã htyk xwÿnh jarênh

Makre 2.1-12; Rukre 5.17-26; Juãw 10.37-38

¹ Nhũm Jejus mẽ hkôt mẽ pa ho mẽ pa xwýnhjaja awjanã nẽ ma akupým pàr wýr mra nẽ gjêx pa nẽ akupým xarmã rê nẽ akupým Jejus nhõ krĩ hwýr mō. ² Hãmri nẽ hwýr pōj nhũm krĩ nhõ xwýnh kwýjaja mẽ omu nẽ ì kamã htyk xwýnhja mý nẽ Jejus wýr o tẽ. Nõr xà kamã nõr rãhã nhũm mẽ hã hije nẽ kumý nẽ hwýr o tẽ. Hãmri nhũm amnhĩ tã mẽ omu. Ra mẽ kot hkrãmnhwýta kaxyw kãm hamaxpêr týt ã mẽ omu nẽ ì kamã htyk xwýnhhta mã kapêr nẽ kãm:

—Pa? Kwa tee ri amnhĩ kukamã ajamaxpêr kêt nẽ. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpêr kêt nẽ. Anẽ.

³ Hãmri nhũm Tirtũm kapêr tũm o mẽ ahkre xwýnhjaja tee ri ã kot kãm kapêr anhýrja ã kuma nẽ axpên mã:

—Tk. Kwa mēhō myti mũj kēp Tirtũm kēt tã te ri kot amnhĩ nhĩpêx pyrãk ã amnhĩ nhĩpêx. Tirtũm pix na kot mẽ nẽ mẽ kot amnhĩ tomnuj o hapêx xwýnh. Anẽ.

⁴ Hãmri nhũm Jejus amnhĩ tã mẽ kuma nẽ mẽ kãm:

—Kwa mẽ ã ajamaxpêr anhýr kêt nẽ. ⁵ Ixte mẽ nẽ mẽ kot amnhĩ tomnuj o ijapêx par ã amnhĩ jarēnh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nẽ. Nom kot paj mẽ anoo mã akupým ì kamã htyk xwýnhhta o mex ka mẽ apiitã hã ixpumu hãmri nẽ ixkôt ajamaxpêr kurê kumrêx. Ixpê Tirtũm kot mẽ awýr inhmēnh xwýnhhta na pa. Ixte mẽ anê mẽ ate amnhĩ tomnuj rēnh kaxyw na pre mẽ awýr inhmē pa mẽ awýr wrý. ⁶ Tã mẽ ate ja hã ixpumunh kaxyw kot paj mẽ anoo mã ja ho mex.

Anhýr o mẽ kãm amnhĩ jarē hãmri nẽ ì kamã htyk xwýnhhta mã kãm:

—E kãnhmã xa nẽ anõr xàta py nẽ ma akupým anhõrkwý hwýr tẽ. Anẽ.

⁷ Puh nhũm kãnhmã ãm kurê kumrêx nẽ nõr xà py nẽ mẽ noo mã kato nẽ ma akupým õrkwý hwýr tẽ. ⁸ Hãmri nhũm mẽ piitã no hapôx rũnh nẽ omunh o kuhê nẽ kamã no puma htýt nẽ. Nẽ tee ri omu nẽ axpên mã:

—Kokýy. Kwa aa mẽ pahte ã mēhō kot amnhĩ nhĩpêx anhýr ã omunh kêt tã jarãhã ja pumu.

Anhýr o Jejus jarē hãmri nẽ ý hã Tirtũm mã mex o mex ã harẽ.

Jejus kot amnhĩ kôt Matêwre hwýr Makre 2.13-17; Rukre 5.27-32

⁹ Tã nhũm Jejus mẽ kēp kato nẽ hkôt mẽ pa xwýnhjê mẽ nhũm mẽ ma mō. Hãmri nẽ pa ixpê Matêwre ixpumu. Ixte Rõm kãm mẽ ho amnhĩptàr xwýnh mã krĩ nhõ xwýnhjê pē kàxpore hkwý jamýnh xwýnh na pa pre. Nom mẽ kot ho tewēn kryre htã ixte amnhĩm hkwý ho ixàrik prãm xàj na pa pre hte mẽ kãm ho rũnh nẽ harẽ. Jakamã nhũm mẽ piitã kãm ixkĩnh kêt nẽ. Tã pa pre mẽ kēp kàxpore jamýnh xà hã ixkre kamã mẽ kēp hamýnh o nhý nhũm Jejus mẽ hkwýjaja ijãnh mra nẽ ixpumu nẽ amnhĩ kôt ixwý nẽ inhmã:

—Pa? E axàpēnhhta kaga nẽ hpãnhã amnẽ mẽ ixkôt mãn tẽ nẽ ixkôt mãn ri apa ho apa. Anẽ.

Hãmri pa kuma nẽ ixàpēnh kaga nẽ ma hkôt tẽ. Nẽ hpãnhã hkôt ixpa ho ixpa.

¹⁰ Hãmri nẽ mẽmo arĩgro hã amnhĩ nhõrkwý hwýr Jejus nẽ hkôt mẽ pa ho pa xwýnhjaja mẽ ixkrãmnhwý hkwýjê hwý. Nhũm mẽ piitã mra nẽ inhõrkwý hwýr agjê nẽ ixkutã apkur o hkrĩ. Nẽ ixpyrà nẽ Rõm nhõ pahi mã mẽ kēp kàxpore hkwý jamýnh xwýnh kwý haxwýja ixwýr mra nẽ mẽ ixkutã apkur o hkrĩ. ¹¹ Hãmri nhũm Parijew nhõ xwýnhjaja mra nẽ inhõrkwý kapem mẽ ixàpkur ã mẽ ixpumu. Nẽ tee ri mẽ ixkaêx ã Jejus pumu hãmri nẽ hkôt mẽ pa ho mẽ pa xwýnhjê hwýr agjê nẽ mẽ ixtã mẽ kãm akir nẽ mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nẽ mẽ kutã apkur o nhý. Kwa nã mẽ kot amnhĩ tomnuj xwýnh kēnã. Jejus kot amnhĩ to mex ronhýt mẽ kutã apkur kêt nẽ. Anẽ.

¹² Hãmri nhũm Jejus amnhĩ tã ã mẽ kapêr anhýrja ma nẽ mẽ kãm:

—Tk. Nà ixte tãm mẽ unhwýr kaxyw na pa mẽ kutã ixàpkur o nhý. Xà na hte tõtôja mẽ mex xwýnhjê hwýr mra nẽ mẽ hkane? Nà ãm mẽ à xwýnhjê pix wýr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrà nẽ na pa pre mẽ kot amnhĩ to mex xwýnhjê hwýr ixwýr kêt nẽ. Mẽ kot amnhĩ tomnuj xwýnhjê pix wýr

na pa pre wrÿ. Ixte tãm mẽ unhwÿr kaxyw mẽ hwÿr wrÿ nẽ ã jajẽ kutã ixàpkur o inhÿr anẽ. ¹³ Ga mẽ ma mra nẽ Tirtũm kapẽr ã kagã htũm kot ja jarẽnhja kamã harẽ nẽ ama. Harẽnh kot:

Na ka htem inhmã tanhmã amnhĩ jarẽnh to kaxyw hãmri nẽ inhmã mẽmoj gõ nẽ tanhmã ixto mex to. Nom kêr ka mẽ ãm ja pix ho anhÿr kêt nẽ. Mẽ mããnẽn mẽ piitã tanhmã mẽ ho mex to ho ri apa. Anẽ.

—Ã Tirtũm kapẽr ã kagã htũm kot ja jarẽnh kot anhÿr. Tã ja pyrã nẽ na pa pre mẽ kot amnhĩ tomnuj xwÿnhjẽ hwÿr wrÿ nẽ mẽ kamã ixukaprĩ ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre ã mẽ hwÿr ixwrÿk anẽ. Tã ka mẽ ri atÿx amnhĩ krã hkõt ã ixto akapẽr anẽ. Anẽ.

*Mẽ kot mẽmoj tã Jejus kujjêr
Makre 2.18-20; Rukre 5.33-35*

¹⁴ Tã nhũm Juãw Paxis kõt mẽ pa xwÿnhjaja Jejus wÿr mra nẽ mẽmoj tã hkukja nẽ kãm:

—Pa? E ot pa mẽ awÿr mra. Kwa mẽ inhmã mẽmoj jarẽ. Na pa htem tõhã Parijew nhõ xwÿnhjẽ pyrã nẽ ixàpkur kêt kãm Tirtũm mã amnhĩ jarẽ. Tã nom akõt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarẽnh o pa. Kwa mo na htem mẽ ixpyrã nẽ tõhã apkur kêt kamã kãm amnhĩ jarẽnh kêt nẽ? Anẽ.

¹⁵ Hãmri nhũm mẽ kuma nẽ mẽ kãm:

—Nã mo kaxyw kot kêt mẽ apkur kêt rãhã kãm amnhĩ jarẽ? Mẽ hkaprĩre hã. Mẽ kot ixkõt pa ho pa hã amnhĩ pumunh jakamã na htem hkĩnh nẽ ixkõt pa. Kormã ixte mẽ kamã ixpa kẽnã kot kêt mẽ apkur kêt rãhã Tirtũm mã tanhmã amnhĩ jarẽnh to. Xã na htem hkrãmnhwÿ hã hkĩnh kaxyw hã akuprõ nẽ hkaprĩ nẽ apkur kêt o kamãt nẽ mÿr o hkrĩ? Nã na htem anhÿr kêt nẽ. Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkõt mẽ pa ho mẽ pa xwÿnhjaja ixkõt kormã àmnhĩx hkĩnh nẽ apkati mẽ apkur o pa. Nom koja mẽ kãm ixkurẽ xwÿnhjaja nhÿrmã tanhmã ixto hãmri nhũm mẽ hkaprĩ htÿx nẽ rĩ kormã tõhã apkur kêt rãhã Tirtũm mã amnhĩ jarẽ. Anẽ.

*Mẽ pahte Jejus kõt amnhĩ nhĩpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapẽr nẽ mẽ kãm:

—Mẽ kot amnhĩ tomnuj xwÿnhjaja ra mẽ kot amnhĩ nhĩpêx tũm o amnhĩ pyrãk jakamã na htem tanhmã mẽ kot amnhĩ nhĩpêx nyw tota kaga. ¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem ixkapẽr ma nẽ ãm ama. Kwa mẽ inhma nẽ mẽ ate amnhĩ nhĩpêx tũmja gryk ã ixkaga hkêt nẽ. Anẽ.

*Mẽ hkra htyk nẽ mẽhõ ni kamrõ wa
harẽnh
Makre 5.21-43; Rukre 8.40-56*

¹⁸ Nhũm pre ã Jejus mẽ kãm kapẽr anhÿr o xa. Rõm nhũm mẽõ pahihtija tẽ nẽ mar o xa. Hãmri nẽ hamaxpẽr o:

—Kokÿÿ. Jejusja ãm hãmri kêt pahimaati kumrẽx. Hã na ri ã kapẽr mex anẽ. E pa hwÿr tẽ nẽ ixkrare ho kuwÿ. Anẽ.

Hãmri nẽ hwÿr tẽ nẽ kutã hkõnkrã ho nhÿ nẽ kãm:

—Pa akupÿm mẽ ixto mex xwÿnh? E ot pa awÿr tẽ. Kwa ma ixkõt tẽ nẽ inhmã ixkra nire pumu nẽ tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpẽr nẽ man awÿr tẽ. Anẽ.

¹⁹ Hãmri nhũm kuma nẽ mẽ kãm:

—Tõe. Nã kot paj ma akõt tẽ. Anẽ.

Hãmri nẽ ma hkõt tẽ. Mẽ ixpê hkõt ixpa ho ixpa xwÿnhjẽ mẽ pa mẽ ma hkõt mõ. ²⁰⁻²¹ Nhũm mẽhõ ni kamrõ rãhã ho pa xwÿnhjaja ma mẽ ixkõt tẽ. Na pre hte hkamrõ hkryre rãhã ho pa hã amgrã pẽ 12 nẽ tee ri kãm amnhĩ mex prãm o pa. Jakamã Jejus jarẽnh ma nẽ amnhĩ kaxyw kãm hamaxpẽr kurẽ kumrẽx nẽ hamaxpẽr o:

—Ma pa kop ma hwÿr tẽ nẽ kêt ê nhĩrẽ pix kupẽnh tã akupÿm inhmex japêr. Anẽ.

Hãmri nẽ ma mẽ ohtõjê kaêx kõt hwÿr tẽ. Nẽ katut kõt tẽ nẽ kêt ê nhĩrẽ kupê. ²² Hãmri nhũm Jejus ho hakêx nẽ amnhĩ tã omu nẽ kãm:

—Pa? Kwa tee ri amnhĩ kukamã ajamaxpẽr kêt nẽ. Ate amnhĩ kaxyw inhmã ajamaxpẽr tÿx jakamã na ka ra akupÿm amex. E mãmrĩ ajamakêtkati nẽ ri apa. Anẽ.

Hāmri nhūm akupŷm mex nē hkīnh tŷx nē ma akupŷm tē. ²³ Hāmri pa mē ma htyk xwŷnh nhīpēêxà hkôt mra nē ōrkwŷ hwŷr agjē nē mē pikuprōnh xwŷnhjē pumu. Nhūm mē ra mē hā htu rax nē. Nē omŷj ri kaprī xàj pifti kakôr o hkrī nē omŷj ri mur. Kàx pē mur nē amnhī tak o hkrī. ²⁴ Hāmri nhūm Jejus mē hwŷr axà nē mē omu. Nē ra kot my hkrata htyk ā omunh tā kuri mē mŷr o mē hkrī xwŷnhjē mā kapēr nē mē kām ām ōt nē nōr ā harē nē mē kām:

—Pa? Kwa mon ka mē ri akaprī nē amŷr o akrī? E mē ma mra. Na wa hkrata wa kēp htyk kêt nē. Na ām gōr nē nō. Anē.

Hāmri nhūm mē kot ra htyk ā omunh mex jakamā kuma nē ām kuma. Nhūm mē hkwŷja axtem nē ri axpēn mā hā hpēr o pikēnh o hkrī. ²⁵ Hāmri nhūm kapôt mā mē hano nhūm mē hapôj nē kapôt ā kuhê. Hāmri nhūm Jejusja htyk xwŷnhhta wŷr axà nē hpa hā kupy nē kànhmā ām nhūm akupŷm htīr nē kànhmā ām kurê kumrēx. ²⁶ Hāmri nhūm mē piitā akupŷm htīr kām omu nē ma ri krī piitā hkôt ri mē kām harēnh o hprôt.

*Wa nohkre xwŷnh wa harēnh
Matêwre 20.29-34*

²⁷ Tā nhūm Jejus kato nē ma tē. Pa mē hkôt ixpa ho ixpa xwŷnhjaja ma hkôt mō. Hāmri nhūm wa myja wa hamēxkrut. Hamē wa nohkre xwŷnh wa Jejus jarēnh ma nē hā ajêt nē hkôt rôrôk o mō. Nē xatā amnhī to hwŷr o hkôt rôrôk o mō nē kām:

—Pa Jejus? E Tīrtūm kot mē ixkaxyw axām jakamā kwa wa ixpumu nē wa ixkamā axukaprī kêt wehe. Anē.

²⁸ Hāmri nhūm wa kuma nē wa hkukamā nhŷri ixkrem axà nhūm wa hkôt axà nē xa nhūm wa omu nē wa kām:

—Pa? E xàn ka wa ra amnhī kaxyw inhmā ajamaxpēr tŷx nē nà? Anē.

Hāmri nhūm wa kām:

—Tŷ. Wa ixte amnhī kaxyw amā ijaxmaxpēr tŷx kênā. Anē.

²⁹ Hāmri nhūm wa kuma nē hamē wa no hā ĩhkra xi nē wa kām:

—Tôe. Nà war ate tanhmā amnhī kaxyw inhmā ajamaxpēr to xà hkôt kot paj war anhīpêx. Anē.

³⁰ Hāmri nhūm wa akupŷm rīt mex kurê kumrēx. Hāmri nē akupŷm kato nē ma htēm kaxyw nhūm wa kām:

—E kēr ka wa nhām mē kām ixte war ato mex ā ijarēnh kêt nē. Ām kwarī ho kwarī.

³¹ Anhŷr tā no nhūm wa kuma nē ām kuma nē wa ma tē nē krī pu hā mē piitā mē kām ri war amnhī tā harēnh o mra.

Kapēr kêt xwŷnh jarēnh

³² Tā nhūm Jejus ma axte nhŷhŷm mē ixto mō. Hāmri nhūm mēhō my mēkarōmnuti kot hwŷr àr nē tanhmā ho nhūm kapēr kêt nē pa xwŷnhja nhūm mē Jejus wŷr o tē. ³³ Hāmri nhūm omu nē nē mēkarōmnuti jano nē kām:

—E kēp akato nē ma tē. Anē.

Hāmri nhūm kuma nē kurūm kato nhūm akupŷm kapēr mex kurê kumrēx. Hāmri nhūm mē kot hā omunh xwŷnhjaja tee ri kot mēkarōmnuti janor ā omu nē kamā no puma nē. Nē axpēn mā:

—Kokŷŷ. Aa mē pahte ā mēhō kot anhŷr pumunh kêt kumrēx tā na pu mē jarāhā ja pumu. Anē.

³⁴ Nom nhūm mē hkwŷ pē Parijew nhō xwŷnhjaja axtem nē hā mē kām kapēr o:

—Tk. Kot amnhī krā hkôt mē hanor kêt kênā. Mēkarōmnuti nhō pahi nhŷ hā kot mē nē mē hanor kênā. Anē.

*Jejus kēp mē pakamā ukaprī xwŷnh
Makre 6.34; Rukre 10.2-3; Juāw 4.35*

³⁵ Tā nhūm Jejusja krī ho ohtô nē hkôt ri mē kām Tīrtūm kapēr jarēnh o pa. Pa mē hkôt ixpa. Na pre hte nhŷri krī hwŷr pōj nē mē kot Tīrtūm kapēr o mē ahkre xà hā ixkre hwŷr mra nē hwŷr agjē nē mē pikuprōnh xwŷnhjē jahkre. Nē mē kām:

—E mē inhma. Tīrtūm kām mē apiitā mē ato hkra hprām. Jakamā kwa mē ate amnhī tomnuj kaga hprām xàj hkôt amnhī xunhwŷ nē kapēr kôt amnhī nhīpêx. Jao amnhī nhīpêx nyw o amnhī nhīpêx o ri apa.

Anhŷr o mē kām kapēr. Hāmri nē ahpŷnhā ri tanhmā mē à kute xwŷnhjē ho mex. Nhūm mē ohtô nē hkôt mar o pa. ³⁶ Hāmri nhūm mē omu nē kām mē hkaprī nē. Na prem tee ri amnhī kukamā hamaxpēr o pa jao ra hkaprī nē. Nhūm Jejus ja hā mē omu nē hamaxpēr o:

—Hêxta waa nē. Na mē mex kêt nē pa. Te mē kēp ôwēhti jamār xwŷnh kêt kot amnhī

nhîpêx pyrâk o htÿx ri pa. Mêhõ koja kãm mē hkaprî nē tanhmã mē ho mex to ho pa? Anē.

Hãmri nē mē kamã ukaprî nē. ³⁷ Hãmri nē mē hã mē ixpê hkôt ixpa ho ixpa xwÿnhjê mã kapêr nē mē inhmã:

—Nã na mē kormã ohtô rax nē Tirtũm kapêr mar kêt nē. No ãm kormã mē ate mē kãm kapêr jarênh o apa kaxyw mē agrêre. Te pur rax kãm ra harôj kamrêk par nē ãm tã no ãm kaxyw hikênh xwÿnhjaja grêre pyrâk. ³⁸ Jakamã kwa mē ho Tirtũm wÿ kê axte mē kaxyw mē akwÿjê rê kê mē apyrã nē ma mē hkôt ri mē kãm kapêr jarênh o pa. Anē.

10

*Jejus kot mē ho 12 nē mē rênh
Makre 3.13-19; Rukre 6.12-16*

¹⁻⁴ Tã nhũm Jejusja hkôt mē ixpa ho mē ixpa xwÿnhjê ho 12 nē mē ixrê. Mē ixte ma krî piitã hwÿr inhmarr nē ÿ hã mē ahkre nē tanhmã mē à kute xwÿnhjê ho mex o ixpa kaxyw. Nē ÿ hã mē nē mēkarõmnuti janor o ixpa kaxyw nhũm mē ixrê. Na pre mē ixto 12 nē mē ixrê. ã mē inhîxi kot anhÿr.

Pêtre kumrêx na pre kuta. Hixi hõ pê Simãw.

Nē hkôt htõ Andreja ta.

Nē hkôt Jepetew kra Xiakreja ta.

Nē hkôt Xiakre htõ Juãwja ta.

Nē hkôt Firiptija ta.

Nē hkôt Patoromewja ta.

Nē hkôt Tomasja ta.

Nē hkôt pa ixpê Matêwre nhũm pre mē hkôt ixta.

Ixpê pahi nhÿ hã kãm mē kêp ixu-jamÿnh xwÿnh tã nhũm pre jajê hkôt ixta.

Nē ixkôt Apew kra Xiakre hõja ta.

Nē hkôt Tatewja ta.

Nē hkôt Simãw Jeroxja ta.

Nē hkôt Jut Kariotja ta.

Kormã kot mē kãm Jejus kurê xwÿnhjê nhîhkram õr mã nhũm Jejus kot amnhî kukamã omunh mex tã mē hkôt amnhî kaxyw kuta.

ã mē ixte ÿ hã mē ahkre o ixpa kaxyw mē ixrênh xwÿnhjê nhîxi kot anhÿr.

*Jejus kot mē kêp 12jê mã mē àpênh ã karõ
Makre 6.7-13; Rukre 9.1-6, 10.1-12,
10.14; mããñên Atre 13.50-51, 18.6*

⁵ Hãmri nhũm Jejus mē ixrênh pa nē ma mē hwÿr mē ixrênh kaxyw tanhmã mē inhmã kapêr to nē mē inhmã:

—E. Kêr ka mē ma mē piitã mē kãm ri ijarênh o apa. No ãm kormã mē kêp Ijaew kêt xwÿnhjê nhõ pika hwÿr apa hkêt nē. Rÿ mē kêp Samar nhõ krî hwÿr ka mē apa hkêt nē. ⁶ ãm mē pahpê Ijaew nhõ krî kôt pix mã mãn ri apa. Mē kot tee ri amnhî kukamã hamaxpêr o pa jakamã te mē kêp ôwêhti pikunor nē htÿx ri mex kêt nē pa pyrâk. ⁷ Jakamã kêr ka mē ma mē hwÿr apa nē ã mē hkôt ri mē kãm akapêr o apa anē nē mē kãm: “E kot kaj mē ate amnhî tomnuj kaga nē Tirtũm kôt amnhî xunhwÿ hãmri nhũm amnhî tã mē apumu nē mē ato hkra. Jakamã e kwa mē tokyx hkôt amnhî xunhwÿ.” Anē. Kêr ka mē ã mē kãm akapêr anhÿr o ri mē hkôt apa. ⁸ Hãmri nē akupÿm mē à xwÿnhjê ho mex o ri apa. Nē mē htyk xwÿnhjaja ka mē akupÿm mē ho htîr o ri apa. Nē mē hkànhy rûnh xwÿnhjaja ka mē akupÿm mē ho mex o ri apa. Nē mē kamã mēkarõmnuti xwÿnhjaja ka mē nē mē hano. E kêr ka mē ã inhÿ hã mē ho mex o ri apa anē. Na pa amarî tanhmã mē ato ka mē inhmã amnhîrer kêt tã ra mē ate tanhmã mē ho mex to mã tãm. Tã kêr ka mē amnhî xwar amarî ri mē ho mex o ri mē hkôt apa. No ri mē ho mex pãnhã kàxpore hã axàhwÿr kêt nē.

⁹⁻¹⁰ —Nē kêr ka mē ma mē hwÿr apa kaxyw anojarêt hãmri nē amnhî kôt akukrêx rûnh o apa hkêt nē. ãm anhÿ kamã mē hwÿr apa. Nē akàxpore ho rax nē ho apa hkêt nē. Rÿ akawà kamã axê hkwy rÿ aparkà hõ xàr nē ho amõr kêt nē. Rÿ kô hõ py nē ri ho apa hkêt nē. ãm anhõ mrykà pix jamÿ nē ma ho apa. Kêr kê mē ate Tirtũm kapêr o mē ahkre nē mē ho mex xwÿnhjaja mãn amnhî pãnhã mē amã mē axàpkur xà gõ ka mē kutã axàpkur o ri mē hkôt apa.

¹¹ —Nē kêr ka mē nhÿri krî hwÿr ajapôj nē kamã mēhõ kot amnhî to mex xwÿnh japêr. Nē ra omu hãmri nē kuri mãn pøj nē hkôt apikamênh tãmtã kurũm akupÿm ajapôj nē ma nhãm krî hõ hwÿr mra.

12 —Nê kêr ka mê mēhō nhōrkwỹ hwỳr pōj nê mê kām: “E ot pa mê awỳr mō. Nà koja Tĩrtũmja mê ato mex nê.” Anhỹr o mê kām akapēr. 13 Koja mê ama nê amnhĩ wỳr awỳ ka mê amnhĩ tã mê omu nê mê kām: “E koja Tĩrtũm mê ato mex nê ka mê ajamakêtkati nê ri axàmnhĩx apa.” Anhỹr o mê kām akapēr. No koja mê amnhĩ nhōrkwỹ nê mê akurê nhũm Tĩrtũm ja hã mê omu nê mê ho mex kêt nê.

14 —Nê koja nhỹri krĩ hō kamã mê akaga nê akapēr mar kêt japēr. Ka mê tee ri amnhĩ tã mê kamã ama hãmri nê tokyx mê kurũm ajapōj nê ma akupỹm apa. Nê akupỹm anojarêt nê mê noo mã akuhê nê amnhĩ par ã awjagrô kapĩ nê ma apa. Mê kot Tĩrtũm kaga hã amnhĩ pumunh kaxyw ka mê ã mê noo mã amnhĩ nhĩpêx anê. Hãmri nê ma nhỹhỹm hpãnhã apa. 15 Koja nhỹrmã Tĩrtũm mê kot amnhĩ tomnuj mỳrapê tanhmã mê ho. Na pre ã Sotō mê Komo nhō xwỳnhjê nhĩpêx anê. Na prem amnhĩ tomnuj tỳx nê nhũm Tĩrtũm tee ri ja hã mê omu nê tanhmã hã mê homnuj tỳx to. Tã jar mê kām ixkapēr mar prãm kêt nê mê kot ixkaga xwỳnhjaja koja ja hã mê omu nê kot Sotō mê Komo nhō xwỳnhjê nhĩpêx o mê hipêx. No ãm tanhmã mê ho htỳx o mê hakre. Anê.

Nhũm pre Jejus ã mê inhmã mê ixàpênh ã karō anê.

Jejus kot mê kêp 12jê hkukamã mê harênh Makre 13.9-13; Rukre 12.11-12, mãânên Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

16 Nhũm Jejus arĩ kot mê ixrênh xwỳnhjê mã kapēr nê mê inhmã:

—E kot paj ma mê hwỳr mê arê. Ma mê ate Tĩrtũm kapēr o mê ahkre ho ri mê hkôt apa kaxyw. Jakamã kot kaj mê te ôwêhti kot mry xoprê hwỳr amnhĩ to mrar nhũm kot hkwỳ hpar pyræk o amnhĩ nhĩpêx. Koja mê hkwỳjaja mê ate mê ahkre ma nhũm ja mê kêp omnuj nê nhũm mê hã tanhmã mê anhĩpêx to. Tã nom kêr ka mê tee ri amnhĩ kukamã ajamaxpêr nê amã mê uma hkêt nê.

17 —E kwa mê o kora. Kêr ka mê ma mê hwỳr mra nê amnhĩ nê mê htãnopxar o ri apa. Koja mê hkwỳjaja mê akapēr ma nê kêp mê aprãm nõkati. Nê mê apynê nê ma

mê utar xwỳnhjê hwỳr mê ato mra nê mê kām tanhmã mê ato hêx to. Hãmri nhũm mê mar xà hkôt mê atak. Tĩrtũm kapēr o mê ahkre xà hã ixkre kamã koja mê ã mê anhĩpêx anê.

18 —Nê koja mê ixtã tanhmã mê ato kaxyw mê apynê nê ma mê õ pahi hwỳr mê ato mra nê tanhmã kām mê ato hêx to. Nom kwâr mê mamrĩ ã mê anhĩpêx anê. Koja mê ato anê ka mê kutã akrĩ nê mê kām Tĩrtũm kapēr jarê. Ijaewjê mã nê mê kêp Ijaew kêt xwỳnhjê mã.

19 —Nê koja mê ma mê õ pahi hwỳr mê ato mra nê ã mê anhĩpêx anê nom kêr ka mê tee ri tanhmã mê kām amnhĩ jarênh to hkukamã ajamaxpêr kêt nê. Koja Tĩrtũm Karō tãm tanhmã mê akrã hto ka mê ô ri mê kām akapēr mex nê. 20 Nê kot kaj mê amnhĩ krã hkôt ri mê kām akapêr kêt nê. Tĩrtũm Karō nhỹ hã kot kaj mê ô ri mê kām tanhmã axujarênh to.

21-22 —Nê koja mê hkwỳjaja ixtã mê akamã gryk nê. Nê mê atã àmnênh pix o pa. Nê mê kot mê apar kaxyw mê akwỳjê hã amỹnê. Koja mê anhĩpêxà hkwỳjaja mê apê mê hkra hã amỹnê. Nhũm mê akra hkwỳjaja mê apê mê hipêxà hã amỹnê. Nhũm mê atō hkwỳjaja mê apê mê htō hã amỹnê. Nhũm mê akatorxajaja mê atã amỹnê. Hãmri nhũm mê apa. No ãm kwâr mê mãmrĩ ã mê anhĩpêx anê. ã mê kot mê anhĩpêx anhỹr tã kêr ka mê tee ri amnhĩ kukamã ajamaxpêr pê ixkaga hkêt nê. Mê ãm amnhĩ to htỳx rãhã ty. Hãmri nê akaxwỳnhja ma Tĩrtũm mê wa inhō krĩ hwỳr axàpir kurê kumrêx nê wa ixkuri akupỹm amex nê atĩr tũm nê apa ho apa.

23 —Nê koja mê nhỹri krĩ hkwỳ kamã ixtã tanhmã mê anhĩpêx hto ka mê mãmrĩ mê kurũm ajapōj nê ma nhỹhỹm krĩ hō hwỳr apa. Nê hpãnhã kamã mê kām ri ijarênh o mê hkôt apa. Kot kaj mê kormã Ijaewjê nhō krĩ piitã hwỳr apa hkêt ri pa akupỹn mê awỳr wrỳ. Kwa kêr ka mê ixkapêr mã ajamaxpêr tỳx rãhã ri apa.

24-25 —Mê ate ixkôt apa ho apa xwỳnh na ka mê. No pa na ixpê mê ajahkre xwỳnh. Jakamã koja mê kot tanhmã inhĩpêx to ho mãânên mê anhĩpêx. Koja mê nhỹrmã tanhmã inhĩpêx to nê mã ixkôt mê ato anê nê. Mê pahte amnhĩ nhĩpêxja kot axpên

pyræk. Jakamã koja mẽ ixpê Satanasti hã ijarê nõ mãânên tanhmã mẽ ajarênh punuj to ho pa. Mẽ pahte amnhĩ nhĩpêxja kot axpên pyræk jakamã koja mẽ panhĩpêx o axpên pyræk.

²⁶ —Tã nom kêr ka mẽ tee ri amnhĩ kukamã ajamaxpêr pê amã mẽ uma ho apa hkêt nõ. Na htem piitã axpên pê tanhmã hamaxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamaxpêr piitã amnhĩrĩt pa. Nẽ mẽmoj piitã ra hpimxur mex tã koja nhÿrmã amnhĩrĩt par kumrêx.

²⁷ —Nẽ koja nhÿrmã mẽ piitã ixte amnhĩ nhĩpêx kôt ixpumu. Na pa ra mẽ hkàx ã mẽ amã ixujarênh rax nõ. Tã kêr ka mẽ ma mẽ piitã mẽ kãm harênh o ri apa. Nẽ ra ixte mẽ hkàx ã ahte ixte mẽ amã mẽmoj jarênh ta ka mẽ hpãnhã ma mẽ kãm harênh o ri apa kêm mẽ apyrã nõ harênh ma.

²⁸ —E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nõ. Mẽ kot mẽ apar mã tã koja mẽ ãm mẽ akrãhkã pix pa nom tanhmã mẽ akaxwÿnh to hkêt nõ. Tĩrtũmja tapxipix na hte mẽ hkrãhkã nõ mẽ hkaxwÿnh mẽ ho pimràatã kot amnhĩ xà htÿx kamã hamak tũm xàta wÿr mẽ rênh pumunh. Tã kot hwÿr mẽ arênh pymaj kêr ka mẽ amã kapêr kwÿm ri tanhmã amnhĩ nhĩpêx to puma ho ri apa.

²⁹⁻³¹ —Nẽ Tĩrtũm kot mẽ pahto hapêx par pumunh tã mãânên kot mẽ pajamãr mex. Mãn ka htem kuwênhre pumu. Na hte Tĩrtũm kuwênhre jamãr mex o pa. Mẽ piitã mẽ kot ãm omunh tã nom nhũm Tĩrtũm mẽ kurom hamãr mex pê mẽ htãnopxar rãhã ho pa. Tã kãm mẽ pajapê htÿx o kot kuwênhre jakrenh jakamã kwa mẽ tee ri amnhĩ kukamã ajamaxpêr o ri akaprĩ nõ apa hkêt nõ. Koja Tĩrtũm mẽ pahtãnopxar rãhã ho pa. Kot mẽ panhĩ piitã omunh par. Nẽ ahpÿnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anẽ.

Mẽ pahte Jejus kôt amnhĩ xunhwÿr rÿ mẽ pahte hkaga jarênh

³² Nhũm Jejus arĩ kot mẽ hwÿr mẽ ixrênh xwÿnhjê mã kapêr nõ mẽ inhmã:

—E kwa mẽ mãmrĩ akwÿjê mã mẽ apê ixkwÿ hã amnhĩ jarênh o ri apa nõ amã mẽ uma xàj tee ri amnhĩ nhĩpêx kêt nõ. Kot kaj mẽ kãm ra ate ixkôt amnhĩ xunhwÿr ã amnhĩ jarê. Pa ja hã mẽ apumu hãmri nõ mẽ apyrã nõ kaxkwa kamã Inhĩpêêxã mã ra ate ixkôt amnhĩ xunhwÿr ã mẽ ajarê. ³³ Nom kot kaj mẽ kot ixtã tanhmã mẽ ato pymaj apê ixkwÿ hã amnhĩ jarênh kêt nõ. Pa ja hã mẽ apumu hãmri nõ nhÿrmã amnhĩ xwar Inhĩpêêxã mã mẽ apê ixkwÿ hkêt ã mẽ ajarê. Jakamã kwa mẽ mãmrĩ mẽ kãm apê ixkwÿ hã amnhĩ jarênh o ri mẽ hkôt apa kêm mẽ ama nõ amnhĩ kaxyw inhmã hamaxpêr japêr. Anẽ.

Mẽ kãm Jejus ã hkwÿjê kurê xwÿnhjaja Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arĩ kot mẽ hwÿr mẽ ixrênh xwÿnhjê mã kapêr nõ mẽ inhmã:

—Ra mẽ awÿr ixwrÿk tã koja mẽ piitã ixkukwak ri hamakêtkati nõ àmnhĩx ri pa hkêt nõ. Kormã. Koja mẽ akwÿjaja ixkapêr ma nõ mẽ apyrã nõ amnhĩ kaxyw ixkôt hamaxpêr. Nhũm mẽ akwÿjaja axtem nõ kuma nõ ãm kuma. Hãmri nõ ixtã tanhmã mẽ atomnuj to ho pa ka mẽ amnhĩ xà htÿx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxã nõ mẽ katorxã kutã amnhĩ xunhwÿ. Nhũm mẽ wÿjjaja ixtã mẽ umregêxjê kutã amnhĩ xunhwÿ.

³⁶ —Koja mẽ ã mẽ akwÿjaja ixtã mẽ akutã amnhĩ xunhwÿr anẽ. Mẽ anhõrkwÿ kamã mẽ akukwak ri pa htã ixtã mẽ akutã amnhĩ xunhwÿ.

³⁷ —Nẽ mẽ amã mẽ anhĩpêêxã nõ mẽ akatorxã japêê. Nẽ mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nõ apê ixkwÿ mã tãm kêt. ³⁸ Rÿ nhũm mẽ nhÿrmã ixtã mẽ apar kaxyw ka mẽ tee ri amnhĩ kukamã ajamaxpêr nõ mẽ kot mẽ apar pymaj ixkaga hã kot kaj apê ixkwÿ mã tãm kêt nõ. ³⁹ Koja mẽ nhÿrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwÿnhjaja. Koja mẽ ixpyrã nõ ixtã mẽ apar mã tã kwa kêr ka mẽ amã atyk pymaj ixkaga hkêt nõ. Kwãr mẽ mãmrĩ tanhmã ixtã mẽ ato. Kot kaj mẽ nhÿrmã Tĩrtũm mẽ

wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xàj ixkaga hãmri nê nhỹrmã wa ixri atĩr tũm nê apa ho apa hkêt nê. Anê.

Mê kot Jejus krajê ho mex xwýnhjê jarênh Matêwre 25.34-40; Makre 9.41; Juãw 13.20

⁴⁰ Nhũm Jejus arĩ kot mẽ hwýr mẽ ixrênh xwýnhjê mã kapêr nê mẽ inhmã:

—E koja mēhō nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tĩrtũm o mex pyrãk.

⁴¹ —Nê kot ka mẽ nhỹri Tĩrtũm nhỹ hã mẽ kãm kapêr jarênh xwýnhjê hō tanhmã ho mex to nhũm Tĩrtũm hã apumu nê nhỹrmã hã ato mex nê. Rỳ ka mẽ mēhō kot Tĩrtũm kôt amnhĩ nhĩpêx xwýnhjê hō pumu nê tanhmã ho mex to. Nhũm Tĩrtũm hã apumu nê mããnên hã ato mex nê. Te ate mēhō ho mexta pyrã nê mããnên ato mex nê.

⁴² Nhũm mēhō nhỹri mẽ kot ixkôt kormã amnhĩ xãm nyw nê kormã àhpumunh tohtuj anhỹr xwýnhjê hō pumu. Nê kãm kôr ã omu nê hamaxpêr o: “Kwa Jejus kôt ri pa xwýnh mũj kãm kôr. Kormã kot Jejus kôt amnhĩ xãm tỳx kêt tã kêp hkwyỳ. E kot paj kãm gô hkwy kê ho ixkô.” Anê hãmri nê kãm hkwy nhũm ho ixkô. Hãmri nhũm Tĩrtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwýr mẽ ixrênh xwýnhjê mã kapêr ry rax anê. Mẽ ixpê 12jê mã ã kapêr anê.

11

Juãw Paxis kot Jejus jarênh mar

Rukre 7.18-23, 7.5, mããnên Rukre 4.16-21

¹ Tã nhũm Jejus ra kot mẽ hwýr mẽ ixrênh xwýnhjê mã kapêr pa hãmri nê kato nê ma krĩ pu hã krĩ hkwyjê hkôt ri pa. Nê mẽ kãm Tĩrtũm kapêr jarênh o ri mẽ hkôt pa.

² Nhũm Juãw Paxisja arĩ kêp prês nê mẽ hagjênh xà kamã hkrĩ. Nhũm pre hte hkôt mẽ pa ho mẽ pa xwýnhjaja hwýr mra nê kãm Jejus kot tanhmã amnhĩ nhĩpêx to ho pa hã harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ

pa xwýnh wa ho axkrut nê wa kuta ³ nê hwýr wa kumê nê wa kãm:

—Kwa wa ma Jejus wýr tẽ nê hkukja nê kãm: “Xà ka na pre Tĩrtũm mẽ ixwýr amê nà? Xà kormã axtem mēhō na pa mẽ ri hamãr o ri ixpa?” Anhỹr o hkukja hãmri nê tanhmã kot amnhĩ jarênh to hã ama nê man akupỹn ixwýr tẽ nê inhmã harê. Anê.

⁴ Hãmri nhũm wa kuma nê ma hwýr tẽ. Nhũm Jejus kormã tanhmã mẽ à kute xwýnhjê ho mex o xa. Mẽ nohkre xwýnhjaja nhũm akupỹm mẽ ho mex. Nê mẽkarõmnuti kot mẽ hwýr gjêx xwýnhjaja nhũm mẽ nê mẽ hanor o ãm rãhã nhũm Juãw kôt wa pa xwýnhta wa hwýr tẽn pøj. Nê kormã mẽ hã omunh o wa xa. Hãmri nê kãm Juãw Paxis kapêr jarê nhũm wa kuma nê wa kãm:

—Tỳ. Nã ãm hãmri na ja hã ijarê. Ixpê mẽ ate ixkamã ajamak o apa xwýnhta na pa. Na ka wa kam ã ixte amnhĩ nhĩpêx anhỹr ã ixpumu. Jakamã wa ma akupỹm tẽ nê aprĩ hã kãm ijarê. ⁵ Na pa hte akupỹm mẽ nohkre xwýnhjê ho mex. Nê mẽ hkànhy xwýnhjaja pa akupỹm mẽ hkà ho mex. Nê mẽ hyk o mẽ pa xwýnhjaja pa akupỹm mẽ hte ho mex. Nê mẽ htyk xwýnhjaja pa akupỹm mẽ ho mẽ htĩr. Nê mẽ kêp amrakati nê ri mẽ pa xwýnhjaja pa mẽ kãm mẽmoj mex jarênh o ri mẽ hkôt ixpa. ã na pa hte mẽ hipêx anhỹr o ri ixpa. Jakamã e wa ma akupỹm Juãw wýr tẽ nê ã kãm ijarênh anê. ⁶ Kê ijarênh ma nê ixkôt hamaxpêr tỳx nê tee ri ixkukamã hamaxpêr kêt nê. Koja ã amnhĩ nhĩpêx anê nê hamakêtkati nê ri pa. E wa tokyx ma akupỹm tẽ nê kãm ã ijarênh anê. Anê.

Jejus kot tanhmã Juãw Paxis jarênh to Rukre 7.24-35

⁷⁻⁹ Nhũm pre ã Jejus Juãw Paxis kôt wa pa ho wa pa xwýnhja wa kãm amnhĩ jarênh anê nê akupỹm hwýr wa kumê nhũm wa ma akupỹm hwýr tẽ. Hãmri nhũm Jejus mẽ kot mar o kuhê xwýnhjê mã tanhmã Juãw Paxisja jarênh to nê mẽ kãm:

—Na ka pre htem kapôt ã Juãw Paxis mar kaxyw ma hwýr mra. Nom é mex ã omunh kaxyw rỳ hpijaãm kãm tanhmã kapêr to hã mar kaxyw na ka prem hwýr amrar kêt nê. Tĩrtũm nhỹ hã kapêr o pa jakamã na ka prem ate mar kaxyw ma hwýr mra. Tĩrtũm

nhỹ hã ixkukamã ijarênh o pa xwýnh na. Ixpê Tirtũm kot mẽ akaxyw ixãm xwýnh ã na hte ijarênh o pa. Nẽ hprĩ hã tanhmã mẽ amã ijarênh to. Jakamã kapêrja mex o kot wam Tirtũm nhỹ hã kapêr jarênh xwýnhjê kapêr piitã hakrenh par. ¹⁰ Tirtũm kapêr ã kagà htũm kot Juãw kukamã tanhmã harênh to nẽ harênh kot:

Kot paj Ixkra hkukamã ma mẽ hwýr harênh xwýnhja mẽ nhũm ma ri kutêp mẽ kãm harênh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhỹr o Tirtũm Juãw Paxis kukamã harê nhũm prem hã kagà. Tã nhũm ixkukamã mẽ awýr kumẽ. ¹¹ Juãw Paxisja na mex kumrêx. Na pre hprĩ hã ixkukamã tanhmã ijarênh to ho pa. Tã nom ixkõt mẽ pa ho mẽ pa xwýnhjê hkĩnhã na pre ixkõt pa ho pa hkêt nẽ. Jakamã ixkõt mẽ pa ho mẽ pa xwýnhjaja kot ixkõt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anẽ.

¹²⁻¹³ —Na pre finat Mojes kumrêx mẽ kãm Tirtũm kapêr kwý hã kagà. Tã nhũm hpãnhã Tirtũm nhỹ hã kapêr jarênh xwýnhjaja Mojes mýr pê hkwy hã kagà. Nhũm prem kamã harê nẽ kuma nẽ hkõt amnhĩ nhĩpêx o pa. Hãmri nhũm Juãw Paxisja mẽ mýrpê kato nẽ tãm Tirtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akõt ixpa nhũm mẽ ohtô nẽ inhma nẽ ixkõt amnhĩ xunhwý nẽ kãm ixkapêr kõt pix mã amnhĩ nhĩpêx o ri pa hprãm nẽ.

¹⁴ —Amnepêm na pre Tirtũm nhỹ hã kapêr jarênh xwýnhjaja mẽhõja kukamã tanhmã harênh to ho pa. Nẽ mẽ kãm harênh o: “Koja nhỹrmã mẽhõ te Eris kot amnhĩ nhĩpêx pyrãk o amnhĩ nhĩpêx nẽ mẽ awýr mō. Nẽ mẽ amã Tirtũm kot mẽ awýr mẽnh mã xwýnhja jarênh o pa ka mẽ ama.” Anhỹr o mẽ kãm mẽhõ jarê. Tã kot paj mẽ amã kot hkukamã harênh xwýnhhta nhĩxi jarê ka mẽ inhma. Nã Juãw Paxisja kukamã na prem ã harênh anhỹr o pa.

¹⁵ —E kot pa mẽ amã mẽ piitã htýx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma. ¹⁶ Te mẽhprĩre kot amnhĩ nhĩpêx pyrãk o na htem amnhĩ nhĩpêx. Mẽhprĩrejaja na htem mẽ

õrkwỹ kapem mẽmoj to amnhĩkati nẽ tee ri hkwyjê kot amnhĩ nhĩpêx pumu nẽ mẽ kãm:

¹⁷ Kwa na pa mẽ amã gre htã ka mẽ ixkutã anhökrepôx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarê htã ka mẽ akaprĩ nẽ amýr kêt nẽ. Kwa mẽ ri ã amnhĩ nhĩpêx anhỹr kêt nẽ. Anẽ.

—Mẽhprĩjaja na htem ã axpên mã kapêr anẽ. Tã te mẽ ate mẽ urãk. Tirtũm kot mẽ awýr ý hã kapêr jarênh xwýnhjê rênh tã ka mẽ te mẽhprĩre kot amnhĩ nhĩpêx pyrã nẽ mẽ ama nẽ ãm mẽ ama nẽ mẽ hkõt amnhĩ nhĩpêx kêt nẽ.

¹⁸ —Juãw Paxis na pre mẽ awýr mō nẽ ixkĩnhã apkur mex o ri pa hkêt nẽ. Nẽ ixkĩnh ã wĩhti ho hkõm kêt nẽ. Ka mẽ ja hã omu nẽ hkaga nẽ atýx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nẽ mẽhprĩre kot amnhĩ nhĩpêxta pyrã nẽ hkõt amnhĩ nhĩpêx kêt nẽ.

¹⁹ Tã hãmri pa hpãnhã mẽ awýr mō nẽ Juãw Paxis rom apkati mẽ ixãpkur mex o ri mẽ akõt ixpa. Nẽ kurom mẽ akutã wĩhti hkwy ho ixkõm o ri ixpa. Tã ka mẽ ja hã ixpumu nẽ atýx ri ixãpkur rũnh nẽ ixpipãnh o ri ixpa hã ixkamnhĩx nẽ ã axpên mã ixto akapêr anẽ. Nẽ mẽ kot amnhĩ tomnuj xwýnhjê hkõt ri ixpa xwýnh ã axpên mã ijarê. ã na ka htem axpên mã ijarênh anẽ. Jao te mẽ ate Juãw Paxis nhĩpêx pyrã nẽ ixkaga nẽ ixkõt amnhĩ nhĩpêx kêt nẽ. Na hte ã htýx ri tanhmã mẽ hamaxpêr to ho mẽ pa xwýnhjaja amnhĩ nhĩpêx anẽ. No tãm ri mẽ hamaxpêr xwýnhjaja na htem ahpýnhã wa ixte amnhĩ nhĩpêx ã wa ixpumu nẽ axpên mã wa ijarênh o: “Nã ahpýnhã wa kot amnhĩ nhĩpêx tã no ãm hamẽ Tirtũm nhỹ hã kapêr mex o pa. E pu mẽ wa urãk nẽ Tirtũm kõt amnhĩ xunhwý.” Anhỹr o axpên mã wa ijarê. Anẽ.

Mẽ kot Tirtũm kõt mẽ hamaxpêr kêt xwýnhjê jarênh

Rukre 10.13-15

²⁰ Na pre hte Jejus krĩ piitã hkõt pa nẽ krĩ nhõ xwýnhjê mã kapêr nẽ mẽ kot amnhĩ tomnuj ã mẽ kãm kapêr. Korajĩ mẽ Pese nhõ xwýnhjê kumrêx mã kapêr nẽ mẽ kãm: ²¹⁻²² —E mẽ inhma. Amnepêm krĩ pê Sitõ mẽ Xir wa kamã mẽ pa xwýnhjaja na

prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỳr rax tã ka mẽ omu nẽ ãm omu nẽ amnhĩ tomnuj kaga hkêt nẽ. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nẽ. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỳx mẽ omu nẽ mẽ arom amnhĩ kaxyw ixkõt hamaxpêr tỳx kurê kumrêx. Nẽ tee ri kot tanhmã kot amnhĩ tomnuj to hã amnhĩ pumu nẽ hkaprĩ nẽ hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỳr o ixpa kaprỳ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Jakamã koja nhỹrmã Tĩrtũm tanhmã mẽ atomnuj tỳx to. Nẽ tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx kamã ajamak rãhã ho ri apa kãm ga. Anẽ.

²³⁻²⁴ Nhũm pre ã Jejus mẽ kãm kapêr anẽ. Nẽ hpãnhã Kapanaũ nhõ xwỳnhjê mã kapêr nẽ mẽ kãm:

—No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ urak nẽ amex kêt nẽ. Ra ixte mẽ amã aa mẽ ate mẽmoj pumunh kêt kwỳ ho anhỳr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nẽ. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỳr ã ixpumunh ronhỳx mẽ ra kot amnhĩ tomnuj kaga nẽ ixkõt amnhĩ xunhwỳr kurê kumrêx. No mẽ kajaja na ka mẽ ã amnhĩ nhĩpêx anhỳr kêt nẽ. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anẽ.

Jejus kot õ Papaj mã amnhĩ jarênh

Rukre 10.21-22

²⁵⁻²⁶ Tã nhũm Jejus Tĩrtũm mã amnhĩ jarê nẽ kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nẽ. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkõt ã mẽ piitã mẽ hipêx anhỳr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kõt apumunh o pa. Anẽ.

Nhũm pre ã Jejus Tĩrtũm mã amnhĩ jarênh anẽ. ²⁷ Hãmri nẽ hpãnhã mẽ kot mar o kuhê xwỳnhjê mã kapêr nẽ mẽ kãm:

—Nà na pre ra Inhipeêxàja inhĩhkra kamã mẽmoj piitã hagjênh pa. Ixte kãm ho amnhĩptar o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nẽ papxipix na ixte Inhipeêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anẽ nẽ inhmã hprãm xà hkõt mẽ hkwyjê mã ho amnhĩrĩt o ri ixpa. Jakamã nhũm mẽ ixpyrà nẽ Inhipeêxà kot tanhmã amnhĩ nhĩpêx to ho pa hkõt omu.

²⁸⁻³⁰ —Nẽ tee ri amnhĩ kukamã mẽ ajamaxpêr o ri apa xwỳnhjaja te mẽ ate mẽmoj pytĩ rax tur nẽ ahte ho apa pyràk. Kwa mẽ ixkõt amnhĩ xunhwỳ nẽ ixte amnhĩ nhĩpêx ã ixpumu. Ixte mẽ akamã ixukaprĩ xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkõt amnhĩ xunhwỳ pa te ixte mẽ anẽ mẽmoj pytĩ ho ixwryk pyràk o mẽ anhĩpêx nẽ tãm mẽ axunhwỳ ka mẽ tãm ajamaxpêr nẽ tãm amnhĩ nhĩpêx o ri apa. Mo kaxyw koja ixkõt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpêr o pa? Nà na htem ixkamnàr rom hamakêtkati nẽ àmnhix ri pa ho pa. Anẽ.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwýnhjê mẽ pa mẽ ma mẽ hpur kôt ri nhỹhỹm ri ixpa. Hãmri nê ra mẽ inhmã prãm nê mẽmo hy te kot harôj pyræk xwýnhja kwý rê nê kugrà nê ma Jejus kôt hkanhar o mō. Mẽ ixpê Ijaew na pa htem axpên pur kãm ã amnhĩ nhĩpêx anhỹr o ixpa. ² Hãmri nhũm mẽ ixkwý pê Parijew nhõ xwýnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhỹr ã mẽ ixpumu nê mẽ ixtã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwýnhjaja axtem nê ã amnhĩ nhĩpêx anhỹr o ri akôt pa. Mẽmo hyta rê nê akôt hkanhar o pa. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arĩgromnu hã mẽmoj tã àpênh kêt kênã. Anê.

³⁻⁴ Hãmri nhũm mẽ kuma nê hprĩ hã mẽ kãm Tĩrtũm kapêr jarê nê mẽ kãm:

—Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkôt ri mẽ pa xwýnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre hwýr agjê. Hãmri nhũm mẽ õ patre maatija mẽ kãm prãm tỳx ã mẽ omu nê kãm mẽ hkaprĩ nê mẽ kãm mẽmoj gō. Mẽ kot Tĩrtũm noo mã pãwti jaxwýr xwýnhja gō nhũm mẽ kuku. Tĩrtũm kapêr ã kagà htũm kot ja nê mẽ hkurê htã nhũm mẽ kãm prãm tỳx ã mẽ omu nê mẽ kamã ukaprĩ xàj mẽ kãm kugō. Æm mẽ õ patre pix kot ja hkur kaxyw tã nhũm mẽ kãm kugō nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukaprĩ nê mẽ kãm õr ã omu nhũm ja kãm mex nê.

⁵—Mẽ panhõ arĩgromnu htã na hte patre-jaja arĩ hã Tĩrtũm mã amnhĩ jarênh xà hã ixkre kamã àpênh o pa. Tĩrtũm kapêr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nê. Kumã mẽ àpênh xwýnh kênã. ⁶ Æm hãmri na pa mẽ amã ja jarê. Tĩrtũm mã amnhĩ jarênh xà hã ixkreta mex tã nom ixpê Tĩrtũm Kra jakamã inhmex o ixte ixkreta jakrenh.

⁷ Tĩrtũm kapêr ã kagà htũm kot ja harênh kot:

Kêr ka mẽ inhmã amnhĩ jarênh kaxyw nê Æm inhmã mẽmoj nhõr pix pê inhmã amnhĩ jarênh kêt nê. Mẽ mãânên mẽ kamã axukaprĩ o ri apa pê inhmã amnhĩ jarê. Ja na kêt inhmã hprãm.

—Æ harênh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwýnhjê kot mẽmo hy rênh nê hkanhar o mōr ã mẽ omu nê ri tanhmã mẽ ho akapêr to hkêt nê. Æm mẽ kãm prãm ã mẽ omu nê mẽ kamã axukaprĩ nê.

⁸—Kêt pa na pre Tĩrtũm mẽ akaxyw ixãm nê mẽ awýr inhmê. Jakamã papxpix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karō. Kwa mẽ jajê pumu nê mẽ kamã axukaprĩ kêt wehe. Kwār mẽ māmri mẽmo hyta rê nê hkanhar o ixkôt mō. Anê.

ĩhkra grà xwýnh jarênh

Makre 3.1-6; Rukre 6.6-11

⁹ Nhũm pre ã Jejus Parijew nhõ xwýnhjê mã kapêr anê hãmri nê Tĩrtũm kapêr o mẽ ahkre xà hã ixkre hwýr tẽ nê axà. ¹⁰ Nhũm Parijew nhõ xwýnhjaja tanhmã ho kapêr to kaxyw htãnopxar o kuhê. Jakamã nhũm ixkre kamã mẽhõ my ĩhkra grà xwýnhja mẽ pikuprõnh xwýnhjê nhĩkhô hã nhỹ nhũm Parijew nhõ xwýnhjaja omu nê axpên mã:

—Kwa pu mẽ jar pakuhê nê Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anê nê Tĩrtũm kapêr tũm kuhpa hã amnhĩ nhĩpêx. E pu mẽ kop xa nê hã omu. Anê.

Hãmri nê hã Jejus kukja nê kãm:

—E mẽ inhmã mẽmoj jarê. Xà na htem arĩgromnu hã akupým mẽ ho mex nhũm Tĩrtũm kãm ja mex nê nà? Anê.

¹¹ Hãmri nhũm mẽ hamaxpêr kôt mẽ omunh mex nê mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tẽm ka omu nê Æm omu nê arĩgro mex jamãr pê ho axàpir kêt nê? Nà kot kaj mẽ tee ri omu nê ho axàpir kurê kumrêx. ¹² Arĩgromnu hã mẽ ho mexja ja mex kênã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kêr pu mẽ tee arĩgromnu htã pu mẽ

hã tanhmã axpên to mex to ho papa. Ja na Tirtüm kãm hprãm.

Anhÿr o mẽ kãm kapër. ¹³ Hãmri nê hpãnhã myta mã:

—E anhĩkra katàt. Anê.

Hãmri nhũm ìhkra katàt nê mex kurê kumrêx. ¹⁴ Hãmri nhũm Parijew nhõ xwÿnhjaja tee ri ja hã omu nê Jejus kamã gryk nê. Arĩgromnu pê sap ã kot ho mex jakamã nhũm mẽ kamã gryk tÿx nê. Hãmri nê ma mra nê hapôj nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhÿrja mÿrapê tanhmã kot puj wem ho? ã kapër anhÿrja o te mẽ papamjaja mẽ pahte hkĩnhã mẽ kamã paxukaprĩ kêt pyrãk ã mẽ pajarê. Koja mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhÿr o axpên kukjêr o kuhê.

Jejus kêp Tirtüm kot mẽ pahwÿr mẽnh xwÿnh ã harênh

Makre 3.7-12

¹⁵ Hãmri nhũm Jejus amnhĩ tâ Parijew nhõ xwÿnhjê jamaxpêr kôt mẽ omu hãmri nê mẽ kêp kato nê hpãnhã ma nhÿhÿm krĩ hõ hwÿr ma tẽ. Nhũm mẽ ohtô nê omu nê ma hkôt mra nhũm mẽ omu nê akupÿm mẽ kãm mẽ à xwÿnh piitã ho mex. ¹⁶ Hãmri nê mẽ kãm:

—E na pa akupÿm mẽ ato mex. Nom kêr ka mẽ amnhĩ tâ ixto axãmra ho ri apa hkêt nê. Ixpê Tirtüm Kra hã mẽ kãm ijarênh kêt nê. ãm kwarĩ kumrêx.

Anhÿr o mẽ kãm kapër. ¹⁷ Na pre ra amnepêm Tirtüm nhÿ hã kapër xwÿnh finat Ijaisja Jejus kukamã mẽ kãm tanhmã harênh to nê hã kagà. Te Tirtüm tãm kapër pyrãk o harê nê hã kagà. Nê hã kagà ho:

¹⁸ Ota ixkôt amnhĩ nhĩpêx o pa xwÿnhnta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tÿx nê. Kot paj hwÿr amnhĩ karõ mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarênh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhĩ to àmra o pa hkêt nê. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

²⁰ ãm kapër xukaprĩ pix o koja mẽ hirerek xwÿnhjê mã kapër o pa. Nê mẽ kot tee ri amnhĩ nhĩpêx ã amnhĩ pumunh xwÿnhjê kamã ukaprĩ o pa. Nê mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

²¹ ã kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tirtüm kôt hamaxpêr nê hkôt amnhĩ xunhwÿ. Anê.

Na pre ã finat Ijaisja Tirtüm nhÿ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harênh nê hã kagà anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

²² Tã nhũm prem Jejus wÿr mẽhõ myja o mõ. Mẽkarõmnuti kot hwÿr àr nê ho nohkre nê ho kapër kêt xwÿnhnta nhũm mẽ hwÿr o mõ. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rĩt mex nê akupÿm kapër mex nê. ²³ Hãmri nhũm mẽ amnhĩ jaêr pê omu nê kamã no puma nê hã axpên kukjêr o:

—Kokÿÿ. Jejus na hte ãm mẽ ho mex o mẽ ho mex o pa. Mãn kêp Tirtüm kot mẽ pahwÿr mẽnh mã xwÿnhnta na nà? ã na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tãmnhwÿta na nà? Anê.

²⁴ Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhix. Jakamã mẽ kot hã axpêr kukjêr ã mẽ kuma nê mẽ kãm:

—Tk pêr hinhu nhĩkôôti nhÿ hã na hte mẽ nê amnhĩ kwÿjê japôx o pa. Anê.

Hinhu nhĩkôôti nhĩxi hõ pê Satanasti nhũm prem ã Satanasti nhÿ hã Jejus kot

amnhĩ nhĩpêx ã hkamnhĩx anê. ²⁵ Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwȳ hã ixkamnhĩx xw̄ynhjaja. Koja pika nhõ xw̄ynhjaja axpên kutã amnhĩ xunhw̄ȳ nê axpu hãmri nê angrã nê ma ahp̄ȳnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xw̄ynhjaja. Rỳ mẽ kot axpên to hkwȳ xw̄ynhjaja mẽmoj tã axpên kãm gryk nê axpên kutã amnhĩ xunhw̄ȳ. Hãmri nê ahp̄ȳnhã awry hã pa nhũm mẽ õ pahija tee ri kãm mẽ hamãr prãm kapr̄ȳ. Mo mẽ hkwȳjaja kot ri mẽ hamãr o pa? No koja pahija tãm amnhĩ nê amnhĩ kw̄ȳjê janor kêt nê. ²⁶ Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kw̄ȳjê janor kêt nê.

²⁷ —No mẽ akw̄ȳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ÿ hã mẽ nê amnhĩ kw̄ȳjê japôx ronhỹx mẽ akw̄ȳjaja ixpyrã nê ÿ hã mẽ nê amnhĩ kw̄ȳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt. ²⁸ Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptãr kaxyw Tĩrtũm kot mẽ aw̄yr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija ahp̄munch tỳx jakamã na htem tee ri kêp hkôt mẽ kot amnhĩ xunhw̄yr xw̄ynhjê pytãr kaxyw nhũm mẽ nê mẽ omunh mex nê. Tã nom ixãhp̄munch tỳx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tã nom kormã ixkôt amnhĩ xunhw̄yr kêt nê. Kwa wem ma amnhĩ to amõr gri nê tokyx ixkôt amnhĩ xunhw̄ȳ kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhw̄yr xw̄ynh pyrãk o amnhĩ nhĩpêx.

³¹⁻³² —Nê koja mēhõ ixkapêr ma nê kãm ixprãm kêt nhũm Tĩrtũm ixtã omu nom tokyx tanhmã ixtã ho hkôt nê. Koja kormã amnhĩ tã hamã. Karõ kot axte kãm ijarênh o amnhĩrĩt nhũm jatã kot mar nê

kãm ixprãm nê ixkôt amnhĩ xãm prãm xaj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mỳrapê koja Tĩrtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kapr̄ȳ. Hãmri nê amnhĩ xã htỳx kamã hamak o pa xãta w̄yr ma pa nê kamã pa rãhã nê pa ho pa. Anê.

Mẽ pajamaxpêr xà hkôt tanhmã ri mẽ pakapêr to

Rukre 6.43-45

³³ Nhũm Jejus arĩ Parijew nhõ xw̄ynhjê mã kapêr nê mẽ kãm:

—Nê kot kaj mẽ atõ anhõ mẽmo pãr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xõ hpãr pumunh kôt tanhmã kute hã harênh anê. Ja pyrã nê na htem tanhmã mẽ kot amnhĩ nhĩpêx to hã mẽ omunh kôt tanhmã mẽ harênh to. Mẽ kot amnhĩ tomnuj xw̄ynh ã mẽ harê rỳ mẽ kot amnhĩ to mex xw̄ynh ã mẽ harê.

³⁴⁻³⁵ —Nê koja mēhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htỳx ri tanhmã amnhĩ tomnuj to ho pa. Na htem ahp̄ȳnhã amnhĩ jamaxpêr xã hkôt tanhmã kapêr to ho pa. No mẽ kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xã hkôt tanhmã ri kapêr to ho pa. ³⁶⁻³⁷ Koja nhỹrmã Tĩrtũm mẽ piitã tanhmã mẽ kapêr to hã mẽ mar xã hkôt tanhmã mẽ harênh to. Jakamã mẽ akapêr mex o mẽ apa xw̄ynhjaja koja mẽ amex ã mẽ ajarê. Nom mẽ atỳx ri akapêr punuj o mẽ apa xw̄ynhjaja koja mẽ amex kêt ã mẽ ajarê. Hãmri nê mẽ akapêr punuj o apaja mỳrapê mẽ atomnuj tỳx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhũm Tĩrtũm kapêr tũm o mẽ ahkre xw̄ynh mẽ Parijew nhõ xw̄ynh kw̄ȳjaja mẽmoj tã Jejus w̄ȳ nê kãm:

—Kwa Pahшти. Mě inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tirtũm kot mẽ ixwÿr amênh ã apumunh kurê kumrêx. Jakamã e mẽ inhmã mẽmoj to anê nà. Anê.

³⁹ Hãmri nhũm mẽ kuma nê mẽ kãm:

—Tk. Pêr ãm mẽ ajamaxpêr punuj pix o na ka htem apa. Ixpê Tirtũm kot mẽ awÿr inhmênh xwÿnh tâ mẽ ate ja hã ixpumunh kêt. Nê mẽ ate ja hã axpên mã ijarênh kêt tâ ixte mẽ amã aa mẽmoj pumunh kêt õ ho anhÿr kaxyw hã ixwÿ. Nà pa mẽ amã ho anhÿr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

⁴⁰ —Tirtũm nhÿ hã kapêr xwÿnh Jõhtija amnepêm na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tirtũm kot mẽ awÿr inhmênh xwÿnh kot paj nhÿrmã kên kre kamã ixtyk nê inhnôr ã apkati axkrunêpxi. Jõhti hkĩnhã ixtyk kumrêx nê inhnôr ã apkati axkrunêpxi hãmri nhũm Tirtũm akupÿm ixto ixtĩr.

⁴¹ —Nê koja nhÿrmã Tirtũm akupÿm mẽ htyk nê mẽ hikwÿ xwÿnh piitã akupÿm mẽ ho htĩr hãmri nhũm mẽ piitã Inhipeêxã mẽ wa ixkutã hkrĩ pa wa tanhmã mẽ harênh to. Tirtũm mẽ wa ixkuri mẽ htĩr tũm nê mẽ pa ho mẽ pa mã xwÿnhjê hã mẽ hkwyjê jarê nê wa ixkuri mẽ pa ho mẽ pa hkêt xwÿnhjê jarê. Mě piitã ã ahpÿnhã mẽ harênh anê. Amarĩ mẽ pa xwÿnhjaja nê mẽ õ pahijaja. Jakamã nhũm Nĩnĩwe nhõ xwÿnhjaja tanhmã wa inhmã mẽ ajarênh to. Jõhti kot mẽ hwÿr môr nê mẽ kãm Tirtũm kapêr jarênh o pa xwÿnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwÿr mō nê mẽ inhmã akapêr jarênh o ri mẽ ixkôt pa. Pa prem kuma nê mẽ ixte amnhĩ tomnuj kaga nê akôt amnhĩ xunhwÿr kurê kumrêx Tirtũm. No or war akutã mẽ hkrĩ xwÿnh kwÿ ata mẽ na pre Akra Jejus tãm mẽ hwÿr mō nê mẽ kãm kapêr o ri mẽ hkôt pa nhũm prem mar tâ mẽ ixkĩnhã mẽ kot amnhĩ tomnuj kaga nê hkôt amnhĩ xunhwÿr kêt nê. Mě ixkurom mẽ kot Akra mar tâ amnhĩ kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ

ama nê ra mẽ amã ma nê. Nom ãm mẽ amã ma kaprÿ.

⁴² —Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harênh ma hãmri nê inhmã mar prãm xaj ma awry hã õ pika hwÿr mō nê omu nê kapêr ma. Hãmri nê ma akupÿm inhõ pika hwÿr mō nê ixkwÿjê mã àhpumunh tÿx ã harênh o ri ixpa. Tã Akra Jejus na kot àhpumunh tÿx o pahi Sarumãw jakrenh tâ or war akutã mẽ hkrĩ xwÿnh kwÿ ata mẽ. Mě kot kapêr mar tâ ixkĩnhã kãm mar prãm kêt. Na prem kuma nê ãm kuma.” Anhÿr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ. Nom ãm amnhĩ kamã agryk kaprÿ. Anê.

Mêkarõmnuti kot tanhmã mēhō hto hã harēnh

Rukre 11.24-26

⁴³ Nhũm Jejus arĩ Parijew nhõ xwÿnhjê mẽ Tirtũm kapêr tũm o mẽ ahkre xwÿnhjê mã kapêr nê mẽ kãm:

—Te mẽ ate ixte mēhō nê mẽkarõmnuti japõx xwÿnhhta pyrãk. Nhũm te kêp kator nê ma htêm pyrãk. Nê nhÿri amgrã kamã ri pa pyrãk. Koja ja kêp omnuj nhũm tee ri kamã nhÿri hkôt xà japêr o pa. Nom tee ri hapêr o pa kaprÿ. ⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwÿnhhta wÿr tē nê axà nê kamã mãn ri ixpa.” ⁴⁵ Anhÿr o hamaxpêr hãmri nê ma akupÿm hwÿr tē. Nom kormã akupÿm hwÿr àr kêt ri nhũm kamã amrakati nê ri pa. Jakamã nhũm akupÿm hwÿr axà. Nom ahte hwÿr àr kêt nê. Amnhĩ kôt hkwyjê ho 7 nê hwÿr mẽ ho gjêx pa. Mě kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja na omnuj tÿx o kot wamta jakrenh jakamã nhũm mẽ kot hwÿr gjêx xwÿnhhta mẽ ÿ hã ra amnhĩ tomnuj tÿx nê oprê htÿx o pa. Wam pyxire kot hwÿr àrta nhÿ hã nhũm amnhĩ tomnuj o ri pa nom kawax pê oprê. Tã nhũm ra axte hwÿr mẽ ohtô nê gjêxta nhÿ hã hãmri oprê htÿx kumrêx. Ja pyrã nê kot kaj mẽ tokyx ixkôt amnhĩ xunhwÿr kêt nê hãmri nê amnhĩ tomnuj tÿx pix o ri apa. Anê.

Jejus kot tanhmã hkwýjê jarênh to hã harênh

⁴⁶ Nhũm Jejus arĩ mẽ ahkre ho nhỹ. Rôm nhũm katorxà nê htôjaja nhỹhỹnh hwýr môn pøj. Nom kormã hwýr gjêx kêt nê. Mẽ kot hã htu rax jakamã nhũm mẽ tee ri hwýr gjêx kaxyw kormã kapôt ã hã mẽ omunh o kuhê. ⁴⁷ Hãmri nhũm mēhōja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atōjaja awýr môn pøj nê tee àr kaxyw. O mũj mẽ kapôt ã kuhê. Anê.

⁴⁸⁻⁵⁰ Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atō Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtō rý ixkatorxà pyrãk o pu mẽ axpên nhĩpêx o ri papa. Pa inhmã ixkatorxà nê ixtōjê japê pyrã nê mãänên inhmã mẽ ajapê nê. Anê.

13

Mẽmo hy hkre xwýnh jarênh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mẽ kãm kapêr pa nê ixkre rũm kato nê ma himô rax wýr tẽ nê gô mýri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwýnhjaja ma hkôt mra. ²⁻³ Hãmri nê gôta wýr pøj nê mýri ixkrĩ. Nhũm mẽ Jejus ã htu rax nê nhũm tee ri mẽ omunh o nhỹ. Hãmri nê hamaxpêr nê kànhmã xa nê tẽ nê pàr krem axà nê pàr kre kamã mütũm awry rũm mẽ ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrã kamã kýx pê mar o hkrĩ. Nhũm mẽ kãm:

⁴ —E mẽ inhma. Koja mēhō ma pur mã mō nê pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt nê. Koja hkwýja ahpýnhã nhỹri rôrôk. Kwý aptýx kãm rôrôk nhũm kuwênhre omu nê hwýr mra nê hkrêr pa.

⁵ —Nê koja kên kãm hkwý rôrôk nê ra higrôt kutã nojarêt nê higrôt pa. Nom nhũm kamã aptýx nê kêp pika hkryre. ⁶ Jakamã nhũm higrôt nhũm hã myt apha nê arĩgro

htýx mẽ nhũm grã pa. Harê hkryre jakamã grã pa.

⁷ —Nê koja mrônhĩ kamã hkwý rôrôk nê higrôt tã no nhũm utĩja kêp amýtã nhũm ô hkêt nê.

⁸ —No kêt hirã kamã pika mex kãm rôrôk xwýnhja hirã kamã rôrôk jakamã higrôt mex nê piitã ô rũnh nê. Kamã ô hkwý kêp 30 nê kamã hkwý kêp 60 nê kamã hkwý kêp 100. ã mẽ ujarênh kot anhýr. ⁹ Kwa kêr ka mẽ ixujarênhja ma nê kãm ajamaxpêr týx rãhã ho apa. Anê.

Mẽmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

¹⁰ Hãmri pa mẽ ixpê Jejus kôt mẽ ixpa ho ixpa xwýnhjaja Jejus kot mẽ kãm ã ujarênh anhýrja ã kuma nê tee ri hkukamã ija-maxpêr. Hãmri nê hã hkukja nê kãm:

—Kwa axujarênhta na pa mẽ ixprĩ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hãmri nhũm mẽ inhmã:

—Tôe. Nà kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tirtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htýx ri pa.

¹² —No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mō. No mẽ kot ixkapêr mar nê ãm mar xwýnhjaja na mẽ akĩnhã inhmar týx kêt nê. Jakamã nhũm Tirtũm tanhmã mẽ hkrã hto nhũm mẽ hã no hkêt tokyx anê htýx ri pa.

¹³ “Ixte mẽ kãm aa mẽ kot mẽmoj pumunh kêt kwý ho anhýr rax tã nhũm mẽ omu nê ãm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tã ãm inhma nê kãm hprĩ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwý nê mẽ kãm ixujarênh anê.

14-15 —Na pre ra Tirtûm nhÿ hã kapêr o pa xwÿnh Ijaisja amnepêm mē hkukamã tanhmã mē harēnh to nē hã kagà. Mē kot inhmar nē ãm inhmar xwÿnhjê jarē nē tanhmã mē hkukamã mē harēnh to nē mē harēnh o:

Koja mē ujarēnh mex mar pymaj amnhĩ jamak pro nē amnhĩ no hpro nē hkôt hamaxpêr kêt nē. Jakamã koja mē kãm mē kot amnhĩ nhĩpêx mex prãm kêt nē harēnhja ma nē ãm kuma. Nē omu nē ãm omu. Mē kãm hprãm kêt jakamã koja mē ã amnhĩ nhĩpêx anē. Æ mē kot amnhĩ nhĩpêx anhÿr kêt ronhÿx mē ra Tirtûm kapêr ma nē hkôt amnhĩ xunhwÿ. Hãmri nhÿm amnhĩ tã mē omu nē mē nē mē kot amnhĩ tomnuj rēnh pa. Hãmri nhÿm mē hkôt amnhĩ nhĩpêx mex nē kapêr mar mex o pa. Tã no nhÿm mē Æ amnhĩ nhĩpêx anhÿr kêt nē. Anē.

—Æ Ijaisja mē hkukamã mē harē nē mē hã kagà anē.

16 —No kêt mē kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nē mē ajamak o ixkapêr mar o ri ixkôt apa. 17 Amnepêm mē akukamã pahijaja nē Tirtûm nhÿ hã mē kãm kapêr o ri mē pa xwÿnhjaja na prem kãm ixpumunh prãm tÿx o pa. Nē mē kãm ixkapêr mar prãm tÿx o pa. No ãm mē akĩnhã ixpumunh nē ixkapêr mar kêt rãhã htyk pa. Kormã ixwrÿk nē jar ixkator kêt jakamã na prem arĩ htĩr nē pa ri ixpumunh kêt rãhã ra htyk pa. Æm mē kapxipixjaja na ka mē mÿr pē ixte amnhĩ nhĩpêx ã ixpumunh nē ixkapêr mar o ixkôt apa. Tã mē kurom mē ate ano ho ixpumunh nē ajamak o ixkapêr mar o ixkôt apa jakamã kwa mē ja hã amnhĩ pumu nē tãm amnhĩ nhĩpêx o ri apa pē akĩnh nē ri apa. Anē.

Nhÿm pre ã Jesus mē ixpê hkôt ixpa ho ixpa xwÿnhjê mã kapêr anē.

*Jesus kot hprĩ hã mēmo hy jarēnh
Makre 4.13-20; Rukre 8.11-15*

18 Hãmri nhÿm Jesus mē ixpê hkôt ixpa ho ixpa xwÿnhjê mã hprĩ hã mē ujarēnhja jarē nē mē inhmã:

—E kot paj ixprĩ hã mē amã mēmo hy ho ukapêr xwÿnh ã ixujarēnhja jarē ka

mē inhma. Nà mēmo hyta te kêp Tirtûm kapêr pyræk. Nē ahpÿnhã mēmo hy rôrôk ã pikata te kêp mē apê panhĩ ahpÿnhã mē ate Tirtûm kapêr mar nē ahpÿnhã hkôt tanhmã amnhĩ nhĩpêx tota pyræk. 19 Jakamã mē kot mar xwÿnh kwÿjaja te mē kot aptÿx kãm hy rôrôk nhÿm kuwēnh kot hwÿr mrrar nē hkrêr par xwÿnhhta pyræk. Jao Tirtûm kapêr ma no nhÿm Satanasti te kuwēnh kot hy krêr parta pyrà nē mē kot mar nē amnhĩ kaxyw hkôt hamaxpêr nē hkôt amnhĩ xunhwÿr pymaj hãmri ra tanhmã kapêrja nē mē hkrã hto. Jakamã nhÿm mē kuma nom ho hamakêtkati tokyx anē nē axte kãm hamaxpêr kêt nē pa.

20 —Nē mē kot mar xwÿnh kwÿjaja te mē kot kēnre kamã hy hkwÿ rôrôk nē higrôt nē grà par tokyx anhÿr xwÿnhhta pyræk. Jao Tirtûm kapêr ma nē hkĩnh nē. Nē kãm mar prãm nē. 21 Tã nhÿm mēhõ Tirtûm nē tanhmã mē kãm kapêr to nhÿm mē kuma nē Tirtûm kaga. Te mēmo hy higrôt nom ra grà par tokyx anhÿrta pyræk.

22 —Nē mē kot mar xwÿnh kwÿjaja te mrônhi kamã hy hkwÿ rôrôk nē higrôt nhÿm mrônhi kot kêp àmnar xwÿnhhta pyræk. Jao mē kãm Tirtûm kapêr mar prãm tã mãânēn kãm mē hikukrêx rÿnh nē mē hikàxpore rÿnh prãm. Hãmri nē ãm ja pix kukamã hamaxpêr o pa. Nē ja gryk ã axte Tirtûm kapêr mã hamaxpêr nē hkôt amnhĩ nhĩpêx kêt nē.

23 —Nē mē kot mar xwÿnh kwÿjaja te hirã kamã pika mex kãm hy hkwÿ rôrôk nē higrôt nē ô rÿnhhta pyræk. Jao ixkapêr ma nē amnhĩ krã him hagiēnh tÿx nē. Nē ixkôt ri amnhĩ nhĩpêx mex rãhã ho pa. Jakamã te mēmo hy ô rÿnh nē ô mex pyræk o amnhĩ nhĩpêx. E ã ixujarēnhja kot anhÿr. Anē.

Harôj kaàkre jarēnh

Matêwre 13.36-43; Makre 4.26-29

24 Nhÿm Jesus axte mē kot mar o hkrĩ xwÿnhjê mã awjarē nom hprĩ hã mē kãm ujarēnh kêt nē. Axte mē kãm mēmoj tã kuxi nē awjarē nē mē kãm:

—Nà nhÿrmã Tirtûm mē kot kormã htĩr ri tanhmã amnhĩ nhĩpêx to ho pa hã mē omunh xà hkôt ahpÿnhã tanhmã mē harēnh toja te mē ujarēnh ja pyræk. Koja mēhõ harôj y mex o ukapêr kaxyw ma hpur

mã mō. Hāmri nē hkre hpa nē ma akupým mō. ²⁵ Tã nhũm kamàt nhũm ra gōr nē nō. Hāmri nhũm kãm hkurê xwýnhja ma kēp ihpur wýr tē nē harôj mexta nhĩpy axtem nē kēp harôj kaàkre hkre. Harôj kaàkreja te kot harôj mex pyræk nom mē kot hkur kêt. Tã nhũm kēp harôj y mex nhĩpy hkre hpa hāmri nē ma akupým tē.

²⁶ —Tã nhũm hamē higrôt nē anhĩpê ô. ²⁷ Nhũm kãm mē àpēnh xwýnhja tee ri harôj mex kaêx ã harôj kaàkreta pumu nē hpur nhō dōn wýr tē nē kãm harê nē kãm: “Kwa ate harôj mex pix kre htã pēr hkaêx ã harôj kaàkre mãânēn kato. Kwa tanhmã na pre amnhĩ to nē hkaêx ã kato?” Anē. ²⁸ Hāmri nhũm tee ri mē kuma nē mē kãm: “Nà mēhō kãm ixkurê xwýnh na pre ã inhĩpêx anē.” Anē hāmri nhũm kãm mē àpēnh xwýnhja kãm: “Kwa xà kot paj mē tokyx ma hwýr mra nē nē harēnh pa nē kurê nà?” Anē. ²⁹ Nhũm mē kãm: “Nà kot kaj mē anē nē harôj mexta mē ho apimràatã ixpê harēnh pa. ³⁰ Kwār mãmrĩ harôj mex mē hpimràatã ô hpa mãn. Ka mē rĩ ma hwýr mra nē harôj kaàkre kumrēx jarēnh pa nē axpēn tã harê ho ê nē ma o mra nē hpòk. Hāmri nē rĩ kormã hpãnhã harôj mex jakà nē ho akuprō nē ô ho mra nē ixkre kamã haxwý.” Anē. ã mē ujarēnh kot anhýr.

Anhýr o mē kãm kapēr.

Jejus te kot mēmo hy hkryre pyræk ã harēnh

Makre 4.30-32; Rukre 13.18-19

³¹⁻³² Hāmri nhũm Jejus arĩ mē kãm amnhĩ tã kuxi nē ujarēnh o nhý. Nē tanhmã mē kãm amnhĩ tã ujarēnh to nē mē kãm:

—Nà Tĩrtũm kot mē awýr ixte mē ato amnhĩptàr kaxyw inhmēnh ã ijarēnhja. Te ixte mēmo hy pixire nhũm mē kot hkre nhũm higrôt pyræk. Kojã gaa nē hprék. Hāmri nē hpa anhgrà nhũm kuwēnhre hwýr mra nē hòptĩ kamã amnhĩm haê nhĩpêx nē kamã hikwý. Tã kot paj nhýrmã mēmo hy jarēnhja pyræk nē ixpyxi htã pika piitã hkôt mē ho amnhĩptã nē mē omunh mex rãhã ho ixpa. Anē.

Jejus te kot pãwti kaxkrit xà pyræk ã harēnh

Rukre 13.20-21

³³ Nhũm Jejus arĩ mē kãm amnhĩ tã kuxi nē ujarēnh o nhý nē mē kãm:

—E kot pa hpãnhã mē amã tanhmã pãwti kaxkrit xà jarēnh to ka mē inhma. Na hte mēnijaja pãwti nhĩpêx kaxyw hāmri nē kaxkrit xà hkwy ho grire nē kupy nē trik xôm mē ho ahkà. Hāmri nē ho pãwti nhĩpêx. Kaxkrit xàja grire htã pãwti piitã ho kaxkrit mex nē. Tã ja pyræk nē ixpyxi htã kojã mē nhýrmã pika piitã hkôt ixkôt amnhĩ nhĩpêx mex o pã.

Anhýr o mē kãm amnhĩ jarē.

Jejus kot mē ujarēnh pix kãm mē ahkre hã harēnh

Makre 4.33-34

³⁴ Na pre ã Jejusja mē ujarēnh o mē ahkre ho pa anē. ãm mē ujarēnh pix o mē ahkre ho pa. Te tãm ujarēnh pyræk no ãm mēmoj tã haxwý rý amnhĩ tã haxwý nē mē kãm tanhmã amnhĩ jarēnh to. ³⁵ ã kot mē ahkre ho pa anhýr kukamã na pre ra amnepēm Tĩrtũm nhý hã kapēr o mē pa xwýnhjê hōja harê nē hã kagà. Te Jejus tãm tanhmã amnhĩ jarēnh to pyræk o hkukamã harê nē hã kagà nē hã hkagà ho:

Kot paj mē kãm ixujarēnh pix kãm mē ahkre ho ri ixpa. Mēmoj te ho tãm pyræk nē harê nom mēmoj tã haxwý nē tanhmã mē kãm ixujarēnh to. Nē aa mē kot mēmoj mar kêt xwýnh kwý kot paj mē kãm harê kê mē kuma. Anē.

Jejus kot hprĩ hã harôj kaàkre jarēnh

Matêwre 13.24-30, 13.47-50

³⁶ Tã nhũm Jejus mē kãm ujarēnh pa nē mē kure nē ma tēn ixkrem axà. Hāmri pa mē ixpê hkôt ixpa ho ixpa xwýnhja ma hkôt mra nē ixkrem agjê. Hāmri nē harôj kaàkre hã ujarēnhja ã hkukja nē kãm:

—Kwa aprĩ hã mē inhmã harôj kaàkre jarēnhja jarē nà. Na pa mē kormã ixprĩ hã mar mex kêt nē. Anē.

³⁷ Hāmri nhũm mē inhmã:

—Tõe pa ixprĩ hã mē amã harê. ãm paa. Ixpê Tĩrtũm kot mē awýr inhmēnh xwýnh te ixte mēmo hy mex o ukapēr xwýnhja pyræk.

³⁸ Nē purta te kēp pika piitã pyræk.

Nê harôj mexta te ra mẽ ate ixkôt amnhĩ xunhwÿr nê ixkôt amnhĩ nhĩpêx o apa xwÿnhjê pyrâk.

Nê harôj kaàkreta te mẽ kot Satanasti hkôt amnhĩ nhĩpêx o mẽ pa xwÿnhjê pyrâk.

³⁹ Nê kot harôj kaàkre hkre xwÿnhhta te Satanasti pyrâk.

Nê harôj jakâr xà hã arĩgrota te Tĩrtũm kot ahpÿnhã tanhmã mẽ harênh to xà hã arĩgrota pyrâk.

Nê mẽ kot harôj jakâr xwÿnhhjaja te Tĩrtũm kapêr o wrÿk xwÿnhjê pyrâk.

⁴⁰ Mẽ ujarênhja kamã na prem harôj kaàkre kumrêx jarê nê hã hpôk jarê. Ja pyrâ nê koja nhÿrmã Tĩrtũm kot ahpÿnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwÿnhjê nhĩpêx anê.

⁴¹ —Kot paj nhÿrmã kãm mẽ piitã mẽ ho amnhĩptâr kaxyw hãmri nê kapêr o mẽ wrÿk xwÿnhjê mã anê nhũm mẽ ma mran wrÿ nê mẽ kot amnhĩ tomnuj xwÿnhjê pix o akuprô. Nê mẽ kot nhãm mẽ hkwyjê kot mẽ urâk nê tanhmã amnhĩ tomnuj to ho pa kaxyw mẽ kãm anhÿr xwÿnhhjaja nhũm mẽ mãânên mẽ ho akuprô. ⁴² Hãmri nê mẽ ho pikuprônh pa nê te mẽ kot harôj kaàkreta nhĩpêx pyrâ nê kuwy kamã mẽ rênh pa. Hãmri nhũm mẽ kamã amnhĩ xà htÿx kamã hamak rãhã nê pa ho pa. Nê amnhĩ xà htÿx ã maj tee ri mÿr rãhã ho pa. Nê tee ri amnhĩ xà hã maj amnhĩ nham o axpên kamnhar tÿx kaprÿ.

⁴³ —No ixkôt mẽ kot amnhĩ nhĩpêx xwÿnhhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tĩrtũm kot kormã pika nyw nhĩpêx mã xwÿnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamaxpêr tÿx rãhã ho apa. Anê.

*Mẽ hikukrêx mex o hpimxur jarênh
Piripos 3.7*

⁴⁴ Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê axte mẽmoj tã kuxi nê mẽ inhmã tanhmã ujarênh to nê mẽ inhmã:

—Mẽ ate ixkôt amnhĩ xunhwÿr xwÿnhhjaja te mẽ apê mẽ hikukrêx mex ã

pika japrôr xwÿnhhta pyrâk. Koja mẽhõ mẽ hikukrêx mex jamÿ nê o tẽ nê nhÿri amnhĩm ho amũxu. Kaxyw kakwÿ nê kamã hagjê nê hity hpa nê ma akupÿm tẽ. Hãmri nhũm jãã nhũm mẽhõ tẽn kãm kato. Hã pikata kakwÿ nê kãm kato nê omu nê hkĩnh nê. Nê hamaxpêr o: “E pa ma tẽ nê inhörkwÿ kamã ixkukrêx piitã ho wênê hpa nê hpãnhã kàxpore jamÿ nê ho amnhĩm mẽ hikukrêx mex ã pika japrô nê amnhĩm mẽmoj mexta o ixarĩk pa.” Anhÿr o hamaxpêr nê akupÿm hity hpa nê ma akupÿm tẽ. Hãmri nê mẽmoj mexta gryk ã õ mẽmoj piitã ho wênê hpa. Hikukrêx nê örkwÿ nhũm piitã ho wênê hpa. Hãmri nê hpãnhã kàxpore jamÿ nê ma o tẽ nê amnhĩm pikata japrô. Hãmri nê ma akupÿm hwÿr tẽ nê kamã mẽ hikukrêx mexta kwÿrÿnh pa nê ho õ kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhhta pyrâk. Na ka mẽ urâk nê inhgryk ã amnhĩ tomnuj kaga hpa nê hpãnhã ixkôt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrôr pyrâk. Anê.

Mêhõ kot kên jaxênh japrôr jarênh

⁴⁵ Nhũm Jejus arĩ mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xàj Tĩrtũm kôt amnhĩ xunhwÿ nê hkôt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhhta pyrâk. ⁴⁶ Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtô nê harê nhũm ma akupÿm tẽ nê kãm ho õ hprãm xàj hikukrêx piitã ho wênê hpa. Hãmri nê kàxpore jamÿ nê o tẽ nê amnhĩm ho haprô. Kên jaxênh mexta pix gryk ã hikukrêx piitã ho wênê hpa nê hpãnhã ho amnhĩm haprô.

—Tã ja pyrâ nê na ka htem amex nê ajamakêtkati nê axamnhix ri apa hprãm xàj ixkôt amnhĩ xunhwÿ nê ixkôt pix mã amnhĩ nhĩpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhũm Jejus arĩ mẽ inhmã awjarê nê mẽ inhmã:

—E Tirtûm kot nhÿrmã tanhmã mẽ harênh to xà hã arĭgro kot paj ixprĭ hã tanhmã mẽ amã harênh to. Te ho mẽmyjaja kot himô kamã kryhti rênh pyrãk. Koja mẽ gôx kãm kumê nê akupÿm ho api nhÿm kamã tep ohtô nê. Nhÿm omu nê kÿx pê amgrã kamã hkapĭ nê ahpÿnhã ri tanhmã kamã kute kawrà. Nê kamã mex kawrà nê kawà kamã kugjê nê mẽ kot hkur kêtja nhÿm nhãm kurê. ⁴⁹Ja pyrã nê Tirtûm kot ahpÿnhã ri tanhmã mẽ kot amnhĭ nhĭpêx to hã mẽ omunh xà hkôt tanhmã mẽ hipêx to kaxyw arĭgrota ã ã mẽ hipêx anê. Koja kapêr o mẽ wrÿk xwÿnhjaja mẽ kot hkôt amnhĭ xunhwÿr xwÿnhjê nê mẽ kot amnhĭ tomnuj o mẽ pa xwÿnhjê kawrà hpa. ⁵⁰Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhÿm mẽ tee ri amnhĭ xà htÿx ã maj amÿra nê tee ri amnhĭ nhĭpêx kaprÿ. Anê.

Nhÿm pre ã Jejusja axte mẽ ixpê hkôt mẽ ixpa ho mẽ ixpa xwÿnhjê mã ujarênh anê.

⁵¹Hãmri nê mẽ inhmã:

—E xàn ka mẽ atã aprĭ hã ixujarênhta ma nã?

Anê pa mẽ kãm:

—Tÿ. Nà na pa mẽ atã ixprĭ hã mar mex nê. Anê.

⁵²Hãmri nhÿm mẽ inhmã:

—Tôe. Nà ãm hãmri. Na ka xep mẽ ra ixte mẽ ahkre nywta mar mex nê. Nê mẽ akwÿjaja mãânên Tirtûm kapêr tÿm mar mex nê. Te mẽ apê mēhō apkur xà rax pyrã nê ma ho mẽ piitã mẽ hipêx o ri mẽ hkôt paja pyrãk. Ja pyrã nê kêr ka mẽ ma mẽ piitã mẽ hkôt Tirtûm mẽ wa ixkapêr o mẽ ahkre ho ri mẽ hkôt apa. Anê.

Najare nhō xwÿnhjaja kot Jejus kaga hã mẽ harênh

Makre 6.1-6; Rukre 4.16-30; Juãw 1.11

⁵³ã Jejus mẽ inhmã ujarênh par anê.

⁵⁴Hãmri nê ma akupÿm Najare hwÿr mō nê Tirtûm kapêr o mẽ ahkre xà hã ixkre hwÿr tē nê axà nê mẽ ahkre ho nhÿ. Nhÿm mẽ amnhĭ jaêr pê tanhmã kot mẽ ahkre hto hã kuma nê tee ri hkukamã hamaxpêr nê axpên mã:

—Tk. Kwa kêp mẽ panhĭō htã tanhmã kot we amnhĭ to nê ã ahpumunh tÿx kôt mẽ pamã kapêr anê nê ri mẽ kãm aa mẽ

kot mẽmoj pumunh kêt kwÿ ho anhÿr o pa? ⁵⁵⁻⁵⁶Na pre mẽ panoo mã hprêk nhÿm mẽ pahte pahprĭ hã hkwyjê pumunh. Kêp pĭ kuprãr xwÿnh Juje mẽ hprō Marir wa hkraa. Nê kêp Xiakre nê Juje nê Simãw nê Jut mẽ htōō. Nê htōxjaja jar mẽ pakamã pa nhÿm mẽ pahte mẽ piitã mẽ omunh mex kênã kot kêt we mẽ kurom ã ahpumunh tÿx anê. Anê.

⁵⁷Hãmri nê kamã gryk nê hkaga. Hãmri nhÿm tee ri amnhĭ tã mẽ omu nê mẽ kãm:

—Nà Tirtûm nhÿ hã kapêr jarênh o mẽ pa xwÿnhjaja na htem krĭ hkwy kamã kãm mẽ mar prãm nê. Nom ô krĭ kamã mẽ kot karãre rÿm hprêk kãm omunh xwÿnhjaja na htem kuma nê ãm kuma. Anê.

⁵⁸Tã mẽ kot amnhĭ kaxyw hkôt hamaxpêr kêt jakamã nhÿm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm. No ãm mẽ kãm mẽmoj to grêre nê ho anê.

14

Mẽ kot Juãw Paxis pĭr ã mẽ harênh Makre 6.14-29; Rukre 9.7-9

¹Tã nhÿm pika pê Garirej kamã mẽō pahĭhti Erox Jejus jarênh ma ²nê tee ri hkukamã hamaxpêr nê hã ô pōristi mã kapêr nê mẽ kãm:

—Kwa pêr Juãw Paxis na nã? Ra ixte hã ixàmnhên nhÿm mẽ kot hpĭr tã mãn tanhmã amnhĭ to nê akupÿm htĭr. Nà pêr tãm kênã. Jakamã na hte aa mẽ kot mẽmoj pumunh kêt kwÿ ho anhÿr o pa. Anê.

³⁻⁵Na pre ra Erox htō pê hprōptàn ho hprō. Tō arĭ htĭr tã nhÿm axtem nê kêp utã nê ho hprō. Hãmri nhÿm Juãw Paxisja harênh ma nê hã kãm akir nê kãm:

—Kwa Eroxis kêp atō hprō kênã na ka kêt axtem nê kêp utã nê ho aprō. Kwa ja omnuj tÿx o omnuj tÿx. Anê.

Hãmri nhÿm amnhĭ tã kuma nê kamã gryk nê kot hpĭr kaxyw. Tã nom nhÿm Ijaew kot axpên mã kêp Tirtûm nhÿ hã kapêr jarênh xwÿnh ã harênh jakamã nhÿm mẽ umaj hpĭr kêt nê. ãm ho prês nê haxà nhÿm hkrĭ ho hkrĭ.

⁶Tã nhÿm jãã nhÿm Erox kator ã arĭgro kato nhÿm mẽ hã akuprō nê hã hkĭnh. Hãmri nhÿm hprō nyw kra niti mẽ hwÿr axà nê ahte mẽ hipôk ri mẽ kãm gre. Mẽ kot

omunh nê kamã hkurê kaxyw nhũm mē noo mã hpijaam kêt nê mē kãm grer o xa. Hãmri nhũm pahi Eroxo omu nhũm ja kãm mex nê nhũm hkĩnh nê kamã nopyma nê. ⁷Hãmri nê kãm:

—Nà ãm hãmri na ka ã mē inhmã amnhĩ nhĩpêx anê. Jakamã kwa mãmri mẽmoj tã ixwỳ. Amã mẽmoj prãm xà hkôt hã ixwỳ kot paj amã kugõ. ãm hãmri na pa amã anê. E mẽmoj na amã hprãm? Anê.

⁸Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwỳr o tẽ nê inhmã agõ. Anê.

Ra katorxà kot kaxyw kãm karõ jakamã nhũm ã hã hwỳr anê. ⁹Hãmri nhũm Eroxo tee ri kuma nhũm ja kêp omnuj nê. Nom ra mẽ pikuprõnh rax xwỳnhjê nhĩpõk ri mẽ noo mã kot kãm: “E mãmri amã mẽmoj prãm xà hkôt hã ixwỳ pa amã kugõ.” Anhỹr jakamã kãm kot kêp nê hprãm kêt nê. Hãmri nê Juãw Paxis wỳr õ põristi hkwỳrê ¹⁰nhũm mẽ ma mẽ hagiênh xàta wỳr mra nê unê nê mut krãhta. ¹¹Hãmri nê hkrã mỳ nê pasiiti kamã kuxà nê ma akupỹm nita wỳr o tẽ nê kãm kugõ nhũm kumỳ nê ma katorxà hwỳr o tẽ nê kãm kugõ.

¹²Hãmri nhũm Juãw Paxis kôt mẽ pa xwỳnhjaja tee ri mẽ kot hpĩr ã harênh ma nê ma hwỳr mra nê kumỳ nê ma o mõn haxà. Hãmri nê ma Jejus wỳr mra nê kãm harê.

Jejus kot mẽ ho ohtõ nê mẽ kãm mẽ õ hã harênh

Makre 6.30-44; Rukre 9.10-17; Juãw 6.1-14

¹³Hãmri nhũm Jejus Juãw Paxis jarênh ma nê hkaprĩ nê. Nê ma himõ nhĩkjê hwỳr kapõt ã mõr kaxyw pàr krem axà nê ma mõ. Pa mẽ hkôt ixpa ho ixpa xwỳnhjaja ma hkôt mra. Hãmri nhũm krĩ hkwỳ kamã mẽ pa xwỳnhjaja harênh ma nê ohtõ nê ma mẽ inhĩhkrep pikap mra. Nê ra amnhĩ to wa nê mẽ inhmõr xàja wỳr põj nê mẽ ixkutêp hkrĩ. ¹⁴Jakamã pa mẽ mõ nê mẽ hwỳr põj nê mẽ omu. Hãmri nhũm Jejus mẽ omu nê kãm mẽ hkaprĩ nê mẽ kãm mẽ à xwỳnhjê ho mex pa.

¹⁵Tã nhũm ra myt àr kaxyw pa mẽ hkôt ixpa ho ixpa xwỳnhjaja tee ri mẽ omu nê Jejus wỳr mra nê kãm:

—Kwa na ra amỹkry htỳx nê. Amnhĩ nê mẽ hano kê mẽ ma nhỹri krĩ hkwỳ hwỳr mra nê tokyx amnhĩm mẽmoj japrõ nê kuku. Mo jar mẽ apkur xà hã mẽõ? Jar akunĩ pix kênã. Anê.

¹⁶Hãmri nhũm mẽ inhma nê mẽ inhmã:

—Nà kot paj mẽ hanor kêt nê. Mẽ kajaja kot kaj mẽ kãm õ nhũm mẽ apku. Anê.

¹⁷⁻²¹No nhũm mẽ ohtõ rax kumrêx. Mẽmyjaja kêp 5.000. Nê kaxyw mẽ hprõ nê mẽ hkrajaja. Jakamã nhũm Jejus ã mẽ inhmã kapêr anê pa mẽ tee ri mẽ hkukamã ijamaxpêr nê kãm:

—Kwa nà mẽ panhõja raxti hã. Mẽ panhõ pãwti kêp sĩk pix. Nê kaxyw tep grãja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhỹri mẽ kãm mẽ mẽmoj japrõ nhũm mẽ kuku? Anê.

Hãmri nhũm mẽ inhma:

—Nà pu mẽ kãm mẽmoj japrõr kêt nê. Kot puj mẽ kãm mẽ panhõta o anhgrà. E mẽ kãm anê kê mẽ ahpỹnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jejus pãwti mẽ tepja jamỳ nê kaxkwa hwỳr rĩt nê ho Tĩrtũm wỳ nê kãm:

—Pa Papaj? Nà apê mẽ inhmã mẽ inhõ ho apa xwỳnh jakamã amex o amex. Anê.

Hãmri nê mẽ kãm ho hkry hpa nê hkôt mẽ ixpa ho mẽ ixpa xwỳnhjê mã kugõ pa mẽ õ ri ho mẽ hipêx pa. Nhũm mẽ piitã apkur o hkrĩ. Mẽõja grire htã nhũm Jejus tanhmã mẽ kãm ho rax to nhũm mẽ ohtõ rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hãmri pa mẽ akupỹm hakrêx o akuprõ nê ho kawà ho 12 nê ho nỳt pa.

Jejus kot gõ krãhkà hã ãm nê htẽm ã harênh

Makre 6.45-52; Juãw 6.15-21

²²⁻²³Tã nhũm Jejus mẽ ixpê hkôt ixpa ho ixpa xwỳnhjê mã anê pa mẽ akupỹm pàr mã agjê nê ma xarmã hkukamã mõ. Hãmri nhũm mẽ kot mar o kuhê xwỳnhjê jano nhũm mẽ ma akupỹm hapêx. Hãmri nhũm Jejus kot Tĩrtũm mã amnhĩ jarênh kaxyw ahte tẽ nê hixêt ã api nê himõk ã kãm amnhĩ jarênh o nhỹ.

Gaa nhũm ra kamàt nhũm arĩ ahte hixêt nhĩmõk ã nhỹ.

²⁴ Rôm pa mẽ pàr kãm mẽ inhmôr xwỳnhjaja kormã himô nhĩpôk ri mỗ. Pu nhũm kôk xàpêr tỳx mẽ ixkaxpa. Nê gô axpên tak tỳx nê pa mẽ tee ri rrêm̄ti ho gô rên̄h nhĩpêx nê tee ri axpên pumu.

²⁵ Tã nhũm krãhyre kà nhũm Jejus man mẽ ixkôt gô krãhkà hã xan tẽ ²⁶ pa mẽ amnhĩ wỳr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarõ hã hkamnhĩx nê umaj ixàmra rax nê. ²⁷ Hãmri nhũm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²⁸ Hãmri nhũm Simãw Pêtre kuma nê kãm:

—Kwa xà ka na ka tẽ? Tôe apê mẽ inhõ Pahĩti jakamã kwa amnhĩ wỳr ixwỳ pa apyrã nê gô krãhkà hã xa nê awỳr tẽ nà? Anê.

²⁹ Hãmri nhũm kãm:

—Tôe mamrĩ amnê ixwỳr tẽ. Anê.

Hãmri nhũm kuma nê pàr rùm kato nê hwỳr tẽ. Uràk nê gô krãhkà hã hwỳr tẽ.

³⁰ Hãmri nê kormã htêp o htêm mẽ kôk xàpêrta kamã ama nê tee ri amnhĩ kukamã hamaxpêr pê ra àr o mỗ. Hãmri nê àmra kamã Jejus mã amnhĩ to akir nê kãm:

—Kwa tokyx ixto api Pahĩti. Anê.

³¹ Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom mãmri man ixwỳr atêmre hkêt nê? Anê.

³² Hãmri nhũm wa akupỳn mẽ ixwỳr tẽ nê wa axà. Hãmri nhũm kôk katàt kôt pinhkrên̄h pa nhũm gô tãm nôr kurê kumrêx. ³³ Hãmri pa mẽ Jejus kot ã amnhĩ nhĩpêx anhỳrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tĩrtũm Kra hã amnhĩ jarê. Nà apê Kra kênã. Anê.

Jenêjare kamã Jejus kot akupỳm mẽ ho mex ã harên̄h

Makre 6.53-56

³⁴ Tã pa mẽ ra himô hã rê nê Jenêjare hwỳr pøj. ³⁵ Hãmri nê ma kapê hã ri ixpa. Hãmri nhũm pika nhõ xwỳnh kwỳjaja Jejus pumu nê mẽ piitã mẽ kãm harên̄h o hprôt nê ahpỳnhã hwỳr nhỹhỹnh mẽ à xwỳnhjê hã karõ. Nhũm mẽ man mẽ ixwỳr mẽ o mra ³⁶ nê mẽ ho Jejus wỳ nê kãm:

—Pa? Kwa kê mẽ à xwỳnhjaja akupỳm mex kaxyw apê axê kupê nà? Anê.

Hãmri nhũm mẽ kãm:

—Tôe. Kwãr mẽ mãmri mran hkupê. Anê.

Hãmri nhũm mẽ kuma nê axpên pãnhã hwỳr mra nê kêp ê pix kupên̄h tã ra akupỳm mex nê ma akupỳm mra.

15

Parijew nhõ xwỳnh mẽ Tĩrtũm kapêr tũm o mẽ ahkre xwỳnhjê jarên̄h

Makre 7.1-13

¹ Tã nhũm Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjaja Jerujarê rùm ma Jejus wỳr mra. Na htem mẽ ixkukamã mẽ inhĩgêjtê pyrà nê apkur kaxyw nê amnhĩ nhĩhkra kuhõnh ryy nê. Amnhĩ nhĩhkra htyk pix kuhõnh nê hkrĩ hkêt nê ãm amnhĩ nhĩhkra kuhõnh japjêê nê. Nê õ prat kuhõnh japjêê nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harên̄h ã amnhĩ kamnhĩx jakamã na pre ã amnhĩ nhĩpêx anhỳr o pa. Jakamã nhũm mẽ ma Jejus wỳr mra. ² Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhĩgêjtaja na prem apkur kaxyw nê amnhĩ nhĩhkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa xwỳnhjaja na htem mẽ ixpyrà nê ã amnhĩ nhĩpêx anhỳr kêt nê. Kwa mo na htem amnhĩ nhĩhkra tyk kuhõnh tokyx anê nê hkrĩ nê apku? Anê.

³ Hãmri nhũm mẽ kuma nê mẽ kãm:

—Tk. Na ka htem ãm mẽ panhĩgêjtê hkôt pix mã amnhĩ nhĩpêx o apa no Tĩrtũm kapêr kôt amnhĩ nhĩpêx kêt nê. ⁴ Tĩrtũm na pre mẽmoj tã mẽ pamã karõ ho:

Kêr ka mẽ anhĩpêêxà nê mẽ akatorxà wa hã apijaàm nê mẽ ho ajuta rãhã ho ri apa. Kot kaj mẽ ã amnhĩ nhĩpêx anhỳr kêt nê tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anê.

—Na pre ã Tĩrtũmja mẽ pamã karõ anê.

⁵ No mẽ kajaja na ka htem ã akwỳjê mã karõ anhỳr kêt nê. ãm kapêrja kwỳm na ka htem mẽ kãm karõ nê mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêxà ho ajuta hto kaxyw wa kãm hkwy nhõr kêt nê. ãm ho ate wa ho ajuta hkêt ã wa kãm amnhĩ jarê hãmri nê Tĩrtũm mã amnhĩ jarênh xà hã ixkre hwỳr o tẽ nê mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex nê. Kêr ka mẽ ã amnhĩ nhĩpêx anhỹr o ri apa.

—Anhỹr o na ka htem mẽ kãm karõ ho ri apa. ⁶ Nom Tĩrtũm kapêr tũm kot ã ja jarênh anhỹr kêt. ãm amnhĩ krã hkôt na ka htem ã mẽ kãm karõ punuj o ri apa anê. Te mẽ akapêrja mex o kot Tĩrtũm kapêr jakrenh pyrãk. ⁷ Mẽ ate Tĩrtũm kôt amnhĩ nhĩpêx ã amnhĩ jarênh tã ãm amnhĩ to axêx nê hkôt amnhĩ nhĩpêx kêt nê. Na pre Tĩrtũm amnepêm mẽ akukamã tanhmã mẽ ajarênh to. Nhũm ã hã mẽ kãm kapêr jarênh xwỳnh Ijaisja ô ri mẽ kãm mẽ ajarê nê hã kagà. Te Tĩrtũm tãm kot mẽ ajarênh pyrãk. ⁸ Na pre mẽ akukamã mẽ ajarênh o: Mẽ kãm ixkĩnh ã mẽ kot amnhĩ jarênh tã mẽ kãm ixkĩnh kêt. Na htem kãm ixprãm ã amnhĩ jarênh kaprỳ.

⁹ Mẽ kot ixkuhpa hã amnhĩ krã hkôt mẽmoj tã hkwyjê mã karõ ho pa jakamã na htem kot ixkôt amnhĩ nhĩpêx o pa hã amnhĩ jarênh kaprỳ. Anê.

—Na pre ã Ijaisja Tĩrtũm nhỹ hã mẽ akukamã mẽ ajarê nê mẽ atã kagà anê. Anê.

Nhũm pre ã Jejus Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr anê.

*Mẽmoj kot mẽ pahtomnu hã harênh
Makre 7.14-23*

¹⁰ Tã nhũm Jejus amnhĩ wỳr mẽ kot mar o kuhê xwỳnhjê hwỳ nê axte mẽ kãm kapêr nê mẽ kãm:

—E mẽ inhma nê inhmar tỳx nê. ¹¹ Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nê amnhĩ krã hkôt mẽ axàpkur xà hã tanhmã mẽ amã karõ hto ho pa. Tĩrtũm kot ja hã mẽ apumunh kôt mẽ amex ã mẽ

ajarênh kaxyw ã mẽmoj tã mẽ amã karõ anê. Nom na hte Tĩrtũm tanhmã mẽ kot amnhĩ nhĩhkra kuhõnh to hã mẽ omunh xà hkôt tanhmã mẽ harênh to hkêt nê. Rỳ mẽ axàpkur xà pumunh kôt mẽ mex ã mẽ ajarênh kêt nê. Ja tanhmã kãm kute hkêt. Na hte ã mẽ kot amnhĩ nhĩpêx anhỹr ã mẽ omunh xà hkôt mẽ mex ã mẽ harênh rỳ mẽ mex kêt ã mẽ harênh kêt nê. Na hte mẽmoj kur ã mẽ omu nê ãm mẽ omu nê hã tanhmã mẽ harênh to hkêt nê. ãm mẽ kapêr punuj rỳ mẽ kapêr mex ã mẽ mar kôt pix mã na hte tanhmã mẽ harênh to. Anê.

¹² Nhũm pre ã Jejus mẽ kãm kapêr anê pa mẽ hkôt mẽ ixpa ho mẽ ixpa xwỳnhjaja kuma hãmri nê hwỳr mra nê kãm:

—Kwa na ka ã mẽ kãm akapêr anê nhũm Parijew nhõ xwỳnhjaja tee ri ama nhũm ja mẽ kêp omnuj nê. Anê.

¹³⁻¹⁴ Hãmri nhũm mẽ inhma nê tanhmã mẽ inhma Parijew nhõ xwỳnhjê jarênh to nê hprĩ hã mẽ hkukamã mẽ harênh o:

—Tk. Kwãr mãmrĩ mẽ kêp omnuj. Mẽ kot Tĩrtũm kapêr tũm o mẽ ahkre ho pa htã na htem hkôt amnhĩ nhĩpêx kêt. Jakamã te mẽ nohkre xwỳnh kot amnhĩ nhĩpêx pyrãk. Koja mẽhõ nohkre htã amnhĩ kôt nhỹhỹm nohkre hõ ho mõi hãmri nê wa hamẽ pry pumunh kêt nê htỳx mõi hãmri nê nhỹri ahkrehti kamã tẽm. Tã Parijew nhõ xwỳnhjaja te kot wam htẽm xwỳnhhta pyrãk nhũm mẽ kot mẽ mar xwỳnhjaja te kot wam htẽm xwỳnh kôt hõ htẽmta pyrãk. Jakamã Parijew nhõ xwỳnhjaja mẽ kot mẽ mar o pa xwỳnhjê mẽ koja mẽ hpimràatã nhỹrmã te ahkrehti kamã rôrõk par pyrãk o amnhĩ nhĩpêx nê mex kêt nê pa ho pa. Koja kaxkwa kamã inhõ Papaj nhỹrmã amnhĩ nê mẽ hanor pa.

—Inhõ Papaj te kêp mẽmo hy hkre ho pa xwỳnhhta pyrãk. Na htem mẽmo hy hkre nhũm higrõt hapõj nê higrõt mex nê. Hãmri nhũm mẽ hwỳr mra nê omu nê nê mẽmoj nhĩgrõt punuj jarê nê kurê. Ja pyrã nê koja nhỹrmã inhõ Papaj amnhĩ nê Parijew nhõ xwỳnhjê janor pa nhũm mẽ mex kêt nê pa ho pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mẽ harênh anê pa mẽ

mar o ixkrî. ¹⁵ Hâmri nhûm Simãw Pêtre tee ri Tîrtûm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hâmri nhûm kuma nê hprî hã mẽ inhmã awjarê nê mẽ inhmã:

—Kwa xàn ka mẽ kormã aprî hã ja mar kêt nê? ¹⁷ E pa ixprî hã mẽ amã harê ka mẽ inhma. Nà na htem mẽmoj ku nhûm hte mẽ hkrã hi hwÿr gjêx kêt nê. Na hte mẽ õhy pix wÿr agjê nê gaa nê nhãm hapôj nê hapêx. Na htem mẽ apkur xàja ku nê ý hã tanhmã amnhî tomnu hto hkêt nê. Jakamã na hte Tîrtûm ja hã mẽ omunh xà hkôt tanhmã mẽ harênh to hkêt nê. ¹⁸ ãm mẽ hkrã kamã mẽ hamaxpêr punuj pix nhÿ hã mẽ kot tanhmã amnhî tomnuj to jakamã na hte Tîrtûm mẽ hamaxpêr ã mẽ omunh xà hkôt tanhmã mẽ harênh to. ¹⁹ Koja mẽhõ tanhmã hamaxpêr punuj to nê ra hkôt amnhî tomnuj pix o pa. Na htem nhãm mẽ hpar o pa nê mẽ kêp ahkî nê amnhî to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhîkati nê mẽ hkuprÿ hwÿr mra nê mẽ ho amnhîkati. Nê tanhmã ri axpên tomnuj to ho pa. ²⁰ Mẽ hamaxpêr punuj nhÿ hã na htem ã amnhî nhîpêx anhÿr o pa. No na hte Tîrtûm mẽ kot amnhî nhîkra kuhõnh japjê hkêt ã mẽ omunh xà hkôt mẽ kot amnhî to mex xwÿnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukaprî hã harênh

Makre 7.24-30

²¹ Tã nhûm Jejus mẽ inhmã kapêr pa hãmri nê mẽ inhmã anê pa mẽ ma hkôt mō. Ma Xir mẽ Sitōja wa pu hã ri ixpa. ²² Nhûm mẽhõ nija omu nê hwÿr tē. Mẽ ixkînhã kêp Ijaew kêt tã hwÿr tē. Kanaã nhõ xwÿnh na pre. Tã Jejus wÿr tē nê kãm:

—Ka Pahihti Jejus? Apê Tîrtûm kot mẽ ixwÿr amênh xwÿnh jakamã xê ixujarênh ma nê ixkamã axukaprî hkêt wehe. Na mẽkarõmnutija tanhmã ixpê ixkra ho nhûm ixpê omnuj tÿx kumrêx. Anê.

²³ Hâmri nhûm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwÿnhjaja kãm:

—Kwa hano kê ma akupÿm tēē ri. Na ãm ri mẽ pahkôt xatã hkrata jarênh pix o ri pa. Anê.

²⁴ Nom nhûm kot amnhî tã kamã hamak kaxyw tanhmã mẽ inhmã hã kapêr to nê mẽ inhmã:

—Nà ãm Ijaewjê pix wÿr na pre Tîrtûm inhmê. Te mẽ kêp ôwêhti pikunor pyrak o na htem htÿx ri amnhî nhîpêx o pa. Jakamã ãm mẽ hwÿr pix mã na pre inhmê. Na kormã inhmã tanhmã nhãm mẽ hkwyjê jarênh to hkêt nê. Anê.

²⁵ Hâmri nhûm nitita tee ri amnhî tã kuma nê hwÿr tē nê kutã hkõnkrã ho htēm nê nhÿ nê kãm:

—Xê ma we ixkamã axukaprî hkêt wehe. Anê.

²⁶ Hâmri nhûm kãm:

—Nà kormã. Na pre Tîrtûm mẽ kêp Ijaewjê pix wÿr inhmê. Jakamã na pa kormã nhãm tanhmã mẽ akwÿjê ho mex to hkêt nê. Anê.

²⁷ Hâmri nhûm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

²⁸ Hâmri nhûm kuma nê kãm:

—Nà ãm hãmri na ka ã akra kaxyw inhmã ajamaxpêr tÿx anê. Jakamã kot paj nê mẽkarõmnutita jano. Koja axte tanhmã apê ho hkêt kumrêx.

Anhÿr o kãm kapêrja rôm nhûm hkraja akupÿm mex kurê kumrêx.

Jejus kot mẽ à xwÿnhjê ho ohtô nê mẽ ho mex ã harênh

Makre 7.31-37

²⁹ Tã nhûm Jejus mẽ inhmã anê pa mẽ ixrohã krîja pē ixkato nê ma himô rax pē Garirej wÿr mō. Nê nhÿri gō mÿri hixêt wÿr mō nê hã api nê ixkrî. ³⁰ Hâmri nhûm mẽ ohtô nê ma mẽ ixkôt mra. Nê mẽ à xwÿnhjaja nhûm mẽ hamÿ nê Jejus wÿr mẽ o mra. Na prem ohtô rax kumrêx. Ra ri mẽ pa hkêt xwÿnhjaja nê mẽ nohkre xwÿnhjaja nê mẽ hyk o mẽ pa xwÿnhjaja. Nê mẽ kapêr kêt xwÿnhjaja nê ahpÿnhã ri tanhmã mẽ à kute xwÿnhjaja nhûm mẽ hamÿ nê ma Jejus wÿr mẽ o mra nê kutã mẽ haxwÿ. Hãmri nhûm mẽ omu nê ahpÿnhã akupÿm mẽ ho

mex pa. ³¹ Jakamã na pre mẽ kapêr kêt xwýnhjaja akupým kapêr mex nê. Nê ri mẽ pa hkêt xwýnhjaja akupým mrar mex nê. Nê mẽ hyk o mẽ pa xwýnhjaja akupým tãm ri mra. Nê mẽ nohkre xwýnhjaja akupým rît mex nê. ã ahpýnhã akupým mex par anê. Hãmri nhũm mẽ kot hwýr mẽ hamýnh nê Jejus wýr mẽ o mrar xwýnhjaja amnhĩ jaêr pê akupým mẽ mex ã mẽ omu nê mẽ kamã no puma nê hkĩnh nê. Hãmri nê Tĩrtũm mã mex o mex ã harê nê axpên mã harênh o:

—Nà ãm hãmri mẽ panhõ Tĩrtũmja ãm mex o mex. Anê.

Jejus kot mẽ ho 4.000 nê mẽ kãm mẽ õ hã harênh

Makre 8.1-10

³² Tã nhũm Jejus mẽ ixte hkôt ixpa ho ixpa xwýnhjaja amnhĩ wýr mẽ ixwý nê mẽ ixkôt mẽ mrar xwýnhjê jahkre nê mẽ inhmã:

—E. Ka mẽ rĩ kam jajê pumu. Na pa ra inhmã mẽ hkaprĩ nê. Na mẽ pahkôt ri pa hã apkati axkrunêpxi nhũm ra mẽ kêp mẽõja hapêx pa. Kojã mẽ apkur kêt rãhã ma akupým mẽ õ krĩ hwýr pa hãmri nê pry hã hiroto nê rôrôk o pa. Mẽ õ krĩ hwýr awryy. Anê.

³³ Nhũm pre ã mẽ inhmã mẽ harênh anê pa mẽ tee ri kuma hãmri nê kãm:

—Kwa nom nhýri kot pu mẽ kãm mẽmoj japró nhũm mẽ tokyx kuku? Ja kapôt pix kênã. Nê mẽ ohtô griiã. Anê.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nê hikwý? Anê.

Hãmri pa mẽ kãm:

—Nà ãm kêp 7 pix. Nê kaxyw tep kwý no ãm grêre. Kot mẽ ho dare kaxyw ã. Anê.

³⁵ Hãmri nhũm mẽ inhma nê mẽ ixkôt mẽ mrar xwýnhjê mã anê nhũm mẽ hkrĩ pa.

³⁶ Hãmri nhũm pãwti mẽ tep grêreta jamý nê ho Tĩrtũm wý nê kãm:

—Pa Papaj. Nà apê mẽ inhmã mẽ inhõ ho apa xwýnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa. ³⁷⁻³⁸ Hãmri nhũm mẽ piitã apku nê õhy htu hpa. Nhũm prem mẽmyjaja kêp 4.000 nê kaxyw mẽnijaja nê mẽhprĩjaja. Mẽ ohtô rax kumrêx tã nhũm Jejus mẽõ ho mẽ

hipêx pa. Hãmri pa mẽ hakrêx o akuprõ nê ho kawà ho 7 nê ho nýt. ³⁹ Hãmri nhũm Jejus ma akupým mẽ õ krĩ hwýr mẽ hano pa mẽ pãr krem agjê hãmri nê ma ijaxwýja mõ. Ma pika pê Makatã hwýr mõ.

16

Parijew nhõ xwýnh kwý kot aa mẽ kot mẽmoj pumunh kêt õ ho anhýr ã Jejus wýr ã mẽ harênh

¹ Tã pa mẽ ra hwýr pøj nhũm Parijew mẽ Satusew nhõ xwýnhjaja Jejus pumu nê hwýr mra. Nê hêx rom kot kamã hamak kaxyw hwýr mra nê kãm:

—Pa Jejus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhýr ã apumu nê Tĩrtũm kot mẽ ixwýr amênh ã akôt ijamaxpêr kurê kumrêx. E kwa tokyx. Anê.

²⁻³ Hãmri nhũm mẽ kuma nê mẽ kãm:

—Tk. Nà kot paj mẽ amã ho anhýr kêt nê. Mẽ ate hã ixpumunh nê ixkôt ajamaxpêere kaxyw ã. Na ka htem kaxkwa kamã kakrã pumu nê axpên mã na wrýk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhĩpêx to hã ixpumu nom Tĩrtũm kot mẽ awýr inhmênh xwýnh ã ixkôt ajamaxpêr kêt nê. ⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awýr inhmênh xwýnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwý ixte mẽ amã ho anhýr kaxyw ka mẽ inhmã hã karõ. Nà kot paj mẽ amã ho anhýr kêt nê. Kormã. Kot paj ãm nhýrmã te amnepêm Jõhti kot amnhĩ nhĩpêx pyrãk o amnhĩ nhĩpêx. E ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhýr kêt nê. Anê.

Nhũm pre ã Jejus mẽ kãm kapêr anê hãmri pa mẽ ixrohã mẽ kêp ixkato nê ma ixpa.

Jejus kot hkôt mẽ pa xwýnhjê jahkre hã harênh

Makre 8.14-21

⁵ Tã pa mẽ Jejus mẽ ixrohã ma mõ nê pãr mã agjê nê ma xarmã akupým rê nê hikjê hã mõ. Hãmri nê tee ri mẽ ixãpkur xã japêr nê axpên mã:

—Kwa na pu mẽ panhõ pãwti ho paja-makêtkati nê kure. Anê.

⁶Hãmri nhũm Jejus mẽ inhma nê tanhmã mẽ inhma Parijew mẽ Satusew nhõ xwýnhjê jarênh to. Nom pãwti hã kuxi nê mẽ inhma mẽ harê nê mẽ inhma:

—Kwa mẽ o kora. Kêr ka mẽ Parijew mẽ Satusew nhõ xwýnhjê mẽ kêp pãw kaxkrit xà hkwy hpyr kêt nê. Anê.

⁷Hãmri pa mẽ tee ri kuma nê ixprĩ hã mar mex kêt nê. Nê arĩ kapêrta ã axpên kukjêr o hkôt mō nê axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwý hpyr nê mẽ pahkurê nã? Anê.

⁸Hãmri nhũm mẽ inhma nê mẽ inhma:

—Hêxta waa nê. Mon ka mẽ ãm axpên mã mẽ panhõ pãwti hkêt pix jarênh o mō? Pêr kormã mẽ ate amnhĩ kaxyw inhma ajamaxpêr tỳx kêt. ⁹Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhĩpêx par. Nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh par nê ho kawà ho 12 nê ho hipu. ¹⁰Nê ham pãwti kêp 7 o mẽ kêp 4.000 nhĩpêx par nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh raxja. ¹¹Ra ixte mẽ anoo mã ja ho anhÿr o axkrut tã ka mẽ ra hã ano hkêt nê arĩ axpên mã mẽ paxàpkur xà pix jarênh o ixkôt mō. Nà mẽ paxàpkur xàja na pa harênh kêt nê. Parijew mẽ Satusew nhõ xwýnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

¹²Nhũm pre ã mẽ inhma kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwýnhjê kapêr kôt amnhĩ nhĩpêx nê na ka mẽ ixkurê nê ã mẽ harênh anê. Anê.

Jejus kot amnhĩ tã hkôt mẽ pa xwýnhjê kukjêr ã harênh

Makre 8.27-30; Rukre 9.18-21

¹³Tã pa mẽ axte Jejus kôt mō nê pika pê Sejarej Piripos kamã kormã mō nhũm Jejus amnhĩ tã mẽ ixkukja nê mẽ inhma:

—E mẽ inhma mẽmoj jarê. Tanhmã na hte mẽ akwýjaja axpên mã ijarênh to wehe? Anê.

¹⁴Hãmri pa mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ajarênh o finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tōhã apê Tirtũm nhÿ hã akapêr o apa xwýnhjê hõ akupÿm atĩr ã ajarê. Nê tōhã finat Jeremĩstija rÿ axtem hõ hã ajarê. ã na htem ahpÿnhã axpên mã ajarênh anê. Anê.

¹⁵Hãmri nhũm mẽ inhma nê mẽ inhma:

—No mẽ kajaja? Ixpê mẽhõ hã na ka htem axpên mã ijarê? Anê.

¹⁶Hãmri nhũm Simãw Pêtre kãm:

—Nà apê Tirtũm kot mẽ ixkaxyw axãm nê mẽ ixwÿr amênh xwýnh na ka. Nê apê mẽ ixpiitã mẽ inhõ Pahi Maati na ka. ã na pa htem axpên mã ajarênh anê. Anê.

¹⁷Hãmri nhũm kuma nê kãm:

—Nà ãm hãmri na ka ã ijarênh anê Simãw Pêtre. Nom amnhĩ krã hkôt na ka ã ijarênh anhÿr kêt nê. Tirtũm tãm kot amã ixto amnhĩrit xà hkôt na ka ã ijarênh anê. ¹⁸Nà akumrêx na ka ã ijarênh anê. Tã koja mẽ apyrà nê nhÿrmã mẽ kot ixkôt amnhĩ xunhwÿr xwýnhjaja ma hkwyjê mã ja hã ijarênh o ri krĩ piitã hkôt pa. Hãmri nhũm mẽ hkwyjaja mẽ kuma nê mẽ apyrà nê ixkôt amnhĩ xunhwÿ. Hãmri nhũm mẽ kêp ixprãm nõkati xwýnhjaja tee ri tanhmã mẽ kot ijarênh toja ma nê ã ijarênh anhÿrja nê mẽ kãm kapêr tã nom ho hkapyrÿ. ã koja ixkôt mẽ kot amnhĩ xunhwÿr xwýnhjaja mẽ kãm ijarênh o pa anê. Jao te mẽ apê kên nhũm ixte mẽ ato amnhĩm inhõrkwÿ nhĩpêx pyràk. Tã akumrêx ate ã ijarênh kot anhÿr jakamã kot paj te ixte akumrêx amÿnh nê ato ixtêm nê inhõrkwÿ nhĩpêx kaxyw amnhĩm akumrêx axãm pyràk o anhĩpêx Simãw Pêtre.

¹⁹—E kêr ka ma inhÿ hã tanhmã mẽ piitã mẽ kãm ijarênh to ho ri apa. Mẽ kot hprĩ hã amar kaxyw. Koja mẽ hkwyjaja ama nê amnhĩ kaxyw ixkôt hamaxpêr nê ixkôt amnhĩ xunhwÿ. Ka ja hã mẽ omu nê mẽ kãm: “E ra mẽ ate Jejus kôt amnhĩ xunhwÿr jakamã kot ka mẽ nhÿrmã ty nê ma kaxkwa hwÿr api nê Tirtũm mẽ wa kuri amex kumrêx nê atĩr tũm nê apa ho apa.” Anhÿr o mẽ kãm ijarênh o apa. No mẽ kot akapêr mar nê ãm mar nê ixkôt amnhĩ xunhwÿr kêt xwýnhjaja ka mẽ kãm: “No mẽ

kajaja mẽ ate Jejus kôt amnhĩ xunhwÿr kêt jakamã kot kaj mẽ nhÿrmã Tĩrtũm mẽ Krata wa kuri atĩr tũm nẽ apa ho apa hkêt nẽ.” Anhÿr o ã inhÿ hã mẽ kãm akapẽr anhÿr o ri mẽ hkôt apa. Jao te ate kaxkwa hwÿr saf pyr nẽ Tĩrtũm krajê mã kahê xà rẽn h nẽ Tĩrtũm kra hkêt xwÿnhjê pê kahê pyræk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapẽr anẽ. ²⁰ Hãmri nẽ hpãnhã mẽ ixpiitã mẽ inhmã kapẽr nẽ mẽ inhmã:

—E. Kwa kêr ka mẽ kormã mẽ piitã mẽ kãm Tĩrtũm kot mẽ awÿr inhmẽn h ã mẽ kãm ijarẽn h o ri apa hkêt nẽ. Kormã. Anẽ.

Jejus kot amnhĩ kukamã amnhĩ jarẽn h ã harẽn h

Makre 8.31-33; Rukre 9.22

²¹ Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarẽn h to nẽ mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwÿjaja kãm hprĩ hã ijarẽn h mar nẽ ixpumunh prãm kêt. Ijaew krãhtũmjaja nẽ Tĩrtũm kapẽr tũm o mẽ ahkre xwÿnhjaja nẽ patre krãhtũmjaja. Mẽ kãm hprĩ hã ixpumunh nẽ kãm ixkapẽr mar prãm kêt jakamã kot paj tokyx ma Jerujarẽ hwÿr mõi nhũm mẽ kamã ixpynẽ nẽ ixtak rax nẽ ixpĩ. Nom kot paj ixtyk ã apkati axkrunẽpxi nhũm Tĩrtũm akupÿm ixta ixtĩr. Anẽ.

²² Hãmri nhũm Simãw Pêtre tee ri kot ã mẽ kãm amnhĩ jarẽn h anhÿrja ã kuma nẽ hwÿr tẽ nẽ hpa hã kupy nẽ mẽ ixpê ho kato nẽ mẽ ixkàx ã o xa. Nẽ ã kot amnhĩ jarẽn h anhÿrja nẽ kãm kapẽr nẽ kãm:

—Kwa nà Pahihtĩ. Ri ã amnhĩ jarẽn h anhÿr kêt nẽ. Mo kot kêt mẽ ri axtem nẽ ã anhĩpêx anẽ? Anẽ.

²³ Hãmri nhũm kuma nẽ hwÿr apkjê nẽ omu nẽ kãm:

—Tk. Te apê Satanasti kapẽr pyræk o na ka ã inhmã akapẽr anẽ. Kot kaj ã akapẽr anẽ hãmri nẽ ixkôt apa hkêt nẽ. Tĩrtũm kãm hprãm xà hkôt na ã mẽ kot inhĩpêx anhÿr kaxyw kẽnã. Tã ka Tĩrtũm jamaxpẽr o ajamaxpẽr kêt nẽ amnhĩ jamaxpẽr o ã inhmã akapẽr anẽ. Te apê ixpê axãmnãr xwÿnh pyræk o amnhĩ nhĩpêx. Anẽ.

Jejus krajaja kot tanhmã amnhĩ nhĩpêx to hã mẽ harẽn h

Makre 8.34–9.1; Rukre 9.23-27; Juãw 12.24-26; mããnẽn Rõmãn 15.1; Wam Korõt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapẽr anẽ hãmri nẽ hpãnhã mẽ ixpê hkôt ixpa ho ixpa xwÿnh piitã mẽ inhmã kapẽr nẽ mẽ inhmã:

—E kot kaj mẽ ixkôt amnhĩ xunhwÿr ã amnhĩ jarẽ hãmri nẽ mããnẽn amnhĩ jarẽn h o: “Jejus kêp inhõ Pahihtĩ jakamã kot paj kapẽr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx hto.” Anhÿr o amnhĩ jarẽ.

²⁵ —Koja mẽ ixtã mẽ atõx pĩ rÿ tanhmã mẽ atõ hto ka ty. Tã nom koja akaxwÿnh ma ixwÿr àpir kurê kumrêx. Hãmri ka ixkuri atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xaj ixkaga hãmri nẽ inhõ krĩ hwÿr axãpir kêt nẽ.

²⁶ —Nẽ koja mõi hikukrêx rax gryk ã Tĩrtũm kaga. Tã nhÿrmã ty hãmri nẽ amnhĩ kôt hikukrêx õ hpyr nẽ o mõi kêt nẽ. Koja tee ri kuwy hwÿr mõi pymaj amnhĩ nẽ hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwÿr api? Koja ã amnhĩ nhĩpêx anhÿr kêt nẽ.

²⁷ —Nẽ ixpê Tĩrtũm kot mẽ awÿr inhmẽn h xwÿnh kot paj nhÿrmã kaxkwa rũm akupÿn mẽ awÿr wrÿ nhũm Tĩrtũm kapẽr o mẽ wrÿk xwÿnhjaja man ixkôt wrÿ. Hãmri pa inhõ Papaj nhÿ hã ixte mẽ piitã tanhmã mẽ kot amnhĩ nhĩpêx to hã mẽ omunh xà hkôt ahpÿnhã tanhmã mẽ harẽn h to. ²⁸ ãm hãmri na pa ã mẽ amã amnhĩ jarẽn h anẽ. Kot paj nhÿrmã akupÿn ixte mẽ ato amnhĩptãr kaxyw man mẽ awÿr wrÿ. Tã kot kaj mẽ akwÿjaja akupÿn ixwrÿÿta kukamã tokyx ixte tanhmã ixte amnhĩ nhĩpêx to hã ixpumu. Anẽ.

17

Jejus kot hixêt prêk nhĩmõk ã hirã kamã ãm ã harẽn h

Makre 9.2-13; Rukre 9.28-36; mããnẽn Sikũn Pêtre 1.16-18

¹ Tã nhũm semãnja hapêx nhũm Jejus ma nhÿri hixêt prêk wÿr mõi. Nẽ kaxyw Simãw

Pêtre nê Xiakre nê Xiakre htô Juãwja nhũm ma amnhĩ kôt wa mẽ o mō. Nhũm wa mẽ mō nê hixêt prêk ã api nê himök ã kuhê. ²Hãmri nhũm Jejus xep ra axtem nê xa. Axtem hkuk nhĩrã htỳx nê xa. Te myyti nhĩrã htỳx pyrãk. Nê ê haka htỳx kumrêx. ³Hãmri nhũm xep ja wa kaxkwa rũm hwỳr wrỳ nê kuri kãm kapêr o xa. Mojes mẽ Erisja wa nhũm hwỳr wrỳ nê kuri xa. Tĩrtũm amnepêm amnhĩ wỳr wa ho àpir tã wa akupỳn wrỳ nê Jejus mã kapêr o xa. ⁴Hãmri nhũm Jejus kôt mẽ mōr xwỳnhjaja wa mẽ omu nhũm Simãw Pêtre tanhmã hamaxpêr to nê Jejus wỳr tẽ nê kãm:

—Kwa Pahihti. Nà ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mẽ kamã akrĩ. E kwa pa mẽ amã ho anê nà?

Anhỳr o kãm kapêr. Nom amnhĩ krã hkôt ã kapêr anê. ⁵Hãmri nê kormã ã kãm kapêr anhỳr rôm nhũm ra kakrã jaka htỳxja wrỳ nê wa mẽ hkunor pa nhũm wa mẽ kamã kuhê. Nhũm kakrã kamã Tĩrtũm mẽ kãm kapêr nê mẽ kãm:

—E ota Ixkra xa. Inhmã hapê ho inhmã hapê. E kêr ka mẽ kapêr mar tỳx rãhã ho ri apa. Anê.

⁶Hãmri nhũm mẽ tee ri kuma nê kãm ma htỳx nê umaj pikap rôrök nê htu mỳrpê hikwỳ. ⁷Hãmri nhũm Jejus mẽ hwỳr tẽ nê mẽ hã ìhkra jaxwỳ nê mẽ kãm:

—E mẽ kànhmã akuhê nê amã ma hkêt nê. Anê.

⁸Hãmri nhũm mẽ kuma nê kànhmã rĩt nê Jejus pix pumu nhũm ahte xa nhũm kuri wa ãm xwỳnhta wa ra ma akupỳm api. ⁹Hãmri nhũm mẽ kormã akupỳm hixêt nhĩmök rũm mẽ ixwỳr wrỳk o mō nhũm Jejus mẽ kãm:

—E kêr ka mẽ ham ate mẽmoj pumunh xwỳnhta kormã nhãm mẽ kãm harênh kêt nê. Kot paj nhỹrmã ty nê akupỳm ixtĩr ka mẽ rĩ kormã mẽ kãm ja hã ijarênh o ri apa. Anê.

¹⁰Hãmri nhũm mẽ kormã akupỳn mẽ ixwỳr wrỳk o mō nhũm mẽ Jejus mã:

—Kwa mẽ inhmã mẽmoj jarê. Na htem Tĩrtũm kapêr tũm o mẽ ijahkre xwỳnhjaja mẽ inhmã: “Eris kumrêx koja Tĩrtũm mẽ

pahwỳr kumê nhũm Krisja kormã hapu hã wrỳ.” Anê. Na htem ã mẽ inhmã war ajarênh anê. Tã ka ra wrỳ nom kormã akukamã Erisja wrỳk kêt. Anê.

¹¹Hãmri nhũm mẽ kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhĩ nhĩpêx pyrãk xwỳnhta tẽ nê ixkutêp mẽ kãm ijarênh o pa. ¹²Tã nom nhũm mẽ ja hã omunh kêt nê. Na prem axtem nê kãm hprãm xã hkôt tanhmã hipêx to nê kupĩ. Tã koja mẽ nhỹrmã ã hipêx anhỳr pyrãk o inhĩpêx. Anê.

¹³Hãmri nhũm mẽ ra hprĩ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhĩ nhĩpêx pyrãk o amnhĩ nhĩpêx o pa. Tã tãm na mẽ pamã harê. Anê.

Jejus kot mēhō hkra nê mēkarōmnuti kator ã harēnh

Makre 9.14-29; Rukre 9.37-43

¹⁴Tã nhũm mẽ ra akupỳm ahpar mã man mẽ ixwỳr hpôx o mō nhũm mẽ ohtô rax nê Jejus kutêp kuhê. Hãmri nhũm mēhō myja mẽ omu nê mẽ kutã tẽ nê mẽ hkaxpa nê Jejus kutã hkõn krã ho tẽm nê nhỹ nê hkra ho kuwỳ nê kãm:

¹⁵—Pa Jejus. Kwa inhmã ixkra kamã axukaprĩ nê. Na hte mẽkarōmnutija xatã tanhmã ixpê ho nhũm hte ÿ hã mra nê rôrök nê tōhã kuwy kamã rôrök nê tōhã gôx kãm mran mrō nê ixpê homnuj tỳx nê. ¹⁶Tã pa akôt mẽ pa ho mẽ pa xwỳnhjê hwỳr o tẽ nom nhũm mẽ kot inhmã ho mex kaxyw tee ri tanhmã ho hkapyr. Kwa xã kot kaj akupỳm inhmã ho mex nà? Anê.

¹⁷Hãmri nhũm kuma nê mẽ ixte hkôt ixpa ho ixpa xwỳnhjê mã kapêr nê mẽ inhmã:

—Hêxta waa nê. Ra mẽ ate ixte Tĩrtũm nhỹ hã mẽ ho mex ã ixpumunh o ixkôt apa ryy htã kormã ixpyrã nê ã mẽ hipêx anhỳr kêt nê. Nà kormã mẽ kaxyw Tĩrtũm kôt mẽ ajamaxpêr tỳx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwỳr akrata o tẽ pa omu. Anê.

¹⁸Hãmri nhũm kuma nê hwỳr o tẽ nhũm omu nê nê mẽkarōmnutija kator nhũm akupỳm mex kurê kumrêx. ¹⁹Hãmri pa mẽ

ixte Jejus kôt ixpa ho ixpa xwÿnhjaja ja hã omu mẽ hkàx ã amnhĩ tâ hkukja nẽ kãm:

—Kwa na pa mẽ axwakre kamã tee ri nẽ hanor prãm kaprÿ. Kwa mon pa mẽ apyrà nẽ nẽ hanor nhũm kator nẽ ma htẽm kêt nẽ? Anẽ.

²⁰⁻²¹ Hãmri nhũm mẽ inhmã:

—Nà kormã mẽ ate mẽ kaxyw Tirtũm kôt ajamexpẽr tÿx kêt. Nom kot ka mẽ kaxyw hkôt ajamexpẽr tÿx hãmri nẽ hkôt amnhĩ nhĩpêx kukwak ri mẽmoj tâ awÿ nhũm mẽ ama nẽ mẽ ate mẽmoj tâ axàhwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapẽr nẽ kãm: “Kwa amnhĩ jarẽ nẽ ma tẽ nẽ gô xujanãr kãm mãn mrõ.” Anhÿr nhũm kot amar nẽ amar xà hkôt ã amnhĩ nhĩpêx anhÿr kurê kumrẽx pyràk. Ja pyrà nẽ kot kaj mẽ amnhĩ kaxyw Tirtũm kôt ajamexpẽr tÿx kukwak ri mẽmoj tâ awÿ nhũm mẽ ama nẽ mẽ amã mẽmoj tanhmã ho rÿ mẽ amã mẽmoj gô. Anẽ.

Jejus kot htyk kukamã amnhĩ jarẽnh ã harẽnh

Makre 9.30-32; Rukre 9.43-45

²²⁻²³ Tã hãmri pa mẽ Jejus kôt ma mõi nẽ nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarẽnh to nẽ mẽ inhmã:

—Nà koja mẽ tokyx mẽ kãm ixtã amÿnẽ nhũm mẽ ixpĩ. Mẽ kot ixpĩr tâ kot paj ixtyk ã apkati axkrunẽpxi nhũm Tirtũm akupÿm ixtõ ixtĩr. Anẽ.

Hãmri pa mẽ tee ri ã kot amnhĩ jarẽnh anhÿrja ã kuma nẽ ixkaprĩ htÿx kumrẽx.

Jejus kot Tirtũm nhõrkwÿ hwÿr àr

Rõmãn 13.5-7; Wam Korĩt 10.32-11.1

²⁴ Tã pa mẽ Jejus kôt ma mõi nẽ ra Kapanau hwÿr pøj. Hãmri nhũm mẽ kot Tirtũm mã amnhĩ jarẽnh xà hã ixkre ho mex kaxyw mẽ kęp kàxpore hkwy jamÿnh xwÿnhjaja mẽ ixpumu nẽ mẽ ixwÿr mra nẽ Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwyjê pyrà nẽ Tirtũm mã amnhĩ jarẽnh xà hã ixkre ho mex kaxyw kàxpore hkwy nhõr kêt nẽ nà? Anẽ.

²⁵ Hãmri nhũm mẽ kuma nẽ mẽ kãm:

—Tÿ kot mẽ kãm òr o pa kênã. Anẽ.

Hãmri nẽ ma mẽ ixkôt tẽ nẽ mẽ ixkôt mẽhõ nhõrkwÿ hwÿr axà. Hãmri nẽ kot Jejus mã mẽ harẽnh mã tâ nhũm ra hamaxpẽr ã omu nẽ kumrẽx kãm kapẽr nẽ kãm:

—Kwa inhmã mẽmoj jarẽ Simãw Pêtre. Xà na hte pahi hkrajaja ò papaj mã kàxpore hkwy nhõr o pa nà? Xà na hte ãm hkra hkêt xwÿnh pixjaja kãm hkwy nhõr o pa? Anẽ.

²⁶ Hãmri nhũm kuma nẽ kãm:

—Nà mẽ kęp hkra hkêt xwÿnh pixjaja na hte kãm òr o pa. Anẽ.

Hãmri nhũm Jejus kãm:

—Tÿ. Nà ãm hãmri na ka ja jarẽ. Na hte pahi hkrajaja ò papaj mã kàxpore nhõr kêt nẽ. Mẽ kęp hkra kênã. Tã ixpê Tirtũm Kra jakamã mo kaxyw kot pa kêt òrkwÿ hwÿr inhgÿx kaxyw kãm kàxpore hkwy gô? ²⁷ Tã nom kot paj òr kêt nhũm kàxpore hkwy jamÿnh xwÿnhjaja tee ri ja hã ixpumu nẽ axpẽn mã ixte amnhĩ tomnuj xwÿnh ã ijarẽ. Jakamã e ma gõnhmã tẽ nẽ tep ò kanhẽ. Hãmri nẽ ho api nẽ apy nẽ hakwa jakjê nẽ kamã kàxpore htÿxre pumu. Nẽ apy nẽ man o tẽ nẽ pahpãnhã kàxpore jamÿnh xwÿnhhta mã agõ. Anẽ.

Nhũm pre ã Jejus Simãw Pêtre mã karõ anẽ nhũm kuma nẽ ma hwÿr tẽ nẽ kot kãm karõ xà hkôt ã amnhĩ nhĩpêx anẽ.

18

Mẽ kot amnhĩ to rũnh xwÿnhjê jarẽnh

Makre 9.33-37; Rukre 9.46-48; mããnẽn Piriapos 2.3-7; Wam Pêtre 3.4, 5.5-6

¹ Tã mẽ ixte Jejus kôt ixpa ho ixpa xwÿnhjaja amnhĩ kukamã ijamaxpẽr nẽ amnhĩ tâ Jejus kukja nẽ kãm:

—Kwa mẽ inhmã mẽmoj jarẽ Pahihti. Nhÿrmã mẽ ixpê pahi nẽ anhĩhkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwÿjê jakre? Anẽ.

² Hãmri nhũm mẽ inhma nẽ amnhĩ wÿr mẽhprĩre hõ mã hpa ho apê nhũm hwÿr tẽ nẽ mẽ ixkuri xa. ³ Hãmri nhũm Jejus omu nẽ hã mẽ inhmã:

—E mẽ inhma. Kêr ka mẽ apê pahi pyràk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyràk o amnhĩ nhĩpêx. Te mẽhprĩre kot amnhĩ nhĩpêx pyràk. Kot kaj mẽ ã amnhĩ nhĩpêx anhÿr o apa hkêt hãmri nẽ nhÿrmã inhĩhkõ hã mẽ

ho amnhĩptàr kêt nê. ⁴ Jakamã kot kaj mẽ amã nhỹrmã inhĩhkô hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nê amã amnhĩ to rũnh prãm kêt nê apa.

⁵ —Nê kêt ka mẽ apê pahi kot amnhĩ nhĩpêx pyrãk o tanhmã amnhĩ jarênh to ho apa hkêt nê. ãm te amarĩ ri mẽ apa pyrãk o amnhĩ nhĩpêx. Jao nhỹri mẽhprĩjê hõ pumu nê kamã axukaprĩ nê kãm mẽmoj tanhmã ho rỳ kãm mẽmoj gõ. Hãmri nê te pa ate tanhmã ixto mex to pyrãk o amnhĩ nhĩpêx. Kot kaj mẽ ã amnhĩ nhĩpêx anhỹr o apa hãmri nhũm Tĩrtũm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwỳnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhỹr o ri apa. Anê.

Mẽ kot amnhĩ tomnuj xwỳnhjê hkukamã mẽ harênh

⁶ Nhũm Jejus arĩ mẽ inhmã mẽhprĩ jarê nê mẽ inhmã:

—Nê mẽhprĩre na htem amnhĩ kaxyw ixkôt hamaxpêr o pa. Tã koja mẽhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xàj tanhmã mẽ kãm kapêr to ho pa. Hãmri nhũm mẽ kuma nê mẽ kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri nê kot inhnê tanhmã kãm kapêr to xwỳnhhta pumu nê homnuj tỳx nê. Te mẽ kot mẽhõ pynênh nê mut ã kên pytĩ hõ nhôr nê ma o htêm nê gô xupỳm kãm mẽnh pyrãk o hipêx. Te ho ja pyrãk no ãm homnuj tỳx o hakre.

⁷ —Nê koja mẽhõ inhnê tanhmã mẽ kot ixkôt amnhĩ xunhwỳr xwỳnhjê hõ mã kapêr to. Kot tanhmã amnhĩ tomnuj to hprãm xàj tanhmã kãm kapêr to. Rỳ kot ixkaga hprãm xàj tanhmã kãm kapêr to. Hãmri nhũm kuma nê mar xà hkôt ixkapêr kwỳm tanhmã amnhĩ tomnuj to. Tã koja Tĩrtũmja ja hã omu nê mãânên kot inhnê kêp àmnar xwỳnhhta pumu nê ã inhnê kãm kapêr anhỹrja mỳrapê homnuj tỳx kumrêx.

⁸⁻⁹ —E kwa mẽ okora. Kot kaj mẽ anhĩkra ho tanhmã amnhĩ tomnuj to rỳ apar o tanhmã amnhĩ tomnuj to. Hã kêt ka mẽ axte ã amnhĩ nhĩpêx anhỹr pymaj te mẽ ate amnhĩ pê krãhyr nê mẽnh pyrãk o amnhĩ nhĩpêx nê axte ã amnhĩ tomnuj

anhỹr kêt nê. Rỳ ka mẽ ano ho mẽmoj punuj pumu. Hã kêt ka kãm ajamexpêr pix o apa pymaj te mẽ ate amnhĩ pê ano katök nê kaxàr nê mẽnh pyrãk o amnhĩ nhĩpêx nê nhãm arĩt kurê kumrêx. Kêt ka mẽ ã amnhĩ nhĩpêx anhỹr o ri apa. Hãmri nê nhỹrmã ty nê ma Tĩrtũm nhõ krĩ hwỳr api. No kot ka mẽ arĩ akutã ano nê arĩ akutã apar nê arĩ akutã anhĩkra rãhã ri apa htã ho amnhĩ tomnuj o apa. Hãmri nê nhỹrmã ty nê ate amnhĩ tomnuj mỳrapê ma mẽ kot amnhĩ xà htỳx kamã hamak tũm xà hwỳr ma mō.

¹⁰⁻¹¹ —Nê kêt ka mẽ mẽhprĩrejê kamã axukaprĩ rãhã ho apa. Na hte kaxkwa kamã Tĩrtũm kapêr o mẽ wryk xwỳnh kwỳjaja Tĩrtũm mã mẽ hamãr mex o pa. Tã koja mẽhõ tanhmã kêp hõ hto nhũm mẽ hã omu nê ma tẽ nê Tĩrtũm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhũm Jejus arĩ mẽ inhmã kapêr nê mẽ inhmã:

—E pa mẽ amã awjarê ka mẽ ixujarênh ma. Nà koja mẽhõ my hkrit ôwêhti xohtô nê. Nê apkati mẽ ma hamãr o pa. Hãmri nhũm pyxire nê tanhmã amnhĩ to nê kêp akunok. Kwỳ kaga nê ma nhỹhỹm ahte tẽ nê kêp akunok. Hãmri nhũm mytita ma akupỳm o mōr kaxyw hkwỳ ho pikuprõnh pa hãmri nê tee ri hkwỳ kaêx ã pikunor xwỳnhhta japêr nom nhỹri omunh kêt nê. Hãmri nê tee ri hkukamã hamaxpêr nê ma hkwỳ ho mō nê nhỹri kure. Kutêp apkur kaxyw nhỹri kure hãmri nê ma akupỳm pikunor xwỳnhhta japêr o tẽ. ¹³ Hãmri nê hapêr ryy nê nhỹri hwỳr kato nê omu nê hkĩnh nê. Hãmri nê kutu nê ma akupỳm o tẽ. Na hte pikunor kêt xwỳnhjê nhỹ hã hkĩnh tã pikunor xwỳnhhta mã kato nê hkĩnh tỳx nê. Krit xohtô htã nom ãm kãm ho pixi nê ho hpikunor prãm kêt. ã mẽ ujarênh kot anhỹr. ¹⁴ Ja pyrã nê Tĩrtũm kãm mẽhõ pyxi nê nhỹrmã ma kuwy wỳr mōr prãm kêt kumrêx. Mẽ piitã mẽ kot hkôt amnhĩ xunhwỳrja na kãm hprãm. Anê.

Jejus kôt mẽ pahtōjê hõ kot mẽ pahtomnuj jarênh

¹⁵ Nhũm Jejus arĩ mẽ inhmã kapêr nê mẽ inhmã:

—Nê ja. Koja ixkôt mẽ atõ rỳ mẽ atõx tanhmã atomnuj to. Hã kêr ka ma hwỳr tẽ nê kot tanhmã anhîpêx to hã amnhĩ tã kãm akapêr. Nom kêr ka mẽ nhãm mēhõ mã harênh kêt nê. ãm tanhmã kot ato xwỳnhhta pix wỳr tẽ nê kumẽ war axpẽn mã akapêr nê war axpẽn ma. Nhũm ama nê akupỹm tãm anhîpêx hã kêr ka akupỹm te ixkôt kệp atõ rỳ atõx pyrãk o ka wa axpẽn nhîpêx nê axte jam ajamaxpêr kêt nê. ¹⁶ Nom koja ama nê ãm ama rỳ tanhmã ato hkêt ã amnhĩ jarênh japêr. Hã kêr ka ma akupỹm tẽ nê akupỹm amnhĩ kôt Kris kôt atõ rỳ atõx o axkrut rỳ mẽ ho axkrunêpxi nê amnhĩ kôt hwỳr mẽ o mra kê mẽ axpẽn tã war ama. Amnepêm Tĩrtũm kapêr ã kagà htũm kot ja jarênh o:

Kêr ka mẽ atõ tanhmã axpẽn nhîpêx to. Hãmri nê hã axpẽn mã akapêr kaxyw nê amnhĩ kôt akwỳjê ho axkrut rỳ ho axkrunêpxi nê akupỹm hwỳr mẽ o mra kê mẽ axpẽn tã war ama. Anê.

—Ã Tĩrtũm kapêr ã kagà htũm kot ja jarênh kot anhỳr. ¹⁷ Jakamã kêr ka mẽ amnhĩ kôt akupỹm kot tanhmã ato xwỳnhhta wỳr mẽ o mra kê mẽ atã kuma. Hãmri nhũm arĩ mẽ kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwỳr tẽ nê Kris kwỳ hã mẽ pikuprõnh xwỳnhjê mã harê. Kê mẽ ama hãmri nê ja hã axte kot tanhmã ato xwỳnhhta mã kapêr. Nhũm mẽ mar kêt nê arĩ kot tanhmã ato hkêt ã amnhĩ jarê ka mẽ amnhĩ nê hanor kurê kumrêx. Hãmri nê te kệp Kris kôt mẽ atõ rỳ mẽ atõx kêt pyrãk o hipêx.

¹⁸ —Nê koja mēhõ ixkôt amnhĩ xãm nê Inhîpêxà Tĩrtũm kôt ri amnhĩ nhîpêx o pa. Ka mẽ ja hã omu nê inhỹ hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhỹrmã Tĩrtũm mẽ wa kuri amex kumrêx nê atĩr tũm nê apa ho apa.” Anhỳr o kãm akapêr. Nom mẽ kot ixkôt amnhĩ xunhwỳr kêt xwỳnhhjaja ka mẽ ã mẽ kãm akapêr anhỳr kêt nê. ãm inhỹ hã mẽ kãm: “No mẽ kajaja mẽ ate Jejus kôt amnhĩ xunhwỳr kêt jakamã kot kaj mẽ Tĩrtũm mẽ Krata wa kuri atĩr tũm nê amex nê apa hkêt nê.” Anê. Kêr ka mẽ inhỹ hã ã ahpỹnhã tanhmã mẽ kãm akapêr to ho apa anê.

¹⁹⁻²⁰ —Nê kot kaj mẽ Tĩrtũm mã amnhĩ jarênh kaxyw te axkrutre rỳ axkrunêpxire htã axpẽn wỳr akuprõ nom mẽ kapxipixjaja apikuprõnh kêt nê. Kot paj mẽ akaêx ã mẽ anhîhkô hã mẽ amar o xa. Mẽ ate ano ho ixpumunh kêt tã pa wa mẽ anhîhkô hã mẽ amar o xa. Jakamã kot kaj mẽ axpẽn wỳr akuprõ nê mẽmoj tã Tĩrtũm wỳ nhũm kaxkwa kamã ja hã mẽ ama. Nê mẽ ate hã axàhwỳr xwỳnhhta nhũm mẽ amã tanhmã ho. Kêr ka mẽ ã ixkamnàr rom axàmnhĩx amnhĩ to Inhîpêxà hwỳr anê. Anê.

Nhũm pre ã Jejus mẽ inhmã kapêr anê.

Mẽ pahte tanhmã axpẽn nhîpêx to hã mẽ pamã karõ

Matêwre 6.14-15; Rukre 17.3-4; mããnêñ Epes 4.32; Korosê 3.13

²¹ Tã nhũm Simãw Pêtre Jejus wỳr tẽ nê mẽmoj tã hkukja nê kãm:

—Kwa inhmã mẽmoj jarê Pahiti. Xà koja akôt ixtõ rỳ ixtõx tanhmã inhîpêx to pa amnhĩ tã omu nê ãm omu nê amnhĩ tã tanhmã ho hkêt nê. Nhũm axte tanhmã ixto nê axte tanhmã ixto ho 6 tã pa ãm amnhĩ tã omu nê amnhĩ tã tanhmã ho hkêt nê. ãm ho ijamakêtkati nê axte kãm ijamaxpêr kêt nê. ã amnhĩ tã hipêx anhỳr o 7 nhũm ja amã mex nê nà? Anê.

²² Hãmri nhũm kãm:

—Nà kot kaj ã amnhĩ tã hipêx anhỳr o 7 pix kêt nê. Koja mēhõ xatã tanhmã ato rãhã nê ka amnhĩ tã omu nê ajaxwỳja amnhĩ tã xatã tanhmã ho hkêt nê. ãm amnhĩ tã omu nê ãm omu nê tãm hipêx rãhã ho ri apa. Mãmrĩ ho anhỳr o apa rãhã nê aa jam anhũrer kêt nê.

²³ —E kot paj ixprĩ hã mẽ amã tanhmã ja jarênh to ka mẽ inhma. Tĩrtũm na hte xatã mẽ ate tanhmã amnhĩ tomnuj to hã mẽ apumu nê mẽ anê rênh o pa. Te kot pahi kot ã hkwỳjê nhîpêx anhỳr pyrãk. Koja mẽ õ pahija kãm mẽ àpênh xwỳnhhjaja kot kệp kàxpore ho ìpresta hã mẽ omunh kaxyw nhỹ. ²⁴ Hãmri nhũm mẽ hwỳr ja ho tẽ nê kutã ãm. Ra kot kệp hikàxpore ho ìpresta rax xwỳnhja. ²⁵ Tã no ãm aa akupỹm kãm õr kêt nê ra kệp ho hapêx pa. Hãmri nhũm pahija tee ri amnhĩ tã omu nê hkwỳjê mã hã amỹnê nê mẽ kãm: “E. Mẽ ma o tẽ nê hprõ nê hkrajaja nê õrkwỹ nê hikukrêx mẽrohã ho wênê hpa nê hpãnhã kàxpore py

nê man inhmã o tẽ. Kot ixpê ixkàxpore ho ìpresta nê akupÿm inhmã òr kêt mÿrapê.” Anê.

²⁶ —Hãmri nhùm kot ho ìpresta xwÿnhnta tee ri amnhĩ tã kuma nê kutã hkõnkrã ho nhÿ nê amnhĩ to hwÿr kãm hihtÿx nê kãm: “Kwa nà ri ixto anhÿr kêt nê pahiti. Ixkamã axukaprĩ nê hkêt wehe. Nà kot paj akupÿm amã kugõ kãm ga.” Anê.

²⁷ —Hãmri nhùm amnhĩ tã kuma nê kãm hkaprĩ nê. Hãmri nê kãm: “Tõe. Nà kot paj ã anhĩpêx anhÿr kêt nê. Kot paj anhõ kõt kaxõnh pa nê kumê ka mãmri ma ajamakêtkati nê axãmnhĩx apa.” Anê. ²⁸ Nhùm ã kãm kapêr anê nhùm kuma nê hkĩnh nê. Hãmri nê ma tẽ nê kato nê ixkre kapem pòristi hõ pumu. Na pre ra kêp kàxpore hkwȳ ho greire nê ho ìpresta nhùm kato nê omu. Hãmri nê hwÿr tẽ nê amnhĩ kĩnhã òkre hã kumÿ nê kãm: “Kwa tokyx akupÿm ate ixpê kàxpore ho ìpresta pãnhã inhmã agõ.” Anê. ²⁹ Hãmri nhùm tee ri amnhĩ tã omu nê ra ham kot pahĩ kutã amnhĩ nhĩpêxta pyrã nê kutã hkõnkrã ho nhÿ nê kãm: “Kwa nà. Kwa ri ixto anhÿr kêt nê. Nà kot paj hpãnhã amã kugõ. Kwa ixkamã axukaprĩ nê hkêt wehe.” ³⁰ Anhÿr tã nom nhùm kuma nê ãm kuma nê hã amÿnê. Hã hkwȳjê mã amÿnê nê mẽ kãm: “E mẽ ma jahti ho tẽ nê haxà. Koja kot ixpê kàxpore ho ìpresta pãnhã inhmã kugõ nê rĩ kormã kato nê rĩ amnhĩ pumu.” Anê. Hãmri nhùm mẽ kuma nê ma o tẽ nê haxà.

³¹ —Hãmri nhùm hkwȳjaja tee ri mar o kuhê nhùm mẽ kêp ja omnuj nê nhùm mẽ pahĩ hwÿr agjê nê kãm harê. ³² Hãmri nhùm tee ri harênh ma nê kamã gryk tÿx nê akupÿm amnhĩ wÿr hã karõ nhùm akupÿm hwÿr axà nhùm kãm: “Tk. Kwa na ka pre amnhĩ tomnuj tÿx nê. Ate amnhĩ to ixwÿr nhùm inhmã akaprĩ nê ixte anhõ kõt kaxõnh nê mênh tã ³³ ka amnhĩ kĩnhã anhĩõta kamã axukaprĩ hkêt nê ri ã hipêx anê.” Anê. ³⁴ Hãmri nê kamã gryk nê hã ò pòristi mã amÿnê nhùm mẽ ma o tẽ nê haxà. Mẽ kot mẽ hagjênh xà hã ixkre kamã apkati mẽ tanhmã mẽ kot hipêx to kaxyw nhùm mẽ kãm hã amÿnê. Tanhmã mẽ kot hipêx to rãhã nhùm kot akupÿm kàxpore raxta nhõr par nê rĩ kormã kator kaxyw nhùm mẽ ma o tẽnh haxà. ã mẽ ujarênh kot anhÿr. Anê.

³⁵ Nhùm pre ã Jejus mẽ ixte hkõt ixpa ho ixpa xwÿnhjê mã kapêr anê. Hãmri nê mẽ inhmã:

—Ja pyrã nê koja ixkõt mẽ atõ rÿ mẽ atõx tanhmã mẽ atomnuj to ka mẽ amnhĩ tã omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahĩ kot mēhõ nhõ kõt kaxõnh par nê axte kãm hamaxpêr kēêta pyrãk. No kot kaj mẽ ã amnhĩ nhĩpêx anhÿr kêt nhùm kaxkwa kamã inhõ Papaj ja hã mẽ apumu nê te ho pahĩ tee ri kot amnhĩ tomnuj xwÿnhnta kot amnhĩ nhĩpêx ã omunh nê hã àmnênh nhùm mẽ kot apkati mẽ tanhmã omnuj tota pyrãk o mẽ anhĩpêx. Anê.

19

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãânên Wam Korit 7.10-16

¹ Tã nhùm Jejus mẽ inhmã kapêr pa nê mẽ inhmã anê pa mẽ ixrohã Garirej rùm ixkato nê pyhti pê Jotãw hã rê nê hpãnhã ihkê hã ri ixpa. Pika pê Jutej kamã. ² Hãmri nhùm mẽ ohtõ nê Jejus pumu nê man mẽ ixwÿr mra nhùm mẽ omu nê mẽ kãm akupÿm mẽ à xwÿnhjê ho mex. ³ Hãmri nhùm Parijew nhõ xwÿnh kwÿjaja hwÿr mra. Hêx rom kot kamã hamak nê tanhmã ho kapêr punuj to kaxyw hwÿr mra nê kãm: —Pa? Kwa mẽ inhmã mẽmoj jarê. Tanhmã na pre amnepêm finat Mojesja mẽ pahte mẽ pahprõ kaga hã mẽ panhigêttjê mã karõ hto? Xà kot mẽ pahprõ pahkwÿm ri tanhmã amnhĩ nhĩpêx to pu mẽ hkaga nhùm ja Tirtũm mã mex nê nã? Anê.

⁴ Hãmri nhùm mẽ kãm:

—Nà na ka mẽ aprĩ hã Mojes kot tanhmã ja jarênh to mar mex kêt nê. Ja kot anhÿr kêt. Amnepêm mẽmoj piitã hkrax kãm na pre Tirtũm my nê nija wa hipêx. Axpên kaxyw wa hipêx. ⁵ Hãmri nê wa hkukamã tanhmã wa kot amnhĩ nhĩpêx to hã wa harê nê wa harênh o:

Koja mẽmyjaja hprõ kaxyw hãmri nê gryk ã katorxà mẽ hipêxà wa hkaga nê ãm hprõ kõt pix mã pa ho pa. Te wa tipxi nê ri wa pa pyrãk o amnhĩ nhĩpêx. Anê.

—Na pre ã Mojes Tirtûm nhÿ hã mẽ kãm ja jarênh anê. ⁶ Jakamã koja te wa tipxi nê ri wa pa pyrãk o axpên nhÿpêx o pa. Tirtûm tãm kot axpên mã wa ôr kênã kot kêt wa axtem nê ri htÿx ri hamaxpêr nê axpên kaga. Anê.

⁷ Hãmri nhÿm mẽ kuma nê mẽ kãm:

—Tÿ. Nom finat Mojes na pre mẽ pakukamã mẽ panhÿgêjtjê mã ã ja hã karõ anê nê mẽ kãm:

Kot kaj mẽ aprõ kaga kaxyw hãmri nê ra kêp aprõ hkêt ã hã kagã nhÿpêx nê kãm agõ nê amnhÿ nê hano kê ma tẽ.

—Anhÿr o na pre mẽ kãm hã karõ. Tã ka na ka mẽ ixte axpên kaga hkêt ã mẽ inhmã karõ. Anê.

⁸ Hãmri nhÿm mẽ kuma nê mẽ kãm:

—Tÿ no ãm mẽ kãm Tirtûm kapêr kôt amnhÿ nhÿpêx prãm kêt jakamã na pre ã mẽ kãm ja jarênh anê. No amnepêp mẽmoj piitã hkrax kãm na prem ã amnhÿ nhÿpêx anhÿr o pa hkêt nê. ⁹ Jakamã kêr ka mẽ aprõ kaga hkêt nê apa. Kot kaj mẽ hkaga nê hpãnhã nhãm mẽhõ ho aprõ nhÿm Tirtûm noo mã te ate wam aprõ kamã nhãm aprõ nyw o amnhÿkati pyrãk. Tirtûm pê ja omnuj tÿx nê. Rÿ koja mẽhõ hprõ kaga ka hpãnhã ho aprõ nhÿm Tirtûm noo mã te ate wam mjên pê ho amnhÿkati pyrãk. Ja mããnên Tirtûm pê omnuj tÿx nê. Anê.

Nhÿm pre ã Parijew nhõ xwÿnhjê mã kapêr anê. ¹⁰ Hãmri pa mẽ ixte hkôt ixpa ho ixpa xwÿnhjaja ã kapêr anhÿrja ã kuma nê mẽ kãm:

—Xà na hte mẽ mjên ra kãm mẽ hprõ hkÿnh kêt tã hkaga hkêt nê arÿ hkôt pa ho pa nhÿm hte Tirtûm mã ja mex nê nà? Jakamã kwa xà kot paj mẽ nhÿrmã ixprõ kaga pymaj ixprõ hkêt kumrêx nê ixpa ho ixpa nhÿm ja mẽ inhmã mex nê nà? Anê.

¹¹ Hãmri nhÿm mẽ inhmã:

—Nã ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koja Tirtûm tãm amã aprõ hkêt ã ajarê ka rÿ aprõ hkêt nê ahte ajamakêtkati nê ri apa.

¹² Na htem piitã hprõ nê pa hkêt nê.

Na hte kamã tanhmã mẽ kute xwÿnhjaja kormã hprÿre ri tanhmã kute mÿrapê kãm hprõ hprãm kêt nê pa.

Nê kamã tanhmã mẽ ho mÿrapê nhÿm mẽ hkurê hkêt nê hprõ hkêt nê pa.

Nê kamã mẽ kãm Tirtûm mã tanhmã amnhÿ to ho pa pix prãm xaj kãm hprõ hprãm kêt nê pa.

Tã kot kaj mẽ jajê pyrã nê ã amnhÿ nhÿpêx anhÿr prãm nê ri kam nê aprõ hkêt nê apa. Anê.

Jejus kot amnhÿ nê mẽhprÿjê janor kêt ã harênh

Makre 10.13-16; Rukre 18.15-17

¹³ Tã nhÿm Ijaew kwÿjaja Jejus pumu nê hwÿr mẽ hkrarejê jamÿ nê mẽ o mra. Kot mẽ hã ïhkra jaxwÿr nê mẽ ho Tirtûm wÿr kaxyw hwÿr mẽ o mra. Hãmri pa mẽ ixte hkôt ixpa ho ixpa xwÿnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wÿr mẽ o mra? Kormã mẽ raxre kênã. Kwa mẽ ma akupÿm mẽ o mra nà? Anê.

¹⁴ Hãmri nhÿm Jejus mẽ inhma nê mẽ inhmã:

—Kwa nà mẽ ri inhnê mẽhprÿjê kurê hkêt nê. Kwãr mẽ mãmrÿ ixwÿr mẽ o mra. Anê.

Hãmri nê amnhÿ wÿr mẽ mẽ kãm hpa ho apê nhÿm mẽ hwÿr mẽ o mra nhÿm mẽ kuri kuhê nhÿm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkÿnh nê ri pa. Nê mẽ kãm amnhÿ to rÿnh prãm kêt nê. Tã Tirtûm kôt mẽ kot amnhÿ nhÿpêx o mẽ pa xwÿnhjaja te mẽ kot jajê pyrã nê mẽ kãm amnhÿ to rÿnh prãm kêt nê pa. Anê.

¹⁵ Hãmri nê mẽ hã ïhkra jaxwÿ nê mẽ ho Tirtûm wÿ hãmri nê mẽ inhmã anê pa mẽ ma axte mẽ kurÿm mõ.

Kàxpore rÿnh xwÿnh jarênh

Makre 10.17-22; Rukre 18.18-23; mããnên Rõmãn 3.19-20; Wam Ximotre 6.6; Xiakre 2.10

¹⁶ Tã nhÿm Ijaew ôja Jejus wÿr tẽ nê mẽ kãm:

—Pa mẽ ijahkre xwÿnh? Kwa inhmã mẽmoj jarê. Tanhmã kot pa nhÿrmã Tirtûm ri ixtÿr tÿm nê ixpa ho ixpa kaxyw amnhÿ nhÿpêx to wehe? Anê.

¹⁷ Hãmri nhÿm mẽ kãm:

—Tk. Ra Tirtûm kot nhÿrmã mẽ atÿr tÿm nê apa kaxyw mẽmoj tã mẽ amã karõ nhÿm ate mar mex kênã kot ka kêt ri axte ja hã ixkukja. Nã Tirtûmja mex o mex jakamã kot kaj amã kuri atÿr tÿm nê apa hprãm hã kot kaj kapêr kôt amnhÿ nhÿpêx no ri apa. Anê.

18 Hāmri nhũm kām:

—No nhỹ kapër kôt kot paj amnhĩ nhĩpêx o ri ixpa wehe? Anê.

Hāmri nhũm kām:

—Na pre mẽ amã mẽmoj tã karõ ho:

Kêr ka mẽ axpên par kêt nê.

Nê nhãm mẽ hprõ ho amnhĩkati hkêt nê.

Nê mẽ kêp axàhkĩnh kêt nê.

Nê tanhmã mẽ ho axêx to hkêt nê.

19 Nê anhĩpêxà mẽ akatorxà wa hã api-
jaàm nê wa ho mex pê wa kutã ano-
jarêt o ri apa.

Nê amã akwỳjê hã ma ho te ka amã
amnhĩ tã ma pyræk o mẽ hipêx. Jao tãm
mẽ hipêx o ri apa.

E kot kaj amã nhỹrmã Tĩrtũm kuri atĩr tũm
nê apa hprãm hã kêr ka ã amnhĩ nhĩpêx
anhỹr o ri apa. Anê.

20 Hāmri nhũm kuma nê kām:

—Ku nhũm. Ra ã ixte amnhĩ nhĩpêx
anhỹr o ri ixpa kênã. Nom te kormã ixtĩr
tũm nê ixpa kaxyw ixte tãm kêt pyræk. Kwa
axte inhmã mẽmoj jarê nà? Anê.

21 Hāmri nhũm kām:

—Nà kormã mẽmoj pyxi nê arĩk. Na ka
amã akukrêx rax prãm tỳx o amã Tĩrtũm
prãm jakre. Jakamã ma akupỹm tẽ nê
akukrêx rax o wênê hpa nê hpãnhã kàxpore
jamỳ nê ma mẽ kêp amrakati xwỳnhjê mã
õr pa. Hāmri nê rĩ akupỹn ixwỳr tẽ nê rĩ
ixkôt apa ho apa. Anê.

22 Hāmri nhũm kuma nê tee ri amnhĩ
kukamã hamaxpêr. Kãm hikukrêx rax japê
nê kãm kamã ãhkra karo hprãm kêt nê.
Hāmri nê tee ri Jejus kot ã kãm hã karõ
anhỹrja ma nhũm ja kêp omnuj nê nhũm
ma akupỹm htêm kurê kumrêx. 23 Hāmri
nhũm Jejus tee ri omu nê mẽ inhmã:

—Hêxta waa nê. Kojã mẽ hikukrêx rũnh
xwỳnhjaja ohtô nê kãm mẽ hikukrêx japê
xàj Tĩrtũm mẽ wa ixri htĩr tũm nê pa ho
pa hkêt nê. Wa ixte amnhĩ nhĩpêxja mẽ
kêp hihtỳx. 24 Mẽ kãm hikukrêx rũnh mã
ãhkra karo hprãm kêt rãhã tee ri kãm Tĩrtũm
kôt amnhĩ nhĩpêx prãm kaprỳ. Te ho mẽhõ
kot menh kagô hã hkre nê kãm kagô katõk
prãm kêt rãhã kãm guhkrax kãm ar prãm
kaprỳta pyræk. Anê.

Nhũm pre ã Jejus mẽ inhmã kapêr anê.

25 Hāmri pa mẽ kuma nê tee ri amnhĩ
kukamã ijamaxpêr nê kãm:

—Kwa mẽ ixpiitã mẽ inhmã mẽ ixkukrêx
japê kênã. Jakamã xà kot paj mẽ ixpiitã
nhỹrmã war ari ixtĩr tũm nê ixpa ho ixpa
hkêt nê nà? Anê.

26 Hāmri nhũm mẽ inhmã:

—Nà kot kaj mẽ amnhĩ krã hkôt mẽ amã
mẽ akukrêx japêja mã anhũrer kêt nê. ãm
Tĩrtũm pix na hte ja kaxyw tanhmã mẽ
akrã hto ka mẽ amã akukrêx japê hkêt nê.
Jao ra mẽ apê Tĩrtũm mẽ wa ixri atĩr tũm nê
mẽ apa ho mẽ apa mã xwỳnh. Anê.

27 Hāmri nhũm Simãw Pêtre kãm:

—Kwa no we mẽ pajaja Pahihti? Na
pa prem agryk ã mẽmoj piitã hkaga hpa
nê akôt ixpa ho ixpa. Jakamã kot paj mẽ
nhỹrmã war ari ixtĩr tũm nê ixpa ho ixpa
nà? Anê.

28 Hāmri nhũm kuma nê mẽ ixpiitã mẽ
inhmã:

—Tỳ. Kot paj nhỹrmã mẽmoj piitã ho nyw
pa hāmri nê ixte mẽ ho amnhĩptar o ixkrĩ
xà maati kamã nhỹ nê mẽ piitã mẽ kot
tanhmã amnhĩ nhĩpêx to hã mẽ omunh xà
hkôt tanhmã mẽ harênh to. Tã mẽ kajaja
mẽ ate ixkôt apa ho apa xwỳnhjaja kot kaj
mẽ inhmã Ijaew kot amnhĩ nhĩpêx ã mẽ
omunh xà hkôt ahpỹnhã tanhmã inhmã
mẽ harênh to. Mẽ mex ã mẽ harê rỳ mẽ
mex kêt ã mẽ harê. Kot kaj mẽ ã inhmã
mẽ harênh anê. ãm hāmri na pa mẽ amã
ixkapêr anê.

29 —Nê ka mẽ atõ inhmã tanhmã amnhĩ
nhĩpêx to ho apa kaxyw akwỳjê re nê ma
inhmã mẽmoj to anhỹr o ri apa. Tanhmãn
anhõrkwỹ rỳ atõ rỳ atõx re. Rỳ aprõ nê
akrajê re. Rỳ akatorxà mẽ anhĩpêxà war
are. Rỳ akukrêx piitã rer pa hāmri nê ma
mẽ piitã mẽ kãm ixkapêr o mẽ ahkre ho ri
mẽ hkôt apa. Hã kot paj mẽ apumu nê mẽ
ato mex rax nê. Hāmri ka mẽ ma mẽ hkôt
apa nê mẽ kãm ixkapêr jarênh o apa nhũm
mẽ kot mẽ amar xwỳnh kwỳjaja mẽ ama nê
kãm mẽ akĩnh nê. Nê ra mẽ ate akwỳjê rer
par tã mẽ tãmjaja te mẽ apê mẽ hkra rỳ mẽ
htõ rỳ mẽ htõx pyræk o mẽ anhĩpêx nê mẽ
ato mex o pa. Hāmri ka mẽ nhỹrmã ty nê
ma Tĩrtũm mẽ wa inhõ krĩ hwỳr api nê wa
ixkuri amex kumrêx nê atĩr tũm nê apa ho
apa. 30 Nom kwa kêr ka mẽ amnhĩ tã ja ma
nê amnhĩ to rũnh xwỳnh ã amnhĩ kamnhĩx
kêt nê. Jar mẽ kot amnhĩ to rũnh ã amnhĩ to

jarkrar xwÿnhjaja koja mẽ nhÿrmã amnhĩ to hkryre hã amnhĩ pumu. No jar mẽ kot amnhĩ to hkryre xwÿnh ã amnhĩ jarênh xwÿnhjaja koja mẽ nhÿrmã amnhĩ to rÿnh ã amnhĩ pumu. Anê.

20

Jejus kot nhÿrmã hkrajê ho mex ã harênh Rômãn 9.14-16

¹ Nhÿm Jejus arĩ mẽ ixte hkôt ixpa ho ixpa xwÿnhjê mã awjarê nê mẽ inhmã:

—Nê kot paj nhÿrmã tanhmã mẽ ato mex to. Te ixpê hpur nhõ dôn kot amnhĩ nhÿpêx pyrãk o mẽ anhÿpêx. Koja pur nhõ dônja ihpur kãm mẽmo xô ra hkà hpa nhÿm omu hãmri nê kaxyw mẽ àpênh xwÿnhjê japêr kaxyw ma gãm tẽ. Nê gáp xa nê mẽ kãm akir nhÿm mẽ hã akuprô. ² Hãmri nhÿm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amÿkry pa hpãnhã mẽ kot apkati pixi hã mẽ àpênh pãnhã mẽ kãm amnhÿrer xàja kôt mẽ amã amnhÿre.” Anê hãmri nhÿm mẽ kuma nê kãm: “Tôe. Nà kot paj mẽ amã apê.” Anê nhÿm pur wÿr mẽ kurê nhÿm mẽ ma kãm àpênh mã mra.

³—Tã nhÿm arĩ kÿx mã myt tẽ nhÿm pur nhõ dôn akupÿm gãm tẽ nhÿm mẽ hkwyjja arĩ kuhê. ⁴ Nhÿm tee ri mẽ omu nê mẽ kãm: “Kwa mon ka mẽ axàpênh kêt nê arĩ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhÿrer mex nê.” Anê. ⁵ Hãmri nhÿm mẽ kuma nê ma mẽ hkôt mra. Tã nhÿm ra myt kaxkwa nhÿpôk ri ajêt nhÿm hpur nhõ dônja mã hkwyjê ho anê nê. Kê axte mẽ hkôt jajê jano nhÿm mẽ ma mẽ hkôt mra. Tã nhÿm ra myt ahpanh grire nhÿm ma akupÿm kêwe gãm tẽ nê mã mẽ ho anê nê axte mẽ hkôt jajê rê.

⁶—Tã nhÿm ra myt grire nhÿm ma akupÿm kêwe gãm tẽ nê jajê pumu nhÿm kê wem arĩ gáp kuhê. Hãmri nhÿm tee ri mẽ omu nê mẽ kãm: “Kwa mon ka mẽ axàpênh kêt nê atÿx gáp akuhê ho akuhê?” Anê. ⁷ Hãmri nhÿm mẽ kãm: “Nà mẽhõ kot mẽ inhmã mẽ ixàpênh ã karôre hã.” Anê. Hãmri nhÿm mẽ kãm: “Tôe. Mẽ ma mẽ hkôt ixpur wÿr mra nê inhmã mãn apê.” Anê hãmri nhÿm mẽ kuma nê ma hkwyjê hkôt mra.

⁸—Tã nhÿm ra kamàt. Hãmri nhÿm hpur nhõ dônja kãm àpênh xwÿnhjê krãhtÿm wÿr

tẽ nê kãm: “E. Ma mẽ hwÿr tẽ nê mẽ kãm anê kê mẽ àpênh kaga nê man akôt mra ka inhmã mẽ kãm amnhÿre. Nom kêr ka hapu hã mẽ môr xwÿnhjê kumrêx mã amnhÿre nê wam mẽ môr xwÿnhjê ho hapu nê mẽ kãm amnhÿre.” Anê. Hãmri nhÿm mẽ kãm: “Tôe. Nà kot paj mẽ ho anê.” Anê. ⁹ Hãmri nê ã mẽ kãm amnhÿrer anê. Hapu hã mẽ mrar xwÿnhjê kumrêx mã amnhÿre. Te mẽ kot kwÿhtã àpênh o amÿkry pyrãk o nhÿm hpãnhã mẽ kãm amnhÿre. ¹⁰ Hãmri nhÿm wam mẽ mrar xwÿnhjaja ja hã mẽ omu nê hkÿnh nê. Hãmri nê htÿx hamaxpêr o: “Nà kot paj xep kàxpore jamÿnh rax o mẽ hakre. Ixàpênh rax o ixte mẽ hakrenh kênã.” Anhÿr tã no nhÿm mẽ piitã mẽ kãm amnhÿrer o axpên pyrãk. Ra pur nhõ dôn kot kãm hã karô xà hkôt. ¹¹ Hãmri nhÿm mẽ hamÿ nê tee ri hkre kamã omu nê we ra hpur nhõ dônja kamã gryk nê. ¹² Hãmri nê hwÿr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwÿhtã ixàpênh rax o kamàt. Arÿgro htÿx kãm ixàpênh o ixãm o ixtã kamàt tã ka pêr ãm mẽ inhmã amnhÿrer o axpên pyrãk. Kwa na ka mẽ ixtomnuj nê.” Anê. ¹³ Hãmri nhÿm mẽ kuma nê mẽ kãm: “Tk. Nà na pa mẽ atomnuj kêt nê. Na pa kwÿhtã tanhmã mẽ amã amnhÿrer to xà jarê ka mẽ inhma nhÿm ja mẽ amã mex nê ka mẽ ma hwÿr axàpênh mã mra. ¹⁴ Kwa mẽ akàxpore jamÿ nê ma mra. ãm pa inhmã hprãm xà hkôt na pa ã mẽ amã amnhÿrer anê. ¹⁵ Ixkàxpore jakamã kot paj nhãm inhmã mẽhõ mã ôr prãm xà hkôt kãm kugô. Tã ka mẽ ã mẽ hã ixkamã agryk anê. E mẽ akàxporeja mÿ nê ma mra.” Anê. Nhÿm ã hpur nhõ dôn mẽ kãm kapêr anê. ã mẽ ujarênh kot anhÿr. Anê.

¹⁶ Nhÿm pre ã Jejus mẽ inhmã ujarênh anê nê mẽ inhmã:

—Ja pyrã nê wam mẽ ate ixkôt amnhĩ xunhwÿr xwÿnhjaja nê hapu hã mẽ kot kormã ixkôt amnhĩ xunhwÿr mã xwÿnhjaja kot paj nhÿrmã mẽ apiitã mẽ ato mex kumrêx o axpên pyrãk. Anê.

Jejus kot htyk kukamã amnhĩ jarênh Makre 10.32-34; Rukre 18.31-34

¹⁷ Tã nhÿm Jejus mẽ inhmã anê pa mẽ ixrohã ma Jerujarê hwÿr mō. Mẽ ohtôjê

hkôt mō. Hāmri nhūm Jejus mē ixpê 12jê mā anē nē mē ixkwỳjê hkàx ã mē inhmā kapêr kaxyw ahte hapu hã mē ixto mō. ¹⁸ Hāmri nē mē inhmā amnhĩ kukamā tanhmā amnhĩ jarēnh to nē mē inhmā:

—E na pu mē ra Jerujarē hwỳr mō. Kamā koja mē pahkwỳjaja inhĩpêx kati nē. Koja mē patre krãhtũmjê mē Mojes kapêr o mē ahkre xwỳnhjê nhĩhkram ijaxà nhūm mē kot ixpĩr kaxyw ixtã amỳnê. ¹⁹ Koja mē kãm ixkurê xwỳnhjaja ixpynê nē Rōm nhō xwỳnhjê nhō pôristijê hwỳr ixto tē nē mē kãm tanhmā ixto hêx to. Hāmri nhūm mē kuma nē mē mar xà hkôt tanhmā inhĩpêx to. Nhūm mē hkwyjaja ixtã hpêr o axkê nē ixtã akunha nhūm mē hkwyjaja ixto kapêr punuj nē tanhmā ijapry hto nē ixtak. Hāmri nē ma ixto tē nē pĩ kahpa hã inhô nē ixpĩ. ã koja mē inhĩpêx anē. Nom kot paj ixytyk ã ixtã apkati axkrunēpxi nhūm Tĩrtũm akupỹm ixto ixtĩr. Anē.

Xiakre mē Juãw wa katorxà kot wa ho Jejus wỳr ã harēnh

Makre 10.35-45; mãänēn Rōmãn 12.3, 12.10, 12.16; Epes 4.2; Piripos 2.3-8; Xiakre 4.6; Wam Pêtre 5.3

²⁰ Tã nhūm Jepetew prōja amnhĩ kôt Jejus wỳr hkra Xiakre mē Juãwja wa o tē. Kot wa ho Jejus wỳr kaxyw hwỳr wa o tē. Mē ixpyrà nē wa kot Jejus kôt pa ho pa xwỳnhjê hō na pre wa nhūm wa katorxàja Jejus wỳr wa o tē. Hāmri nē kutã hkõnkrã ho tēm nē nhỹ ²¹ nhūm kãm:

—Pa mo na? Anē.

Hāmri nhūm kãm:

—Ma ixkrata na pa ixte wa ho awỳr kaxyw awỳr wa o tē. Xê kot kaj nhỹrmã ate mē piitã mē ho amnhĩptar kaxyw nhỹ nhūm ixkrata wa akutã anhĩjê nē wa kêp anhō kōwenatô nē akutã anhĩjê nē wa ato nhỹ. Ja prãm xàj na pa ã wa ho awỳr anē. Anē.

²² Hāmri nhūm kuma nē Xiakre mē Juãw wa omu nē wa kãm:

—Nà na war akatorxàja htỳx ã war ato ixwỳr anē. Koja mē tokyx ixpĩ kot paj amnhĩ xà htỳx kãm ijamak kãm ty. Tã xà koja mē ixpyrà nē ã war anhĩpêx anē ka wa ixpyrà nē amnhĩ xà htỳx kamã ajamak rax kãm ty nà? Anē.

Hāmri nhūm wa kãm:

—Tỳ. Nà kot pa wa ijaxwỳja anē nē apyrà nē amnhĩ xà htỳx kãm ijamak kãm ty. Anē.

²³ Hāmri nhūm wa kãm:

—Nà ãm hāmri na ka wa amnhĩ jarē. War ate ixpyrà nē ixkôt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmā war amã nē hkêt nē. Kêt inhō Papaj tãm koja ixkaxyw mēhō japêr nhūm inhĩhkô hã nhỹ. No pa kot paj amnhĩ kaxyw mēhō jarēnh kêt nē.

Anhỹr o wa kãm kapêr. ²⁴ Hāmri pa mē ixte wa urak nē Jejus kôt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nē wa kamã inhgryk nē. Hāmri nē axpēn mã ixkapêr o:

—Tk. Nà koja Juãw mē Xiakre wa nhỹrmã kêp õ kōwenatô nē mē pahto amnhĩptar kêt kumrêx. Anē.

²⁵ Nhūm Jejus mē inhma nē amnhĩ wỳr mē ixpiitã mē inhmā hpa ho apê nē mē inhmā:

—E mē amnê ixwỳr axkamē pa mē amã awjarē mãn. Anē.

Hāmri pa mē hwỳr axkamē nhūm mē inhmā:

—E mē inhma. Na hte Ijaew kêt xwỳnhjê nhō pahijaja ã amnhĩ nhĩpêx anhỹr o ri pa nē amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nē kãm mē àpênh xwỳnhjê pix mã mēmo mē àpênh ã karõ. Na htem ã amnhĩ nhĩpêx anhỹr o hkrĩ. Nē mē kot mex ã harēnh kaxyw tanhmã mē ho mex to ho pa. ²⁶⁻²⁷ Tã no mē kajaja. Kêr ka mē ho mē urak kêt nē. ãm te amarĩ ri mē apa pyrak o axpēn nhĩpêx o ri apa. Nē te mē apê mē kãm axàpênh xwỳnh pyrak o amnhĩ nhĩpêx o ri mē hkôt apa. No kêr ka mē ho amnhĩptar mã ajamaxpêr o ri apa hkêt nē. ²⁸ Mē ate mēmoj tã pa ixkutã anojarêt ho apa kaxyw na pa pre mē awỳr ixwryk kêt nē. Ixte amarĩ mēmoj to mē kamjaja mē akutã inhnojarêt o ixpa kaxyw na pa pre mē awỳr wry. Nē mē ate ixkôt amnhĩ xunhwỳr xwỳnhjê nē ixytyk kaxyw na pa pre wry. Anē.

Jejus kot no hkre xwỳnh wa ho mex ã harēnh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarẽ hwÿr ra Jeriko htêp o mõ. Hãmri nẽ kurũm ixkaton mõ nhũm mẽ ohtô nẽ mẽ ixkôt mra. ³⁰ Nhũm pry nhĩhkjê hã no hkre xwÿnh wa àhwÿr o hkrĩ xwÿnhja wa amnhĩ wÿr mẽ inhmrrar mar o nhÿ. Mẽ ohtô nẽ Jejus kôt mẽ mrrar xwÿnhjê mrrar ma nẽ mẽ kãm:

—Kwa mo na? Mẽmoj wÿr na ka mẽ axohtô nẽ mra? Anẽ.

Hãmri nhũm mẽ wa kãm:

—Nã Jejus pẽ Najare nhõ xwÿnhhta kôt na pa mẽ mra. Anẽ.

Hãmri nhũm wa mẽ kuma hãmri nẽ kàx pẽ Jejus mã kapër nẽ kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyrãk. Jakamã kwa wa ixkamã axukaprĩ nẽ akupÿm wa ixto mex. Anẽ.

³¹ Hãmri nhũm Jejus kôt mẽ mõr xwÿnhjaja wa kuma nẽ wa kãm:

—Tk. Kwa war akapër kêt nẽ nhÿ nã. Anẽ.

Tã no nhũm wa ãm mẽ kuma nẽ xatã amnhĩ to kuwÿ. Kàx pẽ amnhĩ to kuwÿ.

³² Hãmri nhũm Jejus wa kuma nẽ xa nẽ wa omu nẽ wa kãm:

—Pa mo na? Tanhmã kot pa wa ato? Anẽ.

³³ Hãmri nhũm wa kãm:

—Nã akupÿm wa inhmã wa ixrĩt mex prãm. Anẽ.

³⁴ Hãmri nhũm kãm wa hkaprĩ nẽ wa no htok nhũm wa akupÿm rĩt mex kurẽ kumrẽx. Hãmri nẽ rĩt mex ã amnhĩ pumu nẽ hkĩnh tÿx nẽ ma Jejus kôt hkwyjê hkôt mõ.

21

*Jejus kot Jerujarẽ hwÿr àr ã harẽnh
Makre 11.1-11; Rukre 19.28-40; Juãw
12.12-19*

¹ Tã nhũm Jejus kormã Jerujarẽ hwÿr kormã mõ. Pa mẽ hkôt mõ nẽ ra Petake hwÿr ixàhtêp o mõ. Hixêt pẽ Oriwêhti kahti ri na pre krĩja xa. Jakamã pa mẽ wa hwÿr ixàhtêp o mõ nhũm Jejus mẽ ixte hkôt ixpa ho ixpa xwÿnhjê wa ho axkrut nẽ amnhĩ kukamã wa kumẽ. ² Nẽ wa kãm:

—E wa ma krĩ mũj wÿr mẽ ixkukamã wa tẽ. Nẽ wa hwÿr axà nẽ nhÿri jumẽnre mẽ hkra wa kãm ê nẽ wa ãm xwÿnh wa omu hãmri nẽ kãm ê xà hpôt nẽ man akupÿm

amnẽ hamẽ wa o tẽ. ³ Kojã mẽhõ ja hã war apumu nẽ hã tanhmã war amã kapër to ka wa kãm ã ijarẽnh anẽ nẽ kãm: “Nã mẽ panhõ Pahihti na hã karõ pa wa hwÿr tẽ.” Anhÿr o wa kãm ijarẽ. Hãmri nhũm war ama nẽ war amã òr kurẽ kumrẽx. E wa ma hwÿr tẽ. Anẽ.

⁴ Tĩrtũm kapër ã kagà htũm ra kot ja kukamã harẽnh. Na pre ra Tĩrtũm nhÿ hã kapër xwÿnhjê hõ ja jarẽ nẽ hã kagà ho:

⁵ Pa Jerujarẽ nhõ xwÿnhjaja. Kwa mẽ tee ri amnhĩ kukamã ajamaxpër ho amã ma hkêt nẽ. Ota mẽ anhõ pahi nywta ra jumẽnre hã nhÿ nẽ mẽ awÿr hpôx o tẽ. Te kot amnhĩ to grire xwÿnh pyrãk o amnhĩ nhĩpêx nẽ tẽ.

⁶ Anhÿr o kot hkukamã harẽnh jakamã nhũm Jejus amnhĩ kukamã ja wa kumẽ hãmri nhũm wa ma hwÿr htẽm kurẽ kumrẽx. ⁷ Nẽ krĩta wÿr pøj nhũm Jejus kot wa kãm harẽnh xà hkôt nhũm wa jumẽnreta pumu. Hãmri nẽ hamẽ wa kãm ê xà hpôt nẽ ma Jejus wÿr wa o tẽ. Hãmri nẽ kaxyw amnhĩ xê hkwy hkwrÿ nẽ kãm ho jumẽnre nywta kô kahty. Nẽ kãm ho htÿx nẽ o xa nhũm Jejus hã nhÿ nẽ hã mõ. ⁸ Kormã Jerujarẽ hwÿr hixêt ã àpir o mõ. Nhũm mẽ kot omunh o kuhê xwÿnhjaja hkĩnh nẽ ma hkukamã pry ho mex kaxyw amnhĩ xê hkwyptyr ho mõ. Nẽ pô hkwy jakà nẽ utyr o mõ. ⁹ Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kàx pẽ Tĩrtũm mex o mex ã harẽnh o hkôt mõ nẽ harẽnh o:

Ota Tĩrtũm kot mẽ pahwÿr mẽn h xwÿnhhta ra pøj. ãm hãmri na mẽ pahwÿr wrÿ. Ja na mex kumrẽx. Kêp mẽ panhõ Pahihti mex na. ãm hãmri na pre Tĩrtũm mẽ pahwÿr kumẽ. Tĩrtũm mex kumrẽx. ãm mex o mex.

Anhÿr o Jejus kôt Jerujarẽ hwÿr harẽnh o mõ. Kot mẽ ho amnhĩptar kurẽ kumrẽx ã hkamnhix jakamã hkĩnh nẽ hkôt ã harẽnh anhÿr o mõ. ¹⁰ Hãmri nhũm krĩ nhõ xwÿnhjaja tee ri mẽ kuma nẽ axpẽn mã:

—Kwa mẽhõ na we hpôx o mõ nhũm mẽ ã hkôt harẽnh anhÿr o mõ? Anẽ.

¹¹ Hãmri nhũm Jejus kôt mẽ mrrar xwÿnhjaja mẽ kuma nẽ mẽ kãm:

—Nà Tirtûm nhÿ hã kapêr jarênh xwÿnh pê Jejus na. Kêp Garirej kamã krî pê Najare nhô xwÿnhhta na. Anê.

Jejus kot Tirtûm nhôrkwÿ hwÿr àr ã harênh Makre 11.15-19; Rukre 19.45-48; Juãw 2.13-22

¹²⁻¹³ Tã hãmri nhÿm Jejus Jerujarê wÿr axà nê jumênre rÿm wrÿ nê ma Tirtûm mã amnhÿ jarênh xà hã ixkre hwÿr tẽ nê axà. Hãmri nê tee ri mē kot tanhmã ixkre kamã amnhÿ nhÿpêx to hã mē omunh o xa. Nhÿm mē axtem nê môx nê ôwêhti nê tuuti ho wênê ho kuhê. Mē kot haprôr nê Tirtûm mã amnhÿ jarênh kaxyw kãm hpar nê ôr kaxyw mē kãm ho wênê ho kuhê. Nom axtem nê mē kãm hã ohtô rax kãm mē kãm ho wênê. Hãmri nhÿm Jejus mē hwÿr axà nê tee ri mē omu nhÿm ja kêp omnuj tÿx kumrêx. Hãmri nhÿm mē hwÿr tẽ nê mē kot kãxpore ho pinphanh xwÿnhjê pê mē ô mēsti rênh pa. Nê mē kot tuuti ho wênê xwÿnhjê pê hkrî xà hkujate nê rênh pa. Hãmri nê mē kãm:

—Tk. Kwa Tirtûm kapêr ã kagà htÿm kot ixkreja jarênh kot:

Inhôrkwÿja ãm mē ate inhmã amnhÿ jarênh xà hã ixkre pix kaxyw na.

Anhÿr o kot harênh tã ka mē axtem nê kamã ã amnhÿ nhÿpêx anê. E kwa mē ajapôx tokyx anê. Anê.

Hãmri nê mē kator pa nhÿm mē ma hapêx. ¹⁴ Hãmri nhÿm mē no hkre xwÿnhjaja nê mē hyk o mē pa xwÿnhjaja mra nê agjê nê Jejus kutã kuhê nhÿm mē omu nê akupÿm mē ho mex. ¹⁵⁻¹⁶ Hãmri nhÿm mēhprÿ hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtûm na pre mē ixwÿr amê.

Kot kaj te anhÿgêT Tawi pyrà nê mē ixto amnhÿptâr o apa.

Anhÿr o kãm grer o kuhê. Hãmri nhÿm patre krãhtÿm mē Tirtûm kapêr tÿm o mē ahkre ho mē pa xwÿnhjaja tee ri ã mē grer anhÿr ã mē kuma. Nê tee ri Jejus kot mē no hkre xwÿnhjê mē mē hyk o mē pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mēhprÿjaja mē grer kãm ã ajarênh anê ka mē mar kêt nê? Mē grerja nexti hã. Anê.

Hãmri nhÿm mē kãm:

—Tÿ ixte mē mar kênã. Tirtûm kãm hprãm xà hkôt na mē ã inhmã inhmex o inhmex ã ixtã grer anê. Tirtûm kapêr ã kagà htÿm kot ã mē hkukamã harênh kot anhÿr. Mē harênh kot:

Koja mēhprÿjaja Pahihti mã mex o mex ã grer o kuhê.

Anhÿr o kot mē hkukamã harênh kênã. Tã mãn ka mē kormã kamã harênh kêt jakamã na ka mē ja jarênh mar kêt nê. Kwãr mē mãmrÿ ã inhmex ã grer anê.

¹⁷ Anhÿr o mē kãm kapêr hãmri nê mē inhmã anê pa mē ixkreta rÿm ijapôj nê ma akupÿm Petãn wÿr mra nê kamã amnhÿm hikra.

Jejus kot mēmo hpâr mã kapêr ã harênh Makre 11.12-14; mãânên Xiakre 1.6

¹⁸ Tã nhÿm kwÿhtã nhÿm Jejus kãnhmã nhÿ nê mē inhmã anê pa mē ixrohã ma akupÿm Jerujarê hwÿr mra. Hãmri nê kormã mō nhÿm Jejus pry kahti ri ra kãm prãm nê. ¹⁹ Hãmri nê mēmo pÿ pê fikêhti jarênhja pumu nê kot ô hkwy rênh nê hkrêr kaxyw hwÿr mât. Hãmri nê tee ri ô japêr nhÿm ô hkêt nê ãm hô hpix harir. Hãmri nhÿm tee ri omu nê kãm:

—E kot kaj axte axô hkêt kumrêx.

Anhÿrja o nhÿm grà par kurê kumrêx.

²⁰ Hãmri pa mē ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhÿ nhÿpêx to nê grà kurê kumrêx? Anê.

²¹ Nhÿm mē inhmã:

—Nà kot kaj mē ixpyrà nê fikêhti kot tanhmã amnhÿ nhÿpêx to kaxyw Tirtûm mã ajamaxpêr tÿx nê nhÿm amã hprãm xà hkôt amã tanhmã hipêx to. Nom kër ka mē ajamaxpêr kati ho tee ri hkukamã ajamaxpêr kêt nê. ãm kaxyw Tirtûm kôt ajamaxpêr tÿx nê nhÿm mē amã tanhmã mēmoj nhÿpêx to. ãm hãmri na pa mē amã ja jarê. No ãm ja pix kêt. Kot kaj mē mãânên hixêt mÿj mã akapêr nê kãm: “E anhÿr xàta rÿm akato nê ma tẽ nê gô rax kãm mrô.” Anê nhÿm amar xà hkôt ã amnhÿ nhÿpêx anê.

²² —Nê kot kaj mē mēmoj tã Tirtûm wÿr nê kaxyw kãm ajamaxpêr tÿx kãm hã awÿ nhÿm amã mēmoj prãm xwÿnhhta gô. Anê.

Mêhõ nhỹ hã Jejus kot mẽ ahkre hã harênh

Makre 11.27-33; Rukre 20.1-8

²³ Nhũm arĩgro hõ hã nhũm Jejus kêwe axte Tĩrtũm mã amnhĩ jarênh xà hã ixkreja wỳr axà nẽ kamã mẽ ahkre ho nhỹ. Mẽ kãm tanhmã mẽ kot amnhĩ nhĩpêx to nẽ nhỹrmã Tĩrtũm mẽ wa kuri htĩr tũm nẽ pa kaxyw tanhmã mẽ kãm kapêr to ho nhỹ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwỳr mra nẽ hêx rom mẽmoj tã hkukja nẽ kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nẽ tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anẽ nà? Anẽ.

²⁴ Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nẽ tanhmã inhmã harênh to pa rĩ kormã mẽ amã amnhĩ jarê. ²⁵⁻²⁶ Finat Juãw Paxis ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtũm nhỹ hã? E mẽ atõ inhmã ja jarê. Anẽ.

Hãmri nhũm mẽ kuma nẽ tee ri kot tanhmã kutã kãm harênh to hkukamã hamaxpêr pẽ axpên pumunh o kuhê nẽ axpên mã:

—Kwa tanhmã kot puj wem kãm ja jarênh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarênh xwỳnh ã harê. Tã kot puj mẽ kãm kot amnhĩ krã hkôt kot mẽ hkrã kumrãr ã harê nhũm mẽ tee ri mẽ pama nẽ mẽ pakamã gryk tỳx nẽ. Nẽ mẽ paxêx rom ã mẽ pahte kãm pakapêr anhỹr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harê hãmri nhũm mẽ pamã: “Kwa ã kot anhỹr kênã na ka prem kapêr ma nẽ hkôt ajamaxpêr kêt nẽ?” Anẽ. Jakamã kot puj mẽ ja pymaj tanhmã kãm harênh to hkêt nẽ. Kot puj mẽ ãm kãm aa te mẽ pahte ja jarênh mar kêt pyrãk o harê. Anẽ.

Mẽ kot tanhmã Jejus mã nẽ nhũm kot ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm kaprỳ o kuhê.

²⁷ Hãmri nẽ kãm:

—Konên. Mẽ ixte mêhõ nhỹ hã kapêr o pa hã omunhre hã. Anẽ.

Hãmri nhũm mẽ kuma nẽ mẽ kãm:

—Tk. Tôe kot pa xep ijaxwỳja mẽ amã tanhmã amnhĩ jarênh to hkêt nẽ. Ijaxwỳja ixte mêhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mêhõ my mẽ hkra wa pijakrut ã wa harênh

Matêwre 7.21-23; Rukre 7.29-30

²⁸ Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nẽ mẽmoj tã kuxi nẽ tanhmã mẽ kãm ujarênh to nẽ mẽ kãm:

—E pa mẽ amã awjarê ka mẽ inhma. Koja mêhõ hkra my hamêxkrut. Hãmri nẽ hkra kot waja mã tanhmã kapêr to nẽ kãm: “E kêt ka jarãhã ma tẽ nẽ inhmã pur kãm apê.” Anẽ. ²⁹ Hãmri nhũm kuma nẽ pur mã htêm kaga nẽ hitõt nẽ. Tãã no ãm hã ahtũmre nẽ tanhmã hamaxpêr to hãmri nẽ ma hwỳr tẽ nẽ kamã ãpênh o xa. ³⁰ Hãmri nhũm wa hipêêxàja hpãnhã hkra kot hapu hwỳr tẽ nẽ mã kãm kapêr anẽ nẽ kãm: “E kêt ka ajaxwỳja atõ hkôt tẽ nẽ wa inhmã apê.” Anẽ nhũm kuma nẽ kãm: “Tôe. Nà kot paj ma tẽ.” Anhỹr tã no ãm hõta kĩnhã htêm kêt nẽ.

³¹ —Jakamã e. Nhỹ hkra na pre hipêêxà kapêr ma nẽ hkôt amnhĩ nhĩpêx nẽ kapêr nhĩrõp ãm kêt nẽ? Xà kot waja nà? Xà kot haputa? E mẽ atõ tanhmã inhmã wa harênh to. Anẽ.

Hãmri nhũm mẽ kuma nẽ kãm:

—Nà kot wata. Kot wata na hitõt tã tanhmã hamaxpêr to nẽ ma tẽ nẽ kãm apê. Anẽ.

Hãmri nhũm mẽ kãm:

—Tỳ ãm hãmri na ka harê. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapêr kôt amnhĩ nhĩpêx o apa hã amnhĩ jarênh tã hkwỳm ri amnhĩ nhĩpêx o apa. Te mẽ ate kot hapu kot hipêêxà mã ãpênh ã amnhĩ jarênh tã kãm ãpênh kêeta pyrãk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapêr ma nẽ hkôt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. ãm hãmri na pa mẽ amã ixkapêr. ³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx

ã mẽ amã karõ ho pa. Tã no ka mẽ ãm ama nẽ ãm ama nẽ aa kapêr kôt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwýnh kwýjaja mẽ arom kuma nẽ Tĩrtũm kôt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ urak nẽ ã amnhĩ nhĩpêx anhỹr kêt nẽ. Anẽ.

*Mẽ àpênh punu xwýnhjê jarênh
Makre 12.1-12; Rukre 20.9-18*

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nẽ mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nẽ mẽ kãm awjarê nẽ mẽ kãm:

—Koja mẽhõ mẽ kot kãm pur kãm àpênh kaxyw hkwyjê mã karõ nhũm mẽ ma hwýr mra nẽ kamã mẽmo hy hkre nẽ hkre pa. Hãmri nhũm hpur nhõ dõn nhỹhỹm nojarêt nẽ kãm mẽ àpênh xwýnhjê mã tanhmã hpur jarênh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamýnh pa nẽ ho axkjê. Nẽ ixkutêp inhmã inhõ jaxwý nẽ mãmrĩ anhõ tanhmã ho hprãm xà hkôt tanhmã ho.”

—Anhỹr o mẽ kãm kapêr hãmri nẽ ma nhỹhỹm mẽ. ³⁴ Tã nhũm ra pur kãm mẽmoj hkã pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwýnhjê ho axkrunêpxi nẽ akupým mẽ hwýr mẽ kurê. Mẽ kot mẽ kãm hkwy nhõr nhũm mẽ ma kot kãm o mör kaxyw nhũm ma mẽ hwýr mẽ kurê. ³⁵ Nhũm mẽ ma hwýr mẽ. Mõõ nẽ ra hwýr pøj nhũm mẽ amnhĩ wýr mẽ omu nẽ axtem nẽ mẽ homnuj nẽ. Nẽ mẽ unê nẽ ja tak nẽ ja pĩ nẽ hõja nhũm mẽ kên o htak hãmri nẽ amnhĩ nẽ wa hano nhũm wa ma akupým ý kamã mẽ. ³⁶ Hãmri nhũm mẽ õ patrãwja tee ri wa omu nẽ hamaxpêr o: “Kwa nà na mẽ ixpê inhmã mẽ àpênh xwýnhjê homnuj týx nẽ. Nà kot paj axte mẽ hwýr mẽ hkwyjê rẽ. Nom hpãnhã mẽ ho ohtõ nẽ mẽ kurê. Kê mẽ ohtõ nẽ mẽ hwýr mẽ nẽ tã inhmã inhõ hkwy jamý nẽ man ixwýr o mẽ.”

—Anhỹr o hamaxpêr hãmri nẽ mẽ hwýr jajê rẽ nhũm mẽ ma akupým mẽ hwýr mẽ. Nhũm mẽ amnhĩ wýr mẽ ohtõ hã nẽ mã mẽ ho anê nẽ mẽ hipêx kati nẽ nhũm mẽ ý kamã ma õ patrãwja wýr akupým mẽ.

³⁷ Hãmri nhũm tee ri mẽ omu nẽ hamaxpêr

o: “Hêxta waa nẽ. Tanhmã kot paj amnhĩ nhĩpêx to? Nà kot paj pêr mẽ hwýr ixkraja mãn mẽ. Inhmã hapê htýx tã kot paj mẽ hwýr kumê kê ma mẽ hwýr mẽ. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwý gõ.” Anẽ.

—Hãmri nẽ mẽ hwýr kumê nhũm ma mẽ. ³⁸ Tã hãmri ra mẽ hwýr hpõx o mẽ nhũm mẽ amým amnhĩ wýr omu nẽ kêp hkra hã omu nẽ axtem nẽ hã axpên mã amýnê nẽ axpên mã: “E oněj hpur nhõ dõn krata tẽ. Koja nhỹmã õ papaj mýr pẽ amnhĩm hpur ã pykata pytà nẽ ho õ. Jakamã kwa pu mẽ hpĩr kurê kumrêx nẽ kêp hpur ho arĩk nẽ ho panhõ. E tokyj pu mẽ kupĩ ri.” Anẽ.

³⁹ —Hãmri nhũm ra tẽ nẽ mẽ hwýr pøj nhũm mẽ unê nẽ hpur nẽ ho kato nẽ mã ho anê nẽ kupĩ. Æ mẽ ujarênh kot anhỹr. Anẽ.

⁴⁰ Nhũm pre ã Jejus mẽ kãm ujarênh anê. Hãmri nẽ hã mẽ hkukja nẽ mẽ kãm:

—E koja pur nhõ dõnja hkra jarênh ma hãmri nẽ tãm mẽ hwýr mẽ hãmri nẽ tanhmã mẽ hipêx to wehe? Anẽ.

⁴¹ Hãmri nhũm mẽ kãm:

—Nà koja ma akupým mẽ hwýr mẽ hãmri nẽ mẽ homnuj týx nẽ mẽ himex pa. Hãmri nẽ hpãnhã nhãm hpur ã mẽmojjê rẽ nhũm mẽ tã katat kôt kãm àpênh o pa. Anẽ.

⁴² Hãmri nhũm Jejus mẽ kãm:

—Tý ãm hãmri na ka ã mẽ harênh anê. Kot mẽ ho anhỹr mã tãm kênã. Mã ka prem ra Tĩrtũm kapêr ã kagà htũm kot tanhmã ja jarênh toja ma? Harênh kot:

Mẽ kot kên o amnhĩm òrkwy nhĩpêx kaxyw nẽ kên maati pumu nẽ htýx omnuj ã hkamnhĩx nẽ hkagata. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Tĩrtũm kot kên maati mex ã harênh xwýnhnta mẽ pamã mex o mex.

Æ Tĩrtũm kapêr ã kagà htũm kot ja jarênh kot anhỹr. ⁴³ Ja pyrã nẽ na pre ra Tĩrtũm amnhĩ kaxyw mẽ apê Ijaew xunhwý. Mẽ apê hkra nẽ hkôt mẽ ate amnhĩ nhĩpêx kaxyw amnhĩ kaxyw mẽ axunhwý. Tã ka mẽ axtem nẽ hkaga. Te mẽ kot kên maati pumunh nẽ mex kêt ã hkamnhĩx nẽ hka-gata pyrãk. Jakamã koja mẽ apãnhã Ijaew

kêt xwÿnh kwÿjê xunhwÿ nhÿm mẽ arom hkôt amnhĩ nhĩpêx mex o pa. Jao ra mẽ kêp hkra nê. Anê.

⁴⁴ Nhÿm pre ã Jejus mẽ kãm te kêp kên maati pyræk o mẽ kãm amnhĩ jarênh anê. Hãmri nê axte amnhĩ tâ kuxi nê mẽ kãm axte kên jarênh pyræk ã amnhĩ jarê nê mẽ kãm:

—Nà kot kaj mẽ atõ ixkaga hãmri nê te mēhō htÿx htēm nê kên pumunh kêt nê hã hték nê tēm pyræk o amnhĩ nhĩpêx. Jao ixkutã amnhĩ xãm. Rÿ ka tanhmã ajamaxpêr to nê ixkaga nhÿm te kên maati kot anhĩpy tēm nê axôm par pyræk o anhĩpêx ka mẽ amex kêt kumrêx. Anê.

⁴⁵ Nhÿm pre ã mẽ kãm ujarênh kãm mẽ harênh anê. Hãmri nhÿm patre krãhtũmjê mẽ Parijew nhõ xwÿnhjaja tee ri amnhĩ tâ kuma ⁴⁶ nhÿm ja mẽ kêp omnuj tÿx jakamã nhÿm mẽ kãm unênh nê haxàr prãm nê. No mẽ ãm amnhĩ tâ kãm mẽ kot mar o kuhê xwÿnhjê puma nê. Mẽ kurom Jejus kêp Tĩrtũm nhÿ hã kapêr xwÿnh ã hkamnhĩx jakamã nhÿm mẽ kãm mẽ uma nê. Hãmri nê kormã tanhmã ho hkêt nê.

22

Pahi kot hkra hprõ kaxyw hkwÿjê hwÿr ã harênh

Rukre 14.15-24; mãänēn Wam Korĩt 6.9-11; Epes 5.5-6; Apokarip 19.7-8

¹⁻² Tã nhÿm Jejus axte mẽ kãm awjarê. Ijaew kot Tĩrtũm kaga hã mẽ kãm hã kuxi nê awjarê nê mẽ kãm:

—E pa mẽ amã ahpÿnhã mẽ kot Tĩrtũm kapêr mar nê tanhmã amnhĩ nhĩpêx to xwÿnhjê jarê ka mẽ inhma. Te mẽ kot pahihtiti kot hkra hprõ kaxyw nhÿm kot amnhĩ wÿr hkwÿjê hwÿr nhÿm mẽ kot harênh mar nê ahpÿnhã tanhmã amnhĩ nhĩpêx to xwÿnhjaja kot amnhĩ nhĩpêx pyræk. Kojã pahihtija hkra hã hkĩnh nê hã apkur mex kaxyw amnhĩ wÿr hkwÿjê hã karõ. ³ Hãmri nhÿm kãm mẽ àpênh xwÿnhjaja ra kot amnhĩ wÿr mẽ hã karõ xwÿnhjê hwÿr mra nê mẽ kãm nojarêr nhÿm mẽ kuma nê ãm mẽ kuma nê axtem nê mẽ kêp hitõt nê. Hãmri nhÿm mẽ tee ri mẽ kuma nê akupÿm tē nē pahihtiti mã mẽ harê.

⁴ —Hãmri nhÿm tee ri amnhĩ tâ mẽ harênh ma nê hpãnhã mẽ hwÿr axtem kãm àpênh xwÿnh kwÿjê rē nhÿm mẽ ma mẽ

hwÿr mra nê mẽ kãm: “Pa. E kwa mẽ tokyx. Na ra pahihtiti mẽ akutêp mẽõ nhĩpêx pa. Na mẽ môx kwÿ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ tokyx nã.” Anê. ⁵ ã mẽ kãm kapêr anhÿr tâ nhÿm mẽ kuma nê ãm mẽ kuma nê ma ahpÿnhã nhÿhÿm mra. Nhÿm ja ma àpênh mã mra nhÿm ja ma ihpur kãm àpênh mã ma tē nhÿm ja ma nhÿhÿm mẽmo to wēnē ho tē. ⁶ Nhÿm mẽ hkwÿjaja mẽ kãm ujarênh xwÿnhjê pynê nê mẽ htak o mẽ kupa.

⁷ —Hãmri nhÿm pahihtija mẽ harênh ma nê àhkurê nê. Hãmri nê mẽ hwÿr pōristi hkwÿ rē nhÿm mẽ ma mẽ hwÿr mra nê mẽ unê nê mẽ kupa nê mẽ õ krĩ hã hpòk pa. ⁸ Hãmri nhÿm pahihtiti kãm mẽ àpênh xwÿnh kwÿjê mã kãm: “Kwa ra ixte mẽ kutêp mẽõ mex kwÿ xunhwÿr tâ nhÿm mẽ ixwÿr mra r kêt nê. Ixtÿx ho mẽ mex ã mẽ hkamnhĩx nê amnhĩ wÿr mẽ hã karõ no mẽ mex kêt. Mẽ kot mẽ ixkutã apkur mã tãm kêt. ⁹ E kwa mẽ ma krĩ hkôt axtem mẽ hkwÿjê japêr o mra. Nê nhÿri mēhō pumu nê kãm awjarê kê man ixwÿr tē nē ixkra hã hkĩnh nē mẽ ixkutã apku. Mẽ ã mẽ kãm axujarênh o amrar anê.” Anê.

¹⁰ —Hãmri nhÿm mẽ kuma nê ma mẽ hapêr o mra nê mẽ piitã mẽ kãm anhÿr o mra. Nhÿm mẽ kuma nê wam tajê rom ma mẽ hkôt mra r kurê kumrêx. Mẽ kot amnhĩ to mex xwÿnhjaja nê mẽ kot amnhĩ tomnuj xwÿnhjaja hãmri piitã ma mẽ hkôt mra. Hãmri nê ixkreja wÿr mra nê hwÿr gjêx kaxyw nhÿm mẽ kãm mẽ ê mex gō nhÿm mẽ hagjê hãmri nê kormã mẽ apkur xã hã ixkre hwÿr agjê nê ho nÿt pa. ¹¹ Hãmri nhÿm pahihtija mẽ hwÿr axà nê mẽ piitã mẽ omu. Nhÿm ja pixi nê axtem nê hkwÿjê hkĩnhã mẽ kot kãm ê mex nhōrja jaxàr kêt rãhã axà nê apkur o nhÿ. ¹² Hãmri nhÿm tee ri ja hã omu nê hwÿr tē nē kãm: “Pa. Tk. Kwa na htem ixkrem gjêx kaxyw nē mẽ kot mẽ kãm mẽ ê mex nhōr jagjê nē rĩ kormã hwÿr agjê nē apku. Tã mon ka akwÿjê hkĩnhã haxàr kaga? Kwa na htem ã amnhĩ nhĩpêx anhÿr kêt nê.” Anhÿr o kãm kapêr nom nhÿm kuma nê ãm kuma nê tanhmã kutã kãm nê hkêt nê. ãm htÿx apkur o nhÿ. ¹³ Jakamã nhÿm tee ri omu hãmri nê hã mẽ kot kãm àpênh xwÿnhjê mã amÿnē nē mẽ kãm: “E mẽ hwÿr tē nē unê nē hpa

nê hte hpre nê ma o tẽ nê kamàt kô kamã amẽ. Kê tee ri mur nê amnhĩ xà htỳx kamã hamak o amnhĩ nham o axpẽn kamnhar tỳx kaprỳ ho nõ nê rĩ amnhĩ pumu.” Anẽ. Hãmri nhũm mẽ kuma nê kãm ho anẽ. ã mẽ ujarẽnh kot anhỳr. Anẽ.

¹⁴ Nhũm pre Jejus ã mẽ kãm ujarẽnh anẽ hãmri nê mẽ kãm:

—Nà Tĩrtũm kot pahihtita pyrã nê amnhĩ wỳr mẽ ho ohtô nê mẽ hwỳr tã na hte mẽ piitã hkôt amnhĩ xunhwỳr kêt nê. Jakamã na hte ãm mẽ ho grẽre nê amnhĩ wỳr mẽ ho api. Anẽ.

Parijew nhõ xwỳnh kot Jejus kamã hamak ã mẽ harẽnh

Makre 12.13-17; Rukre 20.20-26; mããnẽn Rômãn 12.1, 13.7

¹⁵⁻¹⁶ Tã nhũm Parijew nhõ xwỳnhjaja ã Jejus kot mẽ kãm ujarẽnh anhỳrja ma hãmri nê kurũm kato nê tanhmã hkukamã axpẽn mã hã àmnẽn to. Hãmri nê hwỳr mẽ hkwyjê mẽ Erox kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurẽ nhũm mẽ ma hwỳr mra nê omu nê kãm:

—Kwa Jejus. Nà ãm hãmri na ka hte Tĩrtũm kapêr o mẽ ahkre mex o ri apa nê mẽ kamã akahak o apa hkêt nê. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. ¹⁷ E kwa mẽ inhmã mẽmoj jarẽ. Rôm nhõ pahihtiti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm õr kêt nê? E kwa mẽ inhmã tanhmã ja jarẽnh to. Anẽ.

¹⁸ Nhũm prem ã hêx rom àhkukjêr anhỳr tã no nhũm ra mẽ hamaxpêr ã mẽ omu nê mẽ kãm:

—Tk. Kwa mon ka mẽ ã axêx rom ja hã ixkukjêr anẽ? ¹⁹⁻²⁰ E mẽ atõ inhmã kàxpore htỳxre hõ gõ pa omu. Anẽ.

Hãmri nhũm mẽ kãm ja gõ nhũm kupy nê kànhmã mẽ kãm kupẽ nê mẽ kãm:

—E mẽhõ nhĩxi nê mẽhõ karõ na ja hã? Anẽ.

²¹ Hãmri nhũm mẽ kãm:

—Pahi Sesti karõ nê hixi na hã. Anẽ.

Hãmri nhũm mẽ kuma nê mẽ kãm:

—Tỳ. Tô kêr ka mẽ mãmrĩ kãm hkwy nhõr o apa. Hã hkarõ nê hã hixi. Tãm kot hipêx xwỳnh jakamã õ na. No mẽ kajaja na pre

Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anẽ.

²² Hãmri nhũm mẽ amnhĩ jaêr pê ã kot kàxpore jarẽnh anhỳrja ma nê axte kãm tanhmã nê hkêt nê. Hãmri nê akryk omu hãmri nê ma akupỳm mra.

Akupỳm mẽ htĩr ã mẽ harẽnh

Makre 12.18-27; Rukre 20.27-40; Juãw 5.21, 6.39-40; mããnẽn Wam Korĩt 6.14, 15.12-28; Wam Tesarõn 4.13-18

²³ Tã nhũm Satusew nhõ xwỳnh kwỳjaja mẽ kot akupỳm mẽ htĩr kêt ã mẽ hkamnhĩx kêt xwỳnhjaja na pre mẽ. Na pre htem mẽ htyk nê mẽ hapêx kumrêx ã mẽ hkamnhĩx jakamã axpẽn mã tanhmã Jejus jarẽnh to nê axpẽn mã:

—E kwa pu mẽ hwỳr mra nê mẽmoj xihtỳx ã hkukja. Kê mẽ pama nê tee ri tanhmã mẽ pamã kapêr to hkukamã hamaxpêr kaprỳ. Kê mẽ piitã ja hã omu nê àhpumunh kêt ã omunh kurê kumrêx. E tokyx pu mẽ hwỳr.

Anhỳr jakamã Parijew nhõ xwỳnhjê pyrã nê hêx rom ma hwỳr mra nê hkukja nê kãm:

²⁴—Pa Jejus? Kwa mẽ inhmã mẽmoj jarẽ. Na pre finat Mojesja Tĩrtũm nhỹ hã ã mẽ panhĩgêjtjê mã karõ anẽ. Mẽ hkra hkêt rãhã mẽ pa nê mẽ htyk xwỳnhjaja nhũm mẽ harẽnh o:

Koja mẽhõ hprõ nê kamã hkra hkêt rãhã pan ty. Hã koja hkôt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwỳnhhta hkra pyrãk. Anẽ.

ã na pre Mojesja Tĩrtũm nhỹ hã mẽ kãm karõ anẽ. ²⁵ Jakamã kwa ga mẽ ixujarẽnh ma. Koja mẽ kot axpẽn to htõ xwỳnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkôt htõja hpãnhã ho hprõ ²⁶ nê wa axpẽn to pa. Nhũm mããnẽn kamã hkra hkêt rãhã ty. Nhũm htõ hõta haxwỳja hpãnhã tãm o hprõ nê we wa axpẽn to pa grire nhũm haxwỳja kamã hkra hkêt rãhã ty. Hãmri nhũm htõ hkwyjaja ni pyxi nê axpẽn pãnhã ho hprõ hpa no mẽhõ kamã hkra hkêt rãhã htyk pa.

²⁷ Hãmri nhũm mẽ hprõta mẽ hkôt amnhĩ to hitep nê ty. ²⁸ Tã Tĩrtũm kot akupỳm

nhÿrmã mẽ ho htÿr ronhÿx nhÿ nhÿx kêp nija mjên kumrêx? Ra piitã kot ho hprô kênã. E mẽ inhmã ja jarê. Anê.

29-30 Hãmri nhÿm Jejus mẽ kuma nê mẽ kãm:

—Nà kaxkwa kamã mẽ kot amnhÿ nhÿpêxja axtem na. Mẽ htÿr ri mẽ kot Tÿrtÿm kôt amnhÿ xunhwÿr xwÿnhjaja na htem ty hãmri nê Tÿrtÿm nhô krÿ kamã axte kãm hprô hprãm kêt nê pa. Jakamã hprô hkêt nê pa. Rÿ ni japêr nê mjên kêt nê pa. Nom ri kãm mjên rÿ hprô hprãm kêt nê pa. Hãmri nê Tÿrtÿm kapêr o mẽ wryk xwÿnhjê pyrà nê axte htyk kêt nê. ãm htÿr tÿm rãhã nê pa ho pa. Pêr mẽ ate Tÿrtÿm kapêr ã kagã htÿm mar mex kêt jakamã na ka mẽ ã ja hã ixkukjêr anê. Tÿrtÿm àhpumunh tÿx o àhpumunh tÿx jakamã kumã mẽ ate mẽmoj tã ixkukjêr xwÿnhhta na tanhmã kêp kute hkêt. Ra ja kukamã àhpumunh tÿx kênã.

31-32 —Nom mẽ ate akupÿm mẽ htÿr kêt ã mẽ hkamnhÿxja kot paj ixprÿ hã mẽ amã harê. Amnepêr na pre Tÿrtÿm pÿ hpôkja kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhô Tÿrtÿm na pa. Nê mãânêr ixpê Apraãw kra Ijak mẽ htãmnhwÿy Jako wa ô Tÿrtÿm na pa.

Anhÿr o Mojes mã amnhÿ jarê nhÿm kuma nê hã kagã. Kêp apu arÿ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepêr Apraãw nê hkra nê htãmnhwÿy mẽ htÿr ri ixpê mẽ ô Tÿrtÿm na pa pre.” Anhÿr o nhÿx pre mẽ harê. Nom na pre ã amnhÿ jarênh anhÿr kêt nê. Mẽ pamã te Apraãwja mẽ htyk nê mẽ hapêx pyràk. Nom nhÿm prem ra Tÿrtÿm ri ra akupÿm htÿr nê mex nê pa ho pa. Tã ka htem Tÿrtÿm kapêr kwÿm ri akupÿm mẽ htÿr kêt ã mẽ harênh o apa.

Anhÿr o Satusew nhô xwÿnhjê mã kapêr. 33 Hãmri nhÿm mẽ kot mar o kuhê xwÿnhjaja amnhÿ jaêr pê kot mẽ ahkreja ma.

Tÿrtÿm kapêr maati jarênh

Matêwre 10.37; Makre 12.28-34; Rukre 10.25-28; mãânêr Wam Juãw 5.3

34 Tã nhÿm Parijew nhô xwÿnhjaja Satusew nhô xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr

akuprô nê Jejus wÿr mra. Kot mẽ uràk nê hêx rom àhkukjêr nê hamaxpêr o hakrenh kaxyw hwÿr mra. 35 Hôja kêp Tÿrtÿm kapêr tÿm o mẽ ahkre o mẽ pa xwÿnh jakamã hêx rom kamã hamak kaxyw kãm kapêr nê kãm:

36 —Kwa Jejus. Ot pa mẽ awÿr mra. Kwa mẽ inhmã mẽmoj jarê. Na pre Tÿrtÿm ahpÿnhã mẽmoj to 10 nê hã mẽ pamã karô. Mẽ pahte hkôt amnhÿ nhÿpêx kaxyw hã mẽ pamã karô. Tã nhÿ kapêr na mex o kot hkwy jakrenh wehe? Anê.

37 Hãmri nhÿm kuma nê mẽ kãm:

—Nà kot mẽ pamã hã karô kot:

Kêr ka mẽ anhÿ piitã ho amã Tÿrtÿm kÿnh tÿx o apa. Mẽ amã hkÿnh tÿx o mẽmoj piitã hakrenh par o apa.

38 E Tÿrtÿm kot mẽ pamã hã karô ja na mex o piitã hakrenh par. 39 Nê hkôt ja:

Kêr ka mẽ amã akwÿjê hã ma ho te ka amã amnhÿ tã ma pyràk. Jao ra tãm mẽ hipêx.

40 ã Tÿrtÿm kapêr ã kagã htÿm kot mẽ pamã hã karô kot anhÿr. ã mẽ pahte amnhÿ nhÿpêx anhÿr o papaja na Tÿrtÿm kãm hprãm tÿx kumrêx. Kot kaj mẽ ja wa hkôt amnhÿ nhÿpêx rãhã ho ri apa nê mãânêr ra Tÿrtÿm kot mẽ pamã mẽmoj tã karô xwÿnh piitã hkôt amnhÿ nhÿpêx. Ja na pre Mojes mẽ Tÿrtÿm nhÿ hã kapêr xwÿnhjaja amnepêr Tÿrtÿm nhÿ hã mẽ panhÿgêjtê mã hã karô ho pa. Anê.

Jejus kot amnhÿ tã mẽ hkukjêr ã harênh Makre 12.35-37; Rukre 20.41-44; mãânêr Rômãn 1.3-4

41 Nhÿm Parijew nhô xwÿnhjaja arÿ Jejus mar o kuhê nhÿm amnhÿ tã tanhmã mẽ hkukjêr to. Nom te nhãm mẽhõ hã mẽ hkukjêr pyràk o mẽ hkukja nê mẽ kãm:

42 —E mẽ inhmã mẽmoj jarê. Tanhmã na ka htem axpên mã Tÿrtÿm kot mẽ akaxyw ãm mã xwÿnhhta jarênh to? Kêp mẽhõ kanrêhã htãmnhwÿy koja wehe? Anê.

Hãmri nhÿm mẽ kãm:

—Nà koja kato nê kêp pahi finat Tawi kanrêhã htãmnhwÿy koja.

43 Anê nhÿm Jejus mẽ kuma nê mẽ kãm:

—Tÿ. ãm hãmri na ka mẽ harê. No mo na htem axpên mã kêp pahi Tawi hkanrêhã

htàmnhwỳ pix ã harê nê mãânên kêp ò pahihiti hã harênh kêt nê? Tawi na pre Tirtũm Karõ nhỹ hã tanhmã harênh to nê harênh o:

⁴⁴ Na pre Tirtũm inhõ Pahihiti mã ã kapêr anê nê kãm: “E amnê ixwỳr tẽ nê inhĩkõ hã nhỹ nê inhmã mẽ ho amnhĩptàr o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxàr pa.” Anhỹr o pre kãm kapêr.

⁴⁵ ã Tawija Tirtũm kot Kris mã kapêr jarênh nê kêp ò pahihiti hã kagà anê. Mẽ kajaja na ka htem ãm kêp Tawi tàmnhwỳ pix ã axpên mã harênh o ri apa. No kêt Tawija na pre kêp ò Pahihiti hã harênh o pa. Anê.

⁴⁶ Hãmri nhũm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprỹ. Jejus mẽmoj piitã hkukamã àhpumunh tỳx o àhpumunh tỳx.

23

Jejus kot tanhmã Parijew nhõ xwỳnhjê jarênh to

Makre 12.38-40; Rukre 11.43-46, 20.45-47

¹ Tã nhũm Jejus mẽ ixte hkõt ixpa ho ixpa xwỳnhjê mẽ mẽ kot mar o kuhê xwỳnhjê mã kapêr nê mẽ inhmã tanhmã Parijew nhõ xwỳnh mẽ Mojes kapêr o mẽ ahkre xwỳnhjê jarênh to nê mẽ inhmã:

² —Nà Parijew nhõ xwỳnh mẽ Tirtũm kapêr tũm o mẽ ahkre xwỳnhjaja na htem hprĩ hã Tirtũm kapêr ã kagà htũm mar mex nê. ³ Jakamã kêt ka mẽ mar tỳx nê mẽ kot ho mẽ ajahkre kõt amnhĩ nhĩpêx. No mẽ kot amnhĩ nhĩpêxja kêt ka mẽ hkõt amnhĩ nhĩpêx kêt nê. Mẽ kot Tirtũm kapêr tũm o mẽ ajahkre htã hkõt amnhĩ nhĩpêx kêt nê.

⁴ Te mẽ kot mẽhõ kot mẽ katut ã mẽ kãm mẽ jênh pytĩ janhôr tã no ãm mẽ kuxwar hkwyỳ htur kêt kot amnhĩ nhĩpêx pyrak o na htem amnhĩ nhĩpêx o pa. Jao mẽ amã mẽmoj tã karõ nê mẽ amã: “E kêt ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr pix o mẽ amã kapêr o pa. Nom mẽ tãmjaja amnhĩ kapêr kõt amnhĩ nhĩpêx kêt nê.

⁵ —Na htem hkwyỳjê kot mẽ omunh nê mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nê mẽ mẽ noo mã mẽ ê mex pix kãm pa. Nê amnhĩm Tirtũm kapêr ã kagà htũm kwỳ hã kagà nê amnhĩ nhõkrã hã hanhõ nê amnhĩ pa hã hanhõ nê hã pa. Mẽ kot hã nohtỳx rãhã hã mẽ hkamnhĩx kaxyw nhũm htem ã amnhĩ nhĩpêx anhỹr o pa. Nê mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

⁶ —Nê mẽ pahpê Ijaewjê nhõ Tirtũm kapêr o mẽ ahkre xà hã ixkre kamã mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. Nê mẽmoj tã mẽ apkur xà mex ã arĩgro hã nhũm htem ma mẽ apkur xà hã ixkre hwỳr akuprõ nhũm mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. ⁷ Nê nhỹri pry hã mra nhũm mẽ kot mẽ omunh nê mẽ kêp mẽ ahkre xwỳnh maati hã mẽ hã hpijaàm kãm tanhmã mẽ kãm kapêr mex toja nhũm htem kãm hprãm. ã na hte Parijew nhõ xwỳnh mẽ Tirtũm kapêr tũm o mẽ ajahkre xwỳnhjaja hêx rom mẽ anoo mã amnhĩ nhĩpêx anhỹr o pa.

⁸⁻¹⁰ —No mẽ kajaja. Kêr ka mẽ ho mẽ urak kêt nê. Kê mẽ axpên mã mẽ ajarênh o: “Pahi Maati” anhỹr o mẽ ajarênh kêt nê. Rỳ mẽ ajarênh o: “mẽ ijahkre xwỳnh maati” anhỹr o axpên mã mẽ ajarênh hkêt nê. Kêt paxipix na pre Tirtũm mẽ akaxyw ixãm jakamã paxipix na ixpê mẽ anhõ Pahi Maati. Nê paxipix na ixpê mẽ ajahkre xwỳnh maati. No mẽ kajaja ixkõt mẽ apê axpên to atõx nê atõ na ka mẽ.

—Nê kêt ka mẽ ri axpên jarênh o: “Mêpahpãm” anhỹr kêt nê. Kêt kaxkwa kamã na Mêpahpãmja.

¹¹⁻¹² —Nê kot ka mẽ amnhĩ to rax prãm xà tanhmã amnhĩ to jarkrar to ho apa htã no nhũm akwỳjaja ama nê ãm ama nê akõt hamaxpêr kêt nê. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nê axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nê ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anê.

Jejus kot mẽ hkwyjê mã kapêr tỳx ã harênh

Makre 12.40; Rukre 11.39-52, 20.45-47

¹³⁻¹⁴ Tã nhũm Jejus hpãnhã Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjê mã kapêr. Nê mẽ kãm kapêr kãm hihtỳx nê mẽ kãm:

—E mẽ apê Parijew nhõ xwỳnh mẽ Tĩrtũm kapêr tũm o mẽ ahkre xwỳnhjaja. E mẽ inhma. Kot kaj mẽ amex kêt nê. Mẽ apê mẽ no kupyw xwỳnh na ka mẽ. Nê mẽ amã Tĩrtũm kôt amnhĩ nhĩpêx prãm kêt. Nê nhỹrmã atyk nê mẽ amã õ krĩ hwỳr axàpir prãm kêt. Nê akwỳjaja kot hwỳr àpir pymaj na ka htem akwỳjê nê tanhmã mẽ kãm axêx to ho apa. Mẽ kot mẽ apyrà nê Tĩrtũm kapêr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwỳr kahêxà kahê htỳx pyræk o apa.

¹⁵ —Nê mẽ akwỳjaja kot mẽ akôt amnhĩ xunhwỳr nê mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarênh to ho ri apa. Jakamã nhũm mêhõ mẽ ama nê mẽ akôt amnhĩ xãm hãmri nê ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrà nê ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nê.

¹⁶ —Hêxta waa nê. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nê Tĩrtũm mã amnhĩ jarênh xà hã ixkre nhĩxi jarênh kôt mêhõ mã amnhĩ jarê nhũm ama nê hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nê ate mẽ kãm õr xàta jarênh kôt ãm hãmri mẽmoj tã mêhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’ ” Anhỹr o hamaxpêr. Na ka htem ã mẽ ahkre ho apa anê. ¹⁷ Nom

mẽ ate mẽ ahkreta mex kêt. Pêr mẽ aja-maxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nê aa paxêx kêt rãhã ho papaja na Tĩrtũm kãm hprãm.

¹⁸ —Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nê Tĩrtũm mã mẽmoj nhõr xà hã mêtija jarênh kôt mêhõ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê rỳ ko na apu ãm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã mêtija ã kãm mẽmoj xi. Hãmri nê ra mẽ ate kãm õr xàta jarênh kôt ãm hãmri mẽmoj tã mêhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nê.’ Anhỹr o hamaxpêr.” Anê. Na ka htem ã mẽ ahkre anê. ¹⁹ Mẽ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mêtija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mêtija jakrenh ã harê. ²⁰ Nom Tĩrtũm mã mêtija mẽ kot hã kãm mẽmoj nhõrta te kot axpên pyræk jakamã kot kaj mẽ mêtija jarênh kôt mẽmoj tã amnhĩ jarê nê mãânên mẽ ate hã Tĩrtũm mã mẽmoj xirja jarênh kôt amnhĩ jarê. Hamê wa kot axpên pyræk jakamã hamê wa harênh pê amnhĩ to axêx kêt nê. Jakamã kêr ka mẽ mẽmoj tã amnhĩ jarênh kaxyw nê hamê wa harênh kôt ãm hãmri mẽmoj tã amnhĩ jarê nê ho axêx kêt nê. ²¹ Tã kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê Tĩrtũm mã amnhĩ jarênh xà hã ixkre hkôt hã amnhĩ jarê nê mãânên Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamê wa harênh pê amnhĩ to axêx kêt nê.

²² —Nê kot kaj mẽ ãm hãmri amnhĩ jarênh ã mẽmoj tã amnhĩ jarênh kaxyw nê kaxkwa jarênh kôt amnhĩ jarênhja o mãânên kaxyw

kaxkwa kamã Tirtûm krî xà maati hkôt amnhî jarê. Nê mãânên Tirtûm kôt amnhî jarê. Jakamã kwa hamê wa harênh pê amnhî to axêx kêt nê.

²³—Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem Tirtûm kapêr piitã hkôt amnhî nhîpêx kêt nê ãm hkwý kôt pix mã amnhî nhîpêx o ri apa. Na ka htem ãm kapêr o hpýnhre nê hkôt amnhî nhîpêx ã amnhî pumu nê ate amnhî to mex xwýnh ã amnhî jarênh o apa. No Tirtûm kãm hprãm xà piitã hkôt amnhî nhîpêx kêt nê. Mê ate tãm mê hipêx nê mê ho mex nê mê kamã axukapri hã kot mê amã karôja. Nê mê amã Tirtûm kînh ã kapêr kôt amnhî nhîpêx hã karôja ra mê ate mar tã hkôt amnhî nhîpêx kêt nê. Mê ate kapêr piitã hkôt amnhî nhîpêx ronhÿx ja mê amã mex o mex. ²⁴ Mê ate ãm kapêr o hpýnh nê hkôt amnhî nhîpêx jakamã te mê ate atÿx ri tanhmã axàpkur to ho mê akri pyrãk. Jao te mê axàpkur xà hã mêõ kamã pure pumunh nê nê hanhir nê rênh tã mãânên kamã kên rax pumunh tã nê hanhir nê rênh kêt rãhã hkur pyrãk. Jao Tirtûm kapêr o hpýnhre nê hkôt amnhî nhîpêx no piitã hkôt amnhî nhîpêx kêt nê. Pêr mê ajamaxpêr kêt tã na ka htem atÿx mê ahkre ho ri apa.

²⁵—Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Nã mê apê Parijew nhô xwýnhjaja te mê ate mê kot apkur kaxyw prat kre kuhôn punuj tã mex ã harênh nê kamã apkur pyrãk o na ka mê. Jao ãm mê akrãhkã rûm pix mã mê amex. Nê mê noo mã te mê amex pyrãk no mê anhõxàhkre kaxwýnh kãm mê ajamaxpêrja mex kêt. Mê akapêr prãm nê mê axàhkurê nê mê anhõxÿy. ²⁶ Mê ajamaxpêr mex kêt kênã. Kwa kêr ka mê tãm ajamaxpêr o tãm akwýjê nhîpêx o ri apa. Nê axãmnhîx ri mê kêp amrakati xwýnhjê mã mêmoj nhôr o ri apa. Kot kaj mê ã amnhî nhîpêx anê nhûm Tirtûm ja hã mê apumu nê amnhîm mê amex ã mê ajarê. No na ka htem amã mê amnhî to mex prãm xà ãm tee ri amnhî kuhôn japjê kaprÿ.

²⁷—Hêxta waa nê. Mê apê Parijew nhô

xwýnhjê mê mê apê Tirtûm kapêr tûm o mê ahkre ho mê apa xwýnhjaja kot kaj mê amex kêt nê. Te mê ate mê htykjê jagjênh xà pyrãk. Na htem mê hagjênh xà ho mex o pa nom kamã mê hi nê ahpunuj pix. ²⁸ Ja pyrã nê ã mê ate amnhî nhîpêx anhÿr. Kapôt rûm mê anhîja na mex. Te mê ate mê ho mex o apa pyrãk o na ka htem amnhî nhîpêx nhûm mê ãm akrãhkã pix pumu nom ãm mê akrã hi kaxwýnh kãm mê ajamaxpêr punuj rãhã hã mê apumunh kêt nê. Mê ate tanhmã mê no kupyw to pix kukamã ajamaxpêr jakamã te mê ate mê htykjê jagjênh xà pyrãk.

²⁹⁻³⁰—Hêxta waa nê. Mê apê Parijew nhô xwýnh mê mê apê Tirtûm kapêr tûm o mê ahkre xwýnhjaja kot kaj mê amex kêt nê. Mê ate mê no kupyw xwýnh na ka mê. Na ka htem ma mê hã pika hwÿr apa nê Tirtûm nhÿ hã kapêr o mê pa xwýnhjê hã pika ho mex. Nê mê kot amnhî to mex xwýnhjê hã pika ho mex. Nê axpên mã mê harênh o: “Hêxta waa nê. Na pre amnepêm mê pakukamã mê panhîgêjtjaja Tirtûm nhÿ hã mê kãm kapêr xwýnhjê homnuj nê mê kupa. No kêt mê papajaja mê kamã ri papa ronhÿx pu prem mê urãk nê ã mê hipêx anhÿr kêt nê.” Anhÿr o axpên mã mê hkapri ho ri apa. ³¹⁻³² Nom ãm amnhî to axêx. Mê ate ã amnhî nhîpêx anhÿr o apa kênã. ã mê ate amnhî nhîpêx anhÿr jao ra apê mê hkanrêhã mê hkra kumrêx ã amnhî to amnhîrit mex o apa. ³³ Te mê ate kagã xoprê kot mê hkamnhar nê mê homnuj tÿx pyrãk jakamã koja Tirtûm nhÿrmã ma mê kot amnhî xà htÿx kamã hamak tûm xàta wÿr mê ajano ka mê ma hwÿr ajapêx. Hãmri nê tee ri amã ajapôx prãm kaprÿ nê rî amnhî pumu.

³⁴—Kot paj nhÿrmã ma mê awÿr inhÿ hã ixkapêr jarênh o mê pa xwýnh kwÿ rê. Nê inhÿ hã mê àhpumunh xwýnh kwÿ rê. Nê ixkapêr o mê ahkre xwýnh kwÿ rê. Nom kot kaj mê ãm mê kapêr ma nê apê mê hprãm nôkati nê tanhmã mê homnuj tÿx to ho apa. Nê ixpê mê hkwÿjê hpar o apa. Jao pî kahpa hã mê hanhôr o mê hkwÿjê hpa. Nhûm mê hkwÿjaja Tirtûm kapêr o mê ahkre xà hã ixkre kamã mê ahkre ho hkrî ka mê omu nê mê unê nê ixkreja kamã

mê htak. Hâmri nhùm mê apymaj nhãm ahpÿnhã krĩ hkwÿ hwÿr hprôt nê mra. Ǻ kot kaj mê inhÿ hã ixkapêr jarênh xwÿnhjê nhĩpêx anhÿr o apa. ³⁵⁻³⁶ Na prem ra mê himex rax nê. Amnepê m panhĩ kator krax rÿm Atãw kra Apewta na pre Tĩrtÿm nhÿ hã kapêr o pa nhùm htôja kãm mar prãm kêt nê kupĩ. Tã nhùm Tĩrtÿm axte mê hwÿr ÿ hã kapêr o mê pa xwÿnh kwÿjê rê nhùm prem mã mê ho anê nê mê hkwÿjê nhĩmex. Nhùm pre xatã mê hwÿr mê hkwÿjê rê nhùm mê xatã mê kupa. Apew rÿm Parakis kra Jakaris wÿr na prem mê himex rÿnh nê. Hâmri nhùm prem Tĩrtÿm mã amnhĩ jarênh xã hã ixkre kamã Jakarisja pĩ. Tã mê kajaja mê ate mê urak nê mê amã Tĩrtÿm kapêr mar prãm kêt nê mê urak nê amã Tĩrtÿm nhÿ hã kapêr xwÿnhjê nhĩmex prãm nê. Ǻ mê ate mê anhĩgêjtjê pyrã nê mê hipêx anhÿr mÿrapê koja Tĩrtÿm mê apê mê hkanrêhã mê hkra nê mê htãmnhwÿjaja mê ato hpimràatã tanhmã mê ato htÿx to ka mê amnhĩ xã htÿx kamã ajamak rãhã ho ri apa. Anê.

Jejus kãm Jerujarê nhõ xwÿnhjê japê htÿx ã harênh

Rukre 13.34-35; mããnh Rõmãn 11.25-27

³⁷ Hâmri nhùm Jejus te ra kot Jerujarê nhõ xwÿnhjê pumunh nê mê kãm kapêr pyrãk o tanhmã kapêr to ho xa. Nê mê kãm:

—Hêxta waa nê Jerujarê nhõ xwÿnhjaja. Tĩrtÿm kot xatã mê awÿr ÿ hã kapêr jarênh xwÿnhjê rênh nhùm mê kot mê akôt mê amã kapêr jarênh o pa htã ka mê kapêr mar kêt kumrêx. Nê axtem nê kên o mê htak o mê himex o apa. Ǻ na ka htem amnhĩ tomnuj o apa anê. Tã nom arĩ inhmã mê ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mê anhĩpêx prãm nê. Nom mê amã ixprãm nõkati nê mê ate ixkaga kumrêx. ³⁸ Mÿrapê koja Tĩrtÿm mê anhõ krĩ jamãr kêt nê. ³⁹ Kot paj tokyx ty nê mê apiitã mê are nê ma akupÿm api ka mê axte ixpumunh kêt nê. Ǻm akupÿn ixwrÿk xã hã arĩgrota pix ã koja mê akwÿjaja mê amÿrpê krĩ ja kamã ixpõx ã ixpumu. Hâmri nê mê akurom ixpumu nê hkĩnh tÿx nê. Nê tã ixkôt amnhĩ xunhwÿr kurê kumrêx. Hâmri nê axpên mã ijarênh o:

Ota Tĩrtÿm kot mê pahwÿr mênh xwÿnhhta wrÿ. Nã ãm hãmri na mê pahwÿr wrÿ. Ja mex o mex.

Koja mê ã axpên mã ijarênh anê. Anê.

24

Jejus kot mê pakukamã mẽmoj jarênh Makre 13.1-13; Rukre 21.5-19; mããnh Wam Ximotre 4.1-3; Sikÿn Ximotre 3.1-9; Apokarip 6.1-17

¹ Tã nhùm Jejus Tĩrtÿm mã amnhĩ jarênh xã hã ixkre rÿm kato nê ma tê. Pa mê ixte hkôt ixpa ho ixpa xwÿnhjaja kormã ixkreja pumunh o ixkuhê nê kãm harê nê kãm:

—Kwa Pahiht. Hêxta waa nê. Ixkreja ãm mex kumrêx. Anê.

Hâmri nhùm mê inhmã:

² —Tÿ mex nom koja nhÿrmã mê kãm Tĩrtÿm kurê xwÿnhjaja grãnh pa. Koja arĩ kên õ axkrutre nê axpên mÿnh nê nõr kêt nê. Koja piitã anhrã nê ahpÿnhã ri hikwÿ. Anê.

³ Hãmri pa mê kuma nê tee ri hkukamã ijamaxpêr. Hãmri nhùm Jejus ma tê nê hixêt pê Oriwêhti hã api nê hã nhÿ pa mê ma hkôt mra nê mê kot ã ixkre nhĩpêx anhÿrta ã hkukja nê kãm:

—Kwa xã ãm hãmri koja mê ã ixkreta nhĩpêx anê? Kwa mê inhmã aprĩ hã harê. Xã koja mê nhÿrmã ho anê nã? Xã koja mê tokyx ho anê? Nê akupÿn mê ixwÿr awrÿk nhùm mẽmoj piitã hapêxja. Kwa mẽmo koja we wÿj ri tanhmã amnhĩ nhĩpêx to wehe? Anê.

⁴ Hãmri nhùm mê inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhÿ nê mê inhmã:

—Nã nhÿrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mê amã harê ka mê inhma. Nã koja mê ohtô nê mê awÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o mê akôt pa. ⁵ Nê mê amã amnhĩ jarênh o: “E Tĩrtÿm na pre mê awÿr inhmê. Ixpê kaxkwa rÿm ixwrÿk xwÿnhhta na pa.” Anhÿr o mê akôt mê amã amnhĩ to hêx o pa. Jao ohtô nê mê nokupyr o pa.

⁶ —Nê koja mê nhÿri awry hã axpên par o pa nê mê atã axpên par o pa. Nom kêr ka mê harênh ma nê ri tokyx mẽmoj piitã hapêx ã hkamnhĩx kêt nê. Kormã mẽmoj

piitã hapêx xà hã arĩgroja kormã. ⁷ Koja mẽmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja pika hõ nhõ xwÿnhjê kutã kuhê nê pijapu ho kuhê. Jao ra axpên par o pa. Hãmri nhũm nhÿri pika hkwy htertet tÿx kumrêx. Nê mẽ hpur kãm mẽõja hapêx nhũm mẽ kãm prãm tÿx nê pa. Jakamã nhũm mẽ ohtô nê prãm xaj axkaprã. ⁸ Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrãk.

⁹—Nê koja mẽ piitã ixkôt mẽ akamã gryk nê kãm mẽ akurê htÿx o pa. Nê mẽ awÿr mra nê ixtã mẽ apynê nê mẽ atomnuj tÿx nê mẽ apa. ¹⁰ Jakamã koja mẽ kot ixkôt amnhĩ xunhwÿr xwÿnh kwÿjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tã amÿnê nê axpên kãm gryk o pa. ¹¹ Nhũm nhÿri mẽ hkwyjaja Tirtũm nhÿ hã kapêr jarênh xwÿnh ã amnhĩ to hêx o pa. Jao mẽ ohtô nê mẽ nokupyr o pa. ¹² Koja mẽ ã amnhĩ nhĩpêx anhÿrja o ra piitã kãm axpên kamã ukapri hkêr o pa. ¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htÿx nê ixkaga hkêr nê. Mẽ kot mẽ apar tã ka mẽ kaxkwa kamã akupÿm atir kurê kumrêx.

¹⁴—Nê kot kaj mẽ apê ixkwÿjaja ma krĩ piitã hkôt Tirtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwÿr nhũm Tirtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupÿn mẽ awÿr wrÿ. Anê.

Mẽ pahtomnuj tÿx xwÿnh maati hã harênh

Makre 13.14-23; Rukre 21.20-24; mããnên Sikũn Tesarõn 2.3-4

¹⁵ Nhũm Jesus arĩ mẽmoj kukamã mẽ inhmã kapêr nê mẽ inhmã:

—Amnepêm Tirtũm nhÿ hã kapêr xwÿnh finat Tãniewja na pre tanhmã mẽ atomnuj tÿx xwÿnh maatija jarênh to. Tã koja nhÿrmã ra kot harênh xà hkôt axtem nê Tirtũm mã amnhĩ jarênh xà hã ixkre hwÿr axà nê Tirtũm xãm xà kamã xa. Ka mẽ ja hã omu hãmri nê mẽ kot krĩ grãnh par ã

hkamnhĩx kurê kumrêx. ¹⁶ Koja ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx. ¹⁷ Rÿ ka mẽ anhõrkwy hkrãmnênh o akrĩ japêr nê amÿm amnhĩ wÿr mẽ omu nê akukrêx wÿr axar nê hõ hpyr mã ajamaxpêr kêt nê. ãm wrÿ nê aprôt nê ma atêm kurê kumrêx. ¹⁸ Rÿ ka mẽ apur kãm axapênh o apa japêr nê amÿm mẽ omu hãmri nê akupÿm anhõrkwy hwÿr axê jamÿnh kaxyw atêm kêt nê. ãm mẽ umaj aprôt nê ma atêm kurê kumrêx.

¹⁹—No mẽ htujarô nê mẽ hkra karàre xwÿnhjaja koja mẽ kêp mẽmoj omnuj tÿx nê. Tanhmã kot mẽ amnhĩ to nê mẽ umaj hprôt tÿx? Nà pika ja kamã koja mẽ mex kêt o mex kêt. Mẽ kot amnhĩ tomnuj mÿrapê koja Tirtũm tanhmã mẽ homnuj tÿx to.

²⁰—Nê kwa kêr ka mẽ amnhĩ to Tirtũm wÿr kê ã mẽ kot amnhĩ nhĩpêx anhÿr xà hã arĩgroja na wrÿk pê ã amnhĩ nhĩpêx anhÿr kêt nê. Rÿ mẽ hkôt xà hã arĩgro pê sap ã ã amnhĩ nhĩpêx anhÿr kêt nê.

²¹—Nê ã mẽ kot amnhĩ nhĩpêx anhÿr ã arĩgroja ã koja mẽ piitã amnhĩ xà htÿx kãm hamak tÿx kumrêx. Amnepêm Tirtũm kot pika ho kator krax rũm amnê mẽ pa xwÿnhjaja kormã aa kot ã amnhĩ xà htÿx kamã hamak anhÿr kêt tã arĩgroja ã koja mẽ amnhĩ xà htÿx kumrêx kamã ama. Hãmri nê axte pika ja kamã ã amnhĩ xà htÿx kumrêx kamã hamak anhÿr kêt nê. ²² Kop apu Tirtũm kot mẽ kot amnhĩ xà htÿx kamã hamak xà hã arĩgro hkwy ho gri hkêr ronhÿx ka mẽ apiitã apikaprar pa. Ja pymaj koja mẽ amã ho gri. Kot ra amnhĩ kaxyw mẽ arênh xwÿnhjê japê xaj mẽ amã ho gri.

²³⁻²⁴—Tã ã mẽmoj kot amnhĩ nhĩpêx anhÿr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupÿn wrÿ. Kwa mẽ hwÿr mra nê omu.” Anê. Rÿ mẽ amã: “Krisja krĩ mÿj kamã na raa. Kwa mẽ ma hwÿr mra nê omu.” Anhÿr o mẽ amã ixto hêx o pa. Rÿ mẽ awÿr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awÿr wrÿ. Tirtũm

na mẽ awÿr inhmẽ pa wrÿ.” Anẽ. Rÿ mẽ amã: “E ixpê Tirtũm nhÿ hã ixkapêr xwÿnh na pa mẽ awÿr mõn pøj.” Anhÿr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwÿ ho anhÿr o pa. Tirtũm kot amnhĩ kôt mẽ arênh xwÿnhjaja kãm mẽ ate ja hã mẽ omunh nẽ mẽ gryk ã ixkaga hprãm xaj koja mẽ ã mẽ anoo mã amnhĩ nhĩpêx anhÿr o pa. Nom ãm ã amnhĩ nhĩpêx anhÿr kaprÿ ka mẽ ixkaga hkêt nẽ.

²⁵ —E kwa mẽ inhmar tÿx nẽ. Na pa ra ixprĩ hã ã mẽ kot amnhĩ nhĩpêx anhÿrja kukamã ã mẽ amã mẽmoj jarênh anẽ. Tã kêr ka mẽ amnhĩ nẽ ã mẽ kot amnhĩ to hêx anhÿr o mẽ pa xwÿnhjê pumunh mex o apa nẽ axkãm ajamak rom. ²⁶ Rÿ koja mẽ tanhmã mẽ amã ixto hêx to nẽ mẽ amã: “Ota Tirtũm kot mẽ pahwÿr mẽnh xwÿnhhta kapôt ã mõn pøj. E mẽ tokyx ma hwÿr mra nẽ omu.” Anhÿr o mẽ amã ijarẽ ka mẽ ama nẽ ãm mẽ ama nẽ hwÿr amrar kêt nẽ. Rÿ nhũm mẽ amã: “Ota hitom kãm xa. E mẽ mamrĩ hwÿr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwÿr agjêx kêt nẽ. ²⁷ Kot paj nhÿrmã akupÿn mẽ awÿr ixwrÿk kaxyw hãmri nẽ ixpinxur kãm ixwrÿk kêt nẽ. Koja pika piitã hkôt mẽ pa xwÿnhjaja anhĩpê ixwrÿk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu. ²⁸ Te nhÿri mẽmoj kro nẽ nõr nhũm nhõnhti kot omunh nẽ hã htor nẽ hpinhpanh nhũm mẽ piitã hã omunh pyrãk o kot paj amnhĩ nhĩpêx. Anẽ.

Jejus akupÿn wrÿk xwÿj ri mẽmoj kukamã harênh

Makre 13.24-31; Rukre 21.25-33; mããnẽn Wam Tesarõn 4.16-17

²⁹ Nhũm Jejus arĩ mẽ ixte hkôt ixpa ho ixpa xwÿnhjê mã kapêr nẽ mẽ inhmã:

—Nẽ kot paj akupÿn mẽ awÿr inhnojarênt nhũm rĩ Tirtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harênh to nẽ harênh kot:

Koja Tirtũm kaxkwa ho àk nhũm kanhêti pitã rôrøk pa nhũm myyti ahtyk nhũm mytwrÿre uràk nẽ axte hpøk kêt nẽ. Anẽ.

³⁰ Koja ã mẽmoj amnhĩ nhĩpêx anhÿr pa hãmri pa kaxkwa hã mẽ amã mẽmoj nhõ. Hãmri nhũm pika piitã hkôt ri mẽ pa xwÿnhjaja piitã omu nẽ tee ri amnhĩ kukamã hamaxpêr o hkaprĩ nẽ mÿr rax kumrêx. No mẽ kajaja kot kaj mẽ omu hãmri nẽ akupÿn mẽ awÿr ixwrÿk nẽ mẽ ato amnhĩptar mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ. ³¹ Hãmri nẽ Tirtũm kapêr o mẽ wrÿk xwÿnh maati mã anẽ nhũm pifti kakô hãmri nhũm hkwÿjaja kuma nẽ ma mẽ awÿr pika piitã hkôt anhgrà nẽ ma mra nẽ inhmã mẽ ato akuprõ. Ixte amnhĩ kaxyw mẽ axunhwÿr xwÿnhjê o akuprõ nẽ man akupÿn ixwrÿ mẽ ato hapêx. Anẽ.

Jejus kot mẽmoj pàr o ejêp jarênh Makre 13.28-31; Rukre 21.29-33

³² Nhũm Jejus arĩ mẽ inhmã kapêr nẽ mẽ inhmã:

—E ka mẽ pĩ hpàr mÿj pumu. Na hte mẽmoj mytwrÿ hã rã nhũm mẽ omu nẽ ô hkukamã hamaxpêr kurê kumrêx. ³³ Ja pyrã nẽ koja ã ixte mẽmoj jarênh anhÿr xwÿnhja amnhĩ nhĩpêx par mẽ ka mẽ omu nẽ akupÿn mẽ awÿr ixwrÿk mã ajamaxpêr kurê kumrêx. Kot paj te ra mẽ anhõrkwÿ kapem ixãm pyrãk o amnhĩ nhĩpêx. ³⁴ Nom akupÿn ixwrÿk kêt ri koja ã mẽ kot mẽmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nẽ koja nhÿrmã pika nẽ kaxkwa wa hapêx pa. Tã no ãm ixkapêrja koja wa uràk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ. Anẽ.

Mẽ pahte akupÿn Jejus wrÿk xà hã arĩgro pumunh kêt ã mẽ pajarênh

Makre 13.32-37; Rukre 12.37, 17.26-30, 17.34-36; mããnẽn Wam Tesarõn 5.2

³⁶ Nhũm Jejus arĩ mẽ inhmã kapêr nẽ mẽ inhmã:

—Nẽ ixte akupÿn mẽ awÿr ixwrÿk xà hã arĩgroja mẽ ate omunh kêt. Nẽ kaxkwa kamã Tirtũm kapêr o mẽ wrÿk xwÿnhjaja haxwÿja kot ja pumunh kêt. Nẽ ijaxwÿja ixpê Tirtũm Kra htã ixte ja hã amnhĩ

pumunh kêt. Æm inhõ Papaj pix na kot ja pumunh.

³⁷ —Nê kot paj nhÿrmã man akupÿn mẽ awÿr wrÿ. Akupÿn mẽ awÿr ixwrÿk xà hã arÿgrota ã koja mẽ htÿx ri amnhÿ tomnuj o pa. Te amnepêm Noehti kormã htÿr ri mẽ pa xwÿnhjaja kot htÿx ri amnhÿ tomnuj o pata pyrãk. ³⁸ Na pre htem amnhÿ kaxyw Tÿrtÿm mã hamaxpêr kêt nê. Æm jar mẽ kot amnhÿ nhÿpêx pix kukamã hamaxpêr kôt pix mã amnhÿ nhÿpêx o pa. Rôm nhÿm Noehtija gô htãm pymaj pãr rax nhÿpêxta mã axà. ³⁹ Nhÿm mẽ ja hã omu nê ãm omu nê tanhmã ri amnhÿ kukamã hamaxpêr to hkêt nê. Hãmri nhÿm naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arÿgroja ã koja mẽ htÿx ri ã amnhÿ nhÿpêx anhÿr o paja o pa mẽ haêr pê naja pyrã nê akupÿn wrÿ.

⁴⁰ —E kot paj mẽ amã nhÿrmã akupÿn ixwrÿk nê tanhmã mẽ anhÿpêx to hã amnhÿ jarê. Te kot ja pyrãk. Koja mẽmyjê hõ wa hamêxkrut nê hpur kãm àpênh o xa. Nhÿm hõja ra ixkôt amnhÿ xãm nhÿm hõja ixkôt amnhÿ xãm kêt japêr. Hãmri pa amnhÿ wÿr ra kot ixkôt amnhÿ xãm xwÿnhnta o api nhÿm kot ixkôt amnhÿ xãm kêt xwÿnhnta hpur kãm ahte arÿ xa. Hãmri nê tee ri hkrãmnhwÿ japêr rÿt o xa. ⁴¹ Rÿ nhÿm mênijê wa hamêxkrut nê harôj kahuk o xa. Nhÿm hõja ra ixkôt amnhÿ xãm nhÿm hõja ixkôt amnhÿ xãm kêt japêr. Hãmri pa amnhÿ wÿr kot ixkôt amnhÿ xãm xwÿnhnta ho api nhÿm kot ixkôt amnhÿ xãm kêt xwÿnhnta tee ri hkrãmnhwÿ japêr rÿt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhÿpêx anê. ⁴² Tã mẽ ate akupÿn ixpôx xà hã arÿgro pumunh kêt jakamã kwa kêr ka mẽ ijamãr rãhã ho ri apa. ⁴³ Na htem htÿx ri nhÿri tanhmã amnhÿ nhÿpêx to ho pa nhÿm mẽ kêp àhkÿnh xwÿnh mẽ ôrkwÿ hwÿr agjê nê mẽ kêp ahkÿ. ⁴⁴ Tã mẽ ate akupÿn ixwrÿk xà hã arÿgro pumunh kêt jakamã kwa kêr ka mẽ ixwakre kamã te mẽ apê mẽ ôrkwÿ nhõ dõn kot amnhÿ nhÿpêx pyrã nê atÿx ri tanhmã amnhÿ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhÿ nhÿpêx rãhã ho ri apa. Anê.

*Mẽ kãm mẽ àpênh mex xwÿnhjê jarênh
Rukre 12.41-48*

⁴⁵ Nhÿm Jejus arÿ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhÿm õ patrãw àpênh ã omu hãmri nê ma nhÿhÿm mõi kaxyw nê ïhkram mẽmoj piitã haxàr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. ⁴⁶ Hãmri nhÿm kot kãm àpênh mex xwÿnhjaja wakre kamã kãm àpênh mex o pa. Jakamã nhÿm õ patrãw akupÿn hpôx o mõi nhÿm amnhÿ wÿr harênh ma nê hkÿnh nê. Nê tee ri amnhÿ kukamã hamaxpêr o kãm uma hkêt nê. Kot wakre kamã kutêp kãm àpênh mex jakamã tee ri tanhmã amnhÿ kukamã hamaxpêr to hkêt nê. ⁴⁷ Jakamã nhÿm õ patrãwja akupÿn pøj nê kot kãm àpênh mex ã omu nê hkÿnh nê. Hãmri nê kot kãm õ mẽmoj piitã hamãr o pa kaxyw ïhkram haxàr pa. ⁴⁸ No koja axtem nê wakre kamã kãm àpênh mex kêt japêr. Nê hamaxpêr o: “Tk. Nã koja tokyx akupÿn mõi kêt nê.” Anhÿr o hkãmnhÿx. ⁴⁹ Hãmri nê wakre kamã kãm mẽ àpênh xwÿnhjê htak nê pipãnh pix o pa. Nê kãm kagôxÿhti xành xwÿnhjê kôt pix mã pa. ⁵⁰ Hãmri nhÿm õ patrãwja haêr pê akupÿn pøj nê tee ri ja hã omu. ⁵¹ Hãmri nê kamã gryk tÿx nê tanhmã homnuj htÿx to nê kãm mẽ àpênh punuj xwÿnhjê mẽ mẽ ho hpimràatã amnhÿ nê mẽ kator pa. Hãmri nê mẽ kot kapêr kwÿm amnhÿ nhÿpêx xwÿnhjê mẽ mẽ ho hpimràatã tanhmã mẽ homnuj to nê amnhÿ nê mẽ kator. Hãmri nhÿm mẽ tee ri amnhÿ kukamã hamaxpêr nê mur nê tee ri amnhÿ nhÿpêx. Tã kêr ka mẽ ixwakre kamã ho mẽ urãk kêt nê. Mẽ kurom ixwakre kamã ixkapêr kôt amnhÿ nhÿpêx mex rãhã ho ri apa. Anê.

25

Kormã mẽ mjên kêt xwÿnhjê ho 10 nê mẽ harênh

Wam Tesarõn 5.1-3

¹ Nhÿm Jejus arÿ mẽ inhmã kapêr nê mẽ inhmã:

—Nê mẽ ate Tirtũm kôt amnhĩ nhĩpêx o mẽ apa xwýnhjaja kêr ka mẽ akupýn amnhĩ wýr ixkãm ajamak rom nê ri apa. Nom mẽ kêp Tirtũm prãm nõkati xwýnhjaja koja mẽ akĩnhã ãm htýx tanhmã amnhĩ to pix kukamã hamaxpêr o pa. Te kormã mẽ mjên kêt xwýnhjaja kot amnhĩ nhĩpêxta pyrãk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwýnh kêp 10jaja ma hkrãmnhwý mjên mã xwýnh kutã pry hã mra. Amnhĩ kôt kanê jamý nê o mra nê kutêp pry nhĩkrep hkrĩ. ²⁻⁴ Nhũm mẽ kêp 5jaja hkwýjê rom amnhĩ kukamã hamaxpêr mex nê kanê kaxyw amnhĩ kôt orti hkwý ho mō. No nhũm mẽ kêp 5 nê mẽ hkĩnhã ãm htýx kanê pix jamý nê o mra. ⁵ Hãmri nê mẽ mjên mã xwýnhja kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nê gaa nê ra õtxwa nê gaa nê hikwý nê ra õt pa.

⁶ —Tã nhũm kôt ã kamãt hãmri nhũm mjên mã xwýnhhta hpõx o tẽ. Hãmri nhũm kot hkukamã harênh xwýnhja mẽ õt o mẽ hikwý xwýnhjê mã amýra nê mẽ kãm: “Kwa mẽ hãmri. Ota mjên mã xwýnhhta tẽ. Mẽ tokyx kãnhmã akrĩ pu mẽ kutã mra.” Anê. ⁷ Hãmri nhũm mẽ hkrã hapôj nê kanê hpõk. ⁸ Nom nhũm mẽ hkwýjê hkĩnhã õ kanê kaxyw orti ho pa hkêt xwýnhjaja ra mẽ kêp mẽ kanêja hkaprý hpa nhũm mẽ tee ri kot hpõk kaxyw. Hãmri nê orti hkwý hã hkwýjê hwý nê mẽ kãm: “Xê mẽ inhmã orti ho inhõ kanê go.” Anê. ⁹ Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhýri amnhĩm hkwý japrõ mê.” Anê. ¹⁰ Hãmri nhũm mẽ tee ri mẽ kuma nê ma amnhĩm hkwý japrõr mã ma mra.

—Rõm nhũm mjên mã xwýnhhta mẽ hãnh tẽ nhũm kanê kamã arĩ mẽ orti xwýnhjaja omu nê hã jêt kurê kumrêx. Hãmri nê ma hkôt mõn mẽ pikuprõnh xà hã ixkreja wýr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xà hã oreja ra hwýr hpõx jakamã nhũm mẽ hã kahê.

¹¹ —Tã nhũm ma mẽ kot orti japrõr mã mra xwýnhjaja hãmri amnhĩ to hapu nê mra nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xà mẽ pa mẽ awýr

agjê.” Anê. ¹² Hãmri nhũm hprõ mã xwýnhhta mẽ kuma nê mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupým mra.” Anê. ã mẽ ujarênh kot anhýr. Anê.

¹³ Nhũm pre ã Jejus mẽ inhmã ujarênh anê. Hãmri nê mẽ inhmã:

—E kêr ka mẽ te kot amnhĩ kôt orti hkwý ho mõr xwýnhjaja kot amnhĩ nhĩpêx pyrãk. Mẽ ate akupýn ixwrýk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ ãpênh xwýnhjê jarênh Rukre 19.11-27

¹⁴ Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mēhõ my kot kãm mẽ ãpênh xwýnhjê nhĩpêx pyrãk. Koja nhýhým nojarêt nê kãm mẽ ãpênh xwýnhjê mã hikukrêx piitã hkaga hpa. Õrkwý nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. ¹⁵ Hãmri nê ahpýnhã mẽ kãm kãxpore hkwý gō. Mẽ kot kutêp kãm tanhmã ho rũnh to kaxyw ahpýnhã mẽ kãm õr pa. Kot kãxpore pumunh mex xwýnhja mã nhũm ho 5.000 nê kugō. Nê kot hkôt kax pẽ omunh xwýnhja mã nhũm ho 2.000 nê kugō. Nê kormã kot omunh týx kêt xwýnhja mã nhũm ãm ho 1.000 pix nê kugō. Hãmri nê mẽ kãm amnhĩ jarê nê ma nhýhým mõ. ¹⁶ Hãmri nhũm kot ho 5.000 nê hamýnh xwýnhja kãxporeta py nê ma o mõr kurê kumrêx nê tanhmã ho ãpênh to ho mõr kãm ra hipy axte ho 5.000 nê kumê. ¹⁷ Nhũm kot ho 2.000 nê hamýnh xwýnhja mããnhen tanhmã ho ãpênh to ho mõr kamã ra hipy axte ho 2.000 nê kumê. ¹⁸ Nom nhũm kot ho 1.000 pix nê hpyr xwýnhja wa hkĩnh ã axtem nê ma o tẽ nê kãm kakwý nê kamã haxà nê hity hpa nê ma akupým tẽ.

¹⁹ —Tã nhũm mẽ õ patrãwja akupýn mõn pøj nê mẽ kãm: “E mẽ amnê ixwýr mra nê ixte mẽ amã kãxpore ho ixpigrãnh xwýnhhta jarê. Tanhmã na ka prem ixkutêp inhmã hipêx to?” Anê. ²⁰ Hãmri nhũm kot ho

5.000 nê hpyr xwÿnhhta kumrêx hwÿr tē nê kām: “E ota akàxporeta. Ate inhmā ho 5.000 pix nê òr tā pa amā ho rax nê amā hipy axte ho 5.000 nê kumē nhūm ho axkamur nê ra ho 10.000. Tā ota.” Anhÿr o kām kapêr hāmri nê kām kugō ²¹ nhūm amnhīm hamÿ nê omu nê hkīnh nê. Hāmri nê kām: “Nā ām hāmri na ka inhmā ho anē. Ixte amā ho 5.000 pix nê òr tā ka ra inhmā ho rax jakamā kot kaj apē inhmā mē àpēnh xwÿnhjê hkrāhtūm. E amnē ixwÿr axà pu mē apku nê pahkīnh.” Anē.

²²—Hāmri nhūm hpānhā kot ho 2.000 nê hpyr xwÿnhhta hwÿr tē nê ò patrāwta mā kām: “E ota akàxporeta. Ate inhmā ho 2.000 pix nê òr tā pa amā ho rax nê amā hipy axte ho 2.000 nê kumē. Tā ota.” Anē.

²³ Hāmri nhūm kuma nê amnhīm hamÿ nê omu nê hkīnh nê. Hāmri nê kām: “Nā ām hāmri na ka ā inhmā ho rax anē. Ixte amā ho 2.000 pix nê òr tā ka inhmā ho rax jakamā kot kaj apē inhmā mē àpēnh xwÿnhjê hkrāhtūm. E amnē ajaxwÿja ixwÿr axà pu mē apku nê pahkīnh.” Anē.

²⁴—Tā nhūm kot ho 1.000 pix nê hpyr xwÿnhhta hapu hā wa hkôt tē. Hāmri nê ò patrāw mā tanhmā kapêr to nê kām: “Nā ra ixte apumunh tūm. Pêr axàhkurê pix kām na ka hte apa. Nê amā akàxpore ho rax nê anhō ho rax pix kukamā ajamaxpêr o ri apa. Nom mē pajaja mē ixàpēnh rax pix kukwak ri na ka hte akàxpore rax nê apa. ²⁵ Jakamā na pa inhmā apyma nê. Nê akàxporeta py nê ma o tē nê kaxyw kre nê kamā haxà. Tā ka akupÿn mōn pōj pa ajarēnh ma hāmri nê hkapa nê man akupÿn amā o tē. Tā ota anhō 1.000ta.” Anē. ²⁶⁻²⁷ Hāmri nhūm tee ri kuma nê kām: “Tk. Kwa amā ixpyma nê ate ixpumunh mex anhÿr tā na ka ixte amā kàxpore nhōrta pyr nê ma ho atēm. Nê mē kot mē kēp kàxpore jamÿnh o kuhê xà kamā mē kām òr nhūm mē ixkutēp tanhmā inhmā ho rax to hkēt nê? Pêr ām amā kaga nê ate amnhī tomnu pix o ri apa xwÿnh.” Anē. ²⁸⁻³⁰ Hāmri nê kēp kàxporeta py nê nhām jam kugō nê kām: “E amÿ nê o tē nê kot inhmā ho 10.000 nê òr xwÿnhhta mā agō. Hāmri nê jahti pynē nê ma o tē nê kamāt kō kamā amē. Apēnh mexti hā. Kojā tee amÿra nê amnhī xà htÿx kamā hamak xàj tee ri amnhī nham

o axpēn kamnhar tÿx kaprÿ nê rī amnhī pumu.” Anhÿr o kām kapêr nhūm kuma nê hpa hā kupy nê ma o tē. Hāmri nhūm mē ò patrāwja mē àpēnh xwÿnhjê mā kām: “E mē ate ixwakre kamā mē axàpēnh mex xwÿnhjaja kot paj ā mē ato mex rax anē ka mē akīnh nê. Nom mē kot inhmā mē àpēnh mex kēt xwÿnhjaja kot paj mē kēp mēō mēmojta jamÿ nê nhām mēhōm kugō nhūm hkaprī nê.” Anē. Ā mē ujarēnh kot anhÿr. Anē.

Jejus kot nhÿrmā mē piitā tanhmā mē harēnh to hā harēnh
Matêwre 13.35-43, 13.47-50; määñēn Apokarip 20.11-15

³¹ Nhūm Jejus arī mē inhmā kapêr nê mē inhmā:

—Nê kot paj nhÿrmā akupÿn mē awÿr wrÿ nhūm Tirtūm kapêr o mē wrÿk xwÿnh piitā man ixkôt wrÿ. Kot paj wrÿ nê ixpē pah maati hā ixkrī xà maati kamā inhmex nê nhÿ. ³²⁻³³ Hāmri nê Tirtūm kapêr o mē wrÿk xwÿnhjê mā anē nhūm mē ma krī piitā hkôt mē apiitā mē ato pikuprōnh pa nê akupÿn ixwÿr mē ato hapēx. Pa mē apumu nê tanhmā mē axunhwÿr to. Te ôwēhti jamār o pa xwÿnh kot ôwēhti kaēx ā motre pumunh nê nhām nê motre xunhwÿr parta pyrāk. ³⁴ Hāmri nê ixupōk rūm mē ate ixkôt amnhī xunhwÿr xwÿnhjê mā ixkapêr nê mē amā: “E mē kajaja kot kaj mē amex kumrêx nê ri apa ho apa. Amnepēm kormā mēmoj piitā hkēt ri na pa pre Inhīpēxà mē wa mē akukamā tanhmā ijamaxpêr to nê mē amā mēmoj mex xunhwÿr rūnh nê. ³⁵ Tā ka prem ajapōj hāmri nê ixkôt amnhī xunhwÿ nê tanhmā ixto mex to ho ri apa.

Na pa pre inhmā prām nê ixpa ka prem ixpumu nê ixkamā axukaprī nê inhmā mēmoj gō pa kuku.

Nê na pa pre inhmā kōr nê ixpa ka prem ja hā ixpumu nê inhmā gō pa ho ixkō nê akupÿm ixihtÿx.

Nê aa mē ate ixpumunh kēt tā ka prem nhÿri ixpumu nê amnhī nhōrkwy hwÿr ixwÿ.

³⁶ Nê na pa pre ixē pynajti nê ri ixpa ka prem ja hā ixpumu nê inhmā axē gō pa haxà nê ri hā ixpa.

Ně na pa pre ixà ně inhīkwý ka prem ixwýr mra ně ixkane ně tanhmã ixto mex to pa akupým inhmex.

Nhům prem ijaxà pa mẽ hagjênh xà kamã ixkrī ka prem ixwýr mra ně tanhmã ixto mex to.

Ã mẽ ate ixto mex anhýr o ri apa jakamã nhům inhõ Papajja ixtã mẽ apumu. Tã koja ixtã mẽ ato mex rax ně.” Aně.

³⁷ —Kot paj ã mẽ ate tãm amnhī nhīpêx xwýnhjê mã ixkapêr aně. Hãmri ka mẽ tee ri inhma ně amnhī tã ixkukja ně inhmã: “Kwa xà mẽ pajaja na pa prem ã ato mex aně? Nà mẽ ixte ã anhīpêx anhýr kãm amnhī pumunh kêt tã na ka ã mẽ ijarênh aně. Kwa nhýri na ka pre amã prãm ně apa pa prem apumu ně amã mẽmoj gõ ka aku? Ně nhýri na ka pre amã kôr ně apa pa prem amã gõ hkwy ka ho ixkõ? ³⁸ Ně nhýri na pa prem apumu ně amnhī nhõrkwý hwýr awý? Rý ka pre axê pynajti ně apa pa prem amã inhīnõhkã gõ ka hagjê? ³⁹ Ně nhýri na ka pre axà ně anhīkwý pa prem apumu ně akane? Ně nhýri na prem ajaxà pa mẽ hagjênh xàja wýr mra ně kamã tanhmã ato mex to? Nà mẽ pa hkêt.” Anhýr o amnhī tã ixkukja. ⁴⁰ Hãmri pa mẽ amã: “Nà mẽ kêp amrakati xwýnhjaja na pre htem pa pyrãk. Tã ka prem mẽ kamã axukaprī hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhýr o ri apa.” Aně. Kot paj ã mẽ ate amnhī to mex xwýnhjê mã ixkapêr aně.

⁴¹ —Hãmri ně hpãnhã apke rům mẽ kot ixkõt amnhī xunhwýr kêt xwýnhjê mã tanhmã ixkapêr to ně mẽ kãm: “No mẽ kajaja kot paj ixupõk rům mẽ unhwýr xwýnhtajê hkīnhã mẽ ato mex kêt ně. Amnepêm na pre Tirtũmja Satanasti mẽ mẽ kot tanhmã kãm amnhī nhīpêx to ho mẽ pa xwýnhjê mẽ mẽ ho hpimràatã mẽ kaxyw kuwy rax kumrêxja nhīpêx. Mě kot amnhī tomnuj tỳx mýrapê nhýrmã kamã amnhī xà htỳx kamã hamak rãhã ně pa ho pa kaxyw. Tã kot kaj mẽ ajaxwýja ma mẽ hkõt hwýr ajapêx. Mě apê Satanasti hkõt mẽ ate amnhī nhīpêx o apa xwýnh jakamã kot kaj mẽ uràn ma hwýr ajapêx pa. ⁴² Aa mẽ ate tanhmã ixto mex to hkêt. Na ka pre

htem inhmã prãm ně ixpa hã ixpumu nom inhmã mẽmoj nhõr kêt ně. Ně inhmã kôr ně ixpa hã ixpumu nom inhmã gõ hkwy hkêt ně. ⁴³ Ně nhýri ahte ixpa hã ixpumu nom amnhī nhõrkwý hwýr ixwýr kêt ně. Ně ixê pynajre ně ixpa hã ixpumu nom inhmã axê nhõr kêt ně. Ně ixà ně inhīkwý hã ixpumu nom ixkane hkêt ně. Ně mẽ kot ijaxàr nhům arī ixkrī hã ixpumu nom ixwýr amrar ně tanhmã ixto mex to hkêt ně. ã mẽ ate inhīpêx anhýr o apa jakamã e mẽ ma kuwy hwýr apa kurê kumrêx.” Aně. Kot paj ã mẽ kãm ixkapêr aně. ⁴⁴ Hãmri nhům mẽ tee ri inhma ně amnhī tã ixkukja ně inhmã: “Kwa nà ã mẽ ijarênh anhýr kêt ně. Aa mẽ ixte ã anhīpêx anhýre hã. Nhýri na pa prem tanhmã akute hã apumu? Nà aa mẽ ixte nhýri ã ate amnhī nhīpêx anhýr ã apumunhre hã.” Aně.

⁴⁵ —Koja mẽ ã inhmã amnhī tã aprãr anhýr kaprý. Kot paj mẽ kãm: “Nà na ka pre htem mẽ kêp amrakati xwýnhjê pumu ně ãm mẽ omunh o ri apa ně mẽ kamã axukaprī hkêt ně. ã mẽ hipêx anhýr jao te pa ã inhīpêx anhýr pyrãk. Jakamã kwa mẽ tokyx ma kuwy hwýr ajapêx kurê kumrêx.” Aně. Kot paj ã kuwy hwýr mẽ hanor aně. ⁴⁶ Hãmri ně hwýr mẽ rênh pa nhům mẽ ma hwýr hapêx ně kamã amnhī xà htỳx kãm hamak rãhã ně pa ho pa ně aa kator kêt kumrêx. No kêt mẽ ate tãm amnhī nhīpêx o mẽ apa xwýnhjaja kot kaj mẽ kurom ma Tirtũm mẽ wa inhõ krī hwýr api ně kamã amex ně atīr tũm ně apa ho pa. Kot paj ã ahpýnhã mẽ apiitã mẽ anhīpêx aně. Aně.

Nhům pre ã Jejus akupýn wrýk ã amnhī kukamã mẽ inhmã ujarênh aně. Hãmri ně mẽ inhmã ujarênh pa.

26

Mě kot Jejus ã ãmnênh ã amnhī jarênh Makre 14.1-2; Rukre 22.1-2; Juãw 11.45-53

¹ Tã nhům Jejus mẽ ixte hkõt ixpa ho ixpa xwýnhjê mã ujarênh pa ně mẽ inhmã:

² —E kot puj mẽ axte pahtã apkati axkrut hãmri nhům arĩgro pê Pas kato. Jakamã koja mẽ piitã amnepêm Tirtũm kot Ejit nhõ xwýnhjê pê mẽ pakukamã mẽ panhīgêjtê kator mã hamaxpêr ně hã hkīnh kaxyw

Jerujarê hwÿr akuprô. Kamã koja mẽ ix-pynê nê pĩ kahpa hã inhô nê ixpĩ. Koja mẽ tokyx ã inhĩpêx anê. Anê.

Nhũm pre ã amnhĩ kukamã mẽ inhmã amnhĩ jarênh anê. ³ Rôm nhũm Jerujarê kamã patre krãhtũmjê mẽ Ijaew pigêtjaja patre maati Kajpasja nhõrkwÿ kamã axpên wÿr akuprô. ⁴⁻⁵ Ra mẽ kãm Jejus pĩr prãm tâ mẽ kãm mẽ kot hkôt kapêr mar o pa xwÿnhjê puma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩ? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhÿr o axpên ma.

*Mêhõ ni kot Jejus krã gregrer ã harênh
Makre 14.3-9; Rukre 7.36-50; Juãw 12.1-8*

⁶ Tã nhũm Jejus kormã krĩ pê Petãn kamã Simãw nhõrkwÿ kamã apkur o nhÿ. Simãwja na pre hkà kro xapêr tÿx o pa nhũm Jejus ra arĩgro hõ hã akupÿm hkà ho mex. Hãmri nê akupÿm õ krĩ hwÿr pøj nê õrkwÿ hwÿr tẽ nê kuri apkur o nhÿ. ⁷ Hãmri nhũm mêhõ nija hpõx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tẽ nê mêhkuxwa xà ho hkuxwa.

Anê hãmri nê kên jaka ho kàx kãm mêhkuxwa xàja nhũm kumÿ nê ma hwÿr o tẽ. Hãmri nê ho hkrã gregrer nê hã hkapĩr pa nê ho hkuxwa hpa. Mêhkuxwa xà hã kàxpore xohtô rax tâ nhũm ã hã hkapĩr par anê. ⁸ Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mêhkuxwa xàta kapĩr pa. ⁹ Kop apu ma kot o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhĩpêx par o nhÿx ja kãm mex nê. Kwa mo na we ã amnhĩ nhĩpêx anhÿr kêt nê? Anê.

¹⁰ Hãmri nhũm Jejus amnhĩ tâ mẽ inhma nê mẽ inhmã:

—Kwa kot ixto mex kaxyw kênã na ka mẽ axtem nê ixtã kãm akir. ¹¹ Mẽ kêp amrakati xwÿnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã tanhmã mẽ ho

ajuta hto hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. ¹² Ixtyk nhũm mẽ kot ijaxàr kukamã na ã ixkuxwa anê. ãm hãmri na ã inhĩpêx anê. ¹³ ãm hãmri na pa mẽ amã kot ã inhĩpêx anhÿrja jarê. Koja mẽ krĩ piitã hkôt axpên mã ijarênh ã kagã kamã ijarênh o pa nê kamã nija kot ã inhĩpêx anhÿr kamã harê nê kuma. Anê.

*Jut Kariot kot mẽ kãm Jejus ã àmnênh
Makre 14.10-11; Rukre 22.3-6*

¹⁴ Tã nhũm Jut Kariotja. Kêp mẽ ixpê Jejus kôt ixpa ho ixpa xwÿnh pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tẽ nê tanhmã Jejus o mẽ mar to nê mẽ kãm:

¹⁵ —E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anê.

Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

Anê hãmri nê kãm kàxpore ho 30 nê õr kurê kumrêx nhũm hamÿ nê hkĩnh nê kato nê ma tẽ. ¹⁶ Hãmri nê mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nê ma mẽ hwÿr o htêm kaxyw.

*Jejus kot hkôt mẽ pa xwÿnhjê kutã apkur
Makre 14.12-21; Rukre 22.7-13; Juãw 13.21-30*

¹⁷ Tã nhũm mẽ hkĩnh pê Pasja kato. Am-nepêm kormã Ejit kãm mẽ pa ri na pre mẽ inhĩgêtjaja ôwêhti hkrare hkwy hpa nê ho anê nê kuku. Tĩrtũm kot ja hã mẽ omunh nê Ejit nhõ xwÿnhjê nê mẽ kator kaxyw nhũm prem ã amnhĩ nhĩpêx anê. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrã mẽ arĩgro pê Pasja ã axpên wÿr akuprô nê jam ijamaxpêr pê mẽ uràk nê ôwêhti hkrare hkwy pa nê pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nê Jejus wÿr tẽ nê amnhĩ tâ hkukja nê kãm:

—Kwa nhÿri kot paj we wa tẽ nê mẽ akutêp Pas ã mẽ panhõ hã apê? Anê.

¹⁸ Hãmri nhũm wa kãm:

—Nà wa mãmrĩ ma Jerujarêja wÿr wa tẽ. Nê krĩm axà nê mêhõ myti pumunh kurê

kumrêx nê kãm: “E Jejus na wa inhmê pa wa awÿr tẽ. Na awÿr hpêr mênh o: ‘E na pa ra inhnojarêt. Jakamã nhÿri kot paj we ixkôt ri mê pa ho mê pa xwÿnhjê mê Pas ã axpên kutã apku?’ Anhÿr o awÿr hpêr mê.” Anê. E wa ã kãm akapêr anê kê war ama nê war amã ôrkwÿ nhÿmök ã ixkre rax ô jahkre. Kamã ra kaxyw mê paxàpkur xà hã mëmoj piitãã. Ka wa omu hãmri nê mãmri mê ixkutêp kamã mëmoj tã apê. Anê.

¹⁹ Hãmri nhÿm wa kuma nê ma Jerujarê hwÿr tẽ. Nê hwÿr axà hãmri nê ra kot wa kãm mëmoj jarênh xà hkôt mëmoj piitã omu hãmri nê mê ixkutêp mëõ hã àpênh o wa xa.

²⁰ Tã nhÿm kamãt pa mê Jejusja kôt ixkreta wÿr ixpôx pa nê hwÿr agjê nê ixàpkur kaxyw ixkrÿ. Mê ixte Jejus kôt ixpa ho ixpa xwÿnhjê pê 12jaja pa mê ixpiitã Jejus kutã ixàpkur o ixkrÿ. ²¹ Hãmri nhÿm Jejus tanhmã mê inhÿõ jarênh to nê mê inhmã:

—E pa mê amã mëmoj jarê ka mê inhma. Kot kaj mê atõ mê kãm ixkurê xwÿnhjê nhÿhkram ijaxã. Anê.

²² Hãmri pa mê tee ri kuma nê ixkaprÿ htÿx nê. Hãmri nê axpên pãnhã amnhÿ tã hkukja nê kãm:

—Kwa xà pa? Nà pa hkêt. Kot paj ã anhÿpêx anhÿr kêt kumrêx Pahiti.

Anhÿr o axpên pãnhã kãm amnhÿ tã aprã.

²³ Hãmri nhÿm mê inhmã:

—Nã ãm hãmri na pa mê amã ixkapêr. Mê ate ixkutã guhkrax kãm anhõ pãwti ho mry kagõ nhek o akrÿ xwÿnhjê hõ kot kaj mê kãm ixtã amÿnê. ²⁴ Tÿrtÿm kapêr ã kagà htÿm ra kot ixkukamã harênh xà hkôt koja mê tanhmã ixto rax nê ixpÿ. Nom kot mê kãm ixtã àmnênh mã xwÿnhhta hêxta waa nê. ã kot amnhÿ nhÿpêx anhÿrja mÿrapê koja amnhÿ xà htÿx kãm hamak rax kumrêx. Kop apu aa õ mãmãj nhõxà hkre rÿm kator kêt ronhÿx ja kãm mex nê. Anê.

²⁵ Hãmri nhÿm Jut Kariot kot mê kãm hã àmnênh mã xwÿnhhta hãmri amnhÿ tã kuma nê kãm:

—Kwa xà we pa Jejus? Xà pa kot paj ã anhÿpêx anê? Kwa nã pa hkêt. Anê.

Hãmri nhÿm kãm:

—Tÿ. Ka ã ate inhÿpêx anhÿr mã kênã. Anê.

Jejus kot amnhÿ kamrô pikapÿr kukamã harênh

Makre 14.22-26; Rukre 22.14-23; mãänêñ Wam Korÿt 11.23-26

²⁶ Tã nhÿm Jejus pãwti hõ py nê Tÿrtÿm mã harê nê mê inhmã ho hkry nê ho mê inhÿpêx pa nê mê inhmã:

—E na pa ã mê amã pãwti ho hkry nê mê amã ôr anê. Ja pyrã nê koja mê ã inhÿpêx anê nê te ixto hkry hpar pyrãk o inhÿpêx pa amnhÿ xà htÿx kamã ijamak kãm ty. Nom mê anê kot paj ty. E mê mãmri aku.

Anhÿr o mê inhmã amnhÿ jarê pa mê kuma nê kot mê inhmã ho hkry xwÿnhja ku. ²⁷⁻²⁸ Hãmri nhÿm hpãnhã kop py nê mã ho anê nê Tÿrtÿm mã harê nê mê inhmã kugõ nê mê inhmã:

—Mê kot ixpÿr xà hã arÿgroja ã koja ixkamrô axkapÿ. Nom koja mê amarÿ ixpÿr nhÿm amarÿ ixkamrô hpikapÿr kêt nê. ãm paa. Pa kot paj mê anê mê ÿhkram amnhÿ jaxã nhÿm mê ã inhÿpêx anê nê ixpÿ. Koja ixkamrô axkapÿ nhÿm Tÿrtÿm omu nê ixkukwak ri mê ate ixkôt amnhÿ xunhwÿr xwÿnhjê nê mê ate amnhÿ tomnuj piitã te amnhÿ katut kôt rênh par pyrãk o hipêx nê mê ato hkra. Ra amnepêm kot ã amnhÿ jarênh anhÿr xà hkôt. Jakamã e mê ixkamrô pikapÿr mã ajamaxpêr pê wÿhti ho akôm o axpên nhÿpêx. ²⁹ ãm hãmri na pa ã mê amã amnhÿ jarênh anê. Kot paj axte wÿhti ho ixkôm kêt rãhã nhÿm nhÿrmã inhõ Papaj akupÿn mê awÿr inhmê. Hãmri pu mê akupÿn ixwrÿk xà hã arÿgrota ã pahkÿnh rax kumrêx. No ãm axtem tanhmã hã pahkÿnh to. Anê.

Nhÿm pre ã Jejus mê inhmã amnhÿ jarênh anê. Pa mê axpên pãnhã kopta py nê wÿta kwÿ ho ixkõ. ³⁰ Hãmri nê mê ixpiitã ho ixkôm pa nê Tÿrtÿm mã mex ã gre. Hãmri nê ijapôj nê hixêt prêk pê Oriwêhti hwÿr ma mÿa.

Jejus kot Simãw Pêtre mã kapêr ã harênh
Makre 14.27-31; Rukre 22.31-34; Juãw 13.36-38

³¹ Tã nhÿm Jejus tanhmã mê ixte hkôt ixpa ho ixpa xwÿnhjê jarênh to nê mê inhmã:

—E Tÿrtÿm kapêr ã kagà htÿmta kot tanhmã mê akukamã mê ajarênh to nê mê ajarênh kot:

Kot paj ôwêhti jamâr o pa xwÿnhja pĩ hãmri nhũm ôwêhti hpigràn pa nê ma angrà nê ri mra.

Anhÿr o kot mē ajarēnh. Te ho mē apē ôwêhti pyrà nê ã mē ajarēnh anē. Tã kamàt ja kamã koja mē tanhmã inhĩpêx to ka mē ixtã mē omu nê mē umaj ôwêhti pyrà nê apiitã ixkaga hpa nê ma aprôt nê mra. ³² Nê mē kot ixpĩr tã kot paj akupÿm ixtĩr. Hãmri nê ma akupÿm mē akukamã pika pē Garirej wÿr mō. Kamã kot puj mē axte axpēn pumu. Anē.

³³ Hãmri nhũm Simãw Pêtre tee ri tanhmã mē kot amnhĩ nhĩpêx to hkukamã amnhĩ jarēnhja ma nê hkaprĩ nê kãm:

—Tk. Nà kot paj ã amnhĩ nhĩpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anē.

³⁴ Hãmri nhũm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mē umaj ate ixkôt apa hkêt ã mē kãm amnhĩ tã axaprãr o axkrunēpxi kãm ga. Kwa jam ajamexpêr tÿx nê. Anē.

³⁵ Hãmri nhũm tee ri kuma nê axte kãm:

—Kwa nà. Mē kot ajaxàr nê apĩr tã kot paj arĩ akôt ri ixpa nhũm mē pahto amÿrà nê tanhmã panhĩpêx to. Nà kot paj aa akaga hkêt nê.

Anhÿr o kãm amnhĩ jarē. Pa mē ijaxwÿja ã kãm amnhĩ jarēnh anē.

*Jejus kot Tĩrtũm mã amnhĩ jarēnh
Makre 14.32-42; Rukre 22.39-46*

³⁶ Tã nhũm Jejus mē inhmã anē pa mē ma nhÿri mē kot kãm “Gesēm” anhÿr xwÿnhja wÿr mra. Hãmri nhũm mē inhmã:

—E mē jar ixkutêp akrĩ. Pa ma mütũm tē nē Tĩrtũm mã amnhĩ jarē mãn. Anē.

³⁷ Hãmri nê mē ixkwÿjê ho axkrunēpxi nê amnhĩ kôt mē kuwÿ. Simãw Pêtre nê Jepetew kra pijakrut pē Xiakre nê Juãwja wa nhũm amnhĩ kôt mē kuwÿ nhũm mē ma hkôt mra. Hãmri nhũm Jejus tee ri mē kot tanhmã hipêx tota kukamã hamexpêr o hkaprĩ nê amnhĩ kamã kahak tÿx nê.

³⁸ Hãmri nê mē kãm:

—Hêxta waa nê. Na pa tee ri amnhĩ xà htÿx kamã ijamakja kukamã ijamexpêr nê amnhĩ kamã ixkahak tÿx o ra ixkaprĩ nê.

Te ixkaprĩ kot ixpĩr o mōr pyræk. Jakamã e mē jar anohtÿx nê ixto Tĩrtũm wÿr o akrĩ kē tanhmã ixto pa mē kot tanhmã ixtoja kutã ixihtÿx nê. Anē.

³⁹ Hãmri nê mē kurũm htēm grire nê Tĩrtũm mã amnhĩ jarēnh kaxyw htu mÿr pē tēm nê pikap nō nê kãm:

—Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamexpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mē kãm ixkurê xwÿnhjaja tanhmã ixto hkêt nê. Rÿ ko. Kot kaj amã mē kot tanhmã ixto hprãm kē mē mãmri tanhmã inhĩpêx to. Nom pam inhmã hprãm xà hkôt kêt. Anē.

⁴⁰ Hãmri nê kãnhmã xa nê akupÿm Simãw Pêtreja mē hwÿr tē nē tee ri mē omu nhũm mē ra ôt pa nê hikwÿ. Nhũm mē omu nê Simãw Pêtre mã kãm:

—Kwa Simãw Pêtre. E mē hãmri akrã hapôj. Kwa wem anohtÿx grire ⁴¹ nê ixkutêp amnhĩ to Inhō Papaj wÿr o akrĩ kē mē ixkôt tanhmã mē ato htã ka mē amã mē uma xaj ixkaga hkêt nê arĩ mē kutã amnhĩ to htÿx nê akuhê. ã mē amã mē ate amnhĩ nhĩpêx anhÿr prãm nom kormã mē amã maa.

⁴² Anhÿr o mē kãm kapêr hãmri nê akupÿm tē nê axte Tĩrtũm mã amnhĩ jarē nê kãm:

—Kwa Papaj. Nà inhmã amnhĩ xà htÿx kãm ijamak prãm kêt. Na pa amnhĩ kukamã ijamexpêr nê amnhĩ kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kē mē kãm ixkurê xwÿnhjaja tanhmã ixto hkêt nê. Nom ko. Kot kaj amã mē kot tanhmã ixto hprãm kē mē mãmri tanhmã inhĩpêx to. Nom pam inhmã ja prãm xà hkôt kêt. Anē.

⁴³ Hãmri nê kãnhmã xa nê Simãw Pêtreja mē hwÿr akupÿm tē. Nê mē omu nhũm kē mē axte gōr nê hikwÿ. Ra mē ôttxwa htÿx nê axte gōr nê hikwÿ. Nhũm Jejus tē nē tee ri mē omunh o xa ⁴⁴ nom axte tanhmã mē kãm nê hkêt nê. Am awjanã nê akupÿm tē nê kē wam kot Tĩrtũm mã amnhĩ jarēnh xà hkôt axte kãm amnhĩ jarē. ⁴⁵⁻⁴⁶ Hãmri nê akupÿm mē hwÿr tē nê mē kãm:

—Kwa xàn ka mẽ arĩ gôr nê anhĩkwỹ? E mẽ tokyx akrã hapôj. Na mẽ ra mẽ kot ixwỳr mrar nê ixpynênh mã. Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỳnê. Ota ra kot ixtã mẽ kãm àmnênh xwỳnhhta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jejus mẽ kãm kapêr o ãm rãhã nhũm Jut Kariot pê mẽ inhĩôja hwỳr tẽ. Nê amnhĩ kôt mẽ ohtô nê hwỳr mẽ o tẽ nhũm mẽ wapohti nê kô jamỳ nê hkôt o mra. Patre krãhtũm mẽ Ijaew krãhtũmjaja kot Jejus wỳr mẽ rênh xwỳnhjaja nhũm mẽ man hkôt Jejus wỳr mra. ⁴⁸ Na pre ra Jut Kariot amnhĩ kukamã mẽ kãm amnhĩ jarênh o:

—Kot paj ixkumrêx hwỳr tẽ ka mẽ ixkôt hapu hã mra. Kot paj hwỳr tẽ nê kãm ixkapêr nê kahti hkôt kumỳ. Ka mẽ hã ixpumu nê hwỳr mra nê unênh kurê kumrêx. Ixte kahti hkôt mỳnh xwỳnhhta kot kaj mẽ unê. Anê.

⁴⁹ Hãmri nê Jejus wỳr tẽ nê kãm:

—Pa Jejus? Xàn ka kormã anhôt kêt nê xa?

Anê nê kahti hkôt kumỳ. ⁵⁰ Hãmri nhũm amnhĩ tã omu nê kãm:

—Kwa Jut. Ate tanhmã ixto kaxyw mã xwỳnh jakamã e kam nê mãmri tanhmã ixto. Anê.

Hãmri nhũm Jut kôt mẽ mrar xwỳnhjaja Jut kot kahti hkôt mỳnh ã omu nê hwỳr mra nê unênh kurê kumrêx. ⁵¹ Hãmri nhũm mẽ inhĩôja tee ri ja hã mẽ omu nê ò wapo kapa nê patre maati mã àpênh xwỳnh kot mẽ hkôt htêm xwỳnhhta mã ho apê. Nê kot ho hkrã nhĩpôn mã tã kuhpaw nê upôk rũm hamak nhĩkjê pix krãhta. ⁵² Hãmri nhũm Jejus omu nê nê kãm kapêr nê kãm:

—Kwa akupỳm awapota hkãm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³ Xà kot paj amnhĩ to Tirtũm wỳ nhũm ãm inhma nê tanhmã jajê pê ixpytãr to hkêt nê? Nà kot paj amnhĩ to kuwỳ nhũm ixwỳr kapêr o mẽ wrỳk xwỳnhjê rênh kurê kumrêx nhũm mẽ ohtô rax kumrêx nê wrỳ nê mẽ kêp ixpytã. ⁵⁴ Nom kot paj ã amnhĩ to hwỳr anhỹr kêt nê. Tirtũm kapêr ã kagã

htũm kot amnepêm ixkukamã ã mẽ kot inhĩpêx anhỹr ã mẽ harênh jakamã kwãr mẽ mãmri Tirtũm kãm hprãm xà hkôt ã inhĩpêx anê. Anê.

⁵⁵ Hãmri nê hpãnhã mẽ kot unênh xwỳnhjê mã kapêr nê mẽ kãm:

—Kwa na pa pre apkati mẽ Tirtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwỳnh pyrãk o inhĩpêx nê ixwỳr wapohti nê kô hã akapên nê ixwỳr tẽ. ⁵⁶ Tã nom ra Tirtũm kapêr ã kagã htũm kamã Tirtũm nhỹ hã mẽ kapêr xwỳnh kot mẽ akukamã mẽ ajarênh nê mẽ atã kagã xà hkôt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwỳnhjaja mẽ omu nê tee ri amnhĩ kukamã ijamaxpêr nê mẽ umaj ixprôt nê anhgrã nê ma inhmrar kurê kumrêx.

Mẽ kot patre maati hwỳr Jejus o môr ã harênh

Makre 14.53-65; Rukre 22.54-55, 22.63-71; Juãw 18.12-14, 18.19-24

⁵⁷ Nhũm pre Ijaew krãhtũmjê mẽ Tirtũm kapêr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nê Jejus kutêp hkrĩ. Hãmri nhũm mẽ kot unênh xwỳnhjaja ma mẽ hwỳr o tẽ. ⁵⁸ Hãmri nê mẽ hwỳr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kítare hwỳr axà nê pôristi nhĩhkô hã nhỹ. Hãmri nê tee ri Jejus kukamã hamaxpêr o nhỹ nê hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anê.

⁵⁹ Hãmri nhũm patre krãhtũmjê mẽ juis-tijaja kãm Jejus pĩr prãm tỳx nê. Jakamã na prem Ijaew wa ho hamêxkrut nê axpên kôt tanhmã mẽ kãm ho hêx to nhũm mẽ kot hã wa mar nê ra hpĩr kaxyw mẽ pikuprõnh xwỳnhjê kapi. ⁶⁰ Jakamã nhũm prem axpên pãnhã mẽ hwỳr mra nê tanhmã ho hêx to. Nom axpên kôt harênh kêt nê. ãm ahpỹnhã tanhmã ri harênh to nom wahõ wa axkrut nê axpên kôt harênh kêt nê. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nẽ axpẽn kôt harẽ nẽ mẽ kãm:

⁶¹—Nà na pre tanhmã Tirtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grành par prãm nẽ kugrà hãmri nẽ ãm ixtã apkati axkrunẽpxi pix nẽ akupỹm hipêx pa. Ja kaxyw ixàhpumunh tỳx.” Anhỹr o na amnhĩ jarẽ pa wa kuma.

⁶² Anhỹr o mẽ kãm ho hêx. Hãmri nhũm patre maatija wa kuma nẽ kànhmã xa nẽ Jejus mã kapẽr nẽ kãm:

—Kwa xà ãm hãmri na wa ã ajarẽnh anẽ nà? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

⁶³ Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapẽr nẽ kãm:

—Kwa aprĩ hã mẽ inhmã tanhmã amnhĩ jarẽnh to. Tirtũm noo mã amã ixkapẽr jakamã kêr ka akatàt kôt mẽ inhmã amnhĩ jarẽ nẽ amnhĩ to axêx kêt nẽ. Xà apê Tirtũm Kra? Xà ka na pre Tirtũm mẽ ixkaxyw axãm? Kwa akatàt kôt mẽ inhmã amnhĩ jarẽ. Anẽ.

⁶⁴ Hãmri nhũm tã hprĩ hã mẽ kãm amnhĩ jarẽ nẽ mẽ kãm:

—Tỳ. Nà ãm hãmri na ka ã ijarẽnh anẽ. Ixpê Tirtũm kot mẽ akaxyw ixãm xwỳnhhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỹn kakrà kamã mẽ awỳr wrỳ. Hãmri nẽ Tirtũm xàhpumunh o àhpumunh xwỳnhhta nhĩhkô hã nhỹ hãmri nẽ pam tanhmã mẽ ajarẽnh to ka mẽ amnhĩ tã ixpumu nẽ inhma. Anẽ.

⁶⁵ Hãmri nhũm patre maatija tee ri ã kot amnhĩ jarẽnh anhỹr ã kuma nẽ kamã gryk tỳx nẽ. Hãmri nẽ gryk xàj kệp patre maati hã ê kapa nẽ hkaxôn pa nẽ kumẽ nẽ hkwyjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harẽnh xwỳnh õ japêr? Tãm kot amnhĩ pê Tirtũm Kra hã amnhĩ jarẽnh ã amnhĩ to hêx nhũm mẽ pahte mar kênã. ⁶⁶ Jakamã e kwa tanhmã kot puj mẽ hipêx to? Anẽ.

Hãmri nhũm mẽ kãm:

—Nà ã kot amnhĩ jarẽnh anhỹr mỳrapê koja ty. Ra htyk mã tãm kênã. Anẽ.

⁶⁷ Hãmri nẽ tanhmã hipêx kati hto. Mẽ hkwyjaja hkuk kuhtô nẽ ìhkra ho htak nhũm mẽ hkwyjaja ìhkra hpo ho htak nẽ hã hpẽr o axkê nẽ kãm:

⁶⁸—E apê Tirtũm Kra hã ate amnhĩ jarẽnh jakamã mãn uràk nẽ axàhpumunh tỳx. Jakamã e mẽ kot atak xwỳnhhta nhĩxi jarẽ pa mẽ ama. Anẽ.

Simãw Pêtre kot Jejus kôt pa hkêt ã amnhĩ jarẽnh

Makre 14.66-72; Rukre 22.56-62; Juãw 18.15-18, 18.25-27

⁶⁹ Rôm nhũm Simãw Pêtre arĩ kĩtare kamã nhỹ. Hãmri nhũm mẽ kãm apênh xwỳnh nitita omu nẽ hprĩ hã omunh kurê kumrêx. Hãmri nẽ kãm:

—Xê pẽr apê Jejus kôt mẽ pa xwỳnhjê hõ na ka. Anẽ.

⁷⁰ Hãmri nhũm tee ri amnhĩ tã kuma nẽ kãm mẽ uma xàj mẽ kãm amnhĩ tã aprã nẽ kãm:

—Tk. Kokỹ. Ixte mễhõ my ata pumunhre hã. Anẽ.

⁷¹ Hãmri nẽ mẽ umaj kànhmã xa nẽ tẽ nẽ kĩtare hwỳr hakwakrem ahte mẽ hkàx ã xa. Tã nhũm hpãnhã hõja omu nẽ hã mẽ kãm:

—Xê ma pẽr ãm hãmri na mẽ harẽ. Kệp Jejus kôt ri mẽ pa xwỳnhjê hõ na pẽr. Anẽ.

⁷² Hãmri nhũm amnhĩ tã kuma nẽ kãm: —Tk. Nà mẽ ri ã amnhĩ krã hkôt ri ixto axêx anhỹr kêt nẽ. Ixte aa mễhõta pumunh kêt kumrêx. Anẽ.

⁷³ Tã nhũm mẽ hkwyjaja hwỳr mra nẽ kãm kapẽr nhũm tanhmã mẽ kãm kapẽr to nhũm mẽ kuma nẽ kãm:

—Kwa pẽr ãm hãmri na mẽ ajarẽ. Apê Jejus kwỳ na ka. War akapẽr kot axpẽn pyràk kênã. Anẽ.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtỳx nẽ mẽ kãm:

—Kwa nà. Na pa Tirtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràk ixpê Garirej nhõ xwỳnhre hã. Ixte mễhõ mỳj pumunh kêt kumrêx tã ka mẽ xatã axpẽn kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprãr o axkrunẽpxi nhũm krãhyre hkàr kurê kumrêx. ⁷⁵ Hãmri nhũm Simãw Pêtre kuma nẽ ra Jejus kot hkukamã krãhyre hkàr kêt ri kot hã amnhĩ aprãr o axkrunẽpxi

hã harênhta mã hamaxpêr kurê kumrêx. Hãmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.

27

Mẽ kot pahшти Pirat wỳr Jejus o htẽm ã mẽ harênh

Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpẽn wỳr pikuprõnh pa. Hãmri nê Jejus ã axpẽn mar o hkrĩ nê axpẽn mã:

—Nà kot puj mẽ hã amỳnê kê mẽ kupĩ. Kêp Tĩrtũm Kra hã kot amnhĩ jarênh o amnhĩ to hêx kênã. Anê.

² Hãmri nê mẽo põiристijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rõm nhõ pahшти nhỹ hã mẽ ixpê Ijaewjê ho amnhĩptàr jakamã nhũm mẽ ma hwỳr o tẽ nê ìhkram haxà.

Jut Kariot kot amnhĩ pĩ ã harênh

Atre 1.15-19

³ Rõm nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ harênh ma nê tee ri amnhĩ kukamã hamaxpêr o hkaprĩ htỳx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hãmri nê ra mẽ kot kãm kàxpore ho 30 nê òrta jamỳ nê ma akupỳm patre krãhtũmjê mẽ Ijaew pigêtjê hwỳr o tẽ. Hãmri nê mẽ kot Tĩrtũm mã amnhĩ jarênh xà hã ixkreja wỳr mẽ hwỳr axà ⁴ nê nhỹri mẽ omu nê mẽ hwỳr tẽ nê mẽ kãm:

—E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nê. Anê.

Hãmri nhũm mẽ tee ri kuma nê kãm:

—Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

⁵⁻⁷ Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htỳx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hãmri nê amnhĩ mut mã ê nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpẽn kukja nê axpẽn mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêtjê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

—E na pa ra ijamaxpêr. Pu mẽ ho Jut kot amnhĩ pĩr xà hã pikata japrô hãmri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprô. ⁸ Hãmri nê hã hixi mẽ nhũm kêp “mẽ hkamrô pikapĩr xà kamã pika”. Mẽ kot Jejus pĩr xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpẽn mã ã hixi jarênh anhỹr o pa. ⁹⁻¹⁰ Nhũm pre ra amnepêm Tĩrtũm nhỹ hã kapêr o pa xwỳnh finat Jeremĩsti mẽ hkukamã hprĩ hã ja jarê nê hã kagà. Nê hã kagà o:

Koja Ijaew nhõ patrejaja mễhõ kot mẽ kãm mễhõ my hã àmnênh pãnhã kãm kàxpore ho 30 nê òr xwỳnhja jamỳ. Hãmri nê ma o tẽ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwỳ japrô. Ra Tĩrtũm kot inhmã mẽ harênh xà hkôt koja mẽ ã amnhĩ nhĩpêx anê. Anê.

ã finat Jeremĩsti kot Tĩrtũm nhỹ hã mẽ hkukamã mẽ harênh nê hã kagà anhỹr xaja kôt nhũm prem ã amnhĩ nhĩpêx anê.

Pahшти Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-

³⁸ ¹¹ Rõm nhũm mẽ pahшти Pirat wỳr Jejus o tẽ nê hwỳr ho axà nê kutã ãm nhũm xa nhũm Piratja omu nê kãm:

—E. Kwa inhmã amnhĩ jarẽ. Xà apê Ijaew nhõ pahi na ka nà? Xà ka na htem amnhĩ wÿr ajamãr o pa? Anẽ.

Hãmri nhũm kãm:

—Tÿ. Nà ãm hãmri na ka ijarẽ. Anẽ.

¹² Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapër punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nẽ. ¹³ Jakamã nhũm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapër anhÿrja mar kêt nẽ nà?

¹⁴ Anhÿr tã nom nhũm Jejus akryk xa nẽ axte tanhmã kãm nẽ hkêt nẽ. Hãmri nhũm Pirat tee ri kot ã amnhĩ nhĩpêx anhÿr ã omu nẽ hamaxpër o:

—Kokÿÿ. Mẽ kot ho kapër punuj tã nhũm ãm mẽ kuma nẽ te kãm mẽ uma hkêt pyrà nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pÿr kaxyw hã àmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhũm Pirat kormã mẽ kot axpën mar xà hã ixkre kamã ÿr rãhã nhũm hprõja hwÿr hpër mẽ nẽ kãm:

—Xê tanhmã mẽ kãm Jejusja ã axàmnênh to hkêt nẽ. Na pa kamàt ja kamã hkôt amÿti nẽ tee ri hkukamã ijamaxpër. Kot amnhĩ to mex xwÿnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nẽ. Kwarĩ. Anẽ.

Hãmri nhũm Piratja kuma nẽ hamaxpër o:

—Nà ixte Ijaew krãhtũmjê pumunh tũm. Ijaew kwÿjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nẽ. Jakamã ixte tanhmã mẽ kãm hã ixàmnênh to kaxyw na mẽ ã ixwÿr o htêm anẽ. Anẽ.

Na htem Pas nhõ arĩgrota hapôx mẽ nhũm pre htem Ijaew o amnhĩptãr xwÿnhja mẽ kãm mẽ hagjênh xà kamã hkrĩ xwÿnhjê ho hpÿnh nẽ mẽ hapôj. Mẽ kãm hprãm xà hkôt nhũm mẽ kãm mẽ hapôj nhũm mẽ akupÿm kapôt ã hamakêtkati nẽ amnhĩx pa. Jakamã nhũm ra mẽ hagjênh xà kamã mēhõ my pē Parapasja hkrĩ. Na pre tanhmã amnhĩ tomnuj to nhũm mẽ mÿrapê unê nẽ haxà. Jakamã nhũm Ijaewjaja mẽ

ho amnhĩptãr xwÿnh Pirat wÿr akuprõ nẽ kuhê nhũm mẽ kãm:

—E kot paj jarãhã mẽ amã mẽ hagjênh xà kamã mẽ hkrĩ xwÿnhjê hõ mã inhũre kê àmnhĩx kato nẽ ri pa. Nhÿ kot paj mẽ amã kãm inhũre? Xà Parapas nà? Xà mẽ akwÿ kot amnhĩm ho mẽ anhõ pahihti Jejus pē Tĩrtũm kot mẽ akaxyw ãm xwÿnhhta kot paj mẽ amã kãm inhũre? Nhÿ wehe? E mẽ inhmã nhÿ jarẽ. Anẽ.

Pirat na pre mẽ inhõ patre krãhtũmjê pumunh mex nẽ. Ijaew kãm Jejus kapër mar prãm tÿx ã nhũm mẽ hã kamã gryk tÿx nẽ hwÿr o mrarja kôt nhũm mẽ omunh mex nẽ. Jakamã ã hã mẽ hkukjêr anẽ. Hãmri nhũm mẽhpigêt mẽ patre krãhtũmjaja kuma hãmri nẽ mẽ pikuprõnh nẽ mẽ kuhê xwÿnhjê mã kãm:

—Kwa mẽ kãm anẽ kê mẽ pamã Parapas mã mãn ure nẽ mãmrĩ Jejus Kris pĩ. E kwa mẽ tokyx kãm anẽ kê Parapas mã ure. Anẽ.

Hãmri nhũm mẽ mẽ kuma nẽ pahihti Pirat mã kãm:

—Nà mẽ inhmã Parapas mã mãn anhũre. Anẽ.

²² Hãmri nhũm tee ri mẽ kuma nẽ mẽ kãm:

—Kwa no mẽ ate Jejus pē Tĩrtũm kot mẽ akaxyw ãm xwÿnh ã harênh xwÿnhhta? Tanhmã kot paj hipêx to? Anẽ.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anẽ.

²³ Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anẽ.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anẽ. Anẽ.

²⁴ Hãmri nhũm tee ri ja nê tanhmã mẽ kãm kapër to no nhũm mẽ mar kêt nẽ. Nhũm tee ri mẽ àmra mar o xa. Hãmri nẽ kãm Jejus pĩr prãm kêt jakamã amnhĩm gô hkwÿ janhi nẽ mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nẽ mẽ kãm:

—E na pa mẽ anoo mã ã amnhĩ nhĩhkra kuhõnh anẽ ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm

jakamã mẽ kam nẽ tanhmã ho. No pa kot paj tanhmã ho hkêt nẽ. ãm kwarĩ ho kwarĩ. Anẽ.

²⁵ Hãmri nhũm mẽ kuma nẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhô. Nẽ mẽ ixkra nẽ mẽ ixtàmnhwýjê mẽ amnhĩ to ixpimràatã amnhĩ tã kunhò. Kê Tĩrtũm kãm tanhmã hã mẽ ixtõ hto hprãm nẽ mamrĩ tanhmã hã mẽ ixtõ hto. Anẽ.

²⁶ Hãmri nhũm mẽ kuma nẽ mẽ kãm hprãm xà hkôt mẽ kãm Jejus ã amýnẽ nẽ mẽ kãm Parapas mã ure. Ra Parapas kot pahi Pirat pê õ pôristi kutã amnhĩ xãm nẽ kęp hõxpĩrja mýrapê nhũm mẽ kot unênh nẽ haxàr tã Ijaew kãm hprãm xà hkôt akupým kãm ure. Hãmri nẽ õ pôristijê mã anẽ nhũm mẽ Jejus tak. Nẽ htak rax nẽ hãmri nhũm Pirat mẽ kãm hã amýnẽ nhũm mẽ kot pĩ kahpa hã nhôr o hpĩr kaxyw ma o tẽ.

Pôristi kot Jejus ã hpẽr o pikẽnh ã harẽnh Makre 15.16-20; Juãw 19.2-3

²⁷ Tã nhũm pôristijaja mẽ kot pĩ kahpa hã Jejus nhôr kaxyw ma o tẽ nẽ pahihiti Pirat nhõrkwý kamã ixkre hõ hwýr ho axà. Nhũm pôristi ohtô nẽ hwýr akuprõ nẽ hã pẽr o pikẽnh kaxyw axpẽn mã:

—E kwa tokyj pu mẽ kãm pahi xê jaxà ri. Kęp pahi hã kot amnhĩ jarẽnh kênã. Anẽ.

²⁸ Hãmri nẽ kęp ê kapa nẽ hpãnhã kęp pahi hã mẽ ê kamrêk mexja py nẽ kãm haxà. ²⁹ Nẽ kãm pahi hã mẽ ahkà nhĩpêx nẽ hkrãm haxà. Nom axtem akunĩ kamã mẽmo mrô nhĩ te kot ronh kanêre pyrãk xwýnhja nhũm mẽ hikãx nẽ hkrãm haxà. Nẽ kãm pahi hã kô gõ nhũm kupy nẽ o xa. Hãmri nhũm mẽ ho anhýr pa nẽ kutã hkõn krã ho rôròk nẽ hkrĩ hpa nẽ hã pẽr o pikẽnh kamã kãm:

—E ãm hãmri. Apê Ijaew nhõ pahi punuti na ka. Anẽ.

³⁰ Hãmri nẽ kànhmã kuhê nẽ hkuk kuhtô nẽ kęp kô pytà nẽ xatã ho hkrãx pê htak. Nhũm prem ã pẽr o pikẽnh kãm hipêx anẽ.

³¹ Hãmri nẽ kęp pahi hã ê kapa nẽ akupým kãm ê jaxà nẽ mẽ kot pĩ kahpa hã nhôr kaxyw ho kato nẽ ma o tẽ.

Pôristi kot pĩ kahpa hã Jejus nhôr ã harẽnh Makre 15.22-32; Rukre 23.27-43; Juãw 19.17-25

³² Nhũm pôristijaja Jejus o kato nẽ ma kapôt mã o tẽ. Nẽ kãm pĩ kahpa pytĩja gõ nhũm kumý nẽ mẽ hkôt o hkwy. Nom ra hirok týx nẽ nhũm mẽ tee ri ja hã omu nẽ mẽhõ kot ho ajuta kaxyw mẽ kot omunh xwýnhjê kapi ho xa. Hãmri nẽ Sirẽn nhõ xwýnh Simãw kà htyk pumu nẽ unê nẽ kãm kot Jejus o ajuta kaxyw hã karõ nhũm hwýr tẽ nẽ kęp pĩ kahpata mý nẽ hkôt kãm kumý nẽ o tẽ. ³³ Hãmri nhũm mẽ kên nhixêt te kot mẽ hkrã hi pyrãk xwýnhhta wýr mẽ o pøj. Mẽ kapêr kãm na prem hixêta jarẽnh o: “Korkot.” No mẽ pakapêr kãm Korkot jarẽnhja kęp “mẽ hkrã hi xà” nhũm mẽ ma hwýr Jejus o pøj. ³⁴ Hãmri nẽ mẽ kot pĩ kahpa hã nhôr kaxyw nhũm à htyx kumrêx kamã hamak pymaj kãm mẽmo mẽ hkanexàja gõ. Wĩhti mẽ mẽmo mry ma xà ho pihkàr nhũm mẽ kãm hkwy gõ. Nom nhũm hkaki nẽ mẽ kot amnhĩ xà htyx kamã hamak kêt xà hã omunh kurê kumrêx nẽ hkaga. Nhũm mẽ tee ri ja hã omu hãmri nẽ kęp ê kapa nẽ kumê nẽ pĩ kahpa hã kuxi nẽ prek o ãhkra nẽ hpar o htyx pa. Hãmri nẽ kànhmã pĩ jarĩ nẽ ahkre kamã ãm nẽ ho htyx nhũm kýxpê ajêt. ³⁵ Hãmri nhũm pôristi hkwyjaja axpẽn mã ê hkwy ho pigrãnh kaxyw hã kênre ho jòka. ³⁶ Hãmri nẽ ho anhýr pa nẽ pikap Jejus jamãr o hkrĩ.

³⁷ Na htem mẽ hpar kaxyw nẽ tanhmã mẽ kot amnhĩ tomnuj to hã kagà nẽ mẽ mýri pĩ kahpa hã hanhò. Jakamã na prem tapti hõ py nẽ tanhmã Jejus ã kagà hto nẽ hã kagà ho:

IJAEW NHÕ PAHI NA JA
HIXI PÊ JEJUS

Hãmri nẽ hwýr ho api nẽ mýri kunhò. ã Jejus kot amnhĩ jarẽnh anhýrja mýrapê na prem kupĩ.

³⁸ Hãmri nhũm mẽ hpãnhã wa àhkĩnh xwýnh wa ho axkrut nẽ mãânên pĩ kahpa hã wa kunhò. Nẽ akutã ho Jejus nhĩjê nhũm war ajêt.

³⁹ Tã nhũm pry hã mẽ mrar xwýnhjaja Jejus pumu nẽ hã hpẽr o pikẽnh o mra nẽ kãm:

⁴⁰ —Kwa ka na ka pre ate Tĩrtũm mã amnhĩ jarẽnh xà hã ixkre grãnh par nẽ atã apkati axkrunêpxi nẽ akupým hipêx par ã amnhĩ jarẽ. Nẽ apê Tĩrtũm Kra hã amnhĩ

jarê. Nê axàhpumunh o axàhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tĩrtũm kapêr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpêr o axkê. ⁴² Nê axpên mã harênh o:

—E jahti na xep pre mẽ kamã ukaprĩ ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kêp mẽ panhõ pahĩti hã hkôt pajamaxpêr kurê kumrêx. E tokyx wrÿ Jejus. Pa mẽ awrÿk kãm apumu. Nà kot kaj awrÿk rax nê. ⁴³ Na hte amnhĩ kaxyw Tĩrtũm mã hamaxpêr o pa. Nê kêp Kra hã amnhĩ jarênh o pa. Jakamã e. Kê Tĩrtũm tãm hwÿr tẽ nê kêp Kra hã akupÿm mẽ pahpê utã. Anê.

⁴⁴ Hãmri nhũm wa kot akutã hijê nê jêt xwÿnhhta wa haxwÿja mẽ mar xà hkôt mã ho kapêr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mããnên Eprêw 10.19-20

⁴⁵ Tã nhũm kaxkwa nhĩpôk ri myt ÿr mẽ nhũm te kamãt pyrãk nhũm kamãt kô rax kumrêx. Jao hã awry mẽ nhũm ra akupÿm myt katêr o mō. ⁴⁶ Hãmri nhũm Jejus kapêr kãm hihtÿx nê àmra htÿx kãm Tĩrtũm mã kapêr nê kãm:

—Inhõ Tĩrtũm inhõ Tĩrtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhĩx. ⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mēhõ kãm hkaprĩ nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwÿ. Nê akupÿn o tẽ nê ho wĩhti nhek nê Jejus kot hkaôr kaxyw kãm kupê. ⁴⁹ Hãmri nhũm hkwÿjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Koja hwÿr tẽ nê ho wrÿk japêr. Anê.

⁵⁰ Hãmri nhũm kamãt kô mẽ nhũm Jejus ra htyk kaxyw nê axte àmra htÿx nê hãmri nê ty. ⁵¹ Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mẽnh pyrãk o ã amnhĩ nhĩpêx anê. Nhũm pika htertet tÿx kumrêx o kên rũnh kwÿ ohtô nê hkrakrak pa. ⁵² Hãmri nhũm mẽ htyk ã pika kamã mẽ htykjê nhõrkwÿ ho ohtô nê mẽ hã axkjê nhũm mẽ hikwÿ xwÿnhjaja akupÿm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupÿm htĩr nê hapôj nê kuhê. ⁵³ Nom kormã nhÿhÿm mrrar kêt nê. Arĩ mẽ hã pika nhĩpy Jejus akupÿm htĩr ã hamãr o kuhê. Tã nhũm Jejus apkati hõ hã akupÿm htĩr ã arĩgrota ã nhũm mẽ rĩ kormã ma Jerujarê hwÿr mra nê hwÿr agjê nhũm mẽ ohtô nê akupÿm mẽ htĩr ã mẽ omu.

⁵⁴ Nhũm kormã Jejus htyk o mōrta ã nhũm pōristi krãhtũm mẽ pōristi hkwÿjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htÿx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwÿnhhta amnhĩ jarê. Kêp Tĩrtũm Kra kênã. Tã pu mẽ amarĩ pahtÿx kupĩ. Anê.

⁵⁵⁻⁵⁶ Nhũm pre mēnijaja ohtô nê amÿm Jejus tyk kãm omunh o kuhê. Marir Matarên nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wÿr mō.

Mê kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt grire nhũm krĩ pê Ari-matej rũm hikàxpore rax xwÿnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrÿk nê haxàr prãm nê. ⁵⁸ Hãmri nê ma pahi Pirat wÿr tẽ nê ã hã kuwÿ nê kãm:

—E ot pa awÿr tẽ. Kwa inhmã htyk xwÿnhta gõ pa ma o tẽ nẽ haxà nà? Anẽ.

Hãmri nhũm kuma nẽ kãm harẽ nhũm ma o tẽ nẽ haxà. ⁵⁹Kaxyw kupêxê mex õ py nẽ ho hkupu pa ⁶⁰nẽ ma o tẽ nẽ õ kẽn kre kamã haxà. Na pre htyk kukamã kẽn kre kakwÿ nhũm mẽ kot kormã kamã mẽhõ jaxàr kêt tã kamã na pre Jejus jaxà. Hãmri nẽ hã kẽn rax õ xãm nẽ ho hitom nẽ ma akupÿm tẽ. ⁶¹Nhũm Marir Matarẽn mẽ Marir õja wa kẽn kreta kapem omunh o wa nhÿ.

Pôristi kot kẽn kre jamãr o kuhê ã harẽn

⁶²Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwÿnhjê mẽ patre krãhtũmjaja ma pahi Pirat wÿr mra nẽ kãm:

⁶³—Kwa pahihti. Nà amnhĩ to hêx o pa xwÿnhta na pre kormã htĩr nẽ pa ri tanhmã amnhĩ jarẽn to ho pa. Nẽ nhÿrmã ty nẽ htyk ã apkati axkrunêpxi pix nẽ akupÿm htĩr ã amnhĩ jarẽ. ⁶⁴Jakamã kwa hwÿr anhõ pôristi hkwy rê kê mẽ ma hwÿr mra nẽ hamãr mex o apkati axkrunêpxi. Kot ka anhÿr kêt nhũm hkõt mẽ pa ho mẽ pa xwÿnhjaja ma hwÿr mra nẽ ho ahkĩ nẽ ma o mra nẽ nhÿri haxà nẽ mẽ piitã mẽ kãm ra akupÿm htĩr ã harẽn o hêx o pa. Te tãm kot amnhĩ kukamã amnhĩ jarẽn pyrãk. Nom mẽ kot axte ã harẽn anhÿrja koja omnuj tÿx o tãm kot ã amnhĩ jarẽn anhÿrja jakre. Anẽ.

⁶⁵Hãmri nhũm mẽ kuma nẽ mẽ kãm:

—Tõe. Nà koja mẽ ho anẽ. E mẽ ma hwÿr amnhĩ kõt pôristi hkwy ho mra kê mẽ hakwakre kahê xà jamãr mex o kuhê. Anẽ.

⁶⁶Hãmri nhũm mẽ kuma nẽ ma hwÿr mra nẽ hakwakre hã kẽn raxta o htÿx pa. Nẽ mẽhõ kot omunh nẽ kahê mẽn pymaj menh ê ho hkukõ. Hãmri nẽ ho anhÿr pa nẽ pôristi mã kãm:

—E Kêr ka mẽ jar kuri hamãr mex o akuhê. Kê mẽhõ tẽ nẽ tanhmã ho hkêt nẽ. Anẽ.

28

Jejus akupÿm htĩr ã harẽn

Makre 16.1-8; Rukre 24.1-12; Juãw 20.1-

10

¹Tã nhũm apkati nhũm tãmĩk. Hãmri nhũm Marir Matarẽn mẽ Marir õja kwÿhtã kãnhmã nhÿ nẽ ma akupÿm kẽn kreta wÿr

wa tẽ. ²Puh nhũm pika htertet tÿx nẽ nhũm Tĩrtũm kapêr o mẽ wrÿk xwÿnhja kẽn kre wÿr wrÿ nẽ nhãm hakwakre nẽ kẽn raxta mẽ nẽ hã nhÿ. ³Hirã htÿx kãm nhÿ. Te na jaxênh pyrãk. Nẽ ê haka htÿx kumrêx. ⁴Nhũm pôristijaja tee ri omu nẽ kãm ma htÿx nẽ htertet nẽ umaj pikap rôrôk pa nẽ te htyk pyrã nẽ hikwÿ. ⁵Hãmri nhũm wa nita kẽn kre hwÿr pøj nẽ tee ri Tĩrtũm kapêr o mẽ wrÿk xwÿnhta pumu. Nhũm wa kãm:

—Kwa wa amã ma hkêt nẽ. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwÿnhta. ⁶Nom jar amrakati. Na ra akupÿm htĩr nẽ kato nẽ ma tẽ. E wa kam nẽ amnẽ axà nẽ nõr xà kaprÿ pumu. Anẽ.

Hãmri nhũm wa kuma nẽ tee ri kẽn kre kamã Jejus japêr nhũm kamã amrakati. ⁷Hãmri nhũm Tĩrtũm kapêr o wrÿk xwÿnh wa kãm:

—E wa tokyx ma akupÿm tẽ nẽ hkõt mẽ pa ho mẽ pa xwÿnhjê mã harẽ. Koja ma Jejus mẽ akukamã akupÿm Garirej wÿr mõ. Garirej kamã kot kaj mẽ axte axpẽn pumu. Ra kot mẽ amã amnhĩ jarẽn xà hkõt. E kwa wa tokyx ma akupÿm mẽ hwÿr tẽ. Anẽ.

⁸Hãmri nhũm wa kuma nẽ ma akupÿm hprõt nẽ htẽm kurê kumrêx. Kãm ma htã hkĩnh nẽ. Nẽ ma Jejus kõt mẽ pa ho mẽ pa xwÿnhjê mã ujarẽn kaxyw ma mẽ hwÿr hprõt nẽ wa tẽ. ⁹Pu nhũm ra Jejus tãm wa kutã tẽ nẽ wa hkaxpa. Hãmri nẽ wa haêr pê wa kãm kapêr nẽ wa kãm:

—Pa? Nhÿhÿm na ka wa tẽ? Anẽ.

Hãmri nhũm wa omu nẽ hkĩnh tÿx kumrêx nẽ hwÿr hprõt nẽ hpar pê hkõn krã ho tẽm nẽ akutã hpar ã kumÿ nẽ kãm mex o mex ã harẽ nẽ kãm:

—Hêxta gàa nẽ. Ma amex kumrêx. Amex o amex. Anẽ.

¹⁰Hãmri nhũm wa kãm:

—E war amã ma hkêt nẽ. Mamrĩ ma tẽ nẽ ixkõt mẽ pa ho mẽ pa xwÿnhjê mã ijarẽ kê mẽ ma Garirej wÿr mra. Kamã kot paj mẽ axte axpẽn pumu. Anẽ.

Pôristi kot kàxpore hprãm xà Jejus o hêx ã harẽn

¹¹Rôm nhũm pôristi hkwyjaja akupÿm tãm hkrã hãmri nẽ ma kẽn kreta rũm akupÿm krĩm mra. Hãmri nẽ patre krãhtũmjê hwÿr mra nẽ mẽ kãm ujarẽn pa. ¹²Hãmri

nhũm mẽ tee ri mẽ kuma nẽ mễhpigêjtê ho akuprô nẽ mẽ hã axpẽn mar o hkri. Hãmri nẽ axpẽn mar pa nẽ pôristi mã amnhĩrer rax nẽ mẽ kãm:

¹³ —E mẽ amnhĩm kàxpore jamý nẽ ma ri ã mẽ kãm amnhĩ jarẽn anhỹr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kẽn kre kapem ixtỳx gôr nẽ inhĩkwỹ nhũm Jejus kôt mẽ pa ho mẽ pa xwỳnhjaja mra nẽ mẽ ixpê ì ho ahkĩ nẽ ma o mra.” Anhỹr o mẽ kãm amnhĩ to axêx o apa. Mễ ixte kàxpore ho mẽ amã amnhĩrerta pãnhã. ¹⁴ Koja pahшти Piratja mẽ anhôt ã mẽ ajarẽn ma nẽ hã tanhmã mẽ ato kaxyw hã kot paj mẽ axypê tanhmã kãm ixkapêr to nhũm tanhmã mẽ ato hkêt nẽ. Jakamã e. Mễ tee ri amnhĩ kukamã ajamxpêr kêt nẽ. Mễ mãmrĩ ma mra nẽ ã mẽ kãm axujarẽn anhỹr o ri apa. Anẽ.

¹⁵ Hãmri nhũm mẽ kuma nẽ mẽ kot amnhĩ to hêxta pãnhã kàxpore jamý nẽ ma mẽ mar xà hkôt mẽ piitã mẽ kãm Jejus kôt mẽ pa xwỳnhjê ho hêx o pa. Tã na htem arĩ jarãhã Ijaewjaja ã axpẽn mã mẽ harẽn anhỹr rãhã ho pa.

Jejus kot hkôt mẽ pa ho mẽ pa xwỳnhjê mã mẽ ãpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

¹⁶ Tã pa mẽ ixte Jejus kôt ixpa ho ixpa xwỳnh pê 11jaja hãmri akupỹm Jejus htĩr ã harẽn ma hãmri nẽ ma Garirej wỳr mra. Nhỹri Jejus kot mẽ inhmã mẽmo hixêt prêk jarẽnhja wỳr.

¹⁷ Nẽ ra hwỳr ixpôx o mrar mẽ Jejus pumu. Tã nom nhũm mẽ ixkwỳjaja tee ri omu nẽ htỳx ho nhãm mễhõ hã hkamnhĩx. No kêt mẽ pajaja na pa prem ixprĩ hã omunh kurê kumrêx nẽ ixkĩnh tỳx nẽ. Nẽ ixkĩnh nẽ hwỳr ixprôt nẽ kãm:

—Pa Jejus? Hêxta waa nẽ. Amex o amex. Anẽ.

¹⁸ Hãmri nhũm mẽ inhmã:

—E na pre Tĩrtũm ã inhmã kapêr anẽ nẽ inhmã: “E kêr ka amnhĩ nhỹ hã mẽmoj piitã tanhmã ho ho apa. Kaxkwa kamã nẽ pika kamã. Mamrĩ nhỹhỹm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anẽ. Na pre mẽ akaxyw ã inhmã kapêr anẽ.

¹⁹ —Jakamã e. Kêr ka mẽ ma pika piitã hkôt ri mẽ kãm ijarẽn o ri apa. Kê mẽ ixte mẽ nẽ tanhmã amnhĩ nhĩpêx to hã ijarẽn ma hãmri nẽ ixkôt amnhĩ xunhwỳ nẽ ixkôt ri amnhĩ nhĩpêx o pa. Nẽ kêr ka mẽ ja hã mẽ omu nẽ Tĩrtũm mẽ wa inhmã mẽ hkrã kumrã. Wa ixkarõ nhỹ hã mẽ hkrã kumrã. Mễ kot wa inhỹ hã pix mã tanhmã amnhĩ nhĩpêx to ho pa kaxyw.

²⁰ —Nẽ mẽ kãm anẽ kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarẽn anhỹr o ri mẽ hkôt apa. Kot paj mẽ anhĩkô hã ri ixpa rãhã nhũm nhỹrmã pikaja hapêx o hapêx. Anẽ.

Na pre ã Jejus mẽ inhmã mẽ ixãpênh ã karõ anẽ.

Matêwre kot Jejus jarẽn nẽ hã kagàja ja kôt na hapêx.

Makre Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwỳjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

² Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mãânênh hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõmê kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Kojã Tĩrtũm tokyx mẽ pahwỳr mẽ panhõ

Pahihti mẽ nhũm wrỳ pu mẽ pah-piitã omu. Jakamã kwa mẽ tokyx kutêp tãm amnhĩ nhĩpêx. Te ho mẽ kot mêhõ kutêp pry ho mex pyræk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrar mex prãm kaprỳ pyræk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katat nhũm ra katat mux nê nõi pyræk o amnhĩ nhĩpêx. E kwa kêt ka mẽ ã kutêp amnhĩ nhĩpêx anê.” Anhỳr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ã hã kapêr xwỳnh pê Ijaisja mẽ pamã hã kagà.

⁴ Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

⁵ Hãmri nhũm mẽ ohtõ nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarê rũm nhũm mẽ ohtõ nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xàj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhma amnhĩ tomnuj kaga nê tãm amnhĩ nhĩpêx prãm nê.

Anhỳr ã amnhĩ jarê. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gõi kãm mẽ hkrã kumrã. Pyhti pê Jotãw kamã. ⁶ Juãw Paxisja hikãxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm

ê nhîpêx nê hagiê nê hã pa. Nê mẽmo mry hkà ho amnhî pre nê ri pa. Nê mẽo mex kur kêt nê ãm krit ku nê menh ôr o ri pa. ⁷ Hãmri nê mẽ kãm tanhmã Jejus jarênh to ho pa nê mẽ kãm:

—E mẽ inhma. Koja tokyx Tirtũm kot mẽ pakaxyw ãm xwýnhhta mẽ pahwýr wrý. Ahpumunh týx o kot ijakrenh jakamã na pa hte ãm kukwak ri ixpa nê amnhî tã hã ixpiaãm rãhã ho ri ixpa. Te ixkrãm ã ixpiaãm o amnhî nhîpêx pyræk. ⁸ Na pa hte gô pix o Tirtũm mã mẽ akrã kumrãr o ri ixpa. Nom mẽ pahwýr wrýk mã xwýnhja koja mẽ awýr Tirtũm Karõ rê nhũm mẽ akaxwýnh mã agiê. Ka mẽ ý hã tãm ri amnhî nhîpêx rãhã ho ri apa. Anê.

Juãw Paxis kot Jejus krã kumrãr ã harênh Matêwre 3.13-17; Rukre 3.21-22; Juãw 1.32-34

⁹ Tã nhũm Jejusja tãm Juãw Paxis wýr tẽ. Garirej kamã krî pẽ Najare rũm ma hwýr tẽn pøj. Hãmri nhũm Juãwja hkrã hkumrã. Pyhti pẽ Jotãw kamã hkrã kumrã. ¹⁰ Hãmri nê wa gôj rũm api nê mýr ri kaxkwa pumunh o xa. Nhũm kaxkwa axkjê nhũm kurũm Tirtũm Karõ te tuuti pyrã nê Jejus wýr wrýk o tẽ nê ìkre hã xa nhũm amnhî tã omunh o xa. ¹¹ Hãmri nhũm Tirtũm kaxkwa rũm kãm kapêr nê kãm:

E apê Ixkra mex na ka. ãm hãmri na ka hte ixkanrêhã amnhî nhîpêx mex o apa. Inhmã ajapê kamã na ka ri apa ho apa. Anê.

Jejus kot Satanasti kaga hã harênh Matêwre 4.1-11; Rukre 4.1-13; mããñnẽn Eprẽw 2.18, 4.15

¹² Tã nhũm Tirtũm Karõja ma kapôt mã Jejus o mõ ¹³ nhũm kapôt ã mry xoprê kaêx ã ri mrar o hã arĩgro pẽ 40. Hãmri nhũm Satanasti omu nê ma hwýr tẽ nê ri hkôt pa. Kapôt ã ri hkôt hêx rom tanhmã kãm kapêr to nhũm kot mar nê hkôt amnhî xãm prãm xàj ma hkôt pa. Nom nhũm Jejus hkaga kumrêx nhũm tee ri ho anhýr kaprý nê ma akupým tẽ. Hãmri nhũm Tirtũm kapêr o mẽ wrýk xwýnhjaja Jejus wýr wrý nê tanhmã ho mex to.

Jejus kot Tirtũm mã àpênh krax ã harênh Matêwre 4.12-17; Rukre 4.14-15

¹⁴ Nhũm pre ra mẽ ixpê Ijaew o amnhîptãr xwýnh pẽ Eroxa Juãw Paxis kot mẽmoj tã kãm àkjêr mýrapê nhũm pre ra unê nê haxà. Tã kot haxàr jakành pẽ nhũm Jejus ma akupým pyka pẽ Garirej wýr mõ nê kamã mẽ kãm Tirtũm kapêr jarênh o pa. Nê Tirtũm kot mẽ hwýr mẽnh ã amnhî jarênh o pa. Nom te nhãm mẽhõ jarênh pyræk o amnhî jarê ¹⁵ nê mẽ kãm:

—E na Tirtũm kãm mẽ ato hkra hprãm nê. Jakamã na ra kot mẽ awýr ãm xwýnhhta mẽ nhũm mẽ awýr wrý. Kwa mẽ tokyx kapêrja ma nê amnhî kaxyw hkôt ajamaxpêr. Hãmri nê ate amnhî tomnuj kaga nê Tirtũm kôt mãn amnhî nhîpêx o ri apa. Kot kaj mẽ ã amnhî nhîpêx anê nhũm Tirtũm amnhî tã mẽ apumu nê mẽ ato hkra. Anê.

Jejus kot amnhî kôt tep pynênh xwýnh wa hwýr ã harênh

Matêwre 4.18-22; Rukre 5.1-11

¹⁶ Tã nhũm Jejus ma Garirej kamã gô rax pẽ Garirej mýri mõ. Hãmri nê Simãw mẽ htõ Andreja wa hwýr kato nê wa omu. Wa kot tep pynênh xwýnh jakamã na pre wa gôx kãm kryhti rênh o xa nhũm Jejus wa hãnh tẽ nê wa omu. ¹⁷ Hãmri nê amnhî kôt wa kuwý nê wa kãm:

—E war amnẽ ixkôt tẽ nê ixkôt mãn apa. War apê tep kanhêr rax o ri apa xwýnh tã kêr ka war axápênhta kaga nê hpãnhã ixkôt apa ho apa. Kot paj tanhmã war akrã hto ka wa tep pynênh pãnhã ma ri mẽ hkôt mẽ kãm ixkapêr jarênh o ri apa. Mẽ ohtõ nê mẽ kot war amar nê Tirtũm kôt amnhî xunhwýr kaxyw. Jao kot kaj te war ate tep kanhêr rax nê Tirtũm mã ôr pyræk o amnhî nhîpêx.

Anhýr o wa kãm kapêr. ¹⁸ Hãmri nhũm wa kuma nê kryhti kaga nê ma hkôt pa ho pa kurê kumrêx. ¹⁹ Hãmri nê mẽ gô mýri mõ nê Jepetew kra Xiakre mẽ htõ Juãw wa hwýr kato nê wa omu. Nhũm wa kormã hipêêxã nhĩhkô hã pãr kãm kryhti ho mex o wa nhý nhũm Jejus wa mẽ hwýr kato nê wa omu nê amnhî kôt wa kuwý. ²⁰ Hãmri nhũm wa kuma nê ma hkôt pa ho pa. Pãr kre kamã mẽ kãm àpênh xwýnhjê ri hipêêxã re nê ma Jejus kôt pa ho pa.

Jejus kot mēhō nē mēkarōmnuti janor ā harēnh

Rukre 4.31-37

²¹ Hāmri nhūm Jejus mē hkôt mē pa ho mē pa xwýnhjaja ma krī pē Kapanau hwýr mō hāmri nē hwýr pōj. Hāmri nhūm mē ixpē Ijaewjê nhō arīgromnu pē sap kato nhūm Jejus ma Tirtūm kapēr o mē ahkre xà hā ixkre hwýr tē nē hwýr axà. Hāmri nē kamā mē kot Tirtūm kapēr mar kaxyw axpēn wýr mē pikuprōnh xwýnhjê jahkre ho nhỹ. ²² Nē mē ahkre mex nhūm mē kuma nē tee ri hamaxpēr nē axpēn mā:

—Hēxta waa nē. Pēr am hāmri na ā mē pamā mēmoj jarēnh anē. Tirtūm kapēr tūm o mē ahkre xwýnhjê rom àhpumunh tỳx kôt na hprī hā mē pajahkre mex nē. Anē.

²³ Hāmri nhūm mēhō myja mē hwýr axà. Na pre ra mēkarōmnuti hwýr axà nhūm ý hā amnhī tomnuj o pa. Hāmri nē mē hwýr axà nē Jejus pumu nē kām kapēr. Nom tām kapēr kêt nē. Mēkarōmnuti nhỹ hā kām kapēr. Kax pē kām kapēr nē kām:

²⁴ —Pa Jejus? Kwa tanhmā mē ixto hkêt nē. Ixte apumunh mex. Apē Najare nhō xwýnh tã mãânēn apē Tirtūm kot mē ixwýr amēnh xwýnh maati na ka. Tirtūm rūm na ka pre mē ixwýr wrý. Kwa xà kot kaj mē ixto ajapêx nà? Anē.

²⁵ Hāmri nhūm kām:

—Tk. Kwa anhīkrē nē myta kurūm akator kurē kumrēx. Anē.

²⁶ Hāmri nhūm kuma nē àmra htỳx kām myja o àk tỳx nē kēp kato nē ma tē nhūm akupým mex. ²⁷ Hāmri nhūm mē piitā omu nē kamā no puma nē. Hāmri nē xatā axpēn mā harēnh o pa nē axpēn mā:

—Kokýỹ. Jejus na pre àhpumunh tỳx kôt mēkarōmnuti jano nhūm kuma nē mē kurūm hapôx kurē kumrēx. Anē.

²⁸ Hāmri nhūm Garirej kamā mē piitā ri axpēn mā harēnh o pa.

Jejus kot akupým Simāw xupānhgêx o mex ā harēnh

Matêwre 8.14-15; Rukre 4.38-39

²⁹ Tã nhūm Jejus Xiakre mē Juāw mērohā Tirtūm kapēr o mē ahkre xà hā ixkre rūm kato nē ma Simāw mē Andre wa ōrkwỹ hwýr mō. ³⁰ Hāmri nē mē hwýr agjê. Nhūm Simāw xupānhgêxja ra à nē hkà kagro htỳx nē nō nhūm Jejus mē hwýr axà nhūm mē

kām harē. ³¹ Hāmri nhūm mē kuma nē hwýr axà nē omu nē hpa hā kupy nē kànhmā ýr nhūm hkà hakry nē akupým mex kurē kumrēx. Hāmri nē kànhmā xa nē tē nē mē kām mēmoj nhīpêx nhūm mē hkur o hkrī.

Jejus kot akupým mē hkwýjê ho mex ā harēnh

Matêwre 8.16-17; Rukre 4.40-41

³²⁻³³ Tã nhūm myt axà nhūm mē ohtô nē Simāw mē Andre wa ōrkwỹ hwýr mra nē hakwakrem Jejus ā akuprō. Nē amnhī kôt mē à xwýnhjê ho mra. Nē mēkarōmnuti kot mē hwýr gjêx xwýnhjaja nhūm mē hwýr mē o mra. ³⁴ Hāmri nhūm Jejus mē omu nē akupým ahpýnhā mē piitā mē ho mex pa. Nē mēkarōmnutija nhūm mē kurūm mē hapôj. Mēkarōmnuti kot kēp Tirtūm Kra hā omunh tãno nhūm kapēr nē mē hkurē nē mē hano nhūm mē kapēr kêt rāhā mē kurūm hapôj nē ma mra.

Jejus kot Tirtūm mã amnhī jarēnh ā harēnh

Rukre 4.42-44

³⁵ Tã nhūm apkati nhūm kormā myt kator kêt ri nhūm Jejus kànhmā nhỹ nē tē nē kato. Hāmri nē ma kapôt ā ahte nhỹhým tē nē nhỹri Tirtūm mã amnhī jarēnh o nhỹ.

³⁶ Hāmri nhūm Simāw Pêtre mē hkwýjaja hkrā hapôj nē tee ri ixkre kamā hapēr. Hāmri nē hapôj nē ma hpri jakop o mō.

³⁷ Hāmri nē hwýr kato nē omu nē kām:

—Pa. Kwa na mē piitā tee ri ajapēr. Anē.

³⁸ Hāmri nhūm mē kām:

—Tô ma pu mē mō. Nom kot puj mē akupým mē hwýr pamōr kêt nē. Kot puj mē hpānhā nhām krī hkwý hkôt mǎn ri pajapôj. Pa kamā mē kām Tirtūm kapēr jarē mǎn. Ja kaxyw na pre mē awýr inhmē. Krī piitā hkôt mē pa xwýnhjaja kot kapēr mar kaxyw. Anē.

³⁹ Hāmri nē mē ma axte Garirej kamā krī hkwý hkôt pa. Nē krī piitā hkôt Tirtūm kapēr o mē ahkre xà hā ixkre kamā mē kām Tirtūm kapēr jarēnh o pa. Nē mē kurūm mēkarōmnuti japôx o pa.

Jejus kot akupým mēhō hkāmnu ho mex ā harēnh

Matêwre 8.1-4; Rukre 5.12-16

⁴⁰ Tã nhũm mēhō hkà hkro xàpēr tỳx xwỳnhja Jejus wỳr tē. Hãmri nē hã hpijaàm kaxyw kutã hkõnkrã ho tēm nē nhỹ nē kãm:

—Pa Pahihti. E ot pa awỳr amnhĩ to tē. Akupỳm ate mē ixto mex kaxyw axàhpumunh tỳx jakamã kot ka akupỳm amã ixto mex prãm nē mãmri akupỳm ixto mex. Anē.

⁴¹ Hãmri nhũm kuma nē kamã ukapri nē hã ìhkra xi nē kãm:

—Nà kot paj ato mex. E akupỳm akà mex.

⁴² Anhỳrja kôt nhũm akupỳm hkà mex kurê kumrēx. ⁴³⁻⁴⁴ Hãmri nhũm Jejus kãm kapēr kãm hihtỳx nē hano nē kãm:

—E kēr ka amnhĩ tã akwỳjē mã tanhmã ijarēnh to hkēt rãhã ma patre hwỳr tē kē akupỳm akà mex ã apumu. Hãmri ka amnepēm Mojes kot mē ate akupỳm mē amex ã Tirtũm mã tanhmã amnhĩ nhĩpēx to hã karō xwỳnhja ka kãm ho anē. Kē mē piitã akupỳm akà mex ã apumu. Anē.

⁴⁵ Hãmri nhũm kuma nē ma tē. Nom axtem nē ma mē piitã mē kãm amnhĩ jarēnh o ri mra. Jejus kot kãm karō xà kuhpa hã ma mē kãm amnhĩ jarēnh o ri mra. Jakamã nhũm mē kuma nē piitã nhỹhỹnh Jejus wỳr mra. Mē ohtō rax kumrēx nē hwỳr mra nhũm tee ri mē noo mã nhỹri krĩm pa mã. Hãmri nē ãm krĩ pu hã ri pa htã nom nhũm mē arĩ ohtō nē hwỳr mra.

2

Jejus kot akupỳm ì kamã htyk xwỳnh o mex ã harēnh

Matêwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grêre nē hkôt mē pa ho mē pa xwỳnhjē mērohã ma akupỳm Kapanau wỳr mō. Hãmri nē hwỳr pōj nhũm mē piitã nhỹri mēhō nhõrkwỹ kamã hpōx kôt harēnh ma nē hã akuprō.

² Ra hã pikuprõnh rax nē ixkre nhĩtom pa. Nhũm mē hkwỳjaja kapôt ã kuhē nhũm Jejus Tirtũm kapēr o mē ahkre ho nhỹ. ³ Hãmri nhũm mēmyjaja kēp kwat nē ì kamã htyk xwỳnhja mỳ nē Jejus kot ho mex kaxyw hwỳr o tē. ⁴ Hãmri nē tee ri hã mē pikuprõnh rax xwỳnhjē pumu nē nhỹhỹnh kot hwỳr o àr kaxyw tee ri amnhĩ kukamã ho ukapi ho pa. Hãmri nē hamaxpēr nē ixkre nhĩmōk po hwỳr ho api nē himōk kwỹ

grã nē hkôt ì kamã htyk xwỳnhja nõr xà mērohã hkôt Jejus wỳr haxà. ⁵ Hãmri nhũm mē kot kaxyw kãm hamaxpēr tỳx ã mē omu nē ì kamã htyk xwỳnhja mã kapēr nē kãm:

—Pa? Kwa tee ri amnhĩ kukamã ajamaxpēr kēt nē. Na pa ra anē ate amnhĩ tomnuj piitã ho ijapēx. Kot paj axte kãm ijamaxpēr kēt nē. Anē.

⁶ Hãmri nhũm Tirtũm kapēr tũm o mē ahkre xwỳnhjaja tee ri ã kapēr anhỳrja ã kuma nē hamaxpēr o:

⁷ —Tk. Kwa pēr mēhō myti mũj kēp Tirtũm kēt tã te kapēr pyrãk o amnhĩ nhĩpēx nē mē nē mē kot amnhĩ tomnuj o hapēx ã amnhĩ jarē. Tirtũm pix kot mē nē mē kot amnhĩ tomnuj o hapēx kēnã. Anē.

⁸ Nom nhũm Jejus mē hamaxpēr kôt mē omunh mex nē. Mē kot Tirtũm pix kot mē nē mē kot amnhĩ tomnuj rēnh nē akupỳm mē à xwỳnhjē ho mex kôt mē hamaxpērja nhũm mē omunh mex nē mē kãm:

—Kwa mē ã ajamaxpēr anhỳr kēt nē.

⁹ Ixte mē nē mē kot amnhĩ tomnuj o ijapēx par ã amnhĩ jarēnh tã mē ate mē ano ho ja kôt ixpumunh kēt jakamã na ka htem ja hã ixkôt ajamaxpēr kēt nē. Nom kot paj mē anoo mã akupỳm myja o mex. Ka mē ja hã ixpumu hãmri nē ixkôt ajamaxpēr kurê kumrēx. ¹⁰ Ixpē Tirtũm kot mē awỳr inhmēnh xwỳnh na pa. Ixte mē anē mē ate amnhĩ tomnuj rēnh kaxyw na pre mē awỳr inhmē pa wrỳ. Tã mē ate ja kôt ixpumunh kaxyw kot paj mē anoo mã mytija ho mex.

¹¹ Anhỳr o mē kãm kapēr hãmri nē ì kamã htyk xwỳnhja mã kapēr nē kãm:

—E kànhmã xa nē anõr xà mỳ nē ma akupỳm anhõrkwỹ hwỳr tē. Anē.

¹² Hãmri nhũm kuma nē kànhmã ãm kurê kumrēx. Hãmri nē akupỳm mex ã amnhĩ pumu nē hkĩnh tỳx nē nõr xà mỳ nē mē noo mã kato nē ma akupỳm õrkwỹ hwỳr tē. Hãmri nhũm mē kot omunh xwỳnhjaja amnhĩ jaēr pē omu nē no hapōx kaxyw nē hkôt omunh o kuhē nē kamã no pyma htỳx nē. Nē tee ri omu nē axpēn mã:

—Hêxta waa nē. Aa mē pahte ã mēhō kot amnhĩ nhĩpēx anhỳr ã omunh kēt kumrēx tã jarãhã ja pumu. Nà Tirtũmja ãm mex o mex. Anē.

*Jejus kot amnhĩ wỳr Rewi hwỳr ã harēnh
Matêwre 9.9-13; Rukre 5.27-32*

¹³ Hāmri nhũm Jejus mẽ ma mra nē akupỳm gô rax pē Garirej wỳr mra nē gô mỳ ri pa. Hāmri nhũm mẽ piitã omu nē hwỳr mra nē hã akuprõ nhũm Tĩrtũm kapēr o mẽ ahkre ho nhỹ. ¹⁴ Hāmri nē mẽ kure nē axte hkõt mẽ pa ho mẽ pa xwỳnhjê mẽrohã ma axte mra nē nhỹri Apew kra Rewija pumu. Rõm kãm mẽ õ pahĩti mã amnhĩ kwỳjê pē kàxpore hkwy jamỳnh xwỳnh na pre. Jakamã nhũm àpēnh o nhỹ nhũm Jejus hãnh tē nē omu nē amnhĩ kõt kuwỳ nē kãm:

—Pa? E kwa axàpēnhhta kaga nē hpãnhã amnē mẽ ixkõt mãn ri apa ho apa. Anē.

Hāmri nhũm kuma nē àpēnh kaga nē ma hkõt mō nē hkõt pa ho pa.

¹⁵ Hāmri nhũm mẽmo arĩgro hã nhũm Rewi nhõ mẽ apkur xà hã mẽõ rax nē. Jakamã nhũm amnhĩ nhõrkwỹ hwỳr hkrãmnhwỳjaja nē Jejus mẽ hkõt mẽ pa ho mẽ pa xwỳnhjê hwỳ. Hāmri nhũm mẽ ma hkõt mra nē õrkwỹ hwỳr agjê nē kuri apkur o hkrĩ. Nē mããnhēn mẽ kēp Rõm nhõ pahi mã mẽ kēp kàxpore hkwy jamỳnh xwỳnh kwỳ nē mẽ ohtõ nē mẽ kutã apkur o hkrĩ. ¹⁶ Hāmri nhũm Tĩrtũm kapēr tũm o mẽ ahkre xwỳnh kwỳ pē Parijew nhõ xwỳnhjaja mra nē mẽ apkur ã mẽ omu. Nē tee ri mẽ hkaêx ã Jejus pumu nē hkõt mẽ pa ho mẽ pa xwỳnhjê hwỳr agjê nē hã mẽ kãm akir nē mẽ kãm:

—Kwa na htem mẽ kot amnhĩ tomnuj xwỳnhjê kutã apkur kêt tã ka mẽ Jejus mẽ apimràatã axtem nē mẽ kutã axàpkur o akrĩ. Mẽ ate amnhĩ to mex ronhỹx ka mẽ kutã axàpkur kêt nē. Anē.

¹⁷ Hāmri nhũm Jejus amnhĩ tã mẽ kapēr ma nē mẽ kãm:

—Tk. Ixte tãm mẽ unhwỳr kaxyw ixte mẽ kutã ixàpkur o inhỹr kēnã. Xà na hte tõtõ mẽ mex xwỳnhjê hwỳr mra nē mẽ hkane? Nà na hte ãm mẽ à xwỳnhjê pix kane ho pa. Ra mẽ ate ja pumunh mex. Ja pyrã nē na pa pre mẽ kot amnhĩ to mex xwỳnhjê hwỳr ixwryk kêt nē. ãm mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nē jajē kutã ixàpkur o nhỹ. Mẽ ate amnhĩ tomnuj mã anhũrer nē hpãnhã tãm amnhĩ nhĩpêx o

apa kaxyw na pa pre mẽ awỳr wrỳ nē mẽ akamã ixukaprĩ ho ri mẽ akõt ixpa. Tã ka mẽ atỳx ã ixte mẽ kutã ixàpkur anhỹrja ã ixto akapēr anē. Anē.

Mẽ kot Tĩrtũm mã amnhĩ jarēnh kaxyw mẽõ kaga hã mẽ harēnh

Matêwre 9.14-17; Rukre 5.33-39

¹⁸ Juãw Paxis kõt mẽ pa xwỳnhjê mẽ Parijew nhõ xwỳnhjaja na prem tõtã Tĩrtũm mã amnhĩ jarēnh kaxyw nē apkur kêt rãhã kamã kãm amnhĩ jarē. Nom nhũm Jejus kõt mẽ pa ho mẽ pa xwỳnhjaja na prem kãm amnhĩ jarēnh prãm nē apkur kãm amnhĩx kãm amnhĩ jarēnh o pa. Jakamã nhũm Ijaew kwỳjaja tee ri ja hã mẽ omu nē Jejus wỳr mra nē mẽ hã hkukja nē kãm:

—Pa? Kwa aprĩ hã mẽ inhmã mẽmojarē. Na hte Parijew nhõ xwỳnhjê mẽ Juãw Paxis kõt mẽ pa xwỳnhjaja tõtã Tĩrtũm mã amnhĩ jarēnh kaxyw nē apkur kêt rãhã kãm amnhĩ jarē. No akõt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarēnh o pa. Kwa mo na htem mẽ urak nē tõtã apkur kêt rãhã kãm amnhĩ jarēnh kêt nē? Anē.

¹⁹ Hāmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anē? Mẽ hkaprĩ hkêt kēnã. Mẽ kot ixkõt pa ho pa hã amnhĩ pumunh jakamã na htem hkĩnh nē pa. Kormã ixte mẽ hkõt ixpa kēnã kot kêt mẽ Tĩrtũm mã kapēr kaxyw nē ho apkur kêt kamã kãm amnhĩ jarē. Xà na htem hkrãmnhwỳ hã hkĩnh kaxyw hã akuprõ nē hkaprĩ nē apkur kêt nē mỳr o hkrĩ? Nà na htem hã akuprõ nē hkĩnh nē apkur rũnh nē. Ja pyrã nē na hte ixkõt mẽ pa ho mẽ pa xwỳnhjaja ixkõt kormã àmnhĩx hkĩnh nē apkati mẽ apkur kãm kãm amnhĩ jarēnh o pa. ²⁰ Nom koja mẽ kãm ixkurē xwỳnhjaja nhỹrmã tanhmã ixto hãmri nhũm mẽ rĩ kormã hkaprĩ htỳx kãm ho apkur kêt rãhã Tĩrtũm mã amnhĩ jarē. Anē.

Nhũm pre ã Jejus mẽ kãm hkõt ri mẽ pa ho mẽ pa xwỳnhjê jarēnh anē hãmri nē axte mẽ kãm kapēr nē mẽ kãm:

²¹⁻²² —Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrak jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrak kêt jakamã

na ka htem inhma nê ãm inhma. Kwa mẽ inhma nê mẽ ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarênh

Matêwre 12.1-8; Rukre 6.1-5

²³ Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwýnhjaja ma nhỹhỹm mõi. Ma mẽ hpur kahti hkôt nhỹhỹm mõi nhũm hkôt mẽ pa ho mẽ pa xwýnhjaja ra kãm prãm nê. Hãmri nê prãm xaj purta kamã amnhĩm mẽmo hy te kot harój pyrək xwýnhhta kwý rê nê ma Jejus kôt hkanhar o mõi. Mẽ ixpê Ijaewjaja na pa htem axpên pur kãm ixpa nê ã amnhĩ nhĩpêx anê. ²⁴ Hãmri nhũm Parijew nhõ xwýnhjaja mẽ hkôt mra nê tee ri ja hã mẽ omu nê Jejus wýr mra nê mẽ hã kãm akir nê kãm:

—Kwa jarãhã sap tã akôt mẽ pa ho mẽ pa xwýnhjaja mẽmo hy hkwy rê nê akôt hkanhar o pa. Tĩrtũm kapêr ã kagà htũm kot mẽ panhõ arĩgromnu hã mẽ pahte mẽmoj nhĩkênh nê mẽ pahkurê kênã. Kwa mẽ kãm anê kê mẽ ã amnhĩ nhĩpêx anhýr kêt nê. Anê.

²⁵⁻²⁶ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xàn ka mẽ kormã Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx to kamã harênh nê mar kêt nê? Kormã Apiatar kêp patre maati ri na pre Tawi hkôt ri mẽ pa xwýnhjê mẽ prãm xaj Tĩrtũm mã amnhĩ jarênh xà hã ixkre hwýr agjê. Hãmri nhũm Apiatar mẽ kãm prãm tỳx ã mẽ omu nê mẽ kamã ukapri nê mẽ kãm mẽmoj gõi. Mẽ kot Tĩrtũm noo mã pãwti jaxwýr xwýnhhta nhũm mẽ kãm kugõi nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukapri xaj mẽ kãm kugõi. Patre pix kot ja hkur kaxyw tã nhũm mẽ kãm kugõi nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nê. Patre kot mẽ kamã ukapri nê mẽ kãm õr nhũm ja hã omu nhũm ja kãm mex nê. Anê.

Hãmri nê mẽ kãm:

²⁷ —Na pre Tĩrtũm panhĩ kumrêx o kato nê kormã mẽ hkõkõt nê Tĩrtũm mã

hamaxpêr o hkrĩ kaxyw arĩgromnu ho kato. No na pre arĩgromnu kumrêx o kato nê hpãnhã kaxyw panhĩ ho kator kêt nê. ²⁸ Tã pa na pre Tĩrtũm mẽ akaxyw ixãm nê mẽ awýr inhmê. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwãr mẽ mãmri mẽmojta rê nê ixkõt hkanhar o mõi. Anê.

3

Jejus kot akupým ãkra grã xwýnh o mex ã harênh

Matêwre 12.9-14; Rukre 6.6-11

¹ Tã nhũm mẽ ixpê Ijaewjê nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkreja wýr tẽ nê axà nê kamã Tĩrtũm kapêr o mẽ ahkre ho nhỹ. Nhũm mēhõ my ãkra grã xwýnhja mẽ ãkõ hã mar o nhỹ. ² Nhũm Parijew nhõ xwýnhjaja kãm mẽ hkrãhtũmjê mã Jejus o kapêr prãm jakamã htãnopxar o kuhê nê axpên mã:

—E kwa pu mẽ jar pakuhê nê kot tanhmã amnhĩ nhĩpêx to hã omu. Xà koja jarãhã ãkra grã xwýnh mũj o mex nã? Jarãhã arĩgromnu kênã kot kêt kãm ãkra ho mex. Koja ho anê nê ra Tĩrtũm kapêr tũm nhĩrõp xa. E pu mẽ xa nê hã omu. Anê.

³ Hãmri nhũm Jejus ãkra grã xwýnhhta pumu nê kãm:

—Pa? E kãnhmã xa nê amnê ixwýr tẽ. Anê.

Hãmri nhũm kãnhmã xa nê hwýr tẽ nê mẽ piitã mẽ noo mã xa. ⁴ Hãmri nhũm Jejus mẽ kot omunh o hkrĩ xwýnhjê hwýr rĩt nê arĩgromnu hã tanhmã mẽ kot amnhĩ nhĩpêx to hã mẽ hkukja nê mẽ kãm:

—E mẽ inhma. Tanhmã na htem arĩgromnu hã axpên nhĩpêx to wehe? Xà kot ka mẽ arĩgromnu hã axà htỳx nê amex prãm xaj ma mēhõ hwýr amnhĩ to tẽ nhũm apumu nê apkatim arĩgro mex jamãr pê akane hkêt ka ty nhũm ja amã mex nê? Rỳ nhũm apumu nê tanhmã atomnuj to nê akupým amnhĩ nê ajano nhũm ja amã mex nê? Nã koja ã anhĩpêx anê nhũm ja amã mex kêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpên nhĩpêx ã mẽ pamã karõ hto? Xà kot puj mẽ hã axpên

kām paxukaprī rỳ hã mẽ pamã axpën kurê ho papa? Xà kot puj mẽ hã mẽmoj punuj pë mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpër ã mẽ omunh mex nẽ ã hêx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pë omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. ⁵ Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ìhkra grà xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhĩhkra katat. Anẽ.

Hãmri nhũm ìhkra katat nẽ akupỹm mex kurê kumrêx. ⁶ Hãmri nhũm Parijew nhõ xwỳnhjaja tee ri ã Jejus kapër anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapõj nẽ ma pahi Erox kôt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpën kukjêr to nẽ axpën mã:

—Kwa tanhmã kot puj mẽ ho? Na ã kapër anhỹrja o mẽ pahto kapër punuj nẽ. Te hkĩnhã mẽ papamjaja mẽ kamã paxukaprĩ hkêt pyrãk ã mẽ pajarẽ. Kojã mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkôt pix mã hamaxpër o pa. Ja pymaj kwa tanhmã kot puj mẽ ho? Anẽ.

Mẽ ohtõ nẽ kot Jejus kapër mar kaxyw hwỳr mrar ã mẽ harẽnh

Matêwre 4.23-25; Rukre 6.17-19

⁷⁻⁸ Tã nhũm Jejus mẽ hkôt mẽ pa ho mẽ pa xwỳnhjê mẽrohã ma akupỹm gõ rax wỳr mõ nhũm mẽ ohtõ nẽ omu nẽ ma hkôt mra. Pyka pë Garirej mẽ Jutej wa kurũm nẽ krĩ pë Jerujarẽ rũm nẽ pyka pë Itumêj rũm nẽ pyhti pë Jotãw nhĩkjê hã krĩ hkwy rũm nẽ krĩ hkwy pë Xir mẽ Sitõ wa pu hã krĩ hkwy rũm ohtõ nẽ ma hwỳr mra. Na prem ra harẽnh ma nẽ nhỹhỹm mõr ã omu nẽ axpën mã harẽnh o:

—E kwa tokyj pu mẽ ma hwỳr mẽ à xwỳnhjê o mõ kê akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. ⁹⁻¹⁰ Hãmri nhũm Jejus akupỹm mẽ à xwỳnhjê ho mex. Gõ mỳri

xa nẽ tanhmã mẽ ho mex to. Jakamã nhũm mẽ axte ohtõ nẽ hwỳr mra nẽ piitã kot htok nẽ akupỹm mex kaxyw hwỳr axpën nhĩgã. Hãmri nhũm tee ri amnhĩ wỳr mẽ omu nẽ hkôt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjênh o tẽ nẽ jar inhmã anhõ. Kê mẽ ixtã axpën nhĩgãnh o ijanênh japêr pa hwỳr axã nẽ amỹm mẽ ho hpỹnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. ¹¹ Na pre mẽkarõmnuti hkwyja mẽ hkwyjê hwỳr agjê. Jakamã nhũm mẽ Jejus pumu nẽ mẽkarõmnuti nhỹ hã kêp Tĩrtũm Kra hã omunh kurê kumrêx. Hãmri nẽ hã hpijaãm kaxyw kutã hkõnkrã ho hkrĩ nẽ mẽkarõmnuti nhỹ hã kãm kapër nẽ kãm:

—Kwa apê Tĩrtũm Kra na ka. Anẽ.

¹² Hãmri nhũm tee ri amnhĩ tã mẽ kuma. Kãm mẽkarõmnuti ã kot harẽnh anhỹr prãm kêt nẽ. ãm mẽ piitã mẽ kot kapër mar nẽ kot amnhĩ nhĩpêx ã omunh pë kêp Tĩrtũm Kra hã omunhja na kãm hprãm. Jakamã nhũm mẽkarõmnuti ã harẽnh anẽ nhũm ja nẽ mẽ kãm kapër nẽ mẽ kãm:

—Tk kwa nà kêr ka mẽ tanhmã ijarẽnh to hkêt nẽ. Anẽ.

Jejus kot amnhĩ kaxyw mẽ kêp 12 rênh ã harẽnh

Matêwre 10.1-4; Rukre 6.12-16

¹³ Tã nhũm Jejus hkôt mẽ pa ho mẽ pa xwỳnh kwỳjê mã kãm:

—E pu mẽ ma mõ nẽ krãhakỳx mũj ã api. Anẽ.

Hãmri nẽ mẽ ma hwỳr mõ nẽ hã api ¹⁴nhũm Jejus amnhĩ kaxyw mẽ ho 12 nẽ mẽ kurê. Mẽ kot ma ÿ hã Tĩrtũm kapër o mẽ ahkre ¹⁵ nẽ ÿ hã mẽ nẽ mẽkarõmnuti janor o pa kaxyw. ¹⁶ ã mẽ hixi kot anhỹr.

Na pre ja kêp Simãw no nhũm Jejus hpãnhã hã hixi hõ mẽ nhũm hpãnhã mããnên kêp Pêtre.

¹⁷ Nẽ hkôt Jepetew kra Xiakre mẽ htõ Juãwja wa kuta.

Hãmri nẽ kot Simãw nhĩpêx pyrã nẽ wa hã hixi hõ mẽ nhũm wa hpãnhã mããnên kêp Poanes. Wa kot amnhĩ prêprêk jakamã nhũm ã wa hã hixi mẽnh anẽ.

¹⁸ Nẽ hõ pë Andreja ta.

Ně hkôt Andre htõ Firiptija ta.
 Ně hkôt Patoromewja ta.
 Ně hkôt Matêwreja ta.
 Ně hkôt Tomasja ta.
 Ně hkôt Arpêw kra Xiakreja ta.
 Ně hkôt Tatewja ta.
 Ně hkôt Simãw ôja ta.

Simãwja na pre kãm mẽ ixpê Ijaewjê
 nhõ pika pê Ijaew kĩnh tỳx nẽ.
 Jakamã na pre kãm nhãm pika hõ
 nhõ pahi kot mẽ ho amnhĩptâr prãm
 kêt nẽ pa.

¹⁹ Ně hkôt Jut Kariotja ta.

Kormã kot mẽ kãm Jejus kurê xwỳnhjê
 nhĩhkram òr mã nhũm Jejus kot
 amnhĩ kukamã omunh mex tã mẽ
 hkôt amnhĩ kaxyw kuta.

Ã mẽ kot ỳ hã mẽ ahkre o pa kaxyw mẽ rênh
 xwỳnhjê nhĩxi kot anhỳr.

Jejus mẽ mẽkarõmnuti wa harênh

*Matêwre 12.22-32; Rukre 11.14-23, 12.10;
 Juãw 10.19-21*

²⁰ Hãmri nhũm Jejus hkôt mẽ pa ho mẽ
 pa xwỳnh kwỳjê rênh pa nẽ ma amnhĩ kôt
 mẽhõ nhõrkwỹ hwỳr mẽ o mõ. Na prem
 apkur kêt ry rax nẽ ra kãm prãm tỳx nẽ
 nhũm ma mẽ apkur kaxyw amnhĩ kôt mẽ
 o mõ. Hãmri nhũm axte mẽ à xwỳnhjaja mẽ
 omu nẽ Jejus wỳr pikuprõnh rax nhũm mẽ
 tokyx apkur kêt nẽ. ²¹ Hãmri nhũm Jejus
 katorxà nẽ htõjaja tee ri mẽ apkur kêt ã mẽ
 harênh ma nẽ axpên mã:

—Kwa mãn ãm ra tanhmã hkrã amnhĩ
 to nà? Hã na mẽ kot omunh kaxyw hã
 hpikuprõnh rax jakamã nhũm kormã ap-
 kur kêt nẽ. E tokyx pu mẽ ma hwỳr mra nẽ
 omu nẽ mẽ kệp utà nẽ akupỳn amnhĩ kôt o
 mõ. Anẽ.

²² Rôm nhũm Tĩrtũm kapêr tũm o mẽ
 ahkre xwỳnhjaja Jerujarê rũm Jejus wỳr
 mõn pøj. Hãmri nẽ tanhmã ho kapêr punuj
 to. Kệp mẽkarõmnuti hkwy hã hkamnhĩx
 jakamã harênh o:

—Tk pêr hinhu nhĩkõõti nhỹ hã na hte
 mẽ nẽ amnhĩ kwỳjê japõx o pa. Anẽ.

Hinhu nhĩkõõti nhĩxi hõ pê Satanasti
 nhũm prem ỳ hã Jejus kot amnhĩ nhĩpêx o
 pa hã hkamnhĩx. ²³ Hãmri nhũm amnhĩ tã
 mẽ omu nẽ amnhĩ wỳr mẽ kãm hpa ho apê

nẽ mẽ kãm amnhĩ jarẽ. Nom amnhĩ tã kuxi
 nẽ mẽ kãm mẽmoj jarẽ nẽ mẽ kãm:

—Kwa mẽ inhma mẽ ate ixpê Satanasti
 hkwy hã ixkamnhĩx xwỳnhjaja. Xà na hte
 Satanasti mẽ nẽ amnhĩ kwỳjê janor o pa?
 Nà na hte ã amnhĩ nhĩpêx anhỳr kêt nẽ.
²⁴ Na hte pika nhõ xwỳnhjaja axpên kutã
 amnhĩ xunhwỳ nẽ axpu hãmri nẽ angrã
 nẽ ma ahpỳnhã ri pa nẽ amnhĩ krã hkôt ri
 tanhmã amnhĩ to ho ri pa. Jakamã nhũm
 mẽ õ pahija mẽ hamãr o pa hkêt nẽ. ²⁵ Nẽ
 krĩ nhõ xwỳnhjaja haxwỳja. Mẽ kot axpên to
 hkwy xwỳnhjaja koja mẽmoj tã axpên kãm
 gryk nẽ axpên kutã amnhĩ xunhwỳ hãmri
 nẽ angrã nẽ ahpỳnhã pa hãmri nhũm mẽ
 õ pahi tee ri kãm mẽ hamãr o pa hprãm.
 Mo hkwyjaja kot kêt ri mẽ hamãr o pa?
 Nom tãm kot amnhĩ nẽ mẽ hanoore hã. Mẽ
 tãmjaja na prem axpên kãm gryk nẽ angrã
 nẽ ahpỳnhã pa. ²⁶ Tã ja pyrã nẽ ixte Sa-
 tanasti nhỹ hã tanhmã amnhĩ nhĩpêx to ho
 ixpa ronhỹx pa ri mẽ kurũm amnhĩ kwỳjê
 japõx o ri ixpa hkêt nẽ. Mẽkarõmnutijaja kệp
 Satanasti hkwy kênã. Koja Satanasti ixte
 mẽ kurũm mẽ hapõx kaxyw tanhmã inhma
 nẽ hkêt nẽ. ²⁷ àhpumunh tỳx jakamã na
 hte mẽ kot hkôt amnhĩ xunhwỳr xwỳnhjê
 pumunh tỳx o pa nhũm mẽhõ tee ri kệp
 mẽ utàr kaxyw. Tã ixàhpumunh tỳx o ixte
 hakrenh jakamã ixte kệp mẽ utàrja inhma
 tanhmã kute hkêt. Na pa hte kệp mẽ utà
 nhũm mẽ hpãnhã ixkôt amnhĩ nhĩpêx o pa
 nhũm Satanasti tee ri mẽ hã ixpumunh o
 pa kaprỹ.

²⁸—Ãm hãmri na pa mẽ amã ixkapêr. Kot
 kaj mẽ tanhmã amnhĩ tomnuj to ho apa.
 Nẽ amnhĩ tomnuj tỳx kumrêx rãhã ho apa.
 Rỳ tanhmã akapêr punuj to ho apa. Rỳ
 tanhmã Tĩrtũm o akapêr punuj to ho apa.
 Tã tee ri ja hã amnhĩ pumu nẽ akapri nẽ
 ã ate amnhĩ nhĩpêx anhỳrja kaga nẽ Tĩrtũm
 kôt amnhĩ xunhwỳ. Hãmri nhũm amnhĩ
 tã mẽ apumu nẽ amnhĩ katut kôt mẽ ate
 amnhĩ tomnuj nẽ mẽ akapêr punuj rênh
 pa nẽ axte kãm hamaxpêr kêt nẽ. Koja
 ho hapêx par kumrêx. ²⁹ Nom koja Tĩrtũm
 Karõ xatã mẽ amã ixto amnhĩrĩt tã ka mẽ
 ama nẽ ãm ama nẽ te kệp amnhĩ jamak pro
 pyrãk o amnhĩ nhĩpêx. Jao Tĩrtũm Karõ hã
 apijaãm kêt ã amnhĩ to amnhĩrĩt. Ja mỳrapê

koja Tirtũm nhỹrmã amnhĩ xwar te mẽ apê amnhĩ jamak pro pyræk o mẽ anhĩpêx ka mẽ tee ri kãm amnhĩ kaprĩ kaprỹ. Hãmri nê mẽ kot amnhĩ xà htỹx kamã hamak o pa htũm xà wỹr ma apa nê kamã apa rãhã apa ho apa. Anê.

³⁰ Mẽ kot Satanasti nhỹ hã mẽ nê mẽkarõmnuti janor o pa hã hkamnhĩx jakamã nhũm pre Jejus ã mẽ kãm kapêr anê.

Jejus katorxà mẽ htõjê jarênh

Matêwre 12.46-50; Rukre 8.19-21; mãânên Eprêw 2.11-12

³¹ Rôm nhũm Jejus katorxà mẽ htõjaja hwỹr mra no ãm kormã hwỹr gjêx kêt nê. Mẽ kot hã htu rax jakamã nhũm mẽ tee ri hwỹr gjêx kaxyw kormã kapôt ã kuhê. Hãmri nê mẽ kot mar o kuhê xwỹnhjê hõ mã kapêr nê kãm:

—Kwa ma tẽn Jejus mã mẽ ijarê kê mẽ ixwỹr kato. Anê.

³² Rôm nhũm ixkre kamã mẽ hkrĩ xwỹnhjaja mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atõjaja awỹr mra nê pøj nê tee ri awỹr gjêx mã nê kormã kapôt ã kuhê nê atã karõ. Anê.

³³⁻³⁵ Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rỹ ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

4

Mẽmo hy hkre xwỹnh jarênh

Matêwre 13.1-9; Rukre 8.4-8

¹ Tã nhũm Jejus axte gõ jakàx ã mẽ ahkre ho nhỹ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axà nê gõx kãm amỹm mẽ ahkre ho nhỹ. Nhũm mẽ piitã kỹxpê omunh nê mar mex o kuhê. ² Hãmri nhũm mẽ ahkre ho nhỹ. Nom mẽ ujarênh pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm hã ujarênh o nhỹ nê mẽ kãm:

³ —E mẽ inhma. Koja mẽhõ ma pur mã mõ nê pur kãm mẽmo hy ho ukapêr o pa

nom nhũm hy piitã amex kãm rôrôk kêt nê. Koja ahpỹnhã rôrôk. ⁴ Koja hkwy aptỹx kãm rôrôk nhũm kuwênhre omu nê hwỹr mra nê hkrêr pa. ⁵⁻⁶ Nê koja kên kãm hkwy rôrôk hãmri nê higrôt kutã nojarêt nê higrôt pa. Nom nhũm kamã aptỹx nê kamã kêp pika hkryre jakamã nhũm higrôt nhũm hã myt apha nê arĩgro htỹx mẽ nhũm grã pa. Harê hkryre jakamã grã pa. ⁷ Nê koja hkwy mrõnhĩ kamã rôrôk nê higrôt tã no nhũm utĩja kêp amỹtã nhũm ô hkêt nê.

⁸ —No koja hirã kamã pika mex kãm hkwy rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mẽ ujarênh kot anhỹr. ⁹ Kwa mẽ ama nê kãm ajamaxpêr tỹx rãhã ho ri apa. Anê.

Jejus kot hprĩ hã mẽmo hy jarênh

Matêwre 13.10-23; Rukre 8.9-15

¹⁰ Hãmri nhũm mẽ Jejus xujarênh mar pa nê angrã nê ma akupỹm mra nhũm hkôt mẽ pa ho pa xwỹnh pê 12 mẽ hkwyjaja pix Jejus ri arĩk. Hãmri nê ujarênhã ã hkukja nê kãm:

—Kwa mon ka hte ã mẽ kãm axujarênh anê Pahihti? Na pa mẽ ixprĩ hã amar mex kêt nê. Anê.

¹¹⁻¹² Hãmri nhũm mẽ kãm:

—Nà kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nà mẽ kot amnhĩ tomnu kaga nhũm Tirtũm kot ja hã mẽ omunh xà hkôt mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar prãm kêt jakamã na pa hte mẽ kãm mẽmoj tã haxwỹ nê awjarê nhũm mẽ ãm ixujarênh pix ma.

Na htem kuma nê ãm kuma nê htỹx ri hã pa. No kêp apu mẽ kãm hprĩ hã mar prãm ronhỹx mẽ ra hprĩ hã kuma nê Tirtũm kôt amnhĩ xunhwỹ nhũm amnhĩ tã mẽ omu nê mẽ kot amnhĩ tomnuj o hapêx. Nom mẽ kãm mar prãm kêt. Anê.

¹³ Tã mẽ ate aprĩ hã ixujarênhja mar mex kêt jakamã tanhmã kot kaj mẽ amnhĩ to nê ixujarênh piitã ama? E kot paj ixprĩ hã mẽ amã mẽmo hyta jarê ka mẽ inhma.

14 —Nà mẽmo hyta te kệp Tĩrtũm kapẽr pyræk. Nẽ ahpỹnhã rôrøk xà hã pikata te kệp ahpỹnhã mẽ kot Tĩrtũm kapẽr mar xwỹnhjê kot mar nẽ ahpỹnhã tanhmã amnhĩ nhĩpêx to pyræk. 15 Jakamã mẽ kot mar xwỹnh kwỹjaja hte kot aptỳx kãm hkwỳ rôrøk nhũm kuwênh kot hwỳr mrar nẽ hkrẽr par xwỹnhhta pyræk. Jakamã na htem Tĩrtũm kapẽr ma nom nhũm Satanasti te kuwênh kot hy hkrẽr parta pyræk o mẽ hipêx. Nẽ mẽ kot amnhĩ kaxyw hkôt hamaxpẽr nẽ hkôt amnhĩ xunhwỳr pymaj tanhmã nẽ mẽ hkrã hto. Jakamã nhũm mẽ Tĩrtũm kapẽr ma nom ho hamakêtkati tokyx anẽ nẽ axte kãm hamaxpẽr kêt nẽ.

16 —Nẽ mẽ kot mar xwỹnh kwỹjaja te kot kênre kamã hkwỳ rôrøk nẽ higrôt nhũm te hã myt apha nhũm grà par tokyx anhỹr xwỹnhhta pyræk. Na htem Tĩrtũm kapẽr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhỹrta pyræk. 17 Tã nhũm mễhõ tẽ nẽ Tĩrtũm nẽ tanhmã mẽ kãm kapẽr to nhũm mẽ kuma nẽ hkaga. Rỳ nhũm mẽ Tĩrtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrôt nẽ grà par tokyx anhỹrta pyræk.

18 —Nẽ mẽ kot mar xwỹnh kwỹjaja te kot mrônhi kamã hkwỳ rôrøk nẽ higrôt nhũm mrônhi kot kệp àmnàr xwỹnhhta pyræk. Nẽ mẽ kãm Tĩrtũm kapẽr mar prãm nẽ. 19 Nom mãânên kãm hikukrêx rax nẽ hikàxpore rax prãm jakamã ãm ja pix kukamã hamaxpẽr o ri pa. Jao ra gryk ã axte Tĩrtũm kapẽr mã hamaxpẽr nẽ hkôt amnhĩ nhĩpêx kêt nẽ. Te mrônhi kot higrôt pẽ àmnàr nhũm ô hkêeta pyræk.

20 —No mẽ kot mar xwỹnh kwỹjaja te hirã kamã pika mex kãm hy hkwỳ rôrøk nẽ higrôt nẽ ô raxta pyræk. Na htem ixkapẽr ma nẽ amnhĩ krã him hagjênh tỳx nẽ. Nẽ ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwỹja kệp 30 nẽ kamã kệp 60 nẽ kamã kệp 100ta pyrã nẽ Tĩrtũm kapẽr kôt amnhĩ nhĩpêx mex rãhã ho pa. E ã ixujarênhja kot anhỹr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

21 Nhũm Jejus arĩ hkôt mẽ pa ho pa xwỹnhjê jahkre nẽ mẽ kãm:

—Xà na htem kanê hpôk nẽ poti ho hpro rỳ hitom kãm par krak ri unhwỳ? Nà na htem hpôk hãmri nẽ kỳx pẽ mẽmoj nhĩmøk ã unhwỳ. 22 Ja pyrã nẽ mẽ piitã kot hkwỳjê pẽ tanhmã hamaxpẽr punuj to ho hpimxur prãm tã tee ri kot ho hpimxur prãm kaprỳ. Koja nhỹrmã mẽ hamaxpẽr piitã amnhĩ to amnhĩrit pa. Nẽ mẽmoj piitã ra hpimxur mex tã koja nhỹrmã amnhĩ to amnhĩrit pa. Te mẽ kot kanê hpôk nẽ kỳx pẽ unhwỳr nhũm amnhĩrit mex pyræk. Ja pyrã nẽ na pa hte Tĩrtũm kapẽr o ri ixpimxur o ixpa hkêt nẽ. Na pa hte ixprĩ hã mẽ amã harênh mex o ixpa. 23 Kwa mẽ ixujarênhja ma nẽ kãm ajamaxpẽr tỳx rãhã ho ri apa. Anẽ.

Nhũm pre ã Jejus mẽ kãm kapẽr anẽ. 24 Hãmri nẽ mẽ kãm:

—Nẽ kêt ka mẽ axpên kãm axukapri ho ri tanhmã axpên to mex to ho ri apa. Kêt kêt Tĩrtũm ja hã mẽ apumu nẽ mẽ apyrã nẽ mẽ akamã ukapri pẽ mẽ ato mex o pa. 25 Koja mễhõ inhmã tanhmã amnhĩ nhĩpêx mex to pa ja hã omu nẽ kot inhmã àpênh mexta pãnhã ho mex nẽ. No koja inhmã àpênh mex kêt pa ja hã omu nẽ hã ho mex kêt nẽ.

—Nẽ koja mễhõ kãm ixkapẽr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tỳx o mỗ. No koja kuma nẽ ãm kuma hãmri nẽ gaa nẽ hã no hkêt. Anẽ.

*Pur kãm mẽmo hy hkre xwỹnh jarênh
Matêwre 13.24-30*

26 Nhũm Jejus arĩ hkôt mẽ pa ho mẽ pa xwỹnhjê jahkre ho nhỹ nẽ mẽ kãm:

—E pa mẽ amã tanhmã mẽ kot ixkapẽr mar tỳx xwỹnhjê jarênh to ka mẽ inhma. Koja mễhõ ixkapẽr mar tỳx nẽ ra hkôt ri amnhĩ nhĩpêx o pa. Hãmri nẽ hamaxpẽr nyw o hamaxpẽr o pa nẽ amnhĩ nhĩpêx nyw o amnhĩ nhĩpêx o pa. Te mẽ hpur kãm mễhõ kot mẽmo hy hkre xwỹnh kot amnhĩ nhĩpêx pyræk. Na hte hyja kre ho pa. 27 Hãmri nẽ hkre hpa nẽ kamàt mẽ ôt o hikwỳ nẽ arĩgro mẽ mẽmoj tã àpênh o pa. Rãhã nhũm mẽmo hyja arĩ hikwỳ ho hikwỳ hkêt nẽ. Koja amnhĩ nhĩpêx ô ho amnhĩ nhĩpêx nẽ higrôt kato nẽ hprêk. Kre xwỹnh kot tanhmã kot amnhĩ nhĩpêx to hã omunh kêt tã nhũm kãm hprêk.

28 —Na hte hpõm hapõx o pa nẽ higrõt o pyka kahte. Hãmri nẽ hprêk nẽ hô axpõt nẽ gaa nẽ hpãnhã ô. Hãmri nẽ hkamrêk pa nẽ xa. 29 Hãmri nẽ mẽ kot hikênh mã mex nẽ nhũm kot hkre xwýnhta omu nẽ amnhĩm hamýnh pa. Tã mẽ kot ixkapêr mar mex xwýnhjaja te mẽmo hy ra higrõt kator nẽ hprêk nẽ hô pipõt nẽ ô xwýnhta pyræk. Nẽ uræk nẽ amnhĩ nhĩpêx õ ho amnhĩ nhĩpêx o pa. Anẽ.

Jejus te kot mẽmo hy pyræk ã kot amnhĩ jarênh

Matêwre 13.31-32; Rukre 13.18-19

30-32 Nhũm Jejus arĩ mẽ ahkre ho nhỹ nẽ mẽ kãm:

—Tĩrtũm kot mẽ awýr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyræk. Koja mẽhõ mẽmo hy hõ pixire nẽ hkre nhũm ra higrõt. Nẽ gaa nẽ hprêk. Hãmri nẽ hpa anhgrà nhũm kuwênhre hwýr mra nẽ hõptĩ kamã amnhĩm haê nhĩpêx. Mẽmo hyta grire htã nhũm hkre nhũm higrõt nẽ ã amnhĩ nhĩpêx anẽ. Tã kot paj nhỹrmã urà nẽ ixpyxi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixpa. Anẽ.

Ã na pre Jejusja hkõt mẽ pa ho mẽ pa xwýnhjê mã amnhĩ tã kuxi nẽ ujarênh anẽ. 33 Mẽ kãm ujarênh kãm mẽ ahkre ho pa. Te nhãm mẽmoj jarênh pyrã nẽ amnhĩ tã haxwý nẽ harẽ. Mẽ kot tanhmã mar to hã mẽ omunh xà hkõt tanhmã mẽ kãm ujarênh to. 34 Na pre ãm ujarênh pix kãm mẽ kãm kapêr mar prãm kêt xwýnhjê mã amnhĩ jarênh rãhã ho pa. No mẽ kot hkõt pa ho pa xwýnhjê mã nhũm hprĩ hã ujarênh jarẽ nhũm mẽhprĩ hã mar mex nẽ.

Jejus kot kòk o pinhkrênh ã harênh

Matêwre 8.23-27; Rukre 8.22-25

35 Tã nhũm amýkry nhũm Jejus arĩ pàr kre kamã nhỹ. Hãmri nẽ hkõt mẽ pa ho mẽ pa xwýnhjê mã kãm: “E pu mẽ ma xarmã mõi.” 36 Anẽ hãmri nẽ mẽ kot mar o hkrĩ xwýnhjê re nẽ pàr mã agjê nẽ ma xarmã mõi. Garirej rũm kato nẽ ma xarmã pika hõ hwýr mõi. Nhũm pàr kwýja ma mẽ hkõt mõi. 37-38 Nhũm Jejus ra õtxwa nẽ tẽ nẽ pàr kre kamã hkrã japar xà hã hkrã xi nẽ ra õt týx nẽ nõ. Nhũm kòk àpêr týx nẽ nhũm gò kànhmã harĩ nẽ axpên tak. Ra ri xatã axpên

tak nẽ pàr kre kamã axkapĩ nhũm ra mẽ kêp àr o mõi. Hãmri nhũm mẽ tee ri amnhĩ nhĩpêx nẽ tee ri amnhĩ kukamã hamaxpêr nẽ Jejus wýr hprõt nẽ kumra nẽ kãm:

—Kwa kànhmã nhỹ Pahihtĩ. Kot puj mẽ jarãhã pahtyk pa. Anẽ.

39 Hãmri nhũm hkrākato nẽ kànhmã nhỹ nẽ kòk mẽ gòta pumu nẽ wa kãm kapêr o:

—E kwa wa anhĩkrê. Anẽ.

Hãmri nhũm gò mẽ kòk hpinhkrênh kurê kumrêx.

40 Hãmri nhũm Jejus hkõt mẽ pa ho mẽ pa xwýnhjê mã kãm:

—Hêxta waa nẽ. Kormã mẽ ate amnhĩ kaxyw Tĩrtũm mẽ wa inhmã ajamaxpêr týx kêt. Hã na ka mẽ ri amã ma nẽ tee ri amnhĩ kukamã ajamaxpêr. Anẽ.

41 Hãmri nhũm mẽ amnhĩ jaêr pê ã kot amnhĩ nhĩpêx anhýr ã omu nẽ tee ri axpên pumunh pê omunh o kuhê. Hãmri nẽ axpên mã:

—Kokýỹ. Jejus kêp mẽ panhĩõ hkêt. Mẽ pahtõ kot pu te kot amnhĩ nhĩpêx pyrã nẽ kòk mã pakapêr nhũm anhĩkrê? Nà mẽ pakurom àhpumunh týx o àhpumunh týx. Anẽ.

5

Jejus kot mẽhõ nẽ mẽkarõmnuti janor ã jarênh

Matêwre 8.28-33; Rukre 8.26-34

1 Tã nhũm Jejus mẽ hkõt mẽ pa ho mẽ pa xwýnhjê mẽrohã mõi nẽ xarmã Geras wýr pøj. 2-4 Hãmri nẽ pàr rũm hapøj nhũm mẽhõ myja Jejus pumu nẽ hwýr tẽ. Mẽkarõmnuti kot hwýr àr nhũm ý hã oprê htýx kumrêx. Hãmri nẽ hkwýjê hkàx ã kapõt ã mẽ hã pika kamã ri hkênh nẽ pa ho pa. Nhũm mẽ xatã kàx o hte hpre nẽ hpa hpre htã no nhũm kurê. 5 Nẽ kamát kãm nẽ arĩgro hã àmra htýx o mrrar pê kên o amnhĩ tak o mra. Mẽ hã pyka kamã nẽ kapõt ã hixêt ã amnhĩ tak týx rãhã ho mra. 6 Tã amým Jejus pumu nẽ hwýr hprõt nẽ hã hpijaam kaxyw kutã hkõn krã ho tẽm nẽ hparpê nhỹ. 7-8 Hãmri nhũm omu nẽ nẽ mẽkarõmnuti mã kapêr nẽ kãm:

—Kwa kurũm akato nẽ ma tẽ. Anẽ.

Hãmri nhũm kuma nẽ tanhmã myta o nhũm tãm mẽkarõmnuti nhỹ hã Jejus mã kapêr nẽ àmra kamã kãm:

—Pa Tirtũm Kra Jejus? Mo kaxyw na ka ixwyr tẽ? Kwa tanhmã ixto hkõt nẽ nà?

⁹⁻¹⁰ Anẽ nhũm kãm:

—Tanhmã na anhĩxi te? Anẽ.

Nhũm kãm:

—Nà ixpẽ Mẽohtõhti. Mẽkarõmnuti ohtõ nẽ kot ixwyr gjẽx jakamã na htem ã inhĩxi jarẽnh anẽ. Kwa nẽ mẽ ijanor kêt nẽ nà? Anẽ.

¹¹⁻¹² Hãmri nhũm mẽkarõmnuti tãm amnhĩ to kuwyr nẽ kãm:

—Kwa kêt ka jahti nẽ mẽ ijapõx japêr nẽ mẽ kot amnhĩ xà htỹx kamã hamak o mẽ pa htũm xàta wyr mẽ ixrẽnh kêt nẽ. Hagrõ hkwy mũj wyr mãn mẽ ixrẽ pa mẽ hpãnhã hwyr mãn hagjẽ? Anẽ.

¹³ Hãmri nhũm mẽ kãm:

—Tõe. Mẽ tãm hwyr mra. Anẽ.

Hãmri nhũm mẽmyta pẽ hapõx pa nẽ ma hagrõ hwyr mra kurẽ kumrẽx nẽ mẽ kãm gjẽx pa nhũm myja akupỹm tãm hkrã. No nhũm hagrõja mẽkarõmnuti pymaj amỹra nẽ axkahkũm nẽ hprõt nẽ himõ hã krã hixêt ã axpum rõrõk nẽ gõx kãm mrõ nẽ hpikaprãr pa. Ohtõ rax kumrẽx. Kêp 2.000 tã hpikaprãr pa. ¹⁴ Hãmri nhũm hagrõ jamãr o ri mẽ pa xwỹnhjaja tee ri ja hã omu nẽ ma mẽ õ patrãw wyr akupỹm mẽ piitã mẽ kãm harẽnh o hprõt nẽ mra. Hãmri nẽ mẽ kãm ujarẽnh pa. ¹⁵⁻¹⁶ Nhũm mẽ tee ri mẽ kuma nẽ ma Jejus wyr mra nẽ hkaxpa nẽ kuri myta pumu. Nhũm ra akupỹm tãm hkrã nẽ ê kamã tãm amnhĩ nhĩpẽx nẽ nhỹ. Nhũm mẽ kot hã omunh xwỹnhjaja mẽ kãm ujarẽnh pa nhũm mẽ kuma nẽ myta pumu hãmri nẽ tee ri amnhĩ kukamã hamaxpêr o kãm Jejus puma nẽ. ¹⁷ Hãmri nẽ amnhĩ nẽ kãm kapêr nẽ kãm:

—Kwa mẽmo kaxyw na ka mẽ ixwyr rẽ? Mẽ ma akupỹm amrar tokyx anẽ. Anẽ.

¹⁸ Hãmri nhũm mẽ kuma nẽ akupỹm pãr wyr agjẽ nhũm akupỹm mex xwỹnhhta tee ri ja hã mẽ omu nẽ mẽ hkõt hkrã. ¹⁹ No nhũm Jejus kãm:

—Nà kot kaj mẽ ixkõt amõr kêt nẽ. Ma akupỹm anhõ krĩ hwyr mãn tẽ nẽ mẽ kãm Tirtũm kot akupỹm ato mex ã amnhĩ jarẽnh o ri mẽ hkõt apa. Anẽ.

²⁰ Hãmri nhũm kuma nẽ ma akupỹm tẽ. Hãmri nẽ õ pyka pẽ Tekap kãm mẽ kãm Jejus kot tanhmã ho mex to hã harẽnh ri mẽ

hkõt pa nhũm mẽ amnhĩ jaêr pẽ kuma nẽ tee ri hkukamã hamaxpêr.

Jejus kot akupỹm mẽhõ ho mex nẽ akupỹm mẽhõ ho htĩr ã harẽnh

Matêwre 9.18-26; Rukre 8.40-56

²¹ Tã nhũm Jejus mẽ hkõt mẽ pa ho pa xwỹnhjẽ mẽrohã akupỹm xarmã mõ nẽ rẽ. Hãmri nẽ pãr nhõ nẽ api nẽ gõ myri kuhẽ nhũm pika nhõ xwỹnhjaja Jejus pumu nẽ hã pikuprõnh rax nẽ. ²²⁻²³ Hãmri nhũm mẽhõ my pẽ Jajtija hwyr tẽ nẽ kutã hkõnkrã ho htẽm nẽ nhỹ. Kêp Tirtũm kapêr o mẽ ahkre xà hã ixkre jamãr xwỹnh maati na pre. Nhũm hkra nija kêp à htỹx nẽ htyk kaxyw nẽ nõ. Kormã nyw. Kormã hã amgrã pẽ 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nẽ ma Jejus wyr tẽ nẽ hpar pẽ hkõn krã ho tẽm nẽ ho hwyr kãm hihtỹx nẽ kãm:

—Pa akupỹm mẽ ixto mex xwỹnh maati. E awyr na pa tẽ. Na ra ixkra ixpẽ htyk kaxyw. Pa tee ri omu nẽ kaxyw amã ijamaxpêr nẽ awyr tẽ. Jakamã kwa ma ixkõt inhõrkwỹ hwyr tẽ nẽ inhmã omu nẽ hã anhĩhkra xi nẽ akupỹm inhmã ho mex. Anẽ.

²⁴ Hãmri nhũm kuma nẽ ma hkõt tẽ. Nhũm mẽ ohtõ nẽ axpẽn nhĩgãnh nẽ axpẽn kujahêk o wa hkõt mra. ²⁵ Nhũm mẽhõ nija haxwỹja wa hkõt tẽ. Na pre hte hkamrõ hkryre rãhã ho pa hã ra hã amgrã kêp 12. ²⁶ Nẽ tõtõ mã amnhĩrer rax nẽ nhũm mẽ tee ri kot ho mex kaxyw nom xatã hkanẽ kaprỹ. Hãmri nhũm ra hikãxpore kêp hapêx nhũm arĩ ãm rãhã nẽ pa. ²⁷⁻²⁸ Hãmri nẽ tee ri amnhĩ kukamã hamaxpêr nẽ Jejus jarẽnh ma nẽ hamaxpêr o:

—Ma kot paj ma hwyr tẽ nẽ kêp ê pix kupênh tã akupỹm inhmex japêr. Ma kot paj ho anẽ.

Anhỹr o hamaxpêr hãmri nẽ ma mẽ hkõt hwyr htẽm kurẽ kumrẽx. Nhũm mẽ ohtõ raxja kaêx ã mẽ hkõt hwyr tẽ. Hãmri nẽ katut kõt kêp ê nhĩrẽ kupê. ²⁹ ãm ê pix kupênh tã akupỹm mex ã amnhĩ pumunh kurẽ kumrẽx. ³⁰ Hãmri nhũm Jejus kot kêp ê kupênh ã amnhĩ tã omu nẽ hẽx rom xa nẽ mẽ ho hakẽx nẽ amnhĩ tã mẽ kãm kapêr nẽ mẽ kãm:

—Kwa mẽ atõ na ka ri amnhĩ kaxyw inhmã ajamxpër tỳx pè ixpê ixê kupê? Anẽ.

Hãmri nhũm mẽ piitã kuma nẽ tee ri axpên pumu nẽ kãm amnhĩ tã aprã.
³¹ Hãmri nhũm hkõt mẽ pa ho pa xwỳnhjaja kãm:

—Mẽ kot apê amnàr griã kot ka kêt ri mēhõ kot apê hkupênh xwỳnh ã ri mẽ hkukja. Kwa măn ãm mẽhõ amarĩ apê hkupê. Anẽ.

³² Hãmri nhũm mẽ kãm:

—Nà na amarĩ ixpê hkupênh kêt nẽ. Na amnhĩ kaxyw inhmã hamaxpër tỳx pè ixpê hkupê. Tã na ixàhpumunh tỳx xà ho akupỹm mex. Nom ra ixte mẽhõ kot ixpê hkupênh xwỳnhhta pumunh jakamã na pa ixêx rom ã amnhĩ tã ri mẽ hkukjêr anẽ. E kwa mẽ atõ inhmã amnhĩ jarẽ. Anẽ.

³³ Hãmri nhũm nija kuma nẽ tee ri kệp kot amnhĩ to hpimxur prãm. Hãmri nẽ hpijaàm nẽ hwỳr htertet o tẽ nẽ kutã hkõn krã ho tẽm nẽ nhỹ nẽ kãm amnhĩ jarẽ nẽ kãm:

—Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

³⁴ Hãmri nhũm kuma nẽ kãm:

—Tỳ. Nà ate amnhĩ kaxyw inhmã ajamxpër tỳx kõt ã ate amnhĩ nhĩpêx anhỹr jakamã na ka akupỹm amex. Kot kaj axte akamrõ rãhã ho ri apa hkêt nẽ. E mãmri ajamakêtkati nẽ ma akupỹm anhõrkwỹ hwỳr tẽ. Anẽ.

Hãmri nhũm kuma nẽ hkĩnh nẽ ma akupỹm tẽ.

³⁵ Rôm nhũm Jajti mã mẽ àpênh xwỳnhjaja òrkwỹ rũm ma ò patrãw kutã mra nẽ wa hkaxpa nẽ Jajti mã kãm:

—Kwa na ra akra apê ty. Mo kaxyw kot ka kêt amnhĩ kõt Jejus o mõi? Kwãr mãmri ma akupỹm awjanã nẽ tẽ. Anẽ.

³⁶ Hãmri nhũm Jejus mẽ kuma nẽ Jajti mã kãm:

—Kwa tee ri akra hkukamã ajamxpër kêt nẽ. ãm kaxyw inhmã măn ajamxpër tỳx rãhã nẽ. Anẽ.

³⁷⁻⁴⁰ Hãmri nhũm mẽ axte mõi nẽ mẽ òrkwỹ hwỳr pøj nẽ mẽ omu. Nhũm mẽ ra hã hturax nẽ mỳr o hkrĩ. Hãmri nhũm Jejus mẽ hwỳr axà nẽ mẽ omu nẽ kot mẽ hkra htyk kumrêx ã omunh tã mẽ kãm:

—Kwa mẽ hãmri amỳr kêt nẽ. Na nireta htyk kêt nẽ. Na ãm gõr nẽ nõ. Anẽ.

Hãmri nhũm mẽ kot ra htyk ã omunh mex jakamã kuma nẽ ãm kuma nẽ axtem nẽ ri axpên mã hã hpër o axkê. Hãmri nhũm Jejus mẽ hanor pa nẽ hitom kãm htyk xwỳnh wỳr àr kaxyw nẽ amnhĩ kõt Juãw nẽ Xiakre nẽ Simãw Pêtre nẽ kaxyw htyk xwỳnh katorxà nẽ hipêêxà pix amnhĩ kõt mẽ ho axà. ⁴¹ Hãmri nẽ htyk xwỳnhhta wỳr tẽ nẽ hpa hã kupy nẽ kãm kapër nẽ kãm:

—Pa? E kwa kànhmã nhỹ. Anẽ.

Nom amnhĩ kapër kãm harẽ nẽ kãm:

—Tarit kũm. Anẽ.

⁴² Hãmri nhũm kànhmã ỳr kurê kumrêx nẽ kànhmã xa nẽ ri mra. Na pre ra hprêk nẽ ty. Na ra hã amgrà kệp 12 tã ty nhũm Jejus akupỹm ho htĩr nẽ kànhmã ỳr nhũm kànhmã xa nẽ ri mra. ⁴³ Hãmri nhũm kuri omunh xwỳnhjaja amnhĩ jaêr pè omu nẽ kamã no puma nẽ hkĩnh tỳx kumrêx. Hãmri nhũm Jejus katorxà mẽ hipêêxàja wa kãm:

—E măn ra kãm prãm nẽ. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupỹm ixte ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

6

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

¹ Tã nhũm Jejus ma ò krĩ pè Najare hwỳr ma akupỹm mõi nhũm hkõt mẽ pa ho mẽ pa xwỳnhjaja ma hkõt mõi. ² Hãmri nẽ hwỳr pøj. Nhũm mẽ ò arĩgromnu pè sap kator jakamã nhũm Jejus ma Tĩrtũm kapër o mẽ ahkre xà hã ixkre hwỳr tẽ. Hãmri nẽ kamã mẽ ahkre ho nhỹ nhũm mẽ amnhĩ jaêr pè kapër mex ã kuma nẽ tee ri axpên pumunh pè hamaxpër o hkrĩ. Jejus kệp mẽ hkwy hã hkamnhĩx nom nhũm mẽ kurom àhpumunh tỳx nẽ kapër mex jakamã nhũm mẽ kuma nẽ tee ri hamaxpër o hkrĩ. Hãmri nẽ axpên mã:

³ —Kwa kệp mẽ panhiõ htã tanhmã kot we amnhĩ to nẽ ã àhpumunh tỳx kõt mẽ pamã kapër anẽ nẽ ri mẽ kãm aa mẽ kot mẽmoj pumunh kêt kwỹ ho anhỹr o pa? Mẽ panoo mã na pre hprêk. Kệp pĩ kuprãr

xwÿnh Juje mẽ hprõ Marir wa hkra na. Nẽ htõ Xiakre nẽ Juje nẽ Simãw nẽ Jutja ra mẽ pahte mẽ kệp htõ hã omunh mex. Nẽ htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tÿx anẽ. Anẽ.

Anhÿr o axpẽn mã harẽ. Hãmri nẽ kamã gryk nẽ hkaga ⁴⁻⁶ nhũm tee ri amnhĩ tã mẽ omu nẽ hamaxpër o:

—Hêxta waa nẽ. Mẽ kãm amnhĩ kaxyw ixkõt hamaxpër prãm kêt kumrêx. Anẽ.

Hãmri nẽ mẽ kãm:

—Nà Tĩrtũm nhÿ hã kapër jarẽnh o mẽ pa xwÿnhjaja na htem krĩ hkwy kamã kãm mẽ mar prãm nẽ. Nom õ krĩ kamã mẽ kot karàre rũm hprêk o mõi kãm omunh xwÿnhjaja na htem kuma nẽ ãm kuma. Anẽ.

Hãmri nhũm mẽ kot amnhĩ kaxyw hkõt hamaxpër kêt jakamã nhũm tee ri mẽ kãm aa mẽ kot mẽmoj pumunh kêt kwÿ ho anhÿr rax prãm kaprÿ. Nẽ ãm mẽ à xwÿnhjê ho grêre nẽ mẽ hã ãhkra jaxwÿ nẽ akupÿm mẽ ho mex. Hãmri nẽ mẽ kurũm kato nẽ ma krĩ hkwy hkõt ri Tĩrtũm kapër o mẽ ahkre ho pa.

Jejus kot mẽmoj tã mẽ kệp 12jê mã karõ hã harẽnh

Matêwre 10.5-15; Rukre 9.1-6, 10.1-12; mããnẽn Atre 13.50-51, 18.6

⁷ Tã nhũm Jejus amnhĩ wÿr mẽ kot ÿ hã mẽ ahkre ho pa xwÿnh pẽ 12jê hwÿ. Ra kot amnhĩ kaxyw mẽ rênh xwÿnhhtaja nhũm amnhĩ wÿr mẽ kuwÿ. Hãmri nẽ axpẽn kaxyw mẽ ho axkrut nẽ mẽ kurê nẽ mẽ kãm mẽ àpênh ã karõ nẽ ma mẽ hkwyjê hwÿr mẽ kurê. Nẽ mẽ kãm:

—E kër ka mẽ ma mẽ pahkwÿjê hwÿr mra nẽ inhÿ hã Tĩrtũm kapër jarẽnh o ri mẽ hkõt apa. Nẽ mẽ kurũm mẽkarõmnuti japõx o ri mẽ hkõt apa. ⁸⁻⁹ Nom kër ka mẽ amnhĩ kõt akukrêx rax nẽ ri apa hkêt nẽ. Nẽ kawà htu nẽ ho ri apa hkêt nẽ. Nẽ amnhĩ kõt axàpkur xà ho ri apa hkêt nẽ. Rÿ akàxpore rax nẽ ri ho apa hkêt nẽ. ãm mẽ anhõ Kamis nẽ mẽ apar kà ho pixire nẽ agjê nẽ ri hã apa. Nẽ mẽ amnhĩ kaxpar xà hã mẽ anhõ kô pix o apa. Mẽ ã anhÿ kamã mẽ hkõt ri apa anẽ.

¹⁰ —Nẽ kër ka mẽ nhÿri krĩ hõ hwÿr pøj. Nẽ apõx xà kamã mẽhõ nhõrkwÿ kamã hkõt ri apikamênh tãmtã kurũm akupÿm ajapøj

nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

¹¹ —Nẽ koja mẽ nhÿri mẽ akapër kaga ka mẽ tee ri amnhĩ tã mẽ kamã ama hãmri nẽ tokyx mẽ kurũm ajapøj nẽ ma apa. Nẽ anojarêt nẽ mẽ noo mã akuhê nẽ amnhĩ par ã awjagrõ kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrà nẽ mẽ hkaga hã omunh kaxyw ka mẽ ã mẽ noo mã amnhĩ nhĩpêx anẽ. Hãmri nẽ hpãnhã ma nhÿhÿm apa.

¹² Anhÿr o mẽ kãm mẽ àpênh ã karõ. Nhũm mẽ kuma nẽ hapøj nẽ ma mẽ hkwyjê hkõt pa. Ma krĩ piitã hkõt Tĩrtũm kapër o mẽ ahkre ho ri mẽ hkõt pa nẽ mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kõt mãn amnhĩ xunhwÿ. Anẽ.

¹³ Hãmri nẽ mẽ nê mẽkarõmnuti jano. Nẽ akupÿm mẽ à xwÿnhjê ho mex kaxyw mẽmo htwÿm o mẽ hkrã gregrer nẽ Jejus nhÿ hã akupÿm mẽ ho mex.

Mẽ kot Juãw Paxis pĩr ã mẽ harẽnh

Matêwre 14.1-12; Rukre 9.7-9

¹⁴ Tã nhũm mẽ piitã Jejus jarẽnh ma nẽ axpẽn mã tanhmã harẽnh to ho pa. Nom ahpÿnhã tanhmã harẽnh to. Na prem kamã harẽnh o:

—Nà Juãw Paxis pimràata na. Për akupÿm htĩr jakamã na hte ã mẽ kot aa mẽmoj pumunh kêt kwÿ ho anhÿr o pa. Anẽ.

¹⁵ Nẽ kamã axtem harẽnh o:

—Nà tãm kêt. Për finat Eris na. Anẽ.

Nẽ kamã axtem harẽnh o:

—Nà tãm kêt. Për Tĩrtũm nhÿ hã kapër jarẽnh xwÿnhjê hõ na. Te kot amnepê mã mẽ kot Tĩrtũm nhÿ hã tanhmã amnhĩ nhĩpêx to xwÿnhjê kot amnhĩ nhĩpêx pyræk o kot amnhĩ nhĩpêx kênã.

Anhÿr o ahpÿnhã harẽ. ¹⁶ Hãmri nhũm Ijaew o amnhĩptàr xwÿnh pẽ Erox àxipasja mẽ kot ã harẽnh anhÿr ã mẽ kuma nẽ Juãw Paxis mã hamaxpër kurê kumrêx. Hãmri nẽ mẽ kãm:

—Nà pẽr Juãw Paxista na. Ixte mẽ kãm hã ixamênh nhũm mẽ kot inhãm mut krãhyr xwÿnhhta mãn ra tanhmã amnhĩ to nẽ akupÿm htĩr. Anẽ.

17-20 Na pre ra pahi Erox äxipasja htõ Pirip pè hprõ Eroxis pytà nê ho hprõ nhùm hkra niti mē wa hwÿr apha. Hāmri nhùm Juāw Paxisja tee ri ja hā pahihiti Erox äxipasja pumu nē hā kām akir nē kām:

—Tk. Kwa Tirtūm kēp ja omnuj. Ra kot ja nē mē pahkurē htā ka axtem nē ã amnhī nhīpēx anē.

Anhÿr jakamā nhùm hprõ Eroxisja amnhī tā kuma nē kamā gryk tÿx nē. Nē kām hpīr prām nē. No nhùm pahi Erox äxipas kām hpīr prām kēt nē. Juāw Paxis kot Tirtūm kōt amnhī nhīpēx nhùm kot hā omunh mex jakamā kām hpīr prām kēt nē. Juāw na pre hte xatā kām Tirtūm kapēr jarēnh o pa. Nhùm pahihiti Erox äxipasja kormā hprī hā mar mex kēt tā hā hpijaàm nē kām mar prām nē. Nom nhùm hprõ kām hpīr prām jakamā nhùm kēp mē kām hā amÿnē nhùm mē ma o tē nē haxà nhùm mex nē mē hagjēnh xà kamā hkrī ho krī.

21-24 Tā nhùm jāā nhùm pahi Erox äxipas kator ã arīgro kato nhùm mē piitā hwÿr mra nē hā akuprõ nē hā hkīnh nē hā apkur o hkrī. Ō kōwenatōjaja nē hkràmnhwÿjaja nē krī hkwy kamā mēō pahijaja nhùm mē ohtō nē hā akuprõ nē hā hkīnh. Hāmri nhùm hprõ Eroxis kra nitija mē hwÿr axà nē mē kām gre. Mē kot omunh nē kamā hkurē pix kaxyw mē noo mā hpijaàm kēt nē ã mē kām grer anē. Hāmri nhùm pahi Erox omu nhùm ja kām mex nē nhùm mē piitā hkīnh nē kamā nopyma nē. Nē grer kām hpijaàm kēt nē tanhmā mē kām grer to nhùm mē omu nē kamā no pyma nē. Hāmri nhùm pahi Erox äxipasja kām:

—Nà ãm hāmri. Na ka mē inhmā agrer mex nē. Jakamā kwa māmri mēmoj tā ixwÿ. Amā mēmoj prām xà hkōt inhmā mēmoj jarē pa amā kugō. ãm hāmri na pa amā amnhī jarē. Na pa Tirtūm noo mā ã amā amnhī jarēnh anē. Ka mamri ixkukrēx mex kwÿ hā ixwÿ pu axpēn mā ho axkjē. E mēmo na amā hprām? Anē.

Hāmri nhùm kuma nē ma katorxà hwÿr tē nē kām harē nē kām:

—Xē mēmoj tā kot paj we kuwÿ? Anē.

Hāmri nhùm kuma nē hamaxpēr o:

—Ma ãm hāmri koja mē tā jarāhā inhmā Juāw Paxis pī. Anē.

Hāmri nē hkrata mā kām:

—Ma Juāw Paxis krā hā kot kaj awÿ kē mē amā kugō ka man ixwÿr o tē. Anē.

25 Hāmri nhùm kuma nē akupÿm pahi hwÿr axà nē kām:

—Ma Juāw Paxis krā kot kaj inhmā agō. Pasiiti kamā axà nē inhmā agō pa ma amnhīm o ixtēm kurē kumrēx. ãm ja pix na inhmā hprām. Anē.

26 Hāmri nhùm tee ri kuma nē hkapri nē. Nē hamaxpēr o:

—Hēxta waa nē. Inhmā hpīr prām kēt. Nom ra ixte ixkutā mē hkrī xwÿnhjē noo mā inhmā kām mēmoj prām xwÿnh nhōr ã amnhī jarēnh nhùm ixte kām ōr ã amnhī jarēnh nhùm mē piitā mē kot inhmar jakamā tanhmā kot pa we amnhī to nē kēp nē? Nà pa nē hkēt nē. Anē.

27 Hāmri nē ō pôristijē mā kām:

—E mē ma Juāw Paxis wÿr mra nē mut krāhta nē pasiiti kamā hkrā xà nē akupÿn o tē nē kām agō. Anē.

Hāmri nhùm mē kuma nē ma mē hagjēnh xà hwÿr mra nē Juāw wÿr axà hāmri nē mut krāhta. 28 Hāmri nē pasiiti kamā hkrā xà nē akupÿm o tē nē kot hā hwÿr xwÿnh mā kugō nhùm kumÿ nē ma katorxà hwÿr o tē nē kām kugō.

29 Hāmri nhùm Juāw Paxis kōt mē pa ho mē pa xwÿnhjaja tee ri harēnh ma nē hkapri htÿx nē. Hāmri nē pahi Erox äxipas wÿr mra nē ĩ hā kuwÿ nhùm mē kām kugō nhùm mē kumÿ nē ma o mra nē kēn kre kamā haxà.

Jejus kot mē ho 5.000 nē mē kām ō hā harēnh

Matēwre 14.13-21; Rukre 9.10-17; Juāw 6.1-14

30 Tā hāmri nhùm mē kot Jejus nhÿ hā mē ahkre ho mē pa xwÿnhjaja akupÿn Jejus wÿr mōn pōj nē kām amnhī jarē. Tanhmā mē kot mē ahkre hto ho pa nē tanhmā mē ho mex to ho pa hā kām amnhī jarēnh pa.

31 Tā nhùm mē piitā axpēn pānhā kot Jejus mar kaxyw mē hwÿr mra nhùm mē kormā apkur kēt nē. Jakamā nhùm Jejus hkōt mē pa ho mē pa xwÿnhjē mā:

—E ma pu mē awrā kaprÿ hwÿr mō nē nhÿri pahkrī nē pakōkōt nē apku.

32 Anē hāmri nhùm mē gōx kām kanōre wÿr agjē nē ma ahte xarmā awrā kaprÿ

hwÿr mō. ³³ Nhũm krĩ hkwy nhō xwÿnhjaja mẽ omu hãmri nẽ nhÿhÿm mẽ mōr xà hã mẽ omunh kurê kumrêx. Hãmri nẽ krĩ hkwy rũm ma mẽ ìhkrep mra nẽ mẽ kãm amnhĩ to wa nẽ pōj nẽ mẽ kutêp hkrĩ. ³⁴ Hãmri nhũm mẽ mō nẽ mẽ hwÿr pōj nẽ kre kura nẽ kanôre nhō. Hãmri nhũm Jejus mẽ hwÿr api nẽ mẽ omu nẽ hamaxpêr o:

—Hêxta waa nẽ. Na mẽ omnu nẽ pa. Te mẽ kêp ôwêhti jamâr xwÿnh kêt nẽ htÿx ri pa xwÿnh kot amnhĩ nhĩpêx pyrâk. Mêhō kot mẽ kamã ukaprĩ nẽ tanhmã mẽ ho mex to ho pa? Anẽ.

Hãmri nẽ mẽ kamã ukaprĩ nẽ xa nẽ Tĩrtũm kapêr o mẽ ahkre rax nẽ.

³⁵⁻³⁶ Tã nhũm myt àr kaxyw nhũm hkôt mẽ kot pa ho pa xwÿnhjaja hwÿr mra nẽ kãm:

—Kwa hãmri na ra amÿkry htÿx nẽ. Mẽ hano kê mẽ ma nhÿri krĩ hkwy hwÿr mra nẽ tokyx amnhĩm mẽmoj japrô nẽ kuku nẽ hikwÿ nẽ gōr. Mo jar kapôt ã mẽ apkur xà? Anẽ.

³⁷ Hãmri nhũm mẽ kuma nẽ mẽ kãm:

—Kwa nà mẽ kamjaja mẽ kãm mẽmoj gō kê mẽ kuku. Anẽ.

Hãmri nhũm mẽ kuma nẽ tee ri hamaxpêr nẽ kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nẽ ho mẽ kãm mẽmoj japrôr tã nom nhũm mẽ ãm ho hkryre nẽ kuku nẽ ho õhy htu hkêt nẽ. Mẽ ohtô rax kumrêx kênã. Anẽ.

³⁸ Hãmri nhũm mẽ kãm:

—Nà kot puj mẽ kãm mẽmoj japrôr kêt nẽ. No mẽ panhō pãwtita? Tanhmã na arĩ kute? E mẽ atō tẽ nẽ omu nẽ akupÿn tẽ nẽ inhmã harẽ. Anẽ.

Hãmri nhũm ja ma tẽ nẽ omu nẽ akupÿn tẽ nẽ kãm:

—Nà pãwti ãm kêp 5 pix. Nẽ kaxyw tep ãm pijakrutre. Anẽ.

³⁹ Hãmri nhũm Jejus kuma nẽ mẽ kãm:

—Tôe. Mẽ kãm anẽ kê mẽ ahpÿnhã ri hije nẽ hkrĩ. Anẽ.

⁴⁰ Hãmri nhũm mẽ piitã ahpÿnhã kêp 50 nẽ hije nẽ hkrĩ hpa.

⁴¹ Nhũm Jejus pãwti mẽ tepta jamÿ nẽ kãnhmã kaxkwa hwÿr rĩt nẽ Tĩrtũm mã kupê nẽ kãm harẽ nẽ kãm:

—Pa Papaj? Nà ka na apê mẽ inhmã mẽ inhō ho apa xwÿnh jakamã amex o amex. Anẽ.

Hãmri nẽ mẽ kãm ho hkry hpa nẽ hkôt mẽ pa ho mẽ pa xwÿnhjê mã kugō nhũm mẽ ô ri ho mra nẽ ho mẽ hipêx pa. Pãwti mẽ tepta nhũm mẽ ho mẽ hipêx pa. ⁴²⁻⁴⁴ Nhũm mẽ piitã apkur mex nẽ. Mẽōja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Mẽmyjaja kêp 5.000 nẽ kaxyw mẽ hprô nẽ mẽ hkrajaja nhũm mẽōja ho mẽ hipêx pa nhũm arĩ hakrêx prã. Jakamã nhũm Jejus kôt mẽ pa ho mẽ pa xwÿnhjaja akupÿm hakrêx o pikuprõnh pa nẽ ho kawà o 12 nẽ ho nÿt.

Jejus kot gō krãhkà hã htêm ã harênh

Matêwre 14.22-33; Juãw 6.15-21

⁴⁵⁻⁴⁶ Tã nhũm Jejus hkôt mẽ pa ho mẽ pa xwÿnhjê mã kãm:

—E mẽ kanôre mã axà nẽ ma akupÿm ixkukamã krĩ pê Petsêj wÿr rê. Pa jajê jano hãmri nẽ ma tẽ nẽ nhÿri Tĩrtũm mã amnhĩ jarẽ nẽ rĩ ma mẽ akôt tẽ. Anẽ.

Hãmri nhũm mẽ kuma nẽ kanôre mã gjêx pa nẽ ma mō nhũm Jejus mẽ kot mar xwÿnhjê janor pa nẽ ma hixêt prêk ã api nẽ Tĩrtũm mã amnhĩ jarênh o nhÿ.

⁴⁷ Tã nhũm kamât nhũm arĩ ahte kÿxpê nhÿ. Nhũm hkôt mẽ pa ho mẽ pa xwÿnhjaja kormã kanôre kamã mō. ⁴⁸ Hãmri nhũm Jejus amÿm mẽ omu nhũm kôk ra mẽ kutã àpêr tÿx kumrêx nhũm mẽ tee ri amnhĩ nhĩpêx nẽ tee ri rrêmti ho gō rênh nhĩpêx o hkrĩ.

Tã nhũm ra krãhyre kà nhũm Jejus Tĩrtũm mã amnhĩ jarênh pa nẽ kãnhmã xa nẽ ma mẽ hkôt tẽ. Nom kanôre kamã htêm kêt nẽ gō krãhkà hã xa nẽ mẽ hwÿr hpar o tẽ.

⁴⁹⁻⁵⁰ Hãmri nẽ mẽ hwÿr kato nẽ mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wÿr omu nẽ mẽkarō hã hkamnhix nẽ tee ri amnhĩ kukamã hamaxpêr nẽ umaj htertet nẽ ãmra rax nẽ. Hãmri nhũm mẽ kãm:

—Tk. Kwa mẽ amã ma hkêt nẽ. Pa na pa mẽ akôt tẽ. Anẽ.

⁵¹ Hãmri nẽ mẽ hwÿr kanôre hkrem axà nhũm kôk xàpêr tÿxta hapêx. Hãmri nhũm mẽ Jejus kamã no pyma nẽ tee ri hamaxpêr nẽ xapên mã:

—Kokÿÿ. Tanhmã na we amnhĩ to nẽ gô krãhkã hã hpar o man mẽ pahkôt tẽ mẽ pahwÿr àr mẽ nhũm kôk hapêx par kurê kumrêx. Anẽ.

Hãmri nẽ tee ri kot ã amnhĩ nhĩpêx anhÿrja kukamã hamaxpêr o hkrĩ. ⁵² Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrã nẽ àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nẽ gô krãhkã hã htẽm nẽ kôk o pinhkrênh ã omu nẽ tee ri ã kot amnhĩ nhĩpêx anhÿrja kukamã hamaxpêr.

Kenêjare kamã Jejus kot akupÿm mẽ ho mex ã harênh

Matêwre 14.34-36

⁵³ Tã nhũm mẽ xarmã rê nẽ krĩ pẽ Jenêjare hwÿr pôj. Hãmri nẽ kanôre nhô ⁵⁴ nẽ api nẽ kuhê nhũm krĩ nhô xwÿnhjaja Jejus pumunh kurê kumrêx nẽ axpên mã:

—Kwa pêr Jejusta na mõ. Nà tãm kênã. Anẽ.

⁵⁵ Hãmri nẽ hkĩnh nẽ ma kape hã mẽ à xwÿnhjê hkôt mmar kurê kumrêx nẽ mẽ harir xà rãhã mẽ hamÿ nẽ akupÿm Jejus wÿr mẽ o mra. Nhÿri hpôx xà kamã omu nẽ hwÿr mẽ o mra.

⁵⁶ Na pre htem ã Jejus nhĩpêx anẽ. Jakamã nhũm hte ma nhÿhÿm mra. Krĩ rũnh kôt mra nẽ krĩ hkryre hkôt mra nhũm mẽ omu nẽ hwÿr mẽ à xwÿnhjê ho mra nẽ mẽ ho kuwÿ nẽ kãm:

—Pa? Kwa kê jajaja akupÿm mex kaxyw apê axê pix kupê nà? Anẽ.

Hãmri nhũm mẽ kãm:

—Tôe. Nà kwâr mẽ mãmri hkupê. Anẽ.

Hãmri nẽ mẽ kot kêp ê kupênh xwÿnh piitã akupÿm mex pa.

7

Mẽ higêt hkôt mẽ kot amnhĩ nhĩpêx xwÿnhjê jarênh

Matêwre 5.21-48, 15.1-20

¹⁻⁴ Tã nhũm Mojes kapêr o mẽ ahkre o mẽ pa xwÿnh kwÿjaja Jerujarê rũm Jejus wÿr mõ. Hãmri nẽ hã akuprô nẽ hkôt mẽ pa ho mẽ pa xwÿnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapêr kôt ri tanhmã amnhĩ nhĩpêx to ho pa. Jakamã mẽ uràk nẽ apkur kaxyw nẽ xatã amnhĩ nhĩkra

kuhõnh japjê nẽ rĩ kormã apku. No mẽ amnhĩ nhĩkra grã pix kuhõnh nẽ hkrĩ nẽ apkur kêt nẽ. Kuhõnh japjê nẽ kormã hkrĩ nẽ apku. Tĩrtũm kot ja hã mẽ omunh nẽ amnhĩm mẽ mex ã mẽ harênh ã amnhĩ kamnhix jakamã na prem ã amnhĩ nhĩpêx anhÿr o pa. Nẽ nhÿri amnhĩm mẽõ hkwy japrô nẽ akupÿm ôrkwy hwÿr o mra nẽ haxwÿ nẽ mẽ higêt pyrã nẽ wÿr japjê rũnh kumrêx nẽ rĩ kormã apku. Nẽ mẽ uràk nẽ poti nẽ gôj nẽ papêre hkre kahõnh japjê rũnh nẽ rĩ kormã kamã ô nhĩpêx. Mẽ higêt pyrã nẽ ã amnhĩ nhĩpêx anhÿr o pa. Tĩrtũm kot ja hã mẽ omunh nẽ amnhĩm mẽ mex ã mẽ harênh prãm xaj. Nom nhũm Jejus kôt mẽ pa xwÿnhjaja na prem ã amnhĩ nhĩpêx anhÿr kêt nẽ. Na prem apkur kaxyw nẽ katat kôt amnhĩ nhĩkra kuhõ nẽ amnhix apkur o hkrĩ. Jakamã nhũm Parijew nhô xwÿnh mẽ Tĩrtũm kapêr tũm o mẽ ahkre xwÿnhjaja tee ri ã mẽ kot amnhĩ nhĩpêx anhÿr ã mẽ omu nẽ mẽ hã Jejus kukja nẽ kãm:

⁵ —Pa Jejus? Kwa mẽ inhmã mẽmoj jarê. Amnepêm mẽ panhigêtjaja na pre htem apkur kaxyw nẽ amnhĩ nhĩkra kuhõnh japjê rũnh kumrêx nẽ arĩ kormã hkrĩn apku. Jakamã na pa htem mẽ uràk nẽ ã amnhĩ nhĩpêx anẽ. No akôt mẽ pa ho mẽ pa xwÿnhjaja na htem ho mẽ ixpyrà kêt nẽ. Kwa mo na htem ã amnhĩ nhĩpêx anhÿr kêt nẽ? Anẽ.

⁶ Hãmri nhũm mẽ kuma nẽ mẽ kãm amnepêm Tĩrtũm nhÿ hã kapêr xwÿnh pẽ Ijais kapêr jarê nẽ mẽ kãm:

—Nà ãm hãmri na pre finat Ijaisja amnepêm tanhmã mẽ ajarênh to. Te Tĩrtũm tãm kapêr pyrãk o mẽ ajarê nẽ mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprÿ.

⁷ Mẽ kot ixkapêr kuhpa hã amnhĩ krã hkôt mẽmoj tã hkwyjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anẽ.

Ã na pre mẽ ajarênh anẽ. ⁸⁻⁹ ãm hãmri na pre mẽ ajarê. Na ka htem mẽ panhigêt kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mẽ akapêr mex o kot Tĩrtũm kapêr jakrenh

pyràk. ¹⁰ Na pre finat Mojes Tirtùm nhỹ hã mẽmoj tã mẽ pamã karõ ho:

Ker ka mẽ anhĩpêêxà nẽ mẽ akatorxà wa hã apijaàm o ri apa. Jao wa kutã anojarêt rãhã nẽ. Nom kot kaj mẽ ho mex hkêt nẽ tanhmã mẽ kãm akapêr punuj to hãmri nhũm mẽ akwỳjaja ja mỳrapê mẽ apa. Anẽ.

Na pre ã finat Mojesja Tirtùm nhỹ hã mẽ pamã karõ anẽ. ¹¹ No mẽ kajaja na ka mẽ axtem nẽ tanhmã akwỳjê mã ja hã karõ hto nẽ mẽ kãm: “Kot kaj mẽ mẽmo arĩgro hã akàxpore hkwỳ nom anhĩpêêxà ho ajuta kaxyw kãm hkwỳ nhõr kêt nẽ. ãm wa kãm ate ho ajuta kêt ã amnhĩ jarẽ hãmri nẽ Tirtùm mã amnhĩ jarẽnh xà hã ixkre hwỳr mãn o tẽ nẽ mẽ ixte ixkre ho mex kaxyw mẽ inhãm agõ. Kot kaj mẽ ã amnhĩ nhĩpêx anẽ nhũm Tirtùm ja hã mẽ apumu nhũm ja kãm mex nẽ. E kêr ka mẽ ã amnhĩ nhĩpêx anhỹr o ri apa.” Anhỹr o na ka htem akwỳjê mã karõ. ¹² Jao mẽ kot mẽ hipêêxà nẽ mẽ katorxà ho ajuta nẽ mẽ hkurê. ¹³ Te mẽ amã mẽ panhĩgêt kapêr mex o kot Tirtùm kapêr jakrenh pyràk o na ka htem amnhĩ nhĩpêx. Jao te Tirtùm kapêr mex kêt pyràk o hipêx nẽ mar kêt nẽ apa. ã na ka htem Tirtùm kapêr kuhpa hã amnhĩ nhĩpêx anhỹr o ri apa. Anẽ.

Mẽ pajamaxpêr punuj kôt mẽ pahtomnu hã harẽnh

Matêwre 15.10-20

¹⁴ Tã nhũm Jejus Parijew nhõ xwỳnhjê mẽ hkwỳjê mã kapêr pa hãmri nẽ amnhĩ wỳr ra mẽ kot mar o kuhê xwỳnhjê mã hpa ho apê nẽ mẽ kãm:

—E pa mẽ amã mẽmoj jarẽ ka mẽ inhãm nẽ inhãm mex nẽ. ¹⁵⁻¹⁶ Na hte Tirtùm kapêr tùm o mẽ ahkre xwỳnhjaja amnhĩ krã hkôt mẽ ate amnhĩ nhĩkra kuhõnh japjê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ nhĩpêx anhỹr nhũm Tirtùm kot ja hã mẽ apumunh kôt amnhĩm mẽ amex ã mẽ ajarẽnh kaxyw nhũm htem ã mẽmoj tã mẽ amã karõ anẽ. Nom na hte Tirtùm tanhmã mẽ panhĩkra kuhõnh to hã mẽ pahpumu nẽ ãm hã mẽ pa hpumu. Nẽ mẽmo mẽ paxàpkur xà hã mẽ pahpumu nẽ ãm hã mẽ pahpumu. Ja kãm tanhmã

kute hkêt. Na hte ja hã mẽ omunh xà hkôt amnhĩm mẽ mex ã mẽ harẽnh rỳ mẽ mex kêt ã mẽ harẽnh kêt nẽ. Rỳ mẽ hakwa ho mẽmoj kur ã mẽ omunh xà hkôt tanhmã mẽ harẽnh to hkêt nẽ. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harẽnh to.

Anhỹr o mẽ kãm kapêr. ¹⁷ Hãmri nẽ mẽ kot mar o kuhê xwỳnhjê re nẽ hkôt mẽ pa ho mẽ pa xwỳnhjê mẽ mẽ amnhĩm hikranh xà hã ixkre hwỳr agjê. Hãmri nhũm hkôt mẽ pa ho mẽ pa xwỳnhjaja tee ri Jejus kot tanhmã mẽ hakwa jarẽnh to hã kuma nẽ hã hkukja nẽ kãm:

—Kwa mon ka ri mẽ inhãm ã ja jarẽnh anẽ? Anẽ.

¹⁸ Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nẽ? E pa ixprĩ hã mẽ amã harẽ ka mẽ inhãm. Nã mẽ apkur xà na hte mẽ hkrã hi kamã mẽ hamaxpêr wỳr gjêx kêt nẽ. ¹⁹ Na hte ãm mẽ õhy pix wỳr agjê nẽ gaa nẽ nhãm hapõj nẽ hapêx. Na htem mẽ apkur xà nhỹ hã tanhmã amnhĩ tomnu to hkêt nẽ. Jakamã na hte Tirtùm mẽ apkur xà hã mẽ omunh xà hkôt tanhmã mẽ harẽnh to hkêt nẽ. Anẽ.

Nhũm pre ã mẽ kãm kapêr anhỹr o mẽ paxàpkur xà piitã mex ã harẽ. Jakamã na hte Tirtùm krajaja àmnhĩx mẽmoj piitã hkur o pa nẽ kãm mẽmoj kur pyma hkêt nẽ. Jakamã nhũm Jejus ã mẽ kãm kapêr anẽ nẽ mẽ kãm:

²⁰ —Mẽ hkrã hi kamã mẽ hamaxpêr punuj pix nhỹ hã na htem tanhmã amnhĩ tomnuj to. Jakamã na hte Tirtùm tanhmã mẽ hamaxpêr to ho pa hã mẽ omunh xà hkôt tanhmã mẽ harẽnh to. Nom mẽ kot mẽmoj kur ã mẽ omunh xà hkôt rỳ mẽ ãkra kuhõnh japjê hã mẽ omunh xà hkôt tanhmã mẽ harẽnh to hkêt nẽ. Ja tanhmã kêp kute hkêt. ²¹⁻²² Nom koja mẽhõ hamaxpêr punuj nẽ ra hkôt tanhmã amnhĩ tomnuj to.

Jao axpên kamã hpijaàm kêt nẽ.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỳ ho amnhĩkati.

Rỳ ri axpên pê õxỳ.

Rỳ tanhmã hkwỳjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyri o ri pa.

Rỳ mẽmoj tã amnhĩ to jarkrar o pa.
Rỳ axpẽn kukrêx pumu nẽ kãm ho õ
hprãm xàj hã õ xwỳnhhta kamã gryk.

Rỳ htỳx ri tanhmã amnhĩ nhĩpêx to.
Mẽ hamaxpêr punuj jakamã na htem ã ri
amnhĩ nhĩpêx anhỹr o pa. ²³ Tã ã mẽ kot
amnhĩ nhĩpêx anhỹr ã mẽ omunh xà hkõt
na hte Tirtũm mẽ kot amnhĩ tomnuj xwỳnh
hã mẽ harẽ. Anẽ.

*Mẽhõ kot hkra kaxyw Jejus mã hamaxpêr
ã harẽnh*

Matêwre 5.21-28

²⁴ Tã nhũm Jejus mẽ hkõt mẽ pa ho mẽ pa
xwỳnhhaja nhỹhỹm nojarêt hãmri nẽ krĩ rũm
hapôj nẽ ma krĩ pẽ Xir pu hã ri pa. Hãmri
nhũm Jejus hkwỳjê mã:

—E kwa pu mẽ tokyx ixkre mũj wỳr mỗ
mẽ kuri pỏj nẽ kamã amnhĩm hikra. Pu mẽ
pahpỏx tokyx anẽ kê krĩ nhõ xwỳnhhaja mẽ
pahpỏx ã mẽ pahpumunh kêt nẽ.

Anhỹr tã nom nhũm mẽ piitã mẽ harẽnh
ma nẽ mẽ hã akuprõ. ²⁵⁻²⁶ Nhũm mẽhõ
ni haxwỳja Jejus hpỏx ã harẽnh ma nẽ ma
hwỳr tẽ. Nom kêp Ijaew kêt axtem Gres
nhõ xwỳnh na pre. Pika pẽ Sir kamã krĩ mẽ
kot kãm “Wẽnĩs” anhỹr xwỳnh kamã na pre
kato. Nhũm pre mẽkarõmnuti kêp hkra ni
mã axà. Hãmri nhũm õ mãmãj tee ri omu
nẽ ra Jejus hpỏx ã harẽnh ma nẽ ma hwỳr
tẽ. Hãmri nẽ hwỳr axà nẽ hparpê hkõnkrã
ho htẽm nẽ nhỹ nẽ kãm:

—Xê Pahihti. Inhmã ixkra nẽ
mẽkarõmnuti jano kê ma tẽ kê akupỹm
inhmã mex. Anẽ.

²⁷ Hãmri nhũm kãm:

—Nà kormã. Na pre Tirtũm taxy kormã
Ijaewjê pix wỳr inhmẽ. Jakamã na pa ko-
rmã nhãm mẽ akwỳjê hõ tanhmã mẽ ato
mex to hkêt nẽ. Anẽ.

²⁸ Hãmri nhũm tee ri amnhĩ tã kuma nẽ
kãm:

—Ma ãm hãmri na ka ja jarẽ. Ixpê Ijaew
kêt tã nom mẽ kuxwar we ixto mex greire
kêt wehe. Anẽ.

²⁹ Hãmri nhũm kãm:

—Nà ãm hãmri na ka ã akra kaxyw
inhmã ajamaxpêr tỳx anẽ. Jakamã kot paj
nẽ mẽkarõmnutita jano. Kojaxte tanhmã
apê ho hkêt nẽ. E ma akupỹm hwỳr tẽ nẽ
omu. Anẽ.

³⁰ Hãmri nhũm kuma nẽ ma akupỹm
õrkwỹ hwỳr tẽ nẽ omu. Nhũm ra

mẽkarõmnutija kêp kato nẽ ma tẽ nhũm
akupỹm tãm hkrã nẽ hkĩnh nẽ par kãm
hkõkõt o nõ.

*Hamak kro nẽ kapêr krok xwỳnh jarẽnh
Matêwre 15.29-31*

³¹ Tã nhũm Jejus mẽ hkõt mẽ pa ho mẽ pa
xwỳnhhaja krĩ pẽ Xir rũm hapôj nẽ akupỹm
gỏ rax pẽ Garirej wỳr ma mra. Pyka pẽ
Sitõ jakre nẽ mỗ nẽ pyka pẽ Tekap jakre.

³² Hãmri nẽ kormã hpỏx o mỗr rỏm nhũm
mẽ amnhĩ wỳr Jejus pumu nẽ hwỳr mẽhõ
myja o tẽ. Kapêr krok nẽ umar kêt xwỳnhhta
nhũm mẽ wỳr o tẽ nẽ kãm:

—Pa? Ot pa mẽ awỳr ixkrãmnhwỳta o tẽ.
Kwa hã anhĩhkra xi kê akupỹm mẽ inhmã
mex. Anẽ.

³³ Hãmri nhũm omu nẽ hpa hã kupy nẽ
mẽ kêp o kato nẽ nhỹri mẽ hkàx ã o xa.
Nẽ akutã hamak kre kupê nẽ argỏx mẽ nẽ
ho õhto htok. ³⁴ Hãmri nẽ kaxkwa hwỳr
rĩt nẽ htyk xà mẽnhtỳx nẽ kãm kapêr.
Mẽ pakapêr kãm kãm: “E ajamak katêr nẽ
anhõhto kaxkrit.” Anẽ. Nom kapêr kãm
kãm: “Epata.” Anẽ. ³⁵ Hãmri nhũm hamak
katêr nẽ õhto kaxkrit kurê kumrêx nẽ tãm
kapêr nẽ tãm ama. ³⁶⁻³⁷ Hãmri nhũm mẽ kot
omunh xwỳnhhaja amnhĩ jaêr pẽ Jejus kot
ho mex ã omu nẽ kamã no pyma nẽ. Hãmri
nhũm mẽ kãm:

—Kwa kêr ka mẽ akwỳjê mã ja hã ijarẽnh
kêt nẽ.

Anhỹr tã no nhũm mẽ kuma nẽ ãm kuma
nẽ ma mẽ piitã mẽ kãm harẽnh o ri hprõt
nẽ mẽ kãm:

—Kwa Jejus na mex o mex. Na hte
mẽ ho mex o pa nhũm mẽ umar kêt
xwỳnhhaja akupỹm tãm ama nhũm mẽ kapêr
kêt xwỳnhhaja akupỹm tãm kapêr. ãm hãmri
na hte ã mẽ hipêx anhỹr o pa. Nà ãm mex o
mex. Anẽ.

8

*Jejus kot mẽ ho 4.000 nẽ mẽ kãm mẽ õ hã
harẽnh*

Matêwre 15.32-39

¹⁻² Tã nhũm arĩgro hõ hã nhũm mẽ ohto
nẽ nhỹri kapôt ã Jejus ã htu rax nẽ kot mẽ
ahkre mar o kuhê hã apkati axkrunêpxi.
Nhũm mẽ apkur xà hã mẽõja ra mẽ kêp
hapêx. Hãmri nhũm Jejus ja hã mẽ omu

hāmri nē hkôt mē pa ho mē pa xwýnhjê mã akir nē mē kām hpa ho apê nē mē kām:

—E mē amnē ixwýr mra nē ixkapēr ma. Anē.

Nhũm mē hwýr mra nē kuhê nhũm mē kām:

—Kwa na pa inhmã mē kot inhmar o kuhê xwýnhjê kaprĩ nē. Na mē ra mē pahkôt ri pa hã apkati axkrunēpxi nhũm mē apkur xà hã mēõja mē kēp hapêx. ³Mē õ krĩ hwýr awry jakamã koja mē mēmoj kur kêt rãhã ma akupým pa hāmri nē pry hã hirot nē rôrôk o pa. Hāmri pa inhmã mē hkaprĩ nē. Anē

⁴ Hāmri nhũm mē kuma nē axte tee ri hamaxpēr nē kām:

—Kwa nà nhỹhnh kot puj kêt mē kām mēmoj to mra? Jar ãm kapôt pix kênã. Anē.

Hāmri nhũm mē kām:

⁵—Nà tanhmã na mē anhõ pãwtija kute? Anē.

Nhũm mē kām:

—Ãm kēp 7 pix. Nē kaxyw tep kwý no ãm grêre. Anē.

⁶ Hāmri nhũm mē kuma nē mē kot mar o kuhê xwýnhjê mã anē nhũm mē kuma nē hkrĩ pa. Hāmri nhũm pãwti jamý nē ho Tĩrtũm wý nē kām:

—Pa Papaj. Nà ka na apê mē inhmã mē inhõ ho apa xwýnh. Jakamã amex o amex. ãm amex kumrêx. Anē.

Hāmri nē mē kām ho hkry pa nē hkôt mē pa ho mē pa xwýnhjê mã kugõ nhũm mē ho mē hipêx pa. ⁷ Nhũm hpãnhã tepta py nē mã ho anē nē ho Tĩrtũm wý. Hāmri nē hkôt mē pa ho mē pa xwýnhjê mã kugõ nhũm mē mã ho anē nē hamý nē ho mē hipêx pa. ⁸⁻⁹ Hāmri nhũm mē ohtô rax kumrêx tã piitã apku nē õhy htu pa. Mēmyjaja kēp 4.000 nē kaxyw mē hprõjaja nē mē hkra-jaja. Tã nhũm Jejus mē apkur xàja o mē hipêx pa. Nhũm hkôt mē pa ho mē pa xwýnhjaja hakrêx o akuprõ nē ho kawà ho 7 nē ho nýt. Hāmri nhũm Jejus ma akupým mē õ krĩ hwýr mē kot mar xwýnhjê jano nhũm mē ma akupým hapêx. ¹⁰ Hāmri nhũm Jejus hkôt mē pa ho mē pa xwýnhjê mē ro hã kanõre hkrem agjê nē mē hkwym ma Tamanut wýr mō.

Parijew nhõ xwýnh kwý kot mēmoj tã Jejus kamã hamak ã mē harênh

Matêwre 12.38-42, 16.1-4; Rukre 12.54-59

¹¹ Tã nhũm mē Tamanut wýr pøj nhũm Parijew nhõ xwýnh kwýjaja Jejus pumu nē ma hwýr mra nē mēmoj tã kuwý nē kām:

—Pa. Ot pa mē awýr mra. Kwa mē inhmã aa mē ixte mēmoj pumunh kêt õ ho anē. Pa mē ja hã apumu nē Tĩrtũm kot mē ixwýr amênh ã akôt ijamaxpēr kurê kumrêx. E tokyx. Anē.

Kot tee ri mē kām mēmoj to anhýr kaxyw nē ho anhýr kêt nhũm mē kot hã omunh nē ma hkwyjê mã ho kapēr punuj kaxyw nhũm mē ã hêx rom kām kapēr anē.

¹² Nhũm ra kām mē kot amnhĩ kaxyw hkôt hamaxpēr kêt kām ã kapēr anhýr mar kaga nē. Hāmri nē tee ri amnhĩ tã mē hamaxpēr ã mē omu nē htyk xà mēnh tỳx nē mē kām:

—Hêxta waa nē. Mē ajamaxpēr punuj pix o na ka htem ri ajamaxpēr o apa. Ixpê Tĩrtũm kot mē awýr inhmênh xwýnh tã ka mē ja hã ixkôt ajamaxpēr kêt nē. Nà mo kaxyw kot pa kêt mē amã mēmoj to anē? Kot paj ho anē ka mē omu nē ãm omu nē ixkôt ajamaxpēr kêt nē. Nà kot paj mē amã mēmoj to anhýr kêt nē. Anē.

¹³ Hāmri nē mē kure nē hkôt mē pa ho mē pa xwýnhjê mērohã ma mra nē akupým kanõre hkrem agjê nē ma xarmã mō.

Jejus kôt mē pa xwýnhjaja kot hprĩ hã omunh kêt ã mē harênh

Matêwre 16.5-12; mããnên Makre 6.52

¹⁴ Tã nhũm mē kormã kanõre kamã xarmã mör rôm nhũm Jejus kôt mē pa ho mē pa xwýnhjaja tee ri mē apkur xà japēr nē axpên mã:

—Kwa hêxta waa nē. Na pu mē panhõ pãwti re nē amnhĩ kôt o pamör kêt nē. Nē ãm pixire nē o mō. Anē.

¹⁵ Hāmri nhũm Jejus tee ri mē kuma nē tanhmã hã mē kām kapēr to. Nom mēmoj tã kuxi nē mē kām awjarê nē mē kām:

—Kwa oko kêr ka mē amnhĩ nê Parijew nhõ xwýnh mē Pahi Erox nhõ pãw kaxkrit xà pumunh mex nē. Anē.

¹⁶ Hāmri nhũm mē kuma nē tee ri kapërja kukamã hamaxpēr pê hã axpên kukjêr o hkrĩ nē axpên mã:

—Kwa mo na ri ã mẽ pamã pãw kaxkrit xà jarënh anê? Mãn mẽ panhõ pãwti hkêt ã mẽ pahpumu hã na ri ã harënh anê nà? Anê.

¹⁷ Hãmri nhũm Jejus mẽ kapër ã mẽ kuma nê mẽ kãm:

—Kwa mon ka wem ãm xatã axpën mã mẽ panhõ pãwti hkêt jarënh pix o mõi? Xàn pa hte mẽ apyrã nê tee ri mẽ paxàpkur xà hkêt kukamã ijamaxpër o ixpa? Nà inhmã ja tanhmã kute hkêt. ¹⁸ Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nê mẽ ajamak o ixkapër mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpër tỳx nê. E mẽ inhmã mẽmoj jarê. ¹⁹ Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nê ho kawà ho nýt to? E mẽ atõ inhmã harê. Anê

Hãmri nhũm ja kãm: “Na pa prem ho kawà ho 12 nê ho nýt.” Anê. ²⁰ Nhũm kuma nê mẽ kãm:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nê ho kawà ho nýt to? Anê.

Nhũm ja kãm: “Na pa prem ho 7.” Anê.

²¹ Hãmri nhũm kuma nê mẽ kãm:

—Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nê arĩ axpën mã mẽ panhõ pãwti hkêt pix jarënh o ixkõt mõi. Kormã mẽ ate ixàhpumunh tỳx ã ixpumunh kêt. Anê.

Jejus kot akupỹm nohkre xwỹnh o mex ã harënh

Juãw 9.1-7

²² Tã nhũm mẽ ma krĩ pê Pesêj wỳr mõi nê ra hwỳr põi. Hãmri nhũm krĩ nhõ xwỹnh kwỳjaja mẽ omu nê Jejus wỳr mõi myja o tẽ. Ra nohkre nê rĩt kêt nê pa xwỹnhja nhũm mẽ hpa hã kupyn hwỳr o tẽ. Hãmri nê ho kuwỳ nê kãm:

—Pa Pahihti? Ot pa mẽ awỳr ja ho tẽ. Kwa hã anhĩkra xi nê akupỹm mẽ inhmã no ho mex. Anê.

²³ Hãmri nhũm mẽ kuma nê nohkre xwỹnhta pumu nê hpa hã kupy nê o tẽ nê krĩ pê ho kato nê nhỹri mẽ hkàx ã o xa. Hãmri nê no hã argõx mẽ nê hã ìhkra xi nê kãm:

—E mãn ka mẽmoj pumu nà? Anê.

²⁴ Hãmri nhũm kuma nê hkrākato nê ri rĩt hãmri nê kãm:

—Tỳ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwỳ ri mrar pyrāk. Anê.

²⁵ Hãmri nhũm axte no hã ìhkra xi nhũm tã rĩt mex nê. Ri hprĩ hã mẽmoj piitã omunh mex nê. ²⁶ Hãmri nhũm Jejus akupỹm òrkwỹ hwỳr kumẽ nê kãm:

—E kêt ka kape hã ri amrar kêt nê. ãm ma ma akupỹm anhõrkwỹ hwỳr atêm kurê kumrêx. Anê.

Jejus kot amnhĩ tã hkõt mẽ pa xwỹnhjê kukjêr ã harënh

Matêwre 16.13-20; Rukre 9.18-21

²⁷ Tã hãmri nhũm Jejus ma hkõt mẽ pa ho mẽ pa xwỹnhjê mẽ mẽ ma mõi. Ma krĩ pê Sejarej Piripos pu hã krĩ hkwy hkõt mõi. Nê kormã pry hã mõi nhũm Jejus amnhĩ tã hkõt mẽ pa ho mẽ pa xwỹnhjê kukja nê mẽ kãm:

—Kwa mẽ inhmã mẽmoj jarê. Tanhmã na htem ahpỹnhã ri axpën mã ijarënh to wehe? Anê.

²⁸ Hãmri nhũm mẽ kãm:

—Nà na htem ahpỹnhã tanhmã ajarënh to. Na hte kamã mẽ hkwyjaja axpën mã ato finat Juãw Paxis ã ajarê. Nê kamã mẽ hkwyjaja ato finat Eris ã ajarê nê mẽ hkwyjaja apê Tĩrtũm nhỹ hã kapër o pa xwỹnh ra htyk xwỹnhjê hõ hã ajarê. ã na htem ahpỹnhã axpën mã ajarënh anhỹr o pa. Anê.

²⁹ Hãmri nhũm mẽ kuma nê mẽ kãm:

—No we mẽ kajaja? Ixpê mõi hã na ka htem axpën mã ijarê? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tĩrtũm kot mẽ ixkaxyw axãm nê mẽ ixwỳr amënh xwỹnh ã ajarê. Nê apê mẽ ixpiitã mẽ inhõ Pahi Maati hã ajarê. ã na pa htem axpën mã ajarënh anê. Anê.

³⁰ Hãmri nhũm kuma nê mẽ kãm:

—Nà ãm hãmri na ka htem ã ijarënh anê. ã ixte anhỹr. Kwa nom kwa kêt ka mẽ inhma. Kêt ka mẽ kormã ã akwỳjê mã ijarënh anhỹr kêt nê. Anê.

Jejus kot amnhĩ kukamã amnhĩ jarënh ã harënh

Matêwre 16.21-23; Rukre 9.22

31 Tã nhũm Jejus amnhĩ kukamã hkôt mẽ pa ho mẽ pa xwýnhjê mã tanhmã amnhĩ jarênh to nê mẽ kãm:

—Nà ra mẽ ate Tirtũm kot mẽ akaxyw ixãm ã ixpumunh mex. No mẽ pahkwýjaja kãm ja hã ijarênh mar nê ixpumunh prãm kêt. Ijaew krãhtũmjê mẽ Tirtũm kapêr tũm o mẽ ahkre o mẽ pa xwýnhjê mẽ patre krãhtũmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynê nê ixtak rax nê ixpĩ. Nom kot paj ixtyk ã ixtã apkati axkrunẽpxi hãmri nhũm Tirtũm akupým ixto ixtĩr. Anẽ.

32 Hãmri nhũm mẽ kot hpĩr ã amnhĩ jarênh ma nê tee ri hkukamã hamaxpêr. Hãmri nhũm Simãw Pêtreja hwýr tẽ nê hkwyjê pê ho kato nê mẽ hkax ã o xa nê kãm:

—Kwa nà Pahihtĩ. Koja Tirtũm anê mẽ omunh mex nê nhũm mẽ ã anhĩpêx anhỹr kêt nê. Kwa ri ã kapêr anhỹr kêt nê. Anẽ.

33 Hãmri nhũm kuma nê hwýr apkjê nê pu hã hkôt mẽ pa ho mẽ pa xwýnh piitã omu. Hãmri nê mẽ hamak mã Simãw Pêtre mã kapêr nê kãm:

—Tk. Kwa na ka ã inhmã akapêr anhỹrja o te Satanasti nhỹ hã akapêr pyrãk. Tirtũm nhỹ hã na ka ã inhmã akapêr anhỹr kêt nê. ãm jar mẽ kãm Tirtũm kapêr mar prãm kêt xwýnhjê jamaxpêr o na ka ajamaxpêr nê ã inhmã akapêr anẽ. No Tirtũm jamaxpêr o ajamaxpêr kêt nê. Anẽ.

Jejus krajaja tanhmã kot amnhĩ nhĩpêx hto hã mẽ harênh

Matêwre 6.24-28; Rukre 9.23-27; Juãw 12.24-26; mããnên Apokarip 2.10, 12.11

34 Tã nhũm Jejus amnhĩ wýr mẽ kot mar o kuhê xwýnhjê mẽ hkôt mẽ pa ho mẽ pa xwýnhjê mã anê nhũm mẽ hwýr axkamẽ nê kuhê. Hãmri nhũm tanhmã mẽ ahkre hto nê mẽ kãm:

—E mẽ inhma. Kot kaj mẽ ixkôt amnhĩ xunhwýr ã amnhĩ jarê hã kot kaj mẽ mããnên amnhĩ jarênh o: “Jejus kêp inhõ Pahihtĩ jakamã kot paj ãm kapêr kôt pix mã amnhĩ nhĩpêx rãhã ho ri ixpa. Kwãr ixkwýjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhỹr o amnhĩ jarê.

35 —Koja mẽ ixtã mẽ atõx pĩ rý ixtã tanhmã mẽ ato ka ty. Ate tanhmã ijarênh to ho apa hã nhũm mẽ apĩ. Tã nom koja akaxwýnh ma inhõ krĩ hwýr àpir kurê kumrêx nê kamã atĩr tũm nê amex rãhã nê apa ho apa. Nom kot kaj mẽ jar atĩr prãm xaj ixkaga hãmri nê hwýr axàpir kêt nê.

36-37 —Nê koja mẽhõ hikukrêx gryk ã Tirtũm kaga. Hãmri nê nhỹrmã ty nê ý kamã kuwy hwýr ma mō nê amnhĩ kôt kukrêx õ hpyr nê o mōr kêt nê. Koja tee ri kuwy hwýr mōr pymaj amnhĩ nê hikukrêx rax o amnhĩ pãnhã amnhĩrer prãm kaprý. Tanhmã koja amnhĩ to nê Tirtũm mã amnhĩre nê ma õ krĩ hwýr api? Koja ã amnhĩ nhĩpêx anhỹr kêt nê.

38 —Nê koja mẽhõ ixte mẽ ahkre hã inhma nhũm ja kêp omnuj japêr. Nhũm kot mẽ kãm ixprãm nõkati xwýnhjê hkôt pa gryk ã ixkaga. Hã kot paj nhỹrmã mẽ ato amnhĩptãr kaxyw akupýn wrý nê amnhĩ xwar kot ixkaga xwýnhta kaga. ãm hãmri na pa mẽ amã ja hã amnhĩ jarê. Kot paj nhỹrmã inhõ Papaj nhỹ hã ixte mẽ ho amnhĩptãr kaxyw akupýn wrý nhũm kapêr o mẽ wrýk xwýnhjaja man ixkôt wrý. Pa mẽ wrý hãmri nê ra mẽ kot ixkaga xwýnhjaja pa amnhĩ pyrã nê amnhĩ xwar mẽ hkaga hpa. Anẽ.

9

1 Nhũm Jejus arĩ mẽ kãm kapêr nê mẽ kãm:

—ãm hãmri na pa mẽ amã amnhĩ jarê. Kot paj nhỹrmã akupýn ixte mẽ ato amnhĩptãr kaxyw mẽ awýr wrý kãm ga. Tã kot kaj mẽ akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

Jejus hirã htýx kãm ãm ã harênh

Matêwre 17.1-9; Rukre 9.28-36; mããnên Sikũn Pêtre 1.16-18

2 Tã nhũm arĩgro kêp 6 nê hapêx nhũm Jejus ma nhỹri hixêt prêk wýr tẽ. Nê Simãw Pêtre nê Xiakre nê Juãwja nhũm ma amnhĩ kôt wa mẽ o mō. Nhũm wa mẽ ahte mō nê hixêt prêk ã api nê himōk ã kuhê. Hãmri nhũm Jejus axtem nê xa. 3 Ra ê haka htýx kumrêx nê xa. 4 Hãmri nhũm ja wa kaxkwa rũm hwýr wrý nê kuri kãm kapêr. Finat Mojes mẽ finat Erisja wa wrý nê kuri kãm

kapër o xa. Tirtüm amnepêm amnhĩ wÿr wa ho àpir tã nhũm wa akupÿn wrÿ nê kãm kapër. ⁵⁻⁶ Nhũm wa mẽ mex kumrêx nê hirã htÿx kãm kuhê nhũm Jejus kôt mẽ mör xwÿnhjaja wa mẽ omu nê mẽ kamã no pyma nê. Nê tee ri mẽ kãm tanhmã kapër to hkukamã hamaxpër. Hãmri nhũm Simãw Pêtre hamaxpër nê Jejus mã kãm:

—Kwa Pahihti. Nà ãm hãmri na pu mẽ amnê mō. Kwa pu mẽ kritpêm jar axkamê nê tokyx panojarêt kêt nê. Pa mẽ amã pô nhĩrõnh o axkrunêpxi nê hipêx. Amã nê Mojes mã nê Eris mã hõ nhĩpêx ka mẽ kamã akrĩ. Kwa xat pa mẽ amã ho anê nà? Anê.

⁷ Hãmri nhũm kakrã jaka htÿx wrÿ nê wa mẽ hkunor pa nhũm wa mẽ kamã kuhê. Hãmri nhũm kakrã kamã Tirtüm mẽ kãm kapër nê mẽ kãm:

—Ota Ixkra xa. Inhmã hapê ho inhmã hapê. Kêr ka mẽ kapër mar tÿx rãhã ho ri apa. Anê.

⁸ Hãmri nhũm mẽ kuma nê amnhĩ pu hã rĩt nhũm ãm Jejus pix mẽ kuri xa nhũm Mojes mẽ Erisja wa ra ma akupÿm api nhũm mẽ ãm Jejus pix pumu.

⁹ Hãmri nhũm mẽ ma akupÿm hkwÿjê hwÿr wrÿk o mō nhũm Jejus mẽ kãm:

—Kwa kêr ka mẽ ham mẽ ate mẽmoj pumunh xwÿnhhta kormã nhãm mẽ kãm harênh kêt nê. Koja mẽ mẽmo arĩgro hã ixpĩ hãmri nhũm Tirtüm akupÿm ixto ixtĩr ka mẽ rĩ kormã mẽ kãm ja hã ijarênh o ri apa.

¹⁰ Anê hãmri nhũm mẽ kuma nê mẽ kãm harênh kêt nê. ãm axpên mã pix mã harê nê kot akupÿm htĩr ã amnhĩ jarênhja ã axpên kukjêr o pa nê axpên mã:

—Kwa mo na ri ã akupÿm htĩr ã amnhĩ jarênh anê? Tanhmã kot we amnhĩ to nê htyk tã akupÿm htĩr? Anê.

Hãmri nê tee ri hkukamã hamaxpër o hkôt pa.

*Juãw Paxis te kot Eris pyrãk ã harênh
Matêwre 11.13-15, 17.10-13*

¹¹ Hãmri nhũm mẽ kormã ahpar mã wrÿk o mör mẽ nhũm Jejus kôt mẽ mör xwÿnhjaja mẽmoj tã hkukja nê kãm:

—Kwa mẽ inhmã mẽmoj jarê. Na hte Tirtüm kapër tũm o mẽ ahkre xwÿnhjaja mẽ inhmã: “Eris kumrêx koja Tirtüm mẽ pahwÿr kumê nhũm Krisja hapu hã wrÿ.”

Anê. Na htem ã mẽ inhmã war ajarênh anê. Tã ka na ka ra wrÿ nom nhũm kormã Erisja akukamã wrÿk kêt nê. Anê.

¹²⁻¹³ Hãmri nhũm mẽ kãm:

—Nà ãm hãmri na htem mẽ amã ã ja jarênh anê. Na pre ra ixkukamã te kot Eris kot amnhĩ nhĩpêx pyrãk xwÿnhhta tẽ nê ixkutêp mẽ kãm ijarênh o pa. Nom mẽ kot ixkukamã ijarênh xwÿnh ã omunh kêt jakamã na prem axtem nê kãm tanhmã hipêx to hprãm xà hkôt tanhmã hipêx kati hton kupĩ. Tã koja mẽ ã hipêx anhÿr pyrã nê mã ixto anê nê inhĩpêx kati nê tokyx mẽ kãm ixprãm kêt xwÿnhjaja ixpynê nê ixpĩ pa amnhĩ xà htÿx kamã ijamak kãm ty. Tirtüm kapër ã kagã htũm kot wa ijamê wa ixkukamã wa ijarênh xà hkôt. Anê.

Jejus kot mẽhõ hkra nê mẽkarõmnuti janor ã harênh

Matêwre 17.14-21; Rukre 9.37-43

¹⁴ Hãmri nhũm Jejus nê Simãw Pêtre nê Xiakre nê Juãwja mẽ akupÿm hkwÿjê hwÿr hpõx o mra nê amnhĩ kukamã hkwÿjê pumu nhũm mẽ ohtô nê mẽ hã akuprõ nê mẽ kãm kapër. Nhũm Tirtüm kapër tũm o mẽ ahkre ho mẽ pa xwÿnhjaja mẽmoj tã mẽ hkukjêr o kuhê. ¹⁵ Jakamã nhũm Jejus mẽ hwÿr hpõx o tẽ nhũm mẽ pikuprõnh xwÿnhjaja amnhĩ wÿr omu nê hkĩnh nê. Hãmri nê kutã hprõt nê kãm:

—Pa. Nà ãm hãmri na ka akupÿn mẽ ixwÿr tẽ. Anê.

¹⁶ Hãmri nhũm mẽ kãm:

—Kwa mẽmoj tã na ka mẽ axpên mã axàkjêr o akuhê? Anê.

¹⁷⁻¹⁸ Hãmri nhũm mẽhõ myja kãm:

—Nà ixkra hã na pa mẽ axpên mã ixkapër. Na pre mẽkarõmnuti ixpê hwÿr axà nê tanhmã ixpê ho nhũm kapër kêt nê pa. Nhũm hte xatã tanhmã ixpê ho nhũm pykap amnhĩ rê nê hakwa jamrô ho hikwÿ. Hãmri nê ã htÿx kamã ama nê amnhĩ nham o axpên kamnhar tÿx kumrêx pê htÿx pa nê hikwÿ nê ixpê omnuj tÿx nê. Na hte ã mẽkarõmnuti nhÿ hã amnhĩ nhĩpêx anhÿr o pa. Jakamã na pa ate inhmã ho mex kaxyw man o tẽ nê tee ri ajapêr. Hãmri nê ho akôt mẽ pa ho mẽ pa xwÿnhjê hwÿ nhũm mẽ kot inhmã ho mex kaxyw tee ri tanhmã ho hkapry. Anê.

19 Hāmri nhūm Jejus kuma nē hkôt mē pa ho mē pa xwýnhjê mã kām:

—Hêxta waa nē. Ra mē ate Tĩrtūm nhỹ hã ixte mē ho mex ã ixpumunh ryy htã ixpyrà nē ã amnhĩ nhĩpêx anhỹr kêt nē. Mãn ka mē kormã kaxyw Tĩrtūm kôt ajamaxpêr tỳx kêt nē. E amnē ixwýr akra ho tē pa omu. Anē.

20 Hāmri nhūm mē hwýr o tē nhūm mēkarōmnuti Jejus pumu nē tanhmã hkrata o htỳx to nhūm pykap tēm nē hakwa jamrô nē amnhĩ rēnh o nō. 21 Nhūm Jejus omu nē hipêêxã mã:

—Kwa tanhmã na ra kot amnhĩ nhĩpêx ã mytwrý kute? Anē.

Nhūm kām:

—Nà hprĩre rŭm na hte ã amnhĩ nhĩpêx anhỹr o pa. 22 Na hte mēkarōmnuti xatã ixpê hprĩ kaxyw kuwy kamã kurê nē gôx kãm kurê. Kwa kot ka ate ho mex kukamã axãhpumunh japêr nē wa ixkamã axukapri nē akupým inhmã ho mex. Anē.

23 Hāmri nhūm Jejus kām:

—Xàn ka tee ri ixte ho mex kaxyw ixkukamã ajamaxpêr? Nà ixte mēmoj piitã ho anhỹr kaxyw ixãhpumunh tỳx kênã. Kot ka mē atō mēmoj tã amnhĩ kaxyw ixkôt ajamaxpêr tỳx hã kot paj amã ho anē. Anē.

24 Hāmri nhūm kuma nē kãm hkra mex prãm tỳx xàj kapêr tỳx nē kãm:

—Nà na pa amnhĩ kaxyw akôt ija-maxpêr. Nom kot kaj tanhmã ixkrã hto pa akôt ijamaxpêr tỳx rãhã ho ri ixpa Pahihti. Anē.

25 Rôm nhūm mē ohtô rax nē hwýr kormã mra nhūm Jejus amnhĩ wýr mē omu hāmri nē mēkarōmnutija mã kapêr kurê kumrêx. Nē kãm kapêr kãm hihtỳx nē kãm:

—Pa mēkarōmnuti. E apê mē ho mē kapêr kêt nē mē umar kêt o apa xwýnh ã pa amã ixkapêr ka inhma. Kêr ka mē hkrata pê akato nē ma amôr o mō nē axte tanhmã ho hkêt nē. Anē.

26 Hāmri nhūm tee ri kot kãm karôja ma nē gryk xàj xatã amýra nē mē hkrata o htỳx kumrêx nhūm htertet tỳx o nō. Hāmri nhūm kêp kato nē ma tē nhūm te htyk pyrà nē nō nhūm mē tee ri omu nē ra htyk ã hkamnhĩx. 27 Hāmri nhūm Jejus hpa hã kupy nē kãnhmã ãm nhūm akupým mex nē kãnhmã xa nē ri mra. Nē tãm kapêr o mra nē umar mex nē.

28 Tã nhūm Jejus hkôt mē pa ho mē pa xwýnhjê mērohã ma akupým amnhĩm hikranh xà hã ixkreja wýr mra nē hwýr agjê nē hkrĩ. Hāmri nhūm Jejus kôt mē pa ho mē pa xwýnhjaja amnhĩ tã hkukja nē kãm:

—Kwa mē inhmã mēmoj jarê Pahihti. Na pa mē tee ri axwakre kamã mē hkrata nē mēkarōmnuti janor kaprý. Kwa mon pa mē apyrã nē ja ho anhỹr mex kêt nē? Anē.

29 Hāmri nhūm mē kãm:

—Nà axtem na mēkarōmnuti ja. Na htem mē nē hanor tokyx anhỹr kêt nē. Na htem ho Tĩrtūm wýr tỳx nē rĩ kormã hano. Anē.

*Jejus kot htyk kukamã amnhĩ jarênh
Matêwre 17.22-23; Rukre 9.44-45*

30-31 Tã nhūm Jejus mē hkôt ri mē pa ho pa xwýnhjê mē krĩja rŭm hapôj nē ma nhãm mō. Nē ma pyka pê Garirej kahti hkôt mō. Nom mē piitã mē hkàx ã mō. Jejus kormã kot amnhĩ tã tanhmã hkôt mē pa ho mē pa xwýnhjê jahkre hto ho pa jakamã kãm mē hkàx ã mē o pa hprãm nē. Hāmri nē amnhĩ kukamã mē kãm tanhmã amnhĩ jarênh to nē mē kãm:

—E kot paj mē amã tanhmã amnhĩ jarênh to ka mē inhma nē inhmar tỳx nē. Kojã mē kãm ixprãm kêt xwýnhjaja tokyx mē kãm ixtã amýnê nhūm mē ixpĩ. Kot paj ixtyk ã ixtã apkati axkrunêpxi hāmri nhūm Tĩrtūm akupým ixto ixtĩr. Kwa kêr ka mē ja ma nē hã anohtỳx nē ho apa. Anē.

32 Hāmri nhūm mē tee ri ã kot amnhĩ jarênh anhỹrja ma nē axpên mã:

—Kwa mo na ri ã mē pamã amnhĩ jarênh anê? Nà kêp mē panhõ Pahi Maati hã kot amnhĩ jarênh kênã kot kêt mēhõ kupĩ.

Anhỹr o axpên mã harênh o hkôt mō. Hāmri nē ã kot amnhĩ jarênh anhỹr mar prãm kêt jakamã hprĩ hã tanhmã hkukjêr to hkêt nē. ãm akryk hkôt mar o mō.

*Mē kot amnhĩ to rŭnh xwýnh jarênh
Matêwre 18.1-5; Rukre 9.46-48*

33-34 Tã nhūm Jejus mē hkôt mē pa ho pa xwýnhjaja kormã ma krĩ pê Kapanaũ hwýr mō nhūm hkôt mē pa ho mē pa xwýnh pê 12jaja tanhmã amnhĩ kukamã hamaxpêr to hāmri nē axpên mã:

—Kwa mẽ pahtõ kot puj we nhÿrmã pahpê pahî mẽ mẽ ho amnhĩptâr rax o ri pahkwÿjê jakre?

Anhÿr o axpên kukjêr o Jejus kôt mõi. Nê axpên mã: “Nà pa.” Nhũm mẽ hkwÿjaja: “Nà kêt pa.” Anhÿr o hkôt mõi. Hãmri nhũm Jejus mẽ mar o mõi. Hãmri nhũm mẽ mõi nê nhÿri amnhĩm hikranh xà hã ixkre hwÿr pøj nê hwÿr agjê nhũm mẽ kãm:

—Kwa mẽmoj tâ na ka mẽ pry hã amnhĩ jarênh o mõi? Anê.

Hãmri nhũm mẽ tee ri kuma nê hpijaàm nê. Nê kãm tanhmã amnhĩ jarênh to hkêt nê. ³⁵ Jakamã nhũm Jejus nhÿ nê mẽ kãm anê nhũm mẽ kuri hkrĩ pa nhũm mẽ kot mẽ kãm mẽ ho amnhĩptâr rax prãmta ã mẽ kãm kapêr nê mẽ kãm:

—E mẽ inhma. Ka mẽ atõ amã mẽ ho amnhĩptâr rax prãm. Hã kêr ka te apê mẽ piitã mẽ kãm amarĩ axàpênh xwÿnh pyræk o amnhĩ nhĩpêx o mẽ hkôt apa. Jao mẽmoj to mẽ kutã anojarêt rãhã nê. Anê.

³⁶ Hãmri nê amnhĩ wÿr mẽhprĩre hõ mã hpa ho apê nhũm hwÿr tẽ nhũm kumÿ nê o nhÿ nê hã mẽ kãm kapêr nê mẽ kãm:

³⁷ —E mẽ inhma. Kêr ka mẽ apê pahî pyræk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyræk o amnhĩ nhĩpêx o ri apa. Jao nhÿri mẽhprĩre hõ pumu nê kamã axukaprĩ nê kãm mẽmoj tanhmã ho rÿ kãm mẽmoj gõi. Hãmri nê ã amnhĩ nhĩpêx anhÿr o te pa ate tanhmã ixto mex to pyræk o amnhĩ nhĩpêx. Nê kot ka mẽ atõ pa tanhmã ixto mex to nê te ate Tĩrtũm o mex pyræk o amnhĩ nhĩpêx. E kêr ka mẽ amã amnhĩ to rũnh prãm nê ã amnhĩ nhĩpêx anhÿr o ri apa. Anê.

³⁸ Hãmri nhũm Juãw nhÿhÿnh tẽn mẽ hwÿr axà nê Jejus mã:

—Kwa Pahĩti. O mũj mẽhõ kêp mẽ pahkwÿ hkêt tâ anhÿ hã mẽ nê mẽkarõmnuti janor o pa. Pa mẽ tee ri ja hã omu nê kêp mẽ pahkwÿ hkêt jakamã pa mẽ ã kot amnhĩ nhĩpêx anhÿrja nê kãm ixkapêr. Anê.

³⁹⁻⁴⁰ Hãmri nhũm kuma nê kãm:

—Kwa nà nê tanhmã kãm nê hkêt nê. Koja mẽhõ inhÿ hã aa mẽ kot mẽmoj pumunh kêt kwÿ ho anê hãmri nê kêp mẽ panhĩõ nê ri mẽ pahkwÿm tanhmã mẽ ahkre hto ho pa hkêt nê. Ra mẽ pahkôt kot

amnhĩ nhĩpêx mã kênã. Jakamã kwa mẽ ja nê tanhmã kãm nê hkêt nê. Kwãr mãmrĩ ã amnhĩ nhĩpêx anê. Ja mex kênã.

⁴¹ —Koja mẽhõ nhÿri mẽ atõ amã kôr ã apumu nê hamaxpêr o: “Kwa Jejus kôt ri pa xwÿnh mũj kãm kôr. E pa kãm gõi hkwÿ kê ho ixkõi.” Anhÿr o hamaxpêr nê apê ixkwÿ hã amã gõi hkwÿ ka ho ixkõi. Nhũm ãm kot amã gõi pix nhõr nhũm ate ho akõm tâ nhũm Tĩrtũm atã omu nê ho mex rax nê. Anê.

Mẽ pahte amnhĩ tomnuj pymaj tanhmã amnhĩ nhĩpêx to hã mẽ pajarênh

Matêwre 18.6-9; Rukre 17.1-2

⁴² Nhũm Jejus arĩ hkôt mẽ pa ho mẽ pa xwÿnhjê mã kapêr nê mẽ kãm:

—Nê mẽ kot ixkôt amnhĩ xunhwÿr tohtuj anhÿr xwÿnhjaja. Koja mẽhõ ma mẽ hwÿr tẽ nê inhnê mẽ kãm kapêr. Mẽ kot mẽ mar nê tanhmã amnhĩ tomnuj to hprãm xàj hêx rom mẽ kãm kapêr nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu nê kot inhnê tanhmã kãm nê xwÿnhnta pumu nê homnuj tÿx nê. Te mẽ kot mẽhõ pynênh nê mut ã kên pytĩ hõ nhõr nê ma o htêm nê gõi xupÿm rax kãm mẽnh pyræk o hipêx. Te ho ja pyræk no ãm homnuj tÿx o hakre.

⁴³⁻⁴⁷ —E kwa mẽ o kora. Kot kaj mẽ anhĩhkra rÿ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhÿr pymaj te ate amnhĩ pê anhĩhkra rÿ apar krãhyr nê mẽnh pyræk o amnhĩ nhĩpêx nê axte ã amnhĩ tomnuj anhÿr kêt nê. Rÿ ka mẽ ano ho mẽmoj punuj pumu. Hãmri nê kãm ajamaxpêr pix o apa pymaj te ate amnhĩ pê ano katõk nê mẽnh pyræk o amnhĩ nhĩpêx nê nhãm arĩt kurê kumrêx. Kêr ka mẽ ã amnhĩ nhĩpêx o apa rãhã nê. Hãmri nê nhÿrmã ty nê ma Tĩrtũm mẽ wa inhõ krĩ hwÿr api. No kot ka mẽ arĩ akutã ano nê arĩ akutã apar nê arĩ akutã anhĩhkra rãhã rĩ mrar tâ tõiã tanhmã ho amnhĩ tomnuj to. Hãmri nê nhÿrmã ty nê ma mẽ kot amnhĩ xà htÿx kamã hamak tũm xà pê kuwy maatita wÿr ma apa.

⁴⁸ Kuwyja kamã na htem mẽ kot amnhĩ tomnuj mÿrapê amnhĩ xà htÿx kamã hamak rãhã ho pa ho pa hãmri nê aa hapõx kêt nê.

49 ã koja mẽ kot amnhĩ tomnuj o mẽ pa xwỳnh piitã amnhĩ nhĩpêx anhỹr rãhã nẽ pa ho pa. 50 Jakamã kwa kêt ka mẽ axpên to mex rãhã ho ri apa. Nom axpên kãm agryk nẽ tanhmã axpên nhĩpêx to ho ri apa hkêt nẽ. Anẽ.

Nhũm pre ã Jejus hkôt ri mẽ pa ho mẽ pa xwỳnhjê jahkre anẽ.

10

Mẽ pahte axpên kaga nê Jejus kot mẽ pahkurê

Matêwre 5.31-32, 19.1-12; Rukre 16.18; mãânên Wam Korĩt 7.10-16

1 Tã nhũm Jejus mẽ hkôt mẽ pa ho pa xwỳnh mẽrohã ma pyka pê Jutej wỳr mỗ. Hãmri nẽ pyhti pê Jotãw ã rê nẽ hpãnhã ma xarmã mỗ. Nhũm mẽ axte mẽ hã akuprỗ nhũm kê Jejus axte mẽ ahkre ho xa. 2 Hãmri nhũm Parijew nhỗ xwỳnh kwỳjaja hwỳr mra. Mẽ kot hêx rom kamã hamak nẽ mar nẽ tanhmã ho kapêr punuj to kaxyw hwỳr mra nẽ kãm:

—Pa. Ot pa mẽ mẽmoj tã akukjêr kaxyw awỳr mra. Kwa tanhmã na pre amnepêm finat Mojesja mẽ pahte mẽ pahprỗ kaga hã mẽ panhĩgêjtê mã karỗ hto? Xà koja mẽ pahprỗ mẽ pakapêr hkwỳm tanhmã amnhĩ nhĩpêx to pu mẽ mỳrapê hkaga nhũm Tĩrtũm ja hã mẽ pahpumũ nhũm ja kãm mex nẽ nà? Anẽ.

3 Hãmri nhũm mẽ kãm:

—Tanhmã na pre Mojes Tĩrtũm nhỹ hã ja hã mẽ amã karỗ hto? Anẽ.

4 Nhũm mẽ kãm:

—Nà na pre harênh o:

Kêt ka mẽ aprỗ kaga kaxyw hãmri nẽ ate hkaga hã amnhĩ jarênh ã kagã nẽ kãm agỗ nẽ rĩ kormã hkaga. Anẽ.

Na pre ã mẽ inhmã ja hã karỗ anẽ. Anẽ.

5 Hãmri nhũm mẽ kãm:

—Tỳ nom mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anẽ. 6 Amnepêm mẽmoj piitã hkrax kãm na prem axpên kaga hkêt nẽ. Na pre Tĩrtũm wam myja nhĩpêx nẽ hpãnhã kãm hprỗ nhĩpêx. Axpên kaxyw wa hipêx. 7 Jakamã na hte mẽmyjaja hprỗ kaxyw nẽ gryk ã katorxã nẽ hipêxã wa hkaga nẽ ãm hprỗ kôt pix mã pa ho pa.

8 Te wa tipxi nẽ ri wa pa pyrãk o axpên nhĩpêx o pa. 9 Tĩrtũm tãm kot axpên mã wa

õr kênã kot kêt mẽhỗ wa kot axpên kaga kaxyw tanhmã wa hipêx to rỳ tanhmã wa kãm kapêr to. Anẽ.

Nhũm pre ã Jejus mẽ kãm kapêr anẽ.

10 Hãmri nẽ hkôt mẽ pa ho mẽ pa xwỳnhjê mẽ akupỳm ixkrem agjê nhũm mẽ kãm:

—Kwa aprĩ hã mẽ inhmã mẽ kot axpên kaga hã mẽ harênhã jarê pa mẽ ixprĩ hã kuma nã. Anẽ.

Hãmri nhũm mẽ kãm:

11 —Nà kot kaj mẽ aprỗ kaga nẽ hpãnhã nhãm mẽhỗ ho aprỗ nhũm Tĩrtũm noo mã te ate wam aprỗ kamã nhãm aprỗ nyw o amnhĩkati pyrãk. Tĩrtũm pê ja omnuj tỳx nẽ. Rỳ koja mẽhỗ hprỗ kaga ka hpãnhã ho aprỗ nhũm Tĩrtũm noo mã te ate wam mjên pê ho amnhĩkati pyrãk. Ja mãânên Tĩrtũm pê omnuj tỳx nẽ.

12 —Nẽ mẽnijaja. Koja mẽhỗ ni ra mjên kaga nẽ hpãnhã nhãm mẽhỗ ho mjên. Ja mex kêt. Mjên krax kêp mjên kumrêx kênã kot kêt hkaga nẽ hpãnhã nhãm hõ ho mjên. Koja anẽ nhũm Tĩrtũm noo mã te kot wam mjên kamã nhãm hõ ho amnhĩkati pyrãk nhũm Tĩrtũm pê ja omnuj tỳx nẽ. Anẽ.

Jejus kot amnhĩ nê mẽhprjê janor kêt ã harênh

Matêwre 19.13-15; Rukre 18.15-17

13 Tã nhũm Ijaew kwỳjaja Jejus wỳr mẽ hkrarejê jamỳ nẽ mẽ o mra. Kot mẽ hã ãhkra jaxwỳr nẽ mẽ ho Tĩrtũm wỳr kaxyw hwỳr mẽ o mra. Hãmri nhũm hkôt mẽ pa ho pa xwỳnhjaja tee ri ja hã mẽ omũ nẽ mẽ kãm:

—Kwa mo kaxyw na ka mẽ Jejus wỳr mẽ o mra? Kormã mẽ rãxre kênã. Mẽ ma akupỳm mẽ o mra nã? Anẽ.

14 Hãmri nhũm Jejus ja hã mẽ kuma nẽ mẽ kãm:

—Kwa nã kwãr mẽ mãmri ixwỳr mẽ o mra. Mẽ ri inhnê mẽhprjê kurê hkêt nẽ. Anẽ.

Hãmri nẽ mẽ kãm hpa ho apê nhũm mẽ hwỳr mẽ o mra nhũm mẽ kuri kuhê. Hãmri nhũm mẽ hã hkôt mẽ pa ho mẽ pa xwỳnhjê mã kãm:

—E mẽ jarejê pumu. Na htem hamakêtkati nẽ hkĩnh nẽ ri pare. Mẽ kãm amnhĩ to rũnh prãm kêt nẽ ri pare. Tã Tĩrtũm kôt mẽ kot amnhĩ nhĩpêx o ri mẽ pa xwỳnhjaja na htem mẽ urãk nẽ kãm amnhĩ to rũnh prãm kêt nẽ ri pa.

15 —Na hte jarejaja hipêêxà nê katorxà wa kapêr ma nê wa hkôt ri amnhî nhîpêx o ri pare. Tã ixpê Tirtûm kot mē awÿr inhmēnh xwÿnh na pa. Kot ka mē amã ixkôt amnhî xunhwÿr prãm hã kot kaj mē jarejê kot amnhî nhîpêx pyræk o amnhî nhîpêx. Jao ixkapêr ma nê ixkôt ri amnhî nhîpêx mex o ri apa. Anê.

16 Hãmri nê mēhprîrejê jamÿ nê mē hã ïhkra jaxwÿ nê mē ho Tirtûm wÿ nê kãm:

—Pa Papaj. E kêr ka jarejê ho mex rãhã nê kê mē mex nê pa. Anê.

Hikàxpore rax xwÿnh jarēnh

Matêwre 19.16-22; Rukre 18.18-23; määnēn Wam Ximotre 6.6-10; Xiakre 5.1-6

17 Tã nhũm Jejus mē hkôt mē pa ho pa xwÿnhjaja nhÿri pry hã mō nhũm Ijaew krãhtûmja omu nê hwÿr tē nê mēmoj tã hkukja nê kãm:

—Pa mē ijahkre xwÿnh maati? E kwa inhmã mēmoj jarē. Nhÿrmã Tirtûm ri ixtîr tûm nê ixpa hprãm xàj mēmo kot pa we ho anhÿr o ri ixpa? Ate amnhî to mex pix o ri apa xwÿnh jakamã kwa inhmã tanhmã ja jarēnh to. Anê.

18 Hãmri nhũm kãm:

—Xà ate ixpê Tirtûm kwÿ hã ixpumunh kôt na ka ixte uræk nê amnhî to mex xwÿnh ã ijarē? Tirtûm pix na kot amnhî to mex rãhã xwÿnh jakamã kot kaj ã ijarēnh anê nê ixpê Tirtûm Kra hã ijarē. Jao uræk nê ixte amnhî to mex xwÿnh ã ijarē. Nà xàn ka ãm atÿx ri amnhî krã hkôt ã ijarēnh anê?

19 —Tirtûm mex o mex jakamã kot kaj amã nhÿrmã kuri atîr tûm nê apa hprãm hãmri nê ra kot mēmoj tã mē amã karō xà hkôt amnhî nhîpêx o ri apa. Ra ate mar mex kênã. Na pre mē amã:

Kêr ka mē axàhkînh o ri apa hkêt nê.

Nê mē hpar kêt nê.

Nê tanhmã axêx kêt nê.

Nê axêx rom tanhmã mē nokupyr to hkêt nê.

Nê mē kêt mē hprō ho amnhîkati hkêt nê.

Nê anhîpêêxà mē akatorxà wa hã api-jaàm nê wa ho mex pê wa kutã ano-jarêt rãhã ho ri apa.

E kot kaj amã nhÿrmã Tirtûm kuri atîr tûm nê apa hprãm hã kot kaj ã amnhî nhîpêx anhÿr o ri apa. Anê.

20 Hãmri nhũm kuma nê kãm:

—Kwa ixprîre ri ra ã ixte amnhî nhîpêx anhÿr o ri ixpa kênã. Nom te ixtîr tûm nê ixpa kaxyw ixte kormã tãm kêt pyræk. Anê.

21 Hãmri nhũm kuma nê hprî hã omu nê kãm hapê nê. Hãmri nê kãm:

—Nà kormã mēmoj pyxire nê arîk. Na ka amã akukrêx rax kînh tÿx o Tirtûm jakre. Jakamã kêr ka ma akupÿm anhörkwÿ hwÿr tē nê akukrêx rax o wênê hpa. Nê kãxpore jamÿ hãmri nê ma mē kêt amrakati xwÿnhjê mã ôr o ri apa. Hãmri nê akupÿn tē nê arî ri ixkôt apa ho apa. Anê.

22 Hãmri nhũm kuma nê tee ri hikukrêx rax kukamã hamaxpêr. Kãm hapê jakamã kãm kãm ïhkra karo hprãm kêt nê. Hãmri nê tee ri Jejus kot ã kãm hã karō anhÿrja ma nhũm ja kãm mex kêt nhũm awjanã nê hkaprî nê ma akupÿm tē. 23 Hãmri nhũm Jejus tee ri omu nê hkôt mē pa ho mē pa xwÿnhjê mã kãm:

—Hêxta waa nê. Koja mē hikukrêx rûnh xwÿnhjaja ohtô nê kãm mē hikukrêx japê xàj Tirtûm mē wa ixri htîr tûm nê pa ho pa hkêt nê. Wa ixte amnhî nhîpêxja mē kêt hihtÿx. Anê.

24 Hãmri nhũm mē tee ri kapêrja ma nhũm Jejus mē hamaxpêr kôt mē omunh mex jakamã axte tanhmã mē kãm harēnh to nê mē kãm:

—Nà Tirtûm mē wa ixte amnhî nhîpêxja na mē hikàxpore rûnh xwÿnhjaja pê ja hihtÿx. 25 Mē kãm hikukrêx rax mã ïhkra karo hprãm kêt rãhã tee kãm Tirtûm kôt amnhî nhîpêx prãm kaprÿ. Te ho mēhō kot menh kagô hã hkre nê kãm kagô katök prãm kêt rãhã kãm guhkrax kãm àr prãm kaprÿta pyræk. Anê.

26 Hãmri nhũm mē kuma nê tee ri amnhî kukamã hamaxpêr nê kãm:

—Kwa no mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhÿrmã war ari ixtîr tûm nê ixpa ho ixpa hkêt nê? Anê.

27 Hãmri nhũm mē kãm:

—Nà kot kaj mē amnhî krã hkôt mē amã mē akukrêx japê mã anhÿrer kêt nê. ãm Tirtûm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tirtûm mē wa ixri atîr tûm nê mē apa ho mē apa mã xwÿnh. Anê.

²⁸ Hāmri nhūm Simāw Pêtre kām:

—Kwa Pahihti na pa prem agryk ã mẽmoj piitã hkaga hpa nê akôt ixpa ho ixpa. Jakamã xà kot paj mẽ nhỹrmã war ari ixtĩr tũm nê ixpa ho ixpa kêt nê nà? Anê.

²⁹ Hāmri nhūm kuma nê hkôt mẽ pa ho pa xwỳnh piitã mẽ kām:

—Nà ka mẽ atõ inhmã tanhmã amnhĩ to ho apa kaxyw akwỳjê re nê ma inhmã tanhmã amnhĩ nhĩpêx to ho ri apa. Anhõrkwỹ re rỳ atõ rỳ atõx rỳ aprõ nê akrajê re. Rỳ akatorxã nê anhĩpêxã wa are. Rỳ akukrêx piitã rer pa hāmri nê ma ixkapêr o mẽ piitã mẽ ahkre ho ri mẽ hkôt apa. ³⁰ Hã kot paj amnhĩ tã mẽ apumu nê mẽ ato mex rax nê. Hāmri ka mẽ ma mẽ kām ixkapêr jarênh o mẽ hkôt apa nhūm mẽ kot mẽ amar xwỳnh kwỳjaja mẽ ama nê kām mẽ akĩnh nê. Nê ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx. Jao tanhmã mẽ ato mex to ho pa.

—Nê koja mẽ kām ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tĩrtũm mẽ wa inhõ krĩ hwỳr api nê wa ixkuri amex nê atĩr tũm nê apa ho apa. ³¹ Nom kêr ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nê. Mẽ kot amnhĩ to rũnh xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nê mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anê.

Jejus kot amnhĩ kukamã axte amnhĩ jarênh

Matêwre 20.17-19; Rukre 18.31-34

³² Tã nhūm Jejus hkôt ri mẽ pa ho mẽ pa xwỳnhjê mã kapêr pa hāmri nê ma Jeru-jarê hwỳr mẽ o mō. Ra kamã kām hkurê xwỳnhjaja kot hpĩr ã amnhĩ jarênh tã ma hwỳr mẽ o mō. Jakamã nhūm mẽ tee ri hkukamã hamaxpêr o hkôt mō. Nhūm mẽ amarĩ mẽ hkôt mrar xwỳnhjaja haxwỳja kām ma nê. Hāmri nhūm Jejus mẽ kêp 12ta o mō nê hkwỳjê hkàx ã amnhĩ kukamã tanhmã mẽ kām amnhĩ jarênh to ho mō nê mẽ kām:

³³ —E na pu mẽ ra Jerujarê hwỳr mō. Kot puj mẽ hwỳr pøj nhūm mẽ kām ixkurê xwỳnhjaja patre krãhtũmjê mẽ Tĩrtũm kapêr

tũm o mẽ ahkre xwỳnhjê nhĩhkram ijaxã. Hāmri nhūm mẽ kām Tĩrtũm kapêr kôt amnhĩ nhĩpêx prãm kêt xwỳnhjaja ixpĩr kaxyw mẽ kām ixtã amỹnê ³⁴ nhūm mẽ mar xã hkôt tanhmã inhĩpêx kati hto. Nê mẽ hkwỳjaja ixtã hpêr o axkê nê ixtã akunha. Nê mẽ hkwỳjaja tanhmã ijapry hto nê ixtã argõx rê nê ixtak hāmri nê ixpĩ. Koja mẽ ã inhĩpêx anê. Nom kot paj ixtyk ã ixtã apkati axkrunêpxi nhūm Tĩrtũm akupỹm ixto ixtĩr. Anê.

Xiakre mẽ Juãw wa kot amnhĩ to Jejus wỳr ã wa harênh

Matêwre 20.20-28; Rukre 22.24-30; mãânênh Piripos 2.3-8; Wam Pêtre 5.3

³⁵ Tã nhūm Jepetew kra Xiakre mẽ Juãw wa tanhmã hamaxpêr to nê Jejus mã kām:

—Kwa mẽ ijahkre xwỳnh. Pa wa amã mẽmoj jarê ka wa inhmã “y” anê nà? Anê.

Hāmri nhūm wa kām:

³⁶ —Ko wa mamrĩ inhmã mẽmoj jarê pa wa ama mãn. Anê.

³⁷ Hāmri nhūm wa kām:

—Nà kot kaj nhỹrmã ate mẽ piitã mẽ ho amnhĩptãr kaxyw nhỹ pa wa akutã anhĩjê. Nê wa papxipix ixpê anhõ kôwenatõ nê akutã anhĩjê nê ato nhỹ. Ja na pa wa inhmã hprãm. Anê.

³⁸ Hāmri nhūm wa kām:

—Nà na ka wa ãm atỳx ri ã amnhĩ to ixwỳr anê. Koja mẽ tokyx ixpĩ pa amnhĩ xã htỳx kamã ijamak rax nê ty. Tã xã koja mẽ ixpyrà nê ã war anhĩpêx anê ka wa ixpyrà nê amnhĩ xã htỳx kamã ajamak rax kām ty nà? Anê.

³⁹ Hāmri nhūm wa kām:

—Tỳ. Nà kot pa wa ijaxwỳja anê nê apyrã nê amnhĩ xã htỳx kamã ijamak kām ty. Anê.

Hāmri nhūm wa kām:

—Nà ãm hāmri na ka wa ja hã amnhĩ jarê. War ate ixpyrà nê ixkôt amnhĩ xã htỳx kãm ajamak kãm atyk mã kênã. ⁴⁰ Tã nom war ate amnhĩ to ixwỳrta ã kot paj tanhmã war amã nê hkêt nê. Inhõ Papaj tãm koja ja kaxyw mēhõ japêr nhūm inhĩhkõ hã nhỹ. No pa kot paj ri ja kaxyw mẽ atõ rênh kêt nê. Anê.

⁴¹ Hāmri nhūm wa urãk nê Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nê wa kamã gryk

ně. ⁴² Jakamã nhũm Jejus mẽ piitã mẽ ho akuprõ mẽ mẽ kãm:

—E mẽ inhma. Na hte Ijaew kêt xwýnhjê nhõ pahihtijaja ã amnhĩ nhĩpêx anhỹr o ri pa mẽ amarĩ hkrĩ xà kamã hkrĩ ho hkrĩ. àhpumunh jakamã amarĩ ixkre kre jakry kamã hkrĩ ho hkrĩ mẽ mẽ kãm mẽ àpênh xwýnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx aně. Nẽ mẽ kot amnhĩm mex ã harênh prãm xaj tanhmã mẽ ho mex to ho pa. ⁴³⁻⁴⁵ Tã no mẽ kajaja kêt ka mẽ atõ amã amnhĩ to rax prãm hãmri mẽ ho mẽ kot amnhĩ nhĩpêx pyrãk kêt mẽ. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpênh o apa kaxyw na pa pre mẽ awýr ixwrýk kêt mẽ. ãm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awýr wrý. Mẽ ate nhỹrmã kuwy wýr apa pymaj mẽ aně ixtyk kaxyw na pa pre mẽ awýr wrý. Jakamã kot kaj mẽ atõ amã amnhĩ to rax prãm hã kêt ka ixpyrà mẽ akwýjê kutã anojarêt rãhã ho ri apa. Hãmri mẽ inhmã te ate amnhĩ to rax o amnhĩ nhĩpêx pyrãk o amnhĩ nhĩpêx. Aně.

Jejus kot akupým Paximew o mex ã harênh

Matêwre 20.29-34; Rukre 18.35

⁴⁶ Tã nhũm Jejus mẽ hkõt mẽ pa ho mẽ pa xwýnhjaja kormã Jerujarẽ hwýr mõi ri ra krĩ pê Jeriko hkõt mõi. Hãmri nhũm mẽ ohtõ mẽ mẽ hã ajêt mẽ mẽ hkõt mõi. Nhũm mēhõ myja pry nhĩhkrep nhỹ. Ximew kra Paximew nohkre xwýnhja pry kamã ahwýr o hkrĩ. ⁴⁷ Hãmri nhũm Jejus mẽ hkwýjaja hwýr htêp o mõi nhũm amnhĩ wýr mẽ kuma mẽ mẽ kot Jejus nhĩxi jarênh o mõi ã kuma hãmri mẽ kax pê kãm kapêr mẽ amnhĩ to kuwy mẽ mẽ kãm:

—Pa Jejus? Nà apê mẽ inhõ Pahihtim mex kumrêx na ka. Te apê amnepêm anhigêt pahihtim Tawi kot amnhĩ nhĩpêx pyrãk. Jakamã kwa we ixkamã axukaprĩ mẽ akupým ixto mex kêt wehe. Ixte amnhĩ kaxyw akõt ijamaxpêr xwýnh na pa. Aně.

⁴⁸ Hãmri nhũm Jejus kukamã mẽ mrar xwýnhjaja kuma mẽ mẽ kãm:

—Tk. Kwa akapêr kêt mẽ nhỹ nà. Aně.

Tã nom nhũm ãm mẽ kuma mẽ xatã amnhĩ to kuwy. Kýx pê amnhĩ to kuwy mẽ axte kãm:

—Kwa ixkamã axukaprĩ mẽ akupým ixto mex Pahihtim. Aně.

⁴⁹ Hãmri nhũm Jejus kuma mẽ xa mẽ hkõt mẽ pa ho mẽ pa xwýnhjê mã mẽ kãm:

—E mẽ atõ hwýr tẽ mẽ hpa hã apy mẽ amnẽ ixwýr o tẽ. Aně.

Hãmri nhũm mẽ kuma mẽ nohkre xwýnhta mã kapêr mẽ mẽ kãm:

—E tee ri amnhĩ kukamã ajamaxpêr kêt mẽ. Na atã karõ. E tokyx kãnhmã xa. Aně.

⁵⁰ Hãmri nhũm mẽ kuma mẽ hkĩnh týx mẽ. Nẽ kãnhmã harĩ mẽ amnhĩ nẽ õ kajaati mẽ mẽ hwýr htêm kurê kumrêx. ⁵¹ Hãmri nhũm Jejus kãm:

—Pa mo na? Tanhmã kot pa ato? Aně.

Hãmri nhũm kãm:

—Nà akupým inhmã ixrĩt mex prãm Pahihtim.

⁵² Aně nhũm kãm:

—Tõe. Nà ra ate amnhĩ kaxyw inhmã ajamaxpêr týx jakamã kot kaj akupým arĩt mex kurê kumrêx. E mãmri ma akupým tẽ. Aně.

Nhũm akupým rĩt mex ã amnhĩ pumu mẽ hkĩnh o hkĩnh. Hãmri mẽ Jejus ã ajêt mẽ ma hkõt hkĩnh mẽ mẽ.

11

Jejus kot Jerujarẽ hwýr àr ã harênh

Matêwre 21.1-11; Rukre 10.28-40; Juãw 12.12-19

¹ Tã nhũm Jejus mẽ hkõt mẽ pa ho mẽ pa xwýnhjê mẽ kormã Jerujarẽ hwýr mõi. Hãmri mẽ krĩ pê Petake mẽ hõ pê Petãn wýr ahtêp o mõi. Hixêt pê Oriwêhti kahti ri na pre krĩja wa xa. Jakamã nhũm Jejus hkõt mẽ pa ho mẽ pa xwýnh wa ho axkrut mẽ mẽ amnhĩ kukamã wa kumẽ ² mẽ wa kãm:

—E wa ma krĩ mũj wýr mẽ ixkukamã wa tẽ. Hãmri mẽ hwýr pój mẽ nhỹri jumênre nyw mã ê mẽ ãm xwýnhta pumu. Kormã mẽ kot hã hkrĩ hkêt kumrêx xwýnhta. ³ Ka wa omu mẽ mẽ kãm ê xà hpôt mẽ man akupým ixwýr o tẽ. Koja mēhõ war apumu mẽ mẽ tanhmã war amã kapêr to ka wa ã kãm ijarênh aně mẽ mẽ kãm: “Nà mẽ panhõ Pahihtim na hã karõ pa wa hwýr tẽ.” Anhỹr o kãm ijarẽ. E wa ma hwýr tẽ. Aně.

⁴Hāmri nhũm wa kuma nẽ ma hwỳr htẽm kurê kumrẽx nẽ hwỳr pøj. Nhũm Jejus kot wa kãm hã karõ xà hkõt jumẽnre nywreta pumu. ⁵Hāmri nẽ kãm ê xà hpõt o xa nhũm kuri mẽ kuhê xwỳnhjaja tee ri hã wa omu nẽ wa kãm:

—Kwa mo kaxyw na ka wa kãm ê xà hpõt o xa? Kwa kot ka wa mẽ ixpê ho ahkĩ nà? Anẽ.

⁶Hāmri nhũm wa mẽ kãm:

—Nà mẽ panhõ Pahшти na wa inhmã hã karõ pa wa hwỳr tẽ. Wa ixte ma hwỳr o ixtẽm kaxyw. Anẽ.

Hāmri nhũm mẽ wa kãm:

—Tỳ? Tõe wa mãmri ma kãm o tẽ. Anẽ.

⁷Hāmri nhũm wa ma akupỹm Jejus wỳr o tẽ. Hāmri nẽ kaxyw amnhĩ xê hkwỳ hkwry nẽ kãm ho hkõ kahty hpa nẽ kãm ho htỳx nẽ o xa nhũm Jejus hã nhỹ nẽ mõ. ⁸Nẽ kormã Jerujarẽ hwỳr hixêt ã àpir o mõ. Nhũm mẽ kot omunh o kuhê xwỳnhjaja hkĩnh nẽ ma hkukamã pry ho mex kaxyw amnhĩ xê hkwỳ hkwry nẽ ho kãm uty. Nhũm mẽ hkwỳjaja nhỹri põ hkwỳ jakà nẽ o mra nẽ hkukamã kãm uty. ⁹⁻¹⁰Nhũm mẽ hixêt ã api nẽ ahpãr mã wryk o mõ nhũm mẽ piitã kàx pẽ Tĩrtũm mex o mex ã harẽnh o hkõt mõ. Nhũm mẽ hkwỳjaja kukamã mra nhũm mẽ hkwỳjaja hapu hã mra nhũm prem piitã hkõt Tĩrtũm mex o mex ã harẽnh o mõ. Nẽ harẽnh o:

E ota Tĩrtũm kot mẽ pahwỳr mẽnh xwỳnhhta ra pøj. Nà ãm hãmri na mẽ pahwỳr wry. Ja mex kumrẽx.

Kêp mẽ panhõ Pahшти mex na. Koja mẽ panhĩgêt pahi Tawi pyrã nẽ mẽ pahto amnhĩptã nẽ mẽ pahto mex o pa.

Ãm hãmri na Tĩrtũm mẽ pahwỳr kumẽ.

Tĩrtũm mex kumrẽx. Ãm mex o mex. Kukwak ri pix mã na pu htem pajamakêtkati nẽ paxãmnhĩx papa rãhã ho papa.

Anhỹr o Jejus kõt harẽnh o mõ. Kot mẽ ho amnhĩptãr kurê kumrẽx ã hkamnhĩx nẽ hkĩnh nẽ ã hkõt kapẽr anhỹr o mõ. ¹¹Jao ra Jerujarẽ hwỳr pøj nhũm Jejus Tĩrtũm mã amnhĩ jarẽnh xà hã ixkre hwỳr tẽn axà. Nom nhũm ra amỹkry htỳx jakamã nhũm hwỳr axà nẽ ãm hkre pumunh o xa hãmri nẽ akupỹm kato nẽ hkõt mẽ pa ho mẽ pa

xwỳnh pẽ 12jẽ mẽ nhũm mẽ ma akupỹm Petãn wỳr mra.

Jejus kot pĩ hpàr pẽ fikêhti mã kapẽr ã harẽnh

Matêwre 21.18-22

¹²Tã nhũm apkati nhũm Jejus mẽ hkõt mẽ pa ho pa xwỳnhjẽ mẽrohã Petãn rũm hapøj nẽ ma akupỹm Jerujarẽ hwỳr mra. Nhũm Jejus ra kãm prãm nẽ mõ. ¹³Hãmri nẽ amỹm mẽmo pĩ hpàr hõptĩ rax pẽ fikêhti pumu nẽ hamaxpẽr o:

—E pa hwỳr tẽ nẽ ô hkwỳ rê nẽ kuwô mãn. Anẽ.

Hãmri nẽ hwỳr tẽ. Nhũm kormã ô kaxyw õ mytwry kator kêt jakamã nhũm ô hkêt nẽ ãm hô pix nẽ xa. ¹⁴Hãmri nhũm hwỳr tẽ nẽ tee ri ô japêr nẽ ãm hô pix pumu. Hãmri nẽ tee ri omu nẽ kãm:

—E kot kaj axte axô hkêt kumrẽx.

Anhỹr o kãm kapẽr nhũm hkõt mẽ pa ho mẽ pa xwỳnhjaja hã kuma.

Jejus kot Tĩrtũm nhõrkwỹ hwỳr àr ã harẽnh

Matêwre 21.12-17; Rukre 19.45-46; Juãw 3.13-22

¹⁵⁻¹⁷Tã nhũm Jejus mẽ hkõt mẽ pa ho mẽ pa xwỳnhjaja Jerujarẽ hwỳr agjẽ nẽ Tĩrtũm mã amnhĩ jarẽnh xà hã ixkre hwỳr agjẽ. Nhũm Jejus tee ri kamã mẽ kuhê xwỳnhjẽ pumu. Nhũm mẽ ra ixkre kamã axtem nẽ môx nẽ ôwêhti nẽ tuuti ho wẽnê ho kuhê. Ixkre hwỳr mra xwỳnhjaja kot haprõr nẽ Tĩrtũm mã amnhĩ jarẽnh kaxyw kãm hpar nẽ õr kaxyw mẽ kãm ho wẽnê. Nom axtem nẽ hã ohtõ rax kãm mẽ kãm ho wẽnê nhũm mẽ hkwỳjaja mẽ kãm mẽ hikãxpore ho anhĩpa. Hãmri nhũm Jejus mẽ hwỳr axà nẽ tee ri mẽ kot ã amnhĩ nhĩpêx anhỹr ã mẽ omu nẽ mẽ kãm akir nẽ mẽ kãm:

—Tk. Kwa Tĩrtũm kapẽr ã kagã htũm kot õrkwỹ jarẽnh kot:

Inhõrkwỹja ãm pika piitã hkõt mẽ piitã kot inhmã amnhĩ jarẽnh xà hã ixkre pix kaxyw na.

Anhỹr o kot harẽnh tã ka mẽ axtem nẽ kamã ã amnhĩ nhĩpêx anhỹr o akuhê. E kwa mẽ ma mra nẽ ajapõx tokyx anẽ. Anẽ.

Nhũm pre ã mẽ kãm kapẽr anhỹr pẽ mẽ ahkre hãmri nẽ ixkreja nẽ mẽ kator pa. ¹⁸Hãmri nhũm patre krãhtũmjẽ mẽ Tĩrtũm kapẽr tũm o mẽ ahkre xwỳnhjaja tee ri ã mẽ hipêx anhỹr ã omu nẽ kapẽr ma nẽ kamã

gryk tỳx nē. Hāmri nē mē kot hã àmnênh kaxyw tanhmã axpên mar to nē axpên mã:

—Tk. Kwa na mē ohtô nē kãm mar prãm nē. Koja mē anē nē gryk ã mē pahkaga nē axte mē pakapêr mar kêt nē. Kwa pu mē kupi ri. E tanhmã kot puj mē ho nē kupi? Anē.

¹⁹ Tã nhũm myt axà nhũm Jejus mē hkôt mē pa ho pa xwýnhjaja Jerujarê rũm hapôj nē ma nhýri amnhĩm hikranh kaxyw mra.

Mē pahte tanhmã mēmoj tã Tirtũm wýr to hã mē pamã karõ

Matêwre 6.14-15, 17.20; Makre 11.13; Juãw 14.13; mãânêñ Xiakre 1.6; Wam Juãw 3.22

²⁰ Tã nhũm apkati nhũm Jejus mē hkôt mē pa ho mē pa xwýnhjaja Jerujarê hwýr akupým mra. Hāmri nē axte pĩ hpàr pē fikêhtita pumu. Jejus ra kot kãm kapêr xwýnhhta pumu nhũm ra grà pa nē xa. ²¹ Hāmri nhũm Simãw Pêtre Jejus kot tanhmã pĩ mã kapêr toja mã hamaxpêr nē hã kãm:

—Kwa mē ijahkre xwýnh. Ga mēmoj mũj pumu. Jãã ate fikêhti mã akapêr xwýnhhta na grà par kumrêx nē xa. Anē.

²²⁻²³ Hāmri nhũm kuma nē mē piitã mē kãm:

—Tỳ nã ãm hāmri na pa mē amã ixkapêr. Kot kaj mē mēmo kaxyw Tirtũm mã ajamaxpêr tỳx pē mēmoj tã awý nhũm ama nē amã hprãm xà hkôt tanhmã amã hipêx to. Ka mē amnhĩ kaxyw Tirtũm mã ajamaxpêr tỳx pē hixêt mũj mã akapêr nē kãm: “E xa nē ma tē nē gô xujanãr kãm mrõ.” Anhýr o kãm akapêr nhũm amar xà hkôt ã amnhĩ nhĩpêx anē nē tēn kamã mrõ. ²⁴ Kot kaj mē mēmoj tã Tirtũm wý nē kaxyw ãm pix mã ajamaxpêr tỳx nē nhũm amã ho anē.

²⁵⁻²⁶ —Nē kot kaj mē Tirtũm mã amnhĩ jarênh kaxyw nē ra mēhõ kot tanhmã ato mã ajamaxpêr. Hāmri nē ja ho ajamakêtkati kurê kumrêx nē axte kãm ajamaxpêr kêt nē. ãm mēmoj nyw pix mã ajamaxpêr o tãm amnhĩ nhĩpêx o apa. Hāmri nhũm Tirtũm kaxkwa rũm ja hã apumu nē apyrà nē ate tanhmã amnhĩ tomnuj to ho hamakêtkati nē axte kãm hamaxpêr kêt nē. Anē.

Mēhõ kapêr kôt Jejus kot mē ahkre hã mē kot hkukjêr

Matêwre 21.23-27; Rukre 20.1-8

²⁷ Nhũm mē akupým Jerujarê hwýr agjê nhũm Jejus kê axte Tirtũm mã amnhĩ jarênh xà hã ixkre hwýr axà. Nhũm hkôt mē pa ho mē pa xwýnhjaja hkôt hwýr mra nē hkôt agjê nē kormã kamã kuhê. Hāmri nhũm Ijaew krãhtũmjê mē mē kot Tirtũm kapêr tũm o mē ahkre xwýnh mē mē õ patre krãhtũmjaja Jejus pumu nē hwýr mra nē hêx rom tanhmã kãm kapêr to. Na pre ra Jejus ixkreja nē mēmoj to wēnê xwýnh mē kãxpore o mē hpinhpanh xwýnhjê jano nhũm mē tee ri ja hã omu nē kamã gryk tỳx nē. Jakamã nhũm akupým mē hwýr axà nhũm mē axte omu nē hwýr mrar kurê kumrêx ²⁸ nē kãm:

—Kwa mē inhmã amnhĩ jarê. Mēhõ nhý hã na ka hte ã amnhĩ nhĩpêx anhýr o ri apa? Mēhõ na pre mē ixwýr amē ka pre mõ? Nà xà amnhĩ krã hkôt na ka hte ã amnhĩ nhĩpêx anhýr o ri apahti? E kwa mē inhmã amnhĩ jarê. Anē.

²⁹ Nhũm Jejus kot tanhmã mē hamaxpêr to hkôt mē omunh mex jakamã mē kãm:

—Nà kot pa ixkumrêx mēmoj tã mē akukja. Ka mē inhmã harê pa rĩ kormã mē amã tanhmã amnhĩ jarênh to. ³⁰ Finat Juãw Paxisja ã kot paj mē akukja. Mēhõ nhý hã na pre hte mē hkrã kumrãr o pa? Xà amnhĩ krã hkôt nã xà Tirtũm nhý hã? E mē atõ inhmã harê. Anē.

³¹⁻³² Hāmri nhũm mē kuma nē tee ri kot tanhmã kutã kãm harênh to hkukamã hamaxpêr nē axpên mã:

—Kwa tanhmã kot puj mē kãm ja jarênh to? Mē kot mar o kuhê xwýnhjaja na htem Juãw Paxis kêp Tirtũm nhý hã kapêr jarênh xwýnh ã axpên mã harênh o pa. Jakamã kot puj mē kãm kot amnhĩ krã hkôt mē hkrã kumrãr o pa hã harê nhũm mē tee ri mē pama nē mē pakamã gryk nē. Nē mē paxêx rom ã kãm mē pakapêr anhýr ã mē pahpumu nē kên o mē pahtak o mē panhĩmex. No kot puj mē kãm Tirtũm nhý hã mē hkrã kumrãr ã harê nhũm mē pama nē mē pamã: “Kwa ã kot anhýr kênã na ka prem kapêr mar tã ixkôt amnhĩ xunhwýr kêt nē?” Anē. Nà kot puj pêr mē kãm tanhmã harênh to hkêt nē. Kot puj mē ãm

kãm aa te mẽ pahte ja jarënh mar kêt pyræk o harë. Anë.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kaprý ho kuhê.

³³ Hãmri nẽ Jejus mã kãm:

—Konën. Mẽ ixte mẽhõ nhỹ hã kapër o pa hã omunhre hã. Anë.

Hãmri nhũm mẽ kuma nẽ mẽ kãm:

—Tk. Tôe kot pa xep ijaxwýja mẽ amã tanhmã amnhĩ jarënh to hkêt nẽ. Ijaxwýja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anë.

12

*Mẽ àpênh punuj xwýnhjê jarënh
Matêwre 21.33-46; Rukre 20.9-18*

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapër tũm o mẽ ahkre xwýnhjê mã kapër o xa. Nẽ mẽ kãm mẽ kot tanhmã hipêx to hkukamã mẽ kãm tanhmã amnhĩ jarënh to. No ãm hã kuxi nẽ mẽ kãm awjarê nẽ mẽ kãm:

—Koja mẽhõ hpur ã hkwýjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwýr mra nẽ kamã mẽmo hy hkre nẽ hkre pa. Hãmri nẽ pu hã kahê hpa nẽ pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nẽ hipêx pa nhũm mẽõ patrãwja awry hã krĩ hõ hwýr nojarêt nẽ mẽ kãm tanhmã hpur jarënh to nẽ mẽ kãm: “E or ixpurta nõ. Kê kamã mẽmoj kà hpa ka mẽ mãmrĩ kamã awjamý nẽ ho axkjê. Hãmri nẽ ixkutêp inhõ jaxwý nẽ mãmrĩ anhõ tanhmã ho hprãm xà hkôt tanhmã ho.”

—Anhỹr o mẽ kãm kapër hãmri nẽ ma mẽõ. ² Tã nhũm ra pur kãm mẽmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwýnhjê hõja nhũm akupým mẽ hwýr kumê. Mẽ kot kãm õ hkwý nhõr nhũm ma kot kãm o mõr kaxyw ma mẽ hwýr kumê nhũm ma akupým mẽ hwýr mẽõ. Mõõ nẽ ra mẽ hwýr pøj. ³ Hãmri nhũm mẽ omu nẽ axtem nẽ homnuj nẽ. Nẽ unê nẽ htak nẽ akupým hano nhũm ý kamã ma akupým mẽõ. ⁴ Hãmri nhũm õ patrãwja tee ri omu nẽ

hpãnhã ja mẽ nhũm ma mẽ hwýr mẽõ. Mõõ nẽ mẽ hwýr pøj. Hãmri nhũm kê wem omu nẽ mã ho anê nẽ. Unê nẽ htak nẽ hkrãx pê htak nẽ akupým hano nhũm wamta pyrã nẽ ma akupým ý kamã mẽõ. ⁵ Hãmri nhũm axpên pãnhã kãm mẽ àpênh xwýnh kwýjê rẽ nhũm mẽ axpên pãnhã ma mẽ hwýr pa. Ma mẽ hwýr pa nẽ pøj nhũm mẽ te ho wantajê mẽ hipêx pyrã nẽ mẽ hkwýjê pynê nẽ htak rax nẽ mẽ hano nẽ mẽ hkwýjê pa. ⁶ Nhũm mẽ õ patrãw mẽ harënh ma nẽ tee ri amnhĩ kukamã hamaxpêr nẽ hamaxpêr o: “Hêxta waa nẽ. Tanhmã kot paj we amnhĩ nhĩpêx to nẽ inhõta kwý jamý? Nà kot paj mẽ hwýr ixkraja mẽ. Inhmã hapê htã kot paj mẽ hwýr kumê kê ma mẽ hwýr mẽõ. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ jatã inhmã kãm inhõja kwý gõ nhũm man ixwýr o tẽ. Nà kot paj anë.”

—Anhỹr o hamaxpêr hãmri nẽ ma mẽ hwýr hkraja mẽ nhũm ma mẽ hwýr mẽõ.

⁷ —Tã mẽ hwýr hpõx o mẽõ nhũm mẽ amým amnhĩ wýr omu nẽ kêp hkra hã omunh kurê kumrêx nẽ hã axpên mã amýnê nẽ axpên mã: “E. Nà oněj hpur nhõ dõn krata tẽ. Koja nhỹrmã õ papaj mýrpê amnhĩm pur ã pyka pytà nẽ ho õ. Jakamã e pu mẽ kupĩ nẽ kêp hpur ho arĩk nẽ ho panhõ. E kwa tokyj pu mẽ kupĩ ri.” Anë.

⁸ —Rõm nhũm ra mẽ hwýr hpõx o tẽ nẽ ra pøj nhũm mẽ unê nẽ pur nẽ ho kato nẽ ahkà kamã kupĩ. ã mẽ ujarënh kot anhỹr. Anë.

⁹ Nhũm pre ã Jejus Ijaew krãhtũmjê mã ujarënh anë. Hãmri nẽ hã tanhmã mẽ hkukjêr to nẽ mẽ kãm:

—E mẽ inhmã mẽmoj jarê. Koja pur nhõ dõnja tee ri mẽ kot hkra hpĩr ã harënh ma hãmri nẽ tãm mẽ hwýr mẽõ hãmri nẽ tanhmã mẽ hipêx to wehe? Nà koja ma mẽ hwýr mẽõ nẽ mẽ himex pa hãmri nẽ hpãnhã nhãm hpurta ã mẽmojjê rẽ. ¹⁰ Mãn ka prem ra Tĩrtũm kapër ã kagà htũm kot ja jarënh ma nà? Harënh kot:

Na prem kên o amnhĩm õrkwý nhĩpêx kaxyw hãmri nẽ kên maati pumu nẽ htýx omnuj ã hkamnhĩx nẽ hkaga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

11 ãm hãmri na pre ã mex ã omunh anẽ.
Anẽ.

Ã Tirtũm kapẽr ã kagà htũm kot harẽnh kot anhÿr. Anẽ.

12 Nhũm pre ã Jejus mẽ kãm ujarẽnh kãm mẽ harẽnh anẽ nhũm mẽ amnhĩ tã kuma. Tirtũm kapẽr tũm o mẽ ahkre xwÿnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kẽn maati kaga xwÿnhjẽ jarẽnh o te mẽ tãm harẽnh pyrãkja ma nhũm ja mẽ kęp omnuj nẽ. Jakamã nhũm mẽ kãm unẽnẽ nẽ haxàr prãm nẽ. Nom amnhĩ tã kãm mẽ kot mar o kuhẽ xwÿnhjẽ puma nẽ. 13 Jakamã na prem ma mra nẽ hapõj hãmri nẽ Jejus wÿr Parijew nhõ xwÿnh mẽ pahi Eroxo kõt mẽ pa xwÿnh kwÿjẽ rẽ. Mẽ kot hẽx rom mẽmoj tã hkukjẽr nhũm kot mẽ mar nẽ tanhmã Rõm nhõ xwÿnhjẽ nhõ pahi Sesti kapẽr kuhpa hã ri tanhmã mẽ kãm nẽ nhũm mẽ kot mar kaxyw. 14 Jakamã nhũm mẽ ma hwÿr mra nẽ hẽx rom kãm kapẽr nẽ kãm:

—Kwa Jejus? Nà ãm hãmri na ka hte Tirtũm kapẽr o mẽ ahkre mex nẽ. Na ka hte mẽ kamã akahak o apa hkêt nẽ. Nẽ mẽ kot tee ri mẽ kot tanhmã ato kapẽr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarẽ. Rõm nhõ pahĩti kot mẽ pahpẽ Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nã? Xà kot pu mẽ kãm kugõ? Xà kot pu mẽ kãm õr kêt nẽ? E kwa mẽ inhmã harẽ. Anẽ.

15 Nhũm prem ã hẽx rom ja hã hkukjẽr anhÿr tã no nhũm Jejus mẽ hamaxpẽr ã mẽ omunh mex mẽ mẽ kãm:

—Tk. Kwa mon ka mẽ axẽx rom ja hã ixkukja? E mẽ atõ inhmã kàxpore htÿxre hõ gõ pa omu. Anẽ.

16 Hãmri nhũm ja kãm ja gõ nhũm kupy nẽ kãnhmã kupẽ nẽ mẽ kãm:

—E mẽhõ nhĩxi nẽ mẽhõ karõ na hã? Anẽ.
Anẽ nhũm mẽ kãm:

—Pahi Sesti karõ nẽ hixi na hã.

17 Anẽ nhũm mẽ kãm:

—Tÿ. Tô kër ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipẽx xwÿnh jakamã õ na. No mẽ kajaja na pre Tirtũm mẽ anhĩpẽx nhũm mẽ apẽ õ jakamã kwa kër ka mẽ kapẽr kõt pix mã ri amnhĩ nhĩpẽx o ri apa. Anẽ.

Nhũm pre ã mẽ kãm kapẽr anẽ nhũm mẽ piitã mar o kuhẽ. Nhũm mẽ kot hẽx rom hkukjẽr xwÿnhjaja amnhĩ jaẽr pẽ ã kàxpore jarẽnh anhÿrja ã kuma nẽ axpẽn mã:

—Kwa mẽ paxẽx rom mẽ pahte hã hkukjẽr tã nhũm ãm hãmri mẽ pakutã mẽ pamã harẽ. Kwa tanhmã kot puj wem hkukjẽr to nhũm pahi Sesti kapẽr kwÿm ri mẽ pamã mẽmoj jarẽ? Anẽ.

Hãmri nẽ tee ri tanhmã hkukjẽr to hkukamã hamaxpẽr o kuhẽ.

Akupÿm mẽ htĩr xwÿnhjẽ jarẽnh

Matêwre 22.23-33; Rukre 20.27-40; Juãw 6.21, 6.38-40; mããnẽn Wam Korĩt 6.14, 15.12-28; Wam Tesarõn 4.13-18

18 Tã nhũm Satusew nhõ xwÿnh kwÿjaja. Mẽ kot akupÿm mẽ htĩr mã hamaxpẽr kêt xwÿnhjaja na pre mẽ. Tã mẽ kot mẽ htyk nẽ mẽ hapẽx ã mẽ hkamnhĩx jakamã na prem axpẽn mã Jejus jarẽnh o:

—E kwa pu mẽ ma hwÿr mra nẽ mẽmoj xihtÿx ã hkukja kẽ mẽ pama nẽ tee ri tanhmã mẽ pamã kapẽr to hkukamã hamaxpẽr. Hãmri nhũm mẽ piitã ja hã omu nẽ àhpumunh kêt ã omunh kurẽ kumrẽx. E tokyx ma pu mẽ hwÿr. Anẽ.

Hãmri nẽ ma hwÿr mra nẽ Parijew nhõ xwÿnhjẽ pyrã nẽ hẽx rom kãm:

19 —Pa Jejus? Kwa mẽ inhmã mẽmoj jarẽ. Na pre finat Mojesja Tirtũm nhÿ hã ã mẽ panhĩgêtjẽ mã karõ anẽ. Mẽ hkra hkêt rãhã mẽ pa nẽ mẽ htyk xwÿnhjaja nhũm mẽ harẽnh o:

Koja mẽhõ hprõ hãmri nẽ kamã hkra hkêt rãhã pa nẽ ty. Hã koja hkõt htõja hpãnhã hprõ o hprõ nẽ kamã hkra. Hãmri nhũm kato nẽ te kęp htõ htyk xwÿnhhta hkra pyrãk. Anẽ.

Na pre ã Mojes Tirtũm nhÿ hã ja hã mẽ kãm karõ anẽ. 20 Jakamã kwa ga mẽ ixujarẽnh ma. Koja mẽmojjaja mẽ kot axpẽn to htõ xwÿnhjaja kęp 7. Nhũm kot waja hprõ. Nẽ wa pa nhũm myja kormã hprõ kamã hkra hkêt rãhã ty. 21 Nhũm hkõt htõ hõta hpãnhã hprõ ho hprõ nẽ wa axpẽn to pa. Nhũm haxwÿja kamã hkra hkêt rãhã ty. Nhũm hkõt htõ hõta haxwÿja ho hprõ nẽ wa axpẽn to pa grire nhũm wamta wa urãk nẽ kamã hkra hkêt rãhã ty. 22 Hãmri nhũm htõ hkwyjaja piitã nija pyxi nẽ axpẽn pãnhã ho

hprõ nom mēhõ kamã hkra hkêt rãhã htyk pa. Hãmri nhũm mē hprõta mē hkõt amnhĩ to hitep nē ty. ²³ Tã Tĩrtũm kot akupỹm nhỹrmã mē ho htĩr ronhỹx nhỹ nhỹx kēp nija mjēn kumrēx? Ra piitã kot ho hprõ kēnã. E kwa mē inhmã ja jarē. Anē.

²⁴ Hãmri nhũm Jejus ã mē ujarēnh anhỹrja ma nē mē kãm:

—Tk. Nã mē ate Tĩrtũm kapēr ã kagã htũm mar mex kêt. Nē mē aprĩ hã tanhmã Tĩrtũm kute hã omunh kêt jakamã na ka mē ã atỹx ja hã ixkukjēr anē. ²⁵ Kormã mē htĩr ri mē kot Tĩrtũm kõt amnhĩ xunhwỳr xwỳnhjaja na htem ty hãmri nē Tĩrtũm nhõ krĩ kamã axte kãm hprõ hprãm kêt pa. Rỳ ni japēr nē kãm mjēn prãm kêt nē pa. Hãmri nē Tĩrtũm kapēr o mē wrỳk xwỳnhjē pyrã nē axte htyk kêt nē. ãm htĩr tũm rãhã nē pa ho pa.

²⁶ —Nom mē ate akupỹm mē htĩr kêt ã mē hkamnhĩxja kot paj ixprĩ hã mē amã harē. Amnepēm na pre Tĩrtũm pĩ hpõk kamã tanhmã Mojes mã kapēr to. Mãn ra mē ate mar. Na pre kãm:

Ixpē Apraãw nhõ Tĩrtũm na pa. Nē mããnēn
ixpē Apraãw kra Ijak mē htãmnhwỳ
Jako wa õ Tĩrtũm na pa.

Anhỹr o Mojes mã amnhĩ jarē nhũm kuma nē hã kagã. ²⁷ Kēp apu arĩ mē htyk rãhã nhỹx pre ã mē harēnh anhỹr kêt nē. Nhỹx pre mē harēnh o: “Amnepēm Apraãw nē hkra nē htãmnhwỳ mē htĩr ri ixpē mē õ Tĩrtũm na pa pre.” Anhỹr o nhỹx pre mē harē. Nom na pre ã amnhĩ jarēnh anhỹr kêt nē. Mē pamã te Apraãwja mē htyk nē mē hapēx pyrãk. Nom nhũm prem ra Tĩrtũm ri akupỹm htĩr nē mex nē pa ho pa. Tã ka htem Tĩrtũm kapēr kwỳm ri akupỹm mē htĩr kêt ã mē harēnh o apa. Anē.

Tĩrtũm kapēr maati jarēnh

Matēwre 10.37, 22.34-40; Rukre 10.25-27; mããnēn Wam Juãw 2.15, 5.3; Apokarip 2.4

²⁸ Tã nhũm Tĩrtũm kapēr tũm o mē ahkre xwỳnhjē hõ mē hwỳr tē nē mē kot axpēn mã kapēr ã mē omunh o xa. Hãmri nē Jejus kot tanhmã Satusew nhõ xwỳnhjē mã kapēr mex toja ma nē kãm:

—Nã ãm hãmri na ka ã mē kãm ja jarēnh anē Pahĩti. Kwa inhmã mēmoj jarē. Na pre Tĩrtũm ahpỹnhã mēmoj to 10 nē mē

pamã hã karõ. Mē pahte hkõt amnhĩ nhĩpēx o ri papa kaxyw hã mē pamã karõ. Tã nhỹ kapēr na mex o kot hkwỳjē jahkrenh wehe? Anē.

²⁹ Hãmri nhũm kãm:

—Nã Tĩrtũm kapēr xohtõõ. Kapēr piitã hkõt mē pahte amnhĩ nhĩpēx o papaja na kãm hprãm. No pixi na mē pahte hkõt amnhĩ nhĩpēx o papaja nhũm kãm hprãm tỹx o kot hkwy jakrenh. Kapēr mex maati na ja. Na pre kapēr o:

E mē apē Ijaew nhõ xwỳnhjaja. Ixpē mē anhõ Tĩrtũm ã ixpaxi mex na pa.

³⁰ Jakamã kēr ka mē amã ixkĩnh tỹx o mēmoj piitã hakrenh pa. Jao mē anhĩ piitã ho amã ixkĩnh tỹx kumrēx o ri apa.

³¹ Anhỹr o na pre mē pamã karõ. Nē hkõt ja:

Kēr ka mē nhãm mē hipēx o te ka amã amnhĩ tã ma pyrãk o mē hipēx o ri apa. Jao tãm mē hipēx rãhã ho ri apa. Anē.

E ja wa kumrēx na Tĩrtũm kãm mē pahte hkõt amnhĩ nhĩpēx o ri papa hprãm tỹx nē. Anē.

³² Hãmri nhũm kuma nē kãm:

—Nã ãm hãmri na ka ja jarē Mēijahkre xwỳnh. Tĩrtũm pyxi mex kēnã. ³³ Amnepēm na pre htem kãm amnhĩ jarēnh kaxyw nē kãm mēmoj gõ nē rĩ kormã tanhmã kãm amnhĩ jarēnh to. Tã nom kot puj mē ã ate harēnh ta kõt amnhĩ nhĩpēx anhỹr o papa jao mē panhĩ piitã pamã Tĩrtũm kĩnh. Nē mē pamã hkĩnh o mēmoj piitã hakrenh pa. Nē nhãm mē hipēx o te mē papamjaja pamã amnhĩ tã ma pyrãk o mē hipēx. Jao tãm mē hipēx rãhã ho ri papa. Kot puj mē ã amnhĩ nhĩpēx anē nhũm Tĩrtũm kãm ja mex o mē pahte kãm mēmoj nhõrta jakre.

Anhỹr o kãm kapēr. ³⁴ Hamaxpēr mex pē ã Jejus mã kapēr anē nhũm kuma nē kãm:

—Nã ãm hãmri na ka ja jarē. Na ka ra mē kot Tĩrtũm kõt amnhĩ nhĩpēx o amnhĩ nhĩpēx nyw pumunh mex o mō. Nã te ate tokyx hkõt amnhĩ xãm kaxyw pyrãk. Anē.

Hãmri nhũm mē kãm hkurē xwỳnhjaja tee ri wa kot axpēn mã kapēr mar o kuhē nē axte kãm mēmoj tã hkukjēr pyma nē. Ra tee ri mē kot hēx rom mēmoj tã hkukjēr kaprỹ jakamã axte tanhmã hkukjēr to hkêt nē.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mãänên Rômân 1.3-4

³⁵ Hãmri nhũm Jejus arĩ Tĩrtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mēhõ hã mẽ hkukjêr pyræk amnhĩ tã mẽ hkukja nē mẽ kãm:

—E mẽ inhmã mẽmoj jarê. Tĩrtũm kapêr tũm o mẽ ajakre xwýnhjaja na htem tanhmã mẽ amã Tĩrtũm kot mẽ akaxyw ãm mã xwýnhjarênh to nē mẽ amã harênh o: “Koja kêp pahi finat Tawi kanrêhã htàmnhwý koja.” Anhÿr o kot mẽ amã harê. ãm kêp kanrêhã htàmnhwý pix ã mẽ amã harênh o pa. No na pre pahi Tawija kêp kanrêhã htàmnhwý hã harê nē mãänên kêp õ pahihti hã harê. Tã nom nhũm Tĩrtũm kapêr tũm o mẽ ajakre xwýnhjaja na htem urà nē kêp pahihti hã mẽ amã harênh kêt nē. ãm kêp kanrêhã htàmnhwý pix ã harê. Kwa mo na htem Tawi pyrà nē kêp õ pahi hã harênh kêt nē? ³⁶ Na pre Tawi tãm Tĩrtũm kapêr tũm kwý hã kagà nē tanhmã Tĩrtũm kot mẽ akaxyw ãm mã xwýnhja jarênh to. Tĩrtũm Karõ nhÿ hã tanhmã harênh to. Tĩrtũm mex ã mẽ grer xàja kwý hã kagà nē hã kagà ho: Tĩrtũm na pre inhõ Pahihti mã ã kapêr anê nē kãm: “E amnê ixwÿr tē nē inhĩhkõ hã nhÿ nē inhmã mẽ ho amnhĩptàr o akrĩ. Kot paj mẽ kot kãm akurê xwýnh piitã mẽ unênh pa nē awÿr mẽ o mra nē anhĩhkram mẽ haxàr pa.” Anhÿr o pre kãm kapêr. Anê.

³⁷—Na pre ã Tawi Tĩrtũm kot Kris mã kapêr jarênh nē kêp õ pahi hã kagà anê. Tã nom Tĩrtũm kapêr tũm o mẽ ajakre xwýnhjaja na htem kêp Tawi htàmnhwý pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwýnhjaja kuma nē hkĩnh nē. Nē kãm axte mar prãm nē.

³⁸ Hãmri nhũm arĩ mẽ ahkre ho nhÿ nē mẽ kãm:

—Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwýnhjê kot amnhĩ nhĩpêx o amnhĩ nhĩpêx kêt nē. Mẽ omu nē ãm mẽ omu nē mẽ kot amnhĩ nhĩpêx kêt amnhĩ nhĩpêx kêt nē. Na htem piitã mẽ hã hpiaàm kaxyw ê mex pix kãm

ri pa. Nē mẽ kot amnhĩm mẽ rũnh ã mẽ harênh nhũm mẽ kot amnhĩ jarênh marja na htem kãm hprãm. ³⁹ Nē Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwýnhjê hkrĩ xà mex pix kamã na mẽ kãm hkrĩ hprãm. Nē mẽmoj tã mẽ apkur xà hã arĩgro hã ma hkwyjê hkôt mẽ apkur xà hã ixkre hwÿr akuprõ nē kãm mẽ kot amnhĩ to rũnh xwýnhjê hkrĩ xà mex pix kamã hkrĩ hprãm.

⁴⁰ —Nē mẽ kot mẽ mjên htyk xwýnhjê ho mex o pa hã amnhĩ jarênh tã amnhĩ to hêx. Nē na htem axtem nē mẽ nokupyr kaxyw mẽ hwÿr mra nē mẽ kãm: “E ot pa awÿr ato ajuta kaxyw tē. Ra amjên apê htyk jakamã kot paj pam amã akukrêx jamãr o ixpa.” Anê hãmri nē mẽ kêp mẽ òrkwy pytà nē amnhĩm mẽ kêp mẽ hikukrêx piitã ho hapêx. Te tãm kot mẽ hipêx o pa pyræk nom tãm mẽ hipêx kêt nē. Nē te tãm amnhĩ nhĩpêx pyrà nē Tĩrtũm mã amnhĩ jarênh japjêê ho kuhê. Te mẽ kot Tĩrtũm mã ãm hãmri amnhĩ jarênh pyræk tã hkwyjaja kot ja hã mẽ omunh pix kaxyw nhũm mẽ ã kãm amnhĩ jarênh anê. Mÿrapê koja mẽ mex kêt nē. Koja Tĩrtũm tanhmã mẽ hipêx kati hto. Jakamã kwa kêr ka mẽ ã mẽ kot amnhĩ nhĩpêx anhÿr o mẽ pa xwýnhjê kêt amnhĩ nhĩpêx o ri apa hkêt nē. ãm kwarĩ ho kwarĩ. Anê.

Kêp mjên htyk xwýnhjarênh
Rukre 21.1-4

⁴¹ Nhũm Jejus arĩ Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew ixkreja o mex kaxyw ixkre jamãr xwýnhjê mã hikàxpore hkwy nhõr o pa. Nhũm mẽ hikàxpore rũnh xwýnhjaja hwÿr agjê nē kàxpore gjênh xà kamã hkwy ho rax nē hagjê nē ma akupÿm mra. ⁴² Tã nhũm mēhõ ni pē mjên htyk xwýnhja haxwÿja hwÿr axà. Kêp amrakati kumrêx. Nē hikàxpore tÿxre ãm pijakrutre htã kàxpore rũnh xwýnhjê hpãnhã ixkreta wÿr tē. Nē kãm Tĩrtũm kĩnh xàj kàxpore gjênh xà kamã hamê kumê hãmri nē kato nē ma akupÿm tē. ⁴³ Hãmri nhũm Jejus amÿm ã kot amnhĩ nhĩpêx anhÿr ã omunh o xa nhũm ja kãm mex nē. Hãmri nē hkôt mẽ pa ho mẽ pa xwýnhjê mã harê nē mẽ kãm:

—E măn ka mēnire htēm mŭj pumu. Na pre mjên kēp ty nhŭm kēp amrakati nē hikàxpore grire htā amnhĩ pē ōr pa. Kwỳjē rom kām Tĩrtŭm kĩnh xàj amnhĩ pē ōr pa. Apkur xà hã hikàxpore na. ⁴⁴ Kēt mẽ hkwyjaja na hte hikàxpore hkwy pix o mra nē gjēnh xà kamã hagjē nom arĩ mẽ hikàxpore rŭnh. No nija na mẽ urak nē kām hikàxpore japē hkēt nē. Nē ho ōxy hkēt nē amnhĩx piitã o tē nē ōr pa. Anē.

13

Jejus kot nhỹrmã mẽmoj piitã ho hapêx ã harēnh

Matêwre 24.1-14; Rukre 21.5-9, 21.17-19; mããnēn Wam Ximotre 4.1; Sikŭn Ximotre 3.1

¹ Tã hãmri nhŭm Jejus kôt mẽ pa ho mẽ pa xwýnhjaja arĩ Tĩrtŭm mã amnhĩ jarēnh xà hã ixkre kaxwýnh pumunh o kuhé nē hã Jejus mã:

—Hêxta waa nē. Ixkreja mex kumrēx Pahшти. Kēn rŭnh o mẽ kot hipêx jakamã mex o mex. Nē mẽ kot ri Tĩrtŭm mã hkĩnh xà nhōr nēj haxwýja piitã mex kumrēx. Anē.

² Hãmri nhŭm mẽ kām:

—Nà mex tã koja nhỹrmã mẽ kām Tĩrtŭm kurē xwýnhjaja granh pa. Koja arĩ kēn axkrutre axpēn mýnh nē nōr kēt kumrēx. Koja piitã angrã nē ahpýnhã ri hikwý.

Anhỹr o mẽ kām kapēr. ³ Hãmri nē ixkreja rŭm kato nē ma tē nē hixēt pē Oriwēhti hã api nē hã nhỹ. Tĩrtŭm nhōrkwý kutã hixētja nhŭm hã api nē hã nhỹ. Hãmri nhŭm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nē mẽ kot Tĩrtŭm mã amnhĩ jarēnh xà hã ixkre granh par ã hkukja nē kām:

⁴ —Kwa xà ãm hãmri koja mẽ ã ixkreja nhĩpêx anē? E aprĩ hã mẽ inhmã harē. Xà koja mẽ nhỹrmã kugrà nà xà koja mẽ tokyx ho anē? Kwa mẽmo koja we wýj ri tanhmã amnhĩ nhĩpêx to? Anē.

⁵⁻⁶ Hãmri nhŭm mẽ kām:

—Nà kot paj mẽ amã harē. Nom nhỹrmã mẽmoj piitã hapêx kaxyw tanhmã amnhĩ nhĩpêx to kumrēx kot paj mẽ amã harē ka mẽ inhma. Koja mẽ ohtô nē mẽ apē ixkwýjē hwýr mra nē hêx rom te pa ixte amnhĩ nhĩpêx pyrãk o amnhĩ nhĩpêx o pa. Nē tanhmã mẽ amã amnhĩ jarēnh to nē mẽ

amã: “E pa na pre Tĩrtŭm mẽ awýr inhmē. Ixpê kaxkwa rŭm ixwryk xwýnhhta na pa.” Anhỹr o mẽ akôt mẽ amã amnhĩ to hêx o pa. Nē mẽ amã: “E na pa mẽ ato amnhĩptãr kaxyw mẽ awýr wrý.” Anhỹr o mẽ amã amnhĩ jarē. Nom kēr ka mẽ ama nē ãm mẽ ama. Mẽ kot amnhĩ to hêx xwýnh na mẽ. Kormã akupýn ixpôx xà hã arĩgroja kormã.

⁷ —Nē koja mẽ nhỹri awry hã axpēn par o pa. Nē mẽ atãã axpēn par o pa. Nom kēr ka mẽ harēnh ma nē ri tee ri tokyx mẽmoj piitã hapêx ã hkamnhĩx kēt nē. Mẽmoj piitã hapêx xà hã arĩgroja kormã.

⁸ —Nē koja mẽmoj piitã hapêx kaxyw nhŭm ahpýnhã ri pika piitã hkôt mẽ pa xwýnh piitã pika hō nhō xwýnhjē kutã amnhĩ xunhwý nē axpu nē axpēn pa.

—Nē koja pika piitã hkôt tanhmã mẽ ã kuteja mẽ hamý nhŭm mẽ amnhĩ xà htýx kām hamak o pa. Nhŭm nhỹri pika htertēt týx nē. Nē nhỹhýnh pika hkwy kamã mẽ pa xwýnhjaja prãm xàj pikaprãr pa. Tã nom kormã mẽ kot amnhĩ xà htýx kām hamak xà hkrax pix na ja. Te mēnijaja pijagri kaxyw nē kormã ōhy xà hpýnh pyrãk. Koja mẽmoj piitã hapêx kaxyw nē ã amnhĩ nhĩpêx anē.

⁹ —E pa hpãnhã mẽ kot Tĩrtŭm mã amnhĩ jarēnh xà hã ixkre granh par xwýj ri mẽmoj tanhmã kot hkukamã amnhĩ nhĩpêx to hã hã harē. Mẽ ate hã ixkukjêr xwýnhhta kot paj mẽ amã harē. Nà koja mẽ kām ixkurē xwýnhjaja mẽ awýr mra nē ixtã mẽ apyné nē mẽ atomnuj nē. Nē ma mẽ pikuprōnh xà hã ixkre hwýr mẽ ato mra nē kamã mẽ kām mẽ ato kapēr punuj nē nhŭm mẽ kuma nē ma mẽ ato mra nē mẽ ajagjē. Mẽ ate ixkôt apa ho apa xwýnh ã ã mẽ anhĩpêx anē. Nē mẽ ō pahшти hwýr mẽ ato mra nē mẽ kām tanhmã mẽ ato kapēr punuj to.

¹⁰ Tã nom kwa kēr ka mẽ kutã akuhé nē mãmrĩ tãm mẽ kām ijarēnh o akuhé. ¹¹ Nom kēr ka mẽ kām amnhĩ jarēnh kukamã tee ri ajamaxpēr o ri amã mẽ uma hkēt nē akuhé. Rý mẽ ajamaxpēr o: “Hêxta waa nē. Mẽ kot ixkukjêr ã arĩgrota ã tanhmã kot pa we ri mẽ kām amnhĩ jarēnh to?” Anhỹr o tee ri amnhĩ kukamã ajamaxpēr kēt nē. Koja Tĩrtŭm Karō tanhmã mẽ akrã hto ka mẽ ý hã akatãt kôt tanhmã mẽ kām amnhĩ jarēnh to.

12 —Ně mẽ atō ně mẽ anhĩpêêxà ně mẽ akrajaja koja mẽ ixtā mẽ atā am̃nê ně ma pahi hw̃ỹr mẽ ato mra ně kām mẽ ajarē nhũm mẽ kuma ně mẽ ajagjê ně mẽ akw̃ỹjê pa. 13 Koja mẽ piitā ixkôt mẽ akamā gryk ně ã kām mẽ akurê ho pa anê. Nom mẽ kot ã mẽ anhĩpêx anh̃ỹr m̃ã tã kêr ka mẽ amnhĩ to ht̃ỹx ně ixkaga hkêr ně. Mẽ kot mẽ apar tã ka mẽ kaxkwa kamā akup̃ỹm atĩr kurê kumrêx. Hãmri ně mẽ kurom Tĩrtũm mẽ wa ixri atĩr tũm ně amex rãhã ně apa ho apa. Mẽ kot tanhmã mẽ ato htã mẽ apê akup̃ỹm kaxkwa kamā atĩr tũm ně apa m̃ã xw̃ỹnh jakamã kwa tee ri amnhĩ kukamã ajamaxpêr o ri apa hkêr ně. Anê.

Mẽ pahtomnuj t̃ỹx xw̃ỹnh maati hã harênh

Matêwre 24.15-28; Rukre 21.20-24; m̃ãñnêñ Sikũn Tesarõn 2.3-4; Apokarip 13.11-17

14-16 Nhũm Jejus arĩ mẽ kām kapêr ně mẽ kām:

—Ně koja nh̃ỹrmã kot mẽ atomnuj t̃ỹx kumrêx xw̃ỹnh maatija axtem ně Tĩrtũm m̃ã amnhĩ jarênh xà hã ixkreja kamā amnhĩ xãm. Hãmri ka mẽ ja hã omu ně mẽ kot krĩ grãnh par m̃ã ajamaxpêr kurê kumrêx. Koja ã amnhĩ nhĩpêx anê ka mẽ am̃ỹm amnhĩ w̃ỹr mẽ omu hãmri ně ajapôj ně ma aprôt ně amrar kurê kumrêx. Mẽ apê jar pika pê Jutej kamã mẽ apa xw̃ỹnhjaja mẽ omu hãmri ně mẽ kot mẽ apar pymaj ma aprôt ně amrar kurê kumrêx. Hixêt prêk w̃ỹr ajapôj ně aprôt ně ma mra. Ně jar Jerujarê nhõ xw̃ỹnhjaja kê mẽ umaj haxw̃ỹja hapôj ně ma hprôt ně ma mrrar o mra. Ně kapôt ã ri mẽ pa xw̃ỹnhjaja kê mẽ ê jam̃ỹnh kaxyw akup̃ỹm krĩ hw̃ỹr gjêx kêt ně. ãm ma mẽ umaj hprôt ně mrrar o mrrar kurê kumrêx.

17 —Ně mẽ htujarô xw̃ỹnhjaja ně mẽ hkra karãre xw̃ỹnhjaja. Jajê pê koja mẽmoj omnuj t̃ỹx ně. Tanhmã kot wem amnhĩ to ně hprôt t̃ỹx? Nã pika ja kamã koja mẽ mex kêt ně. Mẽ kot amnhĩ tomnuj m̃ỹrapê koja Tĩrtũm tanhmã mẽ homnuj t̃ỹx to.

18-19 —Koja ã mẽmoj amnhĩ nhĩpêx anê hãmri nhũm mẽ piitã amnhĩ xà ht̃ỹx kãm hamak rũnh o pa. Tĩrtũm kot mẽ piitã mẽ ho kator krax rũm amnê mẽ pa xw̃ỹnhjaja na mẽ kormã à ht̃ỹx kamã hamak rũnh

kêt ně. Kormã amnhĩ xà kamã hamak kryre. No nh̃ỹrmã mẽ hprôt xà hã arĩgrota ã koja mẽ amnhĩ xà ht̃ỹx kamã hamak rax kumrêx.

—Tã akup̃ỹn ixte mẽ aw̃ỹr ixw̃ỹrk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anh̃ỹr pumunh kêt ně. Nom kormã akup̃ỹn ixw̃ỹrk xw̃ỹj ri kot kaj mẽ amnhĩ xà ht̃ỹx kamã ajamak o apa. Jakamã kêr ka mẽ ã amnhĩ nhĩpêx anh̃ỹrja kukamã amnhĩ to Tĩrtũm w̃ỹr ně kãm: “Pa Tĩrtũm. Kwa kê mẽmoj ã amnhĩ nhĩpêx anh̃ỹr kaxyw hãmri kê amgrà pê ã amnhĩ nhĩpêx anê. Koja na pê ã amnhĩ nhĩpêx anê nhũm omnuj t̃ỹx ně.” Anh̃ỹr o amnhĩ to aw̃ỹ.

20 —Mẽ hprôt xà hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anê mẽmo punuta ã arĩgro hkw̃ỹ grã ně mẽ akukamã mẽ amã ho grêre. Koja mẽ akamã ukapri xaj ã mẽ anê hipêx anê.

21 —Ně koja ã mẽmoj amnhĩ nhĩpêx anh̃ỹr kaxyw hãmri nhũm mẽ hêx o mẽ pa xw̃ỹnhjaja ma mẽ aw̃ỹr mra ně hêx rom tanhmã mẽ amã kapêr to ně mẽ amã: “E ota ra Tĩrtũm kot mẽ pakaxyw ãm xw̃ỹnhnta pøj. Kwa mẽ tokyx hw̃ỹr mra ně omu ně hkôt ri apa.” Anh̃ỹr o mẽ amã hêx. Hãmri nhũm mẽ hkw̃ỹjaja tee ri mẽ kuma ně mẽ amã: “Nã tãm kêt. Jar mẽ ixkamã na. E mẽ tokyx amnê hw̃ỹr m̃ãñ mra ně omu.” Anh̃ỹr o mẽ amã hêx o pa. Nom kêr ka mẽ ama ně ãm mẽ ama ně mẽ hkôt amrar kêt ně.

22-23 —E kwa mẽ inhma. Na pa ra ixpri hã mẽmoj kot ã amnhĩ nhĩpêx anh̃ỹrja kukamã mẽ amã tanhmã harênh to. Tã kêr ka mẽ axkãm ajamak rom ně ri apa. Koja mẽ kot amnhĩ to hêx xw̃ỹnhjaja axpên pãnhã mẽ aw̃ỹr mra ně mẽ amã kêp Tĩrtũm kot mẽ akaxyw ãm xw̃ỹnh ã amnhĩ to hêx. Ně mẽ hkw̃ỹjaja kêp Tĩrtũm nh̃ỹ hã kapêr jarênh xw̃ỹnh ã amnhĩ to hêx. Hãmri ně aa mẽ kot mẽmoj pumunh kêt kw̃ỹ ho anh̃ỹr o pa. Te Tĩrtũm nh̃ỹ hã kot ho anh̃ỹr pyrãk nom hêx rom mẽ apê Tĩrtũm kot amnhĩm mẽ arênh xw̃ỹnhjê nokupyr kaxyw ã amnhĩ nhĩpêx anh̃ỹr o pa. Anê.

Akup̃ỹn Jejus w̃ỹrk xà hã arĩgro jarênh
Matêwre 24.29-31; Rukre 21.25-28;
m̃ãñnêñ Sikũn Pêtre 3.10; Apokarip 1.7,
19.11-16

24-25 Nhũm Jejus arĩ mẽ kãm kapêr nê mẽ kãm:

—Tã koja mẽ kot amnhĩ xà htỳx kamã hamak xà hã arĩgrota hapêx nhũm Tĩrtũm ã mẽmoj nhĩpêx anê.

Koja kaxkwa ho àk tỳx nê nhũm myyti ahtyk.

Nhũm mytwrỳre axte hirã hkêt nê.

Nhũm kanhêti piitã axrê nê rôrôk pa.

26 Hãmri pa man akupỳn pika hwỳr wrỳ nhũm mẽ piitã ixwrỳk kãm ixpumu. Kakrã kamã kot paj ixihtỳx o inhĩrã rax kãm akupỳn mẽ awỳr wrỳ. 27 Hãmri nê ma krĩ piitã hwỳr Tĩrtũm kapêr o mẽ wrỳk xwỳnhjê rê nhũm mẽ ma mra nê amnepê m ixte amnhĩ kaxyw mẽ axunhwỳr xwỳnh piitã ho akuprô nê akupỳn ixwrỳr mẽ ho mra. Anê.

Jejus kot mẽmo pĩ hpàr ã ejêp jarênh

28 Nhũm Jejus arĩ mẽ kãm kapêr nê mẽ kãm:

—E ka mẽ pĩ hpàr mỳj pumu. Na hte mẽmo mytwrỳr hã rã nhũm mẽ omu nê ô hkukamã hamaxpêr kurê kumrêx. 29 Ja pyrã nê koja mẽmoj ã amnhĩ nhĩpêx anhỳr mẽ ka mẽ akupỳn mẽ awỳr ixwrỳk mã ajamaxpêr kurê kumrêx. 30 Koja akupỳn ixpôx kêt ri ã mẽ kot mẽmoj kot amnhĩ nhĩpêx anhỳr pumunh xwỳnhjaja kormã piitã htyk par kêt ri pa akupỳn mẽ awỳr wrỳ.

31 —Nê koja nhỹrmã pika nê kaxkwa wa hapêx pa. Tã no ãm ixkapêr koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mẽnh to hkêt nê. Anê.

Mẽ pahte akupỳn Jejus wrỳk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40; mããnênh Atre 1.9-11; Wam Tesarôn 5.2; Sikũn Pêtre 3

32 Nhũm Jejus arĩ mẽ kãm kapêr nê mẽ kãm:

—Nom akupỳn ixwrỳk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wrỳk xwỳnhjaja kot ja pumunh kêt. Nê pa ixpê Tĩrtũm Kra htã ijaxwỳja ixte ja hã amnhĩ pumunh kêt. ãm Mẽpahpãm maatija tapxipix kot ja pumunh.

33 —Tã mẽ ate akupỳn ixwrỳk xà hã arĩgro pumunh kêt jakamã kwa kêt ka mẽ

axkãm ajamak rom nê ri apa. Nê apkati mẽ amnhĩ wỳr ijapêr arĩt rãhã ho ri apa.

34-35 —E pa tanhmã mẽ amã akupỳn ixwrỳk xà hã arĩgro jarênh to ka mẽ inhma. Koja mẽhõ nhỹhỹm nojarêt hãmri nê kãm mẽ àpênh xwỳnhjê mã mẽ àpênh ã karô nê ôrkwỳ jamãr xwỳnh mã tanhmã kãm karô hto. Hãmri nê ôrkwỳ kahê xà jamãr xwỳnh mã kãm: “E kêt ka ixwakre kamã ijapêr arĩt rãhã ho ri apa.” Anê hãmri nê ma nhỹhỹm mō. Tã mẽ kot ijapêr rĩt rãhã ho mẽ pa xwỳnhjaja te kot ixkre kahê xà jamãr xwỳnh kot amnhĩ nhĩpêx pyrãk. Ô pa-trãwja akupỳn hpôx xà hã arĩgro hã omunh kêt jakamã na hte kahê xà jamãr rãhã ho pa. Koja apu axpêr kamãt nhũm akupỳn hpôx japêr. Rỳ kôt ã kamãt rỳ krãhyre kã nhũm akupỳn hpôx japêr. Rỳ kwỳhtyk nhũm akupỳn hpôx japêr. Tã uràk nê mẽ ate akupỳn ixwrỳk xà hã arĩgro pumunh kêt jakamã kêt ka mẽ ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nê. Ra ixte mẽ amã hã karô xà hkôt.

36 Kop ixkre kahê xà jamãr xwỳnhja tee ri ô patrãw kamã ama hãmri nê ra ôtxwa nê htỳx ô t o ỳr rôm nhũm haêr pê hwỳr hpôx ronhỹx ja kêp mex kêt nê. Ja pyrã nê kêt ka mẽ ixkutêp ixkôt amnhĩ nhĩpêx rãhã ho ri apa. Nom tee ri amnhĩ wỳr ixkãm ama hãmri nê axte inhmã ajamaxpêr kêt pê atỳx ri tanhmã amnhĩ tomnuj to ho apa hkêt nê.

37 —E ixte mẽ amã mẽmoj jarênhja na pa hte ixkwỳjê piitã mẽ kãm harê. Jakamã kwa kêt ka mẽ akupỳn ixwrỳk ã ijapêr arĩt rãhã ho ri apa. Anê.

Nhũm pre ã Jejus amnhĩ kukamã mẽ kãm ujarênh anê.

14

Mẽ kot Jejus pĩr kukamã hamaxpêr ã mẽ harênh

Matêwre 26.1-5; Rukre 22.1-2; Juãw 11.45-53

1 Tã nhũm Ijaew hkĩnhã ã arĩgro pê Pas wỳr apkati axkrut. Pas ã na hte mẽ ixpê Ijaewjaja amnepê m Tĩrtũm kot pika pê Ejit pê mẽ inhĩgêt nê mẽ ixpãmjê kator mã ijamaxpêr kaxyw axpên wỳr akuprô nê hã ixkĩnh. Na pa htem arĩgroja mã: “Pas” anê. Nê harênh o: “Mẽ pahte pãw kaxkrit

kêt kur ã arĩgro” anê. ² Jakamã nhũm mẽ inhõ patre krãhtũmjê mẽ Tĩrtũm kapêr tũm o mẽ ahkre xwỳnhjaja kãm Jejus pĩr prãm nê. Nom mẽ kãm hkõt kapêr mar o mẽ pa xwỳnhjê pyma nê. Nê tee ri hã amnhĩ jahkre nê axpẽn mã:

—Hêxta waa nê. Tanhmã kot puj wem ho nê kupĩĩ? Kot puj mẽ pahkĩnh kãm tanhmã ho nhũm mẽ hkĩnh xwỳnhjaja hã mẽ pahpumu nê mẽ pakamã gryk tỳx nê. Pu mẽ hã axpu nê hã tanhmã axpẽn to. Jakamã kwa pu mẽ kormã tanhmã ho hkêt nê. Anê.

Mêhõ ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

³ Rõm nhũm Jejus Simãw nhõrkwỹ kamã kormã apkur o nhỹ. Krĩ pê Petãn kamã. Simãwja na pre hkà kro xàpêr tỳx o pa nhũm Jejus akupỹn ho mex. Jakamã akupỹm õ krĩ hwỳr pøj nê kutã apkur o nhỹ. Hãmri nhũm mẽhõ nija harênh ma nê mẽ hkuxwa xà hã kàx õ py nê ma hwỳr o tẽ. Nê mẽ hwỳr axà nê nhỹhỹnh kàx kahte nê mẽ hkuxwa xà ho hkrã gregrer pa. ⁴ Hãmri nhũm mẽ apkur o hkrĩ xwỳnhjaja tee ri ã kot amnhĩ nhĩpêx anhỹr ã omu nê kamã gryk nê. Nê axpẽn mã:

—Tk. Kwa nà na hã mẽ hkuxwa xàta kapĩr par kumrêx. ⁵ Kop apu ma o htêm nê ho wênê nê hpãnhã kàxpore ho rax kumrêx nê hamỳnh nê ho mẽ kêp amrakati xwỳnhjê nhĩpêx par nhỹx ja kãm mex nê. Mo na ri ã amnhĩ nhĩpêx anhỹr kêt nê?

Anê nê hã kãm akir. ⁶ Hãmri nhũm Jejus mẽ kuma nê mẽ kãm:

—Tk. Kwa mẽ kãm axàkjêr kêt nê. ãm hãmri na ã inhĩpêx anê. ⁷ Mẽ kêp amrakati xwỳnhjaja koja mẽ arĩ mẽ akõt pa rãhã nê. Ka mẽ amã mẽmo arĩgro hã mẽ ho ajuta hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akõt ixpa ka mẽ ixto mex ry ho apa hkêt nê. Kot paj tokyx mẽ are. ⁸ Ixtyk nhũm mẽ kot ijaxàr kukamã na ã ixkrã gregrer anê. ãm hãmri na ã inhĩpêx anê. ⁹ ãm hãmri na pa mẽ amã ja jarê. Koja mẽ krĩ piitã hkõt axpẽn mã ixte tanhmã mẽ anê amnhĩ nhĩpêx to hã ijarênh o pa nê mãânên kot ã inhĩpêx anhỹrja mãânên harênh o pa. Nhũm mẽ

piitã kot tanhmã ixto mex to hã harênh ma. Anê.

Jut Kariot kot mẽ kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

¹⁰ Tã nhũm Jut Kariotja. Jejus kõt mẽ pa ho mẽ pa xwỳnh pê 12 hõ na pre. Tã axtem nê Satanasti nhỹ hã ma patre krãhtũmjê hwỳr tẽ nê axtem nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amỹnê ka mẽ hpãnhã inhmã amnhĩre nà? Anê.

¹¹ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre. Anê.

Hãmri nhũm mẽ kuma nê kato nê ma tẽ nê Jejus pynênh kaxyw htãnopxar o hkõt ri pa.

Jejus kot ÿ hã kapêr o mẽ pa xwỳnhjê kutã apkur ã harênh

Matêwre 26.17-19; Rukre 22.7-13

¹² Tã nhũm arĩgro pê Pas kato. Amnepêm mẽ inhĩgêtjaja na prem ôwêhti hkrare hkwy pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwỳnhjê nhĩhkra nê mẽ kator kaxyw na prem ã amnhĩ nhĩpêx anê. Jakamã na pa htem arĩ mẽ ixpê mẽ hkanrêhã mẽ htãmnhwỳjaja Pas ã axpẽn wỳr akuprõ nê jam ijamaxpêr pê mẽ urak nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kõt mẽ pa ho pa xwỳnh pê 12jaja Pas ã mẽ apkur xà hã Jejus kukja nê kãm:

—Kwa nhỹri kot paj mẽ akutêp Pas ã mẽ panhõ hã apê? Anê.

¹³ Hãmri nhũm mẽ kuma nê ja wa ho axkrut nê mẽ amnhĩ kukamã wa kumê nê wa kãm:

—E wa ma Jerujarê hwỳr wa tẽ. Nê hwỳr axà nê mẽhõ myja pumunh kurê kumrêx. Nhũm amnhĩm gõ ru nê amnhĩ kre hã poti xãm nê o tẽ ka wa omu nê hã ajêt nê ma õrkwỹ hwỳr hkõt tẽ. ¹⁴ Hãmri nê ixkre nhõ dõn pumu nê kãm: “E Jejus na wa inhmê pa wa awỳr tẽ. Na awỳr pêr mênh o: ‘Nhỹri kot paj we ixkõt ri mẽ pa ho pa xwỳnhjê mẽ Pas ã axpẽn kutã apku?’ Anhỹr o na awỳr pêr mẽ.”

15 —Wa ã kãm akapêr anê kê war ama nê war amã òrkwỹ nhĩmòk ã ixkre rax ò jahkre. Ra kamã kaxyw mẽ paxàpkur xà hà mẽmoj piitãã. Ka wa omu nê mãmrĩ kamã mẽ ixkutêp mẽ panhõ hà apê. Anê.

16 Hãmri nhũm wa kuma nê ma hwỳr tẽ. Nê krĩm axà nê ra kot wa kãm mẽmoj jarẽnh xà hkõt mẽmoj piitã omu nê mẽ kutêp mẽ kãm mẽõ hà àpẽnh o wa xa.

Jejus kot mẽhõ kot mẽ kãm hà àmnẽnh ã harẽnh

Matêwre 26.20-25; Rukre 22.21-23; Juãw 13.21-30

17 Tã nhũm kamãtre nhũm Jejus mẽ hkõt mẽ pa ho pa xwỳnhjaja wa hkõt mõ. 18 Hãmri nê kypê ixkreja wỳr api nê hwỳr agjê nê apkur kaxyw hkrĩ hpa nê kormã apkur o hkrĩ nhũm Jejus mẽ kãm:

—E pa mẽ amã mẽmoj jarẽ ka mẽ inhma nê amnhĩ krãm haxàr tỳx nê. Kot kaj mẽ ixkutã axàpkur o akrĩ xwỳnhjê hõ mẽ kãm ixkurê xwỳnhjê mã ixtã amỳnê. Anê.

19 Hãmri nhũm mẽ tee ri kuma nê hkaprĩ htỳx nê. Nê axpẽn pãnhã amnhĩ tã hkukja nê kãm:

—Kwa xà pa kot paj ã anhĩpêx anê? Nà pa hkêt. Anê.

20 Hãmri nhũm mẽ kãm:

—Nà mẽ apê 12jê hõ kot kaj ã inhĩpêx anê. Mẽ ate ixkutã guhkrax kãm anhõ pãwti ho mry kagõ nhek o akrĩ xwỳnhjê hõ kot kaj ixtã amỳnê. 21 Tĩrtũm kapêr ã kagà htũm kot ixkukamã harẽnh xà hkõt koja mẽ tanhmã ixto rax nê ixpĩ. Nom kot mẽ kãm ixtã àmnẽnh mã xwỳnhta hêxta waa nê. ã kot amnhĩ nhĩpêx anhỹrja mỳrapê koja amnhĩ xà htỳx kãm hamak rax kumrẽx. Kop apu aa ò mãmãj nhõxà hkre rũm kator kêt ronhỹx ja kãm mex nê.

22 Anê nê kormã mẽ apkur o hkrĩ rôm nhũm pãwti hõ py nê ho Tĩrtũm wỳ. Hãmri nê mẽ kãm ho hkry nê mẽ piitã mẽ kãm òr pa nê mẽ kãm:

—E na pa mẽ amã pãwti ho hkry nê mẽ amã kugõ. Ja pyrã nê koja mẽ ã inhĩpêx anê nê te ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anê kot paj ty. E mẽ mãmrĩ aku. Anê.

23-24 Nê hpãnhã wĩhti hà kop py nê mã ho anê nê Tĩrtũm mã harẽ. Hãmri nê mẽ kãm kugõ nê mẽ kãm:

—E mẽ kot ixpĩr xà hà arĩgrota ã koja ixkamrõ axkapĩ. Nom koja mẽ amarĩ ixpĩr nhũm amarĩ hpikapĩr kêt nê. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê. Koja ixkamrõ axkapĩ nhũm Tĩrtũm omu nê ixkukwak ri mẽ anê mẽ ate amnhĩ tomnuj piitã amnhĩ katut kõt rẽnh pa nê mẽ ato hkra. Ra amnepêm kot ja hà amnhĩ jarẽnh xà hkõt. Jakamã e. Mẽ axpẽn pãnhã ixkamrõ pikapĩr mã ajamaxpêr pê ixte mẽ amã kop kãm wĩhti nhõrta o akõm o axpẽn nhĩpêx. Anê.

Nhũm pre ã mẽ kãm amnhĩ jarẽnh anê nhũm mẽ piitã ho hkõm o axpẽn nhĩpêx.

25 Hãmri nhũm mẽ kãm:

—ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hà arĩgrota ã pahkĩnh nê. Nom axtem tanhmã hà pahkĩnh to. Anê.

26 Nhũm pre ã mẽ kãm kapêr anê hãmri nhũm mẽ Tĩrtũm mã mex o mex ã gre hãmri nê hapõx pa nê ma hixêt pê Oriwêhti hwỳr mra.

Jejus kot Simãw Pêtre hkukamã tanhmã harẽnh to

Matêwre 26.31-35; Rukre 22.31-34; Juãw 13.36-38

27 Tã nhũm Jejus hkõt mẽ pa ho pa xwỳnhjê hkukamã tanhmã mẽ kãm ujarẽnh to nê mẽ kãm:

—E mẽ inhmã. Tĩrtũm kapêr ã kagà htũm kot ã mẽ pajarẽnh kot anhỹr.

Kot paj ôwêhti jamãr o pa xwỳnhja pĩ hãmri nhũm ôwêhti hpigrãnh pa nê ma an-hgrã nê ri mra.

Anhỹr o te ixpê ôwêhti jamãr xwỳnh nhũm mẽ apê ôwêhti pyrãk ã mẽ pajarẽnh. Tã kot puj mẽ ã amnhĩ nhĩpêx anê. 28 Mẽ kot ixpĩr tã koja Tĩrtũm akupỹm ixto ixtĩr. Pa akupỹm ixtĩr nê ma mẽ akukamã pika pê Garirej wỳr mõ. Kamã kot puj mẽ axte axpẽn pumu. Anê.

29 Hãmri nhũm Simãw Pêtre tee ri mẽ amnhĩ tã kuma nê kãm:

—Kwa nà. Ri ã mẽ ijarẽnh anhỹr kêt nê Pahihti. Kot paj akaga hkêt nê. Jajaja koja

anhgrà nê hprôt nê ma mrar japêr no pa kot paj anhÿr kêt nê. Anê.

³⁰ Hâmri nhùm kãm:

—Nà kot kaj anê Simãw Pêtre. Koja apkati hkôt krâhyre hkâr kêt ri ka ra mē umaj ate ixkôt apa hkêt ã mē kãm amnhĩ tã axaprâr o axkrunêpxi kãm ga. Kwa jam ajamxpêr tÿx nê. Anê.

³¹ Hâmri nhùm tee ri amnhĩ tã kuma kãm amnhĩ tã aprâr kãm hihtÿx nê kãm:

—Tk. Kwa nà. Kot paj ã amnhĩ nhîpêx anhÿr kêt nê. Koja mē tee akôt ixpîr mã tã no pa ãm aa akaga hkêt kumrêx. Kot paj akôt ixpa ho ixpa rãhã nê. Anê.

Hâmri nhùm hkôt mē pa ho mē pa xwÿnhjê kwÿjê piitã ã kãm amnhĩ jarênh anê.

*Jejus kot Tirtûm mã amnhĩ jarênh
Matêwre 26.36-46; Rukre 22.39-46*

³² Tã nhùm Jejus ma nhÿri mē kot kãm “Gesêm” anhÿr xwÿnhja wÿr hkôt mē pa ho pa xwÿnhjê ho mō. Hâmri nê mē kãm:

—E mē jar ixkutêp akrî. Pa ma mütüm tē nê Tirtûm mã amnhĩ jarê mãn. Anê.

³³ Hâmri nê amnhĩ kôt mē ho axkrunêpxi nê mē o mō. Simãw Pêtre mē Jepetew kra pijakrut pê Xiakre nê Juãwja nhùm amnhĩ kôt mē o mō. ³⁴ Hâmri nê amnhĩ kukamã mē kãm hkurê xwÿnhjaja kot tanhmã hipêx tota kukamã hamxpêr o ra amnhĩ kamã kahak tÿx o ra hkaprî nê. Hâmri nê hkôt mē mrar xwÿnhjê mã kãm:

—Hêxta waa nê. Na pa tee ri amnhĩ xà htÿx kamã ijamakja kukamã ijamxpêr nê amnhĩ kamã ixkahak tÿx o ixkaprî nê. Te ra ixkaprîja kot ixpîr o mōr pyrâk. Jakamã e mē jar anohtÿx nê ixto Tirtûm wÿr o akrî kê tanhmã ixto pa mē kot tanhmã ixtoja kutã ixihtÿx nê. Anê.

³⁵ Hâmri nê mē kurûm htêm grire nê amnhĩ kamã kahak o Tirtûm mã amnhĩ jarênh kaxyw htu mÿr pê htêm nê pikap nō nê kãm:

³⁶ —Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamxpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmrî ho ajapêx nhùm mē kãm ixkurê xwÿnhjaja tanhmã ixto hkêt nê. Rÿ ko. Kot kaj amã mē kot tanhmã ixto hprãm

kê mē mãmrî tanhmã inhîpêx to. Nom pam inhmã hprãm xà hkôt kêt.

³⁷ Anhÿr o Tirtûm mã amnhĩ jarê hãmri nê kãnhmã xa nê akupÿm Simãw Pêtreja mē hwÿr tē nē mē omu nhùm mē ra htÿx gôr nê hikwÿ. Hâmri nhùm tee ri mē omu nê Simãw Pêtre mã kãm:

—Kwa Simãw Pêtre. E mē hãmri akrã hapôj. Kwa wem anohtÿx grire nê ixkutêp amnhĩ to Inhō Papaj wÿr o akrî ³⁸ kê mē ixkôt tanhmã mē ato htã ka mē amã mē uma xàj ixkaga hkêt nê arî mē kutã amnhĩ to htÿx nê akuhê. ã mē amã mē ate amnhĩ nhîpêx anhÿr prãm nom kormã mē amã maa. Anê.

³⁹ Hâmri nê akupÿm tē nē axte Tirtûm mã tanhmã amnhĩ jarênh to.

⁴⁰ Nê akupÿm mē hwÿr tē nē mē omu nhùm mē axte ôt pa nê hikwÿ. Nhùm tē nē tee ri mē omu hãmri nê tanhmã mē kãm nê hkêt nê. ãm awjanã nê ma akupÿm tē nē axte Tirtûm mã amnhĩ jarê. ⁴¹⁻⁴² Hâmri nê akupÿm mē hwÿr tē nē mē kãm:

—Kwa xàn ka mē arî gôr nê anhîkwÿ? E mē tokyx akrã hapôj. Na mē ra ixwÿr mrar nê kot ixpynênh mã. Koja mē tokyx ixkutã mē kot amnhĩ xunhwÿr xwÿnhjaja mē kãm ixtã amÿnê. Ota ra kot ixtã mē kãm àmnênh xwÿnhnta tē. E mē tokyx kãnhmã akrî pu mē kutã mra. Anê.

*Mê kot Jejus pynênh ã mē harênh
Matêwre 26.47-56; Rukre 22.47-53; Juãw
18.1-11*

⁴³ Nhùm Jejus kormã mē kãm kapêr o ãm rãhã nhùm Jut Kariotja tē. Mē hkôt mē pa ho mē pa xwÿnhjê hō htã nhùm ra amnhĩ kôt mē ohtô nê Jejus wÿr mē o tē nhùm mē wapohti nê kô jamÿ nê hkôt o mra. Patre krãhtûm mē Ijaew krãhtûmjê mē Tirtûm kapêr tûm o mē ahkre xwÿnhjaja ra Jut kôt mē kurê nhùm mē man hkôt Jejusja wÿr mra. ⁴⁴ Na pre ra Jut Kariotja mē kãm tanhmã amnhĩ jarênh to nê mē kãm:

—E kot paj nhÿri mē pahte unênh mã xwÿnhnta pumu nê hwÿr tē nē kahti hkôt kumÿ nê tanhmã kãm ixkapêr to. Ka mē ixpumu nê hwÿr tē nē unê nê ma akupÿm o tē.

Anê hãmri nê ma hwÿr mē o tē. ⁴⁵ Nê Jejusja pumu nê hwÿr tē nê kãm: “Pa mē ijahkre xwÿnh.” Anê hãmri nê kahti

hkôt kumy. ⁴⁶ Hāmri nhūm hkôt mẽ mrar xwýnhjaja omu nē Jejus wýr mra nē unēnh kuré kumrēx. ⁴⁷ Hāmri nhūm Jejus kôt mẽ pa ho mẽ pa xwýnhjaja tee ri ja hā mẽ omu nhūm hōja õ wapo kapa nē patre maati mã àpēnh xwýnh kot mẽ hkôt htēm xwýnhhta mã wapo ho apē. Nē kot ho hkrā nhīpōnh mã tā kuhpaw nē upōk rūm hamak nhīkjē krāhta. ⁴⁸⁻⁴⁹ Hāmri nhūm Jejus amnhī tā mẽ kot unēnh xwýnhjē mã kām:

—Kwa na pa pre apkati mẽ Tirtūm mã amnhī jarēnh xà hā ixkre kamā mẽ kām ixujarēnh o ixpa ka prem tokyx ixpynēnh kēt nē. Tā jarāhā te ixte amnhī tomnuj xwýnh pyrā nē ixwýr wapohti nē kō hā akapēn nē ixwýr atēm rax nē. Nom ra mẽ ate tanhmā ixto kaxyw arīgro kator jakamā mẽ māmri tanhmā amā ixto hprām xà hkôt tanhmā ixto. Tirtūm kapēr ā kagà htūm kot mẽ akukamā ā mẽ ate inhīpēx anhýr ā mẽ ajarēnh xà hkôt. Anē.

⁵⁰ Hāmri nhūm hkôt mẽ pa ho mẽ pa xwýnhjaja tee ri mẽ kot unēnh ā mẽ omu hāmri nē mẽ umaj Jejus kaga nē ma hprōt pa nhūm ahte mẽ kuri xa. ⁵¹⁻⁵² Hāmri nhūm mẽ ma o tē. Nhūm kormā mēhō nyw xwýnhja tee ri ja hā mẽ omu nē ma Jejus kôt tē. Nhūm mẽ amnhī kôt omu nē kot unēnh kaxyw kahty xà hā kupy nhūm mẽ umaj mẽ ĩhkra kamā kahty xàja re nē ma hkēnh nē hprōt nē tēn akunok.

Ijaew nhō patre maati kot Jejus kujjēr ā harēnh

Matêwre 26.57-68; Rukre 22.63-71; Juāw 18.12-14, 18.19-24

⁵³ Tā nhūm mẽ ma mẽ õ patre maati nhōrkwý hwýr Jejus o tē. Hāmri nhūm patre krāhtūmjē mẽ Ijaew krāhtūmjē mẽ Tirtūm kapēr tūm o mẽ ahkre xwýnhjaja ōrkwý hwýr Jejus ā akuprō. ⁵⁴ Hāmri nhūm Simāw Pētre mẽ hkôt tē nē mẽ hkôt patre maati nhō kītare hwýr axà nē amým hā mẽ omunh o xa. Nhūm ra pōristijaja kītare kamā amnhīm kuto nē hā ànhunh o hkrī nhūm mẽ hwýr tē nē mẽ ĩhkō hā ànhunh o nhý.

⁵⁵⁻⁵⁶ Rôm nhūm ixkre kamā mẽ pikuprōnh xwýnhjaja tee ri Jejus ā krī nhō xwýnhjē kukja nē mẽ kām:

—E mẽ atō na ka pre Jejus kot tanhmā amnhī tomnuj to hā omu? Mẽ atō mẽ inhmā harē pa mẽ ama nē Rôm nhō xwýnhjē nhīhkram haxà kē mẽ pamā kupī. Anē.

Hāmri nhūm mẽ axpēn pānhā tanhmā harēnh to. Tanhmā kot amnhī tomnuj to hā harēnh to htā nom ri ho hēx jakamā axpēn kwým ri tanhmā ri harēnh to nhūm mẽ tee ri mẽ kuma nē mẽ kām:

—Tk. Kwa mẽ axpēn kwým ri tanhmā harēnh to hkēt nē. Axpēn kôt mǎn ri tanhmā mẽ inhmā harēnh to. Anē.

⁵⁷ Hāmri nhūm mẽ hkwýjaja kànhmā kuhē nē axpēn kôt tanhmā ho hēx to nē mẽ kām:

⁵⁸ —Nà kot paj mẽ amā tanhmā kot amnhī nhīpēx to hā harē. Na pa prem ā kapēr anhýr ā kuma. Na pre tanhmā Tirtūm mã amnhī jarēnh xà hā ixkreta jarēnh to nē harēnh o: “Kot paj ixkreja grānh pa hāmri nē ixtā apkati axkrunēpxi nē akupým hipēx. Nom kot paj amnhī nhīhkra ho hipēx kēt nē.” Anhýr ā ā amnhī jarēnh anē pa mẽ kuma.

⁵⁹ Anhýr o harēnh tā nom axpēn kôt harēnh kēt nē. Arī axpēn kwým ri harē.

⁶⁰ Hāmri nhūm mẽõ patre maati tee ri mẽ kot tanhmā ho kapēr toja ma nē mẽ aptār tūmjē noo mã kànhmā xa nē Jejus mã kām:

—E na ka ra mẽ kot ā ajarēnh anhýrja ma. Xà kot kaj tanhmā mẽ inhmā amnhī tā axàprār to hkēt nē? Xà ãm hāmri na mẽ ajarē? E kwa mẽ inhmā tanhmā amnhī jarēnh to. Anē.

⁶¹ No nhūm akryk xa nē tanhmā kām nē hkēt nē. Hāmri nhūm tee ri ā kot amnhī nhīpēx anhýr ā omu nē axte kām:

—Kwa mẽ inhmā amnhī jarē. Xà apē Tirtūm Kra na ka? Xà ka na apē Tirtūm kot mẽ ixwýr amēnh xwýnh na ka? Anē.

⁶² Hāmri nhūm mã kām amnhī jarē nē kām:

—Tý. Ixpē tāmta na pa. Ra mẽ ate jarāhā tanhmā ijarēnh to kaxyw apikuprōnh mã nom kot paj nhýrmā mẽ kamjaja tanhmā mẽ ajarēnh to ka mẽ amnhī mã ixpumu. Kot kaj mẽ Tirtūm kot mẽ ato amnhīptār xà kutā akrī hāmri pa hwýr tē nē ĩhkō hā nhý. Kakrā kamā kot paj hwýr tē nē ĩhkō hā nhý hāmri nē ý hā tanhmā mẽ ajarēnh to ka mẽ amnhī mã ixpumu. Anē.

63-64 Hāmri nhũm tee ri ã kot amnhĩ jarēnh anhÿrja ã kuma nē gryk xàj amnhĩ xē kaxô nē mē àptàr tũmjê mã kãm:

—Kwa mo kaxyw kot puj mē axte ri ho tanhmã kot amnhĩ tomnuj to hã harēnh xwÿnhjê hõ japêr? Ra tãm kot amnhĩ pē Tĩrtũm Kra hã amnhĩ to hêx nhũm mē pahte pajamak o mar kēnã. E tanhmã kot puj mē ho? Anē.

Hāmri nhũm mē kãm:

—Nà kot puj mē kupĩ. Ra htyk mã tãm kēnã. E kwa tokyx pu mē ma Rõm nhõ pahihiti hwÿr o tē kē mē pamã hã amÿnē kē mē kupĩ. Anē.

65 Hāmri nhũm mē hipêx kati rax nē. Nē hkuk kuhtô nē hpãnhã no hpro nē htak nē kãm:

—E mē kot atak xwÿnhjê nhĩxi jarē. Apē Tĩrtũm Kra hã ate amnhĩ jarēnh jakamã mãn urak nē axàhpumunh tÿx. Jakamã e mē hixi jarē. Anē.

Nhũm prem ã hipêx anē hāmri nē pōristijê nhĩhkram haxà nhũm mē htak rax o kuhē.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.60-75; Rukre 22.54-62; Juãw 18.15-18, 18.25-27

66-67 Rõm nhũm Simãw Pêtre arĩ kĩtare kamã mē ìhkô hã ànhunh o nhÿ. Hāmri nhũm mẽõ patre maati mã àpēnh xwÿnh nitita mē hwÿr kato nē xa. Hāmri nē hirã kamã hprĩ hã Simãw Pêtre pumu nē omunh mex kurê kumrêx nē kãm:

—Xê pēr apē Najare nhõ xwÿnh Jejus kôt mē pa ho mē pa xwÿnhjê hõ na ka. Anē.

68 Hāmri nhũm tee ri kuma nē ra kãm ma nē. Nē kãm amnhĩ tã aprã nē kãm:

—Tk. Kokÿ. Ixte mēhõ my ata pumunh hã. Anē.

Hāmri nē kànhmã xa nē ma tē nē kĩtare hwÿr kahē hkôt ã mē hkàx ã ahte xa nhũm krãhyre kã. 69 Nē gaa nhũm hpãnhã mē kãm àpēnh xwÿnhjê hõja omu nē hã mē kãm:

—Xê ma ãm hāmri na harē. Kôt ri mē pa xwÿnhjê hõ na pēr. Anē.

70 Hāmri nhũm amnhĩ tã kuma nē kãm:

—Tk. Kwa nà. Mē ri ã amnhĩ krã hkôt ri ixto axêx anhÿr kêt nē. Aa ixte mēhõ ata pumunh kêt kumrêx. Anē.

Hāmri nhũm mē hkwyja gaa nē kē axte hprĩ hã omu nē kãm:

—Kwa ãm hāmri na mē ajarē. Apē Jejus hkwy na ka. Ajaxwÿja apē Garirej nhõ xwÿnh kēnã. Anē.

71 Hāmri nhũm tee ri mē kuma nē kãm ma htyx nē. Hāmri nē mē kãm:

—Kwa nà. Na pa Tĩrtũm noo mã mē amã amnhĩ jarē. Kot paj amnhĩ to ixêx japêr nhũm inhma nē hã tanhmã ixto. Nà uràn ixpê Garirej nhõ xwÿnhre hã. Ixte mēhõ mũj pumunh kêt kumrêx tã ka mē xatã axpēn kôt ixte hkôt ixpa ho ixpa xwÿnh ã ixkamnhix o xa.

Anhÿr o ra mē kãm amnhĩ tã aprãr o axkrunēpxi. 72 Hāmri nhũm axte krãhyre kã. Jao ra hkàr o axkrut. Hāmri nhũm Simãw Pêtre kuma nē Jejus kot ra hkukamã ã amnhĩ nhĩpêx anhÿr ã harēnhja mã hamaxpēr kurê kumrêx. Krãhyre kormã hkàr o axkrut kêt ri kot mē kãm amnhĩ tã aprãr o axkrunēpxi hã harēnhja mã hamaxpēr. Hāmri nē ra kànhmã hakry hpar o tē nē hkaprĩ htyx kumrêx. Hāmri nē tee ri amnhĩ kukamã hamaxpēr nē amnhĩ mã:

—Hêxta waa nē. ãm hāmri na pre Jejus ijarē. Tã pa kot ijarēnh xà hkôt ã amnhĩ nhĩpêx anē. Kwa mo na pa axtem nē ã mē kãm amnhĩ to ixêx anē?

Anē hāmri nē hkaprĩ xàj mÿr rax nē.

15

Pirat kot Jejus kukjêr ã harēnh

Matêwre 27.1-2, 27.11-14; Rukre 23.1-5; Juãw 18.28-38

1 Tã nhũm myt kato nhũm mē axte Jejus ã axpēn wÿr akuprõ. Patre krãhtũmjê mē Ijaew krãhtũmjê mē Tĩrtũm kapēr tũm o mē ahkre xwÿnhjê mē Ijaew nhõ juistijaja nhũm mē piitã hã akuprõ. Hāmri nē pōristi mã anē nhũm mē Jejus pa hpre nhũm mē ma Rõm nhõ xwÿnhjê nhõ pahi Pirat wÿr o tē. Piratja na pre hte Rõm nhõ xwÿnhjê nhõ pahi Sesti nhÿ hã Ijaew o amnhĩptàr o pa nhũm prem ma hwÿr o tē. 2 Hāmri nē kutã ãm nē tanhmã kãm harēnh to nē kãm:

—E ot pa mē awÿr jahti ho tē. Na hte mē inhã hêx rũnh o pa. Mē ixte Pahihiti Sesti kapēr kwÿm ri amnhĩ nhĩpêx prãm xàj tanhmã mē inhã hêx to. Nē axtem nē mē ixte Sesti mã kãxpore hkwy nhõr kêt ã mē inhã karõ. Nē Tĩrtũm kot mē ixkaxyw kēp mē inhõ pahi hã ãm ã amnhĩ jarēnh o pa.

Na hte ã mẽ inhmã amnhĩ to hêx anhÿr o pa. Anê.

Hãmri nhũm Pirat mẽ kuma nê Jejus pumu nê tanhmã hkukjêr to nê kãm:

—E inhmã amnhĩ jarê. Xà ãm hãmri na mẽ ã ajarênh anê nà? Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

Hãmri nhũm kãm:

—Tÿ. Nà ãm hãmri na ka ã ijarênh anê. Anê.

³ Hãmri nhũm patre krãhtũmjaja tanhmã kãm ho kapêr to. ⁴ Nhũm mẽ kuma nê axte hkukja nê kãm:

—Kwa na mẽ ã ajarênh anê ka mẽ ama nê ãm mẽ ama nê inhmã tanhmã amnhĩ tã axaprãr to hkêt nê. Anê.

⁵ Nom nhũm Jejus ãm akryk xa nê tanhmã axte kãm nê hkêt nê. Jakamã nhũm Pirat tee ri omunh pê hamaxpêr o nhÿ.

Pirat kot Jejus pÿr ã àmnênh ã harênh

Matêwre 27.15-26; Rukre 23.13-25; Juãw 18.39-19.16

⁶ Na pre hte pahi Pirat arĩgro pê Pasja ã Ijaewjaja kãm hprãm xà hkôt mẽ hagjênh xwÿnhjê ho hpÿnh nê mẽ kãm ure. ⁷⁻¹⁰ Jakamã nhũm Ijaew kwÿjaja hwÿr mra nê kãm:

—Pa. Kwa xà kot kaj jarãhã mẽ inhmã mẽ hagjênh xwÿnhjê hõ mã anhũre nà? Anê.

Hãmri nhũm mẽ kuma nê hamaxpêr o:

—E paj Jejus ã mẽ kuma nê kãm inhũre. Mẽ piitã mẽ kãm kapêr mar prãm nhũm mẽõ patre krãhtũmjaja pix kot mẽ hkôt kamã gryk nê ã ixwÿr o mra anhÿr kênã. Anê.

Hãmri nê mẽ kãm:

—Tÿ. Nà kot paj mẽ amã hõm inhũre. Kwa xà kot pa mẽ amã mẽ anhõ “pahihti” jarênhja mã inhũre nà? Anê.

¹¹ Hãmri nhũm patre krãhtũmjaja tee ri kuma nê mẽ kãm:

—Kwa mẽ kãm anê kê Parapas mã mãn ure. Anê.

Hãmri nhũm mẽ kuma nê Pirat mã kãm:

—Nà Jejus mã anhũrer kêt nê. Parapas mã mãn anhũre. Anê.

¹² Hãmri nhũm mẽ kãm:

—No mẽ ate mẽ anhõ pahi hã harênh xwÿnhnta? Tanhmã kot paj ho? Anê.

¹³ Hãmri nhũm mẽ àmra kamã kãm hã amÿnê nê kãm:

—Kwa pÿ kahpa hã anhõ kê ty. Anê.

¹⁴ Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tom-nuj tore hã kot pa ã hipêx anê.

Anhÿr tã nhũm mẽ xatã anhĩpê kãm kapêr kãm hihtÿx nê kãm:

—Kwa pÿ kahpa hã mãn anhõ kê ty. Tokÿx ã mẽ inhmã hipêx anê.

Anhÿr o kuhê. Kàx pê kãm anhÿr o kuhê.

¹⁵ Nhũm tee ri mẽ kuma hãmri nê mẽ kãm hprãm xà hkôt mẽ kãm Parapas mã ure. Nê pòristi hkwyjê mã Jejus ã amÿnê nê mẽ kãm:

—Tõe. Mẽ mamrĩ hwÿr tẽ nê htak hãmri nê kapôt ã mẽ hpar xà hã pika hwÿr o tẽ nê pÿ kahpa hã anhõ. Anê.

Mẽ kot Jejus tak ã mẽ harênh

Matêwre 27.27-32; Juãw 19.2-3

¹⁶ Tã nhũm pòristijaja akupÿm ixkreja wÿr Jejus o axà nê amnhĩ wÿr hkwyjê hã karõ nhũm mẽ hwÿr agjê nê Jejus ã akuprõ.

¹⁷ Hãmri nê kêp pahi hã hpêr o pikênh kaxyw kãm pahi hã mẽ ahkà nhĩpêx nê hkrãm haxà. Nom axtem nê akunĩ kamã mẽmo mrõ nhĩ te kot ronh kanêre pyrãk xwÿnhja nhũm mẽ kãm hikãx nê hkrãm haxà. Hãmri nê kêp ê kapa nê pahi hã mẽ ê kamrêk õ py nê kãm haxà. ¹⁸ Hãmri nê kãm:

—E apê Ijaewjê nhõ pahi na ka. Anê.

¹⁹ Hãmri nê xatã axpên pãnhã hwÿr mra nê pÿ ho hkrãx pê htak nê hkuk kuhtõ nê hã hpêr o pikênh pê hã hpijaãm pyrã nê kutã hkõn krã ho hkrĩ. ²⁰ Hãmri nê kêp pahi xê kapa nê akupÿm kãm ê jaxà nê pÿ kahpa hã nhõr kaxyw ma o kato nê o tẽ.

²¹ Nom nhũm ra hiro tÿx nê nhũm mẽ tee ri omu hãmri nê mēhõ kot ho ajuta kaxyw mẽ kot hkôt omunh o mör xwÿnhjê kapi ho xa. Hãmri nê Sirên nhõ xwÿnh Simãw hkà htykreja pumu. Aresãn mẽ Rupti wa hipêêxà na pre. Nhũm htÿx hamakêtkati nê mẽ kutã krĩm tẽ. Hãmri nhũm mẽ haê nê unê nê kãm Jejus o ajuta kaxyw hã karõ nhũm kãm pÿ kahpaja mÿ nê mẽ hkôt o tẽ.

Mẽ kot pÿ kahpa hã Jejus nhõr ã mẽ harênh

Matêwre 27.33-44; Rukre 23.33-43; Juãw 19.17-27

²² Nhũm mẽ ra kën nhĩxê te kot mẽ hkrã hi pyrãk xwýnhja wýr Jejus o pøj. Mẽ kot kãm “Korkot” anhýr xwýnhja wýr. Mẽ pakapër kãm na htem Korkotja jarënh o: “Mẽ hkrã hi xà” anë. Jakamã nhũm mẽ ra hwýr o pøj. ²³ Hãmri nẽ kot pĩ kahpa hã nhôr kaxyw wĩhti hkwý ho mẽ mẽmo mẽhkanexà pẽ mĩra ho ahkà. Kot ho kôm nẽ amnhĩ xà htýx kãm hamak kêt kaxyw hipêx nẽ kãm kugõ nom nhũm hkaga nẽ ho hkõm kêt nẽ. ²⁴⁻²⁶ Hãmri nhũm myt kaxkwa nhĩpõk wýr tẽ nhũm mẽ pĩ kahpata ã Jejus xi nẽ prek o ìhkra ho htýx nẽ hpar o htýx. Nẽ hpãnhã kaxyw kakwý nẽ kãnhmã pĩ kahpa jarĩ nẽ kre kamã ãm nẽ hity hpa. Nhũm Jejus kýx pẽ amnhĩ xà htýx kumrêx kamã hamak o ajêt. Nhũm pôristi hõja tẽ nẽ tapti hõ py nẽ hã kagà ho:

IJAWEJÊ NHÕ PAHI NA JA

Hãmri nẽ Jejus wýr ho api nẽ mý ri kunhõ. Hãmri nhũm hparpẽ pôristi hkwýja axpën mã ê hkwý ho hpigrãnh kaxyw hã kënre ho jõka ho hkrĩ.

²⁷⁻²⁸ Tã nhũm mẽ wa kot amnhĩ tomnuj xwýnh wa ho axkrut nẽ mã wa ho anë nẽ. Nẽ pĩ kahpa hã prek o wa ìhkra ho htýx nẽ wa hpar o htýx hãmri nẽ akutã ho Jejus nhĩjê nhũm wa ajêt.

²⁹ Hãmri nhũm mẽ kot omunh mã mrar xwýnhjaja Jejus pumu nẽ hã hpër o pikënh punuj nẽ hkrã ho apẽ nẽ kãm:

—Kwa na ka pre ate Tĩrtũm mã amnhĩ jarënh xà hã ìxkre grãnh par nẽ atã apkati axkrunëpxi nẽ akupým hipêx par ã amnhĩ jarënh o apa. Nẽ axàhpumunh o axàhpumunh ã amnhĩ jarënh o apa. ³⁰ Jakamã e kwa amnhĩ kapa nẽ wrý pa mẽ ja hã apumu. E kwa tokyx. Anë.

³¹ Nẽ patre krãhtũmjê mẽ Tĩrtũm kapër tũm o mẽ ahkre xwýnhjaja piitã hwýr mra nẽ hã hpër o pikënh o kuhê. Nẽ axpën mã kapër o:

—E jahti na xep pre mẽ kamã ukapřĩ ho pa nẽ tanhmã mẽ ho ajuta hto ho pa. Tã tãm tanhmã amnhĩ to nẽ wrýk kêt nẽ. ³² Kwa pu mẽ arĩ pakuhê nẽ kot amnhĩ kaxàr nẽ wrýk kãm omu. Koja wrý pu mẽ omu nẽ kęp mẽ panhõ pahĩti hã hkõt pajamaxpër kurê kumrêx. E tokyx wrý Jejus pa mẽ awrýk kãm apumu. Nà kot kaj awrýk rax nẽ. Anë.

Hãmri nhũm akutã wa kot hijê nẽ jêt xwýnh wa haxwýja kãm kapër punuj o ajêt.

Jejus htyk ã harënh

Matêwre 27.45-46; Rukre 23.44-49; Juãw 19.28-30

³³ Tã nhũm ra kaxkwa nhĩpõk ri myt nhýr mẽ nhũm te kamàt pyrãk. Nhũm kamàt kô rax kumrêx o ra hã awry mẽ nhũm akupým myt katêr o mõ. ³⁴ Hãmri nhũm Jejus àmra kamã Tĩrtũm mã kapër nẽ kãm:

—Inhõ Tĩrtũm inhõ Tĩrtũm. Kwa mon ka ixkaga? Anë.

Nom kapër kãm kapër o:

—Eri Eri rãmã sapatani. Anë.

³⁵ Hãmri nhũm mẽ kot mar o kuhê xwýnhjaja kot Eri hã harënh ma nẽ htýx ho finat Eris mã kapër ã hkamnhĩx. ³⁶ Hãmri nhũm ja hprõt nẽ mẽmo rereeti py nẽ pĩ ho hkanhwý nẽ o tẽ nẽ ho wĩhti nhek nẽ Jejus wýr o tẽ nẽ kot hkaõr kaxyw kãm kupẽ. Hãmri nẽ hkwýjê mã kãm:

—E hãmri pu mẽ jar hkàx ã pakuhê nẽ Eris jamã mãn. Koja kuma nẽ hwýr tẽ nẽ o wrý nà? Anë.

³⁷ Nom nhũm Jejus ra htyk kaxyw nẽ àmra htýx nẽ ty.

³⁸ Hãmri nhũm Tĩrtũm mã amnhĩ jarënh xà hã ìxkre kamã hakwakre hã kupêxêja axkjê nẽ amnhĩ kahê xà mẽnh kurê kumrêx. Utĩ rax tã kýj rũm ahpar mã axkjê nẽ amnhĩ kahê xà mẽ. Te Jejus htyk o mẽ pahte hkõt amnhĩ xunhwýr xwýnhjê mã Tĩrtũm wýr pry jakwa kre kahê xà mẽnh pyrãk o ã amnhĩ kaxõnh anë. ³⁹ Nhũm pôristi krãhtũmjê hõja Jejus parpẽ kutã htyk kãm omunh o xa. Hãmri nẽ tee ri omu nẽ hamaxpër o:

—Hêxta waa nẽ. ãm hãmri na pre hte kęp Tĩrtũm Kra hã amnhĩ jarënh o pa. Tã pa mẽ amarĩ kupĩ. Anë.

⁴⁰⁻⁴¹ Rõm nhũm mẽni kwýjaja amým htyk kãm omunh o kuhê. Na pre htem Garirej kamã Jejus mẽ hkõt mẽ pa ho mẽ pa xwýnhjê mã mẽ apkur xà hã àpênh o mẽ hkõt pa nẽ mẽ hkõt Jerujarê hwýr mõ. Marir Matarën nẽ Xiakre mẽ Jojes wa katorxà Marirja. Nẽ Sarome. Nẽ mãânën mẽni hkwýjaja nhũm mẽ amým Jejus htyk kãm omunh o kuhê.

Mê kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

⁴² Nhũm prem arĩgro pê sêsta hã Jejus pĩ nhũm ra amỹkry htỹx nê. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhỹr kêt nê. ⁴³ Jakamã nhũm Juje hõ pê Arimatej nhõ xwỹnhja. Kêp Ijaewjê nhõ juisti hõ na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tĩrtũm kot mẽ pahwỹr Jejus mênh kôt hamaxpêr o pa. Tã Jejus htyk ã omu hãmri nê hamaxpêr o:

—E pa ma pahi Pirat wỹr tẽ nê Jejus nhĩ hã kuwỹ. Inhmã uma htã kot paj ma hwỹr tẽ nê hã kuwỹ kê inhmã kugõ pa ma o tẽ nê tokyx haxà. Kot paj ho anhỹr tokyx anhỹr kêt nhũm mẽ panhõ arĩgromnu pê sapja wỹr ra myt axà hãmri pa haxàr kêt nê.

Anhỹr o hamaxpêr nê ma Pirat wỹr tẽ nê hã kuwỹ. ⁴⁴ Hãmri nhũm amnhĩ jaêr pê ra htyk ã harênh ma nê amnhĩ wỹr pôristi krãhtũmjê hõ hã karõ nê hã hkukja nê kãm:

—Kwa xà na ra Jejus ty? Anê.

Hãmri nhũm kãm:

—Tỹ na ra ty. Anê.

⁴⁵ Hãmri nhũm kuma nê Juje mã kãm:

—Tõe. Mamrĩ ma o tẽ nê haxà. Anê.

⁴⁶ Hãmri nhũm kuma nê akupỹm Jejus wỹr tẽ nê pôristi mã anê nhũm mẽ kãm ho wrỹ. Nhũm kumỹ nê kupêxê ho hkupu hpa nê o tẽ nê kên kre kakwỹnh kãm haxà. Hãmri nê kên rax o hitom mex nê ma akupỹm krĩm tẽ. ⁴⁷ Nhũm Marir Matarên mẽ Juje katorxà Marir oja wa ma hkôt tẽ nê kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

16

Jejus akupỹm htĩr ã harênh

Matêwre 28.1-10; Rukre 24.1-12; Juãw 20.1-10

¹⁻² Tã nhũm apkati. Nom nhũm ra mẽ inhõ arĩgromnu pê sap kator jakamã nhũm mẽ kormã akupỹm kênkreta wỹr mrar kêt nê. Hãmri arĩgro mex jamãr pê kôkôt o hkrĩ. Hãmri nhũm axte apkati nhũm tãmĩk nhũm ra mẽ inhõ arĩgromnu hapêx nhũm Marir Matarên mẽ Sarome mẽ Xiakre katorxà Marirja mẽ ma akupỹm kênkreta wỹr mra.

Kormã kwỹhtãã. Kormã myt kator o mõi mẽ nhũm mẽ kãnhmã hkrĩ hãmri nê mẽ kot Jejus gregrer kaxyw mẽ hkuxwa xà hkwy jamỹ nê ma hwỹr o mra. ³ Hãmri nê kormã mõi ri tee ri amnhĩ kukamã hamaxpêr nê axpên mã:

—Xê gàà nê. Mẽhõ koja mẽ pamã nhãm kênkre nê hitom raxta xãm pu mẽ Jejus wỹr agjê nê gregrer? Utĩ rax kumrêx kênã. Anê.

⁴ Hãmri nê hwỹr pøj nê omu nhũm ra hitom xàja kàx ã nõi nhũm mẽ tee ri omu. Utĩ rax tã ra kàx ã nõi. ⁵ Hãmri nhũm mẽ kênkre hwỹr agjê nê upøk rũm mẽhõ nyw pumu. Nhũm ê jakajre kamã nhỹ nhũm mẽ amnhĩ jaêr pê omu nê tee ri hamaxpêr.

⁶ Hãmri nhũm mẽ kãm:

—Kwa mẽ amã ma hkêt nê. Mẽ ate Najare nhõ xwỹnh pê Jejus pumunh kaxyw na ka mẽ mra. Mẽ kot pĩ kahpa hã nhõr xwỹnhhta. Nom jar amrakati. Na ra Tĩrtũm akupỹm ho htĩr. E mẽ kam nê amnê agjê nê ano ho nõi xà kaprỹ pumu ⁷ nê tokyx ma akupỹm mra nê hkôt mẽ pa ho pa xwỹnhjê mã harê. Koja ma Jejus mẽ akukamã akupỹm Garirej wỹr mõi. Garirej kamã kot kaj mẽ axte axpên pumu. Ra kot mẽ amã amnhĩ jarênh xà hkôt. Kwa mẽ tokyx ma akupỹm mẽ hwỹr mra. Nê kwa kê Simãw Pêtreja harênh mar mex nê. Anê.

⁸ Hãmri nhũm mẽ kuma nê awjanã nê ma akupỹm hprõt. Nê tee ri hamaxpêr nê kãm ma xàj htertet tỹx jakamã kormã nhãm mẽhõ mã harênh kêt nê.

Jejus kot Marir Matarên wỹr kator ã harênh

Juãw 20.11-18

⁹ Nhũm semãn nyw mã àr xà hã arĩgro pê tãmĩkja ã nhũm Jejus akupỹm htĩr. Hãmri nê Marir Matarên kumrêx wỹr kato. Kot nê mẽkarõmnuti ho ⁷ nê nê hanor xwỹnhhta kumrêx wỹr kato. ¹⁰ Hãmri nhũm akupỹm htĩr kãm omu nê hkĩnh tỹx kumrêx. Nê ma akupỹm tẽ nê Jejus krãmnhwỹjê mã harê. Nhũm mẽ hkaprĩ nê mỹr o hkrĩ nhũm mẽ hwỹr axà nê mẽ omu nê mẽ kãm:

¹¹ —Xê mẽ amỹr kêt nê. Na ra Jejus akupỹm htĩr nê ham ixwỹr kato pa inhno ho omu. Xê mẽ hãmri axte amỹr kêt nê.

Anhỹr tã nom nhũm mẽ htỹx ho amnhĩ krã hkôt kot ri ã harênh anhỹr ã hkamnhĩx jakamã kuma nê ãm kuma.

*Jejus kot hkwỳjê hwỳr kator ã harênh
Rukre 24.13-35*

¹² Tã nhũm Jejus axte ja wa hwỳr kato. Kôt mẽ pa ho pa xwỳnh wa ho axkrut nê wa hwỳr kato. Na pre wa Jerujarê rũm kato nê akupỳm wa ò krĩ hwỳr mõi mẽ nhũm wa hwỳr kato. Nom axtem tanhmã amnhĩ nhĩpêx to nê wa hwỳr kator jakamã nhũm wa tokyx hprĩ hã kêp Jejus ã omunh kêt nê. ¹³ Tã kêp Jejus ã omu hãmri nê akupỳm Jerujarê hwỳr mõi nê hkwỳjê mã harênh kurê kumrêx. Nom nhũm mẽ wa kuma nê ãm wa kuma nê akupỳm htĩr kôt hamaxpêr kêt nê.

*Jejus kot hkwỳjê mã mẽmoj tã karõ hã
harênh*

*Matêwre 28.18-20; Rukre 24.44-49; Juãw
20.19-23; mããnên Atre 1.6-8*

¹⁴ Tã nhũm Jejus tã hkôt mẽ pa ho mẽ pa xwỳnh pê 11 wỳr kato nhũm mẽ kamã no puma nê hkĩnh tỳx nê omunh o kuhê. Hãmri nhũm mẽ kãm:

—Kwa hêxta waa nê. Marir Matarên mẽ akwỳta mẽ kot akupỳm ixtĩr kãm ix-pumunh nê mẽ amã ijarênh tã ka mẽ ama nê ãm mẽ ama. Pêr ãm mẽ akrã hihtỳx jakamã na ka mẽ ama nê mẽ hkôt aja-maxpêr kêt nê. Anê.

¹⁵ Hãmri nê mẽ kot tanhmã kãm amnhĩ nhĩpêx to ho pa hã mẽ kãm karõ nê mẽ kãm:

—E kêr ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa. ¹⁶ Nê mẽ kot mẽ akapêr mar nê amnhĩ kaxyw ixkôt hamaxpêr xwỳnhjaja kêr ka mẽ hkrã kumrã nhũm mẽ nhỹrmã Tĩrtũm mẽ wa ixri htĩr tũm nê mex rãhã nê pa ho pa. No mẽ kot amnhĩ kaxyw ixkôt hamaxpêr kêt xwỳnhjaja koja Tĩrtũm nhỹrmã amnhĩ nê mẽ hano nhũm mẽ ma kuwy hwỳr pa.

¹⁷ —Nê amnhĩ kaxyw ixkôt mẽ aja-maxpêr xwỳnhjaja kot kaj mẽ inhỹ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwỳ ho anê nê inhỹ hã inhĩxi jarênh kôt mẽ nê mẽkarõmnuti janor o ri mẽ hkôt apa. Nê mẽ ate nhãm mẽ kapêr mar kêt tã inhỹ hã ho akapêr mex o apa. Mẽ ate mar kêt tã ra ho akapêr nhũm mẽ kot mẽ kapêrta mar xwỳnhjaja hprĩ hã mẽ amar mex nê. ¹⁸ Nê kot kaj mẽ

nhỹri atỳx kagã xoprê hõ hpyr tã no nhũm tanhmã mẽ ato hkêt nê. Rỳ atỳx mẽmoj to mẽ hpar xà hkwỳ ho akõm tã no nhũm tanhmã mẽ ato hkêt nê. Nê inhỹ hã mẽ à xwỳnhjê hã mẽ anhĩkra jaxwỳ nhũm mẽ akupỳm mex. Kot kaj mẽ amnhĩ kaxyw ixkôt mẽ ajamaxpêr xwỳnhjaja ã inhỹ hã amnhĩ nhĩpêx anhỹr o ri apa. Anê.

*Jejus kot akupỳm kaxkwa hwỳr àpir ã
harênh*

Rukre 24.50-53; mããnên Atre 1.6-11

¹⁹ Tã nhũm mẽ panhõ Pahihti Jejusja hkôt mẽ pa ho mẽ pa xwỳnhjê mã kapêr pa hãmri nhũm Tĩrtũm ma akupỳm amnhĩ wỳr kaxkwa hwỳr ho api. Hãmri nhũm kaxkwa kamã Tĩrtũm nhĩhkô hã upôk rũm nhỹ. Kot ìhkô hã mẽmoj piitã ho amnhĩptàr kaxyw hkrĩ ho hkrĩ. ²⁰ Hãmri nhũm hkôt mẽ pa ho pa xwỳnhjaja ma akupỳm àpir kãm omu hãmri nê anhrã nê ma krĩ piitã hkôt mẽ kãm Tĩrtũm kapêr jarênh o pa nhũm Pahihti Jejus mẽ ìhkô hã pa ho pa. Nhũm mẽ ma ý hã hkwỳjê mã aa mẽ kot mẽmoj pumunh kêt kwỳ ho anhỹr o ri mẽ hkôt pa nhũm mẽ ja hã mẽ omu nê axpên mã mẽ harênh o:

—Nà ãm hãmri na mẽ pamã Tĩrtũm kapêr jarênh o pa nê ho hêx kêt nê. ý hã mẽ kot aa mẽ pahte mẽmoj pumunh kêt kwỳ ho anhỹr o pa kênã. Nà ãm hãmri na ã mẽ pamã kapêr jarênh anhỹr o pa. Anê.

Ja kôt na Makre kot Jejus jarênhja hapêx.

Rukre Rukre tanhmã Jesus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwýnh na pre. Tã amnhĩ kaxyw Jesus kôt hamaxpêr. Na pre kêp tôtô nê mē hkane ho pa. Nê Jesus nhỹ hã kapêr o pa xwýnhjê hõ pê Pawreja kôt pa ho pa. Tã tanhmã hamaxpêr to nê hkràmnhwý Teopre mã kagàja nhĩpêx nê kamã tanhmã Jesus kot amnhĩ nhĩpêx to ho pa hã harê nê hã kagà.

Nê Jesus kêp Tĩrtũm nhỹ hã kapêr o pa xwýnh ã harê. Nê mē pahpyrà nê ã ho ã hã harê. Nê kêp mē pakamã ukapřĩ xwýnh ã harê. Nê kêp mē pahte amnhĩ tomnuj o hapêx xwýnh ã harê. ã na pre Rukreja hkràmnhwý Teopre mã Jesus jarê nê hã kagà anê. Nê mãânên mē pahpiitã mē pakaxyw harê nê hã kagà.

Rukre kot Teopre mã amnhĩ jarênh Atre 1.1-2

¹ Pa pahi Teopre. Xà amex? E ot pa awýr kagà nhĩpêx nê awýr kumê. Ixte amã Jesus jarênh kaxyw. Na prem ra ohtô nê jar mē pahkôt Jesus kot amnhĩ nhĩpêx o pa hã kagà rax nê. ² Jesus nhỹ hã Tĩrtũm kapêr jahkre ho mē pa xwýnhjaja na prem Jesus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mē inhmã harê nê hã kagà nhũm mē ohtô nê mē mar xà hkôt mē urà nê kot tanhmã amnhĩ nhĩpêx to ho pa hã kagà. ³ Tã pa mē harênh ma nê ijamaxpêr o:

—E kot paj ijaxwýja Jesus kot amnhĩ nhĩpêx kwý hã kagà. Nà kot paj ho anê.

Anhýr o ijamaxpêr jakamã ot pa ra ixte amã hã kagà kaxyw.

⁴ Tã kêr ka kamã harê nê ixpyrà nê ama nê aprĩ hã harênh mar týx nê mē kot amã harênh xwýnhjê hkôt ajamaxpêr týx o apa. ãm hãmri na prem mē amã harê. E kot paj amã hkwy hã kagà. Ixpê akràmnhwý Rukre kot paj ixprĩ hã amã harê nê hã kagà.

Tĩrtũm kapêr o wryk xwýnh kot Juãw Paxis jarênh

⁵ Juãw Paxis nhĩpêxà finat Jakarisja kumrêx kot paj amã harê. Kêp finat Apiasti kanrêhã htàmnhwý jakamã urak nê kêp mē apê Ijaew nhõ patre na pre. Pahihti Eroxa kormã kot mē anhõ pika kamã mē ho amnhĩptar ri nhũm Jakaris kêp patre nê pa. Nê hprõ Ijapew mē wa kêp Parãw kanrêhã htàmnhwý. ⁶ Nê wa hamê na pre Tĩrtũm kôt tãm amnhĩ nhĩpêx o wa pa. ãm Tĩrtũm kapêr kôt pix mã ri amnhĩ nhĩpêx rãhã ho wa pa.

⁷ Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx týx nê.

⁸ Jakamã nhũm Jakaris ma mē kot Tĩrtũm mã amnhĩ jarênh xà hã ixkre hwýr tẽ. Kwýjê pyrà nê kot Tĩrtũm mã tanhmã amnhĩ nhĩpêx to kaxyw ma mē hpãnhã hwýr tẽ nê axà. ⁹⁻¹⁰ Hãmri nê kamã Tĩrtũm mã amnhĩ jarênh pê kãm mē hkuxwaxà ho xêt o xa. Nhũm Ijaew kwýjaja ixkreta wýr akuprõ nê kapem kutêp Tĩrtũm mã amnhĩ jarênh o kuhê. ¹¹ Pu nhũm kaxkwa rũm Tĩrtũm kapêr o mē wryk xwýnhja wry nê Jakaris kutã xa. Mē hkuxwa xà ho xêt xà hã mês kunĩhti xupok rũm xa. ¹² Hãmri nhũm amnhĩ jaêr pê amnhĩ kutã omu nê akryk omunh o xa. ¹³ Hãmri nhũm kãm:

—Pa Jakaris? Kwa tee ri ajamaxpêr o amã ma hkêt nê. Na pre Tĩrtũm ate akra hã hwýr o apa hã ama nê hã apumu. Jakamã koja tanhmã aprõ hkra xà ho ka kamã akra. Nhũm nõ nê rax nê kato nê myre. Ka wa hã hixi mē nhũm kêp Juãw. ¹⁴ Koja kato ka wa omu nê akĩnh týx kumrêx. Nhũm akwýjaja haxwýja ohtô nê war akra jarênh ma nê war anhỹ hã hkĩnh nê. ¹⁵ Koja kormã akra kator kêt ri nhũm Tĩrtũm Karõja hkarõ hwýr axà. Hãmri nhũm kato nê gaa nê hprêk nê Tĩrtũm mã tanhmã amnhĩ nhĩpêx to ho pa. Tĩrtũm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrêx. Kê mēmoj to wĩhti ho hkõm kêt nê pa. Nê kagôxyhti ho hkõm kêt nê pa. ãm kwarĩ ho kwarĩ. ¹⁶ Koja hprêk hãmri nê mē apê Ijaew mã Tĩrtũm kapêr jarênh o mē hkôt pa. Nhũm mē ohtô nê kuma nê kot amnhĩ tomnuj kaga nê Tĩrtũm

kôt amnhĩ xunhwỳ nẽ hkôt amnhĩ nhĩpêx mex o pa.

17 —Tĩrtũm kot mẽ awỳr mẽ apytàr xwỳnh maati mẽnh mã xwỳnh kukamã koja mẽ kãm harẽnh o pa. Te Tĩrtũm nhỹ hã kapêr jarẽnh xwỳnh finat Eris kot amnhĩ nhĩpêx pyræk o koja amnhĩ nhĩpêx. Nẽ uræk nẽ Tĩrtũm Karõ nhỹ hã mẽ amã Tĩrtũm kapêr jarẽnh o mẽ akôt pa. Jakamã nhũm mẽ akwỳjaja kuma hãmri nẽ amnhĩ tomnuj kaga hpa nẽ Tĩrtũm kôt pix mã amnhĩ nhĩpêx o pa. Nẽ tãm mẽ hkrajê nhĩpêx o pa. Koja mẽ ã akra Juãwja kôt amnhĩ nhĩpêx anẽ. Jao Tĩrtũm kot mẽ awỳr mẽnh mã xwỳnhhta kutêp tãm amnhĩ nhĩpêx o pa. Anẽ.

18 Nhũm pre ã Tĩrtũm kapêr o wrỳk xwỳnh Jakaris mã hkrata jarẽnh anẽ. Hãmri nhũm tee ri kuma nẽ kãm:

—Kwa xà we ãm hãmri na ka ã inhmã ixkra jarẽnh anẽ nà? Ra ixprõ mẽ wa ijamẽ wa ixpigêx tỳx kẽnã kot pa kêt wa ixkra. Anẽ.

19 Hãmri nhũm kãm:

—Nà ãm hãmri na pa ã amã harẽnh anẽ. Ixpê Gapriew na pa ã awỳr ixwrỳk nẽ Tĩrtũm nhỹ hã amã harẽnh anẽ. Ixte Tĩrtũm nhĩkhô hã ixkuhê xwỳnhjê hõ na pa. Tãm na awỳr inhmẽ pa awỳr wrỳ nẽ ã amã akra jarẽnh anẽ. 20 Tã ate ixkôt ajamaxpêr kêt jakamã kot kaj axte axumar kêt nẽ akapêr kêt rãhã nhũm akra kato. Koja kato ka rĩ kormã akupỳm akapêr nẽ akupỳm ama. Ate ixkôt ajamaxpêr kêt jakamã kot kaj ã amnhĩ nhĩpêx anẽ nẽ rĩ amnhĩ pumu. ãm hãmri na pa ã amã ixkapêr anẽ. Anẽ.

Nhũm pre ã Tĩrtũm kapêr o wrỳk xwỳnhja Jakaris mã kapêr anẽ. Jakamã nhũm tokyx ixkre rũm kator kêt nẽ.

21 Hãmri nhũm ixkre kapem mẽ kuhê xwỳnhjaja tee ri kamã ama nẽ axpên mã:

—Tk. Kwa mo na we ri hitom kãm ho anhỳr kãm unê nẽ tokyx kator kêt? Anẽ.

22 Tã nhũm akupỳn mẽ hwỳr kato. Nẽ tee ri kot mẽ kãm kapêr kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaêr pẽ kot ã amnhĩ nhĩpêx anhỳr ã omu nẽ tee ri hkukamã hamaxpêr nẽ axpên mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anẽ nà? Anẽ.

23 Hãmri nhũm Jakaris ixkre kamã mẽmoj tã àpênh pa hãmri nẽ ma akupỳm òrkwỳ hwỳr tẽ.

24-25 Tã nhũm hprõ Ijapewja htujarõ. Hãmri nẽ amnhĩ tujarõ hã amnhĩ pumu nẽ hkĩnh tỳx nẽ. Nẽ hamaxpêr o:

—Hêxta gàu nẽ. Ma ãm hãmri na pa pre ixkra hkêt nẽ amnhĩ kamã ixpijaàm o ri ixpa. Tã ra ixtujarõ. Kot paj wa axte ri amnhĩ kamã ixpijaàm kêt nẽ. Ma ãm hãmri na Tĩrtũm ã wa inhĩpêx anẽ. Na pa wa ixkĩnh tỳx kumrêx. Anẽ.

Nhũm pre ã hamaxpêr anẽ hãmri nẽ arĩ òrkwỳ kamã hkrĩ ho hkrĩ. Aa nhỹhỹm kator nẽ mõi kêt rãhã hã mytwrỳ kêp 5.

Tĩrtũm kapêr o wrỳk xwỳnh kot Marir mã hkra jarẽnh

Matêwre 1.18-21

26 Tã nhũm Ijapew ra htujarõ hã mytwrỳ kêp 6 nhũm Tĩrtũm axte kapêr o wrỳk xwỳnh pẽ Gapriewja mẽ. Nhỹri Garirej kamã krĩ pẽ Najare hwỳr kumẽ nhũm ma hwỳr wrỳ. 27 Mẽhõ pẽ Marir wỳr wrỳ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja Marir pyrã nẽ kêp pahi finat Tawi kanrêhã htãmnhwỳ na pre. 28 Jakamã nhũm Gapriew Marir wỳr wrỳ nẽ kãm:

—Pa Marir? E ot pa amã Tĩrtũm kapêr jarẽnh kaxyw awỳr wrỳ. Kot akôt pa ho pa jakamã koja ato mex rax kumrêx. Anẽ.

29 Hãmri nhũm amnhĩ tã kuma nẽ tee ri hamaxpêr nẽ hamaxpêr o:

—Xê mẽmo na we ri ã inhmã kapêr anẽ? Tanhmã koja we Tĩrtũmja ixto mex rax to? Anẽ.

30 Hãmri nhũm Gapriew kãm:

—Kwa tee ri amnhĩ kukamã ajamaxpêr kêt nẽ. Tĩrtũm kãm ajapêê. 31 Kot kaj atujarõ nhũm akra kato nẽ myre. Ka hã hixi mẽ nhũm kêp Jejus. 32-33 Koja Tĩrtũm amã ho mex rax nẽ. Nẽ koja mẽ piitã mẽ kãm kêp amnhĩ Kra hã ho amnhĩrĩt. Nẽ mẽ apê Ijaew o amnhĩptàr kaxyw koja mẽ akaxyw ãm nhũm higêt pahi Tawi pyrã nẽ mẽ ato amnhĩptàr o pa. Mẽ ate amnhĩ wỳr kamã ajamak o apa xwỳnhhta koja. Tĩrtũm kãm hprãm xà hkôt koja mẽ ato amnhĩptàr rãhã ho pa. Anẽ.

³⁴ Nhũm pre ã kãm kapër anë nhũm amnhĩ tã kuma nẽ tee ri amnhĩ kukamã hamaxpër hãmri nẽ kãm:

—Xê gòa nẽ. Tanhmã kot pa kêt we amnhĩ to nẽ ixtujarô? Kormã ixkukrit nẽ mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anë? Anë.

³⁵ Hãmri nhũm kãm:

—Nà koja Tirtũm Karõ tãm tanhmã ato ka ã hã tanhmã amnhĩ to hkêt tã atujarô. Jakamã koja akra kệp Tirtũm Kraa. ³⁶⁻³⁷ Na ra haxwýja anã Ijapewja htujarô. Ra hpigêx tỳx nẽ aa hkra hkêt nhũm hkwýjaja kot axpên mã õhy kamã hkra hkêt kumrêx ã harênh o pa htã ra htujarô. Tirtũm kot tanhmã mẽ ho nhũm mẽ htujarô tanhmã kệp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrý kệp 6. Tirtũm tãm kot mẽmoj pitã tanhmã ho kaxyw àhpumunh xihtỳx. Jakamã koja uràk nẽ mã ato anë nẽ ka kormã akukrit tã atujarô. Anë.

³⁸ Nhũm pre ã Gapriew Marir mã kapër anë nhũm amnhĩ tã kuma nẽ kãm:

—Ko. Kê mãmrĩ kãm tanhmã ixto hprãm xà hkôt mãmrĩ tanhmã inhĩpêx to. Inhmã Tirtũm kapër kôt amnhĩ nhĩpêx prãm. Kê mãmrĩ kãm tanhmã ixto hprãm xà hkôt tanhmã inhĩpêx to.

Anë nhũm kuma nẽ ma akupỹm api.

Marir kot Ijapew wýr mõi ã harênh
Rukre 11.27

³⁹⁻⁴⁰ Tã nhũm Marir amnhĩ tujarô hã amnhĩ pumu nẽ nã Ijapew wýr hkrã kurê kumrêx. Hãmri nẽ nojarêt nẽ õ krĩ rũm kato nẽ ma hwýr mõi. Ma Ijapew papxà hwýr mõi. Ijapew nhõ krĩa pika pê Jutej kamã nhỹri hixêt kamã na pre. Nhũm ma hwýr mõi hãmri nẽ hwýr pøj nẽ Ijapew wýr axà nẽ omu nẽ kãm:

—Ka? Xà wa amex? Anë.

⁴¹ Hãmri nhũm kuma nẽ kãm:

—Ý ma wa inhmex na pa wa ixpa.

Anhỹrja kôt nhũm õhy kamã hkraja haxwýja te kot Marir kapër mar nẽ amnhĩ nhĩpêx pyrãk o htu kamã àxõnh tỳx o nõ. Hãmri nhũm Ijapew Tirtũm Karõ nhỹ hã tanhmã Marir mã kapër to. ⁴² Kàx pê kãm kapër nẽ kãm:

—Xê gòa nẽ. Ra Tirtũm kot ato mex jakamã na ka akĩnh rax o mẽ inhni hkwýjê jakrenh pa. Anhõhy kamã akraja koja Tirtũm amã ho mex rax nẽ. ⁴³ Xê mon ka ã ixto mex nẽ ixwýr amõi anë? Apê inhõ Pahihti katorxà htã ixto mex nẽ ã ixwýr amõi anë. Hêxta gòa nẽ. Âm hãmri na ka ixwýr mõi Marir. ⁴⁴ Na ka ixwýr mõi pøj nẽ inhmã akapër hãmri nhũm ixto kamã ixkrare akapër ma nẽ hkĩnh xàj ixto kamã ixkamnãr tỳx o nõ. ⁴⁵ Na ka pre Tirtũm kapër o wryk xwýnh kot amã kapërja ma nẽ hkôt ajamaxpër tỳx nẽ. Jakamã kot kaj Tirtũm nhỹ hã akĩnh nẽ ajamakêtkati nẽ amex nẽ ri apa. Anë.

Marir kot Tirtũm mã mex o mex ã grer ã
harênh

Rukre 6.20-26

⁴⁶ Hãmri nhũm Marir Ijapew kot ã kãm kapër anhỹrja ma nẽ kãm Tirtũm mex o mex ã gre nẽ grer o:

Tirtũm na mex o mex.

⁴⁷ Kệp ixkaprĩ xwýnh na.

Kệp ixkaprĩ xwýnh jakamã na pa inhmex nẽ ixkĩnh nẽ ri ixpa.

⁴⁸⁻⁴⁹ Ixte amnhĩ to grire nhũm ja hã ixpumu nẽ ixkamã ukaprĩ nẽ ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tirtũm kot tanhmã ixto mex to hã ijarênh rãhã ho pa.

Tirtũm na mex o mex nẽ hihtỳx o hihtỳx. Tã na ã inhĩpêx anë.

⁵⁰ Ma na hte ã amnhĩ nhĩpêx anë nẽ axpên kanrêhã mẽ kot hã hpijaam xwýnhjê pumu nẽ mẽ kutã nojarêt rãhã ho pa.

Nẽ mẽ kamã ukaprĩ rãhã ho pa.

ã na hte mẽ hipêx mex anhỹr o pa.

⁵¹ Nẽ hihtỳx o hihtỳx jakamã na hte mẽ kot amnhĩ to jarkrar o ri mẽ pa xwýnhjaja tanhmã mẽ ho nhũm mẽ axkaprã.

⁵² Nẽ pahihti hkwý kot kapër mar nẽ âm mar xwýnhjaja.

Na hte amnhĩ tã mẽ omu nẽ mẽ àpênh nẽ mẽ hapøj nẽ mẽ hpãnhã mẽ kot amnhĩ to hkryre xwýnh kwý jagjê.

⁵³ Na hte mẽ kãm kapër kôt amnhĩ nhĩpêx prãm xwýnhjê ho mex o pa nhũm mẽ mex nẽ pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nê.

⁵⁴⁻⁵⁵ ãm hãmri na pre amnepê mã mẽ panhīgêť mã amnhĩ jarênh xà hkôt mẽ pahpê Apraãw rũm axpên kanrêhã hkrajaja mẽ pahto mex o pa.

Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa.

Nê mẽ pakamã ukaprĩ rãhã ho pa. Anê.

Nhũm pre ã Marir Ijapew mã Tĩrtũm mex o mex ã grer anê. ⁵⁶ Hãmri nê ri hkôt pa hã mytwrỳ axkrunêpxi nê ma akupỹm õ krĩ hwỳr mō.

Juãw Paxis kator ã harênh

⁵⁷ Tã nhũm Ijapew hpjagri kaxyw õhy xà nhũm hkrare kato nê myre. ⁵⁸ Hãmri nhũm omu nê hkĩnh tỳx nê. Hãmri nhũm hkwyjaja Tĩrtũm kot wa kamã ukaprĩ hã wa kãm wa hkra myre nhõr ã harênh ma nê wa ý hã hkĩnh nê.

⁵⁹ Tã nhũm wa hkraja ra hã arĩgro pê 8 nhũm mẽ hkwyjaja kot my kwryť kã krãhyr kaxyw hwỳr akuprõ. Tĩrtũm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrit kaxyw ã hipêx anhỹr kaxyw. Na htem ã mẽ kêp Ijaew krajê piitã mẽ hipêx anê. Jakamã nhũm prem ã hipêx anê hãmri nê hpãnhã tanhmã kot hã hixi mênh to kaxyw ri hã axpên kukja. Hãmri nê hipêêxà hkôt kot hã Jakaris mênh kaxyw. ⁶⁰ Hãmri nhũm katorxà tee ri axpên tã mẽ kuma nê mẽ kãm:

—Ma koja kêp Jakaris kêt nê. Koja kêp Juãw. Anê.

⁶¹ Hãmri nhũm mẽ tee ri kuma nê kãm:

—Kokỹ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anê. Anê.

⁶² Hãmri nê hixi hã hipêêxà kukja. Nom nhũm arĩ umar kêt nê kapêr kêt jakamã nhũm mẽ tanhmã ri kãm mẽ ãhkra nhĩpêx to. ⁶³ Hãmri nhũm ãhkra ho kagà hã ahwỳ nhũm mẽ kãm ja gõ nhũm kupy nê hã mẽ kãm hixi nhĩpêx. Nhũm mẽ kupy nê omu hãmri nê hixi pê Juãw kôt omu. Hãmri nê tee ri hixija kukamã hamaxpêr. ⁶⁴ Rôm nhũm Jakaris akupỹm ama nê kapêr mex kurê kumrêx nê Tĩrtũm mã mex o mex ã

harênh o xa. ⁶⁵⁻⁶⁶ Hãmri nhũm mẽ omu nê ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêť kape hã krĩ hkôt nhũm mẽ ri mẽ piitã mẽ kãm harênh o hprõt. Tĩrtũm kot wa hkra kôt tãnopxar o pa nê ho mex ã harênh o hprõt. Hãmri nhũm mẽ kuma nê tee ri hkukamã hamaxpêr nê axpên mã:

—Hêxta waa nê. Tĩrtũm tãm na xep hte jare hkôt ri pa ho pa. Jakamã koja nhỹrmã hprêk hãmri nê tanhmã koja we amnhĩ nhĩpêx to ho pa wehee? Anê.

Jakaris kot Tĩrtũm nhỹ hã kapêr ã harênh

⁶⁷ Hãmri nhũm Jakaris Tĩrtũm Karõ nhỹ hã Tĩrtũm mex o mex ã harênh o xa. Tĩrtũm kot mẽ kêp Ijaew o mex ã harê nê mẽ kãm:

⁶⁸ Hêxta waa nê. Nà Tĩrtũmja mex o mex.

Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhũm hte Tĩrtũm mẽ pahpê hkrajê kamã ukaprĩ nê mẽ pahto mex o pa. E kwa pu mẽ kãm mex o mex ã harênh rãhã nê.

⁶⁹ Ra kot mẽ pahwỳr mẽ pahkaprĩ xwỳnh pê mẽ panhõ pahihtĩ mênh mã. Ja kaxyw àhpumunh xihtỳx o hihtỳx jakamã na pre ra mẽ pahwỳr mênh ã amnhĩ jarê.

Koja kêp amnepêm Tĩrtũm mã tanhmã amnhĩ nhĩpêx to ho pa xwỳnh Tawija hkanrêhã htãmnhwỳ.

⁷⁰ Amnepêm Tĩrtũm nhỹ hã kapêr xwỳnhjaja na prem mẽ kãm Tĩrtũm kapêr jarênh o pa nê mẽ kãm:

⁷¹ “Koja Tĩrtũm mẽ panê mẽ kãm mẽ pahkurê xwỳnhjê pumunh mex o pa.” Anê.

⁷² Tĩrtũm ra kot mẽ pahpãmjê mã amnhĩ jarênh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhỹr o hamakêtkati hkêt nê.

⁷³⁻⁷⁵ Na pre ra mẽ pahpãm Apraãw mã mẽ pakukamã ã mẽ pahtã amnhĩ jarênh anê nê kãm: “Kot paj mẽ anê mẽ kãm mẽ akurê xwỳnhjê pumunh mex nê mẽ ãhkra nê mẽ ato ixkato. Jakamã kot kaj mẽ amnhĩ kamã amã mẽ uma hkêt nê axãmnhĩx ri ajamakêtkati nê mẽ kamã apa. Nê kot kaj mẽ mãmrĩ axãmnhĩx ri inhmã tanhmã amnhĩ nhĩpêx to ho ri apa

rãhã nê. Nê ixkôt amnhĩ nhĩpêx o ri apa rãhã ty.” Anhÿr o na pre Tĩrtũm mẽ pakukamã mẽ pahtã amnhĩ jarẽ. Anẽ.

Nhũm pre ã Jakaris mẽ kãm Tĩrtũm kapêr jarênh anẽ. Hãmri nê hkrareja mÿ nê o xa nê kãm:

76 —No ka Xugitre. Kot kaj aprêk hãmri nê apê Tĩrtũm maati nhÿ hã kapêr jarênh o apa xwÿnh. Jakamã kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nê kutêp tãm amnhĩ nhĩpêx kaxyw.

77 —Tĩrtũm kot mẽ nê mẽ kot amnhĩ tom-nuj rênh nê mẽ ho hkra hã harênhja kot kaj mẽ hkôt mẽ kãm harênh o ri apa.

78 —Na hte Tĩrtũm mẽ pakamã ukapri ho pa nê mẽ pakamã gryk tokyx anhÿr kêt nê. Jakamã koja mẽ pahwÿr mẽ pahkapri xwÿnhja mẽ. Kormã mẽ pahwÿr wrÿk kêt jakamã te mẽ pahte kamãt kô kamã tee ri mẽ paxãhkupênh o ri papa xwÿnh pyrãk.

—Nom koja mẽ pahwÿr wrÿkja o te ra myt kator nê mẽ pamã hirã nê mẽmoj to amnhĩrit mex pyrãk o mẽ panhĩpêx. Ja kaxyw koja Tĩrtũm mẽ pahwÿr mẽ pahkapri xwÿnhja mẽ nhũm man mẽ pahwÿr wrÿ nê mẽ pamã mẽ pahtyk puma xwÿnhjê mã Tĩrtũm kapêr o amnhĩrit o pa. Mẽ pahte mar nê ra pajamakêtkati nê paxãmnhix ri papa nê pahtyk kaxyw.

79 —Mẽ kãm mẽ htyk puma xwÿnhjaja te kamãt kô kamã ri pa pyrãk. Tã koja mẽ pahkapri xwÿnhja wrÿ hãmri nê tanhmã mẽ hkrã hto nhũm mẽ te arĩgro hã ri mẽ pa xwÿnh kot amnhĩ nhĩpêx pyrãk o amnhĩ nhĩpêx. Jao hamakêtkati nê axte kãm htyk puma hkêt nê ri pa. Anẽ.

Nhũm pre ã Jakaris Tĩrtũm Karõ nhÿ hã hkrare mã kapêr anẽ.

80 Tã nhũm Juãwja gaa nê aptãr. Nê Tĩrtũm kôt amnhĩ nhĩpêx o pa. Nom kormã kot ljaew jahkre ho pa hkêt ri kapôt ã ri mẽ puhã pa.

Ã na pre Juãw kator nê amnhĩ nhĩpêx anhÿr o pa anẽ. Na pre kato nê hã mytwrÿ grêre hãmri nhũm Jejusja hkôt kato.

2

Jejus kator ã harênh Matêwre 1.18-25

1-2 Na pre ã Jejus kator anẽ. Nhũm pre Rôm nhõ xwÿnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwÿja kot pika pê Sir kamã mẽ ho amnhĩptãr ri nhũm pahi Sesti Akus kot mẽ ho kôta kaxyw. Jakamã kãm àpênh xwÿnhjê mã kapêr nê mẽ kãm:

—E kêr ka mẽ ho kôta kaxyw nê mẽ piitã mẽ hixi hã kagã hpa. Anẽ.

3 Hãmri nhũm mẽ piitã ã kot mẽ hipêx anhÿr ã amnhĩ tã harênh ma hãmri nê mẽ kot mẽ hixi hã kagã kaxyw piitã akupÿm papxã hwÿr ma hapêx. 4 Nhũm pre Marir mjên Juje haxwÿja ma krĩ pê Perêj wÿr mō. Garirej kamã õ krĩ pê Najare rŭm kato nê ma hwÿr mō. Pika pê Jutej kamã na Perêjja. Kamã na pre Juje nhĩgêt Tawija kato. 5 Nhũm Juje kêp kanrêhã htãmnhwÿ jakamã na pre ma akupÿm hwÿr mẽ hkwÿjê hkôt mō. Nê ma amnhĩ kôt kot ho hprõ mã xwÿnh Marir o mō. Arĩ htujarõ rax rãhã nhũm ma amnhĩ kôt o mō. 6 Nhũm wa mōõ hãmri nê hwÿr pōj. Nhũm Marir hpijagri xã hã mytwrÿ mã àr jakamã nhũm kamãt nhũm õhy xã. 7 Nom nhũm Perêj wÿr mẽ hpõx nyw xwÿnhjaja ra ixkre piitã ho nyt pa nhũm wa tee ri hpijagri kaxyw amnhĩ to ukapi ho pa. Hãmri nê nhÿri mōx nhõrkwÿ punajre hwÿr axã nhũm Marir kamã hpijagri. Nhũm hkra kato nê myre. Kra kot wa na pre. Hãmri nhũm kumÿ nê kupêxê ho hkupu hpa nê mōx xãpkur xã hã kôsti kaprÿ kamã kuxi nhũm hamakêtkati nê gõr nê nō.

ôwêhti jamãr xwÿnhjê jarênh

8 Rôm nhũm ôwêhti jamãr o mẽ pa xwÿnhjaja kapôt ã ri hkrit ôwêhti jamãr o pa. Nhũm ra kamãt nhũm mẽ hamãr o hkrĩ. 9 Pu nhũm kaxkwa rŭm Tĩrtũm kapêr o wrÿk xwÿnhja wrÿ nê mẽ mÿri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhũm Tĩrtũm tãm ã mẽ hipêx anẽ. Hãmri nhũm mẽ tee ri jawÿ Tĩrtũm kapêr o wrÿk xwÿnhja pumu nê kãm ma htÿx nê akryk omunh o hkrĩ. 10 Hãmri nhũm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awÿr wrÿ. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa. ¹¹ Na ra ham mẽ akamã ukapri xwÿnhhta kato. Pahi Tawi nhõ krĩ mẽ mẽ anhõ krĩ pê Perêj kamã. Kêp mẽ apiitã mẽ anhõ pahihti na. Mẽ ate amnhĩ wÿr kamã ajamak o apa xwÿnh pê Kris na. Tãm na ham kato. ¹² E pa ixpri hã mẽ amã tanhmã harênh to ka mẽ inhma. Na kato nhũm katorxã kupêxê ho kupu hpa nê kôsti kamã kuxi nhũm nõ. Kwa mẽ tokyx ma hwÿr mra nê kêp mẽ anhõ pahihti hã omu. Anê.

¹³ Nhũm pre ã mẽ kãm ujarênh anê. Hãmri nhũm hkwyjaja wamta kôt ohtôo nê mẽ hwÿr wrÿ nê puhã harir. Hãmri nê Tirtũm mã mex o mex ã grer o harir. ¹⁴ Nê hã grer o:

Tirtũm maati na mex o mex.

Jakamã mẽ kãm hprãm xã kôt pix mã amnhĩ nhĩpêx o mẽ pa xwÿnhjaja koja amnhĩ tã mẽ omu nê tanhmã mẽ ho nhũm mẽ hamakêtkati nê amnhix hkĩnh nê pa ho pa.

¹⁵ Anhÿr o grer o harir hãmri nê ma akupÿm kaxkwa hwÿr àpir pa nê akunok. Hãmri nhũm ôwêhti jamãr xwÿnhjaja mẽ kapêr ma nê ma akupÿm àpir ã mẽ omu nê axpên mã:

—E tokyx pu mẽ krĩm nê Tirtũm kot mẽ pamã ho amnhĩrit xwÿnhhta japêr nê tokyx nhÿri omu. Kwa ma pu mẽ tokyx hwÿr nê omu. Anê.

¹⁶ Hãmri nhũm mẽ ma hwÿr mra. Hãmri nê krĩm agjê nê môx nhõrkwy wÿr agjê nê mẽ hkrareta pumu. Nhũm kôsti kamã nõ nhũm mẽ omu nê kuri Marir mẽ Juje wa omu. ¹⁷ Hãmri nê akupÿm hapôj nê ma mẽ piitã mẽ hkôt ri mẽ kãm harênh o pa. Ra Tirtũm kapêr o wrÿk xwÿnh kot mẽ kãm harênh xãja kôt nhũm mẽ ma mẽ kãm harênh o ri mẽ hkôt pa. ¹⁸ Nhũm mẽ amnhĩ jaêr pê mẽ kot harênh ma nê tee ri hkukamã hamaxpêr. ¹⁹ Nom nhũm Marir mẽ kot kãm hkrax rùm tanhmã hkra jarênh to xãta kukamã pix mã hamaxpêr rãhã ho pa.

²⁰ Jakamã nhũm ôwêhti jamãr xwÿnhjaja ma akupÿm hkrit wÿr mra. Tirtũm kapêr

o wrÿk xwÿnh ra kot mẽ kãm ujarênh xã hkôt nhũm mẽ kot Jejus pumunh jakamã ma akupÿm hkĩnh nê Tirtũm mã mex o mex ã harênh pê hã grer o akupÿm mra.

Mẽ kot Jejus ã hixi mẽnh ã harênh

Matêwre 1.21; Rukre 1.31

²¹ Tã nhũm wa hkrareta ra hã arĩgro pê 8 nhũm mẽ hwÿr akuprô nê kãm my kwÿrÿt kã krãhta. Na hte Ijaew mẽ hkra myre piitã ã mẽ hipêx anê. Mẽ piitã mẽ kot Tirtũm mã ôr ã mẽ omunh kaxyw. Jakamã nhũm mẽ kãm ho anê nê hpãnhã hã hixi mẽ. Marir kormã kot ho htujarô hkêt ri Tirtũm kapêr o wrÿk xwÿnh kot hkukamã kãm hixi jarênh xãja kôt nhũm mẽ hã hixi mẽ nhũm hixi kêp Jejus.

Mẽ kot Tirtũm mã Jejus nhõr pyrãk o hipêx

22-24 Tã nhũm Marir hpijagri ho hapêx.

Jakamã nhũm Juje ma krĩ pê Jerujarê hwÿr mẽ kot Tirtũm mã amnhĩ jarênh xã hã ixkre hwÿr amnhĩ kôt o mõ. Na pre ra finat Mojes amnepêm Tirtũm nhÿ hã mẽ hkukamã mẽ hpãmjê mã ja hã karõ. Nê mẽ kãm hã karõ ho:

Koja mẽ aprõ hpijagri. Hãmri nê hpijagri ho hapêx ka mẽ ma Tirtũm mã amnhĩ jarênh xã hã ixkre hwÿr o mra nê hpãnhã Tirtũm mã mẽmoj gõ. Kãm tutre ho gõ rÿ kãm tuuti hõ ho axkrut nê agõ kê patre hamÿ nê kãm kupa. Kot ja hã omunh nê hpijagri xwÿnhhta akupÿm mex ã harênh kaxyw.

Anhÿr o kot mẽ kãm ja hã karõ jakamã nhũm wa ma ã amnhĩ nhĩpêx anhÿr kaxyw hwÿr mõ. Nê amnhĩ kôt Jejus mÿ nê o mõ. Tirtũm kot mẽ kãm ja hã karõ nhũm mẽ kot hã kagã xã hkôt. Na pre ra finat Mojes mẽ kãm ja jarê nê mẽ kãm:

Kot kaj mẽ akra my kot wa hãmri nê te mẽ ate Tirtũm mã ôr kaxyw hipêx pyrãk o hipêx. Kê tãm amnhĩ nhĩpêx o pa nê ÿ hã tanhmã kãm amnhĩ nhĩpêx to ho pa.

Anhÿr jakamã nhũm wa ra Jerujarê hwÿr nojarêt nê amnhĩ kôt Jejus mÿ nê ma amnhĩ kôt o mõ.

Simeãw kot Jejus kukamã harênh

25-26 Rôm nhũm Jerujarê kamã Simeãwja.

Tirtũm Karõ nhÿ hã kot tanhmã amnhĩ to

mex to ho pa xwýnh na pre. Na pre hte Tirtüm kapër kôt pix mã tãm amnhĩ nhĩpêx o pa. Jakamã nhũm pre ra Tirtüm Karõ ã kãm kapër anê nê kãm:

—E inhma Simeãw. Kot kaj atĩr rãhã nhỹrmã Tirtüm kot mẽ akaxyw ãm mã xwýnhja ka ano ho omu nê rĩ kormã ty.

Anhỹr o kãm kapër jakamã nhũm kuma nê hkĩnh nê ãm pix kamã hamak o pa. Mẽ kêp Ijaew wýr wryk nê mẽ ho mex mã xwýnhhta pix kamã hamak rãhã ho pa.

²⁷ Jakamã nhũm Jejus katorxà mẽ hipêêxà purota wa Tirtüm mã amnhĩ jarênh xà hã ixkreja wýr Jejus o axà nê kormã o xa. Finat Mojes kot mẽ kãm hã karõ xà hkôt. Hãmri nhũm Tirtüm Karõ mẽ hwýr Simeãwja mẽ nhũm ma mẽ hwýr tẽ nê axà.

²⁸ Hãmri nê wa hkrata pumu nê hkĩnh tỳx nê. Hãmri nê wa kêp kumý nê o xa nê hã Tirtüm mã mex o mex ã harê nê kãm:

²⁹⁻³² Pa Pahĩ Maati. E ot pa ixte amã tanhmã amnhĩ nhĩpêx to ho ixpa xwýnh ã amnhĩ jarê.

Nà ãm hãmri na ka pre ã inhmã jare hkukamã harênh anê. Tã ate inhmã harênh xà hkôt pa ra inhno ho omu. Kêp mẽ ixkamã ukaprĩ xwýnh ã omu. Nê kêp ate mẽ ixwýr mẽnh xwýnh ã omu.

Nà koja te arĩgro hã myt hirã nê mẽmoj piitã ho amnhĩrit mex pyrãk o koja mẽ inhĩpêx o pa. Jakamã koja hprêk hãmri nê ma Ijaew kêt xwýnhjê mã apê Tirtüm ã akapêr o amnhĩrit o pa nhũm mẽhprĩ hã ajarênh ma. Nê mẽ ixpê Ijaew kot paj mẽ ijaxwýja kuma nê hã ixpijaàm o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nê ixãmnhĩx ty. Ra ixte inhno ho ate inhmã harênh xwýnhhta pumunh kênã. Anê.

³³ Nhũm pre ã Simeãw Jejus jarênh anê. Nhũm katorxà mẽ hipêêxà purota wa amnhĩ jaêr pê kot ã harênh anhỹrja mar o xa. ³⁴⁻³⁵ Hãmri nhũm Simeãw wa ho Tirtüm wý nê kãm:

—E Tirtüm. Kêr ka ja wa ho mex nê. Wa ho mex o wa ho mex rãhã ho apa. Anê.

Hãmri nê Marir mã kapêr nê kãm:

—Nà ãm hãmri na pre Tirtüm mẽ pakaxyw akrata xãm. Mẽ pahpê Ijaew

kaxyw ãm. Jakamã koja hprêk nê ma Tirtüm kapêr o mẽ piitã mẽ ahkre ho ri mẽ hkôt pa. Nhũm mẽ kuma hãmri nê ahpýnhã tanhmã hamaxpêr to xà hkôt tanhmã hipêx to. Jakamã nhũm mẽ hkwyjaja kuma nê hkôt amnhĩ xunhwý nê hkôt amnhĩ nhĩpêx o pa. Jao tãm hipêx o pa. No nhũm mẽ hkwyjaja kuma nê axtem nê kãm hkĩnh kêt nê. Hãmri nê tanhmã hipêx to. Jakamã kot kaj tee ri ja hã mẽ omu nê akaprĩ htỳx nê. Te mẽ kot wapo ho akanhwýr nê akamã ho kaxkep nhũm apê omnuj tỳx pyrãk o kot kaj amnhĩ kamã ama nê mẽ omu. Anê.

ãnti kot Jejus pumunh ã harênh

Wam Ximotre 5.5

³⁶⁻³⁸ Rôm nhũm mẽhõ ni pê ãntija mẽ hwýr axà nê Jejus pumu. ãntija Panuew kra na pre. Nê Ase hkwy na pre. Ni htã kêp Tirtüm nhỹ hã kapêr jarênh o pa xwýnh. Na pre ra mjên no ãm kormã mjên nê pa hã amgrà pê 7 pix nhũm pre kêp ty. Hãmri nhũm axte mjên kêt nê pa rãhã ra hpigêx tỳx nê. Ra hã amgrà pê 84. Na pre hte Tirtüm mã amnhĩ jarênh xà hã ixkre hwýr pa nê kãm amnhĩ jarênh rãhã ho pa. Nê kot kãm amnhĩ jarênh kaxyw nê apkur kêt rãhã kãm amnhĩ jarê. Nê arĩgro hã hwýr pa nê kamãt kãm hwýr pa. ã na pre hte amnhĩ nhĩpêx anhỹr rãhã ho pa anê. Jakamã mẽ hwýr axà nê Jejus pumu nê hkĩnh nê. Hãmri nê hã Tirtüm mã mex o mex ã harê nê kãm:

—Hêxta gàà nê Tirtüm. ãm hãmri na ka mẽ ixwýr Jejus mẽ. Ma amex o amex. Anê.

Hãmri nê Ijaew kot amnhĩ wýr mẽ kamã ukaprĩ xwýnh kamã hamak xwýnhjê mã ra Jejus kator ã harênh o ri mẽ hkôt pa.

Marir mẽ Juje wa kot akupým Najare hwýr mõi ã wa harênh

Matêwre 2.19-23

³⁹ Tã nhũm Marir mẽ Juje wa Tirtüm kapêr ã kagà htüm kôt Tirtüm mã amnhĩ jarênh xà hã ixkre kamã tanhmã amnhĩ nhĩpêx to hpa hãmri nê kato nê ma akupým mõi. Ma Garirej kamã õ krĩ pê Najare hwýr wa ma akupým mõi.

⁴⁰ Tã nhũm wa hkrata ra wa kãm hprêkre ho mõi. Nê mex nê ahpumunh tỳx nê. Tirtüm kot tânopxar nê mẽmoj to kutã nojarêt rãhã ho pa jakamã nhũm mex nê hkĩnh nê pa.

Marir mẽ Juje wa kot tee ri Jejus japêr ã wa harênh

Rukre 4.22

⁴¹ Nhũm pre hte Marir mẽ Juje wa amgrà mẽ hkwyjê hkôt ma Jerujarê hwÿr pa. Mẽ kot arĩgro pẽ Pas ã hkĩnh kaxyw. Pas ã na hte mẽ kẽp Ijaew amnepẽm Tĩrtũm kot pika pẽ Ejit rũm mẽ hpãmjẽ katorja mã hamaxpẽr kaxyw axpẽn wÿr akuprõ nẽ hã hkĩnh. Jakamã nhũm wa ma mẽ hkôt hã hkĩnh kaxyw Jerujarê hwÿr hkwyjê hkôt mõi. ⁴² Nhũm ra Jejus hprêk o mõi. Ra hã amgrà pẽ 12 jakamã nhũm wa ma amnhĩ kôt o mõi. ⁴³⁻⁴⁴ Tã nhũm mẽ hkĩnh pa hãmri nẽ akupÿm nojarêt nhũm Marir mẽ Juje wa ma hkwyjê hkôt akupÿm mõi. Nhũm Jejus Jerujarê kamã ahte arĩk nẽ akupÿm wa hkôt mõi kêt nẽ. Nhũm wa htÿx wam ma hkwyjê hkôt htẽm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkôt mõi o mõi ã ra hã kamãt. Hãmri nẽ mẽ kot amnhĩm hikranh xàja wÿr mẽ hkôt põi nẽ tee ri mẽ hkaêx ã hkra japêr o ri mra nom omunh kêt nẽ. ⁴⁵ Jakamã nhũm apkati nhũm wa awjanã nẽ ma akupÿm Jerujarê hwÿr mõi nẽ kamã hapêr o ri pa. ⁴⁶ Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tĩrtũm mã amnhĩ jarênh xà hã ixkreja wÿr hapêr o mõi nẽ hwÿr axã. Hãmri nẽ omunh kurẽ kumrêx. Nhũm arĩ mẽ kot Tĩrtũm kapêr tũm o mẽ ahkre xwÿnhjê mar o mẽ kutã nhÿ. Nẽ mẽmoj tã ri mẽ hkukja nẽ tanhmã mẽ kãm ujarênh to. ⁴⁷ Nhũm mẽ kot mar xwÿnhjaja tee ri kapêr ã kuma nẽ àhpumunh tÿx ã omu hãmri nẽ akryk mar o hkrĩ. ⁴⁸ Hãmri nhũm Marir mẽ Juje mẽ hwÿr axã nẽ mẽ kuri wa hkraja pumunh kurẽ kumrêx. Hãmri nhũm katorxàja hwÿr tẽ nẽ kãm:

—Xẽ Jejus. Mon ka axtem nẽ ã ri amnhĩ nhĩpêx anẽ nẽ akupÿm wa ixkôt amõi kêt nẽ? Na pa wa mõi nẽ mẽ pahkwÿjê hkôt põi nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

⁴⁹ Hãmri nhũm amnhĩ tã wa kuma nẽ wa kãm:

—Tÿ. Nom Inhĩpêxà nhõrkwÿ kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

⁵⁰ Hãmri nhũm wa kuma nẽ ã kot amnhĩ jarênh anhÿrja kukamã tee ri hamaxpêr.

⁵¹ Hãmri nẽ mẽ ma akupÿm mõi nẽ Najare hwÿr põi nẽ kamã pa. Nhũm pre Jejus wa kapêr kôt ri amnhĩ nhĩpêx rãhã ho pa. Hãmri nhũm katorxàja hkra x rũm mẽ kot kãm tanhmã hkra kot amnhĩ nhĩpêx to hkukamã harênhja pix kukamã hamaxpêr rãhã ho pa.

⁵² Gaa nhũm Jejus ra àptàr o mõi. Nẽ àhpumunh tÿx nẽ. Nhũm mẽ piitã ã kot amnhĩ nhĩpêx anhÿr ã omu nẽ kãm hkĩnh nẽ. Nhũm Tĩrtũm haxwÿja kãm hapê nẽ.

3

Juãw Paxis kot Tĩrtũm kapêr jarênh o pa hã harênh

Matêwre 3.1-10; Makre 1.1-8; Juãw 1.19-28

¹⁻² Tã nhũm kormã pahiti Tipeja mẽ ho amnhĩptàr o pa. Na pre ra mẽ ho amnhĩptàr ã amgrà pẽ 15. Nhũm Põn Piratja pahiti Xipe mã pika pẽ Ijaew nhõ xwÿnhjê ho amnhĩptã. Nhũm Eroxa kãm pika pẽ Garirej nhõ xwÿnhjê ho amnhĩptã. Nhũm Erox tõi Firipja kãm pika pẽ Iturej nẽ hõi pẽ Takonit wa kamã mẽ pa xwÿnhjê ho amnhĩptã. Nhũm Risãnja kãm pika pẽ Apirên kamã mẽ ho amnhĩptã. Nhũm Anas mẽ Kajpasja wa kẽp Ijaew nhõ patre maati.

Rõm nhũm Jejus mẽ Jakaris kra Juãwja wa ra hamẽ anhĩpê àptàr. Jakamã nhũm Tĩrtũm tanhmã Juãw mã kapêr to. Kormã kapõt ã ri pa ri nhũm kãm kapêr nẽ kãm tanhmã kot amnhĩ nhĩpêx to ho pa hã kãm karõ nẽ kãm:

—Pa Juãw. E inhma. Kêr ka ma mẽ kãm ixkapêr jarênh rãhã ho ri apa. Anẽ.

³ Hãmri nhũm kuma nẽ ma ri mẽ kãm kapêr jarênh o pa. Pyhti pẽ Jotãw mÿri mẽ piitã mẽ kãm harênh o ri pa nẽ hpãnhã ihkjê hã ri mẽ pa xwÿnhjê mã harênh o ri pa. Nẽ mẽ kãm:

—E kwa mẽ tokyx amã amnhĩ tomnuj kaga hprãm xaj tãm ri amnhĩ nhĩpêx. Kẽ Tĩrtũm ja hã mẽ apumu nẽ mẽ anẽ mẽ ate amnhĩ tomnuj o hapêx pa. Pa mẽ piitã mẽ kot mẽ apê Tĩrtũm kra hã mẽ apumunh kaxyw mẽ akrã kumrã.

Anhÿr o mẽ kãm kapêr o ri pa. ⁴⁻⁵ Na pre ra amnepẽm mẽ hkukamã Tĩrtũm nhÿ

hã kapêr o pa xwýnh Ijais ra Juãw kukamã kot tanhmã amnhĩ nhĩpêx to hã harê nê hã kagà. Nê hã kagà ho:

Koja nhỹrmã mēhō mōn pōj. Kapôt ã mōn pōj nê mē kãm ujarēnh o ri pa. Nê mē kãm ujarēnh o: “E mē inhma. Koja Tĩrtũm tokyx mē pahwỳr mē panhō pahihtĩ mē nhũm wrỳ nhũm mē piitã omu. Jakamã kwa mē tokyx kutêp tãm amnhĩ nhĩpêx o apa. Te ho mē kot mēhō kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nê tãm axpēn nhĩpêx. Pahihtita kutêp. Mē pahte amnhĩ nhĩpêx te kot pry nhĩnur pyrãk nhũm mē tee ri kot kãm hã mrar mex prãm kaprỳ pyrãk. Hinur nê krã hakỳx nê pry juk pyrãk o na mē pahte amnhĩ nhĩpêxja. Jakamã kot kaj mē ate amnhĩ tomnuj kaga nê tãm amnhĩ nhĩpêx. Nê tãm axpēn nhĩpêx. Hãmri nê te mē kot pry nhĩnur o mex nê ho katàt nhũm katàt muux nê nōr pyrãk o kot kaj mē amnhĩ nhĩpêx. Pahihti nywta kutêp. Kwa kêr ka mē ã amnhĩ nhĩpêx anê.

⁶ Kot kaj mē anê nhũm mē ohtô nê ja hã mē apumu hãmri nê mē apyrã Tĩrtũm kot mē ho hkra kaxyw amnhĩ to kuwỳ.” Anhỹr o mē kãm ujarēnh o pa. Anê.

Nhũm pre ã finat Ijaisja Juãw Paxis kukamã mē kãm ujarēnh anhỹr o pa. ⁷ Jakamã nhũm àptàr nê Ijais kot ra hkukamã harēnh xà hkôt ma Tĩrtũm kapêr o mē ahkre ho pa. Nhũm prem kuma hãmri nê kot mē hkrã kumrãr kaxyw hwỳr amnhĩ to mra. Nhũm mē omu nê tanhmã mē ahkre hto. Nê mē kãm kapêr kãm hihtỳx nê mē kãm:

—Tk. Kwa kormã. Mē ate amnhĩ tomnuj pix o ri apa xwýnh kēnã. Xà kot paj mē ate amnhĩ tomnuj rãhã mē akrã kumrã nhũm Tĩrtũm ja hã mē apumu nhũm ja kãm mex nã? Nã koja ja kãm mex kêt nê. Koja ja mỳrapê nhỹrmã tanhmã mē anhĩpêx to ka mē tee ri umaj apimxur prãm kaprỳ.

⁸ —Na htem amnhĩ tomnuj kaga nê hpãnhã tãm amnhĩ nhĩpêx. Nê tãm ri axpēn nhĩpêx. Jakamã e kwa mē ã amnhĩ nhĩpêx anhỹr o apa. No na ka htem atỳx ri ajamexpêr o: “Mē ixpê finat Apraãw

kanrêhã htãmnhwỳ jakamã koja Tĩrtũm ja hã mē ixpumu hãmri nê mē ixte amnhĩ tomnuj mỳrapê tanhmã mē ixto hkêt nê. Koja ãm mē ixto mex rãhã nê.” Anhỹr o atỳx ri amnhĩ kukamã ajamexpêr o apa. Nom ja kot anhỹr kêt. Mē apê Apraãw kanrêhã htãmnhwỳ htã uràk nê tãm amnhĩ nhĩpêx o apare hã. Kot ka mē apê kanrêhã htãmnhwỳ htã amnhĩ tomnuj o ri apa hãmri nê Tĩrtũm noo mã te mē apê pikap kēne nhĩkwỳ pix pyrãk.

⁹ —Na ra Tĩrtũm kot mē ate amnhĩ tomnuj mỳrapê tanhmã mē ato kaxyw. Koja mē anhĩpêx o te mēhō nhō mēmoj pàr ô hkêt nhũm kot tee ri omunh hãmri nê krãhyr nê kuwy kamã mēnh nê ho xêt par pyrãk o mē anhĩpêx. Jao amnhĩ nê kuwy hwỳr mē arēnh pa ka mē kamã amnhĩ xà htỳx kamã ajamak rãhã ho ri apa. Anê.

Nhũm pre ã Juãw Paxisja mē kãm kapêr anê. ¹⁰ Hãmri nhũm mē kuma nê tee ri amnhĩ kukamã hamaxpêr nê kãm:

—Kwa xô wehe? Xà koja ã mē inhĩpêx anê? Kwa tanhmã kot paj mē kot ã mē inhĩpêx anhỹr pymaj amnhĩ nhĩpêx to wehe? Anê.

¹¹ Hãmri nhũm mē kãm:

—Nà kêr ka mē axpēn kãm axukaprĩ ho ri apa. Nê mē kēp amrakati xwýnhjê mã amnhĩ kutã mēmoj nhōr o ri apa. Nê mē anhĩnôhkã axkrut nê mēhō hinôkã hkêt xwýnhjê mã ho pyxi nê agō nê pyxi nê ho arĩk. Nê mē axàpkur xà ho anhōxỳ ho apa hkêt nê. ãm axãmnhĩx ri mē kēp amrakati xwýnhjê mã amnhĩ kutã mē kãm mēmoj to hkryre nê agō. E kêr ka mē ã axpēn nhĩpêx anhỹr o ri apa. Anê.

¹² Hãmri nhũm Rõm kãm mē õ pahihtĩ mã mē piitã mē kēp kàxpore hkwy jamýnh xwýnhjaja mē uràk nê hwỳr mra. Kot mē uràk nê mē hkrã kumrãr kaxyw hwỳr mra nê kãm:

—No we mē pajaja? Tanhmã kot paj wem amnhĩ nhĩpêx to? Anê.

¹³ Hãmri nhũm mē kãm:

—Nà mē kajaja kêr ka mē Rõm nhō pahi kot mē amã mē ate mē kēp kàxpore hkwy jamýnh jarēnh xà hkôt pix mã hamýnh o ri apa. No mē atỳx ri amnhĩ krã hkôt amnhĩm hkwy jamýnh prãm xàj mē kãm hkre kamã

ho rûnh nê mē kām harēnh o ri apa hkêt nê. Anê.

¹⁴ Hāmri nhūm hpānhā pōristi hkwyjaja hwyr mra nê kām:

—Kwa no we mē pajaja? Tanhmā kot paj wem ri amnhī nhīpêx to ho ixpa? Anê.

Hāmri nhūm mē kām:

—Nà kêr ka mē anhō pahihiti kot mē axapēnh pānhā mē amā kàxpore nhōrta pix jamy nê ajamakêtkati nê axāmnhīx ri ho amnhīm axujaprōr o ri apa. No mē akwýjaja kām apyma nê mē amā kàxpore nhōr prām xaj ri mē kām tanhmā amnhī pyma hto ho ri apa hkêt nê. E kêr ka mē ā amnhī nhīpêx anhýr o ri apa. Anê.

Juāw Paxis kot tanhmā Jejus jarēnh to hā harēnh

Matêwre 3.11-12; Makre 1.7-8; Juāw 1.19-28; mǎānēn Atre 19.4

¹⁵ Nhūm pre ā Juāw Paxisja mē kām kapēr anê. Nhūm mē kuma nê htýx kēp Tirtūm kot mē pakaxyw ām mā xwýnhhta ā hkamnhīx.

¹⁶ Hāmri nhūm amnhī tā ā mē hamaxpēr anhýr ā mē omu hāmri nê mē kām amnhī tā aprā nê mē kām:

—Nà pa hkêt. Na pa hte ām Tirtūm mā gō pix o mē hkrā kumrār o ri ixpa. No koja tokyx ixpānhā Tirtūm kot mē pakaxyw ām xwýnhhta tām mē pahwýr pōj. àhpumunh týx o kot ijakrenh jakamā na pa hte ām kukwak ri ixpa nê hā xpijaām o ri ixpa. Tirtūm kot mē pakaxyw ām xwýnhhta koja mē awýr Karō rē nhūm mē akaxwýnh mā agjê ka mē ý hā tām ri amnhī nhīpêx rāhā ho ri apa. Nom kormā mē kot tām amnhī nhīpêx hkêt xwýnhjaja koja ja hā mē omu hāmri nê mē hipêx o te kuwy kot mēmoj to kaxār par pyrāk o mē hipêx.

¹⁷ —Na htem pur kām harōj nhīkē nê ho grā nê hpānhā kahtwý. Nê kahuk pa hāmri nê hkapī nhūm kōk apê nê prýhka ho htor nê ho hapêx pa. Nhūm mē hy ho pa nê ixkre kamā gōj kām unhwý. Ja pyrā nê koja tokyx Tirtūm mē piitā mē kot tanhmā amnhī nhīpêx to ho pa hā mē omunh xà hkôt mē ho axkjê. Mē kot tām amnhī nhīpêx o mē pa xwýnhjaja koja ma amnhī wýr mē ho api nhūm mē kuri mex nê hkīnh rāhā nê pa ho pa. No mē kot amnhī tomnuj xwýnhjaja koja mē hkīnhā tanhmā mē hipêx to nhūm

mē ma kuwy raxja wýr pa nê kamā amnhī xà htýx kamā hamak rāhā nê pa ho pa. Anê.

¹⁸ Nhūm pre ā Juāw Paxis Tirtūm kapēr o mē ahkre anhýr o pa.

Juāw Paxis kot Jejus krā kumrār ā harēnh Matêwre 3.13-17; Makre 1.9-11

¹⁹ Tā nhūm Ijaew nhō pahi Eroxo ra htō hprō pê Eroxis pytà nê ho hprō nhūm Juāw Paxisja harēnh ma nê ma hwýr tē nê hā kām akir. No ām ja pix ā kām àkjêr kêt nê. Mǎānēn tanhmā kot amnhī tomnuj týx to ho pa hā kām akir. ²⁰ Nhūm amnhī tā kuma nê kamā gryk týx nê amnhī tā mē kām hā amýnē nhūm prem unê nê haxà. Jao amnhī tomnuj týx nê. ²¹ Nom kormā mē kot haxār kêt ri nhūm Juāw Paxis Ijaew kwýjê krā kumrār o xa. Rôm nhūm Jejusja hāmri tām nhýhýnh hwýr tē nê kot hkrā kumrār kaxyw kām anê nhūm kuma nê hkrā kumrā. Hāmri nhūm Jejus gōj rŭm api nê kormā gō mý ri Tirtūm mā amnhī jarēnh o xa. ²² Pu nhūm kaxkwa axkjê nhūm kurŭm Tirtūm Karō te tuuti pyrā nê hwýr wrýk o tē nê ĩkre hā xa. Hāmri nhūm kaxkwa rŭm Tirtūm kām kapēr nê kām:

Pa? E apê Ixkra mex na ka. Ām hāmri na ka hte ixkanrēhā amnhī nhīpêx o apa. Inhmā ajapê kamā na ka ri apa ho apa. Anê.

Jejus kukamā higêt nê hpāmjê nhīxi hā harēnh

Matêwre 1.1-17

²³ Tā nhūm Jejus Tirtūm mā kapēr o mē ahkre ho pa hkrax. Na pre ra hā amgrā pê 30 hāmri nê kām ho hkrax.

E kot paj hpānhā amā Jejus kukamā hpāmjê nhīxi jarē Teopre. Ijaewjaja na prem htýx ho Juje kēp Jejus nhīpêxà kumrēx ā hkamnhīx nom kēp hipêxà kumrēx kêt ām kēp hipêxà puro na pre.

Jejus kēp Eri htāmnhwý na pre.

²⁴ Nê Eri kēp Matat kra na pre.

Nê Matat kēp Rewi hkra na pre.

Nê Rewi kēp Mewki hkra na pre.

Nê Mewki kēp Jānaj kra na pre.

Nê Jānaj kēp axtem Juje hō hkra na pre.

²⁵ Nê Juje kēp Matatis kra na pre.

Nê Matatis kēp Amōs kra na pre.

Nê Amōs kēp Naū hkra na pre.

Nê Naū kēp Eri hkra na pre.

Ně Eri kệp Nakai hkra na pre.
²⁶ Ně Nakai kệp Mate hkra na pre.
 Ně Mate kệp axtem Matatis õ hkra na pre.
 Ně Matatis kệp Semeĩ hkra na pre.
 Ně Semeĩ kệp Juje hõ hkra na pre.
 Ně Juje kệp Jotre hkra na pre.
²⁷ Ně Jotre kệp Joanãn kra na pre.
 Ně Joanãn kệp Rej kra na pre.
 Ně Rej kệp Joropape hkra na pre.
 Ně Joropape kệp Saraxi kra na pre.
 Ně Saraxi kệp Neri hkra na pre.
²⁸ Ně Neri kệp axtem Mewki hõ hkra na pre.
 Ně Mewki kệp Axi hkra na pre.
 Ně Axi kệp Kojã hkra na pre.
 Ně Kojã kệp Ematã hkra na pre.
 Ně Ematã kệp Erti hkra na pre.
²⁹ Ně Erti kệp Jojue hkra na pre.
 Ně Jojue kệp Eries kra na pre.
 Ně Eries kệp Jorĩ hkra na pre.
 Ně Jorĩ kệp Matat hkra na pre.
 Ně Matat kệp axtem Rewi hõ hkra na pre.
³⁰ Ně Rewi kệp Simeãw kra na pre.
 Ně Simeãw kệp Juta hkra na pre.
 Ně Juta kệp axtem Juje hõ hkra na pre.
 Ně Juje kệp Janã hkra na pre.
 Ně Janã kệp Eriakĩ hkra na pre.
³¹ Ně Eriakĩ kệp Merea hkra na pre.
 Ně Merea kệp Mena hkra na pre.
 Ně Mena kệp Matata hkra na pre.
 Ně Matata kệp Natã hkra na pre.
 Ně Natã kệp Tawi hkra na pre.
³² Ně Tawi kệp Jese hkra na pre.
 Ně Jese kệp Opex kra na pre.
 Ně Opex kệp Poas kra na pre.
 Ně Poas kệp Sarã hkra na pre.
 Ně Sarã kệp Nasõ hkra na pre.
³³ Ně Nasõ kệp Amĩnatap kra na pre.
 Ně Amĩnatap kệp Amĩ hkra na pre.
 Ně Amĩ kệp Ari hkra na pre.
 Ně Ari kệp Erõ hkra na pre.
 Ně Erõ kệp Pere hkra na pre.
 Ně Pere kệp Juta hkra na pre.
³⁴ Ně Juta kệp Jako hkra na pre.
 Ně Jako kệp Ijak kra na pre.
 Ně Ijak kệp Apraãw kra na pre.
 Ně Apraãw kệp Tera hkra na pre.
 Ně Tera kệp Nako hkra na pre.
³⁵ Ně Nako kệp Jeruk kra na pre.

Ně Jeruk kệp Rakau hkra na pre.
 Ně Rakau kệp Parek kra na pre.
 Ně Parek kệp Epti hkra na pre.
 Ně Epti kệp axtem Sara hõ hkra na pre.
³⁶ Ně Sara kệp Kajnã hkra na pre.
 Ně Kajnã kệp Apaxat kra na pre.
 Ně Apaxat kệp Sěre hkra na pre.
 Ně Sěre kệp Noehti hkra na pre.
 Ně Noehti kệp Ramek kra na pre.
³⁷ Ně Ramek kệp Metujarẽ hkra na pre.
 Ně Metujarẽ kệp Enok kra na pre.
 Ně Enok kệp Jarate hkra na pre.
 Ně Jarate kệp Marerer kra na pre.
 Ně Marerer kệp axtem Kajnã hõ hkra na pre.
 Ně Kajnã kệp Enos kra na pre.
³⁸ Ně Enos kệp Set kra na pre.
 Ně Set kệp Atãw kra na pre.
 Ně Atãw kệp Tĩrtũm kra na pre. Tĩrtũm kot wam my pê Atãwja pika ho hipêx jakamã te kệp hkra pyrãk.
 Å Jejus kukamã hpãmjê nhĩxi kot anhỹr.

4

Satanasti kot amnhĩ tã Jejus kamã hamak ã harẽnh

Matêwre 4.1-11, 16.23; Makre 1.12-13, 8.33; mããnẽn Eprêw 2.18, 4.15

¹ Tã nhũm Jejus pyhti pê Jotãw rũm akupỹm ma mõ. Hãmri nẽ Tĩrtũm Karõ nhỹ hã mẽmoj kutã amnhĩ to htỳx nẽ. Jakamã nhũm nhỹhỹm ma kapõt wỳr o mõ ² nhũm Satanasti omu nẽ ma hwỳr tẽ nẽ ri hkõt pa. Kapõt ã ri hkõt hêx rom tanhmã kãm nẽ ho pa. Kot mar nẽ Tĩrtũm kapêr nhĩrõp ãm prãm xàj ma hkõt tanhmã kãm kapêr to ho pa. Hãmri nẽ hkõt pa o hã arĩgro pê 40 nhũm Jejus kormã apkur kêt o hã arĩgro pê 40 nẽ hapêx nhũm ra kãm prãm tỳx nẽ. ³ Hãmri nhũm Satanasti kãm:

—Kwa mãn ka ra amã prãm tỳx kumrêx nà? Nom xep apê Tĩrtũm Kra jakamã mẽmoj tanhmã apê kute hkêt. Kwa kẽn nhĩkwỹ mũj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtỳx. E kwa tokyx kãm anẽ. Anẽ.

⁴ Hãmri nhũm kuma nẽ kãm:

—Tk. Nà kot paj akapêr mar xà hkõt tanhmã amnhĩ nhĩpêx to hkêt nẽ. Kojã Tĩrtũm kãm inhmã mẽmoj nhõr prãm nẽ

inhmã mẽmoj gõ pa arĩ kormã kukrẽ. Kapër ã kagà htùm kot ja jarẽnh kot: Na htem mẽ apkur xà pix kukwak ri htĩr nẽ pa hkêt nẽ. Na htem mãânẽn Tĩrtùm kapër mar xà hkôt tanhmã ri amnhĩ nhĩpêx to ho pa ho htĩr nẽ mex nẽ pa. Anẽ.

Ã kapër ã kagà kot ja jarẽnh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nẽ. ãm kwarĩ ho kwarĩ. Anẽ.

⁵ Nhũm pre ã Jejus Satanasti mã kapër anẽ nhũm tee ri kuma hãmri nẽ hpãnhã ma nhỹhỹm o mõi nẽ nhỹri kỳx pẽ mẽmoj prêeti nhĩmõk ã o xa. Hãmri nẽ kãm pika piitã ahkre ho xa. Nẽ kãm mẽ hikukrêx piitã ahkre. Kàxpore nẽ mẽmoj piitã nhũm kãm ahkre hpa nhũm anhĩpê omunh o xa.

⁶ Hãmri nhũm Satanasti kãm:

—E mãn ka kam ri mẽmoj mũj piitã omu. Piitã inhõ na. Inhmã na pre Tĩrtùm piitã õr pa. Kot paj inhmã mẽhõ mã õr prãm nẽ kãm kugõ. ⁷ Tã amã kot paj kugõ. Jakamã e. Kwa tokyx ixkutã tẽm nẽ inhmã inhmex o inhmex ã ijarẽ pa ama nẽ rĩ amã piitã õr pa. E tokyx. Anẽ.

⁸ Hãmri nhũm kuma nẽ kãm:

—Tk. Kot paj amã amex o amex ã ajarẽnh kêt kumrêx. ãm kwarĩ ho kwarĩ. Amexti hã. Tĩrtùm kapër ã kagà htùm kot ja nẽ kapër kãm hihtỳx kẽnã. Kapër kot:

Kêr ka mẽ ixkapër pix ma. Nẽ ixkutã pix mã mãn akõnkrã ho akrĩ nẽ inhmã inhmex o inhmex ã ijarẽnh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harẽnh jakamã kot paj ri amã amex o amex ã ajarẽnh kêt nẽ Satanasti. Anẽ.

⁹ Nhũm pre ã Jejus amnhĩ nẽ kãm kapër anẽ. Hãmri nhũm tee ri kuma nẽ hpãnhã ma krĩ pẽ Jerujarẽ hwỳr o mõi. Nẽ mẽ kot Tĩrtùm mã amnhĩ jarẽnh xà hã ixkre hprêk nhĩmõk wỳr ho api nẽ kỳxpê hatur xà hã ãm nhũm xa. Nhũm amnhĩ parpê kẽn rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtùm Kra jakamã kwa ja rũm ahpar mã ajarĩ nẽ ma tẽ nẽ pikap tẽm. Kojã Anhĩpêxã apumunh mex nẽ ka tanhmã amnhĩ to hkêt nẽ. ¹⁰⁻¹¹ Kapër ã kagà htùm kot ja jarẽnh kot:

Tĩrtùm kojã kapër o wryk xwỳnh mã ajarẽ ka ajarĩ nẽ ahpar mã tẽ nhũm mẽ kỳx pẽ amỳ nhũm mẽmoj akã hyr kêt nẽ.

Ã kapër ã kagà kamã ajarẽnh kot anhỹr jakamã e tokyx ajarĩ nẽ ma tẽn pikap ahto. Anẽ.

¹² Hãmri nhũm kuma nẽ kê axte amnhĩ tã kãm kapër nẽ kãm:

—Tk. Kwa nã. Kot pa ri amar xà hkôt ã amnhĩ nhĩpêx anhỹr kêt nẽ. Kojã Tĩrtùm tãm inhmã ijarĩ hã karõ pa rĩ mar xà hkôt ijarĩ no kot pa ri amar xà hkôt ijarĩ hkêt nẽ. Tĩrtùm kapër ã kagà htùm kot ja jarẽnh kot: Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarẽnh kôt tanhmã amnhĩ nhĩpêx to hkêt nẽ.

Ã ja nẽ kapër kot anhỹr jakamã ãm kwarĩ ho kwarĩ. Kot paj ri amar xà hkôt ã amnhĩ nhĩpêx anhỹr kêt nẽ. Tãm kot inhmã ijarĩ hã karõre hã. Anẽ.

¹³ Nhũm pre ã Jejus Satanasti mã kapër anẽ hãmri nhũm tee ri mẽmoj piitã ho mar kaprỳ hãmri nẽ hkaga nẽ ma nhỹhỹm tẽ. Hãmri nẽ kot nhỹrmã axte hwỳr htẽm nẽ kot mẽmoj punuj o mar kaxyw kormã amnhĩm hamãr o ri pa.

Jejus kot Tĩrtùm kapër o mẽ ahkre ho hkrax ã harẽnh

Matêwre 4.12-17; Makre 4.14-15

¹⁴ Tã nhũm Jejus ma akupỹm Garirej wỳr mõi. Nẽ Tĩrtùm Karõ nhỹ hã ahpumunh tỳx nẽ hkwyjê mã kapër jarẽnh o ri pa. Nhũm mẽ kuma nẽ piitã pikaja kamã axpẽn mã tanhmã harẽnh to. ¹⁵ Na pre hte mẽ kot Tĩrtùm kapër o mẽ ahkre xà hã ixkre hwỳr agjê nẽ kamã mẽ ahkre ho hkrĩ. Nhũm mẽ piitã kuma nẽ kãm mar prãm nẽ. Hãmri nẽ axpẽn mã mex ã harẽnh o ri pa.

Najare kamã mẽ kot Jejus kaga hã mẽ harẽnh

Matêwre 13.53-58; Makre 6.1-6; Juãw 1.11

¹⁶ Tã nhũm Jejus ma akupỹm krĩ kamã àptàr xàja wỳr ma mõi. Najare hwỳr. Hãmri nẽ kamã pøj.

Nhũm Ijaew nhõ arĩgromnu pẽ sap kato nhũm Jejus ma mẽ hkôt Tĩrtùm kapër o mẽ ahkre xà hã ixkre hwỳr tẽ. Hãmri nẽ hwỳr axà nẽ mẽ kuri nhỹ. Hãmri nẽ kamã mẽ kãm Tĩrtùm kapër ã kagà htùm kamã harẽnh kaxyw kànhmã xa ¹⁷ nhũm mẽ omu

nê kãm ja gô. Finat Ijais pê Tirtũm nhỹ hã kapêr xwýnh kot Tirtũm kapêr kwý hã kagàja nhũm mẽ kãm kugô. Hãmri nhũm kupy nê kamã kormã Tirtũm kot tanhmã mẽmoj jarênh to hõ japêr o xa. Nê kãm kato hãmri nê mẽ kãm kamã harê. Nom amnhĩ tã kamã mẽ kãm harênh o xa nê mẽ kãm:

¹⁸ Na pre ra Tirtũm Karôja ixto ixàhpumunh tỳx nê mẽ kêp amrakati xwýnhjê hwýr inhmẽ pa ra mō. Ixte mẽ kãm mẽmoj mex jarênh o ixpa kaxyw. Nê Satanasti kot amnhĩ kôt mẽ unhwýr xwýnhjê hwýr nhũm pre mãânên inhmẽ. Ixte mẽ nê Satanasti japôx o ixpa kaxyw. Nê mẽ kot hprĩ hã Tirtũm kapêr mar kêt xwýnhjê hwýr nhũm pre mãânên inhmẽ. Ixprĩ hã ixte mẽ kãm kapêr jarênh o ri mẽ hkôt ixpa kaxyw. Nê mẽ kot amnhĩ tomnuj o mẽ pa xwýnhjê hwýr nhũm pre mãânên inhmẽ. Ixte mẽ nê mẽ kot amnhĩ tomnuj rênh pa nhũm mẽ hamakêtkati nê àmnhĩx ri pa kaxyw. Æ na pre Tirtũm jajê piitã hwýr inhmênh anê pa ra man mōn pōj.

¹⁹ Nê amgrà ja kêp Tirtũm kot mẽ ato mex xà hã amgràja nhũm ixte mẽ amã harênh o ixpa kaxyw na pre inhmẽ pa mōn pōj. Anê.

²⁰ Nhũm pre ã Jesus Tirtũm kapêr ã kagà htũm kamã mẽ kãm amnhĩ jarênh anê. Hãmri nê akupỹm mẽ kãm kagàja gô nê ho mẽ ahkre kaxyw akupỹm nhỹ nhũm mẽ piitã omunh pê mar o hkrĩ. ²¹ Hãmri nhũm mẽ kãm tanhmã amnhĩ jarênh to nê mẽ kãm:

—E ra Ijais kot ã ixkukamã ijarênh anhỹr xà hkôt na pa mẽ awýr wrý nê mẽ anoo mã ã amnhĩ nhĩpêx anhỹr o hkra. Anê.

²² Hãmri nhũm mẽ amnhĩ jaêr pê ã kot amnhĩ jarênh anhỹr ã kuma. Nê tee ri kuma nê axpên pumunh pê hamaxpêr o hkrĩ. Jesus mẽ kurom àhpumunh tỳx nê kapêr mex tã nhũm mẽ ãm kêp amnhĩ kwý pix ã hkamnhĩx kãm hihtỳx nê. Hãmri nê axpên mã:

—Tk. Kwa kêp Juje hkra pix kênã koja we ri ã amnhĩ jarênh anê. Anê.

²³ Hãmri nhũm amnhĩ tã mẽ kuma nê mẽ kãm:

—Nà na ka mẽ ixte amnhĩ jarênh ma nom ixkôt ajamaxpêr kêt nê. Jakamã axpên mã ijarênh o: “Tk. Kêp mẽ pahkaprĩ xwýnh ro nhỹx jar mẽ panhõ krĩ kamã aa mẽ pahte mẽmoj pumunh kêt kwý tanhmã mẽ pamã hipêx to pu mẽ hã omu. Te ra kot krĩ pê Kapanau kamã mẽ kãm mẽmoj kwý ho anhỹrta pyrãk. Pu mẽ omu nê hkôt pajamaxpêr kurê kumrêx.” Anhỹr o ri axpên mã ijarê. ²⁴ Koja nhãm krĩ hõ kamã mẽhõ kêp Tirtũm kapêr jarênh xwýnh ã amnhĩ jarê ka mẽ harênh ma nê amã ma hwýr amrar nê mar prãm nê. No kêt jar mẽ panhõ krĩ kamã ixpê mẽ anhĩõ hã ã amnhĩ jarênh anê ka mẽ amã inhmar prãm kêt nê.

²⁵ —Kwa mẽ inhma. Amnepêm kormã finat Eris htĩr ri na pre mẽ hã na wrýk kêt ry rax nê. Jao hã amgrà axkrunêpxi nê hkôt mytwrý pê 6. Nhũm mẽ õ hkêt nê pa. Ra mẽ kêp mẽmoj grà pa nê hapêx nhũm mẽ kãm prãm tỳx kumrêx nê pa. Nhũm mẽ kêp mẽ mjên tyk xwýnhjaja kãm prãm xaj hirot o pa. ²⁶ Tã nom Tirtũm mẽ ho mex kaxyw mẽ hwýr Eris mẽnh kêt nê. Erisja mẽ urãk nê kêp Ijaew tã nhũm Tirtũm kot mẽ ho ajuta kaxyw mẽ hwýr mẽnh kêt nê. Mẽ kot amnhĩ kaxyw Tirtũm kôt hamaxpêr kêt jakamã nhũm mẽ hwýr mẽnh kêt nê. Axtem Ijaew kêt xwýnhjê hõ hwýr na pre kumê. Nhãm Sitõ kamã krĩ pê Sarep kamã mjên htyk xwýnhhta wýr. Tokyx kot tanhmã ho mex to kaxyw. Jakamã nhũm ma hwýr mō nê tanhmã kãm kapêr to nhũm kuma nê amnhĩ kaxyw Tirtũm kôt hamaxpêr kurê kumrêx.

²⁷ —Nê finat Eriasti haxwýja. Eris pyrã nê kêp Tirtũm nhỹ hã kapêr o pa xwýnh tã amnhĩ kwý pê Ijaew tanhmã mẽ ho ajuta hto hkêt nê. Na prem ohtô nê hkà nhy nê hkro xàpêr o pa. Jao ra omnuj tỳx nê. Tã nhũm Tirtũm kot akupỹm mẽ ho mex kaxyw mẽ hwýr Eriasti mẽnh kêt nê. Amnhĩ kaxyw mẽ kot hkôt hamaxpêere hã. Æm Sir nhõ xwýnh Namãja pix na pre Tirtũm Eriasti mã anê nhũm akupỹm ho mex. Kêp Ijaew kêt tã nhũm akupỹm ho mex. Tã ja pyrã nê na pa ãm mẽ kot amnhĩ kaxyw ixkôt hamaxpêr pix xwýnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpêr

kêt xwỳnhjê mã tanhmã ri amnhĩ nhĩpêx to hkêt nê. Anê.

Nhũm pre ã Jejus mẽ kãm amnhĩ jarênh anê.

²⁸ Hãmri nhũm mẽ kuma nê kamã gryk tỳx nê axpên mã hã amỳnê nê axpên mã:

—Tk. Kwa pu mẽ ixkre nê kator nê ma o tẽ nê kupĩ ri. Anê.

²⁹ Hãmri nê kaxyw kànhmã kuhê hpa nê hwỳr hprôt nê unê. Mẽ kot ma o htêm nê hixêt prêk jatur xà hã hkujaêk nhũm ahpar mã tẽn htêm nê htyk kaxyw. Mẽ õ krĩa hixêt prêk nhĩmõk ã na pre. Jakamã nhũm prem unê nê hatur xàta wỳr o tẽ. ³⁰ Tã nom nhũm tanhmã amnhĩ nhĩpêx to nê mẽ kêp akunok nê hpãnã nhãm ma tẽ nhũm mẽ tee ri hapêr nom nhỹri omunh kêt nê.

Jejus kot mẽhõ nê mẽkarõmnuti kator ã harênh

Makre 1.21-28

³¹ Tã nhũm Jejus ma akupỳm Garirej kamã krĩ pê Kapanaũ hwỳr mỗ. Nhũm mẽ õ arĩgromnu pê sap kato nhũm ma mẽ kot Tĩrtũm kapêr o mẽ ahkre xà hã ixkre hwỳr tẽ nê mẽ ahkre ho nhỹ. ³² Hãmri nhũm mẽ kot mar o hkrĩ xwỳnhjaja kuma nê kãm mar prãm nê. Nê axpên mã:

—Hêxta waa nê. ãm hãmri na ã mẽ pamã kapêr anê. Ahpumunh tỳx xà hkôt na hte ãm hãmri mẽ pamã awjarê. Anê.

³³ Nhũm mẽhõ myja mẽ ãhkô hã haxwỳja mar o nhỹ. Mẽkarõmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nê mẽ ãhkô hã Jejus mar o nhỹ nê ra ãmra kamã tanhmã kãm kapêr to. Nom nhũm tãm kãm kapêr kêt ãm kamã mẽkarõmnutija kãm kapêr. ³⁴ Nê kãm:

—Pa? Jejus pê Najare nhõ xwỳnh? Nà ate mẽ ixto ajapêx par kaxyw na ka mẽ ixwỳr mỗ. Ra ixte apumunh mex kênã. Apê Tĩrtũm kot mẽ ixwỳr amênh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mỗ? Anê.

³⁵ Hãmri nhũm kuma nê mẽkarõmnuti kot kãm ã kapêr anhỹr ã omunh kurê kumrêx. Jakamã kutã kãm kapêr nê kãm:

—Tk. Kwa anhĩkrê nê kêp akato. Anê.

Hãmri nhũm kuma nê myta o pika kura nê kêp kato nê ma tẽ. ãm ho pika kuranh

pix nhũm nỏ. Hãmri nê akupỳm kànhmã nhỹ nê akupỳm mex. ³⁶ Hãmri nhũm mẽ piitã omu nê kamã no pyma nê. Hãmri nê axpên mã:

—Kokỹỹ. Na hte Jejus amnhĩ krã hkôt àhpumunh tỳx xà hkôt mẽkarõmnuti mã kapêr nê mẽ hano nhũm htem kuma nê mẽ kêp hapôx kurê kumrêx. Anê.

³⁷ Hãmri nhũm mẽ mẽõ pika kamã piitã ri axpên mã harênh o pa.

Jejus kot Simãw Pêtre xupãnhgêx o mex ã harênh

Matêwre 8.14-15; Makre 1.29-31

³⁸ Tã nhũm Jejus Tĩrtũm kapêr o mẽ ahkre xàja rũm kato nê ma Simãw Pêtre nhõrkwỹ hwỳr tẽ. Nê mẽ hwỳr axà nhũm Simãw Pêtre omu nê kãm upãnhgêx tanhmã kute hã harê nê kãm:

—Kwa Pahihti. Tẽ nê inhmã ixupãnhgêx pumu. Na hkà kagro htỳx nê amnhĩ to àpêr o nỏ. Kwa tẽn inhmã omu. Anê.

Hãmri nhũm kãm:

—Tõe. Nà kot paj amã omu. Anê.

³⁹ Hãmri nê hwỳr tẽn kuri xa nê kãm:

—Pa? E kwa akà hakry. Anê.

Hãmri nhũm kuma nê hkà hakry nê akupỳm hihtỳx kurê kumrêx. Hãmri nê kànhmã nhỹ nê mẽ kãm mẽõ hã àpênh o ri mra.

Jejus kot mẽ ho ohtô nê mẽ ho mex ã harênh

Matêwre 8.16-17; Makre 1.32-34

⁴⁰ Tã nhũm ra amỹkry htỳx mẽ nhũm mẽ Jejus wỳr ahpỹnhã ri mẽ ã xwỳnhjê ho mra. Nhũm amnhĩ wỳr mẽ omu hãmri nê mẽ piitã ri mẽ hã ãhkra jaxwỳ nê akupỳm mẽ ho mex pa. ⁴¹ Nhũm ra mẽkarõmnuti mẽ hkwyjê hwỳr agjê nhũm mẽ kurũm mẽ hano nhũm mẽ tee ri amnhĩ tã omu nê mẽ kêp hapôx kurê kumrêx. Hãmri nê mẽ kêp hapôx kaxyw nê ãmra kamã kãm kapêr nê kãm:

—Kwa tanhmã kot pa wem amnhĩ nê ato? Hêxta waa nê. Apê Tĩrtũm Kra hã axàhpumunh tỳx kênã.

Anhỹr o kãm kapêr. ãm hãmri na prem ã harênh anê. Kêp Tĩrtũm kot mẽ pakaxyw ãm xwỳnh kênã. No nhũm Ijaew nhõ pahijaja kot mẽ kapêr mar nê kêp mẽkarõmnuti hkwy hã hkamnhĩx pymaj nhũm Jejus amnhĩ nê mẽ kãm kapêr nê mẽ kãm:

—Kwa mẽ ri ã ijarēnh anhÿr kêt nē.
Anhÿr o mẽ kām kapēr hāmri nē mẽ hano
nhũm mẽ hapôj nē ma mra.

*Mëmo kaxyw Tirtũm kot mẽ pahwÿr Jejus
mēnh ã harēnh*

Makre 1.35-39

⁴² Tã nhũm apkati nē myt kator greire
nhũm Jejus kot Tirtũm mã amnhĩ jarēnh
kaxyw kànhmã nhÿ nē kato nē ma nhÿhÿm
kapôt mã tē. Hāmri nhũm krĩ nhõ xwÿnhjaja
hkrã hapôj nē tee ri hapēr nē ma hkôt hpri
jakop o mō. Nē nhÿri hwÿr kato nē omu
hāmri nē ma nhÿhÿm mōr nē kurē nē kām:

—Kwa Jejus. Kēr ka tokyx ma nhÿhÿm
amōr kêt nē. Kritpēm mẽ ixkôt axkamē
mãn. Anē.

⁴³ Hāmri nhũm mẽ kuma nē amnhĩ tã mẽ
kām:

—Nà kot paj kritpēm mẽ akôt ix-
pikamēnh kêt nē. Kot paj ma krĩ piitã hkôt
ri Tirtũm kapēr o mẽ ahkre ho ri mẽ hkôt
ixpa. Tirtũm kot tanhmã mẽ ho hkra hto hã
harēnhja kot paj mẽ hkôt ri mẽ kām harēnh
o ri ixpa. Ja kaxyw na pre Tirtũm mẽ awÿr
inhmē. Anē.

⁴⁴ Nhũm pre ã mẽ kām amnhĩ jarēnh anē.
Hāmri nē mẽ kēp kato nē ma Ijaew nhõ pika
piitã hkôt Tirtũm kapēr o mẽ ahkre ho ri pa.
Ijaew nhõ Tirtũm kapēr o mẽ ahkre xà hã
ixkre kamã mẽ piitã ho mẽ ahkre ho ri pa.

5

*Jejus kot amnhĩ kôt mẽ hkwÿjê hwÿr ã
harēnh*

Matêwre 4.18-22; Makre 1.16-20

¹ Tã nhũm Jejus ma gō rax pē Jenējare
hwÿr mō. Hāmri nē hwÿr pōj nē gō mÿri
Tirtũm kapēr o mẽ ahkre ho xa nhũm mẽ
ohtō nē pu hã mar o kuhê. Nē kot hpri
hã mar nē hkôt omunh kaxyw hã axpēn
nhĩgãnh o kuhê. ² Hāmri nhũm tee ri amnhĩ
tã mẽ omu nē amnhĩ pu hã hakēx nē rīt
nē gōx kām pàr kaprÿ hamēxkrut nē jētja
wa omu. Nhũm õ dōn wa gōx kām kryhti
kuhōnh o xa. Nhũm pàr hamē hkaprÿ nē
ajēt nhũm Jejus omu. ³ Hāmri nē hwÿr tē nē
hōm axà nē õ dōn pē Simãwja mã anē nhũm
hkôt axà nē kii mẽ kēp pàrja amÿm kunhō
nhũm ajēt. Hāmri nhũm pàr kre rũm amÿm
mẽ ahkre ho nhÿ nhũm mẽ piitã omu nē
mar mex o kuhê.

⁴ Tã nhũm mẽ ahkre hpa nē Simãw mã
kām:

—E gō xupÿm wÿr anhō pàr o axkamē
nē axte anhō kryhti mẽ nē ho amnhĩm tep
kwÿmnē. Anē.

⁵ Hāmri nhũm tee ri kuma nē kām:

—Kwa na pa mẽ ra kamàt kām tee rēnh
o apkati nē ho hōmnēnh kêt tã ka ri inhmã
anē. Nom kot paj amar xà hkôt kop kumē.
Anē.

⁶ Hāmri nē upÿm wÿr pàr o axkamē nē
htō Andre mẽ wa axte kryhti mẽ. Nē ãm
mēnh tipxi htã ho tep pynēnh rax kumrēx.
Jakamã nhũm kryhtija ra pikaxōnh kaxyw.

⁷ Hāmri nhũm wa tee ri ho anē nē amnhĩ
wÿr pàr õ ho mrar xwÿnhhta wa kām akir.
Jepetew kra Juãw mẽ Xiakreja wa nhũm wa
amnhĩ wÿr wa kām akir nhũm wa hwÿr
pàr õ ho tē hāmri nē mẽ kryhti hã hije nē
pàr wÿr ho api. Hāmri nē pàrta hamē tep
o ho nÿt pa nē hamē ho hipu mex nē. Jao
nhÿx gōnh mã wa axà. ⁸⁻¹⁰ Hāmri nhũm
mẽ amnhĩ jaēr pē tep xohtō raxta pumu nē
kamã no puma nē. Hāmri nhũm Simãwja
Jejus kutã hkōn krã ho tēm nē hipō nē nhÿ
nē hã hpijaam kamã kām kapēr nē kām:

—Kwa Pahihti. Kii tamũ axkamē. Akĩnhã
ixte amnhĩ tomnuj tÿx xwÿnh na pa. Anē.

Hāmri nhũm kuma nē ãm kuma nē kām:

—Kwa nà tee ri amnhĩ kukamã aja-
maxpēr kêt nē. Kot kaj jarãhã hpãnhã tãm
amnhĩ nhĩpēx o apa. Na ka ra tep pynēnh
rũnh o apa. Tã kot kaj ja kaga nē hpãnhã
ma ri mẽ hkôt Tirtũm kapēr o mẽ ahkre ho
ri apa. Kojã mẽ ohtō nē ama nē Tirtũm kôt
amnhĩ xunhwÿ nē hkôt amnhĩ nhĩpēx o pa.
Jakamã kot kaj te ate tep pynēnh rũnh nē
Tirtũm mã õr pyrãk o amnhĩ nhĩpēx o apa.
Anē.

Nhũm pre ã Jejus Simãw mã kapēr anē.

¹¹ Hāmri nhũm mẽ gō jakàx ã pàr janhōr tÿx
nē kamã hikukrēx piitã hkaga hpa nē ma
Jejus kôt pa ho pa.

*Jejus kot hkà nhy kro tÿx xwÿnh o mex ã
harēnh*

Matêwre 8.1-4; Makre 1.40-45

¹² Tã nhũm Jejus ma krĩ hō hwÿr mō.
Hāmri nhũm mēhō my hkà nhy hkro htÿx
xwÿnhja omu nē hwÿr tē nē hã hpijaam
kaxyw kutã hkōnkrã ho nhÿ nē kām:

—Pa Pahihti. E ot pa awÿr amnhĩ to tẽ. Kwa akupÿm ate mẽ ixto mex kaxyw axàhpumunh tÿx jakamã kot ka akupÿm amã ixto mex prãm nẽ mãmrĩ akupÿm ixto mex. Anẽ.

¹³ Hãmri nhũm kuma nẽ hkà punuti hã ìhkra xi. Amnhĩ kamã kahak kêt nẽ hã ìhkra xi nẽ kãm:

—Nà kot paj ato mex. E akupÿm akà mex kurê kumrẽx.

Anhÿrja kôt hãmri nhũm hkàja akupÿm mex pa. ¹⁴ Hãmri nhũm Jejus kãm:

—E kêr ka amnhĩ tã akwÿjê mã tanhmã ijarẽnh to hkêt rãhã ma patre hwÿr tẽ kê akupÿm akà mex ã apumu. Hãmri ka amnepẽm Mojes kot mẽ ate akupÿm amex ã Tĩrtũm mã tanhmã amnhĩ nhĩpẽx to hã karõta ka kãm ho anẽ. Kê mẽ mẽ piitã akupÿm akà mex ã apumu. Anẽ.

Hãmri nhũm kuma nẽ kãm:

—Tõe. Nà kot paj anẽ. Anẽ.

Hãmri nẽ ma hwÿr htẽm kurê kumrẽx.

¹⁵ Hãmri nhũm mẽ piitã axpẽn mã Jejus jarẽnh o ri hprõt nhũm mẽ kot kapẽr mar kaxyw ma hwÿr mra. Nẽ mẽ à xwÿnhjaja nhũm kot mẽ ho mex kaxyw nhũm mẽ hwÿr amnhĩ to mra. ¹⁶ Jakamã nhũm pre hte Jejus tõhã mẽ kêp hapõj nẽ ahte ma kapõt ã Tĩrtũm mã amnhĩ jarẽnh kaxyw mra. Nẽ kãm amnhĩ jarẽnh pa hãmri nẽ ma akupÿm mẽ hwÿr mra.

Jejus kot ì kamã htyk xwÿnh o mex ã harẽnh

Matêwre 9.1-8; Makre 2.1-12; Juãw 10.37-38

¹⁷ Tã nhũm Jejus ma Tĩrtũm kapẽr o Ijaew jahkre ho pa. Jakamã nhÿri mẽhõ nhõrkwÿ kamã ho mẽ ahkre ho xa nhũm Parijew nhõ xwÿnhjê mẽ Tĩrtũm kapẽr tũm o mẽ ahkre ho mẽ pa xwÿnhjaja kot mar kaxyw ma hwÿr mra. Na pre ra Garirej rũm mẽ hkwyjaja ma hwÿr mra. Nẽ pika pẽ Jutej rũm mẽ hkwy haxwÿja ma hwÿr mra. Nẽ krĩ pẽ Jerujarẽ rũm. Á na prem ohtõ nẽ krĩ piitã kurũm kot mar kaxyw hwÿr akuprõ nhũm mẽ ahkre anẽ. Nẽ Tĩrtũm kot ho àhpumunh tÿx jakamã nhũm ý hã akupÿm mẽ à xwÿnhjê ho mex. ¹⁸ Hãmri nhũm hkwyjaja ì kamã htyk xwÿnh mÿ nẽ Jejus wÿr o tẽ. Nõr xà kamã nõr rãhã nhũm mẽ hã hije nẽ hwÿr o tẽ. Hãmri nẽ tee ri kot hwÿr

ho àr kaxyw ri mẽ hkupu ho pa. ¹⁹ Nom nhũm mẽ ra ixkre ho nÿt rax jakamã nhũm mẽ tee ri amnhĩ kukamã ho ukapi ho ri pa. Hãmri nẽ ra hamaxpẽr nẽ ixkre nhĩmõk po hwÿr ho api nẽ ixkre nhĩmõk kwÿ grà nẽ hkõt ì kamã htyk xwÿnhta jaxà. Nõr xà kamã nõr rãhã Jejus wÿr haxà nẽ mẽ hipõk ri ho wrÿ nẽ kutã kuxi nhũm nõ. ²⁰ Hãmri nhũm Jejus amnhĩ tã mẽ kot kaxyw kãm hamaxpẽr tÿx ã mẽ omunh mex nẽ. Hãmri nẽ ì kamã htyk xwÿnhta mã kapẽr nẽ kãm:

—Pa? E na pa ra anẽ tanhmã ate amnhĩ tomnuj to ho apaja o ijapẽx pa. Kot paj axte kãm ijamaxpẽr kêt nẽ. Anẽ.

²¹ Hãmri nhũm Parijew nhõ xwÿnhjê mẽ Tĩrtũm kapẽr tũm o mẽ ahkre ho mẽ pa xwÿnhjaja tee ri kot ã kãm kapẽr anhÿrja ã kuma nẽ axpẽn mã:

—Tk. Kwa kêp Tĩrtũm kêt tã te ri kot amnhĩ nhĩpẽx pyrãk o ri mẽ nẽ mẽ kot amnhĩ tomnuj o hapẽx ã amnhĩ jarẽnh o kuhê. Tĩrtũm pix na kot mẽ nẽ mẽ kot amnhĩ tomnuj o hapẽx xwÿnh kênã. Anẽ.

²² Nhũm mẽ ã axpẽn mã Jejus jarẽnh anẽ nhũm amnhĩ tã mẽ kuma nẽ mẽ hamaxpẽr kôt mẽ omunh mex nẽ. Jakamã mẽ kãm:

—Kwa mẽ ã ajamaxpẽr anhÿr kêt nẽ.

²³ Ixte mẽ nẽ mẽ kot amnhĩ tomnuj o ijapẽx par ã amnhĩ jarẽnh tã mẽ ate ja kôt ixpumunh kêt jakamã na ka mẽ ixkõt ajamaxpẽr kêt nẽ. Nom kot paj mẽ anoo mã akupÿm ì kamã htyk xwÿnhta o mex ka mẽ apiitã ja hã ixpumu hãmri nẽ ixkõt ajamaxpẽr kurê kumrẽx. ²⁴ Ixpê Tĩrtũm kot mẽ awÿr inhmẽnh xwÿnhta na pa. Ixte mẽ anẽ mẽ ate amnhĩ tomnuj rẽnh kaxyw na pre mẽ awÿr inhmẽ pa mẽ awÿr wrÿ. Tã mẽ ate ja kôt ixpumunh kaxyw kot paj mẽ anoo mã myja o mex. Anẽ.

Hãmri nẽ hpãnhã ì kamã htyk xwÿnhja mã kapẽr nẽ kãm:

—E kãnhmã xa nẽ anõr xà py nẽ ma akupÿm anhõrkwÿ hwÿr tẽ. Anẽ.

²⁵ Nhũm kãnhmã ãm kurê kumrẽx. Hãmri nẽ amnhĩ pumu nẽ hkĩnh tÿx nẽ nõr xà py nẽ mẽ noo mã kato nẽ akupÿm õrkwÿ hwÿr ma Tĩrtũm mã mex o mex ã harẽnh o tẽ.

²⁶ Hãmri nhũm mẽ amnhĩ jaer pẽ omu. Nẽ no hapõx kaxyw hkõt omunh o kuhê nẽ kamã no puma nẽ. Nẽ tee ri omu hãmri nẽ axpẽn mã:

—Kokỹỹ. Aa mẽ pahte ã mēhõ kot amnhĩ nhĩpêx anhỹr ã omunh kêt tâ na pu mẽ jarãhã ja pumu. Anẽ.

Hãmri nẽ Tĩrtũm mã mex o mex ã harẽnh o kuhẽ.

Jejus kot amnhĩ kôt Rewi hwỹr ã harẽnh Matêwre 9.9-13; Makre 2.15-17; Rukre 15.1-2

²⁷ Tã nhũm Jejus ma hkôt mẽ pa ho mẽ pa xwỹnhjê mērohã ma nhỹhỹm mō. Hãmri nẽ nhỹri Rewi pumu. Rewi nhĩxi hõ pẽ na Matêwre. Rõm kãm mẽ õ pahĩti mã amnhĩ kwỹjê pẽ kàxpore hkwy jamỹnh xwỹnh na pre. Jakamã nhũm ujamỹnh xã hã ixkre kamã mẽ kęp hkwy jamỹnh o nhỹ nhũm Jejus mẽ hkôt mẽ pa o mẽ pa xwỹnhjaja hãnh mra. Hãmri nhũm Jejus àpẽnã ã omu nẽ amnhĩ kôt kuwỹ nẽ kãm:

—Pa? E kwa axàpẽnhta kaga nẽ hpãnhã amnẽ mẽ ixkôt mãn tẽ. Nẽ ixkôt mãn ri apa ho apa. Anẽ.

²⁸ Hãmri nhũm kuma nẽ àpẽnã kaga hpa nẽ ma hkôt mō nẽ hkôt pa ho pa.

²⁹ Hãmri nhũm mēmo arĩgro hã nhũm Rewi nhõ mẽ apkur xã hã mēõ rax nẽ. Jakamã nhũm amnhĩ nhõrkwy hwỹr hkrãmnhwỹjaja nẽ Jejus mẽ hkôt mẽ pa ho mẽ pa xwỹnhjê hwỹ. Mẽ kot kutã apkur kaxyw nhũm amnhĩ kôt mẽ kuwỹ nhũm mẽ ma hkôt mra nẽ õrkwy hwỹr agjẽ nẽ apkur o hkrĩ. Nẽ mẽ kęp Rõm nhõ pahi mã mẽ kęp kàxpore hkwy jamỹnh xwỹnh kwỹjaja nẽ mẽ ohtõ nẽ hwỹr akuprõ nẽ axpẽn kutã apkur o hkrĩ. ³⁰ Hãmri nhũm Parijew nhõ xwỹnhjê mẽ Tĩrtũm kapër tũm o mẽ ahkre ho mẽ pa xwỹnh kwỹjaja mra nẽ mẽ apkur ã mẽ omu nẽ tee ri mẽ hkaêx ã Jejus pumu hãmri nẽ Jejus kôt mẽ pa ho mẽ pa xwỹnhjê hwỹr agjẽ nẽ hã mẽ kãm akir nẽ mẽ kãm:

—Kwa mẽ kot amnhĩ tomnuj ho mẽ pa xwỹnhjê kutã mẽ apkur kêt tâ ka mẽ apytar xwỹnhja mẽ apimràatã axtem nẽ mẽ kutã axàpkur o akrĩ. Kwa mẽ ate amnhĩ to mex ronhỹx ka mẽ kutã axàpkur kêt nẽ. Anẽ.

³¹ Hãmri nhũm Jejus amnhĩ tã mẽ kapër ã mẽ kuma nẽ mẽ kãm:

—Tk. Nà ixte tãm mẽ unhwỹr kaxyw na pa mẽ kutã ixàpkur o nhỹ. Xã na hte tõtõja mẽ mex xwỹnhjê hwỹr mra nẽ mẽ hkane? Nà ãm mẽ à xwỹnhjê pix wỹr na htem mra. Ra mẽ ate ja pumunh mex kẽnã. Ja pyrã

nẽ na pa pre mẽ kot amnhĩ to mex xwỹnhjê hwỹr ixwryk kêt nẽ. Mẽ kot amnhĩ tomnuj xwỹnhjê pix wỹr na pa pre wrỹ. Ixte tãm mẽ unhwỹr kaxyw na pa pre mẽ hwỹr wrỹ nẽ ã jajê kutã ixàpkur o inhỹr anẽ. ³² ãm mẽ kot amnhĩ tomnuj xwỹnhjê hwỹr na pa pre wrỹ nẽ mẽ kamã ixukaprĩ ho ri ixpa. Mẽ kot amnhĩ tomnuj mã urer nẽ hpãnhã tãm amnhĩ nhĩpêx o pa kaxyw na pa pre mẽ hwỹr wrỹ. Tã ka mẽ atỹx ã ri mẽ ixto akapër anẽ. Anẽ.

Mẽ hpãmjaja kot amnhĩ nhĩpêx gryk ã Jejus kaga hã mẽ harẽnh

Matêwre 9.14-17; Makre 2.18-22

³³ Tã nhũm Ijaew kwỹjaja Jejus wỹr mra nẽ kãm:

—Pa? E ot pa mẽ awỹr mra. Kwa aprĩ hã mẽ inhmã mēmoj jarẽ. Na hte Parijew nhõ xwỹnhjê mẽ Juãw kôt mẽ pa xwỹnhjaja tõhã Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. No akôt mẽ pa ho mẽ pa xwỹnhjaja na htem àmnhĩx apkur o pa kamã kãm amnhĩ jarẽ. Kwa mo na htem mẽ urak nẽ tõhã apkur kêt ri kãm amnhĩ jarẽnh hkêt nẽ? Anẽ.

³⁴ Hãmri nhũm mẽ kuma nẽ mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kẽnã. Mẽ kot ixkôt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kẽnã kot kêt mẽ Tĩrtũm mã amnhĩ jarẽnh kaxyw nẽ apkur kêt rãhã kãm amnhĩ jarẽ. Xã na htem hkrãmnhwỹ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwỹnhjaja ixkôt kormã àmnhĩx ri hkĩnh nẽ apkati mẽ apkur o pa. ³⁵ Nom koja mẽ kãm ixkurẽ xwỹnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỹx kãm apkur kêt ri tanhmã amnhĩ nhĩpêx to. Anẽ.

³⁶ Nhũm pre ã Jejus mẽ kãm hkôt ri mẽ pa ho mẽ pa xwỹnhjê jarẽnh anẽ hãmri nẽ mẽ kãm:

—Nà mẽ kot amnhĩ tomnuj xwỹnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. ³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã

ka htem inhma nê ãm inhma. Kwa mẽ ixkapêr ma nê mẽ ate amnhĩ nhĩpêx tũm gryk ã ixkaga hkêt nê. Anê.

6

*Jejus kêp arĩgromnu hpãm ã harênh
Matêwre 12.1-8; Makre 2.23-28*

¹ Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwýnhjê mẽ ma mẽ hpur kôt ri nhỹhỹm ri pa. Hãmri nhũm hkôt mẽ pa ho mẽ pa xwýnhjaja ra kãm prãm nê mra hãmri nê prãm xàj mẽmo hy te kot harôj pyræk xwýnhhta kwý rê nê kugrà nê ma Jejus kôt hkanhar o mõi. Ijaew kot amnhĩ nhĩpêx xà hkôt. ² Hãmri nhũm Parijew nhõ xwýnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nê mẽ hã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwýnhjaja axtem nê mẽmo hyta kwý rê nê akôt hkanhar o mõi. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arĩgromnu hã ã amnhĩ nhĩpêx anhỹr kêt nê. Anê.

³⁻⁴ Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwýnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre wýr agjê nhũm patre maatija mẽ kãm prãm tỳx ã mẽ omu nê mẽ kãm mẽmoj gõi. Mẽ kot Tĩrtũm noo mã pãwti jaxwýr xwýnhhta nhũm mẽ kãm kugõ nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukapri xàj mẽ kãm kugõ. Patre pix kot ja kur kaxyw tã nhũm mẽ kãm kugõ nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukapri nê mẽ kãm õr nhũm mẽ hã omu nhũm ja kãm mex nê.

⁵ Tã pa na pre Tĩrtũm mẽ akaxyw ixãm nê mẽ awýr inhmênh jakamã papxipix na pa hte arĩgromnu hã tanhmã mẽ kot amnhĩ

nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anê.

*Jejus kot ìhkra grà xwýnh o mex ã harênh
Matêwre 12.9-14; Makre 3.1-6*

⁶ Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwýr tẽ nê axà nê Tĩrtũm kapêr o mẽ ahkre ho nhỹ. Nhũm mẽhõ myja upòk rũm ìhkra grà xwýnhja mẽ ìhkõ hã mar o nhỹ. ⁷ Nhũm Parijew nhõ xwýnhjê mẽ Tĩrtũm kapêr tũm o mẽ ahkre ho mẽ pa xwýnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nê ìhkra grà xwýnhhta pumu nê hã axpên mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt kãm ìhkra ho mex. Koja anê nê Tĩrtũm kapêr kwým ri amnhĩ nhĩpêx. E pu mẽ kop pakuhê nê hã omu. Anê.

⁸ Nhũm Jejus ra kot mẽ hamaxpêr kôt mẽ omunh mex jakamã amnhĩ wýr myta mã hpa ho apê nê kãm:

—Pa? E kãnhmã xa nê annê ixwýr tẽ. Anê.

Hãmri nhũm kuma nê kãnhmã xa nê hwýr tẽ. ⁹ Hãmri nhũm Jejus amnhĩ pu hã ri mẽ ho hakêx nê mẽ kot mar o hkrĩ xwýnhjê pumu nê mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htỳx nê nõ hãmri nê amnhĩ mex prãm xàj ma mẽhõ hwýr amnhĩ to tẽ. Hãmri nhũm ãm apumu nê apkatim arĩgro mex jamãr pê akane hkêt ka ty nhũm ja amã mex nê nà? Rỳ nhũm tanhmã atomnuj to nê akupỹm amnhĩ nê ajano nhũm ja amã mex nê nà? Nà koja ã anhĩpêx anê nhũm ja amã mex kêt nê. Na ka htem ã amnhĩ nhĩpêx anhỹr o apa hkêt nê. E mẽ inhmã mẽmoj jarê. Tanhmã na pre finat Mojesja Tĩrtũm nhỹ hã mẽ pamã arĩgromnu hã mẽ pahte axpên nhĩpêx ã karõ hto? Xà kot puj mẽ axpên kãm paxukapri ho papa nà? Kot puj mẽ pamã axpên kurê ho papa? Xà kot puj mẽ hã mẽmoj punuj pê axpên pytã nà? Xà kot puj mẽ hã axpên pytãr pymaj arĩgro mex jamã? E mẽ atõ inhmã ja jarê. Anê.

Nhũm pre ã mẽ hkukjêr anê. ¹⁰ Mẽ hamaxpêr ã mẽ omunh mex pê ã mẽ hkukjêr anhÿr o xa. Nom nhũm arĩ mẽhõ tanhmã kutã kãm nê hkêt nê. ãm akryk mar pê omunh o hkrĩ. Mẽ kot tanhmã kãm nê nhũm ta pãnhã tanhmã kot mẽ kãm nê pymaj nhũm mẽ tee ri kãm tanhmã nê hprãm nom akryk mar o hkrĩ. Hãmri nhũm Jejus tee ri mẽ omu hãmri nê myta mã kãm: —Tk. Mẽ kot tanhmã inhmã kapêr tore hã. E anhĩhkra katat. Anê.

Hãmri nhũm ĩhkra katat nê akupÿm mex kurê kumrêx. ¹¹ Hãmri nhũm mẽ kãm Jejus kurê xwÿnhjaja tee ri ja hã omu nê kamã gryk tÿx nê. Arĩgromnu hã kot ho mex jakamã nhũm mẽ kamã gryk tÿx nê. Nê hã expên kukjêr o kuhê nê expên mã:

—Kwa ã kot amnhĩ nhĩpêx anhÿr mÿrapê tanhmã kot puj wem ho? Na ã kapêr anhÿrja o tanhmã mẽ pahto kapêr punuj to. Te mẽ papamjaja mẽ pahte hkĩnhã pahkwÿjê kamã paxukaprĩ hkêt pyrãk ã mẽ pajarê. Kojã mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mẽ ja nê ho? Anê.

Jejus kot amnhĩ kaxyw mẽ ho 12 nê mẽ rênh ã harênh

Matêwre 10.1-4; Makre 3.13-19

¹² Tã nhũm arĩgro hõ hã nhũm Jejus ma kot Tĩrtũm mã amnhĩ jarênh kaxyw ma hixêt prêk wÿr tẽ nê hã api. Hãmri nê kãm amnhĩ jarênh o apkati.

¹³ Tã nhũm kwÿhtã nhũm amnhĩ kôt kot ri mẽ o pa xwÿnhjê hwÿ nê amnhĩ kaxyw mẽ ho 12 nê mẽ kurê. Nê mẽ kãm:

—E mẽ kajaja kot paj ma mẽ pahkwÿjê hwÿr mẽ arê ka mẽ ma inhÿ hã Tĩrtũm kapêr o mẽ ahkre ho ri mẽ hkôt apa. Kot kaj mẽ apê inhÿ hã mẽ ahkre ho apa xwÿnh. Anê.

¹⁴ Kot amnhĩ kaxyw mẽ rênh xwÿnhjê nhĩxi na jajaja:

Simãw kumrêx na pre kuta nê axte hã hixi mẽ nhũm kêp Pêtre.

Nê Simãw Pêtre hkôt htõ Andreja ta.

Nê hkôt Xiakre hta.

Nê hkôt Juãw ta.

Nê hkôt Firiptija ta.

Nê hkôt Patoromew ta.

¹⁵ Nê hkôt Matêwreja ta.

Nê hkôt Tomasja ta.

Nê hkôt Apew kra axtem Xiakre hõja ta.

Nê hkôt Simãw Jeroxja ta.

¹⁶ Nê hkôt Xiakre hõ hkra Jutja ta.

Nê hkôt Jut Kariot ta.

Jut Kariotja na pre kormã kot mẽ kãm Jejus kurê xwÿnhjê nhĩhkram õr mã. Nhũm kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot Jejus nhÿ hã mẽ ahkre o pa kaxyw mẽ rênh xwÿnhjê nhĩxi kot anhÿr.

Jejus xapênh ã harênh

Matêwre 4.23-25

¹⁷ Tã nhũm Jejus akupÿm ÿ hã mẽ ahkre ho pa xwÿnhjê mẽ hãmri hixêt prêeta kurũm wrÿ nê nhÿri hinur kãm kuhê. Hãmri nhũm nhÿhÿnh mẽ kot mar mã xwÿnhjaja hã akuprõ. Kôt mẽ pa ho mẽ pa xwÿnh kwÿjaja nê nhÿhÿnh krĩ hkwÿ rũm mẽ hkwÿjaja. Pika pê Jutej kurũm mẽ hkwÿjaja. Nê krĩ pê Jerujarê kurũm mẽ hkwÿjaja. Nê gô mÿ ri Xir mẽ Sitõja wa kamã mẽ pa xwÿnh kwÿjaja. ãm ahpÿnhã ri nhÿhÿnh krĩ hkwÿ rũm mẽ kot mar mã xwÿnhjaja hã pikuprõnh rax nê. ¹⁸⁻¹⁹ Mẽ kot kapêr mar nhũm kot akupÿm mẽ ho mex kaxyw nhũm prem ma hwÿr amnhĩ to pa. Mẽ hkwÿjaja tanhmã ri à kute. Nhũm mẽ hkwÿjaja mẽkarõmnuti kot mẽ hwÿr gjêx xwÿnhjaja nhũm mẽ piitã ma hwÿr amnhĩ to pa. Na prem ra amnhĩ kaxyw kãm hamaxpêr o:

—E pa ma hwÿr tẽ nê ãm hkupênh pix tã akupÿm inhmex japêr. Anê.

Hãmri nê ma hwÿr mra nhũm mẽ omu nê Tĩrtũm xãhpumunh tÿx o akupÿm mẽ ho mex pa.

Jejus kot hkôt mẽ pa ho mẽ pa xwÿnhjê jahkre hã harênh

Matêwre 5.1-12

²⁰ Tã nhũm Jejus hkôt mẽ pa ho mẽ pa xwÿnhjê jahkre nê mẽ kãm:

E kot kaj mẽ atõ amnhĩ kaxyw tanhmã inhmã ajamaxpêr to nê ajamaxpêr o: “Nà ixkukrêx rax kêt tã na hte Tĩrtũm ixkôt pa ho pa. Kojã ixkôt pa hkêt pa ixtÿx ri tanhmã amnhĩ nhĩpêx to ho ri ixpa rãhã nê. Tĩrtũmja mex kumrêx o kot mẽ hikukrêx

raxta jakrenh par.” Anhÿr o ajamaxpër. Hämri nhÿm Tirtÿm ã ajamaxpër anhÿr ã apumu nhÿm ja kãm mex nê. Hämri nhÿm apê hkra hã ato mex nê atãnopxar o akôt pa ka ajamakêtkati nê akĩnh nê axàmnhĩx ri apa.

²¹ Nê kot kaj mẽ atõ amã Tirtÿm kãm hprãm xà hkôt tanhmã amnhĩ nhĩpêx to ho ri apa hprãm tÿx nê. Nhÿm amnhĩ tã apumu nhÿm ja kãm mex nê nhÿm ato mex nê. Nê tanhmã ato ka hkôt pix mã amnhĩ to mex o ri apa nê ajamakêtkati nê akĩnh nê axàmnhĩx ri apa.

Nê kot kaj mẽ tanhmã amnhĩ tomnuj to. Hämri nê tee ri ja hã amnhĩ pumu nê ajamaxpër. Nê apijaam nê akaprĩ xàj amÿr o nhÿ. Amÿr rax nê. Hämri nhÿm Tirtÿm ja hã apumu nhÿm ja kãm mex nê. Jakamã nhÿm anê akaprĩ hta nê ato mex nê. Ka ajamakêtkati nê akĩnh nê axàmnhĩx ri apa.

²²⁻²³ Nê kwâr mẽ mãmrĩ ixtã tanhmã mẽ ato kapër punuj to nê tanhmã mẽ ato hêx to nê tanhmã ri mẽ atomnuj to ho pa. Kwâr mẽ mãmrĩ ã mẽ anhĩpêx anhÿr o pa. Ka mẽ ãm inhmã pix mã ajamaxpër rãhã ho apa pê ajamakêtkati nê axàmnhĩx ri apa. Kwâr mẽ mãmrĩ ã mẽ anhĩpêx anê nê mẽ amex kêt ã mẽ ajarênh o pa. Amnepêm na pre Tirtÿm nhÿ hã kapër xwÿnhjaja nhÿm prem ã mẽ hipêx anê. Jakamã koja mẽ uràk nê ã mẽ anhĩpêx anhÿr o pa. Nhÿm Tirtÿm ja hã mẽ apumu nê amnhĩm mẽ amex ã mẽ ajarê. Hämri nê nhÿrmã kaxkwa kamã wa inhõ krĩ kamã mẽ ato mex rax nê. Ka mẽ akĩnh nê ajamakêtkati nê axàmnhĩx ri apa. Jakamã kwâr mẽ mãmrĩ pika jakamã ã ixtã mẽ anhĩpêx anê. Anê.

Jejus kot arĩ mẽ kot mar xwÿnhjê jahkre hã harênh

Xiakre 5.1-5

²⁴ Nhÿm Jejus nhãm hkôt mẽ pa ho mẽ pa xwÿnhjê nhĩhkô hã mẽ kot Tirtÿm kôt amnhĩ nhĩpêx o pa hkêt xwÿnhjê hwÿr apkjê. Nê mẽ omu nê tanhmã mẽ kãm kapër

to. Mẽ hikukrêx rÿnh xwÿnhjê kumrêx mã kapër nê mẽ kãm:

E kwa mẽ o kora mẽ akukrêx rÿnh xwÿnhjaja. Na ka htem ãm akukrêx rÿnh pix mã ajamaxpër o ri apa nê gryk ã Tirtÿm mã ajamaxpër o apa hkêt nê. Jao mẽ amã kapër mar prãm kêt nê. Nê ãm akukrêx rÿnh mã ajamaxpër pê akĩnh nê ri apikunhar o ri apa. Tã kot ka mẽ nhÿrmã ty hãmri nhÿm akĩnh xàja apê hapêx.

²⁵ Nê mẽ amã Tirtÿm kôt ri amnhĩ nhĩpêx prãm kêt xwÿnhjaja. Kot kaj mẽ nhÿrmã akaprĩ htÿx kãm tee ri amnhĩ to hwÿr kaprÿ kãm ga. Koja mẽ amar kêt nê.

Nê mẽ atÿx ri mẽ ate tanhmã amnhĩ tomnuj to hkukamã ajamaxpër nê apikunhar pê amnhĩ tomnuj o apa xwÿnhjaja. Kot kaj mẽ nhÿrmã ã mẽ ate amnhĩ nhĩpêx anhÿrja mÿrapê mẽ kot amnhĩ xà htÿx kamã hamak o pa htÿm xà hwÿr ma apa. Hämri nê kamã akaprĩ xàj amÿr rãhã ho ri apa. Jakamã kwa mẽ o kora mẽ amã Tirtÿm prãm kêt xwÿnhjaja. Kêr ka mẽ ixkapër ma nê axkãm ajamak rom nê ri apa.

²⁶ Amnepêm mẽ pakukamã mẽ pa xwÿnhjaja na prem Tirtÿm kapër o hkwyjê jahkre ho pa. Nom axtem nê hkwyÿm ri tanhmã mẽ kãm ho hêx to nhÿm mẽ kuma nhÿm ja mẽ kãm mex nê nhÿm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ uràk nê axpên mã mẽ amex ã mẽ ajarênh tã Tirtÿm mã mẽ amex kêt. Jakamã kot kaj mẽ amex kêt nê. Anê.

Mẽ kãm mẽ pahkurê xwÿnhjê jarênh

Matêwre 5.38-48; Rukre 23.34; mãânên Atre 7.60; Rômân 12.14

²⁷ Hämri nhÿm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwÿnhjaja. Kêr ka mẽ kot mẽ atomnuj xwÿnhjaja amnhĩ tã tanhmã mẽ ho hkêt nê. ãm mẽ ho mex pix o ri apa hkukamã mãn ajamaxpër.

²⁸ —Nê mẽ kot mẽ ato kapër punuj xwÿnhjaja. Kêr ka mẽ amnhĩ xwar amnhĩ tã tanhmã mẽ ho akapër punuj to hkêt nê. ãm

tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwýnhjaja ka mẽ ho mex pix o ri apa. Nê mẽ ho Tirtũm wýr pix kukamã mãn ajamaxpêr.

²⁹ —Nê koja mēhō anhīnep akura ka ãm omu nê tanhmã amnhĩ tã ho hkêt nê. Te ate kãm ihkjê pêr nhũm kot ihkjê kamã akuranh pyrãk o amnhĩ nhĩpêx nhũm ja amã mex nê. No kêr ka mẽ amnhĩ tã tanhmã mẽ ho hkêt nê.

—Nê koja mēhō apê anhĩnôhkà py ka tanhmã hã kãm nê hkêt nê. Kwãr mãmri apê kupy. Ka määnēn te ate kry pê anhĩnôhkà hpakà ry jagjēnh xwýnhnta anhĩnôhkà hkôt kãm òr pyrãk o hipêx. Nom kamã agryk kãm kãm òr kêt nê.

³⁰ —Nê koja mēhō kêp amrakati kumrêx nê awýr tē nê mẽmoj tã awý. Ka anhō mẽmoj japêr nê mãmri kãm mẽmoj gō. Kêp anhōxý hkêt kamã kãm mẽmoj gō. Rý koja mēhō apê mẽmoj to ahkĩ ka axàhkurê hkêt nê. Nê tanhmã hã ho hkêt nê. ³¹ Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx ri anhōxý hkêt nê tãm mẽ hipêx o ri apa.

³² —Nom kot kaj mẽ amã mẽ piitã mẽ ho mex o apa hprãm kêt japêr. Nê ãm mẽ kot mẽ ato mex xwýnhjê pix ka mẽ amã mẽ ho mex prãm. Xà koja Tirtũm ja hã mẽ apumu nhũm ja kãm mex nê? Nà koja kãm mex kêt nê. Koja mēhō mẽ ato mex kêt tã ka mẽ amnhĩ rom ho mex nê nhũm Tirtũm ja hã mẽ apumu hãmri nê mẽ amex ã mẽ ajarê. Mẽ kot amnhĩ tomnuj o mẽ pa xwýnhjaja na htem ãm mẽ kot mẽ ho mex xwýnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwýnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwýnhjaja nê mẽ kot amnhĩ tomnuj xwýnhjaja nhũm mẽ ho hpimràatã mẽ ho mex o axpēn pyrãk o pa.

³³⁻³⁶ —Nê mẽ kot amnhĩ tomnuj xwýnhjaja na htem ãm mẽ kot mẽ ho mex xwýnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmri mẽ piitã mẽ kamã axukapri pix nê. Jao axàmnhĩx ri mẽ piitã mẽ kãm

mẽmoj nhõr o ri apa. Nhũm Tirtũm ja hã mẽ apumu nê ja hã mẽ ato mex nê.

—Jakamã kêr ka mẽ amarĩ mẽ kãm akurê xwýnhjê ho mex nê. Nê mẽ kamã axukapri nê. Nê mẽ piitã mẽ kãm mẽmoj nhõr o ri apa. Kê nhýrmã Tirtũm maati mẽ hã mẽ amã mẽmoj nhõr rax nê. Nê mẽ ate kot amnhĩ nhĩpêx kôt amnhĩ nhĩpêx xwýnh ã mẽ ajarê. Tirtũm na hte mẽ kot amnhĩ tomnuj xwýnhjê kamã ukapri ho pa. Jakamã kêr ka mẽ urak nê ã mẽ hipêx anhýr o ri apa. E kêr ka mẽ ã axpēn nhĩpêx anhýr rãhã nê. Anê.

Mẽ pahte axpēn to pakapêr punuj kêt ã mẽ pamã karō

Matêwre 7.1-5; määnēn Rômãn 2.1-3, 14.1; Wam Korit 4.5; Xiakre 4.11-12

³⁷ Nhũm Jejus arĩ mẽ ahkre nê mẽ kãm:

—Nê kêr ka mẽ atýx ri amnhĩ krã hkôt tanhmã mẽ kot amnhĩ tomnuj to hã tanhmã axpēn jarēnh to ho ri apa hkêt nê. Kêr kê Tirtũm mẽ apyrã nê ã mẽ ajarēnh anhýr kêt nê.

—Nê kêr ka mẽ tanhmã mēhō kot ra atomnuj tota mã ajamaxpêr rãhã hkêt nê. ãm ho ajamakêtkati tokyx anê nê axte kãm ajamaxpêr kêt nê. Kêr kê Tirtũm ja hã mẽ apumu nê mẽ apyrã nê axte tanhmã mẽ ate amnhĩ tomnuj to mã hamaxpêr kêt nê.

³⁸ —Nê kêr ka mẽ axpēn kamã axukapri pê tanhmã axpēn to mex to ho ri apa. Kêr kê Tirtũm ja hã mẽ apumu nê mẽ apyrã nê mẽ akamã ukapri pê tanhmã mẽ ato mex to ho pa. Na hte mẽ pahte axpēn kamã paxukapri hã mẽ pahpumunh xà hkôt tanhmã mẽ pakamã ukapri to.

³⁹ —Nom kêr ka mẽ atýx ri tanhmã axpēn to akapêr to hkêt nê. Mẽ ate aprĩ hã axpēn jamaxpêr kôt axpēn pumunhre hã. Jakamã kot kaj mẽ atýx ri mēhō ho akapêr punuj hãmri nê te mẽ nohkre xwýnhjê hõ kot mẽmoj pumunh kêt tãã te kot no ho omunh nê tanhmã harēnh to pyrãk o amnhĩ nhĩpêx. ⁴⁰ Tirtũmja tapxipix na kot mẽ pajamaxpêr kôt mẽ pahpumunh par. Mẽ axàhpumunh týx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê gaa nê urak nê mẽ piitã mẽ kamã axukapri pix o ri apa.

41-42 Jao mēhō kot tanhmā amnhī tomnuj to hā omu hāmri nē tanhmā hā kām nē tokyx anh̄yr kêt nē. Akumrēx ate tanhmā amnhī tomnuj to hā amnhī pumu nē hkaga hāmri nē rī kormā mēhōta hw̄yr tē nē kot tanhmā amnhī tomnuj to hā kām akapēr to. Anē.

Mē pajamexpēr xà hkôt mē pakapēr ā mē pajarēnh

Matêwre 7.16-20, 12.33-37

43-45 Nhūm Jejus arī mē ahkre nē mē kām:
—Nē koja mēmo pī hpār mex nē ô mex nē. Nom koja pār punuj hāmri nē ômnuj nē.

—Nē na htem mēmo xô pumu nē hkôt tanhmā pār kute hā omu. No na htem rārāj pumu nē kēp akunī kamā mrônhī xô hā hkamnhīx kêt nē. Na htem mēmo x̄y hpār pumu nē ô xānhre hā hkamnhīx kêt nē. Ja pyrā nē koja mēhō hamaxpēr punuj nē mǎānēn hakwa ho kapēr punuj pix nē. Nē ht̄yx tanhmā amnhī tomnuj to ho ri pa. Nom koja hamaxpēr mex nē hāmri nē mǎānēn hakwa ho kapēr mex o pa. Na htem ahp̄yñhā amnhī jamaxpēr xà hkôt tanhmā hakwa ho kapēr to ho ri pa. Anē.

Ixkre pijakrut jarēnh

Matêwre 7.24-27; mǎānēn Xiakre 1.22-25; Wam Juāw 2.3-6

46 Nhūm Jejus arī mē hkôt mē pa ho pa xw̄yñh̄jē jahkre ho nh̄y nē mē kām:

—Nē kot kaj mē ixpē mē anhō pahihiti hā ijarē hā kot kaj mē ixkapēr kôt amnhī nh̄ipēx rāhā ho ri apa.

47 —E pa mē amā ixprī hā mē kot ixkôt amnhī nh̄ipēx xw̄yñh̄jē kot amnhī nh̄ipēx jarē ka mē aprī hā inh̄ma. 48 Mē kot amnhī nh̄ipēxja te mēhō hamaxpēr mex pē apt̄yx kām amnhīm ōrkw̄y nh̄ipēx pyrāk. Koja apt̄yx kām ōrkw̄y nh̄ipēx nhūm mēmo arīgro hā na wr̄yk rax nē. Nē gō htām rax nē hanhi nom nhūm arī ām t̄yx nē xa. Tā kot kaj mē ixkôt amnhī nh̄ipēx ā kot kaj mē te ixkre jarēnhja pyrāk. Jao amex nē ajamakētkati nē ri apa. Te gō htām kot ixkre janhir tā nhūm ām t̄yxta pyrāk. 49 Nom koja mēhō hamaxpēr mex kêt nē ht̄yx mō nē gō m̄yri gyw rerek kām amnhīm ōrkw̄y nh̄ipēx. Hāmri nhūm mēmo arīgro hā na wr̄yk rax nē. Nē hā gō htām rax nē ōrkw̄y janhi nē kēp grānh pa. Tā koja mēhō ixkôt amnhī nh̄ipēx kêt nē te ho mēhō kot gō m̄yri gyw rerek

kām ixkre nh̄ipēxta pyrāk. Jao mex kêt nē pa. Jakamā kwa mē ixkapēr mar t̄yx nē te gō htām kot ixkre janhir nē grānh parta pyrāk o amnhī nh̄ipēx o apa hkêt nē. Anē.

7

Jejus kot mēhō mā àpēnh xw̄yñh o mex ā harēnh

Matêwre 8.5-13

1 Tā nhūm Jejus mē kām ujarēnh pa hāmri nē ma akup̄ym Kapanaū hw̄yr mō. 2 Nē mōō nē ra hw̄yr pōj. Nhūm krī kamā pōristi krāhtūm mā àpēnh xw̄yñhja à ht̄yx nē nō. Ra htyk kaxyw nē nō nhūm ō patrāw tee ri omu nē kām hapē jakamā tee ri hkukamā hamaxpēr o hkaprī nē. 3 Hāmri nē Jejus pōx ā harēnh ma nē hw̄yr Ijaew pigēt kw̄ȳjē rē nē mē kām:

—Kwa mē ma Jejus w̄yr mra nē kām ijarē kē tokyx man ixw̄yr tē nē inh̄mā àpēnh xw̄yñhta o mex. Anē.

4-5 Hāmri nhūm mē kuma nē ma hw̄yr mra nē omu nē kām:

—Pa. Na pōristi krāhtūm na aw̄yr mē inh̄mē pa mē mra. Mē pahkīnhā kēp Ijaew kêt tā kām mē pahkīnh nē. Tām na pre mē inhō krī kamā mē inh̄mā Tirtūm kapēr o mē ahkre xà hā ixkreja nh̄ipēx. Tā na kām àpēnh xw̄yñhta kēp à ht̄yx nē nō nhūm apōx hā ajarēnh ma nē man aw̄yr mē inh̄mē. Kwa ma hw̄yr tē nē kām ho mex nà? Anē.

6 Hāmri nhūm mē kuma nē mē kām:

—Tōe. Ma pu mē hw̄yr. Anē.

Hāmri nē ma mē hkôt tē. Hāmri nē kormā ōrkw̄y htēp o htēm mē nhūm axte kutā hkrāmnhw̄y hkw̄y rē nhūm mē ma kutā mra. Hāmri nē mra nē mē hkaxpa nē Jejus pumu nē kām:

—Pa? Kwa na pōristi krāhtūmta ā aw̄yr karō anē. Na mē inh̄mā: “E kēr ka mē mra nē nh̄yri Jejus kaxpa nē kām awjarē kē ām ata rūm kapēr pix o inh̄mā à xw̄yñhta o mex. Kīnh ā ixpē Ijaew kêt jakamā ixte amnhī kuk ā ixpijaam t̄yx. Jakamā kot paj pam hw̄yr ixtēm kêt nē. Kwa kām anē kē ata rūm kapēr pix o inh̄mā akup̄ym ho mex. 7-8 Ixpē mē hkrāhtūm jakamā na pa hte inhō pōristi mā mēmoj tā karō nhūm mē inh̄mar xà hkôt inh̄mā mēmoj tanhmā hipēx to. Na pa hte mē kām: ‘E mē ma mra nē ā amnhī nh̄ipēx anē.’ Anē nhūm mē

inhma nē ma mrar kurê kumrēx. Rỳ pa mē kām: ‘E mē amnē ixwỳr mra nē ã amnhĩ nhĩpēx anē.’ Anē nhũm mē inhma nē ixwỳr mra. No kêt Jesus na hte ixrom tanhmã mē à kuteja mã kapēr nhũm kuma nē mē kēp hapôj nē ma mrar kurê kumrēx. Jakamã koja ata rũm kapēr pix o inhmã ho mex.” Anhỳr o awỳr karõ. Jakamã na pa mē akutã mra nē akaxpa nē ã amã kapēr jarēnh anē. Anē.

⁹ Hãmri nhũm Jesus amnhĩ jaêr pē mē kapēr ma nē hkĩnh nē. Hãmri nē hkôt mē kot mar o pa xwỳnhjê mã kām:

—Kwa xà na ka mē ã kot ixwỳr karõ xwỳnh jamaxpēr anhỳrta ã ama? Mē pahkĩnhã kēp Ijaew kêt tâ mē arom amnhĩ kaxyw inhmã hamaxpēr tỳx nē. Aa mē atõ urak nē ate amnhĩ kaxyw ã inhmã ajamaxpēr tỳx anhỳr kêt tâ nhũm mē arom kãm ãpēnh xwỳnh kaxyw inhmã hamaxpēr tỳx nē. Anē.

¹⁰ Nhũm pre ã mē kãm kapēr anē hãmri nhũm pōristi krãhtũm krãmnhwỳjaja kuma nē awjanã nē ma akupỹm hkrãhtũm nhõrkwỳja wỳr mra. Nhũm ra Jesus kãm ãpēnh xwỳnhhta akupỹm ho mex nhũm mex nē ri mra. Hãmri nhũm mē akupỹm pōj nē akupỹm mex ã omu.

Jesus kot akupỹm mēhõ hkra ho htĩr ã harēnh

Juãw 11.1-46

¹¹ Tã nhũm Jesus ma krĩ pē Naĩ hwỳr hkôt mē pa ho mē pa xwỳnhjê mērohã mō nhũm mē ohtõ nē mē hkôt mra. ¹² Nhũm mē ra Naĩ hwỳr hpõx o mō. Nē hwỳr agjê. Axpēr kãm agjê nē mō nhũm kēp mjên htyk xwỳnhja mē kutã tē. Nhũm hkra myja ham kēp ty. Kra pyxi htã kēp ty nhũm mē kasãw kamã kuxà nē kumỳ nē kot haxàr kaxyw o mō nhũm katorxà mē hkôt mỳr o mō. Nhũm krĩ nhõ xwỳnh kwỳjaja ma hkôt mō. Piitã hkaprĩ nē hkôt mỳr o mō. ¹³ Tã nhũm Jesus mē hkwỳja mē mō nē mē hkaxpa nē katorxà mỳr ã omu nhũm Jesus kãm hkaprĩ nē. Hãmri nē xa nē kãm:

—Pa? Kwa amỳr kêt nē. Anē.

¹⁴ Hãmri nē kasãwta wỳr tē nē hã ãhkra xi nhũm mē kot mỳnh xwỳnhjaja omu nē amarĩ kãm o xa. Hãmri nhũm htyk xwỳnhhta mã kapēr nē kãm:

—E kwa kãnhmã nhỹ. Anē.

¹⁵ Pu nhũm kãnhmã ãr kurê kumrēx. Nē kapēr o nhỹ. Hãmri nhũm Jesus nita mã kãm:

—E ota akrata. Na akupỹm amã htĩr. Anē.

Hãmri nhũm akupỹm htĩr ã omu nē hkĩnh tỳx kumrēx. ¹⁶ Hãmri nhũm mē kot omunh xwỳnhjaja amnhĩ jaêr pē akupỹm hkra htĩr kãm omu nē ã hã haxwỳja hkĩnh nē. Nē Tĩrtũm mã mex o mex ã harē nē axpēn mã:

—Kwa ãm hãmri na Tĩrtũm ã mē panhĩpēx anē nē mē pahwỳr ã hã kapēr jarēnh xwỳnhhta mē nhũm mē pahwỳr mō. Tĩrtũm mē pakamã ukaprĩ jakamã na ã mē panhĩpēx anē. Nà ãm hãmri na ã mē panhĩpēx anē. Anē.

¹⁷ Hãmri nē piitã ma pikaja rũm mē kãm harēnh o hprõt nhũm mē piitã harēnh ma.

Juãw Paxis tee ri Jesus kukamã hamaxpēr ã harēnh

Matêwre 11.2-6, 11.22; Rukre 4.16-21

¹⁸ Rôm nhũm Juãw Paxisja kēp prēs nē hkrĩ nhũm hte hkôt mē pa xwỳnhjaja hwỳr mra nē kãm Jesus kot tanhmã amnhĩ nhĩpēx to ho pa hã harē. Hãmri nhũm harēnh ma nē tee ri hkukamã hamaxpēr. Hãmri nē hkôt mē pa xwỳnh wa ho axkrut nē wa kuta ¹⁹ nē Jesus wỳr wa kumē nē wa kãm:

—Kwa wa ma hwỳr tē nē hkukja. Nē kãm: “Xà ka na pre Tĩrtũm mē ixwỳr amē nã? Nà xà kormã axtem hõ na pa mē kormã amnhĩ wỳr hamãr o ri ixpa?” Anē. E wa ma hwỳr tē nē ã hkukjêr anē nē tanhmã kot amnhĩ jarēnh to hã ama hãmri nē man akupỹn tē nē inhmã harē. Anē.

²⁰⁻²¹ Hãmri nhũm wa kuma nē ma hwỳr tē. Nhũm Jesus kormã mē ho mex o xa. Mē nohkre xwỳnhjaja nhũm akupỹm mē no ho mex. Nē mēkarõmnuti kot mē hwỳr gjêx xwỳnhjaja nhũm mē nē mē hapõx o ãm rãhã nhũm wa ra hwỳr tē nē kormã hã mē omunh o xa. Hãmri nē kãm Juãw Paxis kapēr jarē. ²² Hãmri nhũm wa kuma nē wa kãm:

—Tỳ. Nà ãm hãmri na ja hã ijarē. Ixpê mē ate ixkamã ajamak o apa xwỳnhhta na pa. Jakamã e. Wa kam nē tanhmã ixte amnhĩ nhĩpēx to hã ixpumu hãmri nē ma akupỹm hwỳr tē nē aprĩ hã kãm ijarē. Mē nohkre xwỳnhjaja na pa akupỹm mē no ho

mex. Nē mẽ hkànhy xwýnhjaja pa akupým mẽ hkà ho mex. Nē mẽ hyk o mẽ pa xwýnhjaja pa akupým mẽ ho mex. Nē mẽ htyk xwýnhjaja pa akupým mẽ ho htír. Nē mẽ kēp amrakati nē ri mẽ pa xwýnhjê mã mẽmoj mex jarēnh o ri ixpa. Na pa hte ã mẽ ho mex o ri mẽ hkôt ixpa anē. Jakamã e kwa wa ma akupým hwýr tē nē ã kãm ijarēnh anē. ²³ Kē ijarēnh ma nē arī amnhī kaxyw ixkôt hamaxpēr tỳx rāhã nē. Koja ã amnhī nhīpēx anē nē hamakētkati nē ri pa. Nē tee ri ijarēnh kukamã hamaxpēr kēt nē. E wa tokyx ma akupým hwýr tē nē ã kãm ijarēnh anē. Anē.

Jejus kot Juãw Paxis mex ã harēnh
Matêwre 11.7-19

²⁴⁻²⁵ Nhũm pre ã Jejus wa kãm amnhī jarēnh anē nhũm wa kuma nē ma akupým Juãw Paxis wýr tē. Hãmri nhũm Jejus mẽ kot mar o kuhê xwýnhjê mã tanhmã Juãw Paxis jarēnh to nē mẽ kãm:

—Na ka prem kapôt ã mar kaxyw ma hwýr mra. Nom ê mex ã omunh kaxyw rý hpijaam kãm tanhmã kapēr to hã mar kaxyw hwýr amrar kēt nē. ²⁶ Kēp Tirtũm nhỹ hã kapēr xwýnh jakamã na ka prem mar kaxyw ma hwýr mra. Tirtũm nhỹ hã kot ixkukamã ijarēnh o pa xwýnh na. Ixpê Tirtũm kot mẽ akaxyw ixãm xwýnh ã na pre mẽ amã ijarēnh o pa. Nē hprī hã tanhmã mẽ amã ijarēnh to. Jakamã na kapēr mex o kot wam Tirtũm nhỹ hã kapēr jarēnh o mẽ pa xwýnhjê kapēr jakrenh. ²⁷ Tirtũm kapēr ã kagã htũm kot Juãw kukamã tanhmã harēnh to nē harēnh kot:

Kot paj Ixkra hkukamã ma mẽ hwýr harēnh o pa xwýnh mẽ kê ma ri hkukamã mẽ kãm harēnh o ri pa. Kê mẽ kuma nē kutēp tãm amnhī nhīpēx.

Anhỹr o Tirtũm Juãw Paxis kukamã harē nhũm mẽ hã kagã. Tã nhũm mẽ awýr kumē. ²⁸ Juãwja mex kumrēx. Na pre hprī hã ixkukamã tanhmã ijarēnh to ho pa. Nom ixkôt mẽ pa ho mẽ pa xwýnhjê hkĩnhã ixkôt pa ho pa hkēt ãm ixkukamã ijarēnh o pa. Jakamã ixkôt mẽ pa ho mẽ pa xwýnhjaja na mex o kot Juãw Paxisja jakrenh. Mẽ kot ixkôt hprī hã inhmar o pa jakamã mẽ mex o kot hakrenh. Anē.

²⁹ Nhũm pre ã Jejus mẽ kãm Juãw Paxis jarēnh anē. Mẽ kot Juãw mar o kuhê xwýnh kwýjaja na pre htem tanhmã amnhī tomnuj to ho pa. Tã Juãw kot mẽ kãm Tirtũm kapēr jarēnh ma nē axpēn mã Tirtũm mex ã harē. Nē axpēn mã:

—Nà ãm hãmri. Tirtũm kapēr na mex kumrēx. Anē.

Hãmri nē amnhī tomnuj kaga nē Tirtũm kôt amnhī xunhwý. Jakamã nhũm Juãw Paxis Tirtũm mã mẽ hkrã kumrã.

³⁰ No nhũm Parijew nhõ xwýnhjê mẽ Tirtũm kapēr tũm o mẽ ahkre ho mẽ pa xwýnhjaja jajê hkĩnhã Juãw Paxis kaga kumrēx. Jakamã nhũm mẽ hkrã kumrãr kēt nē. Mẽ kot Tirtũm kapēr kaga jakamã na pre htem Jejus kapēr ma nē ãm kuma.

³¹ Hãmri nhũm Jejus mẽ kãm:

—E pa mẽ amã mẽ piitã htỳx ri hamaxpēr ã tanhmã mẽ harēnh to ka mẽ kot amnhī nhīpēx ã mẽ harēnh ma. ³² Te mẽ kot mẽhprīre kot amnhī nhīpēx pyrãk. Mẽhprīrejaja na htem òrkwý kapem hije nē mẽmoj to amnhīkati ho hkrī. Nē tee ri hkwyjé kot amnhī nhīpēx pumu nē mẽ kãm:

Kwa na pa mẽ amã gre htã ka mẽ ixkutã anhõkrepôx kēt nē. Pa mẽ ja hã mẽ apumu nē hpãnhã mẽ amã mẽ htyk jarē htã ka mẽ akaprī nē amýr kēt nē. Kwa mẽ ri ã amnhī nhīpēx anhỹr kēt nē.

Anhỹr o axpēn mã kapēr. Tã te mẽ ate mẽ urãk. Tirtũm kot mẽ awýr ý hã kapēr xwýnhjê rēnh tã ka mẽ te mẽhprīre kot amnhī nhīpēxta pyrã nē mẽ ama ãm mẽ ama nē mẽ hkôt amnhī nhīpēx kēt nē.

³³ —Juãw Paxis na pre mẽ awýr mō nē ixpyrà nē apkur mex o ri pa hkēt nē. Nē ixpyrà nē wĩhti ho hkõm kēt nē pa. Tã ka mẽ ja hã omu nē hkaga nē atỳx ri Satanasti nhỹ hã kot tanhmã amnhī nhīpēx to ho pa hã hkamnhĩx nē ri harēnh o ri apa. Hãmri nē mẽhprīre kot amnhī nhīpēx pyrã nē hkôt amnhī nhīpēx kēt nē. ³⁴ Tã pa Juãw pãnhã mẽ awýr mō. Nē kurom apkati mẽ ixàpkur mex o ri ixpa. Nē kurom wĩhti hkwy ho ixkõm o ri ixpa. Ka mẽ ja hã ixpumu nē atỳx ri ixàpkur rũnh nē ixpipãnh o ri ixpa hã ixkamnhĩx nē ã axpēn mã ixto akapēr anhỹr o ri apa. Nē mẽ kot amnhī tomnuj

xwÿnhjê hkôt ri ixpa hã axpën mã ijarënh o ri apa. Æ na ka htem axpën mã ijarënh anë. Jao te mẽ ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte ã htÿx ri tanhmã mẽ hamaxpër to ho mẽ pa xwÿnhjaja amnhî nhîpêx anhÿr o ri pa.

³⁵ —No tãm ri mẽ hamaxpër o mẽ pa xwÿnhjaja na htem ahpÿnhã Juãw mẽ wa ixte amnhî nhîpêx ã wa ixpumu nê axpën mã wa ijarënh o: “Nà ahpÿnhã wa kot amnhî nhîpêx tã wa hamë ãm hãmri Tirtüm nhÿ hã kapër jarënh mex o pa. E pu mẽ wa uràk nê Tirtüm kôt amnhî xunhwÿ.” Anhÿr o axpën mã wa ijarënh o pa. Anë.

Parijew nhõ xwÿnh pé Simãwre jarënh

Matêwre 26.6-13; Makre 14.3-9; Juãw

12.1-8

³⁶ Tã nhùm Parijew nhõ xwÿnh pé Simãwreja amnhî nhõrkwÿ hwÿr Jejus mẽ hkôt mẽ pa ho pa xwÿnhjê mẽ kuwÿ. Mẽ kot kutã apkur kaxyw amnhî wÿr mẽ kuwÿ nhùm mẽ õrkwÿ hwÿr mra nê mẽ hwÿr agjê nê apkur kaxyw hkrî. ³⁷ Hãmri nhùm mēhõ nija mẽ hwÿr axà. Na pre hte amnhî tomnuj pix o pa. Hãmri nê Jejus õ krî hwÿr hpõx nê Simãwre nhõrkwÿ kamã apkur ã harënh ma nê ma hwÿr tẽ. Mẽ hkuxwaxà hã à py nê ma hwÿr o tẽ. ³⁸ Hãmri nê hwÿr axà nê Jejus pumu nê hwÿr tẽ nê pum xa. Nê tee ri tanhmã kot amnhî tomnuj to ho paja mã hamaxpër nê hpijaàm nê hkaprî nê mÿr o xa. Hãmri nê Jejus kutã hkõn krã ho tēm nê nhÿ nê no kagô ho hpar go. Hãmri nê amnhî krã kî ho hpar grã nê kupã hãmri nê hpãnhã mẽ hkuxwa xà ho kuxwa. Kãm hkînh xà ã hipêx anë. ³⁹ Hãmri nhùm Simãwre tee ri ja hã omu nê hamaxpër o:

—Tk. Kwa jahti kot amnhî tomnuj pix o pa xwÿnh tã mẽ ixwÿr axà nê ã Jejus nhîpêx anë nhùm amnhî nê hanor kêt nê. Kêp ãm hãmri Tirtüm nhÿ hã kapër jarënh o pa xwÿnh ronhÿx ja hã omu nê amnhî nê hanor kurê kumrêx. Anë.

⁴⁰ Hãmri nhùm Jejus amnhî tã hamaxpër ã omu nê hêx rom kãm kapër nê kãm:

—E Simãwre. Pa amã awjarê ka inhma. Anë.

Hãmri nhùm kãm:

—Tõe. Mex. Mãmri inhmã awjarê pa ama. Anë.

⁴¹ Hãmri nhùm kãm:

—Nà koja mēhõ my wa hamëxkrut. Nhùm hõja mēhõ pé kàxpore ho rax kumrêx nê ho ìpresta. Nhùm hõja ãm kêp ho grire nê ho ìpresta. Hãmri nê wa hamë kàxpore ho hapêx pa. ⁴² Hãmri nê akupÿm kot kêp ho ìpresta xwÿnhhta mã hpãnhã õr kaxyw tee ri amnhî kukamã hamaxpër. Ra kot ho hapêx par jakamã tee ri amnhî kukamã hamaxpër. Tã nhùm kot wa kãm ho ìpresta xwÿnhhta wa hwÿr tẽ nê wa kãm: “Kwa wa tee ri amnhî kukamã ajamaxpër kêt nê. Na pa ra war ate ixto tewën ã kagãta kaxõnh pa nhùm ja hapêx. Kot paj axte kãm ijamaxpër kêt nê. Jakamã wa mãmri ajamakêtkati nê axãmnhîx ri apa.” Anhÿr o wa kãm kapër. Æ mẽ ujarënh kot anhÿr. Anë.

Nhùm pre ã Jejus Simãwre mã ujarënh anë. Hãmri nê hã hkukja nê kãm:

—E nhÿ myja koja we kãm ho tewën xwÿnhhta kînh tÿx nê wehe? Anë.

⁴³ Hãmri nhùm kãm:

—Nà kot kêp ho rax nê ho ìpresta xwÿnhhta koja kãm hkînh tÿx o hõta jakre. Anë.

Hãmri nhùm kãm:

—Tÿ. Nà ãm hãmri na ka ã harënh anë.

⁴⁴ Tã mãn ka ni kot ã inhîpêx anhÿr xwÿnhhta pumu. Na ka amnhî nhõrkwÿ hwÿr ixwÿ pa axà nom ka inhmã gô hkwy pa ho amnhî par kuhõnh kêt nê. Tã nhùm nija arom ã inhîpêx anë nê no kagô ho ixpar kuhõ nê amnhî krã kî ho grã ho nhÿ.

⁴⁵ —Nê anhõrkwÿ hwÿr ixarta ã ka ixkahti hkôt inhmÿnh nê ixpãr kêt nê. Tã kêt nija arom xatã ixpar pãr o nhÿ. ⁴⁶ Nê ate orti ho ixkrã gregrer kêt tã nhùm arom mẽ hkuxwaxà ho ixpar kuxwa ho nhÿ. Mēhkukwaxà hã kàxpore xohtõ htã nhùm àmnhîx ho ixpar kuxwa ho nhÿ. ⁴⁷ ãm hãmri na pa amã ja jarê. Nija kot amnhî tomnuj tÿx tã pa ra nê kot amnhî tomnuj o ijapêx pa. Ra kot amnhî tomnuj tÿx xwÿnh ã amnhî pumunh jakamã na amnhî kaxyw inhmã hamaxpër pé kãm ixkînh nê ã inhîpêx anë. No ka na ka hte uràk nê amnhî tomnuj tÿx o apa htã uràk nê tee ri ja hã amnhî pumunh kêt nê. Tã nita kînhã ate amnhî tomnuj kaga hkêt jakamã na ka ãm amã ixkînh grire. Anë.

Nhùm pre ã Jejus Simãwre mã kapër anë.

⁴⁸⁻⁵⁰ Hãmri nê nija mã kapër nê kãm:

—E kànhmã xa. Ra ate amnhĩ kaxyw inhmã ajamaxpër jakamã na pa ra ate amnhĩ tomnuj piitã amnhĩ katut kôt rēnh pa. Kot paj axte kãm ijamaxpër kêt nē. Jakamã māmri ma ajamakêtkati nē axàmnhĩx anhōrkwȳ hwȳr tē. Anē.

Hāmri nhũm mẽ kot axpēn kutã apkur xwȳnhjaja tee ri kot kãm kapër anhȳrja ã kuma nhũm ja mẽ kãm mex kêt nē. Jakamã nhũm mẽ ri axpēn mã harēnh o:

—Tk. Kwa mēhō na hte ri kot Tĩrtũm kot amnhĩ nhĩpēx pyrāk o amnhĩ nhĩpēx nē mẽ kot amnhĩ tomnuj o hapēx ã amnhĩ jarēnh o we ri pahti? Anē.

8

Mēnijē hkwȳ kot Jejus kôt pa hã mẽ harēnh

Makre 15.40-41, 16.9

¹ Tã nhũm Jejus ma mẽ piitã mẽ kãm Tĩrtũm kapër o mẽ ahkre ho ri mẽ hkôt pa. Krĩ rũnh kamã nē krĩ hkryre kamã. Mē kot amnhĩ tomnuj kaga nē Tĩrtũm kôt amnhĩ xunhwȳr nhũm kot amnhĩ tã mẽ omunh nē mẽ ho hkra kaxyw nhũm ri mẽ hkôt mẽ kãm harēnh o pa. Nhũm ỹ hã mẽ ahkre ho mẽ pa xwȳnh pê 12jaja ma hkôt ri pa. ² Nē mēni hkwȳjaja. Na pre ra Jejus mẽ hkwȳjē nē mēkarōmnuti japôj. Nē mẽ hkwȳjaja tanhmã mẽ à kute xwȳnhjaja nhũm akupȳm mẽ ho mex. Xwȳnhjaja nhũm prem haxwȳja ma hkôt ri pa. Hō pê na pre Marir Matarēn nhũm pre ra Jejus nē mēkarōmnuti ho 7 nē hapôj. ³ Nē Joanã. Joanã mjēn Kujahiti na pre kēp pahiht Erox mã mẽ ãpēnh xwȳnhjē krãhtũm. Nē Sujãnre. Nē kaxyw mēnijē ohtô nē Jejus kôt tanhmã mẽ ho ajuta hto ho mẽ hkôt pa. Jao mẽ hikàxpore ho mẽmoj japrô nē ho mẽ kãm mẽ õ nhĩpēx o ri mẽ hkôt pa.

Mēmo hy hkre xwȳnh

Matêwre 13.1-9; Makre 4.1-9

⁴ Tã nhũm mẽ ra krĩ piitã rũm Jejus wȳr akuprô. Jakamã nhũm mẽ ohtô raxkumrēx nhũm Jejus mẽ kãm ujarēnh o nhỹ. No ãm hprĩ hã ujarēnh kêt nē. Mē kot Tĩrtũm kapër mar nē tanhmã hkôt amnhĩ nhĩpēx to nhũm hã kuxi nē mẽ kãm hã ujarēnh o nhỹ. ⁵ Nē mẽ kãm:

—E mẽ inhma. Koja mēhō ma pur mã mō nē pur kãm mẽmo hy ho ukapêr o ri pa. Nom nhũm piitã amex kãm rôrôk kêt nē. Kwȳ ahpȳnhã nhȳri rôrôk. Hāmri nhũm hkwȳ aptȳx kãm rôrôk nhũm kuwēnhre omu nē hwȳr mra nē hkrēr pa.

⁶ —Nē kēn kãm hy hkwȳ rôrôk nē higrôt kutã nojarēt nē higrôt pa. No nhũm kamã aptȳx nē kamã kēp pika hkryre jakamã nhũm higrôt nhũm hã myt ahpa nē arĩgro htȳx mẽ nhũm grã pa. Kamã kēn nhũm amgo mex kêt jakamã nhũm grã pa.

⁷ —Nē mrōnhĩ kamã rôrôk xwȳnhja haxwȳja higrôt tã no nhũm utĩ kēp amȳtã nhũm ô hkêt nē.

⁸ —No hirã kamã pika mex kãm rôrôk xwȳnhja. Hāmri hirã kamã rôrôk nē higrôt mex nē piitã ô rax nē. Piitã kamã ô kēp 100. ã mẽ ujarēnh kot anhȳr. E kwa mẽ ixujarēnh ma nē kãm ajamaxpër tȳx rãhã ho ri apa. Anē.

⁹ Nhũm pre ã Jejus mẽ kãm ujarēnh anē. Hāmri nhũm hkôt mẽ pa ho mẽ pa xwȳnhjaja kuma nē tee ri hkukamã hamaxpër nē kãm:

—Kwa na pa mẽ ixprĩ hã axujarēnh kôt mẽmoj pumunh kêt nē. Aprĩ hã mẽ inhmã tanhmã harēnh to pa mẽ ixprĩ hã kuma nã? Anē.

¹⁰ Hāmri nhũm mẽ kãm:

—Tôe. Nã kot paj mẽ amã harē. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harē. Mē kot amnhĩ tomnuj kaga nhũm Tĩrtũm kot ja hã mẽ omunh nē mẽ ho hkra. Ja na pa harē.

—No mũjjaja na mẽ akĩnhã kãm mar prãm nõkati. Jakamã na htem ixujarēnh ma nē ãm kuma nē htȳx ri pa. Anē.

Jejus kot prĩ hã mẽmo hy jarēnh

Matêwre 13.18-23; Makre 4.13-20

¹¹ Hāmri nhũm Jejus hkôt mẽ pa ho mẽ pa xwȳnhjē mã:

—E kot paj ixprĩ hã mẽ amã mẽmo hy ho ukapêr ã mẽ ujarēnh ta jarē ka mẽ inhma.

—Nã mẽmo hyta te kēp Tĩrtũm kapër pyrāk. Nē ahpȳnhã hy rôrôk ã pikata te kēp ahpȳnhã mẽ kot Tĩrtũm kapër mar xwȳnhjē kot amnhĩ nhĩpēx pyrāk. ¹² Mē kot mar xwȳnh kwȳjaja te kot aptȳx kãm hy rôrôk nhũm kuwēnh kot hwȳr mra nē hkrēr par

xwýnhhta pyræk. Jao Tirtùm kapër ma nhùm Satanastí te kuwênh kot hy hkrêr parta pyrà nê mẽ kot amnhĩ kaxyw Tirtùm kapër kôt hamaxpêr nê hkôt amnhĩ xunhwýr py-maj tanhmã nê mẽ hkrã hto. Jakamã nhùm mẽ kapër ma nom ho hamakêtkati tokyx anê nê axte kãm hamaxpêr nê hkôt amnhĩ nhĩpêx kêt nê.

¹³—Nê mẽ kot mar xwýnh kwýjaja te kot kênre kamã hkwý rôrôk nê higrôt nê grà par tokyx anhýr xwýnhhta pyræk. Jao Tirtùm kapër ma nê hkĩnh nê. Nê kãm mar prãm nê. Tã nhùm mēhõ tē nê Tirtùm nê tanhmã kãm kapër to nhùm mẽ kuma nê Tirtùm kaga. Te mẽmo hy higrôt nê grà par tokyx anhýrta pyræk.

¹⁴—Nê mẽ kot mar xwýnh kwýjaja te kot mrônhi kamã hkwý rôrôk nê higrôt nhùm mrônhi kot kêp àmnar xwýnhhta pyræk. Jao kãm Tirtùm kapër mar prãm nê. No àm mãânên kãm hikukrêx rax nê hikàxpore rax prãm xàj àm ja pix mã hamaxpêr o pa. Nê gaa nê ra gryk ã axte Tirtùm kapër mã hamaxpêr nê hkôt amnhĩ nhĩpêx kêt nê.

¹⁵—Nê mẽ kot mar xwýnh kwýjaja te hirã kamã pika mex kãm hy hkwý rôrôk nê higrôt nê ô raxta pyræk. Nê ixkapêr ma nê amnhĩ krã him hagiênh týx nê ixkôt ri amnhĩ nhĩpêx mex rãhã ho ri pa. Jakamã te ra mẽmo hy hkreta ô rax mex pyræk. E. ã ixujarênh kot anhýr. Anê.

Kanê mẽ guhkrax wa harênh

Makre 4.21-25

¹⁶ Nhùm Jejus arĩ mẽ kãm ujarênh o nhỹ nê mẽ kãm:

—E mẽ inhma. Xà na htem kanê hpôk hãmri nê guhkrax o hpro rý par krak ri unhwý? Nà na htem ã hipêx anhýr kêt nê. Na htem hpôk nê kýxpê kuhê xà kamã unhwý nhùm hirã mex o kuhê. Nhùm htem ixkrem agjê nê hirã kamã mẽmoj pumunh mex nê. Ja pyrà nê na pa hte mẽ ate inhmar týx kaxyw ixprĩ hã mẽ amã awjarê. ¹⁷ Kormã mẽ ate mẽmoj pumunh nê aprĩ hã mar kêt tã kot kaj mẽ tokyx aprĩ hã omu nê ama. Te mẽmoj kot mẽ apê hpimxur pyræk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanê hpôk kãm aprĩ hã mẽmoj pumunh mexta pyræk. ¹⁸ Jakamã kêr ka mẽ ixkapêr mar týx nê

hkôt ajamaxpêr rãhã ho ri apa. Jao ixkapêr piitã mar týx nê. Nom kot ka mẽ mar týx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxà mẽ htôjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

¹⁹ Nhùm Jejus arĩ mẽ ahkre ho nhỹ. Rôm nhùm katorxà nê htôjaja nhỹhỹnh hwýr môn pøj. No nhùm mẽ kot mẽ hã htu rax jakamã nhùm mẽ tee ri hwýr gjêx kaxyw nê kormã kapôt ã kuhê. ²⁰ Hãmri nhùm mēhõja mẽ omu nê Jejus mã mẽ harê nê kãm:

—Kwa Pahihti. Ota ra akatorxà mẽ atôjaja awýr pøj nê tee ri awýr gjêx mã. O mũj mẽ kormã kapôt ã kuhê. Anê.

²¹ Hãmri nhùm mẽ kuma nê mẽ kãm:

—Tôe pa ixkato nê mẽ omu. Inhmã mẽ hapêê. Nom kot kaj mẽ atô Tirtùm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtô rý ixkatorxà kot amnhĩ nhĩpêx pyræk o pu mẽ axpên nhĩpêx. Pa te inhma mẽ hapê pyrã nê inhma mẽ ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

²² Tã nhùm apkati hõ hã nhùm Jejus himô rax ã rêr kaxyw nojarêt nê hkôt mẽ pa ho mẽ pa xwýnhjê mã kãm:

—E kot puj mẽ jarãhã ma xarmã mō. Anê.

Hãmri nê mẽ pàr mã gjêx pa nê ma xarmã mō. Garirej rùm kato nê ma xarmã pika hõ hwýr kormã mō. ²³ Nhùm ra Jejus ôtxwa nê pàr kre kamã gôr nê nō. Pu nhùm kôk àpêr týx nê nhùm gô axpên tak týx nê kànhmã harĩ. Nê pàr kre kamã pikapĩr rax nhùm pàrta mẽ kãm àr o mō nhùm mẽ tee ri amnhĩ nhĩpêx. No nhùm Jejus arĩ htýx gôr nê nō.

²⁴ Hãmri nhùm mẽ tee ri amnhĩ kukamã hamaxpêr nê kumra nê kãm:

—Kwa Pahihti kànhmã nhỹ. Kot puj mẽ jarãhã pahtyk pa. Anê.

Hãmri nhùm kànhmã nhỹ nê kôk mã kapêr nê kãm:

—E. Kwa hãmri anhĩkrê. Anê.

Hãmri nhùm hpinhkrênh par mẽ nhùm gô tãm nôr kurê kumrêx. ²⁵ Hãmri nhùm Jejus hkwýjê hwýr apkjê nê mẽ kãm:

—Kwa kormã te mẽ ate amnhĩ kaxyw Tĩrtũm mẽ wa inhmã ajamaxpër tỳx kêt pyrãk. Anẽ.

Hãmri nhũm mẽ amnhĩ jaêr pê kot ã amnhĩ nhĩpêx anhỹr ã omu nẽ no hawênh rũnh nẽ tee ri axpên pumunh pê hamaxpër o kuhê nẽ axpên mã:

—Kokỹỹ. Jejus kêp mẽ panhĩõ hkêt. Mẽ pahtõ kot pu we te kot amnhĩ nhĩpêx pyrã nẽ we kôk mã pakapër nhũm we pama anhĩkrê? Nã Jejus mẽ parom àhpumunh tỳx o àhpumunh tỳx. Jakamã na ã anẽ. Anẽ.

Jejus kot mēhõ nê mẽkarõmnuti kator ã harēnh

Matêwre 8.28-34; Makre 5.1-20

²⁶ Tã nhũm mẽ ra himô nhĩhkjê hã krĩ pê Geras wỳr rê. Himô nhĩkjê hã na pre pika pê Garirej. Nẽ Garirej nhĩkjê hã na Gerasja. Jakamã nhũm mẽ ra hwỳr rê. ²⁷⁻²⁹ Hãmri nẽ pàr kre rũm hapôj nẽ api nẽ mra nhũm mẽhõ myja mẽ kutã tẽ. Na pre ra hwỳr mẽkarõmnuti hkwy agjê nhũm mẽ y hã oprê htỳx nẽ hkênh nẽ ri mra. Nẽ òrkwỹ kamã hkrĩ hkêt nẽ. ãm ri kapôt ã pa ho pa. Mẽ htykjê hã pika kamã kên kre kaêx kôt ri pa. Na pre ra krĩ nhõ xwỳnhjaja xatã tee ri unê nẽ hkaxpre. Tee ri kãx o ri hkaxpre htã no nhũm amnhĩ nẽ rênh pa. Nhũm mẽkarõmnutija tanhmã hkrã hto nhũm kapôt pix ã ri mra. Jakamã nhũm Jejus mẽ pàr rũm hapôj nẽ api nhũm mẽ omu nẽ mẽ kutã tẽ nẽ Jejus kaxpa. Nhũm amnhĩ wỳr omu nẽ nẽ tanhmã mẽkarõmnuti mã kapër to. Hãmri nhũm my xoprêja hwỳr tẽ nẽ kutã hkõn krã ho tẽm nẽ nhỹ. Hãmri nẽ kãxpêê amnhĩ tã kãm kapër. Nom tãm kapër kêt nẽ. Mẽkarõmnuti nhỹ hã kãm kapër nẽ kãm:

—Pa Tĩrtũm Kra Jejus? Kwa mo kaxyw na ka mẽ ixwỳr tẽ? Kwa tanhmã mẽ ixto hkêt nẽ. Anẽ.

³⁰ Hãmri nhũm mẽ kãm:

—Kwa tanhmã na mẽ anhĩxi kute? Anẽ.

Nhũm mẽ kãm:

—Nã mẽ ixpê Mẽohtõhti. Anẽ.

Mẽkarõmnuti ra kot hwỳr ohtõ nẽ gjêx jakamã na prem ã kãm amnhĩ nhĩxi jarênh anẽ. ³¹⁻³² Hãmri nẽ Jejus mã:

—Kwa jahti nẽ mẽ ijapôj nẽ mẽ kot amnhĩ xà htỳx kamã hamak tũm xà hwỳr mẽ ixrênh kêt nẽ. Hagrô hkwy mũj wỳr

mãn mẽ ixrê pa mẽ hpãnhã hwỳr mãn hagjê nã? Anẽ.

Hagrôja kii mẽ kêp amỳm hixêt ã ri apkur o pa nhũm mẽ ã Jejus mã mẽ hwỳr amnhĩ to hwỳr anẽ. Hãmri nhũm mẽ kãm:

—Tõe. Tõ mẽ tãm hwỳr mãn mra. Anẽ.

³³ Hãmri nhũm mẽ kuma nẽ myta pê hapôj nẽ ma hagrôja wỳr mrrar kurê kumrêx nẽ mẽ kãm gjêx pa. Hãmri nhũm myja akupỳm tãm hkrã. No nhũm hagrôja mẽkarõmnuti pymaj amỹra nẽ axkahkũm nẽ hprôt nẽ himô hã krã hixêt ã axpum rôrôk nẽ gôx kãm mrõ nẽ pikaprãr pa. ³⁴ Hãmri nhũm hagrô jamãr xwỳnhjaja tee ri omu hãmri nẽ ma mẽ õ patrãw wỳr akupỳm mẽ piitã mẽ kãm harênh o hprôt nẽ mra. ³⁵⁻³⁶ Nhũm mẽ tee ri mẽ kuma hãmri nẽ ma kot Jejus pumunh mã hwỳr mra nẽ hkaxpa. Nẽ kuri myta pumu nhũm ra akupỳm tãm hkrã nẽ tãm amnhĩ nhĩpêx nẽ ê kamã mex nẽ nhỹ. Nhũm mẽ kot hã omunh xwỳnhjaja mẽ kãm ujarênh pa. Nhũm mẽ kuma nẽ tee ri amnhĩ kukamã hamaxpër o ra kãm ma nẽ. ³⁷⁻³⁹ Hãmri nẽ amnhĩ nẽ Jejus mã kapër nẽ kãm:

—E kwa mẽ tokyj ma akupỳm amrar kurê kumrêx. Anẽ.

Hãmri nhũm mẽ kuma nẽ awjanã nẽ ma akupỳm pàr wỳr mra nẽ agjê. Nhũm akupỳm mex xwỳnhta mẽ hkôt hkrã nom nhũm Jejus kãm:

—Nã kot kaj mẽ ixkôt amõr kêt nẽ. Ma akupỳm anhõ krĩ hwỳr mãn tẽ nẽ Tĩrtũm kot tanhmã akupỳm ato mex to hã mẽ kãm amnhĩ jarênh o ri mẽ hkôt apa. Anẽ.

Hãmri nhũm kuma nẽ ma akupỳm krĩm tẽ nẽ ri mẽ kãm Jejus kot tanhmã ho mex to hã harênh ri mẽ hkôt pa.

Jejus kot wa ho axkrut nẽ wa ho mex ã harēnh

Matêwre 9.18-26; Makre 5.21-43

⁴⁰ Tã nhũm Jejus mẽ ma akupỳm xarmã mõ nẽ rê nẽ mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nẽ mẽ kutêp gô jakãx ã pikuprõnh rax nẽ. Jakamã nhũm mẽ mẽ hwỳr pôj nhũm mẽ amnhĩ wỳr Jejus pumu nẽ hkĩnh nẽ. ⁴¹⁻⁴² Hãmri nhũm Jajti ma hwỳr tẽ. Ijaew nhõ Tĩrtũm kapër o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrã pê 12. Tã ra kêp à htỳx nẽ

htyk kaxyw nê nõ. Hāmri nhũm hipêêxàja tee ri omu hāmri nê Jejus wÿr tẽ nê kutã hkõnkrã ho tẽm nê nhÿ nê ho kuwÿ nê kãm:

—Pa akupÿm mẽ ixto mex xwÿnh maati. E awÿr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awÿr tẽ. Kwa ma ixkõt inhõrkwÿ hwÿr tẽ nê inhmã omu nê tokyx inhmã ho mex nà? Anẽ.

Hāmri nhũm kuma nê ma hkõt tẽ. Nhũm mẽ ohtô nê wa hkõt pry hã mra nê axpên nhĩgã nê axpên kujahêk o hkõt mra. ⁴³ Hāmri nhũm mẽhõ nija haxwÿja wa hkõt tẽ. Na pre hte hkamrô hkryre rãhã ho pa hã ra amgrã kêp 12. Nhũm tõtô tee ri kot ho mex kaxyw hkane kaprÿ ho pa. ⁴⁴ Jakamã nhũm tee ri amnhĩ kukamã hamaxpêr hāmri nê Jejus jarênh ma nê ma mẽ hkõt hwÿr htẽm kurê kumrêx. Nom nhũm mẽ ohtô rax nê hkõt mör jakamã nhũm mẽ hkaêx kõt hwÿr tẽ nê hkatut kõt kêp ê nhĩrê kupê. Hāmri nê ãm kêp ê pix kupênh tã akupÿm mex. ⁴⁵ Hāmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atõ na ka ri amnhĩ kaxyw inhmã ajamaxpêr tÿx pê ixpê ixê kupê? Anẽ.

Hāmri nhũm mẽ piitã tee ri axpên pumu nê kãm amnhĩ tã aprã. Hāmri nhũm Simãw Pêtre kãm:

—Mẽ kot apê amnàr griã kot ka kêt ri mẽhõ kot apê hkupênh xwÿnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

⁴⁶ Hāmri nhũm kãm:

—Nà mẽhõja amarĩ hkupênh kêt nê. Na amnhĩ kaxyw inhmã hamaxpêr tÿx pê ixpê hkupê. Tã ixàhpumunh tÿx xàja kõt na akupÿm mex. Nom ixte mẽhõ kot ixpê hkupênh xwÿnhja pumunh jakamã na pa ixêx rom ã amnhĩ tã ri mẽ hkukjêr anẽ. Kwa mẽ atõ inhmã amnhĩ jarê. Anẽ.

⁴⁷ Hāmri nhũm mẽhõ nita kuma nê tee ri kêp kot amnhĩ to hpimxur prãm kaprÿ. Hāmri nê hpijaàm kãm hwÿr htertet o tẽ nê kutã hkõn krã ho tẽm nê nhÿ nê kãm amnhĩ jarê nê kãm:

—Ma pa na pa inhmã inhmex prãm xàj apê axê kupê. Tã na pa akupÿm inhmex. Anẽ.

⁴⁸ Hāmri nhũm Jejus kuma nê kãm:

—Tõe. Nà ra ate amnhĩ kaxyw inhmã ajamaxpêr tÿx kõt ate ã amnhĩ nhĩpêx anhÿr jakamã na ka akupÿm amex. E mãmri ajamakêtkati nê ma akupÿm tẽ. Anẽ.

Hāmri nhũm kuma nê hkĩnh nê ma akupÿm tẽ. ⁴⁹ Rôm nhũm Jajti mã àpênh xwÿnhjê hõ õrkwÿ rùm ma õ patrãw kutã tẽ nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kõt hwÿr Jejus o mõi? Kwãr mãmri ma akupÿm tẽ. Anẽ.

⁵⁰ Hāmri nhũm Jejus kuma nê Jajti mã kãm:

—Kwa tee ri akra hkukamã ajamaxpêr kêt nê. Kaxyw inhmã mãn ajamaxpêr tÿx nê. Koja te ra apê htyk tã koja akupÿm amã htĩr. Anẽ.

⁵¹⁻⁵³ Hāmri nhũm mẽ mõi nê õrkwÿ hwÿr pøj nê hwÿr axà nê mẽ omu nhũm mẽ ra htyk xwÿnhnta ã htu rax nê. Nê omũj ri mur. Hāmri nhũm Jejus mẽ hwÿr axà nê mẽ mÿr ã mẽ omu nê mẽ kãm:

—Kwa mẽ hāmri amÿr kêt nê. Na nireta mẽ apê htyk kêt na ãm gõr nê nõ. Anẽ.

Hāmri nhũm ra mẽ kot htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhũm Jejus htyk xwÿnhnta wÿr hitom wÿr àr kaxyw nê amnhĩ kõt Juãw nê Xiakre nê Pêtre nê kaxyw htyk xwÿnh katorxà nê hipêêxàja. Jajê pix na pre amnhĩ kõt mẽ ho agjê. ⁵⁴ Hāmri nê htyk xwÿnhnta wÿr tẽ nê hpa hã kupy nê kãm:

—Pa? Kwa tokyx kãnhmã nhÿ. Anẽ.

⁵⁵ Hāmri nhũm akupÿm htĩr nê kãnhmã ÿr kurê kumrêx. Hāmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nê. Anẽ.

⁵⁶ Hāmri nhũm katorxà mẽ hipêêxà wa amnhĩ jaêr pê akupÿm htĩr kãm omu nê kamã no puma ho hkĩnh tÿx nê. Hāmri nhũm Jejus wa kãm:

—E wa inhma. Kêr ka wa akupÿm ixte war amã ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anẽ.

9

Jejus kot mẽ ho 12 nẽ ahpÿnhã mẽ rẽnh ã harẽnh

Matêwre 10.1, 10.5-15; Makre 6.7-13; Rukre 10.1-12; mãânên Atre 13.49-50, 18.6

¹⁻² Tã nhũm Jejus hkõt mẽ pa ho mẽ pa xwÿnh pẽ 12jẽ mã kapẽr nẽ mẽ kãm:

—E mẽ amnẽ ixwÿr mra nẽ ixkapẽr ma. Na pa ra mẽ amã ixãhpumunh tÿx xà hkwygõ. Jakamã kêr ka mẽ inhÿ hã ma ri akwÿjẽ hkõt tanhmã mẽ ho mex to ho ri mẽ hkõt apa. Mẽ à xwÿnhjẽ ho mex o ri mẽ hkõt apa. Nẽ mẽ hkwyjẽ nẽ mẽkarõmnuti japõj. Nẽ mẽ piitã mẽ kãm anẽ kê mẽ tokyx Tirtũm kõt amnhĩ xunhwÿ kê mẽ ho hkra. ³ Nom kêr ka mẽ amnhĩ kõt akukrẽx ho ohtõ nẽ ri ho apa hkõt nẽ. Nẽ amnhĩ kaxpar xà hã kô ho apa hkõt nẽ. Nẽ kawà htur nẽ ho apa hkõt nẽ. Nẽ amnhĩ kõt axàpkur xà hã anhõ ho apa hkõt nẽ. Rÿ akàxpore rax nẽ ho apa hkõt nẽ. Æm mẽ anhõ kamĩs ho pixi nẽ haxà nẽ ri hã apa. Nẽ anhÿ kamã ã ri mẽ hkõt apa anẽ. Kê mẽ kot mẽ akapẽr mar xwÿnhjaja tãm mãn mẽ amã mẽ anhõ ho pa.

⁴ —Nẽ kêr ka mẽ nhÿri krĩ hõ hwÿr põj nẽ apõx xà kamã mẽhõ nhõrkwÿ kamã hkõt ri apikamẽnh tãmã kurũm akupÿm ajapõj nẽ ma hpãnhã nhãm krĩ hõ hwÿr apa. Nom atÿx ri nhãm mẽ hwÿr amrar nẽ nhãm mẽ hwÿr amrar kêt nẽ.

⁵ —Nẽ koja mẽ nhÿri mẽ akapẽr kaga ka mẽ amnhĩ tã mẽ kamã ama nẽ tokyx mẽ kurũm ajapõj nẽ ma nhãm apa. Nẽ anojarêt nẽ mẽ noo mã akuhẽ nẽ amnhĩ par ã awjagrõ kapĩ. Mẽ kot Tirtũm kaga hã amnhĩ pumunh nhũm Tirtũm kot amnhĩ pyrã nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpẽx anẽ. Hãmri nẽ ma hpãnhã krĩ hõ hwÿr apa. Anẽ.

⁶ Nhũm pre ã Jejus mẽ kãm mẽ àpẽnh ã karõ anẽ. Nhũm mẽ kuma hãmri nẽ hapõj nẽ ma mẽ hkõt pa. Ma krĩ piitã hkõt akupÿm mẽ à xwÿnhjẽ ho mex nẽ Tirtũm kapẽr o tanhmã mẽ ahkre hto ho ri mẽ hkõt pa.

Pahi Erox tee ri kot Jejus kukamã hamaxpẽr ã harẽnh

Matêwre 14.1-12; Makre 6.14-29

⁷⁻⁸ Hãmri nhũm pika pẽ Garirej kamã mẽ piitã Jejus jarẽnh ma nẽ ahpÿnhã ri

tanhmã axpẽn mã harẽnh to. Mẽ hkwyjaja kêp finat Juãw Paxis akupÿm htĩr ã ri harẽ. Nhũm mẽ hkwyjaja amnepẽm mẽ hkukamã Tirtũm nhÿ hã kapẽr jarẽnh xwÿnhjẽ hõ ra akupÿm htĩr ã harẽ. Nhũm mẽ hkwyjaja kêp finat Eris ã axpẽn mã harẽ. Jakamã nhũm pahihti Eroxja mẽ kot ahpÿnhã tanhmã ri harẽnh toja ma nẽ tee ri hkukamã hamaxpẽr. ⁹ Nẽ hamaxpẽr o:

—Kwa mẽhõ na hte we ri ã amnhĩ nhĩpẽx anhÿr o pa wehe? Nã finat Juãw Paxis kêt. Ra ixte amnepẽm hã ixamnẽnh nhũm mẽ kot inhmã mut krãhyr nẽ hpĩr kẽnã. Kwa mẽhõ na hte we ri ã amnhĩ nhĩpẽx anẽ?

Anhÿr o hamaxpẽr hãmri nẽ kãm omunh prãm nẽ.

Jejus kot mẽ ho ohtõ nẽ mẽ kãm mẽ õ hã harẽnh

Matêwre 14.13-21; Makre 6.30-44; Juãw 6.1-14

¹⁰ Tã nhũm Jejus nhÿ hã kapẽr o mẽ pa xwÿnhjaja akupÿn hwÿr mran põj nẽ mẽ kot ri tanhmã amnhĩ nhĩpẽx to ho pa hã kãm amnhĩ jarẽ. Hãmri nhũm mẽ kuma nẽ ma krĩ pẽ Pesẽj wÿr kormã mẽ o mõ. ¹¹ Hãmri nhũm krĩ hkwy nhõ xwÿnhjaja ra ma mẽ mõr ã mẽ harẽnh ma nẽ ohtõ nẽ ma mẽ hkõt mra nẽ nhÿri mẽ hkõt põj. Nhũm Jejus amnhĩ kõt mẽ omu hãmri nẽ tanhmã mẽ ho mex to ho xa. Kõt mẽ à nẽ mẽ pa xwÿnhjaja nhũm akupÿm mẽ ho mex. Hãmri nẽ Tirtũm kapẽr o mẽ ahkre nẽ mẽ kãm:

—E kot kaj mẽ atõ amã amnhĩ tomnuj kaga hprãm xaj Tirtũm kõt amnhĩ xãm nhũm amnhĩ tã apumu nẽ ato hkra. Hãmri ka ajamakêtkati nẽ amex nẽ axãmnhĩx ri apa.

Anhÿr o mẽ kãm kapẽr pẽ mẽ ahkre ho xa.

¹² Tã nhũm myt àr kaxyw nhũm Jejus nhÿ hã mẽ ahkre ho mẽ pa xwÿnh pẽ 12jaja hwÿr mra nẽ kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japẽr nẽ tokyx amnhĩm mẽmoj japrõ nẽ kuku nẽ hikwÿ nẽ gõr. Mo mẽ panhõ? ãm jar kapõt pix kẽnã. Anẽ.

¹³⁻¹⁴ Hãmri nhũm mẽ kuma nẽ mẽ kãm:

—Kwa ka mẽ kamjaja mẽ kãm mẽmoj gõ kê mẽ kuku. Anẽ.

Nhũm mẽ ohtõ rax nẽ mẽ hkõt mra. Memyjaja kêp 5.000 nẽ kaxyw mẽ hprõ nẽ mẽ hkrajaja. Jakamã nhũm mẽ kêp 12jaja

Jejus kot ã mẽ kãm kapêr anhÿrja ma nê tee ri mẽ hkukamã hamaxpêr nê kãm:

—Kwa nà mo mẽ panhõ rax? Mẽ panhõ pãwti kêp sîk nê kaxyw tep grà axkrut্রে kênã kot kêt we mẽ piitã mẽ hipêx pa. Xà kot paj mẽ ma mra nê nhÿri mẽ kãm mẽ apkur xà japrô nhũm mẽ kuku? Anê.

Hãmri nhũm mẽ kãm:

—Nà pu mẽ kãm mẽmoj japrôr kêt nê. Mẽ panhõta kot puj mẽ kãm ho anhrà. E mẽ kãm anê kê mẽ ahpÿnhã ri hije nê hkrĩ nê apku. Anê.

¹⁵ Hãmri nhũm mẽ kuma nê mẽ kãm anê nhũm mẽ piitã hkrĩ pa. ¹⁶ Hãmri nhũm Jejus pãwti mẽ tepta jamÿ nê kãnhmã kaxkwa hwÿr rît nê kãnhmã kupê nê Tirtũm mã harê nê kãm:

—Pa Papaj? Apê mẽ inhmã mẽ inhõ xwÿnh jakamã amex o amex. Anê.

Hãmri nê mẽ kãm ho hkry hpa nê hkôt mẽ pa ho mẽ pa xwÿnhjê mã kugõ nhũm mẽ ô ri ho xa nê ho mẽ hipêx par kumrêx. ¹⁷ Nhũm mẽ piitã apkur mex o hkrĩ. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nê ho õhy htu hpa. Nhũm arĩ mẽõ jakrêx prã nhũm Jejus kôt mẽ pa ho mẽ pa xwÿnhjaja akupÿm hakrêx o pikuprõnh pa nê ho kawà ho 12 nê ho nÿt pa.

Jejus kot amnhĩ tã hkôt mẽ pa xwÿnhjê kujêr ã harênh

Matêwre 16.13-19; Makre 8.27-29

¹⁸ Tã nhũm arĩgro hõ mã nhũm Jejus nhÿri ahte Tirtũm mã amnhĩ jarênh o nhÿ nhũm hkôt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nê amnhĩ tã tanhmã mẽ hkukjêr to nê mẽ kãm:

—Kwa mẽ inhmã mẽmoj jarê. Tanhmã na htem ahpÿnhã axpên mã ijarênh to wehe? Anê.

¹⁹ Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarê. Nhũm kamã mẽ hkwyjaja ato finat Eris ã ajarê nhũm mẽ hkwyjaja tõhã apê Tirtũm nhÿ mã kapêr jarênh xwÿnhjê hõ ra akupÿm htir ã ajarê. Æ na htem ahpÿnhã ajarênh anê. Anê.

²⁰ Hãmri nhũm mẽ kuma nê mẽ kãm:

—No mẽ kajaja? Ixpê mẽhõ mã na ka htem ixkamnhix? Anê.

Hãmri nhũm Simãw Pêtre kãm:

—Nà mẽ pajaja na pa htem apê Tirtũm kot mẽ ixkaxyw axãm nê mẽ ixwÿr amênh xwÿnh ã ajarê. Nê apê mẽ ixpiitã mẽ inhõ Pahi Maati mã ajarê. Æ na pa htem ajarênh anê. Anê.

²¹ Hãmri nhũm kuma nê mẽ kãm:

—Tÿ. Nà ãm hãmri na ka htem ã ijarênh anê. Æ ixte anhÿr kênã. Nom kêr ka mẽ inhmar kumrêx. Kêr ka mẽ kormã ã akwÿjê mã ijarênh anhÿr o ri apa hkêt nê. Anê.

Jejus kot amnhĩ kukamã amnhĩ jarênh

Matêwre 16.21; Makre 8.31-33

²² Nhũm Jejus arĩ hkôt mẽ pa ho pa xwÿnhjê mã kapêr nê hprĩ mã tanhmã mẽ kãm amnhĩ jarênh to nê mẽ kãm:

—Nà ãm hãmri na Simãw Pêtre ijarê. Mẽ kajaja ra mẽ ate ja mã ixpumunh mex. No mẽ pahkwÿjaja na mẽ akĩnhã mẽ kãm ja mã ijarênh mar nê ja mã ixpumunh prãm kêt. Ijaew pigêjtaja nê Tirtũm kapêr tũm o mẽ ahkre o mẽ pa xwÿnhjaja nê patre krãhtũmjaja mẽ kãm ja mã ixpumunh prãm kêt. Jakamã koja mẽ nhÿrmã ixpynê nê ixtak rax nê. Hãmri nê ixpĩ. Nom kot paj ixytk ã apkati axkrunêpxi nhũm Tirtũm akupÿm ixto ixtir. Anê.

Jejus krajaja tanhmã kot amnhĩ nhÿpêx to mã mẽ harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; mããnhên Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhũm pre ã Jejus amnhĩ kukamã hkôt mẽ pa ho mẽ pa xwÿnhjê mã amnhĩ jarênh anê hãmri nê hpãnhã mẽ kot mar o kuhê xwÿnh piitã mẽ kãm kapêr nê mẽ kãm:

—E kot ka mẽ atõ ate ixkôt amnhĩ xãm ã amnhĩ jarê hãmri nê mããnhên ã amnhĩ jarênh anê nê amnhĩ jarênh o: “Jejus kêp inhõ Pahihti jakamã kot paj kapêr kôt pix mã amnhĩ nhÿpêx rãhã ho ri ixpa. Kwãr ixkwÿjaja tanhmã mã inhÿpêx to.” Anhÿr o apkati mẽ ã amnhĩ jarênh anê.

²⁴ —Koja mẽ ixtã mẽ atõx pĩ rÿ tanhmã mẽ atõ hto ka ty. Tã koja akaxwÿnh ma inhõ krĩ mex wÿr àpir kurê kumrêx. Hãmri nê kamã atir tũm nê amex rãhã apa ho apa. Nom kot kaj mẽ jar atir prãm xàj ixkaga hãmri nê hwÿr axàpir kêt nê.

²⁵ —Ně koja mēhō hikukrêx rax gryk ã Tirtũm kaga. Hã koja nhỹrmã ty ně ý kamã kuwy hwýr ma mō ně amnhĩ kôt hikukrêx õ hpyr ně o mōr kêt ně. Koja tee ri kuwy hwýr mōr pymaj amnhĩ ně hikukrêx rax o amnhĩ pãnhã amnhĩrer prãm kaprý.

²⁶ —Ně koja mēhō ixte mē ahkre hã inhma nhũm ja kęp omnuj nhũm ixkaga japêr. Hã kot paj nhỹrmã akupýn mē ato amnhĩptâr kaxyw akupýn wrý ně amnhĩ xwar kot ixkaga xwýnhhta kaga. ãm hãmri na pa ã mē amã amnhĩ jarênh anê. Kot paj nhỹrmã man akupýn inhō Papaj nhỹ hã ixte mē ho amnhĩptâr kaxyw akupýn wrý. Nhũm kapêr o mē wrýk xwýnhhjaja man ixkôt wrý. Pa mē wrý hãmri ně mē kot ixkaga xwýnhhjaja pa amnhĩ pyrã ně mē hkaga. ²⁷ ãm hãmri na pa ã mē amã amnhĩ jarênh anê. Kot paj nhỹrmã akupýn ixte mē ato amnhĩptâr kaxyw mē awýr wrý. Tã kot kaj mē akwýjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus kot kên prêk nhĩmõk ã hirã kamã ãm ã harênh

Matêwre 17.1-8; Makre 9.2-8; mããnêh Sikũn Pêtre 1.16-18

²⁸ Tã nhũm semãnja hapêx nhũm Jejus Simãw Pêtre ně Xiakre ně Juãw wa mē kãm kapêr ně mē kãm:

—E pu mē ma hixêt prêk mũj wýr mō ně hwýr api ně himõk ã Tirtũm mã amnhĩ jarê. Anê.

Hãmri ně ma amnhĩ kôt hwýr mē o mō ně hwýr mē ho api. ²⁹⁻³² Hãmri nhũm Jejus Tirtũm mã amnhĩ jarênh o xa. Nom nhũm hkôt hixêt wýr mē mōr xwýnhhjaja õtxwa htýx ně ra gõr ně hikwý. Pu nhũm Jejus axtem hkuk ně xa. Ně ê haka htýx ně xa. Hãmri nhũm ja wa kaxkwa rũm wrý ně kuri kãm kapêr o xa. Finat Mojes mē finat Erisja wa kuri kãm kapêr o xa. Na pre ra amnepêm Tirtũm amnhĩ wýr wa ho api. Tã nhũm wa ra akupýn wrý ně Jejus mã kapêr o xa. Mē hpimràatã hirã htýx kãm axpên mã kapêr o kuhê. Jejus kormã krĩ pê Jerujarê kapem mē kot hpĩr kêt ri nhũm wa mē axpên mã htyk kukamã harênh o kuhê. Nhũm wa kãm:

—Nã Tirtũm jamaxpêr xã hkôt kot kaj ã amnhĩ nhĩpêx anê.

Anhýr o Jejus tyk kukamã kãm hamaxpêr o hihtýx o wa xa.

Rôm nhũm mē õt xwýnhhjaja hkrã hapôj ně tee ri Jejus pumu. Nhũm mex kumrêx ně hirã htýx kãm xa nhũm mē omu ně kuri wa ãm xwýnhhta wa omu. ³³ Hãmri nhũm Mojes mē Eris wa ra akupým nojarêt nhũm Simãw Pêtre tee ri ja hã wa omu ně Jejus mã kãm:

—Kwa Pahihti. Nã ãm hãmri na pu mē amnê mō. Kwa pu mē kritpê m jar axkamê ně tokyx panojarêt kêt ně. Pa mē amã pô nhĩrõnh o axkrunêpxi ně hipêx. Amã hõ nhĩpêx ně Mojes mã hõ nhĩpêx ně Eris mã hõ nhĩpêx ka mē kamã akrĩ. E kwa pa mē amã ho anê nã? Anê.

Nhũm amnhĩ krã hkôt ã kãm kapêr anê.

³⁴ Hãmri ně kormã kãm kapêr rôm nhũm kakrã jaka týtjaja wrý ně mē hkunor nhũm wa mē kamã kuhê. Hãmri nhũm Simãw Pêtre mē Juãw mē Xiakreja mē tee ri kakrã kot amnhĩ nhĩpêx ã omu ně kãm ma ně. ³⁵ Hãmri nhũm kakrã kamã Tirtũm mē kãm kapêr ně mē kãm:

—E ota Ixkra xa. Mē ate kamã ajamak o apa xwýnhhta na. Inhmã hapêê. Kêr ka mē ãm tapxipix kapêr mar týtj o ri apa. Anê.

³⁶ Hãmri nhũm mē kuma ně kãnhmã rĩt ně ãm Jejus pix pumu nhũm ahte xa. Nhũm kuri wa ãm xwýnhhta wa ra ma akupým api nhũm mē Jejus pix pumu.

Mē tapxipixjaja na prem ã Jejus kot amnhĩ nhĩpêx anhýr ã omu nom taxy kormã nhãm hkwyjê mã harênh kêt ně. ãm axpên pix mã harênh pê hkukamã hamaxpêr o ri Jejus kôt pa.

Jejus kot mēhō ně mēkarõmnuti janor ã harênh

Matêwre 17.14-21; Makre 9.14-29

³⁷ Tã nhũm apkati nhũm mē ma akupým ahparmã hkwyjê hwýr wrýk o mō. Ně mē hwýr hpõx o mō nhũm mē ra mē kutêp pikuprõnh rax ně kuhê. ³⁸ Hãmri nhũm mēhõ myja amnhĩ wýr mē omu ně mē kutã tē ně mē hkaxpa ně Jejus pumu ně kãm:

—Pa Jejus. Kwa ixkamã axukapřĩ ně inhmã ixkra ho mex. ãm ixpê pyxire. ³⁹ Na hte mēkarõmnuti xatã ixpê tanhmã ho nhũm ý hã amýra ně mra ně rôrõk ně hakwa jamrõ ho hikwý nhũm tokyx kãm urer kêt ně. Nhũm ra ixpê homnuj týtj ně.

⁴⁰ Hāmri pa akôt mẽ pa ho mẽ pa xwỳnhjê hwỳr o tẽ nhũm mẽ kot inhmã ho mex kaxyw tee ri tanhmã ho hkapyr. Anẽ.

⁴¹ Hāmri nhũm kuma nẽ hkôt mẽ pa ho pa xwỳnhjê mã kãm:

—Hêxta waa nẽ. Na ka mẽ ra ixte Tĩrtũm nhỹ hã mẽ ho mex ã ixpumunh o ixkôt apa ryy tã kormã ixpyrà nẽ ã mẽ hipêx anhỹr kêt nẽ. Mãn ka mẽ kormã mẽ kaxyw Tĩrtũm kôt ajamaxpêr tỳx kêt nẽ. Anẽ.

Hāmri nẽ myta mã kãm:

—E amnẽ ixwỳr akra ho tẽ pa inhno ho omu. Anẽ.

⁴² Hāmri nhũm hwỳr o tẽ nhũm mẽkarõmnuti axte kêp ho pika kura nhũm amỹra nẽ tẽm nẽ nõ. Hāmri nhũm Jejus omu nẽ nẽ mẽkarõmnuti kator nhũm akupỹm mex nẽ kànhmã nhỹ. Hāmri nhũm akupỹm hipêx mã kugõ. ⁴³ Hāmri nhũm mẽ amnhĩ jaêr pẽ Jejus kot ã hipêx anhỹrja ã omu nẽ ri axpẽn mã harẽnh o:

—Kokỹỹ. Hêxta waa nẽ. Pêr ãm Tĩrtũmja ãm àhpumunh o àhpumunh. Anẽ.

*Jejus kot htyk kukamã amnhĩ jarẽnh
Matêwre 17.22-23; Makre 9.30-32*

⁴⁴ Hāmri nhũm Jejus hkôt mẽ pa ho mẽ pa xwỳnhjê mã kãm:

—E kot paj mẽ amã tanhmã amnhĩ jarẽnh to ka mẽ inhmar tỳx nẽ. Na pa pre mẽ ate aa mẽmoj pumunh kêt kwỳ ho anhỹr o ixpa pix kaxyw mẽ awỳr ixwrỹk kêt nẽ. Koja mẽ tokyx mẽ kãm ixtã amỹnê nhũm mẽ ixpĩ. E kwa kêr ka mẽ ja ma nẽ hã anohtỳx nẽ ho apa. Anẽ.

⁴⁵ Hāmri nhũm mẽ tee ri kot ã amnhĩ jarẽnh anhỹrja ma nẽ axpẽn mã:

—Kwa mo na pẽr ri ã amnhĩ jarẽnh anẽ? Kêp mẽ panhõ Pahi Maati hã kot amnhĩ jarẽnh kênã kot kêt mẽhõ kupĩ.

Anhỹr o axpẽn mã ri harẽnh o kuhê. Hāmri nẽ mẽ kãm ã kot amnhĩ jarẽnh anhỹrja mar prãm kêt jakamã hprĩ hã tanhmã hã hkukjêr to hkêt nẽ. ãm akryk mar o kuhê.

Mẽ kot amnhĩ to rũnh xwỳnhjê jarẽnh

Matêwre 18.1-5; Makre 9.33-37; Rukre 22.24-27; mããnên Piripos 2.3-9; Wam Pêtre 5.5

⁴⁶ Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hāmri nẽ axpẽn mã:

—Kwa mẽ pahtõ kot puj we nhỹrmã pahpê pahi nẽ mẽ ho amnhĩptàr rax o pahkwỳ jakre? Anẽ.

Hāmri nẽ ja hã axpẽn kukjêr o Jejus kôt mõi nẽ axpẽn mã: “Nà pa.” Nhũm mẽ hkwyja: “Nà kêt pa.” Anhỹr o hkôt mõi. ⁴⁷ Hāmri nhũm Jejus mẽ kuma nẽ mẽ hamaxpêr kôt mẽ omu. Hāmri nẽ xa nẽ amnhĩ wỳr mẽhprĩjê mã hpa ho apê nhũm hwỳr tẽ nẽ kuri xa. ⁴⁸ Hāmri nhũm Jejus hkôt mẽ pa ho pa xwỳnhjê mã tanhmã harẽnh to nẽ mẽ kãm:

—E mẽ inhma. Kêr ka mẽ apê pahi pyràk o tanhmã amnhĩ jarẽnh to ho ri apa hkêt nẽ. ãm te amarĩ ri mẽ apa pyràk o amnhĩ nhĩpêx o ri apa. Jao nhỹri mẽhprĩre hõ pumu nẽ kamã axukapĩ ho kãm mẽmoj tanhmã ho rỳ kãm mẽmoj gõ. Hāmri nẽ te pa ate tanhmã ixto mex to pyràk o amnhĩ nhĩpêx. Nẽ kot ka mẽ atõ pa tanhmã ixto mex to nẽ te ate Tĩrtũm tanhmã ho mex to pyràk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nẽ mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm nẽ ã amnhĩ nhĩpêx anhỹr o ri apa. Anẽ.

*Mẽhõ kot Jejus nhỹ hã tanhmã amnhĩ
nhĩpêx to hã harẽnh*

Makre 9.38-41

⁴⁹ Hāmri nhũm Jejus kôt mẽ pa ho pa xwỳnhjê hõ pẽ Juãwja nhỹhỹnh hwỳr hpõx o tẽ nẽ kãm:

—Kwa Pahihti. O mũj mẽhõ kêp mẽ pahkwỳ hkêt tã anhĩxi jarẽnh kôt mẽ nẽ mẽkarõmnuti janor o pa. Pa mẽ tee ri kot ã amnhĩ nhĩpêx anhỹr ã omu nẽ nẽ kãm ixkapêr. Kêp mẽ pahkwỳ hkêt kênã kot kêt ã mẽ hanor anhỹr o pa. Anẽ.

⁵⁰ Hāmri nhũm kuma nẽ kãm:

—Kwa nà ja nẽ tanhmã kãm nẽ hkêt nẽ. Kojã mẽhõ mẽ pahkwỳm ri tanhmã mẽ ahkre hto hkêt nẽ hāmri nẽ kêp mẽ panhĩõõ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nẽ tanhmã kãm akapêr to hkêt nẽ. Kwãr mãmrĩ ã

amnhĩ nhĩpêx anhÿr o ri pa. Ja mex kênã. Anẽ.

Samar nhõ xwÿnhjaja kot Jejus kaga hã mẽ harẽnh

Atre 8.14-15

⁵¹ Hãmri nhũm Jejus akupÿm kaxkwa hwÿr àpir kaxyw ra hwÿr apkati grêre ho mõi jakamã nhũm hamaxpêr o:

—E pa ma akupÿm Jerujarẽ hwÿr mõi. Nà kot paj anẽ. Mẽ kot kamã tanhmã ixto mã tã kot paj ma akupÿm mẽ hwÿr mõi. Anẽ.

⁵² Hãmri nẽ amnhĩ kukamã mẽ hkwÿjê rẽ nhũm mẽ ma mẽ hkukamã Samar nhõ krĩ kamã nhÿri mẽ kot amnhĩm hikranh xà japêr o mõi. ⁵³ Nom nhũm Samar nhõ xwÿnhjaja kêp Jerujarẽ nhõ xwÿnhjê hprãm nõkati jakamã Jerujarẽ hwÿr mõi ã mẽ harẽnh ma nẽ amnhĩ nẽ mẽ hkurê. ⁵⁴ Hãmri nhũm mẽ tee ri amnhĩ tã mẽ kuma nẽ awjanã nẽ akupÿm Jejus wÿr mra nẽ kãm mẽ harẽ. Hãmri nhũm Juãw mẽ Xiakre wa mẽ harẽnh ma nẽ mẽ kamã gryk nẽ nẽ Jejus mã:

—Kwa Pahihti. Nà na mẽ axtem nẽ amnhĩ nẽ mẽ pahkurê. Jakamã e kwa pu mẽ kaxkwa rũm mẽ hipy kuwy hpøk kwÿ rẽ kê mẽ hkaxàr pa nà? Anẽ.

⁵⁵ Hãmri nhũm wa kuma nẽ wa kãm:

—Tk. Kwa nà wa ajamaxpêrja mex kêt. Pu mẽ ã ri mẽ hipêx anhÿr kêt nẽ. Kojã Tirtũm kãm ja ho anhÿr prãm nẽ rĩ tãm tanhmã mẽ ho. No mẽ papajaja pu mẽ ri mẽ kamã pagryk xà tanhmã mẽ hipêx to hkêt nẽ. Pu mẽ ã mẽ hipêx anẽ nẽ ra amnhĩ tomnuj tÿx nẽ. Kwa wa ri ã ajamaxpêr anhÿr kêt nẽ. Anẽ.

⁵⁶ Hãmri nẽ mẽ ma Samar rũm hapôj nẽ hpãnhã nhãm krĩ hõ hwÿr pa.

Mẽ hkwÿjaja kãm Jejus kôt pa hprãm ã mẽ harẽnh

Matêwre 8.18-22

⁵⁷ Tã nhũm Jejus mẽ kormã mõi ri nhũm mēhõja hwÿr tẽ nẽ kãm:

—Pa Jejus? E kot paj ma akôt ixpa ho ixpa. Anẽ.

⁵⁸ Hãmri nhũm kuma nẽ kãm:

—Ko ka mã. Kam nẽ rĩ ma ixkôt ri apa ho apa. Nom kêr ka inhmar kumrêx nẽ rĩ kormã ixkôt apa. Na hte xore pika hkre kamã hikwÿ xà. Nẽ kuwênhre pĩ nhĩmõk ã hikwÿ xà. No pa na Tirtũm kot mẽ awÿr

inhmênh xwÿnh tã jajê hkĩnhã inhõrkwÿ hkêt. Na pa hte ãm nhãm krĩ hõ hwÿr ixpa nẽ nhãm ixpa. Tã xà kot kaj ixpyrà nẽ ã amnhĩ nhĩpêx anhÿr o ri apa nà? Anẽ.

⁵⁹ Nhũm pre ã kãm kapêr anẽ hãmri nẽ nhãm mēhõja wÿr apkjê nẽ kãm:

—Pa? No ka? Xà kot ka ma ixkôt apa ho apa nà? Anẽ.

Hãmri nhũm kãm:

—Tÿ no ãm kormã. Kojã nhÿrmã inhĩpêxàja tanhmã amnhĩ to nẽ ty mãn. Pa haxà hãmri nẽ rĩ kormã ma akôt ixpa ho ixpa. Anẽ.

⁶⁰ Hãmri nhũm Jejus kuma nẽ kãm:

—Kwa nà ri ã ajamaxpêr anhÿr kêt nẽ. Ma ixkôt apa ho apa kurê kumrêx. Kê mẽmoj ano kupyw rÿ inhnê apê amnàr kêt nẽ. Kwãr mẽ htĩr tũm nẽ mẽ pa hkêt mã xwÿnhjaja mãn axwakre kamã amã anhĩpêxà jamãr o pa nhũm nhÿrmã ty kê mẽ amã haxà. Ka mãmrĩ ma Tirtũm kapêr o mẽ ahkre ho ri mẽ hkôt apa. Kê mẽ ama nẽ mẽ hkwÿjaja hkôt amnhĩ xunhwÿ nhũm mẽ ho hkra. Anẽ.

⁶¹ Nhũm pre ã kãm kapêr anẽ hãmri nhũm nhãm mēhõ myja haxwÿja hwÿr tẽ nẽ kãm:

—E. Pa kot pa ma akôt ri ixpa ho ixpa. Nom kormã. Pa ma akupÿm tẽ nẽ ixkwÿjê mã amnhĩ jarê nẽ tanhmã amnhĩ to hpa mãn. Hãmri nẽ mẽmo arĩgro hã rĩ kormã ma akôt ixpa ho ixpa. Anẽ.

⁶² Hãmri nhũm tee ri kuma nẽ kãm:

—Kwa nà. Kot kaj ã ajamaxpêr anẽ hãmri nẽ ixkôt apa htã te amnhĩ katut kôt arĩt rãhã ho ri apa pyràk o amnhĩ nhĩpêx. Kwa ã ajamaxpêr anhÿr kêt nẽ ma ixkôt apa kurê kumrêx. Anẽ.

10

Jejus kot mẽ hwÿr mẽ kêp 72 rênh ã harẽnh
Matêwre 10.1, 10.5-15; Makre 6.7-13;
Rukre 9.1-6, 9.10-11; mãänẽn Atre 13.50-51, 18.6

¹ Tã nhũm Jejus axte amnhĩ kaxyw mẽ ho 72 nẽ mẽ kurê. Hãmri nẽ mẽ ho axkrut kapên nẽ ma nhÿhÿm krĩ hkwÿ hkôt amnhĩ kukamã mẽ kurê. Mẽ kot mẽ hkôt ri Tirtũm kapêr o mẽ ahkre ho pa kaxyw. ² Hãmri nẽ mẽ kãm:

—Na mẽ ohtô rax nẽ kormã Tirtũm kapêr mar kêt nẽ. No ãm kormã mẽ ate mẽ kãm harẽnh o apa kaxyw mẽ agrêre. Te pur kãm

harôj kamrêk pa nê ãm tâ no ãm kaxyw hikênh xwÿnh grêre pyrâk. Jakamã kwa mẽ ho Tirtũm wÿ kê axte mẽ kaxyw mẽ hkwyjê rê.

³—E kot paj ma mẽ hwÿr mẽ arê. Ma mẽ hkôt mẽ ate Tirtũm kapêr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwÿr amnhĩ to mrar nhũm kot hkwy hpar pyrâk o amnhĩ nhĩpêx. Koja mẽ hkwyjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamxpêr nê amã mẽ uma hkêt nê.

⁴—Nê kêr ka mẽ hwÿr anojarêr nê amnhĩ kôt amrykã rÿ akawã rÿ aparkã hõ ho apa hkêt nê. ãm anhÿ kamã ma mẽ hwÿr apa. Nê mẽ hwÿr mra nhũm mẽ nhÿri pry hã mẽ atõ kaxpa nê amã kapêr o xa ka wa axpên mã akapêr ry hkêt nê. Anojarêr kãm kãm akapêr krãnre nê mẽ hakre nê ma krĩm apa.

⁵—Nê kêr ka mẽ hwÿr pøj nê nhÿri mẽ õrkwÿ hwÿr agjê nê mẽ kãm: “Xà kot paj mẽ ato Tirtũm wÿ kê mẽ ato mex nê ka mẽ ajamakêtkati nê ri apa?” Anê. ⁶Hãmri nhũm mẽ ama nhũm ja mẽ kãm mex japêr nhũm mẽ hkĩnh nê amã: “ÿ kam nê mãmrĩ mẽ ixto awÿ.” Anê. Hãmri ka mẽ ama nê tanhmã mẽ ho Tirtũm wÿr to. No koja mẽ apê ja kaga ka mẽ ho hwÿr kêr nê.

⁷—Nê kêr ka mẽ nhÿri mẽ õrkwÿ kamã mẽ hwÿr pøj hãmri nê mẽ hkôt ri apikamênh tãmtã nê akupÿm mẽ kurũm ajapøj nê ma hpãnhã krĩ hõ hwÿr apa. Nê mẽ axãmnhĩx mẽ kuri axãpkur o ri apa. Mẽmoj to akõm o ri apa. Ra mẽ ate mẽ ho mex pê mẽ kãm Tirtũm kapêr o mẽ ahkre ho apa kênã. Jakamã kwãr mẽ mãmrĩ amnhĩ pãnhã mẽ amã mẽ axãpkur xã gõ ka mẽ kuri mẽ apku.

⁸—Nê kêr ka mẽ nhÿri mẽ hwÿr pøj nhũm mẽ ato mex nê. Nê mẽ amã mẽmo mẽ apkur xã gõ ka mẽ mãmrĩ axãmnhĩx aku. Aa kormã mẽ ate mẽmojta kur kêr tã mãmrĩ ajamakêtkati nê aku. No tee ri amnhĩ kukamã tanhmã ajamxpêr to hkêt nê.

⁹—Nê kêr ka mẽ ã mẽ kãm akapêr anê nê mẽ kãm: “Tirtũm kãm mẽ ato hkra hprãm. Na hte amnhĩ wÿr mẽ awÿ.” Anê hãmri nê akupÿm mẽ kãm mẽ à xwÿnhjê ho mex. ã

kot kaj mẽ mẽ kãm amnhĩ nhĩpêx anhÿr o ri mẽ hkôt apa.

¹⁰—Nê kêr ka mẽ nhÿri mẽ hwÿr pøj nhũm mẽ ãm mẽ apumu nê amnhĩ nhõrkwy hwÿr mẽ awÿr kêr japêr. Hãmri ka mẽ tee ri amnhĩ tã mẽ omu hãmri nê ra ma nhãm apa kaxyw. ¹¹Hãmri nê anojarêr nê mẽ kãm: “E mẽ inhma. Tirtũm kot mẽ pahwÿr mênh xwÿnhnta na mẽ awÿr wa inhmẽ pa wa mẽ awÿr mõ. Wa ixte Tirtũm kapêr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harênh kaxyw na pa pre wa ã mẽ awÿr inhmõr anê. Tã ka mẽ harênh ma nê wa ixkaga. Jakamã kot paj wa jar mẽ anhõ krĩ kamã amnhĩ par kã hã awjagrõ kapĩ. Mẽ ate Tirtũm kaga hã amnhĩ pumunh nhũm Tirtũm kot amnhĩ pyrã nê mẽ akaga hã mẽ ate omunh kaxyw kot paj wa mẽ anoo mã ã amnhĩ par kã hã awjagrõ kapĩr anê. Kot kaj mẽ nhÿrmã tee ri ã amnhĩ nhĩpêx anhÿrja mã ajamxpêr nê akaprĩ htÿx kumrêx kãm ga. ãm hãmri na pa wa mẽ amã ja jarê.” Anhÿr o mẽ kãm akapêr nê mẽ kêp ajapøj nê ma hpãnhã nhãm krĩ hõ hwÿr apa kurê kumrêx.

¹²—Koja nhÿrmã Tirtũm mẽ kot amnhĩ tomnuj mÿrapê tanhmã mẽ ho. Na pre ra ã krĩ pê Sotõ nhõ xwÿnhjê nhĩpêx anê. Na prem amnhĩ tomnuj tÿx o pa nhũm Tirtũm tanhmã mẽ kot amnhĩ tomnuj tÿx ã tanhmã mẽ ho. Tã jar mẽ kot kãm ixkapêr mar prãm kêr nê mẽ kot ixkaga xwÿnhjaja. Koja Tirtũm ixtã mẽ omu nê kot Sotõ nhõ xwÿnhjê nhĩpêx pyrâk o mẽ hipêx nom tanhmã mẽ ho htÿx o mẽ hakre.

—E kêr ka mẽ ma krĩ hkwy hkôt apa nê ã mẽ kãm akapêr anhÿr o ri apa. Anê.

Mẽ kot Tirtũm kôt hamxpêr kêr xwÿnhjê jarênh

Matêwre 11.20-24

¹³⁻¹⁴Tã nhũm Jejus krĩ hkwy nhõ xwÿnhjê mã kapêr o xa nê mẽ kot amnhĩ tomnuj ã mẽ kãm akir. Krĩ pê Korajĩ mẽ Pesêj nhõ xwÿnhjê kumrêx mã kapêr nê mẽ kãm:

—E mẽ inhma. Amnepêm krĩ pê Sitõ mẽ Xir wa kamã mẽ pa xwÿnhjaja na prem tanhmã amnhĩ tomnuj tÿx to ho pa nhũm Tirtũm mẽ omu nê hã mẽ homnuj tÿx nê. Tã kwa mẽ o kora Korajĩ mẽ Pesêj wa kamã mẽ apa xwÿnhjaja. Ra ixte mẽ amã mẽ

ate mẽmoj pumunh kêt o anhÿr rax o ixpa htã ka mẽ omu nẽ arĩ amnhĩ tomnuj o ri apa nẽ tokyx amnhĩ tomnuj kaga hkêt nẽ. Jakamã kot kaj mẽ amex kêt nẽ. Kop apu Sitõ rÿ Xir kamã mãn ixte mẽ kãm aa mẽ kot mẽmoj pumunh kêt kwÿ ho anhÿr o ri ixpa ronhÿx mẽ omu nẽ mẽ arom amnhĩ kaxyw ixkôt hamaxpêr kurê kumrêx. Nẽ tee ri tanhmã amnhĩ tomnuj to ho pa hã amnhĩ pumu nẽ hkaprĩ nẽ ã amnhĩ nhĩpêx anhÿr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprÿ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Tã koja nhÿrmã Tĩrtũm mẽ piitã mẽ kot amnhĩ tomnuj mÿrapê tanhmã mẽ hipêx to. Hãmri nẽ tanhmã Sitõ mẽ Xir wa kamã mẽ pa xwÿnhjê jarênh to nhũm mẽ kot amnhĩ tomnuj mÿrapê amnhĩ xà htÿx kamã hamak o ri pa. No mẽ kajaja mẽ ate amnhĩ tomnuj tÿx o mẽ hakrenh jakamã koja Tĩrtũm mẽ hkĩnhã mẽ atomnuj tÿx o mẽ atomnuj tÿx. Ka mẽ amnhĩ xà htÿx kamã ajamak rãhã ho ri apa ho apa. Anẽ.

15 Nhũm pre ã Jejus mẽ kãm kapêr anẽ. Hãmri nẽ hpãnhã Kapanaũ nhõ xwÿnhjê mã kapêr nẽ mẽ kãm:

—No mẽ apê Kapanaũ nhõ xwÿnhjaja. Kot kaj mẽ ajaxwÿja mẽ amex kêt nẽ. Mẽ ate amnhĩ tomnuj kagare pyrã nẽ Tĩrtũm nhõ krĩ hwÿr akrã ho apa. Nom kot kaj mẽ atõ hwÿr axãpir kêt nẽ. Kot kaj mẽ ma kuwy maati hwÿr ajapêx pa kãm ga.

16 Anhÿr o mẽ kãm kapêr hãmri nẽ hpãnhã hkôt mẽ pa ho mẽ pa xwÿnhjê mã kapêr nẽ mẽ kãm:

—Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nẽ akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyrãk o amnhĩ nhĩpêx. No koja amar kêt nẽ akaga hãmri nẽ te pa kot inhmar kêt nẽ ixkaga pyrãk o amnhĩ nhĩpêx. Jao mãânên Tĩrtũm kaga.

Anẽ hãmri nhũm mẽ kuma hãmri nẽ angrã nẽ axkrut kapên nẽ ma ahpÿnhã krĩ hkôt angrã.

*Mẽ hkĩnh nẽ ri mẽ pa xwÿnhjê jarênh
Apokarip 3.5*

17 Tã nhũm mẽ kêp 72jaja krĩ hkwy rũm akupÿn Jejus wÿr pøj. Piitã hkĩnh nẽ hpôx pa. Hãmri nẽ kãm:

—Kwa Pahihti. Na pa prem anhÿ hã mẽ nẽ mẽkarõmnuti japôx rax nẽ. Na pa prem mẽ nẽ mẽ hano nhũm mẽ ãm mẽ kurũm hapôx kurê kumrêx. Anẽ.

18 Hãmri nhũm mẽ kuma nẽ mẽ kãm:

—Tõe. Ixãhpumunh tÿx o ixte Satanasti jakrenh jakamã na ka htem inhÿ hã mẽ hano nhũm mẽ tee ri mẽ akutã hihtÿx prãm. Hãmri nẽ te na haxênh prêprêk pyrãk o amnhĩ nhĩpêx nẽ mẽ kurũm hapôx kurê kumrêx pa ja hã mẽ omu. 19-20 Mẽkarõmnuti te kot kagã xoprê rÿ te kot makre pyrãk. Tã ra ixte mẽ amã ixãhpumunh tÿx xà hkwy nhõr jakamã na ka prem mẽ kãm akapêr nhũm mẽ tee ri akutã tanhmã amnhĩ tÿx to hprãm. Tã koja Satanasti tee ri mẽ ate nhÿrmã Tĩrtũm mẽ wa ixri atĩr tũm nẽ apa pymaj tanhmã mẽ ano kupyrr to kaprÿ. Ra Tĩrtũm kot õ kagã kamã mẽ atĩr tũm nẽ mẽ apa kaxyw mẽ anhÿxi hã kagã kênã. Jakamã kwa mẽ jam ajamaxpêr o akĩnh nẽ ajamakêtkati nẽ ri apa. No kêt mẽkarõmnuti kot mẽ akapêr mar nẽ mẽ kurũm hapôxta ã mẽ omunh xà hkôt pix mã akĩnh nẽ ri apa hkêt nẽ. Anẽ.

Jejus kĩnh kãm kot Hipêêxã mã amnhĩ jarênh

Matêwre 11.25-27

21 Tã nhũm Tĩrtũm Karõ tanhmã Jejus to nhũm ÿ hã hkĩnh nẽ xa. Hãmri nẽ Tĩrtũm mã kapêr nẽ kãm:

—Pa Papaj? Nã apê mẽ ixpiitã mẽ inhõ Pahi Maati na ka. Pikap ri mẽ pa xwÿnhjaja nẽ kaxkwa kamã mẽ pa xwÿnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ ãhpumunh tÿx ã mẽ kot amnhĩ jarênh xwÿnhjê mã axãhpumunh tÿx o amnhĩrĩt kêt nẽ. ãm mẽ ãhpumunh kêt ã mẽ kot amnhĩ jarênh xwÿnhjê pix mã na ka hte ja ho amnhĩrĩt nhũm mẽ tapxipixjaja ja hã apumu. ãm hãmri na ka hte amã hprãm xà hkôt ã mẽ piitã mẽ hipêx anhÿr o ri apa. Jakamã mẽ kot amnhĩ to hkryre xwÿnh pixjaja na htem ate amnhĩ nhĩpêx ã apumunh o pa.

22—Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwỳnhjaja na mẽ kot ja hã ixpumunh kêt. Nê mãânên papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anê nê inhmã hprãm xà hkôt mẽ hkwỳjê mã ato amnhĩrit o ri ixpa nhũm mẽ ixpyrà nê ate tanhmã amnhĩ nhĩpêx to ho apa hkôt apumu. Anê.

Jejus kôt mẽ pa xwỳnhjaja kot hkôt omunh o pa hã mẽ harênh

Matêwre 13.16-17

23-24 Nhũm pre Jesus ã Tĩrtũm mã amnhĩ jarênh anê hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

—E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapêr mar o ri ixkôt apa. No amnepêm mẽ akukamã pahijaja nê Tĩrtũm nhỹ hã kapêr jarênh o ri mẽ pa xwỳnhjaja kãm ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwrỳk nê jar ixkator kêt jakamã na prem ixpumunh kêt rãhã ty. Nê mẽ kãm ixkapêr mar prãm tã mẽ akĩnhã ixkapêr mar kêt nê. ãm mẽ kapxipixjaja na ka mẽ mỳr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar jakamã kwa mẽ ja hã amnhĩ pumu nê tãm amnhĩ nhĩpêx o akĩnh nê ri apa. Anê.

Samar nhõ xwỳnh jarênh

Matêwre 22.34-40; Makre 12.28-34; mãânên Wam Juãw 3.17-18

25 Tã nhũm Tĩrtũm kapêr tũm o mẽ ahkre o mẽ pa xwỳnhjaja Jesus wỳr tẽ nê hêx rom kot kamã hamak kaxyw kãm:

—Pa? E kwa inhmã mẽmoj jarê. Tanhmã kot paj we nhỹrmã Tĩrtũm ri ixtĩr tũm nê ixpa kaxyw amnhĩ nhĩpêx to wehe? Anê.

26 Hãmri nhũm kãm:

—Tanhmã na ka hte Tĩrtũm kapêr ã kagà htũm kot mẽ htĩr tũm nê pa hã kagà kamã harênh nê mar to? Anê.

27 Hãmri nhũm kãm:

—Nà harênh kot:

Kêr ka mẽ anhĩ piitã ho amã Tĩrtũm kĩnh o ri apa. Mẽ amã hkĩnh tỳx o mẽmoj piitã hakrenh par o ri apa.

Nê kêr ka mẽ amã mẽ piitã hã ma ho te ka amã amnhĩ tã ma pyræk o mẽ hipêx o ri apa. Jao tãm mẽ hipêx o ri apa. Anê.

ã Tĩrtũm kapêr ã kagà htũm kamã ja jarênh kot anhỹr. Anê.

28 Hãmri nhũm Jesus kuma nê kãm:

—Tỳ. Nà ãm hãmri na ka harê. Kot kaj ã mẽ hipêx anhỹr o ri apa nê nhỹrmã Tĩrtũm mẽ wa ixri atĩr tũm nê apa ho apa. Anê.

29 Hãmri nhũm kuma nom kãm mẽ piitã mẽ ho mex prãm kêt nê. ãm amnhĩ kwỳ pixjaja nhũm kãm mẽ ho mex o pa hprãm. Jakamã hêx rom kãm:

—Kwa no mẽmojaja kot pa we ri ã mẽ hipêx anhỹr o ri ixpa? Xà mẽ pahkwỳ pê Ijaew pixjaja nà? Anê.

30 Hãmri nhũm kuma nê tanhmã kãm ujarênh to. Nom hã kuxi nê kãm awjarê nê kãm:

—E pa amã awjarê ka inhma. Koja Ijaew nhõ xwỳnhjaja ma Jerujarê rũm Jeriko hwỳr ahpar mã ma mõi. Mõi nhũm ra mẽ ahkĩnh xwỳnhjaja kutã mra. Hãmri nê pry kahti ri hwỳr kato nê unê nê htak rax nê. Nê kêp ê hkwỳrnh pa nê ma kurũm hprõt nê mra nê akunok nhũm mẽ kot htak o hkà rênh rãhã ra htyk kaxyw nê nõ. 31 Hãmri nhũm patreja tẽ nê omu. No ãm omunh o hãnh tẽ nê hkupu nê ma tẽ. Uræk nê kêp Ijaew tã ãm omu nê tanhmã ho ajuta hto hkêt nê hãnh omunh o tẽ nê hkupu nê ma tẽ. 32 Hãmri nhũm patre ho ajuta xwỳnhjaja mãânên tẽ. Nê patre pyræk nê omu nê ãm omu nê hkupu nê ma tẽ. Uræk nê kêp Ijaew tã omu nê ãm omu nê hkupu nê ma tẽ.

33 —Tã nhũm Samar nhõ xwỳnhjaja mãânên mõi. Samar nhõ xwỳnhjê mẽ Ijaew na prem kãm axpên kĩnh kêt tã nhũm mõi nê omu nê kamã ukapĩ nê. Kêp Ijaew ã omunh tã tee ri omu nê kamã ukapĩ nê. 34 Hãmri nê hwỳr tẽ nê omu nê kãm mẽ kot htak o hkà rênh xà kane nê kãm hkupu pa. Hãmri nê kãnhmã ãm nê hkrit jumênre hã kumê nê ma nhỹri mẽ kot amnhĩm hikranh xà hã ixkre hwỳr o mõi nê hwỳr o pøj. Hãmri nê omunh mex o apkati.

35 Hãmri nê akupỹm nojarêt nê kãxpore

hkwỳ jamỳ nē o tē nē kot mē kām ò xwỳnhja mā kugõ nē kām: “E kot paj hāmri ma mō. Ota ixkàxporeta. Kêr ka inhmā à xwỳnhhta tãnopxar mex nē. Nē inhmā omunh mex kê akupỳm mex. Kojã kàxporeja apê grire hã kot paj nhỹrmã akupỳn mō nē axte hkôt amã hkwỳ gõ.” Anhỹr o kãm kapêr nē ma akupỳm mō. ã mē ujarēnh kot anhỹr. Anē.

³⁶ Nhũm pre ã Jejus kãm ujarēnh anē. Hāmri nē kãm:

—E nhỹ na pre kãm mē kot htak xwỳnhhta kaprĩ ho te tãm kãm amnhĩ tã ma pyrãk wehe? Anē.

Hāmri nhũm Tĩrtũm kapêr tũm o mē ahkre xwỳnhhta kãm:

—Nà kot kamã ukaprĩ xwỳnhhta na pre omu nē kamã ukaprĩ nē ho mex o te tãm kãm amnhĩ tã ma pyrãk o hipêx. Anē.

³⁷ Hāmri nhũm Jejus kãm:

—Tỳ. Nà ãm hāmri na ka harē. Urãk nē kēp Ijaew kêt tã kamã ukaprĩ nē ho mex nē. Tã kêr ka urãk nē ã mē piitã mē hipêx anhỹr o ri apa. Urãk nē mē kēp akwỳ hkêt tã mē kamã axukaprĩ ho ri apa. Anē.

Jejus kot Matre mē Marir wa hwỳr mōr ã harēnh

Rukre 12.29-31

³⁸ Tã nhũm Jejus krĩ rũm kato hāmri nē hkôt mē pa ho mē pa xwỳnhjê mē mē ma nhãm krĩ hõ hwỳr mō. Mōõ nē hwỳr pøj. Hāmri nhũm Matre mē omu nē amnhĩ nhõrkwỳ hwỳr mē kuwỳ nhũm mē ma hwỳr mō nē õrkwỳ hwỳr pøj. ³⁹ Hāmri nhũm Jejus mē ahkre ho nhỹ nhũm Matre htõx Marirja arĩ hpar pē mar o nhỹ. ⁴⁰ Hāmri nhũm Matre mē hwỳr axà nē omu. Nē tee ri àpēnh rax kukamã hamaxpêr nē Jejus wỳr tē nē kãm:

—Xê ma Pahihti. Kormã ixàpēnh rax tã nhũm Marir ixto ajuta hkêt nē. ãm akapêr pix mar gryk ã ixkôt htēm nē ixto ajuta hkêt nē. Pa ahte mē panhõ hã ixàpēnh o xa. Xà amã ja mex? Xê kãm anē kê tokyx ixkôt tē pa wa hã axkrut nē mē panhõ hã ixàpēnh tokyx anē. Anē.

⁴¹ Hāmri nhũm tee ri kuma nē kãm:

—Kwa Matre. Na ka ãm mē panhõ pix kukamã ri ajamaxpêr nē gryk ã tee ri amnhĩ nhĩpêx. ⁴² ãm hāmri na Marir kãm ixkapêr mar prãm nē. Jakamã kot paj ri amnhĩ nē akôt hanor kêt nē. Anē.

11

Mē pahte tanhmã Tĩrtũm mã amnhĩ jarēnh to hã mē pamã karõ

Matêwre 6.9-13, 7.7-11

¹ Tã nhũm apkati hõ hã nhũm Jejus nhỹri Tĩrtũm mã amnhĩ jarēnh o nhỹ. Nē kãm amnhĩ jarēnh pa nhũm hkôt mē pa ho mē pa xwỳnhjaja kot kãm amnhĩ jarēnh ã omu nē hwỳr mra nē kãm:

—Kwa Pahihti. Amnhĩ pyrã nē mē ixte Tĩrtũm mã amnhĩ jarēnh kaxyw tanhmã mē ijahkre hto. Kêr pa mē apyrã nē tanhmã kãm amnhĩ jarēnh to ho ri ixpa. Na pre finat Juãw Paxisja hkôt mē pa ho mē pa xwỳnhjê mã ja jahkre nhũm mē kuma nē tãm kãm amnhĩ jarē. E kwa mē inhmã tanhmã ja jahkre hto nà? Anē.

² Hāmri nhũm mē kãm:

—Tõe. Nà kêr ka mē kãm amnhĩ jarēnh kaxyw nē mãmri amnhĩ krã hkôt tanhmã kãm amnhĩ jarēnh to. Rỳ kãm amnhĩ jarēnh o:

Pa Mēinhĩpêxà maati? Nà amex o amex Tĩrtũm.

Apê mē ijamãr mex xwỳnh maati na ka.

³ Nē kwa kêr ka apkati mē mē inhmã mēmo gõ pa mē akukwak ri ho ixàpkur o ri ixpa.

⁴ Nē na pa hte tõhã amnhĩ tomnuj nē Tĩrtũm. Nom mē kot tanhmã ixtomnuj to xwỳnhjaja na pa hte ãm mē omu nē amnhĩ tã tanhmã mē ho hkêt nē. Nē ja ho ijamakêtkati kurê kumrêx. ã na pa hte amnhĩ nhĩpêx anhỹr o ri ixpa.

Jakamã kwa kêr ka ja hã ixpumu nē ixpyrà nē ixte tanhmã amnhĩ tomnuj to hã ixpumu nē hã tanhmã ixto hkêt nē. ãm ho ajamakêtkati kurê kumrêx nē axte kãm ajamaxpêr kêt nē.

Nē kot paj tanhmã amnhĩ tomnuj to kaxyw japêr ka ja hã ixpumu nē ixte ã amnhĩ nhĩpêx anhỹrja nē ixto htỳx nē pa ja ho anhỹr kêt nē.

E ãm ja pix na hapêx. Anē.

E kêr ka mē ã Tĩrtũm mã amnhĩ jarēnh anhỹr o ri apa. Anē.

Mêpahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnẽn Rõmãn 12.12; Epes 6.18; Wam Tesarõn 5.17-18

⁵⁻⁶ Nhũm Jejus arĩ hkõt mẽ pa ho pa xwỳnhjê jahkre ho nhỹ nẽ mẽ kãm:

—Nẽ ja. Koja mẽ akràmnhwỳjê hõ. Nhũm kõt ã kamàt nhũm nhỹhỹnh awỳr mõn pøj. Ka anhõ mẽmoj kêt hãmri nẽ anhĩjuk ri akràmnhwỳ hwỳr tẽ. Hãmri nhũm ra amnhĩ tã kahê nẽ nõ. Ka tee ri omu hãmri nẽ hakwa krem xa nẽ kãm akapêr nẽ kãm: “Pa ixkràmnhwỳ. Na ka mẽ ra gõr? Kwa kànhmã nhỹ nẽ inhmã anhõ mẽmoj japêr. Na ra ham ixkràmnhwỳta mõn pøj. Nẽ kãm prãm tỳx nẽ mõ nom kaxyw inhõ hkêt. Kwa kànhmã nhỹ nẽ inhmã anhõ mẽmoj japêr nẽ inhmã hkwy pa ma o tẽ kê kukrẽ. ãm inhõ hkêt kumrẽx. ãm hãmri na pa amã amnhĩ jarẽ. Kwa tokyj kànhmã nhỹ nẽ inhmã mẽmoj japêr nã?” Anhỹr o kãm akapêr.
⁷ Hãmri nhũm ama nom kãm kànhmã ỳr prãm kêt nẽ. Nẽ amã: “Tk. Nà ra mẽ ixte amnhĩ tã kahê hpar nẽ inhĩkwỳ kẽnã kot pa kêt kànhmã nhỹ nẽ amã mẽmoj japêr.” Anẽ.
⁸ Ka tee ri ama nẽ xatã kãm: “Kwa ã inhĩpêx anhỹr kêt nẽ ixkràmnhwỳ. Kwa tokyx.” Anhỹr o xa. Nẽ xatã kãm anojarêt o xa. Hãmri nhũm ra kãm amar kaga hãmri nẽ tã kànhmã nhỹ nẽ amã ate ho presija xwỳnhta gõ. No ãm kệp akràmnhwỳ hã ate hã axàhwỳr tipxi hã amã õr kêt nẽ. ãm xatã ate ho presija htỳx xwỳnhja mã hamaxpêr nẽ tã kànhmã nhỹ nẽ amã kugõ. ã mẽ ujarẽnh kot anhỹr.

⁹⁻¹⁰ —Tã kêt ka mẽ ja pyrã nẽ amnhĩ to Tĩrtũm wỳr rãhã ho ri apa nhũm ama nẽ ate mẽmoj tã hwỳrta amã kugõ. ãm xatã ate hã axàhwỳr o ri apa nhũm amã kugõ. ãm mẽmoj to hwỳr rãhã ho ri apa nhũm ama hãmri nẽ amã mẽmoj tanhmã hipêx to. Te ho mễhõ kãm tep xành nẽ gõx kãm xatã tep rẽn h xà rẽn h o ãm pyrã nẽ xatã mẽmoj tã hwỳr o ri apa. Hãmri nhũm ama nẽ amã hprãm xwỳnhta gõ. Te ho tep kanhêr xwỳnhta tã kot tep õ kanhêr pyrãk o anhĩpêx nẽ amã mẽmoj prãm xwỳnhta gõ. Anẽ.

Tĩrtũm kot hkrajê mã mẽmoj mex nhõr ã harẽnh

Makre 7.9-11

¹¹ Nhũm Jejus arĩ hkõt mẽ pa ho mẽ pa xwỳnhjê jahkre nẽ mẽ kãm:

—Nẽ xà koja akra kãm tep xành nẽ hã awỳ ka ama nẽ axtem nẽ kãm kagã xoprê hõ py nẽ agõ? ¹² Rỳ nhũm krãhyre gre hã awỳ ka axtem nẽ kãm makre hõ py nẽ agõ? Nà na ka htem ã akrajê nhĩpêx anhỹr kêt nẽ. Na ka htem mẽ kot mẽmoj tã àhwỳr xà hkõt kãm mẽmoj gõ. ¹³ Mẽ kamjaja mẽ ate amnhĩ tomnuj o ri apa htã ka htem akrajê ho mex o ri apa. Tã kaxkwa kamã Tĩrtũmja na hte mẽ pahto mex o mẽ ate mẽ akrajê ho mexta jakrenh. Kãm mẽ pajapê htỳx kõt na hte mẽ pamã mẽmoj mex nhõr o pa. Nẽ mããnẽn amnhĩ Karõja na hte mẽ pamã kugõ. Jakamã kot kaj mẽ atõ Karõ hã awỳ nhũm ama nẽ awỳr kumẽ nhũm wrỳ nẽ akarõ mã axà. ã na hte Tĩrtũm kãm mẽ pajapê xaj mẽ pamã mẽmoj mex nhõr o pa anẽ. Anẽ.

Jejus mẽ Satanasti wa harẽnh

Matêwre 12.22-32; Makre 3.20-30

¹⁴ Tã nhũm Jejus nhỹri axte mễhõ nẽ mẽkarõmnuti kator. Na pre ra mẽkarõmnuti tanhmã ho nhũm kapêr kêt nẽ pa. Hãmri nhũm Jejus omu nẽ nẽ kator nhũm akupỳm kapêr mex nẽ. Nhũm mẽ piitã amnhĩ jaêr pê omu nẽ no hawênh rũnh nẽ omunh o kuhê. ¹⁵ Nom nhũm mẽ hkwyjaja Jejus kot ã hipêx anhỹr ã omu nẽ htỳx ho kệp mẽkarõmnuti hkwy hã hkamnhĩx nẽ axpên mã harẽnh o:

—Tk pêr hinhu nhĩkõti nhỹ hã na hte mẽ nẽ amnhĩ kwỳjê japõx o pa. Anẽ.

Hinhu nhĩkõti nhĩxi hõ pê Satanasti nhũm prem Satanasti nhỹ hã Jejus kot ã amnhĩ nhĩpêx anhỹr o pa hã hkamnhĩx.
¹⁶ Jakamã nhũm mẽ hkwyjaja hwỳr mra nẽ kãm:

—Kwa mẽ inhmã aa mẽ ixte mẽmoj pumunh kêt õ ho anẽ. Pa mẽ omu nẽ ate Tĩrtũm nhỹ hã tanhmã amnhĩ nhĩpêx to ho apa hã apumunh kurê kumrẽx. Anẽ.

Nom hêx rom mẽ kot kamã hamak kaxyw ã kãm kapêr anẽ. ¹⁷ Nhũm ra Jejus mẽ hamaxpêr kõt mẽ omunh mex jakamã mẽ kapêr ma nẽ mẽ kãm:

—Kwa mẽ inhma mẽ ate ixpê Satanasti hkwỳ hã ixkamnhĩx xwỳnhjaja. Koja pika nhõ xwỳnhjaja axpên kutã amnhĩ xunhwỳ nê axpu hãmri nê angrà nê ma ahpỳnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahi mẽ hamãr o pa hkêt nê. Rỳ koja krĩ nhõ xwỳnhjaja. Mẽ kot axpên to hkwỳ xwỳnhjaja mẽmoj tã axpên kãm gryk nê axpên kutã amnhĩ xunhwỳ hãmri nê axpên pê angrà nê ahpỳnhã pa hãmri nhũm mẽ õ pahi tee ri kãm mẽ hamãr o pa hprãm. Mo õ krĩ kamã mẽ hkwỳ kot ri mẽ hamãr o pa? No na pre mẽ õ pahi tãm amnhĩ nê mẽ hanor kêt nê.

18 —Tã ja pyrã nê ixte Satanasti nhỹ hã tanhmã amnhĩ nhĩpêx to ho ixpa ronhỹx pa mẽ nê amnhĩ kwỳjê janor o ri ixpa hkêt nê. Nhỹx Satanasti ixte mẽ nê mẽ hanor kaxyw tanhmã inhma nê hkêt nê.

19 —No kêt mẽ akwỳjaja? Xà Satanasti nhỹ hã na htem mẽ nê mẽ hapôx o pa nã? Kêp apu pa ixte ý hã mẽ nê mẽ hapôx ronhỹx mẽ akwỳjaja ixpyrã nê ý hã mẽ nê mẽ hapôx o pa. Nã Tĩrtũm nhỹ hã mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhỹr o apaja mex kêt. 20 Tĩrtũm Karõ nhỹ hã ixte mẽ nê mẽ hapôx o ri ixpa kênã. Jakamã kwa mẽ ja hã ixpumu nê Tĩrtũm kot ixte mẽ ato amnhĩptar kaxyw mẽ awỳr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

21-22 —Satanastija àhpumunh tỳx jakamã na htem tee ri kêp mẽ kot hkôt amnhĩ xunhwỳr xwỳnhjê pytar kaxyw nhũm mẽ nê mẽ omunh mex nê. Nom ixàhpumunh tỳx o ixte Satanasti jakrenh jakamã pa na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

23 —Mẽ amã ixkapêr mar prãm tã na ka mẽ kormã ixkôt amnhĩ xunhwỳr kêt nê. Kwa wem ma amnhĩ to amõr gri nê tokyx ixkôt amnhĩ xunhwỳ kêt wehe. Kot kaj mẽ anhỹr kêt nê hãmri nê te mẽ ate ixkutã amnhĩ xunhwỳr xwỳnh pyrãk o amnhĩ nhĩpêx. 24 Mẽ ate ixkôt amnhĩ xunhwỳr kêt xwỳnhjaja te mẽ ate mẽhõ nê mẽkarõmnuti japôx xwỳnh pyrãk. Nhũm te kêp kator nê ma mõi nê nhỹri amgrã kamã ri pa. Nhũm ja kêp omnuj nhũm tee ri

kamã nhỹri hkôkôt xà japêr o pa. Nom tee ri hapêr o pa nê hamaxpêr o: “E kot paj ma akupỹm mẽ kot nê ixkator xwỳnhhta wỳr tẽ nê hwỳr axà nê hkôt mãn ixpa.” Anê. 25 Hãmri nê ma akupỹm hwỳr tẽ. Nom kormã akupỹm hwỳr àr kêt ri nhũm kamã amrakati nê pa. 26 Jakamã nhũm ma akupỹm hwỳr tẽn axà. Nom ahte àr kêt nê. Ra amnhĩ kôt amnhĩ kwỳjê ho 7 nê hwỳr mẽ ho agjê. Nê hwỳr gjêx pa. Mẽ kêp 7jaja nê wamta mẽ nhũm mẽ piitã hwỳr gjêx pa. No mẽ kêp 7jaja omnuj tỳx o kot wamta jakrenh jakamã nhũm mẽ kot hwỳr gjêx xwỳnhhta mẽ ý hã amnhĩ tomnuj tỳx o pa. Oprê htỳx nê. Wam pyxire nê kot hwỳr àr nhỹ hã amnhĩ tomnuj o ri pa nom ãm kawax pê oprê. Tã axte hwỳr mẽ ohtõ nê gjêxta nhỹ hã oprê htỳx kumrêx. Ja pyrã nê kot kaj mẽ tokyx ixkôt amnhĩ xunhwỳr kêt nê hãmri nê ãm amnhĩ tomnuj tỳx pix o ri apa. Anê.

Mẽ hkĩnh nê mẽ pa xwỳnhjê jarênh

Rukre 8.19-21

27 Nhũm pre ã Jejus mẽ ahkre anê nhũm mẽhõ nija kuma nê kãm:

—Hêxta gàa nê. Mãn akatorxà ã ate amnhĩ nhĩpêx anhỹr o apa hã apumu nê hkĩnh nê. Anê.

28 Hãmri nhũm kãm:

—Tỳ. Nã kot anhỹr kênã. Nom kot ka mẽ atõ Tĩrtũm kapêr ma nê hkôt amnhĩ nhĩpêx hãmri nê akĩnh rax o ixkatorxà kot ixpumunh nê hkĩnhhta jakre. Anê.

Jejus kot tanhmã Jõhti jarênh to

Matêwre 12.38-42; Makre 8.12

29 Tã nhũm mẽ ohtõ nê Jejus ã akuprõ nê mẽmoj tã kuwỳ nê kãm:

—Pa. Kwa mẽ inhma aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmênh xwỳnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwỳ ixte mẽ amã ho anhỹr kaxyw hã inhma karõ. Nã kot paj kormã mẽ amã ho anhỹr kêt nê. Kot paj nhỹrmã te amnepêm finat Jõhti kot amnhĩ nhĩpêx pyrãk o amnhĩ nhĩpêx ka mẽ hã ijarênh ma nê kormã ja hã ixpumu. 30 Tĩrtũm nhỹ hã

kapêr xwýnh pê Jôhtija amnepê m na pre tep rax kukrê. Tã nom nhũm htĩr rãhã òxàhkre rũm kato nhũm mẽ omu nê Tĩrtũm kot mẽ hwýr mẽnh ã omu. Tã kot paj nhỹrmã Jôhti pyrã nê tanhmã amnhĩ nhĩpêx to nhũm mẽ ja hã ixpumu nê Tĩrtũm kot mẽ awýr inhmẽnh xwýnh ã ixpumunh kurê kumrêx.

³¹ —Nê koja nhỹrmã Tĩrtũm akupým mẽ htyk nê mẽ hikwý xwýnh piitã akupým mẽ ho htĩr hãmri nhũm mẽ piitã Inhĩpêxã mẽ wa ixkutã hkrĩ. Pa wa mẽ piitã tanhmã mẽ harênh to. Tĩrtũm mẽ wa ixkuri mẽ htĩr tũm nê mẽ pa ho mẽ pa mã xwýnh ã mẽ hkwyjê jarê. Nê wa ixkuri mẽ pa ho mẽ pa hkêt xwýnhjê jarê. Mẽ piitã ã mẽ harênh anê. Amarĩ mẽ pa xwýnhjaja nê mẽ ò pahijaja. Hãmri nhũm sur kãm mẽ ò pahi niti Tĩrtũm mã tanhmã amnhĩ jarênh to hãmri nê hpãnhã tanhmã mẽ ajarênh to nê kãm mẽ ajarênh o: “Na pa pre inhmã pahi Sarumãw kot anhỹ hã àhpumunh týx ã harênh ma hãmri nê inhmã mar prãm xàj ma awry hã ò pika hwýr ixpa nê omu nê kapêr ma. Hãmri nê ma akupým inhõ pika hwýr ixpa nê ixkwýjê mã àhpumunh týx ã harênh o ixpa. Tã Akra Jejus na àhpumunh týx o pahi Sarumãw jakrenh tã or war akutã mẽ hkrĩ xwýnh kwý mũj na prem kapêr ma no ãm ixkĩnhã kãm mar prãm kêt nê. Na prem kuma nê ãm kuma.” Anhỹr o wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ.

³² —Hãmri nhũm hpãnhã Nĩnĩwe nhõ xwýnhjaja wa inhmã tanhmã amnhĩ jarênh to. Jôhti kot mẽ hwýr mõi nê mẽ kãm Tĩrtũm kapêr jarênh o pa xwýnhjaja nhũm mẽ tanhmã wa inhmã amnhĩ jarênh to. Hãmri nê pahi nita pyrã nê wa inhmã tanhmã mẽ ajarênh to nê wa inhmã: “Na pre Jôhti man mẽ inhõ krĩ hwýr mõi nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwýr kurê kumrêx Tĩrtũm. Nom or war akutã mẽ hkrĩ xwýnh kwý mũj na pre Akra Jejus tãm mẽ hwýr mõi nê mẽ kãm kapêr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga nê hkõt amnhĩ xunhwýr kêt nê. Mẽ kot Akra mar tã amnhĩ kaxyw kãm hamaxpêr kêt nê.” Anhỹr o koja mẽ wa inhmã mẽ ajarê ka mẽ tee ri mẽ

ama nê amnhĩ kamã agryk týx nê. Jakamã e kwa ixte mẽ amã ã ixkapêr anhỹrja ma nê kãm ajamaxpêr týx rãhã ho ri apa. Anê.

Mẽ pajamaxpêr mex te kot kanê hpòk mex pyrãk ã harênh

Matêwre 5.15, 6.22-23

³³ Nhũm Jejus arĩ mẽ ahkre ho nhỹ nê mẽ kãm:

—Xà na htem kanê hpòk nê poti ho hpro? Nà na htem ho anhỹr kêt nê. Na htem hpòk nê kýx pê mẽmoj nhĩmõk ã unhwý nhũm mẽ piitã mẽ kãm hirã mex nhũm htem ixkrem agjê nê hirã kamã mẽmoj pumunh mex o mra. ³⁴ Ja pyrã nê kot ka mẽ atõ ixkapêr ma nê ixkõt amnhĩ nhĩpêx nê tãm amnhĩ nhĩpêx o ri apa. Nê tãm mẽ hipêx o ri apa. Jao te hirã kamã mẽ rĩt mex xwýnhjaja kot amnhĩ nhĩpêx pyrãk. Nom koja mẽhõ inhma nê ãm inhma nê ixkwým ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwýnhjaja kot htýx amnhĩ nhĩpêx o pa pyrãk o amnhĩ nhĩpêx.

³⁵ —E kêr ka mẽ ã amnhĩ nhĩpêx anhỹr pymaj ixkapêr ma nê kãm ajamaxpêr týx rãhã ho ri apa. ³⁶ Kot kaj mẽ ixkapêr ma nê ixkõt amnhĩ nhĩpêx. Hãmri nê te mẽ ate kanê hpòk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapêr ma nê aprĩ hã ixte tanhmã amnhĩ nhĩpêx to hã ixpumunh mex nê. Anê.

Jejus kot tanhmã Parijew nhõ xwýnhjê jarênh to

Matêwre 23.25-26

³⁷ Tã nhũm Jejus ra mẽ ahkre pa. Hãmri nhũm Parijew nhõ xwýnhja hwýr tẽ nê kãm: —Pa. E kwa ma ixkõt tẽ nê mẽ ixkutã apku. Anê.

Hãmri nhũm kuma nê kãm:

—Tõe. Nà kot paj ma akõt tẽ. Anê

Hãmri nê ma hkõt tẽ nê òrkwý hwýr axà nê apkur kaxyw mẽ ìhkô hã nhỹ. ³⁸ No ãm mẽ hkukamã mẽ hpãmjê pyrã nê amnhĩ nhĩhkra kuhõnh ryy hkêt nê. ãm amnhĩ nhĩhkra htyk pix kuhõnh tokyx anê nê nhỹ. Nê ò prat kuhõnh ryy hkêt rãhã apkur kaxyw nhỹ. Jakamã nhũm kot amnhĩ kõt hwýr xwýnhhta tee ri ja hã omu nê hamaxpêr o:

—Tk. Kwa na hte mẽ ixte amnhĩ nhĩpêx kõt amnhĩ nhĩpêx mex kêt nê.

³⁹ Anê nhũm Jejus amnhĩ tã hamaxpêr ã omu nê kãm:

—Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harênh pyræk o amnhĩ nhĩpêx. Nê ãm mẽ akrã hkà rũm pix mã na mẽ amex. Nê mẽ noo mã te mẽ amex pyræk no ãm mẽ anhõxàhkre kaxwỳnh kãm mẽ ajamaxpêr mex kêt. ãm mẽ akapêr prãm. Nê mẽ axàhkurêê. Nê mẽ anhõxỳy.

⁴⁰ Mẽ ate atỳx ri amnhĩ nhĩpêx o ri mẽ apa xwỳnh kênã. Kwa kêt ka mẽ ãm akrãhkà pix rũm amex nê ri apa hkêt nê. Mẽ mãânênh anhõxàhkre kaxwỳnh kãm ajamaxpêr mex o ri apa. Nê tãm mẽ piitã mẽ hipêx o ri apa.

⁴¹ Kêr ka mẽ tãm ajamaxpêr o tãm mẽ hipêx o ri apa. Nê axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anê hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarê. No na ka htem mẽ amã mẽ amnhĩ to mex prãm xàj tee ri amnhĩ kuhõnh japjê kaprỳ. Anê.

Jejus kot Parijew nhõ xwỳnhjaja mex kêt kukamã mẽ harênh

Matêwre 23.4, 23.7, 23.13-24, 23.27-38; Makre 12.38-39

⁴² Nhũm Jejus arĩ Parijew nhõ xwỳnhjê jahkre nê mẽ kãm:

—Kwa mẽ okora Parijew nhõ xwỳnhjaja. Kot kaj mẽ amex kêt nê. Na ka htem Tĩrtũm kapêr piitã hkôt amnhĩ nhĩpêx o apa hkêt nê ãm hkwỳ kôt pix mã amnhĩ nhĩpêx o ri apa. Nê ãm kapêr o hpỳnhre nê hkôt amnhĩ nhĩpêx hãmri nê hã amnhĩ pumu nê ate amnhĩ to mex xwỳnh ã amnhĩ to jarkrar o ri apa. Nom Tĩrtũm kãm hprãm xà piitã hkôt amnhĩ nhĩpêx hkêt nê. Mẽ ate tãm mẽ piitã mẽ hipêx o ri apa hã kot mẽ amã karõja. Nê mẽ amã Tĩrtũm kĩnh ã kapêr kôt amnhĩ nhĩpêx o ri apa hã karõja mẽ ate mar mex tã hkôt amnhĩ nhĩpêx kêt nê. Mẽ ate kapêr piitã hkôt amnhĩ nhĩpêx ronhỹx ja mẽ amã mex kumrêx.

⁴³ —Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarênhja na mẽ amã hprãm. Nê mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarênhja na mẽ amã hprãm.

⁴⁴ —Kwa mẽ o kora. Kot ka mẽ amex kêt nê. Mẽ kot mẽ akapêr mar nê mẽ akôt amnhĩ nhĩpêx xwỳnhjaja te mẽ kot htỳx ri mẽ hã pika nhĩmøk ã ri mẽ pa xwỳnh kot amnhĩ nhĩpêx pyræk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nê htỳx ri mẽ hã pika nhĩmøk ã ri mẽ pata pyræk o na htem amnhĩ nhĩpêx. Anê.

Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarênh anê.

Jejus kot Tĩrtũm kapêr tũm o mẽ ahkre xwỳnhjê mã kapêr

Matêwre 23.1-4, 23.13, 23.29-36

⁴⁵ Hãmri nhũm Tĩrtũm kapêr tũm o mẽ ahkre ho pa xwỳnhja kuma nê kànhmã xa nê kãm:

—Kwa na ka ã Parijew nhõ xwỳnhjê jarênh punuj anhỹr jao mãânênh ã mẽ paja jarênh anê nà? Mẽ ixte amnhĩ nhĩpêxja ãm tipxi kênã. Anê.

⁴⁶ Hãmri nhũm kãm:

—Tỳ. Mãânênh mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ uræk nê amex kêt nê. Na ka htem mẽ kãm mẽmoj tã karõ ho ri apa nê mẽ kãm: “E kêt ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr tã no ãm mẽ kajaja amnhĩ kapêrja kôt amnhĩ nhĩpêx kêt nê. Te mẽ ate mẽhõ kot mẽ katut ã mẽ kãm mẽ jênh pytĩ janhõr tã mẽ ho ajuta nê hkwỳ htur kêeta pyræk o na ka htem amnhĩ nhĩpêx o ri apa.

⁴⁷⁻⁴⁹ —Na pre Tĩrtũm amnepêm mẽ pahpãmjê hkukamã tanhmã mẽ harênh to. àhpumunh tỳx xà hkôt tanhmã mẽ hkukamã mẽ harênh to nê mẽ harênh o: “Kot paj ma mẽ hwỳr inhỹ hã ixkapêr jarênh xwỳnhjê rê. Nom koja mẽ omu nê ãm mẽ omu nê kêp mẽ hprãm nõkati nê tanhmã mẽ hipêx to ho pa. Nê ixpê mẽ hkwỳjê hpar o pa. ã koja mẽ inhỹ hã ixkapêr jarênh xwỳnhjê nhĩpêx anê.” Anhỹr o mẽ hkukamã mẽ harê. Tã ã mẽ harênh anhỹr xà hkôt nhũm prem ã mẽ hipêx anê nê mẽ hkwỳjê hpa nê mẽ hkwỳjê pynê nê mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa. Te mẽ amã mẽ hapê nê mẽ ho

ajamak pyrà nē mē hã pika ho mex o ri apa. Nom mē amã mē hapê hã ho mex hkêt nē. Æm ra mē htyk nē hapêx nē mē amã Tirtũm kapêr jarênh o pa hkêtja ã na ka htem akĩnh nē ã axêx rom mē hã pika ho mex anhÿr o ri apa.

⁵⁰⁻⁵¹ —Na prem Tirtũm nhÿ hã kapêr jarênh o mē pa xwÿnhjê nhĩmex rax nē. Amnepê m panhĩ kator krax rũm finat Atãw kra finat Apewja na pre Tirtũm nhÿ hã kapêr o pa nhũm htõ kãm mar prãm kêt nē kupĩ. Tã nhũm Tirtũm axte mē hwÿr ÿ hã kapêr jarênh o mē pa xwÿnh kwÿjê rē nhũm prem mã mē ho anē nē mē hkwÿjê nhĩmex. Nhũm pre xatã mē hwÿr mē hkwÿjê rē nhũm mē xatã mē kupa. Æ Apew rũm finat Jakaris wÿr na prem mē himex rax anē. Nē hpãnhã Jakarisja nhũm prem Tirtũm mã amnhĩ jarênh xà hã ixkre kamã kupĩ. Tã ka mē ajaxwÿja amã Tirtũm kapêr mar prãm kêt nē mē uràk nē amã ÿ hã kapêr jarênh o mē pa xwÿnhjê nhĩmex prãm. Tã ã mē pahpãmjê mē ato hpimràatã mē ate mē hipêx anhÿrja mÿrapê koja Tirtũm ja hã mē apê mē hkanrêhã mē htãmnhwÿjaja tanhmã mē ato htÿx to ka mē amnhĩ xà htÿx kamã ajamak o ri apa rãhã nē kãm ga.

⁵² —Jakamã kwa mē o kora mē apê Tirtũm kapêr tũm o mē ahkre xwÿnhjaja. Mē ajaxwÿja na ka htem Parijew nhõ xwÿnhjê pyrà nē Tirtũm kapêr o mē ahkre ho apa. Nē aprĩ hã mar mex tã no ãm amnhĩ kaxyw hkôt ajamaxpêr nē hkôt amnhĩ nhĩpêx kêt nē. Hãmri nē mē kot mē amar o pa xwÿnhjê mã atÿx ri tanhmã mē ahkre hto nhũm htem mē ama nē mē apyrà nē amnhĩ kaxyw Tirtũm kôt hamaxpêr nē hkôt amnhĩ nhĩpêx kêt nē. Mē kãm hprĩ hã kapêr mar mex prãm tã mē amar xà hkôt mē ate amnhĩ nhĩpêx pyràk o amnhĩ nhĩpêx o pa. Nom mē kajaja na ka htem mē kãm mē hamaxpêr mex nhõr kêtja mÿrapê nhũm htem ã amnhĩ nhĩpêx anhÿr o pa. Jakamã kwa mē o kora kot kaj mē amex kêt nē. Anē.

Nhũm pre ã Jejus mē kãm kapêr anē. ⁵³⁻⁵⁴ Hãmri nē kato nē ma tē. Nhũm Tirtũm kapêr tũm o mē ahkre ho mē pa xwÿnhjê mē Parijew nhõ xwÿnhjaja hãmri kot tanhmã mē kãm kapêr toja ma nē kamã gryk tÿx nē. Jakamã ma hkôt mra. Hêx

rom mēmoj tã hkukjêr o hkôt mra. Nē hã hkukjêr kãm hihtÿx o hkôt mra. Kot tanhmã mē kãm ujarênh to nhũm mē kot mar nē ra hã àmnênh kaxyw ma hkôt àhkukjêr o mra.

12

Mē pahte Tirtũm pē mē pajamaxpêr punuj o pahpimxur kêt

Matêwre 10.26-33

¹⁻³ Tã nhũm mē Jejus ã htu rax kumrêx nē hã axpên nhĩgãnh o kuhê. No nhũm kormã mē kãm tanhmã kapêr to hkêt nē. Æm kormã hkôt mē pa ho mē pa xwÿnhjê kumrêx mã kapêr nē mē kãm:

—Mē piitã kãm amnhĩ kwÿjê pē hamaxpêr punuj o hpimxur hprãm tã koja nhÿrmã mē hamaxpêr piitã amnhĩrit pa. Nē mēmoj piitã ra hpimxur mex tã koja nhÿrmã piitã amnhĩrit pa. Nē mē kot kamãt kô kamã hpimxur pē mēmoj jarênh tã koja mē piitã nhÿrmã kot mēmoj jarênhta ma. Nē mē kot hitom kãm kawax pē axpên mã mēmoj punuj jarênh tã koja nhÿrmã mē piitã mēmoj jarênhta ma. Jakamã kwa kêr ka mē tanhmã Parijew nhõ xwÿnhjaja kot amnhĩ nhĩpêx to ho pa hã mē omu nē ãm mē omu nē mē hkôt amnhĩ nhĩpêx kêt nē. Te mē kot tãm amnhĩ nhĩpêx pyràk o amnhĩ nhĩpêx tã no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã kêr ka mē uràk nē ã amnhĩ nhĩpêx anhÿr kêt nē. Anē.

Mē pahte pahkwÿjê pumaj Tirtũm kaga hkêt ã mē pamã karõ

Matêwre 10.28-31

⁴ Nhũm Jejus arĩ hkôt mē pa ho mē pa xwÿnhjê mã kapêr nē mē kãm:

—E ixkrãmnhwÿjaja. Kêr ka mē amã akwÿjê puma rÿ nhãm mē hkwÿjê puma ho ri apa hkêt nē. Koja mē apar tã ãm mē anhĩ pix pa nom tanhmã mē akarõ hto hkêt nē. ⁵ Tirtũmja tapxipix na hte mē ï nē mē hkarõ ho hpimràatã mē kot amnhĩ xà htÿx kamã hamak tũm xà hwÿr mē kurê. Tã kêr ka mē ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nē.

⁶⁻⁷ —Nē Tirtũm kot mē pahto hapêx par pumunh tã mãânên kot mē pajamãr pumunh mex. Mãn ka htem kuwênhre

pumu. Na hte Tirtūm hamār mex o pa. Mē piitā mē kot ām kuwēnhre pumunh o pa htā nhūm Tirtūm mē kurom hamār mex o pa. Nē htānopxar rāhā ho pa. Nom kām mē pajapē htýx o kuwēnhre jakrenh jakamā kwa mē tee ri amnhī kukamā ajamaxpēr o ri akaprī nē apa hkēt nē. Koja Tirtūm mē pahtānopxar rāhā ho pa. Ra kot tanhmā mē pakute hā mē pahpumunh par. Nē ahpýnhā tanhmā mē pahkrā hkī kute hkôt mē pahpumunh par. Tā kot mē pahtānopxar rāhā jakamā mo kaxyw kot kaj kêt mē ri amā mēhō puma ho ri apa?

⁸—Jakamā kwa mē māmri mē kām mē apē ixkra hā amnhī jarēnh o ri apa nē amā mē uma xāj tee ri amnhī nhīpēx o ri apa hkēt nē. Kot ka mē kām ra mē ate ixkôt amnhī xunhwýr ā amnhī jarē. Pa ja hā mē apumu hāmri nē mē apyrā nē kaxkwa kamā Tirtūm kapēr o mē wryk xwýnhjē mā ra mē ate ixkôt amnhī xunhwýr ā mē ajarē. ⁹Nom kot ka mē kot ixtā tanhmā mē ato py-maj apē ixkwý hā amnhī jarēnh kêt japēr. Pa ja hā mē apumu hāmri nē nhýrmā amnhī xwar mē kām mē apē ixkwý hkēt ā mē ajarē. Jakamā kwa mē māmri mē kām apē ixkwý hā amnhī jarēnh o ri mē hkôt apa kē mē ama nē tanhmā inhmā hamaxpēr to. ¹⁰Koja mē ama nē ām ama nē kām ix-prām kêt japēr. Hāmri nhūm Tirtūm ixtā mē omu nom tokyx ixtā tanhmā mē ho hkēt nē. Koja kormā amnhī tā mē hamār o pa. Karō kot axte mē kām ijarēnh o amnhīrit nhūm mē hkwýjaja kot mar nē kām ixprām nē ixkôt amnhī xunhwýr kaxyw nhūm kormā amnhī tā mē hamār o pa. Nom koja Karō xatā mē kām ixto amnhīrit tā nhūm mē kuma nē ām kuma nē te mē kot kēp amnhī jamak pro pyrāk o amnhī nhīpēx o pa. Jao Karō hā hpijaām kêt mýrapē koja Tirtūm nhýrmā amnhī xwar te kot mē kēp amnhī jamak pro pyrāk o mē hipēx nhūm mē tee kām amnhī kaprī kaprý. Hāmri nē amnhī xà htýx kamā hamak tūm xàta wýr ma pa nē kamā pa ho pa. Jakamā kwa mē māmri mē kām mē apē ixkra hā amnhī jarēnh o ri mē hkôt apa nē tanhmā mē kām ijarēnh to ho ri apa. ¹¹Koja mē ama nē kām mē amar prām kêt japēr hāmri nē ixtā mē apynē nē tanhmā mē anhīpēx to kaxyw. Nē Ijaew nhō Tirtūm kapēr o mē

ahkre xà hā ixkre hwýr mē ato mrar japēr. Rý mē õ pahi hwýr mē ato mrar nē tanhmā kām mē ato hēx to. Nom kêr ka mē mē kām amnhī jarēnh kaxyw nē tee ri amnhī kukamā ajamaxpēr o amā mē uma kêt nē. ¹²Koja Tirtūm Karō ja kaxyw mē amā mē ajamaxpēr mex gō hāmri ka mē ô ri mē kām amnhī jarē. Jakamā kwa mē tee ri mē kām amnhī jarēnh kukamā ajamaxpēr o ri mē amā mē uma ho apa hkēt nē. Anē.

Mē hikukrêx rûnh pix kukamā hamaxpēr xwýnhjē jarēnh

Wam Ximotre 6.9-10; Xiakre 4.13-17, 5.1-6

¹³Nhūm Jejus arī mē ahkre o xa nhūm mē mar o kuhé. Rôm nhūm mēhō myja hwýr tē nē kām kapēr nē kām:

—Pa? Kwa ot pa awýr amā mēmoj jarēnh mā tē. Na pre inhīpēxà ty nhūm ixtō ixrom amnhīm õ mēmoj piitā ho arīk pa. Õ pika nē hkrit nē hikukrêx nē ām mēmoj piitā ho arīk par kumrêx. Kwa ma ixkôt tē nē kām anē pa wa amnhīm ho axkjē nà? Anē.

¹⁴Hāmri nhūm kuma nē kām:

—Tk. Koký. Na pa pre mē amā mē mēmoj to ixpikjēr kaxyw mē awýr ixwryk kêt nē. Anē.

¹⁵Hāmri nē mē kot mar o kuhé xwýnh piitā mē kām kapēr nē mē kām:

—Kwa kêr ka mē amā anhō mēmoj rûnh prām o ri apa hkēt nē. Na htem mēmoj rûnh kukwak ri Tirtūm wýr apir kêt nē. Mēmojta kēp pika pix nhō xwýnh na.

¹⁶Anhýr o mē kām kapēr hāmri nē mē kām awjarē. Mē hukukrêx rax ā kuxi nē mē kām awjarē nē mē kām:

—Nà koja mēhō õ mēmoj rax nē. Nē hpur kām õ rax nē. No ām õ jaxwýr xà hā ixkre kēp grire. ¹⁷Hāmri nhūm tee ri hpur kām õ rax kukamā hamaxpēr nē hamaxpēr o: “Kwa tanhmā kot pa amnhī to nē ja piitā nhýri haxwý wehe? Inhmā amarī mē kēp amrakati xwýnhjē mā hkwý nhōr prām kêt. Kot paj ām amnhīm piitā ir pa nē kritpēm hkur o ixpa. Nom ixpē haxwýr xà hā ixkreja ixpē grire.” Anē.

¹⁸—Hāmri nē hamaxpēr o: “Nà na pa ra ijamaxpēr. Kot paj ixkre gireta grà nē hpānhā rax õ nhīpēx. Hāmri nē ixpur kām inhōta jamý nē kamā ir pa. Nē ixāpēnh xà

hã ixkukrêx piitã kamã haxwÿr pa. Nà kot paj ho anê.” Anê.

¹⁹ —Hãmri nê ra ixkreja grãnh pa nê hpãnhã rax õ nhĩpêx. Nê hipêx pa hãmri nê kamã hpur kãm õta xir pa. Nê àpênh xà hã hikukrêx piitã kamã unhwÿ. Hãmri nê omu nê hkĩnh nê. Nê hamaxpêr o: “Nà hãmri. Kot paj tokyx axte mẽmoj tã ixàpênh kêt nê. Ra inhõ rax kumrêx kênã. Kot paj kritpêm ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhĩpêx.” Anê. ²⁰ Tã nhũm Tĩrtũm tee ri ã kot amnhĩ nhĩpêx anhÿr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atÿx ri anhõ rax mẽ akukrêx rax o apikuprõnh kaprÿ. Na ka ãm amnhĩ pix kukamã ajamaxpêr o apa pê ã amnhĩ nhĩpêx anê. Nom kot kaj kamàt ja kamã ty nê anhÿ kamã ma mõi nê amnhĩ kõt anhõ mẽmoj rax õ ho amõr kêt nê. Koja hpãnhã mẽhõ amÿr pê ho amnhĩptàr pa ka rĩ amnhĩ pumu.” Anê. Nhũm ã Tĩrtũm kãm kapêr anê. ã mẽ ujarênh kot anhÿr.

²¹ —Mê kot amnhĩ nhõ nê amnhĩ kukamã pix mã hamaxpêr o mẽ pa xwÿnhjaja na htem myja pyrã nê Tĩrtũm mã hamaxpêr o pa hkêt nê. Jakamã koja mẽ nhÿrmã ty hãmri nê hkukrêx pix kukamã hamaxpêr nê amnhĩ mã pix mã hamaxpêr o paja mÿrapê Tĩrtũm mẽ wa ixri htĩr tũm nê mex nê pa ho pa hkêt nê. Mẽ kot amnhĩ nhõ pix kukamã hamaxpêr xwÿnhjaja nê amnhĩ kukamã pix mã mẽ hamaxpêr xwÿnhjaja nê mẽ kamã ukaprĩ hkêt xwÿnhjaja mẽ õ mẽmoj rũnh tã koja mẽ nhÿrmã ty hãmri nê amnhĩ kõt hõ ho pixi nê o mõi kêt nê. Koja mẽ mẽmoj piitã rer pa nê ma ÿ kamã ma mõi. Jakamã kwa kêr ka mẽ jajê pyrã nê anhõ mẽmoj to anhõxÿ ho ri apa hkêt nê. Anê.

Mẽ pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mããnen Wam Pêtre 1.3-9

²² Tã nhũm Jejus hpãnhã tanhmã hkõt mẽ pa ho mẽ pa xwÿnhjê jahkre hto nê mẽ kãm:

—Kwa kêr ka mẽ tee ri amnhĩ kukamã ajamaxpêr o ri apa hkêt nê. Amnhĩ xàpkur xà rÿ axê ka mẽ tee ri hkukamã ajamaxpêr kêt nê. Nê mẽ ãm mẽmoj piitã hkukamã tee

ri ajamaxpêr kêt nê. ²³ Tĩrtũm àhpumunh tÿx o àhpumunh tÿx xwÿnh na. Na pre àhpumunh tÿx o mẽ anhĩpêx ka mẽ kukwak ri atĩr nê apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtÿx kênã. Kêp mẽ anhĩpêx xwÿnh jakamã mããnen kêp mẽ amã mẽ anhõ ho pa xwÿnh. Nê kêp mẽ amã mẽ axê nhõr o pa xwÿnh.

²⁴ —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nê ri pa hkêt nê. Na hte Tĩrtũm tãm kot kãm õ ho pa. Tã kãm mẽ pajapê htÿx o kuwênhre jakrenh jakamã koja uràk nê mẽ pamã mẽ panhõ mex o pa rãhã nê. ²⁵⁻²⁶ Jakamã kwa kêr ka mẽ mẽmo arĩgro hã axàpkur xà hkryre pumu nê ate amnhĩ pê hkrêr par nê amã prãm o akaprĩ nê apa hkukamã tee ri ajamaxpêr kêt nê. ãm Tĩrtũm kamnàr rom axãmnhĩx anhõ hkryreta ku nê akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nê akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamaxpêr o hkaprĩ nê pa kaprÿ. Jakamã kêr ka mẽ ã ri ajamaxpêr anhÿr o akaprĩ nê apa hkêt nê.

²⁷ —Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpêr o hkaprĩ nê harir kêt tã muxre nê harir ka mẽ omu. Te ho amnepêm finat pahihti Sarumãw xê mex pyrãk nom ãm mex o kot hakrenh.

²⁸ —Pixõrãreja arĩgro ja hã htĩr nê muxre nê harir tã koja mẽmo arĩgro hã grã pa nê hapêx. Kêp pixõrã pix nê hapêx tokyx anhÿr tã na hte Tĩrtũm ho mex nê nhũm mux nê harir. Nom mẽ pajaja na hte mẽ pahto mex o pixõrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpêr o akaprĩ nê apa? Nà kot kaj mẽ anê nê amnhĩ kaxyw Tĩrtũm mã ajamaxpêr tÿx kêt nê.

²⁹ —Kwa mẽ tee ri amnhĩ xàpkur xà hkukamã ajamaxpêr rãhã o ri akaprĩ nê apa hkêt nê. Nê mẽ tee ri amnhĩ kukamã tanhmã ajamaxpêr to ho ri akaprĩ nê apa hkêt nê. ³⁰ Mẽ kot Tĩrtũm kõt amnhĩ xunhwÿr kêt xwÿnhjaja na htem ã ri hamaxpêr anhÿr o hkaprĩ nê pa. Tã kêr ka mẽ ho mẽ uràk kêt nê. Tĩrtũm kot mẽ panhõ

měmoj kêt kôt mẽ pahpumunh mex kênã.
³¹ Jakamã kêt ka mẽ ãm hkôt ri amnhĩ nhĩpêx rãhã nẽ. Nẽ amã ja pix kukamã ajamaxpêr o ri apa hprãm. Hãmri nhũm amnhĩ tã mẽ apumu hãmri nẽ apkati mẽ tãm mẽ amã mẽmoj nhõr o pa. Anẽ.

*Kaxkwa kamã mẽ pakukrêx rax jarênh
 Matêwre 6.19-21; mããnẽn Sikũn Ximotre
 4.8; Eprêw 10.34; Wam Pêtre 1.4*

³² Nhũm Jejus arĩ mẽ kãm kapêr nẽ mẽ kãm:

—E mẽ ate ixkôt amnhĩ xunhwýr xwýnhjaja. Ra Tirtũm kot mẽ ato hkra jakamã kwa mẽ axãmnhĩx hkamnãr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nẽ hkĩnh nẽ. Koja nhýrmã kaxkwa kamã õ krĩ hwýr mẽ ato api ka mẽ kamã wa ixkuri amex nẽ atĩr tũm nẽ apa ho apa. Ja na mex o kot jar pika ja kôt mẽ õ mẽmoj rũnh nẽ pa xwýnhhta jakrenh. ³³ Jakamã kêt ka mẽ axãmnhĩx ri akukrêx kwý ho wênẽ nẽ hpãnhã kãxpore jamý nẽ mẽ kêp amrakati xwýnhjê mã ho apigrãnh o ri mẽ hkôt apa. Kot kaj mẽ ã amnhĩ nhĩpêx anẽ hãmri nẽ kaxkwa kamã akukrêx rax nẽ. Mo kaxkwa kamã mẽ àhkĩnh xwýnh koja mẽ apê ho ahkĩ? Nẽ kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tirtũm kot mẽ amã mẽ akukrêx nhõr mã xwýnhhta koja aa apê omnuj nẽ hapêx kêt kumrêx. ³⁴ Kot kaj mẽ jar pika ja kamã akukrêx rax hãmri nẽ tanhmã apê omnu hto pix kukamã ajamaxpêr rãhã ho ri apa. Nom kot kaj mẽ apê Tirtũm kra hã kot kaj mẽ jar akukrêx rax kêt tã kaxkwa kamã akukrêx pix kukamã ajamaxpêr rãhã ho ra akĩnh nẽ ri apa. Anẽ.

*Mẽ pahte Jejus kutêp tanhmã amnhĩ
 nhĩpêx to hã mẽ pamã karõ*

*Matêwre 24.42-43; Makre 13.32-37;
 Rukre 21.34-36; mããnẽn Wam Tesarõn 5.4-8*

³⁵ Nhũm pre Jejus arĩ mẽ ahkre nẽ mẽ kãm:

—E na pa pre ra mẽ apê ixkôt mẽ apa ho apa xwýnhjê mã tanhmã amnhĩ kukamã amnhĩ jarênh to. Ixtyk nẽ akupým ixtĩr nẽ ma akupým ixàpir hãmri nẽ mẽmo arĩgro hã akupýn mẽ awýr ixwrýkja na pa pre ra mẽ

amã ja hã amnhĩ jarê. Tã kwa kêt ka mẽ ixwakre kamã ixte mẽ amã ã amnhĩ jarênh anhýrja mã ajamaxpêr týx pẽ ixkôt amnhĩ nhĩpêx rãhã ho ri apa.

³⁶⁻³⁸ —Te mẽ õ patrãw mã mẽ àpênh mex xwýnhjaja kot amnhĩ nhĩpêx pyrãk o amnhĩ nhĩpêx o ri apa. Koja mẽ õ patrãw mã mẽ kot axpên mã wa rer mã xwýnh pumunh mã ma nhýhým tẽ. Hãmri nhũm kãm mẽ àpênh xwýnhjaja arĩ kutêp òrkwý kamã hkrĩ. Axkãm hamak rom nẽ kutêp hkrĩ. Akupýn htêm nhũm mẽ kot amnhĩ wýr mar nẽ kãm kahê xà mẽnh tokyx anhýr kaxyw arĩ kutêp òt kêt nẽ hkrĩ. Kôt ã kamãt nhũm akupýn hpõx o htêm rý arĩgro hwýr hpõx o htêm nhũm mẽ kot amnhĩ wýr mar nẽ kãm kahê xà mẽnh tokyx anhýr kaxyw kutêp òt kêt nẽ hkrĩ. Akupýn hpõx ã omunh hãmri nẽ tokyx apkur kaxyw kãm õ nhĩpêx kaxyw. Kêr kê akupýn pøj nẽ ã mẽ kot amnhĩ nhĩpêx anhýr ã mẽ omu nẽ hkĩnh nẽ. Tã kêt ka mẽ àpênh xwýnhhtajê pyrã nẽ ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkôt amnhĩ nhĩpêx mex rãhã nẽ. No kot paj akupýn mẽ awýr wrý hãmri ka mẽ àpênh xwýnhjê pyrã nẽ inhmã mẽmoj nhõr kêt nẽ. Kêt pa kot paj mẽ õ patrãwta kurom mẽ amã mẽmoj mex gõ.

³⁹ —Na htem mẽ kêp àhkĩnh pymaj amnhĩ nhõrkwý jamãr rãhã ho pa. ⁴⁰ Ja pyrã nẽ mẽ ate akupýn ixwrýk xà hã arĩgro pumunh kêt jakamã kêt ka mẽ òrkwý nhõ ðõnta pyrã nẽ ixkutêp axkãm ajamak rom rãhã nẽ ri apa. Jao tãm amnhĩ nhĩpêx rãhã nẽ. Anẽ.

*Mẽ õ patrãw mã mẽ àpênh mex xwýnhjê
 jarênh*

Matêwre 24.45

⁴¹ Nhũm pre ã Jejus hkôt mẽ pa ho pa xwýnhjê jahkre anẽ. Hãmri nhũm Simãw Pêtre kuma nẽ kãm:

—Kwa Pahihti. Xàn ka mẽ piitã mẽ kãm ã akapêr anẽ nã? Xà ãm mẽ papxipixjê mã? Anẽ.

⁴² Hãmri nhũm kãm:

—Nã ãm ixwakre kamã mẽ ate ixkôt tanhmã inhmã amnhĩ nhĩpêx to ho mẽ apa xwýnh piitã mẽ amã na pa ã ixkapêr anẽ. Koja mẽ àpênh xwýnhjê hõ õ patrãw mã àpênh mex o pa nhũm amnhĩ tã omu nẽ ma nhýhým mõi kaxyw nẽ ìhkram mẽmoj

piitã haxàr pa. Hãmri nê kãm: “E kêr ka ixwakre kamã inhmã inhõrkwyõ htãnopxa. Nê mẽ àpênh xwýnhjê mã õ mex kê mẽ apkur mex o pa.” Anê. Koja ã kãm mẽmoj tâ karõ anê hãmri nê kato nê ma nhỹhỹm mõi. ⁴³ Hãmri nhũm kãm àpênh mex xwýnhhta wakre kamã kãm àpênh mex o pa. Jakamã nhũm õ patrãw akupýn hpõx o mõi nhũm amnhĩ wýr harênh ma nê hkĩnh nê. Nê mẽmoj tâ amnhĩ tâ kamã kahak kêt nê. Rý tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupýn hpõx ã harênh ma nê hkĩnh nê.

⁴⁴—Jakamã nhũm õ patrãwja akupýn pøj nê kot kãm àpênh mex ã omu nê haxwýja hkĩnh nê. Hãmri nê kot kãm hamãr o pa kaxyw kãm mẽmoj piitã ãhkram haxàr pa. ⁴⁵ Nom koja kãm àpênh xwýnhhta axtem nê wakre kamã kãm àpênh mex kêt nê. Nê tokyx akupýn mõi kêt ã hkamnhĩx nê wakre kamã kãm mẽ àpênh xwýnhjê hta nê pipãnh pix nê mẽ kãm gõ xành xwýnhjê kõt pix mã pa japêr. ⁴⁶ Hãmri nhũm õ patrãw haêr pè akupýn pøj nê tee ri ã amnhĩ nhĩpêx anhýr ã omu. Hãmri nê gryk týt nê tanhmã homnuj to. Hãmri nê kãm mẽ àpênh punuj xwýnhjê mẽ mẽ ho pimràatã amnhĩ nê mẽ hanor pa. Tã kêr ka mẽ ixwakre kamã ho mẽ urak kêt nê. Mẽ kurom ixkapêr kõt tãm amnhĩ nhĩpêx mex rãhã ho ri apa.

⁴⁷⁻⁴⁸—Nê koja mõi kormã Tĩrtũm kapêr mar kêt nê htýt ri tanhmã amnhĩ tomnuj to ho pa. Hã koja Tĩrtũm ja hã omu nê nhỹrmã kot amnhĩ tomnuj o pata mýrapê tanhmã ho nhũm amnhĩ xà htýt kamã hamak tũm xà kamã pa. Nom akrãnhmã amnhĩ xà kamã hamak o pa. Aa kot Tĩrtũm kapêr mar kêt jakamã koja ãm akrãnhmã amnhĩ xà kamã hamak o pa. Nom koja mõi kapêr mar mex tâ ãm kuma nê hkõt amnhĩ nhĩpêx kêt nê. Nê xatã hirõp kuhê nê tanhmã amnhĩ tomnuj to. Hã koja Tĩrtũm tee ri ja hã omu nê nhỹrmã tanhmã homnuj týt to. Hãmri nhũm wamtajê pyrã nê amnhĩ xà htýt kamã hamak tũm xàta kamã pa ho pa nom mẽ kĩnhã amnhĩ xà htýt kamã hamak rãhã ho pa. Anê.

Jejus kot nhỹrmã mẽ kot amnhĩ tomnuj xà

ho hapêx ã harênh

Matêwre 10.34-36

⁴⁹ Nhũm Jejus arĩ hkõt mẽ pa ho mẽ pa xwýnhjê jahkre nê mẽ kãm:

—Nà ixte mẽ omnu xà piitã ho ijapêx par nê mẽ kot tanhmã amnhĩ tomnuj to piitã ho ijapêx par kaxyw na pa pre wrýt. Tã ra ixte piitã ho ijapêx par o inhmõi ronhýt ja inhmã mex kumrêx. Nom kormã. ⁵⁰ Kot paj amnhĩ xà htýt kãm ijamak rax o mẽ kot amnhĩ tomnuj o ijapêx o hkra. Hãmri nê nhỹrmã ho ijapêx pa. Na pa ra ixtyk kaxyw ixte amnhĩ kà xà kamã ijamak kukamã ijamaxpêr o ra amnhĩ kamã ixkahak nê ri ixpa. Tã kot paj ja ho ijapêx pa nê ixkĩnh týt kumrêx. Anê.

Mẽ kot Jejus ã axpên kutã amnhĩ xunhwýt ã mẽ harênh

Matêwre 10.21, 10.34-35

⁵¹ Nhũm Jejus arĩ mẽ ahkre nê mẽ kãm:

—Nê ra mẽ awýt ixwýt kã koja mẽ piitã ixkukwak ri hamakêtkati nê amnhĩx ri pa hkêt nê. Kormã. Koja mẽ akwýjaja ixkapêr ma nê mẽ apyrã nê amnhĩ kaxyw ixkõt hamaxpêr. No nhũm mẽ akwýjaja mẽ akĩnhã kuma nê ãm kuma. Hãmri nê ixtã tanhmã mẽ anhĩpêx to ka mẽ ixpyrã nê amnhĩ xà htýt kamã ajamak o ri apa.

⁵²—Nê koja tanhmã ixkre pyxi kamã mẽmojaja ohtõn pa. Nhũm war axkrutre nê ixkõt amnhĩ xunhwýt nhũm mẽ axkrunêpxi nê ixkwým ri amnhĩ nhĩpêx nê ixkutã amnhĩ xunhwýt. ⁵³ Nhũm mẽ hipêxà hkra my mẽ wa ixtã axpên kutã amnhĩ xunhwýt. Nhũm mẽ katorxã hkra ni mẽ wa ixtã axpên kutã amnhĩ xunhwýt. Nhũm mẽ wýt umregêx mẽ wa haxwýja ixtã axpên kutã amnhĩ xunhwýt. Koja mẽ ã ixtã axpên nhĩpêx anhýr o pa. Anê.

Mẽ pahte amnhĩ tomnuj kaga nê Tĩrtũm kõt amnhĩ nhĩpêx ã mẽ pamã karõ

Matêwre 5.25-26, 16.2-4

⁵⁴ Nhũm Jejus hpãnhã mẽ kot hkõt amnhĩ xunhwýt kêt xwýnhjê mã kapêr nê mẽ kãm:

—Kwa mẽ inhma mẽ ate ixkõt amnhĩ xunhwýt kêt xwýnhjaja. Na htem kaxkwa kamã na htyk rax pumu nê na wrýt mã hamaxpêr kurê kumrêx. Hãmri nhũm na wrýt. ⁵⁵ Nê amgrã pè køk krihkritja nhũm htem kuma nê arĩgro htýt mã hamaxpêr

kurê kumrêx. Hāmri nhūm arīgro htỳx nê.
⁵⁶⁻⁵⁷ ã na ka htem aprī hã mēmoj pumunh
 kôt mēmoj kukamã ajamaxpêr mex o ri apa
 anê. Nom nhūm Tirtūmja mē ate tanhmã
 amnhī tomnuj to mỳrapê tanhmã mē ato
 kaxyw nhūm mē ate ja hã amnhī pumunh
 tã tokyx amnhī tomnuj kaga hkêr nê.

⁵⁸⁻⁵⁹ —Na htem tanhmã axpên tomnuj
 to. Hāmri nhūm kot tanhmã war axpên to
 xwỳnhta pahi hwỳr htêm nê kãm tanhmã
 kot ho xwỳnhta jarênh kaxyw. Hāmri nhūm
 kamã gryk xwỳnhta kot pahi mã harênh
 kaxyw ã harênh ma nê hāmri tokyx hwỳr
 tē nê wa tãm akupỳm axpên xãm. Na htem
 ã amnhī nhīpêx anê. Pahi kot ja mar nê
 tanhmã mē ho pymaj na htem ã amnhī
 nhīpêx anê nê tokyx akupỳm tãm axpên
 xunhwỳ. No koja mē ã amnhī nhīpêx
 anhỳr kêt nê nhūm pahija mē harênh ma
 hāmri nê tanhmã kot hō ho xwỳnhta pynê
 nê haxà nhūm tee kãm kator prãm o hkrī
 kaprỳ. Hāmri nê tanhmã amnhī to nê
 amnhī pãnhã kãm amnhī rer pa nhūm pahī
 htija kormã mē kãm anê nhūm mē kãm ure
 nhūm kato. Ja pyrà nê kêr ka mē Tirtūm
 tanhmã kot mē anhīpêx to pymaj tokyx
 mē ate amnhī tomnuj kaga nê hkôt amnhī
 nhīpêx rãhã ho ri apa. Anê.

13

¹ Tã nhūm axtem mē hkwỳjaja Jejus wỳr
 mra nê kãm:

—Pa? Kwa xàn ka ra Garirej nhō xwỳnh
 kwỳjê jarênh ma nà? Na xep prem Jerujarê
 hwỳr mra nê ham mē kot Tirtūm mã amnhī
 jarênh xà hã ixkre kamã kãm amnhī jarênh
 kaxyw kormã kãm mry hpar o kuhê nhūm
 xep pahīti Piratja mē harênh ma nê mē hã
 amỳnê nhūm mē ma mē hwỳr mra nê mē
 himex pa. Kwa mãn mē kot amnhī tomnuj
 tỳx o mē pajakrenh ã na prem mē himex
 nà? Anê.

²⁻³ Hāmri nhūm mē kãm:

—Nà mē kot amnhī tomnuj tỳx mỳrapê
 mē kot mē himex kêt. Mē apiitã mē ate
 amnhī tomnuj o axpên pyræk kênã. Tã kot
 ka mē amnhī tomnuj kaga nê Tirtūm kôt
 amnhī xunhwỳr kêt hã kot ka mē nhỳrmã
 ty hāmri nê ò krī hwỳr axàpir kêt nê. ⁴ No
 Jerujarê kamã ixkre prêkja mē kot kãm
 “Siroe” anhỳr xwỳnhta mē ho 18 nê mē hipy

htem nê mē himex par xwỳnhjaja. Xà mē
 kot amnhī tomnuj tỳx mỳrapê na prem ty?
 Xà mē kot amnhī tomnuj tỳx o Jerujarê
 kamã arī mē htír xwỳnhjê jakrenh? ⁵ Nà
 kot anhỳr kêt. Mē apiitã mē ate amnhī
 tomnuj o axpên pyræk. Jakamã kot kaj mē
 ã amnhī nhīpêx anhỳr kaga nê Tirtūm kôt
 amnhī nhīpêx kêt nê hāmri nê mē uræk nê
 nhỳrmã ty hāmri nê Tirtūm nhō krī hwỳr
 axàpir kêt nê. Jakamã kwa mē ixkapêr ma
 nê kãm ajamaxpêr tỳx rãhã ho ri apa. Anê.

*Tirtūm kot mē pakamã gryk tokyx anhỳr
 kêt ã harênh*

Rômãn 2.4; Sikũn Pêtre 3.8-9

⁶ Tã nhūm Jejus kê axte tanhmã mē ahkre
 hto. Nê Tirtūm kot tanhmã mē panhīpêx to
 hã kuxi nê mē kãm awjarê nê mē kãm:

—Koja hpur nhō dôn mēmo pàr kre nhūm
 ra hprêk mex nê ô mã tãm nê. Tã aa ô hkêr
 ã ra hã amgrà axkrunêpxi. ⁷ Hāmri nhūm
 kot hkre xwỳnhja tee ri omu nê kãm àpênh
 xwỳnh wỳr tē nê kãm: “E kwa ma tē nê
 mēmo pàr mỳj krãhta nê amê. Mexti hã. Ra
 ô hkêr ã amgrà axkrunêpxi kênã. Koja pêr
 aa ô hkêr nê. Mo kaxyw kot kêt ô hkêr tã ô
 mex xwỳnh kaêx ã mē kêp àmnàr o kuhê? E
 hwỳr tē nê krãhta nê amê.” Anê. ⁸⁻⁹ Hāmri
 nhūm tee ri kot kãm hã karōja ma nê kãm:
 “Kwa nà kormã. Pa kop ixãmnhix pàr krax
 ã mēmo japôk kwỳ kapī nê kop hamã mãn.
 Kê axte hã amgrà pyxi nê hapêx nê ô hkêr
 pa kormã krãhta nê kumê. Koja amgrà ja
 kamã amã ô japêr ka omu nê akĩnh nê.”
 Anê. ã mē ujarênh kot anhỳr. Anê.

Nhūm Jejus ã mē kãm ujarênh anê. Mē
 kot amnhī tomnuj tỳx o pa htã nhūm Tirtūm
 kot pur nhō dôn mã àpênh xwỳnhta pyrà nê
 mē kamã gryk tokyx anhỳr kêt ã nhūm ã hã
 kuxi nê mē kãm ujarênh anê.

*Jejus kot arīgromnu hã mēhō ho mex ã
 harênh*

Rukre 14.1-6; Juãw 5.16-17

¹⁰ Tã nhūm mē ò arīgromnu pē sap kato
 nhūm Jejus Ijaew pikuprõnh xà hã ixkre
 hwỳr axà nê kamã Tirtūm kapêr o mē ahkre
 ho nhỹ. ¹¹ Nhūm kamã mēhō ni hikôt rãhã
 nê pa xwỳnhja nhỹ. Na pre ra amnepêm
 mēkarõmnuti tanhmã ho nhūm katàt nê ri
 mrrar kêt kumrêx. Am hikôt rãhã nê ri pa hã
 ra hã amgrà pē 18. ¹²⁻¹³ Hāmri nhūm Jejus

omu nê amnhĩ wÿr kãm hpa ho apê nhũm hwÿr tẽ nhũm hã ìhkra xi nê kãm:

—E na ka ra akupÿm amex.

Anê nhũm akupÿm katàt nê mex kurê kumrêx. Hãmri nê amnhĩ pumu nê hkĩnh tÿx nê Tĩrtũm mã mex o mex ã harênh o xa. ¹⁴ Nom nhũm mẽ pikuprõnh xà hã ixkre jamãr xwÿnh maatija tee ri ja hã omu hãmri nê Jejus kamã gryk tÿx nê. Mẽ õ arĩgromnu hã akupÿm kot ho mex jakamã nhũm kamã gryk tÿx nê. Hãmri nê mẽ pikuprõnh xwÿnhjê mã kãm:

—Tk. Kwa semãn ã mẽ àpênh xà hã arĩgro xohtõ. Kêp 6. Kot kaj mẽ mãmri tòmĩk nê sikũn nê tês nê kwata nê kĩa nê sêsta ja ã ka mẽ apê rÿ mãmri Jejus wÿr amnhĩ to mra kê akupÿm tanhmã mẽ ato mex to. No sap ã kwarĩ. Sap kêp mẽ pahpê Ijaew nhõ arĩgromnu kênã. Na pu htem hã paxàpênh kêt nê. Jakamã arĩgro ja hã kot akupÿm mẽ ato mexja mex kêt. Anê.

¹⁵ Hãmri nhũm Jejus kuma nê kãm:

—Kwa xà mẽ kajaja na ka htem sap ã axàpênh kêt nê apa? Nà mẽ ate hã axàpênh kênã. Xàn ka htem sap ã akrit kawar nê akrit môx ma mẽ ho apa nê mẽ hkõm kêt nê? Nà na ka htem ma mẽ ho apa nhũm htem ixkõ. Mot ka kêt mẽ ri axtem nê mẽ kot sap ã tanhmã amnhĩ toja nê mẽ kãm akapêr? ¹⁶ Ixte ni ho mex xwÿnhnta mẽ pahpyrà nê kêp finat Apraãw kagrõt nyw õ na. Nhũm pre Satanasti te kot kãm ê nê ri o pa pyrãk o hipêx jakamã nhũm ÿ hã hikõt nê ri paja ã ra hã amgrà kêp 18. Tã pa nê te ixte Satanasti ho ixkrihkrit nê ixte kêp utàr pyrãk o hipêx nê akupÿm ho mex. Mo kot pa kêt ri omu nê ãm omu nê arĩgromnu hã ho mex kêt nê? Nà ixte arĩgro piitã hã akupÿm mẽ ho mex o ixpa xwÿnh kênã. Anê.

¹⁷ Hãmri nhũm mẽ kot kãm kapêr mar prãm kêt xwÿnhjaja kuma nê kamã gryk nê. Te ho mêmprĩjê mã mẽ hamaxpêr nhõr pyrãk o mẽ hipêx pyrãk jakamã nhũm mẽ amnhĩ tã kuma nê kamã gryk nê. No nhũm mẽ kot ra ã amnhĩ nhĩpêx anhÿr o pa hã omunh xwÿnhjaja ja hã omu nê kãm hkĩnh nê.

*Jejus te kot mẽmo hy pyrãk ã harênh
Matêwre 13.31-33; Makre 4.30-32*

¹⁸⁻¹⁹ Nhũm Jejus arĩ mẽ ahkre nê tanhmã mẽ kãm amnhĩ tã ujarênh to nê mẽ kãm:

—Nê Tĩrtũm kot mẽ awÿr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire pyrãk. Na htem hkre nhũm higrõt. Nê gaa nê rĩ hprêk. Hãmri nê pa anhgrà nhũm kuwênhre hwÿr mra nê hô pytĩ kamã amnhĩm haê nhĩpêx. Tã kot paj nhÿrmã mẽmo hy jarênhnta pyrã nê ixpaxi htã kot paj pika piitã hkõt mẽ ho amnhĩptã nê mẽ omunh mex rãhã ho ri ixpa. Anê.

*Jejus te kot pãwti kaxkrit xà pyrãk ã
harênh*

Matêwre 13.33-35

²⁰⁻²¹ Nhũm Jejus arĩ mẽ ahkre ho xa. Nom hprĩ hã amnhĩ jarênh kêt nê. ãm amnhĩ tã kuxi nê mẽ kãm awjarê nê mẽ kãm:

—E kot pa hpãnhã tanhmã mẽ amã pãwti kaxkrit xà jarênh to. Koja mênijê hõ ãm hkwy ho grire nê kupy nê kaxyw mẽmo xôm kãm kumê nê ho pihkàr pa nê ho pãwti nhĩpêx. Nhũm kaxkrit xàja grire htã pãwti piitã ho kaxkrit mex nê. Ja pyrã nê kot paj ixpyxi htã koja mẽ nhÿrmã pika piitã hkõt ixkõt amnhĩ nhĩpêx mex o pa. Anê.

Nhũm pre ã Jejus mẽ kãm amnhĩ tã pãw kaxkrit xàja xi nê harênh anê.

Kaxkwa hwÿr hakwa kre kahê xà jarênh

Matêwre 7.13-14, 7.21-23; Juãw 10.7-10

²² Tã nhũm Jejus arĩ krĩ pè Jerujarê hwÿr krĩ hkõt ri mẽ ahkre ho mẽ hkõt ri pa.

²³ Hãmri nhũm mêmhõ myja hwÿr tẽ nê mẽmoj tã hkukja nê kãm:

—Pa. Kwa inhmã mẽmoj jarê. Xà koja mẽ ohtõ nê nhÿrmã Tĩrtũm ri htĩr tũm nê papa ho nà koja mẽ grêre? Anê.

²⁴ Hãmri nhũm kuma nê mẽ kot mar o kuhê xwÿnh piitã kãm:

—Nà mẽ kot Tĩrtũm kõt amnhĩ xunhwÿr xwÿnhjê pix koja mẽ õ krĩ hwÿr agjê. Wÿr mẽ gjêx xàja ãm pixii nom koja mẽ ohtõ nê kãm hkõt wÿr gjêx prãm kêt nê. Na htem te hwÿr mẽ gjêx xà hõ japêr o pa pyrãk. Nom pa na te ixpê hwÿr mẽ gjêx xà pixita pyrãk. Jakamã kwa kêr ka mẽ tokyx ixkõt amnhĩ xunhwÿr tÿx nê ixkõt ri amnhĩ nhĩpêx o ri apa. Na htem ohtõ nê kãm ixkõt amnhĩ xunhwÿr prãm kêt nê. Ixte amnhĩ nhĩpêxja mẽ kêp hihtÿx jakamã nhũm htem ixkaga.

²⁵ —Tā koja mẽ nhỹrmã ty nẽ tee ri kãm Tĩrtũm wỳr gĩx prãm kaprỳ. Kot paj te mẽ kệp kahê pyræk o mẽ hipêx nhũm mẽ kapôt ã kuhê nẽ tee ri amnhĩ tã ixpumu nẽ inhmã: “Kwa mẽ inhmã kahê xà mẽ pa mẽ awỳr agjê Pahihti.” Anẽ. Hãmri pa mẽ kãm: “Nà ixte mẽ apumunhre hã kot pa kêt ri mẽ amã kurẽ.” Anẽ.

²⁶ —Hãmri nhũm mẽ tee ri inhma nẽ inhmã: “Kwa nà ra ate mẽ ixpumunh mex kênã. Na ka pre mẽ inhõ krĩ kamã mẽ ijahkre ho ri apa nẽ mẽ ixkutã axàpkur o ri apa.” Anẽ. ²⁷ Hãmri pa mẽ kãm: “Tk. Ixte mẽ akutã ixàpkur tã mẽ ate ixkôt amnhĩ xunhwỳre hã. Jakamã e mẽ ma mra. Mẽ ate amnhĩ tomnuj pix o mẽ apa xwỳnh jakamã kot kaj mẽ ixwỳr agjêx kêt nẽ.” Anẽ. Kot paj ã mẽ kãm ixkapêr anẽ.

²⁸ —Hãmri nhũm mẽ amỳm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nẽ ri mẽ inhmex nẽ ixpa hã amỳm mẽ ixpumunh o kuhê. Apraãw nẽ Ijak nẽ Jako nẽ Tĩrtũm kapêr jarênh o mẽ pa xwỳnh piitã nhũm mẽ amỳm mẽ ixkĩnh nẽ mẽ ixàpkur mex ã mẽ ixpumunh o kuhê. Hãmri nẽ tee ri mẽ ixwỳr kãm gĩx prãm kaprỳ nẽ hkaprĩ nẽ mur nẽ amnhĩ krã hkĩ jarê nẽ amnhĩ kà nhê nẽ amnhĩ kamã gryk tỳx nẽ. No ãm tee ri amnhĩ kamã gryk kaprỳ. ã koja mẽ amnhĩ nhĩpêx anẽ. ²⁹ Nom Tĩrtũm kôt mẽ kot amnhĩ xunhwỳr xwỳnhjaja koja mẽ kurom pika piitã kurũm axpên wỳr akuprõ nẽ Tĩrtũm wỳr agjê nẽ kuri hkĩnh nẽ apkur mex o hkrĩ. Mẽ akwỳjaja nẽ pika piitã kurũm hohtô rax nẽ axpên wỳr akuprõ nẽ hwỳr agjê nẽ kuri apkur mex nẽ hkĩnh nẽ pa ho pa.

³⁰ —Mẽ apê Ijaewjaja mẽ amã Ijaew kêt xwỳnhjê hprãm nõkati htã koja mẽ hkwỳjaja mẽ akwỳjê rom Tĩrtũm ri axpên wỳr akuprõ nẽ hkĩnh nẽ axpên kutã apkur mex o hkrĩ. Jakamã kwa kot kaj mẽ uræk nẽ amã Tĩrtũm mẽ wa ixwỳr agjêx prãm hã kot kaj mẽ ixkôt amnhĩ xunhwỳ nẽ ixkapêr kôt amnhĩ nhĩpêx mex o ri apa. Anẽ.

Jejus kãm Jerujarê nhõ xwỳnhjê japê hã harênh

Matêwre 23.37-39

³¹ Hãmri nhũm Parijew nhõ xwỳnh kwỳjaja Jesus wỳr mra nẽ kãm:

—Pa. E ot pa mẽ awỳr mra. Kwa kêr ka ma Jerujarê hwỳr amõr kêt nẽ. Na ra mẽ hkĩnh wỳr pahi Eroxa pôi nẽ kot tanhmã ato kaxyw atã amnhĩ jarê pa mẽ kuma. Jakamã kwa mẽ hwỳr amõr kêt nẽ. Nhãm krĩ hõ hwỳr mãn mõi. Anẽ.

³² Hãmri nhũm mẽ kuma nẽ mẽ kãm:

—Tk. Nà kot pa umaj nhãm krĩ hõ hwỳr inhmõr kêt nẽ. Kot paj ma mẽ hkwỳjê nẽ mẽkarõmnuti japôx pê mẽ hkwỳjê ho mex o ma hwỳr mõi. Pahi Erox kãm mẽ hpar pix prãm. E mẽ mãmri ma akupỳm hwỳr mra nẽ ã kãm ixkapêr jarênh anẽ. No kot paj umaj nhỹhỹm ixprõt nẽ ixtêm nẽ kệp ixpimxur kêt nẽ. Ra ixte õ krĩ hwỳr inhnojarê kênã. Anẽ.

³³ Hãmri nẽ mẽ kot mar xwỳnhjê mã amnhĩ jarê nẽ mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwỳr mõi pôi nẽ kamã ty. Kamã na htem mẽ kot Tĩrtũm nhỹ hã kapêr jarênh xwỳnhjê nhĩmex. Tã hwỳr kot paj mõi. Anẽ.

Nhũm pre ã Jejus mẽ kãm amnhĩ jarênh anẽ. ³⁴ Hãmri nẽ te ra kot Jerujarê nhõ xwỳnhjê pumunh o ãm nẽ mẽ kãm kapêr pyræk o kapêr nẽ mẽ kãm:

—Hêxta waa nẽ mẽ apê Jerujarê nhõ xwỳnhjaja. Tĩrtũmja xatã mẽ awỳr ý hã kapêr jarênh o mẽ pa xwỳnhjê rênh tã ka mẽ kapêr mar kêt nẽ. Nẽ axtem nẽ kên o mẽ htao o mẽ himex o apa. Na ka htem ã amnhĩ tomnuj o apa anẽ. Tã arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỳ pyræk o na pa inhmã mẽ anhĩpêx prãm tã ka mẽ apê ixprãm nõkati nẽ ixkaga. ³⁵ Mỳrapê koja Tĩrtũm mẽ anhõ krĩ jamãr kêt nẽ. Kot paj tokyx ty nẽ mẽ apiitã mẽ are nẽ ma akupỳm api ka mẽ axte ixpumunh kêt nẽ. ãm akupỳn ixwỳr xà hã arĩgrota pix ã koja mẽ akwỳjaja mẽ amỳr pê krĩ ja hwỳr ixwỳr kãm ixpumu. Hãmri nẽ mẽ akurom ixpumu nẽ hkĩnh tỳx nẽ. Nẽ tã ixkôt amnhĩ xunhwỳ nẽ axpên mã ijarênh o:

E ota Tĩrtũm kot mẽ pahwỳr mẽnh xwỳnhhta pôi. Nà ãm hãmri na mẽ pahwỳr wrỳ. Na mex kumrêx. Anẽ.

14

Jejus kot axte arīgromnu hã mēhõ ho mex ã harēnh

Rukre 13.10-17

¹ Tã nhũm sap nhũm Jejus ma Parijew nhõ xwýnhjê krãhtũm kutã apkur kaxyw òrkwý hwýr tē. Hãmri nhũm mē wa hã htu rax nē Jejus apkur ã tãnopxar o kuhê. Mē kot amnhĩ nhĩpêx kwým ri tanhmã amnhĩ nhĩpêx to nhũm mē kot hã omunh nē ra hã àmnēnh kaxyw nhũm mē kuri htãnopxar o kuhê. ² Nhũm ixkreja kamã mēhõ my hte hikot xwýnh mē kuri xa. ³ Hãmri nhũm Jejus omu nē hã Parijew nhõ xwýnhjê mē Tĩrtũm kapēr tũm o mē ahkre xwýnhjê kukja nē mē kãm:

—Kwa mē inhmã mēmoj jarē. Jarãhã na mē panhõ arīgromnu pē sap. Tanhmã na pre finat Mojesja Tĩrtũm nhỹ hã mē pahte sap ã tanhmã amnhĩ nhĩpêx to hã mē pamã karõ hto? Xà kot puj mē akupým mē ho mex nà? Kot puj mē ãm mē omu nē akupým mē ho mex kêt nē? E mē atõ inhmã ja jarē. Anē.

⁴ Hãmri nhũm mē kuma nē tanhmã kutã kãm nē hkêt nē. ãm akryk mar o kuhê. Mē kot tanhmã kãm nē nhũm kot ta pãnhã mē kãm tanhmã nē pymaj nhũm mē akryk mar o kuhê nē tanhmã kutã kãm nē hkêt nē. Hãmri nhũm tee ri mē omu hãmri nē myja ã ìhkra xi nē akupým ho mex. Hãmri nē hano nhũm ma akupým mex nē hkĩnh nē ma tē.

⁵ Hãmri nhũm Jejus mē kãm:

—E mē inhma. Xà koja mē akra sap ã mē apē ahkrehti xupým kãm tēm ka mē ãm omu nē arīgromnu mex jamãr pē tokyx ho axàpir kêt nē? Nà kot kaj mē ho axàpir kurê kumrêx. Rý koja akrit môx gyw mã axà xat ka mē omu nē ãm omu nē arīgromnu mex jamãr pē tokyx hkaxàr kêt nē? Nà kot kaj mē hkaxàr kurê kumrêx. Na htem sap ã tanhmã mē ho mex to ho pa. Mē panhõ arīgromnu htã pu htem hã tanhmã mē ho mex to. Jakamã na pa ã hã myta ho mex kurê kumrêx anē nē ri arīgromnu mex jamãr kêt nē. Anē.

⁶ Nhũm pre ã Jejus mē kãm amnhĩ jarēnh anē nhũm mē kuma nom kutã kãm mēmoj jarēnh kêt nē. Ra kot akupým ho mex jakamã nhũm mē tanhmã hã kãm nē hkêt nē kuhê.

Mē pahte amnhĩ to hkryre hã mē pa-jarēnh

Matêwre 23.6-14; Rukre 6.32-36; mãänēn Xiakre 4.10; Wam Pêtre 5.5-6

⁷ Hãmri nhũm mē apkur kaxyw mē hkrĩ xà hã hkrĩ hpa. Nhũm mē hkwyjaja hkwyjê pē amnhĩ to wa nē mē hkrĩ xà mex kãm hkrĩ hpa. Hãmri nhũm Jejus ja hã mē omunh o xa nē axte mē kãm mēmoj jarē. No ãm mēmoj tã kuxi nē mē kãm awjarē nē mē kãm:

⁸ —Nà koja mē axpēn mã mēhõ rer kaxyw nē amnhĩ wýr mē atã karõ. Mē ate kutã axàpkur kaxyw. Hãmri kēr ka mē hwýr mra nē axàpkur kaxyw nē kupíp kãm akrĩ kurê kumrêx. No kot kaj mē kēp amnhĩ to wa nē mē hkrĩ xà mex pytã nē hã akrĩ nhũm ra kot amnhĩ to rax xwýnhjê hõja hapu hã mē akõt tēn axà. ⁹ Hãmri nhũm ixkre nhõ dõn kot amnhĩ wýr mē awýr xwýnhta mē hkrĩ xà mexta ã mē awý nē mē amã: “Kwa mē atõ kãnhmã xa nē kãm mē hkrĩ xà kaprã.” Anē. Hãmri ka nhãm xa nē kãm anhýr xàta gõ. Hãmri nē apijaàm kãm hpãnhã kupíp kãm nhỹ. ¹⁰ Ja pymaj kēr ka mē kupíp kãm akrĩ kurê kumrêx. Kê ixkre nhõ dõnja tee ri ja hã mē apumu nē mē amã: “Tk. Kwa ixkrãmnhwýjaja. Mē kupíp kãm akrĩ hkêt nē. Kwa mē mra nē jar mē hkrĩ xà mex ã mãn akrĩ.” Anē hãmri nhũm ja mē amã mex nē. Nhũm mē piitã kot mē ato mex ã mē atã omu ka mē ajaxwýja amnhĩ tã omu nē akĩnh nē ajamakêtkati nē akrĩ.

¹¹ —Nē koja mēhõ te amnhĩ to rax o hkwyjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nē tanhmã hã ho. Hãmri nhũm ra amnhĩ to grire hã amnhĩ pumunh o ri pa nē rĩ amnhĩ pumu. Nom koja mēhõ amnhĩ to rax o hkwyjê jakrenh pyrãk o amnhĩ nhĩpêx o ri pa hkêt nhũm Tĩrtũm ja hã omu hãmri nē tãm amnhĩm kot amnhĩ to rax xwýnh ã harē. Anē.

Mē pahte mē kēp amrakati xwýnhjê ho mex ã mē pamã karõ

¹² Nhũm pre ã Jejus mē ahkre anē hãmri nē hpãnhã mē apkur xà hã ixkre nhõ dõnja mã kapēr nē kãm:

—Nà na ka hte amnhĩ wýr akwyjê pix wý. Atõjê hwý nē akrãmnhwýjê hwý. Nē mē

hikàxpore rūnh xwýnhjê hwý. Nom nhýrmã mẽ kot amnhĩ xwar amnhĩ nhõrkwy hwýr awýr pix kaxyw na ka hte ã amnhĩ wýr mẽ hwýr anê. ¹³ No kêt amnhĩ wýr mẽ no kre xwýnhjê mǎn wý. Nê mẽ hyk o mẽ pa xwýnhjê mǎn wý. Nê mẽ hkrã pipãnh puro xwýnhjê mǎn wý. Nê mẽ hpigêx tỳx xwýnhjê mǎn wý. Nê mẽ hirot nê àpênh kêt xwýnhjê mǎn wý. Kêr ka amnhĩ wýr jajê mǎn wý kê mẽ awýr mra nê akutã apku. ¹⁴ Mo mẽ kot amnhĩ xwar awýr kaxyw mẽ õ mẽmoj? Mẽ kêp amrakati. Tã kot kaj mǎmrĩ amnhĩ wýr mẽ awý nhũm Tĩrtũm mẽ hã apumu hãmri nê nhýrmã kot akupým mẽ ho htĩr xà hã arĩgrota ã mẽ hã amã mẽmoj mex gõ nê ato mex nê. Hãmri ka akĩnh nê. Anê.

Tĩrtũm kutã mẽ paxàpkur xà maati jarênh Matêwre 8.11, 25.1-10, 26.29; mǎãnêh Apokarip 19.9

¹⁵ Hãmri nhũm mẽ apkur kaxyw hkrĩ pa nhũm Jejus nhĩhkõ hã mẽ apkur o mẽ krĩ xwýnhjê hõja tanhmã Jejus mã kapêr to nê kãm:

—Hêxta waa nê. Kot puj mẽ nhýrmã Tĩrtũm nhõ krĩ hwýr api nê kutã paxàpkur o pahkrĩ nê pahkĩnh tỳx kumrêx. Anê.

¹⁶ Hãmri nhũm kuma nê kê axte mẽ ahkre. Mẽ kot Tĩrtũm kutã apkur kaxyw kot amnhĩ wýr mẽ hwýrta ã nhũm mẽ ahkre. No ãm hã kuxi nê tanhmã mẽ kãm ujarênh to nê mẽ kãm:

—Koja mẽhõ amnhĩ wýr mẽ ho ohtõ nê mẽ kot kutã mẽ apkur mex kaxyw mẽ kuwý. ¹⁷ Hãmri nê mẽ hwýr kãm àpênh xwýnh mẽ nê kãm: “E ma tẽ nê mẽ kãm awjarê kê mẽ tokyx mra pa mẽ apku.” Anê. ¹⁸ Hãmri nhũm kuma nê ma mẽ hwýr mẽ kãm ujarênh o tẽ. Hãmri nê wamta mã anê nhũm kuma hãmri nê hitõt nê kãm: “Nà kot paj hwýr ixtêm kêt nê. Na pa ham amnhĩm pika hkwý japrõ. Jakamã kot paj ma hwýr tẽ nê ixprĩ hã omu mǎn. Kwa kêr ka kãm ijarê kê ixte tanhmã hã nê xà hkõt ã ixte amnhĩ nhĩpêx anhýrja mã hamaxpêr kêt nê.” Anê.

¹⁹ —Hãmri nhũm kuma nê hpãnhã nhãm ja wýr tẽ nê kãm awjarê nhũm kuma nê haxwýja hitõt nê kãm: “Nà kot paj hwýr ixtêm kêt nê. Na pa ham amnhĩm môx o 10 nê haprõ. Jakamã kot paj ma hwýr tẽ nê ixprĩ hã ri omu mǎn. Kwa kêr ka kãm ijarê

kê tee ri tanhmã hamaxpêr to hkêt nê. Ixte tanhmã hã nê xà hkõt ã ixte amnhĩ nhĩpêx anhýr kêt.” Anê.

²⁰ —Hãmri nhũm kuma nê hpãnhã ma ihõta wýr tẽ nê kãm awjarê nhũm kuma nê haxwýja hitõt nê kãm: “Nà kot pa hwýr ixtêm kêt nê. Na pa kormã ham ixprõ. Kormã ixprõ nyw nê inhmã rer prãm kêt jakamã kot paj ma hwýr ixtêm kêt nê.” Anê.

²¹ —Hãmri nhũm kãm àpênh xwýnhta tee ri mẽ kuma nê awjanã nê ma akupým tẽ. Kot ma mẽ hwýr mẽnh xwýnhta wýr ma akupým tẽ nê kãm mẽ harê. Hãmri nhũm tee ri mẽ harênh ma nê mẽ kamã gryk nê. Hãmri nê hpãnhã mẽ kêp amrakati xwýnhjê hwýr kãm àpênh xwýnhta mẽ. Mẽ hkrã pipãnh puro xwýnhjê hwýr kumê. Nê mẽ hpigêx tỳx xwýnhjê hwýr kumê. Nê mẽ hirot nê àpênh hkêt xwýnhjê hwýr kumê nhũm ma mẽ kãm ujarênh o tẽ. Hãmri nê amnhĩ kõt mẽ kuwý nhũm mẽ kuma nê wamtajê rom hkõt mrrar kurê kumrêx. Hãmri nê agjê nê apkur kaxyw mẽ hkrĩ xà kamã hkrĩ hpa. ²² Hãmri nhũm kãm àpênh xwýnhja õ patrãw wýr tẽ nê kãm mẽ harê nê kãm: “E ate mẽ hã karõ xàta kõt na mẽ ra hkrĩ hpa htã arĩ mẽ hkrĩ xà hkwý hkaprý.” Anê.

²³ —Hãmri nhũm kuma nê kãm: “Hêxta waa nê. Kêt ãm mẽ hkrĩ xàta hipu mex ronhýx pa omu nê ixkĩnh nê. No ãm kormã piitã hipu hkêt. Kwa ma krĩ pu hã ri mẽ hapêr o mra. Nê nhýri mẽ hkwýjê pumu nê mẽ haprõ nê man amnhĩ kõt mẽ o mra kê mẽ hkrĩxà ho hipu hpa. ²⁴ No kêt wam ixte amnhĩ wýr mẽ hwýr xwýnhtaja. Mẽ hitõt xwýnhjaja kot paj axte amnhĩ wýr mẽ hwýr kêt nê.” Anê. ã mẽ ujarênh kot anhýr. Na hte ã Tĩrtũm amnhĩ wýr mẽ piitã mẽ hwýr anê. Anê.

Mẽ pamã Jejus kĩnh tỳx ã mẽ pamã karõ Matêwre 10.37-38; Makre 8.34; Rukre 9.23-25; Juãw 12.26

²⁵ Tã nhũm Jejus mẽ õrkwy rūm kato nê kormã Jerujarê hwýr mõ nhũm mẽ hohtõ rax nê hkõt mõ. Hãmri nhũm Jejus xa nê mẽ ho hakêx nê mẽ omu nê mẽ kãm:

²⁶ —E kot ka mẽ atõ amã ixkõt amnhĩ xãm prãm nê ã amnhĩ nhĩpêx anê. Nê amã atõ nê atõx nê anhĩpêêxà nê akatorxà japê htỳx tã kêr ka amã ixkĩnh tỳx o wa mẽ

hakrenh pa. Nē amā aprō nē akrajē japê htỳx tã kêr ka amā ixkĩnh tỳx o wa mẽ piitã mẽ hakrenh pa. Nē amā ixkĩnh tỳx o amā amnhĩ japê jakre. Kêr ka mẽ atō ixkôt amnhĩ xãm kaxyw nē ã amnhĩ nhĩpêx anê.

27 —Koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o mẽ apa xwỳnhjaja. Koja mẽ ixtã mẽ apar mã tã kêr ka mẽ amā ixkĩnh tỳx o mẽ umaj ixkaga hkêt nê. Kwãr mẽ mãmri tanhmã ixtã mẽ ato. Kot kaj mẽ nhỹrmã Tirtũm mẽ wa ixri axte amnhĩ xã kamã ajamak kêt nê atĩr tũm nê amex rãhã apa ho apa. Nom kot kaj mẽ ixkĩnhã jar pika ja kamã amā amex nê apa hprãm xàj ixkaga hãmri nê nhỹrmã wa ixri atĩr tũm nê apa hkêt nê. Anê.

Mẽ pahte amnhĩ kukamã pajamaxpêr mex ã mẽ pamã karõ

28 Nhũm Jejus arĩ mẽ kãm kapêr nê mẽ kãm:

—Kwa kêr ka mẽ ixkôt amnhĩ xunhwỳr kaxyw nê amnhĩ kukamã ajamaxpêr mex nê. Na htem amnhĩm òrkwỹ rũnh nhĩpêx kaxyw hãmri nê hkukamã hamaxpêr mex nê. Nê kaxyw krax mã kuhê xã hkukamã hamaxpêr. Nê kaxyw kỳx pê kãm hikwỹ xàja kukamã hamaxpêr. Nê òkwaêja kukamã hamaxpêr. Nê hã pòja kukamã hamaxpêr. ã na htem amnhĩm òrkwỹ rũnh nhĩpêx kaxyw hkukamã hamaxpêr mex anê. 29 Nom kot kaj mẽ hkukamã ajamaxpêr mex kêt nê ãm kaxyw pĩ ho grêre nê hakà. Rỳ ra hã axàpênh rax kurê ra amā ho anhỹr kaga nê hkaga hpa nê hatur xàm mēnh kêt nê. Hãmri nhũm mẽ hkwỳjaja hãnh mra nê omu nê atã hpêr o axkê. 30 Nê axpên mã ri ajarēnh o: “E ga mẽ ixkre mũj pumu. Na pre hipêx xwỳnhja hkurê kãm kaga nê hipêx par kêt nê.” Anhỹr o axpên mã ajarē. Ja pyrã nê kêr ka mẽ ixkôt amnhĩ xunhwỳr kaxyw nê amnhĩ kukamã ajamaxpêr mex nê. Nê ajamaxpêr o: “Nã mẽ kot Jejus ã tanhmã ixto htỳx tã kot paj hkaga hkêt nê. Kot paj hkôt amnhĩ nhĩpêx rãhã ho ri ixpa.” Anhỹr o amnhĩ kukamã ajamaxpêr. Hãmri nê rĩ kormã ixkôt amnhĩ xãm. No kot ka mẽ umaj ixkaga hkukamã ajamaxpêr hãmri nê ixkôt amnhĩ xãm kêt kurê kumrêx.

31 —Nê koja krĩ hõ kamã pahihti nhõ pòristi xohtô nê. Nê kutã nhãm krĩ hõ kamã pahihti nhõ pòristija grêre. Tã nhũm wa hpijapu kaxyw nhũm krĩ hõ rũm pahihti nhõ pòristi xohtôja mẽ grêreta wỳr mra. Hãmri nhũm kutã krĩ hõ kamã mẽ ò pòristi grêre nhõ pahi nhỹ nê tee ri mẽ amnhĩ kukamã hamaxpêr nê hamaxpêr o: “Kwa koja apu krĩ hõ rũm pòristi xohtô raxja nhũm inhõ pòristi grêreja mẽ axpên kutã kuhê nê axpu nhũm mẽ inhnê mẽ himex. Nã inhõ pòristi grêre kênã.” Anhỹr o hamaxpêr.

32 —Hãmri nê pahi hõta wỳr ò kòwenatò mẽ. Kormã krĩ hõ rũm mẽ hohtôtaja mẽ htêp kêt nhũm mẽ kutã kumê nhũm ma mẽ kutã tẽ. Hãmri nê awry hã mẽ hkaxpa nê mẽ ò pahihti mã kãm: “E na mẽ inhõ pahihti akutã inhmẽ pa tẽ. Na inhmã: ‘Ma tẽ nê mẽ kãm awjarê. Kot puj pêr mẽ papijapu hkêt nê. Kwarĩ. Kot puj mẽ tãm axpên xunhwỳ.’ Anhỹr o kapêr nê mẽ akutã inhmẽ pa tẽ.” ã mẽ ujarēnh kot anhỹr. Ja pyrã nê na htem mẽmoj kukamã hamaxpêr mex nê rĩ kormã tanhmã amnhĩ nhĩpêx to.

33 —Tã kêr ka mẽ atō amā ixkôt amnhĩ xãm prãm hãmri nê pahita pyrã nê amnhĩ kukamã ajamaxpêr tỳx nê rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nê inhgryk ã te ate amā amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nê rĩ kormã ixkôt amnhĩ xãm. 34-35 No kot kaj mẽ amnhĩ kukamã ajamaxpêr kêt nê atỳx ri ixkôt amnhĩ xunhwỳr japêr. Hãmri nê mẽmo arĩgro hã mẽ kot ixtã tanhmã mẽ ato xwỳnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xã kamã mex. Na htem amnhĩm ho ò xành nê kuku. Nom koja mẽhõ kamã pika hkwy mẽ nê ho ahkà hãmri tanhmã kot mẽ ho nê akupỹm ho mex? ãm mẽ kot hkapĩr pix kaxyw koja mex. Ja pyrã nê kot ka mẽ atō ate inhmã tanhmã amnhĩ nhĩpêx to ho apa hã amnhĩ jarēnh tã gaa nê amā ixkôt amnhĩ nhĩpêx prãm nõkati. Hãmri nê ra te ate kaxwa punu kapĩr mã tãmta pyrãk. E kwa mẽ mẽmoj tã ixujarēnhja ma nê mẽ urãk nê amnhĩ kukamã ajamaxpêr mex nê. Anê.

15

ôwêhti pikunor jarênh *Matêwre 18.12-14*

¹ Tã nhũm mẽ kot pahihti mã hkwỳjê pê kàxpore hkwỳ jamỳnh xwỳnhjê mẽ mẽ kot amnhĩ tomnuj xwỳnhjaja Jejus kapêr mar kaxyw hwỳr mra. ² Hãmri nhũm Parijew nhõ xwỳnhjê mẽ mẽ kot Tĩrtũm kapêr tũm o mẽ ahkre xwỳnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mũjti axtem nê mẽ kot amnhĩ tomnuj xwỳnhjaja amnhĩ wỳr mẽ kuwỳ nê tũhã mẽ kutã apku. Kwa mẽ kot amnhĩ tomnuj xwỳnh kênã kot kêt mẽ kutã apkur o pa. Anê.

³ Hãmri nhũm Jejus amnhĩ tã mẽ kuma nê tanhmã mẽ kãm kapêr to. Nom hprĩ hã mẽ kãm kapêr kêt nê. Kê ãm amnhĩ tã kuxi nê mẽ kãm ôwêhti pikunor jarê nê mẽ kãm:

⁴ —Koja mēhõ õ ôwêhti xohtõ nê. Nê ma nhỹri hamãr o pa. Hãmri nhũm pyxire nê hkwỳ kaga nê ma nhỹhỹm ahte tẽ nê akunok. Hãmri nhũm õ dõnja ma kot akupỹm piitã o mõi kaxyw hkwỳ ho pikuprõnh pa hãmri nê tee ri hkwỳ kaêx ã pikunor xwỳnhhta japêr. Hãmri nê ma hkwỳ ho mõi nê nhỹri kure. Kot nhỹri kutêp apkur o ri pa kaxyw kure hãmri nê ma akupỹm pikunor xwỳnhhta japêr o tẽ. Hãmri nê hapêr ryy nê nhỹri hwỳr kato. ⁵ Nê omu nê hkĩnh tỳx nê. Hãmri nê amnhĩ kre hã kumẽ nê ma akupỹm hkwỳ hwỳr o tẽ. ⁶ Hãmri nê mẽ ãhkõ hã kumẽ nê hkĩnh nê hkrãmnhwỳjê ho akuprõ nê õrkwỹ htã mẽ õrkwỹ xwỳnhjê ho akuprõ nê mẽ kãm: “Kwa na pre ixpê ixkriita õ akunok. Pa pre hapêr kãm ixihitỳx nê kãm ixkato nê omu nê ixkĩnh nê. Jakamã kwa wem mããnên inhỹ hã akĩnh.” Anê.

—Ã mẽ ujarênh kot anhỹr. ⁷ Ja pyrã nê koja mẽ kot amnhĩ tomnuj tỳx xwỳnhjê hõ tee ri amnhĩ pumu nê kot amnhĩ tomnuj kaga nê Tĩrtũm kõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh tỳx nê. Te ho my kot ôwêhti hpikunor xwỳnh mã kator nê hkĩnh tỳxta pyrãk. Na hte Tĩrtũm tãm mẽ kot amnhĩ nhĩpêx o mẽ pa xwỳnhjê pumu nê hkĩnh nê. Tã koja mēhõ kot amnhĩ tomnuj tỳx tã ã amnhĩ nhĩpêx anhỹrja kaga nê Tĩrtũm kõt amnhĩ

xãm hãmri nhũm amnhĩ tã omu nê hkĩnh tỳx nê. Jakamã na pa hte mẽ akurom ã mẽ kot amnhĩ tomnuj xwỳnhjê hkõt Tĩrtũm kapêr o mẽ ahkre rãhã ho ri ixpa. Anê.

Nhũm pre ã Jejus mẽ kot tanhmã ho kapêr punuj to xwỳnhjê mã amnhĩ jarênh anê.

Kàxpore pikunor jarênh

⁸ Nhũm Jejus arĩ mẽ kãm awjarê nê mẽ kãm:

—Nê ja. Koja mēhõ ni hikàxpore kêp 10. ãpênh o arĩgro pê 10 pãnhã kàxpore kêp 10. Tã ho pyxi nê ho akunok. Hãmri nê tee ri hapêr nê hkaprĩ nê. Hãmri nê kanê hpõk nê hitom kapõnh pê hprĩ hã hapêr o ri pa nê kãm kato. ⁹ Hãmri nê kupy nê hkĩnh nê hkrãmnhwỳjê ho akuprõ nê õrkwỹ htã mẽ õrkwỹ xwỳnhjê ho akuprõ nê mẽ kãm amnhĩ jarê nê mẽ kãm: “Xê na pre ixpê ixkàxpore hõta akunok pa tee ri hapêr tã akupỹm kãm ixkato nê kupy nê ixkĩnh nê. Jakamã xê wem inhỹ hã mããnên akĩnh.” ã mẽ ujarênh kot anhỹr.

¹⁰ —Ja pyrã nê koja mẽ kot amnhĩ tomnuj xwỳnhjê hõ pyxire nê amnhĩ tomnuj kaga nê ixkõt amnhĩ xãm. Hãmri nhũm kaxkwa kamã mẽ piitã ja hã omu nê hkĩnh nê. Te mēhõ ni kot kàxpore pikunor xwỳnh mã kator nê hkĩnhhta pyrãk. Anê.

Mẽ hkra pikunor jarênh

¹¹ Nhũm Jejus arĩ mẽ ahkre ho xa. Tĩrtũm kãm mẽ piitã mẽ hapê htỳx ã mẽ ahkre ho xa. No kê ãm hã kuxi nê kê we tanhmã mẽ kãm ujarênh to nê mẽ kãm:

—Nê koja mēhõ hkra my wa axkrut. ¹² Hãmri nhũm kot hapu õ papaj wỳr tẽ nê kãm: “E papaj. Ot pa awỳr tẽ. Kot kaj nhỹrmã ty pa wa amỳr pê akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptãr kurê kumrêx nã?” Anê. Hãmri nhũm kuma nê wa kãm hikukrêx o axkjê. Kot wa mã hkwỳ gõ nê kot hapu mã hkwỳ gõ. ¹³ Hãmri nhũm kot haputa ãm ri hipêêxã hkõt pa hkrãnre hãmri nê kot kãm hikukrêx nhõr jamỳnh pa nê ma nhỹhỹm o mõi nê ho wẽnê hpa. Hãmri nê hpãnhã kàxpore jamỳ nê ma nhỹhỹm mõi. Nhỹhỹm awry hã pika hõ hwỳr ma mõi. Mõi hãmri nê krĩ hõ kamã htỳx ri tanhmã amnhĩ tomnuj to ho ri pa. Hãmri nê gaa nê

ra mẽ hkuprÿjê hã kàxpore ho hapêx pa. Nê kagôxyhti hã ho hapêx pa. Nê gaa hãmri nê hikàxpore hkêt nê ri pa.

¹⁴ —Rôm nhũm pikaja kamã mẽ hã na wrÿk kêt ry rax nê. Nê gaa nhũm mẽ hpur kãm mẽ kêp mẽ apkur xà hã mẽõja hapêx pa. Jakamã nhũm mẽ hkra kot haputa kêp amrakati nê kãm prãm tÿx nê ri pa. Hãmri nê tee ri amnhĩ kukamã hamaxpêr.
¹⁵ Hãmri nê amnhĩ to krĩ nhõ xwÿnhjê mar o ri pa. Kot mẽ kãm tanhmã àpênh to nê hpãnhã apkur kaxyw. Hãmri nhũm mẽhõ kot kãm hkrit hagrô jamãr kaxyw hã kumê nhũm ma hwÿr tẽ nê kãm hamãr o pa. Nom kot kãm hamãr o pata pãnhã ãm kãm mẽmoj nhõr kryre nhũm arĩ kãm prãm tÿx kumrêx.

¹⁶ Nê tee ri kot hagrô kutã òta kur prãm nê tee ri omunh o pa. ¹⁷ —Nê gaa hãmri nê tanhmã hamaxpêr to. Nê tee ri kot tanhmã amnhĩ tomnuj toja ã amnhĩ pumu nê hamaxpêr o: “Hêxta waa nê. Mãn mÿtar inhõ krĩ kamã inhõ papaj mã mẽ àpênh xwÿnhjaja ixrom apkur mex o pa. àpkur mex nê nhũm mẽõ jakrêx prãr rÿnh tã pa jar mẽ hkĩnhã prãm xàj ra ixtÿk o mõ.
¹⁸ Nà kot paj ma akupÿm mõ. Hãmri nê inhõ papaj pumu nê ã kãm amnhĩ jarênh anê nê kãm: ‘Kwa Papaj. Na pa pre ixpê akra hã amnhĩ tomnuj tÿx kumrêx nhũm ja apê omnuj nê. Nhũm Tirtũm pẽ ja omnuj nê. ¹⁹ Jakamã na pa ixpê akra hã amã amnhĩ jarênh ã ixpijaàm nê. Ixte tãm kêt kumrêx. Jakamã kwa xà kot pa amã mẽmoj tã ixàpênh o ri ixpa ka hpãnhã inhmã inhõ pa apku nà?’ Anhÿr o kot pa kãm amnhĩ jarê. Nà kot paj anê.”

²⁰ —Anhÿr o amnhĩ kukamã hamaxpêr hãmri nê ma akupÿm mõ. Mõõ nê ra hpôx o mõ. Nê kormã amÿm mõi ri nhũm õ papaj hwÿr rÿt nê omu nê amnhĩ kra hã omunh kurê kumrêx nê hkĩnh nê ma kutã hprôt nê tẽ. Omu nê kãm hkaprĩ nê. Nê hwÿr hprôt nê hkaxpa nê kahti hkôt kumÿ. ²¹ Hãmri nhũm kãm amnhĩ jarê nê kãm: “Kwa papaj. Na pa pre amnhĩ tomnuj nê nhũm ja apê omnuj nê. Nê Tirtũm pẽ ja omnuj nê. Jakamã ixte ixpê akra hã amã amnhĩ jarênh ã ixpijaàm. Ixte tãm kêt kumrêx.” Anê. ²² Nom kormã kãm amnhĩ jarênh par kêt ri nhũm hipêêxà kãm mẽ àpênh xwÿnhjê

mã akir nê mẽ kãm: “E kwa mẽ atõ ma tẽ nê kãm ê mex õ py nê akupÿn ixkrata wÿr ho aprôt nê kãm haxà. Nê hpar kà nê ìhkra kamã kàx nê amnê kãm hamÿ nê ho aprôt.
²³ Nê akupÿm aprôt nê mõi kra htwÿm mexta õ pumu nê unê nê apĩ. Nê mẽ ho anê pu mẽ ixkra hã pahkĩnh nê apku. E mẽ amnhĩ prêprêk nê tokÿx ã amnhĩ nhĩpêx anê. ²⁴ Na pre ma ixpê mõi o te ixpê htyk pyræk. Tã akupÿn mõ nê ixwÿr põi nê te akupÿm inhmã htĩr pyræk. Jakamã e mẽ tokÿj.” Anhÿr jakamã nhũm mẽ hã mõi kra pĩ nê ho anê nê hkĩnh nê hã apkur o hkrĩ.

²⁵ —Rôm nhũm hkra kot wata kormã pur kãm htÿx àpênh o xa. àpênh o ãm tã akupÿn hpôx o tẽ. Hãmri nê amnhĩ kukamã mẽ kot ri mẽmoj tatak nê mẽ grer ma. ²⁶ Hãmri nê tee ri hamaxpêr o tẽ nê òrkwÿ hwÿr põi nê kormã kapem xa nê mẽ hã mẽ àpênh xwÿnhjê hõ kukja nê kãm: “Kwa mẽmoj tã na ka wem ã akĩnh rax anê?” ²⁷ Anê nhũm kãm: “Nà mẽhõ hkêt. Atõ na akupÿn põi nhũm anhĩpêêxà omu nê hkĩnh tÿx nê. Nê mẽ inhmã anê pa mẽ hã mõi kra htwÿm mexja pĩ nê hã ho anê nê hã ixkĩnh nê hkur o ixkrĩ.” Anê. ²⁸ Hãmri nhũm tee ri htõ jarênh ma nê gryk tÿx nê. Hãmri nê gryk xàj kapem hkuk punuj o mẽ omunh o xa nê mẽ hwÿr àr kêt nê. Hãmri nhũm hipêêxàja tee ri omu nê hwÿr kato nê tee ri kot mẽ hwÿr ho àr kaxyw ho anhÿr kaprÿ. ²⁹ Hãmri nhũm kãm: “Tk. Kwa na pa hte amã ixàpênh rÿnh rãhã ho ri ixpa hã ra ixtã amgrà xohtõ nê. Nê aa akapêr nhĩrôp tanhmã ixãm to hkêt. Tã ka hte ixpumunh nê akĩnh nê ixtã mẽmoj tõi pĩr kêt nê. ³⁰ Tã nhũm akra kot haputa apê akukrêx kwÿ jamÿnh pa nê ma o mõ nê axtem nê mẽ hkuprÿjê mã òr par tã akupÿn mõ nê põi. Ka omu nê akĩnh nê hã mõi kra twÿmta pĩ. Nà kot paj mẽ awÿr ixàr kêt nê.” Anê.

—Hãmri nê gryk tÿx nê xa. ³¹ Hãmri nhũm õ papaj tee ri kuma nê kãm: “Kwa nà ri ã akapêr anhÿr kêt nê. Inhmã ajapê kênã. Na ka hte ixkôt apa ho apa rãhã nê. Nê ixkukrêx piitã kêp anhõõ. ³² No atõja na pre te ixpê htyk pyræk tã arĩ htĩr. Nê te pikunor pyræk tã te ra akupÿm kator pyræk jakamã na pa omu nê ixkĩnh nê. Nê inhmã hapê ho te mãânên inhmã ajapê pyræk.” Anê.

—Ã mẽ ujarênh kot anhÿr. Ja pyrã nê

koja mēhō te kot amnhī tomnuj tỳx o ri pa htā amnhī kaxyw Tirtūm mā hamaxpēr nē amnhī to kuwỳ nē hkōt amnhī xām. Hāmri nhūm amnhī tā omu nē hkīnh nē. Nē kām hprām nē. No mē kajaja. Mē apē Parijew nhō xwỳnhjē mē Tirtūm kapēr tūm o mē ahkre xwỳnhjaja. Na ka htem mē kot amnhī tomnuj xwỳnhjaja kot Tirtūm kapēr mar o kuhē hā mē omu nē Tirtūm kīnhā akīnh kēt nē. Nē te hkra kot wata jamaxpēr pyrāk o ajamaxpēr nē tee ri ja hā mē omu nē mē kamā agryk nē. Nē mē amā mē hprām nōkati. Anē.

16

Mē panhōxy nē Jejus kot mē pamā karō

¹ Tā nhūm kē Jejus axte hkōt ri mē pa ho mē pa xwỳnhjē jahkre. No ām mēmoj tā kuxi nē mē kām tanhmā ujarēnh to nē mē kām:

—Nà koja mēhō hikàxpore rax xwỳnhja kām àpēnh xwỳnh mā mēmoj to wēnē ho pa kaxyw ām. No nhūm kām ho mex kēt nē. Axtem nē kēp amarī mē kām mēmoj to fiat par o mō. Hāmri nhūm ra mēhō kot ā amnhī nhīpēx anhỹr ā omu nē ma ò patrāw wỳr tē nē kām harē. ² Hāmri nhūm tee ri harēnh ma nē amnhī wỳr hā karō. Hāmri nhūm hwỳr tē nē axà nhūm kām: “Pa. Kwa xà ām hāmri na mē inhmā ajarē? Kwa nà mon ka ri axtem nē ā ixpē inhō mēmoj nhīpēx anē? E inhmā ate mē kām ho fiat par xwỳnhjē nhīxi hā kagà nē inhmā agō hāmri nē ma tē. Kot ka axte inhmā axàpēnh kēt nē rī amnhī pumu.” Anē.

³ —Hāmri nhūm kuma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj amnhī to? Ixihtỳxre hā kot pa mēhō mā pur ā apē. Nom inhmā amarī ri ixàhwỳr o ri ixpa hprām kēt. Ixte amnhī kuk ā xpijaām.” Anē. ⁴ Hāmri nē tanhmā amnhī kukamā hamaxpēr to nē hamaxpēr o: “Nà kot paj amnhī wỳr ixte mē kām ho fiat xwỳnhjē hā karō. Nē mē kām mē ò kōōta ahpar mā hkamē kē mē ām inhō patrāw mā hkwỳ pix gō. Kēr kē mē amnhī tā ixpumu nē kām ixkīnh nē. Hāmri nē inhō patrāw kot ixkaga hā ixtā harēnh ma nē ixkamā ukapri japēr. Hāmri nē amnhī wỳr ixwỳ pa ahpỳnhā mē kutā

ixàpkur o ri ixpa nhūm prām ixpīr kēt nē. Nà kot paj anē.” Anē.

⁵ Hāmri nē amnhī wỳr mē hā karō nhūm mē hwỳr mra. Nhūm mē omu nē ja mā kām: “E tanhmā na ka pre inhō patrāw pē mēmoj to fiat to? E inhmā harē.” Anē. ⁶ Hāmri nhūm kām: “Na pa pre kēp orti hā à ho 100 nē ho fiat. Ota hā kagàta. Tā pa kormā kām amnhīrer kēt nē.” Anē nhūm kuma nē kām: “Tōe ka inhma. Kot paj amā anhō kōt o gri ka ām kām ho 50 pix nē agō pa ixte anhō kōt ho ijapēx par pyrāk o anhīpēx.” Anē. ⁷ Hāmri nē hpānhā nhām ja mā kām: “No ka. Tanhmā na ka pre kēp mēmoj to fiat to?” Anē nhūm kām: “Na pa pre kēp pāy hā xak o 1.000 nē ho fiat. Tā pa kormā hpānhā kām amnhīrer kēt nē.” Anē nhūm kām: “Tōe. Kot paj hāmri amā anhō kōt o gri ka ām kām ho 800 pix nē agō pa ixte anhō kōt ho ijapēx par pyrāk o anhīpēx.” Anē. Nhūm ā mē hipēx anē. Hāmri nē hamaxpēr o: “E. Na pa mē kām mē ò kōt o hkry pa. Kōja mē amnhī tā kām ixkīnh japēr.” Anē.

⁸ —Hāmri nhūm ò patrāwja ā kot mē hipēx anhỹr ā harēnh ma nē kām: “Tk. Kwa ate pa ixkukamā ajamaxpēr nē inhmā mēmoj to anhỹr mex kēt tā ka amnhī kukamā ajamaxpēr mex pē ā mē hipēx mex anē.” Anē. Ā mē ujarēnh kot anhỹr. Anē.

Nhūm pre ā Jejus mē kām ujarēnh anē. Hāmri nē mē kām:

—Tā ja pyrā nē na hte mē kot Tirtūm kōt amnhī xunhwỳr kēt xwỳnhjaja ām amnhī pix kukamā hamaxpēr mex o pa. Jao amnhī kaxyw pix mā mē piitā tanhmā mē ho mex to ho pa. Mē kot amnhī tā mē omunh nē mē kām mē hkīnh nē amnhī xwar tanhmā mē ho mex to kaxyw nhūm htem ā amnhī nhīpēx anhỹr o pa. Tā mē ate ixkōt amnhī xunhwỳr xwỳnhjaja. Tirtūm kot tanhmā mē ate amnhī kwỳjē ho mex to hā amnhīm mē ajarēnh kaxyw kēr ka mē amnhī mē mē piitā mē hkukamā ajamaxpēr mex nē. Pē tanhmā mē ho mex to ho ri apa. Ā mē ate amnhī nhīpēx anhỹrja na mex. Nom kormā mē ate ā amnhī nhīpēx anhỹr kēt.

⁹ —Hēxta waa nē. Mon ka htem mē urāk nē ā axpēn to mex anhỹr kēt nē? Kwa mē àpēnh xwỳnhhta kot amnhī nhīpēx pyrā nē tanhmā axpēn to mex to o ri apa hkēt wehe.

Jao akukrêx nê akàxpore ho anhôxý hkêt nê. Kêr ka nhÿrmã ty nê Tirtûm wÿr api nhÿm ja hã mẽ ato mex rax nê. Te ho kot ô patrãw mã àpênh xwÿnhhta kot tanhmã mẽ ho mex to xwÿnhjê hwÿr mrar nhÿm mẽ kot amnhÿ xwar tanhmã ho mex tota pyræk.

¹⁰⁻¹¹ —Na hte Tirtûm tanhmã mẽ pakute hã mẽ pahpumunh mex nê. Koja mẽ amã mẽmoj gô ka mẽ kãm hprãm xà hkôt ho anhôxý hkêt nhÿm ja hã mẽ apumu nê axte mẽ amã mẽmoj gô. Nom hpãnhã mẽ amã ôr rax o wamta jakre nê kugô. Nom kot ka mẽ ri mẽmojta o anhôxý ho ri apa nhÿm tee ri ja hã mẽ apumu nê axte mẽ amã mẽmoj nhôr kêt nê. Koja mẽ amã mẽmoj gô ka mẽ ho anhôxý ho ri apa nhÿm ja kêp homnuj nê.

¹² —Nê kot kaj mẽ jar Tirtûm kot mẽ amã mẽmoj nhôr xwÿnhja ho anhôxý ho ri apa. Hã koja nhÿrmã kaxkwa kamã mẽ amã mẽmoj mex nhôr kêt nê.

¹³ —Nê kot kaj apyxi nê anhô patrãw hamêxkrut nê arÿgro pyxi hã hamê wa kãm axàpênh o amÿkry hkêt nê. Kot kaj anê nê hõ gryk ã hõ kaga. Ja pyrã nê kot kaj mẽ jar pika ja kamã akàxpore nê akukrêx pix kukamã ajamaxpêr o ri apa hã kot kaj mẽ amã hapê htÿx nê mẽ kêp ho anhôxý ho ri apa. Nê akukrêx rax gryk ã Tirtûm kãm hprãm xà hkôt akukrêx o tanhmã axpênh to ajuta hto ho ri apa hkêt nê. Ja pymaj kwa kêr ka mẽ ãm Tirtûm pix mã mãn ajamaxpêr rãhã ho ri apa. Jao te akukrêx nê akàxpore mã axãmnhÿx ri anhÿhkra karo ho ri apa pyræk. Anê.

Nhÿm pre ã Jejus mẽ ahkre anê. ¹⁴ Hãmri nhÿm Parijew nhô xwÿnhjaja mar o kuhê. Na prem ra mẽ hikàxpore rax gryk ã Jejus kaga. Jakamã ã kot mẽ kãm kàxpore jarênh anhÿrja ma nhÿm ja mẽ kêp omnuj nê nhÿm mẽ hã hpêr o pikênh o kuhê. ¹⁵ Hãmri nhÿm amnhÿ tã mẽ kuma nê mẽ kãm:

—Nà na ka htem te mẽ ate tãm mẽ kot amnhÿ nhÿpêx xwÿnh pyræk o amnhÿ nhÿpêx nom ri mẽ kãm amnhÿ to axêx o ri apa. No nhÿm Tirtûmja kot tanhmã mẽ ate amnhÿ nhÿpêx to nê tanhmã mẽ ajamaxpêr to hkôt mẽ apumunh par. Nê hprÿ hã mẽ anhôxý hã mẽ apumu. Te mẽ ate tãm amnhÿ nhÿpêx pyræk nom mẽ anhôxý kamã na ka htem apa. Mẽmoj te mex pyræk nhÿm htem omu

nê mex ã hkamnhÿx. No nhÿm Tirtûm àhpumunh tÿx xà hkôt hprÿ hã mẽmojta pumu nhÿm kêp omnuj nê. Mẽ akurom omnuj ã omunh kurê kumrêx. Na hte hprÿ hã mẽ ate amnhÿ nhÿpêx ã mẽ apumu. Anê.

Tirtûm kapêr aa hapêx kêt ã harênh

Matêwre 5.17-18

¹⁶ Nhÿm Jejus arÿ mẽ ahkre nê mẽ kãm:

—Nê na pre finat Mojesja kumrêx mẽ kãm Tirtûm kapêr kwÿ hã kagà. Tã nhÿm hpãnhã Tirtûm nhÿ hã kapêr jarênh xwÿnh kwÿjaja mãânênh mẽ kãm hkwÿ hã kagà. Nhÿm prem kuma nê mẽ hkôt amnhÿ nhÿpêx o ri pa. Tã nhÿm finat Juãw Paxisja mẽ hpãnhã kato nê Tirtûm kapêr o mẽ ahkre ho ri pa. Tã pa hpãnhã ho mẽ ajahkre ho ri ixpa nhÿm mẽ ohtô nê ixkôt amnhÿ xunhwÿ nê kãm ixkapêr kôt pix mã amnhÿ nhÿpêx o ri pa hprãm nê.

¹⁷ —Tirtûm kapêr tùmja mex o mex. Koja aa hapêx kêt nê. Koja nhÿrmã kaxkwa nê pika wa hapêx pa no nhÿm Tirtûm kapêr tùmja aa hapêx kêt nê. Koja rãhã ho rãhã nê aa ihkjê ho mênh kêt nê. Anê.

Mẽ pahte axpênh kaga hkêt ã mẽ pamã karô

Matêwre 5.31-32, 19.9-12; Makre 10.2-12

¹⁸ Nhÿm Jejus arÿ mẽ ahkre nê mẽ kãm:

—Nê kêr ka mẽ aprô kaga hkêt nê apa. Kot kaj mẽ hkaga nê hpãnhã nhãm hõ ho aprô nhÿm Tirtûm noo mã te ate wam aprô kamã nhãm ho amnhÿkati pyræk. Nhÿm ja kêp omnuj nê. Rÿ ka ra mêmô kot hprô kaga xwÿnhhta ka hpãnhã ho aprô. Nhÿm Tirtûm noo mã te ate wam mjên pê ho amnhÿkati pyræk. Nhÿm Tirtûm pê ja omnuj nê. Anê.

Hikàxpore rax xwÿnh mẽ kêp amrakati xwÿnh wa harênh

Rukre 6.20-26

¹⁹ Nhÿm Jejus arÿ mẽ ahkre kamã mẽ kãm awjarê nê mẽ kãm:

—Koja mêmô kàxpore rax xwÿnh ê mex pix kãm ri pa. Nê apkati mẽ apkur mex o pa. ²⁰ Nhÿm amrakati xwÿnh pê Rajareja hkà nhyre nê arÿ pry kamã àhwÿr o hkrÿ. Nhÿm htem hamÿ nê ma o pa nê hikàxpore rax xwÿnh nhôrkwÿ jakwakrem haxwÿ. ²¹ Nhÿm ô jakrêx kwÿ hkrêr prãm xàj hakwa krem àhwÿr o hkrÿ. Nhÿm rop hwÿr mra nê hkà nhy kunhnwÿnh o kuhê.

22 —Tã nhũm Rajare ty nhũm Tirtũm kapër o mẽ wryk xwỳnhjaja hwỳr wry nẽ ma akupỳm kaxkwa hwỳr hkarõ ho mõ nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

—Tã nhũm hikàxpore rax xwỳnhhta mãănẽn hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà. 23 Hãmri nhũm hkarõ ma mẽ kot amnhĩ xà htỳx kamã hamak tũm xà pẽ kuwy maatita wỳr ma mõ. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kànhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ. 24 Hãmri nhũm tee ri wa omu nẽ Apraãw mã akapër nẽ kãm: “Kwa Apraãw. Kwa we ixkamã axukapri nẽ ixwỳr Rajare mẽ kê ixwỳr tẽ nẽ ihkrakrã ho gõ htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrẽx.” Anẽ. 25 Hãmri nhũm kuma nẽ kãm: “Tk. Nà kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa. 26 Nẽ pahkaêx kãm ahkapry griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mẽ ixwỳr rê?” Anẽ.

27 —Nhũm ã kãm kapër anẽ nhũm tee ri kuma nẽ kãm: “Kwa tô ma inhõ krĩ hwỳr mãn amẽ kê ma ixkwỳjê hwỳr wry. 28 O mũj arĩ inhõ krĩ kamã ixtõ kệp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwỳr pa pymaj tokyx amnhĩ tomnuj kaga nẽ Tirtũm kõt mãn amnhĩ xunhwỳ nẽ hkõt ri amnhĩ nhĩpêx o pa.” Anẽ.

29 —Hãmri nhũm Apraãw kãm: “Nà pa mẽ hwỳr mẽnh kêt nẽ. Ra mẽ kuri Tirtũm kapër jarẽn h xwỳnhjê mẽ Mojes kot Tirtũm kapër ã kagà kẽnã. Kê mẽ kamã harẽ nẽ ja ma nẽ rĩ tãm tanhmã amnhĩ nhĩpêx to.” Anẽ. 30 Hãmri nhũm tee ri kuma nẽ kãm: “Kwa nà. Koja mẽ kagàja mar kêt nẽ. No kêt Rajare na pre ra htyk tã akupỳm htĩr jakamã koja mẽ hwỳr wry nẽ mẽ kãm awjarẽ nhũm mẽ akupỳm htĩr ã omu nẽ kapër ma hãmri nẽ amnhĩ tomnuj kaga kurẽ kumrẽx. Kwa

nà ã ri anhỹr kêt nẽ mẽ hwỳr amẽ hẽxta waa nẽ.” Anẽ.

31 —No nhũm kãm: “Nà koja mẽ Tirtũm kapër ã kagà mar kêt ã koja mẽ mãănẽn Rajare tyk nẽ akupỳm htĩr nẽ mẽ hwỳr wryk nẽ kot mẽ kãm tanhmã ujarẽn h to hã mar kêt nẽ. Jakamã kwarĩ pa mẽ hwỳr mẽnh kêt nẽ. Kot paj ho anẽ nẽ ãm ixte mẽ hwỳr mẽnh kapry pyrãk o amnhĩ nhĩpêx.” Anẽ. ã mẽ ujarẽn h kot anhỹr. Anẽ.

17

Mẽ kot Jejus nẽ mẽ no kupyř ã mẽ harẽn h
Matêwre 18.6; Makre 9.42; mãănẽn
Rõmãn 1.32; Sikũn Pêtre 2.1, 2.18

1-2 Tã nhũm Jejus hkõt mẽ pa ho mẽ pa xwỳnhjê jahkre ho nhỹ nẽ mẽ kãm:

—E kot paj mẽ kot ixkõt amnhĩ xunhwỳr tohtuj anhỹr xwỳnhjê jarẽ ka mẽ inhma. Nà koja mẽhõ mẽ hwỳr tẽ nẽ inhnẽ mẽ kãm kapër. Mẽ kot mẽ mar nẽ amnhĩ tomnuj prãm xaj tanhmã mẽ kãm kapër to. Hãmri nhũm mẽ mar xà hkõt tanhmã amnhĩ tomnuj to. Hã koja Tirtũm ja hã omu nẽ kot inhnẽ tanhmã kãm nẽ xwỳnhhta pumu nẽ ja hã homnuj tỳx nẽ. Te mẽ kot mẽhõ pynẽn h nẽ mut ã kẽn pytĩ hõ nhõr nẽ ma o htẽm nẽ gõ rax kãm mẽnh pyrãk o koja hipêx. Te ho ja pyrãk no ãm homnuj tỳx o ja jakre. Jakamã kwa mẽ ixkapër ma nẽ kãm ajamãxpër tỳx rãhã ho ri apa. Anẽ.

Mẽ pahte amnhĩ tã tanhmã mẽhõ hto
hkõt ã mẽ pamã karõ

Matêwre 18.21; Makre 11.25-26; mãănẽn
Epes 4.32; Korosẽ 3.13

3 Nhũm Jejus arĩ mẽ ahkre nẽ mẽ kãm:

—Nẽ koja ixkõt atõjê hõ tanhmã atomnuj to. Ka amnhĩ tã omu hãmri nẽ ma hwỳr tẽ nẽ ja hã kãm akapër nẽ kãm: “Kwa mon ka axtem nẽ ri ã inhĩpêx anẽ ixtõ? Kwa nà ri ã inhĩpêx anhỹr kêt nẽ.” Anẽ hãmri nhũm amnhĩ tã ama nẽ amã: “Nà na pa tee ri ixte tanhmã atota ã amnhĩ pumu nẽ ixkapri nẽ. Nà kot paj axte ã ri anhĩpêx anhỹr kêt nẽ. Kwa kêr ka axte tanhmã ja mã ajamãxpër to hkõt nẽ. Te ate amnhĩ katut kõt mẽnh pyrãk o hipêx pu akupỳm tãm axpẽn nhĩpêx o papa.” Anẽ. Koja ã amã kapër anẽ ka amnhĩ tã ama hãmri nẽ axte tanhmã kot atoja mã ajamãxpër kêt nẽ.

4 —Koja arĩgro pyxi hã xatã tanhmã atomnuj to japêr. Hãmri nê xatã tee ri ja hã amnhĩ pumu nê awÿr mra nê xatã amnhĩ tã amã kapêr nê amã: “Pa ot pa awÿr tẽ. Na pa ra ixkaprĩ nê. Kwa ixte ã anhĩpêx anhÿrja pumu nê ãm omu. Kot paj axte hkêt nê.” Anhÿr o xatã amã kapêr. Nê ra axte tanhmã atomnuj to nê kê axte awÿr tẽ nê ã amnhĩ tã amã kapêr anê. Nom kêr ka ama nê kamã agryk kêt nê. ãm xatã kãm: “Nà kot puj anê nê akupÿm tãm axpên nhĩpêx. Kot paj axte tanhmã ate ixtota mã ijamaxpêr kêt nê. Kot puj ja ho pajapêx nê tãm axpên nhĩpêx o akupÿm papa.” Anhÿr o kêr ka mẽ xatã axpên nhĩpêx anhÿr rãhã ho ri apa nê aa jam anhÿrer kêt nê. Anê.

Mẽ pahte mẽmoj tã Tĩrtũm wÿr hã mẽ pajarênh

Matêwre 17.20-21, 21.21-22; Makre 11.23

5 Tã nhũm Jesus nhÿ hã mẽ ahkre ho mẽ pa xwÿnhjaja hãmri kãm:

—Kwa Pahihti. Tanhmã mẽ ixto pa mẽ amnhĩ kaxyw Tĩrtũm kôt ijamaxpêr tÿx rãhã ho ri ixpa. Anê.

6 Hãmri nhũm mẽ kãm:

—Nà ra mẽ ate amnhĩ kaxyw hkôt ajamaxpêr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na ka htem mẽmoj tã awÿ nhũm mẽ ate mẽmoj tã hwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “E amnhĩ jarê nê ma tẽ nê gô xujanãr kãm mãn mrõ.” Anê nhũm kot amar nê amar xà hkôt ã kot amnhĩ nhĩpêx anhÿrta pyrãk. Ja pyrã nê kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awÿ nhũm mẽ ama nê mẽ amã mẽmoj tanhmã ho. Rÿ mẽ amã mẽmoj gõ. Anê.

Te mẽ pahpê Tĩrtũm mã paxàpênh xwÿnh pyrãk

7 Nhũm Jesus arĩ mẽ ahkre nê mẽ kãm:

—Nê ja. Kot kaj mẽ amã mẽ àpênh xwÿnh kwÿjaja nhũm hõ amã mẽmoj tã àpênh o pa ã ho anhÿr pa. Hãmri tanhmã kot kaj kãm akapêr to wehe? Xà kot kaj kãm: “E hãmri axàpênhta kaga nê tẽ nê nhÿ nê apku.” Anhÿr o kãm akapêr? 8 Nà kot kaj kãm anhÿr kêt nê. Kot kaj kãm: “E kwa tokyx tẽ nê hpãnhã inhmã inhõ hã apê. Kot pa

ixàpkur pa ka ixpãnhã nhÿ nê apku.” Anhÿr kãm akapêr. Kêp amã àpênh xwÿnh jakamã ka ã kãm akapêr anê. 9 Ja pyrã nê kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrã nê kot tanhmã mẽ pamã karõ hto xà hkôt pu mẽ amnhĩ nhĩpêx.

—Xà na htem mẽ õ patrãw mã mẽmoj tã àpênh pa hãmri nê hkwyjê mã amnhĩ to jarkrar o ri pa nê mẽ kãm: “E ka mẽ ixpumu. Na pa hte inhõ patrãw mã ixàpênh mex o mẽ hakre ka mẽ ja hã ixpumu. Hêxta waa nê. Mon pa hte ri axtem ã amnhĩ nhĩpêx anê?” Anhÿr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhÿr kêt nê.

10 —Tã pa hte mẽ õ patrãwta pyrã nê tanhmã mẽ amã mẽmoj tã karõ hto ho ixpa. Jakamã kêr ka mẽ inhma nê ixte mẽ amã mẽmoj tã karõ xà hkôt tanhmã inhmã amnhĩ nhĩpêx to ho ri apa. Hãmri nê hã amnhĩ to jarkrar pê amnhĩ jarênh o: “ãm hãmri na pa ã Jesus mã amnhĩ nhĩpêx anê. Hêxta waa nê. Ixpê Jesus mã tanhmã ixte amnhĩ nhĩpêx to mex xwÿnh na pa.” Anhÿr o amnhĩ to jarkrar kêt nê. Kêt ãm amnhĩ jarênh o: “Nà ixte kãm tanhmã amnhĩ nhĩpêx to ho ixpa xwÿnh pix na pa. Na hte mẽmoj tã inhmã karõ pa kuma nê ÿ hã tanhmã kãm amnhĩ nhĩpêx to.” Anhÿr o amnhĩ jarênh o ri apa. No ri amnhĩ krã hkôt atÿx tanhmã amnhĩ to jarkrar to ho ri apa hkêt nê. Anê.

Jesus kot mẽ ho 10 nê akupÿm mẽ ho mex ã harênh

Matêwre 8.1-4

11 Tã nhũm Jesus arĩ Garirej rũm pika pê Samar hkàx ã Jerujarê hwÿr kormã mõ.

12 Nê nhÿri krĩ hõ htêp o mõr mẽ nhũm krĩ pu hã ri mẽ pa xwÿnhjaja kêp 10 nê kutã mra. Mẽ hkànhy hkro htÿx xwÿnhjaja kutã mra nê hkaxpa nê amÿm kuhê nê omu.

13 Hãmri nê kãm:

—Pa Pahihti. Kwa mẽ ixpumu nê mẽ ixkamã axukaprĩ nê tanhmã mẽ ixto mex to. Anê.

14 Hãmri nhũm mẽ kãm:

—Tõe. Nà kot paj mẽ ato mex. E mẽ mãmrĩ awjanã nê ma akupÿm mẽ anhõ

patrejê hwÿr mra kê mẽ akupÿm mẽ akà mex ã mẽ apumu. Anẽ.

Hãmri nhũm mẽ kuma nẽ kapër mar xà hkôt awjanã. Kà nhy rãhã awjanã nẽ ma akupÿm patre hwÿr mra. Nẽ kormã akupÿm hwÿr pry hã mrar rãhã piitã hkà mex pa. ¹⁵ Hãmri nhũm ãm pyxi nẽ hkwyjê rom awjanã nẽ akupÿm Jejus wÿr Tirtũm mã mex o mex ã harẽnh o hwÿr tẽ. ¹⁶ Hãmri nẽ Jejus kaxpa nẽ kutã hkõnkrã ho tẽm nẽ nhÿ nẽ amnhĩ tã kãm kot ho mex ã kãm amnhĩ jarẽ. Kwÿjê hkĩnhã kęp Ijaew kêt axtem kęp Samar nhõ xwÿnh tã mẽ kurom akupÿn hwÿr tẽ nẽ kãm mex o mex ã harẽ. ¹⁷⁻¹⁹ Hãmri nhũm amnhĩ tã kuma nẽ kãm:

—No mẽ akwÿjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupÿn ixwÿr tẽ. Akwÿjê hkĩnhã apê Ijaew kêt tã akupÿm amnhĩ mex ã amnhĩ pumu hãmri nẽ mẽ kurom awjanã nẽ Tirtũm mã mex o mex ã harẽnh o ixwÿr tẽ. Hêxta waa nẽ. Mo na hte ixkwÿjaja apyrã nẽ amnhĩ kaxyw ixkôt hamaxpër kêt nẽ? E kãnhmã xa nẽ mãmrĩ ma ajamakêtkati nẽ akĩnh nẽ ma akupÿm tẽ. Anẽ.

Jejus akupÿn wÿr xà hã arĩgro jarẽnh
Matêwre 24.23-24, 24.37-44; Makre
13.32-37; mãänën Wam Tesarõn 5.2-8; Sikũn
Pêtre 3.3-10

²⁰⁻²¹ Tã nhũm Parijew nhõ xwÿnh kwÿjaja Jejus wÿr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tirtũm tokyx kot mẽ pahwÿr mẽnh mã xwÿnhhta mẽ nhũm mẽ pahwÿr wrÿ nẽ mẽ pahto amnhĩptàr kurê kumrêx nã kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrà nẽ mẽ kãm:

—Nã ra kot mẽ ho amnhĩptàr o pa kênã. Nom nhÿri hkrĩ xà kamã mẽ ho amnhĩptàr o hkrĩ hkêt nẽ. Na htem amnhĩ kaxyw hkôt hamaxpër nẽ hkôt amnhĩ xunhwÿ hãmri nhũm kęp mẽ õ pahihtĩ hã mẽ ho amnhĩptàr o pa. Nẽ mẽ kãm mẽ hamaxpër mex gõ nhũm htem hkôt ri hamaxpër mex o pa. Anẽ.

²² Hãmri nẽ hpãnhã hkôt mẽ pa ho mẽ pa xwÿnhjê mã kapër. Mẽ kot nhÿrmã tee ri kamã hamak o pa hã mẽ kãm kapër nẽ mẽ kãm:

—Kot kaj mẽ nhÿrmã tee ri amã tokyx akupÿn ixwÿr nẽ ixte mẽ ato amnhĩptàr prãm xàj tee ri inhmã anojarêt kaprÿ ho ri apa. Nẽ axpën mã ri ijarẽnh o: “Hêxta waa nẽ. Mo na we Pahihtĩ tokyx akupÿn mẽ pahwÿr wÿr kêt nẽ?” Anhÿr o inhmã anojarêt o ri apa pê ixkamã ajamakrãhã ho apa.

²³ —Nẽ koja mẽ ra akupÿn ixwÿr ã tanhmã mẽ amã ixto hêx to ho pa. Nhÿri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nẽ ãm mẽ ama. ²⁴ Kot paj nhÿrmã akupÿn mẽ awÿr ixwÿr kaxyw nhũm mẽ pika piitã hkôt akupÿn ixwÿr kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. ²⁵ Nom kormã jar pika ja kamã ixpa ri koja mẽ ohtõ nẽ ixkaga pa amnhĩ xà htÿx kamã ijamak kãm ty. Hãmri nẽ mẽmo arĩgro hã ma akupÿm kaxkwa hwÿr api. Hãmri nẽ nhÿrmã akupÿn mẽ awÿr wrÿ.

²⁶ —Nã kot paj nhÿrmã man akupÿn mẽ awÿr wrÿ. Akupÿn ixwÿr xà hã arĩgrota ã koja jar pika ja kamã mẽ pa xwÿnhjaja htÿx ri tanhmã amnhĩ tomnuj to ho pa. Te amnepêm finat Nohti htĩr ri mẽ kot htÿx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa. ²⁷ Na prem amnhĩ kaxyw Tirtũm mã hamaxpër o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpër o ri paja o ãm kôt pix mã tanhmã ri amnhĩ nhĩpêx to ho pa. Rôm nhũm Nohti gô htãm pymaj pàr raxja nhĩpêx nẽ kãm axà. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpër to hkêt nẽ. Tã nhũm nata mẽ haêr pê wrÿ. Hãmri nẽ wÿr rax o ra pika piitã hanhi nhũm mẽ piitã pikaprãr pa.

²⁸ —Akupÿn ixwÿr xà hã arĩgrota ã koja mẽ mãänën te amnepêm Sotõ nhõ xwÿnhjaja kot htÿx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri mẽ kot htÿx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotõ nhõ xwÿnhjaja ãm pika ja kamã mẽ kot amnhĩ nhĩpêx pix kukamã hamaxpër o ri pa. Nẽ ãm kôt pix mã ri amnhĩ nhĩpêx o pa. Nẽ htÿx ri

amnhĩ xàpkur xà pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhĩm òrkwỹ nhĩpêx pix kukamã hamaxpêr. ã na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja o amnhĩ kaxyw Tĩrtũm mã hamaxpêr o pa hkêt nê.

²⁹ —Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỹnhjaja kot amnhĩ tomnuj tỹx o paja mýrapê mẽ himex pa. Jao kaxkwa rũm mẽ hipy mẽmo hpòk kwỹ rê nhũm mẽ hkaxàr pa. ³⁰ Tã akupỹn mẽ awỹr ixwrykja mẽ koja mẽ te Rohti nhõ krĩkamã mẽ kot amnhĩ nhĩpêx pyrã nê htỹx ri amnhĩ tomnuj pix o pa.

³¹ —Nê akupỹn ixwryyta ã ka mẽ anhòrkwỹ nhĩmòk ã hkrãmnhênh o akrĩ japêr nê akupỹn ixwryk kãm ixpumu. Hãmri nê akukrêx wỹr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỹn ixwryk kãm ixpumu. Hãmri nê akupỹm anhòrkwỹ hwỹr atêm mã ajamaxpêr kêt nê. Mo kaxyw kot ka kêt hwỹr tẽ? Kêt ãm inhmã mẽ ajapê hã akupỹn mẽ awỹr ixwryk mã ajamaxpêr o akĩnh nê ixpumunh o akuhê.

³² —Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kôt Sotõta wỹr rĩt hãmri nê ã amnhĩ nhĩpêx anhỹrja mýrapê htyk kurê kumrêx. Tã kêr ka mẽ ho urak nê amã akukrêx rax japê xàj ixkôt amõr kaxyw anhĩtõt kêt nê.

³³ —Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỹrmã ja piitã mẽ apê hapêx pa. Mẽ ate kãm anhĩhkra karo hpar pyrak o piitã hipêx hãmri nhũm Tĩrtũm ja hã mẽ apumu nê hpãnhã nhỹrmã mẽ amã mẽmoj mex nhõr rax nê.

³⁴ —Nê kot paj kamàt kãm akupỹn ixwryk japêr nhũm nhỹri mēhõ ra ixkôt amnhĩ xãm xwỹnh mẽ mēhõ kot ixkôt amnhĩ xãm kêt xwỹnh wa par kãm nõi japêr. Hãmri pa amnhĩ wỹr ra ixkôt kot amnhĩ xãm

xwỹnhta o api nhũm kot ixkôt amnhĩ xãm kêt xwỹnhta arĩ gõi nê nõ. ³⁵ Rỳ pa arĩgro hã akupỹn ixwryk japêr nhũm mēnijê hõ wa hamēxkrut nê harõi kahuk o ãm japêr. Hãmri pa ra kot ixkôt amnhĩ xãm xwỹnhja ho api nhũm kot ixkôt amnhĩ xãm kêt xwỹnhja ahte arĩ harõi kahuk o xa. Hãmri nê hamaxpêr mex kêt kumrêx o xa. ³⁶ Rỳ koja mẽmyjê hõ wa axkrut nê hpur kãm àpênh o ãm japêr. Pu pa amnhĩ wỹr kot ixkôt amnhĩ xãm xwỹnhta o api nhũm kot ixkôt amnhĩ xãm kêt xwỹnhta pur kãm ahte arĩ apênh o xa. Hãmri nê tee ri hkrãmnhwỹ hkukamã hamaxpêr o xa. Anê.

Nhũm pre ã Jejus hkôt mẽ pa ho mẽ pa xwỹnhjê mã amnhĩ jarênh anê. ³⁷ Hãmri nhũm mẽ kuma nê kãm:

—Kwa nhỹri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

—Nã koja nhỹri mẽmojja ã amnhĩ nhĩpêx anê ka mẽ omunh kurê kumrêx. Te nhỹri mẽmoj kro nê nõr nhũm nhõnhti kot omunh nê hã htor nê hpinhĩpanh nhũm mẽ kot hã omunh kurê kumrêxta pyrak. Anê.

18

Mẽ pahte Tĩrtũm mã amnhĩ jarênh rãhã ho papa hã mẽ pamã karõ

Rukre 11.5-8; mãânên Wam Tesarõn 5.17

¹ Tã nhũm Jejus hkôt mẽ pa ho mẽ pa xwỹnhjê mã mẽmoj tã karõ. Mẽ kot tanhmã Tĩrtũm mã amnhĩ jarênh to hã mẽ kãm karõ. Mẽ kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No ãm hã kuxi nê tanhmã mẽ kãm hã ujarênh to nê mẽ kãm:

² —Koja nhỹri krĩ hõ kamã juistija kãm Tĩrtũm prãm nõkati. Nê mãânên kãm amnhĩ kwỹjê hprãm nõkati htã kęp juisti nê tanhmã mẽ kãm kapêr to ho hkrĩ. ³ Jakamã nhũm mēhõ ni pē mjên htyk xwỹnh. Nhũm hte mēhõ xatã tanhmã kęp ò mẽmoj to ho pa. Hãmri nhũm tee ri amnhĩ tã omu nê xatã juistita wỹr mra nê kãm harê nê kãm: “Xê gài nê. Na hte pahkwỹjê hõja ixtomnuj rãhã ho pa. Xê ixtã tanhmã kãm akapêr to kē tãm inhĩpêx.” Anê. Nê xatã hwỹr mra nê amnhĩ to kuwỹ nê xatã hwỹr mra nê amnhĩ to kuwỹ. ⁴⁻⁵ No nhũm kuma nê ãm kuma. Kãm hkwyjê ho ajuta hprãm kêt

jakamã ãm kuma. Tã nhũm xatã hwÿr mra. Gaa nhũm rĩ kãm mar kaga nẽ. Hãmri nẽ hamaxpër o: “Tk. Hêxta waa nẽ. Jahti na hte xatã ixwÿr mra nẽ tanhmã inhmã amnhĩ jarẽnh to. Nẽ ãm xatã ixwÿr mra. Nà na pa ra inhmã mar kagyk nẽ. E pa tokyx tanhmã nẽ kot tanhmã ho xwÿnhta mã ixkapër to. Inhmã Tĩrtũm puma kamã rÿ inhmã ixkwÿjê kaprĩ kamã pa tanhmã nẽ kãm nẽ hkêt tã kot pa anhÿr kêt nhũm amnhĩ tã inhmã harẽnh pix nẽ pa ra mar kurê ixkrã tãtãk nẽ.” Anhÿr o hamaxpër. Æ mẽ ujarẽnh kot anhÿr.

⁶—Juisti tãm hamaxpër kêt tã nhũm nija xatã hwÿr mra nẽ amnhĩ to hwÿr jakamã nhũm jatã tanhmã ho ajuta hto. ⁷⁻⁸ No kêt Tĩrtũmja. Xàn ka htem mẽmoj tã awÿ nhũm juisti punutita pyrã nẽ mẽ ama nẽ ãm mẽ ama? Nà koja ã amnhĩ nhĩpêx anhÿr kêt nẽ. Kot ka mẽmoj tã kãm amnhĩ jarẽ nhũm ama nẽ tanhmã amã mẽmoj to rÿ tanhmã amã amnhĩ nhĩpêx to. Juistita rom mẽ pakamã ukaprĩ xwÿnh na. Tã kot paj nhÿrmã akupÿn wrÿ nẽ mẽ apumu ka mẽ arĩ amnhĩ kaxyw hkôt ajamaxpër mex pẽ kãm amnhĩ jarẽnh rãhã ho ri apa pa ja hã mẽ apumu nẽ ixkĩnh tÿx nẽ. Ja na inhmã hprãm. Anẽ.

Tanhmã mẽ kot Tĩrtũm mã amnhĩ jarẽnh to hã mẽ harẽnh

Matêwre 6.5-8; mããnẽn Wam Pêtre 5.5-6

⁹ Tã nhũm Jejus mẽ kot amnhĩ to mex o hkwyjê jakrenh ã amnhĩ to jarkrar o ri mẽ pa xwÿnhjê pumu nẽ tanhmã mẽ kãm kapër to. Nom mẽ kot amnhĩ to jarkrarta ã kuxi nẽ mẽ kãm awjarẽ nẽ mẽ kãm:

¹⁰—Koja mẽhõ wa hamêxkrut nẽ Tĩrtũm mã amnhĩ jarẽnh kaxyw wa tẽ. Ja kêt Parijew nhõ xwÿnh nhũm hõja kêt mẽ õ pahĩ mã hkwyjê pẽ kãxpore hkwyjê jamÿnh xwÿnh. Nhũm wa Tĩrtũm mã amnhĩ jarẽnh xà hã ixkre hwÿr wa tẽn axà. ¹¹⁻¹² Hãmri nhũm Parijew nhõ xwÿnhta kumrêx tẽ nẽ nhÿri mẽ piitã mẽ noo mã Tĩrtũm mã amnhĩ jarẽ. Nẽ amnhĩ to jarkrar pẽ kãm amnhĩ jarẽnh o: “Pa Tĩrtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kãxpore hkwyjê jamÿnh xwÿnh nẽ rom tãm amnhĩ nhĩpêx. Nẽ semãn piitã hã ixãpkur

kêt rãhã amã amnhĩ jarẽnh rãhã ho ixtã apkati axkrut. Nom ja pix kêt. Na pa hte mããnẽn ixãpênh pãnhã kãxpore jamÿ nẽ mẽ kot amã tanhmã amnhĩ nhĩpêx to ho pa xwÿnhjê mã hkwyjê nhõr o ixpa. Nẽ na pa hte ri ixãhkĩnh o ri ixpa hkêt nẽ. Nẽ nhãm mẽ kêt mẽ hprõ ho amnhĩkati ho ri ixpa hkêt nẽ. Na pa hte mẽ piitã mẽ kurom tãm amnhĩ nhĩpêx ã amnhĩ pumu nẽ ixkĩnh tÿx kumrêx. Hêxta waa nẽ. Mon pa hte ri ã amnhĩ to mex o ixpa anẽ?” Anhÿr o Tĩrtũm mã amnhĩ to jarkrar pẽ kãm amnhĩ jarẽnh o xa.

¹³—Hãmri nhũm hpãnhã mẽ kêt kãxpore hkwyjê jamÿnh xwÿnhta haxwÿja Tĩrtũm mã amnhĩ jarẽ. No ãm Parijew nhõ xwÿnhta rom ki hkwyjê pẽ awry nẽ ahte hipõ nẽ kãm amnhĩ jarẽ. Nẽ kãm amnhĩ jarẽnh pẽ amnhĩ tak nẽ mur nẽ kãm: “Kwa Tĩrtũm. Na pa hte amnhĩ tomnuj tÿx o ri ixpa. Nẽ ixtÿx ri amã prãm xà kuhpa hã tanhmã amnhĩ nhĩpêx to. Na pa tee ri ja hã amnhĩ pumu nẽ ixkaprĩ htÿx nẽ. Æ inhmã amnhĩ nhĩpêx anhÿr o ri ixpa hprãm kêt tã pa hte ã amnhĩ nhĩpêx anhÿr o ri ixpa. Kwa xà kot ka ixkamã axukaprĩ nẽ amnhĩ katut kôt ixte amnhĩ tomnuj rẽn pa Tĩrtũm?” Anhÿr o kãm amnhĩ jarẽ.

¹⁴—Hãmri nhũm Tĩrtũm hamẽ wa kot kãm amnhĩ jarẽnh ma no ãm wamta ma nẽ ãm kuma. No kêt hkôt hõja ma hãmri nẽ kot kãm amnhĩ tã àhwÿr xà hkôt amnhĩ katut kôt kot amnhĩ tomnuj rẽn pa nẽ ho hkra. Jakamã nhũm mex nẽ hkĩnh nẽ pa. Ra tãm hkrã hãmri nẽ hkĩnh nẽ ma htẽn kurê kumrêx. Æ mẽ ujarẽnh kot anhÿr. Æm hãmri na pa mẽ amã ja jarẽ. Koja mẽhõ Parijew nhõ xwÿnhta pyrã nẽ kot amnhĩ to mex xwÿnh ã amnhĩ kamnhix hãmri nẽ Tĩrtũm kot amnhĩ katut kôt kot amnhĩ tomnuj rẽn kaxyw amnhĩ to hwÿr kêt nẽ. Koja ãm kãm amnhĩ to jarkrar pix nẽ. Jakamã koja Tĩrtũm te kot mar nẽ ãm mar pyrãk o hipêx. No koja mẽhõ kot kãxpore hkwyjê jamÿnh xwÿnhta pyrã nẽ tee ri tanhmã amnhĩ tomnuj to hã amnhĩ pumu nẽ hkaprĩ nẽ. Hãmri nẽ amnhĩ to Tĩrtũm wÿ nhũm kuma nẽ tanhmã ho mex to. Anẽ.

Jejus kot amnhĩ wÿr mẽhprẽjê hwÿr ã harẽnh

Matêwre 19.13-15; Makre 10.13-16

15 Tã nhũm Jejus mẽ hkôt mẽ pa ho mẽ pa xwýnhjaja arĩ pry hã Jerujarẽ hwýr mō nhũm Ijaew kwýjaja mẽ omu nẽ mẽ hkrare jamý nẽ Jejus wýr mẽ o mra. Kot mẽ hã ìhkra jaxwýr nẽ mẽ ho Tĩrtũm wýr kaxyw. Hãmri nhũm hkôt mẽ pa ho mẽ pa xwýnhjaja tee ri ja hã mẽ omu nẽ nẽ mẽ kãm kapẽr nẽ mẽ kãm:

—Tk. Kwa mẽ ma akupým mẽ akrata o mra nà? Mo kaxyw na ka mẽ Jejus wýr mẽ o mra? Kormã mẽ ràxre kênã. Anẽ.

16 Hãmri nhũm amnhĩ tã mẽ kuma nẽ mẽ kãm:

—Tk. Kwa nà mẽ ri inhnẽ mẽhprĩjẽ kurẽ hkêt nẽ. Kwãr mẽ mãmri ixwýr mẽ o mra. Anẽ.

Hãmri nẽ amnhĩ wýr mẽ kãm hpa ho apẽ nhũm mẽ hwýr mẽ o mra nhũm mẽ kuri kuhẽ. Hãmri nhũm hkôt mẽ pa ho mẽ pa xwýnhjẽ mã kãm:

—E mẽ jareja mẽ omu. Na htem hamakêtcati nẽ hkĩnh nẽ ri pare. Nẽ kãm amnhĩ to rũnh prãm kêt nẽ ri pa. Tã Tĩrtũm kôt mẽ kot amnhĩ nhĩpêx xwýnhjaja na htem mẽ urak nẽ kãm amnhĩ to rũnh prãm kêt nẽ ri pa.

17 —Jarejaja na htem hipêêxà nẽ katorxà wa kapẽr ma nẽ wa hkôt ri amnhĩ nhĩpêx mex o ri pa. Tã ixpê Tĩrtũm kot mẽ awýr inhmẽnh xwýnh kot ka mẽ amã ixkôt amnhĩ xunhwýr prãm. Hã kot kaj mẽ te ho jarejẽ kot amnhĩ nhĩpêx pyrak o amnhĩ nhĩpêx. Jao ixkapẽr ma nẽ ixkôt ri tanhmã amnhĩ nhĩpêx mex to ho ri apa. Anẽ.

Kàxpore rax xwýnh jarẽnh

Matêwre 19.16-30; Makre 10.17-31; mããnnẽn Wam Ximotre 6.6

18 Tã nhũm Ijaew nhõ pahihiti hõja Jejus wýr tẽ nẽ kãm kapẽr nẽ kãm:

—Pa? Mẽ ijahkre xwýnh maati? Kwa inhmã mẽmoj jarẽ. Tanhmã kot pa we nhỹrmã Tĩrtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19 Hãmri nhũm kãm:

—Xà ate ixpê Tĩrtũm kwý hã ixpumunh kôt na ka ixte urak nẽ amnhĩ to mex xwýnh ã ijarẽ? Tĩrtũm pix na kot amnhĩ to mex rãhã xwýnh jakamã kot kaj ã ijarẽnh anhýr jao ixpê Kra hã ijarẽ. Nẽ urak nẽ ixte amnhĩ to mex xwýnh ã ijarẽ. Nà xàn ka ãm atýx ri amnhĩ krã hkôt ã ijarẽnh anẽ?

20 —Tĩrtũmja mex o mex xwýnh jakamã kot kaj amã nhỹrmã kuri atĩr tũm nẽ apa hprãm hãmri nẽ ra kot mẽmoj tã mẽ amã karõ xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpẽn pẽ axàhkĩnh hkêt nẽ.

Nẽ mẽ axpẽn par kêt nẽ.

Nẽ mẽ axpẽn to axêx o ri apa hkêt nẽ.

Nẽ mẽ axpẽn pẽ aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaãm pẽ wa kutã anojarêt pix o ri apa.

E kot kaj amã nhỹrmã Tĩrtũm kuri atĩr tũm nẽ apa hprãm hã kêr ka ã amnhĩ nhĩpêx anhýr o ri apa. Anẽ.

21 Nhũm pre ã Jejus kãm kapẽr anẽ nhũm kuma nẽ kãm:

—Kwa ixprĩre ri ra ã ixte amnhĩ nhĩpêx anhýr o ri ixpa kênã. Nom ixte ixtĩr tũm nẽ ixpa kaxyw kormã ixte tãm kêt pyrak. Anẽ.

22 Hãmri nhũm Jejus kãm:

—Nà kormã mẽmoj pyxire nẽ arĩk. Na ka amã akukrêx rax japê htýx o Tĩrtũm jakre. Jakamã kêr ka ma akupým tẽ nẽ akukrêx o wẽnẽ hpa nẽ hpãnhã kàxpore jamý hãmri nẽ ma mẽ kêp amrakati xwýnhjẽ mã õr pa. Hãmri nẽ rĩ akupýn ixwýr tẽ nẽ ixkôt apa ho apa. Anẽ.

23 Hãmri nhũm kuma nẽ tee ri amnhĩ kukamã hamaxpêr. Kãm kukrêx rax japê nẽ kãm ìhkra karo hprãm kêt nẽ. Jakamã tee ri Jejus kot ã kãm hã karõ anhýrja ma nẽ awjanã nẽ ma akupým tẽ. 24 Hãmri nhũm tee ri ja hã omu nẽ hã mẽ kot mar xwýnhjẽ mã kapẽr nẽ mẽ kãm:

—Hêxta waa nẽ. Koja mẽ hikukrêx rũnh xwýnhjaja ohtõ nẽ kãm mẽ hikukrêx japê xàj Tĩrtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtýx. 25 Na htem kãm hikukrêx rax mã ìhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprý. Te ho mẽhõ kot menh kagô hã hkre nẽ kãm kagô katõk prãm kêt rãhã kãm guhkrax kãm àr prãm kaprýta pyrak. Anẽ.

Nhũm pre ã Jejus mẽ kãm kapẽr anẽ.

26 Hãmri nhũm mẽ kuma nẽ tee ri amnhĩ kukamã hamaxpêr nẽ kãm:

—Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ

ixpiitã nhÿrmã war ari ixtîr tûm nê ixpa ho ixpa hkêt nê nà? Anê.

²⁷ Hãmri nhÿm mẽ kãm:

—Nà kot kaj mẽ amnhĩ krã hkôt mẽ amã mẽ akukrêx japêja mã anhÿrer kêt nê. Tirtûm pix na hte ã mẽ kot amnhĩ nhÿpêx anhÿr kaxyw tanhmã mẽ hkrã hto nhÿm mẽ kãm mẽ hikukrêx japê htÿx kêt nê. Jao mẽ kêp Tirtûm mẽ wa ixri htîr tûm nê mẽ pa ho pa mã xwÿnh. Anê.

²⁸ Hãmri nhÿm Simãw Pêtre kãm:

—Kwa Pahihti no mẽ pajaja? Na pa prem agryk ã mẽmoj piitã hkaga hpa nê akôt ixpa ho ixpa. Jakamã kot paj mẽ nhÿrmã war ari ixtîr tûm nê ixpa ho ixpa nà? Anê.

²⁹ Hãmri nhÿm kãm:

—Tÿ. Nà ka mẽ atõ inhmã tanhmã amnhĩ nhÿpêx to ho apa kaxyw akwÿjê re nê ma inhmã tanhmã amnhĩ nhÿpêx to ho ri apa. Anhörkwÿ re rÿ atõ rÿ atõx rÿ aprõ nê akrajê re. Rÿ akatorxà nê anhÿpêêxà war are. Rÿ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkôt apa. ³⁰ Hã kot paj ja hã mẽ apumu nê mẽ ato mex rax nê. Hãmri ka mẽ ma nhÿhÿm apa nê nhÿri mẽ kãm ixkapêr jarênh o ri mẽ hkôt apa nhÿm mẽ kot mẽ amar xwÿnh kwÿjaja mẽ ama nê ra kãm mẽ akînh nê. Nê ra mẽ ate akwÿjê rer par tã nhÿm mẽ tãmjaja te mẽ apê mẽ hkra rÿ mẽ htõ rÿ mẽ htõx pyrãk o mẽ anhÿpêx nê tanhmã mẽ ato mex to ho pa. Hãmri ka mẽ nhÿrmã ty nê ma Tirtûm mẽ wa inhõ krĩ hwÿr api hãmri nê wa ixkuri amex kumrêx nê atîr tûm nê apa ho apa. Anê.

Nhÿm pre ã Jesus Simãw Pêtre mẽ hkwÿjê mã kapêr anê.

Jejus kot axte htyk kukamã amnhĩ jarênh Matêwre 20.17-19; Makre 10.32-34

³¹ Tã nhÿm Jesus mẽ kot ÿ hã kapêr jarênh o mẽ pa xwÿnh pê 12jaja mẽ hkwÿjê pê mẽ ho kato. Nê nhÿri mẽ hkàx ã mẽ o xa nê tanhmã mẽ kãm amnhĩ jarênh to nê mẽ kãm:

—Amnepêm Tirtûm nhÿ hã kapêr jarênh xwÿnhjaja na prem ixkukamã tanhmã mẽ kot inhÿpêx to hã ijarê nê ixtã kagà. Tã pu mẽ ra Jerujarê hwÿr mō. Kamã koja mẽ tanhmã ixto rax nê. Ra mẽ kot ixkukamã ijarênh nê ixtã kagà xà hkôt koja mẽ ixto

anê. ³²⁻³³ Koja mẽ kãm ixkurê xwÿnhjaja ixpynê nê Rõm nhõ xwÿnhjê nhõ pôristi hwÿr ixto tẽ nê mẽ kãm ixto hêx nhÿm mẽ kuma nê mẽ mar xà hkôt tanhmã inhÿpêx to. Nê mẽ hkwÿjaja ixtã hpêr o axkê nê akunha. Nê mẽ hkwÿjaja ixto kapêr punuj nê ijapry nê ixtã argôx rê nê ixtak. Hãmri nê ixpĩ. ã koja mẽ inhÿpêx anê. Nom kot paj ãm ixytk ã apkati axkrunêpxi nhÿm Tirtûmja akupÿm ixto ixtîr. Anê.

³⁴ Hãmri nhÿm mẽ kuma nê tee ri htyk nê akupÿm htîrja kukamã hamaxpêr no ãm hprĩ hã hkôt hamaxpêr kêt nê.

Jejus kot no hkre xwÿnh o mex ã harênh Matêwre 20.29-34; Makre 10.46-52

³⁵ Tã nhÿm Jesus mẽ kormã Jerujarê hwÿr Jerikoja tẽp o mō. Hãmri nhÿm pry nhÿhkjê hã no hkre xwÿnhja àhwÿr o nhÿ.

³⁶ Hãmri nê amnhĩ wÿr mẽ mrar ma. Mẽ ohtô nê Jesus kôt mẽ mrar xwÿnhjê mrar ma nê mẽ kãm:

—Kwa mẽmo ri? Mẽmoj wÿr na ka mẽ axohtô nê mra? Anê.

³⁷ Hãmri nhÿm mẽ kãm:

—Nà Jesus pê Najare nhõ xwÿnh kôt na pa mẽ mō. Anê.

³⁸ Hãmri nhÿm mẽ kuma nê kàx pê Jesus mã kapêr nê kãm:

—Pa Jesus? Apê mẽ inhõ Pahihti mex na ka. Te apê amnepêm anhÿgêt pahihti Tawi kot amnhĩ nhÿpêx pyrãk. Jakamã kwa ixkamã axukapry nê akupÿm ixto mex kêt wehe. Ixte amnhĩ kaxyw akôt ijamaxpêr xwÿnhjê hõ na pa. Anê.

³⁹ Hãmri nhÿm Jesus kukamã mẽ mrar xwÿnhjaja tee ri kuma nê kãm:

—Tk. Kwa akapêr kêt nê nhÿ nà. Anê.

Tã no nhÿm ãm mẽ kuma nê xatã amnhĩ to hwÿr o nhÿ. Kàx pê kãm kapêr o nhÿ.

⁴⁰ Hãmri nhÿm Jesus kuma nê xa nê amnhĩ wÿr hã karõ nhÿm mẽ hpa hã kupy nê hwÿr o tẽ nhÿm kãm:

⁴¹ —Pa mo na? Tanhmã kot pa ato? Anê.

Nhÿm kãm:

—Nà akupÿm inhmã ixrît mex prãm. Anê.

⁴² Hãmri nhÿm kãm:

—Tõe. Nà ra ate amnhĩ kaxyw inhmã ajamaxpêr tÿx jakamã kot kaj akupÿm ri rît. Anê.

⁴³ Hāmri nhūm akupŷm rīt mex kurê kumrêx nê ja hā amnhī pumu nê hkīnh tŷx nê. Hāmri nê ma Jejus kôt Tirtūm mā mex o mex ā harēnh o mē hkôt tē. Hāmri nhūm mē kot hā omunh xwŷnhjaja haxwŷja Tirtūm mā mex o mex ā harēnh o Jejus kôt mō.

19

Jakew kām Jejus pumunh prām ā harēnh Rukre 3.8, 3.12-13

¹ Tā nhūm Jejus arī Jerujarē hwŷr mō nê Jeriko hwŷr pōj. Hāmri nê krī kahti hkôt pry hā mō. ² Nhūm mē ra hkôt htu rax nê hkôt omunh o mō. Jakamā nhūm Jakew pē Rōm nhō pahi mā kwŷjē pē kàxpore hkwŷ jamŷnh xwŷnhjē krāhtūm xwŷnhja. Na pre hikàxpore rax nê. ³ Tā haxwŷja kām Jejus pumunh prām nê. Nom ām hakooti nê hprīhti jakamā tee ri kot omunh kaxyw amnhī nhīpêx nhūm mē kēp àmnàr rax nê. ⁴ Hāmri nhūm ra hamaxpēr nê ma kukamā hprōt nê tē nê nhŷri pry mŷri pī xām pumu nê hā api nê kutēp ajēt. Hāmri nhūm Jejus mō nê hapa. ⁵ Nê kànhmā rīt nê omu nê kām:

—Pa Jakew. E kwa tokyx tēn wrŷ pa ma akôt anhōrkwŷ hwŷr tē nê ari amnhīm hikra. Anē.

⁶ Hāmri nhūm kuma nê hkīnh nê. Nê wrŷk kurê kumrêx nê ma amnhī kôt nê o tē. ⁷ Hāmri nhūm mē kot omunh o kuhē xwŷnhjaja tee ri ja hā omu nhūm ja mē kēp omnuj nê nhūm mē axpēn mā harēnh o:

—Tk. Kwa nà. Jakew kot amnhī tomnuj xwŷnh tā nhūm Jejus ma hkôt tē nê kuri pōj. Anē.

⁸ Hāmri nhūm wa ōrkwŷ hwŷr axà nê nhŷ nhūm Jakew Jejus mā amnhī jarēnh o:

—E. Nà ra ixte pahihiti mā kàxpore jamŷnh xwŷnhhta na pa pre hte ho prēs jakre nê amnhīm hamŷnh rax nê. Tā kot paj akupŷm mē kām ōr pa. Na pa pre hte mē hkwŷjē pē ho 10 nê hamŷ. Tā kot paj hipy ho 40 nê kurē nê akupŷm mē kām ho ixpigrành pa. Ā kot paj mē hipêx anē. Nê ixkàxpore jakrêx kot paj ho axkjē nê mē kēp amrakati xwŷnhjē mā ho ixpigrành pa. Anē.

⁹ Hāmri nhūm kuma nhūm ja kām mex nê. Jakamā nhūm kām:

—Nà ām hāmri. Ate pahkukamā panhīgēt Apraāw pyrà nê jarāhā ate amnhī tomnuj kaga jakamā na ra jarāhā anhōrkwŷ hwŷr mē mex xà axà. Kojā Tirtūm jarāhā amnhī katut kôt ate amnhī tomnuj rēnh pa nê axte kām hamaxpēr kēt nê. ¹⁰⁻¹¹ Mē ate amnhī tomnuj xwŷnhjē hwŷr na pre Tirtūm inhmē pa wrŷ. Te nhŷri mē apikunor nhūm ixte mē ajapēr o ixpa kaxyw Tirtūm kot mē awŷr inhmēnh nhūm ixwrŷk nê nhŷri ixte mē ajapēr o ixpa nê mē amā ixkator nê ixkīnh nê ma akupŷm hwŷr mē ato inhmōrta pyrāk. Anē.

Mē pahte Tirtūm mā tanhmā amnhī nhīpêx to

Matêwre 25.14-30

Hāmri nhūm mē ohtō nê Jejus mar o hkôt Jerujarē hwŷr mra. Na prem htŷx tanhmā kot amnhī nhīpêx to hā hkamnhīx o hkôt mō nê axpēn mā:

—E ma pu mē hkôt. Kojā Jerujarē hwŷr pōj hāmri nê kēp mē pahpē Ijaew nhō pahi nê mē pahto amnhīptār kurê kumrêx. E kwa ma pu mē hkôt. Anē.

¹² Nhūm Jejus mē hamaxpēr kôt mē omunh mex nê. Jakamā kot mē piitā mē ho amnhīptār xà hā arīgro hā mē kām amnhī jarēnh kaxyw. Kormā Jerujarē hwŷr ahtēp kēt ri mē kām amnhī jarēnh kaxyw. Nom hprī hā mē kām hā amnhī jarēnh kēt nê. Ām amnhī tā kuxi nê mē kām awjarē nê mē kām:

—Kojā nhŷri krī hō kamā mēhō myja. Kot amnhī to rax o hkwŷjē jakrenh xwŷnhja. Nê krī hō kamā krī piitā hkôt pahi nhō pahihitija hāmri harēnh ma nê amnhī wŷr kuwŷ. Kot ma hwŷr mōr nhūm ō krī kamā nê määnēn krī hkwŷ kamā kēp mē ō pahi kaxyw kot ām kaxyw nhūm hwŷr nojarēt.

¹³ Hāmri nê amnhī wŷr kām mē àpēnh xwŷnhjē ho 10 nê tanhmā mē hā karō hto. Nhūm mē hwŷr mra nhūm mē kām amnhī jarē nê mē piitā mē kām kàxpore hkwŷ gō. Ahpŷnhā mē kām hpŷnh nê kugō nê mē kām: “E ota ixkàxpore hkwŷta. Kot kaj mē ixkutēp tanhmā ri inhmā ho rax to. Kēr pa mēmo arīgro hā akupŷn mō kê ra ixahā inhmā ho ohtō nê pa hamŷ.” Anhŷr o mē kām kapēr hāmri nê ma mō. ¹⁴ Hāmri nhūm ō krī nhō xwŷnhjaja ra kēp mē ō pahi kaxyw

harēnh ma nhūm ja mē kēp omnuj nē. Nē mē kām hkīnh kēt jakamā ma krī hō kamā kot mē kaxyw ām xwýnhhta wýr hkwý rē nhūm mē ma hwýr mra nē hwýr pōj. Hāmri nē kot mē kaxyw ām mā xwýnhhta pumu nē kām: “Pa. E ot pa mē awýr mra. Kwa na ka xep ra mē ixkaxyw mē inhīōja xām kaxyw. Kwa nà mē inhmā jahti hkīnhhti hā. Kwa mē ixkaxyw ām kēt nē nà?” Anhýr o kām kapēr.

15 —Tā no nhūm ām mē kuma nē ām mē kuma nhūm mē awjanā nē mā akupým mra. Hāmri nhūm pahija mē kaxyw mē kām hkīnh kēt xwýnhhta xām nhūm ma akupým ō krī hwýr mō. Mōō nē ra pōj hāmri nē amnhī wýr kām mē àpēnh xwýnhjē hā karō nē mē kām: “E no ixte mē amā kàxpore nhōr xwýnhhta? Tanhmā na ka prem ixkutēp inhmā ho rax to? E mē inhmā agō pa omu.” Anē.

16 —Hāmri nhūm wamta kām: “Ota akàxpore ate inhmā ōr xwýnhhta. Na ka pre inhmā ho pyxi nē agō pa kupy nē ho mēmo hy hkwý japrō nē hkre. Nhūm ō pa mē kām ho wēnē ho ri ixpa nē hpānhā kàxpore jamý nē hipy amā kurē nhūm ra kēp 10. Ota. E amý.” Anē.

17 —Hāmri nhūm kuma nē hkīnh nē. Hāmri nē kām: “Nà ām hāmri na ka ā inhmā ho rax anē. Ixte amā ho pyxi nē ōr tā ka pre inhmā hamār mex nē nhūm kànhmā axkamē nē ra kēp 10. Tā ra ixpē krī hkwý kamā mē ō pahī jakamā kot ka inhmā krī ho 10 nē inhmā hamār o ri apa. Jakamā kwa māmri amnhīm kàxporeta o arīk.” Anē.

18 —Hāmri nhūm hpānhā hōja hwýr tē nē kām: “E ota akàxporeta. Na pa pre ho mēmo hy hkwý japrō nē hkre nhūm ō pa mē kām ho wēnē nē hpānhā kàxpore jamý nē hipy amā kurē nhūm ra kēp 5. Tā ota. E amý.” Anē. 19 Hāmri nhūm kuma nē kām: “Nà ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 nē ho amnhīptār o apa. E māmri amnhīm kàxporeta o arīk.” Anē.

20-21 —Hāmri nhūm hpānhā hkôt hōta tē. Nom hkwýjē hkīnhā ō patrāw mā tanhmā kàxpore ho rax to hkēt nē. Ām tanhmā hamaxpēr punuj to nē htýx ri kot kēp ho ōxy nē amnhīm piitā hamýnh par nē akupým kām hkwý nhōr kēt ā hkamnhīx. Jakamā tanhmā kām ho rax to hkēt nē. Ām

hkupu nē o tē nē nhýri kutēp kuxi. Hāmri nhūm ō patrāw amnhī wýr hā karō nhūm hwýr tē nē amnhī nē kām kapēr punuj nē kām: “Tk. Ota akàxporeta. Ixte amā tanhmā ho rax tore hā. Ixte amā ho rax ronhýx ka amnhīm piitā hamýnh pa nē akupým inhmā hkwý nhōr kēt nē. Rý ixte tanhmā apē homnuj to ronhýx ka hā inhmā akir. Jakamā na pa tanhmā amā ho rax to hkēt nē. Ām hkupu nē o tē nē ho amýxu nhūm arī akutēp hikwý. Tā ota.” Anhýr o amnhī nē ō patrāw mā kapēr punuj nē. 22-23 Hāmri nhūm tee ri amnhī tā kuma. Kot amnhī to mex xwýnh nē kām mē àpēnh xwýnhjē ho mex o pa xwýnh tā ā kām àpēnh xwýnh kot kām kapēr anhýrja ma nē amnhī tā kamā gryk nē. Hāmri nē kām: “Tk. Kwa xà ā ixte amnhī nhīpēx anhýr? Nà ixte ā amnhī nhīpēx anhýr kēt. Ā ixte amnhī nhīpēx anhýr nhūm amā ixpuma ronhýx ka pre amā ixpuma xāj ixkàxporeta py nē ixwakre kamā amnhī krā hkôt tanhmā inhmā ho rax to. Tā nhýx pa pre ra akupým awýr tē nē hamý. Nà na ka ā ijarēnh anhýr o axēx nē amnhī krā hkôt tanhmā inhmā ho rax to hkēt nē. Mýrapē kot paj atomnuj týx nē ka rī amnhī pumu. Pēr ām ajamaxpēr punuj.”

24 —Nhūm pre ā kām kapēr anē hāmri nē mē kot mar o kuhē xwýnhjē mā kām: “E mē atō kēp kàxpore py nē wam kot ho 10 nē hamýnh xwýnhhta mā agō.” Anē. 25 Hāmri nhūm mē tee ri kuma nhūm ja mē kēp omnuj nhūm mē kām: “Kwa nà ra hikàxpore rax kēnā. Ra ate kām ho 10 nē ōr kēnā.” Anē. 26 Hāmri nhūm mē kām: “ýý nom tãã. Māmri kām agō. Koja mēhō inhmā àpēnh mex pa amnhī tā omu nē kot inhmā àpēnh mexta pānhā ho mex nē. No koja inhmā àpēnh mex kēt nē pa tee ri ja hā omu nē ho mex kēt nē. E māmri kām agō.” Anē. 27 Hāmri nē hpānhā mē kām: “E hpānhā mē kām ixprām nōkati xwýnhjaja. Ixte mē ho amnhīptār mā tā mē kām ixprām nōkati xwýnhjaja. Mē ma mē hwýr mra nē mē ho akuprō nē akupým amnē ixwýr mē o mra nē inhnoo mā mē himex pa.” Anē. Ā mē ujarēnh kot anhýr. Anē.

Nhūm pre Jejus ā mē kām ujarēnh anē. Te tām kēp patrāwta pyrā nē ā amnhī jarēnh anē. Mē kot tanhmā amnhī nhīpēx to ho pa

hã mẽ omunh xà hkôt tanhmã mẽ hipêx to hã amnhĩ jarẽ.

Jejus kot Jerujarẽ hwÿr àr ã harẽnh

Matêwre 12.1-11; Makre 11.1-11; Juãw 12.12-19

²⁸ Nhũm Jejus kormã Jerujarẽ hwÿr mō. ²⁹ Hãmri nẽ ra Petake mẽ Petãn wa htêp o mō. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwÿnh wa ho axkrut nẽ amnhĩ kukamã wa kumẽ. ³⁰ Nẽ wa kãm:

—E. Wa ma krĩ mũj wÿr mẽ ixkukamã wa tẽ. Nẽ wa hwÿr pøj nẽ nhÿri jumẽnre nyw mã ê nẽ ãm ata pumu. Kormã mẽ kot hã hkrĩ hkêt xwÿnhhta. Ka wa omu nẽ kãm ê xà hpôt nẽ man akupÿn ixwÿr o tẽ. ³¹ Nhũm mẽhõ ja hã war apumu nẽ hã tanhmã war amã kapêr to ka wa kãm ã ijarẽnh anẽ nẽ kãm: “Mẽ panhõ Pahihti na hã karõ pa wa hwÿr tẽ.” Anhÿr o wa kãm ijarẽ. E wa ma hwÿr tẽ. Anẽ.

³² Hãmri nhũm wa kuma nẽ ma hwÿr htêm kurê kumrêx. Nẽ wa krĩm pøj nhũm Jejus kot wa kãm harẽnh xà hkôt jumẽnreta pumu. ³³ Hãmri nẽ kãm ê xà hpôt o xa nhũm õ dõnjaja mra nẽ hã wa omu nẽ wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkĩ nà? Anẽ.

³⁴ Hãmri nhũm wa mẽ kãm:

—Nà mẽ panhõ Pahihti na wa inhmã anẽ pa wa tẽ. Wa ixte ma akupÿm kutã ho inhmõr kaxyw. Anẽ.

Hãmri nhũm mẽ wa kuma nẽ wa kãm:

—Tõe. Nà wa mãmrĩ ma kãm o tẽ. Anẽ.

³⁵ Hãmri nhũm wa ma akupÿm Jejus wÿr o tẽ. Hãmri nẽ kaxyw amnhĩ xê hkwÿ hopøj nẽ kãm ho hkô kahty nẽ kãm ho htÿx nẽ o xa nhũm hã nhÿ nẽ mō. ³⁶ Kormã Jerujarẽ hwÿr hixêt ã àpir o mō. Nhũm mẽ kot omunh o mrar xwÿnhjaja hkĩnh nẽ ma hkukamã kot pry ho mex kaxyw amnhĩ xê hkwÿptyr o mō. ³⁷ Hãmri nhũm mẽ hixêt ã api nẽ kormã ahpar mã wrÿk o mō. Hãmri nhũm Jejus kôt mẽ pa ho pa xwÿnhjaja kàx pê Tirtũm mex o mex ã harẽnh o hkôt mō. Ra mẽ kot hkôt pikamẽnh ry nẽ kot mẽ kãm aa mẽmoj pumunh kêt kwÿ ho anhÿr rax ã omunh jakamã hkĩnh nẽ nẽ Tirtũm mex o mex ã harẽnh o hkôt mō. ³⁸ Nẽ harẽnh o:

E ota Tirtũm kot mẽ pahwÿr mẽn h xwÿnhhta na ra pøj.

ãm hãmri na mẽ pahwÿr wrÿ. Na mex kumrêx.

Kêp mẽ panhõ Pahihti mex na. ãm hãmri na pre Tirtũm mẽ pahwÿr kumẽ.

Tirtũmjaja mex kumrêx. Mex o mex. Kukwak ri pix mã na pu htem pajamakêtkati nẽ paxãmnhĩx ri papa rãhã ho papa.

Anhÿr o Jejus kôt harẽnh o mō. Ra kot mẽ ho amnhĩptar kurê kumrêx ã hkamnhĩx jakamã hkĩnh nẽ hkôt ã kapêr o mōr anẽ.

³⁹ Hãmri nhũm Parijew nhõ xwÿnh kwÿjaja mẽ hkôt mra nẽ tee ri mẽ kuma hãmri nẽ Jejus mã kãm:

—Kwa Jejus. Mẽ kãm anẽ kê mẽ anhĩkrê nà? Anẽ.

⁴⁰ Hãmri nhũm mẽ kãm:

—Tk. Nà kot paj mẽ kãm anhÿr kêt nẽ.

ã mẽ kapêr anhÿrja na inhmã mar hprãm. Kwãr mẽ mãmrĩ Tirtũm mã mex o mex ã harẽnh o ixkôt mō. Kot mẽ anhÿr kêt nhũm ra pikap kên nhĩkwÿ xwÿnhja tee ri ja hã mẽ omu hãmri nẽ tãm tanhmã amnhĩ nhĩpêx to nẽ mẽ hpãnhã tãm Tirtũm mã mex o mex ã harẽnh o hikwÿ. Jakamã kwãr mẽ mãmrĩ kapêr anẽ. Anẽ.

Jejus tee ri kot Jerujarẽ hkukamã hamaxpêr ã harẽnh

Rukre 23.27-31

⁴¹ Nhũm mẽ kormã Jerujarẽ hwÿr hpôx o mō. Kormã hixêt rũm ahpar mã hwÿr wrÿk o mō. Hãmri nhũm Jejus amÿm amnhĩ hkukamã Jerujarẽ nhõ xwÿnhjê pumunh o mō nẽ mẽ hkukamã hamaxpêr o hkaprĩ nẽ. Hãmri nẽ hkaprĩ xàj mÿr o mō. ⁴² Hãmri nẽ te kot mẽ kuri mẽ omunh o ri pa pê mẽ kãm kapêr pyrãk o mẽ kãm kapêr nẽ mẽ kãm:

—Hêxta waa nẽ Jerujarẽ nhõ xwÿnhjaja. Kot kaj mẽ amex kêt nẽ. Mẽ ate amnhĩ kukamã axàhpumunh mex ronhÿx ka mẽ ra mẽ kãm mẽ akurê xwÿnhjê pumaj ixkôt amnhĩ xunhwÿr kurê kumrêx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa. ⁴³⁻⁴⁴ Tirtũm tãm kot mẽ awÿr inhmẽn h tã ka mẽ amã ixprãm kêt nẽ. Jakamã koja nhÿrmã mẽ kãm mẽ akurê xwÿnhjaja mẽ awÿr mra nẽ mẽ anhõ krĩm hipok pa. Hãmri ka mẽ amnhĩ wÿr mẽ omu nẽ tee ri ajapôx kaxyw nhũm mẽ awÿr agjê

ně mẽ anhĩmex pa ně mẽ anhõ krĩja grành pa. Nẽ ahpỹnhã ri mẽ anhõrkwỹ grành pa. Æ koja mẽ mẽmoj piitã grành par anẽ. Anẽ.

Jejus kot Tĩrtũm nhõrkwỹ hwỳr àr ã harẽnh
Matêwre 21.12-17; Makre 11.15-19; Juãw
2.13-22

⁴⁵⁻⁴⁶ Tã nhũm Jejus Jerujarẽ hwỳr axà ně jumẽnre rũm wrỳ hãmri ně ma Tĩrtũm mã amnhĩ jarẽnh xà hã ixkreja wỳr tẽ. Hãmri ně hwỳr axà ně tee ri kamã mẽ pa xwỳnhjê pumunh o xa. Nhũm mẽ ra axtem ně moux ně ôwêhti ně tuuti ho wẽnê ho kuhê. Mẽ kot haprõr ně Tĩrtũm mã hpar ně kãm õr pẽ kãm amnhĩ jarẽnh kaxyw mẽ kãm ho wẽnê ho kuhê. Nẽ axtem ně mẽ kãm hã ohtõ rax kãm mẽ kãm ho wẽnê. Hãmri nhũm Jejus mẽ hwỳr axà ně tee ri mẽ omu mẽ kãm akir ně mẽ kãm:

—Tk. Kwa nà. Tĩrtũm kapẽr ã kagà htũm kot õrkwỹ jarẽnh kot:

Inhõrkwỹja ãm mẽ ate inhmã amnhĩ jarẽnh xà hã ixkre pix kaxyw na.

Anhỹr o kot harẽnh tã ka mẽ axtem ně kamã ã amnhĩ nhĩpêx anhỹr o apa. E mẽ ajapõj ně ma ajapêx tokyx anẽ.

Anhỹr o mẽ kãm kapẽr hãmri ně ixkre ně mẽ kator nhũm mẽ ma hapêx pa.

⁴⁷ Tã nhũm Jejus apkati mẽ Tĩrtũm mã amnhĩ jarẽnh xà hã ixkreja wỳr mra ně kamã mẽ ahkre ho hkrĩ. Hãmri nhũm mẽ õ patre krãhtũm mẽ Tĩrtũm kapẽr tũm o mẽ ahkre xwỳnhjê mẽ mẽ kot amnhĩ to rũnh xwỳnhjaja kot mẽ ahkre ma nhũm ja mẽ kêp omnuj ně nhũm mẽ kãm hpĩr prãm nẽ. ⁴⁸ Nom nhũm amarĩ mẽ pa xwỳnhjaja mẽ kurom kãm mar prãm ně akryk mar o kuhê. Jakamã nhũm mẽ tee ri ja hã mẽ omu ně tanhmã mẽ kot hpĩr to hkukamã hã axpẽn ma.

20

Mẽhõ nhỹ hã Jejus kot mẽ ahkre hã harẽnh

Matêwre 21.23-27; Makre 11.27-33

¹ Nhũm arĩgro hõ hã nhũm Jejus kê axte Tĩrtũm mã amnhĩ jarẽnh xà hã ixkreja wỳr axà ně mẽ ahkre ho nhỹ. Tanhmã mẽ kot amnhĩ nhĩpêx to ně nhỹrmã Tĩrtũm mẽ wa kuri htĩr tũm ně pa hã mẽ kãm kapẽr o nhỹ. Hãmri nhũm Ijaew nhõ pahijê mẽ mẽ kot Tĩrtũm kapẽr tũm o mẽ ahkre xwỳnhjê

mẽ mẽ õ patre krãhtũmjaja hêx rom mar o kuhê. ² Hãmri ně kãm:

—Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o ri apa? Na ka hte akupỹm mẽ ho mex o apa ně tanhmã mẽ ahkre hto ho apa. Xà amnhĩ krã hkõt na ka hte ã amnhĩ nhĩpêx anẽ nà? Anẽ.

³ Hãmri nhũm mẽ kãm:

—Nà ixkumrêx kot paj mẽmoj tã mẽ akukja. Ka mẽ inhma ně inhmã harẽ pa rĩ kormã tanhmã mẽ amã amnhĩ jarẽnh to.

⁴ Finat Juãw Paxisja ã kot paj mẽ akukja. Mẽhõ nhỹ hã na pre mẽ hkrã kumrãr o pa? Xà amnhĩ krã hkõt nà xà Tĩrtũm nhỹ hã? E mẽ atõ inhmã harẽ. Anẽ.

⁵⁻⁶ Hãmri nhũm mẽ kuma ně tee ri kot tanhmã kutã kãm harẽnh to hkukamã hamaxpêr ně axpẽn mã:

—Kwa tanhmã kot puj mẽ kãm harẽnh to? Jar mẽ kot mar xwỳnhjaja na htem kêp Tĩrtũm nhỹ hã kapẽr jarẽnh o pa xwỳnh ã harẽnh o pa. Tã kot puj mẽ kãm kot amnhĩ krã hkõt mẽ hkrã kumrãr o pa hã harẽ nhũm mẽ tee ri mẽ pama ně mẽ pakamã gryk tỳx nẽ. Nẽ mẽ paxêx rom mẽ pahte kãm pakapêr ã mẽ pahpumunh kurê kumrêx ně kên o mẽ pahtak o mẽ panhĩmex. Nom kot puj mẽ kãm Tĩrtũm nhỹ hã mẽ hkrã kumrãr ã harẽ nhũm mẽ pamã kapẽr o: “ã kot anhỹr kênã na ka prem kapẽr ma ně ra ixkõt amnhĩ xunhwỳr kêt nẽ?” Anẽ. Nà kot puj mẽ kãm tanhmã harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm ně nhũm kot ta pãnhã tanhmã mẽ kãm ně pymaj nhũm mẽ ãm tee ri kãm tanhmã ně hprãm kaprỳ o kuhê.

⁷ Hãmri ně kãm:

—Konẽn. Mẽ ixte mẽhõ nhỹ hã kapẽr o pa hã omunhre hã. Anẽ.

⁸ Hãmri nhũm mẽ kuma ně mẽ kãm:

—Tk. Tõe kot pa xep ijaxwỳja mẽ amã tanhmã amnhĩ jarẽnh to hkêt nẽ. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽ àpênh punuj xwỳnhjê jarẽnh

Matêwre 21.33-46; Makre 12.1-12

⁹ Nhũm Jejus arĩ Ijaew nhõ pahijê mã kapẽr. Nẽ mẽ kot tanhmã hipêx to

hkukamã mẽ kãm tanhmã amnhĩ jarënh to. No ãm amnhĩ tã kuxi nẽ mẽ kãm awjarë nẽ mẽ kãm:

—Koja mēhō hpur ã hkwýjê kot kamã kãm àpēnh kaxyw mẽ kãm karō. Hāmri nhũm mẽ ma hwýr mra nẽ kamã mẽmo hy hkre nẽ hkre pa. Hāmri nhũm ra hpur nhō dōnja nhỹhỹm nojarët nẽ kãm mẽ àpēnh xwýnhjê mã tanhmã hpur jarënh to nẽ mẽ kãm: “E or ixpur nõ. Kê kamã mẽmoj hkà hpa ka mẽ māmri kamã axujamýnh pa nẽ ho axkjê. Nẽ ixkutêp inhō jaxwý nẽ māmri mẽ anhō tanhmã ho hprãm xà hkôt tanhmã ho.” Anẽ.

—Nhũm ã mẽ kãm kapër anẽ hāmri nẽ ma nhỹhỹm mõ.

¹⁰ —Tã nhũm ra hkà hpa. Nom nhũm hpur nhō dōnja kormã krĩ hō kamã ri hã ujahkre ho ri pa. Tã kuri kãm àpēnh xwýnhjê hōja nhũm akupým mẽ hwýr kumẽ. Mẽ kot kãm kwý nhõr nhũm ma kot kãm o mõr kaxyw ma mẽ hwýr kumẽ nhũm ma mẽ hwýr mõ. Mõõ nẽ mẽ hwýr pøj nhũm mẽ omu nẽ axtem nẽ unẽ nẽ hta nẽ akupým hano nhũm ma akupým ý kamã mõ. ¹¹ Hāmri nẽ pøj nhũm õ patrãwja tee ri omu nẽ hpãnhã ja mẽ nhũm ma mẽ hwýr mõ. Mõõ nẽ mẽ hwýr pøj nhũm kê wem mã ho anẽ nẽ unẽ nẽ hta nẽ akupým hano nhũm wamta pyrà nẽ ma akupým ý kamã mõ.

¹² —Hāmri nhũm kê axte hkôt ja mẽ nhũm ma mẽ hwýr mãânēn mõ. Ma mẽ hwýr mõ nẽ pøj nhũm mẽ te ho wamta wa hipêx pyrãk o hipêx nẽ unẽ nẽ hta rax nẽ amnhĩ nẽ hano nẽ pur nẽ kapôt ã kumẽ. Hāmri nhũm ma akupým mãânēn ý kamã mõ. ¹³ Nhũm mẽ õ patrãw tee ri mẽ omu nẽ hamaxpër o: “Hêxta waa nẽ. Tanhmã kot paj amnhĩ nhĩpêx to? Nà kot paj mẽ hwýr ixkra mãn mẽ. Inhmã hapê htã kot paj mẽ hwýr kumẽ kê ma mẽ hwýr mõ. Hāmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhōja kwý gõ.” Anhýr o hamaxpër hāmri nẽ ma mẽ hwýr kumẽ nhũm ma mẽ hwýr mõ.

¹⁴ —Tã ra mẽ hwýr hpõx o mõ nhũm mẽ amým amnhĩ wýr omu nẽ kêp hkra hã omu nẽ hã axpēn mã amýnẽ nẽ axpēn mã: “E oněj hpur nhō dõn krata tẽ. Koja nhýrmã õ papaj mýr pẽ amnhĩm pur ã pyka pytà

nẽ ho õ. Kwa pu mẽ hpĩr kurê kumrêx nẽ kêp hpurja o panhõ. E tokyj pu mẽ kupĩ ri.” Anẽ.

¹⁵ —Hāmri nhũm tẽ nẽ mẽ hwýr pøj nhũm mẽ unẽ nẽ pur nẽ ho kato nẽ ma o tẽ nẽ kupĩ. ã mẽ ujarënh kot anhýr. Anẽ.

Nhũm pre ã Jejus mẽ kãm ujarënh anẽ nẽ hã tanhmã mẽ hkukjêr to nẽ mẽ kãm:

—E koja hpur nhō dōnja hkra jarënh ma hāmri nẽ tãm mẽ hwýr mõ nẽ tanhmã mẽ hipêx to wehe? ¹⁶ Koja ma mẽ hwýr mõ hāmri nẽ mẽ himex pa. Hāmri nẽ hpãnhã hpur ã nhãm mẽmojjê rẽ nhũm mẽ tã kãm hamãr mex o pa. Anẽ.

Nhũm pre ã Jejus mẽ kãm ujarënh anẽ hāmri nhũm mẽ kot mar xwýnhhtaja ujarënh kamã amnhĩ jarënh mar kurê kumrêx. Mẽ kot Tirtũm kot mẽ hwýr rēnh xwýnhjê kapër mar kêp nhũm mýrapê mẽ kãm mẽ hkurê xwýnhjaja kot mẽ kêp mẽ õ pika pytàr nẽ mẽ himex par ã amnhĩ jarënh ma nhũm ja mẽ kêp omnuj týx nẽ. Hāmri nẽ hêx rom Jejus mã kãm:

—Tk. Kwa nã nhỹx pre kêp pur nhō dōnja ã mẽ hipêx anhýr kêp nẽ. Anẽ.

¹⁷ Hāmri nhũm mẽ kuma nẽ mẽ omunh o xa. Nẽ mẽ omunh pẽ mẽ no kagãr mã mẽ kãm kapër nẽ mẽ kãm:

—Nã ã mẽ hipêx anhýr mã mẽ tãm kēnã. Mãn ka prem ra Tirtũm kapër ã kagã htũm kot ja jarënh ma. Harënh kot:

Mẽ kot kēn o amnhĩm õrkwý nhĩpêx kaxyw nẽ kēn maati pumu nẽ htýx omnuj ã hkamnhĩx nẽ hkaga.

Mẽ kot hkaga htã Tirtũm mẽ kurom mex o kot kēn piitã hakrenh par ã omunh kurê kumrêx. Anẽ.

ã Tirtũm kapër ã kagã htũm kot mẽ ajarënh te mẽ kot kēn maati punuj ã hkamnhĩx nẽ hkaga xwýnhjê jarënh pyrãk o ã mẽ ajarënh kot anhýr. Anẽ.

¹⁸ Nhũm pre ã Jejus mẽ kãm te kêp kēn maati pyrãk o mẽ kãm amnhĩ jarënh anẽ. Hāmri nẽ axte amnhĩ tã kuxi nẽ mẽ kãm axte kēn jarēnhhta pyrà nẽ mẽ kãm:

—Nã kot kaj mẽ atõ ixkaga hāmri nẽ te mēhō htýx htēm nẽ kēn pumunh kêp nẽ hã htêk nẽ tēm pyrãk o amnhĩ nhĩpêx. Jao ixkutã amnhĩ xãm. Rý ka tanhmã amnhĩ to nẽ ixkaga nhũm te kēn maati hõ htēm nẽ kot

anhĩpy htēm nē axôm par pyrāk o anhĩpêx ka amex kêt nē. Anē.

¹⁹ Nhũm pre ã Jejus mē kām ujarēnh kām mē harēnh anē. Hāmri nhũm Tĩrtũm kapēr tũm o mē ahkre xwỳnhjê mē mē ò patre krāhtũmjaja kot mē kām kēn jarēnh o te mē tām harēnh pyrākja ma nhũm ja mē kēp omnuj tỳx nē. Jakamã nhũm mē kām Jejus pynēnh nē haxàr prām nē. Nom amnhĩ tã kām mē kot mar o kuhê xwỳnhjê puma nē.

Mē kot hêx rom Jejus kukjêr ã mē harēnh Matêwre 22.15-22; Makre 12.13-17; mãânēn Rômãn 12.1, 13.6-7

²⁰ Hāmri nhũm Tĩrtũm kapēr tũm o mē ahkre xwỳnhjê mē mē ò patre krāhtũmjaja Jejus tãnopxar o kuhê. Hāmri nē ra amnhĩ wỳr mēmy hkwỳ hã karō nē mē kām:

—E. Mē ma Jejus wỳr mra nē te mē ate hkôt amnhĩ xunhwỳr kaxyw pyrāk o amnhĩ nhĩpêx nē mēmoj tã ri hkukja. Mēmoj tã hkukjêr rax nē. Kêr kê Rôm nhõ pahi Sesti kapēr kwỳm ri tanhmã mē amã kapēr to ka mē ama nē man akupỳn mra nē mē inhmã harēnh kurê kumrêx. Pa mē ama nē ma hwỳr mra nē hã unê nē ma Sesti nhỹ hã mē pahto amnhĩptàr xwỳnhhta wỳr o tē nē ìhkram haxà. Anē.

²¹ Hāmri nhũm mē kuma nē mē kām:

—Tôe. Nà kot paj mē anē. Anē.

Hāmri nē ma hwỳr mra nē hêx rom kām kapēr nē kām:

—Pa Jejus? Nà ãm hāmri na ka hte Tĩrtũm kapēr o mē ahkre mex o ri apa. Na ka hte mē kamã akahak kêt nē. Nē mē kot tee ri tanhmã ato kapēr punuj to htã ka aprĩ hã mē ahkre mex o ri apa. ²² Kwa mē inhmã mēmoj jarē. Rôm nhõ pahĩti kot mē pahte kām kàxpore hkwỳ nhõr ã mē pahpê Ijaew mã karōta. Kwa xà we ja amã mex nà? Xà kot pu mē kām kugō nà xà kot pu mē kām òr kêt nē? E kwa mē inhmã tanhmã harēnh to. Anē.

²³ Nhũm prem ã hêx rom kām kapēr anhỹr tã nhũm ra mē hamaxpêr ã mē omu nē mē kām:

²⁴ —E mē atō anhõ kàxpore htỳxre japêr nē inhmã hõ gō pa omu. Anē.

Hāmri nhũm mē kām ja gō nhũm kupy nē omu nē kànhmã mē kām kupê nē mē kām:

—E mēhõ nhĩxi nē mēhõ karō na ja hã? Anē.

Hāmri nhũm mē kām:

—Pahi Sesti karō nē hixi na hã kēnã. Anē.

²⁵ Hāmri nhũm mē kuma nē mē kām:

—Tỳ. Tô kêr ka mē mãmrĩ kām hkwỳ nhõr o apa. Hã hkarō nē hã hixi. Tãm kot hipêx xwỳnh jakamã ò na. No mē kajaja na pre Tĩrtũm mē anhĩpêx nhũm mē apê ò jakamã kwa kêr ka mē kapêr kôt pix mã ri amnhĩ nhĩpêx o ri apa. Anē.

²⁶ Nhũm pre ã Jejus mē kām kapêr anē nhũm mē piitã mar o kuhê. Nhũm mē kot hêx rom kām kapêr mã xwỳnhjaja amnhĩ jaêr pē ã kot kàxpore jarēnh anhỹrja ma. Hāmri nē tee ri axte mēmoj tã hkukjêr nhũm kot pahi Sesti kwỳm ri kot tanhmã harēnh to kaxyw ãm tee ri tanhmã hkukjêr to kaprỳ. Hāmri nē axte tanhmã kām nē hkêt nē ãm akryk omunh pē mar o kuhê.

Akupỳm mē htĩr jarēnh

Matêwre 22.23-33; Makre 12.18-27; Juãw 5.21, 6.39; mãânēn Wam Korĩt 6.14, 15.12-28; Wam Tesarõn 4.13-18; Apokarip 20.4

²⁷ Tã nhũm Satusew nhõ xwỳnh kwỳjaja. Mē kot akupỳm mē htĩr mã hamaxpêr kêt jakamã mē htyk nē mē hapêx ã mē hkamnhĩx. Jakamã na prem tanhmã axpên mã Jejus jarēnh to nē axpên mã:

—E kwa pu mē ma hwỳr mra nē mēmoj xihtỳx ã hkukja kê mē pama nē tee ri tanhmã mē pamã harēnh to hkukamã hamaxpêr. Hāmri nhũm mē piitã ja hã omu nē àhpumunh tỳx kêt ã omunh kurê kumrêx. E ma pu mē hwỳr.

Anē nē ma hwỳr mra nē Parijew nhõ xwỳnhjê pyrã nē hêx rom ahkukja nē kām:

²⁸ —Pa Jejus? Kwa mē inhmã mēmoj jarē. Na pre finat Mojesja Tĩrtũm nhỹ hã mē panhĩgêt mã ã karō anē. Mē hkra hkêt rãhã mē pa nē mē htyk xwỳnhjaja nhũm mē harēnh o:

Koja mēhõ hprõ nē kormã kamã hkra hkêt rãhã pa nē ty. Hã koja hkôt htõja hpãnhã hprõta o hprõ nē kamã hkra. Hāmri nhũm kato nē te kēp htõ htyk xwỳnhhta hkra pyrāk. Anē.

Na pre ã Mojes mē kām karō anē. ²⁹ Jakamã kwa ga mē ixujarēnh ma. Koja mē kot axpên to htõ xwỳnhjaja kēp 7. Nhũm kot waja mēhõ ho hprõ nē wa pa nhũm kamã hkra hkêt rãhã ty. Nhũm hkôt htõ hõta

hpānhā hprō ho hprō ³⁰ nē wa axpēn to pa. Nhūm mǎānēn ty. Kamā hkra hkēt rāhā ty.

³¹ —Nhūm htō hōta. Haxwýja hpānhā tām o hprō nē wa axpēn to pa grire nhūm haxwýja kamā hkra hkēt rāhā ty. Hāmri nhūm htō hkwyjaja piitā nija pyxi nē axpēn pānhā ho hprō hpa. No ām mēhō kamā hkra hkēt rāhā ra htyk pa. ³² Hāmri nhūm mē hprōta mē hkōt amnhī to hapu nē ty. ³³ Tā Tirtūm kot akupým nhýrmā mē ho htír ronhýx nhý nhýx kēp nija mjēn kumrēx? Ra piitā kot ho hprō kēnā. E mē inhmā ja jarē. Anē.

³⁴ Hāmri nhūm Jejus mē kām:

—Nà kaxkwa kamā mē kot amnhī nhīpēxja axtem na. Pika ja kamā na htem pa nē aptār nhūm mē axpēn mā mē kure. Ja mex. ³⁵ No mē kot Tirtūm kōt amnhī xunhwýr xwýnhjaja na htem ty hāmri nē Tirtūm nhō krī kamā kuri axte kām hprō hprām kēt nē ri pa. Rý ni japēr nē kām mjēn prām kēt nē ri pa. ³⁶ Hāmri nē Tirtūm kapēr o mē wrýk xwýnhjē pyrā nē axte htyk kēt nē. Ām htír tūm rāhā nē pa ho pa. Tirtūm ra akupým kot mē ho htír jakamā koja mē kēp hkra nē kuri htír tūm nē mex nē pa ho pa nē axte kām hprō rý mjēn prām kēt nē ri pa.

³⁷ —Nom mē ate akupým mē htír mā ajamxpēr kēt ā harēnhja kot paj mē amā harē. Amnepēm na pre Tirtūmja pī hpōk kamā Mojes mā kapēr nē kām:

Ixpē Apraāw nhō Tirtūm na pa. Nē mǎānēn
ixpē Apraāw kra Ijak mē htāmnhwý
Jako wa ō Tirtūm na pa.

Anhýr o Mojes mā amnhī jarē nhūm kuma nē hā kagā. ³⁸ Kēp apu arī mē htyk rāhā nhýx pre ā mē harēnh anhýr kēt nē. Nhýx pre mē harēnh o: “Amnepēm Apraāw nē hkra nē htāmnhwý mē htír ri ixpē mē ō Tirtūm na pa pre.” Anhýr o nhýx pre mē harē. Nom na pre ā amnhī jarēnh anhýr kēt nē. Mē pamā te Apraāwja mē htyk nē mē hapēx pyrāk. Nom nhūm prem ra Tirtūm ri akupým htír nē mex nē pa ho pa. Tā ka htem Tirtūm kapēr kwým ri akupým mē htír kēt ā mē harēnh o apa. Anē.

³⁹ Nhūm pre ā Jejus mē kām kapēr anē. Hāmri nhūm Tirtūm kapēr tūm o mē ahkre ho mē pa xwýnh kwýjaja kuma nē tee ri axte tanhmā kām nē hprām kaprý nē kām:

—Tý. Nà ām hāmri na ka ā ja jarēnh anē. Anē.

⁴⁰ Hāmri nhūm mē axte mēmoj tā hkukjēr kēt nē. Tanhmā kot wem amnhī to nē hamaxpēr o hakre? Na prem ām tee ri kām hamaxpēr o hakrenh prām kaprý ho kuhē. Jejus kot mēmoj piitā hkukamā àhpumunh týx o àhpumunh týx.

Jejus kēp pahi finat Tawi nhō Pahihti hā kot amnhī jarēnh

Matēwre 22.41-46; Makre 12.35-37; mǎānēn Rōmān 1.3-4

⁴¹ Tā nhūm Jejus kànhmā xa nē amnhī tā tanhmā mē kot mar o kuhē xwýnhjē hkukjēr to. Nom te nhām mēhō hā mē hkukjēr pyrā nē mē kām:

—E kwa mē inhmā mēmoj jarē. Tirtūm kot mē akaxyw ām mā xwýnhta ā na pa mē akukja. Mo na htem axpēn mā kēp finat pahi Tawi kanrēhā htāmnhwý pix ā harē nē mǎānēn kēp ō pahihti hā harēnh kēt nē?

⁴² Na pre Tawi Tirtūm kapēr kwý hā kagā nē tanhmā harēnh to. Tirtūm mex ā mē grer xāja kwý kamā harē nē hā kagā nē hā kagā ho:

Na pre Tirtūm inhō Pahihti mā ā kapēr anē nē kām: “E amnē ixwýr tē nē inhīhkō hā nhý nē inhmā mē ho amnhīptār o akrī.

⁴³ Kot paj mē kot kām akurē xwýnh piitā mē unēnh pa nē awýr mē o mra nē anhīhkram mē haxār pa.” Anhýr o pre kām kapēr. Anē.

⁴⁴ Na pre ā Tawija Tirtūm kot Kris mā kapēr jarēnh anē. Mē kajaja na ka htem ām kēp Tawi kanrēhā tāmnhwý pix ā ri axpēn mā harēnh o ri apa. No kēt Tawi na pre kēp ō Pahihti hā harēnh o pa. Anē.

Jejus kot tanhmā Tirtūm kapēr tūm o mē ahkre xwýnhjē jarēnh to

Matēwre 23.1-12; Makre 12.38-40

⁴⁵ Nhūm pre ā Jejus mē kām kapēr anē nhūm mē piitā mar o kuhē. Hāmri nhūm hpānhā hkōt mē pa ho mē pa xwýnhjē mā kapēr nē mē kām:

—Kwa mē o kora. Kēr ka mē Tirtūm kapēr tūm o mē ahkre xwýnhjē kot amnhī nhīpēx o amnhī nhīpēx kēt nē. Ām mē omu nē ām mē omu nē mē kot amnhī nhīpēx kōt amnhī nhīpēx o ri apa hkēt nē. ⁴⁶ Na htem mē piitā mē kot mē hā hpijaàm kaxyw mē ē

mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwỳnh ã mẽ harênh o mẽ paja na mẽ kãm hprãm. Nê mẽ panhõ Tĩrtũm kapêr o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nê mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

⁴⁷—Nê mẽ kêp mẽ mjên htyk xwỳnhjê ho ajuta ho pa hã amnhĩ jarênh tã ãm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ òrkwỹ pytà. Nê mẽ hêx rom te tãm mẽ kot amnhĩ nhĩpêx pyrà nê Tĩrtũm mã amnhĩ jarênh japjêê ho kuhê. Mỳrapê koja mẽ mex kêt nê. Koja Tĩrtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot amnhĩ nhĩpêx anhỹr xwỳnhjê hkôt amnhĩ nhĩpêx o apa hkêt nê. ãm kwarĩ ho kwarĩ. Anê.

21

Kêp mjên htyk xwỳnh jarênh Makre 12.41-44

¹ Nhũm Jejus kormã Tĩrtũm mã amnhĩ jarênh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwy nhõr o pa. Jakamã nhũm mẽ hikàxpore rũnh xwỳnhjaja hwỳr agjê nê kamã kàxpore gjênh xà kamã hkwy gjê nê ma akupỹm mra.

² Jakamã nhũm mẽhõ ni pê mjên htyk xwỳnh haxwỳja hwỳr axà. Kêp amrakati kumrêx nê hikàxpore tỳxre ãm axkruttre htã mẽ hpãnhã hwỳr axà. Nê kãm Tĩrtũm kĩnh xàj hamê kamã kuxà hãmri nê kato nê ma akupỹm tẽ. ³⁻⁴ Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nê. Hãmri nê hkôt mẽ pa ho pa xwỳnhjê mã harê nê mẽ kãm:

—E mãn ka mênire htêm mũj pumu. Kêp amrakati nê hikàxpore ãm kêp grire htã amnhĩ pê òr pa. Kwỳjê rom kãm Tĩrtũm kĩnh xàj amnhĩ pê òr par kumrêx. Apkur xà hã hikàxpore na. Mẽ hkwyjaja na htem hikàxpore hkwy ho mra nê kugjê nom arĩ mẽ hikàxpore rax. No nhũm nire nêj mẽ

kurom kãm hikàxpore japê hkêt nê. Nê ho òxy hkêt nê àmnhĩx piitã Tĩrtũm mã òr pa. Anê.

Mẽ kot amnhĩ tomnuj xwỳnhjê hkukamã mẽ harênh

Matêwre 24.1-2; Makre 13.1-2

⁵ Tã hãmri nhũm Jejus kôt mẽ pa ho mẽ pa xwỳnhjaja kormã Tĩrtũm mã amnhĩ jarênh xà hã ixkre kaxwỳnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhõr nêj haxwỳja piitã mex. Anê.

Hãmri nhũm Jejus mẽ kuma nê mẽ kãm:

⁶ —Nà mex tã koja nhỹrmã mẽ kãm Tĩrtũm kurê xwỳnhjaja grãnh pa. Koja arĩ kên ò axkruttre nê axpên mỳnh nê nõr kêt nê. Koja piitã angrã nê ahpỹnhã ri hikwỹ. Anê.

⁷ Nhũm pre ã mẽ kot hipêx anhỹrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grãnh parta jarê. Xà koja mẽ tokyx ho anê nà xà kormã? Kwa mẽmo koja wỳj ri tanhmã amnhĩ nhĩpêx to? Anê.

⁸ Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtõ nê mẽ apê ixkrajê hwỳr mra nê hêx rom te pa ixte amnhĩ nhĩpêx pyràk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tĩrtũm mẽ awỳr inhmẽ. Ixpê kaxkwa rũm ixwryk xwỳnh na pa.” Anhỹr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptar kaxyw mẽ awỳr wrỳ.” Anhỹr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupỹn ixpõx xà hã arĩgrota kormã.

⁹—Nê koja mẽ nhỹri awry hã axpên par o pa. Nê mẽ atãã axpên par o pa. Nom kêr ka mẽ harênh ma nê ri tee ri tokyx mẽmoj piitã hapêx kukamã ajamaxpêr kêt nê. Mẽmoj piitã hapêx xà hã arĩgrota kormã.

10 Koja mëmoj piitã hapêx kaxyw nhũm ahpÿnhã ri pika piitã hkôt mẽ pa xwÿnhjaja axpên kutã amnhĩ xunhwÿ nê pijapu nê axpên pa.

11 Nê koja pika piitã hkôt tanhmã ahpÿnhã mẽ à kute mẽ hamÿ nhũm mẽ amnhĩ xà htÿx kamã hamak o pa.

Nê koja pikaja tertet tÿx nê.

Nê koja mẽ nhÿri pika hkwy kamã prãm xàj hpikaprãr pa.

Nê koja kaxkwa kamã mẽmoj tanhmã amnhĩ anhĩpêx to nhũm pika nhõ xwÿnhjaja tee ri omu nê kãm ma htÿx kumrêx nê htertet o kuhê.

Koja mẽmoj ã amnhĩ nhĩpêx anê pa rĩ korãmã akupÿn mẽ awÿr wrÿ nhũm mẽmoj piitã hapêx pa. Koja mẽmoj ã amnhĩ nhĩpêx anê.

12 —E Tirtũm mã amnhĩ jarênh xà hã ixkre grãnh par xwÿj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwÿnhhta kot paj hpãnhã mẽ amã harê ka mẽ inhma. Koja mẽ kãm ixkurê xwÿnhjaja mẽ awÿr mra nê ixtã mẽ apynê nê tanhmã ixtã mẽ anhĩpêx to. Nê ma mẽ pikuprõnh xà hã ixkreja wÿr mẽ ato mra nê kamã mẽ kãm tanhmã mẽ ato kapêr punuj to. Nhũm mẽ kuma hãmri nê ma mẽ ato mra nê mẽ ajagjê. Mẽ ate ixkôt apa ho apa jakamã koja mẽ ã mẽ anhĩpêx anê. Nê mẽ õ pahшти hwÿr mẽ ato mra nê mẽ kãm tanhmã mẽ ato kapêr punuj to. 13 Tã kêr ka mẽ kutã akrĩ nê axãmnhĩx mãmrĩ tanhmã mẽ kãm ijarênh to ho akrĩ.

14 —Nom kwa kêr ka mẽ kãm tanhmã amnhĩ jarênh to hkukamã tee ri ajamaxpêr o ri mẽ amã mẽ uma hkêt nê. Rÿ mẽ ajamaxpêr o: “Hêxta waa nê. Tanhmã koja we mẽ kot ixkukjêr ã arĩgrota ã pa we ri mẽ kãm ixkapêr to?” Anhÿr o tee ri amnhĩ kukamã ajamaxpêr kêt nê. ãm amnhĩ kaxyw inhmã pix mã ajamaxpêr tÿx rãhã nê. 15 Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarênh to. Hãmri nhũm mẽ amnhĩ tã mẽ ama nê axte tanhmã mẽ ato kapêr to hkukamã tee ri hamaxpêr o kuhê.

16 —Nê koja mẽ anhĩpêxà nê mẽ akatorxà nê mẽ atõ nê mẽ akrãmnhwÿjaja. Nê kaxyw krĩ hkôt mẽ akwÿjaja ixtã mẽ atã amÿnê nê ma mẽ õ pahi hwÿr mẽ ato

mra nhũm mẽ ajagjê nê mẽ akwÿjê pa. 17 Koja mẽ piitã ixtã mẽ akamã gryk nê kãm mẽ akurê nê. 18-19 Nom mẽ kot ã mẽ anhĩpêx anhÿr mã tã kêr ka mẽ amnhĩ to htÿx nê ixkaga hkêt nê. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nê ã mẽ kot mẽ anhĩpêx anhÿr xwÿnhjê rom Tirtũm mẽ wa ixri atĩr tũm nê amex rãhã apa ho apa. Mẽ kot tanhmã mẽ ato htã mẽ ate kaxkwa kamã atĩr tũm nê apa mã xwÿnh jakamã kwa kêr ka mẽ tee ri amnhĩ kukamã ajamaxpêr o ri apa hkêt nê.

20 —Koja nhÿrmã nhÿhÿnh põristi ohtõ nê mra nê Jerujarê hwÿr põj hãmri nê mẽ kãm hipõk pa nê kuhê. Ka mẽ ja hã mẽ omu nê mẽ kot krĩja grãnh par mã ajamaxpêr kurê kumrêx. 21 Koja mẽ ã amnhĩ nhĩpêx anê ka mẽ amÿm amnhĩ wÿr mẽ omu hãmri nê ajapõj nê ma aprõt nê amrar kurê kumrêx. Mẽ apê jar pika pê Jutej kamã mẽ apa xwÿnhjaja ka mẽ omu nê mẽ kot mẽ apar pymaj ma aprõt nê amrar kurê kumrêx. Hixêt prêk wÿr ajapõj nê aprõt nê ma mra.

—Nê kê Jerujarê nhõ xwÿnhjaja mẽ umaj haxwÿja hapõj nê ma hprõt nê ma mrar o mra.

—Nê jar kapõt ã ri mẽ pa xwÿnhjaja kê mẽ akupÿm krĩ hwÿr gjêx kêt nê. ãm ma mẽ umaj hprõt nê mrar kurê kumrêx.

22 —Mẽ kot amnhĩ tomnuj mÿrapê koja Tirtũm ã mẽ hwÿr mẽ kãm mẽ hkurê xwÿnhjê rênh anê. Kapêr ã kagà htũm ra kot mẽ hkukamã ja jarênh kot anhÿr. Jakamã koja mẽ nhÿrmã mẽ hkukamã mẽ harênh xàja kôt ã mẽ hipêx anê.

23 —No mẽ htujarõ xwÿnhjaja nê mẽ hkra karare xwÿnhjaja koja mẽ kêp mẽmoj omnuj tÿx nê. Tanhmã kot mẽ amnhĩ to nê hprõt tÿx? Nà pika ja kamã koja mẽ piitã mex kêt nê. Mẽ kot amnhĩ tomnuj mÿrapê koja Tirtũm ã mẽ hipêx anê. 24 Koja mẽ nhÿhÿnh krĩ hõ rũm mẽ hwÿr mra nê mẽ unê nê mẽ hkamnhwÿr o mẽ kupa. Nê mẽ hkwyjê pynê nê ma nhÿhÿm ahpÿnhã mẽ õ pika hwÿr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwÿnhjaja Jerujarê o amnhĩptã nê ã mẽ hipêx anê. Nê kamã pa ho pa rãhã nhũm Tirtũm nhÿrmã akupÿm nê mẽ kator pa. Tã

koja mẽ nê mẽ kator parja o pa ra akupÿn mẽ awÿr inhnojarêt. Anê.

Nhũm pre ã Jejus mẽ kãm mẽ kot Jerujarê granh par xwÿnhjê hkukamã harênh anê.

Akupÿn Jejus wrÿk xwÿj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mãânên Sikũn Pêtre 3.10; Apokarip 1.7

²⁵ Nhũm Jejus arĩ hkôt mẽ pa ho pa xwÿnhjê mã kapêr nê mẽ kãm:

—Nê kot paj nhÿrmã akupÿn mẽ awÿr inhnojarêt nhũm kaxkwa kamã kanhêti nê myyti nê mytwÿre axtem tanhmã ri amnhĩ nhĩpêx to. Nhũm gô xujanãr haxwÿja hkoko htÿx jao axpên tak tÿx nê. Hãmri nhũm pika piitã hkôt mẽ pa xwÿnhjaja kuma nê omu nê mẽ kãm ma htÿx nê mur nê htertet nê tee ri amnhĩ kukamã hamaxpêr.

²⁶ —Nê koja Tĩrtũm tanhmã kaxkwa ho àk to nhũm kanhêti piitã pikarêr pa. Hãmri nhũm pika hkôt ri mẽ pa xwÿnhjaja omu nê tee ri amnhĩ kukamã hamaxpêr o amnhĩ japrãr pa nê hikwÿ. ²⁷⁻²⁸ Koja ã mẽmoj amnhĩ nhĩpêx anê ka mẽ ja hã omu nê akupÿn mẽ awÿr inhnojarêt mã ajamaxpêr kurê kumrêx. Hãmri nê mẽ kot ixkôt amnhĩ xunhwÿr kêt xwÿnhjê rom akĩnh kãm ijapêr arĩt o akuhê.

—Nà kot paj akupÿn mẽ awÿr wrÿ. Kakrã kamã hirã htÿx kãm akupÿn ixihÿtÿx kãm mẽ awÿr wrÿ. Hãmri ka mẽ apiitã pika piitã hkôt ano ho ixpumu. Kot paj ã ixwrÿk anê hãmri nê mẽmoj punuj piitã pê mẽ apytãr pa. Jakamã ka mẽ ã mẽmoj kot amnhĩ nhĩpêx anhÿrja ã omu hãmri nê tokyx ixkôt axàpirta mã ajamaxpêr nê akĩnh tÿx nê. Anê.

²⁹ —E ga mẽ pĩ hpàr mũj pumu. ³⁰ Na hte mẽmo mytwÿr hã rã nhũm mẽ omu nê ô hkukamã hamaxpêr. ³¹ Ja pyrã nê koja ã mẽmoj amnhĩ nhĩpêx par anhÿr mẽ ka mẽ omu nê akupÿn mẽ awÿr ixwrÿkja mã ajamaxpêr kurê kumrêx. ³² Koja akupÿn ixpôx kêt ri mẽ kot ã mẽmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

³³ —Nê koja nhÿrmã pika nê kaxkwa wa hapêx pa. Tã no ãm ixkapêr koja wa urak nê

aa hapêx kêt nê. Koja ãm rãhã ho rãhã. Kot paj aa ihkÿjê ho tanhmã mẽnh to hkêt nê.

³⁴⁻³⁵ —Nê kwa mẽ o kora. Mẽ axkãm ajamak rom. Mẽ kot ixkôt amnhĩ xunhwÿr kêt xwÿnhjaja na htem kãm tanhmã amnhĩ nhĩpêx to hprãm xà hkôt pix mã tanhmã amnhĩ nhĩpêx to ho ri pa. Jao ãm amnhĩ xàpkur xà nê amnhĩ to mex xà nê kàxpore pix kukamã hamaxpêr o pa. Nê htÿx ri tanhmã amnhĩ tomnuj to ho pa. Nê pipãnh kãm tanhmã amnhĩ to ho pa. Tã koja mẽ ã amnhĩ nhĩpêx anhÿr o pa rãhã pa ra mẽ haêr pê akupÿn wrÿ nhũm mẽ tee ri ixpumu nê kãm ma htÿx kumrêx. Te tutre htÿx ri harôj kajyr o pa nê rapuuti hwÿr àr nhũm kot haê nê unênh nhũm tee kãm kator prãm pyrãk. Koja mẽ ã amnhĩ nhĩpêx anê. Nom kêr ka mẽ ho mẽ urak kêt nê. ãm pa inhmã hprãm xà hkôt pix mã tanhmã inhmã amnhĩ nhĩpêx to rãhã ho ri pa.

³⁶ —Tã kêr ka mẽ ã mẽ kot amnhĩ tomnuj o pa anhÿrja kôt amnhĩ nhĩpêx o apa pymaj amnhĩ to Tĩrtũm wÿr rãhã ho apa. Kê tanhmã mẽ ato hihtÿx to ka mẽ ÿ hã ho mẽ urak kêt nê. Kêr pa nhÿrmã akupÿn wrÿ ka mẽ ixpumu nê mẽ kurom amnhĩ kamã akahak kêt nê akĩnh tÿx nê man ixwÿr mra. Anê.

Nhũm pre ã Jejus hkôt mẽ pa ho mẽ pa xwÿnhjê jahkre anê.

³⁷ Hãmri nê apkati mẽ Tĩrtũm mã amnhĩ jarênh xà hã ixkre kamã mẽ pikuprõnh xwÿnhjê jahkre ho hkrĩ. Nhũm kamãt nhũm hkôt mẽ pa ho mẽ pa xwÿnhjê mẽ mẽ krĩ rũm hapôj nê ma hixêt prêk pê Oriwêhti hwÿr mra nê kamã amnhĩm hikra nê hikwÿ. ³⁸ Nhũm kwÿhtã nhũm mẽ kãnhmã hkrĩ nê ma akupÿm krĩm mra nê ixkreja wÿr agjê. Hãmri nhũm mẽ piitã hã akuprô nê kot mẽ ahkre hã mar o hkrĩ.

22

Mẽ kot Jejus ã àmnênh ã mẽ harênh
Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pê Pasja àhtêp o mō. Pas ã na htem amnepêm Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wÿr akuprô nê hã hkĩnh. Na htem arĩgroja jarênh o: “Pas” anhÿr ã harê. Nê mãânên harênh o:

“Mê pahte pãw kaxkrit kêt kur ã arĩgro.” Anhÿr o harê. ² Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwÿnhjaja ra kãm Jejus pĩr prãm nê. No mẽ kãm hkôt mẽ kot kapêr mar xwÿnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mẽ kêp kupĩ? Kot puj mẽ noo mã tanhmã ho nhũm mẽ hã mẽ pakamã gryk tÿx kumrêx. Anê.

Jut Kariot kot Jejus ã ãmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhÿ hã mẽ ahkre ho pa xwÿnh pê 12 hõ na pre. Tã axtem nê tanhmã hamaxpêr to nê Satanasti nhÿ hã ma mẽ õ patre krãhtũm mẽ Tĩrtũm mã amnhĩ jarênh xà hã ixkre jamãr xwÿnh krãhtũmjê hwÿr tẽ. Hãmri nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amÿnê ka mẽ hpãnhã inhmã amnhĩre nà? Anê.

⁵ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nê hkĩnh nê mẽ kãm:

—Tõe. Nà kot paj mẽ amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkôt pa. Mẽ kot mar o pa xwÿnhjê hkàx ã nhÿri unênh nê ma mẽ hwÿr o htêm kaxyw.

Jejus kot ÿ hã mẽ ahkre xwÿnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêh Ijaewjê nhĩgêjtaja na prem ôwêhti hkrare hkwÿ hpar o pa. Tĩrtũm kot ja hã mẽ omunh nê Ejit kãm mẽ kãm mẽ hkurê xwÿnhjê nhĩhkra nê mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwÿjaja arĩgro pê Pas ã axpên wÿr akuprõ nê mẽ kãm hamaxpêr pê mẽ uràk nê ôwêhti hkrare hkwÿ hpa. Hãmri nê pãwti kaxkrit kêt kãm kuku. ⁸ Jakamã nhũm Jejus ÿ hã mẽ ahkre ho mẽ pa xwÿnhjê wa ho axkrut nê mẽ amnhĩ kukamã wa kumê. Simãw Pêtre mẽ

Juãwja nhũm wa mẽ amnhĩ kukamã wa kumê nê wa kãm:

—E wa ma mẽ ixkukamã tẽ nê mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nê kãm:

—Tõe. Nhÿri kot paj we wa tẽ nê mẽ akutêp hã apê? Anê.

¹⁰ Hãmri nhũm wa kãm:

—Nà wa mãmrĩ ma Jerujarê hwÿr wa tẽ. Nê hwÿr axà nê mêmõ mytita pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ. Ka wa omu nê hã ajêt nê ma hkôt òrkwÿ hwÿr tẽ. ¹¹ Hãmri nê ixkre nhõ dõn pumu nê kãm: “E jar na pa wa awÿr tẽ. Jejus na wa inhmê pa wa awÿr tẽ. Na awÿr pêr mênh o: ‘Nhÿri kot paj ixkôt ri mẽ pa ho mẽ pa xwÿnhjê mẽ axpên kutã Pas ã apku?’ Anê. Na ã awÿr hpêr mênh anê.” Anê.

¹² —E ã kãm akapêr anê kê war ama nê ra war amã òrkwÿ nhĩmõk ã ixkre rax õ jahkre. Kamã ra kaxyw mẽ paxàpkur xà hã mêmõj piitãã. Ka wa omu hãmri nê mãmrĩ mẽ ixkutêp kamã mêmõj tã apê. Anê.

¹³ Hãmri nhũm wa kuma nê ma krĩm tẽ. Ma tẽ nê hwÿr axà hãmri nê ra kot wa kãm mêmõj jarênh xà hkôt mêmõj piitã omu hãmri nê mẽ kutêp mêmõ hã ãpênh o wa xa.

¹⁴ Tã nhũm myt axà nhũm mẽ wa hkôt mõi nê ixkreta wÿr àpir pa. Hãmri nê apkur kaxyw hkrĩ hpa nhũm Jejus mẽ ìhkô hã nhÿ.

¹⁵ Hãmri nê mẽ kãm tanhmã amnhĩ jarênh to nê mẽ kãm:

—E na pa inhmã Pas ã mẽ anhĩhkô hã ixàpkur prãm nê. Kormã ixte amnhĩ xà htÿx kãm ijamak xwÿj ri. ¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nê. Nom koja nhÿrmã Tĩrtũm akupÿn ixte mẽ ato amnhĩptar kaxyw inhmê hãmri pu mẽ rĩ kormã axte arĩgro mex maatija ã pahkĩnh kãm axpên kutã paxàpkur rax nê. Anê.

¹⁷ Nhũm ã mẽ kãm amnhĩ jarênh anê nê hpãnhã wĩhti py nê o xa nê Tĩrtũm mã harê nê kãm:

—Pa Papaj. Nà ãm hãmri na ka hte mẽ inhnê mẽ kãm mẽ ixkurê xwÿnhjê pumunh mex nê mẽ ìhkra pê mẽ ijàpôj. Amex o amex. Anê.

Hãmri nê hpãnhã hkôt mẽ pa ho mẽ pa xwÿnhjê hõ mã kugõ nê kãm:

—E mĩ. Apy nẽ mẽ axpẽn pãnhã hkwỳ ho ixkõ. ¹⁸ ãm hãmri na pa mẽ amã amnhĩ jarẽ. Kot paj axte wĩhti ho ixkõm kêt rãhã nhũm nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh rax nẽ. No ãm ra axtem tanhmã hã mẽ pahkĩnh to. Anẽ.

¹⁹ Hãmri nẽ hpãnhã pãwti py nẽ mã ho anẽ nẽ Tĩrtũm mã harẽ. Hãmri nẽ ho hkry hpa nẽ mẽ piitã mẽ kãm õr pa nẽ mẽ kãm:

—E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyrãk o inhĩpêx pa amnhĩ xà htỳx kamã ijamak kãm ty. Nom mẽ anẽ kot paj ty. Jakamã kër ka mẽ ixwakre kamã tõhã axpẽn wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtykja mã ajamaxpêr pẽ akĩnh nẽ pãwti hkur o akrĩ. E mẽ mãmri axãmnhĩx aku. Anẽ.

Nhũm pre ã mẽ kãm amnhĩ jarẽnh anẽ nhũm mẽ mar pẽ pãwtita hkur o hkrĩ. ²⁰ Hãmri nẽ ra hkur pa. Hãmri nhũm Jejus axte kopta py nẽ mẽ kãm:

—Mẽ kot ixpĩr xà hã arĩgro hã koja ixkamrõ axkapĩ. Nom koja mẽ amarĩ ixpĩr nhũm ixkamrõ amarĩ hpikapĩr kêt nẽ. ãm paa. Pa kot paj mẽ anẽ mẽ ãhkram amnhĩ jaxà nhũm mẽ ã inhĩpêx anẽ. Koja ixkamrõ axkapĩ nhũm Tĩrtũm omu nẽ ixkukwak ri mẽ anẽ mẽ ate amnhĩ tomnuj piitã te amnhĩ katut kõt rẽnh par pyrãk o hipêx nẽ mẽ ato hkra. Amnepêm kot ja hã amnhĩ jarẽnh xà hkõt. Jakamã e mẽ ixkamrõ pikapĩrta mã ajamaxpêr pẽ wĩhti hkwỳ ho ixkõ. Anẽ.

Jejus ã mẽ kãm ãmnênh xwỳnh jarẽnh
Matêwre 26.21-25; Makre 14.18-21; Juãw
13.18-19

²¹ Nhũm Jejus arĩ mẽ kãm kapêr nẽ mẽ kãm:

—Nẽ kot mẽ kãm ixtã ãmnênh mã xwỳnhhta na jar mẽ pahkaêx ã mẽ pakutã apkur o nhỹ. ²² Tĩrtũm kãm hprãm xà hkõt koja mẽ tanhmã ixto rax nẽ ixpĩ. Nom kot mẽ kãm ixtã ãmnênh mã xwỳnhhta hêxta waa nẽ. ã kot inhĩpêx anhỹrja mỳrapê koja amnhĩ xà htỳx kãm hamak rax kumrẽx. Anẽ.

²³ Nhũm pre ã Jejus mẽ kãm amnhĩ jarẽnh anẽ. Nhũm mẽ kuma nẽ tee ri axpẽn pumunh o hkrĩ. Hãmri nẽ ri axpẽn kukja nẽ axpẽn mã:

—Kwa nà mẽ pahtõ kot pu we ã ri hipêx anẽ? Nà pa hkêt.

Anhỹr o tee ri axpẽn kukjêr o hkrĩ.

Mẽ pamã amnhĩ to rũnh prãm kêt ã mẽ pamã karõ

Matêwre 20.20-28; Makre 10.35-45; mãânênh Rõmãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mẽ ahkre ho mẽ pa xwỳnhhaja axpẽn mã tanhmã kapêr to ho hkrĩ nẽ axpẽn mã:

—Kwa mẽ pahtõ kot puj wem nhỹrmã pahpê pahi nẽ mẽ ho amnhĩptàr rax o ri papa? Anẽ.

Hãmri nẽ mẽ axpẽn mã: “Nà pa.” Anẽ nẽ nhãnh axpẽn mã: “Nà kêt paa.” Anẽ. Hãmri nhũm mẽ nêtãnh axpẽn mã: “Nà kêt pa kênã.” ²⁵ Anhỹr o axpẽn mã kapêr o hkrĩ. Hãmri nhũm Jejus tee ri axpẽn tã mẽ kuma nhũm mẽ ã hamaxpêr anhỹrja kêp omnuj nẽ nhũm mẽ kãm tanhmã hã kapêr to nẽ mẽ kãm:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nẽ mẽ kot amnhĩm mex ã harẽnh kaxyw tanhmã mẽ ho mex to ho pa. ²⁶⁻²⁷ Tã kër ka mẽ ho mẽ urak kêt nẽ. Kêt ãm te amarĩ ri mẽ apa xwỳnh pyrãk o axpẽn nhĩpêx. Ixpyrà nẽ amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptàr rax kukamã ajamaxpêr kêt nẽ. ²⁸ Na prem axpẽn mã ixto hêx nẽ tanhmã ixto kapêr punuj to htã ka mẽ ama nẽ ãm mẽ ama nẽ arĩ ixkõt ri apa rãhã nẽ. ãm hãmri na ka htem arĩ ixkõt ri apa anẽ. ²⁹⁻³⁰ Kot paj amnhĩ tã mẽ ato mex rax nẽ. Na pre ra Tĩrtũm nhỹrmã ixte mẽ ato amnhĩptàr o ixkrĩ kaxyw ixãm. Tã ot pa amnhĩ pyrà nẽ mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptàr

o apa. Nē mẽ apē ixkràmnhwỳ hã nhỹrmã ixkutã axàpkur o apa. Anē.

Jejus kot Simãw Pêtre mã kapêr ã harênh Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapêr nē kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nē. Tanhmã kot mẽ akrã hto nhũm mẽ ate mẽ kãm ixkurê xwýnhjê pumaj ixkaga hã kãm mẽ akamã hamak prãm tỳx nē. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nē mãmrĩ tanhmã mẽ kamã ajamak to.” Anē.

³² —Tã ate mẽ umaj ixkaga nē axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wỳr kãm ixihtỳx nē Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nē tokyx tãm akupỹm ixkôt amnhĩ xãm tỳx nē. Kêr kê nhỹrmã akwỳjê hõ tanhmã amnhĩ tomnuj to nē tee ri amnhĩ kukamã hamaxpêr ka ja hã omu hãmri nē kãm ate tanhmã amnhĩ tomnuj tota jarê. Kê mẽ ã ate amnhĩ nhĩpêx anhỹr ã ajarênh ma nē apyrã nē tokyx akupỹm tãm ixkôt amnhĩ xãm tỳx kurê kumrêx. E kêr ka ã akupỹm ixkôt mẽ piitã mẽ hipêx anhỹr o ri apa Simãw Pêtre. Anē.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anē. ³³ Hãmri nhũm tee ri amnhĩ tã kuma nē kãm:

—Kwa nà Pahihti. Kot paj ri akwỳm tanhmã amnhĩ tomnuj to hkêt nē. Koja mẽ te ajaxà nē apĩ htã kot paj arĩ akôt ri ixpa ho ixpa nhũm mẽ pahto amỹrã nē tanhmã pahto. Anē.

³⁴ Hãmri nhũm kuma nē kãm:

—Nà koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axàprãr o axkrunêpxi kãm ga. Anē.

Jejus kot hkwỳjê mã mẽmoj tã karõ Matêwre 10.5-15; Rukre 9.1-3

³⁵ Hãmri nhũm Jejus arĩ hkôt mẽ pa ho pa xwýnhjê mã kapêr nē mẽ kãm:

—E wam ixte mẽ hwỳr mẽ arênhta ã na ka prem amnhĩ kôt aparkà hkwỳ ho apa

hkêt nē. Nē kawà jamành nē ho apa hkêt nē. Nē mrykà jamành nē amnhĩ kôt ho apa hkêt nē. Âm mẽ anhỹ kamã mẽ hwỳr apa hã na pa pre mẽ amã karõ. Tã xàn ka prem ã mẽ hwỳr apa anē nhũm mẽ amnhĩ wỳr awỳr kêt nē? Nà xà na prem amnhĩ wỳr mẽ awỳ? Anē.

Hãmri nhũm mẽ kãm:

—Tỳ na prem amnhĩ wỳr mẽ ixwỳ. Mẽ ixte amnhĩ kôt mẽmoj to ixpa hkêt tã na pa prem amarĩ mẽ kutã ixàpkur mex o ri mẽ hkôt ixpa. Anē.

³⁶⁻³⁷ Hãmri nhũm mẽ kãm:

—Tõe. Nà mẽ kot mẽ ato mex tã nom koja mẽ hpãnhã axtem hõ ho mẽ anhĩpêx. Jakamã kêr ka mẽ akupỹm mẽ kãm ijarênh o apa kaxyw anojarêt hãmri nē anhõ mrykà rỳ akawà htu nē ma amnhĩ kôt ho apa. Nē awapo. Kot kaj mẽ awapo hkêt japêr hãmri nē apipro xà ho wênê nē amnhĩm hõ japrô nē ma amnhĩ kôt ho apa. E kêr ka mẽ ã amnhĩ nhĩpêx anē.

—Nē Tĩrtũm kapêr ã kagà htũm kot ra ixkukamã tanhmã ijarênh to nē kot ijarênh kot:

Koja mẽ hipêx o te mẽ kot amnhĩ tomnuj tỳx xwýnh nhĩpêx pyrãk. Anē.

Ã mẽ kot inhĩpêx anhỹr kukamã ijarênh kot anhỹr. Tã na mẽ ra ã inhĩpêx anhỹr kaxyw. Anē.

³⁸ Nhũm pre ã Jejus mẽ kãm kapêr anē nhũm mẽ kuma nē kãm:

—Ota mẽ panhõ wapohti hamêxkrut Pahihti. Anē.

Hãmri nhũm mẽ kãm:

—Tõe. Nà hãmri. Mẽ amnhĩm axi nē ho amnhĩm mẽmoj to anē. Anē.

Jejus kot Tĩrtũm mã amnhĩ jarênh Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nē hixêt pê Oriwêhti hwỳr tẽ nē api nhũm hkôt mẽ pa ho mẽ pa xwýnhjaja ma hkôt mra.

⁴⁰ Hãmri nē nhỹri hixêt kahti ri hkrĩ nhũm Jejus mẽ kãm:

—E kwa kêr ka mẽ ixkutêp amnhĩ to Inhõ Papaj wỳr o akrĩ. Kê mẽ ixkôt tanhmã mẽ ato htã ka mẽ amã mẽ uma xàx ixkaga hkêt nē. Arĩ mẽ kutã amnhĩ to htỳx nē akuhê. Anē.

⁴¹ Hāmri nē mẽ kurũm htēm grire nē Tĩrtũm mã amnhĩ jarēnh kaxyw hkõn krã ho tēm nē nhỹ. ⁴² Hāmri nē kãm:

—Kwa Papaj. Nà na pa ra amnhĩ xà htỳx kukamã ijamaxpēr nē amnhĩ kamã ixkahak tỳx kumrẽx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nē mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt nê. Rỳ ko. Kot kaj amã mẽ kot tanhmã ixto hprãm hã kê mẽ mãmri tanhmã inhĩpêx to. Nom pam inhmã hprãm xà hkôt kêt. Anê.

Nhũm pre ã Jejus amnhĩ to Hipêêxà Tĩrtũm wỳr anê. ⁴³ Hāmri nhũm kuma nê hwỳr kapēr o wrỳk xwỳnhja mẽ nhũm hwỳr wrỳ nê kuri xa. Hāmri nê õxàhkre kaxwỳnh kãm tanhmã ho hihtỳx to. ⁴⁴ Nhũm kê axte amnhĩ to Hipêêxà hwỳr kãm hihtỳx nê. Tee ri amnhĩ kukamã hamaxpēr pê amnhĩ kamã kahak tỳx kumrẽx. Jao hã gô rax nê te hkamrô xàhàr pyràk o pikap ahà. ⁴⁵ Hāmri nê kànhmã xa nê akupỹm hkôt mẽ pa ho mẽ pa xwỳnhjê hwỳr tẽ nê mẽ omu nhũm mẽ ra õt pa nê hikwỹ. Mẽ kot tee ri Jejus kot mẽ kãm amnhĩ jarēnhja kukamã hamaxpēr o hkaprĩ nê õt pa nê hikwỹ. ⁴⁶ Hāmri nhũm Jejus tẽ nê tee ri mẽ omu nê mẽ kumra nê mẽ kãm:

—Kwa nà. Mẽ ri ã amnhĩ nhĩpêx anhỹr kêt nê. Kwa mẽ kànhmã akrĩ nê amnhĩ to Inhõ Papaj wỳr kê mẽ ato mẽ axihtỳx. Hāmri nhũm mẽ tanhmã ixkôt mẽ ato ka mẽ inhỹ hã mẽ kutã amnhĩ to htỳx nê akuhê. Anê.

Mẽ kot Jejus pynênh ã mẽ harēnh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mẽ kãm kapēr anhỹr rôm nhũm hkôt pa ho pa xwỳnh pê Jut Kariotja amnhĩ kôt mẽ kot Jejus pynênh xwỳnhjê ho tẽ. Mẽ ho htēm rax nê. Hāmri nê kot Jejus kahti hkôt mỳnh kaxyw hwỳr tẽ ⁴⁸ nhũm amnhĩ tã omu nê kãm:

—Kwa Jut. Xà mẽ kahti hkôt mẽ hamỳnh nê mẽ hpār o na htem mẽ kãm mẽ hã amỹnê? Anê.

⁴⁹ Hāmri nhũm hkôt mẽ pa ho mẽ pa xwỳnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpēr kurê kumrẽx nê Jejus mã:

—Kwa Pahihti. Xà kot paj mẽ panhõ wapohti py nê ho mẽ panê mẽ hkwỹ hpa? Anê.

⁵⁰ Hāmri nhũm hõta kuma nê mẽ kaxyw ja kapa. Nhũm mẽ õ patre maati mã àpênh xwỳnhja mẽ hkôt tẽ nhũm omu nê kãm wapo ho apê. Nê kot ho hkrã nhĩpôn mã tã kuhpaw nê ho upôk rũm hamak nhĩkjê pix krãhta. ⁵¹ Hāmri nhũm Jejus omu nê nê kãm kapēr nê kãm:

—Kwa nà ri ã amnhĩ nhĩpêx anhỹr kêt nê. Amarĩ xa. Anê.

Hāmri nê hamakja py nê akupỹm kãm hamak ã kuxi nê ho mex. ⁵²⁻⁵³ Hāmri nê mẽ kot unênh mã xwỳnhjê mã tanhmã kapēr to. Mẽ õ patre krãhtũmjê mẽ Tĩrtũm mã amnhĩ jarēnh xà hã ixkre jamār xwỳnhjê krãhtũm mẽ Ijaew nhõ pahijê mẽ nhũm mẽ ho pimràatã mẽ kãm kapēr nê mẽ kãm:

—Kwa na pa pre apkati mẽ Tĩrtũm nhõrkwỹ kamã mẽ kãm ixkapēr o ixpa ka prem tokyx ixpynênh kêt tã jarãhã te ixte amnhĩ tomnuj xwỳnh pyràk o inhĩpêx nê ixwỳr wapo nê kô hã akapên nê ixwỳr ã atēm rax anê. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti nhỹ hã ã mẽ ate inhĩpêx anhỹr mã kênã. Anê.

Simãw Pêtre kot Jejus kôt pa hkêt ã kot amnhĩ jarēnh

Matêwre 26.69-75; Makre 14.66-72; Juãw 18.15-18, 18.25-27

⁵⁴ Tã nhũm mẽ Jejus pynê nê ma o tẽ. Ma mẽ õ patre maati nhõrkwỹ hwỳr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ. ⁵⁵ Nhũm mẽ patre maati nhõrkwỹ hwỳr Jejus o axà nê hkôt gjêx pa hãmri nhũm Simãw Pêtre kĩtare hwỳr axà nê mẽ kuri xa. Nhũm mẽ kĩtare kamã amnhĩm kuto nê hã ànhunh o hkrĩ nhũm ⁵⁶ mẽ ìhkô hã ànhunh o nhỹ. Hāmri nhũm mẽ kãm àpênh xwỳnh niti hirã kamã hprĩ hã omunh kurê kumrẽx nê mẽ kãm:

—Xê pēr myti ja kêp Jejus kôt mẽ pa ho mẽ pa xwỳnhjê hõ na. Anê.

⁵⁷ Hāmri nhũm tee ri amnhĩ tã kuma nê kãm mẽ uma nê mẽ kãm amnhĩ tã aprã nê kãm:

—Tk. Kokỹ. Ixte mēhõ my ata pumunhre hã. Anê.

⁵⁸ Tã nhũm hpãnhã mēhõ myja kãm:

—Kwa nà. ãm hãmri na ajarẽ. Apê Jejus kôt ri mẽ pa xwýnhjê hõ na ka.

Anẽ nhũm kuma nẽ kê axte kãm:

—Kwa mẽ ri ã amnhĩ krã hkôt ri ixto axêx anhÿr kêt nẽ. ãm ixte aa mẽhõta pumunh kêt kumrêx. Anẽ.

⁵⁹ Tã nhũm ja haxwýja axte omu nẽ kãm:

—Kwa ãm hãmri na mẽ ajarẽ. Apê Jejus kwý hõ na ka. Uràk nẽ te apê Garirej nhõ xwýnh pyràk kênã. Anẽ.

⁶⁰ Hãmri nhũm tee ri kuma nẽ mẽ kãm amnhĩ tã aprãr kãm hihtýx nẽ mẽ kãm:

—Tk. Ixpê Garirej nhõ xwýnh kêt. ãm ixte mẽhõ mÿj pumunh kêt kumrêx tã ka mẽ ãm xatã hkôt ixpa ho ixpa xwýnh ã ixkamnhĩx o akuhê.

Anhÿrja o ra mẽ kãm amnhĩ tã aprãr o axkrunẽpxi mẽ nhũm krãhyre kà. ⁶¹ Hãmri nhũm Jejus arĩ ixkre kamã ãm tã Simãw Pêtre ho hakêx nẽ omu. Hãmri nhũm amnhĩ tã no pumu nẽ kot hkukamã kãm ã amnhĩ nhĩpêx anhÿr jarẽnhja mã hamaxpêr kurê kumrêx. Krãhyre hkàr kêt ri kot mẽ kãm amnhĩ tã aprãr o axkrunẽpxi mã harẽnhja mã hamaxpêr nẽ kànhamã hakry hpar o tẽ nẽ hkaprĩ htýx nẽ. ⁶² Hãmri nẽ hkaprĩ xàj kítare pẽ kato nẽ tẽ nẽ awry mã xa nẽ mÿr rax kumrêx.

Mẽ kot Jejus tak ã mẽ harẽnh

Matêwre 26.67-68; Makre 14.65

⁶³ Hãmri nhũm mẽ kot Jejus pumunh o kuhê xwýnhjaja mã hpêr o axkê nẽ htak o kuhê. ⁶⁴ Nẽ no hpro nẽ htak nẽ kãm:

—E atak xwýnh nhĩxi jarẽ. Apê Tirtũm Kra mã ate amnhĩ jarẽnh jakamã mãn uràk nẽ axàhpumunh týx. Jakamã e hixi jarẽ. Anẽ.

⁶⁵ Hãmri nẽ xatã haprý nẽ kãm kapêr punuj nẽ.

Mẽ kot mẽ hkrãhtũm wýr Jejus o htẽm ã mẽ harẽnh

Matêwre 26.57-68; Makre 14.53-65; Juãw 18.19-24

⁶⁶ Tã nhũm myt kator o mõi mẽ nhũm Ijaew nhõ pahijê mẽ patre krãhtũmjê mẽ Tirtũm kapêr tũm o mẽ ahkre xwýnhjaja axpên wýr pikuprõnh pa. Hãmri nhũm mẽ ma mẽ hwýr Jejus o tẽ. ⁶⁷⁻⁶⁸ Nhũm mẽ omu nẽ tanhmã kot amnhĩ jarẽnh to mã hkukja nẽ kãm:

—Kwa mẽ inhmã amnhĩ jarẽ. Xà ka na apê Tirtũm kot mẽ ixkaxyw axãm xwýnhnta? Xà ka kot kaj Rõm nhõ xwýnhjê pẽ mẽ ixpytã nẽ mẽ ixto amnhĩptãr o apa? Anẽ.

Hãmri nhũm mẽ kãm:

—Nà kot paj tanhmã mẽ amã amnhĩ jarẽnh to ka mẽ ixkôt ajamaxpêr kêt nẽ. Ixte ãm hãmri mẽ amã amnhĩ jarẽnh tã ka mẽ inhma nẽ ãm inhma. Nẽ kot pa amnhĩ xwar mẽmoj tã mẽ akukja ka mẽ amnhĩ xwar inhmã tanhmã harẽnh to hkêt nẽ. ãm mẽ axêx rom mẽ ate ã ixkukjêr anhÿr kênã. ⁶⁹ Tã nom kot paj tokyx ma akupÿm Inhĩpêxã Tirtũm wýr api. Hihtýx o hihtýx rãhã nẽ pa ho pa xwýnh na. Jakamã kot paj hwýr api nhũm amnhĩ nhĩhkõ mã inhÿr pa upók rũm mẽ apiitã mẽ ato amnhĩptãr o ixkrĩ. Hãmri nẽ nhÿrmã paa tanhmã mẽ ajarẽnh to. Anẽ.

⁷⁰ Hãmri nhũm mẽ tee ri kot ã amnhĩ jarẽnh anhÿrja ma nẽ kãm:

—Tk. Kwa akatãt kôt mẽ inhmã amnhĩ jarẽ nã. Xà apê Tirtũm Kra na ka? Anẽ.

Hãmri nhũm mẽ kãm:

—Tý ixpê Kra na pa. Anẽ.

⁷¹ Hãmri nhũm mẽ tee ri ã amnhĩ jarẽnh anhÿrja ã kuma nẽ axpên mã:

—Kwa mo kaxyw kot puj mẽ axte mẽ hkwyjê japêr nhũm mẽ tanhmã kot amnhĩ tomnuj to mã harẽ? Tãm kêp Tirtũm Kra mã amnhĩ to hêx nhũm mẽ pahte pahpiitã mar kênã. E kwa tokyx pu mẽ ma Rõm nhõ pahihtĩ hwýr o tẽ kê mẽ pamã mã amÿnê nẽ mẽ pamã kupĩ. Anẽ.

23

Mẽ kot pahi Pirat wýr Jejus o htẽm ã mẽ harẽnh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhũm mẽ Jejus o kato nẽ nhãm Pahihti Pirat wýr o tẽ. ² Hãmri nẽ kutã ãm nẽ tanhmã kãm ho hêx to nẽ kãm:

—E ot pa mẽ awýr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwým ri amnhĩ nhĩpêx prãm xàj tanhmã mẽ inhmã mẽmoj tã karõ hto ho pa. Nẽ axtem nẽ mẽ ixte Sesti mã kãxpore hkwy nhõr kêt ã mẽ inhmã karõ. Nẽ Tirtũm kot mẽ pakaxyw kêp mẽ panhõ pahi mã ãm

xwÿnh ã amnhĩ jarẽ. Æ na hte mẽ inhmã amnhĩ to hêx anhÿr o pa. Anẽ.

³ Hãmri nhũm Pirat mẽ kuma nẽ Jejus pumu nẽ kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anẽ.

Hãmri nhũm kãm:

—Nà ãm hãmri na ka ã ijarẽnh anẽ. Anẽ.

⁴ Hãmri nhũm Pirat tanhmã hkukjêr to nẽ tee ri kot amnhĩ jarẽnh ã kuma hãmri nẽ patre krãhtũmjê mã kãm:

—Kwa mẽmo mÿrapê kot pa tanhmã mẽ amã hã ixãmnẽnh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵ Hãmri nhũm mẽ tee ri kuma nẽ kot mẽ kãm hã ãmnẽnh prãm xaj hã kãm kapêr kãm hihtÿx nẽ. Nẽ kãm:

—Kwa nà. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpẽn kutã amnhĩ xunhwÿ nẽ hã pijapu rũnh o pa. Tã mããnẽn Garirej kamã ã amnhĩ nhĩpêx anhÿr o hkrax nẽ hpãnhã amnẽ mẽ pahwÿr ã amnhĩ nhĩpêx anhÿr kaxyw mõi anẽ. Anẽ.

Mẽ kot Erox wÿr Jejus o htẽm ã mẽ harẽnh Rukre 9.7-9

⁶ Hãmri nhũm Pahi Pirat mẽ kuma nẽ mẽ kãm:

—Kwa xà kêp Garirej nhõ xwÿnh na? Anẽ.

Hãmri nhũm mẽ kãm:

—Tÿ. Kêp Garirej nhõ xwÿnh kênã.

⁷ Anẽ nhũm mẽ kãm:

—Tõ mẽ ma pahihiti Erox ãxipas wÿr mãn o tẽ. Kêp Garirej nhõ xwÿnhjê nhõ pahi na. Tã ra jar Jerujarẽ kamã ham pøj. No axtem ixpê Jutej kamã mẽ pa xwÿnhjê nhõ pahi jakamã kwa mẽ ma õ pahita wÿr mãn o tẽ kê tãm tanhmã mẽ amã ho. Anẽ.

⁸ Hãmri nhũm mẽ kuma nẽ ma pahi Erox ãxipas wÿr o tẽ. Na pre ra Erox ãxipasja xatã Jejus jarẽnh ma nẽ kãm omunh prãm nẽ. Kãm aa kot mẽmoj pumunh kêt õ ho anhÿr ã omunh prãm tÿx jakamã nhũm mẽ ma hwÿr o tẽ nhũm omu nẽ hkĩnh nẽ. ⁹ Hãmri nẽ tee ri mẽmoj tã hkukja no nhũm akryk xa nẽ tanhmã kãm nẽ hkêt nẽ. ¹⁰ Hãmri nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwÿnhjaja kãm ho kapêr punuj nẽ ho hêx kãm hihtÿx nẽ. ¹¹ Hãmri nhũm pahi Erox ãxipas mẽ kuma hãmri nẽ õ pōristi

mẽ wa kãm kapêr punuj nẽ hã hpêr o axkẽ nẽ tanhmã ri haprÿ to. Hãmri nẽ hã hpêr o pikẽnh kãm kêp pahi hã mẽ ê mexja py nẽ kãm haxà nẽ akupÿm pahi Pirat wÿr kumẽ.

¹² Na pre Pahi Pirat mẽ Pahi Erox ãxipasja wa kãm axpẽn kĩnh kêt nẽ. Tã hãmri nhũm Erox ãxipasja tee ri Jejus kot kãm tanhmã amnhĩ jarẽnh to hã mar prãm xaj tee ri hkukamã hamaxpêr hãmri nẽ Pirat ã hpijaam kaxyw akupÿm hwÿr kumẽ. Hãmri nhũm amnhĩ tã omu hãmri nẽ wa ra akupÿm kãm axpẽn kĩnh nẽ. Nẽ akupÿm axpẽn mã hpêr o axkẽ nẽ pikunhar o pa pê akupÿm axpẽn to hkrãmnhwÿ.

Pirat kot Jejus pĩr ã ãmnẽnh Matêwre 27.15-26; Makre 15.6-15; Juãw 18.39-19.16; mããnẽn Atre 3.13-14

¹³ Tã nhũm Pirat akupÿm amnhĩ wÿr mẽ hã karõ. Ijaew kwÿjaja nẽ mẽ õ pahijaja nẽ mẽ õ patre krãhtũmjaja nhũm akupÿm amnhĩ wÿr mẽ piitã mẽ hã karõ. ¹⁴ Hãmri nhũm mẽ akupÿm hwÿr gjêx pa nẽ kuhẽ nhũm mẽ kãm:

—E na ka mẽ ixwÿr mytita o tẽ nẽ tanhmã inhmã harẽnh to. Kot mẽ akwÿjê mã tanhmã hêx to ho pa hã harẽ. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarẽnh to hã kuma. Te kot amnhĩ to mex xwÿnh pyrãk. Mẽ ate tanhmã ho akapêr to htã nom kot anhÿr kêt. Kot amnhĩ to mex xwÿnh na. ¹⁵ Pahi Eroxja ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupÿn ixwÿr kumẽ. Jakamã kwa mẽmo mÿrapê kot paj mẽ amã hã amÿnẽ nhũm mẽ amã kupĩ? Tanhmã kot amnhĩ tomnuj tore hã. ¹⁶ Kot paj ãm mẽ kãm anẽ kê mẽ htak nẽ kãm ure kê mãmrĩ ma tẽ. Anẽ.

¹⁷ Arĩgro pê Pas ã na pre hte mẽ õ pahi mẽ kot mẽ ho prês nhũm mẽ hkrĩ xwÿnhjaja nhũm pre htem mẽ ho hpÿnh nẽ mẽ kãm ure. Jakamã na pre ã mẽ kãm kapêr anẽ nẽ kot Jejus tak nẽ kãm urer mã. ¹⁸⁻¹⁹ Nom nhũm mẽ kuma nhũm ja mẽ kêp omnuj nẽ nhũm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pōristi mẽ pahi Piratja mẽ kutã amnhĩ xãm nẽ kêp õ pōristi hõxpĩ. Mÿrapê na prem ra

haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapêr anê. ²⁰ Nom nhũm kãm Jejus mã urer prãm jakamã axte hã mẽ hkukja nê mẽ kãm:

—Kwa nom mẽmoj mýrapê kot paj mẽ kãm hã amýnê nhũm mẽ amã kupĩ?

²¹ Anhýr tã nhũm mẽ kuma nê ãm kuma. Nê xatã kãm:

—Kwa tokyx pĩ kahpa hã anhô kê ty. Anê.

²² Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhũm ty. Nà kot paj ãm mẽ kãm anê kê mẽ htak nê kãm ure kê ma tẽ. Anê.

²³ Hãmri nhũm mẽ xatã hã kãm kapêr kãm hihtýx nê kãm:

—Kwa nà. Pĩ kahpa hã mãn anhô kê ty.

Anhýr o ãm xatã kàx pê àmra kamã kãm hã amýnê. ²⁴ Hãmri nhũm Pirat tee ri mẽ kuma hãmri nê tã mẽ kãm hprãm xà hkôt mẽ kãm ã amýnê. ²⁵ Hãmri nê mẽ kãm Parapas mã ure. Ra kot pahi Pirat pê õ pôristi kutã amnhĩ xãm nê kêp hõx pĩr tã nhũm mẽ kãm hprãm xà hkôt akupým kãm ure. Hãmri nê mẽ ìhkram Jejus jaxà. Mẽ kãm hprãm xà hkôt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harênh

Matêwre 27.31-43; Makre 15.21-32; Juãw 19.17-20, 19.27-31; mããnên Atre 7.59-8.1

²⁶ Tã nhũm pôristijaja Jejus o kato nê ma kapôt mã o tẽ. Nê kãm õ pĩ kahpa gõ nhũm amnhĩ kaxyw kumý nê o tẽ. Nom mẽ kot htak rax kurê nhũm hirot týx nê nhũm mẽ ja hã omu nê mẽhõ kot ho ajuta kaxyw mẽ hkapi ho xa. Hãmri nê Sirên nhõ xwýnh Simãw hkà htyk pumu. Nhũm pre htýx hamakêtkati nê mẽ kutã krĩm tẽ. Hãmri nhũm mẽ haêr pê unê nê kãm Jejus o ajuta kaxyw hã karõ nhũm kãm õ pĩ kahpaja mý nê mẽ hkôt o tẽ.

²⁷ Hãmri nhũm mẽ ohtô nê Jerujarê rũm Jejus kôt mõ. Nhũm mẽni hkwyjaja omu nê kãm hkaprĩ xàj mýr o hkôt mõ. ²⁸ Hãmri nhũm mẽ mýr ã mẽ kuma nê mẽ ho hakêx nê mẽ omu nê mẽ kãm:

—Kwa nà Jerujarê nhõ xwýnhjaja. Mẽ amã ixkaprĩ xàj amýr kêt nê. Kêt mẽ kamjaja amã amnhĩ kaprĩ xàj mãn mur. Nê

mẽ akrajê kamã axukaprĩ xàj mãn mur. ²⁹ Koja mẽ nhýrmã mẽ apê mẽ anhõ krĩ gràn pa ka mẽ apunuj nê amnhĩ xà htýx kamã ajamak o ri apa. Nê tee ri mẽ akrajê hkukamã tanhmã ajamaxpêr to nê ajamaxpêr o: “Hêxta gòa nê. Na ixkrajaja ixpê amnhĩ xà htýx kãm hamak o pa. Kêp apu mẽ hkra hkêt xwýnhjê pyrã nê ixkra hkêt nê ixpa ro nhýx inhmã mex nê. Nhýx pa ixkĩnh nê.” Anhýr o kot kaj mẽ nhýrmã ajamaxpêr nom ã ajamaxpêr anhýr kaprý.

³⁰ —Nê kot kaj mẽ apiitã mẽmo punujta pymaj tee ri amã tokyx atyk nê ajapêx par prãm kaprý nê axpên mã akapêr o: “Hêxta gòa nê. Kot kên prêk mýj mẽ panhĩpy rôrôk nê tokyx mẽ panhĩmex par ronhýx mẽ pamã ja mex.” Anhýr tã no ãm tee ri ã ajamaxpêr anhýr kaprý. ³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anê. Nom mẽ ate amnhĩ tomnuj mýrapê koja mẽ nhýrmã tanhmã mẽ ato rax o ã mẽ kot inhĩpêx anhýrja jakrenh pa. Hêxta waa nê. Na pa mẽ akukamã ijamaxpêr nê ixkaprĩ htýx nê. Anê.

³² Tã nhũm mẽ ja wa ho hamêxkrut nê tanhmã wa kot amnhĩ tomnuj toja mýrapê Jejus kôt wa hpĩr kaxyw hkôt mããnên wa o tẽ. ³³ Jakamã nhũm mẽ ra kên nhĩxêt te kot mẽ hkrã hi pyrãk xwýnhhta wýr mẽ o pøj. Mẽ kot kãm “mẽ hkrã hi xà” anhýr jarênhja wýr mẽ o pøj. Hãmri nê Jejus pê ê kapa nê pĩ kahpa hã kuxi nê prek o ìhkra nê hpar o htýx pa. Hãmri nê kànhmã pĩ kahpa xãm nê ho htýx nhũm xa. Hãmri nhũm mẽ hpãnhã wa kot amnhĩ tomnuj xwýnhhta mã wa ho anê nê. Nê prek o wa ìhkra nê wa hpar o htýx pa hãmri nê akutã ho Jejus nhĩjê nê wa ãm nhũm wa ajêt. ³⁴ Hãmri nhũm Jejus kýx pê amnhĩ xà htýx kumrêx kamã hamak o jêt rãhã mẽ ho Tĩrtũm wý nê kãm:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anê. Jakamã ãm ixtã mẽ omu nê mẽ kamã axukaprĩ nê. Anê.

Hãmri nhũm hparpê pôristi hkwyjaja axpên mã ê hkwy ho pigràn kaxyw hã kênre ho jõka ho hkrĩ. ³⁵ Nhũm mẽ ohtô rax nê Jejus parpê omunh o kuhê. Nhũm mẽ õ pahijaja mẽ noo mã hã hpêr o axkê nê mẽ kãm:

—E jahti na pre te kēp mē pakaprī xwýnh ã amnhī jarēnh o ri pa. Nē Tirtūm kot mē pakaxyw ãm xwýnh ã amnhī jarēnh o ri pa. Jakamā e kwa pu mē xa nē kot amnhī kaxàr nē wrýk kām omu. Anē.

³⁶ Nhūm pôristi mãânēn tanhmā hā hpēr o pikēnh to. Nē hparpē kām wīhti punuti jahkre nē kām:

—Kwa wrý nē mē ixkutā ja hkwý ho ixkō nā. Anē.

³⁷ Hāmri nē kām:

—E apē Ijaew nhō pahi hā kot kaj amnhī kapa nē akupýn wrý. Kwa tokyx pa mē ja hā apumu. Anē.

³⁸ Nhūm pôristija tapti hō py nē tanhmā hā kagà hto. Nē hā kagà ho:

IJAEW NHŌ PAHI NA JA

Anhýr o hā kagà hāmri nē Jejus wýr api nē mý ri kunhō.

Wa kot Jejus nhýjē nē wa jēt xwýnh wa harēnh

Matêwre 27.44; Makre 15.32

³⁹ Hāmri nhūm wa kot íhkō hā jēt xwýnhhta ō haxwýja kām kapēr punuj nē kām:

—Kwa kot kaj apē Tirtūm kot mē ixkaxyw axām xwýnh hā kot kaj amnhī kapa nē wrý. Nē mãânēn amnhī kôt wa ixto wrý. Anē.

⁴⁰⁻⁴¹ Hāmri nhūm ihōta kuma nē hā kām akir nē kām:

—Tk. Kwa amarī ajēt. Xà amā Tirtūm puma hkēt ã na ka ã kēp Krata mã akapēr anē? Nà koja kām wrýk prām nē kot wrý. No pajamē pahte amnhī tomnuj mýrapē koja mē pahpī. No tām kot tanhmā amnhī tomnuj to hkēt tã nhūm mē amarī ã hipēx anē.

⁴² Anhýr o kām kapēr hāmri nē Jejus mã kām:

—Kwa Jejus. Kêr ka nhýrmā mē ixto amnhīptà hāmri nē inhmā ajamaxpēr nē ixkamā axukaprī nē ixto mex nē. Anē.

⁴³ Hāmri nhūm kām:

—Nà kot kaj jarāhā ma ixkôt kaxkwa hwýr api nē hpānhā ixkuri amex nē atír tūm nē apa ho apa. ãm hāmri na pa ã amā ixkapēr anē. Anē.

Jejus tyk ã harēnh

Matêwre 27.45-56; Makre 15.33-41; Juãw 19.28-30

⁴⁴ Tã nhūm kaxkwa nhīpôk ri myt nhýr mē nhūm te ra kamàt pyrāk nhūm kamàt kô rax kumrēx. Nē kamàt kô ho ra hā awry nē. Ja mē nhūm akupým myt katēr o mō. ⁴⁵⁻⁴⁶ Nom nhūm kormā kamàt kôta ã nhūm Jejus ra htyk kaxyw nē ãmra kamā Tirtūm mã kapēr nē kām:

—E Papaj. Mãmrī ixkarō ho amnhīptà.

Anhýrja kôt hāmri ty. Pu nhūm Tirtūm mã amnhī jarēnh xà hā ixkre kamā hakwakre hā kupēxēja axkjē nē amnhī kahē xà mēnh kurē kumrēx. Utí rax tã kôt ã axkjē nē amnhī kahē xà mē. Te Jejus htyk o kot mē pahte hkôt amnhī xunhwýr xwýnhjē mã Tirtūm wýr pry jakwa kre kahē xà mēnh pyrāk o ã amnhī nhīpēx anē. ⁴⁷⁻⁴⁹ Hāmri nhūm mē piitā mēmoj ã kot amnhī nhīpēx anhýr ã omunh o kuhē xwýnhjaja. Nē kaxyw Jejus kràmnhwýjaja nhūm mē amým omunh o kuhē. Nē Garirej rúm mēni kot Jejus kôt mē pa ho mē pa xwýnhjaja mãânēn mē kuri amým hkaprī nē omunh o kuhē. Nhūm pôristi krāhtūmjē hōja ã mēmoj kot amnhī nhīpēx anhýr ã omu nē tee ri hamaxpēr o:

—Héxta waa nē. Pēr ãm hāmri na pre hte tām amnhī nhīpēx o pa. Tã pa mē amarī mē mar xà hkôt ixtýx kupī. Anē.

Nhūm ã hamaxpēr anhýrja kôt Tirtūm mã mex o mex ã harēnh o xa. Nhūm amarī mē kuhē xwýnhjaja mãânēn mēmoj ã kot amnhī nhīpēx anhýrta pumu nē tee ri hkukamā hamaxpēr o ra kām ma htýx nē. Hāmri nē awjanā nē ma akupým krīm mrar kurē kumrēx.

Mē kot Jejus jaxàr ã mē harēnh

Matêwre 27.57-61; Makre 15.42-47; Juãw 19.38-42

⁵⁰⁻⁵¹ Tã nhūm axtem Juje pē Arimatej nhō xwýnhja. Arimatejja pika pē Ijaew kamā na. Nhūm Jujeja kot amnhī to mex jakamā Tirtūm kôt amnhī nhīpēx o pa. Jakamā na pre hkwýjē rom Tirtūm kot mē pahwýr Jejus mēnh xwýnh ã omu nē hkôt hamaxpēr. Kēp Ijaew nhō pahi hō htã hkwýjē hkôt hamaxpēr kêt nē. Jakamā nhūm prem kot Jejus pír ã amýné nhūm tee ri harēnh ma nhūm ja kēp omnuj nē. ⁵² Jakamā nhūm Jejus ty nhūm Juje ma pahi Pirat wýr tē nē í hā kuwý nē kām:

—Pa? E ot pa awÿr tē. Kwa inhmā htyk xwÿnhta gō pa ma o tē nē haxà. Anē.

⁵³ Hāmri nhūm kuma nē kām kugō nhūm ma o tē nē haxà. Kaxyw kupēxê hō py nē ho hkupu nē ma o tē nē kēn kre kaprÿ kamā haxà. Mē kot kormā kamā mēhō jaxàr kēt nhūm mē kamā Jejus jaxà. ⁵⁴ Arīgro pē sēsta hā nhūm prem kupī nhūm myt xàr o mōr mē nhūm Juje ma o tē nē haxà. Ijaew kōt xà hā arīgromnuja wÿr haxà. ⁵⁵ Nhūm Garirej rūm mēni hkwÿ kot Jejus kōt pa xwÿnhjaja ma hkōt mra nē kot haxàr kām omu. Mē hkuxwaxà ho gregrer kēt rāhā haxàr kām omu. ⁵⁶ Hāmri nē ma akupÿm krīm mra nē kaxyw mē hkuxwaxà hkwÿ ho anē.

Tā nhūm apkati nhūm mē ò arīgromnu pē sap kator jakamā nhūm mē kormā akupÿm hwÿr mra nē. Hāmri arīgro mex jamār pē arī hkōkōt o hkrī.

24

Jejus akupÿm htīr jarēnh

Matēwre 28.1-10; Makre 16.1-8; Juāw 20.1-10

¹ Tā nhūm apkati nhūm tōmīk. Hāmri nhūm mēnijaja kwÿhtā kànhmā hkrī nē ma akupÿm kēn kreta wÿr mē hkuxwaxà ho mra. ² Hāmri nē hwÿr àhtēp o mra nhūm ra hakwakre kahē xà raxta kahē xà hkàx ā xa nhūm mē tee ri omu. ³ Hāmri nē kēn kre wÿr agjē nē kamā tee ri Jejus japēr no nhūm kamā amrakati. ⁴ Nhūm mē tee ri axpēn pumunh pē hkukamā hamaxpēr.

Hāmri nhūm Tīrtūm kapēr o wryk xwÿnh wa axkrut nē mē haēr pē mē hwÿr kato nē wa xa. Wa ē jaka nē hīrā htÿx kām wa xa. ⁵ Nhūm mē tee ri wa omu nē kām wa uma htÿx nē. Nē wa umaj hkōn krā ho rôrōk nē hkrī hpa. Nhūm wa mē omu nē mē kām:

—Kwa mon ka mē ri mē htykjē kamā ra akupÿm htīr xwÿnhta japēr o ri apa? ⁶ Jar amrakati. Na ra akupÿm htīr. Kormā Garirej kamā pa ri kot mē amā amnhī jarēnh xà hkōt na ra akupÿm htīr. Mān ka mē arī kot ā mē amā amnhī jarēnh anhÿrja ā anohtÿx japēr. ⁷ Mē kot unēnh nē pī kahpa hā nhōr nhūm htyk nē htyk ā apkati axkrunēpxi hāmri nē akupÿm htīr ā kot mē amā amnhī jarēnhhta mān ka mē arī hā anohtÿx japēr.

⁸ Anhÿr o mē kām kapēr nhūm mē kuma hāmri nē ra Jejus kot mē kām ā amnhī jarēnh anhÿrja mā hamaxpēr kurē kumrēx. ⁹ Hāmri nē awjanā nē ma akupÿm krīm hkīnh nē mra. Nē hwÿr pōj nē mē kot Jejus nhÿ hā mē ahkre ho mē pa xwÿnhjē mā awjarē. Mē kēp 11 xwÿnhtajē mē kaxyw hkwÿjē mā awjarē. ¹⁰ Mēni kot mē kām ujarēnh xwÿnhtajē nhīxi na pre Marir Matarēn nhūm ja kēp Joanā. Nē Xiakre katorxà Marir ōta. Nē kaxyw mēni hōja. Jakamā nhūm mē ma akupÿm Jejus nhÿ hā mē ahkre ho mē pa xwÿnhjē hwÿr mra nē mē kām awjarē. ¹¹ Nom nhūm mē kuma nē ām mē kuma nē htÿx ho amnhī krā hkōt mē kot ri ā harēnh anhÿr ā mē hkamnhīx nē ām mē kuma. ¹² Nhūm Simāw Pētre hamaxpēr hāmri nē kànhmā xa nē ma kēn kreta wÿr hprōt nē htēm kurē kumrēx. Hāmri nē tee ri kēn kre kaprÿ kamunh o xa nē kamā Jejus kupu xà pix pumu nē tee ri hkukamā hamaxpēr hāmri nē ma akupÿm tē.

Jejus kot Emau hwÿr wa mōr xwÿnh wa hwÿr kator ā harēnh
Makre 16.12-13

¹³ Tā nhūm ra amÿkry ho mō nhūm Jejus kwÿjē hō wa hamēxkrut nē Jerujarē rūm kato nē ma akupÿm wa ò krī pē Emau hwÿr wa mō. Jerujarē rūm Emau hwÿr ahkrānre. ¹⁴ Jakamā nhūm wa hwÿr pry hā axpēn mā tanhmā Jejus jarēnh to ho mō. Kēn kre kamā mē kot haxàr nhūm ra ī pikunorja nhūm wa axpēn mā harēnh o wa mō. Nē tee ri hkukamā hamaxpēr o wa mō. ¹⁵ Hāmri nhūm Jejus tām tē nē wa hā ajēt nē wa hkōt tē. ¹⁶ Nom nhūm wa hprī hā omunh kēt nē. Tÿx ho nhām mēhō hā hkamnhīx nē wa arī axpēn mā harēnh o wa mō. ¹⁷ Hāmri nhūm Jejus hēx rom wa kām:

—Kwa mēmon ka wa axpēn mā harēnh o wa mō? Anē.

Hāmri nhūm wa hkaprī kamā kām harē. ¹⁸ Ihō pē Kroptija kām:

—Kwa xà na ka Jerujarē kamā ri apa htā kamā mē kot tanhmā amnhī nhīpēx toja jarēnh mar kēt nē? Kurūm amōr kēnā na ka ri mēmoj mar kēt nē ri apa. Anē.

¹⁹ Hāmri nhūm wa kām:

—Nà amrakati ixte mẽmoj maare hã. Kwa mo na wehe? Kwa war aprĩ hã inhmã harẽ pa kuma. Anẽ.

Hãmri nhũm wa kãm:

—Nà mẽ kot mẽ ixpê tanhmã Jejus pẽ Najare nhõ xwýnh̄ta to kênã. Kêp Tĩrtũm nhỹ hã kapêr jarênh o pa xwýnh̄ na pre. Nẽ Tĩrtũm nhỹ hã tanhmã amnhĩ nhĩpêx to ho pa nhũm prem piitã amnhĩm mex ã harẽ. ²⁰ Tã nhũm mẽ panhõ patre krãhtũmjẽ mẽ mẽ panhõ pahijaja axtem nẽ mẽ kãm hã amýnẽ. Mẽ kot pĩ kahpa hã nhõr nhũm htyk kaxyw mẽ kãm hã amýnẽ. ²¹ Pa prem ixtýx ho kêp Tĩrtũm kot mẽ pahwýr mên̄h xwýnh̄ ã hkamnhĩx nẽ kot Rõm nhõ xwýnh̄jẽ pẽ mẽ ixpytãr ã hkamnhĩx tã nhũm prem mẽ ixpê kupĩ. Jãã na prem ã hipêx anẽ nẽ kupĩ. Na ra htyk ã apkati axkrunẽpxi.

²²⁻²³ —Nẽ jarãhã kwýhtã mẽni hkwyjaja ma haxàr xà hã kên kre hwýr mra nẽ xep tee kamã hapêr nẽ omunh kêt nẽ. Xep ãm Tĩrtũm kapêr o wrýk xwýnh̄ja wa ho axkrut nẽ wa omu nhũm wa xa. Nhũm mẽ kãm ra akupým htĩr ã harẽ nhũm mẽ akupýn mẽ ixwýr mra nẽ mẽ ijaêr pẽ mẽ inhmã harẽ. ²⁴ Hãmri nhũm mẽ ixkwýjaja ma mẽ hpãnhã kên kreta wýr mra nhũm ra mẽ kot harênh xà hkôt tee ri kamã hapêr nom nhũm kamã amrakati kumrêx. Anẽ.

²⁵ Hãmri nhũm Jejus amnhĩ tã wa kuma nẽ wa kãm tanhmã amnhĩ jarênh to nẽ wa kãm:

—Hêxta waa nẽ. Pêr ãm mẽ ate mẽmoj mã ajamaxpêr týx mex kêt kumrêx. Na pre ra Tĩrtũm nhỹ hã kapêr jarênh xwýnh̄jaja Tĩrtũm kapêr ã kagã htũm kamã ã kot amnhĩ nhĩpêx anhýrja kukamã hprĩ hã harẽ nẽ hã kagã. Mẽ akukamã mẽ anhĩgêjtẽ mã harẽ nẽ hã kagã. Tã ka mẽ kormã aprĩ hã mar týx kêt nẽ. ²⁶ Kêt mẽ anẽ na Tĩrtũm kot ãm xwýnh̄ta ty. Tã ra akupým htĩr nẽ akupým kaxkwa hwýr àpir kaxyw. Kot mẽ ato amnhĩptãr kaxyw ra akupým hwýr àpir mã. ²⁷ Amnepêm na pre finat Mojesja tanhmã hkukamã mẽ anhĩgêjtẽ mã harênh to nẽ hã kagã. Nẽ hprĩ hã harênh o pa. Nhũm hpãnhã Tĩrtũm nhỹ hã kapêr jarênh o mẽ pa xwýnh̄jaja ma anẽ nẽ mẽ kãm harênh o pa. Anẽ.

Nhũm pre ã Jejus wa hkôt hprĩ hã wa kãm amnhĩ jarênh anhýr o tẽ. Te ho nhãm

mêhõ jarênh pyrãk nom tãm wa kãm amnhĩ jarênh o wa hkôt tẽ. No nhũm kormã wa hprĩ hã kêp Jejus ã omunh kêt nẽ.

²⁸⁻²⁹ Nhũm ã wa kãm amnhĩ jarênh anhýr o mõi rãhã nhũm mẽ ra wa õ krĩ hwýr hpõx o mõi. Nhũm ra kamãtre nhũm Jejus te kot wa rer nẽ nhỹhým ma htẽm kaxyw pyrãk o amnhĩ nhĩpêx nhũm wa tee ri omu nẽ kãm:

—Kwa xà kot kaj wa ixre nẽ ma tẽ? Ra kamãt o mõi kênã. Kwa ma wa ixkôt tẽ nẽ wa inhõrkwý kamã mãn wa ixri pøj. Anẽ.

Hãmri nhũm wa kuma nẽ ma wa hkôt tẽ. ³⁰ Nẽ mẽ wa õrkwý hwýr pøj nẽ hwýr agjẽ. Hãmri nẽ apkur kaxyw hkrĩ nhũm Jejus tãm pãwti py nẽ Tĩrtũm mã harẽ nẽ hpãnhã ho axkjẽ nẽ wa kãm kugõ. ³¹ Hãmri nhũm wa atã kêp Jejus ã omunh kurẽ kumrêx. Jao nhũm wa kêp akunok nhũm wa tee ýr xà kamã hapêr nhũm hkaprý mex nẽ xa. ³² Hãmri nhũm wa tee ri axpên pumu nẽ ri hkukamã hamaxpêr nẽ axpên mã:

—Hêxta waa nẽ. Xep tãm na. Tãm na pahkôt mõi nẽ pry hã hprĩ hã pamã Tĩrtũm kapêr ã kagã jarẽ pu hkôt pahkĩnh nẽ mar o mõi. Hêxta waa nẽ. Xep tãm na. Anẽ.

³³⁻³⁵ Hãmri nẽ wa kãnhmã xa nẽ kato nẽ ujanãr kurẽ kumrêx. Hãmri nẽ ma akupým Jerujarẽ hwýr wa hkwyjẽ hwýr tẽ. Nẽ mẽ hwýr pøj nẽ axà. Nhũm Jejus nhỹ hã mẽ ahkre ho mẽ pa xwýnh̄ pẽ 11jaja ra axpên wýr akuprõ nẽ hkrĩ. Mẽ hkwyjẽ mẽ axpên wýr akuprõ nẽ axpên mã tanhmã Jejus jarênh to ho hkrĩ. Hãmri nhũm wa mẽ hwýr axà nhũm mẽ wa omu nẽ wa kãm:

—Kwa na xep ra Jejus akupým htĩr nẽ Simãw Pêtre hwýr kato. Anẽ.

Hãmri nhũm wa mẽ kuma nẽ mẽ kãm:

—Tý na akupým htĩr kênã. Na pa wa ijaxwýja ham omu. Na pry hã wa ixtã ajêt nẽ ma wa ixkôt mõi nẽ wa inhõrkwý kamã pøj. Hãmri pa mẽ ixàpkur kaxyw ixkrĩ nhũm pãwti py nẽ Tĩrtũm mã harẽ nẽ ho axkjẽ nẽ wa inhmã kugõ pa wa ixprĩ hã kêp Jejus ã omunh kurẽ kumrêx. Ixprĩ hã omunh jao nhũm wa ixpê hapêx. Anẽ.

Jejus kot hkwyjẽ piitã hwýr kator ã harênh

Matêwre 28.16-17; Makre 16.14; Juãw 20.19-23

³⁶ Nhũm mẽ kormã axpên mã Jejus jarênh o hkrĩ rôm nhũm tãm nhỹhýnh mẽ hwýr axà

ně xa. Mě haêr pê mẽ hwÿr nhÿhÿnh axà mẽ mẽ kãm:

—Pa? Xàn ka mẽ arĩ akrĩ? Aně.

³⁷ Hãmri nhũm mẽ amnhĩ jaêr pê omunh jao kànhmã hakry hpar o mra. Jao hakryk kãm ma htÿx kãm omunh o hkrĩ. ³⁸ Hãmri nhũm mẽ kãm:

—Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx mẽ amã ixpyma hkêt nẽ. ³⁹ Na pa akupÿn inhĩ ho mẽ awÿr ixkato nẽ xa. Ga mẽ inhĩkra kamã prek tatak xàja pumu. Nẽ ixpar kãm omu. Kwa mẽ amã ixpyma hkêt nẽ. E mẽ mãmri mra mẽ anhĩkra ho ixkupê. Kêp apu ixkarõ hpix ronhÿx ka mẽ inhĩ kupênh kêt nẽ. Mo mẽhkarõja i? Nà na pa akupÿm ixtĩr mẽ inhĩ ho mẽ awÿr ixkato. Aně.

⁴⁰ Hãmri mẽ mẽ kãm amnhĩ nhĩkra hpê mẽ mẽ kãm amnhĩ par pê. ⁴¹ Tã nom nhũm mẽ arĩ akryk omunh o hkrĩ. Mě kot omunh mẽ hkinh tã tee ri omunh o hkrĩ. Hãmri nhũm tee ri ja hã mẽ omu mẽ mẽ kãm:

—E kwa mẽ inhmã mẽmoj japêr pa kukrê. Aně.

⁴² Hãmri nhũm mẽ kãm tep gôj kãm amta gô ⁴³ nhũm kupy mẽ hkur o nhÿ nhũm mẽ arĩ hã omunh o hkrĩ. Jao ra akupÿm htĩr ã omunh kurê kumrêx.

Jejus akupÿm nojarêt mẽ hwÿjê mã mẽmoj tã karõ

Matêwre 28.18-20; Makre 16.15-18; mãânên Atre 1.6-8

⁴⁴⁻⁴⁵ Hãmri nhũm Jejus hprĩ hã mẽ kãm Tĩrtũm kapêr ã kagà htũm kot hkukamã harênh ã amnhĩ jarê mẽ mẽ kãm:

—Nà kormã ixtyk kêt ri na pa pre ixprĩ hã mẽ amã amnhĩ kukamã amnhĩ jarê. Tĩrtũm kapêr ã kagà htũm kot tanhmã mẽ kot inhĩpêx to hkukamã ijarênhja. Na pre finat Mojes Tĩrtũm nhÿ hã ixkukamã tanhmã ijarênh to. Nẽ Tĩrtũm nhÿ hã kapêr jarênh o mẽ pa xwÿnhjaja Mojes mÿr pê haxwÿja ixkukamã tanhmã ijarênh to. Nẽ Tĩrtũm mex o mex ã mẽ grer ã kagà xwÿnhjaja haxwÿja ixkukamã tanhmã ijarênh to. Jajê piitã na prem Tĩrtũm kapêr ã kagà htũm kamã ixkukamã ijarê. ⁴⁶ Nẽ ijarênh o:

Tĩrtũm kot mẽ pakaxyw am xwÿnh pê Krisja koja nhÿrmã ty. Nẽ htyk o apkati axkrunêpxi mẽ akupÿm htĩr.

Anhÿr o mẽ kot ijarênh. Tã pa ra mẽ kot ixkukamã ijarênh xà hkôt ã mẽ anê amnhĩ nhĩpêx aně.

⁴⁷ —No am Tĩrtũm kapêr ã kagà htũm kot papxipix ixkukamã ijarênh kêt. Kamã mãânên mẽ kajaja tanhmã mẽ akukamã mẽ ajarênh kute. Mě apê ixkôt amnhĩ xunhwÿr xwÿnhjaja ixwakre kamã tanhmã mẽ ate inhmã amnhĩ nhĩpêx to ho apa hkukamã tanhmã mẽ ajarênh kute. Nẽ mẽ ajarênh kot:

E mẽ ate ixkôt amnhĩ xunhwÿr xwÿnhjaja. Kêr ka mẽ ma pika piitã hkôt mẽ kãm Tĩrtũm kot mẽ awÿr mênh xwÿnhhta jarênh o ri mẽ hkôt apa. Mě kot mẽ amar mẽ amnhĩ tomnuj kaga mẽ Tĩrtũm kôt amnhĩ xunhwÿr kaxyw. Kêr kê Tĩrtũm ja hã mẽ omu mẽ amnhĩ katut kôt mẽ kot amnhĩ tomnuj rênh pa. E kêr ka mẽ ma krĩ piitã hkôt mẽ kãm ã ja jarênh anhÿr o ri mẽ hkôt apa. Krĩ pê Jerujarê kumrêx kãm hãmri mẽ rĩ kormã pu hã krĩ kuhê xwÿnh piitã hkôt ajapôj mẽ mẽ kãm harênh o ri apa. Aně.

Ã Tĩrtũm kapêr ã kagà htũm kot mẽ akukamã mẽ ajarênh kot anhÿr. ⁴⁸ Tã kêr ka mẽ ã mẽ kãm tanhmã ijarênh to ho ri apa aně. ⁴⁹ No am kormã. Kêr paj ma akupÿm kaxkwa hwÿr api hãmri mẽ amnhĩ pãnhã mẽ awÿr Tĩrtũm Karõ rē măn. Tĩrtũm kot ixte amnhĩ nhĩpêx ã ijarênh xà hkôt kot paj amnhĩ pãnhã mẽ awÿr kurê. Tã kêr ka mẽ kormã krĩ ja kamã kutêp apa. Kêr kê mẽ awÿr wrÿ mẽ mẽ amã agjê ka mẽ rĩ kormã anhrã mẽ ma ÿ hã mẽ kãm ijarênh o ri mẽ hkôt apa. Aně.

Jejus kot akupÿm kaxkwa hwÿr àpir ã harênh

Makre 16.19-20; mãânên Atre 1.9-11

⁵⁰ Tã nhũm Jejus Jerujarê rũm hkôt mẽ pa ho pa xwÿnhjê kator mẽ ma krĩ pê Petãn wÿr mẽ o mõ. Nẽ kormã hwÿr mẽ o mõ ri nhÿri mẽ o xa mẽ kànhmã ihkra pê mẽ mẽ ho Tĩrtũm wÿ. ⁵¹ ã mẽ ho hwÿr anhÿrja rôm nhũm Tĩrtũm amnhĩ wÿr ho àpir o mõ nhũm mẽ noo mã ma akupÿm tēn api. ⁵² Hãmri nhũm mẽ kãm mex o mex ã harênh pê ma akupÿm àpir kãm omunh o kuhê. Nhũm ma tē mẽ mẽ kêp kakrãm axà mẽ mẽ kêp akunok.

Hãmri nhũm mẽ awjanã nẽ ma akupỹm Jerujarẽ hwỳr hkĩnh nẽ pa. ⁵³ Hãmri nẽ apkati mẽ Tĩrtũm mã amnhĩ jarẽnh xà hã ixkre hwỳr agjê nẽ kamã Tĩrtũm mã mex o mex ã harẽnh o hkrĩ rãhã nẽ.

Tã ãm ja pix ixkràmnhwỳ Teopre. Ixpê Rukre na pa awỳr kagàja nhĩpêx nẽ kamã Jejus kot tanhmã amnhĩ nhĩpêx to hã harẽ nẽ hã kagà nẽ awỳr kumẽ.

Juãw Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre mãânên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwýnhjê hõ na pre. Nê ý hã mẽ ahkre ho pa xwýnhjê hõ na pre. Nom kormã ã amnhĩ nhĩpêx anhÿr o pa hkêt ri na pre kêp tep kanhêr xwýnh. Nê kêp Jesus kràmnhwý mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tirtũm Kra hã harê nê hã kagà. Nê ãm pix kukwak ri Tirtũm wa kuri mẽ pahtrĩ tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

Jesus te kot Tirtũm pyrãk ã harênh

Matêwre 1.23; Juãw 8.12, 8.58, 10.30, 20.28; mãânên Atre 10.36; Sikũn Korĩt 4.4; Piripos 2.6-11; Korosê 1.13-17, 2.9; Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

¹ Amnepê mã kormã mẽmoj kêt ri nhũm kot Tirtũm kapêr o amnhĩrĩt xwýnhja Tirtũm kôt pa ho pa. Te kêp urãk nê pa. Wa kot amnhĩ nhĩpêxja ãm tipxi. Nê wa ãhpumunh ãm tipxi. Nê wa hkarõ mãânên ãm tipxi. ãm wa tipxi rãhã nê pa ho pa. ² Kormã mẽmoj kêt ri na pre Tirtũm kapêr o amnhĩrĩt xwýnhja Tirtũm kôt ri pa ho pa. ³ Nê Tirtũm nhÿ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tirtũm nhÿ hã ho kator pa. Kop apu mẽmoj to kator kêt ronhÿx mẽmoj amrakati kumrêx.

⁴ Nê Tirtũm o amnhĩrĩt xwýnhja pix kukwak ri na hte mẽmoj piitã htĩr nê pa. Nê ãm pix kukwak ri na htem Tirtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj

piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamãxpêr nyw o amnhĩrĩt pu mẽ pahprĩ hã mar mex nê. ⁵ Ja kaxyw na pre wrý nê ri mẽ kãm Tirtũm kapêr jarênh o ri mẽ hkôt pa. Jao mẽ kot amnhĩ nhĩpêx nyw jarê nhũm mẽ kot amnhĩ tomnuj xwýnhjaja tee ri kuma nê kãm mar prãm kêt nê. Nê tee ri kãm kapêr o hapêx prãm kaprý.

Juãw Paxis kumrêx kot tanhmã Jesus jarênh to hã harênh

Matêwre 3.1-3; Makre 1.1-4; Rukre 3.2-6

⁶ Tã nhũm kormã Jesus mẽ kãm kapêr o pa hkêt ri nhũm Juãw Paxis kumrêx mõ nê hkukamã Tirtũm nhÿ hã mẽ kãm tanhmã harênh to ho pa. ⁷ Mẽ kãm mẽ kot amnhĩ nhĩpêx nyw nhõr xwýnh pê Jesus Kris kukamã mẽ kãm harênh o ri mẽ hkôt pa. Mẽ kot mar nê amnhĩ kaxyw Jesus kôt hamãxpêr kaxyw. ⁸ No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nê. Na pre ãm kot mẽ kãm õr xwýnhja kukamã mẽ kãm harênh o pa. ⁹ Jakamã na pre hte mẽ kãm harênh o ri pa nê mẽ kãm harênh o:

—E ot pa mẽ amã mēhõ jarênh o ri ixpa. Kot mẽ pamã mẽ pahte amnhĩ nhĩpêx nyw nhõr xwýnhja. Koja tokyx mẽ pakamã pøj pu mẽ omu. Koja pøj nê mẽ piitã mẽ kãm Tirtũm kapêr jarênh o ri pa. Mẽ pahte pahprĩ hã mar mex kaxyw. Anê.

Tirtũm kot mẽ ho hkra hprãm xwýnhjê jarênh

Rõmãn 8.14; Karatas 3.26; Epes 1.5

¹⁰ Tã nhũm Jesus man kot mẽmoj piitã ho kator xwýnhja wrý nê mẽ hkôt ri pa. No nhũm mẽ kot kêp mẽmoj piitã ho kator xwýnh ã omunh kêt jakamã na prem kapêr ma nê ãm kuma nê amnhĩ kaxyw hkôt hamãxpêr kêt nê. ¹¹ Na pre wrý nê mẽ pakamã ĩ ho kato. Kêp mẽ pahpiitã mẽ pahto kator xwýnh tã nhũm mẽ ohtõ nê omu nê ãm omu nê hkôt amnhĩ nhĩpêx kêt nê. ¹² Na prem ãm grêre nê kuma nê amnhĩ kaxyw hkôt hamãxpêr nê hkôt amnhĩ xunhwý. Hãmri nhũm amnhĩ tã mẽ omu nê mẽ kãm:

—E nã ãm hãmri. Ra mẽ ate amnhĩ kaxyw ixkôt ajamãxpêr nê ixkôt amnhĩ xunhwýr

jakamã na ka mẽ ixkukwak ri apê Tĩrtũm kraa. Anẽ.

¹³ Na htem ã kêp Tĩrtũm kra hprãm xaj Jejus kôt amnhĩ xunhwỳr anẽ. No na htem mẽ katorxà nhõxà hkre rũm hapôx kôt kêp Tĩrtũm kra hkêt nẽ. Rỳ amnhĩ krã hkôt tanhmã amnhĩ nhĩpêx to kukwak ri kêp hkra hkêt nẽ. ãm Tĩrtũm tãm kot mẽ ho hkra pix kukwak ri na htem kêp hkra.

Jejus wrỳk nẽ ĩ ho kator ã harẽnh

Matêwre 1.20; mãânẽn Rõmãn 1.2-4; Piri-pos 2.6-7; Eprêw 2.9, 4.15; Wam Juāw 4.2

¹⁴ Jakamã na pre Tĩrtũm o amnhĩrit xwỳnhhta mẽ pahwỳr wrỳ nẽ mẽ pakamã ĩ ho kato nẽ mẽ pakamã pa. Kêp Tĩrtũm Kra hã pixi mex na pre. Nẽ kot amnhĩ nhĩpêxja te Tĩrtũm kot amnhĩ nhĩpêx pyrãk. Urãk nẽ mex o mex. Nẽ urãk nẽ mẽ pakutã nojarêt xwỳnh. Na pre hte katãt kôt Tĩrtũm kapêr jarẽnh o ri mẽ hkôt pa. Pa prem kuma nẽ mex o mex ã omu.

¹⁵ Nhũm Juāw Paxis na pre hkukamã mẽ kãm harẽnh o ri pa nẽ mẽ kãm:

—E ra ixte mẽ amã harẽnh o ri ixpa xwỳnhhta na ra pøj. Te pa ixte wa nẽ ixkator pyrãk nom amnepê mã kormã ixkêt ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã urãk nẽ rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anẽ.

¹⁶ Nẽ kêp mẽ pakutã nojarêt rãhã nẽ pa ho pa xwỳnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

¹⁷ Na pre finat Mojesja mẽ panhĩgêjtjê mã Tĩrtũm kapêr jarẽnh o ri mẽ hkôt pa nẽ mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỳr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wrỳ nẽ mẽ pamã kapêr õ ho kapêr o pa nẽ mẽ pamã:

—E mẽ ate Tĩrtũm kôt amnhĩ nhĩpêx o apa hkêt tã nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ

amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarẽnh anẽ.

Anhỳr o mẽ pamã Tĩrtũm kapêr jarẽnh o pa. Tĩrtũm kapêr na mex o mex.

¹⁸ Nẽ aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêêxaja pyrãk jakamã na pre wrỳ nẽ hprĩ hã tanhmã kute hã mẽ pamã harẽnh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juāw Paxis kot mẽ kãm Jejus jarẽnh o pa hã harẽnh

Matêwre 3.1-12; Makre 1.1-8; Rukre 3.15-17; mãânẽn Atre 19.4

¹⁹⁻²⁸ Na pre Juāw Paxis ma hkwyjê hkôt mẽ kãm Jejus jarẽnh o pa nhũm mẽ hkwyjaja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. Hãmri nhũm Juāw Paxis ja hã mẽ omu nẽ Tĩrtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarẽ kamã Ijaew krãhtũmjaja harẽnh ma nẽ ma hwỳr hkwyjê rẽ. Mẽ kot tanhmã hkukjêr to nhũm kot mẽ kãm tanhmã amnhĩ jarẽnh to kaxyw. Jakamã nhũm mẽõ patre hkwyjê mẽ Tĩrtũm mã amnhĩ jarẽnh xà hã ixkre kamã mẽ ho ajuta xwỳnh kwỳjê mẽ Parijew nhõ xwỳnh kwỳjê mẽ nhũm mẽ ma hwỳr mra. Juāw Paxis wỳr mra nẽ omu nẽ kãm:

—Pa. E ot pa mẽ awỳr mra. Kwa mẽ inhmã amnhĩ jarẽ. Apê mẽ atõ na ka we? Xà ka na apê Tĩrtũm kot mẽ ixkaxyw axãm mã xwỳnhhta na ka nà? Xà ka na pa htem amnhĩ wỳr akamã ijamak o ixpa? Anẽ.

Hãmri nhũm mẽ kuma nẽ mẽ kãm: “Nà pa hkêt.” Anẽ hãmri nhũm mẽ kãm:

—Tõ mãn xep apê amnepê mã Tĩrtũm nhỹ hã kapêr jarẽnh xwỳnh pê finat Erisja. Hã na ka tanhmã amnhĩ to nẽ akupỳm atĩr nẽ mẽ ixkôt apa nà? Anẽ.

Hãmri nhũm mẽ kãm:

—Nà ixpê Eris kêt. Anẽ.

Hãmri nhũm mẽ kãm:

—Tõ mãn xep apê finat Mojes kot mẽ kãm harẽnh o pa xwỳnhhta na ka nà? Anẽ.

Hãmri nhũm mẽ kuma nẽ kê axte mẽ kãm:

—Nà ixpê tām kêt. Anē.

Hāmri nhūm mē tee ri kot ā amnhī tā aprār anhÿrja ma nē kām:

—Kwa apê jajê hō hkêt tā na ka hte mē hkrā kumrār o ri apa. Kwa nà akatāt kôt mē inhmā amnhī jarē. Pa mē ama nē ma akupÿm mra nē mē kot awÿr mē ixrēnh xwÿnhjê mā tanhmā ajarēnh to. Tanhmā na ka hte mē kām amnhī jarēnh to ho ri apa? E kwa mē inhmā amnhī jarē pa mē ama. Anē.

Hāmri nhūm tā hprī hā mē kām amnhī jarē. Amnepê mā mē hkukamā Tirtūm nhÿ hā kapēr jarēnh xwÿnh pē finat Ijais kot hkukamā tanhmā harēnh to nē hā kagà xà hkôt nhūm mē kām amnhī jarē nē mē kām:

—Tôe. Nà kot paj ixprī hā mē amā amnhī jarē ka mē inhma. Amnepēm Tirtūm kapēr jarēnh xwÿnhjê hō pē finat Ijaisja na pre hte mē kām mēhō hkukamā harēnh o ri pa. Mēhō kot mē panhō Pahihti hkukamā htēm nē kapôt ā kutêp mē kām harēnh o pa xwÿnhhta nhūm pre hkukamā harēnh o ri pa. Nē mē kām harēnh o:

Koja nhÿrmā mēhōja kapôt ā mōn pōj nē mē kām tanhmā ujarēnh to ho ri pa. Nē mē kām ujarēnh o: “E mē inhma. Koja Tirtūm tokyx mē pahwÿr mē panhō Pahihti mē nhūm wrÿ nhūm mē piitā omu. Jakamā kwa mē tokyx kutêp tām amnhī nhÿpêx o ri apa. Te ho mē kot mēhō kutêp pry hō mex pyrāk o amnhī nhÿpêx o ri pa. Jao amnhī nhÿ ho tām amnhī nhÿpêx nē tām axpēn nhÿpêx o ri apa. Pahihtita kutêp.”

—Anhÿr o na pre hte finat Ijaisja kot Pahihti hkukamā harēnh o ri pa xwÿnhhta kukamā harēnh anē. Tā paa. Pa na pre Ijaisja ā ixkukamā ijarēnh anhÿr o pa. Pa na pa hte ā Pahihti kutêp mē kām harēnh o ri ixpa anē. Tā ā ixte harēnh anhÿr xwÿnhhta na ra mē pakamā pa ka mē kormā ja hā omunh kêt nē. Kukamā na pa hte mē piitā mē kot hkôt amnhī xunhwÿr ā mē omunh kaxyw gō pix o mē hkrā kumrār o ri mē hkôt ixpa. Nom na pre ra mē pahwÿr Tirtūm kot mē pakaxyw ām xwÿnhhta tām mē pahwÿr wrÿ. Ahpumunh tÿx o kot ijakrenh jakamā na pa hte ām

kukwak ri ixpa nē amnhī tā hā ixpijaàm o ri ixpa. Anē.

Juāw Paxis kot mē kām Jejus jahkre hā harēnh

Matêwre 3.11; Makre 1.10; Rukre 3.22

²⁹ Tā nhūm apkati nhūm Juāw Paxis amnhī wÿr Jejus pumu nē mē kot mar o kuhê xwÿnhjê mā ihkra ho ahkre nē mē kām:

—E. Oněj Tirtūm kot mē pakaxyw ām xwÿnhhta tē. Mē pahpê Ijaew na pu htem xatā pahte amnhī tomnuj pānhā amnhīrer kaxyw Tirtūm mā pahkrit ôwēhti hkra nyw kwÿ hpa nē ho amnhī pānhā kām amnhīrer o papa. No kêt htēm nēj koja nhÿrmā kām mē pahpiitā mē pahte amnhī tomnuj pānhā amnhīrer pa. ³⁰ Na pa pre ra mē amā harēnh o: “Te pa ixte wa nē ixkator nē ixtir nē ixpa pyrāk. Nom amnepēm kormā ixkêt ri na pre htir rāhā nē pa ho pa. Nē ĩ ho wrÿk nē jar kator tā kēp Tirtūm Kra jakamā urāk nē rāhā nē pa ho pa xwÿnh na. Jakamā kot amnhī to rax o kot ijakrenh par.” Anhÿr o pa pre mē amā harēnh o ri ixpa ka prem inhma.

³¹ —Ixte mē amā ā harēnh anhÿr tā ijaxwÿja kormā ixte kēp Tirtūm Kra hā omunh kêt nē ām hkukamā Tirtūm nhÿ hā mē amā ā harēnh anhÿr o ri ixpa. Nē hkukamā Tirtūm mā mē akrā kumrār o ri ixpa. Tā na pa kēp Tirtūm Kra hā omu nē ā mē amā ahkre anē ka mē omu. Anē.

³²⁻³³ Nhūm pre ā Juāw Paxis mē kām Jejus jahkre anē nē mē kām:

—Nà Tirtūm na pre ixte mē akrā kumrār o ixpa kaxyw inhmā hā karō. Tā na inhmā kot mē pakaxyw ām xwÿnhhta o amnhīrit nē inhmā harēnh o: “Koja nhÿrmā Ixkarōja mēhō hwÿr wrÿ nē kuri arĭk. Ka ja hā omu nē kēp Ixkra hā omunh kurê kumrēx. Koja amnhī xō ri amnhī pyrā nē mē kām Ixkarō nhōr o pa nhūm mē hkarō mā agjê.” Anhÿr o inhmā harē. Tā na pa ra omu. Na pre Tirtūm Karō kaxkwa rŭm te tuuti pyrā nē hwÿr wrÿk o tē nē ĩkre hā xa. ³⁴ Pa ā kot hipêx anhÿr ā omu nē kēp Tirtūm Kra hā omunh kurê kumrēx. Jakamā na pa ā mē amā ahkre nē mē amā harēnh anē. Anē.

Juāw Paxis kôt pa xwÿnh wa kot Jejus kôt pa hā wa harēnh

Atre 19.4

³⁵ Tã nhũm apkati nhũm Juãw Paxis axte Jejus pumu. Kot hkôt ri pa ho pa xwýnh mẽ wa nhỹri xa nẽ omunh o xa. ³⁶ Nhũm ra mẽ hãnh tẽ nhũm Juãw Paxis omu nẽ hkôt ri pa xwýnh wa kãm:

—E oněj Tĩrtũm kot mẽ pakaxyw ãm xwýnhhta tẽ. Něj koja mẽ pahte amnhĩ tomnuj pãnhã amnhĩre. Anẽ.

³⁷ Hãmri nhũm wa kuma nẽ omu nẽ ma hkôt tẽ nẽ hã ajêt. ³⁸ Nhũm wa omu nẽ wa kãm: “Pa mo na?” Anẽ nhũm wa kot kęp mẽ ahkre xwýnh ã omunh jakamã kãm:

—Nà wa ixte ma akôt ixtẽm nẽ nhỹri anhõrkwỹ pumunh mã na pa wa akôt tẽ. Anẽ.

³⁹ Hãmri nhũm wa kãm:

—Tõe. Nà wa kam nẽ rĩ ma ixkôt tẽ. Anẽ.

Hãmri nhũm wa kuma nẽ ma hkôt wa tẽ nẽ õrkwỹ hwýr pøj nhũm ra amỹkry nhũm wa hkôt axà nẽ kuri ýr o kamàt hãmri nẽ kato nẽ ma akupỹm tẽ. ⁴⁰ Kôt htẽm xwýnhjẽ hõta na pre kęp Andre. Simãw Pêtre htõ na pre. Nẽ kaxyw hõja. Wa kumã na pre Juãw Paxis Jejus jahkre nẽ harẽ nhũm wa ma hkôt tẽ. Tã wa ra akupỹm wa tẽ. ⁴¹ Hãmri nhũm Andreja htõ Simãw wýr tẽ nẽ kãm:

—Kwa na pa wa jarãhã Tĩrtũm kot mẽ pakaxyw ãm xwýnhhta pumu. Ma pu hwýr ka wa ixwar ano ho omu nà. Anẽ.

Ijaew kapër kãm “Tĩrtũm kot mẽ pakaxyw ãm xwýnh” anhỹrja te kot Gres kapër kãm “Kris” anhỹr jarẽnh pyræk. Ijaew na prem ã Jejus jarẽnh anẽ nẽ harẽnh o: “Tĩrtũm kot mẽ pakaxyw ãm xwýnh.” Anhỹr o harẽ. ⁴² Jakamã nhũm ã Andreja htõ mã harẽnh anẽ nẽ ma akupỹm hwýr o tẽ. Nẽ wa hwýr pøj nhũm wa omu. Wa kęp Juãw kra hã wa omu hãmri nẽ Simãw mã kapër nẽ kãm:

—Pa Simãw. Nà apê Simãw tã kot paj axte atã anhĩxi hõ mẽ. Kot kaj mããnẽn apê Septi. Anẽ.

Mẽ pakapër kãm Septija te kęp “kẽn” jarẽnh pyræk. No Gres kapër kãm te kęp “Pêtre” jarẽnh pyræk. No Ijaew kapër kãm kęp “Septi.” Jakamã nhũm pre Jejus ã Simãw Pêtre hã hixi mẽnh anẽ.

Jejus kot amnhĩ kôt Firipti mẽ Natãnaew wa hwýr ã harẽnh

⁴³⁻⁴⁴ Tã nhũm apkati nhũm ra Jejus pyka pẽ Garirej wýr nojarêt nẽ nhỹri Firipti

pumu. Firiptija Andre mẽ Simãw Pêtre wa uræk nẽ krĩ pẽ Pesěj nhõ xwýnh na pre. Jakamã nhũm Jejus nhỹri omu nẽ amnhĩ kôt kuwý nẽ kãm:

—E kwa ma ri ixkôt apa ho apa. Anẽ.

⁴⁵ Hãmri nhũm kuma nẽ ma tẽ nẽ nhỹri Natãnaew pumu nhũm nhỹri pĩ hpàr parpẽ nhỹ nhũm omu nẽ kãm:

—Kwa na pa jarãhã finat Mojes kot amnepẽm mẽhõ hã kagà xwýnhhta pumu. Tĩrtũm kot mẽ pakaxyw ãm xwýnhhta na. Tĩrtũm nhỹ hã kapër jarẽnh o mẽ pa xwýnhjaja kot hkukamã harẽnh nẽ hã kagà xwýnhhta. Kęp Najare nhõ xwýnh nẽ mããnẽn kęp finat Juje hkra. E kwa tokyx pu hwýr ka ixkuxwar ano ho omu. Anẽ.

⁴⁶ Hãmri nhũm tee ri kot tanhmã harẽnh toja ma nẽ kãm:

—Tk. Kokỹ. Najare nhõ xwýnh piitã kot amnhĩ to mexti hã kot kêt we hõ kęp Tĩrtũm kot mẽ pakaxyw ãm xwýnh. Anẽ.

Hãmri nhũm kãm:

—Kwa nà ã akapër anhỹr kêt nẽ. Ma ixkôt tẽ nẽ ixpyrà nẽ ano ho omu mãn. Nẽ rĩ ã ri akapër anẽ. Anẽ.

Hãmri nhũm kuma nẽ ma hkôt tẽ. ⁴⁷ Hãmri nhũm Jejus amnhĩ wýr wa omu nẽ kuri mẽ kuhẽ xwýnhjẽ mã Natãnaew jarẽnh kurẽ kumrẽx nẽ harẽnh o:

—E oněj Ijaew õja mẽ pahwýr hpõx o tẽ. ãm hãmri na hte tãm amnhĩ nhĩpẽx o pa. Na hte higêt finat Jako kurom hẽx rom ri tanhmã mẽ kãm amnhĩ to hẽx to ho pa hkêt nẽ. Na hte ãm kapër mex pix o ri kapër o pa. Anẽ.

⁴⁸ Hãmri nhũm tee ri amnhĩ tã kuma nẽ kãm:

—Kwa mẽhõ na pre ã amã ijarẽnh anẽ? Aa ixte nhỹri apumunh kêt kumrẽx tã ka ri ãm hãmri ã ijarẽnh anẽ. Anẽ.

Hãmri nhũm kãm:

—Nà mẽhõ kot tanhmã inhmã ajarẽnh to hkêt. ãm pa na pa hte inhno ho apumunh o ixpa. Kormã Firipti kot awýr htẽm nẽ amã ijarẽnh kêt ri pa ra ixprĩ hã inhno ho apumu. Na ka kormã pĩta parpẽ nhỹ pa apumu. Anẽ.

⁴⁹ Hãmri nhũm tee ri kot hprĩ hã harẽnh ã amnhĩ tã kuma nẽ kãm:

—Kwa mẽ ijahkre xwýnh. Pẽr ãm hãmri apê Tĩrtũm Kra kumrẽx jakamã na ka ã ijarẽnh anẽ. Xep ka na mẽ ixte amnhĩ wýr

akãm ijamak o ixpa xwÿnhhta na ka. Nà ka na apê mẽ ixpê Ijaew nhõ Pahihti. Anê.

⁵⁰ Hãmri nhũm Jejus kuma nê kãm:

—Nà ãm hãmri na ka ixte pĩ hpar pè apumunh ã ajarēnhja ma nê hkôt pix mã ixpê Tĩrtũm Kra hã ixpumu. Tã kot kaj ja nhĩrõ pè axte mẽmoj mex o kot ja jakrenh pumu. ⁵¹ Koja nhỹrmã kaxkwa axkjê nhũm Tĩrtũm kapēr o mẽ wrÿk xwÿnhjaja kurũm axpēn japa ka mẽ omu. Finat Jako pyrã nê mẽ omu. Ixte Tĩrtũm kot mẽ akaxyw ixãm xwÿnh wÿr koja mẽ ã wrÿk nê amnhĩ nhĩpēx anê ka ja hã mẽ omu. Kwa jam ajamxpēr tÿx rãhã ho apa. Anê.

2

Jejus kot gô ho mẽ kãm wĩhti nhĩpēx ã harēnh

¹ Tã nhũm apkati axkrut nê hapēx nhũm Jejus arĩ Garirej kamã pa. Nhũm krĩ pè Kanã kamã axpēn mã wahõj wa rer kaxyw nhũm Jejus katorxà ma mẽ hwÿr mō. ² Hãmri nhũm mẽ amnhĩ wÿr Jejus mẽ hkôt ri mẽ ixpa xwÿnhjê wÿ pa mẽ ijaxwÿja ma mẽ hwÿr mō nê ra mẽ hwÿr pōj. ³ Hãmri nê mẽ hkôt wa hã ixkĩnh nê apku nê wĩhti hkwy ho ixkõm o ixkrĩ. Tã nhũm ra wĩhti mẽ kēp hapēx nhũm Jejus katorxàja harēnh ma nê Jejus mã harē nê kãm:

—Xê Jejus. Na xep ra mẽ kēp wĩhti hapēx pa. Xat ka tanhmã mẽ ho ajuta hto mẽ? Anê.

⁴ Hãmri nhũm kãm:

—Tõe. Kwa tee ri ajamxpēr kêt nê. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwÿnh ã pa kormã amnhĩ to amnhĩrit kêt nê. Anê.

⁵ Hãmri nhũm katorxà kuma nê mẽ kãm mẽ àpēnh xwÿnhjê hwÿr tē nê mẽ kãm:

—An koja Jejus mẽ awÿr tē nê tanhmã mẽ amã mẽmoj tã karõ hto ka mẽ ama nê kãm ho anhÿr kurê kumrēx. Anê.

⁶ Nhũm mẽ kuri kēn o poti kēp 6 nê kuhê. Piitã umpÿm rũnh kumrēx. Koja hõ pyxi nê nÿt nê kamã gô kēp 80 rit nê hkwy kamã kēp 100 rit. Ijaew na htem apkur kaxyw nê amnhĩ nhĩkra kuhõnh japjê rũnh nê kormã apku. Nê apkur pa nê axte amnhĩ nhĩkra kuhõ. ã mẽ kot xatã amnhĩ nhĩkra kuhõnh jakamã nhũm pre htem amnhĩ ri ã poti rũnh kwÿ xunhwÿr anê. No nhũm ra

hkapyr nê kuhê. ⁷ Hãmri nhũm Jejus tē nê omu mẽ àpēnh xwÿnhjê mã kãm:

—E mẽ ma mra nê gô ru nê ho poti kuhê mÿj piitã ho nÿt pa. Anê.

Nhũm mẽ kuma nê ma mra nê ho nÿt pa.

⁸ Hãmri nhũm mẽ kãm:

—Nà hãmri. Pãnhã hõ kamã gô hkwy janhi nê o tē nê mẽ anhõ patrãw mã agõ kē hkwy ho ixkõ nê kamã ama. Anê.

Hãmri nhũm mẽ mar xà hkôt kãm hkwy janhi nê hwÿr o tē nê kãm kugõ. ⁹⁻¹⁰ Nom nhũm gõja arĩ kēp gô kumrēx kêt nê. Jejus kot tanhmã ho jakamã nhũm ra hpãnhã kēp wĩhti. Jakamã nhũm mẽõ patrãw wÿr hkwy ho tē nê kãm kugõ nhũm hkaki nê kamã ama. Nom Jejus kot gô ho hipēx ã omunh kêt nê. ãm htÿx ho wĩhti kumrēx ã hkamnhĩx nê mex kumrēx ã hkaki. Hãmri nê amnhĩ wÿr mjēn nyw xwÿnh mã hpa ho apê nhũm hwÿr tē nhũm kãm:

—Kwa na htem wĩhti mex o wa nê mẽ kãm kugõ hãmri nhũm mẽ hpenh pa nhũm mẽ rĩ kormã hkôt omnu ho hapu nê mẽ kãm kugõ. Tã ka pēr mẽ axtem nê wam mẽ kãm omnu nhõr pa hãmri nê kormã mex kumrēxja o hapu nê mẽ kãm agõ. Kêt wĩhti ja na mex kumrēx. ãm mex o mex. Anê.

Jejus kot gô ho hipēx ã omunh kêt jakamã nhũm ã kãm kapēr anê. ãm mẽ àpēnh xwÿnh pixjaja na prem ja hã omu. ¹¹ Nhũm Jejus kormã mẽ kãm aa mẽ kot mẽmoj pumunh kêt õ ho anhÿr kêt tã krĩ pè Kanã kamã ã mẽ kãm amnhĩ nhĩpēx anhÿr o hkax. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkôt ri ixpa xwÿnhjaja ã kot amnhĩ nhĩpēx anhÿr ã omu hãmri nê kēp Tĩrtũm kot mẽ pakaxyw ãm xwÿnh ã omunh kurê kumrēx.

¹² Tã nhũm Jejus hpãnhã ma krĩ pè Kapanã hwÿr mō. Pa mẽ hkôt ri ixpa xwÿnhjaja nê katorxà nê htõjaja pa mẽ ma ixpiitã hkôt mō. Hãmri nê hwÿr pōj nê kamã mẽ hkôt ixpa hã ixtã apkati grēre nê ma hpãnhã krĩ hõ hwÿr ixpa.

*Jejus kot Tĩrtũm nhõrkwÿ hwÿr àr ã harēnh
Matêwre 21.12-13; Makre 11.15-19;
Rukre 19.45-46*

¹³ Tã nhũm ra arĩgro pè Pas ahtēp o mō. Pasja ã mẽ ixpê Ijaew na pa htem amnepēm Tĩrtũm kot pika pè Ejit rũm mẽ

inhīgētjê kator mā ijamaxpēr kaxyw axpên wÿr akuprō nê hã ixkīnh. Jakamã nhūm Jejus ma hkwyjê hkôt krī pē Jerujarē hwÿr mō. Pa mē ixpê hkôt ri ixpa xwÿnhjaja pa mē ma hkôt ixpa. Hāmri nê hwÿr pōj¹⁴ nê Tirtūm mā amnhī jarēnh xà hã ixkre hwÿr mra nê ixkre puhã kahêja wÿr agjê. Nhūm mē kamã axtem nê mēmoj to wēnê ho kuhê. Mōx o wēnê nê ôwēhti ho wēnê nê tutre ho wēnê ho kuhê. Mē kot haprôr nê ho Tirtūm mā hkīnh xà kaxyw mē kām ho wēnê. Nê kàxpore ho pinhpanh xwÿnhjaja haxwÿja mē kuri hkrī. ¹⁵ Hāmri pa mē Jejus kôt mē hwÿr agjê nê ja hã mē omu hāmri nhūm Jejus pē ja omnuj tÿx nê. Jakamã nhūm tee ri mē omu hāmri nê amnhīm mry hkà ho mē hta xà nhīpêx nê ho ixkreja nê mē piitã mē kator pa. Nê mōx nê ôwēhti nê mēmoj piitã kator pa. Nê kàxpore ho pinhpanh xwÿnhjaja nhūm mē kēp mē ô mēsti rēnh pa nhūm mē hikàxpore pykap rôrôk pa nê angrà nê hikwÿ. ¹⁶ Hāmri nhūm Jejus tutre ho wēnê xwÿnhjê mā kām:

—Kwa mē anhō tutre jamÿ nê tokyx ma mra. Na htem Inhīpêêxà nhōrkwÿ kamã mēmoj to wēnê hkêt nê. Kēp mē uja prôr xà hã ixkre hkêt. E kwa mē tokyx ma mra. Anê.

Nhūm pre ã mē kām kapēr anê nhūm mē tee ri kuma hāmri nê ma mrar kurê kumrêx. ¹⁷ Pa mē hkôt mē ixpa ho ixpa xwÿnhjaja ã kot mē hipêx anhÿr ã omu hāmri nê ra Tirtūm kapēr ã kagà htūm kot ã amnhī nhīpêx anhÿrja kukamã hã kagàta mā ijamaxpēr kurê kumrêx. Kagà kot amnepēm Jejus kukamã te ra ã kapēr anhÿr pyrāk o harēnh. Nê harēnh kot:

Na pa hte Tirtūm nhōrkwÿ ho mex rāhã ho ixpa. Nhūm mēmoj punuj hwÿr axà pa omu nhūm ja inhmã mex kêt nê.

Anhÿr o kot hkukamã harēnh jakamã na pa mē ã Jejus kot mē hipêx anhÿrja ã omu hāmri nê ra hkukamã hã kagàta mā ijamaxpēr kurê kumrêx.

Ijaew krāhtūmjaja kot Jejus kukjêr ã mē harēnh

¹⁸ Tã nhūm Ijaew krāhtūmjaja tee ri Jejus kot ixkreja nê mē kator ã omu hāmri nê hwÿr mra nê kām:

—Pa. Kwa mon ka ri ã Tirtūm mā amnhī jarēnh xà hã ixkreja nê mē kator

anê? Mēhō na we mē ixwÿr amē ka ÿ hã ã mē hipêx anēhti? Nà xà Tirtūm na mē ixwÿr amē? E mē inhmã aa mē ixte mēmoj pumunh kêt ô ho anê. Pa mē ja hã apumu hāmri nê Tirtūm kot mē ixwÿr amēnh xwÿnh ã apumunh kurê kumrêx. E kwa tokyx mē inhmã ho anê. Anê.

¹⁹ Hāmri nhūm mē kuma nê mē kām amnhī jarē. Nom amnhī tā kuxi nê mē kām awjarē nê mē kām:

—Nà kot paj aa mē ate mēmoj pumunh kêt ô ho pixi nê mē amã ho anê ka mē omu. Tirtūm nhōrkwÿ jaa. Kot kaj mē agrà pa ixtã apkati axkrunēpxi nê akupÿm hipêx ka mē ja hã ixpumu.

²⁰⁻²² Anhÿr o mē kām kapēr. No ãm ixkreja jarēnh kêt nê. Na pre ãm amnhī tā kuxi nê ã mē kām kapēr anê. Mē kot hpīr nhūm htyk ã apkati axkrunēpxi nê akupÿm htīr ã mē kām ã amnhī jarēnh anê. Te mē kot Tirtūm mā amnhī jarēnh xà hã ixkreta grānh nhūm hã apkati axkrunēpxi nê akupÿm kot hipêx parta pyrāk ã hã kuxi nê ã mē kām amnhī jarēnh anê. Jakamã nhūm mēhprī hã mar mex kêt nê. ãm tee ri kuma nê kām:

—Tk. Kwa ixkre ja na prem hipêx kaxyw nê hã amgrà xohtô rax nê hipêx. Hã amgrà pē 46 nê hipêx par kēnã kot ka kêt atã apkati axkrunēpxi pix nê akupÿm hipêx. Anê.

Mē kot hprī hã mar kêt jakamã na prem ã kām kapēr anê. Pa mē hkôt mē ixpa ho ixpa xwÿnhjaja ã mē kām kapēr anhÿrja ã kuma nê hã inhnohtÿx rāhã ho ri ixpa. Tã nhūm mē kot Jejus pīr nhūm hã apkati axkrunēpxi nê akupÿm htīr nhō arīgrota ã pa mē kot ã amnhī jarēnh anhÿrja mā ijamaxpēr kurê kumrêx. Nê axpên mā:

—Hêxta waa nê. Xep ãm hāmri na pre Pahihti amnhī kukamã ã amnhī jarēnh anê. Mē kot hpīr nhūm htyk ã apkati axkrunēpxi nê akupÿm htīr ã amnhī kukamã amnhī jarēnh mex nê. Te mē kot Tirtūm nhōrkwÿ grānh par nhūm hã apkati axkrunēpxi nê akupÿm hipêx ã amnhī jarēnh pyrāk. ãm hāmri na pre amnhī kukamã ã amnhī jarēnh anê. Anê.

Jejus kot mē pajamaxpēr kôt mē pah-pumunh ã harēnh

²³ Tã nhũm Jejus mẽ hkôt mẽ ixpa ho ixpa xwýnhjaja arĩ Jerujarẽ kamã ri ixpa ho ixpa. Nhũm ra arĩgro pẽ Pasja kato nhũm mẽ piitã hkĩnh kaxyw axpẽn wýr akuprõ. Nhũm Jejus mẽ kãm aa mẽ kot mẽmoj pumunh kêt kwý ho anhýr o ri mẽ hkôt pa. Nhũm mẽ omu nhũm mẽ hkwyjaja Tĩrtũm kot mẽ pakaxyw ãm xwýnh ã hkôt hamaxpěr tã no ãm hkôt hamaxpěr tỳx kêt nẽ. ²⁴ Jakamã nhũm Jejus amnhĩ tã mẽ hamaxpěr ã mẽ omu nẽ hamaxpěr o:

—Nà mẽ kot ixkôt hamaxpěr kryre xwýnhjaja koja mẽ hã apkati grẽre nẽ ixto hamakêtkati nẽ htỳx ri pa. Anẽ.

²⁵ Jejus kot mẽ pahte pahtỳx ri amnhĩ tomnuj o papa hã mẽ pahpumunh par. Nẽ pahtỳx ri pajamaxpěr punuj o papa hã mẽ pahpumunh par. Jakamã na pre ã mẽ harẽnh anẽ.

3

Jejus mẽ Nĩkotẽ wa kot axpẽn mã kapěr ã wa harẽnh

Juāw 1.12-13; mããnẽn Wam Pêtre 1.23

¹ Tã nhũm Parijew nhõ xwýnhjẽ õ pẽ Nĩkotẽ. Mããnẽn kệp Ijaew krãhtũmjẽ hõ. ² Jakamã na pre Jejus jarẽnh ma nẽ kãm omunh prãm nẽ. Hãmri nẽ hkwy pymaj kamàt kãm hwýr tẽ nẽ omu nẽ kãm:

—Pa mẽ ijahkre xwýnh. E ot pa awýr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwýr amẽ ka mẽ ixwýr wrý. Mẽhõ koja apyrã nẽ aa mẽ inhmã mẽ kot mẽmoj pumunh kêt kwý ho anhýr o pa? Nà amrakati kumrẽx. Kop apu Tĩrtũm kot mẽ ixwýr amẽnh kêt ronhỳx ka ã amnhĩ nhĩpêx anhýr kêt nẽ. Anẽ.

³ Hãmri nhũm kuma nẽ tanhmã kãm kapěr to. No ãm amnhĩ tã kuxi nẽ kãm awjarẽ nẽ kãm:

—Na htem piitã mẽ katorxã nhõxã hkre rũm hapõj. Tã Tĩrtũm kãm mẽ piitã axte mẽ hapõx prãm. Jakamã kot kaj mẽ akator o axkrut kêt nẽ hãmri nẽ nhỹrmã Tĩrtũm ri atĩr tũm nẽ apa ho apa hkêt nẽ. ãm hkrajẽ pix na htem kuri htĩr tũm nẽ pa ho pa. Jakamã kwa jam ajamaxpěr tỳx nẽ ri ho apa. Anẽ.

⁴ Hãmri nhũm Nĩkotẽja kuma nẽ tee ri ã kot kãm kapěr anhýrja kukamã hamaxpěr nẽ kãm:

—Kwa ra ixaptãr kẽnã kot pa kêt tanhmã amnhĩ to nẽ akupým ixkatorxã nhõxã hkre hwýr axã nẽ axte kurũm ixkato. Anẽ.

⁵⁻⁷ Hãmri nhũm Jejus kãm:

—Nà na hte mẽ hkrarejaja mẽ katorxã nhõxã hkre rũm kagõ hkôt hapõj hãmri nẽ kệp katorxã mẽ hipêêxã wa hkwyý. Jao wa kot amnhĩ nhĩpêx kôt amnhĩ nhĩpêx o pa. Ja pyrã nẽ ka mẽ atõ amã apê Tĩrtũm kra hprãm hã kot kaj amnhĩ to awý nhũm wa Ixkarõja akarõ mã axã hãmri ka ra apê hkraa. Te ra axte akator pyrãk o amnhĩ nhĩpêx. Nẽ te mẽ hkra kot katorxã nẽ hipêêxã wa kot amnhĩ nhĩpêx kôt amnhĩ nhĩpêx o pata pyrã nẽ apãm Tĩrtũm kot amnhĩ nhĩpêx kôt amnhĩ nhĩpêx o ri apa. Nom koja Tĩrtũm mẽ wa Ixkarõja akarõ mã àr kêt nẽ ka apê hkra hkêt nẽ. Jao te axte akator kêt pyrãk o amnhĩ nhĩpêx. Jakamã na pa amã te ate akator pijakrut o amnhĩ nhĩpêx pyrãk o amã ã ja jarẽnh anẽ. Kwa jam ajamaxpěr tỳx rãhã ho ri apa. No ama nẽ tee ri amnhĩ kukamã ajamaxpěr kêt nẽ.

⁸ —E pa ixprĩ hã amã ja jarẽ ka inhma. Na hte kòk kãm nhỹhým àpêr prãm xã hkôt àpêr o pa. Pu mẽ kamã ama no ãm pano ho nhỹhỹnh mõi xã hkôt omunh kêt nẽ. Nẽ nhỹhỹm ma mõi xã hkôt omunh kêt nẽ. Ja pyrã nẽ na hte Tĩrtũm mẽ wa Ixkarõja mẽ hkaxwýnh mã agjẽ nẽ mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nẽ. Anẽ.

⁹ Hãmri nhũm Nĩkotẽ ã Jejus kot kãm kapěr anhýr ã kuma nẽ tee ri hamaxpěr nẽ kãm:

—Kwa na pa ixprĩ hã amar kêt nẽ. Anẽ.

¹⁰ Hãmri nhũm kãm:

—Kwa mon ka hte Tĩrtũm kapěr tũm o Ijaew jahkre ho apa tã aprĩ hã ixkapěr mar kêt nẽ? ¹¹ Ixte mẽmoj pumunh xã hkôt ixte mẽ amã harẽnh o ixpa htã ka mẽ apê Ijaew krãhtũmjaja mẽ amã ixkapěr mar prãm kêt nẽ. ã mẽ ate anhýr kumrẽx. Kwa jam ajamaxpěr tỳx nẽ. ¹² Na pa ra Tĩrtũm kot jar tanhmã amnhĩ nhĩpêx to hã harẽnh o ixpa htã ka mẽ ãm ama nẽ ixkôt ajamaxpěr kêt nẽ. Jakamã xã kot pa hpãnhã mẽ amã kaxkwa kamã tanhmã kot amnhĩ nhĩpêx to

hã harē ka mē ama nē mar tỳx nē? Nà kot ka mē ama nē ãm ama nē hkôt ajamexpēr kêt nē. ¹³ Mēhō na we ra ma kaxkwa hwỳr api nē kamã mēmoj mex pumu nē man akupỳn mē awỳr wrỳ nē mē amã tanhmã harēnh to? Nà amrakati kumrēx. ãm paxipix ixpê Tirtũm kot mē akaxyw ixãm xwỳnh na pa pre amnē kurũm mē awỳr wrỳ hãmri nē ixprĩ hã mē amã tanhmã harēnh to ho ri ixpa.

¹⁴ —Amnepēm finat Mojesja kormã kapôt ã mē o pa ri na pre mē kãm kàx o kagã karōja nhĩpēx nē kỳxpē mē kãm kunhō. Kagã kot mē hkamnhar xwỳnhjaja kot hwỳr rĩt nē omunh nē akupỳm mex kaxyw mē kãm kunhō. Tã ixpê Tirtũm kot mē akaxyw ixãm xwỳnh kot paj nhỹrmã kagã karōta pyrã nē kỳx pē pĩ kahpa hã ajēt. ¹⁵ Ka mē te mē kot kagã karō pumunh nē akupỳm mexta pyrã nē amnhĩ kaxyw inhmã ajamexpēr nē ixkôt amnhĩ xunhwỳ hãmri nē nhỹrmã Tirtũm mē wa ixri atĩr tũm nē amex rãhã nē apa ho apa.

¹⁶ —Tirtũm kãm pika piitã hkôt mē apiitã mē ajapē htỳx. Nē mē ajapē xàj na pre ixpê Kra hã ixpyxi hã mē awỳr inhmē. Ka mē atō amnhĩ kaxyw ixkôt ajamexpēr nē ixkôt amnhĩ xãm. Hãmri nē nhỹrmã atyk tã nhũm Tirtũm akupỳm ato atĩr ka wa ixkuri atĩr tũm nē amex rãhã nē apa ho apa. Hãmri nhũm Tirtũm aa amnhĩ nē nhỹhỹm amēnh kêt kumrēx. ¹⁷ No mē ate amnhĩ tomnuj mỳrapē tanhmã ixte mē anhĩpēx to kaxyw na pre mē awỳr inhmēnh kêt nē. ãm ixkukwak ri mē atĩr tũm nē mē amex rãhã apa ho apa hprãm xàj na pre mē awỳr inhmē pa mē awỳr wrỳ. ¹⁸ Jakamã kot ka mē atō amnhĩ kaxyw ixpê Tirtũm Kra hã ixkôt ajamexpēr nē ixkôt amnhĩ xãm nhũm Tirtũm ixtã apumu nē ate amnhĩ tomnuj mỳrapē tanhmã anhĩpēx to hkêt nē. No kêt mē kot ixkôt amnhĩ xunhwỳr kêt xwỳnhjaja na Tirtũm ma mē kot amnhĩ xà htỳx kamã hamak tũm xà hwỳr mē pa mã xwỳnhjê hã mē harē. Mē kot ixkôt amnhĩ xunhwỳr kêt mỳrapē. Anē.

Mē kot amnhĩ tomnuj o hpimxur prãm kaprỳ ã mē harēnh

¹⁹ Nhũm Jejus arĩ Nĩkotē mã kapēr nē kãm:

—Na pre Tirtũm amnē pika hwỳr mē awỳr inhmē. Mē ate amnhĩ tomnuj xwỳnh ã amnhĩ pumunh kaxyw mē awỳr inhmē. Tã nhũm mē ohtō nē amnhĩ tomnuj gryk ã kãm kapēr mar prãm kêt nē. Jao ixkaga nē kãm ixkapēr mar prãm kêt nē. ²⁰ Ra ixprĩ hã ixte mē kot tanhmã amnhĩ tomnuj to ho pa hã mē omunh mex jakamã mē kãm ixkapēr mar prãm kêt. Nē ixte mē kot tanhmã amnhĩ tomnuj to ho pa hã mē harēnh pymaj ixkôt kãm pa hprãm hkêt nē. ²¹ No kêt mē kot ixkôt amnhĩ xunhwỳr xwỳnhjaja na mē kot amnhĩ nhĩpēx o pa hã hpijaãm kêt. Na htem ãmnhĩx ixkôt amnhĩ nhĩpēx o pa. Jakamã koja mē piitã ja hã mē omu nē Tirtũm kot tanhmã mē hkrã hto nhũm mē ra kãm hkôt pix mã amnhĩ nhĩpēx ho pa hprãm ã mē omunh kurē kumrēx. Anē.

Nhũm pre ã Jejus Nĩkotēja mã kapēr anē.

Juāw Paxis kot Jejus jarēnh o pa hã harēnh Juāw 1.19-28

²² Tã pa mē ixpê Jejus kôt ri ixpa ho ixpa xwỳnhjaja Jejus kôt Jerujarē rũm ijaopj nē pika pē Jutej kwỳ kamã ixpa. Jejus nhỹ hã Tirtũm mã mē hkrã kumrãr o ri mē hkôt ixpa. ²³ Nhũm finat Juāw Paxis haxwỳja mē ixpyrã nē mē hkrã kumrãr o pa. Krĩ pē Sarĩ htã krĩ pē Enō mỳri pyhti rax jakamã nhũm pre htem hwỳr mra nhũm kamã mē hkrã kumrã. ²⁴ Kormã mē kot haxàr kêt ri nhũm kamã mē hkrã kumrãr o pa.

²⁵ Rôm nhũm Ijaew hōja Juāw Paxis kôt mē pa ho mē pa xwỳnhjê hwỳr tē nē Juāw Paxis kot mē hkrã kumrãr ã tanhmã mē hkukjêr to nhũm mē kuma nē tee ri hã axpēn kukjêr o kuhê. ²⁶ Hãmri nē akupỳm Juāw Paxis wỳr tē nē kãm:

—Kwa mē ijahkre xwỳnh. Pyhti pē Jotãw nhĩkjê hã ate mēhō pumunh nē tanhmã mē inhmã harēnh to xwỳnhhta kôt mē pa ho mē pa xwỳnhjaja na xep htem apyrã nē mē hkrã kumrãr o pa nhũm xep mē ra ohtō nē mē pahkaga nē mē hkôt pa. Kwa xà ja amã mex nà? Anē.

²⁷ Hãmri nhũm mē kuma nē mē kãm:

—Tỳ ja mex kēnã. Tirtũm kãm hprãm xà hkôt na htem mē hwỳr mra nhũm mē ixpãnhã mē hkrã kumrã. Nà ja mex. ²⁸ Ixpê Tirtũm kot mē pakaxyw ãm xwỳnh kêt. Na pa pre ra mē amã ja hã amnhĩ jarē ka prem

inhma. Æm hkukamã na pre Tirtũm amnẽ inhmẽ pa mõi nẽ ã jar ri ixpa anẽ.

²⁹ —Te ixte mẽ umre kot amnhĩ nhĩpẽx pyrãk. Na htem axpẽn mã mẽ rer kaxyw nhũm mẽ umreja myta wỳr tẽ nẽ hpa hã kupy nẽ ma ni hwỳr o tẽ nẽ axpẽn mã wa kure. Hãmri nhũm hpãnhã mẽhõja axpẽn tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpẽx pyrãk jakamã koja mẽ ma Tirtũm kot mẽ pakaxyw ãm xwỳnhhta wỳr mra nẽ kapẽr ma pa mẽ harẽnh ma nẽ ixkĩnh nẽ.

³⁰ Na htem mẽ umre hã hkĩnh kêt nẽ. Mjẽn nyw xwỳnhja ã na htem hkĩnh. Tã ja pyrã nẽ koja mẽ axte ixte mẽ kãm Jejus jarẽnh mar kaxyw ixwỳr mrrar kêt nẽ. Æm hwỳr koja mẽ hpãnhã mra nẽ tãm mar o kuhẽ. Ja mex kumrẽx. ³¹ Jejus kẽp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpẽ pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỳr. Nẽ pika nhõ xwỳnhjẽ jamaxpẽr pix o pajamaxpẽr o ri papa.

³² —Na hte Jejus mẽ kãm kaxkwa kamã kot mẽmoj pumunh xwỳnh kwỳjẽ jarẽnh o pa. Nẽ kamã kot mẽmoj mar xwỳnh kwỳ jarẽnh tã nhũm mẽ ohtõ nẽ kuma nẽ ãm kuma. ³³ No mẽ kot mar nẽ amnhĩ kaxyw hkõt hamaxpẽr xwỳnhjaja na htem kuma nẽ axpẽn mã harẽnh o: “Nà ãm hãmri na ã Tirtũm kapẽr jarẽnh anẽ. Nà Tirtũm kapẽr mex kumrẽx.” Anhỳr o axpẽn mã harẽ.

³⁴ —Tirtũm na pre mẽ pahwỳr Jejus mẽ nhũm amnẽ mẽ pahwỳr wrỳ nẽ Tirtũm Karõ nhỹ hã mẽ pamã kapẽr jarẽnh o ri mẽ pahkõt pa. ³⁵ Tirtũm kãm Krata japẽ htỳx kumrẽx jakamã na pre ãhkram mẽmoj piitã haxãr pa nhũm urãk nẽ hihtỳx o hihtỳx nẽ mẽmoj piitã ho amnhĩptãr o pa. ³⁶ Jakamã mẽ kot amnhĩ kaxyw hkõt hamaxpẽr nẽ hkõt amnhĩ xunhwỳr xwỳnhjaja koja mẽ nhỹrmã wa kuri htĩr tũm nẽ mex rãhã nẽ pa ho pa. No mẽ kot hkaga xwỳnhjaja koja mẽ ã amnhĩ nhĩpẽx anhỳr kêt nẽ. Koja Tirtũm mẽ kot amnhĩ xà htỳx kamã hamak tũm xàta wỳr mẽ rẽnh pa. Anẽ.

4

¹ Tã nhũm Parijew nhõ xwỳnhjaja Je-

jus jarẽnh ma. Nẽ hkõt mẽ pa xwỳnhjaja ohtõ rax o Juãw Paxis kõt mẽ pa xwỳnhjẽ jakrenh ã mẽ harẽnh ma. Nẽ Jejus kot mẽ hkrã kumrãr rax o Juãw Paxis jakrenh ã harẽnh ma. ² Nom Jejus na pre mẽ hkrã kumrãr kêt nẽ. Æm mẽ ixte hkõt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa. ³ Jakamã nhũm Jejus amnhĩ tã Parijew nhõ xwỳnhjẽ jarẽnh ma hãmri nẽ mẽ kẽp kato nẽ hpãnhã ma akupỳm Garirej wỳr mõi pa mẽ ma hkõt ixpa.

Mẽhõ ni kot amnhĩ nhĩpẽx nyw o amnhĩ nhĩpẽx ã harẽnh

Juãw 7.37-39; mããnẽn Apokarip 22.1, 22.17

⁴ Tã pa mõi mõi nẽ kormã pyka pẽ Samar mã axà nẽ hkõt ixpa. ⁵ Hãmri nẽ krĩ pẽ Sika hwỳr ixpõx o mõi. Amnepẽm finat Jako kot hkra Juje mã pyka nhõr xwỳnh tã krĩja xa pa mẽ ra hwỳr ixpõx o mõi. ⁶ Nẽ amnepẽm Jako kot gôm kakwỳnhhta wỳr pøj. Nhũm ra kaxkwa nhĩpõk ri myt nhỹr mẽ nhũm Jejus ra mrrar ryy kurẽ hkẽngrã nẽ. Hãmri nẽ gôm kakwỳnh mỳ ri tẽm nẽ hkõkõt o nhỹ. ⁷⁻⁸ Hãmri pa mõi kure nẽ mõi ixàpkur xà japrõr kaxyw ma krĩm ijapẽx.

Rõm nhũm Samar nhõ xwỳnh nija amnhĩm gõ runh mã tẽ nhũm Jejus omu nẽ kãm:

—Kwa inh mã anhõ gõta kwỳ pa ho ixkõ. Anẽ.

⁹ Nhũm amnhĩ jaer pẽ amnhĩ tã kuma. Ijaew na pre htem Samar nhõ xwỳnhjẽ kutã apkur rỳ mẽ hkõt ri pa rỳ mõi ho mjẽn kêt nẽ. Rỳ mõi kutã hkõm kêt nẽ. Tã nhũm Jejus ã gõ hã nija wỳr anẽ nhũm tee ri amnhĩ tã kuma nẽ kãm:

—Xẽ pẽr apẽ Ijaew tã axtem nẽ ri gõ hã ixwỳ. Xà ate ixpẽ Samar nhõ xwỳnh ã ixpumunh kêt? Hãn ka ri hã ixwỳ. Anẽ.

¹⁰ Hãmri nhũm kuma nẽ kãm amnhĩ jarẽ. No ãm amnhĩ tã kuxi nẽ kãm kapẽr nẽ kãm:

—Nà aprĩ hã ate ixpumunh ro nhỹx ka kam gõ hã ixwỳ pa amã hkwỳ. Inhõ gõ na axte mã. Tirtũm kãm amarĩ mõi amã õr prãm. Na htem ho ixkõ hãmri nẽ mex nẽ htĩr tũm nẽ pa ho pa. Anẽ.

¹¹ Hãmri nhũm tee ri kot ã õ gõ jarẽnh anhỹrja ã kuma nẽ htỳx ho gôm kakwỳnh

kamã gô hã hkamnhĩx nẽ tee ri hkukamã hamaxpêr nẽ kãm:

—Xê tanhmã kot ka kêt amnhĩ to nẽ inhmã gôta kwý janhi? Mo kaxyw anhõ gô janhir xà? Gôm kakwýnhta upým rax kênã kot ka kêt tanhmã amnhĩ to nẽ hkwy janhi. Nhỹhỹnh kot ka anhõ gô jarênh xwýnhta kwý janhi pa ho ixkõ hãmri nẽ ixtĩr tũm nẽ ixpa ho ixpa? ¹² Mẽ inhõ gôm kakwýnhja amnepê mã mẽ panhĩgêt finat Jako nhõ gôm kakwýnh na pre. Jako hkwyjaja na prem hkakwý nhũm kamã gô kato nhũm pre htem hanhi nẽ ho hkõm o pa. Nẽ hkra-jaja nẽ hkrit piitã ho hkõm o pa. Jakamã na pre mẽ ixpê hkanrêhã htãmnhwýjê mã hkaga. Tã xep axtem anhõ gô. Mẽ kot ho hkõm nẽ htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anẽ.

¹³ Hãmri nhũm Jejus kãm:

—Nà mẽ anhõ gôta na htem ho ixkõ nẽ arĩ kãm kôr o pa. ¹⁴ No ixte amã gô jarênh xwýnhta kot ka hkwy ho ixkõ hãmri nẽ axte amã kôr kêt kumrêx nẽ apa. Nhũm te akaxwýnh kãm hinore hprõt pyrãk o ka amnhĩ nhĩpêx. Hãmri nẽ te hinore kamã gôja aa grã hkêt pyrã nẽ aa ajapêx kêt kumrêx. Nhỹrmã atyk tã akupým atĩr nẽ atĩr tũm nẽ amex rãhã apa ho apa. Anẽ.

¹⁵ Nhũm nija kuma hãmri nẽ kãm:

—Xôwehe? Xê tô tokyx inhmã anhõ gôta kwý. Pa ho ixkõ nẽ axte inhmã kôr kêt nẽ ixpa. Nẽ axte amnẽ amnhĩm gô janhir mã inhmrrar kêt nẽ. Xê tokyx inhmã hkwy mẽ? Anẽ.

Tỳx gô kumrêx ã hkamnhĩx nẽ ã hã àhwýr anẽ. ¹⁶ Hãmri nhũm kãm:

—Tô ma akupým krĩm tẽ nẽ amjên japrô nẽ man akupýn ixwýr wa tẽ. Anẽ.

¹⁷ Hãmri nhũm tee ri kuma nẽ kãm:

—Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

—Tỳ. Nà ãm hãmri na ka ã amnhĩ jarênh anẽ. ¹⁸ Na ka pre ra amjên kêp 5. Nẽ my mẽ ri war apa xwýnh ata te kêp amjên pyrãk nom kêp amjên kumrêx kêt. Anẽ.

¹⁹ Hãmri nhũm amnhĩ jaêr pê kot ã kãm kapêr anhỹrja ma hãmri nẽ kãm:

—Xê pêr aprĩ hã ate ixpumunh par pyrãk. Mãn apê Tĩrtũm nhỹ hã kapêr jarênh

o mẽ pa xwýnhjê hõ mãn ka mẽ? ²⁰ Xê inhmã mẽmoj jarê. Nhỹhỹm kot paj wem axpên kôt mra nẽ Tĩrtũm mã mex o mex ã harê? Amnepê mã mẽ panhĩgêtjaja na prem hixêt mũj nhĩmõk ã api nẽ hã kãm amnhĩ jarê nẽ kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kôt mrrar nẽ ã amnhĩ nhĩpêx anhỹr ã mẽ inhmã karõ. Xà hixêt nhĩmõk ã mẽ ixte kãm amnhĩ jarênhja xà apê omnuj mẽ? Ma xà apê omnuj kêt? Anẽ.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarê pix kãm rý hixêt mũj nhĩmõk pix ã axpên wýr akuprõ nẽ Tĩrtũm mã amnhĩ jarênh kêt nẽ. ²² Mẽ apê Samar nhõ xwýnhjaja mẽ ate Tĩrtũm mã mex o mex ã harênh o apa htã aprĩ hã kot amnhĩ nhĩpêx ã omunh kêt. Nẽ tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nẽ tanhmã hamaxpêr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwýr xwýnh piitã nẽ mẽ kot amnhĩ tomnuj rênh pa. ²³ Tã koja mẽ piitã Mẽpahpãm Tĩrtũm mã mex o mex ã harênh kaxyw nhỹhỹm pa hkêt nẽ. Koja mẽ nhỹri pa xà kamã mẽ ôpinh xà kaxwýnh kãm ã kãm amnhĩ jarênh anhỹr o pa. Ja na Tĩrtũm kãm hprãm. No nhỹhỹm mrrar nẽ nhỹri kuhê xà pix kamã kãm amnhĩ jarênhja nhũm kãm hprãm kêt nẽ.

²⁴ —Nẽ Tĩrtũmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhỹri pa nẽ ôpinh xà kaxwýnh kãm amnhĩ kaxyw kãm hamaxpêr nẽ kãm mex o mex ã harê nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Anẽ.

²⁵ Nhũm pre ã Jejus nija mã kapêr anẽ nhũm kuma nẽ kãm:

—Ma koja xep nhỹrmã Tĩrtũm kot mẽ pakaxyw ãm mã xwýnh pê Krisja mẽ pahwýr wrý hãmri nẽ hprĩ hã mẽ pamã mẽmoj piitã ho amnhĩrit pu mẽ kuma. Anẽ.

²⁶ Hãmri nhũm kãm:

—Kwa nhũm paa. Ixte amã ixkapêr xwýnhja ixpê Kris na pa. Jakamã na pa ixprĩ hã amã ã ixkapêr anẽ. Anẽ.

²⁷ Nhũm pre ã kãm amnhĩ jarênh anhỹrja rôm pa mẽ ixte hkôt ri mẽ ixpa ho ixpa

xwýnhjaja ra ixujaprôr pa nê akupÿn hwÿr ixpôx o mra. Hâmri nê amnhĩ jaêr pê kot Samar nhô xwýnh nita mã kapêr ã omu nê tee ri hkukamã ijampêr nom tanhmã hã hkukjêr to hkêr nê. Nija kêp Samar nhô xwýnh tã nhũm àmnhĩx kãm kapêr o nhÿ. Pa mẽ omu nê ãm omu nê tanhmã hã kãm nê hkêr nê. ²⁸ Hâmri nhũm nita gôm kakwýnh mÿr ri ò poti re nê ma akupÿm krĩm tẽ nê hkwÿjê mã awjarê. ²⁹ Nê mẽ kãm:

—Xê mẽ tokyx ma ixkôt gôm kakwýnh wÿr mra nê mÿ ri mēhō my mÿj pumu. Tirtũm kot mẽ pahwÿr mẽnh mã xwýnhnta na. Aa kot nhÿri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nê ixpyrà nê kapêr ã ama. Anê.

³⁰ Hâmri nhũm mẽ kuma nê ma hkôt Jejus wÿr mrar kurê kumrêx.

³¹ Rôm pa mẽ ixte Jejus kôt ri ixpa ho ixpa xwýnhjaja tee ri mẽ ixàpkur xà ho Jejus ma nê kãm:

—E ota mẽ panhōta. Kwa mẽmoj py nê aku mãn.

³² Anhÿr tã nhũm mẽ inhma nê tanhmã mẽ inhma amnhĩ jarênh to. Nom amnhĩ tã kuxi nê amnhĩ jarê nê mẽ inhma:

—Nà kormã. Inhōja axtem na. Mẽ ate inhōja pumunh kêt. Anê.

³³ Hâmri pa mẽ kuma nê tee ri hã axpên kukja nê axpên mã:

—Kwa mãn ra mẽhō mẽ paxwakre kamã kãm mẽmoj to tẽ nhũm kukrê nà? Anê.

³⁴ Hâmri nhũm mẽ inhma nê mẽ inhma:

—Nà mẽhō kot kêt ri inhma mẽmoj to mra pa kuku? Kot paj kot mẽ awÿr inhmēnh xwýnhnta mã tanhmã amnhĩ nhĩpêx to hãmri nê te ra ixàpkur mex nê hã ixihtÿx mex pyræk o amnhĩ nhĩpêx. Tã kot paj ã kãm amnhĩ nhĩpêx anhÿr o ri ixpa rãhã ho ijapêx pa. Jao te ixàpkur rax pyræk.

³⁵ Anhÿr o mẽ inhma amnhĩ jarê. Hâmri nê ra Samar nhô xwýnhjaja mẽ ixwÿr mrar ã mẽ omu nê mẽ inhma tanhmã mẽ harênh to nom mẽ hã kuxi nê mẽ harê nê mẽ harênh o:

—Kot kaj mẽ axte mẽ atã mytwrÿ kêp 4 hãmri nhũm ra mẽ apur kãm mẽ anhōja hamÿnh mã tãm nê. Nom kormã. E ka mẽ pahwÿr mẽ mrar xwýnh nêj pumu. Ra mẽ kot amnhĩ kaxyw ixkôt hamaxpêr nê

ixkôt amnhĩ xunhwÿr mã tãm jakamã te mẽ apur kãm ra mẽ anhō jamÿnh mã tãm pyræk. Jakamã ka mẽ atō ma mẽ hwÿr mō nê mẽ kot amnhĩ kaxyw ixkôt hamaxpêr nê ixkôt amnhĩ xunhwÿr kaxyw mẽ kãm ijarê. Hâmri nê te ate ixpur kãm inhma inhō jamÿnh xwýnh pyræk o amnhĩ nhĩpêx.

³⁶—Jakamã koja mẽhō kumrêx mẽ hwÿr tẽ nê mẽ kãm Tirtũm kapêr jarê hãmri nê te kêp ò pahi mã hpur kãm ahkre ho pa pyræk. Nhũm mẽ kot mar xwýnhjaja kuma nom kormã hprĩ hã mar tÿx kêt nê. Tã kot kaj mẽ atō wamta kôt mẽ hwÿr tẽ nê mẽ kot ixkôt amnhĩ xunhwÿr kaxyw aprĩ hã mẽ kãm ijarênh o mẽ hkôt apa hãmri nê te apê mẽ anhō pahi mã hpur kãm axujamÿnh xwýnh pyræk. Hãmri nhũm mẽ hkwÿjaja mẽ ama nê ixkôt amnhĩ xunhwÿr nê ixkôt ri amnhĩ nhĩpêx o pa. Hã koja nhÿrmã mẽ apyrà nê Tirtũm mẽ wa ixri mex rãhã nê htĩr tũm nê pa ho pa. Ka mẽ amnhĩ tã mẽ omu nê akĩnh nê apa. Te mẽ kot mẽ hpur kãm ahkre xwýnhjaja nê mẽ kot hamÿnh xwýnhjaja mẽõ rũnh pumunh nê hkĩnhnta pyræk.

³⁷—Na htem tōhã ã mẽ pur kãm mẽ àpênh xwýnhjê jarênh anê nê mẽ harênh o: “Axtem mẽ ahkre xwýnhjaja nê axtem mẽ kot hamÿnh xwýnhjaja.” Anê. Tã te mẽ ate mẽ ujarênh ja pyræk. ³⁸ Na pa pre ra ma mẽ hwÿr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar nê amnhĩ kaxyw ixkôt hamaxpêr nê ixkôt amnhĩ xunhwÿr kaxyw. Nom mẽ kajaja na ka prem akumrêx mẽ hwÿr amrar nê mẽ kãm ijarênh kêt nê. Tirtũm kapêr jarênh o mẽ pa xwýnhjaja na prem kumrêx mẽ hwÿr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwÿr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamÿnh xwýnh kot amnhĩ nhĩpêxta pyræk. Anê.

Mê hkwÿ kot amnhĩ nhĩpêx ryw o amnhĩ nhĩpêx ã mẽ harênh

Sikũn Korĩt 5.17; Wam Juāw 4.14

³⁹ Rôm nhũm Samar nhô xwýnh kwÿjaja nija kot mẽ kãm amnhĩ jarênh ma hãmri nê uræk nê amnhĩ kaxyw Jejus kôt hamaxpêr.

Na pre ra amnhĩ tã tanhmã mẽ kãm Jejus jarẽnh to nẽ mẽ kãm harẽnh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nẽ uràk nẽ amnhĩ kaxyw hkôt hamaxpêr kurê kumrêx.

⁴⁰ Hãmri nẽ man mẽ ixwỳr mra nẽ Jejus pumu nẽ amnhĩ wỳr kuwỳ nẽ kãm:

—Pa. E kwa mẽ tokyx anojarêt kêt nẽ. Mẽ ma mẽ ixkôt mẽ inhõ krĩ hwỳr mō nẽ mẽ ixkôt ri apa grire nẽ arĩ ma mō. Anẽ.

Hãmri nhũm mẽ kuma nẽ mẽ kãm:

—Tõe. Nà kot paj mẽ anẽ. Anẽ.

Hãmri pa mẽ ma mẽ hkôt mō nẽ mẽ õ krĩ kamã mẽ hkôt ri ixpa hã apkati axkrut.

⁴¹ Nhũm Jejus mẽ kãm Tĩrtũm kapêr jarẽnh o ri mẽ hkôt pa nhũm mẽ axte ohtõ nẽ kuma nẽ nita pyrã nẽ hkôt amnhĩ xunhwỳ.

⁴² Hãmri nẽ nita wỳr mra nẽ kãm:

—E nã ãm hãmri. Akumrêx na ka mẽ inhmã Jejus o amnhĩrit. Pa mẽ akôt ma hwỳr mra nẽ mẽ pam omu nẽ kapêr ã kuma. Jao apyrã nẽ amnhĩ kaxyw hkôt ijamaxpêr nẽ hkôt amnhĩ xunhwỳ. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwỳnhhta na. Anẽ.

Garirej nhõ xwỳnhjaja kot Jejus pumunh ã mẽ harẽnh

Matêwre 13.57

⁴³ Tã pa mẽ Jejus kôt Samar rũm ixkato nẽ ma pika pê Garirej wỳr mō. Kamã Jejus nhõ krĩ pê Najare htã pa mẽ hwỳr inhmõr kêt nẽ. ⁴⁴ Na pre ra Jejus mẽ inhmã tanhmã õ krĩ nhõ xwỳnhjê jarẽnh to nẽ mẽ harẽnh o:

—Tĩrtũm nhỹ hã kapêr jarẽnh o mẽ pa xwỳnhjaja na htem amnhĩ nhõ krĩ kamã mẽ kãm Tĩrtũm kapêr jarẽnh o pa nhũm mẽ kuma nẽ ãm kuma. Jakamã kot paj Najare hwỳr inhmõr kêt nẽ. Mẽ kãm ixkapêr mar prãmre hã.

⁴⁵ Anhỹr jakamã na pa prem hwỳr inhmõr kêt nẽ. Pãnhã nhãm krĩ hõ hwỳr mō nẽ hwỳr pøj hãmri nhũm mẽ amnhĩ wỳr Jejus pumu nẽ hkĩnh nẽ. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wỳr omu nẽ hkĩnh nẽ.

Jejus kot mẽhõ hkra ho mex ã harẽnh

⁴⁶ Tã pa mẽ kormã Garirej kamã ixpa nẽ akupỹm krĩ pê Kanã hwỳr mō. Kamã na pre Jejus mẽ kãm gô ho wĩhti nhĩpêx. Jakamã pa mẽ akupỹm mẽ hwỳr mō. Nhũm mẽõ pahi nhõ kôwenatôjê hõ hkra myja kêp à htỳx nẽ nõ. Nom Kanã kamã hkêt axtem krĩ hõ pê Kapanaũ kamã. ⁴⁷ Jakamã nhũm hipêêxaja tee ri hkra pumu hãmri nẽ ra Jejus kot Jutej rũm Kanã hwỳr hpôx ã harẽnh ma nẽ hkra kaxyw kãm hamaxpêr nẽ ma hwỳr mõr kurê kumrêx. Hãmri nẽ nhỹri omu nẽ hwỳr tẽ nẽ kãm kapêr kãm hihtỳx nẽ kãm:

—Pa. E ot pa awỳr tẽ. Na ra ixkra ixpê htyk kaxyw. Kwa ixkamã axukapri nẽ ma ixkôt mō nẽ akupỹm inhmã ho mex. Anẽ.

⁴⁸ Hãmri nhũm kuma nẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwỳ ho anhỹr ã ixpumunh kôt pix mã na ka htem amnhĩ kaxyw ixkôt ajamaxpêr. Nom amarĩ amnhĩ kaxyw ixkôt ajamaxpêr kêt nẽ. Anẽ.

⁴⁹ Hãmri nhũm tee ri kuma nẽ kãm:

—Kwa tokyx. Kot kaj tokyx ixkôt amõr kêt koja ixpê ty. Anẽ.

⁵⁰ Hãmri nhũm kãm:

—Nà koja apê htyk kêt nẽ. Ra ixte akupỹm amã ho mex kênã. Mãmri ma akupỹm mō nẽ tokyx omu. Na ra akupỹm amã mex. Anẽ.

Hãmri nhũm kuma nẽ kaxyw hkôt hamaxpêr kurê kumrêx nẽ ma akupỹm hwỳr mō. Nẽ mõr o apkati. ⁵¹ Nẽ kormã õ krĩ hwỳr hpôx o mõr ri nhũm ra kãm mẽ ãpênh xwỳnhjaja kutã mra nẽ nhỹri pry hã hkaxpa nẽ kãm:

—Pa. Kwa na ra akra hkà hakry nẽ akupỹm amã mex. Anẽ.

⁵² Hãmri nhũm mẽ kuma nẽ hkĩnh tỳx nẽ. Nẽ mẽ kãm:

—Kwa xô wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jãã na pre kaxkwa nhĩpôk ri myt nhỹ nhũm hkà hakry nẽ akupỹm amã mex kurê kumrêx. Anẽ.

⁵³ Hãmri nhũm mẽ kuma nẽ mẽ kãm:

—Hêxta waa nẽ. Kwa pêr ãm hãmri Jejus kot inhmã akupỹm mex ã harẽnh xà hã ore kamã na pre akupỹm inhmã mex. Nã ãm hãmri. Anẽ.

Hāmri nē amnhī kaxyw Jejus kôt hamaxpēr kurê kumrêx. Nhūm ōrkwỹ kamā ri mē pa xwỹnhjaja urāk nē amnhī kaxyw hkôt hamaxpēr.

⁵⁴Nhūm Jejus ā kām hkra ho mex anē. Na pre ra pika pē Garirej kamā mē kot mēmoj pumunh kêt ō ho anhỹr o tipxi nē mē kām gô pix o wĩhti nhĩpêx. Tā ra pyka pē Jutej rūm akupỹm mē hwỹr mō nē ā akupỹm mē hkrata o mex anē.

5

Jejus kot himô my ri akupỹm mēhō ho mex ā harēnh

Juāw 7.23, 10.30-33

¹Tā mē ixpê Ijaew mē ixte Tirtūm ā ixkĩnh kaxyw Jerujarē hwỹr akuprō nhūm Jejus haxwỹja ma hwỹr mō. Pa mē hkôt mē ixpa ho mē ixpa xwỹnhjaja ma hkôt mō. ²Jerujarē kamā na himôja hikwỹ. Nhỹhỹnh mē kot krī hwỹr ōwēhti ho gjêx xā htā hikwỹ. Himôja nhĩxi pē na Petes. Nē pu hā mē à xwỹnhjê nhĩkwỹ xā hā ixkre kēp 5. ³Piitā kamā na pre hte tanhmā mē à kute xwỹnhjaja hikwỹ. Mē nohkre xwỹnhjaja nē mē hyk o mē pa xwỹnhjaja nē mē ĩ kamā mē htyk xwỹnhjaja. Ām ahpỹnhā tanhmā mē à kute xwỹnhjaja ixkre hkwyja kamā akupỹm mex prām xàj hikwỹ. ⁴Na pre hte Tirtūm kapēr o mē wrỹk xwỹnhja tōhā himô hwỹr wrỹ nē gô xok. Hāmri nhūm mē à xwỹnhjê hō kot amnhī to wa nē kumrêx hwỹr wrỹk nē kamā mrōr xwỹnhja akupỹm mex. Kwỹjê rom akupỹm mex kurê kumrêx. Jakamā nhūm pre hte mē à xwỹnhjaja akupỹm mex prām xàj gô xok jamār o hikwỹ. ⁵Jakamā nhūm mēhō myja ixkre hō kamā hikwỹ. Te omnuy nē arĩ hikwỹ hā amgrà xohtô rax nē. Ra hā amgrà kēp 38. ⁶Jakamā nhūm Jejus mē hwỹr tē nē omu. Nē hprĩ hā omu nē hamaxpēr o:

—Kwa mũj na hte omnuy nē ri pa hkêt ā amgrà xohtô rax nē. E pa akupỹm ho mex.

Anhỹr o hamaxpēr hāmri nē kām:

—Pa. E kwa inhmā amnhī jarē. Xà amā akupỹm amex prām? Anē.

⁷Hāmri nhūm kuma nē kām:

—Ku nhūm. Inhmā tokyx akupỹm inhmex prām tỳx kumrêx kēnā. No mēhō kot tokyx inhmỹ nē mē kēp ixto wa nē

ixkumrêx gô xok kamā inhmrōr? Na pa tee ri ixkumrêx hwỹr ixtēm nē inhmā inhmrōr prām nhūm mē xatā ixpê amnhī to wa nē mra nē kamā mrō. Anē.

⁸Hāmri nhūm Jejus kām:

—Tỳ? Tōe. E na ka akupỹm amex. E kànhmā xa nē akupĩp py nē ma akupỹm anhōrkwỹ hwỹr tē. Anē.

⁹Hāmri nhūm kuma nē ra akupỹm mex nē kànhmā xa nē ri mra. Nē hkĩnh tỳx nē hikupĩp py nē ma akupỹm ōrkwỹ hwỹr tē. Ijaew nhō arĩgromnu pē sap ā nhūm Jejus kot akupỹm ho mex ¹⁰nhūm ma akupỹm pry hā hikupĩp py nē o tē. Nhūm Ijaew nhō pahi hkwyja nhỹhỹnh mra nē tee ri kot sap ā hpyr nē o htēm ā omu nē kām:

—Tk. Kwa mē pahpê Ijaew na pu htem mē panhō arĩgromnu hā paxapēnh kêt nē. Finat Mojes kot ja nē mē pahkurê htā ka axtem nē akupĩpta py nē nhỹhỹm o tē. Anē.

¹¹Hāmri nhūm mē kuma nē mē kām:

—Tỳ. Kot anhỹr tā kot ixto mex xwỹnhhta na ā inhmā kapēr anē pa mar xā hkôt kupy nē akupỹm inhōrkwỹ hwỹr tē. Anē.

¹²Hāmri nhūm mē tee ri kuma nē kām:

—Kwa mēhō na we ā ri amā karō anē? Anē.

¹³Nhūm kormā kot Jejus nhĩxi mar kêt jakamā kot mē kām ahkre kaxyw hakêx nē tee ri hkwyjê kaêx ā hapêr rīt o xa. Nom nhūm mē ohtô nē pry hā mrar jakamā nhūm tee ri hapêr nhūm Jejus ra ma nhỹhỹm tē.

¹⁴Tā nhūm hā ahtũmre nhūm Jejus Tirtūm mā amnhī jarēnh xā hā ixkre hwỹr tē nē axà nē kot ho mex xwỹnhhta pumu nē kām:

—Pa. E na ka ra akupỹm amex. Nom kwa kêr ka axte tanhmā amnhī tomnuy to ho ri apa hkêt nē. Kot kaj axte ā amnhī nhĩpêx anē hāmri nē apunuj tỳx o wam ate apunujta jakre kām ga. Anē.

¹⁵Hāmri nhūm kuma nē ma tē nē kato. Nē ma mē ō pahijê hwỹr tē nē mē kām:

—E na pa ra kot ixto mex xwỹnhhta nhĩxi ma. Xep kēp Jejus. Anē.

¹⁶Hāmri nhūm mē hixi ma nē hā tanhmā axpēn mā ho kapēr punuj to. Mē ō arĩgromnu hā kot mē ho mex o pa jakamā nhūm mē axpēn jakwa kamā ri hixi ho rē nē nhỹri omu nē tanhmā hā kām àkjêr to.

17 Hāmri nhūm amnhĩ tã mẽ kuma nẽ mẽ kãm:

—Ku nhūm. Inhĩpêêxà Tĩrtūm na hte apkati mẽ tanhmã mẽ pahto mex to ho pa. Jakamã pa hte uràk nẽ ã mẽ ho mex rãhã ho ri ixpa anẽ nẽ aa mẽmo arĩgro hã ja ho anhỹr kaga hkêt nẽ.

18 Anhỹr o mẽ kãm amnhĩ jarẽ nhūm mẽ kuma nẽ kamã gryk tỳx nẽ. Nom mẽ õ arĩgromnu hã kot mẽ ho mexja pix mỳrapê kamã gryk kêt. Mãânẽn Tĩrtūm kêp hipêêxà hã harẽnhja mỳrapê nhūm prem kamã gryk tỳx kumrêx nẽ axpẽn mã:

—Tk. Kwa na ã amnhĩ jarẽnh anhỹr jao te kêp Tĩrtūm pyràk ã amnhĩ jarẽ. E kwa pu mẽ kupĩ ri. Anẽ.

Tĩrtūm Kra kot Hipêêxà nhỹ hã amnhĩ nhĩpêx ã harẽnh

Juāw 14.10-13

19 Hāmri nhūm Jejus axte mẽ kêp Ijaew nhõ pahijê mã kapêr nẽ mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nẽ. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nẽ mẽ ho mex o ri ixpa. Kwa mẽ amnhĩ krã him ja jaxà nẽ kãm ajamxpêr tỳx nẽ ho apa.

20 —Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrĩt. Ixte omunh nẽ uràk nẽ ÿ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nẽ. Kot paj mãânẽn mẽ kãm mẽmoj mex o ja jakrenh o anhỹr o ri ixpa ka mẽ hã ixpumu nẽ ixkamã ano puma ho apa.

21 —Nẽ Inhĩpêêxà kot akupỹm mẽ htyk xwỳnhjê ho htĩr jakamã kot paj uràk nẽ akupỹm mẽ htyk xwỳnhjê ho htĩr o ri ixpa. Anẽ.

Mẽ htĩr tũm nẽ mẽ pa mã xwỳnhjê jarẽnh

Juāw 3.16-17, 3.36, 6.27, 6.40, 6.60, 10.28, 17.2-3; Rõmãn 6.23; Karatas 6.8; Xitre 1.2; Wam Juāw 2.25, 5.11-13

22 Nhūm Jejus arĩ mẽ kêp Ijaew nhõ pahijê mã kapêr nẽ mẽ kãm:

—Koja nhỹrmã Inhĩpêêxàja mẽ htĩr tũm nẽ mẽ pa ho mẽ pa mã xwỳnhjê jarẽnh kêt nẽ. Ja kaxyw na pre pa ixãm. 23 Tã mẽ piitã mẽ kot ja hã ixpumunh nẽ ixtã hpijaàm o ri

pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrà nẽ pa ixtã hpijaàm o pa kaxyw. Jakamã koja mẽhõ ixtã hpijaàm kêt nẽ hāmri nẽ mãânẽn Inhĩpêêxà hã hpijaàm kêt ã amnhĩ to amnhĩrĩt. Tãm kot mẽ awỳr inhmẽn h kênã. 24 Jakamã koja mẽhõ ixkapêr ma nẽ amnhĩ kaxyw kot mẽ awỳr inhmẽn h xwỳnhhta kôt hamaxpêr nẽ ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htũm xàta wỳr mõi kêt nẽ. Kojã Inhĩpêêxà akupỹm ho htĩr nhūm wa ixri htĩr tũm nẽ mex kumrêx nẽ pa ho pa. Jakamã koja mẽhõ ixkôt amnhĩ xãm hāmri nẽ ra kêp wa ixri htĩr tũm nẽ pa ho pa mã xwỳnh. Kwa mẽ jam ajamxpêr tỳx rãhã ho apa.

25 —No mẽ kãm ixkapêr mar prãm kêt xwỳnhjaja kêp Inhĩpêêxà mẽ wa ixri mẽ htĩr tũm nẽ mẽ pa mã xwỳnh kêt. Tã ixpê Tĩrtūm Kra jakamã koja mẽ ixkapêr ma nẽ ixkôt amnhĩ xunhwỳ. Hã kot paj amnhĩ tã mẽ omu nẽ mẽ htĩr tũm nẽ mẽ pa mã xwỳnh ã mẽ harẽ nhūm mẽ àmnhĩx ri hkĩnh nẽ pa ho pa. Kwa mẽ jam ajamxpêr tỳx rãhã ho apa.

26 —Nẽ Inhĩpêêxà tãm kêp mẽ ho mẽ htĩr xwỳnh. Tã ixpê Kra jakamã na pre amnhĩ pyrà nẽ ja kaxyw ixãm.

27 —Ra kot mẽ akaxyw ixãm jakamã na pre mãânẽn ixte tanhmã mẽ ajarẽnh to kaxyw ixãm. Wa ixri mẽ atĩr tũm nẽ apa ho apa mã xwỳnhjê hã mẽ ajarẽnh rỳ wa ixri mẽ atĩr tũm nẽ apa hkêt mã xwỳnhjê hã mẽ ajarẽnh kaxyw. 28-30 Jakamã kot paj nhỹrmã ra mẽ htyk nẽ mẽ hikwỳ xwỳnh piitã mẽ kãm ixkapêr nhūm mẽ inhma. Kojã mẽ ixkapêr ma hāmri nẽ akupỹm htĩr nẽ pika rũm hapõx pa. Hāmri nhūm mẽ kot kormã htĩr ri Tĩrtūm kapêr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhūm mẽ kot amnhĩ to mex xwỳnhjaja. Ra mẽ kot Tĩrtūm kôt amnhĩ nhĩpêx jakamã koja mẽ ma Tĩrtūm mẽ wa ixwỳr api nẽ wa ixri mex nẽ hkĩnh rãhã htĩr tũm nẽ pa ho pa.

—Kot paj ja kaxyw tanhmã mẽ apiitã mẽ ajarẽnh to. Nom kot paj amnhĩ krã hkôt inhmã hprãm xà hkôt tanhmã mẽ ajarẽnh to hkêt nẽ. Kot paj Inhĩpêêxà kot mẽ awỳr

inhmēnh xwỳnhhta nhỹ hã àhpumunh tỳx xà hkôt tanhmã mẽ ajarēnh to. Jao ãm hãmri mẽ ajarē. Kwa mẽ jam ajamaxpēr tỳx nē. No ã ixte mẽ amã amnhĩ jarēnh anhỹrja ma nē tee ri ajamaxpēr kêt nē. Anē.

Mẽ kot Jejus kệp Tirtũm Kra hã harēnh xwỳnhjê jarēnh

Juāw 8.18; Wam Juāw 5.6-8

³¹ Nhũm Jejus arĩ mẽ kệp Ijaew nhõ pahijê mã kapēr nē mẽ kãm:

—E na pa ra tanhmã mẽ amã amnhĩ jarēnh to. Nom kop ãm papxipix ixte ã amnhĩ jarēnh anhỹr ronhỹx ka mẽ inhma nē ajamaxpēr o: “Ko. Na apu ãm hãmri ã mẽ inhmã amnhĩ jarēnh anē rỳ apu ãm amnhĩ to hêx.” Anhỹr o ajamaxpēr. ³² Nom papxipix na pa hte ã amnhĩ jarēnh anhỹr kêt nē. Inhĩpêêxà haxwỳja na hte ã ijarēnh anē. Nē ãm hãmri na hte tanhmã ijarēnh to ho pa. Tirtũmja hêx kêt. ³³ No mẽ amã pika nhõ xwỳnhjê pix kapēr mar prãm jakamã na ka prem finat Juāw Paxisja wỳr akwỳjê rē nhũm mẽ ma hwỳr mra nē ixtã hkukja nhũm mẽ kãm tanhmã ijarēnh to. Nē hprĩ hã mẽ kãm ijarē. ³⁴ No mẽ apê pika nhõ xwỳnhjaja mẽ ate axpēn mã tanhmã ijarēnh toja na ixpê tanhmã kute hkêt. Koja mēhõ tanhmã ixto kapēr punuj to rỳ tanhmã ijarēnh mex to pa amnhĩ jarēnh ma nē tee ri amnhĩ kukamã ijamaxpēr o ixkaprĩ hkêt nē. Tã nom Juāw Paxis kapērja mẽ amã mex jakamã na pa ã mẽ amã harēnh anē. Ka mẽ ra kot tanhmã ijarēnh toja ma nē amnhĩ kaxyw ixkôt ajamaxpēr nē ixkôt amnhĩ xunhwỳ nē nhỹrmã ty nē ma mẽ kot amnhĩ xà htỳx kamã hamak tũm xàta wỳr apa hkêt nē.

³⁵ —Juāw Paxis na pre te kanê hpòk mex nē mẽmoj to amnhĩrĩt mex pyrà nē mẽ amã Tirtũm kapēr o amnhĩrĩt mex o pa. Ka prem te maripòtre kot kanê hã htu pyrà nē hwỳr akuprõ nē mar o akuhê. Nom hkôt ajamaxpēr tỳx kêt nē. ³⁶ Na pre hprĩ hã mẽ amã ijarēnh o ri pa.

—Tã pa pam mẽ awỳr wrỳ nē Inhĩpêêxà nhỹ hã mẽ akamã aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hã ixpumunh nē Inhĩpêêxà tãm kot mẽ awỳr inhmēnh kôt ixpumunh kaxyw.

³⁷ —Nē Inhĩpêêxàja mãânēn ixpê Kra hã mẽ amã ixto amnhĩrĩt. Ra mẽ anhõpinh xà kaxwỳnh kãm kot mẽ amã ixto amnhĩrĩt tã ka mẽ ama nē ãm ama nē ixkôt ajamaxpēr kêt nē. ³⁸ Mẽ amã mẽ ate hkôt amnhĩ nhĩpêx o apa hprãm kêt. Mẽ ate kapēr mar tỳx ronhỹx ka mẽ ixkapēr ma nē amnhĩ kaxyw ixkôt ajamaxpēr kurê kumrêx. Ixpê Tirtũm kot mẽ awỳr inhmēnh xwỳnh kênã.

³⁹ —Nē Tirtũm kapēr ã kagà htũm haxwỳja kot tanhmã ijarēnh to. Ka htem wa ixri atĩr tũm nē apa ho apa hprãm xàj kamã harēnh rãhã ho ri apa. Nē kot tanhmã pa ijarēnh to htã ka mẽ ixkapēr ma nē amnhĩ kaxyw ixkôt ajamaxpēr kêt nē. Anē.

Ijaew nhõ pahijaja kot Jejus kaga hã mẽ harēnh

⁴⁰ Nhũm Jejus arĩ mẽ kệp Ijaew nhõ pahijê mã kapēr nē mẽ kãm:

—Nē pa na ixte Inhĩpêêxà mẽ wa ixri ixte mẽ ho mẽ htĩr tũm nē mẽ pa mã xwỳnh ã mẽ harēnh tã ka mẽ amnhĩ kaxyw ixkôt ajamaxpēr kêt nē. ⁴¹ Nom mẽ ate inhmex ã ijarēnh kêt tã ja ixpê tanhmã kute hkêt. ãm Inhĩpêêxà pix kot inhmex ã ijarēnhja na inhmã hprãm. ⁴² Ra ixte mẽ apumunh mex. Mẽ amã Tirtũm kĩnh kêt. ⁴³ Tãm kot mẽ awỳr inhmēnh tã ka mẽ ixpumu nē ixkaga nē ixkôt amnhĩ nhĩpêx kêt nē. Nom koja mēhõ amnhĩ krã hkôt mẽ awỳr tē nē tanhmã mẽ ajahkre hto ka mẽ ama nē hkôt amnhĩ nhĩpêx kurê kumrêx.

⁴⁴ —ãm pika nhõ xwỳnh pixjaja kot mẽ amex ã mẽ ajarēnhja na mẽ amã hprãm. No Tirtũm kot amnhĩm mẽ amex ã mẽ ajarēnhja mẽ amã hprãm ã mẽ ate amnhĩ jarēnh tã mẽ amã ja prãm kêt. Jakamã na ka htem ixkaga kumrêx. ⁴⁵⁻⁴⁶ Tã nom kot paj pam nhỹrmã Tirtũm mã mẽ apê ixkwỳ hkêt ã mẽ ajarēnh kêt nē. Mo kaxyw kot pa kêt ri ã kãm mẽ ajarēnh anē? Finat Mojes tãm koja ja hã kãm mẽ ajarē. Na ka htem tanhmã ajamaxpēr to nē ajamaxpēr o: “Kot paj finat Mojes kot mẽ inhmã tanhmã kapēr to hkôt amnhĩ nhĩpêx o ri ixpa hãmri nē nhỹrmã Tirtũm ri ixtĩr tũm nē inhmex nē ixpa ho ixpa.” Anhỹr o ajamaxpēr nom hkôt amnhĩ nhĩpêx kêt nē. Mojes na pre hte pa ijarēnh o pa. Tã

mē ate kapēr kôt amnhĩ nhĩpêx ronhỹx ka mē amnhĩ kaxyw ixkôt ajamaxpēr nē ixkôt amnhĩ xunhwỳ. No mē ate ixkaga jakamã koja Mojes tām Tĩrtũm mã mē apê ixkwỳ hkêt ã mē ajarē. ⁴⁷ Mē ate Mojes kapēr kôt amnhĩ nhĩpêx kêt jakamã kot kaj mē mããnēn ixkôt amnhĩ nhĩpêx hkêt nē. Anē.

Nhũm pre ã Jejus Ijaew nhõ pahijê mã kapēr anē.

6

Jejus kot mē ho 5.000 nē mē kãm mē õ hã harēnh

Matêwre 14.13-21; Makre 6.30-44; Rukre 9.10-17

¹⁻⁴ Tã nhũm ra arĩgro pē Pas ahtêp o mō. Pasja ã mē ixpê Ijaewjaja na pa htem axpēn wỳr akuprõ nē hã õwēhti hkra nyw kwỳ pa nē ã hkur o ixkrĩ. Amnepêp Tĩrtũm kot pika pē Ejit rũm mē inhĩgêjtjê kator kaxyw nhũm prem nojarêt nē ã hkwy hpar nē ã hkur anē. Tã arĩ mē ixpê mē hkanrêhã mē htãmnhwỳjaja jam ijamaxpēr pē ixkĩnh kaxyw ã amnhĩ nhĩpêx anē. Jakamã nhũm Jejus pàr krem axà nē ma himõ pē Garirej ã rêr kaxyw ma xarmã mō nē rē. Himõja nhĩxi hõ pē na Tipe nhũm hã xarmã mō nē rē. Pa mē hkôt ixpa ho ixpa xwỳnhjaja ma hkôt ixpa.

Hãmri nhũm pika nhõ xwỳnh kwỳjaja Jejus ma mōr kãm omu hãmri nē ma gõ kape hã pikap mē inhĩhkrep mra. Na pre ra Jejus mē kamã mē à xwỳnhjê ohtõ nē akupỹm mē ho mex nhũm mē axte omu hãmri nē ma mē inhĩhkrep gõ mỳ ri hpar o pa.

Tã pa mē xarmã rē nē pàr rũm ijapõj nē gõ mỳ ri kỳxpê ixkrĩ hpa.

⁵ Hãmri nhũm mē inhĩhkrep mē mrap xwỳnhjaja mē ixwỳr hpõx o mra nhũm Jejus amnhĩ wỳr mē omu nē mē inhĩõ pē Firipti mã kapēr nē kãm:

—Kwa Firip. Mějmoj kot puj mē pahwỳr mē mōr nējje mã ho anē nhũm mē kuku? Tanhmã kot puj mē amnhĩ to nē nhỹri mē kãm mějmoj japrõ nhũm mē kuku? Anē.

⁶ Ra tãm kot tanhmã mē kãm õ hto hã amnhĩ pumunh mex tã ã mē hã Firipti kamã hamak kaxyw mē hã hkukjêr anē.

⁷ Hãmri nhũm kuma nē tee ri mē hkukamã hamaxpēr nē kãm:

—Konēn. Mē ohtõ rax kumrêx kênã. Mo mē kaxyw mē pakàxpore rax? Kot pu mē pakàxpore ho 200 nē ho mē kãm mějmoj japrõr tã nhũm mē ãm ho hkryre nē kuku nē ho õhy htu hkêt nē. Mē ohtõ rax o mē ohtõ rax kênã. Anē.

⁸⁻⁹ Hãmri nhũm mē inhĩõja kuma nē Jejus wỳr tē nē kãm kapēr. Simãw Pêtre htõ Andreja hwỳr tē nē kãm:

—E ota mēhõ hkrata amnhĩ kôt õ hkwy ho mō. No ãm grire. Na pãwti kêp 5 nē kaxyw õ tep axkrutre. No mē ohtõ gri ã kot kêt mē hipêx pa. Anē.

¹⁰ Hãmri nhũm kuma nē hkôt mē ixpa ho mē ixpa xwỳnhjê mã kapēr nē mē inhãmã:

—Tõe. Nà hãmri. E mē kãm anē kē mē hkrĩ pa. Anē.

Hãmri pa mē kãm anē nhũm mē põ kamã hkrĩ hpa. Na prem ohtõ kumrêx. Mějmyjê pixjaja kêp 5.000. Nē kaxyw mē hprõ nē mē hkrajaja. Na prem ohtõ ho ohtõ. Tã piitã hkrĩ pa. ¹¹⁻¹² Hãmri nhũm Jejus mēhõ hkrata pē õ pãwti jamỳ nē o xa nē Tĩrtũm mã harē nē kãm:

—Pa Papaj. Na ka hte mē inhãmã mē inhõ ho apa. ãm kapxipix amex o amex. Anē.

Hãmri nē mē inhãmã pãwtija gõ pa mē õ ri mē hkrĩ xwỳnhjê mã õr o mra nē ho mē piitã mē hipêx pa. Pãwtija ãm hkryre htã nhũm Jejus tanhmã ho nhũm ra ohtõ rax kumrêx. Jakamã pa mē õ ri mē kãm õr o mra nē ho mē piitã mē hipêx pa. Nhũm Jejus hpãnhã tep axkrutreta py nē mã ho anē nē Tĩrtũm mã harē hãmri nē amnhĩ xõ ri mē inhãmã kugõ pa mē mã ho anē nē. Te ho pãwti nhĩpêx pyrã nē ho mē piitã mē hipêx. Hãmri pa mē ixpiitã apku nē inhõhy htu nhũm arĩ mēõ jakrêx kwỳ hprã. Hãmri nhũm Jejus mē inhãmã:

—E kwa mē hkôt mra nē mēõ jakrêx o akuprõ kē omnu hkêt nē. Anē.

¹³ Hãmri pa mē kuma nē ho akuprõ nē kawà o 12 nē ho nýt. Pãwti hkryreja ãm kêp 5 pix tã nhũm Jejus tanhmã ho nhũm rũnh kumrêx. Jakamã pa mē hakrêx prãr o kawà ho 12 nē ho nýt pa. ¹⁴ Hãmri nhũm mē inhĩhkrep mē mōr xwỳnhjaja amnhĩ jaêr pē Jejus kot mē kãm mēõ ho rax ã omu nē ri axpēn mã harēnh o:

—Kokỹỹ. Tãm mãn pre finat Mojesja amnepêp mē panhĩgêjtjê mã harēnh o ri pa.

Tā ra mẽ pahwỳr wrỳ nà? ¹⁵ Kwa pu mẽ kām pakapêr kām paxihtỳx nẽ ma akupỳm amnhĩ kôt o mō nẽ amnhĩ kaxyw ãm kẽ mẽ pahto amnhĩptàr o pa. Anẽ.

Hāmri nhũm Jejus amnhĩ tã mẽ kapêr ma nhũm ja kêp omnuj nẽ. Jakamã nhũm mẽ kêp kato nẽ ma hpãnhã ahte nhỹri hixêt õ hwỳr tẽ.

*Jejus kot gô krãhkà hã htẽm ã harẽnh
Matêwre 14.22-27; Makre 6.45-52*

¹⁶ Tã nhũm ra kamàtre pa mẽ Jejus kôt ri ixpa ho ixpa xwỳnhjaja ma akupỳm himô hwỳr mra. ¹⁷ Nhũm kormã Jejus mẽ ixwỳr akupỳn htẽm kêt jakamã pa mẽ tee ri kamã ama hāmri nẽ akupỳm pàr mã axà nẽ ma akupỳm Kapanaũ hwỳr xarmã ixrêr o mō.

¹⁸ Pu nhũm ra kôk àpêr tỳx nhũm gô xatã kànhmã harĩ nẽ axpẽn wỳr mra nẽ axpẽn tak tỳx nẽ. ¹⁹ Pa mẽ kormã gô nhĩpôk ri mō. Nẽ tee ri rrẽmti ho gô rẽn nhĩpêx kaprỳ nom kormã ixrêr kêt nẽ. Nẽ kormã inhmôr o ixtã 5 kirôm pix nẽ. Hāmri nhũm ra Jejus gô krãhkà hã hpar o mẽ ixkôt tẽ. Pa mẽ ixprĩ hã amnhĩ wỳr omunh mex kêt nẽ ixtỳx mẽkarõ hã hkamnhĩx nẽ mẽ inhmã uma htỳx kumrêx. ²⁰ Tã nhũm mẽ inhmã ixkapêr nẽ mẽ inhmã:

—Tk. Kwa mẽ amã ma hkêt nẽ. Pa na pa mẽ akôt tẽ. Anẽ.

²¹ Hāmri pa mẽ kapêr ma nẽ ixkĩnh nẽ. Nẽ amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nẽ pàr kre rũm ijapôx pa.

Mẽ kot Jejus japêr mrar ã mẽ harẽnh

²² Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwỳnhjaja tee ri hapêr o pa nẽ axpẽn mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỳm xarmã mō nom nhũm Jejusja mẽ hkôt htẽm kêt nẽ. Nà mãn kormã jar nhỹhỹm ri mrar jakamã pu mẽ kormã omunh kêt nẽ. Anẽ.

²³ Rôm nhũm Tipe rũm pàr kwỳja mẽ hwỳr pøj. Jejus kot mẽ apkur xà ho Tĩrtũm wỳr nẽ mẽ kãm ho rax xà hã pikata wỳr nhũm mōn pøj. ²⁴ Hāmri nhũm mẽ amnhĩ wỳr omu nẽ tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hāmri nẽ axpẽn mã:

—E kwa pu mẽ ma mẽ hkôt xarmã mō nẽ Kapanaũ kamã mẽ hapêr. Anẽ.

Hāmri nẽ mẽ kãm amnhĩ jarẽ nẽ mẽ õ pàr kwỳ hwỳr agjê nẽ ma mẽ hkôt xarmã mōn rê. ²⁵ Hāmri nẽ ra mẽ ixwỳr rê nẽ mẽ ixkôt pøj nẽ mẽ ixkaêx ã Jejus pumu nẽ hwỳr mra nẽ kãm:

—Pa mẽ ijahkre xwỳnh. Kwa na pa prem tee ri xarpê ajapêr hāmri nẽ man akôt mōn rê. Kwa tanhmã na ka pre we amnhĩ to nẽ man tẽn rê? Anẽ.

²⁶ Hāmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nẽ anhōhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nẽ ixpê Tĩrtũm Kra hã ixkôt ajamaxpêr kêt nẽ. Kwa mẽ ixpê Kra hã inhmã ajamaxpêr tỳx nẽ kêt wehe. Anẽ.

*Jejus te kêp kaxkwa rũm mẽ paxàpkur xà
maati pyrãk ã kot amnhĩ jarẽnh*

²⁷ Nhũm Jejus arĩ hwỳr mẽ mrar xwỳnhjê mã kapêr nẽ mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nẽ. Na htem mẽ apkur xà kukwak ri Tĩrtũm mẽ wa ixri htĩr tũm nẽ pa ho pa hkêt nẽ. No kot kaj mẽ amnhĩ kaxyw pa ixkôt ajamaxpêr nẽ ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nẽ wa ixri amex nẽ apa ho apa. Te ixpê mẽ kot mẽ apkur xà hkur nẽ y hã htĩr tũm nẽ pa ho pa xwỳnh pyrãk. Ja kaxyw na pre Inhmãpêxà Tĩrtũm mẽ awỳr papxipix inhmẽ pa mẽ awỳr wrỳ. Anẽ.

²⁸ Hāmri nhũm mẽ kuma nẽ kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nẽ mẽ ixto mex nẽ? Anẽ.

²⁹ Hāmri nhũm mẽ kuma nẽ axte mẽ kãm amnhĩ jarẽ nẽ mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽn xwỳnh kôt ajamaxpêr hāmri nhũm ixtã mẽ apumu nẽ tanhmã mẽ akrã hto ka mẽ ajamakêtkati nẽ axamnhĩx akĩnh nẽ tanhmã amnhĩ nhĩpêx to ho ri apa. Anẽ.

³⁰ Hāmri nhũm mẽ kuma nẽ kãm:

—Tõe. Kwa axte mẽ inhmã aa mẽ ixte mẽmoj pumunh kêt õ ho anẽ. Pa mẽ ja hã

apumu nē amnhī kaxyw akôt ijamaxpēr kurê kumrêx. E mēmo kot ka mē inhmā ho anē? Kwa tokyx mē inhmā axte mēmoj tanhmā ho pa mē omu. ³¹ Amnepēm finat Mojes pyrà kot kapôt ā mē panhīgétjê ho pa ri na pre hte apkati mē mē kām mēō mē kot kām “manā” anhÿr xwÿnhhta gō nhūm pre htem hkur o pa. Tīrtūm kapēr ā kagà htūm kot ja jarēnh kot:

Na pre kaxkwa rūm mē hwÿr mē apkur xà rē nhūm mē hkur o pa.

Anhÿr o kot harēnh. Tā kot kaj Mojes nē apkati mē mē inhmā mē inhō ho ri apa pa mē ja hā apumu nē rī kormā amnhī kaxyw akôt ijamaxpēr japēr. Anē.

³² Hāmri nhūm mē kām:

—Xà Mojes na pre hte mē kām kaxkwa rūm mē apkur xà rēnh o pa? Nà tām kêt. Inhīpêêxà na pre hte mē hwÿr kurê nhūm mē hkawrà nē kuku nē kukwak ri hihtÿx nē htīr nē pa. Tā nhūm ra mē awÿr hpānhā pa ixpê Kra hā inhmē. Kwa mē ixkapēr ma nē amnhī krām haxàr tÿx nē. ³³ Na pre Tīrtūm inhīpêx o te amnepēm kot mē hwÿr kaxkwa rūm mē apkur xà rēnhhta pyrà nē amnē pika hwÿr inhmē. Jakamā te ixpê kaxkwa rūm mē apkur xà maati wryk xwÿnhhta pyrāk. Mē ate amnhī kaxyw ixkôt ajamaxpēr nē ixkôt amnhī xunhwÿr hāmri nē ixkukwak ri wa ixri atīr tūm nē apa ho apa kaxyw. Anē.

³⁴ Nhūm pre ā Jejus mē kām amnhī jarēnh anē nhūm mē kuma nom hprī hā mar mex kêt nē. Ām htÿx ho axtem mē apkur xà mex pix ā harēnh ā hkamnhīx nē kām:

—Kwa tô mē inhmā mē apkur xà maatita kwÿ gō pa mē apkati mē hkur o ri ixpa. Anē.

³⁵ Hāmri nhūm mē kuma nē amnhī tā mē kām:

—Nà mē apkur xà kumrêxja ām paa. Te ixpê mē apkur xà maati pyrāk. Jakamā kot kaj mē atō amnhī kaxyw ixkôt ajamaxpēr nē ixkôt amnhī nhīpêx o apa hā kot kaj mē akīnh nē apa. Te ra axàpkur nē anhōhy htū nē akīnh o ri apa pyrāk. Jao amnhī tā ixpumu nē akīnh nē ajamakêtkati nē ri apa.

³⁶ —Ra mē ate ixpumunh mex tā kormā amnhī kaxyw ixkôt ajamaxpēr kêt nē. Kwa mē ixkapēr ma nē amnhī krām haxàr tÿx nē. ³⁷ Tīrtūm kot inhmā mē ōr mā xwÿnhhaja

koja mē ixpumu nē amnhī kaxyw ixkôt hamaxpēr mex kurê kumrêx. Ā mē kot amnhī nhīpêx anhÿr xwÿnhhaja kot paj aa amnhī nē mē hanor kêt nē.

³⁸ —Nē ixte amnhī krā hkôt kaxkwa rūm ixwryk nē inhmā hprām xà hkôt tanhmā amnhī nhīpêx to ho ixpa kaxyw na pa pre ixwryk kêt nē. Inhīpêêxà kot mē awÿr inhmēnh jakamā kām hprām xà hkôt pix mā na pa hte tanhmā amnhī nhīpêx to ho ri ixpa.

³⁹ —Tā mo na hte Inhīpêêxà kām hprām? Nà kot inhmā mē ōr mā xwÿnh piitā nhÿrmā wa ixkuri htīr tūm nē mex nē pa ho paja na kām hprām. Jakamā nhÿrmā akupÿm mē htīr ā arīgrota ā ixte akupÿm mē ho htīr nhūm ixte ām pixire nē ho ix-pikunor kêtja na kām hprām.

⁴⁰ —Tā kot ka mē atō ixpê Tīrtūm Kra hā ixpumu nē amnhī kaxyw ixkôt ajamaxpēr nē ixkôt amnhī xām. Hā kot kaj nhÿrmā atyk tā pa akupÿm mē atīr xà hā arīgrota ā akupÿm ato atīr ka wa ixkuri atīr tūm nē amex nē apa ho apa. Ja na Inhīpêêxàja kām hprām. Anē.

Nhūm pre ā Jejus mē kām amnhī jarēnh anē. ⁴¹ Hāmri nhūm Ijaew nhō pahijaja mē kuri mar o kuhê nē tee ri kêp kaxkwa rūm mē apkur xà maati pyrāk ā amnhī jarēnh ma nhūm ja mē kām mex kêt nhūm mē kamā gryk nē. ⁴² Jakamā axpēn mā ri harēnh o:

—Tk. Kwa mo na ri ā amnhī jarēnh anē? Kêp mē panhīō kēnā kot kêt ri kêp kaxkwa nhō xwÿnh ā amnhī jarē. Kêp Juje mē Marir wa hkra na. Mē pahte katorxà mē hipêêxà wa omunh mex kēnā kot kêt axtem nē kêp kaxkwa nhō xwÿnh ā amnhī jarē. Anē.

⁴³ Hāmri nhūm amnhī tā mē kuma nē mē kām:

—Kwa mē ā ijarēnh anhÿr kêt nē. ⁴⁴ Koja Inhīpêêxà kot mē awÿr inhmēnh xwÿnhhta tanhmā mē hkrā hto nhūm mē rī kormā amnhī tā ja hā ixpumu nē amnhī kaxyw ixkôt hamaxpēr. Tā ā mē kot amnhī nhīpêx anhÿr xwÿnhhaja koja mē nhÿrmā htyk tā pa akupÿm mē ho mē htīr nhūm mē wa ixri htīr tūm nē mex kumrêx nē pa ho pa.

⁴⁵ —Amnepēm Tīrtūm kapēr jarēnh o mē pa xwÿnhhaja na prem ā ja jarēnh anhÿr o:

Koja Tirtūm mẽ hkrā kaxwýnh kām tanhmā mẽ kām kapēr o amnhĩrīt to ho pa.

Anhỹr o harēnh. Jakamā mẽ kot Tirtūm kapēr mar nē hkôt amnhĩ nhĩpêx xwýnhjaja koja mẽ määnēn amnhĩ kaxyw pa ixkôt hamaxpēr nē ixkôt ri amnhĩ nhĩpêx o pa.

⁴⁶—Nē mẽ apê pika nhõ xwýnhjê hõ aa mẽ ate ixkĩnhã ano ho Inhĩpêêxà pumunh kêt. Ām papxipix na ixte omunh. Kurūm na pa pre mẽ awýr wrý. ⁴⁷Tā kot ka mẽ atõ amnhĩ kaxyw ixkôt ajamaxpēr. Hã kot kaj nhỹrmā wa ixkuri atĩr tūm nē amex nē apa ho apa. Kwa mẽ jam ajamaxpēr tỳx nē.

⁴⁸—Nē ixpê mẽ axàpkurxà maati jakamā pa na ixpê akupým mẽ ho mẽ htĩr xwýnh.

⁴⁹Amnepēm mẽ panhĩgêtjaja kormā kapôt ã mẽ pa ri mẽ kot “manā” anhỹr xwýnhhta kur o ri pata ã na prem kukwak ri htĩr tūm nē pa ho pa hkêt nē. Na prem ri pa nē gaa nē rĩ hpigêt nē htyk pa. ⁵⁰Axtem kaxkwa rūm mẽ apkur xà maati jarēnh xwýnhhta pix kukwak ri na htem nhỹrmā htyk tā akupým htĩr nē wa ixri htĩr tūm nē mex nē pa ho pa. ⁵¹Ām paa. Pa na htem inhĩ hkwý hkrē hāmri nē wa ixri htĩr tūm nē mex nē pa ho pa. Na pa pre ra amnhĩ grõnh kôt mẽ awýr wrý. Jakamā ka mẽ atõ inhĩ hkwý hkrē hāmri nē nhỹrmā atyk tā pa akupým ato atĩr ka Tirtūm mẽ wa ixri atĩr tūm nē amex nē apa ho apa. Anē.

⁵²Nhũm pre ã Jejus Ijaew mā amnhĩ jarēnh anē. No ãm mẽ kām amnhĩ tā kuxi nē amnhĩ jarē. Jakamā nhũm mẽ tee ri kuma hāmri nē tanhmā hã axpēn mā kapēr to. Mẽ kot hprĩ hã mar kêt nē ãm mẽ kot ĩ hkwý hkrērja pix jarēnh mar jakamā tee ri hamaxpēr nē axpēn mā:

—Kwa tanhmā kot kêt we amnhĩ to nē mẽ pamā amnhĩ nhĩ hkwý gõ pu mẽ kuku? Anē.

⁵³⁻⁵⁴Hāmri nhũm amnhĩ tā mẽ kuma nē mẽ kām:

—Nà mẽ kot inhĩ hkwý hkrēr nē ixkamrõ hkwý ho hkõm xwýnh pixjaja koja mẽ nhỹrmā Tirtūm mẽ wa ixri htĩr tūm nē pa ho pa. Ixte akupým mẽ ho mẽ htĩr xà hã arĩgrota ã kot paj mẽ ho mẽ htĩr nhũm mẽ wa ixri htĩr tūm nē mex nē pa ho pa. No kot kaj mẽ inhĩ hkwý hkrēr kêt nē ixkamrõ hkwý ho akõm kêt hāmri nē wa ixri atĩr tūm nē amex nē apa ho apa hkêt nē. Kwa mẽ

jam ajamaxpēr tỳx rāhã nē. ⁵⁵Kêt inhĩja kēp mẽ apkur xà maati na. Nē ixkamrõja kēp mẽ hkõm xà maati na. Jakamā na htem inhĩ hkwý hkrē nē ixkamrõ hkwý ho ixkõ nē ra kēp wa ixri mẽ htĩr tūm nē mẽ pa ho mẽ pa mã xwýnh. ⁵⁶Jakamā kot ka mẽ atõ inhĩ hkwý hkrē nē ixkamrõ hkwý ho ixkõ. Hāmri pa amnhĩ tā apumu nē akarõ mã axà ka te apê pa pyrāk o amnhĩ nhĩpêx o apa. ⁵⁷Inhĩpêêxà kot mẽ awýr inhmēnh xwýnhhta kukwak ri na pa hte ixĩr tūm nē ixpa ho ixpa. Tā ja pyrà nē kot kaj mẽ inhĩ hkwý hkrē hāmri nē ixkukwak ri wa ixri atĩr tūm nē apa ho apa mã xwýnh.

⁵⁸—Jakamā na pa ã mẽ amā ixpê kaxkwa rūm mẽ axàpkur xà maati hã amnhĩ jarēnh anē. Amnepēm mẽ panhĩgêtjaja na pre htem kapôt ã mẽõta kur o pa hāmri nē gaa nē hpigêt nē htyk pa. No kêt pa koja mẽ inhĩ hkwý hkrē hāmri nē mẽ kurom wa ixri htĩr tūm nē mex nē pa ho pa. Anē.

⁵⁹Nhũm pre ã Jejus mẽ kām amnhĩ jarēnh anē. Kormā Kapanaũ kamā Tirtūm kapēr o mẽ ahkre xà hã ixkre kamā ã mẽ ahkre anhỹr o xa.

Mẽ ohtõ nē mẽ kot Jejus kaga hã mẽ harēnh

Sikũn Korĩt 3.6; Sikũn Pêtre 3.16

⁶⁰Hāmri nhũm mẽ kot Jejus kôt mar o mẽ pa xwýnhjaja ohtõ nē ã kapēr anhỹrja ma nē tee ri amnhĩ kukamā hamaxpēr nē hã axpēn mā:

—Tk. Kwa pēr kapērja ãm ri katii. Mẽhõ koja we kuma nē hkôt hamaxpēr nē hkamrõ nē ĩ kur o ri hkôt pa? Nà mẽ piitã mẽ kām ja mexti hã. Anē.

⁶¹Hāmri nhũm amnhĩ tā mẽ kuma nē mẽ kām:

—Kwa xà ixkapērja mẽ apê omnuj? ⁶²Nà kot paj nhỹrmā ma akupým kaxkwa hwýr api. Ixpê Tirtūm kot mẽ akaxyw ixām xwýnh ã ma akupým hwýr api. Hāmri ka mẽ ã ixte amnhĩ nhĩpêx anhỹr ã ixpumu nē rĩ kormā ixkôt amnhĩ xunhwýr japêr. ⁶³Na htem mẽmoj kur kukwak ri kēp Tirtūm mẽ wa ixri htĩr tūm nē pa ho pa xwýnh kêt nē. Rý amnhĩ krā hkôt tanhmā amnhĩ nhĩpêx to ho kēp wa ixri htĩr tūm nē pa ho pa mã xwýnh kêt nē. Tirtūm mẽ wa Ixkarõ tām na hte mẽ hkarõ mã agjê nē mẽ ho Tirtūm wa ixkuri mẽ htĩr tūm nē mẽ pa ho mẽ pa mã

xwýnh. Tã ÿ hã na pa ã mẽ amã ixkapêr anê. Nom mẽ amã amnhĩ tã kuxi nê amnhĩ jarê. Tã kot kaj mẽ ixkapêr ma nê ixkôt amnhĩ nhĩpêx. Hã kot kaj mẽ nhỹrmã wa ixri atĩr tũm nê amex nê apa ho apa. ⁶⁴⁻⁶⁵ No mẽ akwýjaja na ka mẽ ixkapêr ma nê ãm ama nê ixkôt ajamaxpêr kêt nê. Jakamã na pa ã mẽ amã ixkapêr anê nê mẽ amã: “Koja Inhĩpêxàja tanhmã mẽ akrã hto ka mẽ rĩ kormã amnhĩ tã ixpumu nê amnhĩ kaxyw ixkôt ajamaxpêr.” Anhỹr o mẽ amã ixkapêr. Anê.

Nhũm ã Jejus mẽ kãm kapêr anê. Ra kot mẽ hkukamã mẽ omunh mex. Ra kot amnhĩ kaxyw mẽ kot hkôt hamaxpêr mã xwýnhjê pumunh nê mãânên mẽ kamã kot mẽõ pahi nhĩhkram haxàr mã xwýnhja nhũm mãânên ra kot amnhĩ kukamã omunh mex. Jakamã nhũm ã mẽ kãm kapêr anê. ⁶⁶ Hãmri nhũm mẽ kot hkôt kapêr mar o mẽ pa xwýnh kwýjaja tee ri kuma hãmri nê hkaga nê axte hkôt pa hkêt nê. ⁶⁷ Hãmri nhũm tee ri mẽ kot hkaga nê ma mẽ mrar ã mẽ omu nê mẽ ixpê hkôt ixpa ho ixpa xwýnh pê 12jê mã kapêr nê mẽ inhmã:

—Pa? No mẽ kajaja. Xà kot kaj mẽ urãk nê ixkaga nê ma akupým mra nà? Anê.

⁶⁸ Hãmri nhũm Simãw Pêtre kãm:

—Nà kot paj mẽ akaga hkêt nê. Kapxipix na htem amnhĩ kaxyw akôt hamaxpêr jao kêp Tĩrtũm mẽ war akuri htĩr tũm nê pa ho pa mã xwýnh. ⁶⁹ Ka na pre Tĩrtũm mẽ ixwýr amê. Jakamã na pa mẽ amnhĩ kaxyw akôt ijamaxpêr o ri ixpa. Nà kot paj mẽ aa akaga hkêt nê. Anê.

⁷⁰ Hãmri nhũm kuma nê kãm:

—Nà ixte amnhĩ kaxyw mẽ apê 12jê rênh tã na ka mẽ atõ akwýjê hkĩnhã axtem nê Satanasti hkôt amnhĩ xãm. Anê.

⁷¹ Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ìhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

7

Jejus tøjaja kot mẽ hkĩnh wýr amnhĩ kôt hwýr ã mẽ harênh

Matêwre 10.36, 13.57-58

¹ Tã nhũm Jejus arĩ Garirej kamã ri pa nê kormã akupým Jutej wýr mõi kêt nê. Jutej kamã Ijaew nhõ pahijaja ra kot hã ãmnênh nhũm mẽ kot hpĩr ã harênh jakamã nhũm mẽ umaj kormã hwýr mõi kêt nê.

² Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnhhta ã na pa pre htem ixpiitã Jutej wýr axpên wýr akuprõ nê ahpýnhã ri amnhĩm ixkre hkryre nhĩpêx nê kamã ixkrĩ. ³ Jakamã nhũm Jejus tøjaja hwýr mra nê kãm nojarêt nê amnhĩ kôt kuwý nê kãm:

—E kwa tokyx pu mẽ pahkwýjê hkôt. Ka mẽ kãm aa mẽ kot mẽmoj pumunh kêt kwý ho anhỹr o ri mẽ hkôt apa kê mẽ kãm akapêr mar prãm xwýnhjaja ja hã apumu.

⁴ Na ka hte jar te apimxur pyrãk o amnhĩ nhĩpêx. E kwa tokyx ma pu mẽ hkôt. Anê.

⁵ Katorxà hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anê. ⁶ Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmrĩ ma mẽ hkôt mra. ⁷ Koja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwýr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê. ⁸ Jakamã mẽ mãmrĩ ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

⁹ Anê nhũm mẽ tee ri kuma hãmri nê kure nê ma mẽ hkwyjê hkôt Jutej wýr mõi. Nhũm Jejus kormã Garirej kamã ri pa hã apkati grêre. ¹⁰ Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwýnhjaja ma hkôt ixpa.

Mẽ kot ahpýnhã tanhmã Jejus jarênh to hã mẽ harênh

Juāw 7.37-44, 9.22, 10.19-21, 12.42-43

¹¹ Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwýnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhỹri mãn we? Anê.

¹² Nhūm Ijaew piitā tanhmā axpēn mā Jejus jarēnh to ho pa. Nē kamā mẽ hkwyjaja harēnh o:

—Nà kot amnhĩ to mex o pa xwýnh na.

Anhỹr o harēnh o pa. Nē kamā mẽ hkwyjaja axtem nē harē nē harēnh o:

—Tk. Kot mẽ no kupyrr o pa xwýnh kēnā. Anē.

¹³ Nom mẽ õ pahi pymaj mẽ piitā mẽ nom tanhmā harēnh to hkēt nē. Ām axpēn mā pix mā tanhmā harēnh to ho pa.

Jejus kot mẽ hkĩnh xwýnhjê jahkre hã harēnh

Makre 3.22; Juāw 5.16

¹⁴ Tã pa mẽ mẽ hwýr pøj. Jejus mẽ pa mẽ hkôt ixpa ho ixpa xwýnhjaja mẽ hwýr pøj. Kormā mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarēnh xà hã ixkreja wýr mra nē agjê nhūm Jejus mẽ ahkre ho nhỹ. ¹⁵ Hãmri nhūm mẽ inhõ pahijaja tee ri kot tanhmā mẽ ahkre hto hã kuma nē hã axpēn kukja nē axpēn mã:

—Kwa mẽ pahkĩnhã kot Tĩrtũm kapēr o istuda hkēt tã ã mẽ ahkre anē. Anē.

¹⁶ Hãmri nhūm amnhĩ tã mẽ kuma nē mẽ kãm:

—Nà na pa hte amnhĩ krã hkôt tanhmā ri mẽ ajahkre hto hkēt nē. Ām kot mẽ awýr inhmēnh xwýnhhta nhỹ hã na pa hte ã mẽ ajahkre anhỹr o ri mẽ akôt ixpa.

¹⁷ Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte ý hã ixkapēr ã ixpumunh kurê kumrêx.

¹⁸ Amnhĩ krã hkôt mẽ kãm kapēr o ri mẽ pa xwýnhjaja na htem mẽ kot mẽ mar nē mẽ hã hpijaàm pix kaxyw tanhmā mẽ kãm kapēr to ho ri pa. No kêt pa na mẽ ate ixkapēr mar nē kot mẽ awýr inhmēnh xwýnhhta ã apijaàm pix kaxyw na pa hte tanhmā mẽ amã ixkapēr to ho ri ixpa. Jakamã ãm hãmri na pa hte mẽ amã ixkapēr o ri ixpa.

¹⁹ —Finat Mojes na pre mẽ panhĩgêtjaja kot tanhmā amnhĩ nhĩpêx to ho pa nhūm Tĩrtũm kot mẽ kãm hã karõ jarēnh o ri mẽ hkôt pa htã ka mẽ hkôt amnhĩ nhĩpêx kêt nē. Tã ixte hkôt amnhĩ nhĩpêx kêt ã ixto axêx nē mẽ ate ixpĩr kaxyw ixtã amnhĩ jarēnh ri apa. Anē.

²⁰ Hãmri nhūm mẽ ã Jejus kot mẽ kãm kapēr anhỹrja ma nē hêx rom kãm:

—Kwa mẽ ixtõ na pa apĩr mã ka ri ã mẽ ijarēnh anē? Amrakati kēnā. Kwa mãn ka akrã axpã nà? Hã na ka ã ri akapēr anē. Anē.

²¹ Hãmri nhūm mẽ kãm:

—Nà ixte mẽ pahkôt xà hã arĩgro hã akupým mẽhõ myta ho mex jakamã na ka prem ja hã ixpumu nhūm ja mẽ apê omnuj nē. Nē te ixte mẽ pahkôt xà hã arĩgro hã ixpijaàm kêt xwýnh pyrãk ã ijarē. ²² Nom na ka htem ixpyrà nē mẽ panhõ arĩgromnu hã mẽmoj tã axápēnh o ri apa. E pa mẽ amã mẽmoj jarē ka mẽ inhma. Na pre finat Mojes mẽ pamã mẽ pahte mẽ pahkra myre pē my kwryt kà jakar ã mẽ pamã karõ. Kukamã higêtjaja kot kãm ja hã karõ xà hkôt. Jakamã na htem mẽ hkra myre hapøj nē hã semãn pyxi nē hapêx nhūm mẽ kêp mẽmy hkwrýt kà jakà. ²³ Mẽ pahkôt xà hã arĩgro hã hõ kator tãã nhūm mẽ hã semãn pyxi nē mẽ panhõ arĩgromnu hõ hã kêp my kwryt kà hkwy krãhta. Mojes kot Tĩrtũm nhỹ hã ja hã mẽ pamã karõ xà hkôt. Jao mẽ panhõ arĩgromnu hã apê. Tã pa pre mẽ apyrã nē arĩgromnu hã ixápēnh pē akupým mẽhõ myta ho mex ka mẽ ja hã ixpumu nē axtem nē ixtýx ri ixte amnhĩ nhĩpêx o ixpa xwýnh ã ijarē nē mẽ ate ixpĩr kaxyw ã amnhĩ jarē. ²⁴ Kwa mẽ amnhĩ krã hkôt tanhmā mẽ harēnh to ho ri apa hkēt nē. Ām mẽ kot tanhmā amnhĩ nhĩpêx to ho pa hã mẽ omu nē ajamaxpēr o: “Kwa xà we Tĩrtũm kãm ja mex nã?” Anhỹr o mãn kêt mẽ ajamaxpēr nē rĩ kormã tanhmā mẽ harēnh to. Anē.

²⁵ Hãmri nhūm Jerujarē nhõ xwýnh kwýjaja ja hã kuma nē tee ri hkukamã hamaxpēr. Hãmri nē hã axpēn kukja nē axpēn mã:

—Kwa xà tãm na mẽ panhõ pahijaja mẽ kot hpĩr kaxyw hã amýnê? ²⁶ Ota jar mẽ pakamã ri pa htã nhūm mẽ ãm omu nē kãm tanhmā nē hkēt nē. Mãn mẽ ãm hãmri kêp Kris ã hkamnhĩx jakamã kapēr ma nē ãm kuma nē kêp Kris ã tanhmā ho hkēt nē. Anē.

²⁷ Hãmri nhūm mẽhõja kuma nē kãm:

—Tk. Nà kêp Tĩrtũm kot mẽ pahwýr mẽnh xwýnhre hã. Kêp Najare nhõ xwýnh kēnā. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwýr mẽnh

mã xwýnh̄ta koja xep mẽ pahwýr kato pu mẽ nhýh̄nh̄ htēm xà hkôt omunh kêt nê. Anê.

²⁸ Rôm nhũm Jejus arĩ Tĩrtũm mã amnhĩ jarēnh xà hã ixkreja kamã mẽ ahkre ho nhỹ. Jakamã mẽ kot axpēn mã harēnh ã amnhĩ tã mẽ kuma nê mẽ kãm:

—Xà mẽ ate aprĩ hã ixpumunh nê nhýh̄nh̄ ixtēm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awýr inhmōr kêt nê. Na pre mēhō mẽ awýr inhmē. Nom kot mẽ awýr inhmēnh xwýnh̄ja kormã mẽ ate omunh kêt. ²⁹ ãm papxipix na ixte omunh. Kurũm ixwryk xwýnh̄ na pa. Kot mẽ awýr inhmēnh nhũm kurũm ixwryk jakamã ixte ixprĩ hã omunh par. Anê.

³⁰ Hãmri nhũm mẽ hkwýjaja tee ri ã kot amnhĩ jarēnh anhýrja ma nê ri axpēn mã harēnh o:

—Kwa Tĩrtũm kot mẽ pahwýr mēnh ã kot amnhĩ to hēx kēnã. E kwa pu mẽ ã kot amnhĩ to hēx anhýr ja ã unê nê haxà nà?

Anhýr o axpēn mã hã amýnê. Nom kormã mẽ kot unēnh nê haxà xà hã arĩgroja kormã kator kêt jakamã nhũm Tĩrtũmja nê mẽ omunh mex nê nhũm mẽ ãm kãm unēnh prãm kaprý. ³¹ No nhũm mẽ hkwýja mẽ kurom kuma nê kēp Tĩrtũm kot mẽ pakaxyw ãm xwýnh̄ ã omunh kurê kumrēx nê amnhĩ kaxyw hkôt hamaxpēr. Hãmri nê axpēn mã harēnh o:

—Kwa mǎn kēp Tĩrtũm kot mẽ pahwýr mēnh mã xwýnh̄ta mǎn nà? Mē pahtō kot pu uràk nê aa mẽ kãm mẽ kot mēmoj pumunh kêt o anhýr rax o ri papa? Amrakati kumrēx. Nà pēr tǎm kēnã. Anê.

Pôristi hkwý kot Jejus pynēnh kaxyw ã mẽ harēnh

³² Nhũm prem ã axpēn mã Jejus jarēnh anhýr o kuhê hãmri nhũm Parijew nhō xwýnh̄jaja hã mẽ kuma. Hãmri nê patre krãhtũmjê mẽ mẽ ma Jejus wýr mēō pôristi hkwý rē nê mẽ kãm:

—E mẽ ma Jejus wýr mra nê unê nê man akupýn o tē. Anê.

³³ Hãmri nhũm mẽ kuma nê ma hwýr mra nê omu nom tokyx unēnh kêt nê. Kormã kapēr ã mar o kuhê. Nhũm Jejus arĩ mẽ kãm kapēr o xa nê mẽ kãm:

—Nà kot paj jar mẽ akôt ri ixpa hã mytwrý grēre hãmri nê ma akupým kot mẽ awýr inhmēnh xwýnh̄ta wýr api. ³⁴ Ka mẽ tee ri jar ijapēr o ri apa nom nhýri ixpumunh kêt nê. Nê ma inhmōr xàta wýr kot kaj mẽ atō ma ixkôt amōr kêt nê. Anê.

³⁵ Hãmri nhũm mẽ tee ri ã kot amnhĩ jarēnh anhýrja ma nê axpēn mã:

—Kwa nhýh̄m koja we ma mō pu mẽ hkôt papa hkêt nê? Mǎn mẽ pahkwýjaja kot Gresjê kamã mẽ pa xwýnh̄jê hwýr koja ma mō nê hpǎnhã mẽ hkôt mẽ ahkre ho pa nà? Hã na ã mẽ pamã amnhĩ jarēnh anê? ³⁶ Mo na ri mẽ pahte tee ri hapēr o papa hã mẽ pajarē nê mẽ pahte hkôt pamrar kêt ã mẽ pajarē? Anê.

Tĩrtũm Karō te kēp gō nyw pyràk ã harēnh Juāw 4.13-14; Apokarip 22.1, 22.17

³⁷ Tã nhũm ra mẽ hkĩnh̄ja hapēx kaxyw hitep xà hã arĩgro maatija kato. Jakamã nhũm Jejus kǎnhmã xa nê kýxpē mẽ hpikuprōnh̄ xwýnh̄jê mã kapēr nê mẽ kãm:

—E te mẽ amã kōr o apa pyràk xwýnh̄jaja. Mē amnē ixwýr akuprō. Kot kaj mẽ amnhĩ kaxyw ixkôt ajamaxpēr pa tanhmã mẽ ato ka mẽ apē Tĩrtũm mẽ wa ixri atĩr tũm nê apa ho apa mã xwýnh̄.

³⁸ —Kot kaj mẽ ja hã amnhĩ pumu hãmri nê ma mẽ kãm ixkapēr jarēnh o ri mẽ hkôt apa. Te mẽ kãm kōr nhũm mẽ ate mẽ kãm gō hkwý nhũm mẽ kot ho hkōm pyràk o mẽ hipēx o ri mẽ hkôt apa. Hãmri nhũm mẽ ama nê mẽ apyrà nê amnhĩ kaxyw ixkôt hamaxpēr. Pa ixte tanhmã mẽ atoja pyrà nê tanhmã mẽ ho nhũm mẽ apyrà nê kēp wa ixri htĩr tũm nê pa ho pa mã xwýnh̄. Anê.

³⁹ Nhũm pre ã Jejus mẽ kãm kapēr anê. No ãm hã kuxi nê mẽ kãm kapēr nê hprĩ hã harēnh kêt nê. Tĩrtũm Karō kot nhýrmã mẽ kot amnhĩ kaxyw Jejus mã hamaxpēr xwýnh̄jê karō mã gjēxja nhũm ã mẽ kãm hã kuxi nê harēnh anê. No kormã akupým kaxkwa hwýr àpir nê mex o mex nê hkrĩ hkêt jakamã kormã mẽ hwýr Karō rēnh kêt nê.

Mē kot ahpýnhã tanhmã Jejus jarēnh to hã mẽ harēnh Juāw 7.11-13, 7.25, 10.19-21

⁴⁰ Hāmri nhūm mẽ kot Jejus mar o hkrī xwýnhjaja ã kapēr anhýrja ã kuma nẽ ahpýnhã tanhmã harēnh to nẽ harēnh o:

—Kwa finat Mojes pyrã nẽ kęp Tĩrtũm nhỹ hã kapēr jarēnh o pa xwýnh na nã? Anẽ.

⁴¹ Nhūm kamã mẽ hkwýjaja mẽ kãm:

—Nà Tĩrtũm kot mẽ pakaxyw ãm xwýnhhta na. Anẽ.

Nhūm kamã mẽ hkwýjaja ja hã mẽ kuma nẽ mẽ kãm:

—Tk. Nà kęp Garirej nhõ xwýnh kēnã kot kēt Tĩrtũm mẽ pakaxyw ãm. ⁴² Tĩrtũm kapēr ã kagã htũm kot kęp Garirej nhõ xwýnh ã harēnh kēt. Kęp Pahi Tawi hkanrēhã hka-grõt nyw jakamã koja uràk nẽ Jutej kamã krī pē Perēj kamã kato. Jao koja uràk nẽ kęp Jutej nhõ xwýnh.

Anhýr o ri axpēn mã harẽ. Mẽ kot htýx Jejus pika pē Garirej kamã kator ã hkamnhĩx jakamã ã axpēn mã harēnh anẽ. Nom pika pē Jutej kamã na pre kato. Krī pē Perēj kamã. Tã no nhūm mẽ hkwýjaja ja hã mar kēt jakamã kęp Tĩrtũm kot mẽ pahwýr mẽnh xwýnh kēt ã hkamnhĩx.

⁴³ Jakamã nhūm mẽ ã ahpýnhã axpēn mã harēnh anẽ. ⁴⁴ Nhūm mẽ hkwýjaja ra kot unēnh kaxyw tã tokyx unēnh kēt nẽ.

Pôristi kot Jejus pynēnh kēt ã mẽ harēnh

Matêwre 7.28-29

⁴⁵ Tã nhūm patre nhõ pôristijaja. Mẽ kot Jejus pynēnh mã hwýr mrar tã hāmri ã kapēr anhýrja ã kuma nẽ tee ri hamaxpēr nẽ unēnh kēt nẽ. Nẽ awjanã nẽ ahte ý kamã ma akupým patre krãhtũmjê mẽ Parijew nhõ xwýnhjê hwýr mra. Hāmri nhūm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unēnh nẽ ho amõr kēt nẽ? Anẽ.

⁴⁶ Hāmri nhūm mẽ kãm:

—Nà na pa mẽ unēnh kēt nẽ. Kapēr mex kēnã. Te kot mẽ pakapēr pyrãk kēt jakamã pa mẽ tee ri kapēr ã kuma nẽ unēnh kēt nẽ. Anẽ.

⁴⁷ Hāmri nhūm Parijew nhõ xwýnhjaja mẽ kuma nẽ mẽ kãm:

—Tk. Kwa mãn ka mẽ ra mẽ uràk nẽ tanhmã kot amnhĩ to hēx toja ma nẽ hkõt ajamxpēr nã? ⁴⁸ Mẽ ixpē Parijew nhõ xwýnhjaja nẽ mẽ panhõ pahijaja na pa htem hkõt ijamxpēr kēt nẽ. ⁴⁹ No kēt mẽ

kot mar nẽ hkõt hamaxpēr xwýnhhtijaja na htem mẽ ixkĩnhã finat Mojes kapēr mar kēt nẽ. ãm Jejus kapēr pix na htem kuma nẽ hkõt hamaxpēr. Mýrapê koja Tĩrtũm tanhmã mẽ homnuj týx to nhūm mẽ rĩ amnhĩ pumu. Anẽ.

Nĩkotẽ kot Jejus xyr pē kapēr ã harēnh
Juāw 3.1-21

⁵⁰ Hāmri nhūm Nĩkotēja mẽ mar o xa. Mẽ uràk nẽ kęp Parijew nhõ xwýnh tã na pre ra kamãt õ hã Jejus wýr tẽ nẽ kãm kapēr. Jakamã tee ri hã mẽ kapēr ma hāmri nẽ yr pē mẽ kãm kapēr nẽ mẽ kãm:

⁵¹ —Tk. Kwa kormã mẽ pahte pahprĩ hã kapēr mar nẽ tanhmã kot amnhĩ nhĩpēx to hã omunhre hã. Na pre finat Mojesja Tĩrtũm nhỹ hã mẽ panhĩgētjê mã ja jarēnh o:

Kēr ka mẽ aprĩ hã mẽ kapēr ã mẽ ama nẽ mẽ kot amnhĩ nhĩpēx ã mẽ omu nẽ rĩ kormã tanhmã mẽ harēnh to.

Anhýr tã ka mẽ kormã aprĩ hã Jejus kot amnhĩ nhĩpēx ã omunh kēt tã ra kot amnhĩ tomnuj xwýnh ã harẽ. Anẽ.

⁵² Hāmri nhūm mẽ tee ri kuma nẽ kãm:

—Tk. Kwa xà we uràk nẽ apē Garirej nhõ xwýnh hã na ka ã yr pē akapēr anẽ? Xà Tĩrtũm kapēr ã kagã htũm kot Garirej nhõ xwýnhjê hõ kęp ý hã kapēr jarēnh o pa xwýnh ã harēnh? Nà ã kot harēnh anhýr kēt. Anẽ.

⁵³ Nhūm mẽ ã Nĩkotẽ mã kapēr anẽ hāmri nẽ anhgrã nẽ Tĩrtũm nhõrkwý rũm hapõj nẽ ma akupým õrkwý hwýr àhkurê ho mra.

8

Mēhõ ni kot nhãm mẽ mjên o amnhĩkati hã
harēnh

Xiakre 2.10-13

¹ Tã nhūm Jejus Tĩrtũm nhõrkwý kamã mẽ ahkre hpa hāmri nẽ kato nẽ ma hixēt præk pē Oriwēhti hwýr tẽ. Hāmri nẽ hã api nẽ nhỹri nõ nẽ ra gõr.

² Tã nhūm apkati nẽ myt kator o mõi mẽ nhūm kãnhmã nhỹ nẽ akupým wrý nẽ Tĩrtũm mã amnhĩ jarēnh xà hã ixkre hwýr tẽ. No ãm kormã ixkre pu hã kahê hkre kamã nhỹ. Nhūm krī nhõ xwýnhjaja omu nẽ hã htu rax nẽ nhūm tanhmã mẽ ahkre hto ho nhỹ. ³ Hāmri nhūm Parijew nhõ xwýnhjê mẽ Tĩrtũm kapēr tũm o mẽ ahkre ho mẽ

pa xwýnhjaja hwýr mēhō nija o tē. Na ra ham mēhō pē mjēn o amnhīkati ho nō nhūm mē ja hā omu nē unē nē hpa hā kupy nē ma Jejus wýr hkjēnh o mō. Hāmri nē mē kot mar o kuhē xwýnhjē kutā ãm nhūm xa.

⁴Hāmri nhūm mē Jejus mā:

—E ot pa mē awýr jahti ho tē ka omu. Na ham mēhō pē mjēn o amnhīkati ho nō. Pa mē ja hā omu nē unē nē man awýr o tē. ⁵E tanhmā kot puj mē hipêx to? Na pre finat Mojes Tirtūm nhỹ hā mē panhīgētjē mā ja jarēnh o:

Koja mēnijē hō axtem nē nhām mēhō pē mjēn o amnhīkati ho nō ka mē ja hā omu nē apiitā ahpýnhā kēn rūnh jamý nē ho htak o apĩ.

Anhýr o kot harēnh. No ka? Tanhmā kot kaj mē inhmā ja jarēnh to? Tanhmā kot paj mē hipêx to nhūm amā mex nē? E mē inhmā tanhmā mē ixte hipêx to jarē. Anē.

⁶Nhūm mē ã hēx rom nija ã Jejus kukjêr anē. Kot mē kot hpīr nē mē kām kapēr nhūm mē kot hā mar nē mē hkrāhtūmjē hwýr mōr nē kām kot Mojes kapēr kwým ri mē ahkre hā harēnh kaxyw nhūm mē hēx rom ã hkukjêr anē. Hāmri nhūm mē kuma nē tanhmā hā mē kām nē hkêt nē. ãm htýx hikôt nē ãhkrakrā ho pyka kagà ho nhỹ.

⁷Nhūm mē tee ri omu nē axte hā hkukja nhūm kànhmā xa nē mē kām:

—Tōe. Nà kot ka mē atō aa tanhmā amnhī tomnuj to hkêt kumrēx ã amnhī pumu hāmri nē kam nē rĩ kaxyw kēn õ py nē akumrēx ho hkura. Kē akwýjaja rĩ kormā akôt hkwy jamý nē ho htak. Anē.

⁸Hāmri nē akupým hikôt nē pyka kagà ho nhỹ. ⁹Hāmri nhūm mē tee ri kapērja kôt kuma hāmri nē mē kot mar o kuhē xwýnhjē rūm angrà nē ma mra. Mē pi-itā mē kot amnhī tomnuj xwýnh ã amnhī pumunh mex jakamā tee ri ã kot mē kām kapēr anhýrja ma nē angrà nē ma akupým hpýnh nē axpēn kôt mrar o xa. Mēhpigēt kumrēx nē hpānhā mē nywjaja nhūm mē hpýnh nē ma axpēn kôt mrar o ãm kām hapêx. Nhūm Jejus mēnija pix wa ahte mē kot mar xwýnhjē kutā wa arīk. ¹⁰Hāmri nhūm Jejus kànhmā xa nē nita mā kapēr nē kām:

—Pa? No mē kot ato kapēr xwýnhhta mē? Xà na mēhō kēn o akuranh kêt nē? Anē.

¹¹Nhūm kām: “Ma amrakati.” Anē nhūm kām:

—Tōe. Nà kot paj ijaxwýja tanhmā ato hkêt nē. E mamrĩ ma akupým anhōrkwy hwýr tē. No ãm kēr ka axte ã amnhī nhīpêx anhýr kêt nē. ãm kwarĩ ho kwarĩ. Anē.

Jejus kot hprĩ hā amnhī jarēnh

Juãw 1.4; Rōmān 13.12-14; Epes 5.8-14; Wam Tesarōn 5.5-8

¹²Tā nhūm arīgro hō hā nhūm Jejus axte Tirtūm nhōrkwy hwýr tē nē kamā mē ahkre ho nhỹ nē mē kām:

—Nà te ixpē mē piitā mē õ kanē pyrāk. Na hte kanēja mē kām hirā mex nē nhūm mē kamā rīt mex o pa. Jao kamāt kō kamā ri pa hkêt nē. Ja pyrā nē na pa hte Tirtūm kot amnhī nhīpêx o amnhīrīt mex o ri ixpa. Kot ka mē atō amnhī kaxyw inhmā ajamaxpēr nē ixkôt amnhī xām hāmri nē tanhmā amnhī tomnuj to ho apa hkêt nē. ãm Tirtūm kām hprām xà kôt pix mā tanhmā ri amnhī nhīpêx to ho ri apa. Jao te ate kanē hpōk nhīrā kamā arīt mex pyrā nē apē wa ixri atīr tūm nē apa ho apa mā xwýnh. Anē.

¹³Hāmri nhūm Parijew nhō xwýnhjaja tee ri ã kapēr anhýr ã kuma nē kām:

—Tk. Kapxipix na ka ã amnhī jarēnh anē. Mēhō kot ã ate amnhī jarēnh anhýrja kôt kot mē inhmā ajarēnhre hā. Jakamā kot paj mē ama nē ãm ama. Anē.

¹⁴Hāmri nhūm mē kām:

—Nà mēhō kot ã ijarēnh anhýr kêt tā no ãm hāmri na pa mē amā amnhī jarē. Ixêx kêt. Mē arom ixte nhỹhýnh ixwryk xà hā amnhī pumunh mex. Nē mē arom ma akupým nhỹhým ixàpir xà hā amnhī pumunh mex. Jakamā ãm hāmri na pa ã mē amā amnhī jarēnh anē. ¹⁵Na ka htem amnhī krā hkôt tanhmā ri ijarēnh to. No pa na pa kormā amnhī xwar tanhmā mē ajarēnh to hkêt nē. ¹⁶Ixte tanhmā mē ajarēnh to ronhýx pa ãm hāmri mē ajarē. Nhỹx pa ãm papxipix amnhī krā hkôt tanhmā mē ajarēnh to hkêt nē. Nhỹx mãânēn Inhīpêêxà pē kot mē awýr inhmēnh xwýnhhta inhīhkô hā pa wa ãm hāmri axpēn kôt tanhmā mē ajarēnh to. Mē ate amnhī to mex ã mē ajarē rý mē ate

amnhĩ tomnuj ã mẽ ajarẽ. ¹⁷ Tĩrtũm kapẽr ã kagà htũm kot ja jarẽnh kot:

Koja mẽhõ wa hamẽxkrut nẽ tanhmã mẽmoj jarẽnh to nẽ ãm axpẽn kõt harẽnh o htipxi. Hã kot kaj mẽ wa ama nẽ ãm hãmri wa kot harẽnh kõt ajamaxpẽr kurẽ kumrẽx.

¹⁸ Anhỹr o kot harẽnh. Tã pa ã amnhĩ jarẽnh anẽ nhũm Inhĩpêêxà kot mẽ awỳr inhmẽnh xwỳnhhta mããnẽn ã ijarẽnh anẽ. Wa ixpijakrut tã ã wa ixte axpẽn kõt amnhĩ jarẽnh anhỹr jakamã kwa mẽ ixte tanhmã amnhĩ jarẽnh toja ma nẽ ixkõt ajamaxpẽr kêt wehe. Anẽ.

¹⁹ Nhũm pre ã Jejus mẽ kãm kapẽr anẽ.

Hãmri nhũm mẽ kuma nẽ kãm:

—No nhỹri na we anhĩpêêxà ja? Anẽ.

Hãmri nhũm mẽ kãm:

—Nà mẽ ate Inhĩpêêxà pumunhre hã. Mẽ ate aprĩ hã ixpumunh ronhỹx ka mẽ mããnẽn aprĩ hã Inhĩpêêxà pumunh mex kurẽ kumrẽx. Nom mẽ ate ixpumunh mex kêt jakamã na ka mẽ mããnẽn omunh mex kêt nẽ. Anẽ.

²⁰ Nhũm pre ã Jejus mẽ kãm kapẽr anẽ.

Arĩ Tĩrtũm mã amnhĩ jarẽnh xà hã ixkreja kamã mẽ ahkre ho xa. Mẽ kot kàxpore gjẽnh xà kuri mẽ ahkre ho xa. Nhũm mẽ kãm hkurẽ xwỳnhjaja tee ri kot tanhmã mẽ ahkre htoja ma nẽ kãm unẽn nẽ haxàr prãm nẽ. Nom kormã mẽ kot ã hipêx anhỹr ã arĩgro kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unẽn prãm kaprỳ.

²¹ Hãmri nhũm Jejus arĩ mẽ kãm kapẽr o xa nẽ mẽ kãm:

—Nà kot paj nhỹrmã mẽ arũm ixkato nẽ ma akupỹm api. Ka mẽ tee ri ijapêr nom nhỹri ixpumunh kêt nẽ. Hãmri nẽ mẽ ate amnhĩ tomnuj o apa rãhã ty nẽ mẽ atõ ixwỳr axàpir kêt nẽ. Anẽ.

²² Hãmri nhũm Ijaew nhõ pahijaja tee ri ã kapẽr anhỹrja ã kuma nẽ axpẽn mã hã hpêr o pikẽnh o kuhê nẽ axpẽn mã:

—Kwa mãn ra kot amnhĩ pĩr kaxyw ã na ri hkõt mẽ paxàpir kêt ã mẽ pajarẽnh anẽ nà? Anẽ.

²³ Hãmri nhũm amnhĩ tã mẽ kuma nẽ mẽ kãm:

—Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamã mẽ pajamaxpẽr kot

axpẽn pyræk kêt. ²⁴ Kot kaj mẽ ixpê kaxkwa rũm ixwryk xwỳnh ã ixpumu nẽ amnhĩ kaxyw inhmã ajamaxpẽr nẽ ixkõt amnhĩ xunhwỳr kêt hã kot kaj mẽ ate amnhĩ tomnuj o apa rãhã nhỹrmã atyk o mẽ kamjaja Tĩrtũm mã amnhĩ pãnhã amnhĩre. Anẽ.

²⁵ Nhũm Jejus ã mẽ inhõ pahijê hkukamã mẽ kot amnhĩ nhĩpêx jarẽnh anẽ nhũm mẽ tee ri amnhĩ tã kuma nẽ kãm:

—Kwa mẽ atõ na ka we ri ã mẽ inhmã akapẽr anẽ? Anẽ.

Hãmri nhũm mẽ kãm:

—Nà ra ixte mẽ amã amnhĩ jarẽnh kẽnã. Xàn ka mẽ kormã aprĩ hã inhmar kêt nẽ?

²⁶ Kot paj nhỹrmã mẽ amã mẽ ate amnhĩ tomnuj piitã ho amnhĩrit pa. Na pa kot mẽ awỳr inhmẽnh xwỳnhhta pix xõ ri tanhmã mẽ amã ixkapêr to ho ri ixpa. ãm hãmri na hte tanhmã mẽmoj jarẽnh to. Na hte hẽx kêt nẽ. Anẽ.

²⁷ Nhũm pre ã Jejus mẽ kãm Hipêêxà kot mẽ hwỳr mẽnh ã harẽnh anhỹr tã no nhũm mẽ Hipêêxà kêp Tĩrtũm ã hkõt hamaxpẽr kêt nẽ. ²⁸ Jakamã nhũm mẽ kãm:

—Nà koja mẽ nhỹrmã pĩ kahpa hã inhõ ka mẽ rĩ kormã aprĩ hã ixpê Tĩrtũm rũm mẽ awỳr ixwryk xwỳnh ã ixpumu. Nẽ ixte amnhĩ krã hkõt ixkapêr o ri ixpa hkêt ã ixpumu. Nẽ ãm Inhĩpêêxà xõ ri ixprĩ hã ixkapêr o ri ixpa hã ixpumu. ²⁹ Ixte kãm hprãm xà hkõt pix mã tanhmã ri amnhĩ nhĩpêx to ho ri ixpa jakamã na hte ixtãnopxar mex o ixkõt pa ho pa. Koja aa ixkaga hkêt nẽ. Anẽ.

³⁰ Hãmri nhũm mẽ hkwỳja kuma nẽ hkwỳjê rom kapẽr kõt hamaxpẽr ³¹ nhũm amnhĩ tã mẽ omu nẽ mẽ kãm:

—Nà ãm hãmri na ka mẽ tã ixkõt ajamaxpẽr. Tã kêt ka mẽ ixkõt amnhĩ xunhwỳ nẽ ixkapêr kõt pix mã ri amnhĩ nhĩpêx mex o ri apa. Hãmri pa ja hã mẽ apumu nẽ mẽ apê ixkwỳ kumrẽx ã mẽ ajarẽ. ³² ãm hãmri na pa hte ã ixkapêr anhỹr o ri ixpa. Tã kot kaj mẽ ixkõt ri amnhĩ nhĩpêx o ri apa hãmri nẽ aprĩ hã inhmar tỳx nẽ. Nom na hte kormã mẽmoj kot amnhĩ tã mẽ ato htỳx pyræk o mẽ anhĩpêx ka mẽ tee ri amnhĩ krã hkõt kãm anhũrer prãm kaprỳ. Tã kot kaj mẽ ixkõt amnhĩ xunhwỳ nẽ ixkõt ri amnhĩ nhĩpêx hãmri nẽ Tĩrtũm nhỹ hã tãm amnhĩ

nhĩpêx. Jao ÿ hã ate amnhĩ tomnuj mã anhũre. Anê.

³³ Nhũm pre ã Jejus mẽ kãm kapêr anê hãmri nhũm mẽ tee ri kuma nê kãm:

—Kwa mẽ ixpê mẽ pahpâr krax finat Apraãw kanrêhã htãmnhwý kênã. Na pre mẽmoj te kot amnhĩ tã ho htýx pyræk o hipêx kêt nê. Jakamã mẽmo kot we mẽ ixpê hkanrêhã htãmnhwýjê ho htýx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

³⁴ Hãmri nhũm Jejus hprĩ hã mẽ kãm awjarê nê mẽ kãm:

—Kwa mẽ ixkapêr ma nê amnhĩ krãm haxâr týx nê. Nà mẽ kot amnhĩ tomnuj o mẽ pa xwýnhjaja te mẽ kot amnhĩ tomnuj tãm ri kot amnhĩ tã mẽ ho htýx pyræk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhÿr rãhã ho pa. ³⁵ Jakamã ixkĩnhã mẽ kêp Tĩrtũm kwý hkêt. No pa na ixpê Tĩrtũm Kra jakamã mããnên ixpê hkwy na pa. ³⁶ Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwý hã kot pa tanhmã mẽ ato ka mẽ ixpyrà nê apê wa ixkwýy. Hãmri nhũm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwýnhjê jarênh

³⁷ Nhũm Jejus arĩ mẽ kãm kapêr nê mẽ kãm:

—Nà ãm hãmri na ka mẽ apê finat Apraãw kanrêhã htãmnhwý hã amnhĩ jarê. Nom mẽ apê hkanrêhã htãmnhwý htã uræk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhÿx ã inhĩpêx anhÿr kêt nê. ³⁸ Na pa hte Inhĩpêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêxà hkôt amnhĩ nhĩpêx kêt nê. Anê.

³⁹ Hãmri nhũm mẽ tee ri amnhĩ tã kuma nê kãm:

—Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

—Nà. Mẽ ate hkôt ri amnhĩ nhĩpêx o apa ronhÿx ka mẽ uræk nê Inhĩpêxà kapêr kôt amnhĩ nhĩpêx. ⁴⁰ No na ka mẽ ra axtem nê ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhÿr o pa? Nà na pre ã mẽ hipêx anhÿr kêt nê. ⁴¹ Mẽ ate hkôt amnhĩ nhĩpêx xwýnhta axtem na. Kêp Apraãw kêt. Nê mããnên kêp Tĩrtũm kêt. Anê.

Hãmri nhũm mẽ tee ri kuma nê kãm:

—Tk. Kwa nà ã mẽ ijarênh anhÿr kêt nê. Mẽ ixte Apraãw kôt amnhĩ nhĩpêx xwýnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hãmri nhũm mẽ kãm:

—Nà mẽ ate Apraãw kôt amnhĩ nhĩpêx ronhÿx ka mẽ ixpumu nê uræk nê amã ixprãm nê. Apraãw kot hkôt amnhĩ nhĩpêx o pa xwýnhta tãm kot mẽ awÿr inhmên nhũm mẽ awÿr ixwryk kênã. Na pa pre amnhĩ krã hkôt man mẽ awÿr ixwryk kêt nê. Tãm na pre mẽ awÿr inhmẽ pa wrý. ⁴³ Kwa mon ka mẽ aprĩ hã ixkapêr mar mex kêt nê? Nà mẽ amã ixkôt amnhĩ nhĩpêx prãm kêt jakamã na ka mẽ tee ri ixkapêr ma nê aprĩ hã mar mex kêt nê. ⁴⁴ Mẽ ate hkôt amnhĩ nhĩpêx xwýnhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwýnhjê hpãm maati na. Nê kêp mẽ kãm hêx o pa xwýnhjê pãm maati na. ã kot amnhĩ nhĩpêx kot anhÿr. Nê kãm mẽ kapêr mex mar prãm kêt o pa. Nê ãm hêx pix o pa jakamã kêp mẽ hêx xwýnhjê pãm. ã kot amnhĩ nhĩpêx anhÿr xwýnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hãmri ixkapêr o ri ixpa. No mẽ kajaja mẽ apê hêx nhi xwýnh maati ja hkra jakamã mẽ amã ixkapêr mar prãm kêt. ⁴⁶ Xà na ka pre mẽ atõ ixte tanhmã amnhĩ tomnuj to hã ixpumu? Nà amrakati. Ixte amnhĩ to mex o ri ixpa xwýnh na pa. Nê tãm ixkapêr o ri ixpa xwýnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr nê ixkôt amnhĩ xunhwÿr kêt nê? ⁴⁷ Tĩrtũm krajaja na htem kapêr mar týx nê hkôt amnhĩ

nhīpêx o pa. No mẽ apê hkra hkêt jakamã mẽ amã kapêr mar prãm kêt. Anê.

Mẽ kot Jejus kêp Satanasti hkwȳ hã harênh

⁴⁸ Hãmri nhũm mẽ ã Jejus kot mẽ harênh anhÿrja ma nê kamã gryk tÿx kumrêx. Hãmri nê kãm:

—Tk. Kwa ate amnhĩ tomnuj o apa xwÿnhhti kênã. Ra Satanasti hkwȳ pê mẽkarômnuti tanhmã kot akrã hto jakamã na ka ã mẽ inhmã akapêr anê. Anê.

⁴⁹ Hãmri nhũm mẽ kãm:

—Nà mẽkarômnuti kot tanhmã ixto hkêt. Na pa hte Inhīpêêxã hã xpijaam pix o ri ixpa. Tã mẽ ate ixkĩnhã hã apijaam kêt jakamã mãânên pa ixtã apijaam kêt nê. ⁵⁰ Na pa hte amnhĩ krã hkôt mẽ piitã mẽ kot ixtã hpijaam prãm xaj tanhmã mẽ kãm ixkapêr to hkêt nê. No mẽ piitã mẽ kot ixtã hpijaam o paja na Inhīpêêxã kãm hprãm. Tã koja nhÿrmã amnhĩ nê ixtã mẽ hpijaam kêt xwÿnhjaja mẽ kot amnhĩ xà htÿx kamã hamak tũm xàta wÿr mẽ rênh pa.

⁵¹ —Nê kot ka mẽ atõ wa ixkapêr ma nê ixkôt amnhĩ nhīpêx. Hã kot kaj wa ixri atĩr tũm nê apa ho apa. Kwa mẽ ixkapêr ma nê amnhĩ krãm haxàr tÿx nê. Anê.

Nhũm pre ã Jejus Ijaew nhõ pahijê mã kapêr anê. ⁵² Nhũm mẽ kuma nê kãm:

—Kwa pêr ãm hãmri na ka hte Satanasti nhÿ hã ã mẽ htĩr tũm nê mẽ pa ho pa hã mẽ harênh anhÿr o ri axêx o ri apa. Finat Apraãw na pre ri paa nê ty. Tã mẽ kot Tĩrtũm nhÿ hã kapêr jarênh o mẽ pa xwÿnhjaja na prem urak nê ri paa nê mãânên htyk pa. Tã ka axtem nê mẽ kot akapêr kôt amnhĩ nhīpêx o mẽ pa xwÿnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa. ⁵³ Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhÿ hã kapêr jarênh xwÿnhjaja mãânên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã xpijaam pix prãm xaj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhÿr kaprÿ. Kot paj mẽ ri akapêr mar kêt nê. Anê.

⁵⁴ Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaam hprãm xaj tanhmã mẽ amã ixkapêr to hkêt nê. Kot paj anê nê ãm ixtÿx ã amnhĩ nhīpêx anhÿr kaprÿ. No Inhīpêêxã tãm kãm mẽ apiitã mẽ ate ixtã apijaam o apaja nhũm kãm hprãm. Mẽ ate Tĩrtũm kôt amnhĩ nhīpêx o apa hã amnhĩ to axêx xwÿnhhta tãm na kãm mẽ ate ixtã apijaamja nhũm kãm hprãm. Tã ka htem ã amnhĩ nhīpêx anhÿr kêt nê. Na ka htem ixkuk pumu nê axtem nê ixte Satanasti nhÿ hã mẽ amã ixêx o ri ixpa hã ijarê. ⁵⁵ Mẽ ate Inhīpêêxã hkôt amnhĩ nhīpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhīpêx mex o ri ixpa. ⁵⁶ Amnepêm mẽ pahpàr krax Apraãwja na pre mẽ awÿr ixwÿrk kukamã ijarênh ma nê mẽ arom inhÿ hã hkĩnh tÿx nê pa. Anê.

Nhũm pre ã Jejus mẽ kãm amnhĩ jarênh anê. ⁵⁷ Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tÿx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nê ate mẽ omunh nê mẽ harênh pyrak. Kwa akatàt kôt mẽ inhmã awjarê. Anê.

Jejus kêp rãhã ho rãhã xwÿnh ã harênh

⁵⁸ Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwÿnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tÿx nê. Anê.

⁵⁹ Hãmri nhũm mẽ tee ri kot ã amnhĩ jarênh anhÿrja ã kuma nê kamã gryk tÿx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwÿnh ã amnhĩ jarê? Tĩrtũm pix na rãhã ho rãhã pa xwÿnh. Anê.

Hāmri nē kamā gryk xàj kēn rūnh kwỳ kawrà ho ri hprôt nē kot ho htak o hpīr kaxyw. Nom nhūm ra amnhī tā mẽ omu nē mẽ kēp akunok nē Tīrtūm mā amnhī jarēnh xà hā ixkreja rūm kato nē ma tē.

9

Jejus kot no hkre xwỳnh o mex ã harēnh Makre 8.22-26

¹ Hāmri nhūm Jejus ma tē pa mẽ hkôt ri mẽ ixpa ho mẽ ixpa xwỳnhjaja ma hkôt mra. Hāmri nē nhỹri no hkre xwỳnh pumu. Katorxà nhōxà hkre rūm na pre no hkre nē kato. Hāmri nē ra hprēk nē hpri kamā àhwỳr o hkrī. ² Tā hāmri pa mẽ mra nē omu nē hā Jejus kukja nē kām:

—Kwa mẽmoj mỳrapê na pre we myti nēj no hkre nē kato? Xà tām kot tanhmā amnhī tomnuj to mỳrapê nà? Xà katorxà rỳ hipêêxà kot amnhī tomnuj mỳrapê na pre ã no hkre nē kator anē? Anē.

³ Hāmri nhūm mẽ inhmā:

—Nà mēhō kot tanhmā amnhī tomnuj to mỳrapê no hkre nē kator kêt. Ām Tīrtūm kot ho mex nhūm mẽ kot ja hā omunh kaxyw na pre ã no hkren kator anē. Tā kot paj Tīrtūm nhỹ hā no ho mex ka mẽ ja hā ixpumu. Na pa hte kormā jar pikap ri ixpa ri Tīrtūm mā tanhmā amnhī nhīpêx mex to ho ri ixpa. ⁴ Na htem arĩgro hā mẽmoj tā apê nhūm kamàt nhūm mẽ kām ure nē àpēnh kêt nē. Ja pyrà nē na pu htem kormā pahtīr ri jar pikap ri papa ri Tīrtūm mā tanhmā amnhī nhīpêx to ho ri papa. Tā kot puj mẽ nhỹrmā ty hāmri nē axte jar ã amnhī nhīpêx anhỹr kêt nē. Jakamā kwa kêr pu mẽ ri jar pikap ri papa ri kām tanhmā amnhī nhīpêx mex to ho ri papa. ⁵ Na pa hte ã kām amnhī nhīpêx anhỹr jao te kanê hirā mex pyrà nē ixprī hā mẽ kām Tīrtūm kot amnhī nhīpêx o amnhīrīt mex o ri ixpa. Anē.

⁶ Nhūm pre ã Jejus mẽ inhmā amnhī jarēnh anē. Hāmri nē kot nohkre xwỳnhhta no o mex kaxyw hikôt nē argôx mẽ nē ho gyw kwỳ nhīpêx nē kànhmā xa nē ho no kukō. ⁷ Hāmri nē kām:

—E ma gô gjēnh xà pē Siroe hwỳr tē nē kamā amnhī no kuhō. Anē.

Mẽ pakapêr kām Siroeja mẽ kot kām: “Nhỹhỹm mēnh xwỳnh” anhỹr jarēnh pyrāk. Tā nhūm Jejus hwỳr kumē nhūm

ma hwỳr tē. Hāmri nē kamā amnhī no hā gyw kuhōnh pa jao rīt mex kurê kumrêx. Hāmri nē rīt mex ã amnhī pumu nē hkīnh tỳx nē ma akupỹm òrkwỹ hwỳr tē. ⁸ Hāmri nhūm òrkwỹ kuri mẽ òrkwỹ xwỳnhjaja nē mẽ kot pry kamā ahwỳr o hkrī hā omunh xwỳnhjaja amnhī jaêr pē ra rīt mex ã omu nē tee ri hā axpēn kukja nē axpēn mã:

—Kwa pēr pry kamā àhwỳr o hkrī xwỳnhhta na nà? Anē.

⁹ Hāmri nhūm kamā mẽ hkwyjaja mẽ kām:

—Tỳ. Tām na. Anē.

Nhūm kamā mẽ hkwyjaja mẽ kām:

—Nà tām kêt. Axtem mēhō na. Te kot uràk nom tām kêt. Anē.

Anhỹr o ri axpēn mã harē. Tā nhūm tām mẽ kām amnhī jarē nē mẽ kām:

—Tỳ pa kēnā. Pa na pa pre hte inhno hkre nē ri ixpa htā ra ixrīt mex. Anē.

¹⁰ Hāmri nhūm mẽ tee ri kuma nē kām:

—Kwa no tanhmā na ka we amnhī to nē ra arīt mex?

¹¹ Anē nhūm mẽ kām:

—Nà mẽ kot kām “Jejus” anhỹr xwỳnhhta na ixwỳr tē nē ixkaxyw gyw kwỳ kagō nē ho inhno kukō. Hāmri nē mẽ kot gô mã: “Siroe” anhỹr xwỳnhhta kamā ixte amnhī no kuhōnh kaxyw hwỳr inhmā anē pa ma hwỳr tē nē kamā amnhī no kuhō nē ixrīt mex kurê kumrêx. Anē.

¹² Hāmri nhūm mẽ kuma nē kām:

—No nhỹhỹm na ato mex xwỳnhja ma tē? Anē.

Hāmri nhūm mẽ kām:

—Konēn. Ixte nhỹhỹm htēm xà hkôt omunhre hā. Anē.

¹³ Hāmri nhūm mẽ kuma nē ma Parijew nhō xwỳnhjê hwỳr o mō nē mẽ kām harē.

¹⁴ Nē mẽ kām:

—E ot pa mẽ awỳr jahti ho tē. Na xep Jejusja jarāhā akupỹm kām no ho mex. Mẽ panhō arĩgromnu htā nhūm hā no ho mex. Anē.

¹⁵ Hāmri nhūm mẽ tee ri mẽ kuma nē myta pumu nē kām:

—E mẽ inhmā amnhī jarē. Tanhmā na ka pre we amnhī to nē anohkre nē akrī htā ra ano mex nē? Anē.

Hāmri nhūm mẽ kām:

—Nà na pre Jejus gyw o inhno kukō nē inhmā anē pa gô ho amnhī no kuhō nē ixrīt kurê kumrêx. Anē.

¹⁶ Hāmri nhūm mẽ kuma nẽ tee ri Jejus ā axpẽn kukjêr o kuhê nẽ axpẽn mã harênh o:

—Kwa mẽ panhõ arĩgromnu hã kot ho mex jakamã kêp Tĩrtũm rũm mẽ pahwỳr wrỳk xwỳnh kêt. Ām kot amnhĩ tomnuj xwỳnh kênã. Anẽ.

Nhūm mẽ hkwỳjaja harênh o:

—Kwa nà. Kot amnhĩ tomnuj xwỳnh ronhỳx àhpumunh tỳx kôt no ho mex kêt nẽ. Anẽ.

¹⁷ Hāmri nẽ hpãnhã no mex xwỳnhhta mã kãm:

—No ka? Ate kot ano ho mex xwỳnh ã amnhĩ tã harênh jakamã mēhõ hã na ka hkamnhĩx? Mēhõ na wehe? Anẽ.

Hāmri nhūm mẽ kãm:

—Konên. Mãn kêp Tĩrtũm kapêr jarênh o ri mẽ pa xwỳnh mãn. Hã na ã inhno ho mex anẽ. Anẽ.

¹⁸ Hāmri nhūm mẽ tee ri kuma nẽ axpẽn mã:

—Kwa pěr aa nohkre hkêt kênã. Na pre ãm amnhĩ to hêx o pa. E kwa pu mẽ amnhĩ wỳr katorxà nẽ hipêêxà wa hã karõ kê wa man tẽ nẽ tanhmã mẽ pamã harênh to. Anẽ.

Hāmri nẽ wa hã karõ ¹⁹ nhūm wa mẽ hwỳr tẽn axà nhūm mẽ wa kãm:

—Pa. E mẽ inhmã mẽmoj jarê. Xà we wa akrata na ãm ja nà? Xà tãm na ka hte wa nohkre nẽ kator ã harê? Kwa tanhmã na we amnhĩ to nẽ ra rĩt mex? Anẽ.

²⁰ Hāmri nhūm wa mẽ kãm:

—Ỡy wa ixkra kênã. Na pre wa ixpê nohkre nẽ kato. ²¹ Tã ra tanhmã amnhĩ to nẽ ra rĩt mex. No wa ixte kot ho mex xwỳnhhta pumunh kêt. Kwa mẽ tãm mãn hkukja nẽ ama. Ra àptàr kênã. Kê tãm mãn mẽ amã tanhmã amnhĩ jarênh to ka mẽ ama.

²² Anhỳr o mẽ kãm wa hkrata jarê. No ãm wa kãm mẽ uma nẽ ã mẽ kãm kapêr anẽ nẽ mẽ kãm Jejus nhĩxi jarênh kêt nẽ. Na pre Parijew nhõ xwỳnhjaja ra Jejus nẽ mẽ kãm kapêr nẽ mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harê hāmri nẽ axte Tĩrtũm kapêr o mẽ ahkre xà hã ixkreja wỳr agjêx kêt kumrêx nẽ rĩ amnhĩ pumu.

²³ Anhỳr o nẽ mẽ hkurê jakamã nhūm wa mẽ umaj ã mẽ kãm hkra jarênh anẽ nẽ kot ho mex xwỳnh nhĩxi jarênh kêt nẽ. ²⁴ Hāmri

nhūm mẽ axte amnhĩ wỳr no mex xwỳnhhta ã karõ nẽ kãm:

—Kwa akatàt kôt mẽ inhmã amnhĩ jarê. Ate kot ano ho mex ã harênh xwỳnhhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarê nẽ axêx kêt nẽ. Anẽ.

²⁵ Hāmri nhūm mẽ kãm:

—Ko ixte ja hã omunh kêt. Ām ja pix na ixte omunh. Na pa pre inhno hkre nẽ ri ixpa htã ra ixrĩt mex nẽ. Anẽ.

²⁶ Hāmri nhūm mẽ tee ri kot amnhĩ jarênhja ã kuma nẽ kãm:

—No tanhmã na we mytita amnhĩ to nẽ amã ano ho mex? Anẽ.

²⁷ Hāmri nhūm tee ri axte mẽ kot hã hkukjêr ã mẽ kuma nẽ mẽ kãm:

—Kwa ra ixte mẽ amã ãm hāmri amnhĩ jarênh griã. Tã ka mẽ inhma nẽ ãm inhma nẽ arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ aprĩ hã ixkukja nà? Mẽ ate kot amnhĩ nhĩpêx ã aprĩ hã harênh mar nẽ hkôt amnhĩ xunhwỳr prãm xàj na ka mẽ aprĩ hã amã harênh prãm nẽ. Anẽ.

²⁸ Hāmri nhūm mẽ tee ri kuma nẽ kamã gryk nẽ. Nẽ hã kãm akir nẽ kãm:

—Tk. Ka na ka hte kapêr kôt amnhĩ nhĩpêx. No kêt mẽ pajaja na pa htem finat Mojes kapêr kôt pix mã amnhĩ nhĩpêx.

²⁹ Mojes mã na pre hte Tĩrtũm kapêr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harênh xwỳnhhta mẽ ixte omunh kêt. Nẽ mēhõ nhỹ hã kot tanhmã amnhĩ nhĩpêx to ho pa xwỳnhja mẽ ixte omunh kêt. Anẽ.

³⁰ Hāmri nhūm tee ri mẽ kuma nẽ mẽ kãm:

—Kwa kot inhmã inhno ho mex nhūm ra ixrĩt mex tã ka mẽ tee ri hkukamã ajamaxpêr nẽ mēhõ nhỹ hã kot ã amnhĩ nhĩpêx anhỳr o pa hã omunh kêt ã amnhĩ jarê. ³¹ Mẽ pahte Tĩrtũm kot amnhĩ nhĩpêx ã omunh mex. Koja mēhõ kot amnhĩ tomnuj xwỳnh mẽmoj tã kuwỳ nhūm kuma nẽ ãm kuma. No kêt mẽ kot hkôt ri amnhĩ nhĩpêx xwỳnhjaja. Nẽ mẽ kot kãm mex o mex ã harênh xwỳnhjaja na htem mẽmoj tã kuwỳ nhūm mẽ kuma nẽ mẽ kãm tanhmã mẽmoj nhĩpêx to rỳ mẽ kãm mẽmoj gõ. ³² Tã aa mẽ pahte mēhõ kot mẽ no ho mex ã harênh

mar kêt tâ nhũm ã Jejus inhmã inhno ho mex anê. ³³ Kêp Tirtũm kwỳ hkêt ronhỹx pre inhno ho mex kêt nê. Anê.

³⁴ Hãmri nhũm mẽ kuma hãmri nê kãm:

—Tk. Kwa pêr âm akator kôt ate amnhĩ tomnuj o ri apa htã na ka ã mẽ inhmã akapêr anê. Kwa ixkreja rũm akato nê ma atẽm kurê kumrẽx.

Anhỹr o kãm kapêr hãmri nê mẽ amnhĩ nê hano nhũm kato nê ma tẽ.

³⁵ Tã nhũm Jejus ra mẽ kot amnhĩ nê hanor ã harênh ma nê ma hapêr o tẽ nê nhỹri omu. Hãmri nê amnhĩ tâ hkukja nom te nhãm mẽhõ hã hkukjêr pyrã nê kãm:

—Pa? Xàn ka ra Tirtũm kot mẽ awỳr mẽn h xwỳnhhta amnhĩ kaxyw hkôt aja-maxpêr nà? Anê.

³⁶ Hãmri nhũm kormã kot no ho omunh kêt jakamã kêp Jejus ã omunh kêt nê. Na pre kormã no hkre nê âm kapêr pix ma. Tã ra akupỹm rĩt mex nom kormã no ho omunh kêt nê. Jakamã nhũm Jejus hwỳr tẽ nê ã kãm kapêr anê nhũm omu nê kormã kêp Jejus ã omunh kêt nê kãm:

—Tỳ kot kaj inhmã ahkre pa omu nê hkôt amnhĩ xãm kurê kumrẽx. Anê.

³⁷ Hãmri nhũm kãm:

—Kwa paa. Ixte amã ixkapêr xwỳnhhta pa na pa. Anê.

³⁸ Hãmri nhũm kãm:

—Kwa xõwehe Pahihti? Nà kot paj amnhĩ kaxyw akôt pix mã ijamaxpêr nê akôt pix mã amnhĩ nhĩpêx o ri ixpa. Anê.

Hãmri nê kutã hkõn krã ho tẽm nê nhỹ nê kãm mex o mex ã harênh o nhỹ. ³⁹ Hãmri nhũm Jejus kãm:

—Nà ixte mẽ apiitã tanhmã mẽ ajarênh to kaxyw na pa pre kaxkwa rũm mã mẽ awỳr wrỳ. Ahpỹnhã mẽ amã ixprãm xwỳnhjê jarênh nê ahpỹnhã mẽ kãm ixprãm kêt xwỳnhjê jarênh kaxyw. Mẽ kãm ixprãm kêt xwỳnhjaja kot hprĩ hã Tirtũm kapêr mar mex kêt tâ na htem htỳx ri kot mar mex ã amnhĩ jarênh o pa. Jakamã te mẽ nohkre xwỳnhjaja kot amnhĩ nhĩpêx pyrãk. Nom koja mẽ Tirtũm kapêr ma nê ixkôt amnhĩ xunhwỳr japêr. Hãmri nê te ra rĩt mex pyrãk o amnhĩ nhĩpêx. Jao ra hprĩ hã Tirtũm kapêr mar mex o pa. Anê.

⁴⁰ Nhũm pre ã Jejus kãm kapêr anê. Nhũm Parijew nhõ xwỳnh kwỳjaja kot kuri mar o

kuhê xwỳnhjaja ã kapêr anhỹr ã kuma nê amnhĩ tâ kãm:

—Kwa nà. Xà we mẽ pajaja na ka ã mẽ inhnohkre hã mẽ ijarênh anê? Xà mẽ ixte ixprĩ hã Tirtũm kapêr mar mex kêt ã na ka mẽ ijarê nà? Anê.

⁴¹ Hãmri nhũm mẽ kãm:

—Ỗy kop apu mẽ ate aprĩ hã kapêr mar mex kêt ã amnhĩ jarênh ronhỹx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tỳx nê. Na hte Tirtũm ja hã mẽ apumu nê amnhĩm mẽ ate amnhĩ tomnuj xwỳnh ã mẽ ajarê. Anê.

10

ôwêhti jarênh

Matêwre 9.36, 12.11-12; Rukre 15.3-7

¹ Nhũm Jejus arĩ Ijaew mã kapêr nê mẽ kãm:

—E pa mẽ amã awjarê ka mẽ inhma nê amnhĩ krã him haxàr tỳx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwỳnhjaja ôwêhti apkur kaxyw mẽ o pa hãmri nhũm kamãt nhũm akupỹm kahê hwỳr mẽ o pa. Kahê jakwakreja âm pixii. Tã koja mẽhõ kahê xà hkôt hwỳr àr kêt nê axtem nê tẽ nê nhỹhỹnh kahê hã api nê ôwêhti hwỳr àr japêr nhũm mẽ omu nê kot hkwy ho àhkĩnh ã omunh kurê kumrẽx.

² —No ôwêhti jamãr o pa xwỳnhja na hte mẽ kurom katãt kôt kahê jakwakre rũm ôwêhti hwỳr agjê. ³ Nhũm kahê xà jamãr xwỳnhja amnhĩ wỳr omu nê kãm kahê xà rênh kurê kumrẽx nhũm axà. Na hte apkati mẽ ma nhỹhỹm apkur kaxyw mẽ o pa. Nê nojarêt nê mẽ kãm akir. Ahpỹnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwỳr mra nê hã pikuprõnh pa nhũm mẽ ho hapôj nê ma nhỹhỹm ri mẽ apkur kaxyw mẽ o pa. ⁴ Ma mẽ apkur kaxyw nhỹhỹm mẽ o pa. Nhũm ôwêhti ra kot kapêr mar mex jakamã ma àmnhĩx ri hkôt apkur o pa.

⁵ —Na hte hamãr o pa xwỳnh pix kapêr ma nê hkôt pa nê nhãm mẽhõ hkôt ri pa hkêt nê. Kot kapêr mar kêt jakamã tee ri kuma nê umaj axkahkũm nê hprõt nê ma mra. Na hte ôwêhti ã amnhĩ nhĩpêx anê. Anê.

Jejus te kēp ôwēhti gjēnh xà hã hakwakre pyrāk

⁶ Nhūm pre ā Jejus mē kām ujarēnh anē. Nē ujarēnhja kamā amnhī kwýjê jarē nē mǎānēn tām amnhī jarē. Nom mē amnhī tā kuxi nē mē kām amnhī jarēnh o te ho ôwēhti jarēnh pyrāk nhūm mē tee ri kuma nē mar mex kêt nē. ⁷ Jakamā nhūm axte mē kām awjarē nē mē kām:

—E pa ixprī hã mē amā ixujarēnhhta jarē ka mē inhma. Te ixpê ôwēhti jagjēnh xà hã hakwakre pyrāk. Kwa mē ja ma nē amnhī krā him haxàr týx nē. ⁸ Na pre ra ixkukamā mē ohtô nē te ām hāmri mē amā Tirtūm kapēr jarēnh pyrāk o mē akôt ri pa. Nom mē amā hēx o pa. Te mē kot ôwēhti o àhkīnh xwýnhhta kot amnhī nhīpēx pyrāk. Nom na hte ôwēhtija ām hamār xwýnh pix kapēr ma nē nhām mēhō kapēr mar kêt nē. Ja pyrā nē mē kot ixkôt amnhī xunhwýr xwýnhjaja na htem Tirtūm kapēr o hēx o mē pa xwýnhjê ma nē ām mē kuma nē mē hkôt amnhī nhīpēx kêt nē. Na htem ām ixkapēr pix ma nē ixkôt pix mā amnhī nhīpēx o pa.

⁹⁻¹⁰ —Te ixpê ôwēhti gjēnh xà hã hakwakre pyrāk. Na hte ôwēhti mēmoj punuj pymaj kahē hwýr agjê nē kamā mex nē kuhē. Nē kurūm hapôj nē ma apkur o pa. Ja pyrā nē mē kot ixkôt amnhī xunhwýr xwýnhjaja koja mē ixkukwak ri hkīnh nē mex nē hamakêtkati nē pa ho pa. Nē nhýrmā Tirtūm mē wa ixri htír tūm nē pa ho pa. Ja kaxyw na pa pre man mē awýr pika hwýr wrý.

—No ôwēhti ho àhkīnh xwýnhjaja na htem amnhīm ho ahkī nē kupa nē ma amnhīm o pa. Tā mē kot Tirtūm kapēr o hēx o mē pa xwýnhjaja te mē kot jajaja kot amnhī nhīpēx pyrāk. Anē.

*Jejus te kēp ôwēhti jamār xwýnh pyrāk
Eprêw 13.20; Apokarip 7.17*

¹¹ —Nē ôwēhti jamār mex xwýnhja koja nhýri mēhō kēp ôwēhti hōxpīr kaxyw hwýr htēm ā omu nē wa hã axpu. Nhūm ho àhkīnh mā xwýnhhta ôwēhti jamār xwýnh pī nhūm ôwēhti nē ty. Tā ixkwýjaja hamakêtkati nē mex nē pa kaxyw na pa pre amnhī grōnh kôt mē hwýr wrý. Jakamā kot paj te ôwēhti jamār xwýnh kot amnhī nhīpēx pyrāk o amnhī nhīpēx.

¹²⁻¹³ —Nē na htem tōhã ôwēhti jamār xwýnh nhýhým pa kaxyw nē mēhō mā amnhīre nhūm wakre kamā kām hkrit jamār o pa. Kàxpore pix prām xàj kām hamār o pa. Jakamā koja nhýhýnh mry xoprê ra hwýr kato nhūm amnhī wýr omu nē umaj ôwēhti re nē ma hprôt nē tē. Kām ôwēhti japê hkêt ām kām htír pix prām xàj ôwēhti mā hamaxpēr kêt nē rer pa nē ma tē. Nhūm mry xoprêta ôwēhti hwýr hprôt nē hkwy pyné nhūm hkwy umaj axkahkūm nē hprôt nē ma mra. No kêt pa na te ixte ôwēhti mā hamaxpēr kêt nē kot rer nē ma hprôt nē htēm xwýnhhta pyrāk kêt. Kot paj aa ixkwýjê rer kêt nē. Kot paj mē hkôt ixpa ho ixpa rāhã nē.

¹⁴⁻¹⁵ —Te ixte ôwēhti jamār xwýnh mex pyrāk jakamā na pa hte urāk nē ahpýnhã mē kot ixkôt amnhī xunhwýr xwýnhjê pumunh mex o ri mē hkôt ixpa. Te mē kēp ixkrit ôwēhti pyrāk nhūm te ixpê mē hamār mex o ri mē hkôt ixpa nē aa mē rer kêt xwýnhhta pyrāk.

—Nē mē kot ixkôt amnhī xunhwýr xwýnhjaja ra mē ixte amnhī nhīpēx kôt axpēn pumunh mex. Nē mē inh mā axpēn japêê. Te Inhīpêêxà mē wa inh mā axpēn japê pyrāk. Tā kot paj nhýrmā mē nē tanhmā amnhī nhīpēx to.

¹⁶ —Mē kot ixkôt amnhī xunhwýr xwýnhjaja piitā kēp Ijaew pix kêt. Koja Ijaew kêt xwýnh kwýjaja mǎānēn ixkapēr ma nē ixkôt amnhī xunhwýr nē ixkôt amnhī nhīpēx. Jao ra te kēp ixkrit ôwēhti pyrāk. Tā kot paj mē ho ixpimràa tā mē ho tipxi nē mē hamār o ri mē hkôt ixpa.

¹⁷ —Nē mē kot ixkôt amnhī nhīpēx o mē pa xwýnhjaja mē mex kaxyw na pa pre amnhī grōnh kôt mē hwýr wrý. Jakamā kot paj nhýrmā mē nē ty. Tā inh mā mē nē ixtyk puma hkêt jakamā na Inhīpêêxà kām ijapêê. Koja akupým ixto ixtír. ¹⁸ Kop apu inh mā mē nē ixtyk prām kêt ronhýx mē kām ixkurê xwýnhjaja tee ri kām ixpīr prām kaprý. Nom ixte mē kot ixkôt amnhī nhīpēx xwýnhjê nē amnhī grōnh kôt mē hwýr ixwrýk kēnā. Jakamā kot paj arī mē kām amnhī grōnh kôt amnhī gō nē arī mē kām xa nhūm mē ixpī. Nom kot paj akupým ixtír. Mēhō koja tanhmā ixto nē ixpīr o ixpī?

Nà koja mēhō ixpīr o ixpīr kēt nē. Inhīpēêxà nhỹ hã kot paj nhỹrmã ã amnhĩ nhīpêx anē nē akupỹm ixtīr. Anē.

Nhũm pre ã Jejus mē kãm amnhĩ jarēnh anē. ¹⁹ Hãmri nhũm Ijaew tee ri ã kot amnhĩ jarēnh anhỹr ã kuma nē kê axte axpēn kwỹm ri tanhmã harēnh to ho kuhê. ²⁰ Nē kamã mē hkwỹjaja harēnh o:

—Tk. Kwa mē mar kēt nē. Satanasti nhỹ hã na hte htỹx ri ã mē pamã amnhĩ jarēnh anhỹr o pa. Anē.

²¹ Hãmri nhũm mē hkwỹjaja mē kuma nē mē kãm:

—Nà kot anhỹr kēt. Xà na htem Satanasti nhỹ hã ã kapēr mex anē nē ã mē no hkre xwỹnhjê ho mex anē? Nà kot anhỹr kēt. Satanastija ukapřire hã. Anē.

Ijaew nhõ pahijaja kot Jejus kaga hã mē harēnh
Juãw 5.18, 8.59

²² Tã nhũm ra amgrà hapêx pa mē ixpê Ijaew akupỹm krī pē Jerujarē kamã axpēn wỳr akuprō. Axte mē ixte mē ixkĩnh kaxyw axpēn wỳr akuprō. Amnepēm mē inhīgêtjaja kot akupỹm Tĩrtũm mã amnhĩ jarēnh xà hã ixkre ho mex pa nē ho Tĩrtũm wỳr mã hamaxpēr nē hã ixkĩnh ã arĩgroja ã pa mē hwỳr akuprō. ²³ Hãmri nhũm Jejus ma mē ixkôt Tĩrtũm mã amnhĩ jarēnh xà hã ixkreta wỳr tē no ãm hwỳr àr kēt nē. ãm ixkre hpu hã kahê xà kape hã ri pa. Mē kot kãm: “Pahi finat Sarumãw pa xà” anhỹr xwỹnhta kamã ri pa. ²⁴ Hãmri nhũm kê ra mē inhõ pahijaja omu nē hã akuprō nē hêx rom kãm kapēr nē kãm:

—Kwa tokyx aprĩ hã mē inhmã amnhĩ jarē. Xà apê Tĩrtũm Kra na ka nà? Xà ka na pre Tĩrtũm mē ixkaxyw axãm? Kwa aprĩ hã mē inhmã amnhĩ jarē pa mē ama. Mon ka hte aprĩ hã mē inhmã amnhĩ jarēnh kēt nē? Na pa mē tee ri ate amnhĩ nhīpêx ã apumu nē akukamã ijamaxpēr rũnh kumrêx o ri ixpa. Xà ãm hãmri apê Tĩrtũm kot mē ixkaxyw axãm xwỹnhta na ka? Anē.

²⁵ Hãmri nhũm mē kãm:

—Tk. Ra ixte mē amã amnhĩ jarēnh xohtô htã ka mē inhma nē ãm inhma. Na pa hte xatã Inhīpēêxà nhỹ hã mē amã mē ate aa mēmoj pumunh kēt kwỹ ho anhỹr

o ri ixpa ka mē ja hã ixpumu nē ãm ixpumu nē ixkôt ajamaxpēr kēt nē. ²⁶ Mē apê ixkwỹ hkêt jakamã na ka mē ixkôt ajamaxpēr kēt nē. Te mē apê ixkrit ôwêhti pyrãk kêt. ²⁷ Ixkwỹjaja na te ho ôwêhti kot hamãr xwỹnh kapēr mar nē hkôt ri pata pyrã nē ixkapēr ma nē ixkôt amnhĩ nhīpêx o pa. Ixpê mē õ pahihiti hã mē kot ixpumunh mex jakamã na htem ixkôt amnhĩ nhīpêx mex o pa. Ixte ja hã mē omunh mex nē. ²⁸ Koja mē nhỹrmã htyk tã no ãm ixkukwak ri akupỹm htĩr hãmri nē Tĩrtũm mē wa ixri htĩr tũm nē pa ho pa nē aa hapêx kēt nhũm mēhō ixpê mē utãr kēt nē. Te inhĩkra hpo nhīpôk ri mē hkrĩ nhũm te mē hã inhĩkra pikamỳr pyrãk nhũm mēmoj tee ri ixpê tanhmã mē ho hprãm kaprỹ. ²⁹⁻³⁰ Inhīpēêxà tãm kot inhmã mē õr kênã. Hihtỹx o kot mē piitã mē hakrenh par jakamã koja mē inhĩkra po nhīpôk ri hkrĩ nē mããnēn Inhīpēêxà nhĩkra hpo nhīpôk ri hkrĩ. Te ixpê Inhīpēêxà Tĩrtũm pyrãk jakamã mēhō kot wa ixpê wa inhĩkra rũm mē utã? Nà amrakati kumrêx.

Anhỹr o mē kãm amnhĩ jarē. ³¹ Hãmri nhũm mē te kêp Tĩrtũm pyrãk ã amnhĩ jarēnh ã kuma nē kamã gryk tỹx nē. Hãmri nē kot kên o htak kaxyw ra kaxyw hkwỹ kawrà ho ri hprôt. ³² Hãmri nhũm amnhĩ tã mē omu nē mē kãm:

—Kwa ra ixte Inhīpēêxà nhỹ hã mē amã aa mē ate mēmoj pumunh kēt kwỹ ho anhỹr rax o ixpa. Jao tanhmã mē ho mex to pix o ri ixpa. Tã ka mē axtem nē ã inhīpêx anhỹr kaxyw. Anē.

³³ Hãmri nhũm mē kãm:

—Nà ã ate amnhĩ nhīpêx anhỹr ja mỳrapê hkêt. Kêt apê mē inhĩõ htã ri axtem nē te apê Tĩrtũm pyrãk ã amnhĩ jarēnhja mỳrapê na pa mē kên o atak kaxyw. Na pu htem ã amnhĩ jarēnh anhỹr o papa hkêt nē. Anē

³⁴ Hãmri nhũm mē kãm:

—No ãm hãmri ixte ã amnhĩ jarēnh anhỹr kênã. Tanhmã na Tĩrtũm kapēr ã kagã htũm kot ja jarēnh to wehe? Na pre Tĩrtũm Ijaew nhõ pahijê mã kapēr nē mē kãm:

E mē ate inhỹ hã mē ho amnhĩptãr jakamã te mē apê pa ixpê Tĩrtũm pyrãk.

Anhỹr o kot mē harēnh. ³⁵ ãm hãmri na Tĩrtũm kapërja. Tãm kot ã mē harēnh kot anhỹr. Mē kot ÿ hã mē kãm kapēr jakamã

te mẽ kêp uràk ã mẽ harênh anhÿr kênã. ³⁶Tã tãm kot ã mẽ harênh anhÿr tã hpãnhã mẽ akaxyw pa ixpê Kra hã ixãm nê mẽ awÿr inhmênh nhũm ixwÿk nê ixpê Kra hã amnhĩ jarênh tã ka mẽ ja hã inhma nê ãm inhma nê ixkôt ajamaxpêr kêt nê. Kwa mon ka mẽ ja hã ixpumunh nê ixkôt ajamaxpêr kêt nê? ³⁷Kot paj Inhĩpêêxà mẽ wa ixãhpumunh kôt mẽ amã aa mẽ ate mẽmoj pumunh kêt kwÿ ho anhÿr kêt ka mẽ ja hã ixpumu nê mẽ rĩ kam nê mãmri ixkôt ajamaxpêr kêt nê. ³⁸Mẽ amã ixkapêr mar prãm kêt tã kwa ixte Tĩrtũm pyrã nê aa mẽ ate mẽmoj pumunh kêt kwÿ ho anhÿr ã ixpumu nê Inhĩpêêxà mẽ wa ixte amnhĩ nhĩpêx tipxi hkôt ajamaxpêr. Anê.

³⁹Hãmri nhũm mẽ kuma nhũm ja mẽ kêp omnuj tÿx nê. Te kot Tĩrtũm pyrãk ã amnhĩ jarênhja nhũm mẽ kêp omnuj nê. Jakamã nhũm mẽ ra kot unênh nê ixkre rũm ho kator nê kapôt ã mênh nê kên ho htak kaxyw nhũm kê axte mẽ kêp akunok nê ma nhÿhÿm tẽ.

Jejus kot Jotãw nhĩhkjê hã ri pa hã harênh

⁴⁰Tã nhũm Jejus ma tẽ nê pyhti pê Jotãw ã rê. Pa mẽ hkôt ri ixpa ho ixpa xwÿnhjaja ma hkôt mō. Finat Juāw Paxis kot Tĩrtũm mã wam mẽ hkrã kumrãr o pa xàta wÿr. ⁴¹Hãmri nhũm mẽ ohtô nê mẽ ixwÿr mra nê Jejus kapêr ma nê kot tanhmã amnhĩ nhĩpêx to hã omunh o kuhê. Hãmri nê hã tanhmã axpên mã kapêr to nê axpên mã:

—Kwa ãm hãmri na pre finat Juāw Paxisja mẽ pamã Jejus jarênh o pa. Aa kot mẽ pamã mẽ pahte mẽmoj pumunh kêt kwÿ ho anhÿr kêt tã ãm xatã hkukamã mẽ pamã harênh o pa. Kêp Tĩrtũm Kra hã Juāw rom hihtÿx o hihtÿx ã harênh o pa. Nê Tĩrtũm kot mẽ pakaxyw ãm xwÿnh ã nhũm mẽ pamã harênh o pa. Nã ãm hãmri na pre ã mẽ pamã harênh anê. Anê.

⁴²Hãmri nhũm mẽ ohtô nê amnhĩ kaxyw Jejus kôt hamaxpêr nê hkôt amnhĩ xunhwÿ.

11

Rajare htyk jarênh

Juāw 5.21-29, 6.40

¹Rôm nhũm krĩ pê Petãn kamã mẽhō my pê Rajareja ra à htÿx nê nō. Na pre htōx

wa hamêxkrut. Hō kêp Matre nhũm hō kêp Marir. ²Marir na pre kormã arĩgro hō hã kot Jejus o mex kaxyw mẽ hkuxwaxà ho hkuxwa nê amnhĩ kĩ ho hpar pōnh kaxyw. Nom kormã. Jakamã nhũm wa hkamyja wa kêp à htÿx nê nō. ³Hãmri nhũm wa tee ri hkukamã hamaxpêr nê ma krĩ hō hwÿr Jejus wÿr mẽhō mẽ nhũm ma hwÿr tẽ. Nê hwÿr pōj nê omu nê kãm:

—Pa Pahiti. E ot pa awÿr tẽ. Na ra amã akrãmnhwÿ japê htÿx xwÿnhãtã à htÿx nê nō nhũm htōx wa tee ri hkukamã hamaxpêr nê awÿr inhmê pa tẽ. Kwa tokyx pu ma hwÿr tẽ ka akupÿm wa kãm ho mex nã? Anê.

⁴Hãmri nhũm kuma nê kãm:

—Nã à htÿx nê nōr tã koja akupÿm mex. Mẽ kot akupÿm mex ã harênh mar hãmri nê Tĩrtũm mẽ wa ixtã hpijaãm nê wa ixihtÿx o wa ixihtÿx ã wa ixpumunh kaxyw na ã à htÿx nê nōr anê. Nê pa ixpê Tĩrtũm Kra hã akupÿm ho mex ã ixpumunh nê ixkôt hamaxpêr kaxyw na ã à htÿx nê nōr anê. Anê.

⁵Na pre Jejus kãm Rajare mẽ htōx wa mẽ hapê nê. ⁶Tã à htÿx ã harênh ma nê hwÿr mōr tokyx anhÿr kêt nê. Pa mẽ arĩ amnhĩm hikranh xà kamã ri ixpaja o ixtã axte apkati axkrut. ⁷Hãmri nhũm rĩ kormã hwÿr nojarêt nê mẽ inhmã:

—E ma pu mẽ jarãhã akupÿm Jutej kamã Rajare hwÿr mō nê omu. Anê.

⁸Hãmri pa mẽ tee ri ja hã kuma nê kãm:

—Kwa ham mẽ panhō pahijaja kot kên o atak o apĩr mã tã ka ra akupÿm mẽ hwÿr akra. Kwa pu mẽ hwÿr pamōr kêt nê nã? Anê.

⁹Hãmri nhũm mẽ inhmã:

—Nã koja mẽ kormã tanhmã ixto hkêt nê. Kormã ixte Tĩrtũm mã tanhmã amnhĩ nhĩpêx to jatur xãm mênhre hã. Te ixte kormã arĩgro hã ixrit mex nê ixpa pyrã nê kormã Tĩrtũm kot mẽmoj tã inhmã karō xà hkôt pix mã tanhmã amnhĩ nhĩpêx to ho ri ixpa. ¹⁰Tã kot paj hatur xãm kumẽ nhũm te myt àr nhũm ra kamãt kô pyrãk nhũm mẽ rĩ kormã tanhmã ixto nê ixpĩ. Jakamã e ma pu mẽ hwÿr. Koja mẽ tokyx tanhmã ixto hkêt nê. Anê.

¹¹Hãmri nê mẽ inhmã Rajare jarênh o:

—Na mẽ pahkràmnhwỳ Rajareta ra gõr nẽ nõ. Tã kot puj mẽ ma hwỳr mõi pa kumra. Anẽ.

¹²⁻¹³ Ra htyk ã omunh tã ã mẽ inhmã harẽnh anẽ. Pa mẽ kuma nẽ ixtỳx ho ãm õt nẽ nõr ã hkamnhĩx nẽ kãm:

—Kwa mãn ra akupỹm amnhĩ kãm hamak o mõi jakamã na ra amnhĩ krit nẽ gõr nẽ nõ. Kwa pu mẽ awjanã nẽ hwỳr pamõi kêt nẽ nà? Anẽ.

¹⁴ Hãmri nhũm mẽ inhma nẽ hprĩ hã mẽ inhmã harẽ nẽ mẽ inhmã:

—Nà na pre ty. ¹⁵ Nom kormã à nẽ hikwỳta ã na pa hwỳr inhmõi kêt nẽ. Tã kot paj ma hwỳr mõi nẽ hã mẽ amã ixàhpumunh tỳx ã amnhĩ to amnhĩrĩt. Ka mẽ ja hã ixpumu nẽ amnhĩ kaxyw ixkõt ajamaxpẽr tỳx o ri apa. ã mẽ ate amnhĩ nhĩpẽx anhỹr kaxyw na pa kormã à nẽ nõr ã hwỳr inhmõi kêt nẽ. E ma pu mẽ hwỳr. Anẽ.

¹⁶ Hãmri nhũm mẽ inhĩõ pẽ Tomas pihpohti tee ri ã kapẽr anhỹrja ã kuma nẽ mẽ inhmã:

—Tõe ma pu mẽ hkõt. Kẽ mẽ mamrĩ hkõt mẽ pahto hpimràatã mẽ panhĩmex pa ri. Anẽ.

¹⁷ Tã pa mẽ ma hkõt mẽ hwỳr mõi nẽ ra Rajare nhõ krĩ hwỳr ixpõx o mõi hãmri nẽ harẽnh ma. Ra htyk nhũm mẽ kot haxàr ã arĩgro pẽ kwat ã harẽnh ma. ¹⁸⁻¹⁹ Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarẽ rũm ma wa hwỳr mra. Mẽ kot wa kãm kapẽr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pẽ Petãnja Jerujarẽ hwỳr ãm 3 kirõm pix jakamã nhũm mẽ ma wa hwỳr mra nẽ wa kuri wa kãm kapẽr o hkrĩ. ²⁰ Rõm nhũm Matre Jejus hpõx o mõi ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkõt htẽm kêt nẽ. ²¹ Hãmri nhũm Matre mẽ ixkutã tẽ nẽ mẽ ixkaxpa nẽ Jejus pumu nẽ mỳr kamã kãm kapẽr nẽ kãm:

—Hẽxta gàa nẽ Pahihti. Na pre ra wa ixkamy wa ixpẽ ty. Kop apu jar mẽ ixkõt ri apa ronhỹx pre htyk kêt nẽ. Xẽ mon ka pre we tokyx mẽ ixwỳr atẽmre hkêt nẽ? ²² Tã na pa arĩ akõt ijamaxpẽr tỳx nẽ. Kot kaj mẽmoj tã tanhmã Tĩrtũm wỳr to nhũm ama

nẽ tanhmã amã mẽmoj to. Ra ixte ja hã apumunh mex kẽnã. Anẽ.

²³ Hãmri nhũm Jejus kuma nẽ kãm:

—Kwa tee ri ajamaxpẽr nẽ akaprĩ hkêt nẽ. Koja akamy akupỹm war amã htĩr kãm ga. Anẽ.

²⁴ Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jejus kot akupỹm ho htĩr tokyx anhỹr ã hkamnhĩx kêt nẽ ã kãm kapẽr anẽ.

²⁵⁻²⁶ Jakamã nhũm kãm:

—Nà pa na ixpẽ akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkõt hamaxpẽr nẽ ixkõt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa. Xà ate ja kaxyw ixkõt ajamaxpẽr tỳx nà? Anẽ.

²⁷ Hãmri nhũm Matre kuma nẽ kãm:

—Xẽ nhũm. Apẽ Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jejus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kẽ tokyx man ixwỳr tẽ pa omu. Anẽ.

²⁸ Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jejus jarẽ. Kõt mẽ hkrĩ xwỳnhjẽ hkàx ã kãm harẽ nẽ kãm:

—An xẽ hãmri amỳr kêt nẽ. Na ra mẽ pajahkre xwỳnhhta hpõx o mõi nẽ mũtar nhỹ nẽ atã karõ. Anẽ.

²⁹ Hãmri nhũm kuma nẽ kànhmã xa nẽ ma mẽ ixwỳr htẽm kurẽ kumrẽx. ³⁰ Hãmri pa mẽ kormã krĩm ixpõx kêt nẽ. Arĩ Matreja Jejus wỳr htẽm xà kamã arĩ ixkrĩ.

³¹ Jakamã nhũm Matre ma tẽ nẽ Marir mã Jejus jarẽ nhũm kato nẽ man mẽ ixwỳr tẽ. Hãmri nhũm Jerujarẽ rũm wa hwỳr mẽ mrar xwỳnhjaja omu nẽ htỳx kot hkamy hã pika pumunh nẽ mỳr kaxyw htẽm ã hkamnhĩx nẽ man hkõt mra. ³² Hãmri nhũm Marir mẽ hkukamã mẽ ixwỳr tẽ nẽ Jejus pumu nẽ hpar pẽ tẽm nẽ kãm kapẽr pẽ hipõ nẽ mỳr o nhỹ. Nẽ kãm:

—Hẽxta gàa nẽ Pahihti. Na pre ra wa ixkamy wa ixpẽ ty. Kop apu jar mẽ ixkõt

ri apa ronhỹx pre htyk kêt nê. Hô mon ka pre we tokyx man mẽ ixwỳr atêmre hkêt nê? Anê.

³³ Hãmri nhũm Jejus kuma nê mỳr ã omu. Nê hkôt mẽ mrar xwỳnhjaja mẽ mỳr ã mẽ omu nê kãm mẽ hkaprĩ nê. ³⁴ Hãmri nê mẽ kãm:

—Nhỹri na ka prem haxà? E mẽ hwỳr ixto tẽ pa omu. Anê.

Hãmri nhũm mẽ kuma nê ma hã pyka hwỳr mẽ ixto mỗ ³⁵ nhũm Jejus mẽ urák nê hwỳr mỳr o tẽ ³⁶ nhũm mẽ ja hã omu nê xypẽn mã:

—Kwa mãn kãm hapê htỳx. Hã na ho ama nê hwỳr mỳr o tẽ. Anê.

³⁷ Nom nhũm mẽ hkwỳjaja axtem nê mẽ kãm:

—Tk. Ra kot no hkre xwỳnhta o mex tã mo na we tokyx man kormã htĩr ri hwỳr htêm nê omunh nê akupỹm ho mex kêt nê? Anê.

Jejus kot akupỹm Rajare ho htĩr ã harẽnh

³⁸ Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nê hwỳr tẽ nê omu. Nhũm prem ra kẽn rax o hitom ³⁹ nhũm omu nê mẽ kãm:

—E mẽ akwỳjaja nhãm inhmã nê kahê xà mẽ. Anê.

Hãmri nhũm Matre kuma nê tee ri hamaxpěr nê kãm:

—Xê ma Jejus. Mẽ ri ã anhỹr kêt nê. Ra htyk ã arĩgro kệp 4 kẽnã. Mãn ra hkatøk nê hkro htỳx kumrẽx. Anê.

⁴⁰ Hãmri nhũm kuma nê kãm:

—Kwa ri ã ajamaxpěr anhỹr kêt nê Matre. Na pa ra amã ixkapěr nê amã ixkapěr o: “Kot kaj amnhĩ kaxyw ixkôt ajamaxpěr tỳx nê. Hã kot kaj Tĩrtũm mẽ wa ixihitỳx o wa ixihitỳx xàja pumu.” Anhỹr o amã ixkapěr. Jakamã kwa ja kaxyw Tĩrtũm mẽ wa ixkôt mãn ajamaxpěr tỳx nê hkêt wehe. Anê.

Hãmri nhũm kuma nê kãm:

—Ma ãm hãmri na ka inhmã akapěr. Ma kot paj kaxyw war amã ijamaxpěr tỳx nê. Anê.

⁴¹ Rôm nhũm mẽ kãm nhãm kẽn jakwa kre kahê xà mẽ. Hãmri nhũm Jejus Tĩrtũm mã amnhĩ jarẽnh kaxyw kànhmã kaxkwa hwỳr rĩt nê kãm:

—Pa Papaj. Nà na pa hte tanhmã mẽmoj tã awỳr to ka inhma nê tanhmã inhmã mẽmoj nhĩpêx to. Amex o amex Papaj. ⁴² Na ka hte ã inhmã amnhĩ nhĩpêx anê. Tã pa jajê noo mã ã amã ixkapěr anê. Ate inhmar nê tanhmã Rajare hto nhũm mẽ kot ja hã ixpumunh nê ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nê ka ate mẽ hwỳr inhmẽnh ã apumunh kaxyw. Anê.

⁴³ Nhũm pre ã Tĩrtũm mã kapěr anê. Hãmri nê kỳx pê Rajare mã kapěr nê kãm:

—Pa Rajare. Kwa tokyx kànhmã nhỹ nê amnẽ mẽ ixwỳr tẽ nê akato. Anê.

⁴⁴ Puh nhũm akupỹm htĩr nê hkupu xà rãhã tẽ nê mẽ ixwỳr kato nê xa. Arĩ hkuk nê ãhkra nê hpar kupu rãhã mẽ ixwỳr kato nê xa. Hãmri nhũm Jejus mẽ kãm:

—Kwa mẽ atõ nê kupu xà hpôt kê ma akupỹm òrkwỹ hwỳr tẽ. Anê.

⁴⁵ Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jejus kot Rajare nhĩpêx anhỹr ã omu nê amnhĩ kaxyw hkôt hamaxpěr nê hkôt amnhĩ xunhwỳr kurê kumrẽx. ⁴⁶ Nom nhũm mẽ hkwỳjaja axtem nê omu nhũm ja mẽ kệp omnuj nê. Jakamã nhũm mẽ ma Parijew nhõ xwỳnhjê hwỳr mra nê mẽ kãm harê.

Mẽ kot Jejus pĩr ã amnhĩ grôn

Matêwre 26.1-5; Makre 14.1-2; Rukre 22.1-2

⁴⁷ Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harẽnh ma hãmri nê patre krãhtũmjê mẽ amnhĩ wỳr mẽ inhõ juisti ho akuprõ nê xypẽn mã Jejus o kapěr punuj pê hã xypẽn mar o hkrĩ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwỳ ho anhỹr rax o pa. ⁴⁸ Kot puj mẽ ãm omu nê tanhmã ho hkêt nhũm mẽ pahkwỳjaja kot ã amnhĩ nhĩpêx anhỹr ã omu nê htỳx ãm hãmri ã kot amnhĩ nhĩpêx anhỹr ã hkamnhĩx. Hãmri nê amnhĩ kaxyw hkôt hamaxpěr nê hkôt amnhĩ xunhwỳ. Jao ra amnhĩ kaxyw kệp mẽ ò pahihiti hã ãm. Kojã mẽ ã amnhĩ nhĩpêx anê nhũm Rôm kamã pahihitija mẽ kot kator nê hpãnhã Jejus xãm ã harẽnh ma. Hãmri nê gryk xàj mẽ pahwỳr ò pòristi hkwy rẽ nhũm mẽ pahwỳr mra nê mẽ

panhĩmex pa nẽ Tĩrtũm nhõrkwỹ granh pa. Kwa tanhmã kot puj wem tokyx amnhĩ nẽ ho? Anẽ.

⁴⁹ Hãmri nhũm Kajpas mẽ kãm kapẽr. Kajpasja na pre amgrãja kamã kệp mẽõ patre nhõ pahi maati. Jakamã mẽ kãm:

—Nà na pa ra ijamaxpẽr. Kwa mẽ inhma.
⁵⁰ Nà kot puj mẽ hpĩr tokyx anẽ kê tapxipix ty pu mẽ arĩ mýrpê pahpiitã pajamakêtkati nẽ ri papa. Anẽ.

⁵¹ Nhũm pre ã mẽ kãm kapẽr anẽ. Nom amnhĩ krã hkõt ã mẽ kãm kapẽr anhỹr kêt nẽ. Arĩ kệp mẽõ patre krãhtũmjê nhõ pahi maati jakamã Tĩrtũm nhỹ hã Jejus kot Ijaew nẽ tykja kukamã ã harẽnh anẽ. Nom ja hã amnhĩ pumunh kêt nẽ. ⁵² Na pre Jejus mẽ ixpê Ijaew pix nẽ htyk kêt nẽ. Krĩ piitã hkõt Tĩrtũm krajê nẽ na pre ty. Mẽ piitã mẽ kot axpẽn to hkwỹ nẽ ri axpẽn to pa kaxyw na pre mẽ nẽ ty. ⁵³ Hãmri nhũm ã Kajpas mẽ kãm kapẽr anẽ nhũm mẽ inhõ pahijaja kuma nhũm ja mẽ kãm mex nẽ. Jakamã nhũm mẽ kot tanhmã Jejus ã àmnẽnh to nhũm mẽ kot mẽ kãm tanhmã hpĩr to kaxyw ã axpẽn mar anhỹr o pa. ⁵⁴ Jakamã nhũm Jejus axte mẽ noo mã ri pa hkêt nẽ. Hãmri ma krĩ pê Epraĩ hwỹr ma mõ. Pa mẽ hkõt ixpa ho ixpa xwỹnhjaja ma hkõt ixpa. Epraĩja kapõt ã krĩ na pre. Jakamã pa mẽ ma hwỹr mõ hãmri nẽ kamã ri ixpa.

⁵⁵ Tã nhũm arĩgro pê Pasja ra ahtêp o mõ. Amnepêm finat Mojes kot Ejit rũm mẽ panhĩgêjtê kator mã hamaxpẽr kaxyw na pa pre htem hã ixkĩnh kaxyw Pas ã Jerujarê hwỹr akuprõ. Na pa pre htem hwỹr pøj nẽ kamã Tĩrtũm noo mã mẽ inhmex kaxyw tanhmã amnhĩ nhĩpêx to.

⁵⁶⁻⁵⁷ Jakamã nhũm ra Ijaew ohtô nẽ ma Jerujarê hwỹr pa. Nẽ kãm Jejus pumunh prãm xàj Tĩrtũm mã amnhĩ jarẽnh xà hã ixkre wỹr mra nẽ hwỹr agjê nẽ kamã hapêr nẽ axpẽn mã:

—Kwa nok? Xà koja mẽ hpakĩnh wỹr mõr kêt nẽ nà? Anẽ.

Nhũm Parijew nhõ xwỹnhjê mẽ mẽ inhõ patre krãhtũmjaja haxwỹja hapêr o kuhê. Nom mẽ kot axtem nẽ unê nẽ haxàr kaxyw. Jakamã mẽ kãm hã karõ nẽ mẽ kãm:

—E kêr ka mẽ nhỹri Jejus pumu nẽ man mẽ ixwỹr mra nẽ mẽ inhmã harẽnh kurê kumrêx. Anẽ.

12

Marir kot Jejus kuxwa hã harẽnh Matêwre 26.6-13; Makre 14.3-9; Rukre 7.36-50

¹ Tã nhũm ra Pas wỹr apkati grêre. Ra hwỹr apkati kệp 6. Jakamã pa mẽ ma akupỹm krĩ pê Petãn wỹr Jejus kõt mõ. Jejus kot akupỹm Rajare ho htĩr xwỹnhhta mẽ õ krĩ hwỹr pa mẽ akupỹm mõ nẽ Rajare nhõrkwỹ hwỹr pøj nẽ mẽ hwỹr agjê. ² Hãmri nhũm mẽ Jejus pumu nẽ hkĩnh nẽ. Nẽ mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỹja mẽ ixkutã apkur o nhỹ. Nhũm htõx Matre mẽ inhmã mẽõ ho pa nẽ mēsti hã unhwỹr o xa. ³ Hãmri nhũm wa htõx Marir Jejus kukamã tanhmã hamaxpẽr to nẽ hamaxpẽr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anẽ.

Hãmri nẽ kax rax kãm mẽ hkuxwaxàja py nẽ o tẽ. Ra rit kahti hkõt hitep xà nhũm kupy nẽ hwỹr o tẽ. Mẽ kot mẽmo htwỹm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nẽ Jejus wỹr o tẽ nẽ hpar ã hkapĩr pa nẽ amnhĩ krã hkĩ ho hpar grà ho nhỹ nhũm ra ixkre kuxwa htỹx kumrêx. ⁴ Hãmri nhũm mẽ inhĩõ pê Jut Kariotja. Kot kormã mẽ ìhkram Jejus nhõr mã xwỹnhhta tee ri ã kot amnhĩ nhĩpêx anhỹr ã omu nhũm ja kệp omnuj nẽ ⁵ nhũm mẽ inhmã:

—Tk. Kwa pẽr mẽ hkuxwaxà hã kàxpore xohtô rax kumrêx tã nhũm ri axtem nẽ Jejus par ã hkapĩr pa. Mo na ma o htẽm nẽ ho wẽnê nẽ hpãnhã kàxpore ho rax nẽ hpyr nẽ ho mẽ kệp amrakati xwỹnhjê nhĩpêx kêt nẽ? Kot ho wẽnê ronhỹx hpãnhã kàxpore ho rax kumrêx nẽ kupy nẽ ho mẽmoj japrõr rax o rax. Tã axtem nẽ amarĩ Jejus par ã hkapĩr pa. Anẽ.

⁶ Te kãm mẽ kệp amrakati xwỹnhjê japê pyræk tã kãm mẽ hapê hkêt. ãm hêx rom ã kapẽr anẽ. Na pre hte mẽ inhmã mẽ ixkàxpore jamý nẽ mẽ ixkõt mẽ inhmã hamãr o pa. Nom tõiã axtem nẽ mẽ ixpê hkwỹ ho ahkĩ nẽ ho amnhĩm mẽmoj japrõ. Jakamã Marir kot mẽ hkuxwaxà ho hapêx

par ā omu nē tee ri hpānhā kàxpore rax mā hamaxpēr nē kamā gryk nē ā mē inhmā kapēr anē. ⁷ Hāmri nhūm Jejus amnhī tā hamaxpēr ā omu nē kām:

—Tk. Kwa tanhmā kām akapēr to hkêt nē. Ixtyk nhūm mē kot ixkuxwa hkukamā na ā inhīpêx anē. ⁸ Na hte mē kēp amrakati xwýnhjaja mē akôt pa rāhā nē. Ka mē amā mēmo arīgro hā tanhmā mē ho ajuta hto hprām nē rī mē ho ajuta nē mē kām mēmoj gō. No kêt pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitā mē are. Jakamā ām hāmri na ā inhīpêx anē. Anē.

Patre krāhtūmjaja kot Rajare hā àmnênh ā harēnh

⁹ Rôm nhūm Jerujarē nhō xwýnhjaja ra Jejus Petān wýr hpôx ā harēnh ma nē kot omunh mā ma hwýr mra. No ām tapxipix pumunh mā hwýr mra. Māānēn kot akupým ho htír xwýnhhta pumunh mā nhūm mē ma hwýr mra. ¹⁰⁻¹¹ Na pre ra Ijaew ohtô nē Jejus kot akupým Rajare ho htír ā harēnh ma hāmri nē mē inhō patre kaga nē Jejus kôt amnhī xunhwý. Jakamā nhūm patre krāhtūmjaja tee ri ja hā mē omu nē axpēn mā:

—Nà kot puj mē Jejus pix pír kêt nē. Kot puj mē māānēn hkôt Rajare pī hāmri nhūm wa hixi hamē mē kēp hapêx japêr. Anē.

Jejus kot Jerujarē hwýr àr ā harēnh

Matêwre 21.1-11; Makre 11.1-11; Rukre 19.28-40

¹² Tā nhūm apkati nhūm Ijaew Jerujarē kamā mē hkīnhja kryx nē Jejus ra mē hwýr àhtêp o mōr ā harēnh ma. ¹³ Hāmri nē axpēn mā:

—Kwa ma pu mē mō nē pô hkwý jakà nē kutā ho mra. Anē.

Hāmri nē hkwý jakà nē hamý nē ma kutā ho mra. Hāmri nē ra hkaxpa nē omu nē hkīnh nē. Nē kām:

Pa. Nà ām hāmri na ka mē ixwýr mō. Tirtūm na pre mē ixwýr amē ka ā amōr anē.

Tirtūmjaja mex o mex. Ām hāmri na pre mē ixwýr amē.

Kot kaj mē inhō pahi hpānhā mē ixto amnhīptār o ri apa. Anē.

¹⁴ Hāmri nhūm Jejus nhýri jumēnre pumu nē hwýr tē nē hā nhý nhūm mē pimràatā

ma akupým Jerujarē hwýr mō. Tirtūm kapēr ā kagà htūm ra kot ja jarēnh kot:

¹⁵ Pa Jerujarē nhō xwýnhjaja. Kwa mē tee ri amnhī kukamā ajamaxpēr ho amā ma hkêt nē.

Ota mē anhō pahi nyw ra mē awýr jumēnre hā nhý nē hpôx o tē. Anē.

¹⁶ No Jejus kôt mē ixpa ho mē ixpa xwýnhjaja pa mē ā kot amnhī nhīpêx anhýrja ā omu nē tee ri hkukamā ijamaxpēr nē axpēn mā:

—Kwa mo na ri ā amnhī nhīpêx anē nē jumēnre hā nhý nē mē hkôt mō? Anē.

Tā nhūm arīgro hō hā ty nē akupým kaxkwa hwýr api pa prem hā omu hāmri nē kormā Tirtūm kapēr ā kagà htūm kot hkukamā ā harēnh kot anhýrja mā ijamaxpēr kurê kumrêx. Hāmri nē axpēn mā harēnh o:

—Kwa ām hāmri na Tirtūm kapēr ā kagà htūm kot ra ā Kraja jumēnre hā ýr nē mē hkôt mōr ā hkukamā kot harēnh anhýrta. Anē.

¹⁷ Hāmri nhūm Jejus kot Rajare mā kapēr pē akupým ho htír ā omunh xwýnhjaja arī nhām mē hkwýjê mā ujarēnh o pa. ¹⁸ Nhūm mē kuma nē ma Jejus wýr omunh mā mra.

¹⁹ Hāmri nhūm Parijew nhō xwýnhjaja tee ri ja hā mē omu nē axpēn mā:

—Kwa na pu mē tee ri Jejus nē mē kām pakapēr kaprý nhūm mē pamar kêt nē ra piitā hkôt amnhī nhīpêx o pa. Kwa nà. Anē.

Ijaew kêt xwýnhjê jarēnh

²⁰ Tā nhūm ra Gres kwýjaja Ijaew kôt hkīnh kaxyw ma Jerujarē hwýr mē hkôt mra nē mē ĩhkô hā Tirtūm mā mex o mex ā harēnh o hkôt mra. ²¹ Jakamā nhūm mē nhýri mē inhīō pē Firipti pumu nē hwýr mra. Firipti kēp pyka pē Garirej kamā krī pē Pesêj nhō xwýnh nhūm Gres nhō xwýnhjaja omu nē hwýr mra nē kām:

—Pa. Kwa na pa mē inhmā Jejus pumunh prām nē. Tanhmā kot pa wem amnhī to nē omu nē kām ixkapēr? Anē.

²² Hāmri nhūm mē kuma nē ma Andre hwýr mē o mra nē kām mē harē. Hāmri nē wa ma Jejus wýr mē o mra nē kām mē harē nē kām:

—Pa Pahihti. Ota Gres nhō xwýnhjaja kām apumunh prām nē awýr mō. Mē

pahkĩnhã mẽ kêp Ijaew kêt tâ mẽ kãm apumunh prãm nê. Anê.

*Jejus kot amnhĩ kukamã amnhĩ jarênh
Matêwre 16.24-28; mããnhên Apokarip
2.10, 12.11*

²³ Hãmri nhũm Jejus mẽ omu nê mẽ kãm tanhmã amnhĩ jarênh to. Kot mẽ ohtô nê mẽ nê htyk nhũm mẽ kukwak ri Tĩrtũm wa kuri htĩr tũm nê pa ho pa hã mẽ kãm amnhĩ jarê nê mẽ kãm:

—Nà na ra ixyk ã arĩgro hwỳr apkati grêre. Ixpê Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anê ty hãmri nê akupỹm ixtĩr nê ma kaxkwa hwỳr akupỹm api. ²⁴ Mẽ axohtô nê nhỹrmã Tĩrtũm mẽ wa ixri atĩr tũm nê apa ho apa kaxyw kot paj ã amnhĩ nhĩpêx anê. Kwa mẽ ã ixte amnhĩ jarênh anhỹrja ma nê mẽ amnhĩ krãm haxàr tỳx nê ri hã apa. Te ixte mẽmo hy kot amnhĩ nhĩpêx pyræk. Na htem pikap hagjê nhũm te htyk pyrã nê pika kaxwỳnh kãm hikwỹ. Tã gaa nê higrôt nê hprêk nê ô. Nê ô rax kumrêx. Hyja pyxire nê hikwỹ htã kamã ô rax kumrêx. Nom koja mẽ hkre hkêt nê nhũm ô hkêt nê. Na hte ã mẽmo hyja amnhĩ nhĩpêx anê. Ja pyrã nê kot paj mẽ anê ixyk kêt nê te mẽ kot mẽmo hy hkre hkêt nhũm hprêk nê ô hkêeta pyræk ka mẽ ixkukwak ri Tĩrtũm mẽ wa ixri atĩr tũm nê apa hkêt nê. Jakamã kot paj mẽ anê ty nhũm mẽ ijaxà. Hãmri pa akupỹm ixtĩr ka mẽ axohtô nê ixkukwak ri wa ixri atĩr tũm nê apa ho apa.

²⁵ —Nê koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixtã mẽ apar mã tâ kwa kêr ka mẽ atyk pymaj ixkaga hkêt nê. Kwãr mẽ mãmrĩ tanhmã ixtã mẽ ato ka mẽ nhỹrmã Tĩrtũm mẽ wa ixri axte amnhĩ xà kamã ajamak kêt kumrêx nê atĩr tũm nê amex nê apa ho apa. No kot kaj mẽ ixkĩnhã jar amã amex pix prãm hãmri nê nhỹrmã wa ixri atĩr tũm nê apa hkêt nê. ²⁶ Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyræk o mẽ anhĩpêx. Hãmri ka mẽ nhỹrmã ma ixkôt kaxkwa hwỳr api nê kamã ixri atĩr tũm nê apa ho apa. Hãmri nhũm Inhĩpêxà ixtã mẽ apumu nê mẽ ato mex kumrêx. Anê.

*Tĩrtũm kot Jejus mã kapêr ã harênh
Matêwre 3.17, 17.5*

²⁷ Tã nhũm Jejus tee ri amnhĩ kukamã htyk mã hamaxpêr nê hkaprĩ htỳx nê. Nê hkôt mẽ ixpa ho mẽ ixpa xwỳnhjê mã amnhĩ jarê nê mẽ inhmã:

—Hêxta waa nê. Na pa tee ri amnhĩ kukamã ijamaxpêr. Nê tee ri amnhĩ xà htỳx kamã ijamak kukamã ijamaxpêr pê ra amnhĩ kamã ixkahak nê. Nom ixte pika piitã hkôt mẽ kot ixkôt amnhĩ xunhwỳr xwỳnhjê nê ixyk kaxyw ixwryk kênã. Jakamã kot paj Inhĩpêxà kot mẽ kêp ixpytãr kaxyw tanhmã amnhĩ to hwỳr to hkêt nê. Anê.

²⁸ Hãmri nê hpãnhã Hipêxà mã kapêr nê kãm:

—Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỳx kumrêx.

Anhỹr o Tĩrtũm mã amnhĩ jarê. Hãmri nhũm kuma nê kaxkwa rũm kãm kapêr. Kỳxpê kãm kapêr nê kãm:

—Nà na pa pre ra ã mẽ kãm amnhĩ to amnhĩrĩt anê nhũm mẽ ja hã ixpumu. Tã kot paj axte akukwak ri amnhĩ to amnhĩrĩt nhũm mẽ piitã axte inhmex o inhmex ã ixpumu. Anê.

²⁹ Nhũm pre ã Tĩrtũm Jejus mã kapêr anê. Hãmri nhũm mẽ kot mẽ ixkuri mar o kuhê xwỳnhjaja kuma no ãm hprĩ hã kot kãm tanhmã kapêr toja mar mex kêt nê. Nê htỳx ho ãm mẽmoj tâ hkamnhĩx. Jakamã nhũm mẽ hkwyjaja axpên mã:

—Kwa mo na wehe? Na mãn katõtøk nà? Anê.

Nhũm mẽ hkwyjaja mẽ kãm:

—Nà na katõtøk kêt. Tĩrtũm kapêr o wryk xwỳnh mãn tanhmã kãm kapêr to. Anê.

³⁰ Hãmri nhũm Jejus mẽ kãm:

—Nà Tĩrtũm tãm na inhmã kapêr. Nom pa ixte mar kaxyw inhmã kapêr kêt nê. Mẽ kajaja mẽ ate ixtã mar kaxyw na kỳx pê ã inhmã kapêr anê. Anê.

Hãmri nê mẽ kãm:

³¹ —E hãmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mããnhên Satanasti pê hihtỳx xà ho ijapêx. ³² Koja mẽ pĩ kahpa hã inhô pa kỳxpê ajêt. Tĩrtũm kot mẽ awỳr inhmênh tâ nhũm mẽ ã inhĩpêx anê

pa ty. Jakamã koja pika piitã hkôt mẽ ohtô nẽ ixkôt amnhĩ xunhwý nẽ amnhĩ kaxyw inhmã hamaxpêr rãhã ho pa. Anẽ.

³³ Mẽ ixte tanhmã htyk to hã harênh mar kaxyw nhũm pre ã mẽ inhmã amnhĩ jarênh anẽ. ³⁴ Hãmri nhũm mẽ kot mẽ ixkuri mar o kuhê xwýnhjaja tee ri kot htyk ã amnhĩ jarênhja ma nẽ kãm:

—Kwa mẽ ixte amnhĩ wýr kamã ijamak o ixpa xwýnhja htír tũm nẽ pa ho pa xwýnh na. Tirtũm kapêr ã kagà htũm kot ã harênh kot anhýr tã ka ã ri mẽ kot apír nhũm atyk ã amnhĩ jarênh anẽ. Ate Tirtũm kot mẽ ixwýr amênh xwýnh ã amnhĩ jarênh tã ã ri atyk ã amnhĩ jarênh anẽ. Kwa xà apê mẽ ixte amnhĩ wýr kamã ijamak o ixpa xwýnh kêt? Anẽ.

³⁵ Hãmri nhũm mẽ kuma nẽ amnhĩ tã mẽ kãm:

—Tý ixpê tãm kênã. Tã kot paj tokyx mẽ are. Jakamã kêr ka mẽ ixte arĩ mẽ akamã ixpa ri ixkôt amnhĩ xunhwý nẽ amnhĩ kaxyw ixkôt ajamaxpêr o ri apa. Te ixpê kanê hpôk pyrãk jakamã na pa hte mẽ kãm Tirtũm kapêr o mẽ ahkre o ri ixpa. Nom kot paj kritpêm mẽ akôt ixpa ry hkêt nẽ. Jakamã kwa kêr ka mẽ tokyx te mẽ kot kanê hpôk nhĩrã kamã ri mẽ pa xwýnh kot amnhĩ nhĩpêx pyrã nẽ Tirtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mõi nhũm te ra kamàt kô pyrãk. Na hte kamàt kô kamã mẽ pa xwýnhjaja tee ri rít mex mã nom rít mex kêt nẽ. Nẽ mẽmoj pumunh mex kêt nẽ.

³⁶ Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpêr nẽ ixkôt amnhĩ xunhwý. Te ixpê kanê hpôk nhũm kamã mẽ arít mex pyrãk. Jao ixpyrà nẽ te mẽ apê kanê hpôk nhĩrã mex pyrãk o amnhĩ nhĩpêx. Nẽ ixpyrà nẽ tãm ri amnhĩ nhĩpêx o apa. Anẽ.

Nhũm pre ã mẽ kãm kapêr anẽ hãmri pa mẽ kêp ixkato nẽ ma nhãm mõi.

Mẽ hkwyjaja kot Jejus kôt hamaxpêr kêt ã mẽ harênh

³⁷ Na pre hte Jejus mẽ noo mã mẽ kot aa mẽmoj pumunh kêt kwý ho anhýr rax o pa. Tã nom nhũm mẽ ohtô nẽ hã omu nẽ ãm hã omu nẽ kêp Tirtũm kot mẽ pahwýr mênh xwýnh ã hkôt hamaxpêr kêt nẽ. ³⁸ Nom ra mẽ hkukamã Tirtũm nhỹ hã kapêr jarênh o

pa xwýnh pê finat Ijaisja mẽ hkukamã ja hã mẽ harê nẽ hã kagà. Nẽ hã kagàja o:

Pa Pahi Maati. Nà ra ixte mẽ kãm ajarênh o ixpa ryy htã no nhũm mẽ inhma nẽ ãm inhma.

Nẽ mẽ kot axihtýx o axihtýx ã ajarênh mar tã no ãm ajarênh ma nẽ amnhĩ kaxyw akôt hamaxpêr kêt nẽ. Anẽ.

³⁹ Mẽ kãm Tirtũm kapêr mar prãm kêt jakamã na prem mãänên Jejus kêp Tirtũm kot mẽ pahwýr mênh xwýnh hkôt hamaxpêr kêt nẽ. Nhũm pre finat Ijaisja axte mẽ hkukamã ja hã mẽ harê nẽ mẽ hã kagà. Nẽ hã kagà ho:

⁴⁰ Na pre Tirtũmja tanhmã amnhĩ nẽ mẽ hkrã hto nhũm mẽ hkôt hamaxpêr kêt nẽ.

Ra mẽ kot hihtýx o hihtýx ã omunh tã omu nẽ ãm omu.

Nẽ mẽ kot kapêr mar tã amnhĩ tomnuj kaga hkêt nẽ.

Nẽ Tirtũm kot mẽ nẽ mẽ kot amnhĩ tomnuj o hapêx prãm xàj hkôt amnhĩ xunhwýr kêt nẽ. Anẽ.

⁴¹ Kormã Jejus mẽ hwýr wrýk kêt ri nhũm finat Ijaisja hpimtir kãm kot amnhĩ to rax kumrêx ã omu nẽ hkukamã ã harênh nẽ hã kagà anẽ.

⁴² Hãmri nhũm Ijaew krãhtũm kwýjaja hkwyjê rom amnhĩ kaxyw Jejus kôt hamaxpêr nẽ hkôt amnhĩ xunhwý. Tã Parijew nhõ xwýnhjaja kot ã mẽ kot amnhĩ nhĩpêx anhýr ã mẽ harênh mar pymaj ja hã amnhĩ to amnhĩrít kêt nẽ. Mẽ kot Tirtũm kapêr o mẽ ahkre xà hã ixkreja nẽ mẽ kator pymaj nhũm mẽ kãm amnhĩ to amnhĩrít kêt nẽ. ⁴³ Na prem hamaxpêr o:

—Nà kot paj ja hã amnhĩ to amnhĩrít nhũm mẽ amnhĩ nẽ ixtomnuj nẽ. Hãmri nẽ amnhĩ pyrã nẽ axpên mã inhmex ã ijarênh kêt nẽ.

Anhýr o mẽ umaj amnhĩ kukamã hamaxpêr o pa. Nom Tirtũm tãm kot amnhĩm mẽ mex ã mẽ harênhja nhũm mẽ hkukamã hamaxpêr kêt nẽ.

Jejus kot Hipêxà nhỹ hã kapêr ã harênh

⁴⁴ Nhũm Jejus axte mẽ kãm kapêr nẽ kýx pê kapêr nẽ mẽ kãm:

—Nà koja mẽhõ amnhĩ kaxyw ixkôt hamaxpêr hãmri nẽ ixkôt pix mã hamaxpêr kêt nẽ. Mãänên amnhĩ kaxyw kot mẽ awýr

inhmēnh xwýnhja kôt hamaxpēr. ⁴⁵ Wa ixte amnhī nhīpêxja te tipxi pyrāk jakamā koja mẽ tanhmā ixte amnhī nhīpêx to hā ixpumu nē te kot Tīrtūm kot amnhī nhīpêx ā omunh pyrāk.

⁴⁶ —Nē te ixpê kanê hpôk nhūm inhīrā kamā mẽ apa pyrāk kaxyw na pre Inhīpêxà mẽ awýr inhmē pa mẽ awýr wrý. Ixte kapēr o mẽ ajahkre ho ri mẽ akôt ixpa kaxyw. Jakamā koja mēhō amnhī kaxyw ixkôt hamaxpēr nē ixkôt amnhī xām hāmri nē te kanê hpôk nhīrā kamā rīt mex o pa pyrāk o amnhī nhīpêx. Jao amnhī nhīpêx nyw o amnhī nhīpêx o pa. ⁴⁷⁻⁴⁸ No mẽ kot ixkapēr mar nē ām mar xwýnhjaja te määnēn Inhīpêxà kapēr mar nē ām mar pyrāk. Mýrapê koja mẽ nhýrmā ma kuwy hwýr pa nē mẽ kot amnhī tomnuj mýrapê kamā pa ho pa. Tā no ā mẽ ate amnhī nhīpêx anhýr o ri mẽ apa kaxyw na pa pre mẽ awýr ixwrýk kêt nē. Ixte mẽ ate amnhī tomnuj pānhā amnhīrer par kaxyw na pa pre mẽ awýr wrý.

⁴⁹ —Nē na pa hte amnhī krā hkôt tanhmā ri mẽ amā ixkapēr to ho ri ixpa hkêt nē. Ām kot mẽ awýr inhmēnh xwýnhja nhý hā na pa hte tanhmā mẽ amā ixkapēr to ho ri mẽ akôt ixpa. ⁵⁰ Tā mẽ kot Tīrtūm kapēr mar nē amnhī kaxyw hkôt hamaxpēr xwýnhjaja koja mẽ nhýrmā wa ixri htīr tūm nē mex nē pa ho pa. Jakamā na pa hte tanhmā kot inhmā karō hto xà hkôt pix mā tanhmā mẽ amā ixkapēr to ho ri ixpa. Anē.

13

Jejus kot hkwýjê hpar kuhōnh ā harēnh Rukre 22.24-27

¹ Tā nhūm ra Pas ā mẽ ixkīnhta ahtêp. Pas ā na hte mẽ ixpê Ijaewjaja axpēn wýr akuprō nē hā ôwēhti hkra nyw pa nē ho anē nē hkur o ixkrī. Amnepēm Tīrtūm kot pika pē Ejit rūm mẽ inhīgêxjê kator kaxyw nhūm mẽ nojarêt nē ā hkwý hpar nē ho anhýr nē hkwý hkurta pyrāk. Na prem nojarêt nē mẽ hkra my kot wa mẽ kêp htyk pumaj ôwēhti hkra nyw kwý hpa nē ho anē nē ī hku. Jakamā nhūm arī mẽ ixpê mẽ hkanrēhā mẽ htāmnhwýjaja ā mẽ kot amnhī nhīpêx anhýrja mā ijamaxpēr nē hā ixkīnh kaxyw mẽ urāk nē hkwý hpa nē

kuku. Jakamā nhūm ra Pas ahtêp nhūm Jejus amnhī kukamā tanhmā hamaxpēr to kurê kumrêx. Ra ma akupým Hipêxà hwýr àpir xà hā arīgro hwýr apkati grêre. Jakamā nhūm akupým nojarêt ā amnhī pumu nē kām mẽ pahte hkôt amnhī xunhwýr xwýnhjê japê jakamā kām mẽ pajapê rāhā mẽ panê htyk mā. ² Tā nhūm myt axà pa mẽ Pas ā ixàpkur o ixkrī. Nhūm Simāw Kariot kra Jut Kariotja määnēn mẽ ixkutā apkur o nhý. Kêp mẽ ixkwý htā nhūm pre Satanasti tanhmā hkrā hto nhūm ra axtem nē kot mẽ kām Jejus kurê xwýnhjê nhīhkram haxàr kaxyw.

³⁻⁴ Tā pa mẽ kormā axpēn kutā ixàpkur kaxyw ixkrī hpa nhūm Jejus kånhmā xa nē hinôkà kapa nē toajti py nē ho amnhī krax pre. Kot amnhī to rax ā amnhī pumunh tā ja hā amnhī to jarkrar pē tanhmā ri mẽ inhnoo mā amnhī nhīpêx to ho pa hkêt. Kêp mẽ inhō pahi htā te kêp mẽ inhmā àpēnh xwýnh pyrāk o amnhī nhīpêx o pa. ⁵ Jakamā toajti py nē ho amnhī krax pre nē pasiiti hō py nē kamā gō hkwý ru nē ho mẽ ixpar kuhō nē toajti o mẽ ixpar grà ho mō. ⁶ Ā mẽ inhīpêx anhýr o mō. Pê ra hpānhā Simāw Pêtre hpar kuhōnh kaxyw nhūm tee ri amnhī tā omu nē kām:

—Tk. Kwa apê inhmā axàpēnh xwýnh kêt kēnā kot ka kêt ri axtem nē ixpar kuhō Pahihti. Apê mẽ inhō Pahi kēnā kot ka kêt ā mẽ inhīpêx anē. Anē.

⁷ Hāmri nhūm kām:

—Kwa nà. Kormā ate ja hā amnhī tā ixpumunh mex kêt. Nom kot kaj nhýrmā aprī hā amnhī tā ixpumu. Anē.

⁸ Hāmri nhūm kām:

—Nà nom kot kaj ām ixpar kuhōnh kêt nē. Kwarī. Anē.

Hāmri nhūm Jejus kām:

—Tôe. Kot paj apar kuhōnh kêt nē ka te apê ixkwý hkêt pyrāk. Anē.

⁹ Hāmri nhūm tee ri kuma nē kām:

—Tôe mamrī ixpar kuhō. Nom ixpar pix kuhōnh kêt nē. Määnēn inhīhkra kuhō nē ixkuk kuhō. Inhmā ixte apyrāk prām týx kumrêx kēnā. Anē.

¹⁰ Hāmri nhūm Jejus kām:

—Nà amýkry hkôt mẽ wýr xwýnhjaja na htem mex nē axte wýr kêt rāhā hikwý. Na htem ām amnhī par pix kuhō nē hikwý. Ja

pyrà nê Tirtūm kot mẽ anê mẽ ate amnhĩ tomnuj ho hapêx par xwýnhjaja te amýkry hwýr mẽ axwýr nê amex pyræk. Ka mẽ te mẽ kot amnhĩ par pix kuhõnhta pyrà nê axte tanhmã amnhĩ tomnuj to hãmri nê Tirtūm mã amnhĩ jarênh kurê kumrêx kê anê amnhĩ katut kôt ate amnhĩ tomnujta mẽ nê ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nê arĩ amnhĩ tomnuj rãhã ri pa. Jakamã te wýr kêt nê arĩ grã htyk rax kãm ri pa pyræk. Anê.

¹¹ Nhũm pre ã Jejus mẽ inhmã kapêr anê. Ra kot hprĩ hã mẽ kot kãm hkurê xwýnhjê mã õr mã xwýnhja pumunh jakamã te wýr kêt nê arĩ grã htyk rax kãm ri pa pyræk ã ã harênh anê.

¹² Tã mẽ ixpar kuhõnh pa nê akupým hinõkà py nê haxà nê nhỹ hãmri nê mẽ inhmã:

—E mẽmo kaxyw na pa we ã mẽ apar kuhõnh anê? Kot paj ixprĩ hã mẽ amã amnhĩ jarê ka mẽ inhma. ¹³⁻¹⁴ Na ka htem ixto “mẽ ijahkre xwýnh” nê ixto “pahihti” anhýr o ijarênh o ri apa. ãm hãmri na ka htem ã axpên mã ijarênh anê. Ixpê mẽ ajahkre xwýnh nê mããnên ixpê mẽ anhõ pahihiti htã inhmã mẽ ate tanhmã axpên nhĩpêx to ho apa hprãm xàj na pa ã mẽ apar kuhõnh anê. Tã kêr ka mẽ ixpyrà nê tanhmã axpên to mex to ho ri apa. ¹⁵ Jao amnhĩ kuxwar axpên to mex pê mẽmoj to axpên kutã anojarêt rãhã ho ri apa. ¹⁶ Kwa mẽ ixkapêr ma nê kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwýnh pyræk. Nê te ixte mẽmoj tã mẽ amã karõ nhũm mẽ ate inhma nê inhmã tanhmã mẽmoj nhĩpêx to pyræk. Tã te ixpê mẽ anhõ patrãw pyræk tã pa ã mẽ apar kuhõnh anê. Ka mẽ amnhĩ tã ixpumu hãmri nê amnhĩ xwar tanhmã axpên to ajuta hto ho ri apa. No ri axpên pumu nê ajamxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhýr o ajamxpêr o ri apa hkêt nê.

¹⁷ —E na pa ã mẽ amã ixujarênh anê. Kot kaj mẽ inhma nê ixujarênh kôt ã axpên

nhĩpêx anhýr o ri apa. Hã kot kaj mẽ akĩnh nê ri apa. Anê.

Jejus kot amnhĩ tã hã ãmnênh xwýnh o amnhĩrĩt ã harênh

Matêwre 26.20-25; Makre 14.17-21; Rukre 22.21-23

¹⁸ Nhũm Jejus arĩ mẽ inhmã kapêr nê mẽ inhmã:

—Kot kaj mẽ apiitã mẽ akĩnh nê apa hkêt nê. Ixte mẽ arênh xwýnhjaja mẽ apiitã mẽ apumunh mex. Jakamã na pa Tirtūm kot mẽ apiitã mẽ ate amnhĩ tomnuj o hapêx par kêt ã mẽ anhĩõja jarê. Tirtūm kapêr ã kagà htũm kot harênh kot:

Ixkutã apkur o ýr xwýnhjê hõ koja axtem nê mẽ kot kãm ixkurê xwýnhjê nhĩhkram ijaxà. Kêp ixkôt pa ho pa xwýnh tã koja axtem nê ã inhĩpêx anê.

Anhýr o kot harênh. Tã koja tokyx ã inhĩpêx anê. ¹⁹ Nom kormã kot ã inhĩpêx anhýr kêt ri na pa hkukamã mẽ amã harê. Jakamã koja ã inhĩpêx anê ka mẽ ja hã ixpumu nê ra ixte amnhĩ kukamã mẽ amã amnhĩ jarênhhta mã ajamxpêr nê ixpê Tirtūm rũm mẽ awýr ixwryk xwýnh kôt ajamxpêr tỳx kurê kumrêx.

²⁰ —Kwa mẽ ixkapêr ma nê amnhĩ krã kamã kãm ajamxpêr tỳx o ri apa. Koja mēhõ ixte mẽ hwýr mẽ arênh xwýnhjê hã tanhmã mẽ ato mex to. Hãmri nê te pa kot tanhmã ixto mex to pyræk. Nê koja mēhõ tanhmã pa ixto mex to nê mããnên te kot mẽ awýr inhmēnh xwýnhhta tanhmã ho mex to pyræk. Anê.

²¹ Nhũm pre ã Jejus mẽ inhmã kapêr anê. Hãmri nê tee ri amnhĩ kukamã hamxpêr nê hkaprĩ nê mẽ inhmã:

—Hêxta waa nê. Nà kot kaj mẽ atõ mẽ kot kãm ixkurê xwýnhjê nhĩhkram ijaxà. Kwa mẽ amnhĩ krã kamã ixkapêrja mã ajamxpêr tỳx nê. Anê.

²² Hãmri pa mẽ amnhĩ tã kuma nê tee ri axpên pumunh o ixkrĩ. ²³ Ixpê Juāw na pa pre ixpê Jejus krãmnhwý mex ã ãhkõ hã ixàpkur o inhýr ²⁴ nhũm Simãw Pêtreja ixpumu nê inhmã nomgõr nê kawax pê inhmã:

—Kwa mẽ pahtõ nhĩxi hã hkukja nà? Anê.

²⁵ Hãmri pa kuma nê Jejus mã kãm:

—Kwa Pahihti. Mě ixtõ koja we ã anhîpêx anê? Anê.

²⁶ Hãmri nhũm mẽ inhmã:

—Nà kot paj pãwti hô py mẽ guhkrax kãm ho mry kagõ nhek mẽ kot mẽ ìhkram ijaxàr mã xwýnhhta mã kugõ ka mẽ hkõt omu. Anê.

Hãmri mẽ kupy mẽ ho mry kagõ nhek mẽ Simãw Kariot kra Jut Kariotja mã kugõ nhũm kupy. ²⁷ Pyrja kõt nhũm Satanasti tanhmã hkrã hto. Hãmri nhũm Jejus te kot kãm amnhĩ to nojarêt pyrãk o amnhĩ tã kãm kapêr mẽ kãm:

—E kwa tokyx nã. Anê.

²⁸⁻³⁰ Hãmri nhũm kuma mẽ kato mẽ ma kamãt kô kamã htêm kurê kumrêx. Hãmri pa mẽ ixàpkur o ixkrĩ xwýnhjaja Jejus kot ã kãm kapêr anhÿrja ã kuma mẽ tee ri hkukamã ijamaxpêr. Hãmri mẽ kot ma mẽ hkĩnh ã mẽõ hkwy japrôr kaxyw ma htêm ã hkamnhĩx. Nhũm mẽ ixkwýjaja axtem Jejus kot mẽ kêp amrakati xwýnhjê mã mẽmoj nhõr ã kãm karõ nhũm ma mẽ hwÿr htêm ã hkamnhĩx. Kêp mẽ inhmã mẽ ixkãxpore jamãr o pa xwýnh jakamã pa mẽ ã ixtÿx mẽmoj tã hkamnhĩx anê.

Jejus akupÿm nojarêt mẽ mẽ kãm mẽmoj tã karõ hã harênh

Matêwre 22.39-40; mããnên Wam Juãw 3.11-24

³¹⁻³² Hãmri nhũm Jejus mẽ inhmã:

—Nà kot kaj mẽ tokyx mẽmoj pumu mẽ Tirtũm mã mex o mex ã harê mẽ ijaxwýja inhmã inhmex o inhmex ã ijarê. Kot kaj mẽ tokyx mẽmojta pumu kãm ga.

³³ —Te mẽ apê ixkra pyrãk tã kot paj arĩ ri mẽ akõt ixpa grire hãmri mẽ ma akupÿm api. Kot kaj mẽ tee ri jar ijapêr o ri apa nom nhÿri ixpumunh kêt mẽ. Nẽ kormã tokyx ma ixkõt apa hkêt mẽ.

³⁴ —E kot paj axte mẽ amã mẽmoj tã karõ. Kormã ixte mẽ amã ja hã karõ hkêt. Kêr ka mẽ amã axpên kĩnh o ri apa. Te pa inhmã mẽ ajapê pyrãk o axpên nhîpêx rãhã ho ri apa. ³⁵ Kot kaj mẽ ã amnhĩ nhîpêx anê nhũm mẽ akwýjaja ja hã mẽ apumu mẽ mẽ apê ixkwý hã mẽ apumunh kurê kumrêx. Anê.

Simãw Pêtre kot Jejus ã amnhĩ to hêx kukamã harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ã kot mẽ ixrer mẽ ma nhÿhÿm mõi ã amnhĩ jarênh anê hãmri nhũm Simãw Pêtre tee ri kot amnhĩ jarênh ma mẽ kãm:

—Kwa Pahihti. Nhÿhÿm kot kaj kêt mõ pa mẽ akõt ixpa hkêt mẽ? Anê.

Hãmri nhũm kãm:

—Nà ma inhmõi xàta wÿr kot kaj mẽ kormã ma ixkõt apa hkêt mẽ. Nom kot kaj mẽ nhÿrmã ma ixkõt apa. Anê.

³⁷ Hãmri nhũm Simãw Pêtre kãm:

—Kwa mo kot pa mẽ omu mẽ tokyx ma akõt inhmrar kêt mẽ? Inhmã akõt ixtyk puma hkêt kênã. Kwãr mẽ mãmrĩ atã ixpĩ. Inhmã ajapê htÿx kumrêx kênã. Anê.

³⁸ Hãmri nhũm Jejus kãm:

—Xà ãm hãmri na ka ã inhmã amnhĩ jarênh anê Simãw Pêtre? Xà amã ixkõt atyk puma hkêt? Kwa o kora. Koja apkati hkõt krãhyre hkàr kêt ri ka ra mẽ umaj ate ixkõt apa hkêt ã amnhĩ tã axaprãr o axkrunêpxi kãm ga. Kwa amnhĩ krã kamã ixkapêrja mã ajamaxpêr tÿx mẽ. Anê.

14

Jejus kot Tirtũm nhõ krĩ jarênh

Eprêw 11.16

¹ Nhũm Jejus arĩ mẽ inhmã kapêr mẽ mẽ inhmã:

—Kwa ã ixte mẽ amã amnhĩ jarênh anhÿrja ma mẽ tee ri amnhĩ kukamã ajamaxpêr mẽ akaprĩ hkêt mẽ. Arĩ amnhĩ kaxyw Tirtũm mẽ wa inhmã ajamaxpêr tÿx rãhã ho ri apa. ² Inhîpêxã nhõ krĩ kamã ixkre xohtõ. ãm hãmri na pa ã mẽ amã harênh anê. Tã kot paj ma akupÿm hwÿr api mẽ mẽ akutêp mã amã mẽ anhõrkwÿ ho mex. ³ Hãmri mẽ ho mex pa mẽ rĩ man akupÿn mẽ awÿr wrÿ. Hãmri mẽ ma akupÿm amnhĩ kõt mẽ ato ixàpir pa ka mẽ Tirtũm mẽ wa ixkõt apa rãhã apa ho apa. Jakamã kwa mẽ ri akaprĩ mẽ apa hkêt mẽ. Anê.

Jejus te kêp Tirtũm wÿr pry pyrãk

Epes 2.18

⁴ —Nẽ ma nhÿhÿm inhmõi xàta ra mẽ ate harênh mar mex. Nẽ hwÿr pryja mããnên mẽ ate harênh mar mex. Anê.

⁵ Hãmri nhũm Tomas tee ri kuma mẽ mẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶ Hãmri nhũm kãm:

—Kwa paa. Te ixpê Inhĩpêêxà hwỳr pry pyræk. Na htem amnhĩ kaxyw inhmã hamaxpêr nẽ ixkõt amnhĩ xunhwý hãmri nẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tĩrtũm kapêr ma. Nẽ ixkukwak ri pix mã na htem wa ixri htĩr tũm nẽ pa ho pa. ⁷ Kot kaj mẽ aprĩ hã ixpumu nẽ mããnẽn te aprĩ hã Inhĩpêêxà pumunh pyræk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyræk. Anẽ.

Jejus mẽ Tĩrtũm wa kot amnhĩ nhĩpêx tipxi hã wa harẽnh

Juāw 1.1, 10.30; Piripos 2.6; Korosẽ 2.9

⁸ Nhũm Jejus ã mẽ inhmã kapêr anẽ nhũm Firipti kuma nẽ kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omu nẽ ixkĩnh tỳx kumrêx. Anẽ.

⁹ Hãmri nhũm Jejus kãm:

—Kwa na pa pre ra mẽ akõt ri ixpa ryy nẽ. Ka mẽ aprĩ hã ixpumunh mex nẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyræk. ¹⁰ Wa ixte amnhĩ nhĩpêxja ãm tipxi. Xà ate kormã amnhĩ krã hi mã ixkapêr jaxàr tỳx kêt? Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Jakamã na pa hte amnhĩ krã hkõt ri tanhmã amnhĩ nhĩpêx to ho ri ixpa hkêt nẽ. ãm Inhĩpêêxà nhỹ hã na pa hte ri tanhmã mẽ amã ixkapêr to ho ri ixpa. Nẽ hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nẽ te ano ho Inhĩpêêxà pumunh pyræk. ¹¹ Kwa mẽ ixkapêr ma nẽ hkõt ajamaxpêr tỳx nẽ. Inhĩpêêxà mẽ wa ixte amnhĩ nhĩpêxja ãm tipxi. Nẽ kot axpẽn pyræk. Rỳ ka mẽ tee ri ja kukamã ajamaxpêr japêr hãmri nẽ ixte aa mẽ ate mẽmoj pumunh kêt kwỳ ho anhỹr ã mãn ixpumu nẽ ja hã wa ixte amnhĩ nhĩpêx tipxi kõt ajamaxpêr.

¹² —Kwa mẽ ixkapêr ma nẽ amnhĩ krã kamã amnhĩ krãm haxàr tỳx nẽ. Mẽ ate amnhĩ kaxyw ixkõt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nẽ ixkõt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nẽ kuri ixpa ho ixpa. Ka mẽ ixwakre kamã ixihtỳx xà ho tanhmã mẽ akwỳjê mã amnhĩ nhĩpêx to ho ri apa.

¹³ —Nẽ kot kaj mẽ apê ixkwỳ hã tanhmã mẽmoj tã ixwỳr to pa mẽ ama nẽ mẽ amã tanhmã mẽmoj nhĩpêx to. Mẽ kot omunh nẽ Inhĩpêêxà mex o mex ã omunh kurê kumrêx kaxyw. ¹⁴ Nà kot kaj mẽ apê ixkwỳ hã mẽmoj tã ixwỳ pa mẽ ama nẽ mẽ amã tanhmã mẽmoj to. Anẽ.

Jejus kot mẽ pahwỳr Tĩrtũm mẽ wa Karõ rẽnh ã kot amnhĩ jarẽnh

Juāw 7.37-39, 16.7-17; Atre 2.1-4; mããnẽn Rõmãn 5.5; Wam Korõt 12.7-11; Epes 3.16; Wam Juāw 2.27

¹⁵ Nhũm Jejus arĩ mẽ inhmã kapêr nẽ mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kõt pix mã ri amnhĩ nhĩpêx rãhã ho ri apa.

¹⁶ —Kot paj akupỹm kaxkwa hwỳr api hãmri nẽ mẽ ato Inhĩpêêxà wỳ nhũm inhma nẽ mẽ awỳr kot mẽ ato ajuta xwỳnh maatita rẽ nhũm man mẽ awỳr wrỳ nẽ mẽ akaxwỳnh mã agjê. Hãmri nẽ mẽ akõt tanhmã mẽ ato ajuta hto ho pa rãhã ho pa. ¹⁷ Wa Ixkarõ koja mẽ awỳr kurê nhũm mẽ amã agjê. Hãmri nẽ hprĩ hã mẽ amã Tĩrtũm kapêr o amnhĩrĩt o mẽ akõt pa ka mẽ aprĩ hã mar mex nẽ. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarẽnh mar kêt nẽ. Mẽ kot wa ixkõt amnhĩ xunhwỳr kêt jakamã koja mẽ hkarõ mã gjêx kêt nẽ. ãm mẽ ate ixkõt amnhĩ nhĩpêx o apa xwỳnhjê pix wỳr koja wrỳ nẽ mẽ awỳr agjê nẽ mẽ akamã pa ho pa.

¹⁸ —Nẽ ixte mẽ arer nẽ ma inhmõr mã tã kot kaj mẽ te mẽ hã awrãre pyrã nẽ ahte atỳx ri apa pyræk kêt nẽ. Kot paj te pa akupỹn mẽ awỳr ixwryk pyrã nẽ mẽ awỳr wa Ixkarõ rẽ nhũm mẽ akãm agjê nẽ mẽ akamã pa ho pa.

¹⁹ —Nẽ koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte

ixpumunh kêt nê. No mẽ papajaja kot puj mẽ tokyx axte nhÿri axpên pumu.

—Nê kot paj akupÿm ixtÿr hãmri nê ixtÿr tÿm nê ixpa ho ixpa ka mẽ ixkukwak ri ajaxwÿja nhÿrmã Tÿrtÿm mẽ wa ixri atÿr tÿm nê apa ho apa.

²⁰ —Tã koja wa Ixkarõ mẽ awÿr wrÿ nê mẽ akarõ mã agjê ka mẽ aprÿ hã Tÿrtÿm mẽ wa ixte amnhÿ nhÿpêx ã wa ixpumunh mex kurê kumrêx. Te wa ixte amnhÿ nhÿpêx tipxi pyrãk o ka mẽ hã wa ixpumu. Nê mãânên mẽ papajaja te ra mẽ pahtipxi nê ri mẽ papa pyrãk ka mẽ hã amnhÿ pumunh mex kurê kumrêx.

²¹ —Nê mẽ kãm ixkÿnh xwÿnhjaja na htem ixkapêr ma nê hkôt amnhÿ nhÿpêx o pa. Jakamã nhÿm Tÿrtÿm ixtã mẽ omu nê kãm mẽ hapê htÿx nê. Pa mãânên amnhÿ tã mẽ omu nê inhmã mẽ hapê htÿx nê. Jakamã kot paj mẽ kãm amnhÿ to amnhÿrÿt nhÿm te mẽ kot no ho ixpumunh pyrãk. Anê.

Nhÿm pre ã Jejus hkôt mẽ ixpa ho mẽ ixpa xwÿnhjê mã amnhÿ jarênh anê. ²² Hãmri nhÿm Jutre hõja. Jut Kariot kêt axtem Jutre hõja Jejus axte kot mẽ inhmã pix mã kot amnhÿ to amnhÿrÿt ã harênhja ma nê kãm:

—Kwa aprÿ hã mẽ inhmã mẽmoj jarê mẽ ijahkre xwÿnh. Mon ka mẽ kêp akwÿ hkêt xwÿnhjê mã axte amnhÿ to amnhÿrÿt kêt ã amnhÿ jarê? Nê ãm mẽ papxipix mã amnhÿ to amnhÿrÿt ã amnhÿ jarê? Anê.

²³ Hãmri nhÿm kãm:

—Nã mẽ amã ixkÿnh xwÿnhjaja na ka htem ixkapêr ma nê hkôt amnhÿ nhÿpêx. Nhÿm Inhÿpêêxã ja hã mẽ apumu nê ixtã kãm mẽ ajapê htÿx nê. Hãmri pa wa mẽ akôt ixpa ho ixpa. Jao mẽ amã amnhÿ to amnhÿrÿt mex o ixpa. ²⁴ Na pa hte amnhÿ krã hkôt ri mẽ kãm ixkapêr o ixpa hkêt nê. ãm Inhÿpêêxã nhÿ hã na pa hte mẽ kãm ixkapêr o ri ixpa. Kot mẽ awÿr inhmênh xwÿnhhta nhÿ hã. Tã nhÿm mẽ kãm inhmar prãm kêt jakamã na pa hte wa mẽ kãm mẽ apyrã nê amnhÿ to amnhÿrÿt o ixpa hkêt nê.

²⁵ —E na pa kormã ixte mẽ akôt ri ixpa ri ã mẽ amã amnhÿ jarênh anê. ²⁶ Tã koja Inhÿpêêxã ixpãnhã mẽ awÿr wa Ixkarõ rê. Ixte hã mẽ amã ixãhwÿr xã hkôt. Hãmri nhÿm man mẽ awÿr wrÿ nê mẽ akaxwÿnh mã agjê nê mẽ akôt ri tanhmã mẽ ato ajuta

hto ho pa. Nê ra ixte ã mẽ amã ixkapêr anhÿrja koja hprÿ hã mẽ amã ho amnhÿrÿt mex nê. Ka mẽ amnhÿ krã kamã kãm aja-maxpêr nê hã ano htÿx nê ho apa. Anê.

Jejus kêp mẽ pajamakêtkati nhôr xwÿnh Rômãn 5.1; Karatas 5.22; Piripos 4.7; Korosê 3.15

²⁷ Nhÿm Jejus arÿ mẽ inhmã kapêr nê mẽ inhmã:

—Nê mẽ kêp ixkwÿ hkêt xwÿnhjaja na htem tee ri amnhÿ kukamã hamaxpêr o ri pa. Jao hkaprÿ nê pa. No pa na pa hte mẽ kurom ijamakêtkati nê ixkÿnh nê ri ixpa ho ixpa. Tã kot paj tanhmã mẽ ato ka mẽ ixpyrã nê ajamakêtkati nê axãmnhÿx akÿnh nê ri apa. Jakamã kwa mẽ ixte amnhÿ jarênh ma nê tee ri amnhÿ kukamã ajamaxpêr o amã ma ho ri apa hkêt nê.

²⁸ —Na pa pre ra mẽ amã ma ixàpir nê nhÿrmã man akupÿm mẽ awÿr ixwrÿk ã mẽ amã amnhÿ jarê. Tã na pa ra ma akupÿm Inhÿpêêxã hwÿr ixàpir mã. Kot amnhÿ to rax o kot ijakrenh. Kot paj akupÿm hwÿr api nê kuri inhmex nê ixpa ho ixpa. Tã ka mẽ amã ixkÿnh hã kot kaj mẽ ma akupÿm hwÿr ixàpir ã ijarênh ma nê inhÿ hã akÿnh nê.

²⁹ —Kormã ma akupÿm ixàpir kêt ri na pa ã mẽ amã amnhÿ kukamã amnhÿ jarênh anê. Kêr pa mẽmo arÿgro hã ma akupÿm api ka mẽ ja hã ixpumu nê ajamaxpêr o: “Nã ãm hãmri na pre mẽ inhmã amnhÿ kukamã akupÿm Hipêêxã hwÿr àpir ã amnhÿ jarê.” Anhÿr o ajamaxpêr. Jao ixkôt ajamaxpêr tÿx rãhã ho ri apa.

³⁰ —Kot paj tokyx axte tanhmã mẽ amã ixkapêr to hkêt nê. Mẽ kêp ixkwÿ hkêt xwÿnhjê nhõ pahшти Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprÿ. Kurom ixihtÿx o ixihtÿx o ixte hakrenh par jakamã koja tanhmã ixto hkêt nê. ³¹ Kwãr kãm tanhmã ixto hprãm xã hkôt tanhmã ixto pa omu. Inhmã Inhÿpêêxã hkôt ixte amnhÿ nhÿpêx prãm jakamã kot paj jahti mã arÿ xa nhÿm te tanhmã kot ixto pyrãk o inhÿpêx nom tanhmã ixto hkêt nê. Mẽ ate inhmã Inhÿpêêxã japê htÿx ã ixpumunh kaxyw kot paj ã mẽ anoo mã amnhÿ nhÿpêx anê. Nê mẽ ate ixte kãm tanhmã amnhÿ nhÿpêx to ho ri ixpa rãhã mẽ kot ixpÿr ã ixpumunh kaxyw.

E hāmri. Ma pu mẽ mō mẽ amnhĩ to Tĩrtũm wỳ. Anẽ.

Nhũm pre ã Jejus hkõt mẽ ixpa ho mẽ ixpa xwỳnhjê mã kapêr anẽ. Pa mẽ kuma mẽ kànhmã ixkuhê mẽ inhnojarêr nhũm axte mẽ inhmã awjarẽ.

15

*Jejus te kêp mẽmo krô pyræk
Karatas 2.20; Wam Juāw 2.28*

¹ Nhũm Jejus arĩ mẽ inhmã kapêr mẽ mẽ inhmã:

—Nà te ixpê mẽmo pĩ pê “uwa” anhỳr xwỳnhnta kahkô maati pyræk. Nẽ Inhĩpêêxà te kot uwa hkre mẽ hamār o pa xwỳnhnta pyræk. ² Nẽ mẽ kot ixkõt amnhĩ xunhwỳr xwỳnhjaja te mẽ kot uwa kahkô rũm krô pyræk. Na hte mẽ hkwỳjaja htỳx ri kêp ixkwỳ hã amnhĩ jarênh ã amnhĩ to hêx. Jao te kot krôja rã htã ô hkêt pyræk. Koja rã htã ô hkêt mẽ nhũm kot hamār xwỳnhjaja tee ri omu mẽ kahkô nê krãhta mẽ kumẽ. No koja ô mex mẽ nhũm omu mẽ hkĩnh mẽ. Hāmri mẽ rã mẽ ô rax kaxyw tanhmã ho mex to. Tã na hte Tĩrtũm uwa krô jamār xwỳnhnta pyræk mẽ ã mẽ ate ixkõt amnhĩ xunhwỳr xwỳnhjê nhĩpêx anẽ. ³ No mẽ kajaja na ka prem mẽ kot ixkwỳ hã amnhĩ to hêx xwỳnhjê rom ixkapêr mar tỳx mẽ. Nẽ amnhĩ kaxyw inhmã ajampêr mẽ ixkõt amnhĩ nhĩpêx mex o apa. Jao te mẽ ate krô rã mẽ ô rũnh pyræk o amnhĩ nhĩpêx.

⁴ —Na hte krôja amnhĩ krã hkõt ô hkêt mẽ. ãm kahkô pix kukwak ri na hte rã mẽ ô. Ja pyræk mẽ kot kaj mẽ ixkukwak ri pix mã inhmã hprãm xà hkõt ri tanhmã amnhĩ nhĩpêx to ho apa. Jakamã kwa kêt ka mẽ ixkapêr pix mãn mar o apa pa mẽ akõt ixpa ho ixpa. ⁵ Te ixpê kahkô nhũm te mẽ apê krô pyræk jakamã kot kaj mẽ inhmã hprãm xà hkõt tanhmã amnhĩ nhĩpêx to ho ri apa mẽ te krô rã mẽ ô rũnh pyræk o amnhĩ nhĩpêx. No kot kaj mẽ amnhĩ krã hkõt ri amnhĩ nhĩpêx o ri apa mẽ te krô grã mẽ ô hkêt pyræk o amnhĩ nhĩpêx.

⁶ Na hte uwa krô nhõ dõnja nhỹri hã krô grã pumu hāmri mẽ kahkô nê hakà mẽ ma o mra mẽ kuwy kamã kurẽ mẽ ho hxêt pa. Ja pyræk mẽ kot htỳx ri ixkõt amnhĩ xunhwỳr ã amnhĩ jarênh xwỳnhjaja koja

mẽ nhỹrmã amnhĩ xà htỳx kamã hamak rãhã ho pa.

⁷ —Tã no mẽ kajaja. Kêr ka mẽ ixkapêr kõt pix mã amnhĩ nhĩpêx rãhã ho ri apa. Te mẽ pahtipxi mẽ ri papa pyræk o amnhĩ nhĩpêx. Hāmri mẽ mãmrĩ amã hprãm xà hkõt mẽmoj tã Tĩrtũm wỳnhũm ama mẽ amã mẽmoj tã ate hwỳr xàta kõt kugõ. ⁸ Kot kaj mẽ Inhĩpêêxà mẽ wa ixkapêr kõt amnhĩ nhĩpêx o ri apa nhũm mẽ piitã ja hã mẽ apumu mẽ hamaxpêr o: “Hêxta waa mẽ. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỳr o hamaxpêr.

⁹ —Nẽ na pa hte Inhĩpêêxà kãm ijapê pyræk o inhmã mẽ ajapê mẽ. Tã kêt ka mẽ amarĩ inhmã mẽ ajapê hã ri ixkõt amnhĩ nhĩpêx mex o apa. ¹⁰ Na pa hte ãm Inhĩpêêxà kapêr kõt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh mẽ ri ixpa. Tã kêt ka mẽ ixpyræk mẽ ixkapêr kõt pix mã tanhmã amnhĩ nhĩpêx to ho ri apa. Nẽ ixpyræk mẽ inhmã mẽ ajapê hã amnhĩ pumu mẽ akĩnh mẽ ri apa.

¹¹ —E na pa ã mẽ amã ixkapêr anẽ. Mẽ ate inhmar mẽ ixpyræk mẽ axãmnhĩx ajamakêtkati mẽ akĩnh mẽ ri apa kaxyw. Tã kêt ka mẽ ã amnhĩ nhĩpêx anẽ mẽ te pa ixte ã amnhĩ nhĩpêx anhỳr pyræk. Anẽ.

Jejus kot mẽ pamã axpên kĩnh tỳx ã mẽ pamã karõ

¹² Nhũm Jejus arĩ mẽ inhmã kapêr mẽ mẽ inhmã:

—E kêt ka mẽ te inhmã mẽ ajapê pyræk o mẽ amã axpên japê ho mẽ amã axpên kĩnh o ri apa. Jao axpên to mex o ri axpên kõt apa. ¹³ Koja mẽhõ kãm hkrãmnhwỳ japê htỳx mẽ nhũm ra mẽhõ mẽmo mỳrapê kot kêp hpĩr mã nhũm tee ri hã omu mẽ nê kãm amnhĩ mẽ nhũm kupĩ. Hāmri nhũm mẽ ja hã omu mẽ kãm hkrãmnhwỳ japê htỳx ã mẽ htyk ã axpên mã harẽ.

¹⁴⁻¹⁵ —E kot paj axte mẽ apê inhmã mẽ axapênh xwỳnh ã mẽ ajarênh kêt mẽ. Na hte mẽ õ patrãwjaja hprĩ hã kãm mẽ apênh xwỳnhjê mã amnhĩ jarênh kêt mẽ. Na htem ãm mẽ apênh pix ã mẽ kurẽ. Nom mẽ kajaja mẽ ate ixkapêr mar mẽ hkõt pix mã amnhĩ nhĩpêx jakamã kot paj hpãnhã mẽ apê ixkrãmnhwỳ hã mẽ ajarẽ. Na htem axpên

to hkràmnhwý nē ma nhỹhỹm pa kaxyw nē tanhmã amnhĩ kukamã hkràmnhwý mã amnhĩ jarēnh to. Tã mẽ apê ixkràmnhwý jakamã na pa hte ã amnhĩ kukamã mẽ amã amnhĩ jarēnh anē. Nom ja pix jarēnh kêt nē. Na pa hte mãänēn Inhĩpêêxà xô ri mẽ amã mẽmoj piitã ho amnhĩrĩt o mẽ akôt ixpa.

16 —Nē mẽ kajaja na ka prem ixpê mẽ akràmnhwý kaxyw ixãm kêt nē. Pa na pa pre amnhĩ kaxyw inhmã mẽ aprãm. Ixkapêr kôt pix mã ri mẽ ate tanhmã amnhĩ nhĩpêx to ho apa kaxyw. Te uwa krô ô rũnh nē aa grã hkêeta pyrãk. Jakamã kot kaj mẽ mẽmoj tã Inhĩpêêxà wý nhũm mẽ ama nē mẽ ate mẽmoj tã hwýr xà hkôt amã kugô.

17 —E. Kwa kêr ka mẽ amã axpēn kĩnh nē tanhmã axpēn to ajuta hto ho axpēn mã mẽmoj kutã anojarêt pix o mãn kêt ri apa. Nã ja na kêt inhmã hprãm. Anē.

Mẽ kot Jejus kwýjê kamã gryk xwýnhjê jarēnh

Matêwre 10.22; mãänēn Juāw 7.7, 17.14; Wam Juāw 3.13

18 —Nē koja ixkwý hkêt xwýnhjaja kãm mẽ aprãm nõkati. Tã kêr ka mẽ amnhĩ tã mẽ omu nē tee ri amnhĩ kukamã ajamaxpêr kêt nē. Ixkumrêx na prem kãm ixprãm nõkati. Tã koja mẽ mã ixtã mẽ ato anē nē kãm mẽ aprãm kêt nē. 19 Mẽ apê mẽ hkwý ronhỹx mẽ amnhĩ tã mẽ apumu nē kãm mẽ ajapê nē. Nom apê mẽ hkwý hkêt. Ra ixte amnhĩ kaxyw mẽ arēnh jakamã na htem tee ixtã mẽ apumu nē kãm mẽ akĩnh kêt o kãm mẽ akurê nē. 20 Koja mẽ ixtã hpijaàm kêt nē nē mãänēn mẽ atã hpijaàm kêt nē. Nē mẽ anhĩpêx o te mẽ kot pa ixpê mẽ anhõ patrãw nhĩpêx pyrãk. Ka mẽ ixpyrà nē amnhĩ xà htýx kãm ajamak o ri apa. Na pa pre ra mẽ amã ja jarē. Nom koja mẽ akwýjaja jajê rom te ra mẽ kot ixkapêr mar nē hkôt amnhĩ nhĩpêxta pyrã nē mãänēn mẽ akapêr ma nē hkôt amnhĩ nhĩpêx o pa. Kwa kêr ka mẽ ixkapêrja mã mãn ajamaxpêr týx rãhã ho ri apa.

21 —Koja mẽ ixtã tanhmã mẽ anhĩpêx to. Mẽ kot Tĩrtũm kapêr kôt amnhĩ nhĩpêx kêt jakamã koja mẽ ã ixtã mẽ anhĩpêx anē. Tĩrtũm kot mẽ awýr inhmēnh kôt hamaxpêr kêt nē ã mẽ anhĩpêx anē. 22 Ixwryk nē mẽ kãm Tĩrtũm kapêr jarēnh o ri ixpa htã nhũm

mẽ inhma nē ãm inhma nē ixkôt amnhĩ nhĩpêx kêt nē. Jakamã koja mẽ kot amnhĩ tomnuj xwýnh ã amnhĩ to hpimxur kêt nē.

23 —Nē koja mēhõ kêp ixprãm nõkati nē mãänēn te kêp Inhĩpêêxà prãm nõkati pyrãk. 24 Na pa pre mẽ piitã mẽ hkôt aa mẽ kot mẽmoj pumunh kêt kwý ho anhỹr o ri mẽ hkôt ixpa nhũm mẽ hã ixpumu. ãm papxipix na pa pre ã amnhĩ nhĩpêx anhỹr o ri mẽ hkôt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpēn mã ijarēnh o: “Tk. Mẽ pahte mēhõja nhỹhỹnh mẽ pahwýr hpôx ã omunhre hã kot puj kêt mẽ ri hã pahpijaàm o ri papa.” Anhỹr o nhỹx prem axpēn mã ijarē. Tã ra mẽ kot ja hã ixpumunh mex tã axtem nē Inhĩpêêxà mẽ wa mẽ kãm wa ixkurê nē. Jao mẽ kot amnhĩ tomnuj xwýnh ã amnhĩ to hpimxur kêt nē. 25 No Tĩrtũm kapêr ã kagã htũm kot mẽ hkukamã mẽ harēnh nē mẽ hã kagã nē kot mẽ hã kagã kot:

Mẽmo tanhmã kute mýrapê na htem kãm ixkurê? Nã ãm amarĩ na htem kãm ixkurê ho pa. Anē.

Tã ã ixtã kagã kot anhỹr xà hkôt na htem ã kãm ixkurê anē. Jakamã koja mẽ mãänēn ixtã kãm mẽ akurê nē. Nom kêr ka mẽ arĩ mẽ kãm ixkapêr jarēnh o ri mẽ hkôt apa nē tee ri amnhĩ kukamã ajamaxpêr kêt nē.

26 —Nē tokyx ma akupỹm Inhĩpêêxà hwýr ixàpir mã tã kot paj hwýr pøj nē aa mẽ ato ijamakêtkati hkêt nē. Kot paj amnhĩ pãnhã mẽ awýr wa Ixkarõ rē. Mẽ kot kãm: “Mẽ kutã nojarêt xwýnh maati” anhỹr xwýnhhta kot paj mẽ awýr kurē nhũm ixpãnhã mẽ awýr wrý nē mẽ amã agjê nē hprĩ hã mẽ amã Tĩrtũm mẽ wa ixto amnhĩrĩt o ri mẽ akôt pa. 27 Kot kaj mẽ ama hãmri nē ma mẽ piitã mẽ hkôt ri mẽ kãm ixkapêr jarēnh o ri apa. Na pa pre ra mẽ kãm Tĩrtũm kapêr jarēnh ryy ho mẽ hkôt ri ixpa ka mẽ ixkôt ri inhmar o apa ry nē. Jakamã kêr ka mẽ ixwakre kamã arĩ mẽ kãm ixkapêr jarēnh o ri mẽ hkôt ri apa. Anē.

16

1 Nhũm Jejus arĩ mẽ inhmã kapêr nē mẽ inhmã:

—Nē mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ

kukamã ajamaxpêr nê mẽ umaj ixkaga py-maj na pa hte ã mẽ amã ixprĩ hã mẽmoj jarênh ry anê. ² Kot kaj mẽ kãm ixkapêr jarênh o ri apa nhũm mẽ hkwýjaja tee ri mẽ ama nhũm ja mẽ kêp omnuj nê. Nhũm mẽ Tĩrtũm kapêr o mẽ ahkre xà hã ixkreja rũm amnhĩ nê mẽ ajano nê mẽ akwýjê hpar o pa. Hãmri nê hamaxpêr o: “E pu mẽ axte mẽ hkwýjê pynê nê mẽ kupa. Tĩrtũm kãm ja mex kênã.” Anhỹr o htýx hamaxpêr o pa. ³ Mẽ kot hprĩ hã Inhĩpêêxà mẽ wa ixkapêr mar mex kêt nê ã htýx wa inhmã ja mex ã wa ijarênh anê. ⁴ Nom mẽ ate ixkôt amnhĩ xunhwýrta krax kãm na pa pre ã mẽ amã mẽ harênh anhỹr kêt nê. Arĩ mẽ akôt ixpa kênã. Kot ka mẽ ixkôt apa rãhã amã mẽ uma hkêt nê. Tã pa ra akupỹm inhnojarêr nê ã mẽ amã mẽ harênh anê. Jakamã koja mẽ nhỹrmã ã mẽ anhĩpêx anê ka mẽ amnhĩ tã mẽ omu nê ra ixte mẽ akukamã ã mẽ harênh anhỹrja mã ajamaxpêr kurê kumrêx nê tee ri amnhĩ kukamã ajamaxpêr kêt nê. E kwa ixkapêrja mãn mẽ amnhĩ krã him haxàr týx nê ri hã apa. Anê.

Jejus mẽ Tĩrtũm wa hkarõ jarênh

⁵⁻⁶ Nhũm Jejus arĩ mẽ inhmã kapêr nê mẽ inhmã:

—E na pa ra kot mẽ awýr inhmênh xwýnhta wýr ra akupỹm inhnojarêr ka mẽ ixte amnhĩ jarênh ã inhma nê akaprĩ nê. Nê tee ri amnhĩ kukamã ajamaxpêr tã mẽ atõ aprĩ hã ma inhmõr xà ã ixkukjêr kêt nê. Rý inhmã: “Kwa mo kaxyw kot kaj kêt mẽ ixre nê ma akupỹm mõi? Xà we ja amã mex?” Anhỹr o mẽ atõ ixkukjêr kêt nê. ⁷ Kêt ma akupỹm ixàpirja mẽ amã mex kumrêx. Kop ãm akupỹm ixàpir kêt ronhỹx mẽ amã mẽmoj kutã nojarêr xwýnhta ixpãnhã mẽ awýr wrýk kêt nê. Tã kot paj ma akupỹm api nê amnhĩ pãnhã mẽ awýr kurê. Jakamã kwa mẽ ja ma nê tãm ajamaxpêr o ri apa. ⁸ Koja ixpãnhã mẽ awýr wrý hãmri nê mẽ kêp ixkwý hkêt xwýnhjê mã mẽmoj to axkrunêpxi nê ho amnhĩrĩt. Koja mẽ kãm mẽ kot tanhmã amnhĩ tomnuj to xà ho amnhĩrĩt. Nê mãânên mẽ kãm tanhmã mẽ kot amnhĩ to mex to xà ho amnhĩrĩt. Nê mãânên Tĩrtũm kot nhỹrmã mẽ kot amnhĩ tomnuj mýrapê tanhmã mẽ homnuj to xàta

nhũm mãânên mẽ kãm ho amnhĩrĩt. Koja mẽ kãm ja piitã ho amnhĩrĩt.

⁹ —Jakamã koja mẽ ja kukamã tanhmã hamaxpêr to nê hamaxpêr o: “Kwa kot paj xep amnhĩ tomnuj kaga nê amnhĩ kaxyw Tĩrtũm Kra Jejus mã ijamaxpêr nê hkôt amnhĩ xãm kêt nhũm Tĩrtũm nhỹrmã ixte amnhĩ tomnuj mýrapê tanhmã ixto. ¹⁰ Nà kot paj hkôt amnhĩ xãm hãmri nê ra urak nê Tĩrtũm kapêr kôt tãm ri amnhĩ nhĩpêx o ixpa. Na pre Jejus tãm ri amnhĩ nhĩpêx o pa nhũm Tĩrtũm amnhĩ wýr ho api pa mẽ axte jar nhỹri omunh kêt nê. ¹¹ Na xep Tĩrtũm nhỹrmã kot ma kuwy hwýr mẽ kêp Jejus kwý hkêt xwýnhjê nhõ pahi maatija mênh ã ra amnhĩ kukamã hã amnhĩ jarê. Jakamã kwa arĩ ixpê hkwý jakamã kot paj tokyx Jejus kôt amnhĩ xãm kêt nhũm hkôt kuwy hwýr inhmê.” Anhỹr o hamaxpêr. Koja ã wa Ixkarõja mẽ kêp ixkwý hkêt xwýnhjê mã mẽmoj to amnhĩrĩt mex anê.

¹² —Nê na pa kormã mẽ amã mẽmoj piitã ho amnhĩrĩt kêt nê. Kormã mẽ ate aprĩ hã mẽmoj pumunh nê mar mã tãm kêt. ¹³ Tã koja ixpãnhã wa Ixkarõ mẽ awýr wrý nê mẽ akarõ mã agjê hãmri nê hprĩ hã mẽ amã Tĩrtũm kot amnhĩ nhĩpêx o amnhĩrĩt o mẽ akôt pa ho pa. Nom koja amnhĩ krã hkôt tanhmã mẽ amã ho amnhĩrĩt to hkêt nê. Koja ãm Tĩrtũm pix xô ri mẽ amã ho amnhĩrĩt o mẽ akôt pa. Jao hprĩ hã mẽ amã ixkôt mẽ ate amnhĩ nhĩpêx nyw o mẽ amã amnhĩrĩt o mẽ akôt pa. ã koja hprĩ hã ra ixte mẽ amã ixujarênh xà hkôt axte mẽ amã mẽmoj to amnhĩrĩt mex o pa anê.

¹⁴ —Nê koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akôt pa. ¹⁵ Inhĩpêêxà mẽ wa ixkapêrja ãm htipxi. Tã koja wa Ixkarõ ixkapêr xô ri ã mẽ amã mẽmoj to amnhĩrĩt anê. Jao ra wa ijamê wa ixkapêr o amnhĩrĩt mex o pa. Koja ã wa mẽ apê ixkwý hã mẽ ato mex o pa anê. Anê.

Mẽ kot akupỹm Jejus tĩr ã omunh ã mẽ harênh

¹⁶ Nhũm Jejus arĩ mẽ inhmã kapêr nê mẽ inhmã:

—Nê kot paj tokyx mẽ ano pê akunok ka mẽ axte amnhĩ kaêx ã ixpumunh kêt nê. Nom kwa kêr ka mẽ tee ri ixkapêrja

kukamã ajamaxpêr kêt nê. Kot paj ixtã apkati grêre ka mẽ axte ixpumu. Anê.

¹⁷⁻¹⁸ Nhũm pre ã Jejus hkôt mẽ ixpa ho mẽ ixpa xwýnhjê mã kapêr anê. Pa mẽ tee ri ã kapêr anhÿr ã kuma nê axpên mã:

—Kwa mo na ri ã amnhĩ jarênh anê? Nê tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarê nê akupÿm Hipêêxà hwÿr àpir ã amnhĩ jarê. Pêr kapêrja ãm ri katii. Anê.

¹⁹ Nhũm amnhĩ tã mẽ inhma nê mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nê? ²⁰ Kot paj ty nhũm mẽ kêp ixkwÿ hkêt xwýnhjaja ijarênh ma nê hkĩnh nê. No mẽ kajaja kot kaj mẽ akaprĩ nê amÿr o apa. Nê gaa nê akupÿm akĩnh nê. Kwa mẽ ixkapêrja ma nê kãm ajamaxpêr tÿx o apa. ²¹ Te mẽ ate mẽ hpijagri xwýnh kot amnhĩ nhĩpêx pyrãk. Na htem õhy xà nê gaa nê ra õhy xà htÿx nê. Nê hkĩnh kêt nê tee ri amnhĩ nhĩpêx o hikwÿ. Tã gaa nê hpijagri nhũm hkrare kato nhũm omu nê akupÿm hkĩnh nê axte õhy xà htÿx mã hamaxpêr kêt nê. ²² Tã ã mẽ ate amnhĩ nhĩpêx anhÿr kaxyw. Kot kaj mẽ akĩnh kêt nê ri apa. Tã kot paj akupÿm tokyx ixtÿr nê axte mẽ awÿr ixkato ka mẽ ixpumu nê akĩnh nê. Hãmri nê akĩnh rãhã ri apa ho apa. Nhũm mēhõ mẽ apumu nê tee ri tanhmã mẽ akĩnh nê mẽ ato kaprÿ ka mẽ arĩ akĩnh rãhã ri apa ho apa.

²³ —Nê ixte akupÿm kaxkwa hwÿr ixàpir nê amnhĩ pãnhã mẽ awÿr wa Ixkarõ rênh nhũm mẽ awÿr wrÿk nê hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nê. Anê.

Jejus kwÿjaja kot àmnhĩx mẽmoj tã Tĩrtũm wÿr

Matêwre 18.19-20; Juãw 14.13-14

Nhũm Jejus arĩ mẽ inhma kapêr nê mẽ inhmã:

—E kwa mẽ ã ixkapêr anhÿrja ma nê amnhĩ krã kamã kãm ajamaxpêr tÿx nê ho apa. Kot kaj mẽ apê ixkwÿ hã mẽmoj tã Inhĩpêêxà wÿ nhũm mẽ ama nê mẽ ate hã axàhwÿr xà hkôt mẽ amã mẽmoj tanhmã ho rÿ mẽ amã mẽmoj gõ. ²⁴ Na ka mẽ kormã apê ixkwÿ hã mẽmoj tã axàhwÿr kêt nê. Tã

kêr ka mẽ amã mẽmoj tã hwÿr prãm nê mãmri mẽmoj tã hwÿr o apa. Kê mẽ ama hãmri nê tanhmã mẽ amã mẽmoj nhĩpêx to ka mẽ amnhĩ tã omu nê akĩnh nê.

²⁵ —Nê na pa pre mẽ amã mẽmoj jarênh kaxyw nê mẽmoj tã haxwÿ nê mẽ amã ixujarênh rax nê. Nom kot paj axte ã mẽ amã ri ixujarênh anhÿr kêt nê. Kot paj tã ixprĩ hã mẽ amã tanhmã Inhĩpêêxà jarênh to ka mẽ aprĩ hã mar mex kurê kumrêx. ²⁶ Hãmri nê mẽ kamjaja mẽ apê ixkwÿ hã tanhmã amnhĩ to hwÿr to ho apa. Jakamã mo kaxyw kot pa kêt axte tanhmã mẽ ato hwÿr to? Kot kaj mẽ kamjaja amnhĩ to hwÿr jakamã arĩ ixte mẽ ato hwÿr kaxyw ixto presija hkêt nê.

²⁷ —Na ka mẽ ra amã ijapê nê. Nê ixte Inhĩpêêxà rũm mẽ awÿr ixwrÿk ã ixpumu. Jakamã nhũm Inhĩpêêxàja ixtã mãânên kãm mẽ ajapê nê. Tã kot kaj mẽ kamjaja mẽmoj tã amnhĩ to hwÿr o apa nhũm mẽ ama nê kãm mẽ ajapê htÿx kãm mẽ amã mẽmoj gõ.

²⁸ —Na pa pre Inhĩpêêxà rũm amnê mẽ awÿr wrÿ. Hãmri nê kãm hprãm xà hkôt tanhmã amnhĩ nhĩpêx to hpar o mō nê ra akupÿm hwÿr inhnojarêt kaxyw. Anê.

Nhũm pre ã Jejus mẽ inhma amnhĩ jarênh anê. ²⁹ Pa mẽ tã ixprĩ hã mar mex nê. Hãmri nê kãm:

—Tÿ. Nã na pa mẽ tã ixprĩ hã ate amnhĩ jarênh ma. Ka amnhĩ tã haxwÿr nê axujarênh kêt jakamã pa mẽ tã ixprĩ hã amar mex nê. ³⁰ Pêr ãm ate mẽmoj piitã omunh par xwýnh na ka. Jakamã ate mẽ ijamaxpêr piitã hkôt aprĩ hã mẽ ixpumunh par kumrêx kênã kot ka tanhmã mẽ ijamaxpêr to hã mẽ ixkukja. ãm hãmri na ka Tĩrtũm rũm awrÿk ã amnhĩ jarê. Anê.

³¹ Hãmri nhũm mẽ inhma nê mẽ inhmã: —Xà ãm hãmri na ka mẽ ixkôt ajamaxpêr tÿx nê? ³² Kwa mẽ o kora. Kot kaj mẽ tokyx mẽ umaj ixre nê angrã nê ma ahpÿnhã mẽ anhõ krĩ hwÿr mra. Mẽ kot ixkôt tanhmã mẽ anhĩmex to pymaj kot kaj mẽ ã amnhĩ nhĩpêx anê kãm ga. Kot paj ahte mẽ kãm ixãm pyrãk o amnhĩ nhĩpêx nom ahte ixãm kêt nê. Inhĩpêêxà aa kot ixrere hã.

³³ —E ixkukwak ri mẽ ajamakêtkati nê axãmnhĩx mẽ apa kaxyw na pa ã mẽ amã ixkapêr anê. Nom mẽ kêp ixkwÿ hkêt

xwýnhjaja koja nhýrmã ixtã mẽ atomnuj tỳx o pa. Tã kêr ka mẽ amã mẽ uma nẽ tee ri amnhĩ kukamã ajamxpêr o ri apa hkêt nẽ. Nhýrmã ixte mẽmoj punuj piitã ho ijapêx par ã arĩgrota ã kot paj mẽ atã mẽ ho ijapêx par kumrêx. Anẽ.

17

*Jejus kot amnhĩ to Tĩrtũm wỳr ã harênh
Rõmãn 8.34; Eprêw 7.25*

¹ Tã nhũm Jejus mẽ inhmã kapêr pa nẽ hpãnhã kaxkwa hwỳr rĩt nẽ Tĩrtũm mã amnhĩ jarẽ nẽ kãm:

“Pa Papaj. E na pa ra amã hprãm xà hkôt tanhmã amã amnhĩ nhĩpêx to hpar o mỗ nẽ akupỹm awỳr inhnojarêr kaxyw. Jakamã kot kaj ixpê Akra hã ma akupỹm amnhĩ wỳr ixto api. Mẽ kot ja hã ixpumunh nẽ amã amex o amex ã ajarênh o pa kaxyw. ² Na ra pyka piitã hkôt ri mẽ pa xwýnh kwỳjaja amnhĩ kaxyw ixkôt hamaxpêr nẽ ixkôt amnhĩ xunhwỳ nom ka na ka pre inhmã mẽ agõ. Ixte mẽ htĩr tũm nẽ mẽ pa mã xwýnh ã mẽ harênh kaxyw. Jakamã koja mẽ nhýrmã ixkukwak ri pakuri htĩr tũm nẽ pa ho pa. ³ Na mẽ ra ixkapêr mar mex nẽ. Nẽ ixpê Jejus Kris pê ate mẽ hwỳr inhmênh xwýnhja kôt hamaxpêr mex nẽ. Nẽ apê Tĩrtũm ã ãm apyxi mex ã mãnhên akôt hamaxpêr mex nẽ. Nẽ amex o amex ã akôt hamaxpêr nẽ kãm akĩnh nẽ. Jakamã koja mẽ nhýrmã pakuri htĩr tũm nẽ pa ho pa. Nà koja mẽ anẽ.

⁴ Amnepêr amnẽ pyka ja hwỳr inhnojarêr nhũm ate tanhmã ixte amnhĩ nhĩpêx to hã inhmã karõta na pa ra hatur xàm mẽnh kaxyw. Na pa xatã mẽ kãm akapêr jarênh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarẽ nẽ amex o amex nẽ axàhpumunh o axàhpumunh ã mẽ kãm ajarênh o ri ixpa. ⁵ Jakamã e Papaj. Kêr ka tokyx ixpê akra hã ma akupỹm amnhĩ wỳr ixto api. Pa akupỹm awỳr pøj nẽ te amnepêr akuri ixpaja pyrà nẽ axte akuri ixpa ho ixpa.” Anẽ.

*Jejus kot hkwỳjê ho Tĩrtũm wỳr ã harênh
Nhũm Jejus arĩ Tĩrtũm mã kapêr nẽ kãm:*

⁶ “E Papaj. Nà ra ate pyka hkôt inhmã mẽ õr xwýnhjaja na pa ra mẽ kãm akapêr jarênh ryy ho ri mẽ hkôt ixpa nhũm mẽ akapêr kôt pix mã amnhĩ nhĩpêx o pa. ⁷ Tã ixte anhỹ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex. ⁸ Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpêr mex nẽ. Nẽ ate mẽ hwỳr inhmênh nhũm mẽ hwỳr ixwrỳkja ã mẽ kot ixpumunh mex.

⁹⁻¹⁰ Tã ot pa mẽ ho awỳr o xa. Nom na pa mẽ kêp ixkwỳ hkêt xwýnhjê ho awỳr kêt nẽ. ãm ate inhmã mẽ õr xwýnhjê pix o na pa awỳ. Mẽ kêp akra jakamã mãnhên mẽ kêp ixkraa. Jakamã na htem pamã pamex o pamex ã pajarênh o ri pa.

¹¹ Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gõ pa te ixte axihtỳx pyræk. Tã na pa ra akupỹm awỳr inhnojarêr kaxyw. Kot paj jar pyka hkôt ri ixpa ry hkêt nẽ. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nẽ kê mẽ inhỹ hã tãm ri amnhĩ nhĩpêx o pa. Nẽ pahpyrà nẽ te ixkre tipxi kamã mẽ htixi nẽ mẽ pa pyræk o axpên kôt pa.

¹² Kormã mẽ kamã ixpata ã ate inhmã axihtỳx xà hkwỳ nhõrta o pa mẽ htãnopxar mex o ri mẽ hkôt ixpa. Jakamã nhũm mẽ ri ixkôt amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nẽ hapêx. No ãm ra akapêr ã kagà kot hkukamã ã kot amnhĩ nhĩpêx anhỹr ã harênh xàja kôt koja ã amnhĩ nhĩpêx anẽ nẽ hapêx.

¹³ Tã na pa ra akupỹm awỳr inhnojarêr kaxyw jakamã na pa ixte tokyx mẽ rer mã xwýnhjê ho awỳr o xa. Kormã mẽ hkôt ri ixpa ri. Mẽ kot inhmar nẽ ixpyrà nẽ hkĩnh nẽ hamakêtkati nẽ ri pa kaxyw.

¹⁴ Na pa pre ra mẽ kãm akapêr jarênh ry nẽ nhũm mẽ ixpyrà nẽ akôt pix mã amnhĩ nhĩpêx o ri pa. Jakamã nhũm hte mẽ kêp ixkwỳ hkêt xwýnhjaja tee ri ja hã mẽ omu nẽ axtem nẽ kãm mẽ hkurê nẽ. Nom mẽ kêp mẽ hkwỳ hkêt jakamã na htem ã mẽ kamã gryk anẽ.

¹⁵ Tã na pa ã mẽ ho awỳr anhỹr o

xa. Nom mẽ kot amnhĩ tomnuj xwýnhjê hkàx ã mẽ pa kaxyw na pa mẽ ho awýr kêt nê. Koja mẽ arĩ mẽ hkôt ri pa. Nom mẽ uràk nê amnhĩ tomnuj o pa pumaj na pa ã mẽ ho awýr anê. ¹⁶ Mẽ kêp mẽ hkwý hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyràk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nê. Æm pahkôt pix mã amnhĩ nhĩpêx o pa. ¹⁷ Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyràk o amnhĩ nhĩpêx.

¹⁸ Na ka pre amnê mẽ hwýr inhmẽ pa pre ixte mẽ kãm akapêr jarênh o ri ixpa kaxyw mẽ hwýr wrý. Nê amnhĩ pyrã nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwýr mẽ kurê. ¹⁹ Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwýnhjê mã amnhĩ gô. Amã hprãm xã hkôt. Ixkwýjaja kot ja hã ixpumunh nê ixpyrà nê amã hprãm xã hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tirtũm wýr

²⁰ Nhũm Jejus arĩ Tirtũm mã amnhĩ jarê nê kãm:

“Tã na pa ã jajê ho awýr anê Papaj. Nom ixkôt mẽ pa ho mẽ pa xwýnhjê pix o na pa awýr kêt nê. Mããnên mẽ ô ri nhỹrmã mẽ kot ixkôt amnhĩ xunhwýr mã xwýnhjaja na pa mẽ ho ixpimràã tã mẽ ho awý. ²¹ Kê mẽ pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhýr o pa nhũm mẽ kêp pahkwý hkêt xwýnhjaja pahtã mẽ omu nê ate mẽ hwýr inhmênh ã apumunh kurê kumrêx.

²² Nê koja mẽ ixkukwak ri panhỹ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. ²³ Na pa htem te ixkre tipxi kamã mẽ ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mẽ ixwakre kamã ã axpên nhĩpêx anhýr o pa nhũm mẽ kêp pahkwý hkêt xwýnhjaja ja hã mẽ omu nê hamaxpêr o: ‘Nà pêr ãm hãmri na

pre Tirtũm tãm mẽ pahwýr Jejus mẽ. Kãm hapê htýx tã mẽ pahwýr kumê nhũm wrý nê amnhĩ xwar kãm hkwýjê japê nê.’ Anhýr o koja axpên mã pajarênh o pa.

²⁴ Amnepêm amrakati ri pa pre amã ijapê hã ri ixpa. Tã ot pa jajê ho awý. Ka na ka pre inhmã mẽ agô. Tã ma awýr inhmôr mã xàta wýr na pa inhmã mẽ àpir prãm nê. Koja mẽ nhỹrmã ma pahwýr api pu mẽ pahpiitã pahpimràãtã pamã axpên japê hã ri papa ho papa.

²⁵ E Papaj. Amex o amex tã mẽ kêp ixkwý hkêt xwýnhjaja na kormã ate mẽ hwýr inhmênh xwýnh ã ixkôt hamaxpêr kêt nê. Nom mẽ kot ixkôt amnhĩ xunhwýr xwýnhjaja na mẽ kurom ja hã ixkôt hamaxpêr mex nê.

²⁶ Na pa ra ixprĩ hã mẽ kãm akapêr o amnhĩrĩt o ri ixpa. Tã kot paj axte mẽ kãm akapêr kwý jarê. Amã ijapêta pyrã nê mẽ kãm axpên kĩnh ã axpên to pa kaxyw na pa mẽ kãm hã karô. Kot paj inhĩ hã mẽ hkôt ixpa hkêt tã koja Pahkarôja mẽ hwýr wrý nê mẽ hkarô mã agjê nê te pa mẽ hkôt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awýr anê. Tã ãm ja pix Papaj.” Anê.

Nhũm pre ã Jejus ô Papaj mã mẽ inhnoo mã amnhĩ jarênh anê pa mẽ ixpiitã hã kuma.

18

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

¹ Tã nhũm Jejus mẽ ixto Hipêêxã hwýr pa. Hãmri nê ixkreja rùm ma tẽ nê Jerujarê rùm kato nê ma gô pê Kirô hwýr tẽ pa mẽ hkôt ixpa ho ixpa xwýnhjaja ma hkôt mra. Nê gô hã rê nê hikjê hã mẽ kot mẽmo pĩ hkô hkre xwýnhja wýr mra nê parpê ixkrĩ hpa. ² Na pre hte Jejus xatã hwýr amnhĩ kôt mẽ ixto pa ho kuhê. Jakamã nhũm Jut Kariot kot mẽ kãm ôr mã xwýnhhta ra kot hwýr mẽ ixpa ho ixkuhê xàta pumunh mex. ³ Jakamã pa mẽ hwýr pôj nê ixkrĩ hpa nhũm mẽ mẽ ixwýr mra. Jut Kariot mẽ pôristijaja. Rôm nhõ xwýnhjê nhõ pôristijê mẽ patre nhõ pôristijaja nhũm mẽ mẽ ixwýr Jut Kariot kôt mra. Ijaew nhõ pahijê nhỹ

hã mẽ ixwỳr mra. Piitã wapohti jamỳ nẽ pô hpòk nẽ kanê jamỳ nẽ mẽ ixwỳr hpòk o kato. ⁴⁻⁵ Hãmri nhũm Jejus amnhĩ wỳr mẽ omu nẽ kànhmã xa nẽ ma mẽ kutã tẽ. Jut Kariot kot mẽ kãm òr kaxyw nhũm amnhĩ tã omunh mex jakamã amnhĩ wỳr mẽ omu nẽ ma mẽ kutã tẽ. Hãmri nẽ mẽ hkaxpa nẽ mẽ omunh o xa nhũm Jut Kariot mẽ kuri xa nhũm Jejus mẽ omu nẽ mẽ kãm:

—Pa. Mẽmoj japêr na ka mẽ pô hpòk o ri apa? Anẽ.

Hãmri nhũm mẽ kãm:

—Nà Jejus pẽ Najare nhõ xwỳnh japêr o na pa mẽ ri ixpa. Anẽ.

Hãmri nhũm mẽ kãm:

—Tỳ ot pa xa. Pa na ixpê Jejus. Anẽ.

⁶ Hãmri nhũm mẽ kuma nẽ tee ri axpẽn pumu nẽ umaj katẽ ho axkamẽ nẽ kuhê. Nom katẽ ho pikamênh o ra rôròk pa nẽ hikwỳ. ⁷ Hãmri nẽ kànhmã kuhê hpa nhũm Jejus axte mẽ kãm:

—Kwa mẽ inhmã amnhĩ jarẽ. Mẽhõ japêr o na ka mẽ apa? Anẽ.

Hãmri nhũm mẽ kãm:

—Jejus pẽ Najare nhõ xwỳnhhta japêr o na mẽ ri ixpa kênã. Anẽ.

⁸ Hãmri nhũm mẽ kãm:

—Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkòt ri mẽ pa xwỳnhhtaja tanhmã mẽ ho hkêt nẽ. Kê mẽ mãmri anhgrã nẽ ma mra.

⁹ Anhỳr o mẽ inhnê mẽ kãm kapêr. Na pre ra ham Hipêêxã mã mẽ ixtã kãm amnhĩ jarẽ nẽ kãm:

—Kormã mẽ kamã ixpa ri ate inhmã ixihtỳx xà nhõrta o na pa mẽ htãnopxar mex o ri mẽ hkòt ixpa.

Anhỳr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwỳnhjê mã kapêr anẽ.

Simãw Pêtre kot mẽhõ pẽ hamak krãhyr ã harênh

Matêwre 26.51-54; Makre 14.47; Rukre 22.49-51

¹⁰ Hãmri nhũm Simãw Pêtre tee ri Jejus ã mẽ omu hãmri nẽ ò wapo kapa nẽ jam ho apê nẽ ho hamak nhĩkjê krãhta. Mawti jamak krãhta. Mawtija mẽõ patre mã apênh xwỳnhjê hõ na pre nhũm Simãw

Pêtre hamak krãhta. ¹¹ Hãmri nhũm Jejus ja hã omu nẽ nẽ kãm kapêr nẽ kãm:

—Tk. Kwa nà amarĩ xa nẽ akupỳm awapota hkàm haxà. Ixte mẽ anê amnhĩ xà htỳx kamã ijamak kaxyw na pa pre Inhĩpêêxã rũm amnẽ mẽ awỳr pika hwỳr wry. Kêt inhmã kãm hprãm xà hkòt pix mã na inhmã tanhmã amnhĩ nhĩpêx to ho ixpa hprãm. Jakamã kwâr mẽ mãmri tanhmã kãm ixto hprãm xà hkòt mãmri tanhmã ixto. Anẽ.

Mẽ kot Anas wỳr Jejus o htêm ã mẽ harênh Matêwre 26.57-58; Makre 14.53-54; Rukre 22.54

¹² Tã nhũm pòristi mẽ mẽ hkrãhtũm nẽ mẽõ patre nhõ pòristijaja Jejus pynê nẽ hpa hpre hpa ¹³ nẽ ma Anas wỳr o tẽ. Anasja Kajpas piinhõ na pre. Nhũm Kajpas kormã amgrãja ã Anas pyrã nẽ kêp mẽõ patre maati. ¹⁴ Jakamã na pre ra Ijaew nhõ pahijê mã Jejus jarênh o:

—Nà kot puj mẽ Jejus pĩr tokyx anẽ. Kê tapxipix ty pu mẽ arĩ mỳrpê pahpiitã paja-makêtkati nẽ ri papa. Anẽ.

Jakamã nhũm mẽ Jejus pynê nẽ kormã ma patre maati hwỳr o tẽ.

Simãw Pêtre kot Jejus kòt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

¹⁵ Hãmri pa ixpê Juāw mẽ ixkrãmnhwỳ Simãw Pêtre mẽ pa wa ma mẽ hkòt wa tẽ. Nhũm mẽ ra mẽ inhõ patre maati nhõrkwỳ hwỳr Jejus o axà. Nhũm patre maati kot ixpumunh jakamã nhũm kãm apênh xwỳnhja ixpumu nẽ inhmã anê pa mẽ hkòt axà. ¹⁶ Nom nhũm Simãw Pêtre arĩ kapòt ã hakwa krem xa. Hãmri pa omu nẽ akupỳm hwỳr tẽ nẽ mẽhõ niti kot hakwa kre jamãr o ãm xwỳnhja mã anê nhũm kãm kahê xà mẽ nhũm mẽ ixkòt axà. ¹⁷ Hãmri nhũm nita hprĩ hã omu nẽ kãm:

—Xêê. Pêr apê mẽ kot unênh nẽ o mõr mũj kòt ri mẽ pa xwỳnhjê hõ na ka mê? Anẽ.

Hãmri nhũm kuma nẽ kãm:

—Tk. Nà ixte mẽhõ myti ata pumunhre hã. Anẽ.

¹⁸ Hãmri nhũm ra kòt ã kamàt nẽ ra kryy nẽ nhũm mẽ apênh xwỳnh kwỳ mẽ mẽõ patre nhõ pòristi hkwỳjaja amnhĩm kuto nẽ hã ànhunh o kuhê. Nhũm Simãw Pêtre mẽ

omu nē mē hwÿr tē nē mē ìhkô hã ànhunh o xa.

Patre maati kot Jejus kujêr ã harēnh
Matêwre 26.59-66; Makre 14.55-64;
Rukre 22.66-71

¹⁹ Rôm nhũm Anasja hêx rom tanhmã Jejus kujêr to nē kãm:

—E kwa inhmã amnhĩ jarē. Tanhmã na ka hte we akôt mē pa ho mē pa xwÿnhjê jahkre hto ho apa wehe? Anē.

²⁰ Hãmri nhũm amnhĩ tã kãm:

—Nà na pa hte mē piitã mē noo mã ri mē kãm ixkapêr o ixpa. Tĩrtũm kapêr o mē ahkre xà hã ixkre kamã nē Tĩrtũm mã amnhĩ jarēnh xà hã ixkre kamã pa hte mē piitã mē noo mã ri mē kãm tanhmã ixkapêr to ho ri ixpa. Na pa hte nhÿri ixpimxur pē ri mē kãm tanhmã ixkapêr to ho ri ixpa hkêt nē. ²¹ Tã ka ixtã mē kot inhmar o kuhê xwÿnhjaja tanhmã ixtã mē hkukjêr to hkêt nē. ãm papxipix ri ixkukja. Kwa ixtã mē hkukja kê mē kot tanhmã ixkapêr mar to xà hkôt tanhmã amã ijarēnh to nà? Anē.

²² Hãmri nhũm patre nhõ pôristi hõja kuma nē hwÿr tē nē kãm:

—Tk. Kwa na htem ã patre maati mã kapêr anhÿr kêt nē. Na htem hã hpijaàm o kãm kapêr. Tã na ka axtem nē ri ã kãm akapêr anē. Anē.

Hãmri nē hinep hkura.

²³ Hãmri nhũm Jejus amnhĩ tã omu nē kãm:

—Kwa kot pa tanhmã mē amã amnhĩ to ixêx to ka mē hã inhma nē rĩ kormã tanhmã axpên mã ixto akapêr to rÿ hã ixtak. Nom ãm hãmri ixte mē amã amnhĩ jarēnh tã ka axtem nē ri inhĩnep ixtak. Anē.

²⁴ Hãmri nhũm Anas tanhmã mar to hpa hãmri nē umre Kajpas wÿr kumē. Na pre Kajpasja kormã hitom kãm ri tanhmã amnhĩ nhĩpêx to ho nhÿ nhũm Anas mē kãm anē nhũm mē kuma nē hwÿr Jejus o tē nē ho axà. Arĩ hpa hpre rãhã hwÿr o tē nē ho axà nhũm xa nē kãm amnhĩ jarē.

Simãw Pêtre kot axte Jejus kôt pa hkêt ã amnhĩ tã aprãr ã harēnh

Matêwre 26.71-75; Makre 14.69-72;
Rukre 22.58-62

²⁵ Nhũm Simãw Pêtre arĩ mē ìhkô hã ànhunh o xa nhũm mēhõja kãm kapêr nē kãm:

—Kwa pēr apê Jejus kôt ri mē pa xwÿnhjê hõ na ka. Anē.

Hãmri nhũm kuma nē kãm:

—Tk. Kokÿ ixte mēhõ nēj pumunhre hã. Anē.

²⁶ Hãmri nhũm hpãnhã mēõ patre maati mã àpēnh xwÿnhja mããnhēn omu. Simãw Pêtre kot kēp hamak krãhyr xwÿnhhta kwÿ na pre. Jakamã nhũm hprĩ hã omunh mex kurê kumrêx nē kãm:

—Kwa nà ka na ka mũtar pĩ hkôta kamã mē ìhkô hã xa pa apumu. Anē.

²⁷ Hãmri nhũm tee ri kuma nē axte mē kãm amnhĩ tã aprãr kãm hihtÿx nē. Jao ra mē kãm amnhĩ tã aprãr o axkrunēpxija mē nhũm krãhyre hkàr kurê kumrêx. Ra Jejus kot hkukamã harēnh xà hkôt kēp hkwy hkêt ã amnhĩ tã aprãr o axkrunēpxi.

Jejus kot Pirat mã amnhĩ jarēnh

Matêwre 27.1-2, 27.11-31; Makre 15.1-20;
Rukre 23.1-5, 23.13-25

²⁸ Hãmri nhũm mē ixpê Ijaew hkrãhtũmjaja ra Kajpas rũm Jejus o kato nē ma Pirat wÿr o tē. Piratja na pre te Rômjê nhõ pahĩ pē Sesti mã mē ixpê Ijaew jamãr o pa nhũm mē ma hwÿr o tē. Nhũm ra myt kator grire nhũm mē hwÿr o tē nē òrkwy kapem o xa. Pirat kēp Ijaew kêt jakamã nhũm mē òrkwy hwÿr gjêx kêt nē kapôt ã kuhê. Na hte Ijaew kormã Pas ã hkĩnh hãmri nē nhãm mē kēp Ijaew kêt xwÿnhjê nhõrkwy hwÿr gjêx kêt nē. Koja mē hwÿr agjê nē amnhĩ tomnu nē Pas ã apkur kêt nē. Jakamã nhũm mē Pirat wÿr Jejus o tē no ãm hwÿr o àr kêt nē. ãm ixkre kapem o xa. ²⁹ Hãmri nhũm Pirat mē hwÿr kato nē omu nē hã mē hkukja nē mē kãm:

—Kwa tanhmã na we amnhĩ tomnuj to ka mē ixwÿr o tē? Anē.

³⁰ Hãmri nhũm mē kãm:

—Nà kot amnhĩ tomnuj o pa xwÿnh kēnã. Jakamã na pa mē awÿr o tē. Ate tanhmã kot amnhĩ tomnuj to hã harēnh mar nē mÿrapê tanhmã ho kaxyw. Anē.

³¹ Hãmri nhũm mē kuma nē mē kãm:

—Tk. Kwa mē kamjaja ma amnhĩ kôt o tē nē amnhĩ krã hkôt tanhmã ho. Mē ate tanhmã kot amnhĩ nhĩpêx to hã omunh xà hkôt. Anē.

Hãmri nhũm mē tee ri kuma nē kãm:

—Kwa amnepê mē ixpê Ijaewjaja na pa pre htem kēn o mē kot amnhĩ tomnuj

xwýnhjê tak o mẽ kupa. Tã na ra Rõm nhõ pahihtija mẽ pamjaja mẽ ixte mẽ hpar nê mẽ ixkurê. Tapxipix kãm mẽ hpar ã àmnênh prãm. Jakamã kot kaj ý hã mẽ inhmã tanhmã hã axàmnênh to kê mẽ kupĩ. Ra ja kaxyw mẽ kot mẽ ixkaxyw axãm kênã. Anê.

³² Rõm nhõ xwýnhjaja na htem mẽ kot amnhĩ tomnuj xwýnhjê hpar kaxyw nê pĩ kahpa hã mẽ hanhõ nê mẽ kupa. Nhũm Jeus amnhĩ kukamã tanhmã mẽ kot hpĩr to hã mẽ omunh mex jakamã ra hprĩ hã mẽ inhmã mẽ kot tanhmã hipêx to hã mẽ harê. Jakamã nhũm pre ã Ijaew Pirat kot mẽ kãm hpĩr prãm xàj ã kãm kapêr kãm xihtýx anê.

³³ Hãmri nhũm mẽ kuma nê akupým òrkwý hwýr axà nê amnhĩ wýr Jeus ã karõ nhũm hwýr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wýr akãm hamak o pa? Anê.

³⁴⁻³⁶ Hãmri nhũm kãm:

—Tý ãm hãmri na ka ã ijarênh anê. Nom jar pika ja kamã ixpê mẽõ pahi hkêt. Axtem ixpê mẽõ pahi na pa. Mo kaxyw na ka ã ixkukjêr anê? Xà na pre mẽhõ ixte mẽ anhõ pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tĩrtũm kot Ijaew wýr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tĩrtũm kot Ijaew wýr amênh ã akukja? Mẽ apyrã nê ixpê Ijaew kêt kênã. Mẽ kot ixwýr ato htêm xwýnhjaja na mẽ ã ate amnhĩ jarênh anhýr ã ajarênh anê. Nà mẽ akwýjê mẽ mẽ anhõ patre krãhtũmjaja na mẽ ã inhmã ajarênh anê. Jakamã e aprĩ hã inhmã amnhĩ jarê. Tanhmã na ka we amnhĩ tomnuj to nhũm mẽ ixwýr ato tẽ? Anê.

Hãmri nhũm kuma nê kê axte kãm:

—Nà ixpê pyka ja kamã mẽ õ pahi hkêt. Kop ãm ixpê pyka ja kôt mẽ õ pahi ronhýx ra ixkôt ri mẽ pa xwýnhjaja tanhmã ixtã mẽ ato. Nom jar ixpê mẽ õ pahi hkêt. ãm axtem ixpê mẽ õ pahi na pa. ãm hãmri na pa ã amã amnhĩ jarênh anê. Anê.

³⁷ Nhũm ã kãm amnhĩ jarênh anê hãmri nhũm tee ri kuma nê kãm:

—Xà apê mẽ õ pahi hõ na ka? Anê.

Hãmri nhũm kãm:

—Tý. Nà ãm hãmri na ka ã ijarênh anê. Na pa pre amnê pikaja wýr wrý nê jar mẽ akamã ixkato nê mẽ akamã ixaptar. Ixte tanhmã mẽ kãm ixkapêr to ho ri ixpa kaxyw na pa pre wrý nê mẽ akamã ixpa nê ãm hãmri mẽ kãm ixkapêr o ri ixpa. Na pa hte tãm ixkapêr o ri ixpa. Tã mẽ kot ixkapêr mar nê ixkôt ri amnhĩ nhĩpêx o mẽ pa xwýnhjaja na htem ixpê mẽ õ pahihtihã ijarênh o pa. Anê.

³⁸ Hãmri nhũm Pirat kot tãm kãm kapêr ã amnhĩ jarênhja ã kuma nê kãm:

—Tk. Aa ixte pika ja kamã mẽhõ pumunh nhũm tãm kapêr o pare hã. Anê.

Hãmri nê kapêr ã kuma nê tee ri hkukamã hamaxpêr. Hãmri nê akupým Ijaew wýr ho kato nê mẽ kutã o xa nê mẽ kãm:

—Kwa tanhmã kot amnhĩ tomnuj tore hã. ³⁹ E mẽ inhma. Na pa hte amgrã mẽ arĩgro pê Pas kãm mẽ amã mẽ hagjênh xà rũm mẽ akwýjê ho hpýnh nê mẽ hapõj nhũm mẽ hamakêtkati nê amnhĩx ri pa. Ka mẽ ja hã omu nê Pas ã akĩnh nê. Jakamã e. Pa mẽ amã mẽ anhõ “pahihtihã” jarênhja mã inhũre. E na pa ra kãm inhũre. Anê.

⁴⁰ Hãmri nhũm mẽ tee ri ã kapêr anhýr ã kuma nhũm ja mẽ kêp omnuj týx nê. Nhũm mẽ hã kàx pê gryk kamã kãm kapêr kãm hihtýx nê kãm:

—Tk. Kwa nà kãm anhũrer kêt nê. Kêt Parapas mã mãnhũre. Anê.

Parapasja na pre hte tanhmã amnhĩ tomnuj týx to ho ri pa nhũm prem mýrapê unê nê haxà. Tã nhũm mẽ axtem nê Pirat kot kãm urer prãm xàj Jeus kaga.

19

Mẽ kot Jeus tak ã mẽ harênh

Matêwre 27.27-31; Makre 15.16-21; Rukre 23.20-25

¹ Tã nhũm Pirat akupým òrkwý hwýr Jeus o axà nê õ pôristijê mã hã amýnê nhũm mẽ hwýr mra nê htak o kuhê. ² Hãmri nê kêp pahi hã hpêr o pikênh kaxyw kãm pahi hã mẽ ahkã nhĩpêx nê hkrãm haxà. Nom axtem mẽmo mrõnhĩ te kot ronh kanêre pyrãk xwýnhja nhũm mẽ hikãx nê hkrãm haxà. Nê kêp pahi hã mẽ ê kamrêk py nê

kām haxà. ³ Hāmri nē xatā hwÿr mra nē hinep htak nē hā hpēr o pikēnh o xa nē kām:

—E apē Ijaew nhō pahi punuti na ka. Anē.

⁴ Hāmri nhūm Piratja akupÿm Ijaew wÿr kato nē mē kām:

—E koja inhō pōristi akupÿm mē awÿr ho kato ka mē omu. Na pa tee ri kot tanhmā amnhī tomnuj to hā hkukja. Pēr tanhmā kot amnhī tomnuj to hkēt kēnā. Anē.

⁵ Hāmri nhūm Jejus kato nē arī pahi hā àhkà tu nē ê kamrēkjaxà nē o xa nhūm Pirat mē kām:

—E kwa mē omu nē kamā axukaprī hkēt wehe. Anē.

⁶ Hāmri nhūm patre krāhtūmjē mē mēō pōristijaja tee ri ja hā kuma nhūm ja mē kēp omnuj nē. Hāmri nē hā kām kapēr kām hihtÿx nē kām:

—Tk. Kwa nà pī kahpa hā mān anhō. Kē pī kahpa hā mān ajēt nē ty. Anē.

Hāmri nhūm tee ri hā mē kuma nē mē kām:

—Nà mē kam nē ma amnhīm o tē nē mē kam amnhīm ho anē. Nò pa kot paj ho anhÿr kēt nē. Mò mÿrapē kot pa kēt hā amÿnē nhūm mē kupī? Nà kwarī kot pa ho anhÿr kēt nē. Anē.

⁷ Hāmri nhūm mē tee ri kuma nē kām:

—Kwa kēp Tirtūm Kra hā amnhī jarēnh kēnā. Mē inhīgētjaja na prem ā mē ixte amnhī jarēnh anhÿrja nē mē inhmā kapēr pa htem ā amnhī jarēnh anhÿr kēt nē. Kojā mēhō ā ri amnhī jarēnh anē nhūm mē ja mÿrapē kupī. Anē.

⁸ Hāmri nhūm Pirat tee ri Jejus kēp Tirtūm Kra hā amnhī jarēnhja ma nē kām uma nē kām tanhmā ho hprām kēt nē. ⁹ Hāmri nē akupÿm ōrkwÿ hwÿr ho axà nē axte hkukja nē kām:

—Kwa aprī hā inhmā amnhī jarē. Nhÿhÿnh na ka pre mē ixwÿr mō? Anē.

Nom nhūm axte tanhmā kām nē hkēt nē. Ām arī akryk mar o xa. ¹⁰ Nhūm tee ri omu hāmri nē kām:

—Kwa xà ate ixpumunh kēt? Inhÿ hā na htem mē kupa nē inhÿ hā akupÿm mē hapōj. Tā ka pēr aprī hā inhmā tanhmā amnhī jarēnh to hkēt nē ri akryk akuhē. Anē.

¹¹ Hāmri nhūm Jejus kām:

—Nom Tirtūm nhÿ hā pix mā na ka hte ā amnhī nhÿpēx anē. Kēp ām Tirtūm kām ja prām kēt ronhÿx ka tee ri tanhmā amā ixto hprām hkaprÿ. Tām kot mē ixkaxyw axām kēnā. Tā mē kot awÿr inhmēnh nē ri ixtyk ā ijarēnh xwÿnh pē Ijaew nhō pahijaja. Ra mē kot ixkaga jakamā na mē ā amā ijarēnh anē. Jakamā mē kot amnhī tomnuj tÿx o ajakrenh. Anē.

¹² Hāmri nhūm Piratja tee ri ā kapēr anhÿr ā kuma nē kot kām urer prām nē. Hāmri nē akupÿm Ijaew wÿr kato nē hā mē kām kapēr nhūm mē tee ri kot kām urer kaxyw ā amnhī jarēnhja ma nē kām ja prām kēt kumrēx. Jakamā kàxpē nē kām kapēr nē kām:

—Kwa nà ra kēp mē inhō pahi hā kot amnhī to hēx kēnā. Kot mēhō ā ri amnhī jarēnh anē nhūm Rōm kamā mē panhō pahi Sestija ja hā harēnh ma nē kamā gryk tÿx nē. Tā kot kaj kām anhÿre nhūm ajarēnh ma nē akamā gryk nē. Anē.

¹³ Hāmri nhūm tee ri mē kuma hāmri nē ma pahi kot tanhmā mē harēnh to xà hā kēn pota wÿr ma tē nē hā nhÿ. Mē ixpē Ijaew kapēr kām mē ixte kām: “Kapata” jarēnh xwÿnhhta wÿr kot tanhmā Jejus jarēnh to kaxyw ma hwÿr tē nē hā nhÿ nhūm mē hwÿr o tē.

¹⁴ Hāmri nhūm ra arīgro pē sēsta. Mē ixpē Ijaewjaja mē ixte Pas ā amnhī tomnuj mÿrapē mry hkwÿ hpar nē Tirtūm kōt pix mā amnhī nhÿpēx ā amnhī jarēnh xà hā arīgroja kato. Jakamā nhūm kaxkwa nhÿpōk ri myt nhÿ nhūm Piratja mē kot Jejus kator ā harēnh prām xàj arī mē kām ho mē ō pahi hā harē nē mē kām:

—E ota mē anhō Pahihitita. Anē.

¹⁵ Hāmri nhūm mē tee ri ā harēnh anhÿrja ā kuma nē kām:

—Kwa apī ri. Ma o tē nē pī kahpa hā anhō kē tokyx ty.

Anē nhūm tee ri mē kuma nē mē kām:

—Kwa nà. Kēp mē anhō pahi kēnā kot paj kēt ri axtem nē mē apē kupī. Anē.

Hāmri nhūm mē kām:

—Nà kēp mē inhō pahi hkēt. Pahi Sesti pix na kēp mē inhō pahi. Anē.

Mē kām Sesti hkĭnh kēt tā ā kām Jejus htyk prām xàj ri harēnh anē. ¹⁶ Hāmri nhūm Pirat tee ri ja hā mē kuma nē tā Jejus ā pōristi mā karō nē mē kām:

—E mẽ māmri ma o tē nē pī kahpa hā anhô kê ty. Anē.

Hāmri nhũm mẽ kuma nē ma o tē.

Mẽ kot pī kahpa hā Jejus nhôr ã mẽ harēnh

Matêwre 27.32-44; Makre 15.21-32; Rukre 23.26-43

¹⁷ Hāmri nhũm pōristija Jejus mã õ pī kahpa gō nhũm kutu nē ma mẽ hkôt hkjēnh o mō. Nhũm mẽ krī rũm ho kato nē ma hixêt prêk wỳr o tē. Hixêt prêkja mẽ kot harēnh o: “Korkot” anē. No mẽ ixpê Ijaewjê kapêr kãm na pa pre htem harēnh o “Mẽ hkrã hi xà” anhỹr xwỳnhnta wỳr nhũm mẽ ma o tē nē hā ho api. ¹⁸ Hāmri nē pikap pī kahpa xi nē hā Jejus xi nhũm hā nõ nhũm mẽ prek o ìhkra ho htỳx nē hpar o htỳx. Hāmri nē kaxyw hkakwỳ nē hkakwỳnh pa nē kamã pī kahpata xãm nē hity hpa nhũm Jejus kỳx pê ajêt. Hāmri nhũm mẽ määnēn wa ho hamēxkrut nē pī kahpa hā wa kunhō nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhũm wa urak nē kỳxpê ajêt.

¹⁹ Hāmri nhũm Piratja õ pōristi mã anē nhũm mẽ tap õ py nē hā tanhmã kagà hto nē kagà ho:

IJA EW NHŌ PAHI JEJUS NA JA

KÊP NAJARE NHŌ XWỠNH

²⁰ Nom mẽ ixpê Ijaew kapêr pix kãm hā kagà hkêt nē. Määnēn Gresjê kapêr kãm nē Raxijê kapêr kãm nhũm mẽ määnēn hā kagà nē Jejus mỳri kunhō. Hāmri nhũm Ijaew kwỳjaja Jerujarê rũm hwỳr mra nē mẽ kot ã hā kagà nhĩpêx anhỹrta pumu nē kamã harê. Jerujarêja hixêt prêêta wỳr jawỳ jakamã nhũm mẽ kurũm ohtô nē hwỳr mra nē omunh o kuhê. ²¹ Hāmri nhũm patre hkrãhtũmjaja tee ri ã Jejus jarēnh anhỹr ã kagàta pumu nhũm ja mẽ kêp omnuj nē. Jakamã nhũm mẽ ma Pirat wỳr mra nē kãm:

—Kwa mon ka ri hā mẽ kãm anē nhũm mẽ axtem nē ã ri kagà nhĩpêx anē? Kwa nà kêp mẽ inhō pahi hkêt. ãm htỳx ri kot ã kot amnhĩ jarēnh anhỹr o pa kênã. Kwa hā kagàja o anhĩpa nē hpãnhã hā kagà ho: “Kêp Ijaew nhō pahi hā kot amnhĩ to hêx xwỳnh.” Anhỹr o hpãnhã hā hipêx nē anhô nà? Anē.

²² Hāmri nhũm mẽ kuma nē mẽ kãm:

—Tk. Nà pa ho ixpinhpanh kêt nē. Ra ixte hā kagà hpar kênã. Anē.

Pōristijaja kot axpên mã Jejus xê ho pigrãnh

Matêwre 27.35-36, 27.55-56; Makre 15.24; Rukre 23.34

²³ Hāmri nhũm pōristijaja kot axpên mã Jejus xê o pigrãnh kaxyw amnhĩ tã haxwỳr o tē. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nē haxwỳ nhũm pyxi nē hprã. ê rytita. Na pre hipêx muxre. Nhỹhỹnh hkayr xà pumunh kêt kumrêx. ²⁴ Jakamã nhũm mẽ omu nē kãm hkĩnh nē. Hāmri nhũm hō kot amnhĩm hpyr nē ho arĩk kaxyw nhũm mẽ hā kênre ho jôka. Na pre ra Tirtũm kapêr ã kagà htũm kot mẽ hkukamã ja hā mẽ harēnh nē mẽ harēnh kot:

Na prem axpên mã ixê o anhgrà nē hā kênre ho jôka ho hkrĩ.

Anhỹr o kot mẽ hkukamã mẽ harēnh. Tã nhũm mẽ ra hkôt ã amnhĩ nhĩpêx anhỹr o hkrĩ.

Jejus kot Juāw nhĩhkram katorxà jaxà ã harēnh

²⁵ Nhũm Jejus par pê katorxà xa. Nē htõx nē Kropti hprõ Marir nē Marir Matarēn mẽ nhũm mẽ Jejus katorxà nhĩhkô hā Jejus pumunh o kuhê. Nhũm amnhĩ tã mẽ omu ²⁶ nē mẽ kuri pa ixpê Juāw pumu. Hāmri nē kêp ixkrãmnhwỳ mex ã ixtã katorxà mã kapêr nē kãm:

—E ota Juāwta. Koja ixpãnhã te kêp akra pyrak o anhĩpêx nē tanhmã ato ajuta hto ho pa. Anē.

²⁷ Hāmri nē hpãnhã pa inhmã kapêr nē inhmã:

—E Juāw. Kêr ka te kêp akatorxà pyrak o inhmã hipêx mex o ri apa.

Anhỹr jakamã pa kuma nē kot inhmã hā karõ xà hkôt inhõrkwỳ hwỳr haxà nē amnhĩ kôt ri ho ixpa.

Jejus htyk ã harēnh

Matêwre 27.45-56; Makre 15.33-41; Rukre 23.44-49

²⁸ Tã nhũm Jejus ra amnhĩ pumu hāmri nē hamaxpêr o:

—Nà Inhĩpêêxà kot mẽmoj tã inhmã karõta na pa ra kãm ho anhỹr o hitep xà xir kaxyw. Anē.

Hāmri nê kām kôr ã amnhĩ jarẽ. Nom ra hkukamã Tĩrtũm kapẽr ã kagà htũm kot htyk kaxyw nê kām kôr kukamã harẽnh jakamã nhũm ã amnhĩ jarẽnh anê nê kapẽr o:

Nà na pa ra inhmã kôr nê. Anê.

²⁹ Nhũm hpar pẽ guhkrax kãm wĩhti punureta ãm jakamã nhũm mẽ ã kot amnhĩ jarẽnh anhỹrja ma nê kaxyw mẽmo rerek py nê o tẽ nê kaxyw pĩ ryti hõ py nê ho hkanhwỳ. Nê akupỹn o tẽ nê ho wĩhti mã haxà nê kãm kupẽ. ³⁰ Nhũm hkaô nê hkaôr pa hãmri nê kapẽr o:

E nà hãmri na pa ra mẽ piitã mẽ kot amnhĩ tomnuj pãnhã amnhĩrer pa. Jao ra Inhĩpêexà kãm hprãm xà hkôt kãm tanhmã amnhĩ nhĩpêx to jatur xãm kumẽ.

Anhỹr o amnhĩ jarẽnhja kôt ahpap mã hkrã nê ty.

Mẽ kot kô xwa ho Jejus kamnhwỳr ã harẽnh

Wam Juāw 5.6-8

³¹ Nhũm ra sêsta nhũm apkati nhũm mẽ inhõ arĩgromnu pẽ sap kaxyw. Sapja ã na hte mẽ ixpẽ Ijaew mẽ ixkĩnh pẽ Pas ã ixkĩnh rũnh o ixpa. Nhũm mẽ kãm sap ã arĩ mẽ htyk nê mẽ harir xwỳnhjê pumunh prãm kêt jakamã nhũm Ijaew krãhtũmjaja ma Pirat wỳr mra nê kãm:

—Kwa pôristi mã anê kê mẽ tokyx mẽ hte hi kukẽ kê mẽ htyk tokyx anê. Kê mẽ tokyx mẽ o wrỳ nê ma mẽ o mra nê mẽ hagjẽ. Kormã sap kêt ri. Anê.

³² Hãmri nhũm mẽ kuma nê ò pôristijê mã anê nhũm mẽ ma mẽ hwỳr mra nê akutã wa kot Jejus nhĩjê nê jêt xwỳnhhta wa kumrẽx wa hte hi hkwỳr. ³³ Hãmri nê hpãnhã Jejus wỳr tẽ nê omu nhũm ra htyk mex nê ajêt nhũm mẽ ja hã omu nê kęp hte hi hkwỳnh kêt nê. ³⁴ Nhũm pôristi hõja kô xwa py nê ho ihkjê rũm hkanhwỳ nhũm hkamrô mẽ ì kagô ahkà nê hprôt nhũm mẽ hkwỳja omunh o kuhê. ³⁵ Nê ixpẽ Juāw na pa pre ijaxwỳja mẽ ìhkô hã xa nê ja hã omunh jakamã pa ã mẽ amã hã kagà anê. ãm hãmri na pa mẽ amã harẽ nê hã kagà. Mẽ ate kamã harẽnh nê harẽnh mar nê hkôt ajamaxpẽr kaxyw. ³⁶ Na pre ra Tĩrtũm kapẽr ã kagà htũm kamã

ra hkukamã tanhmã kot mẽ pahwỳr mẽnh xwỳnhhta jarẽnh to nê hã kagà. Nê hã kagà kot:

Koja mẽ nhỹhỹnh hi hkwỳnh kêt nê. Anê. Tã nhũm mẽ ra hã kagàja kôt ã hipêx anê nê kęp hi hkwỳnh kêt nê. ³⁷ Nê Tĩrtũm kapẽr ã kagà htũmja mããnhen ja hã harẽnh kot:

Mẽ kot hpĩr nê hkanhwỳr xwỳnhja koja mẽ hpar pẽ omunh o kuhê. Anê.

Tĩrtũm kapẽr ã kagà htũm kamã ã Jejus tyk kukamã harẽnh kot anhỹr.

Mẽ kot Jejus jaxàr ã mẽ harẽnh

Matêwre 27.57-61; Makre 15.42-47; Rukre 23.50-56

³⁸ Tã nhũm Juje pẽ Arimatej nhõ xwỳnhja Jejus ra htyk ã omu nê ma Pirat wỳr tẽ nê hã kãm kapẽr. Kot ma o mõr nê tokyx haxàr kaxyw. Na pre ra Jejus kôt amnhĩ xãm nom Ijaew krãhtũmjê pymaj mẽ kãm amnhĩ to amnhĩrit kêt nê. Jakamã nhũm ma Pirat wỳr tẽ nê hã kãm kapẽr nê kãm:

—Pa e ot pa awỳr tẽ. Ixte mẽmoj tã amã ixkapẽr kaxyw. Kot kaj apu inhmã “y” anhỹr japêr. Kwa xà kot pa ma Jejus o mõ nê haxà? Anê.

Hãmri nhũm kuma nê kãm: “Nà mãmrĩ ho anê.” Anê hãmri nhũm ma hwỳr tẽ nê ho wrỳ nê kumỳ nê ma haxàr mã o mõ.

³⁹ Nhũm Nĩkotêja ma hkôt tẽ. Amnepê mã kot kamàt kãm Jejus wỳr htẽm nê wa axpẽn mã kapẽr o ÿr xwỳnhhta. Jakamã ma Juje hkôt tẽ. Nê amnhĩ kôt mẽ hkuxwa xà hkwỳ ho mõ. ãm ho mõr rax kumrẽx. Ho 34 kir nê kutu nê o mõ. Mẽ hkuxwa xàja na pre mẽ kot mẽmo kuxwa xà mã “mĩra” nê “aroe” anhỹr jarẽnhja nhũm kaxyw hkwỳ jakà nê ho ahkà nê ho mẽ hkuxwa xà nhĩpêx. Hãmri nê kutu nê ma Juje kot Jejus jaxàr nhũm kot ho hkuxwa kaxyw hkôt o mõ. ⁴⁰ Hãmri nhũm wa ho kupêxê kukõnh pa nê ho Jejus kupu. Mẽ ixpẽ Ijaew mẽ ixte mẽ htykjê jagjênh kaxyw ã mẽ hipêx anhỹr xà hkôt nhũm wa ã hipêx anê nê haxà. ⁴¹ Nhũm ra mẽ kot pĩ kahpa hã nhõr xà tã mẽ kot mẽmo pĩ ho pa nê hkre xwỳnh kwỳ kuhê. Nê kamã kẽn kre nyw. Kormã mẽ kot kamã mẽ htykjê hõ jaxàr kêt xwỳnhhta. ⁴² Jakamã nhũm wa omu nê axpẽn mã:

—E kwa pu hwỳr Jejus o tẽ nê kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anê.

Hāmri nē hwỳr kumỳ nē o tē nē kamā haxà nē hā hitom pa hāmri nē ma akupỳm krīm wa tē.

20

Jejus akupỳm htĩr ã harēnh

Matēwre 28.1-10; Makre 16.1-8; Rukre 24.1-12

¹ Tã nhũm sap tē nē hapêx nē hpānhã semãn nyw krax xà pē tòmĩk. Hāmri nhũm Marir Matarēn kwỳhtã kànhmã nhỹ. Kormã myt kator kêt ri kànhmã nhỹ nē ma kēn kreta wỳr tē. Nē hwỳr pōj nē tee ri hitom xà hã kēn rax pumu. Nhũm ra nhãm hakwa kre kuhpa hã ri hikwỹ nhũm omu nē tee ri hkukamã hamaxpēr pē omunh o xa. ² Hāmri nē awjanã nē ma akupỳm hprõt nē nhỹri Simāw Pētre nē pa ixpê Jejus kràmnhwỳ mex ã wa ixpumu nē hkaprĩ kamã wa inhmã harē nē wa inhmã:

—Xê na pēr mē pahpê mē panhō Pahihti kapa nē nhỹhỹm ma o tē. Xê nhỹhỹm mãn pre wem o tē? Anē.

³ Hāmri pa wa kuma nē hwỳr ixprõt kurê kumrēx. ⁴ Hāmri pa Simāw Pētre mã wa nē ixkumrēx hwỳr pōj. ⁵ Nom kormã kēn kre hwỳr ixàr kêt ri kormã hakwa krem inhĩkôt nē kaxwỳnh kãm nōr xà kamã Jejus japêr ixrīt o xa. Nhũm kupêxê nhĩrê pix nō pa omu. ⁶ Hāmri nhũm Simāw Pētre ixkôt tē nē ixrom krem àr kurê kumrēx nē kupêxê nhĩrêta pumu. ⁷ Nē hkrã kupu xà pumu nhũm axtem hkrã muxre nē ahte nō. ⁸ Hāmri pa hkôt axà nē nōr xà kaprỳ pumu nē ijamaxpēr o:

—Hêxta waa nē. Nà mãn akupỳm htĩr. Hã na nōr xà hkaprỳ mex nē. Nà mãn akupỳm htĩr kãm ga. Anē.

⁹ Ra Tĩrtũm kapēr ã kagà htũm kot ja kukamã akupỳm htĩr ã harēnh tã pa wa kormã ixprĩ hã ja hã omunh kêt nē. Tã kēn kre kaprỳ pumu nē kãm ijamaxpēr kurê kumrēx. ¹⁰ Hāmri nē wa ixkato nē awjanã nē ma akupỳm wa ixkwỳjê hwỳr wa tē.

Jejus kot Marir Matarēn wỳr kator ã harēnh

Makre 16.9-11

¹¹ No nhũm Marir Matarēnja arĩ kēn kre kapem hkaprĩ nē mỳr o xa. Nē mỳr pē hikôt nē kēn kre kamu ¹² nē kamã Tĩrtũm kapēr o wrỳk xwỳnh wa ho axkrut nē wa

omu. Nhũm wa ê jakajre kamã wa nhỹ. Nhũm hōja hkrãm nhỹ nhũm hōja htem nhỹ. ¹³ Hāmri nē wa Marir Matarēn mã kapēr nē kãm:

—Kwa mon ka ri omu nē amỳr o xa? Anē.

Nhũm kãm:

—Xê nhũm. Na prem ma nhỹhỹm mē ixpê mē inhō Pahihtija mỳ nē ma o tē nē hpānhã nhỹri kuxi. Anē.

¹⁴ Rôm nhũm Jejus tãm tē nē hkatut kôt xa nhũm Marir Matarēn ho hakêx nē omu nom hprĩ hã omunh kêt nē. Omu nē htỳx ho axtem mēhō hã hkamnhĩx. ¹⁵ Hāmri nhũm kãm:

—Kwa mon ka ri amỳr o xa? Mēhō na ka ri hapêr arīt pē amỳr o xa? Anē.

Hāmri nhũm kuma nē htỳx ho pĩ hkre jamār xwỳnh ã hkamnhĩx nē kãm:

—Xê xà ka na ka mē ixpê mē inhō Pahihti ho ahkĩ nē ma o tē nē nhỹri axi mē? Xê ka japêr nē akatàt kôt inhmã harē. Nhỹri inhmã nōr xà jarē pa ma hwỳr tē nē kumỳ nē man akupỳn o tē nē akupỳm kēn kre kamã kuxi. Anē.

¹⁶ Hāmri nhũm Jejus kãm hixi jarē nē kãm:

—Kwa Marir Matarēn. Amnē ixpumu nē arĩ ã akapēr anē nà. Anē.

Hāmri nhũm jatã hprĩ hã kuma nē ho hakêx nē amnhĩ jaêr pē hprĩ hã omu nē kãm:

—Xê Pahihti. Xep ka na ka. Hêxta gàà nē. Anē.

Nom mē ixpê Ijaew kapēr kãm Pahita jarēnh o: “Raponĩ” anē. Nhũm ã kãm kapēr anē hāmri nē axte ma nhỹhỹm kēp htēm pymaj hpa hã kupy. ¹⁷ Hāmri nhũm kãm:

—Kwa inhmã anhũre. Na pa kormã ma akupỳm Inhĩpêêxà hwỳr ixàpir kêt nē. E tokyx ma akupỳm tē nē ixtō nē ixtōxjê mã ijarē. Na ka prem apê ixkràmnhwỳ pix tã ra mē apê ixtō nē ixtōx na ka mē. Jakamã ma akupỳm mē hwỳr tē nē mē kãm ijarē. Nē mē kãm: “Na Jejus mē awỳr pēr mēnh o: ‘Kot paj tokyx ma akupỳm Inhĩpêêxà Tĩrtũm wỳr api. Nom kēp pa Inhĩpêêxà pix kêt mãânēn kēp mē Anhĩpêêxà na. Nē mãânēn kēp mē anhō Tĩrtũm na.’ Anhỹr o mē awỳr pēr mē.” Anē. E ma akupỳm mē hwỳr tē nē tokyx ã mē kãm ijarēnh anē. Anē.

¹⁸ Hāmri nhũm kuma nē ma akupỳm mē ixwỳr tē nē mē inhmã awjarē nē mē inhmã:

—Xê na pa ham mẽ panhõ Pahihitita pumu. Na akupÿm mẽ pamã htír. Anê.

Hãmri nê mẽ inhmã kot tanhmã kãm kapêr to hã harê pa mẽ kuma nê tee ri hkukamã ijampêr.

*Jejus kot hkwÿjê hwÿr kator ã harênh
Rukre 24.36-43*

¹⁹ Tã nhũm tãmik nê kamãt pa mẽ Jejus kôt ixpa ho ixpa xwÿnhjaja axpên wÿr akuprõ hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mẽ ijaêr pê nhÿhÿnh mẽ ixwÿr axà nê mẽ ixkuri xa nê mẽ inhmã:

—Pa. Xà kormã mẽ anhõt kêt? Anê.

²⁰ Hãmri nê mẽ inhmã amnhĩ nhĩhkra kamã prek tatak xà jahkre nê hakÿx kôt mẽ kot hkanhwÿr xàja nhũm mẽ inhmã hahkre. Pa mẽ akupÿm htír kãm omu nê ixkĩnh tÿx kumrêx. ²¹ Hãmri nhũm mẽ inhmã:

—E kwa kêr ka mẽ tee ri amnhĩ kukamã ajampêr o amã ma ho ri apa hkêt nê. Na pre Ìnhĩpêxàja mẽ awÿr inhmê pa pre wÿr. Tã kot paj amnhĩ pyrã nê mẽ piitã mẽ hwÿr mẽ arê. Anê.

²² Hãmri nê mẽ ixkaxyw htyyxà mẽ nê mẽ inhmã Tirtũm mẽ wa Karõ jarê nê mẽ inhmã:

—E koja Tirtũm mẽ wa Ixkarõja wÿr nê mẽ akarõ mã gjêx pa. ²³ Ka mẽ ÿ hã ma mẽ piitã mẽ hwÿr apa nê mẽ kãm Tirtũm kapêr jarênh o ri mẽ hkôt apa. Nê nhÿri mēhõ pumu nê inhÿ hã kãm: “Kot kaj Tirtũm kôt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mẽ ã kãm akapêr anê nhũm mẽ ama nê hkôt amnhĩ xãm nhũm Tirtũm amnhĩ tã omu nê nê kot amnhĩ tomnuj rênh pa. Nom koja mẽ ama nê ãm mẽ ama nê hkôt amnhĩ xãm kêt japêr ka mẽ inhÿ hã kãm: “Nà kot kaj Tirtũm kôt amnhĩ xãm kêt nê nhũm anê ate amnhĩ tomnuj rênh kêt nê.” Anhÿr o kãm akapêr nhũm Tirtũm ho anê nê nê rênh kêt nê. E kêr ka mẽ ã inhÿ hã amnhĩ nhĩpêx anhÿr o ri apa. Anê.

Nhũm pre ã Jejus mẽ inhmã kapêr anê hãmri nê kato nê ma nhÿhÿm tẽ.

*Jejus kot Tomas mã kapêr ã harênh
Matêwre 28.17*

²⁴ No nhũm mẽ inhõ pê Tomas pihpohtita kormã mẽ ixkĩnhã akupÿm Jejus htír

kãm omunh kêt nê. Na pre ma kape hã tẽ nhũm wakre kamã mẽ ixwÿr axà nê mẽ inhmã kapêr hãmri nê ma nhÿhÿm tẽ. Jakamã nhũm Tomas akupÿn mẽ ixwÿr tẽ nê axà pa mẽ kãm harê nhũm tee ri mẽ inhma nê mẽ ixkôt hamaxpêr kêt nê. ²⁵ Nê mẽ inhmã:

—Nà kot pa ìhkra kamã prek tatak xà pumu nê kamã inhĩhkra hkrã jaxà. Nê hakÿx kôt hkanhwÿr xàta pa mã ho anê nê omu nê kamã inhĩhkra hkrã jaxà nê rĩ kormã akupÿm htír kôt ijampêr. Anê.

²⁶ Tã nhũm semãn pyxi nê hapêx pa mẽ axte axpên wÿr akuprõ nê axte Ijaew krãhtũmjê pymaj amnhĩ tã kahê htÿx nê ixkrĩ. Nhũm Tomas tã mẽ ixkuri nhÿ. Hãmri nhũm Jejus axte nhÿhÿnh mẽ ixwÿr axà nê mẽ inhmã:

—Pa. Na ka mẽ rĩ akrĩ. Anê.

²⁷ Hãmri nê Tomas pumu nê hwÿr tẽ nê kãm ìhkra pẽ nê kãm:

—E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Nê hpãnhã ijakÿx kôt mẽ kot ixkanhwÿr xà kamã mã ho anê nê haxà nê akupÿm ixtír kôt ixpumunh kurê kumrêx. Anê.

²⁸ Hãmri nhũm kuma nê kãm:

—Nà pêr ãm hãmri apê inhõ Pahihiti Tirtũm na ka. Anê.

²⁹ Hãmri nhũm kãm:

—Tÿ. ãm ano ho ixpumunh kôt pix mã na ka ixkôt ajampêr. Tã no ãm koja mẽ nhÿrmã mẽ amÿr pê mẽ pa xwÿnhjaja mẽ akĩnhã mẽ no ho ixpumunh kêt tã akupÿm ixtír ã ijarênh mar pix tã ixkôt hamaxpêr. Ja na mex kumrêx. Anê.

*Juāw kot tanhmã amnhĩ jarênh to hã
harênh*

Rômãn 15.4; Wam Juāw 5.13

³⁰ Na pre Jejus kormã mẽ ixto pa ri mẽ inhnoo mã mẽmoj tanhmã hipêx to rax nê nom kot paj kagàja kamã piitã hã kagà hpar kêt nê. ³¹ ãm hkwÿ pix na pa mẽ amã hã kagà. Mẽ ate mẽ ixpyrà nê omunh nê kêt Tirtũm Kra hã kot mẽ pakaxyw ãm xwÿnh ã omunh nê hkôt amnhĩ xunhwÿr kaxyw na pa ã mẽ amã harênh nê hã kagà anê. Tã kot kaj mẽ amnhĩ kaxyw hkôt ajampêr nê hkôt amnhĩ xunhwÿ hãmri nê nhÿrmã atyk tã nhũm akupÿm mẽ ato mẽ atír ka mẽ ixpyrà nê kuri amex nê atír tũm nê apa ho

apa. Tã pa ã mẽ amã mẽmoj piitã harënh nê hã kagã anê.

21

*Jejus kot hkwýjê hwýr kator ã harënh
Matêwre 26.32, 28.7, 28.10*

¹ Tã nhũm Jejus axte hkôt mẽ ixpa ho mẽ ixpa xwýnh kwýjê hwýr kato. Himô pê Tipeja mýri. ² Pa mẽ ixpê 7 nê axpên wýr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krĩ pê Kanã nhõ xwýnh na pre. Nê wa pa wa ixpê Jepetew krata wa nê wa inhõ wa pijakruuta wa. Pa prem wa mẽ nhýri axpên wýr akuprô. ³ Hãmri nhũm Simãw Pêtre mẽ inhmã:

—E pa jarãhã ma tep wýr tẽ nê hkwýmne. Anê.

Pa mẽ kuma nê kãm:

—Tõe. Nã pa mẽ ijaxwýja ma akôt mō. Anê.

Hãmri nê mẽ ma himô rax pê Tipeja wýr mō nê kanõre mã agjê nê gôx kãm kryhti rënh o ixkuhê. Nom tee ri ho tep õmnênh kaxyw rënh o ixkuhê nê hõmnênh kêt nê ixtã apkati nhũm tep amrakati kumrêx.

⁴ Tã nhũm myt kato nhũm Jejus gô mýri xa. Pa mẽ ixpiitã omu no ãm ixprĩ hã kêp Jejus ã omunh kêt nê. Tã no nhũm tãm xa.

⁵ Hãmri nê mẽ inhmã kapêr nê mẽ inhmã:

—Pa. E mãn ka mẽ ra tep kwýmnenh rax nê nã? Anê.

Hãmri pa mẽ kãm:

—Tk. Nã mo tep? Amrakati kumrêx kênã. Anê.

⁶ Hãmri nhũm mẽ inhmã;

—Xô wehe? Tõe. Axte mẽ axupôk rũm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utĩ rax nê. Pa mẽ tee ri ixte ho ixãpir kaxyw ri hkukjê. ⁷ Hãmri pa kêp Jejus ã omunh kurê kumrêx nê Simãw Pêtre mã kãm:

—Kwa pêr mẽ panhõ Pahihitita na. Anê.

Hãmri nhũm inhma nê hkĩnh tỳx nê akupým hinôkã jaxà nê gôx kãm mrõ nê ma hwýr ho nana ho tẽ. ⁸ Hãmri pa mẽ hkôt kanõre kamã kryhti kjênh o mō. Ra amgrã hwýr amgrire. Wýr 100 met pix jakamã pa mẽ hwýr ixpôx tokyx anê. ⁹ Nê pãr o hkre kura nê kuxi nê ijapôx pa nê Jejus wýr

ixprôt nê mra. Nhũm ra mẽ ixkutêp kuto nê par nhĩpêx nê nhýhýnh tep kwý par kãm haxwý nê ho àr o nhý. Nê kaxyw pãwti nê amnhĩ ri haxwý nê o nhý. ¹⁰ Hãmri nê mẽ ixpumu nê mẽ inhmã:

—E mẽ amnê anhõ tep o mra pu mẽ hkuxôt nê kuku. Anê.

¹¹ Hãmri nhũm Simãw Pêtre akupým pãr wýr tẽ nê kryhti ho htỳx xà hpôt nê amgrã hwýr hkjênh o mō. Kamã tep rũnh pix. Nê ohtô nê. Kamã kêp 153 nê hikwý htã nhũm nhýhýnh kryhti hkwý pikaxôn h kêt nê. ¹² Hãmri nhũm Jejus mẽ inhmã:

—E kwa mẽ tokyx mra pu mẽ apku. Anê.

Hãmri pa mẽ kuma nê hwýr mra nê ixkrĩ pa. Hãmri nê tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhýr ã omu nê kêp mẽ inhõ Pahihiti hkôt omunh kurê kumrêx jakamã hixi hã hkukjêr kêt nê. ãm akryk omunh o ixkrĩ. ¹³ Hãmri nhũm mẽ inhmã pãwti ho hkry pa. Nê hpãnhã tep jamý nê mã ho anê nê ho hkry pa nê ho mẽ inhĩpêx pa pa mẽ ixãpkur o ixkrĩ.

¹⁴ Nhũm Jejus akupým htĩr kãm ra ahpýnhã mẽ ixwýr hapôx o axkrunêpxi.

*Jejus kot akupým tãm Simãw Pêtre xãm
Ate 20.28-31; Wam Pêtre 5.1-4*

¹⁵ Tã pa mẽ ra ixãpkur pa nê kãnhmã ixkuhê nê gô mý ri mra. Hãmri nhũm Jejus Juāw hkra Simãw Pêtre mã tanhmã kapêr to. Nom ixpê Juāw nhũm kêp ixkra hkêt axtem Juāw õ hkra na pre. Jakamã nhũm Jejus kãm kapêr nê kãm:

—Kwa Simãw. Xã we amã ijapê ho ate pika hkôt mẽmoj piitã hakrenh par nã? Anê.

Hãmri nhũm kuma nê kãm:

—Tý inhmã ajapê htỳx kênã Pahihiti. Ra ate ja hã amnhĩ tã ixpumunh mex. Inhmã ajapêê. Anê.

Hãmri nhũm kuma nê kãm:

—Tõe. Nã kêt ka inhmã mẽ kot ixkôt amnhĩ xunhwýr xwýnhjê jahkre mex o ri mẽ hkôt apa. Te ho ôwêhti hkrare jamãr xwýnh kot hamãr mex o ri hkôt pata pyrãk. Anê.

Hãmri nhũm kãm:

—Tõe. Nã kot paj amã mẽ ho anê. Anê.

¹⁶ Tã nhũm hã ahtũmre nhũm kê axte kãm:

—Kwa Simāw. Xà we ãm hāmri na ka inhmā amnhĩ jarē. Xà we amā ijapê nà? Anē.

Hāmri nhũm kām:

—Tỳ. Ra ate inhmā ajapê hã ixpumunh kênã. Anē.

Hāmri nhũm kê axte kām:

—Tôe. Kêr ka inhmā mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamār xwýnh kot ôwêhti jamār mex o hkôt pa xwýnh kot amnhĩ nhĩpêx pyræk. Anē.

Hāmri nhũm kām:

—Nà kot paj amā mẽ ahkre mex o ri mẽ hkôt ixpa. Anē.

¹⁷ Tã hāmri nhũm hã ahtũmre nhũm kê axte kām:

—Kwa Simāw. Xà we ãm hāmri na ka inhmā amnhĩ jarē? Xà we amā ijapê htýx kumrêx nà? Anē.

Hāmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hāmri nê kām:

—Kwa Pahihti. Ate mẽmoj piitã omunh par. Nê ate inhmā ajapê htýx ã ixpumunh par kênã. Anē.

Hāmri nhũm kê axte kām:

—Tôe. Kêr ka inhmā mẽ kot ixkôt amnhĩ xunhwýr mã xwýnhjê jahkre mex o ri mẽ hkôt apa. Te ho ôwêhti jamār xwýnh kot hamār mex o ri pata pyræk. Anē.

Hāmri nhũm kām:

—Nà kot paj amā mẽ ho anê Pahihti. Anē.

Simāw Pêtre tanhmã htyk to hkukamã harênh

¹⁸ Nhũm Jejus arĩ Simāw Pêtre mã kapêr nê kām tanhmã htyk to hkukamã harênh to nê kām:

—Kwa ixkapêr ma nê amnhĩ krã him haxâr týt nê hã apa Simāw Pêtre. Nà kormã anyw ri na ka pre hte ma nhỹhỹm apa kaxyw nê anojarêh hāmri nê anhĩnôhkã mex jagjê nê ma nhỹhỹm amã apa hprãm xà hkôt ri apa. Tã kot kaj apigêh nhũm mẽ apynê nê akahti hpre nê apa hpre nê ma nhỹhỹm ato mō ka mẽ kām amnhĩ gō nê amnhĩ nê tanhmã mẽ kām nê hkêt nê. Amã mẽ hkôt amōr prãm kêt tã māmri mẽ kām amnhĩ gō kê mẽ ma nhỹhỹm ato mō. ¹⁹ Tã kêr ka arĩ ixkôt amnhĩ xãm týt nê atĩr prãm xàj mẽ umaj axte ixkaga hkêt nê. Hāmri

nhũm mẽ apĩ nê tanhmã atyk to hã apumu nê amã Tĩrtũm kĩnh ã apumunh mex kurê kumrêx. Hāmri nê atã Pahi Maati Tĩrtũm mex o mex ã harê. Anê.

Nhũm pre ã Jejus Simāw Pêtre tyk kukamã kãm ujarênh anê. Hāmri nê kām:

—E kêr ka ixte amnhĩ to htýt nê amarĩ mẽ kãm ixãm nhũm mẽ kot ixpĩrja pyrã nê ã amnhĩ nhĩpêx anê. Anê.

Hāmri nhũm kuma nê kām:

—Tôe. Nà kot paj hāmri tã ã amnhĩ nhĩpêx anê Pahihti. Anê.

Juāw tyk kukamã tanhmã harênh to hkêt ã harênh

²⁰ Nhũm pre ã Jejus Simāw Pêtre mã tanhmã htyk to hkukamã harênh anê. Hāmri nhũm kuma nê ixpê Juāw ã ixto hakêx nê ixpê Jejus kràmnhwý mex ã ixpumu. Kormã Jejus htyk kêt ri kamàt kãm mẽ ixàpkur o ixkrĩta ã na pa pre ãhkô hã ixàpkur o nhỹ nê kot mẽ kãm ôr mã xwýnhhta nhĩxi hã hkukja. ²¹ Jakamã nhũm Simāw Pêtre ixto hakêx nê ixpumu nê ixtã Jejus kukja nê kām:

—Kwa no pêr pahkôt mōr mũj? Tanhmã koja we htyk to? Anê.

Hāmri nhũm kām:

²² —Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêr pa rãhã pa akupýn ixwryk prãm nhũm arĩ pa nê htyk kêt rãhã pa akupýn wrý. Kêr ka ri htyk kukamã tee ri tanhmã ajamaxpêr to hkêt nê. ãm ixkôt pix mã ate amnhĩ nhĩpêx týt pix kukamã mãn ajamaxpêr o ri apa.

²³ Anhỹr o kãm ijarênh jakamã nhũm mẽ ixkwýjaja kot ã ijarênh anhỹrja ã kuma ma nê htýt nhỹrmã ixtyk kêt ã ixkamnhĩx. Nê gaa nê rĩ piitã axpên mã ã ijarênh anhỹr o pa. Nom na pre ã ijarênh anhỹr kêt nê. Na kêt pre ijarênh o:

—Kot pa inhmã arĩ ri kritpêr pa rãhã pa akupýn ixwryk prãm nhũm arĩ pa nê htyk kêt rãhã pa akupýn wrý.

Anhỹr o ijarê. Nom ãm hāmri ixtyk kêt rãhã nhũm akupýn wrýk ã ijarênh kêt nê.

Juāw kot Jejus kot tanhmã amnhĩ to hã kagã hpar kêt ã kot amnhĩ jarênh

Juāw 20.30-31

²⁴ E na pa mẽ amã Jejus kot tanhmã amnhĩ nhĩpêx to ho pa hã harẽ nẽ hã kagà. Ixpê hkôt ri ixpa ho ixpa xwýnhjê hõ na pa ãm hãmri ã hã kagà anê. Ka mẽ kamã harẽ nẽ ama nẽ ãm hãmri ixte kagà nhĩpêx kôt ixpumunh mex kurê kumrêx. ²⁵ No na pre Jejus ãm ja pix o anhỹr o pa hkêt nẽ. Na pa ãm mẽ amã hkwý pix jarẽ nẽ hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o mõi pyræk.

Tã ãm ja pix. Na hapêx.

Atre
Jejus nhÿ hã mē ahkre ho mē
pa xwÿnhjaja kot tanhmã
amnhÿ nhÿpêx to ho pa hã mē
harēnh

Rukre na pre kagàja nhÿpêx. Na pre kèp tâtô nē hkwyjê kane ho pa. Nē Jejus nhÿ hã mē ahkre ho pa xwÿnh pē Pawre kôt pa ho pa. Hāmri nē hamaxpēr nē hkràmnhwÿ Teopre mā kagàja nhÿpêx nē hwÿr kumē. Nē kagàja kamã Jejus nhÿ hã mē ahkre ho mē pa xwÿnh maatijaja kot Jejus mÿr pē tanhmã amnhÿ nhÿpêx to ho pa hã mē harē.

Nē Ijaew nhô patrejaja nē mē hkwyjê pē Parijew nhô xwÿnhjaja nē mē hkwyjê pē Satusew nhô xwÿnhjaja kot Tirtūm kapēr ā kagà htūm kamã harēnh nē mar nē hkôt amnhÿ nhÿpêx tā Tirtūm Kra Jejus kôt amnhÿ nhÿpêx kêt ā mē harē. Mē kot kèp Tirtūm Kra hkêt ā hkamnhÿx jakamã na prem kām mē kot hkôt amnhÿ xunhwÿr xwÿnhjê kurē nē. Tã nhūm Simãw Pêtre mē Pawre mē Jejus nhÿ hã mē ahkre ho mē pa xwÿnh kwÿjaja mē urak nē kèp Ijaew tā mē kurom Jejus hkôt amnhÿ xunhwÿr nhūm mē tee ri ja hã mē omu mē kamã gryk tÿx nē tanhmã mē hipêx to ho pa. Tã nom nhūm mē tee ri amnhÿ kukamã hamaxpēr nē Jejus kaga hkêt nē. Mē kot mē hipêx kati htã na prem arÿ Tirtūm Karō nhÿ hã mē piitã mē kām tanhmã Jejus kot mē panē amnhÿ nhÿpêx to hã harēnh o pa. Kam nē kapit 1 kamã wesik 8 japēr nē kamã harē. Hāmri nhūm Rukre ā mē kot amnhÿ nhÿpêx anhÿrja piitã hã kagà nē Teopre hwÿr kumē. Nē kām mē harēnh o:

Tirtūm Karō jarēnh

Matêwre 28.16; Makre 16.14; Rukre 24.36; Juãw 20.19

¹ Pa Teopre? Xà amex? E ot pa axte awÿr kagà nhÿpêx nē kumē. Nà wam ixte awÿr kagà nhÿpêx nē mēnhta kamã na pa pre amã Jejus kot tanhmã amnhÿ nhÿpêx to hã harē nē hã kagà. Kot tanhmã amnhÿ nhÿpêx to ho pa nē tanhmã mē ahkre hto ho paja krax rūm pa pre piitã hã kagà hpa nē awÿr kumē. ²⁻⁴ Kormã akupÿm kaxkwa

hwÿr àpir xwÿj ri na pre ÿ hã mē ahkre ho pa kaxyw hkôt mē pa xwÿnh kwÿjê rē. Tã nhūm mē kām hkurē xwÿnhjaja kupÿ nhūm amnhÿ xà htÿx kām hamak rax kām ty. Hāmri nhūm Tirtūm akupÿm ho htÿr. Nom nhūm ma akupÿm kaxkwa hwÿr àpir kurē kumrēx kêt nē. Na pre xatã mē kot ÿ hã mē ahkre ho mē pa xwÿnh maatijê hwÿr hapôj nhūm mē akupÿm htÿr kām omu. Na pre hte nhÿri mē hwÿr hapôj nē tanhmã mē ahkre hto nē mē kām:

—Na pre Tirtūm mē ato hkra nē tām mē ate amnhÿ nhÿpêx o apa kaxyw mē axunhwÿ.

Anhÿr o mē ahkre hã arÿgro ho 40. Hāmri nē kormã mē kamã pa ri axte tanhmã mē kām kapēr to. Tirtūm Karō nhÿ hã mē kām kapēr nē mē kām:

—E kêt ka mē krÿ ja kamã ri apa nē tokyx ma nhÿhÿm apa hkêt nē. Kê Inhÿpêxà Tirtūm mē awÿr amnhÿ Karō rē mãn. Ra ixte mē amã harēnh xà hkôt koja mē awÿr kurē nhūm mē awÿr wrÿ nē mē akarō mā agjê ka mē rÿ kormã angrã nē ma nhÿhÿm krÿ hkôt ri mē kām kapēr jarēnh o ri mē hkôt apa.

⁵ —Juãw Paxis na pre hte Tirtūm mā gôx kām mē hkrã kumrãr o pa. Tã koja Tirtūm tokyx mē awÿr amnhÿ Karō rē. Kot ixpãnhã amnhÿ kaxyw mē ato mē amã ma hkêt kaxyw mē awÿr kurē. Koja hã apkati grêre nhūm mē awÿr kurē nhūm ixpãnhã mē awÿr wrÿ nē mē amã agjê nē mē akamã mē akôt pa ho pa. Ka mē rÿ kormã Jerujarē rūm ajapôj nē ma mē kām Tirtūm kapēr jarēnh o ri mē hkôt apa. Anē.

Jejus akupÿm kaxkwa hwÿr àpir ā harēnh
Makre 16.19; Rukre 24.50

⁶ Tã nhūm mē axte akuprô. Jejus nē ÿ hã mē ahkre ho mē pa xwÿnh maatijaja nhūm mē hixêt pē Oriwêhti nhÿmôk ā axte axpēn wÿr akuprô. Hāmri nhūm mē amnhÿ tã Jejus kukja nē kām:

—Kwa Pahihti mē inhmã mēmoj jarē. Xà kot kaj tokyx apê Tirtūm kot mē ixwÿr amēnh xwÿnh ā amnhÿ jarē nē Rôm nhô xwÿnhjê nē mē pahpê Ijaew kator nà? Hāmri pa mē pamjaja amnhÿ to amnhÿptar o ri ixpa. Anē.

⁷ Hāmri nhūm mē kām:

—Nà Inhîpêxà pix na ã mẽmoj kot anhÿrja kukamã àhpumunh. Tapxipix na kot mẽmoj tanhmã ho hã arîgro nê mẽmoj tanhmã ho hã mytwrÿ pumunh mex. No mẽ kajaja mo kaxyw kot ka mẽ amnhî katorta kukamã amnhî jarênh ma? ⁸ Nà kot paj ãm mẽ amã mẽmoj to pyxire nê hkukamã harê. Koja Tîrtûm tokyx mẽ awÿr amnhî Karô rê nhûm ixpãnhã kot mẽ ato amnhîptâr kaxyw mẽ akarô mã agjê. Hãmri ka mẽ ma pyka piitã hkôt anhrã nê ma mẽ kãm ixkapêr jarênh o ri mẽ hkôt apa. Jar Jerujarê kamã nê pika pê Jutej kôt nê nhãm pika pê Samar kamã nê pika piitã hkôt mẽ kãm ijarênh o ri mẽ hkôt apa. ã mẽ ate amnhî nhîpêx anhÿr pix kukamã kot paj mẽ amã harê. Anê.

⁹ Nhûm pre ã Jejus mẽ kãm kapêr anê hãmri nê mẽ kêp kãnhmã àpir o tẽ nê mẽ noo mã ma kaxkwa hwÿr àpir o tẽ nê kakrãm axà nê mẽ kêp akunok. ¹⁰ Hãmri nhûm mẽ tee ri hapêr o kuhê rãhã nhûm mẽhõ myja wa axkrut nê mẽ hwÿr wrÿ nê mẽ kutã wa xa. Wa ê hakaj nê wa xa. ¹¹ Hãmri nê mẽ kãm:

—Pa Garirej nhõ xwÿnhjaja? Kwa mo kaxyw na ka mẽ tee ri kaxkwa pumunh o akuhê? Tîrtûm na akupÿm amnhî wÿr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nê. Koja nhÿrmã man akupÿn mẽ awÿr wrÿ. Te mẽ arûm kaxkwa hwÿr àpirja pyrã nê akupÿn mẽ awÿr wrÿ ka mẽ omu. Anê.

Akupÿm Jerujarê hwÿr mẽ mrar ã mẽ harênh

Rukre 24.52

¹² Tã nhûm Jejus nhÿ hã mẽ ahkre ho mẽ pa xwÿnh maatijaja wa kuma nê awjanã nê ma akupÿm krîm mra. Hixêt pê Oriwêhti rûm ma akupÿm Jerujarê hwÿr mra. Wÿr jawÿ nhûm mẽ akupÿm hpõx tokyx anê. ¹³ Hãmri nê akupÿm kÿx pê ixkreja wÿr api nê agjê. Na pre

Simãw Pêtre nê
Juãw nê
Xiakre nê
Andrehti nê
Firipti nê
Tomas nê
Patoromew nê
Matêwre nê

Xiakre hõ pê Apew kraja nê

Simãw Jerox nê

Jut pê Xiakre hkraja.

Mê piitã Jejus nhÿ hã mẽ ahkre ho mẽ pa xwÿnh maatijaja na pre mẽ. ¹⁴ Nê mãânênh mẽ hkôt mẽ hkwyjaja. Jejus katorxã Marir nê Jejus tøjaja nê Jejus kot tanhmã mẽni ho mex to xwÿnh kwÿjaja nhûm prem kÿx pê ixkreja wÿr Jejus nhÿ hã mẽ ahkre ho mẽ pa xwÿnh maatijê hkôt gjêx pa. Hãmri nê xatã axpên wÿr akuprô nê Tîrtûm mã amnhî jarênh o hkrî.

Tîrtûm kot Jut Kariot pãnhã mẽhõ xãm ã harênh

Matêwre 27.3-10; Juãw 15.27

¹⁵⁻¹⁹ Tã nhûm mẽ kot Jejus kôt amnhî xunhwÿr xwÿnhjaja ra kêp 120. Jakamã nhûm mẽmo arîgro hã axpên wÿr akuprô nê hkrî. Nhûm Simãw Pêtre kãnhmã xa nê tanhmã mẽ kãm Jut Kariot jarênh to nê mẽ kãm:

—E Jejus kôt ixtõ nê ixtõxjaja. Pa mẽ amã tanhmã finat Jut Kariot jarênh to ka mẽ inhma. Na pre axtem nê mẽ pahkwÿjê mã Jejus ã amÿnê nê hpãnhã kãxpore hkwy jamÿ nê o tẽ nê ho amnhîm pyka hkwy japrô. Tã tanhmã amnhî to nê nhÿri õ pyka kamã tẽm nê amnhî tu katõk nê hkrêx kato nê ty nê hkamrô ho õ pyka xy hpa. Jakamã nhûm Jerujarê nhõ xwÿnhjaja harênh ma nê pykaja ã hixi mẽ nhûm kêp “pyka kamrõhti.” No mẽ pahpê Ijaew kapêr kãm kêp “Ajetãm.” Amnepêm na pre Tîrtûm Karô finat Tawi mã Jut Kariot kukamã tanhmã harênh to. Kormã kator nê kot tanhmã amnhî to hkêt tã nhûm ra hkukamã omu nê Tawi mã harê. Kot axtem nê mẽ kãm Jejus ã àmnênhja nhûm hkukamã omu nê Tawi mã harê nhûm kuma nê ô ri hã kagã. Tã nhûm kot hkukamã hã kagã hkôt nhûm ã Jejus nhîpêx anê. Jut Kariotja mẽ panhõ na pre. Na pre Jejus mẽ pahpyrà nê amnhîm kuta. Mẽ pahpyrà nê ÿ hã kapêr jarênh o pa kaxyw. Tã nhûm axtem nê ã hipêx anê.

²⁰ Nom na pre Tawi kot Tîrtûm mex ã grer ã kagã kot ra hkukamã tanhmã harênh to. Kagã hkwy pê Sam kamã kot harênh kot: Kot amnhî tomnuj xwÿnhnta nhõrkwÿ koja hkapyrÿn kuhê ho kuhê nhûm mẽhõj

mÿr p  kam  pa hk t kumr x. Koja  m ar  hkapr n kuh  ho kuh .

Nom kot Jejus m  tanhm  amnh  nh p x to ho paja k  m h  mÿr p  ho amnh pt  n  hp nh  Jejus nh  h  m  ahkre ho pa. An .

  T rt m kap r   kag  ht m kot Jut Kariot kukam  har nh kot anh r. ²¹ Jakam  e ixkw jaja. Kot puj m  hp nh  m  at  x m ka Jut mÿr p  m  pahp  Jejus nh  h  m  ahkre ho ixpa xw nhj  hk t Jejus akup m ht r   har nh o apa. ²² E m  at  na ka pre m  ixpyr n finat Ju w Paxis kot Jejus hkr  kumr r   omu? N  Jejus kot ri tanhm  amnh  nh p x to ho pa x  hkrax r m ka m  ixk t ri omunh o ri apa? N  htyk k m omu n  akup m ht r k m omu n  ma akup m kaxkwa hw r  pir k m omu? E m  at  na ka pre m  ixpyr n   kot amnh  nh p x anh r   omunh par o ri hk t apa?   m  ate kot amnh  nh p x anh r   omunh o apa xw nhj  h  kot paj m  ata ka Jut Kariot mÿr p  m  ixpyr n ma m  k m Jejus akup m ht r   har nh o ri apa. An .

²³ Nh m pre   Sim w P tre m  k m kap r an . H mri nh m m  kuma n  axp n pumunh o hkr  h mri n  Maxitre m  Jujere wa k m hamaxp r. Jujere na pre hixi axkrun pxi. Na pre k p Jujere n  k p Pasapas n  k p Just . ²⁴⁻²⁵ H mri nh m m  wa h  T rt m kukja n  k m:

—Pa T rt m? N  na pre finat Jut Kariotja Jejus kaga n  ty n  kot amnh  tomnuj mÿrap  ma m  kot amnh  x  ht x kam  hamak t m x ta w r ma m . T  ot pa m  ixte m h  kot mÿr p  m  ixpyr  n  Jejus nh  h  m  ahkre ho pa kaxyw m h  h  akukj r kaxyw akupr . Ate m  ixpiit  tanhm  m  ixte amnh  nh p x to ho ixpa h  m  ixpumunh par T rt m. Ate m  ijamaxp r k t m  ixpumunh par n  m  ixte tanhm  amnh  nh p x to h  m  ixpumunh par. Jakam  e. Ota Maxitre m  Jujereja wa nh . Nh  kot kaj amnh m ata? Kot paj m  k n pijakrutja   wa hixi xi n  ho  k n  h  py. H mri ka am  hpr m xw nhhta. K r pa m  k n pumunh k t r h  h  py n  h  hixi pumu n  am  hpr m xw nh k t omunh kur  kumr x. An .

²⁶ Nh m prem   T rt m m  kap r an  h mri n  k nja o axkamur n  ho  k n  omunh k t r h  ja py n  omu nh m h  Maxitre nh xi n . Jakam  nh m Jejus nh  h  m  ahkre ho m  pa xw nh maatijaja amnh  k t kum  nh m m  akup m k p 12.

2

T rt m Kar  kot m  hw r wr k   har nh Rukre 24.49; Atre 4.31, 8.15, 10.44, 19.2

¹ T  nh m m  hk nh p  P tekos kato nh m m  kot Jejus k t amnh  xunhw r xw nhjaja nh ri axp n w r akupr  n  h  hk nh. P tekosja   na pre hte Ijaew m  hpur k m m o r nh   hk nh kaxyw axp n w r akupr  n  h  hk nh. Jakam  nh m m  kot Jejus k t amnh  xunhw r xw nhjaja haxw ja axp n w r akupr . ² H mri n  kaxkwa kam  m moj ma. Nh m m moj te k k x p r t x krihkrit pyr k o m  hw r wr k o m  n  m  pikupr nh x  h  ixkreja w r ax  nh m m  piit  kuma. ³ H mri nh m m moj te kuwy jakrax pyr kja ahp nh  m  hw r angr  n  m  hkr  nh m k   hikw . ⁴⁻¹³ T rt m Kar  na pre. T m m  hw r wr k jakam    ri m  hip x an . H mri n  kot m  ho amnh pt r kaxyw m  hkar m gj x pa nh m m    h  tanhm  kap r to ho kuh . Nom m  kap r o kap r k t n . Axtem m  kap r kw  ho kap r. T rt m Kar  kot tanhm  m  ho jakam  nh m m  axtem m  kap r kw  ho kap r. Jao ahp nh  m  kap r kw  ho T rt m m  mex o mex   har . Na pre Ijaew kw jaja ahp nh  pyka h  kam  ri m  hk t pa n  m  kap r ma n  ho kap r o pa. T  akup m Jerujar  hw r pan p j n  kam  ri pa ho pa. H mri n  m mojta ma n  ma Jejus kw j  hw r hpr t n  ahp nh  m  kap r   m  kuma n  tee ri m  omunh o kuh . Amnh  ja r p  m  kuma n  tanhm  axp n m  m  har nh to ho:

—Kok y . Garirej nh  xw nhjaja kot m  pakap r mar k t t  ra tanhm  amnh  to n  ahp nh  ri m  pakap r o kap r. Ahp nh  m  pakap r n  ahp nh  m  panh  pyka ht  nh m m    ri m  pakap r o kap r an .

Na pika p  Pat
n  Met
n  Er w
n  M sopot m
n  Jutej

ně Kapatos
 ně Põt
 ně As
 ně Prik
 ně Pāpir
 ně Ejit
 ně Sirěn wỳr Ripja
 ně krī pê Rõm
 ně gô hipôk pê Kret
 ně Arap.

Ně mẽ pahkwỳjaja mẽ pahpê Ijaew
 kumrêx
 ně mẽ pahkwỳjaja amarī ri amnhĩ to
 Ijaew.

Ām ahpỳnhã mẽ panhõ pyka ně ahpỳnhã ri
 mẽ pakapêr.

—Tã pu mẽ ahpỳnhã mẽ pakapêr kãm mẽ
 kapêr ma. Tĩrtũm mex ã mẽ kot axpên mã
 harênhja pu mẽ hã mẽ mar mex ně. Aně.

Nhũm prem ã axpên mã mẽ harênh aně
 ně tee ri mẽ omunh o kuhê. Amnhĩ jaêr
 pê amnhĩ kapêr kãm mẽ kapêr ma ně tee ri
 hamaxpêr ně axpên mã:

—Kokỳỹ. Tanhmã mǎn pre wem amnhĩ
 to ně ra mẽ pakapêr ma ně mẽ pakapêr o
 kapêr? Aně.

Nhũm mẽ hkwỳjaja axtem ně ri mẽ hã
 hpêr o axkê ně axpên mã:

—Tk. Ām mẽ pipǎnh ã ã ri mẽ kot amnhĩ
 nhĩpêx anhỳr kênã. Aně.

*Simãw Pêtre kot mẽ kãm ujarênh
 Atre 3.12-26*

¹⁴ Hãmri nhũm Simãw Pêtre ã mẽ kapêr
 anhỳrja ma hãmri ně kỳx pê mẽ kãm kapêr
 ně mẽ kãm:

—E Jerujarê nhõ xwỳnhjaja ně mẽ apê
 ixkwỳ Ijaew. Pa mẽ amã mẽmoj jarê ka mẽ
 inhma ně inhmar tỳx ně. ¹⁵ Na ka mẽ atỳx
 ri mẽ ixpipǎnh ã mẽ ixkamnhĩx. Mě ixkrã
 pipǎnh kêt. Kormã myt kaxkwa nhĩpôk wỳr
 htêm kênã. Na hte Ijaew kwỳhtã kagôxỳhti
 ho hkõm kêt ně. ¹⁶ Ja na pre Tĩrtũm am-
 nepê mã ã mẽ ixte amnhĩ nhĩpêx anhỳrja
 kukamã mẽ ijarê nhũm ý hã kapêr o pa
 xwỳnh finat Joew mẽ ixkukamã hã kagà.
 Ně hã kagà ho:

¹⁷ Koja nhỹrmã mẽmoj piitã hapêx kaxyw
 pa mẽ piitã mẽ hwỳr Ixkarõ rê nhũm
 ma mẽ hwỳr wrỳ ně mẽ hkarõ mã
 agjê. Hãmri nhũm mẽ hkanrêhã mẽ
 hkra xaptàr nywjaja ma mẽ kãm

ixkapêr jarênh o ri mẽ hkôt pa. Koja
 mẽ hpimtir kãm amnhĩ kukamã
 mẽmoj pumu. Ně mẽhpigêtjaja
 haxwỳja. Kot paj mẽ hpimtir kãm
 tanhmã mẽ kãm ixkapêr to.

¹⁸ Ně kot paj mẽ kot ixkôt ri tanhmã amnhĩ
 nhĩpêx to ho mẽ pa xwỳnhjê hwỳr
 Ixkarõ rê nhũm mẽ ý hã ma mẽ kãm
 tanhmã ixkapêr jarênh to ho ri mẽ
 hkôt pa.

¹⁹ Kot paj kaxkwa kamã ně pyka kamã aa
 mẽ kot mẽmoj pumunh kêt kwỳ ho
 aně nhũm mẽ amnhĩ jaêr pê omu.
 Jao nhỹri mẽ hkamrô pumu ně kuwy
 pumu ně kuwy hkũm pumu hãmri
 ně tee ri amnhĩ kukamã hamaxpêr.

²⁰ Ně koja myyti ahtyk nhũm mytwrỳre
 haxwỳja te mry kamrô pyrãk. Pahi-
 hti Jejus akupỳn hpôx xà hã arĩgro
 xwỳj ri koja mẽmoj ã amnhĩ nhĩpêx
 aně. Akupỳn hpôx xà hã arĩgro koja
 mex kumrêx.

²¹ Tã koja mẽhõ mẽmoj kot ã amnhĩ nhĩpêx
 anhỳr ã omu ně amnhĩ kaxyw
 inhmã hamaxpêr ně amnhĩ to ixwỳ
 pa kuma ně ho ixkra ně mẽmoj
 punujta pê utà. Aně.

Na pre ã Tĩrtũm kapêr aně nhũm finat
 Joewja mẽ pamã hã kagà. ²² E pa mẽ amã
 tanhmã Jejus jarênh to ka mẽ inhma. Nà
 Najare nhõ xwỳnh na pre. Mě pahte Tĩrtũm
 nhỹ hã kot tanhmã amnhĩ nhĩpêx to ho
 pa hã omunh kaxyw na pre Tĩrtũm mẽ
 pahwỳr kumê nhũm ý hã mẽ panoo mã
 tanhmã amnhĩ nhĩpêx to ho pa. Ně aa mẽ
 pahte mẽmoj pumunh kêt kwỳ ho anhỳr o
 pa pu prem hã omu.

²³ —Tã ka prem tanhmã kaxyw aja-
 maxpêr punuj to ně apĩ. Tĩrtũm ra kot
 amnepê mã ja kukamã ja hã mẽ apumunh
 mex tã mẽ pahwỳr kumê ka mẽ axtem ně
 apĩ. Jao mẽ kot htỳx ri amnhĩ nhĩpêx o
 mẽ pa xwỳnhjê mã agõ nhũm mẽ kupĩ. Pĩ
 kahpa hã kunhõ nhũm ty. No ãm mẽ kajaja
 na ka prem mẽ kãm hã amỳnê nhũm mẽ
 ã mẽ amã hprãm xà hkôt hipêx aně ně mẽ
 amã kupĩ.

²⁴ —Tã nhũm Tĩrtũm akupỳm ho htĩr
 nhũm akupỳm htĩr o htĩr nhũm mẽ htykja
 tee ri kot amnhĩ kôt mênh prãm kaprỳ.

25 Amnepê m na pre finat Tawija Jejus akupÿm htîr kukamã harê. Te Jejus tãm kapêr pyrãk o kapêr nê kapêr o:

Na hte Pahi Maati ixkôt pa ho pa rãhã nê. Kot inhîhkô hã ixtãnopxar o pa jakamã kot paj inhmã ma hkê t nê ri ixãmnhîx ijamakêtkati nê ri ixpa.

26-27 Pa Tîrtûm? Nà kot paj nhÿrmã ixtyk tã arî amnhî wÿr akãm ama. Kot kaj mê htykjê kamã ixkarô rer kêt nê. Ixte akapêr kôt amnhî nhîpêx mex o ri ixpa jakamã koja inhî kormã omnu nê hkro hkê t ri ka akupÿm ixto ixtîr. Jakamã na pa inhmã ixtyk puma hkê t nê ixkînh nê ijamakêtkati nê ri ixpa. Nê amnhî kînh jarênh rãhã ho ri ixpa.

28 Na ka pre akupÿm ixto ixtîr ã amnhî jarê pa ixtîr tûm nê ixpa ho ixpa kaxyw. Tã ate ixkôt ri apa rãhã jakamã pa ixkînh nê ri ixpa. Anê.

29 ã na pre mê panhîgê t finat Pahi Tawija Jejus htyk nê akupÿm htîr kukamã harênh anê. No tãm amnhî jarênh kêt nê. Tawija na pre ty nhûm mê haxà nhûm htem arî haxà r xà hã pika ho mex o pa. Tã tãm ã kot amnhî jarênh anhÿr ro nhÿx akupÿm htîr nhûm mê arî haxà r xà kaprÿ ho mex o pa hkê t nê. ³⁰ Pahi Tawi kêp Tîrtûm nhÿ hã kapêr jarênh o pa xwÿnh jakamã nhûm Tîrtûm kãm hkanrêhã htãmnhwÿ Jejusja kukamã harê nê kãm:

Koja nhÿrmã akanrêhã atãmnhwÿjê hõ amÿr pê apyrà nê mê ho amnhîptà r o pa. ãm hãmri na pa amã ja jarê. Anê.

31 Nhûm pre ã Tîrtûm Tawi mã mê pakaxyw ãm mã xwÿnhnta jarênh anê nhûm kuma. Nê mar tÿx jakamã hkukamã htyk nê akupÿm htîr ã harê nê hã kagà. Nê hã kagà ho:

Koja Tîrtûm mê htykjê kamã hkarô rer kêt nê nhûm aa ï omnu nê hkro kêt. Anê.

ã na pre finat Tawija Jejus Kris kukamã harê nê hã kagà anê. ³² Kot harênh xwÿnh Jejusja tãm na pre Tîrtûm akupÿm ho htîr pa mê pamjaja akupÿm htîr kãm omu. Hãmri nê mê ixte omunh xà hkôt ã mê amã harênh anê. Anê.

Nhûm pre ã Simãw Pêtre mê kãm Jejus jarênh anê. Hãmri nê mê kãm:

³³ —Na pre Tîrtûm akupÿm amnhî wÿr Kra Jejus o api. Hãmri nê kãm anê nhûm

ihkô hã mêmoj piitã ho amnhîptà r o hkrî. Hãmri nhûm Tîrtûm kot kãm amnhî jarênh xà hkôt kãm amnhî Karô gô. Tã nhûm ra amnhî pyrã nê mê ixwÿr kurê nhûm jarãhã mê ixwÿr te kuwy jakrax pyrã nê mê ixwÿr wrÿ nê mê ixkarô hwÿr gjêx pa. Hãmri pa mê ÿ hã ahpÿnhã mê akapêr o ixkapêr ka mê inhma. Tã mê akwÿjaja axtem nê mê xpipãnh ã mê ixkamnhîx. ³⁴ No finat Tawija na pre tãm kaxkwa hwÿr àpir ã amnhî jarênh kêt nê. Jejus kot ï ho kaxkwa hwÿr àpirja na pre harê nê harênh o:

Na pre Tîrtûm inhô Pahihti mã kapêr nê kãm:

³⁵ “E jar inhîhkô hã nhÿ.

Pa amã mê kãm akurê xwÿnhjê gô ka mê ho amnhîptà r o akrî.” Anê.

ã na pre finat Tawija Tîrtûm kapêr jarênh anê. Nom tãm ï rãhã kaxkwa hwÿr àpir ã amnhî jarênh kêt nê. Pahihti Jejus na pre ã hã harênh anê. ³⁶ Jakamã kwa ixkwÿ Ijaew. Mê inhma nê inhmar tÿx nê. Mê ate Jejus ã axãmnhênh nhûm mê kot mê amã pî kahpa hã hpîr xwÿnhnta. Tãm na pre Tîrtûmja kêp mê panhõ Pahihti kaxyw ãm. Nê kêp mê papytã r xwÿnh kaxyw mê pakaxyw ãm. Anê.

³⁷ Nhûm pre ã Simãw Pêtre mê kãm ujarênh anhÿr o xa. Hãmri nhûm mê tee ri ujarênhja ma nê hkaprî nê. Nê tee ri amnhî kukamã hamaxpêr nê hamaxpêr o:

—Hêxta waa nê. Pêr ãm hãmri na pre Jejus mê pamã amnhî jarênh tã pu prem amnhî kaxyw hkôt pajamaxpêr kêt nê axtem nê kupî. Anê.

Hãmri nê amnhî tã mê hkukja nê Simãw Pêtre mã:

—Kwa ã kot anhÿr jakamã tanhmã kot paj mê amnhî nhîpêx to? Anê.

³⁸ Hãmri nhûm mê kãm:

—Nà kêr ka mê tee ri ate amnhî tomnuj mã ajamaxpêr nê akaprî nê. Hãmri nê Jejus Kris kôt amnhî xunhwÿ. Pa mê ja hã mê apumu nê Jejus nhÿ hã mê akrã kumrã. Hãmri nhûm Tîrtûm ja hã mê apumu nê te amnhî katut kôt mê ate amnhî tomnuj piitã rênh par pyrã nê axte kãm hamaxpêr kêt nê. Hãmri nê mê ixkuxwar mê awÿr amnhî Karô rê. ³⁹ Kãm mê awÿr rênh prãm. Mê amã nê mê akanrêhã mê akra nê mê atãmnhwÿjê mã nê mê kot kormã Tîrtûm

kapêr mar kêt xwÿnhjê mã. Æm mẽ kot amnhĩ to hwÿr xwÿnh piitã nhũm kãm mẽ hwÿr rênh prãm. Anẽ.

⁴⁰ Nhũm pre ã Simãw Pêtre mẽ kãm ujarênh anẽ. Mẽ kãm kapêr xihtÿx o kapêr ry nẽ. Hãmri nẽ mẽ kãm:

—Koja nhÿrmã Tĩrtũm mẽ kot tanhmã amnhĩ tomnuj to ho mẽ pa xwÿnhjaja tanhmã mẽ homnuj tÿx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nẽ. Anẽ.

⁴¹ Hãmri nhũm mẽ hkwyjaja kapêr mar tÿx nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ. Mẽ ohtô rax nẽ hkôt amnhĩ xunhwÿ. Mẽ kêp 3.000 nẽ hkôt amnhĩ xunhwÿ. Hãmri nhũm mẽ kot Jejus nhÿ hã kapêr jarênh o mẽ pa xwÿnhjaja mẽ hkrã kumrãr pa. Mẽ kêp Jejus kwÿ hã amnhĩ to amnhĩrit kaxyw mẽ hkrã kumrãr pa. ⁴² Hãmri nhũm mẽ ra mẽ kot Jejus kôt amnhĩ nhĩpêx xwÿnhjê hkôt amnhĩ nhĩpêx o pa nhũm Jejus nhÿ hã mẽ ahkre xwÿnh maatijaja apkati mẽ Jejus kapêr o mẽ ahkre nhũm mẽ mar tÿx nẽ ra Jejus kôt amnhĩ nhĩpêx mex o mō. Nẽ gaa nẽ hkôt amnhĩ nhĩpêx mex o pa. Mẽ kãm kapêr mar prãm tÿx jakamã na pre htem axpên wÿr akuprō nẽ axpên kutã apku nẽ Tĩrtũm mã amnhĩ jarênh o hkrĩ. Nẽ mẽ kãm axpên to mex pix prãm o axpên kôt pa ho pa.

Jejus kwÿ kot tanhmã amnhĩ nhĩpêx to hã mẽ harênh

Atre 4.32-35

⁴³ Tã nhũm Jejus nhÿ hã mẽ ahkre ho mẽ pa xwÿnh maatijaja xatã Tĩrtũm nhÿ hã aa mẽ kot mẽmoj pumunh kêt kwÿ ho anhÿr o ri krĩ nhō xwÿnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nẽ mẽ kamã no pyma ho tee ri tanhmã Tĩrtũm mã hamaxpêr to. ⁴⁴ Nhũm mẽ kot Jejus kôt amnhĩ xunhwÿr xwÿnh piitã mẽmoj to axpên kutã nojarêt o pa. Jao axpên pê ri mẽmoj to õxÿ hkêt nẽ pa. ⁴⁵ Jakamã nhũm mẽhō kêp amrakati nhũm mẽ ja hã omu hãmri nẽ õ pyka hkwy ho wênê rÿ mẽ hikukrêx kwÿ ho wênê nẽ kàxpore jamÿ nẽ ma o mra nẽ mẽ kãm kugō. Na pre hte ã mẽ kot Jejus kôt amnhĩ xunhwÿr xwÿnhjaja axpên nhĩpêx anhÿr o pa. ⁴⁶ Hãmri nẽ apkati mẽ Tĩrtũm mã amnhĩ jarênh xà hã

ixkre hwÿr mra nẽ kãm mex o mex ã harê. Nẽ hamakêtkati nẽ àmnhĩx ri hkĩnh kãm axpên nhōrkwÿ hkôt ri apkur o pa. ⁴⁷ Pê Tĩrtũm mã mex o mex ã harênh o ri axpên kôt pa. Æ mẽ kot amnhĩ nhĩpêx anhÿr o pa jakamã nhũm krĩ nhō xwÿnh piitã kãm mẽ hkĩnh nẽ. Nẽ mẽ hkwyjaja apkati mẽ mẽ hwÿr mra nẽ mẽ hkôt axkamẽ nẽ mẽ urak nẽ Jejus kôt amnhĩ xunhwÿ nhũm Tĩrtũm ja hã mẽ omu nẽ mẽ ho hkra. Jakamã nhũm mẽ ra ohtô rax kumrêx o mō.

3

*Te grã xwÿnh jarênh
Juãw 14.12-14; Atre 14.8-10*

¹ Tã nhũm apkati hō hã nhũm Simãw Pêtre mẽ Juãw wa ma Tĩrtũm mã amnhĩ jarênh xà hã ixkre hwÿr wa tẽ. Na pre hte myt àhpanh grire nhũm mẽ piitã kot Tĩrtũm mã amnhĩ jarênh kaxyw hwÿr mra. Jakamã nhũm Simãw Pêtre mẽ Juãw wa haxwÿja ma hwÿr wa mra. ² Nhũm mẽhōja hakwakrem hkrĩ. Katorxà nhōxà hkre rũm hte grã nẽ kator xwÿnhhta. Nẽ arĩ hkrĩ ho hkrĩ nẽ aa kànhmã ãm nẽ ri pa hkêt nẽ. Nhũm hte hkràmnhwÿjaja apkati mẽ hamÿ nẽ ma o pa nẽ Tĩrtũm mã amnhĩ jarênh xà hã ixkre jakwakrem hkrĩ nhũm mẽ hwÿr o hkrĩ. Hakwakreja mẽ kot kãm: “Mẽ gjêx xà mex” anhÿr xwÿnhhta kapem hwÿr mẽ mrar xwÿnhjê hwÿr o hkrĩ. ³ Tã nhũm Simãw Pêtre mẽ Juãw wa tẽ nẽ ixkreja wÿr wa àr o tẽ nhũm hte grã xwÿnhhta wa omu nẽ kàxpore hã wa kuwÿ ⁴ nhũm Simãw Pêtre omu nẽ kãm:

—E amnẽ wa ixpumu. Anẽ.

⁵ Hãmri nhũm kuma nẽ htÿx ho wa kot kãm kàxpore hkwy nhōr ã wa hkamnhĩx nẽ wa omu ⁶ nhũm Simãw Pêtre kãm:

—Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhō xwÿnhhta nhÿ hã amã ixkapêr jakamã tokyx kànhmã xa nẽ ri mra. Anẽ.

⁷ Hãmri nẽ upôk rũm hpa hã kupy nẽ kànhmã ãm nhũm hte mex nẽ kànhmã xa nẽ amnhĩ te karo ho ri mra. ⁸ Hãmri nẽ hte mex ã amnhĩ pumu nẽ hkĩnh tÿx nẽ. Nẽ hkĩnh xàj ma wa hkôt harĩ ho tẽ nẽ wa hkôt ixkrem axà. Tĩrtũm mã mex o mex ã harênh pê harĩ ho wa hkôt tèn axà. ⁹ Hãmri nhũm

mê piitã amnhĩ jaêr pê akupÿm mex ã omu nê kamã no puma nê. ¹⁰ Nê axpên mã:

—Kokÿÿ müjti na pre hte mê gjêx xà mex kamã mê hwÿr rãhã ho hkrĩ htã nhũm Tĩrtũm tanhmã ho nhũm kãnhmã xa nê ri mrar mex kurê kumrêx. Hêxta waa nê. Anê.

*Simãw Pêtre kot mê kãm ujarênh
Rukre 24.46-47; Atre 2.14-36*

¹¹ Hãmri nhũm hte mex xwÿnhja Simãw Pêtre mê Juãw wa hkôt ixkre hwÿr axã nê wa kuri xa. Nhũm mê piitã amnhĩ jaêr pê harênh ma nê hwÿr hprôt nê agjê nê omu. Mê kot ixkre nhĩkjê jarênh o: “Pahi Sarumãw nhõ” anhÿr xwÿnh jarênhja wÿr nhũm mê hprôt nê hte mex xwÿnhhta kamã no puma ho kuhê. Nê kuri Simãw Pêtre mê Juãw wa omu nê axpên mã wa harênh o:

—Hêxta waa nê. Tanhmã na we wa amnhĩ to nê akupÿm kãm hte ho mex nhũm ri mra?

Anê nê wa kamã no puma nê. ¹² Hãmri nhũm Simãw Pêtre mê kuma nê mê kãm:

—Pa ixkwÿjaja. Kwa mëmo na ka mê ri mê ixkamã ano puma ho akuhê? Xã wa ixãhpumunh tÿx xà ho na pa wa ho mex? Nã ja kot anhÿr kêt. Rÿ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nã mãânên ja kot anhÿr kêt. ¹³⁻¹⁷ Mê ate omunh xwÿnhhta Jesus tãm kot ho mex kênã. Kot amnhĩ kaxyw kãm hamaxpêr tÿx jakamã nhũm akupÿm ho mex ka mê omu.

—Finat Apraãw nê Ijak nê Jako mê hkwyjaja kot hkôt amnhĩ nhĩpêx o pa xwÿnh pê Tĩrtũmja. Tãm na pre akupÿm Kra Jesus o htĩr nê mex o mex ã harê. Mê ate hã axãmnhênh nhũm mê kot hpĩr xwÿnhhta. Pahihti Pirat kot kãm urer kaxyw tã ka mê nê kãm akapêr kãm axihtÿx nê. Nom Jesus tãm kot amnhĩ nhĩpêx o pa xwÿnh na pre. Na pre hte amnhĩ nhĩpêx mex rãhã ho pa htã ka mê axtem nê hkaga. Nhũm pahihti Pirat mê ate kot kãm urer kêt ã axihtÿx nhũm kãm urer kêt nê õ pôristi mã kugõ nhũm mê amã kupĩ. Mê kajaja mê amã hprãm xà hkôt mê amã kupĩ. Tĩrtũm kot mê pahwÿr mênh tã ka mê axtem nê apĩ.

—Nom mê ate kêp Tĩrtũm Kra hã omunh kêt jakamã na ka prem ã hipêx anê. Mê kot mê ato amnhĩptar xwÿnhjê mê na ka prem amarĩ apĩ. Na prem mê axãmnhênh xà hkôt

mê amã pĩ kahpa hã kunhõ nê ã hpĩr anê. Kêp akupÿm mê pahto mê pahtrĩ xwÿnh tã ka prem axtem nê apĩ. No nhũm Tĩrtũm akupÿm ho htĩr pa prem akupÿm htĩr kãm omu.

¹⁸ —Amnepêem Tĩrtũm nhÿ hã kapêr jarênh o mê pa xwÿnhjaja na prem Tĩrtũm kot mê pakaxyw ãm xwÿnhja kukamã tanhmã harênh to nê hã kagã nê mê kãm harênh o pa. Kot amnhĩ xà htÿx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhÿr xãja kôt ka mê ã hipêx anê nê apĩ.

¹⁹ —Jakamã kwa mê tee ri mê ate amnhĩ tomnuj ã amnhĩ pumu nê tokyx hkaga. Hãmri nê amnhĩ to Tĩrtũm wÿ kê mê anê mê ate amnhĩ tomnuj piitã amnhĩ katut kôt rênh pa. ²⁰ Hãmri nê mê ato mex nê ka mê kukwak ri akĩnh nê ajamakêtkati nê axãmnhĩx ri apa. Koja nhÿrmã akupÿn mê pahwÿr Jesus mê. Ra kot mê pakaxyw ãm kênã.

²¹ —Nom koja tokyx akupÿn wrÿk kêt nê. Koja kormã kaxkwa kamã pa rãhã nhũm Tĩrtũm akupÿm kot mëmoj piitã ho mex par mê nhũm rĩ kormã akupÿn mê pahwÿr wrÿ. Amnepêem Tĩrtũm nhÿ hã kapêr jarênh o pa xwÿnhjaja kot ja kukamã harênh nê hã kagã xà hkôt.

²² —Na pre finat Mojes haxwÿja Tĩrtũm nhÿ hã mê pahpãmjê mã tanhmã ja jarênh to nê harênh o:

Koja nhÿrmã mê panhõ Pahi Maati Tĩrtũmja te kot ra mê akaxyw pa ixãmja pyrã nê axte mê panhõ xãm. Mê panhõ koja. Koja nhÿrmã inhmÿr pê mõi põi nê mê amã Tĩrtũm kapêr jarênh o pa. Ka mê kapêr ma nê mar tÿx nê kapêr kôt amnhĩ nhĩpêx o ri apa.

²³ Koja mëhõ kuma nê ãm kuma nê hkôt amnhĩ nhĩpêx kêt nê nhũm Tĩrtũm tee ri ja hã omu nê kêp hkra hkêt ã harênh kurê kumrêx. Anê.

²⁴ ã na pre finat Mojesja mê kãm Jesus kukamã ujarênh anê. No ãm tapxipix na pre ã harênh anhÿr kêt nê. Tĩrtũm nhÿ hã mê kapêr o mê pa xwÿnh piitã na prem ã mê kãm harênh anhÿr o pa. Kot harênh o pa xwÿnh kot wa finat Sãmuewja nê hkôt mê hkwyjê piitã ã Jesus kukamã hkwyjê mã harênh anhÿr o pa.

25 —Tã mẽ pahpê mẽ hkamrô hkwy na pu mẽ. Mẽ pahpê mẽ hkanrêhã mẽ htàmnhwỳ. Mẽ pakaxyw na pre Tirtũm ã mẽ kãm kapêr anê. Nê Kraja kukamã finat Apraãw mã kãm:

Koja nhỹrmã akanrêhã atàmnhwỳjê hõ pyka piitã hkôt mẽ piitã mẽ ho mex o pa nhũm mẽ kukwak ri mex kumrêx nê ri pa. Anê.

26 ã kot Kra hkukamã harênh anhỹr tã mẽ pakumrêxjê hwỳr na pre kumê. Kot mẽ pahto mex nhũm mẽ pahte amnhĩ tomnuj kaga kaxyw nhũm mẽ pahpê Ijaew kumrêxjê hwỳr kumê. Anê.

Nhũm pre ã Simãw Pêtreja hte grà xwỳnh pumunh o mẽ kuhê xwỳnhjê mã ujarênh anê.

4

Simãw Pêtre mẽ Juãw wa kot mẽ àptàr tũmjê mã kapêr ã wa harênh

Rukre 21.12-13

1-4 Nhũm Simãw Pêtre mẽ Juãw wa arĩ mẽ kãm Tirtũm kapêr jarênh o wa xa nê mẽ kãm:

—Nà na pre Jejus ty nhũm Tirtũm akupỹm ho htĩr. Tã kot akupỹm ho htĩr jakamã koja nhỹrmã urak nê akupỹm mẽ htyk xwỳnh piitã mẽ ho htĩr pa. Anê.

Hãmri nhũm mẽ kot wa mar o kuhê xwỳnh kwỳjaja wa kuma nê wa hkôt hamaxpêr nê wa urà nê Jejus kôt amnhĩ xunhwỳ. Jakamã nhũm ra mẽ kot Jejus kôt amnhĩ xunhwỳr xwỳnhjaja ohtô rax kumrêx. Ra mẽ kêp 5.000.

Hãmri nhũm axtem mẽ hkwyjaja wa hwỳr mra nê wa mar o kuhê. Mẽ õ patre nhõ pòristi krãhtũm mẽ Satusew nhõ xwỳnh kwỳjê mẽ nhũm mẽ ma Simãw Pêtre mẽ Juãw wa hwỳr mra nê tee ri wa kot mẽ ahkre hã wa mar o kuhê. Nê mẽ kãm akupỹm mẽ htĩr jarênhja ma nê wa kamã gryk nê. Satusew nhõ xwỳnhjaja na pre htem akupỹm mẽ htĩr kôt hamaxpêr kêt jakamã nhũm wa akupỹm mẽ htĩr jarê nhũm mẽ tee ri wa kuma nê hamaxpêr punuj nê wa kamã gryk kato. Hãmri nê wa hã amỹnê nhũm mẽ wa unê nê ma wa o tẽ nê mẽ hagjênh xà kamã wa haxà. Ra myt grire nhũm mẽ wa haxà. Wa kot mẽ

hagjênh xà kamã hã apkati nhũm rĩ kormã mẽ kot ujarênh ã tanhmã wa ho kaxyw.

5-6 Tã nhũm apkati nhũm mẽ ohtô nê wa ujarênh ã wa mar kaxyw Jerujarê kamã axpên wỳr akuprô. Ijaew pigêtjaja nê mẽ àptàr tũm kwỳjaja. Nê mẽ kot finat Mojes kapêr o mẽ ahkre ho mẽ pa xwỳnhjaja. Nê mẽ õ patre maati Anas mẽ hkwyjaja. Nê Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpên wỳr akuprô. 7 Hãmri nê wa hã karõ nhũm pòristi wa hwỳr tẽ nê wa haprô nê ma mẽ hwỳr wa o tẽ nê wa ho axà nê mẽ kutã wa ýr nhũm wa nhỹ. Hãmri nhũm mẽ wa omu nê wa kãm:

—E mẽ inhmã amnhĩ jarê. Mẽhõ xàhpumunh xà ho na ka pre wa hte grà xwỳnhhta ho mex? Mẽhõ na pre hwỳr war amê ka wa ho mex? Anê.

8 Hãmri nhũm Simãw Pêtre mẽ kãm awjarê. Tirtũm Karõ kot kãm hamaxpêr o hihtỳx jakamã nhũm ý hã Ijaew pigêtjê mẽ mẽ àptàr tũmjê mã awjarê nê mẽ kãm:

9 —Tõe mẽhõ kot ho mex xwỳnhja ã mẽ ate wa ixkukjêr 10 jakamã kot paj mẽ amã harê ka mẽ ixte harênhja ma. Wa ixpyrà nê mẽ apê Ijaew kêr ka mẽ wa ixkapêr mar tỳx nê. Jejus Kris pê Najare nhõ xwỳnhhta. Mẽ ate hpĩr nhũm Tirtũm kot akupỹm ho htĩr xwỳnhhta. Tãm na pre àhpumunh tỳx o akupỹm hte grà xwỳnhhta o mex. ý hã ixte kaxyw kãm ixkapêr nhũm tãm akupỹm ho mex. 11 Tirtũm kot mex o mex ã harênh nê mẽ pakaxyw ãm tã ka prem axtem nê hkaga. Nom Tirtũm kapêr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarênh nê mẽ ajarênh kot:

Mẽ kot kên o amnhĩm òrkwỹ nhĩpêx kaxyw nê nhỹri kên maati pumu nê htỳx omnuj ã hkamnhĩx nê hkaga. Mẽ kot hkaga htã nhũm Tirtũm mẽ kurom mex o kot kên piitã hakrenh par ã omunh kurê kumrêx.

Anhỹr o kot mẽ ajarênh. Te mẽ ate kên maati kaga xwỳnh ã mẽ ajarênh pyrak. Tã ka mẽ ã mẽ kot mẽ akukamã mẽ ajarênh anhỹrja kôt te mẽ ate kên maati kaga pyrà nê Jejus kaga nê apĩ. Tirtũm kot amnhĩm mex o mex ã omunh nê harênh tã ka prem axtem nê hkaga. 12 Tapxipix na hte mẽ panê mẽ pahte amnhĩ tomnuj rê. Mẽhõ

koja uràk nē àhpumunh tỳx o mẽ panê kurê? Mēhō koja ahpỳnhã pyka piitã hkôt uràk nē ã mẽ panhĩpêx mex anê? Nà ãm amrakati kumrêx. ãm Jejus pix. Tapxipix na pre Tĩrtũm ja kaxyw ãm jakamã tapxipix na kêp mẽ pahkaprĩ xwỳnh maati. Anê.

¹³ Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nê axpên mã:

—Kwa wa kãm mẽ pahpyma wa hã hkwỳ jêt kêt kumrêx. Te ri wa htỳx ri wa pa pyràk tã wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anê nà? Anê.

¹⁴ Hãmri nê tee ri kot tanhmã mẽmoj tã wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nê Simãw Pêtre wa kuri mex nê ãm nhũm mẽ kot no ho omunh jakamã wa kãm àkjêr kêt nê. ¹⁵ Hãmri nê wa kãm anê nhũm wa mẽ kêp kato nê kapôt ã xa nhũm mẽ tanhmã wa kãm nê kaxyw wa hã axpên ma nê axpên mã:

¹⁶ —Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupỳm hte grà xwỳnh ta mex ã wa omunh kênã kot puj kêt mẽ kãm wa kot ho mex hkêt ã wa harê. ¹⁷ Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karō anê. Anê.

¹⁸ Nhũm mẽ wa hã axpên mar pa hãmri nê akupỳn wa hã karō nhũm wa akupỳn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmrĩ ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. ãm kwarĩ ho kwarĩ. Anê.

¹⁹ Hãmri nhũm wa tee ri mẽ kuma nê mẽ kãm:

—Nà Tĩrtũm tãm kot ja hã wa inhmã karō kênã kot pa kêt wa mẽ akapêr ma nê harênh o ixpa hkêt nê. ²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupỳm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà

kot pa wa mẽ akapêr mar xa hkôt ã amnhĩ nhĩpêx anhỳr hkêt nê. Anê.

²¹⁻²² Hãmri nhũm mẽ kuma nê tee ri mẽ kot tanhmã wa ho kaxyw. Te grà xwỳnh ta hte grà nê hkrĩ ho hã amgrà pê 40 tã ra akupỳm mex nhũm mẽ piitã ja hã omu nê hã axpên mã Tĩrtũm mex o mex ã harênh o ri pa. Jakamã nhũm mẽ utàr xwỳnhja mẽ kuma nê kãm mẽ uma nê. Hãmri nê mẽ umaj tanhmã Simãw Pêtre mẽ Juãw wa ho hkêt nê. ãm axte wa kot Jejus jarênh o pa nê wa kãm kapêr kãm hihtỳx nê wa hano nhũm wa ma tẽ.

Mẽ kot amnhĩ to Tĩrtũm wỳr ã mẽ harênh Matêwre 18.19-20

²³ Tã nhũm Simãw Pêtre mẽ Juãw wa ma akupỳm Jejus kôt htō nê htōxjê hwỳr wa tẽ nê mẽ kãm amnhĩ jarê. Nê patre krãhtũmjê mẽ mẽ àptàr tũmjaja kot Jejus kapêr jarênh nê wa hkurê kamã hihtỳxja nhũm amnhĩ tã mẽ kãm mẽ harê. ²⁴ Hãmri nhũm mẽ wa kuma nê amnhĩ to Tĩrtũm wỳr kurê kumrêx nê kãm:

—Pa Pahi Maati? Nà mẽmoj piitã ho akator xwỳnh ta na ka. Na ka pre kaxkwa ho akato nê pyka ho akato nê gō xujanār o akato. Hãmri nê kamã mẽmoj piitã ho akator pa. ²⁵⁻²⁶ Amnepêm na pre mẽ inhĩgêt Tawija amã tanhmã amnhĩ nhĩpêx to ho pa. Nê Akarō nhỹ hã akapêr kwỳ jarê nê hã kagà. Nê kagàja kamã mẽ kot Pahihti Jejus kutã amnhĩ xunhwỳr xwỳnhjê jarê nê mẽ hã kagà. Mẽ hkukamã mẽ hã kagà nê mẽ hã kagà ho:

Mẽmo mỳrapê na prem Ijaew kêt xwỳnhja Tĩrtũm kutã amnhĩ xunhwỳ?

Nê Ijaew haxwỳja. Mẽmo mỳrapê na prem htỳx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwỳr pa.

Nê kot mẽ pakaxyw ãm xwỳnh Jejus Krisja nhũm mẽ mãânên kutã amnhĩ xunhwỳr pa.

Nê mẽ kot hpĩr kaxyw mẽ kãm hã amỳnê.

Kwa mẽmo mỳrapê na prem axtem nê ã amnhĩ nhĩpêx anê? Anê.

ã na pre finat Tawija Akarō nhỹ hã mẽ harê nê hã kagà anê Tĩrtũm. ²⁷ ãm hãmri na pre mẽ hkukamã mẽ hã kagà. Ra mẽ kot ã amnhĩ nhĩpêx anhỳr kênã. Krĩ ja kamã na prem ã amnhĩ nhĩpêx anhỳr kaxyw axpên

wÿr akuprõ. Pahi Erox nê pahi Põn Pirat nê mẽ ixkwÿjaja nê mẽ kêp Ijaew kêt xwÿnhjaja axpên wÿr akuprõ nê Akra Jejus kutã amnhĩ xunhwÿ nê mẽ kot hpĩr kaxyw hã amÿnê. Kot tãm amnhĩ nhĩpêx o pa nhũm ate mẽ ixkaxyw ãm xwÿnhja nhũm mẽ axtem nê kutã amnhĩ xunhwÿ.

²⁸—Nom amnepêm kormã mẽ ixkêt ri na ka pre mẽ hkukamã ã mẽ kot amnhĩ nhĩpêx anhÿr ã mẽ omu. Mẽ kot tanhmã apê Akra Jejus to nê hpĩrta kukamã ka pre hã mẽ omu. Tã mẽ ixwÿr amê nhũm prem kupĩ. No ãm ajamexpêr xà hkôt.

²⁹—Tã ka mẽ omu. Na mẽ Jejus ã mẽ ixkamã gryk tÿx nê tanhmã hã mẽ ixto kaxyw. Jakamã kot kaj mẽ ixpê amã tanhmã amnhĩ nhĩpêx to ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nê mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tã pa mẽ inhmã mẽ uma hkêt nê ixãmnhĩx ri ixkĩnh nê ri ixpa. Nê anhÿ hã mẽ kutã amnhĩ to htÿx nê arĩ mẽ kãm akapêr jarênh o ri mẽ hkôt ixpa. Mẽ kot Jejus ã tanhmã mẽ ixto htãã.

³⁰—Akra Jejus mex o mex jakamã kot paj mẽ àhpumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nê mẽ kot aa mẽmoj pumunh kêt kwÿ ho anê. Kê mẽ omu nê axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tĩrtũm wÿr anê. Puh nhũm ixkreja mẽ kãm htertet tÿx nê nhũm Tĩrtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nê. ãm amnhĩ to htÿx nê mẽ kãm Tĩrtũm kapêr jarênh rãhã ho ri mẽ hkôt pa.

Jejus kwÿjaja tanhmã kot axpên nhĩpêx to hã mẽ harênh

Atre 2.42-47

³²⁻³³ Nhũm Jejus nhÿ hã mẽ ahkre ho mẽ pa xwÿnh maatijaja. Na pre Tĩrtũmja mẽ ho mẽ kãm ma hkêt jakamã nhũm pre htem akupÿm Jejus htĩr kêt mẽ kãm harênh o ri mẽ hkôt pa. Nhũm Tĩrtũm mẽ kot Jejus kêt amnhĩ xunhwÿr xwÿnh piitã mẽ kutã nojarêt rãhã ho pa nhũm mẽ ra ohtô rax nê. Nê mẽ kãm axpên to mex pix prãm o ri axpên kêt pa. Mẽ ohtô htã te mẽ tipxi pyrãk.

Nê axpên pê mẽmoj to õxÿ hkêt nê. Na pre htem axpên mã mẽ hikukrêx nê mẽ apkur xà jarênh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tã axpên kutã nojarêt o ri pa. No kêt axpên mã mẽmoj jarênh o: “Tk. Nà ãm inhõ pix na.” Anhÿr o harênh kêt nê. ³⁴⁻³⁵ Na pre htem tõhã õ ixkre hõ ho wênê. Rÿ õ pyka hkwÿ ho wênê nê kàxpore jamÿ nê ma o mra nê Jejus nhÿ hã mẽ ahkre ho mẽ pa xwÿnhjê mã kugõ nhũm mẽ hamÿ nê mẽ kêp amrakati xwÿnhjê mã ho anhgrà. Hãmri nhũm mẽ amnhĩm hamÿ nê ho amnhĩm awjaprõ. Jakamã na pre hte mẽ hkwÿjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷ Jujere na pre ã amnhĩ nhĩpêx anê nê mẽ kaxyw õ pika hkwÿ ho wênê. Hãmri nê kàxpore py nê o tẽ nê Jejus nhÿ hã mẽ ahkre xwÿnh maatijê mã kugõ. Jujereja Ijaew nhõ patre ho ajuta xwÿnh na pre. Gõ hipòk pê Sipre kamã na pre kato. Kêp Jujere htã no nhũm Jejus nhÿ hã mẽ ahkre ho mẽ pa xwÿnhjaja na prem kãm: “Panãpe” Anê. Mẽ kapêr kãm Panãpeja te kêp “mẽ hamaxpêr o mẽ hihtÿx o pa xwÿnh” anhÿr pyrãk. Jakamã nhũm õ pika hkwÿ ho wênê nê kàxpore py nê o tẽ nê Jejus nhÿ hã mẽ ahkre xwÿnhjê mã kugõ nhũm mẽ kupy nê mẽ kêp amrakati xwÿnhjê mã ho anhgrà.

5

Ananĩs mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

¹ Tã nhũm Ananĩs mẽ hprõ Sapire wa Jujere jarênh ma nê uràk nê õ pyka hkwÿ ho wênê. ² Hãmri nê kàxpore py. Nom na pre wa ra hã axpên ma. Jakamã nhũm Ananĩs Jujere kĩnhã kàxpore hkwÿ pix py nê o tẽ nê Jejus nhÿ hã mẽ ahkre xwÿnh maatijê mã kugõ. Nom katat kêt mẽ kãm õr ã amnhĩ jarênh kêt nê. Kot kàxpore ho pikjêr nê amnhĩm hkwÿ ho àrĩk ã amnhĩ jarênh kêt nê. ãm mẽ kãm amnhĩ jarênh o hêx. Te piitã õr par pyrãk o amnhĩ nhĩpêx nê mẽ kãm:

—E ota ixkàxporeta. Na pa wa inhõ pika hkwÿ ho wênê nê kàxpore hpy nê hpãnhã Jujere pyrã nê man mẽ awÿr piitã o tẽ. Anê.

³ Hāmri nhūm Simāw Pêtre ra ã kot amnhĩ nhĩpêx anhÿr ã omu hāmri nē kām:

—Tk. Kwa mon ka axtem nē Satanasti kapêr ma nē hkôt amnhĩ nhĩpêx nē te akàxpore piitã òr pyræk ã amnhĩ to axêx anê? Te ate piitã òr pyræk tã no ãm hkwÿ pix gō. Hêxta waa nē. Na ka axtem nē Tirtūm Karō mā akàxpore nhōr par o axêx.
⁴ Anhō pyka kênã. Nē hpānhã kàxporeja anhō kênã. Kot kaj amã tanhmã ho hprãm xà hkôt māmri tanhmã ho. Amã piitã ho axarĩk prãm nē māmri piitã ho arĩk. Rÿ amã hkwÿ hpix nhōr prãm nē māmri hkwÿ pix gō. No ri ate òr par pyræk o amnhĩ to axêx kêt nē. Te ate mē inhmã pix mā axêx pyræk nom mē inhmã pix mā hkêt. Na ka määnēn te Tirtūm mā axêx pyræk. Anē.

⁵⁻⁶ Nhūm pre ã Simāw Pêtre Ananīs mā kapêr anē nhūm kuma nē pykap tēm nē htyk kurê kumrêx. Hāmri nhūm mē àptàr nywjaja hwÿr tē nē kupêxê ho hkupu nē kumÿ nē ma o tē nē haxà. Hāmri nhūm mē kot ã kot amnhĩ nhĩpêx anhÿr ã harēnh mar xwÿnhjaja tee ri harēnh ma nē kām ma htÿx nē.

⁷ Tã nhūm ra hã ahtūm nē. Ra hã 3 ore nē hapêx nhūm Ananīs prō Sapireja htÿx hamakêtkati nē mē hwÿr tē nē axà. Kormã mjên htyk ã harēnh mar kêt nē hamakêtkati nē hkĩnh nē mē hwÿr tē nē axà. ⁸ Hāmri nhūm Simāw Pêtre omu nē hêx rom hkukja nē kām:

—Pa? E kwa inhmã mēmoj jarē. Tanhmã na prem war anhō pykaja pānhã war amã amnhĩrer to? Xà ãm hāmri na amjên mē inhmã harē nà? Anē.

Hāmri nhūm kuma nē mjên pyrà nē kām ho hêx nē kām:

—ÿÿ. ãm hāmri kot amã harēnh kênã. Anē.

⁹ Hāmri nhūm Simāw Pêtre tee ri kuma nē kām:

—Tk. Hêxta waa nē. Kwa mon ka war ajamē war akàxpore ho te Tirtūm mā axêx pyræk? Mãn ka wa ajamaxpêr o: “Koja Tirtūm ja hã wa ixpumu nē ãm hã wa ixpumu nē tanhmã hã wa ixto hkêt nē.” Anhÿr o mãn ka wa ajamaxpêr nà? Nom na ka wa ãm kām axêx kaprÿ. Onēj ra mē kot amjên jaxàr xwÿnhjaja akupÿn hpôx o mra. Koja mē anhĩpêx o te hipêx pyrà nē määnēn ato tē nē ajaxà ka rĩ amnhĩ pumu.

¹⁰ Anē nhūm kuma nē mjên pyrà nē pykap tēm nē htyk kurê kumrêx. Hāmri nhūm mē kot mjên jaxàr xwÿnhjaja mra nē mē hwÿr agjê nē omu nhūm ra htyk mex nē nō nhūm mē kumÿ nē ma o tē nē mjên nhĩhkô hã haxà. ¹¹ Hāmri nhūm mē piitã wa harēnh ma nē kām ma htÿx nē. Mē kot Jejus kôt amnhĩ xunhwÿr xwÿnhjê mē amarĩ ri mē pa xwÿnhjaja nhūm mē tee ri wa hkukamã hamaxpêr o kām ma htÿx kumrêx.

Mē kot aa mēmoj pumunh kêt kwÿ ho anhÿr ã mē harēnh

Makre 16.17-20; Atre 19.11-12

¹²⁻¹⁴ Na pre hte Jejus kôt mē kot amnhĩ xunhwÿr xwÿnhjaja xatã Tirtūm mā amnhĩ jarēnh xà hã ixkre hwÿr akuprō. Mē kot ixkre nhĩkjê mā: “Pahi Sarumāw nhō” anhÿr xwÿnh jarēnhja wÿr nhūm pre htem akuprō. Nhūm mē piitã kām mē hkĩnh nē mē ohtō nē mē hkôt akuprō nē mē uræk nē Jejus kôt amnhĩ xunhwÿ. Mēnijaja nē mēmyjaja. No nhūm mē hkwÿja Ananīs mē Sapire wa kot amnhĩ nhĩpêxja mā hamaxpêr nē kām mē hkôt mrar pyma nē. Kām mē hkĩnh tã kām mē hkôt mrar pyma nē.

Nhūm pre hte Jejus nhÿ hã mē ahkre ho mē pa xwÿnhjaja aa mē kot mēmoj pumunh kêt kwÿ ho anhÿr o ri mē piitã mē hkôt pa. ¹⁵ Jakamã nhūm pre htem mē à xwÿnhjê jamÿ nē ma mē hwÿr mē o mra nē Simāw Pêtre kutêp pry kamã mē haxwÿ nē mē kām:

—E mē jar anhĩkwÿ. Kê Simāw Pêtre ja kôt mē ajānh tē nē mē akupênh o akupÿm mē ato mex rÿ nhūm hkarō pix mē atã harir ka mē akupÿm amex japêr.

Anhÿr o mē kām kapêr hāmri nhūm mē kupĩp kām kutêp hikwÿ. ¹⁶ Nē Jerujarē pu hã krĩ hkwÿ kamã. Mē à xwÿnhjaja nē mēkarōmnuti kot tanhmã mē ho xwÿnhjaja nhūm pre htem mē hamÿ nē ma mē ĩhkrep mē o mra nhūm mē piitã akupÿm mex pa.

Mē kot Jejus kwÿjê jagjênh ã mē harēnh

Rukre 21.12-15; Juāw 15.26-27; Atre 4.1-22

¹⁷ Tã nhūm mē ò patre maati mē hkràmnhwÿ Satusew nhō xwÿnhjaja tee ri

akupÿm mẽ mex ã mẽ harënh ma nẽ axpën mã:

—Tk. Kwa na mẽ ra ohtô nẽ Jejus gryk ã mẽ pahte mẽ ahkre kaga nẽ ãm hkôt pix mã ri amnhĩ nhĩpêx o pa. Anẽ.

Hãmri nẽ Jejus nhỹ hã mẽ ahkre maati xwÿnhjê kamã gryk nẽ ra tanhmã mẽ ho kaxyw. ¹⁸ Hãmri mẽ unê nẽ mẽ hagjê nhũm mẽ hagjênh xà kamã hkrĩ hpa.

¹⁹ Tã nhũm kamãt nhũm Tĩrtũm kapër o mẽ wrÿk xwÿnhja ma mẽ hagjênh xà hwÿr mẽ hwÿr wrÿ nẽ mẽ hwÿr axà nẽ mẽ kãm hakwakre kahê xà mẽ nẽ mẽ kator pa. Hãmri nẽ mẽ kãm:

²⁰ —E mẽ ma akupÿm Tĩrtũm mã amnhĩ jarënh xà hã ixkre hwÿr mra nẽ axte mẽ kãm awjarë. Tanhmã mẽ kot amnhĩ nhĩpêx to nẽ Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anẽ.

²¹ Hãmri nhũm mẽ kuma nẽ ma akupÿm hwÿr hapêx kurê kumrêx. Nhũm myt kator o mör mẽ nhũm mẽ hwÿr agjê nẽ mẽ kãm Tĩrtũm kapër jarënh o kuhê.

Tã nhũm mẽõ patre maati mẽ hkôt ri mẽ pa xwÿnhjaja amnhĩ wÿr mẽ ãptâr tũm xwÿnhjê hwÿ nhũm mẽ piitã axpën wÿr pikuprõnh pa. Hãmri nẽ htÿx arĩ Jejus kwÿjaja mẽ hagjênh xà kamã mẽ hkrĩ hã mẽ hkamnhĩx nẽ amnhĩ wÿr mẽ hã karõ.

²² Nhũm pōristijaja ma kot mẽ haprōr kaxyw mẽ hagjênh xà hã ixkre hwÿr mra nẽ tee ri kamã mẽ hapêr nhũm mẽ kamã amrakati. Hãmri nhũm mẽ akupÿm mẽ pikuprõnh xwÿnhjê hwÿr hprõt nẽ mẽ kãm:

²³ —Nà na pōristi hkwÿjaja arĩ hakwakrem ixkre jamār mex nhũm hakwakre arĩ kahê htÿx nẽ xa. Tã pa mẽ hwÿr agjê nẽ tee ri hkre kamã mẽ hapêr nhũm mẽ kamã amrakati kumrêx. Anẽ.

²⁴ Hãmri nhũm mẽ kuma nẽ tee ri hamaxpër. ²⁵ Rôm nhũm ja mẽ hwÿr tẽn axàn mẽ kãm:

—Kwa jãã mẽ ate mẽ hagjênh xwÿnhjaja na mẽ axte Tĩrtũm mã amnhĩ jarënh xà hã ixkre kamã mẽ ahkre ho kuhê pa ham mẽ omu nẽ mẽ kurũm tẽ. Anẽ.

²⁶ Hãmri nhũm patre nhõ pōristi krãhtũmja kuma nẽ mẽ hwÿr pōristi hkwÿ rẽ nhũm mẽ ma mẽ hwÿr mra nẽ mẽ hwÿr agjê nẽ kê axte mẽ unê nẽ akupÿm mẽ o mra. Nom tanhmã mẽ ho hkêt nẽ. Mẽ kot

hkôt ri mẽ pikamënh xwÿnhjê pymaj mẽ ho mex nẽ mẽ o mō. Nẽ mẽ hã axpën mã:

—Nà kot puj mẽ tanhmã mẽ ho nhũm mẽ ja hã mẽ pahpumu nẽ kën o mẽ pahkapê nẽ tanhmã amnhĩ to nẽ hã mẽ panhĩmex. Anẽ.

²⁷ Hãmri nẽ mẽ ho mex nẽ akupÿm mẽ o mōn mẽ hwÿr mẽ ho agjê nẽ mẽ pikuprõnh xwÿnhjê kutã mẽ hkrĩ. Hãmri nhũm mẽõ patre maatija mẽ kãm:

²⁸ —Kwa ra mẽ ixte Jejus kapër jarënh nẽ mẽ akurê htã ka xep mẽ ãm mẽ inhma nẽ arĩ mẽ kãm harënh o ri apa. Nẽ jar Jerujarë kamã mẽ piitã mẽ kãm harë. Nẽ mẽ pajaja mẽ ixte Jejus pĩr ã ka mẽ ri mẽ kãm mẽ ijarënh o apa. Anẽ.

²⁹ Hãmri nhũm Simãw Pêtre mẽ kuma nẽ mẽ amnhĩ tã mẽ kãm kapër nẽ mẽ kãm:

—Tÿ kot kaj mẽ Tĩrtũm kapër kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tĩrtũm kapër pix ma nẽ hkôt ri amnhĩ nhĩpêx. ³⁰ Amnepêm mẽ panhĩgêjtaja na prem Tĩrtũm kôt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus ã amÿnê nhũm mẽ pĩ kahpa hã kunhó nẽ kupĩ. Nom nhũm Tĩrtũm akupÿm ho htĩr ³¹ nẽ kêp mẽ panhõ Pahihti hã harë. Nẽ kêp mẽ pahkaprĩ xwÿnh mex ã harë. Hãmri nẽ ra amnhĩ ri ÿr nhũm ìhkô hã mẽmoj piitã ho amnhĩptâr o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akôt amnhĩ xunhwÿ pa ja hã mẽ omu nẽ amnhĩ katut kôt mẽ kot amnhĩ tomnuj rënh pa nẽ mẽ ho ixkra.” Anẽ. ³² Tã mẽ pajaja mẽ ixte Jejus htyk nẽ akupÿm htĩr ã omunh mex jakamã na pa hte Tĩrtũm Karõ nhỹ hã ã mẽ amã harënh anẽ. Karõja na pre Tĩrtũm mẽ ixte hkôt amnhĩ nhĩpêx xwÿnhjê hwÿr kurê nhũm mẽ ixwÿr wrÿ nẽ mẽ ixkarõ mã agjê. Tã ÿ hã na pa htem ri ã harënh anhÿr o ri mẽ akôt ixpa. Anẽ.

³³ Hãmri nhũm mẽ kuma nẽ mẽ kamã gryk tÿx nẽ. Nẽ mẽ kãm mẽ himex prãm nẽ mẽ kãm mẽ hã amÿnê. ³⁴ Hãmri nhũm Kamariewtija tee ri ja hã mẽ omu hãmri nẽ kãnhmã xa nẽ Jejus nhỹ hã mẽ ahkre xwÿnh maatiijê xyr pẽ hkwÿjê mã kapër. Parijew nhõ xwÿnh na pre. Nẽ kêp Tĩrtũm kapër ã kaga htũm o mẽ ahkre ho pa xwÿnhjê hõ na pre. Nhũm mẽ piitã kãm hkĩnh nẽ.

Jakamã nhũm kànhmã xa nê pôristi mã anê nhũm mẽ amnhĩ nê Jejus nhỹ hã mẽ ahkre ho mẽ pa xwýnhjê kator nhũm mẽ kapôt ã kuhê. ³⁵ Hãmri nhũm Kamariewtija mẽ nê tanhmã mẽ kãm kapêr to nê mẽ kãm:

—E ixkwýjaja. Kwa kêr pu mẽ tanhmã mẽ ho hkukamã pajamxpêr mex nê. ³⁶ Mãn arĩ mẽ ate finat Tetastija jarênh ã anohtýx nê ho apa japêr. Mytwrý hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkôt ri mẽ pa xwýnhjaja ohtô nê. Mẽ kêp 400. Tã nhũm prem mẽ kêp Tetasti pĩ nhũm hkôt ri mẽ pa xwýnhjaja xxpên pê angrã nê ma hapêx.

³⁷ —Tã nhũm mẽ kot mẽ piitã mẽ ho kôta xà hã arĩgroja ã nhũm Garirej nhõ xwýnh pê finat Jut haxwýja hkôt mẽ pa xwýnhjaja ohtô nê. Tã nhũm mẽ mãânên mẽ kêp kupĩ nhũm hkôt ri mẽ pa xwýnhjaja haxwýja xxpên pê angrã nê ma hapêx.

³⁸ —Jakamã kwa pu mẽ tanhmã jajê ho hkêt nê. Pu mẽ ãm mẽ omu. Koja mẽ amnhĩ krã hkôt ã ujarênh anhýr o pa japêr hã koja Tetasti mẽ Jut wa hkôt pa xwýnhjê pyrã nê tokyx xxpên pê angrã nhũm Jejus jarênh o paja hapêx o hapêx. ³⁹ Nom koja mẽ ãm hãmri Tirtũm nhỹ hã ã mẽ ahkre ho pa anhýr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nê te mẽ pahte Tirtũm kutã amnhĩ xunhwýr pyrãk. Anê.

Nhũm pre ã Kamariewti Jejus nhỹ hã mẽ ahkre ho mẽ pa xwýnh maatijê xyr pê hkwýjê mã kapêr anê. ⁴⁰ Hãmri nhũm mẽ kuma nê kãm:

—Tý nã ãm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupýn mẽ hã karõ nhũm mẽ akupýn mẽ hwýr agjê. Hãmri nhũm mẽ pôristi mã mẽ hã amýnê nhũm mẽ htak. Hãmri nhũm mẽ àptàr tũmrejaja mẽ kãm:

—E mẽ mãmrĩ ma akupým mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anê.

⁴¹ Hãmri nhũm mẽ kãm ure nhũm mẽ ma mra. Kĩnh nê ma mra nê xxpên mã:

—Nã kwãr mẽ Jejus ã mẽ pahtak nê tanhmã hã mẽ pahto. Kwãr mẽ mãmrĩ ã hã mẽ pahto anê. Kot pu mẽ hkaga hkêt nê. Ra Tirtũm kot ja hã mẽ pahpumunh mex kênã.

Anhýr o xxpên mã kapêr o xxpên jamxpêr o hihtýx mex o pa.

⁴² Hãmri nê arĩ apkati mẽ hkwýjê mã Jejus kapêr jarênh o mẽ ahkre ho mẽ hkôt pa. Tirtũm mã amnhĩ jarênh xà hã ixkre kamã nê nhãm mẽ òrkwý kamã ri mẽ ahkre ho pa. Tirtũm kot mẽ pakaxyw Jejus xãm ã mẽ kãm harênh o ri mẽ hkôt pa.

6

Mẽ kêp mẽ mjên htyk xwýnhjê jarênh Wam Ximotre 3.8-9

¹ Tã nhũm mẽ kot Jejus kôt amnhĩ xunhwýr xwýnhjaja ohtô rax kumrêx o mō. Mẽ piitã kêp Ijaew no nhũm mẽ hkwýjaja axtem Gres kapêr o kapêr nhũm mẽ hkwýjaja Ijaew kapêr o kapêr. Na pre hte Ijaew kapêr o kapêr xwýnhjaja apkati mẽ mẽ kêp mẽ mjên htyk xwýnhjê mã mẽõ ho pa. No ãm mẽ piitã mẽ hipêx o xxpên pyrãk kêt jakamã nhũm Gres kapêr o mẽ kapêr xwýnhjaja tee ri ã mẽ kot amnhĩ nhĩpêx anhýr ã mẽ omu nê mẽ kamã gryk nê. Hãmri nê mẽ kãm:

—Kwa na ka htem amnhĩ kamã mẽ kêp mẽ mjên htyk xwýnhjê mã mẽõ ho rũnh nê agõ. No mẽ ixkamã jajê mã na ka htem ãm ho hkryre nê agõ. Kwa mẽ ri ã mẽ hipêx anhýr kêt nê. Mẽ hipêx o xxpên pyrãk nã. Anê.

² Hãmri nhũm Jejus nhỹ hã mẽ ahkre xwýnh maatijaja mẽ hã mẽ kapêr ma hãmri nê mẽ piitã mẽ ho akuprõ nê mẽ kãm:

—Kwa kêr ka mẽ ja hã xxpên mã axàkjêr kêt nê. E pu mẽ kot mẽ kêp mẽ mjên htyk xwýnhjê mã ò ho pa kaxyw mẽ akwýjê rê. No mẽ pajaja kot paj ja ho anhýr o ri ixpa hkêt nê. Kot pa mẽ anê nê Jejus kapêr o ri mẽ ajahkre hkêt nê nhũm ja mex kêt nê. Jakamã mẽ atõ kot kaj mẽ akatàt kôt mẽ kãm mẽ ò ho apa? ³ E mẽ amnhĩ kamã mẽ ho 7 nê mẽ arê pu mẽ kêp mẽ mjên tyk xwýnhjê mã ò ho pa kaxyw mẽ unhwý. Tãm mẽ hamxpêr xwýnhjaja.

Nê mẽ ate xxpên mã mẽ mex ã mẽ harênh xwýnhjaja.

Nê Tirtũm Karõ nhỹ hã mẽ kot amnhĩ nhĩpêx o mẽ pa xwýnhjaja.

Ã mẽ kot amnhĩ nhĩpêx anhýr xwýnhjaja ka mẽ ho 7 nê arê pu mẽ kaxyw mẽ unhwý.

⁴ Nom mẽ pajaja kot paj mẽ akôt arĩ mẽ amã Tĩrtũm kapër jarēnh o ri mẽ ajahkre pix tãnopxar o ri ixpa. Anẽ.

⁵ Hãmri nhũm mẽ kuma nhũm ja mẽ kãm mex nẽ. Nhũm mẽ ma mra nẽ axpẽn mã hkwyjê nhĩxi jarẽ hãmri nẽ mẽ ho 7 nẽ mẽ kurê. ã mẽ hixi kot anhỹr.

Estewãw. Estewãwja na pre Jejus kôt amnhĩ nhĩpêx mex o pa. Tĩrtũm Karõ kaxwỹnh mã àr nẽ ho amnhĩptar jakamã nhũm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nĩkanõ

nẽ Timã

nẽ Parmēnti

nẽ Nĩkoraw. Nĩkorawja krĩ pẽ ãxiok nhõ xwỹnh na pre. Kêp Ijaew kêt tã kãm Tĩrtũm kĩnh o pa. Tã ra mããnēn Kra Jejus kôt amnhĩ xãm.

⁶ Jakamã nhũm mẽ mẽ kêp 7tajê rê nẽ Jejus nhỹ hã mẽ ahkre xwỹnh maatijê hwỹr mẽ o mra. Hãmri nhũm mẽ omu nẽ mẽ àpēnh ã mẽ unhwỹr kaxyw mẽ hã ãhkra jaxwỹ nẽ mẽ ho Tĩrtũm wỳ. Hãmri nhũm mẽ kêp mẽ mjên htyk xwỹnhjê mã mẽ õ ho pa nẽ mẽ piitã mẽ hipêx o axpẽn pyràk.

⁷ Tã nhũm mẽ ra ohtõ rax nẽ Tĩrtũm kapër ma nẽ hkôt amnhĩ nhĩpêx o pa. Jakamã nhũm Jerujarẽ kamã mẽ kot Jejus kôt amnhĩ xunhwỹr xwỹnhjaja ra ohtõ rax kumrêx. Nẽ mẽ õ patre hkwy haxwỹja ohtõ nẽ mẽ uràk nẽ amnhĩ kaxyw hkôt hamaxpēr nẽ hkôt amnhĩ xunhwỹ.

Mẽ kot Estewãw pynēnh ã mẽ harēnh

Rukre 21.14-15

⁸ Tã nhũm Estewãwja. Kot mẽ kêp mẽ mjên htyk xwỹnhjê mã mẽ õ ho pa xwỹnhjê hõja. Tĩrtũm kot kutã nojarêt mex jakamã na pre hte ã hã àhpumunh tỳx o aa mẽmoj pumunh kêt kwỳ ho anhỹr o ri mẽ hkôt pa.

⁹ Hãmri nhũm Ijaew kwỳjaja tee ri ja hã omu nhũm ja mẽ kêp omnuj tỳx nẽ nhũm mẽ hã kãm akir. Uràk nẽ mẽ kêp Ijaew nẽ Jerujarẽ kamã ri mẽ hkôt pa htã ahpỹnhã mẽ õ pyka. Mẽ kot kãm “Ripetat” xwỹnh kwỳ na pre mẽ. Nẽ ahpỹnhã mẽ õ krĩ.

Mẽ hkwyjaja kêp Sirēn nhõ xwỹnh.

Nẽ mẽ hkwyjaja kêp Aresãn nhõ xwỹnh.

Nẽ mẽ hkwyjaja kêp Siris nhõ xwỹnh.

Nẽ mẽ hkwyjaja kêp As nhõ xwỹnh.

Ahpỹnhã mẽõ pika nẽ mẽ õ krĩ htã na prem Jerujarẽ kamã ri axpẽn kôt pa ho pa. Tã Estewãw kot ã amnhĩ nhĩpêx anhỹr o pa hã omu nhũm ja mẽ kêp omnuj tỳx nẽ nhũm mẽ hã kãm akir. ¹⁰ No nhũm Tĩrtũm Karõ nhỹ hã hamaxpēr tỳx o mẽ kãm kapër nhũm mẽ kuma nẽ tee ri kutã tanhmã kãm nẽ hprãm kaprỳ. ¹¹ Hãmri nẽ ma mra nẽ tanhmã ho hêx to kaxyw amnhĩ kwỳjê rê nẽ mẽ kãm hã amỹnê nẽ mẽ kãm:

—E kêr ka mẽ krĩ nhõ xwỹnhjê mã Estewãw o axêx nẽ tanhmã mẽ kãm ho akapër punuj to ho ri mẽ hkôt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anẽ pa mẽ hpãnhã mẽ amã amnhĩre. Anẽ.

Hãmri nhũm mẽ kuma nẽ ma mra nẽ hapõj nẽ ma krĩ nhõ xwỹnhjê mã tanhmã ho hêx to ho ri mẽ hkôt pa nẽ mẽ kãm:

—E mẽ amnẽ akuprõ nẽ mẽ inhma. Kwa kêr ka mẽ Estewãwti kapër mar kêt nẽ. Na hte finat Mojes mẽ Tĩrtũm wa ho kapër punuj pix o ri pa. Pa mẽ ra kot wa ho kapër punuj ã kuma. Anẽ.

¹² Hãmri nhũm mẽ kuma. Krĩ nhõ xwỹnhjê mẽ nẽ mẽ àptar tũmrejê mẽ Tĩrtũm kapër tũm o mẽ ahkre ho mẽ pa xwỹnhjaja nhũm mẽ tee ri mẽ kot Estewãw o hêxja ma nẽ kamã gryk nẽ. Hãmri nẽ ma hwỹr mra nẽ unẽ nẽ ma mẽ õ juisti hwỹr o tẽ. ¹³ Hãmri nhũm mẽ kãm ho hêx xwỹnhjaja mẽ hkôt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhỹ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarēnh xà hã ixkreja nhũm tanhmã ho hêx to pa mẽ kuma. ¹⁴ Na hte mẽ kãm: “Koja nhỹrmã Jejus pẽ Najare nhõ xwỹnh Tĩrtũm mã amnhĩ jarēnh xà hã ixkreja grành pa kãm ga.” Anhỹr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nẽ mẽ pahkurẽ pa prem kuma. Anẽ.

¹⁵ Nhũm prem ã mẽõ juisti mã Estewãw o hêx anẽ. Hãmri nhũm mẽ kuma nẽ Estewãw wỹr rĩt nẽ hkuk pumu nhũm te kot Tĩrtũm kapër o mẽ wrỳk xwỹnhjê kuk nhĩrã rax pyrà nẽ xa nhũm mẽ tee ri omu nẽ kamã no pyma nẽ.

7

Estewāw kot juistijê mā ujarēnh

¹ Hāmri nhūm mē ō patre maatija Estewāw mā kapēr nē kām:

—E mē inhmā amnhī jarē. Xà ām hāmri na mē ri ā ajarēnh anē nā? Anē.

² Hāmri nhūm kuma nē mē piitā mē kām kapēr. Mē kām kapēr ryy nē mē kām:

—Tōe kot paj mē amā mē panhīgēt finat Apraāw tanhmā harēnh to ka mē inhma. Amnepēm na pre Tirtūm maatija Apraāw wūr kato. Kormā pyka pē Mēsopotām kamā pa ri. Kormā kot ma krī pē Arā hwūr mōr kêt ri nhūm hwūr kato nē kām: ³ “E kêt ka mē anhō krī pē akato nē akwýjê re nē ma mō. Kot paj ma nhýhým hpānhā pyka hō hwūr mē ato mō.” Anē.

⁴ —Hāmri nhūm kuma nē amnhī to akuprō nē ma mō. Ō pyka pē Katej pē kato nē ma krī pē Arā hwūr mō nē hpānhā kamā pa. Tā nhūm hipêêxà Terahti kêt ty nhūm Tirtūm amnē jar mē panhō pyka hwūr kumē. Jar mē papapxà hwūr kumē.

⁵ —Nom nhūm kormā kām pykaja nhōr kêt nē. Kormā kām hkwý ho grire nē ōr kêt nē. Na pre ām kām:

E kot paj nhýrmā amā pykaja gō. Amā nē akanrêhā akra nē atàmnhwýjê mā kugō ka mē kamā ri apa ho apa.

Anhýr o kām mē panhō pika pē Kanaāja jarē. Apraāw kormā hkra hkêt ri nhūm ā kām kapēr anē. ⁶ Hāmri nē kām:

Koja akanrêhā atàmnhwýjaja nhýrmā ma nhýhým pyka hō hwūr pa nē hpānhā kamā pa. Mē ō pyka kamā pa hkêt tā nhām pyka hō kamā pa hāmri nē pika nhō xwýnhjê mā àpênh rūnh o pa nhūm pyka nhō xwýnhjaja mē hipêx kati rūnh o pa. Nē mē àpênh ā mē kām amnhīrer kêt nē. Ām mē homnuj o pa hā amgrà xohtō rax kumrêx. Nhūm mē hā amgrà pē 400.

⁷ Nom kot paj mē hā mē homnuj tỳx nē. Akanrêhā atàmnhwýjê hā mē homnuj tỳx nē nhūm mē rī kormā mē kurūm kato nē man akupýn pa nē jar pōj. Hāmri nē jar inhmā inhmex o inhmex ā ijarēnh rāhā ho pa. Anē.

⁸ Hāmri nē kām:

E pu axpēn ma. Koja ka nē akanrêhā akra nē atàmnhwýjaja ka mē ixkôt ri amnhī nhīpêx o apa hā kot paj mē ato ixkra. Tā koja ja amā mex japêr hā kêt ka mē amnhī my kwryt kà hkwý jakà. Nē koja mē akrajaja hapôj nē my ka mē mā mē ho anē nē mē kêt mēmy kwryt kà hkwý jakà. Mē piitā mē kot mē apê ixkra hā mē apumunh kaxyw kot kaj mē ā amnhī nhīpêx anē.

Anhýr o Apraāw mā kapēr nhūm kuma nē mar xà hkôt hkra Ijak my kwryt kà hkwý krāhta. Kormā hkaràre ri. Kormā hā arīgro pē 8 pix ri nhūm kêt hkwý krāhta.

—Tā nhūm Ijak hprêk nē hprō nē hkra. Hāmri nē mā hkra Jako ho anē nē. Nhūm Jako hprêk nē mā hkra pē 12jê ho anē nē mē piitā mēmy kwryt kà hkwý jakà pa. Ā na pre mē pahpàr kraxjaja amnhī nhīpêx anhýr o pa.

⁹ —Jako hkrajê hō na pre kêt Juje. Nhūm Juje htōjaja hipêêxà hkôt kamā gryk nē axtem nē mē urojê mā ho wēnê nhūm mē kêt haprō nē ma pyka pē Ejit wūr o mō. Amarī Ejit nhō xwýnhjê mā àpênh o pa kaxyw. Tā no nhūm Tirtūm arī tãnopxar rāhā ho hkôt pa. ¹⁰ Hāmri nē Ejit kām mē kot homnuj xwýnhjê nhīhkra rūm hkapa nē tanhmā hkrā hto nhūm àhpumunh tỳx nē hamaxpêr mex nē. Jakamā nhūm Ejit nhō xwýnhjê nhō pahi Parahtija omu nē kām hkīnh nē. Kot tām amnhī nhīpêx nē àhpumunh tỳx kôt omu nē kām hkīnh nē. Hāmri nē amnhī ri kumē nhūm ĩhkô hā àpênh o pa. Kām ōrkwý pumu nē Ejit nhō xwýnhjê ho amnhīptàr o pa.

¹¹ —Rôm nhūm mē hpur kām mēmoj nhīgrôt mex kêt nē nhūm mē kêt mē apkur xà hā mē ōja ra ri mē kêt kryre. Ejit kamā nē jar Kanaā kamā nhūm mē apkur xà hā mē ōja mē kêt hapêx par o mō. Nhūm mē piitā prām xāj ra hiire nē kām prām tỳx o pa nhūm mē panhīgêjtaja hāmri prām xāj tee ri amnhī xàpkur xà hā mēmoj japêr.

¹² —Tā nhūm Jakoja Ejit kām arī mē apkur xà hā mē ō rax ā harēnh ma nē ma hwūr hkra hkwýjê rē. Mē panhīgêjtaja nhūm ma mē hwūr mē kurē nhūm mē ma mē hwūr mra. Hāmri nē mē hwūr pōj nē mē kêt

mëmo hy hkwý japrô nê ma akupým o mra. Wam më môrta ã më kêp mëmoj japrô nê ma akupým o mra.

¹³ —Tã nhũm më kêp mëmo hy japrô xwýnhja hapêx nhũm më axte akupým më hwýr mra. Hãmri nhũm më htô Juje më kãm amnhĩ to amnhĩrit nê kêp më htô hã më kãm amnhĩ jarê. Më kot ra htyk ã hkamnhix tã nhũm më kãm amnhĩ jarê. Hãmri nhũm Parahti më kêp Juje htô hã më harênh ma.

¹⁴ —Tã nhũm Juje amnhĩ wýr hipêêxã Jako më htãmnhwýjaja më hã karô nhũm më piitã ma Ejit wýr hapêx. Më kêp 75 nê ma Ejit kamã Juje hwýr hapêx hãmri nê kamã pa ho pa.

¹⁵ —Ã kot anhýr jakamã nhũm Jakoja ma Ejit wýr mô nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa. ¹⁶ Hãmri nhũm më hkanrêhã më hkrajaja më hamý nê ma akupým Kanaã hwýr krĩ pê Sikê hwýr më o pa nê kamã më hagjê. Na pre më hkukamã finat Apraãw kot Amôr krajê pê kênkre japrô nê kamã hprô jaxã. Jakamã nhũm prem mýr pê ma hwýr më o pa nê kamã më hagjê hãmri nê ma akupým Ejit wýr pa.

¹⁷ —Tã gaa nê rĩ ohtô rax kumrêx o mô. Më panhígêjtaja ohtô rax kumrêx o mô. Hãmri nhũm Tirtũm kot Apraãw mã më õ pyka jarênh xwýnhja nhũm kot më kãm õr kaxyw. ¹⁸ No nhũm Ejit nhõ pahi kot Juje ho mex xwýnhta na pre ra ty nhũm axtem hpãnhã hõja më ho amnhĩptãr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mýr pê harênh mar kêt nê. ¹⁹ Hãmri nê hkwýjê homnuj o pa. Tanhmã më panhígêjtê nhĩpêx to ho pa. Nê më kãm më hkra my hapôx xwýnhjê hã amýnê. Më hapôx nhũm më kot pikap më rênh nhũm më htyk kaxyw nhũm më kãm më hã amýnê.

²⁰ —Rôm nhũm finat Mojesja kato. Nê mexre. Hãmri nhũm katorxã Ejit nhõ xwýnhjê kot kêp hpĩr pymaj õrkwý kamã ri më kêp ho hpimxur o pa hã mytwrý axkrunëpxi.

²¹ —Tã nhũm ra htýxre nhũm katorxã më hipêêxã wa tee ri hkukamã hamaxpêr

hãmri nê më kot wa kêp hpĩr pymaj kumý nê ma o tẽ nê kaxyw à nhĩpêx nê nhýri gô nhĩpôk ri pô kamã ho amũxu. Tã nhũm Parahti hkra nija ra gôx mã wýr mã tẽ nê ra omu hãmri nê amnhĩm kumý nê ma o tẽ nê ho hkra. ²² Jakamã nhũm Mojes Ejit nhõ xwýnhjê kamã hprêk. Hãmri nê më àhpumunh xã hã kagã pumunh pa. Nê hihtýx nê më kãm kapêr kãm hihtýx mex o pa.

²³ —Tã hãmri ra hã amgrã pê 40 nê hapêx nhũm Mojes hamaxpêr nê ra kãm amnhĩ kwý pê Ijaewjê pumunh prãm nê ma më hwýr tẽ. ²⁴⁻²⁵ Hãmri nê htêm kôt ja wa omu. Nhũm Ejit nhõ xwýnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwýr tẽ nê ixkwý mýj ã Ejit nhõ xwýnhta pĩ kê ixkwýjaja hã ixpumu nê Tirtũm kot më hwýr inhmênh ã ixpumu. Ixte Ejit nhõ xwýnhjê nê më kator kaxyw më ja hã ixpumunh kurê kumrêx.”

—Anhýr o hamaxpêr hãmri nê wa hwýr tẽ nê amnhĩõja nê Ejit nhõ xwýnh pĩ. Tã no nhũm hkwýjaja kot hpĩr ã harênh mar tã tanhmã amnhĩ kaxyw kãm hamaxpêr to hkêt nê. ²⁶ Nhũm apkati nhũm mêhõja war axkrut nê axte pijapu ho wa xa. Hamê wa kêp Ijaew. Jakamã nhũm Mojes akupým më hwýr tẽ nê tee ri axpên tã wa omu nhũm ja kêp omnuj nê. Hãmri nhũm wa hwýr tẽ nê axpên nê wa kãm kapêr nê wa kãm: “Pa? Kwa war ajamê war apê Ijaew kênã na ka wa ri axtem nê ã axpên nhĩpêx anê.” Anê. ²⁷ Hãmri nhũm kot amnhĩ kaxyw hkryx xwýnhja kuma nê nhãm amnhĩ nê hkujate nê kãm: “Tk. Kwa xã apê më inhõ pahi hã na ka ã wa inhmã akapêr anê? Nã apê më inhõ pahi hkêt kênã. ²⁸ Kot kaj inhĩpêx o te ate Ejit nhõ xwýnhta nhĩpêx pyrã nê wa ixtõ hpĩr kêt nê.” Anê.

²⁹ —Hãmri nhũm tee ri kuma nê ra kãm ma nê Ejit rùm kator kurê kumrêx nê ma pyka pê Mijiã hwýr mô nê kamã hpãnhã pa. Kamã hprô nê hkra. Nhũm hkra myja wa hamëxkrut.

³⁰ —Tã nhũm Mijiã kamã pa hã axte hã amgrã pê 40. Hãmri nê mëmo arĩgro hã kapôt ã krã hakýx pê Sinai kape hã ri pa nhũm Tirtũm kãm kapêr. Nom nhũm Mojes omunh kêt nê. ãm utĩ kaók kamã kuwy

hpòk pix pumu. ³¹ Amnhĩ jaer pè ã kot amnhĩ nhĩpêx anhÿr ã omu hãmri nẽ amnhĩ tã hprĩ hã omunh kaxyw hwÿr tẽ nhũm Tĩrtũm kãm:

³² Pa Mojes? E ixpê Tĩrtũm na pa. Ixpê akukamã anhĩgêt Apraãw nhõ Tĩrtũm na pa. Nẽ ixpê Apraãw kra Ijak mẽ htãmnhwÿ Jako wa õ Tĩrtũm na pa. Anẽ.

Hãmri nhũm tee ri kuma nẽ kãm ma xaj htertet tÿx nẽ. Hãmri nẽ umaj axte pĩ hpòkja wÿr rĩt kêt nẽ. ãm nhãm hkrã nẽ rĩt o xa.

³³ Hãmri nhũm Tĩrtũm kãm:

E kwa ixpê Tĩrtũm maati hã ixtã apijaam ã aparkã kapa nẽ apar kênh nẽ xa.

³⁴ Na pa ra ixkra Ijaewjaja Ejit kãm mẽ omu. Na ra Ejit nhõ xwÿnhjaja ixpê mẽ homnuj tÿx kumrêx rãhã ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nẽ inhmã mẽ hkaprĩ nẽ. Jakamã kot paj Ejit nhõ xwÿnhjê nhĩhkra rũm mẽ kator pa. E ka kot paj mẽ hwÿr amẽ ka ma akupÿm mẽ hwÿr mõ nẽ mẽ kurũm mẽ kator.

Anhÿr o kãm mẽ kaxyw karõ. ³⁵ Ra Ijaew kot Mojes hkaga tã nhũm mẽ kaxyw ãm nẽ ma akupÿm kot mẽ hwÿr mênh kaxyw. Na prem ra omu nẽ hkaga. Te mẽ ate Jejus kagaja pyrã nẽ hkaga. Jakamã nhũm pijapu xwÿnhhta tee ri amnhĩ tã omu nẽ kamã gryk nẽ amnhĩ nẽ kãm kapêr nẽ kãm: “Tk. Kwa xà apê mẽ inhõ pahi hã na ka ã wa inhmã akapêr anẽ? Nã apê mẽ inhõ pahi kêt.” Anhÿr tã nhũm Tĩrtũm mẽ kaxyw tãm xãm. Kot mẽ ho amnhĩptar nẽ Ejit nhõ xwÿnhjê rũm mẽ kator kaxyw. Ja kaxyw na pre pĩ hpòk kamã kãm kapêr nẽ mẽ kaxyw ãm.

³⁶ —Jakamã nhũm Mojes ma akupÿm Ejit wÿr mõ nẽ mẽ kurũm hkwÿjê kator nẽ ma mẽ o pa. Na pre mẽ ho mex nẽ Tĩrtũm nhÿ hã mẽ kãm aa mẽ kot mẽmoj pumunh kêt kwÿ ho anhÿr o ri mẽ o pa. Ejit kamã nẽ mããnẽn mẽ kot gô xujanãr mã: “Gô kamrêk” anhÿr xwÿnhhta kamã. Nẽ kapôt ã mẽ kãm ã amnhĩ nhĩpêx anhÿr o mẽ o pa. Nẽ kapôt ã ri mẽ o pa ho ra hã amgrã pè 40.

³⁷ —Tã tãm na pre mẽ panhĩgêtjê mã mẽhõ hkukamã mẽ kãm tanhmã harênh to nẽ mẽ kãm harênh o: “Koja Tĩrtũm nhÿrmã

te ra mẽ akaxyw pa ixãm pyrã nẽ inhmÿr pè mẽ panhĩõ xãm. ÿ hã mẽ amã kapêr jarênh o pa kaxyw nhũm nhÿrmã mẽ akaxyw ãm ka mẽ omu.”

—Anhÿr o ã Jejus kukamã harênh anẽ.

³⁸ Na pre Mojes kapôt ã mẽ panhĩgêtjê ho pa nhũm mẽ krã hakÿx pè Sinaija wÿr pa. Mẽ panhĩgêtjaja hãmri hwÿr pa nhũm Tĩrtũm kapêr o mẽ wryk xwÿnhja mẽ kaxyw Mojes mã kapêr nhũm ô ri mẽ kãm awjarẽ nẽ hã kagã. Mẽ kot mar nẽ hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kãm Tĩrtũm kapêr jarênh o pa. Nẽ mẽ pajaxwÿja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagã. ³⁹ Tã no nhũm mẽ panhĩgêtjaja Mojes ma nẽ ãm kuma nẽ hkaga kumrêx nẽ akupÿm Ejit wÿr hkrã. ⁴⁰ Jakamã nhũm Mojes kormã nhÿri mẽ kaxyw Tĩrtũm mã kapêr o ãm rôm nhũm mẽ wakre kamã htõ Arãw wÿr mra nẽ kãm: “Kwa Mojes ra kot tanhmã amnhĩ to kênã. Kot Ejit rũm mẽ pakator nẽ mẽ pahto mõi tã ra nhÿri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupÿm Ejit wÿr mẽ pahto pa.” Anẽ.

⁴¹ —Hãmri nhũm mẽ kuma nẽ mẽ kãm kãx o mõi krare karõ ho sãnti nhĩpêx nẽ mẽ kãm ãm. Hãmri nhũm mẽ axtem nẽ te ho Tĩrtũm nhĩpêx pyrãk o hipêx nẽ kãm ôwênti hkwÿ pa nẽ kãm haxwÿ nẽ hã apku. Hãmri nẽ ã amnhĩ nhĩpêx anhÿr ã amnhĩ pumu nẽ hkĩnh nẽ. ⁴² Hãmri nhũm Tĩrtũm tee ri ja hã mẽ omu nhũm ja kèp omnuj tÿx nẽ nhũm mẽ hkaga hpa. Jakamã nhũm prem amnhĩ krã hkôt ri myyti nẽ mytwÿre nẽ kanhêti karõ nhĩpêx nẽ te mẽ kot Tĩrtũm nhĩpêx pyrãk o hipêx o pa. Hãmri nẽ amnhĩ kaxyw kumã pix mã hamaxpêr o pa hã amgrã xohtõ nẽ. Tã nhũm Tĩrtũm nhÿ hã kapêr jarênh o mẽ pa xwÿnhjaja tanhmã mẽ kãm kapêr to nẽ mẽ hã kagã. Te Tĩrtũm tãm mẽ kãm kapêr pyrãk o mẽ kãm kapêr nẽ hã kagã kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pè 40ta ã. Xà we inhmã na ka prem akrit kwÿ hpar o apa?

⁴³ Nã inhmã hkêt. Na ka prem axtem nẽ ri amnhĩ krã hkôt amnhĩm mẽmo

karō nhîpêx nê hipêx o te mē ate pa inhîpêx pyrāk. Pê kām akrit kwÿ hpar nê ôr o ri apa.

Mē anhō mēmo karō nhîpêxta mē ate amnhîm hā hixi pê Mōrok mēnh xwÿnhja ka pre htem à kamā amnhî kôt ho apa.

Nê amnhîm kanhêti karō nhîpêx nê hā hixi mē nhûm kêp Repā. Ka mē ixkuhpa hā wa kêp mē apām ā harēnh o ri apa.

Tā ā mē ate amnhî nhîpêx anhÿrja mÿrapê kot paj pānhā nhÿhÿm mē arē.

Koja mē akutā amnhî xunhwÿr xwÿnhjaja mē apynê nê ma pyka pê Papirōn rûm hamû mē ato hapêx ka mē amarî mē kām axapēnh rûnh o ri apa kām ga. Anē.

Ā na pre Tirtûm mē panhîgêjtê mā kapêr anē nhûm ÿ hā kapêr jarēnh o pa xwÿnhja mē kām hā kagà.

⁴⁴ —Tā nhûm mē panhîgêjtê kormā kapôt ā ri pa ri amnhî kôt mry kà ho ixkre ho pa. Tirtûm mā kapêr xà hā ixkreja nhûm prem amnhî kôt ri o pa. Mē kot kām “Tirtûm nhōrkwÿ kaàkre” anhÿr xwÿnhja. Tirtûm kot mē kām hā karō xà hkôt nhûm mē hipêx nê amnhî kôt ri o pa. Na pre Tirtûm hprî hā Mojes mā tanhmā kot hipêx to hā karō nhûm mē hkôt hipêx nê amnhî kôt ri o pa.

⁴⁵ —Tā nhûm Mojes ty nhûm hpānhā Jojueja amnhî kôt mē o pa. Ma Tirtûm kot mē kām pyka mex nhōrta wÿr Mojes mÿr pê mē o pa. Hāmri nê hwÿr mē o pōj nhûm Tirtûm mē nê mē kot ra kamā mē pa ho mē pa xwÿnhjê japōj nhûm mē pānhā kamā pa ho pa. Nê amnhî kôt Tirtûm nhōrkwÿ kaàkreta o pa. Rāhā nhûm finat Tawija mē hpānhā mē ho amnhîptà. ⁴⁶ Na pre Tirtûm Tawi kot tanhmā amnhî nhîpêx to ho pa hā omu nê kām hapê nê. Jakamā nhûm Tawi kām kapêr nê kām: “Pa Tirtûm? Kwa xà kot paj amā ixkre mex ô nhîpêx nà? Mē ixpê Ijaewjaja mē ixte kamā amā amex o amex ā ajarēnh o ixkrî kaxyw pa hipêx. Xà kot paj amā hipêx?” Anhÿr tā no nhûm Tirtûm kormā kām ja prām kêt nê. ⁴⁷ Jakamā nhûm Tawi hkra Sarumāwja hipêêxà mÿr pê hpānhā kêp mē ô pahi nê kām hipêx. ⁴⁸ Nom xà na hte Tirtûm maatija

mē pahte kām panhîhkra ho ixkre nhîpêx xwÿnh kamā hkrî? Nà kaxkwa kamā na hkrî xà. Na pre ra Tirtûm nhÿ hā kapêr jarēnh o pa xwÿnhja Tirtûm kot tanhmā mē pajamār to ho pa hā kagà nê hā kagà ho:

⁴⁹ Na pa hte kaxkwa rûm pyka hkôt mē piitā mē hamār mex o ixkrî.

Tā tanhmā kot paj amnhî to nê mē îhkra ho mē kot inhmā ixkre nhîpêxta wÿr axà nê kamā ixpa ho ixpa?

⁵⁰ Nà ixte mēmoj piitā ho ixkator xwÿnh kēnā kot pa kêt ā amnhî nhîpêx anē. Anē.

Nhûm pre ā Tirtûm amnhî tā mē kām kapêr anē nhûm ÿ hā kapêr jarēnh xwÿnhja ô ri mē pamā hā kagà.

⁵¹ —E kwa mē inhma ixkwÿjaja. Mē akrā hihtÿx kumrêx jakamā mē amā Tirtûm kapêr mar prām kêt. Na ka htem mē panhîgêjtê pyrā nê amnhî nê Tirtûm Karō kaga nê kapêr mar kêt nê. ⁵² Na pre hte Tirtûm nhÿ hā kapêr o mē pa xwÿnhjaja mē panhîgêjtê hwÿr mra nê mē kām kapêr jarēnh o ri mē hkôt pa. Tā nhûm mē hkaga nê mē hipêx kati ho pa. Na pre htem Jejus wrÿk kukamā mē kām: “E koja nhÿrmā kot Tirtûm kapêr mar nê hkôt amnhî nhîpêx mex rāhā xwÿnh maatija mē pahwÿr wrÿ.” Anhÿr o mē kām harēnh o pa. Tā no nhûm mē kām ja mar prām kêt jakamā axtem nê hā mē hpar o pa. Mē kot mē kām Jejus jarēnh o mē pa xwÿnhjê hpar o pa. Tā nhûm tām mē pahwÿr wrÿ ka mē omu nê mē kot amnhî nhîpêxta pyrā nê hā amÿnê nhûm prem mē amā kupî.

⁵³ —Tirtûm kapêr o mē wrÿk xwÿnhjaja kot Tirtûm nhÿ hā tanhmā mē pahte amnhî nhîpêx to ho papa hā mē pamā karō nhûm mē ate mar tā mē apê hprām nōkati. Nê ama nê ām ama nê hkôt amnhî nhîpêx o ri apa hkêt nê. Anē.

*Mē kot Estewāw pÿr ā mē harēnh
Rukre 21.16-19, 23.34; Atre 22.20*

⁵⁴ Hāmri nhûm juistijaja tee ri Estewāw xujarēnh ma nê kamā gryk tÿx nê kām kapêr punuj nê. ⁵⁵ Nom nhûm Tirtûm Karōja tanhmā hkrā hto nhûm kām mē uma hkêt nê. Hāmri nê kànhmā rÿt nê kaxkwa pumunh o xa nê kamā Tirtûm rûm hirā rax

pumu. Nhũm Jejus Tirtũm nhĩhkô hã xa nhũm omu nẽ hkĩnh nẽ mẽ kãm:

⁵⁶ —Kokỹỹ. Na kaxkwa axkjê nhũm kamã Tirtũm nhỹ pa omu. Nhũm kuri kot mẽ pahwỳr mẽnh xwỳnh Jejusja xa. Hêxta waa nẽ. Nà na pa jarãhã wa omu nẽ ixkĩnh tỳx kumrêx. Anẽ.

⁵⁷ Hãmri nhũm mẽ kuma nẽ kamã gryk tỳx nẽ. Hãmri nẽ kãm mar prãm kêt nẽ kệp amnhĩ jamak pro. Hãmri nẽ gryk xaj àmra htỳx nẽ hwỳr hprôt ⁵⁸ nẽ unẽ nẽ krĩ pẽ ho kato nẽ ma o tẽ nẽ nhỹri o xa. Hãmri nẽ kẽn o htak o hpĩr kaxyw amnhĩ nhĩnôkà hkwrỳ nẽ mẽhõ my pẽ Sawti mã kugõ nhũm mẽ kãm hamỳ. Hãmri nhũm mẽ kẽn rũnh kwỳ jamỳ nẽ o mra nẽ Estewãw wỳr rênh prêprêk o kuhê. Nẽ ho ìkamã htak nẽ hkrãx pẽ htak. ⁵⁹ Hãmri nhũm ra htyk kaxyw nẽ Jejus mã amnhĩ jarẽ nẽ kãm:

—Pa Pahihti Jejus? E koja ixkarõ awỳr api ka ixto amnhĩptà. Anẽ.

⁶⁰ Hãmri nẽ hkõn krã ho tẽm nẽ nhỹ nẽ axte kãm amnhĩ jarẽ nẽ mẽ kot hpĩr xwỳnhjê nẽ kãm kapêr nẽ kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nẽ.

Anhỹr o mẽ nẽ Jejus mã kapêrja kôt ra ty.

8

Mẽ kot Estewãw jaxàr ã mẽ harênh

Atre 22.4, 26.9-11

¹⁻² Hãmri nhũm mẽ kot Jejus kôt amnhĩ nhĩpêx xwỳnhjaja Estewãw wỳr mra nẽ htyk kãm omu nẽ hkaprĩ nẽ. Nẽ mur nẽ kumỳ nẽ ma o mõi nẽ haxà. Nom nhũm Sawtija mẽ kot hpĩr ã omu nhũm ja kãm mex nẽ.

Sawti kot Jejus kwỳjê nhĩpêx kati ho pa hã harênh

Atre 1.8

Tã nhũm Jerujarẽ kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hãmri nhũm mẽ tee ri amnhĩ kukamã hamaxpêr nẽ mẽ hkwyjaja mẽ umaj hapôj nẽ ma pika hkwy hkôt hpigranh pa. Mẽ hkwyjaja Jutej wỳr ma pa nhũm mẽ hkwyjaja Samar hwỳr ma pa. ã na prem mẽ umaj nhỹhỹm hpigranh par anẽ. ãm Jejus nhỹ hã mẽ ahkre xwỳnh maati pixjaja na prem Jerujarẽ kamã arĩk nẽ nhỹhỹm mõi kêt nẽ. Simãw Pêtre nẽ

Juãw nẽ Xiakre nẽ Andre nẽ Firipti nẽ Patromew nẽ Matêwre nẽ Makre nẽ Tomas nẽ Xiakre hõja nẽ Simãw õ nẽ Maxitreja. ãm jajaja pix na prem arĩk.

³ Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xaj tanhmã mẽ hipêx to ho pa. Na pre hte mẽ òrkwỹ hwỳr agiê nẽ mẽ unẽ. Mẽmyjê pynê nẽ mênijê pynê nẽ ma mẽ o mra nẽ mẽ hagiênh xà kamã mẽ hagiê. Mẽ urak nẽ kệp Ijaew tã ã mẽ hipêx anhỹr o pa.

⁴ Tã nhũm mẽ umaj Jerujarẽ rũm pika hõ hwỳr mẽ hpigranh xwỳnhjtaja amarĩ pika hkwy hkôt ri pa hkêt nẽ. Na prem ma mẽ piitã mẽ kãm Jejus kapêr jarênh o ri mẽ hkôt pa. Kệp Tirtũm kot mẽ pakaxyw ãm xwỳnh ã harênh rãhã ho ri mẽ hkôt pa.

Wajaga kot amnhĩ tã Firipti mar ã harênh

Juãw 2.23-24

⁵⁻¹² Tã nhũm Firipti haxwỳja ma mõi. Ma krĩ pẽ Samar hwỳr mõi nẽ kamã mẽ kãm Tirtũm kot mẽ pakaxyw ãm xwỳnhjtaja jarênh o pa. Samar kamã na pre wajaga Simãwti ri Samar nhõ xwỳnhjê hkôt mẽ no kupyrrãhã ho ri mẽ hkôt pa. Nẽ àhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nẽ kamã no puma nẽ. Nẽ htỳx ho ãm hãmri kot amnhĩ jarênh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pẽ mẽ no kupyrrãhã ho ri pa nhũm mẽ amnhĩ jaêr pẽ omu. Mẽ kot amnhĩ to hkryre xwỳnhjaja nẽ mẽ kot amnhĩ to rũnh xwỳnhjaja nhũm mẽ amnhĩ jaêr pẽ kot tanhmã amnhĩ nhĩpêx to hã omunh o hkôt pa. Nẽ ri axpên mã harênh o:

—Kokỹỹ. Wajagaja àhpumunh tỳx kumrêx. Tirtũm nhỹ hã mãn te ã amnhĩ nhĩpêx anhỹr o pa nã? Mãn pre Tirtũm kãm àhpumunh xà hkwy gõ nhũm ý hã ã amnhĩ nhĩpêx anhỹr o pa. Anẽ.

Hãmri nẽ hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mõi nẽ mẽ kãm Jejus Kris jarênh o ri mẽ hkôt pa nẽ mẽ kãm:

—Jesús kệp Tirtũm kot mẽ pahwỳr mẽnh xwỳnh jakamã kot kaj mẽ amnhĩ kaxyw

hkôt ajamaxpër nê hkôt amnhî xunhwý nhũm Tirtũm hã mẽ apumu nê mẽ ato hkra. Anê.

Hãmri nê Tirtũm nhỹ hã akupỹm tanhmã mẽ kute xwýnhjê ho mex to ho pa. Mẽ ĩ kamã mẽ htyk xwýnhjaja nê mẽ hyk o mẽ pa xwýnhjaja nhũm mẽ ohtô nê akupỹm mẽ ho mex o pa. Nê mẽ hkwyjê nê mẽkarõmnuti hkwy jano nhũm mẽ âmra htýx o mẽ hkaga nê ma mẽ kurũm hapôx nê mra. Ā Firiptija Jejus nhỹ hã mẽ ho mex o pa anê nhũm mẽ piitã ja hã omu nê kapër ma nê hkĩnh nê. Nê kapër mar týt nê hkôt hamaxpër. Jao wajaga Simãwti kaga nê hpãnhã amnhî kaxyw Jejus kôt pix mã hamaxpër nê hkôt amnhî xunhwý. Hãmri nhũm Firipti ja hã mẽ omu nê mẽ hkrã kumrã. Mẽmyjaja nê mēnijaja nê mẽ piitã mẽ hkrã kumrã. Ra mẽ kot Jejus kôt amnhî xunhwýr ã mẽ piitã mẽ kãm amnhî to amnhĩrĩt kaxyw nhũm mẽ hkrã kumrãr pa.

¹³ Hãmri nhũm wajaga Simãwti haxwýja Jejus kapër ma nê mẽ uràk nê amnhî kaxyw hkôt hamaxpër nê hkôt amnhî xãm nhũm Firipti hkrã kumrã. Hãmri nhũm hkĩnh nê Firipti hkôt ri pa. Nê aa mẽ kot mẽmoj pumunh kêt kwý ho anhýr o ri pa hã omu nê kamã no puma ho hkôt ri pa. Nê kot Tirtũm nhỹ hã akupỹm mẽ ho mex ã omu nê tee ri hamaxpër.

¹⁴ Tã hãmri nhũm Jerujarẽ kamã Jejus nhỹ hã mẽ ahkre xwýnhjê maatijaja Samar nhõ xwýnhjê jarẽnh ma. Ra mẽ kot Tirtũm kapër kôt amnhî nhĩpêx ã mẽ harẽnh ma nê hkĩnh nê. Hãmri nê ma mẽ hwýr Simãw Pêtre mẽ Juãw wa kumẽ. ¹⁵⁻¹⁷ Hãmri nhũm wa ma mẽ hwýr wa mō nê pōj. Hãmri nhũm Firipti wa omu nê wa kãm krĩ nhõ xwýnhjê jarẽ nê wa kãm:

—Nà na pa pre mẽ kãm Jejus kapër jarẽ nhũm mẽ inhma nê hkôt amnhî xunhwý. Jakamã pa pre mẽ hkrã kumrã. Nom na kormã Tirtũm Karõja mẽ hkarõ mã gjêx kêt nê. Anê.

Hãmri nhũm wa mẽ harẽnh ma nê mẽ himõk ã wa ĩhkra jaxwýr o ri mẽ hkôt mra. Ja kôt nhũm Tirtũm Karõ mẽ hwýr wrý nê mẽ hkarõ mã gjêx pa. ¹⁸⁻¹⁹ Hãmri nhũm wajaga Simãwja mẽ amnhî tã wa omunh o xa nê hamaxpër o:

—Kokỹỹ. Kwa wa kot mẽ hã ĩhkra jaxwýrja kôt na hte Tirtũm Karõ mẽ hkarõ mã agjê. Hêxta waa nê. Inhmã ã mẽ hipêx anhýr o ri ixpa hprãm týt. E pa ixkàxpore hkwy jamý nê o tẽ nê wa kãm kugõ kê wa tanhmã ixto pa wa uràk nê ã mẽ hipêx anhýr o ri ixpa. Nà kot paj anê. Anê.

Hãmri nê wa hwýr tẽ nê wa kãm:

—E ota ixkàxporeta. Kwa amnhĩm apy nê hpãnhã tanhmã ixto pa war apyrà nê mẽ hã inhĩhkra jaxwýr o ri mẽ hkôt ixpa kê Tirtũm Karõja mẽ hkarõ mã agjê. Inhmã ja ho anhýr prãm týt. Anê.

²⁰⁻²³ Hãmri nhũm wa tee ri ã kapër anhýrja ã omu nhũm Pêtre kãm:

—Tk. Kwa ajamaxpërja mex kêt. Xà na htem kàxpore ho Tirtũm mã amnhĩrer pê ý hã mẽ ho hwýr o pa nhũm Karõ mẽ hwýr agjê? Nà na htem kàxpore ho Tirtũm Karõ japrõr kêt nê. Kot kaj wa ixpyrà nê ã mẽ hipêx anhýr kêt nê. Ajamaxpërja mexre hã. Kormã ate Tirtũm kôt amnhî xãm týt kêt jakamã na ka atýt ã ri ajamaxpër anê.

—Na ka ã wa ixte Tirtũm nhỹ hã mẽ hipêx anhýr ã wa ixpumu nê amã wa ixpyrà nê ã mẽ hipêx anhýr o ri apa hprãm xaj ajamaxpër punuj nê. Nhũm ajamaxpër punuj te kot apa hã apyr ka tee ate kệp amnhî kjênh pyràk. Kwa tokyx ajamaxpër punuj ã amnhî pumu nê akaprĩ nê tokyx hkaga. Hãmri nê amnhî to Tirtũm wý kê amnhî katut kôt ajamaxpër punujja mẽ ka axte ã ajamaxpër anhýr kêt nê. Ā mẽ hamaxpër punuj anhýr xwýnhjaja koja mẽ nhỹrmã ma kuwy hwýr pa. Anê.

²⁴ Hãmri nhũm tee ri amnhî tã kuma nê hkaprĩ nê wa kãm:

—Kwa xà wehe? Tô tokyx ixto Tirtũm wý kê ã ijamaxpër anhýrja mýrapê hwýr inhmẽnh kêt nê. Anê.

²⁵ Tã nhũm Simãw Pêtre mẽ Juãw wa Samar nhõ xwýnhjê mã Pahĩti Jejus kapër jarẽnh pê ho mẽ ahkre hãmri nê ma akupỹm Jerujarẽ hwýr mō. Ma pyka pê Samar hkôt mẽ kãm Jejus kapër jarẽnh o ma akupỹm mō.

Firipti mẽ Exiop nhõ xwýnhjê wa harẽnh Ijais 53.7-8

²⁶ Hāmri nhūm Firipti arī Samar kamā arīk. Hāmri nhūm Tirtūm kapēr o mẽ wryk xwýnhja hwýr wry nē kām:

—Pa? E ot pa awýr wry nē tē. Nà kēr ka tokyx akato nē ma mẽ nē Jerujarē rūm kànhmā Kas wýr pry kahpēr ta nē hā juk nē ma hā mẽ. Kapôt ã pry nōrta kahpēr ta nē hā mẽ. E kwa tokyj.

Anhýr o kām kapēr hāmri nē ma akupým tē nē kaxkwa hwýr api. ²⁷ Hāmri nhūm Firipti kuma nē kato nē ma hwýr mōr kurē kumrēx. Mōō hāmri nē pryja kahpēr ta nē hā mẽ.

Hāmri nhūm ra mẽhō myja mẽ. Exiop nhō xwýnh na pre. Exiop kamā mẽō pahi na pre niti. Hixi pē na pre Kátatre. Nhūm pry hā mōr xwýnhja kēp kām kàxpore jamār o pa xwýnh. Exiop kamā te kēp mẽ õ kōwenatō pyrāk. Tã kot Tirtūm mã mex o mex ã harēnh kaxyw ma Jerujarē hwýr mẽ. ²⁸ Hāmri nē akupým Exiop wýr kormā mẽ.

Õ pàr kām nhý nē Tirtūm kapēr ã kagà htūm kamā kapēr o mẽ. Tirtūm nhý hā kapēr o pa xwýnh pē Ijais kot Tirtūm kapēr ã kagà htūmja nhūm kamā kapēr o mẽ. ²⁹ Hāmri nhūm Tirtūm Karō Firipti mã harē nē kām:

—E mẽhō mūj wýr aprôt nē tē nē hā ajēt nē ma hkôt tē. Anē.

³⁰ Hāmri nhūm kuma nē ma hwýr hprôt nē hā ajēt nē kot kagà kamā kapēr ã kuma. Ijais kot Tirtūm kapēr ã kagà htūm kamā kapēr ã kuma nē kām:

—Pa? Mãn ka aprī hā ate kamā akapēr xwýnhhta ma nà? Anē.

³¹ Hāmri nhūm kām:

—Nà ixte maare hā. Mēhō kot hprī hā inhmā harē pa ixprī hā kuma? Xàt ka ixwýr api nē ixri nhý nē aprī hā inhmā harēnh o ixkôt mẽ nà? Anē.

Hāmri nhūm kuma nē hwýr api nē ìhkô hā nhý nē kagàta pumunh o nhý. ³² Nhūm hā kagà kot:

Na htem ôwēhti par kaxyw nhūm amarī mẽ kām akryk kuhē.

Nē mẽ kot kēp hkī jakàr kaxyw nhūm ma anē nē amarī mẽ kām akryk kuhē.

Tã na pre mẽhōja ôwēhti kot amnhī nhīpēx pyrāk o amnhī nhīpēx.

Jakamā nhūm mẽ kot tanhmā hipēx to htã no nhūm arī mẽ kām akryk xa.

Amnhī nē tanhmā mẽ kām kapēr punuj to hkēt nē. ãm arī mẽ kām xa.

³³ Na prem homnuj týx nē ri hipēx kati rax nē.

Aa kot tanhmā amnhī tomnuj to hkēt kumrēx tã nhūm mẽ ã hipēx anē nhūm mẽhō yr pē tanhmā nē mẽ kām kapēr to hkēt nhūm prem kupī.

Nhūm amnhī kanrēhã hkra hkēt rãhã ty. Jakamā kot puj mẽ hkrajē nhīxi mar kēt nē. Kra hkēt rãhã htyk kēnã. Anē.

³⁴ Nhūm pre ã Exiop nhō xwýnh Tirtūm kapēr ã kagà htūm kamā harēnh anē. Hāmri nē tee ri ã kot mẽhō jarēnh anhýrja kukamā hamaxpēr nē hā Firipti kukja nē kām:

—Kwa aprī hā inhmā mẽhōja jarē. Mēhō na prem ã hipēx rax anē? Xà kot kagà xwýnhhta na prem ã hipēx anē nà xà nhām mẽhō na prem ã hipēx anē? E kwa aprī hā inhmā harē pa ã mẽ kot hipēx anhýr xwýnh kôt omu. Anē.

³⁵ Hāmri nhūm kām:

—Tõe kot paj amã harē. Nà Jejus na prem ã hipēx anē nhūm prem hā kagà. Anē.

Hāmri nē hprī hā kām kot kamā harēnh xwýnhhta jarē. Jejus kot tanhmā mẽ panē amnhī nhīpēx toja nhūm hprī hā kām harēnh o hkôt mẽ.

³⁶ Hāmri nhūm wa kormā mẽ nē pry htã himô hãnh mẽ nhūm Exiop nhō xwýnh omu nē Firipti mã kām:

—E mūj gô mūj nõ. Xà kot kaj kamā ixkrã kumrã nà? Anē.

³⁷ Nhūm kām:

—Nà kot kaj amnhī kaxyw Jejus Kris kôt ajamaxpēr nē hkôt amnhī xãm hā kot paj akrã kumrãr kurē kumrēx. Anē.

Hāmri nhūm kām:

—Tý. Kēp Tirtūm Kra kēnã kot paj kēt amnhī kaxyw hkôt ijamaxpēr kēt. Anē.

³⁸ Hāmri nē pàr o mrar xwýnh mã anē nhūm pàr o nõ nhūm wa kato nē himô hwýr wry nhūm Firipti hkrã kumrã. Kot Jejus kôt amnhī xãm ã hkrã kumrã. ³⁹ Hāmri nē wa akupým api nhūm Tirtūm Karō Firipti mý nē ma nhýhým o mẽ nhūm Exiop nhō xwýnhja axte omunh kēt nē. Hāmri nē ma akupým papxà hwýr mẽ. Ra kot Jejus kôt amnhī xãm jakamã hkīnh nē ma akupým mẽ.

⁴⁰ Rôm nhūm Firipti krī pē Ajôt kamã pøj. Tirtūm Karō kot Exiop nhō xwýnh pē kator

nê tanhmã ho nê Ajôt wÿr o mō hãmri nê kamã kumê. Hãmri nhũm mẽ kãm Jejus kot tanhmã mẽ panê amnhĩ nhĩpêx to hã harênh pê ma krĩ hō hwÿr mẽ kãm ujarênh anhÿr o pa rãhã krĩ pê Sejarej wÿr mō nê pōj.

9

Sawti kot Jejus kôt amnhĩ xãm ã harênh Atre 22.6-11, 26.12-18

¹ Rôm nhũm Sawtija xatã Jerujarê kamã Pahihtĩ Jejus kôt mẽ kot amnhĩ xunhwÿr xwÿnhjaja tanhmã mẽ homnuj tÿx to ho ri mẽ hkôt pa. Kãm mẽ himex par prãm jakamã na pre hte ã amnhĩ nhĩpêx anhÿr pix o pa. Tã ra hamaxpêr nê ma patre maati hwÿr tẽ nê mẽ hã amnhĩ jarê nê kãm:

² —E ot pa awÿr tẽ. Kwa inhmã kagã nhĩpêx pa kupy nê ma krĩ pê Tamas kãm mẽ pahpê Ijaew xaptãr tũmrejê hwÿr o mō nê mẽ kãm kugō. Kê mẽ kamã harê nê omu hãmri nê hkôt inhĩkra kamã Jejus kôt mẽ kot amnhĩ nhĩpêx xwÿnhjê jagjê. Mênijaja nê mẽmyjaja. Hãmri pa mẽ unê nê man akupÿn awÿr mẽ o mō ka mẽ omu nê kam tanhmã mẽ hipêx to. Anê.

Hãmri nhũm kuma nhũm ja kãm mex nê. Hãmri nhũm kãm kagã nhĩpêx nê kugō nhũm kupy nê hkôt mẽ pa xwÿnhjê mẽ ro hã ma Tamas wÿr mẽ hwÿr mōr kurê kumrêx.

³ Mōõ mẽ ra hpôx o mōr mẽ nhũm puh kaxkwa rũm hirã rax kumrêx wrÿ nê hã ajêt nhũm hipôk ri xa. ⁴ Hãmri nê tee ri omu nê kãm ma xaj pykap tẽm nê akryk nō. Hãmri nhũm kaxkwa rũm mēhō kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tÿx o ri apa? Anê.

⁵ Hãmri nhũm amnhĩ jaêr pê kuma nê kãm:

—Kwa mẽ atō na ka ã inhmã akapêr anê pahihtĩ? Anê.

Hãmri nhũm kãm:

—Kwa nhũm ixpê Jejus ixte amã ixkapêr kênã. Pa na ka hte ixpê ixkôt mẽ kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrãk. ⁶ Nom kot kaj axte ã amnhĩ nhĩpêx anhÿr kêt kumrêx. E kãnhmã xa nê mãmri ma krĩ hwÿr tẽ. Kot kaj hwÿr pōj nhũm mēhō awÿr tẽ nê mẽmoj

tã amã karō ka ama nê hkôt amnhĩ nhĩpêx. Anê.

⁷ Nhũm pre ã Jejus Sawti mã kapêr anê. Nhũm hkôt mẽ pa xwÿnhjaja mẽmoja ma no ãm hprĩ mar nê mẽmoj pumunh kêt nê. Hãmri nê tee ri hamaxpêr nê kãm ma xaj akryk kapêr kêt kumrêx nê kuhê. ⁸ Hãmri nhũm Sawti kãnhmã xa nom rĩt kêt nê tee ri rĩt mã nhũm mẽ hpa hã kupy nê ma krĩm o mō. ⁹ Nê Tamas wÿr o pōj nê nhÿri mēhō nhōrkwÿ hwÿr ho axà nhũm kamã nohkre nê arĩ hkrĩ. Tee ri amnhĩ kukamã hamaxpêr o hkrĩ. Nê apkur kêt nê hkôm kêt o ra hã apkati axkrunêpxi.

¹⁰ Tamas kamã na pre mēhō my pê Ananĩsja pa. Kot Jejus kôt amnhĩ xunhwÿr xwÿnhjê hō na pre. Jakamã nhũm Jejus hwÿr kato nê kãm kapêr. Te hpimtĩr kãm hwÿr kator nê kãm kapêr pyrã nê kãm:

—Pa Ananĩs? Anê.

Nhũm kãm:

—ÿ? Ot pa xa. Mo na Pahihtĩ? Anê.

¹¹ Nhũm Jejus kãm:

—E kêr ka akato nê ma mẽ kot kãm: “Pry katãt” anhÿr xwÿnhjê wÿr tẽ. Hãmri nê kamã Jut nhōrkwÿ japêr. Kamã na Tas nhō xwÿnhjê pê Sawtija hkrĩ. Na no hkre nê inhmã amnhĩ jarênh o hkrĩ. Ka hwÿr axà nê omu. ¹² Ate hwÿr atẽm nê inhÿ hã hã anhĩkra xir nhũm akupÿm rĩt mex kaxyw na ato amÿti. Jakamã e ma hwÿr tẽ nê ã hipêx anê. Anê.

¹³ Hãmri nhũm Ananĩs tee ri kuma nê kãm Sawti puma ho amnhĩ kamã kahak nê. Hãmri nê kãm:

—Kwa nã Pahihtĩ. Tãm na xep hte Jerujarê kamã mẽ kot amnhĩ kaxyw akôt mẽ hamaxpêr xwÿnhjê nhĩpêx kati ho pa. Pa ra mẽ hã harênh ma. ¹⁴ Tã na xep ra jar Tamas wÿr pōj. Patre krãhtũm kapêr nhÿ hã kot mẽ ixpê akôt amnhĩ xunhwÿr xwÿnhjê pynênh nê ma akupÿm hwÿr mẽ ixto mōr kaxyw. Tãn ka ri hwÿr ijano. Kwa nã ri ixto anhÿr kêt nê Pahihtĩ. Anê.

¹⁵ Nhũm Jejus kãm:

—Nã mamrĩ ma hwÿr tẽ. Ra ixte amnhĩ kaxyw ãm kênã. Jakamã koja ã mẽ anhĩpêx anhÿrta hpãnhã ma mẽ piitã mẽ kãm ixkapêr jarênh o pa. Mẽ apê Ijaew mã nê mẽ anhō pahi hkwÿjê mã nê mẽ kêp Ijaew kêt xwÿnhjê mã. Koja mẽ piitã

mě kām ixkapēr jarēnh mex o ri mẽ hkôt pa. ¹⁶ Koja mẽ ixtā homnuj tỳx nē nhũm amnhĩ xà htỳx kamā hamak o pa. Nom kot paj ixprĩ hã mẽ kot tanhmã ixtā hipêx to hkukamã kãm ixujarēnh pa nhũm amnhĩ kukamã amnhĩ jarēnh ma. E tokyx māmri ma axàmnhĩx hwỳr tẽ. Anẽ.

¹⁷ Hãmri nhũm kuma nẽ kato nẽ ma Sawti hwỳr htēm kurê kumrêx. Hãmri nẽ ixkre hwỳr axà nẽ omu nẽ hkrã hã ìhkra xi nẽ kãm:

—Pa Jejus kôt ixtõ Sawti? E na Pahihti Jejus awỳr inhmẽ pa awỳr tẽ. Pry kahti ri kot awỳr kator xwỳnhta. Tã akupỳm arĩ nhũm Tĩrtũm Karõ kot akarõ mã àr kaxyw na awỳr inhmẽ pa tẽ. Anẽ.

¹⁸ Hãmri nhũm mẽmoj te tep kà pyrækja Sawti no rũm hapôj nẽ rôrôk nhũm akupỳm rĩt mex kurê kumrêx. Hãmri nẽ kànhmã xa nhũm Ananĩs hkrã kumrã. Ra amnhĩ kaxyw Jejus kôt hamaxpēr ã hkrã kumrã.

¹⁹ Hãmri nhũm nhỹ nẽ apku nẽ akupỳm hihtỳx.

Sawti kot Tamas kamã Jejus kapēr jarēnh Sikũn Korĩt 11.22-23

Nhũm Sawti Tamas kãm mẽ kot Jejus kôt amnhĩ xunhwỳr xwỳnhjê hkôt amnhĩ xãm nẽ mẽ hkôt ri pa nẽ tokyx ma akupỳm môr kêt nẽ. ²⁰ Kormã mẽ hkôt ri pa nẽ Ijaew nhõ Tĩrtũm kapēr o mẽ ahkre xà hã ixkre hwỳr mra nẽ kamã mẽ kãm Jejus kapēr jarẽ. Kêp Tĩrtũm Kra hã harēnh o kuhê. ²¹ Hãmri nhũm mẽ amnhĩ jaêr pẽ ã harēnh anhỳrja ma nẽ tee ri hamaxpēr nẽ axpẽn mã:

—Kokỳỹ. Kwa tãm na xep pre Jerujarẽ kamã amnhĩ kaxyw Jejus kôt mẽ kot amnhĩ xunhwỳr xwỳnhjê homnuj tỳx o pa. Tã xep jar kot mẽ hkwỳjê pynênh nẽ ma mẽ o môr nẽ Jerujarẽ kamã patre krãhtũmjê mã mẽ òr kaxyw na pre man mẽ pahwỳr mō. Tã ra tanhmã hamaxpēr to nẽ axtem nẽ mẽ pamã Jejus kapēr jarēnh o mẽ pajahkre ho pa. Anẽ.

²² Hãmri nhũm Sawti arĩ Tamas kãm Ijaew mã tanhmã Jejus jarēnh to kamã hihtỳx o mẽ hkôt pa nẽ mẽ kãm:

—Nã Jejus Krisja na pre Tĩrtũm mẽ pakaxyw ãm nẽ mẽ pahwỳr kumẽ. Æm hãmri na pa mẽ amã ja jarẽ. Anẽ.

Hãmri nhũm mẽ kuma nẽ tee ri kutã tanhmã kapēr to hkukamã hamaxpēr.

²³ Tã ra hã apkati xohtô nẽ nhũm Tamas kãm Ijaew kwỳjaja kot Sawti pĩr kaxyw hã axpẽn ma. ²⁴ Hãmri nhũm mẽhõja hã ama nẽ Sawti hwỳr tẽ nẽ kãm mẽ harẽ nẽ kãm:

—Kwa Sawti kêr ka axkãm ajamak rom. Na mẽ pahkwỳjaja atã amỳnê. Na mẽ ra krĩ puhã kahê xà hã hakwakre piitã hamãr ho kuhê. Kot kaj nhỹhỹm akato nhũm mẽ apumu nẽ apynê nẽ apĩ. Anẽ.

²⁵ Jakamã nhũm kamàt nhũm Sawti hkôt ri mẽ pa xwỳnhjaja kawà rax õ mỳ nẽ hwỳr o tẽ nẽ kãm ãm nhũm hwỳr axà nẽ nhỹ. Hãmri nhũm mẽ hkagrĩ nẽ kẽn o krĩ puhã kahêja nhĩrô pẽ ho wrỳ nhũm mẽ kêp kato nẽ ma mō.

Sawti kot Jejus kwỳjê hkôt pikamēnh ã harēnh

Karatas 1.15-24

²⁶ Tã nhũm Sawti krĩ pẽ Tamas rũm kato nẽ ma akupỳm Jerujarẽ hwỳr mō hãmri nẽ hwỳr pôj. Hãmri nẽ mẽ kot Jejus kôt amnhĩ xunhwỳr xwỳnhjê hkôt amnhĩ jarēnh kaxyw mẽ hwỳr tẽ. Hãmri nhũm mẽ tee ri amnhĩ wỳr omu nẽ kot Jejus kôt amnhĩ xãm ã amnhĩ to hêx ã hkamnhĩx hãmri nẽ amnhĩ kamã kahak o amnhĩ nẽ hkurê nẽ mẽ piitã kãm uma nẽ. ²⁷ Æm Panãpe pix ãm hãmri kot Jejus kôt amnhĩ xãm kôt hamaxpēr. Hãmri nẽ ma hwỳr tẽ nẽ haprô nẽ ma Jejus nhỹ hã mẽ ahkre xwỳnh maatijê hwỳr o tẽ nẽ yr pẽ mẽ kãm kapēr nẽ mẽ kãm:

—Kwa ãm hãmri na Sawti amnhĩ jarẽ. Na ra mẽ pahpyrà nẽ Jejus kôt amnhĩ xãm. Na xep pre Tamas wỳr pry hã kormã mō nhũm xep Pahihti Jejus hwỳr kato nẽ kaxkwa rũm kãm kapēr nhũm kuma nẽ hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhõ xwỳnhjê mã Jejus kapēr jarēnh o ri mẽ hkôt pa. Ra amnhĩ kamã kãm mẽ uma hkêt nẽ àmnhĩx ri mẽ kãm harēnh o ri mẽ hkôt pa. Anẽ.

²⁸ Hãmri nhũm mẽ kuma nẽ amnhĩ kôt Sawti mẽ nhũm mẽ hkôt ri pa. Hãmri nẽ Jerujarẽ kamã mẽ piitã mẽ kãm Jejus kapēr jarēnh o pa. Kãm Jejus kôt amnhĩ xunhwỳr kêt xwỳnhjê pyma hkêt nẽ àmnhĩx ri mẽ kãm kapēr jarēnh o ri mẽ hkôt pa.

²⁹ Nẽ Ijaew kwỳ pẽ Gresjê kapēr o mẽ kapēr xwỳnhjê mã nhũm xatã mẽ kãm Jejus jarēnh o ri mẽ hkôt pa. Kêp Tĩrtũm kot mẽ

pakaxyw ãm xwýnh ã harënh rãhã ho ri mẽ hkôt pa. No nhũm mẽ kãm mar prãm kêt nê ra kot Jejus ã hpĩr mã. ³⁰ Hãmri nhũm mẽ kot Jejus kôt amnhĩ xunhwýr xwýnh kwýjaja mẽ harënh ma nê mẽ kêp ho kato nê ma krĩ pê Sejarej wýr o mõi. Hãmri nê kurũm ma akupým õ krĩ pê Tas wýr kumẽ nhũm ma akupým mõi.

³¹ Tã ra Sawti kot Jejus kôt amnhĩ xãm jakamã nhũm mẽ kãm mẽ hkurẽ xwýnhjaja axte Jejus ã tanhmã hkwýjê hto hkêt nhũm mẽ piitã hamakêtkati nê àmnhĩx ri pa. Pika pê Jutej kamã nê Garirej kamã nê Samar kamã nhũm mẽ piitã hamakêtkati nê àmnhĩx ri pa. Hãmri nê Tĩrtũm mã mex o mex ã harënh o ri pa. Nhũm Tĩrtũm Karõ tanhmã mẽ hkrã hto nhũm mẽ ra kapêr kôt amnhĩ nhĩpêx mex o mõi. Hãmri nhũm mẽ ohtô rax nê mẽ urak nê Jejus kôt amnhĩ xunhwý nê hkwýjê hkôt axkamẽ.

Enejti akupým mex ã harënh

Atre 3.1-10

³² Tã nhũm Simãw Pêtreja ma mẽ kot Jejus kôt amnhĩ xunhwýr xwýnhjê mã Tĩrtũm kapêr jarënh o mẽ ahkre kaxyw ma krĩ piitã hkôt pa. Jakamã krĩ pê Rit wýr mõi ³³ nê hwýr pøj nê kamã Enejti pumu. Nhũm ã kamã htyk pa nê kupĩp kãm hikwý rãhã hã amgrã pê 8. ³⁴ Hãmri nhũm Simãw Pêtre omu nê Jejus nhỹ hã kãm kapêr nê kãm:

—Pa Enejti? E na Jejus Kris akupým ato mex. Jakamã e kãnhmã xa nê akupĩpta py. Anẽ.

Hãmri nhũm akupým mex nê kãnhmã xa nê amnhĩ pumu nê hkĩnh o hkĩnh. ³⁵ Hãmri nhũm krĩja kamã nê krĩ hõ pê Sarõ kamã mẽ piitã harënh ma nê mẽ kot amnhĩ tomnuj kaga hpa nê hpãnhã Jejus kôt amnhĩ xunhwý nê hkôt amnhĩ nhĩpêx o pa.

Tapitre akupým htĩr ã harënh

Rukre 8.49-56; Atre 20.7-12

³⁶ Nhũm Tapitreja krĩ pê Jope kamã na pre pa. Gres kapêr kãm hixi pê Nokre. Mẽ kapêr kãm Nokreja te kêp “karã” anhỹr jarënh pyrãk. Na pre ra Tapitre pê Nokreja Jejus kôt amnhĩ xãm nê mẽ piitã mẽ ho mex o ri mẽ hkôt pa. Nê mẽ kêp amrakati xwýnhjê kamã ukapĩrĩ ho ri mẽmoj to mẽ kutã nojarêt o ri mẽ hkôt pa. ³⁷ Tã ra à htýx nê hãmri ty. Hãmri nhũm mẽ tee ri omu nê

hkaprĩ nê mýr rax nê. Nê kumý nê kuhõ hãmri nê kormã haxàr kêt ri kýx pê ixkre kamã kuxi nê kuri mýr o hkrĩ.

³⁸ Nhũm Simãw Pêtre kormã krĩ hõ pê Rit kamã ri pa. Rit rũm Jope hwýr jawý jakamã nhũm Jope kamã mẽ kot Jejus kôt amnhĩ xunhwýr xwýnhjaja Simãw Pêtre jarënh ma hãmri nê hwýr ja wa ho hamẽxkrut nê wa kumẽ. Nhũm wa ma hwýr tẽ nê hwýr pøj nê omu nê kãm:

—Pa? E jar na pa wa awýr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwýr tẽn omu nã? Anẽ.

³⁹ Hãmri nhũm wa kuma nê ma wa hkôt htẽm kurẽ kumrẽx. Hãmri nê Jope hwýr pøj nê mẽ hwýr tẽ nhũm mẽ kýx pê htyk nê nõr xwýnhja wýr ho api nhũm hwýr axà. Nhũm kuri mẽ kêp mẽ mjên htyk xwýnhjaja hkaprĩ nê mýr o hkrĩ. Hãmri nhũm Simãw Pêtre mẽ hwýr axà nhũm mẽ omu nê kãm Tapitre kormã htĩr ri kot tanhmã mẽ ho mex to hã harẽ. Nê mẽ ê hkwý jamý nê kãm kupẽ nê kãm:

—Ga ja pumu. Tyk xwýnhta na pre mẽ inhmã hkay nê kugõ. Na pre hte mẽ ixto mex o pa. Tã mẽ ixpê ty. Hẽxta gãa nê. Na pa mẽ ixkaprĩ htýx kumrẽx. Anẽ.

⁴⁰ Hãmri nhũm mẽ kuma nê mẽ kator pa hãmri nê htyk xwýnhta ri hkõn krã ho nhỹ nê ho Tĩrtũm wý. Hãmri nê htyk xwýnhta mã kapêr nê kãm:

—Pa Tapitre? E kwa kãnhmã nhỹ. Anẽ.

Pu nhũm no amra nê Simãw Pêtre pumu nê kãnhmã nhỹ. ⁴¹ Hãmri nhũm hpa hã kupy nê kãnhmã ãm nê kapôt ã mẽ kuhẽ xwýnhjê mã anẽ nhũm mẽ akupým wa hwýr agjê nhũm mẽ kãm:

—E ota. Na Tĩrtũm akupým mẽ amã ho htĩr. Anẽ.

Hãmri nhũm mẽ amnhĩ jaêr pê omu nê hkĩnh týx nê. ⁴² Hãmri nhũm Jope kamã mẽ piitã harënh ma nê mẽ ohtõ nê amnhĩ kaxyw Jejus kôt hamaxpêr nê hkôt amnhĩ xunhwý. ⁴³ Hãmri nhũm Simãw Pêtre Jope kamã ri pa hã apkati xohtõ nê tokyx mẽ kurũm kato nê ma krĩ hõ hwýr mõi kêt nê. Na pre mry kã ho mẽmoj nhĩpêx o pa xwýnh pê Simãw ri pøj nê kuri pa hã apkati xohtõ nê.

10

Konëre kot Simāw Pêtre hã karõ hã harënh Rukre 7.1-10

¹ Tã nhũm Ijaew kêt xwýnh Konëre. Kêp Rõmjê nhõ pôristi krãhtũm na pre. Ô pôristija pika pê Itar nhõ xwýnh na pre mẽ nhũm Konëre kêp mẽ hkrãhtũm. Krĩ pê Sejarej kamã. ² Konëreja kot amnhĩ to mex o pa xwýnh na pre. Kêp Ijaew kêt tã na pre hte ôrkwỹ kamã hkwýjê mẽ Tĩrtũm ã hpijaàm nê kãm mex o mex ã harënh o pa. Apkati mẽ kãm amnhĩ jarê. Nê mẽ kêp amrakati xwýnhjê mã kãxpore hkwý nhõr o pa. ³ Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nê kaxkwa kamã Tĩrtũm kapêr o wrýk xwýnh pumu. Nhũm hwýr wrý nê tanhmã kãm kapêr to nê kãm:

—Pa Konëre? Anê.

⁴ Nhũm tee ri omu nê kãm ma htýx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wýr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwýnhjê mã kãxpore hkwý nhõr o apaja nhũm ja mãänên kãm mex nê.

⁵ —Jakamã e inhma. Kêr ka ma Jope hwýr amã mẽ àpênh xwýnh kwý rê kê mẽ ma hwýr mra nê kamã mẽhõ pê Simāw Pêtre japrõ nê man akupýn awýr o mõ. ⁶ Simāw kot mry kà ho mẽmoj nhĩpêx o pa xwýnhhta nhõrkwỹ kamã na hte pa. Ôrkwỹja gô mý ri na. E hwýr mẽ arê kê mẽ ma hwýr mõ nê haprõ nê man awýr o mõ kê amã mẽmoj mex jarê ka ama. Anê.

⁷ Nhũm pre ã Tĩrtũm kapêr o wrýk xwýnhja Konëre mã kapêr anê hãmri nê kato nê ma akupým api. Hãmri nhũm kot mar xà hkôt jajê rê nê Simāw Pêtre hwýr mẽ kurê. Kãm àpênh xwýnhjê ho hamêxkrut nê kaxyw õ pôristi hõ. Pôristija na pre hte Konëre pyrã nê Tĩrtũm ã hpijaàm o pa. ⁸ Jakamã nhũm mẽ kurê nê mẽ kãm kapêr hãmri nê ma Jope hwýr Simāw Pêtre hwýr mẽ kurê nhũm mẽ kato nê ma hwýr mõ. ⁹ Hãmri nhũm apkati nhũm kaxkwa nhĩpõk ri myt nhý nhũm mẽ hwýr hpõx o mõ.

Simāw Pêtre tanhmã hpimtir to hã harënh Atre 11.5; Karatas 2.11-21

Rõm nhũm Simāw Pêtre kot Tĩrtũm mã amnhĩ jarënh kaxyw ixkre nhĩmõk ã api nê himõk po hã kãm amnhĩ jarënh o nhý. ¹⁰ Hãmri nê ra kãm prãm nê nom nhũm mẽ kormã kãm õ hã àpênh jakamã nhũm arĩ ixkre nhĩmõk ã Tĩrtũm mã amnhĩ jarê.

Hãmri nê Konëre pyrã nê te hpimtir kãm kot mẽmoj pumunh pyrã nê mẽmoj pumu nhũm Tĩrtũm Konëre hkukamã tanhmã kãm mẽmoj to amnhĩrĩt to. No ãm hã kuxi nê kãm harënh jakamã nhũm Simāw Pêtre te hpimtir kãm kot mẽmoj pumunh pyrã nê mẽmoj pumu. ¹¹ Nhũm kaxkwa katêr nhũm kurũm mẽmoj te kot mẽ hpiipro xà pyrãk xwýnhja pyka hwýr wrýk o mõ. Nê hatur xà piitã axpên tã akuprõ nê ajêt nê wrýk o mõ nhũm omu. ¹² Mẽ hpiipro xàta kamã mẽmo mry piitã hikwỹ. Mẽmo mry hpar o ri pa xwýnhjaja nê htu mýr pê ri pa xwýnhjaja nê mẽmo àk kýx pê htor o ri mrrar xwýnh piitã mẽ hpiipro xàja kamã hikwỹ nhũm omu.

¹³ Hãmri nhũm Tĩrtũm kãm:

—Pa Simāw Pêtre? Mãn ka ra amã prãm nê nà? E kãnhmã xa nê axãmnhĩx mãmrĩ mryta õ kapi nê api nê ho anê nê aku. Piitã mẽ ate hkur mã mex. Anê.

¹⁴ Hãmri nhũm tee ri kuma nê kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwý pix na pa htem kuku. No mry jaja aa mẽ ixte hõ hkwý hkrêr kêt. Anê.

¹⁵ Hãmri nhũm Tĩrtũm kãm:

—Nà kot anhýr tã kot paj pam amã mẽmoj jarê ka kamã anhõkre kahak kêt nê. Mãmrĩ amnhĩm hõ kapi nê api nê ho anê nê axãmnhĩx hkwý hkre. Anê.

¹⁶ Nhũm pre ã kãm mry hã karõ anhýr o axkrunêpxi. Simāw Pêtre kot mãmrĩ Ijaew kêt xwýnhjê hkôt pa nê àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harënh anhýr o axkrunêpxi. Hãmri nhũm mẽ hpiipro xàja ma akupým kaxkwa hwýr àpir o mõ nê akunok. ¹⁷ Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhý nê hamaxpêr o:

—Kwa mo kaxyw na Tĩrtũm ã inhmã ja hã karõ anê? Anê.

Rôm nhũm Konëre kot hwÿr mẽ rënh xwÿnhjaja ra hwÿr hpôx o mō. Ijaew kêt xwÿnhhtaja Simãw nhõrkwÿ hã mẽ hkukjêr o mō mẽ hwÿr pøj mẽ hakwakrem kuhê.

¹⁸ Hãmri mẽ õrkwÿ nhõ xwÿnhjê mã kãm:

—Pa na ka mẽ arĩ akrĩ? E Simãw Pêtre hwÿr na pa mẽ mō. Xà jar na hte pa nà? Anê.

Hãmri nhũm mẽ kãm: —Tỳ. Omũj kÿx pè ixkre nhĩmōk ã na nhÿ. Anê.

¹⁹ Nhũm Simãw Pêtre arĩ kot mẽmoj pumunhta kukamã hamaxpêr o nhÿ nhũm Tirtũm Karō kãm mẽ hpôx xwÿnhjê jarẽ mẽ kãm:

—E Simãw Pêtre. Ota Ijaew kêt xwÿnhjaja axkrunêpxi mẽ ajapêr o mō mẽ ra anhõrkwÿ hwÿr pøj. ²⁰ Mẽ hwÿr wrÿ mẽ mẽ kot amã mẽmoj jarënh ma mẽ mãmri axãmnhĩx ma mẽ hkôt mō. Tanhmã ajamxpêr to hkêt mẽ. Pa na pa awÿr mẽ kumẽ nhũm mẽ mō. Anê.

²¹ Hãmri nhũm kuma mẽ mẽ hwÿr wrÿ mẽ mẽ omu mẽ mẽ kãm:

—Pa? Xà pa na ka mẽ ijapêr o mō? E ot pa xa. Kam mẽ mẽ inhmã mẽmoj jarẽ pa mẽ ama. Mẽmo kaxyw na ka mẽ ixwÿr mō? Anê.

²² Hãmri nhũm mẽ kãm:

—Nà mẽ inhõ patrãw Konëre na awÿr mẽ inhmẽ pa mẽ mō. Na hte tãm amnhĩ nhĩpêx o pa. Nẽ Tirtũm ã hpijaam mẽ kãm mex o mex ã harënh o pa. Nhũm mẽ inhõ krĩ kamã Ijaew kãm hkĩnh mẽ. Tã na Tirtũm kapêr o wrÿk xwÿnhja ham hwÿr wrÿ mẽ kãm ajarẽ. Kot amnhĩ wÿr atã karō nhũm ate hwÿr amõr mẽ kãm axujarënh kaxyw kãm ajarënh jakamã nhũm mẽ ixte ajaprôr kaxyw awÿr mẽ inhmẽ pa mẽ man awÿr mō. Anê.

²³ Hãmri nhũm mẽ kuma mẽ mẽ kãm:

—Tõe nà na pa mẽ ama. E mẽ agjê mẽ akrĩ mẽ jar mẽ ixri nõ kê apkati pu mẽ rĩ ma akupÿm mō. Anê.

Hãmri nhũm mẽ kuma mẽ mẽ hwÿr agjê.

Tã nhũm apkati nhũm mẽ akupÿm nojarêt nhũm Simãw Pêtre ma mẽ hkôt mō. Nhũm Jope kamã mẽ kot Jesus kôt amnhĩ xunhwÿr xwÿnh kwÿjaja ma mẽ hkôt mō. Nhũm mẽ mõr o kamãt.

²⁴ Hãmri nhũm apkati nhũm mẽ Sejarej wÿr hpôx o mō. Nhũm ra Konëre mẽ kutêp amnhĩ wÿr hkwÿjê ho akuprõ nhũm mẽ

Simãw Pêtre kutêp õrkwÿ kamã akuprõ mẽ hkrĩ. ²⁵ Hãmri nhũm mẽ hwÿr pøj mẽ mẽ hwÿr àr kaxyw nhũm Konëre amnhĩ wÿr omu mẽ kànhmã xa mẽ kutã tẽ mẽ hpar pè hkõnkrã ho tẽm mẽ nhÿ. ²⁶ Hãmri nhũm tee ri ja hã omu mẽ pa hã kupy mẽ kànhmã ãm mẽ kãm:

—Kwa kànhmã xa. Ixpê Tirtũm kêt tã ka ri ã inhĩpêx anê. Anê.

²⁷ Hãmri mẽ hkôt õrkwÿ hwÿr axà mẽ kutêp mẽ pikuprõnh xwÿnhjê pumu mẽ mẽ kãm:

²⁸ —Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhõ xwÿnhjê hkôt ri ixpa hkêt mẽ. Nẽ mẽ anhõrkwÿ hwÿr inhgjêx kêt mẽ. Tã ham Tirtũm inhmã mẽ ixte ã amnhĩ nhĩpêx anhÿr o ixpaja mẽ ixkurê mẽ inhmã: “Kot paj pam mẽ hkwÿjaja mex ã mẽ harẽ ka mẽ kamã anhõkre kahak kêt mẽ.”

²⁹ —Anhÿr jakamã ka xep pre ixtã karō pa inhĩtõt kêt mẽ man mẽ awÿr inhmõr kurê kumrêx. E mẽ inhmã mẽmoj jarẽ pa mẽ ama. Mẽmo kaxyw na ka mẽ ixtã karō? Anê.

³⁰ Hãmri nhũm Konëre kãm:

—Nà jãã na pa pre jar inhõrkwÿ kamã Tirtũm mã amnhĩ jarënh o nhÿ. Ra myt xàpanh grire pa kãm amnhĩ jarẽ. Hãmri nhũm Tirtũm kapêr o wrÿk xwÿnh ixwÿr wrÿ mẽ hirã rax kãm xa. ³¹ Hãmri mẽ inhmã: “Pa Konëre? E na hte Tirtũm ate kãm amnhĩ jarënhhta mar o hkrĩ. Nẽ ate mẽ kèp amrakati xwÿnhjê ho mex o apaja nhũm hã apumu.

³² Jakamã e ma Jope hwÿr amã mẽ àpênh xwÿnh kwÿ rẽ kê mẽ ma hwÿr mō mẽ kamã Simãw Pêtre japrô mẽ man akupÿn awÿr o mō. Mry kà ho mẽmoj nhĩpêx o pa xwÿnh Simãw nhõrkwÿ kamã na hte pa. Õrkwÿja gô mÿ ri na.” Anê.

³³ —Ã kot inhmã kapêr anhÿr jakamã na pa kuma hãmri mẽ awÿr jajê rënh kurê kumrêx. Tã ka mẽ hkôt man mẽ ixwÿr mō mẽ ã apôx anê. ãm hãmri na ka mẽ hkôt mō. Mẽ apê Ijaew kot amnhĩ nhĩpêx kuhpa hã amnhĩ nhĩpêx mẽ axãmnhĩx man mẽ ixwÿr mō. Tã ot pa mẽ Tirtũm noo mã ixkrĩ. Kam mẽ mãmri ÿ hã mẽ inhmã mẽmoj jarẽ pa mẽ ama. Anê.

Simãw Pêtre kot Konëre mã ujarënh

³⁴ Hāmri nhūm Simāw Pêtre Konēre kot kām amnhī jarēnhja ma nē mē kām awjarē nē mē kām:

—Nà ãm hāmri na Tirtūm mē akukamā tanhmā inhmā kapēr to. Xep kām mē ixpē Ijaew pix japê hkêt. Kām mē pahpiitā mē pajapê nē mē panhîpêx o axpēn pyrāk.
³⁵ Koja ahpÿnhā pyka piitā hkôt mēhō mē ixpyrà nē kēp Ijaew kêt tāā hkôt amnhī xām nē hā hpijaàm pē kām mex o mex ã harē nē tām amnhī nhîpêx. Hāmri nhūm Tirtūm ja hā omu nhūm ja kām mex nē.

³⁶ —Na pre ra mē ixpē Ijaew mā tanhmā Kra Jesus Kris jarēnh to. Jesus kot mē panē htyk kukwak ri na hte mē ixte hkôt amnhī xunhwÿr xwÿnhjê ho hkra. Tā ra määnēn ã mē apē Ijaew kêt xwÿnhjê mā ã amnhī jarēnh anē nē Jesus htyk kukwak ri mē ate mē ixpyrà nē hkôt amnhī xunhwÿr xwÿnhjê ho hkra. Jakamā Jesus Krisja kēp mē pahpiitā mē panhō Pahihti.

³⁷⁻³⁸ —Mān ka prem ra harēnh ma. Mē ixpē Ijaew nhō pika pē Jutej kumrêx kām na pre Juāw Paxisja Jesus kukamā mē kām harē nē mē hkrā kumrār o pa. Mē piitā mē kot amnhī tomnuj kaga nē Tirtūm kôt amnhī xunhwÿr ã mē omunh xà hkôt mē hkrā kumrā. Jesusja krī pē Najare kamā na pre hprêk. Tā hwÿr na pre Tirtūm amnhī Karō mē nhūm wrÿ nē hkarō mā axà nē hkôt pa ho pa. Jakamā nhūm ahpumunh o ahpumunh nē ma krī piitā hkôt tanhmā mē ho mex to ho ri mē hkôt pa. Pika pē Garirej kumrêx kamā mē piitā ri mē kām Tirtūm kapēr jarēnh o pa. Nē mēkarōmnuti kot Satanasti nhÿ hā tanhmā mē ho xwÿnhjaja nhūm mē nē mēkarōmnuti japôx o pa. ã na pre Tirtūm nhÿ hā amnhī nhîpêx anhÿr o pa.

³⁹ —Tā Jesus nhÿ hā hkrajê jahkre ho mē ixpa xwÿnhjaja na pa prem kot ri tanhmā amnhī to ho pa hā omunh par o ri hkôt ixpa. Mē ixpē Ijaew nhō pyka kamā nē mē inhō krī pē Jerujarē kamā kot ri tanhmā amnhī nhîpêx to ho paja pa prem piitā omunh o hkôt ri ixpa. Tā nhūm prem axtem nē mē ixpē pī kahpa hā kunhō nē kupī.

⁴⁰ Hāmri nhūm htyk o apkati axkrunēpxi nhūm Tirtūm akupÿm ho htîr nē akupÿm mē ixwÿr kumē pa prem akupÿm htîr kām omu. ⁴¹ No nhūm mē piitā akupÿm htîr

kām omunh kêt nē. ãm mē ixwÿr pix na pre kato nē mē ixkutā apku pa mē papxipixjaja akupÿm htîr ã omu. Hāmri nhūm Tirtūm mē ixte ma mē piitā mē kām akupÿm htîr ã harēnh o ri ixpa kaxyw mē ixrê. ⁴²⁻⁴³ Amnepêm Tirtūm nhÿ hā kapēr jarēnh o mē pa xwÿnhjaja na prem Jesus kukamā tanhmā hā kagà hto nē mē kām harēnh o pa. Nē mē kām:

Koja nhÿrmā mēhōja man mē pahwÿr wrÿ nē mē panē tanhmā amnhī nhîpêx to. Ka mē atō amnhī kaxyw hkôt ajamaxpēr nē hkôt amnhī xām hā koja Tirtūm ja hā apumu nē mēhō kot tanhmā mē panē amnhī nhîpêx to xwÿnhhta kukwak ri amnhī katut kôt ate amnhī tomnuj rēnh pa nē axte kām hamaxpēr kêt nē. Anē.

Na pre Tirtūm nhÿ hā kapēr jarēnh o mē pa xwÿnhjaja Jesus kukamā ã harēnh nē hā kagà anē. Tā koja Jesus nhÿrmā akupÿn wrÿ hāmri nē mē htyk xwÿnhjê nē arī mē htîr xwÿnhjê mē pahto pimràatā tanhmā mē pajarēnh to. Mē pahte tanhmā amnhī nhîpêx to ho papa hā mē pahpumunh kôt tanhmā mē pajarēnh to. Hāmri nē Tirtūm mē wa kuri mē pahtîr tūm nē mē papa ho papa mā xwÿnhjê jarē nē määnēn wa kuri mē htîr tūm kêt xwÿnhjê jarē. Mē pahpiitā tanhmā mē pajarēnh to kaxyw na pre Tirtūm mē pakaxyw Jesus xām. Tā ã kot mē pajarēnh anhÿrja kukamā na pre mē ixte mē amā tanhmā harēnh to ho ixpa kaxyw mē awÿr mē ixrê. Mē ate kapēr mar nē tokyx Jesus kôt amnhī xunhwÿr kaxyw. Anē.

⁴⁴ Nhūm Simāw Pêtre ã mē kām ujarēnh anhÿr rôm nhūm Tirtūm mē kot mar o hkrī xwÿnhjê hwÿr amnhī Karō rē nhūm mē hwÿr wrÿ nē mē hkarō mā gjêx pa. ⁴⁵⁻⁴⁶ Hāmri nhūm mē Tirtūm mā mex o mex ã harēnh o hkrī. No ãm mē kapēr kām harēnh kêt nē. Mē kapēr kwÿ hō ho kām mex o mex ã harē. Aa mē kot mē kapēr mar kêt tā ra ho kapēr mex nē. Jakamā nhūm Jope rûm mē kot Simāw Pêtre hkôt mē mōr xwÿnhjaja. Ijaew kwÿ kot ra Jesus kôt amnhī xunhwÿr xwÿnhjaja amnhī jaèr pē ja hā mē omu nē axpēn mā:

—Hêxta waa nē. Mē kēp Ijaew kêt tā nhūm Tirtūm kot mē panhîpêx pahpyrà nē

mē hwÿr amnhĩ Karō rē nhūm mē hwÿr wrÿ nē mē kām agjē. Nà ãm hāmri na mē pahpyrà nē ã mē hipêx anē. Anē.

Hāmri nhūm Simāw Pêtre mē kuma nē mē kām:

⁴⁷ —Kwa pu mē hkrā kumrār kurē kumrēx. Ra Tirtūm Karō kot mē pahpyrà nē mē hkarō mā gjēx kēnā kot kêt mēhō mē nē tanhmā mē pahpê àmnàr to. Ra mē kot mē pahpyrà nē Jejus kôt amnhĩ xunhwÿr kēnā. Anē.

⁴⁸ Hāmri nē Konēre mē hkwÿjē mā kām:

—E kot paj mē ate Jejus Kris kôt amnhĩ xunhwÿr ã mē akrā kumrā. Anē.

Hāmri nē mē hkrā kumrār pa nhūm mē Simāw Pêtre mā kām:

—Kwa kormā anojarēt kêt nē. Kritpēm ri mē ixkôt ri apa hã atã apkati grēre nē kormā ma akupÿm mō. Anē.

Hāmri nhūm mē kuma nē mē hkôt ri pa hã apkati grēre hāmri nē nojarēt nē ma akupÿm mō.

11

Simāw Pêtre kot hkwÿjē mā Konēre jarēnh Atre 10.1-48

¹⁻² Hāmri nhūm Simāw Pêtre ma akupÿm mō. Jutej kamā krĩ pē Jerujarē wÿr ma akupÿm mō hāmri nē pōj. Hāmri nhūm Jutej kamā Jejus nhÿ hã mē ahkre xwÿnh maatijē mē mē kot Jejus kôt amnhĩ xunhwÿr xwÿnhjaja Ijaew kêt xwÿnhjē jarēnh ma. Konēre mē hkwÿ kot mē urāk nē Jejus kôt amnhĩ xunhwÿr ã mē harēnh ma. Jakamā nhūm Simāw Pêtre akupÿm mē hwÿr pōj nhūm mē omu nē mē hã àhkukjēr kurē kumrēx. Hāmri nhūm mē hkwÿjaja mē hã kām akir nē kām:

³ —Kwa mē pahpê Ijaew pyrà nē mē kot amnhĩ my kwrÿt kà jakār kêt tā ka mēmo hwÿr mē hwÿr mō mē kuri pōj nē mē kutã apku. Anē.

⁴ Hāmri nhūm Pêtre tee ri mē kuma hāmri nē hprĩ hã mē kām amnhĩ jarē. Nē tanhmā Tirtūm kot kām Ijaew kêt xwÿnhjē jarēnh to hã mē kām harē nē mē kām:

⁵ —Kwa mē ã ri ajamaxpēr anhÿr kêt nē. E pa mē amā amnhĩ jarē ka mē inhma măn. Nà na pa pre jãã Jope kamā Tirtūm mā amnhĩ jarēnh o nhÿ nē te ixpimtir kām mēmoj pumunh pyràk. Nhūm mēmoja te

mē hpiro xà pyrà nē kaxkwa rūm ixwÿr wrÿk o mō pa ixprĩ hã omu. ⁶ Nhūm kamā mry piitã. Mry xoprē nē mry xuwapô nē mry hpar o ri pa xwÿnhjaja nē mry htu mÿr pē ri pa xwÿnhjaja nē àk. Nē mē pahte hkur xwÿnhjaja nē mē pahte hkur kêt xwÿnhjaja. ⁷ Kamā mry piitã pa omu. Hāmri nhūm Tirtūm inhmā: “Pa Simāw Pêtre? Măn ka ra amā prām nē nà? E kànhmā xa nē axàmnhÿx māmri mryta ò kapi nē apĩ nē ho anē nē aku. Piitã mē ate hkur mā mex.” Anē.

⁸ —Pa tee ri kuma nē kām: “Kwa Pahi Maati. Mē ixpê Ijaewjaja mē ixte mryja piitã hkur kêt. ãm hkwÿ hpix na pa htem kuku. No ja hkwÿ aa mē ixte hō hkwÿ hkrēr kêt.” Anē. ⁹ Nhūm inhmā: “Nà nom kot anhÿr tãã. Kot paj pam amā mēmoj jarē ka kamā anhōkre kahak kêt nē. Jakamā e māmri amnhĩm hō kapi nē apĩ nē ho anē nē axàmnhÿx hkwÿ hkrē.” Anē.

¹⁰ —Na pre ã Ijaew kêt xwÿnhjē hwÿr inhmōr kukamā inhmā karō ho axkrunēpxi anē. Nom hã kuxi nē inhmā mē pahte mry kur kēêta jarē. Hāmri nhūm mē hpiro xàja ma akupÿm kaxkwa hwÿr apĩ nē kakrām axà nē akunok. ¹¹ Hāmri nhūm Ijaew kêt xwÿnhjaja mē ixwÿr axkrunēpxi nē mra nē pōj. Konēreja Sejarej rūm ixwÿr mē rēnh xwÿnhjaja nhūm mē mra nē ixwÿr pōj. ¹² Hāmri nhūm Tirtūm Karō ma mē hkôt inhmē. Mē kēp Ijaew kêt tā nhūm ixàmnhÿx ma mē hkôt ixpa kaxyw mē hkôt inhmē pa ma mē hkôt mō. Nhūm Jope kamā mē kot Jejus kôt amnhĩ xunhwÿr xwÿnh kwÿjaja kēp 6ja ma mē ixkôt mō. Pa mē mō nē Sejarej kamā Konēreja wÿr pōj. ¹³ Hāmri nhūm mē ixpumu nē mē inhmā amnhĩ jarē. Tirtūm kapēr o wrÿk xwÿnh kot hwÿr wrÿk nē òrkwÿ hwÿr àr nē tanhmā kām kapēr toja nhūm inhmā harē. Na xep pre kām: “E kēr ka ma Jope hwÿr amā mē àpēnh xwÿnh kwÿjē rē kē mē ma hwÿr mō. Hāmri nē kamā Simāw Pêtre japrô nē man akupÿn awÿr o mō kē tanhmā mē amā ujarēnh to. ¹⁴ Koja mē amā tanhmā mē apē Tirtūm kra hprām xàj tanhmā mē ate amnhĩ nhīpêx to hã mē amā karō ka mē ama nē mar tÿx nē hkôt amnhĩ nhīpêx. Ka mē anhōrkwÿ kamā akwÿjē mē apimràatã ama nē mar tÿx nē. Hāmri nē kot mē amā hã karō xà hkôt amnhĩ nhīpêx nhūm Jejus mē ate amnhĩ

tomnuj pê mẽ apytâr pa.” Anê.

—Na xep pre ã Tirtûm kapêr o wryk xwÿnhja kãm ijarênh anê. Jakamã nhũm ixwÿr jajê rê pa ma mẽ hkôt mō. ¹⁵ Hãmri nê kormã mẽ kãm tanhmã Jejus jarênh to. Tanhmã kot mẽ panê amnhĩ nhĩpêx to hã harê. Nê kormã mẽ kãm ixujarênh o ixãm rôm nhũm Tirtûm Karō te wam kot mẽ panhĩpêxta pyrà nê mẽ hwÿr wry nê mẽ hkarō mã gjêx pa. ¹⁶ Pa ja hã mẽ omu nê Pahihti Jejus kot akupÿm kaxkwa hwÿr nojarêr nê tanhmã mẽ pamã kapêr tota mã ijamaxpêr kurê kumrêx. Na pre mẽ pamã: “Finat Juãw Paxis na pre hte gô ho mẽ hkrã kumrâr o pa. Tã koja Tirtûm ta hpãnhã mẽ awÿr amnhĩ Karō rê nhũm mẽ akarō mã agjê.” Anê.

—Ã na pre Pahihti Jejus akupÿm nojarêr nê mẽ pamã kapêr anê. Jakamã pa ã kot mẽ hipêx anhÿr ã mẽ omu nê ã kapêr anhÿrja mã ijamaxpêr kurê kumrêx. ¹⁷ Na pu prem Pahihti Jejus Kris kôt amnhĩ xunhwÿ nhũm Tirtûm ja hã mẽ pahpumu nê mẽ pahwÿr amnhĩ Karō rê. Tã te kot mẽ panhĩpêxta pyrà nê mããnhê Ijaew kêt xwÿnhtajê hwÿr kurê nhũm mẽ hkarō mã agjê. Mẽ kêp Ijaew kêt tã nhũm mẽ pahpyrà nê mẽ hwÿr kurê nhũm mẽ hkarō mã agjê. Tirtûm tãm kot amnhĩ krã hkôt mẽ hwÿr rênh kênã kot pa kêt mẽ nê tanhmã kêp ixãmna to. Anê.

¹⁸ Nhũm pre ã Simãw Pêtre mẽ kãm amnhĩ jarênh anê nhũm mẽ kuma nê tãm hamaxpêr nê hkĩnh nê. Nê axte mẽ hã tanhmã kãm nê hkêt nê. ãm mẽ hã Tirtûm mã mex o mex ã harê. Hãmri nê axpên mã:

—Nà ãm hãmri. Mẽ kêp Ijaew kêt tã na prem Jejus kôt amnhĩ xunhwÿ nhũm Tirtûm kot mẽ panhĩpêxta pyrà nê amnhĩ katut kôt mẽ kot amnhĩ tomnuj rênh pa. Nhÿrmã wa hkuri mẽ pahpyrà nê htĩr tũm nê pa ho pa kaxyw nhũm ã mẽ hipêx anê. Nà ãm hãmri na ã kot mẽ panhĩpêx pyrà nê mẽ hipêx anê. Anê.

*ãxiok kamã Jejus kwÿ jarênh
Atre 4.36-37*

¹⁹ Tã ra mẽ kot kên o Estewãw kapêr o hpĩr xwÿj ri mẽ kot ã hipêx anhÿrta pyrà nê mẽ kot Jejus kôt amnhĩ xunhwÿr xwÿnhjaja omnuj tÿx o pa. Jakamã nhũm mẽ hkwyjaja

mẽ umaj ma ahpÿnhã krĩ hkwy hkôt pi-grãnh pa. Wênĩs wÿr nê Sipre hwÿr nê ãxiok hwÿr nhũm mẽ ma ahpÿnhã krĩ hkwy hkôt angrã nê kamã pa ho pa. Nê mẽ kãm tanhmã Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

²⁰ Tã hãmri nhũm mẽ hkwyjaja Sipre mẽ Sirên rũm ãxiok hwÿr pan pøj. Hãmri nê kamã mẽ kêp Ijaew kêt xwÿnhjê mã Pahihti Jejus kot amnhĩ nhĩpêx jarênh o pa. ã mẽ kot amnhĩ nhĩpêx anhÿr jakamã na mẽ ra ahpÿnhã ri mẽ kãm harênh o ri pa. Ijaew mã nê mããnhê Ijaew kêt xwÿnhjê mã ²¹ nhũm mẽ ma mẽ hkôt ri Pahihti Jejus nhÿ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nê amnhĩ nhĩpêx tũm kaga hpa nê hpãnhã amnhĩ kaxyw Jejus kôt hamaxpêr nê hkôt amnhĩ xunhwÿ.

²² Hãmri nhũm Jerujarê kamã Jejus kwÿjaja mẽ harênh ma nê mẽ hwÿr Panãpe mẽ. ãxiok hwÿr mẽ hwÿr kumê. Ma mẽ hwÿr mōr nê Jejus kôt mẽ hamaxpêr o hihtÿx kaxyw. ²³ Hãmri nhũm ma mẽ hwÿr mō nê mẽ hwÿr pøj nê mẽ omu. Tirtûm kot mẽ ho mex ã mẽ omu hãmri nê mẽ ÿ hã hkĩnh nê. Nê mẽ kãm:

—Nà ãm hãmri na ka mẽ ra Jejus kôt amnhĩ xunhwÿ nê hkôt amnhĩ nhĩpêx mex o ri apa. Tã kêt ka mẽ ãm kapêr kôt pix mã ri amnhĩ nhĩpêx rãhã ho ri apa nê aa hkaga hkêt nê. Anê.

²⁴ Panãpeja na pre tãm amnhĩ nhĩpêx o pa. Nê amnhĩ kaxyw Jejus kôt pix mã hamaxpêr mex o pa. Nê Tirtûm Karō hkôt amnhĩ nhĩpêx rãhã jakamã na pre hte ÿ hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nê ohtô nê Jejus kôt amnhĩ xunhwÿ.

²⁵ Tã nhũm Panãpe ãxiok rũm kato nê kot Sawti japrôr kaxyw ma krĩ pê Tas hwÿr mō. ²⁶ Hãmri nê hwÿr pøj nê Sawti pumu nê haprô nê ma akupÿm amnhĩ kôt ãxiok hwÿr o mō. Hãmri nê kamã mẽ kot Jejus kôt amnhĩ xunhwÿr xwÿnhjê hkôt wa ri pa hã amgrã pyxi nê hapêx. Nê mẽ ho ohtô nê ri mẽ kãm Jejus kapêr o mẽ ahkre ho ri mẽ hkôt pa. Jakamã nhũm krĩ nhō xwÿnhjaja mẽ kot Jejus kôt amnhĩ nhĩpêx

xwÿnhjê pumu nê mē hā mē hixi rē nē mē harēnh o: “Kris tō nē htōxjaja” anhÿr o mē harē. Āxiok kumrēx kām na prem ā mē kot Jejus kōt amnhī xunhwÿr xwÿnhjê jarēnh anē. Jakamā nhūm mē piitā ā mē harēnh anhÿr o pa.

²⁷ Tā nhūm Panāpe mē Sawti wa kormā āxiok kamā paja rōm nhūm Tirtūm nhÿ hā kapēr jarēnh xwÿnh kwÿjaja mē hwÿr mran pōj. Jerujarē rūm mē hwÿr mran pōj. ²⁸ Hāmri nhūm mē piitā mē kot mē kapēr mar kaxyw mē hwÿr akuprō. Jakamā nhūm hō pē Akapōja kànhmā xa nē tanhmā mē kām ujarēnh to. Tirtūm Karō nhÿ hā mēmoj kukamā mē kām awjarē nē mē kām:

—Kwa okora kēr ka mē axkām ajamak rom. Koja tokyx pika piitā hkōt mē apkur xā hā mēōja mē kēp hkryre nē mē piitā mē hipêx kēt nē. Anē.

Tā nhūm gaa nē ujarēnh xāja kōt mēmoj ā amnhī nhīpêx anē. Kormā Pahihti Krawti kot mē ho amnhīptār ri nhūm mēmoj ā amnhī nhīpêx anē. No nhūm kormā ā amnhī nhīpêx anhÿr kēt ri nhūm Akapōja kukamā ā mē kām ujarēnh anē. ²⁹ Hāmri nhūm mē kuma nē tee ri Jutej kamā Jejus kōt mē hkwyjê hkukamā hamaxpēr nē axpēn mā:

—E kwa pu mē Jutej kamā Jejus kōt mē pahtō nē pahtōxjê mā pahkàxpore hkwy gō kē mē ho amnhīm awjaprō nē hkur o pa. Anē.

Hāmri nē mē kaxyw kàxpore hkwy ho akuprō. Nhūm mē hikàxpore hkryre xwÿnhjaja ām mē kām ho hkryre nē kugō nhūm mē hikàxpore rūnh xwÿnhja mē kām ho rūnh nē kugō. ³⁰ Jakamā nhūm mē ho hpikuprōnh pa nē Panāpe mē Sawti wa kot mē hwÿr o mōr nē mē kām ōr kaxyw wa kām kugō. Hāmri nhūm wa hamÿ nē ma Jutej kamā Jerujarē hwÿr mē hwÿr o mō. Hāmri nē hwÿr pōj nē mē kot Jejus kapēr o mē ahkre xwÿnhjê mā kugō. Hāmri nhūm mē kām Jejus kōt mē htō nē htōxjê mā o anhgrā nhūm mē hamÿ nē hkīnh nē ho amnhīm awjaprō.

12

Mē kot Simāw Pêtre pynēnh nē haxār ā mē

harēnh

Matêwre 18.19-20

¹ Tā nhūm mē ō pahi Eroxa ō pōristi mā Kris kwÿjê hā amÿnê nhūm mē mē hipêx kati nē nhūm mē amnhī xā htÿx kamā hamak o pa. ² Juāw tō Xiakreja nhūm mē pahi Erox nhÿ hā unē nē hkanhwÿr o kupī. ³ Hāmri nhūm Ijaew kām ja mex jakamā nhūm pahi Erox hpānhā mē kām Simāw Pêtre hā amÿnê nhūm unē nē haxā. Mē kot pāwti kaxkrit kēt kur ā mē hkīnh xā hā arīgro pē Pasja ā nhūm prem unē. ⁴ Na pre Erox Simāw Pêtre hkukamā hamaxpēr o:

—Nā koja mē hkīnh hapêx pa Ijaew nom kupī nhūm rī amnhī pumu. Anē.

Hāmri nhūm pōristi kot Simāw Pêtre jamār xwÿnhjaja kēp 16. Nhūm mē axpēn pānhā kēp 4 kapēn nē hamār rāhā ho kuhē. ⁵ Nhūm arī mē hagjēnh xā kamā hkrī ho hkrī. Hāmri nhūm Kris kōt htō nē htōxjaja harēnh ma nē tee ri hkukamā hamaxpēr hāmri nē axpēn wÿr akuprō nē ho Tirtūm wÿr rāhā ho hkrī.

Tirtūm kapēr o wrÿk xwÿnh kot Simāw Pêtre kator ā harēnh

⁶ Tā nhūm ra mē hkīnh hapêx nhūm kamāt. Hāmri nhūm pahi Erox kot tanhmā Simāw Pêtre ho xā hā arīgroja wÿr nhūm kamāt nhūm pōristijaja arī mē hagjēnh xā kamā hamār mex o kuhē. Nhūm kuri wa hamēxkrut nē akutā hijē nē hamār o nō. Kàx o akutā kām ē nē wa ho nō nhūm wa hkaêx kām htÿx gōr nē nō. Nhūm ja wa hakwa krem māānēn hamār o xa. ⁷ Puh nhūm Tirtūm kapēr o wrÿk xwÿnhjê hōja mē hwÿr axā nē wrÿhtak rax kām xa. Hāmri nē Simāw Pêtre grēk nē kumra nē kām:

—Pa Simāw Pêtre? E kwa tokyj kànhmā xa pu mō. Anē.

Hāmri nhūm hkrākato nē omu nē kànhmā ām kurē kumrēx nhūm kaxprexā hā kàxja axrē nē pykap rôrōk nē hikwÿ. No nhūm kuri pōristi wa nōr xwÿnhhta wa mar kēt nē. Wa arī ōt tÿx nē nō. ⁸ Hāmri nhūm Tirtūm kapēr o wrÿk xwÿnhja Simāw Pêtre mā:

—E tokyx anhō kamīs jaxā nē amnē ixkōt tē pu pakato nē ma tē. Anē.

⁹ Hāmri nhūm kamīs nē hparkà jaxā nē ma hkōt tē. No ām kormā amnhī pumunh mex kēt nē. Te hpimtir kām ā kot amnhī nhīpêx anhÿr pyrāk ā amnhī kamnhīx.

¹⁰ Hāmri nhūm wa hakwakrem pōristi wa kot hamār o wa ām xwŷnhja hānh wa tē nē wa hakre nē hpānhā ihōja wa hānh wa tē no nhūm mē ōt tŷx nē hkrī nē wa omunh kêt nē. Nhūm wa hakwakre nhītep xà hkôt wa tēn kato nē hpānhā krī nē kahê xà hā hakwakreja wŷr wa tē. Hāmri nhūm tām wa kām amnhī kahê xà mē nhūm wa kato nē pry hā tē. Ja kôt nhūm Tīrtūm kapēr o wryk xwŷnhja akunok nhūm Simāw Pêtre axte omunh kêt nē. ¹¹ Hāmri nē hprī hā amnhī pumunh kurê kumrêx nē hamaxpēr o:

—Kwa te ixpimtir kām ā ixte amnhī nhīpêx anhŷr pyrāk tā xep ixpimtir kêt. Tīrtūm na ixwŷr kapēr o wryk xwŷnhja mē nhūm ixwŷr wry nē mē kēp ixkator. Pahi Eroxo ra kot ixpīr nhūm ixkwŷ Ijaew kām ja prām tā nhūm mē kēp ixkator. Nà ām hāmri na Tīrtūm ā mē kēp ixkator anē. Anē.

¹² Hāmri nē Marir nhōrkwŷ hwŷr htēm kurê kumrêx. Juāw Makre katorxà Marirja nhūm ōrkwŷ hwŷr tē nhūm mē ra kamā hpikuprōnh rax nē ho Tīrtūm wŷr o hkrī nhūm tām mē hwŷr tē. ¹³ Hāmri nē kormā kapôt ā hakwa krem mē kām kahê xà tatak o xa nhūm ixkre kamā mē kām āpēnh xwŷnh Rotreja kuma nē hwŷr tē. ¹⁴ Hāmri nhūm kām kapēr nhūm amnhī jaēr pē kuma nē hkīnh nē. Nē kormā kām kahê xà mēnh kêt ri ma akupŷm tē nē mē kot ho Tīrtūm wŷr xwŷnhjê hwŷr axà nē mē kām:

—Xê pēr Simāw Pêtre na tē nē kapôt ā hakwakrem xa nē inhmā kapēr.

¹⁵ Hāmri nhūm mē tee ri kuma nē kām:

—Kwa arī mē hagjēnh xà kamā hkrī kēnā. Mān ka tanhmā amnhī krā amnhī to hā na ka ri atŷx ā akapēr anē. Anē.

Hāmri nhūm mē kām:

—Ma tanhmā kot pa kêt ri ixkrā amnhī to? ām hāmri na pa mē amā harē. Mē kam nē mra nē omu. Anē.

Nom nhūm mē kuma nē ām kuma nē kām:

—Nà tām kêt. Kaŷkwa rūm Tīrtūm mā hamār o pa xwŷnh mān amā kapēr nom tām kêt. Anē.

¹⁶ Rōm nhūm Simāw Pêtre arī hakwakre tatak o xa. Hāmri nhūm mē jatā hwŷr mra nē kām kahê xà mē nē amnhī jaēr pē omu nē hkīnh nē. ¹⁷ Hāmri nhūm kànhmā mē kām ĩhkra hpē nē mē ho hpinhkrēnh pa nē mē kām:

—Nà Tīrtūm na ixwŷr kapēr o wryk xwŷnhja mē nhūm ixwŷr wry nē pōristi pē ixkator. Anē.

Hāmri nē mē kām:

—E kēr ka mē Xiakre nē Jejus kôt mē pahtō nē pahtōxjê mā ijarē kē mē ijarēnh mar kurê kumrêx. Nom kot paj ixkato nē ma krī hō hwŷr mō. Anē.

Hāmri nē mē kēp kato nē ma mō.

¹⁸ Tā nhūm apkati nhūm pōristi kot hamār o hkrī xwŷnhjaja hkrā hapōj nē tee hapēr nē nhŷri omunh kêt nē. Hāmri nē tee ri amnhī kukamā hamaxpēr o kām ma htŷx kumrêx nē axpēn mā:

—Kwa tanhmā na pre we amnhī to nē mē pahpē akunok? Tanhmā koja we pahi Eroxo hā mē pahkukja pu mē harēnh to? Anē.

¹⁹ Hāmri nhūm pahi Eroxo hpikunor ā harēnh ma nē axtem pōristi hkwyjê mā anē nhūm mē mra nē tee ri mē hagjēnh xà kamā hapēr nom nhŷri omunh kêt nē. Hāmri nhūm Eroxo mē kot hamār xwŷnhjê kamā gryk tŷx kumrêx nē amnhī wŷr mē hā karō nē mē kām:

—Kwa nok? Mē ate hamār rāhā ho akuhê hā ixte mē amā karō htā nhūm tanhmā amnhī to nē akunok. Nà kot paj mē anhīmex ka mē rī amnhī pumu. Anē.

Hāmri nhūm mē tee ri kām amnhī tā āprār kaprŷ nhūm mē hā amŷnē nhūm mē ho kator nē ma mē o mra nē mē himex. Hāmri nhūm pahi Eroxo Jutej rūm kato nē ma Sejarej wŷr mō nē hpānhā kamā pa ho pa.

Pahi Eroxo tanhmā htyk to hā harēnh

Wam Pêtre 1.24-25

²⁰ Krī pē Xir mē Sito wa kamā mē pa xwŷnhjaja na pre htem pahi Eroxo nhō pyka hwŷr pa nē mē kēp amnhīm apkur xà hā mēō japrōr o pa. Tā nhūm Eroxo kot mēmoj mŷrapē mē kamā gryk jakamā nhūm mē tee ri mē kēp ujaprōr kaxyw mē hwŷr mra nom nhūm mē kām mēmoj kwŷ ho wēnē hkêt nē. Hāmri nhūm mē tee ri amnhī kukamā hamaxpēr nē pahi Eroxo nhō kōwenatō Pratōja wŷr mra nē kām:

—E awŷr na pa mē mra. Kwa mē ixyr pē pahi Eroxo mā tanhmā akapēr to kē ama nē mē ixkamā gryk kêt nē. Pa mē axte mē awŷr mra nē mē apē mēmoj kwŷ japrōr o ri ixpa. Anē.

²¹ Hāmri nhūm mẽ kuma nẽ hwỳr tẽ nẽ mẽ yr pẽ tanhmã kãm kapẽr to nhūm kuma hāmri nẽ kot tanhmã mẽ kãm kapẽr to kaxyw mẽ kãm arĩgro hta.

Tã nhūm ra kot arĩgro hyr xwỳnhhta kato nhūm Erox kệp pahi hã ê mex jaxà nẽ tẽ nẽ kệp pahi hã mẽ hkrĩ xà kamã nhỹ nẽ tanhmã mẽ kãm kapẽr to. ²² Mẽ kãm kapẽr ryy nẽ. Hāmri nhūm mẽ kuma nẽ hêx rom kãm mex o mex ã harẽ. Nẽ kỳx pẽp xpẽn mã harẽ nẽ harẽnh o:

—Kwa pahi Erox kệp mẽ panhĩõ hkêt. Pẽr kaxkwa rũm Mẽpahpãm na pre mẽ pahwỳr wrỳ nẽ ã mẽ pamã kapẽr mex anẽ. Anẽ.

Hāmri nẽ te kệp Tĩrtũm pyræk o hipêx nẽ kãm mex o mex ã harẽ. Nom hêx rom ã harẽnh anẽ. Kot mẽ mar nẽ kãm mẽ hkĩnh nẽ akupỹm mẽ kãm mẽmoj to wẽnê hprãm xàj nhūm mẽ hêx rom ã xpẽn mã mex ã harẽnh anẽ. ²³ Hāmri nhūm mẽ kuma nhūm ja kãm mex nẽ nhūm hkĩnh nẽ mẽ mar o nhỹ nẽ kệp Tĩrtũm pyræk ã harẽnhja nẽ tanhmã mẽ kãm nẽ hkêt nẽ. Jakamã nhūm tee ri amnhĩ tã omu nẽ hwỳr kapẽr o wrỳk xwỳnhjê hõ mẽ nhūm hwỳr wrỳ nẽ tanhmã ho nhūm õhy kamã kutõj rax nẽ htyk tokyx anẽ.

Panãpe mẽ Sawti wa akupỹm ãxiok hwỳr mõi ã wa harẽnh

Atre 11.27-30

²⁴ Tã nhūm mẽ ra ohtõ nẽ Tĩrtũm Kra Jejus kot tanhmã mẽ panê amnhĩ nhĩpêx to hã harẽnh ma nẽ hkôt amnhĩ xunhwỳ.

²⁵ Hāmri nhūm Panãpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarẽ hwỳr o mõi nẽ mẽ kãm kugõ. Hāmri nẽ ma akupỹm ãxiok hwỳr nojarêt nẽ war amnhĩ kôt Juãw Makre o mõi. Hāmri nẽ mẽ ma mõi nẽ akupỹm mẽ hwỳr pøj.

13

Tĩrtũm kot Panãpe mẽ Sawti wa hyr

Atre 9.15-16; Rõmãn 1.1

¹ ãxiok kamã Kris kôt mẽ kot xpẽn to htõjaja kot Tĩrtũm nhỹ hã kapẽr o mẽ ahkre ho pa xwỳnhjê nhĩxi ã kot anhỹr. Na pre Panãpe nẽ Sawti nẽ Simeãw kã htykre nẽ Rusti pẽ Sirẽn nhõ xwỳnh nẽ pahi Erox kràmnhwỳ Mãnahẽja. ² Jakamã nhūm prem mẽmo arĩgro hã xpẽn wỳr akuprõ

nẽ Tĩrtũm mã mex o mex ã harẽnh kaxyw apkur kêt rãhã kãm amnhĩ jarẽnh o hkrĩ. Hāmri nhūm Tĩrtũm Karõ mẽ kãm tanhmã kapẽr o amnhĩrit to nẽ mẽ kãm:

—E kêt ka mẽ Panãpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

³ Hāmri nhūm mẽ kuma nẽ wa hyr kurê kumrêx nẽ wa himõk ã mẽ ìhkra jaxwỳ nẽ wa ho Tĩrtũm wỳ. Hāmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhūm wa ma mõi.

Wajaga kot Jejus nẽ hkràmnhwỳ kurê hã harẽnh

Atre 8.9-24

⁴⁻⁵ Tã nhūm Tĩrtũm Karõ krĩ pẽ Serêw wỳr Panãpe mẽ Sawti wa kumẽ nhūm wa ma hwỳr mõi. Nẽ amnhĩ kôt Juãw Makre ho mõi. Kot tanhmã wa ho ajuta hto ho wa hkôt pa kaxyw. Hāmri nẽ wa mẽ mõi nẽ Serêw wỳr pøj nẽ pàr krem axà nẽ ma gõ hipòk pẽ Sipre hwỳr mõi. Hāmri nẽ gõ hipòk ã krĩ pẽ Saramĩn wỳr pøj nẽ Ijaew nhõ Tĩrtũm kapẽr o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harẽnh o wa xa.

⁶⁻⁸ Tã nhūm mẽ krĩa rũm kato nẽ hpãnhã gõ hipòk kôt mõi nẽ hatur xà kamã krĩ pẽ Papos wỳr pøj. Hāmri nẽ kamã wajaga Pajejus pumu. Gresjê kapẽr kãm hixi pẽ Erĩm. Erĩm haxwỳja kệp Ijaew. Na pre hte hêx rom te kệp Tĩrtũm nhỹ hã kapẽr jarẽnh o pa xwỳnh pyræk o amnhĩ nhĩpêx nẽ ma mẽ kãm ujarẽnh o ri mẽ hkôt pa. No ãm mẽ kãm amnhĩ to hêx o pa. Gõ hipòkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panãpe mẽ Sawti wa harẽnh ma nẽ kãm wa kapẽr mar prãm nẽ wa kot kãm Tĩrtũm kapẽr jarẽnh kaxyw amnhĩ wỳr wa kuwỳ. Nom nhūm hkràmnhwỳ wajaga Erĩmja kãm wa hkĩnh kêt nẽ wa nê kãm kapẽr kãm hihtỳx nẽ kãm:

—Kwa nà wa kapẽr mar kêt nẽ. Kot kaj war ama nẽ wa uræk nẽ amnhĩ kaxyw Jejus kôt ajamaxpẽr nẽ hkôt amnhĩ xãm. Kwarĩ wa kapẽr mar kêt nẽ. Anẽ.

⁹ Hāmri nhūm Sawti ra axtem pãnhã hixi. Ra hpãnhã kệp Pawre. Nhūm Tĩrtũm Karõ ra hkarõ mã àr jakamã nhūm ÿ hã wajagata

pumu nê wa nê hkràmnhwý mã kapêr ã kãm akir nê kãm:

¹⁰ —Tk. Kwa pêr apê Satanasti hkwy hã na ka ã wa inhnê kãm akapêr anê. Na ka hte mêmoj punuj pix kukamã ajamaxpêr nê mêmoj mex nê mêmoj no kupyw o apa. Tirtüm kapêr mex kumrêx tã ka axtem nê nê mêmoj hkurê ho ri apa. ¹¹ ã ate amnhĩ nhĩpêx anhÿrja mÿrapê koja Tirtüm tanhmã ato ka ano hkre nê arit kêt o atã apkati xohtô nê kãm ga. Anê.

Hãmri nhùm no hkre kurê kumrêx nê tee ri rit kaxyw no pikrar pÿnh o xa nom mêmoj pumunh kêt nê. Hãmri nê mêmoj kot hpa hã hpyr nê òrkwÿ hwÿr ho mör kaxyw ri amnhĩ pu hã mêmoj hapêr pênh o xa. ¹² Hãmri nhùm hkràmnhwý pahihtija tee ri ja hã omu nê amnhĩ kaxyw Jesus kôt hamaxpêr nê hkôt amnhĩ xãm kurê kumrêx. Hãmri nê Pawre mêmoj Panãpe wa kot tanhmã Tirtüm kapêr jarênh to hã wa kuma nê hamaxpêr o:

—Hêxta waa nê. Aa ixte ã mêmoj kapêr kot anhÿr mar kêt tã pa jarãhã kuma. Nã ãm hãmri na Jesus jarênhja. Anê.

Pawre mêmoj Panãpe ãxiok ò hwÿr wa mör ã wa harênh
Atre 15.38

¹³ Tã nhùm Pawre mêmoj Panãpe mêmoj Juãw Makre wa mêmoj krĩ pê Papos rüm kato nê hpãnhã ma pyka hõ hwÿr mō. Pär kãm ma pyka pê Pãpir wÿr mō nê kamã krĩ pê Perke hwÿr pøj. Hãmri nhùm Juãw Makre tanhmã hamaxpêr to nê tee ri axte wa hkôt mör kukamã hamaxpêr hãmri nê wa hkaga nê awjanã nê ma akupÿm Jerujarê hwÿr ahte mō. ¹⁴ Jakamã nhùm Pawre mêmoj Panãpe wa ahte Perke rüm kato nê hamũ pika pê Pisit kãm krĩ pê ãxiok wÿr mō nê hwÿr pøj. Nhùm Ijaew nhõ arigromnu pê sap kato nhùm wa Tirtüm kapêr o mêmoj ahkre xã hã ixkre hwÿr wa tã nê hwÿr axã nê nhÿ. ¹⁵ Hãmri nhùm mêmoj mêmoj kãm Tirtüm kapêr ã kagã htüm kwÿ kamã harênh o xa. Mojes mêmoj Tirtüm nhÿ hã kapêr o mêmoj pa xwÿnh kot kapêr ã kagã hkwy kamã nhùm mêmoj kãm kamã harênh o xa. Hãmri nê kamã harênh pa nhùm mêmoj ahkre xwÿnhja Pawreja wa omu nê wa hwÿr mêmoj mêmoj nhùm wa hwÿr tã nê wa kãm:

—E na mêmoj ijakre xwÿnhja war ate mêmoj inhmã axujarênh prãm nê mãmri mêmoj inhmã mêmoj jarênh kaxyw nhùm mêmoj war atã anê. Anê.

¹⁶ Hãmri nhùm wa kuma nhùm Pawre kãnhmã xa nê mêmoj hpinhkrênh kaxyw mêmoj kãm kãnhmã ïhkra nhùm mêmoj omu nê hpinhkrênh pa nhùm mêmoj kãm awjarê. Amnhĩ kwÿ pê Ijaewjê mêmoj mêmoj kêt Ijaew kêt xwÿnhjê kãm Tirtüm kÿnh xwÿnhjê mã nhùm mêmoj kãm awjarê. Nê mêmoj kãm kapêr rÿy nê. Tirtüm kot tanhmã mêmoj hkukamã Ijaew nhÿgêt nê pãmjê nhĩpêx to hã mêmoj kãm awjarê nê mêmoj kãm:

—E kot paj mêmoj amã awjarê ka mêmoj inhma. ¹⁷ Nã mêmoj ixpê Ijaew nhõ Tirtümja amnepêm na pre mêmoj ixpê Ijaew pãmjê rê. Kormã Ejit kãm mêmoj pa ri nhùm amnhĩ kaxyw mêmoj kurê nê mêmoj ho ohtô rax kumrêx. Hãmri nê mêmoj kaxyw hihtÿx jakamã Ejit rüm mêmoj kator pa. ¹⁸ Hãmri nê mêmoj ho mex rÿy ho mêmoj hkôt pa. Mêmoj kot kapôt ã ri pa hã amgrã pê 40 kamã mêmoj kot htÿx ri tanhmã amnhĩ nhĩpêx to ho pa htã nhùm mêmoj kamã ukapri rÿy ho mêmoj hkôt pa. ¹⁹⁻²⁰ Na pre mêmoj kãm pyka pê Kanaã kamã mêmoj pa xwÿnhjê nhÿmex pa. Kanaã kamã mêmoj pa xwÿnhja ahpÿnhã axpên kaxyw mêmoj krĩ pê 7ja nhùm mêmoj kãm mêmoj ho hapêx pa. Hãmri nê hpãnhã mêmoj inhÿgêtjê mã pykaja o hpigrãnh pa. Mêmoj ixpê Ijaew nhÿgêtjê mã ho hpigrãnh pa nhùm mêmoj kamã pa hã amgrã xohtô nê. Hã amgrã pê 450. Tã nhùm Tirtüm hpãnhã mêmoj kãm juisti hkwy rê nê mêmoj kaxyw mêmoj unhwÿ nhùm mêmoj ho pa. Tã nhùm hpãnhã Sãmuew mêmoj ho amnhĩptã nê mêmoj o pa. Kêt Tirtüm nhÿ hã kapêr jarênh o pa xwÿnhjê hõ nhùm Tirtüm mêmoj kaxyw ãm.

²¹ —Tã nhùm mêmoj ixpãmjaja axpên ma nê ra te krĩ hkwy kamã mêmoj urak nê mêmoj pahi kot Sãmuew pãnhã mêmoj ho amnhĩptãr o pa hprãm xaj amnhĩ to Tirtüm wÿ nê kãm: “Pa Tirtüm. Kwa mêmoj ixkaxyw pahi hõ xãm kêm mêmoj ixto amnhĩptãr o pa nã. Ja na mêmoj inhmã hprãm tÿx kumrêx.”

—Anhÿr o amnhĩ to hwÿr jakamã nhùm mêmoj kuma nê mêmoj kaxyw Sawti xãm. Kisti hkra na pre. Nê mêmoj inhÿgêt Pëjamĩ kanrêhã htãmnhwÿ na pre. Hãmri nhùm Tirtüm mêmoj kaxyw ãm nhùm kêt mêmoj pahi nê mêmoj ho amnhĩptãr o pa hã amgrã pê 40. ²² Tã nhùm

Tirtûm kator nê hpãnhã mẽ kaxyw Tawi xãm. Hãmri nê harênh o: “Nà Jese hkra Tawija na hte inhmã hprãm xà hkôt amnhĩ nhĩpêx mex o pa.” Anê.

²³ —Tã Jejus kêp Tawi hkanrêhã htãmnhwý na pre. Kukamã na pre Tirtûm mẽ ixpê Ijaew nhĩgêjtê mã harê nê harênh o: “Koja nhỹrmã Tawi hkanrêhã htãmnhwýjê hõ mẽ ate amnhĩ tomnuj pê mẽ apytã.” Anhỹr o hkukamã mẽ kãm harê. ²⁴ No nhũm kormã Jejus kot mẽ ixpê Ijaewjê mã amnhĩ to amnhĩrît kêt ri nhũm Juãw Paxis kumrêx hkukamã mẽ ixwýr mō nê mẽ inhmã Tirtûm kapêr jarênh o ri mẽ ixkôt pa. Nê mẽ ixte amnhĩ tomnuj kaga nê hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karõ ho pa.

²⁵ —Tã mẽ kãm kapêr o pa ryy nê ra hatur xãm mẽnh kaxyw nê amnhĩ tã tanhmã mẽ inhmã kapêr to nê mẽ inhmã: “Na ka mẽ ixpumu nê atýx Tirtûm kot mẽ akaxyw pa ixãm ã ixkamnhix nom pa hkêt. Kot mẽ pakaxyw ãm mã xwýnhhta kukamã na pa pre mō. Tãm kot amnhĩ to rax o ijakrenh. Nê kot amnhĩ to mex o kot ijakrenh. Jakamã na pa hte ãm kukwak ri ixpa nê amnhĩ tã hã ixpijaãm o ixpa.” Anê.

—Na pre ã Juãw Paxisja mẽ inhmã Jejus jarênh anhỹr o pa.

²⁶ —Tã kwa mẽ inhma mẽ apê Apraãw kanrêhã htãmnhwýjaja nê mẽ apê Ijaew kêt xwýnh kãm Tirtûm kĩnh xwýnhjaja. E mẽ apiitã ixkapêr ma nê kãm ajamaxpêr týx rãhã ho ri apa. Nà mẽ pahpiitã mẽ pakaxyw na Tirtûm kapêrja. Kot mẽ pahte amnhĩ tomnuj pê mẽ papytãr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nê hkôt amnhĩ nhĩpêxja na Tirtûm kãm hprãm. ²⁷ Nom Jerujarê nhõ xwýnhjê mẽ mẽ àptãr tũmrejaja na prem Jejus kêp Tirtûm kot mẽ pakaxyw ãm xwýnh ã harênh mar tã hkôt hamaxpêr kêt nê. Na pre htem mẽ inhõ arĩgromnu pê sap ã akuprõ nê axpên mã Tirtûm kapêr ã kagã htũm kamã ujarênh o hkrĩ. Kagãja kamã Tirtûm nhỹ hã mẽ kapêr o mẽ pa xwýnhjaja kot hprĩ hã Jejus jarênh nê hã kagã nhũm mẽ kot mar tã hprĩ hã mar

týx kêt nê. Jakamã na prem axtem nê mẽ kãm hã amýnê. Tirtûm nhỹ hã kapêr jarênh xwýnhjaja kot mẽ hkukamã mẽ harênh xãja kôt nhũm mẽ kot hpĩr kaxyw mẽ kãm hã amýnê.

²⁸⁻²⁹ Kot tanhmã amnhĩ tomnuj to hkêt tã nhũm mẽ amarĩ hã pahi Pirat wý. Kot mẽ kãm hã àmnênh nhũm õ pōristijaja kot hpĩr kaxyw nhũm mẽ hã kuwý nhũm mẽ kãm kupĩ. Ra Tirtûm kapêr ã kagã htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwýnhjaja pĩ kahpa nê ho wrý nê ma o tẽ nê kên kre kamã haxã. ³⁰ Tã nhũm Tirtûm akupým ho htĩr ³¹ nhũm xatã hkôt mẽ pa ho pa xwýnhjê hwýr hapôj. Kormã htyk kêt ri ra Garirej rũm Jerujarê hwýr hkôt mẽ pa ho mẽ pa xwýnhjê hwýr xatã mẽ hwýr hapôx o pa. Jao hã arĩgro xohtõ nê nhũm prem piitã omu. Tã mẽ tãmjaja na htem mẽ ixpê Ijaew mã harênh o pa.

³²⁻³³ —Amnepêm Tirtûm na pre mẽ ixpê Ijaew nhĩgêjtê mã tanhmã Kra Jejus jarênh to. Kormã mẽ pahwýr wryk kêt ri tanhmã mẽ kãm harênh to. Jakamã ra kot hkukamã harênh xà hkôt nhũm pre mẽ pahwýr wrý nê tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awýr mō. Amnepêm finat Tawi na pre Tirtûm kapêr kwý hã kagã. Tirtûm mex ã mẽ grer xà pê Sam 2ja kamã hã kagã. Te Tirtûm tãm Jejus mã kapêr pyrãk o hã kagã nê hã kagã ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrît. Anê.

Nhũm pre ã Tirtûm Jejus mã kapêr anê nhũm Tawi ô ri mẽ pamã hã kagã.

³⁴ —Amnepêm na pre Tirtûm tanhmã Kra Jejus kukamã harênh to. Mẽ kot hpĩr nhũm kot akupým ho htĩr kukamã hã amnhĩ jarê. ĩ hkro pymaj kot mẽ htykjê pê hkaxãr nê akupým ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt.

Anhỹr o hkukamã harênh xà hkôt akupým ho htĩr nhũm axte htyk kêt ã harê.

³⁵ —Ně kagàja nhām hō hō kot tanhmā Jejus jarēnh kute. Te Jejus tām Tirtūm mā kapēr pyrà ně harēnh o:

Ixpē Akra hā ixte akapēr kōt ri amnhī nhīpēx rāhā ho ixpa jakamā kot kaj ixpumunh mex pa inhī hkro hkēt ně. Aně.

Tirtūm kapēr ā kagà htūm kot ā Jejus jarēnh kot anhȳr. ³⁶ Nom ā Tawi jarēnh anhȳr kēt ně. Tawi na pre Tirtūm kapēr kōt amnhī nhīpēx mex o pa hāmri ně ty nhūm prem mẽ panhīgētjē nhīhkō hā haxà hāmri nhūm ĩ hkro ně hapēx.

³⁷ —Tā no Jejusja Tirtūm kot akupȳm ho htīr jakamā nhūm Tawi pyràn ĩ hkro ně hapēx kēt ně.

³⁸ —E mẽ inhmar tȳx ně ixkwȳjaja. Kra Jejus pix kukwak na hte Tirtūm amnhī katut kōt mẽ pahte amnhī tomnuj rē. ³⁹ Jakamā kot kaj mẽ ām Mojes kapēr kōt pix mā ri amnhī nhīpēx nhūm Tirtūm tee ri ja hā mẽ apumu ně amnhī katut kōt mẽ ate amnhī tomnuj rēnh kēt ně. Jejusja tapxipix na pre htyk o Tirtūm mā mẽ pahte amnhī tomnuj piitā hpānhā amnhīrer pa. ⁴⁰⁻⁴¹ Amnepēm na pre Tirtūm kapēr nhȳ hā kapēr xwȳnhjē hōja mẽ kām Tirtūm kapēr jarē ně hā kagà. Te Tirtūm tām mẽ kot kapēr ā hpēr o pikēnh xwȳnhjē mā kapēr pyrà ně mẽ kām:

E kot paj aa mẽ ate mẽmoj pumunh kēt ō ho aně.

Nhūm mẽhō mẽ amā harē ka mẽ harēnh ma ně ām ama.

Nhūm mẽ kot omunh mex xwȳnhjē hō kot hprī hā mẽ amā harēnh tā ka mẽ ām ama ně hkōt ajamaxpēr kēt ně.

Hāmri ně tee ri tanhmā kām ajamaxpēr to ho ri apa. Aně.

Ā Tirtūm mẽ kām kapēr anhȳr jakamā kwa mẽ o kora. Apu mẽ kajaja na pre ā mẽ ajarēnh aně rȳ ko. Aně.

⁴² Nhūm pre ā Pawre mẽ kām ujarēnh rȳy aně. Hāmri ně Panāpe mẽ wa ixkreta rūm kator kaxyw nhūm mẽ kot mar o hkrī xwȳnhjaja tee ri ma wa mōr ā wa omu ně ma wa hkōt mra ně wa kām:

—Kwa war axujarēnhja na mex kumrēx. Mě inhmā axte mar prām. Xà koja axte sap kato ka wa akupȳn mẽ ixwȳr wa tē ně axte mẽ inhmā awjarē? Aně.

Hāmri nhūm wa mẽ kām:

—Tōe. Nà kot paj war aně. Aně.

⁴³ Hāmri ně wa ma tē nhūm mẽ hkwȳja ma wa hkōt mra. Ijaew kwȳjaja ně Ijaew kēt xwȳnh kām Tirtūm kīnh xwȳnhjaja nhūm mẽ ma wa hkōt mra. Hāmri nhūm wa pry hā mẽ kām kapēr o mō. Tirtūm kot mẽ kutā nojarēt rāhā ho pa nhūm mẽ kot amnhī tā omunh ně hkōt amnhī nhīpēx tȳx rāhā ho pa ně hkaga hkēt ā mẽ kām kapēr o mō.

⁴⁴ Tā nhūm axte sap nhūm krī nhō xwȳnh piitā axte Tirtūm kapēr mar kaxyw ixkre wȳr akuprō. Ijaewjaja ně Ijaew kēt xwȳnhjaja. ⁴⁵ Hāmri nhūm Ijaew kwȳjaja tee ri mẽ amnhī wȳr Ijaew kēt xwȳnhjē pumu ně mẽ hā Pawre mẽ Panāpe wa kamā gryk ně. Mě kām Ijaew kēt xwȳnhjaja kot Tirtūm kapēr mar prām kēt jakamā mẽ hā wa kamā gryk ně. Hāmri ně Pawre kapēr ma ně xatā kām kapēr punuj ně kām:

—Tk. Kwa na ka Tirtūm kapēr jarēnh o axēx. Ja kot anhȳr kēt. Aně.

⁴⁶ Nom nhūm wa kām mẽ uma hkēt ně. Wa ām Tirtūm Karō nhȳ hā amnhī to htȳx ně wa mẽ kām kapēr. Ně amnhī tā tanhmā mẽ kām kapēr to ně mẽ kām:

—Nà wa ixpyrà ně mẽ apē Ijaew jakamā na pa mẽ akumrēxjē mā Tirtūm kot mẽ pakaxyw Jejus xām ā harē. Tā ka mẽ ama ně ām ama ně te mẽ ate hkaga pyrà ně ā wa inhmā akapēr aně ně wa ixte kapēr o ixēx ā wa ijarē. Pēr ām mẽ ate mẽ amā Tirtūm mẽ Kra wa kuri mẽ atīr tūm ně mẽ apa hprām kēt. Jakamā kot paj wa mẽ apē ixkato ně hpānhā ma Ijaew kēt xwȳnhjē mā Jejus kapēr jarēnh o ri mẽ hkōt ixpa.

⁴⁷ Tirtūm kapēr ā kagà htūm ā kot mẽ ixte amnhī nhīpēx anhȳrja kukamā mẽ ijarē ně mẽ ijarēnh o:

Mě ate Ijaew kēt xwȳnhjē mā ixkapēr jarēnh o ri apa kaxyw na pa pre mẽ kaxyw mẽ arē.

Jakamā koja pyka piitā hkōt mẽ pa xwȳnhjaja ohtō ně mẽ akapēr ma ně ixkra hkōt amnhī xunhwȳ.

Koja mẽ ā amnhī nhīpēx aně pa ja hā mẽ omu ně mẽ ho ixkra. Aně.

Tirtūm kot ā ja kukamā mẽ ijarēnh anhȳr jakamā kot paj wa mẽ apē ixkato ně mẽ apānhā ma Ijaew kēt xwȳnhjē mā Tirtūm kapēr jarēnh o ri mẽ hkōt ixpa. Aně.

48 Hāmri nhūm Ijaew kêt xwýnhjaja amnhĩ tã wa kapērja ma nē hkĩnh nē Tĩrtũm kapēr mex o mex ã harē. Hāmri nhūm ra Tĩrtũm kot nhỹrmã amnhĩ ri mē htĩr tũm nē mē pa ho mē pa kaxyw mē rēnh xwýnhjaja amnhĩ kaxyw Pahihti Jejus kôt hamaxpēr nē hkôt amnhĩ xunhwý.

49 Tã nhūm pika pē ãxiok kamã mē piitã Tĩrtũm kapēr jarēnh ma. 50 Nom nhūm Ijaew xãptãr tũmrejaja kãm Pawre mē Panãpe wa hkĩnh kêt jakamã na prem krĩ hkôt mē kot amnhĩ to rũnh xwýnhjê mã wa ho kapēr punuj o pa. Mē õ pahi mē mēni kot amnhĩ to rũnh xwýnhjaja nhūm mē kãm tanhmã wa ho kapēr to nhūm mē kuma nē mē hkôt hamaxpēr. Mēnijaja kãm Tĩrtũm prãm tã amnhĩ kaxyw Jejus kôt hamaxpēr kêt jakamã tanhmã mē kot Pawre mē Panãpe wa ho hêx toja ma nē hkôt hamaxpēr nē wa kamã gryk nē. Jakamã nhūm mē ohtô nē tanhmã wa hipêx to nē amnhĩ nē wa hano. 51 Hāmri nhūm wa mē kêp kato nē xa nē mē kot Tĩrtũm kapēr kaga hã amnhĩ pumunh kaxyw mē noo mã wa hparkà kapa nē nē awjagrô kapĩ nē ma wa tē. Hāmri nē ma krĩ pē Ikõn wýr hpãnhã wa mō. 52 Hāmri nhūm ãxiok kamã mē kot Jejus kôt amnhĩ xunhwýr xwýnhjaja hkĩnh nē ri pa. Tĩrtũm Karõ kot mē hkarõ mã gjêx jakamã nhūm mē hkĩnh nē ri pa ho pa.

14

Pawre mē Panãpe wa kot Ikõn wýr mōr ã wa harēnh

Matêwre 10.34-35

1 Hāmri nhūm Pawre mē Panãpeja wa ãxiok rũm kato nē hpãnhã ma krĩ pē Ikõn wýr wa mō. Hāmri nē hwýr pøj nē Ijaew nhõ Tĩrtũm kapēr o mē ahkre xà hã ixkre hwýr wa tē nē kamã mē kãm Jejus jarēnh o nhỹ. Mē kãm harēnh kãm hihtýx jakamã nhūm mē hkwyjaja wa kuma nē amnhĩ kaxyw hkôt hamaxpēr nē hkôt amnhĩ xunhwý. Ijaew kwýjaja nē mē kêp Ijaew kêt xwýnh kwýjaja nhūm mē ohtô nē Jejus kôt amnhĩ xunhwý.

2 Tã nhūm mē hkwyjaja kãm Jejus jarēnh mar prãm kêt nē. Hāmri nē kato nē ma Ijaew kêt xwýnh kwýjê hwýr mra nē tanhmã mē kãm Pawre mē Panãpe wa ho hêx to nē wa ho kapēr punuj nē nhūm mē

mar xà hkôt wa kamã gryk nē. 3 Nom nhūm wa tokyx kator nē ma mōr kêt nē arĩ Tĩrtũm Karõ nhỹ hã amnhĩ to htýx nē mē kãm Tĩrtũm kapēr jarēnh o ri mē hkôt pa. Nē kêp mē kutã nojarêt xwýnh ã harēnh o pa. Nē ý hã mē kãm aa mē kot mēmoj pumunh kêt kwý ho anhýr o ri mē hkôt pa. Jakamã nhūm mē hkwyjaja ja hã wa omu nē wa kapēr ma nē hamaxpēr o:

—Kwa ãm hāmri na wa Tĩrtũm kêp mē pakamã ukaprĩ xwýnh ã harē. Pēr ý hã wa kot ã amnhĩ nhĩpêx anhýr o pa kênã. Anē.

4 Hāmri nhūm Ijaew kêt xwýnh kwýjaja wa hkôt hamaxpēr nē wa hkôt amnhĩ xunhwý. No nhūm mē hkwyjaja wa hkôt hamaxpēr kêt nē. Ra mē kot Ijaew kwý kot tanhmã wa ho kapēr punuj toja ma nē mē hkôt hamaxpēr jakamã nhūm krĩ nhõ xwýnhjaja axpēn kwým ri tanhmã wa hkôt hamaxpēr to ho pa. Jao axpēn kwým ri wa hkôt hamaxpēr o pa.

5 Tã nhūm wa hkôt hamaxpēr kêt xwýnhjaja axpēn wýr akuprõ nē wa hã amýnē. Ijaew kwýjaja nē Ijaew kêt xwýnh kwýjaja nē mē õ pahijaja nhūm mē kot kēn o wa htak o wa hpĩr kaxyw wa hã amýnē.

6 Hāmri nhūm wa amnhĩ tã ama nē mē kêp kato nē hpãnhã ma pika hõ hwýr mō. Ma Rikõn kãm krĩ hkwy hwýr hpãnhã mō. Risti wýr nē Tepe wýr nē pu hã krĩ hkwy hwýr wa mō. 7 Wa mō nē pøj nē ma mē kãm Jejus kot tanhmã mē panē amnhĩ nhĩpêx to hã harēnh o ri mē hkôt pa.

Te grã xwýnh jarēnh

Atre 3.1-10

8 Nhūm Risti kamã mēhõ my hte grã nē hkrĩ xwýnhja. Katorxà nhõxà kre rũm hte grã nē kator jakamã ri pa hkêt nē arĩ hkrĩ xà kamã hkrĩ ho hkrĩ. 9 Jakamã nhūm Pawre mē kãm ujarēnh o xa nhūm kuri mar o nhỹ. Hāmri nē hamaxpēr o:

—Nà pēr Tĩrtũm àhpumunh o àhpumunh. Mãn kot ixto mex kaxyw àhpumunh týx. Nà koja ixto mex. Anē.

Hāmri nhūm Pawre ã hamaxpēr anhýr ã omu 10 nē kàx pē kãm kapēr nē kãm:

—E kwa kãnhmã xa. Anē.

Hāmri nhūm kuma nē kãnhmã ãm kurê kumrêx nē ri mra. Nē amnhĩ te kamã hamak o ri mra nē hkĩnh týx kumrêx.

11 Hāmri nhũm kuri mẽ kuhê xwýnhjaja Pawre kot ã hipêx anhÿrja ã omu nê htÿx wa kêp kaxkwa kamã mẽhpãm ã wa hkamnhÿx nê hkĩnh nê axpên mã:

—Kwa pěr mẽpahpãm na wa. Mẽpahpãm Jupti mẽ Mëkurtija na wa panhĩ hã amnhĩ jahkre nê mẽ pahwÿr wrÿ. Nã ãm hāmri na wa mẽ pahwÿr wrÿ. Anê.

Nom mẽ kapër pê Rikaôn o axpên mã kapër jakamã nhũm Pawre mẽ Panãpe wa mẽ mar kêt nê. Wa kot mẽ kapër mar kêt jakamã ã mẽ kot wa harênh anhÿrja mar kêt nê htÿx wa xa. 12 Nhũm mẽ ã wa kêp mẽhpãm ã wa harênh anê nê hkĩnh tÿx nê. Panãpeja nhũm prem kêp mẽ hpãm Jupti hã hkamnhÿx no Pawreja nhũm prem kêp mẽhpãm Mëkurti hã hkamnhÿx. Pawreja Mëkurti pyrã nê kapër japjê rũnh jakamã nhũm mẽ kêp hã hkamnhÿx. 13 Na prem krĩ htã mẽhpãm Juptija mã amnhĩ jarênh xã hã ixkre nhĩpêx nê hkarõ nhĩpêx. Hāmri nê hwÿr akuprõ nê kãm mex o mex ã harê nê amnhĩ to hwÿr o pa. Jakamã nhũm Jupti nhõ patrejaja Pawre mẽ Panãpe wa kêp mẽhpãm ã wa harênh ma hāmri nê wa hã hkwÿjê mã kãm:

—Kwa pu mẽ wa kãm môx kwÿ hpa nê pixõrã hkwÿ rê. Hāmri nê wa kãm wa mex o wa mex ã wa harê nê wa kêp mẽpahpãm ã amnhĩ to wa kuwÿ. Wa kêp mẽpahpãm kênã. Anê.

Hāmri nê ra ã wa hipêx anhÿr kaxyw 14 nhũm wa tee ri mẽ kot amnhĩ nhĩpêx ã mẽ omu nhũm ja wa kêp omnuj tÿx nê. Jakamã nhũm wa amnhĩ pê hinõkã kaxõnh pa nê mẽ kutã hprõt nê ã mẽ kot wa hipêx anhÿrja nê mẽ kãm kapër kãm hihtÿx nê. 15 Nê mẽ kãm:

—Kwa mẽ ri ã wa inhĩpêx anhÿr kêt nê. Wa ixpê mẽapãm kêt kênã kot ka kêt mẽ ã wa inhĩpêx anê. Nom mẽapãmja na ka htem ãm amnhĩ to hwÿr kaprÿ nê kãm mex o mex ã harênh kaprÿ o ri apa. Tã mẽ ate ã amnhĩ nhĩpêx anhÿr kaga nê hpãnhã Tĩrtũm kõt amnhĩ xunhwÿr nê amnhĩ to pix wÿr o apa kaxyw na pa pre wa mẽ awÿr mō nê pøj. Tĩrtũmja mẽ ate mẽ apãm jarênh ta rom htĩr o htĩr. Na pre mẽmoj piitã ho kato. Kaxkwa ho kato nê pyka ho kato nê gō xujanãr o kato. Nê kamã ri mẽmoj piitã ho kator pa.

16 —Amnepêm mẽ pa xwýnhjaja na pre htem amnhĩ krã hkõt pix mã tanhmã ri amnhĩ nhĩpêx to ho pa nhũm Tĩrtũm ja hã mẽ omu nê ãm mẽ omu nê tanhmã mẽ ho hkêt nê. 17 Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwÿr na rē nhũm mẽ pahpur go mex nê. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rũnh nê. Pu htem hamÿ nê ho paxãpkur mex nê pahkĩnh nê ri papa. Tĩrtũm pix kukwak ri na pu htem ã amnhĩ nhĩpêx anhÿr o ri papa. Anê.

18 Nhũm pre ã Pawre mẽ kot wa kãm môx parja nê mẽ kãm kapër kãm hihtÿx anê. No nhũm mẽ kuma nê ãm kuma nê wa kãm mry hkwÿ hpar kaxyw wa hã hihtÿx nê. Jakamã kritpêm nhÿx prem wa kãm hkwÿ pa. Tã tanhmã hamaxpër to nê hkaga nê wa kãm hpar kêt nê.

*Mẽ kot Pawre pĩr ã àmnênh ã mẽ harênh
Sikũn Ximotre 3.10-11*

19 Tã nhũm Ijaew kwÿjaja mẽ hwÿr mran pøj. Krĩ pê ãxiok mẽ Ikõn rũm ma mẽ hwÿr mran pøj nê mẽ kãm Pawre ho hêx o mẽ hkõt pa nhũm mẽ kuma nê axtem nê Pawre kamã gryk kato. Hāmri nê mẽ kot hpĩr kaxyw kên runh kwÿ jamÿ nê ho hta k prêprêk o kuhê. Hāmri nhũm amnhĩ xã htÿx kamã ama nê tēm nê akryk nõ nhũm mẽ omu nê htÿx ho ra htyk ã hkamnhÿx. Hāmri nê hwÿr tē nê hpa hã kupy nê ma hkjênh o mō nê krĩ pum kumē nê ma akupÿm mra. 20 Hāmri nhũm Jejus kõt mẽ kot axpên to htõjaja tee ri ã mẽ kot hipêx anhÿr ã omu nê hkaprĩ htÿx nê hwÿr hprõt nê omu nê mÿr o kuhê. Hāmri nhũm te htyk pyrã nê nõr tã Jejus nhÿ hã akupÿm hihtÿx mex nê kãnhmã nhÿ hāmri nê ma akupÿm mẽ hkõt krĩm tē.

Tã nhũm apkati nhũm Panãpe mẽ wa krĩja rũm kato nê ma wa mō. Pãnhã ma krĩ pē Tepe hwÿr wa mō.

*Pawre mẽ Panãpe akupÿm ãxiok wÿr wa
mōr ã wa harênh*

21-22 Tã nhũm wa ma Tepe hwÿr mō nê pøj. Hāmri nê kamã mẽ kãm Jejus tanhmã kot mẽ panê amnhĩ nhĩpêx to hã harênh o ri mẽ hkõt wa pa nhũm mẽ wa kuma nê ohtõ nê Jejus kõt amnhĩ xunhwÿ.

Tã nhũm wa kato nẽ awjanã nẽ ma akupÿm pika pê Pisit wÿr wa mō. Nẽ kamã krĩ hkwỳ hkõt ri ra mẽ kot Jejus kõt amnhĩ xunhwÿr xwÿnhjê jahkre ho ri mẽ hkõt pa. Krĩ pê Risti nẽ Ikõn nẽ ãxiokja kõt. Nẽ mẽ ahkre kamã Jejus kõt mẽ ho mẽ hihtÿx o wa pa nẽ mẽ kãm:

—E ra mẽ ate Jejus kõt amnhĩ xunhwÿr jakamã koja mẽ kãm Jejus kurê xwÿnhjaja tee ri ja hã mẽ apumu nẽ hã tanhmã mẽ anhĩpêx to. Tã kêr ka mẽ ãm amnhĩ tã mẽ omu nẽ ãm mẽ omu nẽ Jejus kaga hkêt nẽ. Nẽ arĩ hkõt amnhĩ nhĩpêx mex o ri apa rãhã nhÿrmã ma õ krĩ hwÿr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

²³ Hãmri nẽ ahpÿnhã krĩ piitã hkõt ri mẽ kot pastô nhÿ hã mẽ ahkre kaxyw mẽ hkwỳjê rê nẽ mẽ kaxyw mẽ unhwÿ nẽ mẽ ho Tĩrtũm wÿ. àpkur kêt rãhã mẽ ho kuwÿ nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhÿ hã akrajê jahkre ho pa kaxyw na pa wa mẽ unhwÿ. Jakamã e kêr ka mẽ kutã anojarêt rãhã ho ri mẽ hkõt apa. Anẽ.

Hãmri nẽ wa mẽ kêp kato nẽ ma hpãnhã nhÿhÿm wa mō. ²⁴ Pyka pê Pisit kamã mō nẽ hpãnhã nhãm pyka pê Pãpir kõt mō. Wa ma mẽ kãm tanhmã Jejus kapêr jarênh to ho mẽ hkõt mō. ²⁵ Hãmri nẽ krĩ pê Perke hwÿr wa pøj nẽ kamã mẽ kãm Jejus kot tanhmã amnhĩ nhĩpêx to hã harê hãmri nẽ mẽ kurũm kato nẽ axte mō. Pãnhã ma krĩ pê Atari hwÿr wa mō. ²⁶ Hãmri nẽ hwÿr pøj nẽ hpãnhã kurũm akupÿm ãxiok wÿr wa mō. Pàr rax kãm ma akupÿm mō. ãxiokja kamã na pre wa nojarêt nhũm Jejus kõt wa htõ nẽ wa htõxjaja wa ho Tĩrtũm wÿ nẽ ma krĩ hkwỳ hwÿr wa kumẽ. Wa kot ma mẽ hkõt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumẽ. Jakamã nhũm wa ra ja ho anhÿr pa nẽ akupÿm mẽ hwÿr wa mō. ²⁷ Hãmri nẽ wa akupÿm pøj nẽ Jejus kõt mẽ kot axpên to htõ nẽ htõxjê ho akuprõ nẽ mẽ kãm amnhĩ jarê nẽ mẽ kãm:

—Nã ãm hãmri na pa wa ra ixkãhkĩnh pê akupÿn mẽ awÿr pøj. Na pre Tĩrtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ÿ hã Ijaew kêt

xwÿnhjê mã Jejus jarênh o ixpa nhũm mẽ hkwỳjaja wa inhma nẽ hkõt amnhĩ xunhwÿ.

²⁸ Anhÿr o wa mẽ kãm kapêr hãmri nẽ wa tokyx ma nhÿhÿm krĩ hõ hwÿr axte mōr kêt nẽ. War arĩ ãxiok kamã Jejus kõt wa htõ nẽ htõxjê hkõt ri pa.

15

Jerujarê kamã Jejus kwÿ hpikuprõnh ã mẽ harênh

Matêwre 23.1-4; Karatas 2.1-5, 5.1-16

¹ Tã hãmri nhũm Ijaew kwÿjaja ãxiok wÿr Jejus kwÿ pê Ijaew kêt xwÿnhjê hwÿr mōn pøj. Pika pê Jutej rũm mẽ hwÿr pøj nẽ tanhmã mẽ ahkre hto ho pa. Nom axtem nẽ Tĩrtũm kapêr kuhpa hã mẽ ahkre nẽ mẽ kãm:

—Kot ka mẽ amã Jejus kõt amnhĩ xunhwÿr prãm hãmri nẽ mẽ ixpyrà nẽ finat Mojes kot mẽ pamã karõ xà hkõt amnhĩ my kwÿrÿt kà kwÿ jakà nẽ rĩ kormã hkõt amnhĩ xunhwÿ. Kot kaj mẽ ã amnhĩ nhĩpêx anhÿr kêt nẽ nhũm Tĩrtũm tee ri ja hã mẽ apumu nẽ amnhĩ katut kõt mẽ ate amnhĩ tomnuj rênh nẽ mẽ ato hkra hkêt nẽ. Anẽ.

² Hãmri nhũm Pawre mẽ Panãpe tee ri mẽ kapêr anhÿrja ma nhũm wa kêp ja omnuj tÿx nẽ. Hãmri nhũm wa mẽ kãm:

—Tk. Kwa kot anhÿr kêt. Na hte Tĩrtũm mẽ pahte amnhĩ my kwÿrÿt kà jakàr ã mẽ pahpumunh kõt mẽ pahto hkra hkêt nẽ. Anẽ.

Hãmri nẽ tee ri mẽ kapêrja nê mẽ kãm kapêr no nhũm mẽ ãm wa kuma nẽ wa hkõt hamaxpêr kêt nẽ. Nẽ arĩ ã mẽ ahkre anhÿr o mẽ hkõt pa. Jakamã nhũm mẽ ja hã axpên mã kapêr rax nẽ. Hãmri nhũm Jejus kwÿ pê Ijaew kêt xwÿnhjaja amnhĩ tã Pawre mẽ Panãpe wa hkukja nẽ wa kãm:

—Kwa xà kot paj mẽ apyrà nẽ amnhĩ my kwÿrÿt kà jakà nhũm Tĩrtũm kãm ja mex nẽ nà? Kwa wa ma akupÿm Jerujarê hwÿr mō nẽ ja hã Jejus nhÿ hã mẽ ahkre xwÿnhjê maatijê mẽ mẽ kot Jejus kwÿ jahkre xwÿnhjê kukja nẽ hã mẽ ama. Nẽ ota mẽ ixkwÿjaja koja ma war akõt mra. Kê mẽ tanhmã mẽ amã ja jarênh to ka mẽ ama nẽ man akupÿn mẽ ixwÿr mra nẽ tanhmã mẽ inhmã mẽ kapêr jarênh to. Anẽ.

Hāmri nhūm wa mẽ kām: “Tôe. Nà kot paj mẽ anê.” Anê. ³ Hāmri nê wa mẽ ma Jerujarê hwÿr mō. Ma pyka pê Wēnīs mẽ Samar hkôt ma hwÿr mō. Hāmri nê nhÿri Jejus kôt mẽ htō nê htōxjê pumu nê mẽ kām Ijaew kêt xwÿnhjê jarê. Mẽ hkwÿjaja mẽ uràk nê Jejus kôt amnhĩ xunhwÿr ã mẽ harēnh o mō. Hāmri nhūm mẽ harēnh ma nê mẽ ÿ hã hkĩnh nê. ⁴ Hāmri nhūm mẽ ra Jerujarê hwÿr Jejus kôt mẽ htōjê hwÿr mōn pōj. Hāmri nê mẽ ahkre xwÿnhjê mẽ Jejus nhÿ hã mẽ ahkre xwÿnh maatijê pumu nhūm mẽ haxwÿja amnhĩ wÿr mẽ omu nê hkĩnh nê. Nê tanhmã mẽ ho mex to nê mẽ kām kapêr mex nê. Hāmri nhūm Pawre mẽ Panāpe wa mẽ kām amnhĩ jarê. Tirtūm kot wa ìhkō hã wa hkôt pa nhūm wa ÿ hã kot Ijaew kêt xwÿnhjê mã kapêr o pa nhūm mẽ hkwÿja kot wa mar nê Jejus kôt amnhĩ xunhwÿr ã nhūm wa mẽ kām amnhĩ jarê. ⁵ Nhūm Jejus kwÿjê kamã mẽ kêp Parijew nhō xwÿnh kwÿjaja. Mẽ kêp Parijew tã hkwÿjê rom Jejus kôt amnhĩ xunhwÿ. Jakamã nhūm mẽ tee ri Pawre mẽ Panāpe wa kot Ijaew kêt xwÿnhjê jarēnh ma nê kànhmã kuhé nê wa kām:

—Kwa kê mẽ pahpyrà nê amnhĩ my kwÿt kà jakà nê finat Mojes kot Tirtūm nhÿ hã mẽ pamã mẽmoj tã karō hkôt amnhĩ nhĩpêx o pa. No kot mẽ ã amnhĩ nhĩpêx anhÿr kêt nhūm ja mẽ pahpê omnuj nê. Anê.

⁶ Hāmri nhūm Jejus nhÿ hã mẽ ahkre xwÿnh maatijê mẽ mẽ hkwÿjê jahkre xwÿnhjaja mẽ kuma nê hapōj nê nhÿri akuprō. Ijaew kêt xwÿnh kot Jejus kôt amnhĩ xunhwÿr xwÿnhjaja kot tanhmã amnhĩ nhĩpêx to hã axpēn mar kaxyw nhÿri akuprō. ⁷ Hāmri nê mẽ hã axpēn mar ryy nê. Hāmri nhūm Simāw Pêtre tã kànhmã xa nê mẽ kām:

—Nà na pre Tirtūm mẽ pahkapi nê Ijaew kêt xwÿnhjê kaxyw pa ixta. Ixte mẽ kām Jejus kot tanhmã mẽ panê amnhĩ nhĩpêx to hã harēnh o ri mẽ hkôt ixpa nhūm mẽ kot inhmar nê hkôt amnhĩ xunhwÿr kaxyw nhūm mẽ kaxyw ixta. Ra mẽ ate ja hã ixpumunh mex. ⁸⁻⁹ Tirtūm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrà nê mãânēn Ijaew kêt xwÿnhjê nhĩpêx. Mẽ kot mẽ pahpyrà nê

amnhĩ kaxyw Jejus kôt hamaxpêr jakamã nhūm Tirtūm te ra mẽ panhĩpêx pyrà nê amnhĩ katut kôt mẽ kot amnhĩ tomnuj rē nê mẽ ho hkra. Hāmri nê mẽ hwÿr amnhĩ Karō rē nhūm mẽ hkarō mã agjê. Tirtūm tãm kot amnhĩm mẽ rēnh kēnã.

¹⁰ —Tã xà mẽ pahpê Ijaew na pu htem wam Tirtūm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nê. Nê mẽ panhĩgêjtaja na xep prem haxwÿja hkôt amnhĩ nhĩpêx mex o pa hkêt nê. Mẽ pahpiitã mẽ pahpê hihtÿx kēnã. Tã Ijaew kêt xwÿnhjaja kot hkôt amnhĩ nhĩpêx o pa hã ka mẽ ra mẽ kām karō kaxyw. Kwa kot kaj mẽ anê nhūm Tirtūm tee ri ja hã mẽ apumu nhūm ja kêp omnuj nê. Kām ja prãm kêt. ¹¹ Kwa mẽ ã mẽ kām hã karō anhÿr kêt nê. Mẽ panhō pahihtti Jejus na hte mẽ pahpiitã mẽ pakutã nojarêt o axpēn pyràk. Jakamã Ijaew kêt xwÿnhjaja nê mẽ pahpê Ijaewjaja kot puj mẽ amnhĩ kaxyw hkôt pajamaxpêr nê hkôt amnhĩ xunhwÿ. Hāmri nhūm Tirtūm ja hã mẽ pahpumu nê mẽ panhĩpêx o axpēn pyrà nê Jejus kukwak ri amnhĩ katut kôt mẽ pahte amnhĩ tomnuj rē nê mẽ pahto hkra. No na hte mẽ pahte amnhĩ my kwÿt kà jakà rÿ finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nê. Anê.

¹² Nhūm pre ã Simāw Pêtre mẽ kām kapêr anê. Hāmri nhūm hpānhã Panāpe mẽ Pawreja mẽ kām amnhĩ jarê. Tirtūm kot tanhmã wa ho nhūm wa kot Ijaew kêt xwÿnhjê hwÿr wa mōr ã amnhĩ jarê. Nê Tirtūm nhÿ hã mẽ kām aa mẽ kot mẽmoj pumunh kêt kwÿ ho anhÿr o ri mẽ hkôt pa hã mẽ kām amnhĩ jarê nhūm mẽ piitã akryk wa mar o hkrĩ nê wa ujarēnhta hkukamã hamaxpêr. ¹³ Hāmri nhūm Simāw Pêtre mẽ Panāpe wa mẽ kām ujarēnh pa hāmri nhūm Xiakre wa hpānhã kànhmã xa nê mẽ kām kànhmã ìhkra pē nê mẽ kām:

¹⁴ —E pa ijaxwÿja mẽ amã ixkapêr ka mẽ inhma. Nà na pu mẽ ra Simāw Pêtre kapêr ma. Tirtūm kot wam amnhĩ kaxyw Ijaew kêt xwÿnh kwÿjê rēnh ã mẽ harēnhja pu mẽ ra kuma. ¹⁵ ãm hāmri na ã mẽ harēnh anê. Amnepēm Tirtūm kapêr nhÿ hã mẽ kapêr o mẽ pa xwÿnhjaja na prem ra ja kukamã

Tirtūm kot tanhmã mē hipêx to hã amnhĩ jarēnh kukamã hã kagà. Te ho tãm kot kãm kapēr pyrã nē hã kagà ho:

¹⁶ Amnepēm finat Tawija na pre hte inhmã amnhĩ kwýjê ho amnhĩptâr o pa.

Mē kēp Ijaewjaja nhūm pre inhmã mē ho amnhĩptâr o pa.

Hãmri nhūm mē gaa nē axpēn pē angrã nē ahpýnhã ri pa.

Tã ixpê Tirtūm kot paj nhýrmã ma mē hwýr wrý nē axte mē ho akuprõ nē tãm mē unhwýr pa.

¹⁷ Jakamã Ijaewjê kukwak ri koja Ijaew kêt xwýnh kwýjaja mãânēn ixkôt amnhĩ xunhwý.

Pa te ixte Ijaewjê nhĩpêx pyrã nē mē ho ixkra.

¹⁸ ã mē hkukamã ijamaxpēr anhýr xà hkôt.

¹⁹ Anhýr o mē harēnh jakamã nhūm ra mē hkwýjaja mē higêt kot amnhĩ nhĩpêx kaga hpa nē hpãnhã Tirtūm kôt amnhĩ xunhwý. Jakamã kwa kêt pu mē axte ja nhĩjuk ri mē kãm mēmoj tã karõ hkêt nē. Ja pix na mex.

²⁰ ãm ja pix kot puj mē kãm hã karõ nē hã kagà nē mē hwýr kumē:

Mē kot sãnti hã mē õ hkur nē kot puj mē hkurê.

Nē mē kot mēmo mry hpar nē hkamrõ runh kêt rãhã hkur nē mē hkurê.

Nē mē kot mēmo mry kamrõ kur nē mãânēn mē hkurê.

Nē mēmyjaja kot amnhĩ prõ pix tãnopxar ã mē kãm karõ.

Nē mēnijaja haxwýja kot amnhĩ mjên pix tãnopxar ã mē kãm karõ.

—ãm ja pix kot puj mē kãm hã kagà nē mē kãm hã karõ. ²¹ Mē panhĩgêtjê mã finat Mojes kot ã mē kãm karõ anhýrja na htem arĩ krĩ piitã hkôt ã mē kãm hã karõ anē. Mē panhõ arĩgromnu pē sap ã na htem arĩ ri Tirtūm kapēr o mē ahkre xà hã ixkre kamã ã mē kãm hã karõ anē. Anē.

Mē kot Ijaew kêt xwýnhjê hwýr kagà mēnh ã mē harēnh

Karatas 5.1

²² Hãmri nhūm mē Xiakre kapēr mar o hkrĩ. Jejus nhý hã mē ahkre ho mē pa xwýnh maatijaja nē mē kot hkwýjê jahkre xwýnhjaja nē Kris kwýjê piitã Xiakre kapēr ma nhūm ja mē kãm mex nē. Jakamã nhūm mē axpēn mã:

—Tôe. Nà ãm hãmri na Xiakre ã Ijaew kêt xwýnhjê jarēnh anē. Nà ja mex. Pu mē ã ãxiok nhõ xwýnhjê mã ja hã kagà anē hãmri nē mē hwýr kumē. Koja Pawre mē Panãpeja wa kupy nē ma akupým mē hwýr o mō nē mē kãm kugõ. E mē pahtõ kot puj mē ma wa hkôt mē hwýr mō? Anē.

Hãmri nhūm mē kuma nē Siras mē Jut Pasapas wa kuta. Jejus kôt mē kot axpēn to htõ nē htõxjaja kot axpēn mã hamē wa kot amnhĩ to mex xwýnh ã wa harēnh jakamã nhūm mē ma Pawre mē Panãpe wa hkôt mōr kaxyw wa kuta. ²³ Hãmri nē ãxiok kamã Kris kwý pē Ijaew kêt xwýnhjê kaxyw kagà nhĩpêx nē kamã ã mē kãm kapēr anē nē mē kãm:

Pa? ãxiok mē Sir mē Siris kamã Ijaew kêt xwýnhjaja? Xà mē amex? Mē ixpê Jejus kôt mē atõjaja na pa mē awýr kagãja nhĩpêx nē mē awýr kumē. Mē ixpê Jejus kôt mē kot amnhĩ xunhwýr xwýnhjê jahkre ho ixpa xwýnhjaja nē Jejus nhý hã mē ahkre ho mē pa xwýnh maatijaja pa mē awýr kumē.

²⁴ Na xep ra ja rūm mē ixkwýjaja ma mē awýr mō nē mēmoj tã tanhmã mē amã karõ hto. Mē ate amnhĩ my kwýrýt kà jakàr nē amnepēm mē inhĩgêt Mojes kapēr kôt amnhĩ nhĩpêx o apa hã mē amã karõ. Ka xep mē tee ri ja kukamã ajamaxpēr. No mē pajaja na pa prem mē awýr mē rēnh kêt nē. ãm amnhĩ krã hkôt na prem mē awýr mō nē ã mē amã ja hã karõ anē.

²⁵ Tã pa tee ri mē harēnh ma nhūm ja mē ixpê omnuj týx nē. Jakamã na pa mē jar akuprõ nē mē akaxyw mē inhĩõja wa kuta. Wa kot ma Panãpe mē Pawre wa hkôt mē awýr wa mōr nē mē amã mē ixkapēr jarēnh kaxyw. Panãpe mē Pawreja mē inhmã wa hapê htýx. ²⁶ Na hte mē amã Pahшти Jejus Kris kapēr jarēnh o pa kaxyw wa amnhĩ grõnh kôt mē amã harēnh o pa.

²⁷ Tã pa mē akupým mē awýr wa kumē nē wa hkôt mē pahtõ Jut mē Siras wa kumē. Mē ixte mē amã kagã kamã mē ixkapērja nhūm wa kot hprĩ hã mē amã harēnh kaxyw pa mē wa hkôt mē awýr wa kumē.

28-29 E ja pix nê kot paj mẽ akurê:
 Kêr ka mẽ sânti hã mẽ õ hkur kêt nê.
 Nê mẽmo mry kamrô kur kêt nê. Jao mẽmo mry pa nê hkamrô runh kêt rãhã hkur kêt nê. Kamrô runh pa nê rĩ kormã tanhmã ho nê aku.
 Nê kêr ka mẽ amyjaja amnhĩ prõ pix tãnopxar o apa.

Nê mẽ anijaja ajaxwýja amnhĩ mjên pix tãnopxar o apa.

E ãm ja pix kot paj mẽ amã hã karõ. Tĩrtũm Karõ kãm ja mex. Nê mẽ inhmã mããnên ja mex. Kot kaj mẽ ã amnhĩ nhĩpêx anhýr o ri apa nê amex nê apa.

Tã ãm ja pix. Mẽ ixpê Jesus kwýjê jahkre xwýnhjê mẽ Jesus nhỹ hã mẽ ahkre xwýnh maatijê mẽ pa mẽ mẽ awýr kagàja nhĩpêx nê kumê. E kêr ka mẽ amex nê akĩnh nê ri axpên kôt apa. ãm ja pix na hapêx. Anê.

Nhũm prem ã kagà kamã mẽ kãm mẽmoj tã karõ anê. ³⁰ Hãmri nê Jut wa mẽ kãm kugõ nê ma ãxiok wýr wa mẽ kumê nhũm wa mẽ ma akupým hwýr o mẽ. Jut nê Siras nê Pawre nê Panãpeja nhũm wa mẽ ma akupým mẽ hwýr o mẽ mẽ. Mõõ hãmri nê mẽ hwýr pøj. Hãmri nê Jesus kwýjê ho akuprõ nê mẽ kãm kagàja gõ ³¹ nhũm mẽ kupy nê kamã harê nê kuma. Kamã mẽ kot mẽ kãm mẽmoj tã karõ kamã harê nê kuma nê ý hã hkĩnh nê akupým tãm hamaxpêr.

³² Jut mẽ Siras wa kêp Tĩrtũm nhỹ hã kapêr o pa xwýnh na pre wa. Jakamã na prem mẽ hwýr mõn pøj hãmri mẽ kãm tanhmã ujarênh to ho pa. Mẽ kot Jesus kôt pix mã hamaxpêr o pa kaxyw mẽ kãm ujarênh o pa nê mẽ kãm:

—E kêr ka mẽ mãmrĩ Jesus kôt amnhĩ nhĩpêx mex rãhã ho ri apa nê aa hkaga hkêt nê. Anê.

³³ Hãmri nê mẽ hkôt ri pa hã apkati xohtõ nê. Hãmri nê wa akupým Jerujarê hwýr nojarêr nê mẽ kãm amnhĩ jarê nhũm mẽ wa kuma nê wa kãm:

—Tõe. Nà wa mãmrĩ ma akupým mẽ. Kojã Tĩrtũm war apumunh mex nê ka wa ma akupým amex nê akà hkĩnh pê akwýjê hwýr akato. Anê.

³⁴ Hãmri nhũm wa nojarêr tã nhũm Siras tanhmã hamaxpêr to nê hitõt nê mẽ kuri arĩk nhũm Jut Pasapas pix ma akupým

hkwýjê kot mẽ hwýr wa mẽnh xwýnhjê hwýr mẽ.

³⁵ Hãmri nhũm Pawre mẽ Panãpe wa Siras pyrã nê kormã ãxiok kamã pa. Hãmri nê Jesus kôt mẽ htõ hkwýjê mẽ pimràatã mẽ ahkre ho pa. Tĩrtũm kapêr o mẽ hkôt mẽ ahkre ho pa.

Pawre mẽ Panãpe wa kot axpên pê pikjêr ã wa harênh

Atre 13.13; Korosê 4.10

³⁶ Hãmri nhũm Pawre mẽ Panãpe war arĩ mẽ hkôt ri pa hã apkati xohtõ nê. Tã nhũm Pawre hamaxpêr nê Panãpe mã:

—Kwa ma pu ma akupým ra pahte krĩ hkwý hkôt mẽ kãm Jesus jarênh o papa xwýnhjê hkôt akupým mẽ. Pu ma mẽ hwýr mẽ nê Jesus kôt pahtõ nê pahtõxjê kot tanhmã ri amnhĩ nhĩpêx to hã mẽ omu. Anê.

³⁷ Hãmri nhũm kuma nê kãm:

—Tõe. Nà pu ma mẽ. Nom kêr pu ma amnhĩ kôt Juãw Makre ho mẽ kê axte pahto ajuta ho pahkôt mẽ. Anê.

³⁸ Hãmri nhũm Pawre tee ri kuma nhũm ja kêp omnuj nê nhũm kãm:

—Tk. Kwa na pre pahkôt pa htã Pãpir kamã tanhmã hamaxpêr to nê pahkaga nê ma akupým Jerujarê hwýr mẽ. Jakamã kwarĩ kojã axte pahkôt mõr kêt nê. Anê.

³⁹ Hãmri nhũm Panãpe tee ri hã hihtýx no nhũm kêp hkaga kumrêx. Jakamã nhũm wa ja hã axpên pê axkjê nê ma ahpýnhã mẽ. Nhũm Panãpe amnhĩ kôt Juãw Makre ho mẽ nê wa ma pãr kãm gõ hipòk pê Sipre hwýr wa mẽ. ⁴⁰ Nhũm Pawre axtem amnhĩ kôt Siras wý nê ma wa mẽ. Hãmri nê wa nojarêr nhũm Jesus kôt wa htõjaja wa ho Tĩrtũm wý nê kãm:

—Pa Tĩrtũm. E kojã Pawre mẽ Siras wa ma krĩ hkwý hkôt mẽ kãm akapêr jarênh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhũm wa kato nê ma krĩ hkôt ri Jesus kapêr o mẽ ahkre ho wa pa. ⁴¹ Wa ma pyka pê Sir mẽ Siris kôt Jesus kôt mẽ htõ nê mẽ htõxjê pumunh nê Jesus kôt mẽ ho mẽ hihtýx o wa pa kaxyw.

16

Ximotre kot Pawre mẽ Siras wa hkôtri pa hã harẽnh

Wam Ximotre 1.1-2; Sikũn Ximotre 1.5; Piripos 2.19-22

¹⁻³ Tã nhũm Pawre mẽ Siras wa ma akupỹm krĩ pẽ Tepe hwỳr wa mỗ nẽ hwỳr pøj nẽ hpãnhã kurũm ma Risti hwỳr mỗ. Hãmri nẽ wa hwỳr pøj nẽ kamã Ximotre pumu. Ximotre na pre ra katorxà pyrã nẽ Jejus kôt amnhĩ xãm nhũm mẽ kot Jejus kôt axpẽn to htõ xwỳnhjaja kãm hapê nẽ. Nẽ kot Jejus kapẽr kôt amnhĩ nhĩpêx mex o pa hã axpẽn mã harẽ.

Krĩ pẽ Risti mẽ Ikõn kamã nhũm prem ã axpẽn mã Ximotre jarẽnh anhỹr o pa. Jakamã nhũm Pawre mẽ Siras wa mỗ nẽ mẽ hwỳr pøj nẽ Ximotre kot amnhĩ nhĩpêx ã omu nhũm Pawre kãm war amnhĩ kôt o mõi prãm nẽ. Nom Ximotre hkamrô pihkàr na pre. Katorxà kệp Ijaew nhũm hipêêxã kệp Gres jakamã nhũm ã Ximotre hkamrô pihkàr anẽ. Nhũm Ijaew kot katorxà hkôt kệp Ijaew ã omunh jakamã nhũm Pawre hamaxpẽr nẽ mẽ kaxyw kệp my kwryt kã krãhta nẽ arĩ kormã mẽ hwỳr amnhĩ kôt o mỗ. ⁴ Hãmri nẽ mẽ ma krĩ hkwy hkôt mỗ. Mỗ nẽ Ijaew kêt xwỳnhjaja ra kot amnhĩ kaxyw Jejus kôt hamaxpẽr xwỳnhjê jahkre ho mẽ hkôt pa. Ra Jerujarẽ kãm mẽ kot Jejus kwỳjê jahkre ho pa xwỳnhjê mẽ Jejus nhỹ hã mẽ ahkre xwỳnh maatijaja mẽ kot mẽ kãm mẽmoj tã karõta nhũm mẽ ma mẽ kãm harẽnh o ri mẽ hkôt pa. ⁵ Hãmri nhũm mẽ kuma nẽ ra Jejus kôt amnhĩ nhĩpêx mex o mỗ. Hãmri nhũm apkati mẽ krĩ nhõ xwỳnh kwỳjaja mẽ urak nẽ Jejus kôt amnhĩ xunhwỳ. Jakamã nhũm mẽ ra ohtõ rax o mỗ.

Pawre tanhmã hpimtir to hã harẽnh

Rõmãn 15.18-21

⁶ Tã nhũm Pawre mẽ Siras mẽ Ximotre mẽ ma pyka pẽ As wỳr nojarêt. Mẽ kot mẽ kãm tanhmã Jejus jarẽnh to ho pa kaxyw mẽ hwỳr nojarêt tã nhũm Tĩrtũm Karõ kormã mẽ nẽ mẽ hkurê. Jakamã nhũm mẽ hpãnhã ma pyka hkwy pẽ Prik mẽ Karatas wa hkôt pa. Ixpê Rukre na pa pre mẽ hã ajêt nẽ ma mẽ hkôt ixpa ho ixpa. ⁷ Hãmri nẽ mẽ pyka pẽ Mĩs ã mỗ nẽ hpãnhã ma Pitĩn wỳr inhmõi mã tã no nhũm Tĩrtũm Karõ

axte kê mẽ nẽ mẽ ixkurê. ⁸ Jakamã pa mẽ arĩ Mĩs jakar ã mỗ nẽ gõ xujanar mỳ ri krĩ pẽ Tôx wỳr pøj.

⁹ Tã nhũm kamat pa mẽ ixpiitã gõi nẽ inhĩkwỹ nhũm Pawre tanhmã hpimtir to. Nhũm xep pika pẽ Masetõn nhõ xwỳnhja mẽ amnhĩ wỳr hwỳr kãm hihtyx o xa nhũm hprĩ hã omu nẽ kapẽr ma. Nhũm xep pre kãm:

—Pa Pawre? Kwa amnẽ Masetõn wỳr mẽ ixwỳr mỗ nẽ tanhmã mẽ ijahkre hto. Anẽ.

¹⁰ Hãmri nhũm Pawre hkrãkato nẽ mẽ inhmã hpimtir jarẽ. Pa mẽ kuma nẽ axpẽn mã:

—Tõ kwa tokyx pu mẽ hwỳr. Tĩrtũm kot mẽ hwỳr mẽ parẽnh kẽnã. E pu mẽ ma mẽ hwỳr mỗ nẽ mẽ kãm Jejus jarẽnh o mẽ ahkre. Anẽ.

Hãmri nẽ amnhĩ to akuprõ nẽ mẽ hwỳr inhnojarêt kurê kumrẽx.

Ritre kot Jejus kôt amnhĩ xãm ã harẽnh

Piripos 1.1

¹¹ Hãmri pa mẽ ma Masetõn wỳr mỗ. Tôx rũm ma pãr kãm hwỳr mỗ. Hãmri nẽ gõ nhĩpøk pẽ Samõtas wỳr pøj nhũm mẽ hã pãr nhõ. Hãmri nhũm apkati pa mẽ axte mỗ nẽ Masetõn kamã krĩ pẽ Nẽap wỳr pøj. ¹² Hãmri nẽ pãr rũm ijapøj nẽ hpãnhã kurũm hamũ krĩ pẽ Piripos wỳr ixpar o mỗ. Piriposja Masetõn kamã krĩ maati na. Rõm nhõ xwỳnhjaja na prem ho kato. Jakamã pa prem ma hwỳr mỗ nẽ pøj nẽ tokyx axte kurũm nhỹhỹm inhmõi kêt nẽ. ¹³ Hãmri nhũm sap kato pa mẽ axpẽn mã:

—Kwa pyhti mỳri mãn hte Ijaewjaja axpẽn wỳr akuprõ nẽ Tĩrtũm mã amnhĩ jarẽnh o hkrĩ nã. E kwa pu mẽ hwỳr nẽ gõ mỳri mẽ hapêr o ri papa. Anẽ.

Hãmri nẽ ma hwỳr mra nẽ mẽ hapêr o ri ixpa nhũm ãm mẽni pixjaja axpẽn wỳr akuprõ. Pa mẽ omu nẽ mẽ kuri ixkrĩ nẽ mẽ kãm Jejus kapẽr jarẽnh o mẽ ahkre o ixkrĩ. ¹⁴ Nhũm mẽ kot mẽ inhmã o hkrĩ xwỳnhjê hõ pẽ Ritreja. Krĩ pẽ Xijaxir nhõ xwỳnh na pre. Nẽ kệp kupêxê mex o wẽnẽ xwỳnh. Na pre hte kãm Tĩrtũm prãm o pa. Jakamã nhũm Pawre kot mẽ ahkre ho yrja rõi nhũm Pahihti Jejus tanhmã Ritre hkrã hto nhũm hprĩ hã Pawre kapẽr mar tyx nẽ. ¹⁵ Hãmri nẽ amnhĩ kaxyw Jejus kôt hamaxpẽr nẽ hkôt amnhĩ xãm kurê

kumrêx. Ôrkwÿ kamã hkwÿjê mẽ nhũm mẽ hkôt amnhĩ xunhwÿr pa. Jakamã pa mẽ kêp Jejus kwÿ hã mẽ hkrã kumrã. Mẽ piitã mẽ kot mẽ kêp Tirtũm kra hã mẽ omunh kaxyw. Hãmri nhũm Ritre amnhĩ kôt mẽ ixwÿ nẽ mẽ inhmã:

—An kot kaj mẽ ixte Jejus kôt amnhĩ xãm tÿx ã ixpumu hã kot kaj mẽ ma ixkôt mō nẽ hpãnhã inhörkwÿ kamã pøj nẽ apa. Anẽ.

Pa mẽ kuma nẽ ma hkôt mō.

Mẽ kot Pawre mẽ Siras wa haxà ã mẽ harẽnh

Makre 1.23-26, 1.34

¹⁶ Tã nhũm arĩgro hō hã pa mẽ Tirtũm mã amnhĩ jarẽnh kaxyw axte pyhti mÿri mẽ pikuprõnh xàja wÿr mō. Hãmri nẽ pry kamã mẽ kãm àpẽnh xwÿnh nija pumu. Ra mẽkarõmnuti kot tanhmã hkrã hto nhũm ÿ hã àhpumunh tÿx xwÿnhja. Nhũm hte mẽkarõmnuti nhÿ hã mẽ kãm mẽmo hkukamã tanhmã ujarẽnh to ho pa. Jakamã nhũm õ patrãwjaja kukwak ri ujamÿnh rũnh pẽ hkĩnh nẽ pa. ¹⁷ Jakamã pa mẽ mō nhũm nija mẽ ixpumu nẽ mẽ ixtã ajêt nẽ ma mẽ ixkôt mō. Hãmri nẽ mẽ kãm mẽ ijarẽnh o mẽ ixkôt mō nẽ mẽ kãm:

—Xê mẽ mran jajê pumu. Na htem Tirtũm maati mã tanhmã amnhĩ nhĩpêx mex to ho pa. Tirtũm kot mẽ ate amnhĩ tomnuj pẽ tanhmã mẽ apytàr to hã mẽ amã ujarẽnh kaxyw na mẽ awÿr mra. Anẽ.

¹⁸ Nẽ ãm xatã mẽ kãm mẽ ijarẽnh o mẽ ixkôt paja o ra hã apkati xohtô nẽ. Tã nhũm Pawre ra kãm mar kaga nẽ nẽ mẽkarõmnuti mã kapêr nẽ kãm:

—Tk. Kwa kêp akato nẽ ma tẽ. Pa Jejus Kris nhÿ hã amã ixkapêr ka inhma nẽ kêp akato nẽ ma atẽm kurê kumrêx. Anẽ.

Hãmri nhũm kuma nẽ kêp kato nhũm akupÿm tãm hkrã. ¹⁹ Jakamã nhũm õ patrãwjaja tee ri ja hã omu nẽ gryk tÿx nẽ axpẽn mã:

—Kwa ra mẽkarõmnutijaja kêp kator jakamã koja axte mẽmoj kukamã tanhmã ujarẽnh to hkêt nẽ. Pu mẽ kukwak ri axte paxujamÿnh kêt nẽ. Anẽ.

Hãmri nẽ Pawre mẽ Siras wa kamã gryk tÿx nẽ. Hãmri nẽ wa unê nẽ ma mẽ kot axpẽn mar xà hã ixkre hwÿr wa hkjênh o tẽ ²⁰ nẽ mẽ kot mẽ ho amnhĩptàr xwÿnhjê mã tanhmã wa ho hêx to nẽ mẽ kãm:

—Kwa mẽ amnẽ Ijaewja wa omu. Na hte wa mẽ panhō krĩ kamã hêx pix o pa nhũm mẽ tee ri wa kapêr ma nẽ wa kamã gryk tÿx nẽ. ²¹ Mẽ ixte amnhĩ nhĩpêx te kot axpẽn pyrãk kêt tã nhũm wa mẽ kot amnhĩ nhĩpêx o mẽ pajahkre kaxyw nhÿhÿnh mẽ pahwÿr mō. Nom mẽ pahpê Rõm nhõ xwÿnhjaja axtem mẽ pahte amnhĩ nhĩpêx kênã kot pu kêt wa kuma nẽ wa kapêr kôt amnhĩ nhĩpêx. Anẽ.

²² Hãmri nhũm mẽ kuma nẽ piitã wa kamã gryk tÿx nẽ. Hãmri nhũm mẽ ho amnhĩptàr xwÿnhjaja wa kêp wa ê kaxõnh o hkapa nẽ wa hã mẽ õ pōristi mã amÿnê nẽ mẽ kãm:

—E mẽ ma wa o tẽ nẽ mẽ htak xà ho wa htak. Anẽ.

²³ Hãmri nhũm mẽ kuma nẽ ma wa o tẽ nẽ wa htak rax nẽ. Hãmri nẽ wa haxà nẽ mẽ hagjênh xà jamãr xwÿnh mã kãm:

—E kêr ka ja wa omunh mex nẽ kê wa kator kêt nẽ. Anẽ.

²⁴ Hãmri nhũm mẽ kuma nẽ wa o tẽ nẽ ixkre jatur xà kamã wa haxà nẽ wa kator pymaj hamẽ wa htem pĩ jaxà nẽ ho htÿx nhũm wa arĩ hte tÿx nẽ nhÿ.

²⁵ Tã nhũm kamàt. Nẽ kôt ã kamàt nhũm wa Tirtũm mã amnhĩ jarẽ nẽ mex o mex ã wa grer o wa nhÿ nhũm wa uràk nẽ mẽ hagjênh xwÿnhjaja wa mar o hkrĩ.

²⁶ Puh nhũm pyka mẽ kãm htertet tÿx nẽ nhũm mẽ hã ixkreja amnhĩ to àpêr tÿx nẽ amnhĩ kahê xà rênh pa. Nhũm mẽ hagjênh xwÿnhjê kaxpre xà piitã mẽ nẽ pirênh pa. ²⁷ Hãmri nhũm mẽ hamãr o kuhê xwÿnhja pika tertet kamã ama nẽ hkrãkato. Hãmri nẽ mẽ hã ixkre jakwakre kahê xà rênh parja pumu nẽ mẽ hagjênh xwÿnhjaja hapôx par ã mẽ hkamnhix nẽ tee ri amnhĩ kukamã hamaxpêr. Hãmri nẽ pahĩ kot mẽ hã hpĩr pymaj õ wapo kapa nẽ ra tãm kot ho amnhĩ pĩr kaxyw. ²⁸ Hãmri nhũm Pawre tee ri ja hã omu nẽ kàx pẽ kãm amÿra nẽ kãm:

—Kwa amnhĩ pĩr kêt nẽ. Ot pa mẽ arĩ ixpiitã ixkuhê. Na pa mẽ ixtõ ixkator nẽ ixprõt kêt nẽ. Anẽ.

²⁹ Hãmri nhũm kuma nẽ kanê hã ahwÿ nẽ kuwy nẽ mẽ hwÿr axà nẽ mẽ piitã mẽ omu. Hãmri nẽ Pawre mẽ Sirasja wa omu nẽ wa hwÿr kãm ma ho htertet o tẽ. Hãmri nẽ wa hã hpijaàm kaxyw wa kutã tẽm nẽ hkõnkrã

ho nhỹ. ³⁰ Hāmri nē kànhmã xa nē wa ho kato nē ixkre kapem wa o xa nē wa kām:

—Kwa tanhmã kot pa amnhĩ nhĩpêx to kê Tĩrtũm war apyrà nē ixte amnhĩ tomnuj pē ixpytã? Anē.

³¹ Hāmri nhũm wa kām:

—Nà kot kaj amnhĩ kaxyw Jejus Kris kôt ajamaxpêr nē hkôt amnhĩ xãm nhũm Tĩrtũm ja hã apumu nē amnhĩ katut kôt ate amnhĩ tomnuj piitã rēnh pa. Nhũm anhōrkwỹ kamã akwỹjaja apyrà nē Jejus kôt amnhĩ xunhwỹ nhũm ã mē hipêx anē. Anē.

³² Hāmri nē wa ma hkôt ōrkwỹ hwỹr tē nē hprĩ hã mē kām Tĩrtũm kapêr jarē nhũm mē wa mar o hkrĩ. ³³ Hāmri nhũm mē hagjēnh xà jamār xwỹnhja wa kām wa hta xà kuhō. Kormã kamãt kô hkwỹ kamã wa kām kuhō nē hkane. Hāmri nhũm wa mē kot Jejus kôt amnhĩ xunhwỹr par ã mē omu nē mē hkrã kumrã. Mē hamār xwỹnh mē hkwỹjē mē hkrã kumrãr pa. ³⁴ Hāmri nhũm mē kot amnhĩ kaxyw Tĩrtũm kôt hamaxpêr jakamã piitã hkĩnh nē. Hāmri nhũm mē hamār xwỹnhja ōrkwỹ hwỹr Pawre mē Siras wa o tē nē wa kām ō nhũm wa apku nhũm ma akupỹm mē hagjēnh xà hwỹr wa o tē nē akupỹm wa haxà.

Mē kot Pawre mē Siras wa kām urer ã mē harēnh

Atre 22.25-29

³⁵ Hāmri nhũm apkati nhũm krĩ pytār xwỹnhjaja mē ō pōristi mã anē nhũm mē hagjēnh jamār xwỹnh wỹr tē nē kām:

—E na mē papytār xwỹnhjaja ate Pawre mē Siras wa kām anhũrer nhũm wa māmri ma akupỹm htēm kaxyw hã karō. Anē.

³⁶ Hāmri nhũm mē kuma nē wa hwỹr axà nē wa kām:

—E na krĩ pytār xwỹnhjaja ixte war akator kaxyw war atã inhmã karō. Jakamã e wa māmri axãmnhĩx ma mō. Anē.

³⁷ Hāmri nhũm Pawre kām:

—Nà wa ixte tanhmã amnhĩ tomnuj to hkêt tã nhũm mē kot wa ixpynēnh nē wa ixtak. Wa ijaxwỹja wa ixpê Rôm nhō xwỹnh tã nhũm prem axtem nē mē piitã mē noo mã wa ixtak nē wa ijaxà. Mē kot amarĩ Rôm nhō xwỹnh tak nē mē hagjēnh kêt tã nhũm mē ã mē noo mã ã wa inhĩpêx anē. Kormã wa ixte tanhmã amnhĩ tã ixàprār to hkêt tã nhũm mē ã wa inhĩpêx anē. Jakamã kwarĩ

kot kaj mē no hkàx ã wa ixkator kêt nē. Kê mē kot wa ijaxàr xwỹnhjaja tãm man mra nē wa ixkator pa war arĩ ma mō. Anē.

³⁸ Hāmri nhũm pōristija kuma nē ma akupỹm mē hwỹr mra nē mē kām wa kapêr jarē. Hāmri nhũm mē tee ri mē uràn wa kēp Rôm nhō xwỹnh ã wa harēnh ma nē kām ma htỹx nē. ³⁹ Hāmri nē ma wa hwỹr tē nē wa hwỹr axà nē wa kām:

—Pa? E māmri war akato nē axãmnhĩx ma mō. Na pa prem war anhĩpêx kati rax nē. Tã kêr ka wa axte ja mã ajamaxpêr hkêt nē. Kê ja ãm jar mē pakamã hapêx. Anē.

Hāmri nē wa kator nē wa kām:

—E kwa wa mē inhō krĩ pē akato nē ma nhỹhỹm mō. Anē.

⁴⁰ Hāmri nhũm wa kuma nē kato nē ma akupỹm Ritre nhōrkwỹ hwỹr wa tē. Hāmri nē Jejus kôt wa mē htōjê pumu nē wa mē kām amnhĩ jarē nē mē kām:

—E kot paj hāmri wa mã mō. Nom kêr ka mē arĩ Jejus Kris kôt amnhĩ nhĩpêx mex rãhã ho ri apa nē aa hkaga hkêt nē. Anē.

Hāmri nē wa mē kurũm kato nē ma krĩ hō hwỹr wa mō.

17

Tesarõn kamã mē kot wa kamã gryk ã mē harēnh

Wam Tesarõn 1.1, 2.13-14

¹⁻² Tã nhũm Pawre mē Sirasja wa ma krĩ hkwỹ hkôt pa. Piripos rũm ma Apiporip mē Apōrõn kôt wa mō hāmri nē ra Tesarõn wỹr wa pōj. Na pre hte Pawre nhỹri pōj nē Ijaew nhō Tĩrtũm kapêr o mē ahkre xà hã ixkre hwỹr agjē nē kamã mē kām Jejus kapêr jarēnh o kuhê. Jakamã nhũm wa mō nē Tesarõn wỹr pōj nē ixkre hwỹr mē hwỹr tē nē mē kām ujarēnh o xa. Nē mē kām ujarēnh o hã arĩgromnu pē sap o axkrunēpxi. ³ Nē hprĩ hã mē kām tanhmã Tĩrtũm kapêr jarēnh to nē mē kām:

—Nà Tĩrtũm kapêr ã kagà htũm kot mē pakaxyw ãm xwỹnh jarēnh. Amnhĩ xà htỹx kamã hamak kām htyk hāmri nē akupỹm htĩr ã nhũm kot hkukamã harēnh. Tã na pre Jejusja ã amnhĩ nhĩpêx anē. Tãm kēp Krisja. Tĩrtũm kot mē pakaxyw ãm xwỹnhhta na. Anē.

⁴ Hāmri nhũm mē hkwỹja kuma nē wa hkôt hamaxpêr nē wa urāk nē Jejus kôt

amnhĩ xunhwỳ. Ijaew kwỳjê nê Ijaew kêt xwỳnh kwỳjaja nê mēni kot amnhĩ to rũnh xwỳnh kwỳjaja nhũm mē ohtô nê amnhĩ kaxyw Jejus kôt hamaxpēr nê hkôt amnhĩ xunhwỳ. ⁵ Tã nhũm Ijaew kwỳjaja tee ri hkwỳ kot wa hkôt amnhĩ xunhwỳr ã mē omu nê mē hã Pawre mē Siras wa kamã gryk tỳx nê. Hãmri nê ma mra nê wa kaxyw mē kot amnhĩ tomnuj tỳx xwỳnh kwỳjê ho akuprô nê mē kãm wa hã amỳnê. Jakamã nhũm mē ma kapēr punuj pē wa hapēr o ri mra nhũm mē piitã mē omu nê mē kuma. Hãmri nhũm mē wa hapēr o ra Jasãw nhõrkwỳ hwỳr mra. Nê mē kot Pawre mē Siras pynênh nê ma mē utar xwỳnhjê hwỳr wa o htēm kaxyw mē kēp kahê xà mē nê mē hwỳr agjê. ⁶ Hãmri nê tee ri õrkwỳ kamã wa hapēr nhũm wa kamã amrakati. Jakamã nhũm mē Jasãw mē kot Jejus kôt axpēn to htõ xwỳnh kwỳjê pynê nê ma mē kot mē ho amnhĩptar xwỳnhjê hwỳr mē o mra. Hãmri nê mē kãm tanhmã Pawre mē Siras wa ho hêx to. ãm kapēr punuj kãm kàx pē mē kãm wa harê nê mē kãm:

—Kwa na hte Pawre mē Siras wa pyka piitã hkôt mē kãm ri mēmoj to hêx o pa. Tã wa ra mē panhõ krĩ hwỳr pøj nê jar mē pamã ri tanhmã hêx to ho ri mē pahkôt pa. ⁷ Jasãw nhõrkwỳ kamã na pre wa pøj nhũm amnhĩ wỳr wa kuwỳ. Na hte wa hkôt mē hamaxpēr xwỳnhjaja pahiht Sesti kapēr kwỳm ri kuhpa hã kapēr o pa nê axtem nê mēõ pahi pē “Jesús” anhyr xwỳnhja kapēr kôt amnhĩ nhĩpêx o pa. Anê.

⁸ Hãmri nhũm mē kot mē ho amnhĩptar xwỳnhjê mē krĩ nhõ xwỳnhjaja mē kuma nê gryk tỳx kumrêx. ⁹ Hãmri nê Jasãw mã kãm:

—E kot paj mē apê mē akàxpore hkwỳ jamỳ. Ka mē ajapøj nê ma mē panê Pawre mē Siras wa hano nhũm wa kato nê ma mō pa rĩ akupỳm mē amã kugõ. Anê.

Hãmri nê mē kēp mē hikàxpore hkwỳ jamỳ.

Pawre mē Siras kot Perej wỳr mōr ã wa harênh

¹⁰ Tã nhũm ra kamãt nhũm mē kot Jejus kôt axpēn to htõjaja hãmri Pawre mē Sirasja wa ma krĩ pē Perej wỳr wa kumê. Hãmri nhũm wa kato nê ma hwỳr mō nê hwỳr pøj. Hãmri nê Ijaew nhõ Tirtũm kapēr o mē

ahkre xà hã ixkre hwỳr htēm kurê kumrêx nê wa axà. ¹¹ Perej kamã Ijaew na pre te mē kot Tesarõn kamã Ijaew pyrãk kêt nê. Mē kurom mē kãm Tirtũm kapēr mar prãm nê. Jakamã nhũm pre Pawre mē Siras Tirtũm kapēr o mē ahkre ho pa. Apkati mē mē ahkre mex o pa nhũm mē wa kuma nê hkĩnh nê. Nê Tirtũm kapēr ã kagà htũm kamã wa kot mē ahkreta japēr nê kamã omu nê axpēn mã wa harênh o:

—Nà ãm hãmri na wa ã Tirtũm kapēr o mē pajahkre anê. Tirtũm kapēr ã kagà htũm hkôt na hte wa mē pajahkre. Anê.

¹² Hãmri nê ohtô nê Jejus kôt amnhĩ xunhwỳ. Ijaew kwỳ nê Ijaew kêt xwỳnh kwỳ nê mēni kot amnhĩ to rũnh xwỳnhjaja nhũm mē ohtô nê Jejus kôt amnhĩ xunhwỳ.

¹³ Tã nhũm Tesarõn kãm Ijaewjaja Pawre jarênh ma. Kot Perej nhõ xwỳnhjê mã Tirtũm kapēr jarênh o pa hã harênh ma. Hãmri nê ma mē hwỳr mra nê mē kãm tanhmã ho hêx to nhũm krĩ nhõ xwỳnhjaja mē kuma nê ra Pawre kamã gryk tỳx nê.

¹⁴ Jakamã nhũm Jejus kôt mē htõjaja mē harênh ma nê mē umaj Pawre kator nê ma gô xujanãr wỳr o mō. No nhũm Siras mē Ximotre wa Perej kamã mē kuri arĩk.

¹⁵ Hãmri nhũm mē hkwỳjaja ma Pawre o mō. Ma krĩ pē Atenas wỳr o mō. Hãmri nê hwỳr o pøj nê kamã kure. Hãmri nê ra akupỳm Perej wỳr nojarênt nhũm Pawre mē kãm:

—E kêt ka mē ma akupỳm mō nê Siras mē Ximotre wa kãm ijarê kē war amnhĩm nojarênt nê tokyx man ixkôt wa mō. Anê.

Pawre kot Atenas nhõ xwỳnhjê mã kapēr ã harênh

Rõmãn 1.18-20

¹⁶ Tã nhũm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhĩ nhĩpêx ã mē omunh o pa. Na pre Atenas nhõ xwỳnhjaja sãnti ho ohtô rax nê mē õ krĩ kamã unhwỳ nhũm Pawre ri omunh o ri kuhê ho pa. Na pre htem ahpỳnhã mēmo karõ nhĩpêxja o te Tirtũm nhĩpêx pyrã nê kutã hkõn krã ho rôrõk nê hkrĩ nê kãm mex o mex ã harênh o pa. Hãmri nhũm Pawre tee ri ja hã mē omunh o ri mē hkôt pa nê hkaprĩ nê.

¹⁷ Hãmri nê ma amnhĩ kwỳjê nhõ Tirtũm

kapêr o mẽ ahkre xà hã ixkre hwÿr pa nê kamã mẽ ahkre ho kuhê. Ijaewjê mẽ Ijaew kêt xwÿnh kot Tirtũm ã hpijaãm xwÿnhjê mã nhũm Tirtũm kapêr jarênh o kuhê. Nê apkati mẽ mẽ kot mẽmoj to wênê xà hwÿr mra nê mẽ ujaaprôr xwÿnhjê mã Tirtũm kapêr jarênh o kuhê. ¹⁸ Hãmri nhũm mẽ mar o pa. Atenas nhõ xwÿnhjaja na prem axpên kôt amnhĩ nhĩpêx o pa hkêt nê. Mẽ hkwÿjaja kêp Epikure hkôt amnhĩ nhĩpêx xwÿnh. Nê mẽ hkwÿjaja axtem kêp Etok kôt amnhĩ nhĩpêx xwÿnh. Hãmri nhũm Pawre mẽ kãm Jejus kot tanhmã mẽ panê amnhĩ nhĩpêx to hã harênh o pa nê akupÿm htĩr ã harênh o pa. Hãmri nhũm mẽ tee ri kuma nê hã axpên kukjêr o kuhê nê axpên mã:

—Tk. Kwa mo na hte myti ata harênh o pa? Anê.

Nhũm mẽ hkwÿja mẽ kãm:

—Ko. Axtem mẽpahpãm ò na hte tanhmã harênh to. Anê.

¹⁹⁻²¹ Atenas nhõ xwÿnhjê mẽ axtem krĩ hõ nhõ xwÿnhjaja na prem kãm mẽ ujarênh nyw mar prãm nê. Jakamã nhũm prem mẽmoj jarênh nyw ma hãmri nê ãm axpên mã harênh pix o ri pa. Tã ra Pawre xujarênh nyw ma nê ma amnhĩ kôt mẽ kot axpên mar xà hã ixkre hwÿr o tẽ. Ixkre pê Areopja wÿr nhũm prem amnhĩ kôt o tẽ nê kãm:

—E kwa aprĩ hã mẽ inhmã ate mẽmo jarênh nywta jarê pa mẽ ama. Mẽ inhmã mar prãm. Anê.

²² Hãmri nhũm mẽ kuma nê mẽ kãm ujarênh o xa. Mẽ kot axpên mar xà hã ixkre kamã Atenas nhõ xwÿnhjê mã awjarê nê mẽ kãm:

—E nà na ka htem anhõ mẽmo karõ nhĩpêx xohtõta ã apijaãm pê kãm amnhĩ jagrer o ri apa. Pa hte ja hã mẽ apumunh o mẽ akôt ixpa. ²³ Na pa ra mẽ anhõ sãnti piitã hkôt omunh o ri ixpa nê o mũj hõ kuhê xà kaprÿja wÿr ixkato. Nhũm himõk ã mẽmo karõ nhĩpêx amrakati nom à hã kagà kot:

MËPAHPÂM PUMUNH KÊT KUHÊ XÀ NA JA
 ã mẽ ate hã kagà kot anhÿr. Mẽ ate omunh kêt tã ka htem arĩ hã apijaãm o ri apa. No pa na ixte mēhõja jarênh mar mex. Tã kot paj mẽ amã harê ka mẽ inhma.

²⁴ —Mẽpahpãm mẽ ate omunh kêt ã amnhĩ jarênh ta Tirtũm na. Tãm na pre pyka ho kato nê kamã mẽmoj piitã ho kator pa. Gô ho kato nê mry ho kato nê panhĩ ho kato. ãm mẽmoj piitã ho kator par kumrêx. Na hte pika kamã nê kaxkwa kamã mẽmoj piitã ho amnhĩptar mex rãhã ho pa. Jakamã mẽmo kaxyw kot puj mẽ jar kãm òrkwÿ nhĩpêx? Tãm kêp mẽmoj piitã ho kator xwÿnh jakamã kot mẽmoj to presija hkêt. ²⁵ Kêp mẽmoj piitã hpãm jakamã mẽmoj piitã ò na. Jakamã tanhmã kot pu wem amnhĩ to nê kãm mẽmoj gõ? Tãm kot mẽmoj piitã ho kator nê ho htĩr nê kot mẽmoj piitã òr kênã kot puj kêt mẽ amnhĩ pyrã nê kãm mẽmoj gõ. ²⁶ Na pre mẽ pahkukamã ahpÿnhã mẽ pahpiitã mẽ papapxà jarê nê mẽ pakator hã arĩgro jarê. Na pre mẽ pahpãm kot wa Atãwja nhĩpêx. Jakamã nhũm Atãw kêp mẽ pahpiitã mẽ pahpàr krax.

²⁷ —Tã mẽmo kaxyw na pre ã Tirtũm mẽ panhĩpêx mex anê? Nà ãm mẽ pahte amnhĩ kaxyw hkôt pajamaxpêr nê hkôt amnhĩ xunhwÿr kaxyw na pre mẽ panhĩpêx. Ja mẽ pahpê hihtÿx kêt. Kojã mēhõ kãm Tirtũm prãm nhũm amnhĩ tã omunh kurê kumrêx.

²⁸ —Nê Tirtũm pix kukwak ri na pu htem pahtĩr nê tanhmã amnhĩ nhĩpêx to ho ri papa. Mẽ akwÿ kot kagà jahkre xwÿnhja na pre ja hã kagà nê hã kagà ho: “Mẽ pahpê mẽpahpãm kra na pu htem papa.” Anê. ã hã kagà kot anhÿr.

²⁹ —Tã ka prem amnhĩm mẽmo karõ nhĩpêx. òr o hkwÿ nhĩpêx nê prat o hkwÿ nhĩpêx nê kên o hkwÿ nhĩpêx. Hãmri nê hipêx pa nê ho mẽpahpãm ã harê nê ri hã apijaãm o apa. No mẽ ãm amnhĩ krã hkôt mẽ ate hipêx. Tirtũm te kot ja pyrãk kêt.

³⁰ —Amnepêm mẽ pa xwÿnhjaja na prem mẽ apyrã nê ã mẽmoj nhĩpêx anhÿr o pa nhũm Tirtũm ja hã mẽ omu nê ãm mẽ omu nê hã tanhmã mẽ hipêx to hkêt nê. Kormã mẽ kot kapêr mar kêt jakamã nhũm pre ja hã mẽ omu nê ãm mẽ omu. Tã na ra mẽ pahte mẽmo karõ nhĩpêx o mẽpahpãm nê mẽ pamã kapêr. Mẽ pahte hpãnhã amnhĩ kaxyw ãm kôt pix mã pajamaxpêr o papaja na kãm hprãm. ³¹ Kojã nhÿrmã tanhmã

mě pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwýnhjê jarê nê amnhĩ ri mẽ pa hkêt xwýnhjê jarê. Na pre ra ã mẽ harênh anhÿr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupÿm ho htĩr. Nê akupÿm ho htĩr jao kot nhÿrmã kãm tanhmã mẽ pajarênh to xwýnh ã ho amnhĩrĩt. Anê.

³² Nhũm pre ã Pawre mẽ kãm Tĩrtũm kapêr jarênh anê nhũm mẽ mar o kuhê. Kot mẽ kãm Jejus tyk nê akupÿm htĩr ã harê nhũm mẽ mar o kuhê. Nhũm mẽ hkwyjaja kuma nê ãm kuma nê axtem nê ri hã akunha. Nom nhũm mẽ hkwyjaja mẽ kurom mar tÿx nê Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nê. Anê.

³³ Hãmri nhũm Pawre akupÿm nhÿri hpõx xà hã ixkre hwÿr ma tẽ. ³⁴ Hãmri nhũm Xiõnĩs pẽ Areop kãm mẽ kãm kapêr xwýnh nê mẽhõ ni pẽ Tãmariis nê mẽ hkwyjaja kapêr mar tÿx nê amnhĩ kaxyw Jejus kôt hamaxpêr nê hkôt amnhĩ xunhwÿ. Hãmri nê Pawre kôt pa.

18

Pawre Korĩt wÿr mõi ã harênh Wam Korĩt 1.1-3

¹ Tã nhũm Pawre krĩ pẽ Atenas rũm kato nê ma krĩ pẽ Korĩt wÿr mõi nê põi. ² Hãmri nê nhÿri Akirti pumu. Haxwÿja kêp Ijaew. Krĩ pẽ Põt kamã na pre kato. Tã ma pyka pẽ Itar wÿr mõi nê Itar kamã krĩ pẽ Rõm kamã hpãnhã pa. Pa ho pa htã nhũm mẽ õ pahihiti Krawti tanhmã hamaxpêr to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisiire mẽ wa ma Korĩt wÿr mõi. Hãmri nê hwÿr põi nê kamã pa ho pa. Jakamã nhũm Pawre Korĩt wÿr põi nê wa omu ³ nê wa kuri põi nê wa hkôt ri pa. Nê Siras mẽ Ximotre wa kamã hamak pẽ wa ãhkõ hã ãpênh o pa. Wa urak nê kupêxê pytĩ ho ixkre nhĩpêx nê ho wênê ho ri wa hkôt pa. ⁴ Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwÿr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew

kêt xwýnhjê mã nhũm mẽ kãm ujarênh o hkrĩ. Nê mẽ kãm Jejus kot mẽ panê tanhmã amnhĩ nhĩpêx to hã harê.

⁵ Tã nhũm Siras mẽ Ximotre wa ma Masetõn rũm Pawre wÿr mõi põi. Jakamã nhũm Pawre axte ixkre nhĩpêx ã ãpênh kêt nê. Pãnhã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tĩrtũm kot mẽ pakaxyw ãm xwýnh ã harênh o ri mẽ hkôt pa. Xatã mẽ kãm ujarênh o pa. ⁶ Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmri ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mẽ ate Tĩrtũm kapêr kaga kênã. Nà kot paj mẽ akaga nê ma hpãnhã Ijaew kêt xwýnhjê hkôt ri mẽ kãm ja jarênh o ri ixpa. Anê.

Hãmri nê kãnhmã xa nê hinõkã kapa nê ho apê. Mẽ kot hkaga hã amnhĩ pumunh kaxyw nhũm mẽ noo mã ã amnhĩ nhĩpêx anê. ⁷ Hãmri nê ixkre rũm kato nê hijuk ri Ijaew kêt xwýnh pẽ Xijutre nhõrkwÿ hwÿr tẽ nê hpãnhã Xijutre hkôt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpêr rãhã ho pa.

⁸ Tã nhũm Ijaew õ pẽ Kriptija hkwyjê rom amnhĩ kaxyw Pahihti Jejus kôt hamaxpêr nê hkôt amnhĩ xãm. Kêp Ijaew nhõ Tĩrtũm kapêr o mẽ ahkre xà hã ixkre kamã mẽ ahkre xwýnh na pre. Jakamã õrkwÿ kamã hkwyjê mẽ mẽ hpimràatã Pahihti Jejus kôt amnhĩ xunhwÿr pa. Nê krĩja kamã ra Ijaew kêt xwýnh ohtõ nê Kripti pyrà nê amnhĩ kaxyw Jejus kôt hamaxpêr nê hkôt amnhĩ xunhwÿ. Jakamã nhũm Pawre mẽ kêp Jejus kwÿ hã mẽ piitã mẽ hkrã kumrà.

⁹ Tã nhũm kamãt nhũm Pawre gõi nê nõ nê amÿti nhũm kêwe Pahihti Jejus axte hwÿr kato nê kãm kapêr nê kãm:

—Pa Pawre? E kwa kêt ka mãmri axãmnhĩx ri atar mẽ kãm ijarênh rãhã ho ri apa nê amnhĩ kamã akahak o ri mẽ hkôt apa hkêt nê. ¹⁰ Kot paj atãnopxa nhũm mẽhõ tanhmã ato hkêt nê. Krĩ ja kamã koja mẽ ohtõ nê ixkôt amnhĩ xunhwÿ. Anê.

¹¹ Nhũm pre ã Pahшти Jejus Pawre hpimtir kãm kãm kapër anë. Jakamã nhũm Korit kãm arĩ ri mẽ hkõt pa ryy nẽ. Arĩ mẽ hkõt pa hã amgrã pyxi nẽ hkõt mytwrý kęp 6. Jao Tirtũm kapër o mẽ ahkre ho ri mẽ hkõt pa.

¹² Tã nhũm Korit nhõ xwỳnhjẽ nhõ pika pẽ Gres kamã mẽ ho amnhĩptãr xwỳnh nyw Gartija. Korit kãm pa jakamã nhũm Ijaew xaptãr tũmrejaja Pawre pynẽ nẽ ma hwỳr o tẽ nẽ kãm tanhmã ho hẽx to. ¹³ Jakamã nhũm Ijaew pikuprõnh xã hã ixkre kamã mẽ kãm kapër xwỳnh Sostenesja Garti mã Pawre o hẽx nẽ kãm:

—Kwa jahti na hte mẽ ixpẽ Ijaew kot amnhĩ nhĩpẽx kwỳm ri mẽ ahkre ho pa. Jao mẽ ixte axtem nẽ tanhmã Tirtũm kõt ri amnhĩ nhĩpẽx to ho ri ixpa kaxyw mẽ inhmã karõ ho pa. Nom mẽ ixte amnhĩ nhĩpẽx kuhpa hã mẽ inhmã karõ. Anẽ.

¹⁴ Hãmri nhũm ra Pawre kot Garti mã amnhĩ jarẽnh mã tã nhũm Garti amnhĩ to wa nẽ hã mẽ kãm kapër nẽ mẽ kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mẽ ate inhmã harẽnh ronhỹx pa arĩ mẽ ama nẽ tanhmã mẽ amã hipẽx to. ¹⁵ No xep ãm kot mẽ axaptãr tũmrejaja kot amnhĩ nhĩpẽx kuhpa hã pix mã kot amnhĩ nhĩpẽx o pa kẽnã. Nẽ mẽ ate mẽ ahkre kuhpa hã kot ri mẽ ahkreja pix mỳrapẽ na ka mẽ kamã agryk nẽ ã inhmã ho akapër anë. Nã kot paj ja hã tanhmã ho hkõt nẽ. Ka mẽ kam nẽ amnhĩ krã hkõt tanhmã ho hprãm xã hkõt tanhmã ho. Anẽ.

¹⁶ Hãmri nẽ amnhĩ nẽ mẽ hano. ¹⁷ Hãmri nhũm mẽ tee ri kuma nẽ ra Sostenes kamã gryk nẽ. Kot Garti mã tanhmã Pawre jarẽnh to htã nhũm kuma nẽ ãm mar jakamã nhũm mẽ hã Sostenes kamã gryk. Hãmri nẽ unẽ nẽ Garti noo mã htak o xa. Nẽ htak rax nẽ. Nom nhũm hã mẽ omu nẽ ãm mẽ omu nẽ nẽ tanhmã mẽ kãm nẽ hkõt nẽ.

Pawre kot akupỹm ãxiok wỳr mõi ã harẽnh

¹⁸ Tã nhũm Pawre arĩ Korit kamã mẽ hkõt pa nẽ gaa nẽ nojarẽt nẽ Jejus kõt htõjẽ mã amnhĩ jarẽ nẽ mẽ kãm:

—E kot paj ma akupỹm pika pẽ Sir wỳr mõi. Anẽ.

Hãmri nẽ mẽ kęp kato nẽ ma hwỳr mõi. Nẽ ma amnhĩ kõt Akirti mẽ hprõ Prisire

wa o mõi. Mõi nẽ krĩ pẽ Sẽnkrej wỳr pøj. Nhũm Pawre amnhĩ kukamã mẽmoj tã tanhmã Tirtũm mã amnhĩ jarẽnh to nẽ amnhĩ jarẽnh xã hkõt amnhĩ krã hkẽnh pa. Ijaew kot amnhĩ nhĩpẽx xã hkõt ã amnhĩ nhĩpẽx anẽ. Hãmri nẽ mẽ pãr wỳr agjẽ nẽ Sẽnkrej rũm kato nẽ ma Sir wỳr mõi. ¹⁹⁻²¹ Mõi nẽ krĩ pẽ Epes wỳr pøj. Hãmri nhũm Pawre mẽ hkwỳjaja pãr rũm hapøj nẽ krĩ hwỳr agjẽ nẽ Ijaew nhõ Tirtũm kapër o mẽ ahkre xã hã ixkre hwỳr mra nẽ hwỳr agjẽ nhũm Pawre mẽ kãm Tirtũm kapër jarẽnh o nhỹ. Hãmri nhũm mẽ kuma nẽ kãm mar prãm nẽ. Nẽ kãm:

—Kwa anojarẽt kêt nẽ. Kritpẽm mẽ ixkõt ri apa ryre nẽ Tirtũm kapër o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

—Nã kot paj ma mõi. Nom koja Tirtũm nhỹrmã akupỹn mẽ awỳr inhmẽ pa man akupỹn mẽ awỳr mõi nẽ axte kapër o mẽ ajahkre. Anẽ.

Hãmri nẽ ma mõi. Ma Epes rũm pãr kãm mõi. Nom nhũm Akirti mẽ Prisireja wa Epes kamã arĩk nẽ hpãnhã kamã pa ho pa.

²² Tã nhũm Pawre krĩ pẽ Sejarej wỳr pøj. Hãmri nẽ hpãnhã kurũm ma akupỹm Jerujarẽ hwỳr mõi. Kot Jejus kõt htõjẽ pumunh mã ma mẽ hwỳr mõi. Hãmri nẽ mẽ hwỳr pøj nẽ mẽ omu nẽ tanhmã mẽ kãm amnhĩ jarẽnh to nẽ mẽ kęp kato nẽ ma akupỹm ãxiok wỳr mõi. ²³ Hãmri nẽ hwỳr pøj nẽ kamã mẽ hkõt ri pa ryy nẽ mẽ kurũm kato nẽ hpãnhã ma akupỹm pyka pẽ Prik mẽ Karatas wa hwỳr mõi. Nẽ kamã mẽ kot Jejus kõt amnhĩ xunhwỳr xwỳnhjẽ jahkre ho pa. Mẽ kot Jejus kõt amnhĩ nhĩpẽx tỳx rãhã ho pa kaxyw mẽ hkõt mẽ ahkre mex o ri mẽ hkõt pa.

Apor kot Epes kãm Tirtũm kapër jarẽnh Epes 1.1-2; Wam Korit 3.6-9

²⁴ Tã nhũm Epes wỳr Ijaew õ pẽ Aporja mõi nẽ hwỳr pøj. Krĩ pẽ Aresãn kamã na pre kato. Na pre hte amnhĩ kaxyw Tirtũm kõt pix mã hamaxpẽr nẽ kapër ã kagã htũm mar tỳx nẽ. Jakamã mẽ kãm harẽnh mex o pa nhũm mẽ piitã kãm mar prãm nẽ. ²⁵ Nom kormã Jejus jarẽnh jatur xã mar kêt jakamã ãm mẽ kãm hkrax pix jarẽnh o pa. Juãw Paxis kot tanhmã mẽ ahkre htoja

nhũm mar tỳx nẽ. Nẽ tanhmã kot mẽ hkrã kumrãr to ho paja nhũm mãănẽn mar tỳx nẽ. Jakamã na pre hte mẽ kãm ja pix jarẽnh o pa. No Jesus kệp Tĩrtũm kot mẽ pahwỳr mẽnh xwỳnh ã harẽnhja nhũm kormã mar kêt nẽ. Tã Epes wỳr mỗ nẽ pỏj. ²⁶ Hãmri nẽ Ijaew nhỗ Tĩrtũm kapẽr o mẽ ahkre xà hã ixkre hwỳr axà nẽ kamã mẽ kãm ujarẽnh o nhỹ. Amnhĩ kamã kahak kêt nẽ amnhĩx ri mẽ kãm ujarẽnh mex nẽ. Hãmri nhũm Prisire mẽ Akirti wa kot mẽ kãm ujarẽnh ã kuma nẽ war axpẽn mã:

—Kwa mãn kormã Jesus jarẽnh piitã mar kêt. E pu amnhĩ kôt panhỏrkwỳ hwỳr o tẽ nẽ pahprĩ hã kãm harẽnh jatur xàm kumẽ kẽ hprĩ hã mar pa. Anẽ.

Hãmri nẽ war amnhĩ kôt kuwỳ nẽ hprĩ hã kãm ujarẽnh jatur xàm kumẽ nhũm hprĩ hã harẽnh piitã mar tỳx nẽ.

²⁷ Tã ra pyka pẽ Gres wỳr nojarẽt nẽ Jesus kôt htỏjẽ mã amnhĩ jarẽ nhũm mẽ kuma nhũm ja mẽ kãm mex nẽ. Hãmri nẽ Gres kamã Jesus kôt mẽ htỏjẽ mã kagà nhĩpêx. Apor kot mẽ hwỳr amnhĩ kôt o mỗr nẽ mẽ kãm ỏr nhũm mẽ kot omunh nẽ kamã harẽnh nẽ ho mex kaxyw mẽ kãm hipêx. Hãmri nẽ hipêx pa nẽ kãm kugỏ nhũm kupy nẽ mẽ kurũm kato nẽ ma mẽ hwỳr mỗ. Hãmri nẽ mẽ hwỳr pỏj. Gres nhỗ xwỳnh kwỳjaja na prem ra Jesus kôt amnhĩ xunhwỳ. Tĩrtũm kot mẽ kutã nojarẽt jakamã nhũm mẽ ra hkôt amnhĩ xunhwỳ. Jakamã nhũm Apor mẽ hwỳr pỏj hãmri nẽ mẽ ãhkỏ hã tanhmã mẽ ho ajuta hto ho pa. ²⁸ Nẽ xatã Ijaew mã tanhmã Jesus jarẽnh to kamã hihtỳx o mẽ hkôt pa nẽ mẽ kãm:

—Nà Jesusja tãm na pre Tĩrtũm mẽ pakaxyw ãm. Tĩrtũm kapẽr ã kagà htũm kamã ã harẽnh kot anhỹr. Anẽ.

19

Pawre akupỳm Epes wỳr mỗr ã harẽnh Rukre 3.15-16

¹ Tã nhũm Apor kormã Korĩt kãm pa ri nhũm Pawre ma akupỳm Epes wỳr mỗ. Ma krãhakỳx kôt akupỳm hwỳr mỗ. Hãmri nẽ hwỳr pỏj nẽ mẽ kot Jesus kôt amnhĩ nhĩpêx o mẽ pa xwỳnhjẽ pumu. Nhũm mẽ kormã Jesus jarẽnh jatur xà mar kêt nẽ. ² Jakamã

nhũm Pawre mẽ hwỳr mỗ nẽ mẽ omu nẽ Tĩrtũm Karỏ hã mẽ hkukja nẽ mẽ kãm:

—Kwa mẽ ate Jesus kôt amnhĩ xunhwỳr xà hã arĩgrota ã xà na pre Tĩrtũm Karỏ mẽ akarỏ mã agjẽ? Anẽ.

Hãmri nhũm mẽ kuma nẽ kãm:

—Nà mẽ ixte Tĩrtũm Karỏ jarẽnh mar kêt. Anẽ.

³ Hãmri nhũm mẽ kãm:

—No mẽmoj kôt na prem mẽ akrã kumrã? Anẽ.

Nhũm mẽ kãm:

—Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

⁴ Hãmri nhũm Pawre mẽ kãm:

—Nà Juãw Paxis na pre Ijaew mã kapẽr o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapẽr o pa. Nẽ mẽ kãm Jesus jarẽnh o: “Koja tokyx mẽhỏ ixkỏt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamaxpẽr nẽ hkôt amnhĩ xunhwỳ.” Anẽ. Tã Jesusja na pre ã mẽ kãm harẽnh anhỹr o pa. Anẽ.

⁵ Nhũm pre ã Pawre mẽ kãm Juãw Paxis mẽ Jesus wa harẽnh anẽ nẽ hpãnhã Jesus nhỹ hã mẽ hkrã kumrã. ⁶ Hãmri nẽ hpãnhã mẽ hã ãhkỏra jaxwỳ nhũm Tĩrtũm Karỏ mẽ hwỳr wrỳ nẽ mẽ hkarỏ mã gjêx pa. Hãmri nhũm mẽ ã hã ahpỳnhã axtem mẽ kapẽr kwỳ ho kapẽr nẽ ã hã Tĩrtũm mex o mex ã harẽnh o kuhê. ⁷ ã mẽ kot amnhĩ nhĩpêx anhỹr xwỳnhjaja kệp 12.

⁸ Tã nhũm Pawre Epes kãm Ijaew nhỗ Tĩrtũm kapẽr o mẽ ahkre xà hã ixkre hwỳr mrrar ã mytwrỳ axkrunẽpxi. Amnhĩ kamã kahak kêt nẽ hprĩ hã Ijaew mã hprĩ hã Jesus jarẽ nẽ mẽ kãm:

—E pa mẽ amã Jesus jarẽ ka mẽ inhma. Nà Tĩrtũm kot mẽ pahwỳr mẽnh xwỳnhhta na. Nẽ mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpẽr nẽ hkôt amnhĩ xunhwỳ nhũm Tĩrtũm ja hã mẽ apumu nẽ mẽ ato hkra. Anẽ.

Hãmri nhũm mẽ hkwyjaja kuma nẽ hkôt hamaxpẽr kurê kumrẽx. ⁹ Nom nhũm mẽ hkwyjaja kuma nẽ ãm kuma nẽ Jesus o kapẽr punuj nẽ. Mẽ piitã mẽ noo mã kuhê nẽ ho kapẽr punuj tỳx nẽ. Nhũm Pawre

tee ri ja mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỹnhja wỹr hpãnhã mō. Nẽ amnhĩ kõt mẽ kot Jejus kõt amnhĩ xunhwỹr xwỹnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỹr mra nẽ mẽ ahkre. ¹⁰ Jao hã amgrà axkrut. Jakamã nhũm pyka pê As kamã mẽ piitã Pahihti Jejus jarẽnh ma. Ijaew nẽ Ijaew kêt xwỹnhjaja nhũm mẽ piitã harẽnh ma.

Wajaga hkwỹ jarẽnh

¹¹ Tã nhũm Pawre Tĩrtũm nhỹ hã mẽ kãm aa mẽ kot mẽmoj pumunh kêt kwỹ ho anhỹr o ri mẽ hkõt pa. ¹² Jakamã nhũm pre htem hwỹr mra nẽ kêp ê hkwỹ jamỹ nẽ ma mẽ à xwỹnhjê hwỹr o mra nẽ mẽ hã haxwỹ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỹnhjê hã nhũm prem mãânẽn mẽ hã ê kwỹ jaxwỹ nhũm mẽkarõmnutija mẽ kurũm hapôj nẽ ma mrar kurê kumrẽx nhũm mẽ akupỹm tãm hkrã.

¹³⁻¹⁴ Tã nhũm mẽõ patre maati Sewahtija hkra my kêp 7 nẽ piitã kêp wajaga. Hãmri nẽ mẽ kãm Pawre pyrã nẽ mẽ nẽ mẽkarõmnuti japôx o pa hprãm nẽ. Jakamã kormã Jejus kõt amnhĩ xunhwỹr kêt tã mẽ kot ý hã Pawre pyrã nẽ mẽhõ nẽ hkwỹ janor kaxyw nẽ kãm:

—E Pawre kot Jejus jarẽnh o ri pa xwỹnhhta nhỹ hã kot paj amã ixkapêr. Jakamã e kwa tokyx myta rũm akato nẽ ma tẽ. Anẽ.

¹⁵ Hãmri nhũm mẽkarõmnutija mẽ kuma nẽ ãm mẽ kuma nẽ mẽ kãm:

—Tk. Mẽ apê Jejus mẽ Pawre wa hkwỹ hkêt tã mẽ nẽ ã mẽ inhmã akapêr anhỹr o apa. Nã Jejus mẽ hkwỹ pixjaja na htem Tĩrtũm nhỹ hã mẽ kêp mẽ ijapôx o pa. Mẽ apê mẽ hkwỹ hkêt kênã. Nã pa ixkatoore kaxyw ã. Anẽ.

¹⁶ Hãmri nhũm mẽkarõmnuti kot tanhmã ho xwỹnhhta mẽkarõmnuti nhỹ hã wajagajê pynê nẽ mẽ htak rax o kêp mẽ ê kaxõnh pa nhũm mẽ tee ri amnhĩ nhĩpêx. Hãmri nẽ hkênh nẽ õrkwỹ rũm hapôj nẽ ma umaj hprõt nẽ mra. ¹⁷ Hãmri nhũm Epes kamã mẽ piitã ã kot mẽ hipêx anhỹr ã mẽ harẽnh ma nẽ tee ri hamaxpêr nẽ kãm ma nẽ. Ijaew

nẽ Ijaew kêt xwỹnhjaja nhũm mẽ piitã tee ri kãm hamaxpêr o pa. Nẽ Pahihti Jejus mã mex o mex ã harẽ. ¹⁸ Jakamã nhũm mẽ kot Jejus kõt amnhĩ xunhwỹr nyw xwỹnhjaja piitã tanhmã amnhĩ jarẽnh to. Nẽ mẽ hkwỹjaja amnhĩ jarẽnh o:

—Nã kormã ixte Jejus kõt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kõt amnhĩ xãm hãmri nẽ axte ã amnhĩ nhĩpêx anhỹr kêt nẽ. Anẽ.

Nhũm mẽ hkwỹjaja kêp wajaga htã mẽ urak nẽ Jejus kõt amnhĩ xunhwỹ hãmri nẽ amnhĩ jarẽnh o:

—Nã ijaxwỹja kormã Jejus kõt amnhĩ xãm kêt ri na pa pre hte nẽ mẽ no kupyri nẽ mẽ y pix o ri mẽ hkõt ixpa. Tã Jejus kõt amnhĩ xãm hãmri nẽ axte ã amnhĩ nhĩpêx anhỹr kêt nẽ. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

¹⁹ Hãmri mẽ õ wajaga xàhpumunh xà hã kagã jamỹ nẽ ma o mra nẽ kaxyw kuto nẽ kamã rẽnh pa nẽ mẽ piitã mẽ noo mã ho xêt pa. Wajaga xàhpumunh xà hã kagãja ã kãxpore xohtõ rax kumrẽx tã nhũm mẽ Jejus gryk ã hamỹ nẽ o mra nẽ ho hxêt pa nhũm hapêx. ²⁰ Hãmri nhũm krĩ nhõ xwỹnhjaja ã mẽ kot amnhĩ nhĩpêx anhỹr ã mẽ omu nẽ ohtõ rax nẽ mẽ urak nẽ Jejus kõt amnhĩ xunhwỹ.

Pawre kot Rõm wỹr hkrã hã harẽnh Rõmãn 1.13-15, 15.22-29

²¹ Tã nhũm Pawre ra akupỹm Jerujarê hwỹr nojarêt nẽ hamaxpêr o:

—E kot paj ixkato nẽ hpãnhã ma Masetõn mẽ Gres wa hkõt ma akupỹm Jerujarê hwỹr mō. Ma mẽ kot Jejus kõt amnhĩ xunhwỹr xwỹnhjê pumunh o mẽ hkõt mō. Hãmri nẽ Jerujarê hwỹr pôj nẽ kamã tanhmã amnhĩ to hpa hãmri nẽ hpãnhã ma Rõm wỹr mō. Anẽ.

²² Hãmri nẽ hkõt ho ajuta ho wa pa xwỹnh Ximotre mẽ Eras wa kãm amnhĩ jarẽ nẽ wa kãm:

—E kêt ka wa ma ixkukamã Masetõn wỹr wa mō. Kot paj kormã jar As kamã ixpa grire hãmri nẽ ma war akõt mō pu mẽ hamũ ma Jerujarê hwỹr mō. Anẽ.

Hãmri nhũm wa kuma nẽ kato nẽ ma hkukamã Masetõn wỹr mō.

Mê kot sânti hã Pawre mã àkjêr ã mẽ harênh

Sikũn Korĩt 1.8-9

²³ Rôm nhũm Epes nhõ xwýnhjaja tee ri Pawre kot tanhmã Pahihti Jejus jarênh to hã kuma nhũm ja mẽ kêp omnuj nê. Nhũm mẽ Jejus ã kamã gryk týx nê. ²⁴ Na prem amnhĩ kaxyw Tĩrtũm kôt hamaxpêr kêt nê. Na prem axtem sânti ho mẽ hpãm nê amnhĩ to hwýr pê hã hpijaãm nê kãm mex o mex ã harênh o pa. Mẽ õ sântija ni Xiãre na pre. Nhũm mẽ kãm ixkre nhĩpêx nê kamã hkarõ nhĩpêx xãm. Hãmri nê hwýr akuprõ nê hã hkĩnh nê hkarõ hã hpijaãm nê kãm mex o mex ã harê. Nhũm pre hte Temêtja Xiãre nhõrkwý karõ hkryre hkwý nhĩpêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ àpênh xwýnhjê mẽ nhũm mẽ kot haprõr xwýnhjê kukwak ri kàxpore jamýnh rũnh o pa.

²⁵ —Jakamã nhũm Pawre mẽ hwýr mõ nê pøj nê mẽ kãm Mẽpahpãm Tĩrtũm jarênh o ri mẽ hkôt pa nhũm Temêt tee ri kuma nhũm ja kêp omnuj nê. Hãmri nhũm hamaxpêr nê mẽ kot urak nê Xiãre nhõrkwý karõ hkryre nhĩpêx nê ho wênê ho pa xwýnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãre nhõrkwý karõ hkryre pãnhã kàxpore jamýnh rũnh o papa. ²⁶ Tã mãn ka mẽ ra ham hpõx xwýnh Pawreja pumu nê kapêr ma. Na hte jar mẽ panhõ krĩ kamã nê As piitã hkôt mẽ kãm mẽpanã Xiãre karõ nê mẽ kãm kapêr o pa. Xep mẽ pahte mẽ hkarõ nhĩpêxja kêp mẽpanã kumrêx kêt ã mẽ kãm harênh o pa nhũm xep mẽ ohtõ nê kuma nê ra hkôt hamaxpêr.

²⁷ —Kwa ja mex kêt. Koja mẽ kapêr ma nê hkôt amnhĩ nhĩpêx hãmri nê axte mẽ pahte ixkre karõ hkryre nhĩpêx xwýnhhta japrõr kêt nê. Hãmri nê mẽ paxápênh o kapêr punuj nê. No ãm ja pix omnuj kêt. Koja mẽpanã Xiãre mã amnhĩ jarênh xà hã ixkreja kaga hpa. Nê haxwýja karõja kaga. Mẽ piitã kãm hapê kênã. As kamã nê pyka piitã hkôt mẽ piitã kãm hapê nê hwýr mra nê amnhĩ to hwýr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakàxpore

rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

²⁸ Hãmri nhũm mẽ tee ri ã kapêr anhýr ã kuma nê Pawre kamã gryk týx kumrêx. Nê gryk xàj kàx pêê kapêr nê xatã kapêr týx kãm kapêr punuj nê. Nê kapêr o:

—Xiãre na mex kumrêx. Kêp mẽ pahpê Epes nhõ xwýnhjê nã maati na.

Anhýr o kàxpêê kapêr o kuhê. ²⁹ Hãmri nhũm krĩ nhõ xwýnh piitã mẽ kuma nê mẽ hwýr hprõt nê haxwýja gryk nê kàxpêê mẽ hkôt ã harênh anhýr o kuhê. Hãmri nê gryk xàj Pawre hkôt ri wa pa xwýnhja wa unê nê ma mẽ kot axpên mar xà hã ixkre hwýr wa hkjênh o tẽ. Masetõn nhõ xwýnh wa kêp Gajore mẽ Aristakja nhũm mẽ wa unê. ³⁰ Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprõt nê mẽ kãm tanhmã kapêr to kaxyw nom nhũm mẽ kot Jejus kôt amnhĩ xunhwýr xwýnhjaja ja nê kãm kapêr kãm hihtýx nê. ³¹ Hãmri nhũm As kamã mẽ kot mẽ ho amnhĩptar xwýnh kwýjaja ã mẽ kot amnhĩ nhĩpêx anhýr ã mẽ omu nê Pawre hwýr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwýr hpêr mẽ nê mẽ hkôt htêm nê hkurê kamã hihtýx nê.

³² Rôm nhũm mẽ piitã mẽ kot axpên mar xà hã ixkre hwýr pikuprõnh pa nê kàx pê kapêr punuj o kuhê. Nom axpên kôt kapêr kêt nê. ãm axpên kwým ri kàx pê tanhmã kapêr punuj to ho. Nhũm mẽ hkwýjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê. ³³ Nhũm Ijaew kwýjaja tee ri ja hã mẽ omu nê axpên mã:

—Tk. Kwa okora. Koja mẽ nã Xiãre hã gryk hãmri nê tanhmã mẽ pahpê Ijaew to nã? Anê.

Hãmri nê hamaxpêr nê mẽ hwýr amnhĩõ pê Aresãnja mẽ nê kãm:

—Kwa ma mẽ hwýr tẽ nê mẽ kãm tanhmã mẽ pahtã axaprãr to. Pawre kêp mẽ pahkwý htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwýr tẽ nê xa nê tee ri kot mẽ ho hpinhkrênh kaxyw kãnhmã mẽ kãm ãhkra pêr kaprý. ³⁴ Nhũm mẽ omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

—Měpanā Xiānreja mex o mex. Kêp mē pahpê Epes nhõ xwýnhjê nã mex na. Anê.

³⁵ Tã nhũm mē õ pahi nhõ kôwenatõ jatã tanhmã Epes nhõ xwýnhjê ho hpinhkrênh to hãmri nê ja nê mē kãm kapêr nê mē kãm:

—Kwa mē anhĩkrê. Mē piitã kot Xiānre mex o mex ã omunh kênã. Nê mē pahpê kãm amnhĩ jarênh xà hã ixkre jamãr xwýnh ã mē kot mē pahpumunh mex. Nê kaxkwa rũm karõ kot mē pahwýr tēm nhũm mē pahpê hamãr o papa xwýnh ã nhũm mē kot mē pahpumunh mex. ³⁶ Jakamã mēhõ kot kêt we mē pahpê hamãr xwýnh kêt ã mē pajarê? Ra mē piitã mē kot ja hã mē pahpumunh jakamã kwa mē anhĩkrê nê ri ã akapêr anhýr kêt nê. ³⁷ No mē ate wa unênh nê amnhĩ kôt wa ho atēm xwýnhhta wa. Wa kot tanhmã mēpanā Xiānre ho kapêr punuj to rý kêp õ ixkre kamã àhkĩnh kêt tã ka mē amarĩ wa unê nê amnê amnhĩ kôt wa o tē.

³⁸ —Kwa kê Temêt mē hkwýjaja kãm tanhmã wa ho kapêr to hprãm nê ma pahihiti hwýr wa o tē nê kumã mãn tanhmã wa ho kapêr to. Měmoj tã axpên mã mē kapêr xà hã arĩgrota ãã. ³⁹ Rý ka mē amã mēmoj jarênh prãm nê arĩgroja ã mãn rĩ kormã mēmoj jarê. ⁴⁰ No jarãhã mē ate amnhĩ nhĩpêxja te mē ate pahihiti kutã amnhĩ xunhwýr nê ho akapêr punuj pyrãk. Koja Rõm nhõ xwýnhjê nhõ pahi mē ajarênh ma hãmri nê mē ate kamã agryk ã amnhĩ kamnhĩx. Hãmri nê mē atã ixkukja pa tanhmã kãm mē ajarênh to? Mēhõ nhý hã na ka mē ã apikuprõnh nê amnhĩ nhĩpêx anê? Nà amnhĩ krã hkôt na ka mē akuprõ nê ã amnhĩ nhĩpêx anê. Anê.

⁴¹ Hãmri nê mē kãm kapêr pa nê mē hano nhũm mē anhgrã nê ma akupým õrkwý hwýr hapêx.

20

Pawre ma Masetõn mē Gres wa hwýr mõr ã harênh

¹ Hãmri nhũm Pawre ra nojarêt. Jerujarê hwýr mõr mã nom kormã pika pê Masetõn kumrêx wýr mõr nê kurũm ma akupým Jerujarê hwýr mõr mã. Hãmri nê nojarêt nê mē kot Jejus kôt amnhĩ xunhwýr xwýnhjê ho akuprõ nê mē kãm amnhĩ jarê nê mē kãm:

—E kot paj ma mõ. Nom kêr ka mē arĩ ixwakre kamã Tirtũm kapêr kôt amnhĩ nhĩpêx mex rãhã ho ri apa nê aa hkaga hkêt nê. Anê.

Hãmri nê mē kãm:

—E mē mãmri ixwa kre kamã axãmnhĩx ajamakêtkati nê ri apa. Anê.

Hãmri nê kato nê ma Masetõn wýr mõ. ² Nê hwýr pøj nê kamã krĩ hkwý hkôt mõ nê nhýri mē kot Jejus kôt amnhĩ xunhwýr xwýnhjê pumu nê Tirtũm kapêr o mē ahkre. Mē kot hkôt amnhĩ nhĩpêx mex nê kãm hprãm xà hkôt pix mã amnhĩ nhĩpêx kaxyw mē kãm kapêr o ri mē hkôt pa. Hãmri nê kato nê ma mõ nê pyka pê Gres wýr pøj. ³ Nê kamã mē hkôt pa hã mytwry axkrunêpxi hãmri nê akupým pyka pê Sir wýr nojarêt. Nê ma pãr kãm hwýr mõr kaxyw nê amnhĩ tã Sir kamã Ijaew kwý kot tanhmã harênh to hã amnhĩ jarênh ma. Na prem ra hã axpên mã amýnê nê axpên mã: —E koja amnê mē pahwýr mõ pu mē nhýri omu nê hpĩr kurê kumrêx. Anê.

Hãmri nhũm Pawre amnhĩ tã mē kapêr ma nê pãr kaga nê mē hwýr mõr kêt nê. Hãmri nê awjanã nê Jerujarê hwýr Masetõn kamã pa. ⁴ Nhũm Jejus kôt htõ hkwýjaja ma hkôt mõ. ã mē hixi kot anhýr.

Perej nhõ xwýnh Sopatõja. Piro hkra na pre.

Nê Tesarõn nhõ xwýnh Aristak mē Sikũn wa.

Nê Tepe nhõ xwýnh Gajoreja.

Nê As nhõ xwýnh Xikitre mē Torow wa.

Nê Ximotreja.

Jajaja na prem ma Pawre hkôt Jerujarê hwýr mõ. ⁵ Nê pa ixpê Rukre ixte mē amã ja jarênh nê hã kagã xwýnhja na pa axte Pawre hã ajêt nê hkôt mõ. Jakamã nhũm jajaja piitã ma wa ixkukamã Tôx wýr mõ nê kamã wa ixkãm hamak o pa.

⁶ Tã pa wa ma krĩ pê Piripos rũm ixkato nê pãr kãm ma mē hkôt mõ. Arĩgro pê Pas jakãnh mē ma mē hkôt mõ.

Tã wa ixtã arĩgro pê 5 nê mē hkôt Tôx wýr pøj nê kamã mē omu nê mē hkôt ixpa hã ixtã ù semãn.

Pawre kot akupým Exik o htĩr ã harênh

Juãw 5.21; Atre 9.36-43

⁷ Tã nhũm sap nê kamãt pa mē kot Jejus kôt amnhĩ xunhwýr xwýnhjê hkôt akuprõ

ně axpĕn kutã apku nhũm Pawre mẽ kãm kapĕr. Ra apkati hkõt mẽ inhnojarĕt kaxyw jakamã nhũm mẽ kãm Tĩrtũm kapĕr jarĕnh ryy nĕ. Ra kõt ã kamãt nhũm arĩ mẽ kãm harĕnh o nhỹ. ⁸⁻⁹ Ixkre hprĕk axpĕn nhĩpy axkrunĕpxi nhĩtep xã kamã na pa prem akuprõ nĕ mar o ixkrĩ. Ixkreja kamã kanĕ ohtõ nĕ hpõk o harir. Jakamã nhũm Pawre arĩ mẽ kãm ujarĕnh o nhỹ nhũm mĕhõ xãptãr nyw Exikja ra õtxwa htỹx nĕ mẽ ixkuri õt o nhỹ. Janere hã õt o nhỹ. Tã ra gõr nĕ janere pĕ kato nĕ ahparmã tĕ nĕ pykap tĕm. Pa mẽ tee ri omu nĕ ahparmã hwỳr ixprõt nĕ wrỳ nĕ omu nhũm htyk mex nĕ nõ. Kỳj rũm ahpar mã htĕm ryy jakamã htyk mex nĕ nõ. Hãmri nhũm hkwyjaja tee ri omu nĕ hkaprĩ htỹx nĕ kumỳ nĕ mỳr o hkrĩ. ¹⁰ Hãmri nhũm Pawre mẽ ixkõt wrỳ nĕ hwỳr tĕ nĕ htyk ã omu nĕ kumỳ nĕ mẽ kãm:

—E mẽ amỳr kĕt nĕ. Ra htyk tã koja Tĩrtũm akupỹm mẽ pamã ho htĩr.

Anhỹrja kõt nhũm akupỹm htĩr. ¹¹⁻¹² Hãmri nhũm mẽ akupỹm htĩr ã omu nĕ hkĩnh tỹx kumrĕx. Hãmri pa mẽ akupỹm kỳx pĕ ixkre hwỳr api nhũm Pawre mẽ inhmã pãwti hkwy nhĩrĕ nĕ mẽ inhmã kugõ pa mẽ Jesus kot mẽ panĕ htyk mã ijamaxpĕr pĕ kuku. Hãmri nhũm Pawre axte mẽ kãm kapĕr o ỹr rãhã nhũm myt kato pa mẽ kĕp anhrã nĕ ma ixa.

Pawre Mĩrĕt wỳr mõr ã harĕnh

¹³ Hãmri pa mẽ inhnojarĕt nhũm Pawre mẽ ixte hkõt mẽ inhmõr xwỳnhjĕ mã:

—E kĕr ka mẽ ma pãr kãm ixkukamã mõ. Kot paj ahte ma kỳx pĕ mẽ akõt ixpar o Asõt wỳr mõ. Hãmri nĕ hwỳr põj nĕ mẽ anhõ pãr mã axã pu mẽ ma pahpimrãatã ma hamũ mõ. Anĕ.

¹⁴ Hãmri pa mẽ kuma nĕ ma mõ nĕ mẽmo arĩgro hã Asõt kamã axpĕn wỳr põj. Hãmri nhũm Pawre mẽ ixkõt pãr wỳr axã pa mẽ ma krĩ pĕ Mĩtirĕn wỳr mõ. ¹⁵ Nĕ hwỳr põj nĕ kurũm kormã mõ nhũm apkati pa mẽ gõ hipõk pĕ Kiw jakrenh o mõ. Nĕ hakre nĕ mõ nhũm apkati pa mẽ gõ hipõk pĕ Sãm wỳr põj nĕ hã pãr nhõ. Hãmri nhũm apkati pa mẽ axte mõ nĕ Mĩrĕt wỳr põj. ¹⁶ Nom nhũm ra Pawre nojarĕt nĕ. Kãm tokyx As rũm kator nĕ Jerujarĕ hwỳr mõr nĕ tokyx

hpõx pãrãm nĕ. Kãm mẽ hkĩnh pĕ Pĕtekos xwỳj ri hwỳr hpõx pãrãm jakamã nojarĕt tỹx pa mẽ Epes wỳr inhmõr kĕt nĕ.

Pawre kot Epes kamã Kris kwỳjĕ mã amnhĩ jarĕnh

¹⁷ Tã pa mẽ Mĩrĕt wỳr põj nhũm Pawre amnhĩ wỳr Epes wỳr Jesus kwỳ jahkre ho mẽ pa xwỳnhjĕ hã karõ. ¹⁸ Hãmri nhũm mẽ man mẽ ixwỳr mõ nhũm Pawre mẽ omu nĕ mẽ kãm amnhĩ jarĕ nĕ mẽ kãm:

—Nã ixte mẽ amã amnhĩ jarĕnh kaxyw na pa mẽ atã karõ. Ra mẽ ate tanhmã ixte amnhĩ nhĩpĕx to hã ixpumunh mex. Wam mẽ awỳr As wỳr ixpõxta ã ka prem aprĩ hã ixpumunh mex nĕ. ¹⁹ Na pa pre mẽ akõt ri mẽ amã tanhmã amnhĩ nhĩpĕx to ho ri ixa. Te ixpĕ mẽ amã ixãpĕnh xwỳnh pyrãk. Nĕ Pahihti Jesus mã tanhmã amnhĩ nhĩpĕx to ho ri mẽ akõt ixa. Nĕ ixkwỳ Ijaew kwỳ kot Jesus kapĕr kaga hã mẽ omu nĕ ixkaprĩ nĕ inhmỳr o ixa. Nhũm prem Jesus ã ixtomnuj pa amnhĩ xã htỹx kamã ijamak o ri mẽ hkõt ixa. ²⁰ Nom arĩ ri Tĩrtũm kapĕr o mẽ ajahkre ho ri mẽ akõt ixa rãhã nĕ aa hkaga hkĕt nĕ. Mĕ anhõrkwỹ kamã nĕ mẽ ahkre xã hã ixkre kamã. Mĕ ate tãm amnhĩ nhĩpĕx pãrãm xãj pa pre ã mẽ ajahkre mex anhỹr rãhã ho ri mẽ akõt ixa.

²¹ —Nĕ mẽ ixpĕ Ijaewjĕ mẽ mẽ apĕ Ijaew kĕt xwỳnhjĕ mẽ pa pre mẽ ajahkre ho axpĕn pyrãk. Mĕ apiitã mẽ ate amnhĩ tomnuj kaga nĕ hpãnhã Tĩrtũm kõt amnhĩ nhĩpĕx kaxyw. Nĕ amnhĩ kaxyw mẽ panhõ Pahihti Jesus Kris kõt ajamaxpĕr kaxyw na pa pre mẽ akõt ri mẽ ajahkre rãhã ho ri ixa.

²² —Tã ra Tĩrtũm Karõ kot akupỹm Jerujarĕ hwỳr inhmĕnh jakamã pa kormã hwỳr mõ. Kot paj hwỳr põj nhũm krĩ nhõ xwỳnhjaja Jesus ã ixtomnuj nĕ nom tanhmã mẽ kot ixtoja kukamã ixte ixprĩ hã ixãhpumunh kĕt. ²³ Ja pix na ixte omunh. Na pa hte nhỹri põj nhũm htem Jesus ã ixpynĕ nĕ mẽ hãgĕnh xã kamã ijagjĕ nĕ tanhmã inhĩpĕx to. Tĩrtũm Karõ na pre ra ã mẽ kot inhĩpĕx anhỹrja kukamã inhmã mẽ harĕ. Jakamã ixte amnhĩ kukamã amnhĩ tã ixãhpumunh mex. Kot paj xep akupỹm Jerujarĕ hwỳr põj nhũm mẽ ixpumu nĕ Jesus ã tanhmã inhĩpĕx to. ²⁴ Tã no pa

amnhĩ kamã ixkahak kêt o inhmã mẽ uma hkêt nê. Koja mẽ kãm ixpĩr prãm nê mãmrĩ xpi. Inhmã ixyk pyma hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tĩrtũm kãm mẽ pajapê hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panê tanhmã amnhĩ nhĩpêx to hã harênhja na inhmã mẽ piitã mẽ kãm harênh jatur xàm mẽnh prãm.

25 —Tã e ixkrãmnhwỳjaja. Na pa pre mẽ akôt mẽ ajahkre rãhã ho ri ixpa. Mẽ ate Jejus kôt amnhĩ nhĩpêx mex rãhã ho ri apa kaxyw. Tã kot puj pěr mẽ axte axpẽn pumunh kêt nê.

26-27 —Na pa pre ra mẽ amã Tĩrtũm kapěr piitã harênh pa. Mẽ ate mar tỳx nê hkôt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwỳnhjê hõ amnhĩ kaxyw Jejus kôt hamaxpěr prãm kêt nê rĩ tãm. Kwãr mãmrĩ kot amnhĩ tomnuj kamã ty nê arĩ tãm amnhĩ pumu no ãm kê amnhĩ tã tanhmã inhmã nê hkêt nê.

28 —E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nê mẽ kot Jejus kôt amnhĩ xunhwỳr xwỳnhjê jamãr mex o ri apa. Ja kaxyw na pre Tĩrtũm Karõ mẽ kaxyw mẽ axunhwỳ. Tĩrtũm Kra Jejus kot htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkôt apa. Te ôwêhti jamãr xwỳnh kot ôwêhti jamãr mex o ri pata pyrãk.

29 —Kot paj ma mõ nhũm mẽmojjaja ixpãnhã mẽ awỳr pøj nê mẽ ate Jejus kaga hprãm xàj tanhmã mẽ amã hêx to ho ri mẽ akôt pa. 30 Nê mẽ akwỳjaja mẽ urà nê tanhmã hamaxpěr punuj to nê mẽ ate Jejus kaga hprãm xàj hêx rom tanhmã mẽ amã kapěr to ho ri mẽ akôt pa. 31 Jakamã kwa mẽ o kora. Kêr ka mẽ axkãm ajamak rom nê ri apa. Kê jajaja nhỹrmã ã mẽ amã kapěr anê ka mẽ ama nê mẽ hkôt ajamaxpěr kêt nê. Mẽ ate mẽ mar nê mẽ hkôt ajamaxpěr pymaj na pa pre mẽ akôt ri mẽ ajahkre ho ri ixpa hã ixtã amgrà axkrunêpxi. Arĩgro hã nê kamãt kãm mẽ ajahkre rũnh o ri ixpa. Nê mẽ ate mẽ amã mẽ hêx xwỳnhjê hkôt

amnhĩ xunhwỳr pymaj mẽ ajahkre pê te inhmỳr pyrãk o ri mẽ akôt ixpa.

32 —E kot paj Tĩrtũm nhĩhkram mẽ ajagjênh pa. Koja mẽ atãnopxar o ri mẽ akôt pa nê mẽ akutã nojarêt rãhã ho pa. Hãmri ka mẽ ãm hkôt pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã Tĩrtũm mẽ pahpê hkrajê piitã tanhmã mẽ pahto mex to.

33 —Na pa pre mẽ akôt ixpa ry htã no ãm aa mẽmoj tã mẽ awỳr kêt nê. Mẽ axê hkwỳ hã mẽ awỳ rỳ mẽ akàxpore hã mẽ awỳr o ri ixpa hkêt nê. 34 Na pa pre amnhĩ pa kukwak ri amnhĩm ixujaprôr pê ixàpkur o ri mẽ akôt ixpa. Nê ixkôt mẽ pa xwỳnhjê mã ixujaprôr o ri ixpa. Ra mẽ ate ja hã ixpumunh mex.

35 —Tã mẽmo kaxyw na pa pre ã mẽ akôt amnhĩ nhĩpêx anhỳr o ri ixpa? Nã mẽ ate ja hã ixpumunh nê ixpyrà nê ã amnhĩ nhĩpêx anhỳr o ri apa kaxyw. Nê ixpyrà nê tanhmã mẽ kute xwỳnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã mẽmoj gõ hãmri nê akĩnh tỳx o ate mẽhõ mã mẽmoj nhõrta jakre.” Anê.

36 Na pre ã Pawre mẽ kãm ujarênh anhỳr pa hãmri pa mẽ ra inhnojarêt. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wỳ. 37-38 Hãmri nhũm mẽ piitã kãm Pawre hkĩnh tỳx jakamã mỳr rax o kuhê. Tee ri kot axte mẽ kot axpẽn pumunh kêt ã mẽ kãm amnhĩ jarênhja ma nê hkaprĩ htỳx nê. Nê hkaprĩ xàj kahti hkôt hamỳ nê mur. Hãmri nê ma Jerujarê hwỳr hkujaek kaxyw mẽ ixkôt pàr wỳr hkaprĩ nê mẽ ixkôt mỳr o mõ.

21

Pawre kot Jerujarê hwỳr hpôx ã harênh

1 Tã pa mẽ gõ mỳri Jejus kôt mẽ ixtõjê re nê pàr krem agjê nê axte mõ. Ma gõ hipòk pê Kosti hwỳr ixkatàt kôt mõ nê hã ajêt. Hãmri nhũm apkati pa mẽ axte hamũ mõ nê hpãnhã gõ hipòk pê Roxti hwỳr mõ nê hwỳr pøj nê hã pàr xi. Hãmri nê hpãnhã axte krĩ pê Patar wỳr mõ. 2 Hãmri nê hwỳr pøj nê pàr rũm ijapøj nê pàr õ pumu. Nhũm ra pyka pê Wẽnĩs wỳr nojarêt pa mẽ hwỳr

agjê nê ma kamã axte mō. ³ Mōō nê amým amnhĩ kukamã gō hipōk pê Sipre pumu. Hãmri nê upōk rŭm hakrenh mã mō nê pyka pê Sir wýr mō nê kamã Xir hwýr pōj nê hã pàr nhō. Pàr pãm kot krĩ kamã pàr kukrêx rer kaxyw pa mẽ kormã hã ajêt nê tokyx axte nhãm inhmōr kêt nê. ⁴ Hãmri pa mẽ kutêp api nê krĩ kamã mẽ kot Jejus kôt axpên to htō nê htōx xwýnhjê japêr o mō. Hãmri nê nhýri mẽ omu nê mẽ hkôt ri ixpa ho ixtã ũ semãn. Nhũm prem Tirtũm Karō nhý hã Pawre mã kapêr nê kãm:

—Kwa Pawre mẽ inhma. Kot ka Jerujarê hwýr pōj nhũm xep mẽ kãm akurê xwýnhjaja tanhmã anhĩpêx to. Tirtũm Karō na ã akukamã mẽ inhmã ajarênh anê. Jakamã kwa hwýr amōr kêt nê. Na pa mẽ tee ri akukamã ijamaxpêr. Anê.

⁵ Hãmri nhũm amnhĩ tã mẽ kuma nê ãm mẽ kuma nê Jerujarê wýr hkrã kamã hihtýx nê. Jakamã nhũm semãn hapêx pa mẽ axte inhnojarêt. Axte Jerujarê hwýr kormã inhmōr kaxyw inhnojarêt. Nhũm Jejus kôt mẽ ixtōjaja mẽ kot mẽ ixkujaêk kaxyw piitã pàr wýr mẽ ixkôt mō. Mẽ hprō nê mẽ hkrajê mẽ nhũm mẽ pimràatã mẽ ixkôt mō. Hãmri pa mẽ pàr wýr pōj nê gō mý ri ixpiitã ixkōnkrã ho ixkrĩ hpa nê amnhĩ to Tirtũm wý. ⁶ Hãmri nê mẽ kãm amnhĩ jarênh pa nê mẽ noo mã pàr krem agjê nê ma axte mō nhũm mẽ awjanã nê ma akupým ōrkwý hwýr hapêx. Hãmri pa mẽ kurũm kormã ma Jerujarê hwýr mō. ⁷ Mōō nê krĩ pê Poremax wýr pōj nê hã ajêt. Hãmri nê pàr rŭm ijapōj nê axte krĩ kamã Jejus kôt mẽ ixtō nê mẽ ixtōxjê japêr o mō nê nhýri mẽ omu nê mẽ kuri amnhĩm hikra.

⁸ Tã nhũm apkati pa mẽ axte mō. Pãnhã ma krĩ pê Sejarej wýr mō. Hãmri nê hwýr pōj nê Firipti kuri pōj. Firiptija kormã nyw ri mẽ kot Jerujarê kamã mẽ mjên htyk xwýnhjê mã mẽ apkur xã nhōr ho pa kaxyw mẽ ho ⁷ nê mẽ unhwýr xwýnhjtajê hō na pre. Tã hpãnhã kêp Tirtũm kapêr jarênh o pa xwýnh. ⁹ Nhũm hkra nijaja kêp kwat. Piitã mjên kêt nê hkukrit rãhã pa. Mẽ kêp Tirtũm nhý hã kapêr o mẽ pa xwýnh na pre mẽ. Jakamã pa mẽ mẽ kuri pōj. ¹⁰ Hãmri nê mẽ hkôt ri ixpa hã ixtã apkati grêre nhũm Akapō Jutej rŭm man mẽ ixwýr

mōn pōj. Kêp Tirtũm nhý hã kapêr jarênh o pa xwýnh na pre. ¹¹ Hãmri nê mẽ ixwýr pōj nê Pawre pumu nê hkukamã kot tanhmã harênh to kaxyw hwýr tēn kêp hpexã kapa nê ho amnhĩ te hpre nê ho amnhĩ pa hpre nê xa. Hãmri nê mẽ inhnoo mã Tirtũm Karō nhý hã mẽ kot tanhmã hipêx to hkukamã kãm awjarê nê kãm:

—E kot kaj Jerujarê hwýr pōj nhũm Ijaew xãptàr tũmjaja apumu nê ã anhĩpêx anê nê apa hpre nê ate hpre hãmri nê Ijaew kêt xwýnhjê nhĩhkram ajaxã. Kojã mẽ ã anhĩpêx anê. Anê.

¹² Hãmri pa mẽ tee ri ã ujarênh anhýrja ma nê Pawre kamã ixkahak týx nê ixkaprĩ nê inhmýr o ixkrĩ. Nê xatã kot mẽ hwýr mōr nê kãm ixkapêr kãm ixihýtýx nê kãm:

—Kwa mẽ ixkapêr ma Pawre. Mẽ hwýr amōr kêt o mẽ hwýr amōr kêt. Anê.

¹³ Hãmri nhũm mẽ inhmã:

—Tk. Kwa mẽ amýr kêt nê. Na pa mẽ apumu nê ixkaprĩ nê. Nà kot paj ma mẽ hwýr mō. Kwãr mẽ mãmrĩ Pahĩti Jejus ã tanhmã ixto rý hã ixpĩ. Ixte amnhĩ kamã ixkahak kêt. Anê.

¹⁴ Hãmri pa mẽ tee ri mẽ hwýr mōr nê hkurê kaprý nê kãm:

—Tōe. Nà kam nê Tirtũm kãm hprãm xã hkôt mãmrĩ mẽ hwýr mō rý mẽ hwýr amōr kêt nê. Anê.

¹⁵ Tã pa mẽ ra inhnojarêt nê amnhĩ to ixpikuprōnh pa nê ma Pawre hkôt Jerujarê hwýr tã ma mō. ¹⁶ Hãmri nhũm Sejarej kamã Jejus kôt mẽ ixtō hkwyjaja ma mẽ ixkôt mō. Pa mẽ mōō nê Jerujarê hwýr pōj. Hãmri nhũm mẽ ixkôt mẽ mōr xwýnhjaja mẽ ixto mō nê Mēnasō nhōrkwý hwýr mẽ ixto pōj. Mēnasōja Sipre kamã na pre kato. Tã hpãnhã Jerujarê hwýr ahpa nê kamã ri pa ho pa. Na pre ra Jejus kôt amnhĩ xãm ã hã amgrã xohtō nê. Tã pa mẽ kuri pōj.

Pawre mẽ Xiakre wa harênh

Atre 15.3-21; Wam Korĩ 9.19-22, 10.32-33

¹⁷ Tã pa mẽ Jerujarê hwýr pōj nhũm Jejus kôt mẽ ixtōjaja mẽ ixpumu nê hkĩnh nê.

¹⁸ Hãmri nhũm apkati pa mẽ ma Pawre hkôt Xiakre hwýr mō. Nhũm mẽ kot Tirtũm kapêr o mẽ ahkre xwýnh piitã ra kuri akuprō nê mẽ ixkutêp hkrĩ. ¹⁹ Jakamã nhũm Pawre mẽ hwýr axã nê mẽ kãm

tanhmã amnhĩ nhĩpêx to ho pa hã amnhĩ jarẽ nẽ mẽ kãm:

—Pa na ka mẽ rĩ akrĩ. E ot pa axte mẽ apumunh mã mõi. Ixte mẽ amã amnhĩ jarẽnh ã amnhĩ jarẽnh kaxyw. Nà na pa pre ma Ijaew kêt xwỳnhjê hkôt ixpa nẽ mẽ kãm Jejus kot mẽ panê tanhmã amnhĩ nhĩpêx to jarẽnh o ri mẽ hkôt ixpa. Nhũm Tĩrtũm inhĩhkõ hã ixkutã nojarêt mex jakamã nhũm prem inhma nẽ ohtõ rax nẽ mẽ pahpyrà nẽ Jejus kêt amnhĩ xunhwỳ. Anẽ.

²⁰⁻²⁵ Hãmri nhũm mẽ Ijaew kêt xwỳnh kwỳjaja kot Jejus kêt amnhĩ xunhwỳr ã mẽ harẽnh ma nẽ mẽ ỹ hã hkĩnh nẽ mẽ hã Tĩrtũm mã mex o mex ã harẽ. Hãmri nẽ Pawre mã kãm:

—Nà na pa prem ra mẽ harẽnh ma. Hãmri nẽ mẽ kãm kagà nhĩpêx nẽ mẽmoj tã mẽ kãm karõ nẽ mẽ hwỳr kumẽ. Mẽ kot omunh nẽ kamã harẽnh nẽ hkôt amnhĩ nhĩpêx o pa kaxyw.

Na pa prem kagàja kamã mẽ kot sãnti nhõ hkur nẽ mẽ hkurê.

Nẽ mry kamrõ hkur nẽ mẽ hkurê.

Nẽ mẽmo mry hpar nẽ hkamrõ runh kêt rãhã hkur nẽ mẽ hkurê.

Nẽ mẽ kot amnhĩ prõ pix tãnopxar kaxyw mẽ kãm hã karõ.

Nẽ mẽnijaja kot amnhĩ mjên pix tãnopxar kaxyw mẽ kãm hã karõ.

Nẽ nhãm mẽ kot axpên to amnhĩkati nẽ mẽ hkurê.

Ã na pa prem ja hã kagà nẽ mẽ hwỳr mẽnh anẽ. Jakamã e mẽ inhma. Na ra mẽ pahpê Ijaew kwỳjaja ohtõ rax kumrêx nẽ mẽ pahpyrà nẽ Jejus kêt amnhĩ xunhwỳ. Mãn ka pre mẽ harẽnh ma. Na htem Jejus kêt amnhĩ nhĩpêx o pa jao mãânên Tĩrtũm nhỹ hã Mojes kapêr kêt amnhĩ nhĩpêx mex o pa. Tã nhỹri mẽ kot tanhmã ato hêx to hã ajarẽnh ma. Na ka xep hte Ijaew kêt xwỳnhjê nhõ krĩ kamã põi hãmri nẽ mẽ õ krĩ kamã Ijaew kwỳjê pumu nẽ mẽmoj nẽ tanhmã mẽ kãm akapêr to ho ri apa. Nom Ijaew kêt xwỳnhjê mã ka xep hte ã mẽmoj nẽ akapêr anhỹr kêt nẽ. ãm Ijaew mã pix mã ka xep hte mẽ kot finat Mojes kapêr kêt amnhĩ nhĩpêx nẽ mẽ hkurê ho ri apa. Nẽ mẽ panhĩgêt kot amnhĩ nhĩpêx kuħpa hã mẽ kot mẽ hkra my kwỳt kà jakàr nẽ ka xep hte mẽ hkurê ho ri apa. Nẽ mẽ kot mẽ

panhĩgêt kêt amnhĩ nhĩpêx nẽ ka xep hte mãânên mẽ hkurê ho ri apa. Mẽ kêt Ijaew tã ka xep pre hte ã mẽmoj nẽ mẽ hkurê anhỹr ho ri apa. Na prem jar ã Ijaewjê mã ato hêx o pa anẽ nhũm mẽ kuma nẽ mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kêt amnhĩ nhĩpêx kêt ã akamnhĩx.

—Tã ra mẽ kot apõx ã ajarẽnh mar jakamã tanhmã kot kaj we mẽ kãm amnhĩ tã axaprãr to? Nẽ tanhmã kot kaj we mẽ noo mã amnhĩ nhĩpêx to kêt mẽ arĩ mẽ pahte amnhĩ nhĩpêx kêt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anẽ. Na ra jar mẽ pahkwỳjaja kêt kwat nẽ Tĩrtũm mã tanhmã amnhĩ jarẽnh to jatur xãm mẽnh kaxyw amnhĩ krã hkênh mã. Jakamã e kêt ka ma mẽ hkôt tẽ nẽ mẽ uràk nẽ amnhĩ krã hkênh nẽ kam nẽ mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anẽ hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nẽ mẽ kot ato hêx ã apumunh kurê kumrêx. Nẽ arĩ ate finat Mojes kapêr kêt amnhĩ nhĩpêx o ri apa hã apumu. Anẽ.

²⁶ Hãmri nhũm Pawre mẽ kuma nẽ mẽ kãm:

—Tõe. Nà ãm hãmri na ka mẽ inh mã awjarẽ. Nà kot paj ã amnhĩ nhĩpêx anẽ. Anẽ.

Jakamã nhũm apkati nhũm ma mẽ kêt 4tajê o mõi nẽ mẽ mex kaxyw tanhmã amnhĩ nhĩpêx to. Hãmri nẽ Tĩrtũm mã amnhĩ jarẽnh xã hã ixkre hwỳr mra nẽ agjê nẽ mẽ õ patre mã mẽ amnhĩ jarẽ nẽ kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarẽnh to. Tã kot paj mẽ axte ixtã ù semãn hãmri nẽ hatur xãm mẽnh kaxyw akupỹn awỳr mra nẽ amã mẽmoj gõ ka mẽ inh mã Tĩrtũm mã agõ nẽ hkôt kãm mẽ ijarẽ. Nẽ pa kot paj mẽ ixpiitã hpãnhã amã amnhĩre. Anẽ.

Mẽ kot Pawre pynênh ã mẽ harênh
Atre 24.12

²⁷ Tã nhũm semãnja hapêx kaxyw nhũm pika pê As rũm Ijaew kwỳjaja ma mra nẽ Tĩrtũm mã amnhĩ jarẽnh xã hã ixkre hwỳr agjê. Hãmri nẽ kamã Pawre pumu nẽ kamã gryk tỳx nẽ hwỳr hprõt nẽ unẽ nẽ tanhmã

hkwýjê mã ho hêx to nê ho kapêr punuj nê. Nê mẽ kãm:

²⁸ —E mẽ amnê mra nê jahti pumu. Na hte krĩ piitã hkôt ri mẽ pahkwýjê mã tanhmã ri hêx to ho pa. Tĩrtũm nhỹ hã finat Mojes kapêr nhũm mẽ kãm ho kapêr punuj o pa. Nê mẽ pahte Tĩrtũm mã amnhĩ jarênh xà hã ixkreja nhũm hte mãânên tanhmã mẽ kãm ho kapêr punuj to. Mẽ pahpyrà nê kêp Ijaew tã mẽ pahpê hkwý ho kapêr o pa. Tã ra axtem nê amnhĩ kôt Tĩrtũm nhõ ixkre hwýr Ijaew kêt xwýnh kwýjê ho agjê. Mẽ kot hwýr gjêx kêt kumrêx tã nhũm axtem nê amnhĩ kôt mẽ ho agjê. Anê.

²⁹ Na pre krĩja kamã Ijaew kêt xwýnh Topĩja Pawre hkôt pa nhũm mẽ omu. Kêp Epes nhõ xwýnh nhũm mẽ kot pry ã Pawre hkôt pa hã omu. Tã hã ahtũm nê Tĩrtũm mã amnhĩ jarênh xà hã ixkre kamã Pawre pumu nê htýx amnhĩ kôt Topĩ ho àr ã hkamnhĩx nê ã mẽ kãm harênh anê. ³⁰ Hãmri nhũm mẽ kuma nê Pawre kamã gryk týt nê. Nê hwýr hprôt nê unê nê ixkre rũm ho kato nê kêp hakwa kre kahê. ³¹⁻³² Hãmri nê ma o tẽ nê htak rax nê. Ra mẽ kot htak o hpĩr mã tã nhũm mêmõja pôristi krãhtũm wýr hprôt nê kãm awjarê nê kãm:

—Kwa o mũj mẽ ra kot axpên nhĩmex kaxyw pijapu ho kuhê. Anê.

Hãmri nhũm tee ri kuma nê pôristi hkwýjê mã anê nê mẽ ma mẽ hwýr hprôt kurê kumrêx. Nhũm mẽ arĩ Pawre htak tã amnhĩ wýr mẽ omu nê mẽ umaj kãm ure.

³³ Hãmri nhũm pôristi krãhtũm Pawre hã amýnê nhũm pôristijaja unê nê kàx o mẽ hkaxprexà ho axkrut nê ho hkaxpre pa. Hãmri nhũm mẽ hkrãhtũm Pawre hã mẽ hkukja nê mẽ kãm:

—Kwa mẽ atõ inhmã jahti jarê. Tanhmã na hixi te? Tanhmã na we amnhĩ tomnuj to hã na ka mẽ ã hipêx anê? Anê.

³⁴ Hãmri nhũm mẽ kuma nê piitã anhĩpê kàxpê kãm tanhmã harênh to. Nom axpên kwým tanhmã ri kãm harênh to. Hãmri nhũm tee ri hprĩ hã kot mẽ mar kaxyw hãmri nê pôristi mã anê nhũm mẽ kêp Pawre ho kato nê ma mẽ àpênh xà hã ixkre hwýr o tẽ. ³⁵⁻³⁶ Hãmri nhũm Ijaew kwý ohtô nê pry hã axpên nhĩgãnh o hkôt mra. Nê gryk xàj kapêr punuj týt o mẽ hkôt mō nê kàx pê pôristi mã kapêr nê mẽ kãm:

—Kwa mẽ apĩhti ri. Mexiti hã. Mẽmo kaxyw na ka mẽ ri amã hapê ho apahti? Anê.

Jakamã nhũm pôristija tee ri mẽ kuma hãmri nê mẽ kot tanhmã ho pymaj kumý nê kýt pê mẽ kêp kupê nê o mō. Jao ixkreja wýr mẽ àpir xà hã ho àpir o mō. ³⁷ Nê kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarê ka inhma. Anê.

Mẽ kapêr o kãm kapêr hãmri nhũm amnhĩ jaêr pê kuma nê kãm:

—Kwa xà na ka mẽ ixpyrà nê Gresjê kapêr o akapêr? ³⁸ Na pa ixtýt apê Ejit nhõ xwýnh pê mẽ hpar o apa xwýnhhta ã akamnhĩx. Ham na pre mẽ inhõ pahihtĩ kutã amnhĩ xãm nê kot hkurê kaxàr kaxyw mẽ ho ajuta xwýnhjê ho 4.000 nê mẽ hkurê nê ma kapôt ã mẽ o pa. Nom tãm na xep Gresjê kapêr o kapêr kêt nê. Anê.

³⁹ Hãmri nhũm Pawre kãm:

—Nà ixpê Ejit nhõ xwýnhhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mōr xwýnh nêj mã ixkapêr nà? Anê.

⁴⁰ Hãmri nhũm kãm:

—Tõe. Kam nê mãmri tanhmã mẽ kãm akapêr to. Anê.

Hãmri nhũm mẽ àpir xàta ã kýt pê mẽ mýri xa nê kànhmã mẽ kãm ìhkra pẽ nhũm mẽ omu nê hpinhkrênh pa nhũm mẽ kãm amnhĩ jarê.

22

Pawre kot kãm hkurê xwýnhjê mã amnhĩ jarênh

Atre 9.1-19, 26.1-23

¹⁻² Nhũm Pawre amnhĩ kwý Ijaew kapêr o mẽ kãm kapêr nê mẽ kãm:

—E ixkwýjaja. Pa mẽ amã amnhĩ jarê ka mẽ inhma. Anê.

Hãmri nhũm kot mẽ kapêr o kapêr ma nê hpinhkrênh pa nê akryk mar o kuhê nhũm mẽ kãm:

³ —Nà ixpê mẽ anhĩõ na pa. Ijaxwýja ixpê Ijaew. Pyka pê Siris kamã krĩ pê Tas kamã na pa pre ixkato no ãm jar Jerujarê kamã na pa pre ixaptãr. Kamariew na pre hte ijahkre ho pa. Finat Mojes kot Tĩrtũm nhỹ hã mẽ panhĩgêjtê mã kapêrja nhũm pre hprĩ hã ho ijahkre ho pa. Na pa pre mẽ

apyrà nê inhmã Tirtüm kôt amnhĩ nhĩpêx prãm nê.

⁴ —Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nê nhỹri mẽ kãm ixkato nê mẽ unê. Měmyjê pynê nê mēnijê pynê. Hãmri nê mẽ kot mẽ hpar kaxyw mẽ hagjênh o ri ixpa. ⁵ Na pa pre ã mẽ hipêx o ri ixpa anê. Mě panhõ patre maati nê mẽ àptàr tũmrejaja ra mẽ kot ja hã ixpumunh mex. Mě tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nê inhmã kugõ pa kupy nê ma mẽ hwỳr o mō. Ixte mẽ õ krĩ kamã Jejus kwỳjê pynênh par nê man akupỳn Jerujarê hwỳr mẽ ho inhmõr nhũm mẽ kot tanhmã mẽ ho kaxyw.

⁶ —Tã ra myt ahpa pa mẽ hwỳr ixàhtêp o mō. Puh nhũm kaxkwa rũm hirã rax kumrêxja ixwỳr wrỳ nê ixtã ajêt pa hipòk ri xa. ⁷ Hãmri nê umaj pykap tēm nhũm mēhõ kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa?” Anê. ⁸ Hãmri pa kãm: “Kwa mẽ atõ na ka ri ã inhmã akapêr anê pahihtì?” Anê nhũm inhmã: “Ixpê Najare nhõ xwỳnh Jejus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyræk.”

⁹ —Anhỹr o inhmã kapêr nhũm ixkôt mẽ pa xwỳnhjaja kuma no ãm hprĩ hã mar mex kêt nê. ãm hirã raxta pix pumu. ¹⁰ Tã pa kãm: “No tanhmã kot pa we amnhĩ to Pahihtì?” Anê nhũm inhmã: “E kànhmã xa nê mãmri ma Tamas wỳr mō. Kot kaj hwỳr pøj nhũm mēhõ awỳr tē nê mẽmoj tã amã karõ ka ama nê hkôt amnhĩ nhĩpêx.” Anê.

¹¹ —Nhũm pre ã inhmã kapêr anê. Hãmri pa hirã rax pumunh o ixãm kurê ra inhno hkre nê ixrīt kêt nhũm ixkôt mẽ pa xwỳnhjaja ixpa hã ixpy nê ma Tamas wỳr ixto mō nê ixto pøj.

¹² —Tã nhũm Tamas nhõ xwỳnh pē ãnãnĩsti ixwỳr tē. Na pre hte Tirtüm kapêr ã kagà htũm kôt amnhĩ nhĩpêx mex nhũm Tamas kamã Ijaew piitã kãm hkĩnh nê axpên mã mex ã harê. ¹³ Jakamã nhũm ixwỳr tē nê inhmã: “Pa Jejus kôt ixtõ Sawti? E akupỳm rīt.” Anhỹrja kôt pa akupỳm ixrīt mex kurê kumrêx nê omu. ¹⁴ Hãmri nhũm inhmã: “Nà mẽ panhĩgêtjê nhõ Tirtüm na

amnhĩ kaxyw ata. Ate kapêr mar nê hkôt tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. ¹⁵ Jakamã kêr ka ma mẽ piitã mẽ kãm ate omunh xwỳnhja jarênh o ari mẽ hkôt apa. Nê mẽ kãm kapêr jarênh o mẽ ahkre ho ri apa. ¹⁶ E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hãmri pa apê hkwỳ hã akrã kumrã ka ma mẽ kãm kapêr jarênh o ri apa.” Anê.

—Nhũm pre ã ãnãnĩsti inhmã kapêr anê.

¹⁷ —Tã pa man akupỳn jar Jerujarê hwỳr mẽ awỳr mō. Hãmri nê jar Tirtüm mã amnhĩ jarênh xà hã ixkre kamã kãm amnhĩ jarênh o ixãm rôm axte mẽmoj pumu. ¹⁸ Nhũm Jejus axte ixwỳr kato nê xa nê inhmã kapêr nê inhmã: “E inhma. Jerujarê nhõ xwỳnhjaja kãm ixkapêr mar prãm kêt jakamã kot kaj mẽ kãm ixkapêr jarê nhũm mẽ amar kêt nê. Jakamã kwa tokyx akato nê hpãnhã ma nhỹhỹm mō.” Anê.

—Hãmri pa tee ri ã kapêr anhỹrja ã kuma nê kãm: ¹⁹ “Kwa nà koja mẽ inhma Pahihtì. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kôt mẽ kot ixpumunh mex. Na pa pre hte krĩ piitã hkôt mra nê Tirtüm kapêr o mẽ ahkre xà hã ixkre kamã mẽ kot akôt amnhĩ kaxyw hamaxpêr xwỳnhjê pynê nê mẽ htak nê mẽ hagjênh xà kamã mẽ hagjê nhũm mẽ kot ja hã ixpumunh mex. ²⁰ Nhũm mẽ kot akapêr jarênh o pa xwỳnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinòkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nê akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nê kãm ixkapêr mar prãm nê.” Anê.

²¹ —Pa pre ã Jejus mã amnhĩ jarênh anê nhũm inhmã: “Nà. Kêr ka mãmri krĩja rũm akato nê ma nhỹhỹm mō. Kot paj hpãnhã ma Ijaew kêt xwỳnhjê hwỳr amē ka hpãnhã ma mẽ hwỳr mō nê mẽ hkôt mẽ kãm ixkapêr jarênh o ri apa.” Anê.

²² Nhũm pre Pawre ã amnhĩ hkwỳjê mã amnhĩ jarênh anê nhũm mẽ arĩ mar o kuhê rãhã Ijaew kêt xwỳnhjê jarênh ma nê

kamã gryk tỳx nê. Ijaew kêt xwỳnhjaja kot mẽ urak nê Tirtũm kapêr marja nhũm mẽ kãm hprãm kêt jakamã nhũm Pawre ã mẽ harênh anê nhũm mẽ kuma nê kamã gryk tỳx kumrêx. Nê gryk xàj kapêr punuj nê kapêr o:

—Kwa mẽ mãmri apĩhti ri. ãm hpĩr mã htãmti kênã. Anê.

²³ Hãmri nê gryk xàj amnhĩ nhĩnôkà hkwrỳ nê ho apê nê pyka jamỳ nê kãnhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

²⁴ Hãmri nhũm pôristi krãhtũmjaja tee ri ã mẽ kot amnhĩ nhĩpêx anhỹr ã mẽ omu nê mẽ kapêr ma nê pôristijê mã kapêr nê mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anê? E mẽ tokyx ixkre hwỳr ho axà nê mẽ hta xà ho hta kê mẽ pamã tanhmã amnhĩ jarênh to. Anê.

²⁵ Hãmri nhũm mẽ kuma nê ho axà nê hta kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nê mã mẽ omunh o xa nhũm Pawre omu nê amnhĩ mã kãm kapêr nê mẽ kãm:

—Kwa kormã ixte tanhmã mẽ amã amnhĩ jarênh to hkêt mã mẽ ixtak kaxyw. Ixpê Ijaew mã mãânên ixpê Rõm nhõ xwỳnhjê kênã. Xà na htem ã Rõm nhõ xwỳnhjê nhĩpêx anê? Anê.

²⁶ Hãmri nhũm tee ri ã amnhĩ jarênh anhỹrja ã kuma nê pôristi krãhtũmjaja wỳr hprôt nê mẽ kãm:

—Kwa taxy pu mẽ tanhmã ho hkêt nê. Xep kêp Rõm nhõ xwỳnhjê kênã. Anê.

²⁷ Hãmri nhũm tee ri kuma nê Pawre hwỳr axà nê mẽ kãm:

—Kwa xà ãm hãmri na ka amnhĩ jarê? Xà apê Rõm nhõ xwỳnhjê na ka? Anê.

Hãmri nhũm mẽ kãm:

—Tỳ. ãm hãmri ixte mẽ amã amnhĩ jarênh kênã. Ixpê Rõm nhõ xwỳnhjê na pa. Anê.

²⁸ Hãmri nhũm mẽ kãm:

—Kwa pa na pa pre amnhĩ to Rõm nhõ xwỳnhjê prãm xàj amnhĩ pãnhã mẽ mẽ kãm amnhĩrer rax nê. Anê.

Nhũm Pawre mẽ kãm:

—Tỳ nom pa na pa pre amnhĩ pãnhã mẽ mẽ kãm amnhĩrer kêt nê. Inhipeêxà hkôt ixpê Rõm nhõ xwỳnhjê na pa. Anê.

²⁹ Hãmri nhũm mẽ kuma nê tee ri hamaxpêr o mẽ kãm ma nê. Nê mẽ kãm ma ho hkaga kurê kumrêx. Nhũm mẽ hkrãhtũm nhõ pahija mãânên mẽ kãm ma nê. Kêp Rõm nhõ xwỳnhjê mã nhũm mẽ axtem nê kot unênh nê kax o hkaxpreja mã hamaxpêr nê mẽ kãm ma nê. Na htem ã Rõm nhõ xwỳnhjê nhĩpêx anhỹr kêt nê. Na htem tanhmã mẽ hkukjêr to nê hprĩ mã mẽ kuma nê mã mẽ kormã tanhmã mẽ hipêx to.

Pawre kot Ijaew xàptar tũmrejê mã amnhĩ jarênh

Matêwre 23.27-28

³⁰ Mã nhũm apkati nhũm pôristi krãhtũmjaja Ijaew kwỳ ho akuprô. Mẽo patre maati nê patre krãhtũmjaja nê mẽ ãptar tũmrejaja nhũm kot mẽ mẽ kãm tanhmã Pawre jarênh to kaxyw mẽ ho hpikuprôn pa. Hãmri nê Pawre pê hkaxpre xà rê nê mã mẽ hwỳr o tẽ nê mẽ kutã ỹr.

23

¹ Hãmri nhũm mẽ omu nê mẽ mẽ kãm amnhĩ jarê nê mẽ mẽ kãm:

—E ixkwỳjaja. Pa mẽ amã amnhĩ jarê ka mẽ inhma. Na pa hte Tirtũm nom mã amnhĩ nhĩpêx o ixpa nê mẽ pahpê Ijaew mẽ pahpê amnhĩ nhĩpêx kwỳm ri tanhmã amnhĩ nhĩpêx to hkêt nê. Anê.

² Hãmri nhũm mẽ õ patre maati ãnãniĩsti kuma nê kamã gryk nê. Axtem ãnãniĩsti hõ na pre. Hãmri nê ã Pawre kot amnhĩ jarênh anhỹrja ã kuma nê kamã gryk nê. Hãmri nê mẽ kot mar o kuhê xwỳnhjê mã mẽ kãm:

—Kwa mẽ atõ hakwap hkurahti ri. Mã kot amnhĩ nhĩpêxti mã. Na ãm mẽ pamã amnhĩ to hêx o xa. Anê.

³ Hãmri nhũm Pawre kuma nê hwỳr rĩt nê omu nê mẽ kãm:

—Mã ka koja Tirtũm akura mẽ kãm ga. Te ate finat Mojes kot ỹ mã kapêr kôt amnhĩ nhĩpêx pyrak mã ri axtem nê ri mẽ kot ijakwap ixkuranh kaxyw ri mẽ mẽ kãm ixtã amỹnê. Anê.

⁴ Hãmri nhũm kuri mẽ kuhê xwỳnhjê tee ri ã mẽ kãm kapêr anhỹrja ã kuma nê mẽ kãm:

—Kwa kêp patre maati kênã kot ka kêt ri ã mẽ kãm akapêr anê. Anê.

⁵ Hāmri nhūm amnhī jaēr pē ja hā kuma nē kām:

—Kwa ixte ja hā omunh kēt jakamā na pa ā ixtỳx kām ixkapēr anē. Ixte kēp patre maati hā omunh ronhỳx pa ā kām ixkapēr anhỳr kēt nē. Tĩrtũm kapēr ā kagà htũm kot ja nē mē pamā kapēr kēnā. Mē pahte tanhmā mē panhō pahi ho pakapēr punuj to nē mē pamā kapēr. Tā pa ām ixtỳx ā kām ixkapēr anē. Anē.

⁶⁻⁸ Hāmri nē hprī hā mē kot mar o hkrī xwỳnhjē pumu. Nhūm mē kamā Satusew nhō xwỳnh kwỳ nē Parijew nhō xwỳnh kwỳ. Satusew mē Parijew nhō xwỳnhjaja na htem axpēn kwỳm ri tanhmā mē htykjē jarēnh to. Satusew nhō xwỳnhjaja na htem mē htyk nē mē hkarō mē ro hā mē hapēx o mē hapēx ā mē hkamnhīx. Nē Tĩrtũm kapēr o mē wrỳk xwỳnh kēt ā mē harēnh o pa. No Parijewjaja na hte mē kurom mē htyk nē akupỳm mē htĩr ā mē hkamnhīx nē Tĩrtũm kapēr o mē wrỳk xwỳnh ā mē hkamnhīx. Nhūm Pawre kot ja hā mē omunh jakamā tanhmā hamaxpēr to hāmri nē mē kām kapēr. Na pre Parijew nhō xwỳnhjē pyrā nē mē htyk nē akupỳm mē htĩr kōt hamaxpēr nē Tĩrtũm kapēr o mē wrỳk xwỳnh kōt hamaxpēr. Jakamā mē omu nē kàx pē mē kām kapēr nē mē kām:

—Nà ijaxwỳja ixpē Parijew nhō xwỳnh. Nhūm inhīpēxà haxwỳja kēp Parijew nhō xwỳnh. Jakamā na pa hte mē apē Parijew nhō xwỳnhjē pyrā nē mē htyk nē akupỳm mē htĩr kōt ijamaxpēr. Tā ām ja pix mỳrapē na ka mē ixpynē nē ā inhīpēx anē. Anē.

Hāmri nhūm Parijew mē Satusew nhō xwỳnhjaja kuma nē ja hā axpēn kām gryk nē. Nē hā axpēn mā akir. ⁹ Hāmri nē ra axpēn mā àkjēr rax nē. Hāmri nhūm Parijew kwỳ pē Mojes kapēr o mē ahkre ho mē pa xwỳnhjaja kànhmā kuhē nē mē kām Pawre hā àprār kām hihtỳx nē mē kām:

—Kwa pēr tanhmā kot amnhī tomnuj tore hā. Mān ām hpimtir kām na pre ā ri kaxkwa kamā mēmoj mar anē. Rỳ apu Tĩrtũm kapēr o wrỳk xwỳnh kām tanhmā kapēr to nhūm pre Tamas wỳr pry kamā mar o xa rỳ ko. Anē.

¹⁰ Hāmri nhūm Satusew nhō xwỳnhjaja tee ri Tĩrtũm kapēr o mē wrỳk xwỳnh kot

kām kapēr ā harēnhja ma nē hā axpēn mā àkjēr rax nē. Hāmri nhūm pōristi krāhtũmja tee ri mē kot axpēn mā àkjēr ā mē omu hāmri nē pōristi mā kām:

—Kwa mē Pawre hwỳr tē nē mē kēp utà nē ma akupỳm o tē nē haxà. Kot ka mē ho anhỳr kēt nhūm mē tanhmā hamaxpēr to nē gryk xàj axpēn nhīhkra kamā hkaxōnh pa. Anē.

Hāmri nhūm mē kuma nē hwỳr tē nē mē kēp utà nē akupỳm o tē nē ixkre hwỳr ho axà.

Jejus kot Pawre jamaxpēr o hihtỳx ā harēnh

Atre 18.9-10

¹¹ Tā nhūm kamāt nhūm Jejus tām Pawre hwỳr kato nē kām:

—Pa Pawre? Kwa tee ri amnhī kukamā ajamaxpēr o amnhī kamā akahak kēt nē. Kot kaj te ra ate jar Jerujarē kamā mē kām ijarēnh ta pyrā nē ma krī pē Rōm wỳr mō nē krī nhō xwỳnhjē mā ijarē. Anē.

Mē kot Pawre hā àmnēnh ā mē harēnh

Sikũn Ximotre 4.18

¹²⁻¹³ Tā nhūm apkati nhūm Ijaew kwỳjaja axpēn wỳr akuprō. Mēmyjaja kēp 40 nē axte hkōt mē hkwyjaja axpēn wỳr akuprō. Mē kot Pawre pĩr kaxyw hā axpēn mar kaxyw hā akuprō nē hā axpēn mā amỳnē nē axpēn mā:

—Tōe. Nà kot puj mē hpĩr kaxyw amnhī jagri htỳx o paxàpkur kēt rāhā kupĩ nē rĩ kormā apku nē ixkō. Nà kot puj mē ho anē. Ra Tĩrtũm noo mā mē pahte ja hā amnhī jarēnh kēnā. Anē.

¹⁴ Hāmri nē mē ma mē ò patre krāhtũmjē mē mē àptār tũmrejē hwỳr mra nē mē kām hā amnhī jarē nē mē kām:

—Ot pa mē amā amnhī jarēnh mā mra. Nà kot paj mē tā Pawre pĩ. Kot paj mē kormā hpĩr kēt ri ixàpkur kēt rāhā kupĩ. Ra mē ixte Tĩrtũm noo mā ja hā amnhī jarēnh xà hkōt. ¹⁵ Jakamā e mē inhma. Kēr ka mē axēx rom pōristi krāhtũm mā anē kē apkati kē man mē awỳr Pawre ho tē. Te mē ate aprĩ hā hkukjēr kaxyw pyrāk o kām axēx. Kojā mē kormā mē awỳr ho hpōx kēt ri pa mē unēn kupĩ. Anē.

¹⁶ Hāmri nhūm Pawre tàmnhwỳ mē kot ā hā amnhī jarēnh anhỳrja ma hāmri nē ma pōristi xàpēnh xà hā ixkrej wỳr Pawre

hwÿr hprôt nê kãm mē harē. ¹⁷ Hāmri nhūm kuma nē amnhī wÿr pōristi krāhtūm nhÿ hā mē hamār xwÿnh ā karō nē kãm:

—Kwa ma mē akrāhtūm wÿr ixtāmnhwÿta o tē kē kãm mēmoj jarē nà? Anē.

¹⁸ Hāmri nhūm kuma nē ma hwÿr o tē nē kãm:

—E Pawre na inhmā anē pa awÿr htāmnhwÿ ho tē. Kot tanhmā amā ujarēnh to kaxyw. Anē.

¹⁹ Hāmri nhūm omu nē hpa hā kupy nē o tē nē ahte mē hkàx ā o xa nē kãm:

—E māmri inhmā mēmoj jarē pa ama. Mēmo na ka te inhmā harēnh kaxyw? Anē.

²⁰⁻²¹ Hāmri nhūm kãm:

—Nà Ijaew xāptār tūmrejaja na mē kot inhġēt Pawre pīr kaxyw hā amnhī jarē pa amā harēnh o tē. Koja xep mē hā awÿ. Xep apkati nhūm ate ma mē hwÿr mē hkukjēr xā hā ixkre hwÿr ho amōr nhūm mē kot hprī hā kot amnhī nhġpēx ā hkukjēr kaxyw. Nom koja mē ām amā amnhī to hēx. Koja xep mē kēp 40 nē pry kamā kutēp amūxu nē kuhē. Na mē ra hā axpēn mar pa nē axpēn mā: “Kot puj mē paxāpkur kēt rāhā Pawre pī nē rī kormā apku nē ixkō.” Anhÿr o amnhī jarē pa mē kuma. Jakamā na mē kormā ate mē hwÿr mēnh kaxyw akām ama. Kwa mē hwÿr ho amōr kēt nē. Anē.

²² Hāmri nhūm kuma nē kãm:

—Tōe. Nà na pa ra ama. Māmri ma akupÿm tē. Nom kē ka inhmar kumrēx. Kē ka nhām mēhō mā ja jarēnh kēt kumrēx. Ām kwarī ho kwarī. Anē.

Hāmri nhūm kuma nē kato nē ma akupÿm tē.

Mē kot Ijaew pymaj nhÿhÿm Pawre mēnh ā mē harēnh

²³⁻²⁴ Tā nhūm pōristi krāhtūmja amnhī wÿr ŷ hā pōristi jamār o mē pa xwÿnh wa ho hamēxkrut nē wa hā karō nē wa kãm:

—E wa inhma. Koja kōt ā kamāt ka wa ma krī pē Sejarej wÿr Pawre ho mō kē hkā hkġnh pē pahġti Peris wÿr pōj.

Nē amnhī kōt pōristi ho 200 nē o mō.

Nē kē mē kēp 70 nē kawar ā hkrī nē mē akōt mō.

Nē kē mē kēp 200 nē wapo jamÿ nē mē akōt o mō.

Kē mē ā ohtō rax anē.

Nē Pawre kot kawar ā ŷr nē mōr kaxyw ka mē kãm hō ho mō.

E kē ka mē ā axohtō nē hkōt amōr anē kē hkā hkġnh pē pahġti Peris wÿr pōj. Anē.

²⁵ Hāmri nē pahġti Peris mā kagā nhġpēx nē kamā kãm Pawre jarē nē kãm:

²⁶ Pa pahġti Peris? Xā amex? Ixpē Kraw Risas na pa awÿr kagā mē.

²⁷ E ot pa awÿr Ijaew pē Pawre mē.

Na pre hkwyja kot hpīr kaxyw unēnh tā pa mǎānēn kēp Rōm nhō xwÿnh ā harēnh ma hāmri nē hwÿr inhō pōristi rē nhūm mē hwÿr hprôt nē mē kēp utā. ²⁸ Hāmri nē Ijaew xāptār tūmrejē hwÿr o tē. Mē kot inhmā tanhmā kot amnhī tomnuj to hā harēnh kaxyw. ²⁹ Tanhmā kot amnhī tomnuj to nhūm mē kot haxār rÿ hpīr ronhÿx ja mex nē. No xep ām kot mē higētjē kot amnhī nhġpēx kōt amnhī nhġpēx kēt pix mÿrapē na mē kamā gryk.

³⁰ Tā pa mē kot hpīr kaxyw hā mē harēnh ma nē mē umaj awÿr kumē. Hāmri nē kamā mē gryk xwÿnhjē mā ajarē. Jakamā koja mē mēmo arġgro hā awÿr pōj nē tanhmā kot amnhī nhġpēx to hā amā harē ka kam ja hā mē ama nē tanhmā ho.

Tā ām ja pix na pa amā harē. Ixpē Kraw Risas na pa awÿr kagāja mē. Tā mǎn ka arī ixte amā harēnhja ma. Anē.

³¹ Tā nhūm kamāt nhūm mē hkrāhtūm kot mē kãm karō xā hkōt nhūm pōristijaja ma Pawre o mō. Hāmri nē krī pē āxġpat wÿr pōj nē kamā amnhġm hikra.

³² Nhūm apkati nhūm mē kot mē hkōt pykap mōr xwÿnhjaja mē ō pahi kot mē kãm hā karō xā hkōt awjanā nē ma akupÿm mō nhūm kawar ā mē mōr xwÿnh pixjaja ma Pawre ho mō. ³³ Hāmri nē mō nē Sejarej wÿr pōj nē pahġti Peris nhġhkram Pawre jaxā nē kãm kagāja gō nē awjanā nē ma akupÿm hapēx. ³⁴ Hāmri nhūm Perisa kagāja py nē omu. Nē omunh pa nē Pawre mā kãm:

—E inhmā amnhī jarē. Tanhmā na anhō pyka hixi te? Anē.

Nhūm kãm:

—Kēp Siris. Anē.

³⁵ Nhūm kãm:

—Tōe. Kē mē kot ato kapēr xwÿnhjaja pōj pa kormā ixprī hā mē kot tanhmā ajarēnh to ma mǎn. Anē.

Hāmri nē ō pōristi mā anē nhūm mē ma Pawre o tē. Ma pahi EroX htyk xwÿnh

nhõrkwÿ hwÿr o tē nē kamā haxà nhũm hkrī ho hkrī.

24

Ijaew kot tanhmā Pawre ho kapēr punuj to hā mẽ harēnh

Rukre 21.12-13; Atre 25.7

¹ Tā nhũm arīgro kēp 5 nē hapêx nhũm Ijaew kwÿjaja Sejarej wÿr pōj. Mē õ pa-tre maati ânānīsti nē Tetur nē kaxyw mẽ àptār tũmrejaja nhũm mẽ ma hwÿr mō nē pōj. Tetur kēp axiwōkat ā mẽ yr pē kapēr xwÿnh jakamā nhũm mẽ kot tanhmā Pawre o kapēr punuj to kaxyw pahi Peris wÿr amnhī kōt o mō. ² Hāmri nhũm mẽ amnhī wÿr Pawre hā karō nhũm pōristi haprō nē mẽ hwÿr o tēn ho axà. Hāmri nhũm Teturja pahihti Peris mā Pawre kot tanhmā amnhī tomnuj to hā harē nē kām:

—E pahihti inhma. Nà na ka hte tām mẽ inhīpêx nē mẽ ixto mex o apa. Jakamā nhũm hte nhām pika hkwÿ nhõ xwÿnhjaja mẽ ixkurē kaxàr kaxyw mẽ ixwÿr hprōt kēt nē. Pa htem ixpiitā akukwak ri ija-makētkati nē ixamnhīx inhmex nē ixpa. ³ Nē mẽ ixkīnh rāhā ho ixpa. Hēxta waa nē. Mē ixpiitā inhmā akīnh. ⁴ E kot paj amā awjarē ka inhma. Kot paj ixujarēnh o hakotre ka inhma nē tokyx ma akupÿm tē. ⁵ Nà Pawre na hte amnhī tomnuj pix o pa. Kēp Jejus pē Najare nhõ xwÿnhhta kōt amnhī nhīpêx o mẽ pa xwÿnhjē nhõ pahi na. Jakamā na hte pyka piitā hkōt mẽ ixpē Ijaew tanhmā axpēn kaxyw mẽ ixkryx to ho pa. ⁶ Jāã na pre Tīrtũm mā amnhī jarēnh xà hā ixkre hwÿr amnhī kōt mẽ kēp Ijaew kēt xwÿnh kwÿjē ho agjē nē mẽ ixpē ixkreja omnu kaxyw mā tā pa mẽ omu nē unē. ⁷ Tā nhũm pōristi krāhtũm Risasja mẽ ixpē utā ⁸ nē awÿr mẽ ixte tanhmā amā harēnh to xwÿnhjē rē. Tā ot pa mẽ ixkrī. Nē ota Pawre nhÿ. Kam kot amnhī nhīpêx ā hkukja kē tanhmā amā amnhī jarēnh to ka ama nē ixte amā harēnh xà hkōt tanhmā mar to. Anē.

⁹ Hāmri nhũm Ijaew hkwÿ haxwÿja kām:

—Nà ãm hāmri na ā amā harēnh anē pahihti. Anē.

Pawre kot pahihti mā amnhī jarēnh

Rukre 21.14-19

¹⁰ Hāmri nhũm pahihti Peris Pawre mā anē nhũm kot kām amnhī tā àprār kaxyw kånhmā xa nē kām:

—Nà na ka ra inhõ pyka kamā mẽ ixto amnhīptār mex o atā amgrà xohtō nē pahihti. Jakamā na pa pre ate ixkapēr mar kaxyw ā ajarēnh ma nē ixkīnh nē.

¹¹ —E kot paj amā amnhī jarē ka inhma. Ham na pa pre Jerujarē hwÿr mō nē pōj. Na pa hwÿr ixpōx ā ixtā arīgro pē 12 pix. Kam nē ixtā ixkwÿjē kukja nē mẽ ama. Ixte Tīrtũm mā amnhī jarēnh xà hā ixkre kamā Tīrtũm mā mex o mex ā harēnh kaxyw na pa pre hwÿr mō. ¹² No na pa pre nhÿri axpēn kaxyw tanhmā ri mẽ hkryx to hkēt nē. Nē mẽ ixte Tīrtũm mā amnhī jarēnh xà hā ixkre kamā rÿ kapēr o mẽ ahkre xà hā ixkre kamā rÿ nhÿri pry kamā tanhmā axpēn kaxyw ri mẽ hkryx to hkēt nē. ãm amrakati ho amrakati. ¹³ Mē kot ā ri ijarēnh anhÿrja amrakati kumrēx. Mēhõ kot ā ixte amnhī nhīpêx anhÿr ā ixpumunh kēt tā na htem amnhī krā hkōt amā ijarēnh o hēx. ¹⁴ Na htem mẽ ixte Jejus kōt amnhī nhīpêx xwÿnhjaja mẽ ixte amnhī nhīpêx mex kēt ā mẽ ijarē nom kot anhÿr kēt. ãm mẽ inhīgētjē nhõ Tīrtũm kapēr nywja kōt na pa hte amnhī nhīpêx mex o ri ixpa rāhā nē. Nhũm ixkwÿjaja htÿx axtem kapēr õ hkōt ixte amnhī nhīpêx o ixpa hā ixkamnhīx no ãm kapēr õ hkēt. Ijaxwÿja na pa hte mẽ uràk nē finat Mojes kapēr ā kagà mar o ixpa. Nē Tīrtũm nhÿ hā mẽ kapēr o mẽ pa xwÿnh kot kapēr ā kagàja pa hte mẽ uràk nē hkōt amnhī nhīpêx mex o ri ixpa. ¹⁵ Nē mẽ uràk nē Tīrtũm kot nhÿrmā akupÿm mẽ ho htīr kōt pa hte ijaxwÿja ijamaxpēr tÿx nē. Mē htyk xwÿnh piitāã. Mē kot amnhī to mex xwÿnhjē mẽ mẽ kot amnhī tomnuj xwÿnhjē mẽ mẽ ho hpimràatā akupÿm mẽ ho htīrja kōt pa hte mẽ uràk nē ijamaxpēr tÿx o ri ixpa. ¹⁶ Jakamā na pa hte tām amnhī nhīpêx rāhā nē. Tīrtũm noo mā nē mẽ piitā mẽ noo mā tām ri amnhī nhīpêx mex rāhā nē.

¹⁷ —Tā na pa pre pyka hkwÿ hkōt ri ixpa hā ixtā amgrà xohtō nē. Hāmri nē ma akupÿm Jerujarē hwÿr ixkwÿjē hwÿr mō. Amarī ixte mẽ kām kàxpore hkwÿ nhõr kaxyw pa akupÿm mẽ hwÿr mō. Nē

mãänën Tirtũm mã mẽmoj nhõr kaxyw. ¹⁸ Hãmri nẽ mẽ ixte amnhĩ nhĩpêx xà hkõt pa mẽ amnhĩ to mex pa nẽ ma tẽn Tirtũm mã amnhĩ jarënh xà hã ixkre hwÿr axà nhũm mẽ kamã ixpumu. Nom na pa pre ri ixkreja kamã tanhmã amnhĩ tomnuj to hkêt nẽ. Rÿ tanhmã ixkapêr punuj to hkêt nẽ. Na pa prem ãm inhgrêre nẽ akryk ixkuhê nhũm mẽ ixpumu. ¹⁹ Pika pê As rũm Ijaew kwÿjaja na prem ixkre kamã ixpumu. Nar mẽ tãmjaja mãn awÿr mra nẽ tanhmã amã ijarënh to.

²⁰ —Nẽ jar mẽ kot ixto kapêr xwÿnhjaja. Na pa pre mẽ àptâr tũmrejê mã amnhĩ jarënh pa nhũm mẽ inhma nẽ tanhmã inhmã nẽ hkêt nẽ. Kam nẽ ja hã mẽ hkukja nẽ mẽ ama. ²¹ Rÿ ko. Koja apu mẽ amã ãm ja pix ã ijarënh japêr. Na pa pre mẽ kãm ixkapêr nẽ mẽ kãm: “Na pa hte mẽ htyk nẽ akupÿm mẽ htĩr kõt ijamaxpêr tÿx nẽ. Tã ja pix mÿrapê na ka prem ixpynê nẽ ã inhĩpêx anê.” Anhÿr o mẽ kãm ixujarënh jakamã nhũm apu mẽ hkwyjaja kêp ja omnuj nẽ. Jakamã koja apu mẽ amã ja hã ijarënh japêr. Nom ja pix jarê. Anê.

Ã na pre Pawreja pahi Peris mã amnhĩ jarënh anê.

Peris mẽ hprõ wa kot Pawre mar ã wa harënh

²² Tã nhũm pahihti Peris kot mẽ kot Jejus kõt amnhĩ xunhwÿr xwÿnhjê kot amnhĩ nhĩpêx ã mẽ omunh mex jakamã hãmri Pawre mar pa nẽ ho kapêr xwÿnhjê mã kãm:

—Nà hãmri. Na pa ra mẽ ama. E mẽ mamrĩ ma mra. Kê pôristi krãhtũm Risasja mõi nẽ pøj pa wa ixprĩ hã mẽ ate tanhmã harënh toja ma nẽ rĩ kormã tanhmã Pawre jarënh to. Anê.

²³ Hãmri nẽ hpãnhã pôristi pytâr xwÿnh mã Pawre jarê nẽ kãm:

—E mẽ ma akupÿm ixkre hwÿr o tẽn mẽ kamã hamãr o apa. No ãm kwãr mãmrĩ ãmnhĩx ri ixkre kamã tanhmã amnhĩ to ho ri pa. Nẽ kê hkrãmnhwÿjaja mãmrĩ hwÿr mẽmoj to mra kê kuku. Anê.

Hãmri nhũm mẽ kuma nẽ ma o tẽn mẽ akupÿm ixkre hwÿr ho axà nhũm kamã pa ho pa.

²⁴ Tã ra hã apkati grêre nhũm Peris mẽ hprõ wa ma Pawre hwÿr tẽn. Prõ haxwÿja kêp Ijaew. Hixi pê na pre Turujire. Jakamã nhũm wa ma Pawre nhõrkwÿ hwÿr wa tẽn. Nhũm Peris Pawre hã karõ nhũm kato nẽ wa hwÿr tẽn nẽ wa kãm awjarê. Tanhmã wa kot amnhĩ to nẽ amnhĩ kaxyw Jejus Kris kõt hamaxpêr nẽ hkõt amnhĩ xãm prãm xaj hprĩ hã wa kãm harê. ²⁵ Nẽ wa kãm:

—Nà na htem Jejus Kris kõt amnhĩ nhĩpêx nẽ tãm ri amnhĩ nhĩpêx o pa. Kãm tanhmã amnhĩ tomnuj to hprãm tã ho anhÿr kêt nẽ. Nẽ arĩ Jejus kot amnhĩ nhĩpêx kõt amnhĩ nhĩpêx o pa. Koja Tirtũm nhÿrmã mẽ pahpiitã mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarënh to. Mẽ pahte tãm amnhĩ nhĩpêx xwÿnh ã mẽ pajarê rÿ mẽ pahte amnhĩ tomnuj xwÿnh ã mẽ pajarê. Anê.

Nhũm pre ã Pawre Peris mẽ Turujire wa kãm kapêr anê. Hãmri nhũm Peris tee ri ujarënhja ma nẽ kãm ma nẽ. Kot amnhĩ tomnuj o pa xwÿnh ã amnhĩ pumu nẽ ã kãm kapêr anhÿrja mar puma nẽ. Hãmri nẽ Pawre mã kãm:

—E hãmri. Nà na pa wa ra ama. Mamrĩ ma akupÿm tẽn axà. Kot paj mẽmo arĩgro hã mẽmoj to anhÿr kêt nẽ axte amnhĩ wÿr atã karõ ka axte tanhmã wa inhmã axujarënh to. Anê.

²⁶ Nẽ htÿx hamaxpêr o:

—Nà kot paj mẽmo arĩgro hã axte amnhĩ wÿr hã karõ kê ixwÿr tẽn nẽ ixte kator prãm xaj inhmã amnhĩrer japêr. Anê.

Hãmri nẽ xatã amnhĩ wÿr hã karõ htã no nhũm aa kot kator kaxyw tanhmã kãm nẽ hkêt nẽ.

²⁷ Tã nhũm amgrà axkrut nẽ hapêx nhũm Pos Pesti pahi Peristi hpãnhã kêp mẽ õ pahi nẽ mẽ ho amnhĩptã. Jakamã nhũm Peris akupÿm õ krĩ hwÿr nojarêt nẽ Pawre mã ãhkra karo hkêt rãhã ma mõi. Na pre hamaxpêr o:

—Nà kot paj Pawre kator nhũm Ijaew ja hã ijarënh ma nẽ ixkamã gryk nẽ. Nà kwãr mẽ hagjênh xà hã ixkre kamã hkrĩ ho hkrĩ. Kot paj kator kêt nẽ. Anê.

Hãmri nẽ kãm ãhkra karo hkêt rãhã ma akupÿm õ krĩ hwÿr mõi. Jakamã nhũm

Pawre arĩ ixkre kamã kêp prês nê hkrĩ ho hkrĩ.

25

Pawre Rôm wÿr hkrà ã harênh

¹ Tã nhũm pahi nyw Pos Pesti krĩ pê Sejarej wÿr mōn pōj. Hãmri nê kamã ri pa hã apkati axkrunēpxi pix nê ma Jerujarē hwÿr mō. ² Hãmri nê hwÿr pōj nhũm Ijaew kwÿjaja omu nê hwÿr mra nê kãm Pawre ho kapêr nê hã hwÿr kurê kumrêx. Mëõ patre krãhtũmjê mē Ijaew xàptàr tũmrejaja nhũm mē hwÿr mra nê kãm:

³ —Pa pahihti? E ot pa mē awÿr mra. Kwa xà kot ka Pawre hã karō kê man awÿr mō ka jar kot tanhmã amnhĩ tomnuj to hã hkukja nê ama? Anê.

No ãm hêx rom ã hã kãm kapêr anê. Kot hã karō nhũm mē kot pry hã hpĩr kaxyw nhũm mē hêx rom ã kãm kapêr anê. ⁴ Hãmri nhũm mē kuma nê mē kãm:

—Tk. Kwa ra Sejarej kamã kêp prês nê hkrĩ kênã kot pa kêt amnhĩ wÿr hã karō. Kot pa tokyx ma akupÿm hwÿr mō. ⁵ Jakamã kêr ka mē axàptàr tũmjaja ma ixkôt mra. Hãmri nê Sejarej kamã inhmã tanhmã kot amnhĩ tomnuj to hã harênh to pa mē ama nê rĩ kormã tanhmã harênh to. Anê.

⁶ Hãmri nê mē kamã pa hã apkati grêre nê ma akupÿm Sejarej wÿr mō. Hãmri nê hwÿr pōj nhũm apkati nhũm mē hkukjêr xà hã ixkre hwÿr tē nê mē kot mē mar xà hã mē hkrĩ xà kamã nhÿ nê amnhĩ wÿr Pawre hã karō. ⁷ Nhũm mē hwÿr o tē nê ÿr nhũm hkwy kot Jerujarē rũm mē mōr xwÿnhjaja kãm hipòk nê pahi Pos Pesti mã tanhmã ho kapêr to nê ho kapêr punuj tÿx nê. Kot tanhmã amnhĩ tomnuj to ho pa hã ho kapêr o kuhê. Nom mē kot ã kot amnhĩ nhĩpêx anhÿr ã omunh kêt tã ãm amnhĩ hkrã hkôt ri tanhmã ho hêx to. ⁸ Jakamã nhũm Pawre tee ri amnhĩ tã mē kot ho hêxja ma nê kãnhmã xa nê Pos Pesti mã amnhĩ tã aprã nê mē kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tĩrtũm nhÿ hã kapêr nhĩròp ixãm nê hkwÿm ri tanhmã amnhĩ nhĩpêx to hkêt nê. Nê mē ixte Tĩrtũm mã amnhĩ jarênh xà hã ixkre kamã ri tanhmã ixtÿx ri amnhĩ nhĩpêx to hkêt. Nê pahihti

Sesti kapêrja pa pre hiròp ixãm nê tanhmã amnhĩ tomnuj to hkêt nê. Aa ixte ã amnhĩ nhĩpêx anhÿr kêt kumrêx. Anê.

⁹ Hãmri nhũm Pos Pesti kuma nê tanhmã hkukamã hamaxpêr to nê hamaxpêr o:

—Kwa nhÿ krĩ kamã kot pa we Pawre kot inhmã tanhmã amnhĩ jarênh toja ma nhũm Ijaew ja hã kãm ixkĩnh japêr? Nà mëõ krĩ pê Jerujarē hwÿr kot paj akupÿm mē hwÿr o mō nê kamã mãn hkukja nê kuma. Nà ja na mex. Nà kot paj anê. Anê.

Hãmri nê Pawre mã kãm:

—E xà kot puj ma akupÿm Jerujarē hwÿr mō pa kamã axte mē kot ajarênh ma nê tanhmã ajarênh to nà? Anê.

¹⁰ Hãmri nhũm kãm:

—Nà jar ixte pahihti Sesti nhÿ hã mē kot mē hkukjêr xà hã ixkre kamã inhÿr nê amnhĩ jarênh kênã. Jar na htem mē hkukja nê tanhmã ri mē mar to. Na pa pre tanhmã ixkwÿjê ho hkêt nê. Mëmo kaxyw kot pa akupÿm mē hwÿr mō nê axte mē kãm amnhĩ jarê? ¹¹ Kop apu pa tanhmã ixte amnhĩ tomnuj to ronhÿx mē mãmrĩ ja hã ixpĩ pa mē kêp tanhmã ri amnhĩ to hkêt nê. Nom mē kot ixto hêx pix o ã ijarênh anhÿr kênã. Jakamã mëmo mÿrapê kot kaj mē ïhkram ijaxà? E Rôm kãm pahi maati Sesti hwÿr mãn inhmē pa kumã mãn amnhĩ jarê. Anê.

Pahi Sesti kêp pyka piitã hkôt mē ho amnhĩptàr xwÿnh maati jakamã nhũm Pawre kot mar kaxyw hwÿr hkrà. ¹² Hãmri nhũm Pos Pesti kuma nê ma tē nê hã ò kôwenatòjê ma. Hãmri nê hã axpên mar pa nê akupÿm hwÿr tē nê kãm:

—Tòe. Nà kot paj pahi maati Sesti wÿr amê. Ra hwÿr akrà kênã. Anê.

Pos Pesti kot Akrip mã Pawre jarênh

¹³ Tã nhũm apkati grêre nê hapêx nhũm pahi hō pê Akripja ma Pos Pesti hwÿr mō. Tòx Perênĩs mē wa mō. ¹⁴ Hãmri nê wa hwÿr pōj nê kuri wa pa hã apkati grêre nhũm Pos Pesti wa kãm Pawre jarê nê wa kãm:

—E pa war amã mëhō jarê. Na pre pahi Perisja mē hagjênh xà kamã mëhō jaxà nê kormã kator kêt ri nhũm mē àpênh nê kator pa hpãnhã àpênh o amnhĩptã. ¹⁵ Tã ra ma Jerujarē hwÿr mō nhũm Ijaew nhō patre krãhtũmjê mē mē àptàr tũmrejaja inhmã ho kapêr punuj rax nê. Nê ixte mē kãm hpĩr

kaxyw inhmã hã àmnênh kãm hihtỳx nẽ.
¹⁶ Nom pa mẽ kệp ja kaga nẽ mẽ kãm: “Nà mẽ ixpê Rôm nhõ xwỳnhjaja na pa htem ã mẽ hipêx anhỳr kêt nẽ. Na pa htem mẽ kot ho kapêr xwỳnh noo mã tanhmã hkukjêr to nhũm tanhmã amnhĩ tã àprâr to pa htem kuma nẽ rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêt ri tanhmã mẽ ho hkêt nẽ.” Anẽ.

¹⁷ —Jakamã nhũm prem kaxyw Sejarej wỳr pøj nhũm apkati pa hã mẽ hkukjêr kurê kumrêx. Nẽ mẽ kot mẽ hkukjêr xà hã mẽ hkrĩ xà kamã nhỹ nẽ ixte hkukjêr kaxyw amnhĩ wỳr Pawre hã karõ. ¹⁸ Na pa pre ijamaxpêr o: “Mãn pre tanhmã amnhĩ tomnuj tỳx to hã na mẽ inhmã harênh kaxyw.” ¹⁹ Anhỳr ã hkamnhĩx tã te kot amnhĩ to mex xwỳnh pyræk. ãm kot mẽ hkôt amnhĩ nhĩpêx kêt pix ã nhũm mẽ inhmã harê. Nẽ kaxyw mēhõ htyk xwỳnh jarê. Mẽ kot kãm “Jejus” anhỳr xwỳnhja na xep hte mẽ kãm akupỳm htĩr ã harênh o pa. ãm ja pix na prem inhmã harê. ²⁰ Pa tee ri ixte nhỹri ixprĩ hã tanhmã mẽ kot harênh to hã mẽ mar kaxyw hkukamã ijamaxpêr. Hãmri nẽ hã Pawre kukja nẽ kãm: “Xà kot puj ma akupỳm Jerujarê hwỳr mõi pa axte akwỳ kot tanhmã ajarênh to ma nẽ rĩ kormã tanhmã ajarênh to nà?” ²¹ Anhỳr tã no nhũm akupỳm Jerujarê hwỳr mõi kaga kumrêx nẽ amnhĩm Rôm kãm pahi maati Sesti jarê. Ixte ma hwỳr mēnh nhũm kot kãm amnhĩ jarênh nhũm kot mar nẽ tãm tanhmã harênh to kaxyw. Jakamã pa kormã ixte hwỳr mēnh kaxyw amnhĩ xa hã akupỳm mẽ hagjênh xà kamã haxà nhũm arĩ hkrĩ ho hkrĩ. Anẽ.

²² Hãmri nhũm Akrip kuma nẽ kãm:

—Xôwehe? Kwa na pa inhmã tanhmã kapêr to mar prãm nẽ. Anẽ.

Hãmri nhũm kãm:

—Tõe. Nà kê apkati pa hã karõ ka tanhmã kapêr mar to. Anẽ.

²³ Jakamã nhũm apkati nhũm Akrip mẽ htõx Perênĩs wa pahi hã mẽ ê mex jagjê nẽ ma mẽ hkukjêr xà hã ixkre hwỳr wa tẽ. Pôristi krãhtũm kwỳjê mẽ Sejarej kamã mẽ kot amnhĩ to rũnh xwỳnh kwỳjê mẽ nhũm mẽ hwỳr akuprõ. Nhũm mẽ piitã Akrip mẽ htõx wa kệp pahi hã wa ê mex ã wa omu

nẽ wa kamã no puma nẽ. Hãmri nhũm Pos Pesti Pawre hã karõ nhũm mẽ haprõ nẽ ma mẽ hwỳr o tẽ. ²⁴ Hãmri nhũm Pos Pesti omu nẽ Akrip mẽ htõx mẽ mẽ kot mar o hkrĩ xwỳnhjê mã kãm:

—E pahihiti Akrip mẽ mẽ apikuprõnh xwỳnhjaja. Ota Pawre xa. Jerujarê kamã nẽ jar Sejarej kamã na pre hkwyjaja inhmã ho kapêr rax nẽ. Hãmri nẽ ixte hpĩr kaxyw inhmã hã àmnênh kãm hihtỳx nẽ. ²⁵ Nom mẽmoj mỳrapê kot pa kêt kupĩ? Tã nhũm amnhĩm pahi maati Sesti jarê pa ma hwỳr mēnh kaxyw. ²⁶⁻²⁷ Nom na htem amarĩ pahi maati Sesti hwỳr mẽ rēnh kêt nẽ. Na htem kãm mẽ kot tanhmã amnhĩ tomnuj to hã kaga nẽ hwỳr kaga mẽ ro hã mẽ kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyræk. Jakamã na pa mẽ awỳr o tẽ. Mẽ ate kapêr mar nẽ kot tanhmã amnhĩ tomnuj to hã inhmã harênh nhũm ixte hã kaga nẽ pahi Sesti hwỳr mēnh kaxyw. Jakamã e mẽ kam nẽ hkukja nẽ ama nẽ tanhmã mar to. Anẽ.

26

Pawre kot pahihiti Akrip mã amnhĩ jarênh

Atre 8.3, 9.1-19, 22.1-21

¹ Hãmri nhũm Akrip Pos Pesti kot tanhmã Pawre jarênh toja ma nẽ Pawre mã kãm:

—E mãmri mẽ inhmã amnhĩ jarê pa mẽ ama. Anẽ.

Hãmri nhũm kuma nẽ kãm amnhĩ jarênh kaxyw kànhmã kãm ìhkra pẽ nẽ kãm:

²⁻³ —Hêxta waa nẽ. Nà na pa amã amnhĩ jarênh kaxyw nẽ ixkĩnh nẽ pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nẽ mẽ ixte tanhmã amnhĩ nhĩpêx to hã mẽ ixte axpēn kukjêrta ate hã mẽ ixpumunh mex. Jakamã na pa amã amnhĩ jarênh kaxyw nẽ ixkĩnh nẽ. E tokyx anojarêt kêt nẽ inhma. Pa amã ixujarênh jatur xàm kumẽ ka aprĩ hã inhma. ⁴ Nà ixkwỳjaja ra mẽ kot ixte amnhĩ nhĩpêx ã ixpumunh mex. Ixprĩre rũm ixpapxà kamã nẽ mãânēn Jerujarê kamã ixte tanhmã amnhĩ nhĩpêx to ho ixpaja mẽ kot hã ixpumunh mex. ⁵ Ixpê mẽ hkwy pẽ Parijew nhõ xwỳnh kwỳjê hã mẽ kot ixpumunh. Kojã mẽ apu ja hã amã ijarênh japêr rỳ ko.

Mê ixpê Parijew nhõ xwýnhjaja na pa htem amnepê m finat Mojes kot Tirtũm nhỹ hã mẽ inhĩgêjtjê mã mẽmoj tã karõ xà hkõt amnhĩ nhĩpêx mex o ixkwýjê jakre.

6 —Amnepê m na pre Tirtũm mẽ inhĩgêjtjê mã tanhmã amnhĩ jarênh to. Kot nhỹrmã mẽ piitã akupỹm mẽ ho htĩr ã amnhĩ jarê. Tã ixte ja kõt ijamaxpêr pix mýrapê na prem kot hã amã ixto kapêr kaxyw awýr ixto mõ. 7 Mê ixpê Ijaew nhĩgêjtjê piitã na prem Tirtũm kapêr kõt hamaxpêr o ri pa. Kot nhỹrmã akupỹm mẽ ho htĩr ã amnhĩ jarênh kõt hamaxpêr tỳx o pa. Amnepê m finat Jako mẽ hkra pê 12jaja na prem hkõt hamaxpêr. Nê ixpê mẽ hkanrêhã mẽ htãmnhwý na pa hte ijaxwýja ja kõt ijamaxpêr tỳx rãhã ho ri ixpa. Tã ãm mẽmoj pixi mýrapê na ixkwýjaja ã amã ixto kapêr punuj anê. 8 Mê kot ixpyrà nê ja kõt hamaxpêr ã amnhĩ jarênh tã nhũm pre Tirtũm akupỹm Kra Jejus o htĩr nom nhũm mẽ ixkĩnhã ja kõt hamaxpêr kêt. Nom Tirtũm kêp akupỹm mẽ pahto pahĩr xwýnh kênã.

9 —Amnepê m kormã Jejus kõt ijamaxpêr kêt ri na pa pre ijaxwýja mẽ urak nê akupỹm htĩr kõt ijamaxpêr kêt nê. Nê ixtỳx ijamaxpêr o: “Kot paj Jejus pê Najare nhõ xwýnh kõt mẽ kot amnhĩ xunhwýr xwýnhjê nhĩpêx kati ho ixpa nhũm Tirtũm ja hã ixpumu nhũm ja kãm mex nê.”

10 —Anhỹr jakamã pa pre hte tanhmã mẽ homnuj tỳx to ho ri ixpa. Jao Jerujarê kamã mẽ inhõ patre krãhtũmjê nhỹ hã mẽ unê nê mẽ hagiênh xà kamã mẽ hagiênh o ixpa nhũm mẽ kot mẽ himex kaxyw mẽ hã inhmã amnhĩ jarê nhũm ja inhmã mex nê. Pa mẽ harênh ma nê ixkĩnh nê. 11 Pa pre hte xatã tanhmã mẽ hipêx to nê mẽ kot Jejus kaga hprãm xaj mẽ hipêx kati rũnh nê. Tirtũm kapêr o mẽ ahkre xà hã ixkre piitã kamã pa pre hte ã mẽ hipêx anê. Nê mẽ kamã inhgryk tỳx jakamã ma krĩ hkwý hkõt mẽ hapêr o ri ixpa. ã na pa pre mẽ hipêx anhỹr o ri ixpa.

12 —Tã axte ixte mẽ hkwýjê pynênh nê mẽ hagiênh kaxyw ma Tamas wýr mõ. Mê inhõ patre krãhtũmjê nhỹ hã ma mẽ hwýr mõ. 13 Hãmri nhũm ra kaxkwa nhĩpók ri myt nhỹ pa kormã pry hã inhmõr ri

kaxkwa rũm mẽmo nhĩrãja pumu. Nhũm hirã htỳx o myt jakre nê ixtã ajêt pa ixkõt ri mẽ pa xwýnhjê mẽ hipók ri ixkuhê. 14 Hãmri nê mẽ inhmã ma xaj pykap ixrôrok pa nhũm kaxkwa rũm mêhõj inhmã kapêr. Mê ixpê Ijaew kapêr o kapêr nê inhmã: “Pa Sawti? Hêxta waa nê. Kwa mon ka hte axtem nê ixtomnuj tỳx o ri apa? Nom na ka tee ri ã amnhĩ nhĩpêx anhỹr kaprý.” Anê. 15 Hãmri pa tee ri kuma nê kãm: “Kwa mẽ atõ na ka ã inhmã akapêr anê?” Anê.

—Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkõt mẽ kot amnhĩ xunhwýr xwýnhjê homnuj tỳx o apa ho te pa ixtomnuj tỳx pyrak. 16 E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩrit. Jarãhã ate ixpumunh xà hkõt ate mẽ kãm ma ijarênh nê mẽ kãm ixkapêr jarênh o mẽ ahkre ho ri mẽ hkõt apa kaxyw na pa amnhĩ kaxyw ata. Kot paj nhỹrmã axte awýr ixkato nê tanhmã amã ixkapêr to ka inhma nê ma mẽ kãm ixkapêr jarênh o ri mẽ hkõt apa. Ja kaxyw na pa amnhĩm ata.” Anhỹr o inhmã kapêr. 17 Hãmri nê inhmã: “E kot paj Ijaew mẽ Ijaew kêt xwýnhjê hwýr amê nê anê mẽ omunh mex nê nhũm mêhõ apĩr kêt nê. 18 Kêr ka ma mẽ hkõt mẽ kãm ixkapêr jarênh o ri apa kê mêhprĩ hã kuma. Mê kot amnhĩ tomnuj kaga nê amnhĩ kaxyw ixkõt hamaxpêr nê ixkõt amnhĩ xunhwýr kaxyw. Hãmri nhũm Tirtũm ja hã mẽ omu nê ixkukwak ri amnhĩ katut kõt mẽ kot amnhĩ tomnuj piitã rênh pa nê axte kãm hamaxpêr kêt nê. Hãmri nê mẽ ho hkra. Koja mẽ ã amnhĩ nhĩpêx anê hãmri nê axte Satanasti nhỹ hã tanhmã amnhĩ nhĩpêx to hkêt nê. Pãnhã Tirtũm kõt pix mã amnhĩ nhĩpêx o pa.” Anê.

19 —ã na pre Pahihti Jejus inhmã kapêr anê. Tã kot kaxkwa rũm inhmã ixapênh jarênh ã karõja pa pre mar tỳx nê hkõt amnhĩ nhĩpêx rãhã ho ri ixpa pahi Akrip. 20 Jakamã na pa pre ma mẽ hkõt mẽ kãm kapêr jarênh o ri ixpa. Tamas kumrêx hwýr nê hpãnhã Jerujarê hwýr nê hpãnhã pika pê Jutej piitã hkõt Ijaew mã kapêr jarênh o ri ixpa. Tã hpãnhã Ijaew kêt xwýnhjê mã harê. Na pa hte mẽ kãm ixkapêr o: “Kwa mẽ ate amnhĩ tomnuj kaga nê hpãnhã

Tirtûm kôt amnhî xunhwỳ. Hāmri nê hkôt pix mã amnhî nhîpêx o ri apa. Mê piitã mẽ kot apê hkwỳ hã mẽ apumunh kaxyw.” Anê.

²¹—Ăm ja pix mỳrapê na pre ixkwỳjaja ixpynê. Tirtûm mã amnhî jarênh xà hã ixkre kamã ixpynê nê ra mẽ kot ixpîr kaxyw. ²²⁻²³ Nom na hte Tirtûm ixtânopxa nê ixto ixihtỳx mex rãhã ho pa pa arĩ mẽ kãm harênh o ri ixpa. Mẽ kot amnhî to rũnh xwỳnhjê mã nê mẽ kêp amrakati xwỳnhjê mã nê mẽ piitã mẽ kãm harênh o ri ixpa. Finat Mojes mẽ Tirtûm nhỹ hã kapêr jarênh o mẽ pa xwỳnhjaja kot ra hkukamã tanhmã harênh to xà hkôt pa hte mẽ kãm harênh o ri ixpa. Nê mẽ kãm: “Tirtûm kot mẽ pakaxyw ăm xwỳnhta na pre amnhî xà htỳx kamã hamak kãm ty. Tã nhũm Tirtûm akupỹm ho htĩr. Kumrêx na pre akupỹm ho htĩr jakamã kumrêx na pre tanhmã mẽ kãm kapêr to ho ri mẽ hkôt pa. Mẽ kot amnhî kaxyw hkôt hamaxpêr nê hkôt amnhî xunhwỳr xwỳnh piitã uràk nê nhỹrmã Tirtûm mẽ wa õ krĩ kamã htĩr tũm nê pa ho pa hprãm xaj mẽ harênh o pa. Mẽ ixpê Ijaew nê mãânênh mẽ apê Ijaew kêt xwỳnhjaja nhũm pre ã mẽ pajarênh anê.” Anhỹr o pa hte mẽ kãm harênh o ri mẽ hkôt ixpa pahi Akrip. Anê.

²⁴ Nhũm Pawre kormã kot mẽ kãm amnhî jarênh par kêt ri nhũm Pos Pesti tee ri tanhmã Jejus jarênh to hã kuma nê kax pê kãm kapêr nê kãm:

—Kwa na ka akrã axpã nà? Pêr ate kaga pumunh tỳx kurê akrã pipãnh pyràk o ri atỳx ã ri mẽ inhmã axujarênh anê. Anê.

²⁵ Hāmri nhũm kãm:

—Nà ixkrã pipãnh kêt. Ăm hāmri na pa mẽ amã awjarê. ²⁶ Jerujarê kamã na prem Jejus pĩ nhũm mẽ piitã omu. Tã nhũm akupỹm htĩr hāmri nê hpimxur pê ri pa hkêt nê. Na pre mẽ ohtô nê akupỹm htĩr kãm omu. Pahi Akrip ra kot ja mar mex jakamã na pa ixãmnhĩx ã mẽ amã harênh anê.

²⁷ Anhỹr o kãm kapêr hāmri nê pahi Akrip wỳr rĩt nê kãm:

—Kwa pahi Akrip. Xà Tirtûm nhỹ hã kapêr jarênh o mẽ pa xwỳnhjaja kot Jejus kukamã tanhmã harênh toja kôt na ka hte ajamaxpêr? Nà ra hkôt ajamaxpêr kênã. Ra ixte ajamaxpêr kôt apumunh mex. Anê.

²⁸ Hāmri nhũm tee ri kuma nê kãm:

—Tk. Kwa xà kot kaj ã inhmã akapêr anê pa ama nê apyrà nê amnhî kaxyw Jejus kôt ijamaxpêr? Nà na ka ixte ã ate Jejus jarênh anhỹrja kôt ijamaxpêr ã ixkamnhĩx kaprỳ. Anê.

²⁹ Hāmri nhũm Pawre kãm:

—Ko. Kot kaj ixpyrà nê amnhî kaxyw hkôt ajamaxpêr pa ixkĩnh nê. Nom kaxipix kêt. Mẽ apiitã mẽ ate inhmar o akrĩ xwỳnhjaja mãânênh. Mẽ ate mẽ ixpyrà nê Jejus kôt amnhî xunhwỳr na inhmã hprãm. Ăm ixpyrà nê mẽ apê prês pix na inhmã hprãm kêt. Anê.

³⁰ Hāmri nhũm pahi Akrip nê htõx Perênĩs nê pahi Pox Pesti nê mẽ hkôt mẽ mõi xwỳnhjaja kãnhmã kuhê nê ma mrar kaxyw. ³¹ Nê nojarêr nê Pawre hã axpên mã:

—Kwa tanhmã kot amnhî tomnuj to hkêt kênã kot kêt mẽ haxà rỳ kupĩ. Anê.

³² Hāmri nhũm Akripja Pos Pesti mã kãm:

—Kwa kop apu kot amnhî kaxyw pahi maati Sesti hwỳr hkrà hkêt ronhỹx pu mẽ ra kator. Anê.

27

Mẽ kot Rôm wỳr Pawre mẽnh ã mẽ harênh Atre 23.11, 25.12

¹ Tã nhũm mẽ pyka pê Itar wỳr pahi maati Sesti hwỳr Pawre mẽnh kaxyw. Itar kamã mẽ õ krĩ maati na pre kêp Rôm. Jakamã nhũm Pawre mẽ mẽ kot mẽ hãgênh xà kamã mẽ hkrĩ xwỳnh mẽ ho hpimràatã ma mẽ o mra nê põiристи krãhtũm Jurti nhĩhkram mẽ haxàr pa. Kot ma Rôm wỳr mẽ o mõi kaxyw. Jurtija kêp Itar kamã mẽ õ pahi maati hã põiристи krãhtũm nhũm prem ma mẽ kãm mẽ o mõi kaxyw ãhkram mẽ hãgênh pa. Ixpê Rukre na pa pre inhmã Pawre hkôt inhmõi prãm nê mẽ hã ajêt nê mẽ hkôt mõi.

² Tã pa mẽ ra inhnojarêr nhũm Aristak haxwỳja ma mẽ ixkôt mõi. Pyka pê Masetõn nhõ xwỳnh na pre. Õ krĩ pê na pre Tesarõn. Jakamã nhũm ma wa ixkôt mõi. Hāmri nhũm pàrja nojarêr. Atamĩx rũm pàr nhũm ra As wỳr nojarêr pa mẽ hwỳr inhgêx pa nê ma kamã mõi. ³ Hāmri nhũm apkati pa mẽ krĩ pê Sito hwỳr pøj nê hã pàr xi. Nhũm põiристи krãhtũm Jurtija Pawre ho mex jakamã pa mẽ Sito hwỳr pøj nhũm Pawre

mã anê pa mẽ ixkato nê ma ixkràmnhwýjê hwýr mra nê mẽ kutã apku nê ma akupým pàr wýr mra.

⁴ Tã pa mẽ axte mõ. Nom nhũm kôk mẽ ixkutã àpêr tỳx jakamã pa mẽ umaj juk nê gô hipôk kupu ho mõ. Gô hipôk pê Sipreja pa mẽ upôk rùm ma hkupu ho mõ nhũm mẽ inhnê kôk pê àmnàr mex nê. ⁵ Hãmri pa mẽ mõõ nê pyka pê Siris mẽ Pãpir wa hakrenh o mõ nê pyka pê Ris kamã Mira hwýr pôj nê hã pàr xi nê ijapôx pa. ⁶ Hãmri nhũm pôristi krãhtũmja Aresãnrir rùm pàr pumu nhũm ra Itar wýr nojarêr. Pa mẽ hwýr inhgjêx kurê kumrêx hãmri nê ma kamã axte mõ. ⁷ Hãmri nhũm pàrja kôk kutã tee ri môr prêprêk kaxyw nê ãm amnhĩm hprĩ nê môr ã apkati xohtô nê pa mẽ tokyx ixpôx kêt nê. Tã Sito hwýr ixàhtêp o mõ nom nhũm kôk mẽ ixkutã hihtỳx rax kumrêx. Jakamã pa mẽ juk nê gô hipôk pê Kret jatur xà jahpa nê ma kape hã mõ nhũm mẽ inhnê kôk pê àmnàr mex nê. Hãmri pa mẽ ma Sarmôn jakrenh o mõ ⁸ nhũm pàr kôk kutã amnhĩm hprĩ nê kape hã mõ. Pa mẽ mõ nê jatã Rasej tã pàr nhĩkwý xà mex wýr pôj nê kamã pàr xi. ⁹ Nom pàr kot amnhĩm hprĩ nê môr jakamã nhũm ra kôk xàpêr tỳx nê kamã kry htỳx ã mytwrý mẽ ixtã kato. Mytwrýja ã mẽ kot kôk xàpêr tỳx pymaj nhỹhỹm pàr kãm mrar kêt. Jakamã nhũm Pawre tokyx mẽ inhmôr nê pàr nhõ xwýnhjê mã kapêr kãm hihtỳx nê mẽ kãm:

¹⁰ —Kwa pu mẽ jar kôk xàpêr tỳx jamãr o ri papa nã. Kê kôk mẽ kry htỳxja hapêx pu mẽ rĩ kormã axte mõ. Kot puj mẽ anhỹr kêt nê kôk xàpêr tỳx kãm mõ nhũm nhỹri pàrja mẽ pahpê axà nhũm gô mẽ apê mẽ akukrêx o hapêx pa. Pu mẽ pajaxwýja axkaprã.

¹¹ Anhỹr o mẽ kãm kapêr tã no nhũm mẽ kuma nê ãm kuma. Pàr pãm mẽ pàr o mrar xwýnh wa nojarêr tỳx nê kapêr ma nê ãm kuma. Nhũm pôristi krãhtũm wa nojarêr ã wa kuma nê haxwýja Pawre mar kêt nê. ¹² Nhũm mẽ kot pàr nhĩkwý xà mex jarênhja mẽ kot mex ã harênh tã mẽ kêp omnuj nê. Hã na wrýk nê kôk xàpêr tỳx nhũm mẽ kêp omnuj tỳx nê. Jakamã nhũm mẽ piitã Pawre rom ra nojarêr nê. Mẽ kãm tokyx krĩ pê Wênĩs wýr hpôx prãm jakamã nojarêr tỳx nê. Gô hipôk pê Kret kamã na Wênĩsja.

Nê kamã kôk xàpêr tỳx kêt jakamã nhũm mẽ hwýr nojarêr nê axpên mã:

—E kwa pu mẽ tokyx Wênĩs wýr mõ nê kamã mãn kôk xàpêr tỳx japêx jamãr o papa. Anê.

Hãmri nê piitã hwýr nojarêr.

Kôk kot pàr o àpêr tỳx ã harênh

¹³ Tã nhũm kahpa hkôt kôk xàpêrja katàt kôt kawax pê apê nhũm mẽ kamã ama nê axpên mã:

—E hãmri. Tokyx pu mẽ mõ. Anê.

Jakamã pa mẽ pàr o htỳx xà ho api nê axte mõ. Ma gô hipôk pê Kret jakàr ã mõ. ¹⁴ Puh nhũm na wrý nê kôk àpêr tỳx kumrêx. Mẽ kot kãm “kôk xàpêr tỳx maati” anhỹr xwýnhja gô hipôk rùm mẽ ixto àpêr tỳx kumrêx o mõ. ¹⁵ Hãmri nê mẽ ixkutã àpêr tỳx nhũm pàr tee ri kutã hkarôt. Pa mẽ kormã Wênĩs wýr ixpôx kêt ri ra ho awjanã nhũm amnhĩ krã hkôt kôk kôt mõ. ¹⁶⁻¹⁷ Hãmri nê mõ nê gô hipôk pê Krawti jahpa nê hakàr ã mõ nhũm mẽ inhnê kôk pê amýtã nhũm amnhĩm hprĩ nê kawax pê apê. Hãmri pa mẽ pàr krare kot mẽ ixkôt môr xwýnhja pa mẽ kumý nê pàr rax kãm kumê. Ra kamã gô rax tã pa mẽ ixkarôt tỳx nê nê hkapĩr pa nê ho api nê pàr rax kãm kumê nê ho htỳx. Hãmri nê hpãnhã kôk xàpêr tỳx pymaj pàr rax kaxpre hpa. Hãmri nê kôk kot pykahti grã maati pê Sirteja wýr pàr mênh nhũm kot amnhĩ to pykahti xãm o htêm pymaj nhũm mẽ kot ho mrar xà hã kupêxê rax o wrý nhũm pàr amnhĩ krã hkôt mã kôk kôt mõ.

¹⁸ Tã nhũm apkati nhũm kôk arĩ mẽ ixpê pàr o àpêr tỳx nê arĩ na wrýk rax rãhã nê. Jakamã pa mẽ pàr àr pymaj nê mẽ hikukrêx kwý gôx kãm rênh pa. Kaxkritre nê àr kêt kaxyw.

¹⁹ Tã nhũm apkati pa mẽ hpãnhã pàr kre kamã ri nê hikukrêx kwý rê nê gôx kãm kurê. ²⁰ Nhũm kôk arĩ àpêr tỳx kumrêx ã apkati xohtô nê. Nê na wrýk rax rãhã jakamã pa mẽ kanhêti pumunh kêt nê myt pumunh kêt o mẽ ixtã apkati xohtô rax kumrêx. Hãmri nê tee ri ahkapi nê tee ri amnhĩ kukamã ijamaxpêr. Nê ixtyk par pix kukamã ijamaxpêr o ixkaprĩ nê ixkrĩ.

²¹ Hãmri nê mẽ inhmã ma xàj ixàpkur kêt rryy nê. Hãmri nhũm Pawre tee ri ja hã mẽ

ixpumu nē pàr nhõ xwýnh wa kãm kapër nē wa kãm:

—Kwa na pa pre tee ri Kret kãm man mẽ pamõr nē war amã ixkapër. Kop apu mũtar mãn mẽ kuri arĩ ri mẽ hkõt mẽ papa ronhỹx pu mẽ pajamakêtkati nē paxàmnhĩx ri papa. Tã nhỹx pu mẽ ri mẽ hikukrêxja gõx kãm rēnh par kêt nē. ²² Nom kwa kêt ka mẽ tee ri amnhĩ kukamã ajamaxpër kêt nē. Kot puj mẽ pahtõ pahtyk kêt nē. Æm pàrja pix koja axà nē hapêx. ²³ Ixpê Tĩrtũm krajê hõ na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamàt ja kamã ixwýr kapër o wrýk xwýnhjê hõ mẽ nhũm ixwýr wrý nē inhmã awjarê ²⁴ nē inhmã: “Pa Pawre? Kwa tee ri amnhĩ kukamã ajamaxpër o amã ma hkêt nē. Kot kaj akà hkĩnh pê ma Itar kamã Rõm wýr mõ nē põj nē pahi maati Sesti pumu nē kãm amnhĩ jarê. Jakamã koja Tĩrtũm akõt mẽ mõr xwýnh piitã omunh mex nē ka mẽ atõ tanhmã amnhĩ to hkêt nē.” Anê.

²⁵ —Æ kot inhmã kapër anhýr jakamã kwa mẽ amnhĩ to htýx nē tee ri amnhĩ kukamã ajamaxpër kêt nē. Tĩrtũm kapër o wrýk xwýnh kot inhmã ujarēnh xà hkõt koja Tĩrtũm ã mẽ panhĩpêx anê. Ixte ja hã omunh mex kēnã. ²⁶ Koja xep kòkja nhỹri gõ hipòk ã pàr krakrak pa. Nom mẽ papajaja kot puj mẽ pahkà hkĩnh pê hwýr pahpõx pa. Anê.

²⁷ Tã pa mẽ mõõ nē ã inhmõr anhýrja ã ixtã semãn axkrut nē ra gõ rax pê Ariax kõt axà. Kamàt kãm hkõt axà nhũm kòkja arĩ pàr o apêr týx rãhã ho mõ. Hãmri nhũm kõt ã kamàt nhũm pàr o mrar xwýnhja ra pàr kot pykahti grà htêp ã hkamnhĩx. ²⁸ Jakamã nhũm mẽ gõ xupým pumunh xà ho gõ pumu nhũm upým kêp 36 met. Hãmri nhũm hã ahtũmre nē axte omu nhũm ra hpãnhã kêp 27 met pix. Jao ra pàr kot gõ kokwe htêp o mõr ã omu. ²⁹ Hãmri nē kot kēn kuranh nē hã pikrakrak pymaj katē rũm ho htýx xà ho 4 nē gõx kãm kurē nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. ³⁰ Hãmri nhũm pàr kãm mẽ ãpēnh xwýnhjaja tanhmã hamaxpër to nē hêx rom pàr krare ho wrýk o tē. Mẽ kot mẽ ixrer nē ahte xarmã mõr nē rēr nē tokyx gõ hipòk wýr hpõx kaxyw. No ãm hêx rom te mẽ kot axte pàr krã rũm ho htýx xà

hõ mēnh kaxyw pyræk o amnhĩ nhĩpêx nē kaxyw ho wrýk o tē. ³¹ Nom nhũm Pawre mẽ hamaxpër ã mẽ omu hãmri nē pòristi mẽ mẽ hkrãhtũm mã mẽ harē nē mẽ kãm:

—Kwa koja mũjjaja mẽ pare nē ahte pàr krare kamã xarmã mõn rē ka mẽ apikaprãr pa kãm ga. Anê.

³² Hãmri nhũm mẽ tee ri kuma nē mẽ hwýr hprõt nē mẽ kêp pàr krare pê hkaxpre xà jakà nhũm gõx kãm tēm nē ma gõ hkõt hkaprýn mõ.

³³ Tã hãmri nhũm ra myt kator o mõ nhũm Pawre akupým mẽ piitã mẽ ho mẽ hamaxpër o hihtýx kaxyw mẽ kãm:

—Kwa na ka mẽ tee ri amnhĩ kukamã ajamaxpër o akaprĩ nē axàpkur kêt o atã semãn axkrut. ³⁴ E pu mẽ mẽmoj krē nē ho amnhĩ xihtýx. Kot puj mẽ pahtõ pahtyk kêt nē. Æm hãmri na pa mẽ amã ixkapër. Anê.

³⁵ Hãmri nē mẽmoj py nē mẽ noo mã Tĩrtũm mã harē nē hkur o xa ³⁶ nhũm mẽ ja hã omunh xà hkõt akupým tãm hamaxpër o mõ. Hãmri nē amnhĩm mẽõ hkwy jamý nē kumē kuku. ³⁷ Pàr kãm mẽ inhmõr xwýnhjaja na pa prem ixpê 276. ³⁸ Tã pa mẽ ra ixàpkur pa. Hãmri nē pàr kaxkrit kaxyw mẽ apkur xà hã mẽmoj y jakrêxja gõx kãm hkaprĩ pa.

Pàr mẽ kêp pikrakrak ã harēnh

³⁹ Tã nhũm ra myt kator mex nē nhũm mẽ amnhĩ kukamã gõ hipòk pumu nē axpēn mã:

—Kwa nhỹ pika na mũj wehe? Anê.

Hãmri nē nhỹri hakàx ã amnhĩm nõr xà mex pumu nē hwýr pàr o mõr kaxyw hã axpēn ma. ⁴⁰ Hãmri nē kaxyw pàr o htýx xà jakà nhũm axrē nē gõx kãm rôròk pa. Nē pĩ ho pàr o juk xà nhõ xê xàja nhũm mẽ mããnen krãhta. Hãmri nē akupým mrar xà hã kupêxê nhõ nhũm kòk ho hikot nē ma gõ jakàx wýr o mõ. ⁴¹ Nom nhũm pàr kormã hakàx pê awry hã mõr ri amnhĩ to kokwe kura nē pyka nhĩmòk ã nõ nhũm mẽ tee ri kot hkaxàr nē akupým gõ xupým mã mẽnh kaxyw. Nom nhũm gõ kot pàr nhĩxõ htak týx kurē nhũm mẽ ixpê pikrakrak par o mõ. ⁴² Jakamã nhũm pòristijaja tee ri omu hãmri nē ra mẽ kêp prēsje nhĩmex kaxyw. Mẽ kot gõx kãm rôròk nē gõ hipòk wýr hpa ho nana nē mẽ kêp pikunor pymaj kot mẽ himex

kaxyw. ⁴³ Nom nhũm mẽ hkrãhtũmja kãm Pawre pĩr prãm kêt jakamã ja nê mẽ hkurê nê mẽ inhmã:

—E mẽ ate apa ho gô rēnh mex xwýnhjaja. Akumrēx mra nê mrõ nê ho nana ho mra nê rê. ⁴⁴ No mẽ ate apa ho nana punuj xwýnhjaja kêr ka mẽ tapti rý pàr kukrēx ò my nê hã ajêt nê hã ma mōn rê. Anē.

Hãmri pa mẽ ã amnhĩ nhĩpêx anē nê xpiitã ixkà hkĩnh pê ixrêr pa.

28

Gô hipôk pê Maw kamã mẽ pa hã mẽ harēnh

Makre 16.17-18

¹ Tã pa mẽ xpiitã ixkà hkĩnh pê ixrêr pa. Nhũm gô hipôk ã mẽ pa xwýnhjaja mẽ inhmã gô hipôk nhĩxi jarē nhũm xep kêp Maw. ² Nhũm Maw nhõ xwýnhjaja mẽ ixto mex nê. Nhũm axte na wrýk rax nê nhũm kry htýx kumrēx nhũm mẽ ixkamã ukapri nê mẽ inhmã kuto nê mẽ inhmã kapêr mex nê. ³ Hãmri nhũm Pawre kuwy kaxyw ri pĩ kawrà ho mra nê kuwy hwýr o tē nê hã haxwýr o xa. Hãmri nhũm kagã xoprê ò wēnēn xihťýxja kuwy kagro pymaj pĩ rũm kato nê ìhkra hã kunha nê hã àpêr o ajêt. ⁴⁻⁵ Hãmri nhũm Pawre omu nê amnhĩ nê ho apê nê kuwy kamã kumē nhũm kamã tēm nê xêt pa. Hãmri nhũm gô hipôk nhõ xwýnhjaja tee ri ja hã omu nê axpēn mã:

—Kwa ga mẽmyti mũj pumu. Mãn kêp mẽ hpar o pa xwýnh na. Hã na kagã ò wēnēn xihťýxja kunha. Nà koja ty nê rĩ amnhĩ pumu. Ra hkà hkĩnh pê gô rũm mẽ pahwýr rêr tã koja tã ty kãm ga. Anē.

⁶ Hãmri nhũm mẽ tee ri kot tanhmã amnhĩ to hã hkamnhĩx nê hamãr o kuhê. à htýx nê ìhkra hikot rý htyk kurê kumrēx ã hkamnhĩx tã nhũm tanhmã amnhĩ kamã hamak to hkêt nê. Âm htýx ri hkĩnh nê kapêr nê hpikunhar o ri mra. Hãmri nhũm mẽ tee ri omu nê axpēn mã:

—Kwa tanhmã kot amnhĩ tore hã. Kêp mẽ hpar o pa xwýnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nê. Anē.

⁷ Nhũm gô hipôk ã mẽ ò pahihtĩ pê Pup-tija. Òrkwý hã jawý jakamã nhũm amnhĩ kôt mẽ ixwý pa mẽ ma hkôt mō nê kuri hkôt ixpa ho ixtã apkati axkrunēpxi nhũm

mẽ ixto mex nê. ⁸ Nhũm ra Pupti nhĩpêxà kêp à nê nō. Kà kagro htýx nê haôk. Hãmri nhũm Pawre hwýr tē nê omu nê hã ìhkra xi nê ho Tĩrtũm wý nhũm akupým ho mex kurê kumrēx. ⁹ Hãmri nhũm gô hipôk nhõ xwýnhja harēnh ma nê Pawre hwýr mẽ à xwýnh piitã o mra nhũm mẽ omu nê Tĩrtũm nhỹ hã akupým mẽ ho mex pa. ¹⁰⁻¹¹ Hãmri nhũm gô hipôk nhõ xwýnhjaja mẽ ixto mex rax nê.

Pawre axte Rôm wýr nojarêt ã harēnh Rômãn 1.10-12, 15.30-32

Tã pa mẽ gô hipôta kamã ixpa hã mytwrý axkrunēpxi. Hãmri nhũm kôk xàpêr týtã hapêx pa mẽ axte inhnojarêt nê ma mō. Pàr ò kamã hpãnhã mō. Aresãnrir rũm pàrja pa mẽ hpãnhã kamã mō. Mẽ kot kãm “sãnti pihpo” anhýr xwýnhhta kamã. Na pre gô hipôk kamã haxwýja kôk xàpêr týtã hapêx jamãr xa hã hikwý htã ra axte nojarêt. Hãmri nhũm gô hipôk nhõ xwýnhja ma mẽ inhmōr xà hã mẽ inhmã mẽ ixàpkur xà hkwy nhōr rax nê. Hãmri pa mẽ pàr wýr inhgjêx pa nê ma kamã mō. ¹² Mōõ nê Sirakus wýr pøj nê hã pàr xi. Hãmri nê krĩa kamã mẽ ixtã apkati axkrunēpxi nê axte mō. ¹³ Mōõ hãmri nê Rekre hwýr pøj nê hã pàr xi. Hãmri nê kamã mẽ ixtã apkati. Nhũm ra kahpa hkôt kôkja kawax pê àpêr mex jakamã pa mẽ ma hkôt mō. Nê mẽ ixtã apkati axkrut nê Potew wýr pøj nê hã pàr xi. ¹⁴ Hãmri nê pàr rũm ijarpøj nê krĩ kamã Jesus kôt mẽ ixtō nê htōx kwýjê pumu nhũm mẽ amnhĩ wýr mẽ ixwý. Pa mẽ ma mẽ hkôt mra nê mẽ hkôt ri ixpa hã ixtã ù semãn. Hãmri nê ma Rôm wýr hpãnhã ixpar o mō. ¹⁵ Hãmri nê kormã amým inhmōr ri nhũm Rôm kãm Jesus kôt mẽ ixtō nê ixtōxjaja mẽ ijarēnh ma nê man mẽ ixkutã mra. Ma krĩ pê Prasxi Apja mẽ “Wēn Pijakrunēpxi” anhýr xwýnh jarēnhja wa hwýr mẽ ixkutã mra. Hãmri pa mẽ axpēn kaxpa nhũm Pawre mẽ omu nê hkĩnh nê. Nê mẽ hã Tĩrtũm mã amnhĩ jarē nê kãm:

—Pa Tĩrtũm? Nà âm hãmri na ka mẽ ixkutã jajê rê. Na pa mẽ omu nê ixkĩnh nê. Nà amex o amex Tĩrtũm. Anē.

¹⁶ Hãmri pa mẽ ma mẽ hkôt Rôm wýr mō nê pøj. Jatã Itar kãm Rôm wýr pøj. Hãmri nhũm pōristi krãhtũm Pawre mã:

—E kot paj mẽ haghênh xà kamã ajaxàr kêt nê. Kot kaj amã nhÿri ixkre kamã apa hprãm nê mamrĩ kamã apa. Nom koja pòristi hõ akõt pa ho pa.

Anhÿr jakamã nhũm nhÿri ixkre kamã pahihtu Sesti kot mar kaxyw kamã hamak o pa.

Pawre kot Rõm kamã tanhmã amnhĩ nhĩpêx to hã harênh

Atre 17.5-6

¹⁷ Tã nhũm Pawre Rõm kamã hã apkati axkrunêpxi nê amnhĩ wÿr Ijaew xàptàr tũmrejê hwÿ nhũm mẽ hã akuprõ nhũm mẽ kãm amnhĩ jarê nê mẽ kãm:

—E ixkwÿjaja. Pa mẽ amã amnhĩ jarê ka mẽ inhma. Nà na pa pre mẽ panhĩgêjtê kapêr nhĩrõp tanhmã ixãm to hkêt nê rÿ ixte tanhmã mẽ pahkwÿjê hõ hto hkêt tã nhũm mẽ pahkwÿjaja amarĩ ixpynê. Jeru-jarê kamã ixpynê nê Rõm nhõ xwÿnhjê nhĩhkram ijaxà. ¹⁸ Hãmri nhũm mẽ ixte amnhĩ nhĩpêx ã ixkukja nê tee ri mẽ kot mẽmoj mÿrapê ixpĩr kaxyw tanhmã ixkukjêr to kaprÿ. Jakamã nhũm mẽ kãm ixkator prãm nê. ¹⁹ Nom nhũm mẽ pahkwÿjaja kãm ja mex kêt jakamã pa pre jar pahĩ maati Sesti kot ixte kãm amnhĩ jarênh ã inhmar kaxyw amnhĩm harê nê man hwÿr mõ. Kot paj tanhmã kãm mẽ pahkwÿjê ho ixkapêr punuj to hkêt nê. ãm ixte amnhĩ tã tanhmã mar to hpix kaxyw na pa hwÿr mõ.

²⁰ —Tã pa amnhĩ wÿr mẽ awÿ. Ixte mẽ amã amnhĩ jarênh kaxyw. Mẽ pahkaprĩ xwÿnhhta. Mẽ pahte kormã kamã pajamak o papa xwÿnh Jejusta. ãm ixte amnhĩ kaxyw hkõt ijamaxpêr pix mÿrapê na prem ã kax o ixkaxpre anê. Anê.

²¹ Hãmri nhũm mẽ kuma nê kãm:

—Nà jar tanhmã ajarênh kute hkêt. Na pre Jutej kamã mẽ pahkwÿjaja tanhmã ajarênh to hã kagà nê mẽ ixwÿr mẽnh kêt nê. Nê ham mẽ kurũm mẽ hpõx xwÿnhjaja na prem tanhmã mẽ inhma ajarênh to hkêt nê. ²² No na xep hte pyka piitã hkõt mẽ kãm mẽ ate Jesus kõt amnhĩ xunhwÿr xwÿnhjê kurê nê. Na pa pre mẽ ajarênh ma nê mẽ inhma axujarênh mar prãm nê. Anê.

²³ Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwÿ hwÿr pikuprõnh rax nê nhũm mẽ kãm awjarê. Mẽ kãm ujarênh ry nê. Nê ho kamàt. Nê mẽ kãm:

—Nà mẽ pahte amnhĩ wÿr kamã pajamak o papa xwÿnh Jejusta. Kot kaj mẽ atõ amnhĩ kaxyw hkõt ajamaxpêr nê hkõt amnhĩ xãm nhũm Tĩrtũm ja hã apumu nê ato hkra. Anê.

Nhũm pre ã mẽ kãm kapêr anê. Nê finat Mojes kot Tĩrtũm nhÿ hã Jejusta kukamã tanhmã hã kagà htoja nhũm mẽ kãm harê. Nê Tĩrtũm nhÿ hã kapêr jarênh o mẽ pa xwÿnhjaja kot tanhmã hã kagà htoja nhũm mẽ kãm harê. ²⁴ Hãmri nhũm mẽ hkwyjaja kuma nê hkõt hamaxpêr nê amnhĩ kaxyw Jejusta kõt hamaxpêr nê hkõt amnhĩ xunhwÿ. No nhũm mẽ hkwyjaja kuma nê ãm kuma nê kãm axte mar prãm kêt nê.

²⁵⁻²⁹ Jakamã kãnhmã kuhê nê nojarêr nhũm Pawre mẽ kãm:

—Nà amnepêr na pre Tĩrtũm finat Ijaisti mã tanhmã kapêr to. ÿ hã kot mẽ panhĩgêjtê mã tanhmã kapêr jarênh to kaxyw. Tĩrtũm Karõ nhÿ hã kot mẽ kãm kapêr nê tanhmã mẽ harênh to kaxyw. Te Tĩrtũm tãm mẽ kãm kapêr pyrãk mẽ kãm kapêr. Nê ãm hãmri tanhmã mẽ pahkwÿjê jarênh to. Na pre mẽ kãm:

E Ijaisti. Kêr ka ma akwÿjê hkõt ri mẽ kãm tanhmã ixkapêr jarênh to ho ri apa.

Nê mẽ kãm: “Kot kaj mẽ ajamak o axumar tÿx tã aprĩ hã ixkapêr mar kêt nê.

Nê mẽ ano ho arĩt tÿx tã aprĩ hã ixte amnhĩ nhĩpêx ã ixpumunh kêt nê.

Mẽ amã ixkapêr mar prãm kêt jakamã te mẽ ate mar pymaj amnhĩ jamak pro pyrãk o amnhĩ nhĩpêx o ri apa.

Nê mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyrãk o amnhĩ nhĩpêx o ri apa.

Jao amnhĩ kaxyw ixkõt ajamaxpêr kêt nê. Kop mẽ amã ixkapêr mar prãm ronhÿx ka mẽ aprĩ hã inhmar tÿx nê.

Nê aprĩ hã ixte amnhĩ nhĩpêx ã ixpumunh mex nê.

Jao amnhĩ tomnuj kaga hpa nê ixkõt amnhĩ xunhwÿ.

Pa ja hã mẽ apumu nê mẽ ato mex nê.

Tã ka mẽ ã amnhĩ nhĩpêx anhỹr kêt nẽ.”

Anhỹr o kêt ka mẽ kãm ixkapêr jarênh o ri mẽ hkôt apa Ijaisti. Anẽ.

Na pre ã Tĩrtũm mẽ panhĩgêjtjê kaxyw Ijaisti mã kapêr anẽ nhũm ô ri mẽ kãm ujarênh o pa nẽ mẽ pamã hã kagà. Jakamã kwa mẽ okora. Kêt ka mẽ jajê pyrà nẽ ã amnhĩ nhĩpêx anhỹr hkêt nẽ. Kwa mẽ inhma nẽ inhmar týx nẽ. Ijaew kêt xwỳnhjaja kot kapêr marja na ra Tĩrtũm kãm hprãm nẽ. Jakamã koja mẽ hwỳr mẽ kot kapêr jarênh o mẽ pa xwỳnh kwỳjê rẽ nhũm mẽ hkôt mẽ kãm ujarênh o pa nhũm mẽ kuma nẽ mẽ akurom kãm mar prãm nẽ. Anẽ.

Hãmri nhũm mẽ kuma nẽ hapôx pa nẽ ma akupỹm axpên mã tanhmã kapêr jarênh to ho mra. ³⁰ Hãmri nhũm pahĩ maati Sesti tokyx amnhĩ wỳr Pawre hwỳ nẽ tanhmã mar to hkêt nhũm ôrkwỹ kamã kêp prês nẽ pa ho hã amgrà axkrut. Nẽ tãm ôrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nẽ hwỳr mra nhũm amnhĩ wỳr mẽ omu nẽ hkĩnh nẽ. ³¹ Na pre hte amnhĩ wỳr mẽ kuwỳ nẽ mẽ kãm Tĩrtũm kapêr jarênh o hkrĩ. Mẽ kot Tĩrtũm Kra Pahĩti Jejus Kris kôt amnhĩ xunhwỳr nhũm Tĩrtũm kot ja hã mẽ omunh nẽ amnhĩ katut kôt mẽ kot amnhĩ tomnuj rênh par nẽ mẽ ho hkra hã mẽ kãm ujarênh o hkrĩ. Nẽ mẽ kot hkôt amnhĩ xunhwỳr xwỳnhjê jahkre. Tanhmã mẽ kot Jejus kôt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mẽhõ ja nẽ tanhmã kãm kapêr to hkêt nẽ.

Tã ãm ja pix Teopre. Ixpê Rukre na pa awỳr kagàja nhĩpêx nẽ kumẽ. Nẽ kamã amã tanhmã mẽ pahkwỳjê jarênh to. Tã ãm ja pix na hapêx.

Rômân Pawre kot Rôm kãm Jejus kôt hkwÿjê hwÿr kagà nê mênh

Kagà ja na pre Pawre hipêx. Kêp Jejus nhÿ hã mē ahkre ho pa xwÿnh na pre. Na pre hte mry kà ho ixkre nhÿpêx nê mē kãm ho wênê ho mē hkôt pa pē mē piitã mē kãm Tirtũm kapêr jarênh o pa. Tã krÿ pē Rôm kamã mē kot Jejus kôt amnhÿ xunhwÿr xwÿnhjê hwÿr kagàja nhÿpêx nê mē hwÿr kumê. Kormã ma mē hwÿr môr nê mē omunh kêt ri.

Nê Jejus kêp Tirtũm mã tanhmã mē pajarênh to xwÿnh ã nhũm pre mē kãm harê nê hã kagà. Jejus kot mē pahte amnhÿ tomnuj pãnhã mē panê htyk jakamã na hte Tirtũm mē pahte hkôt amnhÿ xunhwÿr ã mē pahpumu nê Jejus kukwak ri mē pahte amnhÿ to mex xwÿnh ã mē pajarê.

Nê Tirtũm Karô nhÿ hã mē kot amnhÿ nhÿpêx nyw nê hamaxpêr nyw o pa hã nhũm Pawre mē kãm karô nê hã kagà. ã na pre mē kãm mēmoj jarê nê hã kagà anê. Nê hã kagà ho:

¹ Pa Rôm nhõ xwÿnhjaja? Xà mē amex? E ot pa mē awÿr kagà nhÿpêx nê kumê. Tirtũm na pre mē akaxyw ixãm. Ixte mē amã Jejus kot tanhmã mē panê amnhÿ nhÿpêx to hã harênh o ri ixpa kaxyw. Na pre ixpê Pawre hã ixpumu nê ixãm. Jakamã na pa ã mē awÿr kagà nhÿpêx nê mênh anê. Ixte Jejus nhÿ hã mē ahkre ho ri ixpa xwÿnh na pa. Na pa hte kãm tanhmã amnhÿ nhÿpêx to ho ri ixpa. Tã ã mē awÿr kagà nhÿpêx nê mênh anê.

² Amnepê m na pre Tirtũm nhÿ hã kapêr jarênh o ri mē pa xwÿnhjaja mē pakukamã mē panhigêjtê mã Jejus kukamã tanhmã harênh to ho ri pa. Nê mē kãm kapêr jarênh o mē hkôt pa nê mē kãm:

—Koja nhÿrmã Tirtũm mē pahpiitã mē panê tanhmã kot amnhÿ nhÿpêx to mã xwÿnh mē nhũm mē hpiitã hprÿ hã harênh ma nê omu. Anê.

Nhũm prem ã Jejus kukamã mē kãm harênh anhÿr o ri mē hkôt pa. Tirtũm kapêr ã kagà htũm kamã harênh xà hkôt

tanhmã mē kãm harênh to. ³ Tirtũm Kra Jejus Krisja na pre mē kãm harênh o ri mē hkôt pa. Mē panhõ Pahihti na. Kêp Tirtũm Kra htã na pre mē pahpyrà nê ã ho amnhÿ nhÿpêx nê wrÿ nê katorxà nhõxà hkre rũm kato. Jakamã kêp Tirtũm Kra pix kêt mãânên katorxà hkôt kêp higêt Tawi hkanrêhã htãmnhwÿ.

⁴ Kêp Tirtũm Kra htã nhũm prem axtem nê tanhmã hamaxpêr to nê kupÿ. Nom nhũm Tirtũm kêp amnhÿ Kra hã akupÿm ho htÿr. Jakamã na pu htem harênh ma nê kãm pajamaxpêr o:

—Jesús kêp Tirtũm Kraa. Mē kot kêp hpÿr tã nhũm akupÿm ho htÿr. Jakamã nhũm Tirtũm pyrà nê hihtÿx o hihtÿx. Anê.

⁵ Tã ã Tirtũm kot Kra nhÿpêx anhÿrja ri na mãânên pa ixto mex nê mē akaxyw ixãm. Jakamã na pa hte ma krÿ piitã hkôt mē kãm tanhmã Jejus Kris jarênh to ho ri mē hkôt ixpa. Ijaew mã nê Ijaew kêt xwÿnhjê mã. Mē kot harênh mar nê amnhÿ kaxyw kãm hamaxpêr nê kapêr kôt pix mã amnhÿ nhÿpêx mex kaxyw. ⁶⁻⁷ Nê mē apê Rôm nhõ xwÿnhjaja. Na ka prem Jejus kôt amnhÿ xunhwÿ nhũm Tirtũm ja hã mē apumu nê mē ato hkra nê mē apê Jejus mē wa hkwÿ hã mē ajarê. Mē ate hkôt amnhÿ nhÿpêx kaxyw nhũm pre ã mē ajarênh anê.

Tã ot pa kagà nhÿpêx nê mē awÿr mênh kaxyw. Tirtũm kot mē ato hkra xwÿnhjê hwÿr. Tirtũm kãm mē ajapêê.

Na pa hte mē ato mē panhÿpêxà maati Tirtũm mē Pahihti Jejus Kris wa hwÿr rãhã ri ixpa. Nê mē ato wa hwÿr o:

—Kwa kêr ka wa Rôm kamã war akrajê pumunh mex nê mē kutã anojarêr rãhã nê. Kê mē hamakêtkati nê àmnhÿx ri tanhmã amnhÿ nhÿpêx to ho ri pa. Anê.

*Pawre kot Rôm nhõ xwÿnhjê pumunh
prãm ã amnhÿ jarênh*

Atre 28.15-16; Rômân 15.22-29

⁸ Nê na ka prem amnhÿ kaxyw Jejus Kris mã ajamaxpêr nê hkôt amnhÿ xunhwÿ nhũm krÿ piitã hkôt mē pa xwÿnhjaja mē ajarênh ma. Nê mē ate amnhÿ nhÿpêx nyw ã mē ajarênh ma nê axpên mã tanhmã mē ajarênh to ho pa. Nê mē ajarênh o:

—Kwa na xep Rôm kãm mē hkwÿjaja amnhÿ kaxyw Jejus mã hamaxpêr tÿx nê.

Ně hkôt amnhĩ nhĩpêx mex rãhã ho ri pa. Aně.

Pa ã mẽ kot mẽ ajarēnh anhỹrja ma nẽ ixkĩnh tỳx nẽ. Nẽ Tĩrtũm mã mẽ anhỹ hã ixkĩnh ã amnhĩ jarēnh o ri ixpa. ⁹ Na pa hte mẽ ato hwỳr rãhã ho ri ixpa. Nẽ nhỹri mẽ kãm Tĩrtũm Kra Jejus kapēr jarēnh o ri ixpa nẽ mẽ amã ijamaxpēr nẽ mẽ ato kuwỳ. Nẽ tanhmã Tĩrtũm mã amnhĩ nhĩpêx to ho ixpa pẽ mẽ amã ijamaxpēr nẽ mẽ ato kuwỳ. Tĩrtũm kot ja hã ixpumunh mex. ¹⁰ Na pa hte tanhmã kãm amnhĩ jarēnh to kaxyw nẽ mẽ akaxyw amnhĩ to kuma nẽ kãm:

—Pa Tĩrtũm? Na pa ra inhmã ma Rõm wỳr inhmõr nẽ kamã akôt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Aně.

¹¹ Na pa ra inhmã mẽ awỳr inhmõr prãm tỳx nẽ. Na pre Tĩrtũm Karõ tanhmã ixkrã hto pa ỹ hã kapēr ã kagà mar tỳx nẽ. Nẽ hkôt mẽmoj mex pumunh rax nẽ. Tã ra inhmã ma mẽ awỳr inhmõr nẽ amnhĩ xõ ri mẽ amã harēnh prãm nẽ. Mẽ ate inhmar nẽ aprĩ hã Jejus Kris kôt amnhĩ xunhwỳr tỳx nẽ hkôt amnhĩ nhĩpêx mex rãhã ho ri apa kaxyw. ¹² Kot paj nhỹrmã ma mẽ awỳr mō. Nẽ mẽ awỳr pōj pu mẽ axpēn pumu nẽ pahkĩnh nẽ. Mẽ pahte amnhĩ kaxyw Jejus Kris mã pajamaxpēr mex o papa hã axpēn pumu nẽ pahkĩnh nẽ. Nẽ mẽ pahpiitã hkôt amnhĩ nhĩpêx mex o ri papa.

¹³ E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mō. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarēnh aně. Na pa pre krĩ hkwỳ kamã mẽ apê Ijaew kêt xwỳnh kwỳjê hwỳr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harēnh o ri mẽ hkôt ixpa. Nhũm mẽ hkwỳjaja inhma nẽ hkôt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm nẽ. Mẽ akwỳjaja kot ixkapēr mar nẽ mẽ apyrà nẽ Jejus kôt amnhĩ xunhwỳr kaxyw. ¹⁴ Na pre ra Tĩrtũm ixte kapēr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Nẽ mẽ kot kagà

pumunh xwỳnhjê mẽ mẽ kot kagà pumunh kêt xwỳnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harēnh o ri mẽ hkôt ixpa kaxyw. ¹⁵ Jakamã na pa ra inhmã mẽ apê Rõm nhõ xwỳnhjê hwỳr inhmõr prãm nẽ. Ixte mẽ anhõ krĩ kamã mẽ piitã mẽ kãm ja jarēnh o ri ixpa nhũm mẽ kot inhmar nẽ mẽ pahpyrà nẽ Jejus kôt amnhĩ xunhwỳr kaxyw.

*Jejus kot mẽ panê htyk ã harēnh
Sikũn Ximotre 1.6-12*

¹⁶ Nẽ Jejus kot mẽ panê htyk ã harēnhja ãm hãmri na. Harēnhja mex o mex. Na htem kuma nẽ kãm hamaxpēr nẽ amnhĩ kaxyw hkôt hamaxpēr nẽ hkôt amnhĩ xunhwỳ. Hãmri nhũm Tĩrtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhõ xwỳnhjê pix kêt. Mããnen mẽ apê Ijaew kêt xwỳnhjaja nhũm kãm mẽ pajapê ho axpēn pyræk. Jakamã na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx. ¹⁷ ãm mẽ kot amnhĩ kaxyw Jejus mã hamaxpēr xwỳnh pixjaja na hte mẽ ho hkra. Kapēr ã kagà htũm kot tanhmã ja jarēnh to nẽ harēnh kot:

Na hte Tĩrtũm mẽ kot amnhĩ kaxyw Kra mã hamaxpēr ã mẽ omunh xà hkôt mẽ ho hkra nhũm mẽ amnhĩ kaxyw kãm hamaxpēr rãhã ho pa. Jao ra ô ri tãm amnhĩ nhĩpêx o pa. Aně.

*Mẽ pahpiitã mẽ pahte amnhĩ tomnuj
xwỳnh ã mẽ pajarēnh*

Atre 14.15, 17.22-29; Apokarip 9.20-21

¹⁸ Nẽ mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harēnh to. Na htem Tĩrtũm kapēr ma nom amnhĩ tomnuj gryk ã ãm kuma. Nẽ mẽ hkwỳjaja kot kapēr mar pymaj kapēr õ ho mẽ kệp àmnàr rãhã ho ri pa nhũm Tĩrtũm ja hã mẽ omu nhũm ja kệp omnuj nẽ. ¹⁹⁻²⁰ Te mẽ kot Tĩrtũm kot amnhĩ nhĩpêx ã omunh kêt pyræk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kệp Tĩrtũm ã omunh

mex nê. Nê kêp mẽmoj piitã ho kator xwÿnh ã omunh mex nê. Nê mex o mex ã omu nê hihtÿx o hihtÿx hã omu. Tÿrtÿm kot amnhÿ nhÿpêx kot amnhÿrÿt mex nhÿm mẽ kot omunh mex tã hkôt amnhÿ xunhwÿr kêt nê. Nê axtem nê hamaxpêr o:

—Tk. Tÿrtÿm kot inhmã amnhÿ to amnhÿrÿtre hã kot pa kêt ri hkôt amnhÿ nhÿpêx. Kot pa inhno ho omu nê rÿ kormã hkôt amnhÿ nhÿpêx japêr. Anê.

Ra mẽ kot amnhÿ nhÿpêx ã omunh mex tã ri ã hamaxpêr anê. Jakamã nhÿm Tÿrtÿm tee ri ja hã mẽ omu nhÿm ja kêp omnuj tÿx nê. ²¹ Mẽ kot amnhÿ nhÿpêx ã omunh mex tã amnhÿ kaxyw tanhmã kãm hamaxpêr hto hkêt. Rÿ arÿ hamaxpêr japêr nê kãm:

—Nà Tÿrtÿm. ãm hãmri amex kumrêx. ãm amex o amex. Apê Tÿrtÿm ã ãm apixi mex kumrêx na ka. ãm hãmri na ka hte mẽ ixto mex o apa.

Anhÿr o amnhÿ kaxyw kãm kapêr kêt nê. Nê ãm htÿx tanhmã hamaxpêr punuj to pix o ri pa. Te kamãt kô kamã ri mẽ pa xwÿnhjê kot amnhÿ nhÿpêx pyrã nê mẽmoj mex pumunh kêt nê.

²² Mẽ kot àhpumunh tÿx ã amnhÿ to jarkrar o ri pa htã no ãm te mẽ hkrã kanhÿn kêt nê mẽ hamaxpêr kêt pyrãk o amnhÿ nhÿpêx. ²³ Jakamã na htem amnhÿm mẽmo karõ nhÿpêx. Mẽmo htyk mã xwÿnhjê hõ karõ nhÿpêx. Tanhmãn panhÿ karõ rÿ mẽmo mry karõ rÿ mẽmo kuwênh karõ. Rÿ mẽmo kagã karõ nhÿpêx. Hãmri nê ho õ sãnti nê te ri ho Tÿrtÿm nhÿpêx pyrãk o hipêx. Jao hpar pê hkõn krã ho rôrôk nê amnhÿ to kuwÿ nê kãm amnhÿ jagrer pê kãm mex o mex ã harê. Tÿrtÿmja sãnti rom htÿr o htÿr tã nhÿm mẽ axtem nê sãnti gryk ã hkaga nê ã amnhÿ nhÿpêx o pa anê.

²⁴ Jakamã nhÿm tee ri ã mẽ kot amnhÿ nhÿpêx anhÿr ã mẽ omu nê amnhÿ pyrã nê mẽ hkaga nê ãm mẽ omu. Jakamã nhÿm mẽ ãm amnhÿ krã hkôt tanhmã ri amnhÿ tomnuj to ho pa. Nê axpên kãm ri tanhmã hpijaàm kêt to. ã na htem htÿx ri amnhÿ tomnuj anhÿr o pa.

²⁵ Tÿrtÿm kapêrja ãm hãmri htã nhÿm mẽ axtem nê te amnhÿ pum rênh pyrãk o hipêx nê kãm hamaxpêr kêt nê. Nê hpãnhã ri mẽ hêx xwÿnhjê kapêr pix ma nhÿm ja te mẽ kãm mex pyrãk. Na htem ã amnhÿ

nhÿpêx anê hãmri nê axtem nê Tÿrtÿm kot mẽmoj nhÿpêx pix parpê rôrôk nê amnhÿm mex o mex ã harê. Nom kot hipêx xwÿnh Tÿrtÿm parpê mãn ã amnhÿ nhÿpêx anhÿr kêt nê. Nom kot mẽmoj nhÿpêx xwÿnhhta mex o mex jakamã koja mẽ kot hkôt amnhÿ nhÿpêx xwÿnhjaja jajê rom kãm mex o mex ã harênh tÿm rãhã ho ri pa. ²⁶ No mẽ kot amnhÿ tomnuj xwÿnhjaja na hte Tÿrtÿm amnhÿ pyrã nê mẽ hkaga nhÿm mẽ htÿx amnhÿ krã hkôt ri tanhmã amnhÿ tomnuj to ho ri pa. Jao mẽni hkwyjaja axtem nê axpên gryk ã mjên kaga nê axpên nhÿõ ho mjên. ²⁷ Nhÿm mẽmy hkwyjaja mãânên axtem nê amnhÿ kwÿjê my gryk ã hprõ kaga nê axpên nhÿõ ho hprõ. Na htem ã axpên kamã hpijaàm kêt o pa anê. Mÿrapê koja mẽ à pix kãm amnhÿ xã htÿx kamã hamak o pa. ²⁸ Na htem amnhÿ tomnuj gryk ã Tÿrtÿm mã hamaxpêr kêt nhÿm tee ri amnhÿ tã mẽ omu nê hamaxpêr o:

—Mẽ kãm amnhÿ tomnuj pix prãm jakamã kwãr mẽ mãmrÿ ã amnhÿ nhÿpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhÿm mẽ arÿ htÿx ri amnhÿ krã hkôt tanhmã amnhÿ tomnuj to ho ri pa rãhã nê.

²⁹ Hãmri nê mẽmoj punuj pix mã hamaxpêr.

Nê kãm amnhÿ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

³⁰ Nê kãm mẽmoj tã axpên to hêx pix prãm.

Nê kãm Tÿrtÿm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhÿ to jarkrar rãhã ho ri pa.

Nê tanhmã amnhÿ tomnuj to pix kukamã hamaxpêr. Nhÿm mẽ katorxã nê mẽ hipêxã tee ri ja nê tanhmã mẽ kãm kapêr to no nhÿm mẽ mar kêt kumrêx.

³¹ Ā mẽ kot amnhĩ nhĩpêx anhÿr o ri mẽ pa xwÿnhjaja na hte Tĩrtũm kãm mẽmoj mex nhũm mẽ kêp omnuj nê nhũm Tĩrtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhÿr kêt nê. Nê axpên kãm ukaprĩ ho ri pa hkêt nê. ³² Tĩrtũm kapêr ã kagà htũm kot tanhmã mẽ hkukamã mẽ harênh to nê mẽ harênh kot:

Ā mẽ kot amnhĩ nhĩpêx anhÿr o ri mẽ pa xwÿnhjaja koja mẽ nhÿrmã ty hãmri nê amnhĩ xà htÿx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tÿx tã aa amnhĩ tomnuj kaga hkêt nê. Arĩ ã amnhĩ nhĩpêx anhÿr o pa rãhã nê. Nhũm mẽ hkwyjaja mẽ kot amnhĩ tomnuj ã mẽ omu nê mẽ urak nê ã amnhĩ nhĩpêx anhÿr o ri mẽ hkôt pa nhũm mẽ amnhĩ pyrã nê mẽ omu nê hkĩnh nê. Na htem ã amnhĩ nhĩpêx anhÿrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ amnhĩ tomnuj tÿx pix rãhã ho pa.

2

Mẽ kot amnhĩ tomnuj xwÿnhjê hkukamã mẽ harênh

Matêwre 7.1-5; Sikũn Tesarõn 1.6; Eprêw 9.27; Sikũn Pêtre 2.4, 3.7; Jutre 6-14; Apokarip 6.15, 20.11

¹ Nê kot ka mẽ atõ ã mẽ kot amnhĩ tomnuj anhÿr xwÿnhjê kot amnhĩ nhĩpêx ã mẽ harênh ma nê ã ajamaxpêr anê nê ajamaxpêr o:

—Tk. Mẽ kot amnhĩ tomnuj pix o ri pa xwÿnh kênã. No pa na ã ixte amnhĩ nhĩpêx anhÿr o ri ixpa hkêt. Mẽ kurom ixte tãm amnhĩ nhĩpêx o ri ixpa xwÿnh na pa.

Anhÿr o amnhĩ jarê. Kwa nã mẽ ã ajamaxpêr anhÿr kêt nê. Mẽ pajaxwÿja na pu htem tõhã mẽ urak nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyrak. ² Tĩrtũm kapêr ã kagà htũm kot mẽ kot amnhĩ tomnuj o ri mẽ pa xwÿnhjê jarênh kot:

Mẽ kot amnhĩ tomnuj mÿrapê koja mẽ nhÿrmã amnhĩ xà htÿx kamã hamak rãhã ho ri pa. Anê.

Ām hãmri ã mẽ harênh kot anhÿr. ³ Mãn ka mẽ atõ tanhmã amnhĩ kukamã ajamaxpêr to nê ajamaxpêr o:

—Nã koja Tĩrtũm nhÿrmã amnhĩ nê kuwy hwÿr mẽ kot amnhĩ tomnuj xwÿnhjê rê. No pa koja hwÿr inhmênh kêt nê. Anê.

Kwa mẽ ã ajamaxpêr anhÿr kêt nê. Kot ka mẽ ã amnhĩ kukamã ajamaxpêr anhÿr tã tõhã mẽ urak nê tanhmã amnhĩ tomnuj to. Jakamã koja Tĩrtũm mẽ urak nê hã tanhmã mẽ ato. ⁴ Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamaxpêr o:

—Ixte amnhĩ tomnuj xwÿnh tã na hte Tĩrtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukaprĩ xwÿnh jakamã na hte gryk tokyx anhÿr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhÿrer kêt nê. Tĩrtũm kot ja hã tanhmã ixtore kaxyw hã.

Anhÿr o ajamaxpêr. No ãm ja kot anhÿr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwÿr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

⁵ Mẽ akrã hihtÿx jakamã mẽ amã hkôt amnhĩ xunhwÿr prãm kêt. Na ka htem tanhmã amnhĩ tomnuj to pix kukamã ajamaxpêr o ri apa. Nê gaa nê ra anhÿr kumrêx. Nhũm Tĩrtũm tee ri ja hã mẽ apumu nhũm ja kêp omnuj tÿx o mō. Jakamã koja nhÿrmã tanhmã mẽ ajarênh to nê gryk tÿx kãm tanhmã mẽ atomnuj tÿx to. Ām hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

⁶ Koja nhÿrmã mẽ pahpiitã kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwÿnhjaja nhũm mẽ homnuj nê. Koja nhÿrmã mẽ pahpiitã mẽ pahto hpimràatã ã mẽ panhĩpêx anê. ⁷ Mẽ kot hkôt tãm ri amnhĩ nhĩpêx o pa pê kãm Tĩrtũm kot amnhĩm mẽ mex ã mẽ harênh prãm xwÿnhjaja koja nhÿrmã amnhĩm mẽ mex ã mẽ harê. Hãmri nhũm mẽ kuri htĩr

tūm nē hkīnh nē mex kumrēx nē pa ho pa. ⁸ Nom mē kot amnhī mā pix mā ri hamaxpēr o ri mē pa xwýnhjaja. Nē mē kot tanhmā amnhī tomnuj to gryk ā Tirtūm kapēr kaga xwýnhjaja koja kām mē hkīnh kēt nē tanhmā mē homnuj tỳx to. ⁹ Mē kot amnhī tomnuj xwýnh piitā koja mē nhýrmā amnhī xà htỳx kamā hamak rāhā nē pa ho pa. Ijaew kumrēxjaja nē hpānhā Ijaew kēt xwýnhjaja nhūm mē amnhī xà htỳx kamā hamak rāhā nē pa ho pa. Mē kot amnhī tomnuj tỳx o paja mýrapê.

¹⁰ No kēt tām mē kot amnhī nhīpēx xwýnhjaja koja Tirtūm mē ho mex rax rāhā ho pa ho pa. Nē amnhīm mē kot amnhī to mex xwýnhjē hā mē harē. Nē tanhmā mē ho mex to nhūm mē kamā amnhī krit nē pa ho pa. Hamakētkati nē hkīnh nē àmnhīx ri pa ho pa. Ijaew kwý kumrēxjaja nē mǎānēn Ijaew kēt xwýnh kwýjaja nhūm mē mex nē hamakētkati nē hkīnh nē àmnhīx ri pa ho pa. ¹¹ Koja Tirtūm nhýrmā ahpýnhā mē pahte amnhī nhīpēx ā mē pahpumunh xà hkôt tanhmā mē pajarēnh to pē tanhmā mē panhīpēx to. Mē ixpē Ijaewjaja nē mē apē Ijaew kēt xwýnhjaja nhūm ā mē pahpiitā mē panhīpēx anē.

¹² Amnepēm na pre finat Mojes mā tanhmā kapēr to nhūm kuma nē ô ri hā kagà hpa. Mē ixpē Ijaew ri na kapēr ā kagàja. Ra mē ixte mar tỳx jakamā koja mē ixtō ra kapēr mar tỳx tā hkôt amnhī nhīpēx kēt hāmri nhūm Tirtūm tee ri amnhī tā omu nē ā amnhī nhīpēx anhýrja mýrapê nhýrmā ma mē kot amnhī xà htỳx kamā hamak tūm xàta wýr kumē. Kot kapēr mar tỳx tā hkôt amnhī nhīpēx kēt mýrapê nhūm ā hipēx anē. No kēt mē apē Ijaew kēt xwýnhjaja mē ixkīnhā mē ari Tirtūm kapēr ā kagà hkēt jakamā koja mē ate kapēr nhīrôp mē akuhē hā mē apumunh kôt tanhmā mē anhīpēx to hkēt nē. Koja hpānhā mē ate tanhmā amnhī tomnuj to ho apa mýrapê mē kot amnhī xà htỳx kamā hamak o pa tūm xàta wýr mē arē.

¹³ Na hte mē kot kapēr mar ā mē omunh xà hkôt amnhīm mē kot amnhī to mex xwýnh ā mē harēnh kēt nē. Ām mē kot kapēr kôt amnhī nhīpēx ā mē omunh xà hkôt pix mā na hte amnhīm mē kot amnhī

to mex xwýnh ā mē harē. ¹⁴ No mē hkwyjaja kormā kot kapēr mar kēt tā te ra mē kot mar mex pyrāk o amnhī nhīpēx. Jao amnhī krā hkôt tām ri amnhī nhīpēx kurē kumrēx. Te kot Ijaew pyrā nē Tirtūm kapēr mar tỳx nē hkôt amnhī nhīpēx o ri pata pyrāk. ¹⁵ Na htem amnhī krā hkôt tanhmā amnhī nhīpēx mex to. Te Tirtūm kapēr kot mē hkrām gjēx pyrāk o amnhī nhīpēx o pa. Jakamā tee ri tanhmā amnhī tomnuj to hā amnhī pumu nē hkaprī nē. Nē tām amnhī nhīpēx ā amnhī pumu nē hkīnh nē.

¹⁶ Tā koja nhýrmā Tirtūm Jejus Kris mā anē nhūm kuma hāmri nē mē piitā kormā mē htūr ri tanhmā mē kot amnhī nhīpēx to hā mē omunh xà hkôt tanhmā mē harēnh to. Nē mē hamaxpēr kôt mē omunh mex xà hkôt tanhmā mē harēnh to. Mē papa-jaja mē pahte axpēn jamaxpēr kôt axpēn pumunh kēt tā Jejus kot mē pajamaxpēr kôt mē pahpumunh par.

Tā na pa hte mē kām Jejus kot tanhmā amnhī nhīpēx to hā harēnh o ixpa pē ā mē kām ixujarēnh anhýr o ri ixpa.

*Pawre kot hkwyjē mā kapēr
Rōmān 3.19-20*

¹⁷ Nē ixpyrà nē mē apē Ijaew kwýjaja na ka mē axtem nē Ijaew kēt xwýnhjē mā tanhmā amnhī to jarkrar o ri apa nē mē kām:

—Nà mē ixpē Ijaew ri Tirtūm kapēr ā kagà jakamā ām mē papxipixjaja na hte Tirtūm amnhīm mē inhmex ā mē ijarē. Nē ām mē papxipixjaja na hte mē ixto hkra. ¹⁸ Nē mē papxipixjaja na mē ixte Tirtūm kām hprām xà hkôt mēmoj pumunh par nē mē kot amnhī to mex xà pumunh par nē mē kot amnhī tomnuj xà pumunh par. Mē apē Ijaew kēt xwýnhjē rom mē ixte mēmoj piitā omunh par kumrēx. Anē.

¹⁹⁻²⁰ Nē amnhī jarēnh o:

—Nà te mē ixpē mē nohkre xwýnhjē pa hā mē hamýnh nē ri mē ho ixpa xwýnh pyrāk. Jakamā Ijaew kēt xwýnh pē htỳx ri mē pa xwýnhjaja na pa htem mē kām Tirtūm kapēr tūm o mē ahkre mex o ri ixpa. Kormā mē kot hprī hā mar kēt jakamā na pa htem ho mē ahkre ho ri mē hkôt ixpa. Mē kurom mē ixte mar par kēnā.

21 Anhÿr ã amnhĩ jarēnh nē mẽ ate kapēr o mẽ ahkre ho apa htã hkôt amnhĩ nhĩpêx kêt nē.

Nē mẽ ate mẽ kot axpēn pê àhkĩnh nē mẽ hkurê htã no ãm mẽ kamjaja axpēn pê axàhkĩnh o ri apa.

22 Nē mẽ amã sãnti hkĩnh kêt ã amnhĩ jarēnh tã axtem nē hwÿr agjê nē hpar pê kàxpore nhĩkwÿ xwÿnh o axàhkĩnh o ri apa.

Nē mẽ kot axpēn prô ho amnhĩkati nē mẽ hkurê ho apa htã mẽ kamjaja ã ri amnhĩ nhĩpêx anhÿr o ri apa.

23 Nē mẽ ate Tĩrtũm kapēr ã kagà mex o mex ã harēnh tã hkôt amnhĩ nhĩpêx hkêt nē. Jakamã nhũm mẽ akwÿjjaja ja hã mẽ apumu nē mẽ apyrà nē Tĩrtũm ã hpjajaam kêt o pa.

24 Tĩrtũm kapēr ã kagà htũm kot tanhmã mẽ ate amnhĩ nhĩpêx ã mẽ ajarēnh to nē mẽ ajarēnh kot:

Mē kēp Ijaew kêt xwÿnhjaja na htem Ijaew kot htÿx ri amnhĩ nhĩpêx o ri mẽ pa hã mẽ omu nē mẽ ÿ hã tanhmã Tĩrtũm o kapēr punuj to ho ri pa. Anē.

25 Mē pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kēp mẽmy kwÿr kà jakà. Finat Mojes kot Tĩrtũm nhÿ hã mẽ panhĩgêtjê mã hã karô xà hkôt na pu htem ã mẽ hipêx anē. Mē pahte Tĩrtũm mã mẽ pahkrajê nhôr ã amnhĩ to amnhĩrĩt kaxyw. Jakamã na pu htem arĩ Mojes kapēr kôt ã mẽ hipêx anē nhũm Tĩrtũm kãm ja mex nē. Nom kot pu mẽ kapēr kwÿm ri tanhmã amnhĩ nhĩpêx to ho papa nhũm ja kēp omnuj tÿx nē hãmri pu mẽ tee ri mẽ pahkrajê my kwÿr kà jakàr kaprÿ. Na hte Tĩrtũm ã mẽ pahkrajê nhĩpêx anhÿr ã mẽ pahpumunh kôt amnhĩm mẽ pamex ã mẽ pajarēnh kêt nē. Nom mẽ pahte kapēr kôt amnhĩ nhĩpêx mex o papa pê mẽmy kwÿr kà jakàrja nhũm kãm mex nē. 26 Ijaew kêt xwÿnhjaja kot ã mẽ hkrajê nhĩpêx anhÿr kêt tã ra mẽ hkwÿjjaja Tĩrtũm kapēr ma nē hkôt amnhĩ nhĩpêx o ri pa. Jao te mẽ kot amnhĩ my kwÿr kà jakàr pyràk o amnhĩ nhĩpêx. Jakamã nhũm Tĩrtũm ja hã mẽ omu nē mẽ kãm:

—Nà ãm hãmri. Mē ate amnhĩ my kwÿr kà jakàr kêt tã mẽ apê ixkra na ka mẽ. Anē.

27 Mē kot amnhĩ jakàr kêt tã Tĩrtũm kapēr kôt amnhĩ nhĩpêx mex o ri pa nhũm amnhĩ tã mẽ omu nē mẽ arom amnhĩm mẽ kot amnhĩ to mex xwÿnh ã mẽ harē. Mē kot amnhĩ jakàr kêt tã.

No mẽ kajaja mẽ ate Tĩrtũm nhÿ hã Mojes kapēr ã kagà mar tÿx tã hkôt amnhĩ nhĩpêx kêt nē. Ja mÿrapê koja ja hã mẽ apumu nē Ijaew kêt xwÿnhjê kĩnhã mẽ ate amnhĩ tomnuj xwÿnh ã mẽ ajarē. Ra mẽ ate amnhĩ jakàr tã mẽ ate amnhĩ tomnuj xwÿnh ã mẽ ajarē.

28 Nē kot ka mẽ atô tanhmã amnhĩ to jarkrar to nē amnhĩ jarēnh o:

—Nà ixpê Ijaew jakamã na hte Tĩrtũm mẽ kot inhmy kwÿr kà krãhyr kôt ixto kraa. Anē.

Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kôt mẽ pahto hkra? Nà kot anhÿr kêt. Na htem ãm htÿx ã amnhĩ to jarkrar anhÿr kaprÿ ho pa.

29 Nē Tĩrtũm Karô kot mẽ hkarô mã gjêx xwÿnhjaja kēp Tĩrtũm kra jakamã na htem Tĩrtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nē. Rÿ htÿx hamaxpēr o:

—Nà kot paj Mojes kapēr ã kagà hkôt amnhĩ nhĩpêx nhũm Tĩrtũm ja hã ixpumu nē amnhĩm inhmx ã ijarē nē ixto hkra.

Anhÿr o hamaxpēr kêt nē. Na htem hamaxpēr o:

—Nà ra Tĩrtũm Karô kot ixkarôm àr jakamã ixpê hkra nhũm amnhĩm inhmx ã ijarē. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwÿjjaja amnhĩm inhmx kêt ã ijarē. Anē.

Kêr ka mẽ ã ajamaxpēr anhÿr o ri pa. ã mẽ hamaxpēr anhÿr na mex o mex.

3

1 Nē mãn ka mẽ ra tee ri tanhmã amnhĩ kukamã ajamaxpēr to nē ajamaxpēr o:

—Kwa mo kaxyw na pa ixpê Ijaew? Mon pa pre we ixpê Ijaew kêt hê hê nê? Mē kēp Ijaew kêt xwÿnhjaja kot amnhĩ jakàr kêt tã nhũm Tĩrtũm mẽ pahpyrà nē mẽ ho hkra. Anē.

Kwa mẽ ã ri ajamaxpēr anhÿr kêt nē.

2 Mē pahpê Ijaew na pre Tĩrtũm Ijaew kêt xwÿnhjê rom mẽ pahto mex rax nē. Na pre amnepê mã mẽ panhĩgêt mã tanhmã

kapēr to. Mē pahpiitā mē pahte mar nē hkôt amnhī nhīpêx kaxyw. Nom Ijaew kêt xwýnhjê nhīgêť mā ā kapēr anhýr kêt nē. Ām mē pahpê Ijaew nhīgêť pix mā kapēr. Jakamā mē pahpê Ijaew mā ja mex kumrêx. ³ Nom kot kaj mē atō ja ma nē ajamaxpēr o:

—Nà Tirtūm kot mē ixto mex mā mē ixtā amnhī jarēnh tā no nhūm xep mē inhīgêť kwýjaja hkôt amnhī nhīpêx kêt nē. Na xep prem kapēr kwým ri amnhī tomnuj o pa. Jakamā ko. Koja Tirtūm mē ixpê mē hkanrêhā mē htāmnhwýjaja tanhmā mē ixto mex to japêr ko. Anē.

⁴ Kwa mē ri ā ajamaxpēr anhýr kêt nē. Tirtūm na hte mē pahpiitā mē pakurom mēmoj tā amnhī jarēnh o hêx kêt nē. Tā ra kot tanhmā mē pahtā amnhī jarēnh to xà hkôt koja ā mē pahto mex anē. Kapēr ā kagā htūm kot mēhō tanhmā Tirtūm mā kapēr to nē harēnh kot:

Pa Tirtūm. Nà ām kapxipix na ka hte mēmoj tā amnhī jarēnh xà hkôt amnhī nhīpêx o ri apa.

Jakamā na htem ām axpēn mā axêx ā akapēr ā ajarēnh kaprý. Anhýr o harē.

⁵ No kot ka mē atō atýx ajamaxpēr nē ajamaxpēr o:

—Xà koja Tirtūm tanhmā mē ixte amnhī tomnuj to hā mē ixpumu nē gryk? Nà koja gryk kêt nē. Jakamā kot paj arī amnhī tomnuj o ri ixpa. Kê mē piitā ja hā ixpumu nē ixrom Tirtūm tapxipix kot amnhī to mex o pa xwýnh ā harēnh o pa. Nà ja mex. Jakamā kot paj arī amnhī tomnuj rāhā ho ri ixpa nhūm mē Tirtūm pix mā mán kot tām amnhī nhīpêx xwýnh ā harē. Hāmri nhūm Tirtūm amnhī tā ixpumu nē tanhmā ixto hkêt nē. Koja tanhmā ixto japêr hāmri nē ixpyrà nē amnhī tomnuj nē. Anē.

Kot kaj mē ā ajamaxpēr anē nē ām amnhī krā hkôt ā ajamaxpēr anhýr kaprý. Nom ā ajamaxpēr anhýrja Tirtūm jamaxpēr kôt kêt. ⁶ Kwa mē ri ā ajamaxpēr punuj anhýr kêt nē. Tirtūm kot mē pahpyrà nē aa kot amnhī tomnujre hā. Kop ām mē pahpyrà nē tanhmā kot amnhī tomnuj to ronhýx tanhmā kot we amnhī to nē mē pahte amnhī tomnuj xwýnh ā mē pajarē? Nhýx

mē pahpyrà nē ā amnhī jarēnh anē. Nà ā mē ajamaxpēr anhýrja mex kêt.

⁷⁻⁸ E pa ixprī hā mē amā ja jarē ka mē inhma. Kot kaj mē atō amnhī kukamā ajamaxpēr o:

—E kot paj māmri ri mēmoj tā ixêx o ri ixpa kê mē ixêx nhi hā ixpumu nē ixrom Tirtūm pix mā mán kot amnhī to mex ā harē. Nē ām pix mā mán hêx kêt xwýnh ā harē. Hāmri nhūm Tirtūm amnhī tā ixpumu nē mē ā mē kot harēnh anhýrja ma nhūm ja kām mex nē nhūm hkīnh nē. Jakamā ixêx o ri ixpaja ā tanhmā ixto hkêt nē. Ra mē kot ixrom tām kot amnhī nhīpêx o pa xwýnh ā harēnh jakamā nhūm ixêx nhita ā tanhmā ixto hkêt japêr. Jakamā kot paj ixte amnhī tomnuj o ri ixpaja mā inhūrer kêt nē. Kêr kê mē ja hā ixpumu nē ixrom Tirtūm tapxipix kot amnhī to mex xwýnh ā harē.

Anhýr o ajamaxpēr nom mē ajamaxpērja kot anhýr kêt. Na hte akwýjaja pa ixpê Pawre ixêx o ixpa hā ri axpēn mā ijarē no na pa hte ixêx o ri ixpa hkêt nē. Ā mē ajamaxpēr anhýr o ri apa xwýnhjaja koja Tirtūm mē atomnuj týx nē kām ga.

Mē mē pahte amnhī tomnuj xwýnh ā mē pajarēnh

Wam Korīt 6.9; Karatas 3.22; Xitre 3.3

⁹ Tā tanhmā kot puj mē pahpê Ijaew amnhī jarēnh to? Xà kot pu mē pahte amnhī to mex o Ijaew kêt xwýnhjê jakrenh ā amnhī jarē? Nà mē pahte ā amnhī nhīpêx anhýre hā. Mē pahpê Ijaew nē Ijaew kêt xwýnhjaja. Mē pahpiitā mē pahte amnhī tomnuj o axpēn pyràk. Na pa pre ra mē amā ja jarē. ¹⁰ Tirtūm kapēr ā kagā htūm kot ja jarēnh kot:

Mēhō na we aa kot amnhī tomnuj kêt kumrêx nē pa?

¹¹ Nē mēhō na we kot mēmoj mex piitā omunh par?

Nē mēhō na kām Tirtūm prām?

¹² Nà amrakati kumrêx. Na mē ra piitā hkaga hpa.

Nē kapēr kwým ri tanhmā amnhī tomnuj to ho pa.

Ām mēhō pyxire nē amnhī to mex o ri pa hkêt kumrêx.

¹³ Na htem kapēr punuj pix o ri pa.

Jakamā Tīrtūm noo mā mẽ kot amnhī nhīpêxja te kot mẽmoj tyk nê hkro punuj pyrāk.

Na htem âm ri hêx pix kukamā ri hamaxpêr o pa. Tanhmā mẽ hêx to xàja te kêp kagā xoprê nhõ wenên xihtýx pyrāk.

¹⁴ Nê na htem mẽ piitā mẽmoj nhīxi ho ri axpên mã mẽ hixi jarênh o pa. Nê ri tanhmā axpên japrȳ hto ho pa.

¹⁵ Nê tanhmā kapêr mã gêt kām mẽ kām kapêr to.

¹⁶ Nê tanhmā mẽ hkwýjê homnuj to. Jakamā nhūm mẽ piitā ri hkaprī nê mex kêt nê pa.

¹⁷ Nhūm htem âm axpên mã mẽ gryk xà pix o kapêr o pa.

¹⁸ Nê Tīrtūm ā hpijaàm kêt o pa. Na htem kapêr ma nê âm kuma nê kām hkīnh kêt o pa.

Ā na htem amnhī nhīpêx anhýr rāhā ho pa. Anê.

Ā Tīrtūm kapêr ā kagā htūm kot mẽ pajarênh anhýr. ¹⁹ Mẽ pahpê Ijaew ra mẽ pahte ja jarênh mar týx. Tīrtūm kapêr ā kagā htūm kwý na. Na hte ā mẽ kot amnhī tomnuj xwýnhjê jarênh anê. Nê mãânên mẽ papajaja. Mẽ pahpê Ijaew na hte ā mẽ pajarênh anê. No âm mẽ papapxipix hkêt. Krī piitā hkôt ri mẽ pa xwýnhjaja nhūm ā mẽ harênh kot anhýr. Ijaew kêt xwýnhjaja nê mẽ pahpê Ijaew. Mẽ pahpiitā mẽ pahte amnhī tomnuj xwýnhjakamā mẽmo kaxyw kot pu mẽ pahte amnhī tomnuj kêt ā ri amnhī to jarkrar o papa? Kot puj mẽ ā amnhī jarênh anhýr kaprȳ. Jakamā koja Tīrtūm mẽ pahpiitā mẽ pahte amnhī tomnuj mýrapê tanhmā mẽ panhīpêx to. ²⁰ Mẽ pahtō koja mẽ pahte kapêr kôt pix mã amnhī nhīpêx o papa hā mẽ pajarê? Nê mẽ pahtō mã koja mẽ pamā kapêr nê mẽ pamā:

—Nà na ka hte akatāt kôt ixkapêr kôt pix mã amnhī nhīpêx mex nê. Âm hāmri na ka hte ā amnhī nhīpêx anhýr o apa.

Anhýr o mẽ pahtō mã kot we ā kapêr anê? Nà aa kot mẽ pahtō mã kapêr anhýr kêt. Na pu htem âm kapêr ma nê tee ri amnhī kukamā pajamaxpêr. Mẽ pahte amnhī tomnuj ā amnhī pumunh kaxyw na pre mẽ pamā kapêr ā kagā htūmja gō. Mẽ pahtō mẽ pahte kapêr ā kagā hkôt amnhī

nhīpêx mex o papa hkêt kênā kot kêt ri amnhīm mẽ pahte amnhī to mex xwýnh ā mẽ pajarê.

Tanhmā Tīrtūm kot mẽ pahto hkra to hā harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nê na hte Tīrtūm mẽ pahte kapêr kôt amnhī nhīpêx ā mẽ pahpumunh kôt amnhīm mẽ pahte amnhī to mex xwýnh ā mẽ pajarênh kêt nê. Jakamā mēhõ kukwak ri koja we ā mẽ pajarênh anê? Nà nhām mēhõ kot tām amnhī nhīpêx rāhā ho pa hā omunh pix kukwak ri koja ā mẽ pajarênh anê. Tā mēhõ kukwak ri kot ā mẽ pajarênh anhýr xwýnhhta na pre ra mẽ pamā ho amnhīrīt. Amnepêm Tīrtūm kapêr ā kagā htūm kamā na pre mēhõ hkukamā tanhmā harênh to. Nê Tīrtūm nhý hā mẽ kapêr jarênh o pa xwýnhjaja haxwýja kukamā tanhmā harênh to ho pa.

²² Jejus Krisja na prem hkukamā harênh o pa. Tām na pu htem hkôt amnhī xunhwý nê amnhī kaxyw kām pajamaxpêr rāhā ho papa nhūm Tīrtūm ja pix ā mẽ pahpumunh kôt amnhīm mẽ pahte amnhī to mex xwýnh ā mẽ pajarê. Mẽ kot Jejus kôt amnhī xunhwýr xwýnh piitā. Mẽ ixpê Ijaew nê mẽ apê Ijaew kêt xwýnhjaja. Mẽ pahpiitā mẽ pahte axpên pyrāk jakamā kot puj mẽ pahtō Jejus kôt amnhī xām nhūm Tīrtūm Kra Jejus kot amnhī to mex pix o pa kukwak ri mẽ pahpumu nê amnhīm pajarênh o:

—Nà âm hāmri. Ra kot ixkra Jejus kôt amnhī xām jakamā ra inhmā te Jejus kot amnhī nhīpêx pyrā nê amnhī to mex o pa. Anê.

²³ No mẽ pahtō na mẽ pahte Tīrtūm mẽ Jejus wa urāk nê amnhī nhīpêx mex rāhā ho ri papa? Nà amrakati kumrêx. Mẽ pahpiitā mẽ pahte amnhī tomnuj xwýnh kênā. ²⁴ Tā Tīrtūm kot mẽmoj tā mẽ pakutā nojarêr rāhā jakamā na hte Jejus Kris kukwak ri amarī amnhīm mẽ pahte amnhī to mex xwýnh ā mẽ pajarênh o pa. Mẽ pahte Jejus kôt amnhī xunhwýr xwýnh piitā nhūm ā mẽ pajarênh anê. Ra Jejus kot htyk o mẽ pahte amnhī tomnuj piitā hpānhā amnhīrer par jakamā na hte Tīrtūm Jejus kukwak ri amarī mẽ pahte

amnhî to mex xwÿnhjê hã mẽ pajarê. Te mẽ pahte amnhî tomnuj kêt kumrêx pyrâk mẽ pajarê. ²⁵⁻²⁶ Na pre mẽ pahwÿr Jejus mẽ nhũm mẽ pahwÿr wrÿ nê mẽ panê ty nê htyk o mẽ pahte amnhî tomnuj piitã hpãnhã amnhîrer pa. Jakamã kot pu mẽ pahtõ amnhî kaxyw hkôt pajamaxpêr nhũm Tirtũm ja hã mẽ pahpumu nê Kra kukwak ri amnhî katut kôt mẽ pahte amnhî tomnuj piitã rênh pa. Jao te aa mẽ pahte amnhî tomnuj kêt kumrêx pyrâk ã mẽ pahpumu.

No kêt amnepêm kormã Jejus wrÿk nê mẽ panê htyk kêt ri mẽ pa xwÿnhjaja. Tanhmã na pre Tirtũm mẽ kot hkôt amnhî xunhwÿr xwÿnhjê nhîpêx to? Kormã Jejus mẽ panê htyk kêt ri mẽ pa xwÿnhjaja tanhmã na pre mẽ hipêx to? Nà na pre mẽ hkwyÿjaja amnhî kaxyw Tirtũm kôt hamaxpêr nê hkôt amnhî xunhwÿ nhũm amnhî tã mẽ omu nê amnhîm mẽ harênh o:

—Nà ãm hãmri. Koja nhÿrmã Ixkra ma mẽ hwÿr wrÿ nê mẽ nê ty nê htyk o mẽ kot amnhî tomnuj pãnhã amnhîrer pa. Jakamã koja mẽ tãmjaja amnhî tomnuj pãnhã amnhîrer kêt nê. Anê.

Tã nhũm Jejus tãm mẽ pahwÿr wrÿ nê mẽ pahpiitã mẽ panê ty. Jakamã nhũm Tirtũm ra mẽ pahte hkôt amnhî xunhwÿr xwÿnhjaja Kra kukwak ri amnhî katut kôt mẽ pahte amnhî tomnuj piitã rênh pa. No na hte amarî ã mẽ panhîpêx anhÿr kêt nê. ãm Jejus tyk pix kukwak ri na hte ã mẽ panhîpêx anê. ãm hãmri na hte ã mẽ panhîpêx mex anê. Na hte tãm mẽ panhîpêx rãhã ho pa. ²⁷ Jakamã kot puj mẽ ã pajamaxpêr anê nê pajamaxpêr o:

—Nà na pa hte amnhî to mex rãhã o ri ixpa. Amnhî to mex o mẽ piitã mẽ hakrenh pã.

Anhÿr o pajamaxpêr kêt nê. Koja mēhõ ã hamaxpêr anê nê ãm amnhî jarênh o hêx. Na hte Tirtũm mẽ pahte amnhî to mex ã mẽ pahpumunh kôt amnhîm mẽ pahte amnhî to mex xwÿnh ã mẽ pajarênh kêt nê. Mẽ pahte amnhî to mex rãhãre hã. Nom na pu htem amnhî kaxyw Jejus mã pajamaxpêr nê hkôt amnhî xunhwÿ nhũm ja hã mẽ pahpumu nê rî kormã amnhîm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprî hã inhma. Mẽmoj pumunh kôt na hte Tirtũm mẽ pahte amnhî to mex xwÿnh ã mẽ pajarênh wehe? Xà mẽ pahte kapêr tũm kôt amnhî nhîpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhÿr kêt nê. Mẽ pahte hkôt amnhî nhîpêx rãhã ho papare hã. ãm mẽ pahte amnhî kaxyw Kra Jejus kôt pajamaxpêr nê hkôt amnhî xunhwÿr ã mẽ pahpumunh kôt pix mã na hte mẽ pahte amnhî to mex xwÿnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

²⁹ Nê xà Tirtũm kêp mẽ ixpê Ijaew pix nhõ Tirtũm pix na? Nà kêp mẽ ixpix nhõ Tirtũm kêt. Kêp mẽ ixpê Ijaew nhõ Tirtũm nê mãânên kêp mẽ apê Ijaew kêt xwÿnhjê nhõ Tirtũm.

³⁰ Nê Tirtũm ãm pyxi mex. Axtem hõ kêt. Na hte mẽ pahpiitã mẽ panhîpêx o axpên pyrâk. Jakamã na hte mẽ kot amnhî kaxyw Jejus kôt hamaxpêr o mẽ pa xwÿnhjê pumu nê mẽ kot amnhî to mex xwÿnh ã mẽ harê. Mẽ ixpê Ijaew nê mãânên mẽ apê Ijaew kêt xwÿnhjaja.

³¹ Tã koja mēhõ htÿx hamaxpêr o:

—Nà ixte amnhî kaxyw Jejus kôt ijamaxpêr mex o ixpa nhũm Tirtũm kot amnhîm inh mex ã ijarênh jakamã kot paj axte kapêr kôt amnhî nhîpêx kêt nê. Kot paj ãm amnhî krã hkôt amnhî nhîpêx o ri ixpa. Ra Tirtũm kot ixto hkra kênã.

Anhÿr o ajamaxpêr japêr. Kwa mẽ ã ri ajamaxpêr anhÿr kêt nê. Na htem amnhî kaxyw Jejus kôt hamaxpêr hãmri nê kãm hkôt amnhî nhîpêx prãm rãhã nê pa ho pa.

4

Apraãw kot amnhî kaxyw Tirtũm kôt hamaxpêr

Karatas 3.6-18; Xiakre 2.23

¹ Nê mẽ panhîgêt finat Apraãwja kêp mẽ pahpê Ijaew pàr krax. Tã mẽmoj tã na pre Tirtũm omu nê kot amnhî to mex xwÿnh ã harê? ² Xà kot kãm tanhmã amnhî nhîpêx to hã karõ xà hkôt amnhî nhîpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhÿr

ronhÿx Apraãw amnhĩ tã omu nẽ Tĩrtũm mã amnhĩ to jarkrar nẽ kãm:

—Pa Tĩrtũm? E mãn ka ixpumu. Na pa hte akapër kôt amnhĩ nhĩpêx mex o ri ixpa.

Anhÿr o nhÿx pre kãm amnhĩ to jarkrar. No na pre tanhmã kãm amnhĩ to jarkrar to hkêt nẽ. ³Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapër ã kagà htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpër nẽ hkôt amnhĩ xãm nhũm amnhĩ tã omu nẽ amnhĩm mex ã harê. Anẽ.

⁴Mẽ õ patrãwjaja na htem kãm mẽ àpênh xwÿnhjaja àpênh mex ã mẽ omunh xà hkôt mẽ kãm amnhĩre. ⁵No Tĩrtũm na hte ã mẽ panhĩpêx anhÿr kêt nẽ. Na hte mẽ pahte tãm amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nẽ. ãm mẽ pahte amnhĩ kaxyw Kra Jesus kôt pajamaxpër nẽ hkôt amnhĩ xunhwÿr ã mẽ pahpumunh kôt pix mã na hte amnhĩm ã mẽ pajarênh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jesus kôt pajamaxpër xwÿnh pixjaja na hte ã mẽ pajarênh anẽ.

⁶Jakamã na hte mẽ pamã amnhĩ jarênh o:

—Ixte mẽ amex ã mẽ ajarênh tã no ãm mẽ ate amnhĩ to mex kôt mẽ apumunh kôt na pa ã mẽ ajarênh anhÿr kêt nẽ. ãm mẽ ate amnhĩ kaxyw Ixkra mẽ wa ixkôt ajamaxpër nẽ wa ixkôt amnhĩ xunhwÿr ã mẽ apumunh kôt na pa hte ã mẽ ajarênh anẽ. Anẽ.

Pu mẽ ã kot pamã kapër anhÿr ã amnhĩ tã kuma nẽ pahkĩnh nẽ. Pahi finat Tawi na pre haxwÿja ja jarênh o:

⁷Na hte Tĩrtũm amnhĩ katut kôt mẽ pahte amnhĩ tomnuj piitã rênh pa nẽ axte kãm hamaxpër kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

⁸Nẽ amnhĩ kukamã pajamaxpër o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkarpĩ nẽ.

Hãmri nẽ amnhĩ to Tĩrtũm wÿ nhũm inhma nẽ ixte amnhĩ tomnuj o hapêx pa nẽ axte kãm hamaxpër kêt nẽ.

Nà ãm hãmri. Ja mex kumrêx.” Anẽ.

⁹Tã mẽ kot ja hã amnhĩ pumunh nẽ hkĩnh xwÿnhjaja mẽmojaja na mẽ? Xà mẽ kot amnhĩ my kwÿrýt kà jakàr xwÿnh pix kwÿjaja na pre pahi Tawija ã mẽ harênh anẽ nà? Nà mẽ tapxipixjaja kêt. Mãânên mẽ kot amnhĩ jakàr kêt xwÿnh kwÿjaja. Tanhmã na pre ra Tĩrtũm kapër ã kagà htũm kot finat Apraãw jarênh to? Na pre harênh o:

Na pre Apraãw amnhĩ kaxyw Tĩrtũm kôt hamaxpër nẽ hkôt amnhĩ xãm nhũm amnhĩ tã omu nẽ amnhĩm mex ã harê. Anẽ.

¹⁰Xà Apraãw ra kot amnhĩ my kwÿrýt kà krãhyr nhĩrô pẽ na pre Tĩrtũm amnhĩm mex ã harê? Nà kormã kot amnhĩ krãhyr kêt ri na pre ã harênh anẽ. ¹¹Kormã kot amnhĩ krãhyr kêt ri kãm kapër nẽ kãm:

—E ate amnhĩ kaxyw inhmã ajamaxpër nẽ ixkôt amnhĩ xãm ã ixte apumunh kôt na pa amnhĩm amex ã ajarê.

Anhÿr o kãm kapër hãmri nẽ rĩ kormã kãm tanhmã amnhĩ krãhyr to hã kãm karõ nhũm kuma nẽ mar xà hkôt amnhĩ my kwÿrýt kà hkwÿ krãhta. Kot Tĩrtũm mã amnhĩ nhõr ã amnhĩ to amnhĩrít kaxyw ã amnhĩ nhĩpêx anẽ.

Nom kormã amnhĩ krãhyr kêt ri na pre Tĩrtũm amnhĩm mex ã harê. Tã Ijaew kêt xwÿnhjaja kot amnhĩ jakàr kêt tã mẽ hkwÿjaja Apraãw pyrã nẽ amnhĩ kaxyw Tĩrtũm mã hamaxpër nẽ kãm amnhĩ nhõr jakamã Apraãw te kêp mẽ hpàr krax maati pyrãk. ¹²Nẽ mãânên mẽ pahpê Ijaew. Kot puj mẽ pahtõ amnhĩ kaxyw Tĩrtũm kôt pajamaxpër nhũm amnhĩ tã mẽ pahpumu nẽ mẽ pamex ã mẽ pajarê. No ãm mẽ pahte amnhĩ jakàr ã mẽ pahpumunh kôt ã mẽ pajarênh anhÿr kêt nẽ. ãm Apraãw pyrã nẽ amnhĩ kaxyw Tĩrtũm kôt pajamaxpër pix ã mẽ pahpumunh kôt na hte mẽ pamex ã mẽ pajarê. Kormã Apraãw kot amnhĩ my kwÿrýt kà krãhyr kêt ri ra kot amnhĩ kaxyw Tĩrtũm mã hamaxpër jakamã kêp mẽ pahpê Ijaew mẽ pahte urãk nẽ amnhĩ kaxyw Tĩrtũm mã pajamaxpër xwÿnhjê

hpâr krax maati. Ijaew kêt xwýnhjê pyrà nê kêp mē pahpâr krax maati.

Tirtûm kot Apraâw mã mēmoj mex jarênh Karatas 3.22

¹³ Amnepê m na pre Tirtûm Apraâw mã tanhmã kapêr to nê kãm:

—E koja nhÿrmã akanrêhã akra nê atàmnhwýjaja amÿrpê apyrà nê krî piitã hkôt mē kêp mē õ pahi. Anê.

Tã tanhmã Apraâw kot amnhÿ nhÿpêx to hã omunh xà hkôt na pre ã kãm kapêr anê? Xà kot kãm tanhmã amnhÿ nhÿpêx to hã karõ nhÿm kot hkôt amnhÿ nhÿpêx mex ã omunh xà hkôt na pre hkÿnh nê ã kãm kapêr anê? Nà kot anhÿr kêt. Mē pahtõ kot pu we Tirtûm kapêr xà hkôt pix mã amnhÿ nhÿpêx mex rãhã ho ri papa? Mē pahpê hihtÿx kênã. ãm kot amnhÿ kaxyw Tirtûm kôt hamaxpêr nhÿm kot amnhÿ tã omunh nê amnhÿm mex ã harênh kôt pix mã na pre ã kãm kapêr anê. ¹⁴ Kop apu kot kãm tanhmã kapêr to nê kãm:

—E Apraâw. Kot kaj ixkapêr piitã ama nê hkôt amnhÿ nhÿpêx mex rãhã ho ri apa. Hã koja nhÿrmã akanrêhã akra nê atàmnhwýjaja kêp krî piitã hkôt mēõ pahihtî.

Anhÿr o kãm kapêr ronhÿx ãm kãm ã kapêr anhÿr kaprÿ. Apraâw aa kot kapêr piitã hkôt amnhÿ nhÿpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhÿ kukamã hamaxpêr nê hamaxpêr o:

—Kwa nã. Ra ixte Tirtûm kôt amnhÿ xãm tã tanhmã kot pa amnhÿ to nê kapêr piitã hkôt amnhÿ nhÿpêx mex rãhã ho ri ixpa? Kot paj tee ri inhmã ã amnhÿ nhÿpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtàmnhwýjaja kêp mē õ pahi hkêt nê pa. Hêxta waa nê. ¹⁵ Koja Tirtûm ixte kapêr kwÿm ri tanhmã ixte amnhÿ tomnuj to hã ixpumu nê tanhmã ixtomnuj to. No mēhõ kot we kapêr piitã hkôt amnhÿ nhÿpêx mex rãhã ho pa? Nã amrakati kumrêx.

Anhÿr o nhÿx pre hamaxpêr. ¹⁶ No na pre Tirtûm ã kãm kapêr anhÿr kêt nê. Ra kot hprî hã mē pahte amnhÿ nhÿpêx ã mē pahpumunh mex kênã. Na pre ãm kãm:

—E ate amnhÿ kaxyw ixkôt ajamaxpêr nê ixkôt amnhÿ xãm jakamã kot paj amarÿ ato mex nê. Anê.

Tirtûm na hte mēmoj tã amnhÿ jarênh o amnhÿ to hêx kêt nê. Na hte mēmoj tã amnhÿ jarênh xà hkôt tanhmã mēmoj nhÿpêx to ho ri pa. Jakamã koja mē pahte Apraâw pyrà nê amnhÿ kaxyw hkôt paja-maxpêr xwýnh piitã mē pahto mex nê.

Nê xà na pre ã mē pamã kapêr anê nê mē pamã:

—E kot kaj mē ixkapêr kôt pix mã ri amnhÿ nhÿpêx o ri apa hã kot paj mē ato mex rax nê.

Anhÿr o mē pamã kapêr? Nã na pre ã mē pamã kapêr anhÿr kêt nê. Na pre mē pamã:

—Kot kaj mē finat Apraâw pyrà nê amnhÿ kaxyw ixkôt ajamaxpêr nê ixkôt amnhÿ xunhwÿ hã kot paj mē ato mex nê.

Anhÿr o mē pamã kapêr. Tã Apraâw kumrêx kot mē pakukamã amnhÿ kaxyw hkôt hamaxpêr jakamã te kêp mē pahpiitã mē pahte urak nê ã amnhÿ nhÿpêx anhÿr xwýnhjê pâr krax maati pyràk.

¹⁷ Amnepê m na pre Tirtûm tanhmã Apraâw mã kapêr to. Kot tanhmã kãm kapêr toja Tirtûm kapêr ã kagã htum kamã na. Na pre kãm:

Kot kaj apê ahpÿnhã ri mē urojê hpâr krax.

Anê.

Kormã Apraâw kra hkêt tã nhÿm hkra hkukamã ã kãm kapêr anê. Hãmri nhÿm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprõ mē wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhÿ to nê tokÿx ty. Tã ra Tirtûm kot ixkra nê ixtàmnhwýjê hkukamã ã inhmã mē harênh anhÿr kênã. Jakamã kot pa xep wa ixpigêt tÿx tã tanhmã amnhÿ to nê ixkra. Nã kot pa xep wa anê. Nê koja ixkraja tanhmã amnhÿ to nê ixpê htyk japêr tã koja Tirtûm akupÿm inhmã ho htîr. Nã koja inhmã ho anê. Ra kot inhmã ixkra nê ixkanrêhã ixtàmnhwÿ xotô jarênh kênã. Anê.

¹⁸⁻¹⁹ Na pre ra hpigêt tÿx nê. Ra hã amgrã pê 100 nê hkurê kêt nê pa. Nhÿm hprõ mãânên hpigêx tÿx nê. Nê õhy kamã hkra hkêt kumrêx. Kormã wa hkra hkêt tã nhÿm

Tirtûm Apraãw mã hkra nê htàmnhwý xohtô hã harê. Nê kêp mē urojê xohtôjê pàr krax ã kãm harê. Hãmri nhùm kuma nê amnhĩ kaxyw hkôt hamaxpêr tỳx kurê kumrêx. ²⁰ Nê ã amnhĩ nhĩpêx anhÿr rãhã ho pa. Na pre war amnhĩ kra hã amnhĩ jarênh ma nê tee ri amnhĩ kukamã hamaxpêr kêt nê. ãm Tirtûm tãm kot wa kãm wa hkra jarênh pix mã hamaxpêr pē amnhĩ kaxyw kãm hamaxpêr tỳx o ri wa pa. Nê hamaxpêr o:

—Nà ra wa ixpigêt tỳx kumrêx tã koja xep Tirtûm wa inhmã wa ixkra hõ gõ. Nà koja wa inhmã kugõ. Hêxta waa nê. ãm hãmri Tirtûmja mex o mex. ²¹ Nà kot wa inhmã wa ixkra jarênh xã hkôt koja wa inhmã kugõ. Ja kaxyw àhpumunh o àhpumunh. Tirtûmja hêx kêt. Anê.

²² Hãmri nhùm Tirtûm ã hamaxpêr anhÿr ã omu nê amnhĩm mex ã harê. Nê kot kãm amnhĩ jarênh xã hkôt wa kãm wa hkraja gõ.

²³ Nom na pre amnhĩm Apraãwja pix mex ã harênh kêt nê. ²⁴ Kot puj mē pahtõ uràk nê amnhĩ kaxyw hkôt pajamaxpêr nhùm amnhĩ tã mē pahpumu nê ra kot Apraãw jarênhhta pyrã nê amnhĩm mē pamex ã mē pajarê. Na pre mē panhõ Pahiiti Jejus ty nhùm Tirtûm akupÿm ho htĩr. Tã mē papajaja na pu prem amnhĩ kaxyw Jejus kôt pajamaxpêr nhùm Tirtûm ja hã mē pahpumunh kôt mē pahte amnhĩ to mex xwÿnh ã mē pajarê. ²⁵ Na pre mē pahwÿr Kra Jejus mē nhùm mē pahwÿr wrÿ. Tã nhùm mē axtem nê kupĩ nom nhùm amarĩ htyk kêt nê. Na pre htyk o mē pahte amnhĩ tomnuj pãnhã amnhĩrer pa. Ja kaxyw na pre Tirtûm mē pahwÿr kumê. Jakamã nhùm prem kupĩ nhùm akupÿm ho htĩr. Tã mēmo kaxyw na pre Tirtûm ã mē pahwÿr Kraja mēnh nhùm mē panê htyk anê nhùm akupÿm ho htĩr? ãm kot kukwak ri amnhĩm mē pahte amnhĩ kaxyw hkôt pajamaxpêr xwÿnhjaja mē pahte amnhĩ to mex xwÿnh ã mē pajarênh pix kaxyw.

5

*Tirtûm kot mē pahto hkwÿ hã harênh
Matêwre 5.12; Sikÿn Korĩt 4.8, 5.18-21;
Xiakre 1.2-4; Wam Pêtre 4.12, 5.9*

¹ Nê na pu prem amnhĩ tomnuj o ri papa nhùm Tirtûm ja hã mē pahpumu nhùm ja kêp omnuj nê. Jakamã nhùm Jejus amnhĩ grõnh kôt wrÿ nê mē panê ty. Nhùm Tirtûm htykja kukwak ri mē pahto hkwÿ. Mē pahte amnhĩ kaxyw hkôt pajamaxpêr nê hkôt amnhĩ xunhwÿr ã mē pahpumu hãmri nê ã mē panhĩpêx anê pu mē ra pahpê hkwÿ hã papa. ² Na pre Jejus Tirtûm mã mē pajarênh o:

—E jajê pumu. Na mē ra amnhĩ kaxyw pamã hamaxpêr nê pahkôt amnhĩ xunhwÿ. Anê.

Hãmri nhùm kuma nê mē pahto mex nê mē pakutã nojarêt rãhã ho pa. Tã kot puj mē pahpê hkrajaja nhÿrmã pano ho Tirtûm mex o mex xwÿnhja pumu. Jakamã na pu htem amnhĩ kukamã ã pajamaxpêr anhÿr o pahkĩnh nê papa nê pajamaxpêr o:

—Hêxta waa nê. Kot paj nhÿrmã inhno ho Tirtûm mex o mex ã omu nê kuri ixpa ho ixpa. Nà ãm hãmri. Inhmã omunh prãm tỳx kumrêx. Anê.

³⁻⁴ Nê na htem Jejus ã mē pahtomnuj nê pu mē pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mē mãmri ã mē panhĩpêx anê. Pu mē pahpunuj kurê Jejus kôt amnhĩ xunhwÿr tỳx o kormã mō. Nê mē umaj hkaga hkêt nê. Arĩ amnhĩ wÿr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nê ri papa.

Kot puj mē ã amnhĩ nhĩpêx anhÿr o ri papa nhùm Tirtûm ja hã mē pahpumu nhùm ja kãm mex nê. Hãmri nhùm ja kaxyw tanhmã mē pahto paxihtỳx to pu mē pahpunuj tã hkôt pajamaxpêr tỳx rãhã nê.

⁵ Nê ra mē kot Jejus ã tanhmã mē panhĩpêx to htã pu mē amnhĩ kaxyw tee ri kãm pajamaxpêr kaprÿ hkêt nê. Ra kot mē pamã amnhĩ Karõ nhõr nhùm kot mē pahkarõ mã gjêx kênã kot pu kêt mē ri tee ri amnhĩ kaxyw kãm pajamaxpêr kaprÿ. Na hte Karõja mē pahkarõ kamã mē pamã Tirtûm kapêr jarênh o amnhĩrĩt nê kãm mē pajapê htỳx ã harênh o amnhĩrĩt rãhã nê.

⁶ Amnepê mã na pre mē piitã amnhĩ tomnuj o ri pa nê tee ri kãm amnhĩ to mex rãhã hprãm kaprÿ. Mêhõ kot we ja kaxyw

tanhmã mẽ hkrã hto? Jakamã nhũm Tĩrtũm ja hã mẽ omu hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwỳr wrỳ. Ixte mẽ nẽ atyk kaxyw agrõnh kõt mẽ hwỳr amẽnh jakamã kot kaj wrỳ nẽ mẽ kãm ixkapẽr jarẽnh o ri mẽ hkõt apa. Rãhã nhũm mẽ hkwỳjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

—Tõe. Nà kot paj amã hprãm xà hkõt ã amnhĩ nhĩpẽx anẽ. Anẽ.

Hãmri nẽ man amnhĩ grõnh kõt mẽ pahwỳr wrỳ. ⁷⁻⁸ Xà koja mẽhõ kãm axpẽn japẽ xàj axpẽn nẽ ty nà? Xà kot mẽhõ tãm kot amnhĩ nhĩpẽx xwỳnh tã nhũm mẽ kot hpĩr kaxyw nhũm hkrãmnhwỳja kãm hapẽ nẽ. Nẽ nẽ amnhĩ grõnh kõt mẽ kãm xa nhũm mẽ kupĩ nhũm nẽ ty? Nà kot apu nẽ htyk japẽr ko. No mẽ papajaja. Na pu htem mẽhõ hkrãmnhwỳta kĩnhã arĩ amnhĩ tomnuj rãhã ho ri papa htã nhũm Tĩrtũmja arĩ kãm mẽ pajapẽ nẽ. Nẽ kãm mẽ pajapẽ xàj mẽ pahwỳr Kris mẽ nhũm mẽ panẽ ty. Arĩ mẽ pahte amnhĩ tomnuj rãhã ho papa tãã. Na pre ã Tĩrtũmja kãm mẽ pajapẽ hã ã mẽ pahwỳr mẽnh anẽ. ⁹ Na pre ty nhũm hkamrõ hkwỳ axkapĩ nhũm Tĩrtũm ja hã omunh xà hkõt tãm amnhĩm mẽ paxunhwỳ. Tã Jejus kukwak ri koja ma mẽ kot amnhĩ xà htỳx kamã hamak tũm xàta wỳr mẽ parẽnh kêt nẽ. Mẽ pahpẽ hkwỳ kẽnã kot kêt hwỳr mẽ parẽ.

¹⁰ Nom kormã mẽ pahpẽ hkwỳ hkêt ri na pu prem te ra kutã amnhĩ xunhwỳr pyrãk o amnhĩ nhĩpẽx. Tã nhũm Kra mẽ panẽ ty pu mẽ hkõt amnhĩ xunhwỳ. Jakamã nhũm Tĩrtũm Jejus tyk kukwak ri mẽ pahto hkwỳ. Nẽ ra akupỹm Kra ho htĩr jakamã kot puj mẽ pahte hkõt amnhĩ xunhwỳr xwỳnhjaja nhỹrmã wa uràk nẽ wa kuri pahtĩr tũm nẽ pamex kumrẽx nẽ papa ho papa.

¹¹ Nẽ mẽ pahpẽ kuwy rax wỳr mẽ papa mã xwỳnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpẽx anhỹr kêt nẽ. Mẽ pahpẽ Tĩrtũm krãmnhwỳ jakamã na pu htem mããnẽn pahkĩnh nẽ ri papa. Pahihti Jejus Kris kot mẽ panẽ htyk ã omunh xà hkõt na pre Tĩrtũm mẽ pahte hkõt amnhĩ

xunhwỳr xwỳnhjẽ ho hkwỳ jakamã na pu htem pahkĩnh nẽ pajamakêtkati nẽ ri papa.

*Atãw mẽ Kris wa harẽnh
Wam Korĩt 15.20-22, 45-49*

¹²⁻¹³ Nẽ amnepẽm na pre Tĩrtũm finat Mojes mã tanhmã kapẽr to. Hãmri nhũm kuma nẽ Ijaew kot tanhmã amnhĩ nhĩpẽx to ho pa kaxyw mẽ kãm mẽmojta ã karõ nẽ mẽ kãm hã hkagã. Mẽ kot kamã harẽnh nẽ mar nẽ Tĩrtũm kõt amnhĩ nhĩpẽx kaxyw. Hãmri nhũm mẽ tee ri ã kot mẽ kãm mẽmoj tã karõja ma nẽ tanhmã axpẽn mã kapẽr to nẽ axpẽn mã:

—Kwa na pu htem ã amnhĩ nhĩpẽx anhỹr kêt nẽ. Na pu htem ãm amnhĩ tomnuj tỳx kumrẽx o ri papa nẽ amnhĩ to mex kêt kumrẽx. Anẽ.

ãm hãmri na prem ã amnhĩ jarẽnh anẽ. Mẽ pahpiitã mẽ pahte amnhĩ tomnuj xwỳnh kẽnã. My kot wa pẽ finat Atãwja kumrẽx na pre tanhmã mẽ pahte amnhĩ tomnuj to ho hkrax. Mỳrapẽ na pre htĩr tũm nẽ ri pa ho pa hkêt nẽ. Na pre ri pa nẽ gaa nẽ rĩ hpigêt tỳx nẽ ty. Tã mỳr pẽ ri mẽ papa xwỳnhjaja na pu htem uràk nẽ tanhmã amnhĩ tomnuj to ho ri papa. Mỳrapẽ na pu htem ri papa nẽ gaa nẽ Atãw pyrã nẽ pahtyk pa. Tĩrtũm kot mẽ pahtã Atãw mã kapẽr xà hkõt. ¹⁴⁻¹⁹ Jakamã na prem kormã Mojes kator xwỳj ri pika piitã hkõt ri pa nẽ gaa nẽ haxwỳja htyk pa. Mẽ kot amnhĩ tomnuj mỳrapẽ ty. Atãw pyrã nẽ Tĩrtũm kot mẽmo xõ nẽ hkurẽ xwỳnhnta krẽr kêt tã uràk nẽ tanhmã amnhĩ tomnuj to ho ri pa. Hãmri nẽ mỳrapẽ ty.

Na pre ã Atãwja mẽ pahpiitã mẽ pamã Tĩrtũm kapẽr nhĩrõp ãm nẽ amnhĩ tomnuj o hkrax anẽ nẽ mẽmo xõta krẽ. Jao te mẽ pahpiitã mẽ pahte uràk nẽ kumẽ hkur pyrãk o mẽ panhĩpẽx. Mỳrapẽ nhũm htem arĩ pika piitã hkõt hapõj nẽ kormã hprĩre htã ra Atãw pyrã nẽ tanhmã amnhĩ tomnuj to ho ri pa. Jakamã nhũm Tĩrtũm Atãw kot tanhmã amnhĩ tomnuj to hã omunh xà hkõt mẽ pakukamã hamaxpẽr o:

—Nà koja mẽ Atãw pyrã nẽ amnhĩ tomnuj o ri pa. Mỳrapẽ kot paj ma mẽ kot amnhĩ xà htỳx kamã hamak tũm xàta wỳr mẽ rẽn pa. Anẽ.

Tã Jejus Kris mẽ Atãw wa harênhja kot axpên pyrâk jakamã na hte Atãw kanrêhã hkra nê htãmnhwýjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urâk nê amnhĩ tomnuj rãhã ho ri pa. Nhũm axtem Jejus kôt mẽ kot amnhĩ xunhwýr xwýnhjaja Jejus kôt amnhĩ nhĩpêx rãhã ho ri pa. Te mẽ kêp hkanrêhã hkra nê htãmnhwýjê pyrã nê urâk nê tãm amnhĩ nhĩpêx. Na htem ã ahpýnhã amnhĩ nhĩpêx anhýr o ri pa. Na pre Jejus mẽ pahte amnhĩ tomnuj pãnhã amnhírer par kaxyw mẽ panê ty. Jakamã mẽ pahte hkôt amnhĩ xunhwýr xwýnhjaja na hte Tĩrtũm ja hã mẽ pahpumunh kôt mẽ pahto hkra. Kot puj mẽ nhýrmã pahtyk tã nhũm akupým mẽ pahto mẽ pahtĩr pu mẽ wa kuri pahtĩr tũm nê papa ho papa.

Atãw kot Tĩrtũm kapêr nhĩrôp ãm jakamã na hte Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Nom nhũm Jejus Atãw rom kot Tĩrtũm kapêr mar nê hkôt amnhĩ nhĩpêx rãhã jakamã na hte Tĩrtũm mẽ pahte hkôt amnhĩ xunhwýr xwýnhjaja amnhĩm mẽ pahte amnhĩ to mex xwýnh ã mẽ pajarê.

Nhũm Atãw kot Jejus kĩnhã Tĩrtũm kapêr nhĩrôp ãm mýrapê na hte mýr pê mẽ pa xwýnhjaja ohtô nê pa nê gaa nê Atãw pyrã nê htyk pa. Hãmri nê kormã htĩr ri amnhĩ to mex o pa hkêt mýrapê ma mẽ kot amnhĩ xã htýx kamã hamak tũm xãta wýr ma hapêx. Tã nhũm Tĩrtũmja mex o mex jakamã na hte Jejus Kris mẽ wa mẽ pakamã ukaprĩ nê. Jakamã na pre mẽ pahwýr Jejus mẽ nhũm mẽ pahwýr wrý hãmri nê htyk o mẽ pahte amnhĩ tomnuj pãnhã amnhíre. Nhũm Tĩrtũm ã kot amnhĩ nhĩpêx anhýr kukwak ri mẽ pahte hkôt amnhĩ xunhwýr xwýnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Tã nhũm Jejus mẽ pakamã ukaprĩ nê mẽ panê ty nhũm Tĩrtũm ja hã omunh xã hkôt ra mẽ pahte amnhĩ kaxyw hkôt pajamaxpêr xwýnhjaja te mẽ pahte aa tanhmã amnhĩ tomnuj to hkêt pyrâk o mẽ panhĩpêx. Na hte amarĩ ã mẽ panhĩpêx anê.

Nê Atãw kot amnhĩ tomnuj mýrapê na

htem piitã ri pa nê tanhmã amnhĩ to nê ty rý ri pa nê gaa nê wejre nê ty. No na pre Jejus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwýr xwýnhjê kutã nojarêt rãhã nê mẽ pakukamã hamaxpêr o:

—Nà mẽ kot Ixkra hkôt amnhĩ xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwýnhũm mẽ nhýrmã wa ixri mex nê htĩr tũm nê pa ho pa. Anê.

²⁰⁻²¹ Nê na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. Hãmri nê mẽ kot kapêr mar nê hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nê amnhĩ xô ri mẽ kãm hã kagã nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwym pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mýrapê koja mẽ nhýrmã ty nê ma mẽ kot amnhĩ xã htýx kamã hamak tũm xãta wýr ma pa. Nom Tĩrtũm arĩ kãm pika piitã hkôt mẽ papa xwýnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwýr Kra Jejus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhírer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwýnhjaja nhýrmã Tĩrtũm mẽ wa kuri pahtĩr tũm nê pa mex nê papa ho papa.

6

Mẽ kot mẽ pahkrã kumrãr ã mẽ harênh Sikũn Korĩt 5.17; Karatas 2.19-20, 5.24, 6.14; Epes 4.17-24; Korosẽ 3.1-11; Wam Pêtre 4.1-6

¹ Nê mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nê. Nê arĩ mẽ pakutã nojarêt rãhã nê. Jakamã xã kot kaj mẽ atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nà Tĩrtũm kãm ijapê nê kot ixkutã nojarêt rãhã ho ri pa jakamã mo kaxyw kot pa

Jejus kôt amnhĩ nhĩpêx o ri ixpa? Nà kot paj ho anhÿr kêt nê. Anê.

Ka ã mẽ atõ atÿx ri ajamexpêr anhÿr japêr. Kwa xà ajamexpêrja mex? Nà mex kêt. ² Æ ajamexpêr anhÿrja mẽ hamaxpêr mex xà hkôt kêt. Ra mẽ pahte Jesus kôt amnhĩ xunhwÿr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyræk. Jakamã kot puj mẽ arĩ tanhmã amnhĩ tomnuj to ho ri papa hkêt nê. ³ Mẽmo kaxyw na htem Tĩrtũm mã mẽ pahkrã kumrã? Nà mẽ pahte ra Jesus kôt amnhĩ xunhwÿr ã amnhĩ to amnhĩrit kaxyw. Te Jesus htyk nhũm mẽ pahte amnhĩ tomnujja haxwÿja hkôt htyk nê hapêx par pyræk o amnhĩrit kaxyw. Jakamã na pu htem pajamexpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

⁴ Na htem Tĩrtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jesus kôt haxwÿja haxàr pyræk. Hãmri nhũm mẽ akupÿm mẽ pahto api. Te Tĩrtũm hihtÿx o hihtÿx o kot akupÿm Kra Jesus ho htĩr pyræk. Te mẽ pahtÿk tã nhũm akupÿm kot mẽ pahto mẽ pahĩr pyræk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. ⁵ Nhũm mẽ pahte amnhĩ nhĩpêx tũmja te Jesus kôt htyk nê hapêx par pyræk. Nê mẽ pahte amnhĩ nhĩpêx nywja te Jesus akupÿm htĩr pyræk o amnhĩ nhĩpêx.

⁶ Amnepêm na pu pre htem amnhĩ tomnuj rãhã ho ri papa. Te mẽ kãm mẽ àpênh xwÿnhjaja kot mẽ õ patrãw mã àpênh rãhãta pyræk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamexpêr punujja te pĩ kahpa hã Jesus kôt harir nê htyk nê hapêx par pyræk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamexpêr nyw pix o pajamexpêr papa kaxyw. ⁷ Na hte mẽ htyk xwÿnhjaja axte tanhmã amnhĩ tomnuj to hkêt nê. Tã kër pu mẽ uræk nê axte ã amnhĩ nhĩpêx anhÿr kêt nê. ⁸ Na pu prem Jesus kot mẽ panê htyk ã harênh ma nê pajamexpêr o:

—Nà ra Jesus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyræk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

⁹ Nê Jesus htyk nhũm Tĩrtũm akupÿm ho htĩr jakamã koja axte htyk kêt nê. Ra mẽ pahte ja mar mex. ¹⁰ Na pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupÿm htĩr o htĩr nê kaxkwa kamã Tĩrtũm mã tanhmã amnhĩ nhĩpêx to ho ri pa. ¹¹ Tã mẽ papajaja kot puj mẽ ã kot amnhĩ nhĩpêx anhÿrja ma nê ã pajamexpêr anê nê pajamexpêr o:

—Nà ãm hãmri. Te ixte Jesus pyrã nê ra ixtyk pyræk jakamã kot paj axte amnhĩ tomnuj o ri ixpa hkêt nê. Te ixte Jesus pyrã nê akupÿm ixtĩr nê ãm Tĩrtũm kôt pix mã amnhĩ nhĩpêx o ri ixpata pyræk o kot paj hpãnhã amnhĩ nhĩpêx o ri ixpa. Anê.

¹² Jakamã kot ka mẽ atõ nhÿrmã tanhmã amnhĩ kukamã ajamexpêr punuj to japêr hãmri nê ajamexpêr o:

—Nà inhmã ã amnhĩ tomnuj anhÿr prãm nê. Omnuj tã kot paj ho anê. Nà ixte ho anhÿr mã kênã.

Anhÿr o ajamexpêr japêr tã kwa mẽ ã ajamexpêr anhÿr kêt nê.

¹³ Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamexpêr nê tãm akapêr. Nê mẽ kot amnhĩ to mex xwÿnhjê kôt pix mã mãn ri apa.

Na ka pre htem akapêr punuj nê. Nê ajamexpêr punuj nê.

Nê mẽ kot amnhĩ tomnuj o mẽ pa xwÿnhjê hkôt ri apa.

Nê kagôxÿhti japrô nê ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhÿr kêt nê.

¹⁴ Amnepêm na pu prem tanhmã mẽ pahte amnhĩ nhĩpêx to ho papa hkukamã pajamexpêr nê pajamexpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhÿr tã no ãm tee ri mẽ pamã hkôt amnhĩ nhĩpêx o ri papa hprãm kaprÿ nê arĩ ri kapêr kwÿm tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêt rãhã ho pa xwÿnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anê.

Anhÿr jakamã ra amnhĩ kaxyw kãm pajamaxpêr tÿx o mẽmoj punuj kutã amnhĩ to htÿx nê.

Mẽ pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamaxpêr to? Xà kot pu mẽ ã pajamaxpêr anê nê pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nê. ãm kêp ixkutã nojarêt rãhã nê amarĩ amnhĩm inhmex ã ijarênh xwÿnh jakamã kot paj arĩ amnhĩ tomnuj rãhã nê aa ja kaga hkêt nê.

Anhÿr o kot puj mẽ pajamaxpêr? Nà kot puj mẽ ã pajamaxpêr anhÿr kêt nê. ã mẽ pajamaxpêr anhÿrja mex kêt. ¹⁶ Koja mẽhõ nhÿri kot amnhĩ tomnuj tÿx xwÿnhjê hõ pumu nê kãm amnhĩ jarênh japêr nê kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixpa. Jakamã e inhmã mẽmoj tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhĩ nhĩpêx anhÿr tã amnhĩ tomnuj pix o ri pa. Tã ã mẽ kot amnhĩ nhĩpêx anhÿr o mẽ pa xwÿnhjaja koja nhÿrmã ty hãmri mẽ kot amnhĩ xà htÿx kamã hamak tũm xàta wÿr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixpa.

Anhÿr o kãm amnhĩ jarê nê hkôt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhÿrmã ty nê ma õ krĩ hwÿr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

¹⁷ Tã mẽ kajaja na ka xep prem tee ri mẽ amã mẽ ate amnhĩ tomnuj mã anhÿrer prãm tã nhũm te tãm kot amnhĩ tã mẽ

ato htÿx pyræk o mẽ anhĩpêx ka mẽ tee ri kãm anhÿrer prãm kaprÿ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkôt ajamaxpêr tÿx nê ãm hkôt pix mã amnhĩ nhĩpêx. Pa ja hã mẽ ajarênh ma nê mẽ anhÿ hã ixkĩnh nê. Nê Tĩrtũm mã ixte mẽ ajarênh mar nê mẽ anhÿ hã ixkĩnh ã amnhĩ jarê. ¹⁸ Na pre Tĩrtũm tanhmã mẽ akrã hto ka mẽ amnhĩ tomnuj mã anhÿrer pa nê hpãnhã hkôt pix mã amnhĩ nhĩpêx.

¹⁹ E kot paj ixprĩ hã tanhmã mẽ amã ja jarênh to. Te ixte ixkrajê jahkre pyræk o kot paj mẽ amã awjarê. Nà amnepêm na ka prem ajamaxpêr punuj kôt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhÿr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê. ²⁰ Na ka prem tee ri amã amnhĩ tomnuj mã anhÿrer prãm kaprÿ. Te tãm kot amnhĩ tã mẽ ato htÿx nê amnhĩ kôt mẽ ato pa pyræk o mẽ anhĩpêx. ²¹ Xàn ka prem ã amnhĩ tomnuj anhÿr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwÿ nê tee ri ate tanhmã amnhĩ tomnuj to hã amnhĩ pumu nê akapri nê apijaam nê. ã mẽ kot amnhĩ tomnuj anhÿr o pa xwÿnhjaja na htem ja mÿrapê ty nê ma mẽ kot amnhĩ xà htÿx kamã hamak tũm xàta wÿr pa. ²² No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htÿx nê amnhĩ kôt mẽ ato pa pyræk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhÿrmã kuri amex kumrêx nê atĩr tũm nê ri apa ho apa.

²³ Na hte mẽ kãm ãpênh o ri mẽ pa xwÿnhjaja mẽ kãm mẽmoj tã apê nê ãpênh pa nê hpãnhã amnhĩrer xà jamÿ. Ja pyræk nê koja mẽ kot amnhĩ tomnuj xwÿnhjaja nhÿrmã ty hãmri nê ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamaxpêr xwÿnhjaja na hte Tĩrtũm ja hã

mê pahpumu nê mê pajarênh o:

—Nà âm hămri. Jajaja koja nhỹrmã Ixkra mê wa Ixkuri mex kumrêx nê htĩr tũm nê pa ho pa. Hêxta waa nê. Nà âm hămri koja mê anê. Anê.

Xà tãm mê pahte amnhĩ nhĩpêx ã mê pahpumunh kôt na hte ã mê pajarênh anê? Nà âm mê pahte Kra Jejus Kris kôt amnhĩ xunhwýr ã mê pahpumunh kôt pix mã na hte ã mê pajarênh anê.

7

Mê pahte amnhĩ tomnuj kot axte amnhĩ tã mê pahto htýx kêt ã harênh

Rômân 8.2, 10.4; Karatas 4.1; Epes 2.2; Korosê 3.7

¹ E Jejus kôt ixkwýjaja. Nà Tĩrtũm kot mê pakaxyw tanhmã Mojes mã kapêr tota na ka mê ra mar týx nê. Na pu htem kormã pahĩr ri hkôt amnhĩ nhĩpêx o ri papa. Tã ty hămri nê axte hkôt amnhĩ nhĩpêx kêt nê. Ra mê ate ja mar týx. E pa mê amã ja hã ejêp jarê ka mê inhma. ² Nà finat Mojes kot Tĩrtũm nhỹ hã mênijaja kot tanhmã amnhĩ nhĩpêx to ho pa hã mê kãm karôja. Koja mêmõ ho mjên hămri nê âm kôt pix mã ri pa ho pa nê aa hkaga hkêt nê. No koja nhỹrmã mjên kêp ty nhũm ahte ri pa. Hămri nê kãm axte mêmõ ho mjên prãm nê mãmrĩ axte mêmõ ho mjên. Ja tanhmã kute hkêt. ³ Nom koja wam mjên arĩ htĩr japêr nhũm hprõ tanhmã hamaxpêr to nê hkaga nê hpãnhã nhãm mêmõ ho mjên. Hã koja Tĩrtũm pê ja homnuj nê. Nom koja mjên ra kêp ty nhũm mýrpê axte kãm mêmõ ho mjên prãm nê mãmrĩ ho mjên. Ja na Tĩrtũm pê homnuj kêt. Ra wam mjênja htyk kênã. ã Tĩrtũm kot Mojes mã mê pakaxyw mêmõj tã karõ kot anhỹr.

⁴ Tã ja pyrã nê na pu prem amnepêp pajamaxpêr o:

—Ixte Tĩrtũm kapêr kôt pix mã amnhĩ nhĩpêx o ri ixpa jakamã nhũm Tĩrtũm ja hã ixpumu nê amnhĩm inhmex ã ijarê. Anê.

Tã pu mê ra tanhmã pajamaxpêr to nê hpãnhã pajamaxpêr õ ho pajamaxpêr o:

—Nà na xep hte Tĩrtũm mê ixte kapêr kôt amnhĩ nhĩpêx ã mê ixpumunh kôt amnhĩm mê inhmex xwýnh ã mê ijarênh kêt nê. Mê ixte hkôt amnhĩ nhĩpêx mex o ri ixpare hã. Kêt âm Kris kot mê inhnê htyk nhũm mê

ixte amnhĩ kaxyw hkôt ijamaxpêr nê hkôt amnhĩ xunhwýr pix ã mê ixpumunh kôt na hte mê inhmex ã mê ijarê. Âm ja pix ã mê ixpumunh kôt na hte mê ixto hkra nê mê ixkutã nojarê o pa. Kra Jejus pix kukwak ri na hte ã mê inhĩpêx anhỹr o pa. Anê.

ã mê pajamaxpêr nyw kot anhỹr. Jakamã te mê pahte mêmõ kot mjên nyw xwýnh gryk ã axte mjên htyk xwýnh mã hamaxpêr kêeta pyrãk o na pu htem amnhĩ nhĩpêx o papa. Jao Kris kapêr kôt pix mã amnhĩ nhĩpêx o ri papa. Nê Tĩrtũm noo mã tãm ri amnhĩ nhĩpêx. Nê axte mê pahte amnhĩ tomnuj kukamã tanhmã pajamaxpêr to hkêt nê.

⁵ Nê amnepê mã mê pahte amnhĩ krã hkôt tanhmã mê pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mê pahte Tĩrtũm kapêr mar týx tã kuma nê âm kuma nê ri papa nê ri hkôt amnhĩ nhĩpêx kêt nê. Mýrapê nhũm Tĩrtũm tee ri ja hã mê pahpumu nê mê pahtyk nê ma mê kot amnhĩ xã htýx kamã hamak tũm xã hwýr papa mã xwýnhjê hã mê pajarê.

⁶ Nê amnepêp na pu pre htem ã pajamaxpêr anhỹr o:

—Nà kot paj Tĩrtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwýnh ã ijarê.

Anhỹr o pajamaxpêr no âm tee ri ã pajamaxpêr anhỹr kaprý. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrãk o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mê pamã Tĩrtũm kapêr kôt amnhĩ nhĩpêx prãm kaprý hkêt nê. Ra Tĩrtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tĩrtũm kapêr ã kagã htũm kot tanhmã mê pajarênh to

Rômân 3.20, 5.20; Karatas 3.23-24

⁷ Tã Tĩrtũm mê pahte kapêr kôt ri amnhĩ nhĩpêx ã mê pahpumunh kôt amnhĩm mê pamex ã mê pajarênh kêt jakamã mêmõ kaxyw na kapêr ã kagã htũmja? Nà mê pahte mar nê pahprĩ hã Tĩrtũm noo mã mê kot amnhĩ tomnuj xã jarênh mar nê omunh mex kaxyw na. Na hte mê pahkwýjê kukrêx kĩnh o pamã ho panhõ hprãm nê mê

pamã karõ. Æ kot mẽmoj punuj piitã nê mẽ pamã karõ kot anhÿr. Tã mẽ pahte ja mar kêt ronhÿx pu mẽ Tirtũm kêp ja homnuj ã harênh mar kêt nê. ⁸ Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kïnh o ho pamã panhõ hprãmja mãânên kêp ja homnuj ã harênh mar tã nom aa hkaga hkêt nê arĩ pamã axpên kukrêx kïnh o pamã ho panhõ hprãm tÿx rãhã ho ri papa. Kop ãm Tirtũm kapêr kêt ronhÿx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyrãk. ⁹ Amnepê mã ixte Tirtũm kapêr mar kêt ri na pa pre ixtÿx ri amnhĩ kukamã ijamaxpêr o ri ixpa nê ijamaxpêr o:

—E kot paj nhÿrmã Tirtũm ri ixtÿr tũm nê inhmex nê ixpa ho ixpa.

Anhÿr tã hpãnhã pamã axpên kukrêx kïnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

—Hêxta waa nê. Nã ã ixte amnhĩ nhĩpêx anhÿr o ixpa jakamã kot paj nhÿrmã ty nhũm Tirtũm akupÿm ixto ixtÿr pa kuri ixtÿr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwÿnh na pa. Kot paj nhÿrmã ty nhũm Tirtũm ma mẽ kot amnhĩ xà htÿx kamã hamak tũm xàta wÿr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰ Tã hpãnhã axtem ijamaxpêr o:

—Nã kot paj Tirtũm kapêr kôt pix mã mãn ri amnhĩ nhĩpêx o ri ixpa hãmri nê nhÿrmã ixtyk tã hwÿr api nê kuri ixtÿr tũm nê inhmex nê ixpa ho ixpa. Nã kot paj anê.

Anhÿr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprÿ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

—Kwa tanhmã kot pa amnhĩ nhĩpêx to nê ãm Tirtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhÿr prãm tÿx kaprÿ. Æm ixte amnhĩ tomnuj pix o ri ixpa xwÿnh jakamã ãm hãmri koja amnhĩ nê kuwyta wÿr inhmê. Nã koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹ No mẽhõ koja Tirtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhÿr prãm kaprÿ. Mẽ pahpê hihtÿx kumrêx jakamã na pa pre ixtÿx ixte Tirtũm kuri ixtÿr tũm nê ri ixpa hã amnhĩ kukamã amnhĩ jarênh kaprÿ. Æm xatã kapêr nhĩrôp ixkuhê nê amnhĩ tomnuj pix o ri ixpaja mÿrapê koja mẽ kot amnhĩ xà htÿx kamã hamak tũm xàta wÿr amnhĩ nê inhmê. ¹² Kot anhÿr tã tanhmã kot paj mẽ Tirtũm kapêr ã kagã htũmta jarênh to? Nã kot mẽ pamã mẽ pahte amnhĩ nhĩpêx ã karõta mex kumrêx. Mex o mex. ¹³ Mex kumrêx tã na htem kuma nê tee ri kãm hkôt amnhĩ nhĩpêx hprãm kaprÿ. Jao nhÿrmã ty nê ma kuwy hwÿr pa. Kêt pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwÿnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapêr nhĩrôp ixkuhê nê hkwy m ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

—Nã na pa hte ãm tee ri inhmã Tirtũm kôt amnhĩ nhĩpêx prãm kaprÿ no ãm ho anhÿr kêt nê. Æm ixte amnhĩ tomnuj pix o ixpa xwÿnh na pa. Ja mÿrapê koja Tirtũm amnhĩ nê ma kuwy hwÿr inhmê. Nã koja ixto anê. Anê.

Mẽ pahte mẽ pamã amnhĩ tomnuj kaga hprãm kaprÿ hã mẽ pajarênh Karatas 5.17

¹⁴ Nê Tirtũm kapêr ã kagã htũmta Tirtũm kapêr na. Nê Tirtũm kïnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa?

¹⁵ Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Mẽmoj ixpê omnuj tã pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mẽmoj ixpê omnuj nhũm inhmã ho anhÿr prãm kêt tã ra ho anê. Nhũm mẽmoj mex nhũm inhmã ho anhÿr prãm tã ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

¹⁶ Ā ixte amnhĩ nhĩpêx anhÿr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tã pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

¹⁷ Inhmã amnhĩ tomnuj prãm kêt tã arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa. ¹⁸ Nê inhmã tãm amnhĩ nhĩpêx prãm tã no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh. ¹⁹ Inhmã mẽmoj mex kôt pix mã amnhĩ nhĩpêx prãm tã no ãm ã amnhĩ nhĩpêx anhÿr kêt nê. Nê ãm hkwÿm ri tanhmã amnhĩ tomnuj to ho ri ixpa. Mẽmoj ixpê omnuj tã pa hkôt amnhĩ nhĩpêx o ri ixpa. ²⁰ Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mẽmoj ixpê omnuj pa inhmã ho anhÿr prãm kêt tã ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. ²¹ Nê mẽmoj mex nhũm inhmã hkôt amnhĩ nhĩpêx prãm tã ra hkwÿm ri amnhĩ nhĩpêx. Ā ixte amnhĩ nhĩpêx anhÿr xwÿnh na pa. ²² Nê inhmã Tĩrtũm kapêr mar nê hkôt ri amnhĩ nhĩpêx prãm tã ²³ nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tã no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ. ²⁴ Hêxta waa nê. Na pa ixkaprĩ htÿx nê ri ixpa. Ā ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xàta wÿr ma mō. Mẽhō kot tanhmã ixkrã hto pa ã amnhĩ nhĩpêx anhÿrja kaga? ²⁵ Nà mẽ panhō Pahihti Jejus Kĩsja pix. Tãm koja ixte amnhĩ tomnuj kutã tanhmã ixto

ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. Ā ixte anhÿr xwÿnh na pa.

8

Tĩrtũm Karō kot mẽ pahto tãm mẽ pahte amnhĩ nhĩpêx xwÿnh ã harênh

Karatas 5.16-26

¹ Nê Jejus Kris kêp mẽmoj punuj kutã mẽ pahto mẽ paxihtÿx xwÿnh jakamã mẽ pahte hkôt amnhĩ xunhwÿr xwÿnhjaja na pu htem ÿ hã amnhĩ tomnuj o ri papa hkêt nê. Jao mẽ pahte kuwy hwÿr papa mã xwÿnh kêt. ² Te ra mẽ pahtyk nhũm Tĩrtũm kot akupÿm mẽ pahto mẽ pahťir pyrãk jakamã nhũm Karōja mẽ pahkarō mã agjê pu mẽ ÿ hã tãm amnhĩ nhĩpêx o ri papa. Te tãm kot amnhĩ nhĩpêx pyrãk o amnhĩ nhĩpêx nhũm Karō mẽmoj punuj piitã kutã mẽ pahto mẽ paxihtÿx. Kêp mẽ pajamaxpêr punuj kutã mẽ pahto mẽ paxihtÿx xwÿnh jakamã kot puj mẽ nhÿrmã mẽ kot amnhĩ xà htÿx kamã hamak tũm xàta wÿr papa hkêt nê.

³ Nom kormã mẽ pahte Jejus kôt amnhĩ xunhwÿr kêt ri na pu prem tee ri pamã Tĩrtũm kapêr piitã hkôt amnhĩ nhĩpêx prãm kaprÿ nhũm mẽ pahpê hihtÿx kumrêx. Jakamã tanhmã koja Tĩrtũm amnhĩ to nê amnhĩ mã mẽ pamex xwÿnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwÿr Kraja mẽ nhũm man mẽ pahwÿr wrÿ nê mẽ pahpyrà nê ĩ ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamaxpêr punuj kutã mẽ pahto paxihtÿx xwÿnh. Na pu htem hkôt amnhĩ xunhwÿ hãmri nê kukwak ri amnhĩ tomnuj o ri papa hkêt nê. ⁴ Pãnhã Tĩrtũm kot amnhĩ

nhîpêx kôt amnhî nhîpêx o ri papa nê axte mē pahte amnhî nhîpêx tûm kôt amnhî nhîpêx kêt nê. Hāmri hpānhā Tîrtûm Karō kot amnhî nhîpêx kôt pix mā amnhî nhîpêx. Nê hamaxpêr kôt pix mā pajamaxpêr. Ja kaxyw na pre Tîrtûm mē pahwÿr Kraja mē nhûm wrÿ nê mē pahpiitā mē panê ty.

⁵ Nê mē kot amnhî krā hkôt tanhmā amnhî nhîpêx to ho ri mē pa xwÿnhjaja na htem htÿx ri tanhmā hamaxpêr to xà hkôt amnhî nhîpêx o ri pa. No kêt Tîrtûm Karō kot mē pahkarō mā gjêx xwÿnhjaja na pu htem mē kurom te Jejus jamaxpêr pyrāk o pajamaxpêr o papa.

⁶ Nê mē kot amnhî krā hkôt amnhî nhîpêx xwÿnhjaja koja mē nhÿrmā ty nê ma kuwy hwÿr pa nê kamā pa ho pa. No mē pahte Tîrtûm Karō hkôt amnhî nhîpêx xwÿnhjaja kot puj mē pajamaxpêr nyw o pajamaxpêr nê amnhî nhîpêx nyw o amnhî nhîpêx. Jao paxāmnhîx ri pajamakêtkati nê ri papa. Nê nhÿrmā ty hāmri nê Tîrtûm mē Jejus wa kuri akupÿm pahtîr tûm nê pamex kumrêx nê papa ho papa.

⁷ Nê mē kot amnhî krā hkôt ri amnhî nhîpêx xwÿnhjaja kām Tîrtûm kînh kêt. Nê kām kapêr mar prām kêt jakamā tanhmā kot mē amnhî to nê hkôt amnhî nhîpêx?

⁸ Koja mēhō amnhî krā hkôt kām hprām xà hkôt pix mā amnhî nhîpêx hāmri nhûm Tîrtûm tee ri ja hā omu nê hkînh kêt nê.

⁹ No mē papajaja na pu htem mē urāk nê ā amnhî nhîpêx anhÿr kêt nê. Ra Tîrtûm Karō kot mē pahkarō mā gjêx jakamā na pu htem hkôt pix mā amnhî nhîpêx hprām. No koja Tîrtûm Karō mēhō kaxwÿnh mā àr kêt nê nhûm kêp hkra hkêt nê.

¹⁰⁻¹¹ Tā mē papajaja. Mē pahte amnhî tomnuj mÿrapê koja mē pakrāhkāja nhÿrmā ty. No nhûm Tîrtûm ra kot amnhîm mē pahte amnhî to mex xwÿnh ā mē pajarēnh nhûm Kris Karō kot mē pahkarō mā gjêx jakamā koja mē pahkarōja htyk kêt nê. Mē pakrāhkā pix koja ty nhûm mē pahkarōja ma kaxkwa hwÿr àpir kurê kumrêx. Tā nhûm nhÿrmā Tîrtûm akupÿm mē pakrāhkā ho htîr nê akupÿm mē pahkarōja mē pakrāhkām hagjê pu mē wa kuri pahtîr tûm nê papa ho papa. ¹² Jakamā e kwa ixkwÿjaja. Kêr pu mē axte ri mē pajamaxpêr tûm kôt amnhî nhîpêx o ri

papa hkêt nê. ¹³ Kot puj mē arî ā amnhî nhîpêx anhÿr o ri papa hāmri nê nhÿrmā ty nê ma mē kot amnhî xà htÿx kamā hamak tûm xàta wÿr papa. Jakamā kêr pu mē mēmo arîgro hā pamā tanhmā amnhî tomnuj to hprām hāmri nê amnhî kukamā pajamaxpêr o:

—Nà inhmā ā amnhî nhîpêx anhÿr prām tā kot paj Tîrtûm Karō nhÿ hā ja kutā amnhî to htÿx nê ho anhÿr kêt nê. Anê.

Kot puj mē ā pajamaxpêr anê hāmri nê nhÿrmā kuwy wÿr papa hkêt nê. Pānhā Tîrtûm mē Jejus wa kuri pamex nê pahtîr tûm nê ri papa ho papa. ¹⁴ Mē kot Tîrtûm Karō hkôt amnhî nhîpêx xwÿnhjaja kêp Tîrtûm kraa.

¹⁵ Nom amnepêm kormā mē pahte hkôt amnhî xunhwÿr kêt ri. Nê kormā mē pamā kapêr mar prām kêt ri nhûm kot amnhî tā mē pahpumunh nê tanhmā mē pahto pumaj na pu prem pamā uma ho ri papa. Tā hkôt amnhî xunhwÿ nhûm Karōja mē pahkarō mā gjêx jakamā na pu htem ra pamā uma hkêt nê ri papa. Karō kot mē pahpê Tîrtûm kra hā mē pajarēnh jakamā pu mē amnhî kamā kot tanhmā mē panhîpêx to puma hkêt nê ri papa. Nê paxāmnhîx pajamakêtkati nê kām amnhî jarê nê kām amnhî jarēnh o:

—Pa Inhîpêêxā maati? Ot pa ixpê akra hā amā amnhî jarēnh kaxyw amnhî kaxyw amā ijamaxpêr. Anê.

Jao ra mē pamā uma hkêt nê ri papa. ¹⁶ Karō kot mē pahkarō mā gjêx nhûm mē pahte amnhî tā omunh jakamā na pu htem pajamaxpêr o:

—Nà Tîrtûm Karō kot ixkarō mā àr jakamā ixpê hkra na pa. Anê.

Nhÿrmā mēmoj piitā akupÿm mex par ā harēnh

Sikûn Korîť 4.16-18; Korosê 3.4; Wam Pêtre 4.13

¹⁷ Nê mē kām Tîrtûm prām kêt xwÿnhjaja na htem te mē kot Tîrtûm Kra Jejus nhîpêx pyrāk o mē panhîpêx pu mē pahpunuj nê ri papa. Nom kot puj mē nhÿrmā Tîrtûm mex o mex xwÿnhja kuri pamex kumrêx nê papa. Mē pahpê hkra jakamā kot puj mē Kra Jejus pyrā nê ō krî kamā kuri pamex kumrêx nê ri papa ho papa. ¹⁸ Jar Jejus ā mē pahpunuj nê ri papa htā kot puj mē

nhÿrmã kuri pamex kumrêx nê papa ho papa. Hãmri nê mẽ pamex o pamex ã amnhĩ pumu nê jar pika ja kamã tanhmã mẽ pahpunuj toja mã axte pajamexpêr kêt kumrêx.

¹⁹ Nê pika hkôt Tirtũm kot mẽmoj ho kator xwÿnhjaja na htem Tirtũm kot mẽ pahto mex par jatur xãm mẽnh ã arĩgro jamãr rãhã ho pa. ãk nê mry nê pĩ nê gô nê mẽmoj piitã mẽ pajamãr o pa. Te kot mẽ pakukamã hamaxpêr o:

—Kwa mẽmo arĩgro hã koja Tirtũm hkrajê piitã ho amnhĩrit nê mẽ ho mex par jatur xãm kumê pu mẽ ja hã mẽ omu? Hêxta waa nê. Inhmã tokyx ja hã mẽ omunh prãm tÿx. Koja tokyx ã mẽ hipêx anê pa ixkĩnh tÿx kumrêx.

Anhÿr o hamaxpêr pyrãk. ²⁰ Mẽmo kaxyw na hte mryja ã mẽ pakukamã hamaxpêr anê? Nà amnepê mã Tirtũm kot mẽmoj piitã ho katorta ã nhũm pre piitã mex o mex. Pĩ nê mry nê gô. Mẽmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhũm ra ÿ hã mẽmoj piitã homnu par jakamã na hte mẽmoj hÿr nê pa nê gaa nê ty nê hapêx. Nê mẽ pahpur kãm ahkagrôt punuj hapôj. Atãw kot amnhĩ tomnuj mÿrapê nhũm Tirtũm kapêr xã hkôt ã mẽmoj omnu hpar anê. ²¹ Nom koja arĩ rãhã ho rãhã hkêt nê. Koja nhÿrmã Tirtũm akupÿm mẽmoj piitã ho mex pa nhũm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mẽ pahpyrà nê mex o mex. Jakamã na htem Tirtũm kot mẽ pahto mex par jatur xãm mẽnh xã hã arĩgro jamãr rãhã ho pa. ²² Te mẽhõ ni hpijagri kaxyw õhy xã htÿx nê tokyx kãm hpijagri hprãm xà ãmra ho nõr pyrãk o amnhĩ nhĩpêx pê mẽ pahto mex jatur xãm mẽnh ã arĩgrota jamãr o pa.

²³ Nê mẽ papajaja na pu htem tanhmã pahpunuj to nê jajê pyrà nê te amnhĩ kamnhêr o ri papa pyrãk. Rÿ tanhmã paxã kute nê ri papa. Rÿ pamã prãm nê paxãã nê ri papa. Nê tanhmã mẽ pahpunuj to nê ri papa. Jao te pĩ nê gô nê mryja pyrà nê amnhĩ tã Tirtũm kot mẽ pahto mex par jatur xãm mẽnh ã arĩgro jamãr rãhã ho ri papa.

Na pre Tirtũm mẽ pahwÿr Karõ rê nhũm mẽ pahkarõ mã agjê nê mẽ pakukamã Tirtũm tanhmã kot mẽ pahto mex to hã mẽ pamã ho amnhĩrit nê mẽ pamã ho amnhĩrit o:

—Koja nhÿrmã Tirtũm mẽ ato mex par jatur xãm kumê nê mẽ piitã mẽ kãm mẽ apê hkra hã mẽ ato amnhĩrit. Hãmri nê mẽ amã mẽ anhi nyw gô ka mẽ axte axã nê ri apa nê atyk kêt nê. Hãmri nê Tirtũm ri amex kumrêx nê ri apa ho apa. Nà kot kaj mẽ nhÿrmã ã amnhĩ nhĩpêx anê. Anê.

Ã Tirtũm Karõ kot mẽ pakukamã mẽ pajarênh anhÿr jakamã na pu htem amnhĩ tã kot mẽ pahto mex jatur xãm mẽnh pix jamãr o ri papa. ²⁴ Nom na kormã ã mẽ pahto mex anhÿr kêt nê. Kormã mẽ pamã mẽ panhi nyw nhõr kêt nê. Nom ra kot mẽ pahto hkra jakamã pu mẽ ja hã amnhĩ pumu nê pajamaxpêr o:

—Nà ra Tirtũm kot ixto hkra jakamã koja nhÿrmã mããnên inhmã inhi nyw gô. Nà koja inhmã kugõ.

²⁵ Anhÿr o pajamaxpêr tã kormã. Na pu htem kormã amnhĩ tã hamãr rãhã ho ri papa nê aa hkaga hkêt nê papa.

Mẽ pahte Tirtũm Karõ nhÿ hã Tirtũm mã amnhĩ jarênh

²⁶ Nê na pu htem Tirtũm mã amnhĩ jarênh kaxyw nhũm hte Karõja mẽ pahto ajuta pu mẽ ÿ hã pakatãt kôt kãm tanhmã amnhĩ jarênh to. No kot puj mẽ amnhĩ krã hkôt kãm amnhĩ jarênh mex kêt nê. Na pu htem ja kaxyw tee ri amnhĩ kukamã pajamaxpêr o:

—Kwa tanhmã kot pa Tirtũm mã amnhĩ jarênh to? Tanhmã kot pa mẽmoj tã ixãhwÿr to rÿ amnhĩ to hwÿr to? Nà kot paj amnhĩ krã hkôt ja ho anhÿr mex kêt nê. Hêxta waa nê. Anê.

No nhũm Tirtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ÿ hã kãm amnhĩ jarênh mex nê pakatãt kôt mẽmoj tã kuwÿ. Te Karõja tanhmã mẽ pakute hã mẽ pahpumunh nê mẽ pakamã ukaprĩ xà tãm mẽ pahto hwÿr pyrãk.

²⁷ Jakamã pu mẽ ÿ hã tanhmã Tirtũm mã amnhĩ jarênh to nhũm mẽ pamar kurê kumrêx. Ra kot mẽ pajamaxpêr kôt mẽ pahpumunh par kênã. Nhũm ra Karõ kot

mê pahkarô mâ gjêx jakamâ na pu htem kâm hprâm xà hkôt kâm amnhî jarê nê tanhmâ amnhî to paxàhwÿr to.

Tîrtûm kot mê pamâ mêmôj piitâ ho mex â harênh

Rômân 8.37; Piripos 1.12; Wam Pêtre 5.10

²⁸ Nê mê pamâ Tîrtûm kînh xwÿnhjaja. Tîrtûm kot mê pahto hkra xwÿnhjaja. Koja mêmôj mê pakamâ tanhmâ amnhî to htâ kêr pu mê âm ja hâ amnhî pumu nê tee ri amnhî kukamâ pajamxpêr kêt nê. Koja te mê pahpê omnuj pyrâk tâ koja nhÿrmâ hpânâ mê pamâ mex nê. Koja Tîrtûm nhÿrmâ tanhmâ mê pamâ mêmôjta o mex to. ²⁹ Amnepê mâ mêmôj piitâ hkêt ri na pre Tîrtûm mê pakukamâ tanhmâ mê pajarênh to nê mê pajarênh o:

—E kot paj nhÿrmâ mê kot Ixkra Jejus kôt amnhî xunhwÿr xwÿnhjê ho ixkra jakamâ nhÿm mê Jejus pyrâ nê kêp ixkraa. Nê urâk nê ixkapêr kôt amnhî nhîpêx o pa. Jao pa ra ixkra xohtô nê. Nà ja na inhmâ hprâm. Anê.

³⁰ Tâ pu htem pajapôj nê ri papa. Hâmri nê kapêr ma nê amnhî kaxyw Kra Jejus kôt pajamxpêr nê hkôt amnhî xunhwÿ. Hâmri nhÿm Tîrtûm ja hâ mê pahpumu nê pahto hkra nê amnhîm mê pamex xwÿnh â mê pajarê nê mê pahto mex nê. Nê te ho Kra Jejus nhîpêx pyrâk o mê panhîpêx. Jao nhÿrmâ wa kuri mê pahpêr tûm nê papa ho papa mâ xwÿnh â mê pajarê.

Mêhō kot Tîrtûm pê aa mê papytâr kêt â harênh

Rômân 5.1

³¹ Tâ â Tîrtûm kâm mê pajapê nê mê pahto mex kot anhÿr. Â kot mê panhîpêx mex anhÿr jakamâ ra mê pahkôt pa ho pa râhââ. Jakamâ mêhō koja îhkra pê mê pahpytâ? Nê mêhō koja tanhmâ ri kêp mê pahto? Nà koja kêp mê papytâr rÿ tanhmâ kêp mê pahto hkêt nê. ³² Tîrtûm kâm Kra Jejus japê htÿx tâ na pre mê pahpê nê hkêt nê mê pahwÿr kumê. Te kot mê pamâ ôr pyrâk o hipêx nhÿm mê pahwÿr wrÿ nê mê panê ty. Tâ ra Tîrtûm kot mê pamâ ôr jakamâ koja mâânên kâm mê pahte Kra hkôt amnhî xunhwÿr xwÿnhjê japê nê mê pahto mex râhâ ho ri pa. Nà koja â mê pahto mex anê.

³³ Jakamâ mêhō koja kâm mê pahte amnhî tomnuj xwÿnh â mê pajarê? Ra tãm kot mê pahto hkra nê mê pahte amnhî to mex xwÿnh â mê pajarênh kênâ kot kêt mêhō kâm tanhmâ mê pahto kapêr punuj to nhÿm mê kuma. Koja mê tee ri kâm tanhmâ mê pahto kapêr to kaprÿ. ³⁴ Na pre ra Jejus Kris mê pahte amnhî tomnuj pânâ amnhîrer kaxyw mê panê ty nhÿm Tîrtûm akupÿm ho htÿr. Hâmri nhÿm ma akupÿm kaxkwa hwÿr api nê Pahi Maati krî xà kamâ Tîrtûm nhîhkô hâ hkrî ho hkrî. Nê Tîrtûm mâ mê pakutâ nojarêt râhâ ho kuri hkrî ho hkrî. Jakamâ mêhō koja kêp mê kot amnhî xà htÿx kamâ hamak tûm xàta wÿr mê pajano? Nà amrakati kumrêx.

³⁵ Nê Krisja kaxkwa kamâ Tîrtûm nhîhkô hâ hkrî ho hkrî htâ mâânên jar mê pahkôt pa ho pa. Kâm mê pajapê htÿx jakamâ kot puj mê tanhmâ pahpunuj to htâ nhÿm arî kâm mê pajapê nê mê pahkôt pa ho pa.

Rÿ nhÿm mê kot hkôt amnhî xunhwÿr kêt xwÿnhjaja tanhmâ hâ mê pahto htâ nhÿm arî kâm mê pajapê kamâ mê pahkôt pa ho pa.

Rÿ mê pamâ prâm nê ri papa. Rÿ mê paxê hkêt nê pamâ kry nê ri papa htâ nhÿm arî kâm mê pajapê kamâ mê pahkôt pa ho pa.

Rÿ ra mê kot hâ mê panhîmex kaxyw rÿ hâ mê pahpar kumrêx. Tâ nhÿm arî kâm mê pajapê kamâ mê pahkôt pa ho pa râhâ nê.

Kâm mê pajapê kamâ mê pahkôt pa ho pa râhâ jakamâ pu mê tee ri amnhî kukamâ pajamxpêr kêt nê. Âm hkôt paxâmnhîx ri pajamakêtkati nê ri papa ho papa. ³⁶ Tîrtûm kapêr â kagà htÿm te mê papajaja mê pahte kâm tanhmâ amnhî jarênh to pyrâ nê mê pajarênh kot:

Pa Tîrtûm. Na htem atâ mê ixtomnuj tÿx o pa.

Nê ra mê kot mê inhîmex kaxyw.

Nê mê inhîpêx o te mê kot ôwêhti ho môr nê hpar kaxyw tanhmâ hipêx to pyrâk.

Jakamâ na pa mê ra ixtyk kaxyw.

Anhÿr o kot mê pajarênh. ³⁷ Tâ kwâr mê â mê panhîpêx anê. Arî Kris kâm mê pajapê kamâ mê pahkôt pa ho pa râhâ jakamâ mê kot tanhmâ mê pahto htâ pu mê arî

amnhī kaxyw kām pajamaxpēr tỳx rāhā ho ri papa. Nhūm arī mẽ kutā mẽ pahto paxihtỳx pu mẽ arī mẽ kām pakuhê.

³⁸ Měmoj koja tanhmā mẽ pahto nhūm Tirtūm tee ri ja hā mẽ pahpumu nē kām mẽ pajapê hkêt nē? Nà amrakati kumrēx. Koja mēhō rỳ mẽmoj mẽ pahpê àmnàr kêt nē. Na hte jar pika ja kamā Kris kām mẽ pajapê kamā mẽ pahkôt pa ho pa. Nē kot puj mẽ nhỹrmā ty nhūm arī kām mẽ pajapê kamā mẽ pahkôt pa ho pa rāhā nē. Jakamā koja mẽkarō rỳ mẽkarōmnuti rỳ jar pika ja kamā mẽ kām Tirtūm prām kêt xwỳnhjaja mẽ pahpê àmnàr kêt nē. Rỳ mẽmoj tanhmā kute. Rỳ kormā hapu hā mẽmoj tanhmā kute. Koja mẽmoj piitā tee ri tanhmā kệp mẽ pahto htā nhūm Kris arī kām mẽ pajapê kamā mẽ pahkôt pa ho pa rāhā nē nhūm mẽmoj tee ri mẽ pahpê àmnàr kaprỳ. ³⁹ Nē koja kỳj rùm mẽmoj wrỳ nē tanhmā kệp mẽ pahto japêr. Rỳ pyka rùm mẽmoj kato nē tanhmā kệp mẽ pahto japêr. Rỳ kuwy rỳ kôk xàpêr tỳx tanhmā kệp mẽ pahto. Tā nhūm mẽ panhō Pahihti Jejus Kris arī kām mẽ pajapê kamā mẽ pahkôt pa ho pa rāhā nē. Te Tirtūm kām mẽ pajapê pyrāk o kām mẽ pajapê htỳx kām mẽ pahkôt pa ho pa rāhā jakamā nhūm mẽmoj tee ri mẽ pahpê àmnàr kaprỳ.

9

Ijaew jarēnh

Atre 3.25; Rōmān 3.1-2

¹⁻² Nē na pa tee ri ixkwỳ Ijaew kot tanhmā amnhī nhĩpêx to ho pa hā mẽ omu nē ixkaprĩ nē. Ixpyrà nē mẽ kệp Ijaew tā ixkĩnhā amnhī kaxyw Kris kôt hamaxpēr kêt jakamā nhūm Kris tee ri kām mẽ hamakêtkati nē àmnhĩx ri mẽ pa hprām kaprỳ. Pa tee ri mẽ hkukamā ijamaxpēr nē ixkaprĩ nē ri ixpa. Nē aa ixkaprĩ ixpê kator kêt kumrēx. Mě kot inhmā mẽ hkĩnh kêt ã amnhī tā ijarēnh tā inhmā mẽ hkĩnh kēnā. ãm hāmri na pa ã amnhī jarēnh anē. Tirtūm Karō kot ja hā ixpumunh mex nē inhmā:

—Nà ãm hāmri na ka amā mẽ hkĩnh ã amnhī jarē. Anē.

³ Mě kệp ixkwỳ na mẽ. Mě ixpàr kraxja ãm pixi mex. Tā nhūm mẽ ixkĩnhā amnhī kaxyw Kris kôt hamaxpēr kêt jakamā

kop ãm Tirtūm kot mẽ nē kuwy hwỳr pa inhmēnh ronhỹx ja inhmā mex. Nhỹx pa kām:

—Kwa Tirtūm. Amnhī nē kuwy hwỳr ixkwỳjê rēnh kêt nē. Inhmā mẽ hapê htỳx kumrēx. Mě hpānhā pa mǎn mẽ nē hwỳr inhmē nà.

Anhỹr o nhỹx pa kām ixkapêr. Nom kot paj amnhī to ã ixàhwỳr anhỹr kaprỳ. Tirtūm kot mẽ kamā ukaprĩ htā no nhūm mẽ amnhī kaxyw Kris mǎ hamaxpēr kêt jakamā tanhmā koja amnhī to nē mẽ hpānhā pa mẽ nē kuwy wỳr inhmē nhūm mẽ ixrom kuri htĩr tūm nē pa ho pa? Mě kot hkôt amnhī xunhwỳȳre hā. ⁴ Mě ixpê Ijaew nhĩgêtjaja na pre Tirtūm amnepê mǎ mẽ ho mex rax nē. Nē kām mẽ ho hkra hprām nē. Nhūm prem tanhmā kot amnhī nhĩpêx mex to hā no ho omunh o pa. Nē hirā htỳx kām ri pa hā omu nhūm mẽ kām:

—E kot kaj mẽ ixkapêr ma nē ixkôt amnhī nhĩpêx o ri apa. Hā kot paj mẽ akôt ixpa ho ixpa nē mẽ ato mex nē ka mẽ axpên kanrēhā axàmnàr rax nē. Hāmri pa mẽ amā pika mex gō ka mẽ kamā ajamakêtkati nē axàmnhĩx ri apa ho apa.

Anhỹr o mẽ kām kapêr. Hāmri nē mẽ kaxyw Mojes mǎ tanhmā kapêr to nē mẽ kaxyw kām mẽmoj piitā hā karō. Mě kot tanhmā amnhī tomnuj to hāmri nē tee ri ja hā amnhī pumunh nē tanhmā amnhī to Tirtūm wỳr to nhūm kot mẽ mar nē mẽ nē ja ho hapêx par kaxyw. Finat Mojes kot amnhī xô ri mẽ kām ujarēnh nhūm mẽ kot mar nē hkôt amnhī nhĩpêx mex o ri pa kaxyw. ⁵ Mě ixkukamā mẽ ixpāmjaja. Apraāw nē Ijak nē Jako kanrēhā mẽ hkra nē mẽ htàmnhwỳjaja na pre mẽ. Mě hwỳr na pre Tirtūmjaja Kra Jejus Kris mẽ nhūm mẽ hwỳr wrỳ nē mẽ kamā ì ho ì ho kator jakamā haxwỳja kệp Ijaew na pre. Kệp Měpahpām nē mex o mex nē hihtỳx o hihtỳx tā Ijaew wỳr wrỳ nē mẽ kamā kato. Hāmri nhūm Ijaew kêt xwỳnhjaja harēnh ma nē tee ri hamaxpēr nē hamaxpēr o:

—Hêxta waa nē. Kệp ãm Jejus mẽ papa kamā mǎn kator ronhỹx mẽ pamā mex kumrēx. Anē.

⁶ No nhūm kormā Ijaew hwỳr wrỳk kêt ri nhūm Tirtūm ra kot mẽ ho hkra kaxyw mẽ hā amnhī jarē nhūm mẽ hkwỳja kām ja

prâm kêt nê hkaga. Tã xà na pre Tirtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwýjaja hkwýjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwýjaja kot hkaga jakamã nhũm ãm mẽ hkwýjê pix o hkra.

⁷Nê finat Apraãwja na pre hkanrêhã hkra nê htãmnhwý xohtô nê. Tã xà na pre Tirtũm htãmnhwý piitã mẽ ho hkra hã amnhĩ jarê? Nà mẽ piitã ã mẽ harênh anhýr kêt nê. ãm mẽ hkwýjê pix na pre mẽ ho hkra hã mẽ harê. Apraãw kra Ijak kôt hkanrêhã htãmnhwý pixjaja nhũm kot mẽ ho hkra hã mẽ harê.

⁸⁻⁹Nê Apraãw kormã hprô kamã hkra hkêt ri na pre kãm àpênh xwýnh kamã hkra nhũm kato nê myre nê hixi pê Ismael. Nom kêp Apraãw prô kumrêx kamã hkra hkêt. Prô kuprý kamã hkra na pre. Tã nhũm Tirtũm kãm hkra kumrêx kukamã harê nê kãm:

—E kot paj ma tê hãmri nê mẽmo arĩgro hã akupýn awýr tê nhũm ra aprô hpijagri nhũm war akra myre. Anê.

Tã nhũm hprô Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prô kamã hkra jakamã Tirtũm nom kêp Apraãw kra kumrêx. Jakamã hkra Ijak kanrêhã htãmnhwýjaja na pre Tirtũm kot mẽ ho hkra hã mẽ harê. Ra kot Apraãw mã ja hã amnhĩ jarênh xà hkôt.

¹⁰Tã nhũm Ijakja hprêk nê Repek o hprô. Nê gaa nê ra haxwýja wa hkra nhũm hkraja wa ahpo nê kato nê wa hamê my. Kot wa pê Ejau nhũm kot hapu pê Jako. ¹¹⁻¹²Nom nhũm kormã wa kator kêt ri nhũm Tirtũm wa hkukamã tanhmã wa harênh to. àhpumunh xà hkôt wa katorxã mã wa harê nê kãm:

—E kot paj amã war akra wa hkukamã tanhmã wa harênh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anê.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harênh anê. Kãm wa kot tanhmã amnhĩ nhĩpêx to hprãm xà hkôt ã wa harênh anê. Kormã wa kot tanhmã amnhĩ tomnuj to rý

tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harênh anê. ¹³Tirtũm kapêr ã kagà htũm kot wa harênh nê wa hã kagà kot:

Ejau rom Jako kanrêhã hkra nê htãmnhwý pixjaja na pre Tirtũm amnhĩm mẽ ho hkra. Anê.

¹⁴Mãn ka mẽ Tirtũm kot ã wa harênh anhýrja ma nê ajamexpêr o:

—Tk. Kwa ja mexti hã. Mo na pre hamê wa hkanrêhã wa hkra nê wa htãmnhwý piitã ho hkra hkêt nê? Anê.

Kwa mẽ ã ajamexpêr anhýr kêt nê. Tirtũm na hte kãm hprãm xà hkôt tanhmã mẽ panhĩpêx to ho pa pu mẽ kot tanhmã mẽ panhĩpêx to hã omu nê ãm omu nê amnhĩ tã tanhmã kãm nê hkêt nê. ¹⁵Na pre finat Mojes mã amnhĩ jarênh o:

Inhmã hprãm xà hkôt na pa hte mẽ omu nê tanhmã mẽ kamã ixukaprĩ hto ho ri ixpa.

Nê inhmã hprãm xà hkôt na pa hte ahpýnhã tanhmã mẽ hipêx to ho ri ixpa.

Anhýr o kãm amnhĩ jarê. ¹⁶Nom tanhmã mẽ pahte amnhĩ nhĩpêx to hã mẽ pahpumunh kôt na hte mẽ pakamã ukaprĩ hkêt nê. ãm tãm kãm hprãm xà hkôt na hte tanhmã mẽ pakamã ukaprĩ hto ho pa. ¹⁷Amnepê mã Ejit kãm mẽ õ pahihtĩ Paraohti hwýr na pre Mojes mẽ nhũm ma hwýr mō nê kãm tanhmã Tirtũm kapêr jarênh to nê kãm:

—E Tirtũm na awýr inhmê pa mō. Tãm na pre apê Ejit nhõ xwýnhjê nhõ pahi kaxyw axãm. Akrã hihtýx tã nhũm mẽ kaxyw axãm. Tã ra xatã àhpumunh týx o tanhmã anhĩpêx to. Krĩ piitã hkôt ri mẽ pa xwýnhjaja kot atã harênh mar nê àhpumunh o àhpumunh ã omunh kaxyw. Tã ixte amã ja jarênh kaxyw na pre awýr inhmê pa man awýr mō. Anê.

¹⁸Ã na hte Tirtũm kãm hprãm xà hkôt tanhmã mẽ panhĩpêx anhýr to ho pa. Jao mẽ hkwýjê kamã ukaprĩ ho pa. No mẽ hkwýjaja nhũm tee ri mẽ hkrã hihtýx ã mẽ omu nê ãm mẽ omu nhũm mẽ amnhĩ krã hkôt ri tanhmã amnhĩ tomnuj to ho ri pa.

Tirtũm kêp mẽ pakamã ukaprĩ xwýnh ã harênh

19 Nē kot kaj mẽ atō Tīrtūm kot ā mẽ hipêx anhÿrja ā harēnh ma nē tanhmā hā ixkukjêr to nē inhmā:

—Kwa na xep hte Tīrtūm ahpÿnhā tanhmā mẽ hipêx to. Nē mẽ hkwÿjê kamā ukaprī ho pa nē mẽ hkwÿjaja mẽ hkrā hihtÿx ā mẽ omu nē ãm mẽ omu nē mẽ kamā ukaprī hkêr nē. Jakamā kwa mo na hte mẽ kot amnhī tomnuj xwÿnh ā mẽ harē? Tām kot ā mẽ hipêx anhÿr kēnā kot kêt mẽ kot amnhī tomnuj xwÿnh ā mẽ harē.

Anhÿr o ajamaxpêr japêr. 20 Kwa mẽ ri ā atÿx Tīrtūm jarēnh anhÿr kêt nē. E pa mẽ amā ejêp jarē ka mẽ inhma. Xà kot mēhō gyw kwÿ ho amnhīm poti nhîpêx nhūm tee ri amnhī tā omu nē amnhī tā tanhmā kām kapêr to nē kām: “Tk. Kwa mon ka ri ā inhîpêx anē?” Anhÿr o amnhī tā kām kapêr? Nà koja kām tanhmā nē hkêr nē.

21 Hipêx xwÿnh kām hprām xà hkôt kot ā hipêx anhÿr kēnā kot kêt amnhī tā kām akir. Koja amnhīm gyw kwÿ kakwÿ nē ho poti ho axkrut nē hipêx. Nē hō ho muxre. Ho mex kumrêx nhūm xa. Nhūm ihōja mã ho anē nē hipêx no ãm wamta kīnhā ho hanhàjti nhūm omnajti nē xa. No ãm tām kot hamē wa hipêx prām xà hkôt wa hipêx kēnā.

22 Tā na hte ā Tīrtūm mẽ panhîpêx anē. Te poti pynajre pyrā nē mẽ pahkwÿjê nhîpêx nhūm mẽ kām kapêr mar prām kêt nē htÿx ri tanhmā amnhī tomnuj to ho ri pa. Hāmri nhūm amnhī tā mẽ omu nē te amnhī nē mẽ rēnh kaxyw pyrāk o mẽ hipêx no ãm kormā hamaxpêr o:

—Nà kot paj nhÿrmā mẽ kot amnhī tomnuj mÿrapê mẽ ho ijapêx pa nhūm mẽ piitā ja hā ixpumu nē inhmā ixàhpumunh o ixàhpumunh ā ijarē. Nē inhmā mẽmoj punuj piitā hkīnh kêt kumrêx ā axpēn mã ijarē. Anē.

23 Nom na hte jajê rom mẽ pahkwÿjê nhîpêx o te poti mexta nhîpêx pyrā nē amnhī kaxyw mẽ paxunhwÿ nē mẽ pahto hkra kaxyw. Nē mẽ pajarēnh o:

—Nà koja mẽ amnhī kaxyw Ixkra Jejus mã hamaxpêr nē hkôt amnhī xunhwÿ pa ja hā mẽ omu nē mẽ kamā ixukaprī ho ri ixpa. Nē mẽ ho mex pē mẽ kutā inhnojarêt rāhā ho ri ixpa. Hāmri nhūm mẽ nhÿrmā Ixkra mẽ wa ixri htīr tūm nē mex nē pa

ho pa. Kot paj ā mẽ ho mex anē nhūm mẽ amnhī tā ixpumu nē inhmā inhmex o inhmex ā ijarēnh o pa. Anē.

Ā na hte Tīrtūm ahpÿnhā mẽ pahpiitā mẽ panhîpêx anē.

24 Nē na hte mẽ ixpê Ijaew pix o hkra hkêr nē. Na hte määnēn mẽ apê Ijaew kêt xwÿnhjê ho hkra. 25 Amnepê mã mẽ kām kapêr jarēnh o ri mẽ pa xwÿnhjê hō pē finat Ojejja na pre te Tīrtūm tām kot Ijaew kêt xwÿnhjê jarēnh pyrā nē mẽ harēnh o:

Amnepê na pa pre mẽ ho ixkra hkêr tā kot paj mẽ hkwÿjê ho ixkra.

Na pa pre mẽ kamā ixukaprī hkêr tā pa ra inhmā mẽ hapê nē.

26 Nē ixte mẽ kêp ixkra hkêr ā mẽ harēnh tā kot paj ra mẽ kêp ixkra hā mẽ harē.

Ixpê mẽō Tīrtūm kot paj ā mẽ harēnh anē. Anē.

27 Hāmri nhūm finat Ijais Ojej pānhā tanhmā Ijaew jarēnh to. Ijaisja Tīrtūm nhÿ hā kapêr jarēnh o ri pa xwÿnhjê hō na pre. Jakamā nhūm Tīrtūm kām tanhmā mẽ ijarēnh to nhūm kuma nē ô ri mẽ ixkukamā mẽ inhîgêxjê mã ujarēnh o pa nē hā kagā. Nē hā kagā ho:

Ijaew na mẽ ohtō rax kumrêx.

Te gō xujanār mÿri pykahti grā hkryre xotō pyrāk.

Tā koja mẽ piitā ixkôt amnhī xunhwÿr kêt nē.

Koja mẽ ãm grêre nē amnhī kaxyw inhmā hamaxpêr nē ixkôt amnhī xunhwÿ.

Jakamā mẽ tapxipixjaja koja hkwÿjê rom nhÿrmā inhō krī hwÿr api.

28 No mẽ kot amnhī kaxyw inhmā mẽ hamaxpêr kêt xwÿnhjaja kot paj tokyx tanhmā mẽ harēnh to.

Mē kot amnhī tomnuj mÿrapê tanhmā mẽ harēnh to nhūm mẽ ma mẽ kot amnhī xà htÿx kamā hamak tūm xàta wÿr ma pa.

Nà kot paj tokyx ā mẽ hipêx anē.

Anhÿr o mẽ harē. 29 Nom nhūm kormā ā mẽ harēnh anhÿr kêt ri nhūm ra wam tanhmā mẽ harēnh to nē mẽ harēnh o:

Amnepê Sotō mẽ Komo kamā mẽ pa xwÿnhjaja na prem amnhī tomnuj tÿx rāhā ho ri pa.

Mÿrapê nhūm Tīrtūm xàhpumunh o àhpumunh xwÿnhja tee ri ja hā mẽ

omu hāmri nē kaxkwa rūm mē ò krī
wa hipy mēmoj pōôta rē.

Nhūm mē hā rôrôk nē mē ho hkaxàr pa
nhūm mē hapêx.

Tā na pu htem mē uràk nē amnhī tomnuj o
ri papa.

Jakamā kop ām Tirtūm kot mē pahkwỳjê
kamā ukaprī kêt ronhỹx pu mē ra
mē uràk nē pahpiitā pajapêx pa.
Anē.

*Ijaew kwỳ kot Jejus kôt amnhī xunhwỳr
kêt ã mē harēnh*
Rômân 10.1-4

³⁰ Nē Ijaew kêt xwỳnhjaja na prem Ijaew
pyrà nē kām Tirtūm prām kêt tā Jejus
jarēnh ma nē Ijaew rom amnhī kaxyw hkôt
hamaxpēr nē hkôt amnhī xunhwỳ. Hāmri
nhūm Tirtūm ja hā mē omu nē mē ho hkra
nē mē kot amnhī to mex xwỳnhjê hā mē
harē. ³¹⁻³² Hāmri nhūm Ijaew tee ri mē kot
Jejus kôt amnhī xunhwỳr ã mē omu nhūm
ja mē kām mex kêt nē. Hāmri nhūm mē
hamaxpēr o:

—Tk. Kwa ra mē ixte finat Mojes kapēr
kôt amnhī nhīpêx mex o ri mē ixpa xwỳnh
jakamā koja Tirtūm ja hā mē ixpumu nē mē
ixte amnhī to mex xwỳnhjê hā mē ijarē nē
mē inhnē mē ixte amnhī tomnuj rēnh pa.
No kot paj mē Ijaew kêt xwỳnhjê pyrà nē
Jejus kôt amnhī xunhwỳr kêt nē. Ām kwarī
ho kwarī.

Anhỹr ã amnhī jarē. No ãm ã mē
hamaxpēr anhỹrja mex kêt. Na prem htỳx
Tirtūm noo mã kot amnhī to mex ã amnhī
jarēnh kaprỳ nē arī ri tanhmã amnhī tom-
nuj to ho ri pa. Te pry kamã kēn nōr nhūm
mē kot nhām nē mēnh kaxyw hkamnār nē
ho amnhī par krã hi kukēnh pyràk o na
htem amnhī nhīpêx. Jao amnhī krã hkôt
tanhmã amnhī nhīpêx to ho pa hprām xà te
Jejus kapērja nhām amnhī nē rēnh pyràk o
hipêx. Jakamã koja mē Tirtūm nhō krī hwỳr
àpir kêt nē. ³³ Tirtūm kapēr ã kagà htūm kot
ja jarēnh kot:

E mē inhma. Kot paj nhỹrmã Ijaewjê hwỳr
mēhō mē nhūm mē hkôt kapēr o pa.

Nom koja mē kapēr mar kêt nē. Koja mē
kuma nē ãm kuma.

Te pry kamã kēn nōr nhūm mē kot nhām
pry nē mēnh kaxyw hkamnār nē ho

amnhī par krã hi kukēnh pyràk o
koja mē amnhī nhīpêx.

No te mē kot nhām pry nē mēnh kaxyw
hkamnār kêt pyràk xwỳnhjaja koja
mē kurom nhỹrmã ma Tirtūm nhō
krī hwỳr api.

Hāmri nē hkīnh nē pa ho pa. Anē.

Nom kēn kumrêx jarēnh kêt nē. Na prem
Jejus ã kuxi nē ã harēnh anē. Ijaew te
mē kot kēn nhīpêx pyràk o Jejus nhīpêx nē
amnhī kaxyw hkôt hamaxpēr kêt nē axtem
nē hkaga nē ãm kamã gryk pix o ri pata ã
nhūm mē harē. No mē kot amnhī kaxyw
hkôt hamaxpēr ronhỹx Jejus te kēn kot mē
kêp àmnār pyràk kêt nē. Jakamã ã mē
harēnh kot anhỹr.

10

¹ Hêxta waa nē. Ijaxwỳja ixpê Ijaew.
Mē kêp ixkwỳ jakamã kêp apu mē kot
amnhī kaxyw Jejus mã hamaxpēr nē hkôt
amnhī xunhwỳr ronhỹx pa ixkīnh tỳx
kumrêx. Inhmã mē kêp Tirtūm kra hprām
tỳx kumrêx kēnã. Inhmã ja prām xà na pa
hte mē ho Tirtūm wỳr rãhã ho ri ixpa. ² Ra
ixte mē omunh mex. Mē kām Tirtūm mã
tanhmã amnhī nhīpêx to hprām tā no ãm
mē kot hprī hā kapēr mar kêt. Jakamã na
htem tee ri tanhmã kām amnhī nhīpêx to
ho ri pa hprām kaprỳ. ³ Nhūm pre Tirtūm
tee ri amnhī tā mē omu nē hamaxpēr o:

—Koja mēhō amnhī kaxyw Ixkra Kris kôt
hamaxpēr nē hkôt amnhī xãm pa ja hā omu
nē kot amnhī to mex xwỳnh ã harē nē ho
ixkra kurê kumrêx. Nom na hte Ijaew ohtô
nē ã amnhī nhīpêx anhỹr kêt nē.

Anhỹr o mē harē. Ām hāmri na ã
mē harēnh anē. Na htem ãm axtem nē
hamaxpēr o:

—Tk. Kot paj amnhī kaxyw Kris kôt
ijamaxpēr nē hkôt amnhī xãm kêt nē. Kot
paj ãm pam amnhī krã hkôt tãm ri amnhī
nhīpêx o ri ixpa. Mē ixpê Ijaewjê mē ixte
amnhī nhīpêx xà hkôt. Hāmri nhūm Tirtūm
ja hā ixpumu nē amnhīm inhmex ã ijarē.
Nom kot paj Kris kôt amnhī xãm kêt nē. Ām
kwarī ho kwarī.

Anhỹr ã amnhī jarē. ⁴ Nom na htem ãm
htỳx ri amnhī krã hkôt amnhī to mex o pa
hā amnhī kamnhix kaprỳ. Koja mē tee ri
kām finat Mojes kapēr kôt amnhī nhīpêx o

ri pa hprâm kaprÿ. Jejus tapxipix na pre tãm amnhĩ nhĩpêx mex rãhã ho pa. Na pre Tĩrtũm kapêr kôt amnhĩ nhĩpêx mex o ri pa nê aa kapêr ô nhĩrôp ãm nê hkwÿm ri tanhmã amnhĩ tomnuj to hkêt nê. Kot amnhĩ tomnuj kêt xwÿnh ã ãm pixi mex na. Jakamã tapxipix kukwak ri na hte Tĩrtũm amnhĩm mẽ pahte amnhĩ to mex xwÿnh ã mẽ pajarê.

Tĩrtũm kãm mẽ pahpiitã mẽ pahto hkra hprãm ã harênh

⁵ Nê amnepêm na pre finat Mojes Tĩrtũm nhÿ hã Ijaew mã tanhmã ujarênh to nê hã kagã. Nê mẽ kãm ujarênh o:

—E kot kaj mẽ atô Tĩrtũm nhÿ hã ixu-jarênh ma nê hkôt amnhĩ nhĩpêx mex o ri apa nê hkwÿm ri tanhmã amnhĩ nhĩpêx to hkêt nê. Hã koja Tĩrtũm hã apumu nê amnhĩm ate amnhĩ to mex xwÿnh ã ajarê ka nhÿrmã kuri atĩr tũm nê amex nê apa ho apa. Anê.

⁶ ã mẽ kãm kapêr anhÿr tã mẽ pahte Mojes kapêr xã hkôt amnhĩ nhĩpêx o papaja na mẽ pahpê hihtÿx kumrêx. Tĩrtũm kapêr tũm na. Kapêr ã kagã kamã kot mẽ pamã mẽ pahte tanhmã amnhĩ nhĩpêx to hã karôja ohtô rax kumrêx jakamã pu mẽ tee ri pamã piitã hkôt amnhĩ nhĩpêx prãm kaprÿ. Nhũm Tĩrtũm tee ri amnhĩ tã mẽ pajamã hãmri nê mẽ pahwÿr Kra Jejus mẽ. Jakamã na pu htem amnhĩ kaxyw hkôt pajamaxpêr nê hkôt amnhĩ xunhwÿ nhũm Tĩrtũm hã mẽ pahpumu nê kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhũm mẽ kot hpĩr nhũm akupÿm ho htĩr jakamã na pu htem harênhja ma nê pajamaxpêr o:

—Nà na xep pre Jejus ixto ixpê Tĩrtũm kra. Anê.

Nom xã na hte Tĩrtũmja ã mẽ pamã kapêr anê nê mẽ pamã:

—E kot kaj mẽ ma kaxkwa hwÿr api nê Kris japrô nê man amnhĩ kôt akupÿn o wrÿ pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot puj mẽ amnhĩ to nê ã amnhĩ nhĩpêx anê? ⁷ Rÿ xã na hte ã mẽ pamã kapêr anê nê mẽ pamã:

—E na pre Krisja ty. Jakamã mẽ kam nê ma hwÿr mra nê akupÿm amnhĩm ho htĩr. Hãmri pa ja hã mẽ apumu nê mẽ ato ixkra.

Anhÿr o mẽ pamã kapêr? Nà na hte ã mẽ pamã kapêr anhÿr kêt nê. Tanhmã kot pu mẽ amnhĩ to nê akupÿm ho htĩr? Ja pyrã nê na hte Tĩrtũm mẽ pamã mẽmoj tã karô pu mẽ kãm ho anhÿr nhũm ja hã mẽ pahpumunh kôt mẽ pahto hkra hkêt nê. ⁸ ãm mẽ pahte amnhĩ kaxyw Jejus kôt pajamaxpêr nê hkôt amnhĩ xunhwÿr ã mẽ pahpumunh kôt pix mã na hte mẽ pahto hkra. Hãmri nê mẽ pahwÿr Karô rê nhũm mẽ pahkarô mã gjêx jakamã mẽ pahte Tĩrtũm kãm hprãm xã hkôt amnhĩ nhĩpêx o papaja na mẽ pahpê hihtÿx kêt. Te kapêr ra mẽ pahkrã hi kaxwÿnh kãm hikwÿ pyrãk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa nê mẽ kãm:

⁹ —Kot ka mẽ atô Jejus kêp anhô Pahihti hã harê nê Tĩrtũm kot akupÿm ho htĩr kôt ajamaxpêr. Hã koja Tĩrtũm ja hã apumu nê anê ate amnhĩ tomnuj o hapêx nê ato hkra. ãm ja pix ã mẽ pahpumunh kôt na hte mẽ pahto hkra. Anê.

¹⁰ Nê na pu htem mẽ pahkrãhi kaxwÿnh kãm amnhĩ kaxyw Jejus mã pajamaxpêr. Nê mẽ pajakwa ho kêp mẽ panhõ Pahihti hã harê. Hãmri nhũm Tĩrtũm ja hã mẽ pahpumu nê amnhĩm mẽ pahte amnhĩ to mex xwÿnh ã mẽ pajarê nê mẽ pahto hkra. ¹¹⁻¹³ Tã mẽ pahte amnhĩ kaxyw Jejus kôt pajamaxpêr nê hkôt amnhĩ xunhwÿr xwÿnhjaja kot puj mẽ pahkĩnh nê papa ho papa. Mẽ pahpiitã. Ijaew nê Ijaew kêt xwÿnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rÿ Ijaew kêt xwÿnhjê hõ amnhĩ to kuwÿ nhũm kuma nê ho hkra. Kapêr ã kagã htũm kot ja jarênh kot:

Mẽ kãm kêp Tĩrtũm kra hprãm xwÿnhjaja koja mẽ amnhĩ to Tĩrtũm wÿ nhũm mẽ kuma nê Jejus kot mẽ nê htyk kukwak ri mẽ nê mẽ kot amnhĩ tomnuj o hapêx nê mẽ ho hkra nhũm mẽ hkĩnh nê pa. Anê.

14-15 Xà na htem kormã amnhĩ kaxyw Kris mã hamaxpêr kêt rãhã amnhĩ to Tirtũm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỳ? Na hte Tirtũm ma mẽ hwỳr mẽ hkwyjê rê nhũm mẽ ma mẽ hwỳr mra nẽ Tirtũm kapêr o mẽ ahkre ho ri mẽ hkôt pa. Nhũm mẽ hkwyjaja mẽ kuma nẽ amnhĩ kaxyw Jesus kôt hamaxpêr nẽ amnhĩ to Tirtũm wỳ. Kapêr ã kagà htũm kot ja jarênh kot:

Koja mẽmoj mex jarênh xwỳnhjaja ma mẽ hwỳr mra.

Nẽ mẽ hwỳr hpôx o mō nhũm mẽ amỳm amnhĩ wỳr mẽ omu nẽ hkĩnh nẽ. Anẽ.

16 Tã ra mẽ piitã kot kapêr mar tã piitã amnhĩ kaxyw hkôt hamaxpêr kêt nẽ. Jakamã nhũm finat Ijais tee ri ja hã mẽ omu nẽ Tirtũm mã mẽ harênh o:

Pa Pahi Maati. Kwa ra mẽ kot akapêr mar tỳx tã akôt amnhĩ nhĩpêx kêt nẽ. Mẽ kãm akapêr kôt amnhĩ nhĩpêx o pa hprãm kêt. Na htem ãm grêre nẽ akôt amnhĩ xunhwỳ nẽ akôt amnhĩ nhĩpêx o ri pa. Anẽ.

17 Kot anhỳr tã ãm mẽ kot Kris kapêr jarênh mar kôt pix mã na htem amnhĩ kaxyw hkôt hamaxpêr. Koja mẽ harênh mar kêt tã tanhmã koja wem amnhĩ to nẽ amnhĩ kaxyw hkôt hamaxpêr nẽ hkôt amnhĩ xunhwỳ? 18 Mãn ka mẽ atõ atỳx ã ajamaxpêr anhỳr o:

—Ko mãn Ijaew kormã Jesus kot mẽ panê tanhmã amnhĩ nhĩpêx to hã harênh mar kêt jakamã na mẽ kormã hkôt amnhĩ xunhwỳr kêt nẽ.

Anhỳr o ajamaxpêr. Nom ja kot anhỳr kêt. Ijaew piitã ra mẽ kot harênh mar kênã. Tirtũm kapêr ã kagà htũm kot ja hã mẽ harênh kot:

Na prem ma mẽ piitã mẽ kãm ja jarênh o ri mẽ hkôt pa nhũm mẽ piitã kuma. Anẽ.

19 Tã mãn ka prem ra ja ma nẽ atỳx ajamaxpêr o:

—Kot anhỳr tã no mãn kormã hprĩ hã Jesus jarênh mar kêt jakamã mẽ hkôt amnhĩ xunhwỳr kêt nẽ. Anẽ.

Nom ja haxwỳja kot anhỳr kêt. Ra mẽ kot hprĩ hã harênh mar mex tã kuma nẽ ãm

kuma nẽ amnhĩ kaxyw kãm hamaxpêr kêt nẽ. No mẽ apê Ijaew kêt xwỳnh kwỳjaja na ka mẽ kurom harênh ma nẽ amnhĩ kaxyw hkôt ajamaxpêr nẽ hkôt amnhĩ xunhwỳr kurê kumrêx. Hãmri nhũm Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tirtũm kot ã mẽ hkukamã mẽ kot amnhĩ nhĩpêx anhỳr ã mẽ omunh nẽ mẽ harênh kot anhỳr kênã. Na pre finat Mojes mẽ kãm tanhmã hã kagà hto. Te Tirtũm tãm kot mẽ hã kagà pyrã nẽ kapêr ã kagà htũm kamã kot mẽ harênh kot:

Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harênh tã no kot paj mẽ arom amnhĩm mẽ kot amnhĩ to mex xwỳnhjê hã mẽ harê.

Kot kaj mẽ tee ri ja hã mẽ omu nẽ mẽ kamã agryk tỳx kumrêx.

Nẽ mãânên pa ixte mẽ ho mex ã ixpumu nẽ mẽ hã ixkamã agryk nẽ. Anẽ.

20 Nẽ finat Ijais na pre haxwỳja ã mẽ harênh anẽ. Na pre kãm amnhĩ kwỳpê Ijaew puma hkêt nẽ xatã Tirtũm nhỹ hã tanhmã mẽ kãm Ijaew kêt xwỳnhjê jarênh to ho pa. Te Tirtũm tãm kot mẽ harênh pyrãk o mẽ kãm: Nà Ijaew kêt xwỳnhjaja kot Tirtũm japêr kêt tã koja tãm mẽ kãm amnhĩ to amnhĩrĩt nhũm mẽ hkôt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrĩt. Anẽ.

21 ã Ijaew kêt xwỳnhjê jarênh kot anhỳr. Nẽ axte mã tanhmã Ijaewjê jarênh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyrãk o na hte Tirtũm Ijaewjê nhĩpêx o pa.

Jaoo tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkôt amnhĩ nhĩpêx kêt nẽ. Anẽ.

11

Tirtũm kot Ijaew kamã ukapri hã harênh Matêwre 13.10-17

1 Tã ra Ijaew kot Tirtũm kaga jakamã mãn ka mẽ atõ mẽ harênh ma nẽ ajamaxpêr o:

—Mãn pre Tirtûm tee ri amnhĩ tâ mẽ omu nẽ amnhĩ pyrà nẽ mẽ hkaga.

Anhÿr o ajamxpêr. Nom na pre mẽ hkaga hkêt nẽ. Ijaxwÿja ixpê Ijaew na pa. Mẽ urak nẽ ixpê Ijaew pàr krax pê finat Apraãw kanrêhã htàmnhwÿ Pêjamĩ kanrêhã hõ na pa. Tã xà na pre Tirtûm ixkaga? Nà kot ixkaga hkêt. ² Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarê. Tã nhũm amgrà xohtô nẽ hapêx nhũm mẽ hapôj hãmri nẽ Tirtûm kôt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tirtûm mã tanhmã mẽ harênh to nẽ mẽ hã kagã. Nẽ hã kagã ho:

³ Kwa Tirtûm. Mẽ ixte amã amnhĩ jarênh xà hã mēsti hkwÿ na prem ra hkrakrak pa. Nẽ anhÿ hã akapêr jarênh o ri mẽ pa xwÿnh kwÿ nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarê. Anẽ.

⁴ Tã tanhmã na Tirtûm kutã kãm kapêr to? Na pre kãm:

Nà kapxipix na ka arĩ atĩr kêt nẽ. Arĩ mẽ ohtô nẽ apyrà nẽ amnhĩ kaxyw ixkôt hamaxpêr. Mẽ ohtô. Arĩ mẽ kêp 7.000 nẽ akwÿjê rom ri sãnti Paaw kutã hkõnkrã ho hkrĩ nẽ kãm mex ã harênh kêt nẽ. Anẽ.

⁵ Tã arĩ ã jarãhã mẽ kot ã amnhĩ nhĩpêx anhÿr kênã. Tirtûm kãm Ijaew japê jakamã mẽ kamã ukapriĩ. Jakamã nhũm ra mẽ hkwÿjaja mẽ pahpyrà nẽ amnhĩ kaxyw Kris kôt hamaxpêr nhũm Tirtûm mẽ ho hkra.

⁶ Nom mẽ kot amnhĩ to mex ã mẽ omunh xà hkôt mẽ ho hkra hkêt nẽ. Amarĩ kãm mẽ hapê htũm xà hkôt na hte mẽ ho hkra. Kop apu mẽ kot amnhĩ to mex ã mẽ omunh xà hkôt kot mẽ ho hkra ronhÿx amarĩ mẽ ho hkra hkêt nẽ. Nhÿx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

⁷ Ijaew piitã Tirtûm kot amnhĩm mẽ mex ã mẽ harênh prãm tâ no ãm mẽ grêre nẽ hamaxpêr xà hkôt Jejus kôt amnhĩ xunhwÿ. Na htem ohtô rax nẽ kapêr ma nẽ ãm kuma nẽ tee ri kot amnhĩm mẽ mex ã mẽ harênh prãm xaj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot

Jejus kaga jakamã ã amnhĩ nhĩpêx anhÿr kaprÿ. Mẽ kot hkaga jakamã te ri mẽ hamak kro nẽ Tirtûm kapêr mar kêt pyrã nẽ pa. ⁸ Tirtûm kapêr ã kagã htũm kot mẽ harênh kot:

Tirtûm na hte mẽ kãm kapêr mar prãm kêt xwÿnhjê pumu nẽ ãm mẽ omu nhũm htem htÿx ri pa ho pa. Nẽ Tirtûm mã hamaxpêr kêt o ri pa. Mẽ kot kapêr mar mã hprĩ hã mar tÿx kêt nẽ. Nẽ mẽ kot kapêr ã kagã kamã harênh mã hprĩ hã mar tÿx kêt nẽ. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhÿr o ri pa. Te mẽ nohkre nẽ mẽ hamak kro xwÿnh kot amnhĩ nhĩpêx pyrãk. Anẽ.

⁹ Nẽ amnepêm na pre pahi finat Tawija amnhĩ kwÿ Ijaew jarênh o:

Na htem htÿx ri hkĩnh kãm apkur o pa.

Te tutre kãm prãm nẽ kot rapuuti hwÿr àr nẽ tee ri kãm kator prãm kaprÿ pyrãk.

Ja pyrã nẽ mẽ kot Tirtûm kapêr mar kêt mÿrapê koja Tirtûm tanhmã mẽ ho nhũm mẽ tee ri kãm mex prãm kaprÿ.

¹⁰ Te mẽ nohkre xwÿnhjaja tee ri mẽ hpa nhĩpêx o pa pyrãk.

Nẽ omnuy nẽ à nẽ ho gjêx o ri pa pyrãk o amnhĩ nhĩpêx o ri pa.

Anhÿr o mẽ harê. ¹¹ Tã arĩ Ijaew Jejus kaga nẽ kãm kapêr mar prãm kêt jakamã xà na Tirtûm tee ri ja hã mẽ omu nẽ mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nõkati jakamã nhũm tee ri ja hã mẽ omu nẽ mẽ hpãnhã Ijaew kêt xwÿnhjê mã amnhĩ to amnhĩrit nẽ mẽ hkwÿjê ho hkra. Jakamã koja Ijaew kwÿjaja ja hã mẽ omu nẽ tee ri hamaxpêr nẽ hamaxpêr o:

—Kwa na xep Ijaew kêt xwÿnh kwÿjaja Jejus kôt amnhĩ xunhwÿ nhũm Tirtûm ja hã mẽ omu nẽ mẽ ho hkra. Kwa mon pu prem axtem nẽ ri Jejus kaga? E pu mẽ kuxwar amnhĩ kaxyw hkôt mãn pajamxpêr nẽ hkôt amnhĩ xunhwÿ kê Tirtûm ja hã mẽ pahpumu nẽ Ijaew kêt xwÿnhjê pyrã nẽ mẽ

pahto hkra. Hâmri nê amnhî mã mẽ pahte amnhî to mex xwýnh ã mẽ pajarê. Anê.

Ã Ijaewjaja hamaxpêr anhÿr kaxyw na pre Tirtûm Ijaew kêt xwýnhjê mã amnhî to amnhîrît. ¹² Hâmri nhùm mẽ amnhî tâ omu nê hkînh nê pa. No nhùm Ijaew kwýjaja. Mẽ kãm Jejus prãm nôkati ho mẽ pa xwýnhjaja mẽ hkînhã hkaprî nê pa. Tã koja mẽ nhÿrmã amnhî kaprî hã amnhî pumu nê amnhî kînh kêt ã amnhî pumu hãmri nê Tirtûm kôt amnhî xunhwÿr nê amnhî kaxyw Kra Jejus Kris mã hamaxpêr japêr. Koja mẽ ã amnhî nhîpêx anê hãmri nê Ijaew kêt xwýnhjê pyrã nê hkînh nê ri pa. Hãmri nhùm Tirtûm ja hã mẽ omu nê Ijaew kêt xwýnhjê mẽ mẽ ho hpimràatã mẽ ho mex rax nê nhùm mẽ hkînh nê hamakêtkati nê pa ho pa.

Tirtûm kot Ijaew kêt xwýnhjê ho hkra hã harênh

¹³ E kot paj hpãnhã mẽ apê Ijaew kêt xwýnhjê mã ixkapêr nê mẽ atã kagã. Na pre Jejus ma mẽ awÿr inhmê. ÿ hã ixte mẽ ajahkre ho ri mẽ akôt ixpa kaxyw. Pa pre ma krî hkwy kamã mẽ akwÿjê hwÿr mõi nê ixkînh kãm mẽ kãm kapêr jarênh o ri mẽ hkôt ixpa. Nhùm mẽ hkwyjaja inhma nê amnhî kaxyw Jejus kôt hamaxpêr nê hkôt amnhî xunhwÿ. ¹⁴ Tã koja apu ixkwÿjaja mẽ harênh mar japêr. Ijaew tee ri mẽ apê Ijaew kêt xwýnhjê jarênhja ma hãmri nê ra amnhî kamã gryk japêr. Jao mẽ apyrã nê Jejus kôt amnhî xunhwÿ nê nhÿrmã kuri htîr tûm nê mex nê pa ho pa. ¹⁵ Kormã mẽ kot amnhî kaxyw kãm hamaxpêr kêt jakamã na pre Tirtûm hpãnhã mẽ apê Ijaew kêt xwýnhjê mã amnhî to amnhîrît. Ka mẽ ra krî piitã hkôt axohtô nê hkôt amnhî xunhwÿ nê hkôt amnhî nhîpêx mex o ri apa. Tã koja Ijaewjaja nhÿrmã amnhî kaxyw Tirtûm mã hamaxpêr nê mẽ apyrã nê Jejus kôt amnhî xunhwÿr japêr. Hãmri nê te mēhō hkra kēp htyk nhùm hkaprî htã nhùm hkraja tanhmã amnhî to nê akupÿm kãm htîr nhùm kot omunh nê hkînh tÿx kumrêxta pyrãk o amnhî nhîpêx. Jao Tirtûm mẽ kot hkôt amnhî xunhwÿr ã mẽ omu nê hkînh nê. Pu mẽ pahpimràatã urãk nê pahkînh nê ri papa.

¹⁶ E pa mẽ amã mẽ ujarênhja ã ejêp kwÿ jarê. Koja mẽmo pî hpàr jarê mex nê hã koja pàr mex nê xa. Ja pyrã nê Ijaew pàr krax finat Apraãwja kumrêx na pre amnhî kaxyw Tirtûm mã hamaxpêr nhùm ho hkra. Jakamã koja nhÿrmã hkanrêhã htãmnhwÿjaja urãk nê amnhî kaxyw kãm hamaxpêr nhùm mã mẽ ho anê nê mãânēn mẽ ho hkra nhùm mẽ mex nê pa. Te kot mẽmo pî hpàr jarê mexja nhÿ hã pàr mexta pyrãk.

¹⁷ Nê na htem akunî kamã mẽmo pî hpa jakã nê hamÿ nê ma amnhî kôt o mra. Nê ixkre kapem ra mẽ kot mẽmo pî hkreja hpa jakàr nê rēnh xwýnh xwakre kamã wam pî hpa jakàr xwýnhhta nhô nê axpēn tã hkaxpre nê gaa nê axpēn jamÿnh mex nê grã hkêt nê. Nê arî htîr mex nê. Te kēp hpa kumrêx pyrãk. Tã Ijaew kwÿ kot amnhî kaxyw Jejus kôt hamaxpêr xwýnhjaja te mẽ kēp ixkre kapem pî hparta pyrãk. No mẽ hkwyjaja mẽ kot Jejus kaga xwýnhjaja te mẽ kēp mẽ kot kēp hpa jakàr nê rēnhhta pyrãk. Jakamã nhùm Tirtûm te mẽ kot pàr pé hpa jakàr nê rēnhhta pyrãk o mẽ hipêx nê mẽ hkaga. Nê axtem te mẽ kot mẽmoj pàr pa jakàr nê hpãnhã kamã axtem pî hpa janhôr nê hã hkaxpreta pyrãk o mẽ apê Ijaew kêt xwýnhjê nhîpêx nê mẽ amã amnhî to amnhîrît. Ka mẽ ra amnhî kaxyw Jejus mã ajamaxpêr nê hkôt amnhî xunhwÿ nhùm Tirtûm mẽ ato mex nê.

¹⁸ Tã kêr ka mẽ arî Ijaew o mex o ri apa. Tanhmã ri mẽ hipêx to mã ajamaxpêr to hkêt nê. Rÿ ajamaxpêr o:

—Nã ãm hãmri na Tirtûm mẽ hkaga nê ãm kãm mẽ papxipixjê japê.

Anhÿr o ajamaxpêr kêt nê. Ijaew te ixkre kapem pî hpàr mexta pyrãk. No mẽ kajaja te mẽ ate akunî rûm pî hpa kot ixkre kapem pàr mex pix kukwak ri htîr nê hã harirta pyrãk. Kêt akunî rûm pî hpa jakàr kukwak ri na hte ixkre kapem parta htîr nê kuhê hkêt nê. Kop apu parta mex kêt ronhÿx ra akunî rûm hpaja grã pa. Ja pyrã nê Ijaew kukwak ri kot kaj mẽ nhÿrmã Tirtûm ri atîr tûm nê apa ho apa. Jakamã kwa kêr ka mẽ ate amnhî to rûnh o mẽ hakrenh ã amnhî to jarkrar kêt nê. ¹⁹ Mãn ka mẽ atô ajamaxpêr o:

—Ra Tirtûm kot Ijaew kaga nê hpânâ mē pajaja mē ixto hkra jakamâ mân kām mē ijapê ho mē hakre. Ra mē hpânâ mē ixto hkra kênâ. Anê.

²⁰ Nà âm hāmri na pre Tirtûm Ijaew kwý kaga. Mē kot Jejus kôt amnhî xunhwýr kêt mýrapê na pre te mēmo pî hpa jakâr nê rênhta pyrâk o mē hipêx. Ka mē ra mē kurom amnhî kaxyw hkôt ajamxpêr jakamâ nhûm Tirtûm te kot akunî kamâ pî hpa jakâr nê ho htêm nê ixkre kapem pî hpâr mex ã hanhôr nê hã hkaxpre pyrâk o mē anhîpêx. Nom kwa kêr ka mē ja hã amnhî pumu nê ri hã Ijaewjê mã amnhî to jarkrar kêt nê. Âm amnhî to mex nê Tirtûm kapêr kôt amnhî nhîpêx mex o ri apa. No kot kaj mē ã amnhî nhîpêx anhýr kêt nhûm amnhî tã mē apumu nê ra kot Ijaew kwý nhîpêxta pyrâ nê tanhmã mē ato nê mē akaga.

²¹ ã Ijaew jarênh kot anhýr. Te mē kêp pâr mex pyrâk. Tã nhûm mē kot Jejus kôt amnhî xunhwýr kêt jakamâ nhûm Tirtûm te kot pî hpa jakâr nê rênhta pyrâk o mē hipêx nê mē homnuj nê. Kot kaj mē urâk nê ã amnhî nhîpêx anê nhûm mã mē ato anê nê. ²² Ijaew kot Jejus kôt amnhî xunhwýr kêt jakamâ nhûm Tirtûm mē hpânâ mē apê Ijaew kêt xwýnhjê mã amnhî to amnhîrît. Tã ka mē Ijaew rom amã Jejus prãm nhûm Tirtûm ja hã mē apumu nê amnhî pyrâ nê kãm mē aprãm nê mē akamã ukaprî rãhã nê pa ho pa. Tã kwa mē okora. Kêr ka mē hkôt pix mã amnhî nhîpêx o ri apa rãhã ty. Kot kaj mē hkaga nhûm amnhî tã mē apumu nê te Ijaew kot hkaga xwýnhjê nhîpêx pyrâk o mē anhîpêx nê mē akaga.

²³ Koja Ijaew nhýrmã Jejus kôt amnhî xunhwýr japêr nhûm Tirtûm ja hã mē omu nê mē ho hkra. Te mē kot pâr pa jakâr nê rênh nhûm grã par xwýnh nhûm kot akupým amnhîm hamýnh nê ixkre kapem pâr wýr o htêm nê akupým hã hanhôr nê hã hkaxpre ho htýx nhûm kukwak ri akupým htírta pyrâk. Ja kêp tanhmã kute hkêt. Kot ã hipêx anhýr kaxyw àhpumunh týx. ²⁴ Mē apê Ijaew kêt xwýnhjaja te mē ate akunî kamâ pî hpa jakâr nê ixkre kapem pâr ã hanhôr nê hã kaxpreta pyrâk. Jao Jejus

kôt amnhî xunhwý nhûm mē ato hkra kurê kumrêx. No Ijaew te mē kêp ixkre kapem pârta pyrâk jakamâ Tirtûm kot akupým hanhôrta tanhmã kêp kute hkêt. Kêp Tirtûm kênâ kot tanhmã kêp kute. Jakamã koja mē hkôt amnhî xunhwý nhûm amnhî tã mē omu nê mē ho hkra kurê kumrêx.

Tirtûm kot mē piitã mē kamã ukaprî hã harênh

Matêwre 23.37-39; Rukre 21.24; Juãw 10.16

²⁵ E kot paj mē amã mēmoj to amnhîrît ka mē inhma. Nà na pa ra mē amã Ijaew krã xihtýx xwýnhjê jarê ka mē harênh ma. Ra mē kot Jejus kaga hã mē harênhja. Tã koja mē ã amnhî nhîpêx anhýr o pa rãhã hkêt nê. Na hte Tirtûm kormã amnhî tã mē apê Ijaew kêt xwýnhjê jamâr o pa. Amnepêm na pre amnhî kaxyw mē akukamã tanhmã mē akwýjê jarênh to. Tã kot kaj mē kot tanhmã mē ajarênh to xwýnh piitã Jejus kôt amnhî xunhwýr pa nhûm rî Ijaew amnhî to hapu nê kormã hkôt amnhî xunhwý. ã mē kot amnhî nhîpêx anhýr kaxyw. Jakamã kwa kêr ka mē ri ja hã amnhî to jarkrar o ri mē hkôt apa hkêt nê. Mē pahpyrà nê mē kot Jejus kôt amnhî xunhwýr mã xwýnh kênâ. ²⁶ Koja Tirtûm nhýrmã Ijaew piitã ho hkra. Kapêr ã kagã htûm kot mē harênh kot:

Nhýrmã kot mē ate amnhî tomnuj pê mē apytâr mã xwýnhja Ijaew ò koja.

Jako hkanrêhã htãmnhwýjê hõ koja.

Koja nhýrmã wrý nê mē ate amnhî tomnuj pê mē apytã nê mē ate amnhî tomnuj o hapêx pa. Anê.

Anhýr o kot harênh. ²⁷ Nê mãânên ja:

Kot paj mē nê mē kot amnhî tomnuj o ijapêx pa.

Amnepê mã ixte mē hkukamã mē hã amnhî jarênh xã hkôt. Anê.

²⁸ Nom arî mē kãm Jejus mar prãm kêt jakamã te mē kot kutã amnhî xunhwýr pyrâk o amnhî nhîpêx. Tã ã mē kot amnhî nhîpêx anhýrja ri ka mē kamjaja mē hpânâ mē apê Tirtûm kra. Nom nhûm Tirtûm arî kãm mē hapêê. Na pre amnepê mã kot tanhmã mē ho mex to hkukamã tanhmã mē hã amnhî jarênh to. Mē hpâr kraxjê mã tanhmã mē hã amnhî jarênh to. Finat Apraãw mē Ijak mē Jakoja mã

mê hkanrêhã mê htàmnhwÿjê hã tanhmã amnhĩ jarênh to.

²⁹ Na hte Tirtûm mêmoj tâ tanhmã amnhĩ jarênh to nê âm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mêmoj tâ amnhĩ jarênh tâ gaa nê ho hamakêtkati hkêt nê. Rÿ hpãnhã axtem tanhmã hipêx to hkêt nê. Na hte mêmoj tâ amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhÿrmã mê ho mex rax nê ã mê hipêx anhÿrja o hamakêtkati hkêt nê.

³⁰ No mê kajaja mê apê Ijaew kêt xwÿnhjaja. Amnepêm na ka prem ajaxwÿja Tirtûm kôt amnhĩ nhĩpêx kêt nê. Tã nhũm mê akamã ukaprĩ nê kãm mê ajapê nê. Ka mê ra harênh ma nê hkôt amnhĩ xunhwÿ nê hkôt amnhĩ nhĩpêx mex nê. No âm Ijaew kukwak ri. Mê kot kapêr kôt amnhĩ nhĩpêx o pa hkêt jakamã nhũm Tirtûm mê hpãnhã nhãm mê amã amnhĩ to amnhĩrit nê mê ato mex rax nê. Jakamã te Ijaew kukwak ri mê amex nê ri mê apa pyrãk. ³¹ Tã koja nhÿrmã kot mê anhĩpêxta pyrã nê Ijaew ho hkra. Nê mê apyrã nê mê kamã ukaprĩ nê. Mê kot mê apyrã nê amnhĩ kaxyw Kra hkôt hamaxpêr xwÿnhjaja nhũm mê apyrã nê mê ho hkra nê mê ho mex nê. ³² Mê apê Ijaew kêt xwÿnhjaja nê mê ixpê Ijaew mê pahte axpên pyrãk. Na pu htem pahpiitã Tirtûm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mê tee ri ja hã amnhĩ pumu nê amnhĩ to kuwÿ nhũm mê pama nê amarĩ mê pakamã ukaprĩ nê mê pahto mex nê.

*Pawre kot Tirtûm mex o mex ã harênh
Epes 3.20; Korosê 1.16; Wam Korĩt 2.9,
2.16*

³³ Tirtûmja àhpumunh tÿx o àhpumunh tÿx. Nê ukaprĩ ho ukaprĩ nê mex o mex. Mê pahtõ na pu urãk nê ã amnhĩ nhĩpêx anhÿr o papa? Nã amrakati kumrêx. Nê mê pahtõ na pahte Tirtûm jamaxpêr kôt omunh? Nã mê pahte hamaxpêr kôt omunh kêt. ³⁴ Kapêr ã kagã htũm kot ja jarênh kot: Mê pahte Tirtûm jamaxpêr kôt omunh kêt. Nê kot pu mê pahtõ mêmoj tâ hakre hkêt nê. Mê parom àhpumunh o àhpumunh xwÿnh kênã.

³⁵ Nê mê pahtõ kot puj we kãm pakapêr nê kãm: “Kwa Tirtûm. Ra ixte amã mêmoj nhõrta pãnhã kwa amnhĩ xwar inhmã mêmoj gõ.” Anê.

Nã mêmoj piitã õ kênã kot puj kêt ri ã kãm mêmoj nhõr ã amnhĩ jarênh anê. Anê.

³⁶ Tãm na pre amnhĩ kaxyw mêmoj piitã ho kator pa. Nê âm pix kukwak ri na mêmoj piitã htĩr nê pa. Jakamã kwa pu mê kãm mex o mex ã mãn harênh rãhã ho ri papa.

12

Mê pahte Tirtûm mã amnhĩ nhõr ã mê pajarênh

Wam Korĩt 6.20; Epes 4.1; Piripos 4.8-9; Korosê 1.10; Wam Tesarõn 4.1-3; Wam Pêtre 2.11

¹ Kwa Jejus kôt ixkwÿjaja. Tirtûm na hte mê pahto mex nê mê pakamã ukaprĩ rãhã jakamã na pa ã mê amã ixkapêr anê. Kwa mê tokyx kãm amnhĩ jarê nê kãm amnhĩ gõ. Te mê ate kãm hkĩnh xà nhõr pyrãk o amnhĩ nhĩpêx nê kãm amnhĩ gõ. Jao mê amã kapêr kôt pix mã amnhĩ nhĩpêx o ri apa hprãm ã kãm amnhĩ jarê. Nê kãm hprãm xà hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarê. Kot kaj mê ã kãm amnhĩ jarênh anê nhũm amnhĩ tâ mê ama nê hkĩnh nê. ã mê pahte kãm amnhĩ jarênh anhÿrja na kãm mar prãm.

² Nê kêr ka mê kãm Tirtûm prãm kêt xwÿnhjaja kot amnhĩ nhĩpêx o ri amnhĩ nhĩpêx o ri apa hkêt nê. Nê mê amnhĩ to Tirtûm mãn wÿ kê mê amã mê ajamaxpêr mex jagjê. Koja mê ama nê mê amã hagjê ka mê ra aprĩ hã hamaxpêr xà hkôt mê pahte amnhĩ to mex xà pumunh mex nê. Na pu htem hkôt amnhĩ nhĩpêx o ri papa nhũm amnhĩ tâ mê pahpumu nê hkĩnh nê. Pu mê pajaxwÿja ÿ hã pahkĩnh nê ri papa.

*Kris kwÿjaja kot tanhmã axpên nhĩpêx to
hã mê kãm karõ*

Rômân 12.1-11; Epes 4.11-16; Wam Pêtre 4.10-11

³ Nê na pre Tirtûm ixto mex nê. Nê mê akaxyw ixãm. Ixte mê amã Kra Jejus kot tanhmã mê panê amnhĩ nhĩpêx to hã harênh o ri mê akôt ixpa kaxyw. Tã na pa ã kagãja kamã mê amã harênh anê.

Jakamã kwa kêr ka mẽ amnhĩ to jarkrar o ri mẽ kãm apa hkêt nê. ãm kwarĩ ho kwarĩ. Rỳ atỳx ri ajamaxpêr o:

—Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nê. Kêt mẽ ãm amnhĩ jarênh o:

—Na pa pre amnhĩ kaxyw Jejus kôt ija-maxpêr nhũm Tĩrtũm ixpumu nê ixto hkra. Jakamã na pa hte Jejus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nê. Anê.

⁴ E pa mẽ amã mẽmoj jarê ka mẽ inhma. Nà mẽ panhĩja pyxi htã kamã mẽmoj xoh-tôô. Na kamã mẽ pano nê mẽ pajakwa. Nê kamã mẽ pajamak nê mẽ pahte. Na pu htem mẽ pano ho rĩt nê mẽ pajakwa ho pakapêr. Nê mẽ pajamak o ri ama nê mẽ pahte ho ri mra. ⁵ Ja pyrã nê Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu htem ahpỳnhã tanhmã axpên to mex to ho ri papa. Jao Kris kôt axpên to pahtõ nê pahtõx o papa.

⁶ Tĩrtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karõ to nê kaxyw mẽ pahto mẽ paxihtỳx. Tã kêr pu mẽ ra kot mẽ pamã mẽmoj tã karõ xà hkôt kãm amnhĩ nhĩpêx rãhã ho ri papa. Jakamã koja mēhõ ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnãr rom mẽ kãm kapêr jarênh mex o ri mẽ hkôt apa.

⁷ Rỳ ate akwỳjê mã tanhmã axàpênh to ho ri apa kaxyw axãm ka mẽ kãm axàpênh mex o ri mẽ hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

⁸ Rỳ ate Tĩrtũm kapêr o ri Jejus kôt mẽ akwỳjê jamaxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa.

Rỳ ka mẽ atõ akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axãmnhĩx ri mẽ kãm mẽmoj nhõr o ri mẽ hkôt apa.

Rỳ ate akwỳjê ho amnhĩptàr kaxyw axãm ka mẽ ho amnhĩptàr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêt o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkôt apa hkêt nê.

⁹ Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkôt amnhĩ nhĩpêx rãhã ho ri apa. ¹⁰ Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkôt apa. No mẽ ri atỳx ajamaxpêr o:

—Nà koja mēhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

¹¹ Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. ¹² Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mēhõ tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. ¹³ Nê koja Kris kôt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwỳ gõ. Nê amnhĩ wỳr awỳ nê tanhmã ho mex to.

¹⁴ Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atēm nê kãm tanhmã hã axãmnhênh to hkêt nê. Kêt ãm ho Tĩrtũm pix wỳ nê kãm:

—Pa mẽ ijamãr mex xwỳnh maati. Nà na ixkwỳjê hõja ã inhĩpêx anê. Tã nom kêr

ka ixtã tanhmã homnuj to hkêt nê. Æm tanhmã ho mex to.

Anhÿr o mãn mẽ ho awÿ.

¹⁵ Nê koja akwÿjê hõ mẽmoj tâ hkĩnh nê. Ka omu nê uràk nê ÿ hã akĩnh nê. No koja mẽmoj tâ hkaprĩ nê mÿr o nhÿ ka omu nê ra uràk nê ÿ hã akaprĩ nê.

¹⁶ Nê kêr ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwÿjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tÿx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

¹⁷ Nê koja mẽhõ tanhmã ato htã ka ãm amnhĩ tâ omu nê tanhmã amnhĩ tâ ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

¹⁸⁻¹⁹ Nê kêr ka mẽ tãm ri axpên mã akapêr rãhã ho ri apa.

Nê kot kaj akràmnhwÿ mẽ wa tanhmã axpên nhĩpêx to. Hãmri ka wa akupÿm tãm axpên xãm kaxyw kãm akapêr tâ nhũm ama nê ãm ama nê akaga. Ka ãm amnhĩ tâ omu nê kamã agryk kêt nê. Koja Tĩrtũm tãm tanhmã atã ho. Kapêr ã kagã htũm kot ja jarênh kot:

Kêr ka mẽ amnhĩ tâ tanhmã kot ato xwÿnh to hkêt nê. Pa kot paj mẽ atã tanhmã ho. Anê.

Nê harênh kot:

²⁰ Kêr ka mẽ amã mẽ kãm mẽ akurê xwÿnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwÿ gõ kê mẽ kuku.

Rÿ nhũm mẽ kãm kôr ka mẽ kãm gõ hkwyê kê mẽ ho ixkõ.

Kot kaj mẽ ã amnhĩ tâ mẽ hipêx mex anê nhũm mẽ tee ri amnhĩ tâ mẽ apumu nê amnhĩ kamã hpijaãm jao mẽ atã amnhĩ kamã gryk nê. Anê.

²¹ Nom kot kaj mẽ amnhĩ tâ tanhmã mẽ homnuj to hãmri nê ajaxwÿja uràk nê amnhĩ tomnuj nê. Ja pymaj kêr ka mẽ amnhĩ rom tãm mẽ hipêx. Hãmri nhũm mẽ amnhĩ tâ mẽ apumu nê mẽ apyrã nê tãm mẽ anhĩpêx japêr.

E kêr ka mẽ ã axpên nhĩpêx o ri apa anê.

13

Mẽ pahto amnhĩptàr xwÿnhjê jarênh

Matêwre 22.21; Xitre 3.1; Wam Pêtre 2.13-

17

¹ Nê kêr ka mẽ kot mẽ ato amnhĩptàr xwÿnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwÿr kênã. Mẽ kot mẽ pahto amnhĩptàr o pa kaxyw na hte mẽ unhwÿ. ² Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nê nhÿrmã tanhmã hã ho.

³ Xà na hte tãm mẽ kot amnhĩ nhĩpêx xwÿnhjaja kãm mẽ kot mẽ ho amnhĩptàr xwÿnhjê puma ho pa? Nà na htem kãm mẽ uma hkêt kãm ri pa. Æm mẽ kot amnhĩ tomnuj xwÿnh pixjaja na amnhĩ kamã kãm mẽ uma ho pa. Tã ka mẽ amã mẽ kot mẽ ato amnhĩptàr xwÿnhjê puma hprãm kêt xwÿnhjaja kêr ka mẽ kapêr ma nê hkôt amnhĩ nhĩpêx kê amnhĩ tâ mẽ apumu nê hkĩnh nê. Nê amnhĩm mẽ ate amnhĩ to mex xwÿnh ã mẽ ajarê. ⁴ Tĩrtũm nhÿ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. Æm hãmri na hte ã mẽ pahto amnhĩptàr xwÿnhjaja mẽ panhĩpêx anê. Tĩrtũm kãm hprãm xà hkôt. ⁵ Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mãânên ã amnhĩ kukamã ajamaxpêr anê nê ajamaxpêr o:

—Nà Tĩrtũm kot mẽ ixkaxyw unhwÿr jakamã na pa hte kapêr ma nê hkôt amnhĩ nhĩpêx mex o ri ixpa.

Anhÿr o ajamaxpêr.

⁶ Nê mẽ pahto amnhĩptàr xwÿnhjaja kot Tĩrtũm nhÿ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. ⁷ Jakamã kêr ka mẽ hã apijaãm o ri apa kamã mãmri mẽ kãm kàxpore hkwyê ho

hkryre nê òr o ri apa. Mě kot hã àhwÿr xà hkôt.

Mě pahte tanhmã axpën nhîpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

⁸Ně kêr ka mēhõ ho tewën japêr nê tokyx kãm amnhîre. Ně mẽ amã axpën kînh o aa ho ajamakêtkati hkêt nê. Jao mẽmoj to axpën kutã anojarêt rãhã ho ri apa. Kot kaj mẽ ã axpën nhîpêx anê nê Tîrtûm kapêr piitã hkôt amnhî nhîpêx mex o ri apa.

⁹Amnepê mã na pre finat Mojesja Tîrtûm nhÿ hã Ijaew mã mẽmoj tã karõ nê mẽ kãm: Kêr ka mẽ aprõ pix tãnopxa nê nhãm mēnijê hõ kamã ri akurê ho apijaàm kêt o apa hkêt nê.

Ně mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaàm kêt o ri apa hkêt nê.

Ně mẽ ri axpën par kêt nê.

Ně mẽ ri axpën pē axàhkînh o ri apa hkêt nê.

Ně mẽ amã ri axpën kukrêx kînh o ri amã ho anhõ hprãm o ri apa hkêt nê. Anê.

Ně mãânên ja:

Kêr ka mẽ nhãm mẽ axpën nhîpêx o te ka amã amnhî tã ma pyrãk. Jao tãm axpën nhîpêx o ri apa. Anê.

Ã kot mẽ kãm hã karõ kot anhÿr. Kot puj mẽ ã pamã pahkwÿjê kînh anê nê mãânên wam finat Mojes kot mẽmoj tã mẽ panhîgêjtê mã karõ hkôt amnhî nhîpêx o ri papa rãhã nê. Jao axpën par kêt nê. Nê axpën pē paxàhkînh kêt nê. Nê axpën kutã panojarêt rãhã nê. ¹⁰Koja mēhõ kãm amnhî tã ma pyrãk o hkwyjê nhîpêx nê mẽ ho mex pix o pa. Jakamã kot kaj mẽ amã ri axpën kînh nê mẽmoj to axpën kutã anojarêt pix nê. Jao Tîrtûm kapêr piitã hkôt amnhî nhîpêx mex o ri apa.

¹¹Amnepê mã mẽ pahte amnhî kaxyw Jejus kôt pajamaxpêr xà hã arîgrota ã na pre kormã akupÿn mẽ pahwÿr hpôx xà hã arîgro kormã hwÿr awry rax nê. Tã ra hwÿr ahtêp o mō. Kojã tokyx akupÿn mẽ pahwÿr wrÿ nê ma akupÿm kaxkwa hwÿr mẽ pahto api. Jakamã kwa kêr pu mẽ arî hamãr rãhã ho ri apa. Jao tanhmã amnhî tomnuj to kaxyw nê pajamaxpêr o:

—Kwa koja Jejus tanhmã amnhî to nê jarãhã akupÿn wrÿk japêr. Tã kot pa ri ã amnhî nhîpêx anê nhũm wrÿ nê tee ri ja hã ixpumu pa amnhî kamã ixpijaàm tÿx nê. Nà kot paj ã amnhî tomnuj anhÿr kêt nê. Anê.

Hãmri nê Jejus kamã ajamak pē kutêp Tîrtûm kapêr kôt pix mã ri amnhî nhîpêx mex rãhã ho ri papa.

¹²Na pu htem kamãt kãm gôr nê arîgro jamãr pē kamã pajamak o panhîkwÿ. Arîgro te kêp Jejus akupÿn wrÿk pyrãk. Jakamã kwa pu mẽ kamã pajamak pē kãm panojarêt rãhã ho ri papa nê amnhî nê tanhmã mẽ omnu xà kute pumunh mex o ri papa. Te ho pôristi kot amnhî nê mẽ kot kãm mẽ hkurê xwÿnhjê pumunh mex pyrãk o Jejus kutêp tãm amnhî nhîpêx o ri papa. Na pre tanhmã mẽ pahkrã hto pu mẽ ÿ hã tãm ri amnhî nhîpêx. Tã kêr pu mẽ arî ã amnhî nhîpêx anhÿr o ri papa nê te mẽ pahte arîgro hã mẽ pa xwÿnhjê kot amnhî nhîpêx pyrãk o amnhî nhîpêx.

¹³Kot puj mẽ ã amnhî nhîpêx anê nê mẽ piitã mẽ noo mã tee ri tanhmã mẽ pahte amnhî tomnuj to mã pajamaxpêr kêt nê. Jao amnhî kamã pahpijaàm nê ri papa hkêt nê. Nê pajamakêtkati nê paxàmnhîx ri papa. Te ho hirã kamã ri mẽ pa xwÿnhjê kot amnhî nhîpêx pyrã nê ãm ri paxàmnhîx tãm amnhî nhîpêx o ri papa.

Ně mẽ pahprõ pix tãnopxar o ri papa.

Ně mẽ pahpipãnh nê ri papijapu ho ri papa hkêt nê.

Ně mẽmoj tã axpën mã paxàkjêr hkêt nê.

Ně mẽmoj tã axpën kãm pagryk kêt nê.

¹⁴Nom kot puj mẽ axtem nê ã amnhî tomnuj anê nê mẽ pahte amnhî nhîpêx tũm kôt pix mã amnhî nhîpêx. Tã kêr pu mẽ ã amnhî nhîpêx anhÿr pumaj hpãnhã amnhî to Pahihti Jejus Kris wÿ nê kãm:

—Pa Jejus. Nà kormã jar apa ri na ka pre mẽ kot tanhmã amnhî tomnuj to kutã axihtÿx o axihtÿx nê aa tanhmã amnhî tomnuj to hkêt nê. Tã inhmã apyrã nê ixte amnhî tomnuj kutã ixihtÿx o ixihtÿx o ixpa hprãm. Anê.

Jao mẽ pajamaxpêr tũmja te ra kot amnhî tã mẽ pahto htÿx kêt pyrãk o pu mẽ amnhî nhîpêx o ri papa.

14

Mě pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Rômân 2.1; Wam Korît 10.23-33; Xiakre 4.11

¹ Nê koja mēhõ kormã Jejus kôt amnhĩ xãm nyw ri kormã hkôt hamaxpêr tohtuj anê. Hãmri nê htỳx tanhmã hamaxpêr to nê mẽmoj mex kaga. Ka mẽ ja hã omu nê ãm omu nê hã tanhmã kãm nê hkêt nê. Kwãr mãmrĩ ã amnhĩ nhĩpêx anê. Koja gaa nê rĩ hprĩ hã Tĩrtũm kapêr mar tỳx nê hãmri nê hkôt mẽmojta pumunh mex nê. ² Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harê nê hkaga nê hamaxpêr o:

—Nà kot pa ja hkur kêt nê. Kot pa apu kuku nê hkur o amnhĩ tomnuj nê. Anê.

Kwãr mãmrĩ ã hamaxpêr anê nê hkur kêt nê. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxãmnhĩx Jejus kamnãr rom mẽmoj piitã kuku. Nom mẽ pahkĩnhã ham mẽ kot hkôt amnhĩ xunhwỳr xwỳnhjaja kormã kapêr piitã mar kêt jakamã kwãr mẽ mãmrĩ anê nê mẽmoj kur kêt nê. ³ Nom kêr ka mẽ ri tanhmã hã mẽ kãm akapêr to hkêt nê. Rỳ mẽ kãm:

—Kwa mẽ ixpyrà nê mẽmoj piitã aku.

Anhỹr o mẽ kãm akapêr kêt nê. Ano ho ãm hã mẽ omu.

Nê mẽ ate mẽmoj piitã hkur kêt xwỳnhjaja kêr ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nê. Mẽ ixte mẽmoj piitã hkur o ixpa hã mẽ ixpumu nê ãm hã mẽ ixpumu nê hã tanhmã mẽ inhmã axàkjêr to hkêt nê. Rỳ hã mẽ inhmã:

—Kwa nà kot kaj mẽ ja kur o amnhĩ tomnuj nê.

Anhỹr o hã mẽ inhmã akapêr kêt nê. Ano ho ãm ja hã mẽ ixpumu. Mẽ pahte ahpỳnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã. ⁴ Jakamã kwa mẽmoj tã tanhmã axpên mã axàkjêr to ho ri apa hkêt nê. Koja Kris kôt atõjê hõ axtem tanhmã hamaxpêr to ka mẽ tee ri ja hã omu nê tanhmã hã kãm nê hkêt nê. Rỳ ajamaxpêr o:

—Tk. Na hte ã ri amnhĩ nhĩpêx anhỹr o pa. Ja omnuj. Pa na pa hte ã amnhĩ nhĩpêx anhỹr kêt nê.

Anhỹr o ri axpên kukamã ajamaxpêr hkêt nê. Mẽ pahpê Tĩrtũm kêt kênã kot pu kêt mẽ ã ri axpên kukamã pajamaxpêr anê. Tĩrtũm pix na hte tanhmã mẽ pajarênh to xwỳnh. àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpêr pê ãmnhĩx ri tanhmã amnhĩ nhĩpêx to ho pa.

⁵ Nê koja Jejus kôt atõjê hõ mẽmo arĩgromnu jarê nê hã àpênh kêt nê. Ka mẽ apê hkwỳjaja tee ri ja hã omu nê ajamaxpêr o:

—Nà arĩgro piitã mẽ pamã mex kênã. Kot paj mãmrĩ arĩgro piitã hã apê.

Anhỹr o ajamaxpêr japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpỳnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. ⁶ Kêt mẽ kot arĩgromnu jarênh xwỳnhjê mẽ mẽ pahte arĩgro piitã mex ã harênh xwỳnhjaja mẽ pahpiitã mẽ pahpê Tĩrtũm kraa. Jakamã mẽ pahpiitã na pu htem pajamaxpêr o:

—Na pa hte Tĩrtũm kãm hprãm xà hkôt ã amnhĩ nhĩpêx anhỹr o ri ixpa. Anê.

Nê mẽ pahte mẽmoj piitã hkur xwỳnhjaja nê mẽ kot mẽmoj kwỳ hkur kêt xwỳnh piitã mẽ pahpê Tĩrtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tĩrtũm mã amnhĩ jarê nê kãm:

—Pa mẽ ijamãr mex xwỳnh maati. Nà ãm hãmri na ka hte apkati mẽ mẽ inhmã mẽ inhõ ho apa. Amex o amex Tĩrtũm.

Anhỹr o kãm amnhĩ jarê. Hãmri nê kormã hkamnãr rom paxãmnhĩx ri tanhmã mẽõ kuteta ku. ⁷⁻⁸ Mẽ pahpê Tĩrtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahpêr ri tanhmã ri amnhĩ nhĩpêx to ho papa hkukamã hamaxpêr. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. ⁹ Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ

Pahihti nē mẽ panê ty. Hāmri nē akupÿm htîr. Kêp mẽ panhō Pahihti hã akupÿm htîr. Kêp mẽ pahte hkôt amnhî xunhwÿr xwÿnhjê nhō Pahihti kaxyw. Jakamã kêp ra mẽ pahkwÿ htyk xwÿnhjê nhō Pahihti nē mãânên kêp arî mẽ pahÿr xwÿnhjê nhō Pahihti. ¹⁰ No mẽ papajaja mẽ pahpê Kris kôt mẽ pahkwÿjê nhō pahi hkêt jakamã kêr mẽ Kris kôt akwÿjê hō tanhmã amnhî nhîpêx to hã omu hāmri nē tanhmã ho akapêr to hkêt nê. Rÿ ajamaxpêr o:

—Kwa na ã amnhî nhîpêx anê. Inhmã ja mex kêt.

Anhÿr o ajamaxpêr kêt nê. Koja nhÿrmã Tîrtûm tãm mẽ pahpiitã tanhmã mẽ pahte amnhî nhîpêx to hã mẽ pahpumunh xã hkôt tanhmã mẽ pajarênh to. Nom kêr pu mẽ papajaja amnhî hkrã hkôt ã axpên jarênh anhÿr kêt nê. ¹¹⁻¹² Kot puj mẽ nhÿrmã pahpiitã Tîrtûm kutã pahkrî nê kãm tanhmã amnhî jarênh to. Kormã mẽ pahÿr ri tanhmã mẽ pahte amnhî nhîpêx to ho papa hã kãm pahprî hã amnhî jarê. Kê mẽ pama nê tanhmã mẽ pajarênh to. Kapêr ã kagã htûm kot mẽ pakukamã mẽ pajarênh kot:

Koja nhÿrmã mẽ piitã ixpê mẽ õ pahi hã ixkutã hkôn krã ho rôrôk nê hkrî nê inhmã inhmex o inhmex ã ijarê.

Nê mẽ piitã ixpê Tîrtûm ã ixpyxi mex ã ijarê. Æm hāmri na pa ã mẽ hkukamã mẽ harênh anê. Anê.

Mẽ pahte Kris kôt pahkwÿjê ho mex ã mẽ pamã karõ

Wam Korî 8.9-13

¹³ Nê kwa kêr ka mẽ akwÿ kot Jejus kôt amnhî xunhwÿr tohtuj anhÿr xwÿnhjaja tanhmã mẽ kot amnhî nhîpêx to ho pa hã mẽ omu nê ja nê tanhmã mẽ kãm akapêr to hkêt nê. Æm mẽ noo mã tãm ri amnhî nhîpêx rãhã ho ri apa. Mẽ kot ja hã mẽ apumunh nê mẽ akôt amnhî nhîpêx kaxyw. No kot ka mẽ kot tanhmã amnhî nhîpêx toja ã kãm akapêr nhÿm ama nê tee ri amnhî kukamã hamaxpêr nê hkaprî nê.

¹⁴ E kot pa hpãnhã mẽ paxàpkur xã hã tanhmã mẽ panhō jarênh to. Ixte Pahihti Jejus jamaxpêr xã hkôt tanhmã ijamaxpêr to ho ri ixpa jakamã kot paj ixkatat kôt mẽ amã tanhmã mẽ panhō jarênh to nê Æm

hāmri harê. Nã mẽ paxàpkur xãja Æm pixi nê omnu hkêt. Piitã mex o mex. Nom koja mēhō tee ri mẽmo mẽ apkur xã hō pumu nê hamaxpêr o:

—Nã kot paj ja hkur kêt nê. Kot paj apu kuku nê ho amnhî tomnuj nê. Anê.

Hāmri nê hkur kêt nê. Tã kwār mãmrî ã hamaxpêr anê nê hkur kêt nê. Nom na Æm amnhî krã hkôt Tîrtûm kêp ja omnuj ã hkamnhîx. Kêp omnuj kêt. Ra kot mẽmo mẽ paxàpkur xã piitã mex ã harênh. ¹⁵ Tã kot kaj mẽ kot mẽmoj kur kêt xwÿnhÿta py nê o tẽ nê kot hkaga xwÿnh noo mã hkur o xa nhÿm apumu nê tee ri hamaxpêr nê hkaprî nê. Jakamã kot ka mẽ ã noo mã amnhî nhîpêx anhÿrja o ho mex kêt nê. Kwa mẽ ã ri axpên nhîpêx anhÿr hkêt nê. Kot ka mẽ ã axpên nhîpêx anê nê te amnhî pix kukamã ajamaxpêr pyrãk o amnhî nhîpêx. Jao akwÿjê ho mex kukamã ajamaxpêr kêt nê. Kris kãm mẽ hapê hÿx kôt mẽ kot amnhî tomnuj pãnhã amnhîrer kaxyw ra nê htyk kênã kot ka kêt mẽ axtem nê ri ã mẽ noo mã mẽ kot mẽmoj kur kêeta kur anê. Rÿ koja apu tee ri kot mẽmoj kur kêeta kur ã mẽ apumu nê tanhmã amnhî tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê. ¹⁶ Mẽmo mẽ apkur xãja mex tã nhÿm mẽ akwÿjê hō kãm mex kêt japêr ka mẽ noo mã hkur kêt nê. Nê tanhmã hã kãm nê hkêt nê. Kot kaj mẽ anê nhÿm Kris kra hkêt xwÿnhjaja tee ri ja hã mẽ apumu nê tanhmã axpên mã mẽ apê Kris kwÿjê ho kapêr punuj to. ¹⁷ Mẽ pahpê Tîrtûm krajaja na pu htem paxàpkur xã nê pahkôm xã pix kukamã pajamaxpêr o ri papa hkêt nê. Na pu htem amnhî mẽ pahkwÿjê mex kukamã pajamaxpêr. Nê mẽ pahte tãm amnhî nhîpêx kukamã pajamaxpêr. Nê tãm axpên nhîpêx kukamã pajamaxpêr. Kot puj mẽ ã amnhî nhîpêx anê nhÿm Tîrtûm Karõ ja hã mẽ pahpumu nê mẽ pahto mẽ pahkînh nê. Pu mẽ pahkînh nê pajamakêtkati nê ri axpên kôt papa. ¹⁸ Tã kot puj mẽ ã Kris mã tanhmã amnhî nhîpêx to ho ri papa anê nhÿm Tîrtûm ja hã mẽ pahpumu nhÿm ja kãm mex nê. Nê Kris kôt mẽ pahkwÿjê mã haxwÿja ja mex nê.

¹⁹ Jakamã kêr pu mẽ tãm axpên mã pakapêr o ri papa. Nê pajamakêtkati nê

axpên kôt ri pajapôj. Nê Kris kôt tanhmã axpên to paxihtÿx to ho ri papa. ²⁰ No kot ka mẽ axàpkur xà gryk ã akwÿ hkukamã ajamxpêr kêt nê atÿx ri mēhō noo mã mẽmoj kur japêr. Kêp omnuj tã ka mẽ ãm amnhĩ pix kukamã ajamxpêr nê noo mã hkur japêr. Hãmri nhũm ja hã mẽ apumu nê ra kot Tirtũm kaga mã. Ra kêp hkra jakamã kwa mẽ noo mã mẽ kot mẽmoj punuj ã harēnh xwÿnhhta kur kêt nê. Nom mẽ paxàpkur xàja piitã mex. Tirtũm kot mẽ pamã òr jakamã piitã mẽ panhõõ. Tã koja akwÿjê hõ Tirtũm kêp mẽmoj omnuj ã hkamnhĩx tã ka mẽ noo mã aku nê ho amnhĩ tomnuj nê. ²¹ Kêr pu mẽ pahkwÿjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamxpêr mex o papa. Mẽmo mẽõ nê mẽmo kagô pē wĩhtija. Tirtũm kot mẽ pamã mẽmoj piitã òr tã no nhũm mẽ pahkwÿjaja kêp ja omnuj nê pu mẽ noo mã hkur rÿ ho pahkõm kêt nê. Mẽmo mry nê mẽmo wĩhti pu mẽ noo mã hkur rÿ ho pahkõm kêt nê.

²² Nê kêr ka mẽ atõ mẽmoj krêr kaxyw nê hkukamã ajamxpêr o:

—Nà kot paj ja krê. Tirtũm kãm ja mex kênã. Anê.

Hãmri nê mãmrĩ Tirtũm kamnàr rom axàmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamxpêr nê hkaga. ²³ No kot kaj mẽ atõ mẽmoj to anhÿr kaxyw nê tee ri amnhĩ kukamã ajamxpêr nê ajamxpêr o:

—Ko kot paj apu ja ho anê nhũm Tirtũm hã ixpumu nhũm ja kêp omnuj nê rÿ ko. Anê.

Hãmri nê tee ri amnhĩ kukamã ajamxpêr. Tã ra ã amnhĩ nhĩpêx anê nê akrê rÿ mẽmoj to anê. Hãmri nhũm Tirtũm tee ri ã ate amnhĩ nhĩpêx anhÿr ã apumu nhũm ja kêp omnuj nê. Ate hkamnàr rom mẽmoj to anhÿr kêt nê amarĩ amnhĩ krã hkôt ho anhÿr jakamã ho amnhĩ tomnuj nê.

15

Mẽ pahte amnhĩ pix kukamã pajamxpêr kêt ã mẽ pamã karõ

Makre 10.45; Wam Korĩt 10.24; Piripos 2.3-5

¹ Nê kêr pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã

mẽ kot Jejus kôt amnhĩ xunhwÿr totuj janhÿr xwÿnhjê jamãr mex nê. Jao mẽ kamã pagryk tokyx anhÿr kêt nê. ãm mẽ kutã panojarêr pix o papa. Jao ra amnhĩ pix kukamã pajamxpêr kêt nê. ² Mãânēn amnhĩ mẽ Kris kôt mẽ pahkwÿjê hkukamã mãn mẽ pajamxpêr. Jao mẽ kot tãm amnhĩ nhĩpêx kaxyw mẽ ho mex o ri papa. ³ Kris na pre jar pa ri amnhĩ pix kukamã hamxpêr kêt nê. Na pre mãânēn ò Papaj kukamã hamxpêr. Jakamã Tirtũm kapêr ã kagà htũm kot kãm kapêr jarēnh kot:

Pa Papaj. Na hte mẽ pahkurê xwÿnhjaja ixto kapêr punuj nê. Nom mãânēn ã ato kapêr o pa anê. Anê.

⁴ Mẽ pakaxyw na Tirtũm kapêr ã kagàja. Mẽ pahte kamã harēnh nê mar nê amnhĩ kaxyw hkôt pajamxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nê. Jao tee ri amnhĩ kukamã pajamxpêr o ri pahkaprĩ hkêt nê. ãm nhÿrmã Tirtũm kot mẽ pahto mex kukamã pajamxpêr o akupÿm paxihtÿx nê pahkĩnh nê ri papa. Mẽ pahkĩnh nê ri papa kaxyw na Tirtũm kapêr ã kagàja. ⁵⁻⁶ Na pu htem Tirtũm kamnàr rom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mẽ ato Tirtũm wÿr to nê kãm:

—Pa Tirtũm. Apê mẽ ijamãr xwÿnh maati na ka. Nê apê mẽ inhõ Pahihti Jejus Kris nhõ Papaj na ka. Nà xep ra Rõm nhõ xwÿnh kwÿjaja kãm akapêr kôt amnhĩ nhĩpêx prãm jakamã kwa tanhmã mẽ hkrã ho mex to kê mẽ hamakêtkati nê ajamxpêr kôt hamxpêr rãhã ho ri akôt pa. Hãmri nhũm mẽ amnhĩ tã apumu nê piitã amex o amex ã ajarê.

Anhÿr o pa hte mẽ ato kuwÿ.

Ijaew kêt xwÿnhjê jarēnh

Atre 10.34; Rômân 9.24; Karatas 3.28

⁷ Nê kwa kêr ka mẽ amã axpên tã ma ho ri apa. Te ho Kris kãm mẽ pahtã mata pyrãk. Jao axpên to mex pix o apa. Kot kaj mẽ ã axpên nhĩpêx anê nhũm mẽ piitã axpên tã mẽ apumu nê mẽ anhÿ hã Tirtũm mã mex o mex ã harê.

⁸ Amnepêm Tirtũm Ijaew mã tanhmã Kris jarēnh to. Kormã pika hwÿr wrÿk kêt

ri nhũm hkukamã nhỹrmã mẽ hwỳr wrỳk nẽ mẽ kamã kator ã harẽ.

Tã nhũm mẽ hwỳr wrỳ nẽ mẽ kamã kato. Ijaew hkanrêhã htàmnhwỳjê kamã kato nẽ mẽ ho mex o ri mẽ hkôt pa. Mẽ kot amnhĩ tã omunh nẽ ã hamaxpêr anhỹr kaxyw. Nẽ hamaxpêr o:

—Amnepê m Tĩrtũm kot mẽ panhĩgê mã hkukamã harênh xà hkôt na mẽ ixwỳr Kraja mẽ nhũm wrỳ nẽ mẽ ixto mex o ri pa. Nã ãm hãmri na pre mẽ ixwỳr kumê.

Anhỹr o hamaxpêr kaxyw. ⁹ Nẽ mẽ apê Ijaew kêt xwỳnhjaja mẽ ajaxwỳja mẽ ate tanhmã kot amnhĩ nhĩpêx to hã harênh mar nẽ Tĩrtũm mã mex o mex ã harênh kaxyw. Nẽ Tĩrtũm kot mẽ akamã ukaprĩ hã mẽ ate amnhĩ tã omunh nẽ mex o mex ã harênh kaxyw na pre wrỳ. Tĩrtũm kapêr ã kagà htũm kot tanhmã mẽ ixpê Ijaew jarênh to nẽ mãânên tanhmã mẽ apê Ijaew kêt xwỳnhjê jarênh to nẽ mẽ pajarênh kot: Kot paj Ijaew kêt xwỳnhjê jamak mã amã amex ã ajarênh o ri mẽ hkôt ixpa.

Nẽ amex ã inhgrer o ri mẽ hkôt ixpa. Anẽ.

¹⁰ Nẽ ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tĩrtũm nhỹ hã akĩnh nẽ ri apa. Anẽ.

¹¹ Nẽ mãânên ja:

E kêr ka mẽ apê Ijaew kêt xwỳnhjaja nẽ krĩ piitã hkôt mẽ apa xwỳnhjaja mẽ apiitã Tĩrtũm mã mex o mex ã harênh o ri apa.

Anhỹr o kot harênh. ¹² Nẽ Tĩrtũm nhỹ hã kapêr o pa xwỳnh finat Ijais haxwỳja Ijaew mã Jejus jarênh o:

Koja nhỹrmã Jese kanrêhã htàmnhwỳjê hõja mẽ pahwỳr kato.

Hãmri nẽ mẽ pahpê Ijaew mẽ Ijaew kêt xwỳnhjê ho amnhĩptar o pa.

Jakamã nhũm mẽ amnhĩ kaxyw hkôt hamaxpêr o pa. Anẽ.

¹³ Nẽ na pa hte tanhmã mẽ ato Tĩrtũm wỳr to ho ri ixpa nẽ kãm:

—Pa Tĩrtũm. Kwa kêr ka Rôm nhõ xwỳnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nẽ hamakêtkati nẽ ri axpên to pa. Nẽ kê Akarõ mẽ ho mẽ hihtỳx o pa kê mẽ amnhĩ kaxyw amã mãn hamaxpêr tỳx rãhã ho ri pa. Anẽ.

Pawre kot hprĩ hã amnhĩ jarênh

Sikũn Pêtre 1.12-13

¹⁴ E Kris kôt ixkwỳjaja. Nã ra ixte mẽ ajarênh mar mex. Na ka xep htem amnhĩ to mex o ri apa. Nẽ mẽmoj to axpên kutã anojarêr rãhã ho ri apa. Nẽ mẽ kot tanhmã Tĩrtũm kapêr kôt amnhĩ nhĩpêx to xàja ka mẽ omunh mex nẽ ho axpên jahkre ho ri apa. ¹⁵ Tã ot pa kagà ja kamã mẽ amã ixujarênh kãm ixihtỳx nẽ. Tĩrtũm nhỹ hã. Ra mẽ ate mẽmoj mar mex tã pa axte mẽ amã harẽ. Mẽ ate mar tỳx nẽ hã anohtỳx kaxyw. Nã ã ixte amnhĩ nhĩpêx anhỹr kaxyw na pre Tĩrtũm mẽ akaxyw ixãm. ¹⁶ Ixte Jejus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nẽ mẽ ato hwỳr o ri ixpa kaxyw. Tã pa hte krĩ hkwỳ kamã ã mẽ akwỳjê mã harênh anhỹr o ri mẽ hkôt ixpa. Nẽ Jejus jarênhja pa hte mẽ hkôt mẽ kãm harênh o ri ixpa. Mẽ kot mar nẽ hkĩnh kãm hkôt amnhĩ nhĩpêx mex kaxyw. Hãmri nhũm Tĩrtũm Karõ mẽ kãm mẽ hamaxpêr nyw jagjê nhũm Tĩrtũm hã mẽ omu nhũm ja kãm mex nẽ nhũm hkĩnh nẽ hamaxpêr o:

—Nã ãm hãmri. Koja mẽ nhỹrmã wa ixri htĩr tũm nẽ mex nẽ pa ho pa. Anẽ.

¹⁷ Tã na pa ixte Jejus Kris nhỹ hã Tĩrtũm mã tanhmã amnhĩ nhĩpêx to ho ixpa hã amnhĩ pumu nẽ ixkĩnh nẽ. ¹⁸⁻¹⁹ Na pa hte ý hã mẽ apê Ijaew kêt xwỳnhjê mã Tĩrtũm kapêr jarênh o ri mẽ akôt ixpa. Nẽ mẽ anoo mã tanhmã ri Kris kot mẽ amã amnhĩ nhĩpêx to hã harẽ. Nẽ mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tĩrtũm Karõ nhỹ hã. Nhũm hte mẽ akwỳjaja amnhĩ jaêr pê omu nẽ kamã no puma nẽ. Hãmri nẽ mẽ pahpyrà nẽ Jejus kôt amnhĩ xunhwỳ. Nom pa hte ã amnhĩ nhĩpêx anhỹr ã amnhĩ pumu nẽ ri hã amnhĩ to jarkrar kêt nẽ. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harênh mex nẽ. ²⁰ Na pa hte mẽ hwỳr inhnojarêr nẽ ã ijamaxpêr anẽ nẽ ijamaxpêr o:

—Kormã mẽ kot Kris jarênh mar kêt xwỳnhjê hwỳr kot paj mỗ. Nom ra mẽ

kot harênh mar xwÿnhjê nhô krî hwÿr inhmôrja inhmã prãm kêt. Anê.

²¹ Tîrtûm kapêr ã kagà htûm kot kapêr mar kêt xwÿnhjê jarênh kot:

Kormã mẽ kot Tîrtûm kapêr mar kêt xwÿnhjaja koja mẽ kuma nê hprî hã mar tÿx nê. Anê.

Pawre kot Rôm wÿr hkrà hã amnhî jarênh Rômân 1.8-15

²² Hêxta waa nê. Inhmã mẽ apumunh prãm tÿx nê Rôm kãm Jejus kôt ixkwÿjaja. Na pa hte xatã mẽ awÿr ixkrà nom kormã mẽ awÿr inhmôr kêt nê. Kormã ixte krî hkwÿ kamã mẽ kãm Kris jarênh o ri ixpa jakamã kormã mẽ awÿr inhmôr kêt nê.

²³ Na pa ra xatã mẽ awÿr ixkrà hã ixtã amgrà xohtô nê. Tã ra jar mẽ kãm Kris kot mẽ panê tanhmã amnhî nhîpêx toja jarênh pa. ²⁴ Jakamã kot paj tokyx ma mẽ awÿr mō. Hãmri nê mẽ awÿr pōj pu mẽ axpên pumu nê pahkînh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wÿr ma mō. Nê kot paj inhnojarêt ka mẽ ixto Tîrtûm wÿ nê inhmã ixàpkur xà hkwÿ gō pa ma mẽ hwÿr pry hã hkur o mō.

²⁵⁻²⁶ No na pa kormã mẽ awÿr inhnojarêt kêt nê. Kot paj ja rûm awjanã nê akupÿm Jerujarê hwÿr mō. Kamã Kris kôt mẽ pahkwÿjaja kêp amrakati nê ri pa nhũm pika pê Gres mẽ Masetôn kamã Kris kôt mẽ pahkwÿjaja mẽ harênh ma nê mẽ kãm kàxpore hkwÿ ho akuprō nê mẽ kaxyw inhmã kugō. Tã kot paj ma mẽ hwÿr o mō nê mẽ kãm kure nê rî kormã ma mẽ awÿr mō. ²⁷ Jerujarê kamã Kris kôt mẽ pahkwÿjaja Ijaew na mẽ. Mẽ kumrêx na prem Kris kôt amnhî xunhwÿ. Hãmri nhũm mẽ hkwÿjaja ma mẽ apê Ijaew kêt xwÿnhjê mã kapêr jarênh o ri mẽ akwÿ hkôt pa. Hãmri nhũm pika pê Gres kamã mẽ pa xwÿnhjaja mẽ kapêr ma nê mẽ uràk nê Kris kôt amnhî xunhwÿr kurê kumrêx. Jakamã amnhî xwar kãm nhãm krî hō kamã Kris kôt mẽ pahkwÿjê ho mex prãm nê. Hãmri mẽ kãm kàxpore hkwÿ ho akuprō nê mẽ kaxyw inhmã kugō.

²⁸⁻²⁹ Tã kot paj ma Jerujarê hwÿr mẽ kãm o mō nê mẽ kãm kure hãmri nê awjanã nê rî kormã ma Rôm wÿr mẽ awÿr mō. Hãmri

nê mẽ awÿr pōj pu mẽ axpên pumu nê pahkînh nê. Nê axpên mã Jejus Kris mex o mex ã harê nê kãm tanhmã amnhî jarênh to ho papa. Jao pahkînh nê papa. Tã pa hpãnhã hamũ ma Espãnhã wÿr mō.

³⁰ Nê na pu prem Jejus Kris o panhō Pahîhti. Jao te mẽ pahpê hkôt axpên to pahtō nê pahtōx pyrak o axpên nhîpêx. Nê Karō nhÿ hã pamã axpên kînh nê. Jakamã kwa Jejus kôt ixkwÿjaja. Kêr ka mẽ ixpê mẽ atō hã ixto Tîrtûm wÿr kãm axihtÿx nê. ³¹ Kêr pa ma pyka pê Jutej kamã Jerujarê kamã Kris kôt mẽ pahkwÿjê hwÿr mō nê mẽ kãm kàxporeta gō nhũm mẽ omu nê Ijaew kêt xwÿnhjê kot mẽ kãm ôr ã mẽ omunh tã tee ri hamaxpêr kêt nê. ãm hkînh kãm mãmrî àmnhîx hamÿ nê ho amnhîm awjaprô.

Nê kêr ka mẽ ixto awÿ kê inhnê mẽ kêp mẽ pahkwÿ hkêt xwÿnhjê pumunh mex nê.

³² E kêr ka mẽ ã ixto Tîrtûm wÿr anê. Kê ixte ma Jerujarê rûm ma Rôm wÿr pâr kãm inhmôrta ã kê ixpumunh mex nê. Pa inhmex pê mẽ kurûm ma mẽ awÿr mōn pōj pu mẽ tokyx axpên pumu nê pahkînh nê. Pa mẽ ate tanhmã amnhî nhîpêx to ho ri apa hã mẽ apumunh o mẽ akôt ri ixpa nê ixkînh nê. ³³ Tã ãm ja pix. Kê Tîrtûm mẽ akôt pa ho pa. Tãm na hte tanhmã mẽ pahto pu mẽ ÿ hã pajamakêtkati paxàmnhîx ri pahkînh nê ri papa.

16

Pawre kot ahpÿnhã hkràmnhwÿjê mã kapêr

¹ Ku nê mãânên ja. Ot pa mẽ awÿr Kris kôt pahtōx Pepreja mẽ awÿr kumê. Na hte krî pê Sênkrej kamã Kris kôt mẽ pahkwÿjê tanhmã mẽ ho mex to ho ri mẽ hkôt pa. ² Nê mãânên pa na hte tanhmã ixto mex to. Tã kê mẽmo arîgro hã mẽ awÿr pōj ka mẽ kêp Kris kôt mẽ pahtōx ã omu nê ho mex nê tanhmã ho ajuta hto.

³ Nê kêr ka mẽ atar Kris kôt ixkràmnhwÿjê mã ijarê. Na pa hte mẽ kãm ijamaxpêr rãhã ho ri ixpa. Nê Akirti mẽ hprô Prisireta ka mẽ wa kãm ijarê. Na pre hte wa inhîhkô hã Jejus Kris mã tanhmã amnhî nhîpêx mex to ho wa pa. ⁴ Jao wa amnhî grônh kôt mẽ kãm ixkurê xwÿnhjê pê ixpytã. Pa amnhî tã wa omu nê inhmã wa hkînh nê. No ãm

papxipix inhmā wa hkīnh kêt nē. Na pre Ijaew kêt xwýnh kwý pê Kris kwýjaja ixtā wa harēnh ma nē haxwýja kām wa hkīnh nē.

⁵ Nē na hte Kris kwýjaja wa ōrkwý kamā axpēn wýr akuprō. Mē kot Tirtūm mā amnhī jarēnh nē kapēr ā kagā hkwý mar kaxyw axpēn wýr akuprō. Tā kēr ka mē mē kām ijarē.

Nē Kris kôt mē pahtō Epēnre mā ijarē. Kēp ixkrāmnhwý mex na. Inhmā hkīnh. Kumrēx na pre jar pika pê As kamā amnhī kaxyw Kris kôt hamaxpēr nē hkôt amnhī xām.

⁶ Nē Kris kôt mē pahtōx Marir ka mē kām ijarē. Na xep hte tanhmā mē ato mex to rūnh o pa.

⁷ Nē Kris kôt mē pahtō ārōhti mē Jūhti wa kām ijarē. Ixpyrà nē wa kēp Ijaew na wa. Kormā ixte Kris kôt amnhī xām kêt ri na pre wa kumrēx hkôt amnhī xām. Na hte Jejus nhý hā mē ahkre ho mē pa xwýnhjaja wa kot Kris kapēr jarēnh mex ā wa harē. Tā ā amnhī nhīpēx anhýrja mýrapē na pre mē hkwýjaja wa unē nē wa haxā pa prem ixpimràatā ixpē prēs nē mē hagjēnh xā kamā ixkrī.

⁸ Nē Kris kôt mē pahtō āpritre mā ka mē ijarē. Kēp Kris kôt ixkrāmnhwý mex na.

⁹ Nē Kris kôt mē pahtō Upānre mā ijarē. Na hte ixpyrà nē Kris mā tanhmā amnhī nhīpēx to ho ri pa.

Nē Kris kôt mē pahtō Etaki mē ijarē. Kēp ixkrāmnhwý mex na.

¹⁰ Nē Kris kôt mē pahtō Apes ka mē kām ijarē. Na prem ra Kris ā hipēx punuj nē no nhūm mē kutā amnhī to htýx nē Kris kaga hkêt nē.

Nē Aristopti nhōrkwý kamā hkwýjē mā ijarē.

¹¹ Nē Kris kôt mē pahtō Erojāwti mā ijarē. Ixpyrà nē kēp Ijaew na.

Nē Nasisti nhōrkwý kamā Kris kwýjaja ka mē kām ijarē.

¹² Nē Kris kôt mē pahtōx Xiripēre mē Xiripos wa kām ijarē. Wa kēp Pahihti Jejus mā tanhmā amnhī nhīpēx mex to xwýnh na wa.

Nē Kris kôt mē pahtōx Pesixti mā ijarē. Haxwýja kēp ixkrāmnhwý na. Na hte Pahihti Jejus mā tanhmā amnhī nhīpēx mex to ho ri pa.

¹³ Nē Kris kôt mē pahtō Rupti mā ijarē. Na hte Kris kôt amnhī nhīpēx mex o ri pa. Nē katorxā mā ijarē. Na pre te ixpē hkra nhīpēx pyrāk o inhīpēx.

¹⁴ Nē Kris kôt mē pahtō Asīnre mā nē Prekōxti nē Emes nē Patopas nē Emas mē. Jajē piitā mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

¹⁵ Nē Kris kôt mē pahtō Pirorti mā nē mē pahtōx Juure mē Nērew wa nē htōxja nē mē pahtō Orīpti wa mē kām ijarē. Nē mē pahkwý kot mē hwýr pikuprōnh xwýnhjē mē mē ho apimràatā mē kām ijarē.

E kēr ka mē jajē piitā mē kām ijarē. Na pa hte mē kām ijamaxpēr rāhā ho ri ixpa.

¹⁶ Nom mē tapxipixjaja kêt. Ā mē apiitā mā na pa hte ijamaxpēr rāhā ho ixpa.

Nē ota jar Kris kwýjaja mē awýr hpēr mē.

¹⁷ Kwa ixkrāmnhwýjaja. Na ka mē ra aprī hā Tirtūm kapēr mar týx nē. Tā kēr ka mē amnhī nē mē kot Tirtūm kapēr o hēx xwýnhjē pumunh mex o apa. Mē kām axpēn nē mē ato hpigrānh par prām. Nē mē ate Kris kaga nē hpānhā mē kot amnhī nhīpēx o amnhī nhīpēxja mē kām hprām jakamā kwa mē amnhī nē mē omunh mex nē axkām ajamak rom. ¹⁸ Na htem ā amnhī nhīpēx anhýr o Pahihti Kris mā tanhmā amnhī nhīpēx to ho pa hkêt nē. Ām amnhī hkrā hkôt tanhmā ri hkwýjē jahkre hto ho pa. Kot mē no kupyw kaxyw tanhmā mē kām hēx to ho ri mē hkôt pa. Te mē ahkre mex pyrāk tā mē ahkre mex kêt nē. Jakamā nhūm htýx ri mē pa xwýnhjaja mē kot mē ahkreja ma nhūm te mē kām mex pyrāk. Jakamā kwa mē okora mē amnhī nē mē omunh mex nē. ¹⁹ Na ka htem mē kurom Kris kôt amnhī nhīpēx mex nē nhūm xep mē piitā mē apumu nē axpēn mā ja hā mē ajarēnh o ri pa. Pa mē ajarēnh ma nē ixkīnh nē. Tā kēr ka mē arī ajamaxpēr mex rāhā ho ri ajamaxpēr o apa. Nē amnhī nhīpēx mex rāhā nē. No tanhmā ajamaxpēr punuj to ho ri amnhī tomnuj o ri apa hkêt nē.

Ã mẽ ate amnhĩ nhĩpêx anhÿrja na inhmã hprãm.

²⁰ Nẽ na hte Satanasti mẽ hkwÿjaja mẽ ate Jejus kaga hprãm xàj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tã mẽ omu nẽ tee ri amnhĩ kukamã ajamxpêr kêt nẽ. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nẽ hpĩr pyræk o mẽ hipêx. Jakamã ã mẽ kot mẽ anhĩpêx anhÿr tã koja Tĩrtũm mẽ amã mẽ ajamakêtkati xàja gõ. Tapxipix na kot mẽ pajamakêtkati xà nhõr kaxyw àhpumunh tÿx.

Nẽ na pa hte mẽ ato Pahihti Jejus wÿ nẽ kãm:

—Pa Pahihti. Kwa kêr ka Rõm kãm akwÿjê pumu nẽ mẽ ho mex nẽ mẽmoj to mẽ kutã anojarêt rãhã ho ri apa. Anẽ.

²¹ Nẽ ota mẽ pahtõ Ximotreja mẽ awÿr hpêr mẽ. Na hte inhĩhkõ hã Kris mã tanhmã amnhĩ nhĩpêx to ho ri pa. Nẽ ixtõ Rusti mẽ Jasãwti mẽ Sosipa wa mẽ haxwÿja mẽ awÿr hpêr mẽ.

²² Nẽ kot inhmã ixkapêr ã kagã xwÿnh Testi haxwÿja mẽ awÿr hpêr mẽ. Kêp Kris kôt mẽ pahtõ na. ²³ Nẽ Kris kôt mẽ pahtõ Gajre haxwÿja mẽ awÿr hpêr mẽ. Őrkwÿ kamã na hte Kris kwÿjaja axpên wÿr akuprõ nẽ kamã Tĩrtũm mã amnhĩ jarẽ nẽ kapêr ã kagã kamã harẽ nẽ mar o hkrĩ. Őrkwÿ kamã na pa pre pøj.

Nẽ mẽ pahtõ Eras haxwÿja mẽ awÿr pêr mẽ. Na hte jar krĩ ja kamã Rõm nhõ pahihti mã õ kàxpore jamãr pê ho mẽmoj to anhÿr o pa.

Nẽ Kris kôt pahtõ Kwatre haxwÿja mẽ awÿr hpêr mẽ. E jajaja piitã na mẽ awÿr hpêr rẽ.

²⁴ E kê Pahihti Jejus Krisja mẽ akutã nojarêt rãhã ho pa.

*Pawre kot Tĩrtũm mex o mex ã harênh
Epes 1.3, 3.20-21; Wam Ximotre 1.17;
Eprêw 13.20; Jutre 24-25*

²⁵ Nẽ kwa kêr pu mẽ Tĩrtũm mã mex ã harênh rãhã ho ri papa.

Nẽ ixte mẽ amã Jejus Kris jarênhhta ã ka prem ama nẽ hkôt amnhĩ xunhwÿ. Tã koja mẽ ato mẽ axihtÿx ka mẽ hkôt axihtÿx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt

xwÿnhjê ho hkra kaxyw hã amnhĩ jarênh kêt nẽ. Kormã ja ho hpimxur ryy nẽ. ²⁶ Tã ã mẽ anhĩpêx anhÿrja o amnhĩrĩt nẽ ÿ hã mẽ kapêr jarênh o ri pa xwÿnhjê mã kapêr nẽ mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagã kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêt nẽ. Kê pika piitã hkôt kamã harẽ nẽ kuma. Panhĩ nẽ kupê nẽ kupê hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarênh ma nẽ amnhĩ kaxyw hkôt hamaxpêr nẽ hkôt amnhĩ xunhwÿ. Hãmri nẽ hkôt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma nẽ hã kagã.

²⁷ Nã Tĩrtũmja tapxipix na àhpumunh tÿx xwÿnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awÿr ixpêr mênh anẽ. Na hapêx.

Wam Korî Pawre kot Korî kãm Jejus kôt hkwýjê hwýr kagà nê mēnh

Pawre na pre kagàja nhîpêx. Jejus nhÿ hã kapêr jarênh o pa xwýnhjê hô na pre. Na pre hipêx nê ma krî pê Korî kãm Jejus krajê hwýr kumê. Nê kagàja kamã mē kãm tanhmã mēmoj tâ karô hto. Na pre mē kot àhpumunh tÿx ã amnhî to jarkrar o pa nê mē kãm kapêr. Nê tanhmã amnhî tomnuj to nê mē kãm kapêr. Nê mē hprô nê mē mjên xwýnhjaja tanhmã wa kot axpên nhîpêx to hã mē kãm karô. Nê mē kot Tîrtûm mã mex o mex ã harênh kaxyw axpên wýr mē pikuprônê nê tanhmã amnhî nhîpêx to hã nhûm mē kãm karô. ã na pre Pawre mē kãm mēmoj tâ karô nê hã kagà anê. Nê mē kãm:

¹ Pa Korî kãm Jejus kôt ixkwýjaja. Xà mē amex? Ot pa mē awýr kagàja nhîpêx nê kumê. Ixpê Pawre na pa Kris kôt mē pahtô Sostenes mē wa awýr ixpêr mē. Tã kagàja nhîpêx nê mē awýr kumê. Tîrtûm na pre ixte Jejus Kris nhÿ hã mē ajahkre ho ri ixpa kaxyw ixãm. ² Tã ot pa mē awýr kagà nhîpêx nê mēnh mã. Korî kãm ixpyrà nê mē apê Tîrtûm krajê hwýr.

Tîrtûm kot amnhî kaxyw mē axunhwýr jakamã na ka prem amnhî tomnuj kaga nê Kris kôt amnhî xunhwý nê hkôt amnhî nhîpêx mex o ri apa. Krî piitã hkôt mē kot amnhî to Jejus Kris wýr o mē pa xwýnhjê pyrà nê. Mē panhõ Pahihti Jejus Krisja ãm pixi mex na.

³ Nê Tîrtûm kêp Mēpahpãm maati nê Jejus Kris kêp mē panhõ Pahihti jakamã na pa hte mē ato wa hwýr rãhã o ri ixpa nê mē ato wa hwýr o:

—Kwa Tîrtûm mē Jejus wa. Kêr ka wa Korî nhõ xwýnhjê kutã anojarêr rãhã ho wa ri apa. Nê mē ho mex rãhã nê. Kê mē amnhî tâ war apumunh kôt ri hamakêtkati nê hkînh nê àmnhîx tanhmã ri amnhî nhîpêx to ho ri pa. Anê.

Tîrtûm kot Jejus Kris kukwak ri mē pahto mex ã harênh
Sikûn Pêtre 1.2; Wam Tesarôn 5.23-24

⁴ Nê mē ate amnhî kaxyw Jejus Kris kôt ajamaxpêr o ri apa jakamã na hte Tîrtûm mē ato mex nê. Tã pa hte kãm amnhî jarênh kaxyw nê kãm mē ajarênh o:

—Pa Tîrtûm. ãm hãmri na ka pre Korî nhõ xwýnh kwýjê ho akra. Nã ja mex o mex. Anê.

⁵ Nê ra mē ate Kris kôt amnhî xunhwýr jakamã na ka mē ra amex kumrêx nê ri apa. Nê aprî hã Kris kot amnhî nhîpêx pumunh mex nê aprî hã akwýjê mã harênh o ri mē hkôt apa. ⁶ Na pa pre mē awýr mō nê mē amã Kris kot amnhî nhîpêx ã harênh o ri mē akôt ixpa. Ka prem inhma nê hkôt amnhî xunhwýr tÿx kurê kumrêx.

⁷ Jakamã nhûm Tîrtûm mē ate kãm tanhmã amnhî nhîpêx to ho apa kaxyw mē ato mē axihtÿx. Nê kaxyw mē amã mē ate axpên to mex xà piitã mē amã kugõ. Mē ate Jejus kot akupÿn mē pahwýr wrÿk jamãr pê hapêr arît o apa pê tanhmã kãm axpên nhîpêx to ho apa kaxyw. ⁸ Koja Tîrtûm tanhmã mē akrã hto ka mē hkôt pix mã ri amnhî nhîpêx rãhã nhûm Pahihti Jejus Krisja akupÿn mē pahwýr wrÿ. Hãmri nê mē ate amnhî nhîpêx ã mē apumu nê mē ajarênh o:

—Nã ãm hãmri na hte jajaja amnhî to mex pix o ri pa. Anê.

⁹ Nê koja Tîrtûm ra kot amnhî jarênh xà hkôt mē ato mex nê. Ra kot mē ate Pahihti Jejus Kris kôt apa kaxyw amnhîm mē axunhwýr jakamã koja ra kot amnhî jarênh xà hkôt mē ato mex rãhã nê.

Mê pahte mēmoj tâ axpên pê pahpigrànê kêt ã mē pamã karô

Rômãn 15.5-6; Sikûn Korî 13.11; Epes 4.1-6; Piripos 2.1-4; Wam Pêtre 3.8

¹⁰⁻¹¹ E Kris kôt ixkwýjaja. Na ka xep htem mēmoj tâ axpên mã axàkjêr pix o ri apa nhûm pre Krojre hkwýjaja amnê ixwýr pøj nê inhma mē ajarê. Kwa nã mē ã amnhî nhîpêx anhÿr kêt nê. Kêr ka mē axpên kôt ri amnhî nhîpêx rãhã ho ri apa. Nê axpên kôt ri ajamaxpêr rãhã nê. Te ixkre tipxi kamã mē ri apa pyràk o mãn kêt mē axpên nhîpêx o ri axpên kôt apa. Nê mē axpên kutã anojarêr rãhã ho ri apa. No mēmoj tâ axpên mã axàkjêr pê axpên pê apigrànê kêt

ně. Na pa Pahшти Jejus Kris nhỹ hã mẽ amã ã ja hã karõ aně.

¹² Ně na ka xep htem ahpỹnhã ri mẽ apě mẽ ixkwỳ hã amnhĩ jarěnh o ri apa. Jao mẽ akwỳjaja pa ixkõt ri amnhĩ nhĩpêx xwỳnh ã amnhĩ jarě. Ně mẽ akwỳjaja axtem Apor kõt ri amnhĩ nhĩpêx xwỳnh ã amnhĩ jarě. Ně mẽ akwỳjaja axtem Simãw Pêtre hkõt amnhĩ nhĩpêx xwỳnh ã amnhĩ jarě. Ně mẽ akwỳjaja axtem Kris kõt amnhĩ nhĩpêx o ri apa xwỳnh ã amnhĩ jarě. ã na ka xep htem ahpỹnhã amnhĩ jarěnh anhỹr o ri pa.

¹³ Kwa nã ka mẽ ã ahpỹnhã amnhĩ jarěnh aně nẽ te mẽ ate Kris o apigrãnh pyrãk o hipêx. Kwa mon ka hte mẽ akwỳjaja apě ixkwỳ hã amnhĩ jarě? Xà pa na pa pre pĩ kahpa hã ajêt nẽ mẽ aně ty? Nã Kris pix na pre mẽ panê hã ajêt nẽ ty. Xà mẽ apě pa ixkwỳ hã amnhĩ jarěnh kaxyw na prem mẽ akrã kumrã? Nã mẽ apě Kris kwỳ hã amnhĩ jarěnh kaxyw na prem ã mẽ anhĩpêx aně. Mẽ kot ja hã mẽ apumunh xwỳnhjaja kot mẽ apě Kris kwỳ hã mẽ apumunh kaxyw. Tã na ka xep htem axtem nẽ ã ri ahpỹnhã mẽ kãm amnhĩ jarěnh anhỹr o ri apa.

¹⁴⁻¹⁵ Kop ãm ixte amnhĩ kõt mẽ axunhwỳr prãm ronhỹx pa mẽ ato mẽ axohtõ nẽ mẽ akrã kumrã nẽ mẽ amã: “E ra mẽ apě ixkwỳ na ka mẽ.” Aně. Nom na pa pre ã mẽ amã ixkapěr anhỹr kêt nẽ. ãm hãmri na pa pre ãm mẽ ato grêre nẽ mẽ akrã kumrã. ãm Kripti mẽ Gajre wa pix. ¹⁶ Ku nẽ xep mããnẽn Estepti nẽ kaxyw mẽ hkwỳjaja. ãm jajê pixjaja. Nom ko apu axte mẽ hkwỳ ko. Ixte mẽ hkrã kumrãr xwỳnhjê mã ijamaxpěr tỳx kêt. ¹⁷ Na pre Kris ixte mẽ hkrã kumrãr o ri ixpa kaxyw ixãm kêt nẽ. ãm ixte mẽ kãm kapěr jarěnh o ri mẽ hkõt ixpa pix kaxyw na pre ixãm.

Ně na pa hte amnhĩ krã hkõt ri ixujarěnh o ri mẽ akõt ixpa hkêt nẽ. Kot pa ã amnhĩ nhĩpêx aně nhũm mẽ ixkapěr mex ã inhma nẽ pa ixkõt amnhĩ xunhwỳ. Ja pymaj na pa hte amnhĩ krã hkõt ri tanhmã ixujarěnh to ho ri ixpa hkêt nẽ. Na pa hte ãm ixprĩ hã Kris kot tanhmã mẽ panê amnhĩ nhĩpêx to hã harěnh o ri mẽ hkõt ixpa. Mẽ pahpiitã mẽ panê htyk ã harěnhja pa hte mẽ kãm harě. Mẽ kot hprĩ hã mar nẽ hkõt amnhĩ xunhwỳr kaxyw. Jao amnhĩ krãm

mẽ ujarěnh mexta jagjênh nẽ hã no htỳx kaxyw. Pa ja hã mẽ omu nẽ ixkĩnh nẽ ijamaxpěr o:

—Nã htem ixkapěr ma nẽ Jejus kõt amnhĩ xunhwỳr kurê kumrêx. Nã ãm hãmri na pa hte mẽ kãm ixkapěr kaprỳ ho ri ixpa hkêt nẽ. Aně.

¹⁸ No kêt mẽ pahte Tĩrtũm kot mẽ pahto hkra xwỳnhjaja ra mẽ pahte Kris pĩ kahpa hã mẽ panê htyk ã harěnh mar nẽ pahkĩnh nẽ papa xwỳnh na pu mẽ. Jakamã na pu htem pajamaxpěr o:

—Nã ãm hãmri na Tĩrtũm Kraja htyk kukwak ri mẽ ixto mex nẽ mẽ ixto hkra. Mẽ ujarěnhja mex kumrêx. Aně.

No kêt mẽ kệp hkra hkêt xwỳnhjaja na htem tee ri Kris tyk ã harěnh ma nẽ hamaxpěr o:

—Tk. Tanhmã kot kêt we amnhĩ to nẽ mẽ panê ty? ãm amarĩ mẽ kot amnhĩ krã hkõt pĩ kahpa hã nhôr nẽ hpĩr kẽnã. Aně.

*Tĩrtũm kra hkêt xwỳnhjê jarěnh
Matêwre 11.25-26; Wam Korit 3.19*

¹⁹ Nẽ Tĩrtũm kapěr ã kagã htũm kot mẽ kệp hkra hkêt xwỳnhjê jarěnh kot:

Mẽ kot htỳx ri àhpumunh tỳx ã amnhĩ to jarkrar o pa htã kot paj mẽ kệp ja ho ijapêx pa nhũm mẽ ã amnhĩ jarěnh anhỹr kaprỳ. Aně.

²⁰ Jakamã mẽ àhpumunh tỳx ã mẽ kot amnhĩ to jarkrar xwỳnhjaja nẽ mẽ kot Mojex kapěr o mẽ ahkre ho ri mẽ pa xwỳnhjaja nẽ mẽ kapěr rũnh xwỳnhjaja. Mẽ kot Tĩrtũm Kra hkõt amnhĩ xunhwỳr kêt jakamã te mẽ àhpumunh kêt pyrãk. Tĩrtũm kra hkêt xwỳnhjaja kot mẽ àhpumunh tỳx ã mẽ harěnh tã no ãm Tĩrtũm noo mã te mẽ àhpumunh kêt pyrãk. Nẽ te htỳx ri mẽ kot amnhĩ nhĩpêx o pa pyrãk. ²¹ Tĩrtũm àhpumunh o àhpumunh jakamã na pre ra mẽ hkukamã hamaxpěr o:

—Nã kot paj mẽ àhpumunh tỳx ã mẽ omunh xà hkõt mẽ ho ixkra hkêt nẽ. ãm mẽ kot ixkra Jejus kot mẽ nẽ htyk ã harěnh mar nẽ amnhĩ kaxyw hkõt hamaxpěr pix ã mẽ omunh xà hkõt kot paj mẽ ho ixkra. Aně.

²²⁻²⁴ No Ijaewjaja kãm amnhĩ krã hkõt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nẽ mẽ kãm Kris kapěr jarěnh o ri ixpa nhũm

mē inhma nē ãm mē inhma. Nē te mē kot mē inhmar kêt pyrã nē mē inhmã:

—Tk. Nà kot paj mē tokyx axujarēnh kôt amnhĩ nhĩpêx kêt nē. Kot kaj mē inhmã mē ixte aa mēmoj pumunh kêt õ ho anē pa mē ja hã apumu nē axihtỳx ã apumu nē rĩ kormã hkôt amnhĩ nhĩpêx.

Anhỳr o inhmã kapêr. Tã no pa mē kãm ã amnhĩ nhĩpêx anhỳr kêt nē. ãm Kris kot mē panê pĩ kahpa hã htykja pix pa htem mē kãm harēnh o ri ixpa. Ja kamã nhũm mē hkwyjaja mē inhma nē ãm mē inhma nē Kris xihỳx kêt ã ãm amarĩ htyk ã harē. No mē hkwyjaja. Tĩrtũm kot amnhĩ kaxyw mē unhwỳr xwỳnhjaja na htem mē kurom mē inhma nē ra mē inhmar tỳx kurê kumrêx. Nē mē inhmã kapêr o:

—Nà ãm hãmri na Krisja Tĩrtũm pyrã nē hihtỳx o hihtỳx. ãm hãmri na ka ã harēnh anē. Anē.

No Ijaew kêt xwỳnhjaja na Ijaew pyrã nē kãm amnhĩ krã hkôt amnhĩ nhĩpêx o pa hprãm kêt nē. Nē mē kãm mē àhpumunh tỳx pix prãm o pa. Jakamã na pa htem mē kãm Kris kapêr jarēnh o ri mē hkôt ixpa nhũm mē hkwyjaja mē inhma nē Ijaew kwỳjê pyrã nē ãm mē inhma nē mē inhmã:

—Tk. Nà na ka htem ãm ri axêx o ri apa. Kot pa mē akapêr mar kêt nē. Kot paj mē axàhpumunh tỳx ã mē apumu nē rĩ kormã mē ama nē mē akôt amnhĩ nhĩpêx.

Anhỳr tã pa mē ãm arĩ Kris kot mē panê htykja pix pa mē kãm harēnh o ri mē hkôt ixpa. Nhũm mē hkwyjaja mē inhma nē mē inhmã:

—Nà mē axàhpumunh kêt jakamã na ka htem atỳx ri ã ja jarēnh anē.

Anhỳr tã no nhũm mē hkwyjaja. Tĩrtũm kot amnhĩ kaxyw mē unhwỳr xwỳnhjaja na htem mē inhma nē mē inhmã kapêr o:

—Nà ãm hãmri na ka mē ã Krisja jarēnh anē. Tĩrtũm pyrã nē àhpumunh o àhpumunh kênã. Anē.

²⁵ Tĩrtũm mē Jesus wa mē pakurom àhpumunh o àhpumunh nē hihtỳx o hihtỳx.

Tĩrtũm mē parom hihtỳx o hihtỳx ã harēnh Matêwre 11.25; Sikũn Korīt 12.7-10; Xi-akre 2.5

²⁶ E Kris kôt ixtõ nē ixtõxjaja. Amnepê mã Tĩrtũm kot amnhĩm mē axunhwỳrta ã tanhmã na ka prem amnhĩ nhĩpêx to ho ri

apa? Nà na ka prem axohtõ nē jar mē noo mã axàhpumunh kêt nē ri apa. Nē mē apê pahĩ hkêt nē ri apa. Mē axohtõ nē amnhĩ to hkryre nē ri apa. ²⁷ Tã nhũm Tĩrtũm amnhĩ kôt mē ate amnhĩ to hkryre xwỳnhjê xunhwỳ. Kojã nhỹrmã kot tanhmã mē pahpiitã mē pajarēnh to xà hã arĩgrota kato hãmri nhũm mē àhpumunh tỳx ã amnhĩ to jarkrar xwỳnhjaja Tĩrtũm kot mē kurom mē pahto hkra hã mē pahpumu hãmri nē tee ri amnhĩ kukamã hamaxpêr nē amnhĩ kamã hpijaam tỳx nē. Nē mē hihtỳx ã amnhĩ to jarkrar xwỳnhjaja haxwỳja. Nhũm Tĩrtũm kot mē kurom mē pahto hkra hã mē pahpumu nē tee ri amnhĩ kukamã hamaxpêr nē amnhĩ kamã hpijaam tỳx nē.

²⁸ Na hte Tĩrtũm amnhĩ kaxyw mē kot amnhĩ to hkryre xwỳnhjê xunhwỳ. Nē mē kot mē kamã kahak o pa xwỳnhjê xunhwỳ. Jar pyka ja kamã mē hkwy kot mē hkaga htã nhũm Tĩrtũm amnhĩ mã mē unhwỳ. Mēmo kaxyw na hte ã amnhĩm mē unhwỳr anē? Nà mē kot nhỹrmã tee ri mē àhpumunh tỳx ã amnhĩ jarēnh xwỳnhjê pumunh nē axpên mã mē harēnh o:

—Kwa mē pahte mē àhpumunh tỳx ã mē harēnh tã nhũm Tĩrtũm mē pahpyrà nē amnhĩ kaxyw mē unhwỳr kêt nē. Nà te mē àhpumunh kêt pyrãk.

Anhỳr o axpên mã mē harēnh kaxyw na pre Tĩrtũm amnhĩm mē kot amnhĩ to hkryre xwỳnhjê xunhwỳ. ²⁹ Jakamã kot puj mē nhỹrmã Tĩrtũm mã amnhĩ to jarkrar pē tanhmã kãm amnhĩ jarēnh to hkêt nē. Rỳ kãm:

—Kwa ga ixpumu Tĩrtũm. Na pa hte ã amnhĩ nhĩpêx anē nē ã amnhĩ nhĩpêx anē. Kwa ja hã ixpumu nē ixto akra nà?

Anhỳr o amnhĩ to hwỳr kêt nē. ³⁰ ãm Jesus pix kukwak ri na hte Tĩrtũm mē pahto hkra. Tãm na pre Tĩrtũm noo mã amnhĩm mē paxunhwỳ. Mē pahte urãk nē pahpê hkra kaxyw. Jakamã na pu htem ãm pix kukwak ri amnhĩ nhĩpêx mex o ri papa. Nhũm mē pamã àhpumunh tỳx xà hkwy gõ. Tã ra kot mē pahte amnhĩ tomnuj pē mē papytãr jakamã kot puj mē nhỹrmã pahtyk tã no ãm akupỹm pahtĩr nē Tĩrtũm mē wa kuri pahtĩr tũm nē pamex kumrêx nē papa ho papa. ³¹ Tã ã Jesus kot mē panhĩpêx kot

anhÿr jakamã Tirtÿm kapër ã kagà htÿm kot ja jarënh kot:

Kot ka mẽ amã mẽmoj tã jarkrar prãm nom kër ka mẽ kamjaja amnhĩ to jarkrar kêt nẽ. Mẽ panhõ Pahihti ra kot mẽ panê tanhmã amnhĩ nhĩpêx toja pix ã tanhmã ho jarkrar to ho ri apa. Anẽ.

2

Pawre kot tanhmã Kris jarënh to hã harënh

Sikÿn Korit 4.1-7; Wam Pêtre 3.15

¹⁻² E Kris kôt ixtõ nẽ ixtõxjaja. Amnepê mã ixte mẽ awÿr inhmõrta ã na pa pre inhnojarêt nẽ ijamaxpër o:

—Kot paj ma mẽ hwÿr mõ nẽ mẽ kãm Kris kapër jarë. Kot amnhĩ grõnh kôt mẽ inhnê htykja pa mẽ kãm harë. ãm ja pix jarënh o ri mẽ hkôt ixpa. Nom kot paj mẽ kapër japjê xwÿnhjê pyrã nẽ mẽ kãm ixkapër japjê hkêt nẽ. Rÿ mẽ urak nẽ te ixàhpumunh tÿx o ri ixkapër japjê pyrãk o ri mẽ kãm ixkapër japjê hkêt nẽ. Kot paj ãm ixkatat kôt ri mẽ kãm tanhmã Jesus jarënh to pix o ri mẽ hkôt ixpa.

Anhÿr o mẽ akukamã ijamaxpër. Hãmri nẽ ma mẽ awÿr mõ nẽ mẽ awÿr pøj nẽ mẽ amã Jesus kot mẽ panê htyk nẽ akupÿm htĩrja pix jarënh rãhã ho ri ixpa. ³ Na pa pre tee ri amnhĩ kukamã ijamaxpër nẽ ijamaxpër o:

—Hêxta waa nẽ. Tanhmã kot pa we mẽ kãm Tirtÿm kapër jarënh to nhÿm mẽ inhmar tÿx nẽ hkôt amnhĩ xunhwÿr kurê kumrêx wehe? Kot paj amnhĩ krã hkôt mẽ kãm harënh kêt nẽ. Ja kaxyw ijamaxpër tÿx kêt kênã. Kot paj amnhĩ krã hkôt mẽ kãm harë nhÿm mẽ ãm inhma nẽ hkôt amnhĩ xunhwÿr kêt nẽ. Nã kot paj Tirtÿm nhÿ hã mẽ kãm tanhmã ixkapër to kê tãm tanhmã mẽ hkrã hto kê mẽ inhma nẽ hkôt amnhĩ xunhwÿr japêr.

Anhÿr o ijamaxpër. ⁴ Nẽ mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nẽ. Rÿ mẽ pajaja mẽ ixàhpumunh xà hkôt tanhmã mẽ amã ixkapër to hkêt nẽ. Na pa pre ãm Tirtÿm Karõ nhÿ hã mẽ amã awjarë. Mẽ ate mar nẽ hihtÿx o hihtÿx ã omunh kaxyw. ⁵ Jakamã na ka prem Tirtÿm xihtÿx

ã omu nẽ amnhĩ kaxyw hkôt ajamaxpër kurê kumrêx. No pa ixàhpumunh tÿx ã ixpumunh kôt ixkôt ajamaxpër kêt nẽ. Na ka prem ixkapër ma nẽ ajamaxpër o:

—Nã Tirtÿm na mẽ parom àhpumunh o àhpumunh nẽ hihtÿx o hihtÿx.

Anhÿr o ajamaxpër kôt ajamaxpër kurê kumrêx.

Tirtÿm Karõ kot mẽ pamã àhpumunh xà nhõr ã harënh

Matêwre 7.6; Juãw 14.22, 16.13-15; Xiakre 3.13-18

⁶ Nẽ na hte Tirtÿm kra hkwÿjjaja Tirtÿm kot amnhĩ nhĩpêx ã omunh mex. Nẽ hamaxpër ã omunh mex. Jakamã na pa hte mẽ ahkre japjê ho mẽ hkôt ixpa. Nom jar pika ja kamã mẽ pajamaxpër tÿx xà ho mẽ ahkre hkêt nẽ. Rÿ pika piitã hkôt mẽ utar xwÿnhjê jamaxpër tÿx xà ho ri mẽ ahkre ho ri ixpa hkêt nẽ. Koja nhÿrmã mẽ àhpumunh xàja mẽ kêp hapêx pa. ⁷ Jakamã na pa hte ãm Tirtÿm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tirtÿm amnhĩ kukamã amnhĩ jarënh o:

—Mẽ kot amnhĩ kaxyw Ixkra hkôt mẽ hamaxpër o mẽ pa xwÿnhjaja kot paj mẽ ho ixkra nhÿm mẽ mex kumrêx nẽ pa ho pa.

Anhÿr o mẽ harë. Nom mẽ kot hkôt amnhĩ xunhwÿr kêt xwÿnhjaja nhÿm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harënh rãhã ho ri mẽ hkôt ixpa nhÿm mẽ Tirtÿm kãm mẽ pahto hkra hprãm hã harënh ma. ⁸ Nom pika piitã hkôt mẽ ho amnhĩptar xwÿnhjaja na mẽ kormã ja mar kêt nẽ. Kêp apu mẽ kot mar ronhÿx prem pĩ kahpa hã mẽ panhõ Pahihti nhõr nẽ hpĩr kêt nẽ. Mex o mex tã nhÿm prem axtem nẽ ã hipêx anẽ. ⁹ Mẽ kot mẽmoj mex pumunh kêt tã Tirtÿm kapër ã kagà htÿm kot mẽmoj mex jarënh kot:

Na pre Tirtÿm mẽ kãm hkĩnh xwÿnhjê kutêp mẽmoj mex kwÿ jaxwÿ nhÿm mex o mex nẽ mẽ ahã hikwÿ.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhÿr pumunh kêt.

Nẽ aa ã mẽmoj mex kot anhÿr kukamã hamaxpër kêt.

Tã nhũm Tirtũm mẽ kutêp hkwỳ jaxwỳ.
 Anhÿr o kot harênh tã no nhũm mẽ kot
 hkôt amnhĩ xunhwÿr kêt xwỳnhjaja ã kapêr
 anhÿrja mar kêt nê. ¹⁰ Mẽ pamã na pre
 Tirtũm ja ho amnhĩrît. Na pre ra mẽ pamã
 Karõ gõ nhũm mẽ pamã gjêx o mẽ pamã
 mẽmoj to amnhĩrît mex nê. Tirtũm Karõja
 àhpumunh tÿx o àhpumunh tÿx. Nê kot hprĩ
 hã Tirtũm jamaxpêr pumunh par. ¹¹ No
 mẽ papajaja na pu htem axpên jamaxpêr
 kôt axpên pumunh kêt nê. Na pu htem
 papam amnhĩ jamaxpêr ã amnhĩ pumu. Ja
 pyrã nê Tirtũm Karõ pix na hte Tirtũm ja-
 maxpêr pumunh. ¹² No mẽ pahpê hkrajaja
 na hte mẽ pahkarõja pix mẽ pakamã pa
 hkêt nê. Na hte mãânên Tirtũm Karõja mẽ
 pakamã pa nê mẽ pamã tanhmã mẽmoj to
 amnhĩrît to ho mẽ pahkôt pa. Nê Tirtũm kot
 mẽ pakutêp mẽmoj mex jaxwÿrja nhũm ja
 kukamã mẽ pamã harênh o amnhĩrît.

¹³ Jakamã na pa htem amnhĩ krã hkôt ri
 mẽ kãm ixujarênh kêt nê. ãm Tirtũm Karõ
 nhÿ hã na pa hte ixprĩ hã mẽ kãm kapêr
 jarênh o ri mẽ hkôt ixpa. Ra Tirtũm Karõ kot
 mẽ amã gjêx xwỳnhjê mã pa ÿ hã ixkapêr.
¹⁴ No mẽ kãm Tirtũm Karõ kapêr mar prãm
 kêt xwỳnhjaja na htem Tirtũm kot amnhĩ
 nhĩpêx pumu nê hprĩ hã omunh kêt nê. Mẽ
 kãm kapêr mar prãm kêt jakamã na htem ri
 kot tanhmã mẽ pahto mex to hã harênh ma
 nê hamaxpêr o:

—Tk. Kwa mo kaxyw na htem ri ã Tirtũm
 jarênh anê? Tanhmã kot we amnhĩ to nê
 mẽ pahto mex? Nà kot anhÿr kêt. Anê.

¹⁵ Nom mẽ pahpê Tirtũm kra hkwỳ hã mẽ
 pahte Karõ kapêr mar mex xwỳnhjaja na pu
 hte mẽ kurom Tirtũm kot amnhĩ nhĩpêx ã
 omunh mex nê. Nê Karõ xô ri mar mex nê
 nhũm mẽ kot Karõ kapêr mar kêt xwỳnhjaja
 tee ri ã mẽ pahte amnhĩ nhĩpêx anhÿr ã mẽ
 pahpumu. Nom hprĩ hã mẽ pahte Tirtũm
 kôt amnhĩ nhĩpêx pumunh kêt nê. ¹⁶ Tirtũm
 kapêr ã kagã htũm kot ja jarênh kot:

Mêhõ na kot Tirtũm jamaxpêr pumunh?

Nê mêhõ na pre we kãm hamaxpêr gõ?

Nà amrakati kumrêx. Tapxipix na
 àhpumunh tÿx o àhpumunh tÿx. Anê.

Tã mẽ papajaja mẽ pahte Tirtũm Karõ
 kapêr mar tÿx xwỳnhjaja na pu htem Kris xô
 ri pahprĩ hã hamaxpêr kôt omunh mex nê.

3

*Mẽ kot Tirtũm mã tanhmã amnhĩ nhĩpêx
 to xwỳnhjê jarênh*

*Wam Korît 14.20; Karatas 5.16-21; Epes
 4.14; Eprêw 5.11*

¹ E Kris kôt ixtõ nê ixtõxjaja. Pa mẽ
 amã mẽmoj jarê ka mẽ inhma nê kãm aja-
 maxpêr. Nà amnepê mã kormã mẽ ate
 Kris kôt amnhĩ nhĩpêx tohtuj anhÿrta ã
 tanhmã na ka prem amnhĩ nhĩpêx to ho
 ri apa wehe? Na ka prem arĩ ajamaxpêr
 tũm kôt pix mã amnhĩ nhĩpêx. Kormã mẽ
 ate Tirtũm Karõ hkôt amnhĩ nhĩpêx mex
 kêt jakamã na ka pre htem mēhprĩre kot
 amnhĩ nhĩpêx pyrãk o amnhĩ nhĩpêx. Nê
 mẽ urak nê kormã mẽmoj piitã omunh kêt
 nê. Jakamã na pa pre mẽ amã ixujarênh
 kaxyw nê te mẽ ate kormã Tirtũm kapêr
 mar kêt xwỳnhjê pyrãk o mẽ anhĩpêx nê mẽ
 amã tanhmã ixujarênh to. ² Mẽ hkarãre na
 htem mẽ hkã kagõ pix kaõ nê kormã mẽ
 apkur xà mex kur kêt nê. Ja pyrã nê na pa
 pre te ixte mẽ ato hpijaõr pyrã nê mẽ amã
 Tirtũm kapêr piitã harênh par kurê kumrêx
 kêt nê. ãm mẽ amã hkwỳ pix jarê ka prem
 ama nê Jejus kôt amnhĩ xunhwÿ. Tã na pa
 hte arĩ mẽ amã hkwỳ pix jarênh o ri ixpa nê
 kormã piitã ho mẽ ajahkre jatur xãm mēnh
 kêt nê. ³ Na ka htem arĩ te mẽ apê Kris kwỳ
 hkêt pyrãk o amnhĩ nhĩpêx o apa. Nê mẽmoj
 kôt axpên kãm agryk axpên mã axàkjêr o
 apa. ã amnhĩ nhĩpêx anhÿr jao arĩ mẽ ate
 amnhĩ nhĩpêx tũm kôt amnhĩ nhĩpêx rãhã
 nê.

⁴ Na hte mẽ akwỳjaja amnhĩ jarênh o:
 “Ixpê Pawre hkwỳ na pa.” Anê. Nê mẽ
 akwỳjaja amnhĩ jarênh o: “Pa na ixpê Apor
 kwỳ na pa.” Anê. Kwa na ka htem ã amnhĩ
 jarênh anhÿr o te mẽ apê Kris kwỳ hkêt
 pyrãk. ⁵ Apor mẽ pa ãm wa ixte Tirtũm
 kapêr o mẽ ajahkre xwỳnh pix na pa wa.
 Wa ixpê mẽ anhõ pahihtĩ hkêt kēnã kot
 ka kêt mẽ axtem nê mẽ apê ahpÿnhã wa
 ixkwỳ hã amnhĩ jarê. Na pa pre wa mẽ
 amã Tirtũm kapêr jarênh o ri mẽ akôt ixpa
 ka prem wa inhma nê amnhĩ kaxyw hkôt
 ajamaxpêr tÿx nê. Nê hkôt amnhĩ xunhwÿ
 nom wa pa wa ixkôt amnhĩ xunhwÿr kêt
 nê. Na pa wa ãm Tirtũm kapêr o mẽ ajahkre
 nom amnhĩ kôt mẽ axunhwÿr kêt nê.

6-9 E pa ixprĩ hã mẽ amã war amnhĩ jarẽ ka mẽ inhma. Te wa ixpê Tirtũm pur kãm wa ixapênh xwýnh pyrãk no mẽ kajaja te mẽ apê hpur pyrãk. Na htem hpur karê nhũm hirã nhũm mẽ kamã ahkre ho pa. Ja pyrã nẽ na pa pre ixkumrêx mẽ awýr ixpa nẽ mẽ amã Tirtũm kapêr jarênh o ri mẽ akôt ixpa. Te mẽ kot pur kãm ahkre ho ri pata pyrãk. Tã nhũm Apor ixpãnhã ma mẽ awýr pa nẽ te mẽ kot pur karêta pyrãk o mẽ anhĩpêx nẽ mẽ amã Tirtũm kapêr o mẽ ajahkre mex o ri pa. Xà na hte pur karêr xwýnhja rý kamã ahkre xwýnhja tãm tanhmã mẽmo hy hto nhũm ra higrôt nẽ hprêk nẽ ô? Nà na htem ãm ahkre hpa nhũm arĩ hikwý. Nhũm Tirtũm tãm tanhmã hyta to nhũm higrôt nẽ hprêk nẽ ô. Ja pyrã nẽ na hte Tirtũm mẽ ho hkra nẽ tanhmã mẽ ho nhũm mẽ amnhĩ kaxyw hkôt hamaxpêr týx nẽ hkôt amnhĩ nhĩpêx mex o pa. Nom mẽ kãm harênh o pa xwýnhhta kôt amnhĩ xunhwýr kêt nẽ.

Nẽ na hte pur karêr xwýnh rý kamã ahkre xwýnhja tãm tanhmã hyta to nẽ ho htĩr kêt nẽ. Tirtũm pix na hte tanhmã ho nhũm higrôt. Ja pyrã nẽ na pa hte Tirtũm kapêr o mẽ ajahkre o ri mẽ akôt ixpa nom pa tanhmã mẽ ato ka mẽ apê Tirtũm kra nẽ ri apa hkêt nẽ. Tanhmã kot pa mẽ ato ka mẽ apê hkra? Tapxipix na kot mẽ pahto hkra kaxyw àhpumunh. Nẽ tapxipix na hte tanhmã mẽ pahkrã hto pu mẽ kãm hprãm xà hkôt amnhĩ nhĩpêx mex o ri papa.

Nẽ pur karêr xwýnh mẽ pur kãm ahkre xwýnhja wa. Hamẽ wa àpênh mex jakamã koja hamẽ wa kot pur kãm àpênh pãnhã amnhĩm ujamýnh rax nẽ. Ja pyrã nẽ kot paj mẽ ixte Tirtũm kapêr o mẽ ajahkre ho ri mẽ akôt ixpa xwýnhjaja nhũm Tirtũm nhýrmã mẽ ixapênh pãnhã mẽ inhmã amnhĩrer mex nẽ.

Nẽ te mẽ ate Tirtũm nhõ ixkre pyrãk. 10 Nẽ pa te ixpê Tirtũm mã ixkre hã ixapênh xwýnh pyrãk jakamã na pre Tirtũm mẽ akaxyw tanhmã ixto pa mẽ amã tanhmã kot amnhĩ nhĩpêx to hã harênh o ri mẽ akôt ixpa. Te ixte õ ixkre kaxyw ãm xà maati xãm pyrãk o mẽ anhĩpêx. Jao mẽ amã kapêr jarênh o ri mẽ akôt ixpa. Mẽ ate amnhĩ kaxyw hkôt ajamaxpêr nẽ hkôt amnhĩ xunhwýr kaxyw. Tã na ka prem

hkôt amnhĩ xunhwý nhũm ixpãnhã Tirtũm kapêr o mẽ ahkre ho mẽ pa xwýnh kwýjaja mẽ awýr mra nẽ mẽ amã kapêr jarênh jatur xãm kurê. Nẽ hprĩ hã ho mẽ ajahkre ho ri mẽ akôt pa. Te ho mẽ kot ixkre krax nhĩpêx pyrãk o mẽ anhĩpêx.

Nẽ kwa mẽ ate mẽ ahkre o mẽ apa xwýnhjaja kêr ka mẽ akatãt kôt mẽ ahkre mex rãhã ho ri mẽ hkôt apa.

11 Nẽ Jejus Kris tapxipix na pu htem hkôt amnhĩ xunhwý nhũm mẽ panê mẽ pahte amnhĩ tomnuj o hapêx. Jakamã te kêp kýxpê ixkre nhĩmõk ã nõr xà maatita pyrãk.

12 Nẽ na htem tõhã ixkre nhĩpêx kaxyw nẽ pĩ htýx jakà nẽ ho hipêx nhũm kritpêm mẽ kãm mex ry nẽ kuhê. No na htem tõhã nojarêt kãm ixkre hã apê nẽ pĩ rerek o hipêx nhũm mẽ kãm mex ry hkêt nẽ. Koja rôr nhyre hwýr mra nẽ mẽ kêp hapôk nẽ homnu. Ja pyrã nẽ na hte Tirtũm kapêr o mẽ ahkre ho ri mẽ pa xwýnh kwýjaja te mẽ kot katãt kôt pĩ htýx o ixkre nhĩpêxta pyrã nẽ katãt kôt mẽ ahkre ho ri mẽ hkôt pa. No nhũm mẽ hkwyjaja axtem nẽ te mẽ kot pĩ rerek o ixkre nhĩpêxta pyrãk o amnhĩ nhĩpêx nẽ htýx ri Tirtũm kapêr kwým ri tanhmã mẽ ahkre hto ho pa. Jao hkwyým ri amnhĩ nhĩpêx rãhã ho ri pa.

13 Nẽ koja mẽhõ pĩ htýx pix o amnhĩm òrkwý nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã põja pix xêt pa nhũm kãm hikwý xà nẽ òkwa êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrã nẽ koja nhýrmã Krisja akupýn mẽ pahwýr wrý hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwýjaja mẽ pahte mẽ kot pĩ htýx o ixkre nhĩpêxta pyrã nẽ Tirtũm mã mẽ pahte amnhĩ nhĩpêx mex o mẽ papa xwýnhjê xapênh pumu nẽ mẽ pahte amnhĩ to mex xwýnh ã mẽ pajarê. Hãmri nẽ hpãnhã mẽ kot pĩ rerek o ixkre nhĩpêxta pyrã nẽ mẽ kot kãm amnhĩ nhĩpêx mex kêt xwýnhjê pumu nẽ mẽ kot amnhĩ to mex kêt xwýnh hã mẽ harê.

14 Nẽ pĩ htýxja na hte tanhmã amnhĩ to nẽ hpôr no ãm arĩ mex nẽ kuhê nhũm

mě piitã arĩ mex ã omu. Ja pyrã nẽ koja Krisja mẽ kot kãm tanhmã amnhĩ nhĩpêx mex to ho mẽ pa xwýnhjê pumu nẽ mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. ¹⁵ No pĩ rerekja na hte pôr nẽ kaxàr pa. Ja pyrã nẽ mẽ kot Kris mã amnhĩ nhĩpêx mex hkêt xwýnhjaja koja Tirtũm mẽ kãm amnhĩrer kêt nẽ. Nom arĩ mẽ kêp hkra jakamã koja mẽ arĩ kuri htĩr tũm nẽ pa. No ãm mẽ kot Tirtũm mã amnhĩ nhĩpêx mex kêt jakamã koja mẽ hkwyjê hkĩnh ã amnhĩm mẽmoj mex kwý jamýnh kêt nẽ. Te mẽhõ nhõrkwý kêp hpõr nhũm mẽ hkukrêx kwý jamýnh kêt nẽ ý kamã kurũm hapõx pyrãk.

¹⁶⁻¹⁷ E pa mẽ amã mẽmoj jarẽ. Ra mẽ ate mar tã mãn ka mẽ ra tanhmã amnhĩ to nẽ hã ano hkêt rý ko. Nà te mẽ pahpê Tirtũm nhõrkwý pyrãk. Tirtũm nhõrkwýja õ na. Tã mẽ pahpê hkra nhũm Karõ kot mẽ pakaxwýnh mã gjêx jakamã te mẽ pahpê õrkwý pyrãk. Jakamã mẽ kot kapêr kwým ri mẽ ajahkre o ri mẽ pa xwýnhjaja te mẽ kot Tirtũm nhõrkwý grãnh xwýnh pyrãk. Koja mẽ nhýrmã amnhĩ xà htýx kamã hamak o pa.

Mẽ pahte amnhĩ to jarkrar kêt ã mẽ pamã karõ

Wam Korit 1.10-25

¹⁸ Nẽ kot kaj mẽ atõ axàhpumunh týx o amnhĩ to jarkrar o ri apa japêr. Kwa mẽ jam anhũre nẽ axte ri ã amnhĩ nhĩpêx anhýr kêt nẽ. Nẽ te mẽ ate amnhĩ nẽ axàhpumunh týx xàja nhãm rênh par pyrãk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kër ka mẽ te amnhĩ nẽ nhãm rênh pyrã nẽ hpãnhã Tirtũm xàhpumunh xà hkõt pix mã amnhĩ nhĩpêx o ri apa. ¹⁹ No pika kamã mẽ àhpumunh xwýnhjaja Tirtũm noo mã te mẽ hkrã pipãnh nẽ htýx ri pata pyrãk. Tirtũm kapêr ã kagã htũm kot mẽ harênh kot:

Pika ja kamã mẽ àhpumunh týx ã mẽ kot amnhĩ to jarkrar xwýnhjaja Tirtũm noo mã te mẽ kot amnhĩ to hêx o pa pyrãk. Anẽ.

²⁰ Nẽ mãânên mẽ harênh kot:

Mẽ kot amnhĩ xàhpumunh týx ã amnhĩ to jarkrar o ri mẽ pa xwýnhjaja na hte

Tirtũm mẽ omu nẽ mẽ kot ã amnhĩ jarênh anhýr kaprý hã mẽ harẽ. Anẽ. ²¹⁻²² Jakamã kwa kêt ka mẽ axte mẽ apê ixkwý rý mẽ apê Apor kwý hã amnhĩ jarênh o ri apa hkêt nẽ. Mẽ apê wa ixkwý hkêt kênã. Nẽ mẽ apê nhãm mẽhõ hkwy hkêt. Mẽ pahpiitã mẽ pahpê Kris kwý na pu mẽ.

Nẽ kot puj mẽ nhýrmã pahtyk tã akupým pahtĩr nẽ Tirtũm mẽ Jesus wa kuri pamex nẽ pahtĩr tũm nẽ ri papa. Jakamã kwa mẽ tee ri amnhĩ kukamã ajamaxpêr kêt nẽ.

Nẽ jarãhã mẽmoj piitã mẽ panhõõ. Nẽ kormã mẽmoj kot amnhĩrit kêt xwýnhjaja haxwýja mẽ panhõ na. ãm mẽmoj piitã mẽ panhõ jakamã te mẽ pahpê mẽmoj piitã mẽõ pahi pyrãk. ²³ No mẽ papajaja axtem Kris kêp mẽ panhõ Pahihti. Nẽ Tirtũm kêp Kris nhõ Pahihti.

4

Tirtũm pix kot tanhmã mẽ pajarênh to xwýnh ã harênh
Eprêw 13.17

¹ Nẽ mẽ pajaja mẽ ixpê mẽ anhõ pahi hkêt. ãm mẽ ixte Kris mã tanhmã amnhĩ nhĩpêx to ho ixpa xwýnh pix jakamã Tirtũm kormã kapêr kwý ho amnhĩrit kêtja na pa htem mẽ amã ho amnhĩrit o ri mẽ akõt ixpa. Ja kaxyw na pre mẽ ixunhwý. ² Na pre Kris tanhmã mẽ inhmã kapêr to nẽ mẽ inhmã:

—E kêt ka mẽ ixkapêr pix o mãn mẽ ahkre ho ri mẽ hkõt apa. Anẽ.

³⁻⁴ Kumã pix mã ixte amnhĩ nhĩpêx o ri ixpa jakamã koja tapxipix ixte kãm amnhĩ nhĩpêx ã ixpumunh kõt tanhmã ijarênh to. Ixte kãm amnhĩ nhĩpêx mex ã ijarê rý ixte kãm amnhĩ nhĩpêx mex kêt ã ijarê. ãm tapxipix koja tanhmã ijarênh to. No koja nhãm mẽhõ rý mẽ atõ ã ijarênh anẽ pa ama nẽ ãm ama. Rý papam tanhmã kãm ixte amnhĩ nhĩpêx mex to hã kãm amnhĩ jarênh japêr hãmri nẽ ãm ixtýx kãm ã amnhĩ nhĩpêx anhýr ã amnhĩ jarênh kaprý. Pahihti Kris pix kot hprĩ hã mẽ pahte amnhĩ nhĩpêx kõt pahpumunh jakamã tapxipix koja tanhmã mẽ pajarênh to.

⁵ Jakamã kwa kêt ka mẽ ri mẽ kot Tirtũm mã tanhmã amnhĩ nhĩpêx to hã mẽ omunh xà hkõt tanhmã mẽ harênh to hkêt nẽ.

Koja nhÿrmã Pahihiti Krisja akupÿn mẽ pahwÿr wrÿ nẽ rĩ tãm tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nẽ mẽ kot hpimxur pẽ tanhmã amnhĩ tomnuj to ho mẽ pa xwÿnhjaja nhũm mẽ piitã mẽ noo mã mẽ kãm ja ho amnhĩrĩt nhũm mẽ ja hã mẽ omu. Nẽ mẽ pahpiitã mẽ pajamaxpêr xà ho amnhĩrĩt nhũm mẽ piitã hprĩ hã ja hã axpên pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwÿnhjê jarẽ.

⁶ E Jejus kôt ixkwÿjaja. Nà na pa ã mẽ amã Apor mẽ wa amnhĩ jarênh anẽ. Mẽ ate inhmar nẽ Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anẽ hãmri nẽ ahpÿnhã tanhmã mẽ ixte Kris kapêr jarênh xwÿnhjê jarênh to hkêt nẽ. Nẽ axpên mã mẽ ijarênh o:

—Nà tãm kot Kris kapêr jarênh mex o kot hkwÿjê jakrenh jakamã kot paj hkôt pix mã mãn ri ixpa.

Anhÿr o axpên mã mẽ ixtõ jarênh kêt nẽ. Kot kaj mẽ ã mẽ ixtõ jarênh anẽ nẽ te mẽ ixto jarkrar pyræk o amnhĩ nhĩpêx. ⁷ Kwa mẽhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anẽ? Nẽ mẽ ixkapêr mex ã mẽ ixkwÿjê jarẽ nẽ mẽ ixkapêr mex kêt ã mẽ ixkwÿjê jarẽ. Nà na ka mẽ ãm amnhĩ krã hkôt ã mẽ ijarênh anẽ nom Kris xàhpumunh xà ho ã mẽ ijarênh anhÿr kêt nẽ. ãm mẽ ixte Tĩrtũm kapêr o mẽ ajahkre xwÿnhjaja na pa prem mẽ amã mẽmoj jarẽ ka mẽ ama nẽ mẽ inhÿ hã hkôt axàhpumunh mex nẽ. No amnhĩ krã hkôt mẽ axàhpumunh kêt kênã kot ka kêt mẽ ã ahpÿnhã tanhmã mẽ ixto jarkrar anhÿr to ho ri apa.

⁸ Te mẽ ate Apor mẽ wa ixrom Tĩrtũm kapêr mar par nẽ hkôt amnhĩ nhĩpêx mex pyræk. Te wa ixrom mẽ ate Jejus nhĩhkõ hã mẽ ho amnhĩptàr pyræk. Hêxta waa nẽ. Kop apu ãm hãmri mẽ ate ìhkõ hã mẽ ho amnhĩptàr ronhÿx pa ijaxwÿja mẽ apyrà nẽ ã amnhĩ nhĩpêx anẽ. Hãmri nẽ ixkĩnh tÿx kumrêx. ⁹ Nom ja kot anhÿr kêt.

*Jejus nhÿ hã mẽ ahkre xwÿnhjê jarênh
Sikũn Korit 4.8-10; Eprêw 12.1*

Nẽ mẽ ixpê Jejus nhÿ hã mẽ ajahkre ho mẽ ixpa xwÿnhjaja te Tĩrtũmja axtem tanhmã mẽ inhĩpêx to pyræk pa mẽ inhmex kêt nẽ ixpa. Te mẽ ixte gyw kãm amnhĩ rênh nhũm mẽ kot mẽ ixkamã òkre kahak pyræk o na htem mẽ inhĩpêx. Jakamã na hte mẽ hkwÿjaja mẽ ixpumu nẽ mẽ ixkapêr ma nẽ ãm mẽ inhma nẽ axpên mã mẽ ijarênh o:

—Tk. Kot mẽ ahkreja mexti hã. Kwa pu mẽ himex ri.

Anhÿr jakamã te ra mẽ ixtyk nẽ mẽ inhĩkwÿ nhũm mẽ piitã mẽ ixtã htũ nẽ mẽ ixpumunh nẽ ma pa pyræk o amnhĩ nhĩpêx. Jakamã na htem mẽ ixte mẽ ahkre ma nẽ ãm kuma nẽ ma pa. Nom Tĩrtũm kapêr o mẽ wrÿk xwÿnhjaja na htem ja hã mẽ pahpumu nẽ axpên mã mẽ pajarênh o:

—Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nẽ aa hkaga hkêt nẽ. Hêxta waa nẽ. Nà ãm hãmri na htem ã amnhĩ nhĩpêx anhÿr o pa. Anẽ.

¹⁰ Na hte mẽ kot mẽ ixkapêr mar xwÿnh kwÿjaja kãm mẽ ixkĩnh kêt nẽ tanhmã mẽ ixto kapêr punuj to. No mẽ kajaja nhũm mẽ ã mẽ ato kapêr anhÿr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhÿ hã mẽ axàhpumunh tÿx ã mẽ ajarẽ. Nẽ mẽ ixte Tĩrtũm kapêr kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã òkre kahak tÿx tã mẽ akamã òkre kahak kêt nẽ mẽ kãm mẽ akapêr mar prãm nẽ. ¹¹ Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôr nẽ ri ixpa. Nẽ mẽ ixê pikaxõnhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwÿ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhÿr o ri ixpa. ¹²⁻¹³ Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jejus prãm kêt xwÿnhjaja mẽ ijapry ho pa htã pa mẽ amnhĩ kurom mẽ kãm ixkapêr mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htÿx nẽ arĩ mẽ hkôt ixpa. Na htem te mẽ kot ahpunuj nhĩpêx pyræk o mẽ inhĩpêx nẽ mẽ ixwÿr mrar kêt nẽ. ã na

htem mẽ ixte Jejus nhỹ hã mẽ ahkre o mẽ
ixpa xwýnhjê nhĩpêx anê.

*Pawre te kêp mẽ hpãm pyræk ã kot amnhĩ
jarênh*

Wam Tesarôn 2.11-12

¹⁴⁻¹⁵ E Kris kôt ixkwýjaja. Na pa ã mẽ amã
kagà nê mênh anê. Nom mẽ ate inhmar
nê amnhĩ kamã apijaàm kaxyw kêt. Inhmã
mẽ ajapê jakamã na pa ã mẽ amã ixkapêr
nê hã kagà nê mênh anê. Na mẽ ra ohtô
nê ixpãnhã mẽ awýr pa nê mẽ amã Tirtũm
kapêr o mẽ ajahkre. Nom ixkumrêx na pa
pre mẽ amã kapêr jarê ka prem inhma nê
Kris hkôt amnhĩ xunhwý nê amnhĩ kaxyw
hkôt ajamaxpêr tỳx nê. Jakamã paxipix te
ixpê mẽ apãm nhũm te mẽ apê ixkra pyræk.
¹⁶ Jakamã kwa mẽ ixte amnhĩ nhĩpêx kôt
ixpumu nê ixkôt mãn kêt mẽ amnhĩ nhĩpêx
o ri apa. ¹⁷ ã mẽ ate amnhĩ nhĩpêx anhýr
kaxyw na pa pre ijamaxpêr nê ma mẽ awýr
Ximotre mẽ. Haxwýja Kris kôt te kêp ixkra
pyræk. Nê inhmã hapêê. Na hte jar Kris mã
tanhmã amnhĩ nhĩpêx mex to ho pa. Tã pa
pre mẽ awýr kumê. Koja ma mẽ awýr mỗ
nê pøj nê mẽ amã Kris kapêr jarênh o ri mẽ
akôt pa. Nê mẽ amã tanhmã ijarênh to nê
mẽ amã:

—Nà Pawre na hte Jejus Kris jamaxpêr
kôt hamaxpêr o pa. Nê kot amnhĩ nhĩpêx
kôt amnhĩ nhĩpêx o pa. Nê krĩ piitã hkôt
mẽ kot uræk nê ã amnhĩ nhĩpêx o pa anhýr
kaxyw mẽ ahkre mex o pa. Anê.

¹⁸ Nê na xep mẽ akwýjaja te ra àhpumunh
tỳx pyræk nê tanhmã ijarênh to nê ijarênh o:

—Pawreja akupýn mẽ pahwýr mỗr ã
amnhĩ jarênh tã koja akupýn mỗr kêt nê
kãm ga. ãm kapêr kati xwýnh na.

¹⁹ Anhýr ã ijarênh tã koja Tirtũm kãm
tokyx ma mẽ awýr inhmỗr prãm hã kot
pa ma mẽ awýr inhmỗr kurê kumrêx.
Hãmri nê pøj nê ixprĩ hã ã mẽ kot ixto
kapêr anhýr xwýnhhtajê pumu. Nê mễhỗ
kot ã mẽ kãm ijarênh anhýr xwýnhhta ã
ahkukja. ²⁰ Tirtũm krajaja na htem hkôt
pix mã amnhĩ nhĩpêx jakamã na htem hkôt
tanhmã amnhĩ nhĩpêx to hã mẽ omu nê rĩ
kormã kêp hkra hã mẽ harê. Tã kot paj
nhỹrmã mẽ awýr pøj nê ã ixto kapêr anhýr
xwýnhjê pumu nê ixprĩ hã mẽ kot amnhĩ
nhĩpêx ã mẽ omu nê rĩ kormã tanhmã mẽ

harênh to. Jao Tirtũm nhỹ hã mẽ kot mẽ
ajahkre hã mẽ omu rỳ amnhĩ krã hkôt mẽ
kot mẽ ajahkre hã mẽ omu nê rĩ kormã
tanhmã mẽ harênh to. ²¹ Jakamã kwa mẽ
tokyx ixkutêp tãm amnhĩ nhĩpêx o ri apa.
Kêr pa mỗ nê mẽ awýr pøj nê mẽ ate tãm
amnhĩ nhĩpêx ã mẽ apumu nê ixkĩnh nê. Nê
mễmoj tã mẽ amã ixàkjêr kêt nê. Nê mẽ amã
ixkapêr mex pix o ri mẽ amã ixkapêr. Te
mễ hipêêxà kot hkrajê mã kapêr mex pyræk
o mẽ amã ixkapêr mex nê. Hãmri pu mẽ
axpên pumu nê pahkĩnh nê.

5

*Mễhỗ kot tanhmã amnhĩ tomnuj to hã
harênh*

Sikũn Korit 2.5-11

¹ Nê kwa na pa pre tee ri mẽ anhĩõja
jarênh ma nê ixkaprĩ htỳx nê. Na xep hte
amnhĩ tomnuj tỳx pê nã puro hã hpijaàm
kêt o pa. Kwa mẽ pahpê Kris kwýjaja mẽ
pahte ã amnhĩ nhĩpêx anhýr kêt nhũm mẽ
kot Kris kôt amnhĩ xunhwýr kêt xwýnhjaja
haxwýja ã amnhĩ nhĩpêx anhýr kêt tã nhũm
ra mẽ anhĩõja kot Kris kôt amnhĩ xãm tã
ã amnhĩ nhĩpêx anê. Kwa ja omnuj tỳx
kumrêx. ² Na xep ri ã amnhĩ nhĩpêx anhýr
o pa ka mẽ ja hã omu nê ãm omu nê nê
tanhmã kãm nê hkêt nê. Amarĩ hã omunh o
ri hkôt apa. Mễ ate Tirtũm kôt axàhpumunh
tỳx ã amnhĩ jarênh tã no ãm ja hã omu
nê ãm hã omu nê nê tanhmã kãm nê hkêt
nê. Kwa nà. Mễ tee ri kot ã amnhĩ nhĩpêx
anhýrja ã omu nê akaprĩ nê hkêt wehe. Nê
mễ tokyx amnhĩ nê hano kê mẽ akôt Tirtũm
mã amnhĩ jarênh xà hã ixkre hwýr axte
mrar kêt nê.

³⁻⁵ Ixte mẽ apê awry htã ã kot amnhĩ
nhĩpêx anhýr ã harênh ma nê hkukamã
tanhmã ijamaxpêr to. Nà ra ixte mẽ awýr
ixpôx ronhỹx pa mẽ ato akuprỗ. Pahihti
Jejus nhỹ hã mẽ ato akuprỗ nê mẽ amã
kot amnhĩ tomnuj xwýnhhta jarê nê mẽ anê
hanor kurê kumrêx. Jakamã e kêr ka mẽ
mãmri ã amnhĩ nê hipêx anê. Mễ panhỗ
Pahihti Jejus nhỹ hã amnhĩ nê hano nê te
Satanasti mã rer pyræk kê tee ri ja hã amnhĩ
pumu nê tokyx kãm urer japêr. Hãmri nê
akupým tãm amnhĩ nhĩpêx. Kê nhỹrmã
Pahihti akupýn mẽ pahwýr wrý nhũm ma
mễ pahkôt õ krĩ hwýr api.

6 Mē ate Tirtūm kapēr jarēnh mar mex ā amnhī jarēnh tā kormā amnhī nē ā kot amnhī nhīpêx anhÿr xwÿnhhta janor kêt nē. Kwa mē tokyx amnhī nē hano. Na htem pāwti nhīpêx kaxyw nē kamā kot ho hikot xà ho hkryre nē kamā kurē nē gaa nē rī ho piitā hikot pa. Ja pyrā nē kot ka mē amnhī nē kot amnhī tomnuj xwÿnhhta janor kêt nē hāmri nē gaa nē ra urāk nē apiitā ā amnhī nhīpêx anhÿr o ri apa.

7 Kwa mē tokyx amnhī nē hano. Kêr ka mē arī amnhī to mex pix o ri axpēn kôt apa nē tām ri amnhī nhīpêx o ri axpēn kôt apa. Na pre ra Jejus Kris mē pahte amnhī to mex o papa kaxyw mē panē ty. Mē pahpiitā mē panē ty. 8 Jakamā na pu htem ām amnhī to mex pix o ri papa. Nē tām amnhī nhīpêx o ri papa. Jao tanhmā amnhī tomnuj to ho ri papa hkêt nē.

9 Nē wam ixte mē awÿr kagà nē mēnhhta kamā na pa pre mē amā:

—Kêr ka mē nhām mē kot mēnijê kamā hpijaàm kêt o mē pa xwÿnhjê hkôt ri apa hkêt nē. Ām ri mē hkàx ā apa.

Anhÿr o mē amā hā karō. 10-11 Nom na pa pre mē piitā ā mē nē mē akurê anhÿr kêt nē. Ām mē kēp Kris kwÿ hā amnhī jarēnh tā ā ri amnhī tomnuj anhÿr xwÿnh pixjaja na pa pre mē nē mē akurê. Koja mēhō kēp Kris kôt mē pahtō rÿ mē pahtōx ā amnhī jarēnh tā mē kamā hpijaàm kêt o ri pa ka mē ja hā omu nē hkôt ri apa hkêt kurē kumrêx.

Nē mē kām nhām mē hkukrêx kīnh o kām ho ō hprām o ri mē pa xwÿnhjaja.

Nē sānti kutā hkōn krā ho rôrôk nē hkrī nē kām mex ā harēnh o ri mē pa xwÿnhjaja.

Nē mē kot axpēn to kapēr punuj o ri mē pa xwÿnhjaja.

Nē mē pipānh o ri mē pa xwÿnhjaja.

Nē axpēn pē ri mē àhkīnh o mē pa xwÿnhjaja.

Koja mēhō kēp Kris kwÿ hā amnhī jarēnh tā ā amnhī nhīpêx anhÿr o ri pa ka mē ja hā mē omu nē hkôt ri apa hkêt kumrêx. Nē mē kutā axàpkur kêt nē. Ām mē hkàx ā ri mra.

No mē kēp Kris kwÿ hkêt xwÿnhjê nē na pa pre ā mē akurê anhÿr kêt nē. Mē piitā ā mē kot amnhī nhīpêx anhÿr o pa kēnā. Na htem axpēn kām hpijaàm kêt o ri pa.

Nē mē kām axpēn kukrêx kīnh o kām ho ō hprām o ri pa.

Nē sānti kutā hkōn krā ho rôrôk nē hkrī nē kām amnhī jagrer pē amnhī to hwÿr o pa.

Nē mē axpēn pē àhkīnh pix o pa.

Kris kwÿ hkêt xwÿnhjaja na htem ā amnhī nhīpêx anhÿr o pa. Tā tanhmā kot ka wem amnhī to nē mē hkàx ā ri apa? Mē piitā ā mē kot amnhī nhīpêx anhÿr kēnā. Kot puj mē nhÿrmā Tirtūm nhō krī mex wÿr api nē rī kormā mē hkàx ā ri papa.

12-13 Nē mē kēp Kris kwÿ hkêt xwÿnhjaja na pa hte mē kot amnhī tomnuj ā mē omu nē ām mē omu nē tanhmā hā mē kām nē hkêt nē. Tirtūm tām koja nhÿrmā ja hā tanhmā mē hipêx to. No koja Kris kôt mē pahtō rÿ mē pahtōxjê hō tanhmā amnhī tomnuj to ho pa pu mē pahtō ja hā omu nē nē tanhmā kām pakapēr to kurē kumrêx. Tirtūm kapēr ā kagà htūm kot ja jarēnh kot: Kêr ka mē amnhī nē Kris kôt akwÿjê hō kot tanhmā amnhī tomnuj to ho pa xwÿnhjê jano. Ā harēnh kot anhÿr.

6

Mē pahte Kris kwÿjê ho pakapēr kêt

Matêwre 5.38-40

1 Nē na ka xep htem Kris kôt atō rÿ atōxjê hō mē ka wa tanhmā axpēn tomnuj to nē axtem nē juisti hwÿr axpēn to mra. Mē apyrā nē kēp Kris kwÿ hkêt tā ka htem ma hwÿr amnhī to mra nhūm war axpēn tā war ama nē tanhmā war ajarēnh to. Kwa mon ka htem axtem nē ā Kris kwÿ hkêt xwÿnhjê hwÿr mē amnhī to amrar anē? Kêt mē Kris kôt anhīō hwÿr mān kêt mē amnhī to mra nē kumā mān amnhī jarē kē axpēn tā war ama nē axpēn tā tanhmā war amā kapēr to.

2 Ra mē ate ja mar tÿx tā hkôt amnhī nhīpêx kêt nē. Mēmoj ām grire htā ka wa tokyx akupÿm hā tām axpēn xām kêt nē. Rÿ Kris kôt war atōjê hō hwÿr wa amnhī to atēm nhūm akupÿm tām axpēn tā war axām kêt nē. Ām axtem nē mē kēp Kris kôt mē atō hkêt xwÿnhjê hwÿr amnhī to mra. Kwa mē ā amnhī nhīpêx anhÿr kêt nē. Mē pahpê Kris kwÿjaja kot puj mē nhÿrmā Kris nhīhkō hā mē kēp hkwy hkêt xwÿnhjê

tanhmã mẽ harēnh to. ³ Nē Tirtūm kapēr o mẽ wryk xwýnhjaja kot puj mẽ mãññēnh nhýrmã tanhmã mẽ harēnh to ho pahkrī. Jakamã kwa mãmrī ã mẽ pahte amnhī nhīpēx anhýrja kukamã akupým tanhmã axpēn xunhwýr to ho apa. Měmoj tã mẽ atōjē hō wa kot tanhmã axpēn to hã wa omu nē tokyx akupým axpēn tã wa kãm akapēr kê wa tokyx akupým tãm axpēn nhīpēx. ã mẽ kot axpēn nhīpēx anhýr o paja na kêt mex. ⁴ No na ka xep htem arī Kris kôt mẽ akwý hkêt xwýnhjē hwýr axpēn to mra nē mẽ kãm amnhī jarē. Kwa mẽ ri ã amnhī nhīpēx anhýr kêt nē. ⁵ Mě tokyx tee ri ja hã amnhī pumu nē amnhī kamã apijaàm kêt wehe. Xà mẽ akamã Kris kôt mẽ atōjē hō pixire nē kot tãm akupým mẽ axunhwýr kaxyw amrakati kumrēx? ⁶ Na ka xep htem mẽmoj tã axpu. Kris kôt mẽ atōjē hō mẽ mẽmoj tã axpu nē ra mẽ kēp Kris kwý hkêt xwýnhjē hwýr amnhī to mra. Kot tãm akupým mẽ unhwýr xwýnhjē hwýr amnhī to mra.

⁷ Mě apijapu ho apa jakamã na ka mẽ amnhī tomnuj tỳx nē. Hãmri nē te mẽ apē Kris kwý hkêt xwýnh pyrã nē mẽ hwýr amnhī to mra. Kwa kwār Kris kôt anhīo mãmrī apē ahkī rý tanhmã anhīpēx to. Ka mẽ ãm amnhī tã omu kê tapxipix tanhmã amnhī tomnuj to. ⁸ Ja mex tã mẽ ate ã amnhī nhīpēx anhýr kêt. Na ka htem axpēn pē ahkī. Mě ate Kris kôt axpēn to atō nē atōx tã axtem nē ã axpēn nhīpēx anē. Te mẽ apijaàm kêt pyrãk o amnhī nhīpēx o ri apa. ⁹⁻¹⁰ Mě kot tanhmã amnhī tomnuj to xwýnhjaja koja mẽ nhýrmã ma Tirtūm nhō krī mex wýr àpir kêt nē. Ra mẽ ate ja jarēnh mar tỳx.

Měmyjē hō kot nhãm mēnijē hō ho amnhī kati xwýnhjaja.

Nē mēnijē hō kot nhãm mẽmyjē hō ho amnhī kati xwýnhjaja.

Nē mēnijaja axtem nē mẽ kot amnhīo ho mjēn o ri mẽ pa xwýnhjaja.

Nē mẽmyjaja haxwýja axtem nē amnhīo ho hprō ho ri mẽ pa xwýnhjaja.

Nē mẽ àhkīnh o ri mẽ pa xwýnhjaja.

Nē mẽ kãm nhãm mẽ hkukrēx kīnh o kãm ho õ hprãm o ri mẽ pa xwýnhjaja.

Nē ri mẽ pipãnh o mẽ pa xwýnhjaja.

Nē ri axpēn to kapēr punuj o mẽ pa xwýnhjaja.

Nē mẽ kot amnhī to sãnti hwýr o mẽ pa xwýnhjaja.

ã mẽ kot amnhī nhīpēx anhýr xwýnh piitã koja mẽ Tirtūm nhō krī hwýr àpir kêt nē.

¹¹ Kormã mẽ ate Kris kôt amnhī xunhwýr kêt ri na ka pre mẽ akwýjaja ã amnhī nhīpēx anhýr o ri apa. Tã amnhī kaxyw Jejus kôt ajamaxpēr nē hkôt amnhī xunhwý. Hãmri nhũm Tirtūm Karō mẽ Pahihti Jejus Krisja wa mẽ anē mẽ ate amnhī tomnuj piitã rēnh pa nē mẽ apē Tirtūm kra hã mẽ axunhwý nē amnhīm mẽ ate amnhī to mex xwýnh ã mẽ ajarē.

Mě pahte tãm amnhī nhīpēx o papa hã mẽ pamã karō

Matēwre 5.27; Rōmãn 12.1-2; Epes 5.3; Korosē 3.5; Wam Tesarōn 4.1-8

¹² Nē na ka hte mẽ akwýjaja amnhī jarēnh o:

—Nà na pa hte pa inhmã tanhmã amnhī nhīpēx to hprãm xà hkôt amnhī krã hkôt amnhī nhīpēx o ri ixpa. Anē.

Mě ate ã amnhī jarēnh anhýr tã no ãm mẽ ate amnhī jarēnhja mex kêt. Měmoj piitã mẽ pamã mex kêt. Na pu htem pamã hprãm xà hkôt mẽmoj to anē nē gaa nē ra ho amnhī pyrã nē ho anhýr pix o papa. Nē gaa nē kãm panhūrer kêt kumrēx. Jao ra pahpipãnh pix o ri papa. Rý paxēx pix o ri papa. Rý paxàhkīnh pix o ri papa. Jakamã kêr pu mẽ pamã tanhmã amnhī nhīpēx to hprãm xà hkôt tanhmã amnhī nhīpēx to ho papa hkêt nē. ãm amnhī mẽ amnhī kaxyw Jejus mã pajamaxpēr pix nē.

¹³ Nē na htem amnhī jarēnh o:

—Nà kot paj inhmã prãm nē mãmrī mẽmoj ku. Nē inhmã nhãm mēhō kamã ix-pijaàm kêt prãm nē mãmrī ã amnhī nhīpēx anē. Ja tanhmã inhmã kute hkêt. Anē.

Tã koja nhýrmã Tirtūm mẽ panhīja o hapēx pa. Na pre mẽ pahte nhãm mẽ kamã pahpijaàm kêt o papa kaxyw mẽ panhīpēx kêt nē. ãm mẽ pahte mẽ panhīpēx xwýnh maatija mã tanhmã amnhī nhīpēx mex to ho papa pix kaxyw na pre mẽ panhīpēx.

¹⁴ Nē na pre Pahihtija ty nhũm Tirtūm akupým ho htīr. Ja pyrã nē kot puj mẽ nhýrmã mẽ pajaxwýja ty nhũm akupým mẽ

pahto mē pahtīr. Ja kaxyw tapxipix pix na àhpumunh tỳx o àhpumunh tỳx. ¹⁵ Na pu htem Kris kôt amnhī xunhwỳr kôt pahpê hwỳr nē te pahpê ī pyrāk. Jakamā kwa mē ja hā anohtỳx nē axte nhām mē hkuprỳjê hwỳr amrar nē mē ho amnhīkati hkêt nē. Tirtūm kēp ja omnuj. Te mē pahte Kris nhī pyrāk jakamā kot kaj mē ā amnhī nhīpêx anhỳr jao te Kris tām kot ā amnhī nhīpêx anhỳr o pa pyrāk. Kwa ja mex kêt. Xà kot we Krisja ā amnhī nhīpêx anē? Nà koja ā amnhī nhīpêx anhỳr kêt nē. ¹⁶ Tirtūm kapēr ā kagà htūm kot ja jarēnh kot:

Kot ka mē atō mēnijê hō ho aprō nhūm kēp aprō kumrēx. Hāmri nē te ra war atipxi pyrāk o axpēn nhīpêx. Anē.

Ā kot aprō mē wa ajarēnh anhỳr jakamā kwa kēr ka mē atỳx ri nhām mē hkuprỳjê hwỳr apa hkêt nē. Kot kaj mē ā amnhī nhīpêx anē nē Tirtūm noo mā te ate aprō kuhpa hā hkuprỳta o aprō pyrāk. Te wam aprōta kuhpa hā war atipxi pyrāk. ¹⁷ Na pu htem Pahihti Jejus Kris kôt amnhī xunhwỳ nhūm amnhī tā mē pahpumu nē mē pamā Karō gō nhūm mē pamā agjê. Pu mē ra Karōja kôt te ra Jejus mē wa pahtipxi nē ri papa pyrāk o axpēn nhīpêx. Jao Kris jamaxpēr mē mē pajamaxpērja te wa kot axpēn pyrāk. Nē Kris kot amnhī nhīpêx mē mē pahte amnhī nhīpêxja te kot axpēn pyrāk.

¹⁸ Jakamā kwa kēr ka mē amnhī prō pix tănopxar o ri apa. Nē mē anijaja amjên pix tănopxar o ri apa. No mē nhām mēmyjê ho amnhīkati ho ri apa hkêt nē. Nē mē amyjaja nhām mēnijê ho amnhīkati ho ri apa hkêt nē. Kot ka mē nhām mēmoj tanhmā omnuj kute ho anē no ām amnhī nhī homnu hkêt nē. Nom kot kaj mē nhām mēnijê ho amnhīkati rỳ nhām mēmyjê ho amnhīkati hāmri nē ra amnhī nhī homnu hpa. ¹⁹ Mē panhī kamā na hte Tirtūm Karō agjê nē kamā hkrī. Tirtūm na pre mē pahwỳr kurē nhūm mē pahkarō mā agjê pu mē te mē pahpê ōrkwỳ pyrāk. Jakamā na pu htem amnhī krā hkôt pahtỳx ri mēmoj tanhmā ho ho papa hkêt nē. Ām Tirtūm jamaxpēr xà hkôt pix mā na pu htem tanhmā mēmoj nhīpêx to ho papa. ²⁰ Na pre ra Jejus mē pahte amnhī tomnuj pānhā amnhīrer

kaxyw mē pahpiitā mē panê ty. Te htyk o amnhīm mē pajaprōr pyrāk o mē panhīpêx. Jakamā kwa kēr pu mē ām hkôt pix mā mām ri amnhī nhīpêx rāhā ho ri papa. Kē mē pahkwỳjaja ja hā mē pahpumunh kôt Tirtūm mā mex o mex ā harēnh o ri pa.

7

Mē mjên mē mē hprō wa kot axpēn to mex ā mē pamā karō

Epes 5.22; Korosē 3.18; Eprêw 13.4

¹ Nē ota mē ate ixwỳr kagà nē mēnhta na pre ixwỳr pōj pa omu. Nē kamā mē ate mē aprō hā ixkukjêr xwỳnhhta pa kamā harē nē omu. Tā kot paj mē amā tanhmā harēnh to ka mē inhma.

Nà kot ka mē amyjê hō amā aprō hkêt nē ahte ri apa hprām nē kam nē aprō hkêt apa. Ja tanhmā kute hkêt. Nom kēr ka mē hkuprỳjê ho presija ho ri apa hkêt nē. ² Na htem tōhā kām hprō hprām kêt nē ri pa nē gaa nē mē hkuprỳjê hō pumu rỳ mē kēp mē hprōjê hō pumu nē kamā hpijaàm kêt o ri pa. Ja pymaj kēr ka mē amyjaja māmri aprō nē mē anijaja māmri amjên.

³ Nē mē anijaja. Koja mē amjên akamā hkurē ka mē māmri kām amnhī gō kē mē anī. Nē mē amyjaja määnēn. Koja mē aprō mē akamā hkurē ka mē māmri mē anī. ⁴ Ām ka amā tanhmā amnhī nhīpêx to hprām xà hkôt pix mā amnhī nhīpêx kêt nē. Määnēn amā aprō kot kām tanhmā amnhī nhīpêx to hprām xà hkôt määnēn hkôt kām amnhī nhīpêx.

⁵ Nē kot kaj mē mēmo arīgro hā amā Tirtūm mā amnhī jarēnh ryy hprām japēr. Hāmri nē aprō mā:

—E kot puj jarāhā axpēn to amnhīkati hkêt nē. Kot puj ām Tirtūm pix mā amnhī jarēnh o amỳkry. Anē.

Hāmri nē māmri ā amnhī nhīpêx anē. No kwa kēr ka mē ām ja ho anhỳr o apkati pixi nē kām anhūre. Nhūm jāā ka mē amā axpēn to amnhīkati hprām nē māmri tanhmā axpēn nhīpêx to. No kot kaj mē ā amnhī nhīpêx anhỳr kêt o hā atā apkati xohtō nē gaa nē ra akurē xàj axtem nē Satanasti jamaxpēr o ajamaxpēr. Jao nhām mēhō ni hwỳr mra nē aprō kuhpa hā kamā akurē ho kamā apijaàm kêt. Rỳ nhūm

mënijaja nhâm mëmyjê hõ hwÿr mra nê mjên kuhpa hã kamã hkurê ho war axpën kamã hpijaam kêt.

⁶ E më ate ja hã ixkukjêr jakamã na pa ã ixprî hã më amã ja jarênh anê. Ka më akwÿjaja amã aprõ hprãm nê mãmri aprõ nê ri apa. Nê më akwÿjaja amã aprõ hprãm kêt nê mãmri aprõ hkêt nê ri apa. Nom kot pa paa më amã më aprõ hã ixamnênh kêt nê. Ka më kam amnhî krã hkôt ajamaxpër xà hkôt tanhmã amnhî nhîpêx to. ⁷ Na pa hte ixprõ hkêt nê ri ixpa nom inhmã ja mex pa hte ahte ixpa.

Më mjên kêt nê më hprõ kêt xwÿnhjê jarênh

Nê kormã më aprõ hkêt xwÿnhjaja. Ka më ixpyrà nê aprõ hkêt nê ri apa ronhÿx inhmã ja mex nê. Na hte mëmy hwÿjaja hprõ kêt nê ri pa nhũm Tirtũm ja hã më omu nê tanhmã më ho nhũm më mex nê ri pa nê mënijê kamã hkurê ho më kamã hpijaam kêt o ri pa hkêt nê. No na hte më hwÿjaja hprõ hkêt nê ri pa nê gaa nê ra hkurê xaj mënijê kamã hpijaam kêt. ã më ate amnhî nhîpêx anhÿr pymaj kêt ka më amã aprõ hprãm nê mãmri aprõ. Tirtũm mã ja mex kênã.

⁸ E më aprõ hkêt nê më amjên kêt xwÿnhjaja. Nê ra më apê më aprõ htyk rÿ më amjên htyk xwÿnhjaja. Pa më amã mëmoj jarê. Nà kot kaj më ixpyrà nê më aprõ hkêt nê ri apa rÿ më amjên kêt nê ri apa nhũm ja inhmã mex nê. ⁹ No kot ka më atõ ra akurê japêr nê mãmri aprõ rÿ mãmri amjên. Ja mãânênh tanhmã kute hkêt.

Më pahte axpën kaga hkêt ã më pamã karõ

Matêwre 5.31, 19.3-9; Makre 10.2

¹⁰ E kot paj hpãnhã ra më ate axpën to amjên nê axpën to aprõ xwÿnhjê mã ixkapêr. Nom kot paj amnhî krã hkôt tanhmã ixkapêr to hkêt nê. Pahihti Jejus Kris kapêr xà hkôt kot paj më amã ixkapêr. Jakamã e kêt ka më anijaja më amjên kaga hkêt nê. ¹¹ Nom kot kaj më tanhmã ajamaxpêr to nê hkaga japêr hãmri nê ahte ri apa nê axte nhâm mëhõ ho amjên kêt nê. Rÿ tee ri amnhî kukamã ajamaxpêr nê mãmri akupÿm amjênta wÿr tẽ nê akupÿm hkôt ri

apa. No kêt ka më axte nhâm mëhõ ho amjên kêt nê.

Nê ra më amyjaja kêt ka më ajaxwÿja ã amnhî nhîpêx anê nê më aprõ kaga hkêt nê. E kêt ka më ã amnhî nhîpêx anhÿr o ri apa.

¹² Nê më ate ixwÿr kagã mënh kamã axpën tã ixkukjêrta kot paj hpãnhã më amã harê. Na Pahihti Jejusja ja hã tanhmã inhmã nê hkêt nê. ãm amnhî krã hkôt kot paj më amã tanhmã harênh to ka më inhma.

Ka më amyjê hõ ra Kris kôt amnhî xãm nom nhũm aprõ kormã hkôt amnhî xãm kêt japêr. Nom koja kãm arî ri akôt pa hprãm ka hkaga hkêt nê. Kê arî ri akôt pa.

¹³ Nê më anijaja. Ka më ajaxwÿja ra apê Kris kwÿ hã ri apa nhũm amjên kêt hwÿy hkêt tã arî ri akôt pa hprãm nê arî ri akôt pa ka hkaga hkêt nê. ¹⁴ Kêp Kris kwÿ hkêt tã koja akôt Kris kwÿjê hkôt ri pa. Rÿ më aprõ kêt Kris kwÿ hkêt tã koja akôt Kris kwÿjê hkôt ri pa. Jao Tirtũm kapêr mar o pa nê gaa nê apyrã nê hkôt amnhî xãm japêr. Nê më akra kêt Kris kwÿ hkêt xwÿnhjaja haxwÿja më akôt Kris kwÿjê hkôt ri pa nê Tirtũm kapêr mar o pa nê gaa nê akôt Jejus kôt amnhî xunhwÿr japêr.

¹⁵ Nom koja aprõ kêt Kris kwÿ hkêt ã kãm akaga hprãm nê rî tãm mãmri akaga. Rÿ amjên kêt Kris kwÿ hkêt ã kãm akaga hprãm nê rî tãm mãmri akaga. Kêt ka më kot akaga nê tee ri kãm tanhmã akapêr to hkêt nê. Kwãr mãmri akaga ka ahte ajamakêtkati nê axãmnhix ri apa. Më pajamakêtkati nê më pamex nê ri papaja na Tirtũm kãm hprãm.

¹⁶ No koja amjên kêt Kris kwÿ hkêt tã kãm më akaga hprãm kêt nê ka më hkaga hkêt nê. Rÿ aprõ kêt Kris kwÿ hkêt tã ka më kam hkaga hkêt nê. Koja arî ate amnhî nhîpêx ã apumunh o ri akôt pa nê gaa nê rî apyrã nê Kris kôt amnhî xãm japêr. ¹⁷ Jakamã kot ka më aprõ rÿ amjên ra Kris kôt ahte amnhî xãm. Hãmri nê wa arî ri axpën kêt ri apa ho apa. Na pa hte krî piitã hkôt Jejus kôt më pahkwÿjê mã ã ixujarênh anhÿr o ri ixpa. Tã kêt ka më ã amnhî nhîpêx anhÿr o ri apa.

Kris kôt amnhî xunhwÿr kêt ri tanhmã më pakute hã më pajarênh

18 Ja pyrà nê kot kaj mē ra amy kwryt kà jakàr japêr. Tã ra Kris kôt amnhĩ xãm nê arĩ arãhã ri apa. Rỳ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà? 19 Tĩrtũm na hte mē pahte amnhĩ my kwryt kà jakàr ã mē pahpumunh kôt tanhmã mē pajarēnh to hkêt nê. Rỳ mē pahte amnhĩ jakàr kêt ã mē pahpumunh kôt mãânēn tanhmã mē pajarēnh to hkêt nê. ãm mē pahte hkôt amnhĩ nhĩpêx pix ã mē pahpumunh kôt na hte tanhmã mē pajarēnh to. 20 Jakamã kêr pu mē pahte Kris kôt amnhĩ xunhwyr kêt ri tanhmã mē pakuteja arĩ rãhã ri papa. 21 Ka mē akwýjaja ate nhãm mē kãm mē axàpēnh o apa htã Jejus kôt amnhĩ xunhwý. Tã kêr ka mē mãmrĩ mē kãm axàpēnh o ri apa. Nom koja anhõ patrãwja amnhĩ nê mē ajano ka mē mãmrĩ ma mra nê amnhĩ mã tanhmã axàpēnh to ho ri apa.

22 Nê koja mēhõ Kris kôt amnhĩ xãm. Tanhmãn kêp mē õ patrãw rỳ kot mē kãm mē àpēnh xwýnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyrãk.

23 Na pre Jejus mē pahte amnhĩ tomnuj piitã hpãnhã amnhĩrer kaxyw mē panê ty. Te htyk o kot amnhĩm mē pajaprõr pyrãk o mē panhĩpêx. Jakamã kwa kêr ka mē jar mē anhõ patrãw kôt pix mã amnhĩ nhĩpêx o ri apa hkêt nê. Mē mãânēn Tĩrtũm kapêr kôt amnhĩ nhĩpêx o ri apa. 24 Jakamã kêr pu mē pahte Kris kôt amnhĩ xunhwyr kêt ri tanhmã mē pakuteta pu mē arĩ rãhã ri hã papa.

Ra mē pahte amnhĩ jakà rỳ mē pahte amnhĩ jakàr kêt.

Rỳ ra mē pahte nhãm mēhõ mã paxàpēnh o papa rỳ amnhĩ mã paxàpēnh o papa.

Rỳ ra mē pahprõ nê ri papa rỳ mē pahprõ hkêt nê ri papa.

Pu mē pahte Kris kôt amnhĩ xunhwyr kêt ri tanhmã mē pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpêx o ri apa.

Mē hprõ nê mē mjên kêt xwýnhjê jarēnh

Matéwre 19.10-12

25 Nê mē ate ixwyr kagã mēnhta kamã na ka mē mãânēn kormã mē hprõ hkêt xwýnhjê hã ixkukja. Tã kot paj mē amã tanhmã mē harēnh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhĩ krã hkôt tanhmã hã mē amã ixkapêr to. Na pre Pahihti mē akaxyw tanhmã ixkrã hto pa hte ý hã tanhmã mē amã mēmoj tã karõ hto ho ri ixpa. Jakamã e mē inhma nê inhmar tỳx nê.

26-27 Nà ra mē kãm mē pahkurê xwýnhjaja Kris ã mē pahtomnuj o pa jakamã koja ixpyrà nê mē hprõ hkêt rãhã mē pa xwýnhjaja ahte ri pa nhũm ja mex nê. Nhũm mē umaj amnhĩ pix tânopxar o ri pa. Nê mē aprõ xwýnhjaja kêr ka mē kãm mē pahkurê xwýnhjê pymaj mē aprõ kaga hkêt nê. ãm pix tânopxar o ri apa.

28 Tã kot ka mē atõ amã aprõ hprãm nê mãmrĩ aprõ. Ja mãânēn tanhmã ixpê kute hkêt. Nê mē anijaja mē amã amjên prãm nê mãmrĩ amjên. Ja tanhmã ixpê kute hkêt. Nom kot ka mē akwýjê pyrã nê aprõ rỳ amjên. Nê gaa nê akra. Hãmri nê tanhmã mēmoj kute kamã ka tee ri wa mē amnhĩ kukamã ri ajamaxpêr o ri apa. Ja pymaj na pa hte mē amjên kêt nê mē aprõ hkêt ã mē amã awjarê.

29 Nê Kris tokyx akupýn mē pahwyr wrýk kaxyw jakamã kwa ra mē aprõ nê apa xwýnhjaja. Kêr ka mē amnhĩ prõ nê amnhĩ kra pix kukamã ajamaxpêr o ri apa hkêt nê. Te ho mē hprõ hkêt nê mē pa xwýnhjaja kot amnhĩ nhĩpêx pyrã nê Kris kutêp kumrêx mã ajamaxpêr pê tanhmã amnhĩ nhĩpêx to ho apa nê arĩ kormã aprõ nê akrajê ho hapu nê tanhmã mē kutã anojarêt to ho apa.

30 Kris kot tokyx akupýn mē pahwyr wrýk jakamã kwa mē ri amýr o ri mē apa xwýnhjaja. Kêr ka mē kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mē akĩnh nê ri apikunhar o ri mē apa xwýnhjaja kêr ka mē Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mē axujaprõr o ri mē apa xwýnhjaja kêr ka mē Kris kutêp tanhmã axujaprõr to pix kukamã ri ajamaxpêr kêt nê.

³¹ Nê mẽ apê mẽ ate mẽmoj to wênê ho ri mẽ apa xwýnhjaja Kris kutêp ãm ri mẽ akukrêx pix kukamã ajamaxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê. ³² Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwý pê mẽ hprõ hkêt xwýnhjaja na htem Pahiiti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarêt to rãhã ho ri pa. ³³ No kêt ra mẽ hprõ nê mẽ pa xwýnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. ³⁴ Mẽ kãm Tĩrtũm kapêr kôt amnhĩ nhĩpêx prãm tã no ãm mããnên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mênijaja kot Jejus kôt amnhĩ nhĩpêx nê kormã mẽ mjên kêt xwýnhjaja na htem kãm Pahiiti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwýnhjaja na htem arĩ ri mẽ hikukrêx tânopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

³⁵ E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tĩrtũm kapêr kôt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwýnhjê jarênh

³⁶ E kot paj hpãnhã mẽ ate mẽhõ ho aprõ mã xwýnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwýnhjê kukamã ajamaxpêr o:

—Nà kot paj ho ixprõ hkêt nê. Inhmã hkĩnh tỳx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

—Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwýr tẽ nê kãm amnhĩ jarê nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã. ³⁷ Nom kot kaj ho aprõ hkêt ã amnhĩ jarê nê mããnên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mããnên tanhmã kute hkêt. ³⁸ Kot ka ho aprõ nê war amex nê apa. Rý kot ka ho aprõ kêt nê mããnên amex kumrêx nê ri apa. Ja na mex o ate mẽhõ ho aprõ nê ho apata jakrenh.

Mẽ kêp mẽ mjên tyk xwýnhjê jarênh

³⁹ E kot paj hpãnhã mẽ apê mẽ amjên tyk xwýnhjê mã ixkapêr. Nà koja amjên arĩ htĩr ri ka ãm hkôt pix mã axkamẽ nê hkaga hkêt nê. No koja nhýrmã apê ty hãmri ka tee ri amnhĩ kukamã ajamaxpêr hãmri nê amã axte amjên prãm nê mãmrĩ axte amjên. Nom kwa kêr ka mẽ amnhĩ pyrà nê Kris kôt akwýjê hõ pix o amjên. No mamrĩ nhãm mẽhõ ho amjên kêt nê. ⁴⁰ No kot ka mẽ axte amjên kêt nê ahte ri apa hãmri nê axãmnhĩx ri ajamakêtkati nê apa. No na pa ãm amnhĩ krã hkôt mẽ amã ã ja jarênh anê. Mãn Tĩrtũm Karõ mã mããnên ja mex nê.

8

Sãnti hã mẽ apkur xà jarênh

Rõmãn 14.13-23; Wam Korît 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nê mẽ ate ixwýr kagã mênhta kamã na ka prem mããnên sãnti hã mẽ apkur xà hã ixkukja. Tã kot paj mẽ amã tanhmã ja jarênh to ka mẽ inhma.

Nà na hte Kris kôt pahkwý hkêt xwýnhjaja mẽmo karõ ho sãnti nhĩpêx mã mẽõ hkwy nhĩpêx nê hwýr o mra. Hãmri nê hpar pê haxwý nê kutã hkõn krã ho rôrõk nê hkrĩ nê kãm mex o mex ã harê nê kãm amnhĩ jagrer pê amnhĩ to kuwý. Hãmri nê kãm amnhĩ jagrer pa nê akupým amnhĩm mẽõta jamý nê ma o mra nê hkwyjê mã ho wênê. Na htem ã amnhĩ nhĩpêx anhýr o pa. Tã na ka prem kagãta kamã mẽ ate mẽ kêp mẽõ japrõr nê hkur ã ixkukja. Nà ra mẽ ate sãnti pumunh mex. ãm mẽ kot ãhkra pix o

hipêx ã omunh mex jakamã na pu htem hã pamã mẽ apkur xàta hkur prãm nẽ mãmri paxàmnhix ri kuku. Ja tanhmã Tirtùm pẽ kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kôt mẽ pahkwýjê mã amnhĩ to jarkrar o ri papa hkêt nẽ. Nẽ ja hã mẽ kurom paxàhpumunh týx ã mẽ kãm amnhĩ to jarkrar hkêt nẽ. Kot pu mẽ ã amnhĩ nhĩpêx anhÿr o mẽ hamaxpêr o hihtýx hkêt nẽ. Kêr pu mẽ ãm mẽ kamã paxukapri pẽ tanhmã mẽ ho mex to ho papa. Nẽ Kris kôt mẽ hamaxpêr o hihtýx o papa. ã mẽ pa hte amnhĩ nhĩpêxja na Tirtùm kãm hprãm. ² No koja mẽhõ mẽmoj pumunh týx ã amnhĩ to jarkrar o ri pa nẽ ãm tee ri ã amnhĩ jarênh anhÿr kapry. ³ No koja mẽhõ àhpumunh týx kêt tã kãm Tirtùm kĩnh nhũm amnhĩ tã omu nẽ kãm hapê nẽ ho hkra. Kêt ja na mex o mex.

⁴ E kot paj ixpri hã mẽ amã tanhmã sãnti hã mẽ apkur xàta jarênh to ka mẽ inhma. Nã Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ãhkra o hipêx jakamã htir kêt. Ra mẽ pahte ja jarênh mar týx nẽ omunh mex. ⁵ Na htem ohtô nẽ ri sãnti kęp Mẽpahpãm ã hkamnhix o pa. Kaxkwa kamã mẽmo karõ nhĩpêxja nẽ pika kamã mẽmo karõ nhĩpêxja nhũm htem kęp Mẽpahpãm ã harênh ho pa. Nom ja kot anhÿr kêt. ⁶ Mẽpahpãmja ãm pixi ho pixi mex. Mẽ panhõ Tirtùmja. Tãm na pre mẽmoj piitã ho kator pa. Jakamã na pu htem kapêr kôt pix mã amnhĩ nhĩpêx o ri papa.

Nẽ mẽ panhõ Pahihti haxwýja pixii. Pahihti Jesus Krisja. Na pre Tirtùm nhĩhkõ hã mẽmoj piitã ho kator pa. Na pu htem ja hã omunh xà hkôt ri pamex nẽ ri papa. Ra mẽ pahte ja jarênh mar týx nẽ omunh mex. Jakamã na pu htem paxàmnhix ri mẽmoj piitã hkur o papa. Tirtùm kot mẽmoj piitã ho kator par kênã. ⁷ Tã no ãm ham mẽ kot Kris kôt amnhĩ xunhwýr xwýnhjaja na htem mẽ pahkĩnhã kãm sãnti hã mẽ apkur xà hkur puma nẽ. Ham mẽ kot sãnti kaga nẽ amnhĩ kaxyw Kris kôt amnhĩ xunhwýr jakamã kormã Tirtùm kôt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xàja pumu nẽ hamaxpêr o:

—Nã kot paj ja kur kêt nẽ. Kot paj anẽ

nhũm apu Tirtùmja pẽ ja omnuj nẽ. Anẽ.

⁸ Nom na kêt hte Tirtùm mẽ paxàpkur xà hã mẽ pahpumunh kôt mẽ pahte amnhĩ to mex xwýnh ã mẽ pajarênh kêt nẽ. Kot puj mẽ mẽmoj ku rý mẽmoj kur kêt nẽ nhũm ja hã mẽ pahpumunh kôt tanhmã mẽ pamex ã pajarênh to hkêt nẽ. Jakamã na pu htem mãmri paxàmnhix ri mẽmoj tã mẽ apkur xà hkur o papa nẽ tanhmã amnhĩ to hkêt nẽ. ⁹⁻¹⁰ Nom kwa mẽ okora. Kêr ka mẽ sãnti mã amnhĩ jarênh xà hã ixkre hwýr agjêx nẽ kamã axàpkur hkêt nẽ. Kot kaj mẽ atõ ã amnhĩ nhĩpêx anẽ nhũm mẽhõ kormã kot Kris kôt amnhĩ xãm tohtuj anhÿr xwýnhja ja hã mẽ apumu nẽ tee ri hamaxpêr. Axàhpumunh týx ã ate amnhĩ jarênh tã sãnti nhõrkwy kamã axàpkur o nhÿ nhũm ja hã apumu nẽ tanhmã amnhĩ nhĩpêx to wehe? Koja ja kęp omnuj tã apyra nẽ tẽ nẽ axà nẽ mẽ kutã apku. Hãmri nẽ apkur pa nẽ tee ri amnhĩ kukamã hamaxpêr o:

—Hêxta waa nẽ. Kwa mon pa axtem nẽ ri ã mẽmojja kur anẽ? Nã na pa anẽ nẽ ra amnhĩ tomnuj týx nẽ. Anẽ.

Hãmri nẽ hkapri nẽ pa. ¹¹ Ate axàhpumunh týx ã amnhĩ jarênh tã amnhĩ kôt atõja mex kukamã ajamaxpêr kêt nẽ. Kris ra myrapê htyk tã nhũm ã ate sãnti hã mẽõ hkur ã apumu nẽ tee ri hamaxpêr o Jesus hkôt amnhĩ nhĩpêx mex kêt nẽ. ¹² Kormã kot Kris kôt amnhĩ xãm týx kêt tã tee ri ja hã mẽ apumu nẽ hamaxpêr mex kêt nẽ. Jakamã ka Kris noo mã amnhĩ tomnuj nẽ. ¹³ Tã ã ixte Kris kôt ixkwýjê nhĩpêx anhÿr pymaj koja ixtõjê hõ kãm mẽmoj kur puma nẽ. Nẽ htýx ho Tirtùm kęp omnuj ã hkamnhix. Pa ja hã omu nẽ ijaxwýja axte hkur kêt nẽ. Ixte mex ã omunh tã no ãm kot tee ri ja hã ixpumunh nẽ hamaxpêr o:

—Kwa Tirtùm kęp ja mex kêt tã nhũm Pawreja ri kuku. Jakamã kot paj ijaxwýja urak nẽ kuku. Omnuj tãã.

Anhÿr o hamaxpêr pymaj kot paj urak nẽ mẽmota kur kêt nẽ. Na pa hte ã Kris kôt ixtõjê mex kukamã ri ijamaxpêr anhÿr o ixpa.

9

Pawre kot amarĩ Tirtũm kapër o mẽ ahkre hã amnhĩ jarënh

Atre 9.1-18, 20.33-35; Sikũn Korit 11.7-9

¹ Nẽ ixte Jesus nhỹ hã mẽ ahkre ho mẽ pa xwýnhjê hõ jakamã na pa hte Tirtũm kapër o mẽ ajahkre ho ri ixpa. Na pa pre inhno ho mẽ panhõ Pahihti Jesus pumu nẽ mẽ amã harënh o ri mẽ akõt ixpa ka prem inhma nẽ hkõt amnhĩ xunhwý. ² Mẽ hkwýjaja kot axpën mã ixpê Jesus nhỹ hã mẽ ahkre xwýnh kêt ã ijarënh tã mẽ kajaja mẽ ate ja hã ixpumunh mex. Ixte mẽ amã mẽ ujarënh mexja jarënh nhũm mẽ ate mar nẽ hkõt amnhĩ xunhwýrja kukwak ri na ka mẽ apê Jesus kwýy. ³ Jakamã koja mẽ atã ixto kapër japêr kot paj ã mẽ kãm mẽ ajarënh anẽ. ⁴ Nẽ ixte Jesus nhỹ hã kapër jahkre o ixpa xwýnh jakamã kot paj inhã Kris kwýjê kutã amarĩ ixàpkur prãm nẽ mãmrĩ mẽ kutã apku. Ja tanhmã kute hkêt tã kot paj ã amnhĩ nhĩpêx anhỹr kêt nẽ. Kot paj ixàpkur kaxyw nẽ amnhĩ pãnhã amnhĩre nẽ rĩ kormã apku. Na pa hte ã amnhĩ nhĩpêx anhỹr o ri mẽ akõt ixpa. ⁵ Rý kot pa ixkwýjê pyrã nẽ inhã Kris kõt ixkwýjê hõ ho ixprõ hprãm nẽ mãmrĩ ho ixprõ. Nẽ wa ma krĩ piitã hkõt Kris kwýjê kukwak ri ixàpkur o ixpa hprãm nẽ wa mãmrĩ ã amnhĩ nhĩpêx anhỹr o ixpa. Ja mex kênã. Na hte ã Simãw Pêtre mẽ Jesus tõ kot hapujaja amnhĩ nhĩpêx anhỹr o pa nhũm ja tanhmã kêp kute hkêt. No ãm mẽ hkĩnhã ixprõ hkêt na pa hte ri ixpa.

⁶ Nẽ ixkwýjaja na htem apkur xà hpãnhã àpênh o pa hkêt nẽ. Na htem Jesus nhỹ hã kapër jarënh o ri pa nhũm hte Jesus kwýjaja mẽ kãm mẽ apkur xà gõ nhũm mẽ amarĩ hkur o pa. Tã no pa na pa hte Panãpe mẽ wa ã amnhĩ nhĩpêx anhỹr kêt nẽ. Na pa hte wa mry kà ho ixkre nhĩpêx nẽ mẽ kãm ho wênê nẽ hpãnhã amnhĩm awjaprõ. Na pa hte wa ã amnhĩ pa kukwak ri ixujaprõr nẽ ho ixàpkur o ri ixpa anẽ.

⁷ Mẽ kãm pur kãm harôj jamýnh o mẽ pa xwýnhjaja na htem amarĩ hkwý jamý nẽ ho apkur o pa. Nẽ motre jamãr o mẽ pa xwýnhjaja haxwýja amarĩ hkà kagõ janê nẽ ho hkõm o pa. Nẽ pôristijaja na hte mẽ õ pahija mẽ àpênh pãnhã mẽ kãm amnhĩrer o

pa. Jajê piitã na htem mẽ àpênh pãnhã mẽ kãm amnhĩrer o pa. Ja pyrã nẽ te ixpê mẽ amã ixàpênh o ixpa xwýnh pyrãk jakamã ixte mẽ ajahkreta pãnhã kot ka mẽ inhã inhõ ho apa nhũm ja mãânën mex nẽ. ⁸ No ãm papxipix na pa hte ja mex ã harënh kêt nẽ. Tirtũm kapër ã kagã htũm haxwýja kot ja mex ã harënh. ⁹ Kamã na pre finat Mojesja Tirtũm nhỹ hã harënh kot:

Koja akrit amã àpênh o pa ka omu nẽ ho mex nẽ. Kãm õ mex nẽ.

Anhỹr o kot harënh. Xà na pre Tirtũmja ãm mẽ pahkrit pix kukamã ukapri nẽ ã harënh anẽ nã? Nã kot anhỹr kêt. ¹⁰ Mãânën mẽ pahpê panhĩ kaxyw na pre ã ja jarënh anẽ. Mẽ pahte mẽ hpur kãm paxàhkre xwýnhjaja nẽ mẽ pahte kamã paxujamýnh o papa xwýnhjaja. Jajê kaxyw mẽ pahte pur kukwak ri amarĩ paxàpkur o ri papa kaxyw ã pre ã ja jarënh anẽ. ¹¹ Tã ja pyrã nẽ na pa hte mẽ awýr mõ nẽ mẽ amã Tirtũm kapër jarënh o ri mẽ akõt ixpa. Nẽ mẽ akõt ho mẽ ajahkre ho ri ixpa ka htem inhã ixàpênhã pãnhã amnhĩrer kêt nẽ. Ixkwýjaja kot Tirtũm kapër o mẽ ajahkre hpãnhã mẽ ate mẽ kãm amnhĩrer tã pa inhã amnhĩrer kêt nẽ. Na pa pre mẽ ajahkreta pãnhã mẽmoj tã mẽ awýr kêt nẽ. ãm nhãm ixàpênh õta kukwak ri na pa hte ixàpkur o ri ixpa.

¹² Nẽ na hte mẽ ixkwýjaja mẽ awýr mra nẽ Tirtũm kapër o mẽ ajahkre o ri mẽ akõt pa. Hãmri nẽ hpãnhã mẽ apkur xà hã mẽ awý ka mẽ kãm mẽmoj gõ. No kêt pa na pa hte mẽ urak nẽ ixàpkur xà hã mẽ awýr kêt nẽ. Kot pa apu hã mẽ awý ka mẽ tanhmã ixto akapêr to nẽ axpën mã ijarënh o:

—Pêr ãm mẽ pahte kãm amnhĩrer pix kaxyw na hte Pawre mẽ pahwýr mra nẽ mẽ pamã Jesus Kris kot tanhmã mẽ panê amnhĩ nhĩpêx to hã harënh o pa. Pêr ãm apkur xà pix prãm xaj ã kot mẽ pamã ujarënh anhỹr o pa. Jakamã kot puj mẽ kuma nẽ ãm kuma.

Anhỹr o axpën mã ijarënh pymaj na pa hte mẽ ajahkre hpãnhã mẽmoj tã mẽ awýr kêt nẽ. Na pa hte ãm mry kà ho ixkre nhĩpêx nẽ ho wênê nẽ ja pix kukwak ri ixàpkur o ri ixpa. Nẽ amarĩ ri mẽ ajahkre ho ri mẽ akõt ixpa.

13 Nē Tirtūm mā amnhī jarēnh xà hā ixkre kamā mẽ àpēnh xwýnhjaja na htem hwýr mẽ mrar xwýnhjaja mẽ àpēnh pānhā mẽ kām amnhīre. Nē mẽ kot mẽ kām Tirtūm mā mẽmoj nhōr o kuhē xwýnhjaja na htem mǎānēn mẽ àpēnh pānhā mẽ kām amnhīre. 14 Nē Pahihti Krisja na pre ja hā mẽ pakukamā pahťā karō kot:

—Kēr ka mẽ kot tanhmā mẽ amā ijarēnh to ho ri mẽ pa xwýnhjē mǎ amnhīrer o ri apa. Anē.

15 Tā no na pa hte aa mẽmoj tā ixàhwýr kēt nē. Nē mẽ ate inhmā amnhīrer kaxyw pa mẽ amā ja jarēnh kēt nē. Aa ixte mẽmoj tā mẽ awýr kēt. Kot paj apu anē nē ixpijaàm nē. Rý kot pa apu anē nē mẽ akukwak ri ixàpkur o ri ixpa hāmri nhūm mẽ akwýjaja ja hā ixpumu nē hā ijarēnh o:

—Tk. Na hte amarī mẽ pajahkre o ri pa hkēt nē. Ām mẽ apkur xà pix prām xàj na hte ā mẽ pajahkre ho pa anē. Anē.

Jakamā na pa hte mẽmoj tā mẽ awýr kēt nē. 16 Ixte mẽ amā mẽ ujarēnh mexja jarēnh o ri ixpa htā na pa hte ja hā amnhī to jarkrar o ri ixpa hkēt nē. Pahihti Jesus na pre ja hā inhmā karō pa hte kām ho anhýr o ri ixpa. Kot paj kām ho anhýr kēt nē ixpunuj nē ri ixpa. 17 Kēp ām amnhī krā hkēt mǎn tanhmā mẽ amā ixujarēnh to ho mẽ akōt ri ixpa ronhýx pa hpānhā ixàmnhīx kàxpore hā mẽ awý. No ām ā ixte amnhī nhīpēx anhýr kēt. Tirtūm tām kot inhmā ja hā karō jakamā na pa hte amarī ixàmnhīx ri mẽ amā kapēr jarēnh o mẽ ajahkre ho ri mẽ akōt ixpa nē mẽmoj tā ixàhwýr o ri ixpa hkēt nē. 18 Ixte amarī ri mẽ amā mẽ ujarēnh mexta jarēnh o ri ixpaja na inhmā hprām. Ja na inhmā mex. Na pa hte ā amnhī nhīpēx anhýr o ri ixpa nhūm ja inhmā mex pa ixkīnh nē ri ixpa. Jakamā na pa hte hpānhā ixàhwýr kēt nē. Nē inhmā mẽmoj prām o ri ixpa hkēt nē. 19 Nē nhām mẽ kām tanhmā ixàpēnh to ho ixpa hkēt tā pa hte mẽ piitā tanhmā mẽ kām amnhī nhīpēx to ho ri ixpa. Pē mẽ kām Jesus kapēr jarēnh o ri ixpa. Jakamā na mẽ ra ohtō nē ixujarēnh ma nē amnhī kaxyw Jesus kōt hamaxpēr nē hkōt amnhī xunhwý.

Pawre kot tām mẽ piitā mẽ hipēx o pa hā amnhī jarēnh

Wam Korit 10.33

20 Nē na pa hte Ijaewjē hwýr ixpa nē mẽ kot amnhī nhīpēx kōt amnhī nhīpēx o ri mẽ hkōt ixpa. Ixte mẽ kurom Tirtūm kot finat Mojes mā mẽmoj tā karō hkōt amnhī nhīpēx o ixpa hkēt tā mẽ hkōt ri ixpa nē mẽ urāk nē hkōt amnhī nhīpēx o ri ixpa. Mē kot ja hā ixpumunh nē ixte mẽ kām Jesus jarēnh mar nē ixpyrà nē amnhī kaxyw hkōt hamaxpēr kaxyw.

21 Tā pa hpānhā mẽ kēp Ijaew kēt xwýnhjē hwýr ixpa nē mẽ kot amnhī nhīpēx kōt amnhī nhīpēx o ri mẽ hkōt ixpa. Mē kot ja hā ixpumunh nē ixkapēr mar nē ixpyrà nē amnhī kaxyw Jesus kōt hamaxpēr kaxyw. Tirtūm mẽ Kris wa hamaxpēr xà hkōt na pa hte ahpýnhā mẽ kot amnhī nhīpēx xwýnhjē hwýr mra nē ā amnhī nhīpēx anhýr o ri mẽ hkōt ixpa.

22 Nē na pa hte kormā mẽ kot Kris kōt amnhī xunhwýr tohtuj anhýr xwýnhjē hkōt ri ixpa nē te ixte ho mẽ urāk nē kormā hkōt amnhī xām nyw pyrāk o amnhī nhīpēx o ri mẽ hkōt ixpa. Mē kot ja hā ixpumunh nē ixkapēr mar nē hkōt amnhī nhīpēx mex kaxyw. Ā na pa hte mẽ piitā mẽ hkōt ri ixpa nē mẽ hkōt amnhī nhīpēx o ri ixpa anē. Mē kot ja hā ixpumunh nē inhmar nē ixpyrà nē Kris kōt amnhī nhīpēx tỳx kaxyw. 23 Mē kot mẽ ujarēnh mex mar kaxyw na pa hte mẽ piitā mẽ hkōt ā amnhī nhīpēx anhýr o ri ixpa. Tirtūm kot mẽ ho hkra nē mẽ ho mex kaxyw. Nē mǎānēn pa kot mẽ hā ixto mex kaxyw.

Pawre kot htỳx ri amnhī nhīpēx kēt ā kot amnhī jarēnh

Sikūn Ximotre 4.7; Eprēw 12.1-3

24 Mē hprōt xwýnhjaja na htem hprōt tỳx no nhūm mēhō pixi nē wam hkwyjē re nē wam tēn pōj nhūm htem ja hā omu nē kām mẽ hkīnhxà gō. Ja pyrā nē kēr ka mẽ apiitā tām amnhī nhīpēx mex rāhā ho ri apa kē Tirtūm mẽ apumu nē nhýrmā ja pānhā mẽ amā mẽmoj mex gō.

25 Nē mẽ hprōt xwýnhjaja na htem mẽ hkīnhxà hpyr prām xàj mẽ hprōt xà hā arīgro hwýr apkati mẽ hprōt o kuhē. Prōt tỳx prām xàj. Tā mẽ hprōt xà hā arīgrota ā

nhũm hkwýjê pê amnhĩ to wa nẽ amnhĩm hkĩnhxà py. Nom koja hkĩnhxàja kritpêm kãm mex ry hkêt nẽ. Koja gaa nẽ hapêx tokyx anẽ. Tã nom kot puj mẽ Tirtũm kapêr kôt amnhĩ nhĩpêx mex o ri papa. Nẽ mẽ hprôt xwýnhjê kot hkĩnhxà hpyr prãm xàj apkati mẽ hprôt o kuhêta pyrà nẽ apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nẽ nhỹrmã mẽ pamã hkĩnhxà mex ô gô. No ãm jar hkĩnhxà kurom koja aa mẽ pahpê hapêx kêt nẽ. Koja mẽ pamã mex rãhã ho rãhã.

²⁶ Nẽ na hte mẽ hprôt xwýnhjaja htýx ri tanhmã hprôt to ho pa hkêt nẽ. Na htem hkwýjê pê amnhĩ to wa kaxyw hprôt nẽ nhỹri mẽ àhuk xàta pix pumunh pê hwýr hprôt nẽ mra hãmri nẽ kamã ahtwý. Nẽ kamã àhuk pix kukamã hamaxpêr o hprôt týx nẽ mra. Ja pyrà nẽ na pa hte apkati mẽ Tirtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Nẽ mẽ pijapu mex xwýnhjaja na htem htýx ri nhỹhýnh axpên tak kêt nẽ. Na htem nhỹhýnh kot mẽ htak o mẽ rênh xà pix kamã mẽ htak o mẽ rênh kukamã hamaxpêr pê kamã mẽ htak. Ja pyrà nẽ na pa hte ixtýx ri tanhmã amnhĩ nhĩpêx to ho ri ixpa hkêt nẽ. Na pa hte Tirtũm mã ijamaxpêr pê tanhmã amnhĩ nhĩpêx to rãhã ho ixpa. Kot nhỹrmã inhmã mẽmoj mex nhõr kaxyw. ²⁷ No na pa hte ixtýx ri amnhĩ jamaxpêr xà hkôt tanhmã amnhĩ nhĩpêx to ho ri ixpa hkêt nẽ. Kot pa ã amnhĩ nhĩpêx anẽ nẽ ixte mẽ kãm Jejus kapêr jarênh o ri ixpa htã ãm ri ixtýx ri ã amnhĩ nhĩpêx anhýr kaprý nhũm Tirtũmja tee ri ja hã ixpumu nẽ inhmã mẽmoj mex nhõr kêt nẽ.

10

Ijaew kot amnhĩ nhĩpêx

Rõmãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgétjaja tanhmã mẽ harênh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harê. Mẽ pahte mẽ uràk nẽ pahtýx ri amnhĩ nhĩpêx

pymaj kot paj mẽ amã tanhmã mẽ harênh to ka mẽ inhma. Mãn ka mẽ arĩ mẽ harênh ã anohtýx japêr. Na prem piitã pika pê Ejit kamã pa htã kurũm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhũm pre Tirtũm tanhmã kakrã hto nhũm ma mẽ hkukamã pa nhũm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhýr xwýnhja wýr pøj nẽ tee ri rêr prãm xàj amnhĩ kukamã hamaxpêr. Hãmri nhũm Tirtũm mẽ kãm hkôt ã ho amgrà nhũm mẽ hkôt mex pê rêr pa nẽ axte kakrã hkôt pa ho pa. ² Finat Mojes kot mẽ o pa jakamã nhũm prem kêp hkwý hã amnhĩ jarê nẽ kãm amnhĩ jarênh o:

—Nà kot paj mẽ akapêr ma nẽ akôt ri amnhĩ nhĩpêx o ixpa. Anẽ.

Te mẽ pahpê Kris kwý hã amnhĩ jarênh kaxyw mẽ kot gôx kãm mẽ pahkrã kumrãr nhũm mẽ pahte Kris mã amnhĩ jarênhata pyràk. ³ Na prem kapôt ã ri pa nhũm Tirtũm tãm kaxkwa rũm mẽ hwýr mẽ apkur xà rẽ nhũm mẽ hkawrà nẽ ho apkur o pa. ⁴ Tã ra kôr xàj hiroto nhũm Tirtũm tanhmã mẽ kãm kên prêkja to nhũm kurũm mẽ kãm gô axkapĩnhũm mẽ ho ixkõ nẽ akupým hihtýx. ã Krisja mẽ hkôt mẽ ho mẽ hihtýx o pa anẽ. Mẽ kot no ho omunh kêt tã nhũm mẽ hkôt mẽ ho mẽ hihtýx o pa.

⁵ Tã no nhũm mẽ ohtô nẽ Tirtũm kôt amnhĩ nhĩpêx kêt nẽ. Kot mẽ ho mex kumrêx tã nhũm mẽ ãm amnhĩ tã omu nẽ ãm omu nẽ kapêr kôt amnhĩ nhĩpêx kêt nẽ. ãm kapêr kwým ri tanhmã amnhĩ tomnuj to ho pa nhũm tee ri amnhĩ tã mẽ omu nẽ tanhmã mẽ ho nhũm mẽ hkwýja hpikaprãr pa. Hãmri nhũm arĩ mẽ htír xwýnhjaja kapôt ã mẽ hagiênh pa nẽ axte ma pa.

⁶ Jakamã kwa kêr pu mẽ kot ã amnhĩ nhĩpêx anhýr ã mẽ harênh ma nẽ hã pano htýx nẽ ho papa hãmri nẽ ho mẽ uràk kêt nẽ. Mẽ uràk nẽ pahtýx ri tanhmã amnhĩ nhĩpêx to ho ri papa hkêt nẽ.

⁷ Nẽ na pre mẽ hkwýjaja sãnti kutã hkõn krã ho rôrôk nẽ hkrĩ nẽ kãm amnhĩ jagrer pê amnhĩ to kuwý. Tirtũm kapêr ã kagà htũm kot mẽ kot amnhĩ nhĩpêx anhýr ã mẽ harênh kot:

Na prem sãnti kutã apkur o hkrĩ nẽ kãm amnhĩ jagrer o hkrĩ nẽ gaa nẽ pipãnh

pix o pa. Jao axpën kamã hpijaàm kêt o pa.

Anhÿr jakamã kwa kër pu mẽ ã mẽ kot amnhĩ nhĩpêx anhÿrja ã pano htÿx nê ho mẽ uràk hkêt nê.

⁸ Nê na pre mẽ hkwÿjaja htÿx ri mjên nê hprô kuhpa hã nhãm ri mẽ kamã hpijaàm kêt o pa. Mÿrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhÿr pymaj kër pu mẽ ja hã pano htÿx nê ho mẽ uràk kêt nê. ãm kwarĩ ho kwarĩ.

⁹ Nê na pre mẽ hkwÿjaja axtem nê htÿx ri tanhmã axpën mã Tĩrtũm jarênh to nê harênh o:

—Nà Tĩrtũmja gryk tokyx anhÿr kêt jakamã kwa pu mẽ ã amnhĩ tomnuj anhÿr o papa. Kojã mẽ pahpumu nê tanhmã mẽ pahto hkêt nê.

Anhÿr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwÿr kagã xoprê nhõ wenên xihtÿx kwÿ rê nhũm mẽ hwÿr mra nê mẽ hkamnhar o mẽ hkwÿjê pa. Tã ã kot mẽ panhĩpêx anhÿr pymaj kwa kër pu mẽ ja hã pano htÿx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

¹⁰ Nê na pre mẽ hkwÿjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwÿr kapêr o wrÿk xwÿnh mẽ nhũm ma mẽ hwÿr wrÿ nê ÿ hã mẽ hkwÿjê nhĩmex. Tã ã kot mẽ panhĩpêx anhÿr pymaj kwa kër pu mẽ ja hã pano htÿx nê ho mẽ uràk nê Tĩrtũm o pakapêr punuj kêt nê.

¹¹ Na pre mẽ ixpê Ijaew nhĩgêjtaja ã htÿx ri amnhĩ nhĩpêx o pa anê. Tĩrtũm kapêr ã kagã htũm kot ã mẽ kot amnhĩ nhĩpêx anhÿr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tÿx nê mẽ uràk nê ã amnhĩ nhĩpêx anhÿr kêt kaxyw. Ra Jesus akupÿn mẽ pahwÿr wrÿk xà hã arĩgro hkukamã grêre jakamã kwa kër pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htÿx ã mẽ pamã karõ

Matêwre 4.1, 6.9-13; Wam Korit 1.8; Sikũn Pêtre 2.9; Jutre 24

¹² Tã kër ka mẽ ã Ijaew kot amnhĩ nhĩpêx anhÿr ã mẽ harênhja ma nê ã ajamaxpêr anhÿr kêt nê. Rÿ mẽ ajamaxpêr o:

—Nà mẽmoj piitã kutã ixihtÿx kênã kot pa hkêt mẽ uràk nê ã amnhĩ nhĩpêx anhÿr o ri ixpa.

Anhÿr o mẽ ajamaxpêr kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

¹³ Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyrã nê na hte arĩ mẽ pahte amnhĩ tomnuj hprãm xàj tanhmã mẽ pahkrã hto ho pa. Mẽ pahpiitã ã mẽ pahto anhÿr o ri mẽ pahkôt pa. Nom nhũm Tĩrtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpêr nhũm ja hã mẽ pahpumu nê mẽ panê mẽkarõmnuti mã kapêr. Nê kutã mẽ pahto paxihtÿx nê pu mẽ ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwÿnhjê jarênh

Wam Korit 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kêr ka mẽ amnhĩ kaxyw sãnti hkôt ajamaxpêr o ri apa hkêt nê. Nê amnhĩ to hwÿr kêt nê. ãm kwarĩ ho kwarĩ.

¹⁵ E mẽ axãhpumunh tÿx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tÿx japêr. ¹⁶ Nà na pu htem tõhã Jesus kot mẽ panê htyk mã pajamaxpêr kaxyw axpën wÿr akuprô. Hãmri nê mẽmo kagô hkwÿ ru nê Tĩrtũm mã mex ã harê nê mẽmoj o pahkôm pê Jesus kot mẽ panê hkamrô pikapĩr mã pajamaxpêr. Nê hpãnhã pãwti hõ py nê axpën mã ho hkry nê mẽ kot Kris pĩr nê ï kamã hkamnhwÿr nhũm mẽ panê htykja mã pajamaxpêr pê kuku. ¹⁷ Pãwtita ãm pixire htã pu htem axpën mã ho hkry nê pahpiitã kuku. Mẽ pahpê Kris kwÿ hã mẽ pahte

amnhĩ jarēnh nhũm mẽ pahkwỳ kot ja hã mẽ pahpumunh kaxyw. Te mẽ pahtipxi nē ri mẽ papa pyrək nē pāwti pixire htā pu mẽ pahpiitā kuku.

¹⁸ E kot paj hpānhā mẽ amā amnepē mā Ijaew kot tanhmā amnhĩ nhĩpēx to jarē ka mẽ inhma. Na pre htem Tirtũm mã mex ã harēnh nē kām amnhĩ nhõr ã kot amnhĩ tã mẽ omunh kaxyw nhũm prem tanhmā amnhĩ nhĩpēx to. Jao kām mẽ apkur xà hkwỳ gō nē kām mex o mex ã harē. Hāmri nē amnhĩ mã mẽmojta kwỳ xà nē hkur o hkrĩ. Jao ra Tirtũm mã mex o mex ã harē nē kām kēp hkra hã amnhĩ jarē.

¹⁹ Nom mẽ kot sãnti mã mẽmoj nhõr xwỳnhjaja na htem kām mẽmo mẽ apkur xà hkwỳ gō nom ãm kām õr kaprỳ. Tanhmā kot we amnhĩ to nē amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipēx kēnā. Jakamā na htem ãm kām mẽ apkur xà hkwỳ nhõr kaprỳ. ²⁰ Mẽ kot sãnti mã mẽmoj nhõr xwỳnhjaja na htem Tirtũm mã õr kēt nē. Mēkarõmnuti mã na htem kugō. Jakamā kot kaj mẽ urək nē sãnti mã mẽmoj gō nē apē mēkarõmnuti hkwỳ hã amnhĩ to amnhĩrit nē apē hkwỳ hã ri apa. Jakamā mẽ ate sãnti mã mẽmoj nhõrta na inhmā hprãm kēt kumrēx. ²¹ Kot kaj mẽ panhõ Pahihti Jejus kot mẽ panē htyk ã mẽmoj kagō hkwỳ ho ixkō hāmri nē ma mra nē hpānhā sãnti pē mēkarõmnuti hã mẽmoj to ixkō. Hāmri nhũm Tirtũmja tee ri ja hã mẽ apumu nhũm ja kēp omnuj tỳx nē. Rỳ ka mẽ Pahihti Jejus kot mẽ panē htyk ã pāwti hkwỳ hku nē hpānhā ma mra nē sãnti pē mēkarõmnuti hã mẽmoj hku. Hāmri nhũm Tirtũm kēp ja omnuj tỳx nē. Mẽ pahte ã amnhĩ nhĩpēx anhỹrja na axpēn kuhpa hã. ²² Jakamā kot ka mẽ ã amnhĩ nhĩpēx anē nē te ra mẽ amā mēkarõmnuti hkĩnh nē mãnēn amā Tirtũm kĩnh pyrək o amnhĩ nhĩpēx. Nē te Tirtũm kurom mẽ kajaja mẽ axàhpumunh tỳx pyrək o amnhĩ nhĩpēx. Nhũm tee ri amnhĩ tã mẽ apumu nē mẽ akamā gryk tỳx nē. Kwa mẽ okora. Koja Tirtũm akamā gryk ka amex kēt kumrēx.

Mẽ pamā Kris kõt mẽ pahkwỳjê hkĩnh pē mẽ ho mex ã mẽ pamā karõ

Matêwre 20.28; Rõmãn 14.1–15.7; Piripos 2.1-4

²³ Nē na htem tõhã amnhĩ jarēnh o:

—Nà kot pa inhmā mẽmoj to anhỹr prãm nē ixàmnhĩx ã amnhĩ nhĩpēx anhỹr o ri ixpa. Anē.

Tã no ãm mẽmoj piitã mẽ pamā mex kēt. Na htem kām mẽmoj to anhỹr prãm xà hkõt mẽmoj piitã tanhmā ho ho ri pa nē tanhmā amnhĩ tomnuj to. Hāmri nhũm mẽ hkwỳjaja ja hã mẽ omu nē mẽ urək nē tanhmā ri amnhĩ tomnuj to. Jao Kris kõt amnhĩ xunhwỳr tỳx kēt nē. ²⁴ Jakamā kwa kēr pu mẽ amnhĩ pix kukamā pajamaxpēr pē tanhmā amnhĩ nhĩpēx to ho papa hkēt nē. Mãnēn amnhĩ kwỳjê hkukamā pajamaxpēr pē tanhmā mẽ ho mex to ho ri papa pē tãm ri amnhĩ nhĩpēx o papa.

²⁵ Nē kot kaj mẽ amnhĩ xàpkur xà japrõr kaxyw ma nhỹhỹm mra nē mãmrĩ axàmnhĩx ri amā mẽmoj prãm xà hkõt mẽmoj japrõ. Nom kēr ka mẽ axujaprõrja kēp sãnti xàpkur xà hã mẽ hkukjêr kēt nē. ãm axàmnhĩx ri mẽ kēp mẽmoj japrõr o ri apa. ²⁶ Tirtũm kapēr ã kagà htũm kot ja jarēnh kot:

Pika piitã hkõt mẽmoj piitã kēp Tirtũm nhõ na. Anē.

Jakamā mẽ mãmrĩ axàmnhĩx ri mẽmoj piitã haprõ nē mẽmoj piitã hkur o apa.

²⁷ Tã koja mẽ kēp Kris kwỳ hkēt xwỳnhjê hõ ate kutã axàpkur kaxyw amnhĩ wỳr awỳ ka amā hwỳr amõr prãm nē mãmrĩ ma hwỳr mō. Nhũm mẽmoj to amā anhõ ka axàmnhĩx ri mãmrĩ aku. No ri tee ri amnhĩ kukamā ajamaxpēr nē tanhmā hã hkukjêr to hkēt nē. Rỳ kām:

—Kwa xà we mryja sãnti hã mẽ apkur xà na nà?

Anhỹr o hã mẽ hkukjêr kēt nē. ãm mãmrĩ axàmnhĩx hkur o akrĩ. ²⁸⁻²⁹ Nom koja Kris kõt mẽ kot amnhĩ xãm tohtuj anhỹr xwỳnhjê hõ mẽ awỳr axà nē tee ri ja hã apumu nē amā:

—Kwa sãnti hã mẽ apkur xà na ka ri mẽ kutã hkur o akrĩ.

Anhỹr o amā kapēr ka ama nē hkaga kurē kumrēx nē hkur kēt nē. Amā mex tã Kris kõt atõja kēp omnuj jakamā ka hkaga nē hkur kēt nē. No kot ka ãm ama nē arĩ hkur o anhỹr japēr. Kot amā harēnh xwỳnhta kēp omnuj tã ka arĩ noo mã hkur japēr. Nhũm ja hã apumu nē tee ri Tirtũm kapēr kukamā tanhmā hamaxpēr

to. Hāmri nē apyrà nē kuku nē gaa nē tee ri amnhĩ kukamã hamaxpēr nē amnhĩ mã:

—Hêxta waa nē. Sânti nhōja mex kêt tâ pa ri kuku. Kwa na pa pēr hkurja o amnhĩ tomnuj nē. Hêxta waa nē. Anē.

Hāmri nē tee ri amnhĩ kukamã hamaxpēr o hkaprĩ nē. ã kot amnhĩ nhĩpêx anhÿr pymaj koja mēhō ã mēmo mē apkur xà nē amã kapēr anē ka ama nē hkaga kurê kumrêx. Jao amnhĩ pix kukamã ajamaxpēr kêt nē. Mãânên Kris kôt atō nē atōxjê mex kukamã ajamaxpēr. Nom koja amã kêp sânti hã mē apkur xà hã harê ka ama nē ã ajamaxpēr anhÿr japêr nē ajamaxpēr o:

—Nà kêp omnuj tâ kot paj mamrĩ kuku. Ja inhmã mex kênã. ³⁰ Ra ixte Tirtũm mã harênh nē ixãmnhĩx hkur o inhÿr kênã kot kêt ã nē inhmã kapēr anē. Anē.

Kwa mē ã ajamaxpēr anhÿr kêt. Kot kaj mē ã ajamaxpēr anē hāmri nē Kris kôt atō rÿ atōx mex kukamã ajamaxpēr kêt nē.

³¹ Jakamã kêr ka mē tãm tanhmã amnhĩ nhĩpêx to ho ri apa. Nē axàpênh mex nē. Kêr kê mē piitã ja hã mē apumu nē mē apumunh kôt amnhĩm Tirtũm mex ã harê.

³² Nē kêr ka mē piitã mē noo mã tãm ri amnhĩ nhĩpêx o apa. Ijaew noo mã nē Ijaew kêt xwÿnhjê noo mã. Nē Jejus kwÿjê noo mã. Mē piitã mē noo mã tãm ri amnhĩ nhĩpêx rãhã ho ri apa. Mē kot tee ri mēmoj tâ mē apumunh nē hpijaàm pymaj ka mē tãm ri mē piitã mē noo mã tanhmã amnhĩ nhĩpêx mex to ho ri apa. ³³ Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamaxpēr kêt nē. Mē piitã mē mex kukamã na pa hte ijamaxpēr o ri ixpa. Pê tanhmã amnhĩ nhĩpêx to ho ri ixpa. Mē kot ja hã ixpumunh nē ixpyrà nē Jejus kôt amnhĩ xunhwÿr nē ãm kôt pix mã ri amnhĩ nhĩpêx o pa kaxyw.

11

¹ Na pre hte Kris ã ã amnhĩ nhĩpêx anē nē mē piitã mē mex kukamã hamaxpēr rãhã ho ri pa. Tã na pa hte uràk nē ã amnhĩ nhĩpêx anē. Jakamã kwa kêr ka mē ixpyrà nē ã amnhĩ nhĩpêx anhÿr o mãn ri apa.

Mēnijaja mē mjên ã hpijaàm ã mē kãm karō
Epes 5.22; Wam Pêtre 3.1-6

² Nē na ka xep htem arĩ ra ixte tanhmã mē amã ixkapêr toja mã ajamaxpēr tÿx o ri apa. Na pa pre Kris kôt mē pahtō nē mē pahtōxjaja axpên wÿr pikuprōnh nē tanhmã amnhĩ nhĩpêx to hã mē amã karō ka prem inhma nē mē uràk nē ã amnhĩ nhĩpêx anē. ãm hāmri na ka htem ã amnhĩ nhĩpêx anhÿr o apa. Ja na inhmã mex.

³ Na pa pre krĩ hō kamã mēnijaja kot amnhĩ krã hpro hã mē amã mē harê. Ka prem inhma nhũm mē akwÿjaja kãm ja mex nē nhũm mē akwÿjaja tee ri ja kukamã ajamaxpēr. No mēmo kaxyw na hte mēnijaja amnhĩ krã hpro? E kot paj ixprĩ hã mē amã ja jarê ka mē inhma. Nà Tirtũm kêp Kris jamãr xwÿnh nhũm Kris kêp Tirtũm mã mē inhmyjê jamãr xwÿnh. No mē anijaja mē amjên kêp Kris mã mē ajamãr xwÿnh. Na hte mēnijaja ohtō nē ra mē mjên ã amnhĩ to amnhĩrĩt kaxyw amnhĩ krã hpro nē ri pa. No mē inhmyjaja na pa htem ã amnhĩ nhĩpêx anhÿr kêt nē. Na pa htem amarĩ ixkrã hkênh nē ixpa. ⁴ Jakamã na pa htem Tirtũm kapêr mar xà hã ixkre hwÿr axpên wÿr akuprō nē Tirtũm nhÿ hã mē anijê mã kapêr jarênh o ixkuhê. Rÿ Tirtũm mã tanhmã mē pajarênh to. No ãm amnhĩ krã hpro hkêt rãhã kãm mē ajahkre rÿ kãm mē pajarê. Kot pa mē amnhĩ krã hpro nē te mē apê ixprōjaja mē apê mē ijamãr xwÿnh ã mē ajarênh pyrãk. Jao te mē ixte mē ijamãr xwÿnh Kris ã ixpijaàm kêt pyrãk o amnhĩ nhĩpêx. ⁵ No mē anijaja mē ixte Kris mã mē ajamãr xwÿnh jakamã na ka htem Tirtũm nhÿ hã mē inhmã kapêr jarênh rÿ kãm mē pajarênh kaxyw nē amnhĩ krã hpro. Mē ixte Kris mã mē ajamãr xwÿnhjê hã apijaàm kaxyw ã amnhĩ nhĩpêx anē nē mē amnhĩ krã hpro. Kot ka mē ã amnhĩ nhĩpêx anhÿr kêt nē te mē ate mē ixtã apijaàm kêt pyrãk o amnhĩ nhĩpêx nhũm mē amjên tee ri ja hã apumu nē hpijaàm nē. Te ate amnhĩ krã hkênh nē ri apa nhũm tee ri apumunh nē hpijaàm pyrãk. ⁶ Kot kaj mē amnhĩ krã hkênh nē ri apa nē amnhĩ kamã apijaàm nē ri apa. Mē anijaja na ka htem akrã hkĩ japjê nē kamã amex nē ri apa. No kot ka mē amnhĩm akrã hkênh nē apunuj nē amnhĩ kamã apijaàm nē ri apa. Jakamã kêr ka mē Tirtũm mã amnhĩ jarênh kaxyw

nê amnhî krâ hpro. Nom kot ka mê amjên ã apijaàm kêt nê ri apa hprâm japêr nê mamrî amnhîm akrâ hkênh nê ri amnhî kuk ã apijaàm kêt nê ri apa.

⁷ No mê inhmyjaja na pa htem amnhî krâ hpro hkêt nê. Te mê ixpê Tîrtûm pyrâk nhûm mê anijaja te mê apê Tîrtûm kra pyrâk o na pu htem axpên nhîpêx. Tîrtûm krajaja na htem mêmoj tâ Tîrtûm mã karô hkêt nê. Ja pyrâ nê mê anijaja na ka htem mê inhmyjê mã mêmoj tâ karô kamã axihtÿx o apa hkêt nê. Na ka htem mê ixtã apijaàm kãm mêmoj tâ mê ixwÿ.

⁸ Amnepê mã Tîrtûm kot mêmoj to kator krax rûm na pre myja kumrêx nhîpêx hãmri nê kêp ôkwa i hõ kapa nê ho kãm hprô nhîpêx. No na pre nija kumrêx nhîpêx nê ôkwa i ho kãm mjên nhîpêx kêt nê. ⁹ Myja mã na pre hprô nhîpêx. No nija mã mjên nhîpêx kêt nê. ¹⁰ Jakamã kêr ka mê anijaja amjên ã apijaàm ã amnhî to amnhîrît kaxyw hãmri nê mê inhmã Tîrtûm nhÿ hã tanhmã akapêr jarênh to kaxyw rÿ kãm amnhî jarênh kaxyw hãmri nê amnhî krâ hpro nê akuhê. Hãmri nhûm Tîrtûm kapêr o mê wrÿk xwÿnhjaja ja hã mê apumu nê hkînh nê tee ri mê akukamã hamaxpêr kêt nê.

¹¹⁻¹² Nê wam ni kator xwÿnhhta na pre myja rûm kato. Tã na pa htem jarãhã mê inhmyjaja hpãnhã mê anijê rûm ijapôj. Tîrtûm jamaxpêr xà hkôt. Tãm na pre ã mê pahte amnhî nhîpêx anhÿr kaxyw ã mê panhîpêx anê. Tã mê ixpê Pahihti Kris kwÿ hã mê inhmyjaja nê mê anijaja na pu htem ri ahte papa hkêt nê. Na pu htem axpên kutã pamã axpên hkînh o papa nê mêmoj to axpên kutã panojarêr o ri papa. Nê axpên to presija ho papa. Na hte mê anijaja mê amjên o presija ho apa. Nê mê amyjaja na ka htem mê aprô ho presija ho apa. Tã kêr ka mê anijaja mê amjên ã apijaàm o ri hkôt apa. ¹³ Jakamã kwa mê kot amnhî krâ hproja kukamã ajamaxpêr tÿx nê. Xà mê anhõ krî kamã mênijaja mê mjên ã hpijaàm ã amnhî to amnhîrît kaxyw amnhî krâ hpro nã? Koja mê ja kaxyw ã amnhî nhîpêx anhÿr japêr kê mê rî mê anoo mã Tîrtûm mã amnhî jarênh kaxyw nê kupê xê hkwy ho amnhî krâ hprô nê rî kãm amnhî jarê. Nom koja mê ã amnhî

nhîpêx anhÿr kêt nhûm mëmyjaja tee ri ja hã mê omunh nê ho kapêr hkêt japêr hãmri kê mê rî amnhî krâ hpro hkêt nê ri pa.

¹⁴ Mê kot mê pahte amnhî nhîpêx ã mê pahpumunh nê hkînh kaxyw na pu htem tanhmã amnhî nhîpêx to ho ri papa. Na htem mê pahkrã hkî jarênh o: “Koja mëmyjaja hkrã hkî japjê nê ri pa nê ra kamã omnajti.” Anhÿr jakamã na pa htem amnhî krã hkênh nê ri ixpa. ¹⁵ No mê anijaja na htem mê ajarênh o: “Mênijaja na htem hkrã hkî japjê nê ri pa nê kamã muxti.” Anhÿr jakamã na ka htem akrã hkî japjê nê ri apa. Mê akî te kêp mê akrã hpro xà pyrâk. Na ka htem ã amnhî nhîpêx anhÿr o apa.

¹⁶ E na pa ra mê amã krî hkwy kamã Kris kwÿ nijaja kot mjên ã hpijaàm ã amnhî to amnhîrît kaxyw tanhmã amnhî nhîpêx to hã mê harê. Tã koja mēhõ nija tee ri ja ma nhûm ja kêp omnuj japêr. Nhûm amnhî jarênh o:

—Kêt. Kot paj tanhmã inhmã amnhî nhîpêx to hprâm xà hkôt tanhmã ri amnhî nhîpêx to ho ri ixpa. Koja inhmjên ja hã ixpumu nê hpijaàm nê rî tãm.

Anhÿr ã amnhî jarê ka mê tee ri ã kot amnhî jarênh anhÿrja ã ama nê kãm:

—Kwa nã ã ri ajamaxpêr anhÿr kêt nê. Na hte Kris kwÿjaja ã hamaxpêr anhÿr kêt nê. Anê.

Jejus tyk mã mê pajamaxpêr pê tanhmã mê pahte amnhî to hã mê pajarênh

Matêwre 26.26-30; Makre 14.22-26; Rukre 22.19-20

¹⁷ Nê na ka xep htem Tîrtûm mã amnhî jarênh xà hã ixkre hwÿr axpên wÿr akuprô nê kamã amnhî to mex kêt nê. Na ka htem tanhmã amnhî tomnuj to pa tee ri mê ajarênh ma nê ixkaprî nê. Nê amnhîm mê amex ã mê ajarênh kêt nê. ¹⁸ Na ka xep htem axpên wÿr akuprô nê mêmoj tâ axpên mã akir nê axpên pê anhgrã. Nê ahpÿnhã mêmoj mã ajamaxpêr jao ra mê amã axpên kînh kêt nê. Na pa tee ri ã mê ajarênh anhÿrja ma nê ixkaprî htÿx nê. ¹⁹ Xà na hte Tîrtûm ahpÿnhã tanhmã mê pahte amnhî anhîpêx to hã mê pahpumunh kôt kãm mê pajapê hkêt ã amnhî jarê? Nã na hte ã amnhî nhîpêx anhÿr kêt nê. Kãm mê pajapê ho axpên pyrâk kênã.

²⁰ Nē na hte Kris kwỳjê piitã tõhã axpēn wỳr akuprõ nē Jesus tyk mã hamaxpēr kaxyw pãwti hkwy hku. Tã mẽ kajaja na ka xep htem ja kaxyw axpēn wỳr akuprõ nom axtem nē Jesus tyk mã ajamaxpēr pē axàpkur kêt nē. ãm mẽ axàpkur pix kukamã ajamaxpēr nē axtem nē axàpkur rũnh o akrĩ. ²¹ Jao amnhĩ pix kukamã ajamaxpēr. Mē akwỳjaja wam mrar nē hpõx nē mẽ apkur xà hã mẽ hkrĩ xwỳnhjaja na xep htem hkwyjê rom mẽõta pinh pa. Nē wĩhtija nhũm mẽ mãânēn hpenh pa nē axtem nē ho axpã. Jakamã nhũm mẽ akwỳjaja kot amnhĩ to hapu nē hpõx xwỳnhjaja mẽmojta ã hprãr pa. ²² Kwa mon ka mẽ amã hprãm nē anhõrkwỹ kamã axàpkur kêt nē? Mē kot Tĩrtũm mã amnhĩ jarēnh xà hã ixkre kamã na htem apkur rũnh hkêt nē. Ka mẽ ã amnhĩ nhĩpēx anē nhũm mẽõ hkêt xwỳnhjaja amnhĩ to hapu nē mra nē mẽõ hã prã nē amnhĩ kamã hpijaam nē. Kwa xà kot pa ã mẽ ate amnhĩ nhĩpēx anhỹr ã mẽ ajarēnh ma nē ixkĩnh nē mẽ ate amnhĩ nhĩpēx mex ã mẽ ajarē? Nà kot paj ã mẽ ajarēnh anhỹr kêt nē.

²³ Pahihti Jesus na pre ja hã tanhmã inhmã kapēr to nē inhmã:

—Kēr ka mẽ tõhã axpēn wỳr akuprõ nē axàpkur pē ixtyk mã mãn mẽ ajamaxpēr pē ã amnhĩ nhĩpēx anē nē ã amnhĩ nhĩpēx anē. Anē.

Jakamã kot paj ixprĩ hã amnhĩ xõ ri mẽ amã kot tanhmã inhmã kapēr tota jarē ka mẽ inhma. Nà Jesus kormã htyk kêt ri Jut Kariot ra kot põristi mã hã àmnēnh kaxyw nhũm kamàt nhũm Jesus mẽ ý hã mẽ ahkre xwỳnhjê mẽ apkur kaxyw hkrĩ hpa. Hãmri nhũm Jesus pãwti hõ py nē o xa ²⁴ nē Tĩrtũm mã harē nē kãm:

—Pa Papaj. Nà ãm hãmri na ka hte mẽ inhmã mẽ inhõ mex o apa. Anē.

Nē hpãnhã pãwja o hkry pa nē ho mẽ kot ý hã mẽ ahkre ho mẽ pa xwỳnhjê nhĩpēx pa nē mẽ kãm:

—E na pa ã pãwti ho hkry nē mẽ amã õr anē. Koja mẽ ã inhĩpēx anē nē te mẽ kot ixto hkry hpar pyrãk o inhĩpēx pa amnhĩ xà htỳx kamã ijamak kãm ty. Nom mẽ anē kot paj ty. Jakamã e kēr ka mẽ ixwakre kamã tõhã axpēn wỳr akuprõ nē ixte mẽ ate amnhĩ tomnuj pãnhã amnhĩrer kaxyw

mē anē ixtyk mã ajamaxpēr pē akĩnh nē pãwta kur o akrĩ. E mẽ mãmrĩ axàmnhĩx aku. Anē.

²⁵ Hãmri nē hpãnhã kop kãm wĩhtita py nē o xa nē mẽ kãm:

—E kop kãm wĩhtija te kēp Tĩrtũm kot mẽ atã amnhĩ jarēnh nyw xà jarēnh pyrãk. Ixtyk kukwak ri koja mẽ ato hkra. Kot paj ty nhũm ixkamrõ mẽ anē axkapĩ. Jakamã e. Mē kopja kamã wĩhti ho akõm o axpēn nhĩpēx. Nē ho akõm pē ixte mẽ anē ixtyk mã ajamaxpēr. Anē.

²⁶ Tã ã kot amnhĩ jarēnh anhỹr jakamã na pu htem axpēn wỳr akuprõ nē pãwti hkwy hku nē mẽmo kagõ hkwy o ixkõ. Nē ho pahkõm pē axpēn mã Jesus tyk jarēnh o pahkrĩ. Tã kēr pu mẽ arĩ ã amnhĩ nhĩpēx anhỹr o ri papa rãhã nhũm Jesus akupỹn mẽ pahwỳr wrỳ. ²⁷ Jakamã kot kaj mẽ tõhã mẽmo arĩgro hã kot mẽ panē htykja mã ajamaxpēr kaxyw axpēn wỳr akuprõ. Hãmri nhũm mẽ anhĩõ mẽ awỳr axà nē nhỹ. Nom axtem nē Jesus tyk mã hamaxpēr kêt japēr. Nē htỳx pãwti kur o nhỹ. Nē hkõt amarĩ mẽmo kagõ ho hkõm o nhỹ. Koja ã htyk mã hamaxpēr kêt rãhã amnhĩ nhĩpēx anē nē te Jesus o kapēr pyrãk o amnhĩ nhĩpēx. Te ho kapēr o:

—Nà Jesus amarĩ htyk nhũm hkamrõ amarĩ hpikapĩr kēnã. Na pre mẽ panē htyk kêt nē.

Anhỹr o ho kapēr pyrãk. ²⁸ Jakamã kwa kēr ka mẽ ate pãwta kur kaxyw nē taxy kormã tanhmã ate amnhĩ nhĩpēx to mã ajamaxpēr nē ajamaxpēr o:

—Kwa mãn pa Tĩrtũm kapēr kõt amnhĩ nhĩpēx mex rãhã ho ri ixpa nà?

Anhỹr o mãn ajamaxpēr. Hãmri nē ate hkõt amnhĩ nhĩpēx mex ã amnhĩ pumu nē amarĩ axàmnhĩx aku. No kot ka mẽ kormã mẽmoj punuj kaga hkêt nē arĩ ri ho anhỹr o pa hãmri nē kãm ajamaxpēr nē hkur kêt nē. Rỳ tanhmãn tee ri tanhmã ate amnhĩ tomnuj tota mã ajamaxpēr nē akaprĩ nē. Hãmri nē tokyx Tĩrtũm mã amnhĩ jarē nē amnhĩ to mex prãm xàj amnhĩ to awỳ hãmri nē arĩ kormã axàmnhĩx pãwtita ku. ²⁹ Koja mẽhõ mẽ akõt axà nē mẽmoj kukamã hamaxpēr pē htỳx pãwti nhĩrēnhã õ py hkur o nhỹ. Hãmri nhũm Tĩrtũm tee ri ja hã omu nē hã tanhmã ho. ³⁰ Na ka mẽ ra axohtõ

ně ã amnhĩ nhĩpêx aně ně atỳx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atỳx tanhmã ajamaxpêr to pê hkwỳ hkur o akrĩ. Mỳrapê na ka mẽ ra ja hã axà ně ri apa. Ně mẽ akwỳjaja ra htyk rax ně. ³¹ Nom kot ka mẽ axpên wỳr akuprô hãmri ně akupỳm tãm axpên kôt ajamaxpêr ně axpên kôt amnhĩ nhĩpêx ně rĩ kormã pãwtita ku. Hãmri nhũm Tĩrtũm ja hã mẽ apumu ně tanhmã mẽ ato hkêt ně. ³² Na hte mẽ pahte tanhmã amnhĩ tomnuj to hã mẽ pahpumu ně hã tanhmã mẽ pahto. Mẽ pahte ja hã amnhĩ pumunh ně axte ã amnhĩ nhĩpêx anhỳr kêt kaxyw na hte ã mẽ pahpê hkrajê nhĩpêx aně. Jakamã kot puj mẽ nhỹrmã mẽ kêp hkra hkêt xwỳnhjê hkôt kuwyta wỳr ma papa hkêt ně. ³³ Jakamã e Kris kôt ixtô ně ixtôxjaja. Kêr ka mẽ axte Pahihti Jejus tyk mã ajamaxpêr kaxyw axpên wỳr akuprô. Hãmri ně ra axpên wỳr apikuprôn̄h pa hã axpên pumu ně rĩ kormã pãwti hkwỳ hku ně hkur pê Jejus kot mẽ panê htyk mã ajamaxpêr o akrĩ. ³⁴ Ně ka mẽ atô ra amã prãm japêr ně anhõrkwỳ kamã apku ně rĩ kormã mẽ hkôt tẽ. Jao ra anhõhy htu ně ajamakêtkati ně akwỳjê jamãr o nhỹ. Kẽ mẽ hpôx pa ka mẽ atipxi ně Pahihti Jejus tyk mã ajamaxpêr pê hkur o akrĩ. Hãmri nhũm Tĩrtũm ja hã mẽ apumu ně hkĩnh ně tanhmã mẽ ato hkêt ně.

Na ka prem mẽ ate inhmã kagà ně mênhta kamã mẽmoj tã ixkukjêr rax ně. Tã na pa ra kagà ja kamã mẽ amã hkwỳ jarênh rax ně. Nom kot paj piitã harênh par kêt ně. Kot paj ãm mẽ amã hkwỳ pix jarê. Hãmri ně nhỹrmã ma mẽ awỳr mō ně mẽ apumu ně kormã axte mẽ amã harênh jatur xàm kumẽ.

12

Mẽ kot Tĩrtũm kapêr o hêx xwỳnhjê jarênh Rômãn 12.6-8; Wam Korîť 14.29; Wam Pêtre 4.10-11; Wam Juãw 4.1-2

¹ Ně kot paj hpãnhã mẽ amã tanhmã Tĩrtũm Karô jarênh to ka mẽ inhma. Tanhmã kot mẽ pahkrã hto nhũm mẽ pahte ahpỳnhã tanhmã kãm amnhĩ nhĩpêx to ho papaja kot paj mẽ amã harê. ² Amnepê mã kormã mẽ ate Kris kôt amnhĩ xunhwỳr kêt

ri na ka prem sãnti hkôt ri amnhĩ nhĩpêx o ri apa. Kapêr kêt tã ka prem hkôt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Ně kãm amnhĩ jagrer pê amnhĩ to hwỳr o ri apa. ã na ka prem amnhĩ nhĩpêx anhỳr o ri apa. ³ Tã ra hpãnhã Tĩrtũm kôt amnhĩ xunhwỳ.

Na htem ohtô ně Tĩrtũm nhỹ hã kapêr jarênh o pa hã amnhĩ jarênh tã no ãm mẽ hkwỳjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mẽhõ mẽ kãm Tĩrtũm nhỹ hã kapêr jarênh o pa hã amnhĩ jarê hã koja Jejus o kapêr punuj o pa hkêt ně. Koja harênh o:

—Jesús kêp mẽ panhõ Pahihti jakamã kwa pu mẽ hkôt amnhĩ xunhwỳ ně hkôt amnhĩ nhĩpêx o ri papa.

Anhỳr o harê. Koja mẽhõ ã mẽ amã kapêr aně ka mẽ ama ně mẽ kot Tĩrtũm nhỹ hã kapêr jarênh o pa xwỳnh ã omunh kurê kumrêx. No koja mẽ amã ã kapêr anhỳr kêt ně ka mẽ ama ně Tĩrtũm kapêr o hêx o pa hã omunh kurê kumrêx.

Tĩrtũm Karô kãm mẽ pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Ně ahpỳnhã kot tanhmã mẽ panhĩpêx to xwỳnhja ãm pixii. Kêp Tĩrtũm Karô. Na hte mẽ pahkarô mã agjê ně ahpỳnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xãja ohtôô. Mẽ pahte ahpỳnhã ri tanhmã kãm amnhĩ nhĩpêx to ně tanhmã axpên to mex to ho ri papa kaxyw na. Tĩrtũm Karô na hte ja kaxyw tanhmã mẽ pahkrã hto.

⁵ Ně mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỳnhã kãm tanhmã amnhĩ nhĩpêx to ho ri papa.

⁶ Ně kot mẽ pahto ajuta nhũm mẽ pahte ahpỳnhã tanhmã axpên to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỳnhã tanhmã hkôt axpên xunhwỳr tỳx to kaxyw tanhmã axpên to mex to ho papa.

⁷ Ně Karôja na hte ahpỳnhã tanhmã axpên kaxyw mẽ panhĩpêx to pu mẽ axpên to ajuta mex o ri papa.

⁸ Jakamã na pu hte mẽ pahkwỳjaja Tirtũm Karõ nhỹ hã ma mẽ pahkwỳjê mã Tirtũm kapêr jarênh o ri mẽ hkõt papa. Nẽ mẽ pahkwỳjaja ma ý hã paxàhpumunh mex pê ma ri kapêr o mẽ ahkre ho mẽ hkõt papa.

⁹ Nẽ mẽ pahkwỳjaja Karõ nhỹ hã Tirtũm kot tanhmã mẽ pahto ajuta hto kaxyw hkõt pajamexpêr tỳx nê.

Nẽ mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nê pa.

¹⁰ Nẽ mẽ pahkwỳjaja aa mẽ kot mẽmoj pumunh kêt kwỳ ho anhỹr o ri mẽ hkõt papa.

Nẽ mẽ pahkwỳjaja Tirtũm kapêr mar tỳx nê ô ri mẽ kãm harênh o mẽ hkõt ri papa.

Nẽ mẽ pahkwỳjaja Tirtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Nẽ mẽ pahkwỳjaja nhãm mẽ kapêr mar kêt tã ra mẽ kapêr o pakapêr.

Nẽ mẽ pahkwỳjaja mẽ kapêr o pakapêrja ma nê mẽ kot mar kêt xwỳnhjê mã harê. Kormã aa pahte mar kêt tã ra pahprĩ hã mar mex nê mẽ kãm harê.

¹¹ ã na hte Tirtũm Karõ kãm hprãm xà hkõt tanhmã mẽ panhĩpêx to pu mẽ ahpỹnhã ý hã ã axpên nhĩpêx anhỹr o ri axpên kõt papa.

Te mẽ pahpê Kris nhĩ pyræk ã mẽ pajarênh Rõmãn 12.3-8; Epes 1.22-23, 4.11-16; Korosẽ 3.15

¹² E pa hpãnhã mẽ amã mẽ panhĩ kamã tanhmã mẽmoj jarênh to ka mẽ inhma nê hã anohtỳx nê. Mẽ panhĩja ãm pixi htã no ãm kamã mẽmoj xohtõ. Kamã mẽ pahte nê kamã mẽ pahpa nê kamã mẽ pajakwa. Nẽ mẽ panhĩnhu nê mẽ pano. ã mẽ panhĩ kamã mẽmoj xohtõ kot anhỹr. Ja pyrã nê Kris nhĩja ãm pixi htã te mẽ pahpê ì kamã mẽmoj xohtõta pyræk. Mẽ pahkwỳjaja te mẽ pahpê hte pyræk. Nẽ mẽ pahkwỳjaja te mẽ pahpê ìhkra pyræk. Nẽ mẽ pahkwỳjaja te mẽ pahpê no pyræk.

¹³ Mẽ pahpê Kris kwỳjaja axpên kaxyw mẽ paxohtõ. Mẽ ixpê Ijaewjaja nê mẽ apê

Ijaew kêt xwỳnhjaja. Nẽ amarĩ ri mẽ kãm mẽ axàpênh o mẽ apa xwỳnhjaja nê amnhĩ mã ri mẽ axàpênh o mẽ apa xwỳnhjaja. ã ahpỹnhã mẽ paxohtõ kot anhỹr tã nhũm Tirtũm Karõ te mẽ pahpê Kris nhĩ pixi pyræk o mẽ panhĩpêx. Nhũm Krisja mẽ pahpiitã mẽ pamã Karõ gõ nhũm mẽ pahkarõ mã agjê. Pixi htã mẽ pahpiitã mẽ pahkarõ mã agjê.

¹⁴ Nẽ mẽ panhĩja pixi tã kamã tanhmã mẽ pakute xàja ohtõ. Tã Kris nhĩja te kot mẽ panhĩja pyræk. Uræk nê kamã mẽ paxohtõ. Jakamã na pu htem ahpỹnhã tanhmã kãm amnhĩ nhĩpêx to ho ri papa. Karõ kot tanhmã amnhĩ kaxyw mẽ panhĩpêx to xà hkõt.

¹⁵ Nẽ kop ãm mẽ pahparja kapêr ronhỹx tee ri mẽ panhĩhkra pumu nê amnhĩ mã:

—Hêxta waa nê. Kêp ãm ixpê mẽ ìhkra ronhỹx pa inhmex nê ijarir. No ãm ixpê mẽ hpar pix jakamã pêr ãm mẽ hkĩnhã ixpê mẽ hkwy hkêt ãm ixpê mẽ hatur xà pix na pa.

Anhỹr o amnhĩ jarênh japêr. Nom ja kot anhỹr kêt. Axtem nhỹhỹm kot mẽ pahto pa kaxyw na mẽ pahparja. Nẽ axtem mẽmoj tã mẽ paxàpênh rỳ mẽmoj jamỳnh kaxyw na mẽ panhĩhkraja. Na pu htem hamê wa ho presija rãhã ho papa. Ja pyrã nê kot puj mẽ pahkwỳjê hõ mẽ parom Tirtũm Karõ nhỹ hã mẽmoj tã àpênh tỳx ã omu nê hkĩnhã mẽ pahte amnhĩ to warê hkêt ã amnhĩ jarênh o papa hkêt nê.

¹⁶ Nẽ mẽ pajamakja kapêr ronhỹx kapêr o:

—Hêxta waa nê. Kêp apu ixpê mẽ no ronhỹx pa inhmex nê ijarir. No ãm ixpê mẽ umar xà pix jakamã pêr ãm ixte ho warê hkêt kumrêx.

Anhỹr o amnhĩ jarênh japêr. Nom ja kot anhỹr kêt. Hamê wa mex kênã. Axtem ho mẽ paxumar kaxyw na mẽ pajamakja. Nẽ axtem ho mẽ parit kaxyw na mẽ panoja.

¹⁷ Kêp ãm mẽ pano pix ronhỹx pu mẽ parit pix nê paxumar kêt nê ri papa. Rỳ kêp ãm pajamak pix ronhỹx pu mẽ paxumar pix nê parit kêt nê mẽ paxupãr kêt nê ri papa.

¹⁸ Mẽ panhĩja pixi htã kamã hikukrêx xohtõ. Na pre Tirtũm amnhĩ krã hkõt kamã mẽmoj piitã hipêx nê hanhõ. ¹⁹ Kêp ãm mẽ panhĩja kamã ãm mẽmoj pixi ronhỹx pu mẽ pamex kêt nê papa. ²⁰ Tã no ãm kot anhỹr

kêt. Mě panhīja ãm pixi htã kamã hikukrêx xohtôô. ²¹ Jakamã na hte mẽ panoja amnhĩ nê mẽ panhĩhkra mã kãm:

—Tk kwa ma tẽ. Ixte ato presijare hã.

Anhỹr o kãm kapêr kêt nẽ. Rỳ mẽ pahkrãja amnhĩ nê mẽ pahpar mã kãm:

—Tk kwa ma tẽ. Na pa ato presija hkêt nẽ.

Anhỹr o kãm kapêr kêt nẽ. Ja pyrã nẽ kot puj mẽ nhỹri Kris kôt panhĩõ pumu nẽ pamex o pahte hakrenh ã amnhĩ jarênh kêt nẽ. ²² Nẽ mẽ panhĩ kamã mẽmoj kwỳ te hirerek pyrãk tã no pu mẽ arĩ pamã hapê nẽ. Ja pyrã nẽ kêr pu mẽ kormã mẽ kot Kris kôt amnhĩ xunhwỳr tohtuj anhỹr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

²³⁻²⁴ Nẽ na pu htem mẽ panhĩ kamã mẽ pakukrêx kwỳ hã pahpijaãm nẽ hpro nẽ ri ho papa. Nẽ hkwỳ hã pahpijaãm kêt nẽ hpro hkêt nẽ ho ri papa. Nẽ hkwỳ mẽ pahpê omnajti htã pu mẽ ho mex nẽ ri ho papa. Tĩrtũm kot ã mẽ panhĩpêx anhỹr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex nẽ ri ho papa. Ja pyrã nẽ kêr pu mẽ Tĩrtũm kôt mẽ pahtõ nẽ mẽ pahtõx piitã ho mex o ri papa. Nẽ tãm mẽ hipêx. Mẽ pahkwỳjaja muxre nẽ mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jesus kôt mẽ pahtõ nẽ mẽ pahtõx ã mẽ ho mex o ri apa.

²⁵ Nẽ na hte mẽ panhĩ kamã mẽ pahpar nẽ mẽ panhĩhkra nẽ piitã axpên kôt ãpênh mex o pa. No na hte mẽ pahparja nhỹhỹm ma mra nhũm ihõja hkwỳm nhỹhỹm ma mrar kêt nẽ. Na hte wa axpên kôt ãpênh mex o pa. Ja pyrã nẽ kêr pu mẽ pahpê Tĩrtũm krajaja axpên kôt amnhĩ nhĩpêx rãhã ho ri papa. Nẽ axpên to mex rãhã ho ri papa. No ri axpên kwỳm ri tanhmã amnhĩ nhĩpêx to ho ri papa hkêt nẽ.

²⁶ Na pu htem tõhã nhỹhỹnh panhĩ kamã paxã nẽ ri papa. Pahkrã tãtãk rỳ pakatut gêk. Jao te mẽ panhĩ piitã kamã mẽ paxã pyrãk. Nẽ nhỹhỹnh akupỹm pamex nẽ te panhĩ piitã hkôt akupỹm pamex pyrãk. Ja pyrã nẽ koja Kris kôt panhĩõ nhỹhỹnh ã nẽ ri pa. Rỳ tanhmã amnhĩ to nẽ ra hkaprĩ nẽ ri pa pu mẽ ja hã omu nẽ ÿ hã pahkaprĩ nẽ

papa. No koja mẽmoj tã hkĩnh nẽ pa pu mẽ ja hã omu nẽ ÿ hã pahkĩnh nẽ papa.

Te mẽ pahpê Kris nhĩ pixi pyrãk ã mẽ pa jarênh

²⁷ Nẽ mẽ pahpê Kris kwỳjaja te mẽ pahpê Kris nhĩ pixi pyrãk. Ahpỹnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ï pixi pyrãk.

²⁸ Nẽ mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mẽ paxunhwỳr to.

Mẽ pahkwỳjaja mẽ pahte ÿ hã nhãm mẽ kãm kapêr jarênh o papa kaxyw mẽ paxunhwỳ.

Nẽ mẽ pahkwỳjaja mẽ pahte ÿ hã tanhmã kapêr jarênh to ho ri papa kaxyw mẽ paxunhwỳ.

Nẽ mẽ pahkwỳjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwỳ.

Nẽ mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỹr o ri papa kaxyw mẽ pa xunhwỳ.

Nẽ mẽ pahkwỳjaja akupỹm mẽ ã xwỳnhjê ho mex o mẽ papa kaxyw mẽ pa xunhwỳ.

Nẽ mẽ pahkwỳjaja mẽ kapêr o mẽ hihtỳx o mẽ papa kaxyw mẽ pa xunhwỳ.

Nẽ mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nẽ mẽ pahkwỳjaja nhãm mẽ kapêr õ ho mẽ pakapêr o mẽ papa kaxyw mẽ pa xunhwỳ.

Ã na pre ahpỹnhã mẽ pahpê hkwỳjê piitã mẽ paxunhwỳr anẽ. ²⁹ No na pu htem pahpiitã axpên kôt Tĩrtũm kapêr o mẽ ahkre ho ri papa hkêt nẽ.

Nẽ mẽ pahpiitã ÿ hã tanhmã pakapêr to ho ri papa hkêt nẽ.

Nẽ mẽ pahpiitã kapêr jarênh o ri papa hkêt nẽ.

Nẽ mẽ pahpiitã aa mẽ kot mẽmoj pumunh kêt kwỳ ho anhỹr o ri papa hkêt nẽ.

³⁰ Nẽ mẽ pahpiitã akupỹm mẽ ã xwỳnhjê ho mex o ri papa hkêt nẽ.

Nẽ mẽ pahpiitã mẽ kapêr õ ho ri pakapêr o ri papa hkêt nẽ.

Ně mẽ pahpiitã ri mẽ kapêrja ma nẽ pakapêr kãm pahkwýjê mã harênh o ri papa hkêt nẽ.

Na pu htem ahpýnhã tanhmã Kris kôt mẽ pahkwýjê ho ajuta hto ho ri papa. ³¹ Tã kêr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarênh to ka mẽ inhma.

13

Mẽ pahte axpên kamã paxukapri ho papa hã mẽ pamã karõ

Juãw 13.31-35; Karatas 5.13-15; Korosẽ 3.12-14

¹ Kot pa ma mẽ piitã ahpýnhã mẽ kapêr kãm mẽ kãm Tirtũm kapêr jarênh o ri ixpa japêr. ãm mẽ piitã mẽ kapêr o ixkapêr mex o mẽ kãm harênh o ri ixpa japêr. Nẽ Tirtũm kapêr o mẽ wrýk xwýnhjê kapêr o mẽ ahkre ho ri ixkwýjê hkôt ixpa japêr. Tã inhma mẽ hkĩnh kêt kãm ixte mẽ ahkre ho ri ixpa ronhýx mẽ inhma nẽ ãm inhma. Nhũm ixkapêrja te ixte rat tatak pyrãk o pa tee ri Tirtũm kapêr o mẽ ahkre kaprý ho ri mẽ hkôt ixpa nhũm Tirtũm tee ri inhma mẽ hkĩnh kêt ã ixpumu nẽ inhma:

—Nà amã mẽ hkĩnh kêt jakamã na ka tee ri ixkapêr o mẽ ahkre kaprý. Anẽ.

² Rý kot paj Tirtũm xãhpumunh týx o mẽ kãm kapêr pimxur kwý jarênh o ri ixpa japêr. Rý Tirtũm mẽ kurom inhma mẽmoj to amnhĩrit pa omu nẽ mẽ kãm harênh o ri ixpa japêr. Rý pa Tirtũm kot amnhĩ nhĩpêx piitã omunh par japêr. Rý ixte amnhĩ kaxyw hkôt ijamaxpêr týx kôt ý hã kên krã hprêk õ mã ixkapêr nhũm kot inhmar nẽ inhmar xà hkôt nhãm pikamênh japêr. Tã inhma ixkwýjê hkĩnh kêt kãm ã amnhĩ nhĩpêx anẽ nhũm Tirtũm tee ri ja hã ixpumu nẽ inhma:

—Nà amã mẽ hkĩnh kêt jakamã te axãhpumunh týx kêt kumrêx pyrãk. Na ka tee ri ã mẽ kãm ixkapêr jarênh anhýr o ri apa kaprý. Anẽ.

³ Rý pa mẽ kêp amrakati xwýnhjê mã ixkukrêx nhõr par japêr. Rý Kris ã mẽ kãm amnhĩ grõnh kôt mẽ kãm xa nhũm mẽ hã ixpĩr japêr. Tã inhma mẽ hkĩnh kêt kãm ã

amnhĩ nhĩpêx anẽ nhũm Tirtũm tee ri ja hã ixpumu nẽ inhma:

—Nà ã ate mẽ kãm amnhĩ nhĩpêx anhýr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhýr kaprý. Anẽ.

⁴ Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Ja o axpên kãm pagryk tokyx anhýr kêt nẽ.

Nẽ pamã axpên to mex pix prãm.

Nẽ mẽmoj tã axpên kamã pagryk kurê kumrêx kêt nẽ.

Nẽ mẽmoj tã amnhĩ to jarkrar o ri papa hkêt nẽ.

Kot puj mẽ pamã axpên kĩnh hã kot puj mẽ ã amnhĩ nhĩpêx anhýr o ri papa hkêt nẽ.

⁵ Nẽ kot puj mẽ axpên kamã paxukapri ho papa hã kot puj mẽ tãm axpên nhĩpêx rãhã ho papa. Ja o amnhĩ pix kukamã pajamaxpêr o ri papa hkêt nẽ. Nẽ mẽ pagryk tokyx anhýr kêt nẽ. Rý axpên kãm pagryk tokyx anhýr hkêt nẽ. Rý koja mēhõ tanhmã mẽ panhĩpêx kati hto pu mẽ ãm amnhĩ tã omu nẽ axte kot tanhmã mẽ panhĩpêx tota mã pajamaxpêr kêt nẽ.

⁶ Nẽ kot puj mẽ pamã axpên kĩnh o papa hã kot puj mẽ tee ri mēhõ kot tanhmã amnhĩ tomnuj to hã omu nẽ pahkapri nẽ. Rý tanhmã kot amnhĩ to mex to hã omu nẽ pahkĩnh nẽ.

⁷ Nẽ kot puj mẽ pamã axpên kĩnh o papa hã kot puj mẽ arĩ Tirtũm kot mẽ pahto mex par jatur xà mēnh xà hã arĩgro jamãr rãhã ho ri papa. Nẽ mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr to hkêt nẽ. ãm mẽ kutã amnhĩ to htýx nẽ mẽ kãm pakuhê nẽ arĩ amnhĩ kaxyw Tirtũm mã pajamaxpêr týx rãhã nẽ.

⁸ Nẽ kot puj mẽ pamã axpên kĩnh o papa hãmri nẽ aa mẽ pahte ã amnhĩ nhĩpêx anhýrja mã panhũrer kêt nẽ. Nẽ arĩ mẽ pamã axpên kĩnh rãhã ho papa ho papa. Jar pika ja kamã mẽ pahte Tirtũm nhý hã mẽ kãm kapêr jarênh o ri papa htã kot puj mẽ nhýrmã ma õ krĩ hwýr api hãmri nẽ kuri axte ã kãm amnhĩ nhĩpêx anhýr kêt nẽ. Mo kaxyw kot puj mẽ axte ri mēhõ mã kapêr jarẽ? Kot puj mẽ õ krĩ hwýr api nẽ ra mẽ pahpiitã paxãhpumunh o axpên pyrãk.

Ně na pu htem tōhã mẽ kapěr õ ho pakapěr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nẽ kuri axte nhãm ri mẽ kapěr o pakapěr kêt nẽ.

Ně na pu htem jar mẽ pahkwỳjaja mẽ paxàhpumunh mex kôt Tĩrtũm kapěr jarẽnh o ri papa. Tã kot puj mẽ nhỹrmã õ krĩ hwỳr api hãmri nẽ axte ã amnhĩ nhĩpêx anhỹr kêt nẽ. ãm mẽ pamã axpẽn kĩnh pixja kot puj mẽ arĩ õ krĩ kamã mẽ pamã axpẽn kĩnh tũm rãhã papa ho papa. ⁹Jar mẽ pahpiitã mẽ paxàhpumunh tohtuj anhỹr o pakapěr jakamã na pu htem kormã Tĩrtũm kapěr jarẽnh tohtuj anhỹr o ri papa. ¹⁰Tã kot puj mẽ nhỹrmã õ krĩ hwỳr api nẽ kuri paxàhpumunh jatur xàm mẽnh pa. Jakamã nhũm jar mẽ paxàhpumunh tohtuj anhỹr xwỳnhhta mẽ pahpê hapêx.

¹¹E pa mẽ amã ja hã ejêp jarẽ ka mẽ inhma. Nà amnepê mã ixprĩre ri na pa pre ixtỳx ri mẽhprĩjê kot amnhĩ nhĩpêx o amnhĩ nhĩpêx nẽ mẽ hamaxpěr o ijamaxpěr. Nẽ mẽ kapěr mex kêt o ixkapěr o ri ixpa. Tã ra ixaptàr hãmri nẽ mẽ aptàrjê jamaxpěr o ijamaxpěr o ri ixpa. Te ra mẽ pahte kaxkwa kamã mẽ paxàhpumunh jatur xàm mẽnh parta pyràk mẽ aptàrjê jamaxpěr o ijamaxpěr o ri ixpa.

¹²Ja pyrã nẽ na pu htem kormã Tĩrtũm kot amnhĩ nhĩpêx ã omunh tohtuj anhỹr. Te mẽ pahte amnhĩ pumunh xà pynajre kamã pahprĩ hã amnhĩ pumunh mex kêêta pyràk. Nom kot puj mẽ nhỹrmã õ krĩ hwỳr api hãmri nẽ pahprĩ hã paxàhpumunh jatur xàm kumê. Te Tĩrtũm kot hprĩ hã tanhmã mẽ pakute hã mẽ pahpumunh parja pyràk.

¹³E arĩ mẽ pahte Tĩrtũm kôt amnhĩ nhĩpêx o papa xàja na axkrunêpxi. Mẽ pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpěr mex rãhã ho ri papa. Nẽ hkôt ja: Kêr pu mẽ arĩ Tĩrtũm kot mẽ pahto mex par jatur xà mẽnh xà hã arĩgro jamãr rãhã ho papa. Nẽ hkôt ja: Kêr pu mẽ arĩ pamã axpẽn kĩnh pẽ tanhmã axpẽn to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhỹr rãhã ho ri papa.

14

Tĩrtũm Karõ kot mẽ pahto mẽ paxihtỳx ã harẽnh

Wam Korît 12.7-11, 12.27-31

¹E kêr ka mẽ arĩ amã axpẽn kĩnh pẽ axpẽn to mex rãhã ho ri apa nẽ aa jam anhũrer nẽ ho ajamakêtkati hkêt nẽ. Nẽ amnhĩ to Tĩrtũm Karõ mãn amnhĩ to awỳ kẽ mẽ amã tanhmã mẽ ajamaxpěr to ka mẽ ahpỳnhã tanhmã axpẽn to mex to ho ri axpẽn kôt apa. Nẽ kêr ka mẽ ã ajamaxpěr anẽ nẽ ajamaxpěr o:

—Inhmã mẽ hkĩnh o ri ixpa hprãm tỳx. Nẽ Tĩrtũm Karõ kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mããnẽn inhma ho anhỹr prãm. Nẽ kot tanhmã ijakwa hto nhũm ixte ahpỳnhã mẽ kapěr õ ho ixkapěrja pa mããnẽn inhma ho anhỹr hprãm. No kêt ixte Tĩrtũm nhỹ hã mẽ kãm kapěr jarẽnhja na inhma ho anhỹr prãm tỳx kumrêx. Anẽ.

²⁻⁴Mẽ pakamã mẽ kapěr õ ho Tĩrtũm mã kapěr xwỳnhjaja na htem Tĩrtũm Karõ nhỹ hã ãm kumã pix mã kapěr õta o kãm kapěr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapěr xwỳnhhta pix koja mẽ pakurom amnhĩ ma. Nom koja mẽ pakapěr kãm Tĩrtũm mã amnhĩ jarẽ pu mẽ mar mex nẽ. Nhũm mẽ pakapěr kãm Tĩrtũm nhỹ hã mẽ pamã kapěr jarẽ pu mẽ pahprĩ hã kuma. Jao mẽ pamã kapěr kôt amnhĩ nhĩpêx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwỳnh kãm amnhĩ to paxihtỳx.

⁵Mẽ apiitã mẽ ate nhãm mẽ kapěr õ ho Tĩrtũm mã amnhĩ jarẽnhja na mex. Nom mẽ ate mẽ akapěr o mẽ akwỳjê mã Tĩrtũm kapěr jarẽnh o ri mẽ apaja na mex o wamta jakre. Kot ka mẽ nhãm mẽ kapěr õ ho Tĩrtũm mã amnhĩ jarẽ nhũm mẽ akwỳjaja mẽ amar kêt jakamã ka mẽ ã akapěr anhỹrja o Kris kôt mẽ ho mẽ hamaxpěr o hihtỳx kêt nẽ. ãm kapxipix amnhĩ ma. Rỳ koja kapěr õja mar mex xwỳnhjê hõ amar japêr nẽ mẽ akapěr kãm akwỳjê mã harẽ. Hã koja ja mex nẽ. Nom kot kaj mẽ apiitã ma mẽ kapěr kãm mẽ kãm Tĩrtũm kapěr jarẽnh o ri apa nhũm mẽ piitã hprĩ hã amar mex nẽ. Nẽ amar xà hkôt Tĩrtũm kapěr

kôt amnhĩ nhĩpêx mex nê. ⁶ Jakamã e Kris kôt ixtõ nê ixtõxjaja. Kot paj apu nhĩrmã ma mẽ awỳr mō hãmri nê nhãm mẽ kapêr ò ho mẽ amã ixkapêr japêr ka mẽ inhmar kêt nê. Nom kot paj mẽ akapêr o mẽ amã ixkapêr ka mẽ apiitã aprĩ hã inhmar mex nê. Pa Tĩrtũm nhỹ hã mẽ amã mẽmoj jarẽ rỳ tanhmã kot amnhĩ nhĩpêx toja pa mẽ amã harẽ. Rỳ Karõ nhỹ hã mẽ amã mẽmoj jarẽnh o ã mẽ amã Tĩrtũm kapêr jarẽnh anê ka mẽ aprĩ hã inhmar mex nê. ⁷ Nom mẽ kapêr ò ho mẽ kapêr o mẽ akôt ri mẽ pa xwỳnhjaja te mẽhõ kot htỳx ri wiorãwti kakrênh xwỳnh pyrãk. Kojaja htỳx ri hkakrênh o xa nhũm mẽ tee ri kot grer mar mã. Rỳ nhũm mẽhõ htỳx ri pifti kakôr o xa nhũm mẽ tee ri mẽmo mẽ grer mar mã.

⁸ Pôristijaja na htem amarĩ ri tanhmã amnhĩ nhĩpêx to ho pa nhũm mẽ hkrãhtũmja mẽ kãm pifti kakô nhũm mẽ kuma nê mẽ pijapu mã hamaxpêr kurê kumrêx nê hwỳr hprôt. Nom koja kawax pê hkakô rỳ htỳx ri tanhmã hkakôr to nhũm mẽ kuma nê ãm kuma. ⁹ Ja pyrã nê kot kaj mẽ kapêr ò ho akwỳjê mã akapêr nhũm mẽ ama nê ãm mẽ ama. Ka te ãm mẽ kãm ajakwa momok pyrãk o axãm o amnhĩ nhĩpêx.

¹⁰ Nê ahpỹnhã mẽ pakapêr xohtôô. Na htem ahpỹnhã mẽ kapêr o amnhĩ kwỳjê mã kapêr nê axpên mar mex nê. ¹¹ Nom koja mẽhõ nhỹhỹnh pika hõ rũm ixwỳr mō nê mẽ kapêr o inhãm kapêr pa mar kêt nê. Nê amnhĩ xwar kutã ixkapêr o kãm ixkapêr nhũm ixpyrã nê inhmar kêt nê. ¹² Jakamã kot kaj mẽ amã Tĩrtũm Karõ xihỳx xà ho amã tanhmã kãm amnhĩ nhĩpêx to ho apa hprãm hã kot kaj mẽ amnhĩ to awỳ nê kãm:

—Kwa amnhĩ kôt ijamaxpêr o axihỳx Tĩrtũm. Pa anhỹ hã ixkapêr o ma Kris kôt ixkwỳjê ho mẽ hamaxpêr o ixihỳx o ri mẽ hkôt ixpa. Kê mẽ akapêr ma nê Kris kôt amnhĩ xunhwỳr tỳx nê. Nê hkôt amnhĩ nhĩpêx mex o ri pa. Anê.

¹³ Nê kêr ka mẽ nhãm mẽ kapêr ò ho Tĩrtũm mã amnhĩ jarẽnh xwỳnhjaja amnhĩ to Tĩrtũm Karõ wỳ nê kãm:

—Ixte mẽ kapêr ò ho ixkapêr tã ixte amnhĩ mar kêt. Jakamã kwa tanhmã ixto ijamaxpêr mex to pa amnhĩ mar mex nê

ixkapêr kãm ixprĩ hã Kris kôt ixkwỳjê mã ja jarẽ kê mẽ inhmar tỳx nê. Anê.

¹⁴ Nom kot paj nhãm mẽ kapêr ò ho Tĩrtũm mã mex ã harênh tã amnhĩ mar kêt nê. Te ixpimtir kãm ixkarõ pix kapêr pyrãk. No kot paj pam amnhĩ krã hkôt ixkapêr o kãm mex ã harẽ hãmri nê ra amnhĩ mar mex nê. ¹⁵ Nà ja na inhãm mex jakamã kot paj nhãm mẽ kapêr ò ho Tĩrtũm mã mex ã harẽ nê kãm gre. Nê mãânên ijamaxpêr xà hkôt ixkapêr o mãânên kãm mex ã harẽ nê kãm gre. Nà ja na inhãm mex. ¹⁶ Nom kot paj mẽ ma mẽ kot Tĩrtũm kapêr mar xà hã ixkre hwỳr mra nê kamã Tĩrtũm mã mex ã harẽ. Tã pa nhãm mẽ kapêr ò ho kãm ixkapêr japêr. Ka mẽ ate inhmar o akrĩ xwỳnhjaja tee ri inhma. Jakamã tee ri inhma nê ixkôt Tĩrtũm mã akapêr kêt nê. Rỳ kãm:

—Nà ãm hãmri na ã amex ã ajarênh anê Tĩrtũm.

Anhỹr o kãm akapêr kêt nê. Mẽ ate inhmaare hã kot ka mẽ ã kãm akapêr anê. Jakamã kot paj ri mẽ akamã mẽ kapêr ò ho ixkapêr kêt nê. ãm mẽ akapêr pix o mẽ anom Tĩrtũm mã mex ã harẽ. ¹⁷ Kot paj mẽ kapêr ò ho Tĩrtũm mã mex o mex ã harênh mex tã ka mẽ mẽmo mẽ kapêrja aprĩ hã mar kêt jakamã inhmar pê Tĩrtũm kôt amnhĩ xunhwỳr tỳx kêt nê.

¹⁸ Na pa hte tōhã mẽ arom nhãm mẽ kapêr ò ho Tĩrtũm mã amnhĩ jarẽ. Nom nhỹri ahte nhỹ nê ã kãm amnhĩ jarẽnh anê. ãm hãmri na pre Tĩrtũm ja kaxyw tanhmã ixto pa hte ã amnhĩ nhĩpêx anhỹr o ri ixpa.

¹⁹ Tã na pu htem Tĩrtũm mã mex o mex ã harênh kaxyw nê ma mẽ kot kãm amnhĩ jarẽnh xà hã ixkreta wỳr axpên wỳr mra pa mẽ pikuprõnh xwỳnhjê kapêr o mẽ kãm ixkapêr. Nom kot paj nhãm mẽ kapêr ò ho mẽ kãm ixkapêr ry rax kumrêx tã no nhũm mẽ inhmar kêt nê. Nom kot paj mẽ kapêr o ãm ixkapêr krãnre htã no nhũm mẽ inhmar mex kurê kumrêx. Ja na inhãm mex. ²⁰ Kwa mẽ ixkapêr ma nê mar tỳx nê. Nê mẽhprĩrêjê jamaxpêr o ajamaxpêr kêt nê. ãm Kris kôt mẽ àptàr tũmjê jamaxpêr o mãn kêt mẽ ajamaxpêr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpêr pyrãk o ajamaxpêr. Mẽhprĩjaja na

hitem mëmoj punuj kukamã hamaxpêr kêt nê. Na htem ãm htÿx pa. Tã kêr ka më urak nê mëmoj punuj kukamã ajamaxpêr o ri apa hkêt nê.

²¹ Amnepêm na pre Tîrtûm tanhmã Ijaewjê mã kapêr to. Më kapêr o më kãm kapêr tã no nhùm më kuma nê ãm kuma. Jakamã nhùm tee ri ja hã më omu nê amnhî tã tanhmã më harênh to. Tanhmã më harênh toja Tîrtûm kapêr ã kagã htûm kamã na. Kot më harênh kot:

E kot paj ma më hwÿr axtem pika hõ rûm pôristi hkwy rê kê më ma më hwÿr mra nê më unê. Hãmri nê amnhî kapêr o më kãm kapêr nhùm më tee ri më kuma no ãm hkôt mëmoj pumunh kêt nê.

Koja më ã më hipêx anhÿr tã nhùm më arî kãm ixkapêr mar nê amnhî kaxyw ixkôt hamaxpêr prãm kêt nê. Anê.

Tîrtûm kapêr ã kagã htûm kot ã më harênh kot anhÿr. ²² Jakamã kot kaj më Tîrtûm mã amnhî jarênh xà hã ixkre hwÿr akuprô nê më kapêr ô ho Tîrtûm mã amnhî jarênh japêr. Nhùm Kris kôt amnhî xunhwÿr kêt xwÿnhjaja më akôt agjê nê hkrî nê tee ri më akapêr ma nê Kris kôt amnhî xunhwÿr kêt nê. Tanhmã kot më amnhî to nê hkôt amnhî xunhwÿ? Më kot akapêrta maare hã. No kot ka më akapêr o Tîrtûm nhÿ hã më kãm akapêr nhùm mëhprî hã amar mex nê. Jao tanhmã hamaxpêr to nê më apyrà nê Kris kôt amnhî xunhwÿr japêr. ²³ Nom kot ka më apiitã nhãm më kapêr ô ho Tîrtûm mã mex ã harê nhùm amarî ri më pa xwÿnhjaja më awÿr agjê nê më akapêr ã më ama nê hã më apumu. Hãmri nê tee ri hamaxpêr nê më akrã pipãnh ã axpên mã më ajarê. ²⁴ Nom koja më awÿr agjê ka më akatãt kôt më amnhî kapêr o Tîrtûm kapêr jarênh o akuhê nhùm mëhprî hã më amar mex nê. Hãmri nê amnhî kapêr o akapêr ma nê hamaxpêr o:

—Hêxta waa nê. Xep ixte amnhî tomnuj xwÿnh na pa. Nã ãm hãmri na më Tîrtûm kapêr jarê. Nã ãm hãmri na kêt ja. Anê.

²⁵ Hãmri nê më amã tanhmã kot amnhî tomnuj to hã amnhî jarênh pa hãmri nê hkaga nê Jesus kôt amnhî xunhwÿ. Nê hkônkrã ho htêm nê hkrî nê Tîrtûm mã mex o mex ã harê. Hãmri nê më amã:

—Nã ãm hãmri na hte Tîrtûm më akamã pa ho pa. Anê.

Tîrtûm nhôrkwÿ kamã më pahte tanhmã amnhî nhîpêx to hã më pamã karô
Atre 2.42, 5.12-13; Eprêw 10.25

²⁶ E Jesus kôt ixkwÿjaja. Kot paj hpãnhã axtem më amã mëmoj tã karô. Më kot Tîrtûm mã amnhî jarênh xà hã ixkre kamã tanhmã më ate amnhî nhîpêx to hã karô ka më inhma.

Nã kêr ka më axpên wÿr akuprô nê akrî ka më atô amã Tîrtûm mã mex ã harênh ã më grer o agrer prãm hãmri nê mãmri kãm ho gre. Hãmri nê agrer pa kê apãnhã mëhõ kãnhmã xa nê Tîrtûm kapêr kwÿ ho më ajahkre. Nê ho anhÿr pa nhùm hpãnhã mëhõ kãnhmã xa nê Tîrtûm kot tanhmã ho mex to hã më amã amnhî jarê. Nê amnhî jarênh pa hãmri nhùm mëhõ nhãm më kapêr ô ho më amã ujarênh japêr. Hãmri nê ujarênh pa kê mëhõ hpãnhã më akapêr o hprî hã më amã kapêrta jarê.

E kêr ka më axpên wÿr akuprô nê Kris kôt axpên to axihtÿx kaxyw ã axpên pãnhã amnhî nhîpêx anê.

²⁷ Nê ka më atô amã nhãm më kapêr ô ho më kãm akapêr prãm japêr. Nom kêr ka më axohtô nê ã më kãm amnhî nhîpêx anhÿr kêt nê. ãm më atô wa axkruttre rÿ axkrunêpxire nê më kapêr ô ho më kãm akapêr. Hãmri nê axpên pãnhã akapêr pa kê mëhõ kot hprî hã më kapêr ôta mar japêr nê më apãnhã xa nê më akapêr o më kãm harê kê mëhprî hã mar mex nê. ²⁸ Nom koja ja kaxyw mëhõ amrakati japêr ka më kapêr ô ho akapêr kêt nê. ãm kapxipix nhÿri ahte Tîrtûm mã akapêr.

²⁹ Nê kê Tîrtûm nhÿ hã kapêr jarênh xwÿnhjê hõ wa axkrut rÿ axkrunêpxi nê më ajahkre ka më aprî hã mar o akrî. Hãmri nê mar pa nê tanhmã më harênh to. ãm hãmri Tîrtûm nhÿ hã kapêr ã më harê rÿ ho hêx ã më harê.

³⁰ Nê koja mëhõ Tîrtûm nhÿ hã mëmoj jarênh o xa. Rôm nhùm Tîrtûm më kaxyw më atô mã ajamaxpêr kwÿ gô. Ka kapêr o ãm xwÿnhta mã kãnhmã anhîhkra pë kê apumu nê anhîkrê. Hãmri ka hpãnhã xa nê më kãm tanhmã ajamaxpêr tota jarê.

³¹ Nom kêr ka më anhîpê më kãm akapêr

hkêt nê. ãm axpên pãnhã Tirtũm kapêr o axpên jahkre nê ho axpên jamaxpêr o axihtỳx. Ja mex. ³²⁻³⁴ Nom kêr ka mē axpên wỳr akuprô nê apiitã anhĩpê atỳx ri akapêr kêt nê. Ja na Tirtũm kêp hprãm nõkati. Mē ate axpên pãnhã axpên mã akapêrja na kãm hprãm. Jakamã kê mē kot Tirtũm nhỹ hã mē kapêr jarênh o pa xwỳnhjaja taxy axpên jahkre hã axpên jamã. Nhũm mēhõ kumrêx kapêr pa hãmri ka hpãnhã mē kãm akapêr.

Nê kê mēnijaja amarĩ mē ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mē anijaja. Kêr ka mē amarĩ akryk mē mar o akrĩ nê axpên mã akapêr o akrĩ hkêt nê. ³⁵ No kot kaj mē tee ri mēmoj ma nê mar mex kêt japêr tã hã axpên kukjêr kêt nê. ãm akryk arĩ mar o akrĩ. Hãmri nê akupỳm anhõrkwỹ hwỳr tē nê rĩ kormã hã amjên kukja. Nom kot ka mē apikuprõnh xà hã ixkre kamã axpên mã akapêr o akrĩ nhũm mē amjênjaja tee ri ja hã mē apumu nê hpijaàm nê.

³⁶ E na pa ã Tirtũm mã amnhĩ jarênh xà hã ixkre kamã tanhmã mē pahte amnhĩ nhĩpêx to hã mē amã karõ anê. Tã te mē apê ja mex kêt pyræk. Kwa mon ka wem ja ma nhũm mē apê omnuj nê? Xà mē ate Tirtũm kapêr mar mex o ijakrenh kôt na ka mē ã ajamaxpêr anê? Xà na pre Tirtũm mē akumrêx mã kapêr? Hã na ka mē ã ajamaxpêr anê? Rỳ xà mē kapxipix mã na pre kapêr? Hã na ka mē ixkapêr ma nhũm mē apê omnuj nê? Nà ixkumrêx na pa pre mē awỳr inhmõr nê mē amã Tirtũm kapêr jarênh kênã kot ka kêt mē axtem nê ã ajamaxpêr anê. ³⁷ Kot kaj mē atõ ã ajamaxpêr anhỹr japêr nê ajamaxpêr o:

—Nà na pre Tirtũm tanhmã inhmã kapêr to pa ô ri mē kãm ixujarênh mex o ri ixpa.

Anhỹr o ajamaxpêr. Rỳ ajamaxpêr o:

—Nà na pre Tirtũm Karõ mē kaxyw tanhmã ixto pa ỹ hã tanhmã mē ho mex to ho ri ixpa.

Anhỹr o ajamaxpêr. Kot kaj mē ã ajamaxpêr anê hãmri nê mããnên pa ã ixte amnhĩ nhĩpêx anhỹr ã ixpumunh mex kurê kumrêx. Amnhĩ pyrã nê ixte Tirtũm nhỹ hã mē kãm ixkapêr xwỳnh ã ixpumunh nê hã ijarênh kurê kumrêx. ³⁸ Nom koja ja hã ijarênh kêt ka mē ja hã omu hãmri nê

tanhmã kot mē amã kapêr toja ma nê ãm ama.

³⁹ E Kris kôt ixtõ nê ixtõxjaja. Kêr ka mē amnhĩ to Tirtũm Karõ wỳ kê ma mē ate mē kãm Tirtũm kapêr jarênh o ri apa kaxyw mē ato mē axihtỳx.

Nê koja mēhõ kãm nhãm mē kapêr ô ho kapêr prãm ka mē ja nê kãm akapêr kêt nê. Kwãr mãmrĩ ã amnhĩ nhĩpêx anê. ⁴⁰ Nom kêr ka mē ate Tirtũm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

15

*Kris akupỳm htĩr kumrêx ã harênh
Atre 2.23-36, 10.39-41; Wam Korit 6.14*

¹ E Kris kôt ixkwỳjaja. Kot paj axte mē amã Jesus kot mē panê tanhmã amnhĩ nhĩpêx to hã harê ka mē inhma. Na pa pre ra mē amã ja jarê ka mē ama nê hkôt amnhĩ xunhwỳ. Nê hkôt amnhĩ nhĩpêx mex o ri apa. ² Na pa pre mē amã harê ka mē amnhĩ kaxyw kãm ajamaxpêr tỳx nê nhũm Tirtũm mē ato hkra. Tã ka htem arĩ kapêr kôt amnhĩ nhĩpêx mex o ri apa. Koja mēhõ kot Tirtũm kapêr mar tã amnhĩ kaxyw hkôt hamaxpêr kêt nê nhũm Tirtũm tee ri amnhĩ tã omu nê ho hkra hkêt nê.

³ Na pa pre amnhĩ krã hkôt mē amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xõ ri mē amã tanhmã harênh to ho ri ixpa. Jesus jarênhja na mex o kot mē ujarênh piitã hakrenh par kumrêx. Tã tãm kot paj mē amã harê. Na pre Krisja mē pahte amnhĩ tomnuj pãnhã amnhĩrer kaxyw mē panê ty. Tirtũm kapêr ã kagã htũm kot hkukamã harênh xà hkôt.

⁴ Hãmri nhũm mē kên kre kamã haxà nhũm kamã nõr o apkati. Nê axte hã apkati. Hãmri nhũm Tirtũm akupỳm ho htĩr. Kapêr ã kagã htũm kot hkukamã harênh xà hkôt.

⁵ Tã nhũm Simãw Pêtre kumrêx akupỳm htĩr ã omu nhũm hpãnhã Jesus nhỹ hã mē ahkre ho mē pa xwỳnh maatijaja haxwỳja omu.

⁶ Hãmri nhũm mē kot hkôt mē pa xwỳnh pê 500 jakrenh xwỳnh piitã anhĩpê haxwỳja akupỳm htĩr kãm omu. Na pre ra mē hkwyjaja ty nhũm mē hkwyjaja arĩ htĩr nê pa. ⁷ Jakamã nhũm prem ra akupỳm htĩr kãm omu. Hãmri nhũm hpãnhã Xiakreja omu. Nhũm hpãnhã ỹ hã mē ahkre o mē pa

xwŷnh piitā omu. Akupŷm htīr kām omu. ⁸ Tā pa na pa pre ijaxwŷja amnhī to hapu nē akupŷm htīr kām omu. Te ixpē mē hkra kot hapu pyrā nē amnhī to hapu nē omu. Na pre kaxkwa kamā inhmā kapēr o xa pa ixprī hā omu. ⁹ No mē kot ixpyrā nē Kris nhŷ hā mē ahkre ho mē pa xwŷnh maati hkwyjaja na mē mex o kot ijakrenh. Na pa pre hte mē hkīnhā amnhī tomnuj tŷx nē. Jao Kris pē hkrajē homnuj tŷx o ri ixpa. Tā hkôt amnhī xām hāmri nē tee ri ā amnhī nhīpēx anhŷr ā amnhī pumu nē amnhī kamā xpijaām tŷx nē. Jakamā na pa hte Kris nhŷ hā kapēr jarēnh o ixpa hā amnhī pumu nē ixte hkôt amnhī xām kêt ri tanhmā ixte amnhī nhīpēx toja mā ijamaxpēr nē xpijaām nē. ¹⁰ Na pa pre amnhī tomnuj tŷx o ixpa htā nhŷm Tīrtŷm arī kām ijapē nē. Nē ixkamā ukaprī nē. Pa pre hkôt amnhī xām nhŷm ixto hkra pa ra kām tanhmā amnhī nhīpēx to mex rāhā ho ixpa. Jakamā na hte tee ri amnhī tā ixpumu nē tanhmā hamaxpēr to hkêt nē. Rŷ hamaxpēr o:

—Hēxta waa nē. Inhmā Pawre japē nē ixte ho mex tā nhŷm ixkôt amnhī nhīpēx kêt kumrēx.

Anhŷr o tee ri hamaxpēr kêt nē. Na pa hte kām tanhmā amnhī nhīpēx to ho ixpa rūnh o ŷ hā mē kapēr o pa xwŷnh kwŷjē jakre ho ixpa. Nom amnhī krā hkôt mē ahkre hkêt nē. Ja kaxyw na pre Tīrtŷmja ixto ixihtŷx pa ŷ hā kām tanhmā amnhī nhīpēx to ho ri ixpa nhŷm ja hā ixpumu nē hkīnh nē.

¹¹ Nē Jejus jarēnhja ām pixii. Axtem hō hkêt. Nē ŷ hā mē ahkre ho mē pa xwŷnhjē kapērja nē pa ixte mē amā harēnhja kot axpēn pyrāk. Harēnh tipxi. Kris kot mē pahte amnhī tomnuj mŷrapē mē panē htyk nhŷm Tīrtŷm kot akupŷm ho htīr ā wa harēnhja na pa hte pix jarēnh o ri mē akôt ixpa. Ka prem inhma nē amnhī kaxyw hkôt ajamaxpēr tŷx nē.

Tīrtŷm kot akupŷm mē pahto mē pahtīr ā harēnh
Rukre 20.37

¹² Nē kwa ra ixte mē amā Kris htyk nē akupŷm htīr ā harēnh tā ka xep mē akwŷjaja axtem nē mē htyk nē akupŷm mē htīr kêt

ā mē hkamnhīx o ri apa. ¹³ Kwa mē ajamaxpērja mex kêt. Kêp apu ām hāmri mē ate ā mē harēnh anhŷr ronhŷx pre Kris haxwŷja akupŷm htīr kêt nē. Nhŷx pre htyk o ty.

¹⁴ Nē kêp apu Kris akupŷm htīr kêt ronhŷx pa mē ām mē amā kapēr jarēnh o ixpa kaprŷ. Ka mē ajaxwŷja amnhī kaxyw hkôt ajamaxpēr kaprŷ.

¹⁵ Nē kêp ām akupŷm mē htīr kêt ronhŷx pa mē ixte mē amā Tīrtŷm kapēr jarēnh o ri ixpa xwŷnhjaja mē amā ho ixēx o ri ixpa. Na pa htem mē amā Tīrtŷm ra kot akupŷm Jejus o htīr ā harēnh o mē akôt ixpa. Tā kêp apu akupŷm mē htīr kêt ronhŷx pa mē ām mē amā harēnh o ixēx.

¹⁶ Nē kêp apu akupŷm mē htīr kêt ronhŷx pre Kris haxwŷja akupŷm htīr kêt nē. Nhŷx pre ām amarī tyn hapēx.

¹⁷ Nē Kris amarī htyk nē hapēx ronhŷx kot pu mē ri amnhī kaxyw hkôt pajamaxpēr nē hkôt amnhī xunhwŷr kaprŷ.

Nē Kris amarī htyk nē hapēx ronhŷx pre Tīrtŷm Jejus kukwak ri mē panē mē pahte amnhī tomnuj o hapēx kêt nē. Nhŷx pu mē pahpiitā nhŷrmā ma kuwy hwŷr pajapēx pa.

¹⁸ Nē kêp apu Kris htyk nē hapēx ronhŷx ra mē kot amnhī kaxyw hkôt hamaxpēr tā ra htyk xwŷnhjaja ma mē kot amnhī tomnuj mŷrapē kuwyta wŷr hapēx.

¹⁹ Nē kêp apu Kris htyk kumrēx nē hapēx ronhŷx pu mē kormā pahtyk kêt xwŷnhjaja tee ri amnhī wŷr kamā pajamak o ri papa kaprŷ. Nē pahpē hkra hā amnhī jarēnh kaprŷ. Jao pahkaprī htŷx o mēmoj piitā hakrenh par kumrēx nē ri papa.

Kris kumrēx akupŷm htīr ā harēnh
Atre 26.23; Sikŷn Korīt 4.14; Piripos 3.10-11; Wam Tesarōn 4.15-18; Apokariṗ 20.1-15

²⁰ Nā mē htyk nē nhŷrmā akupŷm mē htīr kêt ā mē harēnhja kot anhŷr kêt. Ra Tīrtŷm kot akupŷm Kris o htīr jakamā koja māānēn hkra htyk xwŷnhjaja nhŷm mē piitā Jejus pyrā nē nhŷrmā akupŷm mē ho htīr pa. Jakamā na pu htem Kris akupŷm

htirja mā pajamxpēr nē amnhī kukamā pajamxpēr o:

—Nà ra Tirtūm kot akupŷm Jejus o htir jakamā koja uràk nē nhŷrmā akupŷm mē pahte hkôt amnhī xunhwŷr xwŷnh piitā mē pahto mē pahtir. Nà koja ā mē panhîpêx anê. Ja kaxyw àhpumunh tŷx kumrêx xwŷnh kênā. Anê.

²¹ Nē amnepê m na pre Tirtūm my kot waja nhîpêx. Hāmri nhūm kot tanhmā amnhī tomnuj to ho ra mē htykja o hkra x. Tā nhūm wamta kôt my hōta wamta rom amnhī to mex o mē htyk tā akupŷm mē ho htir o hkra x. ²²⁻²³ Tā mē pahpê wam my pê Atāw kanrêhā tāmnhwŷ jakamā kot puj mē uràk nē nhŷrmā ty. No ām mǎānēn mē pahpê Kris kraa. Kris kumrêx na pre akupŷm htir. Tā koja nhŷrmā akupŷn mē pahwŷr wrŷ hāmri nhūm Tirtūmja kot hipêx pyrā nē akupŷm mē pahto mē pahtir. Mē pahte hkôt amnhī xunhwŷr ā mē pahpumunh kôt akupŷm mē pahto mē pahtir pa. No ām kormā.

Kris nhŷrmā kot mē htyk o hapêx ā harēnh Juāw 11.25; Rōmān 6.23; Wam Korit 15.54; Sikūn Ximotre 1.10; Eprêw 2.14; Apokarip 20.14

²⁴⁻²⁸ Nē koja Kris arī mē ho amnhîptār rāhā nhūm Tirtūm mē kot kutā amnhī xunhwŷr xwŷnhjê pê mē hihtŷx xā ho hapêx pa. Kapēr ā kagā htūm kot ja jarēnh kot:

Koja nhŷrmā Tirtūm Kris kot kām mē ho amnhîptār kaxyw ām. Anê.

Jakamā Jejus tapxipix koja mē ho amnhîptār o pa. Koja Tirtūm pix mē ho amnhîptār kêt nē. Nom koja pahi hkwyjê hō axte nhām mē ho amnhîptār kêt kumrêx.

Tā mē kot mēkarōmnuti hkôt kām tanhmā amnhī to ho mē pa xwŷnhjaja koja Tirtūm ma amnhī nē kuwy hwŷr mē rēnh pa. Nē mēhtykja o hapêx nhūm mēhō axte htyk kêt kumrêx. Jakamā koja Jejus Kris mēmoj punuj piitā ho hapêx nē Mēpahpām Tirtūm nhīhkram akupŷm mēmoj piitā haxār pa. Tirtūm jamaxpēr xā hkôt ā mēmoj to anhŷr par anê hāmri nē ihkram mēmoj jaxār pa. Nē mǎānēn tām kām amnhī gō. Jakamā nhūm Tirtūm tapxipix mēmoj piitā ho amnhîptār pa.

Mē htyk xwŷnhjê jarēnh

²⁹ Nē na hte mē pahkwŷjaja kormā kēp Tirtūm kra hkêt tā Jejus kôt mē kot amnhī xunhwŷr nē mē htyk xwŷnhjê mā hamaxpēr o pa. Hāmri nē mē kām nhŷrmā axte mē omunh prām xāj mē uràk nē Jejus kôt amnhī xunhwŷr nhūm mē hkrā kumrā. Tā akupŷm mē htir kêt ronhŷx mē ām ā pajamxpēr anhŷr kaprŷ. ³⁰ Nē paa. Na pa hte ma mē kām Tirtūm kapēr jarēnh o ri mē hkôt ixpa. Nhūm mē hkwyjaja ja hā inhma nē ixkamā gryk nē ixtā amŷnē pa mē mŷrapê ixpunuj nē ri ixpa. No ām amnhī to htŷx nē arī ri mē kām Kris kapēr jarēnh o ri mē hkôt ixpa. Tā kēp ām nhŷrmā akupŷm ixtir mā kêt ronhŷx pa tee ri ā amnhī nhîpêx anhŷr o ri ixpa kaprŷ. ³¹ Na htem apkati mē ixtā tanhmā āmnēnh to ho ri pa. Ām hāmri na pa mē amā ā mē harēnh anê. Nom na pa hte tee ri amnhī kukamā ijamaxpēr o ri ixkaprī nē ixpa hkêt nē. Mē kot ixpīr mā tā pa hte mē ate Pahihti Jejus Kris kôt amnhī nhîpêx mex ā mē apumunh kôt ixkīnh nē ri ixpa. Nhūm te ixkamā mēmoj kêt pyrāk pa hte ri ixpa. ³² Na pa hte jar Epes kamā mē oprê xwŷnhjê kutā amnhī to htŷx pê mē kām Jejus kapēr jarēnh o ri mē hkôt ixpa nhūm mē kām mar prām kêt jakamā hā ixtomnuj tŷx nē. No nhŷrmā ixyk nē akupŷm ixtir mā kêt ronhŷx pa mē kēp Kris kwŷ hkêt xwŷnhjê jamaxpēr o ijamaxpēr nē mē uràk nē ijamaxpēr o:

Ixte ixyk ā arīgro pumunh kêt jakamā kot paj māmri mēmoj piitā hkur o ri ixpa.

Nē māmri mēmoj piitā ho ixkōm o ri ixpa.

Nē māmri mēmoj piitā ri tanhmā ho ho ri ixpa.

Ixyk nē axte ixte ā amnhī nhîpêx anhŷr o ixpare kaxyw ā.

Anhŷr o nhŷx pa ijamaxpēr o ixpa. Kēp ām Tirtūm kot akupŷm mē pahto mē pahtir mā kêt ronhŷx pu mē ā mē kēp Kris kwŷ hkêt xwŷnhjê jamaxpēr anhŷrja kôt pajamxpēr pix o ri papa. No ām ja kot anhŷr kêt.

³³ Na htem mēmoj jarēnh o:

—Mē kot htŷx ri amnhī tomnuj xwŷnhjê hkôt ri mē pa xwŷnhjaja koja mē gaa nē mē kot amnhī nhîpêx kôt amnhī nhîpêx o ri pa. Anê.

Âm hãmri na ã mẽ harênh anhÿrja. Jakamã kwa mẽ okora. Kêr ka mẽ ã amnhĩ nê mẽ kot amnhĩ nhĩpêx anhÿr o mẽ pa xwÿnhjê pumunh mex o ri apa. ³⁴ Kwa mẽ tokyx mẽ ate tanhmã amnhĩ tomnuj to hã amnhĩ pumu nê axte ã amnhĩ nhĩpêx anhÿr kêt nê. Nê mẽ ate Tirtũm kot akupÿm mẽ ho htĩr kêt ã harênh xwÿnhjaja. Te mẽ ate Tirtũm kot amnhĩ nhĩpêx ã omunh kêt pyrãk. Tã mẽ ate tokyx ja hã amnhĩ pumunh nê amnhĩ kamã apijaàm kaxyw na pa ã mẽ amã ixkapêr anê.

Mẽ panhĩ nyw jarênh

Rukre 20.34-36; Rõmãn 8.10-11; Sikũn Korît 5.1; Piriþos 3.20-21

³⁵ Nê mãn ka mẽ atõ akupÿm mẽ htĩr ã mẽ harênh ma nê tee ri mẽ hkukamã ajamaxpêr nê hã ri tanhmã axpên kukjêr to nê axpên mã:

—Kwa tanhmã koja we Tirtũm akupÿm hkra htyk xwÿnhjê ho htĩr to? Ra mẽ htyk nê mẽ ã katõk nê hapêx par mã kênã. Tanhmã kot wem amnhĩ to nê akupÿm htĩr? Nê tanhmã koja we mẽ ã nywja kute wehe? Anê.

³⁶ Nã na ka mẽ atÿx ri ã ajamaxpêr anê nê tee ri mẽ hkukamã ajamaxpêr. E kot paj ixprĩ hã ja hã ejêp jarê ka mẽ inhma. Nã na htem mẽmo y hkre. Te mẽ kot mẽ htyk jaxàr pyrãk o hipêx nê hkre nhũm hikwÿ nê gaa nê higrõt hapõj. Nom te kêp mẽmo yta pyrãk kêt. ³⁷ Âm hy pix na htem hkre. No higrõt kre hkêt nê. Rÿ tanhmãn pàr nywja kre hkêt nê. Âm hy pix na htem hkre. Tã nhũm higrõt hapõj nê hprêk nê gaa nê ô. ³⁸ Tirtũm na hte hamaxpêr xà hkõt tanhmã ho nhũm higrõt hapõj nê hprêk nê ô. Tã ja pyrã nê kot puj mẽ Tirtũm jamaxpêr xà hkõt pahtyk tã koja akupÿm mẽ pahto mẽ pahtĩr nê mẽ pamã mẽ panhĩ nyw gõ.

³⁹ Nê mẽmo hy piitã te kot axpên pyrãk kêt. Ahpÿnhã na. Ja pyrã nê ahpÿnhã ri mẽmoj piitã ã. Na axtem mẽ panhĩ nê axtem mry nhĩ nê axtem àk nhĩ nê axtem tep nhĩ. Mẽmoj piitã ahpÿnhã ri ã.

⁴⁰⁻⁴¹ Nê kaxkwa kamã haxwÿja mẽmoj piitã ahpÿnhã no ãm muxre. Myytija mex. Nê mytwrÿreja axte mã no ãm haxwÿja mex. Nê kanhêti haxwÿja mex. Haxwÿja axte

mã. Kamã hkwy hpõk kryre nê kamã hkwy hpõk rÿnhti no ãm piitã mex.

Nê jar pika ja kamã haxwÿja mẽmoj piitã mex. No ãm te kot kaxkwa kamã mẽmoj jarir xwÿnhja mex pyrãk kêt. Axtem na raa.

⁴² Tã koja mẽ panhĩ nywja haxwÿja axte mã. Te kot panhĩ htũm pyrãk kêt. Na htem ty nhũm mẽ ma mẽ o mra nê mẽ hagjê. Nhũm mẽ hikwÿ nê gaa nê ã rerek nê hapêx. Tã koja Tirtũm akupÿm tanhmã mẽ pahto mẽ pahtĩr to pu mẽ hpãnhã pamex kumrêx. Hãmri nê axte mã mẽ panhĩ nyw mex o mex jakamã koja axte htyk nê ã rerek kêt nê.

⁴³ Na htem ty nhũm mẽ hagjê nhũm htyk xwÿnhja tanhmã amnhĩ to hkêt nê amarĩ hikwÿ. Omnuj nê ã nhenhek nê hikwÿ. Tã koja Tirtũm akupÿm mẽ ho mẽ htĩr nê mẽ kãm mẽ ã nyw gõ nhũm mẽ hpãnhã mex kumrêx nê hihtÿx nê Tirtũm nhõ krĩ kamã pa ho pa.

⁴⁴ Mẽ htyk nhũm mẽ kot mẽ hagjênh xwÿnhjaja na htem arĩ ã htũm ã hikwÿ. Âm jar pika ja pix kãm ri mẽ papa kaxyw na mẽ panhĩ htũmja. No mẽ panhĩ nywja axtem Tirtũm nhõ krĩ kamã ri mẽ papa kaxyw jakamã koja mẽ panhĩ nywja axte mã. Tirtũm Karõ koja mẽ pamã kugõ.

Mẽ panhĩ nyw te kot Kris nhĩ pyrãk ã harênh

Rukre 20.34-36

⁴⁵⁻⁴⁶ Nê Tirtũm kapêr ã kagà htũm kot Atãw jarênh kot:

Na pre Tirtũm my kot wa Atãwja nhĩpêx. Jakamã Atãw kêp pika nhõ xwÿnh na pre. Anê.

Ã Atãw jarênh kot anhÿr. Ja pyrã nê na pu htem pakatorxà nhõhy rũm pajapõj nê Atãw pyrã nê pahpê pika nhõ xwÿnh. Tã nhũm Atãwja pa nê gaa nê hpigêt nê ty. Jakamã kot puj mẽ urãk nê papa nê gaa nê ty. Nom nhũm Krisja Atãw kurom kêp akupÿm mẽ ho mẽ htĩr xwÿnh jakamã kot puj mẽ pahpê hkwyjaja Atãw pyrã nê nhÿrmã mẽ pahtyk tã nhũm Kris akupÿm mẽ pahto mẽ pahtĩr. Hãmri nhũm Tirtũm Karõ mẽ pamã mẽ panhĩ nyw gõ pu mẽ axte pahtyk kêt nê. Pãnhã axte mã mẽ pahpê kaxkwa nhõ xwÿnh.

⁴⁷ Nê Atãw na pre Tirtũm pika ho hipêx nê ho htĩr nhũm ri pa. Nom Kris na pre Atãw

rom kaxkwa rŭm mē pahwŷr wrŷ. ⁴⁸ Tã mē pahpê pika nhõ xwŷnhjaja te mē pahpê Tirtŭm kot wam my nhŷpêx xwŷnhhta pyrãk. No mē pahte kaxkwa hwŷr ma papa mã xwŷnhjaja te mē pahte kaxkwa rŭm my kot mē pahwŷr wrŷk xwŷnh Krista pyrãk. ⁴⁹ Tã kormã mē pahpê pika nhõ xwŷnh jakamã te mē pahpê my pika ho hipêx xwŷnhhta nhŷ pyrãk. Nom kot puj mē nhŷrmã ty hãmri nê hpãnhã te pahpê kaxkwa rŭm my kot mē pahwŷr wrŷk xwŷnhhta nhŷ pyrãk.

Axte mē pahtyk kêt kumrêx ã mē pajarênh

Juãw 11.25; Sikŭn Korit 5.4; Wam Tesarõn 4.13-18

⁵⁰ Nê kot puj mē panhŷ htŭm rãhã Tirtŭm nhõ krŷ hwŷr paxãpir kêt nê. Panhŷ htŭm na hte ty nê rerek nê hapêx. Jakamã koja Tirtŭm Karõ mē pamã mē panhŷ nyw gõ pu mē rŷ kormã ma õ krŷ hwŷr pajapêx pa nê kamã papa ho papa.

⁵¹⁻⁵² E mē inhma. Na pre kormã Tirtŭm mē amã mēmoj to amnhŷrŷt kêt tã ra inhmã ho amnhŷrŷt. Jakamã kot paj ŷ hã mē amã harê ka mē inhma. Nã kot puj mē pahpiitã mē pahtyk kêt nê. Koja nhŷrmã Tirtŭm kapêr o mē wrŷk xwŷnhjê hõja mē pamã pifti kakõ. Mē pajaêr pê hkakõ. Hãmri nhŷm Tirtŭm kra ra mē htyk nê mē hikwŷ xwŷnhjaja akupŷm ŷ nyw o htŷr kurê kumrêx. Nê kormã mē pahtyk kêt xwŷnhjaja kot pu mē mē pahtyk kêt ri mē urãk nê panhŷ nyw kurê kumrêx. Hãmri pu mē pahpiitã pahtŷr o pahtŷr tŭm nê papa.

⁵³ Koja Tirtŭm mē panhŷpêx o te mē pahte paxê htŭm o papinhŷpanh nê hpãnhã paxê nyw jagjênh pyrãk. Jao mē panhŷ htŭm o hapêx nê hpãnhã mē pamã mē panhŷ nyw gõ pu mē axte pahtyk kêt kumrêx nê ri papa ho papa. ⁵⁴ Tirtŭm kapêr ã kagã htŭm kot ja jarênh kot:

Na ra Tirtŭmja mēhtyk ho hapêx pa. Anê. Te ra kot ho hapêx par pyrãk o ã harênh kot anhŷr. No ãm kormã. Jakamã kot puj mē nhŷrmã panhŷ nyw nê ri papa nê mē pahtõ axte pahtyk kêt kumrêx. ⁵⁵ Mē pahtykja te mē kot makre par nhŷm axte kot mē hkamnhwŷr kêtja pyrãk. Urã nê koja Tirtŭm akupŷm mē pahto mē pahtŷr pu mē axte pahtyk kêt nê. Nê axte ri

pamã ma hkêt nê papa. Nê axte paxã hkêt nê. ⁵⁶ Tirtŭm kapêr ã kagã htŭmja ã mē pakukamã mē pajarênh kot anhŷr. Mē pahte amnhŷ tomnuj xwŷnh jakamã kot puj mē nhŷrmã ty. ⁵⁷ Nom nhŷm Tirtŭm àhpumunh tŷx o àhpumunh tŷx jakamã na hte Pahihti Jejus Kris kukwak ri mē pahte hkõt amnhŷ xunhwŷr xwŷnhjê nê mē pahte amnhŷ tomnuj rênh pa. Pu mē nhŷrmã mē pahtyk tã nhŷm akupŷm mē pahto pahtŷr.

Mē pahte Jejus mã tanhmã amnhŷ nhŷpêx mex to hã mē pamã karõ

Karatas 6.9; Korosê 1.10

⁵⁸ Jakamã e kwa Jejus kõt ixkwŷjaja. Kêr ka mē arŷ Pahihti Jejus kõt mãn amnhŷ xunhwŷr tŷx rãhã ho ri apa. Nê kapêr kõt pix mã ri amnhŷ nhŷpêx rãhã nê kãm tanhmã amnhŷ nhŷpêx mex to ho ri apa. Kot kaj mē ã amnhŷ nhŷpêx anê hãmri nê kãm tanhmã amnhŷ nhŷpêx to kaprŷ ho ri apa hkêt nê. Æm hãmri kãm mēmoj to anhŷr mex rãhã ho ri apa.

16

Mē kêp amrakati xwŷnhjê jarênh

Atre 11.27-30; Rõmãn 15.25-27; Sikŭn Korit 8.1-24, 9.1-5; Wam Ximotre 6.18

¹ Nê na pa pre krŷ pê Karatas kamã tanhmã Jerujarê kamã Kris kwŷjê jarênh to. Ijaew kwŷ kot mē pahpyrà nê Jejus kõt amnhŷ xunhwŷr ã mē harê nê mē kêp amrakati hã mē harê hãmri nê mē kãm:

—E. Kwa kêr ka mē kãm mē akãxpore hkwy ho akuprõ nê ma mē hwŷr amê.

Anhŷr o mē kãm ixkapêr. Jakamã kwa kêr ka mē urãk nê mē kaxyw mē kãm kãxpore hkwy ho akuprõ. ² Mē panhõ arŷgromnu pê sap ã hkwy ho akuprõ. Kot kaj mē akãxpore rax japêr nê mē kaxyw hkwy ho rax nê axi. Nom kot kaj akãxpore grire japêr nê mē kaxyw mē kãm ho grire nê agõ. Kêr pa mēmo arŷgro hã ma mē awŷr mõ ka mē ra mē kaxyw ho apikuprõnh rax nê.

³ Nê ma mē kot mē kãm ho mõr mã xwŷnhjaja ka mē ixkutêp mē akwŷjê rê. Kêr pa põj nê mē omu hãmri nê mē kaxyw kagã nhŷpêx nê kamã mē harê. Nê mē kãm kugõ nhŷm mē ma Jerujarê hwŷr kãxpore mē ro hã amnhŷ kõt o mõ nê mē kãm kugõ. Mē kot kamã harênh nê mar hãmri nê mē kamjaja

mē ate mē kaxyw mē rēnh ã mē ajarēnh ma. ⁴Rỳ kot ka mē amã mē hkôt inhmēnh prãm nē mãmri mē hkôt inhmē pa ma mē hkôt mō.

*Pawre kot amnhĩ kukamã amnhĩ jarēnh
Atre 19.21-22*

⁵Nom kot paj tokyx mē awyr inhmōr kēt nē. Kot paj ja rüm ixkato nē hpānhã ma pika pē Masetōn wyr mō. Hāmri nē mē hkôt ixpa grire nē ma kormã mē awyr Korīt wyr mō. ⁶Hāmri nē pōj nē mē akôt ri ixpa ryy nē. Nē ixtã amgrã pixi nē hapêx nē rĩ kormã ma axte nhãm krĩ hō hwyr mō. Nē inhnojarēt ka mē ixto Tirtūm wý nē inhmã ixãpkur xà hkwý gō pa ma mē hwyr pry hã hkur o mō. ⁷No ixte mē awyr ixpōx nē tokyx mē akurūm ixkator nē hpānhã ma nhãm krĩ hō hwyr inhmōrja na inhmã hprãm kēt. Jakamã koja Tirtūm kãm ja mex pa arĩ ri mē akôt ri ixpa hã ixtã mytwry xohtō nē tokyx ma nhãm inhmōr kēt nē. ⁸Kot paj kormã jar Epes kamã ri ixpa rãhã nhũm mē hkĩnh pē Pētekos kato nē hapêx pa rĩ kormã ma Masetōn wyr mō. ⁹Na pa hte jar kormã mē kãm Jejus kapēr jarēnh o ri mē hkôt ixpa nhũm mē ohtō nē inhmar o pa. Mē kãm mar prãm. Tã no nhũm mē hkwýjaja ohtō nē mē kēp ja omnuj nē nhũm mē hã ixkamã gryk nē ixtomnu o pa.

*Mē kot Ximotre ho mex ã mē harēnh
Hapuhã Juãw 5*

¹⁰Nē kwa koja Ximotre mēmo arĩgro hã mē awyr pōj ka mē omu nē ho mex nē. Nē mē amnhĩ nhōrkwy hwyr awý kē mē akutã apkur o pa. Na hte ixpyrà nē Pahihti Jejus mã tanhmã amnhĩ nhĩpêx to mex o pa. ¹¹Kormã mē pahkĩnhã nyw tã kēr ka mē tee ri ja hã omu nē ri axpēn mã tanhmã harēnh to hkēt nē. Mē ãm akapēr mex pix o kãm akapēr. Nē koja akupýn nojarēt ka mē pry hã kãm apkur xà hkwý gō kē mex pē man akupýn ixwyr mō pa tokyx omu. Kot paj jar mē pahkwýjê mē akupýn hpōx kamã ijamak o ixpa.

¹²Nē na pa hte xatã jar mē pahtō Aporja ma mē awyr mōr kaxyw mē awyr hano. Kot jar mē pahtō hkwýjê mē ma mē awyr mōr kaxyw. Nom kormã. Koja xep mē jar tanhmã amnhĩ to hpa nē rĩ kormã ma mē awyr mō.

*Kagà jatur xà kamã Pawre kot mēmoj tã
karō*

*Epes 6.10-12; Sikūn Ximotre 1.7; Wam
Pētre 5.8-9*

¹³E kwa kēr ka mē arĩ amnhĩ wyr Jejus kamã ajamak rãhã ho ri apa. Nē hamār pē kutêp tãm amnhĩ nhĩpêx o ri apa. Nē amnhĩ kaxyw hkôt ajamexpēr tỳx rãhã nē.

¹⁴Nē mē amã axpēn kĩnh pē tanhmã axpēn to mex to.

¹⁵Mãn ka mē ra Estepti mē hkwýjê jarēnh ma. Mē hkumrējaja na prem pika pē Gres kamã Kris kôt amnhĩ xunhwý. Tã xep mē ra Kris kôt hkwýjê ho mex o ri mē hkôt pa. ¹⁶Kēr ka mē ã mē kot amnhĩ nhĩpêx anhýr xwýnhjê kapēr ma nē hkôt ri amnhĩ nhĩpêx o ri apa. Mē kot Kris mã mē ajamār xwýnh piitã kēr ka mē kapēr ma nē mē hkôt ri amnhĩ nhĩpêx mex nē.

¹⁷Nē ota Estepti nē Akajkre nē Putunatretra na mē ra jar pōj. Pa mē Sostenes mē wa mē omu nē wa ixkĩnh nē. Te ixte mē apumunh nē ixkĩnh tỳxta pyrãk. ¹⁸Na xep prem ma mē awyr mō nē tanhmã mē amã kapēr to ka prem mē ama nē akĩnh nē. Tã mē ra amnē ixwyr mō nē tanhmã inhmã kapēr mex to pa mē kuma nē ijaxwýja ixkĩnh nē. Kwa kēr pu mē ã mē kot mē panhĩpêx anhýr xwýnhjê ho mex o papa.

¹⁹⁻²⁰Nē ota jar pika pē As kamã Kris kôt mē pahkwýjaja piitã mē awyr hpēr mē. Nē Akir mē hprō Prisireja wa. Nē wa ōrkwy kamã mē kot Tirtūm mã amnhĩ jarēnh kaxyw mē pikuprōnh xwýnh piitã mē awyr hpēr mē.

Nē kēr ka mē nhýri axpēn pumu nē mē apē Kris kôt mē ate axpēn to atō nē atōx ã axpēn mã akapēr mex nē akĩnh nē.

²¹E kot paj kagà jatur xà kamã inhĩkra ho mē amã amnhĩ nhĩxi nhĩpêx ka mē omu. Koja inhmã ixkapēr ã kagà xwýnhhta ja hã kagà hkēt nē. Pa kot paj hipêx. Ixpê Pawre na pa ã amnhĩ nhĩxi nhĩpêx anē ka mē omu.

²²Nē kwa kēr ka mē arĩ amã Pahihti Jejus kĩnh o ri apa. Koja mēhō kãm hkĩnh kēt hã koja Tirtūm ja hã homnuj tỳx kumrēx.

E “maranat.” Mē pakapēr kãm na htem maranat jarēnh o: “Kwa tokyx akupýn mē ixwyr wry Pahihti.” Anē.

²³E kē Pahihti Jejus Krisja mē ato mex nē mē akutã nojarēt rãhã ho pa. ²⁴Ixpyrà

ně mẽ apê Jejus Kris kwỳ jakamã na pa hte
inhmã mẽ akĩnh ně.

Tã ãm ja pix. Ixpê Pawre na pa ã mẽ awỳr
kagà nhĩpêx ně mẽnh aně.

Sikūn Korīt Pawre wam Korīt kām Jejus kôt hkwỳjê hwỳr kagà nē mēnh kôt kagà hō mēnh

Pawre na pre kagàja nhīpêx. Kêp mry hkà ho ixkre nhīpêx nē ho wēnê ho pa xwỳnh na pre. Tā hpānhā kêp Jejus nhỹ hā hkrajê jahkre ho pa xwỳnh. Jakamā na pre kagàja nhīpêx nē Korīt kām mē kot Jejus kôt amnhĩ xunhwỳr xwỳnhjê hwỳr kumē. Na pre ra mē hwỳr wamta nhīpêx nē kumē. Wam kagà nhīxi pē Wam Korīt. Tā axte hkôt ja nhīpêx nē mē hwỳr mēnh jakamā kagà nhīxi pē Sikūn Korīt.

Na pre Korīt kām Jejus kôt mē htōjê hō axtem nē nā puro kamā hpijaam kêt o pa nhūm Pawre tee ri harēnh ma nē mē hwỳr wam kagàta mē nē kamā tanhmā mē kot hipêx to hā mē kām karō. Tā kagà ja kamā axte tanhmā hā mē kām karō hto.

Na pre ra Korīt wỳr mē kêp Kris nhỹ hā mē ahkre hā amnhĩ to hêx xwỳnhjaja mē hwỳr pōj nē tanhmā mē kām kapêr jarēnh to ho mē hkôt pa. Nē tanhmā mē kām Pawre ho hêx to. Jakamā nhūm kagàja kamā tanhmā mē kām amnhĩ tā aprār to nē kām mē hkīnh tỳx ā amnhĩ jarē. Ā na pre Pawre mē kām mēmoj jarēnh nē hā kagà anē. Nē mē kām hā kagà ho:

¹ Pa Korīt kām Tirtūm krajaja. Xà mē apiitā mē amex na ka mē apa? E ot pa mē awỳr kagà nhīpêx nē kumē. Mē amā nē mē anhō pika pē Gres kamā Tirtūm krajê mē mē ato ixpimràatā mē awỳr hipêx nē kumē. Ixpê Pawre na pa hte Tirtūm jamaxpêr xà hkôt ma Jejus Kris nhỹ hā krī piitā hkôt hkrajê jahkre ho ri ixpa. Tā Kris kôt mē pahtō Ximotre mē wa mē awỳr hipêx nē kumē.

² E kê Mēpahpām Tirtūm mē Pahihiti Jejus Kris wa mē ato mex rāhā ho pa. Nē mēmoj to mē akutā nojarêt rāhā ho pa. Ka mē wa kukwak ri ajamakêtkati nē amex nē ri akīnh nē apa ho apa.

Pawre kām amnhĩ xà htỳx kamā hamak pyma hkêt ā harēnh

Rōmān 1.11-12; Korosē 1.11; Sikūn Tesarōn 2.16

³⁻⁴ Nà Tirtūm kêp mē panhō Pahihiti Jejus Kris nhīpêxà na. Nē kêp Mēpahpām maati jakamā na hte mē pakamā ukapri nē tanhmā mē pahto mex to ho pa. Kot puj mē mēmoj tā tanhmā amnhĩ to nē pahkapri nē ri papa nhūm ja hā mē pahpumu hāmri nē hamaxpêr pix o akupỳm mē pahto mē paxihtỳx. Mēmo kaxyw na hte ā mē pahto mex anē? Nà mē pahte amnhĩ tā omunh nē amnhĩ pyrāk mē hkapri nē ri mē pa xwỳnhjê jamaxpêr o hihtỳx o mē hkôt papa kaxyw. Ja kaxyw na hte mē pajamaxpêr o hihtỳx. Jakamā kwa pu mē kām mex o mex ā mán harēnh rāhā ho papa.

⁵ Na htem tōhā ixto Kris nhīpêx pyrā nē tanhmā ixto pa amnhĩ xà htỳx kamā ijamak o ri ixpa. Tā nhūm Tirtūm inhīpêx o te Kris nhīpêx pyrā nē hamaxpêr pix o tanhmā ixkrā hto pa mē kutā amnhĩ to htỳx nē arī mē hkôt ixpa. ⁶⁻⁷ Na pa hte mē amā Kris kapêr jarēnh o ixpa. Mē ate inhmar nē hkôt amnhĩ nhīpêx kaxyw. Jakamā na hte mē kām Tirtūm kapêr mar prām kêt xwỳnhjaja tōhā mē atā ixtomnuj nē pa amnhĩ xà htỳx kamā ijamak o ri ixpa. Tā kwār mē māmri ā inhīpêx anē. Mē ate Jejus kôt amnhĩ xunhwỳr tỳxja na inhmā hprām. Na htem tanhmā Kris ā inhīpêx to nhūm Tirtūm mē hā ixpumunh nē tanhmā ixkrā hto pa inhmā amnhĩ xà htỳx kamā ijamak pyma hkêt nē ixpa. Nē arī mē hkôt mē kām kapêr jarēnh rāhā ho ri ixpa. Na hte Tirtūm amarī ā inhīpêx anhỳr kêt nē. Mē ate ā kot inhīpêx anhỳr ā ixpumunh nē ixpyrà nē amnhĩ kaxyw kām ajamaxpêr tỳx kaxyw na hte ā inhīpêx anē. Mē ate ja hā ixpumunh nē ā ajamaxpêr anhỳr kaxyw nē mē ajamaxpêr o:

—Nà kot pa nhỹrmā Pawre pyrā nē tōhā mē mỳrapê amnhĩ xà htỳx kamā ijamak o ixpa. Hāmri nhūm Tirtūm ja hā ixpumunh nē te ho Pawre nhīpêx pyrā nē tanhmā ixto pa inhmā amnhĩ xà htỳx kamā ijamak pyma hkêt nē ixpa. Nà koja ā inhīpêx anē.

Anhỳr o mē ajamaxpêr kaxyw na hte Tirtūm mē kutā ixto ixihtỳx. Mē ate ja hā ixpumunh nē akupỳm tām ajamaxpêr

pê Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamxpêr kêt nê.

Tĩrtũm kêp mẽ papytâr xwỳnh ã harênh

⁸E Kris kôt ixkwỳjaja. Kot paj ixprĩ hã mẽ amã tanhmã amnhĩ jarênh to ka mẽ inhma. Na pa pre ma pika pê As wỳr mỗ nê mẽ kãm Jejus kapêr jarênh o ri mẽ hkôt ixpa. Hãmri nhũm mẽ hkwỳjaja ja hã ixtomnuj tỳx nê pa amnhĩ xà htỳx kamã ijamak pê mẽ hkôt ixpa. Kironhỹx pa pre mẽ kamã ty. ⁹Na pa pre tee ri amnhĩ kukamã ijamaxpêr o:

—Koja pêr mẽ ixpĩ. Tanhmã kot pa we amnhĩ to nê tokyx mẽ kêp amnhĩ pytà? Kot paj tee ri inhmã mẽ kêp amnhĩptâr prãm. Tĩrtũm pix na ja kaxyw mẽ kutã àhpumunh tỳx. Rỳ nhũm mẽ kot ixpĩr tã nhũm kot akupỳm ixto ixtĩr kaxyw tapxipix na àhpumunh tỳx. Nà kot paj amnhĩ kaxyw tapxipix mã mãn ijamaxpêr o ri ixpa nhũm amnhĩ tã ixpumunh nê hkĩnh nê. ã ixte amnhĩ nhĩpêx anhỹr o ixpaja na kãm hprãm. Anê.

¹⁰Tã nhũm pre ã inhĩpêx anê nê xatã mẽ kêp ixpytâr o ixkôt pa. Koja ã mẽ kêp inhĩpêx anhỹr rãhã ho pa. Nà ã kot inhĩpêx anhỹr mã kênã.

¹¹Nom kwa kêr ka mẽ apiitã arĩ ixto Tĩrtũm wỳr rãhã ho ri apa kê mẽ ama nê mẽ kãm ixkurê xwỳnhjê kutã ixto ixihtỳx rãhã ho pa. Nê ixto mex rãhã nê. Hãmri nhũm mẽ ohtô nê kot mẽ kêp tanhmã ixpytâr to hã ixtã omu nê ixtã kãm mex o mex ã harê.

Pawre kot mẽ kãm amnhĩ tã aprãr ã harênh

Wam Korīt 2.1-5

¹²Nê na xep pre atar Kris kôt mẽ pahkwỳjaja tanhmã ixto kapêr punuj to nê Jejus kot mẽ awỳr inhmênh kêt ã mẽ amã ixto hêx. Nê ijakwa nhĩkjê ho inhmã mẽ akĩnh nê ijakwa nhĩkjê ho mẽ ato ixkapêr punuj ã ijarênh o ri pa. Nom ixte ã amnhĩ nhĩpêx anhỹr kêt. Aa ixte tanhmã mẽ ano kupyur to hkêt. ãm hãmri na pa mẽ amã amnhĩ jarê nê tãm mẽ amã ixkapêr o ri ixpa nê tãm ri mẽ anhĩpêx o ri ixpa. No ijamaxpêr tũm kôt tanhmã mẽ anhĩpêx to hkêt nê. ãm Tĩrtũm kot mẽmoj to mẽ pakutã nojarêr ã omunh xà hkôt pix mã na pa hte ỹ hã mẽ ato mex o ri ixpa. Ijamaxpêr nyw

o. Na pa hte Tĩrtũm pyrà nê mẽ piitã mẽ ho mex nê. No mẽ kajaja ixpyràn mẽ apê hkra jakamã na pa hte mẽ ato mex kumrêx o ri ixpa. ¹³Na pa hte mẽ amã kagà hkwỳ nhĩpêx nê ixprĩ hã mẽ amã tanhmã mẽmoj jarênh to. Mẽ ate kamã harênh nê mar mex kurê kumrêx kaxyw. No na pa hte mẽ amã tanhmã ixêx to rỳ tanhmã mẽ ano kupyur to hkêt nê. ¹⁴ã ixte amnhĩ nhĩpêx anhỹr o ri ixpa htã kormã mẽ apiitã ja hã ixpumunh mex kêt nê. Nê Jejus kot mẽ awỳr inhmênh ã ixpumunh mex kêt nê. Jakamã na hte mẽ akwỳjaja ixto akapêr punuj o pa. Tã kot kaj mẽ nhỹrmã ãm hãmri Jejus kot mẽ awỳr inhmênh ã axpên mã ijarê pa mẽ ama nê ixkĩnh nê. Hãmri nhũm nhỹrmã mẽ panhõ Pahihti Jejus mẽ pahwỳr akupỳn wrỳ pa kãm mẽ ajarê nê kãm:

—E Pahihti. Jajê mã na pa pre akapêr jarênh o ixpa nhũm mẽ inhma nê akôt amnhĩ xunhwỳr kurê kumrêx nê tãm amnhĩ nhĩpêx mex o pa.

Anhỹr o kãm mẽ ajarê. Hãmri nê ã mẽ ate amnhĩ nhĩpêx anhỹr ã mẽ apumunh kôt ixkĩnh nê. Ka mẽ ajaxwỳja akĩnh pê tanhmã kãm ijarênh to ho akuhê.

Pawre hêx kêt ã kot amnhĩ jarênh

Wam Korīt 16.5-6

¹⁵⁻¹⁶Nê na pa pre ra mẽ awỳr ixkrã. Ixte ma mẽ awỳr inhmõr nhũm mẽ ate ixpumunh nê akĩnh ã mẽ akamnhĩx nê mẽ awỳr ixkrã nê ijamaxpêr o:

—Nà ma Masetõn wỳr inhmõr xwỳj ri kot paj ma Korīt kumrêx wỳr mỗ. Hãmri nê Kris kôt ixkwỳjê pumu nê rĩ kormã hamũ Masetõn wỳr mỗ. Nê mẽ kamã ri ixpa tãmtã awjanã nê akupỳn Korīt wỳr mỗ nê axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumunh nê hkĩnh nê. Hãmri pa akupỳm Jutej wỳr inhnojarêr nhũm mẽ pry hã ixàpkur xà hã inhmã mẽmoj kwỳ nhõr japêr.

Anhỹr o ijamaxpêr. ¹⁷Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nê axpên mã ijarênh o:

—Kwa Pawre kot ra mẽ pahwỳr nojarêr ã amnhĩ jarênh tã amnhĩm nojarêr kêt kumrêx. Mãn pre ãm mẽ pamã amnhĩ to

hêx nà? Ra kot mẽ pamã amnhĩ jarênh tâ tokyx hpôx kêtne hã. Anê.

¹⁸ Kwa mẽ ri ã inhmã ajamexpêr anhÿr kêt nê. Na pa pre mẽ amã ixêx kêt nê. Na pa hte Tirtûm noo mã ãm hãmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nà ãm hãmri na pa pre ma mẽ awÿr inhmôr ã amnhĩ jarê.

¹⁹ Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tirtûm Kra hã harê nê kot amnhĩ nhĩpêx te kot Tirtûm kot amnhĩ nhĩpêx pyrãk ã harênh o ri ixpa. Jejus haxwÿja amnhĩ to hêx kêt. Kot mẽmoj tâ amnhĩ jarênh xà hkôt na hte ãm hãmri tanhmã amnhĩ nhĩpêx to. Tã ã kot amnhĩ nhĩpêx anhÿrja kôt na pa inhmã ixte amnhĩ nhĩpêx o ixpa hprãm nê. ²⁰ Ra Tirtûm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

—Koja Tirtûm Jejus kukwak ri mẽ pahto mex rax nê. Ra kot mẽ pahtã amnhĩ jarênh xà hkôt. Nà Tirtûm mex o mex. Anê.

Tirtûm kot mẽ pa hwÿr Karõ rênh ã harênh Rômãn 8.14; Epes 1.13

²¹ Nà Tirtûmja mex o mex. Kot mẽ pahpê hkra kaxyw amnhĩm mẽ paxunhwÿr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

²² Na pu htem Kris kôt amnhĩ xunhwÿ nhũm Tirtûm ja hã mẽ pahpumu nê mẽ pahwÿr Karõ rê nhũm mẽ pahwÿr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhũm mẽ kot kêp õ dôn ã omunhta pyrãk. Tã koja Tirtûm Karõ mẽ pakamã hkrĩ pu mẽ ja hã amnhĩ pumunh kôt Tirtûm kot nhÿrmã mẽ pahto mex rax ã amnhĩ tâ omunh kurê kumrêx. Ra kot mẽ pahto mex tâ koja nhÿrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korîit 4.21; Sikûn Korîit 10.1-2

²³ E Kris kôt ixtõ nê ixtõxjaja. Kot paj kormã ma mẽ awÿr inhmôr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tirtûm tãm mẽ arom kot

ijamexpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awÿr inhnojarêt tâ no ãm tee ri amnhĩ kukamã ijamexpêr nê ijamexpêr o:

—Nà kot paj taxy kormã ma mẽ hwÿr inhmôr kêt nê. Kot paj tokyx mẽ hwÿr mõn pøj nê kot amnhĩ tomnuj xwÿnhta ã mẽ kãm akir nê nê tanhmã mẽ kãm ixkapêr to. Hãmri nhũm mẽ amnhĩ tâ inhma nê hkaprĩ nê tee ri amnhĩ kukamã hamexpêr. ã mẽ kot amnhĩ nhĩpêx anhÿr pymaj kot paj kormã mẽ hwÿr inhmôr kêt nê.

Anhÿr o ijamexpêr. ²⁴ Inhmã ma mẽ awÿr inhmôr nê tanhmã mẽ ate amnhĩ nhĩpêx to hã axte mẽ amã karõ kamã ixihÿx prãm kêt. Mẽ akwÿjê rom ra mẽ ate Kris hkôt amnhĩ xunhwÿr tÿx kênã. Tã mẽ ate hkôt amnhĩ nhĩpêx mex o akĩnh nê apaja na inhmã hprãm.

2

¹ Na pa pre ma mẽ awÿr mõ nê mẽmoj tâ mẽ amã akir nê nê tanhmã mẽ amã ixkapêr to ka prem inhma nê akaprĩ nê ri apa. Tã inhmã akupÿm mẽ awÿr inhmôr nê axte mẽ amã ixàkjêr prãm kêt jakamã na pa kormã mẽ awÿr inhmôr kêt nê. ² Kot kaj mẽ akĩnh nê apa pa ijaxwÿja ixkĩnh nê ixpa. No kot paj ma mẽ awÿr mõ nê mẽmoj tâ mẽ amã akir ka mẽ tee ri inhma nê akaprĩ nê. Pa mẽ apumu nê ijaxwÿja ixkaprĩ nê.

³ Ja pymaj na pa pre wam ixte mẽ awÿr kagã mênhta kamã mẽmoj nê tanhmã mẽ amã ixàkjêr to. Mẽ ate kamã harênh nê mar nê tokyx kormã mẽ awÿr inhmôr xwÿj ri tanhmã mẽ ate amnhĩ tomnuj tota kaga nê tãm amnhĩ nhĩpêx kaxyw. Kêr pa mẽmo arĩgro hã ma mẽ awÿr mõn pøj nê mẽ ate tãm amnhĩ nhĩpêx o apa hã mẽ apumu nê ixkaprĩ hkêt nê ixkĩnh nê. Ka mẽ ajaxwÿja ixpumu nê akĩnh nê. ⁴ Jakamã na pa pre ã mẽ amã kagãta nhĩpêx nê mẽ awÿr mênh anê. Nê kamã mẽmojta nê tanhmã mẽ amã ixàkjêr to. Na pa pre ixkaprĩ htÿx nê tee ri mẽ akukamã ijamexpêr o inhmyr rax pê mẽ amã mẽmojta ã kagã. No ãm mẽ akaprĩ kaxyw na pa pre mẽ amã hipêx kêt nê. ãm mẽ ate kamã harênh nê inhmar nê ajamexpêr o:

—Hêxta waa nê. Nà Pawre na kām mē pahkīnh tỳx kumrêx. Hã na pre mē pahte tanhmã amnhĩ tomnuj to hã mē pajarênh ma nê tee ri mē pakukamã hamaxpêr pê kagàja kamã hã mē pamã akir nê mē pahwỳr kumê. Nà kām mē pahkīnh tỳx kām na ã mē pamã kapêr kām hihtỳx anê.

Anhỳr o ajamaxpêr kaxyw na pa pre hipêx nê mē awỳr kumê.

Mê kot axte amnhĩ tomnuj mã hamaxpêr kêt ã mē kām karō

Rukre 17.3-4; Wam Korīt 5.1-13; Karatas 6.1-2

⁵⁻⁹ Nê wam kagàta kamã na pa pre mē amã mē akwỳjê hō kot nã kaàkre kamã hpijaàm kêeta pa mē amã tanhmã hã karō hto. Ra mē ate harênh mar tã nê kām akapêr kêt nê. Tã mē ate inhmar nê nê tanhmã kām akapêr to nê amnhĩ nê hanor kaxyw na pa pre mē awỳr kagàja mē. Hãmri nê ijamaxpêr o:

—Ko. Koja mē ixkapêr mar xà hkôt amnhĩ nê hanor japêr. Anê.

Tã ka xep prem kamã harê nê ama nê tee ri ja hã amnhĩ pumu nê akaprĩ nê. Nê ixpyrà nê apijaàm nê. Hãmri nê ijamaxpêr xà hkôt amnhĩ nê hanor kām axihtỳx nê. Âm hãmri na ka prem ã hipêx anê. Nhũm xep tee ri ja hã amnhĩ pumu nê hkaprĩ nê hkaprĩ xàj ri mỳr o pa. Jao ra ã amnhĩ nhĩpêx anhỳrta kaga nê akupỳm tãm amnhĩ nhĩpêx. Tã ra ã kot amnhĩ nhĩpêx anhỳr jakamã kwa mē tokyx akupỳm amnhĩ wỳr awỳ kê axte mē awỳr mra nê mē akôt pa. Ra kot amnhĩ tomnujta kaga jakamã kêr ka mē axte kām ajamaxpêr kêt nê. Akupỳm tãm kām akapêr kêt tokyx akupỳm tãm hamaxpêr nê hkīnh nê pa. Kot kaj mē tokyx ã hipêx anhỳr kêt nê nhũm tee ri amnhĩ kukamã hamaxpêr nê hkaprĩ nê pa. Ja pymaj kwa mē amã hkīnh ã kām amnhĩ jarê nê akupỳm tãm kām akapêr pê tãm hipêx o ri apa. Kê amnhĩ tã mē apumu nê akupỳm hkīnh nê tãm hamaxpêr. ¹⁰ E kêr ka mē axte kot tanhmã amnhĩ tomnuj tota mã ajamaxpêr kêt nê. Kwarĩ ho kwarĩ. Kot kaj mē ã hipêx anê pa ijaxwỳja ma hipêx anê. No pa na pre tanhmã ixtomnuj to hkêt nê. Âm Jesus kapêr kwỳm na pre ri ã amnhĩ nhĩpêx anê. Tã ra kot amnhĩ

tomnujta kaga jakamã kot paj Jejus nhỹ hã akupỳm tãm hipêx nê kot amnhĩ tomnujta o ijamakêtkati tokyx anê nê axte kām ijamaxpêr kêt nê. Mē apiitã mē amex nê ri mē apa kaxyw. Jakamã kêr ka mē ajaxwỳja mē amex nê apa kaxyw ã amnhĩ nhĩpêx anê nê axte kām ajamaxpêr kêt nê. ¹¹ Kwa mē tokyx ja ho ajamakêtkati. Kê Satanasti tee ri ja hã mē apumu nê mē amã mē ate tanhmã amnhĩ tomnuj to hprãm xàj tee ri tanhmã ri mē ato ho pa kaprỳ. Kêr pu mē Satanasti kot amnhĩ nhĩpêx kôt amnhĩ nhĩpêx o ri papa hkêt nê. Ra mē pahte Tĩrtũm kapêr kuhpa hã tanhmã kot amnhĩ nhĩpêx to ho pa hã omunh mex kênã.

Pawre kot Xitre japêr o pa hã harênh

¹² Nê na pa pre ja rũm ixkato nê ma Tôx wỳr mō. Ixte mē kām Kris jarênh o mē hkôt ixpa kaxyw ma mē hwỳr mō. Nhũm Pahi-hti Kris ixkukamã tanhmã mē hkrã hto jakamã pa pre mē hwỳr pōj nhũm mē piitã kām ixujarênh mar prãm nê. Pa pre mē kām Tĩrtũm kapêr jarênh ryy ho mē hkôt ixpa. ¹³ Na pa pre Xitre ra mē hwỳr ixkukamã hpôx ã hkamnhĩx tã nhỹri omunh kêt nê. Hãmri nê ijamaxpêr o:

—Hêxta waa nê. Inhmã Korīt kām Jejus kwỳjê jarênh mar prãm. Na pa tee ri mē hkukamã ijamaxpêr o ixpa. Nom kormã Xitre mē kurũm akupỳn hpôx kêt. Mãn kormã Masetõn kamã pa.

Anhỳr o ijamaxpêr hãmri nê mē kām amnhĩ jarê nê ixkato nê ma Masetõn wỳr krĩ hkwy hkôt hapêr o mō. Tã ra hwỳr ixkato nê omu.

Te mē pahpê mēhkuxwa xà pyræk ã mē pajarênh

Epes 5.2; Piripos 4.18

¹⁴⁻¹⁶ Nà Tĩrtũmja mex o mex. Na hte mē pahto mex rãhã ho pa. Nê mē kot mē panê àmnàr xwỳnhjaja nhũm hte tanhmã mē ho pu mē ma paxàmnhĩx ri mē hkôt mē kām Kris kapêr jarênh o ri papa. Te mē pahte mē hkuxwa xà ho ri mē hkuxwa ho papa pyræk. Mē pahte Kris kôt amnhĩ nhĩpêx jakamã Tĩrtũm mã te mē pahkuxware nê ri mē papa pyræk. Nê te mē kām Kris jarênh o ri papa pê te mē hkuxwa xà ho mē hkuxwa ho ri mē hkôt papa pyræk. Nhũm hte mē hkwyjaja mē pama nê kām

mar prām nē. Nē mē paxujarēnhja haxwỳja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kōt amnhī xunhwỳ. No nhūm mē hkwỳjaja axtem nē mē kēp mē pamar prām nōkati. Mē kumā Tīrtūm kapērja te kēp wenēn kuxỳ htỳx nhūm mē kot hpār nē htyk pymaj amỳm kuhē pyrāk. Jao kapēr kaga nē kēp amỳm amnhī xunhwỳ.

Nē na pu htem amnhī krā hkōt mē kām Kris kapēr jarēnh o ri papa hkēt nē. Ām Tīrtūm nhỹ hā pix mā tanhmā harēnh to ho papa.

Pawre kot katāt kōt Tīrtūm kapēr o mē ahkre hā harēnh

¹⁷ Na hte mē kot mē kēp Kris nhỹ hā mē ahkre hā amnhī to hēx xwỳnhjaja te Tīrtūm kapēr o wēnē pyrāk o mē hkōt pa. Jao kàxpore hprām xàj amnhī krā hkōt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpēx anhỹr kēt nē. Nē mē urāk nē amnhī krā hkōt Tīrtūm kapēr jahkre ho ixpa hkēt nē. Tīrtūm kot mē akaxyw ixām jakamā na pa hte ixkatāt kōt Kris nhỹ hā amarī mē amā kapēr jarēnh o ri mē akōt ixpa. No mē urāk nē kàxpore prām xàj mē amā harēnh kēt nē. Tīrtūm kot ja hā ixpumunh mex.

3

¹ Mē kēp Kris nhỹ hā mē ahkre hā amnhī to hēx xwỳnhjaja na htem nhỹhỹm nojarēt nē mē kot mar xwỳnhjē mā:

—E kot paj ma nhām krī hō hwỳr mō nē Tīrtūm kapēr o mē ahkre. Jakamā kwa mē kaxyw inhmā kagā nhīpēx nē kamā ixte Tīrtūm kapēr o mē ajahkre mex xwỳnh ā ijarē nē hā kagā. Hāmri nē inhmā agō pa ma amnhī kōt o mō nē mē kot inhmar mā xwỳnhjē mā kugō kē mē kamā harē nē ijarēnh ma nē kām ixkapēr mar prām nē.

Anhỹr o na htem amnhī to mē hwỳr o pa. No pa na inhmā ā amnhī nhīpēx anhỹr prām kēt. Inhmā nhām mē kām amnhī to jarkrar prām kēt. Mē ate ja hā ixpumunh mex. Ra mē piitā mē kot ixkatāt kōt ixte Tīrtūm kapēr jarēnh mex ā ixpumunh mex jakamā mo kaxyw kot pa ri amnhī kōt kagā jamỳ nē ho ixpa? Nà kot pa amnhī kōt

hō ho inhmōr kaxyw hā ixàhwỳr kēt nē. ²⁻³ Mē kajaja te mē apē inhō kagā pyrāk. Na ka prem ixte mē ajahkre ma nē Jejus kōt amnhī xunhwỳr kurē kumrēx. Hāmri nhūm Tīrtūm mē amā amnhī Karō rē nhūm mē amā agjē ka mē ý hā amnhī nhīpēx nyw o amnhī nhīpēx o apa. Hāmri nhūm mē akwỳjaja amnhī jaēr pē mē ate amnhī nhīpēx nyw ā mē apumu nē mē atā axpēn mā ijarēnh o:

—Hēxta waa nē. Pēr ām hāmri na pre Kris mē hwỳr Pawre mē. Na pre ma mē hwỳr mō nē mē kām Tīrtūm kapēr o mē ahkre nhūm mē kuma nē amnhī tomnuj kaga hpa nē hpānhā Tīrtūm kapēr kōt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Hēxta waa nē.

Anhỹr o mē atā ijarēnh jakamā mo kaxyw kot pa kagā hkwỳ jamỳ nē amnhī kōt ho ixpa? Nà mē kajaja te mē apē inhō kagā pyrāk.

⁴ Na pa pre Jejus kōt amnhī xām nhūm Tīrtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kē ka ma mē kām ixkapēr jarēnh o ri mē hkōt apa.

Anhỹr jakamā na pa hte Tīrtūm kamnàr rom ā amnhī nhīpēx anhỹr o ri mē hkōt ixpa. ⁵ Nom amnhī krā hkōt mē ahkre hkēt nē. Tanhmā kot pa we amnhī to nē amnhī krā hkōt mē kām kapēr o mē ahkre mex nē? Nà Tīrtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tīrtūm kapēr nyw jarēnh

⁶ Nē Tīrtūm na hte tanhmā ixkrā hto pa Karō nhỹ hā mē piitā mē kām kapēr nyw jarēnh o ri ixpa. Annepēm Tīrtūm kot Ijaew mā mēmoj tā karō xwỳnhhta. Mojes kot kapēr tūm jarēnh o pa xwỳnhhta mex tā no nhūm mē tee ri hkōt kām amnhī nhīpēx prām o pa. Nē xatā kamā harē nē omunh tā tee ri kot hkōt kām amnhī nhīpēx prām. Tā mē kot hkōt amnhī nhīpēx kēt mỳrapē na prem pikaprār pan hapēx. No kēt Tīrtūm kapēr nywja. Jejus jarēnhja. Na hte Tīrtūm Karō tanhmā mē pahkrā hto pu mē Jejus kōt amnhī nhīpēx o ri papa. Jao mē pahpē pahtīr tūm nē papa mā xwỳnh. No na hte

nhâm mẽ hkwýjaja kãm harênhja mar prãm kêt nê amnhî jarênh o:

—Nà kot paj amnhî krã hkôt ã amnhî nhîpêx anê nê ã amnhî nhîpêx anê nhùm Tirtûm ja hã ixpumu nê ixtîr tûm nê ixpa mã xwýnh ã ijarê.

Anhÿr tã no ãm ã amnhî jarênh anhÿr kaprÿ. Tirtûm Karõ nhÿ hã mẽ kot amnhî to mex o mẽ pa xwýnh pixjaja koja mẽ htîr tûm nê pa ho pa.

⁷ Nê Tirtûm kapêr tûmta na pre Mojes mẽ kãm harênh kaxyw nhùm mẽmoj tanhmã amnhî nhîpêx to rax kumrêx. Naja hkrakrak nê haxênh nê kamã kamât kô htyk. Hãmri nhùm Tirtûm mẽ kot hkôt amnhî nhîpêx kaxyw kên po hã mẽ kãm mẽmoj tã karõ nhùm Mojes kumÿ nê mẽ hwÿr o wrÿ nê mẽ kãm kamã harê. Tirtûm kot hirã htÿx kamã kãm kapêr nhùm kuri mar o ãm jakamã uràk nê ÿ hã hkuk nhîrã htÿx kumrêx nê mẽ kãm kapêr jarênh o xa. Jakamã nhùm mẽ tee ri kot hprî hã omunh mex kaxyw no ãm nom gêk tÿx nê. Tã gaa nhùm hkuk kãm hirãja amnhîm hprî nê hapêx o mõ. Na pre ã Tirtûm Ijaewjê mã kapêr tûm nhôr anê. Hãmri nhùm Mojesja ô ri mẽ kãm kamã harê nê harênh pa hãmri nê mẽ kãm:

—E kêr ka mẽ Tirtûm kapêr mar tÿx nê hkôt amnhî nhîpêx mex rãhã ho ri apa. Kêr ka mẽ nhÿrmã atyk tã kê akupÿm mẽ ato mẽ atîr ka mẽ õ krî kamã kuri atîr tûm nê amex nê apa ho apa. Anê.

Hãmri nhùm mẽ kuma nê kãm:

—Tõe. Nà kot paj mẽ hkôt pix mã ri amnhî nhîpêx mex rãhã ho ri ixpa.

Anhÿr ã amnhî jarênh tã no ãm hkôt amnhî nhîpêx kêt nê nhùm Mojes tee ri mẽ kot amnhî nhîpêx ã mẽ omu nê mẽ kãm:

—Nà mẽ ate Tirtûm kapêr kôt amnhî nhîpêx kêt jakamã kot kaj mẽ nhÿrmã ty nê Tirtûm pê awry rax kumrêx nê ri apa. Anê.

⁸ Tã na hte Tirtûm jarãhã axtem tanhmã mẽ pamã kapêr to. Pãnhã kapêr nyw o kapêr nê mẽ pamã:

—Kot kaj mẽ Ixkra Jesus kôt amnhî xunhwÿ pa hã mẽ apumu nê mẽ ato ixkra. Hãmri nhùm Ixkarõ mẽ amã agjê. Anê.

Kapêr ja na mex kumrêx o kot kapêr tûm jakrenh. ⁹ Kapêr tûmja mex tã nhùm htem hkôt amnhî nhîpêx kêt nê. Jakamã na htem

ty nê Tirtûm pê awry rax ã ri pa. No kapêr nywja na tûmta rom mex o mex. Na hte Tirtûm mẽ pamã kapêr nywja jarênh o:

—Kot paj tanhmã mẽ akrã hto ka mẽ amnhî to mex pix o ri apa. Jao ixkôt ri amnhî nhîpêx mex o ri apa. Anê.

¹⁰ Nê kapêr tûmja te kot kanê hpôk kryre pyrãk. No kapêr nywja mex o kot tûm jakrenh jakamã te kot mẽmo hpôk rûnh o kanê hpôk kryre jakrenh pyrãk. Jakamã nhùm mẽ kot hirã rax kãm ri mrar gryk ã hpôk grire nhîrã kamã mrar kêt pyrãk.

¹¹ Tirtûm kapêr tûm te kot Mojes kuk pyrãk. Na pre kamã hirã rax tã gaa nê amnhîm hprî nê kamã hirã hapêx o mõ. Nê gaa nê hapêx. No kêt Tirtûm kapêr nywja te kot Tirtûm nhîrã htÿx rãhã ho rãhãta pyrãk. Koja uràk nê aa hapêx kêt kumrêx.

Ijaewjê jarênh

Rômãn 11.7-10

¹² Nê Tirtûm kapêr nywja mex o mex jakamã na pa hte ixãmnhîx mẽ kãm harênh o ri ixpa. ¹³ Te ixte Mojes kot amnhî nhîpêx pyrãk kêt. Na pre hte Mojes ixkînhã ãmnhîx Ijaewjê mã Tirtûm kapêr jarênh o ri pa hkêt nê. Mẽ kot hkuk kãm hirãta ra hapêx o mõr ã omunh nhùm hpijaàm pymaj na pre kupêxê puroore ho amnhî kuk pro nê ri mẽ hkôt pa. ¹⁴ Jakamã nhùm prem hprî hã hkuk kãm hirã pumunh mex kêt nê. Nê Tirtûm kapêr ã kagà htûmja nhùm prem mãânên hprî hã mar mex kêt nê. Mẽ hkrã hihtÿx jakamã te mẽ kot amnhî jamak pro nê mẽmoj mar mex kêt pyrãk jakamã mẽ kot mar tã hprî hã mar kêt nê. Nê hkôt ri amnhî nhîpêx mex kêt nê. No mẽ kot Kris kôt amnhî xunhwÿr xwýnhjaja na hte Tirtûm amnhî tã mẽ omu nê te mẽ nê mẽ hamak hpro xãta rênh par nê rênh pyrãk o mẽ hipêx nhùm mẽhprî hã kapêr mar tÿx nê.

¹⁵ Tã na hte Ijaewjaja arî jarãhã Mojes kot Tirtûm kapêr ã kagà htûm kamã harênh o pa. Nom arî mẽ hkrã hihtÿx jakamã te mẽ kot amnhî jamak pro nê kamã harênh o pa pyrãk o amnhî nhîpêx jakamã kormã hprî hã mar kêt nê. ¹⁶ Tã koja mẽ hkwýjaja Pahihti Jesus Kris kôt amnhî xunhwÿ nhùm amnhî tã omu nê te kot mẽ hamak nê hpro xã hpyr nê mẽnh pyrãk o mẽ hipêx nhùm

mēhprī hā kapēr nyw mar tỳx nē. ¹⁷ Pahihti mē Karōja wa htipxi jakamā na hte mē pakamā agjē nē hprī hā mē pamā kapēr o amnhīrīt o pa. ¹⁸ Ra mē pahte Pahihti Kris kōt amnhī xunhwȳr jakamā te mē pahte mē kot amnhī jamak pro xwȳnh kot amnhī nhīpēx pyrāk kēt. Nhūm Pahihti Karōja tanhmā mē panhīpēx to pu mē ra hkōt amnhī nhīpēx mex o mō. Jakamā na htem mē pahte amnhī nhīpēx nyw pumunh kōt Tirtūm kot tām amnhī nhīpēx ā omunh kurē kumrēx. Kormā mē pahte hkōt amnhī nhīpēx mex kumrēx kēt tā ra hkōt amnhī nhīpēx mex o mō. Jao te tām kot amnhī nhīpēx pyrāk o amnhī nhīpēx o mō.

4

Jejus kapēr te kēp kanē pyrāk ā harēnh
Wam Korīt 2.1-5; Sikūn Korīt 1.12; Wam
Tesarōn 2.1

¹ Nē na pre Tirtūm ixto mex nē tanhmā kām ixàpēnh to hā inhmā karō. Ixte ma mē kām kapēr jarēnh o ri mē hkōt ixpa kaxyw. Jakamā na pa hte ixàmnhīx mē hkōt mē kām harēnh o ri ixpa. ² Nhūm mē hkwȳjaja axtem nē ixēx o ri ixpa hā ijarēnh tā ixte ā amnhī nhīpēx anhȳr kēt. Na pa hte amnhī tomnuj o ri ixpa hkēt nē. Mē hkwȳjaja kot mē no kupyw kaxyw mē kām Tirtūm kapēr o hēx o pa htā pa na pa hte ā amnhī nhīpēx anhȳr kēt nē. Ixprī hā mē kām harēnh o ixpaja na inhmā hprām jakamā na pa hte ixkatāt kōt harēnh o ri mē hkōt ixpa. Mē piitā mē kot ixēx kēt kōt ixpumunh mex kaxyw. Tirtūm kot ixēx kēt kōt ixpumunh mex. ³ No nhȳrmā mē htyk nē ma kuwy hwȳr mē pa mā xwȳnh pixjaja na htem hprī hā ixkapēr mar mex kēt nē. ⁴⁻⁶ Satanasti tām kēp mē hpām. Kēp mē kām Tirtūm kapēr mar prām kēt xwȳnh piitā mē hpām. Jakamā na pa hte mē kām tanhmā Jejus jarēnh to. Kēp Tirtūm Kra hā harē nē te kot Tirtūm kot amnhī nhīpēx pyrāk ā harēnh o ri ixpa. Hāmri nhūm Satanasti tee ri ja hā ixpumu nhūm ja kēp omnuj nē. Jakamā nhūm tanhmā Tirtūm nē mē hkrā hto nē te mē hamak pro pyrāk o mē hipēx. Mē kot hprī hā Jejus jarēnh mar nē hkōt amnhī xunhwȳr pymaj nhūm ā nē mē hipēx anē. Jejus jarēnh te kēp kanē hpōk mex pyrāk jakamā mē kot mar kēt xwȳnhjaja te kamāt

kō kamā ri mē pa pyrāk. No nhūm Satanasti tām kot nē mē no kupyw jakamā nhūm htem ā ri kamāt kō kamā mē pa pyrāk o amnhī nhīpēx anē.

Amnepē mā kormā mēmoj kēt ri nhūm kamāt kō pix. Tā nhūm Tirtūm tanhmā kapēr to nē kapēr o:

—E kē hirā kato. Anē.

Hāmri nhūm ra kapēr xà hkōt hirā kator kurē kumrēx. Tā ja pyrā nē na pa pre kamāt kō kamā ixtỳx ri ixpa pyrāk nhūm Tirtūm te kot inhmā kanē hpōk nhūm hirā pyrāk o inhīpēx pa mex o mex ā omunh kurē kumrēx. Hāmri nē Jejus Kris kot amnhī nhīpēx ā omu nē te Tirtūm kot amnhī nhīpēx ā omunh pyrāk. Wa kot amnhī nhīpēx te kot axpēn pyrāk.

Nē na pa hte pam tanhmā amnhī jarēnh to ho ri ixpa hkēt nē. Ām Jejus Krisja pix na pa hte harē. Tapxipix na kēp mē panhō Pahihti. Jakamā hkīnhā te ixpē mē amā ixàpēnh xwȳnh pyrāk o na pa hte mē amā kapēr jarēnh o ri mē akōt ixpa.

Pawre te kēp poti grāre nhīpēx pyrāk ā
harēnh

Wam Korīt 2.4-5; Sikūn Korīt 11.23, 12.9

⁷ Nē Tirtūm ixrom hihtỳx o hihtỳx. No pa na hkīnhā ixihtỳx kēt. Te ixpē poti grāre nhīpēx pyrāk jakamā na pa hte Tirtūm xihtỳx xwȳnh pix nhȳ hā mē kām kapēr jarēnh o ri mē hkōt ixpa. Nhūm htem inhma nē ām hāmri ixte ȳ hā ixkapēr ā ixpumunh kurē kumrēx. No pa ixte amnhī krā hkōt ixkapēr ā ijarēnh kēt nē.

⁸ Na pa hte mē hkōt mē kām Jejus jarēnh o ri ixpa nhūm mē hkwȳja tōhā inhma nē ja hā inhīpēx kati nē pa amnhī xà htỳx kamā ama. Nom nhūm Tirtūm mē kutā tanhmā ixkrā hto pa inhmā amnhī xà kamā ijamak puma hkēt nē arī mē kām kapēr jarēnh o ri mē hkōt ixpa. Nē amnhī kaxyw Jejus kōt pix mā ijamaxpēr tỳx rāhā pē tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwȳnhjaja ohtō. Na htem xatā Jejus ā tanhmā ixtomnuj to htā pa kormā ixtyk kēt nē. Na pa hte Tirtūm kamnār rom arī mē hkōt ixpa nhūm Tirtūm ixkōt pa ho pa. ¹⁰ Na htem Jejus pyrā nē ixpīr kaxyw tanhmā inhīpēx to. No ām ko. Koja mē nhȳrmā ixpī rỳ ko. Ixte amnhī

kukamā ixàhpumunh kêt. Kot paj ãm arĩ ixtĩr ri mẽ kãm Jejus jarēnh o ri mẽ hkôt ixa. Kêr kê mẽ hkwyjaja ixkapēr ma nē axpēn mā tanhmā Jejus jarēnh to nē harēnh o:

—Nà pēr ãm hāmri na pre Jejus akupỹm htĩr nē tanhmā hkwyjê ho mex to. ãm hāmri na hte Pawre ja hã harē. Anē.

¹¹ Mē kot Jejus ã ixpĩr mã tã pa arĩ mẽ kãm akupỹm htĩr ã harē. Tĩrtũm na hte ja kaxyw tanhmā ixkrã hto pa arĩ mẽ kãm harēnh o ri mẽ hkôt ixa. ¹² Na pa pre ra mẽ amã harē ka prem inhma nē Jejus kôt amnhĩ xunhwȳr kurê kumrēx nē amnhĩ nhĩpēx nyw o amnhĩ nhĩpēx o ri apa. Jakamã ixpyrà nē mẽ apē atĩr tũm nē apa mã xwȳnh. Nhũm htem piitã mẽ ate Jejus kôt amnhĩ xunhwȳr ã mẽ apumu. Tã nhũm mẽ kot Jejus ã ixpĩr kaxyw. Nom kwār mẽ māmri xpi. Ja inhma tanhmã kute hkêt. Mē kot ixpĩr mã tã kot paj arĩ Jejus kapēr jarēnh o ri ixa rãhã ty. Ra mẽ kot ixkapēr mar nē Jejus kôt amnhĩ xunhwȳr xwȳnhjaja mẽ pahpyrà nē kēp htĩr tũm nē pa ho pa mã xwȳnh kēnã. ¹³ Jakamã kwār mẽ māmri xpi. Na pa hte arĩ amnhĩ kaxyw Tĩrtũm kôt ijamaxpēr mex rãhã nē. Amnepê mã na pre Pahi finat Tawija tanhmã Tĩrtũm kapēr jarēnh to nē harēnh o:

ãm hāmri na Tĩrtũm kapērja. Hêx kêt jakamã na pa hte mẽ kãm harēnh rãhã ho ri ixa. Anē.

Tã pa hte Tawi pyrã nē mẽ piitã mẽ kãm Tĩrtũm kapērjarēnh o ri ixa. Tĩrtũm kot mẽ pamã tanhmã mẽmoj to hêx to hkêt. ¹⁴ Ra kot amnhĩ jarēnh xà hkôt akupỹm Pahihti Jejus o htĩr jakamã kot puj mẽ nhỹrmã urak nē ty nhũm akupỹm mẽ pahto mẽ pahtĩr nē ma war amnhĩ wȳr mẽ pahto api.

¹⁵ Amnepēm na pa pre ma mẽ awȳr mō nē mẽ akôt mẽ amã Tĩrtũm kapēr jarēnh o ri ixa. Ka prem inhma nē Jejus kôt amnhĩ xunhwȳ nē ixpyrà nē Tĩrtũm mã mex o mex ã harē. Jakamã kwār mẽ māmri Jejus ã tanhmã inhĩpēx to. Kojã mẽ gaa nē rĩ mẽ hkwyjaja mẽ pahpyrà nē Jejus kôt amnhĩ xunhwȳ nē Tĩrtũm mã mex o mex ã harē.

Pawre tee ri amnhĩ kukamã hamaxpēr kêt ã kot amnhĩ jarēnh

Rōmãn 8.17; Sikūn Korīt 1.7; Wam Pêtre

1.3-9, 4.12-16, 5.10

¹⁶ Jakamã na pa tee ri amnhĩ kukamã ijamaxpēr o ixkaprĩ nē ixa hkêt nē. Mē kot Jejus ã tanhmã ixtomnuj to htãã pa hte ixàmnhĩx kapēr jarēnh o ri ixa. Ra ixpigêt nē ixirerek o inhmōr tã inhōpinh xà kaxwȳnh kãm ijamaxpēr o Jejus kôt amnhĩ nhĩpēx mex o mō. ¹⁷ Mē kãm ixkurê xwȳnhjaja na htem Jejus ã inhĩpēx kati htã ã inhĩpēx anhȳr japjê hkêt nē. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrēx nē ixa ho ixa. Mē kot ixtomnujja na mẽ ho apkati grēre no kot paj nhỹrmã Tĩrtũm mẽ Krata wa kuri inhmex kumrēx nē ixtĩr tũm nē ri ixa ho ixa. Jao rãhã ho rãhã.

¹⁸ Jakamã na pa tee ri mẽ kot tanhmã ixtomnuj tota kukamã ijamaxpēr o ri ixa hkêt nē. Ja kojã tokyx hapēx. Na pa hte ãm nhỹrmã Tĩrtũm nhõ krĩ kamã inhmex nē ixkĩnh rãhã ri ixpaja pix kukamã ijamaxpēr o ri ixa.

5

Mē panhĩ nyw jarēnh

Piripos 3.21; Sikūn Pêtre 1.13-14

¹ Nē mẽ panhĩja te kot tyrti hō ho ixkre pyrak. Na htem tyrti hō ho ixkre nhĩpēx nhũm gaa nē hapēx. Tã mẽ panhĩja na hte urak nē hapēx tokyx anē. Na pu htem ri papa nē gaa nē pawej nē ty. Tã nhũm Tĩrtũm hpãnhã mẽ pahpê hkrajê mã mẽ panhĩ nyw gō pu mẽ kuri õ krĩ kamã pamek kumrēx nē pahtĩr tũm nē papa ho papa. ²⁻³ Na pu htem jar pahpunuj nē papa. Nē mẽ paxà nhi nē mẽ pahkaprĩ nē. Mē panhĩ htũmja te kot mẽ paxê htũm pyrak jakamã na pu htem ty nē te paxê htũm kwȳnh nē hpãnhã nyw jagjēnh pyrak o amnhĩ nhĩpēx. Tã na pu htem amnhĩ kukamã panhĩ nywja mã pajamaxpēr o ri papa. Kot pu mẽ kaxkwa kamã pahkarõ pix nē ri papa hkêt nē. Mē panhĩ nyw ã kot puj mẽ ri papa ho papa.

⁴ Nē na pu htem jar pahpunuj nē pamek kêt nē ri papa. Nē tokyx mẽ pahtyk nē panhĩ htũm o pajapēx nē hpãnhã panhĩ nyw ã mẽ papa hprãm. Tã kojã Jejus tokyx akupỹn wrȳk japēr pu mẽ pahtyk kêt rãhã tokyx panhĩ nywta o panhĩ nyw. Nom

koja tokyx akupŷn wrŷk kêt japêr pu mē nhŷrmā ty nhūm Tīrtūm akupŷm mē pahto mē pahtīr nē mē pamā mē panhī nyw gō pu mē ho panhī nyw. ⁵⁻⁶ Na pre ra Tīrtūm mē panhī nyw kukamā hamaxpêr nē mē pahtā tanhmā amnhī jarēnh tō. Nē mē pahwŷr Karō rē nhūm mē pahkarō mā agjē pu mē ja hā amnhī pumu nē pahkīnh nē pajamaxpêr o:

—Nà ra Tīrtūm kot ixwŷr amnhī Karō mēnh nhūm ixkarō mā àr jakamā koja määnēn nhŷrmā inhmā inhī nyw gō. Kor mā inhī htūm kamā ixpa nē Pahihti Jejus mē wa ō krī kamā ixpa hkêt tā koja nhŷrmā inhmā inhī nywja gō pa inhī nyw o wa kuri ixpa ho ixpa. Nà koja ā inhīpêx anē.

Anhŷr o pajamaxpêr pē pahkīnh nē papa.

⁷ Nē mē pahte jar pano ho nhŷri Jejus pumunh kêt tā no ām panhōpinh xà kaxwŷnh kām kām pajamaxpêr mex nē. ⁸ Jakamā na pu mē tee ri amnhī kukamā pajamaxpêr o papa hkêt nē. Na pu htem ām tokyx mē pahtyk nē ma Pahihti Jejus nhō krī hwŷr paxàpir jamār o papa. Ō krīja kēp mē papaxà kumrêx jakamā na pu htem ma hwŷr paxàpir pix kukamā pajamaxpêr rāhā nē. ⁹ No ām mē pamā ja pix prām kêt. Na pu htem määnēn pamā Jejus mā hprām xà hkôt nhŷri tanhmā kām amnhī nhīpêx to ho ri papa hprām o papa. Jar mē panhī htūm rāhā rŷ mūtār kuri ō krī mex kām mē panhī nyw ā tanhmā kām amnhī nhīpêx to ho ri papaja na mē pamā hprām.

¹⁰ Nē na hte Krisja jar mē pahte tanhmā amnhī nhīpêx to hā mē pahpumunh o hkrī. Mē pahte tām amnhī nhīpêxja nē mē pahte amnhī tomnujja nhūm hte hā mē pahpumunh rāhā ho hkrī. Tā koja nhŷrmā kot mē pahte tanhmā amnhī nhīpêx to hā mē pahpumunh kôt tanhmā mē panhīpêx to. Mē pahte tām amnhī nhīpêx o ri papa xwŷnhjaja koja ra mē panē htyk kukwak ri mē pahto mex nē. No mē kot amnhī tomnuj o mē pa xwŷnhjaja koja mē homnuj tŷx nē. Jakamā na pa inhmā kām hprām xà hkôt pix mā amnhī nhīpêx o ixpa hprām nē.

Mē pajamaxpêr nyw jarēnh

Rōmān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tīrtūm kot hprī hā mē pahpumunh rāhā ho hkrī jakamā inhmā kām hprām xà hkôt pix mā amnhī nhīpêx o ri ixpa hprām. Mān ka mē ra ja hā ixpumunh mex nē rŷ ko. Mē piitā mē kot hkôt amnhī xunhwŷr prām xāj na pa hte mē kām kapêr jarēnh o ri ixpa. ¹² Nom ixte ja hā amnhī to jarkrar o ri ixpa hkêt. Ām mē ate inhmar nē mē kēp Kris nhŷ hā mē ahkre hā amnhī to hēx xwŷnhjē mā tanhmā ijarēnh to kaxyw na pa ā mē amā amnhī jarēnh anē. Mē kot Tīrtūm kapêr jahkre mex kumrêx ā amnhī to jarkrar tā na htem hkôt amnhī nhīpêx kêt nē. Tā mē ate aprī hā ixte Tīrtūm kapêr kôt amnhī nhīpêx mex ā ixpumunh nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē. ¹³⁻¹⁴ Mē kot ixkrā pipānh ā ijarēnh tā Tīrtūm na mē akaxyw ixām pa hte mē amā kapêr jarēnh o ri mē akôt ixpa. Ixkrā pipānh kêt. Ixte Tīrtūm kām hprām xà hkôt tanhmā amnhī nhīpêx to xwŷnh na pa. Tā mē memo kaxyw na pa hte ā kapêr jarēnh rūnh anhŷr o ri mē akôt ixpa? Nà inhmā mē akīnh kēnā. Mē ate Tīrtūm kôt tām amnhī nhīpêx prām xāj na pa hte ā mē amā kapêr jarēnh anhŷr rāhā nē. Kris na pre tanhmā ixto pa inhmā mē akīnh nē. Te tām kām mē ajapē pyrāk. Na pre Kris amnhī grōnh kôt mē pahpiitā mē nē ty. Tīrtūm kot mē pahte amnhī tomnuj mŷrapē tanhmā mē pahto pymaj nhūm mē pahpiitā mē panē ty. Jakamā te mē pahpiitā Jejus kôt mē pahtyk pyrāk o na pu htem amnhī nhīpêx. Jao te mē pahte amnhī nhīpêx tūmja mē pahpē hapêx par pyrāk o pu mē amnhī nhīpêx nyw o amnhī nhīpêx o ri papa. ¹⁵ Mē pajamaxpêr nyw o tām mē pahte amnhī nhīpêx o papa kaxyw na pre Jejus mē panē ty. Jakamā na pu htem axte amnhī pix kukamā ri pamā mēmoj prām o ri papa hkêt nē. Na pu htem määnēn Tīrtūm kām hprām xà hkôt tanhmā kām amnhī nhīpêx to ho ri papa. Ja kaxyw na pre Tīrtūm akupŷm Kris o htīr pu mē kukwak ri pajamaxpêr nyw o amnhī nhīpêx o papa. ¹⁶ Jao mē piitā mē hkrā hkā hā mē omunh xà hkôt pix mā tanhmā mē harēnh to hkêt nē. Mē kot amnhī tomnuj ā mē harēnh rŷ mē kot amnhī to mex ā mē harēnh kêt nē. Amnepē

mã na pa pre ã Kris jarênh anê nê harênh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. ãm ri kot mẽ pahte amnhĩ nhĩpêx kwým ri amnhĩ nhĩpêx jakamã kot amnhĩ tomnuj tỳx xwýnh na.

Anhÿr ã harênh o ixpa. Tã axte ã harênh anhÿr hkêt nê. Kot amnhĩ tomnuj xwýnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtùm kràmnhwý hã mẽ pa-jarênh

Rômãn 5.1, 5.10; Epes 6.20; Korosê 1.20

¹⁷ Nê koja mēhō Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr. ¹⁸ Tirtùm na hte tanhmã mẽ pahto pu mẽ ã amnhĩ nhĩpêx anhÿr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwýnhjê ho hkràmnhwý. Hãmri nê tanhmã mẽ pahte amnhĩ nhĩpêx to hã mẽ pamã karō nê mẽ pamã:

—E kêr ka mẽ ma krĩ piitã hkôt ri mẽ kãm ixkapêr jarênh o ri apa kê mẽ ama nê mẽ apyrã nê Kris kôt amnhĩ xunhwý. Pa ja hã mẽ omu nê ixte mẽ anhĩpêx pyrã nê mẽ ho ixkràmnhwý. Anê.

¹⁹ Jakamã na pa hte ma mẽ kãm kapêr jarênh o ri mẽ hkôt ixpa nê mẽ kãm:

—E pa mẽ amã mẽmoj mex jarê ka mẽ inhma. Nà na pre Krisja mẽ pahte amnhĩ tomnuj mýrapê mẽ panê ty. Nê htyk o Tirtùm mã mẽ pahpãnhã amnhĩrer par kumrêx. Jakamã na ra Tirtũmja Kris kukwak ri kãm mẽ pahpiitã mẽ pahto hkràmnhwý prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwý hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwý kê Tirtùm kot inhĩpêx pyrã nê mẽ ato hkra nê mẽ ato hkràmnhwý.

Anhÿr o mẽ kãm harênh o ri mẽ hkôt ixpa.

²⁰ Kris kot mẽ apiitã mẽ awýr inhmênh jakamã na pa hte ÿ hã mẽ amã kapêr jarênh o ri mẽ akôt ixpa nê mẽ amã:

—E Tirtùm kãm mẽ ajapê jakamã na mẽ awýr inhmê pa mō. Jakamã kwa mẽ tokyx amnhĩ tomnuj kaga nê hkôt amnhĩ xunhwý. Kê amnhĩ tã mẽ apumu nê mẽ ato hkràmnhwý. Anê.

²¹ Krisja aa kot tanhmã amnhĩ tomnuj to hkêt kumrêx tã nhũm pre Tirtũmja te mẽ kot amnhĩ tomnuj tỳx kumrêx xwýnh pyrãk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwýr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwýnh pyrãk o mẽ panhĩpêx kaxyw na pre ã mẽ panê Krata nhĩpêx anê.

6

¹ Tã kot ã Kra nhĩpêx anhÿr jakamã kwa mẽ ixkapêr ma nê mar tỳx nê. No mẽ ama nê ãm mar kêt nê. Tirtùm kãm mẽ pajapê htỳx jakamã mẽ pakutã nojarêt rãhã ho pa. Kumã na pa hte ã mẽ amã kapêr jarênh anhÿr o ri mẽ akôt ixpa. ² Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhĩ to ixwý pa pre mẽ ama nê mẽmojta pê mẽ apytã nê mẽ ato mex nê. Anê.

Jakamã kwa mẽ inhma. Tirtùm kãm mẽ ate amnhĩ tomnuj pê mẽ apytãr prãm tỳx jakamã kwa mẽ tokyx amnhĩ to awý kê ã kêp mẽ apytãr anê.

Mẽ kot Kris ã tanhmã Pawre nhĩpêx to hã mẽ harênh

Sikûn Korît 4.7, 11.23-33; Korosê 1.10

³⁻⁴ Nê mẽ kot Tirtùm kapêr mar nê hã ixtomnuj tã pa hte amnhĩ katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arĩ mẽ kãm kapêr jarênh rãhã ho ri mẽ hkôt ixpa. Mẽ kot mar nê ãm mar nê hkaga pymaj na pa hte ã amnhĩ nhĩpêx anhÿr rãhã nê. Mẽ kot ja hã inhĩpêx punuj tã pa arĩ mẽ kãm harênh o ri mẽ hkôt ixpa. ⁵ Mẽ kot Kris ã ixtak nê ijagjênh nê tanhmã ixto kaxyw ixtã htu htã pa hte mẽ kutã amnhĩ to htỳx nê ixkuhê. Na pa pre hte Tirtùm mã mẽ kãm kapêr jarênh rax nê. Jao tōhã inhōt kêt nê inhōtxwa ho ri mẽ hkôt ixpa. Nê tōhã inhmã prãm tỳx nê ri ixpa. Tã no ãm arĩ mẽ kãm kapêr jarênh rãhã nê. ⁶ Inhmã tanhmã ixte amnhĩ tomnuj to hprãm kêt. Inhmã Tirtùm kot amnhĩ

nhīpêx kôt pix mā amnhī nhīpêx prām. Nē inhmā inhgryk tokyx anhÿr prām kêt. Ām inhmā mē piitā mē hkīnh kām mē ho mex pix prām. Ā na pa hte Tirtūm Karō nhÿ hā amnhī nhīpêx anhÿr o ri mē hkôt ixpa. Mē kot ja hā ixpumunh nē ra Tirtūm kapêr ma nē hkôt amnhī xunhwÿr kaxyw. ⁷ Na pa hte ixkatāt kôt mē kām ixkapêr mex pix nē. Tirtūm xihtÿx xwÿnhja nhÿ hā ri mē kām kapêr jarēnh jao tām amnhī nhīpêx nē tām ri ijamaxpêr o ri mē hkôt ixpa. Jakamā na htem ja hā ixpumu nē ixte Tirtūm kapêr jarēnh ma nē hkôt amnhī xunhwÿ. ⁸ Na hte mē hkwÿjaja kām ixkīnh nē nhūm mē hkwÿjaja axtem kām ixkurê nē. Nē mē hkwÿjaja amnhīm inhmex ā ijarē nhūm mē hkwÿjaja axtem axpēn mā tanhmā ixto kapêr punuj to. Mē kot ixêx nhi hā ijarēnh tā pa hte ixkatāt kôt mē kām ixkapêr o ri ixpa. Nom kwār mē māmri tanhmā ri ixto kapêr to. Ja tanhmā inhmā kute hkêt. ⁹ Na hte mē hkwÿjaja ixkamā ōkre kahak nē pika piitā hkôt axpēn mā tanhmā ijarēnh to ho pa. Mē kām ixpīr prām tā no pa arī ixtīr nē ixpa. Mē kot Jejus ā ixtomnuj tÿx tā kormā ixpīr kêt nē pa ri ixtīr nē ixpa. ¹⁰ Ixte Kris ā amnhī xā htÿx kamā ijamak o ri ixpa htā arī ixkīnh nē ixpa. Nē ixkàxpore hkêt tā nhūm mē ohtō nē ixte mē kām Jejus kapêr jarēnh kukwak ri mex nē pa. Nē ixkukrêx rax kêt tā nhūm Tirtūm ixto mex nē pa inhmex nē ixpa. Tā kot paj nhÿrmā ō krī kamā kuri inhmex kumrêx nē ixtīr tūm nē ixpa ho ixpa. Jakamā na pa hte arī mē kām Jejus kapêr jarēnh o ri mē hkôt ixpa. ¹¹ E Korīt kām ixkrāmnhwÿjaja. Na pa ixprī hā mē amā amnhī nhīpêx jarēnh par kumrêx. ¹² Inhmā mē akīnh tÿx tā te mē amā ixkīnh kêt pyrāk. ¹³ Kwa te mē ate ixto mē akatut nē akuhê pyrāk o inhīpêx kêt nē. Amnhī pyrā nē amā ixkīnh nē hkêt wehe. Te mē apê ixkra pyrāk o na pa ā mē amā ixkapêr anē.

Te mē pahpê Tirtūm nhōrkwÿ pyrāk ā mē pajarēnh

Wam Korīt 10.20-22, 15.33; Epes 5.3-14; Sikūn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nē kêt ka mē kot Kris kôt amnhī xunhwÿr kêt xwÿnhjê mē mē mēmoj tā tanhmā

axpēn mar to hkêt nē. Rÿ mēhō ho amjên rÿ mēhō ho aprō hkêt nē. Ahpÿnhā mē pajamaxpêr kēnā. Tanhmā kot we mē hamaxpêr nyw xwÿnhjaja nē mē hamaxpêr tūm xwÿnhjaja amnhī to nē axpēn kôt hamaxpêr nē ri axpēn kôt pa? Nā koja mē ā amnhī nhīpêx anhÿr kêt nē. Ahpÿnhā mē pajamaxpêr. Na hte hirā htÿxja kamāt kō mē pihkār kêt nē. ¹⁵ Xā na hte Kris mē Satanasti wa axpēn kôt hamaxpêr? Nā wa kot axpēn kôt hamaxpêr kêt. Ahpÿnhā wa hamaxpêr nē ahpÿnhā wa kot amnhī nhīpêx. Nē ahpÿnhā hirā nē ahpÿnhā kamāt kō. Nē mē pahpê Kris kwÿjaja nē mē kēp hkwÿ hkêt xwÿnhjaja ahpÿnhā mē pajamaxpêr nē ahpÿnhā mē pahte amnhī nhīpêx. ¹⁶ Na pu htem Tirtūm mā amnhī jarēnh xā hā ixkre kamā sānti xunhwÿr nē amnhī to hwÿr pē kām mex o mex ā harēnh kêt nē. Axtem na sāntija. Mē panhō Tirtūmja sānti rom htīr tūm rāhā nē pa ho pa xwÿnh. Nē mē papajaja te mē pahpê Tirtūm nhōrkwÿ pyrāk. Kapêr ā kagā htūm kot ja jarēnh kot:

Ixkrajaja te kēp inhōrkwÿ nhūm ixpê ō dōn pyrāk. Te ixpê inhōrkwÿ kamā ixpa xwÿnh pyrāk jakamā kot paj ixkrajê kamā ri ixpa ho ixpa. Ixpê Mēhpām na pa. Anē.

¹⁷⁻¹⁸ ā Tirtūm xihtÿx xwÿnhja kot amnhī jarēnh anhÿr jakamā na hte mē kot amnhī tomnuj xwÿnhjê nē mē pahkurê ho:

Kêt ka mē hkôt ri apa hkêt nē. Kwarī ho kwarī.

Nē mē hkôt ri amnhī nhīpêx o apa hkêt nē. Kot kaj mē ixkapêr ma nē ixkôt amnhī nhīpêx hā kot paj amnhī wÿr mē awÿ nē mē ato ixkra.

Nē pa kot paj ixpê Mēapām maati. Anē.

7

¹ Tā ā Tirtūm kot mē pahto hkra nē mē pahkôt pa ho pa hā amnhī jarēnh kot anhÿr jakamā kwa ixkrāmnhwÿjaja. Kêt pu mē kapêr ma nē tanhmā amnhī tomnuj to hkêt nē. Nē mēmoj punuj kukamā pajamaxpêr kêt nē. Nē ām kapêr kôt pix mā amnhī nhīpêx mex rāhā nē.

Pawre kot Korīt nhō xwÿnhjê nhÿ hā hkīnh ā harēnh

² Nē kwa Kris kōt ixtō nē ixtōxjaja. Kēr ka mē tee ri amnhī tā tanhmā inhmā ajamaxpēr to hkēt nē. Na pa pre tanhmā mē atō hto hkēt nē. Rỳ tanhmā mē atō hto ka mē ja hā ixpumu nē ixkōt tanhmā amnhī tomnuj to hkēt nē. Rỳ pa pre ixēx rom tanhmā mē anokupyr to ho ri ixpa hkēt nē. Kwa mē amā ixkīnh nē tokyx ixkōt ajamaxpēr kēt wehe. ³ Mē ate inhmā nē amnhī tā apijaàm kaxyw na pa ā mē amā ixkapēr anh̄r kēt nē. Inhmā mē akīnh kēnā. Na pa pre inhmā mē akīnh ā amnhī jarēnh rax nē. Inhmā ri mē akōt ixpa rāhā ho ixpa hprām. Rỳ ka mē nh̄rmā apiitā apikaprar par japēr pa inhmā mē akōt ixtyk prām nē. ⁴ Na pa hte ra mē amā ijamaxpēr pē ixkīnh nē ixpa. Nā kot kaj mē ixkapēr ma nē Jejus kōt amnhī nh̄pēx mex nē. Tā kēr ka mē ā amnhī nh̄pēx anh̄r rāhā nē. Na pa hte jar ra amnhī xà htỳx kamā ijamak o ri ixpa htā no ām mē amā ijamaxpēr nē ixkīnh nē.

⁵ Nē na pa pre amnē Masetōn w̄r kormā Xitre japēr o mō. Hāmri nē Masetōnja w̄r pōj nē hapēr pē mē kām Jejus kapēr jarēnh o ri mē hkōt ixpa. Hāmri nh̄m mē kām ixkurē xw̄ynhaja Kris ā inh̄pēx punuj nē hā inhmā àkjēr pix o pa. Hāmri nē ma Masetōn kamā krī piitā hkōt ri mē kām ixto kapēr punuj nē pa amnhī tā mē mar o ri mē hkōt ixpa. Nē mē kajaja mē ate Kris kaga nē nhām mē hamaxpēr kōt amnhī nh̄pēx pymaj na pa pre tee ri mē akukamā ijamaxpēr o ri mē hkōt ixkaprī nē ixpa. ⁶ Tā Tirtūm kēp mē hkaprī xw̄ynh̄jē pumunh nē akup̄m mē ho mē hkīnh xw̄ynh jakamā na pre ixkaprī hā ixpumu nē ixw̄r Xitre mē. Pa pre omu nē akup̄m ixkīnh nē tām ijamaxpēr. ⁷ No ām Xitre pumunh kōt pix mā ixkīnh kēt. Na pre ixw̄r pōj nē tanhmā inhmā mē ajarēnh to nē mē ate tanhmā ho mex to hā mē ajarē. Nē mē amā ixpumunh prām tỳx ā mē ajarē. Nē Kris kōt mē atōta hpijaàm kēt o pa nh̄m ixte kagà kamā hā mē amā ixàkjēr nh̄m mē ate ja hā omunh nē ra amnhī kamā apijaàm o akaprī htỳx ā mē ajarē. Nh̄m Tirtūm kot inhnē mē kām ixkurē xw̄ynh̄jē pumunh mex kaxyw mē ate ixto hw̄r ā mē ajarē. Na pre ā inhmā mē ajarēnh anē pa kuma nē mē anh̄r hā

ixkīnh tỳx kumrēx.

⁸⁻⁹ Nē wam ixte mē amā kagàta nh̄pēx kēt ri na pa pre tee ri mē ate amnhī nh̄pēx ā mē ajarēnh ma nē mē akaxyw hipēx. Nē kamā mē ate hpijaàm kēt xw̄ynhta kot tanhmā amnhī nh̄pēx to hā omunh nē ām omunh o arī hkōt apa hā kagàta kamā mē amā akir hāmri nē Xitre mā kugō nh̄m kupy nē ma mē aw̄r o mō. Tā ka xep prem kamā harē nē ama nē amnhī kamā apijaàm nē. Nē akaprī nē ajamaxpēr o:

—Hēxta waa nē. Ām hāmri na Pawre ā mē ijarēnh anē. Na pa mē ā amnhī nh̄pēx anē nē amnhī tomnuj tỳx nē. Anē.

Tā nh̄m Xitre akup̄m ixw̄r pōj nē inhmā mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hēxta waa nē. Mon pa pre axtem nē ā ri mē kām ixàkjēr anē? Nā na xep prem kagàta kamā harē nē kuma nē hkaprī htỳx nē. Anē.

Tā ām hāmri na pa pre ā mē akaxyw hipēx nē mēmojta ā mē amā ixàkjēr anē. Na ka xep prem kamā harē nē ama nē tee ri ajamaxpēr o ra akaprī nē. Nom Tirtūm kām hprām xà hkōt na ka prem ja hā amnhī pumu nē ā akaprī anē. Tā xep ra akup̄m tām amnhī nh̄pēx nē akup̄m Tirtūm kōt amnhī nh̄pēx mex nē. Jao akup̄m akīnh nē ri apa. Jakamā ām hāmri na pa pre mē aw̄r wam kagàta mēnh nē mēmoj tā ā mē amā ixàkjēr anē.

¹⁰ Koja Tirtūm krajē hō tanhmā amnhī tomnuj to. Hāmri nē tee ri ja hā amnhī pumu nē amnhī kamā hpijaàm nē akup̄m Tirtūm kōt tām amnhī nh̄pēx. Hāmri nē akup̄m mex nē tām hamaxpēr pē hkīnh nē ri pa. Nē axte tee ri amnhī kukamā hamaxpēr hkēt nē. Ja na Tirtūm kām hprām. Tā koja mē kēp hkra hkēt xw̄ynh̄jē pyrā nē tanhmā amnhī tomnuj to nē ra hpijaàm japēr. Nom hkwyjaja kot ja hā omunh pix m̄rapē hpijaàm nē arī Tirtūm kōt amnhī nh̄pēx kēt japēr. Hā koja nh̄rmā ty nē Tirtūm kra kot akup̄m hkōt tām amnhī nh̄pēx xw̄ynh̄jē kīnhā Tirtūm pē awry rax kumrēx nē ri pa.

¹¹ Mē pahte Tirtūm kapēr kw̄m ri tanhmā amnhī nh̄pēx to hā tee ri amnhī pumunh nē amnhī kamā hpijaàm nē

akupÿm tām amnhĩ nhĩpêxja na Tĩrtũm kām hprām. Tā na ka xep ā amnhĩ nhĩpêx anē. Wam ixte mē awÿr kagā mēnhta na ka xep prem kamā tanhmā ixte nā puro kamā hpijaām kêt xwÿnhta ā mē amā ixàkjêr tota kamā akapêr nē ama. Hāmri nē tee ri mē ate kormā kot amnhĩ tomnuj ā kām axàkjêr kêt ā amnhĩ kukamā ajamaxpêr nē amnhĩ kamā apijaām nē. Nom Tĩrtũm kām hprām xà hkôt. Mē ate jam ajamaxpêr pē amnhĩ kamā apijaāmja na kām hprām. Tā ka mē hpijaām xwÿnhta kamā agryk nē kām akapêr o:

—Kwa mē pahpê Jejus kwÿjaja mē pahte ā amnhĩ nhĩpêx anhÿr kêt tā ka ā amnhĩ nhĩpêx anē. Nā na ka amnhĩ tomnuj tÿx kumrêx. Kot kaj ā amnhĩ nhĩpêx anē pa mē hā apumu nē gaa nē apyrā nē ā amnhĩ tomnuj anē. Kwa ja kaga nē axte ā amnhĩ nhĩpêx anhÿr kêt nē. Nē akupÿm Tĩrtũm kôt amnhĩ xām tÿx nē hkôt amnhĩ nhĩpêx rāhā ho ri apa. Anē.

Hāmri nhũm krĩ nhõ xwÿnhjaja ja hā mē ajarēnh ma nē mē apē jamnuj ā mē apumunh kurē kumrêx. Ām hāmri na ka prem ā kām akapêr anē.

¹² Nē ixte mē awÿr kagā nē mēnhta kamā na pa pre nā puro kamā hpijaām kêt xwÿnhta mā tanhmā ixàkjêr to hkêt nē. Rÿ nā purota mā tanhmā ixàkjêr to hkêt nē. Na pa pre mē apē Kris kwÿjê hwÿr kagā nhĩpêx nē kamā tanhmā mē amā hpijaām xwÿnhta ā karõ hto. Mē ate kamā harēnh hāmri nē inhÿ hā amnhĩ nē hanor nhũm Korīt nhõ xwÿnh piitā kot ā mē ate amnhĩ nhĩpêx anhÿr ā mē apumunh kaxyw. Nē mē ate Tĩrtũm nom ā hipêx anhÿr jao mē amā ixkĩnh pē ixkapêr kôt ā hipêx anhÿr ā amnhĩ pumunh kaxyw.

¹³ Tā nhũm Xitre ixwÿr pøj nē tanhmā inhmā mē ajarēnh to. Na xep pre mē awÿr nojarêt nē tee ri amnhĩ kukamā hamaxpêr. Mē ate kagāta kamā harēnh nē ijarēnh mar nē kamā agryk pymaj tee ri amnhĩ kukamā hamaxpêr. Tā ma mē awÿr mōn pøj nē mā amā kugõ. Ka xep prem kamā harē nē ama nē hkôt amnhĩ nhĩpêx kurē kumrêx nhũm mē ate amnhĩ nhĩpêx ā mē apumu nē hkĩnh nē. Hāmri nē tām hamaxpêr. Tā ra akupÿn ixwÿr mō nē inhmā mē ajarē pa mē ajarēnh

ma nē ijaxwÿja ixkĩnh nē. ¹⁴ Na pre kormā mē awÿr nojarêt pa kām tanhmā mē amex ā mē ajarēnh to. Tā nhũm xep ma mē awÿr mōn pøj nē mē apumu nē hamaxpêr o:

—Nā pēr ām hāmri na pre Pawre inhmā mē mex ā harē. Mē mex kēnā. Anē.

¹⁵ Tā nhũm pre mē arũm kato nē ra man akupÿn ixwÿr mōn pøj nē inhmā mē ajarēnh o:

—Na pa pre ma mē hwÿr mō nē mē kām ixkapêr o ri mē hkôt ixpa nhũm mē ixkapêr ma nē ixkôt amnhĩ nhĩpêx kurē kumrêx nē ixto mex nē. Kormā ixte mē hwÿr inhmōr kêt tā mē harēnh ma nē inhmā mē hkĩnh nē. Tā pa ma mē hwÿr mō nhũm mē ixto mex rax nē pa ra inhmā mē hkĩnh tÿx kumrêx. Anē.

¹⁶ Ā inhmā mē ajarēnh anē pa mē ajarēnh ma nē ixkĩnh tÿx nē. Ām hāmri na ka htem mēmoj tā amnhĩ jarēnh xà hkôt tanhmā amnhĩ nhĩpêx to ho apa.

8

Mē kot Kris kôt mē hkwÿjê pē õxÿ hkêt ā mē kām karõ

Atre 11.27-30; Rōmān 15.25-27; Wam Korīt 16.1-4

¹ E Kris kôt ixkwÿjaja. Kot paj hpānhā mē amā jar Masetōn kamā tanhmā Jejus kwÿjaja kot amnhĩ nhĩpêx to hā mē harē ka mē harēnh ma. Na hte Tĩrtũm mē kutā nojarêt nhũm mē mex nē pa. ² Mē hkwÿjaja kot Kris ā mē hipêx kati nhũm mē kot amnhĩ xà htÿx kām hamak o pa htā hkĩnh nē hamakêtkati nē ri pa. Nē mē hkàxpore hkryre htā ho õxÿ hkêt nē pa. Na htem àmnhix ri mē kēp amrakatĩ xwÿnhjê mā hkwÿ nhõr o pa.

³⁻⁴ Tā na prem Jerujarē kamā Kris kôt mē pahkwÿjê jarēnh ma. Mē kēp amrakatĩ hā mē harēnh ma nē kām mē hkaprĩ nē. Nē mē kām mē hwÿr mēmoj rēnh nē mē ho ajuta hprām nē. No ām pa ixte mē kām hā karõ xà hkôt kêt. Mē tāmjaja mē hamaxpêr xà hkôt na prem ā hamaxpêr anē nē mē kaxyw kàxpore ho pikuprõnh rax nē. Hāmri nē inhmā kugõ nē inhmā:

—Kwa na pa prem Jerujarē kamā Kris kôt mē pahkwÿjê jarēnh ma nē mē inhmā mē hkaprĩ nē mē kām mē ixkàxpore hkwÿ ho akuprõ. Jakamā e amÿ nē ma mē hwÿr o

mō nē mē kām agō kē mē tokyx ho amnhīm awjaprō nē kuku. Anē.

⁵ Pa mē kuma nē ixtýx ho âm kàxpore grire hā hkamnhīx nē ijamaxpēr o:

—Kwa mo mē hikàxpore rax koja mē ri ho akuprō nē mē kām kugō? âm mē hikàxpore hkryre kēnā.

Anhýr o ijamaxpēr tā no nhūm mē kaxyw ho rax nē ho akuprō. Mē hikàxpore hkryre htā mē kām ōr rax nē. Hāmri nē inhmā amnhī jarēnh o:

—Na pa mē ra Pahihti Jejus Kris mā amnhī gō. Mē ixte tanhmā kām amnhī nhīpêx to ho ri ixpa kaxyw. Jakamā e tanhmā mē inhmā mēmoj tā karō hto. Kot pa mē ama nē akapēr kōt amnhī nhīpêx. Ja na pa mē inhmā hprām nhūm Tirtūm haxwýja kām ja prām. Anē.

⁶ Na pa pre ā mē kot amnhī nhīpêx anhýr ā mē omu nē mē apē Korīt nhō xwýnhjē mā ijamaxpēr kurē kumrêx. Hāmri nē Xitre mā mē ajarē. Na pre mē awýr mō nē mē amā Jerujarē nhō xwýnhjē jarē. Mē ate mē kām kàxpore hkwý ho apikuprōnh kaxyw. Tā pa pre jam ijamaxpēr nē ra akupým mē awýr mēnh mā nē kām:

—Kwa ma akupým Korīt wýr mō nē mē kām anē kē mē ra kot amnhī jarēnh xà hkōt Jerujarē nhō xwýnhjē kaxyw kàxpore hkwý ho akuprō nē tokyx mē hwýr kumē. Ra mē kām Kris kōt mē hkwýjê hkīnh ā amnhī jarēnh kēnā. E kwa tokyj. Anē.

⁷ Na ka htem amnhī to mex o ri apa. Nē amnhī kaxyw Kris hkōt ajamaxpēr týx nē. Nē ma mē kām Tirtūm kapēr jarēnh mex o ri mē hkōt apa. Nē mē ajamaxpēr mex nē. Nē mē piitā mē ho mex o ri apa. Nē mē amā ixkīnh o ri apa. Jakamā kwa kēr ka mē axàmnhīx mē kēp amrakati xwýnhjē mā mē akàxpore hkwý nhōr o apa. Jao mē amā Tirtūm kīnh týx ā amnhī to amnhīrīt.

⁸ Ixte ā mē amā ja hā karō anhýr tā hā mē atā ixihtýx kēt nē. Âm mē kamā axukapri hkōt mē ate mē kām axàmnhōr o apa kaxyw na pa ā mē amā ixkapēr anē. Masetōn kamā mē pahkwýjaja kot amnhī nhīpêxta pyrā nē. ⁹ Ra mē ate Jejus Kris kām mē pajapê hā kot tanhmā amnhī nhīpêx to hā mar mex. Amnepēm na pre kaxkwa kamā mex kumrêx nē ri pa ho pa nhūm

mēmoj piitā kēp ō htā nhūm rer pa nē mē pahwýr wrý nē mē pakamā kēp amrakati nē ri pa. Hikàxpore hkēt nē ri pa. Tā mēmo kaxyw na pre ā mēmoj mex piitā rer par nē mē pahwýr wrýk anē? âm kot mē pahto mex pix kaxyw. Kot mē pahto mex nhūm mē pahte kukwak ri mē paxàmnhīx ri mē pajamakêtkati nē mē papa kaxyw na pre ā amnhī nhīpêx anē. Mē pahte nhýrmā uràk nē kaxkwa kamā pamex kumrêx nē ri papa ho pa papa kaxyw.

¹⁰ E kwa kēr ka mē tokyx kàxpore hkwý ho apikuprōnh pa nē Jerujarē nhō xwýnhjē hwýr amē. Mē akumrêxjaja na ka prem ham amgrā hapêxta kamā ra mē kaxyw ho apikuprōnhja krax. Mē amā mē ho mex prām xàj ham ho hkra x tā no âm kormā hatur xàm mēnh nē mē hwýr mēnh kēt nē.

¹¹ Kwa mē tokyx ja ho ajapêx nà. Na ka prem ate ho anhýr krax ā akīnh pē kàxpore hkwý ho apikuprōnh o apa. Tā kēr ka mē arī akīnh rāhā ho apikuprōnh par jatur xàm amē. No mē ri atýx tanhmā ajamaxpēr to hkēt nē. Rý mē ajamaxpēr o:

—Nà kormā. Kot paj nhýrmā ixkàxpore rax nē rī kormā mē hwýr hkwý mē.

Anhýr o mē ri ajamaxpēr hkēt nē. Mē ate tanhmā akàxpore hkre kamā kute hā omunh xà hkōt mē kām hkwý pix gō. ¹² Kēr ka mē axàmnhīx akīnh kām mē kām ho akuprō. Ate amnhī kàxpore pumunh xà hkōt. Ka mē akàxpore rax nē mē kām ho rax nē agō. Rý mē akàxpore grire nē mē kām ho grire nē agō. Ja na kēt mex. ¹³ No mē ate mē kām ōr par nhūm mē arom mē hikàxpore rax nē ri paja mex kēt. ¹⁴ Nom ra mē akàxpore rūnh jakamā kwa mē amnhī kutā mē kām hkwý ho hkryre nē ho akuprō kē mē apyrā nē hikàxpore nē ri pa. Kēr ka mē nhýrmā tanhmā amnhī to nē axà nē nhūm akàxpore apē hapêx nhūm mē ajarēnh ma nē amnhī kuxwar mē ato ajuta nē mē amā hkwý ho akuprō nē mē awýr kumē. Ka mē akàxpore ho axpēn pyrā nē ri apa. ¹⁵ Amnepēm Tirtūm kot kaxkwa rūm Ijaewjê hwýr mēō rēnh nhūm mē kot apkati mē amnhīm hkawrà nē ho apkur o pata ā na pre Tirtūm kapēr ā kagà htūmja ā mē harēnh anē nē mē harēnh kot:

Na pre mē hkra xohtô xwýnhjaja mē apkur xà hkawrà rûnh nē. Nē gôj kām unhwý nē kuku nē piitâ ho ôhy htú. Nhûm mē hkra grêre xwýnhjaja haxwýja hkwý kawrà no âm ho hkryre nē hkawrà. Nē gôj kām unhwý nē kuku nē haxwýja ho ôhy htú hpa. Na pre htem apkati mē â amnhî nhîpêx anhÿr o pa. Anē.

Ja pyrâ nē kêr ka mē akâxpore ho axpên pyrâk o ri ho apa.

Xitre mē hkrâmnhwýjê jarênh

¹⁶ Nē Xitre na pre ixpyrà nē kām mē ato ajuta hprâm nē. Na pre inhmâ mē atâ amnhî jarê pa pre kuma nhûm ja inhmâ mex nē pa ixkînh nē. Nē ijamaxpêr o:

—Nâ âm hāmri na Tîrtûm tanhmâ Xitre hkrâ hto nhûm â hamaxpêr mex anē. Anē.

¹⁷ Tâ pa ma akupÿm mē awÿr môr â hkukja nhûm inhma nē hkînh nē mē awÿr nojarêt kurê kumrêx. Nom kormâ ixte kām mē ajarênh kêt ri nhûm tām amnhî kukamâ hamaxpêr nē mē awÿr hkrâ. ¹⁸ Tâ na ra nojarêt kaxyw. Kot paj ma hkôt Kris kôt mē pahôtjê hō mē kê ma hkôt mô. Kôt ixte mēnh xwýnhhta na hte mē kām Tîrtûm kapêr jarênh mex nē nhûm htem amnhîm mex â harê. ¹⁹ Na pre jar Jejus kwýjaja kot ma ixkôt Jerujarê hwÿr kâxpore hkwý ho môr kaxyw nhûm prem amnhîm mē kurê. Tâ koja Xitre mē wa mē awÿr môn pôj ka mē kām kâxporeta gō nhûm man akupÿn o mô pa wa rî kormâ ma Jerujarê hwÿr mē kām o mô. Mē kot hamÿnh nē mē pamâ mē hkînh â kot amnhî tâ mē pahpumunh kaxyw. Nē Tîrtûm mâ mex o mex â harênh kaxyw. ²⁰⁻²¹ Nom kâxpore rax nhûm ixte mē hwÿr o inhmôr nhûm mē kot hâ ixkamnhîx pymaj kot paj ma amnhî kôt Kris kôt mē pahôtta o mô. Ixte Xitre hkôt mē awÿr mēnh xwýnhhta pa ma amnhî kôt o mô. Nom ixâhkînh o ixpare hâ. Tîrtûm kot ja kôt ixpumunh mex tâ kot paj ma amnhî kôt o mô.

²² Nē ot pa ma Xitre wa hkôt axte mē awÿr ja mē. Kêr kê mē axkrunêpxi nē ma ixkukamâ mē awÿr mô. Ixte wa hkôt mēnh xwýnhhta ixte kot amnhî nhîpêx â omunh mex. Na hte kām mē piitâ mē ho ajuta ho pa hprâm nē. Tâ mē ajarênh ma nē inhmâ mē ajarênh o:

—Nâ koja mē Jerujarê nhō xwýnhjê mâ kâxpore nhôr rax nē kām ga. Mē kot amnhî to mex kênâ. Anē.

Jakamâ ra mē awÿr hkrâ. Tâ koja ma Xitre wa hkôt mô nē mē ato ajuta ka mē tokyx kâxpore ho apikuprôn pa.

²³ Nē koja mēhō tanhmâ Xitre hâ mē akukjêr to ka mē kêp ixkrâmnhwý mex â harê. Nē kot inhîhkô hâ mē ho ajuta mex o pa hâ harê. Na pre ra jar Kris kwýjaja mē akaxyw kuta nē ma mē awÿr kumê. Jakamâ koja ma mē awÿr mô nhûm Kris kôt mē pahôtjê hō wa pijakrutja wa ma hkôt mô. Na hte wa haxwýja Kris kôt amnhî nhîpêx mex o pa. ²⁴ Koja mē awÿr pôj ka mē omu nē mē ho mex nē. Nē mē amâ mē hkînh nē. Kê krî piitâ hkôt Kris kôt mē pahkwýjê piitâ mē hâ mē ajarênh ma nē axpên mâ mē amex â mē ajarê. Nē mē ajarênh o:

—Pêr âm hāmri na pre Pawreja mē pamâ Korîit kām mē pahkwýjê jarê. Na xep pre Xitre mē hkwýta ma mē hwÿr mô nhûm mē ho mex rax nē. Ra Pawre kot mē pamâ mē harênh xâ hkôt. Anē.

9

Mē kot kâxpore ho pikuprôn â mē harênh

¹⁻² Kwa ixkrâmnhwýjaja. Kot paj Jerujarê nhō xwýnhjê kaxyw mē atâ ixihÿtx kêt nē. Ra mē amâ mē ho ajuta hprâm jakamâ na pa pre Masetôn kamâ Kris kôt mē pahkwýjê mâ mē ajarênh o:

—Pika pê Gres kamâ Kris kôt mē pahkwýjaja na prem ham amgrâ hapêxta kamâ Jerujarê kamâ mē pahkwýjê jarênh ma nē kām mē ho ajuta hprâm. Anē.

Hāmri nhûm mē ajarênh ma nē mē apyrâ nē kām tanhmâ mē ho ajuta hto hprâm. ³⁻⁴ Tâ ot pa mē awÿr Xitre mē hōta wa mē ho ixpimràatâ wa mē kumê. Mē kot kâxpore hâ mē akukjêr kaxyw. Kêr pa mytwrÿ hō hâ ma Masetôn nhō xwýnh kwýjê mē mē awÿr mô nē ra ixte mē kām kâxpore hkwý ho mē apikuprôn â mē ajarênh kôt mē ate ho apikuprôn rax â mē apumu nē ixkînh nē. Nom kot pa mô nē tee ri hapêr nē te ixte Masetôn nhō xwýnhjê mâ mē ato ixêx pyrâ nē ixpijaâm nē. Ka mē ajaxwýja amnhî kamâ apijaâm nē. ⁵ Â mē pahte

amnhī nhīpêx anhÿr pymaj na pa ã mẽ amã kagàja nhīpêx nē Xitre mã òr nē ma amnhī kukamã mẽ awÿr mēnh anē. Nē hkôt wa mōr mã xwÿnhhta mẽ ho ixpimrààtàã amnhī kukamã wa mẽ kumē. Tã kê mẽ awÿr pōj nē mẽ amã kagàja gō ka mẽ kamã harē nē ama nē tokyx kàxpore ho apikuprōnh jatur xàm amē. Kêr pa mẽ hapu hã mẽ awÿr mō ka mẽ ra mẽ ixkutêp ho apikuprōnh pa nē mẽ kãm agō nē ajamakêtkati nē apa. No pa ixte mẽ amã mẽ ate ho apikuprōnh kaxyw mẽ atã ixihtÿx kêt. ⁶ Na htem piitã ã hamaxpêr anhÿr o pa nē hamaxpêr o:

—Kot ka apur rax nē kamã anhō rax nē. Nom kot ka apur grire nē kamã anhō grire.

Anhÿr o hamaxpêr jakamã kêr ka mẽ apitã ajamakêtkati nē Jerujarē nhō xwÿnhjê mã kàxpore nhōr mex nē. Kêr ka mẽ ho apikuprōnh pa nhūm rax nē. Te mēhō ihpur rax nē kamã ò raxta pyrāk. Kê Tirtūm ã mẽ ate amnhī nhīpêx anhÿr ã mẽ apumu nē nhÿrmã mẽ ato mex nē. ⁷ Nom kêr ka mẽ anhōxÿ kamã mẽ kãm òr kêt nē. Mē pahte pahkīnh kãm panhōxÿ hkêt kãm mẽ kêp amrakati xwÿnhjê mã mẽmoj nhōr o papaja na Tirtūm kãm hprãm. ⁸⁻⁹ Koja mẽ hã mẽ apumu hãmri nē amnhīm mẽ amex ã mẽ ajarēnh rãhã ho pa. Mē kãm Tirtūm kīnh xwÿnhjaja na htem àmnhīx ri mẽ kêp amrakati xwÿnhjê mã mẽmoj nhōr o pa. Te Tirtūm kot amnhī nhīpêx pyrāk. Na hte àmnhīx ri mẽ pamã mẽmoj nhōr o pa. Mē pahwÿr na rē nhūm wrÿ. Nhūm mẽ pamã mẽ paxàpkur xà nhōr o pa. Nē tanhmã mẽ pahto pu mẽ paxà hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamã kwa pu mẽ urāk nē paxàmnhīx ri mẽ kêp amrakati xwÿnhjê mã mẽmoj nhōr o papa.

¹⁰ E pa ixprī hã mẽ amã ja jarē ka mẽ inhma. Nà na hte ã Tirtūm mẽ pamã mẽ paxàpkur xà nhōr o pa anē. Kot kaj apur kãm ahkre nhūm tanhmã amã mẽmo hyta nhīpêx to nhūm amã hapōx mex nē amã ô rūnh nē ka anhō rax nē. Nē hkwy ho axàpkur o apa nē axte hkwy hkre. Tã kêr ka mẽ ã Tirtūm kot mẽ ato mex anhÿr ã amnhī pumu hãmri nē urāk nē axàmnhīx ri mẽ kêp amrakati xwÿnhjê mã axàmnhōr pē mẽ ho mex o ri apa. Nhūm Tirtūm

mē hã mẽ apumu nē mẽ amã mẽmoj nhōr rãhã nē. Ka mẽ amnhī pyrã nē mẽ kêp amrakati xwÿnhjê mã hkwy nhōr o apa. ¹¹ Koja Tirtūm mẽ ato mex rax nē ka mẽ anhō mẽmoj rax nē. Ja o amnhī xwar mẽ kêp amrakati xwÿnhjê kaxyw kàxpore hkwy jaxwÿ. Kêr pa mẽ amã hkwy jamÿ nē ma Tirtūm kôt mẽ pahkwÿjê mã o mō nē mẽ kãm kugō kê mẽ omu nē hkīnh nē. Nē mẽ atã Tirtūm mã mex o mex ã harē. ¹² Hãmri nē mẽ akukwak ri mex nē ri pa. Nē axpēn mã Tirtūm mex o mex ã harēnh o ri pa. ¹³ Koja mẽ amnhī tã mẽ apumu nē hkīnh nē. Hãmri nē Tirtūm mã amnhī tã tanhmã mẽ ajarēnh to nē kãm:

—Pa Tirtūm. Nà ãm hãmri na pre Korīt kãm akôt mẽ ixkwÿjaja amnhī jarē. Na htem akôt pix mã amnhī nhīpêx mex o ri pa. Jao mẽ ixpê òxÿ hkêt nē mẽ inhmã kàxpore hkwy nhōr rax nē. àmnhīx ri hamakêtkati nē mẽ inhmã hkwy nhōr rax nē. No ãm mẽ papxipix na htem ã mẽ inhīpêx anhÿr kêt nē. Na htem mẽ kêp amrakati xwÿnh piitã ã mẽ hipêx anhÿr o pa. ãm hãmri na ka pre tanhmã mẽ hkrã hto nhūm mẽ anhÿ hã ã amnhī nhīpêx anhÿr o pa. Amex o amex Tirtūm. Anē.

¹⁴ Hãmri nē mẽ ato hwÿr o:

—Pa Tirtūm. ãm hãmri na hte Korīt nhō xwÿnhjaja amnhī pyrã nē mẽmoj to mẽ ixkutã nojarêt o pa. Jakamã aa mẽ ixte amnhī tã mẽ inhno ho mẽ omunh kêt tã mẽ inhmã mẽ hkīnh nē. Kwa kêr ka mẽ ixtã mẽmoj to mẽ kutã anojarêt rãhã ho apa Tirtūm.

Anhÿr o mẽ ato kuwÿ. ¹⁵ Tirtūmja mex o mex. Nom na hte mẽ pahto mex pē mẽ pamã kàxpore nhōr kêt nē. Kra Jesusja na pre mẽ pamã kugō. Kãm mẽ pajapê ho mẽ pahwÿr kumē nhūm mẽ pahwÿr wrÿ nē mẽ pahpiitã mẽ pahte amnhī tomnuj pãnhã amnhīrer kaxyw mẽ panê ty. Ja na mex o kot mẽ pamã kàxpore nhōr jakrenh. Mēhō koja urāk nē ã mẽ panê htyk anē? Nà amrakati ho amrakati. ãm Jesus pix na pre ã amnhī nhīpêx anē.

10

Pawre kêp Tirtūm Karō nhÿ hã kapêr xwÿnh ã harēnh
Epes 6.10-20; Wam Tesarōn 5.8

¹ E Kris kôt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarê ka mẽ apiitã inhma. Nà na hte Kris mẽ pakamã gryk tokyx anhỹr kêt nê. Na hte mẽ pahto mex japjê nê. Tã inhmã uràk nê ã mẽ anhĩpêx anhỹr prãm nê. No na hte mẽ akwỳjaja axpên mã tanhmã ixto kapêr punuj to nê ri axpên mã:

—Pawre na hte nhỹri krĩ kamã pa nê mẽ pamã kagà nhĩpêx nê mẽ pahwỳr kurê nê kamã mẽmoj tã mẽ pamã kapêr kãm hihtỳx nê hã mẽ pamã akir. Tã amnê mẽ pahwỳr mỗ hãmri nê te kãm mẽ pahpyma pyràk o mẽ pamã kapêr o pa.

Anhỹr o ijarê. ² Nom inhmã mẽ awỳr inhmôr nê mẽmoj tã mẽ amã ixàkjêr prãm kêt tã kot paj nhỹrmã mẽ awỳr mỗ ka mẽ tanhmã amnhĩ tomnuj to ho apa japêr. Pa ja hã mẽ apumu nê hã mẽ amã akir kãm ga. ³ Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nê amnhĩ krã hkôt tanhmã amnhĩ nhĩpêx to ho ixpa hkêt nê. Nê mẽ uràk nê amnhĩ krã hkôt tanhmã ijamaxpêr to ho ixpa hkêt nê. Na pa htem Tĩrtũm Karô nhỹ hã àhpumunh xà ho amnhĩ nhĩpêx o ri ixpa. ⁴ Nê Tĩrtũm xàhpumunh tỳx xà ho mẽ kãm kapêr jarênh o ri ixpa. Mẽ kot mar nê hkôt amnhĩ nhĩpêx kaxyw. Nê àhpumunh tỳx o na pa htem mẽ kot Tĩrtũm kôt amnhĩ xunhwỳr pymaj mẽ kêp àmnàr xwỳnhjaja tanhmã mẽ nê mẽ ho. ⁵ Na htem htỳx ri tanhmã Tĩrtũm nê hkwỳjê mã kapêr to ho pa. Amnhĩ kaxyw hkôt mẽ hamaxpêr kêt kaxyw tanhmã nê mẽ kãm kapêr to. Na pa htem ja hã mẽ omu nê Tĩrtũm xàhpumunh tỳx xà ho tanhmã mẽ kãm ixkapêr to nhũm mẽ tee ri inhma nê axte mẽ kêp àmnàr kêt nê. Pa mẽ kãm Tĩrtũm kapêr jarê nhũm mẽ ohtô nê kuma nê Kris kôt amnhĩ xunhwỳ nê hkôt amnhĩ nhĩpêx o pa. ⁶ Tã mẽ kajaja kot kaj mẽ Tĩrtũm kôt amnhĩ nhĩpêx mex tã mẽ atô ra kapêr nhĩrôp xa nê tanhmã amnhĩ tomnuj to. Pa ja hã apumu rỳ hã ajarênh ma nê hã amã akir. ⁷ Mẽ ate Tĩrtũm kot mẽ awỳr inhmênh kêt ã axpên mã ijarênh tã kot kaj mẽ atô ãm hãmri apê Kris kwỳ hã amnhĩ pumu nê ra mãânên pa ixpê hkwỳ hã ixpumunh kurê kumrêx.

Mẽ apyrà nê ixpê hkwỳ kênã. ⁸ Na pa pre ma mẽ awỳr mỗ nê tanhmã mẽ amã amnhĩ jarênh to nê mẽ amã:

—Tĩrtũm na pre mẽ awỳr inhmê pa mỗ. Ixte ý hã mẽ amã kapêr jarênh o ri mẽ akôt ixpa kaxyw. Anê.

Tã pa hte arĩ ã amnhĩ jarênh anhỹr o ri ixpa. ãm hãmri na pre Tĩrtũm mẽ awỳr inhmê pa hte ãm hãmri mẽ amã kapêr jarênh o ri mẽ akôt ixpa. Na pa hte Tĩrtũm nhỹ hã mẽ amã ixkapêr nê kapêr o ixêx o amnhĩ to jarkrar kêt nê. Ixte tanhmã mẽ atomnuj to ho ri ixpa kaxyw na pre Tĩrtũm mẽ awỳr inhmênh kêt. Mẽ amã ixkapêr mex nhũm mẽ ate inhmar nê Kris kapêr kôt amnhĩ nhĩpêx mex o apa kaxyw na pre mẽ awỳr inhmê. ⁹ E kwa Kris kôt ixkwỳjaja. Na pa hte mẽ amã ixpuma kaxyw mẽ awỳr kagà rênh kêt nê. Mẽ ate kamã harênh nê tee ri amnhĩ kukamã ajamaxpêr o amnhĩ kamã amã ma kaxyw kêt. ¹⁰ Mẽ akamã mẽ kãm ixkĩnh kêt xwỳnhjaja na htem ijarênh o:

—Pawre na hte awry hã pa nê mẽ pahwỳr kagà rênh nê kamã te kêp pahi ho amnhĩ nhĩpêx pyrà nê mẽmoj tã mẽ pamã kapêr kãm hihtỳx nê. Tã mẽ pahwỳr pôj hãmri nê kapêr kaxyw nom kapêr kãm hihtỳx o kapêr kêt nê. Jakamã mo kaxyw kot puj mẽ hwỳr mra nê kapêr ma?

Anhỹr o ijarê. ¹¹ Nom ã ixte anhỹr kêt. Kwa mẽ inhma. Kot paj nhỹrmã ma mẽ awỳr mỗ hãmri nê te kagà ja kamã mẽ amã ixkapêr pyràk o mẽ amã ixkapêr nê ixkapêr xihtỳx o mẽ amã ixkapêr kãm ga.

¹² Na hte mẽ akwỳjaja kot amnhĩ to mex o mẽ ajakrenh ã amnhĩ to jarkrar o ri pa. No ãm amnhĩ krã hkôt pix mã na htem ã ri amnhĩ jarênh anê. Na hte Tĩrtũm ã mẽ harênh anhỹr kêt nê. ¹³ Tã inhmã mẽ uràk nê ã amnhĩ jarênh anhỹr prãm kêt. ãm ixte Tĩrtũm kot tanhmã inhmã karô hto xà hkôt amnhĩ nhĩpêx o xpaja na inhmã hprãm. Tã mẽ kajaja mẽ awỳr na pre inhmê. ¹⁴ Ra kot mẽ awỳr inhmênh jakamã ixkumrêx na pa pre mẽ awỳr mỗ nê mẽ akôt ri mẽ amã tanhmã Kris jarênh to ho ri ixpa. Tĩrtũm kãm nhỹhỹm ixpa hprãm xà pix wỳr na inhmã ixpa hprãm.

¹⁵ No kêt mẽ kot amnhĩ krã hkôt htỳx ri Tĩrtũm kapêr jahkre o mẽ pa xwỳnhjaja na

htem nh̄yri krī kamā mẽ kot Kris kôt amnhĩ xunhw̄yr ã mẽ harēnh ma nē mẽ hã amnhĩ to jarkrar o ri pa. Te tãm kot mẽ hw̄yr mōr nē mẽ kãm ujarēnh nh̄um mẽ kot mẽ mar xà hkôt Kris kôt amnhĩ xunhw̄yr pyrāk. Nē mẽ hã amnhĩ to jarkrar o:

—E na pa pre ma mẽ hw̄yr mō nē mẽ kãm Tirtūm kapēr jarē nh̄um mẽ inhma nē hkôt amnhĩ xunhw̄yr kurē kumrēx. Ixkukwak ri na prem ã amnhĩ nh̄ipēx anē. Anē.

Nom ã amnhĩ nh̄ipēx anh̄yrja ã amnhĩ to hēx. No pa na pa hte ho mẽ urāk kêt nē. Koja Tirtūm ma nh̄yri krī hw̄yr ixkw̄yjē hō mẽ nh̄um ma hw̄yr mō nē mẽ kãm Kris kapēr jarē. Hāmri nh̄um mẽ kuma nē Kris kôt amnhĩ xunhw̄y. Pa mẽ harēnh ma nē mẽ ŷ hã ixkīnh nē nom pa ixkukwak ri mẽ kot hkôt amnhĩ xunhw̄yr ã amnhĩ to jarkrar kêt nē. Ixte mẽ hw̄yr ixpa nē mẽ kãm ixujarēnhre hã kot pa hkêt mẽ hã amnhĩ to jarkrar. Ām Tirtūm kãm nh̄yh̄ym ixpa hprām xà pix w̄yr na pa hte ixpa nē mẽ kãm kapēr jarē. Jakamā kot kaj mẽ nh̄yrmā Kris kôt amnhĩ nh̄ipēx mex o ri apa pa ja hã mẽ apumu nē mẽ are nē hpānhã ma krī hō hw̄yr Kris kot mẽ hw̄yr inhmēnh xà hō hw̄yr mō. Ka mẽ ja hã ixto Tirtūm w̄yr o apa. ¹⁶ Kot paj mẽ anhō krī kamā mẽ piitā mẽ kãm Jejus kapēr jarēnh pa hāmri nē hpānhã ma krī hkwȳ hkôt ijapōx o ri ixpa nē kamā mẽ kãm harēnh o ri mẽ hkôt ixpa. Kormā aa mẽ kot mar kêt kumrēx xw̄yñh̄jē mā harēnh o ri mẽ hkôt ixpa. Na pa hte ã mẽ hw̄yr ixpa nē mẽ kãm ixujarēnh anē. Jakamā nh̄um mẽ ja hã ixpumu nē mẽ kot Tirtūm kapēr mar xw̄yñh̄jē pix w̄yr ixpa hã ijarēnh kêt nē.

¹⁷ Nē Tirtūm kapēr ã kagà htūm kot mẽmoj tā mẽ kot amnhĩ to jarkrar ã harēnh kot:

Kēr ka mẽ kamjaja amnhĩ mex ã amnhĩ to jarkrar kêt nē. Ām Tirtūm pix mā m̄n mex o mex ã harēnh o ri ho jarkrar o ri apa. Anē.

¹⁸ Kot pu mẽ Tirtūm noo mā amnhĩ to mex ã amnhĩ to jarkrar nē ãm amnhĩ to jarkrar kapr̄y. Nom koja Tirtūm tãm ja hã mẽ pahto jarkrar nē ãm hāmri mẽ pahte amnhĩ to mex xw̄yñh̄ ã pahto jarkrar.

11

Jejus kot mẽ hw̄yr mẽ rēnh ã amnhĩ to hēx xw̄yñh̄jē jarēnh

Matēwre 7.15; Rōmān 16.17; Karatas 1.6-9; Korosē 2.8; Sikūn Pētre 2.1

¹ E kot paj te mẽ hkrā pipānh xw̄yñh̄ kot ht̄yx ri amnhĩ jarēnh pyrāk o tanhmā mẽ amā amnhĩ to jarkrar to. Kwa mẽ inhma nē ixkamā agryk kêt nē. No mẽ ixkapēr kumrēx m̄n ma. ² Inhmā mẽ akīnh. Te ho Mēpahpām Tirtūm kãm mẽ akīnh̄ta pyrāk. Te mẽ apē mēhō kukrit kãm my hkīnh nē kot ho mjēn prām xw̄yñh̄ta pyrāk. Kãm mẽmyjē piitā mẽ hkīnh kêt ãm kãm pix kīnh. Ja pyrā nē kēr ka mẽ amā Kris kīnh o nhām amā mẽ hkīnh xw̄yñh̄jē jakre. Te ho mēhō ni kot kãm myta pix kīnh nē kãm ho mjēn prām xw̄yñh̄ta pyrāk. Ja na pa inhmā hprām. ³ Ra mẽ amā Kris kīnh t̄yx o apa nē hkôt amnhĩ nh̄ipēx mex o ri apa htā nh̄um mẽ kot amnhĩ krā hkôt ht̄yx ri Tirtūm kapēr jahkre ho mẽ pa xw̄yñh̄jaja tee ri ja hã mẽ ajarēnh ma nē axpēn mā mẽ ajarēnh o:

—Kwa nà ja mex kêt. Koja mẽ Pawre kapēr ma nē ãm kuma nh̄um ja mex nē. No mẽ pahkôt mẽ kot amnhĩ nh̄ipēxja na mẽ pamā mex. Ja na kêt mẽ pamā mex o mex. Anē.

Hāmri nē ra kot Kris nē tanhmā mẽ amā hēx to kaxyw. Te amnepē mā kagā kot mẽ panā kot wa pē Ewa mā hēx nh̄um kot mar nē hkôt amnhĩ nh̄ipēxta pyrāk. ⁴ Na pa pre ra mẽ aw̄yr mō nē mẽ amā tanhmā Jejus jarēnh to. Nē tanhmā mẽ amā Tirtūm Karō jarēnh to. Nē tanhmā wa kot mẽ pahto hkra hto hã mẽ amā wa harē ka prem inhma nē mar t̄yx nē. Tā nh̄um ra mẽ kot ht̄yx ri Tirtūm kapēr jahkre xw̄yñh̄jaja ixpānhã mẽ aw̄yr mō nē Jejus kapēr kw̄ym ri tanhmā mẽ amā ujarēnh to nē mẽ amā harēnh o hēx rāhã ho pa. Nē Tirtūm Karōja nh̄um mẽ amā tanhmā ho hēx to. Nē ixte mẽ amā Tirtūm kapēr jarēnh kw̄ym ri ixpānhã tanhmā mẽ amā harēnh to ho pa. Na ka prem mẽ ama nē ãm hāmri harēnh ã hkamnh̄ix. Kwa kēr ka mẽ ri mẽ ujarēnh piitā mar nē hkôt amnhĩ nh̄ipēx kêt nē. Mē kot Jejus jarēnh tā no ãm katāt kôt harēnh kêt nē. Ām ri ho hēx o pa. Ka htem ama nē ãm hāmri harēnh ã hkamnh̄ix nē mẽ amā mẽ mar prām nē. Mē kot mẽ amā harēnh o hēx o pa

htā ka mẽ ama nē ra mẽ hkôt amnhĩ nhĩpêx kaxyw. Kwa mẽ ri ā amnhĩ nhĩpêx anhỹr hkêt nē. ⁵ Kris kot mẽ awýr mẽ rēnh ā mẽ kot amnhĩ jarēnh tā amnhĩ to hêx. Ka prem ama nē ām hāmri mẽ kot mẽ amā harēnh ā mẽ hkamnhĩx. Nom na pre Krisja mẽ awýr mẽ rēnh kêt nē. Kêt pa na pre mẽ awýr inhmē. ⁶ Mē hkĩnhā ixkapēr krór pyrāk tā no ām ixte Tĩrtūm kapēr mar tỳx. Nē kot amnhĩ nhĩpêxja na ixte omunh par. Ra mẽ ate ja hā ixpumunh mex.

⁷ Na pa pre mẽ akôt ri mẽ amā Jejus jarēnh o ri ixpa no ām hpānhā mẽmoj tā mẽ awýr o ri ixpa hkêt nē. Xà amarĩ ixte mẽ amā harēnh nē hpānhā mẽmoj tā mẽ awýr kêtja mẽ apê omnuj? ⁸⁻⁹ Kormā ixte mẽ amā Tĩrtūm kapēr jarēnh o ri ixpata ā na pa pre hte tōhā kàxpore ho presija no ām aa hā mẽ awýr kêt nē. Jar Masetōn kamā Kris kôt mẽ pahkwýjaja na prem ixwýr hkwy rēnh o pa pa ho ixàpkur xà japrōr o ri mẽ akôt ixpa. Mē kumā ixte Tĩrtūm kapēr jarēnh o ri ixpa hkêt tā pa hte mẽ kukwak ri mẽ akôt ho ixàpkur o ri ixpa. Tā kot paj arĩ ā mẽ akôt ixpa nē ā amnhĩ nhĩpêx anē nē mẽmoj tā mẽ awýr o ri ixpa hkêt nē. ¹⁰ Ja inhmā mex. Jakamā kot paj amarĩ mẽ anhō pika pē Gres kām ā mẽ amā Tĩrtūm kapēr jarēnh o ixpa anē nē mẽmoj tā mẽ awýr kêt nē. Ām hāmri na pa ā mẽ amā amnhĩ jarēnh anē. Kris pyrā nē ixêx kêt kēnā. ¹¹ Xà we inhmā mẽ akĩnh kêt kôt na pa hte ā mẽ amā Tĩrtūm kapēr jarēnh pānhā mẽ awýr kêt anē? Nà inhmā mẽ akĩnh jakamā na pa hte kapēr jarēnh pānhā mẽ awýr o ri ixpa hkêt nē. Inhmā mẽ akĩnh tỳx kēnā. Tĩrtūm kot ja hā ixpumunh mex. ¹² No mẽ kot amnhĩ krā hkôt htỳx ri Tĩrtūm kapēr jahkre xwýnhjaja na htem mẽ ajahkre hpānhā kàxpore hā mẽ awýr pix o pa. Nē mẽ amā tanhmā amnhĩ to hêx to nē mẽ amā:

—Nà mẽ ixte Pawre kot amnhĩ nhĩpêx pyrāk. Mē ixte amnhĩ nhĩpêxja kot axpēn pyrāk.

Anhỹr o mẽ amā amnhĩ to hêx. Nom ixte ho mẽ urāk kêt kumrēx. Mē ixte amnhĩ nhĩpêx kot axpēn pyrāk ronhỹx pa mẽ urāk nē kàxpore hā mẽ awýr o ri ixpa. Nom ixte ā amnhĩ nhĩpêx anhỹr kêt. Kot paj aa ā amnhĩ nhĩpêx anhỹr o ixpa hkêt nē. ¹³ Ā

mē kot amnhĩ nhĩpêx anhỹr xwýnhjaja na pre Tĩrtūm mẽ awýr mẽ rēnh kêt nē. Mē kot Kris nhỹ hā mẽ ahkre xwýnh ā amnhĩ jarēnh tā ām amnhĩ to hêx. ¹⁴ Mē ō pahi Satanastija te mẽmoj mex jarēnh pyrāk tā no ām na hte mẽ pano kupyrr pē mẽ pamā tanhmā hêx to ho mẽ pahkôt pa. Te kot mẽmoj mex ā ām hāmri kot harēnh pyrāk tā no ām ho hêx. ¹⁵ Tā hkôt mẽ kot amnhĩ nhĩpêx xwýnhjaja na htem urāk nē te tām mẽ kot amnhĩ nhĩpêx xwýnhjê pyrā nē mẽ pahwýr mra nē tanhmā mẽ pamā hêx to. Satanasti pyrā nē mẽ pano kupyrr kaxyw tanhmā mẽ pamā hêx to. Nom koja Tĩrtūm nhỹrmā mẽ pahtā mẽ homnuj tỳx kumrēx nhūm mẽ rĩ amnhĩ pumu.

Tanhmā mẽ kot Kris ā Pawre nhĩpêx to ā mẽ harēnh
Atre 9.23-25

¹⁶ E kot paj axte te ixtỳx ri amnhĩ to jarkrar pyrāk o mẽ amā tanhmā amnhĩ jarēnh to ka mẽ inhma nē ixkamā agryk kêt nē. ¹⁷ Pahihti Kris nhỹ hā kot paj mẽ amā amnhĩ jarēnh kêt ām amnhĩ krā hkôt kot paj mẽ amā amnhĩ jarē. ¹⁸ Na htem ohtō nē mẽ ate mẽ hā apijaam kaxyw tanhmā mẽ amā amnhĩ to jarkrar to ho pa. Tā kot paj mẽ urāk nē amnhĩ krā hkôt mẽ amā amnhĩ to jarkrar ka mẽ inhma. ¹⁹ Mē ate amnhĩ xàhpumunh tỳx ā amnhĩ jarēnh tā ka htem htỳx ri mẽ kot amnhĩ to jarkrar o ri mẽ pa xwýnhjê kapēr ma nē mẽ hkôt ajamxpēr nē mẽ hkôt amnhĩ nhĩpêx kurē kumrēx. ²⁰ Mē kot Kris nhỹ hā mẽ ahkre hā amnhĩ to hêx xwýnhjaja mẽ pakurom mẽ kot amnhĩ to rax xwýnh ā amnhĩ jarēnh jakamā na htem mẽmoj tā mẽ amā karō ho pa.

Nē mẽ kām hprām xà hkôt nhỹhỹm mẽ arē nē nhỹhỹm mẽ arē.

Nē mẽ apa pix kukwak ri apkur o pa.

Nē mẽmoj tā mẽ ajakwap mẽ atak o pa.

Ā mẽ kot mẽ anhĩpêx anhỹr tā ka te mẽ ate atūm kêt pyrā nē atỳx ri mẽ kapēr ma nē mẽ hkôt amnhĩ nhĩpêx o ri apa. ²¹ Tā ixte mẽ urāk nē ā mẽ anhĩpêx anhỹr kêt tā kot paj mẽ urāk nē mẽ amā tanhmā amnhĩ to jarkrar to ka mẽ inhmar japēr. Te ixtỳx ri amnhĩ jarēnh pyrāk o kot paj mẽ amā amnhĩ jarē nom ām hāmri mẽ amā amnhĩ jarē. ²² Mē kot Jejus nhỹ hā mẽ ahkre hā

amnhî to mẽ hêx xwÿnhjaja na htem mẽ amã tanhmã amnhî to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwÿ jakamã kwa mẽ ixkapêr ma nê mẽ ixkôt amnhî nhîpêx. Anê.

Nom ijaxwÿja ixpê Ijaew tâ pa hte mẽ uràk nê ja hã amnhî to jarkrar hkêt nê. ²³ Nê mẽ kot Kris kapêr jarênh mex o pa hã amnhî jarênh tâ pa na pa hte harênh mex o mẽ hakre. Te ixkrã pipãnh pyrãk o ã mẽ amã amnhî jarênh anhÿr tâã.

E pa mẽ amã tanhmã amnhî jarênh to ka mẽ inhma. Nã na pre Kris ã mẽ kãm ixkurê xwÿnhjaja mẽ kot amnhî to jarkrar xwÿnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tõiã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhÿx pa pre ty. ²⁴ Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhma ure. Na pre htem nhÿri ixpynê nê ã inhîpêx anê. Na prem ã inhîpêx anhÿr o 5 wês.

²⁵ Nê na prem ra mẽ kot ixpĩr kaxyw nê kên rũnh kwÿ jamÿ nê ho ixtak o kuhê. Nê Rõm nhõ xwÿnhjaja haxwÿja pĩ ho ixtak rax kumrêx. ã inhîpêx anhÿr o axkrunêpxi.

Nê na pa pre hte gô xujanãr kãm nhÿhÿm Jejus jarênh o ri ixpa kaxyw pãr kãm mẽ hwÿr ixpa nhũm pãrja tanhmã amnhî to nê agjê. Kritpêm nhÿx pre hte gõiã ixpĩ. Pa pre ã amnhî nhîpêx anhÿr o axkrut. Tã arĩgro hõ hã kê axte pãr õ mã axà nê ma axte krĩ hõ hwÿr mõi. Nhũm kê pãrta axte mẽ ixpê axà nhũm gõiã nhÿx kê axte ixpĩ. Pa pãr jakà hã kumÿ nê hã ijêr o amÿkry. Nê ho apkati. Tã nhũm nhÿhÿnh pãr õja mõi nhũm kamã mẽ mõi xwÿnhjaja ixpumu nê ixwÿr pãr o mõi nê amnhî wÿr ixto api nê ma amnhî kôt ixto mõi.

²⁶ Na pa pre amnhî xà htÿx kamã ijama o ri ã mẽ kãm Kris kapêr jarênh o ri ixpa anê. Kironhÿx pre gõiã tãmja ixpĩ. Nhũm mẽ àhkĩnh nhi xwÿnhjaja kironhÿx prem mããnen ixpĩ. Nê Ijaew nê Ijaew kêt xwÿnhjaja tõiã tanhmã ixtomnuj to ho pa.

Pa pre krĩ hkwy hwÿr ixpa rÿ kapôt ã ixpa nhũm mẽ ixtã amÿnê. Pa pre gõiã xujanãr kãm pãr kãm ri ixpa nê nhÿx kamã ty. Nhũm mẽ kêp Kris kwÿ hã amnhî to hêx xwÿnhjaja haxwÿja tanhmã ixtomnuj to pa mẽ ÿ hã amnhî xà htÿx kamã ijama o ri ixpa. ã na prem Kris ã inhîpêx anhÿr o pa.

²⁷ Nê na pa Jejus kapêr jarênh o ri ixpa kurê ixkêngrã nê ri ixpa. Nê tõiã inhõt kêt ã ixtã apkati. Nê tõiã inhma prãm nê inhma kôr nê ri ixpa. Nê tõiã ixê mex kêt nê inhma kry nê ri ixpa. ²⁸ Na pa hte Kris kapêr jarênh o ri ixpa pê ã amnhî nhîpêx anê. Nom ja pix kêt. Na pa hte krĩ piitã hkôt Kris kwÿjê hkukamã tee ri ijamaxpêr nê ijamaxpêr o:

—Hêxta waa nê. Mãn mẽ arĩ Kris kôt amnhî nhîpêx mex japêr rÿ ko. Mãn mẽ ra kapêr kwÿm ri tanhmã amnhî tomnuj to rÿ ra hkaga.

Anhÿr o ijamaxpêr o ixpa.

²⁹ Nê na hte mõiã Tĩrtũm kapêr nhĩrôp xa nê tanhmã amnhî tomnuj to pa tee ri omu nê ixkaprĩ htÿx kumrêx. Koja mõiã tanhmã Tĩrtũm nê mõiã mã kapêr to nhũm kuma nê Tĩrtũm kôt amnhî nhîpêx kêt pa tee ri ja hã omu nê nê kêp àmnãr xwÿnhhta kamã inhgryk tÿx kumrêx.

³⁰ E Kris kôt ixkwÿjaja. Na pa ã mẽ amã amnhî jarênh anê. Te ixte amnhî to ijarkrar pyrãk no ãm mẽ ate ixirerek xwÿnh ã ixpumunh pix kaxyw. ³¹ ãm hãmri na pa ã mẽ amã amnhî jarênh anê. Ixêx kêt. Pahihti Jejus nhîpêxã Tĩrtũm kot ja hã ixpumunh mex. Tĩrtũmja mex o mex. Koja mex o mex tũm nê pa rãhã ho pa. Tãm kot ixirerek ã ixpumunh mex. ³² Kormã krĩ pê Tamas kãm ixpare ri na pre mẽ õ pahi Arêtja mẽ kãm ixtã amÿnê nhũm põiistijaja krĩ hpu hã kahê xà nhõ hakwakre piitã kãm hipôk pa nê ixkãm hamak o kuhê. Pa tee inhma nhÿhÿnh ixkator nê ma mẽ umaj ixprôt nê ixtêm prãm nê ixirerek xwÿnh ã amnhî pumunh kurê kumrêx. ³³ Tã nhũm Kris kôt mẽ pahkwÿjaja hamaxpêr nê kawà rax mÿ nê o tẽ nê inhma ãm pa hwÿr axà nê kamã nhÿ. Hãmri nhũm mẽ pãr nhõr o kahê nhĩrô pê ixto wÿr pa ixkato nê mẽ kêp amũxu nê amnhim ixpĩr nê ma tẽ nê mẽ kêp

akunok. Ā na pre Tirtūm ixirerek xwýnh ã inhmã ixto amnhĩrīt anē.

12

Tirtūm kot Pawre mã mẽmoj to amnhĩrīt ã harēnh

¹ E Kris kôt ixkwýjaja. Nà inhmã amnhĩ to jarkrar hprãm kêt tã kot paj tanhmã mẽ amã amnhĩ jarēnh to ka mẽ inhma nē hã ixtã apijaãm japêr. Na hte Tirtūm tōhã inhōt kãm ixkarō mã tanhmã kapêr to. ²⁻³ Amnepê mã amgrà hō hã na pre tanhmã ixkrã hto nē ò krĩ hwýr amnhĩ wýr ixto api. Na pre ra hã amgrà pē 14 ãn. Apu inhĩ rãhã ixto api rý apu ãm ixkarō pix o api rý ko. Ixte ja hã amnhĩ pumunh mex kêt. Tirtūm pix kot ja hã ixpumunh. ⁴ Na pre ixto api pa pōj nē ò krĩ kamã axtem tanhmã mẽ kapêr to hã mẽ kuma. Na prem mẽmoj mex kumrēx jarē pa kuma nē ixkĩnh nē. Nē inhmã mar prãm nē. Hãmri nē ijamaxpêr o:

—Hêxta waa nē. Mẽmoj jarēnhja mex kumrēx. Nà kot paj akupým wrý nē ixkwýjê mã harē kê mẽ ixpyrà nē kuma. Nà kot paj anē.

Anhýr tã nhũm Tirtūm Karō ja nē ixkurē nē inhmã:

—Nà kêr ka mẽ kãm ja jarēnh kêt nē. Ām kapxipix kot kaj ama nē ri hã apa.

⁵ Anhýr jakamã pa pre paxipix mẽ arom mẽmojja pumu nē kuma nom kot paj ri hã amnhĩ to jarkrar kêt nē. Kot paj ãm Jejus pix tanhmã harēnh to ho ri ixpa. Jao ixrom mex o mex ã harē. Nē ixrom hihtýx o hihtýx nē àhpumunh o àhpumunh ã harēnh o ri ixpa.

⁶ Nē ixte Tirtūm nhō krĩ hwýr ixàpirja ãm hãmri ixte hã amnhĩ jarēnh tã kot paj ja hã amnhĩ to jarkrar o ri ixpa hkêt nē. Mẽ ate ja hã inhmar kôt inhmex ã ijarēnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nē tãm ixkapêr ã inhma hãmri nē rĩ kormã inhmã inhmex ã ijarē. Ā mẽ ate amnhĩ nhĩpêx anhýrja na inhmã hprãm. ⁷ Na pre Tirtūm inhōt kãm inhmã mẽmoj mex kwý jarēnh rax nē. Hãmri nē hpãnhã inhmã:

—E na ka akwýjê rom inhō krĩ hwýr api nē mẽ kurom mẽmoj mex pumunh rax nē. Tã ate ja hã amnhĩ pumunh nē ma mẽ kãm

hã amnhĩ to jarkrar o ri apa pymaj kot paj Satanasti mã anē nhũm inhma nē tanhmã atomnuj to ho pa. Nom ijamaxpêr xà hkôt koja ã anhĩpêx anē.

Anhýr jakamã nhũm tanhmã inhĩpêx to pa inhmex kêt nē ixpa. Te mrōnhĩ rax nhýhýnh kot ixkamnhwýr nhũm inhmã tee ri hkaxàr prãm kaprý nē ý hã ho inhgêx rãhã nē ixpaja pyræk. ⁸ Tã pa tee ri ja hã amnhĩ pumu nē amnhĩ to Jejus wý nē kãm:

—Kwa Pahihti. Na pa ra mẽmojta nhý hã ixpunuj nē ixirerek nē ixpa. Kwa inhnē ata pa akupým ixihtýx nē ijamakêtkati nē ri ixpa nà?

Anhýr o amnhĩ to hwýr o axkrunēpxi. ⁹ Hãmri nhũm inhmã:

—Nà kot paj anē hyr kêt nē. Kot paj ãm akutã inhnojarêt rãhã ho ri akôt ixpa. Ka axirerek nē apa htã ixihtýx xwýnh ã ixpumunh kôt ixkamnàr rom tanhmã inhý hã amnhĩ nhĩpêx to ho ri apa. Anē.

Ā inhmã kapêr anhýr jakamã na pa ixpunuj nē ri inhĩrot nē ixpa htã ixrom hihtýx xwýnhhta nhý hã ixkĩnh nē ixpa. Nē kurom ixirerek xwýnh pix ã amnhĩ to jarkrar o ri ixpa. ¹⁰ Jakamã kot paj Kris ã ixpunuj nē ri ixpa htã ixkĩnh nē ijamakêtkati nē ri ixpa. Kwãr mẽ mãmrĩ hã tanhmã ixto kapêr to nē tanhmã hã inhĩpêx to pa amnhĩ xà htýx kamã ijamak o ri ixpa. Nē ixpê amrakati nē inhĩrot nē ri ixpa htã Kris nhý hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harēnh

¹¹ Tã mẽmo kaxyw na pa ã mẽ amã amnhĩ jarēnh anē? Nà mẽ ate ixtã apijaãm kêt jakamã na pa ã mẽ amã amnhĩ jarēnh anē. Mẽ kêp Kris nhý hã mẽ ajahkre xwýnh ã amnhĩ to hêx xwýnhjaja na ka htem ixrom kot amnhĩ to rũnh xwýnh ã mẽ harē nē mẽ hã apijaãm o ri apa. Nom ixte amnhĩ to grire xwýnh tã mẽ kot amnhĩ to rũnh o ijakrenh kêt. ¹² Na pa pre mẽ akamã ri ixpa nē Tirtūm nhý hã aa mẽ ate mẽmoj pumunh kêt kwý ho anhýr rax o ri mẽ akôt ixpa. Nē ý hã akupým mẽ à xwýnhjê ho mex. Nē mẽ nohkre xwýnhjê no ho mex. Na pa pre hte ã mẽ amã mẽmoj nhĩpêx anhýr o ri mẽ akôt ixpa. Amnhĩ xà htýx kamã ijamak o ri ixpa htã Tirtūm xihtýx xà ho amnhĩ to htýx

nē ã mē amā mēmoj to anhÿr o ri mē akôt ixpa. Mē ate omunh nē Tirtūm àhpumunh tÿx ã omunh kurê kumrêx kaxyw. Nē ixpê Kris nhÿ hã mē ajahkre hã ixpumunh kurê kumrêx kaxyw na pa pre ã mē amā amnhÿ nhÿpêx anhÿr o ri mē akôt ixpa. ¹³ Xàn pa pre nhãm krÿ hkwÿ kamã Kris kôt mē pahkwÿjê ho mex tã mē kajaja tanhmã mē ato mex to hkêt nê? Nà na pa pre hte mē anhÿpêx o axpên pyræk. Æm mēmoj pixire na pa pre mē uræk nê mē awÿr kêt nê. Nhãm krÿ hkwÿ kamã ixpata ã na pa pre mēmoj to presija nhūm prem inhmã òr o pa. Tã pa pre mē mō nê mē akôt ixpa nê mēmoj to presija htã hã mē awÿr kêt nê. Kwa mē ã ixte amnhÿ jarênh anhÿrja ma nê ixkamã agryk kêt nê.

¹⁴ Tã ot pa ra akupÿm mē awÿr inhnojarêt kaxyw. Na pa pre ra mē awÿr inhmōr o axkrut. Tã ra axte mē awÿr inhnojarêt kaxyw. Kot paj mē awÿr mō nê mē akôt ixpa nom te wam ixtēmta pyrã nê mēmoj tã ri mē awÿr kêt nê. Æm mē amā ixkÿnh pix na inhmã hprãm. Mē apiitã te mē apê ixkra pyræk. Na hte mē hkrarejaja mē katorxà nê mē hipêêxà mã ujaprôr o pa hkêt nê. Mē hipêêxà nê mē katorxà na hte hkrare mã kot mēmoj to presija xà hkôt kãm haprôr o pa nom mēmoj tã hwÿr kêt nê. Ja pyrã nê kot paj mē apê ixkra pyræk ã mēmoj tã mē awÿr kêt nê. ¹⁵ Kot kaj mē mēmoj to presija japêr nê inhmã harê pa ixãmnhÿx ixkÿnh kãm mē amā ixkãxpore piitã òr par pyræk o amnhÿ nhÿpêx. Nê mē amā tanhmã amnhÿ nhÿpêx to ho ixpa rãhã ixtykja na inhmã hprãm. Inhmã mē akÿnh tÿx kumrêx tã mē kajaja mē amā ixkÿnhja mē atã hkwÿ jêt kêt kumrêx. ¹⁶ Ixte amnhÿ mã mēmoj tã mē awÿr kêt tã na hte mē akwÿjaja ixêx rom ixte nhãm mē kêp amrakati xwÿnhjê mã kãxpore hã mē awÿr o ixpa hã ixkamnhÿx.

¹⁷ Kwa tanhmã na pa pre ri mē ano kupyrt to? Xà ja kaxyw na pa pre mē awÿr ixkrãmnhwÿta wa kumê? ¹⁸ Na pa pre Xitre hã ixihÿtÿx nê mē awÿr kumê. Nê Kris kôt mē pahtōja pa Xitre hkôt kumê nhūm wa ma mē awÿr mō. Tã xà na pa pre Xitre tanhmã mē ano kupyrt to? Nà na pre ã mē anhÿpêx anhÿr kêt nê. Tã wa ixte amnhÿ nhÿpêx nê wa ijamaxpêrja kot axpên pyræk. Nà na pa

hte uræk nê mē ano kupyrt o ri ixpa hkêt nê. ¹⁹ Mãn ka mē axpên mã mē ijarênh o:

—Nà Pawre mē hkwÿjaja mē kãm amnhÿ to rÿnh xwÿnh prãm jakamã na ã Pawre kagàja kamã mē pamã amnhÿ tã àprãr anê.

Anhÿr o mē ijarênh japêr nom mē inhmã amnhÿ tã tanhmã ixàprãr to hprãm kêt. Æm mē inhmã mē akÿnh nê mē ato mex prãm jakamã na pa htem tanhmã mē amā amnhÿ nhÿpêx to ho ri ixpa. Na pa Tirtūm noo mã Kris nhÿ hã ã mē amā mē amnhÿ jarênh anê.

²⁰ Tã kot paj jatã ma mē awÿr mō ka mē akwÿjaja tanhmã amnhÿ tomnuj to japêr.

Mēmoj tã axpên mã axàkjêr o apa.

Rÿ mēmoj tã axpên kãm agryk.

Rÿ axpên kãm agryk tokyx anhÿr o apa.

Rÿ axpên pê anhōxÿ.

Rÿ axpên to akapêr punuj o apa.

Rÿ mē ajakwa kamã nhãm mē hixi ho rêr o ri apa.

Rÿ amnhÿ to rÿnh prãm xàj anhmã amnhÿ nhÿpêx to ho apa.

Kot kaj mē ã amnhÿ nhÿpêx anhÿr o ri apa pa ja hã mē apumu nê ixkaprÿ htÿx kumrêx ka mē tee ri amnhÿ tã ixpumu. ²¹ Xà kot paj mē awÿr mō nê mē apumu ka mē akwÿjaja arÿ mē aprō kuhpa hã nhãm mēnijê ho amnhÿkati ho ri apa? Rÿ arÿ tanhmã ajamaxpêr punuj to ho apa? Rÿ atÿx ri apijaãm kêt o apa? Kot ka mē arÿ ã amnhÿ nhÿpêx anê pa ja hã mē apumu nê ixkaprÿ xàj inhmÿr rax nê. Nê mē anhÿ hã Tirtūm noo mã ixpijaãm tÿx kumrêx.

13

Pawre kot tanhmã amnhÿ kukamã mē kãm karō hto

¹ Tirtūm kapêr ã kagà htūm tanhmã mē kot amnhÿ tomnuj to xwÿnhjê jarênh kot:

Koja mēhō tanhmã amnhÿ tomnuj to nhūm mēhō pyxi nê ã amnhÿ nhÿpêx anhÿr ã omu nê awÿr tē nê amā harê ka mē ama nê ãm ama nê hkôt ajamaxpêr kêt nê. No koja mēmojaja axkrut rÿ axkrunêpxi nê hã omu nê awÿr mra nê axpên kôt amā harê ka mē ama nê mē hkôt ajamaxpêr kurê kumrêx. Anê.

Tã ra mē awÿr inhmōr o axkrut tã kot paj akupÿm mē awÿr mō nê mē apumu. ² Hapu

hã mẽ awÿr inhmôrta ã na pa pre mẽ akwÿ kot tanhmã amnhĩ tomnuj to hã mẽ omu nẽ hã mẽ kãm akir nẽ mẽ kãm:

—Kot kaj mẽ amnhĩ tomnuj kaga nẽ tãm amnhĩ nhĩpêx kêt kot paj nhÿrmã akupÿn mẽ awÿr mō nẽ ã mẽ ate amnhĩ nhĩpêx anhÿr ã mẽ apumu nẽ hã mẽ atomnuj tÿx kumrêx kãm ga. Anẽ.

Jakamã kot paj mẽ ma mẽ awÿr mō nhũm mẽ akwÿjaja arĩ mẽ ate amnhĩ tomnuj o apa hã inhmã mẽ ajarẽ pa mẽ atã mẽ kuma nẽ tanhmã mẽ ato htÿx nẽ. ³ Kot kaj mẽ ja hã ixpumu nẽ aprĩ hã ixte Kris nhÿ hã ixkapêr xwÿnh ã ixpumunh tÿx kurê kumrêx. Kris ixrom hihtÿx o hihtÿx. Na pre ra mẽ ate amnhĩ tomnuj o apata mÿrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhÿrja kaga hkêt hã koja tee ri ja hã mẽ apumu nẽ mẽ anhĩpêx kati nẽ. ⁴ Amnepêm na pre Krisja te hihtÿx kêt pyrã nẽ ãm arĩ mẽ kãm xa nhũm mẽ unẽ nẽ pĩ kahpa ã kunhō nẽ kupĩ. Tã nhũm Tirtũmja ãhpumunh tÿx o akupÿm ho htĩr nhũm akupÿm htĩr o htĩr nẽ Tirtũm nhÿ hã hihtÿx o hihtÿx ã amnhĩ to amnhĩrĩt. Ja pyrã nẽ wam mẽ awÿr inhmôrta ã na pa pre hte mẽ akamã te Kris kormã htyk kêt ri hihtÿx kêeta pyrã nẽ mẽ akôt ixpa. Tã kot paj ma akupÿm mẽ awÿr mō hãmri nẽ te Kris ra akupÿm htĩr nẽ hihtÿx o hihtÿxta pyrã nẽ Tirtũm xihtÿx xà ho tanhmã mẽ kot amnhĩ tomnuj xwÿnhjê nhĩpêx to. Hãmri nhũm mẽ amnhĩ tã ixpumu nẽ Tirtũm nhÿ hã ijamaxpêr tÿx ã ixpumunh kurê kumrêx.

⁵ Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kôt ajamaxpêr o ri apa nà? Kot kaj mẽ apê hkwÿ hã koja mẽ akaxwÿnh kãm mẽ akamã hkrĩ rãhã nẽ. Nom koja mẽ akaxwÿnh kãm mẽ akamã hkrĩ hkêt ka mẽ ãm apê hkwÿ hã amnhĩ jarênh kaprÿ. ⁶ No pa na ixte ja hã amnhĩ pumunh mex. Ixpê Jejus kwÿ na pa. Ra ixkamã hkrĩ nẽ ixkôt pa ho pa jakamã ixpê hkwÿ na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwÿ hã amnhĩ jarênh kaprÿ hkêt nẽ.

⁷ Nẽ na pa hte mẽ ato tanhmã Tirtũm wÿr to ho ri ixpa nẽ mẽ ato hwÿr o:

—Pa Tirtũm. Kwa tanhmã Korîit nhō xwÿnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhÿr o mẽ ato kuwÿ. Mẽmo kaxyw na pa hte ã mẽ ato hwÿr anẽ? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhÿr o ri apa hãmri nhũm axtem mēhō mẽ awÿr mōn pōj nẽ tanhmã mẽ amã mẽ ijarênh to nẽ mẽ ijarênh o:

—Kwa Pawre mẽ hkwÿjaja na htem Tirtũm kapêr kwÿm ri Korîit nhō xwÿnhjê jahkre ho pa.

Anhÿr tã pa amnhĩ tã mẽ kuma nẽ ãm mẽ kuma. ⁸ Na pa hte Tirtũm kapêr kutã amnhĩ xunhwÿr kêt nẽ. Na pa hte ãm mẽ ate hkôt amnhĩ nhĩpêx o ri apa hã mẽ amã karō kamã ixihtÿx rãhã ho ri mẽ akôt ixpa. ⁹ Jakamã kot kaj mẽ hkôt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarênh o pa htãã. ã mẽ ate amnhĩ nhĩpêx anhÿr o apa kaxyw na pa hte mẽ ato Tirtũm wÿr o ri ixpa nẽ kãm:

—Pa Tirtũm. Kwa tanhmã Korîit nhō xwÿnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kôt pix mã mãn amnhĩ nhĩpêx rãhã nẽ. Anẽ.

¹⁰ Tã pa kormã mẽ awÿr inhmôr xwÿr ri ã amnhĩ kukamã kaga nhĩpêx nẽ mēnh anẽ. Mẽ ate kamã harênh nẽ mar nẽ tokyx akupÿm tãm amnhĩ nhĩpêx kaxyw. Kot pa mẽ awÿr mō nẽ Pahihti nhÿ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhÿr prãm kêt. ãm ÿ hã kapêr o mẽ ajahkre mex nhũm mẽ ate inhmar nẽ hkôt amnhĩ nhĩpêx rãhã ho apaja na inhmã hprãm.

¹¹ E Kris kôt ixkwÿjaja. ãm ja pix. Kwa kêr ka mẽ ixkapêr mar tÿx nẽ hkôt amnhĩ nhĩpêx mex nẽ. Nẽ Tirtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpên kôt ajamakêtkati nẽ akĩnh nẽ axãmnhĩx ri apa. Kot kaj mẽ ã amnhĩ nhĩpêx anhÿr o apa nhũm Tirtũm mẽ akôt pa ho pa. Kãm mẽ pajapê htÿx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwÿnh.

12-14 Nē ota jar Kris kôt mē pahkwỳjaja pa mē ixpimràatā mē awỳr ixpēr mē. Mē ixpiitā mē inhmā mē akīnh tỳx jakamā na pa mē awỳr ixpēr mē.

Nē kê Pahihti Jejus Kris mēmoj to mē akutā nojarêt rāhā ho pa. Nhũm Tirtũm arĩ kām mē ajapê rāhā ho pa. Nhũm Karõ tanhmā mē akrā hto ka mē axpẽn to mex pix kukamā mǎn ajamaxpēr o apa.

Tā e ixkwỳjaja. Ām ja pix. Ixpê Pawre na pa mē awỳr kagàja nhĩpêx nē ã mēnh anē.

Karatas Pawre kot Karatas kamã Jejus kôt hkwyjê hwÿr kagã nê mênh

Pawre na pre kagãja nhîpêx nê pika pê Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtüm kapêr kwÿm ri mē ahkre ho pa nê mē kãm:

—Kot kaj mē amnhî kaxyw Jejus Kris kôt ajamaxpêr hãmri nê mãânên mē ixpê Ijaew nhîgêt kot amnhî nhîpêx kôt amnhî nhîpêx. Kê Tirtüm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kôt pajamaxpêr nê hkôt amnhî xunhwÿr pix ã mē pahpumunh kôt na hte Tirtüm mē pahto hkra. Tã nhüm prem ã mē kãm ho hêx anhÿr o pa nhüm Pawre tee ri ã mē kapêr anhÿrja ã mē harênh ma nhüm ja kêp omnuj nê. Jakamã nhüm Karatas nhõ xwÿnhjê mã kagãja nhîpêx nê mē hwÿr kumê. Nê kamã hprî hã Tirtüm kot mē ho hkra kaxyw tanhmã amnhî nhîpêx to hã mē kãm harê nê hã kagã. Nê mē kãm:

1-2 Pa Karatas nhõ xwÿnhjaja? Xà mē amex? Ixpê Pawre na pa mē awÿr ixpêr mē nê mēmoj tã mē amã karõ.

Mêpahpãm Tirtüm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhüm Tirtüm akupÿm ho htîr. Hãmri nhüm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtüm mē Jejus Kris na pre wa ixãm. Jakamã na pa ã mē awÿr kagã nhîpêx nê mênh anê. Mē apê Tirtüm krajê hwÿr.

Nê ota jar krî ja kamã ixpyrà nê Kris kôt mē pahkwÿjaja mē awÿr hpêr mē.

³ E kê Mêpahpãm Tirtüm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axãmnhîx ri apa.

⁴ Nà na pre Krisja amnhî grõnh kôt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtüm kãm hprãm xà

hkôt. Tã mēmo kaxyw na pre ã mē panê amnhî nhîpêx anê? Nà pika ja kamã mē kot amnhî nhîpêxja omnuj tÿx jakamã nhüm amnhî grõnh kôt te mē kot amnhî tomnuj pê mē papytâr pyrãk o mē panhîpêx nê ã mē panê htyk anê. ⁵ Jakamã kwa kêr pu mē Tirtüm mã mex o mex ã mãn harênh o ri papa. Nà kot puj mē ã amnhî nhîpêx anhÿr rãhã ho ri papa.

Mê ujarênh pixi ãm hãmri hã harênh

Rõmãn 16.17; Sikün Korît 11.3-4; Epes 4.14; Korosê 2.8; Sikün Pêtre 2.1-3

⁶ Kwa ixkrãmnhwÿjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijamaxpêr. Na pre Tirtümja Kris kukwak ri mē ato mex nê. Nê mē ate hkôt amnhî nhîpêx o apa hprãm xàj te kot amnhî wÿr mē awÿr pyrãk o mē anhîpêx ka mē hkôt amnhî xunhwÿ. Tã xep tanhmã mē ajamaxpêr to nê ra hkaga kaxyw. Ra axtem mē ujarênh ôja ma nê gryk ã Tirtüm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhÿr mã? ⁷ Jejus jarênh pix na ãm hãmri. Mo mē ujarênh mex ô kot ka kêt mē ama nê hkôt amnhî nhîpêx? Nà amrakati kumrêx. ã mē amã ujarênh anhÿr xwÿnhjaja na htem Kris kapêr o pihkâr rûnh kumrêx o pa nê katãt kôt harênh kêt nê. Ka xep mē ama nê ajamaxpêr kati rûnh nê.

⁸ Na pa pre ma mē awÿr mō nê ãm hãmri mē amã Jejus kot tanhmã mē panê amnhî nhîpêx to hã harê ka prem inhma. Tã koja mēhõ mē awÿr mō nê mē amã nhãm mē ujarênh ô jarê nhüm Tirtüm ja hã omu nê nhÿrmã ma mē kot amnhî xà htÿx kamã hamak tùm xà hwÿr kumê nhüm ma hwÿr mō nê aa kator kêt nê. Mē pahtõ rÿ Tirtüm kapêr o wrÿk xwÿnhjê hõ koja ã amnhî nhîpêx anê nhüm ja hã omu nê ma kuwy pê himõta wÿr amnhî nê kumê. ⁹ E kot paj axte mē amã ja jarê ka mē aprî hã inhma. Koja mēhõ mē awÿr mō nê mē ate hkôt amnhî xunhwÿr xwÿnhhta kwÿm ri tanhmã mē amã ujarênh to. Hã koja Tirtüm omu nê nhÿrmã ma mē kot amnhî xà htÿx kamã hamak tùm xà hwÿr kumê nhüm ma hwÿr mō nê kamã pa ho pa nê aa kator kêt kumrêx.

Tirtüm pix kãm Pawre hkĩnh hprãm ã kot jarẽnh

Juãw 5.44; Atre 26.9-20; Karatas 2.6

¹⁰ Nẽ koja mẽmojaja ixkapër ma nẽ kãm mar prãm kêt o kãm ixkĩnh kêt japër nẽ mãmrĩ kãm ixkĩnh kêt. Tirtüm kãm ixkĩnhja pix na inhmã hprãm. Kop apu mẽ piitã kãm ixkĩnhja mãn inhmã hprãm ronhỹx pa Kris nhỹ hã kapër jarẽnh o ri ixpa hkêt nẽ.

Tirtüm kot Pawre mã Kra Jejus o amnhĩrĩt ã harẽnh

Sikũn Korĩt 1.12; Wam Tesarõn 2.4

¹¹⁻¹² E Jejus kôt ixkrãmnhwýjaja. Nã ixte mẽ ujarẽnh mex jarẽnh o ixpaja na pre jar pika ja kamã mẽhõ amnhĩ krã hkôt inhmã harẽnh rý inhmã ahkre hkêt nẽ. Jejus Kris tãm na pre ixwýr kato nẽ inhmã ho amnhĩrĩt. Jakamã mex o kot pika jakamã mẽ ujarẽnh piitã hakrenh par. ¹³⁻¹⁵ E kot paj ixprĩ hã mẽ amã tanhmã amnhĩ jarẽnh to ka mẽ inhma. Tanhmã Tirtüm kot amnhĩ kaxyw ixãm to hã pa mẽ amã amnhĩ jarẽ. Nã na pre kormã ixkêt ri ixkukamã hamaxpër nẽ amnhĩm ixta nẽ amnhĩ kaxyw ixãm nẽ kot ixto mex ã ixtã amnhĩ jarẽ. Tã pa pre ixkato nẽ gaa nẽ ixaptar nom kormã Jejus Kris kôt amnhĩ xãm kêt nẽ. Na pa pre axtem nẽ inhmã mẽ ixpẽ Ijaew kot amnhĩ nhĩpẽx kôt pix mã amnhĩ nhĩpẽx o ri ixpa hprãm nẽ. Nhũm pre ixpyrà nẽ arĩ mẽ nywjaja haxwýja kãm mẽ hkôt pix mã ri amnhĩ nhĩpẽx o pa hprãm nẽ. No inhmã mẽ hkôt amnhĩ nhĩpẽx mex o mẽ hakrenh par prãm jakamã na pa pre mẽ inhĩgêt kôt amnhĩ nhĩpẽx mex kumrẽx o ri ixpa. Mẽ kapër piitãã hkôt amnhĩ nhĩpẽx mex nẽ. Tã ã amnhĩ nhĩpẽx anhỹr o ixpa kaprý. Na pa pre axtem nẽ mẽ kot Tirtüm Kra Jejus Kris kôt amnhĩ xunhwýr xwýnhjẽ nhĩpẽx kati ho ri mẽ hkôt ixpa nẽ inhmã mẽ himex prãm týx kumrẽx. ã na pa pre amnhĩ nhĩpẽx anhỹr o ri ixpa. Ra mẽ ate ja hã ixpumunh mex.

¹⁶⁻¹⁷ Tã pa pre ma Tamas wýr mõ. Kamã tanhmã Kris kwýjẽ nhĩpẽx to kaxyw ma mẽ hwýr mõ. Hãmri nẽ kormã mẽ hwýr ixãhtẽp o inhmõr mẽ nhũm Tirtüm tanhmã ixto nẽ inhmã Kra Jejus o amnhĩrĩt pa jatã omu. Kẽp Tirtüm Kra hã pa ixprĩ hã omu. Nhũm inhmã kapër nẽ ixte kãm tanhmã amnhĩ

nhĩpẽx to ho ri ixpa kaxyw ixapẽnh ã inhmã karõ nẽ Ijaew kêt xwýnhjẽ hwýr inhmẽ. Ixkwý Ijaew wýr inhmẽnh kêt nẽ. Na pre inhmã:

—E kêt ka ma Ijaew kêt xwýnhjẽ hkôt ri mẽ kãm ixkapër jarẽnh o ri apa.

Anhỹr jakamã pa pre kuma nẽ hkôt amnhĩ xãm kurẽ kumrẽx nẽ ã amnhĩ nhĩpẽx anhỹr o ri ixpa. Jao tanhmã ixte kẽp hkwyjẽ nhĩpẽx tota kaga nẽ ma pyka pẽ Arap wýr mõ. Nom tanhmã amnhĩ tã Jejus kwýjẽ kukjẽr to hkêt nẽ. Nẽ Jerujarẽ hwýr inhmõr nẽ Jejus nhỹ hã mẽ ahkre xwýnh maatiijaja tanhmã amnhĩ tã mẽ kukjẽr to hkêt nẽ. ãm Tirtüm kot inhmã hã karõ xã hkôt ma Arap wýr mõ nẽ kamã kapõt ã ri ixpa. Kamã na pre Tirtümja inhmã Jejus Kris kot tanhmã amnhĩ nhĩpẽx to ho amnhĩrĩt o pa. Hãmri nẽ inhmã kapër pa amnhĩ tã kuma hãmri nẽ ma akupým Tamas wýr mõ.

¹⁸ Tã nhũm ra amgrã axkrunẽpxi nẽ hapẽx pa Tamas rũm ixkato nẽ ma Jerujarẽ hwýr Simãw Pẽtre hwýr mõ. Hãmri nẽ kuri pøj nẽ hkôt ixpikamẽnh ã ixtã semãn axkrut. ¹⁹ Nom mẽ kot Jejus nhỹ hã hkwyjẽ jahkre ho mẽ pa xwýnh maati hkwyjẽ hõ pumunh kêt kumrẽx. ãm Simãw Pẽtre mẽ Pahihti Jejus tõ Xiakreja pix wa omu. ²⁰ ãm hãmri na pa ã amnhĩ jarẽnh anẽ. Tirtüm kot ja hã ixpumunh mex. ²¹ Tã pa pre mẽ kurũm ixkato nẽ hpãnhã ma pika hkwyjẽ hkôt ijapõx o mẽ hkôt ixpa. Ma pika pẽ Sir mẽ Sirisja wa hwýr mõ.

Mẽ kot amnhĩ jaer pẽ Pawre kot amnhĩ nhĩpẽx nyw ã omunh ã mẽ harẽnh

²² Nom Jutej kamã Kris kwýjaja na prem kormã ixpumunh kêt nẽ. ãm Simãw Pẽtre mẽ Xiakre pix na pre wa ixpumu. ²³ Na pre ra mẽ hkwyjaja tanhmã hkwyjẽ kot axpẽn mã ijarẽnh toja ma. Na prem ijarẽnh o:

—Kwa Jejus ã mẽ panhĩpẽx kati htýx o pa xwýnhta na pre tanhmã hamaxpër to nẽ hpãnhã mẽ kãm Jejus kapër jarẽnh o ri mẽ hkôt pa. Mẽ kot amnhĩ kaxyw hkôt hamaxpër kaxyw. Ra kot Jejus nẽ mẽ pahkurẽ htã hpãnhã mẽ kãm kapër jarẽnh o ri mẽ hkôt pa. Anẽ.

²⁴Hāmri nhūm Kris kwỳjaja amnhĩ jaêr pê ijarênh ma nê inhỹ hã hkĩnh nê. Nê ixtã Tĩrtũm mã mex o mex ã harê.

2

Pawre kot Kris kwỳ hkrãhtũmjê mã amnhĩjarênh

Atre 15.1-11

¹⁻²Tã nhūm amgrà pê 14 nê hapêx nhūm Tĩrtũm akupỹm Jerujarê hwỳr inhmẽ pa ma akupỹm mō. Panãpe nê Xitre mẽ pa mẽ mō nê mẽ hwỳr pōj. Hāmri nê Kris kwỳ hkrãhtũmjê hwỳr mra nê mẽ kãm amnhĩ jarê. Mẽ tapxipixjê mã amnhĩ jarê nê ixte Ijaew kêt xwỳnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

—Koonên. Kot pa apu mẽ kãm amnhĩ jarê nhūm mẽ inhma nê ixte Tĩrtũm kapêr kwỳm ri mẽ ahkre ho ixpa hã ixkamnhĩx rỳ hã inhmã akir. Na pa hte Ijaew kêt xwỳnhjê mã Kris jarênh o ixpa no ãm mẽ ixpê Ijaew pyrã nê finat Mojes kapêr kêt mẽ kot amnhĩ my kwỳrýt kà jakàr ã mẽ kãm karō hkêt nê. ãm mẽ kot Kris kêt amnhĩ xunhwỳr pix kaxyw na pa hte mẽ kãm hã karō ho ixpa. Tã kot paj Kris kêt mẽ ixkrãhtũmjê mã ja hã amnhĩ jarê nhūm mẽ inhma nê tanhmã hamaxpêr to nhūm ja mẽ kêp omnuj japêr nhūm mẽ tanhmã amnhĩ to nê ixte Kris kapêr jarênh o ixpaja nê ixkurê. Jakamã nhūm ra ixte mẽ kãm Kris kapêr jarênh o ixpa nhūm mẽ kot inhmar xwỳnhjaja ijarênh ma nê tee amnhĩ kukamã hamaxpêr o ra hkaprĩ nê pa.

Anhỹr o ijamaxpêr. ³Tã na prem ixte amnhĩ jarênhja ma nê ja nê tanhmã inhmã nê hkêt nê. Pa mẽ kãm amnhĩ jarênh pa nhūm mẽ inhma nhūm Ijaew kêt xwỳnhjaja kot amnhĩ jakàr kêtja nhūm mẽ kãm mex nê. Mẽ kêp tanhmã kute hkêt nê. Nhūm Ijaew kêt xwỳnh Xitre ixkôt pa nhūm mẽ kot omunh tã kot mẽ ixpyrà nê amnhĩ my kwỳrýt kà krãhyr ã kãm karō hkêt nê.

⁴Tã nhūm mẽ kêp Jejus kwỳ hã amnhĩ jarênh o hêx xwỳnhjaja mẽ ixtã akuprō. Nom hêx rom mẽ ixte Kris kêt amnhĩ nhĩpêx ã mẽ ixpumunh pix kaxyw. Hāmri nê ixkapêr ma nê Xitre hã inhmã akir nê inhmã:

—Kwa na pre Xitre Jejus kêt pix mã amnhĩ xãm nom finat Mojes kot mẽ pahpê Ijaew kot amnhĩ nhĩpêx ã karō hkôt amnhĩ nhĩpêx kêt nê. Kwa ja mex kêt. Na htem Jejus kêt amnhĩ xunhwỳ nê mãânên finat Mojes kapêr kêt amnhĩ nhĩpêx. Jakamã kwa kãm anê kê amnhĩ my kwỳrýt kà krãhta. Finat Mojes kot mẽ panhĩgêjtjê mã hã karō xà hkôt.

⁵Anhỹr tã pa prem mẽ kuma nê ãm mẽ kuma. Kot pa ri mẽ kãm ja hã karō hkêt nê. ãm Jejus kapêr kêt pix mã kot puj mẽ amnhĩ nhĩpêx o papa nê finat Mojes kapêr mẽ Jejus kapêr o papihkàr kêt nê. Kot puj mẽ anhỹr o Jejus kapêr o ahkà nhūm ja mex kêt nê. Jejus kapêr kãm mo mẽ kot mẽmy kwỳrýt kà jakàr ã mẽ kãm karō? Amrakati. Jakamã na pa pre ãm mẽ pano kupyrr o mẽ pa xwỳnhtajê kapêr ma nê ãm mẽ kuma.

⁶Tã pa pre ra Ijaew kwỳ pê Jejus kêt ixkwỳ hkrãhtũmjê mã amnhĩ jarênh pa. Tanhmã ixte Ijaew kêt xwỳnhjê mã Jejus kapêr jarênh to hã mẽ kãm amnhĩ jarê nhūm mẽ inhma nhūm ja mẽ kãm mex nê. Jakamã Ijaew kêt xwỳnhjaja kot mẽ ixpê Ijaew pyrã nê finat Mojes kapêr kêt amnhĩ nhĩpêxja nhūm mẽ tanhmã mẽ kaxyw inhmã hã karō hto hkêt nê. Tĩrtũm na hte mẽ kêp mẽ hkrãhtũm ã mẽ omunh xà hkôt mẽ hkwỳjê rom tanhmã mẽ ho mex to hkêt nê. Na hte mẽ pahpiitã mẽ panhĩpêx o axpên pyrãk. Jakamã na pa hte ijaxwỳja Jejus kêt mẽ ixkrãhtũmjaja kot amnhĩ to rax o ijakrenh ã tanhmã ijamaxpêr to hkêt nê. ⁷Na pa pre mẽ kãm amnhĩ jarênh pa nhūm mẽ inhma nê axpên mã:

—Nà ãm hāmri na pre Tĩrtũm ahpỹnhã Pawre mẽ Simãw Pêtre wa kãm wa àpênh ã karō nê Ijaewjê hwỳr Simãw Pêtre mẽ nê axtem Ijaew kêt xwỳnhjê hwỳr Pawre mẽ. Wa kot ahpỹnhã mẽ hkôt mẽ kãm Jejus kapêr jarênh o ri pa kaxyw. Nà ãm hāmri na hte wa ã amnhĩ nhĩpêx anhỹr o pa. Nà ja mex. Anê.

⁸Ra Tĩrtũm kot Ijaew wỳr Simãw Pêtre mênh tã hpãnhã Ijaew kêt xwỳnhjê kaxyw pa ixãm. ÿ hã wa ixte mẽ kãm Jejus kapêr jarênh o ri mẽ hkôt wa ixpa kaxyw. ⁹Jakamã nhūm mẽ ixkrãhtũm Xiakre mẽ Simãw Pêtre mẽ Juãwja ixte mẽ kãm amnhĩ

jarēnh ma nē hkīnh nē. Tīrtūm kot ixto mex nē Ijaew kêt xwýnhjê hwýr inhmēnh ā ixte amnhī jarēnhja ma nē hkīnh nē. Hāmri nē Panāpe mē wa inhmā kapēr nē wa inhmā:

—Nā ām hāmri. Kot puj xep mē anē. Ka mē Panāpe wa kot kaj wa ma Ijaew kêt xwýnhjê hkôt mē kām Jejus kapēr jarēnh o ri apa. No mē pajaja kot paj mē axtem mē pahkwý Ijaew kôt harēnh o ri ixpa. Ā kot puj mē ahpýnhā mē hwýr papa anē. ¹⁰ Nom kêt ka wa inhmar kumrēx. Kêt ka wa mē ixpyrà nē Kris kôt mē pahkwýjê pē amrakati xwýnhjê ho mex o ri apa. Měmoj to mē kutā anojarēt rāhā ho ri apa.

Anhýr o wa inhmā kapēr pa wa mē kuma nē mē kām:

—Tôe. Nā kot paj wa anē. Ra ā wa ixte amnhī nhīpêx anhýr kaxyw kēnā. Anē.

Pawre kot Simāw Pêtre mā àkjêr ā harēnh Atre 10; Rōmān 3.21-31, 6.1-14

¹¹⁻¹⁴ Tā nhūm Simāw Pêtreja man mē ixwýr krī pē āxiok wýr mō. Nē jar mē ixkôt ri pa. Ixpyrà nē kēp Ijaew tā Kris kôt Ijaew kêt xwýnhjê hkôt pa nē mē kutā apkur o pa. Ixpyrà nē amnhīx ri mē kutā apkur o ri mē hkôt pa. Ijaew kêt xwýnhjaja kot amnhī my kwrýt kà jakàr kêt jakamā na pa htem mē kutā ixàpkur kêt nē. Tā ra mē ixte Kris kôt amnhī xunhwýr jakamā ja mē ixpê tanhmā kute hkêt. Na pa htem ixàmnhīx mē hkôt ixpa nē mē kutā apku. Ra mē ixte Kris kôt amnhī xunhwýr kēnā kot pa hkêt ri mē hkôt ixpa hkêt. Na pa htem ixàmnhīx mē hkôt tanhmā amnhī nhīpêx to ho ri ixpa.

Tā nhūm Xiakre kot mē ixwýr mē rēnh xwýnhjaja haxwýja mē ixwýr mō. Mē ixpyrà nē mē kēp Ijaew tā mē ixpyrà nē Kris kôt amnhī xunhwý. Jakamā ra mō nē mē ixwýr pōj. Hāmri nhūm Simāw Pêtre mē omu nē mē umaj axte Ijaew kêt xwýnhjê kutā apkur kêt nē. Axtem nē oja py nē o tē nē mē hkàx ā ahte apkur o nhý. Hāmri nhūm ra mē ixri Ijaew kwý pē Kris kôt mē pahkwýjaja ja hā omu nē piitā urāk nē ā amnhī nhīpêx anē nē Simāw Pêtre ri Ijaew kêt xwýnhjê hkàx ā apkur o hkrī. Nhūm ixkôt pa xwýnh Panāpeja haxwýja ja hā mē omu nē mē urāk nē ā amnhī nhīpêx anē nē mē hkàx ā apku. Hāmri pa tee ri ja hā

mē omu nhūm ja inhmā mex kêt nē. Na prem ā amnhī nhīpêx anhýr o Tīrtūm kapēr ā kagà htūm kamā mē ujarēnh mex kwým ri amnhī nhīpêx. Jakamā pa ā mē kot amnhī nhīpêx anhýrja nē Simāw Pêtre mā ixkapēr. Mē piitā mē noo mā xa nē ā kot amnhī nhīpêx anhýrja nē kām ixkapēr nē kām:

—Tk. Kwa nā Simāw Pêtre. Ri ā amnhī nhīpêx anhýr kêt nē. Pahpê Ijaew tā kormā pahkwýjaja hpôx kêt ri ka hte ixpyrà nē axàmnhīx Ijaew kêt xwýnhjê kutā axàpkur o ri apa. Tā amnhī wýr mē pahkwýjê pumu nē axtem nē mē hkàx ā axàpkur o akrī. Kwa nā na ka ā amnhī nhīpêx anē nē ra axtem amnhī nhīpêx. Te ate mē kām akapēr nē mē kām: “Kot kaj mē ixpyrà nē amnhī my kwrýt kà jakà pa rī mē akôt ri ixpa nē mē akutā ixàpkur o ixpa.” Anhýr pyrāk. Kwa ja mex kêt.

¹⁵ —Mē pahpê Ijaew na pu htem mē kēp Ijaew kêt xwýnhjê jarēnh o: “Mē kot mē pahte amnhī nhīpêx kôt amnhī nhīpêx kêt xwýnhjaja.” Anē. ¹⁶ Tā mē pahpê Ijaew tā na hte Tīrtūmja mē pahte mē panhīgêt kot amnhī nhīpêx kôt mē pahte amnhī nhīpêx ā mē pahpumunh kôt mē pahto hkra hkêt nē. Ra mē pahte ja pumunh mex. Ām mē pahte amnhī kaxyw Jejus Kris kôt pajamxpēr ā mē pahpumunh kôt pix mā na hte mē pahto hkra. Kot pu mē amnhī kaxyw hkôt pajamxpēr nhūm ja hā mē pahpumunh kôt pix mā mē pahto hkra.

¹⁷ —Mē pahpê Kris kwý jakamā na hte Tīrtūm amnhīm mē pamex ā mē pajarē nē mē pahte amnhī tomnuj xwýnh kêt ā mē pajarē. Jakamā na pu htem paxàmnhīx ri Ijaew kêt xwýnhjê kot Kris kôt amnhī xunhwýr xwýnhjê hkôt ri papa ho papa. Ra Tīrtūm kot mē pahpyrà nē amnhīm mē mex ā mē harēnh kēnā. Tā koja mēhō kormā ja mar kêt nē tanhmā hā mē pajarēnh to nē mē pajarēnh o: “Tk. Ra mē kot amnhī kaxyw Kris kôt hamaxpēr tā axtem nē Ijaew kêt xwýnhjê hkôt ri pa. Jakamā arī mē kot amnhī tomnuj xwýnh kēnā.” Anhýr o mē pajarēnh japēr. Nom ām mē pahte amnhī tomnuj xwýnh ā mē pajarēnh kaprý. Na pu htem Kris kôt amnhī nhīpêx nē ra tām amnhī nhīpêx mex o papa. ¹⁸ No kot pu mē hkôt ri amnhī nhīpêx o papa

htã tanhmã pajamaxpêr to nê pahte amnhĩ nhĩpêx tũm o awjanã hãmri nê amnhĩ tomnuj tỳx kumrêx.

19 —Tã tanhmã kot puj wem amnhĩ to nê mẽ panhĩgêť kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamaxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tĩrtũm ja hã ixpumu nê amnhĩm inhmex ã ijarê.” Anhỹr o pajamaxpêr. Hãmri nê finat Mojes kot mẽ panhĩgêťjê mã kapêr piitã hkôt ri mnhi nhĩpêx o papa nom tũhã hkwỳm ri tanhmã amnhĩ tomnuj to. Jakamã nhũm Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhỹr. Nom kot puj mẽ amnhĩ kaxyw Kris kôt pajamaxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tĩrtũm kôt amnhĩ nhĩpêx o ri papa nê axte mẽ pahpê Ijaew nhĩgêťjê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrã nê pãnhã Tĩrtũm kapêr kôt pix mã ri amnhĩ nhĩpêx o ri papa.

20 —Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwỳja htyk pyrãk. Jakamã na pu htem amnhĩ tomnuj kaga nê Kris kôt amnhĩ xunhwỳ nhũm Karô mẽ pahkarõm agjê pu mẽ te Jejus Kris kot amnhĩ nhĩpêx pyrãk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xã hkôt pix mã tanhmã ri amnhĩ nhĩpêx to ho papa. Kris kêp Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamaxpêr rãhã ho papa.

21 —Ãm hãmri na pre Tĩrtũm mẽ pahto mex kumrêx nê mẽ pahwỳr Krisja mẽ nhũm mẽ pahwỳr wrỳ nê mẽ panê ty. Tã na pa pre kapêrja ma nê mar tỳx nê hã ri ixpa nê ho ijamakêtkati hkêt nê. Tã kop apu Tĩrtũm kot mẽ pahte mẽ panhĩgêťjê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhỹx pre Krisja ãm mẽ panê htyk kaprỳ. Mo kaxyw nhỹx pre mẽ panê ty? Anê.

Ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

3

Mẽ pahte amnhĩ krã hkôt pahpê Tĩrtũm kra hkêt ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

¹ Kwa Karatas nhõ xwỳnhjaja. Te ri mẽ ajamaxpêr kêt kumrêx pyrãk. Amnepê mã mẽ awỳr inhmõrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tĩrtũm kapêr jarênh o mẽ hêx xwỳnhjaja ixpãnhã mẽ awỳr mra nê tanhmã mẽ amã ujarênh to ka mẽ ama nê mẽ ajamaxpêr o apihkàr rax nê. Jao axte Kris tyk mã ajamaxpêr kêt nê. ² E mẽ inhmã mẽmoj jarê. Mẽmoj tã mẽ apumunh kôt na pre Tĩrtũm mẽ awỳr amnhĩ Karô rê nhũm mẽ awỳr agjê? Xã mẽ anhĩgêť kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nã na pre ja hã mẽ apumunh kôt mẽ awỳr rênh kêt nê. Na ka prem Kris jarênh ma nê amnhĩ kaxyw hkôt ajamaxpêr nhũm ja hã mẽ apumunh kôt mẽ awỳr kurê nhũm mẽ awỳr agjê.

³ Na pu htem amnhĩ krã hkôt tanhmã amnhĩ nhĩpêx to ho pahpê Tĩrtũm kra hkêt nê. Tĩrtũm Karô pix kukwak ri na pu htem pahpê hkra. Tã ka mẽ axtem nê ajamaxpêr o:

—Nã Tĩrtũm ra kot ixto hkra jakamã kot paj arĩ ri mẽ inhĩgêť kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamaxpêr anhỹrja mex kêt. ⁴ Mẽ akwỳ kot Kris ã mẽ atomnuj tã ka mẽ amnhĩ xã htỳx kamã ajamak o ri apa htã Kris kaga hkêt nê. Tã ra axtem nê mẽ kapêr o mẽ hêx xwỳnhjê jamaxpêr kôt ajamaxpêr o te Kris ã amnhĩ xã kamã ajamak kaprỳ pyrãk. Kwa nã mẽ ri mẽ hkôt ajamaxpêr kêt nê. ⁵ Na pre Tĩrtũm mẽ awỳr amnhĩ Karô rê nhũm mẽ awỳr agjê nê mẽ amã aa mẽ ate mẽmoj pumunh kêt kwỳ ho anhỹr o ri mẽ akamã pa ho pa. Xã mẽ anhĩgêť kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nã ja kôt kêt. ãm mẽ ate

Kris kapër mar nê amnhî kaxyw hkôt ajamaxpër ã mē apumunh kôt pix mã na pre ã mē amã amnhî nhîpêx anê.

Tirtûm kot amnhî tâ finat Apraãw pumunh kôt mex ã harênh

Rômãn 4.1-25; Xiakre 2.23

⁶ Nê mē ixpê Ijaew pàr krax finat Apraãw na pre amnhî kaxyw Tirtûm kôt hamaxpër nhûm amnhî tâ omu nê kãm:

Nà ate amnhî kaxyw inhmã ajamaxpër tÿx jakamã na pa amnhîm amex ã ajarê.

Amex kumrêx Apraãw.

⁷ Anhÿr o kãm kapër jakamã mē pahte urak nê amnhî kaxyw hkôt pajamaxpër xwÿnhjaja te mē pahpê Apraãw tàmnhwÿ pyrak. ⁸ Nê mē apê Ijaew kêt xwÿnhjaja.

Na hte Tirtûm mē pahto hpimrãk tâ mē pahte amnhî kaxyw kãm pajamaxpër ã mē pahpumunh kôt amnhîm mē pamex ã mē pajarê nê mē pahto hkra. Amnepêm na pre Apraãw mã kapër nê kãm:

E ate amnhî kaxyw ixkôt ajamaxpër jakamã kot paj akukwak ri pyka piitã hkôt mē piitã mē ho mex nê.

Anhÿr o kãm kapër jao mãânên mē apê Ijaew kêt xwÿnhjê jarê. ⁹ Jakamã mē pahte Apraãw pyrã nê amnhî kaxyw Tirtûm kôt pajamaxpër xwÿnhjaja kot puj mē pahpiitã urak nê pamex kumrêx nê papa ho papa.

Tanhmã Tirtûm kot mē panê pî kahpa hã jêt xwÿnh nhîpêx to hã harênh

Rômãn 4.14, 7.10; Wam Korît 15.56

¹⁰ Nê koja mēhõ hamaxpër o:

—E kot paj finat Mojes kapër kôt ri amnhî nhîpêx o ri ixpa nhûm Tirtûm ja hã ixpumu nê amnhîm inhmex ã ijarê nê ixto hkra. Anê.

No ãm ja kot anhÿr kêt. Tirtûm kapër ã kagã htûm kot ja jarênh kot:

Ixte amnhîm mē mex ã mē harênh kaxyw mē kot Mojes kapër kôt amnhî nhîpêx xwÿnhjaja koja mē ãm mēmoj pixire nê hirôp kuhê. Rÿ mēmoj pixire nê hkôt amnhî nhîpêx kêt pa ja hã mē omu nê hã mē homnuj tÿx kumrêx.

Anhÿr jakamã tanhmã kot pu mē amnhî to nê Mojes kapër piitã hkôt amnhî nhîpêx nê aa ho pixi nê hirôp pakuhe hkêt? Nà kot puj mē ho anhÿr kêt nê. Kot puj mē tee ri pamã

ja ho anhÿr prãm kaprÿ. Jakamã Tirtûm kot amnhîm mē mex ã mē harênh kaxyw mē kot ã amnhî nhîpêx anhÿr mã xwÿnhjaja koja mē mex kêt nê.

¹¹ Na hte Tirtûm mē kot finat Mojes kapër kôt amnhî nhîpêx o mē pa hã mē omunh xã hkôt mē mex ã mē harênh kêt nê. ãm mē kot amnhî kaxyw hkôt hamaxpër xwÿnh pixjaja na hte ã mē harênh anê. Kapër ã kagã htûm kot mē harênh kot:

Mē kot amnhî kaxyw ixkôt hamaxpër xwÿnhjaja na pa hte mē mex ã mē harênh o ixpa. Mē tapxipixjaja koja mē nhÿrmã Ixkra mē wa ixri mex kumrêx nê htÿr tûm nê pa ho pa. Anê.

¹² Nom na htem amnhî kaxyw Tirtûm mã hamaxpër pê finat Mojes kapër kôt amnhî nhîpêx o pa hkêt nê. Mojes kapër ã kagã kot ja jarênh kot:

Mē kot ixkapër piitã hkôt amnhî nhîpêx mex o mē pa xwÿnh pixjaja koja mē htÿr tûm nê pa ho pa. Anê.

¹³ Tã kot pu mē ãm kapër o pixire nê hirôp pakuhe hãmri nê mÿrapê pahÿr tûm nê papa hkêt nê. Nê hpãnhã mē kot amnhî xã htÿx kamã hamak tûm xãta hwÿr ma papa. Ja pymaj na pre Krisja ï ho mē pahwÿr wrÿ nê mē pahte amnhî tomnuj mÿrapê mē panê ty. Tirtûm kot mē pahte amnhî tomnuj mÿrapê tanhmã mē pahto pymaj ã mē panê htyk anê. Jakamã nhûm Tirtûm mē pahte amnhî tomnuj ã mē pahpumunh kôt mē pakuhe hã Kraja homnuj nê. Kapër ã kagã htûm kot ja jarênh kot:

Pî kahpa hã jêt xwÿnhhta na pre Tirtûm homnuj tÿx kumrêx. Anê.

Mē kot amnhî kaxyw Kris kôt mē hamaxpër xwÿnhjê jarênh

¹⁴ Tã ã Jesus Kris kot mē panê amnhî nhîpêx anhÿr kukwak ri na pre Tirtûm kot Apraãw nhîpêx pyrã nê mē ixpê Ijaew pix o mex kêt nê. Mãânên mē apê Ijaew kêt xwÿnhjê ho mex nê. Jakamã koja mēhõ. Ijaew õ rÿ Ijaew kêt xwÿnhjê hõ amnhî kaxyw Kris kôt hamaxpër nhûm Tirtûm hã omu nê ho hkra nê hwÿr Karõ mē nhûm kãm axã.

Tirtüm kot finat Mojes kukamã mẽ pahto mex ã harẽnh

Rõmãn 3.19-20, 5.20-21, 11.32; Eprêw 6.13-18

¹⁵ E ixkràmnhwýjaja. Kot paj ixprĩ hã mẽ amã ja jarẽ ka mẽ inhma. Nà koja mẽhõ wa hamẽxkrut nẽ mẽmoj tã axpẽn ma. Pika hã war axpẽn ma rý mẽmoj tã war axpẽn ma. Hãmri nẽ wa hã axpẽn mar pa nhũm ja ãm hãmri nẽ ãm rãhãã. Koja nhãm mẽhõ tẽ nẽ axtem tanhmã harẽnh to hkêt nẽ. ¹⁶ Ja pyrà nẽ na hte ã Tirtüm mẽmoj tã amnhĩ jarẽnh anẽ. Na hte mẽmoj jarẽ nhũm arĩ rãhãã. Na hte jarãhã mẽmoj jarẽ nhũm jãã nhũm axtem hijuk ri mẽmoj jarẽnh kêt nẽ. Na hte ãm kapër pýnh nẽ. Tã na pre Apraãw mã hkanrẽhã htãmnhwýjê hõ kukwak ri Apraãw o mex ã amnhĩ jarẽ. Tãmnhwý piitã kukwak ri ho mex ã amnhĩ jarẽnh kêt nẽ. ãm kanrẽhã htãmnhwý Krisja pix kukwak ri ã Apraãw o mex ã kãm amnhĩ jarẽnh anẽ.

¹⁷ E kot paj hpãnhã axtem tanhmã mẽ amã harẽnh to. Na hte Tirtüm kot mẽmoj tã amnhĩ jarẽnh xà hkõt tanhmã mẽmoj to ho pa rãhã nẽ. ã na pre finat Apraãw mã kot ho mex ã amnhĩ jarẽnh anẽ. Tã ra hã amgrã pẽ 430 nẽ hapêx nhũm hpãnhã finat Mojes mã kapër. Kot mar nẽ amnhĩ xõ ri Ijaew mã harẽnh o ri mẽ hkõt pa kaxyw. Tã no nhũm ra kot Apraãw mã mẽmoj jarẽnh ta arĩ hã no htýx rãhã nẽ aa ho hamakêtkati hkêt nẽ. Nẽ kot Mojes mã tanhmã kapër toja nẽ Apraãw mã tanhmã kapër toja nhũm hamẽ wa ho hamakêtkati hkêt nẽ. Nhũm wa hamẽ arĩ rãhã ho rãhã. ¹⁸ Tã mẽ ano kupyr o ri mẽ pa xwýnhjaja na htem htýx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapër kõt amnhĩ nhĩpêx o papa hkêt nẽ nhũm Tirtüm tee ri ja hã mẽ pahpumu nẽ mẽ pahto mex kêt nẽ. Anẽ.

Nom ja kot anhýr kêt. Kop apu ã kot anhýr ronhýx Tirtüm ra wam kot tanhmã Apraãw mã kapër tota ra ho hamakêtkati. Nom na hte arĩ kãm hamaxpër rãhã nẽ ho pigrãnh nẽ ho hapêx kêt nẽ. Na pre Apraãw mã kãm:

Kot kaj amnhĩ kaxyw ixkõt ajamaxpër hã kot paj ato mex kumrêx. Anẽ.

Tã kot ho mex ã amnhĩ jarẽnhja arĩ rãhãã. Na hte arĩ mẽ kot amnhĩ kaxyw hkõt

hamaxpër xwýnhjê ho mex nẽ. Nom mẽ kot Mojes kapër kõt amnhĩ nhĩpêx o pa hã mẽ omunh xà hkõt mẽ ho mex kêt nẽ. ãm mẽ kot amnhĩ kaxyw hkõt hamaxpër xwýnhjê pixjaja na hte mẽ ho mex.

Mo kaxyw na Mojes kapër ã kagà?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapër ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhũm Tirtüm kot ã mẽ pahte amnhĩ nhĩpêx anhýrja nẽ mẽ pahkurê kaxyw. Na pre Mojes Tirtüm nhý hã mẽmoj nẽ mẽ pahkurê. Mẽ pahte axpẽn pẽ paxàhkĩnh nẽ mẽ pahkurê. Nẽ mẽ pahte axpẽn mã paxêx o ri papa nẽ mẽ pahkurê. ã mẽmoj nẽ mẽ pahkurê anẽ. Mẽ pahprĩ hã kapër mar nẽ tãm amnhĩ nhĩpêx o papa kaxyw. Ja kaxyw na pre Tirtüm Ijaew kaxyw Mojes mã kapër gõ. Na pre kaxkwa rũm kapër o wrýk xwýnhjaja kumrêx kãm harẽ nhũm kuma nẽ Ijaew mã hã kagà. Jakamã na htem harẽnh o: “Mojes kapër” anhýr o harẽ.

Tã Apraãw kanrẽhã htãmnhwý Krisja kormã kator kêt ri nhũm Ijaew Mojes kapër ma nẽ hkõt ri amnhĩ nhĩpêx o pa. Tã nhũm Krisja kator o Mojes kapër o hapêx. Ra Tirtüm kot Kris kukamã ho mex ã amnhĩ jarẽnh xà hã arĩgrota kator mẽ nhũm Mojes kapër hapêx.

No na pre Tirtüm Ijaew mã ujarẽnh kaxyw tãm mẽ kãm ujarẽnh kêt nẽ. Kapër o wrýk xwýnhjê mã na pre harẽ nhũm mẽ amnhĩ xõ ri Mojes mã mẽ kaxyw kãm awjarẽ. Kot mẽ ô ri mẽ kãm harẽnh kaxyw. No Apraãw mã na pre Tirtüm tãm kapër. Na pre hwýr kapër o wrýk xwýnhjê hõ mẽn kêt nẽ. Tãm kot kãm kapër jakamã kapërja na mex o Ijaew kaxyw Mojes mã kapër jakrenh.

²¹ Nẽ na pre Tirtüm tanhmã mẽ pamã kapër o amnhĩrit to nẽ mẽ pamã:

—E kot paj amnhĩ kaxyw ixkõt mẽ ajamaxpër ã mẽ apumunh kõt pix mã mẽ amex ã mẽ ajarẽ.

Anhýr o mẽ pamã kapër. Tã xà na pre kapërja nhĩjuk ri axte amnhĩ jarẽ nẽ amnhĩ jarẽnh o:

—E kot paj mẽ ate Mojes kapër kôt amnhĩ nhĩpêx mex o apa hã mẽ apumunh kôt mẽ amex ã mẽ ajarê.

Anhÿr o mẽ pamã kapër? Xà na hte mẽmoj jarê nhũm jãã nhũm ra hijuk ri axtem mẽmoj jarê? Nà Tĩrtũm kapër ãm hpÿnh kênã. Kop ãm mẽ pahte Mojes kapër kôt amnhĩ nhĩpêx o papa hã mẽ pahpumunh kôt mẽ pamex ã mẽ pajarênh ronhÿx mẽ pamã:

—Ãm ja pix ã mẽ apumunh kôt kot paj mẽ amex ã mẽ ajarê. Anê.

²² Nom na pre ã kapër anhÿr kêt nê. Kapër ã kagà htũm kot ja jarênh o:

Mẽ apiitã mẽ ate amnhĩ tomnuj o mẽ apa xwÿnh na ka mẽ.

Anhÿr jakamã tanhmã kot puj mẽ amnhĩ to nê Mojes kapër kôt amnhĩ nhĩpêx mex o papa? Mẽ pahpiitã mẽ pahte amnhĩ tomnuj xwÿnh kênã. Mẽ pahte kapër piitã hkôt amnhĩ nhĩpêx kêt jakamã koja Tĩrtũm ja hã mẽ pahpumunh kôt mẽ pamex ã mẽ pajarênh kêt nê. Koja ãm mẽ pamã kapër o:

—Kot kaj mẽ amnhĩ kaxyw Jejus Kris mã ajamaxpêr pa ja hã mẽ apumunh kôt mẽ amex ã mẽ ajarê nê mẽ ato ixkra nê mẽ ato mex o ri ixpa. Anê.

Mojes kapër te kêp Kris xwÿj ri mẽ hamãr xwÿnh pyrãk ã harênh

Rômãn 10.4; Karatas 4.1

²³ Nê kormã Kris kot mẽ pahwÿr wrÿk nê mẽ panê htyk xwÿj ri na pre Ijaew Mojes kapër ma nê hkôt amnhĩ nhĩpêx o ri pa. Nhũm kapêrja te kot amnhĩm mẽ unênh nhũm mẽ kot hkôt pix mã amnhĩ nhĩpêx o ri pa pyrãk. Na prem Tĩrtũm kot mẽ mex ã mẽ harênh prãm xàj ãm pix ma nê hkôt amnhĩ nhĩpêx o pa. Nom kapêr piitã hkôt amnhĩ nhĩpêx mex kêt nê. ²⁴ Te mẽhprĩre nhũm Mojes kapêr te kêp mẽ hamãr xwÿnh pyrãk. Mẽhprĩ jamãr xwÿnhjaja na htem mẽhprĩjê pumu nê tãm mẽ kot amnhĩ nhĩpêx kaxyw tanhmã mẽ ahkre hto ho mẽ hkôt pa. Ja pyrã nê na pre Ijaew tãm amnhĩ nhĩpêx o pa kaxyw Mojes kapêr ma nê hkôt amnhĩ nhĩpêx o ri pa. Jejus Kris kutêp ã amnhĩ nhĩpêx anhÿr o ri pa. Tã nhũm Jejus tãm kaxkwa rũm wrÿ pa mẽ ixkwÿ pixjaja mẽ ixkwÿjê rom amnhĩ kaxyw hkôt ijamaxpêr.

Hãmri nhũm Tĩrtũm ja hã mẽ ixpumunh kôt mẽ inhmex ã mẽ ijarênh kurê kumrêx.

Jejus kukwak ri mẽ pahpê Tĩrtũm kra ã mẽ pajarênh

Juãw 1.12; Rômãn 8.14; Epes 1.5

²⁵⁻²⁶ Tã ra mẽ ixte amnhĩ kaxyw Kris kôt ijamaxpêr jakamã na pre Tĩrtũm mẽ ixto hkra pa mẽ ra te ixpê hkra xàptàr pyrãk o amnhĩ nhĩpêx nê kapêr kôt amnhĩ nhĩpêx mex o ri ixpa. Jao Mojes kapêr kaga. Te mẽhprĩre ra mẽ ahkre kamã mẽ àptàr nê kot mẽ ahkre xwÿnh kaga pyrãk. Hãmri pa mẽ ixpê Tĩrtũm kra xàptàrjaja hãmri axte Mojes kapêr kôt amnhĩ nhĩpêx hkêt nê.

²⁷ Tã mẽ kajaja na ka pre mẽ ixpyrà nê amnhĩ kaxyw Kris kôt ajamaxpêr nhũm mẽ akwÿ kot mẽ apê Jejus kwÿ hã mẽ apumunh kaxyw nhũm mẽ akrã kumrà. Hãmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa. ²⁸ Tã ra mẽ pahpê Jejus Kris kôt amnhĩ xunhwÿr xwÿnh jakamã na hte Tĩrtũm ahpÿnhã ri tanhmã mẽ pakute hkôt mẽ pahpumunh kêt nê. Mẽ pahpê Ijaew rÿ mẽ pahpê Ijaew kêt xwÿnhjaja. Rÿ mẽ pahpê nhãm mẽ kãm paxàpênh xwÿnh rÿ amnhĩ mã mẽ paxàpênh xwÿnh nhũm hte ja hã mẽ pahpumunh kôt tanhmã mẽ pajarênh to hkêt nê. Rÿ mẽ anijê hkôt rÿ mẽ inhmÿjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pahpumunh o pa anê.

²⁹ Nê na pre Tĩrtũm Apraãw mã hkanrêhã htãmnhwÿ Jejus Kris o mex ã amnhĩ jarê. Tã Kris kêp mẽ panhõ Pahihti jakamã pu mẽ Tĩrtũm noo mã urãk nê te mẽ pahpê Apraãw tãmnhwÿ pyrãk. Jakamã koja Apraãw nhĩpêxta pyrã nê mẽ pahto mex rax nê.

4

Mojes kapêr te axte mẽ pahpÿnênh kêt pyrãk ã harênh

Rômãn 7.1, 8.14-17; Karatas 3.23

¹ E kot paj axte mẽ amã tanhmã mẽhprĩjê jarênh to ka mẽ inhma. Koja mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhũm hkraja kormã hprĩre nê hamaxpêr mex kêt jakamã nhũm kormã hprêk jamãr

o pa. Nhũm hkraja arĩ te kãm àpênh o pa xwýnh kot amnhĩ nhĩpêx pyrã nê amnhĩ krã hkôt ri amnhĩ nhĩpêx o pa hkêt nê. Kormã hipêêxã kapêr kôt ri amnhĩ nhĩpêx o pa. Nhũm hipêêxãja kot kãm õ mẽmoj piitã òr kaxyw no ãm kormã hprêk jamã. ² Tã kormã hkraja hprĩre ri nhũm hipêêxã tanhmã amnhĩ to nê ty. Nom nhũm hkraja mýr pê kormã õ mẽmoj o amnhĩptàr kêt nê. Kormã hprĩre jakamã nhũm hipêêxã mýr pê kot kãm hamãr o pa xwýnhja kormã kãm hamãr o pa. Tã nhũm hipêêxã kot kãm amgrã jarênh xwýnhhta kato nhũm tãm mẽmoj piitã ho amnhĩptã. Ra àptàr mex nê hamaxpêr mex nê amnhĩm ho amnhĩptàr pa. ³ Tã Ijaew na prem ã amnhĩ nhĩpêx anê. Amnepêm kormã mẽ kot Mojes kapêr kôt ri amnhĩ nhĩpêx o pata ã na prem te mẽhprĩre hamaxpêr kêêta pyrãk. Te kormã mẽ àptàr kêt pyrã nê jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nê mẽ kãm ê pyrãk o mẽ hipêx nhũm mẽ hkôt pix mã amnhĩ nhĩpêx o ri pa. ⁴ Tã nhũm Tĩrtũm kot Kra hkukamã mẽ pahwýr mẽnh xã hã arĩgrota kato hãmri nhũm mẽ pahwýr kumê nhũm mẽ pahwýr wrý nê mẽ pahpyrã nê mẽhõ nhõhy rũm kato. Nê mẽ pahpyrã nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. ⁵ Jao te kot Mojes kapêr pê mẽ papytãr pyrãk o mẽ panhĩpêx pu mẽ hpãnhã pahpê Tĩrtũm kra kaxyw. ⁶ Tã mẽ ixpê Ijaew kwýjaja nê mẽ apê Ijaew kêt xwýnh kwýjaja ra mẽ pahpê Tĩrtũm kra jakamã na pre mẽ pahwýr Kra Jejus Karõja rê nhũm mẽ pamã agjê. Hãmri nê mẽ pamã kapêr o:

—Ra mẽ apê Tĩrtũm kra jakamã kêr ka mẽ kãm amnhĩ jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

⁷ Jakamã na pu mẽ ra te pahpê mẽ kãm paxàpênh xwýnh pyrãk kêt nê. Ra mẽ pahpê Tĩrtũm kra jakamã na hte mẽ panhĩpêx o te Kra Jejus nhĩpêx pyrã nê mẽ pahto mex nê.

Mojes kapêr kôt mẽ kot amnhĩ nhĩpêx xwýnhjê jarênh

Sikũn Korĩt 11.3-4; Korosê 2.16-19; Eprêw

6.1; Wam Pêtre 1.14

⁸ Nê amnepê mã kormã mẽ ate amnhĩ kaxyw Jejus kôt ajamaxpêr kêt ri na ka prem Tĩrtũm jarênh mar kêt nê. ãm atýx ri sãnti mã mex ã harê nê kãm amnhĩ jagrer o ri apa. Nê amã mẽmoj kĩnh nê amã hprãm xaj tanhmã amnhĩ to hwýr to ho ri apa. Te mẽ kãm mẽ àpênh o mẽ pa xwýnhjaja kot amnhĩ nhĩpêx pyrã nê sãnti mã tanhmã amnhĩ nhĩpêx to ho ri apa. Nom sãntija kêt Tĩrtũm kêt.

⁹ Tã ka prem Tĩrtũm jarênh ma nê hkôt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nê akupým sãnti hkôt amnhĩ nhĩpêx kaxyw? Nã mẽ ajamaxpêrja mex kêt. Sãnti nhĩpêxta tanhmã koja amnhĩ to nê mẽ ato ajuta? ãm mẽ kot ìhkra ho hipêx pix jakamã hihtýxti hã. Amarĩ kuhê xã kamã kuhê ho kuhê xwýnh kênã. Tã te kot akupým amnhĩ kôt mẽ arênh kaxyw pyrãk o mẽ anhĩpêx ka mẽ ra axtem nê akupým hkôt amnhĩ nhĩpêx kaxyw. Kwa nã mẽ ã ri amnhĩ nhĩpêx anhýr kêt nê.

¹⁰ Nê na ka htem amnhĩ kukamã ajamaxpêr o:

—Na pre hte Ijaewjaja Mojes kapêr xã hkôt arĩgro hkwy hã axtem tanhmã amnhĩ nhĩpêx to nê mẽmo mytwrý hã tanhmã amnhĩ nhĩpêx to nê mẽmo amgrã hã tanhmã amnhĩ nhĩpêx to. Tã kot paj mẽ urãk nê ã amnhĩ nhĩpêx anhýr o ixpa. Kê Tĩrtũm ja hã ixpumu nê inhmex ã ijarê. Anê.

Kwa mẽ ã ajamaxpêr anhýr kêt nê. Mon ka htem axtem nê ri ã ajamaxpêr anê? Na hte Tĩrtũm ã mẽ pahte amnhĩ nhĩpêx anhýr ã mẽ pahpumunh kôt mẽ pamex ã mẽ pajarênh kêt nê. ¹¹ Na pa ja hã mẽ ajarênh ma nê tee ri mẽ akukamã ijaxpêr. Te ixte Tĩrtũm kapêr o mẽ ajahkre kaprý ho ri ixpa pyrãk.

Karatas nhõ xwýnhjaja kot Pawre ho mex ã mẽ harênh

Wam Korĩt 9.21-23

¹² Kwa ixkrãmnhwýjaja. Ixpê Ijaew tã te ixpê Ijaew kêt pyrãk o amnhĩ nhĩpêx o ri mẽ apê Ijaew kêt xwýnhjê hkôt ri ixpa. Jao Kris kapêr gryk ã mẽ inhĩgêjtaja kot amnhĩ nhĩpêx kaga nê axte hkôt amnhĩ nhĩpêx kêt

nē. Tā kwa mē ixpyrà nē ã amnhĩ nhĩpêx anē. Wem ma amnhĩ to amõr gri kêt wehe. Wam ixte mē awÿr inhmõrta ã na pa pre mē amã Tirtũm kapêr jarênh o ri mē akõt ixpa ka prem inhma nhũm ja mē amã mex nē ka mē ja hã tanhmã ixto hkêt nē. ¹³ Na pa pre ixàà nē mē awÿr mõ nhũm ixàja ixto htÿx nē pa tokyx ixkator nē ma akupÿm mē arũm inhmõr kêt nē arĩ mē amã Tirtũm kapêr jarênh o ixpa. ¹⁴ Kormã ixà nē tanhmã ixkute htã ka prem ja hã ixpumu nē ixto mex nē ixkamã anhõkre kahak kêt nē. Na ka prem te ixto Jesus Kris nhĩpêx pyrãk o inhĩpêx. Nē te ixto Tirtũm kapêr o wryk xwÿnh nhĩpêx pyrãk o inhĩpêx. ¹⁵ Jaõ mē amã ixkĩnh nē ã inhĩpêx anē nē mē amã ixto mex pix prãm. Nē nhÿri ixpumu nē ixkamã axukapri nē inhmã akapêr o:

—Hêxta waa nē. Anopxàà. Inhmã amnhĩ no kaxàr nē amã õr prãm nom tanhmã kot pa mē amnhĩ to nē hkapa nē amã kugõ? Anē.

Nē mē amã inhmã mēmoj mex pix nhõr prãm. Tã ra tanhmã ajamaxpêr to nē axtem nē te mē amã ixkĩnh kêt pyrãk o inhĩpêx.

Mē no kupyw xwÿnhjaja kot mē hamaxpêr o pihkàr ã mē harênh

¹⁶ Nē na pa pre ãm hãmri mē amã Tirtũm kapêr jarênh o ri mē akõt ixpa. Nom ra mē amã mar prãm kêt jakamã na ka mē axtem nē inhĩpêx o te ixte mē akutã amnhĩ xãm pyrãk. ¹⁷ Mē amã Tirtũm kapêr o mē hêx xwÿnhjaja te mē kãm mē akĩnh pyrãk o mē anhĩpêx no ãm mē kãm akĩnh kêt. Na htem mē amex kaxyw tanhmã mē amã kapêr to hkêt nē. ãm mē ate mē mar nē mē gryk ã ixkaga nē mē hkõt ri amnhĩ nhĩpêx o apa pix prãm xàj na htem mē akõt tanhmã mē amã hêx to ho pa. ¹⁸ Pa mē harênh ma hãmri nē mē kamã inhgryk o ã mē amã mē harênh anhÿr kêt nē. Koja mēhõ mē awÿr mra nē ixwakre kamã rÿ inhnoo mã mē amã mēmoj mex jarê nhũm ja inhmã mex nē. No nhũm mē amã mē hêx xwÿnhjaja axtem nē mē ajamaxpêr o pihkàr pix kaxyw na htem mē awÿr mra nē mē amã ã ujarênh o pa anē.

Pawre kot tee ri mē hkukamã hamaxpêr ã harênh

¹⁹ Te mē apê ixkra pyrãk jakamã na pa hte mē ate amnhĩ nhĩpêx ã mē apumu nē tee ri ijamaxpêr nē ixkapri htÿx nē. Te nhÿhÿnh ixà htÿx nē ixte amnhĩ xà htÿx kamã ijamak o ri ixpaja pyrãk. Rÿ te mē hpijagri ho mē hikwÿ xwÿnh õhy xà htÿxta pyrãk. Mē ate Kris kõt amnhĩ nhĩpêx mex o apa hprãm xàj na pa hte ã amnhĩ nhĩpêx anhÿr o ri ixpa. ²⁰ Hêxta waa nē. Kop apu ra mē awÿr ixpõx nē mē akõt ixpa ronhÿx pa ixkĩnh tÿx kumrêx. Nhÿx pa ra ixpri hã mē amã ixkapêr ka mē inhma. Nē amnhĩ tã inhmã mē akĩnh tÿx ã mē akamã inhgryk kêt ã ixpumunh kurê kumrêx. No kagã pix kãm ixkapêrja ka mē kamã harê nom apri hã inhmar mex kêt nē. Na pa tee ri mē akukamã ijamaxpêr o ixkapri htÿx nē ixpa.

Mojes kapêr kõt mē kot amnhĩ nhĩpêx xwÿnhjê jarênh

Eprêw 12.18-29

²¹ Kwa mē amã arĩ Mojes kapêr kõt amnhĩ nhĩpêx o ri mē apa hprãm xwÿnhjaja. Mãn ka mē kormã apri hã Mojes kapêr piitã mar par kêt jakamã na ka mē amã hkõt amnhĩ nhĩpêx prãm. E pa ixpri hã mē amã tanhmã harênh to ka mē inhma. ²² Nã Tirtũm kapêr ã kagã htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nē kot amnhĩm haprõr nhũm ri kãm àpênh o pa xwÿnh Aga kamã ja. ²³ Kãm àpênh xwÿnh kamã ja na pre mē pahpiitã mē pahpyrà nē amarĩ kato. No hprõ Sara kamã ja. Sara na pre ra hpigêx tÿx nē. Ra hkamrõ hkêt rÿy nē pa htã nhũm Tirtũm kot wa hkra hkukamã wa kãm ujarênh xà hkõt nhũm Apraãwja htũm wa hkrata kato. Tirtũm kot hkukamã wa kãm harênh xà hkõt nhũm kamã hkra nhũm kato.

²⁴⁻²⁵ Tã wa nita ã wa harênh kot anhÿr. Na pre Tirtũm mēmoj jarê. Te ho wa urãk o wa harê no ãm hã kuxi nē ã wa harênh anē. Jakamã ni wa harênhja te kot Tirtũm kapêr pijakruuta pyrãk. Wam ni Agata te kot hixêt prêk pê Sinai nhĩmõk ã Tirtũm kot Mojes mã kapêrta pyrãk. Hixêtja pika pê Arap kamã na pre. Jakamã nhũm Tirtũm Ijaew kaxyw Mojes mã kapêr nhũm kuma nē amnhĩ xõ ri mē kãm hã kagã. Tã na hte arĩ jarãhã mē hkwyjaja hamaxpêr o:

—E kot paj mẽ panhîgêt finat Mojes kapër kôt amnhî nhîpêx o ri ixpa nhũm Tirtũm ja hã ixpumu nẽ amnhĩm inhmex ã ijarẽ nẽ ixto hkra.

Anhÿr o hamaxpër no ãm ã hamaxpër anhÿr kaprÿ. Æ mẽ hamaxpër anhÿr xwÿnhjaja te mẽ kêp Apraãw mã àpênh xwÿnh Aga hkrata pyræk. Nẽ krĩ pẽ Jeru-jarẽ kêp Ijaew nhõ krĩ jakamã haxwÿja te kêp Agata pyræk. Nhũm krĩ nhõ xwÿnhjaja haxwÿja te mẽ kêp Aga hkrata pyræk. Na htem htÿx Tirtũm kot mẽ omunh nẽ mẽ ho hkra hprãm xàj Mojes kapër kôt amnhî nhîpêx o pa hã amnhî jarênh kaprÿ. Jakamã haxwÿja te mẽ kêp mẽ kãm mẽ àpênh o pa xwÿnh pyræk.

Jejus kôt mẽ kot amnhî kaxyw hamaxpër xwÿnhjê jarênh

²⁶ Nẽ hapu hã Tirtũm kapërta. Apraãw prõ kumrêx Saraja te kêp kaxkwa kamã Jerujarẽ õja pyræk. Krĩ ja kamã mẽ pa mã xwÿnhjaja te mẽ kêp mẽ kãm mẽ àpênh xwÿnhjê pyræk kêt. Ra mẽ kot amnhî kaxyw Kris mã hamaxpër nẽ hkôt amnhî xunhwÿr jakamã na htem hamaxpër o:

—Ixte amnhî kaxyw Kris mã ijamaxpër nẽ hkôt amnhî xãm jakamã na Tirtũm ixpumu nẽ amnhĩm inhmex ã ijarẽ nẽ ixto hkra. Anẽ.

Ãm hãmri na mẽ ã wamtajê rom hamaxpër anẽ. Tã ã mẽ hamaxpër anhÿr xwÿnhjaja te mẽ kêp Sara hkra pyræk.

²⁷ Tirtũm kapër ã kagà htũm kot ja jarênh kot:

E kormã akra hkêt nẽ apa htã kêt ka mãmrĩ akĩnh nẽ ri apa.

Nẽ kormã apijagri hkêt tã kêt ka akĩnh tÿx nẽ ri apa.

Kormã amjên kot akamã hkra hkêt nẽ te kot akaga pyræk tã kot kaj akra nẽ akanrêhã atãmnhwÿ sohtõ rax nẽ.

Mẽ ohtõ rax o ra amjên kot nhãm hprõ hõ kamã hkrata jakre. Anẽ.

Æ kapër kot anhÿr o mẽ kot amnhî kaxyw Kris kôt hamaxpër xwÿnhjê hkukamã mẽ ohtõ hã mẽ harẽ.

²⁸ E ixkrãmnhwÿjaja. Te mẽ apê Ijak kanrêhã htãmnhwÿ pyræk. Kojã mẽhõ amnhî kaxyw Kris kôt hamaxpër hãmri nẽ te kêp Apraãw mẽ hprõ Sara wa hkra Ijak

kanrêhã htãmnhwÿ pyræk. Na pre Tirtũm amnepê mã kormã Ijak kator kêt ri ra hkukamã hamaxpër nẽ Apraãw mã harẽ. Nẽ mẽ papajaja nhũm Tirtũm Ijak pyrã nẽ mẽ pakukamã mẽ pamã hamaxpër nẽ amnhĩm mẽ paxunhwÿr ã amnhî jarẽ. Tã ra mẽ ate amnhî kaxyw Kris kôt ajamaxpër jakamã te mẽ apê Ijak kanrêhã htãmnhwÿ pyræk.

²⁹ Nhũm Apraãw kot Aga kamã hkra Ismaewja na pre hprõ kumrêx kamã hkrata pumu nẽ kãm hkĩnh kêt nẽ kamã gryk pix o pa. Nẽ tanhmã hipêx to pẽ ri haprÿ ho ri hkôt pa. Tã mẽ kot amnhî krã hkôt amnhî to Tirtũm kra hprãm xwÿnhjaja na htem ã mẽ pahte Kris kôt amnhî xunhwÿr xwÿnhjê nhîpêx anhÿr o pa. Na htem Tirtũm kot mẽ pahto hkra hã mẽ pahpumu nẽ Ismaew kot Ijak nhîpêx pyrã nẽ mẽ pakamã gryk pix o pa. Nẽ tanhmã mẽ pahptomnuj to pẽ mẽ pahto kapër o ri pa. ³⁰ Tã no ãm kwãr mẽ mãmrĩ ã mẽ panhîpêx anẽ. Kojã mẽ pahpyrà nẽ nhÿrmã Tirtũm nhõ krĩ hwÿr àpir kêt nẽ. Tirtũm kapër ã kagà htũm kot mẽ harênh kot:

Na pre Tirtũm Apraãw mã kapër nẽ kãm: “E kêt ka amnhî nẽ ate haprõr nhũm kot amã àpênh o ri pa xwÿnh mẽ hkrata wa hano. Kojã hkrata amÿr pẽ amnhĩm mẽmoj to àrĩk kêt nẽ.

Ate aprõ kumrêx kamã akrata pix kojã hõja rom amÿr pẽ mẽmoj piitã ho amnhĩptàr pa.” Anẽ.

³¹ Tã te mẽ pahpê àpênh xwÿnh kamã hkrata pyræk kêt. Te mẽ pahpê Apraãw prõ kumrêx kamã hkrata pyræk. Te Tirtũm kot Ijak kukamã hamaxpër pyræk o na pre mẽ pakukamã hamaxpër.

5

¹ Nẽ Kris kot mẽ pahte amnhî nhîpêx tũm pẽ mẽ papytãr jakamã kwa ixkrãmnhwÿjaja. Kêr ka mẽ arĩ ate amnhî nhîpêx tũm kôt amnhî nhîpêx kêt nẽ. Ra Kris kot ja pẽ mẽ papytãr nhũm mẽ paxãmnhĩx ri papa kênã.

Mẽ pahpê Tirtũm kra hprãm xàj tanhmã mẽ pahte amnhî nhîpêx to Juãw 8.32, 8.36; Korosẽ 2.20

² E mẽ inhma. Kot kaj mẽ atõ Tirtũm kot ato hkra hprãm xàj amnhĩ my kwryt kà krãhta hã kot kaj mẽ ãm amarĩ ã amnhĩ nhĩpêx anhỹr kaprỹ. Na hte Tirtũm ja hã mẽ omu mẽ ãm hã mẽ omu. Kot kaj ã amnhĩ nhĩpêx anẽ nhũm Krisja ãm ate amnhĩ tomnuj mýrapê anẽ htyk kaprỹ pyræk o amnhĩ nhĩpêx. ³ Hãmri nhũm Tirtũm tee ri ja hã mẽ apumu mẽ te kot ã mẽ amã kapêr anhỹr pyrã mẽ mẽ amã kapêr o:

—E ra amã apê Kris kwý hprãm xàj amnhĩ my kwryt kà krãhyr jakamã kot kaj mãânẽn Mojes kapêr piitã hkõt amnhĩ nhĩpêx o ri apa.

Anhỹr o mẽ amã kapêr pyræk.

⁴ Nom kot kaj mẽ atõ amnhĩ kukamã ajamaxpêr o:

—Nã kot paj Mojes kapêr piitã hkõt amnhĩ nhĩpêx o ri ixpa nhũm Tirtũm ja hã ixpumu mẽ inhmex ã ijarẽ mẽ ixto hkra kãm ga. Anẽ.

No ãm ja kot anhỹr kêt. Na hte Tirtũm ã mẽ pahte amnhĩ nhĩpêx anhỹr ã mẽ pahpumunh kõt mẽ pahto hkra hkêt nẽ. Jakamã kot kaj mẽ ã amnhĩ nhĩpêx anẽ mẽ te ate Kris kutã amnhĩ xãm pyræk nhũm Tirtũm ato mex kêt nẽ. ⁵ Nom kot ka mẽ axtem ajamaxpêr o:

—Ra ixte amnhĩ kaxyw Kris kõt ijamaxpêr mẽ hkõt amnhĩ xãm jakamã koja Tirtũm hã ixpumu mẽ inhmex ã ijarẽ. Karõ ra kot ã inhmã ja ho amnhĩrĩt anhỹr kênã.

Anhỹr o ajamaxpêr. ãm hãmri ã mẽ ajamaxpêr anhỹrja. ⁶ Jakamã mẽ pahpê Kris kõt amnhĩ xunhwýr xwýnhjê kamã ra mẽ kot amnhĩ my kwryt kà jakàr xwýnhjaja nhũm mẽ pahkwýjaja ã amnhĩ nhĩpêx anhỹr kêt nẽ. Tã nhũm Tirtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kà jakàr ã mẽ pahpumu mẽ ãm hã mẽ pahpumu. No kot pu mẽ Jesus Kris kõt amnhĩ nhĩpêx mex o ri papa. Nẽ amnhĩ kaxyw hkõt pajamaxpêr tỳx o ri papa. Nẽ mẽ pamã axpên kĩnh pê tãm ri axpên nhĩpêx o ri papa. Ja na kêt Tirtũm kãm hprãm.

⁷ Ra mẽ ate Kris kõt amnhĩ nhĩpêx mex o ri apa htã nhũm mẽ hêx xwýnhjaja mẽ awýr mra mẽ tee ri ã mẽ ate amnhĩ nhĩpêx anhỹr ã mẽ apumu mẽ tanhmã mẽ amã

Tirtũm kapêr o hêx to. Ka mẽ ama mẽ axte Tirtũm kõt amnhĩ nhĩpêx mex hkêt nẽ. ⁸ No ãm ã mẽ kot mẽ amã mẽ ujarênh anhỹr xwýnhjaja na pre Tirtũm mẽ awýr mẽ rênh kêt nẽ. Tirtũm kot amnhĩ wýr mẽ awýr xwýnh kênã kot kêt axtem mẽ mẽ awýr kapêr o mẽ amã hêx o mẽ pa xwýnhjê rẽ.

⁹ Nẽ koja mẽhõ pixi mẽ tanhmã amnhĩ tomnuj to nhũm mẽ piitã ja hã omu mẽ uræk mẽ kãm tanhmã amnhĩ tomnuj to hprãm. ¹⁰ No kêt mẽ apê Kris kwý na ka mẽ. Ixte ja hã mẽ apumunh mex. Kot kaj mẽ axte ixkapêr ma mẽ akupým Kris kõt amnhĩ nhĩpêx mex o ri apa. Nã kot kaj mẽ ã amnhĩ nhĩpêx anẽ mẽ axte mẽ kot mẽ apê àmnàr xwýnhjê kapêr mar mẽ mẽ hkõt amnhĩ nhĩpêx kêt nẽ. Kõja Kris mẽ atã mẽ homnuj tỳx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karõ hkêt ã harênh

¹¹ Nẽ na hte Tirtũm kapêr o mẽ hêx xwýnhjaja tanhmã mẽ amã ixto hêx to ho pa. Ixte mẽ kãm Tirtũm kot mẽ ho hkra kaxyw mẽ kot amnhĩ my kwryt kà jakàr ã mẽ kãm karõ hã ixto ri hêx o pa. Nom ixte anhỹr kêt ixkràmnhwýjaja. Kop apu ixte mẽ kãm ja hã karõ ho ixpa ronhỹx Ijaew krãhtũmjaja ja hã ijarênh ma nhũm ja mẽ kãm mex mẽ nhũm mẽ axte Kris ã tanhmã inhĩpêx to hkêt nẽ. Nom ixte ja hã mẽ kãm karõ hkêt. ãm ixte mẽ kãm Kris kot mẽ panê pĩkahpa hã htykjarênh pix mýrapê na htem ixkamã gryk mẽ.

¹² Hêxta waa mẽ. Mẽ kot mẽ amã hêx o pa pê mẽ ajamaxpêr o pihkàr xwýnhjaja kop mẽ ãm mẽ anhõ krĩ rũm hapôx mẽ ma nhỹhým hapêx ronhỹx pa ixkĩnh tỳx kumrêx.

Mẽ pahte axpên to mex o papa hã mẽ pamã karõ

Wam Korõt 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkràmnhwýjaja. Nã na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kõt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pê mẽ papytãr jakamã kêr ka mẽ amnhĩ tã ja ma mẽ axte atỳx ri amã hprãm xà hkõt tanhmã amnhĩ nhĩpêx to ho ri apa

hkêt nê. Mě ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tã ma pyrãk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyrãk. ¹⁵ No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amõr pyrãk o amnhĩ nhĩpêx. Te mry xoprê kot axpên par o pata pyrãk. Kwa mẽ ã amnhĩ nhĩpêx anhÿr hkêt nê. Mě ãm axpên to mex pix nê mẽ axpên kãm axukapĩ ho ri axpên kôt apa.

*Mě pahte amnhĩ nhĩpêx nyw jarênh
Matêwre 26.41; Rõmãn 8.1-11*

¹⁶ Nê kwa kêr ka mẽ amnhĩ to Tĩrtũm Karõ wÿ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa. ¹⁷ Tĩrtũm Karõ kot amnhĩ nhĩpêxja nê mẽ pahte amnhĩ nhĩpêx tũmja wa kot axpên pyrãk kêt. Te wa kot axpên kutã amnhĩ xãm nê wa pijapu pyrãk. Jakamã kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprãm xà hkôt amnhĩ nhĩpêx hkêt nê. ¹⁸ No kot puj mẽ Tĩrtũm Karõ hkôt amnhĩ nhĩpêx nê ra jar pika ja kamã mẽ kot amnhĩ nhĩpêx kôt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx. ¹⁹ Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htÿx ri hkwÿjê kamã hpijaàm kêt o pa.

Jao mẽmyjaja hprõ kuhpa hã nhãm mênijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nê mẽmy hkwÿjaja axtem nê mẽmyjê hkwÿ ho amnhĩkati.

Nê mẽni hkwÿ haxwÿja axtem nê mênijê hkwÿ ho amnhĩkati.

²⁰ Nê mẽ kãm mẽmoj mẽ hikukrêx japê htÿx o kãm Tĩrtũm kĩnh jakre.

Nê mẽmoj kaxyw ma wajaga hwÿr amnhĩ to pa.

Nê hkwÿjê kamã oprê ho ri pa.

Nê mẽmoj tã axpên kãm gryk pix nê.

Nê mẽmoj to axpên pê õxÿ nê.

Nê mẽmo mÿrapê axpên pê anhrã nê amÿm ahpÿnhã ri pa.

²¹ Nê mẽmoj tã axpên kamnhĩx rãhã ho ri pa.

Nê axpã nê mẽ grer kãm ri axpên kãm hpijaàm kêt o ri pa.

ã na htem mẽ kot amnhĩ nhĩpêx tũm kôt amnhĩ nhĩpêx o ri mẽ pa xwÿnhjaja amnhĩ nhĩpêx anê. ã mẽ kot amnhĩ nhĩpêx anhÿr xwÿnhjaja koja mẽ Tĩrtũm nhõ krĩ hwÿr gjêx kêt nê. Ra ixte mẽ amã ja jarênh tã pa axte mẽ amã harê. Mě ate hã ano htÿx rãhã ho ri apa kaxyw. ²² No mẽ kot amnhĩ nhĩpêx nywja axtem na.

Tĩrtũm Karõ hkôt mẽ kot amnhĩ nhĩpêx nyw o amnhĩ nhĩpêx xwÿnhjaja na htem axtem kãm axpên kĩnh nê.

Nê hkĩnh nê ri hamakêtkati nê àmnhĩx ri axpên kôt pa.

Nê gryk tokyx anhÿr hkêt nê. ãm axpên to mex pix o ri axpên kôt pa.

Nê tãm axpên nhĩpêx.

Nê kot mẽmoj tã amnhĩ jarênh xà hkôt tanhmã mẽmoj to.

²³ Nê axpên mã kapêr mã hprĩ ho ri axpên mã kapêr.

Nê mẽmoj punuj piitã nê amnhĩ to htÿx o ri pa.

ã na hte mẽ kot Tĩrtũm Karõ hkôt amnhĩ nhĩpêx o mẽ pa xwÿnhjaja Karõ nhÿ hã amnhĩ nhĩpêx nyw o amnhĩ nhĩpêx anhÿr o pa. Jao mããnên Mojes kapêr kwÿm ri amnhĩ nhĩpêx hkêt nê. Jakamã koja mẽhõ mẽ pahte amnhĩ nhĩpêx nyw nê tanhmã mẽ pahkurê hto hkêt nê. ²⁴ Tã mẽ pahpê Jejus Kris kwÿ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrã nê axte hkôt amnhĩ nhĩpêx kêt nê.

*Tĩrtũm Karõ hkôt mẽ pahte amnhĩ nhĩpêx
ã mẽ pamã karõ*

Epes 4.23-24; Korosê 3.10

²⁵ Tã ra Tĩrtũm Karõ kot mẽ pahto hkra jakamã kwa kêr pu mẽ ãm kôt pix mã amnhĩ nhĩpêx nyw o amnhĩ nhĩpêx o ri papa. ²⁶ Kot puj mẽ ã amnhĩ nhĩpêx anê hãmri nê mẽmoj tã mẽ pahkwÿjê mã amnhĩ to jarkrar o ri papa hkêt nê. Kot puj mẽ ã amnhĩ nhĩpêx anê nhũm mẽ pakamã gryk

ně. Jakamã kêr pu mẽ ã amnhĩ nhĩpêx anhỹr o ri papa hkêt nẽ.

6

Mẽ pahte tanhmã axpên to ajuta hto hã mẽ pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

¹⁻³ Kwa ixkrãmnhwýjaja. Mẽ apê Tĩrtũm Karõ hkôt amnhĩ nhĩpêx o ri mẽ apa xwýnhjaja. Kojã Kris kôt akwýjê hõ tanhmã amnhĩ tomnuj to ka mẽ ja hã omu nẽ ã amnhĩ nhĩpêx anhỹrja nê kãm akapêr. Nom kêr ka mẽ kamã agryk kamã kãm tanhmã nẽ hkêt nẽ. ãm kãm akapêr mã aprĩ ho kãm akapêr nẽ akupým tãm ãm. Nom kwa kêr ka mẽ amnhĩ pumunh mex nẽ uràk nẽ ã amnhĩ tomnuj anhỹr kêt nẽ.

Kot ka mẽ atõ ã kot amnhĩ nhĩpêx anhỹr ã omu nẽ ãm omu nẽ nê tanhmã kãm akapêr to hkêt nẽ. Nẽ ajamaxpêr o:

—Tk. Kwãr mãmrĩ ã amnhĩ nhĩpêx anẽ. Pa ja nê tanhmã kãm ixkapêr to hkêt nẽ. Kurom ixte amnhĩ nhĩpêx mex o ri ixpa kênã.

Anhỹr o ajamaxpêr japêr. Kwa mẽ ã ajamaxpêr anhỹr kêt nẽ. Kot kaj mẽ ã ajamaxpêr anẽ nẽ nê kãm akapêr kêt nẽ hãmri nẽ te ate amnhĩ to mex ã amnhĩ jarênh kaprý pyrãk.

Nẽ kêr ka mẽ axpên to ajuta mex o ri axpên kôt apa. Jao Kris kôt amnhĩ nhĩpêx mex nẽ.

⁴⁻⁵ Nẽ na htem piitã amnhĩm àpênh pix tânopxar o pa. Jakamã kêr ka mẽ amnhĩ tânopxar pê tãm amnhĩ nhĩpêx rãhã ho ri apa. Hãmri nẽ ja hã amnhĩ pumu nẽ akĩnh nẽ. Nom kwa kêr ka mẽ ate amnhĩ nhĩpêx mex o akwýjê jakrenh ã mẽ kãm amnhĩ to jarkrar o ri apa hkêt nẽ.

⁶ Nẽ kêr ka mẽ kot Tĩrtũm kapêr o mẽ ajahkre xwýnhjê ho mex nẽ mẽ kãm mẽmoj nhõr o ri apa.

⁷ Kojã Tĩrtũm nhỹrmã mẽ pahtĩr ri mẽ pahte amnhĩ nhĩpêx ã mẽ pahpumunh kôt tanhmã mẽ pajarênh to. Hãmri pu mẽ tee ri amnhĩ kukamã pajamaxpêr nom amnhĩ nê tanhmã kãm paxêx to hkêt nẽ. Kojã mẽhõ kãm amnhĩ to hêx nẽ te tãm kot amnhĩ mã hêx pyrãk nom kot puj mẽ Tĩrtũm mã amnhĩ nê tanhmã paxêx to hkêt

nẽ. ⁸ Jakamã kot kaj mẽ amnhĩ krã hkôt tanhmã ri amnhĩ nhĩpêx to rãhã ho apa hãmri nẽ nhỹrmã ty nẽ Tĩrtũm pê awry rax ã ri apa. Nom kot kaj mẽ Tĩrtũm Karõ mã hprãm xà hkôt pix mã amnhĩ nhĩpêx nẽ nhỹrmã ty nhũm Tĩrtũm akupým ato atĩr ka kuri amex nẽ ajamakêtkati atĩr tũm nẽ ri apa ho apa.

Mẽ pahte axpên to mex rãhã hã mẽ pamã karõ

Atre 20.35; Wam Korĩt 15.58; Xitre 3.14; Eprêw 13.3, 13.16; Xiakre 1.27

⁹ Jakamã kwa kêr ka mẽ arĩ tãm ri amnhĩ nhĩpêx nẽ tãm axpên nhĩpêx o ri axpên kôt apa nẽ jam anhũrer kêt nẽ. Mẽ ã amnhĩ nhĩpêx o ri apa anhỹr rãhã ty nhũm Tĩrtũm nhỹrmã ja hã mẽ ato mex rax nẽ. ¹⁰ Tã kêr pu mẽ arĩ Kris kôt pahtõjê ho mex rãhã ho ri papa. Nom mẽ tapxipixjê ho mex kêt nẽ. Pu mẽ mẽ piitã mẽ ho mex o axpên pyrãk.

¹¹ E ixte mẽ amã kagã nhĩpêx nẽ mẽnh nhũm mẽ ate ja hã ixpumunh kaxyw kot paj pam kagã jatur xà hã inhĩhkra ho inhĩxi nhĩpêx ka mẽ ixte inhĩxi hã kagã rũnhtita pumu.

Jejus kot mẽ panê htyk ã Pawre kãm harênh prãm ã harênh

Wam Korĩt 1.22-24, 2.1-2

¹² Nẽ mẽ amã Tĩrtũm kapêr o mẽ hêx xwýnhjaja na htem hamaxpêr o:

—Nã kot paj Karatas nhõ xwýnhjê mã Kris pĩ kahpa hã htyk ã harênh o ri ixpa hkêt nẽ. Kot pa anẽ nhũm mẽ ixpê Ijaew kwýjaja ja hã inhma nẽ hã tanhmã inhĩpêx to. Ja pymaj kot paj mẽ kãm tanhmã harênh to hkêt nẽ. Kot paj ãm mẽ kot amnhĩ my kwryt kã jakàr pix ã mẽ kãm karõ kê mẽ ixkapêr xà hkôt ã amnhĩ nhĩpêx anẽ. Pa hã mẽ omu nẽ ma ixkwýjê mã mẽ hã amnhĩ to jarkrar o ri ixpa. Anẽ.

¹³ Te mẽ kot finat Mojes kapêr kôt ri amnhĩ nhĩpêx pyrãk tã no na htem ã amnhĩ nhĩpêx anhỹr kêt nẽ. Ra mẽ kot amnhĩ jakàr tã no ãm Mojes kapêr piitã hkôt amnhĩ nhĩpêx hkêt nẽ. ãm hkwy hkôt pix mã amnhĩ nhĩpêx o pa. Nom kot kaj mẽ ama nẽ mẽ uràk nẽ amnhĩ jakà nhũm mẽ ja hã mẽ apumu nẽ hkĩnh nẽ. Nẽ ma ri mẽ hkwyjê mã mẽ atã amnhĩ to jarkrar o ri pa nẽ mẽ kãm:

—E Karatas nhõ xwýnhjaja na pa prem mẽ kot amnhĩ my kwryt kà jakàr ã mẽ kãm karõ nhũm mẽ inhma nẽ mẽ pahpyrà nẽ ã amnhĩ nhĩpêx anẽ. Anẽ.

¹⁴ No pa na pa hte ã mẽ kãm mẽmoj tã karõ anhỹr o ri ixpa hkêt nẽ. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nẽ htykja pix na pa hte mẽ kãm harẽ. Ra kot inhnẽ htyk jakamã te pa ixte kuri ijêt nẽ ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nẽ hapêx pyræk pa axte hkõt amnhĩ nhĩpêx kêt pyræk.

¹⁵ No mẽ kot amnhĩ my kwryt kà jakàr xwýnhjaja nẽ mẽ kot amnhĩ jakàr kêt xwýnhjaja na hte Tĩrtũm ja hã mẽ omu nẽ ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm. ¹⁶ Kot kaj mẽ ã amnhĩ nhĩpêx anhỹr o ri apa nẽ apê Tĩrtũm kra mex nhũm mẽ ato mex rax nẽ. Nẽ mẽmoj to mẽ akutã nojarêt rãhã nẽ. Ka mẽ axãmnhĩx ajamakêtkati nẽ ri apa ho apa.

¹⁷ Nẽ na prem Kris ã ixtak rax nẽ nhũm ixkatut ã ixtak xà arĩ rãhã nẽ pa hte hã ixpa. Ixte Jejus Kris mã tanhmã amnhĩ nhĩpêx to xwýnh ã ixto amnhĩrĩt xà na. Jakamã kê mẽhõ axte Jejus kot mẽ awýr inhmẽnh ã tee ri ixpumu nẽ tanhmã hã ixkukjêr to hkêt nẽ.

¹⁸ E ixkrãmnhwýjaja. Kê Pahihti Jejus Kris mẽmoj to mẽ akutã nojarêt nẽ mẽ ato mex rãhã ho pa. Nà koja mẽ ato anẽ.

ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awýr mẽnh anẽ.

Epes

Pawre kot Epes kãm Jejus kôt hkwỳjê hwỳr kagà nê mênh

Pawre na pre kagàja nhípêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kãm Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mē. Nhũm pre ra Pawre ma mē hwỳr mō nê mē kãm Tĩrtũm kapêr jarênh o ri mē hkôt pa nhũm mē hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mē hkôt pa. Hãmri nhũm mē hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mē kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhípêx nê mē hwỳr kurê. Jakamã na pre Epes kamã hkwỳjê hwỳr kagàja nhípêx nê mē hwỳr kumê.

Nê kagàja kamã hprĩ hã mē kot Jejus kôt amnhĩ xunhwỳr xwỳnhjê kot tanhmã amnhĩ nhípêx to ho pa hã mē kãm karõ. Ra mē kot hkôt amnhĩ xunhwỳr jakamã te mē htipxi nê ri mē pa xwỳnh kot amnhĩ nhípêx pyrãk o amnhĩ nhípêx o pa hã mē kãm hã karõ. Nê jar pika hkôt te mē kêp Kris nhĩ pyrã nê pa hã mē harê. ã na pre Pawre mē kãm mēmoj jarê nê hã kagà anê nê mē kãm:

¹ Pa Epes kãm Kris kôt ixkwỳjaja. Xà mē amex na ka mē apa? E ot pa mē awỳr kagà nhípêx nê kumê. Ixpê Pawre na pa hipêx nê mē awỳr kumê. Ixpê Jejus Kris nhỹ hã mē ahkre ho mē ixpa xwỳnh na pa. Tĩrtũm kãm hprãm xà hkôt. Tã pa ã mē awỳr kagà nhípêx nê mē awỳr mênh anê. Mē apê Tĩrtũm krajê hwỳr. Na ka xep htem Jejus Kris kôt amnhĩ nhípêx mex o ri apa. ãm hãmri na ka htem ã amnhĩ nhípêx anê.

² E kê Mēpahpãm Tĩrtũm mē Pahihti Jejus Kris wa mē ato mex nê mēmoj to mē akutã nojarêr rãhã ho pa. Ka mē wa ý hã axãmnhĩx ajamakêtkati nê akĩnh pê tanhmã amnhĩ nhípêx to ho ri apa.

Tĩrtũm kot mē pakukamã amnhĩm mē parênh ã harênh

Rõmãn 8.28-30; Wam Korĩt 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhípêxà Tĩrtũmja mē pahto mex rãhã ho pa. Mē pahpê Kra Kris kwỳ hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhĩx pajamakêtkati mē pamex nê ri papa jakamã kwa kêr pu mē amnhĩm ãm mex o mex ã harênh rãhã nê.

⁴⁻⁵ Amnepê mã kormã mēmoj kêt ri na pre Tĩrtũm mē pakukamã amnhĩm mē parê. Kris kukwak ri amnhĩm mē parê. Tã mēmo kaxyw na pre ã mē pakukamã mē parênh anê? ãm mē pahte kapêr kôt pix mã amnhĩ nhípêx o ri papa kaxyw. Jao tãm kot amnhĩ nhípêx pyrã nê noo mã tãm amnhĩ nhípêx o ri papa. Kãm mē pajapê jakamã na pre mē pakukamã tanhmã hamaxpêr to nê hamaxpêr o:

—Nà Ixkra Jejus Kris koja nhỹrmã ma mē hwỳr wrỳ nê mē nê ty. Tã mē kot mē nê htyk ã harênh mar nê amnhĩ kaxyw hkôt hamaxpêr xwỳnhjaja kot paj mē ho ixkra. Nà kot paj ã mē hipêx anê. Anê.

⁶ No mē papajaja tanhmã mē pahte amnhĩ nhípêx mex to hã mē pahpumunh kôt na pre ã mē pahto hkra hã mē pajarênh anhỹr kêt nê. ãm Kra Kris pix kukwak ri na pre ã mē pajarênh anê. Kãm Kra japê jakamã na hte mēmoj to mē pahpê hkwỳ hã mē pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸ Na pre Krisja mē panê htyk o Tĩrtũm mã mē pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhípêx anhỹr ã omunh xà hkôt mē pahte hkôt amnhĩ xunhwỳr xwỳnhjê nê mē pahte amnhĩ tomnuj rênh pa. Koja aa tanhmã hã mē pahto hkêt nê. Pu mē axte amnhĩ amnhĩ tomnuj o papa hkêt nê. Hêxta waa nê. Kãm mē pajapê htỳx kumrêx jakamã na pre ã mē pahto mex rax anê. ãm mex o mex nê àhpumunh o àhpumunh.

9-10 Amnepê m na pre hamaxpêr o:

—Nà na pa ra kaxkwa ho ixkato nê kamã mêmôj piitã ho ixkato. Nê pika ho ixkato nê kamã mêmôj piitã ho ixkato. Tã koja nhÿrmã Ixkra Kris mêmôj piitã ho amnhÿptâr o pa. Kaxkwa kamã nê pika piitã hkôt mêmôj piitã ho amnhÿptã nê tapxipix inhÿ hã kêp mêmô Pahihtî. Koja ã amnhÿ nhÿpêx anhÿr xà hã arÿgro kato nhÿm ã amnhÿ nhÿpêx o pa anê. Nà ja na inhmã hprãm. Anê.

Ã Tÿrtÿm amnhÿ kukamã hamaxpêr anhÿrja kôt na pre Kris kêp mêm panhõ Pahihtî hã harê. Tã nhÿrmã mêm pahto amnhÿptâr kaxyw koja mêm pakaxyw ãm. Amnepê m ri mêm pa xwÿnhjê mã kot kormã ja ho amnhÿrÿt kêt tã ra jarãhã mêm pamã ho amnhÿrÿt.

11 Kris kukwak ri na pre amnhÿm mêm parê. Ra kot mêm pakukamã mêm pahtã amnhÿ jarênh xà hkôt. 12 Tã mêm ixpê Ijaew kwÿ kumrêx mêm ixte Kris kôt amnhÿ xunhwÿr jakamã koja mêm piitã mêm inhÿ hã Tÿrtÿm mã mex o mex ã harênh o ri pa.

13 Nê mêm kajaja na ka prem mêm ixpyrà nê Tÿrtÿm kapêr ma nê ajaxwÿja hkôt amnhÿ xunhwÿ. ãm hãmri na Tÿrtÿm kapêrja. Tã ka prem ama nê hkôt amnhÿ xunhwÿ. Hãmri nhÿm amnhÿ tã mêm apumu nê kot inhÿpêx pyrà nê mêm anê mêm ate amnhÿ tomnuj piitã rênh pa nê mêm ato hkra. Hãmri nê mêm awÿr Karõ rê nhÿm mêm awÿr wrÿ nê mêm akarõ mã agjê nê mêm akamã pa ho pa. Kris kukwak ri na pre mêm awÿr kurê. Amnepê mã na pre mêm pakukamã hamaxpêr o:

—Koja mêm Ixkra hkôt amnhÿ xunhwÿ pa ja hã mêm omu nê mêm ho ixkra nê mêm hwÿr Ixkarõ rê. Hãmri nhÿm mêm hkarõ mã agjê nê mêm kamã hkrÿ ho hkrÿ.

14 Anhÿr jakamã na pre mêm pahwÿr kurê nhÿm mêm pahwÿr wrÿ nê mêm pahwÿr agjê nê mêm pakamã hkrÿ ho hkrÿ. Pu mêm ja hã amnhÿ pumu nê pajamaxpêr o:

—Nà ra Tÿrtÿm kot ixwÿr Karõ mênh jakamã na ixkarõ hwÿr axà nê kamã hkrÿ ho hkrÿ. Tã koja ra kot mêm ixtã amnhÿ jarênh xà hkôt ja hã ixto mex nê. Ra kot ixto hkra kênã. Jakamã koja nhÿrmã ma amnhÿ wÿr ixto api pa kuri inhmex kumrêx nê ixpa ho ixpa. Hãmri nê kukwak ri axte

tanhmã amnhÿ tomnuj to ho ri ixpa hkêt nê. Anê.

Jakamã koja mêm piitã ã kot mêm ho mex anhÿr ã amnhÿ tã kamã ama nê amnhÿ tã omu nê kãm mex o mex ã harênh rãhã ho pa.

Pawre kot Epes nhõ xwÿnhjê ho Tÿrtÿm wÿr ã harênh

Piripos 1.9; Korosê 1.9-12; Wam Tesarõn 5.23; Sikÿn Tesarõn 1.11, 2.16; Eprêw 13.20

15 Nê na ka xep htem amnhÿ kaxyw Kris kôt ajamaxpêr tÿx pê amã Tÿrtÿm krajê piitã mêm hkÿnh o mêm ho mex o apa. Na pa pre mêm ajarênh ma nê ixkÿnh tÿx nê. 16-18 Nê xatã mêm ato Tÿrtÿm wÿr o ri ixpa nê mêm ato hwÿr o:

—Pa Mênhÿpêêxã maati Tÿrtÿm. Nà amex o amex. Ka na ka pre mêm ixwÿr mêm inhõ Pahihtî Jejus Krisja mêm nhÿm mêm ixwÿr wrÿ nê hprÿ hã mêm inhmã ate tanhmã amnhÿ nhÿpêx to ho apa hã ato amnhÿrÿt. Tã Epes kãm akrajaja na xep htem akôt pix mã ri amnhÿ nhÿpêx rãhã ho ri pa. ãm hãmri na htem ã amnhÿ nhÿpêx anê.

—Nê kwa Tÿrtÿm. Kê Akarõ tanhmã mêm hkrã hto kê mêmhprÿ hã akapêr mar tÿx rãhã ho pa. Jao ra ate mêm ixkukamã mêm ixtã tanhmã mêm ixto mex to hã amnhÿ jarênhja kê mêm kãm hamaxpêr tÿx rãhã ho pa. Nê ate nhÿrmã mêm ixpê akrajaja mêm ixpiitã tanhmã mêm ixto mex to jarênhja kê mêm kãm hamaxpêr tÿx pê hkÿnh rãhã ho pa ho pa.

19-20 —Nê kê mêm axãhpumunh o axãhpumunh ã ate akupÿm Akra Kris o htÿr ã apumunh mex nê Tÿrtÿm. Na ka pre axãhpumunh xà ho akupÿm ho htÿr nê ma akupÿm anhõ krÿ hwÿr ho api nê amnhÿ nhÿhkõ hã ÿr nhÿm arÿ hkrÿ ho hkrÿ. Apyrà nê kot mêm ixto amnhÿptâr kaxyw. ã axãhpumunh xà htÿx kot anhÿr. Tã kê akrajê piitã ja hã apumu nê axãhpumunh tÿx o ate tanhmã mêm ixto ajuta hto ho apa hã apumu.

Anhÿr o na pa hte mêm ato hwÿr o ri ixpa.

21 Nê Krisja ãhpumunh tÿx o mêmkarõmnuti piitã hakrenh. Nê hihtÿx o mêm hakrenh jakamã krÿ nhõ xwÿnhjê mã te mêm ãhpumunh tÿx kêt pyràk o na htem htÿx ri amnhÿ nhÿpêx o pa pyràk. Nê Krisja hihtÿx

o pika piitã hkôt pahi piitã mẽ hakrenh par kumrêx. Nê hihtýx o kot pika piitã hkôt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rý kãm hamaxpêr gõ? Nã amrakati kumrêx. Ra kot ã amnhĩ nhĩpêx anhÿr rãhã nê pa ho pa xwýnh kênã. Nê hihtýx o hihtýx rãhã nê pa ho pa xwýnh. Nê àhpumunh o àhpumunh rãhã nê pa ho pa xwýnh. Nê hihtýx o kot jar pika ja kôt mẽ pajakrenh par nê hihtýx o Tirtüm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htír tùm nê pa ho pa.

Kris te kêp mẽ pahkrã pyrãk ã harênh
Rõmãn 12.4; Wam Korõt 12.12; Epes 4.16;
Korosê 3.25

²² Na pre Tirtümja Kra Kris nhĩhkram mẽmoj piitã haxàr pa. ý hã kot nhÿrmã ho amnhĩptàr o pa kaxyw. Jakamã kot mẽ pahto amnhĩptàr xwýnh ã kêp mẽ panhõ Pahihti. Nê te kêp mẽ pahkrã pyrãk. Nê mẽ papajaja te mẽ pahpê ì pyrãk jakamã na pu htem hkôt ri amnhĩ nhĩpêx o papa. ²³ Na hte mẽ panhija mẽ pahkrã kamã mẽ pajamaxpêr xà hkôt tanhmã amnhĩ nhĩpêx to. Ja pyrã nê na pu htem mẽ pahkrã pyrãk xwýnh Krisja kapêr ma nê hkôt tanhmã ri amnhĩ nhĩpêx to ho ri papa.

Koja mẽhõ ãm hkrã pix nê ì hkêt nê pa hãmri nê mex kêt nê. Na htem hkrã nê mãânên ì nê pa nê mex nê. Ja pyrã nê na hte Kris mẽ pahte hkôt amnhĩ nhĩpêx o papa hã mẽ pahpumu nê hkĩnh nê mex nê pa. Pu mẽ pajaxwýja hkôt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

2

Tanhmã Tirtüm kot mẽ pahto hkra hto ã harênh

Wam Korõt 6.11; Xitre 2.11–3.7

¹ Nê amnepê mã na pu pre htem Tirtüm kàx ã tanhmã amnhĩ tomnuj to ho ri papa.

² Nê jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mẽkarõmnuti nhõ pahi Satanasti kapêr kôt pix mã ri amnhĩ nhĩpêx rãhã nê. Na pre hte tanhmã mẽ pahkôt mẽ pahto ho pa. Mẽ pahte tanhmã amnhĩ tomnuj to

kaxyw mẽ pamã mẽ pajamaxpêr punuj jagjê. Pu mẽ amnhĩ tã omunh kêt tã ý hã amnhĩ tomnuj o papa. Satanastija kêp mẽ kot Tirtüm kapêr kwým ri amnhĩ nhĩpêx o mẽ pa xwýnhjê nhõ pahihti na. Tã pu pre htem pahtýx ri hkôt amnhĩ nhĩpêx pix o ri papa. ³ Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nê mẽmoj punuj kukamã pajamaxpêr nê ra hkôt ã amnhĩ tomnuj anê. Æ na pu prem mnhi nhĩpêx anê nhũm Tirtüm ja hã mẽ pahpumu nhũm ja kãm mex kêt nê. Jakamã nhũm tee ri mẽ pakukamã hamaxpêr nê hamaxpêr o:

—Hêxta waa nê. Na htem ixkapêr kwým ri tanhmã amnhĩ tomnuj to rãhã ho pa. Æ mẽ kot amnhĩ nhĩpêx anhÿr o mẽ pa xwýnhjaja koja mẽ nhÿrmã ixri htír tùm nê mex nê pa ho pa hkêt nê. Ixkĩnhã mẽ kot amnhĩ tomnuj xwýnh jakamã tanhmã kot mẽ amnhĩ to nê ixri htír tùm nê pa ho pa? Nã mẽ kot amnhĩ tomnuj mÿrapê koja mẽ nhÿrmã ma amnhĩ xà htýx kamã hamak tùm xàta wÿr ma hapêx pa. Nã koja mẽ anê. Hêxta waa nê. Inhmã ma hwÿr mẽ pa prãm kêt tã ra ma hwÿr mẽ pa kaxyw.

Anhÿr o hamaxpêr. ⁴⁻⁵ Nê amnepêm kormã mẽ pahte amnhĩ tomnuj o papata ã te mẽ pahte amnhĩ xà htýx kamã pajamak tùm xà hwÿr pryta ã mẽ papa pyrãk. Nom Tirtüm kãm mẽ pajapê nê mẽ pakamã ukaprĩ jakamã na pre mẽ pahto mex rax nê. Nê akupÿm Kris o htírja ri te ra mẽ pahte amnhĩ xà htýx kamã pajamak tùm xà hwÿr pryta nê mẽ pahto ujanãr pyrãk o mẽ panhĩpêx. Mẽ pakamã ukaprĩ nê kãm mẽ pajapê ho ã mẽ panhĩpêx anê. Amarĩ ã mẽ panhĩpêx anê nê mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwÿr xwýnhjaja nhÿrmã amnhĩ xà htýx kamã mẽ hamak tùm xàta wÿr papa hkêt nê. ⁶ Ra Tirtüm akupÿm Jejus Kris o htír jakamã te ra Jejus kôt akupÿm mẽ pahpê hkwyjê ho mẽ pahtır pyrãk. Jakamã te ra õ krĩ kamã ìhkõ hã mẽ pamex kumrêx nê pahkrĩ pyrãk. ⁷ Mẽmo kaxyw na pre Tirtüm kãm mẽ pajapê hkôt ã mẽ pahwÿr Jejus Kris mẽnh nhũm mẽ panê htyk anê? Nã kãm mẽ pajapê htýx ã mẽ pahte pahprĩ hã amnhĩ tã omunh kaxyw

na pre ã mẽ pahwÿr mẽnh anê. Tã kot pu mẽ nhÿrmã kaxkwa kamã hwÿr pøj nhÿm mẽ pamã amnhÿ jarênh o:

—E mẽ amnê ixpumu. Inhmã mẽ ajapê htÿx jakamã na pa pre mẽ akamã ixukapri xàj ma mẽ awÿr Ixkra Jejus Krisja mẽ nhÿm amnhÿ grônh kôt mẽ awÿr wrÿ nê mẽ anê ty. Inhmã mẽ ajapê htÿx jakamã na pa pre ã mẽ awÿr mẽnh nhÿm mẽ anê htyk anê. Inhmã mẽ apê ixkrajê japê xàj na pa pre ã mẽ ato mex rax anê.

Anhÿr o mẽ pamã kapêr hãmri nê mẽ pahto mex rãhã ho pa. ⁸⁻⁹ Xà na pu prem pahpê hkra hprãm xàj amnhÿ krã hkôt mẽ papamjaja kãm tanhmã amnhÿ to mex to nê kãm:

—E kwa Tirtÿm. Na pa ã amnhÿ to mex anê nê ã amnhÿ to mex anê. Jakamã kwa ja hã ixpumu nê ixto akra nà?

Anhÿr o na pu prem amnhÿ to kuwÿ? Nà na pu prem ã amnhÿ to hwÿr anhÿr kêt nê. Na pu prem amnhÿ kaxyw hkôt pajamexpêr nê hkôt amnhÿ xunhwÿ nhÿm ja pix ã mẽ pahpumunh kôt mẽ panê mẽ pahte amnhÿ tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêr rãhã ho pa jakamã na hte ã mẽ panhÿpêx mex anê. Jakamã na pu htem amnhÿ tã omu nê pajamexpêr o:

—Nà na xep hte Tirtÿmjaja mẽ pahte tanhmã amnhÿ nhÿpêx to ho papa hã mẽ pahpumunh kôt mẽ pahto hkra hkêt nê. Æm mẽ pahte amnhÿ kaxyw kãm pajamexpêr ã mẽ pahpumunh kôt pix mã na hte mẽ pahto hkra. Anê.

¹⁰ Nê Tirtÿm tapxipix na hte tanhmã mẽ pahto pu mẽ amnhÿ to mex rãhã ho papa. Nom kormã kot mẽ pahto hkra hkêt ri na pu prem ã amnhÿ nhÿpêx anhÿr kêt nê. Tã Jejus Kris kôt amnhÿ xunhwÿ nhÿm Tirtÿm ja hã mẽ pahpumu nê mẽ pamã mẽ pahte amnhÿ nhÿpêx nyw jagiê pu mẽ ÿ hã tãm amnhÿ nhÿpêx o ri papa. Amnepêm tanhmã kot mẽ pakukamã hamexpêr to xà hkôt. No na hte tanhmã mẽ pahte amnhÿ krã hkôt amnhÿ nhÿpêx to hã mẽ pahpumunh kôt mẽ pahto hkra hkêt nê.

Tirtÿm krajaja te kot axpên to htõ nê htõx pyræk

Karatas 3.28; Korosê 1.21-23

¹¹ E mẽ apê Ijaew kêt xwÿnhjaja. Na ka htem mẽ akatorxã nhõhy rÿm ajapøj hãmri nê mẽ ixpê Ijaew pyrã nê amnhÿ my kwrÿt kà jakàr kêt nê. Jakamã na pre ixkwÿjaja mẽ akurom amnhÿ jakàr ã amnhÿ to jarkrar o ri pa nê amnhÿ jarênh o:

—Ra mẽ ixte amnhÿ my kwrÿt kà jakàr ã mẽ ixpumunh kôt na hte Tirtÿm mẽ ixto hkra. Tã Ijaew kêt xwÿnhjaja kot mẽ ixkÿnhã amnhÿ jakàr kêt jakamã mẽ kêp hkra hkêt. Nê mãânên mẽ kêp mẽ pahkwÿ hkêt.

Anhÿr o mẽ ajarênh o pa. ¹² Æm hãmri na prem mẽ apê mẽ ixkwÿ hkêt ã mẽ ajarê. Na pa prem mẽ akurom amnhÿ my kwrÿt kà jakà nê mẽ akurom Kris kamã ijamak o ri ixpa. Jakamã nhÿm Tirtÿm kot mẽ ixto mex ã amnhÿ jarê pa mẽ mẽ apyrã nê tee ri amnhÿ kukamã ijamexpêr o ri ixpa hkêt nê. Nê mẽ akurom amnhÿ kaxyw Tirtÿm mã ijamexpêr. Nà Æm hãmri na prem mẽ apê mẽ ixkwÿ hkêt ã mẽ ajarê.

¹³ Te Tirtÿm kàx ã ri mẽ apa pyræk tã ka mẽ arÿ ã amnhÿ nhÿpêx anhÿr kêt nê. Jejus Kris kot mẽ panê htyk nhÿm mẽ ate hkôt amnhÿ xunhwÿr jakamã ra mẽ apê hkwyÿ. Jao arÿ hkàx ã ri apa hkêt nê. Te mẽ ixpê Ijaew kwÿ pyrã nê hpãnhã kuri ra ri apa pyræk. ¹⁴ Jakamã na pu htem Kris kukwak ri ra axpên nhÿpêx nyw o axpên nhÿpêx o ri papa. Mẽ ixpê Ijaewjaja nê mẽ apê Ijaew kêt xwÿnhjaja na pu htem te ra ixkre tipxi kamã ri papa pyræk. Nom amnepêm na pu prem ã axpên nhÿpêx anhÿr kêt nê. Mẽ pahte amnhÿ nhÿpêx tÿmjaja ahpÿnhã na pre. Na pu prem pamã axpên kurê nê axpên kàx ã ri papa. Nê nhÿri axpên pumu nê te pahte axpên pumunh kêt pyrã nê nhãm parÿt o ri mra. Tã nhÿm Kris mẽ panê htyk o mẽ pahte amnhÿ tomnuj piitã hpãnhã amnhÿrer pa. Mẽ ixpê Ijaew nê mẽ apê Ijaew kêt xwÿnhjaja. Nê htyk o te ra kot mẽ pahte axpên nhõrkwÿ hwÿr axpên wÿr o papa pyræk. Jao mẽ pamã axpên kurê ho hapêx nê hpãnhã tãm axpên kaxyw mẽ paxunhwÿ pu mẽ hpãnhã axpên to mex rãhã ho ri papa. ¹⁵ Amnepêm Mojes kot Tirtÿm nhÿ hã mẽ ixpê Ijaew mẽ ixte tanhmã amnhÿ nhÿpêx to ho ixpa hã karõja. Na pa prem mẽ apê Ijaew kêt xwÿnhjaja mẽ ate Tirtÿm kôt amnhÿ nhÿpêx kêt ã mẽ

apumu nē mē akamā inhgryk nē. Nē axpēn mā mē ajarēnh o:

—Nā mē pahkīnhā mē kot Mojes kapēr kôt amnhī nhīpēx kêt jakamā koja Tirtūm mē ho hkra hkêt nē.

Anhūr tā nhūm Kris mē pahwūr wrūr nē mē pahpiitā mē panē htyk o mē pahte hkôt amnhī xunhwūr ā mē pahpumunh kôt pix mā mē pahto Tirtūm kra. Jakamā pa mē axte mē ate Mojes kapēr kôt amnhī nhīpēx kêt ā mē apumunh kôt mē apē Tirtūm kra hkêt ā mē ajarēnh kêt nē. Hāmri nē mē ixpē Ijaew nē mē apē Ijaew kêt xwūnhjaja pu mē axte axpēn kām pagryk o ri papa hkêt nē. Ra te ixkre tipxi kamā mē pahte axpēn kôt ri papa pyrāk.

¹⁶ Kris na pre pī kahpa hā mē panē htyk o ā mē panhīpēx anē nē mē pahte axpēn kôt amnhī nhīpēx o papa kaxyw mē paxunhwūr. Nom Tirtūm jamaxpēr xā hkôt ā mē panhīpēx anē. Jakamā na pu htem arī pamā axpēn kurē ho papa hkêt nē. ¹⁷ Na pre Kris mē pahwūr wrūr nē ā mē panhīpēx anē. Mē apē Ijaew kêt xwūnhjaja mē ate kormā Tirtūm kapēr mar kêt xwūnhjaja nē määnēn mē ixpē Ijaew mē ixte kapēr mar mex xwūnhjaja nhūm pre akupūm tām mē pahte axpēn kôt amnhī nhīpēx o papa kaxyw mē paxunhwūr. ¹⁸ Hāmri nhūm Tirtūm mē pahwūr amnhī Karō rē nhūm mē pahkarō mā agjē. Kris kukwak ri pix mā mē pahwūr kurē pu mē ŷ hā paxamnhīx ri kām tanhmā amnhī jarēnh to ho ri papa. ¹⁹ Hāmri nē te mē pahpē nhām axpēn kaxyw mē urojē pyrā nē axpēn kax ā ri papa hkêt nē.

Te mē pahpē Tirtūm nhōrkwūr pyrāk ā mē pajarēnh

Wam Korīt 3.16; Sikūn Korīt 6.16; Wam Pētre 2.5

²⁰ Nē mē pahpē Jejus kwūr jakamā te mē pahte ixkre tipxikamā ri papa pyrāk. Nē te mē pahpē ixkre nhīpēx mex pyrāk. Nē Kris te kēp ixkre hkrax mā kuhē xā nē kypē kām nōr xā maatija pyrāk. Nē mē kot Jejus nhī hā mē ahkre xwūnhjaja nē mē kot Tirtūm nhī hā kapēr o ri mē pa xwūnhjaja te mē kēp ixkre nhōkwa ēja pyrāk. Nē mē papajaja te mē pahpē ixkre nhīmōk ā pōja pyrāk. ²¹ Ixkre mā kuhē xā nē kypē

kām nōr xā maati kukwak ri pix mā na hte ōkwa ē nē hā pōja kypē mex nē axpēn tā harir. Ja pyrā nē ām Kris kukwak ri pix mā na pu htem te ixkre tipxi kamā ri papa pyrāk o axpēn nhīpēx mex o ri papa. Te mē pahpē mē kot ixkre rax kumrēx nhīpēx o mōr nhūm muxre nē ām xwūnhta pyrāk.

²² Na htem amnhīm ōrkwūr nhīpēx nē hipēx pa nē hwūr agjē nē kamā pa ho pa. Ja pyrā nē na hte Tirtūm Karōja mē pahpē hkrajē karō mā agjē nē mē pakamā pa ho pa. Te mē pahpē Tirtūm nhōrkwūr pyrāk. Mē ixpē Ijaew nē mē apē Ijaew kêt xwūnhjaja Tirtūm mā te mē pahpē ōrkwūr pyrāk.

3

Pawre kot Ijaew kêt xwūnhjē mā mēmoj to amnhīrīt ā harēnh

Rōmān 15.14-21; Korosē 1.24-29

¹ Tā te mē pahpē Tirtūm nhōrkwūr pyrāk jakamā na pa hte jar mē hagdēnh xā kamā mē ato hwūr rāhā ho ixkrī. Na pa pre hte ma mē apē Ijaew kêt xwūnhjē hwūr ixpa nē ixprī hā mē amā Jejus kapēr jarēnh o ri mē akôt ixpa. Mūrāpē na prem ixpynē nē ijaxā pa arī jar ixkrī ho ixkrī. Nom arī amnhī kaxyw Tirtūm mā ijamaxpēr tūx pē mē ato hwūr rāhā ho ixkrī. ² Na pre kām ijapē hā mē apē Ijaew kêt xwūnhjē kaxyw ixām. Ma ixte ri mē akôt ixpa nē mē amā kapēr jarēnh o ri mē akôt ixpa kaxyw. Ra mē ate ja hā ijarēnh mar mex. ³ Na pre mē pahto hpimrāatā tanhmā mē pahto mex to hā inhmā amnhī to amnhīrīt pa pre omu. Mē kajaja nē mē pajaja. Pika piitā hkôt mē piitā tanhmā mē ho mex to. Na pre kormā kot mēhō mā ja jarēnh kêt tā inhmā ho amnhīrīt pa pre omu. Tā kagā ja kamā kot paj mē amā hkwūr ho grēre nē ho amnhīrīt nē mē amā hā kagā ka mē ixpyrā nē kamā harē nē ama. ⁴ Jao aprī hā mar mex nē. ⁵ Amnepēm mē pahkēt ri mē pa xwūnhjē mā Tirtūm kot ja ho amnhīrīt kêt tā nhūm Karō mē ixkwūrjē kumrēx mā ho amnhīrīt. ŷ hā kapēr o ri mē pa xwūnh mē mē ixpē Jejus nhī hā mē ajahkre o mē ixpa xwūnhjē kumrēx mā ho amnhīrīt. Mē ixte kām tanhmā amnhī nhīpēx to ho ixpa xwūnhjē mā ho amnhīrīt pa prem omu. ⁶ Na pre mē inhmā tanhmā mē ato amnhīrīt to pa

prem ja hã mẽ apumu nẽ mẽ akukamã ijamaxpêr o:

—Nà ãm hãmri koja xep Ijaew kêt xwýnhjaja mẽ ixpê Ijaew pyrã nẽ Tĩrtũm kapêr ma nẽ Jejus Kris kôt amnhĩ xunhwý nhũm Tĩrtũm ã mẽ kot amnhĩ nhĩpêx anhỹr ã mẽ omu nẽ mẽ ixpyrã nẽ mẽ ho hkra nẽ mẽ ho mex o pa. Anẽ.

⁷ Tã nhũm Tĩrtũmja mẽ awýr inhmẽ. Ixte mẽ amã ja jarênh o ri mẽ akôt ixpa nhũm tokyx mẽ ate mar kaxyw. Na pre ixto mex nẽ kãm hprãm xà hkôt mẽ akaxyw ixãm nẽ ixte ý hã kãm tanhmã amnhĩ nhĩpêx to ho ixpa kaxyw ixto ixihtýx nẽ mẽ awýr inhmẽ. ⁸ Tã mo kaxyw na pre mẽ akaxyw ixãm? Te ixte ja kaxyw inhmex kêt pyrãk. Ixkwýjaja ja kaxyw mex o kot ijakrenh tã nhũm pre ixpumu nẽ tanhmã hamaxpêr to nẽ mẽ akaxyw ixãm nẽ mẽ awýr inhmẽ. Ixte mẽ amã mẽmoj mex kumrêx jarênh o ri mẽ akôt ixpa kaxyw. Na pre inhmã:

—Kêr ka ma Ijaew kêt xwýnhjê hwýr mō nẽ mẽ kãm Jejus Kris kapêr jarênh o ri mẽ hkôt apa. Nẽ mẽ kãm: “Kot kaj mẽ Jejus Kris kôt amnhĩ xunhwý hãmri nẽ kukwak ri amex nẽ apa.” Anẽ. ⁹ Koja mẽ apê Ijaew kwýjê pyrã nẽ amnhĩ kaxyw Ixkra Kris kôt hamaxpêr nẽ hkôt amnhĩ xunhwý pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrêx mã harê. E ma mẽ hkôt ri mẽ kãm ã ijarênh anhỹr o ri apa kê mẽ ijarênh ma.

Anhỹr o mẽ pahto kator xwýnh maatija inhmã kapêr. ¹⁰ Tã mẽmo kaxyw na hte mẽ pahto hpimràatã mẽ pahto hkra? Nà kaxkwa kamã kapêr o mẽ wrýk xwýnh pytãr xwýnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarênh to kaxyw. Nẽ harênh o:

—Kokýỹ. Tĩrtũm àhpumunh týx o àhpumunh týx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nà Tĩrtũm àhpumunh o àhpumunh nẽ hihtýx o hihtýx. Anẽ.

Koja mẽ ate amnhĩ to mex o apa hã mẽ apumu nẽ ã axpên mã Tĩrtũm jarênh anẽ.

¹¹ Amnepêm kormã mẽmoj kêt ri na pre Tĩrtũm mẽ pakukamã mẽ pahtã tanhmã amnhĩ jarênh to hãmri nẽ Jejus kukwak ri ã mẽ panhĩpêx anẽ. Jao mẽ piitã mẽ kãm

àhpumunh o àhpumunh ã amnhĩ to amnhĩrĩt. ¹² Tã pu mẽ ra Jejus kukwak ri amnhĩ kamã pamã Tĩrtũm puma hkêt nẽ. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarênh rãhã ho ri papa. Te ra pahte hwýr paxàpir nẽ pano ho omunh nẽ kãm pakapêr o pakuhê pyrãk. ¹³ Jakamã kwa kêr ka mẽ kot mẽ atã tanhmã ixtomnuj to hã ijarênhja ma nẽ tee ri ixkukamã ajamaxpêr hkêt nẽ. Kwãr mẽ mãmri tanhmã inhĩpêx to. ãm ixte mẽ amã amnhĩ jarênh ma nẽ axpên mã ijarênh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwýr mra nẽ mẽ pamã Tĩrtũm kapêr jarênh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴ Nẽ na pa hte mẽ ato Mẽpanhĩpêêxã maati hwýr kãm ixihtýx o ixpa. ¹⁵ Kêp mẽ pahte hkôt amnhĩ xunhwýr xwýnhjê nhõ Pahi Maati mex kumrêx na. Kra hkwyjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre típxi kamã Tĩrtũm kôt ri papa pyrãk. ¹⁶ Jakamã na pa hte mẽ ato hwýr o:

—Pa Tĩrtũm. Nà amex o amex. E ot pa Epes nhõ xwýnhjê ho awýr o ixkrĩ. Kwa kê Akarõ mẽ kãm axàhpumunh xà hkwy gō kê mẽ akôt ri amnhĩ nhĩpêx rãhã ho pa.

¹⁷ —Nẽ kê mẽ amnhĩ kaxyw Kris kôt hamaxpêr týx o pa. Te mẽmo pĩ hpàr jarê kot pika kaxwýnh kãm pimãnh nẽ pika jamýnh týtã pyrãk. Nhũm kôk xàpêr týx tã tee kot kãm mênh prãmta pyrãk. Kê mẽ pĩ hpàr jarê kot pika jamýnh pyrã nẽ kãm axpên kĩnh o pa. Jao mẽmoj to axpên kutã nojarêt rãhã ho pa.

¹⁸⁻¹⁹ —Nẽ kê krĩ piitã hkôt mẽ akrajê pyrã nẽ amnhĩ tã Kris kãm mẽ hapê htýx o mẽ hapê htýx ã amnhĩ pumu. Jao urãk nẽ mẽ kãm axpên kĩnh týx o pa. Nẽ kê mẽ ate amnhĩ nhĩpêx pix o amnhĩ nhĩpêx rãhã ho pa. Nẽ ajamaxpêr pix o hamaxpêr rãhã

ho pa. Jao te mẽmo pĩ hpàrta pyrà nẽ akõt hihtỳx nẽ. Anẽ.

²⁰ Kot puj mẽ ã amnhĩ to Tĩrtũm wỳr anẽ nhũm mẽ pama nẽ ra àhpumunh tỳx xà ho ã mẽ panhĩpêx anẽ. Ra kot mẽ pakamã pa ho pa kênã. ²¹ ã Tĩrtũm Jejus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêt pu mẽ kãm mex o mex ã harênh rãhã ho papa. Nà kot puj mẽ ã kãm anhỳr o papa.

4

Te ixkre tipxi kamã axpẽn kõt ri mẽ papa pyræk

Rõmãn 15.5; Piripos 2.1-4; Korosẽ 3.12-17; Wam Pêtre 3.8

¹ Nẽ ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nẽ hã kagà anhỳr o ixkrĩ. Kwa kêt ka mẽ Tĩrtũm kot amnhĩ nhĩpêx kõt amnhĩ nhĩpêx mex rãhã ho ri apa. Ja kaxyw na pre amnhĩ kõt mẽ awỳ ka prem hkõt amnhĩ xunhwỳ.

² Nẽ kêt ka mẽ amã amnhĩ to rax o akwỳjê jakrenh prãm o ri apa hkêt nẽ. Nẽ mẽ agryk tokyx anhỳr kêt nẽ. ãm axpẽn kãm axukapri pix o mãn ri axpẽn kõt apa. Kê mẽhõ tee tanhmã ri mẽ ato htã ka mẽ kamã agryk tokyx anhỳr kêt nẽ. ãm mẽ amã ri axpẽn hkĩnh pix o mãn ri axpẽn kõt apa. ³ Ra Tĩrtũm Karõ kot mẽ pahkarõ mã gjêx par jakamã te mẽ pahte ixkre tipxi kamã axpẽn kõt ri mẽ papa pyræk. Jakamã kêt ka mẽ axpẽn to mex pix kukamã mãn kêt ajamaxpêr o ri axpẽn kõt apa. Nẽ tãm axpẽn nhĩpêx. Jao ajamakêtkati nẽ axãmnhĩx ri axpẽn kõt ri apa ho apa. ⁴ Te mẽ pahte ixkre tipxi kamã ri axpẽn kõt papa pyræk jakamã mẽ pahpiitã mẽ pahkarõ kamã Tĩrtũm Karõja hkrĩ ho hkrĩ. Jakamã kot puj mẽ nhỳrmã ma õ krĩ hwỳr api nẽ kamã mẽ pamex rãhã papa ho papa.

⁵ Nẽ mẽ panhõ Pahihtija ãm pixii. Na pu prem pahpiitã amnhĩ kaxyw hkõt pajamaxpêr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrit kaxyw na prem Tĩrtũm mã mẽ pahkrã kumrã. ã mẽ panhĩpêx anhỳr o axpẽn pyræk o mẽ panhĩpêx o pa anẽ.

⁶ Nẽ Tĩrtũm haxwỳja ãm pixii. Kêp mẽ pahpiitã mẽ panhĩpêxà maati na. Na hte mẽ pahpê hkrajê mã àhpumunh xà hkwy gõ pu mẽ ý hã kãm tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpẽn kõt papa pyræk.

Kris kot ahpỳnhã tanhmã mẽ pahto mex to hã harênh

Rõmãn 12.3-8; Wam Korĩt 12.1-12; Wam Pêtre 4.10-11

⁷⁻⁸ Nẽ Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwỳr xwỳnhjê pytàr pa nẽ ma akupỳm kaxkwa hwỳr api.

Tã arĩ jar pika hkõt mẽ pahpê hkwyjê mã tanhmã mẽ pahto paxihtỳx to ho pa. Na hte Krisja tanhmã mẽ pahte ahpỳnhã kãm amnhĩ nhĩpêx to ho papa kaxyw tanhmã mẽ pahto paxàhpumunh to. Kãm hprãm xà hkõt. ⁹ Tĩrtũm kapêr ã kagà htũm kot akupỳm kaxkwa hwỳr àpir ã harênh. ãm tapxipix na pre ã pika hwỳr wrỳk nẽ akupỳm kaxkwa hwỳr àpir anẽ. Na pre ty nhũm mẽ haxà. Hãmri nhũm akupỳm htĩr nẽ kato nẽ ma akupỳm api. Tapxipix na pre ã amnhĩ nhĩpêx anẽ. ¹⁰ Tã akupỳm kaxkwa hwỳr àpir xwỳnhta na hte kaxkwa kamã nẽ pika hkõt amnhĩm mẽmoj piitã tanhmã ho ho hkrĩ. ¹¹ Na pre ahpỳnhã tanhmã mẽ pahto mex to. Ahpỳnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwỳ.

Nẽ mẽ pahkwỳjaja mẽ pahte krĩ piitã hwỳr pamrar nẽ ý hã hkrajê mã kapêr jarênh o papa kaxyw mẽ paxunhwỳ.

Nẽ mẽ pahkwỳjaja mẽ pahte krĩ pixi kamã Tĩrtũm nhỹ hã hkrajê jahkre ho ri mẽ hkõt papa kaxyw mẽ paxunhwỳ.

Nẽ mẽ pahkwỳjaja mẽ pahte pahpri hã mẽ piitã mẽ kãm tanhmã mẽ kot amnhĩ nhĩpêx to nẽ Jejus kõt amnhĩ xunhwỳr ã mẽ kãm harênh o papa kaxyw mẽ paxunhwỳ.

Nẽ mẽ pahkwỳjaja mẽ pahpê pastõ kaxyw mẽ paxunhwỳ.

Nẽ mẽ pahkwỳjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwỳ.

¹² ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pamar tÿx nê. Nê gaa nê mẽ pahpyrà nê Tirtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. ¹³ Nê gaa nê mẽ pahpiitã mẽ pahpê Tirtũm kra hã Jejus kot amnhĩ nhĩpêx kôt omunh mex nê. Nê amnhĩ kaxyw hkôt pajamexpêr tÿx nê. Jao te ra hkôt mẽ paxaptâr mex pyrâk. Nê te kot amnhĩ nhĩpêx pyrâk o amnhĩ nhĩpêx.

¹⁴ Mêhprĩrejaja na htem nhãm hamaxpêr nê nhãm hamaxpêr o pa. Te kôk xâpêr nê nhãm mẽmoj to mrar nê nhãm mẽmoj to mrar pyrâk. Nom kêr pu mẽ ho mẽ urâk kêt nê. ãm Kris kôt pix mã pajamexpêr tÿx o papa. Jakamã nhũm mẽ tee ri mẽ pahte hkwȳm ri tanhmã amnhĩ tomnuj to hprãm xâj tanhmã mẽ pahto kaprÿ. Nom kêr pu mẽ mẽ mar kêt nê. ãm pakatât kôt mẽ aptâr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa. ¹⁵ Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyrâk o amnhĩ nhĩpêx mex o mõ.

¹⁶ Nê mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamexpêr xâ hkôt axpên kôt ahpÿnhã tanhmã axpên to ajuta hto. Te ixkre pixi kamã mẽ pahte axpên kôt tanhmã axpên to ajuta hto ho ri papa pyrâk.

Kris kôt mẽ pahte amnhĩ nhĩpêx nyw ã mẽ pamã karõ

Korosê 3.5-11; Wam Pêtre 4.7

¹⁷ E kot paj Pahшти nhÿ hã mẽ amã mẽmoj jarê nê nê mẽ amã ixkapêr kãm ixihtÿx nê ka mẽ inhma. Nã kêr ka mẽ axte mẽ kêp Tirtũm kra hkêt xwÿnhjê kot amnhĩ nhĩpêx o amnhĩ nhĩpêx o ri apa hkêt nê. Na htem htÿx ri tanhmã hamaxpêr punuj to ho ri amnhĩ tomnuj o pa. ¹⁸ Jao Tirtũm mã hamaxpêr kêt nê pa. Kãm hamaxpêr prãm kêt kumrêx nê pa. Te mẽ kot omunh nê nhãm hkrã pyrâk o amnhĩ nhĩpêx. Rÿ te mẽhõ wa kot axpên kãm gryk kãm axpên nhĩpêx pyrâk o hipêx. Jao te kamât kô kamã ri pa pyrã nê Tirtũm kot amnhĩ

nhĩpêx pumunh kêt nê pa. Jakamã koja mẽ nhÿrmã kuri htĩr tũm nê pa hkêt nê. ¹⁹ Na htem tanhmã amnhĩ tomnuj to htã amnhĩ kamã hpijaàm kêt nê pa. Nê axpên kamã hpijaàm kêt rãhã ho pa. ãm amnhĩ pix kukamã hamaxpêr nê tanhmã amnhĩ tomnuj to ho ri pa. ²⁰⁻²¹ Nom Jejus Krisja ã kot amnhĩ nhĩpêx anhÿr kêt. Mẽ kurom tãm kot amnhĩ nhĩpêx mex o pa xwÿnh nê tãm kapêr o pa xwÿnh na. Na pa pre ma mẽ awÿr mõ nê ixprĩ hã mẽ amã ja hã harê ka prem inhma nê inhmar tÿx nê. ²² Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nê. Ja na omnuj tÿx. Na ka prem ã amnhĩ nhĩpêx anê nê ajamexpêr punuj pix o ri apa. Jao amnhĩ tomnuj rãhã nê. Tã kêr ka mẽ amnhĩ nê awry hã mẽnh pyrã nê axte ã amnhĩ tomnuj anhÿr o ri apa hkêt nê.

²³ —Nê kêr ka mẽ axte mẽ ajamexpêr tũm nê mẽ ate amnhĩ nhĩpêx tũm kôt ri amnhĩ nhĩpêx kêt nê. Nê mẽ ajamexpêr nyw nê mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrȳnh nê rênh nê hpãnhã nyw jagjêx nê ri hã pata pyrã nê ãm amnhĩ nhĩpêx nyw kôt pix mã amnhĩ nhĩpêx o ri apa. ²⁴ Mẽ ajamexpêr nyw nê mẽ ate amnhĩ nhĩpêx nywja axtem na. Te Tirtũm jamaxpêr nê kot amnhĩ nhĩpêxta pyrâk. Jakamã kwa kêr ka mẽ kãm hprãm xâ hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nê kapêr kôt ri amnhĩ nhĩpêx. Anê.

Na pa pre ã mẽ amã ixkapêr anê. Tã kêr ka mẽ arĩ ixkapêr kôt pix mã amnhĩ nhĩpêx. ²⁵ Mẽ pahpê Kris nhĩ jakamã te pahte ixkre htipxi kamã axpên kôt amnhĩ nhĩpêx pyrâk jakamã kwa mẽ axte axpên mã mẽmoj to axêx kêt nê. Nê amarĩ axpên xô ri axpên mã mẽmoj to axêx kêt nê. ãm tãm axpên mã mẽmoj jarênh o ri apa.

²⁶ Nê kot kaj mẽ mẽmoj tã agryk japêr. Rÿ mẽhõ kamã agryk rÿ amarĩ agryk japêr. Tã kêr ka ho ajapêx tokyx anê agryk japjê hkêt nê. Kêr kê kormã kamât kêt ri ka akupÿm tãm akrã nhũm ja amã mex nê. ²⁷ Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ

apumu nê te mē ate amnhĩ tomnujta ã mē apynênh pyrâk o mē anhĩpêx. Ka mē ra hkôt tanhmã amnhĩ tomnuj to. Ja pymaj kêr ka mē agryk japjê hkêt nê. Satanasti kãm hprãm xà hkôt ã amnhĩ nhĩpêx anhÿr kêt nê.

²⁸ Nê mē axàhkĩnh o mē apa xwÿnhjaja kêr ka mē axte mē kêp axàhkĩnh hkêt nê. Mëmoj tâ apê nê hpãnhã kàxpore jamÿ nê ho amnhĩm awjaprô. Nê mē kêp amrakati xwÿnhjê mã mëmoj japrôr o ri apa. Kêr ka mē ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhÿr o ri apa.

²⁹ Nê kêr ka mē amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mē amã axpên kĩnh nê mē amã axpên to mex pix prãm xàj tãm axpên mã ri akapêr o ri apa.

³⁰ Tĩrtũm na pre mē pahwÿr amnhĩ Karô rē nhũm mē pahpê hkra hã mē pahkarô mã agjê nê mē pakamã hkrĩ ho hkrĩ. Koja mē pakamã hkrĩ ho hkrĩ rãhã nhũm nhÿrmã Tĩrtũm amnhĩ wÿr mē pahto api pu mē kuri pahtĩr tũm nê papa ho papa. Jakamã kwa kêr ka mē tanhmã amnhĩ tomnuj to ho amnhĩ kamã Tĩrtũm Karô mã hkaprĩ jagjênh kêt nê. Nê kãm hpijaàm jagjênh kêt nê. Koja mē pahte amnhĩ tomnuj ã mē pahpumu nê mē pahkaga hkêt tâ tee ri ja hã mē pahpumu nê hkaprĩ nê. Jakamã kêr pu mē ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹ Nê kêr ka mē axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rÿ axpên japrÿ ho ri apa hkêt nê. Nê atÿx ri axpên tâ apêr o apikênh kêt nê. Nê ri axpên tâ mē kãm axàmnênh kêt nê. ³² Kêt mē ãm axpên to mex pix nê axpên kãm axukaprĩ ho ri apa. Nhũm mēhõ tanhmã mē ato ka mē ãm amnhĩ tâ omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mē pahte amnhĩ tomnuj grãnh pa nê axte kãm hamaxpêr kêt nê. Tã kêr ka mē urâk nê mēhõ kot tanhmã atomnuj tota tokÿx ho ajamakêtkati nê axte kãm ajamaxpêr kêt nê.

5

¹ Nê koja mēhõ kãm hkra japê nhũm amnhĩ tâ omu nê hkĩnh nê. Hãmri nê nhÿrmã hkra nê amnhĩ pyrâ nê kãm hapê nê. Ja pyrâ nê Tĩrtũm kãm mē pahpê hkwyjê japê jakamã kêr pu mē amnhĩ pyrâ nê pamã pahkwÿjê hkĩnh tÿx o papa. ² Kris haxwÿja kãm mē pajapê jakamã na pre htyk o mē panê mē pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mē panê amnhĩ nhĩpêx anê. Tã ã kãm mē pajapê anhÿr jakamã nhũm Tĩrtũm ja hã omu nhũm ja kãm mex nê. Te ho mē hkuxwa xà mex kuxwa pyrâk. Jakamã kêr pu mē amnhĩ tâ omu nê urâk nê pamã axpên kĩnh o axpên to mex o mãn ri papa.

Mê pahte amnhĩ tomnuj kaga hã kot mē pamã karô

Sikũn Korõt 6.14–7.1; Korosê 3.16-17; Wam Juãw 1.5-10, 2.15

³ Nê mē pahpê Tĩrtũm kra jakamã kêr pu mē pahprô pix tânopxar o ri papa nê nhãm mēnijê hõ kamã pahpijaàm kêt o ri papa hkêt nê.

Nê kêr pu mē amnhĩ pix kukamã pajamaxpêr kêt nê. ãm ja ho anhÿr hkêt kumrêx. Mē pahpê Tĩrtũm kra kênã kot pu kêt axtem nê ã amnhĩ nhĩpêx anhÿr o ri papa. Tĩrtũm krajaja na htem ã amnhĩ nhĩpêx anhÿr kêt nê.

⁴ Nê mãânên mē pakapêrja. Kêr pu mē ri tanhmã axpên mã pakapêr punuj to hkêt nê. Nê ri axpên japrÿ hkêt nê. Nê amnhĩ krã hkôt pahtÿx ri tanhmã pakapêr to hkêt nê. ãm tãm axpên mã pakapêr mex nê axpên mã Tĩrtũm mex o mex ã harênh o ri papa.

⁵ Nê Tĩrtũm kapêr kôt amnhĩ nhĩpêx kêt xwÿnhjaja nê axpên kãm mē hpijaàm kêt xwÿnhjaja nê amnhĩ pix kukamã mē hamaxpêr o pa xwÿnhjaja. ã mē kot amnhĩ nhĩpêx anhÿr xwÿnhjaja kêp Tĩrtũm mē Kris wa hkra hkêt. Na htem ã amnhĩ nhĩpêx anhÿrja gryk ã wa kãm hamaxpêr kêt nê.

⁶ Nê koja nhÿrmã mēhõ mē awÿr mō nê mē ate tanhmã amnhĩ tomnuj to prãm xàj hêx rom amã kapêr nê mē amã:

—Kwa mon ka hte mē ixpyrà nê ã amnhĩ nhĩpêx anhÿr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhÿr xwÿnhjaja koja Tĩrtũm nhÿrmã ja hã mẽ homnuj tÿx kumrêx. ⁷ Jakamã kwa kêr ka mẽ ate ho mẽ kot amnhĩ nhĩpêx pyrãk pymaj mẽ hkôt ri apa hkêt nê. Kwarĩ ho kwarĩ.

*Mẽ pahte amnhĩ nhĩpêx nyw jarênh
Juãw 1.4, 3.19, 8.12, 12.35; Rõmãn 13.12;
Wam Tesarõn 5.5; Wam Juãw 1.5*

⁸ Amnepêm kormã mẽ ate Tĩrtũm kôt amnhĩ xunhwÿr kêt ri na ka prem te kamàt kô kamã ri apa pyrã nê atÿx ri tanhmã amnhĩ tomnuj to ho ri apa. Tã ra Jejus kôt amnhĩ xunhwÿ hãmri nê te hirã kamã mẽ apa xwÿnh pyrãk. Jakamã kwa kêr ka mẽ hpãnhã Tĩrtũm kãm hprãm xà hkôt pix mã mãn ri amnhĩ nhĩpêx o apa. Ra mẽ apê hirã kamã mẽ apa xwÿnh kênã. ⁹ Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰ Jao Tĩrtũm kãm hprãm xà hkôt pix mã amnhĩ nhĩpêx o ri apa ¹¹⁻¹² nê te kamàt kô kamã ri mẽ pa xwÿnhjaja kot amnhĩ nhĩpêx pyrãk o amnhĩ nhĩpêx kêt nê. ã mẽ kot amnhĩ nhĩpêx anhÿr xwÿnhjaja na htem hpimxur pê tanhmã amnhĩ tomnuj tÿx to ho pa. Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê xpijaãm tÿx nê. Ixte harênh mã xwÿnhja omnuju. Tã kêr ka mẽ urãk nê ã amnhĩ nhĩpêx anhÿr kêt nê. ãm mẽ noo mã tãm ri amnhĩ nhĩpêx o ri apa. ¹³ Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴ Te mẽ kot kanê hpôk rax kãm mẽmoj piitã omunh mexta pyrãk. Tĩrtũm kapêr ã kagà htũm kot ja jarênh kot:

Mẽ amã Tĩrtũm prãm kêt xwÿnhjaja te ra mẽ atyk nê mẽ anhĩkwÿ pyrãk.
Nê te kamàt kô kamã mẽ anhõt nê mẽ anhĩkwÿ pyrãk.

Jakamã kwa te mẽ akrã hapôx nê kãnhmã mẽ akrĩ pyrãk o amnhĩ nhĩpêx nê Tĩrtũm kôt amnhĩ xunhwÿ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyrãk o amnhĩ nhĩpêx. Anê.

*Tĩrtũm krajaja kot tanhmã amnhĩ nhĩpêx
to hã mẽ kãm karõ*

Korosê 4.5; Sikũn Ximotre 4.2

¹⁵ Nê kwa kêr ka mẽ amnhĩ pumunh mex o ri apa. Nê mẽ ri htÿx ri mẽ kot amnhĩ nhĩpêx xwÿnhjê hkôt amnhĩ nhĩpêx kêt nê. Nê ãm amnhĩ to mex pix o ri apa. ¹⁶ Na htem ra Kris ã mẽ pahomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nê.

¹⁷ Nê ãm Tĩrtũm pix mã amnhĩ jarênh o ri papa nê kãm:

—Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhÿr kaxyw ixkrãm ijamaxpêr mex jagjê nê ho amnhĩrit mex pa tanhmã amã amnhĩ nhĩpêx to ho ri ixpa.

Anhÿr o amnhĩ to kuwÿ. Nom kêr pu mẽ pahÿtÿx ri pajamaxpêr kôt tanhmã kãm amnhĩ nhĩpêx to hkêt nê.

¹⁸ Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagôxÿhti kot amnhĩ tã mẽ pahkaxpre pyrãk o mẽ panhĩpêx pu mẽ tee ri pamã hkaga hprãm kaprÿ. Te kot amnhĩm mẽ pahto arĩk pyrãk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htÿx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhÿr hkêt nê ãm Tĩrtũm Karõ pix hkôt mãn ri amnhĩ nhĩpêx o ri papa.

¹⁹ Nê kêr pu mẽ axpên wÿr akuprõ nê pahkĩnh kãm Tĩrtũm mã mex o mex ã harênh pê ho pagrer o pahkrĩ. ²⁰ Nê mẽ pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Mẽpanhĩpêxã maati jakamã mẽ pahpê Pahiti Jejus Kris kwÿ hã pu mẽ kãm mex ã harênh rãhã ho papa nê aa ho pajamakêtkati hkêt nê.

²¹ Nê kêr ka mẽ Kris ã apijaãm rãhã o ri apa. Jao axpên kôt ajamaxpêr nê axpên kôt ri amnhĩ nhĩpêx mex o ri apa.

*Tanhmã mẽ hprõ nê mẽ mjên kot axpên
nhĩpêx to hã mẽ kãm karõ*

Wam Korĩt 11.3; Korosê 3.18-19; Wam Pêtre 3.1-7

²² Nē kēr ka mē anijaja mē amjēn ā api-jaam o ri apa. Nē mē hamaxpēr mex ā mē omu nē mē hkôt ri amnhī nhīpêx o ri apa. Te mē ate Pahihti Kris kapēr kôt amnhī nhīpêx o ri apata pyrāk. ²³ Kris kēp mē pakamā ukaprī xwýnh nē kēp mē papytār xwýnh jakamā te kēp mē pahpiitā mē pahkrā pyrāk. Nē mē papajaja te mē pahpê ĩ pyrāk. Jakamā na pu htem pahpê ĩja te mē pahkrā kot tanhmā hamaxpēr to xā hkôt amnhī nhīpêx o papaja pyrāk. Ja pyrā nē kēr ka mē anijaja mē amjēn jamaxpēr mex ā mē omu nē mē hkôt amnhī nhīpêx mex nē. ²⁴ Mē pahpê Kris kwý jakamā na pu htem hkôt amnhī nhīpêx mex o ri papa. Ja pyrā nē kēr ka mē amjēn kôt amnhī nhīpêx mex o ri apa.

²⁵ Nē mē amyjaja. Kēr ka mē amā aprō hā ma ho ri apa. Te ho Kris kot mē pahtā ma ho pata pyrāk. Na pre kām mē pajapê xà amnhī grōnh kôt mē pahwýr wrý nē mē panē ty. Tā kēr ka mē urāk nē ā amā aprō hā ma ho apa anē. ²⁶ Na pre Kris kām mē pajapê xà mē pahte amnhī tomnuj pē mē pahpytā. Te mēhō my kām mēhō ni hkīnh nē mēmoj punuj pē utār nē ho hprōta pyrāk. Nhūm te mē kot axpēn mā wa rer kaxyw nhūm nija ma gōx mā htēm nē wýr nē amnhī to mex nhūm mē kot axpēn kaxyw wa ho mexta pyrāk. Hāmri nē te ra axpēn mā wa rer nhūm wa kot axpēn kôt pa ho pata pyrāk.

Ja pyrā nē na pre Jejus kām mē pajapê nē kām amnhī kuri mē papa ho mē papa hprām xà mē pahwýr wrý nē mē pahte amnhī tomnuj pē mē pahpytā nē mē pamā Tirtūm kapēr jarēnh o pa. Tā mē pahpê hkrajaja na pu htem kapēr ma nē hkôt amnhī nhīpêx o papa ho amnhī tomnuj kaga. Te gōx kām mē paxwýr nē mē pahte amnhī nē amnhī grā htyk kuhōnh par pyrāk. Jao Tirtūm kapēr kôt pix mā amnhī nhīpêx o ri papa. Te ra paxwýr nē amnhī nē tanhmā mē pahte amnhī tomnuj to grānh par pyrāk. Nē te mjēn mā xwýnh wýr nē amnhī to mex pyrāk.

²⁷ ā mē pahte amnhī nhīpêx anhýr jakamā te mē pamex nē ri papa pyrāk. Hāmri nhūm Krisja ja hā mē pahpumu nē kām mē pajapê htýx nē. Jakamā koja

nhýrmā akupýn wrý nē ma akupým amnhī kôt mē pahto api pu mē kuri pa htír tūm nē papa ho papa.

²⁸ Nē xā mē amyjaja mē amā amnhī japêê? Nā mē amā amnhī japê ho na ka htem amā amnhī tā ma ho apa. Tā kēr ka mē aprō nhīpêx o te ka amā amnhī tā mata pyrāk. Jao tām mē hipêx o ri apa. Te war apixire nē war apa pyrāk o wa axpēn nhīpêx. Kot kaj mē tanhmā hipêx to nē te ate amnhī nhī tanhmā hipêx to pyrāk. ²⁹⁻³⁰ Na htem amnhī nhī ho mex pix o pa nē kamā gryk kēt nē. Nē kām prām nē apku. Nē kām kōr nē ixkō. Nē nhýhýnh à nē amnhī kane. Na pu htem ā amnhī to mex o ri papa anē. Ja pyrā nē te mē pahpê Kris nhī pyrāk jakamā na hte mē pahto mex o pa. Te mē pamā mē papa mē pahte amnhī nhī hā mata pyrāk. ³¹ Tirtūm kapēr ā kagā htūm kot ja jarēnh kot:

Koja mēmyjê hō hprō kaxyw hāmri nē hipêêxà nē katorxà wa ōrkwý kaga nē ām hprō kôt pix mā hpānhā ri pa ho pa. Te wa tipxi nē ri pa pyrāk o wa axpēn nhīpêx o pa. Anē.

³² Na pre Tirtūm ā ja jarēnh anē. Kapērja mex tā amnepê mā mē pa xwýnhjaja na prem hprī hā mar týt kēt nē. Na prem htýt mē mjēn kot tanhmā mē hprō nhīpêx to pix ā hkamnhix no ām ja pix kēt. Māānēn te mē pahpê Kris nhī pyrā nē tām mē pahte amnhī nhīpêx nē axpēn nhīpêx o papa hā ā mē pajarēnh kot anhýr. Te ixkre tipxi kamā mē pahte Kris kôt mē papa pyrāk o ā mē pajarēnh anē.

³³ Jakamā kwa kēr ka mē amyjaja mē amā mē aprō japê ho ri apa. Te ka amā amnhī tā ma pyrāk o mē hipêx. Jao tām mē hipêx. Nē mē anijaja kēr ka mē ajaxwýja mē amjēn ā apijaam o ri apa.

6

Mē hkrajaja kot tanhmā hipêêxà nē katorxà nhīpêx to hā mē kām karō

Korosē 3.20-21

¹ Nē mē apē mē hkrajaja kēr ka mē anhīpêêxà nē mē akatorxà wa kapēr ma nē hā ano htýt nē wa hkôt ri amnhī nhīpêx rāhā ho ri apa. Mē amā Pahihti Kris kôt amnhī nhīpêx prām xà ĩ amnhī nhīpêx

anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. 2-3 Tĩrtũm kapêr ã kagã htũm kot ja jarênh kot:

Kêr ka mẽ anhĩpêêxã nê mẽ akatorxã wa kapêr ma nê wa hkôt ri amnhĩ nhĩpêx. Kot kaj mẽ ã amnhĩ nhĩpêx anê nê amex nê kritpê m atĩr nê ri apa ry nê.

Anhÿr jakamã kot kaj mẽ amã kritpê m atĩr nê ri apa hprãm hã kêr ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anê. E kêr ka mẽ ã mẽ anhĩpêêxã nê mẽ akatorxã nhĩpêx anhÿr o ri apa.

⁴ Nê mẽ apê mẽ hipêêxã nê mẽ katorxã kêr ka mẽ akrajê gryk kaxyw mẽ kãm apêr o apikênh hkêt nê. Tãm mẽ kãm akapêr nê Pahihti Jejus kapêr o mẽ ahkre ho ri apa. E kêr ka mẽ ã akrajê nhĩpêx anhÿr o ri apa.

Mẽ pahte mẽ panhõ patrãw kapêr kôt amnhĩ nhĩpêx ã mẽ pamã karõ

Korosê 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nê mẽ ate mẽ kãm mẽ axapênh o mẽ apa xwÿnhjaja kêr ka mẽ anhõ patrãw kapêr ma nê hkôt amnhĩ nhĩpêx mex o ri apa. Te mẽ ate Kris kapêr mar nê hkôt amnhĩ nhĩpêx pyrãk. Jao mẽ hã apijaãm rãhã nê.

⁶ Nom kêr ka mẽ ãm mẽ noo mã pix mã ri mẽ kãm axapênh mex kêt nê. Mããnên mẽ wa kre kamã mẽ kãm axapênh mex rãhã nê. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwÿnh jakamã kêr ka mẽ anhõ patrãw mã axapênh mex o ri apa. ⁷ Nê mẽ akĩnh kãm mẽ kãm axapênh mex nê. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nê mẽ kãm tãm amnhĩ nhĩpêx pê axapênh mex o ri apa.

⁸ Kot puj mẽ amnhĩ kaxyw Tĩrtũm mã pajamaxpêr pê pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nê nhÿrmã ja hã mẽ pahto mex rax nê. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nê amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nê.

Mẽõ patrãwjaja kot tanhmã kãm mẽ ãpênh xwÿnhjê nhĩpêx to

Korosê 4.1

⁹ Nê mẽ apê mẽ õ patrãwjaja kêr ka mẽ amã mẽ ãpênh xwÿnhjê ho mex nê mẽ ãpênh ã mẽ kãm axãkjêr o ri apa hkêt nê. Tãm mẽ hipêx. Kaxkwa kamã mẽ panhõ Pahi Maatija mããnên kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kêr ka mẽ ã mẽ hipêx anhÿr o ri apa.

Tanhmã mẽ pahte Satanasti kutã amnhĩ to htÿx to hã mẽ pamã karõ

Rõmãn 16.20; Sikũn Korĩt 10.3-5; Wam Tesarõn 5.8-11; Xiakre 4.7; Wam Pêtre 5.8-11

¹⁰ E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kêr ka mẽ Pahihti nhÿ hã kutã amnhĩ to htÿx rãhã nê apa. Ate tanhmã amnhĩ tomnuj to hprãm xãj tanhmã kot ato htã ka Tĩrtũm xihtÿx o anhõpinh xã kaxwÿnh kãm kutã amnhĩ to htÿx nê. Rÿ koja ate mẽmoj mex o anhÿr nê tanhmã ato ka mẽ amnhĩ tã hamaxpêr ã omu nê ãm omu nê arĩ Tĩrtũm xihtÿx nhÿ hã tãm ajamaxpêr mex rãhã ho ri apa. ¹¹ Na hte põristijaja pijapu kaxyw hãmri nê amnhĩ nê kãx o mẽ ê jagjê nhũm mẽ tee ri kãm mẽ hkamnhwÿr prãm hkaprÿ. Tã ja pyrã nê koja Satanasti mẽ ate kapêr kôt tanhmã amnhĩ nhĩpêx to hprãm xãj tanhmã mẽ ato ka mẽ amnhĩ tã hamaxpêr ã omu hãmri nê Tĩrtũm xihtÿx nhÿ hã kutã amnhĩ to htÿx nê. Jao mẽ ate amnhĩ nhĩpêx nyw pix o amnhĩ nhĩpêx nê mẽ ajamaxpêr nyw pix o ajamaxpêr. Kot kaj mẽ ã amnhĩ nhĩpêx anê nhũm Satanasti tee ri tanhmã kãm mẽ ato hprãm hkaprÿ.

¹² Mẽ pahpê Tĩrtũm kra jakamã mẽ kot mẽ pakutã amnhĩ xunhwÿr xwÿnh maati-jaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kôk kôt tanhmã amnhĩ tomnuj tÿx to ho pa. Nê mẽ hihtÿx. Na htem arĩ jar pika ja kamã mẽ kêp Tĩrtũm kra hkêt xwÿnhjê ho amnhĩptã nhũm htem mẽ hkôt ri htÿx tanhmã ri amnhĩ tomnuj tÿx to ho pa. Nom amnhĩ tã mẽ omunh kêt nê. ¹³ Jakamã kwa kêr ka

mê Tirtûm kot mê akarõ mã amnhĩ Karõ jagjênh xwýnhata kôt pix mã amnhĩ nhĩpêx o apa. Jao mê ate amnhĩ nhĩpêx nyw kôt pix mã mãn ri mê amnhĩ nhĩpêx. Kêr kê mẽkarõmnuti tee ri kãm tanhmã mê ato hprãm kaprý ka mê arĩ Tirtûm Karõ xihtýx nhỹ hã kutã amnhĩ to htýx rãhã ho apa.

¹⁴ Jakamã kwa kêr ka mê axkãm ajamak rom nê te ho sôrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nê môx kà ho mê ê jagjê nê mẽ hpre xà ho amnhĩ pre hpa. Nê hipy kàx o mẽ hinô kà jagjê. Hãmri nê rĩ kormã ma mẽ kãm mẽ hkurê xwýnhjê kutã mra nê axpu. No mẽ kajaja kêr ka mẽ kurom amnhĩ krãm Tirtûm kapêr jaxàr týx nê hkôt pix mã ri ajamaxpêr rãhã ho ri apa. Nê hkôt ri amnhĩ nhĩpêx mex nê. Jao te sôrdat pijapu kaxyw kot amnhĩ nhĩpêxta pyrãk.

¹⁵ Na hte sôrdatjaja hpar kà jagjê nê aa hopôx kêt nê. ãm rãhã gôr nê hikwý. Jao ra mẽ kutã pijapu kaxyw amnhĩ grõnh rãhã gôr nê hikwý. Tã kêr ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nê sôrdat pyrã nê amnhĩ grõnh kôt ma mẽ hwýr apa nê amnhĩ kamã akahak kêt nê.

¹⁶ Nê sôrdatjaja na htem amnhĩ nê amnàr xà hã kàx po jamý nê ho kuhê nhũm mẽ tee ri kãm mẽ hkamnhwýr prãm kaprý. Ja pyrã nê koja Satanasti tanhmã mẽ ato ka mẽ Tirtûm kêp mẽ anhõ pahi hã hihtýx o kot Satanasti jakrenhja mã ajamaxpêr kurê kumrêx nê ãm hkôt pix mã amnhĩ nhĩpêx. Na hte Satanasti te kot mẽ pahwýr krur rênh pyrãk o mẽ panhĩpêx. Jao xatã mẽ pahte Tirtûm kaga hprãm xàj tanhmã mẽ pahto. Nê mẽ pahte Tirtûm mã tanhmã amnhĩ nhĩpêx to pymaj xatã tanhmã mẽ pahto kaprý. Pu mẽ amnhĩ tã omu hãmri nê Tirtûm Karõ xihtýx nhỹ hã Tirtûm kôt pix mã amnhĩ nhĩpêx.

¹⁷ Nê na hte sôrdatjaja kàx o mẽ hkrãjapap jagjê nê pijapu kaxyw mẽ kutã mra nhũm mẽ tee ri mẽ hkrã jayr prãm kaprý. Ja pyrã nê kêr ka mẽ amnhĩ kaxyw Tirtûm kôt pix mã ajamaxpêr rãhã ho ri apa. Nê ra kot mẽ ato hkra mã ajamaxpêr rãhã nê. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkapyrý.

Nê sôrdatjaja na htem mẽ kutã wapo jamý nê ho kuhê. Nom mẽ papajaja mẽ panhõ wapoja na axtem kêp Tirtûm kapêr. Na hte Tirtûm Karõ mẽ pahkrã kamã kapêr o amnhĩrit pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprý. Te mẽ papijapu nhũm mẽ pahte amnhĩ nê ho pakrihkrit pyrãk o hipêx.

¹⁸ ã Satanasti pê mẽ pahte amnhĩ nê amnhĩ nhĩpêx kot anhýr. Jakamã kêr pu mẽ amnhĩ to Tirtûm pix wýr o ri papa kê Satanasti kutã mẽ pahto paxihtýx pu mẽ hkôt tanhmã amnhĩ tomnuj to hkêt nê.

Nê kêr pu mẽ mẽmoj to anhýr kaxyw nê ra Tirtûm Karõ nhỹ hã amnhĩ to Tirtûm wý. Nê kãm amnhĩ jarênh rãhã ho papa nê aa ja ho pajamakêtkati hkêt nê. Nê Tirtûm krajê piitã mẽ ho hwýr rãhã ho ri papa.

¹⁹ Nê kwa kêr ka mẽ mãânên ixto Tirtûm wýr rãhã nê. Kot tanhmã ixto nhũm ixãmnhĩx ixte mẽ kãm kapêr jarênh mex o ri mẽ hkôt ixpa kaxyw. Mẽ kot ja hã tanhmã ixto htã pa arĩ ixãmnhĩx mẽ kãm harênh mex o ri mẽ hkôt ixpa. Nê ixprĩ hã mẽ kãm Jejus kot tanhmã mẽ panê amnhĩ nhĩpêx to hã harê. Kormã mẽ kot hprĩ hã ja mar mex kêt. ²⁰ Tã ixte mẽ kãm ja jarênh kaxyw na pre Tirtûm mẽ hwýr inhmê nhũm prem hã ijaxà pa arĩ mẽ hãgjênh xà kamã ixkrĩ ho ixkrĩ. Jakamã kwa mẽ ixto Tirtûm wý kê tanhmã ixto ixihtýx to pa arĩ mẽ kãm kapêr jarênh o ixkrĩ. Ja na Tirtûm kãm hprãm nê ijaxwýja inhmã ja prãm.

Kagà jatur xà Korosê 4.7-8

²¹ Nê ot pa mẽ awýr Xikitre mẽ. Kot paj mẽ amã kagàja nhĩpêx pa nê kãm kugõ nhũm kupy nê ma mẽ awýr o mõ. Hãmri nê mẽ awýr o pøj nê mẽ amã kugõ nê mẽ amã tanhmã ijarênh to ka mẽ ijarênh ma nê akĩnh nê. Xikitre na hte Pahihtĩ mã tanhmã amnhĩ nhĩpêx mex to o pa. Kris kôt mẽ pahtõ na. Nê inhmã hapêê. ²² Tã ot pa mẽ awýr kumê. Kê mẽ awýr pøj nê mẽ amã ijarê ka mẽ kam ama nê akupým tãm akrã nê tee ri ixkukamã ajamaxpêr kêt nê. ²³ E ixkrãmnhwýjaja. Kê Mëpahpãm Tirtûm mẽ Pahihtĩ Jejus Krisja wa tanhmã mẽ akrã

hto ka mẽ ajamakêtkati nẽ axàmnhĩx ri apa.
Nẽ mẽ amã axpẽn kĩnh o ri axpẽn kôt apa.
Nẽ mẽ apiitã wa hkôt ajamaxpêr mex o ri
apa. ²⁴ E mẽ amã mẽ panhõ Pahihti Jejus
Kris kĩnh rãhã ho apa xwỳnhjaja. Kê Tĩrtũm
mẽ ato mex nẽ mẽmoj to mẽ akutã nojarêr
rãhã ho pa.

Tã ãm ja pix na hapêx. Ixpê Pawre na pa
mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhÿ hã mē ahkre o mē pa xwýnhjê hõ na pre. Na pre Jejus ã mē kãm hkurê xwýnhjaja unê nê ma krî pê Rõm wýr kumê nê kamã haxà nhũm mē hãgênh xà kamã hkrî ho hkrî. Tã nhũm arî hkrî rãhã Piripos kamã Jejus kôt hkwýjê hwýr kagàja nhîpêx nê kumê. Na prem Pawre jarênh ma nê kãm ukapri nê. Jakamã axpên kaxyw kàxpore hkwý ho akuprõ nê hwýr kumê. Hãmri nhũm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwýr kumê. Kot amnhî xà htýx kamã hamak o hkrî htã arî hwýr mē mrrar xwýnhjê mã Tirtũm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mē kãm amnhî jarênh anê. Nê mē kãm:

1 Pa Piripos kamã Jejus Kris kôt ixkwýjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awýr kumê. Nhũm Ximotre haxwýja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwýnh jakamã na pa wa mē awýr hipêx nê kumê. Mē ate Tirtũm kapêr o mē ajahkre xwýnhjê hwýr nê mē kãm mē ate tanhmã amnhî to xwýnhjê hwýr nê mē ate mē mar o akrî xwýnhjê hwýr. Mē apê Kris kôt wa ixtõ nê wa ixtõxjê ho ixpimràatã mē awýr hipêx nê kumê. ² E kê Mēpanhîpêxã maati Tirtũm mē Pahihti Jejus Kris wa mēmoj to mē akutã nojarêr rãhã nê ka mē axãmnhîx ri ajamakêtkati nê ri apa ho apa.

*Pawre kot Piripos nhõ xwýnhjê ho Tirtũm
wýr ã harênh
Epes 1.15-19; Korosê 1.9-12*

³ Na pa hte xatã mē amã ijamaxpêr o ixkrî nê mē panhõ Tirtũm kot tanhmã mē ato mex toja pa kãm ijamaxpêr nê ixkînh nê ixkrî. ⁴ Nê Tirtũm mã mē ajarênh nê mē ato kuwý. Ixkînh kãm mē ato kuwý.

⁵ Wam ixte mē awýr inhmõrta ã na pa pre mē amã Jejus kot mē panê tanhmã amnhî nhîpêx to hã harênh o ri mē akôt ixpa. Ka prem inhma nê hkôt amnhî xunhwýr týx nê hkôt amnhî nhîpêx o ri apa. Jakamã inhma axpên kaxyw ri kàxpore hkwý nhõr o apa. Te ham mē ate ixwýr mēnhãta pyrãk pa pre mē akukwak ri amnhîm ho ixujaprõr o ri ixpa pê nhãm ri mē kãm Jejus jarênh o ri mē hkôt ixpa. Na pa hte arî jam ijamaxpêr rãhã ho ixkînh nê ixkrî. Nê Tirtũm mã mē ate ixto mex ã kãm mē ajarênh o ixkrî.

⁶ Nê na pa pre ma mē awýr mõ nê mē amã Jejus jarê ka prem inhma nê hkôt amnhî xunhwý nhũm Tirtũm ja hã mē apumunh mex nê. Hãmri nê mē ate hkôt amnhî to htýx kaxyw tanhmã mē ato mē axihtýx to. Tã koja arî mē ato mē axihtýx rãhã nhũm Jejus Kris nhÿrmã akupýn mē pahwýr wrý. Koja ã mē ato mex anê. ⁷ Na hte tanhmã ixto mex tota pyrã nê tanhmã mē ato mex to ho pa nê mē akutã nojarêr rãhã ho pa.

Nê kormã mē kot ijaxàr kêt ri pa pre ma mē piitã mē kãm Jejus jarênh o ri ixpa. Nê ãm hãmri mē kãm harê. Mē kot mar nê hkôt amnhî xunhwýr týx kaxyw pa pre mē hkôt harênh rãhã ho ri ixpa. Ka prem ja kaxyw inhma kàxpore hkwý gõ pa pre ho amnhîm ixujaprõr pê mē hkôt ri mē kãm harênh o ri ixpa. Tã nhũm prem jar Rõm kamã ijaxà pa arî ixkrî htã ka mē axte ixwýr hkwý mē. Jakamã na pa hte mē amã ijamaxpêr rãhã ho ixkrî nê inhma mē akînh týx nê. ⁸ Te Jejus Kris kãm mē ajapê htýx pyrãk. Tirtũm kot ja hã ixpumunh mex.

⁹⁻¹⁰ Na pa hte mē ato kuwý nê kãm:

—Pa Tirtũm. E Piripos nhõ xwýnhjê pumu. Na mē ra kãm axpên kînh o axpên kôt pa. Kwa tanhmã mē hipêx to kê mē arî kãm axpên kînh týx pix nê. Jao axpên to mex rãhã ho pa. Nê tanhmã mē hkrã hto kê mē amnhî krãm akapêr jaxàr týx nê. Jao tãm amnhî nhîpêx mex nê hamaxpêr mex o ri pa. Nom kormã mē kot ja pumunh tohtuj

anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. ¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nẽ tãm axpên nhĩpêx o ri axpên kôt apa. Nhũm mẽ piitã ja hã mẽ apumu nẽ axpên mã Tĩrtũm mex o mex ã harê.

Pawre kãm Kris kôt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

¹² E Kris kôt ixtõ nẽ ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nẽ hã ijaxà pa amnhĩ xà htÿx kamã ijamak o ixkrĩ. Nom mẽ kot ã inhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nẽ tanhmã kot mẽ panê amnhĩ nhĩpêx to hã harênh ma. ¹³ Põristi kot inhĩhkõ hã ixtãnopxar xwÿnhjê mẽ ixwÿr mẽ mrar xwÿnh piitã ixte Kris kapêr jahkre ho ixpa pix ã mẽ kot ijaxà ã ijarênh ma. ¹⁴ Nẽ jar Kris kôt mẽ pahtõ nẽ mẽ pahtõxjaja haxwÿja ijarênh ma nẽ ohtõ nẽ ixpyrà nẽ Kris nhÿ hã amnhĩ to htÿx nẽ arĩ hkwÿjê mã kapêr jarênh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htÿx pê mẽ kãm harênh rãhã ho pa.

¹⁵⁻¹⁸ Nẽ na pre mẽ hkwÿjaja ixte mẽ amã Kris jarênh o ixpa hã ijarênh ma nẽ hã ixkamã gryk nẽ axtem hamaxpêr nẽ ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwÿr mõi xwÿnhjê hwÿr mõi nẽ kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkôt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nẽ hkaprĩ nẽ rĩ amnhĩ pumu. Nã kot paj anê.

Anhÿr o hamaxpêr tã pa mẽ harênh ma nẽ ixkaprĩ hkêt nẽ. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nẽ ixkaprĩ. Kwãr mẽ mãmrĩ ri ixkamã gryk kãm kapêr jarênh o ri pa. Pa mẽ harênh ma nẽ ixkĩnh nẽ. Nom

na hte mẽ hkwÿjaja jajê rom kãm ixkĩnh kãm mẽ kãm Kris kapêr jarênh o pa. Nẽ tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tĩrtũm kot jar mẽ hwÿr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmrĩ tanhmã inhmã hamaxpêr to xà hkôt mẽ ujarênh mexja jarênh o pa. Mẽ kãm ixkĩnh kãm harê rÿ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wÿr o apa jakamã koja Karõja ixkaxyw tanhmã jar Rõm kamã pahiti nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akôt ixpa. ²⁰ Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nẽ arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nẽ ixpĩ pa mẽ kutã mẽ kãm amnhĩ to htÿx nẽ ixãm rãhã nhũm mẽ ixpĩ pa ijamakêtkati nẽ ty. Kê mẽ ja hã ixpumu nẽ ixtã Kris mex o mex ã harê. ãm Jejus kãm hprãm xà hkôt pix mã na inhmã amnhĩ nhĩpêx prãm. ²¹ Tã kot paj tanhmã amnhĩ to nẽ arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nẽ hã ixpĩ pa ty nhũm Tĩrtũm ma kaxkwa hwÿr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa. ²²⁻²³ Tã nhÿ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nẽ Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nẽ arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mããnên inhmã mex. ²⁴ No mẽ amã na arĩ ixtĩr nẽ ixpaja mẽ amã hprãm ²⁵ jakamã kot paj pêr tokyx ixtyk kêt nẽ. Kot paj arĩ ri mẽ amã Kris kôt mẽ ato mẽ axihtÿx o ri mẽ akôt ixpa. Jao ãm ho hkrãre ka mẽ ra amnhĩ kaxyw kãm ajamaxpêr nẽ hkôt amnhĩ xunhwÿr tÿx nẽ. Jao akĩnh nẽ apa. ²⁶ Tã kot paj nhÿrmã akupÿm ixtĩr rãhã mẽ awÿr mõi ka mẽ ixpumu nẽ akĩnh nẽ. Jejus Kris kot akupÿm ixkator ã akĩnh nẽ. Hãmri

nē ixtā Jejus mā mex o mex ã harē.

Mē pahte Jejus ã pahpunuj tā mē pahte amnhĩ to ht̄yx ã mē pamã karō

Rukre 6.22; Sikũn Korõt 2.14-16; Xiakre 1.12; Jutre 3

²⁷ Jakamã e kêr ka mē Jejus Kris kapêr kôt pix mã amnhĩ nhĩpêx. Nē axpên kôt axpên to axiht̄yx pê mē kãm Jejus kot tanhmã mē panê amnhĩ nhĩpêx to hã harēnh o ri apa kê mē ama nē mē pahpyrà nē hkôt amnhĩ xunhwỳ. E kêr ka mē ã amnhĩ nhĩpêx anh̄ȳr o ri apa. Kêr pa nh̄yrmã mē hagjēnh xàja rũm ixkator japêr nē nh̄yri ja hã mē ajarēnh ma rỳ ma mē anhõ krĩ hwỳr mō nē ja hã mē apumu nē ixkĩnh nē. ²⁸ Nom kwa kêr ka mē amã mē kot Kris ã tanhmã mē ato xwỳnhjê puma hkêt nē. Mē kot tanhmã mē anhĩpêx kati hto htã kêr ka mē kutã amnhĩ to ht̄yx nē mē hkôt apa. Kêr kê mē amnhĩ tã mē apumu nē tee ri hamaxpêr hãmri nē axpên mã:

—Kwa mē pahte Kris ã tanhmã mē hipêx to htã na htem amnhĩ to ht̄yx nē arĩ mē pamã harēnh o ri pa. Pêr mē kãm mē pahpuma hkêt. Mãn hte Tĩrtũm tanhmã mē ho nhũm mē ȳ hã kãm mē pahpuma hkêt nã? Kwa tanhmã kot puj mē ho nhũm mē Jejus kapêr jarēnh o pata kaga? Nã kot puj mē ãm tee ri hã tanhmã mē ho kaprỳ. Mãn ãm hãmri na htem nh̄yrmã Tĩrtũm kuri htĩr tũm nē pa ho pa hã amnhĩ jarēnh o pa nã? Anē.

Koja mē ã mē ajarēnh anē. Tĩrtũm kot mē ato mē axiht̄yx ã mē apumunh kôt. ²⁹ Na pre tanhmã mē ato ka mē Kris kôt amnhĩ xunhwỳ. Tã mē kot tanhmã hã mē anhĩpêx to htã na hte Tĩrtũm mē kutã tanhmã mē ato ka mē ȳ hã amnhĩ to ht̄yx nē apa. ³⁰ Ijaxwỳja na pa hte amnhĩ xà ht̄yx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarēnh ma nē hã ixpumu. Tã ota kê mē ra axte tanhmã hã inhĩpêx to. Pa kê amnhĩ xà ht̄yx kãm ijamak o ixkrĩ ka mē ijarēnh ma. Tã xep mē ixpyrà nē Kris ã amnhĩ xà ht̄yx kamã ajamak o apa. Nom kwa kêr ka mē tee ri amnhĩ kukamã ajamxpêr o akaprĩ nē apa hkêt nē.

2

Jejus kãm mē pajapê xàj tanhmã kot amnhĩ nhĩpêx to hã harēnh

Rômãn 15.5-6; Epes 4.1-6; Piripos 2.18

¹ Nē ra mē pahte Jejus kôt amnhĩ xunhwỳr jakamã pu mē tee ri amnhĩ kukamã pajamxpêr o pahkaprĩ nē ri papa hkêt nē. ãm kãm mē pajapêja mã pajamxpêr rãhã ho pahkĩnh nē pajamakêtkati nē ri papa. Nhũm Karō mē pahkarō mã agjê nē mē pahto mex nē mēmoj to mē pakutã nojarêt o ri mē pakamã pa. ² Tã kêr ka mē axpên mar mex nē mēmoj tã axpên mã axàkjêr o ri apa hkêt nē. Te ri ixkre pixi kamã mē atipxi nē axpên kôt amnhĩ nhĩpêx pyràk. Nē Tĩrtũm kãm hprãm xà hkôt pix mã ajamxpêr o ri apa. Nē mē amã axpên kĩnh o ri apa. Kot kaj mē ã amnhĩ nhĩpêx anê pa ja hã mē apumu rỳ hã mē ajarēnh ma nē ixkĩnh t̄yx kumrêx.

³ Nē kwa kêr ka mē axpên pumu nē ã ajamxpêr anh̄ȳr kêt nē. Mē ajamxpêr o:

—Tk. Kot pa ri tanhmã jahti ho ajuta hto ho ixpa hkêt nē. Ixte amnhĩ to rax o hakrenh kēnã kot pa hkêt ri ho ajuta. Kê tãm mãn tanhmã ixto ajuta hto.

Anh̄ȳr o ajamxpêr kêt nē. Kêt nh̄yri mēhõ pumu nhũm tanhmã kute ka hã omu nē ajamxpêr o:

—Hêxta waa nē. Kwa tanhmã kot pa we ho ajuta htoo?

Anh̄ȳr o ajamxpêr hãmri nē ajamxpêr xà hkôt tanhmã ho ajuta hto.

⁴ Jao Jejus pyrà nē mēmoj to axpên kutã anojarêt o ri apa. No ri amnhĩ pix kukamã ajamxpêr o apa hkêt nē. ⁵ Kêr pu mē te Jejus tanhmã hamaxpêr toja pyràk o pajamxpêr o ri papa.

⁶ Kêp Tĩrtũm Kra kumrêx jakamã te uràk tã xà na pre ja hã amnhĩ pumu nē amnhĩ pix kukamã ã hamaxpêr anē nē hamaxpêr o:

Te ixte Tĩrtũm pyràk jakamã mēmoj piitã inhõ na. Jakamã kot paj jar kaxkwa kamã inhmex nē ixkĩnh nē ixpa ho ixpa nē aa rer nē nh̄yh̄m inhmõr kêt kumrêx. Anh̄ȳr o na pre hamaxpêr? Nã na pre ã hamaxpêr anh̄ȳr kêt nē.

⁷⁻⁸ Kãm mē pajapê xàj na pre kaxkwa kamã mēmoj mex piitã rer pa nē man mē

pahwÿr wrÿ nē mē pahpyrà nē ĩ ho katorxà nhōhy rūm kato.

Kêp mē panhō Pahihtti htã te kêp mē panhĩõ nē te kot amnhĩ to grire pyrãk o amnhĩ nhĩpêx o ri pa.

Nē Tĩrtũm kãm hprãm xà hkôt pix mã amnhĩ nhĩpêx o pa.

Nē ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mē kãm xa nē tanhmã amnhĩ tã mēhõ hto hkêt nē.

Na prem hipêx kati nē. Te kêp mē kot amnhĩ tomnuj tÿx xwÿnhjê nhĩpêx pyrãk o hipêx nē pĩ kahpa hã kunhõ nē kupĩ.

Tã no nhũm mē kêp tanhmã amnhĩmnuj to hkêt nē arĩ mē kãm xa. Mē panê na pre ã amnhĩ nhĩpêx anê.

⁹ Hãmri nhũm Tĩrtũm ã kot amnhĩ nhĩpêx anhÿr ã omu nē akupÿm ho htĩr nē akupÿm amnhĩ wÿr ho api.

Nē mex o mex ã harê.

Nē kot nhÿrmã mē pahpiitã mē pahto amnhĩptàr kaxyw mē pakaxyw ãm.

¹⁰ Jakamã kot puj mē nhÿrmã pahpiitã Jejus kutã pahkõnkrã ho rôrõk nē pahkrĩ hpa nē kàx pêê kãm mex o mex ã harê.

Mē pahpiitãã. Kaxkwa kamã mē pa xwÿnhjaja nē pika piitã hkôt mē papa xwÿnhjaja.

Nē mē htyk xwÿnh piitã koja mē akupÿn htĩr pu mē pahpimràatã Jejus kutã pahkõnkrã ho parõrõk nē pahkrĩ hpa nē kãm mex o mex ã harê.

¹¹ Nē kãm:

Pa Pahihtti Jejus. Nà ãm hãmri na apê mē inhõ Pahi Maati hã apyxi mex na ka.

Jakamã mē ixtõ kot paj mēmoj tã tanhmã amã karõ hto? Nà kot paj mē ixtõ ã amnhĩ nhĩpêx anhÿr kêt nē. Anê.

Kot puj mē nhÿrmã ã Jejus mã pakapêr anê. Jao mããnên Tĩrtũm hihtÿx o hihtÿx nē àhpumunh o àhpumunh ã omu. Nē mex o mex ã omu.

Te mē pahpê kanhêti pyrãk ã mē pajarênh Matêwre 5.14-16

¹²⁻¹³ Tã kwa ixkrãmnhwÿjaja. Inhmã mē akĩnh. Kwa kêr ka mē arĩ Tĩrtũm kôt amnhĩ nhĩpêx mex rãhã nē. Te ixte mē akamã ixpare ri mē ate amnhĩ nhĩpêx mexta pyrãk

o ixwakre kamã amnhĩ nhĩpêx mex o ri apa. Na pre ra Tĩrtũm mē panê mē pahte amnhĩ tomnuj rē nē tanhmã mē pahto pu mē ÿ hã kapêr kôt amnhĩ nhĩpêx o ri papa. Jakamã kwa kêr pu mē axte tanhmã amnhĩ tomnuj to ho papa hkêt nē. Nē mē pahte Tĩrtũm kapêr kwÿm ri amnhĩ nhĩpêx pymaj ãm hkôt pix mã amnhĩ nhĩpêx o ri papa.

¹⁴ Nē kêr ka mē mēmoj to anhÿr kaxyw nē agryk kãm tanhmã ri ho hkêt nē. Nē mēmoj tã axapênh kaxyw nē ri hã axpên mã akapêr kati kamã ho anhÿr kêt nē. ¹⁵⁻¹⁶ Mē kot amnhĩ tomnuj xwÿnhjaja na htem ã amnhĩ nhĩpêx anhÿr o pa. No kêt mē kajaja. Mē ate mē hkôt apa htã kêr ka mē hkôt amnhĩ nhĩpêx kêt nē. Mē kurom mē apê Tĩrtũm kra jakamã kêr ka mē hkôt pix mã amnhĩ nhĩpêx o ri apa. Nē tanhmã amnhĩ tomnuj to rÿ tanhmã ajamaxpêr punuj to hkêt nē. Mē kot amnhĩ tomnuj xwÿnhjaja te ri kamãt kô kamã ri mē kêp àhkĩnh o ri mē pa xwÿnhjê kot amnhĩ nhĩpêx pyrãk. Tã kot kaj mē hkôt tãm ri amnhĩ nhĩpêx o apa nē te ate kanhêtija kamãt kô kamã hirã ho harir pyrãk o amnhĩ nhĩpêx. Jao mē kãm Tĩrtũm kapêr jarênh o ri mē hkôt apa. Mē kot amar nē apyrã nē nhÿrmã kuri htĩr tũm nē pa ho pa kaxyw. Kot kaj mē ã amnhĩ nhĩpêx anê nhũm nhÿrmã Jejus Kris akupÿn mē pahwÿr wrÿk ã arĩgrota ã pa mē apumu nē ixkĩnh nē. Nē ixkĩnh kãm Jejus mã mē ajarê nē kãm mē ajarênh o:

—Kwa Pahihtti. E jajê pumu. Na pa pre mē kãm akapêr jarênh o ri mē hkôt ixpa nhũm mē inhmar tÿx nē nē akapêr kôt amnhĩ nhĩpêx o ri pa. Jakamã na pa pre mē kãm akapêr jarênh kaprÿ hkêt nē.

Anhÿr o kãm mē ajarê. ¹⁷ Na pa pre mē akôt mē amã Tĩrtũm kapêr jarênh o ri ixpa ka prem inhma nē hkôt amnhĩ xunhwÿ. Jakamã te ixte Tĩrtũm mã mē ato ixkĩnh xà nē kãm mē anhõr pyrãk.

Nē koja jar Rõm nhõ pahihtija tanhmã ixto hkêt japêr. Rÿ tanhmã ixto. Nom kwãr mē mãmrĩ tanhmã kãm ixto hprãm xà hkôt tanhmã ixto rÿ ixpĩ. Koja mē ã ixte mē anhĩpêx anhÿr ã ixpĩ pa ixkĩnh nē. Nē tanhmã ijamaxpêr to hkêt kãm ty. Jakamã na pa ra ã mē kot inhĩpêx anhÿrja kukamã mē amã amnhĩ kĩnh ã amnhĩ jarê ka mē

inhma. ¹⁸ Tã kêr ka mẽ ixpyrà nẽ ajaxwỳja ixtã akĩnh nẽ apa.

Ximotre mẽ Eparoxit wa harẽnh

¹⁹ Nẽ koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mō nẽ ri mẽ akõt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupỳn ixwỳr mō nẽ inhmã mẽ ajarẽ pa mẽ ajarẽnh ma nẽ ixkĩnh nẽ tee ri mẽ akukamã ijamaxpěr o ixkrĩ hkêt nẽ. ãm tãm mẽ akukamã ijamaxpěr o ixkrĩ. ²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarẽnh rãhã ho pa. ²¹ Nom jar mẽ piitã Ximotre kĩnhã amnhĩ mex pix kukamã hamaxpěr o pa nẽ kãm Jejus Kris kõt tanhmã amnhĩ nhĩpêx to ho pa hprãm kêt nẽ.

²² Ximotre te kêp ixkra pyrãk. Na hte ixkõt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarẽnh mex jarẽnh o wa ri mẽ hkõt ixpa. ²³ Tã koja mẽ tanhmã ixtã xypẽn mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awỳr Ximotre mẽ kê ma mẽ awỳr mō nẽ mẽ amã tanhmã ijarẽnh to.

²⁴ Nẽ koja Pahihti Jejus kãm ja mex pa ijaxwỳja ma mẽ awỳr mō pu mẽ axte xypẽn pumu.

²⁵ Nẽ kot paj tokyx ma akupỳm mẽ awỳr Kris kõt mẽ pahtõ Eparoxit mẽ. Na ka prem kãm kàxpore gō nhũm man ixwỳr o mō nẽ inhmã kugō. Hãmri nẽ jar inhmã àpẽn rax nẽ ixpyrà nẽ mẽ ujarẽnh mexja jarẽnh o pa. ²⁶⁻²⁷ Tã ra à htỳx nẽ. Kironhỳx pre mẽ pahpê ty. Tã nhũm Tĩrtũm omu nẽ kamã ukapĩ nẽ. Nẽ mããnẽn pa ixkamã ukapĩ nẽ. Nẽ tee ri ixte à htỳx ã omunh nẽ ixkapĩ htỳx pymaj akupỳm inhmã ho mex nhũm ra akupỳm mex nẽ ri pa. Hãmri nẽ kãm mẽ apumunh prãm nẽ. Mẽ ate à htỳx ã harẽnh mar nẽ akapĩ hã mẽ ajarẽnh ma nẽ tee ri mẽ akukamã hamaxpěr. ²⁸ Jakamã inhmã akupỳm tokyx mẽ awỳr mẽn prãm. Tã koja mẽmo arĩgro hã mẽ awỳr pōj ka mẽ omu nẽ akĩnh nẽ tãm ajamaxpěr. Pa ijaxwỳja jar ixkĩnh nẽ tãm ijamaxpěr. ²⁹⁻³⁰ Na ka prem ixwỳr amẽ nhũm man ixwỳr mō nẽ

jar ixri mẽ kãm Kris kapěr jarẽnh o ri mẽ hkõt pa rãhã nhỳx hã ty nom kot amnhĩ kamã kahak kêt. Jakamã kê akupỳm mẽ awỳr pōj ka mẽ omu nẽ akĩnh nẽ. Nẽ kahti hkõt amỳ nẽ ho mex nẽ. Kêp Kris kõt mẽ pahtõ mex kẽnã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỳr o pa.

3

Mẽmoj tã mẽ pahpumunh kõt Tĩrtũm kot tãm mẽ paxunhwỳr ã harẽnh

Piripos 2.18, 4.4

¹ E Kris kõt ixtõ nẽ ixtõxjaja. Kris kêp mẽ panhõ Pahihti jakamã kwa mẽ jam ajamaxpěr nẽ akĩnh rãhã ho ri apa.

Na pa ra mẽ amã mẽmoj jarẽnh rax nẽ. Nẽ hã kagà rax tã kormã inhmã ja ho anhỳr kaga hkêt nẽ. Kot paj axte mẽ amã hkwy hã kagà. Mẽ ate hã ano htỳx nẽ ho apa kaxyw. ² Jakamã e kwa mẽ okora. Kêr ka mẽ amnhĩ nẽ mẽ kot Tĩrtũm kapěr o hêx xwỳnhjê pumunh mex o ri apa. Na htem tanhmã mẽ amã kapěr ho pa nẽ mẽ amã:

—Kot kaj mẽ ixpê Ijaewjê pyrã nẽ amnhĩ my kwryt kà jakà hãmri nẽ apê Tĩrtũm kra. Anẽ.

³ Nom ja kot anhỳr kêt. Mẽ pahte amnhĩ jakàr kõt mẽ pahpê Tĩrtũm kra hkêt. ã kot anhỳr ronhỳx pu mẽ amnhĩ krã hkõt tanhmã amnhĩ nhĩpêx to ho pahpê hkra. Nom ja kot anhỳr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpěr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karõ nhỳ hã kãm mex o mex ã harẽnh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ. ⁴ Kop ãm amnhĩ krã hkõt mẽ pahte amnhĩ to Tĩrtũm kra ronhỳx pa ra amnepêm amnhĩ to hkra nẽ ri ixpa. Na pa pre ixpê hkra hprãm xaj amnhĩ krã hkõt tanhmã ri amnhĩ nhĩpêx to rax o ixpa nom ã amnhĩ nhĩpêx anhỳr kaprỳ. E pa ja hã mẽ amã amnhĩ jarẽ ka mẽ ijarẽnh ma.

⁵ Na pa pre ixkato nẽ kormã ixtã semãn pixire nhũm mẽ ixpê Ijaew ã inhmy kwryt kà krãhta. Nom pa ã mẽ kot inhĩpêx anhỳr kõt ixpê Tĩrtũm kra hkêt nẽ. Nẽ inhĩpêxã

hkôt ixpê finat Pějãmĩ kanrêhã htàmnhwý jakamã ixpê Ijaew mex na pa. Nê Ijaew kapêr o ixkapêr o ri ixpa. Nom ja kôt ixpê Tĩrtũm kra hkêt. Nê mãânên ixpê Parijew nhõ xwýnh jakamã na pa pre Tĩrtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixpa hprãm. ⁶ Jao tee ri mẽ kot Jejus kôt amnhĩ nhĩpêx xwýnhjê pumu nê mẽ homnuj tỳx o ri ixpa. Na pa pre ijamaxpêr o: “Nà mũjjaja na htem mẽ ixkwým ri amnhĩ nhĩpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tĩrtũm nhỹ hã kapêr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

⁷ ã na pa pre ixpê Tĩrtũm kra hprãm xàj amnhĩ nhĩpêx anhỹr o ixpa. Tã nom ãm ã amnhĩ nhĩpêx anhỹr hkaprý. Na htem ã ri amnhĩ nhĩpêx anhỹr kôt kêp Tĩrtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahihti pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nê amnhĩ katut kôt mênh nê axte kãm ijamaxpêr kêt pyrãk. Jao amnhĩ kaxyw Jejus kôt pix mã ijamaxpêr o ri ixpa. ⁹ Nom kormã ã ijamaxpêr anhỹr kêt ri na pa pre ixtỳx ri ijamaxpêr o:

—Nà ixte Mojes kot Tĩrtũm nhỹ hã kapêr kôt amnhĩ nhĩpêx o ixpa jakamã koja Tĩrtũm ja hã ixpumu nê ixto hkra.

Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwý nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê. ¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupým htĩr nê hihtỳx nê àhpumunh tỳx o tanhmã amnhĩ nhĩpêx to ho pa. Tã ijaxwýja inhmã uràn ã amnhĩ nhĩpêx anhỹr prãm. Nê inhmã uràk nê

amnhĩ xà htỳx kutã amnhĩ to htỳx nê ixpa hprãm. Mẽ kot hã ixpĩr mã tã pa uràk nê Tĩrtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã uràk nê hã ty. Ja na inhmã ho anhỹr prãm. ¹¹ Kê Tĩrtũm kot hipêxta pyrã nê akupým ixto ixtĩr pa wa kuri ixtĩr tũm nê ixpa ho ixpa. ¹² Inhmã Kris kôt pix mã amnhĩ nhĩpêx o ixpa hprãm tỳx kumrêx. Kormã ixte hkôt amnhĩ nhĩpêx o inhmõr nê kormã hatur xãm mênh kêt tã inhmã tokyx hatur xãm mênh prãm. Na pa ã inhmã amnhĩ nhĩpêx anhỹr prãm tỳx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nê na pa kormã ixprĩ hã Kris kot amnhĩ nhĩpêx mar o inhmõr nê hatur xãm mênh kêt tã inhmã hkôt amnhĩ nhĩpêx o inhmõr nê tokyx hatur xãm mênh prãm. Ja kaxyw na pre Jejus Kris amnhĩ kaxyw ixta. ¹³ Na pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rênh par pyrãk o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴ Koja nhỹrmã Tĩrtũm ixpê Kris kwý hã amnhĩ wýr ixwý nê inhmã:

—E amnê ixwýr api Pawre. Kot kaj jarãhã amnê mẽ ixwýr api.

Anhỹr o nhỹrmã inhmã kapêr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mõ. Nà kot paj gaa nê hkôt pix mã amnhĩ nhĩpêx mex o ri ixpa. ¹⁵ Kwa kêr pu mẽ pahpiitã ã pajamaxpêr anê. Jao amnhĩ wýr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwý kênã. Nom kot ka mẽ atõ ja kaxyw tee ri amnhĩ kukamã ajamaxpêr nê ajamaxpêr o:

—Nà tanhmã kot paj we amnhĩ to nê Jejus kôt amnhĩ nhĩpêx mex rãhã o ri ixpa? Ja kaxyw ixàhpumunh tỳxre hã. Anê.

Hãmri nê ã ajamaxpêr anhỹr o apaja apê hihtỳx japêr. Hã koja Tĩrtũm hprĩ

hã tanhmã amã ja kukamã harënh to nê kaxyw ato axihtýx ka ixpyrà nê hkôt pix mã ri amnhĩ nhĩpêx o apa. ¹⁶ Jakamã kêr pu mẽ ãm Tĩrtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtõ nê ixtõxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nê ixpyrà nê hkôt amnhĩ nhĩpêx o ri apa. Hãmri nê nhĩri mẽ kot ixpyrà nê ã amnhĩ nhĩpêx anhỹr xwýnhjê hõ pumu nê uràk nê ã amnhĩ nhĩpêx anê. ¹⁸⁻¹⁹ Jejus kot mẽ pamã mẽ pahte amnhĩ tomnuj mýrapê pĩ kahpa hã mẽ panê htykja nhũm mẽ ra ohtõ nê hprĩ hã mar tã hkôt amnhĩ xunhwýr kêt nê. Mẽ kãm ã kot amnhĩ nhĩpêx anhỹrja ã mar prãm nõkati. Jakamã te mẽ kãm Jejus kurê xwýnh pyræk. Na htem hã hpijaàm kêt kãm tanhmã ri amnhĩ tomnuj to ho pa. Nê kãm amnhĩ mex pix prãm. Nê tanhmã amnhĩ tomnuj to nê ja hã amnhĩ pumu nê hkĩnh nê. Nom tee ri ja hã amnhĩ pumu nê hkaprĩ nê ri pa hkêt nê. Tã ã mẽ kot amnhĩ nhĩpêx anhỹr jakamã koja mẽ nhỹrmã ma mẽ kot amnhĩ xà htýx kamã hamak o pa tũm xàta wýr hapêx. Nà koja mẽ ã amnhĩ nhĩpêx anê. Ra ixte mẽ amã ja hã mẽ harënh rax tã pa axte mẽ amã mẽ harê. Inhmã mẽ hkaprĩ hkôt na pa hte xatã mẽ amã ja hã mẽ harê. ²⁰ Kêt mẽ papajaja mẽ kurom mẽ pahpê kaxkwa nhõ xwýnh nom kormã. Koja nhỹrmã Jejus Kris akupýn mẽ pahwýr kaxkwa rũm wrý. Mẽ papytår xwýnh maati Pahihtija akupýn wrý hãmri nê ma akupým amnhĩ kôt mẽ pahto api. Jakamã na pu htem arĩ pahkĩnh pẽ amnhĩ wýr kamã pajamak rãhã ho ri papa. ²¹ Na pu htem jar pyka ja kamã Jejus kĩnhã paxirerek nê pahpunuj nê ri papa. Nom koja nhỹrmã akupýn mẽ pahwýr wrý hãmri nê amnhĩ pyrã nê mẽ pamã mẽ panhĩ nyw gõ pu mẽ uràk nê paxihtýx kãm pahtrĩ tũm nê papa ho papa. Æ kot mẽ panhĩpêx anhỹr kaxyw àhpumunh o àhpumunh. Tã koja àhpumunh týx kãm mẽmoj piitã ho amnhĩptår pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ nê ixtõxjaja. Inhmã mẽ ajapêê. Na pa hte mẽ ato ijamak o ixkrĩ nê mẽ amã ijamaxpêr nê ixkĩnh nê. Nê jar mẽ pahkwýjê mã mẽ ajarënh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nê wa ka Ewox mẽ Sĩxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre nê tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nê mẽmoj tã axpên kamã agryk o ri apa.

³ Nê ka Xikitre. Apê ixkrãmnhwý mex jakamã kêr ka axpên tã wa nita wa kãm akapêr kãm axihtýx nê kê war ama nê akupým tãm axpên nhĩpêx. Na pre wa ra Kremën mẽ hkwyjê mẽ hpimràatã ixpyrà nê Jejus kot tanhmã mẽ panê amnhĩ nhĩpêx to hã harënh o ri pa. Tĩrtũm nhõ kagà kamã mẽ hixi piitã hikwý. Mẽ pahtrĩ tũm nê mẽ papa mã xwýnhjaja ra Tĩrtũm nhõ kagà kamã mẽ panhĩxi jaxwýr par.

⁴ Nê kêr ka mẽ apê Pahihti hkwyjê hã akĩnh nê ri apa. Mẽ ate ã amnhĩ nhĩpêx anhỹr o apaja na pa inhmã hprãm týx jakamã kot pajaxte mẽ amã harê. Kwa kêr ka mẽ akĩnh nê ri axpên kôt apa.

⁵ Pahihti Jejus ra akupýn mẽ pahwýr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nê kêr ka mẽ tee ri amnhĩ kukamã ajamaxpêr o ri apa hkêt nê. Arĩ amnhĩ to Tĩrtũm wýr rãhã nê. Kot ka mẽ mẽmo arĩgro hã apê amrakati japêr nê tee ri ja hã amnhĩ pumu nê amnhĩ to awý kê mẽ ama nê mẽ amã mẽmoj gõ. Rý mẽ ate mẽmoj tã hwýr xwýnhta tanhmã mẽ amã hipêx to ka mẽ amnhĩ tã omu nê kãm:

—Nà ãm hãmri na ka ã inhĩpêx anê nê inhmã ja gõ Tĩrtũm. Amex o amex.

Anhỹr o kãm amnhĩ jarê. ⁷ Kot kaj mẽ ã amnhĩ to hwýr anhỹr o ri apa nhũm tanhmã mẽ akrã hto ka mẽ mẽ apê Jejus Kris kwý hã ajamakêtkati nê axãmnhix ri apa. Hãmri nê mẽmoj tã tee ri amnhĩ kukamã ajamaxpêr o ri akaprĩ nê apa hkêt

nē. Ām akīnh rāhā ri apa. Tīrtūm kot tanhmā mẽ pahto nhūm mẽ pajamakêtkati nē ri mẽ papaja mẽ pahte amnhī tā omunh kêt. Ām tapxipix kot ā mẽ panhīpêx anhÿr kukamā àhpumunh tÿx.

⁸ E Kris kôt ixtō nē ixtōxjaja. Nà ixkapêr ā kagà jatur xà na ja. Kwa kêr ka mẽ ixujarênh mar tÿx nē hkôt amnhī nhīpêx o apa.

Nē kêt ka mẽ axàpênh mex pix kukamā ri ajamaxpêr o apa.

Nē mẽmoj mex pix kukamā ri ajamaxpêr. Nē axpên mã akapêr mex pix kukamā ri ajamaxpêr.

Nē akatāt kôt akapêr xàptàr pix o axpên mã akapêr hkukamā ri ajamaxpêr o ri apa.

Nē tām ri amnhī nhīpêx hkukamā mǎn ajamaxpêr o ri apa.

Nē mẽ piitā ri mẽ ho mex o apa hkukamā ajamaxpêr.

Nē mẽ akapêr mex pix kukamā mǎn ajamaxpêr o ri apa.

E kêt ka mẽ ā amnhī nhīpêx anhÿrja kukamā ajamaxpêr rāhā ho ri apa.

⁹ Nē mẽ akôt ixpare ri na pa pre Kris kôt amnhī to mex pix nē tām ixkapêr o ri ixpa. Tā kêt ka mẽ ixpyrà nē ā amnhī nhīpêx anē. Koja Tīrtūm ja hā mẽ apumu nē mẽ akôt ri pa ho pa. Kêp mẽ pamā mẽ paxàmnhīx pajamakêtkati xà nhõr xwÿnh na.

Mẽ kot Pawre hwÿr mẽmoj mẽnh nhūm kot omunh nē hkīnh ā harênh

Sikūn Korīt 11.7-9; Piripos 1.5

¹⁰ Nē amnepêm na ka prem xatā tanhmā ixtō mex to ho ri apa. Tā axte ā inhīpêx anhÿr prām nom mẽ apê awry nē ixpa jakamā ka xep prem tee ri tanhmā ixtō mex to hkukamā ajamaxpêr kaprÿ. Tā jar mẽ kot ijaxàr ā ijarênh ma nē ixwÿr Eparoxit mẽ nhūm man ixwÿr mō nē inhmā kàxporeta gō. Mẽ amā ijapê hā ixwÿr amē pa omu nē ixkīnh tÿx nē. Nē ixkīnh kām Tīrtūm mã mẽ ajarê. Ām hāmri na ka prem ixwÿr amē.

¹¹⁻¹² Nē na pa hte tanhmā ixkute htā arī ixkīnh nē ijamakêtkati nē ri ixpa. Jakamā kot pa mẽmo arīgro hā ixpê amrakati nē inhmā prām japêr tā no ãm tee ri amnhī kukamā ijamaxpêr o ri ixkaprī hkêt nē.

Arī ixkīnh rāhā ixàmnhīx ri ixpa. Rÿ pa inhō mẽmoj rax japêr nē mãânên ixkīnh nē ixàmnhīx ri ixpa. Na pa pre tōhā inhō rax nē ixpa. Nē tōhā inhō hkêt nē ixpa. Tā arī ixkīnh rāhā nē ixpa ho ixpa. ¹³ Na hte Kris mẽmoj piitā hkukamā ixtō ixihtÿx pa ÿ hā mẽmoj kutā ixihtÿx nē ixpa. Jao mẽmo arīgro hā inhmā prām tÿx nē ri ixpa htā ÿ hā kutā ixihtÿx nē ixàmnhīx ri ixpa. ¹⁴ Tā jar ixpunuj nē ixkrī ka mẽ ijarênh ma nē ixwÿr kàxpore hkwy rē. Ām hāmri na ka prem ixwÿr arē. ¹⁵ Amnepêm na pa pre mẽ anhō pika pê Masetōn rūm ixkato nē mẽ piitā mẽ kām Jejus kot tanhmā mẽ panê amnhī nhīpêx to hā harênh o ri ixpa ka mẽ xatā ixwÿr kàxpore hkwy rē pa ho amnhīm ixujaprôr o ri mẽ hkôt ixpa. Mẽ apê Piripos kamā Kris kôt ixtō nē ixtōx pixjaja na ka prem ā inhīpêx anē. Krī hkwy kamā Kris kôt mẽ pahkwÿjaja na mẽ akīnhā ā inhīpêx anhÿr kêt nē. Ām mẽ kapxipix na ka pre ā ixtō mex anē. ¹⁶ Tesarōn kamā ixpare ri na pa pre ixpê amrakati kumrêx nē ri mẽ hkôt ixpa ka mẽ xatā ixwÿr kàxpore hkwy rē pa pre ho amnhīm ixujaprôr rāhā ho ri mẽ hkôt ixpa. ¹⁷ Nom mẽ ate ixwÿr hkwy rēnh kaxyw mẽ akamā ijamak o ri ixpa hkêt nē. Rÿ ijamaxpêr o:

—Ko. Koja Piripos nhõ xwÿnhjaja ijarênh ma nē kām ixkaprī nē ixwÿr kàxpore hkwy rēnh japêr.

Anhÿr o mẽ akukamā ijamaxpêr kêt nē. Nom ra mẽ ate ixwÿr hkwy rēnh jakamā koja Tīrtūm ja hā mẽ apumu nē mẽ ato mex nē. Ā mẽ pahte axpên kutā panojarêr anhÿrja na kām hprām.

¹⁸ Tā nhūm Eparoxitja ham mẽ arūm kato nē man ixwÿr mō nē inhmā kàxporeta gō. Kwa na ka mẽ inhmā òr rax nē. Koja tokyx ixpê hapêx kêt pa kritpêm ho ixàpkur o ixkrī. Tā ot pa ho kōta nē tanhmā hkre kamā kute pumunh xà hkôt hā kagà nē mẽ awÿr kumē. Nà mẽ ate ixwÿr axàmnhōrta na Tīrtūm omu nē ixtā mẽ apumu nhūm ja kām mex kumrêx. Te mẽ kot mẽ hkuxwaxà hpār nhūm mẽ kām mexta pyrāk nhūm ja kām mex nē. ¹⁹ Nà koja Tīrtūm mẽ apê Jejus Kris kwÿ hā mẽ amā mẽ ate mẽmoj to presija xà nhõr rāhā ho pa. Mẽmoj piitā kêt ò kênā.

²⁰ E kêr pu mẽ Měpanhĩpêêxà maati Tĩrtũm mã mex o mex ã harẽnh rãhã o papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpěr mẽ. Mẽ ixpyrà nẽ mẽ apê Tĩrtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽn. ãm jar mẽ ixpê Tĩrtũm krajê piitã pa mẽ awỳr ixpěr mẽ.

²³ E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Korosê Pawre kot Koros kamã Jejus kôt hkwýjê hwýr kagà nê mênh

Pawre na pre kagàja nhîpêx. Jejus nhý hã hkrajê jahkre o mẽ pa xwýnhjê hõ na pre. Tã nhũm mẽ kêp Jejus kra hkêt xwýnh kwýjaja Jejus ã unê nê haxà nhũm arĩ hkrĩ ho hkrĩ. Hãmri nê krĩ pê Koros kamã Jejus krajê mã kagà nhîpêx nê mẽ hwýr kumê. Koros kamã Jejus kwýjê kamã Ijaew kwý nê kamã Ijaew kêt xwýnh kwý nhũm Pawre mẽ ho hpimràatã mẽ hwýr kumê. Kormã mẽ hwýr mõi nê mẽ omunh kêt tãã. Nê kagàja kamã mẽ kot tanhmã Jejus o hêx to ho pa xwýnhjê jarênh to. Jejus kêp Tirtũm Kra hkêt ã mẽ kot ho hêx xwýnhjê jarê nê mẽ nê mẽ kãm kapêr. Mẽ kot mẽ hkôt amnhĩ nhîpêx kêt kaxyw mẽ kãm kapêr nê hã kagà nê mẽ hwýr kumê nê mẽ kãm:

¹ Pa Koros kamã Kris kôt ixkwýjaja. Xã mẽ amex na ka mẽ apa? Ixpê Pawre na pa mẽ awýr kagàja nhîpêx nê mẽ awýr kumê. Kris kôt mẽ pahtõ Ximotre mẽ wa kumê. Ixte Jejus Kris nhý hã mẽ ahkre ho mẽ ixpa xwýnhjê hõ na pa. Tirtũm kãm hprãm xà hkôt. ² Tã pa mẽ awýr kagà nhîpêx nê kumê. Mẽ apê Kris kôt mẽ ixtõ nê ixtõx na ka mẽ. Na ka xep htem Kris kapêr kôt amnhĩ nhîpêx mex o ri apa. E kê Tirtũm mẽ apê hkra hã mẽ akutã nojarêt rãhã nê. Ka mẽ amex nê ajamakêtkati nê axãmnhix ri tanhmã amnhĩ nhîpêx ho ri apa.

*Koros nhõ xwýnh kwýjaja kot Jejus kôt
amnhĩ xunhwýr ã mẽ harênh*

Wam Tesarõn 1.2-5

³⁻⁴ Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nê hkôt amnhĩ nhîpêx mex o apa hã mẽ ajarênhja ma. Nê mẽ kot Tirtũm kôt amnhĩ xunhwýr xwýnh piitã mẽ amã mẽ hkĩnh ã mẽ ho mex o apa hã mẽ ajarênhja ma nê wa ixkĩnh nê. Jakamã na pa wa Pahihti Jejus Nhîpêêxã Tirtũm mã amnhĩ jarênh kaxyw nê kãm mẽ anhý hã wa ixkĩnh ã amnhĩ jarê. ⁵ Na pre Epas ma mẽ awýr mõi nê mẽ amã Jejus kot tanhmã

mẽ panê amnhĩ nhîpêx to hã harênh o mẽ akôt pa. ãm hãmri kot mẽ amã harênhja. Tã ka xep prem ama nê amnhĩ kaxyw hkôt ajamaxpêr nê hkôt amnhĩ xunhwý. Hãmri nê amnhĩ wýr Jejus jamãr o ri apa. Koja nhýrmã akupýn mẽ pahwýr wrý nê amnhĩ pyrã nê ma akupým kaxkwa hwýr mẽ pahto api nê mẽ pahto mex kumrêx o mẽ pahkôt pa ho pa. Tã ka xep htem amnhĩ kaxyw hkôt ajamaxpêr tỳx nê ã kot amnhĩ nhîpêx anhýr kutêp amnhĩ wýr kamã ajamak rãhã nê. Nê mẽ amã mẽ kot Tirtũm kôt amnhĩ xunhwýr xwýnhjê hkĩnh tỳx nê.

⁶ Na hte Tirtũm ãm hãmri mẽ pahto mex pix rãhã ho pa. Nê mẽmoj to mẽ pakutã nojarêt rãhã nê. Tã wam mẽ ate harênh marta ã ka mẽ hkôt amnhĩ xunhwýr kurê kumrêx nê ri kapêr kôt axpên kôt amnhĩ nhîpêx mex pix o ri apa. Jao hkôt pix mã amnhĩ nhîpêx mex nê. Tã na hte pika piitã hkôt ri mẽ pa xwýnh kwýjaja mẽ apyrã nê Jejus jarênh ma nê hkôt amnhĩ xunhwý. Nê mẽ apyrã nê axtem hkôt pix mã amnhĩ nhîpêx nê kapêr kôt amnhĩ nhîpêx mex o ri pa.

⁷ Nê mẽ awýr mõiarta ã na pre Epasja mẽ amã Tirtũm kapêr jarênh o ri mẽ akôt pa ka prem ama nê amnhĩ kaxyw hkôt ajamaxpêr nê hkôt amnhĩ xunhwý. Epasja wa ixpyrã nê kot Kris mã tanhmã amnhĩ nhîpêx to ho pa xwýnh. Nê wa inhmã hapêê. Na pre katat kôt mẽ amã Tirtũm kapêr jarênh pa. Kot mẽmoj to mẽ pakutã nojarêt rãhã hã harênh o ri mẽ akôt pa. ⁸ Tã man akupýn wa ixwýr mõi põi nê wa inhmã tanhmã mẽ ajarênh to. Tirtũm Karõ nhý hã mẽ amã Kris kôt atõ nê atõx piitã mẽ hkĩnh o ri apa hã mẽ ajarê. Pa wa mẽ ajarênh ma nê wa ixkĩnh tỳx kumrêx.

*Pawre mẽ Ximotre wa kot Koros kãm
hkwýjê ho Tirtũm wýr ã wa harênh*

*Epas 1.15-23, 3.14-21; Piripos 1.9; Wam
Tesarõn 5.23-24; Sikũn Tesarõn 1.11, 2.16*

⁹ Nê na pre Epas akupýn wa ixwýr põi nê wa inhmã tanhmã mẽ ajarênh to. Mẽ ate amnhĩ kaxyw Jejus kôt ajamaxpêr o apa nê mẽ amã Kris kôt akwýjê piitã mẽ hkĩnh o ri apaja nhũm wa inhmã mẽ ajarê. Pa wa mẽ ajarênh ma nê mẽ ato Tirtũm wýr rãhã o jar

mê haghênh xà kamã ixkrî. Nê arî mê ato hwÿr rãhã ho ixkrî. Nê mê ato hwÿr o:

—Pa Tirtûm. Ot pa Ximotre mê wa Korosê nhõ xwÿnhjê ho awÿr kaxyw amã mê harê. Kwa tanhmã mê hamaxpêr to kê mê amã hprãm xà hkôt pix mã amã tanhmã amnhî nhîpêx to ho pa. Nê Akarõ nhÿ hã hprî hã akapêr ma nê ãm hkôt pix mã tanhmã amnhî nhîpêx to ho pa. Anê.

¹⁰ Na pa hte wa ã mê ato Tirtûm wÿr anhÿr rãhã ho ixkrî. Kot kaj mê ã amnhî nhîpêx anhÿr o ri apa nê Jesus kot amnhî nhîpêx o amnhî nhîpêx mex o ri apa. Nê aprî hã Tirtûm kot amnhî nhîpêx ã omunh mex o mō. Jao mēmoj to axpên kutã anojarêt pix o ri apa hprãm. Hãmri nhũm Tirtûm ja hã mê apumu nê hkînh nê. ¹¹ Tirtûmja mê pakurom mēmoj piitã kaxyw àhpumunh o àhpumunh. Nê mēmoj piitã kaxyw hihtÿx o hihtÿx. Jakamã na pa hte wa mê ato hwÿr o:

—Pa Tirtûm. Kwa tanhmã Korosê nhõ xwÿnhjê ho kê mê axihtÿx nhÿ hã mēmoj punuj kutã amnhî to htÿx nê. Mê kot Jesus ã tanhmã mê ho nhũm mê kot amnhî xà kamã hamak tã kê mê tee ri amnhî kukamã hamaxpêr o hkaprî nê ri pa hkêt nê. ãm anhÿ hã mê hkurê xwÿnhjê kutã amnhî to htÿx nê hkînh kãm ri pa ho pa. Anê.

Na pa hte wa ã mê ato hwÿr anê.

¹² Na pre ra Tirtûm amnhî ri mê pakutêp mēmoj mex kwÿ jaxwÿ. Mê pahpê hkrajê mã haxwÿ. Tã ka mê ÿ hã tãm amnhî nhîpêx o apa jao mê ate mēmoj mex jamÿnh mã tãm. Ô krî nhîrã rax kumrêx kamãã. Jakamã kwa mê kot Jesus ã tanhmã mê pahto htã kêr pu mê arî Tirtûm mã mex o mex ã harênh rãhã ho ri papa.

¹³ Nê Satanasti kêp kamãt kô kamã mê kot amnhî tomnuj ho mê pa xwÿnhjê pãm. Tãm na hte mê ho amnhîptâr o pa nê hkôt na pu prem amnhî nhîpêx o papa rãhã nhũm Tirtûm tee ri ja hã mê pahpumu. Hãmri nê kãm kêp mê papytâr prãm xàj mê pahwÿr Kra japê htÿx kumrêx xwÿnhja mê. Nhũm mê pahwÿr wrÿ nê mê panê htyk o mê pahte amnhî tomnuj pãnhã kãm amnhîre. Tã pu prem hkôt amnhî xunhwÿ nhũm Tirtûm hã mê pahpumu nê mê panê mê pahte amnhî tomnuj o hapêx pa. Te kot amnhî katut kôt rênh par pyrãk. Jao

Satanasti pê mê pahpytã nhũm hpãnhã Jesusja tãm kêp mê pahto amnhîptâr o pa xwÿnh.

¹⁴ Ra htyk o mê pahte amnhî tomnuj piitã hpãnhã amnhîrer jakamã na pu htem hkôt amnhî xunhwÿ nhũm mê pahte amnhî tomnuj o hapêx pu mê axte Satanasti hkôt ri amnhî nhîpêx kêt nê. ãm Jesus kôt pix mã amnhî nhîpêx o ri papa.

Kris mê Tirtûm wa kot amnhî nhîpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵ Nê Krisja te kot Tirtûm pyrãk. Mê pahte pano ho Tirtûm pumunh kêt tã Kra Kris kot amnhî nhîpêx ã harênh mar kôt mãänên Tirtûm kot amnhî nhîpêx ã omunh mex nê. Amnepê mã kormã mēmoj kêt ri nhũm Jesus pa ho pa rãhã nê. Jakamã kot amnhî to rax o Tirtûm kot mēmoj to katorja piitã hakrenh par kumrêx. ¹⁶ Na pre hipêêxã Tirtûm nhÿ hã mēmoj piitã ho kator pa. Kaxkwa kamã nê pika hkôt mēmoj piitã ho kator pa. Nê kaxkwa kamã mê pahte pano ho mēmoj pumunh par xwÿnhjaja nhũm pre ho kato. Nê kamã mê pahte pano ho mēmoj pumunh kêt xwÿnhjaja nhũm pre mãänên ho kato. Nê kapêr o wrÿk xwÿnhjaja nê mê hkrãhtûmjaja nhũm pre mê ho kato. Nê pika kamã mê ho amnhîptâr xwÿnhjaja nhũm pre mê piitã mê ho kator pa. Kãm hprãm xà hkôt Tirtûm nhÿ hã mēmoj piitã ho kator pa.

¹⁷ Tã na hte arî kaxkwa kamã nê pika hkôt mēmoj piitã hamãr rãhã ho pa. Kêp apu kot hamãr kêt ronhÿx mēmoj piitã akupÿm hapêx pa.

¹⁸ Nê tãm na hte mê pahpê hkrajê ho amnhîptâr o pa. Te kêp mê pahkrã nhũm te mê pahpê ï pyrãk jakamã na pu htem kapêr kôt pix mã amnhî nhîpêx o papa. Kumrêx na pre akupÿm htîr o htîr jakamã kot amnhî to rax o mēmoj piitã hakrenh par.

¹⁹ Nê na pre Tirtûm ã hamaxpêr anê nê hamaxpêr o: “Nã Ixkra mê wa ixte amnhî nhîpêxja te kot axpên pyrãk. Nê wa ixihtÿx mãänên te kot axpên pyrãk. Nê wa inhmex xà mê wa ixàhpumunhja te kot axpên pyrãk. ã wa ixte amnhî nhîpêx kot anhÿr. Wa ixte amnhî nhîpêxja na mex kumrêx.” Anê.

²⁰ Tã Jejus kot pĩ kahpa hã mẽ panê tyk nê hkamrô pikapĩr kukwak ri na hte Tĩrtũm mẽ kot hkôt amnhĩ xunhwỳr xwỳnh piitã mẽ ho hkra nhũm mẽ hamakêtkati nê àmnhĩx pa ho pa. Kaxkwa kamã nê pika piitã hkôt mẽ kot Jejus kôt amnhĩ xunhwỳr xwỳnhjaja na htem ã amnhĩ nhĩpêx mex anhỳr o pa. ã Jejus kot mẽ panê htyk anhỳr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỳr xwỳnh ã harênh

²¹ Nê mẽ papajaja na pu prem pamã Tĩrtũm prãm kêt o ri papa. Te hkàx ã ri papa pyrã nê kutã amnhĩ xunhwỳ nê pajamxpêr punuj nê tanhmã amnhĩ tomnuj to pix o ri papa. ²² Tã Jejus kôt amnhĩ xunhwỳ nhũm amnhĩ tã mẽ pahpumu. Hãmri nê ra mẽ panê htyk jakamã amnhĩ tã mẽ pahpumu nê Tĩrtũm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkêt pyrãk o mẽ panhĩpêx nê tãm mẽ paxunhwỳ. Pu mẽ arĩ pahpê Tĩrtũm kutã amnhĩ xunhwỳr xwỳnh kêt nê hpãnhã pahpê hkrãmnhwỳy. ²³ Na pre Tĩrtũm mẽ pahte amnhĩ kaxyw Kra Kris kôt pajamxpêr nê hkôt amnhĩ xunhwỳr ã mẽ pahpumunh kôt ã mẽ pahto mex anê. Tã kêt pu mẽ arĩ hkôt amnhĩ nhĩpêx o ri papa nê aa hkaga hkêt nê. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỳr o ri mẽ hkôt ixpa. Tã ka prem Jejus jarênh ma nê hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrã nê harênh ma nê hkôt amnhĩ xunhwỳ nê hkôt amnhĩ nhĩpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh

Epes 3.1-13

²⁴ Nê ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htỳx nê pa amnhĩ xà htỳx kãm ijamak o ri ixpa. Tã arĩ Tĩrtũm kãm hprãm xà hkôt ã amnhĩ nhĩpêx anhỳr jakamã na pa ixkĩnh nê jar ixkrĩ. Ixte Kris kwỳjê kaxyw amnhĩ xà kamã ijamak tỳx o ixkrĩ. Te mẽ apê Kris nhĩ pyrãk xwỳnhjê

mãã. Tã pa te ixpê Kris kot amnhĩ nhĩpêx pyrãk o mẽ akaxyw amnhĩ xà htỳx kãm ijamak o ixkrĩ.

²⁵ Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par nhũm mẽ ate mar nê hkôt amnhĩ nhĩpêx mex o ri apa kaxyw.

²⁶ Na pre kormã mēhō mẽ awỳr mōr nê mẽ amã harênh kêt nê. Tã ra Tĩrtũm kãm mẽ ate mar prãm nê. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpên pyrãk. Nom na pre amnepêm ri mẽ pa xwỳnhjê mã kormã ja hã amnhĩ to amnhĩrit kêt nê. Tã ra jarãhã mẽ pahpê Kris kwỳjê mã ja ho amnhĩrit. Mããnhên kãm mẽ apê Ijaew kêt xwỳnhjê japê hã amnhĩ to amnhĩrit. ²⁷ Mẽ apê Ijaew kêt tã na ka prem Kris kôt amnhĩ xunhwỳ nhũm Tĩrtũm Karō mẽ akarō mã agjê nê mẽ akamã pa ho pa. Ka mẽ ra hkôt amnhĩ nhĩpêx jakamã kot kaj mẽ ixpyrà nê nhỹrmã kuri atĩr tũm nê amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nê mẽ akaxyw ixãm. ²⁸ Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihitỳx o ri mẽ akôt ixpa. Nê kapêr o mẽ ajahkre ho ri mẽ akôt wa ixpa. Nê jar mẽ hagjênh xà kamã krĩ piitã hwỳr kagã nhĩpêx nê mẽ hwỳr kurê. Mẽ kot kamã harênh nê mar nê amnhĩ tomnuj kaga nê hpãnhã Kris kôt amnhĩ xunhwỳr nê ãm kôt pix mã amnhĩ nhĩpêx o pa kaxyw. Kêt pa nhỹrmã kãm mẽ ate inhmar nê hkôt amnhĩ xunhwỳr xwỳnhjê jahkre nê kãm:

—E Pahihti. Ota akwỳjaja. Na htem akôt amnhĩ nhĩpêx mex rãhã ho ri pa. Anê.

²⁹ ã ixte kãm mẽ piitã mẽ harênh anhỳrja na inhmã hprãm. Ja kaxyw na pre Jejus ixto ixihitỳx. Jakamã na pa hte Tĩrtũm nhỹ hã tanhmã kapêr o mẽ ahkre hto ho ri mẽ hkôt ixpa. Jao mẽ ho Tĩrtũm wỳr o ri ixpa nê mẽ kãm kagã nhĩpêx nê mẽ hwỳr kurê nê kamã kapêr o mẽ ahkre o ri ixpa.

2

Pawre kot Jejus kapêr o Koros nhō xwỳnhjê o hihtỳx ã harênh
Epes 3.14-19; Piripos 1.9

¹ E kot paj mẽ amã tanhmã amnhĩ jarênh to ka mẽ inhma. Na pa hte mẽ ato Tĩrtũm wỳr rãhã ho ixkrĩ. Mẽ kajaja nẽ krĩ pẽ Ratisej kamã Jejus kõt mẽ pahkwỳjaja. Kormã ixte mẽ apumunh kêt tã pa hte mẽ ato Tĩrtũm wỳr kãm ixihỳtỳx ãhã ho ixkrĩ. ² Mẽmo kaxyw na pa hte ã mẽ ato hwỳr anẽ? Nẽ mẽmo kaxyw na pa hte mẽ amã kagã nhĩpêx nẽ mẽ awỳr kurẽ? Nã ãm mẽ ate kamã harênh nẽ mar nẽ Jejus kapêr kõt axpẽn to axihỳtỳx o ri apa kaxyw. Nẽ mẽ amã axpẽn kĩnh o ri apa kaxyw. Pẽ te mẽ ate ixkre tipxi kamã axpẽn kõt amnhĩ nhĩpêx o ri apa pyrãk. Jao aprĩ hã Tĩrtũm kot amnhĩ nhĩpêx pumunh mex nẽ amnhĩ kaxyw hkõt ajamaxpêr tỳx nẽ. Kot kaj mẽ ã amnhĩ nhĩpêx anẽ nẽ Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tã ra mẽ pamã ho amnhĩrĩt. ³ Tĩrtũm kot amnhĩ nhĩpêx nẽ kapêrja na pu htem Kris nhỹ hã pahprĩ hã omunh nẽ mar mex nẽ. ⁴ Jakamã koja mẽmojaja mẽ awỳr mra hãmri nẽ hêx rom Tĩrtũm kapêr kwỳm ri tanhmã mẽ amã mẽmoj jarênh to. Te mẽ ãhpumunh tỳx pyrãk o mẽ amã harẽ no ãm mẽ ãhpumunh kêt. Ka mẽ ama nẽ ãm mẽ ama nẽ Kris kaga hkêt nẽ.

⁵ Nẽ kormã arĩ Jejus ã ijaxàr nẽ ixkrĩ nẽ kormã mẽ akõt ixpa hkêt tã ot pa hte mẽ amã ijamaxpêr rãhã ho ixkrĩ. Nẽ ra tanhmã mẽ ajarênh mar to. Na ka xep htem Kris kõt amnhĩ nhĩpêx tỳx o ri apa. Te ahkrô pẽ kukryt mut kuxêêti kot pĩ kupu htỳxta pyrãk. Nẽ ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nẽ ixkĩnh tỳx nẽ.

⁶ Na ka prem Pahihti Jejus Kris kõt amnhĩ xunhwỳr pa. Tã kêt ka mẽ arĩ hkõt amnhĩ nhĩpêx mex rãhã ho apa. Kêp mẽ panhõ Pahihti kênã. ⁷ Jakamã mẽ ãm kõt pix mã amnhĩ xunhwỳr tỳx nẽ aa hkaga hkêt nẽ. Te mẽmo pĩ hpàr jarêja pika kaxwỳnh kãm pimành nẽ kot pika jamỳnh tỳxta pyrãk. Nhũm kôk xàpêr tỳx tã tee kot mẽnh kaxyw pyrãk. Tã kêt ka mẽ pĩ hpàrta pyrã nẽ hkõt amnhĩ xunhwỳr tỳx nẽ hkõt amnhĩ nhĩpêx mex o ri apa. Ra Epas kot mẽ ajahkre ho pa xà hkõt. Nẽ amnhĩ krãm Kris kapêr jaxàr tỳx nẽ aa ho ajamakêtkati hkêt nẽ. Pẽ akĩnh

kãm Tĩrtũm mã mex o mex ã harênh rãhã ho ri apa.

⁸ Nẽ kwa kêt ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nẽ mẽ omunh mex nẽ. Nẽ mẽ kapêr mar hkêt nẽ. Mẽ ate Kris kaga hprãm xàj na htem tanhmã mẽ amã hêx to ho ri mẽ akõt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyrãk. Hinhu hikôôti kapêr kõt na htem tanhmã mẽ amã hêx to nom Kris nhỹ hã mẽ amã kapêr kêt nẽ. Jakamã kwa mẽ amnhĩ nẽ mẽ omunh mex nẽ.

⁹ Nẽ Kris mẽ Tĩrtũm wa kot amnhĩ nhĩpêx kot axpẽn pyrãk. Nẽ wa hamaxpêr kot axpẽn pyrãk. ¹⁰ Tã kêt pu mẽ pajaxwỳja wa hamaxpêr o pajamaxpêr nẽ wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhĩpêx o amnhĩ nhĩpêx kêt nẽ. Nẽ mẽ kapêr ma nẽ ãm mẽ ama. Kris na hihtỳx o hihtỳx o kot mẽkarômnuti nhõ pahi piitã mẽ hakrenh par. Nẽ hihtỳx o hihtỳx o kot Tĩrtũm kapêr o mẽ wryk xwỳnhjê piitã mẽ hakrenh par. Nẽ ãhpumunh o ãhpumunh o kot mẽmoj piitã hakrenh par jakamã kêt ka mẽ kapêr kõt pix ma nẽ hkõt pix mã ri amnhĩ nhĩpêx o ri apa.

Mẽ pahte amnhĩ nhĩpêx nyw jarênh Rô mân 6.3; Karatas 5.24

¹¹ Nẽ na hte ixkwỳ Ijaewjaja mẽ hkra nhỹrmã hprêk nẽ Tĩrtũm kõt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwỳnhjaja na pre Kris mẽ anhĩpêx o te mẽ kot amnhĩ jakarta pyrãk. Jao te kot mẽ anẽ mẽ ate amnhĩ nhĩpêx tũm jakàr par pyrãk o mẽ anhĩpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nẽ mẽ ate Jejus kapêr kõt amnhĩ nhĩpêx ã mẽ apumunh kurê kumrêx. ¹² Tã na pu htem jarãhã mẽ pahte Tĩrtũm kõt amnhĩ nhĩpêx o papa hã amnhĩ jarênh kaxyw amnhĩ jakàr kêt nẽ. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kõt pajamaxpêr. Kot mẽ panê pahte amnhĩ tomnuj rênh par kõt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm

rer par pyrâk o amnhî nhîpêx. Te Jejus htyk nhûm mẽ kot haxâr nhûm nôr nhûm mẽ pahte amnhî tomnujja ïhkô hã nôr nê hapêx par pyrâk. Tã pu htem ra gôj rûm pahkrã hapôj. Te Tirtûm kot akupÿm Kris o htîr pyrâk. Jao ra mẽ pahte Kris kôt amnhî nhîpêx nyw o amnhî nhîpêx o papa hkrax ã amnhî to amnhîrît. ¹³ Amnepêm kormã mẽ pahte Jejus kôt amnhî xunhwÿr kêt ri na pu prem ri amnhî tomnuj to nê tanhmã pajamxpêr punuj to ho ri papa. Tirtûm noo mã te ra mẽ pahtyk pyrâk. Tã Tirtûm te akupÿm Kris kôt mẽ pahto pahtîr pyrâk o mẽ panhîpêx nê mẽ panê mẽ pahte amnhî tomnuj piitã ho hapêx nê axte kãm hamaxpêr kêt kumrêx. ¹⁴ Te mẽ pahte tanhmã amnhî tomnuj to ho papa nhûm Tirtûm kot ja hã mẽ pahpumunh nê mẽ pahte amnhî tomnuj piitã hã kagà hpar pyrâk. Nê kot kagàja pyr nê Kris nhîhkô hã pïkahpa hã nhôr pyrâk. Jao te kot mẽ pahte amnhî tomnuj ã kagàta hkaxôn nê rênh par pyrâk o hipêx. ¹⁵ Hãmri nhûm Krisja pï kahpa hã htykja o mẽkarômnuti mẽ mẽ ô pahi Satanasti wa mẽ ho hirerek pa. Jao hihtÿx o kot mẽ hakrenh par ã amnhî to amnhîrît. Te mẽ kot kutã amnhî xunhwÿr xwÿnh piitã mẽ noo mã mẽ ho krihkrit par nê ma akupÿm ô krï hwÿr hkînh nê grer o môrta pyrâk.

¹⁶ Nê koja mẽmojaja mẽ awÿr mra nê tee ri mẽ ate mẽmoj kur o akrï hã mẽ apumu nê mẽ amã:

—Kwa na hte Tirtûm kôt mẽ kot amnhî xunhwÿr xwÿnhjaja ja kur kêt nê. Nê ja ho hkôm kêt nê. Nê mẽ panhõ arïgromnu pè sap ã ri mẽmoj tã àpênh kêt nê. Nê mytwrÿ nyw ã mẽmoj tã àpênh kêt nê. Na htem ã Tirtûm ã hkînh o pa anê. Tã ã mẽ ate mẽ ixkôt amnhî nhîpêx anhÿr kêt jakamã mãn mẽ apê Tirtûm kra hkêt nà. Anê.

Tã nom kêr ka mẽ kapêr ma nê ãm ama. ¹⁷ Amnepêm kormã mẽ pahte Kris kôt amnhî xunhwÿr kêt ri na pu prem ã amnhî nhîpêx anhÿr o papa. Tã Jejus kôt amnhî xunhwÿr hãmri nê axte ã amnhî nhîpêx anhÿr kêt nê. Pãnã kapêr pix ma nê hkôt pix mã amnhî nhîpêx o ri papa.

Mẽ pahte mẽ kot Tirtûm kapêr o mẽ hêx xwÿnhjê mar kêt ã mẽ pamã karõ

¹⁸ Nê koja mẽmojaja mẽ awÿr mra nê hêx rom tanhmã mẽ amã amnhî jarênh to nê mẽ amã:

—Na pre Tirtûm ãm mẽ papxpix mẽ inhmã amnhî to amnhîrît. Jakamã kwa mẽ ixkapêr ma. Kot kaj mẽ inhmar kêt nê hãmri nê mẽ amex kêt nê apa.

Anhÿr o mẽ amã kapêr japêr ka mẽ ama nê ãm mẽ ma. Rÿ nhûm mẽ amã:

—Tirtûm mẽ parom kot amnhî to rax o kot mẽ pahpiitã mẽ pajakrenh par jakamã kwa mẽ tanhmã amnhî to hwÿr to hkêt nê. Kot ka mẽ anê nhûm mẽ ama nê mẽ akamã gryk nê. No kêt mẽ amnhî to kapêr o wrÿk xwÿnhjê mãn wÿ. Koja mẽ ama nê mẽ akamã gryk kêt nê tanhmã mẽ amã mẽmoj nhîpêx to. Anê.

Koja mẽ ã mẽ amã kapêr anê ka mẽ ama nê ãm mẽ ama. Te ho mẽ àhpumunh tÿx kãm mẽ kot ã mẽ amã kapêr anhÿr pyrâk no ãm mẽ kapêrja mex kêt. Na htem amnhî krã hkôt te amnhî to rax pyrâk o ã mẽ amã kapêr jao mẽ hamaxpêr tûm o hamaxpêr o ri pa. No mẽ apyrã nê mẽ hamaxpêr nyw o hamaxpêr kêt nê. ¹⁹ ãm mẽ kot Tirtûm kapêr kwÿm ri mẽ ahkre jakamã mẽ kêp Jejus kwÿ hkêt. No mẽ papajaja mẽ pahpê Jejus kwÿ na pu mẽ. Nhûm Jejus kêp mẽ panhõ Pahihti jakamã na hte tanhmã mẽ pahto paxihtÿx to pu htem kukwak ri tanhmã axpên to ajuta hto ho ri papa. Nê hkôt axpên to paxihtÿx o ri papa. Mẽ pahpiitã mẽ pahte hkôt amnhî nhîpêx mex o ri papa kaxyw. Tirtûm kãm hprãm xà hkôt.

Mẽ pahte amnhî krã hkôt tãm amnhî nhîpêx kêt ã mẽ pajarênh

Karatas 3.1-5, 5.1-9; Epes 2.8; Piripos 3.9

²⁰⁻²¹ Nê wam mẽ pahte amnhî nhîpêx tûm nê mẽ pajamaxpêr tûmta te kot Kris kôt htyk nê mẽ pahpê hapêx par pyrâk jakamã na pu htem arï hkôt amnhî nhîpêx kêt nê. Nê mẽkarômnuti hkôt amnhî nhîpêx kêt nê. Tã no nhûm xep ra mēhõja mẽ awÿr mō nê hêx rom mẽmoj nê tanhmã mẽ amã kapêr to nê mẽ amã:

—Kwa mẽ ja jamÿnh kêt nê. Nê ja hkur kêt nê. Nê ja kupênh kêt nê.

Anhÿr o mẽmoj nê mẽ akurê ho pa. Xep mẽ ã mẽmoj nê mẽ akurê anê ka xep mẽ ama nê mẽ hkôt amnhî nhîpêx. Kwa nà

mon ka mẽ ri axtem nê mẽ hkôt amnhĩ nhĩpêx? ²² Tĩrtũm kot mẽmojja nê tanhmã mẽ pahkurê htore hã. ãm mẽ kot amnhĩ krã hkôt mẽmoj nê mẽ akurê ka mẽ ama nê mẽ hkôt amnhĩ nhĩpêx. Mẽmoj kur nê mẽ akurê xwỳnh̄ta na htem kuku nhũm hapêx kurê kumrêx. Mo koja we Tĩrtũm omu nhũm kêp omnuj? Nà ja kot anhỹr kêt kênã. Mẽ ãm amnhĩ krã hkôt mẽ kot ja nê mẽ akurê. ²³ Tã ã mẽmoj nê mẽ akurê anhỹr xwỳnh̄jaja na ka htem nhỹri mẽ omu nê mẽ kapêr ma nê atỳx ajamaxpêr o:

—Nà te Tĩrtũm kôt amnhĩ nhĩpêx mex o pa pyrãk. Te mẽ àhpumunh tỳx pyrãk o ã mẽ ìnhmã mẽmoj jarênh anê. Anê.

No ãm mẽ kot mẽmoj jarênhja kot anhỹr kêt. ã mẽ kot amnhĩ nhĩpêx anhỹr xwỳnh̄jaja kêp Tĩrtũm kra hkêt. Na htem ãm amnhĩ krã hkôt mẽmoj nê mẽ akurê ho pa. Nê hã amnhĩ to jarkrar o ri pa. Mẽ ate ja hã mẽ mar nê mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No ãm ri ã amnhĩ nhĩpêx anhỹr kaprỳ. Nê ãm htỳx Tĩrtũm kapêr o mẽ wrỳk xwỳnh̄jê hwỳr kaprỳ ho pa.

3

Mẽ pajamaxpêr nyw nê mẽ pahte amnhĩ nhĩpêx nyw jarênh

Rõmãn 6.4-11

¹ Nê na pre Tĩrtũm akupỹm Kris o htĩr nhũm mẽ pahte hkôt amnhĩ xunhwỳr jakamã te Tĩrtũm kot Kris nhĩpêx pyrã nê akupỹm mẽ pahto mẽ pahtĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nê ra kaxkwa hwỳr paxàpir nê kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nê pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupỹm kaxkwa hwỳr api nê Tĩrtũm nhĩhkô hã mẽ ho amnhĩptàr xà kamã hkrĩ ho hkrĩ.

²⁻³ Nê ra mẽ pahte Kris kôt amnhĩ xunhwỳr jakamã te jar pika hkôt pajapêx par nê Tĩrtũm wa kuri kaxkwa kamã pamex nê papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn

pajamaxpêr rãhã ho papa. Nê axte mẽ pahte amnhĩ nhĩpêx tũm mã pajamaxpêr kêt nê.

⁴ Kris kêp akupỹm mẽ pahto mẽ pahtĩr xwỳnh̄. Koja nhỹrmã akupỹn mẽ pahwỳr wrỳ hãmri nhũm Tĩrtũm te ho mex raxta pyrãk o mẽ panhĩpêx nê mẽ pahto mex rax kumrêx.

Mẽ pahte akupỹm amnhĩ nhĩpêx tũm o paxujanãr kêt ã mẽ pamã karõ

Epes 4.17-5.2

⁵ Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nê hapêx par pyrã nê axte kãm ajamaxpêr kêt nê.

Jakamã axte ri axpên mjên rỳ axpên prõ ho amnhĩkati hkêt nê.

Nê nhãm ri mẽmyjê hõ rỳ mênijê hõ ho amnhĩkati hkêt nê.

Nê mẽ amã tanhmã amnhĩ tomnuj to hprãm kêt nê.

Nê mẽ amã akukrêx rax prãm kêt nê.

Kot ka mẽ ã amnhĩ nhĩpêx anê nê gaa nê akukrêx rax gryk ã axte Tĩrtũm mã ajamaxpêr kêt nê.

⁶ ã mẽ kot amnhĩ nhĩpêx anhỹr xwỳnh̄jaja Tĩrtũm kãm mẽ hprãm kêt. Koja nhỹrmã tanhmã ja hã mẽ homnuj tỳx to.

⁷ Amnepêm kormã mẽ ate Kris kôt amnhĩ xunhwỳr kêt ri na ka prem ã amnhĩ nhĩpêx anhỹr o ri apa. ⁸⁻⁹ Tã kêr ka mẽ axte ã amnhĩ nhĩpêx anhỹr kêt nê.

Nê mẽ ri axpên kãm agryk o ano hkà karõt o axpên pumunh kêt nê.

Nê mẽ axpên kamã axàhkurê hkêt nê. Ri tanhmã axpên tomnuj to ho apa hkêt nê.

Rỳ axpên jakwa kamã mẽmoj ma nê ri axpên xô ri tanhmã ri axpên mã ho axêx to ho ri apa hkêt nê.

Nê mẽ akapêr mã agêt o ri mẽ kãm akapêr kêt nê.

Nê mẽ ri mẽmoj to axpên mã axêx hkêt nê.

ã mẽ ate amnhĩ nhĩpêx anhỹr tũmta ra mẽ apê hapêx par kênã.

Mẽ pahte amnhĩ nhĩpêx nyw kôt amnhĩ nhĩpêx ã mẽ pamã karõ

Rõmãn 12.2; Epes 4.23; Wam Pêtre 2.11

10 Nê na ka mẽ ra mẽ ate amnhĩ nhĩpêx nyw o amnhĩ nhĩpêx o ri apa. Jao ra mẽ pahto kator xwýnh maatija kôt amnhĩ nhĩpêx mex o mō. Kot kaj mẽ gaa nê rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

11 Nê mẽ pahpê Kris kwýjaja ahpýnhã na pu mẽ. Na mẽ pakamã Ijaew nê Ijaew kêt xwýnhjaja. Nê mẽ pakamã panhĩ nê kupê. Nê mẽ kãm àpênh xwýnhjaja nê mẽ kot amnhĩ mã ri àpênh xwýnhjaja. ãm ahpýnhã mẽ pahpê Kris kwýjaja mẽ pahte anhýr tã na hte Tĩrtũm tanhmã mẽ pakute hkôt mẽ pahpumunh kêt nê. Na hte mẽ panhĩpêx o axpên pyrã nê mẽ pahpiitã mẽ pakamã pa ho pa pu htem pahpimràatã hkôt ri amnhĩ nhĩpêx o papa.

12 Nê Tĩrtũm kãm mẽ pajapê nê kãm mẽ pajapê xaj mẽ pakukamã amnhĩm mẽ parê. Mẽ pahte kãm tanhmã amnhĩ nhĩpêx to ho ri papa kaxyw mẽ pakukamã mẽ parê.

Jakamã kêr ka mẽ axpên kamã axukapri ho ri axpên kôt apa.

Nê axpên to mex pix o ri axpên kôt apa.

Nê mẽ amã amnhĩ to rax o axpên jakrenh prãm kêt nê.

Nê mẽ ãm amnhĩ pix kukamã ri ajamaxpêr kêt nê. Amnhĩ mẽ nhãm mẽ hkukamã ajamaxpêr o ri apa.

Nê mẽ ri agryk tokyx anhýr kêt nê.

13 Nê koja mēhō tanhmã mẽ ato ka mẽ amnhĩ tã omu nê tanhmã amnhĩ tã ho hkêt nê. ãm ja ho ajamakêtkati kurê kumrêx nê axte kãm ajamaxpêr o ri apa hkêt nê. Ra Jejus kot mẽ panê mẽ pahte amnhĩ tomnuj piitã rênh par kênã kot pu kêt mẽ amnhĩ tã tanhmã mēhō hto. Tã kêr ka mẽ axpên to mex o ri apa nê amnhĩ tã tanhmã axpên to ho ri apa hkêt nê.

14 E kêr ka mẽ ã axpên nhĩpêx anhýr o ri apa. No ãm ja pix kêt. Nê mẽ mãânên amã axpên kĩnh pê axpên kutã anojarêt rãhã nê. Kot kaj mẽ ã amnhĩ nhĩpêx anê nê mãânên ra ixte mẽmoj tã mẽ amã karōta ka mẽ ho anhýr mex kurê kumrêx. Mẽ pamã axpên kĩnhja na mex kumrêx o kot mẽmoj piitã hakrenh par.

15 Nê kêr ka mẽ Kris kukwak ri anhōxàhkre kaxwýnh kãm akĩnh nê aja-

makêtkati nê tãm ri axpên nhĩpêx o ri axpên kôt apa. Te ixkre tipxi kamã mẽ ate axpên kôt ri amnhĩ nhĩpêx pyrãk. ã mẽ pahte amnhĩ nhĩpêx anhýr o papa kaxyw na pre Tĩrtũm amnhĩ wýr mẽ pahwý. Mẽ pahte hkôt amnhĩ xunhwýr kaxyw.

Nê kêr ka mẽ Tĩrtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mẽ pahte Tĩrtũm mã mex ã pagrer ã mẽ pamã karō

Epes 5.19

16 Nê kêr ka mẽ Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

17 Nê kêr ka mẽ Mẽpahpãm Tĩrtũm mã amnhĩ jarênh o:

—Pa Tĩrtũm. Nã ãm hãmri na ka pre mẽ ixwýr Akra Jejus mẽ nhũm mẽ ixwýr wrý nê mẽ inhné ty.

Anhýr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rý ãm kôt pix mã tanhmã akapêr to ho ri apa.

Tanhmã mẽ pahte axpên nhĩpêx to hã mẽ pamã karō

Epes 5.22–6.9

18 Nê mẽ anijaja. Tĩrtũm kot myja kumrêx nhĩpêx nê hkôt kãm hprō nhĩpêx jakamã kêr ka mẽ amjên ã apijaãm o apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx mex nê. ã mẽ ate amnhĩ nhĩpêxja na Tĩrtũm kãm hprãm.

19 Nê mẽ amyjaja kêr ka mẽ amã mẽ aprō japê nê. Te amã amnhĩ tã ma pyrãk o mẽ hipêx o ri apa. Jao tanhmã mẽ homnuj to hkêt nê.

20 Nê mẽ apê mẽ hkrajaja kêr ka mẽ anhĩpêxà nê akatorxà wa hã apijaãm nê wa kapêr ma nê wa hkôt ri amnhĩ nhĩpêx. ã mẽ ate amnhĩ nhĩpêx anhýrja na Tĩrtũm kãm hprãm. Koja ã mẽ ate amnhĩ nhĩpêx anhýr ã mẽ apumu nê hkĩnh nê.

21 Nê kêr ka mẽ apê mẽ hipêxà nê mẽ katorxà mẽ akra gryk kaxyw mẽ kãm apêr

o apikênh kêt nê. Kot kaj mê ã mê hipêx anê nhùm mê tee ri amnhĩ tâ mê ama nê hkaprĩ nê.

²² Nê mê ate mê kãm tanhmã amnhĩ nhĩpêx to ho ri mê apa xwýnhjaja kêr ka mê anhõ patrãw kapêr ma nê hkôt amnhĩ nhĩpêx. Nê mê noo mã mê kãm tanhmã amnhĩ nhĩpêx mex to nê mãânên mê wa kre kamã mê kãm tanhmã amnhĩ nhĩpêx mex to. Nom mê kot axàpênh ã apumunh nê hã kãm akĩnh pix kaxyw axàpênh mex kêt nê. Mãânên mê amã Pahihti Kris kĩnh ã akatãt kôt mê kãm mêmoj tâ axàpênh mex nê. Mê noo mã nê mãânên mê wakre kamã. ²³ Nê mê akĩnh kãm mê kãm axàpênh mex o ri apa. Te mê ate Pahihti mã akĩnh kãm tanhmã kãm amnhĩ nhĩpêx to pyrã nê tãm amnhĩ nhĩpêx o tãm mê kãm axàpênh mex o ri apa. ²⁴ Te mê anhõ patrãw pix mã axàpênh pyrãk nom kumã pix mã hkêt. Mãânên mê panhõ Pahihti Krisja mã. Jakamã kot kaj mê ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mêmoj tâ apê nhùm Pahihtija ja hã mê apumu nê nhỹrmã mê ato mex rax nê. ²⁵ E kêr ka mê ã mê anhõ patrãw mã axàpênh mex o ri apa anê. No kot kaj mê kapêr kwým amnhĩ krã hkôt ri tanhmã amnhĩ nhĩpêx to nhùm Tĩrtũm tee ri ja hã mê apumu hãmri nê nhỹrmã tanhmã hã mê anhĩpêx to. Na hte ã mê kot amnhĩ tomnuj xwýnhjê piitã mê hipêx anê nê mê hipêx o axpên pyrãk. Jakamã kwa kêr ka mê anhõ patrãw mã axàpênh mex rãhã ho ri apa.

4

¹ Nê mê apê mê õ patrãw kêr ka mê kot mê amã mê àpênh xwýnhjê ho mex nê tanhmã mê homnuj to hkêt nê. Mê urãk nê kaxkwa kamã mê anhõ Patrãw maatija hkrĩ. Kot mê pahte tanhmã amnhĩ nhĩpêx to nê tanhmã mê pajamaxpêr to hã mê pahpumunh rãhã jakamã kêr ka mê noo mã mê ho mex rãhã ho ri apa.

E kêr ka mê apiitã ã axpên to mex anhỹr o ri apa.

Mê pahte Tĩrtũm mã amnhĩ jarênh rãhã hã mê pamã karõ

Matêwre 7.7; Rukre 11.1-8; Atre 1.14; Epes 6.18

² Nê kêr ka mê xatã Tĩrtũm mã amnhĩ jarênh rãhã ho ri apa. Nê tanhmã mêmõ kot amnhĩ nhĩpêx to hã harênh ma nê ho Tĩrtũm wý. Nê mê ate kãm amnhĩ jarênh kamã kãm mex o mex ã harê. ³⁻⁴ Nê mãânên ixto awý kê mê tokyx ixkator japêr. Pa ixãmnhĩx mê kot kormã Kris jarênh mar kêt xwýnhjê mã harênh o ri mê hkôt ixpa. ã ixte amnhĩ nhĩpêx anhỹrta ã na prem ixpynê nê ijaxã pa kormã jar ixkrĩ. Jakamã kwa mê mãmrĩ ja hã ixto Tĩrtũm wýr o apa.

Mê pahte apkati mê mê pahkwýjê mã Jejus jarênh ã mê pamã karõ

Epes 5.16

⁵ Nê kêr ka mê kêp Kris kwý hkêt xwýnhjê hkôt nhỹhým ri apa nê tãm ri Tĩrtũm kapêr kôt amnhĩ nhĩpêx o mê hkôt ri apa.

⁶ Nê kê mêmõ awýr tẽ nê tanhmã Jejus ã akukjêr to ka amã hkĩnh ã aprĩ hã kãm awjarê. Ahpýnhã tanhmã mê kot hã akukjêr to xà hkôt tanhmã mê kãm harênh to kê mêmhrĩ hã mar mex nê.

Pawre kot Koros wýr Xikitre mê Ones wa mênh ã harênh

Epes 6.21-22

⁷⁻⁸ Nê ot pa mê awýr mê pahtõ Xikitre mênh mã. Kot ma mê awýr ixte mê amã ixkapêr ã kagã nhĩpêx o mõr kaxyw. Na hte ixkôt Tĩrtũm mã amnhĩ nhĩpêx o ri pa. Inhmã hapêê. Tã kot paj mê awýr kumê kê ma mê awýr mõ nê hprĩ hã mê amã ijarê. Mê ate ijarênh mar nê tãm ajamaxpêr nê akĩnh kaxyw. ⁹ Mê akwý Onesti hkôt koja ma mê awýr mõ. Mãânên Kris kôt kêp mê pahtõ hã mê pamã hapê xwýnh na. Na hte Tĩrtũm kapêr kôt amnhĩ nhĩpêx mex rãhã ho ri pa. Tã Xikitre mê koja wa ma mê awýr mõ. Hãmri nê mê awýr pøj nê jar tanhmã mê ixte amnhĩ nhĩpêx to hã mê ijarê ka mê ama.

Kris kôt mê hkwy kot mê hwýr hpêr mênh ã mê harênh

¹⁰ Nê ota Aristakja ixpyrà nê kêp prês nê hkrĩ. Tã mê awýr hpêr mê. Nê Panãpe htõ Juãw Makreja mãânên mê awýr hpêr mê. Na pa pre ra mê amã Juãw Makre jarê. Tã koja mêmõ arĩgro hã akupýn mê awýr mõr japêr ka mê omu nê ho mex nê.

¹¹ Nê Jejus Justija mãânên mê awýr hpêr mê. Jajaja mê ixpyrà nê kêp Ijaew. Tã

mê tapxipixjaja na htem ixpyrà nê mê ixpê Ijaew kwýjê rom mê kãm Tirtûm kapêr nyw o mê ahkre ho ri mê hkôt pa. Tirtûm kot Kra Kris kôt mê kot amnhĩ xunhwýr xwýnhjê ho hkra hã harênh nywja na htem mê kãm harênh o ri mê hkôt pa. Pa ja hã mê omu nê ixkĩnh nê. ¹² Nê mê anhĩõ Epasja mãânên mê awýr hpêr mê. Na hte Jejus Kris mã tanhmã amnhĩ nhĩpêx mex to ho pa. Nê mê ato Tirtûm wýr rãhã ho pa nê mê ato hwýr o:

—Pa Tirtûm. E kwa tanhmã Koros kamã akrajê ho kê mê akôt amnhĩ xunhwýr týx nê. Nê amã hprãm xà hkôt pix mã amnhĩ nhĩpêx o ri pa. Nê amnhĩ kaxyw Kris kôt pix mã hamaxpêr týx rãhã nê. Anê.

¹³ ãm hãmri na hte mê ato hwýr o pa. Nom mê kapxipix o hwýr kêt nê. Mãânên krĩ pê Ratisej kamã nê krĩ pê Jerop kamã Kris kôt mê pahkwýjê ho hwýr o ri pa. Mê ate Tirtûm kôt amnhĩ nhĩpêx mex o apa kaxyw. Ixte ja hã omunh mex.

¹⁴ Nê jar mê pahõt tótô Rukre mê Têmtija wa mãânên mê awýr hpêr mê. Tótô Rukreja kêp ixkrãmnhwý mex na.

¹⁵ Nê kêr ka mê krĩ pê Ratisej kamã Kris kôt mê pahkwýjê mã ijarê. Nê Nĩpare mã nê òrkwý hwýr mê pikuprõnh nê Tirtûm mã mex o mex ã harênh o mê hkrĩ xwýnhjê mã mãânên ijarê.

¹⁶ Nê e kêr ka mê ixte mê awýr kagà mênhja kamã harênh pa nê hpãnhã krĩ pê Ratisej kamã Kris kôt mê pahkwýjê hwýr amê kê mê apyrà nê kamã harê nê piitã kuma. Nê mê kãm anê kê ra ixte mê hwýr kagà mênh xwýnhta kê mê amã kugõ ka mê kuxwar kamã harê nê ama.

¹⁷ Nê kêr ka mê Akip mã ijarê kê ra Tirtûm kot kãm mêmoj tã karõ xwýnhta kê ho anhýr jatur xàm kumê. Kêp hkra hã kê tãm kãm àpênh jatur xàm kumê.

¹⁸ Tã ãm ja pix. E paj pam amnhĩ nhĩhkra ho hatur xà hã kagà. Mê ate ixte mêmoj tã kagà pumunh nê hkôt inhmã ajamaxpêr kaxyw. Nê ixte mê awýr mênh ã ijarênh mar kaxyw. Kwa kêr ka mê arĩ ixpê prês ã ixto Tirtûm wýr rãhã ho ri apa.

E kê Tirtûmja mêmoj to mê akutã nojarêt nê mê ato mex nê ka mê amex nê ajamakêtkati nê apa ho apa. Tã ãm ja pix. Ixpê

Pawre na pa mê awýr kagàja nhĩpêx nê ã mê awýr mênh anê.

Wam Tesarõn Pawre kot Tesarõn kamã Jejus kõt hkwýjê hwýr kagà nê mẽnh

Pawre na pre kagàja nhĩpêx. Kêp Jejus nhĩ hã mẽ ahkre ho pa xwýnhjê hõ na pre. Jakamã na pre kagàja nhĩpêx nê ma krĩ pê Tesarõn kamã Jejus kõt hkwýjê hwýr kumê. Tesarõn kamã Jejus ã kãm mẽ hkurê xwýnhjaja na prem Jejus ã mẽ homnuj o pa nhũm mẽ amnhĩ xà htýx kamã hamak o pa. Hãmri nhũm Pawre mẽ harênh ma nê kagàja nhĩpêx nê mẽ hwýr kumê. Kot mẽ kãm mẽ hamaxpêr o hihtýx kaxyw mẽ kot arĩ Jejus kõt amnhĩ nhĩpêx mex o pa nê aa hkaga hkêr ã mẽ kãm karõ. Nê nhỹrmã Jejus akupýn kaxkwa rũm mẽ pahpê hkwýjê hwýr wrýk nê ma akupým amnhĩ kõt mẽ pahto àpirja nhũm mẽ kãm harê. Æ na pre mẽ kãm mẽmoj jarê nê hã kagà anê nê mẽ kãm:

¹ Pa mẽ apê Tesarõn kamã Jejus kwý hã axpên wýr mẽ apikuprõnh xwýnhjaja? Xà mẽ amex na ka mẽ apa? Ixpê Pawre na pa mẽ awýr kagàja nhĩpêx nê mẽ awýr kumê. Siras mẽ Ximotre mẽ pa mẽ awýr kumê. Mẽ pahpê Mẽpanhĩpêxà maati Tĩrtũm mẽ Pahihti Jejus Kris wa hkwý jakamã na pa htem mẽ ato Tĩrtũm wýr rãhã ho ri ixpa. Kot mẽ akutã nojarêr rãhã nhũm mẽ ajamakêtkati nê axãmnhĩx mẽ apa kaxyw.

²⁻³ Nà mẽmoj kêt. Na pa htem mẽ amã ijamaxpêr nê mẽ anhỹ hã ixkĩnh nê ixpa hãmri nê mẽ awýr kagàja mẽ. Na pa htem mẽ ato Tĩrtũm wýr rãhã ho ri ixpa nê kãm mẽ ajarênh o:

—Pa Tĩrtũm. E mãn ka Tesarõn kamã akrajê pumu. Æm hãmri na ka pre tanhmã mẽ hkrã hto nhũm mẽ akõt amnhĩ nhĩpêx mex o pa. Na htem amnhĩ kaxyw akõt hamaxpêr týx nê. Jao mẽ piitã mẽ kamã ukapri kamã tanhmã mẽ ho ajuta hto ho pa. Nhũm mẽ kãm mẽ ixkurê xwýnhjaja Pahihti Jejus Kris ã tanhmã mẽ ho ho pa htã nhũm mẽ tee ri amnhĩ kukamã hamaxpêr o hkapri nê Jejus mẽ war akaga hkêr nê. Arĩ war anhỹ hã amnhĩ to htýx nê Pahihti

Jejus kutêp tanhmã kãm amnhĩ nhĩpêx to ho pa. Æm hãmri na htem ã amnhĩ nhĩpêx anê Tĩrtũm. Na pa htem mẽ kot ã amnhĩ nhĩpêx anhỹrja mã ijamaxpêr nê ixkĩnh nê.

Anhỹr o pa htem mẽ ato kuwý. ⁴ E Kris kõt ixkwýjaja. Nà Tĩrtũm kãm mẽ ajapê jakamã na pre amnhĩm mẽ arê. Kot mẽ ato hkra nhũm nhỹrmã kuri mẽ amex nê atĩr tũm nê apa ho apa kaxyw. Ra mẽ ixte ja hã mẽ ajarênh mar mex.

Mẽ piitã mẽ kot Tesarõn nhõ xwýnhjê jarênh mar ã mẽ harênh

⁵ Nê na pa prem ma mẽ awýr mõ nê mẽ amã Jejus jarênh o mẽ akõt ixpa. Kot mẽ panê tanhmã amnhĩ nhĩpêx to hã harênh o ri mẽ akõt ixpa. Nom pa mẽ amnhĩ krã hkõt mẽ amã ixujarênh kêt nê. Æm Tĩrtũm Karõ nhỹ hã na pa prem hihtýx xà ho tanhmã mẽ amã ixkapêr to ka prem mẽ inhma nê mẽ ixkõt ajamaxpêr kurê kumrêx. Na pa prem tãm amnhĩ nhĩpêx o ri ixpa ka mẽ ja hã mẽ ixpumunh o ri mẽ ixkõt apa. ⁶ Tã Jejus kõt amnhĩ xunhwý nê hkõt amnhĩ nhĩpêx mex nê. Nê mẽ ixkõt amnhĩ nhĩpêx mex nê. Mẽ kot Jejus ã tanhmã mẽ ato htã ka htem Tĩrtũm Karõ nhỹ hã akĩnh nê hkõt amnhĩ nhĩpêx mex rãhã ho ri apa. ⁷ Tã nhũm pika pê Masetõn mẽ Gres wa kamã Jejus kõt mẽ pahkwýjaja ã mẽ ate amnhĩ nhĩpêx anhỹr ã mẽ ajarênh ma nê mẽ apyrã nê ã amnhĩ nhĩpêx anhỹr o pa. ⁸ Na ka prem tanhmã Jejus kot mẽ panê amnhĩ nhĩpêx to hã harênh o ri mẽ hkõt apa nhũm mẽ piitã mẽ akapêr ma. Nom mẽ tapxipixjaja mar kêt nê. Na mẽ ra ohtõ nê mẽ ajarênh ma nê mẽ apyrã nê ma mẽ kãm Jejus jarênh o pa. Ra mẽ ate Jejus kõt amnhĩ xunhwýr ã amnhĩ jarênh o ri apa nhũm mẽ piitã kot mẽ amar jakamã mẽ pajaja na pa htem mẽ kãm ã mẽ ajarênh anhỹr kêt nê. Mo kaxyw? Ra mẽ kot mẽ ajarênh mar mex kênã. ⁹ Na pa htem nhỹri krĩ hõ hwýr pøj nhũm mẽ ixpumu nê ra mẽ tãmjaja mẽ inhmã mẽ ajarênh kurê kumrêx. Nê mẽ ajarênh o:

—Kwa Tesarõn kamã Kris kõt mẽ pahkwýjaja na xep kãm mẽ akĩnh nê. Amnepêm na pre htem amnhĩm sãnti nhĩpêx nê kêp mẽhpãm ã harê nê amnhĩ to hwýr o pa. Tã ka xep prem ma mẽ hwýr mõ nê mẽ kãm Tĩrtũm kapêr jarê nhũm

mê ama nê Tirtûmja sânti rom ãm hãmri hã omunh kurê kumrêx. Hãmri nê gryk ã sânti kaga hpa nê Tirtûm kôt amnhĩ xunhwý nê hkôt pix mã amnhĩ nhĩpêx mex o pa. ¹⁰ Nê amnhĩ wýr Tirtûm Kra kamã hamak rãhã ho ri pa. Anê.

Ãm hãmri na ka htem amnhĩ wýr kamã hamak rãhã ho apa. Na pre ty nhũm Hipêêxà Tirtûm akupým ho htír. Tã koja nhýrmã akupýn mê pahwýr kumê nhũm akupýn mê pahwýr wrý. Hãmri pu mê ãm pix kukwak ri mê kot amnhĩ xà htýx kãm hamak o pa htũm xàta wýr papa hkêt nê.

2

Pawre kot amnhĩ jarênh

Sikũn Korĩt 1.12, 4.1-6

¹⁻² Nê kormã mê awýr mê inhmõr kêt ri na pa prem kormã Piripos nhõ xwýnhjê mã Tirtûm kapêr jarênh o ri mê hkôt ixpa. Nom nhũm mê hkwýjaja kãm mê inhmar prãm kêt nê. Na prem Jesus ã mê inhmã kapêr punuj nê mê inhĩpêx kati pa prem amnhĩ xà htýx kamã ijamak o mê hkôt ixpa. Na ka prem ja hã mê ijarênh ma. ã mê kot mê inhĩpêx anhýr tã pa mê tee ri amnhĩ kukamã ijamaxpêr pê Tirtûm kapêr jarênh kaga hkêt nê. Na pa prem arĩ mê kãm Jesus kot tanhmã mê panê amnhĩ nhĩpêx to hã harênh o ri mê hkôt ixpa. Tã mê awýr inhnojarêt nê Tirtûm nhý hã amnhĩ to htýx nê ma mê awýr mō. Hãmri nê mê amã tanhmã Jesus jarênh to ho ri ixpa. Ka prem mê inhma hãmri nê axohtô nê hkôt amnhĩ xunhwý. ³ Nom pa prem ixêx rom tanhmã mê amã ixkapêr to hkêt nê. Rý mê inhmã mēmoj prãm xàj mê ano kupy r pē mê amã ixkapêr kêt nê. ⁴ Rý mê ate mê ixkapêr mar nê mê inhmex ã mê ijarênh kaxyw pa tanhmã mê amã ixkapêr to hkêt nê. ãm Tirtûm kot mê inhmar nê tapxipix mê inhmex ã mê ijarênh pix prãm xàj na pa prem mê amã kapêr jarênh o ri mê akôt ixpa. Tirtûm tapxipix na hte tanhmã mê pakute hkôt mê pahpumunh rãhã ho pa. Tãm na pre mê ixte kapêr jarênh o ri ixpa kaxyw mê ixunhwý.

⁵ Xàn pa prem mê ijakwa nhĩkjê ho mê ate tãm amnhĩ nhĩpêx ã mê ajarê hãmri nê mê ijakwa nhĩkjê ho mê ato ixkapêr punuj

nê? Nà na pa prem ã amnhĩ nhĩpêx anhýr kêt nê. Na pa prem ixkatat kôt mê ate amnhĩ nhĩpêx ã mê apumunh kôt tanhmã mê ajarênh to ho ri ixpa.

Nê xà mê ate mê ixkapêr mar nê akĩnh nê hpãnhã mê inhmã amnhĩrer kaxyw na pa prem mê awýr mō nê mê amã Jesus kapêr o mê ajahkre? Nà na pa prem kãxpore prãm xàj mê amã ixkapêr kêt nê. Tirtûm kot ja kôt mê ixpumunh mex.

⁶ Rý xà mê ate mê inhmex ã mê ixto jarkrar kaxyw na pa prem mê awýr mō? Nà mãñnên ja kaxyw kêt. ã mê ate mê ijarênh anhýr prãm xàj na pa htem Tirtûm kapêr o mê ajahkre ho ri ixpa hkêt nê.

⁷ Rý xàn pa pre mê awýr mō nê mê amã amnhĩ jarênh o:

—E mê ixte Jesus nhý hã ixkapêr o ixpa xwýnh jakamã kot paj mê amã tanhmã ixkapêr to ka mê inhma nê hpãnhã mê inhmã amnhĩre.

Anhýr o mê amã ixkapêr? Nà na pa pre ã mê amã ixkapêr anhýr kêt nê. Na pa prem te mê katorxà kot hkrajê nhĩpêx pyræk o mê anhĩpêx nê amarĩ mê ajahkre ho ixpa nê mēmoj tã mê awýr kêt nê.

⁸ Mê inhmã mê akĩnh jakamã na pa prem mê amã ixprĩ hã Tirtûm kapêr piitã harênh par o mê akôt ixpa nê mê kot ja hã tanhmã mê ixto pymaj tee ri amnhĩ kukamã ijamaxpêr o ri ixkaprĩ hkêt nê. ãm ixãmnhĩx ri tanhmã Jesus kot mê panê amnhĩ nhĩpêx to hã harênh o mê akôt ixpa. ⁹ Mê apê mê ixkwý jakamã na pa prem tanhmã mê amã ixkapêr to hpãnhã mê ixàpkur xà rý mēmoj tã mê awýr kêt nê. Na pa prem mê pamjaja mēmoj tã ixàpênh pê mê amã ixkapêr o ri ixpa. Nê ixàpênh rũnh kumrêx. Arĩgro hã nê kamàt kãm. Mãn arĩ mê ate ã mê ixte amnhĩ nhĩpêx anhýrja ã anohtýx japêr ko. ¹⁰ Na pa prem tãm amnhĩ nhĩpêx o mê akôt ixpa. Tirtûm kãm hprãm xà hkôt. Jao tanhmã amnhĩ to mex to rãhã ho ri ixpa ka prem amnhĩ tã mê ixpumu. Nhũm Tirtûm haxwýja ja hã mê ixpumu. ¹¹ Na pa pre mê apê mê ixkra pyræk mê anhĩpêx o ri mê akôt ixpa. ¹² Jao mê amã ixkapêr mex nê. Nê mê akaprĩ nê apa xwýnhjaja pa prem akupým mê ajamaxpêr o mê axihtýx hãmri nê mê apiitã mê amã ixkapêr nê mê amã:

—Kwa kêr ka mẽ Tirtũm kôt amnhĩ nhĩpêx mex rãhã ho ri apa nê aa hkaga hkêt nê. Anê.

Tirtũm tãm na pre amnhĩ wỳr mẽ pahwỳ pu prem hkôt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamek kumrêx nê ri papa ho papa. Jakamã kwa kêr ka mẽ hkôt amnhĩ nhĩpêx mex rãhã ho ri apa.

Jejus kwỳjaja kãm Jejus kôt amnhĩ xunhwỳr hkêt xwỳnhjê pyma hkêt

Atre 17.1-9

¹³ Nê ma mẽ awỳr mẽ inhmōrta ã na pa prem mẽ amã Tirtũm kapêr jarênh o ri mẽ akôt ixpa ka prem mẽ inhma nê mẽ ixte amnhĩ krã hkôt mẽ ixkapêr ã mẽ ixkamnhĩx kêt nê. Na ka prem ãm hãmri mẽ ixte Tirtũm kapêr jarênh ã mẽ ixpumunh kurê kumrêx nê amnhĩ kaxyw hkôt ajamxpêr nê Jejus mẽ Hipêêxà wa hkôt amnhĩ xunhwỳ. Jakamã na pa hte mẽ amã ijamxpêr nê mẽ anhy hã ixkĩnh nê. Hãmri nê Tirtũm mã mẽ anhy hã ixkĩnh jarênh o ri ixpa. Nà na ka htem arĩ Tirtũm kapêr kôt amnhĩ nhĩpêx mex nê. ¹⁴ Nhũm hte mẽ akwỳjaja tee ri ja hã mẽ apumu nê Jejus ã mẽ atomnuj nê. Nom mẽ kapxipixjaja ã mẽ anhy pêx anhyr kêt nê. Jutej kamã Ijaew kwỳjaja na prem mẽ apyrà nê Jejus kôt amnhĩ xunhwỳ nhũm mẽ hkwỳjaja tee ri ja hã mẽ omu nê hã mẽ hipêx kati ho pa.

¹⁵ Amnepêm Ijaew na prem Tirtũm nhỹ hã mẽ kãm kapêr o mẽ pa xwỳnhjê homnuj nê mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urak nê Pahihti Jejusja pĩ. Tã jarãhã mããnên ã Jejus ã mẽ panhĩpêx anê nhũm Tirtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nê.

Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt ¹⁶ jakamã na htem mẽ akwỳ kot Tirtũm kôt amnhĩ xunhwỳr pymaj mẽ anê mẽ ixkurê nê mẽ inhmã:

—Kwa Ijaew kêt xwỳnhjê mã Tirtũm kapêr jarênh kêt nê. Ja mex kêt. Anê.

Mê ate Jejus kôt amnhĩ xunhwỳr nê nhỹrmã Tirtũm wa kuri atĩr tũm nê apaja mẽ kãm hprãm kêt jakamã na htem ã mẽ anê àmnar o pa anhyrja o amnhĩ tomnuj nê.

Mê kot amnhĩ tomnuj tỳx o mẽ pa xwỳnh jakamã na Tirtũm mẽ kamã gryk nê. Koja nhỹrmã mẽ kot amnhĩ xà htỳx kamã hamak tũm xà hwỳr mẽ rênh pa.

Pawre akupỳm Tesarōn nhõ xwỳnhjê hwỳr hkrã hã harênh

Atre 17.10-13

¹⁷ Nê ma mẽ awỳr mẽ inhmōr tã mẽ anhõ krĩ kamã mẽ kêp Kris kwỳ hkêt xwỳnhjaja na pre mẽ ixpumu nê mẽ anê mẽ ijano pa prem ijapôj nê hpãnhã ma nhỹhỹm krĩ hõ hwỳr ixpa. Nom arĩ mẽ amã ijamxpêr rãhã nê mẽ ato ijamak o ri ixpa nê xatã akupỳm mẽ awỳr ixkrã. ¹⁸ Na pa prem inhmã akupỳm mẽ awỳr inhmōr prãm tỳx nê. Ixpê Pawre na pa pre xatã mẽ awỳr ixkrã htã nhũm Satanasti tanhmã mẽ anê ixpê amnar to pa kormã mẽ awỳr inhmōr kêt nê. ãm tee ri inhmōr prãm kaprỳ. ¹⁹⁻²⁰ Mẽ inhmã mẽ akĩnh tỳx. Mẽ ate Tirtũm kôt amnhĩ nhĩpêx mex jakamã koja nhỹrmã Pahihti Jejus akupỳn mẽ pahwỳr wrỳ pa mẽ akuri xa nê kãm mẽ ajarênh o:

—Pa Pahihti. E Tesarōn nhõ xwỳnhjê pumu. Na ka pre mẽ hwỳr inhmẽ pa mẽ hwỳr mō nê mẽ kãm ajarê nhũm prem inhma nê amnhĩ kaxyw akôt hamxpêr tỳx nê akôt amnhĩ xunhwỳ. Tã na htem akôt tãm amnhĩ nhĩpêx rãhã ho pa.

Anhyr o kãm mẽ ajarê nê mẽ anhy hã ixkĩnh tỳx kumrêx.

3

Pawre kot Tesarōn wỳr Ximotre mênh ã harênh

Atre 17.14-15, 18.5

¹⁻⁵ Nê kormã mẽ akôt ixpa ri na pa pre Kris kwỳ hkêt xwỳnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwỳnhjaja mẽ panhĩpêx anhyr o pa. Tã nhũm prem ã mẽ anhy pêx anê pa mẽ ajarênh ma nê tee ri mẽ akukamã ijamxpêr nê axpên mã mẽ ajarênh o:

—Hêxta waa nê. Kwa mẽ kot Jejus ã tanhmã mẽ homnuj toja mỳrapê mãn mẽ tee ri amnhĩ kukamã hamxpêr nê Jejus kaga rỳ ko. Mãn ra Satanasti tanhmã mẽ kãm Jejus o hêx to nhũm mẽ kuma nê tanhmã hamxpêr to nê hkaga. Kwa mãn

pu prem ãm mẽ kãm Tĩrtũm kapẽr jarẽnh kaprỳ nà? Anẽ.

Hãmri nẽ tee ri mẽ akukamã ijamaxpẽr nẽ mẽ awỳr Ximotre mẽnh kaxyw nẽ kãm:

—Mãn ra Tesarōn nhõ xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o ra tee ri amnhĩ kukamã hamaxpẽr. Kwa ma mẽ hwỳr mō nẽ ja hã mẽ omu. Hãmri nẽ mẽ kot Kris kõt amnhĩ xunhwỳr tỳx kaxyw mẽ hamaxpẽr o axihtỳx. Hãmri nẽ akupỳn wa ixwỳr mō nẽ wa inhmã tanhmã mẽ harẽnh to. Kot paj Siras mẽ wa akutẽp jar Atenas kamã wa arĩk. Anẽ.

Hãmri nẽ mẽ awỳr kumẽ. Ximotre na hte Siras mẽ wa inhĩhkõ hã mẽ kãm Tĩrtũm kapẽr jarẽnh o pa. Nẽ Kris kot tanhmã mẽ panẽ amnhĩ nhĩpẽx toja nhũm wa inhĩhkõ hã mẽ kãm harẽnh o pa. Tã pa pre mẽ awỳr kumẽ nhũm ma mẽ awỳr mō pa Siras mẽ wa Atenas kamã kutẽp arĩk.

Ximotre akupỳn mōr nẽ Pawre mã mẽ harẽnh

⁶ Tã nhũm ra ham akupỳn mẽ arũm wa ixwỳr mō nẽ wa inhmã tanhmã mẽ ajarẽnh to pa wa mẽ ajarẽnh ma nẽ ixkĩnh nẽ. Na ka xep htem arĩ amnhĩ kaxyw Kris kõt ajamaxpẽr tỳx rãhã nẽ. Jao mẽ amã mẽ piitã mẽ hkĩnh nẽ tanhmã mẽ ho mex to ho ri apa. Nẽ arĩ mẽ inhmã ajamaxpẽr nẽ ixpyrà nẽ mẽ amã mẽ ixpumunh prãm o ri apa. ⁷ Nà ãm hãmri na ka htem ã amnhĩ nhĩpẽx anẽ. Na pa wa ra jar ixpunuj nẽ ixpa nẽ Kris ã amnhĩ xà htỳx kamã ijamak tã mẽ ajarẽnh ma nẽ tãm ijamaxpẽr. ⁸ Tesarōn nhõ xwỳnhjaja kot Kris ã tanhmã mẽ anhĩpẽx to htã ka mẽ arĩ hkõt amnhĩ xunhwỳr tỳx rãhã nẽ. Pa wa mẽ ajarẽnh ma nẽ mẽ anhỹ hã ixkĩnh pẽ tanhmã Pahihti Jejus mã amnhĩ nhĩpẽx to ho ri ixpa. ⁹ Nà na pa hte wa mẽ anhỹ hã ixkĩnh nẽ. Nẽ xatã Tĩrtũm mã mẽ ajarẽ nẽ kãm:

—Pa Tĩrtũm. Nà ãm hãmri na ka pre amnhĩ kõt Tesarōn kãm akwỳjẽ xunhwỳr tỳx nẽ nhũm htem akõt amnhĩ nhĩpẽx mex rãhã ho pa. ãm hãmri na ka hte ã mẽ hipẽx anẽ. Na pa hte mẽ kot amnhĩ nhĩpẽx mã ijamaxpẽr o ri ixpa nẽ ixkĩnh nẽ.

Anhỹr o kãm mẽ ajarẽ. ¹⁰⁻¹¹ Nom kãm ja pix jarẽnh kêt nẽ. Na pa hte wa

mããnẽn arĩgro hã nẽ kamàt kãm amnhĩ to Mẽpanhĩpẽxà Tĩrtũm mẽ Pahihti Jejus Kris wa hwỳr kãm ixihtỳx rãhã ho ixpa nẽ wa kãm:

—Kwa Tĩrtũm mẽ Jejus wa. Na pa wa ra inhmã Tesarōn wỳr inhmōr nẽ mẽ pahkwỳjẽ pumunh prãm tỳx nẽ. Kormã mẽ kot akapẽr jatur xà mar kêt. Tã wa inhmã akupỳm mẽ hwỳr wa inhmōr nẽ mẽ kãm akapẽr jatur xàm mẽnh prãm. Mẽ kot mar nẽ akõt amnhĩ nhĩpẽx mex o pa kaxyw. Kwa xat ka wa akupỳm mẽ hwỳr wa inhmẽ nã? Anẽ.

Na pa hte wa ã amnhĩ to wa hwỳr rãhã ho ixpa anẽ. Tã koja wa akupỳm mẽ awỳr wa inhmẽ pa wa ma mẽ awỳr inhmōr kurẽ kumrẽx. ¹² Koja Tĩrtũm tanhmã mẽ akrã hto ka mẽ amã axpẽn kĩnh pẽ tanhmã axpẽn to ajuta hto ho ri apa. Nẽ mẽ amã akwỳjẽ hã ma ho te mẽ kam amã amnhĩ tã ma pyrãk o ri apa. ã kot kaj mẽ apiitã axpẽn nhĩpẽx anẽ. Te wa inhmã mẽ akĩnh pẽ tanhmã mẽ ato mex to pyrãk. ¹³ Koja Tĩrtũm ja kaxyw tanhmã mẽ akrã hto ka mẽ tãm ajamaxpẽr mex nẽ. Kêr kê Jejus nhỹrmã akupỳn wrỳ. Mẽ kot hkõt amnhĩ xunhwỳr xwỳnhjẽ mẽ ro hã akupỳn wrỳ. Hãmri ka mẽ Mẽpanhĩpẽxà Tĩrtũm kutã amnhĩ kukamã ajamaxpẽr nẽ tãm mẽ ate amnhĩ nhĩpẽx ã amnhĩ pumunh kõt akĩnh nẽ apikunhar o kuri akuhẽ. No ri tee ri amnhĩ kamã ajamaxpẽr nẽ ajakwamnajre nẽ akuhẽ hkêt nẽ.

4

Tĩrtũm kãm mẽmoj prãm ã harẽnh Rōmãn 13.11-14; Epes 5.3-14

¹ E Jejus kõt ixkwỳjaja. Na pa prem ma mẽ awỳr mō nẽ Tĩrtũm kapẽr o mẽ ajahkre ho ri mẽ akõt ixpa. Mẽ ate mar nẽ Tĩrtũm kãm hprãm xà hkõt tanhmã amnhĩ nhĩpẽx to kaxyw. Ka prem mẽ inhma nẽ hkõt amnhĩ nhĩpẽx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mẽmoj tã mẽ amã karõ. Jakamã kwa kêr ka mẽ arĩ Tĩrtũm kapẽr kõt pix mã ri amnhĩ nhĩpẽx mex nẽ y hã amnhĩ to htỳx pẽ ã amnhĩ nhĩpẽx anhỹr o ri apa. ² Na pa prem ra Jejus nhỹ hã mẽ amã mẽmoj tã karõ. Mẽ ate hkõt amnhĩ nhĩpẽx prãm

xàj mẽ amã hã karō ka prem mẽ inhma. ³ Nà mẽ pahte tãm amnhĩ nhĩpêx o papaja na Tirtũm kãm hprãm. No kêt mẽ pahtýx ri nhãm mēnijê ho amnhĩkati o papaja na kãm hprãm kêt. ⁴ Jakamã kwa kêr ka mẽ amyjaja aprō pix tânopxar o ri apa. No mẽ ri nhãm mēnijê ho amnhĩkati ho ri apa hkêt nê. Nê mẽ anijaja kêr ka mẽ amjên pix tânopxar o ri apa. No mẽ ri nhãm mēmyjê ho amnhĩkati ho ri apa hkêt nê. ⁵ Jejus kwý hkêt xwýnhjaja kot htýx ri kãm hprãm xã hkôt mēnijê hwýr mrrar nê mẽ ho amnhĩkati htã kêr ka mẽ ho mẽ urak kêt nê. Kwarĩ ho kwarĩ. ⁶ ã mẽ kot amnhĩ nhĩpêx anhýr xwýnhjaja koja Tirtũm nhýrmã mẽ homnuj týx kumrêx. Na pa prem ra mẽ amã ja jarê ka prem mẽ inhma. Jakamã kwa kêr ka mẽ ã amnhĩ nhĩpêx anhýr o ri apa hkêt nê. ⁷ Xà na pre Tirtũm ã mẽ pahte amnhĩ nhĩpêx anhýr kaxyw amnhĩ wýr mẽ pahwý nê mẽ pahto hkra? Nà ja kaxyw na pre mẽ pahto hkra hkêt nê. Æm mẽ pahte tãm amnhĩ nhĩpêx o ri papa kaxyw nê tãm ri axpên nhĩpêx o ri papa kaxyw na pre mẽ pahto hkra. ⁸ Jakamã kot kaj mẽ atō ja hã mẽ inhma nê ãm mẽ inhma nê arĩ ã amnhĩ nhĩpêx anê. Hãmri nê mẽ pajaja mẽ ixkapêr nhĩrôp axãm kêt nê. Tirtũm kapêr nhĩrôp kot kaj xa. Nê mãânên kot mẽ pahwýr Karō mēnh xwýnhja kapêr nhĩrôp kot kaj xa.

⁹ Nê mẽ amã axpên kĩnh pê axpên to mex o apa hprãm xàj na pre Tirtũm tanhmã mẽ amã kapêr o amnhĩrit to ka htem ã axpên nhĩpêx anhýr o ri apa. Jakamã kot paj mẽ axte ja hã tanhmã mẽ amã nê hkêt nê. ¹⁰ Na ka mẽ ra amã axpên kĩnh pê te mẽ kam amã amnhĩ tã ma pyrak o axpên nhĩpêx o ri apa. Nê pika pê Masetōn kamã Kris kôt mẽ akwýjaja ka mẽ mãânên amã mẽ hkĩnh pê ã mẽ hipêx anê. Tã kêr ka mẽ arĩ ã amnhĩ nhĩpêx anhýr rãhã nê. ¹¹ Kot kaj mẽ ã amnhĩ nhĩpêx anê hãmri nê ajamakêtkati nê axãmnhĩx axápênh pix tânopxar o ri apa. Jao mẽ hakwa kamã nhãm tanhmã mẽ hixi jarênh to ho ri apa hkêt nê. Nê ãm amnhĩ pix tânopxar o ri apa. Nê amnhĩ pa kukwak ri axápkur kaxyw amnhĩm axápênh mex o ri apa. Na pa prem ra ã ja hã mẽ amã karō anê. ¹² Kot kaj mẽ ã amnhĩ nhĩpêx anê hãmri nê amã prãm xàj axàhwýr o ri apa

hkêt nê. Nhũm Kris kwý hkêt xwýnhjaja mẽ ate amnhĩ nhĩpêx ã mẽ apumu nê axpên mã mẽ ate tãm amnhĩ nhĩpêx xwýnhjê hã mẽ ajarênh kurê kumrêx.

Kris kwý htyk xwýnhjê jarênh

Matêwre 24.29-31; Wam Korĩt 15.51-58

¹³ E Kris kôt ixkwýjaja. Na ka xep mẽ tee ri Kris kôt akwý htyk xwýnhjê hkukamã ajamaxpêr. Jakamã kot paj ixpĩ hã tanhmã mẽ amã mẽ harênh to ka mẽ inhma. Nà Kris kwý hkêt xwýnhjaja na htem ty nhũm mẽ hkwýjaja tee ri mẽ hkukamã hamaxpêr o hkaprĩ nê. Mẽ htyk nê ma Jejus wýr àpir kêt jakamã na htem mẽ mýr pê hkaprĩ htýx nê pa. No mẽ papajaja na pu htem ho mẽ urak kêt nê. ¹⁴ Jejus na pre ty nhũm Tirtũm akupým ho htĩr. Tã ra ã kot hipêx anhýr jakamã koja nhýrmã Jejus akupýn wrý nê mẽ kot hkôt amnhĩ xunhwýr nê htyk xwýnhjê karō nhũm man amnhĩ kôt kaxkwa rũm mẽ o wrý. Na pu htem ã ja kôt pajamaxpêr anê. ¹⁵⁻¹⁶ Na pre Pahihti Jejus inhmã hkôt mẽ pahkwý htyk xwýnhjê jarênh o:

—Kot paj nhýrmã akupýn mẽ awýr wrý ka mẽ ate ixkôt amnhĩ nhĩpêx xwýnh piitã ma ixkutã axàpir o mō. Nom kot kaj mẽ arĩ atĩr nê apa xwýnhjaja akumrêx axàpir kêt nê. Kormã. Koja Tirtũm kapêr o mẽ wrýk xwýnh krãhtũmja Tirtũm mã pifti kakō. Kakōr týx pa ixkwý htyk nê hikwý xwýnhjê mã ixkapêr nê ixãmra kamã mẽ kumra. Nhũm mẽ hkarō akupýn mẽ hwýr wrý nê mẽ kãm gjêx pa. Hãmri nhũm mẽ akupým htĩr nê kãnhmã hkrĩ hpa nê ma kumrêx ixkutã àpir o mō. ¹⁷ Hãmri ka mẽ ate ixkôt amnhĩ xunhwýr xwýnh arĩ mẽ atĩr nê apa xwýnhjaja ka mẽ hã ajêt nê mẽ atipxi nê ma ixkutã axàpir o mō pu mẽ kakrã kamã axpên kaxpa. Hãmri nê mẽ pahpimràatã ma kaxkwam api nê inhō krĩ hwýr pōj. Kaj mẽ Tirtũm mẽ wa ixkuri amex kumrêx nê atĩr tũm nê apa ho apa. Anê.

¹⁸ ã Pahihti Jejus inhmã mẽ pakukamã mẽ pajarênh anê. Jakamã kwa kêr ka mẽ tee ri mẽ pahkwý htyk xwýnhjê hkukamã ajamaxpêr hkêt nê. Æ ixujarênh anhýrta ã anohtýx pê axpên jamaxpêr o axihtýx o ri axpên kôt apa.

5

Mē pahte akupÿn Jejus wrÿk xà hã arÿgro pumunh kêt ã harênh

Matêwre 24.32–25.13; Wam Pêtre 3.8-13

¹⁻² Nē mē pahte Jejus akupÿm wrÿk xà hã arÿgro pumunh kêt jakamã kot paj mē amã tanhmã hã kagà hto hkêt nē. Koja nhÿrmã akupÿn mē pahwÿr nojarêt hãmri nē te kot mē ahkÿnh xwÿnh kot amnhÿ nhÿpêx pyrã nē mē pajaêr pê mē pahwÿr wrÿ. ³ Jakamã koja kormã wrÿk kêt ri nhÿm Kris kwÿ hkêt xwÿnh kot amnhÿ wÿr kamã hamak kêt xwÿnhjaja hãmri mex nē pa hã amnhÿ pumu nē hkÿnh nē pa. Nē axpên mã kapêr o:

—Nà koja Tÿrtÿm tanhmã mē pahto hkêt nē. Arÿ mē pamex nē ri mē papa kênã. Nà kot puj mē paxàmnhÿx ri pajamakêtkati nē ri papa ho papa.

Anhÿr o axpên mã kapêr rôm nhÿm puh Jejus mē haêr pê akupÿn wrÿ. Hãmri nē ma mē kot amnhÿ xà htÿx kamã hamak o pa htÿm xà hwÿr mē rênh pa nhÿm mē tee ri kêp hpimxur prãm kaprÿ. Te mē htujarô xwÿnh kot amnhÿ nhÿpêx pyrãk. Na htem mex nē pa htã hpijagri kaxyw ôhy xà htÿx kumrêx nē tee ri kãm ôhy xà hkêt prãm kaprÿ ho hikwÿ. ⁴ Nom mē kajaja kot kaj mē urã nē amnhÿ jaêr pê akupÿm wrÿk kãm omu nē tee ri amnhÿ kukamã ajamxpêr o akaprÿ hkêt nē. ⁵ Mē pahpê Jejus kwÿ jakamã na pu htem kapêr kôt ri tãm amnhÿ nhÿpêx o ri papa. Jao te mē pahte mē kêp Jejus kwÿ hkêt xwÿnhjê kot amnhÿ nhÿpêx pyrãk kêt. ⁶ Na htem mē pahkÿnhã akupÿn wrÿk kukamã hamaxpêr kêt nē. Te htÿx ri mē ôt rãhã ho hikwÿ pyrãk. Nom mē papajaja na pu htem akupÿn wrÿk kamã pajamak o papa pê kãm tanhmã amnhÿ nhÿpêx mex to rãhã ho ri papa. ⁷ Te kot ja pyrãk. Na htem kamãt kãm gôr nē mēmoj mã hamaxpêr kêt nē htÿx hikwÿ. Nē mē hkwÿjaja kamãt kãm axpã nē htÿx ri tanhmã amnhÿ tomnuj to ho pa. Jao hamaxpêr mex kêt nē. Tã mē kêp Jejus kwÿ hkêt xwÿnhjaja hte mē urãk nē htÿx ri tanhmã amnhÿ tomnuj to ho pa nē akupÿn Jejus wrÿk mã hamaxpêr kêt nē. ⁸ No kêt mē papajaja. Mē pahte hkôt amnhÿ xunhwÿr xwÿnhjaja. Kêr pu mē ho mē urãk kêt nē. Satanasti kãm mē pahte amnhÿ

tomnuj prãm tã mē pahte kãm hprãm xà hkôt amnhÿ nhÿpêx pymaj kêr pu mē mēmoj punuj pê amnhÿ to htÿx rãhã ho ri papa.

Nē amnhÿ kaxyw Jejus kôt pajamxpêr tÿx rãhã nē.

Nē mē pamã mē piitã mē hkÿnh pê mē kutã panojarêt rãhã ho ri papa.

Nē nhÿrmã Tÿrtÿm mē hkra Jejus wa kuri pahtÿr tÿm nē papa ho papa hkukamã mân pajamxpêr rãhã o ri papa.

Kot puj mē ã amnhÿ nhÿpêx anê hãmri nhÿm Satanasti tee ri mē pahte amnhÿ tomnuj prãm xàj mē pahkrãm pajamxpêr punuj jagjênh kaprÿ.

⁹ Xà na pre Tÿrtÿm mē pakamã gryk kãm mē kot amnhÿ xà htÿx kamã hamak tÿm xà hwÿr mē pajanor kaxyw mē parê? Nà na pre ja kaxyw mē parênh kêt nē. ãm Pahihti Jejus Kris kukwak ri kot amnhÿ katut kôt mē pahte amnhÿ tomnuj rênh par nē mē pahto hkra kaxyw na pre mē parê.

¹⁰ Tã mēmo kaxyw na pre Krisja mē panê ty? Nà nhÿrmã Tÿrtÿm mē wa kuri mē pamex kumrêx nē pahtÿr tÿm nē papa ho papa hprãm xàj na pre mē panê ty. Jakamã koja nhÿrmã akupÿm amnhÿ kôt ma mē pahto àpir kaxyw akupÿn mē pahwÿr wrÿ pu mē amnhÿ kaxyw hkôt pajamxpêr xwÿnh piitã ma hkôt kaxkwa hwÿr api hãmri nē Tÿrtÿm wa kuri pamex nē pahtÿr tÿm nē papa ho papa. Kormã mē pahtÿr ri mē papa xwÿnhjaja nē ra mē htyk nē hikwÿ xwÿnhjaja nhÿm akupÿm mē ho htÿr. Hãmri nē mē pahto hpimràatã amnhÿ kôt mē pahto àpir pa. Mē pahte hkôt amnhÿ xunhwÿr xwÿnh piitã koja Jejus nhÿrmã akupÿn wrÿ nē ã mē panhÿpêx mex anê.

¹¹ Tã ã kot anhÿr jakamã kwa kêr ka mē jam ajamxpêr o apa pê axpên jamxpêr o hihtÿx o ri axpên kôt apa. Nē Jejus kôt axpên jamxpêr o hihtÿx o ri axpên kôt apa. Ra ã mē ate axpên nhÿpêx anhÿr tã kêr ka mē arÿ ho anhÿr rãhã ho ri apa nē aa hkaga hkêt nē.

Tÿrtÿm kapêr o mē pajahkre xwÿnhjê jarênh

Karatas 6.6; Wam Ximotre 5.17-19

¹² Nē kwa Kris kôt ixkwÿjaja. Na hte mē kot Tÿrtÿm kapêr o mē ajahkre xwÿnhjaja mē ajahkre mex pê Tÿrtÿm mã mē ajamãr

mex o pa. Na htem ã mẽ anhîpêx mex anhÿr rãhã ho ri mẽ akõt pa. Tã kwa kêr ka mẽ amnhî tã mẽ omu mẽ mẽ kapêr mar tÿx mẽ. ¹³ Nẽ mẽ hã apijaãm pê tanhmã mẽ ho mex to ho apa.

Nẽ kwa kêr ka mẽ tãm axpên nhîpêx mẽ axãmnhîx ri ajamakêtkati mẽ axpên kõt ri apa ho apa.

Mẽ pahte tanhmã Kris kõt mẽ pahkwÿjê nhîpêx to hã mẽ pamã karõ

Epes 4.1-6

¹⁴ Nẽ koja Kris kõt mẽ anhîõ kãm kaga mẽ pa ka mẽ ja hã omu mẽ mẽ kãm anê kê ã amnhî nhîpêx anhÿr kêt mẽ. Kê hpãnhã amnhî xàpkur xà kaxyw àpênh o pa.

Nẽ mẽ kãm ma ho mẽ pa xwÿnhjaja ka mẽ kãm mẽ hamaxpêr o axihtÿx o ri mẽ hkõt apa.

Nẽ kormã amnhî kaxyw Jejus kõt mẽ hamaxpêr tohtuj anhÿr xwÿnhjaja ka mẽ tanhmã Jejus kõt mẽ ho mẽ axihtÿx to kê mẽ hkõt amnhî nhîpêx mex o pa.

E kêr ka mẽ ã mẽ axpên nhîpêx anhÿr o ri apa mẽ axpên kamã agryk tokyx anhÿr kêt mẽ.

¹⁵ Nẽ koja mẽhõ tanhmã atomnuj to ka mẽ ãm omu mẽ amnhî tã tanhmã ho hkõt mẽ. ãm ho mex o ri apa. Nẽ mẽ piitã tanhmã mẽ ho mex to hpix kukamã ajamaxpêr rãhã mẽ.

¹⁶ ã mẽ pahte amnhî nhîpêx anhÿr o papaja na Tirtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

¹⁷ Nẽ mẽ pahte Tirtũm mã amnhî jarênh rãhã ho papaja na mããnên kãm hprãm.

¹⁸ Nẽ tanhmã mẽ pakute htã arĩ Tirtũm mã mẽ mex o mex ã harênh o papaja na mããnên kãm hprãm. Mẽ pahkĩnh mẽ papa kamã kãm mex o mex ã harê. Rÿ mẽ pahpunuj mẽ papa htã arĩ kãm mex o mex ã harê. Rÿ nhũm mẽhõ tanhmã mẽ panhîpêx to htã pu mẽ arĩ kãm mex o mex ã harê.

ã mẽ pahte amnhî nhîpêx anhÿr o papaja na Tirtũm kãm hprãm.

Mẽ pahte tanhmã Tirtũm Karõ nhîpêx to hã mẽ pamã karõ

¹⁹ Nẽ koja Tirtũm Karõ mẽ amã mẽmoj tã tanhmã kapêr o amnhîrît to ka mẽ ama

nẽ hkõt amnhî nhîpêx kurê kumrêx. Rÿ mẽhõ mã tanhmã akapêr to kurê kumrêx. No kêr ka mẽ ama mẽ ãm ama mẽ atÿx ri hã apa hkõt mẽ. ²⁰ Rÿ nhũm mẽhõ Tirtũm Karõ nhÿ hã tanhmã mẽ amã kapêr to ka mẽ ama mẽ agryk mẽ tanhmã ho akapêr punuj to hkõt mẽ. ²¹ Koja Tirtũm kapêr kõt tanhmã mẽ amã mẽmoj jarênh to mẽ ãm hãmri Tirtũm Karõ nhÿ hã harênh ã amnhî jarê. Ka mẽ ama mẽ hkõt amnhî nhîpêx. ²² No koja Tirtũm kapêr kwÿm ri tanhmã mẽmoj jarênh to hãmri mẽ Tirtũm Karõ nhÿ hã ja jarênh kêt mẽ. ãm amnhî krã hkõt harê. Ka mẽ tee ri ama mẽ amnhî krã kamã kapêr xir tÿx kêt mẽ. Jao hkõt amnhî nhîpêx kêt mẽ.

Tanhmã Pawre kot mẽ ho Tirtũm wÿr to hã harênh

Wam Tesarõn 3.3, 16

²³ Nẽ na pa hte mẽ ato Tirtũm wÿr o ri ixpa mẽ mẽ kãm:

—Pa Tirtũm. Nà ate mẽ inhmã mẽ ijamakêtkati xà nhõr jakamã na pa htem anhÿ hã ixãmnhîx ijamakêtkati mẽ ri ixpa. Jakamã kwa kêr ka tanhmã Tesarõn kamã akwÿjê ho kê mẽ amnhî to mex rãhã ri pa. Jao tãm amnhî nhîpêx mẽ tãm ri hamaxpêr rãhã nhũm Pahihti Jejus Kris akupÿn mẽ ixwÿr wrÿ.

Anhÿr o mẽ ato kuwÿ. ²⁴ Tã koja ã mẽ anhîpêx anê. Ra kot amnhî jarênh xà hkõt. ã mẽ anhîpêx anhÿr kaxyw na pre amnhîm mẽ arê.

Kagã jatur xà

²⁵ E Kris kõt ixkwÿjjaja. Kwa kêr ka mẽ amnhî xwar ixto Tirtũm wÿr o apa.

²⁶ Nẽ kêr ka mẽ atar Kris kõt mẽ pahkwÿjê piitã mẽ mẽ kãm mẽ ijarê.

²⁷⁻²⁸ Nẽ kê Pahihti Jejus Kris mẽ akutã nojarêr rãhã ho pa. Ixte Pahihti nhÿ hã ã mẽ amã ixkapêr mẽ hã kagã anhÿr jakamã kêr ka mẽ atar Kris kwÿjê piitã mẽ mẽ kãm kamã harê kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagã nhîpêx mẽ mẽ awÿr mẽnh anê.

Sikûn Tesarôn
Pawre kot Tesarôn kamã
Jejus kôt kwÿjê hwÿr wam
kagà nê mēnh kôt hō kagà nê
mēnh

Pawre na pre kagàja nhîpêx nê ma Tesarôn kamã Jejus kôt hkwyjê hwÿr kumê. Na pre hte Tesarôn kamã mē kãm Jejus ã mē hkurê xwÿnhjaja Jejus ã tanhmã mē homnuj to nhũm mē amnhî xà htÿx kamã hamak o pa. Hãmri nhũm Pawre mē harênh ma nê kagàja nhîpêx nê mē hwÿr kumê. Nê kamã mē kãm mē hamaxpêr o hihtÿx. Nê mē kot arî Tirtûm kôt amnhî nhîpêx mex o pa nê hamaxpêr kôt hamaxpêr o pa hã mē kãm karō. Nê nhÿrmã Jejus akupÿn kaxkwa rûm mē pahpê hkrajê hwÿr wrÿk nê pika ho hapêx par ã mē kãm harê. Æ na pre Pawre mē kãm kagàja kamã mē kãm ujarênh anê. Nê mē kãm:

¹ Pa Tesarôn nhō xwÿnh kot Tirtûm kapêr mar kaxyw axpên wÿr mē apikuprôn h xwÿnhjaja? Xà mē amex na ka mē apa? Ixpê Pawre na pa axte mē awÿr kagà nhîpêx nê kumê. Siras mē Ximotre mē pa mē awÿr kumê. Nà mē pahpê Mēpanhîpêxà maati Tirtûm mē Kra Jejus Kris kwÿ na pu mē. ² Jakamã na pa htem mē ato wa hwÿr rãhã ho ri ixpa. Wa kot mē akutã nojarêr rãhã ka mē ajamakêtkati nê apa kaxyw. Nê mēmoj to mē akutã wa nojarêr rãhã ho pa kaxyw.

Tirtûm kot nhÿrmã hkrajê nhîpêx kati xwÿnhjê homnuj tÿx ã harênh

Wam Pêtre 4.12-19

³ Nê na ka htem amnhî kaxyw Tirtûm mã ajamaxpêr tÿx mex o ri apa. Nê axpên kutã anojarêr rãhã nê. Na pa htem ã mē ate amnhî nhîpêx anhÿrja mã ijamaxpêr nê mē anhÿ hã ixkÿnh nê Tirtûm mã mē anhÿ hã ixkÿnh ã amnhî jarê. ⁴ Nê nhÿhÿm ixpa nê nhÿri krÿm agjê nê kamã Tirtûm kôt mē pahkwÿjê mã mē ato amÿra nê mē kãm:

—E pa mē amã Tesarôn kamã Kris kwÿjê jarê ka mē inhma. Nà mē ò krÿ kamã mē hkwyjaja na htem Kris ã mē hipêx kati ho pa nhũm htem amnhî xà htÿx kamã hamak pê mex kêt nê pa. Tã nom tee ri amnhî

kukamã hamaxpêr o Jejus kaga hkêt nê. Na htem arî hkôt amnhî nhîpêx mex rãhã ho pa. Anê.

⁵ ã mē ate mē kutã amnhî nhîpêx anhÿr o apaja na hte Tirtûm hã mē apumu nê hkÿnh nê pa. Nê mē akukamã hamaxpêr o:

—Mê kot Ixkra Jejus ã tanhmã mē hipêx to ho pa htã ãm hãmri na htem mē kutã amnhî to htÿx o pa nê mē umaj wa ixkaga hkêt nê. Na htem ã amnhî nhîpêx anê nê mē kêp ixkra hã amnhî to amnhîrÿt mex nê. Nà koja mē nhÿrmã wa ixri mex kumrêx nê htÿr tûm nê pa ho pa.

Anhÿr o hamaxpêr. ⁶ Nê mē kot Kris ã mē anhîpêx punuj xwÿnhjaja koja Tirtûm nhÿrmã mē atã mē homnuj tÿx nê nhũm mē amnhî xà htÿx kamã hamak rãhã ho pa. Æm hãmri koja ã mē atã mē hipêx anê. ⁷⁻¹⁰ Koja Pahihti Jejusja nhÿrmã man akupÿn pika hwÿr hirã htÿx kãm wrÿ nhũm Tirtûm kapêr o mē wrÿk xwÿnh xihtÿx xwÿnhjaja man hkôt wrÿ. Koja mē wrÿ hãmri nê mē kot amnhî tomnuj xwÿnhjê homnuj tÿx kumrêx. Jao ma mē kot amnhî xà htÿx kamã hamak tûm xàta wÿr mē rênh pa nhũm mē kamã htÿr tûm nê amnhî xà htÿx kamã hamak rãhã ho pa ho pa. Koja ã Pahihtija amnhî nê mē kot hkôt amnhî xunhwÿr kêt xwÿnhjê rênh anê nhũm mē pahkÿnhã Tirtûm mē Krata wa kuri mex nê pa hkêt nê. Nê mē pahkÿnh ã wa mex o wa mex nê wa hihtÿx o wa hihtÿx ã wa omunh kêt nê. Koja Pahihti Jejus nhÿrmã akupÿn wrÿ nê ã mē panê mē hipêx anê. Koja wrÿ pu mē amnhî kaxyw hkôt pajamaxpêr xwÿnhjaja amnhî wÿr omu nê pahkÿnh nê. Hãmri nê amnhî nhÿ nyw ã amnhî pumu nê kãm:

—Hêxta waa nê. Amex o amex Pahihti. Na ka pre mē inhnê ty hãmri nê mē inhmã mē inhÿ nyw gō. Kot paj mē Tirtûm mē war ari inhmex kumrêx nê ixtÿr tûm nê ixpa ho ixpa. Æm hãmri na ka ã mē ixto mex anê. Nà amex kumrêx o amex kumrêx Pahihti. Anê.

Æ kot puj mē pahpê hkwyjaja amnhî tã kãm mex o mex ã harênh anê. Ra mē ate mē ixkapêr mar nê hkôt amnhî xunhwÿr jakamã kot kaj mē ixpyrà nê ã kãm mex o mex ã harênh anê.

Pawre kot Tesarôn nhô xwÿnhjê ho Tirtûm wÿr ã harênh

11-12 Nê na pa htem mê ato Tirtûm wÿr rãhã ho ixpa nê kãm:

—Pa Tirtûm? E Tesarôn kãm akrajaja na pa mê ho awÿ. Na ka hte Akra Pahihti Jejus Kris mê wa mê ho mex rax o apa. Jao amnhîm mê arê nhûm mê ra kãm amnhî to mex prãm nê. Na htem amnhî kaxyw Jejus mã hamaxpêr rãhã pê mëmoj to axpên kutã nojarêt o pa. Jakamã kwa tanhmã mê hkrã hto kê mê akôt ã amnhî nhîpêx anhÿr rãhã ho pa. Kêr ka mê kot akôt amnhî nhîpêx o pa hã mê omu nê akînh nê mê kãm mê mex ã mê harê. Nhûm mê ate tanhmã mê ho mex to hã amnhî tã apumu hãmri nê mê amnhî pyrã nê amã amex o amex ã ajarênh rãhã ho pa. Anê.

2

Kot amnhî tomnuj tÿx kumrêx xwÿnh maati jarênh

Matêwre 24.23-25; Makre 13.14-23; Rukre 21.20-24; Wam Juãw 2.18-19; Apokarip 13.1-18

¹ Nê koja nhÿrmã mê panhõ Pahihti Jejus Kris akupÿn wrÿ pu mê ma kutã api nê kakrã kamã hkaxpa. Jakamã kwa Jejus kôt ixkwÿjaja. ² Koja mëhõ mê awÿr mō nê mê amã Jejus ra akupÿn wrÿk ã harênh japêr. Rÿ tanhmã mê amã Jejus hpôx xà hã arÿgro jarênh o hêx to nê mê amã:

—Kwa na ra Jejus akupÿn nojarêt. Koja tokyx akupÿn mê pahwÿr wrÿ. Semãn ja kamã rÿ kō. Apu hõ hã koja apu wrÿ rÿ kō.

Anhÿr o harê. Nê Tirtûm Karõ nhÿ hã ã kot mê amã harênh anhÿr ã amnhî jarê rÿ nhãm mëhõ kot ã kãm harênh anhÿr ã harê. Rÿ pa ixte harênh nê hã kagã hã ijarê. Nom kwa kêr ka mê kapêr ma nê ãm ama nê hkôt ajamaxpêr kêt nê. Rÿ ama nê tee ri amnhî kukamã ajamaxpêr kêt nê. Koja mëhõ ã mê amã Jejus tokyx wrÿk ã harênh anê nê ãm amnhî krã hkôt ã harênh anhÿr o hêx. Nom Tirtûm Karõ nhÿ hã rÿ pa inhÿ hã rÿ nhãm Kris kôt mê panhõ nhÿ hã ã harênh anhÿr kêt nê. ³⁻⁴ Jakamã kêr ka mê ãm mê kot harênh o hêxja ma nê hkôt ajamaxpêr kêt nê. Kormã Pahihti Jejusja akupÿn nojarêt kêt. E kot paj ixprî hã mê amã ja jarê ka mê inhma. Nà kormã

Pahihti akupÿn nojarêt kêt ri koja mê ohtô rax kumrêx nê Tirtûm kutã amnhî xunhwÿ nê kãm hkurê ho pa. Nê amnhî tomnuj tÿx o pa. Hãmri nhûm ra kot amnhî tomnuj tÿx kumrêx xwÿnh maati amnhî to amnhîrît. Nom na pre ra Tirtûm tanhmã kot hipêx to hkukamã hã amnhî jarê. Koja xep gaa nê ma mê kot amnhî xà htÿx kamã hamak tûm xàta wÿr kumê nhûm kamã amnhî xà htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mënh kêt ri koja mê piitã omu nê kêp Mêhpãm maati pixi hã harênh kaxyw mê kêp mê õ sãnti piitã hkrakrak pa. Nê mê kot mëmo karõ ho amnhî pãm ã harênh xwÿnhja nhûm piitã hkrakrak pa. Hãmri nê axtem nê Tirtûm mã amnhî jarênh xà hã ixkre jatur xà kamã hitom wÿr axà nê kamã nhÿ nê hêx rom mê piitã mê kãm kêp Tirtûm ã amnhî to hêx nê mê kãm:

—E mê amnê ixpumu. Ixpê mê anhõ Tirtûm na pa. Pa kot kaj mê inhmã inhmex o inhmex ã ijarê. No kêr ka mê anhõ sãnti ho apãm o apa hkêt nê. Kwarî ho kwarî. ãm paxipix ixpê Mëapãm maati nê paxipix ixpê mê anhõ Tirtûm.

Anhÿr o amnhî to hêx. ⁵ Na pa pre arî mê akôt ixpa ri ã mê amã harênh anê. Mãn arî mê ate ja hã anohtÿx rÿ kō. ⁶ Nom kormã ã kot amnhî nhîpêx anhÿr xà hã arÿgrota kormã kator kêt. Mëhõ kormã kot kêp àmnàr jakamã nhûm kormã kator kêt nê. Ra mê ate kêp àmnàr xwÿnhja jarênh mar. Tã koja hpôx xà hã arÿgro kato nhûm kêp àmnàr xwÿnhta kãm pry kaprã nhûm rî kormã mō. ⁷ Nom na hte ra hpimxur pê Tirtûm nê mê piitã mê hkurê ho pa. Mê kot Tirtûm kôt amnhî xunhwÿr pymaj tanhmã nê mê ho ho pa. Nom kormã kêp àmnàr xwÿnhja kêp àmnàr jakamã nhûm hte mê noo mã tanhmã mê ho hkêt nê. Tã koja Tirtûm nhÿrmã kêp àmnàr xwÿnhja mã anê nhûm kuma nê kãm ure nhûm rî kormã amnhî to amnhîrît nê mê piitã mê noo mã mō nê Tirtûm nê tanhmã mê kãm hêx to ho pa. ⁸⁻¹² Koja kato nê Satanasti mê wa mê piitã tanhmã mê nokupyr to ho ri mê hkôt pa. Nê hêx rom mê kãm aa mê kot mëmoj pumunh kêt kwÿ ho anhÿr o ri pa. Koja wa hêx rom te Tirtûm kot amnhî nhîpêx pyrãk o ã amnhî nhîpêx anê. Hãmri

nhūm mē kot Jejus kōt amnhī xunhwȳr kēt xwȳnhjaja ja hā wa omu nē wa hkōt hamaxpēr kurē kumrēx. Nē ām hāmri wa kapēr ā wa hkamnhīx. Kop apu ra mē kot Tīrtūm kapēr mar nē hkōt amnhī xunhwȳr ronhȳx ra Tīrtūm amnhī tā mē omu nē mē ho hkra. Nom koja mē kām kapēr mar prām kēt nē. Ām wa kot amnhī to hēx o wa pa xwȳnhhta kōt pix mā koja mē kām amnhī nhīpēx prām.

Ja mȳrapē koja Tīrtūm tee ri ja hā mē omu hāmri nē mē nē wa kot amnhī tomnuj tȳx xwȳnhhta wa omunh kēt nhūm wa tanhmā mē kām amnhī nhīpēx to nhūm mē wa omu nē wa hkōt hamaxpēr kurē kumrēx. Hāmri nē wa gryk ā Tīrtūm kaga jakamā nhūm nhȳrmā mē kot amnhī xā htȳx kamā hamak tūm xāja wȳr mē rēnh pa.

Koja Satanasti mē kot amnhī tomnuj tȳx kumrēx xwȳnh maatita ā hēx rom tanhmā mē no kupyw to anhȳr o pa rāhā nhūm Pahihiti Jejusja hirā rax kām akupȳn mē pahwȳr wrȳ. Hāmri nē kot amnhī tomnuj tȳx kumrēx xwȳnh maatita ā amȳnē nhūm mē kām hpīr kurē kumrēx nhūm hapēx. Koja ā amnhī nhīpēx anē.

Tīrtūm kot tanhmā mē pahto mex to hā harēnh

Rōmān 8.28-30; Wam Tesarōn 2.13, 5.23-24

¹³ Nē amnepēm kormā mēmoj kēt ri na pre Tīrtūm amnhīm mē arē. Mē ate kapēr mar nē hkōt amnhī xunhwȳr nhūm kot mē ato hkra kaxyw mē arē. Kām mē ajapēē. Na pre mē awȳr amnhī Karō rē nhūm mē akarō mā agjē nē tanhmā mē ajamaxpēr to ka mē ŷ hā tām amnhī nhīpēx rāhā ho ri apa. Na pa htem ja hā mē amā ijamaxpēr nē mē anhȳ hā ixkīnh kām Tīrtūm mā mē ajarēnh o ri ixpa. ¹⁴ Na pre mē awȳr mē ixrē. Mē ixte mē awȳr ixpa nē mē amā tanhmā Jejus kot mē panē amnhī nhīpēx to hā harēnh o ixpa kaxyw. Mē ate mē inhmar nē Jejus kōt amnhī xunhwȳr nhūm Tīrtūm kot Pahihiti Jejus Kris o mex pyrā nē tanhmā mē ato mex to kaxyw. ¹⁵ Jakamā kwa kēr ka mē ra mē ixte wam mē awȳr kagā mēnhhta kamā harē nē mar tȳx nē. Nē mē akōt mē ixpa ri tanhmā mē ixte mē ajahkre htoja mā ajamaxpēr mex nē hā

ano htȳx nē hkōt amnhī nhīpēx rāhā ho ri apa. Jao Jejus kōt amnhī nhīpēx mex o ri apa Kris kōt ixkwȳjaja.

¹⁶ Mēpanhīpēēxā maati mē Pahihiti Jejus Kris wa kām mē pajapē htȳx kumrēx. Na hte wa tanhmā mē pajamaxpēr o hihtȳx to ho pa pu mē wa ŷ hā tām pajamaxpēr o ri papa. Nē wa ŷ hā nhȳrmā wa kuri pamex nē pahȳr tūm nē papa hkukamā pajamaxpēr kaprȳ ho papa hkēt nē. ¹⁷ Na pa htem mē ato wa hwȳr o ixpa nē wa kām:

—Pa Tīrtūm mē Jejus wa? Kwa kēr ka wa tanhmā Tesarōn kamā akrajē mā mē hamaxpēr o hihtȳx to kē mē war anhȳ hā tām amnhī nhīpēx nē tām hamaxpēr. Jao kapēr mex rāhā nē pa ho pa. Anē.

3

Tanhmā mē pahte axpēn to Tīrtūm wȳr to hā kot mē pamā karō

Korosē 4.2-4

¹ Nē kwa Kris kōt mē ixtō nē ixtōxjaja. Kēr ka mē amnhī xwar mē ixto Tīrtūm wȳr rāhā ho ri apa. Mē ixte krī piitā hkōt mē kām Jejus jarēnh o ri mē hkōt ixpa nhūm mē kot mē inhmar nē amnhī kaxyw Jejus kōt hamaxpēr kaxyw. Jao mē apyrā nē hkōt amnhī nhīpēx mex o pa kaxyw. ² Nom koja mē piitā ā amnhī nhīpēx anhȳr kēt nē. Mē hkwȳjaja kām Jejus jarēnh mar prām kēt jakamā kwa mē ixto Tīrtūm wȳr kē mē inhnē mē omunh mex nē nhūm mē Jejus ā tanhmā mē ixto hkēt nē.

³ Nē koja Pahihiti tanhmā mē akrā hto ka mē ajamaxpēr mex nē ŷ hā hkōt amnhī xunhwȳr tȳx o ri apa. Jakamā nhūm Satanasti mē ate amnhī tomnuj hprām xāj tee ri tanhmā mē anhīpēx to kaprȳ nhūm Pahihiti mē anē omunh mex nē. Ra kot mē atā amnhī jarēnh xā hkōt. ⁴ Koja ā mē anē hipēx anē ka mē ŷ hā tanhmā mē ixte mēmoj tā mē amā karō xā hkōt amnhī nhīpēx mex o ri apa. ⁵ Tā kē Pahihiti tanhmā mē akrā hto ka mē Tīrtūm pyrā nē mē piitā mē kamā axukaprī ho ri apa. Nē Pahihiti Kris pyrā nē mēmoj punuj kutā amnhī to htȳx nē. Jao hkōt amnhī nhīpēx mex rāhā ho ri apa.

*Mē kām kaga xwýnhjê jarēnh**Wam Korīt 4.12; Epes 4.28; Wam Tesarōn 4.9-12*

⁶ E kot paj hpānhā Kris kōt mē pahkwý kām kaga xwýnhjê jarē ka mē inhma. Pahihti Jejus nhý hā kot paj mē amā tanhmā mē harēnh to. Nà koja mē akwýjaja kām kaga nē amnhīm mēmoj tā àpēnh kēt japēr. Nē mē ixte mē axàpēnh mex o apa hā mē amā karōja kuhpa hā amnhīm mēmoj tā àpēnh kēt japēr. Koja mē ā amnhī nhīpēx anē ka mē ja hā mē omu hāmri nē mē hkōt ri apa hkēt nē. ⁷⁻⁸ Xà mē pajaja na pa prem ma mē awýr mō nē mē akōt inhma kaga nē mēmoj tā ixàpēnh kēt nē ri ixpa? Nà na pa prem mē apa kukwak ri ixàpkur pymaj ixàpēnh rūnh nē amnhī pa pix kukwak ri ixàpkur o ri ixpa. Na ka prem mē inhma mēmo mē apkur xà ho mra pa prem amarī amnhīm hamýnh nē hkur kēt nē. Na pa prem hpānhā mē amā amnhīre nē kormā kuku. Tā kēr ka mē ā amnhī nhīpēx anhýr o ri axpēn kōt apa nē amnhī pa pix kukwak ri apku. Nē mē amā kaga hā nhām akwýjê hpa kukwak ri axàpkur o ri apa kēt nē. ⁹ Na pa prem amnhī pa pix kukwak ri ixàpkur o ri mē akōt ixpa. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhma mē ixàpkur xà nhōrja Jejus mā tanhmā kute hkēt tā pa prem ā amnhī nhīpēx anhýr kēt nē. Mē ate ja hā mē ixpumunh nē mē ixpyrà nē ā amnhī nhīpēx anhýr kaxyw na pa prem amnhī pa pix kukwak ri ixàpkur o ri mē akōt ixpa.

¹⁰ Na pa prem mē amā ja hā karō ho:

—Koja mēhō kām kaga nē àpēnh kēt nē ka mē ja hā omu nē kām ō hkēt nē. Kwār māmri apkur kēt nē kām prām nē ri pa nē amnhī pumu. Anē.

¹¹ Tā xep ra mē akwýjaja ā amnhī nhīpēx anē nē kām kaga nē àpēnh kēt nē amarī ri pa. Nē xep htýx ri axpēn jakwa kamā nhām mē hixi ho rēr o ri pa. ¹² Kwa mē inhma Jejus kōt ixkwýjaja. Kot paj Pahihti Jejus nhý hā mē amā mē kot ā amnhī nhīpēx xwýnhjê jarē ka mē inhma nē mē inhmar týx nē. Kēr ka mē kām kaga xwýnhjê mā anē kē mē jam ure nē hpānhā àpēnh mex o pa.

Jao mē apyrà nē amnhī pa kukwak ri apkur o pa. Kēr ka mē ā mē kām ixkapēr jarēnh anē.

¹³ Nē kwa kēr ka mē axpēn to mex o apata kaga hkēt nē.

¹⁴ E na pa mē ā Tirtūm nhý hā mēmoj tā mē amā karō nē hā kagà anē. Tā koja mēhō kamā harē nē kuma nē ām kuma nē hkōt amnhī nhīpēx kēt ka mē ja hā omu nē hkōt ri apa hkēt nē. Tokyx kot ja hā amnhī pumunh nē amnhī tā hpijaàm kaxyw. ¹⁵ Nom arī Kris kōt kēp mē akwý jakamā kēr ka mē arī kēp mē atō rý atōx ā tām hipēx nē kām akapēr mex o ri apa. Nom te ho kēp mē akwý hkēt pyrāk o kām akapēr kēt nē.

Tanhmā Pawre kot mē ho Jejus wýr to hā harēnh

¹⁶⁻¹⁸ Nē na pa hte mē ato Pahihti Jejus wýr rāhā ho ixpa. Kot mē pamā mē pajamakētkati xà nhōr jakamā na pa htem mē ato kuwý nē kām:

—Pa Pahihti? Kwa kēr ka Tesarōn kamā akwýjê pumu nē mēmoj to mē kutā anojarēt rāhā ho ri mē hkōt apa. Kē mē hamakētkati nē àmnhīx pa ho pa. Anē.

Tā ām ja pix. Ixpē Pawre na pa kagà jatur xà kamā inhīhkra ho amnhī nhīxi nhīpēx. Na hte kagà nhīpēx xwýnh inhma ixkapēr ā kagà. Nē hā kagà hpa pa hpānhā hatur xà kamā pam inhīxi nhīpēx. Tā na hapēx.

Wam Ximotre Pawre kot Ximotre hwÿr kagà nê mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tîrtûm kapêr o Jejus kôt hkwÿjê jahkre ho pa. Hãmri nhÿm Pawre krî hõ kamã pa nê kagàja nhîpêx nê hwÿr kumê. Nê kamã kãm mëmoj tã karõ. Na pre ra Epes kamã më hkwÿjaja Tîrtûm kapêr o hêx o më ahkre ho pa nhÿm Pawre më harênh ma nê kagàja kamã Ximotre mã tanhmã më harênh to. Nê kot Tîrtûm kapêr o Jejus kwÿjê jahkre mex xwÿnhjê xunhwÿr kaxyw kãm karõ. Nê Tîrtûm kãm hprãm xà hkôt pix mã më ahkre ho pa hã kãm karõ nê hwÿr kagà nê kumê. Nê kãm:

¹ Pa Ximotre? Xà amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hã më ahkre ho ixpa kaxyw na pre Mëpapytâr xwÿnh Tîrtûm më Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nà ra ate ixkapêr mar xà hkôt Jejus kôt amnhî xãm jakamã te apê ixkra pyrãk Ximotre. Jakamã na pa hte ato Mëpanhîpêêxã maati Tîrtûm më panhõ Pahihti Jejus Kris wa hwÿr o ixpa nê ato wa hwÿr o:

—Pa Tîrtûm më Pahihti wa. E Ximotre ho na pa war awÿr kaxyw. Kwa kêr ka wa kamã axukaprî nê kutã war anojarêr rãhã ho wa ri apa. Kot kaj wa ã ho mex anê nhÿm war anhÿ hã hamakêtkati nê àmnhîx pa ho pa.

Anhÿr o na pa hte war ato kuwÿ

Tîrtûm kapêr o më ahkre xwÿnhjê jarênh Rômãn 16.17; Wam Ximotre 6.3; Sikûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetõn wÿr panojarêr nê tee ri Epes kamã Tîrtûm kapêr ho hêx o më ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tîrtûm kapêr o më hêx

xwÿnhjê mã akapêr nê ã më hêx anhÿrja nê më hkurê ho ri më hkôt apa.

Anhÿr o amã harê hãmri nê Epes kamã are nê ma Masetõn wÿr ahte mõ. ⁴ Më hêx xwÿnhjaja amnepê m panhîgêjtaja kot tanhmã amnhî nhîpêx to nê tanhmã ujarênh toja nhÿm htem më kãm harênh pix o pa. Nê më hixi piitã harênh o pa. Na htem ã amnhî krã hkôt hkwÿjê mã ujarênh anhÿr o pa. Jao axpên kwÿm ri më ahkre nê më hã axpên mã àkjêr o pa. ã më kot amnhî nhîpêx anhÿr jao Tîrtûm nhÿ hã kãm hprãm xà hkôt më ahkre hkêt nê. Kojã mëhõ Tîrtûm nhÿ hã kapêr o më ahkre hãmri nê amnhî kaxyw kãm hamaxpêr tÿx pê tanhmã më ahkre hto. Nom ixte amã më harênh xwÿnhjaja Tîrtûm nhÿ hã më ahkre hkêt jakamã na pa pre inhnojarêr nê ã amã më harênh anê nê më kuri Epes kamã are.

⁵ Tã kêr ka arî më ahkre ho ri më hkôt apa Ximotre. Nê Kris kôt më pahkwÿjê mã anê kê më amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê më kãm anê kê më te kãm amnhî tã ma pyrãk o nhãm kãm më hã ma ho pa. ⁶ Ixte amã më hêx xwÿnh jarênh xwÿnhjaja na htem ã më ahkre anhÿr kêt nê. Na htem htÿx ri amnhî krã hkôt tanhmã më ahkre hto. ⁷ Tîrtûm kot finat Mojes mã mëmoj tã karõja më kot mar tÿx ã amnhî kamnhîx nê ho më ahkre hprãm tã no ãm hprî hã mar kêt nê htÿx ri ho më ahkre ho pa. ⁸ Tîrtûm kot Mojes mã mëmoj tã karõja mex. Më kot mar nê hkôt amnhî nhîpêx o pa kaxyw na pre. ⁹ No na pre më kot tãm amnhî nhîpêx xwÿnhjê mã ã hã karõ anhÿr kêt nê. ãm më kot amnhî tomnuj xwÿnhjê mã na pre hã karõ.

Më kot më õ pahi kapêr mar kêt xwÿnhjê mã.

Nê më kot Tîrtûm kapêr nhîrõp kuhê ho më pa xwÿnhjê mã.

Nê Tîrtûm ã më hpîjaãm kêt xwÿnhjê mã. Nê më kot më hipêêxã nê më katorxã hpar xwÿnhjê mã.

¹⁰ Nê më hprõ kuhpa hã nhãm mënijê ho amnhîkati xwÿnhjê mã.

Nê më mjên kuhpa hã nhãm mëmyjê ho amnhîkati xwÿnhjê mã.

Ně mēmyjaja kot mēnijê kuhpa hã kãm amnhĩ kwỳ myjê hkĩnh nē mē ho amnhĩkati xwỳnhjê mã.

Ně mēnijaja kot mēmyjê kuhpa hã kãm amnhĩ kwỳ nijê hkĩnh nē mē ho amnhĩkati xwỳnhjê mã.

Ně mē kot mēmoj to àhkĩnh nē nhãm mē kãm ho wēnê o mē pa xwỳnhjê mã.

Ně ri mē hêx o mē pa xwỳnhjê mã.

Ã mē kot Tĩrtũm kapēr kwỳm ri amnhĩ nhĩpêx anhỹr o mē pa xwỳnh piitã mē kaxyw na pre Mojes mã mēmojta ã karõ. Mē kãm Jejus prãm kêt xwỳnhjê mã. Mē kot mar nē tãm amnhĩ nhĩpêx kaxyw. ¹¹ Tã pa na pa hte Pahihti kot tanhmã mē panê amnhĩ nhĩpêx to hã harēnh o ri mē hkôt ixpa. Ja kaxyw na pre Tĩrtũm ixãm. Tĩrtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harēnh

Atre 26.9-18

¹² Ně Pahihti Jejus Kris na hte ixto mex rãhã ho pa. Na hte tanhmã ixto pa ý hã mē piitã mē kãm tanhmã kot mē panê amnhĩ nhĩpêx to hã harēnh o ri mē hkôt ixpa. Na pre ixte ã amnhĩ nhĩpêx anhỹrja kukamã inhmã ixàpēnh ã karõ nē inhmã:

—E ate amnhĩ kaxyw ixkôt ajamaxpēr mex jakamã kēr ka ma mē piitã mē hkôt ri mē kãm ixkapēr jarēnh o ri apa. Anē.

¹³ Nom amnepēm na pa pre hkôt ijamaxpēr kêt nē. ãm axtem nē haprỳ rũnh nē ho ixkapēr punuj o ri ixpa. Ně hkwỳjê ho ixkrihkrit nē mē haprỳ nē mē htak. Nom kormã amnhĩ kaxyw Kris kôt ijamaxpēr kêt jakamã ixtỳx ã mē hipêx anhỹr o ixpa nhũm Pahihti ja hã ixpumu nē ixkamã ukaprĩ nē mē hã tanhmã ixto hkêt nē. ¹⁴ Ně kãm ijapê xàj mēmoj to ixkutã nojarêt rãhã ho pa nē tanhmã ixkrã hto pa ra amnhĩ kaxyw hkôt ijamaxpēr nē hkôt amnhĩ xãm. Hãmri nē kukwak ri ra inhmã hkwỳjê hkĩnh nē hpãnhã mē ho mex o ri mē hkôt ixpa.

¹⁵ Ně Jejus Kris ra wrỳk nē mē pahte amnhĩ tomnuj piitã hpãnhã amnhĩrer kaxyw mē panê htyk ã harēnhja na pa hte harēnh o ri ixpa. ã kot amnhĩ nhĩpêx anhỹrja na mex o mex. Kê mē piitã kuma nē hã nohtỳx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj tỳx kumrêx o mē piitã mē hakrenh ¹⁶ nhũm Tĩrtũm ixpumu nē ixkamã ukaprĩ nē. Hãmri nē amnhĩ kaxyw ixãm. Mē piitã mē kot ja hã ixpumunh nē axpēn mã ã ijarēnh anhỹr kaxyw. Ně ijarēnh o:

—Kwa Pawre na pre amnhĩ tomnuj tỳx kumrêx o pa nhũm Jejus Kris ja hã omu nē kamã gryk tokyx anhỹr kêt nē. Na pre tanhmã hkrã hto nhũm ra tãm amnhĩ nhĩpêx o pa. Kwa pu mē urak nē amnhĩ kaxyw Jejus kôt pajamaxpēr nē hkôt amnhĩ xunhwỳ. Kēr pu mē Pawre pyrã nē nhỹrmã Tĩrtũm mē Kraja wa kuri pamex nē pahĩr tũm nē papa ho papa.

Anhỹr o axpēn mã ijarēnh nē ixpyrà nē Jejus kôt amnhĩ xunhwỳr kaxyw na pre Tĩrtũm ã ixto mex anē. ¹⁷ Jakamã na pa hte kãm amnhĩ jarēnh kaxyw nē kãm:

—Pa Tĩrtũm? Nã kapxipix apê Pahi Maati. Ně arãhã ho arãhã nē amex o amex. Mē ixte inhno ho aa apumunh kêt tã kapxipix apê Mēinhĩpêxã maati. Tã koja nhỹrmã mē piitã ã amã amex o amex ã ajarēnh anhỹr o pa. Anē.

Ximotre kot tanhmã Epes nhõ xwỳnhjê jahkre hto hã kãm karõ

Wam Korĩt 5.1-5

¹⁸ Ně te apê ixkra pyrak Ximotre. Tã kot paj mēmoj tã amã karõ ka inhma nē inhmar tỳx nē. Nã Pahihti Jejus mã ate tanhmã amnhĩ nhĩpêx to ho apa kaxyw na pa prem axãm nhũm Tĩrtũm nhỹ hã kapēr o mē pa xwỳnhjaja axàpēnh kukamã amã kapēr nē amã:

—E ate ma mē kãm Pahihti Jejus jarēnh o apa kaxyw Tĩrtũm kot axãm jakamã kēr ka ã amnhĩ nhĩpêx anhỹr o ri mē hkôt apa. Anē.

Tã kot paj ijaxwỳja kagàja kamã amã ixkapēr nē mēmoj tã amã karõ. Ka mar tỳx nē hkôt amnhĩ nhĩpêx mex pē Tĩrtũm mã amnhĩ nhĩpêx mex o ri apa. Jao aprĩ hã mē kãm tanhmã Jejus jarēnh to ho ri mē hkôt apa. ¹⁹ Ně amnhĩ kaxyw Jejus mã ajamaxpēr mex nē. Ně mēmoj punuj pumu nē amã ho anhỹr prãm tã Jejus nhỹ hã nē amnhĩ to htỳx nē ho anhỹr kêt nē. Jao tãm amnhĩ nhĩpêx ã amnhĩ pumunh

mex o ri apa. Nom kot kaj ja nê amnhĩ to htỳx kêt nê tanhmã amnhĩ tomnuj to hãmri nê te ate Pahihti Jejus kaga pyræk. Na pre pahkwỳjaja ã amnhĩ nhĩpêx anhỳr o hkaga nê axte kãm hamaxpêr kêt nê. ²⁰ Imênew mẽ Aresãnja na pre wa ã amnhĩ nhĩpêx anê nê tanhmã Tĩrtũm o kapêr punuj to. Mỳrapê na pa pre Satanasti nhĩhkram wa haxã. Kot tanhmã wa ho nhũm wa kot tee ri amnhĩ tomnujta ã amnhĩ pumunh nê tokyx tãm amnhĩ nhĩpêx nê axte ã amnhĩ nhĩpêx anhỳr kêt kaxyw.

2

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mẽ pahte Tĩrtũm mã amnhĩ jarênh to hã amã karõ Ximotre. Ka inhma nê ixõ ri ho mẽ pahkwỳjê jahkre ho ri mẽ hkõt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wỳr ho ri pa. Nê kãm mẽ harê nê mẽ kaxyw mẽmoj tã axàhwỳr o ri apa. Kêr kê ama nê tanhmã mẽ ho mex to. Kê mẽ amnhĩ tã omu nê ã kãm kapêr anê nê kãm:

—Pa Tĩrtũm? Nà ãm hãmri na ka ã mẽ ixto mex anê. Amex o amex. Anê.

² Nê mẽ kãm anê kê mẽ õ pahi nê mẽ ho amnhĩptàr xwỳnh piitã mẽ ho ahwỳr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwỳnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nê ixãmnhĩx ixpa pê amã tanhmã amnhĩ nhĩpêx to ho ri ixpa. Nê ixãmnhĩx mẽ hkõt tãm amnhĩ nhĩpêx. Anê.

³ Kot puj mẽ ã mẽ ho mẽ papytàr xwỳnh Tĩrtũmja wỳr o papa anê nhũm mẽ pama nhũm ja kãm mex nê.

E kêr ka ã mẽ kãm ja hã karõ anê Ximotre.

Tĩrtũm kãm mẽmoj prãm ã harênh

Sikũn Pêtre 3.9

⁴ Nê mẽ piitã mẽ kot kapêr mar nê amnhĩ kaxyw Jejus kôt hamaxpêr nê hkõt amnhĩ xunhwỳrja na Tĩrtũm kãm hprãm.

⁵ Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kêp Mêpahpãm. Nê Kra Jejusja

tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kôt wrỳ mẽ pahpyrà nê ã ho ã nê kato.

⁶ Hãmri nê gaa nê àptàr hãmri nê mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỳr ã harênh mar nê tokyx hkõt amnhĩ xunhwỳrja na Tĩrtũm kãm hprãm.

⁷ Ja kaxyw na pre ixãm. Ixte Ijaew kêt xwỳnhjê mã Tĩrtũm kapêr jarênh o ri mẽ hkõt ixpa kaxyw. Nê Jejus nhỹ hã tanhmã mẽ kãm ixkapêr to ho ri ixpa kaxyw. Nê tanhmã kot mẽ panê amnhĩ nhĩpêx to hã harênh kaxyw. ãm hãmri na pa ã amnhĩ jarênh anê. Ixêx kêt. Na pa hte Ijaew kêt xwỳnhjê hkõt ixpa nê ã mẽ kãm ixkapêr anê nê mẽ kãm:

—E mẽ ate Tĩrtũm Kra Jejus kôt amnhĩ xunhwỳrja na Tĩrtũm kãm hprãm. Jakamã kwa mẽ tokyx amnhĩ kaxyw hkõt aja-maxpêr nê hkõt amnhĩ xunhwỳ. Anê.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

⁸ Nê kot kaj mẽ tõiã Tĩrtũm kapêr mar kaxyw axpên wỳr akuprõ. Hãmri nê Tĩrtũm mã amnhĩ jarê nom kêr ka mẽ mẽmoj tã axpên kamã agryk kamã kãm amnhĩ jarênh kêt nê. Rỳ mẽmoj tã axpên mã axàkêr kamã kãm amnhĩ jarênh kêt nê. ãm tãm mẽ ajamaxpêr pix o kãm amnhĩ jarê. Nê tãm amnhĩ nhĩpêx kamã kãm amnhĩ jarê. Ja na inhma hprãm. Tã kêr ka ã Epes nhõ xwỳnhjê mã ja hã akarõ anê Ximotre.

Mênijaja kot tanhmã amnhĩ nhĩpêx to kaxyw mẽ hã kãm karõ

Wam Korõt 14.34; Epes 5.22; Xitre 2.3; Wam Pêtre 3.1-7

⁹ Nê kot paj hpãnhã Kris kôt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nà mẽmyjaja kot mẽ omunh nê kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nê. Nê ja prãm xàj tanhmã ê jagjênh to hkêt nê rỳ tanhmã ri mmar to hkêt nê. Rỳ mẽ kãm mẽ hkĩnh prãm xàj òkrexê mex jagjênh rỳ mẽ ìhkra kamã kàx mex jagjênh nê ri hã mẽ hkõt pa kêt nê. Rỳ ja kaxyw tanhmã ri amnhĩ kĩ jaxwỳr

to nê ri hã mẽ hkôt pa kêt nê. Rỳ mẽ ê mex jagjê nê mẽ noo mã htỳx ri hpijaàm kêt o pa hkêt nê. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỹr o pa hkêt nê. ¹⁰ Mẽ kãm anê kê mẽ kãm Tĩrtũm mãn kĩnh xàj mẽ piitã mẽ kutã mẽmoj to nojarêt o pa.

¹¹ Nê mẽ kãm anê kê mẽ Tĩrtũm kapêr mar kaxyw mẽ pikuprõnh xà hwỳr agjê nê akryk Tĩrtũm kapêr mar o hkrĩ nê htỳx ri axpên mã kapêr o hkrĩ kêt nê.

¹² Nê kê mẽ ikrêsti kamã Tĩrtũm kapêr o mẽmyjê jahkre hkêt nê. Rỳ kamã mẽmoj tã tanhmã mẽ kãm karõ hto hkêt nê. ãm akryk Tĩrtũm kapêr mar o hkrĩ. ¹³ Mẽmo mỳrapê koja mẽ ã amnhĩ nhĩpêx anê? Nà na pre Tĩrtũm my kot wa finat Atãwja kumrêx nhĩpêx nê kormã hprõ Ewa o hapu nê hipêx. ¹⁴ Nê Atãwja na pre kagã kapêr mar nê hkôt amnhĩ nhĩpêx kêt nê. Prõ na pre mar xà hkôt Tĩrtũm kapêr nhĩrõp xa nê tanhmã amnhĩ tomnuj to. ¹⁵ Mỳrapê na htem mênijaja hpijagri ho hikwỹ nhũm mẽ hkrajaja à htỳx kãm hapõj. Tã nom koja mẽ Jesus kôt amnhĩ xunhwỳ nê ã ixte mẽ kaxyw amã mẽmoj tã karõ xà hkôt amnhĩ nhĩpêx hãmri nê nhỹrmã mex kumrêx nê htĩr tũm nê pa ho pa. E kêr ka ã mênijê mã mẽmoj tã karõ anê Ximotre.

3

Pastô kot tanhmã amnhĩ nhĩpêx to kaxyw mẽ hã kãm karõ

Xitre 1.5-9

¹ E kot paj hpãnhã tanhmã pastô jarênh to. Koja mẽhõ kãm kêp Kris kwỳjê nhõ pastô nê Tĩrtũm kapêr o mẽ ahkre hprãm nê ãm hãmri ã hamaxpêr anê. Ja mex. ² Jakamã koja mẽhõ kãm kêp pastô hprãm hãmri nê ã amnhĩ nhĩpêx anhỹr o apa.

Koja mẽ piitã mẽ noo mã tãm ri amnhĩ nhĩpêx.

Nê hprõ pix tãnopxar o pa.

Nê mẽmoj punuj kutã amnhĩ to htỳx nê.

Nê tãm hamaxpêr.

Nê ãmnhĩx amnhĩ wỳr mẽ piitã mẽ kuwỳ.

Nê Tĩrtũm kapêr o mẽ ahkre mex nê.

³ No kê mẽ kagõxyhti japrõr nê ho pipãnh o pa hkêt nê.

Nê àhkurê ho pa hkêt nê.

Nê mẽ piitã mẽ kamã ukaprĩ ho ri mẽ hkôt pa. Jao mẽ kutã nojarêt rãhã ho pa.

Nê amnhĩm kàxpore rax o pikuprõnh prãm xàj tanhmã amnhĩ nhĩpêx to hkêt nê.

⁴⁻⁵ Nê hkrajê jahkre mex o pa nhũm mẽ kapêr ma nê hkôt amnhĩ nhĩpêx. Nê hã hpijaàm kãm tãm amnhĩ nhĩpêx.

Koja mẽ hkrajê jahkre mex kêt nê hãmri nê mããnên Kris kwỳjê jahkre mex kêt nê. Jakamã nhũm hkrajê mẽ Kris kwỳjaja tãm amnhĩ nhĩpêx kêt nê.

⁶⁻⁷ Nê kê mẽ kot Jesus kôt amnhĩ xunhwỳr kêt xwỳnhjê noo mã tãm amnhĩ nhĩpêx rãhã ho pa.

Mẽ kot ja hã mẽ omunh nê mẽ hã hpijaàm o pa kaxyw. Nom koja mẽ tanhmã amnhĩ tomnuj to nhũm mẽ tee ri ja hã mẽ omu nê mẽ ho kapêr punuj nê. Satanasti kãm hprãm xà hkôt.

Nê kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

Koja mẽ kêp pastô hãmri nê mẽmo arĩgro hã tanhmã hamaxpêr to nê amnhĩ to rax prãm xàj tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nê te kot Satanasti nhĩpêx pyrak o hipêx nê tanhmã homnuj to. Ja pymaj kê mẽ kot Kris kôt amnhĩ xunhwỳr nyw xwỳnhjaja kêp pastô hkêt nê.

E pastô na hte ã amnhĩ nhĩpêx anhỹr o pa kamã Jesus kwỳjê jahkre nê tanhmã mẽ ho ajuta hto ho mẽ hkôt pa Ximotre.

Mẽ kot Kris kôt hkwỳjê ho ajuta xwỳnhjê kaxyw mẽ hã kãm karõ

Atre 6.1

⁸ Nê kot paj hpãnhã amã mẽ kot Kris kôt hkwỳjê ho ajuta xwỳnhjê jarê ka inhma Ximotre. Nà koja mẽhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỹr o pa.

Koja mẽ htỳx ri mẽmoj tã mẽ kãm hpêr o pikênh o pa hkêt nê.

Nê tanhmã mẽmoj to hêx to ho pa hkêt nê.

Nê kagõxyhti japrõr nê ho pipãnh o pa hkêt nê.

Ně amnhĩm kàxpore ho pikuprõnh ně ho rax prãm xàj tanhmã amnhĩ nhĩpêx to hkêt ně.

⁹Ně kê Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrit jakamã koja Kris kôt hkwyjê ho ajuta xwýnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

¹⁰⁻¹³ Ně kê mẽ amnhĩ prõ pix tãnopxar o pa.

Ně pastô pyrã ně mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Ně kê mẽ hprõjaja mjên pyrã ně mẽ piitã mẽ noo mã tãm ri amnhĩ nhĩpêx.

Ně hkwyjê ho kapêr rý mẽ axpên jakwa kamã ri axpên mã mẽ hixi ho rér o pa hkêt ně.

Ně mjên pyrã ně mẽmoj punuj kutã amnhĩ to htýx o ri pa. Ně amnhĩ to mex rãhã ně.

E koja mẽhõ kãm Kris kwýjê ho ajuta ho pa hprãm hã koja ã amnhĩ nhĩpêx anhýr o pa. Nom kêr ka mẽ kot mẽ ho ajuta kaxyw mẽ unhwýr tokyx anhýr kêt ně Ximotre. Taxy mẽ kamã ama ně aprĩ hã mẽ kot ri tanhmã amnhĩ nhĩpêx to hã mẽ omu mãn. Hãmri nhũm mẽ piitã mẽ mex ã mẽ harê ka mẽ hã mẽ ama ně rĩ kormã mẽ kot mẽ ho ajuta ho pa kaxyw mẽ unhwý. Hãmri nhũm mẽ amnhĩ tã omu ně axpên mã mẽ mex ã harê. Ně amnhĩ kaxyw Jejus Kris mã hamaxpêr mex o pa hã mẽ omu ně mẽ hã hpijaãm o pa.

Pawre kot Ximotre mã amnhĩ jarênh

¹⁴ Ně inhmã awýr inhmõr ně apumunh prãm Ximotre. Nom kot pa amnhĩ kukamã ã mẽmoj tã amã karõ ně hã kagã anê. ¹⁵ Kêr pa tokyx awýr inhmõr kêt japêr ka ixte amã mẽmoj ã kagãta kamã harê ně ixkutêp ho mẽ ahkre ho ri apa. Mẽ kot mar ně hprĩ hã mẽ õ pastô ně mẽ kot mẽ ho ajuta ho mẽ pa xwýnhjaja kot tanhmã amnhĩ nhĩpêx to hã mẽ harênh mar kaxyw.

Mẽ pahpê Kris kwýjaja mẽ pahpê Tĩrtũm kra jakamã na pu htem kapêr kôt ri amnhĩ nhĩpêx ně pakatãt kôt mẽ piitã mẽ kãm pakapêr o papa. Jao tanhmã mẽ kãm Jejus Kris jarênh to ho ri papa.

Pawre kot Jejus mex o mex ã mẽ grer jarênh

¹⁶ Ně Jejusja mex o mex. Amnepêm kormã mẽ pahte harênh mar kêt tã pu prem harênh ma hãmri ně mex o mex ã pagrer o papa. Ně pagrer o:

Kris kêp Mẽpahpãm tã na pre mẽ pahwýr wrý ně mẽ pahpyrà ně ĩ ho ĩ ně kato.

Nhũm pre Tĩrtũm Karõja mex o mex ã harê.

Nhũm Tĩrtũm kapêr o mẽ wrýk xwýnhjaja omunh o pa.

Nhũm ahpýnhã pika piitã hwýr tanhmã kot mẽ panê amnhĩ nhĩpêx to hã harênhja anhrã.

Nhũm hte mẽ hkwyjaja harênh ma ně amnhĩ kaxyw hkôt hamaxpêr ně hkôt amnhĩ xunhwý.

Tã nhũm pika kamã àpênh jatur xãm kumê nhũm Tĩrtũm akupým amnhĩ wýr ho api.

Na pu htem ã Jejus mex o mex ã pagrer anê.

4

Mẽ kot Tĩrtũm kapêr kwým ri tanhmã Kris kwýjê jahkre hto xwýnhjê jarênh

Matêwre 24.4-13; Korosê 2.16-19; Sikũn Ximotre 3.1-9; Sikũn Pêtre 2.1-3; Jutre 3-16

¹ Ně nhýrmã Jejus akupýn mẽ pahwýr wrýk kaxyw koja pika nhõ xwýnh kwýjaja ma hkwyjê mã tanhmã Tĩrtũm kapêr o hêx to ho pa. Na pre Tĩrtũm Karõ hprĩ hã mẽ hkukamã tanhmã mẽ harênh to. Koja xep Satanasti hkwyjaja Jejus kwýjê hwýr mra ně hêx rom tanhmã mẽ kãm kapêr to. Satanasti nhý hã mẽ kãm hêx o pa nhũm mẽ hkwyjaja mẽ kuma ně mẽ hkôt hamaxpêr ně Jejus kaga. ã koja mẽ Jejus akupýn mẽ pahwýr wrýk kukamã amnhĩ nhĩpêx anê.

² Ně Satanasti nhý hã mẽ kãm mẽmoj to hêx xwýnhjaja ãm Satanasti pix mar o pa jakamã koja mẽ hamaxpêr mex kêt ně. Koja mẽ mẽmoj punuj pumu ně htýx mex ã hkamnhix. ³ Tã koja mẽ Tĩrtũm kapêr kwým ri ã Jejus kwýjê mã hêx ho pa anê ně mẽ kãm:

—Kwa kêr ka mẽ axpên mã ri mẽ rer o apa hkêt ně. Tĩrtũm kãm ja prãm kêt. ãm ahte ri mẽ papaja na kãm hprãm. Anê.

Ně mẽ kot mẽmoj mex kur ã mẽ omu ně nê mẽ kãm kapêr ně mẽ kãm:

—Kwa na htem ata hkur kêt nê. Tirtûm pê omnuj kênâ kot ka kêt ri aku.

Anhÿr o koja mẽ kãm kapêr o pa. ⁴ Nom Tirtûm na pre mẽ pamã mẽ apkur xà piitã ho kato. Mẽ paxãmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtûm mã harê hãmri nê paxãmnhĩx kuku. ⁵ Tirtûm kot mẽ paxàpkur xà piitã mex ã harênh jakamã na pu htem kãm harênh pê paxãmnhĩx piitã hkur o papa.

*Pawre kot mẽmoj tã Ximotre mã karõ
Sikûn Ximotre 1.6-14; Xitre 2.1-8*

⁶ E Ximotre. Ixte mẽmoj tã amã karõta kêr ka ho Kris kôt pahkwÿjê jahkre mex o ri mẽ hkôt apa. Kot kaj ã mẽ ahkre anhÿr jao ra Jejus Kris mã axàpênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhigêt xujarênh kamã mo Tirtûm jarênh? Amrakati kumrêx. Jakamã kêr ka mẽ hkôt ajamxpêr o ri apa hkêt nê. ãm Tirtûm kapêr kôt pix mã ajamxpêr tÿx rãhã ho ri apa. Tirtûm kapêrja ãm hãmri na.

⁸ Nê na htem amnhĩ karo hprãm xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tirtûm kapêr kôt ri amnhĩ nhĩpêx o paja na mex o mẽ hkarota jakre. Na htem Tirtûm kapêr kôt ri amnhĩ nhĩpêx hãmri nê mex nê hkĩnh nê pa ho pa. Hãmri nê nhÿrmã kaxkwa kamã Tirtûm mẽ Kra Jejus wa kuri mex nê htĩr tûm nê pa ho pa. Ja na mex o mex. ⁹ ãm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtûmja rãhã ho rãhã. Tã na pu pre amnhĩ kaxyw Kra Jejus kôt pajamxpêr nê hkôt amnhĩ xãm nhũm Tirtûm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhĩ kaxyw Kra hkôt hamxpêr nê hkôt amnhĩ xunhwÿ nhũm amnhĩ tã mẽ omunh xà hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhĩ nhĩpêx to hã

harênh rãhã o ri mẽ hkôt papa. Jao Tirtûm mã paxàpênh mex nê.

¹¹ E kêr ka ã ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhĩ nhĩpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhĩ nhĩpêx o apa. Mẽ kot Jejus ã tanhmã ato htã arĩ amnhĩ kaxyw kãm ajamxpêr tÿx nê. Nê mẽ piitã mẽ kutã anojarêr nê ajamxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

¹³ Nê kêr ka mẽ ate Tirtûm kapêr mar kaxyw axpênh wÿr akuprõ ka arĩ ixkutêp mẽ kãm Tirtûm kapêr tûm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka ã amnhĩ nhĩpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêt ri na pre pastõ nhÿ hã mẽ kapêr xwÿnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ïhkra jaxwÿ nê axàpênh kukamã tanhmã ajarênh to nê ato Tirtûm wÿ. Hãmri nhũm ate mẽ kãm kapêr jarênh o ri apa kaxyw amã ajamxpêr o hihtÿx. Tã kêr ka ÿ hã ã kãm amnhĩ nhĩpêx anhÿr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tirtûm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwÿ. Hãmri nê pahpyrà nê nhÿrmã Tirtûm wa kuri htĩr tûm nê pa ho pa.

5

*Tanhmã mẽ pahte Kris kôt mẽ pahkwÿjê
nhĩpêx to kaxyw mẽ pamã karõ
Sikûn Ximotre 2.24-25*

¹⁻² E kot paj hpãnhã Kris kôt pahkwÿjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nà koja mẽhõ tanhmã ri amnhĩ tomnuj to ka harênh ma hãmri nê ma hwÿr tẽ nê ja

nê tanhmã kãm akapêr to. Nom kêr ka kãm akapêr mã agêt kêt nê.

Koja mēwejjê õ tanhmã amnhĩ tomnuj to ka te kêp anhĩpêexà rỳ akatorxà pyræk o kãm akapêr. Jao hã apijaàm o tanhmã kãm akapêr to.

Rỳ koja apyrà nê mē nywjê hõ tanhmã amnhĩ tomnuj to ka te kêp atõ pyræk o kãm akapêr.

Rỳ mēnijê nyw õ amnhĩ tomnuj japêr ka te kêp atõx pyræk o kãm akapêr. Jao hã apijaàm o kot amnhĩ tomnujja nê tanhmã kãm akapêr to.

E kêr ka mē kot amnhĩ tomnuj nê ã mē pahkwýjê mã akapêr anhỹr o apa Ximotre.

*Mê kêp mē mjên htyk xwýnhjê jarênh
Xiakre 1.27*

³ Nê kot paj hpãnhã Kris kôt pahkwý pê mē mjên htyk xwýnhjê jarê. Nã koja mēhõ nija hkra hkêt nê htãmnhwý hkêt nê pa nhũm mjên kêp ty ka mē apê Kris kôt hkwyjaja ja hã omu nê mēmoj to kutã anojarêt rãhã ho ri apa. ⁴ Nom koja ra hkra rỳ ra htãmnhwý japêr kê mē tãmjaja tanhmã ho ajuta hto ho pa. Kãm õ nê kãm mēmoj nhõr o pa. Kormã mēhprĩre ri na pre mē õ wówô nê mē katorxà nê mē hipêexà mē hamãr mex pê mē kãm õ ho pa. Tã ra mē àptàr jakamã kê mē amnhĩ pyrà nê mē hamãr mex pê mēmoj to mē kutã nojarêt rãhã ho pa. Ja na Tĩrtũm kãm hprãm. ã mē kot hkwyjê kamã ukaprĩ ho pa jakamã te mē kot Tĩrtũm mã àpênh pyræk.

⁵ No koja mēhõ ni ra wejre nê ahte ri pa. Nê hkra nê htãmnhwý hkêt nê ri pa. Tã kê ja hã amnhĩ pumu nê Tĩrtũm kamnàr rom amnhĩ to hwýr o pa. Nê mē piitã mē ho hwýr o pa. Jao tãm hamaxpêr. Ka mē apê Kris kôt hkwyjaja ja hã omu hãmri nê mē kam nê tanhmã kutã anojarêt to ho ri apa.

⁶ No koja mē ã amnhĩ nhĩpêx anhỹr kêt nê. Nê htýx ri mē grer wýr mra nê hpijaàm kêt o ri mra ka mē ja hã mē omu nê mē ho ajuta hkêt nê. Na htem ã amnhĩ nhĩpêx anhỹr o pa nê arĩ htĩr tã te ra htyk nê híkwý pyræk.

⁷ E kêr ka ã ja hã Kris kôt pahkwýjê mã karõ anê. Kê mē ama nê ã mē mjên htyk xwýnhjê nhĩpêx anhỹr o pa. ⁸ Nom koja mēhõ amnhĩ kwýjê ho mex kêt japêr. Nê õrkwý kamã hprõ nê hkrajaja nê hipêexà

nê katorxà nhũm mē kãm mē apkur xà nhõr kêt japêr. Koja mē ã amnhĩ nhĩpêx anhỹr jao Jejus kaga nê te mē kot hkôt amnhĩ xunhwýr kêt xwýnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj týx o mē hakre.

⁹ Nê mē mjên htyk nê mē hkra nê mē htãmnhwý hkêt xwýnhjaja kêr ka mē tanhmã mē ho ajuta hto kaxyw hãmri nê mē hixi piitã hã kagà. Nom kwa kêr ka aprĩ hã tanhmã mē amnhĩ nhĩpêx to hã mē omu nê rĩ kormã mē hixi hã kagà.

Koja mēhõ kormã mjên htĩr ri tãm hipêx nê nhãm mēmyjê ho amnhĩkati hkêt nê.

Nê ra hã amgrà pê 60 rỳ ra hã 60 jakre.

¹⁰⁻¹¹ Nê tãm mē piitã mē hipêx o pa.

Nê hkrajaja kormã htĩr ri nhũm mē hamãr mex nê mē ahkre mex o pa.

Nê nhãm krĩ hõ nhõ xwýnhjaja õ krĩ hwýr pøj nhũm mē omu nê amnhĩ nhõrkwý hwýr mē kuwý.

Nê mē kêp amrakati xwýnhjê ho mex o pa.

Koja mē ã amnhĩ nhĩpêx anê ka ja hã mē omu nê rĩ kormã mē ho ajuta kaxyw mē hixi hã kagà. Nom mē hixi hã kagà kaxyw nê mēmoj tã mē hkukja nê mē kãm:

—E kot kaj ã amnhĩ nhĩpêx anhỹr o apa hã inhmã amnhĩ jarê pa ama nê rĩ kormã anhĩxi hã kagà.

Kot kaj axte amjên kêt nê.

Nê tanhmã Kris kôt akwýjê ho mex to ho ri apa.

Nhũm mēhõ mēmo myrapê hkaprĩ nê pa ka ja hã omu nê tanhmã ho ajuta hto.

E kot kaj ã amnhĩ nhĩpêx anhỹr o apa hã amnhĩ jarê pa ama nê anhĩxi hã kagà. Hãmri nhũm Kris kôt akwýjaja amã axàpkur xà nhõr o pa. Anê.

ã mē kãm akapêr anê nhũm mē ama nê amã:

—ÿ. Ma kot paj ã amnhĩ nhĩpêx anê.

Anhỹr ã amnhĩ jarê ka mē ama nê mē hixi hã kagà. No kormã mē hã amgrà pê 60 kêt xwýnhjaja kêr ka kormã mē hixi hã kagà hkêt nê. Koja mē tanhmã mē kot amnhĩ nhĩpêx to ho pa hã mē kãm karõja ma nê wam tajê pyrà nê amã:

—ÿ. Ma kot paj ã amnhĩ nhĩpêx anê. Na pa Jejus Kris noo mã ã amnhĩ jarênh anê.

Anhÿr ã amnhĩ jarēnh tã gaa nē ra hkurē hapôj nē ra kot amnhĩ jarēnh ta kwÿm ri tanhmã amnhĩ nhĩpêx to nē axte mjên.
¹² Ra amnhĩ jarēnh o:

—Ma kot paj ãm Jejus mã pix mã tanhmã amnhĩ nhĩpêx to ho ri ixpa nē axte inhmjên kêt nē.

Anhÿr tã tanhmã hamaxpēr to nē kot amnhĩ jarēnh kwÿm ri axte mjên. Jao te Jejus mã amnhĩ to hêx pyrãk nhũm Tĩrtũm pê jamnuj. Ja pymaj kêr ka mē kormã mē hã amgrã pê 60 kêt xwÿnhjê nhĩxi hã kagã hkêt nē. Kormã mē hã amgrã pê 60 kêt xwÿnhjaja arĩ mē hkĩnh tÿx ¹³ jakamã kot kaj mē kãm mē apkur xã nhõr o apa nhũm mē ja hã amnhĩ tã mē apumu nē axte amnhĩm àpēnh kêt nē. ãm kãm kaga nē htÿx ri nhãm mē hwÿr mra nē nhãm mē hwÿr mra. Nē amnhĩ pumunh mex kêt nē htÿx ri axpēn jakwa kamã ri mē hixi ho rēr o pa. Nē nhÿri mēmoj pumu rÿ tanhmã mēmoj jarēnh mar to hãmri nē ma htÿx ri hkwyjê mã harēnh o mra. Koja mē ã amnhĩ nhĩpêx anhÿr o pa hãmri nhũm mē kēp Kris kwÿ hkêt xwÿnhjaja ja hã mē omu nē mē hkôt mē pahpê Kris kôt pahkwÿjê ho kapēr punuj nē. ¹⁴ ã mē kot amnhĩ nhĩpêx anhÿr o pa pymaj kêr ka kormã mē nyw xwÿnhjê mã anē kê mē mãmri axte mjên nē o pa. Hãmri nē hkra nē hkrajê jamãr o pa. Ja na inhmã hprãm. Koja mē ã amnhĩ nhĩpêx anē hãmri nhũm mē kēp Kris kôt pahkwÿ hkêt xwÿnhjaja mē hkôt tanhmã mē pahto kapēr punuj to hkêt nē. ¹⁵ Mãn ka ra Kris kôt pahkwÿjê nyw pê mē mjên htyk xwÿnh kwÿjaja tanhmã amnhĩ tomnuj to hã mē harēnh ma. Na prem Jejus kaga nē Satanasti hkôt amnhĩ nhĩpêx o pa.

¹⁶ E kêr ka mē ã Kris kwÿ pê mjên htyk xwÿnhjê nhĩpêx o apa anē Ximotre. Nom koja mē akwÿ kamã mēhõ nhõ wõwõ mjên rÿ katorxã mjên kēp ty kê tãm kãm õ ho pa. Kêr kê Kris kôt pahkwÿjaja ãm mē kēp mē mjên htyk xwÿnh pê mē hkra nē mē htãmnhwÿ hkêt nē ahte ri mē pa xwÿnh pixjaja tanhmã mē ho ajuta hto ho pa.

Mē pahpê Kris kôt pahkwÿjê hkrãhtũm kaxyw mē pahtã kãm karõ

Atre 14.23; Wam Korĩt 9.7-14; Karatas 6.6; Wam Tesarõn 5.12; Wam Pêtre 5.1-4

¹⁷⁻¹⁸ Nē kot paj hpãnhã amã Kris kôt mē pahkrãhtũmjê jarē. Tĩrtũm kapēr ã kagã htũm kot mē harēnh kot:

Kêr ka Tĩrtũm kapēr o mē ajahkre xwÿnhjaja mē ahkre pãnhã mē kãm amnhĩre. Anē.

Nē mããnēn mē harēnh ã kuxi nē mē harēnh o:

Koja akrit amã àpēnh o pa ka ho mex nē kãm õ mex o apa. Anē.

ã ja jarēnh kot anhÿr jakamã koja Kris kôt mē akrãhtũmja Kris mã tanhmã mē ato mex to ho pa ka mē amnhĩ tã kãm amnhĩrer mex o ri apa. Kot Tĩrtũm kapēr o mē ajahkre mex jakamã ka mē amnhĩ tã kãm amnhĩrer mex nē.

¹⁹ Nē koja mēhõ pixi nē mē awÿr tē nē amã Kris kôt mē akrãhtũm kot tanhmã amnhĩ tomnuj to hã harēnh to ka ama nē ãm ama. Nom koja wa hamēxkrut rÿ mē axkrunēpxi nē mē awÿr mra nē axpēn kôt tanhmã harēnh to ka mē ama nē ãm hãmri mē kot tanhmã kot amnhĩ tomnuj tota kôt ajamaxpēr. ²⁰ Hãmri nē Kris kwÿjê piitã mē noo mã kot amnhĩ tomnuj xwÿnh ta mã tanhmã kot amnhĩ tomnuj to nē kãm akapēr kê axte ã amnhĩ nhĩpêx anhÿr kêt nē. Mē piitã mē kot hã amar nē nhÿrmã tanhmã amnhĩ tomnuj to nhũm ate urãk nē hã tanhmã mē kãm axãkjêr to pymaj tanhmã amnhĩ tomnuj to hkêt nē.

²¹ E Tĩrtũm noo mã na pa ã amã mē kaxyw mēmoj tã karõ anē Ximotre. Nē Jejus Kris mē Tĩrtũm kapēr o mē wrÿk xwÿnhjê noo mã pa ã amã karõ anē. Jakamã kêr ka inhmar tÿx nē hkôt amnhĩ nhĩpêx o ri apa. Jao mē piitã mē hipêx o axpēn pyrãk. Nom kêr ka akrãmnhwÿ kot tanhmã amnhĩ tomnuj to hã omu nē axtem nē ãm omu nē ajamaxpēr o:

—Nã kēp ixkrãmnhwÿ kēnã kot paj kêt ja nē tanhmã kãm ixkapēr to. Pa ho anhÿr kêt nē.

Anhÿr o ajamaxpēr kêt nē. Mē piitã mē hipêx o axpēn pyrãk.

²² Nē kêr ka anojarêt kãm mē kot Tĩrtũm mã tanhmã amnhĩ nhĩpêx to ho mē pa kaxyw mē unhwÿr kêt nē. Aprĩ hã tanhmã mē kot amnhĩ nhĩpêx ã hã mē omu nē mē hkapi nē rĩ kormã mē unhwÿ rÿ tee ri mēmoj tã mē omu nē mē hkaga.

Ně koja mēhō tanhmā amnhī tomnuj to ka ja hā omu rý harēnh ma hāmri ně urāk ně ā amnhī nhīpēx anhýr kêt ně. Arī Tirtūm kôt amnhī nhīpēx pē tām ri amnhī nhīpēx pix o apa. ²³⁻²⁵ Na htem tōhā tanhmā amnhī tomnuj to nhūm mēhō ja hā mē omu ně mē harēnh kurē kumrēx. Kris kôt mē hkrāhtūm kormā kot tanhmā hā kām ně hkêt ri nhūm mē ja hā mē omu ně tanhmā mē harēnh to. Nom na htem tōhā hpimxur pē tanhmā amnhī tomnuj to nhūm Tirtūm pix ja hā mē omu. Tā koja nhýrmā mē piitā mē kām ja ho amnhīrīt nhūm mē piitā harēnh ma ně hkôt omu.

Ně mē kot amnhī to mex xwýnhjaja haxwýja. Na htem tōhā mē noo mā tanhmā mēhō ho mex to nhūm hkwýjaja ja hā omu ně axpēn mā mex ā mē harē. Ně tōhā hpimxur pē tanhmā mēhō ho mex to nhūm mēhō ja hā omunh kêt ně. Ām Tirtūm pix ā kot amnhī nhīpēx anhýr ā omu. Tā koja nhýrmā mē piitā mē kām ja ho amnhīrīt nhūm mē piitā harēnh ma ně hkôt omu.

Ně kwa Ximotre. Axà ně anhōhymnuj ně ri apa jakamā kwa kêr ka gô pix o akôm o apa hkêt ně. Māānēn wīhti hkwý ho ixkô kêr ka anhōhy mex japēr.

6

Mē kām mē àpēnh xwýnhjê kaxyw mē hā kām karō

Epes 6.5-9; Korosē 3.22-4.1; Xitre 2.9-10; Wam Pêtre 2.18-25

¹ E kot paj mē akwýjaja mē kām mē àpēnh o mē pa xwýnhjê kaxyw mēmoj tā amā karō. Mē kām anē kê mē ō patrāw ā hpijaàm o ri pa. Jao mē kapēr ma ně hkôt kām àpēnh mex ně. Koja mē ā amnhī nhīpēx anē nhūm amnhī tā mē omu ně hamaxpēr o:

—Kwa pēr Tirtūm kapēr na mex kumrēx. Inhmā àpēnh xwýnhja na hte hkôt amnhī nhīpēx pē amnhī to mex o pa. Pēr ām hāmri na hte Pawre ho mē ahkre ho pa.

Anhýr o hamaxpēr. ² Ně koja mē ō patrāw ra Kris kôt amnhī xām japēr ka kām mē àpēnh xwýnhjê mā anē kê Kris kôt mē kêp mē htō hā mē kām àpēnh mex o ri pa. Nom kê mē urāk ně kêp Kris kôt hkwý hā mē omu ně hamaxpēr o:

—Nà Kris kôt ixtō kēnā kot paj kêt ri kapēr kôt amnhī nhīpēx ně kām ixàpēnh mex o ri ixpa.

Anhýr o hamaxpēr kêt ně. Kê kêp Kris kôt htō hā kām ho mex prām xàj kām àpēnh mex o pa.

E kêr ka mē kām mē àpēnh o mē pa xwýnhjê mā ā tanhmā mē àpēnh to ho pa hā karō anē Ximotre.

Tirtūm kapēr kwým ri mē ahkre xwýnhjê jarēnh

Rukre 12.13-21; Xiakre 5.1-6

³ Ně na hte Kris kwý hkêt xwýnh kwýjaja Kris kwýjê mā Tirtūm kapēr o hēx o pa. Ně htýx ri Jejus kapēr kwým ri tanhmā harēnh to ho pa. Ām hāmri na Tirtūm mē Pahihti Jejus Kris wa kapēr tā nhūm htem htýx ri tanhmā ho hēx to ho ri mē hkôt pa.

⁴ Mē kot amnhī to rŭnh xwýnh ā amnhī to jarkrar tā mē àhpumunh týx kêt. Na htem tanhmā Tirtūm kapēr kute hā axpēn mā akir ně mēmoj tā axpēn kām gryk o pa. Ně axpēn mā kapēr punuj ně mēmoj tā axpēn kamnhīx o pa. ⁵ Ně hamaxpēr mex kêt jakamā mēmoj tā axpēn mā àkjēr pix o pa. Na htem ā amnhī nhīpēx anhýr o Tirtūm kapēr mar týx kêt ně. Hāmri ně htýx ri hamaxpēr ně hamaxpēr o:

—Kot paj Tirtūm kapēr o mē ahkre ho ixpa nhūm mē inhma ně inhmā amnhīrēr mex ně pa ixkàxpore rax ně ri ixpa. Nà kot paj ā amnhī nhīpēx anhýr o ri ixpa. Ja inhmā mex.

Anhýrja o kām hikàxpore rŭnh prām o amnhī to amnhīrīt o pa.

Kàxpore jarēnh

⁶⁻⁸ E kot paj hpānhā amā tanhmā kàxpore jarēnh to ka inhma Ximotre. Xà na pu htem pakatorxà nhōhy rŭm pajapôj ně amnhī kôt kàxpore hkwý jamý ně ho pajapôj? Nà na pu htem pahkēnh ně panhý kamā pajapôj. Tā kot puj mē ja pyrā ně nhýrmā ty ně mā ho anē ně panhý kamā ma papa. Jakamā kêr pu mē kormā pika ja kamā pahťir ně papa ri paxàpkur xà ně mē paxé pix tãnopxar pē pahkīnh ně ri papa. Pakàxpore rŭnh kêt tā na pu htem Tirtūm kamnàr rom pahkīnh ně pajamakêtkati ně papa. Jao pajamaxpēr o:

—Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nê ijamakêtkati nê ixãmnhĩx ixpa.

Anhÿr o pajamexpêr o papa.

9-10 Mẽ kot amnhĩm kàxpore o pikuprõnh rũnh xwÿnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã amnhĩ tomnuj o pa. Na pre mẽ pahkwÿjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nê hamakêtkati nê pa hkêt nê. Na htem omnuj nê hkaprĩ nê pa. ã na htem mẽ hikàxpore rũnh xwÿnh kwÿjaja amnhĩ nhĩpêx anhÿr o pa. Jao kàxpore pix kukamã hamaxpêr nê gaa nê ra gryk ã mẽ kot amnhĩ to mex xà kaga hpa nê htÿx ri tanhmã amnhĩ tomnuj to ho pa. Nê tanhmã hkwÿjê nhĩpêx punuj to. Te tutre kot harôj xành ã htÿx rapuuti hwÿr gjêx nê tee ri kãm kator prãm kaprÿ pyræk. ã mẽ kot amnhĩ nhĩpêx anhÿr o pa jakamã koja nhÿrmã Tĩrtũm ma mẽ kot amnhĩ xà htÿx kamã hamak tũm xà hwÿr mẽ kurẽ.

Pawre kot Ximotre mã mẽmoj tã karõ

Korosẽ 4.17; Wam Ximotre 4.14; Sikũn Ximotre 2.1-7

11 Nê kwa Ximotre kêt ka mẽ uræk nê kàxpore rax prãm xàj amnhĩ tomnuj o apa hkêt nê. Ate Tĩrtũm mã tanhmã amnhĩ nhĩpêx to ho apa xwÿnh jakamã kêt ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrã nê ate amnhĩ jarênh xà hkôt amnhĩ nhĩpêx o ri apa. Nê amã Kris kôt akwÿjê hkĩnh pê mẽmoj to mẽ kutã anojarêt o ri apa. Nê Kris kôt mẽ hkwÿ hkêt xwÿnhjaja kot Kris ã tanhmã ato htã ka arĩ hkôt amnhĩ nhĩpêx mex nê mẽ piitã mẽ ho mex o ri mẽ hkôt apa. 12 Na ka pre Kris kôt mẽ pahkwÿjê noo mã tanhmã amnhĩ jarênh to. Tĩrtũm kot amnhĩ wÿr awÿr nhũm ate Jejus kôt amnhĩ xãm nê amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêt ka arĩ Jejus kôt amnhĩ nhĩpêx mex rãhã ho ri apa. Hãmri nê nhÿrmã Tĩrtũm mẽ Kra wa kuri amex kumrêx nê atĩr tũm nê apa ho apa.

13-14 E na pa mẽmoj tã amã karõ rax ka piitã kamã harê nê mar pa. Tã kêt ka inhmã ja hã tanhmã amnhĩ jarênh to. Mẽmoj piitã ho htĩr xwÿnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nê àmnhĩx kot Pahi Põn Pirat mã amnhĩ jarênh xwÿnhnta noo mã amnhĩ jarê nê inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupÿn mẽ pahwÿr wrÿ. ãm hãmri na pa ã amã amnhĩ jarênh anê Pawre.

Anhÿr o inhmã amnhĩ jarê.

Tĩrtũm mex o mex ã mẽ grer

15 Nê koja Tĩrtũm akupÿn mẽ pahwÿr Jejus mênh xà hã arĩgro jarê hãmri nhũm kot harênh xàta wÿr pøj nhũm akupÿn mẽ pahwÿr kumẽ. Tĩrtũmja mex o mex. Tapxipix kêp mẽmoj piitã ho amnhĩptar xwÿnh maati. Nê kêp jar mẽ ho amnhĩptar xwÿnh piitã mẽ õ Pahi Maati.

16 Nê tapxipix na rãhã ho rãhã nê mex o mex jakamã puhã hirã rax kumrêx. Tã hkĩnhã mẽ pahte amnhĩ tomnuj xwÿnh jakamã kot puj mẽ puhã hirã raxja kutã hkêt nê. Jao hwÿr mẽ pamrar kêt nê.

Nê aa mẽhõ kot no ho Tĩrtũm pumunh kêt tã kwa kêt pu mẽ pahpiitã kãm mex o mex nê hihtÿx o hihtÿx ã harênh rãhã ho papa.

Axte mẽ hikàxpore rũnh xwÿnhjê jarênh

Rukre 16.9

17 Nê kêt ka Kris kwÿjê kamã mẽ hikàxpore rũnh xwÿnhjê mã anê kê mẽ kot amnhĩ to rũnh kôt amnhĩ to àmra ho pa hkêt nê. Nê amnhĩ kaxyw mẽ hikàxpore rũnh kôt hamaxpêr o pa hkêt nê. Kàxpore na hte hapêx tokyx anê. Mẽ kãm anê kê mẽ hpãnhã amnhĩ kaxyw Tĩrtũm kôt mãn hamaxpêr tÿx rãhã ho pa. Na hte àmnhĩx tanhmã mẽ pahto mex to ho pa nê mẽ pahpê õxÿ hkêt nê. Jao mẽ pahwÿr na rẽ nhũm mẽ pahpur go mex nê pu mẽ kamã panhõ rũnh o papa. Nê mẽ pamã myyti ho hirã pu mẽ kukwak ri parĩt mex pê mẽmoj tã paxàpênh o papa. ã Tĩrtũm kot mẽ pahto mex kot anhÿr pu mẽ kukwak ri

pahkĩnh nẽ pajamakêtkati nẽ ri papa. Tã kër ka mẽ hikàxpore rũnh xwýnhjê mã anẽ kê mẽ amnhĩ kaxyw kumã pix mã mãn hamaxpër rãhã ho pa. ¹⁸ Nẽ mẽ kãm anẽ kê mẽ hikàxpore ho hkwyjê pê õxý hkêt nẽ ho tanhmã mẽ ho mex to ho pa. Nẽ àmnhĩx ho tanhmã mẽ kêp amrakati xwýnhjê ho ajuta hto ho pa. ¹⁹ Koja mẽ ã amnhĩ nhĩpêx anẽ nhũm Tĩrtũm ja hã mẽ omu nẽ hkĩnh nẽ õ krĩ kamã mẽ kutêp mẽ kãm mẽmoj mex o akuprõ. Jakamã nhũm mẽ kormã jar htĩr nẽ pa ri mex nẽ pa nẽ mããnẽn nhỹrmã kaxkwa kamã mex kumrêx o jar pika ja kamã mex nẽ pata jakre. E kër ka ã mẽ hikàxpore rũnh xwýnhjê mã ja hã karõ anẽ Ximotre.

Pawre kot Ximotre mã mẽmoj tã karõ jatur xà

Korosẽ 4.17; Wam Ximotre 6.14; Sikũn Ximotre 1.13, 4.5

²⁰ Nẽ ra Tĩrtũm kot ate kapër o mẽ ahkre ho apa kaxyw axãm jakamã kër ka tãm amnhĩ nhĩpêx pê mẽ ahkre mex rãhã ho ri apa. Jao Tĩrtũm kapër o hêx o ri mẽ ahkre xwýnhjê hkõt apa hkêt nẽ. Na htem mẽ kuma nẽ mẽ kapër mex ã mẽ hkamnhĩx nom mẽ kapër mex kêt. Jakamã kwa kër ka mẽ kot tanhmã mẽ ahkre hto hã mẽ ama nẽ ãm mẽ ama. ²¹ Na pre ra mẽ pahkwýjaja mẽ kuma nẽ mẽ kapër gryk ã Jejus kaga.

E ãm ja pix. Kê Tĩrtũm mẽ apiitã mẽ akutã nojarêt rãhã ho pa. Ixpê Pawre na pa ã amã ixkapër ã kagà anẽ.

Sikūn Ximotre Pawre kot Ximotre hwÿr wam kagà nē mēnh kōt hō mēnh

Pawre na pre kagàja nhîpêx. Na pre Jejus kwÿ hkêt xwÿnhjaja Jejus ã unê nē krî pê Rôm kamã haxà nhũm arî hkrî ho hkrî. Tã ra mē kot hpîr kaxyw nhũm Ximotre mã kagàja nhîpêx nē hwÿr kumē. Na pre Ximotre Pawre hkôt pa ho pa hã mytwrÿ xohtô nē. Tã hpãnhã krî pê Epes kamã arîk nē Tîrtũm kapêr o Jejus kōt hkwÿjê jahkre ho ri mē hkôt pa. Jakamã nhũm Pawre kagàja nhîpêx nē kamã kãm mēmoj tã karō nē hwÿr kumē. Nē nhÿrmã mē kot Pawre pyrã nē Jejus ã hpîr mã htã tee ri amnhî kukamã hamaxpêr kêt ã kãm karō.

Nē mē hkwÿjaja kêp Tîrtũm kra hã amnhî jarēnh tã nhũm Pawre Tîrtũm kãm hprãm xà kuhpa hã mē kot tanhmã amnhî nhîpêx to ho pa hã Ximotre mã mē harē. Kot mē harēnh mar nē Jejus kwÿjê nē mē omunh mex o pa kaxyw. Nē Ximotre kot Tîrtũm kãm hprãm xà kot pix mã amnhî nhîpêx o pa hã kãm karō. ã na pre Pawreja Ximotre mã mēmoj tã karō kamã hihtÿx nē hã kagà nē hwÿr mēnh anē. Nē kãm:

¹ Pa Ximotre? Xà amex? Ixpê Pawre na pa amã ixkapêr nē hã kagà nē awÿr kumē. Ixpê Jejus nhÿ hã hkwÿjê jahkre ho ixpa xwÿnh na pa. Tîrtũm na pre ja kaxyw ixãm. Tîrtũm Kra Jejus Krisja kot puj mē pahpê hkwÿjaja nhÿrmã kukwak ri pamex kumrêx nē pahpêr tũm nē ri papa ho papa.

*Pawre kot Ximotre ho Tîrtũm mē Jejus wa
hwÿr ã harēnh
Atre 16.1-2*

²⁻³ Te apê ixkra pyrãk Ximotre. Jakamã na pa hte ato Mēpanhîpêêxã maati Tîrtũm mē Pahihti Jejus Kris wa hwÿr rãhã ho ri ixpa. Na pa hte mē pakukamã mē panhîgêt pyrã nē tãm ijamaxpêr o ixpa pê Tîrtũm mã tanhmã amnhî nhîpêx to ho ri ixpa. Jakamã na pa hte ato Kra Jejus mē wa hwÿr rãhã ho ri ixpa. Arîgro hã nē kamãt kãm amã ijamaxpêr nē ato wa kuwÿ nē wa kãm:

—Pa Tîrtũm mē Pahihti wa. E ixte ixkra puro Ximotre ho war awÿr kaxyw war amã ijamaxpêr. Na ka hte wa ho mex nhũm war akôt amnhî nhîpêx mex o pa. Te õ wôwô mē katorxã wa kot amnhî nhîpêx pyrãk. Na pa hte kot amnhî nhîpêx o paja mã ijamaxpêr nē ÿ hã ixkînh nē. War ate kamã axukaprî ho ri apa kaxyw na pa ho war awÿ. War ate kutã war anojarêr rãhã ho ri war apa nhũm hamakêtkati nē àmnhîx ri pa ho pa kaxyw. Anē.

Pawre kot Ximotre nhÿ hã hkînh ã harēnh

⁴ Nē na ka pre hte ixkôt ixto ajuta ho ri ixkôt apa htã pa pre nhÿhÿm inhnojarêr nē axtem axapênh õ hã amã karō hãmri nē Epes kamã are nē ma mō. Ka amã ijapê xaj tee ri ma inhmōr ã ixpumu nē amÿr rax nē. Na pa hte arî ja hã inhnohtÿx nē ri ho ixpa Ximotre. Jao ra ato ama nē. Tã kot puj nhÿrmã axte axpên pumu nē pahkînh tÿx nē.

⁵ Nē na pa hte akatorxã Enître mē anhō wôwôre Rojti wa kãm ijamaxpêr rãhã ho ri ixpa. Na pre wa kumrêx amnhî kaxyw Jejus kōt hamaxpêr nē hkôt amnhî xãm. Tã ka wa hkanrêhã wa urak nē ã amnhî nhîpêx anē. Ixte ja hã apumunh mex. ⁶ Na pa pre ate tanhmã Jejus mã amnhî nhîpêx to ho ri apa kaxyw axãm kaxyw anhîmōk ã inhîhkra xi nē ato Tîrtũm wÿ. Kot tanhmã akrã hto nhũm ate Karō nhÿ hã tanhmã amnhî nhîpêx to ho apa kaxyw. Tã kêt ka arî ã kãm amnhî nhîpêx anhÿr rãhã ho ri apa. ⁷ Na pu htem Tîrtũm Karō nhÿ hã pamã ma ho papa hkêt nē. Na pu htem ÿ hã pamã mē piitã mē hkînh pê paxãmnhîx tanhmã mē ho ajuta hto ho papa. Nē ÿ hã kapêr o mē ahkre htÿx o ri mē hkôt papa. Nē mēmoj punuj kutã amnhî to htÿx rãhã nē. Jao amnhî to mex pix nē.

⁸ Jakamã kwa kêt ka amã mē kãm Jejus jarēnh o apa pymaj tee ri amnhî kukamã ajamaxpêr kêt nē. Nē mē kot Jejus ã ijaxàr nhũm arî ixkrî hã ijarēnh ma nē mē kot ixkuxwar ajaxàr pymaj mē kãm Tîrtũm kapêr o mē ahkre hkukamã tee ri ajamaxpêr kêt nē. Mē kot ã anhîpêx anhÿr mã tã kêt ka amnhî kamã akahak kêt nē. ãm Tîrtũm nhÿ hã hihtÿx xà ho amnhî to htÿx nē ixpyrã nē ma mē kãm Jejus kot mē panê tanhmã amnhî nhîpêx to hã harēnh

to rāhā ho ri mē hkôt apa. Mē kot tanhmā hā anhîpêx to htāā. ⁹ Na pu htem Jejus kôt amnhî xunhwý nhūm Tirtūm ja hā mē pahpumu nē Jejus kukwak ri amnhî katut kôt mē pahte amnhî tomnuj piitā rēnh pa nē mē pahto hkra. Hāmri nē mē pahte hkôt pix mā amnhî nhîpêx o papa kaxyw mē paxunhwý. Ām Jejus pix kukwak ri na hte mē pahto hkra nē ā mēmoj to mē pakutā nojarêt rāhā ho pa anē. No na hte mē pahte amnhî to mex ā mē pahpumunh kôt mē pahto hkra hkêt nē. Amnepēm kormā mēmoj piitā hkêt ri na pre mē pakukamā hamaxpēr o:

—Koja mē nhÿrmā Ixkra Jejus Kris kôt amnhî xunhwý pa ja hā mē omu nē Ixkra kukwak ri mē ho mex nē. Anē.

¹⁰ Tā kormā mē pahte amnhî tā ā kot mē pajarēnh anhÿrja mar kêt jakamā na pre Jejus mē pahwÿr wrÿ nē tanhmā mē pahto mex to. Na pre ty nhūm Tirtūm akupÿm ho htír. Jakamā na pu htem ra amnhî kaxyw hkôt pajamaxpēr nē hkôt amnhî xunhwý hāmri nē nhÿrmā mē pahtyk tā nhūm Tirtūm kot Kra Jejus nhîpêx pyrā nē akupÿm mē pahto mē pahtír pu mē Jejus kukwak ri wa kuri pamex nē pahtír tūm nē papa ho papa. Jakamā na pu htem mē pamā pahtyk puma ho papa hkêt nē.

¹¹ Amnepēm na pre Tirtūm ixām nē tanhmā inhmā ixápēnh ā karō hto nē inhmā:

—E Pawre kēr ka Jejus nhÿ hā ma hkwÿjê jahkre ho ri mē hkôt apa. Nē ixkapēr o mē ahkre mex nē. Kēr ka ā amnhî nhîpêx anhÿr rāhā ho ri mē hkôt apa. Anē.

¹² Tā ā kot inhmā kapēr anhÿr nhūm ixte kapēr kôt amnhî nhîpêx o ixpaja mÿrapê na htem Jejus ā tanhmā inhîpêx kati hto ho pa. Pa hte ixpunuj nē amnhî xà htÿx kamā ijamak o ri Jejus mā tanhmā amnhî nhîpêx to ho ri mē hkôt ixpa. Tā nom tee ri ja hā amnhî pumu nē amnhî kamā ixpijaàm nē ixkaprî hkêt nē. Ixte amnhî kaxyw hkôt ijamaxpēr xwÿnhja na ixte tanhmā kot amnhî nhîpêx to hā omunh mex jakamā kot paj ty nhūm mē arî inhmÿr pē Tirtūm kapēr mar o pa. Mē kot ja hā ixpír tā koja mē apē Kris kôt ixkwÿjaja inhmÿr pē arî mē kām harēnh o apa. Koja mē ā xapēn mÿr

pē amnhî nhîpêx anhÿr o pa rāhā nhūm Pahihti Jejus akupÿn mē pahwÿr wrÿ.

¹³ Kwa Ximotre. Ra ixte amā mēmoj tā karō rax jakamā kēr ka mar tÿx nē hkôt amnhî nhîpêx rāhā o ri apa. Jao Jejus Kris nhÿ hā mē piitā mē noo mā amnhî kaxyw kām ajamaxpēr tÿx rāhā nē. Nē mē piitā mē ho mex o ri apa. ¹⁴ Ate mē kām tanhmā Jejus jarēnh to hō ri apaja ām hāmri na. Tā koja mēhō htÿx ri tanhmā ho kapēr punuj to rÿ axtem nē tanhmā harēnh to ka ja hā ama nē nē kām akapēr kām axihtÿx nē. Tirtūm Karō ra kot akarō hwÿr àr jakamā kēr ka ÿ hā ā Jejus jarēnhja jamār mex o ri apa anē.

Pawre kot tanhmā amnhî jarēnh to

Sikūn Ximotre 4.16-18

¹⁵ Nē mǎn ka pre ra pika pē As kamā Kris kwÿ kot ixkaga hā mē harēnh ma. Na pre Pijerti mē Emosti mē mē ohtō nē tanhmā hamaxpēr to nē ixto ajuta hkêt nē. ¹⁶⁻¹⁸ ām Onēsipti pix na pre mē kurom ijarēnh ma nē man ixwÿr Rōm wÿr mō nē ijapēr o ri mē hkôt mra nē ixwÿr kato. Hāmri nē xatā ixwÿr mra nē tanhmā ixto mex to. Jao akupÿm ijamaxpēr o hihtÿx. Ixpē prēs nē ixkrî htā kēp ixkrāmnhwÿ hā amnhî jarēnh ā hpijaàm kêt nē. Nē amnepēm kormā krî pé Epes kamā ixpa ri na pre mǎānēn tanhmā ixto mex to ho pa. Tā ā kot inhîpêx mex anhÿr o pa jakamā na pa hte ho Pahihti Jejus wÿ nē kām:

—Pa Pahihti? Onēsipti o na pa awÿ. Kot ixto mex rāhā ho pa jakamā kwa kēr ka ixtā omu nē kutā anojarêt rāhā ho apa. Nē ōrkwÿ kamā hkwÿjaja mǎānēn tanhmā mē ho mex to. Hāmri nē nhÿrmā akupÿn mē ixwÿr wrÿ nē ixtā kamā axukaprî hā tanhmā ho mex to. Anē.

2

Mē pahte Jejus kôt amnhî nhîpêx pix prām ā mē pamā karō

Wam Ximotre 6.11-16

¹ E Ximotre. Jejus Kris kot mēmoj to mē pakutā nojarêt rāhā jakamā kwa kēr ka ÿ hā amnhî to htÿx nē kām tanhmā amnhî nhîpêx to ho apa hā amnhî kamā akahak o ri apa hkêt nē. ² Ra ate pa tanhmā Tirtūm kapēr o mē ahkre htoja mar jakamā kēr ka

amnhĩ xō ri ã Jejus kōt mẽ pahkwỳjê jahkre ho apa anẽ. Mẽ kot amar nẽ pahpyràn axpẽn xō ri ho axpẽn jahkre ho pa kaxyw.

³⁻⁴ Sōrdat na htem mẽ hkrāhtũm kām prām xà hkōt tanhmã amnhĩ nhĩpêx to. Jao tanhmã kute htã kapêr ma nẽ hkōt amnhĩ nhĩpêx. Tanhmãn à rỳ kām prām rỳ tanhmã omnuj to htã kutã amnhĩ to htỳx nẽ mẽ hkrāhtũm kōt amnhĩ nhĩpêx. Na htem amnhĩ xàpênh kukamã tee ri hamaxpêr o pa hkêt nẽ. ãm mẽ hkrāhtũm kapêr kōt pix mã amnhĩ nhĩpêx o pa hprãm. Tã kêr ka mẽ uràk nẽ Pahihti Jejus kōt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

⁵ Nẽ mẽ hprōt tỳx xwỳnhjaja na htem hkwỳjê pẽ amnhĩ to wa hprãm xàj ãm ja pix kukamã hamaxpêr. Hãmri nẽ hprōt tỳx prãm xàj mẽmoj kot mẽ ho hirerek kêt nẽ amnhĩ jagri htỳx nẽ. Hãmri nẽ hprōt tỳx o hkwỳjê jakre nẽ amnhĩ to wa nẽ pōj nẽ kot amnhĩ to wa hã mẽmoj to kãnja. Tã kêr ka mẽ uràk nẽ amã Pahihti Jejus kot amnhĩ nhĩpêx kōt pix mã amã amnhĩ nhĩpêx prãm.

⁶ Nẽ pur kām mẽ àpênh xwỳnhjaja na htem mẽ hpur kām àpênh pix tãnopxar o pa nẽ àpênh rũnh nẽ. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nẽ ho apkur mex o pa. Nòm koja mẽ kãm kaga nẽ àpênh mex kêt nẽ hãmri nẽ õ grire nẽ apkur mex kêt nẽ. Tã kêr ka pur kãm mẽ àpênh rũnh xwỳnhjê pyrã nẽ Pahihti Jejus mã amnhĩ nhĩpêx mex o apa. Nẽ mẽ uràk nẽ amã kaga hkêt kãm axàpênh pix tãnopxar o ri apa.

⁷ E na pa ã ajahkre anẽ Ximotre. Tã kêr ka ixte ajahkreja ma nẽ kãm ajamaxpêr rãhã nẽ. Koja Pahihti tanhmã akrã hto ka aprĩ hã mar tỳx nẽ.

⁸ Nẽ kêr ka Pahihti Jejus Kris mã ajamaxpêr rãhã ho ri apa. Na pre katorxà hkōt kêp Pahi finat Tawĩ kanrêhã htãmnhwỳ hã mẽ pahpyrà nẽ ì ho ì nẽ kato nẽ panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm ty. Hãmri nhũm Tĩrtũm akupỹm ho htĩr nhũm akupỹm htĩr o htĩr. ã na pre hte harênh anhỳr rãhã ho ri mẽ hkōt ixpa. ⁹ Mỳrapẽ na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwỳnh pyrãk o

inhĩpêx nẽ axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỳr tã na hte Kris kōt pahtōjaja arĩ ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kaprỳ. ¹⁰ Jakamã kwār mẽ mãmri ã inhĩpêx anẽ. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwỳjaja hkōt amnhĩ xunhwỳ nẽ nhỹrmã pahpyrà nẽ kêp Jejus Kris kwỳ hã Tĩrtũm mẽ wa kuri mex nẽ htĩr tũm nẽ pa ho pa.

Kris kwỳ kot tanhmã amnhĩ tã grer to hã mẽ harênh

¹¹ Na pu htem mẽ pahpê Kris kwỳ hã ã amnhĩ tã pagrer anẽ:

Mẽ kot Kris ã mẽ panhĩmex tã kot puj mẽ akupỹm pahtĩr nẽ kuri pamex nẽ pahtĩr tũm nẽ papa ho papa.

¹² Mẽ kot tanhmã Kris ã mẽ pahtomnuj to htã kot puj mẽ arĩ hkōt amnhĩ nhĩpêx o papa rãhã ty nẽ nhỹrmã ìhkô hã mẽ ho amnhĩptar o papa.

Nom kot puj mẽ amnhĩ kamã pakahak pẽ mẽ pahpê Jejus kwỳ hkêt ã amnhĩ jarê hã koja Jejus amnhĩ xwar mẽ pahpê hkwỳ hkêt ã mẽ pajarẽ.

¹³ Nẽ mẽ pahte amnhĩ kaxyw Jejus kōt pajamaxpêr kêê tã tanhmã amnhĩ jarênh to xà hkōt tanhmã amnhĩ nhĩpêx to. Aa kot mẽmoj tã amnhĩ jarênh kuhpa hã ri tanhmã amnhĩ nhĩpêx to hkêt. Anẽ.

Mẽ kot Tĩrtũm kapêr o mẽ ahkre mex xwỳnhjê jarênh

Wam Pêtre 3.15-16

¹⁴ E Ximotre. Ixte ã mẽmoj tã amã karõ anhỳrja kêr ka ho mẽ ahkre rãhã ho ri mẽ hkōt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tĩrtũm kapêr o mẽ ahkre mex o ri pa nẽ kapêr ã tanhmã axpẽn mã àkjet to hkêt nẽ. Koja mẽ hã axpẽn mã akir hãmri nẽ amnhĩ to mex kêt nẽ. Hãmri nhũm mẽ kot mẽ kapêr mar xwỳnhjaja ja hã mẽ omu nẽ tee ri Tĩrtũm kapêr kukamã hamaxpêr nẽ hkōt amnhĩ nhĩpêx mex kêt nẽ.

¹⁵ Nẽ na htem mẽ kãm mẽ àpênh mex xwỳnhjaja mẽ õ patrãw kapêr ma nẽ hkōt mẽmoj tã àpênh mex nẽ. Nhũm õ patrãwja hwỳr mra nẽ àpênh ã omu. Hãmri nhũm

amnhĩ wỳr omu nē àmnhĩx noo mǎ apē. Kām àpēnh mex jakamǎ amnhĩ kamǎ kām uma hkēt nē. Ja pyrǎ nē kēr ka Tĩrtūm noo mǎ kām amnhĩ nhĩpēx mex rǎhǎ nē aprĩ hǎ kapēr o mē ahkre mex o ri mē hkôt apa. Kē ǎ ate amnhĩ nhĩpēx anhỹr ǎ apumu nē anhỹ hǎ hkĩnh nē. Ka àpēnh xwỳnhhta pyrǎ nē amnhĩ kamǎ amǎ uma hkēt nē noo mǎ kām amnhĩ nhĩpēx mex o ri apa.

¹⁶ No mē kot Tĩrtūm kapēr o hēx o mē pa xwỳnhjaja kēr ka mē hkôt ri apa hkēt nē. Nē mē kapēr mar nē ri mē hkôt axām hkēt nē. Na htem mē kapēr ma nē mē hkôt amnhĩ nhĩpēx o pa nē kām Tĩrtūm kapēr mar prām kēt nē. Nē gaa nē te kēp mar pumaj amnhĩ jamak pro pyrǎk o amnhĩ nhĩpēx. ¹⁷ Tỳx ri tanhmǎ mē ahkre hto xǎja te kot mē hkànhy aa mex kēt nē ra omnuj tỳx o mōrja pyrǎk. Jao mē kot mē kapēr mar o mē pa xwỳnhjaja mē mar pē ra mē hkôt amnhĩ tomnuj tỳx o mō. Na hte ra Imēnew mē Pijertija wa ǎ htỳx ri amnhĩ krǎ hkôt mē ahkre anhỹr o pa. ¹⁸ Nē Tĩrtūm o hēx o mē hkôt pa nē nhỹrmǎ akupỹm mē pahto mē pahtĩr kēt ǎ harēnh o pa. Hāmri nhũm mē amnhĩ tǎ wa kuma nē tee ri amnhĩ kukamǎ hamaxpēr pē Jejus kaga nē axte amnhĩ kaxyw hkôt hamaxpēr kēt nē. Nom wa kapērja kot anhỹr kēt. ¹⁹ Kēt Tĩrtūm kapērja ǎm hāmri na. Kot mēmoj to hēx kēt jakamǎ na pu htem amnhĩ kaxyw hkôt pajamaxpēr kaprỳ hkēt nē. Kapēr ǎ kagǎ htũm kot tanhmǎ mē pahpē hkrajē jarēnh to nē harēnh kot:

Tĩrtūm na kot hkrajē piitǎ omunh mex rǎhǎ ho pa xwỳnh.

Anhỹr o mē pajarēnh. Nē mē pamǎ mēmoj tǎ karō kot:

Kē mē kot Jejus kôt amnhĩ xunhwỳr xwỳnhjaja amnhĩ tomnuj o pa hkēt nē. Anē.

Tĩrtūm krajaja te kēp prat mex pyrǎk ǎ mē harēnh

²⁰ Nē mē hikàxpore rūnh xwỳnhjaja mē õ xijere nē mē õ prat xohtō. Prat kwỳ muxre nē hkwỳ omnajre. Prat pynajre na htem māmri kamǎ apku no prat muxreja ǎm mēmoj mex pix kaxyw na htem mēsti hǎ haxwỳ nē kamǎ apku. Kasamēt ǎ rỳ mē hkra krǎ hkēnh ǎ mē hkĩnh nhũm htem mēsti hǎ haxwỳ nē kamǎ apku. ²¹ Tǎ mē kot

Tĩrtūm kapēr o hēx o mē pa xwỳnhjē hkôt hamaxpēr kēt nē mē hkôt amnhĩ tomnuj kēt xwỳnhjaja te mē kot prat muxre pyrǎk. Na htem tǎm amnhĩ nhĩpēx nē tanhmǎ hamaxpēr punuj to ho pa hkēt nē. Hāmri nhũm Tĩrtūm ja hǎ mē omu nē mē ý hǎ hkĩnh nē. Hāmri nē te mē kot prat muxre jaxwỳr nē kamǎ apkur pyrǎ nē mē kot kām tanhmǎ amnhĩ nhĩpēx to ho pa kaxyw mē unhwỳ.

Mē pahte tǎm amnhĩ nhĩpēx ǎ mē pamǎ karō

²² Nē mē àptàr nyw jamaxpēr punujja kēr ka te ate hamỳnh nē amnhĩ katut kôt rēnh par pyrǎk o hipēx Ximotre. Jao axte ho ajamaxpēr o ri apa hkēt nē. Nom mē hamaxpēr mexja kēr ka hamỳ nē amnhĩ krǎ him hagiē nē ho ajamaxpēr rǎhǎ ho ri apa. Jao tǎm amnhĩ nhĩpēx nē amnhĩ kaxyw Tĩrtūm kôt ajamaxpēr rǎhǎ nē. Nē amǎ mē kēp Kris kôt akwỳjē hkĩnh pē tanhmǎ mē ho ajuta hto ho ri mē hkôt apa. Jao mēmoj to mē kutǎ anojarēt rǎhǎ nē. Na hte ǎ Pahihti Jejus kôt amnhĩ nhĩpēx xwỳnhjaja amnhĩ nhĩpēx anhỹr o pa.

²³ Nē kēr ka mē kot htỳx ri amnhĩ krǎ hkôt mē ahkre ho mē pa xwỳnhjē hkôt apa hkēt nē. Te ate mē kēp awry hǎ ri apa pyrǎ nē mē kapēr ma nē ǎm ama. Na htem mē kapēr mar o pa nē ra hǎ axpēn mǎ tanhmǎ àkjēr to ho pa. Jakamǎ kwarĩ mē hkôt ri apa hkēt nē. ²⁴ Mē pahte Tĩrtūm mǎ amnhĩ nhĩpēx o papa xwỳnhjaja na pu htem mē kurom mēmoj tǎ axpēn mǎ paxàkjēr o ri papa hkēt nē. Na pu htem ǎm mē piitǎ mē kamǎ paxukapri pē mē ho mex nē mē kamǎ pagryk tokyx anhỹr kēt nē. Nē Tĩrtūm kapēr o mē ahkre mex nē. Na hte ǎ mē pahte Tĩrtūm mǎ tanhmǎ amnhĩ nhĩpēx to xwỳnhjaja amnhĩ nhĩpēx o papa anē.

²⁵⁻²⁶ Jakamǎ koja mēhō ate Tĩrtūm kapēr o mē ahkreja ma nē tanhmǎ ho amǎ kapēr to ka ama nē amnhĩ tǎ tanhmǎ kām akapēr punuj to hkēt nē. ǎm kamǎ axukapri ho tanhmǎ hǎ kām akapēr mex to. Na hte Satanasti te kot amnhĩm mē unēnh pyrǎk o mē hipēx nē tanhmǎ mē kām Tĩrtūm kapēr o hēx to nhũm mē kuma nē hkôt hamaxpēr nē kapēr kôt amnhĩ nhĩpēx. Tǎ kot kaj mē kamǎ axukapri ho mē kām akapēr mex nē

nhūm Tirtūm tanhmā mẽ hkrā hto nhūm mẽ ama nē hkôt amnhī xunhwȳr japêr. Te Tirtūm kot Satanasti pē amnhīm mẽ utār pyrāk. Jakamā nhūm mẽ hpānhā Tirtūm kapêr mex ā harē nē harēnh o:

—Nà pēr ām hāmri na Tirtūm kapêrja. Ām mex o mex. Anē.

3

Jejus akupȳn wrȳk kukamā mẽ kot amnhī tomnuj xwȳnhjē jarēnh

Matêwre 24.4-13; Korosē 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nē Jejus akupȳn mẽ pahwȳr wrȳk xwȳj ri mẽ kot tanhmā amnhī nhīpêx toja kot paj hpānhā ixprī hā amā harē ka inhmar tȳx nē Ximotre. Koja Jejus akupȳn mẽ pahwȳr nojarêt pu mẽ pahpê hkwȳjaja pahpunuj nē papa. ² Nē Kris kwȳ hkêt xwȳnhjaja koja mẽ amnhī pix kukamā hamaxpêr o pa.

Jao hikāxpore rax o pikuprōnh pix kukamā hamaxpêr pē hkwȳjê pē ôxy htȳx o pa.

Nē mẽmoj tã amnhī to jarkrar o pa.

Nē tanhmā hkwȳjê japrȳ hto ho pa.

Nē mẽ hipêêxà nē mẽ katorxà hā hpijaàm kêt o pa.

Nē Tirtūm ā hpijaàm kêt o pa.

Nhūm mēhō tanhmā mẽ ho mex to nhūm mẽ amnhī tã mẽ omu nē ām mẽ omu nē amnhī tã tanhmā mẽ kām nē hkêt nē. Rȳ mẽ kām: “Nà ām hāmri na ka ā ixto mex anē. Nà ja mex.” Anhȳr o mẽ kām kapêr kêt nē.

³ Mē ukaprī hkêt jakamā koja mēhō tanhmā mẽ homnuj to nhūm amnhī tã mẽ omu nē kamā gryk kurê kumrêx nē aa gryk o hapêx kêt nē.

Nē amnhī tã tanhmā hkwȳjê ho hêx to ho pa.

Nē htȳx ri kām hprām xà hkôt tanhmā amnhī tomnuj to.

Nē oprê ho pijapu pix kukamā hamaxpêr.

Nē axtem nē kām mẽmoj mex pumunh prām rȳ mẽmoj mex mar prām kêt nē.

⁴ Nē mēhō ho hkrāmnhwȳ htã axtem nē mẽ kām mẽ hkurê xwȳnhjê nhīhkram haxà.

Nē hamaxpêr mex kêt o tanhmā amnhī tomnuj to rāhā ho ri pa.

Nē amnhī to rūnh o mẽ piitã mẽ hakrenh par ā amnhī to jarkrar o ri pa.

Nē amnhī krā hkôt kām amnhī nhīpêx prām xà hkôt amnhī nhīpêx o pa nē kām Tirtūm kām prām xà hkôt amnhī nhīpêx prām kêt nē.

⁵ Hāmri nē mẽ kēp hkra hā amnhī jarēnh o pa htã aa hkôt amnhī nhīpêx kêt. Ā Tirtūm kra hkêt xwȳnhjaja amnhī nhīpêx kot anhȳr jakamā kwa kêr ka ā mẽ hkôt apa hkêt nē Ximotre.

⁶⁻⁷ Na htem hêx rom hkwȳjê nhōrkwȳ hwȳr agjê nē kamā tanhmā mēnijê mã hêx to. Mē kot mẽ mar nē tanhmā amnhī tomnuj to hāmri nē ja hā amnhī pumu nē tee ri amnhī kukamā hamaxpêr kaxyw. Nē mẽ kām mẽ kapêr nyw mar prām tã nhām mẽ kapêr ma nē nhām mẽ kapêr mar nē aa Tirtūm kapêr mar nē amnhī kaxyw hkôt hamaxpêr kêt nē. Jakamā nhūm mẽ kot amnhī tomnuj xwȳnhjaja hêx rom mẽ hwȳr mra nē mẽ ōrkwȳ hwȳr agjê nē tanhmā mẽ kām mẽmoj to hêx to. ⁸ Te kot amnepêm finat Jānre mẽ finat Jāmtija wa kot amnhī nhīpêxta pyrāk. Na pre finat Mojestija Tirtūm nhȳ hā tanhmā mẽ ahkre hto ho pa nhūm Jānre mẽ Jāmti wa kām mar prām kêt nē. Nē tanhmā ja nē hkwȳjê mã kapêr to ho pa. Tã ā mẽ kot amnhī tomnuj anhȳr o mẽ pa xwȳnhjaja na htem wa urāk nē kām Tirtūm kapêr mar prām kêt nē kapêr nē tanhmā hkwȳjê mã kapêr to ho pa. Nhūm mẽ hamaxpêr mex kêt jakamā ām mẽmoj punuj pix kukamā hamaxpêr nē mẽ kuma nē amnhī kaxyw Jejus kôt hamaxpêr kêt nē. ⁹ Tã nom koja mẽ hkwȳjaja tokyx hprī hā mẽ kot mẽmoj to hêx ā mẽ omu hāmri nē axte mẽ hkôt hamaxpêr kêt nē nhūm mẽ rī amnhī pumu. Te amnepêm mẽ kot hprī hā Jānre mẽ Jāmti wa kot tanhmā amnhī tomnuj to hā wa omunhta pyrāk.

Mē pahte Jejus ā pahpunuj tã hkaga hkêt ā mẽ pamā karō

Atre 13.50-14.7, 14.19-22

¹⁰ E Ximotre. Ate ixkôt apa rȳ jakamā ra ate tanhmā ixte amnhī nhīpêx ho ixpa hā ixpumunh mex.

Ixte tanhmā Tirtūm kapêr o mẽ ahkre hto ho ixpaja.

Nē inhmā mẽmoj to anhȳr prām xwȳnhja.

Nē ixte amnhī kaxyw Kris kôt ija-maxpērja.

Nē inhgryk tokyx anhÿr kêtja.

Nē ixte tanhmā Kris kôt ixkwÿjê ho mex to ho ri ixpaja.

Nē ixpunuj nē ixpa htā arī Kris kôt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate xpumunh mex.

¹¹ Na pa pre krī pē āxiok nē Ikōn nē Ristija kamā mẽ kām Jejus jarēnh o ixpa nhūm mẽ hkwyjaja Jejus ā tanhmā inhīpêx to pa amnhī xā htÿx kamā ijamak o ri mẽ hkôt ixpa. Tā nhūm Pahihti Kris xatā mẽ kēp ixpytā pa ixtīr pē mẽ ĩhkra rūm ijapōx o ixpa. ¹² Na hte Kris kwÿ hkêt xwÿnhjaja mẽ pahte Kris kôt amnhī nhīpêx o papa hā mẽ pahomnuj o pa.

¹³ Nē mẽ kot Tīrtūm kapēr o hêx o mẽ pa xwÿnhjaja koja arī mẽ kēp Kris kwÿ hā amnhī to hêx pē mẽ nokupyr. Nē mẽ kām Tīrtūm kapēr o hêx o pa. Jao ra mẽ tāmjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tīrtūm kapēr ā kagà jarēnh to

Rōmān 15.4; Sikūn Pêtre 1.19-21

¹⁴⁻¹⁵ No ka Ximotre. Amnepēm aprīre rūm na pa pre mẽ ixohtō nē Tīrtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akôt ixpa ka mẽ inhmar tÿx nē amnhī kaxyw Jejus kôt ajamaxpēr. Jakamā kwa kēr ka arī hkôt ajamaxpēr mex rāhā ho ri apa. Tīrtūm kapērja na htem mar pē amnhī kaxyw Jejus Kris kôt hamaxpēr nē hkôt amnhī xunhwÿ nhūm Tīrtūm ja hā mẽ omunh xā hkôt mẽ ho hkra. ¹⁶ Tīrtūm kapēr ā kagàja Tīrtūm kapēr na. Na htem ho mẽ ahkre ho pa. Koja mēhō hkwȳm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rÿ tanhmā amnhī tomnuj to htā kapēr ā kagà kamā kapēr nē Tīrtūm kot ā kot amnhī tomnuj anhÿrja nē mẽ pamā kapēr ā harēnh ma nē amnhī tomnujta kaga kurē kumrêx. Rÿ kamā kapēr nē Tīrtūm kot tanhmā mẽ pahte amnhī to mex to hā mẽ pamā karō kamā harē nē kuma. Hāmri nē ŷ hā hkôt amnhī nhīpêx mex rāhā

nē. Ā na hte Tīrtūm kapēr kagàja mẽ kot mar nē hkôt amnhī nhīpêx xwÿnhjê ho mex anē. ¹⁷ Na hte mẽ kot Tīrtūm mā amnhī nhīpêx o mẽ pa xwÿnhjaja kamā harē nē hkôt amnhī nhīpêx mex pē mẽ piitā mẽ ho mex nē ho mẽ ahkre mex rāhā ho pa.

4

Pawre kot mēmoj tā Ximotre mā karō Korosē 4.5-6

¹ Nē koja nhÿrmā Jejus Krisja akupÿn mẽ pahwÿr wrÿ hāmri nē mẽ pahpiitā tanhmā mẽ pajarēnh to. Ra mẽ htyk xwÿnhjaja nē arī mẽ pahÿr xwÿnhjaja nhūm tanhmā mẽ pahte amnhī nhīpêx to ho papa hā mẽ pahpumunh kôt tanhmā mẽ pajarēnh to. Jao Tīrtūm mẽ wa kuri mẽ pahÿr tūm nē papa ho papa hā mẽ pajarē rÿ wa kuri pahÿr tūm nē papa hkêt ā mẽ pajarē. Jakamā kwa Ximotre kot paj Tīrtūm mẽ Jejus Krisja wa noo mā mēmoj tā amā karō ka inhmar tÿx nē. ²⁻⁴ Koja nhÿrmā mẽ kēp Tīrtūm kra hkêt xwÿnhjaja axte kām Tīrtūm kapēr mar prām kêt nē nhām mẽ kapēr pix mar prām o ri pa. Jao amnhī kukamā hamaxpēr o:

—Nā inhmā Tīrtūm kapēr mar prām kêt. Kot mēmoj piitā nē mẽ hkurē kēnā. Kot paj hpānhā mēhō kot mēmoj nē mẽ hkurē hkêt xwÿnhjê kapēr pix mar o ri ixpa. Nā kot paj anē. Ja na inhmā hprām. Nom kot paj axte Tīrtūm kapēr mar kêt nē.

Anhÿr jao kapēr kaga nē hpānhā htÿx ri nhām mẽ ujarēnh pix ma nē hkôt hamaxpēr. Koja mẽ ā amnhī nhīpêx anhÿr o pa. Jakamā kwa kēr ka arī mẽ kām Jejus kot tanhmā mẽ panē amnhī nhīpêx to hā harēnh rāhā ho ri mẽ hkôt apa Ximotre. Mē kām mar prām kêt tā māmri ri mẽ kām harē. Nē nhÿri mēhō pumu nē kām harē. Mē kām mar prām xwÿnhjê mā harē nē mẽ kām mar prām kêt xwÿnhjaja ka määnēn mẽ kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupÿm tām amnhī nhīpêx. Rÿ nhūm mēhō tām amnhī nhīpêx o pa ka ja hā omu nē hā kām akapēr nē kām:

—Ām hāmri na ka hte Tīrtūm kôt amnhī nhīpêx mex nē. Anē.

Hāmri nē anojarēt kêt kām mẽ kām Tīrtūm kapēr o mẽ ahkre rāhā ho ri apa.

⁵ Nē tām ri amnhī nhīpêx rāhā nē. Mē kot Jejus ā tanhmā anhīpêx to htā kēr ka ŷ hā amnhī to htỳx nē arī mē kām kapêr jarēnh o ri mē hkôt apa. Jao Tirtūm mā amnhī nhīpêx mex rāhā nē. Kēr ka ā mē hkôt amnhī nhīpêx anhỳr o ri apa Ximotre.

Pawre kot ra htyk kaxyw ā amnhī jarēnh Atre 20.17-35

⁶ Nē mē kot ixpīr xā hā arīgroja ra hwỳr ahtêp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xā kamā mēmo kagōja py nē mē kot Tirtūm mā mēmoj nhōr xā hā mēstija ā hkapīr pa nhūm hapêx. Tā te ixpê mē hkōm xā kamā mēmo kagō pikapīrta pyrāk. Kot paj tokyx ty nē jar ijapêx. ⁷ Na pa ra Pahihti Jejus mā amnhī nhīpêx mex o ri ixpa. Mē kot tanhmā hā ixtomnuj to htā pa hkaga hkêt nē arī hkôt amnhī nhīpêx mex rāhā ra ixtyk kaxyw. ⁸ Ixte Pahihti kām hprām xā hkôt amnhī nhīpêx mex o ri ixpa jakamā koja amnhī tā tanhmā ixto mex to. Nom papxipix ixto mex kêt nē. Na hte ām hāmri tām mē pahpiitā mē panhīpêx. Jakamā nhỹrmā kot mē piitā tanhmā mē harēnh to xā hā arīgrota ā koja mē pahkīnh pē mē pahte amnhī wỳr kamā pajamak o papa xwỳnh piitā mē pamā mā mēmoj mex gō.

Pawre kot amnhī wỳr Ximotre hwỳr

⁹ Kwa na pa ra ato ijamak tỳx nē Ximotre. Kwa kēr ka amnhīm anojarêt nē tokyx tanhmā amnhī to hpa nē man ixwỳr mō.

¹⁰ Na pre ra Kresēx ma Karatas wỳr mō nhūm Xitre ma pika pē Tawmas wỳr mō. Nhūm Tēmti ra tanhmā hamaxpēr to nē àpēnh gryk ā ixkaga nē ma akupỹm Tesarōn wỳr mō. ¹¹ ām Rukre pix na arī ixkôt pa jakamā kēr ka anojarêt hāmri nē ahte amōr kêt nē. Makre mā anē kê man akôt ixwỳr mō nē tanhmā ixto ajuta hto ho pa.

¹² Nē Xikitre na pa pre ra Epes wỳr kumē.

¹³ Nē Torôt kām Kapti nhōrkwỹ kamā ixte kry pē inhō kamīs pa hkà ryti rer jakamā kēr ka anojarêt nē inhmā apy nē man inhmā o mō. Nē inhō kagàta ka määnēn inhmā amỳ nē o mō. Nē mēmo mry kà hā ixte mēmoj tā kagàta ka määnēn apy nē

mān inhmā o mō. E kēr ka anojarêt nē ixkukrêxja jamỳ nē ixwỳr ho mō.

Tanhmā Aresānti kot Pawre nhīpêx to hā harēnh

¹⁴⁻¹⁵ Nē na pre kàx o mēmoj nhīpêx xwỳnh Aresāntija ixtomnuj nē. Pa pre mē kām Tirtūm kapêr o mē ahkre ho ri mē hkôt ixpa nhūm tee ri inhma nē kām mar prām kêt nē. Hāmri nē ixkutā amnhī xām nē inhīpêx kati nē. Nom koja Pahihti Jejus ixtā tanhmā ho. Kwa kēr ka amnhī nē omunh mex nē Ximotre.

Pahihti Jejus kot Pawre mā hamaxpēr o hihtỳx ā harēnh

¹⁶ Nē pahi kot mē mar xā hā ixkre kamā wam ixte mē kām amnhī jarēnh ta ā na pre mēhō ixyr pē mē kām tanhmā ijarēnh to hkêt nē. Na prem piitā mē umaj ixkaga hpa. Nom kwār mē māmri ā amnhī nhīpêx anē. Tirtūm kot ixtā tanhmā mē hoja na inhmā hprām kêt. ¹⁷ ām Pahihti Jejusja pix na pre mē kurom ixkaga hkêt nē. Na pre ixto ixihtỳx nē pa ŷ hā mē kām tanhmā mē panē kot amnhī nhīpêx to hā harēnh pa. Nhūm Ijaew kêt xwỳnh kot inhmar o hkrī xwỳnhjaja ixujarēnh mar o hkrī nhūm Tirtūm inhnē tanhmā mē ho nhūm mē ixpīr kêt nē. ¹⁸ Koja Pahihti mē kutā ixto ixihtỳx rāhā nē mēmo arīgro hā amnhī wỳr ixto api. Pa Tirtūm mē wa kuri inhmex kumrēx nē ixtīr tūm nē ixpa ho ixpa. Pahihti mex o mex jakamā kēr pu mē kām mex o mex ā harēnh rāhā ho papa nē aa jam panhūrer kêt nē.

Pawre kot tanhmā hkrāmnhwỳjê jarēnh to

¹⁹ Nē kēr ka Prisire mē mjēn Akir wa kām ijarē. Nē Onēsipti hprō nē hkrajaja ka määnēn mē kām ijarē. ²⁰ No Eras kormā Korīt kām pa. Nē Toropti na pre à nē pa Mīrêt kām kure nhūm ixkôt mōr kêt nē.

²¹ Kwa kēr ka amnhīm anojarêt nē amgrà pē man tokyx ixwỳr mō Ximotre.

Nē ota Epti mē Prutēhti mē Rīnre mē Krawreja awỳr hpēr mē. Nē jar Kris kôt pahkwỳjê piitā awỳr hpēr mē.

²² E kê Pahihti Jejus ato mex rāhā nē mē apiitā mē akutā nojarêt rāhā ho pa.

Tā ām ja pix. Ixpê Pawre na pa awỳr kagàja nhīpêx nē kumē.

Xitre Pawre kot Xitre hwÿr kagà nē mēnh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hõ na pre. Nhÿm pre Xitre Pawre hkôt pa hã mytwrÿ xohtô nē. Tã kêp Jejus kôt hkwyjê nhõ pastô kaxyw gô hipôk pê Kret ã arîk nē Tîrtûm kapêr o mē ahkre ho mē hkôt pa. Jakamã nhÿm Pawre kãm kagàja nhîpêx nē kamã kãm mēmoj tã karô. Tîrtûm kapêr o mē hêx xwÿnhjaja tanhmã kot ja nē mē hkurê to hã kãm karô. Nē mē kot Tîrtûm kapêr o mē ahkre mex pix xwÿnhjaja Jejus kwÿjê kaxyw kot mē rēnh ã kãm karô. Nē Jejus kwÿjaja kot axpēn to mex o pa hã kot mē kãm karô kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karô nē hã kagà nē hwÿr mēnh anē. Nē kãm:

¹ Pa Xitre? Xà amex? Ixpê Pawre na pa awÿr kagà nhîpêx nē kumē. Na pa hte Tîrtûm mã tanhmã amnhî nhîpêx to ho ixpa. Nē ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nē mē kot hprî hã mar kaxyw Tîrtûm kapêr o mē ahkre mex nē. ² Mē kot inhmar nē nhÿrmã htyk nē ma Tîrtûm mē Jejus wa hwÿr àpir nē wa kuri htîr tûm nē pa ho pa hã amnhî kukamã hamaxpêr kaxyw. Amnepēm na pre Tîrtûm ã mē pahpê hkrajê hkukamã mē pajarēnh anē. Nē ãm hãmri ã mē pajarēnh anē. Na hte mēmoj tã amnhî to hêx kêt nē. ³ Tã ra mē pakukamã mē pamã mēmoj to amnhîrît nē inhmã kapêr o:

—E Pawre kêr ka ma mē hpiitã mē hkôt ri apa nē mē kãm ixkapêr jarē nē mē kãm: “Kot kaj mē amnhî kaxyw Tîrtûm Kra hkôt ajamaxpêr nē hkôt amnhî xunhwÿ nhÿm Tîrtûm ja hã mē apumu nē mē ato hkra. Ka mē nhÿrmã atyk tã nhÿm amnhî wÿr mē ato api ka mē wa kuri amex kumrêx nē atîr tûm nē apa ho apa.” Anhÿr o mē kãm ixkapêr jarēnh o ri mē hkôt apa Pawre.

⁴ Anhÿr o inhmã kapêr tã pa ã amã ixkapêr nē hã kagà anē Xitre. Pajamē

pahte amnhî kaxyw Jejus kôt pajamaxpêr nē hkôt amnhî xãm jakamã te apê ixkra pyrãk. Jakamã na pa hte ato Mēpanhîpêxã maati Tîrtûm mē mē papytâr xwÿnh Jejus Krisja wa hwÿr rãhã ho ri ixpa nē wa kãm:

—Pa Tîrtûm mē Pahihti wa. Nà Xitre ho na pa wa awÿ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nē àmnhîx pa ho pa. Anē.

*Kris kwÿ hkrãhtûmjaja kot tanhmã amnhî
nhîpêx to kaxyw mē hã kãm karô*

Wam Ximotre 3.1-13

⁵ Nē na pa pre Kret rûm inhnojarêt hãmri nē amã axàpēnh ã karô nē Kret kãm are nē man mō. Na pa pre amã:

—E kêr ka jar arîk nē mē kãm ixkapêr jarēnh jatur xãm mēnh o mē hkôt apa. Nē Kris kôt pahkwÿjê mã mē hkrãhtûmjê xunhwÿ. Kret kãm krî piitã hkôt. Na pa pre ixprî hã tanhmã amã mē harēnh to. Tã kêr ka ate inhmar xà hkôt mē hkwyjê kapi nē mē unhwÿ. Koja mē ã amnhî nhîpêx anhÿr o pa ka ja hã mē omu nē mē unhwÿ.

⁶ Koja mē tãm amnhî nhîpêx o pa nhÿm mē piitã axpēn mã mē mex ã mē harē. Nē mē hprô pix tânopxar o pa nē kuhpa hã nhãm mēnijê ho amnhîkati hkêt nē. Nē kê mē hkrajaja hipêxã pyrã nē amnhî kaxyw Jejus kôt hamaxpêr o pa. Jao hipêxã nē katorxã wa kapêr ma nē wa hkôt amnhî nhîpêx. No ri htÿx ri amnhî tomnuj o pa hkêt nē.

Anhÿr o na pa pre mē hã amã karô. ⁷ Jejus kôt pahkwÿjê hkrãhtûmjaja kot Tîrtûm nhÿ hã hkrajê mã kapêr mex o pa jakamã na htem tãm amnhî nhîpêx o pa.

Nē amnhî pix kukamã hamaxpêr o pa hkêt nē.

Nē gryk tokyx anhÿr kêt nē.

Nē kagôxyhti japrôr nē ho pipãnh o pa hkêt nē.

Nē oprê ho pa hkêt nē.

Nē kàxpore rûnh prãm xàj hêx rom tanhmã amnhî nhîpêx to hkêt nē.

Na htem ã amnhî nhîpêx anhÿr hkêt nē.

⁸ Æm àmnhîx amnhî nhôrkwy hwÿr mē hwÿr o pa.

Nē mē piitã mē kutã nojarêt rãhã nē.

Nē tãm hamaxpêr nē tãm mē piitã mē hipêx o pa.

Ně amnhĩ tomnuj pymaj amnhĩ to htỳx pê Tĩrtũm kôt amnhĩ nhĩpêx mex rãhã ho pa.

⁹ Ně mẽ kot Tĩrtũm kapêr mar tỳx jakamã kê mẽ arĩ hã nohtỳx nẽ mar tỳx xà hkôt amnhĩ xô ri ho hkwỳjê jahkre mex o pa.

Ně ho mẽ piitã mẽ hamaxpêr o hihtỳx o pa.

Nhũm mễhõ Tĩrtũm kapêr kwỳm ri tanhmã ujarênh to nhũm hã kuma nẽ hprĩ hã kãm tanhmã harênh to kê mar mex nẽ.

E Xitre. Na hte ã Jejus kwỳjê hkrãhtũmjaja amnhĩ nhĩpêx anhỹr o pa. Jakamã kêr ka aprĩ hã Kret kãm Jejus kôt pahkwỳjê kapi nẽ mẽ kot tanhmã amnhĩ nhĩpêx to ho pa hã mẽ omu. Nhũm mễhõ ã amnhĩ nhĩpêx anẽ ka ja hã omu hãmri nẽ kêp Jejus kwỳjê hkrãhtũm kaxyw ãm.

Kret nhõ xwỳnhjaja kot tanhmã amnhĩ tomnuj to hã mẽ harênh

Xitre 3.9-11

¹⁰ Nẽ atar Kret kãm na hte mẽ ohtô nẽ kãm mẽ ô pahi kapêr mar prãm kêt nẽ htỳx ri tanhmã Kris kwỳjê mã kapêr to ho pa. Na hte Ijaew kwỳjaja ã amnhĩ nhĩpêx anhỹr o pa. Jao Ijaew kêt xwỳnh kot Jejus kôt amnhĩ xunhwỳr xwỳnhjê mã kãm:

—Kwa mẽ ixpyrà nẽ mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

¹¹ Anhỹr o mẽ kãm kapêr jakamã kwa kêr ka ã mẽ kapêr anhỹrja nẽ mẽ kãm akapêr kãm axihtỳx nẽ. Na htem hpijaàm kêt o hikàxpore hprãm xà ã mẽ kãm kapêr anhỹr o pa. Jao mẽ hamaxpêr o ahkà nhũm mẽ kuma nẽ tee ri hamaxpêr. ¹² Na pre ra mẽ hkwỳjê hõ tanhmã mẽ harênh to. Mẽ ahkre xwỳnhjê hõja mẽ harênh o:

—Kret nhõ xwỳnhjaja na htem hêx pix o pa. Nẽ oprê nẽ kãm kaga nẽ apkur xà pix kukamã hamaxpêr o pa. Anẽ.

¹³ ãm hãmri ã mẽ harênh kot anhỹr. ã mẽ kot amnhĩ nhĩpêx anhỹr jakamã kwa mẽ kot amnhĩ nhĩpêxja nẽ mẽ kãm akapêr kãm axihtỳx o ri mẽ hkôt apa Xitre. Kê mẽ ã amnhĩ nhĩpêx anhỹr kêt nẽ. Nẽ mẽ kãm anẽ kê mẽ amnhĩ kaxyw Tĩrtũm kôt mãn hamaxpêr tỳx nẽ. ¹⁴ Nẽ kê mẽ axte Ijaewjê xujarênh nẽ mẽ kot amnhĩ nhĩpêx

kôt amnhĩ nhĩpêx kêt nẽ. ã mẽ kot amnhĩ nhĩpêx o pa hã mẽ kãm karõ xwỳnhjaja na prem Tĩrtũm kapêr kaga hpa. ¹⁵ Mẽ kot Jejus kôt amnhĩ xunhwỳr xwỳnhjaja tãm mẽ hamaxpêr o pa jakamã na htem Tĩrtũm kot mẽmoj piitã ho kator xwỳnh pumu nẽ piitã mex ã harẽ. No mẽ kêp Jejus kwỳ hket xwỳnhjaja na htem hamaxpêr punuj pix o pa. Nẽ mẽmoj mex pumu nẽ mex kêt ã harẽ. Mex tã nhũm mex kêt ã harênh o pa. ¹⁶ Nẽ mẽ kêp Tĩrtũm kra hã amnhĩ jarênh tã amnhĩ tomnuj pix o pa. Jao kêp hkra hã amnhĩ jarênh o hêx nẽ kapêr kwỳm ri amnhĩ nhĩpêx pix o pa. Nhũm Tĩrtũm tee ri ja hã mẽ omu nẽ kãm mẽ hkĩnh kêt nẽ. Tĩrtũm mã mẽ kot amnhĩ to mex kwỳ mẽ hã jêt kêt kumrêx.

2

¹ E Xitre kot paj tanhmã ate mẽ ahkre hto hã amã karõ ka ìnhma nẽ amnhĩ xô ri mẽ kãm hã karõ ho ri apa.

Měmy wejjaja kot tanhmã amnhĩ nhĩpêx to kaxyw mẽ hã kãm karõ

² Nẽ kêr ka mẽmy wejjê mã anẽ kê mẽ amnhĩ to ãptàr mex nẽ pa.

Nẽ pipãnh nẽ ri pa hkêt nẽ.

Ně mẽ gryk kaxyw htỳx ri hkwỳjê hã hpêr o pikênh kêt nẽ.

Kê mẽ tãm hamaxpêr nẽ tãm amnhĩ nhĩpêx o pa.

Nẽ amnhĩ kaxyw Jejus kôt hamaxpêr tỳx rãhã nẽ.

Nhũm mẽ hkwỳjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nẽ amnhĩ tã tanhmã mẽ ho hkêt nẽ.

E kêr ka ã mẽmy wejjê mã ja hã akarõ anẽ.

Měni wejjaja kot tanhmã amnhĩ nhĩpêx to kaxyw mẽ hã kãm karõ

Wam Korĩt 14.34-35; Wam Ximotre 2.9-15, 3.11; Wam Pêtre 3.1-6

³⁻⁴ Nẽ mẽni wejjê mã anẽ kê mẽ kãm Jejus kĩnh xà tãm ri amnhĩ nhĩpêx o pa.

Jao axpên jakwa kamã nhãm mẽ hixi ho rêr o pa hkêt nẽ.

Nẽ kagòxyhti ho pipãnh o pa hkêt nẽ.

Ně mẽ kãm anẽ kê mẽni xàptàr nywjê jahkre mex o pa. Mẽ kot mẽ mar nẽ mẽ uràk nẽ tãm amnhĩ nhĩpêx kaxyw.

Jao mẽ kãm mẽ mjên nẽ mẽ hkrajê japê
hã mẽ kãm mẽmoj to anhÿr o mẽ kutã
nojarêr rãhã ho pa.

Kêr ka ã mẽni wejê mã akapêr anê.

*Mêni xàptâr nywjaja kot tanhmã amnhĩ
nhĩpêx to kaxyw mẽ hã kãm karõ*

⁵Nẽ mẽni xàptâr nywjê mã anê kê mẽ tãm
hamaxpêr pê tãm amnhĩ nhĩpêx o pa.

Nẽ mẽ òrkwÿ kamã àpênh mex o pa.

Nẽ mẽ mjên kapêr ma nẽ hkôt amnhĩ
nhĩpêx.

E. ã mẽni xàptâr nywjê mã karõ anê. Koja
mẽ ã amnhĩ nhĩpêx anhÿr o pa hãmri nhũm
mẽ piitã mẽ kot amnhĩ nhĩpêx ã mẽ omu nẽ
mẽ harênh o:

—Tĩrtũm kapêrja mex kumrêx. Mẽ kot
hkôt amnhĩ nhĩpêx o mẽ pa xwÿnhjaja na
htem tãm amnhĩ nhĩpêx mex o pa. Anê.

*Mêmy xàptâr nywjaja kot tanhmã amnhĩ
nhĩpêx to kaxyw mẽ hã kãm karõ*

*Wam Ximotre 4.12; Sikũn Ximotre 2.22;
Wam Pêtre 5.5*

⁶Nẽ kêr ka mẽmy xàptâr nywjê mã anê kê
mẽ mẽmoj punuj pê amnhĩ to htÿx o pa. Mẽ
hamaxpêr punuj nẽ mẽ kot tanhmã amnhĩ
tomnuj to pê amnhĩ to htÿx o pa.

⁷Nẽ kêr ka ajaxwÿja tãm amnhĩ nhĩpêx
rãhã ho ri mẽ hkôt apa Xitre. Mẽ kot ja
hã apumunh nẽ akôt amnhĩ nhĩpêx o pa
kaxyw. Nom kêr ka tanhmã mẽ ahkre hto
hkwÿm ri tanhmã amnhĩ nhĩpêx to hkêt nẽ.
Ãm Tĩrtũm ã apijaam o akatãt kôt mẽ kãm
kapêr o mẽ ahkre pê tãm amnhĩ nhĩpêx o ri
apa.

⁸Nẽ kêr ka tãm akapêr rãhã ho ri apa.
Kêr kê mẽ kãm mẽ pahkurê xwÿnhjaja ja
hã ama nẽ amnhĩ kamã hpijaam hãmri nẽ
apê Kris kwÿ hã tanhmã ato kapêr punuj
to hkêt japêr.

*Mẽ kãm mẽ àpênh xwÿnhjaja kot tanhmã
amnhĩ nhĩpêx to kaxyw mẽ hã kãm karõ*

*Epês 6.5-8; Korosê 3.22-25; Wam Xi-
motre 6.1-2; Wam Pêtre 2.18-25*

⁹Nẽ kêr ka mẽ kãm mẽ àpênh o mẽ pa
xwÿnhjê mã anê kê mẽ ò patrãw kãm hprãm
xã hkôt amnhĩ nhĩpêx o pa.

Jao mẽ kapêr ma nẽ hkôt amnhĩ nhĩpêx
mex nẽ.

Nẽ amnhĩ tã tanhmã mẽ kãm kapêr
punuj to hkêt nẽ.

¹⁰Nẽ kê mẽ kêp mẽmoj to àhkĩnh kêt nẽ.

Nẽ tãm mẽ hipêx rãhã nẽ.

Nẽ kãm hkukrêx jamãr mex o pa.

Koja mẽ ã amnhĩ nhĩpêx anhÿr o pa nhũm
mẽ ò patrãw amnhĩ tã mẽ omu nẽ mẽ ÿ hã
hkĩnh nẽ pa. Hãmri nẽ hamaxpêr o:

—Hêxta waa nẽ. Inhmã àpênh xwÿnhhta
na hte inhmã àpênh mex o pa. Na hte
ixkukrêx nẽ ixkrit jamãr mex nẽ ixpê
mẽmoj to àhkĩnh kêt nẽ. Nà mẽ kot Tĩrtũm
kapêr kôt amnhĩ nhĩpêx o mẽ pa xwÿnhjaja
na htem tãm amnhĩ nhĩpêx o pa. Pêr Tĩrtũm
kapêr ãm hãmri na. ãm mex o mex. Anê.

E Xitre kêr ka mẽ kãm mẽ àpênh xwÿnhjê
mã ã mẽ kot amnhĩ nhĩpêx anhÿr ã karõ.

*Tanhmã Jesus kãm mẽ pajapê xàj amnhĩ
nhĩpêx to hã harênh*

Epês 2.8-10; Wam Tesarõn 1.9-10

¹¹Nẽ Tĩrtũm kot mẽmoj to mẽ pakutã
nojarêr rãhã ho pa jakamã na hte mẽ pahte
Kra hkôt amnhĩ xunhwÿr xwÿnhjê ho hkra
pu mẽ nhÿrmã wa kuri pahtür tũm nẽ papa
ho papa. ¹²Na hte ã mẽ pamã kapêr o
amnhĩrit anê nẽ mẽ pamã:

—E kêr ka mẽ apê ixkra hã tãm amnhĩ
nhĩpêx rãhã ho ri apa nẽ axte tanhmã
amnhĩ tomnuj to nẽ tanhmã ajamaxpêr
punuj to hkêt nẽ. Mẽ ate amnhĩ tomnuj
pê amnhĩ to htÿx nẽ ixkapêr kôt pix mã ri
amnhĩ nhĩpêx rãhã nẽ. Anê.

¹³Na pu htem ã amnhĩ nhĩpêx anhÿr o
papa jao pahkĩnh nẽ mẽ papytâr xwÿnh
Jesus Kris jamãr o papa. Koja nhÿrmã mẽ
panhõ Tĩrtũm xihtÿx xwÿnhja akupÿn mẽ
pahwÿr kumê pu mẽ mex o mex ã omu.

¹⁴Na pre Jesus amnhĩ grõnh kôt mẽ
pahwÿr wrÿ nẽ mẽ pahpiitã mẽ pahte
amnhĩ tomnuj pãnhã amnhĩrer kaxyw htyk
o Tĩrtũm mã amnhĩrer pa. Mẽmo kaxyw na
pre ã mẽ panê amnhĩ nhĩpêx anê? Nà mẽ
pahpê hkwÿja na kãm hprãm. Nẽ mẽ pahte
tãm ri Tĩrtũm kapêr kôt amnhĩ nhĩpêx o
papaja na kãm hprãm. Nẽ mẽ pahte urak nẽ
mẽ piitã mẽ kutã panojarêr rãhã ho papaja
na kãm hprãm. Jakamã na pre ã mẽ panê
amnhĩ nhĩpêx anê.

¹⁵E Xitre. Ixte mẽmoj tã amã karõja kêr
ka ho Kris kwÿjê jahkre mex o apa kê mẽ
ama nẽ kapêr kôt amnhĩ nhĩpêx o pa. Nhũm
mêhõ tanhmã amnhĩ tomnuj to ka hã omu

ně Tirtům nhỹ hã tanhmã nê kãm akapěr to kê axte hkêt nê. Tã mãn ka inhma. Kêr ka ã Kris kwỳjê jahkre mex o apa anê.

3

Tanhmã Kris kwỳ kot amnhĩ nhĩpêx to hã mẽ kãm karõ

Rômãn 13.1-10; Epes 2.1-10

¹ Nê kêr ka Kris kôt akwỳjê mã anê kê mẽ ho amnhĩptàr xwỳnhjê kapěr ma nê mẽ hkôt amnhĩ nhĩpêx o pa. Nê mẽmoj to mẽ kutã nojarêt rãhã ho pa.

² Nê mẽ kãm anê kê mẽ tanhmã hkwỳjê mã kapěr punuj to ho pa hkêt nê. Rỳ mẽmoj tã mẽ kãm àkjêr kêt nê. Kê mẽ tãm mẽ hipêx nê mẽ kamã ukapřĩ pê mẽ ho mex rãhã ho pa. Na hte ã Kris kwỳjaja axpẽn nhĩpêx o pa anê. ³ Kormã mẽ pahte hkôt amnhĩ xunhwỳr kêt ri na pu prem ã amnhĩ nhĩpêx anhỹr kêt nê. Na pu prem Tirtům mã pajamaxpěr kêt nê kapěr kôt ri amnhĩ nhĩpêx hkêt nê. Nê amnhĩ tomnuj pix kukamã pajamaxpěr o ri papa. Nê amnhĩ pix kukamã pajamaxpěr. Jao mẽ pamã pam amnhĩ nhĩpêx prãm xà kôt pix mã tanhmã amnhĩ nhĩpêx to ho ri papa. Nê axpẽn tomnuj nê. Nê axpẽn kãm pagryk rãhã ho papa. ã mẽ pahte amnhĩ nhĩpêx anhỹr ho papa jakamã nhũm pre mẽ piitã kãm mẽ pahkĩnh kêt nê. Pu mẽ pajaxwỳja pamã mẽ hkĩnh kêt nê.

Tanhmã Tirtům kot mẽ pahto mex to hã harênh

Rômãn 5.6-8; Epes 2.4-10

⁴ Tã pu prem Tirtům kêp mẽ papytãr xwỳnh ã harênh ma. Kot tanhmã mẽ panê amnhĩ nhĩpêx to hã harênh ma nê mex o mex nê mẽ pakamã ukapřĩ hã harênh ma. ⁵⁻⁶ Hãmri nê amnhĩ kaxyw hkôt pajamaxpěr nê hkôt amnhĩ xunhwỳ nhũm amnhĩ tã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukapřĩ nê ã mẽ papytãr anê. Tã tanhmã na pre mẽ papytãr to wehe? Nã na pre Jejus Kris kukwak ri te kot mẽ pane mẽ pahte amnhĩ tomnuj piitã kuhõnh par pyrãk o mẽ panhĩpêx. Hãmri nê mẽ pahwỳr amnhĩ Karõ rě nhũm mẽ

pahwỳr agjê nê mẽ pamã mẽ pahte amnhĩ nhĩpêx nyw gõ. ã na pre Tirtům Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwỳr amnhĩ Karõ rênh anê. ⁷ Tã mẽmo kaxyw na pre ã mẽ pahto mex anê? Nã kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwỳnh tã kãm mẽ pajapê htỳx nê kãm tanhmã mẽ pahto hprãm kêt nê. Nê mẽ pahwỳr Kra Jejus mẽ nhũm wrỳ nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamaxpěr nê hkôt amnhĩ xunhwỳr xwỳnhjaja Jejus kukwak ri mẽ pahpê Tirtům kraa. ã na pre Jejus mẽ pahto mex anê. Jakamã kot puj mẽ nhỹrmã Tirtům mẽ wa kuri pahťir tũm nê pamex nê papa ho papa. Kojã wa nhỹrmã ã mẽ pahto mex anê.

⁸ ãm hãmri na pa amã ã ja jarênh anê Xitre. Jakamã kwa kêr ka inhma nê inhmar tỳx nê. Nê ho amnhĩ kaxyw Tirtům kôt mẽ hamaxpěr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

⁹ Nê mẽ kot htỳx ri mẽmoj tã axpẽn mã àkjêr o mẽ pa xwỳnhjaja kêr ka mẽ hkôt apa hkêt nê. Nê mẽ hkukamã mẽ higêt kôt apa hkêt nê. Rỳ finat Mojes kot Tirtům nhỹ hã kapěr ã axpẽn mã mẽ àkjêr xwỳnhjê hkôt apa hkêt nê. Na htem ã ri axpẽn mã àkjêr anhỹr o pa nê tãm amnhĩ nhĩpêx kêt nê.

¹⁰ Nê kojã mẽ akwỳjê hõ amnhĩ krã hkôt tanhmã hkwỳjê mã kapěr to nhũm mẽ kuma nê hã axpẽn mã akir nê axpẽn pè pikjêr kaxyw. Ka ja hã omu nê ã kapěr anhỹrja nê kãm akapěr kê axte hkêt nê. Hãmri nhũm ama nê ãm ama nê arĩ ã mẽ kãm kapěr anhỹr japêr ka axte nê kãm akapěr. Tã ra ate nê kãm akapěr o axkrut tã nhũm arĩ ã kapěr anhỹr o axkruněpxi japêr ka ja hã omu hãmri nê mẽ amnhĩ nê hano kê axte mẽ apê Kris kwỳjê hkôt ri pa hkêt nê. ¹¹ ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrĩt.

Pawre kot kagà jatur xà kamã tanhmã Xitre mã kapěr to

¹² Nê kot paj tokyx ma Nĩkop wỳr mō. Kêr pa tokyx hwỳr pōj nê amgrà pê krĩ nhō xwỳnhjê hkôt ixpa. Jakamā kot paj tokyx ma awỳr Atēmti rỳ Xikitre mē. Kê mō nê awỳr pōj ka tokyx tanhmā amnhĩ to hpa nê man ixwỳr mō pu mē Nĩkop kamā axpēn pumu.

¹³ Nê ota mē akuri Apor mē axiwōkat Jēntija. Kojā wa mēmo arĩgro hã ma krĩ hō hwỳr nojarêt ka wa kãm mē apkur xà hkwỳ gō kê wa ma ÿ kamā mōr kêt nê.

¹⁴ Nê kêr ka Kris kwỳjê mǎ anê kê mē arĩ òrkwỳ pix kãm hkrĩ ho hkrĩ hkêt nê. Kê mē tanhmā axpēn to mex to ho axpēn kôt pa. Nhũm mēhō kêp amrakati kê mē tanhmā ho ajuta hto. Mē kãm anê kê mē ã axpēn nhĩpêx anhỳr o pa.

¹⁵ Nê ota jar Kris kôt pahkwỳjê piitǎ awỳr hpēr mē Xitre. Nê kêr ka atar Kris kôt mē pahkràmnhwỳjê mǎ mē ijarê.

E ãm ja pix. Kê Pahihti Jejus mē akutǎ nojarêt rǎhã ho pa. Ixpê Pawre na pa amǎ ã ixkapēr nê hã kagà nê awỳr mēnh anê.

Piremõ Pawre kot Piremõ hwÿr kagà nẽ mẽn

Pawre na pre kagàja nhÿpêx nẽ hkràmnhwÿ Piremõ hwÿr kumẽ. Na pre Piremõja amnhĩm kãm àpênh xwÿnh Onesti japrô. Kàxpore ho haprô nhũm amarĩ kãm àpênh o pa. Tã tanhmã hamaxpêr to nẽ hkaga nẽ ma umaj krĩ hõ hwÿr hprôt nẽ tẽn amũxu nẽ kamã pa ho pa. Hãmri nẽ Pawre pumu nẽ kãm amnhĩ jarẽ. Pawre arĩ kêp prês nẽ hkrĩ ho hkrĩ nhũm Onesti omu nẽ kãm amnhĩ jarẽ. Hãmri nhũm Pawre kãm Jejus jarẽ nhũm kuma nẽ hkôt amnhĩ xãm kurê kumrêx. Hãmri nhũm Pawre ja hã omu nẽ hkràmnhwÿ Piremõ mã kagà nhÿpêx nẽ kamã Onesti xyr pẽ kãm kapêr. Hãmri nẽ hipêx pa nẽ Onesti mã kugõ nẽ ma akupÿm õ patrãw Piremõ wÿr kumẽ nhũm ma mõ. Nhũm Pawre kagàja kamã kãm kapêr nẽ kãm:

¹ Pa ixkràmnhwÿ Piremõ? Xà amex? Ixpê Pawre na pa awÿr kagà nhÿpêx nẽ kumẽ. Apê Kris kôt ixtõ hã inhmã akĩnh. Na ka hte ixpyrà nẽ Kris mã tanhmã amnhĩ nhÿpêx to ho apa. Ta ot pa awÿr kagàja kamã ixpêr mẽ. ² Amã nẽ anhõrkwÿ kamã Tirtũm kapêr mar kaxyw mẽ kêp Jejus kwÿ hã mẽ pikuprõnh xwÿnhjê hwÿr. Nẽ Kris kôt pahtõx Apti mẽ Akip wa hwÿr kumẽ. Akipja na hte mẽ pahpyrà nẽ Pahihti Jejus mã tanhmã amnhĩ nhÿpêx to ho pa.

³ Na pa hte mẽ ato Mẽpanhĩpêêxà maati Tirtũm mẽ Pahihti Jejus Kris wa hwÿr rãhã ho ri ixpa. Kot mẽmoj to mẽ akutã nojarêt rãhã nhũm wa ÿ hã mẽ ajamakêtkati nẽ axãmnhĩx apa ho apa kaxyw.

Pawre kot Piremõ nhÿ hã hkĩnh ã harênh

⁴⁻⁵ Na pa pre ajarênh ma Piremõ. Na htem xatã tanhmã inhmã ajarênh to nẽ ajarênh o:

—Hêxta waa nẽ. Piremõ na hte amnhĩ kaxyw Pahihti Jejus Kris kôt hamaxpêr tÿx nẽ kãm mẽ ixpê Kris kôt hkwyjê piitã hkĩnh pẽ tanhmã mẽ ixto mex to ho ri mẽ ixkôt pa.

Anhÿr o inhmã ajarê pa mẽ kuma nẽ anhÿ hã ixkĩnh nẽ ato Tirtũm wÿr rãhã ho ixpa nẽ ato hwÿr o:

—Pa Tirtũm. Na xep hte Piremõ kãm akĩnh tÿx nẽ akwyjê ho mex rãhã ho pa. ãm hãmri na hte ã mẽ hipêx anhÿr o pa. ⁶ Na xep mẽ piitã mẽ kãm tanhmã Jejus kot mẽ inhnê amnhĩ nhÿpêx to hã harênh o ri mẽ hkôt pa. Jakamã kêr ka tanhmã mẽ kot mar xwÿnhjê hkrã hto kê mêmprĩ hã mar tÿx nẽ Kris kot tanhmã mẽ ho mex to hã amnhĩ tã omu.

Anhÿr o ato kuwÿ. ⁷ Ate Kris kwÿjê ho mex o apa jakamã te ate pa ixto mex pyràk Piremõ. Na htem anhÿ hã hkĩnh nẽ pa. Pa ijaxwÿja ajarênh ma nẽ anhÿ hã ixkĩnh tÿx nẽ jar mẽ hagjênh xà kamã ixkrĩ.

*Piremõ kot Onesti kamã ukapri hã
Pawre kot kãm karõ
Rõmãn 15.7; Epes 4.31*

⁸ Nã ixte amã mẽmoj jarênhja tanhmã kute hkêt. Kot paj ãm amã mẽmoj jarê nẽ hã awÿ. Nom kot paj Kris nhÿ hã amã tanhmã hã karõ hto hkêt nẽ. ⁹ Kot paj ãm pahte xpên to pahkràmnhwÿ hã hã awÿ. Ra ixwej tÿx nẽ Kris ã arĩ mẽ hagjênh xà kamã ixkrĩ htã mẽmoj tã awÿ ka inhma nẽ inhmã ho anhÿr japêr ko.

¹⁰ E amã àpênh xwÿnh Onestija na ixte amã harênh kaxyw. Na pre man ixwÿr mõ. Ixpê prês nẽ ixkrĩ nhũm ixwÿr mõ. Pa omu nẽ kãm Jejus jarẽ nhũm inhma nẽ pahpyrà nẽ amnhĩ kaxyw hkôt hamaxpêr nẽ hkôt amnhĩ xãm. Jakamã te kêp ixkra pyràk. Hãmri nẽ ixto ajuta mex o pa. ¹¹ Xep kormã Jejus kôt amnhĩ xãm kêt ri na pre amã àpênh mex kêt nẽ. Nẽ kãm kaga nẽ htÿx ri tanhmã àpênh to ho pa. Tã ra Jejus kôt amnhĩ xãm hãmri nẽ katat kôt inhmã àpênh mex o pa. Nẽ ixto ajuta mex nẽ. Koja akupÿm amã apê hãmri nẽ amã àpênh mex nẽ.

¹² Jakamã ot pa akupÿm awÿr kumẽ ixkràmnhwÿ. Nom inhmã hapê jakamã koja ma akupÿm mõ pa ho ama nẽ. Tã kot paj akupÿm awÿr kumẽ. ¹³ Kot jar ixri arĩk nẽ apãnhã tanhmã ixto ajuta hto ho paja na inhmã hprãm. ¹⁴ Jakamã kot kaj amã akupÿn ixwÿr mẽn prãm nẽ mãmrĩ ixwÿr amẽ. Nom ixte ja pumunh kêt. Kam nẽ amã hprãm xà hkôt tanhmã kãm akapêr to.

Kãm anê kê akuri arĩk nê amã àpênh o pa rỳ akupỹn ixwỳr amê. ¹⁵ Nom konên. Mãn akupỹm awỳr mõi nê kêp Kris kôt akwỳ hã amã àpênh mex kaxyw na pre Tĩrtũm ixwỳr kumê nhũm ixwỳr mõi nê ixri Jejus kôt amnhĩ xãm nê ixri pa hã mytwrỳ hkwỳ hapêx pa akupỹm awỳr kumê. ¹⁶ Nom ra kêp amã àpênh xwỳnh pix kêt mããnên kêp Kris kôt atõõ. Jakamã kot kaj wa atar axpên kôt Pahihti Jejus kôt tãm amnhĩ nhĩpêx o ri apa. Nom mããnên kêp ixkràmnhwỳ mex ã inhmã hapêê. ¹⁷ Jakamã kot kaj ixpê Kris kôt akràmnhwỳ hã ijarê hã kot kaj mããnên inhmã ho mex o apa.

¹⁸ Nê wam amã àpênh o pata ã mãn pre apê mẽmoj to ahkĩ rỳ akàxpore hkwỳ ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre. ¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagà anê. Nom ajaxwỳja na ka tanhmã ixto tewên to Piremõ. Na pa pre amã Jejus kot mẽ panê htyk ã harê ka pre inhmar xà hkôt hkôt amnhĩ xãm. Jao ixpyrà nê atĩr tũm nê apa ho apa mã xwỳnhta pãnhã te ate ixto tewên pyrãk.

²⁰ E kwa ixkràmnhwỳ. Ixpyrà nê apê Kris kwỳ jakamã kêr ka ixkamã axukapĩ hã inhmã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr. ²¹ Nà ra ixte apumunh mex kênã. Kot kaj ixte hã awỳrta kôt hipêx. Ja kaxyw na pa amã kagàja nhĩpêx nê awỳr kumê. Nom kot kaj ãm ja pix ho anhỳr kêt nê. Kot kaj ixte hã awỳrja kôt amnhĩ krã hkôt tanhmã ho mex to. Nà kot kaj ho anê.

Pawre kãm Piremõ hwỳr mõi nê omunh prãm ã harênh

²² Nê Tĩrtũm kot mẽ awỳr inhmênh kaxyw mẽ ate ixto hwỳr o apa jakamã koja apu tokyx ma mẽ awỳr inhmê. Jakamã kwa kêr ka ixkutêp tanhmã mẽmoj to mex to. Kêr pa mẽmo arĩgro hã mõi awỳr põi ka ra ixkutêp tanhmã amnhĩ to hpa nê ãm ixpix kãm ajamak o apa.

²³ Nê ota Epasja awỳr hpêr mẽ. Na hte ixpyrà nê Jejus Kris ã mẽ hagjênh xà kamã kêp prês nê hkrĩ ho hkrĩ. ²⁴ Nê Makre nê Aristak nê Tẽmti nê Rukre mẽ awỳr hpêr

mê. Na htem ixpyrà nê Kris mã tanhmã amnhĩ nhĩpêx to ho pa nom ixrom mẽ kêp prês kêt.

²⁵ E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kagà nê awỳr kumê.

Eprêw Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanâr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhõrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

¹ Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepêm Tirtũm na pre mẽ panhĩgêjtê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrīt o mẽ hkôt pa. Nhũm Tirtũm xatã mẽ hkanrēhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm hkwÿ pix jarê. Tã nhũm hpãnhã mẽ hkwÿjaja wamtajê mÿr pê mẽ hwÿr mra nê axte mẽ kãm hkwÿ jarênh o ri pa. Jao ra mẽ kãm harênh jatur xàm mēnh o mō. ²⁻³ Tã nhũm Tirtũm Kraja mẽ pahwÿr wrÿ nê mẽ pamã kapêr jarênh jatur xàm

kumê. Kêp Tirtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânēn tipxi. Jakamã mẽ pahte pano ho Tirtũm pumunh kêt tã Jejus pumunh pê te mẽ pahte Tirtũm pumunh pyrãk. Uràk nê kot amnhĩ to rax o mẽ pahpiitã mẽ pa-jakrenh par. Amnepêm kormã mẽmoj kêt ri nhũm Jejus Tirtũm kukwak ri mẽmoj piitã ho kator pa. Tã koja Tirtũm nhÿrmã kãm mẽmoj piitã òr pa. Kaxkwa kamã mẽmoj piitã nê jar pika piitã hkôt nhũm kãm piitã òr pa.

Nê Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupÿm htĩr hãmri nê ma akupÿm kaxkwa hwÿr api. Tirtũm xihtÿx o hihtÿx xwÿnhja wÿr akupÿm api. Nê ò krĩ kamã upòk rũm pahi maati hkrĩ xà hã kuri hkrĩ ho hkrĩ. Nê ìhkò hã mẽ pahto amnhĩptàr rãhã ho hkrĩ.

Jejus mẽ Tirtũm kapêr o mẽ wrÿk xwÿnhjê jarênh

⁴⁻⁵ Nê Jejus kot amnhĩ to rax o Tirtũm kapêr o mẽ wrÿk xwÿnhjê jakrenh jakamã na pre ã Tirtũm kãm kapêr anê nê kãm:

Na ka amnhĩ to rax o mẽ kot ixkapêr o mẽ wrÿk xwÿnhjê jakre.

Mê kot inhmã tanhmã amnhĩ nhĩpêx to ho mẽ pa xwÿnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nê apê pika nhõ xwÿnhjê hwÿr ixte amēnh mã xwÿnh na ka. Nà apê Ixkra kumrêx.

Kot paj jarãhã ixpê anhĩpêêxã hã mẽ piitã mẽ kãm amnhĩ to amnhĩrīt. Pa na ixpê anhĩpêêxã.

Anhÿr o Kra Jejus mã kapêr. Na pre kapêr o mẽ wrÿk xwÿnhjê mã ã kapêr anhÿr kêt nê. Jejus mã pix mã ã kapêr anê.

⁶ Nê koja nhÿrmã akupÿn mẽ pahwÿr Kra mēnh kaxyw hãmri nê kapêr o mẽ wrÿk xwÿnhjê mã kãm:

E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã aròròk nê kãm mex o mex ã harê.

Anhÿr o mẽ kãm kapêr. ⁷ Nê kapêr o mẽ wryk xwÿnhjê na pre axtem tanhmã mẽ harênh to nê mẽ harênh o:

Ixkapêr o mẽ wryk xwÿnhjaja na pa hte nhÿhÿm mẽ kurê nhÿm htem inhmar xà hkôt ma nhÿhÿm mra nê inhmã tanhmã amnhĩ nhĩpêx to.

Te ixte ma nhÿhÿm kôk nê kuwyja mênh nhÿm ixkapêr kôt nhÿhÿm môrja pyrâk.

Anhÿr o mẽ harê. ⁸ No ã Krata jarênh anhÿr kêt nê. Na pre tanhmã kãm kapêr to nê amnhĩ pyrã nê kêp Tirtÿm ã harê nê kãm: Pa Tirtÿm? E ka kot kaj mẽ ho amnhĩptâr rãhã ho akrĩ. Nê akatãt kôt mẽ ho amnhĩptã.

⁹ Koja mẽ tãm amnhĩ nhĩpêx ka ja hã mẽ omu nhÿm ja amã mex nê.

No koja mẽ tanhmã amnhĩ tomnuj to ka ja hã mẽ omu nhÿm ja apê omnuj nê. Mẽ kot tanhmã amnhĩ tomnuj to ho paja na omnuj tÿx.

Tã ate inhmã hprãm xà hkôt amnhĩ nhĩpêx jakamã na pa mẽ kaxyw axãm ka akĩnh kãm mẽ ho amnhĩptã.

Ixpê anhõ Tirtÿm na pa ã amã ixkapêr anê. Anê.

¹⁰ Hãmri nê kãm:

Pa Pahihti. Nã amnepêm kormã mẽmoj kêt ri na ka pre ixkukwak ri pika nê kaxkwa ho akato. ãm hãmri na ka pre ã amnhĩ nhĩpêx anê.

¹¹ Tã nom koja nhÿrmã hamê wa hapêx pa. ãm kaxipix kot kaj kurom arĩ arãhãã nê aa ajapêx kêt nê.

Kaxkwa nê pika koja wa nhÿrmã te ixkre hã pô htÿm kot amnhĩ nhĩpêx pyrâk.

¹² Kot kaj wa hipêx o te mẽ kot ixkre nê pô htÿm mã hikranh par nê hpãnhã hã nyw janhôr pyrâk.

Jao pika nê kaxkwa htÿm o ajapêx pa nê hpãnhã nyw nhĩpêx. Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tÿmta pyrã nê aa awej nê axirerek kêt nê.

Kot kaj arĩ anyw nê axihtÿx rãhã apa ho apa nê aa ajapêx kêt nê. Arãhã atĩr tÿm nê apa ho apa xwÿnh na ka.

¹³ E jar inhĩhkô hã nhÿ nê inhmã mẽ ho amnhĩptâr o akrĩ.

Kot paj mẽ kãm akurê xwÿnhjê pynênh pa nê man awÿr mẽ o mra nê anhĩhkram mẽ haxãr pa. Anê.

ã na pre Tirtÿmja Kra Jejus mã kapêr anê. No kapêr o mẽ wryk xwÿnhjê mã ã kapêr anhÿr kêt nê.

¹⁴ E kot paj hpãnhã ixprĩ hã mẽ amã Tirtÿm kapêr o mẽ wryk xwÿnhjê jarê ka mẽ inhma. Tirtÿm mã na htem tanhmã amnhĩ nhĩpêx to ho pa. Na hte nhÿrmã kuri mẽ htĩr tÿm nê mẽ pa mã xwÿnhjê hwÿr mẽ kurê nhÿm mẽ ma mẽ hwÿr wry nê tanhmã mẽ ho ajuta hto ho pa. Na htem ã amnhĩ nhĩpêx anhÿr o pa.

2

Mẽ pahte Jejus kaga hkêt ã mẽ pamã karõ

¹ Tã ã Tirtÿmja Kra kot amnhĩ to rax o kapêr o mẽ wryk xwÿnhjê jakrenh ã harênh kot anhÿr jakamã kwa kêt pu mẽ kapêr mar tÿx rãhã nê hkôt pix mã amnhĩ nhĩpêx o papa. Kot pu mẽ ho anhÿr kêt hãmri nê gaa nê hkaga. ² Na pre Tirtÿm kapêr o mẽ wryk xwÿnhjaja amnepê mã mẽ panhĩgêtjê hwÿr wry nê Tirtÿm nhÿ hã mẽ kot tanhmã amnhĩ nhĩpêx to ho pa hã mẽ kãm karõ nê ma akupÿm api. Nê katãt kôt ri mẽ kãm Tirtÿm kapêr jarênh o pa. Hãmri nhÿm mẽ kot hkôt amnhĩ nhĩpêx nê mar mex xwÿnhjaja nhÿm mẽmoj mẽ kãm mex nê. No nhÿm mẽ kot mar nê ãm mar xwÿnhjaja koja mẽmoj mẽ kêp omnuj nê. ³ Koja nhÿrmã mẽmoj mẽ kêp omnuj tÿx kumrêx nhÿm mẽ tee ri amnhĩ tã omu nê tee ri kêp amnhĩptâr prãm kaprÿ nê mex kêt nê pa. Nom mẽ kot Tirtÿm kapêr mar tÿx xwÿnhjaja koja mẽmoj mẽ kãm mex o mex. Koja Tirtÿm amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nhÿm mẽ kuri htĩr tÿm nê mex rãhã nê pa ho pa. Na pre Pahihti Jejus mẽ kot kapêr mar o kuhê xwÿnhjê kumrêx mã ã ja jarênh anê nê mẽ kãm:

—Nã kot kaj mẽ amnhĩ kaxyw inhmã ajamaxpêr nhÿm Tirtÿm ixtã mẽ apumu nê mẽ anê mẽ ate amnhĩ tomnuj piitã ho hapêx pa nê axte kãm hamaxpêr kêt nê. Anê.

Hãmri nhÿm mẽ kot kapêr mar nê hkôt mẽ pa ho mẽ pa nê xwÿnhjaja mar tÿx nê

amnhĩ xô ri mẽ pamã harênh o ri pa. Nê mẽ pamã:

—Nà ãm hãmri. Nà ã ja jarênh kot anhÿr. Anê.

⁴ Hãmri nê mẽ pamã aa mẽ pahte mẽmoj pumunh kêt kwÿ ho anhÿr o ri mẽ pahkôt pa. Tirtũm Karô kot ja kaxyw mẽ ho mẽ àhpumunh tÿx jakamã nhũm mẽ ÿ hã ahpÿnhã tanhmã mẽ pamã amnhĩ nhĩpêx to ho pa. Mẽ pahte ja hã mẽ omunh nê kamã pano puma kaxyw. Nê ã mẽ pajamaxpêr anê nê pajamaxpêr o:

—Nà ãm hãmri na mẽ pamã ã Jejus jarênh anê nê ÿ hã ã amnhĩ nhĩpêx anhÿr o pa.

Anhÿr o pajamaxpêr kaxyw na prem ã mẽ pahkôt amnhĩ nhĩpêx anhÿr o pa.

Mẽ pahpê Jejus tō nê htōx ã mẽ pajarênh Juãw 1.14; Rômãn 8.3-4; Piripos 2.5-11; Korosê 2.9; Wam Juãw 4.2

⁵ Nê na pre Tirtũm amnhĩ kukamã tanhmã amnhĩ jarênh to nê nhÿrmã kot akupÿm mẽmoj piitã ho nyw nê tãm mẽmoj piitã ho amnhĩptar o pa hã amnhĩ jarê. No na pre kapêr o mẽ wrÿk xwÿnhjê mã ã mẽ kot amnhĩ nhĩpêx anhÿr ã mẽ kãm karô hkêt nê. Kojã jajaja mẽ pahto amnhĩptar o pa hkêt nê. ⁶ Tirtũm kapêr ã kagã htũm kot ja jarênh kot:

Kwa Tirtũm. Nà ãm hãmri na ka hte pika ja kamã ri mẽ ixpa xwÿnhjê jamãr mex rãhã ho apa.

Akĩnhã amarĩ ri mẽ ixpa xwÿnh tã amã mẽ ijapêê.

Nê mẽ ixkutã anojarêr rãhã ho apa.

⁷ Na ka hte tanhmã mẽ inhĩpêx to pa mẽ te mẽ ixpê akapêr o mẽ wrÿk xwÿnhjê pyrãk.

Jao mẽ urãk nê akukwak ri mẽ inhmex nê ixpa ho ixpa.

Mẽ urãn mẽ ixàhpumunh nê ixihitÿx kêt tã mẽ inhmex nê ixpa.

⁸ Na ka pre ra ate mẽmoj to akator xwÿnh piitã mẽ inhĩhkram haxã.

Nà ãm hãmri na ka pre ã mẽ inhĩpêx anê Tirtũm. Amex o amex. Anê.

Na pre ra mẽmoj piitã mẽ panhĩhkram haxã. Pika nê kaxkwa nê kapêr o mẽ wrÿk xwÿnhjaja nê mẽkarõmnuti nê kot mẽmoj piitã hipêxja nhũm mẽ panhĩhkram haxãr pa. Mẽ pahte ìhkô hã ho amnhĩptar o

papa kaxyw. No na pu mẽ kormã piitã ho amnhĩptar kêt nê. ⁹ No kêt Jejusja na Tirtũm mẽ pakurom ìhkram mẽmoj piitã haxãr par kumrêx. Kormã pika ja kamã ri pare ri na pre tanhmã amnhĩ nhĩpêx to nê Tirtũm kapêr o mẽ wrÿk xwÿnhjê hkĩnhã te amnhĩ to grire pyrã nê amnhĩ xà htÿx kamã hamak kãm ty. Tirtũm kãm mẽ pahto mex prãm xaj ã mẽ pahpiitã mẽ panê htyk anê. Tã nhũm Tirtũm akupÿm ho htir nê akupÿm amnhĩ wÿr ho api nê kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anê nhũm Tirtũm ja hã omu nê kukwak ri mẽ pahto mex nê.

¹⁰ Nê Tirtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhÿrmã man amnhĩ wÿr mẽ ho api kê mẽ ixri mex rãhã nê pa ho pa. Nà kot paj ã mẽ hipêx anê. Nê Ixkra Jejus koja kêp mẽ õ Pahihti. Kojã mẽ urãk nê mẽmoj punuj pumunh o pa hãmri nê à htÿx kamã hamak o kêp mẽ õ Pahihti mã tãm. Anê.

¹¹ Na hte Jejus mẽ panê mẽ pahte amnhĩ tomnuj rê nê hpãnhã mẽ pamã mẽ pahte amnhĩ nhĩpêx nyw jagjê nhũm Tirtũm ja hã mẽ pahpumunh kôt mẽ pahto hkra. Kêp Jejus Nhĩpêxã nê kêp Mẽpanhĩpêxã maati jakamã nhũm Jejusja mẽ pahpê htō nê mẽ pahpê htōx ã mẽ pajarê nê mẽ panhÿ hã hkĩnh nê.

¹² Tirtũm kapêr ã kagã htũm ã mẽ pajarênh kot anhÿr. Kamã Jejusja Mẽpanhĩpêxã maati mã mẽ pajarênh kot: Kojã ixtō nê ixtōxjaja akapêr mar kaxyw axpên wÿr akuprō pa ma mẽ hkôt mra nê mẽ kãm akapêr jarê nê mẽ ìhkô hã amex ã gre. Anê.

¹³ Hãmri nê kãm:

Kot paj amnhĩ kaxyw akôt pix mã ija-maxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mẽ kêp ixtō nê ixtōx kaxyw inhmã mẽ agô.

Kojã mẽ ixpyrã nê amnhĩ kaxyw amã hamaxpêr rãhã ho pa Tirtũm. Anê.

¹⁴ Nê mẽ pahpê pika nhõ xwÿnhjaja na pu htem ãm ri panhĩ pix ã papa. Nê panhĩ kamã pahkamrô hã ri papa. Jakamã na pre

Jejus kot mē panê htyk kaxyw mē pahwÿr wrÿ nē mē pahpyrà nē ĩ ho mē pakamã kato. Tã mēmo kaxyw na pre ĩ ho ĩ nē mē pahkôt pa? Nã ĩ ho htyk o Satanasti pē hihtÿx xà ho hapêx par kaxyw na pre ã amnhĩ nhĩpêx anê. Satanasti kēp mē kot amnhĩ tomnuj xwÿnhjê hpãm nē kēp mē htyk xwÿnhjê hpãm. ¹⁵ Jakamã na hte kot mē pahtã ĩhkra pikamÿr pyrãk o mē panhĩpêx pu mē ŷ hã pamã pahtyk pyma nē ri papa. Tã ra Jejus kot mē pahwÿr wrÿk nē te kēp mē papytãr pyrãk o mē panhĩpêx jakamã pu mē tee ri pahtyk kukamã pajamaxpêr o ri pamã ma ho papa hkêt nē.

¹⁶ Nē Tĩrtũm kapêr o mē wrÿk xwÿnhjê ho mex kaxyw na pre Jejus pika hwÿr wrÿk kêt nē. Mē panhĩgêt finat Apraãw pyrã nē mē panhĩ ho panhĩ xwÿnhjê ho mex kaxyw na pre wrÿ. ¹⁷ Ijaew nhõ patrejaja na pre htem mē kot amnhĩ tomnuj mÿrapê mē hpãnhã Tĩrtũm mã mry hkwy pa nē hkamrô kapĩ nē mē ho Tĩrtũm wÿ. Kot hã mē omunh nē mē mex ã mē harênh kaxyw. Tã nhũm Jejus wrÿ nē mēmo mryta pyrã nē ã mē panê hkamrô pikapĩr anê. Kaxyw na pre mē pahtõ maatija mē pahwÿr ĩ ho ĩ nē wrÿ nē mē pahpyrà nē ni nhõhy rũm kato. Jao kēp mē pahto Tĩrtũm wÿr xwÿnh maati. Na pre Tĩrtũm kãm hprãm xà hkôt mē panê mē pahte amnhĩ tomnuj pãnhã amnhĩrer pa. Tã kot mē pahpyrà nē mēmoj punuj pumunh nē amnhĩ xà htÿx kamã hamak o pa jakamã kēp mē pakamã ukapĩr xwÿnh ã pixi mex na. ¹⁸ Kormã htyk kêt ri na pre mē pahpyrà nē omnuj nē ri pa. Nhũm mēkarõmnuti nhõ pahi kot tanhmã amnhĩ tomnuj to hprãm xàj tee ri hkôt kãm ahkrox o pa hkaprÿ nhũm hkôt amnhĩ nhĩpêx kêt nē amnhĩ nē ho axtem nē. Jakamã koja Satanastija urãk nē tanhmã mē panhĩpêx to nhũm Jejus mē pahtã omu nē amnhĩ pyrã nē tanhmã kēp mē panhĩpêx to pu mē ŷ hã kutã amnhĩ to htÿx nē papa.

3

Jejus kot amnhĩ to rax o Mojes jakrenh ã harênh

Juãw 1.17-18

¹ E ixkrãmnhwÿjaja. Ra Tĩrtũm kot mē pahte kapêr mar nē tãm amnhĩ nhĩpêx

o ri papa kaxyw mē pahto hkra jakamã kwa kêr ka mē Jejus kot tanhmã mē pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mē pahwÿr kumê nhũm mē pahwÿr wrÿ nē Tĩrtũm kapêr o mē pajahkre ho ri mē pahkôt pa. Nē te kēp mē panhõ patre pyrã nē mē pahto Tĩrtũm wÿr o pa. ² Na pre Tĩrtũm finat Mojes kwÿ kaxyw Mojesja xãm nhũm kãm hprãm xà hkôt tanhmã mē hipêx to ho pa. Tã nhũm hpãnhã mē pakaxyw Kra Jejusja xãm nhũm Mojes pyrã nē Tĩrtũm kãm hprãm xà hkôt pix mã tanhmã mē panhĩpêx to ho pa. Hamê na pre wa Tĩrtũm jamaxpêr xà hkôt tanhmã kãm mē panhĩpêx to ho pa.

³ Koja mēhõ amnhĩm ixkre mex nhĩpêx nē hipêx pa nhũm hkwyjaja hwÿr mra nē omu nē mex kumrêx ã harê. Nom kot hipêx xwÿnhãtã ãhpumunh xà hkôt hipêx jakamã tãm na mex o kot ixkreta jakrenh. Ja pyrã nē finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kēp ixkre nhĩpêxta pyrãk no Jejus te kēp ixkre nhĩpêx xwÿnhãtã pyrãk jakamã kot amnhĩ to rax o kot Mojes jakrenh.

⁴ Nē mē kot ahpÿnhã amnhĩ krã hkôt tanhmã ixkre nhĩpêx to jakamã kot hipêx xwÿnhãtã na mex o ixkreja jakrenh. Tã ja pyrã nē Tĩrtũm kot mēmoj piitã ho kator jakamã kot amnhĩ to rax o kot mēmoj piitã ho kator xwÿnh jakrenh par.

⁵ Nē finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nē ma kãm hkwyjê piitã hkôt mē kãm kapêr jarênh o ri pa. Tĩrtũm tanhmã kot mē kãm kapêr tota kukamã nhũm mē kãm harênh o mē hkôt pa. No ãm Tĩrtũm mã tanhmã amnhĩ nhĩpêx to ho hpa xwÿnh pix na pre.

⁶ Nē Kris haxwÿja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kēp Tĩrtũm Kra kumrêx jakamã kurom kēp mē panhõ Pahihti kumrêx. Tã kwa kêr pu mē kãm hprãm xà hkôt pix mã tanhmã kãm amnhĩ nhĩpêx to ho ri papa. Mē kot hã tanhmã mē panhĩpêx to htã pu mē ŷ hã mē kutã amnhĩ to htÿx nē papa nē pajamaxpêr o:

—Nã ixpunuj nē ixpa htã kot paj ixpunuj rãhã ixpa ho ixpa hkêt nē. Koja nhÿrmã

Tirtûm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tỳx kumrêx.

Anhÿr o amnhĩ kukamã pajamaxpêr o papa.

Mê pahte Tirtûm kaga hkêt ã mê pamã karõ

Wam Korõt 10.1-11; Jutre 5

⁷⁻⁸ Amnepêm na pre mēhōja tanhmã Tirtûm Karõ nhÿ hã kapêr to nê kapêr o:

E kêr ka mê Tirtûm kapêr mar tỳx o apa.

No ama nê ãm ama nê ri hã apa hkêt nê. Rÿ kapêr pê akrã hihtỳx o apa hkêt nê.

Mê akukamã mê anhīgêtjaja na prem ã amnhĩ nhĩpêx anê nê Tirtûm kapêr pê hkrã hihtỳx o pa. Kapôt ã Mojes kôt mê pata ã na prem kãm Tirtûm kapêr mar prãm kêt nê. Nê tee ri amnhĩ kukamã hamaxpêr nê akupÿm Ejit wÿr hkrã nê axpên mã: “Kwa na pu mê ra pahpunuj tỳx nê papa nhũm Tirtûm ãm ja hã mê pahpumu nê tanhmã mê pahto mex to hkêt nê. Mãn ra mê pahkaga nà? E kwa pu mê awjanã nê ma akupÿm Ejit wÿr mãn papa.” Anê.

⁹⁻¹⁰ Na prem ã axpên mã kapêr anhÿr o ri pa hã amgrã pê 40.

Tirtûm xatã kot tanhmã mê ho mex to nhũm mê kot amnhĩ tã omunh tã ãm omu nê htỳx ri amnhĩ hkrã hkôt pa.

Nhũm tee ri amnhĩ tã mê omu nê mê kamã gryk nê.

Hãmri nê hamaxpêr o: “Nà pêr mê hamaxpêr kot mê hã hkwy jêt kêt kumrêx. Te mê hamak kre hkêt pyrã nê ixkapêr mar kêt nê.” Anhÿr o hamaxpêr.

¹¹ Hãmri nê mê kãm: “E mê inhma. ã mê ate amnhĩ nhĩpêx anhÿrja mÿrapê kot kaj mê ma ixte mê amã pika mex nhõr mã xwÿnhhta wÿr apa hkêt nê.”

Anhÿr o mê kãm kapêr. Anê.

ã mēhōja Tirtûm Karõ nhÿ hã te Tirtûm tãm kot mê kãm kapêr pyrãk o mê harēnh anê.

¹² Jakamã kwa mê okora ixkrãmnhwÿjaja. Kêr ka mê amnhĩ to mex o apa. Tirtûm kêp Mēpahpãm ã pixi mex tã kot kaj mê tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nê te ate amnhĩ katut kôt ãm pyrãk o hipêx nê hkaga. Kwa mê ã

amnhĩ nhĩpêx anhÿr kêt nê. ¹³ Kêt mê Kris kôt axpên to axihtỳx o ri apa. Nê apkati mê ã axpên nhĩpêx anhÿr rãhã nê. Kot kaj mê anhÿr kêt hãmri nê mê amã Tirtûm kapêr mar prãm kêt ã amnhĩ to amnhĩrît. Jao tanhmã amnhĩ tomnuj to ho ri apa nê atỳx ajamaxpêr o: —Nà ixte ã amnhĩ tomnuj anhÿr tã nhũm Tirtûm ja hã ixpumu nê ãm hã ixpumu.

Anhÿr o ajamaxpêr japêr. Rÿ mê ajamaxpêr o:

—Nà na pa hte ã amnhĩ tomnuj anê nhũm Tirtûm ja hã ixpumu nhũm ja kãm mex nê.

Anhÿr o ajamaxpêr japêr. ¹⁴ Kwa mê ri ã ajamaxpêr anhÿr kêt nê. Amnepê mã mê pahte Kris kôt amnhĩ xunhwÿr nhũm kot mê pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mê arĩ ã amnhĩ nhĩpêx anhÿr tỳx o papa rãhã ty. ¹⁵ Tirtûm kapêr ã kagã htũm kot ja jarēnh kot:

E kêr ka mê Tirtûm kapêr ma nê mar tỳx nê. No ama nê ãm mar nê ri hã apa hkêt nê.

Rÿ mê kot hkaga xwÿnhjê pyrã nê kêp akrã hihtỳx kêt nê. Anê.

¹⁶ Mê panhīgêtjaja na prem Mojes kôt pika pê Ejit rũm kato nê hkĩnh nê ma kapôt ã kormã pika mex wÿr pa. Nom Tirtûm kapêr mar nê hkôt amnhĩ nhĩpêx rãhã hkêt nê. Na prem kuma nê hkôt amnhĩ nhĩpêx o hã apkati grêre htã ra mēmoj nhÿ hã omnuj nê pa hã amnhĩ pumu nê tee ri amnhĩ kukamã hamaxpêr. ¹⁷ Jao xatã kapêr nhĩrôp kuhê nê amnhĩ hkrã hkôt pix mã amnhĩ nhĩpêx o pa ho ra hã amgrã pê 40. Hãmri nhũm tee ri amnhĩ tã mê omu nhũm ja kêp omnuj nê. Jakamã nhũm mê piitã kapôt ã ri pa nê gaa nê pikaprãr pa. ¹⁸ Mê kot kapêr mar kêt jakamã nhũm mê kãm:

—Nà ã mê ate amnhĩ nhĩpêx anhÿr o ri apaja mÿrapê kot kaj mê ixte mê amã mê amex nhõr mã xwÿnhhta wÿr apa hkêt nê. Anê.

¹⁹ Tã mê kot amnhĩ kaxyw Tirtûm kôt hamaxpêr o pa hkêt jakamã na prem pika mexta wÿr hpôx kêt rãhã pikaprãr pa. Nhũm mê hkra nê mê htãmnhwÿjê pixjaja na prem mê mÿr pê hwÿr pøj nê kamã pa.

4

Mē pahte Tirtūm kukwak ri paja-makêtkati nē ri papa hā mē pajarēnh

¹ Mē pahte Tirtūm kukwak ri paja-makêtkati nē ri papa ho papaja Tirtūm kām hprām jakamā kwa kêr pu mē amnhī pumunh mex o papa. Nē wam mē panhīgēt rom Tirtūm kapēr mar tỳx nē hkôt mām kêt ri amnhī nhīpêx mex rāhā nē. Kêr pu mē kurom mē pajamak kām amnhī krit xā hā pika mexta wỳr pōj. ² Mē kot mē pahpyrà nē Tirtūm kapēr mar mex tā na htem amnhī kaxyw hkôt hamaxpēr kêt nē. Te mē kot mar kêt pyrāk. ³ Ām mē kot amnhī kaxyw Kris mā hamaxpēr xwỳnh pixjaja na htem kukwak ri hamakêtkati nē ri pa ho pa. Amnepê mā mēmoj piitā hkêt ri na pre Tirtūm mēmoj piitā ho kator pa hāmri nhūm apkati nhūm axte mēmoj tā àpēnh kêt nē. Ām ò krī kamā arī hamakêtkati nē hkôkôt o hkrī. Tā mē pahte urāk nē pajamakêtkati nē papa ho papaja na kām hprām. No wam ri mē pa xwỳnhjaja mē kot amnhī tomnuj mỳrapê na pre Tirtūm mē kot urà nē hamakêtkati nē paja nē mē hkurê. Kapēr ā kagà htūm kot harēnh kot: Na pre Tirtūm tee ri amnhī tā mē kot hipêx ā mē omu nhūm ja kêp omnuj nē. Hāmri nhūm mē kām: “Nà kot kaj mē ixkukwak ri axàmnhīx ajamakêtkati nē apa hkêt nē.” Anē.

⁴ Nē kot harēnh kot:

Na pre Tirtūm àpēnh ā arīgro kêp 6 hāmri nhūm arīgro pē 7ta ā nhūm axte mēmoj tā àpēnh kêt nē. Na pre arī hkôkôt o nhỹ.

Arīgro pē 7 ā arī hamakêtkati nē hkôkôt o nhỹ. Anē.

⁵ Nē mē kot kapēr mar nē Ām mar xwỳnhjê jarēnh kot:

Kot kaj mē aa ixkukwak ri axàmnhīx nē ajamakêtkati nē apa hkêt nē. Anē.

⁶ Mē panhīgêjtaja kot amnhī kaxyw Tirtūm kôt hamaxpēr kêt jakamā na prem hamakêtkati nē ri pa hkêt nē. Tā mē papajaja na Tirtūm arī kām mē paxàmnhīx nē pajamakêtkati nē papa hprām. ⁷ Amnepēm Ijaew Tirtūm kôt hamaxpēr kêt jakamā na prem kapôt ā pikaprār pa. Hāmri nhūm amgrà xohtô nē hapêx nhūm Tirtūm

mē hkanrêhā mē htàmnhwỳjê hō pē finat Tawija mā kapēr nhūm kuma nē mē pamā tanhmā kapēr tota ā kagà nē hā kagà kot:

Kwa kêr ka ixkapēr ma nē mar tỳx nē.

No mē anhīgêjtjê pyrà nē akrā hihtỳx ho inhma nē Ām inhmar kêt nē. Anē.

Na pa pre ra mē amā ā ja jarēnh anē.

⁸ Na pre finat Jojueja finat Mojes mỳr pē ma pika pē Kanaā hwỳr mē hkanrêhā mē hkrajê o pa nē hwỳr mē o pōj. Tā nhūm prem Jojue kukwak ri hamakêtkati nē pa ho pa hkêt nē. Kêp Ām kukwak ri ā amnhī nhīpêx anhỳr ronhỳx Tirtūm axte mē kām mē hamakêtkati nē mē hamak kām amnhī krit nē mē pata hkukamā harēnh kêt nē.

⁹ Nom mē pahte kukwak ri pajamakêtkati nē pajamak kām amnhī krit nē ri papa ho papaja na Tirtūm arī kām hprām. ¹⁰ Na pre arīgro pē 6ja ā mēmoj piitā ho kator pa nhūm apkati nhūm hamakêtkati nē hkôkôt o nhỹ. Tā kot puj mē pahpê hkrajaja amnhī to kuwỳ nhūm tanhmā mē pahkrā hto pu mē kukwak ri urāk nē paxàmnhīx nē pajamakêtkati nē papa ho papa. Te Tirtūm àpēnh pa nhūm apkati nhūm hamakêtkati nē hkôkôt o ỳrta pyrāk. ¹¹ Jakamā kwa kêr pu mē amnhī to kuwỳ kê ā mē panhīpêx anē pu mē urāk nē ā amnhī nhīpêx anhỳr rāhā ho papa. Nom kot pu mē pahkwỳ Ijaewjê pyrà nē kapēr kwỳm amnhī nhīpêx o papa hāmri nē mē urà nē paxàmnhīx pajamakêtkati nē papa hkêt nē.

Tirtūm kapēr te kot wapo xwa gix pyrāk ā harēnh

¹² Nē Tirtūm kapērja te ĩ ho tanhmā kot mēmoj to kaxyw hihtỳx pyrāk. Nē te wapo xwa gix pyrāk. Kojā mēhō ò wapo xwa mex nē ho mēmoj jakār mex nē. Ho mry hi jakār mex pē kaxwỳnh kām hi kanhīn o amnhīrīt. Ja pyrà nē na hte Tirtūm kapēr mē pajamaxpēr o amnhīrīt nē mex ā harē rỳ omnuj ā harē.

¹³ Nē na htem Tirtūm pē mēmoj to pimxur kêt nē. Na hte hprī hā mēmoj piitā omunh pa. Nē mē pajamaxpēr kôt mē pahpumunh pa. Na pu htem ā kot mēmoj piitā omunh par anhỳr xwỳnhja noo mā tanhmā amnhī nhīpêx to rāhā ho papa.

Jejus kêp mē panhō patre maati hã harēnh

Eprêw 10.19-25; Wam Juãw 2.1-2

¹⁴ Nē Ijaew nhō patrejaja na pre htem Tirtūm mā amnhī jarēnh xà hã ixkre hwÿr agjê nē kamā mē ho Tirtūm wÿr o pa. Ja pyrà nē na pre ra Jejus Tirtūm nhō krī hwÿr api nē kamā mē pahto hwÿr o hkrī. Kêp Kra kumrêx jakamā kêp mē pahto Tirtūm wÿr xwÿnh maati. Jakamā kwa kêr pu mē amnhī kaxyw hkôt pajamexpêr tÿx rãhã ho papa. ¹⁵ Satanasti na pre te kot mē panhīpêx pyrāk o Jejus nhīpêx. Nē tee ri kot tanhmã kãm kapêr to nhūm kot mar nē tanhmã amnhī tomnuj to hprãm xà ãm ri kãm ahkrox kaprÿ nhūm kutã amnhī to htÿx nē hkôt amnhī nhīpêx kêt nē. Tã kot Satanasti kot amnhī nhīpêx ã omunh mex jakamã na hte kêp mē pahtãnopxar mex o pa. Kot mē paxirerek kôt mē pahpumunh mex. ¹⁶ Jakamã kwa kêr pu mē amnhī tã kamã pahpijaãm kêt kãm paxãmnhix ri amnhī to hwÿr o papa. Kêp mē pakutã nojarêt xwÿnh nē kêp mē pakamã ukaprī xwÿnh jakamã kêr pu mē tee ri mēmoj tã amnhī pumu nē amnhī to hwÿr kurê kumrêx. Hãmri nē ÿ hã paxãmnhix nē pajamakêtkati nē ri papa.

5

¹ Nē mē panhō patre maati Jejusja Tirtūm na pre mē pakaxyw ãm. Kêp mē pahkwÿ hã mē pakaxyw ãm nhūm hte mē pahto Tirtūm wÿr o pa. Nē kãm mē pahkĩnh xà nhõr o pa. Kot ja hã mē pahpumunh nē mē pahte kapêr kwÿm tanhmã amnhī nhīpêx to ho papa hã mē pakamã gryk o hapêx tokyx anhÿr kaxyw.

² Mē panhīgêjtaja na pre htem mē õ patre maati hwÿr mra nē kãm tanhmã amnhī tomnuj to hã amnhī jarē nhūm mē kuma nē mē kamã ukaprī nē. Mē urà nē kormã kot Tirtūm kôt amnhī nhīpêx totuj anhÿr jakamã na pre mē kot tanhmã amnhī jarēnh toja ma nē mē kamã ukaprī nē.

³ Hãmri nē mē hpãnhã Tirtūm mã mēmoj gõ nē mããnēn amnhī pãnhã kãm mēmoj gõ. Mē urāk nē kot amnhī tomnuj o paja mÿrapê amnhī pãnhã kãm mēmoj gõ. ⁴ No na pre hte patrejaja amnhī krã hkôt kêp patre maati kaxyw amnhī xunhwÿr kêt nē. Tirtūm kot

mē kaxyw mē unhwÿr jakamã na pre mē kaxyw finat Arãwja xãm nhūm kêp mē õ patre maati hã mē ho Tirtūm wÿr o pa.

⁵ Nē Kris haxwÿja kêp mē panhō pahi maati hã tãm kot amnhī xãm kêt. Tirtūm na pre mē pakaxyw ãm nē tanhmã kãm kapêr to nē kãm:

Nà apê Ixkra na ka.

Kot paj jarãhã ixpê Anhīpêêxã hã mē kãm amnhī jarē. Anê.

⁶ Nē hpãnhã kãm:

Kot kaj Mekijetek pyrà nē apê patre maati hã mē ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhī to Tirtūm wÿr rãhã ho pa. Tõhã hkaprī nē tee ri mēmoj tã amnhī pumu nē amnhī to kuwÿ. Nē tee ri mē kot hpĩrta kukamã hamaxpêr nē mÿr kãm amnhī to kuwÿ. Kop apu Tirtūm kãm mē kot kêp hpĩr prãm kêt ronhÿx pre tanhmã nē mē kãm hkurê xwÿnhjê ho nhūm mē hpĩr kêt nē. Jakamã nhūm pre ã amnhī to hwÿr anê. No ãm Tirtūm kãm prãm xà hkôt kãm amnhī nhīpêx prãm jakamã nhūm kuma no ãm tanhmã nē mē ho hkêt nhūm prem kupi. ⁸ Kêp Tirtūm Kra kumrêx tã amnhī xà htÿx kãm hamak kãm ty. Jao Tirtūm kãm hprãm xà hkôt amnhī nhīpêx ã amnhī pumunh mex nē. ⁹ Na pre amnhī xà htÿx kãm hamak o amnhī mex o amnhī mex ã mē kãm amnhī to amnhirit. Jakamã na hte mē kot kapêr kôt ri amnhī nhīpêx o mē pa xwÿnhjê mã mē kot amnhī nhīpêx nyw jagjê nē nhÿrmã Tirtūm mē wa kuri mē htĩr tũm nē mē pa mã xwÿnhjê hã mē harê.

¹⁰ Jakamã na pre Tirtūm Mekijetek pyrà nē kêp patre maati kaxyw ãm.

Mē pahte Kris kaga nē mē pahkurê

Wam Korīt 3.1-2, 13.11, 14.20; Epes 4.11-16

¹¹ Nē Jejus kêp mē pahto Tirtūm wÿr xwÿnh maati hã harēnhja inhãm ixprī hã mē amã harēnh par prãm tã ka mē kormã inhmar tÿx kêt nē. Pa tee ri ixprī hã mē amã harēnh kaprÿ. Te mē amã mar prãm kêt o amõr pyrāk. ¹² Amnepê mã mē ate Kris kôt amnhī xunhwÿr nē kapêr mar tÿx tã kormã nhãm amnhī xõ ri ho amnhī kwÿjê jahkre ho ri apa hkêt nē. Te mē ate hã ano hkêt pyrāk jakamã na pa hte

arĩ mẽ amã kapêr kot amnhĩrĩt mex xwýnh kwý ho mẽ ajahkre ho pa. No kot amnhĩrĩt mex kêt xwýnh o mẽ ajahkre hkêt nê. Te mẽ hkaràre kot amnhĩ nhĩpêx pyrãk o na ka htem amnhĩ nhĩpêx o apa. Na hte mẽ hkaràre mẽõ mex kur kêt nê. ãm kormã katorxà hkà pix kaô. Ja pyrã nê ãm Tĩrtũm kapêr kot amnhĩrĩt mex xwýnhhta pix na ka mẽ mar tỳx o apa nom kapêr kot amnhĩrĩt mex kêt xwýnhja ka mẽ mar mex kêt nê.

¹³ Nê mẽ hkaràre kormã Tĩrtũm kapêr mar kêt jakamã na htem kormã mẽmoj mex nê mẽmoj punuj pumunh kêt nê. Tã te mẽ ate mẽ kot amnhĩ nhĩpêx pyrãk.

¹⁴ Mẽ kot Tĩrtũm kapêr mar mex xwýnhjaja na htem hprĩ hã kapêr piitã mar tỳx nê. Kot amnhĩrĩt mex xwýnhhta mar tỳx nê mãânên kot amnhĩrĩt mex kêt xwýnhja nhũm mẽhprĩ hã piitã mar tỳx nê. Te ho mẽ àptàr kot mẽõ mex kur o pata pyrãk. Jao ra mẽ àptàr jamaxpêr o hamaxpêr o ri pa nê hamaxpêr o:

—Kot paj tãm amnhĩ nhĩpêx o ri ixpa nhũm ja inhmã mex nê. Nom kot paj axtem tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tĩrtũm mã ja mex nê. Anê.

6

¹⁻² Na pu prem ra Tĩrtũm kapêr kot amnhĩrĩt mex xwýnhhta kwý ma. Tãm na ja: Kris kot mẽ panê tanhmã amnhĩ nhĩpêx to hã harênhja.

Nê mẽ pahte amnhĩ tomnuj kaga hã kot mẽ pamã karôja.

Nê amnhĩ kaxyw Tĩrtũm kôt mẽ pajamaxpêr ã mẽ pamã karôja.

Nê mẽ pahpê Tĩrtũm kra hã amnhĩ to amnhĩrĩt kaxyw mẽ kot mẽ pahkrã kumrãr ã pamã karôja.

Nê mẽ pahte Tĩrtũm mã tanhmã amnhĩ nhĩpêx to ho papa hkukamã mẽ kot mẽ pahkrã hã ãhkra jaxwýr nê mẽ pahto Tĩrtũm wýr ã mẽ pamã karôja.

Nê mẽ pahtyk nê akupým mẽ pahtĩr ã mẽ pajarênhja.

Nê Tĩrtũm kot nhỹrmã mẽ kot amnhĩ xà htỳx kãm hamak tũm xà hwýr mẽ kêp hkra hkêt xwýnhjê janorja.

Mẽmojja piitã pu mẽ ra harênh mar tỳx nê. Prĩ hã kot amnhĩrĩt mex. Tã kwa kêr pu mẽ hpãnhã hijuk ri kot amnhĩrĩt mex kêt xwýnh kwý ma. Jao mẽ pahpê Tĩrtũm kra xàptàr mex nê ri papa. ³ Jakamã kwa kêr pu mẽ kot amnhĩrĩt mex xwýnh kumrêx kwý ma nê hpãnhã hijuk ri kot amnhĩrĩt mex kêt xwýnh kwý ma. Nê axpên mã harênh rãhã ho ri papa. Nã koja Tĩrtũm kãm ja prãm pu mẽ ã amnhĩ nhĩpêx anhỹr rãhã o ri papa.

⁴⁻⁶ Na pre ra mẽ pahkwýjaja Kris kaga nê htỳx ri amnhĩ nhĩpêx o pa. Mẽ kot kapêr mar tỳx tã axtem nê hkaga jakamã koja mẽ axte kapêr mar kêt nê. Ra mẽ kãm mar prãm kêt. Kot puj mẽ tee ri axte mẽ kãm harênh o papa kaprý. Na prem hprĩ hã kuma. Tĩrtũm kãm mẽ ho hkra hprãm ã harênhja nhũm prem hprĩ hã kuma nê kãm mar prãm nê hkôt amnhĩ xunhwý. Hãmri nhũm Tĩrtũm Karô te mẽ panhĩpêx pyrã nê mẽ hkarô mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ý hã tanhmã kãm amnhĩ nhĩpêx to ho pa. Nê kãm Tĩrtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwý pumu nê axpên mã harênh o:

—Nã Krisja ãm hãmri àhpumunh tỳx o àhpumunh tỳx. Koja nhỹrmã akupým mẽ pahwýr wrý nê axte mẽ pamã àhpumunh tỳx o amnhĩrĩt pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tĩrtũm pê Krata pĩ hã nhôr nê hpĩr pyrãk. Nê te mẽ piitã mẽ noo mã tanhmã haprý hto nê tanhmã kãm kapêr punuj to pyrãk. Jakamã kot pu mẽ tee ri akupým tãm mẽ unhwýr prãm kaprý.

⁷ Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwýr prãm xwýnhjaja te mẽ hpur mex nê kamã mẽmoj ô rũnh pyrãk. Nê urãk nê amnhĩ to mex o pa.

⁸ Nom koja mẽ hpur kãm mẽmoj nhĩgrôt mex kêt japêr. Kamã mrônhi nê kahpare nê mẽmoj punuj pix hapôj nhũm mẽ tee ri omu nê hkaga kurê kumrêx. Tã mẽ kot Kris kaga xwýnhjaja te pur punuj kot amnhĩ

nhîpêxta pyrâk nhûm Tîrtûm te kêp pur nhô dôn pyrâk. Jao tee ri amnhî tâ mẽ kot amnhî nhîpêx ã mẽ omu nê mẽ hkaga kurê kumrêx nê ma mẽ kot amnhî xà htỳx kãm hamak tùm xà pê kuwyta wỳr mẽ rênh pa.

⁹ E ixkràmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ urâk kêt. Kris kôt mẽ ate amnhî xunhwỳr xwỳnh mex na ka mẽ. Ra mẽ ate hkôt amnhî xunhwỳr tỳx jakamã te mẽ apê pur mexta pyrâk. ¹⁰ Na ka htem Kris kôt mẽ akwỳjê ho mex o ri apa. Te mẽ amã amnhî tâ ma pyrâk o axpên nhîpêx o ri apa nhûm Tîrtûm ja hã mẽ apumu. Tã koja tanhmã ja hã mẽ ato mex to. Kot tãm mẽ panhîpêx o pa jakamã koja tanhmã mẽ ate axpên nhîpêx mex tota ã tanhmã mẽ ato mex to.

¹¹ Tã kêr ka mẽ arĩ ã axpên nhîpêx anhỳr o ri apa rãhã ty kê nhỹrmã ja hã mẽ ato mex nê. ã mẽ ate amnhî nhîpêx anhỳr o apaja na inhmã hprãm tỳx kumrêx. ¹² Kot kaj mẽ ã amnhî nhîpêx anê hãmri nê amã kaga nê apa hkêt nê. Nê amnhî nhîpêx o te Tîrtûm kra hkwy htyk xwỳnhjaja kormã htĩr ri kot amnhî nhîpêxta pyrâk. Na prem amnhî kaxyw Tîrtûm mã hamaxpêr tỳx rãhã ho pa. Kot mẽ ho mex ã mẽ hã amnhî jarênhja nhûm prem amnhî tâ kamã hamak rãhã ho pa. Tã amnhî tâ kamã hamak o pa ry rax rãhã ty nhûm Tîrtûm ra kot mẽ hã amnhî jarênh xà hkôt mẽ ho mex nê. Tã kêr ka mẽ urâk nê ã amnhî nhîpêx anhỳr o ri apa rãhã ty. ¹³⁻¹⁵ ã na pre finat Apraãwja amnhî nhîpêx anê. Kormã hkra hkêt tâ nhûm Tîrtûm kãm hkra nê kanrêhã htàmnhwỳjê hkukamã tanhmã mẽ harênh to nê kãm:

—Pa Apraãw. E inhma. Kot paj aprô mẽ war ato mex nê. Kot kaj war akra hãmri nê gaa nhûm akanrêhã war atàmnhwỳjaja ohtô rax kumrêx. ãm hãmri na pa ã mẽ hkukamã amã mẽ harênh anê. Kot paj amã amnhî jarênh xà hkôt ã anhîpêx anê. Ixpê mẽ anhîpêx xwỳnh na pa ã amã amnhî jarênh anê. Anê.

Tã ã kãm wa hkra jarênh anhỳr tâ nhûm wa tokyx hkra hkêt nê. Nom tee ri ja hã amnhî pumu nê Tîrtûm kot wa kãm hêx ã hkamnhix kêt nê. ãm hkamnàr rom ã hamaxpêr anê nê hamaxpêr o:

—Nà kot paj wa nhỹrmã ixkra. Tîrtûm tãm kot wa inhmã wa ixkra jarênh kênã. Anê.

Tã nhûm amgrà xohtô rax kumrêx nê hapêx nhûm wa hkra. Nhûm axte amgrà hkwy hapêx nhûm wa hkanrêhã htàmnhwỳ hkwy. Ra Tîrtûm kot mẽ hkukamã Apraãw mã mẽ harênh xà hkôt. Tîrtûmja hihtỳx o hihtỳx nê àhpumunh o àhpumunh jakamã na pre amnhî jarênh xà hkôt ã wa kãm wa hkra nê wa htàmnhwỳjê nhôr anê. Kot ra wa kãm hã amnhî jarênh xà hkôt. No ri nhãm mêhõ nhixi jarênh kôt wa kãm wa hkra jarênh kêt nê. Mêhõ kot we hihtỳx o hihtỳx o Tîrtûm jakre nhûm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhî jarênh o:

—Nà ixàhpumunh xà hkôt na pa ã war amã war akra jarênh anê. Anê.

¹⁶ No pika ja kamã na htem ã amnhî jarênh anhỳr kêt nê. Na htem mêhõ mã tanhmã mẽmoj tâ amnhî jarênh to kaxyw nê mêhõ hihtỳx o kot hakrenh xwỳnh nhixi jarênh kôt amnhî jarê. Nê amnhî jarênh o:

—Nà ixte jahti noo mã ã amã amnhî jarênh anhỳr jakamã ãm hãmri na pa ã amnhî jarênh anê. Anê.

Kot hã amnhî to hêx nhûm hihtỳx o kot hakrenh xwỳnhhta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tâ amnhî jarênh anê. Hãmri nê kot tanhmã hã ho pymaj ra kot amnhî jarênh xà hkôt tanhmã mẽmoj nhîpêx to. ¹⁷ Nom Tîrtûm na hte urâk nê nhãm mêhõ nhixi jarênh kôt ri mẽmoj tâ amnhî jarênh kêt nê. Na hte tãm amnhî jarênh xà hkôt mẽmoj to anê nê aa hã amnhî to hêx kêt nê. Na pre mẽ pahpê hkrajê mã kãm:

—Kot paj nhỹrmã mẽ ato mex rax nê. ãm hãmri na pa mẽ amã amnhî jarê. Ixte amnhî pumunh xà hkôt na pa ã mẽ amã amnhî jarênh anê. Anê.

Mê pahte ãm hãmri kot amnhî jarênhja mar nê amnhî to hêx kêt ã omunh kurê kumrêx kaxyw. Koja Tîrtûm mẽmoj tâ ã amnhî jarênh anê hãmri nê hijuk ri axtem hpãnhã tanhmã amnhî jarênh to hkêt nê. ¹⁸ Jakamã koja nhỹrmã ma amnhî wỳr mẽ

pahto àpir ã amnhĩ jarẽ hãmri nẽ ãm hãmri amnhĩ jarẽ nẽ amnhĩ jarẽnh o:

—Nà ãm hãmri ixte amnhĩ pumunh xà hkôt na pa mẽ amã ja hã amnhĩ jarẽ. Anẽ.

Koja ã amnhĩ jarẽnh anẽ hãmri nẽ hijukri axte hpãnhã tanhmã mẽmoj jarẽnh to hkêt nẽ. Ra kot ã amnhĩ jarẽnh anhÿrja koja arĩ rãhã nẽ. Jakamã e kwa kêr ka mẽ tee ri amnhĩ kukamã ajamaxpêr o ri apa hkêt nẽ. Ra mẽ pamex nẽ ri papa kaxyw Tĩrtũm kôt amnhĩ xunhwÿr jakamã kêr pu mẽ arĩ kot mẽ pahto mex rax xà hã arĩgrota jamãr rãhã ho ri papa.

¹⁹ Na hte kanôre ho htÿx xàja kanôre ho htÿx nhũm ma gô hkôt pa hkêt nẽ. Ja pyrã nẽ kot puj mẽ Tĩrtũm kot mẽ pahto mex xà kamã pajamak o papa hãmri nẽ hkaga hkêt nẽ.

Amnepê mã na pre hte mẽ panhõ patre maati ja Tĩrtũm mã amnhĩ jarẽnh xà hã ixkre hwÿr agjê nẽ hkôt ã kupêxê ho hitom maati hwÿr agjê nẽ kamã mẽ ho Tĩrtũm wÿr o kuhê. Tã nhũm Jejus akupÿm kaxkwa hwÿr api nẽ Tĩrtũm ri hkrĩ hãmri nẽ patre maati pãnhã tãm mẽ pahto hwÿr o hkrĩ. ²⁰ Na pre ra mẽ pakukamã kaxkwa hwÿr api nẽ kamã pa ho pa nẽ finat Mekijetekja pyrã nẽ kêp mẽ panhõ patre maati. Tã koja mẽ pahto Tĩrtũm wÿr rãhã nẽ pa ho pa.

7

Patre Mekijetek jarẽnh

¹⁻³ E kot paj ixprĩ hã mẽ amã tanhmã finat Mekijetekja jarẽnh to ka mẽ inhma. Krĩ pẽ Sarẽ kamã na pre kêp mẽ õ pahi nẽ mãânên kêp mẽõ patre. Sarêja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ krĩ.” Jakamã Mekijetekja mẽ pakapêr kãm kêp: “Mẽ hamakêtkati nẽ ri mẽ pa xwÿnhjê nhõ pahi.” Nẽ mãânên kêp: “Pahi kot tãm amnhĩ nhĩpêx o pa xwÿnh.” Nẽ Mekijetek nhĩpêxà nẽ katorxà nẽ higêt nhĩxija mẽ pahte harênh mar kêt. Nẽ kator ã arĩgro nẽ htyk ã arĩgroja mãânên mẽ pahte harênh mar kêt. Tĩrtũm kapêr ã kagã htũm kot tanhmã ja jarẽnh to hkêt. ãm Jejus pyrã nẽ kêp patre hã mẽ ho Tĩrtũm wÿr rãhã ho pa xwÿnh pix ã kot harênh. ãm ja pix na mẽ pahte harênh mar. Nẽ kot amnhĩ to rax xwÿnh jakamã na pre Apraãw nhÿri omu

nẽ hã hpijaãm kaxyw kãm hikukrêx kwÿ gô. Na pre hkwÿjê mẽ ra mẽ urojê kutã amnhĩ xunhwÿ nẽ pijapu nẽ mẽ kêp mẽ õ pahi ho 4 nẽ mẽ himex. Nẽ mẽ kêp mẽ hikukrêx kwÿptã nẽ hamÿ nẽ ma õ krĩ hwÿr o mõ. Nẽ kormã pry hã mör ri Mekijetek kaxpa nhũm amnhĩ wÿr omu nẽ kãm:

—Pa Apraãw? E kê Tĩrtũm ato mex nẽ ka amex nẽ apa. Anẽ.

Nhũm amnhĩ tã kuma nẽ hkĩnh nẽ. Hãmri nẽ kãm mẽ hikukrêx kwÿptãr xwÿnhhta hkwÿ gô nhũm hamÿ nẽ ma amnhĩm o mõ. ⁴ Na pre Apraãw kot amnhĩ to rax ã omu nẽ kãm mẽmojta kwÿ gô. Kêp mẽ pahpê Ijaew pãr krax jakamã mãânên kot amnhĩ to rax tã Mekijetekja urak nẽ kot amnhĩ to rax ã omu nẽ kãm mẽmota kwÿ gô. ⁵ Finat Mojes kot Ijaew mã Tĩrtũm kapêr jarẽnh xà hkôt kãm kugô. Na pre mẽ kãm:

—Mẽ akwÿ pẽ finat Rewi hkanrêhã htãmnhwÿjaja kêp mẽ anhõ patre jakamã kêr ka mẽ kãm mẽ akukrêx kwÿ nhõr o ri apa. Kot kaj mẽ akrit kêp 10 nẽ kãm ho pixi nẽ agô. Nẽ mẽ akãxpore kêp 10 nẽ kãm hõ gô. Kêr ka mẽ ã mẽ kãm mẽ akukrêx nẽ mẽ akrit kwÿ nhõr o apa anẽ. Nẽ kêr ka mẽ kãm mẽmoj mex pix gô. Mẽ kêp mẽ akwÿ na mẽ. Mẽ apiitã mẽ apê Apraãw kanrêhã htãmnhwÿ jakamã kêr ka mẽ ã mẽ hipêx anhÿr o apa. Anẽ.

⁶ Tã Mekijetekja kêp Rewi hkwÿ hkêt tã nhũm Apraãw amarĩ ã hipêx anẽ nẽ kãm pahi htyk xwÿnhjê kukrêxta kwÿ gô. Jao hikukrêxta kamã mẽmoj kêp 10 nhũm omu nẽ kamã kãm ho hpÿnh nẽ kugô. Na pre ã kãm mẽmoj nhõr anẽ. Hãmri nhũm amnhĩm hamÿ nẽ kãm:

—Nà ãm hãmri koja Tĩrtũm ato mex rax nẽ. Anẽ.

Ra Tĩrtũm kot Apraãw kanrêhã kãm htãmnhwÿ ho ohtô nẽ mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anẽ. ⁷ Mẽ kot amnhĩ to rũnh o mẽ hakrenh xwÿnh pixjaja Tĩrtũm kot mẽ ho mex kaxyw mẽ ho àhwÿr o pa jakamã na pre Apraãw o Tĩrtũm wÿ. Jao kot amnhĩ to rax o kot hakrenh ã amnhĩ to amnhĩrĩt. ⁸ Hãmri nẽ Rewi hkanrêhã htãmnhwÿ kot amnhĩ nhĩpêx pyrã nẽ Apraãw o Tĩrtũm wÿ nẽ kêp mẽmojta jamÿ. Mẽ urak nẽ mẽmoj kamã

kêp 10ja rûm ho hpÿnh nê amnhîm hamÿ. Nom kot amnhî to rax o Rewi hkanrêhã htàmnhwÿjê jakrenh. Tîrtûm kapêr ã kagà htûm kot Rewi hkanrêhã htàmnhwÿjê htyk par ã mē harēnh tã tanhmã Mekijetek htyk ã harēnh to hkêt jakamã kot amnhî to rax o kot Rewi hkwÿjê jakrenh.

9-10 Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwÿ mã xwÿnh. Jakamã nhûm Apraãwja Mekijetek mã mē hikukrêxta kwÿ nhôr jao te Rewi mã ôr pyrãk. Tã nhûm amgrã xohtô nê hapêx nhûm Rewi hkanrêhã htàmnhwÿjaja hapôj nê kêp mē ô patre nê ri pa. Jao Mekijetek pyrã nê mē kêp mē hikukrêx kwÿ jamÿnh o ri pa.

11 Nê finat Mojes na pre Ijaewjê mã tanhmã Rewi hkanrêhã htàmnhwÿjê jarēnh to. Kormã mē hapôx kêt ri nhûm hkwÿjê mã tanhmã mē harēnh to. Mē kêp patre hã mē harē. Tã nhûm mē hapôj nê hprêk nê mē ho Tîrtûm wÿr o ri mē hkôt pa. Nom mē kot tãm amnhî nhîpêx o pa kaxyw na prem tanhmã mē hkrã hto hkêt nê. Tanhmã kot mē amnhî to nê ã mē hipêx anê? Jakamã nhûm Tîrtûm mē hpãnhã mē pahwÿr kÿj rûm mēhõja mē nhûm mē pahwÿr wrÿ. Nom kêp Rewi hkanrêhã htàmnhwÿ hkêt. Nê mãânên kêp Rewi hpãm Arãw kanrêhã htàmnhwÿ hkêt. Axtem te Mekijetek kot amnhî nhîpêx pyrãk xwÿnh na pre. Jejus Krisja. Tãm na pre mē pahwÿr wrÿ hãmri nê tanhmã mē pahkrã hto pu mē ÿ hã tãm amnhî nhîpêx o papa. 12 No Mojes kapêr kot Rewi hkanrêhã htàmnhwÿ pixjaja kêp mē ho Tîrtûm wÿr xwÿnh ã mē harēnh. Tã nhûm Krisja mē pahwÿr wrÿ nê mē hpãnhã kêp mē pahto àhwÿr o pa xwÿnh. Jakamã na pu htem axte Mojes kapêr kôt amnhî nhîpêx kêt nê. Pãnhã Jejus kapêr kôt pix mã amnhî nhîpêx o papa.

13-14 Nê Jejus kêp Rewi hkanrêhã htàmnhwÿ hkêt. Katorxã hkôt kêp Apraãw tàmnhwÿ Juta hkanrêhã htàmnhwÿ na pre. Ra mē pahte ja mar mex. Aa Juta hkanrêhã htàmnhwÿjaja kêp patre hkêt. Na pre Tîrtûm jajê mã mē kot mēmoj nhôr xã hã mēsti kunihita ã kãm mēmoj nhôr nê hkwÿjê ho hwÿr ã mē kãm karõ hkêt nê. ãm Apraãw

tàmnhwÿ Rewi hkanrêhã htàmnhwÿjê mã pix mã na pre ã mē kãm ja hã karõ anê. Tã nhûm Jejus wrÿ nê mē hpãnhã mē pahto hwÿr o pa. Mē urãk nê kêp Rewi hkanrêhã htàmnhwÿ hkêt axtem kêp Juta hkanrêhã htàmnhwÿ htã Rewi hkwÿjê hpãnhã mē pahto Tîrtûm wÿr o pa.

Mekijetek pyrã nê mē pahto Tîrtûm wÿr xwÿnh jarēnh

15-19 Nê Ijaewja na prem Mojes kapêr mar tÿx nê hkôt amnhî nhîpêx tã aa amnhî to mex kêt nhûm Tîrtûm tee ri ja hã mē omu nê hamaxpêr o:

—Nã Rewi hkanrêhã htàmnhwÿjaja kêp mē ô patre nê mē ho ixwÿr o pa htã nhûm mē arÿ htÿx ri amnhî tomnuj pix o pa. Jakamã koja mē axte ri mē ho ixwÿr o pa hkêt nê. Anê.

Hãmri nê mē pakaxyw mē pahto àhwÿr xwÿnhja ta nê ãm. Kra Jejusja nhûm kuta nê ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhî nhîpêx nê Tîrtûm kôt amnhî nhîpêx mex nê. Jao nhÿrmã ma mē pahte Tîrtûm nhõ krÿ hwÿr paxãpirja jamãr o papa.

Jejus na hte Mekijetek pyrã nê kêp mē panhõ patre maati nê mē pahto Tîrtûm wÿr rãhã ho pa. Kêp Rewi hkanrêhã htàmnhwÿ hkêt tã Tîrtûm pyrã nê kêp htîr tûm nê pa ho pa xwÿnh jakamã na pre Tîrtûmja mē pakaxyw kuta nê mē pahwÿr kumê. Kapêr ã kagà htûm kot harēnh kot:

Kot kaj Mekijetek pyrã nê mē ho ixwÿr rãhã ho ri apa. Anê.

20-21 No Rewi hkwÿjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nê. ãm kapxipix kot kaj mē ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarēnh anê.

22 Anhÿr jao Jejus kot amnhî to rax o Rewi hkwÿjê jakrenh par ã ho amnhîrît. Mē kot Ijaew mã Tîrtûm kapêr jarēnh nhûm mē kot mar nom hkôt amnhî nhîpêx kêt jakamã nhûm Tîrtûm mē hpãnhã Jejus xãm. Tapxipix na hte tanhmã mē pahkrã hto pu mē

tãm amnhĩ nhĩpêx mex o ri papa. ²³ Rewi hkwýjaja na prem axpên mýr pê kêp mẽõ patre nê ri pa htã htyk pa nê hapêx. ²⁴ Nom Jesusja htĩr tũm nê pa ho pa xwýnh jakamã koja mẽ uràk nê aa hapêx kêt. Koja mẽ pahto Tĩrtũm wýr rãhã ho pa nê aa jam urer kêt nê. ²⁵ ã Jesus kot amnhĩ nhĩpêx anhýr jakamã te kêp Tĩrtũm wýr mẽ panhõ pry pyràk. Na pu htem hkôt amnhĩ xunhwý nhũm mẽ panê mẽ pahte amnhĩ tomnuj piitã rênh pa nê mẽ pahpê Tĩrtũm kra hã mẽ pajarê.

²⁶ Nê ãm hãmri kêp mẽ pahto Tĩrtũm wýr xwýnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wýr ho àpir jakamã nhũm ra kuri mẽ pahto hwýr rãhã ho pa. ²⁷ Nê kot amnhĩ to rax o wam mẽõ patre maati jê jakrenh. Wamtaja na prem hkwýjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwý. Hãmri nê rĩ kormã kot nhãm mẽ hwýr mẽ mrar xwýnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwý. No kêt Jesusja wam patre maati rom aa kot amnhĩ tomnuj kêt jakamã na pre hte mẽ uràk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhýr kêt nê. Mo kaxyw kot kêt axte mẽ panê ty?

²⁸ Mojes kapêr kôt na pre Ijaew amnhĩm Rewi hkwýjê xunhwý nhũm mẽ kêp mẽ õ patre nê ri pa. Tã no nhũm mẽ uràk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

—Nã kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwýr o apa rãhã ho rãhã. Anê.

8

*Jesus kêp mẽ pahto Tĩrtũm wýr xwýnh maati hã harênh
Rukre 22.20; Sikũn Korõt 3.6-11*

¹ E kot paj axtem tanhmã mẽ amã mẽ pahto Tĩrtũm wýr xwýnh maati jarênh to ka mẽ inhma. Na hte kaxkwa kamã Tĩrtũm nhĩhkô hã hkrĩ. ãhkô hã kêp Pahi Maati hã hkrĩ xã hã upôk rũm hkrĩ ho hkrĩ.

² Wam patre maati jaja na prem Tĩrtũm nhõrkwý kaàkre wýr mra nê kamã hitom maati kamã mẽ ho Tĩrtũm wýr o pa. Nom nhũm Jesus na hte mẽ kurom kaxkwa kamã Tĩrtũm nhõrkwý mex kãm mẽ pahto àhwýr o hkrĩ. Õrkwý kaàkreja na prem ãhkra ho hipêx nom kaxkwa kamã òrkwý mexja na pre mẽhõ ãhkra ho hipêx kêt nê. Tĩrtũm na pre tanhmã hipêx to nhũm kamã Jesusja mẽ pahto hwýr o hkrĩ.

³ Nê mẽ pahpê Ijaew nhõ patre maati jaja na prem mẽ ho hwýr kaxyw nê mẽ kot amnhĩ tomnuj pãnhã Tĩrtũm mã mẽmoj nhõr kôt mẽ ho kuwý. No Kris na hte ã amnhĩ nhĩpêx anhýr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mẽmoj nhõr kêt nê.

⁴ Tã na hte arĩ Ijaew Mojes kapêr kôt amnhĩm Rewi hkwý kêp mẽ õ patre kaxyw mẽ unhwý nhũm mẽ ho Tĩrtũm wýr o pa. No Jesus kêp Rewi hkanrêhã htãmnhwý hkêt. Katorxã hkôt kêp Juta hkanrêhã htãmnhwý jakamã kop apu arĩ jar pika ja kamã htĩr nê pa ronhýx Ijaew nhõ patre pyrã nê kêp mẽ ho Tĩrtũm wýr o pa xwýnh kêt. ãm Rewi hkanrêhã htãmnhwý pixjaja na htem mẽ kaxyw kãm mẽmoj gõ nê hkôt mẽ ho kuwý. ⁵ Jar na htem arĩ ã amnhĩ nhĩpêx anhýr o pa nom kaxkwa kamã na htem ã amnhĩ nhĩpêx anhýr hkêt nê.

Nê jar Tĩrtũm nhõrkwý kaàkreja te kot kaxkwa kamã òrkwý mexta pyrãk. Na pre Mojes òrkwý kaàkre nhĩpêx kaxyw nhũm Tĩrtũm tanhmã kãm hã karõ hto nê kãm:

—E jãã hixêt prêk nhĩmõk ã axãmta ã na pa pre amã ãkreta kukamã ixprĩ hã tanhmã mẽ ate hipêx to hã amã karõ. Tã kêr ka ã hipêx anê. Anê.

Hãmri nhũm kuma nê kot kãm hã karõ xã hkôt hipêx. Hãmri nhũm mẽ õ patre maati ixkreja kamã mẽ ho Tĩrtũm wýr o pa. Na prem ã amnhĩ nhĩpêx anhýr o pa.

⁶ Tã nhũm ra Tĩrtũm axtem mẽ hpãnhã mẽ pakaxyw Kris xãm nhũm hte mẽ pahto hwýr mex o wamtajê jakre. Na hte kaxkwa

kamã mẽ pahpiitã mẽ pahpumunh mex rãhã ho hkrĩ mẽ wamtajê rom tanhmã mẽ pahkrã hto pu mẽ tãm amnhĩ nhĩpêx o ri papa. Tĩrtũm kot finat Mojes mã kapêrja mex mẽ nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mẽ pahtyk tã akupỹm pahĩr mẽ nhỹrmã Tĩrtũm mẽ Jejus wa kuri pamex mẽ pahĩr tũm mẽ papa ho papa mẽ axte pahtyk kêt mẽ. ⁷ Kêp apu Tĩrtũm kot Mojes mã kapêr kôt mẽ kot tãm amnhĩ nhĩpêx o pa ronhỹx pre Tĩrtũm axte kapêr nyw ã kagã hkêt mẽ. ⁸ Nom wam kapêr tũmta na pre mẽ mar tỹx htã arĩ amnhĩ tomnuj rãhã ho pa nhũm tee ri ja hã mẽ omu mẽ mẽ kãm:

Nã kot paj axte nhỹrmã mẽ apê Ijaew mã axtem tanhmã ixkapêr to.

⁹ Amnepêm mẽ anhĩgêjtê mã na pa pre ixkapêr.

Na pa pre Ejit pê mẽ kator mẽ mẽ kot tanhmã amnhĩ nhĩpêx to ho pa kaxyw tanhmã hã mẽ kãm karõ hto.

Nom na prem ixkapêr ma mẽ ãm kuma mẽ ixkôt amnhĩ nhĩpêx kêt mẽ. Pa tee ri ja hã mẽ omu hãmri mẽ mẽ hkaga.

¹⁰ Tã kot paj mẽ apê mẽ hkanrêhã mẽ htãmnhwỹ nywjê mã axtem ixkapêr ka mẽ ixkapêr nywja ma.

Kot paj nhỹrmã tanhmã mẽ akrã hto ka mẽ ixkapêr nyw mar tỹx mẽ hã ano htỹx mẽ ho apa.

Nẽ akĩnh mẽ apa.

Nẽ ixkôt ri amnhĩ nhĩpêx mex o apa.

Nẽ axpên mã ijarênh o: “Nã ãm hãmri Tĩrtũm kêp mẽ panhõ Tĩrtũm na.” Anhỹr o ri axpên mã ijarênh o apa.

Pa amnhĩ tã mẽ ama mẽ mẽ apumu mẽ amnhĩ xwar mẽ apê ixkra hã amnhĩm mẽ ajarê.

¹¹ Kot kaj mẽ apiitã ixte amnhĩ nhĩpêx kôt ixpumunh mex o ri apa. Mẽ akàxpore rũnh xwỹnhjaja mẽ mẽ akàxpore hkryre xwỹnhjaja mẽ apiitã ixpumunh mex jakamã kot kaj mẽ ri axte ixtã tanhmã axpên kukjêr to ho ri apa hkêt mẽ.

¹² Nẽ kot paj mẽ ato mex rax o ixpa.

Nẽ axte tanhmã mẽ ate amnhĩ tomnu hto ho apaja mã ijamaxpêr kêt mẽ. Anẽ.

¹³ Nẽ koja mẽmoj ra htũm hãmri mẽ hapêx tokyx anẽ. Ja pyrã mẽ na pre Tĩrtũm mẽ pamã kapêr tũmta jarênh o:

—E kêr ka mẽ axte ixkapêr tũm mar kêt mẽ. Pãnhã ixkapêr nyw pix mãn mar o apa mẽ ãm kôt pix mã mãn amnhĩ nhĩpêx rãhã ho ri apa. Anẽ.

9

Tĩrtũm nhõrkwỹ kaàkre jarênh

¹ Nẽ amnepêm na pre finat Mojesja mẽ panhĩgêr mẽ mẽ pahpãmjê mã tanhmã Tĩrtũm nhõrkwỹ kaàkre jarênh to. Tanhmã mẽ kot hipêx to mẽ kamã tanhmã amnhĩ nhĩpêx to hã mẽ kãm karõ. Nẽ kamã tanhmã mẽ kot amnhĩ to Tĩrtũm wỹr to hã mẽ kãm karõ. Nẽ tanhmã mẽ hkwỹjê ho hwỹr toja nhũm pre mãânên mẽ kãm hã karõ. No Tĩrtũm nhõrkwỹ kaàkreja kêp õrkwỹ kumrêx kêt. ãm mẽ kot omunh mẽ kaxkwa kamã õrkwỹ kumrêx mã hamaxpêr kaxyw na pre. ² Jakamã nhũm prem Mojes kapêr ma mẽ hipêx. Kamã hitom hamêxkrut. Wam hitom kamã na pre kanê hprêêti xãm mẽ kutã mêsti xãm. Nẽ mêsti nhĩmõk ã Tĩrtũm mã õ pãwti jaxwỹ. Mẽ panhõ patre na pre htem Tĩrtũm mã kugõ mẽ mêsti ã kãm haxwỹ hãmri mẽ hkwỹjê ho kuwỹ. Tã hitom ja na prem kêp Tĩrtũm nhõ hitom mex ã harê.

³⁻⁴ Nẽ hitom wa hkaêx kãm na pre kupêxê ho hakwakre kahê xàja ajêr. Haturxã kamã hitomja na prem Tĩrtũm nhõ hitom maati hã harê. Tĩrtũm na pre te hirã htỹx kãm hwỹr wrỹ mẽ te kamã hkrĩ pyrãk. Nẽ kamã na pre Tĩrtũm mã mẽhkuxwa xã ho xêt xã hã mês kunĩhtija kuhê. Na prem ôr o hipêx mẽ kamã ãm nhũm kuhê. Nhũm pre hte mẽõ patre hwỹr agjê mẽ kutã kuhê mẽ mẽ ho Tĩrtũm wỹ. Nẽ mês kunĩhti haxwỹja hitom maati kamã kuhê. Na prem pĩ ho hipêx mẽ ôr o hpro mẽ mẽkamã ãm. Mêstija kaxwỹnh kãm na pre htem mẽmoj jagjê.

Tĩrtũm kot Ijaew mã tanhmã mẽ kot amnhĩ nhĩpêx to ho pa hã karõ mẽ kên po hã mẽ kãm hã kagãja nhũm prem kamã kuxã nhũm hikwỹ.

Nẽ mãânên ôr o xijereja xã nhũm hikwỹ. Nẽ xijere kamã amnepê mã Tĩrtũm kot kaxkwa rũm mẽ hwỹr mẽõ rênh kwỹ.

hikwÿ. Mëõja më kot kãm: “Manã” anhÿr xwÿnhja na prem hkwy hkawrà nê xijere kamã kugjê hãmri nê mësti kamã kuxà.

Nê finat Arãw nhõ kô kot ho amnhÿ kaxpar xà htũmta nhũm prem kamã kuxà. Tÿrtũm kot tanhmã ho nhũm kurũm pixôrã muxre hapôx xwÿnhja nhũm prem mãânên mës kunÿhti kamã kuxà nhũm hikwÿ.

⁵ Nê himõk ã Tÿrtũm kapêr o wrÿk xwÿnh wa hkarõ nhÿpêxja wa hamêxkrut nê axpên kutã wa hkõn krã ho hkrÿ. Axpên wÿr hara koror nê wa hkrÿ. Patre maati kot omunh nê Tÿrtũm kot më hkôt pa ho paja mã hamaxpêr kaxyw. Nê wa hkaêx kãm ahkaprÿja Tÿrtũm kot më nê më kot amnhÿ tomnuj rênh mã hamaxpêr xà na pre.

Ã Tÿrtũm nhõrkwy kaàkre kot anhÿr. No kot paj ixprÿ mã më amã piitã harênh par kêt nê. ⁶ Na pre hte mëõ patre apkati më wam hitom wÿr agjê nê kamã Ijaew ho Tÿrtũm wÿr o pa. ⁷ No hitom maatija ãm më õ patre maati pix na pre hwÿr agjê. Nom apkati më hwÿr pa nê gjêx kêt ãm amgrã pÿnh kãm hwÿr gjêx pÿnh nê. Nê hwÿr gjêx kaxyw nê mëmo mry pa nê hkamrô ru nê o pa nê hitom maati hwÿr ho agjê. Hãmri nê ho mës kunÿhti nhÿmõk kamã nê Tÿrtũm mã kãm:

—Pa Tÿrtũm. E ota mry kamrôta. Më ixpê akwÿjaja më ixte amnhÿ tomnuj jakamã na pa më amnhÿ pãnhã mëmo mry nhõkre jakã nê kupÿ nê hkamrô ru nê man awÿr o mra. Te kot më ixte amnhÿ tomnuj mÿrapê htyk pyrãk. Jakamã kwa ã më ixte amnhÿ nhÿpêx anhÿrja ã më ixpumunh hkôt më inhnê më ixte amnhÿ tomnuj rê.

Anhÿr o më amnhÿ to kuwÿ. ⁸ Nê patre maati pix na pre hitom maatija wÿr agjê nê më ho Tÿrtũm wÿ. Ijaew na prem ixkre kapem hamãr o kuhê nê hwÿr gjêx kêt nê. Tÿrtũm Karõ kot mã më kãm karõ xà hkôt. Te Tÿrtũm pé amÿm kuhê pyrãk. Tã na htem jarãhã arÿ Ijaew kanrêhã më hkra nê më htãmnhwÿjaja ã amnhÿ nhÿpêx anhÿr o pa. Jao më higêtjê pyrã nê Tÿrtũm pé amÿm kuhê.

⁹ Më kot arÿ Tÿrtũm mã mry hpar nê hkamrô ho mëmoj kamãr nê amnhÿ to hwÿr o pa htã na htem arÿ hamaxpêr punuj pix o pa.

¹⁰ Tÿrtũm kapêr tũm kot tanhmã mëmoj tã më kãm karõ hto.

Na pre tanhmã më apkur xà mã më kãm karõ hto nhũm htem pix kur o pa.

Nê tanhmã më hkõm xà mã më kãm karõ hto nhũm htem pix o hkõm o pa.

Nê tanhmã amnhÿmnuj to mã tanhmã më kot amnhÿ kuhõnh to mã karõja nhũm htem hkôt pix mã tanhmã amnhÿ kuhõnh to ho pa.

Nê tanhmã më kot ri më hikukrêx kuhõnh to mã më kãm karõja nhũm htem kôt pix mã tanhmã kuhõnh to ho pa.

Ã na pre Tÿrtũm Kris kukamã më kãm mëmoj tã karõ rax anê. Kris kutêp pix mã ã më kot amnhÿ nhÿpêx anhÿr kaxyw. No më pahte arÿ ã amnhÿ nhÿpêx anhÿr kaxyw kêt. Na pre ra Kris më pahwÿr wrÿ nê Tÿrtũm kapêr tũm o hapêx nê hpãnhã më pamã kapêr nyw jarê pu më hpãnhã nywta kôt pix mã amnhÿ nhÿpêx o papa. Kapêr nywja mex o mex. Nê mex o wamta jakrenh.

Kris htyk o më pahte amnhÿ tomnuj pãnhã amnhÿrer ã harênh

¹¹ Tã na pre Krisja tãm më pahwÿr wrÿ nê kêp më pahto Tÿrtũm wÿr xwÿnh maati nê patre hpãnhã më pahto hwÿr o pa. Nom jar pika ja kamã më kot më ïhkra ho Tÿrtũm nhõrkwy kaàkre nhÿpêxta wÿr àr nê kamã më pahto hwÿr kaxyw na pre wrÿk kêt nê. Na pre ra akupÿm kaxkwa hwÿr api nê kamã õrkwy mex wÿr axà nê kamã tanhmã më pahto mex to nê tanhmã më pahto Tÿrtũm wÿr to rãhã ho hkrÿ. ¹² ã kaxkwa kamã Tÿrtũm nhõ hitom maatija wÿr àr tipxi htã më pahpiitã më pahte amnhÿ tomnuj pãnhã amnhÿrer pa. Nom mëmo mry kamrô ho më pahpãnhã amnhÿrer kêt nê. Mõx kamrô rÿ motre kamrô ho më pahpãnhã amnhÿrer kêt nê. Amnhÿ kamrô ho na pre më pahpãnhã amnhÿre. Tyk nê hkamrô pikapÿrta o më pahpiitã më pahpãnhã amnhÿrer pa.

¹³ Nê amnepêp Ijaew kot Tÿrtũm kapêr tũm kôt amnhÿ nhÿpêx mex o pa hkêt jakamã nhũm tee ri më omu nê më kot amnhÿ tomnuj o më pa xwÿnh ã më harê. Jakamã na pre mëõ patre xatã mry kamrô ho më hkamã. Mõx kamrô nê motre kamrô ho më hkamã. Na pre mõx krare hkwy hpa

nê ho hxêt nê hprà ho hkwýjê kamĩ. Æ na prem xatã mē hipêx anhÿr o pa. Tĩrtũm kot ja hã mē omunh nê mē mex ã mē harēnh kaxyw. Nom te mē krãhkà pix mex pyrã nê mē hkrã kaxwÿnh kãm arĩ hamaxpêr punuj o pa. ¹⁴ ã na prem amnhĩ nhĩpêx anhÿr o pa. Nom Krisja mē kurom aa tanhmã amnhĩ tomnuj to hkêt jakamã na pre mē pahte amnhĩ tomnuj xwÿnhjê nê ty. Te mē kot amnhĩ nê môx rÿ motre hpar nê hkamrô runhta pyrãk o amnhĩ nhĩpêx nê mē panê Tĩrtũm mã amnhĩ gô nhũm pre mē kãm hkurê xwÿnhjaja kupĩ. Na pre Tĩrtũm Karôja ã kot mē panê htyk anhÿr kaxyw tanhmã ho hihtÿx to. Karôja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhũm mē panê ty. Tapxipix na mē pahte tãm amnhĩ nhĩpêx o papa kaxyw kêp tanhmã mē pahkrã hto xwÿnh. Jakamã na pu htem ra pajamxpêr nyw o pajamxpêr o papa nê pajamxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprÿ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harēnh ma nê amnhĩ kaxyw hkôt ijamxpêr tÿx nê nhũm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tĩrtũm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwÿnh jakamã kot paj nhÿrmã kuri urãk nê ixtĩr tũm nê ixpa ho ixpa. Anê.

¹⁵ Nê amnepê mã na prem piitã Tĩrtũm kapêr tũm kôt amnhĩ nhĩpêx mex o pa hkêt nê. Mē kot xatã hkôt amnhĩ nhĩpêx o pa hã amnhĩ jarēnh tã hkôt amnhĩ nhĩpêx kêt nê. Jakamã na pre Kris wrÿ nê mē pahte hkôt amnhĩ xunhwÿr mã xwÿnhjê mã Tĩrtũm kapêr nyw jarê nê mē pamã:

—Kot paj mē anê ty nhũm Tĩrtũm ã ixte amnhĩ nhĩpêx anhÿrja kukwak ri mē ato mex rãhã ho pa. Anê.

Hãmri nê amnhĩ jarēnh xà hkôt mē pahte amnhĩ tomnuj piitã hpãnhã amnhĩrer kaxyw mē panê ty. ¹⁶⁻¹⁷ Te jar pika ja kamã mēhõ htyk kukamã hkrajê mã tanhmã amnhĩ jarēnh to pyrãk. Na htem htyk kaxyw nê hkrajê mã:

—Nà kot paj mēmo arĩgro hã ty ka mē inhmÿr pē ixpê ixkukrêx kwÿ o arĩk.

Anhÿr o na htem amnhĩ jarê. Hãmri nê ty nhũm hkrajaja amnhĩm õ mēmoj to arĩk pa. Mē hipêxà kukwak ri mē hikukrêx mex nê mÿr pē o pa. No kormã htĩr ri nhũm mē kormã kêp hamÿnh kêt nê. Ja pyrã nê na pre Tĩrtũmja Jejus htyk kukwak ri tanhmã mē pahto mex to pu mē kukwak ri mē pamex nê pahkĩnh nê ri papa.

¹⁸ Nê Tĩrtũm kapêr tũm kôt na pre hte mē õ patre mry pa nê ãm hkamrô runh kôt pix mã mē ho Tĩrtũm wÿr o pa nhũm amnhĩ tã mē omunh xà hkôt mē kuma nê tanhmã mē ho mex to.

¹⁹ Na pre finat Mojesja Ijaew mã Tĩrtũm kapêr tũm piitã harê nê harēnh pa hãmri nê môx õxpĩ nê kaxyw motre hõxpĩ. Hãmri nê xijere kamã hamê wa hkamrô runh pa nê kamã gô hkwÿ ru. Hãmri nê kaxyw mēmo pi hpa hkryre pē “isop” jarēnhja kwÿ kukê. Nê kaxyw ôwêhti hkĩ kamrêkre hkwÿ hpy nê isop mē ho pihkàr pa nê mry kamrô o go. Hãmri nê ho hkwÿjê kamĩ. Nê ho Tĩrtũm kapêr ã kagã tũmta kamĩ. ²⁰⁻²² Hãmri nê ho anhÿr pa nê mē kãm:

—Nà na Tĩrtũmja ixte mry kamrô ho mē akamĩr pumunh kôt mē pamã kapêr o: “E kot kaj mē ixkapêr kôt amnhĩ nhĩpêx o ri apa hã kot paj tanhmã mē ato mex to rãhã ho ri ixpa ka mē amex nê akĩnh nê ajamakêtkati nê ri apa. Jakamã kêr ka mē mry kamrô ho mēmoj piitã hkamĩr pa. Nê ho amnhĩ kamĩ. Kêr pa ja hã mē apumu hãmri nê axte tanhmã mē ate amnhĩ tomnuj tota mã ijamxpêr kêt nê.” Anê. Æ na Tĩrtũm mē pamã kapêr anê. Anê.

Hãmri nê hpãnhã mry kamrôta o õrkwÿ kaàkre kamĩ. Nê hkre kamã mēmoj kuhê xwÿnh piitã nhũm ho hkamĩr pa. Æ na pre mē õ patre mē mex kaxyw mē hipêx anhÿr o pa. Mē kot tõhã mēmoj to hpÿnhre nê ho hkamĩr kêt jakamã kironhÿx pre mēmoj piitã ã hipêx anhÿr o pa. Kop apu mē kot mry hpar nê hkamrô runh kêt ronhÿx pre Tĩrtũm arĩ mē kot amnhĩ tomnuj mã hamaxpêr rãhã ho pa.

²³ Na prem ã Tĩrtũm nhõrkwÿ kaàkre kamã mēmoj kuhê xwÿnh piitã mex kaxyw hipêx anê. Te Tĩrtũm kot mē pahto mex

nhũm mẽ pahte nhỹrmã ma kaxkwa hwỳr ò krĩ hwỳr paxàpirta pyrà nẽ. Nom mẽ kot mry hpar nẽ hkamrô runhta kukwak ri mẽ pamex nẽ papa hkêt. Æm mẽhõ kamrô kukwak ri mẽ pamex xwỳnhhta pix kukwak ri na mẽ pahpê pahťir tũm nẽ papa mã xwỳnh. Ja na mex o mry kamrô piitã hakrenh pa. ²⁴ Jejus Krisja pix kukwak ri. Tãm na pre patre pyrà nẽ mẽ pahto Tĩrtũm wỳr kaxyw mẽ ìhkra ho Tĩrtũm nhõrkwỹ kaàkre nhĩpêxta wỳr gjêx kêt nẽ. Æm ixkre kaàkre pix na pre. Na pre kaxkwa kamã Tĩrtũm nhõ krĩ hwỳr axà. Tã arĩ kamã Tĩrtũm nhĩhkô hã mẽ pahto hwỳr rãhã ho hkrĩ.

²⁵ Nẽ Ijaew nhõ patre maati na hte amgrà mẽ òrkwỹ kaàkre kamã hitom maati hwỳr gjêx tipxi. Nẽ amnhĩ kôt mry kamrô ru nẽ ho agjê. Tĩrtũm kot hã omunh nẽ axte mẽ kot amnhĩ tomnuj mã hamaxpêr hkêt kaxyw. Nom Kris na pre mẽ urak nẽ mẽmo mry pa nẽ Tĩrtũm mã hkamrô kapĩr kêt nẽ. Kamrô na pre mẽ panê axkapĩ. Nom patre pyrà nẽ amgrà mẽ ã amnhĩ nhĩpêx anhỹr kêt nẽ. Na pre htyk o Tĩrtũm mã amnhĩ nhõr tipxi. ²⁶ Kêp apu patre pyrà nẽ amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkra. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỳr wrỳ nẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte tý?

²⁷ Æm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahťir nẽ ahpỹnhã tanhmã mẽ pajarênh to nẽ ahpỹnhã tanhmã mẽ panhĩpêx to. Kormã mẽ pahťir ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. ²⁸ Ja pyrà nẽ na pre Krisja Æm mẽ panê htyk tipxi htã mẽ pahto ohtô nẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nẽ akupỹm amnhĩ wỳr ho api. Tã koja nhỹrmã akupỹn mẽ pahwỳr wrỳ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỳk kêt nẽ. Ra kot mẽ pahte amnhĩ tomnuj pãnhã

amnhĩrer kênã. Koja akupỹn wrỳ nẽ mẽ pahte amnhĩ wỳr kamã pajamak o papa xwỳnhjaja ma akupỹm amnhĩ kôt kaxkwa hwỳr mẽ pahto àpir pa. Ra mẽ pahtyk tã nhũm akupỹm mẽ pahto mẽ pahťir nẽ ma amnhĩ kôt mẽ pahto àpir pa pu mẽ kuri pamex nẽ pahťir tũm nẽ papa ho papa.

10

Kris kot mẽ panê htyk tipxi hã harênh

¹ Nẽ arĩ mẽ kot Tĩrtũm kapêr tũm kôt amnhĩ nhĩpêx o mẽ pa xwỳnhjaja kormã hprĩ hã Tĩrtũm kot tanhmã mẽ pahto mex to hã harênh mar tỳx kêt. Na prem kormã hkwỳ pix ma. Na hte mẽ ò patreja amgrà mẽ kãnhmã kaxkwa hwỳr mry kamrôta pẽ nẽ mẽ amnhĩ to Tĩrtũm wỳ. Kot ja hã mẽ omunh nẽ axte mẽ kot amnhĩ tomnuj mã hamaxpêr hkêt kaxyw. Tã ã mẽ kot amnhĩ nhĩpêx anhỹr tã arĩ Tĩrtũm kapêr kwỳm amnhĩ nhĩpêx rãhã ² jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nẽ tãm ri hamaxpêr ronhỹx arĩ ã amnhĩ nhĩpêx anhỹr o pa hkêt nẽ. Nẽ xatã amnhĩ pãnhã mry hpar nẽ hkamrô ho Tĩrtũm nhõrkwỹ kaàkre kamã mẽmoj kamĩr kêt nẽ. ³ Nom na prem tãm amnhĩ nhĩpêx o pa hkêt nẽ. Mẽ kot amgrà mẽ Tĩrtũm kot mẽ nẽ mẽ kot amnhĩ tomnuj rênh kaxyw mẽ kot kãm mẽmo mry hpar o pa htã no Æm hkôt amnhĩ nhĩpêx xwỳnh ã amnhĩ jarênh kêt nẽ. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nẽ tee ri amnhĩ kukamã hamaxpêr o hkaprĩ nẽ pa. ⁴ Nom na hte môx kamrô rỳ motre kamrôja mẽ panê mẽ pahte amnhĩ tomnuj rênh kêt nẽ. ⁵⁻⁸ Jakamã na pre Krisja mẽ pahwỳr nojarêr nẽ Tĩrtũm mã amnhĩ jarênh o:

Pa Tĩrtũm? E kot paj ma mẽ hwỳr wrỳ.

Mẽ kot amnhĩ pãnhã amã mry hparta apê hprãm nõkati nẽ amã hkĩnh kêt.

Ate mẽ nẽ mẽ kot amnhĩ tomnuj rênh kaxyw mẽ kot amã mẽmo mry hparta amã hprãm kêt. Æm ixkukamã na ka pre ã mẽ kot amnhĩ nhĩpêx anhỹr kaxyw mẽ kãm ja hã karõ.

Mê kot mry nhîpêx o te pa ixte mê nê ixtyk nê ixkamrô pikapîr pyrâk o na prem ixkukamã ã amnhî nhîpêx anê.

Jakamã na ka ra mê kaxyw inhmã inhî gô pa mê urâk nê inhî ho inhî.

Tã kot paj ma mê hwÿr wrÿ. Ixte amã hprãm xà hkôt pix mã ixte tanhmã amã mnhî nhîpêx to ho ixpa kaxyw. Akapêr ã kagà htüm kot tanhmã ixkukamã ijarênh to xà hkôt kot wrÿ nê ã amã amnhî nhîpêx anê. Anê.

Hãmri nê man mê pahwÿr wrÿ. ⁹ Kot Tîrtüm kapêr tùm o hapêx par nê hpãnhã tãm mê panê htyk kaxyw wrÿ. Jakamã na pre nojarêr nê Tîrtüm mã amnhî jarênh o:

—E ixte amã hprãm xà hkôt amnhî nhîpêx kaxyw kot paj ma mê hwÿr wrÿ.

¹⁰ Anhÿr jakamã wrÿ nê Tîrtüm kãm hprãm xà hkôt mê panê ty. Na pre nhãm mēhō mê kãm hkurê xwÿnhjê mã ör nhüm mê kot hpîr nhüm amarî htyk kêt nê. Na pre amnhî grônh kôt mê kãm amnhî gô nhüm prem kupî. Hãmri nhüm htyk o mê pahte hkôt amnhî xunhwÿr xwÿnhjê o Tîrtüm kra. Mê kot xatã mry hparta rom htyk tipxi tã mê pahpiitã mê pahte amnhî tomnuj pãnhã amnhîrer pa.

¹¹ Nê mê õ patrejaja na htem apkati mê Tîrtüm nhörkwÿ kaàkre kamã kãm tanhmã amnhî nhîpêx to. Nê apkati mê hkwÿjê hpãnhã mry hkwÿ hpa nê hkamrô ru nê mê ho Tîrtüm wÿ. Tã nom ja hã mê omunh xà hkôt mê nê mê kot amnhî tomnuj rênh kêt nê. ¹² No kêt Kris na pre mê kot xatã mry hpar xwÿnhta rom ãm htyk tipxi htã mê pahte amnhî tomnuj piitã hpãnhã amnhîre. Hãmri nê ma akupÿm kaxkwa hwÿr api nê Tîrtüm nhîhkô hã Pahi Maati hkrî xà kamã upôk rüm hkrî ho hkrî. ¹³ Koja kuri hkrî rãhã nhüm Tîrtümja ïhkram mê kot kutã amnhî xunhwÿr xwÿnhjê jaxàr pa. Ja kaxyw na kormã kuri hamãr o hkrî. ¹⁴ ãm htyk tipxi htã htykja o mê pahte hkôt amnhî xunhwÿr xwÿnhjê ho Tîrtüm kra pu mê ra hpãnhã tãm amnhî nhîpêx rãhã ho papa. Nê pajamexpêr mex o ri papa. Tîrtüm kãm hprãm xà hkôt.

¹⁵ Amnepêr mê kot Tîrtüm nhÿ hã kapêr jarênh o mê pa xwÿnhjaja na prem mê

panhîgêjtê mã kapêr o pa. Tîrtüm Karô nhÿ hã mê kãm kapêr nê mê kãm:

¹⁶ —E na Tîrtüm mê pamã amnhî jarê nê amnhî jarênh o:

Kot paj nhÿrmã axtem ixkapêr nyw o mê amã ixkapêr.

Nê mê akrãm hagjê ka mê mar tÿx pê hã ano htÿx nê ho apa.

Ixkapêr tùm na pa pre mê amã kên pota ã hã kagà.

Nom ixkapêr nyw kot paj axtem mê akrãm hagjê.

¹⁷ Nê kot paj axte mê ate amnhî tomnuj mã ijamexpêr kêt nê.

Anhÿr o mê pamã amnhî jarênh. Anê.

¹⁸ Tã ra axte mê pahte amnhî tomnuj mã hamexpêr kêt ã kot amnhî jarênh jakamã mo kaxyw kot pu mê arî amnhî pãnhã kãm mēmo mry hpar nê hkamrô runh o papa? Tã mê pahkwÿjaja na hte arî kãm ja ho anhÿr prãm o pa. E kwa mê axte ã amnhî nhîpêx anhÿr kêt nê ixkwÿjaja.

Akupÿm mê pahte amnhî nhîpêx tùm o pajujanãr kêt ã mê pamã karô

Matêwre 27.51; Rukre 23.45; Rômãn 5.1-2; Epes 3.12; Eprêw 4.14-16

¹⁹⁻²⁰ E ixkrãmnhwÿjaja. Ra Jejus kot mê panê htyk o hkamrô pikapîr jakamã na pu htem arî tee ri amnhî kukamã pajamexpêr hkêt nê. Tîrtüm axte kot mê pahte amnhî tomnuj mã hamexpêr kêt jakamã na pu htem paxãmnhîx amnhî to hwÿr o papa. Te paxãmnhîx örkwÿ kaàkre kamã hitom maati hwÿr pagjêx nê kamã amnhî to hwÿrta pyrâk. Jao ra mê papamjaja amnhî to hwÿr o papa nhüm patre axte mê pahto hwÿr kêt nê. Jejus na pre htyk o mê pamã hitom maati wÿr hakwakre kahêxã hã kupêxêja kôt ã ho axkjê. Jao mê paxãmnhîx hwÿr mê pagjêx kaxyw mê pamã kahê xà mê.

²¹ Tã ra kêp Tîrtüm nhō krî kamã mê pahto hwÿr xwÿnh maati na. Nê mex kumrêx o jar pika ja kamã patre kot mê ho hwÿr o pa xwÿnhta jakrenh. ²² Jakamã e kwa kêr pu mê mãmri paxãmnhîx amnhî to Tîrtüm wÿr o papa. Ra Jejus kot mê panê htyk nhüm mê pahte amnhî kaxyw hkôt pajamexpêr rãhã ho papa jakamã kêr pu mê axte mê pahpê amnhî tomnuj xwÿnh ã amnhî jarênh kêt nê. Kêr pu mê nhÿrmã tanhmã pajamexpêr

punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ kamã amnhĩ to Tĩrtũm wÿr kurê kumrêx. Jejus ra kot mē pahte amnhĩ tomnuj pãnhã amnhĩrer par jakamã kot puj mē Tĩrtũm mã tanhmã mē pahte amnhĩ tomnuj to hã amnhĩ jarē nhũm mē pama nē axte kãm hamaxpēr kêt nē. Pu mē te paxwÿr nē pahte amnhĩ nē pagrã htyk kuhõnh par nē akupÿm pamex pyrãk. Nē axte paxãmnhĩx amnhĩ to Tĩrtũm wÿr o papa.

²³ Nē mē kot Kris ã tanhmã mē pahto htã kwa kēr pu mē tee ri amnhĩ kukamã pajamaxpēr kêt nē. Rÿ pajamaxpēr o:

—Konēn. Koja mē tanhmã hamaxpēr to nē Kris ã ixpĩ rÿ ko. Pa apu mē kot ixpĩr pymaj akupÿm ixte amnhĩ nhĩpêx tũm o awjanã nē akupÿm hkôt amnhĩ nhĩpêx japēr rÿ ko. Anē.

Kwa pu mē tee ri ã pajamaxpēr anhÿr hkêt nē. Pu kêt mē pajamaxpēr o:

—Nã mē kot Kris ã tanhmã ixto htã kot paj aa hkaga hkêt nē. Mē kot hã ixpĩr mã tã kot paj hkaga hkêt kumrêx.

Anhÿr ã amnhĩ jarē. ²⁴ Nē kēr ka mē akwÿjê mã anē kē mē mēmoj to axpēn kutã nojarēt rãhã ho ri axpēn kôt pa. Jao tanhmã axpēn to mex to o ri axpēn kôt pa.

²⁵ Na pre ra mē pahkwÿjaja tanhmã hamaxpēr to nē axte mē pahkôt pikuprõnh nē Tĩrtũm kapēr mar o hkrĩ hkêt nē. No kēr pu mē ho mē urãk kêt nē. Kēr pu mē arĩ xatã axpēn wÿr akuprõ nē mē pahte tee ri amnhĩ kukamã pajamaxpēr nē axpēn mã pakapēr o papa. Kêt mē panhõ Pahihtija ra akupÿn mē pahwÿr wrÿk kaxyw jakamã kwa kēr pu mē kutêp arĩ axpēn mã pajamaxpēr mex nhõr pē tãm axpēn nhĩpêx mex rãhã ho i papa.

²⁶ Mē pahkwÿjaja kot Tĩrtũm kapēr mar mex tã na htem kuma nē ãm kuma. Kwa kēr ka mē ho mē urãk kêt nē. Kris kot mē panē htyk ã harēnhja mē kot mar mex tã na htem kuma nē ãm kuma nē hkaga kumrêx. Jakamã mēhõ koja Kris pyrã nē htyk o mē kot amnhĩ tomnuj pãnhã amnhĩre? Nã amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mē panē amnhĩ nhĩpêx anē. Tã nhũm mē kot hka-gaja mÿrapê koja mē nhÿrmã mē tãmjaja mē kot amnhĩ tomnuj pãnhã amnhĩre. ²⁷ Mē

kot Tĩrtũm kutã amnhĩ xunhwÿr xwÿnh na mē. Amnepēm na pre Tĩrtũm mē kot kutã amnhĩ xunhwÿr xwÿnhjê kaxyw mē kot amnhĩ xà htÿx kamã hamak tũm xàta nhĩpêx. Tã ra mē kot Jejus kaga jakamã koja nhÿrmã ma hwÿr mē rēnh pa nhũm mē tee ri kãm hwÿr pa hprãm kêt kaprÿ. ²⁸ Amnepēm finat Mojesja kormã htĩr ri na pre hte mēhõ pixi nē kapēr kaga nē akupÿm kot amnhĩ nhĩpêx tũm o awjanã nē tanhmã amnhĩ tomnuj to nhũm hkwyjaja ja hã omu. Tanhmãn axkrut rÿ axkrunēpxi nē ja hã omu. Hãmri nē ma Mojes wÿr mra nē axpēn kôt kãm tanhmã kot amnhĩ tomnuj to hã harē. Hãmri nhũm harēnh ma nē mē kãm hã amÿné nhũm tee ri kãm htĩr prãm kaprÿ. Mē kot akupÿm amnhĩ nhĩpêx tũm o ujanãr nē amnhĩ tomnuj o paja mÿrapê na prem mē kupa. ã na pre htem mē hipêx anhÿr o pa.

²⁹ Nē koja mēhõ tanhmã Tĩrtũm Kra Jejus o kapēr punuj to. Tĩrtũm kapēr ã kagã htũm kot ra mē kot kēp Tĩrtũm Kra hã harēnh mar mex tã axtem nē tanhmã ho kapēr punuj to ho pa. Kot mē panē htyk nē hkamrõ pikapĩr kôt kot mē pahte amnhĩ tomnuj pãnhã amnhĩrer ã harēnh mar tã kuma nē ãm kuma nē harēnh o:

—Nã mē pahpyrà nē kot amnhĩ tomnuj xwÿnh nhũm mē kot hã hpĩr kēnã. Na pre mē panē htyk kêt nē.

Anhÿr ã harē. Nē Tĩrtũm Karõja nhũm mãänēn tanhmã ho kapēr punuj to. Kēp mē pakutã nojarēt xwÿnh tã nhũm axtem nē tanhmã ho kapēr punuj to. Mÿrapê koja nhÿrmã Tĩrtũm tanhmã homnuj tÿx to. Homnuj tÿx o mē kot Mojes kapēr kaga nhũm mÿrapê kot mē hparta jakre. Jakamã kwa kēr ka mē ã amnhĩ nhĩpêx anhÿr hkêt nē. ³⁰ Tĩrtũm kapēr ã kagã htũm kot ja jarēnh kot:

Ixpê Tĩrtũm kot paj mē kot amnhĩ tomnuj xwÿnhjê homnuj tÿx nē. Anē.

Nē mē kot tãm amnhĩ nhĩpêx xwÿnhjê jarēnh kot:

Mē kot amnhĩ to mex o mē pa xwÿnhjaja kot paj nhÿrmã mē ho mex rax nē. No mē kot amnhĩ tomnuj o mē pa xwÿnhjaja kot paj nhÿrmã mē homnuj tÿx nē. Anē.

Ra mẽ pahte ã kapêr anhÿr xwÿnhja kot amnhÿ nhÿpêx ã omunh mex. ³¹ Jakamã kwa mẽ okora. Kêr ka mẽ amnhÿ to mex rãhã ho ri apa. Tirtũm rãhã ho rãhã nê hihtÿx o hihtÿx jakamã koja mẽmoj tã akamã gryk ka amex kêt o amex kêt.

³² Nê amnepê m mẽ ate Jejus kôt amnhÿ xunhwÿr krax kãm na prem Jejus ã mẽ atomnuj tÿx tã ka prem mẽ umaj hkaga hkêt nê. Tã kêr ka mẽ arÿ ã amnhÿ nhÿpêx anhÿrja kukamã mãn ajamaxpêr nê hã anohtÿx rãhã ho apa. Jao arÿ ã amnhÿ nhÿpêx anê nê mẽ umaj Jejus kaga hkêt nê. ³³ Na prem mẽ piitã mẽ noo mã tanhmã mẽ amã kapêr punuj to nê tanhmã mẽ anhÿpêx to. Nê tãhã tanhmã mẽ akwÿjê homnuj tÿx to ka mẽ tee ri ja hã mẽ omu nê mẽ kamã axukaprÿ nê. Nê mẽ hkôt axkamê nhũm prem mã mẽ ato anê nê. ³⁴ Na prem mẽ akwÿjê jagjê ka prem ja hã mẽ omu nê ma mẽ hagjênh xà hã ixkre hwÿr mẽ hwÿr mra nê tanhmã mẽ ho mex to. Nhũm prem mẽ apê mẽ akukrêx kwÿptã nê ma amnhÿm o pa ka mẽ ãm amnhÿ tã mẽ omu nê ajamaxpêr o:

—Kwãr mẽ mãmrÿ ma amnhÿm hamÿn o pa. Koja nhÿrmã Tirtũm inhmã ixkukrêx mex o kot ja jakrenhta kwÿ nhõr rax nê pa amnhÿm hamÿ nhũm aa ixpê hapêx kêt nê. Hãmri nhũm axte mẽhõ aa ixpê utar kêt nê. Jar mẽ ixkukrêxta mexti hã. Anê.

Jao mẽ kot mẽ apê utar tã ka mẽ akaprÿ nã apa hkêt nê. ã amnhÿ kukamã ajamaxpêr anhÿr pê akÿnh nê apa. ãm hãmri na ka prem ã amnhÿ kukamã ajamaxpêr anê. ³⁵ Na ka prem mẽ kutã amnhÿ to htÿx kãm ã apa anê. Tã kwa kêr ka mẽ arÿ ã amnhÿ nhÿpêx anhÿr o ri apa. Kêr kê nhÿrmã Tirtũm ja hã mẽ ato mex rax nê.

³⁶ Nê kêr ka mẽ arÿ amnhÿ kaxyw Tirtũm mã ajamaxpêr rãhã ho ri apa. Mẽ kot Jejus ã tanhmã mẽ ato htã ka mẽ hkaga hkêt nê. Kot kaj mẽ ã amnhÿ nhÿpêx anhÿr o apa nhũm Tirtũm ja hã mẽ apumu nhũm ja kãm mex nê. Hãmri nhũm ra kot amnhÿ jarênh xà hkôt nhÿrmã amã mẽmoj mex nhõr rax nê. Jakamã kwa mẽ kot tanhmã mẽ anhÿpêx to hã amnhÿ pumu nê tee ri amnhÿ kukamã ajamaxpêr o ri akaprÿ hkêt nê. Kot kaj mẽ Kris ã apunuj rãhã apa hkêt

nê. ³⁷ Tirtũm kapêr ã kagã htũm kot Jejus jarênh kot:

Koja mẽ pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ixxôt mẽ kot amnhÿ nhÿpêx mex o mẽ pa xwÿnhjaja koja mẽ amnhÿ kaxyw ixkôt hamaxpêr tÿx rãhã nê. Jao nhÿrmã ixri htÿr tũm nê mex rãhã nê pa ho pa.

Nê koja mẽhõ ixkaga pa tee ri kãm ixkÿnh kêt ã omu. Anê.

³⁹ No mẽ papajaja te mẽ pahte mẽ kot Jejus kaga nhũm kot amnhÿ tã mẽ homnuj mã xwÿnhjê pyrãk kêt. Arÿ mẽ pahte amnhÿ kaxyw hkôt pajamaxpêr rãhã jakamã koja nhÿrmã amnhÿ wÿr mẽ pahto api.

11

Amnhÿ kaxyw Tirtũm kôt mẽ hamaxpêr mex xwÿnhjê jarênh

Sikũn Pêtre 3.5-7

¹ Nê na htem Kris ã mẽ panhÿpêx kati ho pa pu mẽ pahpunuj rãhã nê ri papa. Te Kris kot mẽ pahto mex kêt pyrãk pu htem mẽmoj punuj pix kãm ri papa nê kormã Tirtũm kot mẽ pahto mex ã amnhÿ tã omunh kêt nê. Tã ã mẽ pahte anhÿr tã kwa kêr pu mẽ arÿ kapêr kôt amnhÿ nhÿpêx rãhã ho papa. Mẽ pahte pano ho Tirtũm pumunh kêt tã kot mẽ pahkôt pa ho pa hã amnhÿ kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhÿ nhÿpêx o papa. ² Amnepê mã mẽ pakukamã mẽ panhÿgêjtaja na prem no ho Tirtũm pumunh kêt tã amnhÿ kaxyw kãm hamaxpêr nê kapêr kôt amnhÿ nhÿpêx o pa nhũm amnhÿ tã mẽ omu nhũm ja kãm mex nê.

³ Nê mẽ papajaja na pu htem pajaxwÿja mẽ pano ho omunh kêt tã amnhÿm harênh o:

—Nà amnepêm kormã mẽmoj piitã amrakati ri nhũm Tirtũm ãm kapêr pix o mẽmoj piitã ho kato. Ixte inhno ho ja hã omunh kêt tã kot ã amnhÿ nhÿpêx anhÿr ã amnhÿ jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhÿpêx nê kaxyw hprõ Ewa nhÿpêx. Hãmri nhũm wa hkra

Apewja htô Kaï rom amnhî kaxyw Tîrtûm kôt hamaxpêr tÿx o pa. Jakamã nhûm wa Tîrtûm mã mẽmoj gô. Nhûm Apew kot Kaï rom Tîrtûm kãm hprãm xà hkôt kãm mẽmoj nhôr jakamã nhûm amnhî tã omu nê kot amnhî to mex xwÿnh ã harê nê kot kãm ôr xwÿnhta nhûm mex ã harê. Tã Apew amnepêm htyk tã pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tîrtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhî kaxyw Tîrtûm mã hamaxpêr tÿx o pa. Jao hkamnàr rom kãm hprãm xà hkôt pix mã tanhmã kãm amnhî nhîpêx to ho pa nhûm amnhî tã omu nê amnhîm mex ã harê. Jakamã na pre htyk kêt nê. Na pre Tîrtûm htîr rãhã ma amnhî wÿr ho apî nhûm hkwyjaja tee ri hapêr o pa. Jakamã na pu htem arî xepên mã Enok kot amnhî kaxyw Tîrtûm kôt hamaxpêr mex o pa hã harênh o papa. ⁶ Mẽ kot amnhî kaxyw Tîrtûm mã mẽ hamaxpêr kêt xwÿnhjaja na hte Tîrtûm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tîrtûmja htîr rãhã ho rãhã. Koja nhÿrmã mẽ ixte amnhî kaxyw hkôt ijamaxpêr xwÿnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhûm Tîrtûm amnhî tã mẽ pajamaxpêr ã mẽ pahpumu nê mẽ pahte amnhî to mex ã mẽ pajarê. No mẽ kot amnhî kaxyw kãm hamaxpêr kêt xwÿnhjaja na hte ã mẽ harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tîrtûm mã hamaxpêr tÿx o pa. Jao hkamnàr rom amnhîm pàr raxja nhîpêx. Na pre ra Tîrtûm na rax kukamã tanhmã kãm ujarênh to. Kormã aa na wrÿk nhûm Noehti kot omunh kêt tã Tîrtûm kapêr ma nê mar xà hkôt amnhîm pàr rax kumrêxta nhîpêx. Ôrkwÿ kamã hkwyjê mẽ mẽ amnhîm hipêx. No mẽ kot Tîrtûm kapêr mar nê ãm mar xwÿnhjaja na pre Tîrtûm gô tãm o mẽ hanhi nê mẽ himex pa. Nom Noehtija nhûm kot amnhî to mex xwÿnh ã harê. Kot amnhî kaxyw

hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Noehti kanrêhã htãmnhwÿ Apraãwja na pre haxwÿja amnhî kaxyw Tîrtûm mã hamaxpêr tÿx o pa. Na pre Tîrtûm kot kãm pika nhôr ã kãm amnhî jarê nê ra kot ma hwÿr mẽnh kaxyw. Hãmri nhûm Apraãw kuma nê hkamnàr rom ô pika kaga nê ma pika hõja wÿr pa. Aa kot ma hwÿr môr nê omunh kêt tã Tîrtûm kapêr mar xà hkôt ô pika kaga nê ma hwÿr pa ho pa. ⁹ Hãmri nê hwÿr pøj nê omu nhûm Tîrtûm kãm:

—E pika ja kot paj nhÿrmã akanrêhã akra nê atãmnhwÿjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mẽ uro hkwyjaja ri pa nhûm Tîrtûm kormã mẽ kator kêt ri nhûm mẽ ô pika hwÿr pøj nê mẽ kamã pa ho pa. Nom amnhîm ôrkwÿ mex nhîpêx kêt nê. Kormã kêp ô pika kumrêx kêt ã hkamnhîx jakamã ãm mry kà o ixkre nhîpêx nê kamã pa ho pa. Nê nhÿhÿm pa kaxyw nê kugrà nê ma amnhî kêt o pa. Amnhî kaxyw Tîrtûm mã hamaxpêr rãhã jakamã ã amnhî nhîpêx anhÿr o pa.

Nê Apraãw kra Ijak nê htãmnhwÿ Jakoja wa Apraãw pyrã nê mry kà ho ôrkwÿ nê ma amnhî kêt o pa. Nhûm Tîrtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwÿjê mã pika nhôr ã amnhî kukamã wa kãm amnhî jarê. ¹⁰ Jakamã nhûm Apraãw kormã Tîrtûm nhô krî hwÿr àpir xa hã amnhî tã hamãr pê kot ho ô pika mã xwÿnhjê kamã pa ho pa. Kaxkwa hwÿr àpir mã xwÿnhta mex kumrêx. Tîrtûm kot hipêx jakamã koja mry kà ho ixkre nhîpêxta rom aa hapêx kêt nê. Jakamã nhûm Apraãw mẽ pahpyrà nê ma kot hwÿr àpir xa hã amnhî tã Tîrtûm jamãr rãhã ho pa. ¹¹⁻¹² Tã ra hpigêt tÿx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwÿja hpigêx tÿx nê. Kamrô hkêt ã amgrã xohtô rax kumrêx. Nhûm wa aa hkra hkêt nê pa htã nhûm Tîrtûm nhÿrmã wa hkra hã wa kãm awjarê nhûm wa kuma nê amnhî kaxyw hkôt hamaxpêr kurê kumrêx. Nom amnhî tã kuma nê tee ri amnhî kukamã hamaxpêr hkêt nê. Na pre wa kuma nê xepên mã:

—Nà kot puj xep hāmri tā pahkra. Tirtūm kot hā ã pajarēnh anhÿr kēnā. Anē.

Tā ã wa kot hkra kaxyw Tirtūm mā hamaxpēr anhÿr jakamā na pre Apraāwja hprō htu. Ra wa hamē hpigēt tÿx kumrēx tā nhūm htu. Nhūm wa hkra Ijakja gaa nē wa kām kato. Jakamā nhūm wa gaa nē rī wa hkanrēhā wa htāmnhwÿ xohtō rax o ohtō rax. Ohtō ho kaxkwa kamā kanhēti xohtō jakre. Nē ohtō ho gō xujanār mÿri pikahti grā hkryre jakre. Jakamā nhūm mē tee ri mē ho kōta hpar mā. Nhūm Apraāw kēp mē hpār krax. ¹³ Tā nhūm Apraāw nē Ijak nē Jakoja mē ri pa tāmtā nē htyk pa nē hapēx. Tirtūm kormā kot mē kām pika jarēnhhta nhōr xwÿj ri ra htyk pa. Nom kormā mē htīr ri tanhmā kām hamaxpēr to nē hamaxpēr o:

—Nà kormā Tirtūm kot mē inhmā pika jarēnhja nhōr kēt tā koja nhÿrmā inhmÿr pē ixkanrēhā ixkra nē ixtāmnhwÿjē mā kugō. Nà koja mē kām kugō. Ra kot hā inhmā amnhī jarēnh kēnā kot kēt mē kām ōr kēt.

Anhÿr o kaxyw kām hamaxpēr rāhā ho pa. Jao hkīnh nē hamaxpēr o:

—Nà inhō krīja axtem na. Na pa hte jar pika ja kamā ri mē hkōt ri ixpa. Te ixpē mē uro pyrā nē ri mē hkōt ixpa nom jar inhō krī hkēt. Inhō krī na kēt axte mā. Anē.

¹⁴⁻¹⁵ Na prem ã õ krī hō hkukamā hamaxpēr anhÿr o pa. No õ krī htūmta mē kot hkaga nē pika hō hwÿr mōr xwÿnhhta na prem ã harēnh anhÿr kēt nē. Kop apu mē kot amnhīm tām mǎn jarēnh ronhÿx prem awjanā nē ma akupÿm hwÿr pa. Na prem axtem krī hō jarē nē kormā hwÿr mōr kēt ã amnhī jarēnh o pa. ¹⁶ Tā nhÿ krī na prem ã harēnh anē? Nà kaxkwa kamā Tirtūm nhō krīja. Tām na mex kumrēx jakamā nhūm prem kormā hwÿr ma àpir xa hā mē pahpyrà nē amnhī tā Tirtūm jamār rāhā ho pa nhūm amnhī tā mē omu nē hkīnh nē. Nē mē kot tām amnhī nhīpēx ã mē omu nē mē kēp hkra hā mē harēnh ã hpijaàm kēt nē. Hāmri nē mē kutēp tanhmā õ krī ho mex to ho pa.

¹⁷⁻¹⁸ Na pre ra tanhmā Apraāw mā hkra Ijakja jarēnh to nē kām:

—Akra Ijak kanrēhā hkra nē htāmnhwÿjjaja koja mē kēp ixkra. Anē.

Tā ra kot amnhī tā Apraāw kamā hamak kaxyw hkukamā hamaxpēr nē hamaxpēr o:

—Xà we Apraāw kām ixkīnh tÿx kumrēx nē kām ixkōt amnhī nhīpēx rāhā ho pa hprām nà? Xà we kām ixkīnh tÿx o hkrata jakrenh? E pa kop we ja hā amnhī tā kamā ama nē omu mǎn. Anē.

Hāmri nē kot hkra hpīr nē kām ōr ã kām karō. Hāmri nhūm kuma nē ra kot kām hpīr kaxyw. Kot Tirtūm kot amnhī nhīpēx ã omunh mex jakamā hkamnār rom kot kām hpīr kaxyw. ¹⁹ Nē hamaxpēr o:

—Nà Tirtūm akupÿm kot mē ho htīr xwÿnh kēnā.

Anhÿr jakamā kām hkra hpīr pyma hkēt nē ra kot kām hpīr mā tā nhūm Tirtūm amnhī tā omu nē nē kām kapēr nhūm kuma nē hpīr kēt nē wa ma akupÿm ōrkwÿ hwÿr mō. Tā ã kot hkra nhīpēx anhÿr jakamā Apraāw mā te Ijak htyk nē akupÿm htīr pyrāk.

²⁰ Nē Ijakja na pre haxwÿja amnhī kaxyw Tirtūm mā hamaxpēr tÿx o pa. Jao hkamnār rom amnhī kra wa kām Tirtūm kot wa ho mex kukamā wa kām harē. Kra Jako mē Ejauta wa kām harē nē wa kām:

—E koja nhÿrmā Tirtūm inhmÿr pē war ato mex rāhā ho pa. Anē.

²¹ Nē Jakoja na pre haxwÿja amnhī kaxyw Tirtūm mā hamaxpēr tÿx o pa. Jao hkamnār rom hkra Juje mā Tirtūm kot mē ho mex kukamā harē. Na pre Jakoja hkra nē htāmnhwÿ mē hpimràatā hprām xàj ma Ejit wÿr pa nē kamā pa ho pa. Tā nhūm Jako hpigēt tÿx nē ra htyk kaxyw. Hāmri nē hkra Juje mē hkra wa mē kām kapēr nē mē kām:

—E na pa tee amnhī kamā ama. Na pa ra ixtyk kaxyw. Nom koja Tirtūm nhÿrmā inhmÿr pē mē ato mex rax nē. Anē.

Hāmri nē amnhī kaxpar xà hā pī hā amnhī kaxpa nē kànhmā xa nē Tirtūm mā mex o mex ã harē. Hāmri nē akupÿm nōr xà kamā nōn ty.

²² Nē Jujeja na pre haxwÿja amnhī kaxyw Tirtūm mā hamaxpēr tÿx o pa. Jao htyk kaxyw nē hkamnār rom hkwyjē mā tanhmā amnhī jarēnh to. Ra hpigēt nē htyk kaxyw nē hkwyjē mā tanhmā amnhī tā karō hto nē mē kām:

—E na pa ra ixtyk kaxyw. Tã koja Tĩrtũm inhmȳr pē nhȳrmã Ejit rũm mē akator nē ma akupȳm mē panhõ pika hwȳr mē ato pa. Ra kot mē panhĩgēt Apraãw mã amnhĩ jarēnh xà hkõt. Jakamã kwa mē inhma. Kēr ka mē akupȳm anojarēt nē ma amnhĩ kõt ixtã kasãwja mȳ nē amnhĩ kõt ixto mō. Hãmri nē mũtar mē panhõ pika kamã mē anhõ krĩ htã ijaxà pa jawȳ mē akuri ixtã pyka. Anē.

²³ Nē Mojes katorxà mē hipēêxàja na pre wa haxwȳja jajē pyrã nē amnhĩ kaxyw Tĩrtũm mã hamaxpēr tȳx o pa. Juje hkanrēhã htãmnhwȳ na pre wa. Jakamã nhũm Ejit nhõ pahija tee ri Ijaew xohtõ rax kumrēx ã mē omu nhũm ja kēp omnuj nē. Hãmri nhũm mē hkra myjaja mē hapõx kõt mē hamȳnh xwȳnhjaja kot mē hpar ã mē kãm karõ. Tã nhũm Mojes kato nhũm hipēêxà mē katorxàja wa omu nhũm muxre nhũm wa tee ri hkukamã hamaxpēr. Hãmri nē pahi Paraohti mã mē hkra jamȳnh xwȳnh kot wa kēp hpĩr pymaj ho pimxur o hã mytwrȳ axkrunēpxi. Tĩrtũm kamnār rom wa amnhĩ tã kãm uma hkēt nē ã kēp hkra ho hpimxur anē.

²⁴ Nē Mojes na pre haxwȳja amnhĩ kaxyw Tĩrtũm mã hamaxpēr tȳx o pa. Kormã karàre ri na pre Paraohti hkra nija omu nē amnhĩm kumȳ nē ho hkra nē amnhĩ kõt o pa. Rãhã nhũm àptār nhũm Ejit nhõ xwȳnhjaja kēp pahi Paraohti htãmnhwȳ hã axpēn mã harē. Hãmri nhũm tee ri amnhĩ tã mē kuma nē amnhĩ tã mē kãm aprã nē mē kãm:

—Kwa mē ã ijarēnh anhȳr kēt nē. Ixpē mē akwȳ hkēt. Anē.

²⁵ ãm kãm Tĩrtũm kwȳjē kõt pix mã ri pa ho pa hprãm. Nē kãm Ejit nhõ pahi hkõt amnhĩ tomnuj prãm kēt nē. ãm mē kot amnhĩ tomnuj pix o paja na mē kãm hprãm nhũm ja hã mē omu nē tee ri mē hkukamã hamaxpēr nē hamaxpēr o:

—Nà kot paj mē hkõt ri ixpa hkēt kumrēx. Mē hkĩnh nē pa htã koja mē gaa nē ty nhũm mē hkĩnhja mē kēp hapêx. Nà kot paj Tĩrtũm kwȳjē hkõt mãn ri ixpa ho ixpa. Mē kot Tĩrtũm ã mē inhĩpêx kati htã pa arĩ mē hkõt ixpa ho ixpa. ²⁶ Inhmã Ejit nhõ xwȳnhjē hkõt ixkukrēx rax nē ri ixpa hprãm kēt. Kwār mē mãmrĩ Tĩrtũm

ã tanhmã inhĩpêx to. Koja mē ã inhĩpêx anē pa ixpunuj nē ri ixpa htã koja Tĩrtũm nhȳrmã ixto mex rax nē. Nà kot paj Ejit nhõ pahĩhti hkõt ri ixpa hkēt nē.

Anhȳr jao ra mē pahpyrà nē Kris gryk ã mē hkaga. ²⁷ Tã akupȳm mēõ pika hwȳr Ijaewjē ho mōr kaxyw nhũm Ejit nhõ pahĩhtija tee ri ja hã omu nē kamã gryk tȳx nē. No nhũm Mojesja amnhĩ kaxyw Tĩrtũm kõt hamaxpēr tȳx o hkamnār rom kãm mē uma hkēt nē. Nē mē kēp hkwȳjē kator pa nē ma akupȳm mēõ pika hwȳr amnhĩ kõt mē o pa. Tĩrtũm kamnār rom ã mē kēp mē ho kator anē. Aa kot no ho omunh kēt tã amnhĩ kaxyw kãm hamaxpēr tȳx nē hkamnār rom mē kator nē hamakētkati nē mē o pa. ²⁸ Nē hkamnār rom mē hkĩnh ã arĩgro mē kot kãm “Pas” anhȳr xwȳnhhta ho hkra. Kormã Ejit rũm kator kēt ri. Nē kaxyw amnhĩ kwȳjē mã hã karõ nē mē kãm:

—E pa mē amã Tĩrtũm kapēr jarē ka mē inhma. Nà kot puj xep mē jarãhã ôwēhti hkwy pa nē hkamrõ ru. Nē hkamrõ ho panhõrkwy jakwakre hã pĩ kukõ. Hãmri nē ã kuxõt nē kuku. Koja kamãt nhũm mē kot amnhĩ tomnuj xwȳnhjē pē mē hkra my kot wa piitã mē hpar mã xwȳnhja mō. Hãmri nē mē pamȳ ri mō nē ã mē pahte mē panhõrkwy nhĩpêx anhȳrja ã omu nē tanhmã mē pahkrajē ho hkēt nē. Tĩrtũmja ã mē pahte amnhĩ nhĩpêx anhȳr kaxyw ã inhmã karõ anē. Jakamã e pu mē hkamnār rom ã amnhĩ nhĩpêx anē kē mē pahkrajaja mē pahpē htyk kēt nē. Anē.

Hãmri nē ã mē kot Ejit rũm kator xà hã arĩgrota ã mē hkĩnh o kator kra. Mē hkĩnhja na htem kãm “Pas” anē.

²⁹ Nē Ijaewjaja na prem haxwȳja Ejit rũm kormã Mojes kõt mē pa ri uràk nē amnhĩ kaxyw Tĩrtũm mã hamaxpēr. Jakamã na prem ra gō xujanār pē “Gõ Kamrêk” anhȳr xwȳnhja mȳ ri kuhē nhũm Tĩrtũm mē kãm ho axkjē. Nē mē kãm hkõt ã ho amgrã nhũm mē hã hkamnār rom mex nē rēr pa. No nhũm mē hkõt mē kot mē himex kaxyw mē mrrar xwȳnhjaja. Ejit nhõ pôristijaja nhũm gōja akupȳm mē hã axkamur nē mē himex pa.

³⁰⁻³¹ Nē Ijaew kot Mojes mȳr pē Jojue hkõt pa ri mē uràk nē amnhĩ kaxyw Tĩrtũm kõt hamaxpēr o pa. Na prem ra Tĩrtũm kot

mê kãm pika nhõr xwÿnhhta wÿr pøj nhũm Tirtũm krĩ pē Jeriko hwÿr mē kurē. Mē kot kamã mē pa xwÿnh pē utàr kaxyw mē hwÿr mē kurē. Mēõ krĩ pu hã kahêja kēn tÿx pix o na pre. Nē hprêk rax kumrêx. Nē krĩ nhõ xwÿnhjaja kãm Tirtũm kapēr mar prãm kêt. Hãmri nhũm Tirtũm mē hã Ijaewjê mã amÿnê nē mē kãm:

—E mēõ krĩja kot paj mē amã kugõ nom kêr ka mē inhmar kumrêx. Kêr ka mē apkati mē mē õ krĩ hwÿr mra nē kupu hpÿnh o atã apkati kêp 7 nē rĩ ma akupÿm mra. Anē.

Hãmri nhũm mē kuma nē mar xà hkôt ma Jeriko hwÿr mra. Hãmri nē hwÿr pøj nē Tirtũm kamnàr rom krĩ puhã kahêja kupu hpÿnh o hã apkati kêp 7. Hãmri nhũm apkati pē 7ta ã nhũm kēn tÿx o kahêja mē kêp amnhĩ krakrak nē rôrôk pa. Nhũm mē mra nē hkôt krĩ hwÿr agjê nē krĩ nhõ xwÿnhjê nhĩmex pa. Nom krĩ kamã kuprÿ pē Raapja Ijaew pyrã nē amnhĩ kaxyw Tirtũm mã hamaxpēr o pa jakamã nhũm mē kormã mē himex kaxyw mē hwÿr mör kêt ri amnhĩ kukamã mē hkwÿjaja kot mē hã ukapi ho pa kaxyw mē hwÿr mē kurē. Hãmri nhũm Raapja mē kêp amnhĩ pyrã nē Tirtũm kôt hamaxpēr ã mē omu nē hkwÿ kot mē himex pymaj amnhĩ nhõrkwÿ kamã mē kêp mē ho amũxu nhũm mē hkã hkĩnh pē ma akupÿm hkwÿjê wÿr mō. Jakamã nhũm mē kot mē himex kaxyw mē hwÿr mra hãmri nē amnhĩ pyrã nē tanhmã Raap mē õ fãmii ho hkêt nhũm mē arĩ htĩr nē pa. Mē uràk nē amnhĩ kaxyw Tirtũm kôt hamaxpēr o pa hã omunh xà hkôt tanhmã mē ho hkêt nē.

³² ã na pre mē kot amnhĩ kaxyw Tirtũm kôt mē hamaxpēr xwÿnhjaja Tirtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nē. Mãânēn Giteãw nē Parak nē Sãsõ nē Jepte nē Tawi nē Sãmuew nē Tirtũm nhÿ hã mē kapēr o pa xwÿnhjaja. Jajê piitã na prem wamtajê pyrã nē amnhĩ kaxyw Tirtũm kôt hamaxpēr tÿx rãhã ho pa. Nom kot paj ixprĩ hã tanhmã mē kot hkamnàr rom amnhĩ nhĩpêx to hã mē harēnh kêt nē. Kot pa anē nē tokyx harēnh par kêt nē. Mē ohtõ rax kumrêx jakamã na pa ãm hkwÿ pix jarē nē hã kagã.

³³ Na prem hkwÿjaja Tirtũm kamnàr rom ma mē kot amnhĩ tomnuj xwÿnhjê nhõ krĩ hwÿr mra nē mē kêp mē õ pika pytà. Nē mē hkwÿjaja Tirtũm kamnàr rom mē ho amnhĩptàr mex o pa. Nhũm prem kãm Tirtũm kurê xwÿnhjaja mē hkwÿjê pynê nē ahkrehti kamã mry xoprê hkwÿ nhĩpy mē kurē. Nhũm prem amnhĩ tã mē omu nē amnhĩ kaxyw Tirtũm mã hamaxpēr kurê kumrêx nhũm amnhĩ tã mē omu mē nē te mry jakwa ho pikamÿr tÿx pyrãk o mē hipêx nhũm ãm mē omunh o kuhê nē tanhmã mē ho hkêt nē. ã na prem Tirtũm kamnàr rom amnhĩ nhĩpêx anhÿr o pa.

³⁴ Nhũm mē kot kuwy rax kãm mē hkwÿjê rēnh tã nhũm mē kot amnhĩ kaxyw Tirtũm mã hamaxpēr tÿx nhũm amnhĩ tã mē omu nē mē nē tanhmã kuwy ho nhũm mē hxêt kêt nē. Nhũm pre mē hkwÿjaja wapo ho mē hkamnawÿr o mē hkwÿjê hpar kaxyw nhũm mē amnhĩ kaxyw Tirtũm mã hamaxpēr nhũm amnhĩ tã mē omu nē mē nē tanhmã mē ho nhũm mē amnhĩ rē nē mē umaj hprõt nē ma mra. Mē hihtÿx kêt tã Tirtũm kamnàr rom ÿ hã hihtÿx nē mē kãm mē hkurê xwÿnhjê ho krihkrit pa nhũm mē ma akupÿm hapêx.

³⁵ Nē mēni hkwÿjaja na prem haxwÿja amnhĩ kaxyw Tirtũm mã hamaxpēr tÿx o pa. Jao mē hkrajaja mē kêp htyk tã nhũm prem Tirtũm kamnàr rom mē ho kuwy nhũm mē kuma nē akupÿm mē kãm mē ho htĩr.

ã na prem amnhĩ kaxyw Tirtũm mã hamaxpēr pē mex nē pa anē. No na pre mē hkwÿjaja mē uràk nē amnhĩ kaxyw kãm hamaxpēr tÿx tã nhũm Tirtũm tokyx mē ho mex kêt nē. Na pre mē kãm mē hkurê xwÿnhjaja Tirtũm ã mē par kaxyw. Nē mē hkwÿjaja Tirtũm ã mē hipêx kati ho pa nhũm mē amnhĩ xà htÿx kãm hamak kãm ty. Nhũm mē himex kaxyw nē mē kãm:

—Kwa mē Tirtũm kaga. Kot kaj mē hkaga pa mē amã inhÿre nē mē anhĩmex kêt nē. Anē.

No nhũm mē kuma nē ãm mē kuma nē amnhĩ kaxyw kãm hamaxpēr tÿx pē mē kãm:

—Nà mē kam nē mãmrĩ ixpĩ. Inhmã ixyk puma hkêt. Kot paj ty nhũm Tirtũm

akupÿm ixto ixtîr pa kuri inhmex kumrêx nê ri ixtîr tûm nê ixpa ho ixpa.

Anhÿr o mē kām amnhî jarēnh jakamā hāmri Tîrtûm kaga hkêt rāhā nhûm mē himex.

³⁶ Nê mē kām mē hkurê xwÿnhjaja na prem Kris ā mē hkwÿjê mā hpēr o pikēnh pê mē htak xà ho mē htak rûnh o pa. Nê kàx o mē hkwÿjê hpa hpre nê mē hte hpre nhûm mē kēp prês nê hkrî ho hkrî.

³⁷⁻³⁸ Nhûm prem kēn rûnh o mē hkwÿjê htak o mē kupa. Nê mē hayr o mē hkwÿjê pa. Nê mē hkamnhwÿr o mē hkwÿjê pa. Ā na prem Kris kôt mē hamaxpēr ā mē omunh xà hkôt mē hipêx anhÿr o pa. Jakamā na pre mē hkwÿjaja mē umaj mēō krî rûm hapôj nê ma hprôt nê mra. Nê te mē ô krî hkêt pyrā nê kapôt ā kēp amrakati nê ri pa. Mē ê hkêt nê ôwēhti hkà ho ê nê ri hā pa. Nê motre kà ho amnhî pre nê ri hā pa. Nê kēn prêk ā api nê kre kamā hpimxur o pa. Nê pika hkre kamā hpimxur o pa. Nhûm mē kām mē hkurê xwÿnhjaja te mē kēp ahpunu nê mē kēp ahkro pyrāk o mē hipêx nê axpēn mā mē harēnh o:

—Nà mē mexti hā. Kwa pu mē piitā mē himex paa ri.

Anhÿr o mē harēnh tā nhûm Tîrtûm mē urāk nê ā mē harēnh anhÿr kêt nê. Na pre mē mex kumrêx ā mē harê. Nê nhÿrmā kuri mē mex nê pa ho pa hkukamā mē harê.

³⁹ ā na prem Tîrtûm kamnār rom mē kām mē hkurê xwÿnhjê kutā amnhî to htÿx kām htyk o pa anê. Nhûm Tîrtûm ja hā mē omu nê hkînh nê kām mē hapê htÿx nê. No nhûm mē kormā htîr ri amnhîm Tîrtûm kot mē ho mex xà jamÿnh kêt rāhā ty. ⁴⁰ Tā mo na pre Tîrtûm kormā mē htîr ri hkwÿjê pyrā nê mē ho mex kêt nê? Nà na pre kormā mē hkukamā hamaxpēr o:

—Nà kot paj kormā mē ho mex kêt nê. Kot pa mē mÿr pê mē kot ixkôt amnhî xunhwÿr mā xwÿnhjê jamār grire măn. Kêr pa inhō krî kamā mē ho ixpimràatā mē ho mex rax kumrêx. Nà kot paj ā mē ho mex anê. Ja na kêt inhmā mex o kormā mē htîr ri ixte mē ho mexta jakrenh. Anê.

Ja o ra ā mē papajaja mē pakukamā hamaxpēr anê.

12

Mē pahte Jejus pyrā nê mēmoj kutā amnhî to htÿx ā mē pamā karō

Piripos 3.12-21

¹ Na pre mē pakukamā mē panhîgêt kwÿjaja amnhî kaxyw Tîrtûm mā hamaxpēr pê ā amnhî xà htÿx kamā hamak o pa anê. Tā te ra mē kot kÿj rûm kaxkwa rûm mē pahpumunh nê tanhmā mē pamā kapēr to pyrā nê mē pamā kapēr o:

—E mē inhma mē ixkanrêhā mē ixtāmnhwÿjaja. Na pa prem ā Tîrtûm kamnār rom amnhî nhîpêx o ixpa anê. Mē kot ja hā mē inhîpêx kati htā pa prem Jejus kaga hkêt nê. Tā kêr ka mē ixpyrā nê ā mē kām mē akurê xwÿnhjê kutā amnhî to htÿx anê. Nê mē ixpyrā nê amnhî kaxyw Tîrtûm kôt pix mā ajamaxpēr tÿx rāhā ho ri apa. Anê.

Jakamā kwa kêr pu mē urāk nê ā amnhî nhîpêx anhÿr rāhā ho măn ri papa. Te mē hprôt xwÿnhjaja kot amnhî nhîpêx pyrāk o amnhî nhîpêx. Na htem hprôt tÿx kaxyw mēmoj pytî jamÿnh nê ho hprôt hkêt nê. Na htem ŷ kamā hprôt o hprôt tÿx nê wam hkwÿjê mā wa nê mra. Ja pyrā nê kêr pu mē pahte Tîrtûm kapēr kôt amnhî nhîpêx mex o papa kaxyw tanhmā mē pahte amnhî tomnuj to hā amnhî pumu nê hkaga kurê kumrêx. Mē pahte amnhî tomnuj o papa xāja te mex pyrāk no âm mex kêt. Te ho mē hprôt xwÿnh kot axtem nê mēmoj pytî mÿnh nê tee ri ho hprôt tÿxta pyrāk. Kot puj mē tanhmā amnhî tomnuj to ho papa nê Tîrtûm kapēr kôt amnhî nhîpêx mex kêt nê. Jakamā kwa kêr pu mē Tîrtûm kapēr gryk ā amnhî tomnuj nê amnhî to htÿx rāhā ho papa. Te ho mē hprôt nê nhÿri mē àhuk xà pix kukamā hamaxpēr rāhā hprôt tÿx xwÿnhhta pyrā nê âm Jejus mā pajamaxpēr tÿx rāhā ho papa.

² E kot paj mē amā Jejus kot tanhmā mē panê amnhî nhîpêx toja jarê ka mē inhma. Nà kot mē panê mē pahte amnhî tomnuj pānhā amnhîrer kaxyw htyk nhûm mē pahte hkôt amnhî xunhwÿr jakamā na hte mē pamā pajamaxpēr nyw gō pu mē amnhî kaxyw hkôt pajamaxpēr ho ri papa. Na pre mē kām hkurê xwÿnhjaja kot pî kahpa hā nhôr nê hpîr mā nhûm mē kutā

mê kãm amnhĩ to htỳx nẽ arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tĩrtũm kaga hkêt nẽ. Na pre hamaxpêr o:

—Nà kwâr mẽ mãmri xpi. Kot paj ty nhũm Inhĩpêxà akupỹm ixto ixtĩr pa kuri inhmex kumrêx nẽ ixtĩr tũm nẽ ixpa ho ixpa. Anẽ.

Tã na ra kaxkwa kamã Tĩrtũm xupôk rũm mex nẽ hkrĩ ho hkrĩ. ³ Jakamã kwa kêr pu mẽ kot ã mẽ panê amnhĩ nhĩpêx anhỹrja mã pajamxpêr rãhã ho ri papa. Mẽ kot hipêx kati htã nhũm mẽ kutã amnhĩ to htỳx nẽ xa. Tã kêr pu mẽ uràk nẽ mẽ kãm mẽ pahkurê xwỳnhjê kutã amnhĩ to htỳx rãhã ri papa. Jao tee ri amnhĩ kukamã pajamxpêr o mẽ umaj Tĩrtũm kaga hkêt nẽ.

⁴ Na ka htem ma mẽ kot amnhĩ tomnuj xwỳnhjê hwỳr mra nẽ mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwỳjê nhĩpêxta pyrã nẽ kormã mẽ atõxpĩr kêt nẽ.

Tĩrtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

⁵ Nẽ mãn ka mẽ arĩ Tĩrtũm kapêr ã kagã htũm kwỳ hã ano htỳx japêr. Mẽ pahpê Tĩrtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nẽ mẽ amã kapêr ka mẽ ama nẽ mar tỳx nẽ mẽmojta kaga kurê kumrêx. No mẽ ama nẽ tee ri kot nẽ akurê xwỳnhta kukamã ajamxpêr o ri akapri o axtem nẽ Tĩrtũm kaga hkêt nẽ. Ama nẽ kot amã mẽmoj nẽ kapêr xwỳnhta kaga kurê kumrêx.

⁶ Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nẽ hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anẽ. Anẽ.

⁷ Jakamã kot kaj mẽ tanhmã amnhĩ tomnuj toja myrapê tanhmã apunuj kute nẽ ri apa

htã no ãm tee ri amnhĩ kukamã ajamxpêr hkêt nẽ. Kêt mẽ ãm ajamxpêr o:

—Nà ixte tãm amnhĩ nhĩpêx kaxyw na Tĩrtũm ã inhĩpêx anẽ. Ixpê hkra hã ixte amnhĩ to mex o ixpa prãm xaj ã inhĩpêx anẽ.

Anhỹr o mãn kêt ajamxpêr. Na hte mẽ hipêxà mẽ hkra kot amnhĩ to mex kaxyw ã mẽ hipêx anẽ. Tã Tĩrtũm na hte mẽ uràk nẽ ã mẽ panhĩpêx anẽ. ⁸ No koja mẽhõ hkra kot tanhmã amnhĩ tomnuj to hã omu nẽ ãm omu nẽ hã tanhmã ho hkêt nẽ. Hã koja hkraja te hipêxà hkêt nẽ hã awrãre nẽ ri pa pyrãk. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nẽ hã tanhmã mẽ pahto. Nom mẽ kêp hkra hkêt xwỳnhjaja nhũm hte ja hã mẽ omu nẽ ãm hã mẽ omu nẽ hã kormã tanhmã mẽ hipêx to hkêt nẽ.

⁹ Nẽ na hte mẽ panhĩpêxà mẽmoj tã mẽ pamã karõ pu htem kuma nẽ hkôt amnhĩ nhĩpêx. Ja mex. Nom kaxkwa kamã Mẽpahpãm maatija mẽ pahte mar nẽ hkôt amnhĩ nhĩpêxja na kêt mex kumrêx. Kot puj mẽ ã amnhĩ nhĩpêx anẽ nẽ nhỹrmã kuri pamex nẽ pahĩr tũm nẽ papa ho papa.

¹⁰ Nẽ mẽhprĩre na htem hamaakro nhũm mẽ hipêxà tanhmã hã mẽ ho. Hã mẽ hkaprêprêk rỳ hã mẽ kãm akir. Amnhĩ krã hkôt tanhmã mẽ hipêx to. Mẽ kot ja hã amnhĩ pumunh nẽ axte hkêt kaxyw. Ja mex. Tã mẽ papajaja. Mẽ pahpê Tĩrtũm kra na pu htem tãhã tanhmã amnhĩ tomnuj to nhũm mẽ pahpumu nẽ tanhmã hã mẽ pahto. Mẽ pahte amnhĩ pumunh nẽ axte hkêt kaxyw. Uràk nẽ amnhĩ to mex pix o papa kaxyw. ¹¹ Na hte mẽmoj tã tanhmã mẽ panhĩpêx to pu mẽ tee ri amnhĩ pumu nẽ pahkapri nẽ pahkĩnh kêt nẽ ri papa. Nom kot puj mẽ tokyx tanhmã amnhĩ tomnuj tota kaga nẽ akupỹm Tĩrtũm kôt tãm amnhĩ nhĩpêx o papa nẽ akupỹm pahkĩnh nẽ pajamakêtkati nẽ ri papa.

Mẽ pahte Tĩrtũm kaga hkêt ã mẽ pamã karõ

¹² Jakamã e kwa kêr ka mẽ amnhĩ to htỳx nẽ apa. Mẽ kot Kris ã tanhmã mẽ anhĩpêx to htãã. ãm Tĩrtũm kôt pix mã amnhĩ nhĩpêx mex pê akĩnh nẽ apa. ¹³ Kêr kê Kris kôt atõjê hõ tee ri mẽmoj tã amnhĩ

pumunh kôt ra Tirtûm kaga kaxyw tâ ã mē ate amnhĩ nhĩpêx anhÿr ã mē apumu nē mē apyrà nē akupÿm hkôt amnhĩ xãm tÿx nē hkaga hkêt nē.

¹⁴ Nē kêr ka mē tãm ri axpën nhĩpêx o ri apa. Jao axpën kôt ajamakêtkati nē ri apa nē amnhĩ to mex pix kukamã ajamaxpêr. No kot kaj mē anhÿr kêt nē nhÿrmã mē panhõ Pahi Maati hwÿr axàpir nē kuri amex nē apa hkêt nē.

¹⁵ Na hte Tirtûm mē pahto mex nē mēmoj to mē pakutã nojarêt rãhã o pa. Jakamã kwa kêr ka mē hkaga hkêt nē. Nē tanhmã ri ajamaxpêr punuj to ho ri apa hkêt nē. Kot ka mē ã amnhĩ nhĩpêx anē nhÿm Kris kôt mē pahkwÿjaja ja hã mē apumu nē mē apyrà nē tanhmã amnhĩ tomnuj.

¹⁶ Nē kêr ka mē axpën kãm apijaàm kêt o ri apa hkêt nē. Nē te finat Ejau kot amnhĩ nhĩpêx pyrãk o ri apa hkêt nē. Na pre Tirtûm ã hpijaàm kêt nē hkwyjê kamã hpijaàm kêt o pa. Nē Tirtûm mã hamaxpêr kêt kumrêx. Kêp Ijak kra kot wa jakamã koja nhÿrmã hipêêxà mÿr pê kêp hikukrêx nē ò pika piitã ho àrĩk pa. Hãmri nhÿm hipêêxà kot ho Tirtûm wÿr nhÿm kot ho mex kaxyw mã tâ nhÿm axtem nē mēmo arĩgro hã kãm prãm xaj kot kêp mēmoj to àrĩk mã xwÿnhhta htõ Jako mã hkaga hpa. Mankwÿrtre gôj kãm ãm prãm xaj kãm hkaga hpa. Jakamã nhÿm Jako hpãnhã te kêp Ijak kra kot wa pyrã nē mÿr pê ò mēmoj piitã ho àrĩk mã.

¹⁷ Gaa nhÿm Ejau tee ri ã amnhĩ nhĩpêx anhÿrja mã hamaxpêr o hkaprĩ nē. Nē tee ri kãm Jako kot akupÿm kãm mēmojta nhõr prãm kaprÿ. Nē mur nē hã hipêêxà wÿ no nhÿm axte kãm mēmoj nhõr kêt nē. Nhÿm kot ho Tirtûm wÿr kaxyw tee ri amnhĩ to kuwÿ no nhÿm kuma nē ãm kuma nē kãm ho anhÿr kêt nē.

¹⁸ Nē amnepê mã Tirtûm kot mē panhĩgêxjê mã kapêr kaxyw na prem hixêt prêk pê Sinai jarênhja wÿr akuprõ nē hparpê kuhê. Hãmri nhÿm hixêt nhĩmõk ã kuwy hpõk rax kumrêx. Nē kuwy mÿr ri kakrã htyk ajêt. Nē kôk àpêr tÿx nē. Nhÿm Ijaewjaja hixêt krax ã omu nē kãm maa ho htertet o kuhê. ¹⁹⁻²¹ Hãmri nhÿm mēhõ pifti kakõ nhÿm Tirtûm hixêt nē mē kãm kapêr nē mē kãm:

—E mē inhma. Kêr ka mē hixêt ã axàpir kêt nē. Kot kaj mē atõ hã api rÿ mē akrit ò hã api ka mē ja hã omu nē kaxyw kên rÿnh kwÿ jamÿ nē ho htak o apĩ. Anē.

Hãmri nhÿm mē piitã tee ri kuma nē kãm ma htÿx kumrêx nē amnhĩ nē kãm:

—Kwa hãmri Tirtûm. Axte mē inhmã mēmoj jarênh kêt nē. Mojes pix mã mãn mē ixkaxyw tanhmã kãm akapêr to. Anē.

Jakamã nhÿm Mojes Tirtûm mã amnhĩ jarênh nē kapêr mar kaxyw hixêtja ã api. Kãm ma nē htertet rãhã mõ nē hã api. ²² Nom mē kãm ma ho Tirtûm mã amnhĩ jarênh tâ mē papajaja na pu htem mē kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nē hixêt prêk ã paxàpir kêt nē. Te ra mē pahte ma kaxkwa hwÿr ò krĩ hwÿr paxàpir nē pano ho omunh pê kãm amnhĩ jarênh pyrãk. Ò krĩja mex o mex. Kamã kapêr o mē wrÿk xwÿnhjaja ohtõ o ohtõ. Na htem kamã hkĩnh rãhã ho pa ho pa.

²³ Nē ò krĩ hwÿr na hte hkra xàpir xwÿnhjaja ri pa. Nē mē papajaja na pu htem kãm amnhĩ jarênh kaxyw nē te kaxkwa kamã kuri pakuhê nē kãm amnhĩ jarênh pyrãk o amnhĩ nhĩpêx. Te mē pahpê hkra kot wa pyrãk jakamã mē pamã uma hkêt. Nhÿm pre Tirtûm ra ò kagã kamã mē pakutêp amnhĩm mē panhĩxi hã kagã hpa. Na hte mēmoj piitã hamãr o hkrĩ. Nē krĩja kamã amnepêm kormã Kris kot mē pahwÿr wrÿk kêt ri nhÿm ra amnhĩ kaxyw Tirtûm kôt hamaxpêr mex xwÿnhjaja haxwÿja ra kamã ri pa. Ra Tirtûm kot mē ho hkra jakamã nhÿm mē kuri ri pa ho pa. ²⁴ Nē Jejus haxwÿja kamã pa ho pa. Na pre mē panê htyk nē hkamrõ pikapĩrja o mē pahte amnhĩ tomnuj pãnhã amnhĩre. Jakamã na pu htem hkôt amnhĩ xunhwÿ nhÿm mē pahto hkra pu mē paxãmnhĩx ri Tirtûm mã amnhĩ jarênh nē amnhĩ to hwÿr o papa.

Amnepêm na pre Tirtûm tee ri Kaĩ kot htõ Apew pĩr nē hkamrõ pikapĩrja ã omu nē hamaxpêr o:

—Nà ã kot amnhĩ nhĩpêx anhÿr jakamã kot paj hã homnuj tÿx nē. Anē.

Tã ra hpãnhã Jejus kot mē panê htyk nē hkamrõ pikapĩrja ã omu nē ra axtem hamaxpêr o:

—Nà ãm hãmri na Ixkraja mẽ nê ty. Jakamã mẽ kot hkôt amnhĩ xunhwÿr xwÿnhjaja kot pa Ixkra kukwak ri mẽ kot amnhĩ tomnuj mÿrapê tanhmã mẽ ho hkêt nê.

Anhÿr o mẽ pakukamã hamaxpêr. ã hamaxpêr anhÿrja mex o mex.

²⁵ Na pre Mojes Tirtũm nhÿ hã mẽ panhĩgêxjê mã xatã mẽ kãm Tirtũm kapêr jarênh o ri pa nhũm mẽ kuma nê hkôt amnhĩ nhĩpêx o pa. Tã gaa nê ra hã nohkêt pa nê akupÿm mẽ kot amnhĩ nhĩpêx tũm o awjanã nhũm Tirtũm tee ri ja hã mẽ omu nê mÿrapê tanhmã mẽ hipêx to. Tã nhũm Kraja kaxkwa rũm mẽ pahwÿr wrÿ nê mẽ pamã kapêr. Jakamã kwa mẽ okora kêr pu mẽ panhĩgêjtjê pyrã nê mẽ pahte amnhĩ nhĩpêx tũm o paxujanãr kêt nê. Kot puj mẽ anê nhũm Tirtũm ja hã mẽ pahpumu nê mẽ urak nê ja hã tanhmã mẽ panhĩpêx to.

²⁶ Amnepêm Tirtũm kot hixêt prêk pê Sinai kamã mẽ kãm kapêrja. Na pre kapêr tÿx o pika ho àk nhũm htertet tÿx nê. Tã koja nhÿrmã axte pika ho àk nê kaxkwa ho àk nhũm wa hamê htertet tÿx kumrêx. Koja axte ho anhÿr ho pixi nê axte ho anhÿr kêt nê. ²⁷ Tã nhÿrmã axte mẽmoj to àk ã amnhĩ jarênh jakamã koja mẽmoj to kator xwÿnhnta piitã ho àk. Nê mẽ pahte panhĩkra ho mẽmoj nhĩpêx xwÿnhja nhũm ho àk nhũm htertet tÿx kãm hpigranh pa nê hapêx. Nhũm mẽmoj htertet nê hpi-granh kêt xwÿnh pixjaja arĩ rãhã ho rãhã. ²⁸ No Tirtũm nhõ krĩ koja htertet nê hapêx kêt nê. Nê mẽ papajaja mẽ pahpê hkra jakamã te ra kuri ô krĩ kamã ri mẽ papa pyrak. Jakamã kot puj mẽ mẽ urak nê pajapêx kêt nê. Jakamã e kwa kêr pu mẽ amnhĩ tã Tirtũm mã mex o mex ã harênh nê hã pahpijaãm rãhã ho papa. Nê tanhmã amnhĩ tomnuj to hã amnhĩ pumu nê Tirtũm pumaj mẽmojta kaga kurê kumrêx. ã mẽ pahte amnhĩ nhĩpêx anhÿr o papaja na Tirtũm kãm hprãm. ²⁹ Hihtÿx o hihtÿx jakamã koja mẽmoj tã akamã gryk kot kaj amex kêt o amex kêt.

13

Mẽ pahte Tirtũm kãm hprãm xà hkôt

amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtõ nê ixtõxjaja. Kêr pu mẽ arĩ Kris kôt pahkwÿjê ho mex o mãn axpên kôt ri papa. Nê kêr pu mẽ tanhmã pahpunuj to hã amnhĩ pumunh tã axpên to mex mã panhÿrer kêt nê. ã axpên nhĩpêx anhÿr rãhã ho papa.

² Nê amnepê mã na pre mẽmojaja nhÿhÿnh mra nê mẽ panhĩgêjtjê hõ hwÿr pøj. Hãmri nhũm mẽ omu nê htÿx axtem krĩ hõ nhõ xwÿnh ã mẽ hkamnhĩx tã no nhũm mẽ kêp Tirtũm kapêr o mẽ wrÿk xwÿnh kwÿ na prem. Hãmri nhũm amnhĩ nhõrkwÿ hwÿr mẽ kuwÿ nhũm mẽ ma hkôt mra nê kuri pøj nê kutã apku. Jakamã kwa koja nhÿhÿnh krĩ hõ rũm mẽmojaja ma mẽ awÿr mō ka mẽ omu nê axãmnhĩx amnhĩ nhõrkwÿ hwÿr mẽ hwÿr kurê kumrêx kê mẽ ari pøj. ã mẽ hipêx anhÿr o apa hãmri nê nhÿrmã mẽ panhĩgêjtja pyrã nê amnhĩ wÿr Tirtũm kapêr o mẽ wrÿk xwÿnhjê hõ hwÿr japêr. Mẽ urak nê ja hã mẽ omunh kêt tã atÿx amnhĩ wÿr mẽ awÿ nhũm ja mẽ amã mex o mex.

³ Nê kêr ka mẽ ra mẽ kot Jejus ã mẽ akwÿjê pynênh nê mẽ hagjênh xwÿnhjê mã ajamaxpêr rãhã ho ri apa nê mẽ ho aja-makêtkati hkêt nê. Te mẽ kajaja mẽ ãhkô hã mẽ hagjênh xà kamã apunuj nê akrĩ pyrak o mẽ kãm ajamaxpêr o ri apa. Jao mẽ kamã axukapri ho mẽ hwÿr mra nê mẽ kãm mẽmoj nhõr o ri apa.

⁴ Nê mẽ kot axpên to hprõja na mex. Nom kêr ka mẽ amyjaja ãm aprõ pix tãnopxar o ri apa. Nê mẽ anijaja mẽ ajaxwÿja amjên pix tãnopxar o ri apa. No mẽ hkuprÿjê hwÿr mẽ mrar xwÿnhjaja nê nhãm mẽ kêp mẽ hprõ ho amnhĩkati xwÿnhjaja nê nhãm mẽ kêp mẽ mjên o amnhĩkati xwÿnhjaja koja Tirtũm ja hã mẽ omu nê mẽ homnuj tÿx kumrêx.

⁵⁻⁶ Nê kêr ka mẽ akàxpore rũnh kêt ã amnhĩ pumu nê tee ri amnhĩ kukamã ajamaxpêr o akapri hkêt nê. Na pre Tirtũm mẽ pamã kapêr o:

Kot paj akôt ri ixpa rãhã ho ixpa nê aa arer rÿ akaga hkêt kumrêx.

Anhÿr jakamã kot kaj mẽ akàxpore grire htã akaprĩ nẽ apa hkêt nẽ. Aa Tĩrtũm kot mẽ pahkaga hkêt ã amnhĩ jarẽnh jakamã mẽmoj kot pu wem omu nẽ pamã nhãm ri mẽ uma ho papa? Tĩrtũm kot mẽ pahkõt pa ho pa kênã. Jakamã na pu htem paja-maxpẽr o:

Nà Pahi Maatija ra kot ixkõt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhÿr o pajamaxpẽr o papa. ⁷ Nẽ mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arĩ mẽ kot tanhmã amnhĩ nhĩpêx to ho paja mã ajamaxpẽr rãhã ho ri apa. Na prem Tĩrtũm kapẽr o mẽ ajahkre mex nẽ. Nẽ tãm ri amnhĩ nhĩpêx o ri mẽ akõt pa. Nẽ amnhĩ kaxyw Tĩrtũm kõt pix mã hamaxpẽr rãhã ty. Tã kêt ka mẽ urak nẽ ã amnhĩ nhĩpêx anhÿr o ri apa rãhã ty.

⁸ Nẽ Jejus Krisja arĩ rãhãã. Nẽ amnepê mã kot amnhĩ nhĩpêxja mããnẽn arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

⁹ Nẽ kwa kêt ka mẽ Tĩrtũm kõt amnhĩ nhĩpêx rãhã ho ri apa. Na hte kapẽr o hẽx xwÿnhjaja mẽ awÿr mra nẽ mẽ amã:

—Amnepêm mẽ ate Tĩrtũm kot mẽ amex ã mẽ ajarẽnh kaxyw mẽ ate kãm mẽmo mry nhõr nẽ akupÿm hamÿnh nẽ hkur o apa htã ra ja ho anhÿr kaga. Kwa mẽ ja ho awjanã nẽ axte ã amnhĩ nhĩpêx anhÿr o ri apa. Kê Tĩrtũm ja hã mẽ apumunh kõt mẽ amex ã mẽ ajarẽ.

Anhÿr o mẽ amã kapẽr. Nom xà na hte Tĩrtũm ã mẽ pahte amnhĩ nhĩpêx anhÿr ã mẽ pahpumunh kõt mẽ pamex ã mẽ pajarẽ? Xà na htem mẽmo mẽ apkur xà hkur pẽ amnhĩ kaxyw Jejus kõt hamaxpẽr tÿx o pa? Nà na htem anhÿr kêt nẽ. Na pu htem mẽmoj kur kõt pamã Tĩrtũm kĩnh kêt nẽ. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kõt mẽ pahto paxihtÿx kêt nẽ. ãm Tĩrtũm kot amarĩ kãm mẽ pajapê nẽ mẽmoj to mẽ pakutã nojarêt jakamã na pu htem ja hã amnhĩ pumu nẽ amnhĩ kaxyw hkõt pajamaxpẽr tÿx o papa.

¹⁰ Tĩrtũmja Jejus kot mẽ panê htyk ã omunh xà hkõt ra kot mẽ pamex ã mẽ

pajarẽnh jakamã mo kaxyw kot pu mẽ axte kot mẽ pamex ã mẽ pajarẽnh kaxyw kãm mẽmo mry gõ nẽ hkwy hku? Koja mẽhõ akupÿm Tĩrtũm kapẽr tũm o ujanãr jao Jejus kot nẽ htyk nẽ hkamrõ pikapĩrja kaga.

¹¹ Amnepêm na pre patre maatijaja tõhã mẽ kãm mẽmo mry hpar xwÿnh hkamrõ ru nẽ guhkrax kãm kuru nẽ hamÿ nẽ ma o mra nẽ Tĩrtũm nhõrkwÿ kaakre hwÿr hitom maati hwÿr ho agjê. Tĩrtũm kot mẽ omunh nẽ axte mẽ kot amnhĩ tomnuj mã hamaxpẽr kêt kaxyw. Hãmri nhũm hpãnhã ï mÿ nẽ krĩ pẽ ho kato nẽ ma o mra nẽ nhÿri amÿm hkwyjê hkàx ã ho hxêt pa. Tĩrtũm kapẽr tũm kõt na prem ã amnhĩ nhĩpêx anhÿr o pa. ¹² Tã ja pyrã nẽ na prem ma krĩ pẽ amÿm Jejus o tẽ nẽ kupĩ nhũm hkamrõ axkapĩ. Kot mẽ pahte amnhĩ tomnuj pãnhã amnhĩrer nẽ mẽ pahto mẽ pahpê Tĩrtũm kra kaxyw ã htyk nẽ hkamrõ pikapĩr anẽ.

¹³ Na prem Tĩrtũm kapẽr tũm gryk ã Jejus kaga nẽ pòristijê mã anẽ nhũm mẽ ma krĩ pẽ ho kato nẽ o tẽ nẽ kupĩ. Tã kêt pu mẽ jajê rom Jejus gryk ã mãn Tĩrtũm kapẽr tũm kaga. Kwãr mẽ mãmrĩ Jejus pyrã nẽ Tĩrtũm ã tanhmã mẽ pahto nẽ amnhĩ nẽ nhÿhÿm mẽ pajano. ¹⁴ Kêt jar mẽ papapxàja kêp mẽ papapxà kumrẽx kêt. Nẽ jar mẽ panhõ krĩja kêp mẽ panhõ krĩ kumrẽx kêt. Mẽ pamã te kot pô nhĩrõnh o ixkre pix pyrãk. No kêt mẽ panhõ krĩ kumrẽx koja jar mẽ panhõ krĩ rom aa hapêx kêt nẽ. Tã tãm na pu mẽ kormã ma hwÿr papa kaxyw arĩ amnhĩ tã Tĩrtũm jamãr o papa.

¹⁵ Nẽ na htem Ijaew arĩ ohtõ nẽ amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhÿr hkêt nẽ. Kot puj mẽ ãm Jejus kukwak ri Tĩrtũm mã mex o mex ã harẽnh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

¹⁶ Nẽ kêt pu mẽ arĩ axpẽn to mex o ri axpẽn kõt papa. Nẽ kê mẽhõ kêp amrakati japêr ka ja hã omu nẽ amnhĩ kutã kãm anhõ mẽmoj kwÿ. ã kot puj mẽ axpẽn nhĩpêx anhÿr rãhã ho ri axpẽn kõt papa. Kot puj mẽ anẽ nẽ te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhÿrja na mex o mex.

¹⁷ Nẽ kêt ka mẽ Kris kõt mẽ akrãhtũmjê

kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamâr o ri mẽ akôt pa. Koja mẽ nhỹrmã mẽ kot tanhmã mẽ anhiĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

¹⁸ Nê kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêr. ãm inhmã amnhĩ to mex pix o ri ixpa hprãm.

¹⁹ Nê kêr ka mẽ ixto awỳkê tokyx akupỹm mẽ awỳr inhmê. Na pa ra inhmã mẽ apumunh prãm tỳx nê.

Kagà nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13, 5.23; Sikũn Tesarõn 1.11-12, 2.16-17

²⁰ Nê mẽ panhõ Pahihti Jejus Krisja na hte mẽ panhiĩpêx o te ôwêhti jamâr xwỳnh kot hkrit jamâr pyrak o pa. Jakamã kêp mẽ pajamâr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỹm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwỳnh na. ²¹ Tã na pa hte tanhmã mẽ ato hwỳr to ho ixpa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xã hkôt pix mã war amã tanhmã ri amnhĩ nhĩpêx to ho pa. Anê.

E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xã kamã mẽmoj jarênh

²² E Kris kôt ixkràmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêr nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

²³ Nê mãn ka mẽ ra Ximotre jarênh mar japêr. Na pre Kris ã mẽ hagjênh xã kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mỗ nê hpõx japêr kot paj ma amnhĩ kôt mẽ awỳr o mỗ ka mẽ omu.

²⁴ Nê kêr ka mẽ kot Kris mã mẽ ajamâr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

²⁵ E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre Xiakre kot Jejus kôt hkwýjê piitã hwýr kagà nê mēnh

Xiakre na pre kagàja nhîpêx. Kêp Jejus tō nê kêp Jerujarê kamã mē kot Jejus kôt amnhî xunhwýr xwýnhjê nhō pastô na pre. Nê kêp Ijaew. Jakamã na pre hkwýjê mã kagàja nhîpêx nê krî piitã hkôt uràk nê Jejus kôt mē kot amnhî xunhwýr xwýnhjê hwýr kurê. Jejus ã mē kãm mē hkurê xwýnhjaja na prem mē hipêx kati nhũm mē amnhî xà htýx kamã hamak o pa. Jakamã nhũm Xiakre kot mē hamaxpêr o mē hihtýx kaxyw kagàja nhîpêx nê mē hwýr kurê nê mē kãm:

¹ Pa ixkwýjaja. Xà mē amex? E ixpê Xiakre na pa. Ixte Tirtũm mē Pahihti Jejus Kris wa kãm tanhmã amnhî nhîpêx to xwýnh na pa. Jakamã kot paj kagàja nhîpêx nê pika piitã hkôt mē apiitã mē awýr kurê. Mē apê Tirtũm krajê hwýr.

Mē pahpunuj tã mē pahte amnhî kaxyw Tirtũm kôt pajamaxpêr

Rukre 6.20-23; Rõmãn 5.3-5; Korosê 1.11; Wam Pêtre 4.12-19

²⁻³ E ixkwýjaja. Kêr ka mē atō tanhmã amnhî to rý tanhmã apunuj to. Rý mēhō tanhmã Jejus ã mē anhîpêx to. Tã kêr ka mē ja hã amnhî pumu nê tee ri amnhî kukamã ajamaxpêr o ri akaprî hkêt nê. Arî akĩnh kãm amnhî kaxyw Tirtũm kôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê rî mēmoj punuj pê Jejus kôt amnhî xunhwýr týx nê. Jakamã kwa kêr ka mē tanhmã apunuj to hã amnhî pumu nê ã mē ate amnhî nhîpêx anhýrja kukamã ajamaxpêr pê akĩnh nê ri apa.

⁴ Nom kêr ka mē tee ri tanhmã apunuj to hã amnhî pumu nê akaprî xà Tirtũm kaga hkêt nê. ãm amnhî kaxyw hkôt ajamaxpêr týx rãhã ho ri apa. Kot kaj mē ã amnhî nhîpêx anê nê gaa nê Tirtũm noo mã tãm amnhî nhîpêx mex o ri apa. Nê kãm hprãm xà hkôt pix mã amnhî nhîpêx o apa.

Mē pahte tanhmã amnhî kute hã amnhî pumunh kôt amnhî to Tirtũm wýr ã mē pamã karõ

Matêwre 21.18-22

⁵ Nê kêr ka mē mēmoj mýrapê tanhmã apunuj to hãmri nê tee ri ja hã amã Tirtũm mã ajamaxpêr týx prãm nhũm apê ja hihtýx japêr. Rý mēmoj tanhmã apê amnhî nhîpêx to ka tee ri hkukamã ajamaxpêr japêr. Kêr ka mē ã ajamaxpêr anhýr japêr hãmri nê amnhî to Tirtũm wýr kurê kumrêx. Kot amã ajamaxpêr mex nhõr nhũm ate ý hã tãm ajamaxpêr kaxyw amnhî to awý. Kot kaj mē ã amnhî to hwýr anê nhũm amnhî tã mē ama nê mēmojta kutã tanhmã ato axihtýx to kurê kumrêx ka ý hã hkôt ajamaxpêr týx mex o ri apa. Jao tanhmã akute htã akĩnh nê ajamakêtkati nê ri apa. Kojã Tirtũm tee ri amã mēmoj kôt ajamaxpêr týx prãm kaprý hã apumu nê hã amã àkjêr kêt nê. Kojã ate amnhî to hwýrta ma nê tanhmã ato mex to. ⁶ Nom kêr ka mē amnhî to hwýr kãm tee ri amnhî kukamã ajamaxpêr kati hkêt nê. Rý ajamaxpêr o:

—Koonên. Kojã apu Tirtũm inhmã ja ho anhýr japêr.

Anhýr o tee ri amnhî kukamã ajamaxpêr kati hkêt nê. ãm akĩnh kãm tanhmã ate amnhî to hwýr toja kukamã ajamaxpêr o:

—Nã kojã inhmã ho anê. Ixte amnhî kaxyw kãm ijamaxpêr nê amnhî to hwýr xà hkôt kojã inhmã tanhmã amnhî nhîpêx to.

Anhýr o hkamnàr rom ã amnhî kukamã ajamaxpêr anê.

Nom kot kaj mē tanhmã amnhî to hwýr to nê tee ri amnhî kukamã ajamaxpêr kati nê hkôt ajamaxpêr týx kêt nê. Nê te kôk nhãm àpêr nê nhãm àpêrta pyrã nê nhãm ri ajamaxpêr nê nhãm ri ajamaxpêrja o hkôt ajamaxpêr kêt nê. Kot kaj mē ã amnhî nhîpêx anê nhũm Tirtũm tee ri ja hã mē apumu nhũm ja kãm mex kêt nê. ⁷⁻⁸ ã mē hamaxpêr anhýr xwýnhjaja na htem nhãm hamaxpêr nê nhãm hamaxpêr jao hamaxpêr mex kêt nê. Jakamã kot kaj mē ã ajamaxpêr anhýr o amnhî to Tirtũm wý hãmri nê ãm amnhî to hwýr kaprý. Kojã ama nê ãm ama. Nom kot kaj mē tanhmã akute hã amnhî kaxyw hkôt ajamaxpêr týx pê amnhî to awý. Nê tee ri amnhî kukamã ajamaxpêr kati hkêt kãm tanhmã amnhî to hwýr to nhũm amnhî tã ama nê hkĩnh nê tanhmã amã mēmoj nhîpêx to. Mē ate hã

axàhwÿr xà hkôt tanhmã mẽ amã mẽmoj nhĩpêx to.

Mẽ kêp amrakati xwÿnh mẽ mẽ kot amnhĩ to rÿnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mẽ akàxpore hkêt xwÿnhjaja. Jar mẽ apê amrakati htã mẽ apê Tĩrtũm kra na ka mẽ. Jakamã kêr ka mẽ akàxpore rÿnh kêt tã mẽ apê Tĩrtũm kra hã amnhĩ pumunh kôt ajamakêtkati nê nê akĩnh nê apa.

¹⁰⁻¹¹ Nê mẽ akàxpore rÿnh xwÿnhjaja. Mẽ akàxpore rÿnh nê mẽ akukrêx rÿnh tã kot kaj mẽ nhÿrmã ty nê piitã rer pa nê mẽ kêp amrakati xwÿnhjê pyrã nê anhÿ kamã Tĩrtũm kuri akrĩ nhũm tanhmã mẽ ajarênh to. Te mẽ apê mẽmo pixôrà kot amnhĩ nhĩpêx pyrãk. Na hte kwÿhtã axpên pê axpôt nê muxre nê mex nê harir. Tã gaa nê rĩ hã myt xàhpanh mẽ nhũm ra nhôôre. Nê gaa nê ra grã pa nê rôrôk nê hapêx. Tã kot kaj mẽ nhÿrmã uràk nê ty nê akukrêx rer pa. Jakamã kwa kêr ka mẽ akàxpore rÿnh pumunh kôt akĩnh nê ri apa hkêt nê. Kêt ãm mẽ apê Tĩrtũm kra hã mãn amnhĩ pumunh kôt akĩnh nê apa.

Mẽ pahpunuj kôt pagryk nê mẽ pahkurê

¹² Nê kot kaj mẽ atô tanhmã apunuj to htã arĩ amnhĩ kaxyw Tĩrtũm mã ajamaxpêr tÿx rãhã ho ri apa. No tanhmã apunuj to hã amnhĩ pumu nê hkaga hkêt nê. Rÿ kot tanhmã ato xwÿnhhta kêr ka mẽ amnhĩ tã kamã agryk nê tanhmã ho hkêt nê. ãm Jesus kôt pix mã amnhĩ nhĩpêx rãhã ho ri apa. Kêr kê Tĩrtũm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atĩr tũm nê apa ho apa. Ra kot mẽ pakukamã mẽ pahtã amnhĩ jarênh xà hkôt. Jakamã kêr ka mẽ tanhmã apunuj to htã ã amnhĩ kukamã ajamaxpêr anhÿr pê akĩnh nê apa.

¹³ Nê Tĩrtũm aa kãm tanhmã amnhĩ tomnuj to hprãm kêt. Nê mẽ papajaja mẽ pahte tanhmã amnhĩ tomnuj to kaxyw na hte mẽ pamã tanhmã ãmnênh to rÿ mẽ pamã mẽ pajamaxpêr punuj jagjênh kêt nê. Jakamã kot ka mẽ atô amã tanhmã amnhĩ tomnuj to hprãm tã kwa kêr ka Tĩrtũm tãm kot ja kaxyw mẽ akrãm mẽ ajamaxpêr punuj jagjênh to hã hkamnhĩx

kêt nê. ¹⁴⁻¹⁵ Mẽ papamjaja na pu htem pajamaxpêr punuj xà hkôt tanhmã amnhĩ tomnuj to. No Tĩrtũm Karô na hte mẽ pamã mẽ pajamaxpêr punuj jagjênh kêt nê. Mẽ papamjaja na pu htem pajamaxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhÿr rãhã ho ri papa. Mẽ kot amnhĩ tomnuj o mẽ pa xwÿnhjaja koja mẽ nhÿrmã ty hãmri nê Tĩrtũm mẽ Kra wa kuri htĩr tũm nê pa ho pa hkêt nê.

Tĩrtũm kot tanhmã mẽ pahto mex to hã harênh

Xiakre 3.17-18; Sikũn Pêtre 1.3-4

¹⁶ Nê e ixkwÿjaja. Tĩrtũm kot mẽ pahte amnhĩ tomnuj prãm xà mẽ pamã mẽ pajamaxpêr punuj jagjênh kêt jakamã kwa kêr ka mẽ ã ajamaxpêr anhÿr kêt nê. ¹⁷ Na hte mẽ pahto mex pix o pa. Na pre myyti ho katô. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhũm mẽ pamã hirã mex o harir. Na hte mytwrÿre tôhã hirã mex o pa. Nê gaa nê nyw kaxyw nê kamàt kô. Nê gaa nê nyw mẽ nhũm akupÿm hirã. ã na hte amnhĩ nhĩpêx anhÿr o pa. No Tĩrtũmja ã kot anhÿr kêt. Kot amnhĩ nhĩpêxja ãm rãhã ho rãhã. Na hte mẽ pahto mex pix o pa. No tôhã tanhmã mẽ pahto mex to nhũm jãã nhũm tanhmã mẽ pahtomnuj to hkêt nê. ¹⁸ Tã kapêr pix o kot ã mẽmoj to kator kot anhÿr. Nê mẽ pamã kapêr o amnhĩrĩt. Kãm mẽ pahto hkra hprãm xà mẽ pamã Jesus kot tanhmã mẽ panê amnhĩ nhĩpêx toja nhũm pre mẽ pamã ho amnhĩrĩt. Na pu prem kuma nê hkôt amnhĩ xunhwÿ nhũm amnhĩ tã mẽ pahpumu nê mẽ pahto hkra. Mẽ pahpê Ijaew kumrêxjaja na pre mẽ pahto hkra.

Mẽ pagryk o papa nê mẽ pahkurê

Rômãn 12.17-21; Epes 4.25-5.2

¹⁹ E ixkwÿjaja. Kwa mẽ ixkapêr ma nê hã anohtÿx nê ho apa. Koja mẽhõ Tĩrtũm kapêr o mẽ ajahkre kaxyw mẽ awÿr mõi nê mẽ amã kapêr jarê ka mẽ mar tÿx nê. Koja mẽ ate tanhmã amnhĩ tomnuj to nê mẽ amã kapêr ka mẽ amnhĩ tã ama nê kamã agryk kêt nê. ²⁰ Mẽ gryk o mẽ pa xwÿnhjaja na htem Tĩrtũm kapêr kôt ri amnhĩ nhĩpêx kêt nê. ²¹ Jakamã kwa kêr ka mẽ axte

amnhĩ tomnuj rý ajamaxpêr punuj o ri apa hkêt nê. Na htem ohtô nê ã amnhĩ nhĩpêx anhÿr o pa nom kêr ka mẽ kurom Tĩrtũm kapêr mãn amnhĩ krã him haxàr tỳx nê. Kapêr o mẽ ajahkre xwỳnhjaja na htem ho mẽ ajahkre mex o pa. Tã kêr ka mẽ ama nê amã hkôt amnhĩ nhĩpêx prãm rãhã ho ri apa. Na pu htem Tĩrtũm kapêr ma nê hkôt amnhĩ nhĩpêx o papa hãmri nê nhÿrmã Tĩrtũm mẽ Kra wa kuri pahtĩr tũm nê pa mex nê papa ho papa.

Mẽ pahte Tĩrtũm kapêr kôt amnhĩ nhĩpêx ã mẽ pamã karõ

Matêwre 7.24-27; Wam Juãw 2.3-6

²² Nê kwa mẽ okora. Kêr ka mẽ ãm Tĩrtũm kapêr ma nê ãm mar kêt nê. Mãânên hkôt amnhĩ nhĩpêx rãhã ho ri apa. Kot kaj mẽ ama nê ãm ama nê hkôt amnhĩ nhĩpêx kêt nê hãmri nê apê Tĩrtũm kra hã amnhĩ jarênh kaprÿ. Jao nhÿrmã Tĩrtũm mẽ Kra wa kuri atĩr tũm nê apa hkêt nê. ²³⁻²⁴ Te ho mēhõ kot amnhĩ pumunh xà hpyr nê kamã amnhĩ pumunh nê amnhĩ krã hkĩ jaê rý amnhĩ kuk tyk pumunh pyrãk. Tã te kot ãm ja hã amnhĩ pumunh nê kot amnhĩ to mex kêt rãhã akupÿm amnhĩ pumunh xà xir nê ma htēm nê axte amnhĩ kuk tyk rý amnhĩ krã kĩ jaërta mã hamaxpêr kêt pyrãk. Mẽ kot Tĩrtũm kapêr mar nê ãm mar nê hkôt amnhĩ nhĩpêx kêt xwỳnhjaja te kot ja jarênh pyrãk. ²⁵ Tã kêr ka mẽ ã amnhĩ nhĩpêx anhÿr kêt nê. Mẽ ate Tĩrtũm kapêr kôt amnhĩ nhĩpêx o apa kaxyw xatã kamã harê nê mar tỳx o apa. Jao hkôt amnhĩ nhĩpêx mex o apa. Tĩrtũm kot mẽ pahte tanhmã amnhĩ nhĩpêx to ho papa hã mẽ pamã karõ xàja ãm hãmri na. Na htem hkôt amnhĩ nhĩpêx nhũm Tĩrtũm ja hã mẽ omu nê mẽ ho mex nê nhũm mẽ àmnhĩx hamakêtkati nê hkôt amnhĩ nhĩpêx o pa. ²⁶ Nom koja mēhõ kêp Tĩrtũm kra hã amnhĩ jarênh tã htỳx ri kapêr punuj o ri pa hãmri nê ãm kêp hkra hã amnhĩ jarênh kaprÿ. Mẽ pahpê Tĩrtũm krajaja na pu htem ã pakapêr anhÿr kêt nê. ²⁷ Axtem mẽ pahte amnhĩ nhĩpêx. Na pu htem mẽ hã awrã rý mẽ kêp mẽ mjên tyk xwỳnhjê ho mex nê mẽ hã pahpêr o pahpikênh o papa hkêt nê. Nê tanhmã mẽ kute hã mẽ omu nê mẽ ho ajuta ho papa. Æ na pu htem pahpê Tĩrtũm krajaja amnhĩ

nhĩpêx anhÿr o papa nhũm Mẽpanhĩpêêxà Maati Tĩrtũm ja hã mẽ pahpumu nê hkĩnh nê. No na pu htem mẽ kot amnhĩ tomnuj o mẽ pa xwỳnhjê hkôt ri amnhĩ nhĩpêx kêt nê ãm Tĩrtũm kapêr xà kôt pix mã amnhĩ nhĩpêx nhũm amnhĩ tã mẽ pahpumu nê hkĩnh nê.

2

Mẽ pahte mẽ piitã mẽ hipêx o axpên pyrãk ã mẽ pamã karõ

Rômãn 2.11; Korosê 3.25

¹ E ixkwỳjaja. Pahihti Jejus Krisja mex o mex. Tã ra mẽ ate hkôt amnhĩ xunhwÿr jakamã kwa kêr ka mẽ apê hkwy hã mẽ piitã tãm mẽ hipêx o apa. Nê mẽ hipêx o axpên pyrãk. ² Jakamã kot kaj mẽ nhÿrmã Tĩrtũm kapêr mar kaxyw axpên wÿr akuprõ nhũm hikàxpore rax xwỳnhhta mẽ akôt axà. ê mex nê ôr o ìhkra kamã kàx hãmri nê mẽ akôt axà. Nhũm hkôt mēhõ pê amrakati xwỳnhja tē nê axà. Nom wamta kĩnhã kêp amrakati nê ê omnajti nê pikaxônhti. Hãmri nê hikàxpore rax xwỳnhhta hkôt mẽ awÿr tēn axà. ³ Tã tanhmã kot kaj wem ri wa hipêx to? Xà kot kaj mẽ wa hipêx o axpên pyrãk nà? Nà xà kot kaj mẽ ã wa hipêx anê nê wam àr xwỳnhhta ê mex ã omunh xà hkôt kãm kadêre hõ gõ nê kãm:

—E ota kadêre. Mãmrĩ hã nhÿ. Anê.

Hãmri nê ê pynajti xwỳnhhta pumu nê axtem nê kãm:

—E atar pikap nhÿ.

Anhÿr o ahpÿnhã wa kãm akapêr? ⁴ Kot kaj mẽ ahpÿnhã ã wa hipêx anê nê amnhĩ tomnuj nê. Wam àr xwỳnhhta ka kãm akapêr mex nê tanhmã ho mex to. No hkôt hõta omnajti hã omunh xà hkôt te kamã anhõkre kahak pyrãk o hipêx. Kot kaj mẽ ã ahpÿnhã wa hipêx anê nhũm Tĩrtũm tee ri ja hã mẽ apumu nhũm ja kêp omnuj nê. ⁵ Kwa mẽ inhma ixkwỳjaja. Mẽ kêp amrakati xwỳnhjaja mẽ hikàxpore hkêt tã na hte mẽ hkwyjaja amnhĩ kaxyw Tĩrtũm kôt hamaxpêr nê hkôt amnhĩ xunhwÿ nhũm amnhĩ tã mẽ omu nê kot mẽ panhĩpêx pyrã nê mẽ ho hkra. Jakamã jar mẽ kêp amrakati htã na htem amnhĩ kaxyw Tĩrtũm kôt hamaxpêr tỳx rãhã ho pa. Jakamã koja mẽ nhÿrmã kuri htĩr tũm nê mex kumrêx

nē pa ho pa. Mē kām Tirtūm kīnh o mē pa xwýnh piitā koja mē nhýrmā ā mex nē ri pa anē. ⁶ Nom kot kaj mē ahpýnhā mē hipêx nē amnhī tomnuj nē. E pa mēmoj tā mē akukja. Mēmojaja na htem tanhmā mē ato hêx to? Nē mēmojaja na htem juisti mā tanhmā mē ato kapēr punuj to? Xà mē kēp amrakati xwýnhjaja? Nà mē tām kêt. Mē hikàxpore rūnh xwýnhjaja na htem ā mē anhīpêx anhýr o pa. ⁷ Nē ra mē ate hkôt amnhī xunhwýr xwýnhja nhūm mē axtem nē tanhmā mē apê ho kapēr to ho pa. Tā ka htem mē kēp amrakati xwýnhjê rom mē kām akapēr mex nē mē kām kadêre mex gō nhūm mē hā hkrī. ⁸ Tirtūm kapēr ā kagā htūm kot ja jarēnh kot:

Kêr ka mē piitā mē hipêx o te ka amā amnhī tā ma pyrāk. Anē.

Ā kot mē pamā karō kot anhýr. Kapērja mex kumrêx. Kot puj mē ā axpēn nhīpêx anhýr jao Tirtūm kām hprām xà hkôt amnhī nhīpêx mex nē. ⁹ Nom kot puj mē ā amnhī nhīpêx anhýr kêt nē ahpýnhā tanhmā mē hikàxpore rūnh xwýnhjê ho mex to nē ahpýnhā tanhmā mē kēp amrakati xwýnhjê nhīpêx to japêr. Hā kot puj mē Tirtūm kapēr htūmta nhīrôp pakuhê nē amnhī tomnuj nē. ¹⁰ Kot pu mē kapēr tūm piitā hkôt ri amnhī nhīpêx mex o ri papa htā ām pixire nē hirôp pakuhê. Jao te pahte kapēr piitā hirôp pakuhê pyrāk. ¹¹ Na pre Tirtūm mē pahte mē pahprō pix tănopxar o papa hā mē pamā karō. Nē mē pamjên pix tănopxar o papa hā mē pamā karō. Nē mē pahte axpēn par nē mē pahkurê. Jakamā kot puj mē pahprō pix tănopxar mex o ri papa japêr. Nē mē pamjên pix tănopxar mex o ri papa japêr tā tanhmā pajamexpēr to nē pahkwýjê hōxpī. Jao te Tirtūm kapēr tūm piitā hirôp pakuhê hpar pyrāk o amnhī nhīpêx.

¹²⁻¹³ Koja nhýrmā Tirtūm mē pahtír ri tanhmā axpēn nhīpêx to ho papa hā mē pahpumunh kôt tanhmā mē pajarēnh to. Mē pamā axpēn kīnh ā axpēn to mex o papa hā mē pahpumunh kôt mē pajarē rý mē pamā axpēn kīnh kêt ā axpēn nhīpêx o papa hā mē pahpumunh kôt mē pajarē. Jakamā mē kamā mē ukaprī kêt xwýnhjaja koja nhýrmā ja hā mē omu nē mē urāk nē

mē kamā ukaprī hkêt nē. Nom mē kamā mē ukaprī ho mē pa xwýnhjaja koja ja hā mē omu nē mē urāk nē mē kamā ukaprī nē mē nē mē kot amnhī tomnuj piitā rēnh pa. Jakamā kwa kêr ka mē amnhī to mex nē tām axpēn nhīpêx o ri axpēn kôt apa. Nē axpēn mā akapēr mex nē axpēn kamā axukaprī pix kukamā ajamexpēr o apa.

Amnhī kaxyw Tirtūm kôt mē hamexpēr xwýnhjê jarēnh

Rukre 3.8-14

¹⁴ Nē kwa ixkwýjaja. Koja mēhō kot amnhī kaxyw Jejus kôt hamexpēr nē hkôt amnhī xām ā amnhī jarēnh tā hkôt ri amnhī nhīpêx kêt nē. Hā koja nhýrmā ty hāmri nē tanhmā kot we amnhī to nē Tirtūm mē Jejus wa kuri htír tūm nē pa ho pa? Nà koja anhýr kêt nē. Kēp hkra hā amnhī jarēnh tā hkôt amnhī nhīpêx kêt jakamā koja nhýrmā wa hwýr àpir kêt nē.

¹⁵ Nē xà koja mēhō kēp amrakati nē ri pa. Nē ê pynajre pix jagjê nē ri hā pa. Nē ô hkêt nē ri kām prām nē pa. ¹⁶ Ka mē ja hā omu nē tanhmā kām akapēr to nē kām:

—Kwa ā amnhī nhīpêx anhýr kêt nē. Anhōrkwy hwýr tēn axê mex japêr nē axà nē amnhīm mēmoj japêr nē aku. Koja Tirtūm ato mex rax nē.

Anhýr o kām akapēr tā kām mēmoj nhōr kêt nē. Tā xà koja we ama nē amar xà hkôt ê mex jagjê nē apkur mex o ri pa? Nà kot ka mē ā kām akapēr anē nē ho ajuta hkêt nē nhūm arī kām prām nē ê hkêt nē omnuj nē ri pa. Na htem mē kapēr pix o mē ho mex kêt nē. Kot kaj mē ā kām akapēr anē nē ām kām mēmoj tā karō kaprý. ¹⁷ Ja pyrà nē koja mēhō ra amnhī kaxyw Jejus kôt hamexpēr nē hkôt amnhī xām ā amnhī jarēnh tā kapēr kôt ri amnhī nhīpêx kêt japêr. Hā koja ām kēp hkra hā amnhī jarēnh kaprý.

¹⁸ Nē kot kaj mē atō ā ajamexpēr anē nē ajamexpēr o:

—Nà Jejus kwýjaja na htem ahpýnhā tanhmā amnhī nhīpêx to ho pa. Na hte mē hkwyjaja amnhī kaxyw Jejus kôt hamexpēr tỳx pix o ri pa. Nē mē hkwyjaja tanhmā hkwyjê ho mex to ho ri pa. Ā na htem ahpýnhā tanhmā amnhī nhīpêx anhýr to ho pa. Anē.

Kwa mẽ ri ã ajamaxpër anhÿr kêt nê. Mẽ hkwÿjê ho mex o mẽ pa xwÿnhjaja na htem Tirtũm hkôt hamaxpër pẽ mãânẽn hkôt amnhĩ nhĩpêx nê hkwÿjê ho mex o pa. Koja mẽhõ amnhĩ kaxyw Jejus kôt hamaxpër hã koja mãânẽn hkôt amnhĩ nhĩpêx pẽ tanhmã hkwÿjê ho mex to ho pa. Na htem amnhĩ kaxyw hkôt hamaxpër pix o pa hkêt nê. Na htem mãânẽn hkôt mẽ piitã mẽ ho mex o ri pa.

¹⁹ Na ka hte mẽ akwÿjaja ã ajamaxpër anê nê ajamaxpër o:

—Nà Tirtũmja pyxi mex o pyxi mex. Tã kot paj jam ijamaxpër rãhã ho ri ixpa nê ra ixpê hkra hã ri ixpa. Nom kot paj kapër kôt amnhĩ nhĩpêx o ri ixpa hkêt nê.

Anhÿr o ajamaxpër nê ã ajamaxpër anhÿr kaprÿ.

Nê ãm hãmri na ka htem Tirtũm pyxi mex o pyxi mex ã harê. Nom na htem jam hamaxpër kôt pix mã kêp hkra hkêt nê. Mẽkarõmnutijaja na htem haxwÿja Tirtũm pyxi mex o pyxi mex kôt hamaxpër tã mẽ kêp hkra hkêt. Na htem ã hamaxpër anhÿr pẽ kãm uma ho pa. ²⁰ ã mẽ ajamaxpër anhÿrja mex kêt. Koja mẽhõ amnhĩ kaxyw Tirtũm kôt hamaxpër ã amnhĩ jarênh tã hkôt amnhĩ nhĩpêx o pa hkêt japêr. Hãmri nê ãm amnhĩ kaxyw hkôt hamaxpër ã amnhĩ jarênh hkaprÿ. E kot paj ixprĩ hã mẽ amã ja jarê ka mẽ inhma. ²¹ Mẽ panhigêt finat Apraãw na pre amnhĩ kaxyw Tirtũm mã hamaxpër nê hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwÿ nhũm kuma nê ra kot kãm hpĩr nê õr kaxyw nhũm Tirtũm amnhĩ tã omu nê amnhĩm mex ã harê. Hãmri nê kot hkra hpĩr nê kãm kapêr. ²² Ra kot amnhĩ kaxyw hkôt hamaxpër nê hkôt amnhĩ xãm jakamã mãânẽn hkôt amnhĩ nhĩpêx nê ra kot kãm hkra nhõr kaxyw Tirtũm amnhĩ tã omu nê amnhĩm mex ã harê. Na pre ã finat Apraãw Tirtũm kapêr kôt amnhĩ nhĩpêx mex anhÿr o pa. Jao amnhĩ kaxyw hkôt hamaxpër mex ã amnhĩ to amnhĩrĩt.

²³ Nê kormã Apraãw wa hkra hkêt ri nhũm Tirtũm wa kãm hkra jarê nhũm kuma nê hkra hkukamã amnhĩ kaxyw Tirtũm kôt hamaxpër tÿx o pa nhũm amnhĩ tã omu nê

mex ã harê. Nê kêp hkrãmnhwÿ hã harê. Kapêr ã kagà htũm kot ja jarênh kot:

Na pre Apraãw hkra hkukamã amnhĩ kaxyw Tirtũm kôt hamaxpër tÿx nhũm amnhĩ tã omu nê amnhĩm mex ã harê. Anê.

²⁴ ã na pre finat Apraãwja hkra kaxyw Tirtũm kôt hamaxpër anhÿrja o ra hkôt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkôt hamaxpër pix nê hkôt amnhĩ nhĩpêx kêt ronhÿx pre Tirtũm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tirtũm mã hamaxpër nê mãânẽn hkôt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. ²⁵ Mẽhõ ni kuprÿ finat Raapja na pre ã amnhĩ nhĩpêx anê nê amnhĩ kaxyw Tirtũm kôt hamaxpër pẽ tanhmã hkôt amnhĩ nhĩpêx to ho pa. Na pre Ijaew myja wa hamêxkrut nê ma Raap nhõ krĩ hwÿr wa tẽ. Mẽ hã ukapi nê kot mẽ hkurê kaxàr kaxyw mẽ hwÿr wa tẽ. Hãmri nhũm Raap Tirtũm kot wa mênh ã wa omunh kurê kumrêx nê pôristi kot tanhmã wa ho pymaj amnhĩ nhõrkwÿ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkôt akupÿm wa kumê nhũm wa hkà hkĩnh pẽ ma akupÿm mex nê tẽ. Hãmri nhũm Tirtũm wa hã Raap pumu nê amnhĩm mex ã harê.

²⁶ Tã kot kaj mẽ atõ amnhĩ kaxyw Tirtũm kôt ajamaxpër ã amnhĩ jarênh tã hkôt amnhĩ nhĩpêx kêt japêr. Hãmri nê apê hkra hã amnhĩ jarênh kaprÿ. Te ra mẽhõ htyk nê nõr tã nhũm mẽ kot arĩ htĩr ã harênh kaprÿta pyræk.

3

Mẽ kot Tirtũm kapêr o mẽ ahkre xwÿnhjê jarênh

¹ Nê kwa Kris kôt ixkwÿjaja. Mẽ axohtõ nê mẽ amã Tirtũm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tirtũm kapêr o mẽ ajahkre xwÿnhjaja kot paj mẽ tanhmã amnhĩ tomnuj to japêr nhũm Tirtũm ja hã mẽ ixpumu nhũm ja kêp omnuj nê. Mẽ ixte kapêr o mẽ ajahkre ho mẽ ixpa kênã kot pa hkêt mẽ ri tanhmã amnhĩ tomnuj to ho ri

ixpa. Jakamã kot kaj mẽ Tĩrtũm kapẽr piitã hkõt ri amnhĩ nhĩpêx mex mẽ rĩ kormã ho akwỳjê jahkre ho ri apa.

² Nẽ mẽ pahpiitã na pu htem tõhã mẽ pajakwa ho tanhmã amnhĩ tomnuj to. Mẽmoj tã axpẽn kãm pagryk mẽ tanhmã mẽ kãm pakapẽr punuj to. Nom koja mẽhõ tanhmã kapẽr punuj toja nẽ amnhĩ to htỳx mẽ hãmri mẽ tãm amnhĩ nhĩpêx o pa.

Mẽ pajakwa jarẽnh
Epes 4.29

³ Na htem nhỹhỹm kawar o juk kaxyw hakwam kax jagjê mẽ kãm nhỹhỹm o htẽm prãm xà hkõt ma nhỹhỹm ho juk o tẽ. Kàxja hkryre nhũm kawar rũnh tã no nhũm kãm ma nhỹhỹm ho mrar prãm xà hkõt ho juk o mra.

⁴ Nẽ gô xujanãr kãm pàr rũnh ta rũnh tã na hte kòk àpêr tỳx mẽ ma nhỹhỹm o pa. Nẽ pĩ ho pàr o juk xàta hkryre htã ma nhỹhỹm ho juk o mõi. Nhỹhỹm pàr o mrar xwỳnh kãm o mõi prãm xà hkõt o mõi.

⁵ Ja pyrã mẽ mẽ pajakwaja hkryre htã na htem ho kapẽr o tanhmã mẽ hipêx to ho pa. Tõhã ho kapẽr mex mẽ nhũm mẽ kuma mẽ hkĩnh mẽ. Nẽ tõhã ho kapẽr punuj mẽ nhũm mẽ tee ri mẽ kapẽr ã mẽ kuma mẽ hkaprĩ mẽ rỳ kapẽr xwỳnh ta kamã gryk mẽ. Mẽ pajakwa hkryreja te kot kuwy jakrax kryre pyrãk. Kot ka kuwy jakrax grire ho tẽ mẽ nhỹri põtĩ kamã amẽ nhũm kòk ho apê nhũm hpòk rax tokyx anẽ. Hãmri mẽ ma pà ho hkaxàr par o mõi mẽ ho hkaxàr pa. ⁶ Mẽ pajakwaja mã kot anhỹr. Kot kaj atỳx ri tanhmã ho akapẽr punuj to nhũm mẽ ama mẽ axpẽn mã anhĩxi ho krĩ nhĩpêx ka amex kêt mẽ apa. Rỳ ka atỳx ri ajakwa ho tanhmã akwỳjê ho akapẽr to nhũm mẽ tee ri amnhĩ tã ama mẽ hkaprĩ mẽ rỳ akamã gryk mẽ. Satanasti nhỹ hã na htem ã mẽ hakwa ho kapẽr punuj anẽ.

⁷ Na htem tõhã mẽmo mry xoprê pynê mẽ tanhmã ho mẽ ra ho kãm ma hkêt. Kagã rỳ hagrõre rỳ àati rỳ gõx kãm mẽmo mryja nhũm htem unê mẽ tanhmã ho nhũm kãm ma hkêt mẽ mẽ hkõt pa ho pa. Nom na htem mry piitã ã hipêx anhỹr kêt mẽ. ⁸ Tã mẽ pajakwa te mẽ kot tee ri mẽmo mry ho kãm ma hkêt kaprỳ xwỳnh ta pyrãk. Na pu htem amnhĩ krã hkõt pajakwa ho

pakapẽr mex pix kêt mẽ. Tanhmã kot puj mẽ pakapẽr punuj kêt kaxyw amnhĩ jakwa hto? Mẽ pakapẽr punuj te kot kagã xoprê kot mẽ hkamnhar mẽ õ wenẽn o mẽ hparta pyrãk. ⁹⁻¹⁰ Na pu htem tõhã pajakwa ho tãm pakapẽr mẽ tõhã pakapẽr punuj mẽ. Nẽ tõhã Pahi Maati Tĩrtũm mã mex o mex ã harẽn tã ra axtem mẽ tanhmã mẽhõ japrỳ hto. Tĩrtũm kot mẽ pahto amnhĩ pyrã mẽ mẽ panhĩpêx tã pu htem axtem mẽ tanhmã axpẽn japrỳ hto ho ri papa. Jao te pahte Tĩrtũm japrỳ pyrãk. Kwa ixkwỳjaja. Kêr pu mẽ pahpê Tĩrtũm krajaja ã pakapẽr punuj anhỹr hkêt mẽ. ãm mẽ pajakwa ho mẽmoj mex pix jarẽnh o ri papa.

¹¹⁻¹² Xà koja pà kamã hinore pyxi htã kamã gô xành mẽ mããnẽn kamã gô xenh nõkati? Nà koja anhỹr kêt mẽ. Na hte kamã gô mex pix mẽ rỳ kamã gô xenh nõkati pix mẽ.

Nẽ xà koja jàaxõ hpàr ã rãrãj harir? Rỳ ahkrõ xô hã mánkwrýtire harir? Nà na hte ahpỹnhã hpàr ã harir. Ja pyrã mẽ kêr pu mẽ pahpê Tĩrtũm krajaja pajakwa ho pakapẽr punuj pẽ ho papikamỳr tỳx mẽ. Nẽ te hinore kamã gô mex pixta pyrã mẽ ãmoj mex pix jarẽnh o ri papa. No mẽ pajakwa nhĩkjê ho tãm pakapẽr mẽ hikjê ho pakapẽr punuj kêt mẽ. ãm pakapẽr mex pix o pakapẽr o ri papa. Kwa kêr pu mẽ ã amnhĩ nhĩpêx anhỹr rãhã ho papa.

Tĩrtũm kòt mẽ àhpumunh xwỳnhjê jarẽnh
Wam Korĩt 2.6-16

¹³ Nẽ kwa mẽ axàhpumunh tỳx xwỳnhjaja kêr ka mẽ amnhĩ to mex o ri apa. Nẽ mẽ piitã tãm mẽ hipêx mex mẽ mẽ amã axpẽn japê hã axpẽn to ajuta mex o ri apa. Tĩrtũm kapẽr xà hkõt. Kot kaj mẽ ã amnhĩ nhĩpêx anẽ mẽ axàhpumunh mex ã amnhĩ to amnhĩrit. ¹⁴ Nom kot ka mẽ mẽmoj tã axpẽn kamã agryk o ri apa. Rỳ amnhĩ pix kukamã ajamaxpêr o ri apa hãmri mẽ ãm ate Tĩrtũm kapẽr kòt amnhĩ nhĩpêx ã amnhĩ jarẽnh kaprỳ. ¹⁵ ã mẽ kot amnhĩ nhĩpêx anhỹr xwỳnhjaja na htem Tĩrtũm kòt amnhĩ nhĩpêx kêt mẽ. Mẽ kệp Tĩrtũm kra hkêt xwỳnh pixjaja na htem ã amnhĩ nhĩpêx anhỹr o pa. Jao mẽkarõmnuti kot amnhĩ nhĩpêx kòt pix mã amnhĩ nhĩpêx o pa. ¹⁶ Axpẽn kamã mẽ gryk o mẽ pa xwỳnhjaja

na htem amnhĩ pix kukamã hamaxpër jao tanhmã amnhĩ tomnuj to ho pa. Nẽ amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhĩpêx anhỹr pumaj kwa kêr pu mẽ mẽmoj tã axpên kamã pagryk o ri papa hkêt nẽ. ¹⁷ Mẽ kot Tĩrtũm kôt amnhĩ nhĩpêx xwỳnhjaja na htem jajê rom tãm axpên nhĩpêx rãhã o pa.

Nẽ axpên kamã ukaprí pix o ri axpên kôt pa.

Nẽ tãm hamaxpër o pa.

Nẽ mẽ piitã mẽ hipêx o axpên pyræk.

Nẽ axpên tã hpijaãm o ri pa.

Nẽ tanhmã ri axpên no kupyri to hkêt nẽ.

Nẽ ri oprê ho pa hkêt nẽ.

Nẽ mẽ axpên kamã ôkre kahak kêt nẽ.

Nẽ mẽ piitã mẽ ho mex o axpên pyræk.

Nẽ tãm mẽ piitã mẽ hipêx rãhã nẽ.

Ã na htem Tĩrtũm kôt mẽ kot amnhĩ nhĩpêx xwỳnhjaja amnhĩ nhĩpêx anhỹr o pa. ¹⁸ Kot puj mẽ ã amnhĩ nhĩpêx anẽ nẽ pajamakêtkati nẽ paxãmnhĩx pahkĩnh nẽ ri papa. Nhũm nhỹri mẽhõ wa axpên kãm gryk pu mẽ wa omu rỳ wa harênh ma hãmri nẽ mẽ pahtõ ma wa hwỳr tẽ nẽ wa kãm pakapër nẽ tãm akupỹm wa ãm. Hãmri nhũm wa ra mẽ pahpyrà nẽ tãm amnhĩ nhĩpêx pẽ hamakêtkati nẽ wa ri pa. ãmnhĩx ri hkĩnh nẽ wa ri pa.

4

Mẽ kot amnhĩ pix kukamã mẽ hamaxpër xwỳnhjê jarênh

Matêwre 20.20-28; Juãw 16.24

¹ Nẽ kwa mon ka hte mẽ akwỳjaja axpên mã akapër mã agêt o axpên kãm agryk pix o apa? Na ka htem ã amnhĩ nhĩpêx anhỹr o amnhĩ pix kukamã ajamaxpër. Nẽ mẽ amã amnhĩ jamaxpër kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nẽ. ² Na ka htem nhỹri mẽmoj pumu nẽ tee ri ho amã anhõ hprãm kaprỳ. Nẽ amã ho anhõ hprãm xaj õ xwỳnhta pĩr nẽ kêp utàr mã.

Nẽ na ka htem tanhmã axpên kukrêx kute hã omu nẽ amã ho anhõ hprãm nẽ hã õ xwỳnhta mẽ wa axpu. No mẽ amã hprãm xwỳnhta mẽ ate hõ hã Tĩrtũm wỳr ronhỹx ra mẽ ama nẽ mẽ amã hõ gõ. Tã mẽ ate hã

axàhwỳr kêt jakamã nhũm mẽ amã õr kêt nẽ.

³ Rỳ ka mẽ tõiã mẽmoj tã awỳ nhũm kot mẽ amar tã mẽ amã õr kêt nẽ. Kot mẽ amã õr nhũm mẽ ate ho anhõxỳ ho apa pymaj na hte tõiã mẽ amã mẽ ate hã axàhwỳr xwỳnhta nhõr kêt nẽ.

⁴ Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nẽ mẽ kãm hprãm kêt xwỳnhjê hkôt amnhĩ nhĩpêx o ri apa nẽ mẽ uræk nẽ tanhmã amnhĩ tomnuj to ho ri apa. Nẽ mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrit.

⁵ Tĩrtũm kapër ã kagà htũm kot tanhmã Karõ jarênh to nẽ harênh kot:

Na pre Tĩrtũm mẽ pahwỳr amnhĩ Karõ rẽ nhũm mẽ pahwỳr wrỳ nẽ mẽ pakamã agjê nẽ mẽ pahkôt pa ho pa. Mẽ pahte hkôt pix mã amnhĩ nhĩpêx o papaja na kãm hprãm. Anẽ.

Ãm hãmri ã harênh kot anhỹr jakamã kwa kêr ka mẽ harênh ma nẽ kãm ajamaxpër tỳx rãhã ho ri apa.

⁶ Na hte Tĩrtũm mẽmoj to mẽ pakutã nojarêt rãhã pu mẽ ý hã tãm amnhĩ nhĩpêx o ri papa. Kapër ã kagà kot ja jarênh kot:

Mẽ kãm Tĩrtũm kôt amnhĩ nhĩpêx prãm kêt xwỳnhjaja na hte Tĩrtũm amnhĩ tã mẽ omu nẽ mẽ kutã amnhĩ xunhwỳ.

No mẽ kãm hkôt ri amnhĩ nhĩpêx prãm xwỳnhjaja na hte amnhĩ tã mẽ omu nẽ mẽ ho mex o pa nhũm htem hitỳx xà nhỹ hã mẽ kãm hprãm kêt xwỳnhjê hkôt ri amnhĩ nhĩpêx kêt nẽ. Anẽ.

⁷ Jakamã kwa kêr ka mẽ Tĩrtũm kapër kôt pix mã mãn ri amnhĩ nhĩpêx o ri apa. Kêr kê Satanasti tanhmã mẽ ate amnhĩ tomnuj to hprãm xaj tanhmã mẽ ato ka mẽ Tĩrtũm Karõ nhỹ hã ãm ama nẽ hkôt amnhĩ nhĩpêx kêt nẽ. Nhũm tee ri amã àhkrox kaprỳ nẽ akaga nẽ ma tẽ.

⁸ Nẽ kot kaj mẽ Tĩrtũm kapër kôt pix mã ri amnhĩ nhĩpêx o apa nhũm amnhĩ tã mẽ apumu nẽ te kot mẽ apa hã mẽ ajamỳnh nẽ mẽ ato pa pyræk o mẽ anhĩpêx. Jao mẽ ato mex o ri mẽ akôt pa ho pa. Nẽ mẽ atãnopxar rãhã ka mẽ ajamakêtkati nẽ akĩnh nẽ ri apa.

Ně kêr ka mẽ tanhmã amnhĩ tomnuj to hãmri nẽ tee ri ja hã amnhĩ pumu nẽ hkaga kurê kumrêx nẽ axte ã amnhĩ nhĩpêx anhÿr kêt nẽ. Rÿ ka mẽ tanhmã ajamaxpêr punuj to hãmri nẽ ja hã amnhĩ pumu nẽ hkaga nẽ hpãnhã tãm ajamaxpêr pix o ri apa. Mẽ apê Tĩrtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ
Wam Juãw 1.5-10

⁹ Nẽ kêr ka mẽ tee ri ate tanhmã amnhĩ tomnuj to hã amnhĩ pumu nẽ akapřĩ xàj mur nẽ akĩnh kêt nẽ. Nẽ akapřĩ xàj amÿr rax nẽ. ¹⁰ Hãmri nẽ Tĩrtũm mã amnhĩ jarênh o:

—Pa Tĩrtũm. Na pa ã amnhĩ tomnuj anẽ. Nom kot paj axte hkêt nẽ. ãm inhmã akapêr kôt pix mã ri amnhĩ nhĩpêx prãm.

Anhÿr o kãm akapêr kê mẽ ama nẽ mẽ ate amnhĩ tomnujta ã tanhmã mẽ ato hkêt nẽ. ãm mẽ ato mex nẽ ka mẽ akupÿm ajamakêtkati nẽ axãmnhĩx akĩnh nẽ ri apa.

Mẽ pahte axpên to pakapêr nẽ mẽ pahkurê

Matêwre 7.1-5; Rõmãn 2.1-3, 14.10-13; Wam Korit 4.5

¹¹ E ixkwÿjaja. Kwa kêr ka mẽ anhĩõ kot tanhmã amnhĩ tomnuj to hã omu nẽ tanhmã ho akapêr punuj to hkêt nẽ. Tĩrtũm kapêr ã kagã htũm kot ja nẽ mẽ pahkurê kamã hihtÿx jakamã kot ka mẽ ri ã amnhĩ nhĩpêx anẽ nẽ te ate Tĩrtũm kapêr tũm kwÿ omnuj ã harênh pyrãk. Rÿ te axãhpumunh tÿx o ate Tĩrtũm jakrenh ã amnhĩ to jarkrar pyrãk. Jao kapêr kôt amnhĩ nhĩpêx kêt nẽ. Na htem Tĩrtũm kapêr ã kagã htũm kwÿ mex ã harẽ nẽ hkwy omnuj ã harênh kêt nẽ. Piitã mex kênã.

¹² Nẽ Tĩrtũmja tapxipix na kêp mẽ pahto amnhĩptãr xwÿnh maati. Nẽ tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwÿnh ã mẽ pajarẽ rÿ mẽ pahte amnhĩ tomnuj xwÿnh ã mẽ pajarẽ. ãm tapxipix kot ã mẽ pajarênh kot anhÿr xwÿnh. Tã ka mẽ axtem nẽ kapêr kwÿm ri tanhmã akwÿjê ho akapêr punuj to ho ri apa.

Mẽ pahte Tĩrtũm mã pajamaxpêr pê kãm amnhĩ jarênh ã mẽ pamã karõ

Rukre 12.13-21

¹³ E kwa mẽ inhma ixkwÿjaja. Na ka hte mẽ akwÿjaja tanhmã amnhĩ kukamã ajamaxpêr to nẽ akwÿjê mã amnhĩ jarênh o:

—Koja apkati pa ma krĩ hõ hwÿr mõi nẽ kamã mẽ kãm ixãpênh o ixpa hã ixtã amgrã pyxi nẽ hpãnhã kãxpore jamÿnh rax nẽ man akupÿn mõi.

Anhÿr o amnhĩ jarê. ¹⁴ Kwa mẽ ã amnhĩ kukamã amnhĩ jarênh anhÿr kêt nẽ. Mẽ pahtõ mẽ pahte amnhĩ kukamã paxãhpumunh mex? Amrakati kênã. Kot ka mẽ ã amnhĩ kukamã amnhĩ jarênh anhÿr tã kormã ã amnhĩ nhĩpêx anhÿr kêt ri tanhmã amnhĩ to nẽ ty. Rÿ tanhmã amnhĩ to nẽ axã hãmri nẽ nhÿhÿm amõi kêt nẽ. Te mẽ pahpê namê pyrãk na pu htem ri papa nẽ tanhmã amnhĩ to nẽ ty nẽ pajapêx tokyx anẽ. ¹⁵ Jakamã mẽ ã amnhĩ kukamã amnhĩ jarênh anhÿr kêt nẽ. Kêt amnhĩ jarênh o:

—Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhÿr o Tĩrtũm kamnãr o tanhmã amnhĩ kukamã amnhĩ jarênh to. ¹⁶ No mẽ ate amnhĩ krã hkôt amnhĩ kukamã amnhĩ jarênh ta Tĩrtũm jamaxpêr xã hkôt kêt. ãm amnhĩ krã hkôt mẽ ate amnhĩ kukamã amnhĩ jarênh kênã. ã mẽ ate amnhĩ jarênh anhÿrja mex kêt.

¹⁷ Nẽ mẽ kot tãm amnhĩ nhĩpêxja kot kaj mẽ ate mar mex tã hkôt amnhĩ nhĩpêx kêt japêr hãmri nẽ amnhĩ tomnuj o apa.

5

Mẽ hikãxpore rũnh xwÿnhjê jarênh

Rukre 12.13-21; Wam Ximotre 6.9-10; Apokarip 18.14

¹ Nẽ kwa mẽ akãxpore rũnh xwÿnhjaja. Mẽ inhma nẽ inhmar tÿx nẽ. Nhÿrmã mẽ amex kêt jakamã kwa mẽ tee ri amnhĩ kukamã ajamaxpêr o ra akapřĩ nẽ amÿr o apa kurê kumrêx. ² Tĩrtũm noo mã mẽ akãxpore te ra mẽ apê hapêx par pyrãk. Te ra mẽ anhÿ kamã mẽ ate amnhĩ tomnuj xwÿnh ã kutã akrĩ pyrãk. ³ Mẽ ate mẽ akukrêx nẽ mẽ akãxpore ho apikuprõnh rũnh tã ka htem mẽ akwÿjê pê ho anhõxÿ ho ri apa. Mÿrapê koja nhÿrmã tanhmã mẽ apê amnhĩ to nẽ

omnu pa ka mẽ ho apikuprõnh rax kapry. Hãmri nẽ mẽ ate amnhĩ tomnuj mýrapê Tirtũm mẽ Kra wa kuri atĩr tũm nẽ apa ho apa hkêt nẽ. 3 ãm kuwy kamã mẽ amnhĩ xà htỳx kamã ajamak rãhã ho ri apa. 4 Na ka htem apur kãm mẽ àpênh xwỳnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tirtũm xihtỳx xwỳnhhta wỳr o pa nhũm mẽ atã mẽ kuma. 5 Mẽ akĩnhã mẽ kêp amrakati htã ka htem ãm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamaxpêr. Nẽ amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê mỗx htwỳm nhũm mẽ kot hpĩr nẽ hkrêr mã mex ã harênh xwỳnhhta pyrãk. Mýrapê kot kaj mẽ mỗxta pyrã nẽ nhỹrmã ty hãmri nẽ Tirtũm mẽ Kra wa kuri atĩr tũm nẽ apa ho apa hkêt nẽ. 6 Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwỳjê ho axêx to ho ri apa. Mẽ kot tanhmã atomnuj to hkêt tã ka mẽ kãm mẽ ho axêx rũnh nẽ. Tã koja nhỹrmã Tirtũm mẽ hã tanhmã mẽ ato rax kumrêx ka mẽ rĩ amnhĩ pumu.

Mẽ pahte Jesus kutêp amnhĩ kaxyw kãm pajamaxpêr o papa hã mẽ pamã karõ

Sikũn Pêtre 3.1-13

7 E ixkwỳjaja. Koja mẽhõ tanhmã mẽ atomnuj to htã ka mẽ arĩ amnhĩ kaxyw Jesus mã ajamaxpêr rãhã ho ri apa. Pê akupỳn hpỗx xà hã arĩgro jamãr rãhã nẽ. Te pur nhõ dõn kot amnhĩ nhĩpêx pyrãk. Koja hpur kãm ahkre nẽ ahkre hpa hãmri nẽ arĩ hamãr o pa nẽ kãm nojarêr kêt nẽ hã na wrỳk jamãr o pa. Jao hamakêtkati nẽ ô jamãr rãhã ho pa. 8 Tã kêr ka mẽ urãk nẽ arĩ Pahihti akupỳn hpỗx xà hã arĩgro jamãr rãhã ho ri apa. Koja tokyx akupỳn mẽ pahwỳr wrỳ. Jakamã kêr ka mẽ kutêp mẽ kot mẽ atomnuj xwỳnhjê kutã amnhĩ to htỳx nẽ ri apa. Nom tee ri amnhĩ kukamã ajamaxpêr o Jesus kaga hkêt nẽ. Arĩ hamãr pê akĩnh nẽ ajamakêtkati nẽ ri apa. Koja akupỳn mẽ pahwỳr wrỳ nẽ mẽ pahto mex rax kumrêx.

9 Nẽ kêr ka mẽ axpênh to akapêr o ri apa hkêt nẽ. Kot ka mẽ ã amnhĩ nhĩpêx anê nhũm Tirtũm mẽ ama nẽ tanhmã mẽ ajarênh to. Kot mẽ pahpumunh xà hkôt

tanhmã mẽ pajarênh to xwỳnh na. Tã ra tanhmã kot mẽ pahpiitã mẽ pajarênh to xà hã arĩgroja ra ahtêp o mỗ.

10 E ixkwỳjaja. Kêr ka mẽ wam mẽ kot Tirtũm nhỹ hã kapêr jarênh xwỳnhjaja kot amnhĩ nhĩpêx mã ajamaxpêr rãhã nẽ. Na prem Tirtũm nhỹ hã mẽ kãm kapêr o ri mẽ hkôt pa nhũm mẽ hkwỳjaja ja hã tanhmã mẽ hipêx to nhũm mẽ amnhĩ xà htỳx kamã hamak rãhã ho pa. Tã tee ri amnhĩ kukamã hamaxpêr pê Tirtũm kaga hkêt nẽ. Na prem arĩ ã hã kapêr jarênh rãhã ho ri mẽ hkôt pa. Tã kêr ka mẽ kot amnhĩ nhĩpêx pyrãk o amnhĩ nhĩpêx nẽ Tirtũm kaga hkêt nẽ. 11 Na prem amnhĩ xà htỳx kamã hamak o pa rãhã ty hãmri nẽ Tirtũm kuri mex nẽ hkĩnh nẽ pa ho pa. Ra mẽ ate finat Johti jarênh mar mex. Na pre omnuj tỳx nẽ pa htã amnhĩ tã Pahi Maati Tirtũm kamã gryk nẽ hkaga hkêt nẽ. Hãmri nhũm amnhĩ tã omu nẽ gaa nẽ ho mex rax nẽ nhũm akupỳm mex kumrêx nẽ pa. Pahi Maatija ukaprĩ ho ukaprĩ nẽ mex o mex jakamã na pre ã Johti ho mex anê. Tã koja ho mexta pyrã nẽ ã mẽ pahto mex anê.

Mẽ pahte tanhmã amnhĩ nhĩpêx to hã mẽ pamã karõ

Matêwre 5.33-37, 18.15; Rõmãn 12.15; Karatas 6.1-2; Jutre 22-23

12 E ixkwỳjaja. Pa mẽ amã mẽmoj jarê ka mẽ inhma nẽ inhmar tỳx nẽ. Kêr ka mẽ mẽmoj tã amnhĩ jarênh kaxyw hãmri nẽ akatãt kôt amnhĩ jarênh kurê kumrêx. Nẽ amnhĩ jarênh o: “Nã kot paj ja ho anê.” Anê. Rỳ amnhĩ jarênh o: “Nã kwarĩ pa ja ho anhỹr kêt nẽ.” Anhỹr o amnhĩ jarênh kurê kumrêx. Kê mẽ akwỳjaja ãm hãmri mẽ ate amnhĩ jarênh ã mẽ apumunh kurê kumrêx nẽ axêx ã mẽ akamnhĩx kêt nẽ. Mẽ apê Tirtũm kra kênã kot ka kêt mẽ ri axtem nẽ amnhĩ jarênh o axêx.

13 Nẽ koja mẽ anhõ mẽmoj tã tanhmã amnhĩ to nẽ omnuj nẽ. Ka mẽ ja hã omu nẽ kãm anê kê amnhĩ kaxyw Tirtũm mã hamaxpêr pê amnhĩ to hwỳr rãhã ho pa. Rỳ koja hkĩnh nẽ ri pa ka mẽ ja hã omu nẽ kãm anê kê hkĩnh kãm mex o mex ã grer o pa. 14 Rỳ koja à nẽ nõ ka mẽ ja hã omu nẽ kãm anê kê amnhĩ wỳr pastõ nhỹ hã mẽ kapêr xwỳnh kwyjê hã karõ. Kê mẽ hwỳr

mra nê Jejus nhÿ hã mêmō twÿm kwÿ ho hkukō nê ho Tirtũm wÿ. ¹⁵ Kê mē ã mē à xwÿnhjê hwÿr mrar nê mē ho Tirtũm wÿr o pa anê. Koja mē ho kuwÿ nhũm mē kuma nê akupÿm mē ho mex. Nhũm mē tanhmã amnhĩ tomnuj to japêr kê mē ja hã amnhĩ jarê kê Tirtũm mē kuma nê ja hã tanhmã mē ho hkêr nê. ¹⁶ Jakamã kêr ka mē atō tanhmã amnhĩ tomnuj to nê tee ri ja hã amnhĩ pumu hãmri nê tokyx akwÿjê mã amnhĩ jarê kê mē tokyx ato Tirtũm wÿ. Kê atã mē kuma nê tanhmã akrã hto ka axte ã amnhĩ nhÿpêx anhÿr kêr nê. Nê ra amex nê apa.

Nê koja mēhō Tirtũm kôt pix mã amnhĩ nhÿpêx mex rãhã ho pa. Hãmri nê mēmoj tã kuwÿ nhũm kuma nê kãm tanhmã mēmoj to. ¹⁷ Te finat Eris kot mēmoj tã hwÿr nhũm kot mar nê kãm ho anhÿrta pyrãk. Erisja kêp mē panhĩō na pre. Tã na pre hkwyjaja amnhĩ tomnuj pix o pa nhũm tee ri mē omu nê mē hã na wrÿk kêr kaxyw ho Tirtũm wÿr kãm hihtÿx nê. Hãmri nhũm kuma nê kãm ho anê nhũm na wrÿk kêr ry rax kumrêx. Hã amgrã axkrunêpxi nê hkôt mytwrÿ kêp 6. Mē kot amnhĩ tomnuj tÿx o paja mÿrapê. ¹⁸ Tã nhũm Eris axte mē ho kuwÿ nhũm axte mē hwÿr na rē nhũm akupÿm katat kôt wrÿk mex nê. Nhũm akupÿm mē hpur kãm mē ôja mē kãm mex nê akupÿm mē kãm ô rÿnh nê. Tã ã Tirtũm kot Eris mar nê kãm mēmoj nhÿpêx anhÿrja pyrã nê koja mē pama nê mē pamã mēmoj tanhmã ho.

¹⁹ Nê e mē inhma ixkwÿjaja. Koja mēhō Tirtũm kapêr mar tÿx nê te kêp hkra pyrãk o amnhĩ nhÿpêx. Tã tanhmã hamaxpêr to nê kapêr kaga nê htÿx ri amnhĩ tomnuj pix o pa. Ka mē ja hã omu nê hwÿr mra nê kot amnhĩ tomnuj nê kãm akapêr kãm axihtÿx kê tokyx hkaga nê akupÿm Tirtũm kôt amnhĩ xãm tÿx nê ãm hkôt pix mã amnhĩ nhÿpêx. ²⁰ Koja amnhĩ tã mē ama nê Tirtũm kôt amnhĩ xãm tÿx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kôt kurê nhũm nhÿrmã kuri hÿr tũm nê mex nê pa ho pa. Koja amnhĩ tomnuj tÿx o pa htã hkaga hpa nhũm Tirtũm ja hã omu nê hã tanhmã ho hkêr nê axte tanhmã kot amnhĩ tomnuj tota mã hamaxpêr kêr nê.

Tã ãm ja pix. Ixpê Xiakre na pa ã mē awÿr

kagã nhÿpêx nê mēnh anê.

Wam Pêtre Simãw Pêtre kot Jejus kôt hkwÿjê hwÿr kagà nê mênh

Simãw Pêtre na pre kagàja nhîpêx. Kêp tep pynênh o pa xwÿnh tâ hpânã kêp Jejus nhÿ hã hkrajê jahkre ho pa xwÿnh. Nê krî pê Jerujarê kamã kêp Jejus krajê nhõ pastô. Na pre krî piitã hkôt Jejus ã mē kãm mē hkurê xwÿnhjaja tanhmã hã mē hipêx to nhũm Pêtre mē harênh ma nê mē hamaxpêr o hihtÿx kaxyw mē kãm kagàja nhîpêx nê krî piitã hkôt mē hwÿr kurê. Mē kot kamã harênh nê mar nê amnhî kamã kahak kêt nê arî Tirtũm kôt amnhî nhîpêx mex o pa kaxyw. Nê Jejus ã mē kot amnhî xà htÿx kamã hamak tâ nhÿrmã kaxkwa kamã mex nê pa ho pa hã mē kãm awjarê. Æ mē kãm mēmoj jarê nê hã kagà anê. Nê mē kãm:

¹ Pa mē ate Jejus kôt amnhî xunhwÿr nhũm Tirtũm kot mē ato hkra xwÿnhjaja. Xà mē amex? Ot pa mē awÿr kagà nhîpêx nê kumê. Ixpê Simãw Pêtre na pa. Ixte Jejus nhÿ hã hkrajê jahkre ho mē ixpa xwÿnhjê hõ na pa mē awÿr kagà nê kumê.

Na xep pre Kris ã mē kãm mē pahkurê xwÿnhjaja tanhmã mē anhîpêx to ka mē panhõ pika rũm mē umaj anhrã nê ma ahpÿnhã krî hkôt ri apa.

Jaο mē akwÿjaja ma pika pê Põt kamã krî hkwÿ hkôt apa.

Nê mē akwÿjaja pika pê Karatas wÿr apa.

Nê mē akwÿjaja pika pê Kapatos wÿr apa.

Nê mē akwÿjaja pika pê As wÿr apa.

Nê mē akwÿjaja Pitin wÿr apa.

Æ ahpÿnhã pika hkôt mē apigranh par anê. Tã ot pa mē awÿr kagà nhîpêx nê mē apiitã mē awÿr kurê. Mē apÿnh nê mē ate kamã harênh nê ixkapêr mar kaxyw. ² Na pre Mēpahpãm Tirtũmja amnhim mē pahte amnhî kaxyw kãm pajamaxpêr xwÿnhjê rê nê mē pahtã amnhî jarênh o:

—Kot paj jajê ho ixkra. Na pre ra Ixkra Jejus Kris ixpê mē nê ty nê htyk o hkamrõ axkapî nhũm mē harênh ma nê hkôt amnhî xunhwÿ. Tã nhũm Ixkarõ mē hkarõ mã agjê nhũm mē ra inhmã hprãm xà kôt pix

mã ri inhmã tanhmã amnhî nhîpêx to ho pa.

Anhÿr o mē pahtã amnhî jarênh. Tã kê mē akutã nojarêt rãhã ho ri mē akôt pa ka mē ÿ hã axãmnhix ajamakêtkati nê akinh nê ri apa.

Mē pahte amnhî kukamã pajamaxpêr pê pahkînh o papa hã mē pamã karõ

Rukre 12.32-34; Rõmãn 8.18-25; Sikũn Korît 4.16-18

³ Nê na pre mē panhõ Pahihti Jejus Krisja ty nhũm Hipêxã Tirtũm akupÿm ho htir. Tã kot mē pakutã nojarêt rãhã ho pa jakamã na pre mē pahpê hkrajê mã mē pajamaxpêr nyw jagjê pu mē ÿ hã pahte amnhî nhîpêx nyw o amnhî nhîpêx o papa. Hãmri nê Jejus akupÿm htirja mã pajamaxpêr nê amnhî kukamã pajamaxpêr o:

—Kot paj nhÿrmã ty nhũm Tirtũm kot Jejus nhîpêx pyrã nê akupÿm ixto ixtir pa wa kuri ixtir tũm nê inhmex kumrêx rãhã ixpa ho ixpa. Nã koja ã inhîpêx anê.

Anhÿr o pajamaxpêr jakamã kwa kêr pu mē Tirtũm mã mex o mex ã mãn harênh rãhã ho papa. ⁴ Na ra mē pakutêp õ krî kamã mēmoj piitã ho mex nê. Õ krî kamã mēmoj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mē kot Kris ã mē atomnuj mÿrapê na ka mē amnhî xà htÿx kamã ajamak o ri apa nom arî amnhî kaxyw Tirtũm mã ajamaxpêr rãhã ho ri apa. Hihtÿx o hihtÿx jakamã koja mē pahkôt pa ho pa nê mē pamã pajamaxpêr o hihtÿx rãhã nhũm nhÿrmã Jejus akupÿm mē pahwÿr wrÿ. Hãmri pu mē hkôt ri amnhî nhîpêx mex rãhã ho ri papa. Ra Tirtũm kot mē pakukamã mē pajarênh xà hkôt. ⁶ Jar mē pahte arî amnhî xà htÿx kãm pajamak o papa htã na pu htem Tirtũm nhÿrmã kot mē pahto mexta kukamã pajamaxpêr hãmri nê tee ri amnhî kukamã pajamaxpêr kêt nê. Mē pahpê mē pahpunuj tũm nê ri papa ho papa mã xwÿnh kêt. ⁷ Na hte Tirtũm mē panhîpêx o te mē kot ôr nhîpêx pyrãk. Na htem hprî hã tanhmã ôr kute hã omu. Kêp ôr kumrêx ã omu rÿ mēmoj mē ho pihkãr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mē omu nê harênh o:

—Nà ãm hãmri. Kêp ôr kumrêx nê mẽmoj mẽ ho pihkâr kêt. Anê.

Na hte Tirtùm ã mẽ panhîpêx anê. Jakamã mẽ pahpê Jejus kôt amnhî nhîpêx o mẽ papa xwýnhjaja mẽ pahte tōhã tanhmã pahpunuj to htã no nhũm mẽ panê ja rênh kêt nê. Na hte amnhî tã mẽ pahpumu nê hamaxpêr o:

—Kot paj kormã ja hã mẽ hamã nê tokyx akupým mẽ ho mex kêt nê. Koja mẽ omnuj nê pa htã tee ri amnhî kukamã hamaxpêr nê ixkaga hkêt nê arĩ amnhî kaxyw ixkôt hamaxpêr rãhã ho pa. Hãmri nhũm mẽ hkwyjaja ja hã mẽ omu nê mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mẽ arĩ amnhî kaxyw hkôt pajamaxpêr rãhã ho papa. Mẽmo myrapê mẽ pahpunuj nê ri papa htã arĩ hkôt pajamaxpêr rãhã nhũm Jejus nhÿrmã akupým mẽ pahwÿr wrÿ. Hãmri nhũm Tirtùm mẽ pahpumu nê mẽ pamã:

—Nà ãm hãmri na ka prem amnhî kaxyw ixpix mã ajamaxpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhî xà htÿx kamã ajamak o apa htã aa ixkaga hkêt nê arĩ amnhî kaxyw inhmã ajamaxpêr rãhã ho ri apa. Nà ãm hãmri mẽ ate amnhî to mex kumrêx xwýnh na ka mẽ. Kot paj mẽ piitã mẽ kãm ja hã mẽ ajarê.

Anhÿr o mẽ pamã kapêr.

Nê ôr o mẽ hikukrêxja mex tã koja arĩ mex rãhã hkêt nê. Koja mẽhõ kãm tanhmã homnu hto hprãm nê homnu hpa. No mẽ papajaja kot puj mẽ arĩ amnhî kaxyw Tirtùm mã pajamaxpêr rãhã ho papa hãmri nê ôrta pyrã nê pajapêx kêt nê. Kurom mẽ pamex tùm nê aa pajapêx kêt nê papa ho papa.

⁸⁻⁹ Nê Jejusja aa mẽ ate ano ho omunh kêt tã na ka htem kãm mẽ ajapê htÿx nê kot mẽ panê tanhmã amnhî nhîpêx to hã harênh ma nê mẽ amã hkĩnh nê. Nê amnhî kaxyw hkôt ajamaxpêr mex rãhã ho ri apa. Jakamã na pre Tirtùm ja hã mẽ apumu nê mẽ ato hkra nê mẽ apê ô krĩ kamã wa kuri amex nê apa mã xwýnh ã mẽ ajarê. Ja kaxyw na pu prem amnhî kaxyw hkôt pajamaxpêr rãhã jao pahkĩnh nê ri papa. Nê tee ri tanhmã amnhî kĩnh tÿx ã amnhî

jarênh to hkukamã pajamaxpêr. Kormã aa ã mẽ pahkĩnh anhÿr kêt tã mẽ pahkĩnh tÿx nê ri papa.

¹⁰ Nê Tirtùm kot mẽ pahto mex pê mẽ panê mẽ pahte amnhî tomnuj rênh par nhũm kuri mẽ pahtir tùm nê mẽ papa hã mẽ pajarênhja. Amnepê mã Tirtùm nhÿ hã kapêr jarênh o ri mẽ pa xwýnhjaja na pre mẽ pakukamã ã mẽ pajarênh anhÿrja ma nê tee ri hamaxpêr nê tee ri hã axpên kukjêr o ri axpên kôt pa. Nom hprĩ hã mar mex kêt nê. Tã arĩ ri mẽ pakukamã hkwyjê mã ja hã mẽ pajarênh o ri pa.

¹¹ Na pre Tirtùm Karõja Kris tyk kukamã mẽ kãm ã mẽ pajarênh anhÿr o amnhîrit. Kormã Kris kaxkwa kamã pa ri. Kormã wrÿk nê katorxã nhõxãhkre rùm kator kêt ri nhũm pre hkukamã mẽ kãm tanhmã ho amnhîrit to. Mẽ kot hpîr nhũm kot amnhî xà htÿx kãm hamak kãm mẽ panê htykja ã hkukamã mẽ kãm harênh o amnhîrit. Nhũm Tirtùm kot akupým ho htir nê kãm mex o mex ã harênhja nhũm hkukamã mẽ kãm harênh o amnhîrit. No ãm hprĩ hã mẽ kãm mẽhõ nhÿxi hkôt harênh kêt jakamã nhũm prem harênh ma nê tee ri hkukamã ri hamaxpêr nê tee ri hã axpên kukjêr o ri axpên kôt pa. Nê hã axpên kukjêr o:

—Kwa mẽhõ koja we ã amnhî nhîpêx anê? Xà koja tokyx ã amnhî nhîpêx anê nã kormã?

Anhÿr o hã axpên kukjêr o ri pa. ¹² Hãmri nhũm Tirtùm axte mẽ kãm Jejus jarênh kwÿ ho amnhîrit nê mẽ kãm:

—Nà mẽ anoo mã koja ã amnhî nhîpêx anhÿr hkêt nê. Mẽ amÿr pê mẽ akanrêhã mẽ akra nê mẽ atãmnhwÿjê noo mã koja kato nê mẽ hkôt ã amnhî nhîpêx anhÿr o pa. Anê.

Mẽ papamjaja mẽ panoo mã kator nê ã kot amnhî nhîpêx anhÿr o paja o ã mẽ kãm ho amnhîrit anê.

Amnepêm Tirtùm nhÿ hã kapêr o ri mẽ pa xwýnhjaja nê jarãhã mẽ ixte Jejus nhÿ hã mẽ ahkre ho ri ixpa xwýnhjaja mẽ ixkapêr ãm pixii. Na pa htem wamtajê pyrã nê Tirtùm Karõ nhÿ hã ãhpumunh tÿx xà ho mẽ amã tanhmã Jejus jarênh to ho ri mẽ akôt ixpa. Nhũm hte Tirtùm kapêr o mẽ wrÿk xwýnhjaja mẽ ixkapêr ma nê tee ri

hamaxpêr o mẽ pahpyrà nê kãm hprĩ hã harênh mar par prãm nê.

Mẽ pahte Tĩrtũm pyrà nê tãm amnhĩ nhĩpêx ã mẽ pamã karõ

Epes 4.1-3; Korosẽ 1.10-12; Sikũn Pêtre 3.10-13; Wam Juãw 3.1-6

¹³ E kwa Kris kõt ixtõ nê ixtõxjaja. Kêr ka mẽ Jesus kutêp mẽmoj punuj kutã amnhĩ to htỳx rãhã ho ri apa. Nê Tĩrtũm mã amnhĩ nhĩpêx mex rãhã nê. Pê tãm ajamaxpêr nê tãm amnhĩ nhĩpêx o apa. Nê mẽ ã ajamaxpêr anhỳr o:

—Nà koja nhỹrmã Jesus akupỹn mẽ ixwỳr wrỳ hãmri nhũm Tĩrtũm ixtõ mex rax nê. Nà koja ã inhĩpêx anê. Anê.

¹⁴ Nê kêr ka mẽ Tĩrtũm kapêr kõt pix mã mãn ri amnhĩ nhĩpêx mex rãhã ho ri apa. Te mẽhprĩre kot mẽ hipêêxà kapêr mar nê hkõt amnhĩ nhĩpêx pyrãk. Kormã mẽ ate Kris kõt amnhĩ xunhwỳr kêt ri na ka prem ate amnhĩ nhĩpêx tũm kõt ri tanhmã amnhĩ tomnuj to ho ri apa. ¹⁵ Tã kêr ka mẽ hpãnhã amnhĩ to mex o mãn ajamaxpêr o apa nê Tĩrtũm pyrà nê amnhĩ tomnuj o apa hkêt nê. Tĩrtũmja kot amnhĩ to mex pix o pa xwỳnh na. ¹⁶ Kapêr ã kagà htũm kot ja jarênh kot:

Kêr ka mẽ ixpyrà nê amnhĩ to mex pix o ri apa. Anê.

¹⁷ Tã koja nhỹrmã kêp Mẽpahpãm maati hã hprĩ hã mẽ pahte amnhĩ nhĩpêx ã mẽ pahpumunh hkõt tanhmã mẽ pajarênh to. Tãm mẽ pahte amnhĩ nhĩpêx kõt mẽ pajarê rỳ mẽ pahte amnhĩ tomnuj kõt mẽ pajarê. Hãmri nê ahpỹnhã mẽ panhĩpêx. Mẽ pahto mex nê rỳ mẽ pahtomnuj nê. Jakamã kwa pu mẽ nhỹrmã kot tanhmã mẽ pahtomnuj to pymaj hkõt pix mã amnhĩ nhĩpêx o ri papa rãhã nê.

¹⁸ Nê kormã mẽ pahte Jesus kõt amnhĩ xunhwỳr kêt ri na pu prem mẽ panhĩgêt pyrà nê pahtỳx ri amnhĩ tomnuj o ri papa. Tã nhũm Krisja te amnhĩm mẽ pajaprõr pyrãk o mẽ panhĩpêx. Mẽ pahte hpãnhã kapêr kõt pix mã amnhĩ nhĩpêx o papa kaxyw. No mẽmoj to na pre mẽ pahpãnhã amnhĩre? Nà ra mẽ pahte ja jarênh mar tỳx. Na pre kàxpore ho mẽ pahpãnhã amnhĩrer kêt nê. Rỳ ôr o mẽ hikukrêx ã ohtõ ho mẽ pahpãnhã amnhĩrer kêt nê. Rỳ prat o mẽ

hikukrêx ã ohtõ ho mẽ pahpãnhã amnhĩrer kêt nê. Jajaja hapêx tokyx anhỳr mã xwỳnh na. ¹⁹ Na pre ã mẽ hpãnhã amnhĩrer anê nê tãm mẽ panê ty nê htyk o amnhĩ nhĩ ho mẽ pahpãnhã amnhĩrer pa. Nhũm hkamrõ axkapĩ. Te amnepê mã mẽ panhĩgêt kot amnhĩ pãnhã Tĩrtũm mã ôwêhti hkrare hpar nhũm hkamrõ pikapĩrta pyrãk. ôwêhti krare mexre pix na prem kãm kupa. Mex nê tanhmã kute hkêt xwỳnh pix. Tã Krisja aa tanhmã amnhĩ tomnuj to hkêt kumrêx nê mẽ panê ty nê htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa. ²⁰ Amnepê mã kormã mẽmoj kêt ri na pre Tĩrtũm kot ã mẽ pahpãnhã amnhĩrer anhỳr kaxyw mẽ pakukamã kuta nê ãm. Tã nhũm amgrà ohtõ nê hapêx nhũm mẽ pahwỳr kumê nhũm man mẽ pahwỳr wrỳ. Kot ã mẽ pahpãnhã amnhĩ nhĩpêx anhỳr kaxyw. ²¹ Tã nhũm prem kupĩ nhũm Tĩrtũm akupỹm ho htĩr nê mex o mex ã harê. Mẽ pahte ja hã harênh mar kõt amnhĩ kaxyw Tĩrtũm pix mã pajamaxpêr o ri papa kaxyw. Nê mẽ pahte amnhĩ wỳr Jesus jamãr rãhã ho ri papa kaxyw.

²² Tã pu prem ra kot ã mẽ panê amnhĩ nhĩpêx anhỳr ã harênh ma nê mẽ pahte amnhĩ tomnuj kaga nê hkõt amnhĩ xunhwỳ. Jao amnhĩ to mex pix o ri papa. Nê mẽ pamã Kris kõt mẽ pahkwỳjê hkĩnh o papa. Tã kwa kêr pu mẽ arĩ pamã axpên kĩnh tỳx rãhã ho papa.

Te mẽ pakatorxà rũm mẽ pajapõx pyrãk o axte mẽ pajapõx ã mẽ pajarênh

Juãw 3.1-21

²³ Nê na pu prem mẽ pakatorxà nhõxàhkre rũm mẽ pajapõx pyrà nê axte mẽ pajapõx pyrãk o amnhĩ nhĩpêx. Jao ra mẽ pahpê Tĩrtũm kra nê ri papa. Na hte mẽ pakatorxà nê mẽ panhĩpêêxàja wa ri pa nê gaa nê mẽ pahpê ty. No kêt Mẽpanhĩpêêxà maati Tĩrtũmja wa kurom rãhã ho rãhã. Tã ra mẽ pahte amnhĩ kaxyw kapêr kõt pajamaxpêr o pahpê hkra jakamã kot puj mẽ urãk nê nhỹrmã pahtĩr tũm nê papa rãhã ho papa.

Nê Tĩrtũm kapêrja Tĩrtũm pyrà nê rãhãã. Koja aa hapêx kêt nê. ²⁴ Kapêr ã kagà htũm kot ja jarênh kot:

Pika piitã hkôt mẽ pa xwýnhjaja te mẽ kot pōti grà pyræk.

Nẽ mẽ kot amnhĩ to mex xàja te kot kapôt ã pixôrà pyræk.

Na hte pōti tokyx grà nẽ hapêx.

Nẽ pixôràja haxwýja arĩgro htýx mẽ nhũm grà tokyx anẽ nẽ rarak pa nẽ hapêx.

²⁵ No Tĩrtũm kapêr koja pōti mẽ pixôràta wa kurom aa hapêx kêt nẽ. Koja arĩ rãhã ho rãhã. Anẽ.

Tã kapêrja tãm na htem mẽ pamã kamã harẽ pu mẽ pahpiitã mar o papa.

2

Mẽ pahte Tĩrtũm kot amnhĩ nhĩpêx kôt amnhĩ nhĩpêx ã mẽ pamã karô

Rômãn 12.2; Wam Korĩt 3.16-17; Epes 2.19-22

¹ Nẽ kwa kêr pu mẽ axte tanhmã amnhĩ tomnuj to ho ri papa hkêt nẽ.

Rý tanhmã axpẽn mã paxêx to hkêt nẽ.

Nẽ paxêx rom tanhmã ri axpẽn nokupyr to hkêt nẽ.

Nẽ mẽmoj tã axpẽn kãm pagryk kêt nẽ.

Nẽ tanhmã axpẽn japry hto hkêt nẽ.

Kêr pu mẽ ã amnhĩ nhĩpêx anhýr o papa hkêt kumrêx.

² Mẽ hkaràre na htem ãm kãm pijaôr pix prãm. Nẽ gaa nẽ htýxre nẽ ra hprék o mō. Tã kêr ka mẽ pijaôr pix prãm xwýnhjê pyrã nẽ amã Tĩrtũm kapêr mar nẽ hkôt pix mã amnhĩ nhĩpêx o apa hprãm. Jao mar týx pê ra hkôt amnhĩ nhĩpêx mex o mō nẽ gaa nẽ hkôt amnhĩ nhĩpêx mex o apa. Te mẽ karàre pijaôr nẽ gaa nẽ ra hprék o mōrta pyræk. ³ Ra mẽ ate Jesus kot mẽ pahto mex ã omunh mex kênã.

⁴ Nẽ na htem kên o ixkre nhĩpêx kaxyw hãmri nẽ hkwy kawrà nẽ ri hkapi. Nhũm hō mex kêt nhũm mẽ tee ri omu nẽ nhãm kumẽ. Tã ja pyrã nẽ na pre mẽ pahkwýjaja tee ri Kris pumu nẽ htýx mex kêt ã hkamnhĩx nẽ te mẽ kot kên mênhta pyræk o hipêx nẽ hkaga. No nhũm Tĩrtũmja amnhĩm Kris mex o mex ã harẽ. Te ho mẽhō kot kên mex kêt ã hkamnhĩx nẽ mẽnh nhũm mẽhō kot mex ã omunh nẽ amnhĩm mýnhta pyræk. Nom Krisja kên rom kêp htĩrtũm nẽ pa xwýnh jakamã nhũm pre Tĩrtũm mẽ pakaxyw ãm pu prem hkôt amnhĩ xunhwý.

⁵ Nẽ Tĩrtũm na hte nhýrmã mẽ pahťĩrtũm nẽ wa kuri mẽ papa mã xwýnh ã mẽ pajarẽ. Te mẽ pahpê kên nhũm Tĩrtũm te kot amnhĩ Karô mã mẽ pahto ixkre nhĩpêx pyræk. Jakamã na hte Jesus Kris tanhmã mẽ pahkrã hto pu mẽ Tĩrtũm kôt amnhĩ nhĩpêx mex rãhã ho ri papa. Nẽ tanhmã kãm amnhĩ nhĩpêx mex to nhũm ja hã mẽ pahpumu nẽ hkĩnh nẽ.

⁶ Tĩrtũm kapêr ã kagã htũm kot tanhmã Kris jarênh to. Nẽ hã kuxi nẽ tanhmã harênh to. Te kêp kên pyræk ã harẽ nẽ harênh kot:

Kot paj nhýrmã Ijaew wýr mẽhō mẽ nhũm mẽ hkôt pa ho pa.

Koja te kêp kên o inhōrkwy nhĩpêx kaxyw kên maati mex kumrêxta pyræk.

Koja amnhĩ kaxyw hkôt mẽ hamaxpêr xwýnhjaja nhýrmã ma inhō krĩ hwýr api nẽ hkĩnh nẽ mex rãhã nẽ pa ho pa. Anẽ.

⁷ Tã ra amnhĩ kaxyw hkôt mẽ pajamaxpêr xwýnhjaja. Kên pyræk xwýnh pê Jesusja na mẽ pamã mex o mex. No mẽ kot hkaga xwýnhjaja na htem hamaxpêr punuj xwýnh ã hkamnhĩx nẽ hkaga nẽ kãm hkĩnh kêt nẽ. Tĩrtũm kapêr ã kagã htũm kot mẽ harênh kot:

Na prem kên o amnhĩm ōrkwy nhĩpêx kaxyw hkawrà ho pa nẽ kên maatija pumu nẽ htýx omnuj ã hkamnhĩx nẽ hkaga.

Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Anẽ.

⁸ Nẽ mãânên harênh kot:

Koja mẽ kapêr mar kêt kumrêx.

Te pry kamã kên nōr nhũm mẽ kot nhãm pry nẽ mẽnh kaxyw hkamnãr o amnhĩ par krã hi kukênh pyræk o koja mẽ amnhĩ nhĩpêx. Anẽ.

Mẽ kot Kris kapêr mar tã hkôt amnhĩ xunhwýr kêt jakamã te ho mẽ kot amnhĩ nẽ kên kamnãr o amnhĩ par krã hi kukênh pyræk o koja mẽ amnhĩ nhĩpêx. Jakamã koja nhýrmã Tĩrtũmja ja hã tanhmã mẽ ho htýx kumrêx. Ra kot amnhĩ kukamã mẽ kãm amnhĩ jarênh xà hkôt. ⁹ No mẽ papajaja na pre Tĩrtũm jajê rom amnhĩ kôt mẽ paxunhwý. Nhýrmã ō krĩ kamã mẽ papa ho papa kaxyw. Nẽ mẽ pahte mex o

mex ã harênh kaxyw. Na pu htem Ijaew nhõ patre pyrã nê Pahi Maati Tirtũm mã tanhmã amnhĩ nhĩpêx to ho papa. Nom kormã mẽ pahte Kris kôt amnhĩ xunhwýr kêt ri te mẽ pahpê kamãt kô kamã mẽ pahtýx ri mẽ papa xwýnh pyrãk. Tã Jejus kôt amnhĩ xunhwý nê hpãnhã te mẽ pahpê hirã mex kãm ri mẽ papa xwýnh pyrã nê tãm amnhĩ nhĩpêx rãhã ho papa. Ra mẽ pahpê Tirtũm kra jakamã na pu htem amnhĩ to mex rãhã ho ri papa. Nê Mẽpahpãm maati Tirtũm mã tanhmã amnhĩ nhĩpêx to ho ri papa. Te mẽ kot mẽ ho àhwýr xwýnhjaja kot kãm amnhĩ nhĩpêx o pata pyrãk. ã na pre Tirtũm mẽ pahte amnhĩ nhĩpêx anhýr o papa kaxyw mẽ panhĩpêx.

¹⁰ Amnepêm kormã mẽ pahpê hkra hkêt ri na pre mēhõ mẽ pakamã ukaprĩ hkêt kumrêx pu htem pahpunuj nê ri papa. Tã Jejus kôt amnhĩ xunhwý nhũm Tirtũm mẽ pahto hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mẽ pahpê Tirtũm mã tanhmã amnhĩ nhĩpêx to xwýnh ã mẽ pajarênh Rômãn 13.1-7; Xitre 3.1

¹¹ E ixkrãmnhwýjaja. Ra mẽ pahpê Tirtũm kra jakamã mẽ pahpê õ krĩ nhõ xwýnh. Te mẽ pahpê jar pika nhõ xwýnh kêt pyrãk jakamã kwa kêt pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nê. Nê mẽ pajamaxpêr tũm o pajamaxpêr kêt nê. Ra axtem mẽ pajamaxpêr nyw nê axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupým mẽ pahte hkôt amnhĩ to paxujanãr prãm pyrãk. Mẽ pahte axte hkôt amnhĩ nhĩpêx o ri papa kaxyw. Tã nom kêt pu mẽ anhýr kêt nê. ¹² E kwa kêt ka mẽ anhõ krĩ kamã akwý kot Kris kôt amnhĩ xunhwýr kêt xwýnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rý tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhýr o ri apa hãmri nhũm mẽ tee ri mẽ apumu nê hamaxpêr o:

—Kwa mẽ ixte mẽ kot amnhĩ tomnuj xwýnh ã mẽ harênh tã mẽ kot amnhĩ to mex pix xwýnh na mẽ. Anê.

Hãmri nê nhýrmã mẽ pahpyrà nê Tirtũm kôt amnhĩ xunhwý nê kãm mex o mex ã harê nê kãm:

—Kwa Tirtũm. Na pre hte akrajaja anhý hã amnhĩ to mex rãhã nê pa ho pa pa ja hã mẽ omu. Nã xep amex o amex Tirtũm. Anê.

¹³ Nê mẽ apê Pahihti Jejus Kris kôt amnhĩ nhĩpêx xwýnh jakamã kêt ka mẽ anhõ krĩ kamã mẽ anhõ pahihiti kapêr ma nê kapêr kôt mãn amnhĩ nhĩpêx mex o ri apa. Nê mẽ anhõ pika kamã mẽ anhõ prêjitênja ka mẽ kapêr ma nê hkôt amnhĩ nhĩpêx. Mẽ kot mẽ ato amnhĩptàr xwýnhjaja ka mẽ piitã mẽ kapêr ma nê mẽ kapêr kôt pix mã amnhĩ nhĩpêx rãhã ho ri apa. ¹⁴ Nê mẽ anhõ pahi nhý hã mẽ kapêr o mẽ pa xwýnhjaja na htem mẽ akaxyw mẽ unhwý. Mẽ kot amnhĩ tomnuj xwýnhjaja nhũm tanhmã mẽ kot mẽ ho kaxyw. Nê tãm mẽ kot amnhĩ nhĩpêx o ri mẽ pa xwýnhjaja nhũm mẽ kot mẽ õ pahi mã mex ã mẽ harênh kaxyw. ¹⁵ Tã kêt ka mẽ kapêr ma nê mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwýnhjaja ja hã mẽ apumu nê axte tanhmã mẽ ato kapêr to hkêt nê. ã mẽ ate amnhĩ nhĩpêx anhýr o apaja na Tirtũm kãm hprãm.

¹⁶ Nê mẽ pahpê Tirtũm kra jakamã na pu htem paxãmnhĩx kãm tanhmã amnhĩ nhĩpêx to ho ri papa. Nom kêt pu mẽ pahpê hkra hã pahtýx ri amnhĩ nhĩpêx kêt nê.

¹⁷ Nê kêt ka mẽ piitã mẽ ho mex o ri apa. Nê mẽ ato amnhĩptàr xwýnhjê ho mex nê mẽ hã apijaãm rãhã ho ri apa.

Nê mẽ apê Kris kôt mẽ ate axpên to mẽ atõ nê mẽ atõxjê hã amã axpên kĩnh pè axpên to mex nê.

Nê Tirtũm ã apijaãm rãhã nê.

Mẽ kãm mẽ apênh xwýnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosê 3.22-25; Wam Ximotre 6.1-2; Xitre 2.9-10

¹⁸ Nê mẽ apê mẽ kãm mẽ axapênh xwýnhjaja kêt ka mẽ anhõ patrãw kapêr ma nê hkôt ri amnhĩ nhĩpêx. Kot mẽ ato mex o pa rý mẽ atomnuj o pa htã ka mẽ arĩ mẽ hã apijaãm pè hkôt ri amnhĩ nhĩpêx.

¹⁹ Tanhmã kot mẽ anhĩpêx punuj to htã ka mẽ arĩ kãm axapênh mex rãhã nê. Kêt kè Tirtũm ja hã mẽ apumu nê mẽ ato mex

nê ka mē ajamakêtkati nê axàmnhĩx ri kãm axàpênh o apa. ²⁰ Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htỳx kamã ama nê rĩ amnhĩ pumu. No kot kaj akatàt kôt kãm axàpênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htỳx kamã kãm xa nê amnhĩ tã tanhmã ho hkêt nê. Hãmri nhũm Tĩrtũm ja hã apumu nê ato mex nê. ²¹ Amnepê m na pre mē pahte hkôt amnhĩ xunhwỳr xwỳnhjaja Kris pyrã nê mē paxã htỳx kamã pajamak o papa hkukamã ja hã mē pahpumunh mex. Na pre Kris mē pakaxyw amnhĩ xà htỳx kãm hamak tỳx tã amnhĩ to htỳx nê mē kãm xa. Tã kêr pu amnhĩ xà htỳx kamã pajamak tã ỹ hã uràk nê amnhĩ to htỳx nê papa. ²² Krisja aa tanhmã amnhĩ tomnuj to hkêt nê pa ho pa. Nê aa mēmoj tã amnhĩ to hêx o pa hkêt. ²³ Mē kot kãm kapêr punuj tã nhũm amnhĩ tã tanhmã mē kãm nê hkêt nê. Nê mē kãm kapêr punuj kêt nê. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mē kãm àkjêr nê tanhmã mē haprỳ hto hkêt nê. Na pre ãm hamaxpêr o: “Nà Tĩrtũm kot ixtã mē omunh mex kênã. Koja nhỹrmã mē piitã tanhmã mē kot amnhĩ nhĩpêx to hã mē omunh xà hkôt tanhmã mē hipêx to. Tãm koja àhpumunh tỳx xà hkôt tanhmã ixtã mē harênh to. Mē kurom àhpumunh tỳx o àhpumunh tỳx xwỳnh kênã.” Anê.

²⁴ Kris na pre te kawà kamã mē pahte amnhĩ tomnuj piitã gjênh nê ho nỳt nê htur rãhã pĩ kahpa hã mē panê htyk pyrãk o amnhĩ nhĩpêx. Mē pahte axte tanhmã amnhĩ tomnuj to hkêt prãm xàj. Pãnhã mē pahte amnhĩ to mex pix o ri papa kaxyw. Tã ã kot amnhĩ xà htỳx kãm hamak anhỹr o jêt jakamã kot puj mē pahte hkôt amnhĩ xunhwỳr xwỳnhjaja aa mē pahte amnhĩ tomnuj pãnhã amnhĩrer kêt nê. Ra Jejus htyk o kot mē panê amnhĩrer par kênã.

²⁵ Na pu pre te mē pahpê ôwêhti pikunor pyrã nê pahtỳx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwỳnh kot ôwêhti pikunor mã katorta pyrãk o mē panhĩpêx. Pu mē hkôt amnhĩ xunhwỳr nê hkôt amnhĩ nhĩpêx

mex o ri papa. Jao hkôt papa ho papa.

3

Mē mjên mē mē hprõ kot tanhmã axpên nhĩpêx to hã mē kãm karõ

Wam Korõt 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mē anijaja mē amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mē ate amnhĩ nhĩpêx ã mē apumu nê mē apyrã nê Kris kôt amnhĩ xunhwỳr japêr. Mē kãm Tĩrtũm kapêr mar prãm kêt tã koja mē ã mē ate amnhĩ nhĩpêx anhỹr ã mē apumunh kôt mē apyrã nê amnhĩ kaxyw hkôt hamaxpêr japêr. ² Na htem mē ate Tĩrtũm kapêr kôt tãm ri amnhĩ nhĩpêx o apa hã mē apumunh o ri mē akôt pa.

³ Jakamã kêr ka mē anijaja amnhĩ mex pix kukamã ajamaxpêr o ri apa hkêt nê. Rỳ ajamaxpêr o:

—Ma kot paj mē hkuxwaxà ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwỳ japrõ nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mē piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhỹr o ri amnhĩ kukamã ajamaxpêr kêt nê. ⁴ Tĩrtũm na hte ã mē pahte amnhĩ nhĩpêx anhỹr ã mē pahpumu nê ãm hã mē pahpumu. Mē ôkrexê nê mē ê mex na hte hapêx tokyx anê. No mē panhõpinhxà kaxwỳnh kãm tãm ri mē pajamaxpêr nê pakamã amnhĩkrit nê papaja. Kot kaj mē ã amnhĩ nhĩpêx anhỹr o ri apa hãmri nhũm Tĩrtũm ja hã mē apumu nhũm ja kãm mex nê. ⁵ Amnepê mã mē pakukamã mē panhõ wôwô nê mē panãjaja. Mē hkwy kot Tĩrtũm kôt amnhĩ nhĩpêx xwỳnhjaja na prem ã amnhĩ nhĩpêx anhỹr o pa. Mē kot mjên kôt amnhĩ nhĩpêx o pa jakamã na prem amnhĩ tã mē omu nê mē ho mex nê kãm mē hapê nê. ⁶ Mē panhõ wôwô finat Saraja na pre ã amnhĩ nhĩpêx anhỹr o pa. Jao mjên Apraãw kapêr ma nê hkôt amnhĩ nhĩpêx. Nê kêp õ pahĩ hã harê nê hkôt pix mã amnhĩ nhĩpêx o ri pa. Tã kot kaj mē uràk nê amnhĩ to htỳx

nê ã amnhĩ nhĩpêx anhÿr o apa. Hãmri nê amnhĩ tã amã amjên puma hkêt nê apa nê te apê Sara hkra pyræk.

⁷ Nê mẽ amyjaja kêr ka mẽ tãm mẽ aprõ nhĩpêx o ri mẽ hkôt apa. Mẽ akĩnhã mẽ hihtÿx kêt jakamã mẽ kamã axukaprĩ rãhã ho ri mẽ hkôt apa. War ajamẽ war apê Jejus kukwak ri war atĩr tũm nê apa mã xwÿnh jakamã kêr ka mẽ ho mex rãhã ho ri mẽ hkôt apa. Tĩrtũm kãm war ajamẽ war ajapê jakamã kot kaj mẽ ã mẽ hipêx anhÿr o ri apa hãmri nê ra axãmnhĩx mẽmoj tã amnhĩ to Tĩrtũm wÿ nhũm mẽ amar kurê kumrêx.

Tĩrtũm krajaja kot amnhĩ xà htÿx kamã hamak ã mẽ harênh

Rômãn 12.9-21; Korosẽ 1.10; Wam Tesarõn 5.14-15

⁸ E Kris kôt ixkrãmnhwÿjaja. Nà ixkapêr jatur xà na ja. Kêr ka mẽ ri axpên kôt ajamaxpêr mex pê axpên to mex rãhã ho ri apa. Nê mẽ ate Kris kôt axpên to atõ nê atõx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêt rãhã nê. ⁹ Na pu prem Jejus kôt amnhĩ xunhwÿ nhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rÿ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rÿ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyræk o mẽ hipêx nê mẽ ho mex pix o ri mẽ hkôt apa. Ja na Tĩrtũm kãm hprãm. ¹⁰ Kapêr ã kagà htũm kot ja jarênh kot:

Kot kaj mẽ amã amex nê akĩnh nê ri apa hprãm hã kot kaj mẽ ã amnhĩ nhĩpêx anê:

Kot kaj mẽ ri akapêr punuj o ri apa hkêt nê. Nê mẽmoj tã amnhĩ to axêx o ri apa hkêt nê.

¹¹ Nê te mẽ ate amnhĩ katut kôt ate amnhĩ tomnuj rênh o apa pyrã nê hpãnhã amnhĩ to mex pix o ri apa.

Nê mẽ amã tãm axpên nhĩpêx pix prãm o ri axpên kôt apa.

Nê mẽ amã ajamakêtkati nê axpên kôt apa hprãm rãhã ho ri apa.

¹² Na hte Tĩrtũmja ã mẽ kot amnhĩ nhĩpêx anhÿr o pa xwÿnhjê jamãr mex rãhã ho pa.

Nhũm mẽ tanhmã amnhĩ to hwÿr to nhũm mẽ mar kurê kumrêx.

No mẽ kot amnhĩ tomnuj o mẽ pa xwÿnhjaja na hte mẽ kutã amnhĩ xãm nê ãm mẽ omu nê mẽ ho mex kêt nê. Anê.

Tĩrtũm kapêr ã kagà htũm kot ã mẽ harênh kot anhÿr.

¹³ Nê kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nê. ¹⁴ No kot kaj mẽ amnhĩ to mex pix o apa htã nhũm mẽhõ ja hã apumu nê tanhmã hamaxpêr to nê atomnuj ka amnhĩ xà htÿx kamã ajamak japêr. Tã koja Tĩrtũm nhÿrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nê. Nê tee ri amnhĩ kukamã ajamaxpêr o akaprĩ nê ri apa hkêt nê. ¹⁵ ãm amnhĩ kaxyw Kris mã mãn ajamaxpêr tÿx rãhã nê mẽ panhõ Pahihti hã apijaàm rãhã ho ri apa. Nhũm mẽhõ ja hã mẽ apumu nê tanhmã hã mẽ akukjêr to nê mẽ amã:

—Kwa mẽmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mẽ ama hãmri nê aprĩ hã kãm amnhĩ jarênh kurê kumrêx. ¹⁶ Nom kêr ka mẽ akapêr mã aprĩ kamã kãm amnhĩ jarê. Tĩrtũm kapêr kôt amnhĩ nhĩpêx o apa hã mẽ kãm amnhĩ jarê. Koja mẽ Kris ã mẽ ato kapêr punuj rÿ hã mẽ atã hpêr o axkê nê pikunhar japêr ka mẽ ãm amnhĩ tã mẽ ama nê ãm mẽ ama. Kwãr mẽ mãmri ã mẽ anhĩpêx anê. Kêr ka mẽ amnhĩ tã mẽ omu nê arĩ amnhĩ to mex rãhã ho ri apa. Kêr kê mẽ tee ri amnhĩ tã mẽ apumu nê hpijaàm nê.

¹⁷ Nê koja mẽ akwÿjaja mẽ ate Tĩrtũm kapêr kôt amnhĩ nhĩpêx mex o apa hã mẽ apumu nê hã tanhmã mẽ anhĩpêx to htã kêr ka mẽ arĩ Tĩrtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nê pahihti mã mẽ ajarê nhũm kuma nê ja hã tanhmã mẽ amã ãkjêr to ka mẽ ra apijaàm nê.

¹⁸ Nê Krisja na pre mẽ panê ty. ãm htyk tipxi tã mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tã mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwÿr nê nhÿrmã ma Tĩrtũm nhõ krĩ

hwÿr paxàpir nê kamã pahtîr tûm nê papa ho papa kaxyw. Mê kot hpîr tâ nhûm Tîrtûm akupÿm ho htîr nhûm htîr o htîr. 19-20 Nom kormã akupÿm htîr kêt ri na pre hkarõ pix o mê htyk xwÿnhjê hwÿr mō. Ahpunu kamã mê hkarõ kêp prês nê hkrî xwÿnhjê hwÿr mō nê mê kot Noehti kapêr mar nê hkôt amnhî nhîpêx kêt nhûm gô htàm kot mê hanhir par xwÿnhjê mã kapêr. Tîrtûm kot nhÿrmã mê kot amnhî tomnuj mÿrapê kuwy maati wÿr mê rênh ã mê hkukamã mê kãm awjarê. Amnepêm kormã Noehti kot pâr raxta nhîpêx o kuhê ri na prem kãm Tîrtûm kapêr mar prãm kêt nê. Nhûm amnhî tâ mê omu nê mê kamã gryk tokyx anhÿr kêt nê. Arî amnhî tâ mê hamâr o pa. Mê kot hkôt amnhî xunhwÿr nê hkôt amnhî nhîpêx prãm xàj arî mê hamâr ry ho pa. No ãm tee ri mê hamâr kaprÿ nhûm mê amnhî kaxyw hkôt hamaxpêr kêt nê htÿx ri amnhî tomnuj o pa. Mê ãm grêre nê Noehti kapêr ma nê gô htàm pymaj hkôt pâr raxta wÿr agjê. ãm mê kêp 8 pix nê hwÿr agjê nhûm gô htàm mê hanhir kêt nê. Tîrtûm na pre mê nê omunh mex nê. No mê kot amnhî tomnuj xwÿnhjaja nhûm gô htàmja mê hanhir o mê himex pa. Nhûm mê kêp 8ja pix arî htîr nê mex nê pâr raxta kamã gô krâhkà hã mex rãhã pa.

21 Gô tàmja kêp hprî hã mê pahte Jejus kôt amnhî xunhwÿr ã mê pahto amnhîrît xà na. Mê pahte amnhî nhîpêx tûm kaga nê hpãnhã amnhî nhîpêx nyw o amnhî nhîpêx o papa hã mê pahto amnhîrît xà. Jakamã na htem mê pahkrã kumrã. Nom mê kot mê panê mê pagrã kugràn h kaxyw kêt ra mê pahte Jejus kôt amnhî xunhwÿr ã amnhî to amnhîrît kaxyw na htem mê pahkrã kumrã. Ra mê pahte Tîrtûm kapêr kôt amnhî nhîpêx o papa hã amnhî to amnhîrît kaxyw. Pu mê ra mê pahte amnhî nhîpêx nyw o amnhî nhîpêx ã amnhî to amnhîrît. Te mê pahte gôx kãm mê pahte amnhî tomnuj rer par pyrã nê hpãnhã amnhî nhîpêx nyw o amnhî nhîpêx o papa.

22 Nê na pre Jejus akupÿm htîr nê ma akupÿm Tîrtûm nhô krî hwÿr api nê Tîrtûm nhîhkô hã pahihtî hã mê hkrî xà kamã hkrî ho hkrî. Hãmri nê ra Tîrtûm kapêr o mê

wrÿk xwÿnh nê pahi piitã mê ho amnhîptâr o hkrî.

4

Mê pahte amnhî nhîpêx nyw o amnhî nhîpêx ã mê pamã karõ

Epes 4.17-24; Korosê 3.1-11

1 Nê na prem Kris pî nhûm amnhî xà htÿx kãm hamak kãm htyk kaxyw tâ arî mê kãm xa. Ra kot amnhî xà hkukamã amnhî tâ mê omunh tâ tee ri amnhî kukamã hamaxpêr o amnhî tâ tanhmã ri mê kot hpîr mã xwÿnhjê homnuj to hkêt nê. Arî mê kãm xa nhûm prem kupî. Tã kêr pu mê uràk nê ã amnhî nhîpêx anhÿr o ri papa. Mê kot hã tanhmã mê panhîpêx to htã pu mê uràk nê amnhî xà htÿx kãm pajamak tâ tanhmã amnhî tâ mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tã kêr pu mê uràk nê axte tanhmã amnhî tomnuj to ho ri papa hkêt nê. 2 Jakamã kêr pu mê axte mê pahte amnhî nhîpêx tûm kôt amnhî nhîpêx o papa hkêt nê. Nê mê pajamaxpêr tûm kôt axte pajamaxpêr o papa hkêt nê. ãm Tîrtûm kãm hprãm xà hkôt pix mã tanhmã amnhî nhîpêx to ho papa rãhã ty.

3 Amnepêm kormã mê pahte Jejus kôt amnhî xunhwÿr kêt ri na pu prem mê kêp Tîrtûm kra hkêt xwÿnhjê hkôt amnhî nhîpêx.

Jao nhãm mênijê pumu nê mê kamã pah-pijaàm kêt hprãm.

Nê pahpipãnh o ri papa.

Nê mê pahpipãnh kaxyw axpên wÿr akuprô nê mênijê kamã pahpijaàm kêt.

Nê sãnti hwÿr pahkônkrã ho pahkrî nê kãm amnhî jagrer.

4 Tã Kris kôt amnhî xunhwÿ hãmri nê mê pahte amnhî nhîpêx nyw o amnhî nhîpêx o papa. Hãmri nhûm arî mê kot amnhî nhîpêx tûm o amnhî nhîpêx xwÿnhjaja tee ri ja hã mê pahpumu nê hêx rom amnhî kôt mê pamã tanhmã ri àhkrox to ho pa. Pu mê axte mê hkôt amnhî nhîpêx kêt nhûm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to. 5 Tã koja Tîrtûm nhÿrmã amnhî wÿr mê hã karõ nhûm mê ma hwÿr mra nê kutã hkrî. Nê kormã mê htîr ri tanhmã mê kot amnhî nhîpêx to ho pa hã

kãm amnhĩ jarēnh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarēnh to. Mẽ htyk xwýnhjaja nê kormã mẽ pahťir nê mẽ papa xwýnhjaja nhũm mẽ pahpiitã tanhmã mẽ pajarēnh to.

⁶ Na pre Jejus ty hãmri nê kormã akupỹm htĩr kêt rãhã hkarõ pix o ma amex wýr tẽ nê kamã mẽ htĩr ri amnhĩ kaxyw Tĩrtũm mã hamaxpēr xwýnhjê mã awjarē. Na prem mẽ kot amnhĩ tomnuj mýrapê ra wej nê ty nê arĩ amex kãm ri pa. Jakamã nhũm Jejusja hkarõ ho ma mẽ hwýr tẽ nê mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamaxpēr jakamã kot kaj mẽ ma hwýr api nê wa ixkuri wa ixpyrà nê atĩr tũm nê amex nê apa ho apa. Anē.

Mẽ pahpê Kris kwý hã tanhmã mẽ pahte axpēn nhĩpêx to hã mẽ pamã karõ

Rõmãn 12.6-8; Wam Korĩt 12.1-11

⁷ Nê koja tokyx mẽ panhõ pikaja mẽ pahpê hapêx nê kamã mẽmoj piitã hapêx pa. Jakamã kwa kêt ka mẽ ate amnhĩ nhĩpêx ã amnhĩ pumunh mex o apa.

Nê mẽ atýx ri ajamaxpēr ri apa hkêt nê.

Nê mẽmoj punuj nê amnhĩ to htýx o ri apa ho ajamaxpēr nyw pix o amnhĩ to Tĩrtũm wýr rãhã ho ri apa.

⁸ Nê kwa kêt ka mẽ amã axpēn kĩnh o ri axpēn kôt apa. Ja na mex o mex. Kot kaj mẽ ã axpēn nhĩpêx anē nhũm Kris kôt atõ rý atõxjê hõ tanhmã atomnuj to japēr ka amnhĩ tã omu nê ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpēr kêt nê.

⁹ Nê kêt ka mẽ axãmnhĩx ajamakêtkati nê amnhĩ nhõrkwy hwýr axpēn wý nê axpēn to mex o ri apa. Nom kêt ka mẽ agryk kãm amnhĩ wýr mẽ hwýr kêt nê. ¹⁰ Na pre ra Tĩrtũm mẽ pahpê hkra hã ahpýnhã tanhmã mẽ pamã mẽmoj tã karõ hto nê ã mẽ pahte amnhĩ nhĩpêx anhýr o papa kaxyw mẽ pahto mẽ paxihtýx. Mẽ pahte ahpýnhã tanhmã axpēn to mex to ho ri axpēn kôt papa kaxyw. Tã kêt ka mẽ ra kot mẽmoj tã mẽ amã karõ hkôt axpēn nhĩpêx o ri axpēn kôt apa. ¹¹ Koja ma mẽ ate akwýjê mã kapēr jarēnh o ri apa kaxyw mẽ amã

karõ ka mẽ ama nê akatàt kôt ý hã mẽ kãm harēnh mex o ri mẽ hkôt apa. Rý tanhmã axpēn to ajuta hto ho ri apa kaxyw mẽ axunhwýr japēr ka mẽ amnhĩ tã omu nê hkamnàr rom mẽ ho ajuta mex rãhã ho ri apa. Mẽ apiitã Jejus nhý hã ã amnhĩ nhĩpêx anhýr o ri apa. Kêt kêt Jejus kôt mẽ akwýjaja amnhĩ tã mẽ apumu nê mẽ anhý hã Tĩrtũm mã mex o mex ã harē.

Jejus kwýjaja kot amnhĩ xà htýx kamã hamak o pa hã mẽ harēnh

Rukre 6.20-23; Juãw 16.1-4; Sikũn Tesarõn 1.3-12; Sikũn Ximotre 3.13; Eprêw 12.3; Xiakre 1.2-4

¹² E Kris kôt ixkrãmnhwýjaja. Koja Kris kwý kêt xwýnhjaja Kris ã tanhmã mẽ anhĩpêx to nom kwa kêt ka mẽ tee ri amnhĩ kukamã ajamaxpēr o akaprĩ nê apa hkêt nê. Kêt mẽ akĩnh rãhã axpēn kôt ri apa. Na htem ã mẽ pahpê Kris kwýjê nhĩpêx anhýr o pa. Jakamã kwa mẽ amnhĩ tã mẽ omu nê tee ri amnhĩ kukamã ajamaxpēr kêt nê.

¹³ Mẽ arĩ akĩnh nê ri apa. Mẽ kot Kris pyrà nê mẽ panhĩpêx punuj tãã. Kêt kêt Jejus nhýrmã akupỹn mẽ pahwýr wrý pu mẽ omu nê pahkĩnh týx o pahkĩnh týx. ¹⁴ Kwãr mẽ mãmrĩ mẽ pahpê Kris kwý hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwýnhjê nhĩpêx o pa anē.

¹⁵ Nê mẽ apê Kris kwý jakamã kwa kêt ka mẽ amnhĩ to mex rãhã o ri apa.

Jao mẽ hpar o ri apa hkêt nê.

Nê ri axàhkĩnh o ri apa hkêt nê.

Nê nhãm mẽ hkaêx mã agjêx o ri apa hkêt nê.

Nê tanhmã mẽ homnuj to ho ri apa hkêt nê.

Kot kaj mẽ ã amnhĩ nhĩpêx anhýr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaàm týx nê.

¹⁶ Nom koja mẽ apê Kris kwý hã tanhmã mẽ anhĩpêx to ka mẽ ja hã amnhĩ tã mẽ omu nê amnhĩ kamã apijaàm kêt nê. ãm Tĩrtũm pix mã amnhĩ jarē nê kãm:

—Pa Tĩrtũm. Ixpê akra Kris kwý hã na mẽ ã ixtomnuj anē. Nom ixpê akra jakamã kwãr mẽ mãmrĩ tanhmã inhĩpêx to. Amex o amex o ate ixto akra jakamã kwãr mẽ mãmrĩ ã inhĩpêx anhýr o pa. Anē.

17 Nê koja Tirtûm tokyx mẽ pahpiitã tanhmã mẽ pahte amnhĩ nhĩpêx to hã mẽ pahpumu nê tanhmã mẽ panhĩpêx to. Mẽ pahpê hkrajaja koja tanhmã mẽ pahte amnhĩ nhĩpêx to hã tanhmã mẽ pahto mex to. Hãmri nê hpãnhã mẽ kêp hkra hkêt xwýnhjê ho hapu nê tanhmã mẽ hipêx to. Mẽ kot amnhĩ kaxyw hkôt hamaxpêr kêt jakamã nhũm mẽ pahkĩnhã tanhmã mẽ homnuj týx to. 18 Kapêr ã kagã htũm kot ja hã mẽ pajarênh kot:

Mẽ kot Tirtûm kapêr kôt amnhĩ to mex xwýnhjaja na htem àmnhĩx amnhĩ xà htýx kamã hamak o pa kamã ty nhũm Tirtûm ma õ krĩ hwýr amnhĩ wýr mẽ ho àpir kurê kumrêx.

Nom mẽ kot amnhĩ tomnuj xwýnhjaja koja mẽ hkĩnhã amnhĩ xà htýx kamã hamak rãhã nê pa ho pa nê aa mex kêt nê. Anê.

19 Tã koja Tirtûm kãm ja prãm japêr kwãr mẽ mãmri Kris ã tanhmã mẽ pahtomnuj to. Nom kêt pu mẽ Tirtûm kamnãr rom amnhĩ to mex pix o ri papa. Kêp mẽ panhĩpêx xwýnh maati jakamã ra kot amnhĩ jarênh xà hkôt koja tanhmã ri mẽ pamã amnhĩ nhĩpêx to ho pa.

5

Tirtûm krajaja kot tanhmã amnhĩ nhĩpêx to hã mẽ kãm karõ
Atre 20.28-31

1 E kot paj hpãnhã mẽ apê Kris kwý hkrãhtũmjê mã ixkapêr ka mẽ inhma. Ijaxwýja ixpê mẽ akrãhtũmjê hõ na pa. Na pa pre mẽ akurom Kris htyk kãm omu. Nom kot puj mẽ nhỹrmã pahpimrãatã mex o mex ã omu nê urak nê mẽ pamex nê ri papa ho papa. 2-3 Jakamã e Kris kôt mẽ hkrãhtũmjaja kêt ka mẽ atar Kris kôt pahkwýjê jamãr mex nê. Ra Tirtûm kot mẽ ate kãm hkwyjê jamãr kaxyw mẽ axunhwýr jakamã kêt ka mẽ omunh mex rãhã ho mẽ hkôt ri apa. Te ho ôwêhti jamãr xwýnh kot ôwêhti jamãr mexta pyrãk. Te mẽ kêp Tirtûm krit ôwêhti nhũm mẽ ate kãm mẽ hamãr o apa xwýnh pyrã nê kãm mẽ omunh mex rãhã ho ri mẽ hkôt apa. Nê akĩnh pê tanhmã ri mẽ ho ajuta hto ho ri mẽ hkôt apa. Ja na Tirtûm kãm hprãm. Nom kêt ka mẽ ano hkã karôt kãm mẽ

ho ajuta hkêt nê. Rý kàxpore hprãm xaj mẽ kãm tanhmã amnhĩ nhĩpêx to hkêt nê. Æm amarĩ tanhmã mẽ kutã anojarêt to pix kukamã ajamaxpêr o ri mẽ hkôt apa.

Nê kêt ka mẽ kãm mẽmoj tã karõ kamã axihtýx kêt nê. Mẽ akapêr mã aprĩ kamã mẽ kãm mẽmoj jarê kê mẽ amnhĩ tã mẽ apumu nê mẽ apyrã nê ã axpên nhĩpêx anhýr o pa.

4 E kêt ka mẽ ã Kris kôt mẽ akwýjê jamãr mex pê mẽ hipêx o apa anê. Hãmri nhũm mẽ pajamãr xwýnh maati ja hã mẽ apumu nê nhỹrmã akupýn mẽ pahwýr wrý nê mẽ ato mex rax nê.

5 Nê e mẽ amy xãptãr nywjaja. Kêt ka mẽ Kris kôt mẽ akrãhtũmjê kapêr ma nê mẽ hkôt ri amnhĩ nhĩpêx mex o ri apa.

Nê kwa kêt ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tirtûm kapêr ã kagã htũm kot ja jarênh kot: Mẽ kot amnhĩ to jarkrar o ri mẽ pa xwýnhjaja na hte Tirtûm mẽ kutã amnhĩ xunhwý.

No mẽ kot amnhĩ to hkryre nê axpên tã hpijaãm o mẽ pa xwýnhjaja na hte mẽ ho mex o pa.

6 Anhýr ã mẽ harênh jakamã kwa kêt ka mẽ Tirtûm ã apijaãm rãhã ho ri apa ixkwýjaja. Nê axpên mã ri amnhĩ to jarkrar o ri apa hkêt nê. Kêt kê Tirtûm xihtýx xwýnhja ja hã mẽ apumu hãmri nê nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwýnh ã mẽ ajarê nê mẽ ato mex rax nê.

7 Nê kêt ka mẽ tee ri amnhĩ kukamã ajamaxpêr pê akaprĩ ho ri apa hkêt nê. Æm te mẽ ate Tirtûm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tirtûm kêp mẽ pajamãr xwýnh maati kênã kot ka kêt mẽ ri akaprĩ nê ri apa.

8 Nê kwa mẽ okora. Kêt ka mẽ amnhĩ nê kot mẽ pakutã amnhĩ xunhwýr xwýnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyrãk o mẽ panhĩpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkôt pa. 9 Na hte ã pika piitã hkôt Kris kôt mẽ pahtõ nê mẽ pahtõxjê nhĩpêx anhýr o pa nhũm mẽ pahpyrã nê amnhĩ xà htýx kamã hamak o pa pê omnuj

nê pa. Jakamã kwa kêr ka mẽ Kris kôt amnhĩ xunhwÿr tÿx nê kutã amnhĩ to htÿx rãhã ho ri pa. ¹⁰ Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhÿrmã mẽ pahte kuri tãm amnhĩ nhĩpêx o papa mã xwÿnh ã mẽ pajarê. Kris kukwak ri ã mẽ pajarênh anhÿr jakamã mẽ ate jar Kris ã apunuj nê ri apa htã kot kaj mẽ kritpêm ã amnhĩ nhĩpêx anhÿr ry hkêt nê. Koja Tĩrtũm mẽ akrã kamã mẽ ajamaxpêr xihtÿx jagjê ka mẽ akupÿm amex nê axihtÿx pê ate amnhĩ nhĩpêx nyw o amnhĩ nhĩpêx rãhã ho ri apa.

¹¹ Tĩrtũmja hihtÿx o hihtÿx nê àhpumunh o àhpumunh. Nê hihtÿx xà nê àhpumunh xà koja aa kêp hirerek nê hapêx kêt kumrêx. ãm hãmri na mẽ kot harênh kot anhÿrja.

Pêtre kapêr jatur xà

¹² Nê ota Kris kôt mẽ pahtõ Sirastija na inhmã mẽ akaxyw kagàja nhĩpêx pa mẽ awÿr mẽnh kaxyw. Na pa hte kãm ixkapêr nhũm inhma nê inhmã hã kagà. Na hte Kris kapêr kôt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nê mar nê tãm ajamaxpêr kaxyw. Nê Tĩrtũm kãm mẽ ajapê nê kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhĩ tã harênh ma nê kapêr kôt pix mã amnhĩ nhĩpêx mex rãhã ho ri apa. Mẽ akwÿjaja kot tanhmã hã mẽ ato htãã.

¹³ Nê ota jar Papirõn kamã Kris kôt mẽ pahtõ nê mẽ pahtõxjaja mẽ awÿr hpêr mẽ. Tĩrtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awÿr hpêr mẽ. Nê Xiakre mãânên mẽ awÿr hpêr mẽ. Te kêp ixkra pyræk.

¹⁴ Nê kêr ka mẽ nhÿri apê Kris kwÿ hã axpên pumu nê mẽ axpên to atõ nê atõx ã axpên mã akapêr mex kurê kumrêx.

E kê Tĩrtũm mẽ apê Kris kwÿ hã mẽ amã mẽ ajamakêtkati nê mẽ apa xà gõ ka mẽ axãmnhix ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awÿr kagà nê mẽnh anê.

Sikūn Pêtre
Simāw Pêtre kot Jejus kôt
hkwýjê hwýr wam kagà nē
mēnh kôt hō mēnh

Simāw Pêtre na pre kagàja nhîpêx. Jejus nhî hā hkrajê jahkre ho mē pa xwýnhjê hō na pre. Mē kēp Jejus kra hkêt xwýnhjaja ra kot Jejus ā hpîr kaxyw nhūm pre kagàja nhîpêx nē krî piitā hkôt Jejus kwýjê hwýr kurē nē kamā hprî hā mē kām mēmoj tā karō. Mē kot arî Tirtūm kot amnhî nhîpêx kôt amnhî nhîpêx rāhā ho pa hā mē kām karō. Nē hamaxpēr o mē hamaxpēr rāhā ho pa hā mē kām karō.

Nē mē hkwý kot Tirtūm kôt amnhî nhîpêx ā amnhî jarēnh tā hkôt amnhî nhîpêx kêt xwýnhjaja nhūm pre tanhmā mē harēnh to. Ā na pre mē kām mēmoj jarēnh nē hā kagà nē krî piitā hkôt mē hwýr rēnh anē. Nē mē kām:

¹ Pa Kris kôt ixtō nē ixtōxjaja. Xà mē amex? Ot pa mē awýr kagà nhîpêx nē krî piitā hkôt mē awýr kurē. Ixpê Simāw Pêtre na pa wam ixte kagà nhîpêx nē mē awýr mēnh tā axte hō nhîpêx. Ixte Jejus Kris nhî hā mē ajahkre ho ixpa xwýnh ā mē amā hipêx nē kumē. Na pa hte Jejus mā amnhî nhîpêx mex o ri ixpa.

Nē mē papytār xwýnh Jejus Krisja Tirtūm pyrā nē mex o mex. Nē wa kot amnhî nhîpêxja mex o mex. Jakamā na pre wa tanhmā mē pahkrā hto pu mē amnhî kaxyw wa hkôt pajamaxpēr tỳx rāhā ho ri papa. Na ka htem ixpyrā nē ā amnhî nhîpêx anē. Tā pa mē amā kagàja nhîpêx.

² Nà Tirtūm mē mē panhō Pahihti Jejus wa kot amnhî nhîpêxja na ka mē ra harēnh mar tỳx nē. Wa kot tanhmā amnhî nhîpêx to nē tanhmā wa hamaxpēr toja ka mē mar tỳx nē wa hkôt pix mā amnhî nhîpêx. Tā kēr ka mē arî ā amnhî nhîpêx anhýr rāhā ho ri apa. Jao axāmnhîx ajamakêtkati nē akînh nē apa ho apa. Na pa hte ā mē ato Tirtūm mē Pahihti Jejus Kris wa hwýr o ri ixpa anē. Na hte Tirtūm mē ato mex nē mē akutā nojarêt rāhā ho pa.

Tirtūm kot mē pahto mex o pa hā harēnh
Epes 2.12-13; Wam Tesarōn 1.2-4; Sikūn
Pêtre 3.18

³ Nē Tirtūmja àhpumunh tỳx o àhpumunh tỳx jakamā na pu htem hkôt amnhî xunhwý nhūm amnhî tā mē pahpumu nē mē pamā àhpumunh tỳx xà hkwý gō. Hāmri pu mē ra urāk nē amnhî to mex nē tām amnhî nhîpêx o ri papa. Tā kot puj mē nhýrmā ma ō krî hwýr api. ⁴ Na pre mē pakukamā amnhî jarēnh o:

—Kot paj nhýrmā ixkrajê mā ixte amnhî nhîpêx mex kwý gō nhūm mē inhý hā ho tām ri amnhî nhîpêx mex o pa. Nē ixpyrā nē hamaxpēr mex o pa.

Anhýr jao te ra mē pamā hkînh xà mex kwý nhōr pyrāk o mē panhîpêx. Nē te ra kot mē pahkrām hamaxpēr mex jagjēnh nē mē pamā kot amnhî nhîpêx mex jagjēnh pyrāk. Mēmo kaxyw na pre ā mē panhîpêx mex anē? Nà urāk nē tām mē pahte amnhî nhîpêx mex rāhā o ri papa kaxyw. Jao mē pahte mē kēp hkwý hkêt xwýnhjê hkôt amnhî nhîpêx kêt nē. Nē mē hamaxpēr punuj o pajamaxpēr kêt nē. Nē hpānhā mē pahte Tirtūm kôt pix mā amnhî nhîpêx rāhā ho papa. Ā mē pahte amnhî nhîpêx anhýrja na mex o mex. ⁵ Tā ā Tirtūm kot mē panhîpêx mex anhýr jakamā kwa kēr ka mē kapēr mar tỳx nē hkôt pix mā amnhî nhîpêx mex o ri apa. Jao amnhî kaxyw hkôt ajamaxpēr rāhā nē. Kot kaj mē ā amā amnhî nhîpêx anhýr o apa hprām hā kot kaj mē määnēn amā tām amnhî nhîpêx o apa hprām. Nē mē amā Tirtūm kapēr piitā mar prām o ri apa. ⁶ Hāmri nē piitā mar pa nē mēmoj punuj piitā nē amnhî to htỳx nē. Nhūm mē kēp Kris kwý hkêt xwýnhjaja Kris ā tanhmā mē anhîpêx to htā ka mē am amnhî tā mē omu nē mē umaj mē amā Kris kaga hprām kêt nē.

Nē mē amā Tirtūm mā amnhî jarēnh rāhā ho apa hprām.

Nē mē amā kapēr mar rāhā ho apa hprām.

⁷ Nē mē amā Kris kôt mē atō nē mē atōxjê ho mex pix o ri apa hprām. Jao te mē amā amnhî tā ma pyrāk o mē piitā mē hipêx o ri mē hkôt apa.

⁸ E kēr ka mē ā amnhî nhîpêx anhýr o ri apa. Kot ka mē ā amnhî nhîpêx anē nē mē

panhõ Pahihti Jejus Kris kôt amnhĩ nhĩpêx mex o mō. Hāmri nhũm mẽ akwỳjaja mẽ apumu nẽ mẽ apê Kris kwỳ hã mẽ ajarênh kurê kumrêx. ⁹ No kot ka mẽ atō ixkapêr mar tã hkôt amnhĩ nhĩpêx kêt nẽ hāmri te Tĩrtũm kot anê ate amnhĩ tomnuj rênh par mã ajamexpêr kêt pyræk. ¹⁰⁻¹¹ No na ka htem ã amnhĩ nhĩpêx anhỹr kêt nẽ. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nẽ Tĩrtũm kot mẽ ato hkra hã mẽ ajarênh kurê kumrêx. Kot kaj mẽ ã hkôt amnhĩ nhĩpêx anhỹr o apa nẽ mẽmo arĩgro hã apunuj nẽ apa htã Jejus kaga hkêt nẽ. Hāmri nẽ nhỹrmã ma Tĩrtũm nhõ krĩ hwỳr api nhũm mẽ apumu nẽ mẽ ato mex rax nẽ. Hāmri ka mẽ õ krĩ kamã mẽ panhõ Pahihti Jejus Kris wa kuri atĩr tũm nẽ amex nẽ apa ho apa.

¹² Nẽ na ka mẽ ra Tĩrtũm kot amnhĩ nhĩpêx mar tỳx nẽ amnhĩ krã kamã kot amnhĩ nhĩpêx mã ajamexpêr tỳx o ri apa. Tã nom kot paj arĩ mẽ amã ja jarênh rãhã ho ri ixpa. ¹³ Kormã ixtĩr ri kot paj xatã mẽ amã harênh o amnhĩrĩt. Ja na kêt inhmã hprãm. Mẽ ate nhỹrmã tanhmã ri ajamexpêr to nẽ hkaga pumaj. ¹⁴ Na pre mẽ panhõ Pahihti Jejus Krisja inhmã tokyx ixtyk ã ijarê. Kot paj xep kritpêm ri ixtĩr nẽ ixpa hkêt nẽ. ¹⁵ Jakamã na pa kormã ixtĩr ri ã mẽ amã kagã nhĩpêx anẽ. Mẽ ate inhmỹr pê arĩ omunh nẽ kamã harênh nẽ Tĩrtũm kot amnhĩ nhĩpêx mã ajamexpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matêwre 17.1-5; Makre 9.1-8; Sikùn Ximotre 3.16-17

¹⁶ Nẽ na pa pre ra tanhmã mẽ amã mẽ panhõ Pahihti Jejus Krisja jarênh to. Hihtỳx o hihtỳx ã harê nẽ àhpumunh tỳx o àhpumunh tỳx ã harê. Nẽ nhỹrmã akupỹn mẽ pahwỳr wrỳk ã harê. No na pa pre amnhĩ krã hkôt ã harênh anhỹr kêt nẽ. Na pa pre inhno ho Jejus hihtỳx o hihtỳx ã omunh o hkôt ixpa nẽ ixte omunh xà hkôt ã mẽ amã harênh anẽ. ¹⁷⁻¹⁸ Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wỳr api. Pa nẽ kaxyw Xiakre nẽ Juãw mẽ pa mẽ hkôt xipimràatã hixêt ã api nẽ himõk ã ixkuhê.

Hāmri nhũm Tĩrtũm tanhmã Jejus to nhũm hirã htỳx kãm xa. Hāmri nhũm Mẽpahpãm Tĩrtũmja mẽ inhmã kapêr. Kaxkwa kamã hirã htỳx rax rũm mẽ inhmã kapêr o:

—E ota Ixkrata xa. Inhmã hapê ho inhmã hapê. Anẽ.

Tã ra ixte mar xà hkôt pa amnhĩ xõ ri mẽ amã harê nẽ hã kagã. ¹⁹ Na pa prem ã hixêt prêk nhĩmõk ã Jejus pumunh nẽ Tĩrtũm kot tanhmã harênh to hã mar anẽ. Hāmri nẽ ijamexpêr o:

—Nà ãm hāmri na pre amnepêm Tĩrtũm nhỹ hã kapêr jarênh o mẽ pa xwỳnhjaja Jejus kukamã ã harênh anhỹr o pa. Anẽ.

Mẽ kot tanhmã Jejus kukamã harênh toja te kot kamat kô kamã kanê hpòk nhĩrã hkryre pyræk. Tã koja nhỹrmã akupỹn wrỳ hāmri nẽ te myt kator nẽ hirã mex nhũm mẽ pahte mẽmoj pumunh mex pyræk. Jakamã kwa kêt pu mẽ kot tanhmã Jejus kukamã harênh toja mar tỳx rãhã nhũm nhỹrmã te myt kator pyrã nẽ akupỹn mẽ pahwỳr wrỳ. ²⁰ Tĩrtũm kapêr ã kagã htũm kot tanhmã ÿ hã kapêr jarênh xwỳnhjê jarênh to. Mẽ kot mẽmoj kukamã ujarênh ã mẽ harê. Nẽ Jejus kukamã tanhmã ujarênh to hã mẽ harê. ã mẽ kot mẽmoj kukamã harênh kot anhỹr. Nom na pu htem amnhĩ krã hkôt ã mẽ ujarênh anhỹrja mar tỳx kêt nẽ. Koja Tĩrtũm Karõ hprĩ hã mẽ pamã ho amnhĩrĩt pu mẽ rĩ kormã pahprĩ hã mar tỳx nẽ. ²¹ Na pre ÿ hã kapêr jarênh o mẽ pa xwỳnhjaja amnhĩ krã hkôt hkwỳjê mã ujarênh o pa hkêt nẽ. Tĩrtũm Karõ na pre tanhmã mẽ hkrã hto nhũm mẽ ÿ hã hkwỳjê mã tanhmã harênh to ho pa nẽ ÿ hã mẽ pamã hã kagã.

2

Tĩrtũm kapêr jarênh o hêx xwỳnhjê jarênh Korosê 2.16-17; Wam Ximotre 4.1-5; Sikùn Ximotre 3.1-9; Jutre 3-16

¹ Nẽ amnepêm na pre Ijaew kwỳjaja te mẽ kêt Tĩrtũm nhỹ hã kapêr jarênh xwỳnh pyræk. Nom Tĩrtũm kapêr kwỳm ri hkwỳjê mã tanhmã ho hêx to ho pa. Tã koja nhỹrmã mẽmojaja mẽ uræk nẽ mẽ awỳr mra nẽ ã mẽ amã Tĩrtũm kapêr o hêx o pa anẽ. Nẽ kapêr kwỳm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nẽ amnhĩ nhĩpêx nyw kaga nẽ hpãnhã mẽ

kot amnhĩ tomnuj kôta apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jejus kot mẽ nê htyk tâ nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mýrapê koja Tĩrtũm tokyx mẽ kot amnhĩ xà htyx kamã hamak tũm xà hwýr mẽ rênh pa.

² Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htyx ri tanhmã amnhĩ tomnuj to ho ri pa. Tã ã mẽ kot Tĩrtũm kapêr o mẽ hêx xwýnhjê mar nê mẽ hkôt amnhĩ nhĩpêx anhýr jakamã koja mẽ kãm Tĩrtũm kapêr mar prãm xwýnhjaja mẽ kot amnhĩ nhĩpêx ã mẽ omu nê Tĩrtũm kapêrja mex kêt ã harênh japêr. ³ Tĩrtũm kapêr o mẽ hêx o mẽ pa xwýnhjaja na htem kãxpore pix prãm xàj mẽ awýr mra nê tanhmã mẽ amã kapêr jarênh o hêx to ho pa nhũm Tĩrtũm ja hã mẽ omunh rãhã ho hkrĩ. Na hte nhýhým mrar kêt nê rý htyx ôt o hikwý hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhýrmã ma mẽ kot amnhĩ xà htyx kamã hamak tũm xàta hwýr mẽ kurê nhũm mẽ ma hwýr hapêx pa.

⁴ Nê amnepê mã kaxkwa kamã Tĩrtũm kapêr o mẽ wrýk xwýnh kwýjaja na prem axtem nê Tĩrtũm kapêr nhĩrôp kuhê nhũm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukaprĩ hkêt nê amnhĩ nê mẽ kator pa hãmri nê mẽ kot amnhĩ xà htyx kamã hamak tũm xàta wýr mẽ hano. Nhũm prem ma hwýr pa nê ahkre xupým kãm kamãt kô kamã arĩ hkrĩ ho hkrĩ. Tĩrtũm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprý ho hkrĩ.

⁵ Nê amnepêm pika kamã ri mẽ pa xwýnhjaja na prem haxwýja piitã amnhĩ tomnuj pix o ri pa. Jakamã nhũm Tĩrtũm ja hã mẽ omu nê mẽ kamã ukaprĩ hkêt nê. Nê mẽ hwýr na rax mẽ. Mẽ kãm kapêr mar prãm kêt jakamã nhũm mẽ hwýr kumê nhũm wrýk rax kumrêx nê mẽ hanhir pa nê mẽ himex. ãm Noehti mẽ hkwý pê 7 pixjaja nhũm mẽ kurom htĩr nê hkã hkĩnh nê mex nê pa. Noehti kormã na xwýj ri kot mẽ kãm Tĩrtũm kapêr jarênh o ri mẽ hkôt pa

htã nhũm mẽ kuma nê ãm kuma. Mýrapê na prem piitã pikaprãr pa.

⁶ Nê Sotô mẽ Gomo wa kamã mẽ pa xwýnhjaja haxwýja na prem amnhĩ tomnuj tỳx kumrêx o pa nhũm Tĩrtũm wantajê pyrã nê mẽ kamã ukaprĩ hkêt nê. Na pre kaxkwa rũm mẽ hipy mẽmo hpôk kwý rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nã mẽ piitã mẽ kot mẽ harênh mar nê hamaxpêr o:

—Na hte ã Tĩrtũm mẽ kot amnhĩ tomnuj xwýnhjê nhĩpêx anê.

Anhýr o hamaxpêr kaxyw na pre ã mẽ hipêx anê. ⁷⁻⁸ Nom Rohtija na pre Tĩrtũm Sotô nê kator jakamã nhũm htyk kêt nê. Na pre hkwýjê rom tãm amnhĩ nhĩpêx tã mẽ kot amnhĩ tomnuj tỳx xwýnhjê nhõ krĩ kamã ôrkwý nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ý hã hkaprĩ nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprĩ htyx nê pa. ⁹ Tã nhũm Tĩrtũm mẽ himex kaxyw nê mẽ nê kator nê mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ nhĩpêx xwýnhjê pytãr anê. No mẽ kot amnhĩ tomnuj xwýnhjaja na hte axtem mẽ hipêx. Tã koja nhýrmã mẽ pahpiitã tanhmã mẽ pajarênh to xà hã arĩgro kato nhũm ma mẽ kot amnhĩ xà htyx kamã hamak tũm xà wýr mẽ rênh pa. ãm tapxipix kot ã mẽ hipêx anhýr kaxyw àhpumunh tỳx. ¹⁰ Tã mẽ hpijaàm kêt kãm amnhĩ tomnuj o mẽ pa xwýnhjaja nê mẽ kot Tĩrtũm kapêr mar nê ãm mar xwýnhjaja koja nhýrmã mẽ homnuj tỳx nê.

Nê Tĩrtũm kapêr o hêx o ri mẽ pa xwýnhjaja na htem amnhĩ to jarkrar pix o pa. Nê Tĩrtũm kapêr o mẽ wrýk xwýnhjê hã hpijaàm kêt nê. Nê axtem nê mẽ ho kapêr punuj pê tanhmã mẽ haprý hto ho pa. ¹¹ Tã nhũm htem amnhĩ tã mẽ kuma nê ãm mẽ kuma. Mẽ kurom mẽ hihtỳx kumrêx tã no ãm amnhĩ tã Tĩrtũm mã tanhmã mẽ ho kapêr to hkêt nê.

¹² Nê mry xoprê na hte htyx ri pa ho pa. Tã Tĩrtũm kapêr o mẽ hêx o mẽ pa

xwýnhjaja htem mry xoprêta pyrà nê htýx ri hamaxpêr mex kêt o pa. Jao hprî hã mēmoj mar kêt tã htýx ri hijuk ri tanhmã mēmoj jarênh to.

Nê mry xoprêja htýx pa nhūm mē kot hparja pyrà nê mē kot Tirtūm kapêr o hêx o mē pa xwýnhjaja koja Tirtūm nhÿrmã kuwy hwÿr mē ho hapêx nê kamã mē rēnh pa.

¹³ Nê koja nhÿrmã Tirtūm mē kot tanhmã mē ama hêx to ho pa hã mē omunh xà hkôt mē homnuj tÿx nê. Na htem hpijaàm kêt nê mē piitã mē noo mã tanhmã amnhî tomnuj to ho pa. Kamàt kãm nê arîgro hã. Nê mē kãm tanhmã amnhî nhîpêx to hprãm xà hkôt pix mã amnhî tomnuj o pa.

Na htem te mē kêp Kris kôt mē atôjê pyrà nê mē akôt Tirtūm kapêr mar xà hã ixkre hwÿr agjê nê mē anhîhkô hã mē kot Jejus tyk mã hamaxpêr kaxyw pãwti hkwÿ hku. Nom htýx hkur o hkrî nê htyk mã hamaxpêr kêt nê. Kãm Jejus kînh kêt tã hêx rom hpijaàm kêt kãm mē anhîhkô hã htýx ri hkur o hkrî.

¹⁴ Nê nhÿri krî hwÿr pôj nê mēnijê pumu nê kãm mē hkînh nê. Ra mē mjên ri pa htã nhūm mē kãm mē ho amnhîkati hprãm nê mē kamã hpijaàm kêt o ri pa.

Nê kormã mē kot Kris kôt amnhî xunhwÿr tohtuj anhÿr xwýnhjê hwÿr mra nê hêx rom tanhmã mē kãm kapêr to pē mē no kupyw o ri mē hkôt pa. Mē kot mē mar nê Kris kaga nê mē hkôt ri amnhî nhîpêx prãm xàj ã mē hipêx anhÿr o pa.

Na htem hikàxpore rûnh o pikuprôn timer pix kukamã hamaxpêr o ra ho ôxÿ nê.

Ã na htem amnhî nhîpêx anhÿr o pa. Tã ra Tirtūm kot mē homnuj tÿx kaxyw mē hã amnhî jarê. ¹⁵⁻¹⁶ Te mē kot kamàt kô kamã pryjuk ã hpikunor nê htýx ri pa pyræk o na htem amnhî nhîpêx nê kãm Tirtūm kapêr mar prãm kêt nê amnhî tomnuj pix o pa.

Amnepê m Peo hkra Paraãwta kêp Tirtūm nhÿ hã kapêr jarênh o pa xwýnh tã axtem nê kàxpore rax prãm xàj tanhmã amnhî tomnuj to kaxyw. Nhūm Tirtūm tee ri ja hã omu nê Paraãw krit jumênreja tanhmã hakwa hto nhūm kãm kapêr. Jumênre kapêr kêt tã nhūm Tirtūm tanhmã hakwa hto nhūm kãm kapêr nê tanhmã kot amnhî tomnuj to kaxywta ã kãm akir nhūm amnhî tã kuma hãmri nê ã amnhî nhîpêx anhÿr

kêt nê. Tã mē kot Tirtūm kapêr o mē hêx ho mē pa xwýnhjaja na htem Paraãw pyrà nê kàxpore rax prãm xàj tanhmã amnhî tomnuj to pix prãm. ¹⁷ Te hino ra grã nhūm mē tee ri kamã gô japêr pyræk o na htem amnhî nhîpêx. Rÿ te kakrà hapôx nhūm mē kot omunh nê na wrÿk ã hkamnhîx kaprÿ pyræk. Tã ra Tirtūm mē kaxyw kamàt kô htýx pē mē kot amnhî xà htýx kamã hamak tūm xàta o mē nê. ¹⁸ Na htem htýx ri amnhî tomnuj o pa hã mē amã amnhî to jarkrar o ri pa. Jakamã nhūm mēhō ra amnhî tomnuj kaga kaxyw nhūm mē tee ri ja hã omu nê kot ã amnhî nhîpêx anhÿr pymaj tanhmã nê kãm kapêr to nê mē kãm:

—Kwa ixte amnhî tomnuj o ixpa htã nhūm Tirtūm ja hã ixpumu nê ãm ixpumu nê arî inhmex ã ijarê. Na pa hte mē hkuprÿjê hwÿr mra nhūm ja hã ixpumu nê ãm ixpumu nê hã tanhmã ixto hkêt nê. Jakamã kwa mē ixpyrà nê arî ã amnhî nhîpêx anhÿr o ri apa. Koja Tirtūm tanhmã hã ato hkêt nê. Anê.

Hãmri nhūm mē tee ri kuma nê ra hamaxpêr kati nê. ¹⁹ Na htem mē kãm kapêr o:

—Kwa mē ixpyrà nê mãmrî amã tanhmã amnhî tomnuj to hprãm xà hkôt amnhî nhîpêx o ri apa. Mēhō kot kêt ja nê tanhmã amã kapêr to? Anê.

Mē kot amnhî tomnuj xàja te kêp mē ô patrãw pyræk jakamã na htem ãm kôt pix mã amnhî nhîpêx o pa. Jakamã kot pu mē tanhmã amnhî tomnuj to. Nê gaa nê axte. Nê gaa nê ra ho amnhî pyræk. Hãmri nê tee ri pamã hkaga hprãm kaprÿ nhūm te kêp mē panhō patrãw pyræk o mē panhîpêx pu mē ãm kôt pix mã ri amnhî nhîpêx o ri papa.

²⁰ Nê koja mēhō ra Tirtūm kapêr ma. Nê mē panhō Pahihti Jejus Kris jarênhja nhūm hprî hã kuma. Kêp mē pahte amnhî tomnuj pē mē papytãr xwýnh ã harênh ma. Tã nhūm mē kot Tirtūm kapêr o mē hêx xwýnhjaja hwÿr mra nê tanhmã kãm ho hêx to nhūm mē kuma nê kot amnhî nhîpêx tūm o awjanã. Jao amnhî tomnuj tÿx o kormã kot Tirtūm kapêr mar kêt ri kot amnhî tomnujta jakre. ²¹ Kêp ãm aa kot Tirtūm kapêr mar kêt rãhã htyk ronhÿx ja kãm mex nê. Nom ra kot mar mex tã ãm kuma nê hkaga jakamã koja mex kêt kumrêx. ²² Mē kot ã

mê kot amnhî nhîpêx anhÿr ã mê harênh kot:

Rop na hte ôjaïr nê akupÿm ôjaïrta ku.

Nê hagrô na htem unê nê hkumrâ nhÿm muxre. Tã nhÿm mê kãm ure nhÿm akupÿm hprôt nê mra nê akupÿm gyw o amnhî tomnu pa. Anê.

Tã mê kot Tirtÿm kapêr o mê hêx xwÿnhjê mar nê mê hkôt amnhî nhîpêx xwÿnhjaja te mê kot rop mê hagrô wa kot amnhî nhîpêxta pyrã nê Tirtÿm kapêr kaga nê akupÿm mê kot amnhî nhîpêx tÿm o awjanã nê htÿx ri amnhî nhîpêx o pa.

3

Tirtÿm kot pika ho hapêx kaxyw kormã amnhî tã mê pajamãr ã harênh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrãmnhwÿjaja. Na pa pre ra wam kagãta nhîpêx nê mê awÿr kurê. Tã ra axte hkôt ja nhîpêx. Hamê wa kamã na pa mê amã Tirtÿm kot tanhmã amnhî nhîpêx to hã harê. Nê Jesus Kris nhÿrmã akupÿn mê pahwÿr wrÿk ã harê. Mê ate mar nê tãm amnhî nhîpêx nê tãm ajamaxpêr o kutêp mê apa kaxyw.

² Amnepê mã Tirtÿm nhÿ hã kapêr jarênh o ri mê pa xwÿnhjaja na prem Tirtÿm kot nhÿrmã mê pahwÿr mēhō mēnh mã xwÿnhhta jarênh o pa. Kot nhÿrmã mê pahwÿr wrÿk nê mê pahto amnhîptâr o pa hã harênh o pa. Tã kêr ka mê kapêr ma nê hã ano htÿx nê hkôt ajamaxpêr tÿx rãhã ho ri apa. Nê Jesus kot mê awÿr mê rēnh xwÿnhjaja ka mê kapêr ma. Mê kot mê amã mēmoj jarênh o mê pa xwÿnhjaja na htem tanhmã mê amã Pahÿhti Kris jarênh to ho ri mê akôt pa. Nê tanhmã kot mê panê amnhî nhîpêx to hã harê. Tã kêr ka mê kapêr ma nê hã ano htÿx nê kãm ajamaxpêr tÿx rãhã ho ri apa.

³ Nê kwa mê inhma. Nhÿrmã Kris akupÿn mê pahwÿr wrÿk xwÿj ri koja mê kot amnhî tomnuj tÿx xwÿnhjaja mê awÿr mra. Mê hpijaàm kêr o pa xwÿnh jakamã koja mê tanhmã mê akamã amnhî tomnuj to ho pa. Nê mê apê Kris kwÿ hã mê apumu nê mê atã hpêr o pikēnh o pa. ⁴ Nê htÿx ri Kris ã mê akukja nê mê amã:

—Kwa no Krisja? Amnepêm akupÿn wrÿk nê mēmoj piitã tanhmã hipêx to hã amnhî jarênh tã arÿ Tirtÿm kot mēmoj to kator krax rÿm mēmoj amarÿ rãhãã. Ra mê panhîgêjtaja pikaprãr par tã nhÿm kormã akupÿn wrÿk kêr nê. Kot mê pamã amnhî to hêx kēnã. Mo kaxyw koja kêr akupÿn mê pahwÿr wrÿ? Kot mê pamã amnhî to hêx kēnã. Anê.

⁵⁻⁶ Nom ã mê kot harênh anhÿrja kot anhÿr kêr. Tirtÿm kot mēmoj to kator krax rÿm mēmoj amarÿ rãhã hã mê kot harênhja kot anhÿr kêr. Na pre Tirtÿm kapêr pix o kaxkwa nê pika ho kato. Nhÿm gô hkwÿja kapêr mar xà hkôt pika hã amnhî jahkre. Nhÿm hpãnhã panhî nhîpêx. Tã no nhÿm mê kapêr mar kêr kumrêx. Nê mê kot amnhî tomnuj tÿx mÿrapê na pre Tirtÿm gô ho mê himex pa. Jao mê hwÿr na rax mê nhÿm mê hanhir o mê ho hapêx. No nhÿm mê kot Jesus wrÿk ã hpêr o pikēnh xwÿnhhtaja kãm ã mê harênh anhÿrja mar prãm kêr. Ra mê kot mar tã kãm mar prãm kêr nê arÿ mēmoj piitã rãhã hã ri harênh o pa. ⁷ Pika nê kaxkwaja arÿ rãhã htã koja Tirtÿm nhÿrmã mê pahpiitã mê pahte tanhmã amnhî nhîpêx to hã mê pahpumunh kôt tanhmã mê pajarênh to. Nê mê kot amnhî xà htÿx kamã hamak tÿm xà hwÿr mê kot amnhî tomnuj xwÿnhjê rēnh pa. Hãmri nhÿm rÿ kormã kaxkwa nê pikaja wa pôr nhÿm himôk ã mēmoj piitã hkaxàr pa nê hapêx.

⁸ Nê amgrã pé 1.000ja mê pamã amgrã xohtô rax kumrêx no Tirtÿm mã te arÿgro pixire pyrãk. ⁹ Tã ra kot mê pamã tokyx Jesus akupÿn wrÿk ã harênh tã nhÿm kormã wrÿk kêr jakamã nhÿm htem tōhã tee ri hamãr o pa nê hamaxpêr o:

—Hêxta waa nê. Tirtÿm kot tokyx akupÿn mê pahwÿr Jesus mēnh ã amnhî jarênh tã tokyx mēnh kêr nê.

Anhÿr o harênh tã no ãm kot anhÿr kêr. Na kormã amnhî tã mê kot amnhî tomnuj xwÿnhjê jamãr o pa. Mê kot amnhî tomnuj kaga nê hkôt amnhî xunhwÿr prãm xàj kormã amnhî tã mê hamã. Kãm mê kot amnhî xà htÿx kamã hamak tÿm xàta wÿr mēhō ho pixire nê mōr prãm kêr jakamã na kormã amnhî tã mê hamã. ¹⁰ Tã koja nhÿrmã

mê panhõ Pahihtija akupÿn mê pahwÿr wrÿ. Te mê àhkÿnh xwÿnh kot amnhÿ nhÿpêx pyràk o mê pajaêr pê akupÿn wrÿ. Pu mê pahtÿx ri tanhmã paxâpênh to ho ri papa nê akupÿn wrÿk ã hkamnhÿx kêt rãhã nhÿm mê pajaêr pê akupÿn wrÿ. Hãmri nê ma akupÿm amnhÿ kôt mê pahte hkôt amnhÿ xunhwÿr xwÿnhjê ho àpir par kurê kumrêx. Hãmri nhÿm rÿ kormã kaxkwa kaxàr o hkrihkrit tÿx kãm hapêx pa. Nê kanhêti mê myt nê mytwrÿre kaxàr pa. Nê pikaja nê mãânên kamã mêmoj piitã kaxàr pa. ¹¹⁻¹² Koja nhÿrmã ã mêmoj hapêx par anê. Jakamã kwa kêr pu mê Jejus kutêp tãm ri amnhÿ nhÿpêx rãhã ho ri papa. Nê Tÿrtÿm kapêr kôt pix mã amnhÿ nhÿpêx rãhã nê. Nê kãm hprãm xà hkôt tanhmã kãm amnhÿ nhÿpêx to ho ri papa. Kêr kê Jejus akupÿn wrÿ nê ã mê pahte amnhÿ nhÿpêx anhÿr ã mê pahpumu. Koja wrÿ nhÿm rÿ kormã kaxkwa nê pikaja wa kaxàr pa. Nhÿm kuwy mÿri kaxkwa kamã mêmoj harir xwÿnhja xêr nê ôr pa nê hapêx. ¹³ Tã kwâr mãmrÿ mêmoj ã amnhÿ nhÿpêx anê. Koja Tÿrtÿm axte mêmoj mex nhÿpêx. Na pre amnhÿ kukamã ja jarênh o:

Kot paj axte pika nê kaxkwa hõ nhÿpêx nhÿm mex o mex. Nhÿm mê kot amnhÿ kaxyw Jejus mã hamaxpêr nê hkôt amnhÿ xunhwÿr nhÿm ixte mê mex ã mê harênh xwÿnh pixjaja koja mê pika nywja kamã mex nê pa ho pa. Anê.

¹⁴ Jakamã kwa ixkràmnhwÿjaja. Kêr ka mê Kris kutêp kapêr kôt amnhÿ nhÿpêx mex rãhã ho ri apa. Jao kutêp ajamakêtkati nê axàmnhÿx xepên kôt apa. Kêr ka mê nhÿrmã amnhÿ wÿr omu nê tee ri amnhÿ kukamã ajamaxpêr kêt nê. Ate tãm amnhÿ nhÿpêx o apa hã amnhÿ pumu nê akÿnh nê amnhÿ wÿr omunh o akuhê.

¹⁵ Nom arÿ Jejus kãm mê pahkwÿjê ho hkra hprãm jakamã na kormã amnhÿ tã mê hamã nê tokÿx akupÿn wrÿk kêt nê. Na pre Jejus kôt mê pahtõ Pawre Tÿrtÿm nhÿ hã ã mê pamã ja hã kagà anê. Pawreja ixkràmnhwÿ mex na. ¹⁶ Na hte mê pakaxyw kagà nhÿpêx nê kamã mê pahte Jejus kutêp tãm amnhÿ nhÿpêx o papa hã mê pamã karõ. Na hte tõhã mêmoj tã kagà pu mê kamã harê nê tee ri pahprÿ hã mar mã no

ãm mar mex kêt nê. Hãmri nhÿm Tÿrtÿm kapêr o mê hêx o mê pa xwÿnhhtaja haxwÿja kuma hãmri nê amnhÿ krã hkôt hijuk ri tanhmã ho hêx to. Te mê kot hprÿ hã mar nê harênh pyràk nom hprÿ hã mar kêt nê. Æ na htem Tÿrtÿm kapêr ã kagà piitã ho hêx o pa anê. Mÿrapê koja mê nhÿrmã amnhÿ xà kamã hamak tÿx kumrêx.

¹⁷ Tã e Kris kôt ixkràmnhwÿjaja. Ra mê ate mê harênh mar jakamã kwa mê okora. Mê amnhÿ nê mê omunh mex nê mê hkôt amnhÿ nhÿpêx kêt nê. Kot kaj mê anê nê Tÿrtÿm kôt amnhÿ nhÿpêx mex kêt nê. ¹⁸ Na ka htem mê papytãr xwÿnh Pahihtija Jejus Kris kôt ri amnhÿ nhÿpêx o apa. Tã kêr ka mê arÿ hkôt amnhÿ nhÿpêx mex rãhã ho ri apa. Nê hkôt amnhÿ xunhwÿr tÿx nê. Kêr kê amnhÿ tã mê apumu nê mêmoj to mê akutã nojarêt nê. Krisja mex o mex nê hihtÿx o hihtÿx. Tã kêr pu mê kãm mex o mex ã mãn harênh rãhã ho ri papa.

Tã ãm ja pix. Ixpê Simãw Pêtre na pa ã mê amã ja hã kagà nê mê awÿr mênh anê.

Wam Juãw Juãw kot Jejus kôt hkwyjê hwÿr kagà nê mênh

Juãw na pre kagàja nhîpêx. Na pre kagà hkwy nhîpêx rax nê. Na pre mãânên Juãw kot tanhmã Jejus kot amnhî nhîpêx to ho pa ã kagà nê Apokarip nê Sikün Juãw nê Hapuhã Juãw nhüm pre ja piitã Tirtüm nhÿ hã hã kagà.

Juãwja Jejus nhÿ hã hkrajê jahkre ho mē pa xwÿnhjê hõ na pre. Nê kēp Xiakre htõ na pre. Tã ra hpigēt tÿx nê kagàja nhîpêx. Urak nê mē kot Tirtüm kôt amnhî xunhwÿr xwÿnhjê mã hipêx. Mē kot kamã harēnh nê mar nê kãm axpēn kÿnh o pa kaxyw. Nê mē kot amnhî tomnuj ã amnhî pumunh kôt tanhmã amnhî nhîpêx to hã mē kãm karõ nê hã kagà. ã na pre Juãw mē kãm mēmoj jarēnh nê hã kagà anē nê mē hwÿr kumē. Nê mē kãm:

Jejus kēp Tirtüm kapēr o amnhîrît xwÿnh ã harēnh

Juãw 1.1-4; Eprêw 1.1-4

¹ Pa ixpyrà nê mē ate Jejus kôt amnhî xunhwÿr xwÿnhjaja? Xà mē amex? E ot pa mē amã kagàja nhîpêx nê mē awÿr kumē. Ixte mē amã Tirtüm kapēr o amnhîrît xwÿnh jarēnh kaxyw. Amnepê mã kormã mēmoj amrakati ri nhüm pre ra rãhã ri pa ho pa. ãm kukwak ri pix mã na pu htem Tirtüm mē wa kuri pahtîr tùm nê papa ho papa mã xwÿnh. Tã ÿ hã mē ixte kapēr o mē ajahkre ho ri mē ixpa xwÿnhjaja na pa prem ixpiitã kormã akupÿm kaxkwa hwÿr àpir kêt ri inhno ho omunh o ri hkôt ixpa. Nê mē ijamak o kapēr mar o ri hkôt ixpa. Nê mē inhîhkra ho hkupēnh o ri hkôt ixpa. ² Na pre kaxkwa kamã Hipêêxà hkôt ri pa ho pa htã amnê pika hwÿr mē pahwÿr wrÿ. Hãmri nê jar mē pakamã kato pa pre mē ixkwÿjaja omu. Tã mē ixte omunh xà hkôt na pa htem amnhî xô ri tanhmã mē amã harēnh to. Koja nhÿrmã akupÿm mē pahto mē pahtîr pu mē kuri pahtîr tùm nê pamex nê papa ho papa. ³ Na pa prem tanhmã kapēr to hã mar o ri

hkôt ixpa. Nê kot tanhmã mē kãm amnhî nhîpêx to hã omunh o ri hkôt ixpa. Ta kagàja kamã amnhî xô ri ixprî hã mē amã harē nê hã kagà. Mē ate ixpyrà nê aprî hã kot tanhmã amnhî nhîpêx to ho pa hã harēnh mar kaxyw. Jao mē pahpiitã te ixkre tipxi kamã mē papa pyrak o amnhî nhîpêx o papa nê axpēn kôt pajamaxpēr o ri papa. Jao Mēpanhîpêêxà Maati mē Kra Jejus Kris wa hkôt amnhî nhîpêx mex o ri papa. ⁴ Tã pa mē amã kagàja nhîpêx nê mē awÿr kumē. Mē ate kamã harēnh nê mar hãmri nê mē ixpyrà nê ajamakêtkati nê akÿnh nê ri apa kaxyw.

*Tirtüm mex o mex ã harēnh
Juãw 8.12; Epes 5.3-21; Wam Tesarõn 5.5;
Eprêw 4.14-16, 9.11-14*

⁵ Nê Jejus kot tanhmã mē inhmã Tirtüm jarēnh toja kot paj amnhî xô ri mē amã hã kagà. Nã Tirtüm kot amnhî nhîpêxja mex o mex. Aa kot tanhmã amnhî tomnuj to hkêt. Mex o mex jakamã na hte tanhmã mē kot amnhî tomnuj to mã amnhî jagjênh kêt. ãm kot amnhî to mex o kot amnhî to mex rãhã nê pa ho pa xwÿnh na. ⁶ Kot mē pahte amnhî tomnuj kêt ã mē pamã karõ jakamã kot puj mē pahpê hkra hã amnhî jarēnh tã amnhî tomnuj pix o ri papa nê ãm pahpê hkra hã amnhî jarēnh kaprÿ nê amnhî to paxêx. Tirtüm krajaja na htem amnhî tomnuj o pa hkêt nê. ⁷ Nom kot puj mē hkôt amnhî nhîpêx nê urak nê tãm ri amnhî nhîpêx o papa. Nê kapēr kôt ri amnhî nhîpêx. Hãmri nê te ixkre tipxi kamã ri Tirtüm mē Kra Jejus Kris wa hkôt axpēn to papa pyrak o amnhî nhîpêx. Na pre Jejus mē panê ty nê hkamrô axkapî. Jao mē pahte hkôt amnhî xunhwÿr xwÿnhjaja mē panê mē pahte amnhî tomnuj piitã hpãnhã amnhîrer pa. Jakamã ãm kukwak ri pix mã na pu htem tãm amnhî nhîpêx o ri papa.

*Mē pahpiitã mē pahte amnhî tomnuj
xwÿnh ã mē pajarēnh*

⁸ Nê mē pahte tõhã tanhmã amnhî tomnuj to jakamã kot puj mē aa pahte amnhî tomnuj kêt ã amnhî jarē hãmri nê ã amnhî jarēnh anhÿr o paxêx. Tirtüm kot mē pahpiitã mē pahte amnhî tomnuj ã mē pahpumunh xwÿnh kênã.

Mē pahte amnhĩ tomnuj nē tanhmã amnhĩ nhĩpêx to hã mē pamã karõ

Xiakre 4.9-10

⁹ Nē mē pahpê Tĩrtũm krajaja na pu htem tanhmã amnhĩ tomnuj to hãmri nē tee ri ja hã amnhĩ pumu nē pahkaprĩ nē. Nē tokyx amnhĩ to Tĩrtũm wỳ. Hãmri nhũm mē pama nē Jejus kukwak ri tanhmã hã mē pahto hkêt nē. Ām amnhĩ katut kôt tanhmã mē pahte amnhĩ tomnuj tota rē nē axte kãm hamaxpêr kêt nē. Ra kot mē pahtã amnhĩ jarēnh xà hkôt. Na hte Tĩrtũm amnhĩ jarēnh xà hkôt tanhmã amnhĩ nhĩpêx to. Tã ra kot mē pahpê hkrajaja mē pahte amnhĩ tomnuj piitã amnhĩ katut kôt rēnh par ā amnhĩ jarēnh jakamã na pre ā mē panhĩpêx anē. Na hte mēmoj tã tanhmã amnhĩ jarēnh to hãmri nhũm apkati nhũm ihkjê ho kumē nē axtem tanhmã mēmoj jarēnh to hkêt nē. ¹⁰ Ra kot mē pahpiitã mē pahte amnhĩ tomnuj xwỳnh ā mē pajarēnh jakamã kot puj mē pahtõ ā mē pajarēnh anhỹrja ma nē hkôt pajamaxpêr kêt japêr. Rỳ kuma nē ām kuma nē pajamaxpêr o:

—Nà ixte tanhmã amnhĩ tomnuj tore hã.

Anhỹr o amnhĩ jarē. Hãmri nē te ate Tĩrtũm hêx xwỳnh ā harēnh pyræk. Jao amã kapêr mar prãm kêt ā amnhĩ to amnhĩrĩt.

2

Jejus kêp mē paxyr pê Tĩrtũm mã kapêr xwỳnh ā harēnh

Wam Ximotre 2.5; Eprêw 9.11-14

¹⁻² E mē ate amnhĩ tomnuj o apa hkêt kaxyw na pa ā mē amã ixkapêr nē hã kagã anē. Mē ate kamã harēnh nē mar hãmri nē tanhmã amnhĩ tomnuj to hkêt kaxyw. Jejus Kris na pre mē pahpiitã mē pahte amnhĩ tomnuj pãnhã amnhĩrer kaxyw mē panê ty. Jakamã kot puj mē pahpê hkrajaja tanhmã amnhĩ tomnuj to nhũm ja hã mē pahpumu nē te kêp mē paxyr pê Tĩrtũm mã kapêr xwỳnh pyræk o amnhĩ nhĩpêx. Mē pakurom aa kot amnhĩ tomnuj kêt jakamã na hte mē paxyr pê Tĩrtũm mã kapêr nhũm kuma. Hãmri nē kukwak ri pix mã mē pahte tanhmã amnhĩ tomnuj to piitã amnhĩ katut kôt rēnh pa nē axte kãm hamaxpêr kêt nē.

Tĩrtũm krajaja kot Tĩrtũm kôt amnhĩ nhĩpêx ā mē kãm karõ

³ Nē na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nē. ⁴ Nom koja mēhõ kêp hkra hã amnhĩ jarēnh tã hkôt amnhĩ nhĩpêx kêt nē ām kêp hkra hã amnhĩ to hêx. ⁵ Na htem Tĩrtũm kapêr kôt amnhĩ nhĩpêx o pa pê kãm hkĩnh tỳx ā amnhĩ to amnhĩrĩt. Nē kêp hkra hã amnhĩ to amnhĩrĩt mex o pa. ⁶ Jakamã kêr ka mē apê Jejus Kris kwỳ hã amnhĩ jarēnh xwỳnhjaja hkôt pix mã amnhĩ nhĩpêx mex o ri apa.

Mē pamã axpên kĩnh ā mē pamã karõ

Juāw 13.34-35; Wam Juāw 3.14-18

⁷ E Kris kôt ixkrãmnhwỳjaja. Inhmã mē akĩnh jakamã na pa ā mē amã mēmoj jarēnh nē hã kagã anē. Kot paj mē amã mēmoj nyw jarēnh kêt nē. Ra mē ate mēmoj mar xwỳnhhta kot paj axte mē amã harē. Mē pamã axpên kĩnh nē tãm axpên nhĩpêx o papa hã Tĩrtũm kot mē pamã karõta. Ra mē ate mar tã kot paj axte mē amã harē nē hã kagã. ⁸ Wam Tĩrtũm kot mē pamã axpên kĩnh ā mē pamã karõja kormã Jejus kot mē panê htyk hkêt ri kot mē pamã hã karõta na. Tã ra Jejus kãm mē pajapê xàj mē panê htyk jakamã na pa axte ā mē ate axpên nhĩpêx anhỹr o apa hã mē amã karõ nē hã kagã. Mē ate Kris pyrã nē amã axpên kĩnh xàj tanhmã axpên kutã anojarêt to ho ri apa kaxyw. Nom kormã mē pahte Jejus kôt amnhĩ xunhwỳr kêt ri na pu prem ā axpên nhĩpêx anhỹr kêt nē. Tã hkôt amnhĩ xunhwỳ hãmri nē ā axpên to mex o papa anē. ⁹⁻¹¹ Tã koja mēhõ kot Jejus kôt amnhĩ nhĩpêx ā amnhĩ jarēnh tã kãm hkwyjê hkĩnh kãm àmnhĩx ri mē kutã nojarêt o pa hkêt nē. Hãmri nē kot Jejus kôt amnhĩ nhĩpêx ā amnhĩ jarēnh ā amnhĩ to hêx. Jao te htỳx ri kamát kô kamã pa pyræk. No koja mēhõ kãm hkwyjê hkĩnh kãm mē kutã nojarêt o pa nē mãănēn Jejus kôt amnhĩ nhĩpêx mex o pa. Jao te hirã kamã ri pa pyræk. Jakamã tanhmã hkwyjê homnuj to ho pa hkêt nē mē piitã mē ho mex o axpên pyræk o pa.

Juāw kot mē piitã ahpỳnhã tanhmã mē kãm kapêr to

12-14 E kot pa ahpÿnhã tanhmã mẽ amã ixkapër to nẽ hã kagà. Mẽ apiitã te mẽ apê ixkra pyræk. Na ka prem Jejus kôt amnhĩ xunhwÿ nhũm Tĩrtũm ja hã mẽ apumu nẽ Kra kukwak ri mẽ ate amnhĩ tomnuj piitã amnhĩ katut kôt rēnh pa nẽ axte kãm hamaxpër kêt nẽ. Jakamã ra mẽ ate Tĩrtũm kęp Mēpanhĩpēêxà Maati hã omunh mex.

Nẽ mẽ ate Jejus kôt amnhĩ xunhwÿr ã amgrà xohtô xwÿnhjaja. Amnepēm amrakati ri Jejus ra rãhã ri pa ho pa xwÿnhja kôt mẽ ate amnhĩ xunhwÿr xwÿnhjaja kot paj mẽ amã tanhmã ixkapër to nẽ hã kagà.

Nẽ mẽ akwÿjaja ham Jejus kôt mẽ ate amnhĩ xunhwÿr xwÿnhjaja ra mẽ ate Tĩrtũm kapër mã ajamxpër rãhã ho ri apa. Jakamã na hte Satanasti mẽ ate amnhĩ tomnuj prãm xaj tee ri tanhmã mẽ akrã hto ka mẽ Jejus nhÿ hã kutã amnhĩ to htÿx pē hkôt amnhĩ nhĩpēx kêt nẽ.

Mẽ kot amnhĩ tomnuj xwÿnhjaja tanhmã kot amnhĩ nhĩpēx to

Matêwre 6.24; Eprêw 11.24-26; Xiakre 4.4

15 Nẽ kêr ka mẽ amã Tĩrtũm kôt amnhĩ nhĩpēx prãm xaj mẽ kot amnhĩ tomnuj xwÿnhjê hkôt amnhĩ nhĩpēx kêt nẽ. Nẽ mẽ hamaxpër punuj xwÿnhjê hkôt ri amnhĩ nhĩpēx kêt nẽ. Kot kaj mẽ hkôt amnhĩ nhĩpēx hãmri nẽ amã Tĩrtũm kĩnh kêt ã amnhĩ to amnhĩrīt. 16 Mẽ kot amnhĩ tomnuj xwÿnhjaja na htem mẽmoj punuj mã hamaxpër nẽ hkôt tanhmã amnhĩ tomnuj to. Nẽ mẽmoj pumu nẽ ra kãm ho õ hprãm nom Tĩrtũm pē ja omnuj ã hkamnhĩx kêt nẽ. Rÿ tanhmã mēhõ kot amnhĩ tomnuj to hã omu nẽ hkôt kãm amnhĩ nhĩpēx prãm. Nẽ tanhmã amnhĩ to jarkrar to ho ri pa. ã na hte mẽ kot amnhĩ tomnuj xwÿnhjaja amnhĩ nhĩpēx anhÿr o pa. Mẽ kot amnhĩ nhĩpēxja Mēpanhĩpēêxà Tĩrtũm kãm hprãm kêt. 17 Kojã nhÿrmã mẽ kot tanhmã amnhĩ tomnuj toja piitã hapēx pa. Nẽ mẽ hamaxpër punujja mããnēn nhÿrmã hapēx pa. Nẽ mẽ kot amnhĩ tomnuj o mẽ pa xwÿnhjaja kojã mẽ amnhĩ xà htÿx kamã hamak rãhã ho pa ho pa. No Tĩrtũm kôt mẽ kot amnhĩ nhĩpēx o mẽ pa xwÿnhjaja kojã mẽ kurom kuri htĩr tũm nẽ mex nẽ hkĩnh nẽ pa ho pa.

Kãm Kris kurê xwÿnh maati jarēnh Wam Juāw 4.1-6; Sikũn Juāw 7-11

18 E Kris kôt ixkwÿjaja. Kris akupÿn mẽ pahwÿr wrÿk kukamã kojã mẽmoj tanhmã amnhĩ nhĩpēx to. Na pre ra Kris kôt mẽ panhĩõja mẽ pamã ã harēnh anē nẽ harēnh o:

—Kojã mẽ panhõ Pahihti Kris akupÿn mẽ pahwÿr wrÿk kaxyw hãmri nhũm kęp Kris ã amnhĩ to hēx xwÿnh maati kumrēx nhÿhÿnh kato. Hãmri nẽ hēx rom te Kris pyrã nẽ tanhmã mẽ kãm kapër to nẽ tanhmã mẽ hipēx to ho pa nhũm rĩ kormã Kris akupÿn mẽ pahwÿr wrÿ. Anē.

Na pre hkukamã ã harēnh anē ka mẽ harēnh ma. Tã ra mẽ kęp Kris ã amnhĩ to hēx xwÿnhjaja ohtô nẽ mra nẽ kãm hkurê xwÿnh maatita kukamã tanhmã amnhĩ nhĩpēx to pē mẽ kãm amnhĩ to hēx o pa. Jakamã na pa ixprĩ hã mẽ amã tanhmã mẽ harēnh to. Kojã tokyx kęp Kris ã amnhĩ to hēx xwÿnh maatita nhÿhÿnh mẽ pahwÿr kato. 19 Na pre hkwyjaja mẽ pahpē Kris kwÿjê hkôt ri pa htã mẽ pahkĩnhã kęp Kris kwÿ hkêt. Kęp hkwy ronhÿx arĩ mẽ pahkôt Kris kôt amnhĩ nhĩpēx o pa. Nom axtem nẽ àhpumunh tÿx pyrã nẽ mẽ pahkaga nẽ htÿx tanhmã amnhĩ tomnuj to ho pa. Jao kęp Jejus kwÿ hkêt ã amnhĩ to amnhĩrīt.

20 No kêt mẽ pahpē Tĩrtũm krajaja na pre Jejus mẽ pahwÿr Karõ rē nhũm mẽ pahkarõ mã agjē nẽ mẽ pahkrãm kapër mex jagjē. Jakamã na pu mẽ mẽ kęp Kris kwÿ hkêt xwÿnhjê rom Tĩrtũm kapër mar mex nẽ.

21 Xà mẽ ate Tĩrtũm kapër ã kagà pumunh kêt kôt na pa ã mẽ amã ixkapër nẽ hã kagà anē? Nà ra mẽ ate omunh nẽ mar mex kēnã. Tã mẽ ate mẽ kot tanhmã Jejus o hēx to xwÿnhjê pumunh mex nẽ mẽ harēnh mar mex kaxyw na pa ã mẽ awÿr kagà nhĩpēx nẽ mēnh anē. Kêr kê mẽ mẽmo arĩgro hã mẽ awÿr agjē nẽ tanhmã mẽ amã Jejus o hēx to ka mẽ aprĩ hã mẽ omunh mex kurê kumrēx. 22 Tanhmã na htem Jejus o hēx to? E kot paj ixprĩ hã mẽ amã tanhmã mẽ harēnh to ka mẽ inhma. Nà kojã mēhõ mẽ amã tanhmã harēnh to nẽ harēnh o:

—Nà Jejus kęp Tĩrtũm Kra hkêt. Tĩrtũm kot mẽ pahwÿr mēnh kêt tã ka htem atÿx kapër kôt ri amnhĩ nhĩpēx o ri apa. Kwa

kêt mē ixkapēr kôt mǎn ri amnhĩ nhĩpêx o ri apa.

Anh̄yr o mē amā kapēr ka mē ama nē kām Kris mē Tirtūm wa hkīnh kêt xwýnh ā omunh kurê kumrêx. ²³ Kojā mēhō Tirtūm Kra Jejus kaga nē mǎānēn Hipêêxà kaga. No kojā mēhō Tirtūm Kra hkôt amnhĩ xām nē mǎānēn Hipêêxà hkôt amnhĩ xām.

Mē pahte Kris kaga pymaj tanhmā amnhĩ nhĩpêx to hā mē pamā karō

²⁴ Amnepêem mē ate Jejus kôt amnhĩ xunhwýrta ā na ka prem kēp Tirtūm Kra hā Tirtūm kot mē pahwýr mēnh xwýnh ā harēnh ma. Tā kēr ka mē arĩ amnhĩ kaxyw hkôt ajamaxpēr nē hkôt pix mā amnhĩ nhĩpêx o ri apa. Kot kaj mē anē nē Mēpanhĩpêêxà Maati mē Kra wa hkôt amnhĩ nhĩpêx mex o apa rāhā ty. ²⁵ Hāmri nē wa kuri atīr tūm nē amex kumrêx nē apa ho apa. Ra Jejus kot ja jarēnh xà hkôt.

²⁶ Na pa ā mē amā ixkapēr nē hā kagà anē. Mē aprĩ hā mē amā Jejus o hēx xwýnhjê kapēr mar nē mē kot mē amā hēx kôt mē omunh mex kaxyw. ²⁷ Tirtūm Karō na pre mē akarō mā gjêx pa nē mē amā Tirtūm kapēr piitā o amnhĩrīt mex o mē akôt pa. Jakamā mēmo kaxyw kot kaj mē Tirtūm kapēr o hēx xwýnhjaja kot tanhmā harēnh toja ma? Ra Tirtūm Karō kot mē amā ho amnhĩrīt o mē ajahkre mex o pa kēnā kot ka kêt mē nhām mē kapēr ma. Na hte Tirtūm Karōja mē urà nē Tirtūm kapēr ho hēx kêt nē. Ām katāt kôt kot ho amnhĩrīt mex jakamā kwa kēr ka mē mar tỳx nē hkôt ri amnhĩ nhĩpêx mex rāhā ho ri apa.

Mē pahte tām ri amnhĩ nhĩpêx ā mē pamā karō

Juāw 14.25-26, 15.1-8

²⁸ E Jejus kôt ixkrajaja. Kēr ka mē arĩ Kris kôt amnhĩ nhĩpêx mex rāhā ho ri apa. Kē nh̄ymā akupýn mē pahwýr wrýk o tē ka mē amnhĩ wýr omu nē akīnh nē. Nē akīnh kām axāmnhĩx kutā mra nē hkaxpa nē amnhĩ kamā amā uma hkêt nē. Rý mēmoj tā amnhĩ tā apijaàm kêt nē. Ām axāmnhĩx akīnh nē ma kutā mra. ²⁹ Krisja mex o mex jakamā na pu htem urāk nē amnhĩ to mex o ri papa. Mē pahte amnhĩ to mex o papa xwýnhjaja urāk nē mē pahpê Tirtūm kra na pu mē.

3

Tirtūm krajê hkukamā tanhmā mē harēnh to Rōmān 8.18; Sikūn Korīt 3.18; Sikūn Pêtre 3.11-14

¹ Nē Mēpanhĩpêêxà Maati kām mē pajapê htỳx kumrêx jakamā na pre mē pahte hkôt amnhĩ xunhwýr ā mē pahpumunh kôt mē pahpê hkra hā mē pajarê pu mē pahpê hkra nē ri papa. Ja na mē pamā mex o mex. Nom mē kot hkôt amnhĩ xunhwýr kêt xwýnhjaja kot hprĩ hā ja hā mē pahpumunh kêt jakamā na htem mē pahte tām amnhĩ nhĩpêx ā mē pahpumu nē tee ri hamaxpēr.

² E Kris kôt ixkwýjaja. Ra mē pahpê Tirtūm kra htā kormā mē pahte amnhĩ kukamā mē pahprĩ hā ja hā amnhĩ pumunh mex kêt. Kojā nh̄ymā Jejus akupýn mē pahwýr wrý pu mē pano ho tanhmā kute hā omunh mex nē. Hāmri nē tā te kot amnhĩ nhĩpêx pyrāk o amnhĩ nhĩpêx mex o papa. Ra mē pahte ja mar mex. ³ ā mē pahte amnhĩ kukamā pajamaxpēr anh̄yr o papa xwýnhjaja na pu htem kormā amnhĩ wýr Jejus kamā pajamak o papa. Pê urāk nē mēmoj punuj mā pajamaxpēr kêt o papa. Nē urāk nē tanhmā amnhĩ tomnuj to hkêt nē.

Tirtūm krajaja kot amnhĩ tomnuj o pa hkêt ā mē kām karō

⁴ Nē mē kot amnhĩ tomnuj o mē pa xwýnhjaja na htem Tirtūm kapēr kwým ri amnhĩ nhĩpêx o pa. Tā kot puj mē tanhmā amnhĩ tomnuj to hāmri nē mē urāk nē kapēr kwým ri amnhĩ nhĩpêx. ⁵ No Jejus na pre mē pahte amnhĩ tomnuj pānhā amnhĩrer kaxyw mē pahwýr wrý. Aa kot amnhĩ tomnuj kêt jakamā tapxipix kot mē pahpānhā amnhĩrer mā tām. Ra mē pahte ja jarēnh mar mex. ⁶ Jakamā mē pahpê hkwyjaja na pu htem ri pahtỳx tanhmā amnhĩ tomnuj to ho papa hkêt nē. Ā mē kot amnhĩ nhĩpêx anh̄yr xwýnhjaja kēp hkwy hkêt. ⁷ Nom kojā mēhō Kris pyrā nē tām amnhĩ nhĩpêx o pa hāmri nē kēp Tirtūm kraa. Jakamā kwa kojā mēhō Tirtūm kapēr kwým ri tanhmā mē amā kapēr to ka mē ama nē ām ama. ⁸ Mē kot amnhĩ tomnuj o mē pa xwýnhjaja na htem Satanasti hkôt ā amnhĩ nhĩpêx anh̄yr o pa. Satanastija

Tĩrtũm kot mẽmoj to kator krax rũm nhũm ã kot amnhĩ tomnuj anhỹr o pa xwỹnh na. Tã ã kot amnhĩ nhĩpêx anhỹr o paja o hapêx par kaxyw na pre Tĩrtũm Kra Jesusja amnê pika hwỹr wrỹ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwỹr amnhĩ Karõ rê nhũm mẽ pahkarõ mã gjêx pa nê mẽ pahkõt pa ho pa. Jakamã tanhmã kot puj wem amnhĩ to nê Satanasti pyrã nê pahtỹx ri amnhĩ tomnuj o papa? Nã kot puj mẽ ã amnhĩ nhĩpêx anhỹr kêt nê. ¹⁰ Koja mẽhõ tãm amnhĩ nhĩpêx kêt nê hãmri nê mããnên hkwỹjê kamã ukaprĩ hkêt nê. Hãmri nê ã amnhĩ nhĩpêx anhỹr o kêp Tĩrtũm kra hkêt ã amnhĩ to amnhĩrĩt. ãm kêp Satanasti hkra hã amnhĩ to amnhĩrĩt kurê kumrêx.

Mẽ pamã axpên kĩnh o te Jejus kãm mẽ pahkĩnh pyrãk ã mẽ pamã karõ

Matêwre 22.39; Rukre 10.25-37; Juāw 13.31-35

¹¹ Nê kêt ka mẽ arĩ amã axpên kĩnh pê tãm axpên nhĩpêx o ri apa rãhã nê. Te anepê mã mẽ ate Jejus kõt amnhĩ xunhwỹr ã arĩgrota ã mẽ kot mẽ amã ja hã karõ pyrã nê. ¹² No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nê. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nê kamã gryk nê kupĩ. ¹³ Tã koja mẽ kêp Tĩrtũm kra hkêt xwỹnhjaja Kaĩ pyrã nê kêp mẽ aprãm nõkati nom kêt ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. ¹⁴ Kormã mẽ pahte Jejus kõt amnhĩ xunhwỹr kêt ri na pu prem mẽ urãk nê amnhĩ tomnuj o papa. Jao mẽ pahpê kuwy hwỹr papa mã xwỹnh. Tã mẽ pahte Jejus kõt amnhĩ xunhwỹr jakamã ra pahpê Tĩrtũm mẽ Kra wa kuri pahĩr tũm nê papa mã xwỹnh. Jakamã na pu htem mẽ kêp hkra hkêt xwỹnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwỹjê hkĩnh kêt xwỹnhjaja arĩ mẽ kêp kuwy hwỹr mẽ pa mã xwỹnh na mẽ. Ra mẽ pahte ja jarênh mar mex. ¹⁵ Mẽ kãm mẽ hpar prãm o mẽ pa xwỹnhjaja koja nhỹrmã Tĩrtũm mẽ Kra wa kuri htĩr tũm nê pa ho pa hkêt nê. Ra mẽ pahte mããnên ja mar mex. Jakamã kwa mẽ amã akwỹjê hprãm nõkati ho ri mẽ apa xwỹnhjaja. Tĩrtũm noo mã te ra mẽ

ate mẽ hpar pyrãk jakamã kot kaj mẽ arĩ ã amnhĩ nhĩpêx anhỹr o ri apa hãmri nê nhỹrmã Tĩrtũm nhõ krĩ hwỹr axãpir kêt nê.

¹⁶⁻¹⁸ E ixkwỹjaja. Kwa kêt pu mẽ pajakwa pix o pamã axpên kĩnh ã amnhĩ jarênh kêt nê. Mããnên axpên kutã panojarêto o ri papa. Nê tanhmã axpên to mex to. Tanhmã na pre Jejus kãm mẽ pajapê hã amnhĩ nhĩpêx to? Nã na pre kãm mẽ pamex prãm xaj mẽ panê ty. Kãm amnhĩ tã ma hkêt kãm mẽ pakamã ukaprĩ xaj mẽ panê ty. Tã kêt pu mẽ urãk nê pahkwỹjê kamã paxukaprĩ ho mẽ kutã panojarêto rãhã ho papa. Jao mẽ paxãpkur xã hã panhõ pumu nê nhỹri pahkwỹjê hõ pumu nhũm kêp amrakati. Pu mẽ tee ri ja hã omu hãmri nê kãm mẽ panhõta kwỹ gõ. Kot pu mẽ ã amnhĩ nhĩpêx anhỹr kêt nê hãmri nê pamã Tĩrtũm kĩnh ã amnhĩ jarênh kaprỹ. ¹⁹ Nê kot puj mẽ ã axpên to mex o papa anê nê ra pahte Tĩrtũm kõt amnhĩ nhĩpêx mex ã amnhĩ to amnhĩrĩt. Hãmri nê ra paxãmnhĩx kãm tanhmã amnhĩ jarênh to ho papa. Amnhĩ kamã pamã uma hkêt nê paxãmnhĩx pajamakêtkati nê kãm tanhmã amnhĩ jarênh to.

Mẽ paxãmnhĩx amnhĩ to Tĩrtũm wỹr ã mẽ pamã karõ

²⁰ Nê kot puj mẽ mẽmo arĩgro hã tanhmã amnhĩ tomnuj to hãmri nê tee ri ja hã amnhĩ pumu nê amnhĩ kamã pagryk nê. Na hte Tĩrtũm tanhmã mẽ pahte amnhĩ tomnuj to hã mẽ pahpumu nom arĩ kãm mẽ pajapê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex. ²¹ Jakamã puj mẽ ã kãm pajamaxpêr anê nê amnhĩ kamã pamã uma hkêt kãm paxãmnhĩx tanhmã ri amnhĩ to hwỹr to ho ri papa. ²² Kot puj mẽ hkõt amnhĩ nhĩpêx o papa rãhã nê mẽmoj tã kuwỹ. Nê kãm hprãm xã hkõt amnhĩ nhĩpêx o papa hã amnhĩ pumunh kõt mẽmoj tã kuwỹ. Hãmri nhũm mẽ pama nê tanhmã mẽ pamã mẽmoj to rỹ mẽ pamã mẽmoj gõ.

Te ixkre pixi kamã mẽ pahtipxi pyrãk ã mẽ pamã karõ

²³ Nê tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nã mẽ pahte amnhĩ kaxyw Kra Jejus Kris

kôt pajamaxpēr nē hkôt amnhĩ nhĩpêx o papa hã na hte mē pamã karõ. Nē kapēr xà hkôt pamã axpēn kĩnh o mēmoj to axpēn kutã panojarêt o papa hã na hte mē pamã karõ. Na hte ã mē pahte amnhĩ nhĩpêx anhÿr ã mē pamã karõ anē. ²⁴ Jakamã kot puj mē kapēr xà hkôt axpēn nhĩpêx o papa nē te ixkre tipxi kamã mē pahte axpēn kôt Tĩrtũm kôt ri papa pyrãk. Ra kot mē pahwÿr Karõ rēnh nhũm kot mē pahkarõ mã gjêx jakamã na hte mē pahkôt pa ho pa hã amnhĩ to amnhĩrīt.

4

Mē kot Kris kapēr jarēnh ã amnhĩ to hêx xwÿnhjê jarēnh

Wam Korĩt 12.1-3; Wam Juāw 2.18-26; Sikũn Juāw 7-11

¹⁻³ Nē koja mēhõ Tĩrtũm kapēr o mē ajahkre kaxyw mē amã tanhmã Jejus Kris jarēnh to nē ãm hãmri harē nē harēnh o:

—Na pre Tĩrtũm Kra Jejus mē pahwÿr wrÿ nē ĩ ho ĩ ho mē pakamã kato. Tĩrtũm tãm na pre mē pahwÿr kumē nhũm wrÿ.

Anhÿr o mē amã harē ka mē ama nē kapēr kôt ajamaxpēr kurē kumrêx. ãm hãmri na hte Tĩrtũm Karõ nhÿ ã harēnh anē. No koja Jejus kēp Tĩrtũm Kra hkêt ã harē ka mē ama nē ãm ama nē hkôt ajamaxpēr kêt nē. Kãm Kris kurē xwÿnh maati nhÿ hã kapēr xwÿnhjaja na hte ã harēnh anhÿr o pa. Na ka prem ra kãm Kris kurē xwÿnh maati ja tokyx hpõx ã harēnh ma. Tã na ra ÿ hã kapēr xwÿnhjaja ohtõ nē pika piitã hkôt mē hkôt pa nē te Tĩrtũm Karõ nhÿ hã mē kãm kapēr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwÿjaja. Koja mēhõ mē awÿr mra nē tanhmã mē amã Tĩrtũm kapēr jarēnh to ka mē aprĩ hã ama nē rĩ kormã kēp Tĩrtũm nhÿ hã kapēr jarēnh xwÿnh ã harē rÿ kot amnhĩ to hêx xwÿnh ã harē.

⁴ Kêt mē papajaja jajê rom mē pahpê Tĩrtũm kra na pu mē. Nē Tĩrtũm Karõ kot ra mē pahkarõ mã gjêx xwÿnhhta hihtÿx o jajê piitã mē hakrenh. Jakamã na pu htem ÿ hã mē kutã amnhĩ to htÿx o papa nhũm mē tee ri tanhmã mē pamã Jejus o hêx to kaprÿ. Pu mē kuma nē ãm mē kuma. ⁵ Mē kēp Tĩrtũm kra hkêt jakamã

na htem hkôt amnhĩ nhĩpêx kêt nē. Mē kot amnhĩ nhĩpêxja axtem na. Jakamã na htem Tĩrtũm kapēr kwÿm ri tanhmã hkra hkêt xwÿnhjê mã kapēr to ho pa nhũm mē kuma nē kãm mē mar prãm nē. ⁶ Nom mē ixte Tĩrtũm kapēr o mē ajahkre xwÿnhjaja na pa htem mē kurom Tĩrtũm nhÿ hã ixkatat kôt ãm hãmri mē amã kapēr jarēnh o ri ixpa. Jakamã ka mē apê hkra hã mē amã mē inhmar prãm nē. No mē kēp hkra hkêt xwÿnhjaja kãm mē inhmar prãm kêt.

Na pu htem pahprĩ hã mē kapēr ã mē kuma nē rĩ kormã tanhmã mē harēnh to. Tĩrtũm nhÿ hã kapēr ã mē harē rÿ kãm hkurê xwÿnh maati nhÿ hã kapēr ã mē harē.

Tĩrtũm kãm mē pajapê hã tanhmã amnhĩ nhĩpêx to hã harēnh

Juāw 3.16-21; Rõmãn 5.5-9, 8.35-37

⁷ E ixkwÿjaja. Na hte Tĩrtũm tanhmã mē pahpê hkrajê ho pu mē pamã axpēn kĩnh nē. Jakamã kēr pu mē ã axpēn nhĩpêx anhÿr jao axpēn to mex pix nē. ã Tĩrtũm kot mē panhĩpêx anhÿr jakamã kēr pu mē pahpê hkrajaja ÿ hã ã axpēn nhĩpêx anhÿr o ri papa.

⁸ Koja mēhõ Tĩrtũm kĩnhã kãm mē hkwÿjê hkĩnh kêt hãmri nē mē kamã ukaprĩ hkêt o pa. Hãmri nē kēp Tĩrtũm kra hkêt ã amnhĩ to amnhĩrīt mex nē.

⁹⁻¹⁰ Tĩrtũm kãm mē pajapê htÿx kumrêx. Kormã mē pamã hkĩnh kêt ri nhũm kumrêx amnhĩ rom kãm mē pajapê ho pa. Nē kãm mē pajapê xaj mē pahwÿr Kra pyxita mē. Mē pahte amnhĩ tomnuj pãnhã kot mē panê htyk kaxyw. Mē pahte kukwak ri amnhĩ nhĩpêx nyw o amnhĩ nhĩpêx nē nhÿrmã wa kuri pahtĩr tũm nē pamex nē papa ho papa kaxyw. ã na pre Tĩrtũm mē pahwÿr Kra mēnh anhÿr o kãm mē pajapê hã amnhĩ to amnhĩrīt.

¹¹ E ixkwÿjaja. Tĩrtũm kãm mē pajapê htÿx jakamã kwa kēr pu mē urak nē pamã axpēn kĩnh o papa. Nē axpēn kamã paxukaprĩ nē. ¹² Aa mē pahtõ pahte pano ho Tĩrtũm pumunh kêt tã na hte mē pakamã pa ho pa. Pu mē kãm mē pajapêta pyrã nē ÿ hã pamã axpēn kĩnh o papa. ¹³ Na pre mē pahwÿr Karõ rē nhũm mē pahkarõ

mã agjê pu mẽ ý hã kot amnhĩ nhĩpêx o amnhĩ nhĩpêx o papa.

¹⁴ Nê mẽ ixpê Jejus nhỹ hã mẽ ajahkre xwýnhjaja. Mẽ ixte kot amnhĩ nhĩpêx nê kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kãm harênh o ri mẽ hkôt ixpa. Nê mẽ kãm harênh o:

—Tĩrtũm na pre mẽ pahwýr Kraja mẽ. Kot mẽ pahpiitã mẽ panê htyk kaxyw mẽ pahwýr kumê. Anê.

¹⁵ Mẽ kot Jejus kêp Tĩrtũm Kra hã harênh o pa xwýnhjaja na hte Tĩrtũm mẽ kamã pa ho pa nhũm htem ý hã ã Kra jarênh anhỹr o pa.

¹⁶ Na pu mẽ ra pahprĩ hã Tĩrtũm kãm mẽ pajapê hã amnhĩ tã omu. Kãm mẽ pajapê htýx kumrêx ã amnhĩ tã omu. Jakamã kot puj mẽ urak nê ý hã pamã mẽ piitã mẽ hkĩnh o papa. Tĩrtũm mẽ mẽ pahpĩpxi nê ri papa kênã.

Mẽ kãm axpên kĩnh xwýnhjaja kãm Tĩrtũm puma hkêt ã mẽ harênh

¹⁷ Nê kot puj mẽ pamã axpên kĩnh o papa nê mãânên Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nê mẽ pa ho mẽ pa mã xwýnhjê nhĩxi jarênh kaxyw pu mẽ tee ri amnhĩ kukamã pajamxpêr kêt nê. Ra amnhĩ nhĩxi jarênh ma nê pahkĩnh nê.

¹⁸ Nê koja mēhō kãm hkwýjê hkĩnh kêt nê tanhmã hō homnuj to. Hãmri nê kot amnhĩ tã tanhmã ho pymaj kãm uma ho hwýr mrar kêt nê. No koja kãm hkwýjê hkĩnh nê tanhmã mẽ ho mex to ho pa nê kãm mẽ uma hkêt nê. ¹⁹ Tĩrtũm kumrêx na pre kãm mẽ pajapê nê mẽ pakukamã tanhmã mẽ pahto mex to. Tã pu mẽ ra amnhĩ pyrã nê pamã hkĩnh o papa. Nê pamã mẽ piitã mẽ hkĩnh o papa.

²⁰ Nê koja mēhō kãm Tĩrtũm kĩnh ã amnhĩ jarênh tã kãm hkwýjê hō hprãm nōkati hãmri nê ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwýjê pumunh o apa xwýnhta amã hkĩnh kêt tã tanhmã kot ka we amnhĩ to nê ate ano ho Tĩrtũm pumunh kēeta amã hkĩnh ã amnhĩ jarê? Nã ka ã amnhĩ jarênh anhỹr o amnhĩ to axêx. ²¹ Na pre Tĩrtũm mẽ pamã kapêr o amnhĩrĩt o:

Kot kaj mẽ amã ixkĩnh hã kot kaj mẽ mãânên amã akwýjê hkĩnh o mẽ ho mex o ri apa. Anê.

5

Tĩrtũm nhỹ hã mẽ pamã axpên kĩnh ã mẽ pamã karō

¹ Nê Tĩrtũm kot mẽ pahwýr Jejus mēnh ã harênhja. Koja mēhō kuma nê amnhĩ kaxyw hkôt hamaxpêr nê Jejus kôt amnhĩ xãm hã koja Tĩrtũm ja hã omu nê ho hkra.

Nê koja mēhō kãm Tĩrtũm kĩnh hã koja mãânên kãm hkwýjê hkĩnh o pa. ² Ja pyrã nê kot puj mẽ pamã Tĩrtũm kĩnh nê kapêr kôt amnhĩ nhĩpêx. Hãmri nê mãânên pamã krajê piitã mẽ hkĩnh ho papa.

³ Nê kot puj mẽ pamã Tĩrtũm kĩnh nê nhũm kapêrja mẽ pahpê hihtýx kêt nê. Pu mẽ pamã Tĩrtũm kĩnh ã kapêr kôt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kôt pajamxpêr nê hkôt amnhĩ xunhwý nhũm Tĩrtũm ja hã mẽ pahpumu nê mẽ pahto hkra pu mẽ ý hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nê.

Mẽmoj axkrunêpxi nê kot Jejus kêp Tĩrtũm Kra hã ho amnhĩrĩt

Juāw 1.32-34, 3.36, 5.31, 15.26

⁶ Nê Jejus pix na pre Tĩrtũm mẽ pakaxyw ãm nhũm kêp Kra hã mẽ pahwýr wrý. Hãmri nhũm Juāw Paxisja pyhti kamã hkrã kumrã. Kêp Tĩrtũm Kra hã hkrã kumrã. Tã nhũm Tĩrtũm kapêr kôt ma tanhmã amnhĩ nhĩpêx to ho pa. Nê ri hkwýjê mã kapêr jarênh o ri mẽ hkôt pa. Tã nhũm mẽ kupĩ nhũm kêp Tĩrtũm Kra hã pĩ kahpa hã ajêt nê ty nê hkamrô axkapĩ. ã mẽ panê amnhĩ nhĩpêx anê nhũm Tĩrtũm Karōja kêp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anê. Mẽmoj to hêx kêt jakamã na pre Jejus kêp Tĩrtũm Kra hã mẽ pamã ho amnhĩrĩt.

⁷ Nê kêp Tĩrtũm Kra hã mẽ pamã mẽmoj to axkrunêpxi nê ho amnhĩrĩt. ⁸ Tĩrtũm Karō na pre kêp Kra hã mẽ pamã ho amnhĩrĩt pu prem kêp Kra hã omu. Nê Juāw Paxis kot hkrã kumrãrta ã pu mẽ mãânên kêp Tĩrtũm Kra hã kot ho amnhĩrĩtja ã omu. Nê

mããñnên kêp Tĩrtũm Kra hã pĩ kahpa hã jêt nê htyk nê hkamrô pikapĩrta ã mē pamã ho amnhĩrĩt pu mē kêp Kra hã omu. E mē pamã mēmoj to axkrunēpxi nē Jejus kêp Tĩrtũm Kra hã kot ho amnhĩrĩt xwýnh na jajaja.

⁹Nē na pu htem jar pahkwýjaja kot axpēn mar xà hã ixkre kamã mē kapēr ma nē mē hkôt pajamaxpēr. Tã koja Tĩrtũm tanhmã mē pamã mēmoj to amnhĩrĩt to pu mē hkôt pajamaxpēr kurê kumrēx. Kêp Tĩrtũm kēnã kot pu kêt mē kapēr prã nē hkôt pajamaxpēr kêt. Tãm na pre mē pamã Jejus kêp Kra hã ã ho amnhĩrĩt anē. ¹⁰Jakamã mē pahte Tĩrtũm Kra hkôt amnhĩ xunhwýr xwýnhjaja na pu prem Jejus kêp Kra hã harēnh ma nē hkôt pajamaxpēr kurê kumrēx. No mē kêp hkra hkêt xwýnhjaja na htem Tĩrtũm kot kêp Kra hã harēnh ma nē ãm kuma nē amnhĩ kaxyw hkôt hamaxpēr kêt nē. Jao te Tĩrtũm kêp Hipēêxà hã amnhĩ to hēx pyrãk ã harē.

¹¹E kot paj ixprĩ hã mē amã tanhmã ja jarēnh to ka mē inhma. Nà na pre Tĩrtũm Krata mē pahpiitã panē ty. Jakamã kot puj mē pahte hkôt amnhĩ xunhwýr xwýnhjaja nhýrmã ty nhũm Tĩrtũm akupým mē pahto mē pahtĩr. Pu mē wa kuri pamex nē pahtĩr tũm nē papa ho papa. ¹²Mē pahpê Jejus kwýjaja kot puj mē ã pahtĩr tũm nē papa anē. No mē kêp hkwý hkêt xwýnhjaja koja mē nhýrmã ty nē mē pahpyrà nē wa hwýr àpir kêt nē.

¹³Na ka prem ixpyrà nē amnhĩ kaxyw Tĩrtũm Kra hkôt ajamaxpēr nē hkôt amnhĩ xunhwý. Tã pa ã mē amã kagàja nhĩpēx anē. Mē ate kamã harēnh nē mē pahte nhýrmã Tĩrtũm mē Kra wa hwýr mē paxàpir ã mē pajarēnhja mar nē amnhĩ kaxyw hkôt ajamaxpēr o ri apa kaxyw nē kapēr prãr o ri apa hkêt nē.

Mē pahte paxàmnhĩx mēmoj tã Tĩrtũm wýr ã mē pajarēnh
Juãw 14.13-14

¹⁴Nē mē pahpê Tĩrtũm krajaja na pu htem paxàmnhĩx pajamakêtkati nē mēmoj tã tanhmã hwýr to ho papa. Kot puj mē kãm hprãm xà hkôt mēmoj tã kuwý nhũm mē pama. ¹⁵Na pu htem mēmoj tã kuwý nhũm mē pamar mex nē mē pahte mēmoj

tã hwýr xà hkôt tanhmã mē pamã mēmoj nhõr to rý tanhmã mēmoj to. Ra mē pahte ja mar mex.

Tĩrtũm kot tanhmã hkra hkêt xwýnhjê nhĩpēx to hã harēnh
Rukre 22.31-32

¹⁶⁻¹⁷Nē koja Kris kôt mē anhĩõ tanhmã amnhĩ tomnuj to ka mē atõ tee ri ja hã omu nē ho Tĩrtũm wý. Ho awý kê nē tanhmã kot amnhĩ tomnuj tota o hapēx nē ja nē ho htýx kê axte ã amnhĩ nhĩpēx anhýr kêt nē. Kot puj mē pahtõ tanhmã amnhĩ tomnuj to nhũm Tĩrtũm tee ri ja hã mē pahpumu nhũm ja kêp omnuj nē. Tã kot puj mē amnhĩ tomnujta kaga nhũm ja hã mē pahpumunh kôt tanhmã hã mē pahto hkêt nē. ãm mē kot amnhĩ nhĩpēx pixi koja ho hamakêtkati hkêt nē. Koja mēhõ Tĩrtũm kaga ho hkaga nē aa hkôt amnhĩ xãm kêt nē. Hãmri nhũm tee ri amnhĩ tã omu nhũm ja kêp omnuj týx kumrēx. Jakamã koja aa ho hkra hkêt nē. Nē aa kot hkaga ho hamakêtkati hkêt nē pa ho pa. Jakamã koja hkaga xwýnhta nhýrmã ty nē kuri htĩr tũm nē pa ho pa hkêt nē.

¹⁸Nē mē pahpê Tĩrtũm krajaja na pu htem amnhĩ tomnuj o papa hkêt nē. Tĩrtũm Kra Jejus kot ja pymaj mē panē Satanasti pumunh mex jakamã nhũm tee ri mē pahte tanhmã amnhĩ tomnuj to hprãm xàj mē pano kupyr kaprý ho ri pa. Ra mē pahte ja mar mex. ¹⁹Mē pahpê Tĩrtũm kra na pu mē. No mē kêp hkra hkêt xwýnhjaja Satanasti kot amnhĩ tã mē ho htýx pyrãk o mē hipēx jakamã nhũm htem tanhmã amnhĩ tomnuj to ho pa. Mē pahte ja mar mex.

²⁰Nē mããñnên ja mē pahte mar mex. Na pre Tĩrtũm Kra mē pahwýr wrý nē mē pamã tanhmã Tĩrtũm o amnhĩrĩt to ho pa. Tapxipix kêp Mēpahpãm ã mē pamã ho amnhĩrĩt. Tã Jejus kukwak ri mē pahpê Tĩrtũm kra jakamã kot puj mē nhýrmã wa kuri pahtĩr tũm nē pa mex nē papa ho papa.

²¹E Kris kôt ixkwýjaja. Kêr ka mē Tĩrtũm kapēr kôt pix mã mãn ri amnhĩ nhĩpēx o ri apa rãhã nē. No nhãm mē kot Tĩrtũm kapēr kwým ri mē amã kapēr o hēx xwýnhjê kapēr ma nē ãm mē ama nē mē hkôt amnhĩ nhĩpēx hkêt nē.

Tã ãm ja pix. Ixpê Juãw na pa krĩ piitã
hkôt mẽ amã kagà nhĩpêx nẽ kurẽ.

Sikûn Juãw

Juãw kot Jejus kôt hkwýjê hwýr wam kagà nê mênh kôt hõ mênh

Juãw na pre kagàja nhîpêx. Jejus nhý hã hkrajê jahkre ho ri pa xwýnhjê hõ na pre. Jakamã na pre hkrî hõ kamã Kris kôt htõx mē õ fãmii mã kagàja nhîpêx nê mē hwýr kumê. Na pre hte Tîrtûm kapêr o mē hêx o pa xwýnhjê hõ mē õ krî hwýr mra nhûm Juãw kràmnhwý nita omu nê htýx kot mē ahkre mex ã hkamnhîx. Hãmri nê kot Tîrtûm kapêr o hkwýjê jahkre kaxyw amnhî nhõrkwý hwýr kuwý. Hãmri nhûm Juãw tee ri harênh ma nê kãm kagàja nhîpêx nê kamã kot amnhî wýr hwýr nê kãm kapêr nê hprî hã kãm tanhmã mē kot Tîrtûm o hêx to ho pa hã tanhmã mē harênh to. Kot kamã harênh nê mē harênh mar hãmri nê mē axkãm hamak rom nê ri pa kaxyw. ã na pre Juãwja hkràmnhwý ni mē hkwýjê mã mēmoj jarênh nê hã kagà nê mē hwýr mênh anê. Nê mē kãm:

¹ Pa Jejus kôt ixtõx. Xà mē amex? E ot pa mē amã kagà nhîpêx nê mē awýr kumê. Akrajaja nê apê mē hkatorxà mē mē ato ix-pimràatã mē awýr kumê. Ixpê Juãw pigêtre na pa. Inhmã mē akînh nom papxipix inhmã mē akînh kêt. Mē pahpyrà nê mē kot Tîrtûm kôt amnhî xunhwýr xwýnhjaja haxwýja kãm mē akînh. ² Mē pahte Tîrtûm kapêr kôt ri amnhî nhîpêx rãhã ho ri papa jakamã na pu htem pamã axpên kînh o ri papa.

³ Na pa hte mē pahto Mēpanhîpêêxã maati Tîrtûm wýr o ixpa nê kãm:

—Pa Tîrtûm. Ot pa mē amnhî to awý. Akra Jejus Kris mē mē amnhî to war awý. Kêr ka wa mē ixkamã axukaprî nê mē ixkutã war anojarêr rãhã ho ri apa. Nê tanhmã mē ixkrã hto pa mē ixãmnhîx ija-makêtkati nê ixkînh nê mē inhmã axpên kînh nê axpên to mex o ri axpên kôt ixpa. Nê tãm ri amnhî nhîpêx. Anê.

*Mē pamã axpên kînh kãm axpên to mex ã
mē pamã karõ*
Juãw 13.34-35; Wam Juãw 2.7-9, 3.14-18

⁴ Nê na pa pre akra hkwýjê pumu nhûm mē inhmã amnhî jarê pa mē kuma nê mē ý hã ixkînh nê. Na xep prem Tîrtûm kôt amnhî xunhwý nê hkôt ri amnhî nhîpêx mex o pa. Mē kot Mēpanhîpêêxã Maati Tîrtûm kapêr ã kagà hkôt amnhî nhîpêx ã inhmã amnhî jarê pa mē kuma nê ixkînh nê. ⁵⁻⁶ Jakamã na pa ã amã ixkapêr nê hã kagà anê. E kwa Kris kôt ixtõx. Kêr pu mē pamã axpên kînh o ri papa hã mēmoj to axpên kutã panojarêr rãhã ho ri papa. ã ixujarênh anhýrja nyw kêt. Amnepê mã mē ate Jejus kôt amnhî xunhwýr ã arîgrota ã na prem ã mē amã karõ anê. Tã kêr pu mē arî pamã axpên kînh pê Tîrtûm kapêr piitã hkôt amnhî nhîpêx mex o ri papa. Kapêr ã kagà kot ã mē pahte amnhî nhîpêx anhýr ã mē pamã karõ.

Tîrtûm kapêr o mē hêx xwýnhjê jarênh
Rômãn 16.17-18; Wam Ximotre 5.22;
Wam Juãw 2.18-26, 4.1

⁷ Nê mē kot Tîrtûm kapêr o hêx o ri mē pa xwýnhjaja na mē ra ma krî piitã hkôt mē kãm tanhmã ho hêx to ho pa nê mē kãm:

—Jesús kêp Tîrtûm Kra hkêt ãm mē panhîõ na pre. Na pre Tîrtûm mē pahwýr mênh kêt nê. ãm mē panhîõ rûm na pre kato.

Anhýr o mē kãm ho hêx o pa. Kãm Kris kurê xwýnh maatija nhý hã na htem ã ri ho hêx o pa anê. ⁸ Jakamã kwa mē amnhî nê mē omunh mex nê mē ama nê ãm mē ama. Kot kaj mē kapêr ma nê mē hkôt aja-maxpêr hãmri nê mē ixte Tîrtûm kapêr o mē ajahkreta kaga. Kwa mē arî mē ate amnhî nhîpêx nyw pix o mãn amnhî nhîpêx rãhã o ri apa. Nê arî mē amã axpên kînh kãm tanhmã axpên to ajuta hto rãhã ho ri apa. Kêr kê Tîrtûm ja hã mē apumu nê nhýrmã mē ato mex nê. ⁹ Nom kot kaj mē nhãm mē kapêr punujja kôt amnhî nhîpêx nê Kris kôt amnhî nhîpêx kêt nê nhûm Tîrtûm mē akôt pa hkêt nê. Nom kot ka mē arî Kris kôt amnhî nhîpêx mex nê hãmri nhûm Tîrtûm mē Kra Jejusja wa mē akôt ri pa ho pa rãhã nê. ¹⁰ Jakamã koja ã Tîrtûm kapêr ã kagà kuhpa hã Jejus o hêx xwýnhjaja mēmo arîgro hã mē anhõ krî hwýr pøj ka mē omu nê amnhî nhõrkwý hwýr mē hwýr kêt nê. Nê tanhmã mē kãm akapêr to hkêt nê. ãm ri mē hkax ã ri mra. ¹¹ No kot kaj mē ã mē

hipêx anhÿr kêt nẽ mẽ hwÿr mra nẽ mẽ
mar o akuhê hãmri nẽ te mẽ ate mẽ hkôt
amnhĩ nhĩpêx o amnhĩ nhĩpêx pyræk. Ja
pumaj kêr ka mẽ nhÿri mẽ omu nẽ mẽ htêp
kêt kumrêx.

Kagà jatur xà

Hapuhã Juāw 13-15

¹² E Kris kôt ixtõx. Ixkapêr jatur xà na
ja. Ixkapêr ã kagàja ãm hakotre nom inhmã
mẽ amã ixkapêr ry hprãm. Jakamã kot paj
mẽmo arĩgro hã ma mẽ awÿr mō pu mẽ
axpên pumu nẽ pahkĩnh nẽ. Pa rĩ kormã
mẽ amã ixkapêr jatur xàm kumẽ ka mẽ
aprĩ hã inhma.

¹³ Nẽ ota jar Kris kôt atõx krajaja awÿr
hpêr mẽ.

E ixpê Juāw pigêtre na pa ã awÿr kagàja
nhĩpêx nẽ mẽnh anẽ.

Hapuhã Juãw Juãw kot Jejus kôt hkwýjê hwýr kagà nê mênh o axkrut kôt hõ mênh

Juãw na pre mãânên kagàja nhípêx. Jejus nhý hã hkrajê jahkre ho mē pa xwýnhjê hõ na pre. Tã hkràmnhwý Gajore mã kagàja nhípêx nê hwýr kumē. Na pre Jejus kwýjaja ma krĩ piitã hkôt mē kãm Jejus kapêr jarênh o ri mē hkôt pa. Jao Gajore nhõ krĩ hwýr pøj nhũm Gajore mē hpôx ã mē harênh ma nê amnhĩ nhõrkwý hwýr mē kuwý. Jakamã nhũm pre htem ma õ krĩ hwýr pa hãmri nê kuri pøj. Nhũm Juãw ã Gajore kot amnhĩ nhípêx anhýr ã harênh ma nê hkĩnh nê hwýr kagàja nhípêx nê kumē. Nê kamã kãm mēhõ pē Xotre kot tanhmã amnhĩ tomnuj to ho pa hã harē. ã na pre Juãwja Gajore mã mēmoj jarênh nê hã kagà nê hwýr mênh anē. Nê kãm:

¹ Pa ixkràmnhwý Gajore? Xà amex? E ot pa awýr kagàja nhípêx nê kumē. Apê ixkràmnhwý mex na ka. Inhmã akĩnh.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tĩrtũm kôt amnhĩ nhípêx mex rãhã ho ri apa. Pa ajarênh ma nê anhý hã ixkĩnh nê. Nê ato Tĩrtũm wýr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

⁴ Ixte Tĩrtũm kapêr o mē ajahkre o ri ixpa jakamã te mē apê ixkra pyrãk. Tã pa tanhmã ate mē pahkwýjê nhípêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwýjê ho mex to hã harênh

Wam Korĩt 16.10-11

⁵ E ixkràmnhwý. Na ka xep hte Jejus kôt pahtõjê ho mex o ri apa. Aa ate mē omunh kêt tã nhũm htem ma anhõ krĩ hwýr pa ka mē omu nê apê Jejus kôt mē htõ hã mē ho mex nê. ãm hãmri na ka hte ã mē hipêx anhýr o ri apa Gajore. ⁶ Na pre ra mē hkwýjaja akupýn ixwýr pøj nê mē ixpê Kris kwýjê mã amnhĩ tã ajarē. Amã mē hkĩnh nê ate tanhmã mē ho mex to hã ajarē. Nhũm

pre nojarêt ka xep pre mē kãm pry hã mē apkur xà hã mēmoj gõ nhũm mē inhmã ajarē. Nã ãm hãmri na ka hte ã mē ho mex o apa anē. ã ate mē hipêx anhýr o apata ã na hte Tĩrtũm apumu nê hkĩnh nê. ⁷ Na htem krĩ piitã hkôt mē kãm Kris kot tanhmã mē panê amnhĩ nhípêx to hã harênh kaxyw ma mē hwýr pa. Nom mē apkur xà hprãm xàj mē kot Kris kôt amnhĩ xunhwýr kêt xwýnhjê hwýr pa hkêt nê. ⁸ Jakamã kwa kêr pu mē papajaja mē pahpê Jejus kôt mē htõ hã mē kãm mēõ hkwý nhõr o papa. Kot puj mē ã mē ho ajuta anē nê te mē pajaxwýja mē ìhkô hã ri mē kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

⁹ Nê ra ixte anhõ krĩ kamã mē apê Kris kwýjê mã kagà nê mênh nhũm mē ate kamã harênh ta. Na xep pre Xotreja kuma nê ãm kuma. Kêp mē akrãhtũm prãm xàj kãm ixkapêr mar prãm kêt nê. ¹⁰ Na xep hte tanhmã ixto hêx to ho pa. Nom papx- ipix ixto hêx kêt nê. Mãânên Kris kôt mē pahtõjaja nhýhýnh krĩ hõ rũm mē awýr pan pøj nhũm xep tanhmã mē amã mē ho hêx to. Nê mē hpôx ã mē omu nom amnhĩ nhõrkwý hwýr mē hwýr kêt nê. Tã ka mē kurom amnhĩ nhõrkwý hwýr mē awý nhũm xep tee ri ja hã mē apumu nê mē akamã gryk nê mē hã mē amã akir nê Tĩrtũm mã amnhĩ jarênh xà hã ixkre nê mē ajano. Na xep hte ã amnhĩ nhípêx anhýr o pa. Jakamã kot paj nhýrmã ma mē awýr mõ hãmri nê mē apiitã mē anoo mã hã kãm akir. Tanhmã kot mē ixto hêx to nê tanhmã kot amnhĩ tomnuj to hã kãm akir ka mē apiitã hã inhma.

Mê pahte mē kot amnhĩ tomnuj xwýnhjê hkôt amnhĩ nhípêx kêt ã mē pamã karõ

Rukre 6.45; Rõmãn 12.9

¹¹ E kwa ixkràmnhwý. Kêr ka ã Xotre kot amnhĩ tomnuj o pa anhýrja kôt amnhĩ nhípêx kêt nê. Mē kot amnhĩ tomnuj o mē pa xwýnhjaja na htem Tĩrtũm kôt amnhĩ nhípêx kêt nê. No kêt mē kot amnhĩ to mex o ri mē pa xwýnhjaja na mē kêp Tĩrtũm kra jakamã kêr ka mē ã mē kot amnhĩ nhípêx anhýr xwýnhjê kôt pix mã amnhĩ nhípêx.

Temêtre jarênh

¹² Nê Temêtre na hte tãm ri amnhĩ nhĩpêx nê ãm hãmri Tĩrtũm kapêr o mẽ ahkre mex nê nhũm mẽ piitã axpẽn mã mex ã harê. Pa hte ijaxwýja mẽ kãm mex ã harênh o ri mẽ hkôt ixpa ka htem inhma. ãm hãmri na pa hte tanhmã harênh to ho ri ixpa.

*Kagà jatur xà**Sikũn Juãw 12-13*

¹³ E kagàja kamã na pa ãm ja pix jarê nê hã kagà nê awýr kumẽ Gajore. Na pa kormã harênh jatur xà mẽnh kêt nê. ¹⁴ Nom kot paj tokyx ma awýr mõi hãmri nê rĩ kormã amã hatur xãm kumẽ.

E kê Tĩrtũm akutã nojarêt rãhã ho pa.

Nê ota jar Kris kôt akrãmnhwýjaja awýr hpêr mẽ. Nê kër ka atar Kris kôt ixkrãmnhwýjê mã ijarê.

Tã ãm ja pix. Ixpê Juãw pigêtre na pa ã awýr kagà nhĩpêx nê mẽnh anê.

Jutre

Jutre kot Jejus kôt hkwýjê piitã hwýr kagã nê mēnh

Jutre na pre kagàja nhîpêx. Xiakre pyrã nê kêp Jejus tō na pre. Tã kagàja nhîpêx nê krî piitã hkôt Jejus kôt hkwýjê hwýr kurê. Na pre mē hkwýjaja kêp Jejus kwý hã amnhî jarēnh tã axtem nê tanhmã amnhî tomnuj to ho pa. Jakamã nhũm Jutre kagàja kamã Jejus kwýjê mã hprî hã tanhmã mē harēnh to nê mē kot mē hkôt amnhî nhîpêx nê mē kãm kapêr kãm hihtýx nê. Nê mē kãm:

¹ Pa Jejus kôt ixtō nê ixtōxjaja. Xà mē amex? E ot pa mē amã kagã nhîpêx nê mē awýr kurê. Tirtũm kot ixpyrà nê amnhî kaxyw mē axunhwýr xwýnhjê hwýr. Mēpanhîpêxà Maati Tirtũm kãm mē pahpiitã mē pajapê jakamã na hte Kra Jejus Kris mē wa mē pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhî nhîpêx to ho ri ixpa. Nê ixpê Xiakre htō na pa.

² Na pa hte mē ato Tirtũm wýr ho ixpa nê kãm:

—Pa Tirtũm. Kwa mē kot Akra Jejus kôt amnhî xunhwýr xwýnhjê pumu nê amã mē hapê hã mē kamã axukaprî rãhã ho apa. Kê mē kamã amnhî krit nê àmnhîx hamakêtkati nê ri tanhmã amnhî nhîpêx to ho pa. Nê mē kãm axpên kînh o ri axpên kôt pa. Anê.

*Mê kot Tirtũm kapêr o hêx xwýnhjê jarēnh
Wam Ximotre 1.18-20, 6.12*

³ E ixkrãmnhwýjaja. Nà inhmã mē akînh. Na pa pre jãã mē amã kagã hkwý nhîpêx kaxyw. Mē pahte Jejus Kris kukwak ri amnhî nhîpêx nyw ã tanhmã mē pajarēnh to nê hã kagã kaxyw tã kormã harēnh kêt nê. Kot paj axtem mēmoj jarê. Na pre Tirtũm mē pamã kot amnhî nhîpêx o amnhîrît pa. Nê kapêr o amnhîrît pa. Mē pahte mar nê hkôt amnhî nhîpêx kaxyw. Jakamã kêr pu mē kapêr mar týt nê amnhî krã hi kamã haxàr týt nê hã papa. Nom

koja mēhō kapêr kuhpa hã tanhmã mē amã kapêr o hêx to ka mē ama nê ãm ama.

⁴ Na xep ra kapêr o mē hêx xwýnhjaja mē akôt pa nê mē apyrã nê Jejus kôt amnhî xunhwýr ã amnhî jarê nom amnhî to hêx. Ka xep mē aprî hã mē hêx ã mē omunh kêt nê mē kêp Jejus kôt mē atō hã mē hkamnhîx nê atýt amnhî nhōrkwý hwýr mē awý. Nom mē kot Tirtũm kapêr o hêx pix kaxyw na htem mē akôt pa nê mē amã kapêr o:

—Tirtũm kãm mē pajapê htýt kumrêx nê mē pakutã nojarêt ho pa jakamã kwa kêr pu mē mãmri nhãm mēnijê ho amnhîkati ho papa. Koja ja hã mē pahpumu nê tanhmã hã mē pahto hkêt nê. Kãm mē pajapê kênã kot kêt hã tanhmã mē pahto. No kêt Jejus Krisja mē ate kêp mē panhō Pahihti hã harê nom kêp mē panhō patrãw rý kêp mē panhō Pahihti hkêt. Anê.

À Tirtũm kapêr kuhpa hã mē amã harēnh anhýr o pa. Tirtũm kapêr ã kagã htũm kot amnepê mē hkukamã tanhmã mē harēnh to nê mē harēnh kot:

À mē kapêr anhýr o paja mýrapê koja mē mex kêt nê pa. Koja Tirtũm mē homnuj týt kumrêx.

Anhýr o kot mē harēnh. Tã pa mē amã ixprî hã mē harê nê hã kagã. Mē ate inhmar nê amnhî nê mē omunh mex kaxyw.

*Tirtũm kot tanhmã mē kot amnhî tomnuj
xwýnhjê nhîpêx to hã harēnh*

Sikũn Pêtre 2.1-17; Sikũn Ximotre 3.1-9

⁵ Nê amnepê mã mē panhîgêjtaja kormã Ejit kamã mē pa ri nhũm Tirtũm Ejit nhō xwýnhjê rũm mē kator pa. Hãmri nhũm mē hkwýjaja tanhmã hamaxpêr to nê axtem nê amnhî kaxyw hkôt hamaxpêr kêt nê. Nhũm tee ri amnhî tã mē omu nê ã mē kot amnhî nhîpêx anhýr xwýnhjê nhîmex pa. Ra mē ate mē harēnh mar mex tã pa axte mē amã mē harê.

⁶ Nê Tirtũm kapêr o mē wrýk xwýnh kwýjaja. Na prem Tirtũm nhý hã kapêr o pa htã tanhmã hamaxpêr punuj to nê ra kãm ja ho anhýr prãm nõkati nê Tirtũm kaga. Jakamã nhũm mē hã amýnê nhũm mē unê nê kàx o mē hkaxpre pa. Nê nhýri pika kaxwýnh kãm kamãt kô htyk kãm mē kurê nhũm mē arî kamã hkrî ho hkrî. Nom koja

nhÿrmã Tÿrtÿm kot tanhmã mẽ pahpiitã mẽ pajarënh to xà hã arÿgro kato nhÿm mẽ rÿ kormã hapôx pa. Hãmri nẽ kot amnhÿ tomnuj mÿrapê ma mẽ kot amnhÿ xà htÿx kamã hamak tÿm xàta wÿr ma hapêx.

⁷ Nẽ krÿ pê Sotô nẽ Komo nhô xwÿnhjaja na prem haxwÿja kãm Tÿrtÿm kapêr kôt amnhÿ nhÿpêx prãm kêt nẽ. Nẽ krÿja wa hpuhã krÿ hkwÿ kamã ri mẽ pa xwÿnhjaja haxwÿja mẽ urak nẽ nẽ kãm kapêr mar prãm kêt nẽ. Na prem amnhÿ tomnuj tÿx rãhã ho pa. Nẽ axtem nẽ axpên pê ri mẽ hprô ho amnhÿkati ho pa. Nẽ mẽmy hkwÿjaja ri axtem nẽ axpên to amnhÿkati ho pa. Hãmri nhÿm Tÿrtÿm tee ri mẽ kot amnhÿ nhÿpêxja ã omu nẽ mẽ hipy kuwy hpôk kwÿ rẽ nhÿm mẽ amnhÿ wÿr omu nẽ kãm ma xàj tee ri hprôt kaprÿ. Nẽ hprôt kaxyw ôrkwÿ rÿm hapôj nẽ hxêt pa nẽ hapêx. Na hte ã Tÿrtÿm mẽ kot amnhÿ tomnuj o mẽ pa xwÿnhjê nhÿpêx anẽ. Jakamã koja nhÿrmã kuwy hpôk rãhã xwÿnhhta wÿr mẽ piitã mẽ rënh pa nhÿm mẽ kamã amnhÿ xà htÿx kamã hamak rãhã ho pa ho pa nẽ aa à hapêx kêt nẽ. Nẽ à htÿx rãhã papa ho pa. Tã mẽ pahte Sotô mẽ Komo nhô xwÿnhjê jarënh mar nẽ mẽ pahte amnhÿ tomnuj kaga kurê kumrëx kaxyw na pre Tÿrtÿm ã mẽ pamã mẽ harënh o amnhÿit anẽ.

*Mẽ hpijaàm kêt xwÿnhjê jarënh
Sikÿn Pêtre 2.10*

⁸ Nẽ mẽ kot Tÿrtÿm kapêr o pihkàr xwÿnhjaja na htem ã mẽ kot amnhÿ nhÿpêx anhÿr xwÿnhjê pyrã nẽ amnhÿ tomnuj tÿx pix o ri pa. Jakamã na htem tanhmã hpimtir punuj to hãmri nẽ hkrã hapôj nẽ hpimtir xà hkôt tanhmã amnhÿ tomnuj to. Jao hkwÿjê kamã hpijaàm kêt o pa. Rÿ mënijê hõ rÿ mẽmyjê hõ nhÿm mẽ axpên kãm hpijaàm kêt o pa. Rÿ Tÿrtÿm kapêr o mẽ wrÿk xwÿnhjê ho kapêr punuj nẽ. Kapêr mã gêt o tanhmã mẽ ho kapêr punuj to. ã na htem hpimtir punuj xà hkôt amnhÿ tomnuj o pa anẽ. ⁹ Tÿrtÿm kapêr o mẽ wrÿk xwÿnh krãhtÿm Mikewja. Kêp mẽ hkrãhtÿm tã aa mẽ kãm kapêr mã gêt kêt nẽ. Na pre Mojes ty nhÿm Mikew ra ma hwÿr tẽn wrÿ. Nẽ kuri Satanasti pumu hãmri nẽ Mojes nhÿ nẽ tanhmã kãm kapêr to. Nom

kapêr mã gêt o kãm kapêr kêt nẽ. ãm kapêr mã hprÿ ho kãm kapêr nẽ kãm:

—Kwa ãm omu kê nô. Kot kaj tanhmã ho nhÿm Tÿrtÿm apumu nẽ hã tanhmã hã ato. Anẽ.

¹⁰⁻¹¹ Nom ixte mẽ amã mẽ hpimtir punuj jarënh xwÿnhjaja. Mẽ kot Tÿrtÿm kapêr o pihkàr xwÿnhjaja kot hprÿ hã Tÿrtÿm kot amnhÿ nhÿpêx ã harënh mar kêt jakamã na htem htÿx ri ho kapêr o haprÿ ho pa. Te ho mry xoprêja hamaxpêr kêt nẽ htÿx ri amnhÿ nhÿpêx o pa pyrãk. Nom koja nhÿrmã Tÿrtÿm mẽ homnuj tÿx nẽ.

Te mẽ kot finat Kaÿ kot amnhÿ tã hpÿr xwÿnh kot amnhÿ nhÿpêxta pyrãk. Nẽ te mẽ kot finat Paraãw kot amnhÿ nhÿpêx pyrã nẽ kàxpore rÿnh prãm xàj Tÿrtÿm kapêr kuhpa hã tanhmã amnhÿ nhÿpêx to ho pa. Nẽ te mẽ kot finat Kore kot amnhÿ nhÿpêx pyrã nẽ Tÿrtÿm kot mẽ kaxyw mẽ ô pahi xãm xwÿnhhta kutã amnhÿ xunhwÿ. Mÿrapê koja mẽ jajê pyrã nẽ kuwy hpôk rãhã xwÿnhhta wÿr ma hapêx pa.

¹² Na ka htem apê Jejus kwÿ hã axpên wÿr akuprô. Nẽ tãhã mẽ apê hkwÿ hã amã axpên kÿnh ã axàpkur kaxyw axpên wÿr akuprô. Nhÿm ixte mẽ amã mẽ harënh xwÿnhjaja mẽ akôt agjê nẽ mẽ akutã apku. Jakamã kwa mẽ o kora mẽ amnhÿ nẽ mẽ omunh mex nẽ. Mẽ hipêx o te mẽ ate mẽ axàpkur xà hã mẽ anhô kamã kënre pumunh nẽ hanhir nẽ rënh pyrã nẽ amnhÿ nhÿhkô hã mẽ pumu nẽ amnhÿ nẽ hanor kurê kumrëx. Na htem hpijaàm kêt kãm amnhÿ pix kukamã hamaxpêr pê apkur rÿnh o pa.

Te na wrÿk kaxyw htyk rax nẽ mör nhÿm mẽ kot omunh nẽ wrÿk ã hkamnhÿx tã nhÿm kôk kot nhãm mën nhÿm wrÿk kêêta pyrãk o na htem amnhÿ nhÿpêx. Jao te mẽ kot ãm hãmri mẽ amã Tÿrtÿm kapêr jarënh mex pyrãk tã mẽ amã ho hêx.

Nẽ te mẽ kêp mẽmo pÿ hpàr ra ô mã tãm tã ãm htÿx rã nẽ aa ô hkêt nhÿm mẽ kot krãhyr nẽ mën nhÿm grã parta pyrãk.

¹³ Nẽ te mẽ kêp gô xujanãr kot amnhÿ nhÿpêx pyrãk. Na hte gô xujanãrja hakax wÿr kapê nẽ mra nhÿm hamrô kÿxpê amgrã kamã arÿk nhÿm gô awjanã nẽ ma akupÿm hipôk wÿr mra. Ja pyrãk na htem

ma nhÿhÿm mra nÿ mÿ kãm mÿmoj jarÿ nÿ nhãm mra nÿ mÿ kãm mÿmoj jarÿ nÿ ma akupÿm mÿ kurÿm mra. Nhÿm mÿ mar xà hkôt amnhÿ tomnuj rãhã ho pa.

Nÿ te mÿ kot kaxkwa hã kanhêre nhÿhÿm htÿm nhÿm mÿ kot nhÿhÿm htÿm xà hkôt omunh kêeta pyrãk. Jakamã koja Tÿrtÿm nhÿrmã kamãt kô kamã mÿ rÿnh pa nhÿm mÿ aa hapôx kêt nÿ.

Mÿ kot amnhÿ tomnuj xwÿnhjê hkukamã mÿ harÿnh

Apokarip 20.11-15

¹⁴ Nÿ na pre finat Enokja amnepê mã ã mÿ kot amnhÿ tomnuj anhÿr xwÿnhjê hkukamã tanhmã mÿ harÿnh to. Mÿ kot Tÿrtÿm kapÿr o pihkãr o ri mÿ pa xwÿnhjaja nhÿm mÿ hkukamã mÿ harÿ. Enokja finat Atãw kanrêhã htãmnhwÿ na pre. Tã ã mÿ kot amnhÿ tomnuj anhÿr xwÿnhjê hkukamã mÿ harÿnh o:

Koja nhÿrmã Pahihtija man pika hwÿr akupÿn wrÿ. Kapÿr o mÿ wrÿk xwÿnh xohtô rax mÿ mÿ hpimràatã akupÿn wrÿ.

¹⁵ Hãmri nÿ mÿ pahpiitã kormã mÿ pahtÿr ri mÿ pahte tanhmã amnhÿ nhÿpêx to ho papa hã mÿ pahpumunh xà hkôt tanhmã mÿ pajarÿnh to. Hãmri nÿ mÿ kot Tÿrtÿm kapÿr o hêx o pa xwÿnhjê pumu nÿ tanhmã mÿ harÿnh to nÿ mÿ harÿnh o: “Jajaja na pre mÿ kãm Inhÿpêêxã Tÿrtÿm prãm kêt nÿ ri kapÿr kwÿm pix mã amnhÿ nhÿpêx o pa. Nÿ kapÿr punuj o pa. ã na prem amnhÿ nhÿpêx anhÿr rãhã ho pa.” Anhÿr o mÿ harÿ nÿ amnhÿ nÿ kuwy hwÿr mÿ kurÿ nhÿm mÿ amnhÿ xà htÿx kãm hamak o pa rãhã nÿ pa ho pa. Anÿ.

ã na pre finat Enokja mÿ hkukamã mÿ harÿnh anÿ. ¹⁶ ãm hãmri na mÿ harÿ. Tã na hte arÿ mÿ hkwyjaja ã amnhÿ nhÿpêx anÿ. Nÿ hamaxpÿr mex kêt nÿ. Na htem nhãm tanhmã mÿ ho kapÿr punuj to pix kukamã hamaxpÿr. Nÿ amnhÿ krã hkôt htÿx ri tanhmã amnhÿ tomnuj to ho pa. Nÿ amnhÿ to jarkrar rãhã nÿ. Nÿ hêx rom mÿ kêp mÿmoj jamÿnh kaxyw tanhmã mÿ kãm hêx to.

¹⁷ E Kris kôt ixkrãmnhwÿjaja. Koja mÿ ã mÿ amã Tÿrtÿm kapÿr o hêx anhÿr o mÿ akôt pa ka mÿ ama nÿ ãm mÿ ama nÿ mÿ kapÿr

mar kêt nÿ. ãm mÿ panhõ Pahihti Jejus Kris nhÿ hã mÿ ajahkre o mÿ pa xwÿnhjaja kot tanhmã mÿ amã mÿ harÿnh toja mã mãn kêt ajamaxpÿr tÿx rãhã o ri apa. ¹⁸ Na prem mÿ amã mÿ harÿnh o:

—Jesús akupÿn wrÿk xwÿj ri koja mÿmojaja mÿ awÿr mran pôj. Nom mÿ kot Jejus kapÿr kwÿm amnhÿ krã hkôt tanhmã amnhÿ nhÿpêx to xwÿnhjaja koja mÿ. Hãmri nÿ mÿ apê Jejus kwÿ hã mÿ apumu nÿ mÿ atã akunha nÿ mÿ atã hpÿr o axkê nÿ Tÿrtÿm ã hpÿr o axkê nÿ kapÿr ã kagã hã hpÿr o axkê. Anÿ.

¹⁹ ã mÿ kot amnhÿ nhÿpêx anhÿr xwÿnhjaja mÿ pahpê Jejus kwÿjaja mÿ pahte axpÿn kutã amnhÿ xunhwÿrja na mÿ kãm hprãm. Mÿ kamã Tÿrtÿm Karõ gjêx kêt jakamã mÿ kãm amnhÿ krã hkôt pix mã tanhmã amnhÿ tomnuj to ho pa hprãm.

Mÿ pahte Kris akupÿn wrÿk jamãr pÿ tanhmã amnhÿ nhÿpêx to hã mÿ pamã karõ

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikÿn Pêtre 3.12-15

²⁰ Kwa mÿ apê Jejus kôt ixtõ nÿ ixtõxjaja kêr ka mÿ ã mÿ kot amnhÿ nhÿpêx anhÿr o mÿ pa xwÿnhjê rom apkati mÿ amnhÿ kaxyw Jejus pix mã mãn ajamaxpÿr rãhã ho ri apa. Te mÿ kot mÿ hakre hã ra ãptãr nÿ amnhÿ krãm mÿ hakre xà jagjênh tÿxta pyrãk.

Jao Tÿrtÿm kapÿr mar tÿx nÿ hkôt amnhÿ nhÿpêx mex o ri apa.

Nÿ Karõ nhÿ hã amnhÿ to hwÿr rãhã nÿ.

²¹ Nÿ Tÿrtÿm kãm mÿ pajapê hã kãm ajamaxpÿr rãhã ho ri apa.

Nÿ Pahihti Jejus Kris kãm mÿ pajapê hã kãm ajamaxpÿr tÿx rãhã ho apa.

Koja nhÿrmã kãm mÿ pajapê hã akupÿn mÿ pahwÿr wrÿ nÿ tanhmã mÿ pahto mex to pu mÿ kuri pahtÿr tÿm nÿ pahkÿnh nÿ papa ho papa. Tã kêr pu mÿ arÿ akupÿn mÿ pahwÿr wrÿk xà hã arÿgro jamãr rãhã ho papa.

²² Nÿ mÿ pahkwÿjaja kormã mÿ kot Jejus kôt amnhÿ xunhwÿr tÿx kêt xwÿnhjaja kêr ka mÿ kamã axukaprÿ nÿ aprÿ hã mÿ kãm Tÿrtÿm kapÿr jarÿnh o ri mÿ hkôt apa. ²³ Na pre ra mÿ hkwyjaja mÿ kot Tÿrtÿm kapÿr o pihkãr xwÿnhjê kapÿr ma nÿ mÿ hkôt

amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpôk rũnh nê mẽ hpa hã mẽ hamỳnh nê nhãm mẽ rēnh pyrək o mẽ hipêx. Jao mẽ kot nhỹrmã Tĩrtũm kapēr o pihkār xwỳnhjê hkôt kuwy hpôk rũnhta wỳr pa pymaj mẽ nê mẽ kãm akapēr kãm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwỳnhjaja kêr ka mẽ kamã axukapĩrĩ ho ri apa nê mẽ kamã agryk tokyx anhỹr kêt nê. Xatã mẽ kãm Tĩrtũm kapēr jarēnh rãhã ho ri mẽ hkôt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nê. Kwarĩ ho kwarĩ.

*Jutre kot Tĩrtũm mã mex o mex ã harēnh
Wam Pêtre 1.5-7*

²⁴ Nê kêr pu mẽ Tĩrtũm mã amnhĩ jarēnh kaxyw nê ã kãm amnhĩ jarēnh anê nê kãm: —Pa Tĩrtũm. Nà ãm hãmri na ka hte amnhĩ kôt mẽ ixunhwỳr tỳx nê pa mẽ akaga hkêt nê akôt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto apĩ pa mẽ Akra mẽ war akuri axte tanhmã amnhĩ tomnuj to hkêt nê. Nê amnhĩ to mex pê anhĩrã htỳx rax kãm ixpa. Jao ixkĩnh tỳx nê ixpa ho ixpa.

²⁵ —Apê mẽ inhõ Tĩrtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nê na ka hte anhĩrã htỳx rax rãhã ri apa. Nê amex o amex nê axihtỳx o axihtỳx nê axàhpumunh o axàhpumunh. Nê apê mẽ inhõ Pahi Maati hã apyxi mex na ka. Amnepê mã kormã mẽmoj kêt ri ka pre ã amnhĩ nhĩpêx anhỹr o apa rãhã nê. Tã arĩ ã ate amnhĩ nhĩpêx anhỹr ho apa ho rãhã. Nê kot kaj apkati mẽ ã ate amnhĩ nhĩpêx anhỹr ho rãhã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anê.

E kêr pu mẽ ã Tĩrtũm mã mex o mex ã harēnh anhỹr o papa.

Ãm ja pix. Ixpê Jutre na pa mẽ awỳr kagàja nhĩpêx nê kumê.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwýnhjê hõ pê Juãw na pre hipêx. Na pre Jejus ã mẽ kãm hkurê xwýnhjaja unê nê ma gô hipôk pê Patos wýr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htĩr ri nhũm Tĩrtũm kapêr o wrýk xwýnhjê hõ gô hipôkja wýr wrý nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwýr xwýnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwýr xwýnh piitã ma mẽ kot amnhĩ xà htýx kamã hamak tũm xà hwýr mẽ rênh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnên hã kagà. Hãmri nê mẽ pamã hã kagà o:

1-2 E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwýnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarênh to ho ra kãm ho amnhĩrĩt pa. Kot amnhĩ xô ri mẽ pahte hkôt amnhĩ xunhwýr xwýnhjê mã harênh kaxyw. Hãmri nhũm kuma nê kot amnhĩ xô ri inhmã ujarênh kaxyw man ixwýr kapêr o wrýk xwýnh mẽ nhũm man ixwýr wrý nê ô ri inhmã mẽmoj to amnhĩrĩt pa. ãm hãmri ã inhmã mẽmoj to amnhĩrĩt anê. Tã kot paj amnhĩ xwar mẽ apê Jejus kôt ri mẽ apa xwýnhjê mã harê nê hã kagà. Mẽ ate mar nê axkãm ajamak rom nê ri apa kaxyw. Nà ixte hã kagà mã xwýnhja koja tanhmã amnhĩ to nê tokyx mẽ pahwýr wrý. ³Jakamã kwa kêr ka mẽ aprĩ hã kagàja kamã harê nê ama nê hkôt pix mã amnhĩ nhĩpêx nê mẽ piitã mẽ kãm kamã harênh

o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarênh mar nê hkôt amnhĩ nhĩpêx xwýnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juãw kot krĩ pê 7 kôt Jejus kwýjê hwýr kagà rênh

⁴E ixpê Juãw kot paj atar pika pê As kamã krĩ pê 7 piitã hkôt mẽ apê Jejus kwý hã axpên wýr mẽ apikuprôn xwýnhjê hwýr kagà nê kurê ka mẽ kamã harê nê ama.

Na pa hte mẽ ato Tĩrtũm wýr rãhã ho ri ixpa. Nê mẽ ato hwýr o:

—Pa Tĩrtũm. Kwa kêr ka pika pê As kamã akrajê ho mex nê mẽmoj to mẽ kutã anojarêt rãhã ho apa. Kê mẽ hamakêtkati nê àmnhĩx ri pa ho pa. Ja na inhmã hprãm. Anê.

Tĩrtũmja rãhã ho rãhã. Amnepêm kormã mẽmoj kêt ri nhũm pre ra rãhã ho rãhã. Nê koja nhỹrmã mẽmoj akupým hapêx par tã nhũm Tĩrtũm aa hapêx kêt kumrêx. Koja arĩ rãhã ho rãhã. Na hte kaxkwa kamã kot mẽ pahto amnhĩptãr ã hkrĩ xà kamã mẽ papytãr rãhã ho hkrĩ.

Nê Tĩrtũm Karõ te kot Tĩrtũm kot mẽ pahto amnhĩptãr xà hã hkrĩ xà kapem kanê maati pixi kamã kwryt pê 7 xãm xwýnhhta pyrãk. Na hte Tĩrtũm nhĩhkô hã hkrĩ ho hkrĩ. Tã kê mẽ ato mex rãhã ho pa.

⁵Nê Jejusja na pre hte Tĩrtũm kapêr o mẽ ahkre mex o pa nê aa hkaga hkêt nê. Tã nhũm prem axtem nê kupĩ. Hãmri nhũm Tĩrtũm akupým ho htĩr. Jejus kumrêx ho htĩr nhũm htĩr o htĩr. Nê kêp pika piitã hkôt pahi piitã nhõ Pahihti. Kãm mẽ pajapê htýx jakamã na pre mẽ panê ty nê hkamrôja te mẽ panê hpikapĩr pyrãk o amnhĩ nhĩpêx. Nê htyk o mẽ pahte amnhĩ tomnuj pãnhã amnhĩre. Jao te mẽ pahte amnhĩ tomnuj pê mẽ papytãr par pyrãk o mẽ panhĩpêx.

⁶Nê na pre mẽ pahpê patre nê mẽ piitã mẽ ho Hipêêxà Tĩrtũm wýr o papa kaxyw mẽ paxunhwý. Nê kêp mẽ panhõ Pahi Maati hã kãm hprãm xà hkôt mẽ pahte kãm tanhmã amnhĩ nhĩpêx to ho papa kaxyw mẽ paxunhwý. Jakamã kwa kêr pu mẽ kãm

mex o mex nê hihtỳx o hihtỳx ã mãn harênh rãhã ho papa.

⁷ Nê koja tokyx akupỳn mẽ pahwỳr kakrã kamã wrỳ pu mẽ pahpiitã wrỳk kãm omu. Nhũm mẽ kot hpĩr xwỳnhjaja tee ri amnhĩ wỳr omu. Nê pika piitã hkõt ri mẽ pa xwỳnhjaja omu nê mẽ kot amnhĩ tomnuj jakamã tee ri amnhĩ kukamã hamaxpêr o kãm ma htỳx kumrêx. Hãmri nê kãm ma xà mur nê htertet o kuhê. Koja nhỹrmã Jejus akupỳn wrỳ nhũm mẽ amnhĩ wỳr omu nê ã amnhĩ nhĩpêx anê.

⁸ Nê Tĩrtũm na hihtỳx o hihtỳx nê àhpumunh o àhpumunh. Nê aa kot mēhõ ni rũm kator kêt. Na hte amnhĩ jarênh o:

—Ixrahã ixpa xwỳnh na pa. Amnepê mã kormã mẽmoj piitã hkêt ri pa pre ra ixrahã ri ixpa ho ixpa. Nê koja nhỹrmã mẽmoj akupỳm hapêx tã pa arĩ ixrahãã. Anê.

Juãw kot Jejus akupỳm htĩr ã omunh

⁹ Nê ixpê Jejus kõt mẽ atõ Juãw na pa hte mẽ apyrã nê Jejus kõt amnhĩ nhĩpêx nhũm hte mẽ kãm Jejus kurê xwỳnhjaja mẽ apyrã nê hã inhĩpêx kati ho pa. Mẽ pahte hkõt ri amnhĩ nhĩpêx o papa jakamã na htem hã mẽ pahtomnuj tỳx rãhã ho pa. Tã pu htem ý hã mẽ kutã amnhĩ to htỳx nê arĩ hkõt amnhĩ nhĩpêx. Jakamã na pa pre Tĩrtũm kapêr o mẽ ajahkre rãhã ho ri mẽ akõt ixpa. Nê Jejus kêp mẽ panhõ Pahihti hã mẽ amã harê. Mỳrapê na prem hã ixpynê nê man amnê ixto tẽ nê jar gô hipòk pê Patos kãm inhmẽ pa kamã ixpê prês nê ixpa ho ixpa.

¹⁰ Tã nhũm tòmĩk pa Tĩrtũm mã amnhĩ jarênh o nhỹ. Hãmri nhũm Karõ tanhmã ixkrã hto pa te ixpimtir kãm mẽmoj pumunh pyrã nê amnhĩ katut kõt mēhõ kapêr ma. Te kot pifti kakôr tỳx pyrãk pa kuma. ¹¹ Hãmri nhũm inhmã kapêr nê inhmã:

—Pa Juãw? E kot paj amã mẽmoj to amnhĩrit ka omu nê akwỳjê mã hã kagà. Nê hã kagà hpa hãmri nê ahpỳnhã krĩ hkwỳ hkõt mẽ kêp ixkwỳ hã axpên wỳr mẽ pikuprõnh xwỳnhjê hwỳr arê. Mẽ kot kamã harênh nê mar nê axkãm hamak rom nê ri pa kaxyw. Epes wỳr nê Emĩnã hwỳr nê Pekamõ hwỳr nê Xijaxir wỳr nê Satre hwỳr nê Pirate hwỳr nê Raxisej wỳr. Krĩ pê 7ja

piitã hwỳr ixkapêr ã kagà nê mẽ hwỳr arê kê mẽ apyrã nê mẽmoj jarênhja ma. Anê.

¹² Hãmri pa ixte mēhõja pumunh kaxyw ho ijakêx nê kanê hkwỳ pumu. Kanê kêp 7 nê piitã ôr o.

¹³ Nê kanê nhĩpòk ri mēhõja te panhĩ pyrã nê pahi hã ê mex kãm xa. Éja hpar kôn kõt hitep nhũm xa. Nê pahi hã mẽ hinõ hpre xà ho amnhĩ nhĩnõ hpre nê xa. Hinõ pre xàja ôr pix o. ¹⁴ Nê hkrã hkĩ te kaxat nhĩ jaka pyrã nê hakaajre. Nê no te kuwy hpòk pyrã nê hkarỳr tỳx nê. ¹⁵ Nê hpar te mẽmo kax karỳr tỳx pyrãk. Nê kapêr te gô hprõt tỳx koko pyrãk. ¹⁶ Na pre upòk rũm kanhêti ho 7 nê hamỳ nê o xa. Nê hakwa rũm wapo pòm kato nê akutã wa gixre nê ajêt. Nê hkuk kamã hirã htỳx kumrêx. Te myt kot mẽ pano hã harir nhũm gêk tỳx pyrãk. ã mēhõja kot anhyr.

¹⁷ Pa tee ri tanhmã kute hã omu nê inhmã ma htỳx kumrêx nê umaj tẽm nê hpar pê te ixtyk pyrã nê nõ. Hãmri nhũm ixtã upòk rũm ìhkraja xi nê inhmã kapêr nê inhmã:

—Kwa amã ixpuma hkêt nê. Pa na pa. Amnepê mã kormã mẽmoj kator kêt ri pa pre raa. Nê ixrahãã. Koja nhỹrmã mẽmoj akupỳm hapêx pa arĩ ixrahã ixpa ho ixpa.

¹⁸ —Na pa pre ty tã akupỳm ixtĩr. Nê ixtĩr o ixtĩr. Kam ixpumu. Kot paj axte ixtyk kêt nê. Ixpê mẽhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nê ma mẽhtykjê papxà hwỳr ma pa.

¹⁹ —E kêt ka ate mẽmoj pumunh xwỳnhta pumunh tỳx nê akwỳjê mã hã kagà. Nê mẽmoj kormã kot amnhĩ nhĩpêx kêt nhũm ate omunh mã xwỳnhta ka inhỹ hã mẽ kãm hã kagà. Mẽ kot kamã harênh nê mar tỳx kaxyw.

²⁰ —Nê kot paj axte ixprĩ hã ate mẽmoj pumunh xwỳnhta jarê ka inhma. Nà kanê pê 7ta te mẽ kot krĩ hkwỳ pê 7 kamã mẽ kêp ixkwỳ hã axpên wỳr mẽ pikuprõnh xwỳnhjê pyrãk. Nê inhĩhkra kamã kanhêti pê 7ta te kêp inhmã mẽ kot mẽ hamãr xwỳnhjê pyrãk. Anê.

2

Epes kamã Jejus kwỳjê hwỳr kagà

¹ Nhũm Jejus arĩ inhmã kapêr nê inhmã:

—E kêr ka krĩ pê Epes kamã ixkwỳjê jamãr xwỳnh wỳr kagà nê amê. Nê kagãja kamã mẽ kãm ixkapêr jarê nê mẽ kãm:

Pa Epes kamã ixkapêr mar kaxyw axpên wỳr apikuprôn timer xwỳnhjaja. Ot pa mẽ awỳr ixpêr mẽ. Ixpê ixupôk o kanhêti ho 7 nê hamỳnh nê ho ixãm xwỳnh ta na pa. Nê ixpê ôr o kanê pê 7 nhĩpôk ri ixpa xwỳnh ta na pa ã mẽ awỳr ixpêr mên timer anê.

² Na pa hte tanhmã mẽ ate amnhĩ nhĩpêx to ho apa hã mẽ apumun timer mex o ixpa. Na ka htem inhmã amnhĩ nhĩpêx mex nê pa ja hã mẽ apumu. Mẽ kot ixtã mẽ anhi pêx kati htã ka mẽ kutã amnhĩ to htỳx nê ixkaga hkêti nê. Nê mẽ kot amnhĩ tomnuj xwỳnhjê hkôti amnhĩ nhĩpêx o ri apa hkêti nê. Nhũm ixte mẽ awỳr mẽ rên timer ã amnhĩ to hêx xwỳnhjaja mẽ awỳr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhĩpêx ã mẽ omu nê amnhĩ nê mẽ hanor kurê kumrêx. ãm hãmri na ka htem ã mẽ hipêx anê.

³ Nê mẽ kãm ixkurê xwỳnhjaja kot tanhmã ixtã mẽ atomnuj tỳx to htã ka mẽ kutã amnhĩ to htỳx nê aa ixkaga hkêti nê. Nê ixkôti amnhĩ nhĩpêx mex rãhã ho ri apa. ãm hãmri na ka htem ã amnhĩ nhĩpêx anhi r o ri apa.

⁴ ãm mẽmoj pixi na ixpê omnuj. Amnepê mã kormã mẽ ate ixkôti amnhĩ xunhwỳr nyw ri na ka prem amã axpên kĩnh nê axpên to mex o ri apa. Nê mẽ amã axpên tã ma ho te mẽ amã amnhĩ tã ma pyrãk o axpên nhĩpêx. Tã tanhmã ajamaxpêr to nê axte ã axpên nhĩpêx anhi r kêt nê. Jao te mẽ amã ixkĩnh kêt pyrãk o amnhĩ nhĩpêx. Pa tee ri ja hã mẽ apumu nhũm ja inhmã mex kêt nê.

⁵ Kwa mẽ tokyx ja hã amnhĩ pumu nê akupỳm mẽ ate ixkôti amnhĩ xunhwỳr nyw ri mẽ ate axpên nhĩpêx ta o akupỳm axpên nhĩpêx o apa. Kot kaj mẽ anhi r kêt kot paj te mẽ apê mẽ anhô kanê hpyr nê kapôti ã mên timer pyrãk o mẽ anhi pêx ka mẽ ri apa nê gaa nê apikaprãr pa. Tã mẽhô koja mẽ amỳr pê mẽ anhô krĩ kamã mẽ kãm ijarên timer o pa?

⁶ Nê mẽ kêp Nikoraw nhô xwỳnhjaja na ka htem mẽ kot tanhmã amnhĩ tomnuj

to hã mẽ omu nê ixpyrã nê apê ja hprãm nôkati nê mẽ hkôti ri amnhĩ nhĩpêx kêt nê. Pa ja hã mẽ apumu nê ixkĩnh nê.

⁷ Tã ixte mẽ amã ixkapêr jatur xã na ja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarô nhĩ hã ixte mẽ amã ixkapêr anhi rja ma nê kãm ajamaxpêr tỳx rãhã ho ri apa.

Tĩrtũm nhô krĩ kamã mẽmo pi hpar kuhê xwỳnh. Mẽ kot ô hkur nê axte htyk kêt nê pa ho pa mã xwỳnh ta. Kot kaj mẽ ate amnhĩ tomnuj nê amnhĩ to htỳx nê arĩ inhmã hprãm xã hkôti amnhĩ nhĩpêx rãhã ty pa akupỳm mẽ ato mẽ atĩr nê ma pi hpar ta wỳr mẽ arê. Ka mẽ ma hwỳr mra nê ô hõ hta nê akrê nê axte atyk kêt kumrêx nê apa ho apa.

E ãm ja pix na hapêx. Anê.

—E Juãw. Kêr ka Epes kamã ixkwỳjê jamãr o pa xwỳnh ta wỳr ã ixkapêr ã kagã anê nê mẽ hwỳr amê. Anê.

Hãmri pa kuma nê ô ri mẽ kãm hã kagã hpa.

Emĩnã kamã Jesus kwỳjê hwỳr kagã

⁸ Hãmri nhũm hpãnhã Emĩnã nhô xwỳnhjê kaxyw inhmã kapêr nê inhmã:

—Nê hpãnhã Emĩnã kamã ixkwỳjê jamãr xwỳnh wỳr kagã nê mẽ hwỳr amê. Nê mẽ kãm ixkapêr jarê nê mẽ mẽ kãm:

Pa Emĩnã kamã ixkapêr mar kaxyw axpên wỳr mẽ apikuprôn timer xwỳnhjaja. Ot pa mẽ awỳr ixpêr mẽ. Ixrãhã ho ixrãhã ixpa xwỳnh ta na pa. Amnepêm kormã mẽmoj piitã hkêti ri na pa pre ixrãhã nê ri ixpa. Koja nhỹrmã mẽmoj akupỳm hapêx pa arĩ ixrãhã ho ixrãhã nê ri ixpa. Na pa pre ty no ãm akupỳm ixtĩr o ixtĩr. Tã pa ã mẽ awỳr ixpêr mên timer anê.

⁹ Nã na pa hte mẽ ate tanhmã amnhĩ nhĩpêx to ho apa hã mẽ apumun timer rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati nê ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã nê ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapêr punuj rũnh o pa. Mẽ kot Tĩrtũm kôti amnhĩ nhĩpêx ã amnhĩ jarên timer tã no ãm hkôti amnhĩ nhĩpêx kêt nê. ãm

Satanasti kôt pix mã na htem amnhĩ nhĩpêx o pa.

¹⁰ Tã mẽ kãm ixkurê xwýnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Nẽ arĩ mẽ kutã amnhĩ to htỳx nẽ. Koja Satanasti mẽ akwỳjê pynê nẽ mẽ ajagjê. Hãmri nẽ mẽ ate ixkaga hprãm xàj tanhmã mẽ anhĩpêx kati hto ka mẽ hagjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nẽ ixkaga hkêt nẽ. Mẽ kot mẽ apar mã tã ka mẽ kutã amnhĩ to htỳx nẽ. Kot kaj mẽ aa ixkaga hkêt nẽ ixkôt ri amnhĩ nhĩpêx rãhã ty pa akupỳm mẽ ato mẽ atĩr nẽ ma amnhĩ wỳr mẽ ato api. Hãmri ka mẽ Tĩrtũm mẽ wa ixri amex nẽ atĩr tũm nẽ apa ho apa nẽ axte atyk kêt nẽ apa.

¹¹ E ixkrajaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêrja anhỹr ma nẽ kãm ajamaxpêr tỳx rãhã ho ri apa. Kot kaj mẽ ate amnhĩ tomnuj nẽ amnhĩ to htỳx nẽ inhmã hprãm xà hkôt pix mã amnhĩ nhĩpêx rãhã ty. Hã kot paj akupỳm mẽ ato mẽ atĩr ka mẽ ma kuwyta wỳr apa hkêt nẽ.

E. ãm ja pix. Na hapêx. Anẽ.

—E Juãw. Kêr ka Emĩnã kamã ã ixkrajê mã ixkapêr ã kagã anẽ. Anẽ.

Hãmri pa kuma nẽ ô ri mẽ kãm hã kagã.

*Pekamõ kamã Jesus kwỳjê hwỳr kagã
Sikũn Korĩt 6.14–7.1*

¹² Nhũm Jesus arĩ inhmã kapêr nẽ hpãnhã inhmã:

—E hpãnhã Pekamõ kamã ixkrajê jamãr o pa xwýnhja wỳr kagã nẽ mẽ hwỳr amẽ. Nẽ mẽ kãm ixkapêr jarê nẽ mẽ kãm:

Pa Pekamõ kamã ixkapêr mar kaxyw axpên wỳr mẽ apikuprõnh xwýnhjaja. Ot pa mẽ awỳr ixpêr mẽ. Ixpê ijakwa rũm pôm wapo akutã wa gix nẽ kator nẽ ãm xwýnhta na pa mẽ awỳr ixpêr mẽ.

¹³ Na pa hte mẽ anhõ krĩ nhõ xwýnhjaja kot tanhmã amnhĩ tomnuj to ho pa hã mẽ omunh mex nẽ. Mẽ kot Satanasti kôt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyrãk. ãxipas kot mẽ hkôt mẽ kãm ixkapêr o mẽ

ahkre ho pa nẽ aa hkaga hkêt tã nhũm prem axtem nẽ ixtã kupĩ. Ka mẽ ja hã mẽ omunh tã mẽ umaj ixkaga hkêt nẽ arĩ ixkôt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anẽ.

¹⁴ Mẽmoj pixi na ixpê omnuj. Na hte mẽ akwỳjaja axtem nẽ Paraãw kapêr kôt amnhĩ nhĩpêx o pa. Na pre Paraãwja Parak mã tanhmã kapêr to nhũm kuma nẽ amnhĩ xô ri tanhmã mẽ anhĩgêt mã kapêr to ho pa. Nom ixkapêr kôt kêt ixkapêr kuhpa hã tanhmã mẽ kãm kapêr to nẽ mẽ kãm: “Mẽ mãmrĩ ma sãnti hã mẽ hkĩnh mã xwýnhjê hkôt mra nẽ sãnti hã apku nẽ hã akĩnh. Nẽ mẽ urãk nẽ axpên pê axpên prõ ho amnhĩkati nẽ axpên pê ri axpên mjên o amnhĩkati nẽ mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã kapêr o pa nhũm mẽ kuma nẽ mẽ hkôt amnhĩ nhĩpêx. Tã ka mẽ akwỳjaja mẽ urãk nẽ ã amnhĩ nhĩpêx anhỹr o apa. Kwa ja mex kêt.

¹⁵ Na hte mẽ akwỳjaja Nikorawjê kapêr kôt ixkapêr kuhpa hã tanhmã amnhĩ nhĩpêx to ho pa. Ja mããnên mex kêt. ¹⁶ Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nẽ ãm mẽ omu nẽ nẽ tanhmã mẽ kãm akapêr to hkêt nẽ. Kwa mẽ ate ã amnhĩ nhĩpêx anhỹr xwýnhjaja. Kêr ka mẽ tokyx ja kaga nẽ akupỳm ixkôt ri amnhĩ nhĩpêx mex nẽ. Kot kaj mẽ anhỹr kêt kot paj tokyx mẽ awỳr wrỳ nẽ te ijakwa rũm pôm wapo kator xwýnhta o mẽ hkanhwỳr pyrãk o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

¹⁷ E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Nẽ kot kaj mẽ ate amnhĩ tomnuj nẽ amnhĩ to htỳx nẽ inhmã hprãm xà hkôt amnhĩ nhĩpêx rãhã ty. Hã kot paj akupỳm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapôt ã pa nhũm ixte mẽ hwỳr “manã” anhỹr xwýnhta rênh nhũm mẽ kot hkur o pata pyrãk. Nom ixte mẽ amã mẽ anhõja na hpimxur. ãm papxipix na

pa hte mẽ kãm òr o ixpa.

Ně kot paj mẽ atã mẽ anhĩxi nyw rě. Jao kěn jakare hkwy hã ahpÿnhã mẽ anhĩxi nyw jaxwý nẽ mẽ amã kugõ. Ka mẽ hamý nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Aně.

—E Juãw. Kêr ka Pekamõ kamã ixkrajê hwýr ã ixkapêr anhÿr ã kagà nẽ mẽ hwýr amě. Aně.

Hãmri pa kuma nẽ ô ri mẽ kãm hã kagà.

*Xijaxir kamã Jejus kwýjê hwýr kagà
Jutre 3-23*

¹⁸ Nhũm Jejus arĩ inhmã kapêr nẽ inhmã:

—E hpãnhã Xijaxir kamã ixkwýjê jamãr xwýnh wýr kagà nẽ amě nẽ mẽ kãm ixkapêr jarě nẽ mẽ kãm:

Pa Xijaxir kamã ixkapêr mar kaxyw mẽ apikuprõnh xwýnhjaja. E ot pa mẽ awýr ixpêr mẽ. Ixpê Tĩrtũm Kra na pa. Ixpê inhno te kot kuwy hpõk karýr tÿx pyrãk xwýnhhta na pa. Nẽ ixpê ixpar te kot kãx karýr tÿx pyrãk xwýnhhta na pa mẽ awýr ixpêr mẽ.

¹⁹ Na pa hte mẽ ate amnhĩ nhĩpêx kõt mẽ apumunh mex o ri ixpa. Na ka htem amnhĩ kaxyw inhmã ajamaxpêr pẽ inhmã amnhĩ to mex o ri apa. Mẽ akwý kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tÿx kãm tanhmã amnhĩ nhĩpêx to ho ri apa. Nẽ axpẽn to mex nẽ ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrêx.

²⁰ ãm mẽmoj pixi na ixpê omnuj. Mẽ akõt niti ri pa xwýnh Jejapewtita. Kêp Tĩrtũm nhÿ hã kapêr jarěnh o pa xwýnh ã amnhĩ to hêx xwýnhhta. Na hte ixkapêr kupa hã tanhmã mẽ ajahkre hto ka htem ama nẽ nẽ tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprýjê hwýr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjẽn o amnhĩkati. Nẽ mẽ kot sãnti hã mẽ hkĩnh nẽ hã apkur xwýnhjê hkõt mra nẽ mẽ hkõt amnhĩ nhĩpêx. Tĩrtũm kãm ja mex kẽnã.” Anhÿr o mẽ amã kapêr o pa. Nẽ inhmã ja mex ã ijarě nom inhmã ja mex kêt. Tã ra mẽ akwýjaja kapêr ma nẽ hkõt

amnhĩ nhĩpêx ka mẽ ja hã mẽ omunh tã amnhĩ nẽ nitita janor kêt nẽ nhũm arĩ ri mẽ amã hêx o ri mẽ akõt pa. ²¹ Ra kot ã amnhĩ nhĩpêx anhÿr o mẽ akõt pa ry rax kumrêx tã pa kormã ja hã tanhmã ho hkêt nẽ kormã amnhĩ tã hamã. Kot ã amnhĩ nhĩpêx anhÿr kaga kaxyw na pa kormã hamãr o ri ixpa. No nhũm aa hkaga hkêt nẽ.

²² Mýrapê kot paj tokyx tanhmã ho nhũm amnhĩ xà htÿx kamã hamak o hikwý. Tã mẽ kot kapêr mar nẽ hkõt amnhĩ nhĩpêx xwýnhjaja kot amnhĩ tomnuj ã amnhĩ pumu nẽ hkaga hkêt hã kot paj mã mẽ ho aně nẽ. Mããnen tanhmã mẽ homnuj to nhũm mẽ nitita pyrã nẽ amnhĩ xà htÿx kamã hamak o hikwý.

²³ Nẽ nitita kot paj kêp hkrajê nhĩmex pa. Ka mẽ apê ixkrajaja ja hã ixpumu nẽ ixte mẽ apiitã ahpÿnhã tanhmã mẽ ajamaxpêr to hkõt mẽ apumunh ã ixpumu. Nẽ ixte ahpÿnhã mẽ apiitã tanhmã mẽ ate amnhĩ nhĩpêx to ho apa hã mẽ apumunh xà hkõt tanhmã mẽ anhĩpêx to hã ixpumu.

²⁴ Na hte mẽ akwýjaja akwýjê rom nita kapêr ma nẽ ãm kuma nẽ hkõt amnhĩ nhĩpêx kêt nẽ. Nẽ mẽ kapêrja mẽ kot kãm: “Satanasti kapêr pimxur” anhÿr xwýnhhta kõt nhũm mẽ amnhĩ nhĩpêx kêt nẽ. Na htem ixkõt pix mã amnhĩ nhĩpêx mex o ri pa. Tã ã mẽ ate ixkõt amnhĩ nhĩpêx anhÿr o apa xwýnhjaja kot paj mẽ amã ja pix ã karõ ka mẽ inhma. ²⁵ Kêr ka mẽ arĩ ixkõt pix mã amnhĩ nhĩpêx o ri apa rãhã pa akupÿn mẽ awýr wrý. ãm ja pix ã kot paj mẽ amã karõ.

²⁶ Nẽ kot kaj mẽ ate amnhĩ tomnuj nẽ amnhĩ to htÿx nẽ arĩ inhmã hprãm xà hkõt amnhĩ nhĩpêx rãhã ty. Hãmri pa ja hã mẽ apumu nẽ nhÿrmã mẽ ate krĩ hkwy hkõt mẽ pa xwýnhjê ho amnhĩptãr o apa kaxyw mẽ axunhwý. Ka mẽ apê mẽ õ pahшти nẽ inhmã mẽ ho amnhĩptãr o ri apa.

²⁷ Na pre Inhĩpêxã ixte pika piitã hkõt ri mẽ pa xwýnhjê ho amnhĩptãr kaxyw ixãm.

Tã kot paj nhÿrmã amnhĩ pyrã nẽ mẽ kaxyw mẽ axunhwý ka mẽ inhmã mẽ

hamār o apa.

Nhũm mēhō ixkapēr kwým ri tanhmā amnhĩ nhĩpêx to ka mẽ ja hã omu nê hã tanhmā ho. Te mẽ kot poti punuj mýnh nê mēnh nê hkrakrak pyrāk.

²⁸ Kot paj ã mẽ ate mẽ hipêx anhỹr o apa kaxyw mẽ axunhwý. No ãm ja pix kêt. Kot paj te ixte mẽ amã kanhêti hō nhõr pyrāk o mẽ anhĩpêx. Arĩgro hkôt kanhêti no hpòk rax japôx xwýnhhta kot paj te ixte mẽ amã òr pyrāk ka mẽ ixri atĩr tũm nê apa ho apa.

²⁹ E ixkrajaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỹrja ma nê kãm ajamaxpēr tỳx rãhã ho ri apa. Anẽ.

—E Juãw. Kêr ka ã Xijaxir kamã ixkrajê kaxyw ixkapēr ã kagà nê mẽ hwýr mēnh anẽ. Anẽ.

Hãmri pa kuma nê ô ri mẽ kãm hipêx nê mẽ hwýr kumẽ.

3

Satre kamã Jejus kwýjê hwýr kagà

Rukre 12.35-40

¹ Nhũm Jejus arĩ inhmã kapēr nê inhmã:

—E hpãnhã Satre kamã ixkwýjê jamār xwýnh wýr kagà nê mẽ kãm ixkapēr jarẽ nê mẽ kãm:

Pa Satre kamã ixkrajaja. E ot pa mẽ awýr ixpēr mẽ. Ixpê inhĩhkra ho kanhêti pê 7 jamýnh nê xãm xwýnhhta na pa. Nê ixpê inhĩhkra ho Tĩrtũm Karõ ãm pyxi htã te kamã kêp 7 jamýnh nê ho ixãm xwýnhhta na pa mẽ amã ixkapēr.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpēn mã mẽ ate ixkôt amnhĩ nhĩpêx ã mẽ ajarēnh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk nê mẽ anhĩkwỹ pyrāk.

² Na ka htem ãm akrãnh mã ixkôt ri amnhĩ nhĩpêx nom Tĩrtũm mẽ wa ixkôt amnhĩ nhĩpêx mex kêt nê. Ra Tĩrtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu nê ate amnhĩ tomnuj mã

anhũre nê wa ixkôt amnhĩ xunhwýr tỳx nê.

³ Kêr ka mẽ amnepê mã kormã mẽ ate ixkôt amnhĩ nhĩpêx nyw ri mẽ kot ixkapēr o tanhmã mẽ ajahkre htoja mã ajamaxpēr nê amnhĩ tomnuj mã anhũre. Nê ixkapēr kôt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupýn mẽ awýr wry nê ja hã tanhmã mẽ ato.

⁴ ãm mẽ agrêre nê amã ixkôt amnhĩ nhĩpêx prãm. Jao tãm ri amnhĩ nhĩpêx nê mẽ kot amnhĩ tomnuj xwýnhjê hkôt amnhĩ nhĩpêx kêt nê. Te mẽ axê jakare kamã apa nê tanhmã amnhĩ pê htyk to hkêt pyrāk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kēnã. Ja na Tĩrtũm kãm hprãm.

⁵ Nê krĩ piitã hkôt mẽ ate amnhĩ tomnuj nê amnhĩ to htỳx nê inhmã hprãm xà hkôt amnhĩ nhĩpêx rãhã atyk xwýnh piitã kot ka mẽ nhỹrmã Tĩrtũm mẽ wa ixri amex nê atĩr tũm nê apa ho apa. Ra mẽ hixija Mēpahpãm Maati nhõ kagàja kamã na. Kamã mẽ atĩr o mẽ atĩr mã xwýnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt nê. Hãmri nê Inhĩpêêxã mẽ kapēr o mẽ wryk xwýnhjê mã mẽ ajarēnh o: “E mẽ jajê pumu. Ixkwý na mẽ.” Anhỹr o mẽ kãm mẽ ajarẽ.

⁶ E ixkwýjaja. Kot kaj mẽ amã ixkapēr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapēr anhỹrja ma nê kãm ajamaxpēr tỳx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka ã Satrejê mã ixkapēr ã kagà nê mẽ hwýr mēnh anẽ. Anẽ.

Hãmri pa kuma nê ô ri mẽ kãm hã kagà.

Pirate kamã Jejus kwýjê hwýr kagà

Wam Tesarõn 2.13-16

⁷ Nhũm Jejus arĩ inhmã kapēr nê inhmã:

—E hpãnhã Pirate kamã ixkwýjê jamār xwýnh hwýr kagà nhĩpêx nê amẽ nê mẽ kãm ixkapēr jarẽ nê mẽ kãm kãm:

Pa Pirate kamã mẽ ate ixkapēr mar kaxyw mẽ apikuprõnh xwýnhjaja. E ot pa mẽ awýr ixpēr mẽ. Inhmex o inhmex

xwýnh na pa. Aa ixêx kêt nê ixpa xwýnh. Amnepê mã na pre mēhōja pahi Tawi mã ōrkwý mex ã saf jamār o pa. Tã pa hte urak nê Inhîpêêxà Tirtũm nhō krī hwýr mē gjêx xà hã saf jamý nê ho ixpa. Æm papxipix inhō saf jakamã papxipix na pa hte mē ate ixkôt amnhî xunhwýr xwýnhjaja mē agjêx kaxyw mē amã kahê xà rē nê ixkra hkêt xwýnhjê pê kahê. Kot paj mē apê ixkrajê mã kahê xà rē ka mē hwýr agjê. Hãmri pa mē atã kahê nhũm ixkra hkêt xwýnhjaja tee ri kãm mē akôt gjêx prãm kaprý.

⁸ Na pa hte tanhmã mē ate amnhî nhîpêx to ho apa hã mē apumunh mex o ri ixpa. Mē agrêre htã na ka htem ixkapêr kôt amnhî nhîpêx mex nê aa ixkaga hkêt nê. Jakamã kot paj te ixte mē amã Tirtũm nhō hakwakre kahê xà mēnh pyrak o mē anhîpêx ka mē axãmnhîx ajamakêtkati nê ma mē kãm Tirtũm kapêr o mē ahkre ho ri mē hkôt apa. Nhũm mē hkwyjaja tee ri ã mē ate amnhî nhîpêx anhýrja nê mē amã kapêr kaprý ka mē arī ho mē ahkre ho ri mē hkôt apa.

⁹ Nê mē anhō krī kamã mē akwyjaja na prem ra Satanasti hkôt amnhî xunhwý nê hêx rom mē amã amnhî to hêx nê mē amã: “E mē ixpê Ijaew mex jakamã kwa mē ixkapêr ma nê mē ixkôt amnhî nhîpêx.” Anhýr o mē amã karō htã no ãm mē kot Satanasti hkôt amnhî nhîpêx xwýnh na mē. Tã kot paj nhýrmã tanhmã mē homnuj to nhũm mē tee ri amnhî pumu nê akupým mē awýr mra nê mē akutã hkõnkrã ho rôrôk nê hkrī nê mē amã: “Nà mē kajaja na ka pêr mē ixrom Jesus kôt amnhî nhîpêx. Mãn kãm mē ajapêê.” Anê.

¹⁰ Mē kot ixtã mē atomnuj týt nhũm mē ate amnhî xà htýt kamã ajamak tã aa mē umaj ixkaga hkêt nê. Nê arī ixte mē amã mēmoj tã karō xà hkôt mē kutã amnhî to htýt rãhã arī ixkôt ri amnhî nhîpêx o apa. Jakamã mē kot nhýrmã mē kãm ixkurê xwýnhjaja pika piitã hkôt tanhmã mē homnuj týt to nhũm mē amnhî xà htýt kamã ama. Tã kot paj mē anê mē omunh mex nê nhũm mē tanhmã mē ato hkêt nê ka mē amex nê ri apa ho apa.

¹¹ E kot paj tokyx akupým mē awýr wrý nê mē ate ixkôt pix mã amnhî nhîpêx ã mē ato mex rax kumrêx. Jakamã kwa mē mãmrī ã amnhî nhîpêx anhýr o inhmã hprãm xà hkôt pix mã amnhî nhîpêx rãhã ty. Kot ka mē anhýr kêt kot pa mē amã mēmoj mex nhõr kêt nê.

¹² Nê kot kaj mē kot amnhî tomnuj xwýnhjê kutã amnhî to htýt nê inhmã hprãm xà hkôt pix mã amnhî nhîpêx rãhã ty. Hã kot paj amnhî kôt mē ato mē axihtýt nê ka mē aa ixkaga hkêt nê. Nê kot paj nhýhýnh mē atã mē inhîxi ho axkrunêpxi nê haxwý. Inhîpêêxà nhîxi nê inhîxi nyw nê Inhîpêêxà nhō krī nhîxija kot paj nhýhýnh mē atã haxwý. Tirtũm nhō krī mē kot kãm: “Jeru-jarê nyw” anhýr xwýnhta koja nhýrmã tanhmã amnhî to nê ra kaxkwa rũm pika wýr wrý.

¹³ E ixkwýjaja. Kot kaj mē amã ixkapêr mar prãm hã kot kaj mē ã Tirtũm mē wa Ixkarō nhý hã ixte mē amã ixkapêr anhýrja ma nê kãm ajamaxpêr týt rãhã ho ri apa.

Tã ãm ja pix. Na ra hapêx. Anê.

—E Juãw. Kêr ka ã Pirate kamã ixkrajê mã ixkapêr ã kagà anê. Anê.

Hãmri pa kuma nê ô ri mē kãm hã kagà.

Raxisej kamã Jejus kwýjê hwýr kagà

¹⁴ Nhũm pre Jejus arī inhmã kapêr nê inhmã:

—E hpãnhã krī pê Raxisej kamã ixkrajê jamār xwýnh wýr kagà nhîpêx nê amê. Nê mē kãm ixkapêr jarênh o:

Pa Raxisej kamã ixkrajaja. Ot pa mē awýr ixpêr mē. Æm hãmri ixkapêr o ixpa nê aa ixêx kêt xwýnhta na pa. Jakamã ãm hãmri na pa hte Tirtũm kapêr o mē ajahkre o ixpa nê aa ja kaga hkêt nê. Pa na ixpê mēmoj piitã hpãr krax.

¹⁵⁻¹⁶ Na pa hte mē ate tanhmã amnhî nhîpêx to ho apa hã mē apumunh rãhã ho ixpa. Kop apu mē ate ixkôt amnhî nhîpêx mex ronhýx pa ja hã mē apumu nê ixkĩnh nê. Nom mē ate ã amnhî nhîpêx anhýr kêt. No mãânên aa ixkaga hkêt nê. Na ka htem ri atýt amnhî krã hkôt pix mã tanhmã amnhî nhîpêx to ho apa nhũm ja ixpê omnuj nê. Kot kaj mē arī

ã amnhĩ nhĩpêx anhÿr o apa pa hpãnhã amnhĩ nê mẽ akurê. Te mẽ kot gô xenh nõkati janhir nê tee hkakin nê akupÿm hkapÿr pyrãk.

¹⁷ Mẽ ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nê. Nê ixkapêr mar tÿx nê amnhĩ kaxyw inhmã ajamaxpêr mex kêt nê.

¹⁸ Kwa mẽ tokyx ja hã amnhĩ pumu nê akupÿm ixkôt amnhĩ xunhwÿr tÿx nê. Kêr pa ja hã mẽ apumu nê amnhĩ katut kôt mẽ ate amnhĩ tomnuj rê nê tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrit to ka mẽ aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

¹⁹ Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mẽ apumu nê ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nê hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nê akupÿm amnhĩ kaxyw inhmã ajamaxpêr ho ri apa.

²⁰ Na htem hkwÿjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nê mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkõm o hkrĩ. Ja pyrã nê ot pa mẽ ajamãr o ixpa. Mẽ ate inhmã anhÿr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

²¹ Kormã mẽ kot ixpÿr kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhĩpêxã akupÿm ixto ixtÿr nê akupÿm amnhĩ wÿr ixto api. Hãmri nê amnhĩ nhĩhkô hã mẽ ho amnhĩptàr ã hkrĩ xà kamã inhÿr pa ixkrĩ ho ixkrĩ nê ìhkô hã mẽ piitã mẽ ho amnhĩptàr o ixkrĩ. Tã kot kaj mẽ atõ ixpyrà nê ate amnhĩ tomnuj nê amnhĩ to htÿx nê. Nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ pyrã nê wa ixte mẽ ato amnhĩptàr

ã ixkrĩ xàja kamã amnhĩ nhĩhkô hã mẽ akrĩ ka mẽ wa inhĩhkô hã wa inhmã mẽ ho amnhĩptàr o akrĩ.

²² E ixkwÿjaja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tã ãm ja pix. Na hapêx. Anê.

—E Juãw. Kêr ka Raxisej kamã ixkrajê mã ixkapêr ã kagã nê mẽ hwÿr amê. Nê kagãja piitã krĩ hkwÿ kamã ahpÿnhã ixkwÿjê hwÿr arê kê mẽ kamã harê nê ixkapêr ma. Anê.

Nhũm pre ã Jejus inhmã kapêr anê. Pa kuma nê ô ri mẽ piitã mẽ kãm hã kagã hpa.

4

Tirtũm kot mẽ ho amnhĩptàr ã hkrĩ xà jarênh

¹ Tã pa axte mẽmoj pumu nhũm kaxkwa hwÿr mẽ gjêx xà hã hakwakreja amnhĩ kahê xà mẽ pa omu. Hãmri nhũm axte mẽhõ kapêr tÿx xwÿnhata. Te kot pifti kakõr tÿx pyrãk xwÿnhata axte inhmã kapêr nê inhmã:

—E amnê ixwÿr api pa mẽmoj nhÿrmã kot tanhmã amnhĩ nhĩpêx to hkukamã amã ho amnhĩrit ka omu. Anê.

² Hãmri nhũm Tirtũm Karõ tanhmã ixto nê ixto api pa kaxkwa kamã mẽmoj pumunh o xa. Tirtũm kot mẽ ho amnhĩptàr ã hkrĩ xà maatita pa pre omu. Nhũm kamã mẽhõja nhÿ. ³ Kuk kamã hirã htÿx kumrêx. Te mẽmo kên kamrêk karÿr jaxênh tÿx pyrãk. Nê kot mẽ ho amnhĩptàr ã hkrĩ xà puhã màxwÿxti grãgrãreja kãm hipõk nê harir pa omunh o xa.

⁴ Nhũm hkrĩ xà maati puhã mẽ ho amnhĩptàr o hkrĩ xà kêp 24. Kamã mẽ àptàr tũmjaja hkrĩ. Mẽ piitã ôr o mẽ ahkã htu nê ê jakare nê hkrĩ.

⁵ Nê Tirtũm hkrĩ xà maatiija rũm na katõtõk nê hkrakrak nê haxênh japã nê hikwÿ. Nê hkrĩ xà kapem kanê maati pixi kamã kwÿrÿt pê 7ja põk rãhã ho kuhê. Kanêja te Tirtũm Karõ pyrãk.

⁶ Nê hkrĩ xà kapem mẽmo te gô rax pyrãkja hkarÿr jaxênh tÿx kumrêx nê nõ. Te ho kãx karÿr jaxênh tÿx pyrã nê hkarÿÿre. Nê hkrĩ xà puhã mẽmoj tÿr nê kuhê pê kwat

kuhê. Nê ôkwa nê katut piitã hkôt no. ãm no xohtô rax kumrêx. Na pre ã mëmoj kêp kwatja no xohtô anê pa omu.

⁷ Wamta te kot mry pê rêãwti pyrãk. Nê hkôt ja te kot môx myti pyrãk. Nê hapu hã hkuk te panhĩ hkuk pyrãk. No hapu hã ja te kot àanhãhti htor kaxyw hara koror pyrãk.

⁸ Nê piitã hara kêp 6. Nê ï piitã kamã no. Nhũm prem Tirtũm mã mex o mex ã grer rãhã ho kuhê nê aa pinhkrênh kêt nê. Nê kãm grer o:

Amex o amex Tirtũm.
Nê axihtỳx o axihtỳx.

Nê aa ate amnhĩ tomnuj kêt kumrêx.

Amnepê mã kormã mëmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nê.

ãm hãmri na ka hte mẽ ixto mex rãhã ho apa.

Nê amex o amex Tirtũm. Anê.

⁹⁻¹⁰ Nhũm prem xatã mẽ ho amnhĩptãr hkrĩ xà kamã hkrĩ xwỳnhja mẽ kot kãm “Rãhã pa xwỳnh” anhỳr xwỳnhja mã ã grer anhỳr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhũm mẽ àptãr tũm pê 24jaja mããnên kutã hkõn krã ho rôrôk nê hipô hpa nê hkrĩ. Nê amnhĩ krã rũm ôr o mẽ ahkàja kwry nê hpar pê haxwỳ. Kêp mẽ ô Pahi Maati hã hã hpijaãm kaxyw wamtajê pyrã nê mex o mex ã harênh o hkrĩ nê kãm:

¹¹ ãm hãmri na pa htem amex o amex ã ajarê Tirtũm

Apê mẽ inhõ Pahi Maati na ka.

Nê apê mẽ inhõ Tirtũm na ka.

Na ka pre mëmoj piitã ho akato. Axãhpumunh tỳx nê ajamaxpêr tỳx o mëmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mẽ ixrom axihtỳx mex kumrêx na ka hte apa Tirtũm. Anê.

5

Mẽ pahte amnhĩ tomnuj pãnhã amnhĩrer xwỳnh jarênh

Juãw 1.29; Piripos 2.5-11

¹ Tã pa pre arĩ te kaxkwa kamã mëmoj pumu. Mẽ ho amnhĩptãr ã hkrĩ xà maatita kamã hkrĩ xwỳnh nhĩkra kamã kagã pa omunh o xa. Upôk rũm omu. No ãm axtem

kagã kaxkep na pre. Nê akutã hã kagã nê menh ê ho ho htỳx xàja kêp 7.

² Hãmri nhũm Tirtũm kapêr o wrỳk xwỳnh xihtỳx xwỳnhja kapêr tỳx kãm kapêr o:

—E mẽ atõ na ate kagã mũj pyr nê ho htỳx xà hpôt mã tãm? Anê.

³ Hãmri nê tee ri mẽ piitã mẽ hkapi nom nhũm ja kaxyw mēhõ amrakati kumrêx. Kaxkwa kamã amrakati nê pika kamã mããnên amrakati nê pika hkrak ri amrakati. Nhỹri mēhõ kot kagã kaxkepta pyr nê hpôt nê omunh mã tãm xwỳnhja amrakati ho amrakati.

⁴ Nhũm tee ri mēhõ japêr nom mēhõ pumunh kêt nê. Pa tee ri ja hã omu nê ixkaprĩ htỳx nê inhmỳr o xa.

⁵ Hãmri nhũm pahi hõja ixpumu nê inhmã:

—Kwa amỳr kêt nê. E mēhõ mũj pumu.

Juta kanrêhã htãmnhwỳ xihtỳx xwỳnhja. Pahi Tawi kanrêhã htãmnhwỳ te kêp mry pê rêãw xihtỳx pyrãk o hihtỳx xwỳnh mũj pumu. Kot mẽ kãm hkurê xwỳnhjê kutã amnhĩ to htỳx nê mëmoj punuj piitã ho hapêx kaxyw mã xwỳnh jakamã tapxipix na kot kagãta hpyr nê ho htỳx xà hpôt par mã tãm. E ka omu. Anê.

⁶ Hãmri pa kuma nê hwỳr rĩt nê Jejusja pumu. Kot mẽ pahte amnhĩ tomnuj pãnhã amnhĩrer xwỳnhja mẽ ho amnhĩptãr o hkrĩ xà maati kapem xa. Mẽmoj htĩr pê kwat mẽ àptãr tũm pê 24jê nhĩpôk ri xa. Mẽ kãm hkurê xwỳnhjaja kot hpĩr nhũm ra akupỳm htĩr nê xa. Nom ra axtem nê xa. àhpumunh tỳxja te kot pahi xãhpumunh pyrãk. Nê hpãr kêp 7. Nê no mããnên kêp 7. Noja te Tirtũm Karõ pyrã nê kêp pika piitã hkôt pa xwỳnh. ã Jejusja axtem nê ãm anê pa omu.

⁷ Hãmri nhũm mẽ pahto amnhĩptãr o hkrĩ xwỳnhja wỳr tẽ nê ïhkra kamã kêp kagã kaxkepta py.

⁸ Hãmri nhũm mẽ htĩr pê kwat mẽ mẽ àptãr tũmjaja hpar pê hkõn krã ho rôrôk nê hkrĩ hpa nê hipô nê hkrĩ. Piitã wiorãwti jamỳ nê ôr o xijere kamã mēhkuxwa xà jamỳ nê o hkrĩ. Nhũm Tirtũm krajaja Tirtũm mã tanhmã amnhĩ jarênh to nhũm mẽ mar o hkrĩ. Te xijere kamã mēhkuxwa xà hpãr o hkrĩ pyrã nê mẽ kuma.

⁹⁻¹⁰ Jakamã nhũm mẽ hkõn krã ho hkrĩ xwỳnhjaja mẽ pahte amnhĩ tomnuj pãnhã

amnhîrer xwÿnhhta kutã kãm grer o hkrî. Mẽ grer nyw o kãm gre nẽ kãm:

Na prem apî ka atyk o mẽ piitã mẽ kot amnhî tomnuj pãnhã amnhîrer pa.

Ahpÿnhã pika piitã hkôt mẽ urojê piitã hpãnhã amnhîrer pa.

Nẽ ahpÿnhã ri mẽ kapër xwÿnh kwÿjê piitã mẽ hpãnhã amnhîrer pa. Atyk o mẽ kot amnhî tomnuj piitã hpãnhã amnhîrer pa.

Jakamã nhũm mẽ kot akôt amnhî xunhwÿr xwÿnhjaja kêp Tirtũm kra nẽ ri pa.

Ka ra mẽ panhõ Tirtũm mã mẽ kêp patre kaxyw mẽ unhwÿ nhũm htem pika piitã hkôt mẽ ho amnhîptâr o pa.

Tã atyk o ate pika piitã hkôt mẽ hpãnhã amnhîrer jakamã kapxipix na ate kagàta pyr nẽ ho htÿx xà hpôt mã tãm. Anẽ.

¹¹ Hãmri nhũm Tirtũm kapër o mẽ wryk xwÿnhjaja nhÿhÿnh hapôj nẽ kuhê. Mẽ ohtô rax o ohtô rax. Ohtô rax o mẽ pajamaxpër jakrenh. Hãmri nẽ Tirtũm kot mẽ ho amnhîptâr ã hkrî xà maatija wÿr mra nẽ kãm hipôk pa. Nẽ mẽmoj tîr nẽ kuhê xwÿnhjê mẽ mẽ àptâr tũmjê mã hipôk pa nẽ mẽ pahte amnhî tomnuj pãnhã amnhîrer xwÿnhhta mã kapër.

¹² Kàx pẽ kãm kapër nẽ kãm:

ãm hãmri na pa htem amex o amex ã ingrer o ixkuhê.

Mẽ ixrom axihtÿx o axihtÿx.

Nẽ mẽmoj piitã anhõõ.

Nẽ ate mẽmoj piitã hkukamã axàhpumunh par.

Nẽ amex o amex jakamã na pa htem amã amex pix ã ingrer o ri ixpa. Anẽ.

¹³ Tã nhũm mẽmoj piitã Tirtũm mẽ Jesus wa kãm wa mex o wa mex ã harê. Pika hkôt panhî nẽ mry nẽ àk nẽ mẽmoj piitãã. Nẽ pika hkrak ri nẽ gô hkrak ri mẽmoj piitãã. Nẽ mẽ htykjaja. Nhũm mẽ piitã wa kãm wa mex o wa mex ã wa harê nẽ wa kãm: E ate mẽ ixto amnhîptâr ã akrî xà kamã akrî xwÿnh mẽ kot mẽ ixte amnhî tomnuj pãnhã amnhîrer xwÿnh mẽ war amex o wa amex.

Nẽ war axihtÿx o war axihtÿx.
Nẽ war axàhpumunh o war axàhpumunh.
Na pa htem ã war ajarênh anhÿr rãhã ixpa ho ixpa. Anẽ.

¹⁴ Hãmri nhũm mẽmoj tîr pẽ kwatjaja mẽ kuma nẽ mẽ kãm:

—Nà ãm hãmri na ka mẽ ã wa harênh anẽ. Wa mex o wa mex kumrêx. Anẽ.

Hãmri nhũm mẽ àptâr tũmjaja Tirtũm mẽ Jesus wa hpar pẽ hkôn krã ho rôrôk nẽ hkrî hpa nẽ haxwÿja wa kãm wa mex o wa mex ã wa harê.

6

Kagà ho htÿx xà pẽ 7 jarênh

Matêwre 24.3-14; Sikũn Tesarõn 2.3; Wam Juãw 2.18

¹ Tã pa arî kaxkwa kamã mẽ pahte amnhî tomnuj pãnhã amnhîrer xwÿnh kot tanhmã amnhî nhîpêx to hã omunh o xa. Nhũm kagà kaxkepta py nẽ wam ho htÿx xà pôt. Hãmri nhũm mẽmo tîr pẽ kwatjê hõja kapër tÿx kumrêx. Te na katôtök tÿx pyrãk o mẽhõj mã kapër nẽ kãm:

—E amnẽ mẽ ixwÿr tẽ. Anẽ.

² Hãmri nhũm kawar jakajre nhÿhÿnh hwÿr hpôx o tẽ. Nhũm mẽhõja õ kuxê mÿ nẽ hã nhÿ nẽ tẽ. Hãmri nhũm nhãm mẽhõja hwÿr tẽ nẽ kãm pahi hã mẽ ahkà htu. Hãmri nẽ kãm tanhmã kapër to nhũm kuma nẽ mẽ kot kãm Tirtũm mẽ Jesus wa kurê xwÿnhjê nhîmex par kaxyw hakêx nẽ ma pika hwÿr tẽn wry.

³ Hãmri nhũm mẽ pahte amnhî tomnuj pãnhã amnhîrer xwÿnhja wam kagà ho htÿx xàta kôt axte ja pôt. Hãmri nhũm mẽmoj tîr pẽ kwatjê hõja axtem mẽhõj mã kapër nẽ kãm:

—E amnẽ mẽ ixwÿr tẽ. Anẽ.

⁴ Hãmri nhũm kawar kamrêk mẽ hwÿr hpôx o tẽ. Nhũm mẽhõ hã nhÿ nẽ tẽ. Nhũm nhãm mẽhõja kãm wapo gõ nẽ ma pika hwÿr htẽm nẽ wryk kaxyw hano. Kot hwÿr wryk nẽ pikap mẽ pa xwÿnhjê kurê huk kaxyw. Mẽ kot axpên par kaxyw ma mẽ hwÿr kumê. Hãmri nhũm kuma nẽ wapota py nẽ hakêx nẽ ma mẽ hwÿr tẽn wry.

⁵ Hãmri nhũm mẽ pahte amnhî tomnuj pãnhã amnhîrer xwÿnhja kagà ho htÿx xà hõ pôt. Na pre ra ho axkrut nẽ hpôt tã hpãnhã axte hkôt ja pôt. Hãmri nhũm mẽmoj tîr pẽ 4jê hõta mẽhõj mã kapër nẽ kãm:

—E amnẽ mẽ ixwÿr tẽ. Anẽ

Hāmri nhūm kawar tykre mẽ hwỳr hpôx o tẽ. Nhūm hã ỳr xwỳnhja mẽmoj to peja xà hã parās mỳ nẽ o tẽ.

⁶ Hāmri nhūm mẽ htír pẽ kwatjẽ rūm mẽhõja kãm kapër nẽ kãm:

—E kêt ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpênh pãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm òr o apa. Nom mẽ apkur xà hã orti nẽ wĩhti ka mẽ kêp tanhmã ho hkêt nẽ. Anẽ.

Hāmri nhūm kuma nẽ hakẽx nẽ ma tẽn mẽ hwỳr wrỳ.

⁷ Tã nhūm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hāmri nhūm mẽmoj tĩr pẽ kwat kot hitep xwỳnhja mẽhõj mã kãm:

—E amnẽ mẽ ixwỳr tẽ. Anẽ.

⁸ Hāmri nhūm kawar ràrààre mẽ hwỳr hpôx o tẽ. Nhūm mẽhõ hã nhỹ nẽ tẽ. Hã ỳr xwỳnh nhĩxi na pre kêp “Mẽhtyk” anẽ. Hāmri nhūm mẽhõja kãm kapër nẽ kãm:

—E ma pika hwỳr wrỳ nẽ tanhmã mẽ ho kê mẽ ohtô nẽ tanhmã amnhĩ to nẽ axkaprã. Kê mẽ hkwyjaja pijapu kamã axpên pa nẽ mẽ hkwyjaja prãm xàj ty nẽ mẽ hkwyjaja tanhmã à htỳx kute kamã ty. Nẽ mẽmo mry xoprêja mẽ hkwyjê pa. E ma mẽ hwỳr wrỳ nẽ tanhmã mẽ ho ho apa. Anẽ.

Hāmri nhūm kuma nẽ hakẽx nẽ ma pika hwỳr tẽn wrỳ. Hāmri nhūm mẽ htykjê papxàja tanhmã amnhĩ to nẽ te kot hã jêt nẽ ma hkôt mõi nẽ pika hwỳr wrỳk pyræk pa pre arĩ omunh o xa.

⁹ Hāmri nhūm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hāmri nẽ hpôtja kôt pa ra mẽ kot Tĩrtũm mã mẽmoj nhõr xà hã mēsti pumu. Nẽ hkrak ri mẽ hkarõjê pumu. Mẽ kot hkwyjê hkôt ri mẽ kãm Tĩrtũm kapër jarênh nẽ Jejus kêp mẽ õ Pahшти hã harênh o pa nhūm mẽ kot hã mẽ hpar xwỳnhjê karõja pa pre mẽ omu. Nhūm mẽ mēsti hkrak ri amnhĩ to Tĩrtũm wỳr o hkrĩ. ¹⁰ Kỳx pẽ kãm kapër nẽ kãm:

—Ăm hãmri amex o amex Pahi Maati. Aa ate mẽmoj tã tanhmã amnhĩ to axêx to hkêt kumrêx. Kwa xà kot kaj tokyx pika hkôt mẽ

kot mẽ inhĩmex xwỳnhjaja tanhmã mẽ ixtã mẽ ho nà? Anẽ.

¹¹ Hāmri nhūm mẽhõja mẽ hwỳr tẽn nẽ mẽ kãm mẽ ê jakajre gõ nhūm mẽ hagjê. Hāmri nhūm mẽ kãm:

—E mẽ mamrĩ atar akôkôt o akrĩ. Koja Tĩrtũm kormã tanhmã mẽ kot mẽ atomnuj xwỳnhjê ho hkêt nẽ. Kê mẽ axte mẽ apyrã nẽ mẽ akwyjê nhĩmex mãn. Koja mẽ Tĩrtũm jamaxpêr xà hkôt axte mẽ akwyjê pa nhūm rĩ kormã mẽ ato hpimràatã tanhmã mẽ atã mẽ hipêx to. Jakamã e mẽ atar kutêp mãmrĩ akôkôt o akrĩ. Anẽ.

¹² Hāmri nhūm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt pa omu. Na pre ra ho 5 nẽ hpôt tã hpãnhã hkôt axte ja pôt. Hāmri nhūm pika htertet tỳx kumrêx. Nẽ myyti ahtyk nẽ mytwrỳre te kêp mẽ hkamrô kamrêk tỳx pyrã nẽ ajêt.

¹³ Nẽ kanhêti tanhmã amnhĩ to nẽ axrê nẽ pikap rôrôk pa. Te kôk xapêr tỳx nẽ kot pàrerekre kormã ràx tã kot kãm hikranh par pyrã nẽ piitã rênh pa nhūm rôrôk.

¹⁴ Hāmri nhūm kaxkwaja te kagà kaxkep pyrã nẽ amnhĩ to kaxkep o tẽ. Nẽ pika piitã hkôt kên prêk nẽ hixêt prêk maati piitã te hkrĩ xà rūm hapôx nẽ mrar nẽ nhãm hkrĩ pyræk. Nhūm gõ hipôk piitã haxwýja te hikwý xà rūm hapôx nẽ mrar nẽ nhãm hikwý pyræk. Pika htertet tỳx nhỹ hã ã mẽmoj amnhĩ nhĩpêx anẽ. ¹⁵ Hāmri nhūm pika hkôt mẽ piitã tee ri mẽmoj ã amnhĩ nhĩpêx anhỹr ã omu nẽ kãm ma nẽ htertet tỳx kumrêx. Mẽ ho amnhĩptar xwỳnhjaja nẽ pôristi krãhtũmjaja nẽ mẽ kot amnhĩ to rũnh xwỳnhjaja nẽ mẽ hihtỳx xwỳnhjaja nẽ mẽ kãm mẽ àpênh xwỳnhjaja nẽ amnhĩ mã mẽ àpênh xwỳnhjaja. Ăm piitã mẽmoj ã kot amnhĩ nhĩpêx anhỹr ã omu nẽ tee ri amnhĩ kukamã hamaxpêr nẽ kãm ma ho kãm ma. Hāmri nẽ hpimxur kaxyw ma kên prêk kre japêr o hprôt nẽ mra. ¹⁶⁻¹⁷ Hāmri nẽ amnhĩ to kên prêk wỳ nẽ kãm:

—Kwa na ra mẽ ixto amnhĩptar ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhja wa mẽ ixkamã gryk tỳx kumrêx. Ra wa kot tanhmã mẽ ixtomnuj to xà hã arĩgrota kato. Koja wa mẽ ixtomnuj tỳx nẽ pa mẽ kutã

hkêt nê. Kwa tokyx mẽ inhĩpy arôrôk nê wa kêp mẽ ixto amũxu. Anê.

7

Mẽ kot Tirtũm mã hkrajê kagà Apokarip 9.4

¹ Tã pa arĩ kaxkwa kamã mẽmoj pumu. Nhũm Tirtũm kapêr o mẽ wrỳk xwỳnh pê kwatja piitã ahpỳnhã pika nhĩtep xà hkôt kôk jatur xà hã hamỳ nê ho kuhê. Pika piitã hkôt kôk hpinkrênh par nê àpêr kêt nê gô xujanâr kôt àpêr kêt kaxyw hatur xà hã hamỳ nê ho kuhê. Nê pã piitã hkôt àpêr nê tanhmã pĩ hkwỳ ho pymaj nhũm mẽ ã amnhĩ nhĩpêx anê nê nê hatur xà hã hamỳ nê ho kuhê. ² Na pre ra Tirtũm ja hã mẽ kãm karô nê mẽ kãm:

—E kêr ka mẽ ma pika hwỳr wrỳ nê pika nê gô xujanârja tanhmã wa homnu hto. Anê.

Hãmri nhũm mẽ kuma nê hwỳr wrỳ nê kormã nê kôk ho htỳx. Hãmri nhũm Tirtũm kapêr o wrỳk xwỳnhjê hõja myt japôx xà rũm mẽ hwỳr hpôx o tẽ. Nê ãkra kamã mẽ kot Tirtũm kra hã mẽ hixi jarênh xà hã kagàta py nê o tẽ. Hãmri nê kax pê mẽ kot pika mẽ gô xujanâr homnu mã xwỳnhjê mã kapêr nê mẽ kãm:

³—Kwa taxy pa Tirtũm krajê nhõkrã kagà hpa mãn. Kêr ka mẽ omu nê mẽ tapxipixjaja tanhmã mẽ ho hkêt nê. Anê.

⁴⁻⁸ Hãmri nê mẽ hkagà pa. Ahpỳnhã Ijaew pigrành xwỳnhjaja mẽ ho ohtô rax kumrêx nê tanhmã mẽ hkagà hto. Pa tanhmã mẽ kute hã mẽ harênh ma nhũm xep mẽ ohtô rax kumrêx.

Juta kamã mẽ kêp 12.000.

Nê Rupê kamã mẽ kêp 12.000.

Nê Gax kamã mẽ kêp 12.000.

Nê As kamã mẽ kêp 12.000.

Nê Natari kamã mẽ kêp 12.000.

Nê Manase kamã mẽ kêp 12.000.

Nê Simeãw kamã mẽ kêp 12.000.

Nê Rewi kamã mẽ kêp 12.000.

Nê Isaka kamã mẽ kêp 12.000.

Nê Jepurô kamã mẽ kêp 12.000.

Nê Juje kamã mẽ kêp 12.000.

Nê Pêjamĩ kamã mẽ kêp 12.000.

Ã mẽ ohtô rax kot anhỳr. Hãmri nê mẽ piitã mẽ pikamỳr par kãm mẽ kêp 144.000. Piitã

kêp Apraãw kanrêhã htàmnhwỳ na pre mẽ. Tã ã axpên kaxyw mẽ ohtô rax kumrêx kot anhỳr tã nhũm mẽ hkagà pa.

Tirtũm kra hkwỳjê jarênh Apokarip 14.1-5

⁹ Tã pa axtem mẽmoj pumu. Nhũm mẽ ohtô rax nê Tirtũm nhõ krĩ kamã kuhê. Ahpỳnhã ri pika piitã hkôt mẽ urojaja. Nê ahpỳnhã ri mẽ kapêr xwỳnhjaja nhũm prem pika piitã kurũm kot mẽ ho amnhĩptâr ã hkrĩ xà maatija kamã hkrĩ xwỳnh pê Tirtũm mẽ mẽ pahte amnhĩ tomnuj pãnhã amnhĩrer xwỳnhja wa kutã kuhê. Mẽ ohtô rax kumrêx jakamã pa tee ri mẽ piitã mẽ ho kôta hpar prãm kaprỳ. Nê piitã ê jakare kamã kuhê. Nê hkĩnh nê hkĩnh xaj pô hkwỳ jamỳ nê ho àpêr o kuhê. ¹⁰ Hãmri nê kỳx pêe Tirtũm mẽ Jesus wa kãm kapêr nê wa kãm: Hêxta waa nê. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nê.

War ajamê mẽ ixkamã axukaprĩ rãhã ho apa xwỳnh na ka wa.

Jakamã pa mẽ inhmex nê war awỳr api nê war akuri inhmex nê ijamakêtkati nê ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anê.

¹¹ Hãmri nhũm Tirtũm kapêr o mẽ wrỳk xwỳnhjaja Tirtũm krĩ xà mã hipôk nê hkôn krã ho rôrôk nê hkrĩ hpa. Nê mẽ àptâr tũmjê mẽ mẽ htĩr nê kuhê xwỳnhjaja mẽ ãhkô hã kãm hipôk nê wam tajê pyrak nê hkôn krã ho rôrôk nê hkrĩ. Hãmri nê mẽ ohtô kot Tirtũm mẽ Jesus wa kãm kapêr ã mẽ kuma hãmri nê Tirtũm ã hpijaàm kaxyw hpar pê htũ myr pê hikwỹ hpa nê kãm mex o mex ã harê nê kãm:

¹² “Ãm hãmri na mẽ ã ajarênh anê Tirtũm. Amex o amex.

Na ka hte mẽ ixto mex o apa.

Mẽ ixrom axàhpumunh o axàhpumunh.

Nê mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrêx rãhã ho apa.

Ã ate anhỳr rãhã o rãhã jakamã na pa htem amã amex o amex ã ajarênh rãhã ho ixpa.” Anê.

13 Hāmri pa mẽ omunh o ixām rôm nhũm mẽ àptàr tũmjê hõja ixwỳr tẽ nẽ mẽ ê jaka kamã mẽ hkĩnh xaj pô jamỳnh nẽ ho kuhê xwỳnhjê hã ixkukja nẽ inhmã:

—E mǎn ate mẽ ê jakare kamã mẽ kuhê xwỳnh mũjjê pumunh nà? Tanhmã na prem amnhĩ nhĩpêx to nẽ amnẽ api? Xà ate mẽ omunh? Anẽ.

14 Hāmri pa kuma nẽ kãm:

—Nà ixte mẽ omunh kêt. Kêt ka na ixrom ate mẽ omunh. Anẽ.

Hāmri nhũm inhmã mẽ harênh o:

—Nà na pre mẽ hkwỳjaja Jejus ã mẽ homnuy tỳx kumrêx nẽ mẽ kupa. Tã mẽ kêp Jejus kwỳ jakamã na pre mẽ nẽ mẽ kot amnhĩ tomnuj o hapêx nẽ te amnhĩ kamrô ho mẽ nẽ mẽ kot amnhĩ tomnuj piitã kuhõnh par pyræk o mẽ hipêx. Jakamã nhũm mẽ ê jaka kamã mex nẽ hkĩnh tỳx nẽ pa.

15 Nẽ Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harênh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kêp mẽ ho hkêt nẽ.

16-17 Nẽ mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyræk.

Nẽ te mẽ kot mẽ hkrit kôm o pa nhũm htĩr nẽ pa pyræk.

Koja mẽ kuri htĩr tũm nẽ hkôt pa ho pa.

Nẽ axte kãm prãm kêt nẽ.

Nẽ axte kãm kôr kêt nẽ.

Nhũm arĩgro htỳxja axte mẽ hkà ho hxêt kêt nẽ.

Koja Tĩrtũm te mẽ kot mẽ hkra no kagô nhĩnhĩnh par pyræk o mẽ hipêx nhũm mẽ axte hkaprĩ nẽ mỳr o pa hkêt nẽ.

Pãnhã hkĩnh nẽ mex rãhã kurĩ pa ho pa. Anẽ.

8

Kagà kaxkep o htỳx xà kot hitep jarênh

1 Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hāmri nhũm kaxkwa kamã mẽmoj piitã hpinhkrênh pa nhũm mẽhõ kapêr kêt kumrêx. Nẽ hpinhkrênh par o ra hã ahtũm rỳ mex nẽ.

2 Hāmri nhũm Tĩrtũm kutã kapêr o wryk xwỳnh pê 7 nẽ mẽ kuhê xwỳnhjaja. Nhũm kapêr o wryk xwỳnhjê hõja mẽ hwỳr tẽ nẽ mẽ piitã mẽ kãm pifti gõ.

3-4 Hāmri nhũm kapêr o wryk xwỳnhjê hõja ôr o xijere py nẽ Tĩrtũm mã mẽhkuxwa xà ho xêt xà hã mês kunĩhti hwỳr o tẽ. Mẽ ho amnhĩptàr ã hkrĩ xà maati kutã ôr o mêtija wỳr o tẽ nẽ kuri o xa. Hāmri nhũm mẽ kãm kamã mẽhkuxwa xà hkwỳ runh rax nẽ nhũm mêtia hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarênh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarênh xàja mẽ nhũm ahkà nẽ Tĩrtũm kapêr o wryk xwỳnh nhĩhkra kamã xijere rũm Tĩrtũm kutã kax mã àpir o pa.

5 Hāmri nhũm kapêr o wryk xwỳnhja xijere kamã kuwy hpòk kwỳ ho nỳt nẽ ahpar mã pika hwỳr kumẽ nhũm ma tẽ nẽ pikap tẽm nhũm pika httertet tỳx nẽ kamã na katõtøk nẽ haxênh nẽ hkrakrak.

Mẽ kot pifti kakôr ã mẽ harênh

6 Hāmri nhũm Tĩrtũm kapêr o wryk xwỳnh pê 7 kot pifti jamỳnh xwỳnhjaja ra kot pafiti kakôr mã.

7 Jakamã nhũm wanta õ pifti kakô nhũm na mê te kot jêr krã jakot pyræk xwỳnh mẽ kuwy te kot mẽmo kamrô kamrêk pyræk xwỳnhhta pikap rôrøk pa. Nẽ nhỹhỹnh pika hkwỳ ho rax nẽ ho kaxàr pa. Nẽ põtĩ nẽ akunĩ hkwỳ ho rax kumrêx nẽ ho kaxàr pa. 8 Hāmri nhũm wam ãm xwỳnh nhĩjuk ri ãm xwỳnhja õ pifti kakô nhũm mẽmoj te kên krã hprêk pòk pyrã nẽ kaxkwa rũm ahpar mã tẽ nẽ gô xujanãr nhĩkjê kamã hpòk rãhã tẽn mrõ. Hāmri nhũm gô nhĩkjê kamã gôja mẽmo hkamrô hã amnhĩ jahkre hpa. 9 Jakamã nhũm gôx kãm mẽmoj htĩr nẽ ri mrar xwỳnhjaja pikaprãr pa. Nẽ gôx kãm pàr gô krãhkà hã pa xwỳnhja haxwỳja gjêx pa. Nẽ pàr kãm mẽ pa xwỳnhjaja haxwỳja hagjê nẽ pikaprãr pa. No nhũm gô mex kãm pàr kãm mẽ pa xwỳnhjaja mẽ kurom arĩ htĩr nẽ.

10 Tã nhũm wam ãm xwỳnhhta wa hijuk ri ãm xwỳnhja õ pifti kakô. Hāmri nhũm kanhêti rax kumrêxja axta nẽ hpòk o ma ahpar mã tẽn pikap tẽm nẽ pyhti nẽ hino hkwỳ ho ohtô nẽ homnu hpa. 11 Kanhêti nhĩxi pê na pre “mẽmoj xỳ xà” anhỳr

jakamã nhũm tẽm nẽ pyhti nẽ hino hkwỳ ho ohtô nẽ homnu pa. Nhũm prem hwỳr mra nẽ hkwỳ janhi nẽ ho ixkõ nhũm ý nẽ nhũm mẽ ohtô nẽ ho ixkõ nẽ axkaprã.

¹² Hãmri nhũm hpãnhã Tĩrtũm kapẽr o wrỳk xwỳnhjẽ hõja õ pifti kakô. Na pre ra ho axkrunẽpxi nẽ hkakôr tâ hpãnhã ra axte hõja kakô. Hãmri nhũm mẽhõja tẽ nẽ myyti kura nhũm hkwỳ ahtyk nẽ hirã hkêt nẽ. Nhũm mytwrỳre nẽ kanhêti mã ho anẽ nẽ myyti pyrã nẽ hkwỳ ahtyk nẽ hirã hkêt nẽ harir. Jakamã nhũm kamãt kãm hirã mex kêt nẽ. Nẽ arĩgro hã myytija haxwỳja hirã mex kêt nẽ.

¹³ Hãmri pa kaxkwa kamã àànhahti pumu nhũm kỳx pẽ ri htor o pa pẽ tanhmã kapẽr to nẽ kapẽr o:

—Hêxta waa nẽ. Kormã kot pifti kakôr xwỳnhjaja axkrunẽpxi nẽ kormã hkakôr kêt nẽ. Koja mẽ tokyx hkakô nhũm pika hkôt ri mẽ pa xwỳnhjaja amnhĩ xà htỳx kamã hamak tỳx o pa. Na pa tee ri mẽ hkukamã ijamaxpẽr nẽ inhmã mẽ hkaprĩ htỳx nẽ. Hêxta waa nẽ. Koja mẽ omnuy tỳx kumrẽx. Anẽ.

9

¹ Tã pa axte mẽmoj pumu. Nhũm Tĩrtũm kapẽr o wrỳk xwỳnhjẽ hõ õ pifti kakô. Na prem ra ho kwat nẽ hkakôr tâ hpãnhã axte hõja ja kakô. Hãmri nhũm kanhêti hõ axta nẽ pikap tẽm kurẽ kumrẽx nhũm mẽhõja omu nẽ hwỳr tẽ nẽ kãm mẽmoj tã saf gõ. Satanasti jagjẽnh xà hã ahkre xupỳm o htỳx xà hã safja nhũm kanhêti mã kugõ.

² Hãmri nhũm kupy nẽ ahkrehtita wỳr o tẽ nẽ kahê xà mẽ nhũm kurũm kuwy hkũm hapõx rax nẽ. Nẽ ma kàx mã àpir o pa nẽ myyti hpro hpa nhũm kamãt kô rax kumrẽx.

³⁻¹¹ Nẽ kuwy hkũmja rũm mẽmoj te krit pyrãk xwỳnh kwỳjaja pikap rôrõk nẽ kuhê. Te kot krit pyrãk tã mẽ hkuk te panhĩ hkuk pyrãk. Nẽ mẽ hkrã hkĩ te mẽnijẽ hkrã hkĩ japjẽ pyrãk. Nẽ ôr o mẽ ahkà jagjẽ. Nẽ mẽ wa japjẽ htỳx kumrẽx. Te rêawti xwa japjẽ pyrãk. Nẽ kàx o mẽ hinô hkà. Nhũm mẽ htor o hara hkoko htỳx o mra. Te ho kawar xohtô pijapu kaxyw kot mẽ hkjẽnh xà kamã mẽ htur nẽ mẽ hkjẽnh o hprõt nhũm hkoko htỳx pyrãk. Nẽ mẽ

hkamnhwỳr o pa kaxyw mẽ hanhyja te kot makre janhy pyrãk. ã kriitija kot anhỳr. Nẽ te nhỹhỹm oprẽ kaxyw nojarêt nẽ mẽ hkrit kawar hã hikukrẽx mex rẽnh pyrãk. Mẽõ pahija ahkre xupỳmta kamã kẽp mẽ hkrãhtũm. Ijaew kapẽr kãm hixi pẽ “Ap- atõ.” No Gres kapẽr kãm kẽp “Aporiãw.” No mẽ pakapẽr kãm kẽp “mẽ hpar o pa xwỳnh.” Hãmri nhũm Tĩrtũm kriiti mã kapẽr nẽ mẽ kãm:

—E kêr ka mẽ ma pika piitã hkôt te makre kot amnhĩ nhĩpẽx pyrã nẽ ri mẽ hkôt mẽ hkamnhwỳr o apa. ã amnhĩ nhĩpẽx anhỳr o mẽ atã mytwrỳ pẽ sĩk. No ãm kêr ka mẽ hpar kumrẽx kêt nẽ. ãm mẽ kot amnhĩ xà htỳx kãm hamak pix kaxyw tanhmã mẽ ho ho apa. Te makre kot mẽ hkamnhwỳr nhũm à htỳx kumrẽxta pyrãk. No mẽ ate mẽ hkamnhwỳr nhũm mẽ hkamnhwỳr xàja koja à htỳx o makre kot mẽ hkamnhwỳr jakre. Nom ra mẽ kot Tĩrtũm kra hã mẽ hkagà xwỳnhjaja kêr ka mẽ omu nẽ ãm mẽ omu nẽ tanhmã mẽ ho hkêt nẽ. Mẽ kẽp ixkwỳ na mẽ. Nẽ põ nẽ prãt ka mẽ ãm omu nẽ tanhmã ho hkêt nẽ. ãm mẽ kot panhĩ nhõkrã kagà hkêt xwỳnh pixjaja ka ã mẽ hipẽx anhỳr o ri mẽ hkôt apa. Nom kêr ka mẽ hpar kêt nẽ. Kê mẽ tee ri amnhĩ xà hã maj kãm tokyx htyk nẽ hapẽx prãm hkaprỳ ho pa. E ma mẽ hwỳr mra nẽ ã mẽ hipẽx anhỳr o ri apa. Anẽ.

Hãmri nhũm mẽ kuma nẽ ma mẽ hwỳr mra.

¹² Na ra pika hkôt wam mẽ homnu xà pyxi nẽ hapẽx. No ãm arĩ hamẽxkrut.

¹³ Jakamã nhũm Tĩrtũm kapẽr o wrỳk xwỳnhjẽ hõja axte õ pifti kakô. Na prem ra ho sĩk nẽ hkakôr tâ axte hkôt hõja hkakô. Nhũm Tĩrtũm kutã ôr o mẽsti rũm mẽhõja tanhmã kapẽr to. Mẽsti janhã rũm kapẽr.

¹⁴ Pifti kakôr xwỳnhhta mã kapẽr nẽ kãm:

—E na ra mẽ kot mẽ hkwỳjẽ nhĩmex ã arĩgrota kato. Jakamã kêr ka ma pyhti pẽ Erax wỳr wrỳ nẽ gô mỳ ri Satanasti mã mẽ àpẽnh xwỳnh pẽ kwatja pumu. Na prem ra mẽ hpa hpre nhũm mẽ gô mỳr ri arĩ hkrĩ ho hkrĩ. Ka mẽ omu nẽ mẽ kãm mẽ hpa hpre xà hpõt pa kê mẽ ma mẽ hkôt ri mẽ hpar o pa. Anẽ.

15 Na pre ra Tirtũm mẽ kot mẽ hkwyjê nhĩmex o pa kaxyw mẽ kurê nẽ gô mỳ ri mẽ unhwỳ nhũm mẽ kormã mẽ hpar xà hã arĩgro jamãr o hkrĩ. Jakamã nhũm ã pifti kakôr xwỳnhhta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. 16 Nẽ ma amnhĩ kôt pòristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kêp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

17 Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhhaja. Mẽ hinô kaja axtem kàx o. Nẽ hkamrẽkja te kuwy hpòk kamrẽk pyrãk. Nẽ rãrãrja te mẽ hkurôt kane xà pẽ ãsôf rãrãr pyrãk. Nẽ kakrã htyk. ã kàx o mẽ hinô hkà kot anhỹr. Nẽ mẽ hkrit kawarti hkrãja te rêãwti krã pyrãk. Nẽ mẽ hakwa rũm kuwy hpòk mẽ ãsôfti mẽ kuwy hkũm axpẽn kôt hapôx o pa. 18-19 Nẽ kawarti jamy axtem te kêp kagã xoprê hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpòk mẽ ãsôfti hapôx xwỳnhhta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.

20-21 Tã nom nhũm arĩ mẽ htĩr nẽ ri mẽ pa xwỳnhhaja. Mẽ kot mẽ hkwyjê hpar kêt xwỳnhhaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprô nẽ mjên o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpêx anhỹr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpêx o pa. Nẽ amnhĩm sãnti hkwy nhĩpêx. Pĩ ho hipêx nẽ kàx o hipêx nẽ kẽn o hipêx. Nẽ hipêx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utar kaxyw mo hte? Na htem arĩ ã amnhĩ to hwỳr kaprỹ anhỹr o pa.

10

Kagã kaxkep grire jarẽnh

1 Tã pa arĩ mẽmoj pumu. Nhũm axte Tirtũm kapër o wrỳk xwỳnh xihtỳxjê hõja pika hwỳr wrỳk o tẽ. Nẽ êja kakrã ho na pre. Nẽ hkrã mỳ ri màxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpòk pyrãk. 2 Nẽ ãhkra kamã kagã kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanãr kãm upòk rũm hte xãm nẽ kỳx pẽ amgrã kamã apke rũm hte xãm nẽ o xa pa ixprĩ hã omu.

3 Hãmri nhũm kàx pẽ amỹra. Te rêãw hkàr tỳx pyrãk. Nhũm hpãnhã kaxkwa kamã mẽhõja kãm kapër. Te na katõtòk o 7 wês pyrãk pa ixprĩ hã tanhmã kapër to hã kuma. 4 Hãmri nẽ ra mẽ amã ã kagã kaxyw nhũm mẽ ja nẽ inhmã kapër nẽ inhmã:

—Kwa nã kwarĩ ja kot kaj hã kagã hkêt nẽ. ãm ja pix kot kaj akwỳjê mã hã kagã hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagã hkêt nẽ. ãm papxipix kuma nẽ ri hã ixpa.

5 Tã nhũm Tirtũm kapër o wrỳk xwỳnh kot gô xujanãr kãm upòk rũm hte xãm nẽ apke amgrã kamã ãm xwỳnhhta hãmri Tirtũm nhỹ hã kapër kaxyw nẽ kãnhmã ãhkra pẽ. 6-7 Tirtũm pẽ kaxkwa nẽ pika nẽ gô xujanãr o kator nẽ kamã kot mẽmoj piitã ho kator xwỳnhhaja. Nẽ htĩr rãhã nẽ pa ho pa xwỳnhhaja. Nhũm ã hã kapër nẽ kapër o:

—E hãmri. Amnepê mã na pre Tirtũm ã hã mẽ kãm kapër o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkôt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapër o wrỳk xwỳnh kot hitepta ò pifti kakô hãmri nhũm mẽmojja ã amnhĩ nhĩpêx anhỹr kurê kumrẽx. ãm hãmri na pa mẽ amã ja jarẽ. Anẽ.

8 Pa mar o ixãm rôm nhũm wam inhmã kapër xwỳnhhta axte inhmã kapër nẽ inhmã:

—E ma pika hwỳr wrỳ nẽ gô xujanãr kãm upòk rũm hte xãm nẽ amgrã kamã apke rũm hte xãm xwỳnhhta wỳr tẽ nẽ kêp kagã kaxkep grire pipôt xwỳnhhta py. Anẽ.

⁹ Hāmri pa kuma nē ma hwÿr wrÿ nē hā kuwÿ nhÿm inhmā kugō nē inhmā:

—E mī. Apy nē akrē. ànhre. Te kot menh xành pyrāk. Nom kot kaj akrē nē anhōhy xà. Nom māmri apy nē akrē. E mī. Anē.

¹⁰ Hāmri pa kēp kupy nē hkaki nhÿm ànhre. Pa hkrēr pa hāmri nē inhōhy xà kurē kumrēx.

¹¹ Hāmri nhÿm kot inhmā òr xwÿnhhta inhmā:

—Nà àm hāmri na ka apy nē akrē. Jakamā kēr ka ano ho ate mēmoj piitā omunh xwÿnhja nē ajamak o ate mēmoj mar xwÿnhja nē ate tanhmā Tirtūm kapēr mar toja ka piitā hā kagà hpa. Hāmri nē ate omunh xà hkôt akwÿjē mā piitā harēnh o apa. Mē kot nhÿrmā Tirtūm kot tanhmā mē piitā mē hipēx to hā harēnh mar kaxyw. Ahpÿnhā ri pika piitā hkôt mē urojē piitā koja nhÿrmā ã mē hipēx anē. Ahpÿnhā ri mē kapēr xwÿnh piitā. Nē mē ò pahijaja. Àm mē piitā koja nhÿrmā ã mē hipēx anē. Anē.

11

Tirtūm nhÿ hā kapēr xwÿnh pijakrut wa harēnh

¹ Tā nhÿm mēhōj inhmā mēmoj to mīdi xà hā pī ryre gō nē inhmā:

—E ja py nē Jerujarē hwÿr wrÿ nē kamā Tirtūm mā amnhī jarēnh xà hā ixkreja o mīdi. Nē ixkre kamā amnepēm mē kot amnhī tomnuj pānhā Tirtūm mā òwēhti nhōr xà hā mēstita mā ho anē nē ho mīdi. Nē ixkre kamā mē kot Tirtūm mā amnhī jarēnh o mē hkrī xwÿnhjaja ka aprī hā mē ho kōta.

² —No ixkre kapem pikaja ka ho mīdi hkēt nē. Ra Tirtūm kot mē kot amnhī tomnuj xwÿnhjē mā hkaga jakamā koja mē htÿx ri kām hprām xà hkôt tanhmā homnu hto ho pa. Nē Jerujarē piitā hkôt ri homnu ho paja ã hā amgrà axkrunēpxi nē hkôt mytwrÿ kēp 6.

³ —Koja Tirtūm ma ÿ hā kapēr xwÿnh ho hamēxkrut nē mē hwÿr wa kumē nhÿm wa ma mē hwÿr wrÿ nē mē kām Tirtūm kapēr jarēnh o ri mē hkôt pa. Hāmri nē tee ri mē kot tanhmā amnhī tomnuj to hā mē omu nē hkaprī nē. Hāmri nē wa hkaprī xàj xak punure kaxō nē haxà nē mē kām

Tirtūm kapēr jarēnh o ri wa pa hā amgrà axkrunēpxi nē hkôt mytwrÿ kēp 6. Jakamā e. Pīja py nē ma mē hwÿr wrÿ nē ixkreta o mīdi. Anē.

⁴ Wa pijakrut wa kot Tirtūm nhÿ hā kapēr jarēnh o wa pa xwÿnhhta wa. Na htem wa kot amnhī nhīpēx ã wa harēnh ma nē mēmo pī hpār pē oriwēhti kot tanhmā amnhī nhīpēx toja mā hamaxpēr kurē kumrēx. Nē amnepēm Tirtūm nhÿ hā kapēr o pa xwÿnh pē Jakaris kot kanē hpôk xāmta mā määnēn hamaxpēr. Oriwēhti xōja htwÿm rax kumrēx nhÿm htem htwÿm opōj nē ho kanē ho nÿt nē hpôk nē kÿx pē unhwÿ nhÿm mē piitā hirā kamā rīt mex o ri mra. Nē kanē hpôk mexja te kot Tirtūm kapēr pyrāk. Nē kanē xām xàja te kot Tirtūm nhÿ hā kapēr jarēnh o wa pa xwÿnhhta wa urāk. Nē oriwēhtija haxwÿja te kot wa urāk. Ra Tirtūm Karō kot wa hkarō mā àr jakamā na hte wa hprī hā mē kām Tirtūm kapēr jarēnh o pa nhÿm mē kot mar xwÿnhjaja te kanē nhīrā kamā ri rīt mex nē ri pa pyrā nē hprī hā mar tÿx nē.

⁵ Tā koja mēhō tanhmā wa hipēx to kaxyw wa hwÿr tē nhÿm wa hakwa rūm kuwy hpôk kato nē kot tanhmā wa ho mā xwÿnhhta o hxēt o kupī.

⁶ Nē koja wa Tirtūm xàhpumunh tÿx xà ho tanhmā ri mē hā mēmoj nhīpēx to pē mē kām kapēr jarēnh o ri mē hkôt pa. Jao tanhmā na hto nhÿm mē hā wrÿk kēt ry nē. Rÿ tanhmā mē kēp gō hto nhÿm mē hkamrō hā mē kēp amnhī jahkre. Koja wa ã Tirtūm nhÿ hā mē kēp mēmoj nhīpēx anhÿr ho wa pa. Nē xatā wa kām hprām xà hkôt tanhmā mēmoj tomnu hto. ⁷ Nē mē kām kapēr o pa pē ã mē hipēx anhÿr o wa hā amgrà axkrunēpxi nē hkôt mytwrÿ kēp 6 nē rī kormā ho hapēx. Hāmri nhÿm ahkre xupÿm rūm Satanasti nhō kōwenatōja kato nē ma wa hwÿr tē nē nhÿri pry kahti ri wa unē nē wa kupī nhÿm wa pry kamā ty nē nō. ⁸ Hāmri nhÿm mē wa haxàr kēt nē nhÿm wa arī pry kamā nō. Krī kapem na prem pī kahpa hā Jejus nhō nē kupī. Krī nhō xwÿnhjaja mē kot amnhī tomnuj tÿx xwÿnh na mē. Te ho amnepēm krī pē Sotō mē pika pē Ejit kamā mē kot amnhī tomnuj xwÿnhjē kot amnhī nhīpēx pyrāk. ⁹ Jakamā nhÿm

mē kot wa haxàr nē axpēn kurē nhūm wa pry kamā arī ty nē nō nhūm mē piitā wa hwÿr mra nē wa omu. Nē ahpÿnhā krī piitā hkôt mē pa xwÿnhjaja tanhmā amnhī to nē ja hā wa omu. Ahpÿnhā ri pika piitā hkôt mē urojaja. Nē ahpÿnhā ri mē kapēr xwÿnh piitā. Hāmri arī ahpÿnhā mē ò krī kamā pa htā tanhmā amnhī to nē wa htyk ā wa omunh ā hā apkati axkrunēpxi nē hkôt hā myt apha. ¹⁰ Koja mē wa htyk ā wa omu hāmri nē hkīnh nē. Nē hkīnh xà axpēn mā hkīnh xà nhōr o pa. Wa kot kormā htīr ri tanhmā mē homnuj to ho ri mē hkôt paja mā hamaxpēr nē wa htyk ā wa omu nē hkīnh tÿx nē.

¹¹ Tā koja wa htyk ā apkati axkrunēpxi nē hkôt hā myt apha hāmri nhūm Tīrtūm wa kamā htyxà rē nē akupÿm wa ho wa htīr nhūm wa kànhmā xa nē ri mra. Hāmri nhūm mē kot wa omunh xwÿnhjaja tee ri hā wa omu nē kām wa uma htÿx kumrēx. Ām kām wa uma ho kām wa uma.

¹² Hāmri nhūm kaxkwa kamā mēhōja wa kām kapēr nē wa kām:

—E war amnē mē ixwÿr war api. Anē.

Hāmri nhūm wa kuma nē ma kakrā kamā àpir o mō. Nhūm mē kām wa hkurē xwÿnhjaja tee ri wa àpir ā wa omu.

¹³ Hāmri nhūm pika htertēt tÿx nē. Nē krī kamā ixkre ohtō nē grành pa nē mē hkwy nhīmex rax nē nhūm mē ohtō rax kumrēx nē axkaprā. Mē kēp 7.000 nē pikaprār pa. Hāmri nhūm arī mē htīr nē ri mē pa xwÿnhjaja tee ri mē omu nē kām ma xà htertēt tÿx nē axpēn mā:

—Kwa Tīrtūm mǎn ā mē panhīpēx anē. Hihtÿx o hihtÿx jakamā kaxkwa rūm ā mē panhīpēx anē pu mē pahpiitā pano ho ixkre pigrành ā omu. Anē.

¹⁴ E na ra amnhī xà htÿx kamā hamak xàja hamēxkrut nē hapēx. Tā no ām arī mē kaxyw pyxi nē arīk.

*Mē kot pifti kot hitep kakô ā harēnh
Apokarip 4.8, 5.9-14, 7.9-12, 14.2-5, 15.3-4, 19.1-2*

¹⁵ Tā nhūm Tīrtūm kapēr o wrÿk xwÿnh kot hitepja ò pifti kakô nhūm kaxkwa kamā mē pa xwÿnhjaja kàx pē kapēr o:

E ām hāmri. Na ra Mēpahpām Maati mē Jejus Krisja wa kēp krī piitā hkôt mē piitā mē ò Pahihtī na wa.

Koja Mēpahpām Maati kēp Pahi Maati rāhā nē pa ho pa xwÿnh. Anē.

¹⁶ Hāmri nhūm mē àptār tūm pē 24jaja. Tīrtūm kot mē pahto amnhīptār o hkrī xà mā hipôk nē mē hkrī xwÿnhjaja. Hāmri ā mē kapēr anhyrja ma nē Tīrtūm ā hpijaàm kaxyw hpar pē rôrôk pa nē htu mÿr pē hikwÿ. Hāmri nē kām mex o mex ā harē nē kām:

¹⁷ Pa Pahi Maati Tīrtūm. Nà ām hāmri mē ixrom axàhpumunh o axàhpumunh nē axihtÿx o axihtÿx.

Amnepē mā kormā mēmoj kēt ri na ka pre arāhā apa ho apa.

Tā arī arāhā apa ho apa.

Ām hāmri apē mē ixpiitā mē ixto amnhīptār xwÿnh. Nà ām hāmri amex o amex.

¹⁸ Kot kaj tokyx mē piitā tanhmā mē kot amnhī nhīpēx to ho pa hā mē omunh xà hkôt tanhmā mē harēnh to.

Nē ra mē htyk xwÿnhjaja kot kaj mē piitā akupÿm mē ho mē htīr pa nhūm mē pika rūm hapôx pa nē ma mra nē arī mē htīr xwÿnhjē nhīhkô hā akutā hkrī pa.

Ka mē piitā mē omu nē tanhmā mē kot amnhī nhīpēx to ho pa hā mē omunh hkôt tanhmā mē harēnh to.

Mē kot amnhī tomnuj xwÿnhjaja kot kaj ma mē kot amnhī xà htÿx kamā hamak o pa htūm xà hwÿr amnhī nē mē arē nhūm mē ma hwÿr hapēx. Hāmri nē tee ri amnhī kukamā hamaxpēr nē gryk tÿx kumrēx.

Ka hpānhā mē kot akôt amnhī xunhwÿr nē akapēr kôt amnhī nhīpēx o mē pa xwÿnh piitā mē omu nē tanhmā mē ho mex to.

Mē kot amnhī to rūnh xwÿnhjaja nē mē kot amnhī to hkryre xwÿnhjaja.

Nē amnepēm mē kot anhy hā mē kapēr o mē pa xwÿnhjaja.

Akrajē piitā kot atā hpijaàm xwÿnhjaja kot kaj kormā mē htīr ri tanhmā amnhī to mex hā mē omunh xà hkôt tanhmā mē ho mex to.

Ā kot kaj tokyx mē piitā ahpÿnhā mē omunh xà hkôt mē hipēx anē. Anē.

19 Hāmri nhūm kaxkwa kamā Tirtūm nhōrkwỹ hā hakwakre kahê xà amnhĩ mẽ pa kamā ôr o mēs kunĩhtita pumu. Pu nhūm na hkatōtōk nē haxênh nē hkrakrak nē na mê te kot jêr krā hakotre pyrāk xwýnhja pikap rôrōk rax nē. Nē pika htertēt tỳx o htertēt tỳx pa arĩ omunh o xa.

12

Mēhō ni mẽ kagānuti wa harēnh

1 Tā pa axte mẽmoj pumu. Kaxkwa kamā aa mẽ pahte mẽmoj pumunh kêt xwýnhja pa omu. Nhūm mēhō nija xê te myt no mā hirā htỳx pyrāk. Nē hpar nhōkwa kamā mytwrỹre ajêt. Nē kanhêti ho 12 o mẽ ahkà tu nē o xa. 2 Na ra htujarō nē hpijagri kaxyw ôhy xà nē amnhĩ kamnhêr o xa.

3 Tā pa axte mẽmoj pumu. Aa mẽ pahte mẽmoj ã kot anhỹr pumunh kêt xwýnh òja pa omu. Kagānuti nom ãm axtem hkà kamrêk tỳx kumrêx. Nē rax kumrêx. Nē hkrā kêp 7. Nē hkrā piitā kamā ôr o pahi hā mẽ ahkà htu nē o nõ. Nē hkrā kamā pàr kêp 10.

4 Tā nhūm hamy ho apêr o kaxkwa kamā kanhêti ho ohtô nē pikap kurê. Hāmri nē ôhy xà nē amnhĩ kamnhêr o ãm xwýnhhta wýr tē nē hkra kator nhūm kot kêp krêr kaxyw kutā hamār o nõ.

5 Hāmri nhūm hkra kato nē myre. Hihtỳx o hihtỳx ã kot pika piitā hkôt mẽ piitā mẽ ho amnhĩptār mā xwýnh na pre. Nhūm kagānutija kot kêp utār nē hkrêr mā tā nhūm Tirtūm kapêr o wrỹk xwýnhjê hōja hwýr wrỹ nē kêp kumy nē ma Tirtūm wýr kaxkwa kamā kot mẽ pahto amnhĩptār ã hkrĩ xà maatija wýr ho api.

6 Hāmri nhūm kagānuti tee ri ma kot kêp o mōr ã omu nē hpānhā nita o apkjê nē kot tanhmā ho kaxyw nhūm amnhĩ tā omu nē umaj hprôt nē ma tē nē nhỹri kapôt ã amũxu. Ra Tirtūm kot hkukamā kām hpimxur xà nhĩpêx xà hwýr hprôt nē ma tē nē kamā kêp amũxu. Nhūm Tirtūmja nē kagā pumunh mex nhūm kêp hpimxur mex ã amgrà axkrunêpxi nē hkôt hā mytwrỹ kêp 6.

Mē kot kaxkwa kamā mẽkarōnuti kurê kaxàr ã mẽ harēnh

7 Tā nhūm mẽ ra kaxkwa kamā kurê kaxàr kaxyw. Kagānuti mẽ hkwyjaja nhūm mẽ ra Tirtūm kurê kaxàr kaxyw kutā amnhĩ xunhwý. Jakamā nhūm Tirtūm kapêr o mẽ wrỹk xwýnhjê hkrāhtūm Mikewja ma mẽ hwýr amnhĩ kôt hkwyjê o mra nē mẽ pijapu ho kuhê.

8 Hāmri nhūm kagānuti tee mẽ kutā amnhĩ to htỳx kaprỹ nhūm Tirtūm kapêr o mẽ wrỹk xwýnhjaja amnhĩ nē mẽ ho axtem nē kaxkwa rūm mẽ kator o mẽ kator.

9 Satanasti pē kagānutita kagā kot ni kator ewa mā hêx xwýnh na pre. Nē hêx rom tanhmā hêx to ho pa xwýnh. Jakamā nhūm Mikew mẽ hkwyjaja hkwyjê mẽ mẽ ho hpimràatā amnhĩ nē pikap mẽ rēnh pa.

10 Hāmri nhūm kaxkwa kamā mẽhōja axte kàxpê kapêr nē kapêr o:

E ãm hāmri. Na ra Tirtūm hihtỳx o hihtỳx o mẽ panê mẽmoj punuj piitā ho hapêx par kumrêx.

Na pre hte Satanasti pē mẽkarōnutija xatā hwýr mra nē kām tanhmā Jejus kwýjê ho kapêr punuj to ho pa.

Tā koja axte mẽ ho kapêr kêt kumrêx. Ra Tirtūm kot amnhĩ nē kator o kator nhūm ra ma mōr o mōr kênā.

Koja Tirtūm pika piitā hkôt mẽ ho amnhĩptār xwýnhjê japôx pa nē hpānhā mẽ kaxyw Kra Krisja xām nhūm pika piitā hkôt mẽ ho amnhĩptār rāhā ho pa.

Nà ãm hāmri. Ja mex o mex.

11 Na pre Jejus kôt mẽ pahtō nē mẽ pahtōxjaja mẽkarōnuti kutā amnhĩ to htỳx nē pa. No ãm amnhĩ nhỹ hā ã kutā amnhĩ nhĩpêx anhỹr kêt.

Mē pahte amnhĩ tomnuj pānhā amnhĩrer xwýnhhta na pre ty nē hkamrô ho mẽ kuhō nē mẽ nē mẽ kot amnhĩ tomnuj o hapêx.

Jakamā nhūm prem kukwak ri Satanasti kutā amnhĩ to htỳx rāhā pa.

Nhūm mẽ kot Jejus ã mẽ himex par kaxyw tā nhūm mẽ kām htyk pyma hkêt nē. ãm Jejus kôt arĩ amnhĩ to htỳx nē mẽ hkôt pa rāhā nē.

Jao arĩ mẽ kām Jejus kot mẽ panê tanhmā amnhĩ nhĩpêx to hā harēnh o ri mẽ hkôt pa.

12 Tã Tĩrtũm ra kot mẽ panê mẽmoj punuj o hapêx par jakamã kwa kaxkwa kamã mẽ apa xwýnhjaja kêr ka mẽ akĩnh nê apa.

Nom gô xujanãr kãm nê pika kamã mẽ pa xwýnhjaja hêxta waa nê. Koja mẽ mex kêt nê.

Nê ra Mikew mẽ hkwýjaja kot amnhĩ nê kaxkwa rũm mẽkarõmnuti mẽ hkwýjê kator nê pikap mẽ rênh par jakamã nhũm Satanastija gryk tỳx kumrêx.

Tĩrtũm kot ma mẽ kot amnhĩ xà htỳx kamã hamak o pa tũm xàta wỳr mênh xà hã arĩgro hwỳr amgrà grêre nhũm tee ri amnhĩ kukamã hamaxpêr nê gryk tỳx o gryk tỳx. Anê.

13 Hãmri nhũm kagãmnutija mẽ kot amnhĩ nê kaxkwa rũm kator ã amnhĩ pumu nê gryk tỳx nê. Nê gryk xàj ma akupỳm ni kot hkra myre ho pijagri xwýnhta wỳr tẽ nê tanhmã ho kaxyw hkôt ho krihkrit.

14-16 Hãmri nhũm Tĩrtũm kapêr o mẽ wrỳk xwýnhjê hõja omu nê nija mã àanhàhti jara gô. Kot kagãmnuti pẽ ho htor nê ma nhỹri hpimxur xà wỳr htẽm kaxyw. Nê kormã htor kaxyw nhũm kagãmnuti omu nê kot gô ho hanhir kaxyw hkôt hakwa rũm gô kapĩ nhũm hpikapĩr rax kumrêx. Te pyhti hprõt tỳx pyrãk. Hãmri nhũm Tĩrtũm omu nê nija nê tanhmã pika hto nhũm kãm axkjê nhũm gô hprõt nê kamã pikapĩr pa. Jakamã nhũm mex pẽ àanhàhti jara ho to nê ma kapôt ã pimxur xà hwỳr ma tẽ. Nê kamã pa hã amgrà axkrunêpxi nê hkôt mytwrỳ kêp 6 nhũm prem hamãr mex rãhã ho pa.

17 Hãmri nhũm kagãmnuti tee ri kãm hpĩr prãm kaprỳ nê gryk tỳx kumrêx. Hãmri nê ma ni hkwýjê hwỳr mō. Mẽ kot Tĩrtũm mẽ Jesus wa hkôt amnhĩ nhĩpêx o mẽ pa xwýnhjê hwỳr tanhmã mẽ homnuj to kaxyw ma mẽ hwỳr mō. Hãmri nê tanhmã kot mẽ ho kaxyw gô xujanãr mỳ ri nō.

13

Satanasti nhõ kôwenatô wa kot gô xujanãr rũm kator ã wa harênh

Sikũn Tesarõn 2.3-5

1 Tã pa axte mẽmoj pumu. Nhũm gô xujanãr rũm Satanasti nhõ kôwenatôjê hõja te mrymnuti pyrã nê àpir o mō. Kagãmnuti

pyrã nê hkrã kêp 7. Nê urak nê hpàr kêp 10. Nê hpàr piitã kamã pahi hã mẽ ahkà. Nê ahkà piitã hã axtem tanhmã Tĩrtũm o kapêr punuj to nê tanhmã haprỳ hto hã kagàja hikwỳ.

2 Nê hkà te kêp ropkrorti kà pyrãk. Nê hakwa te kot rêãwti jakwa pyrãk. Nê ìhkra te kot pàati nhĩhkra pyrãk. Jakamã na pre kagãmnuti nhỹ hã hihtỳx o kêp pahi hã pika nhõ xwýnhjê ho amnhĩptàr o pa.

3 Nê hkrã hõ te mẽ kot hayr o hpĩr nhũm ra akupỳm htĩr nê arĩ hayr xà wakre rã nyw pyrãk. Jakamã nhũm pika kamã mẽ pa xwýnhjaja amnhĩ jaêr pẽ omu nê kamã no puma nê. Hãmri nê hkôt amnhĩ nhĩpêx o pa.

4 Hãmri nê kagãmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamẽ wa hã hpijaam kaxyw wa kãm wa mex o wa mex ã wa harênh o pa. Nê mrymnuti hã axpẽn mã:

—Hêxta waa nê. Mẽ pahtõ na mẽ pahte mrymnutita pyrã nê ã mẽ pahte amnhĩ nhĩpêx kot anhỹr? Mẽ pahtõ kot pu kutã xa nê paxihtỳx o hkurê kapa? Nà amrakati kumrêx. Anê.

5-6 Hãmri nhũm Satanasti tanhmã mrymnuti ho nhũm kapêr o ri mẽ hkôt pa nê mẽ ho amnhĩptàr o hã amgrà axkrunêpxi nê hkôt mytwrỳ kêp 6. No ãm axtem nê Tĩrtũm o kapêr punuj o ri mẽ hkôt pa. Nê ri tanhmã haprỳ hto nê õ krĩa mex kêt ã harênh o ri mẽ hkôt pa.

7 Hãmri nhũm Satanasti ra kot mẽ hkurê kaxàr kaxyw kãm anê nhũm axtem nê Tĩrtũm pẽ hkrajê kutã amnhĩ xãm nê mẽ hwỳr hprõt nê tanhmã hpijapu hto ho pa nê mẽ ho axtem nê mẽ ho krihkrit pa nê ahpýnhã ri pika piitã hkôt mẽ uro hkwýjê ho amnhĩptàr o pa. Nê ahpýnhã mẽ kapêr xwýnh piitã mẽ ho amnhĩptà.

8 Jakamã nhũm mẽ ohtõ rax kumrêx nê mrymnuti hkôt amnhĩ nhĩpêx. Nê kutã hkõn krã ho rôrôk nê hkrĩ nê kãm mex o mex ã harê. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwýnh kôt ra mẽ kot amnhĩ xunhwỳr xwýnhjaja tapxipixjaja na prem hkôt amnhĩ xunhwỳr kêt nê. Amnepê mã kormã amrakati ri Tĩrtũm mẽ Jesus wa õ kagã kamã mẽ htĩr tũm nê mẽ pa mã xwýnh nhĩxi

xwýnh pixjaja na prem mrymnuti pumu nê hkwyjê rom hprî hã kot amnhî nhîpêx ã omunh kurê kumrêx nê hkôt amnhî nhîpêx kêt nê.

⁹ E ka mẽ atõ axumar kaxyw ajamak kre hã kot kaj ixujarênh piitã ama nê kãm ajamaxpêr tỳx rãhã ho apa.

¹⁰ Jakamã kwa Tirtũm kôt ixkwỳjaja. Kwãr mẽ mãmrĩ mẽ apynê nê mẽ ajagjê. Nê kwãr mẽ mãmrĩ wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mẽ ãm ixkôt pix mã amnhî nhîpêx o ri apa rãhã ty.

Pika rũm mrymnuti hõ kator ã harênh Makre 13.22

¹¹ Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpàr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

¹² Gô xujanãr rũm mrymnuti xàpir xwýnhhta nhỹ hã pika nhõ xwýnhjê mã kapêr tỳx nê mẽ kãm:

—E pika piitã hkôt mẽ apa xwýnhjaja mẽ inhma. Kêr ka mẽ kot hkrã hõ jayr o hpîr nhũm akupỹm htîr xwýnhhta kôt pix mã amnhî nhîpêx rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr. ¹³ Hãmri nê Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhî jaêr pê omu nê kamã no pyma nê. ¹⁴ ã ri mẽ noo mã mẽ kãm amnhî nhîpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhî nhîpêx anhỹr o mẽ no kupyw o pa nhũm mẽ omu nê hkôt amnhî nhîpêx. Hãmri nhũm mẽ kãm mẽmoj tã karõ nê mẽ kãm:

—E wam mrymnutita. Mẽ kot hkrã hõ jayr o hpîr nhũm akupỹm htîr xwýnhhta kêr ka mẽ kãm hkarõ nhîpêx nê ho mẽ anhõ sãnti. Kê mẽ piitã hwỳr mra nê kutã hkõn krã ho rôrôk nê hkrî nê amnhî to kuwy nê kãm mex o mex ã harê.

Anhỹr o mẽ kãm hã karõ. ¹⁵ Hãmri nhũm mẽ kuma nê mar xà hkôt hipêx nê ãm nhũm

xa. Hãmri nhũm mrymnuti kot hitepta omu nê hwỳr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwýnhjê pynê nê mẽ himex pa. Anê.

¹⁶ Hãmri nhũm pika rũm mrymnuti kator xwýnhhta haxwỳja mẽ kãm kapêr nê mẽ kãm:

—E koja ixkwỳjaja inhỹ hã mẽ apiitã mẽ apê ixkwỳ hã mẽ akagã. Mẽ ate amnhî to rũnh xwýnhjaja nê mẽ ate amnhî to hkryre xwýnhjaja. Nê amarĩ mẽ kãm mẽ axàpênh xwýnhjaja nê amnhî mã mẽ axàpênh xwýnhjaja. Nê mẽ akàxpore rũnh xwýnhjaja nê mẽ apê amrakati xwýnhjaja. Koja mẽ apiitã mẽ akagã hpa. Mẽ akwỳ nhõkrã kagã nê mẽ akwỳ xupòk rũm mẽ anhĩkra katut kagã.

¹⁷ —Gô xujanãr rũm mrymnutita nhĩxi kot paj mẽ atã hipêx. Rỳ hixi hã nũm nhîpêx. Hãmri ka mẽ axàpkur xà japrôr kaxyw nhỹhỹm mra nhũm mẽ atã hixita pumu nê rĩ kormã mẽ amã mẽmoj kwỳ ho wênê ka mẽ amnhĩm haprô nê ho axàpkur o ri apa. Nê mẽ ate mẽmoj to wênê xwýnhjaja koja mẽ apê mẽmoj japrôr kaxyw mẽ awỳr mra ka mẽ tee ri nhỹhỹnh mẽ hã hixi japêr hãmri nê mẽ kãm mẽmoj to wênê hkêt nê. ãm nhỹhỹnh mẽ atã hixi hã kagãta pumunh pix kukwak ri kot kaj mẽ awjaprô rỳ mẽmoj to wênê. Anê.

¹⁸ E kwa kêr ka mẽ ixte mẽmoj pumunh nê mẽ amã hã kagãta pumu nê ama nê kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwýnhjaja kot kaj mẽ aprĩ hã ja mar tỳx kurê kumrêx.

14

Tirtũm mex ã mẽ grer Apokarip 7.1-8

¹ Tã pa axte mẽmoj pumu. Nhũm mẽ pahte amnhî tomnuj pãnhã amnhîrer xwýnhja hixêt pê Siãwja nhĩmòk ã xa. Nê puhã mẽ ohtô rax kumrêx nê kuhê. Mẽ ohtô ho mẽ ohtô. Piitã kamã mẽ kêp 144.000. Nê piitã õkrã hã mẽ pahte amnhî tomnuj pãnhã amnhîrer xwýnh mẽ Hipêxà wa hixi jaxwỳr pa mẽ omu.

² Nhũm mẽ kaxkwa kamã grer o kuhê. Mẽ grerja mex o mex. Te kot gô hprõt

tỳx hkoko htỳx pyræk. Nê te na katôtøk tỳx pyræk. Nê te wiorãw môr xwỳnhjaja kot hkakrênh mex pyræk pa mẽ mar o xa.

³ Nê mẽ grer xwỳnhjaja. Jejus puhã mẽ ohtô rax kumrêx nê mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nê mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utàr nê amnhĩ wỳr mẽ ho àpir xwỳnh na pre mẽ. ãm mẽ tapxipixjaja mẽ grer nywja ma nê wa kãm ho grer o kuhê.

⁴⁻⁵ Na prem tãm amnhĩ nhĩpêx nê Tĩrtũm kôt amnhĩ nhĩpêx rãhã ho pa. Te mẽ kot amnhĩ prõ pix tânopxar rãhã ho pata pyræk. Nê ri tanhmã hêx to rỳ tanhmã ri amnhĩ tomnuj to ho pa hkêt nê. ãm tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrøk nê kãm mex o mex ã harênh kêt nê. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

⁶ Tã pa axte Tĩrtũm kapêr o wrỳk xwỳnhjê hõ pumu nhũm kỳx pê ri htor o pa. Ahpỳnhã ri pika piitã hkôt mẽ uro hkwỳjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx to hã harênh kaxyw. Ahpỳnhã mẽ kapêr xwỳnh piitã mẽ kãm harênh o pa. Nê htor o pa pê kỳx pê mẽ kãm kapêr nê mẽ kãm:

⁷ “E na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôrøk nê akrĩ nê kãm mex o mex ã harê. Kêp mẽmoj piitã ho kator xwỳnh na. Na pre kaxkwa ho kato nê pika ho kato nê gô xujanãr o kato nê hino ho kato nê mẽmoj piitã ho kator pa. Jakamã kwa kêr ka mẽ tapxipix ã mãn apijaàm nê kãm mex o mex hã harênh rãhã ho apa.”

Anhỳr o mẽ kãm kapêr. ⁸ Hãmri nhũm hõja wamta kôt tẽ nê uræk nê kỳx pê mẽ kãm kapêr o:

—Koja Tĩrtũm tokyx Papirõn grãnh pa. Na hte krĩ nhõ xwỳnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagôxyhti ho hkõm nê amnhĩ mẽ mẽ piitã mẽ kãm õr nê ho mẽ ho pipãnh pyræk. Na htem mẽnijê piitã ho amnhĩkati o pa. Nê amnhĩ kwỳjê pê mẽ hprõ ho amnhĩkati. Nê amnhĩ mẽ pika piitã hkôt mẽ pa xwỳnhjê mã anhỳr o pa. Mẽ kot mẽ uræk nê ã amnhĩ nhĩpêx anhỳr o pa kaxyw mẽ kãm anhỳr o pa. Ja mỳrapê na ra Tĩrtũm kot tanhmã mẽ ho kaxyw mẽ hã amnhĩ jarê. Anê.

⁹ Tã nhũm wa hkôt hõja tẽ nê wa uræk nê kàx pê pika nhõ xwỳnhjê mã kapêr nê mẽ kãm:

—E mẽ ate mrymnuti kutã akõn krã ho arôrøk nê akrĩ nê kãm mex ã harênh xwỳnhjaja. Nê mẽ ate karõ nhĩpêx nê kutã akõn krã ho akrĩ nê kãm mex ã harênh xwỳnhjaja. Nê mẽ anhõkrã nê mẽ anhĩhkra hã hixi hã kagà xwỳnhjaja.

¹⁰⁻¹¹ —Tĩrtũm na tee ja hã mẽ apumu nê mẽ akamã gryk tỳx kumrêx. Mẽ ate kapêr kuhpa hã mrymnuti hkôt amnhĩ xunhwỳr jakamã nhũm mẽ akamã gryk tỳx o mẽ akamã gryk tỳx. Jakamã koja kuwy hpøk rãhã ho rãhã xwỳnhhta kamã mẽ arênh pa ka mẽ amnhĩ xà htỳx kamã ajamak rãhã apa ho apa. Koja kuwy hpøkja aa hapêx kêt nê kurũm kàx mã hkũm àpir o pa rãhã nê. Koja ã mẽ ate amnhĩ tomnuj o mẽ apa xwỳnhjê nhĩpêx anê ka mẽ kamã apa ho apa nê aa kurũm ajapõx kêt nê kamã amnhĩ xà htỳx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhỳr rãhã apa ho apa. Mẽ ate gõj rũm mrymnuti mẽ hkarõ ho sãnti wa kutã akõn krã ho arôrøk nê akrĩ nê wa kãm wa mex ã wa harênhja mỳrapê kot kaj mẽ ã amnhĩ nhĩpêx anê. Kot mẽ pahte amnhĩ tomnuj pãnhã amnhĩrer xwỳnh mẽ Tĩrtũm kapêr o mẽ wrỳk xwỳnhjê noo mã kot kaj mẽ ã amnhĩ nhĩpêx anhỳr o apa.

¹² Anhỳr o mẽ kãm kapêr jakamã kwa kêr pu mẽ pahte Tĩrtũm kôt amnhĩ xunhwỳr xwỳnhjaja mẽ hkukamã mẽ harênhja ma nê Tĩrtũm kapêr kôt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto

htã pu mẽ hkaga hkêt nẽ amnhĩ kaxyw Jejus kôt pajamaxpêr tỳx rãhã nẽ. Hãmri nẽ nhỹrmã mẽ kurom ma õ krĩ hwỳr api nẽ kamã pamex kumrêx nẽ papa ho papa.

Mẽ kêp Jejus kwỳ hã mẽ htyk xwỳnhjê jarênh

Wam Tesarõn 4.16

¹³ Tã nhũm kaxkwa kamã mẽhõja axte inhmã kapêr nẽ inhmã:

E Juãw. Kêr ka ã akwỳjê mã mẽmoj tã kagà anẽ nẽ mẽ kãm hã kagà ho: “E mẽ ate Tĩrtũm kôt ri amnhĩ nhĩpêx xwỳnhjaja. Mẽ kot Tĩrtũm ã mẽ apar nhũm mẽ atyk tã koja amnhĩ tã mẽ ato mex rax kumrêx.” Anhỹr o mẽ kãm hã kagà.

Anhỹr o inhmã kapêr. Hãmri nhũm Tĩrtũm Karõja kuma nẽ kãm:

—Nã ãm hãmri na ka ã mẽ harênh anẽ. Ra Tĩrtũm kot amnhĩ tã mẽ omunh rãhã ho pa. Mẽ kot kôt pix mã amnhĩ nhĩpêx o pa pê mẽ kãm mẽ hkurê xwỳnhjê kutã amnhĩ to htỳx rãhã htykja nhũm Tĩrtũm kot amnhĩ tã mẽ omunh mex. Koja mẽ ho mex kumrêx. Mẽ kot Jejus ã mẽ hpar tã koja mẽ ho mex rax nẽ nhũm mẽ kuri mex rãhã nẽ pa ho pa nhũm mẽhõ axte tanhmã mẽ ho hkêt nẽ. Anẽ.

Tĩrtũm kot tanhmã mẽ kãm hkĩnh xwỳnhjê nhĩpêx to

¹⁴ Tã pa axte mẽmoj pumu. Kaxkwa kamã kakrã jakajre pumu. Nẽ kamã mẽhõj te panhĩ pyrã nẽ nhỹ. Nhũm ôr o pahi hã mẽ ahkà htu nẽ kuteere xwagixre py nẽ o nhỹ.

¹⁵ Hãmri nhũm kaxkwa kamã Tĩrtũm kapêr o mẽ wrỳk xwỳnhjê hõja Tĩrtũm mã amnhĩ jarênh xà hã ixkre rũm kato nẽ kakrã jaka kamã ÿr xwỳnhhta mã kapêr. Kax pê kãm kapêr nẽ kãm:

—E pika nhõ xwỳnhjaja te mẽ hpur kãm mẽmo hy ra hkamrêk nẽ hikênh mã mex pyrãk. Jakamã anhõ kuteere ata py nẽ ma mẽ hkôt tanhmã ri mẽ ho ho ri mẽ hkôt apa. Te mẽ kot mẽmo hy nhĩkênh o ri pa pyrãk o mẽ hipêx nẽ ma ho mẽ himex o ri apa. Anẽ.

¹⁶ Hãmri nhũm kuma nẽ pika piitã mỳri õ kuteere ho apê nẽ te mẽmo hy jakàr pyrãk o mẽ hipêx.

¹⁷ Hãmri nhũm axte Tĩrtũm mã amnhĩ jarênh xà hã ixkre rũm kapêr o mẽ wrỳkjê hõja kato. ĩhkra kamã kuteere xwa gixre py nẽ o xa. ¹⁸ Hãmri nhũm axte hõja ixkre rũm kê hkôt kato nẽ hkukamã kator xwỳnhhta mã kapêr. Kax pê kãm kapêr nẽ kãm:

—E na ra Tĩrtũm tanhmã mẽ kot amnhĩ tomnuj to hã tanhmã mẽ hipêx to kaxyw. Te mẽ kêp mẽ hpur kãm mẽmo xõ pê uwa ra hkamrêk nẽ rênh mã tãm pyrãk. Jakamã ma pika hwỳr mẽ hwỳr wrỳ nẽ mẽ hkôt ri anhõ kuteere ho mẽ himex o ri apa. Anẽ.

¹⁹ Hãmri nhũm kuma nẽ ma pika hwỳr wrỳ nẽ mẽ hipêx o te mẽ kot uwa xõ rênh nẽ prês kãm hkapĩr nẽ kagô janênh pyrã nẽ mẽ hkôt ri kuteere ho mẽ hpar o pa. Tĩrtũm ra mẽ kamã gryk tỳx o mẽ kamã gryk tỳx jakamã nhũm ã mẽ hkôt mẽ hipêx anhỹr o ri pa.

²⁰ Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nõr pyrãk. Jao upỳm o 2 met nẽ hkôt ho měj met. Nom hprôt xà hkôt ry rax o ry rax. Ho 300 kirõm. Nhũm ã mẽ kamrô hprôt rax anẽ.

15

Tĩrtũm mex ã mẽ grer

¹ Tã pa axte kaxkwa kamã mẽmoj pumu. Hãmri nẽ amnhĩ jaêr pê omu nẽ tee ri hkukamã ijamaxpêr. Aa mẽ pahte mẽmoj ã kot anhỹr pumunh kêt xwỳnh pa pre omu. Nhũm Tĩrtũm kapêr o mẽ wrỳk xwỳnh pê 7jaja ahpỳnhã pika hkôt mẽ kot amnhĩ tomnuj xwỳnhjê homnuj kaxyw akuprõ nẽ kuhê. ãm jajê pixjaja koja Tĩrtũm nhỹ hã axte tanhmã mẽ homnuj to nẽ ho anhỹr pa hãmri nhũm ra ja hapêx o hapêx.

² Jakamã pa axte Tĩrtũm kapem gô rax pumu. Te kot kax karỳr jaxênh mẽ kuwy hpòk o pihkàr pyrãk xwỳnhja hprôt o nõ. Nhũm Tĩrtũm kra hkwỳjaja gô mỳ ri ohtô rax kumrêx nẽ kuhê. Na pre ra mrymnutiya tee ri amnhĩ kôt mẽ rênh mã nẽ tee ri mẽ hã amnhĩ nhĩxi hã kagà hprãm kaprỳ nom nhũm mẽ hkaga nẽ Jejus kôt amnhĩ nhĩpêx rãhã ho pa. Nẽ mrymnuti karõ ho sãnti mã mex ã harênh kêt rãhã ty nẽ kaxkwa hwỳr api. Jakamã nhũm Tĩrtũm amnhĩ tã mẽ omu nẽ mẽ kãm wiorãwti

hkwỳ gô nhũm mẽ piitã hamỳ nê gô rax mỳ ri ho kuhê.

³ Hãmri nê Tĩrtũm mã tanhmã amnhĩ to ho pa xwỳnh pê Mojes mẽ mẽ pahte amnhĩ tomnuj pãnhã amnhĩrer xwỳnhhta wa kot Tĩrtũm mã greta nhũm mẽ Tĩrtũm mã ho grer o kuhê nê grer o:

E Pahi Maati Tĩrtũm. Na pa mẽ ra inhmex pê awỳr ixàpir pa.

Ăm hãmri na ka hte tanhmã amnhĩ nhĩpêx to ho ri apa.

Aa tanhmã axêx to hkêt.

Nê mẽ ixrom axihtỳx o axihtỳx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwỳ ho anhỳr o apa.

Pika piitã hkôt ahpỳnhã mẽ ho amnhĩptàr xwỳnhjê nhõ Pahi Maati na ka.

Nê ate tãm amnhĩ nhĩpêx xwỳnh na ka.

⁴ Jakamã na htem piitã atã hpijaàm o pa.

Nê amã mẽ kapêr xàptàr pix o amã kapêr.

Nê amã amex o amex ã ajarênh rãhã nê.

Ăm hãmri mẽ ixrom kapxipix amex o amex.

Jakamã koja ahpỳnhã pika piitã hkôt akrajê piitã ate tãm amnhĩ nhĩpêx nê tãm mẽ piitã tanhmã mẽ harênh to hã ajarênh ma nê awỳr mra nê akutã hkôn krã ho rôrôk nê hkrĩ nê amã amex o amex ã ajarê. Anê.

Mẽ homnu xà hã xijere jamỳnh xwỳnh jarênh

⁵ Tã na pa axte mẽmoj pumu. Kaxkwa kamã Tĩrtũm nhõrkwỳ hã hitom xà piitã amnhĩ kahê xà rê nê kuhê pa omu. Nê ixkre kamã õ hitom mex maati haxwỳja amnhĩ kahê xà mẽ nê xa.

⁶ Hãmri nhũm ixkreja rũm Tĩrtũm kapêr o mẽ wrỳk xwỳnh pê 7jaja hapôj nê kuhê. Mẽ ê hakajre nê hirã htỳx kumrêx. Nê mẽ hinô pre xàja ôr pix o. Nê piitã Tĩrtũm mã tanhmã kot mẽ homnuj to xà hã xijere pê 7ta jamỳnh kaxyw kuhê.

⁷ Hãmri nhũm mẽmoj tĩr pê kwatjê ôja mẽ kãm xijere hkwỳ jamỳ nê mẽ hwỳr o tẽ. Xijere kêp 7 nê piitã ôr o. Nhũm hamỳ nê Tĩrtũm kapêr o mẽ wrỳk xwỳnhhtajê hwỳr o tẽ nê ho mẽ hipêx nhũm mẽ ahpỳnhã hamỳ. Xijere kamã Tĩrtũm gryk xà jamỳ nê o kuhê.

⁸ Pu nhũm Tĩrtũm rũm kuwy hkũm hapôj. Tĩrtũm mex nê hihtỳx xwỳnhhta rũm hapôx rax o ixkreta kunor pa nhũm mẽ tee ri hwỳr gjêx prãm kaprỳ.

16

Xijere kamã mẽ homnu xà pê 7 jarênh

¹ Tã pa arĩ mẽmoj pumu nhũm Tĩrtũm nhõrkwỳ kamã mẽhõja kapêr o wrỳk xwỳnh pê 7jê mã kàx pê kapêr nê mẽ kãm:

—E na pa ra mẽ kot ixkapêr kwỳm ri amnhĩ nhĩpêx xwỳnhjê pumu nhũm ixpê ja omnuj tỳx o ixpê omnuj tỳx. Jakamã e mẽ anhõ xijereta jamỳ nê ma pika hwỳr mẽ hwỳr wrỳ nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwỳr wrỳ. Anê.

² Hãmri nhũm mẽ kuma nê axpên pãnhã mẽ hwỳr wrỳ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nê amnhĩ tã wa hixi jaxwỳr xwỳnh piitã hkànhy hpa nê à htỳx kumrêx nê ri pa.

³ Hãmri nhũm wamta kôt hõja õ xijere py nê gô xujanãr kãm hkapĩr pa nhũm gô te mẽ htykjê kamrô pyrã nê kamã mẽmo mry htyyxã rênh xwỳnh piitã pikaprãr pa.

⁴ Tã ra xijere kapĩr xwỳnh o axkrut nê õ xijere kapĩ hãmri nhũm hkôt hõta õ xijere py nê hpãnhã gô hkryre piitã hkôt hkapĩr pa. Pyhti nê ri hino piitã hkôt hkapĩr pa nhũm piitã gô xujanãr pyrã nê mẽ hkamrô hã amnhĩ jahkre hpa.

⁵ Hãmri nhũm axtem Tĩrtũm kapêr o mẽ wrỳk xwỳnhjê hõ kot kãm gô piitã hamãr xwỳnhhta ja hã omu nê Tĩrtũm mã kãm: Pa amex rãhã apa ho apa xwỳnh. Nê arãhã apa ho apa xwỳnh.

Nà ãm hãmri na ka ã mẽ kêp gôta nhĩpêx anê.

⁶ Na prem mẽ kot akôt amnhĩ nhĩpêx xwỳnhjê mẽ mẽ kãm ri akapêr jarênh xwỳnhjê hpar o pa nhũm mẽ hkamrô hpikapĩr rax nê.

Tã ka ra mẽ hã mẽ kêp mẽ hkôm xà homnu hpa nhũm mẽ kêp mẽ hkamrô ã amnhĩ jahkre nhũm mẽ tee ri ho hkôm mã. Nà ãm hãmri na ka ã mẽ kêp gô nhĩpêx anê Tĩrtũm. Anê.

⁷ Hāmri nhũm mẽ kot Tĩrtũm mã mẽmoj nhõr xà hã mẽsti hpar pẽ hkrĩ xwỳnhjẽ hõja kuma nẽ kãm:

Nà ãm hāmri na ã ajarẽnh anẽ Tĩrtũm.

Ãm hāmri na ka ã akrajẽ hã mẽ hipêx anẽ.

Ra ate mẽ hã amnhĩ jarẽnh xà hkõt na ka hte tanhmã mẽ hipêx to.

Nà apê mẽ inhõ Tĩrtũm Maati na ka.

Mẽ ixrom axihtỳx o axihtỳx nẽ axàhpumunh o axàhpumunh. Anẽ.

⁸ Tã ra axkrunẽpxi nẽ õ xijere kapĩ. Jakamã nhũm mẽ hpãnhã hõja õ xijere o tẽ nẽ myyti hã hkapĩr pa nhũm hkagro htỳx nẽ pika hkõt mẽ pa xwỳnhjẽ hkà ho hxêt o pa.

⁹ Kagro htỳx o hkagro htỳx jakamã mẽ hkà ho hxêt nhũm mẽ kamã hkà kajẽ hpa. Hāmri nẽ tee ri amnhĩ pumu nẽ hamaxpẽr o:

—Nà Tĩrtũmtija na ã mẽ pahtomnuj tỳx anẽ. Anẽ.

Hāmri nẽ kamã gryk tỳx nẽ haprỳ nẽ tanhmã ho kapẽr punuj to ho pa. Nom mẽ kot amnhĩ tomnuj kaga nẽ kãm mex o mex ã harẽnh kêt nẽ arĩ tanhmã amnhĩ tomnuj to ho pa.

¹⁰ Nhũm ra kęp kwat nẽ õ xijere kamã mẽmojja kapĩ. Jakamã nhũm ra hpãnhã hõja õ xijere o tẽ nẽ gõj rũm mrymnuti kot mẽ ho amnhĩptàr xà hã hkrĩ xà hã hkapĩr pa. Jakamã nhũm ra kot mẽ ho amnhĩptàr xà hã pikaja kamã kamàt kô htyk par kumrẽx. Hāmri nhũm mrymnuti mẽ hkõt mẽ kot amnhĩ nhĩpêx xwỳnhjẽ hã kamàt kô hpa nhũm mẽ amnhĩ xà htỳx ã maj amnhĩ nham o axpẽn kamnar tỳx kumrẽx. ¹¹ Nẽ ã Tĩrtũm kot mẽ hipêx anhỹr ã amnhĩ tã omu nẽ kamã gryk tỳx nẽ tanhmã ho kapẽr punuj to ho pa. No ãm kot amnhĩ tomnuj xwỳnh ã amnhĩ pumunh nẽ kot amnhĩ tomnuj kaga hkõt nẽ.

¹² Nhũm prem ra kęp sĩk nẽ õ xijere kamã mẽmoj kapĩ. Jakamã nhũm hpãnhã hõja õ xijere kamã mẽmojta o tẽ nẽ pyhti pẽ Erax kamã hkapĩr pa nhũm gõja grà pa nẽ te kęp pry pyrà nẽ nõ. Jakamã nhũm myt japõx xà rũm mẽ ho amnhĩptàr xwỳnhjaja nẽ pòristijaja hāmri pijapu kaxyw Jerujarẽ hwỳr nojarèt nẽ hã hwỳr pa.

¹³ Tã nhũm kagãmnuti mẽ ỹ hã mẽ kãm hẽx o pa xwỳnh mẽ mrymnutita wa mẽ hakwa rũm mẽmoj te priti pyrà nẽ hapõx o

pa. No ãm priti hkõt mẽ kęp Satanasti mã mẽ ãpẽn xwỳnh kwỳy.

¹⁴ Jakamã na prem pika piitã hkõt mẽ kot aa mẽmoj pumunh kêt kwỳ ho anhỹr o hẽx rom mẽ no kupyw o mẽ hkõt pa. Tã pika piitã hkõt mẽ ho amnhĩptàr xwỳnhjẽ mẽ ho pikuprõnh kaxyw mẽ hapêr o pa. Mẽ kot Tĩrtũm xihtỳx o hihtỳx kurẽ kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwỳjẽ mã kapẽr ã harẽnh

¹⁵ Tã nhũm Jejus pika hkõt hkrajaja arĩ mẽ htĩr nẽ pa xwỳnhjẽ mã kapẽr nẽ mẽ kãm: E mẽ inhma ixkwỳjaja. Akupỹm ixte mẽ awỳr ixwryk xà hã arĩgroja ã kot paj te mẽ ãhkĩnh xwỳnh kot amnhĩ nhĩpêx pyrà nẽ mẽ ajaer pẽ mẽ awỳr wrỳ. Jakamã kër ka mẽ amnhĩ wỳr ijamãr rãhã ho apa. Kër pa akupỹn wrỳ ka mẽ amnhĩ wỳr ixpumu nẽ akĩnh nẽ amnhĩ kamã amã ixpuma hkõt nẽ. Anẽ.

Mẽ kot axpẽn kurẽ kaxàr kaxyw mẽ pikuprõnh ã mẽ harẽnh

¹⁶ Tã nhũm Satanasti hkwyjaja pika piitã hkõt mẽ ho amnhĩptàr xwỳnhjẽ ho pikuprõnh pa nẽ mẽ hkurẽ kaxàr kaxyw ma Ijaew kot kãm “Amaketõ” jarẽnhja wỳr mra.

¹⁷ Hāmri nhũm Tĩrtũm kapẽr o mẽ wryk xwỳnh pẽ 7 kot hitepta õ xijere py nẽ kàx mã kamã mẽmoj kapĩr pa. Jakamã nhũm Tĩrtũm nhõrkwỹ kamã mẽ ho amnhĩptàr ã hkrĩ xà rũm Tĩrtũm kàx pẽ kapẽr o:

—E hāmri. Na pa ra mẽ kot amnhĩ tomnuj mỳrapê tanhmã mẽ ho jatur xàm mẽn h kaxyw. Anẽ.

¹⁸ Pu nhũm na hkatõtõk nẽ hkrakrak nẽ haxẽn nhũm pika htertet tỳx nẽ. Aa mẽ kot pika htertet tỳx kot anhỹr ã omunh kêt kumrẽx.

¹⁹ Jakamã nhũm Papirõnja kajẽ axkrunẽpxi. Papirõn nhõ xwỳnhjaja kot amnhĩ tomnuj tỳx o paja mỳrapê nhũm Tĩrtũm ã mẽ hipêx anẽ. Nẽ pika htertet o pika piitã hkõt krĩ grành pa. ²⁰ Nhũm gõ hipõk piitã gõja hã axkamur nhũm hapêx pa. Nẽ kẽn prẽk nẽ hkrã hixêt rõrõk nẽ hpigrành pa. Pika htertet tỳx kumrẽx jakamã ã mẽmoj amnhĩ nhĩpêx anẽ. ²¹ Nẽ

na mê pê jêr krã jakootija mê piitã mê hipy rôrôk. No âm hkrã hkryre hkêt hkrã rûnh kumrêx. Âm hpÿnh nê kamã kêp 40 kir nê mê hã rôrôk nhũm mê tee ri amnhĩ tã ã omu nê Tirtũm kamã gryk týx nê haprÿ nê ho kapêr punuj nê.

17

Tirtũm kra hkêt xwÿnhjê jarênh

¹ Tã pa pre kê axte mêmoy pumu. Nhũm kot xijere jamÿnh xwÿnhjê hõja ixwÿr tẽ nê inhmã:

—E ma ixkôt tẽ nê mêmoy pumu. Anê.

Hãmri pa kuma nê ma hkôt tẽ nhũm inhmã:

—Nà ahpÿnhã gô rax mÿri krĩ nhõ xwÿnhjaja te ho ni hkuprÿ gô mÿ ri ÿr nê kãm mêmÿjê piitã hkĩnh o ÿr xwÿnhhta pyrãk. Na htem urãk nê Tirtũm kapêr kôt ri amnhĩ nhĩpêx kêt nê. Âm htÿx ri tanhmã amnhĩ tomnuj to ho pa. Jakamã koja Tirtũm tanhmã mê homnuj týx to nê mê ho hapêx.

² Krĩ piitã hkôt mê ho amnhĩptâr xwÿnhjaja na hte ma mê õ krĩ hwÿr mra nê te mê kot mê hkuprÿjê ho amnhĩkati pyrãk o amnhĩ nhĩpêx. Nê te pipãnh nê htÿx ri amnhĩ nhĩpêx pyrãk o amnhĩ nhĩpêx o pa. Nhũm krĩ nhõ xwÿnhjaja mê urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mê omu. Anê.

³⁻⁴ Hãmri nhũm Tirtũm Karõ tanhmã ixto nhũm kapêr o wrÿk xwÿnhja ma kapôt wÿr ixto mō pa kapôt ã mrymnuti hkrã kêp 7 nê kamã hpâr kêp 10 xwÿnhhta pumu nhũm hkamrêeti nê xa. Nê ï piitã hã tanhmã Tirtũm o kapêr punuj to hã kagã. Nhũm katut ã mēhõ ni kuprÿta nhÿ. Mê ho amnhĩptâr xwÿnh ã mê ê kakrã htyk nê hkamrêk o hkukâr jaxà nê hã nhÿ. Nê ôr o ôkrexê. Nê ôr o hinwÿyêxê nê ïhkra kamã kàx. Âm ôr pix o hikukrêx. Nê kēn mex karÿr pix o amnhĩ jamrêx. Nê ôr o kopti hõ py nê hã nhÿ. Kopti kamã ni kuprÿ kot amnhĩ tomnuj xà. Âm kot mê kêp mê mjên o amnhĩkati ho pa xà pix nhũm kupy nê o nhÿ.

⁵ Nê ôkrã hã amnhĩ nhĩxi hã kagã kot: Inhĩxi pimxur pê PAPIRÕN RAXTI. Nê ixpê mê kêp mê mjênjê ho amnhĩkati ho mê pa xwÿnhjê nã na pa.

Nê ixpê mê kot axpên prõ ho amnhĩkati o mê pa xwÿnhjê nã na pa.

Nê ixpê mê kot Tirtũm nê mê kãm hêx o ri mê pa xwÿnhjê nã na pa.

Nê ixpê mê kot Tirtũm kapêr kôt amnhĩ nhĩpêx o pa hkêt xwÿnhjê nã na pa.

Anhÿr o ôkrã hã amnhĩ nhĩxi hã kagã kot anhÿr. ⁶ Nhũm axpã nê nhÿ pa omu. No âm kagõxÿhti ho hpiãnh kêt. Mê kot Jejus kôt amnhĩ xunhwÿr nê ri mê kãm Jejus kêp mê õ pahihtĩ hã harênh xwÿnhjê kamnhwÿr o mê hpar nhũm mê hkamrô pikapÿr xwÿnhjê kamrô ho na pre axpã nê nhÿ. Pa ã kot amnhĩ nhĩpêx anhÿr ã omu nê tee ri ijamaxpêr.

⁷ Hãmri nhũm Tirtũm kapêr o wrÿk xwÿnhja inhmã:

—Kwa mon ka ri ja pumu nê tee ri ajamaxpêr? E kot paj ixprĩ hã amã harê ka inhma. Niti mê hã ÿr xwÿnh pê mrymnutita. Krã pê 7 nê kamã hpâr pê 10 xwÿnhhta kot paj ixprĩ hã amã hamê wa harê ka wa harênh ma.

⁸ —Nà mrymnutija na pre htĩr nê ri pa tã ty nê ahkre xupÿmti kamã hikwÿ. Nom koja akupÿm htĩr nê kurũm kato nhũm mê piitã omu nê ahpÿnhã tanhmã hamaxpêr to. Amnepêm kormã amrakati ri Tirtũm kot õ kagã kamã mê htĩr tũm nê mê pa mã xwÿnhjê nhĩxi jaxwÿr xwÿnhjaja koja kator ã omu nê âm omu nê tanhmã hamaxpêr to hkêt nê. No mê kot Jejus kôt amnhĩ xunhwÿr kêt xwÿnhjaja koja mê amnhĩ jaêr pê akupÿm kator ã omu nê tee ri hkukamã hamaxpêr. Hãmri nê axpên mã: “Kwa amnepêm htyk tã ra tanhmã amnhĩ to nê akupÿm htĩr nê api nê mō.” Anhÿr o axpên mã harê. Hãmri nhũm kato nê ma tẽ nhũm Tirtũm tã ho hapêx kumrêx nhũm hapêx o hapêx.

⁹ —Kwa inhma nê jam ajamaxpêr týx nê. Mrymnuti krã pê 7ta te kêp hixêt prêk pê 7 pyrã nê hã ÿr xwÿnh ni kuprÿta te hixêt prêk pê 7ta ã ÿr pyrãk.

¹⁰ —Nê mrymnuti hkrã pê 7ja te kêp mê ho amnhĩptâr xwÿnh pê 7 pyrãk. Nhũm mê ho amnhĩptâr xwÿnhjaja te mê kêp 5 nê ra htyk pyrãk nhũm hkôt hõja arĩ mê ho amnhĩptâr o pa. No kot hitepta kormã. Nom koja mê ho amnhĩptâr ry hkêt nê.

11 —Mrymnuti htĩr nẽ pa htã htyk nẽ ra akupỹm htĩr nẽ àpir xwýnhhta koja hkrã hitepta pãnhã mẽ ho amnhĩptàr o pa. Jakamã te mẽ ho amnhĩptàr xwýnh pẽ 7jẽ hõ pyræk. Koja hkrã pẽ 7ja mẽ ho amnhĩptã nẽ gaa nẽ htyk mẽ nhũm hpãnhã mrymnutita hpãnhã mẽ ho amnhĩptã. Hãmri nhũm rĩ kormã Tĩrtũm tã mẽ ho hapêx par kumrẽx.

12 —Nẽ ate mrymnuti hkrã kamã pàr pẽ 10 pumunh xwýnhhta te mẽ kęp mẽ ho amnhĩptàr xwýnh pẽ 10 pyræk. No ãm jaja na kormã mẽ ho amnhĩptàr kêt nẽ. Koja mẽ nhỹrmã anhĩpẽ mrymnuti nhỹ hã ahpỹnhã ri mẽ ho amnhĩptàr o pa nom mẽ ho amnhĩptàr japijẽ hkêt nẽ. 13 Koja mẽ tanhmã ja hã axpẽn mar to hãmri nẽ mrymnuti mã anẽ nhũm mẽ hpãnhã mẽ piitã mẽ ho amnhĩptã.

14 —Nẽ mẽ ho amnhĩptàr xwýnh pẽ 10jaja koja mẽ pahte amnhĩ tomnuj pãnhã amnhĩrer xwýnh kurẽ kaxàr kaxyw hwýr mra nẽ kutã pijapu ho kuhẽ. No ãm tee ri kãm tanhmã ho hprãm hkaprỹ nhũm mẽ ho axtem nẽ amnhĩ tã mẽ himex pa. Hihtỹx o hihtỹx o kot mẽ ho hpimràatã mẽ hakrenh par. Nẽ kęp pika piitã hkôt mẽ ho amnhĩptàr xwýnhjẽ nhõ Pahihti. Tãm na pre amnhĩ wýr mẽ kot hkôt amnhĩ nhĩpêx o mẽ pa xwýnhjẽ wý nhũm htem amnhĩ kaxyw hkôt hamaxpẽr mex rãhã ho pa. 15 —Nẽ krĩ pẽ Papirõn kapem gõ xohtõ mý ri ni kuprỹ hkrĩ xwýnhhta. Gõ xohtõja te kęp ahpỹnhã ri pika piitã hkôt mẽ uro hkwý pyræk. Nẽ te ahpỹnhã ri mẽ kapẽr xwýnh kwý pyræk.

16 —Nẽ mrymnuti hpàr pẽ 10ta kęp mẽ ho amnhĩptàr xwýnh pẽ 10 pyræk. Jakamã koja mẽ kãm ni kuprỹta prãm nõkati nẽ kamã gryk tỹx kumrẽx. Hãmri nẽ hwýr mra nẽ kęp hikukrẽx piitã utã nẽ kęp ê hkwrýnh pa nhũm hkênh mex nẽ xa. Hãmri nhũm mẽ kupĩ nẽ ĩ hkrẽr pa nẽ kuwy kamã hi rẽ nhũm kaxàr pa nẽ hapêx.

17 —Na pre pahi pẽ 10jaja mrymnuti hkôt amnhĩ xunhwý nhũm Tĩrtũm ãm ja hã mẽ omu nẽ tanhmã nẽ mẽ kãm nẽ hkêt nẽ. Jakamã koja mẽ ãm hkôt pix mã amnhĩ nhĩpêx o pa rãhã nhũm Tĩrtũm mẽ ho hapêx. Nẽ mẽ õ krĩ mẽ mẽ ho hpimràatã mẽ ho

hapêx pa. Hãmri nẽ mẽ ho hapêx o mẽ ho hapêx.

18 —Nẽ ate mẽhõ ni kuprỹ pumunh xwýnhhta te kęp krĩ rax pẽ Papirõn nhõ xwýnhjẽ pyræk. Nẽ mẽ ho amnhĩptàr xwýnhja pika piitã hkôt mẽ ho amnhĩptàr xwýnhjẽ hkrãhtũm na. Anẽ.

Ã Tĩrtũm kapẽr o mẽ wrýk xwýnhja inhmã mẽ harẽnh anẽ. Pa kuma nẽ õ ri mẽ amã hã kagà. Mẽ ate kamã harẽnh nẽ aprĩ hã mar tỹx kaxyw.

18

Tĩrtũm kot Papirõn grành par ã harẽnh

1 Tã pa kẽ axte mẽmoj pumu. Nhũm axte Tĩrtũm kapẽr o mẽ wrýk xwýnhjẽ hõja kaxkwa rũm ahpãr mã wrýk o tẽ. Tĩrtũm nhỹ hã hihtỹx nẽ kamã hirã rax kumrẽx o pika piitã hkôt mẽ kãm hirã pa. 2 Nẽ ahpãr mã tẽn wrý nẽ kàx pẽ kapẽr o:

E koja Papirõnja pigrành pa nẽ hpãnhã kęp Satanasti mã mẽ àpẽnh xwýnhjẽ papxã nẽ kęp nhõnhti papxã. Hãmri nẽ aa kamã mẽmoj mex kêt kumrẽx.

3 Krĩ nhõ xwýnhjaja na htem Tĩrtũm kapẽr kôt amnhĩ nhĩpêx kêt nẽ amnhĩ krã hkôt kãm prãm xã hkôt pix mã tanhmã amnhĩ tomnuj to ho pa. Te mẽhõ pipãnh nẽ htỹx ri amnhĩ nhĩpêx o pa pyræk.

Nhũm krĩ piitã hkôt mẽ ho amnhĩptàr xwýnhjaja mẽ hwýr mra nẽ mẽnijẽ ho amnhĩkati ho pa.

Nẽ krĩ nhõ xwýnhjaja mẽmoj pumu nẽ kãm hkĩnh nẽ haprõr kurẽ kumrẽx o pa nẽ aa ujaprõr o hapêx kêt nẽ.

Jakamã na hte krĩ hkwý nhõ xwýnhjaja mẽ hwýr mẽmoj to pa nẽ xatã mẽ kãm ho wẽnẽ nẽ mẽ kukwak ri mẽ hikãxpore rũnh nẽ pa.

Anhỹr o kapẽr. 4 Hãmri nhũm Tĩrtũm Papirõn kamã hkrajẽ mã kapẽr nẽ mẽ kãm: E mẽ tokyx mẽ kot ri htỹx amnhĩ nhĩpêx xwýnhjẽ nhõ krĩta rũm ajapõj ixkrajaja.

Kot kaj mẽ anhỹr kêt nẽ ra mẽ hkôt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj tỹx nẽ.

5 Krĩ nhõ xwýnhjaja na htem amnhĩ tomnuj rũnh o pa.

Mě kot amnhĩ tomnuj xà te mẽ kot kën katutxô nhũm hprêk rax o kot kaxkwa kanhwÿr kaxyw pyràk.

Na pa hte ã mẽ kot amnhĩ nhĩpêx anhÿr ã mẽ omunh rãhã ho ri ixpa. Jakamã kwa ixkrajaja mẽ tokyx mẽ kurũm ajapôj.

Anhÿr o hkrajê mã kapêr. Hãmri nê kapêr o mẽ wrÿk xwÿnhjê mã kãm:

⁶ E kwa mẽ ma mẽ hwÿr wrÿ nê tanhmã ixkrajê hã mẽ ho.

No ãm kêr ka mẽ tanhmã mẽ ho htÿx o mẽ kot ra tanhmã ixpê ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htÿx kumrêx o mẽ kot mẽ hipêxta jakre.

⁷ Krĩ nhõ xwÿnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ jarênh o:

“Ot pa mẽ te pahi ni kot amnhĩ nhĩpêxta pyrã nê ixkrĩ xà mex pix kãm ixkrĩ pyràk.

Nê te Tĩrtũm kot amnhĩ nhĩpêx pyràk o na pa htem amnhĩ nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

“Ã mẽ ixte amnhĩ nhĩpêx anhÿr xwÿnh na pa mẽ.”

Anhÿr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj tÿx nê pa.

Nê kê mẽ hkaprĩ nê amnhĩ xà htÿx kãm hamak rãhã nê pa ho pa.

⁸ E kê mẽ ã amnhĩ nhĩpêx anhÿr o pa.

Jakamã koja mẽ arĩgro hpÿnh kãm mẽ hkwyjaja hpikaprãr rũnh nê nhũm arĩ mẽ htĩr xwÿnhjaja omnuj nê pa.

Nê tee ri amnhĩ pumu nê hkaprĩ xàj mÿr o pa.

Nê amnhĩ xà htÿx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtÿx kãm ã mẽ hipêx anê. Anê.

⁹ Hãmri nhũm krĩ piitã kurũm mẽ ho amnhĩptàr xwÿnhjaja. Mẽ kot mẽ hwÿr mrar nê mẽ hkuprÿjê ho amnhĩkati nê mẽ uràk nê mẽmoj pumunh nê haprôr rãhã ho

pa xwÿnhjaja tee ri krĩ kaxàr nê kàx mã kuwy hkũm àpir o paja pumu nê hkaprĩ nê mÿr o kuhê.

¹⁰ Nê Tĩrtũm kot mẽ ho hapêx par ã mẽ omu nê kãm ma htÿx kumrêx. Amÿm mẽ omunh o kuhê nê tee ri amnhĩ kukamã hamaxpêr nê htertet tÿx nê. Nê mÿr kãm kapêr o:

Hêxta waa nê Papirõn nhõ xwÿnhjaja.

Mẽ amex nê axihtÿx mex nê apa htã nhũm Tĩrtũm mẽ anhĩmex pa. Hêxta waa nê. Anê.

¹¹ Nê mẽ hwÿr mrar nê mẽ kãm mẽmoj to wênê ho mẽ pa xwÿnhjaja haxwÿja krĩ pumu nê tee ri amnhĩ kukamã hamaxpêr nê hkaprĩ nê mÿr o kuhê. Nhÿri koja mẽ tokyx axte mẽmoj to wênê? Mẽ kêp mẽmoj japrôr rũnh xwÿnhjaja hkaxàr par kumrêx kênã.

¹² Na prem mẽmoj piitã ho pa nê mẽ kãm ho wênê. Mẽmoj mex piitã. ôr o mẽ hkukrêx nê prat o mẽ hkukrêx nê kën jaxênh ã kàxpore xohtô. Nê kupêxê mex. Kakrã htyk nê hkamrêk nê hkroore nê hã hapjê. Nê mẽmo pĩ kuxware nê pĩ htÿx nê kën jakàr nê kàx o ri mẽmo nhĩpêxja nhũm prem mẽ kãm ho wênê ho pa. ¹³ Nê mẽmo htwÿm nê mẽ hkuxwa xà. Nê mẽ ô ho ành xà nê mẽ ô kuxwa xà nê xwÿgrã nê harôj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhÿhÿnh krĩ hõ kamã panhĩ hkwy pynê nê mẽ hwÿr mẽ o pa nê mẽ kãm mẽ ho wênê nhũm mẽ amarĩ mẽ hkôt ri àpênh rũnh o pa. Na prem ã mẽ kãm mẽmoj to wênê anhÿr o pa. Tã ra mẽ kot mẽ haprôr xwÿnh mẽ mẽ pimràatã hapêx pa.

¹⁴ Jakamã nhũm mẽ tee ri mẽ hkukamã hamaxpêr nê te kot mẽ kãm kapêr pyrã nê mẽ kãm:

Hêxta waa nê. Mẽ amã mẽmoj prãm nê amnhĩm haprôr xwÿnhhta na mẽ apê hapêx par kumrêx.

Nê mẽ akàxpore rũnh nê mẽ akukrêx rũnhhta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

¹⁵ Hãmri nê amÿm ri Tĩrtũm kot tanhmã mẽ hipêx to hã mẽ omu nê kãm ma xàj mur nê htertet o kuhê.

¹⁶ Nê mẽ kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mē hikukrêx mex o amnhĩ jamrêx nê ri hã mra.

Nê ôr nê kên mex ã ohtô xwýnh o amnhĩ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gô xujanãr kãm pãr nhõ dõn nê mē kot mē kãm pãr o ri mrrar xwýnhjaja nê mē kot kamã tep pynênh xà ho tep pynênh o ri mē pa xwýnhjaja nê pãr kãm amarĩ mē pa xwýnhjaja hãmri mē hwýr mra nê wamtajê pyrã nê tee ri amým ri mē õ krĩ pumu nê mýr o kuhê. ¹⁸ Nê kurũm kuwy hkũm xàpir o pa hã omu nê tee ri mē hkukamã hamaxpêr nê axpên mã:

Hêxta waa nê. Krĩ mũj na pre mex o mex. Mex o krĩ piitã hakrenh par htã hapêx pa. Anê.

¹⁹ Hãmri nê mur nê hkaprĩ xàj pika hkwy jamý nê ho amnhĩ kamĩ nê mýr kãm kapêr o:

Hêxta waa nê. Krĩ mũj na pre rax o rax.

Nhũm pre nhỹhýnh pãr kãm mēmoj to wênê ho pa xwýnhjaja mē hwýr mēmoj to pa nê mē kãm ho wênê nê mē hkukwak ri hikãxpore rũnh nê ri pa.

Tã hãmri mē hapêx pa. Anê.

²⁰ Hãmri nhũm Tĩrtũmja krajê piitã mē kãm kapêr nê mē kãm:

E ixpê Tĩrtũm na pa ã mē hipêx anê.

Mē kot mē apê ixkrajaja tanhmã mē atomnuj to ho paja mýrapê na pa mē atã ã mē hipêx anê.

Jakamã e kaxkwa kamã mē apê ixri mē apa xwýnhjaja.

Nê mē ate inhý hã ri mē kãm ixkapêr jarênh o mē apa xwýnhjaja.

Nê Jesus nhỹ hã mē akapêr o ri mē apa xwýnhjaja. Mē apiitã mē apê ixkra na ka mē.

E mē amnhĩ tã ja pumu nê akĩnh nê axpên mã apikunhar o akuhê. Pa na pa mē atã ã mē ho ijapêx anê. Anê.

²¹ Tã nhũm kapêr o mē wrýk xwýnhjê hõja hihtýx o kên rax kumrêxja mý nê o tẽ nê gô xujanãr kamã kãm gêt nê kumê nhũm mrõ nê akunok. Hãmri nhũm kapêr o:

E krĩta koja Tĩrtũm te ho ixte gôx kãm kên mênh nhũm mrõr nê hpikunor pyrãk o hipêx nhũm hapêx par kumrêx.

²²⁻²⁴ Na pre hte krĩja kamã mē kot ri mē kãm mēmoj to wênê xwýnhjaja amnhĩ to rũnh o krĩ piitã hkôt mē hakrenh pa. Nê krĩ nhõ xwýnhjaja na prem pika piitã hkôt hêx rom tanhmã mē no kupyr to ho ri pa. Jakamã ra mēmoj to wênê xwýnhjê pyrã nê mē hikukrêx rũnh gryk ã Tĩrtũm kaga.

No ãm ja pix kêt. Tĩrtũm krajê mē Tĩrtũm nhỹ hã kapêr o mē pa xwýnhjaja na prem mē himex rax nê. Hãmri nhũm krĩ piitã kamã mē pa xwýnhjaja mē kot mē hipêx ã mē omu nê mē urak nê ã mē hipêx anhýr o pa.

Tã Papirõn nhõ xwýnhjaja kot mē hipêx anhýrja mýrapê koja Tĩrtũm mē himex par kumrêx.

Jakamã koja mē axte hkĩnh nê hkĩnh xàj ri grer kêt nê.

Nê axte hkĩnh nê grer kãm hakwa kôr o ri pa kêt nê.

Nê axte ri wiorãw kakrênh hkêt nê.

Nê axte ri amnhĩm kawà hyr o hkrĩ hkêt nê.

Nê axte harôj kahuk o kuhê hkêt nê.

Nê axte mē õrkwý kamã kanê hpok kêt nê.

Nê axte axpên mã ri hkrajê rer o ri pa hkêt nê. Koja ã mēmoj kot anhýr piitã hapêx pa. Anê.

19

Mē kot Tĩrtũm mex ã mē harênh

¹ Tã pa kê axte mēmoj pumu. Nê kaxkwa kamã mē kapêr ma nhũm mē ohtô rax kumrêx nê tanhmã axpên mã kapêr to. Nê anhĩpê kàx pê kapêr týx nê kapêr o:

E pu mē pahpiitã Tĩrtũm mã mex o mex ã harê.

Tapxipix na hihtýx o hihtýx.

Nê tapxipix na àhpumunh o àhpumunh.

Nê tapxipix na mex o mex.

Tapxipix na mex o kot mēmoj piitã hakrenh par.

Ra kot mēmoj punuj pê mē papytãr par jakamã kêp mē papytãr xwýnh ã pixi mex na.

² Na hte amnhĩ jarênh xà hkôt tanhmã mēmoj to ho pa.

Nê amnhĩ to hêx kêt nê.

Tã ãm hãmri na ã Papirõn nhõ xwýnhjê nhĩpêx anê.

Na prem mẽ kãm Tĩrtũm kapêr jarênh o mẽ pa xwýnhjê nhĩmex rax kumrêx.

Nê krĩ piitã hkõt ri pa nê amnhĩ kõt mẽ kurê nhũm mẽ kuma nê mẽ hkõt amnhĩ tomnuj o pa.

Nhũm Tĩrtũm tee ri hã mẽ omu nê ã hkrajê hã mẽ hipêx kati anê. ãm hãmri na ã mẽ hipêx anê.

Anhỹr o axpên mã harê. ³ Hãmri nê xatã axpên mã:

Nã ãm hãmri na ã mẽ panhõ Tĩrtũmja mẽ hipêx anê nhũm mẽ kurũm kuwy hkũm kàx mã àpir o pa.

Koja krĩ nhõ xwýnhjaja amnhĩ xà htỳx kamã hamak rãhã ho pa nê aa à htỳx hapêx kêt.

E pu mẽ hã Tĩrtũm mã mex o mex ã harê. Anê.

⁴ Hãmri nhũm mẽ àptàr tũm pê 24 mẽ mẽmoj tĩr pê kwatjaja hãmri Tĩrtũm kot mẽ ho amnhĩptàr ã hkrĩ xà maati kutã rôròk nê kãm hipò hpa. Hãmri nê ã mẽ kapêr anhỹr xwýnhjê mã kapêr nê kãm:

Nã ãm hãmri na ka mẽ ã Tĩrtũm mex ã harênh anê. E pu mẽ pahpiitã kãm mex o mex ã harê. Anê.

⁵ Hãmri nhũm mẽhõja Tĩrtũm krĩ xà maati kamã kapêr o:

E mẽ axte Tĩrtũm mã mex o mex ã harê. Mẽ ate Mẽpahpãm kõt amnhĩ nhĩpêx o mẽ apa xwýnhjaja.

Nê mẽ apê mẽ ho amnhĩptàr xwýnhjaja nê amarĩ ri mẽ apa xwýnhjaja nê mẽ apiitã mẽ ate Tĩrtũm ã apijaàm o mẽ apa xwýnhjaja kãm mex o mex ã harê. Anê.

Kot mẽ pahpãnhã amnhĩrer xwýnh mẽ hkwyjê jarênh

⁶ Tã pa tanhmã mẽ kapêr to hã mẽ kuma nhũm mẽ kàx pê kapêr tỳx nê. Te mẽ ohtò rax kumrêx kapêr pyræk. Nê te gò koko htỳx rỳ na katõtòk tỳx pyræk. Hãmri nê mẽ kapêr o:

E na ra Tĩrtũm kêp mẽmoj piitã ho amnhĩptàr xwýnh.

Nê kêp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

⁷⁻⁸ Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpên mã mẽ rer xwýnh kot amnhĩ nhĩpêx pyræk.

Ja o mẽ pahte amnhĩ tomnuj pãnhã amnhĩrer xwýnhhta te kêp myja pyræk.

Nê mẽ kot hkõt amnhĩ nhĩpêx xwýnh piitã te mẽ kêp nija pyræk.

Nê te mẽ kot axpên mã wa rer nhũm wa kot axpên kõt pa ho pa pyræk o koja mẽ amnhĩ nhĩpêx.

Nê te mẽ kot mjên mã xwýnh mã ê mex jakare nhõr nhũm kot hagjênh pyræk. Nê ê mexja te mẽ kot tãm amnhĩ nhĩpêx xà pyræk. Anê.

⁹ Hãmri nhũm Tĩrtũm kapêr o wrỳk xwýnhja inhmã:

—E Juãw. Pa amã mẽmoj jarê ka mar tỳx nê akwỳjê mã hã kagà. Tĩrtũm kapêr kwỳ kot paj amã harê. Kêp Tĩrtũm kapêr jakamã ãm hãmri na. Na hte mẽmoj jarênh o hêx kêt nê. E kapêr ã kagà ho:

Na htem axpên mã mẽ rer kaxyw nê amnhĩ wỳr hkwyjê wỳ nhũm mẽ hwỳr mra nê wa hã hkĩnh nê apkur mex nê.

Ja pyrã nê Tĩrtũm kot amnhĩ wỳr mẽ hwỳr xwýnhjaja koja mẽ nhỹrmã mẽ pahte amnhĩ tomnuj pãnhã amnhĩrer xwýnhhta wỳr api nê ã amnhĩ nhĩpêx anê nê hkĩnh nê apkur mex nê.

Hãmri nhũm Tĩrtũm mẽ ho mex rax kumrêx. Anê.

—E kêr ka ã akwỳjê mã ja hã kagà anê Juãw. Anê.

Hãmri pa kuma nê kagà ja kamã mẽ amã hã kagà. ¹⁰ Hãmri nê hã kagà hpa nê ra ixte kãm mex o mex ã harênh kaxyw kutã ixkõn krã ho tẽm nê nhỹ nhũm tee ri amnhĩ tã ixpumu nê inhmã:

—Kwa ã ri inhĩpêx anhỹr kêt nê. Apyrà nê ixte Jesus mã tanhmã amnhĩ nhĩpêx to xwýnh kênã. Jesusja apyrã nê kêp inhõ pahihtĩ na. Jesus kapêr na prem hkukamã mẽ kot Tĩrtũm nhỹ hã kapêr o mẽ pa xwýnhjaja hã kagà nê mẽ kãm harênh o pa. Jakamã kwa pu mẽ Tĩrtũm pix kutã mãn pahkõn krã ho paròròk nê pahkrĩ nê kãm mex o mex ã harê. Anê.

Kawar jaka hã ýr xwýnh jarênh

¹¹⁻¹⁶ Tã pa kê axte mẽmoj pumu. Nhũm kaxkwa axkê nhũm kamã kawar jakajre

xa nhũm mēhōja hã nhỹ. Hixi na pre kēp “Aa kot Tirtũm kaga hkēt xwýnh.” Anē nē hixi hō na pre kēp: “Tirtũm kōt pix mã amnhĩ nhĩpēx o pa xwýnh.” Anē. Ā hixi kot anhỹr jakamã na hte katāt kōt ahpýnhã mē kot amnhĩ nhĩpēx Ā mē omunh xà hkōt tanhmã mē harēnh to. Mē kot amnhĩ to mex Ā mē omunh xà hkōt tanhmã mē hkwýjē jarēnh to nē mē kot amnhĩ tomnuj Ā mē omunh xà hkōt ahpýnhã tanhmã hkwýjē jarēnh to. Na pre mē kot tanhmã hkwýjē nhĩpēx to ho pa xwýnhjē kutã amnhĩ xunhwý nē mē hã tanhmã mē ho. Ā na pre kawar Ā ýr xwýnhja amnhĩ nhĩpēx anhỹr o pa.

Nē no te kot kuwy hpōk pyrāk jakamã hprĩ hã mēmoj piitã omu nhũm mēmoj kēp hpimxur kēt nē. Nē kēp pahi hã mē ahkã ho ohtō nē kutu. Nē nhỹhỹnh ĩ hã hixi hō hã kagã nom Ām tapxipix kot amnhĩ tã amnhĩ nhĩxija pumunh. Na pre ra amnhĩ kamrō ho ē xy hpa nē xa. Nē hixi hō pē:

TIRTŪM KAPĒR O AMNHĪRĪT XWÝNH
Nē ē ryti hã hixi hō hã kagã. Nē ihkjē hã Ām tãm. Hã kagã jarēnh kot:

Ixpē mē ho amnhĩptār xwýnh piitã mē ō
Pahi Maati na pa.

Nē hakwa rũm wapo xwa gixre pōm katon ajēt. Kot ho tanhmã mē kot Tirtũm mē wa kutã amnhĩ xunhwýr xwýnhjē nhĩpēx to kaxyw. Jakamã ra mē piitã mē ho pikuprōnh pa nē mē hipēx o te mē kot prēs kãm uwa xō kagō janēnh pyrāk nhũm mē hkamrō hpikapĩr rax kumrēx. Tirtũm xihtýx xwýnh kot mē kamã gryk týx jakamã nhũm Ā kãm mē hipēx anē. Mē kot amnhĩ tomnuj o paja mýrapē.

Nhũm ō pōristi piitã urāk nē kawar jakare hã hkrĩ nē hkōt ri pa. Mē ē jaka muxre jagjē nē hã ma hkōt ri pa.

17-18 Tã pa axte Tirtũm kapēr o mē wrýk xwýnh ōja pumu nhũm myyti kutã xa nē kax pē nhōnhti mã kapēr nē mē kãm:

—E mē amnē mē ixwýr wrý nē Tirtũm Ā akĩnh nē mē htyk nē mē hikwý xwýnhjē hã atu nē aku. Mē ho amnhĩptār xwýnhjaja nē pōristijaja nē mē hkrãhtũm nē kawar nē kawar Ā mē hkrĩ nē ri mrar xwýnhjaja nē mē kot amnhĩ to rũnh xwýnhjaja nē mē kot amnhĩ to hkryre xwýnhjaja. Nē mē kãm mē

àpēnh xwýnhjaja nē amnhĩ mã ri mē àpēnh xwýnhjaja. Ām mē htyk nē mē hikwý xwýnh mũj piitã mãmrĩ mē hwýr wrý nē mē hã atu nē mē aku. E mē tokyx nhōnhti. Anē.

19 Tã nhũm mrymnuti nē krĩ piitã hkōt mē ō pahi nē mē ō pōristijaja piitã axpēn wýr akuprō. Wam kawar jakare hã ýr nē htēm xwýnh mē ō pōristijē hwýr hprōt nē mē hkurē kaxār kaxyw axpēn mar kaxyw akuprō.

20-21 Hãmri nē mē hwýr mra nē mē hkurē kapa. No Ām tee ri amnhĩ nhĩpēx nē tee ri kãm tanhmã mē ho hprãm hkapyr nhũm wam kawar jakare hã ýr nē htēm xwýnhhta hakwa rũm wapo xwagixre kator o mē himex pa. Hãmri nhũm mē hkwýjē pyràn htyk pa nē hikwý. Nhũm nhōnhti mē omu nē mē hwýr wrýk o mra nē mē kuku hãmri nē kãm mē hkur kaga nē mē hkaga. No nhũm mrymnuti nē ý hã mē kãm hēx o pa xwýnhhta wa nhũm mē axtem nē htĩr rãhã wa unē nē ma wa o tē nē ēsōf o kuwy maati kamã wa kumē. Hãmri nhũm wa kamã htĩr tũm nē hxēt rãhã nē pa ho pa nē aa htyk kēt nē.

20

Mē kot Satanasti hpa hpre hã mē harēnh Wam Korĩt 15.20-28

1 Tã pa kē axte mēmoj pumu. Nhũm Tirtũm kapēr o mē wrýk xwýnhjē hōja kaxkwa rũm wrý nē ahkre xupýmti hpro xà ho htýx xà hã safja py nē kax pytĩhti ho mē hpre xàja ō py. 2-3 Hãmri nē kagãmnuti pē hēx xwýnh maati Satanastija pynē. Amnepēm Atãw mē Ewa wa kãm hēx xwýnhhta pynē nē kax pytĩ o hpa hpre nē hte hpre hãmri nē ahkre xupýmti nhĩtom xà mē nē kamã kumē. Hãmri nē akupým hpro xà ho hpro nē saf o hã ho htýx. Kot pika piitã hkōt mē kãm hēx o pa pymaj Ā hipēx anē. Koja tokyx kator kēt ry rax kumrēx. Koja kamã arĩ hkrĩ hã amgrã xohtō nē. Hã amgrã pē 1.000 nhũm rĩ kormã Tirtũm akupým kator nhũm kato nē ri pa. Nom pa hkrãre.

4 Tã pa mē htyk nē akupým mē htĩr xwýnh kwýjē pumu. Kormã mē htĩr ri na prem Tirtũm kapēr kōt pix mã amnhĩ nhĩpēx o pa. Nē Jesus kēp mē ō pahĩhti hã harēnh rãhã ho pa. Aa mē kot mrymnuti kutã hkōnkrã

ho rôrok nê kãm mex ã harênh kêt. Nhũm prem tee mē òkrã hã nê mē ìhkra katut ã mrymnuti nhĩxi nhĩpêx kaxyw nom nhũm prem hkaga kamã hihýt̃x nhũm prem kãm mē hkurê xwýnhjaja tee ri ja hã mē omu nê mē mut jakàr o mē kupa. Hãmri nhũm Tirtũm akupým mē ho mē htír nê mē kot mē ho amnhĩptàr ã hkrĩ xà kamã mē hkrĩ. Jejus nhĩhkô hã mē hkrĩ hã amgrà pē 1.000 kaxyw. ⁵ Mē kumrêx na pre Tirtũm akupým mē ho mē htír nhũm mē hkwyjaja mē hkĩnh ã arĩ ty nê hikwý hã amgrà pē 1.000 jakre nhũm rĩ kormã akupým mē ho mē htír.

⁶ Wam akupým mē htír xwýnhjaja kêt Tirtũm kra jakamã koja mē Tirtũm kra hkêt xwýnhjê kurom hkĩnh nê pa ho pa. Nê mē kurom mē kot amnhĩ xà htýt̃x kamã hamak o pa htũm xà wýr pa hkêt nê. Nê mē kurom Tirtũm mē Kra Jejus Kris wa kuri mex kumrêx nê wa kãm tanhmã ri amnhĩ nhĩpêx to ho pa. Nê Jejus nhĩhkô hã mē ho amnhĩptàr o pa hã amgrà pē 1.000.

Tirtũm kot kuwy hwýr Satanasti mēnh ã harênh

⁷ Tã koja amgrà pē 1.000 hapêx nhũm rĩ kormã Tirtũm kapêr o wrýk xwýnhja akupým ahkre xupým wýr tē nê Satanasti mã kahê xà mē nhũm kato. ⁸ Hãmri nê kê axte pika piitã hkôt tanhmã mē kãm hêx to ho ri pa. Gorti nhõ xwýnhjê mã nê Makok nhõ xwýnhjê mã nê krĩ piitã hkôt Tirtũm nê tanhmã mē kãm hêx to ho mē hkôt pa. Hãmri nê mē kot Tirtũm krajê kutã amnhĩ xunhwýr nê mē hkurê kaxàr kaxyw amnhĩ kwýjê ho akuprõ nhũm mē ohtô rax kumrêx nê axpên wýr akuprõ. Te pikahti grã xohtô pyrãk.

⁹ Hãmri nê ma Tirtũm krajê nhĩmex par kaxyw mē hwýr mra nê mē ò krĩ mã hipòk pa nê kuhê. Mē ò krĩa Tirtũm mã mex tã nhũm mē kot kêt grãnh par kaxyw ma hwýr mra. Hãmri nhũm kaxkwa rũm kuwy hpòkja mē haêr pē mē hã rôrok nê mē ho hxêt pa.

¹⁰ No mē kãm hêx xwýnh maati Satanastita nhũm Tirtũm kapêr o wrýk xwýnhja axte unê nê ma êsòf o kuwy maatita wýr o tē nê kamã kumê. Ra mē kot kamã mrymnuti wa kot Tirtũm nê mē nokupyr o pa xwýnh wa mēnh tã wa hkôt Satanasti mã ho anê nê kamã kumê nhũm kamã pa ho

pa. Koja mē aa kator kêt kumrêx. Nê arĩ kamã amnhĩ xà htýt̃x kamã hamak rãhã nê pa ho pa.

Tirtũm kot ahpýnhã tanhmã mē piitã mē harênh to kaxyw

Matêwre 25.31-46; Juãw 5.25-29

¹¹ Tã pa axte mēmoj pumu nhũm kaxkwa mē pikaja wa ra hapêx pa. Pa Tirtũm kot tanhmã mē piitã mē harênh to hã hkrĩ xà raxja pumu. Nhũm hakajre nhũm Tirtũm kamã nhý.

¹²⁻¹³ Hãmri nhũm ra mē htyk nê mē hikwý xwýnh piitã akupým hapòx pa nê Tirtũm kot tanhmã mē harênh to hã hkrĩ xàta kutã hkrĩ pa. Mē piitãã. Mē kot amnhĩ to rũnh xwýnhjaja nê mē kot amnhĩ to hkryre xwýnhjaja nê mē ho amnhĩptàr xwýnhjaja nê gô xujanãr kãm mē mròr nê mē htyk xwýnhjaja. Ra mē htyk nhũm mē kot mē hagjênh xwýnhjaja piitã mē htykjê papxà rũm hapòx pa nê Tirtũm kutã ohtô ho ohtô nê hkrĩ. Hãmri nhũm Tirtũm ò kagà py nê kamã mē piitã mē hixi japêr. Kagà kamã ra mē hkukamã mē htír tũm nê mē pa ho mē pa mã xwýnhjê nhĩxi japêr. Nê kagà hõ kamã mē htír ri tanhmã mē kot amnhĩ nhĩpêx to ho pa hã mē piitã mē hã kagàja. Nhũm kupy nê kamã tanhmã mē harênh to nê hkôt hprĩ hã mē piitã mē omunh pa nê rĩ kormã ahpýnhã tanhmã mē harênh to.

¹⁴⁻¹⁵ Hãmri nê mē htír tũm nê mē pa mã xwýnhjê nhĩxi hã kagàja kamã tee ri mē hkwyjê nhĩxi japêr nhũm kamã amrakati. Jakamã nhũm mē ma kuwy maatita wýr mē o mra nê kamã mē rênh pa. Te axte mē htyk nhũm mē kot kuwy kamã mē hagjênh pyrãk nhũm mē kamã rôrok nê tee ri amnhĩ xà htýt̃x kamã hamak rãhã nê pa ho pa nê aa kator kêt kumrêx.

21

Pika mē kaxkwa wa nyw jarênh

Sikũn Pêtre 3.8-13

¹ Tã pa axte mēmoj pumu. Nhũm Tirtũm ra pika mē kaxkwa nyw wa ho kato. Ra pika nê kaxkwa nê gô xujanãr tũmja hapêx pa nhũm kaxkwa mē pika nyw wa ho kato. Nom axte gô xujanãr o kator kêt nê.

² Hãmri nhũm Tirtũm nhõ krĩ mex pē Jerujarê nywja tanhmã amnhĩ to nê pika

nyw wÿr wrÿk o mō. Krīja mex kumrēx. Mex o mex. Te mjên mā xwÿnh ê mex jaxàr nē amnhī to muxre nē mjên wÿr htēm pyrà nē pika nyw wÿr mex kumrēx nē wrÿk o mō.

³ Hāmri nhūm Tirtūm kot mē ho amnhīptàr ā hkrī xà maati ja kamā mēhōja kapēr o:

—Nà ām hāmri. Na ra Tirtūm hkrajê hkôt pa ho pa. Pika nyw kamā mē hkôt pa ho pa nhūm mē tā no ho omu nē hkôt pa ho pa rāhā nē. Nà ām hāmri. Ja mex o mex.

⁴ —Koja hkrajaja hkôt pa ho pa nē axte htyk kêt kumrēx. Nhūm Tirtūm mē nē mē no kagô nhīnhīnh pa nhūm mē axte hkaprī nē mÿr kêt nē. Nē ri axte amnhī xà kamā hamak kêt nē. Nē axte ri tanhmā omnu hto hkêt nē. Ra mē hkaprī nē à nē mÿr o pata hapêx par kumrēx nhūm hpānhā mēmoj nyw pix. Anē.

⁵ Hāmri nhūm Tirtūm tām tanhmā inhmā kapēr to. Krī xà maati kamā ŷr xwÿnhhta tām inhmā kapēr o:

—E na pa ra akupÿm mēmoj piitā ho nyw pa. Jakamā e Juāw. Ām hāmri na pa ā amnhī kukamā amā mēmoj jarēnh anē. Ixêx kêt. Jakamā kēr ka akwÿjê mā piitā hā kagà hpa. Kê mē kamā harē nē tokyx kuma nē hkôt hamaxpēr rāhā ho pa.

⁶ —Ra ixte amnhī kukamā mēmoj mā ijamaxpēr xwÿnhja na pa ra ho anhÿr pa. Ixpê mēmoj piitā ho anhÿr o hkra xwÿnh nē māānēn ixpê mēmoj piitā ho ijpêx par xwÿnh. Nē ixrāhā ixpa xwÿnh. Amnepēm kormā mēmoj kator kêt ri na pa pre ixrāhā ixpa. Nē ot pa arī ixrāhā ixpa. Tā mē kām kôr nē kām gô hkwÿ ho hkôm hprām xwÿnhjê pyrà nē mē kām ixpix prām xwÿnhjaja kot paj te mē kām inhō hino rūm gô hkwÿ nhōr nhūm mē kot ho hkôm pyrāk o mē hipêx. Hāmri nhūm mē htīr tūm nē ixri pa ho pa nē axte htyk kêt nē. Kot paj ā mē hipêx mex anē.

⁷ —Mē ate tanhmā amnhī tomnuj to nē amnhī to htÿx nē ixkôt pix mā amnhī nhīpêx o mē apa rāhā mē atyk xwÿnhjaja kot paj ā mē anhīpêx mex anē. Ka mē apê ixkra hā amex nē ixkôt ri apa rāhā ho apa. Pa ixpê mē anhō Tirtūm ā tanhmā mē ato mex to rāhā ho ixpa.

⁸ —No mē kot amnhī kaxyw ixkôt hamaxpēr kêt xwÿnhjaja. Nē mē kot amnhī tomnuj xwÿnhjaja nē mē kot ri mē hpar prām xwÿnhjaja. Nē mē kot nhām ri mēnijê ho amnhīkati xwÿnhjaja. Nē wajagajaja. Nē mē kot amnhī to sānti hwÿr o pa xwÿnhjaja. Nē ri mē hêx nhi xwÿnhjaja. Ā mē kot amnhī nhīpêx anhÿr xwÿnh piitā koja mē apê ixkrajê hkīnhā ma kuwy maati wÿr hapêx par kumrēx. Te axte mē htyk pyrāk nom koja mē axte htyk kêt nē. Anē.

Jerujarē nyw jarēnh

Sikūn Korīt 6.16; Karatas 4.26; Eprēw 12.22-24

⁹ Tā nhūm mē kot xijere pē 7 kamā Tirtūm gryk xà jamÿnh xwÿnhjê hōja hāmri ixwÿr tē nē inhmā:

—E ma ixkôt tē nē mēmoj pumu. Na ra krī nywja pika nyw wÿr wrÿk o mō. Te mjên mā xwÿnh ê mex jaxàr nē amnhī to muxre nē mjên wÿr htēm pyrà nē mex kumrēx nē kaxkwa rūm pika nyw wÿr wrÿk o mō. Nē kot ho mjên mā xwÿnhhta te mē pahte amnhī tomnuj pānhā amnhīrer xwÿnhhta pyrāk. E tokyx tē nē omu. Anē.

¹⁰ Hāmri nhūm Tirtūm Karō tanhmā ixto pa ma kot inhmā kapēr xwÿnhhta kôt tē nhūm ma ixto mō nē kēn krā hprêēti hwÿr ixto api nē himōk ā ixām. Pa Tirtūm nhō krī mex pē Jerujarē nywja pumunh o xa. Nhūm mex o mex. Ām hāmri te mjên mā xwÿnh kot ê mex jaxàr nē amnhī to muxre nē mjên wÿr htēm pyrà nē ahpar mā wrÿk o mō pa ixprī hā omu.

¹¹ Na pre rax o rax nē mex o mex. Tirtūm kamā pa ho pa jakamā nhūm kamā hirā htÿx kumrēx. Te kēn mex ā kàxpore xohtō jaxēnh mex tÿx pyrāk.

¹²⁻¹³ Nē krī puhā kahêja hprêk rax nē. Nē hwÿr mē gjêx xà kēp 12. Na pre myt japôx xà rūm axkrunēpxi. Nē myt gjêx xà rūm haxwÿja axkrunēpxi. Nē akutā kahpa hkôt haxwÿja axkrunēpxi. Nē ahpÿnhā hakwakre hā Tirtūm kapēr o wrÿk xwÿnhjaja hamār o kuhê. Nē hakwa kre piitā hā Ijaew pē ahpÿnhā mē pikjêr kām mē kēp 12jaja mē hixi hā kagà.

¹⁴ Nē kahê xunhwÿr xà hkukamā kēn pytyrja ahpÿnhā kēp 12. Kēn pytyrta ā na

mě kot Jejus nhỹ hã mẽ ahkre o mẽ pa xwýnh maati pè 12jê nhĩxi hikwỹ.

15 Tã nhũm kot ixto mõi nẽ inhmã mẽmoj jahkre xwýnhhta ôr o mẽmo pĩ py nẽ kot ho krĩ ho mĩdi kaxyw xa. Nẽ ho kahê piitã ho mĩdi kaxyw. Nẽ mẽ gjêx xàja ho mĩdi kaxyw.

16-17 Hãmri nẽ ho mĩdi hpa. Krĩja ry nẽ kahpa piitã axpẽn pyræk. Nẽ hprêk piitã mãânẽn axpẽn pyræk. Kamã mẽmoj piitã ahpýnhã kèp 2.200 kirõm. No puhã kahêja hprêk o 64 met pix nẽ.

18 Nẽ kahêja kèn jaxênh pix o kot amnhĩ nhĩpêx jakamã mex o mex. Nẽ hkarýr týx kumrêx. Nẽ kahê hkre kamã krĩ kamã ahpýnhã ri ixkreja ôr pix o kot amnhĩ nhĩpêx. Nẽ piitã hkarýr týx.

19-20 Nẽ kahê xunhwýr xà hkukamã kèn pytyrta ahpýnhã ri kèn mex pix o kot amnhĩ nhĩpêx. Piitã mex kumrêx nẽ hkarýrti.

Wamta kawax pè grãgrãre.

Nẽ hkôt ja kawax pè grãgrã kakrã htyk.

Nẽ hkôt ja kakrã htyk.

Nẽ hkôt hõja grãgrã karýr.

Nẽ hkôt ja hkamrêk pihkàrti.

Nẽ hkôt ja grãgrã kakrã htyk.

Nẽ hkôt ja hkamrêk týx kumrêx.

Nẽ hkôt ja ràràare.

Nẽ hkôt ja grãgrã mẽ pihkàr.

Nẽ hkôt ja ràràr mẽ pihkàr.

Nẽ hkôt ja grãgrã karýyre.

Nẽ hkôt ja kakrã htyk pihkàr.

Ã kèn pytyr mex kot anhýr.

21 Nẽ mẽ gjêx xà hã hakwakre kahê xà pè 12ja mẽmo kèn jakooti rũnh kumrêx pix o. Nẽ krĩ kahti hkôt pry nhĩkwỹ xwýnhja ãm ôr pix o. Nẽ hkarýyre.

22 Pa pre tee ri krĩ kamã Tĩrtũm mã amnhĩ jarênh xà hã ixkre japêr nhũm am-rakati. Mo kaxyw koja mẽ axte ixkreja hwýr mra? Ra Pahi Maati Tĩrtũm xihtýx xwýnh mẽ mẽ pahte amnhĩ tomnuj pãnhã amnhĩrer xwýnhhta ra hkrajê kamã pa ho pa kênã kot kêt mẽ axte ri ixkreta o presija. Koja mẽ kãm wa mex ã wa kãm harênh prãm nẽ nhỹri tãm wa hwýr mra nẽ ã wa kãm kapêr anê. Te mẽ pahte pahi hwýr pamrar nẽ kãm pakapêrta pyrã nẽ wa hwýr mra nẽ wa kãm kapêr.

23 Nẽ koja krĩja kamã myyti nẽ mytwrýre hkêt. Mo kaxyw kot kêt myyti nẽ mytwrýreja arĩ ri hirã ho pa? Krĩ kamã Tĩrtũm pa ho pa jakamã kamã hirã mex kumrêx. Nẽ mẽ pahte amnhĩ tomnuj pãnhã amnhĩrer xwýnhhta haxwýja kamã pa ho pa. Te kèp kanê hpòk rax kumrêx pyrã nẽ hirã mex o pa. Kot hirã mex o kot myyti jakrenh. ã Tĩrtũm mẽ Kra wa krĩja kamã pa ho pa jakamã nhũm mẽ axte myyti ho presija hkêt nẽ.

24 Koja krĩ nhõ xwýnhjaja hirã mex pix kãm ri pa ho pa nẽ tãm ri amnhĩ nhĩpêx o ri pa. Tã koja mẽ ho amnhĩptãr xwýnhjaja Tĩrtũm wýr mra nẽ amnhĩ rom kãm mex o mex ã harê nẽ kãm:

—Na pre mẽ ixkwýjaja mẽ ixpê mẽ ho amnhĩptãr xwýnh ã axpẽn mã mẽ inhmex nẽ mẽ ixàhpumunh ã ri axpẽn mã mẽ ijarê. Nom mẽ ixrom amex o amex nẽ axàhpumunh o axàhpumunh. Jakamã ãm hãmri na htem amã amex o amex ã ajarê Tĩrtũm. Anê.

25 Nẽ krĩ hwýr hakwakre koja amnhĩ kahê xà rênh rãhã kuhê nẽ aa amnhĩ kahê hkêt nẽ. Jar mẽ panhõ pika kamã na hte kamãt kaxyw nhũm htem amnhĩ tã hakwakre kahê hpa. No mo kaxyw koja mẽ axte pika nywja kamã ã amnhĩ nhĩpêx anê? Koja kamãt kêt nẽ hirã rãhã ho rãhã jakamã nhũm mẽ amnhĩ tã kahê hkêt rãhã nẽ pa ho pa.

26 Nẽ koja mẽ piitã Tĩrtũm wýr mra nẽ kãm mex o mex ã harê nẽ kãm:

—Pa Tĩrtũm. Hêxta waa nẽ. Anhõ krĩja mex kumrêx. Mex o mex. Nẽ mẽ ixrom amex o amex nẽ axihtýx o axihtýx. Nẽ mẽ ixrom axàhpumunh o axàhpumunh. ãm hãmri na ka ra mẽ ixpê akrajê kamã apa ho apa Tĩrtũm. Anê.

27 Nẽ koja mẽmoj punuj krĩja wýr gjêx kêt kumrêx. Mẽ hpijaãm kêt xwýnhjaja nẽ ri mẽ hêx xwýnhjaja hwýr gjêx kêt nẽ. ãm mẽ pahte amnhĩ tomnuj pãnhã amnhĩrer xwýnhhta nhõ kagã kamã Tĩrtũm ri mẽ htĩr tũm nẽ mẽ pa mã xwýnhjê nhĩxi nhĩpêx xwýnh pixjaja koja mẽ hwýr agjê nẽ kamã pa ho pa.

22

1-2 Tã pa pre axte mẽmoj pumu. Nhũm Tĩrtũm kapër o wryk xwỳnhja axte inhmã mẽmoj jahkre. Nhũm Tĩrtũm mẽ kot mẽ pahpãnhã amnhĩrer xwỳnhja wa kot mẽ ho amnhĩptàr ã hkrĩ xà maati rũm pyhti hprõt. Krĩ kahti hkõt pry pohti nõr xwỳnhhta kahti hkõt hprõt o nõ. Pyhti kamã gõja na htem ho ixkõ nẽ htĩr tũm nẽ pa ho pa. Gõ karỳyẽ. Nhũm mẽmo pĩ hpàr muxre xwỳnhja akutã hijẽ nẽ xa. Pĩ xõja na htem kuwõ nẽ htĩr tũm nẽ pa ho pa. Na hte apkati mẽ ô rãhã nẽ kuhẽ. Nẽ axtem hõja mẽ piitã mẽ mex nẽ à hkõt kaxyw na hõja.

³ Amnepẽm na pre Tĩrtũm Atãw mã kapër nẽ kãm:

—Ate amnhĩ tomnuj mỳrapẽ kot paj tanhmã pika homnu hto nhũm apẽ mex kêt nẽ. Ka kamã apur nẽ kamã axàpẽnh rũnh o apa rãhã nẽ rĩ kormã kamã axàpkur o ri apa. Apẽ jamnuj tã kot kaj mẽ ã amnhĩ nhĩpẽx anhỹr o apa rãhã ty. Anẽ.

Tã ra Tĩrtũm nhõ krĩ nyw kamã mẽ omnuj xàja amrakati kumrẽx. Nẽ Tĩrtũm mẽ kot mẽ pahpãnhã amnhĩrer xwỳnhhta wa õ krĩ kamã pa ho pa jakamã mẽ pahte kamã mẽ papa xwỳnhjaja kot puj mẽ wa kãm tanhmã amnhĩ nhĩpẽx to ho ri papa.

⁴ Kot puj mẽ tã pano ho Tĩrtũm pumunh o papa. Hãmri nhũm te mẽ pahpiitã mẽ panhõkrã hã amnhĩ nhĩxi nhĩpẽx pyrak o mẽ panhĩpẽx.

⁵ Nẽ kot puj mẽ Pahi Maati Tĩrtũm nhĩrã kamã ri papa nẽ axte myyti nhĩrã ho presija hkõt nẽ. Koja kamãt hapẽx pa pu mẽ axte kanẽ ho presija hkõt nẽ. Nẽ Jejus nhĩhkõ hã hirã kamã mẽmoj to amnhĩptàr rãhã ho papa.

Jejus tokyx akupỹn wryk ã harẽnh Apokarip 1.1-3

⁶ Tã nhũm Tĩrtũm kapër o mẽ wryk xwỳnh kot ixto mõr xwỳnhhta axte inhmã kapër nẽ inhmã:

—E nã ãm hãmri na ixte amã mẽmoj piitã harẽnh xwỳnhja. ãm hãmri na. Jakamã kwa kêt ka arĩ hã ano htỹx rãhã ho apa. Amnepẽm Tĩrtũmja ý hã mẽ kapër o pa xwỳnhjẽ mã tanhmã kapër o amnhĩrit to. Kot tanhmã amnhĩ nhĩpẽx to hkukamã mẽ kãm ho amnhĩrit nhũm prem kuma nẽ ô

ri ma hkwỳjẽ mã harẽnh o ri mẽ hkõt pa. Tã ra mẽ hpãnhã pa mẽ awỳr inhmẽ. Mẽ ate Tĩrtũm mã tanhmã amnhĩ to ho apa xwỳnhjẽ mã ixte ja jarẽnh kaxyw Pahihti Tĩrtũmja mẽ awỳr inhmẽ pa wry. Nã koja mẽmoj tokyx ã amnhĩ nhĩpẽx anẽ. ⁷ Na pre Jejus mẽ amã amnhĩ jarẽnh o: “Kot paj tokyx akupỹm mẽ awỳr wry. Tã mẽ ate ijarẽnh ã kagã kamã harẽnh nẽ mar nẽ amnhĩ kaxyw hkõt ajamaxpẽr nẽ hkõt amnhĩ nhĩpẽx xwỳnhjaja kot kaj mẽ akĩnh nẽ ri apa.” Anhỹr o amnhĩ jarẽ. Anẽ.

⁸ Nã ixpẽ Juãw na pa pre ã inhno ho mẽmoj pumunh anẽ. Hãmri nẽ omunh pa nẽ Tĩrtũm kapër o wryk xwỳnh kot inhmã harẽnh xwỳnhhta kutã ixkõn krã ho ixtẽm nẽ inhỹr kaxyw. Nom nhũm amnhĩ nẽ inhmã kapër kãm hihtỹx nẽ inhmã:

⁹ —Kwa nã ri ã inhĩpẽx anhỹr kêt nẽ. ãm Tĩrtũm pix kutã na pu htem ã amnhĩ nhĩpẽx anẽ. Apyrà nẽ ixpẽ Jejus kwỳ kẽnã. Na pa hte apyrã nẽ ý hã tanhmã amnhĩ nhĩpẽx to ho ixpa. Nẽ mẽ apyrã nẽ kapër ã kagã hkõt pix mã amnhĩ nhĩpẽx. Na pu htem axpẽn kutã pahkõn krã ho parõrõk kêt nẽ. ãm Tĩrtũm pix kutã na pu htem ã amnhĩ nhĩpẽx anẽ.

¹⁰ —E ã ate mẽmoj pumunh nẽ mar anhỹr xwỳnhja koja tokyx ã amnhĩ nhĩpẽx anẽ. Jakamã kwa kêt ka akwỳjẽ pẽ ho apimxur kêt nẽ. Piitã hã kagã hpa kêt mẽ kamã harẽ nẽ kuma nẽ mẽmoj kot ã amnhĩ nhĩpẽx anhỹr mã xwỳnhhta piitã hkukamã harẽnh ma. Koja tokyx mẽmoj ã amnhĩ nhĩpẽx anẽ.

¹¹ —Jakamã kwãr mẽ mãmrĩ piitã tanhmã kãm amnhĩ nhĩpẽx to ho pa hprãm xà hkõt amnhĩ nhĩpẽx o pa. Kwãr mẽ mẽ kot amnhĩ tomnuj xwỳnhjaja ã amnhĩ anhĩpẽx anhỹr o pa. Nẽ kwãr mẽ kot tanhmã kapër punuj to xwỳnhjaja mãmrĩ ã amnhĩ nhĩpẽx anhỹr o pa. Nẽ kwãr mẽ kot tãm amnhĩ nhĩpẽx o ri mẽ pa xwỳnhjaja mãmrĩ Tĩrtũm kõt pix mã ri tãm amnhĩ nhĩpẽx o pa. Anẽ.

Nhũm pre ã kaxkwa hwỳr ixto àpir xwỳnhhta inhmã kapër anẽ.

¹² Hãmri nhũm hpãnhã Jejus tãm inhmã kapër nẽ inhmã:

—E kot paj tokyx akupÿm mẽ awÿr wrÿ. Nẽ akupÿm pøj hãmri mẽ mẽ kot amnhĩ tomnuj o mẽ pa xwÿnhjaja pa ja mÿrapê ma mẽ kot amnhĩ xà htÿx kamã hamak tũm xàta wÿr mẽ rẽn pa. No mẽ kot ixkõt amnhĩ nhĩpêx xwÿnhjaja kot paj akupÿn inhõ krĩ hwÿr amnhĩ kõt mẽ ho api.

13 —Nẽ ixrãhãã xwÿnh na pa. Amnepê mã kormã mẽmoj kêt ri na pa pre ra ixrãhãã. Nẽ koja nhÿrmã mẽmoj piitã akupÿm hapêx pa arĩ ixrãhã mẽ ixpa ho ixpa.

14 —Nẽ Tĩrtũm kot mẽ anê mẽ ate amnhĩ tomnuj kuhõnh par xwÿnhjaja kot kaj mẽ amex kumrêx mẽ apa ho apa. Nẽ akĩnh mẽ ajamakêtkati mẽ ri atÿx apa ho apa. Te ho mẽ kot amnhĩ xê kahõnh mẽ mex jagiênh mẽ ri hã pata pyrãk. Koja Tĩrtũm mẽ amã anê ka mẽ ajamakêtkati mẽ õ krĩ hwÿr agjê mẽ kamã ri amex kumrêx mẽ ri apa ho apa. Nẽ kamã mẽmo pĩ xõ mẽ kot kur mẽ htĩr tũm mẽ pa mã xwÿnhhta wÿr mra mẽ amnhĩm ô rê mẽ hkur o ri apa. Ra mẽ ate Jejus kõt amnhĩ xunhwÿr jakamã kot kaj mẽ axãmnhĩx hwÿr mra mẽ amnhĩm hkwÿrê mẽ hkur o ri apa. Kot kaj mẽ ã amnhĩ nhĩpêx anê.

15 —Nom mẽ kot amnhĩ tomnuj o mẽ pa xwÿnhjaja koja mẽ akĩnhã inhõ krĩ hwÿr gjêx kêt mẽ. Mẽ kot ri mẽ y ho mẽ pa xwÿnhjaja. Nẽ mẽ kot nhãm ri mênijê ho amnhĩkati ho mẽ pa xwÿnhjaja. Nẽ mẽ kot ri mẽ hpar o mẽ pa xwÿnhjaja. Nẽ mẽ kot ri sãnti nhĩpêx o te Tĩrtũm nhĩpêx pyrãk o mẽ pa xwÿnhjaja. Nẽ mẽ kãm ri hêx prãm o ri mẽ pa xwÿnhjaja. Koja mẽ akĩnhã inhõ krĩ hwÿr pa hkêt mẽ.

16 —E Juãw. Nà ixpê Jejus na pa awÿr ixkapêr o mẽ wrÿk xwÿnhhta mẽ. Kot ixkwÿjê kaxyw amã ixkapêr jarênh kaxyw. Ixpê Tawi pàr krax na pa. Te ixpê arĩgro hkõt kanhêti hpòk rax kot arĩgro ho mör ã ho amnhĩrĩt xwÿnhhta pyrãk. Anê.

Nhũm pre ã Jejus inhmã kapêr anê. 17 Tĩrtũm Karõ mẽ Jejus kwÿjaja na htem ã Jejus kot amnhĩ jarênh anhÿrja ma mẽ hkĩnh mẽ. Nẽ kãm kapêr o:

—Hêxta waa mẽ. Kwa amnhĩm anojarêr mẽ tokyx akupÿn mẽ ixwÿr wrÿ Pahihti. Pa mẽ tokyx ã amnhĩ nhĩpêx anhÿr o ri war akõt ixpa. Anê.

Nẽ mẽ ate ja mar xwÿnhjaja kêr ka mẽ urak mẽ ã kãm akapêr anê.

Nẽ te mẽ amã kôr mẽ ri mẽ apa pyrãk xwÿnhjaja kêr ka mẽ te Jejus wÿr amrar mẽ õ gô ho akôm pyrã mẽ hkõt amnhĩ xunhwÿ. Te Jejus amarĩ mẽ pamã õ gô nhõr pyrãk o mẽ panhĩpêx pu mẽ hkõt amnhĩ xunhwÿ mẽ ra pahpê pahtĩr tũm mẽ papa mã xwÿnh. Hãmri mẽ amnhĩ pãnhã tanhmã kãm amnhĩrer to hkêt mẽ.

Nhÿrmã mẽmoj nyw par ã harênh jatur xà

18 E ixpê Juãw na pa Jejus nhÿ hã mẽ amã mẽmoj tanhmã kot amnhĩ nhĩpêx to hkukamã ã mẽ amã hã kagà anê. Tã kwa mẽ o kora. Kêr ka mẽ atõ amnhĩ krã hkõt ri ajamãxpêr o te ho ja pyrã mẽ hijuk ri axte mẽmoj nhĩpêx kêt mẽ. ãm kwarĩ ho kwarĩ. Kot ka mẽ atõ anê nhũm Tĩrtũm ja hã apumu mẽ kagàja kamã tanhmã mẽ hipêx kati hto xàta o tanhmã anhĩpêx to ka arĩ amnhĩ pumu.

19 Rÿ ka mẽ atõ kagà kamã harê mẽ ama mẽ tanhmã ajamãxpêr to mẽ ajamãxpêr o:

—Nà ja kot anhÿr kêt. Na mẽ ãm harênh o hêx. Kot paj kuma mẽ ãm kuma.

Anhÿr o ajamãxpêr japêr. Hãmri nhũm Tĩrtũm amnhĩ tã ama mẽ kagà mexta kamã kot tanhmã mẽ ho mex toja o ato mex kêt mẽ. Ka õ krĩ hwÿr axãpir mẽ mẽmo pĩ xõ mẽ kot hkur mẽ htĩr tũm mẽ pa kaxyw mã xwÿnhhta ka amnhĩm hõ hyr mẽ hkrêr kêt mẽ. Jakamã e kwa mẽ o kora. Kêr ka mẽ kagàta kamã ã mẽmoj kot amnhĩ nhĩpêx anhÿr mã xwÿnhhta jarênh ma mẽ aprĩ hã piitã hkõt ajamãxpêr tÿx rãhã ho ri apa.

20 E Jejus kot inhmã mẽmoj kukamã tanhmã ujarênh to xwÿnhhta na pre inhmã amnhĩ jarênh o: “Kot paj tokyx akupÿn mẽ awÿr wrÿ.” Anê. ãm hãmri na pre ã amnhĩ jarênh anê. Koja tokyx akupÿn mẽ pahwÿr wrÿ hãmri nhũm mẽmoj piitã mex o mex. Jakamã kwa kêr ka amnhĩm anojarêr mẽ tokyx akupÿn mẽ ixwÿr wrÿ Pahihti Jejus.

21 Nẽ ixpyrà mẽ mẽ apê Tĩrtũm krajaja na pa hte mẽ ato Pahihti Jejus wÿr rãhã ho ri ixpa mẽ kãm:

—Kwa akwÿjê pumu mẽ mẽ kutã anojarêr rãhã ho ri apa Pahihti. Anê.

E mẽ ujarẽnhja na hapêx. Ixpê Juãw na amnhĩ xô ri mẽ amã hã kagà hpa. E na pa Jejus kot inhmã tanhmã ujarẽnh toja pa hapêx.